


# Thai Phum Holy Bible



The Holy Bible in the Thaiphum Chin language of Myanmar



# **Thai Phum Holy Bible**

## **The Holy Bible in the Thaiphum Chin language of Myanmar**

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners. Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

---

PDF generated using Haiola and XeLaTeX on 13 Jul 2024 from source files dated 8 May 2024  
84c7fe95-3b68-5ab6-b17e-a642d33ac078



## Contents

KAMTAWNGNAE . . . . .	1
TĀCONAE . . . . .	68
BAWKNAE . . . . .	123
MILU PAREINAE . . . . .	160
KĀLAWK BOUT POENAE . . . . .	214
JOSHUA . . . . .	260
LAWKCENGKUNG . . . . .	292
RUTH . . . . .	323
1 SAMUEL . . . . .	328
2 SAMUEL . . . . .	370
1SIANGPAHRANG . . . . .	406
2 SIANGPAHRANG . . . . .	448
SETOUKNAE . . . . .	489
2 SETOUKNAE . . . . .	526
EZRA . . . . .	571
NEHEMIAH . . . . .	583
ESTA . . . . .	601
JOB . . . . .	612
SAM . . . . .	662
CINGTHUILAWKNAW . . . . .	796
PHUNGDEIKUNG . . . . .	838
SOLOMON LA . . . . .	850
ISAIAH . . . . .	860
JEREMIAH . . . . .	932
KHUINAE . . . . .	1008
EZEKIEL . . . . .	1016
DANIEL . . . . .	1083
HOSI . . . . .	1103
JOEL . . . . .	1114
AMOS . . . . .	1118
OBADIAH . . . . .	1126
JONAH . . . . .	1128
MIKAH . . . . .	1131
NAHUM . . . . .	1137
HABAKKUK . . . . .	1140
ZEPHANIAH . . . . .	1143
HAGGAI . . . . .	1146
ZEKHARIAH . . . . .	1148
MALAKHI . . . . .	1160
MATTHAI . . . . .	1164
MARK . . . . .	1215
Luk . . . . .	1247
JAWHAN . . . . .	1300



GUNCEI . . . . .	1338
ROM . . . . .	1387
1 KAWRIN . . . . .	1409
2 KAWRIN . . . . .	1429
GALATI . . . . .	1443
EFISA . . . . .	1451
FILIPPI . . . . .	1458
KOLOSΑ . . . . .	1464
1 THESALON . . . . .	1469
2 THESALON . . . . .	1474
1 TIMOTE . . . . .	1477
2 TIMOTE . . . . .	1483
TITU . . . . .	1487
FILIMON . . . . .	1490
HEBRU . . . . .	1492
JEM . . . . .	1508
1 PITER . . . . .	1514
2 PITER . . . . .	1520
1 JAWHAN . . . . .	1524
2 JAWHAN . . . . .	1530
3 JAWHAN . . . . .	1531
JUDAH . . . . .	1532
PAPHOLAWK . . . . .	1534



## KAMTAWNGNAE (Genesis)

### *Sak kamtawngnae*

<sup>1</sup> Apuengcuae vah, Cathut ni kalvan hoi talai a sak.

<sup>2</sup> Talai teh meilam tawn hoe. Ahrawng lah doeh ao. Hmonae ni kadung poung e hmuen a ramuk. Cathut e Muitha teh tui van a kâroe.

### *Hnin taruk touh hoi saknae*

<sup>3</sup> Cathut ni angnae awm seh ati teh angnae teh ao. <sup>4</sup> Angnae teh Cathut ni a khet navah ahawi ati teh, Cathut ni angnae teh hmonae daw k hoi a kapek. <sup>5</sup> Cathut ni angnae hah khodai telah a phung, hmonae hah karum telah a phung. Hottelah, tangmin hoi amom teh apasuek hnin lah ao.

<sup>6</sup> Hahoi Cathut ni, tui lungui lathueng awmseh, tui hoi tui kâkapek seh telah ati. <sup>7</sup> Hottelah Cathut ni lathueng a sak teh, lathueng lah kaawm e tui hoi lathueng rahim lah kaawm e tui hah a kapek teh hottelah ao awh.

<sup>8</sup> Cathut ni lathueng teh kalvan telah a phung. Hottelah tangmin hoi amom teh apâhni hnin lah ao.

<sup>9</sup> Hahoi Cathut ni kalvan rahim kaawm e tui hmuen buet touh koe awm seh. Kaphui e talai kamnuek seh ati e patetlah ao. <sup>10</sup> Cathut ni kaphui e talai hah talai telah ati teh, tuikamuemnae teh tuipui telah a phung. Cathut ni a khet navah ahawi telah ati.

<sup>11</sup> Hahoi Cathut ni hettelah ati, talai ni pho, cati ka tâcawt sak e cakung, a paw ka paw e thingkung, amamouh a coung e patetlah atimu katâcawtkhai e naw hah paw naseh ati e patetlah ao awh. <sup>12</sup> Talai ni pho, cati ka tâcawt sak e cakung, ati ka tawn ni teh a paw ka paw e thingkungnaw a pâw sak. Hotnaw hah Cathut ni a khet navah ahawi telah ati. <sup>13</sup> Hottelah tangmin hoi amom teh apâthum hnin lah ao.

<sup>14</sup> Hahoi Cathut ni karum daw k hoi khodai kapek nahanelah, kalvan e lathueng daw k angnae awm seh, mitnoutnae tue, hnin hoi kumnaw awmseh. <sup>15</sup> Kalvan e lathueng daw k, talai angnae ka poe hanelah, angnae awmseh telah ati e patetlah ao. <sup>16</sup> Hahoi Cathut ni angnae kalen kahni touh a sak teh, khodai ka uk hanelah kalen e buet touh, karum ka uk hanelah kathoege buet touh hoi âsinaw a sak. <sup>17</sup> Cathut ni talai daw k ang sak hanelah thoseh, khodai hoi karum ka uk hanelah thoseh, hmonae daw k hoi angnae kapek hanelah thoseh, kalvan e lathueng daw k a hruek. <sup>18</sup> Hote hah Cathut ni a khet navah, ahawi telah ati. <sup>19</sup> Hottelah tangmin hoi amom teh apali hnin lah ao.

<sup>20</sup> Hahoi, Cathut ni kahring ni teh kâroe e saring, tui ni pungdaw sak naseh. Tavanaw hai kalvan e lathueng daw k kamleng naseh telah ati. <sup>21</sup> Hahoi, Cathut ni tuipui daw k e saring kalenpoungnaw, kahring ni teh kâroe e saringnaw tui ni amamouh counгнаe patetlah lengkaleng a pungdaw sak teh, rathei ka tawn e tavanaw hai amamouh counгнаe patetlah lengkaleng a sak. Hote hah Cathut ni a khet navah ahawi telah ati. <sup>22</sup> Cathut ni hote saringnaw hah yawhawi a poe teh, moikapap pungdaw awh nateh, tuipui tuinaw daw k kawi sak awh. Tavanaw hai talai daw k pungdaw awh telah ati. <sup>23</sup> Hottelah tangmin hoi amom teh apanga hnin lah ao.



<sup>24</sup> Hahoi Cathut ni saring hoi moithangnaw, vonpui hoi kâva e moithangnaw tali ni pungdaw sak seh telah ati e patetlah ao. <sup>25</sup> Hottelah Cathut ni moithangnaw, saringnaw, vonpui hoi kâva e moithang pueng teh a sak. Hote hah Cathut ni a khet navah ahawi telah ati.

<sup>26</sup> Hahoi Cathut ni, mamae mei hoi kâvan lah, meikalat lah tami sak awh sei. Ahni ni tuipui dawk e tanganaw, kalvan e tavanaw, talai dawk e saring pueng hoi, vonpui hoi kâva e saring pueng e lathueng kâ tawn seh telah ati. <sup>27</sup> Hottelah Cathut ni amae mei hoi kâvan lah, amae meikalat lah tongpa hoi napui hah a sak.

<sup>28</sup> Hahoi ahnimouh roi hah Cathut ni yawhawinae a poe teh, Cathut ni ahnimouh roi koe, canaw moikapap khe nateh pungdaw awh. Talai dawk kaw i awh nateh, tâ awh loe. Tuipui dawk e tanganaw, kalvan e tavanaw, talai dawk vonpui hoi kâva e moithang pueng koe kâ tawn awh telah ati. <sup>29</sup> Hahoi Cathut ni khenhaw! talai dawk cati ka tâcawt sak e cakung aphunphun, a paw dawk a mu kaawm e thingkung pueng, na ca awh hanelah kai ni na poe. <sup>30</sup> Hahoi, talai e moithang, kalvan e tava, hoi kahring niteh, talai dawk vonpui hoi kâva e moithang pueng ni a ca hanelah, pho kahring aphunphun ka poe telah ati e patetlah ao. <sup>31</sup> Hahoi, Cathut ni a sak e pueng a khet navah, ahawipoung telah ati. Hottelah tangmin hoi amom teh ataruk hnin lah ao.

## 2

### *Asari hnin Cathut a kâhat*

<sup>1</sup> Hottelah kalvan hoi talai, a thung kaawm e pueng teh koug a cum. <sup>2</sup> Hahoi, a cum e thaw hah asari hnin dawk Cathut ni a pâpout. Hahoi, thaw pueng a cum dawkvah, asari hnin a kâhat.

### *Tongpa hoi Napui saknae*

<sup>3</sup> Hottelah, Cathut ni asari hnin hah yawhawi a poe teh a thoungsak. Bangkongtetpawiteh, a sak e hnopueng koug a cum toug dawkvah, hote hnin dawk a kâhat. <sup>4</sup> Hetenaw teh kalvan hoi talai a saknae hnin navah, <sup>5</sup> talai dawk phokung pâw hoehnahlan, law dawk patue e hai a pâw hoehnahlan, BAWIPA Cathut ni talai van khorak sak hoeh rah. Talai dawk ka taw hane tami hai awm hoeh rah. <sup>6</sup> Hatei, talai dawk hoi tui kahû a tâco sak teh, talai pueng a duk sak. <sup>7</sup> Hahoi, BAWIPA Cathut ni talai dawk e vaiphu hoi tami a sak teh, hringnae kâha a hnawng dawk hoi a poe hnukkhu tami teh kahring e tami lah a kangcoung.

<sup>8</sup> Hahoi BAWIPA Cathut ni kanitholah, Eden hmuen dawkvah, takha buet touh a sak teh, a sak e tami hah hawvah a hruek. <sup>9</sup> Hote talai dawk a meikahawi niteh, cakawi thingkung aphunphun a pâw sak. Takha lungui vah, hringnae thingkung hoi thoe hoi hawi panuena thingkung hai a pâw sak.

<sup>10</sup> Takha kaduksak hanelah, Eden hoi tui buet touh a lawng teh, takha lawilah hoi pali touh lah a kampek teh tui sei pali touh lah a coung. <sup>11</sup> Apasueke tui min teh Pishon. Sui onae Havilah ram pueng, kâkalup lah a lawng. <sup>12</sup> Hote ram dawk e sui teh, ahawi. Hote hmuen koe Dellium hoi Onyx talung aphu kaawm e hai ao. <sup>13</sup> Apâhni e tui min teh Gihon. Kush ram kâkalup lah a lawng. <sup>14</sup> Hahoi apâthum e tui min teh Khiddekel. Assiria ram kanitholah a lawng teh, apali e tui min teh Euphrates.

<sup>15</sup> BAWIPA Cathut ni tami a la teh, Eden takha dawk thaw taw hane hoi khetyawt hanelah a hruek. <sup>16</sup> Hahoi, BAWIPA Cathut ni tami koe kâ



a poe e teh, thoe hoi hawi panuenae thingkung hloilah, hote takha daw k kaawm e thingpaw pueng teh, na ca thai. <sup>17</sup> Hatei, thoe hoi hawi panuenae thingpaw teh na cat mahoe. Na cat pawiteh, na ca hnin na due roeroe han atipouh.

<sup>18</sup> Hahoi, BAWIPA Cathut ni tongpa teh amadueng ao e hawihoe a titeh, kabawmkung kahawi ka sak pouh han ati. <sup>19</sup> BAWIPA Cathut ni talai a la teh, talai van e saring pueng hoi kalvan e tava pueng a sak hnukkhu, min phung hanelah, Adam koe a thokhai. Adam ni hai a thokhai e saring pueng min a phung e patetlah min lengkaleng a tawn awh. <sup>20</sup> Hottelah, saringpueng, kalvan e tava pueng, moithang pueng Adam ni min a phung. Hatei, Adam kabawmkung kahawi awm hoe rah. <sup>21</sup> Hatdawkvah, BAWIPA Cathut ni Adam mat a i sak teh, a i lahun nah a nâhru buet touh a rayu pouh teh, a tak hoi bout a pâbing pouh. <sup>22</sup> Hahoi, BAWIPA Cathut ni tongpa daw k hoi a rayu e a nâhru hoi napui a sak teh, tongpa koe a thokhai. <sup>23</sup> Hahoi, Adam ni hethateh, ka hru thung e ka hru, ka tak thung e ka tak doeh. Tongpa thung e rayu e lah ao dawkvah, napui telah phung hanelah ao ati. <sup>24</sup> Hatdawkvah, tongpa ni manu hoi na pa a ceitakhai han. Hathnukkhu, a yu hoi a kâpahlawm vaiteh, takthai buet touh lah a coung han. <sup>25</sup> Tongpa hoi a yu teh, caici lah ao roi eiteh, kayanae tawn roi hoe.

### 3

#### *Rawpnae*

<sup>1</sup> BAWIPA ni a sak e moithang pueng hlak tahrn teh huenghai kaawm poung e lah ao dawkvah, napui koe nangmouh roi ni takha daw k e thingpaw pueng cat hanh telah Cathut ni ati katang maw telah a pacei.

<sup>2</sup> Napui ni tahrn koevah, takha daw k kaawm e thingpawnae teh na ca thai.

<sup>3</sup> Hatei, takha lungui kaawm e thingpaw teh na cat mahoe. Tek hai na tek mahoe. Hoehpawiteh, na due han telah Cathut ni ati telah atipouh.

<sup>4</sup> Tahrn ni napui koe, khoeroe na dout mahoe. <sup>5</sup> Bangkongtetpawiteh, a paw na ca hnin vah, na mit ang roi vaiteh, thoe hoi hawi na panue roi han. Cathut boiboe lah na o roi han tie ama Cathut ni a panue daw k doeh telah atipouh.

<sup>6</sup> Hote thingkung teh cakawi kahawi e lah, mitkhet kantang e lah, tami lungkaangsakkung a paw lah a hmu dawkvah, a la teh a ca. Hahoi ateng kaawm e a vâ hai a poe teh a ca. <sup>7</sup> Hathnukkhu, ahnimouh roi teh, a mit ang roi toun dawkvah, caici lah ao roi e hah a kâpanue roi. Hatdawkvah, thai hna a khui roi teh, a khohna roi.

<sup>8</sup> Hot hnin tangmin lah, takha daw k BAWIPA Cathut a tho e pawlawk ahnimouh roi yuvâ ni a thai navah, BAWIPA Cathut e hmaitung hoi hlout nahanelah takha thung e thingkung rahak a kâhro roi. <sup>9</sup> Hatei, BAWIPA Cathut ni Adam a kaw teh, nâmaw na o atipouh.

<sup>10</sup> Tongpa ni, takha thung na lawk ka thai teh, caici lah ka o daw k ka taki teh ka kâhro telah atipouh.

<sup>11</sup> BAWIPA ni, apinimaw nang caici lah na o e hah a dei. Cat hanh ka tie thingpaw hah na ca toun maw telah a pacei.

<sup>12</sup> Tongpa ni nang ni na poe e napui ni thingpaw na poe teh ka ca atipouh.

<sup>13</sup> BAWIPA Cathut ni, napui koevah, hete hno heh bangkong maw na sak telah a pacei navah, napui ni, tahrn ni na dum teh ka ca telah atipouh.



<sup>14</sup> BAWIPA Cathut ni tahrn koevah, hete hno na sak dawkvah, saring hoi moithang pueng hlakvah, thoebo lah na o han. Na vonpui hoi na thawn vaiteh, na hring nathung vaiphu na ca han. <sup>15</sup> Nang hoi napui rahak, nang e catoun hoi napui e catoun rahak kai ni kâtarannae ka hruek han. Ahni ni na lû a phawm vaiteh, nang ni ahnie a khokpaimai na phawm pouh han telah atipouh.

<sup>16</sup> Napui koevah, camo na vawn navah patawnae ka pung sak vaiteh, na khe nah patawnae na khang han. Na ngainae teh na vâ hanelah ao vaiteh, na vâ ni na uk han.

<sup>17</sup> Adam koevah, na yu e lawk na tarawi teh, cat hanh telah kai ni kâ na poe e thingpaw na ca dawkvah, talai teh nang kecu dawk thoebo lah ao. Tha pataw laihoi na hringyung thung na tawk vaiteh, na ca han. <sup>18</sup> Pâkhingnaw hoi pâkhingkungnaw ka pâw sak vaiteh, law daw k hoi ka tâcawt e apawhik na ca han. <sup>19</sup> Na tâconae talai lah bout na ban hoehroukrak, na minhmai daw k hoi lahuntui tâco laihoi na ca han. Bangkongtetpawiteh, nang teh vaiphu e lah na o dawkvah, vaiphu lah bout na ban han telah atipouh.

<sup>20</sup> Hahoi, Adam ni amae yu hah Evi telah min a phung. Bangkongtetpawiteh, ahni teh kahring pueng e a manu lah ao daw k doeh. <sup>21</sup> BAWIPA Cathut ni Adam hoi a yu hanlah phaivuen angkidung a sak pouh teh, a khohna sak.

<sup>22</sup> Hahoi, BAWIPA Cathut ni tami teh, maimouh thung daw k e buetbuet touh hoi a kâvan toung dawkvah, thoe hoi hawi a panue toe. Atuteh, yungyoe hringnae coe hanelah a kut a kâyp vaiteh hringnae thingpaw khi vaiteh, a cakawi nahoe toe telah ati. <sup>23</sup> Hatdawkvah, BAWIPA Cathut ni tami teh ama a tâconae talai daw k thaw taw k hanelah Eden takha thung hoi a pâlei. <sup>24</sup> Hottelah, tami hah a pâlei hnukkhu, avoivang kamrit thai e tahloi hoi Cherubim hah, hringnae thingkung lamthung ka ring hanelah, Eden takha kanîtholah a hruek.

## 4

### *Kain ni Abel a thei*

<sup>1</sup> Adam ni a yu Evi a panue teh, camo a vawn. Capa a khe teh, BAWIPA ni na kabawp daw k ca tongpa ka khe ati teh, Kain telah min a phung.

<sup>2</sup> Hahoi, a nawngaha Abel bout a khe. Abel teh tu kakhoumkung lah ao teh, Kain teh law kasakkung lah ao. <sup>3</sup> Atueng akuep toreï teh, Kain ni amae law thung e a pawhiknaw hah BAWIPA koe a sin. <sup>4</sup> Abel ni hai tu pasuek ka khe e hoi, kathâwnaw a sin. Hatdawkvah, BAWIPA ni Abel hoi a sin e hno teh a dâw pouh. <sup>5</sup> Hatei Kain hoi a sin e hno teh dâw pouh hoe. Hatdawkvah, Kain teh a lung puenghoi a khuek dawkvah minhmai a mathoe.

<sup>6</sup> BAWIPA ni Kain koevah, Bangkongmaw na lungkhuek teh minhmai a mathoe. <sup>7</sup> Kahawicalah na sak pawiteh ka dâw mahoe haw. Kahawicalah na sak hoehpawiteh yon thuengnae sathei teh longkha koe a tabo. Ahnie a ngainae teh nange doeh. Hatei nang ni ahni na uk telah atipouh.

<sup>8</sup> Kain ni a nawngaha Abel koevah law lah cet sei atipouh. Law a pha roi toreï teh Kain ni a nawngaha a taran teh a thei. <sup>9</sup> Hatdawkvah, BAWIPA ni Kain koe, na maw na nawngaha Abel te, telah a pacei navah, ahni ni ka panuek hoe, ka nawngaha ka khoun e nahoe telah atipouh.



<sup>10</sup> Hahoi, BAWIPA ni bangmaw na sak na nawng e thi ni talai daw k hoi kai koe a hram toe. <sup>11</sup> Na kut hoi na palawng e na nawng e thi, dâw hanelah apâhni ka ang e talai daw k hoi nang teh atu thoebo lah na o toe. <sup>12</sup> Talai daw k thaw na taw k navah a thaonae nang koe tâcaw t mahoe h toe. Nang teh talai vah, ka yawng e tami hoi ka kâva a e tami lah na o han telah atipouh.

<sup>13</sup> Kain ni BAWIPA koe vah, reknae ka hmu e heh ka phu thai e hla k a lenhnawn. <sup>14</sup> Sahnin teh talai hoi na pâlei toe ti ka panue. Na hmaitung hoi hro lah ka o toe. Talai van vah ka yawng e hoi yuengyoe kâva e tami lah kaawm vaiteh, ka hmaw t e pueng ni na thei han doeh telah atipouh.

<sup>15</sup> Hatei, BAWIPA ni Kain koe nang ka thet e pueng teh let sari touh hoi a moi ka pathung han atipouh. Hahoi, BAWIPA ni Kain ka hmaw t e tami, buet touh ni hai a thei hoe h nahanlah ahni daw k noutnae a ta pouh. <sup>16</sup> Hathnuk khu, Kain teh BAWIPA e hmaitung hoi a tâco teh, Eden kanîtholah, Nod ram daw k kho a sak. <sup>17</sup> Kain ni a yu a panue teh, camo a vawn teh Enok a khe. Kho a thawng teh a capa min lah Enok kho telah min a poe. <sup>18</sup> Hahoi Enok ni Irad a khe. Irad ni Mehujael a khe. Mehujael ni Methushael a khe. Methushael ni Lamek a khe. <sup>19</sup> Hathnuk khu, Lamek ni a yu kahni touh a la teh, apasueke min teh Adah, apâhni e min teh Zillah doeh. <sup>20</sup> Adah ni Jabal a khe. Ahni teh rimnaw daw k kho ka sak e lah ao teh saringnaw kapacakung e na pa lah ao. <sup>21</sup> A nawng e min teh Jubal. Ahni teh ratoung hoi vovitnaw ka pâtu e na pa lah ao. <sup>22</sup> Zillah ni hai Tubal-kain a khe. Ahni teh rahum hoi sum ka dei pueng e na pa lah ao. Naamah teh Tubal-kain e tawncanu lah ao. <sup>23</sup> Hahoi, Lamek ni a yu roi Adah hoi Zillah koe vah, ka lawk thai roi haw, patawnae na poe dawkvah tongpa buet touh ka thei. Na pacekpahlek dawkvah, thoundoun buet touh ka thei toe.

<sup>24</sup> Kain ni let sari touh e moipathungnae khang pawiteh, Lamek ni teh a let 70 touh hoi a khang han.

<sup>25</sup> Hahoi, Adam ni a yu bout a panue teh, ca tongpa a khe. Seth telah min a phung. Bangkongtetpawiteh, Kain ni Abel a thei dawkvah Cathut ni alouke cati bout na poe telah ati. <sup>26</sup> Seth ni hai capa a khe teh Enosh telah min a phung. Hahoi tami ni Jehovah min kaw han a kamtawng awh.

## 5

### *Adam imthung*

<sup>1</sup> Adam catounnaw cauk teh a rahim lae patetlah doeh. Cathut ni tami a sak navah amae meikalat lah a sak. <sup>2</sup> Tongpa hoi napui a sak teh yawhawinae a poe. A sak hnin ahnimouh roi teh tami telah min a phung. <sup>3</sup> Adam teh kum 130 touh a pha navah, ama hoi kâlat e ama hoi mei kâvan e ca tongpa a khe teh Seth telah min a phung. <sup>4</sup> Seth a khe hnuk khu, Adam teh kum 800 touh a hring teh ca tongpanaw hoi napuinaw hai bout a khe. <sup>5</sup> Adam teh kum 930 touh aku ep navah a due.

<sup>6</sup> Seth teh kum 105 touh a pha navah Enosh a khe. <sup>7</sup> Enosh a khe hnuk khu Seth teh kum 807 touh a hring teh ca tongpanaw hoi napuinaw bout a khe.

<sup>8</sup> Seth teh a kum 912 touh aku ep navah a due.

<sup>9</sup> Enosh teh kum 90 touh a pha navah Kenan a khe. <sup>10</sup> Kenan a khe hnuk khu, Enosh teh kum 815 touh a hring teh ca tongpanaw hoi napuinaw khe. <sup>11</sup> Enosh teh kum 905 touh a hring teh a due. <sup>12</sup> Kenan teh kum 70 touh a pha navah Mahalalel a khe. <sup>13</sup> Mahalalel a khe hnuk khu, Kenan



teh kum 840 touh a hring teh ca tongpanaw hoi napuinaw bout a khe. <sup>14</sup> Kenan teh kum 910 touh a hring teh a due.

<sup>15</sup> Mahalalel teh kum 65 touh a pha navah Jared a khe. <sup>16</sup> Jared a khe hnukkhu, Mahalalel teh kum 830 touh a hring teh ca tongpanaw hoi napuinaw bout a khe. <sup>17</sup> Mahalalel teh kum 895 touh a hring teh a due. <sup>18</sup> Jared teh kum 162 touh a pha navah Enok a khe. <sup>19</sup> Enok a khe hnukkhu Jared teh kum 800 touh a hring teh ca tongpanaw hoi napuinaw bout a khe. <sup>20</sup> Jared teh kum 962 touh a hring teh a due.

<sup>21</sup> Enok teh kum 65 touh a pha navah Methuselah a khe. <sup>22</sup> Methuselah a khe hnukkhu Enok teh kum 300 touh thung Cathut hoi rei a ceio teh, ca tongpanaw hoi napuinaw bout a khe. <sup>23</sup> Enok teh kum 365 touh a hring. <sup>24</sup> Enok teh Cathut hoi cungtalah a ceio teh bout awmhoeh toe. Bangkongtetpawiteh, Cathut ni a la toe.

<sup>25</sup> Methuselah teh kum 187 touh a pha nah Lamek a khe. <sup>26</sup> Lamek a khe hnukkhu Methuselah teh kum 782 touh a hring teh ca tongpanaw hoi napuinaw bout a khe. <sup>27</sup> Methuselah teh kum 969 touh a hring teh a due.

<sup>28</sup> Lamek teh kum 182 touh a pha navah ca tongpa a khe. <sup>29</sup> BAWIPA ni thoebonae talai daw kute hoi thaw taw awh teh, patang khangnae daw kute hoi lung na pahawi han ati teh, Noah telah min a phung. <sup>30</sup> Noah a khe hnukkhu Lamek teh kum 595 touh a hring teh ca tongpanaw hoi napuinaw bout a khe. <sup>31</sup> Lamek teh kum 777 touh a hring teh a due.

<sup>32</sup> Noah teh kum 500 touh a pha nah Shem, Ham hoi Japheth a khe.

## 6

### *Talai van rawknae a pung*

<sup>1</sup> Talai vah tami pungdaw a kamtaung navah, canunaw a khe awh teh, <sup>2</sup> Cathut e capanaw ni tami e canunaw a meihawi e a hmu navah a ngai e patetlah a rawi awh teh, a paluen awh. <sup>3</sup> Hat toreih teh, BAWIPA ni ka muitha teh taminaw koe yungyoe kaawm sak mahoehtoe. Bangkongtetpawiteh, tami teh tak lah ao dawkvah, atu hoi teh tami e a hringnae teh kum 120 touh han toe telah ati. <sup>4</sup> Hatnae tueng daw kute Nephilimnaw teh talai van ao awh. Hathnukkhu, Cathut e capanaw ni tami e canunaw a yonkhaw awh teh, ahnimouh hanelah canaw a khe awh. Hote taminaw teh ayan e tueng daw kute Athakasaipoung hoi min kamthang e naw lah ao awh.

<sup>5</sup> BAWIPA ni talai van daw kute tami e thoenae a len e hoi lungpouk pueng pou a payon toe tie a hmu. <sup>6</sup> Hahoi BAWIPA ni talai van tami a sak e hah a lungmathoe teh a lung caca a pataw. <sup>7</sup> Hatdawkvah, BAWIPA ni ka sak e tami teh talai daw kute hoi ka takhoe han toe. Tami hai, saring hai, vonpui hoi kavanaw hoi kalvannaw daw kute tavanaw hai, ahnimanaw ka sak e daw kute ka lung caca a pataw telah ati. <sup>8</sup> Hatei Noah teh BAWIPA lungyok e tami lah ao.

### *Noah ni Cathut a lunghawi sak*

<sup>9</sup> Hethateh, Noah e catounnaw doeh. Noah teh tamikalan, a miphun daw kute toun han kaawm hoehtoe tami lah ao. Cathut hoi cungtalah a ceio.

<sup>10</sup> Noah ni Shem, Ham, hoi Japheth, ca tongpa kathum touh a khe.

<sup>11</sup> Hat navah, talai teh Cathut hmalah karaw e lah ao. Talai teh yonnae hoi akawi. <sup>12</sup> Cathut ni talai a khet navah, karaw e lah ao e hah a hmu. Bangkongtetpawiteh, talai van e tami pueng e takthai lamthung teh koug a ro toe. <sup>13</sup> Hatdawkvah, Cathut ni Noah koevah takthai pueng e a poutnae



teh ka hmaitung a kamnue toe. Ahnimouh kecu dawk talai teh yonnae hoi akawi toe. Talai hoi cungtalah ahnimanaw teh ka raphoe katang han toe. <sup>14</sup> Gopher thing hoi nama hanelah, long sak leih. Athung haiyah rakhannaw sak nateh, athung, avan petkâkalup lah thingtapi hoi kanan sin haw. <sup>15</sup> Hote long teh asaw e dong 300, akaw e dong 50, a rasang dong 30 touh a pha han. <sup>16</sup> Long lempu na sak vaiteh, a lathueng lahoi dong touh kakaw lah hlangaw na sak vaiteh, tapang koe lah tho na sak han. Apasuekpoung, apâhni hoi apâthum telah coung thum touh lah na sak han. <sup>17</sup> Kahring e saring pueng, kalvan rahim hoi ka raphoe hanelah, talai van tuikamuem ka tho sak vaiteh, talai van kaawm pueng koug a due aw h han. <sup>18</sup> Nang koe ka lawkkam ka caksak han. Nama hoi capanaw na yu hoi langanaw teh long thung na kâen aw h han. <sup>19</sup> Hahoi ka hring e saring pueng thung e anapui hoi anatongpa kahni touh hring sak hanelah, nang hoi cungtalah long thung na kâen sak han. <sup>20</sup> Tava dawk hai amae aphun lah, saring dawk hai amae aphun lah, vonpui hoi kâva e dawk hai amae aphun lah, aphun tangkuem dawk e kahni touh hring sak hanelah nang koe a tho aw h han. <sup>21</sup> Hahoi nama ni na ca hane hoi saringnaw ni a ca hanelah, cakawi rawca aphunphun na la vaiteh, na pâkhueng han telah atipouh. <sup>22</sup> Cathut ni kâ a poe e patetlah Noah ni koug a sak.

## 7

### *Long thung a kâen aw h*

<sup>1</sup> Hathnukkhu vah, BAWIPA ni Noah koe bout a dei pouh e teh, atu e taminaw thung dawk nang teh ka hmalah tamikalan lah na o e ka panue dawkvah, na imthungkhu abuemlahoi long thung kâen aw h. <sup>2</sup> Kathounge saring dawk e anatongpa hoi anapui phun sari, kathounghoehe saring dawk e anatongpa hoi anapui phun hni touh, <sup>3</sup> kalvan e tava thung dawk e hai anatongpa hoi anapui phun sari touh telah lengkaleng talai van daw hoi hlout sak hanelah, nama koe na thokhai han. <sup>4</sup> Bangkongtetpawiteh, atu hoi kamtawng vaiteh hnin sari touh akuap navah, hnin 40 touh hoi a rum 40 touh thung kho ka rak sak vaiteh, ka sak e kahring e pueng koug ka raphoe han. <sup>5</sup> BAWIPA ni kâ a poe e patetlah Noah ni a sak. <sup>6</sup> Talai van dawk tuikamuem a tho navah, Noah teh kum 600 touh a pha. <sup>7</sup> Tuikamuem kecu dawk, Noah hoi a capanaw, a yu hoi a langanaw teh a hlout nahanelah long thung a kâen aw h. <sup>8</sup> Cathut ni Noah koe kâ a poe e patetlah kathounge saringnaw hoi kathounghoehe saringnaw tavanaw hoi vonpui hoi kâva e saringnaw daw k e, <sup>9</sup> a napui hoi a na tongpanaw teh Noah hoi cungtalah long thung a kâen aw h. <sup>10</sup> Hnin sari touh akuap hnukkhu hoi tuikamuem teh talai van a tho.

<sup>11</sup> Noah a kum 600 nae kum, thapa ayung pahni, hnin 17 nah, kadung poung e tuikhu pueng a kamawng teh kalvannaw daw k e hlangaw pueng hai a kamawng. <sup>12</sup> Hathnukkhu, hnin 40 touh hoi rum 40 touh talai van vah kho a rak. <sup>13</sup> Hote hnin daw k Noah hoi a capanaw, Shem, Ham, hoi Japheth, Noah e a yu hoi a langanaw teh long thung a kâen aw h. <sup>14</sup> Ahnimouh hoi saring phun, sarang phun, talai daw k kâva e pueng daw k e phun, kamlang e tava phun, rathei ka tawn e pueng daw k e phun, a yuvâ lahoi long thung a kâen aw h. <sup>15</sup> Hringnae kâha ka tawn e pueng a yuvâ lahoi long thung Noah koe a kâen aw h. <sup>16</sup> Hottelah Cathut ni lawk a thui e patetlah saring thung daw k e anatongpa hoi anapui a kâen sak teh, BAWIPA ni Noah teh athung vah tho a khan sin.



<sup>17</sup> Tuikamuem teh talai van hnin 40 touh thung a kamuem. Tui hoehoe a len teh talai dawkhoei long teh a kâtaakhoei teh a tawm. <sup>18</sup> Talai van tui hoehoe a len teh, long teh tui van lah hoehoe a kâtaawm. <sup>19</sup> Hahoi, tui teh talai van dawkhoei a tha hoehoe ao teh, kalvan rahim kaawm e mon ka rasang pueng koug a muem. <sup>20</sup> Tui ni a muem e monnaw e a lathueng tui teh dong 15 touh arasang. <sup>21</sup> Hatdawkvah, talai van ka kâroe e tava, sarang, saring, talai dawkhoei ka kâva e saring pueng hoi tami pueng teh koug a due awh. <sup>22</sup> A oung lah kaawm e pueng hai koug a due. <sup>23</sup> Hottelah talai van kaawm ni teh hringnae ka tawn e pueng, tami hoi saring, a von hoi ka kâvanaw hoi kalvan e tavanaw koug a thei. Noah hoi cungtalah long thung kaawmnaw dueng doeh kahlout. <sup>24</sup> Hnin 150 touh thung tui teh talai van a kamuem.

## 8

### *Noah hloutnae*

<sup>1</sup> Hateiteh, Cathut ni Noah hoi cungtalah long thung kaawm e kahring e pueng hoi saring pueng teh pahnim hoe. Hahoi Cathut ni kahli a tho sak teh tui a kum sak. <sup>2</sup> Ka dungpoug koe e tui kâkhunaw hoi kalvan e hlalangawnaw hai a khan teh khorak e a dep sak. <sup>3</sup> Talai van e tui hah, pout laipalah a kum sak teh, hnin 150 touh aloum hnukkhu tui teh a hak. <sup>4</sup> Hottelah long teh thapa yung sarinae hnin 17 nah Ararat mon dawkhoei kâhat.

<sup>5</sup> Ahranae thapa totouh tui teh pout laipalah, a kum cathuk. Thapa yung hra, apasuek hnin dawkhoei monsomnaw teh a kamnue. <sup>6</sup> Hahoi, hnin 40 touh abaw hnukkhu, Noah ni long dawkhoei hlalangaw a sak e a paawng. <sup>7</sup> Vonga buet touh a patoun teh, talai van tui a hak hoehrourak a voivang lah yuengyoe a kamlang. <sup>8</sup> Hahoi talai van e tui a hak toung maw tie panue thai nahanlah âbakhu hah ama koe hoi a patoun. <sup>9</sup> Hateiteh âbakhu ni a kâhat nahan a hmu hoeh dawkvah, long thung ama koe bout a ban. Bangkongtetpawiteh, tui teh talai van koug a kamuem rah. Noah ni a kut a dâw teh âbakhu a la hnukkhu, long thung ama koe bout a pakhum. <sup>10</sup> Hnin sari touh bout ao hnukkhu hote âbakhu hah long thung hoi bout a patoun. <sup>11</sup> Tangmin lah âbakhu teh Noah koe bout a ban teh, a pahni hoi ka hringsuep e Olive hna a thokhai teh, Noah ni talai van tui a hak toe tie a panue. <sup>12</sup> Hnin sari touh bout aloum hnukkhu hote âbakhu, bout a patoun teh ama koe bout ban hoeh toe. <sup>13</sup> Kum 601, apasuek thapa apasuek hnin navah, talai van e tui pueng teh koug a hak. Hatdawkvah, Noah ni long ramuknae a hawng teh a khet navah talai van remke e hah a hmu. <sup>14</sup> Apâhni e thapa, hnin 17 nah, talai teh remphui toe.

### *BAWIPA e lawkkam*

<sup>15</sup> Hottelah Cathut ni Noah koe vah, <sup>16</sup> Nama hoi na yu, na capanaw hoi na langanaw, long thung hoi tâcawt awh leih. <sup>17</sup> Nang koe kaawm e moithang, saring pueng, tava pueng, vonpui hoi kâva e pueng, talai van ca a khe vai teh, pungdaw thai nahanelah, tâcawtkhai leih, telah atipouh.

<sup>18</sup> Hatdawkvah, Noah teh ama koe kaawm e a capanaw hoi a yu, a capanaw hoi a yunaw hoi a tâco awh. <sup>19</sup> Moithang, saring pueng, a von hoi kâva e pueng, tava phunkuep hoi talai van kâroe e pueng long thung hoi a tâco awh. <sup>20</sup> Hahoi, Noah ni BAWIPA hanelah khoungroe a sak teh, khoungroe dawkhoei hmaisawi thuengnae a sak. <sup>21</sup> BAWIPA ni hai



hmuitui hmui a thai teh, kai ni taminaw hanelah, talai teh thoe bout ka bo mahoe. Bangkongtetpawiteh, taminaw teh a nawca hoi lungthin pouknae a mathoe. Kai ni atu ka sak e patetlah kahring e pueng ka raphoe mahoe toe. <sup>22</sup> Talai tueng ao nathung, cati patuena tueng hoi anae tueng, pâdingnae hoi abetnae, kompawi tue hoi kasik tue, khodai karum nâtuék hai ka pout sak mahoe telah ati.

## 9

### *Cathut ni Noah koe lawkkamnae a sak*

<sup>1</sup> Hottelah Cathut ni Noah hoi a canaw yawhawinae a poe teh, ahnimouh koe, ca moi khe awh, pungdaw awh nateh, talai van kawi awh. <sup>2</sup> Talai van moithang, saring phunkuep, kalvan e tava phunkuep, talai van a von hoi kâva e pueng, hoi tui thung e tanga pueng ni nangmouh na taki vaiteh a pâyaw awh han. Hote moithang pueng teh nangmae kut daw na poe. <sup>3</sup> Kahring ni teh kâroe e pueng nangmouh han rawca lah ao han. Hnopai pueng, anhla kahring pueng totouh na poe awh han. <sup>4</sup> Hottelah a moi hah a hringnae a thi hoi hmai na cat awh mahoe. <sup>5</sup> Hahoi, nangmae hringnae thi phu teh ka hei han. Tami saring pueng koe ka hei han. Tami tangkuem e hmaunawngghanaw koe, tami e hringnae phu teh ka hei roeroe han. <sup>6</sup> Apipatethai tami e thi ka palawng e tami teh tami ni thi palawng lah ao van han. Bangkongtetpawiteh, tami teh Cathut ni amae meikalat lah a sak e doeh. <sup>7</sup> Hateiteh, nangmouh teh ca khe awh nateh pungdaw awh. Talai van vah canaw moi khe awh nateh pungdaw awh telah atipouh.

<sup>8</sup> Cathut ni Noah hoi a capanaw koe bout a dei pouh e teh, <sup>9</sup> Nangmouh hoi thoseh, nangmae catoun hoi thoseh, <sup>10</sup> Nangmouh koe kaawm e kahring e moithang pueng, tava pueng, saring pueng, long thung hoi tâcokhai e saring pueng koe lawkkam ka caksak han. <sup>11</sup> Nangmouh koe lawkkam ka caksak e teh, tuikamuem lahoi nâtuék hai moithang pueng ka raphoe mahoe toe. Talai teh tui hoi ka raphoe mahoe toe telah ati. <sup>12</sup> Cathut ni kai hoi nang rahak, nang koe kaawm e kâroe ni teh kahring e pueng hoi na catounnaw rahak vah ka sak e lawkkam mitnoutnae doeh. <sup>13</sup> Kaie salumpa hah tâmai daw ka hruek vaiteh, kai hoi talai rahak lawkkam mitnoutnae lah ao han. <sup>14</sup> Kai ni tâmai ka tabo sak navah, tâmai daw salumpa a kamnue han. <sup>15</sup> Kai hoi nang rahak, kahring ni teh kâroe e pueng koe, ka lawkkam e pou ka pouk vaiteh, saring moithang pueng tuikamuem hoi ka raphoe mahoe toe. <sup>16</sup> Tâmai daw salumpa a paham e ka khet vaiteh, Cathut hoi talai van kaawm e kahring e saring moithang pueng rahak vah, yungyoe e lawkkam ka pouk han. <sup>17</sup> Hahoi Cathut ni Noah koe, hete teh kai hoi talai van kaawm e moithang saring pueng rahak vah, ka caksak e lawkkam mitnoutnae doeh telah atipouh.

### *Noah hoi a canaw*

<sup>18</sup> Long thung hoi a tâco navah Noah e a capanaw teh Shem, Ham, Japheth. Ham teh Kanaan e a na pa lah ao. <sup>19</sup> Ahnimanaw kathum touh teh Noah e a capanaw lah ao teh, ahnimanaw koehoi talai van taminaw a pungdaw. <sup>20</sup> Noah ni law sak a kamtawng teh, misur takha a sak. <sup>21</sup> Misurtui hai a nei dawkvah a parui teh tawngtai lah ao. <sup>22</sup> Kanaan e a na pa Ham ni a na pa caici lah ao e a hmu teh alawilah kaawm e a hmaunawnggha kahni touh koe a dei pouh. <sup>23</sup> Hatei Shem hoi Japheth ni teh hni a la roi teh a loung daw ka thueng roi teh, kâhnawn laihoi a na pa e caicinae teh a ramuk pouh roi. Ahnimouh roi teh alawilah a kangwawi



roi dawkvah, a na pa caici lah ao e hah hmawt roi hoe. <sup>24</sup> Noah ni misur parui e a thanguem torei teh a capa cahnoung e ni a sak e a panue. <sup>25</sup> Hatdawkvah, Kanaan teh thoebola awm seh. A hmau roi koe san thung daw e san lah awm seh. <sup>26</sup> Hahoi, Shem e BAWIPA Cathut teh yawhawinae awm seh. Kanaan teh ahni koe san lah awm seh. <sup>27</sup> Cathut ni Japheth teh len nateh rounng seh. Shem e lukkareim daw awm seh. Kanaan teh ahni koe san lah awm seh telah atipouh. <sup>28</sup> Noah teh tuikamuem a tho hnukkhu kum 350 a hring. <sup>29</sup> Noah e a hringnae teh kum 950 touh a pha teh a due.

## 10

### *Noah e catounnaw*

<sup>1</sup> Tuikamuem a tho hnukkhu, Noah capa Shem, Ham hoi Japheth koehoi patuen a khe e casaknaw teh a rahim lae patetlah doeh. <sup>2</sup> Japheth e capanaw teh Gomer, Magog, Madai, Javan, Tubal, Meshek hoi Tiras. <sup>3</sup> Gomer e capanaw teh, Ashkenaz, Riphath hoi Togarmah. <sup>4</sup> Javan e capanaw teh, Elishah, Tarshish, Kittim hoi Dodarim. <sup>5</sup> Ahnimanaw teh miphun tangkuem, ram louk hmuennaw hah amamae ram, amamae lawk, amamae imthung lahoi amamae ram daw lengkaleng kâkapek awh. <sup>6</sup> Hahoi, Ham e capanaw teh Kush, Izip, Put hoi Kanaan, <sup>7</sup> Kush e capanaw teh Seba, Havilah, Sabtah, Raamah hoi hmaloe pasuek a thakasaipoung e lah ao. <sup>8</sup> Hahoi Kush ni Nimrod a khe teh, ahni teh talai van daw hmaloe pasuek a thakasaipoung e lah ao. <sup>9</sup> Ahni teh BAWIPA hmalah thakasaipoung e lah ao. Hatdawkvah, BAWIPA hmalah thaonae hoi moikathaipoung Nimrod patetlah ouk ati awh. <sup>10</sup> A uknaeram a kamtawngnae teh, Babilon, Erech, Akkad hoi Shinar ram e Kalneh. <sup>11</sup> Hote ram koehoi Assiria ram lah a cei teh Nineveh, Rehobothir aka lahoi, <sup>12</sup> Nineveh hoi Kalah rahak kaawm e Resen khopui kalenpoung kho hmuen hai a thawng. <sup>13</sup> Izip e capanaw teh Ludim, Anamim, Lehabim, Naphtuhim, <sup>14</sup> Pathrusim (philistin hoi Kapthorimnaw a tâconae) hoi Kapthorim, <sup>15</sup> Kanaan e a camin teh Sidon, hahoi Heth, <sup>16</sup> hahoi Jebusit tami Amor tami, Gergashite tami, <sup>17</sup> Hiv tami, Arkit tami, Sin tami, <sup>18</sup> Arvad tami, Zemarit tami hoi Hamath taminaw hah a khe. Hathnukkhu, Kanaan e ca catounnaw teh a kampek awh. <sup>19</sup> Kanaannaw e a ramri Sidon hoi Gerar koelae Gaza totouh. Hahoi Sodom, Gomorrah, Admah, hoi Zeboiim kho a tapoung teh Lasha kho totouh a pha. <sup>20</sup> Hete miphunnaw teh Ham e ca catounnaw doeh. Ahnimanaw teh amamae imthung lahoi, lawk lahoi, kho hmuen lahoi, amamae ram thung kho lengkaleng a sak awh. <sup>21</sup> Japheth e nawngah, Hebru miphunnaw e a na pa Shem haiyah canaw a khe. <sup>22</sup> Shem e capanaw teh Elam, Assyria, Arphaxad, Lud hoi Aram. <sup>23</sup> Aram e capanaw teh Uz, Hul, Gether hoi Mash. <sup>24</sup> Arphaxad e capa teh Shelah, Shelah e capa teh Eber, <sup>25</sup> Eber ni capa kahni touh a khe. Buet touh e min teh Peleg. Bangkongtetpawiteh, ahnie a se navah talai a kârei awh. A nawngah e min teh Joktan. <sup>26</sup> Joktan e a capanaw teh, Almodad, Sheleph, Hazarmaveth, Jerah, <sup>27</sup> Hadoram, Uzal, Diklah, <sup>28</sup> Obal, Abimael, Sheba, <sup>29</sup> Ophir, Havilah, hoi Jobab, <sup>30</sup> Kho a saknae hmuen teh Mesha kho koehoi kanîtholoh Sephar mon totouh a pha. <sup>31</sup> Hete taminaw teh Shem e capanaw lah ao teh, amamae imthung lahoi, lawk, kho ram tangkuem daw kho a sak awh. <sup>32</sup> A lathueng lae khenae hoi miphunnaw teh, Noah e imthung hoi a capanaw ni patuen a khe e catounnaw e kong



doeh. Ahnimanaw teh tuikamuem a tho hnukkhu kho ram alouklah a kampek awh.

## 11

### *Babel imrasang*

<sup>1</sup> Hatnavah lawk phun touh hoi lawk pan e buet touh dueng doeh kaawm . <sup>2</sup> Kanitholah hoi kahlawng a cei awh teh, Shinar ram dawkh tanghling a hmu awh teh, haw vah kho hmuen a thawng awh. <sup>3</sup> Hat toreih teh, buet touh hoi buet touh, tho awh amhru sak awh vaiteh kahawicalah paeng awh sei telah a kati awh. Hottelah talung e yueng lah amhru a hno awh teh pato nahanelah ailai a hno awh. <sup>4</sup> Hahoi, tho awh mamouh hanelah khopui thawng awh vaiteh kalvan kadeng lah imrasang sak awh sei. Mamouh hanelah min kamsawng sak awh sei, telah hoehpawiteh talai van tangkuem koe kakahei payon han doeh telah ati awh.

<sup>5</sup> Hatei taminaw e capanaw ni a thawng awh e khopui hoi imrasang khet hanlah BAWIPA teh a kum. <sup>6</sup> BAWIPA ni kenhaw! taminaw teh miphun buet touh lah ao awh teh lawk buet touh dueng a hno awh dawkvah, hete hno hmaloe pasuek a kamtawng awh. Sak han a ngai awh e kangangkung awm laipalah a sak awh han doeh. <sup>7</sup> Hatdawkvah, tho awh, kum awh sei. Ahnimanaw buet touh hoi buet touh lawk kathi awh hoeh nahanelah, lawk alouklouk lah sak awh sei telah ati. <sup>8</sup> Hottelah BAWIPA ni ahnimanaw teh talai van a kampek sak awh teh khopui kangdout sak thai awh hoeh toe. <sup>9</sup> Hatdawkvah, Babel telah min a poe. Bangkongtetpawiteh, hote hmuen koehoi BAWIPA ni lawk alouklouk lah a pan sak teh talai van koug a kampek sak.

### *Shem koehoi Abraham totouh*

<sup>10</sup> Hetnaw teh Shem e ca catounnaw doeh. Shem teh kum 100 touh a pha nah, tuikamuem a tho hnukkhu kum 2 touh aloum nah capa Arphaxad a sak. <sup>11</sup> Arphaxad a khe hnukkhu, Shem teh kum 500 touh a hring teh ca tongpanaw hoi napuinaw bout a sak. <sup>12</sup> Arphaxad teh kum 35 touh a pha nah capa Shelah a khe. <sup>13</sup> Shelah a khe hnukkhu Arphaxad teh kum 403 touh a hring teh ca tongpanaw hoi napuinaw bout a sak. <sup>14</sup> Shelah teh kum 30 touh a pha nah Eber a khe. <sup>15</sup> Eber a khe hnukkhu Shelah teh kum 403 touh a hring teh ca tongpanaw hoi napuinaw bout a sak. <sup>16</sup> Eber teh kum 34 touh a pha nah capa Peleg a sak. <sup>17</sup> Peleg a khe hnukkhu Eber teh kum 430 touh a hring teh ca tongpanaw hoi napuinaw bout a sak. <sup>18</sup> Peleg teh kum 30 touh a pha navah Reu a sak. <sup>19</sup> Reu a khe hnukkhu Peleg teh kum 209 touh a hring teh ca tongpanaw hoi napuinaw bout a sak. <sup>20</sup> Reu teh kum 32 touh a pha navah Serug a sak. <sup>21</sup> Serug a khe hnukkhu Reu teh kum 207 touh a hring teh ca tongpanaw hoi napuinaw bout a sak. <sup>22</sup> Serug teh kum 30 touh a pha nah Nahor a khe. <sup>23</sup> Nahor a khe hnukkhu Serug teh kum 200 touh a hring teh ca tongpanaw hoi napuinaw bout a sak. <sup>24</sup> Nahor teh kum 29 touh a pha navah Terah a sak. <sup>25</sup> Terah a khe hnukkhu Nahor teh kum 119 touh a hring teh ca tongpanaw hoi napuinaw bout a sak. <sup>26</sup> Terah teh kum 70 touh a pha nah Abram, Nahor, hoi Haran a sak.

### *Terah casaknaw*

<sup>27</sup> Terah e casaknaw teh, Terah ni Abram, Nahor hoi Haran a sak. Haran ni Lot a sak. <sup>28</sup> Haran teh a na pa Terah hmaitung, a khenae hmuen



Khaldean taminaw a onae Ur kho dawkh a due. <sup>29</sup> Hahoi, Abram hoi Nahor ni a yu a la roi. Abram e a yu min teh Sarai, Nahor e a yu min teh Haran e a canu Mikah. Haran teh Milkah hoi Iskah e a na pa lah ao. <sup>30</sup> Hatei Sarai teh carôe dawkvah ca tawn hoe. <sup>31</sup> Terah ni a capa Abram hoi a capa Haran capa Lot, a langa lah kaawm a capa Abraham e yu Sarai, a kaw teh Kanaan ram lah cei hanelah Khaldean taminaw a onae Ur kho hoi a tâcokhai, Hatei Haran kho a pha awh navah haw vah kho a sak awh. <sup>32</sup> Terah teh kum 205 touh a pha navah, Terah teh Haran kho dawkh a due.

## 12

### *Abram koe lawkkamnae*

<sup>1</sup> BAWIPA ni Abram koevah, Na ram, na imthung hoi na pa im cettakhai nateh kai ni na patue e ram koe lah cet leih. <sup>2</sup> Kai ni miphun kalen lah na sak vaiteh, yawhawinae na poe han. Na min kamsawng sak vaiteh yawhawinae ka coe e tami lah na o han. <sup>3</sup> Nang yawhawinae ka poe e tami teh yawkahawi sak vaiteh, thoe na ka bo e tami teh thoe ka bo van han. Nang lahoi tami pueng ni yawhawinae a coe awh han telah atipouh.

<sup>4</sup> BAWIPA ni a dei pouh e patetlah Abram ni a kamthaw teh, Lot hai a kâbang van. Haran kho hoi a tâco navah Abram teh kum 75 touh a pha.

<sup>5</sup> Abraham ni a yu Sarai, a hmau e capa Lot hoi hnopai pueng thoseh, Haran kho dawkh a hmu e taminaw hai thoseh, a ceikhâi teh Kanaan ram pha hanelah a tâco. Hottelah hoi Kanaan ram a pha. <sup>6</sup> Abram ni hote ram dawkh yuengyoe a kâhlai teh, Shekhem hmuén Moreh e kathen kung koe a pha. Han navah Kanaan taminaw hote ram dawkh yo la o awh toe.

<sup>7</sup> BAWIPA teh Abram koe a kamnue teh hote ram teh na ca catounnaw na poe han atipouh. Hote ka kamnuek e BAWIPA hanelah khoungrôe a sak pouh. <sup>8</sup> Hote hmuén koehoi Bethel kho Kanitholae mon dawkh a kampuen teh kaniloumlah Bethel hoi kanitholah Ai kho rahak rim a sak. Hote hmuén koe BAWIPA hanelah khoungrôe a sak teh BAWIPA e min a kaw. <sup>9</sup> Hottelah Abram teh akalah kampuen hanlah a cei teh, Negev totouh a pha.

### *Izip ram lah a ceinae*

<sup>10</sup> Hathnukkhu Kanaan ram takang a tho dawkvah, Abram teh Izip ram lah a cei. Bangkongtetpawiteh, ram thung puenghoi takang a tho dawkh doeh. <sup>11</sup> Izip ram a pha tawmlei navah a yu Sarai koe nang teh meikahawi e napui lah na o tie ka panue. <sup>12</sup> Hatdawkvah, Izip taminaw ni nang na hmu awh navah, hete napui teh a yu doeh tet awh vaiteh kai na thei awh han, hatei nang teh na hlout sak awh han. <sup>13</sup> Hatdawkvah, a tawncanu doeh na ti pouh han. Hottelah na dei pouh pawiteh nang dawkh hoi kai hawinae ka hmu vaiteh ka hringnae hai a hlout han telah atipouh.

<sup>14</sup> Abram teh Izip ram a kâen navah Izip taminaw ni a yu a hmu navah a meihawi ati awh. <sup>15</sup> Faro e ukkungnaw ni a hmu navah, Faro hanelah a oup awh teh Faro im vah a ceikhâi awh. <sup>16</sup> Faro siangpahrang ni napui kecu dawkh Abram teh a khetyawt. Tu, Maito, La apui atan, sannu sanpa hoi kalaunknaw a poe. <sup>17</sup> Hatei BAWIPA ni Abram e yu Sarai kecu dawkh Faro hoi a imthungnaw pueng hoi runae a poe. <sup>18</sup> Faro ni Abram a kaw teh, kai dawkh na sak e hno Bangtelamaw, bangkongmaw na yu nahlangva, na dei hoevaw. <sup>19</sup> Bangkongmaw ka tawncanu na ti teh yu lah na la sak.



Hatdawkvah, na yu heh atu hrawi nateh cet leih telah atipouh. <sup>20</sup> Hottelah Faro ni a taminaw kâ a poe teh a yu hoi a tawn e naw pueng hoi a cei sak.

## 13

### *Abram hoi Lot a kamphei roinae*

<sup>1</sup> Hathnukkhu Izip ram hoi Abram a tâco teh akalae ram Negev lah vah a yu, a tawn e hnopai pueng hoi a kamthaw teh a hnuk vah Lot hai a kâbang. <sup>2</sup> Abram teh saringnaw, suinaw, ngunnaw hoi lutlut a bawi. <sup>3</sup> Negev ram lahoi bout a kamthaw teh ahmaloe pasuek e rim ao na koe lah a cei. Hote im teh Bethel hoi Ai kho rahak vah ao. <sup>4</sup> Hmaloe pasuek e khoungroe a saknae hmuen koe bout a pha navah, Abram ni BAWIPA min a kaw.

<sup>5</sup> Abram koe kâbang e Lot hai tunaw, maitonaw hoi rimnaw a tawn van. <sup>6</sup> Ahnimouh roi teh cungtaloh kho rei a sak roi hanelah, hote ram ni khout hoeh. Hnopai a tawn roi e ekvoi apap dawkvah cungtaloh kho sak thai roi hoeh toe. <sup>7</sup> Hatdawkvah, Abram e saring kakhounnaw hoi Lot e saring kakhounnaw kâpohoeahnae ao. Hat nae tueng dawK Kanaan tami hoi Periznaw hote ram dawK ao awh.

<sup>8</sup> Hahoi, Abram ni Lot koevah, maimouh roi teh, hmaunawngaha roi doeh. Hatdawkvah, nang hoi kai rahak thoseh, nange saring kakhounnaw hoi kaie saring kakhounnaw rahak thoseh kâpohoeahnae awm hanh naseh.

<sup>9</sup> Na hmalah ram moi ao nahoeahmaw. Kai koehoi cet leih. Nang avoillah na cet pawiteh kai aranglah ka cei han telah atipouh.

<sup>10</sup> Lot ni a radoung navah, Jordan yawn pueng teh tui ka duk niteh, Jehovah e takha patetlah Sodom hoi Gomorrah kho BAWIPA ni a raphoe hoeahnahlan, Zoar lah ceinae Izip ram patetlah a hmu. <sup>11</sup> Hottelah Lot ni Jordan yawn pueng a rawi. Hatdawkvah, Lot teh kanitholah a cei teh buet touh hoi buet touh a kamphei roi. <sup>12</sup> Abram teh Kanaan ram dawK kho a sak. Lot teh thingyei yawn dawK e khopuinaw koe kho a sak teh, Sodom kho teng rim a sak. <sup>13</sup> Hatei Sodom kho taminaw teh tamikathout lah ao awh teh, BAWIPA koevah tamikayon poung lah ao awh.

<sup>14</sup> Lot hoi a kamphei hnukkhu BAWIPA ni Abram a kaw teh na onae hmuen koehoi atung, aka, kanitho, kaniloumlah radoung haw. <sup>15</sup> Na hmu e ram pueng nama hoi na ca catounnaw na poe vaiteh a yungyoe e ram lah ao han. <sup>16</sup> Na ca catounnaw vaiphu patetlah ka pungdaw sak han. Tami ni vaiphu touk thai pawiteh na ca catounnaw hai a touk thai han. <sup>17</sup> Thaw nateh ayung lahoi thoseh, andangka lahoi thoseh cet haw, kai ni na poe han.

<sup>18</sup> Hatdawkvah, Abram ni rim a puen teh Hebron kho Mamre ka-thenkungnaw koe kho a sak teh, BAWIPA hanelah khoungroe a sak pouh.

## 14

### *Abraham ni Lot rungngangnae*

<sup>1</sup> Hatnae tueng dawK Shinar siangpahrang Amraphel, Ellasar siangpahrang Ariyawk, Elam siangpahrang Kedorlaomer hoi Goiim siangpahrang Tidal ti naw hoi, <sup>2</sup> Sodom siangpahrang Bera, Gomorrah siangpahrang Birsha, Admah siangpahrang Shinab, Zebiiim siangpahrang She-meber, Zoar siangpahrang Bela tinaw taran a kâtuk awh. <sup>3</sup> Ahnimanaw pueng teh palawi tui tie Siddim yawn dawK a kamkhueng awh. <sup>4</sup> Kum 12 touh thung Kedorlaomer koe san lah ao awh teh, kum 13 nae dawK teh a tuk awh. <sup>5</sup> Kum 14 nae dawK teh Kedorlaomer ni ama koe lah



kambawng e siangpahrangnaw hoi a tho awh teh, Ashterothkarnaim kho dawkh Rephaim taminaw, Ham kho dawkh Zuzim taminaw, Kiriathaim koe Emim taminaw, <sup>6</sup> Seir mon dawkh Khorim taminaw hoi thingyei yawn teng kaawm e Elparan kho totouh a thei awh. <sup>7</sup> Hahoi bout a ban awh teh Kadesh ram Enmishpat kho dawkh a pha awh navah, Amalek ram dawkh kaawm e tami pueng, Hazezontamar kho dawkh kaawm e Amor taminaw hai kOUNg a thei awh.

<sup>8</sup> Hathnukkhu Sodom siangpahrang, Gomorrah siangpahrang, Admah siangpahrang, Zeboim siangpahrang hoi Bela siangpahrang, tinaw a cei awh teh, Siddim yawn dawkh a kâtuk awh hanelah a kamkhueng awh. <sup>9</sup> Hottelah, Elam siangpahrang Kedorlaomer, Goiim siangpahrang Tidal, Shinar siangpahrang Amraphel, Ellasar siangpahrang Aryawk, ahnimanaw pali touh ni siangpahrang panga touh a tuk awh. <sup>10</sup> Siddim yawn teh tuithaw dui ka cawt e tangkawmnaw ao dawkvah, Sodom hoi Gomorrah siangpahrang teh a yawng roi, a tangawn te tangkom dawkh a bo teh alouknaw teh mon lah a yawng. <sup>11</sup> Hatdawkvah, Sodom hoi Gomorrah kho dawkh kaawm e hnopai pueng, canei kawi kaawm pueng a la awh teh a ban awh. <sup>12</sup> Sodom kho dawkh kaawm e Abram e a hmau e capa Lot hoi a hnopai pueng hai kOUNg a la awh.

<sup>13</sup> Hote runae dawkh hoi ka hlout e tami buet touh a tho teh, Hebru tami Abram koe a dei pouh. Ahni teh Amor tami Mamre e kathenkungnaw teng ao. Mamre teh Eskol hoi Aner e hmau doeh. Ahnimanaw teh Abram hoi cungtalah kambawng awh e doeh. <sup>14</sup> Abram ni a hmau e capa hah san hanelah a man awh toe tie a thai navah, ama im ka khe ni teh a cangkhai e tami 318 touh a hrawi teh, Dan kho totouh a pâlei. <sup>15</sup> Khohmo navah, a hrawi e taminaw a kapek teh a tuk sak Damaskas atunglah kaawm e Hobah kho totouh a pâlei. <sup>16</sup> A ceikhai e hnopai pueng, a hmau e capa Lot hoi a hnopai pueng napuinaw hoi a taminaw bout a bankhai.

<sup>17</sup> Khedorlaomer hoi ama koe kaawm e siangpahrangnaw kOUNg a thei hnukkhu a ban navah, Sodom siangpahrang teh Shaveh yawn dawkh Abram dawn hanelah a tho. (Shaveh yawn teh siangpahrang yawn doeh). <sup>18</sup> Salem siangpahrang Melkhizedek ni vaiyei hoi misurtui a sin. (Ahni teh ka rasang poung e Cathut e vaihma doeh). <sup>19</sup> Hahoi, Abram yawhawinae a poe teh, kalvan hoi talai katawnkung ka rasang poung e Abram Cathut teh yawhawinae awm seh. <sup>20</sup> Na tarannaw na kut dawkh na kapoekung ka rasang poung e Cathut teh yawhawinae awm seh telah ati. Abram ni hai hnopai a tawn e pueng dawkh hoi pung hra pung touh a poe. <sup>21</sup> Sodom siangpahrang ni Abram koevah taminaw teh kai na poe, hatei hnopainaw teh lat yawkaw telah atipouh.

<sup>22</sup> Hatei Abram ni Sodom siangpahrang koe ralui buet touh hoi khokkhawm rui buet touh boehai nang koe ka lat mahoe, <sup>23</sup> telah kalvan hoi talai katawnkung Jehovah, ka rasang poung e Cathut koe ka kut ka dâw toe. Telah hoehpawiteh Abram teh kai ni ka bawi sak e doeh na tet payon vaih. <sup>24</sup> Thoundounnaw ni a canei e hoi ka hrawi e ka taminaw ni a coe hane hloilah teh banghai ka lat mahoe. Aner, Eshkol hoi Mamre ni a coe awh e teh ama ni lat awh naseh, telah atipouh.



<sup>1</sup> Hathnukkhu, Abram koe BAWIPA e lawk vision lahoi ka tho e teh, Abram, taket hanh kai teh nange bahling lah ka o, na tawkpheu hmu hane a len poung telah atipouh.

<sup>2</sup> Hatei Abram ni, Oe Bawipa Jehovah, ca tawn laipalah ka o e na hmu nahlangva, bangmaw na poe han. Im e raw kacoekung teh Damaskas tami Eliezer doeh telah atipouh.

<sup>3</sup> Hahoi Abram ni kenhaw! kai ca na poe hoe. Ka im kaawm e ni doeh raw a coe toe telah bout atipouh.

<sup>4</sup> BAWIPA e lawk Abram koe ka tho e teh, hete tami kaawm e ni nange raw coe mahoe telah atipouh.

<sup>5</sup> Hahoi Abram hah alawilah a hrawi teh, kalvan lah kenhaw! asi na touk thai pawiteh touk haw, hot patetlah na catoun ka pungdaw sak han.

<sup>6</sup> Abram ni BAWIPA a yuem dawkvah, ahnie a yuemnae hah a lannae lah a khoe pouh.

<sup>7</sup> Hahoi kai ni hete ram poe hane hoi coe sak hane ka ngai daw doeh Khaldean taminaw a onae Ur kho hoi nang kahrawikung kai teh BAWIPA doeh telah atipouh.

<sup>8</sup> Hatei ahni ni Bawipa Jehovah, hete bangtelah hoi maw ka coe han tie ka panue han telah atipouh.

<sup>9</sup> BAWIPA ni Abram koe a dei pouh e teh, kum thum touh e maito, kum thum touh e hmaela, kum thum touh e tutan buet touh abakhuca hoi bakhuca buet touh thokhai loe atipouh.

<sup>10</sup> Hote hnonaw pueng ahni koe a thokhai pouh teh a lungui hoi a sei teh aovivang lah a hruet. Hatei tava teh sei hoe. <sup>11</sup> Hote moinaw koe vah langtanaw a tho navah Abram ni a palei. <sup>12</sup> Hatei kanî a khup toteh, Abram teh mat a i. Hahoi kenhaw! puenghoi hmonae ni a tho sin teh roumkalue.

<sup>13</sup> Hathnukkhu BAWIPA ni Abram koe, na ca catounnaw ni ayânaw e ram daw imyin lah ao awh vaiteh, kum 400 touh thung rektapnae hoi san lah ao awh han tie kancengcalah panuek.

<sup>14</sup> Hatei ahnimanaw san lah ka hno e taminaw kai ni lawk ka ceng han. Hathnukkhu hnopai moikapap hoi a tâco awh han. <sup>15</sup> Nang teh mintoenaw koe karoumcalah na cei vaiteh matawng lahoi na pakawp awh han. <sup>16</sup> Hateiteh a se palinae daw hete ram daw bout a ban awh han. Bangkongtetpawiteh Amornaw ni thoesaknae kuep sak lah awm hoe rah, telah atipouh.

<sup>17</sup> Kanî a khup teh kho bout a hmo torei teh hmaikhu tâconae hlaam hoi hmai paangnae hmaiim teh moi tâtueng e rahak yuengyoe a kâhlai.

<sup>18</sup> Hote hnin daw BAWIPA ni Abram hoi lawkkamnae a sak teh Izip palang koehoi palang kalenpounge Euphrates totouh, <sup>19</sup> Ken tami, Kene tami, Kadmon tami, <sup>20</sup> Hit tami, Periz tami, Rephaim tami, <sup>21</sup> Amor tami, Kanaan tami, Gîrgashite taminaw hoi Jebusit taminaw e ram, na ca catounnaw ka poe toe, telah atipouh.

## 16

### *Hagar hoi Ishmael*

<sup>1</sup> Abram e yu Sarai ni ahni hanelah ca khe pouh hoe. Hatei ahni ni vah a sannu Izip tami buet touh a tawn. A min teh Hagar. <sup>2</sup> Hatdawkvah, Sarai ni Abram koe vah kenhaw! BAWIPA ni ca khe hanelah kâ na poe hoe.



Ka sannu koe mah cet leih ahni koehoi ca khe thai yawkaw han doeh telah atipouh. Sarai e lawk Abram ni a tarawi pouh.

<sup>3</sup> Hottelah Abram teh Kanaan ram kum 10 touh ao hnukkhu Abram e yu Sarai ni a sannu Izip tami Hagar hah a hrawi teh a vâ Abram koe a yu hanelah a poe. <sup>4</sup> Ahni ni Hagar a ikhai teh camo a vawn. Camo vawn tie a kâpanue torei teh a bawinu hah a hnephnap. <sup>5</sup> Hat torei teh Sarai ni Abram koevah, kai dawk thoenae a sak e heh nang lathueng phat seh. Kai ni ka sannu na poe ei camo vawn tie a panue torei teh a mit hoi kai na hnephnap. BAWIPA ni nang hoi kai rahak lawkceng lawiseh telah atipouh.

<sup>6</sup> Hatei Abram ni Sarai koevah, na sannu teh na kut dawk doeh ao. Sarai ni puenghoi a yue teh ahni koehoi oun a yawng.

<sup>7</sup> BAWIPA e kalvantami ni Shur kho lah ceinae kahrawngum lam teng tuiphuek teng vah a hmu. <sup>8</sup> Sarai e sannu Hagar, nâ lahoi maw na tho teh nâ lah maw na cei han telah a pacei. Hat torei teh ahni ni ka bawinu Sarai koehoi ka yawng e doeh atipouh.

<sup>9</sup> BAWIPA e kalvantaminaw, na bawinu koe bout ban nateh a kut rahim awm pouh loe telah atipouh. <sup>10</sup> BAWIPA e kalvantami ni, na canaw moikapap ka pungdaw sak vaiteh na touklek thai mahoe telah atipouh.

<sup>11</sup> Hahoi, BAWIPA e kalvantami ni thaihaw, camo na vawn vaiteh ca tongpa na khe han, Ishmael telah min na phung han. Bangkongtetpawiteh nange na reithainae BAWIPA ni a thai toe. <sup>12</sup> Hatei na capa teh la ka matheng e lah ao han. Tami pueng a taran vaiteh tami pueng ni hai a taran van han. A hmaunawngah pueng hai a taran vaiteh kho a sak han telah atipouh.

<sup>13</sup> Hottelah ahni koe lawk ka dei e BAWIPA min a kaw teh, Nang teh kai kahmawtkung Cathut doeh. Bangtelamaw hivah kai kahmawtkung teh kai ni hai ka hmu toe telah ati. <sup>14</sup> Hatdawkvah, tuikhu teh Beerlahairoi telah a phung. Hote teh Kadesh hoi Bered kho rahak vah ao. <sup>15</sup> Hathnukkhu, Hagar ni Abram hane ca tongpa a khe pouh. Hagar ni a khe e a capa teh Abram ni Ishmael telah min a phung. <sup>16</sup> Hagar ni Abram hanelah Ishmael a khe pouh navah Abram teh kum 86 touh a pha.

## 17

### *Vuensomanae lawkkam*

<sup>1</sup> Hathnukkhu, Abram teh kum 99 a pha navah, BAWIPA ni Abram koe a kamnue teh, kai teh Athakasaipounge Cathut doeh ka hmalah toun hane kawi kaawm hoeh lah awm haw. <sup>2</sup> Kaie lawkkamnae nang hoi ka sak vaiteh moikapap na pungdaw sak han telah atipouh.

<sup>3</sup> Abram ni a tabo teh Cathut ni, <sup>4</sup> Thai haw kaie lawkkamnae teh nang koe ao. Nang teh miphun moikapap e a na pa lah na o han. <sup>5</sup> Nange na min hai Abram telah na kaw mahoe toe. Abraham telah na kaw han toe, bangkongtetpawiteh nang teh miphun moikapap e na pa lah na coung han. <sup>6</sup> Kai ni moikapap na pungdaw sak han. Nang lahoi miphunnaw ka pung sak vaiteh, nang dawk hoi siangpahrang a tâco han. <sup>7</sup> Ka lawkkamnae ka caksak vaiteh nang hoi kai rahak, na canaw hoi patuen e na catoun rahak vah a yungyoe e lawkkam lah ao han. Kai teh nang hoi na ca catounnaw e Cathut lah ka o han. <sup>8</sup> Atu imyin lah na onae ram, Kanaan ram pueng nang hoi na ca catounnaw koe a yungyoe e râw lah na poe han. Kai teh ahnimae Cathut lah ka o han.

<sup>9</sup> Hathnukkhu, Cathut ni Abraham koevah nang hoi na ca catounnaw pueng ni ka lawkkam heh na tarawi awh han. <sup>10</sup> Hete teh kai hoi nange na



ca catounnaw ni a tarawi hane lawkkam doeh. Tongpa pueng vuensoma pouh han. <sup>11</sup> Hatdawkvah, vuensom na a e tak teh kai hoi nang rahak mitnoutnae lawkkam lah ao han. <sup>12</sup> Nangmouh dawkvah, na ca catounnaw totouh, ca tongpa pueng. Im dawk ka khe e thoseh, mae miphun nahoeih eiteh, alouke miphunnaw koe tangka hoi ran e hai thoseh, hnin 8 nah vuensom na a pouh han. <sup>13</sup> Na im dawk ka khe e hoi tangka hoi ran e tami ni vuensoma roeroe vaiteh ka lawkkam teh tak dawk yungyoe ka cak e lawkkam lah ao han. <sup>14</sup> Hatei vuensom ka a hoeh e tongpa a tak dawk e vuengsom ka a hoeh e tami teh ka miphun dawk hoi takhoe lah ao han telah atipouh. Ahni teh kaie lawkkam a raphoe toe.

<sup>15</sup> Cathut ni Abraham koevah Na yu Sarai hah, Sarai telah na kaw mahoeih, Sarah telah na kaw han toe. <sup>16</sup> Ahni hah yawhawinae ka poe vaiteh ahni lahoi nang hai ca tongpa na poe han. Yawhawinae ka poe vaiteh miphun moikapap e manu lah ao han. Athung hoi miphunnaw hane siangpahrang a tâco han. <sup>17</sup> Hat toreih teh, Abraham ni a minhmai hoi a tabo teh a panui. Kum 100 touh e ni ca khe han namaw. Kum 90 touh e Sarah ni ca a khe han rah maw telah ati. <sup>18</sup> Hatdawkvah, Abraham ni Cathut koe, na hmalah Ishmael mah hring yawkaw seh telah atipouh.

<sup>19</sup> Hatei Cathut ni telah nahoeih, na yu Sarah ni capa na khe pouh vaiteh, Isak telah a min na phung han. Ka lawkkam ka cak e lawkkam lah ao han. <sup>20</sup> Ishmael e kong dawk teh kai ni ka thai toe. Ahni yawhawinae ka poe toe. A ca catoun ka pungdaw sak vaiteh moikapap sak han. Ahni teh khobawi 12 touh e a na pa lah ao han. Miphun kalen poung lah ka sak han. <sup>21</sup> Hateiteh palawng atu e tueng navah, Sarah ni na khe pouh hane Isak dawk ka lawkkam ka caksak han telah atipouh.

<sup>22</sup> Hottelah Abraham hoi lawk a kâpato hnukkhu Cathut teh a luen.

<sup>23</sup> Hatdawkvah, Abraham ni a capa Ishmael hoi a im dawk ka khe e pueng, tangka hoi a ran e pueng Abraham imthung dawk e tongpa pueng a ceikhai teh Cathut ni ahni koe a dei pouh tangcoung e patetlah hnin touh dawkvah vuensom koug a a pouh. <sup>24</sup> Amae vuensom a a nah Abraham teh kum 99 touh a pha toe. <sup>25</sup> Capa Ishmael, vuensom a a nah kum 13 touh a pha. <sup>26</sup> Hnin touh dawk, Abraham hoi a capa Ishmael teh vuensom rei rei a a roi. <sup>27</sup> Amae im dawk kaawm e tongpa pueng a im dawk ka khe e, miphun alouke koe tangka hoi a ran e tongpa pueng teh, ama hoi cungtalah vuensom a a awh.

## 18

### *Capa lawkkamnae*

<sup>1</sup> Abraham teh kanîthun khumbei a thoe lahun nah, rim takhang koe a tahung navah BAWIPA teh Mamre kathenkungnaw koehoi ahni koe a kamnue . <sup>2</sup> A khet teh a hmalah tami kathum touh a kangdue e a hmu navah, rim takhang koehoi ahnimanaw kâhmo hanelah a yawng teh talai dawk a tabo. <sup>3</sup> Hahoi, ka bawipa na hmalah minhmai kahawi ka hmawt pawiteh na san heh na cettakhai hanh. <sup>4</sup> Tui youn touh ka sin vaiteh na khok pâsu awh nateh, thingkung rahim kâhat awh ei. <sup>5</sup> Na tha tawn e roum nahanelah vaiyei youn touh ka sin hnukkhu, na cettakhai awh. Hottelah e coe hanelah na san onae koe na pha toe telah atipouh. Ahnimanaw ni hai na dei patetlah sak lawih atipouh.

<sup>6</sup> Abraham teh rim thung kaawm e Sarah koe karanglah a yawng teh tavai sum thum touh hane coungkacoe lat nateh karanglah kanawk nateh



thawng leih atipouh. <sup>7</sup> Hahoi Abraham ni maitohu koe a yawng teh, maitoca a tak kathâw e a la teh, a san thoundoun koe a poe teh karanglah a rakueng sak. <sup>8</sup> Hathnukkhu, sanutui hoi maitoca moi ahnimae hmalah a pâtoum pouh teh a ca awh. Ahnimanaw ni a ca awh lahun nah, ama teh thingkung rahim a kangdue. <sup>9</sup> Ahnimanaw ni na maw Sarah ao telah a pacei navah rim thung ao telah atipouh. <sup>10</sup> Hahoi ahnimanaw ni palawng het tuektue nah nang koe bout ka tho vaiteh na yu Sarah ni ca tongpa a khe han atipouh. Hatnavah Sarah teh ahnimae a hnukkhu lae rim takhang koe ao teh a thai. <sup>11</sup> Abraham hoi Sarah teh a matawng ni teh a kumcue roi poung toe. Sarah teh camo o thainae a pout toe. <sup>12</sup> Hatdawkvah, Sarah ni lunghawinae kai ni ka tawn han rah maw ati teh duem a panui. Ka bawipa hai a matawng poung toe telah ati. <sup>13</sup> BAWIPA ni Abraham koevah, bangkongmaw Sarah ni ka matawng toung dawkvah camo ka khe thai han rah maw ti teh a panui vaw. <sup>14</sup> BAWIPA hanelah hno ka ru ao maw. A tueng khoe e patetlah palawng vah Sarah camo a khe han telah atipouh. <sup>15</sup> Hatei Sarah ni ka panui hoeh titeh a kâpapha. Bangkongtetpawiteh, a lungpuen dawk doeh. Ahni ni nahoe han panui atipouh awh.

### *Abraham ni Sodom kho hanelah a kêhei*

<sup>16</sup> Hahoi, taminaw hote hmuen koehoi a thaw awh teh Sodom kho a radoung awh. Abraham hai ahnimanaw a thak hanelah a kâbang van. <sup>17</sup> Hatei BAWIPA ni ka sak hane hno Abraham koe ka pâpha pouh han maw.

<sup>18</sup> Abraham teh tami kalen hoi Athakasaipounge miphun lah a coung han. Talaivan e tami pueng ni ahni lahoi yawhawî a coe awh han. <sup>19</sup> Bangkongtetpawiteh ahni ni hmalah ka tho hane a canaw hoi imthung-naw ni BAWIPA e lamthung a dawn awh vaiteh, lannae hoi hnokahawi sak hanelah, ka dei tangcoung e patetlah BAWIPA ni Abraham koe kakuep sak hanelah ahni teh ka panue e doeh telah ati. <sup>20</sup> Hahoi BAWIPA ni Sodom hoi Gomorrah kho daw koe e hramnae lawk hoi a yonnae teh puenghoi a len toung dawkvah, <sup>21</sup> Atu ka cei vaiteh kai koe ka phat e a hram awh patetlah ahnimanaw ni a sak katang maw. Sak katang hoeh maw tie atu ka khet han. Sak hoehpawiteh a sak hoeh e ka panue han telah ati.

<sup>22</sup> Hote taminaw teh hote hmuen koehoi a kamlang awh teh Sodom kho lah a cei awh. Abraham ma teh BAWIPA hmalah paroup a kangdue. <sup>23</sup> Hahoi Abraham ni a hnai teh, tamikalannaw hai tamikathoutnaw hoi mek na raphoe han maw. <sup>24</sup> Hote kho daw koe tamikalan 50 touh awm pawiteh, a thung e tamikalan 50 touh ao kecu daw koe hote hmuen teh na raphoe han maw. <sup>25</sup> Tamikalannaw hah tamikathoutnaw patetlah khang sak hane teh nang hoi kâhlat naseh. Talaivan pueng lawkcengkung ni kalan lah lawkceng mahoe han maw.

<sup>26</sup> Hottelah BAWIPA ni Sodom kho thung vah, tamikalan 50 touh ka hmawt pawiteh, ahnimouh kecu daw koe hote hmuen pueng teh ka pasai han telah atipouh.

<sup>27</sup> Abraham ni kai teh vaiphu hoi hraba lah ka o ei, BAWIPA nang koe lawk na pacei hanelah tha bout ka kêla. <sup>28</sup> Tamikalan 50 touh daw koe panga touh kuep hoehpawiteh, hote panga touh akuep hoeh daw koe, hote khopui teh na raphoe han maw, telah a pacei. Ahni ni hawvah 45 touh ka hmu nakunghai ka raphoe mahoe han atipouh.

<sup>29</sup> Hahoi 40 touh ka hmu yawkaw han doeh bout atipouh navah, 40 touh hai ka raphoe mahoe han atipouh.



<sup>30</sup> Hahoi Oe BAWIPA na lungphuen hanh, bout na pacei ei nei, 30 touh ka hmu yawkaw han doeh bout atipouh navah, 30 touh hane dawkh hai ka raphoe mahoeah atipouh.

<sup>31</sup> Ahni ni thai haw, BAWIPA koe lawk bout ka pacei ei nei, hawvah 20 touh ka hmu yawkaw han doeh bout atipouh navah, 20 touh hane dawkh hai ka raphoe mahoeah atipouh.

<sup>32</sup> Hahoi, Oe BAWIPA na lungkhuek hanh yawkaw, vai touh bout na pacei einei, hawvah 10 touh ka hmawt pawiteh atipouh navah, 10 touh hane dawkh hai ka raphoe mahoeah atipouh.

<sup>33</sup> BAWIPA teh Abraham hoi lawk kOUNG a kâpato roi hnukkhu a ceitakhai. Abraham haiyah a ma onae koe a ban.

## 19

### *Sodom yonnae*

<sup>1</sup> Kalvantami kahni touh tangmin lah Sodom kho a tho roi. Lot teh khopui thung kâennae longkha koe a tahung teh, Lot ni ahnimouh roi a hmu navah dawn hanelah a thaw teh, talai dawkh a tabo. <sup>2</sup> Ahni ni ka bawipa roi, pahren lahoi na sanpa im kâen roi nateh roe rawi ei. Na khok hai pâsu roi ei telah atipouh. Ahnimouh roi ni telah nahoeah, alawilah ka roe roi han doeh atipouh.

<sup>3</sup> Hatei, puenghoi a pasawt dawkvah, ahni koe a cei roi teh, im thung a kâen roi. Hahoi, tonphuenhoehe vaiyei a poe teh a ca roi.

<sup>4</sup> Ahnimanaw a i awh hoehnahlan vah, Sodom kho e tongpa camo matawng abuemlah a tho awh teh, im khik a kalup awh. <sup>5</sup> Lot a kaw awh teh, tapa tangmin lah na im ka tho e tami roi namaw ao. Hote tami roi ikhai hanelah ka ngai awh, alawilah tâcawt sak telah atipouh awh.

<sup>6</sup> Lot teh takhang koehoi alawilah ahnimouh koe a tâco teh, tho a khan hnukkhu, <sup>7</sup> ka hmaunawngghanaw pahren lahoi thoenae sak awh hanh.

<sup>8</sup> Khenhaw! tongpa ka panuek hoeh rae ka canu kahni touh ka tawn. Na ngai patetlah na ti thai awh. Hatdawkvah, pahren lahoi ahnimouh roi nangmouh koe ka tâco sak han. Imyin roi koe teh banghai sak awh hanh.

<sup>9</sup> Ahnimanaw ni, kâhnawnh telah atipouh awh. Hahoi nang teh imyin lah na o eiteh, lawkcengkung lah o hanelah na kâcai. Hatdawkvah, ahnimanaw koe ka sak awh e hlak nang koe hoe kathout lah ka sak awh han telah atipouh awh. Hahoi Lot hah rek a savek awh teh, tho hai peng raphoe hanelah a tho awh. <sup>10</sup> Hatei, ahnimouh roi ni a kut hoi imthung lah Lot hah a sawn roi teh, tho khik a khan sin roi. <sup>11</sup> Tho teng kaawm e tami kahoeng kalen abuemlahoi a mit a dawn sak teh, tho hmawt thai awh hoeh.

### *Sodom hoi Gomorrah raphoenae*

<sup>12</sup> Ahnimouh roi ni Lot koevah, hivah nang hoi na kâkuen e tami ao rah maw. Na langa, capanaw, canunaw, hoehpawiteh, khothung kaawm e tâcawtkhai leih. <sup>13</sup> Bangkongtetpawiteh, BAWIPA hmalah a hramki awh teh, a tarannae a len poung toe. Hatdawkvah, hie hmuen raphoe hanelah BAWIPA ni na patoun roi e doeh telah atipouh.

<sup>14</sup> Lot a tâco teh, a canu ka lat e a cavanaw koevah, thaw awh leih. Hete hmuen heh tâcawt takhai awh leih. Bangkongtetpawiteh, BAWIPA ni khopui a raphoe han toe atipouh. Hatei, a cavanaw ni panuilai lah a pouk awh. <sup>15</sup> Amom kho vumpava a dai navah, kalvantami roi ni, thaw



leih, na yu hoi na canu roi tâcawtkhai leih, nahoe pawiteh, hete kho reknae na khang payon vaih telah ngangngang a cangawt.

<sup>16</sup> Hatei, a hnanthoe dawkvah, kalvantami roi ni, ama hoi a yu, a canu roi hoi a kut dawkhoei a sawn teh, khopui alawilah a tâcokhai. Bangkongtetpawiteh, BAWIPA ni a pahren dawkhoei.

<sup>17</sup> Alawilah, a tâcokhai awh hnukkhu, na hringnae a hlout thai nahanlah yawng leih. Hnuklah kamlang laihoi khen hanh. Tanghling koe khoeroe awh hanh. Mon vah yawng leih. Nahoe pawiteh na due han telah atipouh.

<sup>18</sup> Lot ni ahnimouh roi koe, telah nahoe, ka bawipa roi. <sup>19</sup> Na sanpa ni na mithmu vah minhmai kahawi ka hmu toe. Ka hringnae na hlout sak teh, kai dawkhoei lungpatawnae kalen poung na kamnue sak toe. Hatei, mon lah teh ka yawng thai mahoe. Telah nahoe pawiteh, runae ni na kei vaiteh, kadout han doeh. <sup>20</sup> Khenhaw! hote kho teh yawng nahane a hnaica. Kho kathoungcalah hai ao. Hote kho kathoengca koe na yawng sak haw. Ka hring han doeh telah atipouh.

<sup>21</sup> Ahnimouh roi ni na kâhei e patetlah lung na kuep khai toe. Na dei e kho teh ka raphoe mahoe. <sup>22</sup> Karanglah hawvah yawng leih. Hote kho dawkhoei na pha hoehnahlan bang hno hai ka sak thai mahoe atipouh. Hatdawkvah, hote kho teh Zoar telah min a phung.

<sup>23</sup> Zoar kho dawkhoei Lot a kâen navah talai van kanî teh a tâconae toe. <sup>24</sup> Hahoi BAWIPA ni BAWIPA ma koehoi e ganhmai Sodom hoi Gomorrah kho dawkhoei lah a rak sak. <sup>25</sup> Hote khopui roi hoi thingyei yawn pueng, khopui karingkungnaw abuemlah talai hoi ka paw e thingkung pueng koug a raphoe. <sup>26</sup> Hatei, a yu teh hnuklah a kangvawi dawkvah, palawi khom lah a kangcoung.

<sup>27</sup> Abraham teh BAWIPA hmalah a kangduenae hmuen koe amom vah a cei. <sup>28</sup> Sodom hoi Gomorrah thingyei yawn pueng a khet navah, takhuen koe e hmaikhu patetlah ram pueng dawkhoei e hmaikhu kahlun lah a luen e hah a hmu. <sup>29</sup> Hottelah Cathut ni thingyei yawn dawkhoei e khopuinaw a raphoe lahunnah hoi Lot onae khopuinaw a raphoe nah Cathut ni Abraham a pahnim hoe dawkvah, Lot teh rawknae koehoi a hlout sak.

### *Lot canaw*

<sup>30</sup> Hottelah Lot teh, Zoar kho hoi a luen teh mon dawkhoei a sak. A canu kahni touh hai ama koe ao. Bangkongtetpawiteh, Zoar kho dawkhoei hane ngam hoe. Hahoi a canu kahni touh hoi lungngoum thung ao awh. <sup>31</sup> A canu kacue e ni a nawngnae koe, apa a matawng toe, talai van e phung patetlah maimouh roi na ka ipkhai hane tongpa awh hoe. <sup>32</sup> Thohaw, apa misurtui pânei roi sei. Apa e miphun apout hoe nahanlah ipkhai roi sei, telah atipouh.

<sup>33</sup> Hote tangmin vah, misurtui a na pa a pânei roi teh, a na pa ni a ikhai e hoi bout a thaw e hah panuek hoe. <sup>34</sup> Atangtho amom teh, kacue e ni paduem tangmin apa hoi kai ka i roi toe. Atu tangmin vah misurtui bout pânei sei. Apa e miphun a pout hoe nahanelah, nang louk ipkhai loe atipouh. <sup>35</sup> Hote tangmin haiyah a na pa misurtui a pânei roi hnukkhu, kanaw e ni a na pa a ikhai teh, a i e hoi bout a thaw e a na pa ni panuek hoe.

<sup>36</sup> Hottelah Lot e canu roi teh camo a vawn roi. <sup>37</sup> Kacue e ni tongpa a khe teh, Moab telah a min a phung. Hote tami teh atu kaawm e Moab miphunnaw e a na pa lah ao. <sup>38</sup> Kanaw e ni hai tongpa a khe



teh, Benammi telah min a phung. Hote tami teh sahnin totouh kaawm e Ammon miphunnaw e a na pa doeh.

## 20

### *Abraham hoi Abimelek*

<sup>1</sup> Abraham teh hote hmuen koehoi akalah a cei teh, Kadesh kho hoi Shur kho rahak vah kho a sak teh Gerar kho dawk a roe. <sup>2</sup> Abraham ni a yu Sarah hanelah ka tawncanu atipouh. Hahoi Gerar Siangpahrang Abimelek ni tami a patoun teh Sarah a la sak.

<sup>3</sup> Hatei, Cathut ni tangmin vah Abimelek koe a mang lahoi a tho teh, thai haw, na lae napui kecu dawk tami kadout patetlah doeh na o toe, bangkongtetpawiteh ahni teh ayâ yu doeh atipouh.

<sup>4</sup> Hatei, Abimelek ni ipkhai hoeh rah. Hahoi ahni ni kalan e miphun hai na thei han maw <sup>5</sup> Ama ni roeroe kai koevah, ka tawncanu ati nahoehmaw. A yu ni hai ka thangroi doeh ati tayaw, lungthin thoung lahoi, ka kut kathoungcalah hoi hete hno ka sak e doeh telah atipouh.

<sup>6</sup> Cathut ni a mang lah vah, ahman doeh, lungthin kathoungcalah hoi hete hno na sak e doeh tie ka panue. Hatdawkvah kai ni hai kai tak dawk hnokathout sak hane ka pasoung hoeh. Hat dawk doeh ahni na tek hanelah ka pasoung hoeh. <sup>7</sup> Hatdawkvah ayâ yu atu bout poe leih, bangkongtetpawiteh ahni teh profet doeh. Na ratoum pouh vaiteh na dam han. Hatei na poe hoehpawiteh, nang hoi na sannaw abuemlah, na due roeroe awh han atipouh.

<sup>8</sup> Hahoi Abimelek teh amom, a thaw, a sannaw pueng a kaw teh a thai e hnonaw pueng a dei pouh teh puenghoi a taki awh.

<sup>9</sup> Abimelek ni Abraham a kaw teh, kai dawb bang hno maw na sak, nang koe bangmaw ka payon teh, kai hoi kaie uknaeram koe kahawihoehe hno na pha sak. Sak hoeh hane kawi kai dawb na sak vaw atipouh.

<sup>10</sup> Abimelek ni Abraham koevah, Bang hno maw na hmu teh kai dawb hete hno na sak telah bout atipouh.

<sup>11</sup> Abraham ni hie kho dawb e taminaw teh Cathut ka taket awmhoeh vaiteh, ka yu kecu dawb kai na thei awh han doeh telah ka pouk dawb doeh atipouh. <sup>12</sup> Hothloilah ahni teh ka tawncanu katang doeh. Apa e canu doeh. Anu e canu nahoe, hatei ka yu lahai ao. <sup>13</sup> Cathut ni apa im hoi na ceisak hane navah, na pha nah tangkuem koe ka thangroi doeh na ti pouh han telah ati dawb doeh atipouh.

<sup>14</sup> Abimelek ni tu hoi maitotannaw, sanpa hoi sannu naw a ceikhai teh Abraham a poe teh, a yu Sarah hai bout a poe. <sup>15</sup> Abimelek ni, Khenhaw! ka ram teh na hmalah ao, na ngainae pueng koe awm loe atipouh.

<sup>16</sup> Sarah koevah, na thangroi koe tangka 1,000 touh ka poe toe. Nang hoi na huikonaw pueng hanelah minhmai sak lah ka poe e doeh atipouh.

<sup>17</sup> Hottelah Abraham ni Cathut koe a ratoum teh, Cathut ni Abimelek hoi a yu, a sannunaw a dam sak teh canaw hai bout a khe. <sup>18</sup> Abraham e a yu Sarah kecu dawb BAWIPA ni Abimelek imthung abuemlah carôe sak.

## 21

### *Isak a khe*

<sup>1</sup> BAWIPA ni a dei tangcoung e patetlah Sarah koe a pai teh a lawkkam pouh e patetlah Sarah hanelah a sak pouh. <sup>2</sup> Hahoi, ahni koe a dei pouh tangcoung e patetlah Cathut ni a khoe pouh e tueng navah Sarah ni camo a vawn teh, a matawng hnukkhu Abraham hanelah tongpa a khe pouh.



<sup>3</sup> Abraham ni hai a tawn e capa, Sarah ni a khe pouh e hah Isak telah min a phung. <sup>4</sup> Hottelah, Cathut ni kâ a poe tangcoun e patetlah Abraham ni a capa Isak hah ataroe hnin navah vuensom a a pouh. <sup>5</sup> Abraham teh a capa Isak a khe navah kum 100 touh a pha toe. <sup>6</sup> Sarah ni hai kai ka panuithainae Cathut ni na poe toe. Hete kamthang ka thai e pueng ni hai kai hoi cungtalah a panui van aw h han doeh telah ati. <sup>7</sup> Sarah ni camo sanu a pânei han telah Abraham koe apinimaw ouk a dei pouh. A matawng toreî kai ni ca tongpa ka khe pouh foe telah ati.

### *Hagar hoi Ishmael a pâlei*

<sup>8</sup> Hottelah, camo a roun e takhang teh sanu a pâphei. Sanu a pâphei nah hnin dawk Abraham ni buven pawî kalenpounge a sak. <sup>9</sup> Izîp tami Hagar capa, Abraham hanelah a khe pouh e ni a panuikhai e hah Sarah ni a hmu. <sup>10</sup> Hatdawkvah, Abraham koevah, Hete sannu hoi a capa pâlei leih, bangkongtetpawiteh sannu e capa ni ka capa e râw coe thai mahoe telah atipouh.

<sup>11</sup> A capa lah ao kecu dawk Abraham hanelah hno ka ru poun lah ao. <sup>12</sup> Hatei Cathut ni Abraham koe, camo hoi na sannu kong dawk hno ka ru lah pouk hanh. Sarah ni a dei e pueng tarawi loe. Bangkongtetpawiteh Isak dawk hoi na catoun telah kaw e lah ao han. <sup>13</sup> Na sannu e capa dawk hai miphun ka pungdaw sak han. Bangkongtetpawiteh ahni hai na ca doeh telah atipouh.

<sup>14</sup> Hottelah amom vah Abraham a thaw teh vaiyei hoi tuium a la teh Hagar e aloung dawk a patue pouh hnukkhu, camo hoi a ceisak. A cei roi teh Beersheba kahrawngum vah yuengyoe a kâva roi. <sup>15</sup> Tuium dawk e tui a baw hnukkhu camo hah buruk rahim a hruek. <sup>16</sup> Pala vai touh ka sittouh bang hane a cei teh, hnuklah a kangvawi laihoi a tahung hnukkhu, camo due e na hmawt sak hanh loe telah ati. Hottelah hnuklah a kangvawi laihoi a tahung teh puenghoi kacaipounglah a ka.

<sup>17</sup> Camo lawk Cathut ni a thai teh Cathut kalvantami ni kalvan laihoi Hagar a kaw teh, Hagar bangmaw runae na kâhmo. Taket hanh, camo e lawk Cathut ni a thai toe atipouh. <sup>18</sup> Thaw nateh camo hah na kut hoi pathaw leih, bangkongtetpawiteh miphun kalen poun lah kacounsak han telah atipouh.

<sup>19</sup> Cathut ni a mit ang sak teh tuikhu buet touh a hmu. A cei teh tuium dawk yikkawi a do hnukkhu camo a pânei. <sup>20</sup> Cathut teh camo koe lah a o, ahni teh a roun takhang teh, kahrawngum vah kho a sak teh moikathaipounge lah ao. <sup>21</sup> Paran kahrawngum vah kho a sak teh a manu ni a yu lah Izîp tami a la pouh.

### *Abimelek koe lawkkam*

<sup>22</sup> Hatnae tueng dawk Abimelek hoi ransahu kaukkung Phikhol ni Abraham koevah, na sak e hno pueng dawk Cathut ni na okhai. <sup>23</sup> Hatdawkvah Cathut minhmai khet laihoi kai hoi ka capa catoun totouh dumyennae awm laipalah na pahren e patetlah kai hoi na onae ram heh a hawinae ka hmu nahanelah lawk na kam pouh leih telah atipouh.

<sup>24</sup> Abraham ni hai, lawkkam han atipouh. <sup>25</sup> Abimelek e a sannaw ni tuikhu a lawp dawkvah Abraham ni Abimelek a yue.

<sup>26</sup> Abimelek ni, hot patet hno ka sak e teh apimaw. Ka panuek hoe h, nang ni hai na dei hoe h. Kai ni hai sahnin totouh ka panuek hoe h atipouh.

<sup>27</sup> Hottelah, Abraham ni tu hoi maitotan a hrawi teh Abimelek a poe, hahoi kahni touh hoi lawkkamnae a sak roi. <sup>28</sup> Abraham ni tuhu dawk e



tulaca sari touh alouklah a kapek. <sup>29</sup> Abimelek ni Abraham koevah tulaca sari touh na ka pek e, bang hane maw atipouh.

<sup>30</sup> Ahni ni hete tuikhu ka tai e heh kapanuekkhaikung lah tulaca sari touh e ka kut dawk e na la roeroe han telah atipouh.

<sup>31</sup> Hote hmuen koe kahni touh hoi lawkkamnae a sak roi dawkvah Beersheba telah min a phung. <sup>32</sup> Hottelah Beersheba vah lawkkamnae a sak roi hnukkhu Abimelek hoi ransabawi Phikhol tinaw a thaw awh teh Filistin ram lah a ban awh.

<sup>33</sup> Abraham ni Beersheba vah hmaicakung a ung teh haw vah BAWIPA yungyoe Cathut e min a kaw. <sup>34</sup> Hahoi, Abimelek teh Filistin ram dawk hnin moi kasawlah a cam.

## 22

### *Abraham e a yuemnae a cak sak*

<sup>1</sup> Hathnukkhu hoi Cathut ni Abraham a tanouk teh Abraham telah a kaw. Ahni ni hi ka o telah atipouh.

<sup>2</sup> Ahni ni, na capa, na capa tawn dueng, na lungpataw poung e, Isak roeroe hah cethkhai nateh, Moriah ram lah cet, kai ni na patue e mon dawk thuengnae na sak han telah atipouh.

<sup>3</sup> Abraham ni, amom a thaw teh, la dawk hnopainaw apu sak hnukkhu a capa Isak hoi thoundoun kahni touh a kaw. Hmaisawi thueng nahane thing a racei hnukkhu, Cathut ni a dei e hmuen koe lah a cei. <sup>4</sup> Apâthum hnin nah a radoung teh ahlanae koehoi a hmu. <sup>5</sup> Abraham ni thoundoun roi koe, hivah la hoi la awm roi. Kai hoi camo teh hote hmuen koe ka cei roi vaiteh bawkae ka sak roi han. Ka cum roi hnukkhu nangmouh roi koe bout ka ban roi han telah atipouh.

<sup>6</sup> Hahoi Abraham ni hmaisawi thueng nahane thing hah a capa Isak a hrawm sak teh, ama ni hmaibo hoi sarai hah a sin teh, cungtalah a cei roi.

<sup>7</sup> Hatei, Isak ni a na pa Abraham a pato teh, Apa atipouh navah, A na pa ni ka ca kai hi ka o atipouh. Ahni ni kenhaw! hmai hoi thing teh ao toe, hatei, hmaisawi thueng nahane tuca teh na maw telah atipouh.

<sup>8</sup> Abraham ni, ka capa Cathut ni ama hanelah hmaisawi thueng nahane tuca teh a rakueng han doeh atipouh. Hathnukkhu ahnimouh roi teh cungtalah a cei roi.

<sup>9</sup> Cathut ni a dei pouh e hmuen koe a pha roi. Abraham ni hote hmuen koe khoungroe a sak teh, thingnaw hah kahawicalah a hruek, a capa Isak hah a katek hnukkhu, khoungroe dawk e thing van a payan. <sup>10</sup> Hahoi, Abraham ni a capa thei hanelah a kut a pho teh sarai hah a la. <sup>11</sup> Hatei BAWIPA kalvantami ni Abraham Abraham telah kalvan hoi a kaw. Ahni ni hai kai hi ka o atipouh.

<sup>12</sup> Ahni ni camo e tak dawk na kut tha hanh. Bangkongtetpawiteh, Cathut na taki e atu ka panue toe. Na capa, na tawn dueng e ka hei teh nang ni na kangek hoeh telah atipouh. <sup>13</sup> Hahoi Abraham ni a moung teh a khet navah, amae a hnuklah tutan buruk dawk a ki ka mang e hah a hmu. Abraham ni a cei teh hote tu hah a la hnukkhu, hmaisawi thuengnae a sak. <sup>14</sup> Hatdawkvah, Abraham ni hote hmuen teh, BAWIPA ni kho a khan han (Jehovah-Jireh) telah min a poe. BAWIPA e mon dawk BAWIPA ni na rakueng pouh telah atu totouh ati awh.

<sup>15</sup> Hahoi, BAWIPA e kalvantami ni apâhni lah kalvan hoi Abraham bout a kaw teh, <sup>16</sup> hete hno na sak teh, na capa, na tawn dueng e na pasai hoeh dawkvah, yawhawi na poe roeroe han. <sup>17</sup> Kalvan e âsi hoi tui teng e sadi



yit touh. Na catounnaw ka pungdaw sak roeroe han. Na catounnaw ni na tarannaw e longkha a coe awh han. <sup>18</sup> Hahoi, ka lawk na ngai kecu dawк talai van e tami pueng ni nange catounnaw lahoi yawhawinae a coe awh han.

<sup>19</sup> Hathnukkhu thoundoun roi aonae koe lah Abraham, bout a ban teh, ahnimanaw hoi cungtalah a kamthaw awh teh, Beersheba lah a cei awh. Abraham teh Beersheba vah kho tawngtang a sak.

<sup>20</sup> Hathnukkhu, Abraham ni a thai e teh, nange na nawngna Nahor e a yu Milkah ni ca tongpanaw a khe toe. <sup>21</sup> A camin lah Uz, a nawngna Buz hoi Aram na pa Kemuel, <sup>22</sup> Khesed, Hazo, Pildash, Jidlap hoi Bethuel. <sup>23</sup> Bethuel ni Rebekah a khe. Hete taroe touh e naw teh Milkah ni Abraham e a nawngna Nahor hanelah, a khe pouh e naw doeh.

<sup>24</sup> Hathnukkhu Nahor e ado Reumah ni hai Tebah, Gaham, Tahash hoi Maakah bout a khe pouh.

## 23

### *Sarah duenae hoi pakawpnae*

<sup>1</sup> Sarah teh kum 127 touh a hring. Sarah e a hringnae kum teh ama het doeh toe. <sup>2</sup> Sarah teh Kanaan ram Hebron tie Kiriatharba kho dawк a due. Abraham hai Sarah kecu dawк khuika hanelah a tho.

<sup>3</sup> Hahoi Abraham teh a yu e ro hmalah a kangdue teh Hit taminaw koe, <sup>4</sup> Kai teh nangmouh koe imyin hoi kahlong tami lah doeh ka o. Ka yu e ro ka pakawp nahanelah nangmouh koe e talai lem na poe awh haw atipouh.

<sup>5</sup> Hit taminaw ni Abraham koe a dei pouh e teh, <sup>6</sup> Ka bawipa kaimae lawk thai haw, nang teh kaimouh rahak vah Cathut e khobawi doeh. Hatdawkvah na ngai e hmuen rawi nateh pakawp ngoun. Na tami ro pakawp nahanelah apinihai phuen hmuen pasoung hoe hoi laipalah awm mahoe hoi, telah atipouh awh.

<sup>7</sup> Hathnukkhu, Abraham teh a thaw teh, Hit taminaw hoi hote ram dawк e taminaw hmalah a tabo. <sup>8</sup> Hahoi, ahnimouh koe, ka tami ro pakawp nahanelah, na lungkuep awh pawiteh ka lawk thai awh haw. <sup>9</sup> Nangmouh koe, phuen hmuen ka tawn thai nahanelah, Zohar capa Ephron ni, amae law apout koe lah kaawm e Makpelah talungkhu hah, aphu hoi kâki lah kai koe a yo thai nahane, ahni koe na het pouh haw loe, telah atipouh.

<sup>10</sup> Hat tore i teh Hit taminaw koe Ephron teh a tahung. Hit tami Ephron ni khopui longkha dawк hoi ka kâen e Hit taminaw pueng ni a thainae koe, <sup>11</sup> Telah nahoeh, ka bawipa law na poe awh, law thung kaawm e talungkhu hai na poe awh. Ka miphunnaw hmaitung roeroe na poe awh, na tami ro teh pakawp leih telah Abraham koe atipouh. <sup>12</sup> Abraham teh, hote ram dawк e taminaw hmalah a tabo teh, <sup>13</sup> Ram dawк e taminaw ni a thainae koe Ephron hanelah na lungkuep pawiteh thai haw, law hmuen phu teh na poe han. Aphu dâw leih, hote hmuen koe ka tami ro teh ka pakawp han atipouh.

<sup>14</sup> Ephron ni Abraham koe, <sup>15</sup> Ka bawipa, ka lawk thai haw, ka law hmuen phu tangka (shekel) cumpali touh doeh. Nang hoi kai hanlah banghai bang nahoeh. Na tami ro teh pakawp yaw kaw telah atipouh.

<sup>16</sup> Abraham ni a lungkuepkhai teh, Hit taminaw ni a thainae koe tangka shekel cumpali touh hno kayawtnaw ni a khing e patetlah a khing teh a poe. <sup>17</sup> Hatdawkvah Mamre kho hoi kanitholah, Makpelah hmuen koe kaawm e Ephron e law, law thung kaawm e talungkhu hoi thingkungnaw, lawri koe kaawm e thingkung pueng, <sup>18</sup> Hit taminaw hoi



khopui longkha koe ka tho e tami pueng e hmaitung vah Abraham ni coe hanelah a poe. <sup>19</sup> Hathnukkhu, Abraham ni Mamre kho, Hebron hoi kanitholah, Makpelah law daw koe talungkhu daw koe a yu Sarah teh a pakawp. <sup>20</sup> Hatdawkvah lawhmuen hoi talungkhu teh, Abraham ni phuen hmuen lah, a tawn hanelah, Hit taminaw ni a poe.

## 24

### *Isak hanlah yu paceinae*

<sup>1</sup> Abraham teh a kumcue teh a matawng poung toe. BAWIPA ni Abraham teh hno pueng daw koe yawhawi a poe. <sup>2</sup> Abraham ni a san, a imthungkhu thung daw koe kacue poung lah a tawn e naw pueng lathueng vah ka ka tawn poung e koevah, pahren lahoi na kut hah ka phai rahak vah tat haw, <sup>3</sup> kai teh ahnimouh rahak kho ka sak ei, Kanaan tanglanaw heh ka capa hane a yu lah lat hanh. <sup>4</sup> Hateiteh, ka miphunnaw koe, ka hmaunawngghanaw e im daw koe cet nateh ka capa Isak hanelah a yu na paluen pouh han telah ati.

<sup>5</sup> A san ni ahni koe, Napui ni hete ram daw koe tho ngai hoehpawiteh, na capa heh na thonae ram dawkvah ka ceikhai han na maw, telah ati.

<sup>6</sup> Abraham ni ahni koe, ka capa heh haw ceikhai hoeh nahanlah kâhruetcuets. <sup>7</sup> Hete ram heh na ca catounnaw ka poe han telah kai koe law koe kam, kalvan e BAWIPA Cathut ni apa im hoi ka tâconae ram daw koe hoi na kalatkung ni na hmalah kalvantami a patoun vaiteh hote hmuen daw koe ka capa hanlah a yu na paluen pouh han. <sup>8</sup> Hote napui ni kâbang ngai hoehpawiteh, kai koevah thoebonae daw koe hoi nang teh na hlout han. Ka capa teh haw na cetkhai mahoeht telah atipouh. <sup>9</sup> Hottelah a san ni a bawipa e a tangka vah a kut a ta teh, hote kong daw koe thoe a kâbo.

<sup>10</sup> A san ni a bawipa e kalauk thung daw koe hoi hra touh a hrawi teh, a bawipa e hnokahawi phunkuep hah a sin teh a kamthaw. Hottelah a kamthaw teh Mesopotamia ram e Nahor kho lah a cei. <sup>11</sup> Tangmin lah napuinaw tui do hanlah thonae tueng dawkvah, longkha teng e tuikhu koe a kalauknaw a kamkawn sak. <sup>12</sup> Ahni ni, Oe BAWIPA Cathut, pahren lahoi sahnin vah, ka bawipa, Abraham koevah na lungmanae kamnuek sak nateh na kuep sak haw. <sup>13</sup> Khenhaw! tuikhu koevah ka kangdue. Khothung e a canunaw hai tui do hanlah a tho awh toe. <sup>14</sup> Hettelah awm naseh, tangla koe pahren lahoi tui ka nei hanlah tuium hah patue sak haw, ka ti navah, ahni ni net leih, na kalauknaw a nei hanlah ka poe han telah ka tet e teh na san Isak hanlah na hmoun pouh e lah awm naseh. Hottelaho ka bawipa koe lungmanae na kamnuek sak tie hah ka panue thai han telah ati.

<sup>15</sup> Hahoi, lawk koug a dei hoehnahlan vah, Abraham e a nawngah Nahor e a yu Milkah capa Bethuel canu Rebekah teh a loung daw koe tuium thueng hoi a tho. <sup>16</sup> Tangla teh a meihawipoung. Thoundoun ni a ikhai hoeht rae tanglakacuem lah ao. Tuikhu koe a cathuk teh tuium tui yikkawi a do hnukkhu, a takhang. <sup>17</sup> Sanpa ni ahni kâhmo hanlah a yawng teh, pahren lahoi na tuium daw koe tui youn touh na pânei haw telah atipouh.

<sup>18</sup> Napui ni net leih ka bawipa telah atipouh. Karang poung lah a tuium teh a loung daw koe hoi a patue teh tui a pânei. <sup>19</sup> Tui a pânei hnukkhu, na kalauknaw hanlah hai tui a boum awh hoehroukrak boutbout ka do han telah atipouh. <sup>20</sup> Karang poung lah tui teh dokko daw koe hlun teh tui bout do hanlah tuikhu koe lah a cathuk teh kalauknaw pueng hanelah tui a do pouh. <sup>21</sup> Tongpa ni lawkkamuem hoi a khet teh, BAWIPA ni kahlawng ka



ceinae a lam a kâko sak vaiteh akuep sak hoi kakuep sak hoe hane panue hane a ngai dawkkamuem lah ao.

<sup>22</sup> Kalauknaw ni tui kounge a nei awh hnukkhu vah, hnongpacap hoi sui kuthrawt sekel hra touh ka ri e hah a poe. <sup>23</sup> Ahni koevah, nang apie canu maw. Pahren lahoi na dei pouh haw. na Pa im dawkk ka roe nahanlah rakhan ao han na ou, telah ati.

<sup>24</sup> Napui ni ahni koevah, Milkah ni Nahor hanlah a khe pouh e Bethuel canu doeh telah atipouh. <sup>25</sup> Napui ni hothloilah, caphon hoi saring e rawca moi ka tawn awh. Roenae rakhan haiyah ka tawn awh telah ati.

<sup>26</sup> Hat toteh, a san ni a lûsaling teh BAWIPA hah a bawkk. <sup>27</sup> Ahni ni, ka bawipa lathueng vah a lungmanae hoi hawinae ka pout thai hoe e, ka bawipa Abraham e BAWIPA Cathut teh pholen lah awm naseh. Kai patenghai BAWIPA ni ka bawipa e a hmaunawngghanaw e im dawkk na ceikhai tangngak telah ati.

<sup>28</sup> Tangla ni a yawng teh hno kaawmnaw hah a manu imthungkhu hah a dei pouh. <sup>29</sup> Rebekah ni a thangroi a tawn. Ahnie min teh Laban doeh. Laban a tâco teh tuikhu koelah hote tongpa koevah a yawng. <sup>30</sup> Hahoi, hnongpacap hoi a tawncanu e a kut dawkk e a buet e a hmu nah, tongpa ni hottelah na dei pouh telah a tawncanu ni a dei e a thai toteh, tongpa koevah a cei. Ahni teh tuikhu koe e kalauknaw rahak vah kangdout e hah a hmu.

<sup>31</sup> Laban ni, BAWIPA ni yawhawi a poe e tho nateh, kaie im dawkk luenh. Bangkongmaw alawilah na kangdue Bangkongtetpawiteh, im hoi kalauknaw hanlah hmuen teh kounge ka rakueng toe telah atipouh.

<sup>32</sup> Tongpa ni imthung a kâen teh Laban ni kalauk van e hnonaw a patue pouh. Hahoi, kalauk hanlah caphon hoi rawca hah a poe teh, ama hoi a huinaw hanelah khok pâsu nahanlah tui a poe. <sup>33</sup> Ca hane rawca a hmalah a pâtoutm pouh. Hateiteh, ahni ni, ka tho ngainae ka dei hoehroukrak ka cat mahoe telah atipouh. Ahnimouh ni dei yawkwaw telah atipouh.

<sup>34</sup> Ahni ni kai teh Abraham e a san doeh. <sup>35</sup> BAWIPA ni ka bawipa teh yawhawi a poe dawkk moi a tawnta. BAWIPA ni ahni koevah tunaw, maitonaw, tangka hoi sui, san napui tongpa, kalauknaw, lanaw hah a poe.

<sup>36</sup> Ka bawipa e a yu Sarah ni a matawng hnukkhu, capa buet touh a khe pouh teh a tawn e naw pueng teh ahni koevah a poe. <sup>37</sup> Hahoi, ka bawipa ni ka onae Kanaan tanglanaw hah ka capa hanelah a yu lah na paluen pouh mahoe. <sup>38</sup> Ka im vah, ka hmaunawngghanaw koe cet nateh ka capa hanelah a yu paluen pouh telah lawk na kam sak. <sup>39</sup> Ka bawipa koe napui ni kâbang ngai laipalah ao thai telah ka ti pouh. <sup>40</sup> Ahni ni kai koevah, a hmalah ouk ka onae BAWIPA ni a kalvantami nang koevah a patoun vaiteh, na ceinae koe a lamcawn sak han. Hottelah ka hmaunawngghanaw hoi apa imthungkhunaw koehoi ka capa hanlah a yu na paluen pouh. <sup>41</sup> Ka hmaunawngghanaw koe na pha nah napui na poe ngai hoe boipawiteh, hete lawkkamnae dawkk hoi na hlout han telah ati. <sup>42</sup> Sahnin vah tuikhu koe ka pha teh, Oe, ka bawipa Abraham e BAWIPA Cathut, ka ceinae koe a lam na cawn sak han pawiteh, <sup>43</sup> Tuikhu koevah ka kangdue teh tui do hanlah ka tho e tanglakacuem apipatet koe haiyah, pahren lahoi tuium dawkk e tui youn touh na pânei haw telah ka ti navah, <sup>44</sup> Napui ni kai koevah, net haw. Na kalauknaw hanlah tui ka do han telah a ka tet e tami teh, ka bawipa e a capa hanlah BAWIPA ni a hmoun e lah awm naseh telah ka ti.

<sup>45</sup> Khenhaw! hottelah, ka lungthin hoi kounge ka dei hoehnahlan vah, Rebekah teh tuium hoi a tho. Tuikhu koe a cathuk teh tui a do. Hahoi,



ahni koevah, pahren lahoi tui na net sak haw telah ka ti. <sup>46</sup> Ahni ni a loung dawk e tuium hah a patue teh tui net leih. Na kalauknaw hai tui pânei leih telah ati. Hatdawkvah, tui ka nei teh, kalauknaw tui a nei han haiyah a poe. <sup>47</sup> Kai ni nang apie canu maw telah ka pacei Ahni ni, Milkah ni a khe e Nahor e capa Bethuel e canu doeh telah ati. Hatdawkvah, a hnawng dawk hnongpacap ka bang pouh teh a kut dawk hai laikaw ka buet sak. <sup>48</sup> Ka lûsaling laihoi BAWIPA hah ka bawk teh, ka bawipa Abraham e BAWIPA Cathut, ka bawipa e a nawngah e canu, a capa hane a yu paluen pouh hane lamkatang dawk na kahrawikung hah ka pholen. <sup>49</sup> Atuvah ka bawipa lathueng vah lungmanae hoi lawkkatang na kamnue sak hanelah awm pawiteh, na dei pouh haw. Hottelah hoeh nakunghai, kai koe vah na dei pouh awh haw. Hat to doeh, avoilah hai, aranglah hai ka kamlang thai tih telah ati.

<sup>50</sup> Laban hoi Bethuel ni a pathung teh hete hno heh BAWIPA koehoi ka tâcawt e doeh. Ahawi thoseh, a thoe thoseh ka dei thai a hoeh. <sup>51</sup> Khenhaw! Rebekah teh na hmaitung doeh ao. Hrawi nateh cetkhaih. BAWIPA ni a dei tangcung e patetlah na bawipa e a capa e a yu lah awm naseh, telah atipouh.

<sup>52</sup> Hahoi, Abraham e a sanpa ni ahnimae lawk a thai navah, talai a tabo teh BAWIPA hah a bawk. <sup>53</sup> Hatdawkvah, Abraham e a sanpa ni kamthoupnae suingun hoi hnicu a rasa teh Rebekah hah a poe. A thangroi hoi a manu hai aphu kaawm e hno hah a poe. <sup>54</sup> Ahni hoi a huinaw teh a canei awh teh, hote tangmin teh a roe awh. Amom a thaw teh ka bawipa koe na cetsak awh, telah ati.

<sup>55</sup> Hateiteh, a thangroi hoi a manu ni, napuica teh hnin dongdeng, hnin hra touh thung teh kaimouh koe awm sak ei, hahoi ka ceisak han telah atipouh awh. <sup>56</sup> Ahni ni ahnimouh koevah, na haw awh hanh leih. BAWIPA ni ka ceinae dawk a lamcawn sak e patetlah ka bawipa koevah ka ban thai nahanlah na cetsak awh.

<sup>57</sup> Ahnimouh ni, napuica kaw awh vaiteh, amae pahni ring awh ei sei telah ati awh.

<sup>58</sup> Rebekah hah a kaw awh teh, hete tongpa koe na cei han maw telah a pacei awh. Napui ni ka cei han telah ati. <sup>59</sup> Hatdawkvah, a tawncanu Rebekah hoi kaawmkhai e, Abraham e a san hoi a hnukkâbang teh a ceisak awh.

<sup>60</sup> Hahoi ahnimouh ni Rebekah, ka tawncanu, nang teh tami a thongsang e manu lah na awm naseh, Na ca catounnaw ni a tarannaw e longkhanaw hah uk awh naseh telah yawhawi a poe awh.

<sup>61</sup> Rebekah ni a tho teh a sannunaw hoi kalauk van a kâcui teh tongpa hnuk a kâbang. Hahoi, Abraham e a san ni Rebekah hah a hrawi.

<sup>62</sup> Isak teh Beerlahairoi koe lahoi a tho. Bangkongtetpawiteh, akalah kaawm e doeh. <sup>63</sup> Tangminlasa vah Isak teh khopouk hanlah law lah a cei teh radoung teh a khet nah kalauk a tho e hah a hmu. <sup>64</sup> Rebekah ni a khet teh Isak a hmu toteh, kalauk van hoi a kum. <sup>65</sup> Bangkongtetpawiteh, a san koevah, law dawkvah maimouh dawn hanlah ka tho e tami teh apimaw, telah yo a pacei toe. A san ni ka bawipa doeh telah atipouh. Hatdawkvah, minhmai ramuknae hni a la teh a minhmai hah a ramuk. <sup>66</sup> A san ni a sak e naw pueng Isak koevah a dei pouh.

<sup>67</sup> Isak ni Rebekah teh a manu Sarah e lukkareiim dawk a kâenkhai. A yu lah a coung teh a lungpataw. Hatdawkvah, a manu a due hnukkhu vah, Isak teh a lungmawng.



## 25

*Abraham hoi Keturah*

<sup>1</sup> Abraham ni Keturah a yu lah bout a la. <sup>2</sup> Hote a yu ni Zimran, Jokshan, Medan, Midian, Ishbak hoi Shuah tinaw a khe. <sup>3</sup> Jokshan ni capa Sheba hoi Dedan a sak. Dedan capanaw teh Asshurim, Lethushim hoi Leummim tinaw doeh. <sup>4</sup> Midian capanaw teh Ephah, Ephes, Hanok, Abida hoi Eldaah tinaw doeh. Hetnaw pueng teh Keturah ca catounnaw lah ao. <sup>5</sup> Abraham ni a tawn e pueng hah Isak a poe. <sup>6</sup> Hateiteh, Abraham ni a yu do hoi a sak e canaw teh poehno a poe. Ama a hring nah roeroe vah Isak koehoi kanitholae ram lah a cei sak.

*Abraham duenae hoi Pakawpnae*

<sup>7</sup> Abraham e a hringyung teh a kum 175 touh a pha. <sup>8</sup> Abraham ni a hnukteng poung a kâha teh se kuep laihoi nget matong hoi kum rek kakueplah a due teh a hmaunawngghanaw koe vah a pakawp awh. <sup>9</sup> A capa Isak hoi Ishmael ni Hit tami Zoar capa Ephron law dawk Mamre teng Makpelah talung kâko dawk a pakawp roi. <sup>10</sup> Hote law teh Abraham ni Hetnaw koehoi a ran e doeh. Hote hmuon koe Abraham teh a yu Sarah koe a pakawp awh. <sup>11</sup> Abraham a due hnukkhu vah, Cathut ni Isak hah yawhawi a poe. Isak teh Beerlahairoi dawk kho a sak.

*Isak hoi Ishmael imthungkhu*

<sup>12</sup> Het heh Abraham capa Ishmael, Sarah e a sannu, Izip tami Hagar ni Abraham hoi a khe roi e canaw doeh. <sup>13</sup> Hetnaw heh min parui lahoi a catoun lahoi Ishmael capanaw e min lah ao. Ishmael capa camin teh Nebaioth doeh. A nawngghanaw teh Kedar, Adbeel, Mihsam tinaw doeh. <sup>14</sup> Mishma, Dumah, Massa, <sup>15</sup> Hadad, Tema, Jetur, Naphish hoi Kedemah tinaw doeh. <sup>16</sup> Hotnaw teh Ishmael capanaw lah ao teh amamouh hoi kho hoi a roenae patetlah a min a thut awh. A miphun parui lah bawi hlaikahni touh ao. <sup>17</sup> Ishmael a dam nathung a kum teh 137 touh a pha. A hnuktengpoung e a kâha a phout teh a due. A hmaunawngghanaw koe vah a pakawp awh. <sup>18</sup> Ahnimouh teh Havilah ram koehoi Assyria ram pâtam hoi Izip ram teng Shur totouh kho a sak awh. A hmaunawngghanaw e hmaitung vah a due. <sup>19</sup> Abraham e capa Isak e catounnaw teh hettelah ao. Abraham ni a capa Isak a khe teh, <sup>20</sup> Isak ni Paddanaram ram e Syria tami Bethuel canu, Syria tami Laban e a tawncanu Rebekah a yu lah a la nah a kum 40 touh a pha. <sup>21</sup> A yu teh carôe dawk BAWIPA koe vah pou a hei teh BAWIPA ni a heinae teh a thai pouh dawkvah Rebekah teh camo a vawn. <sup>22</sup> Camo a vawn e teh a thung vah pou a kâthe dawkvah, ahni ni hettelah awm rah pawiteh, bangkongmaw kahring rah telah ati. Hatdawkvah, BAWIPA koe pacei hanlah a cei. <sup>23</sup> BAWIPA ni camo im dawm miphun kahni touh ao. Na von thung hoi miphun kahni touh kâkapek han. Miphun buet touh e teh buet touh e hlaak a thayoun han. Hahoi, a hmau ni a nawnggha e thaw a tawm pouh han telah ati.

<sup>24</sup> Hottelah camo khenae tueng a pha toteh, camo im dawm ca samphei e ao. <sup>25</sup> Hmaloe e teh ka palingphung lahoi a tâco. Hni muon patetlah a muon puk a tho teh a min lah Esaw telah a phung. <sup>26</sup> Hathnukkhu hoi, a nawnggha teh Esaw e khokpaimai kuet lahoi a tâco. Hatdawkvah, a min lah Jakop telah a phung. Rebekah ni ahni a khe nah Isak teh a kum 60 touh a pha.



<sup>27</sup> Camo roi a rounge teh, Esaw teh moi ka ka thai poung e samram pou ka cet tami lah ao. Hateiteh, Jakop teh kâkamuete lah ao dawkh im vah ao. <sup>28</sup> Isak teh Esaw ni a thokhai e moi ouk a ca dawkhvah, Esaw hah a lungpataw. Hateiteh, Rebekah ni teh Jakop hah a lungpataw.

### *Esaw ni camin counghae a yo*

<sup>29</sup> Jakop ni rawca a thawng teh, Esaw teh kahrawng hoi a tho nah a vonhnam ni a khaw teh ngawt a tawn dawkhvah, <sup>30</sup> Esaw ni Jakop koevah, pahren lahoi na thawng e rawca hah na cat sak haw. Bangkongtetpawiteh, ka vonhnam ni na khaw toe telah atipouh. Hat dawkh nahoehmaw min teh Edom telah ati. <sup>31</sup> Hateiteh, Jakop ni camin counghae hah hmaloe lah na ran sak telah atipouh.

<sup>32</sup> Esaw ni khenhaw! kai teh meimei ka due toe, camin counghae teh kai hanlah bangmaw cungkei han telah ati.

<sup>33</sup> Jakop ni, kai koevah hmaloe thoekâbo ei, telah atipouh. Jakop koe thoe a kâbo teh a camin counghae hah a yo. <sup>34</sup> Jakop ni Esaw teh vaiyei hoi rawca a thawng e hah a poe. Hottelah, a canei hnukkhu vah a tâco teh a cei. Hot patetlah Esaw ni camin counghae hah banglahai noutna hoe.

## 26

### *Isak hoi Abimelek*

<sup>1</sup> Abraham a hring nathung vah ahmaloe e takangnae hloilah, Isak tueng nahai hote ram dawkh takangnae a tho. Hatdawkhvah, Isak teh Gerar kho Filistin siangpahrang Abimelek koevah a cei. <sup>2</sup> Ahni koevah, BAWIPA a kamnue teh Izip ram vah cet hanh. Kai ni na dei pouh hane ram dawkh awmh. <sup>3</sup> Hete ram dawkh awmh. Nang koe ka o vaiteh yawhawinae na poe han. Bangkongtetpawiteh, Hete ram pueng heh nang hoi na catounnaw koe poe hoi na pa Abraham koevah lawk ka kam e patetlah ka sak han. <sup>4</sup> Kalvan e âsi yit touh na ca catounnaw ka pung sak vaiteh hete ram pueng heh na ca catounnaw koevah ka poe han. Hahoi, na ca catounnaw lahoi talai miphunnaw pueng yawhawinae lah ao awh han. <sup>5</sup> Bangkongtetpawiteh, Abraham ni kaie lawk, kai ni dei e, kaie kâpoelawknaw, kaie phunglawknaw hoi kaie kâlawnaw hah a tarawi telah ati. <sup>6</sup> Hot patetlah Isak teh Gerar vah kho a sak.

<sup>7</sup> Khocanaw ni a yu e kong a pacei teh ahni ni, ka tawncanu doeh telah atipouh. A meihawipoung dawkhvah, ka yu doeh telah ka tetpawiteh hete khocanaw ni na thei han doeh telah ati dawkh doeh.

<sup>8</sup> Hahoi, hote kho dawkh moikasaw ao hnukkhu, Filistin siangpahrang Abimelek ni hlalangaw koehoi kho hah a radoung nah Isak ni a yu Rebekah hoi a pai roi e hah a hmu. <sup>9</sup> Abimelek ni Isak hah a kaw teh na yu roeroe doeh. Bangkongmaw ka tawncanu telah na ti thai, telah atipouh. Isak ni ahni kecu dawkh due hane ka taki dawkh doeh telah atipouh.

<sup>10</sup> Abimelek ni kaimae lathueng vah bang hno maw na sak. Taminaw ni na yu heh a ikhai thai nahoehmaw. Hottelah kaimouh lathueng vah hnokahawi hoe na pha sak thai nahoehmaw telah atipouh. <sup>11</sup> Abimelek ni apihai ama thoseh, a yu thoseh, ka tek e tami teh thei roeroe lah ao han telah a taminaw pueng koe kâ a poe.

<sup>12</sup> Isak ni hote ram dawkh cang a patue teh BAWIPA ni hote kum dawkh roeroe alet 100 touh yawhawinae a poe. <sup>13</sup> Ahni teh hoehoe a bawi teh, lutlut bawi totouh a tawn, hnopai hoehoe a pungdaw pouh.

<sup>14</sup> Bangkongtetpawiteh, tûhunaw hoi maitonaw hoi a sannaw moi a tawn.



Hatdawkvah, Filistinnaw ni a ut awh. <sup>15</sup> A na pa Abraham a hring nah a sannaw ni a tai e tuikhunaw pueng hah Filistinnaw ni hno han pasoung hoeh dawkvah, talai kOUNg a paten sin awh. <sup>16</sup> Abimelek ni Isak koevah, kaimouh koehoi tâcawt leih. Bangkongtetpawiteh, nang teh kaimouh hlak vah hno na sak thai telah atipouh.

<sup>17</sup> Isak ni hote hmuen koehoi a tâco teh Gerar yawn dawkw rim a sak teh haw vah kho a sak. <sup>18</sup> A na pa Abraham ni a hring nah a tai e tuikhunaw hah Isak ni bout a tai. Bangkongtetpawiteh, Abraham a due hnukkhu vah Filistinnaw ni talai muen a paten awh. Hahoi, a na pa ni min a phung e patetlah min bout a phung. <sup>19</sup> Isak e sannaw ni hai hote yawn dawkw tuikhu a tai awh teh hote hmuen koe tui a tâco e hah a hmu awh. <sup>20</sup> Hateiteh, Gerar e saring kakhounnaw ni tui heh kaimae doeh telah Isak e saring kakhounnaw hoi a kâounkhah awh. Ahnimouh hoi a kâoun awh dawkvah, tuikhu e min teh Esek telah ati awh. <sup>21</sup> Tuikhu alouke bout a tai teh hote haiyah lawp hanlah a kâounkhah awh dawkvah a min Sitnah telah ati awh. <sup>22</sup> Hote hmuen koehoi a kampuen awh teh hai alouke tuikhu hah bout a tai awh. Hote teh lawp hanlah kâcai awh hoeh toe. Atu teh BAWIPA ni hmuen kakawpoung na sak pouh dawkvah hete ram dawkw canaw moikapap ka khe awh han toe telah ati awh teh a min lah Rehoboth telah ati awh.

<sup>23</sup> Hote hmuen koehoi Beersheba lah a takhang awh. <sup>24</sup> Hote tangmin dawkvah BAWIPA teh ahni koevah a kamnue teh kai teh na pa Abraham e Cathut doeh, taket hanh, bangkongtetpawiteh, nang koe ka o. Yawhawinae na poe vaiteh, ka san Abraham pawlawk hoi na ca catounnaw ka pungdaw sak han telah ati.

<sup>25</sup> Hote hmuen koe khoungroe hah a sak. BAWIPA min a kaw teh rim a sak. Hahoi, Isak e sannaw ni hote hmuen koe tuikhu hah a tai awh.

<sup>26</sup> Hatdawkvah, Gerar hoi Abimelek teh a hui Ahuzzath hoi a ransabawi Fikol hoi ahni koevah a tho awh. <sup>27</sup> Isak ni na hmuhma awh teh namamouh koehoi na pâlei hnukkhu, bangkongmaw kai koevah bout na tho awh telah atipouh.

<sup>28</sup> Ahnimouh ni nang koevah BAWIPA ao tie kamcengcalah ka panue awh. Patawnae poe hanlah ka tho awh hoeh. Hawinae hoi roumnae lahoi na ceisak e patetlah kaimouh pataw nahanlah banghai na sak hoeh nahanlah, <sup>29</sup> kaimouh rahak vah, nangmouh hoi kaimouh rahak roeroe dawkvah lawkkamnae aww naseh. Nang teh BAWIPA ni yawhaw i poe e tami doeh telah atipouh awh.

<sup>30</sup> Isak ni ahnimouh hanlah buvennae a sak pouh teh a canei awh. <sup>31</sup> Amom lah palang a tho awh teh buet touh hoi buet touh thoebo lawkkamnae a sak awh. Isak ni a ceisak teh ahni koehoi karoumcalah hoi a tâco awh. <sup>32</sup> Hote hnin dawkvah, Isak e sannaw hah a tho awh teh tuikhu a tai awh e kongnaw a dei pouh teh, tui ka hmu awh toe telah atipouh awh. <sup>33</sup> Hote tuikhu teh Sheba telah ati awh. Hatdawkvah, hote kho teh sahnin totouh Beersheba telah ati awh.

<sup>34</sup> Esaw teh a kum 40 touh a pha nah Hit tami Beeri canu Judith hoi Hit tami Elon e canu Basemath hah a yu lah a paluen. <sup>35</sup> Hotnaw teh Isak hoi Rebekah a lung ka pataw sakkungnaw doeh.



<sup>1</sup> Hahoi, hettelah ao. Isak teh matawng toung dawkvah mithmu thai hoeh totouh a mitmawm hnukkhu, a capa kacue e Esaw hah a kaw teh ahni koevah, ka capa telah atipouh. Ahni ni hi vah ka o telah atipouh.

<sup>2</sup> A na pa ni atu kai teh ka matawng toe. Na tueng maw ka due han ti hai ka panuek hoeh. <sup>3</sup> Hatdawkvah, pahren lahoi palabom hoi licung hah sin nateh kahrawng vah moi na ka pouh haw. <sup>4</sup> Ka due hoehnahlan yawhawinae na poe thai nahanlah ka ngai e patetlah katuipoung lah na thawng pouh nateh ka ca hanlah kai koevah thokhai telah atipouh.

<sup>5</sup> Isak ni a capa Esaw hoi lawk a kâpato roi e hah Rebekah ni a thai. Hatdawkvah, Esaw teh moi ka hanlah kahrawng vah a cei. <sup>6</sup> Rebekah ni a capa Jakop koevah, thai haw, na pa ni na hmau Esaw koevah, <sup>7</sup> moi ka nateh ka due hoehnahlan ka ca vaiteh BAWIPA hmalah yawhawinae na poe thai nahanlah rawca katuipoung lah na thawng pouh haw telah a dei pouh e ka thai. <sup>8</sup> Hatdawkvah, ka capa kai ni kâ na poe e patetlah na ngâi han. <sup>9</sup> Atu saringnaw koe cet nateh haw e hmaeca kahawi e kahni touh kai koevah thokhai. Hottelah, na pa hanlah, ama ni a ngai e patetlah katuipoung lah na thawng pouh han. <sup>10</sup> A due hoehnahlan yawhawinae na poe thai nahanlah a ca hane na pa koevah na ceikhai han telah atipouh.

<sup>11</sup> Jakop ni a manu Rebekah koevah, Khenhaw! ka hmau Esaw teh muen puk a tho, hatei, kai teh muen ka tawn hoeh. <sup>12</sup> Apa ni na payam pawiteh, ahni ka dum e lah kaawm vaiteh, yawhawinae laipalah thoebonae koe kâhmo payon han na vaimoe telah a manu koe atipouh.

<sup>13</sup> Hatei, a manu ni ahni koevah, na thoebonae teh kai dawк phat na seh. Ka dei e hah tarawi nateh na lat pouh haw telah atipouh.

<sup>14</sup> Ahni ni a cei teh a la. A manu koe a poe teh a manu ni na pa ni ngai e patetlah a thawng pouh. <sup>15</sup> Rebekah ni a capa kacue Esaw e khohna kahawipoung e, im ahni koe kaawm hah a la teh, a capa kanaw Jakop hah a khohna sak. <sup>16</sup> Hmae pho hah a kut hoi muen o hoeh nae lahuen dawк a bet pouh. <sup>17</sup> Hahoi, ka tuipoung lah thawng e hmae moi hoi vaiyei hah a capa Jakop koevah a poe.

<sup>18</sup> Hatdawkvah, na pa koe vah a cei teh, apa telah ati teh, a na pa ni hi vah ka o, ka capa, api nang maw telah a pacei.

<sup>19</sup> Jakop ni a na pa koevah, na capa kacue Esaw doeh, na patoun e patetlah kounг ka sak toe, pahren lahoi thaw nateh yawhawinae na poe thai nahanlah rawca heh cat leih telah atipouh.

<sup>20</sup> Hatei, Isak ni a capa koevah, ka capa bangtelamaw telah karanglah na hmu thai telah atipouh. Ahni ni na BAWIPA Cathut ni na poe dawк doeh telah atipouh.

<sup>21</sup> Isak ni ka capa, na payam thai nahanlah pahren lahoi na hnai haw. Ka capa Esaw katang maw telah atipouh. <sup>22</sup> Jakop ni a na pa Isak teh a hnai. A na pa ni a payam teh na lawк teh Jakop e lawк doeh, a kut teh Esaw e a kut doeh telah ati.

<sup>23</sup> A kut hah a hmau Esaw e kut patetlah muen a tho dawк vah, panuek thai laipalah yawhawinae a poe. <sup>24</sup> A na pa ni, ka capa Esaw nang ka tang maw telah atipouh. Ahni ni, Oe kai doeh telah atipouh.

<sup>25</sup> Ahni ni, kai koe rek thokhai haw yawhawinae na poe thai nahanlah ka capa ni thokhai e moi teh ka ca hanlah telah ati. Hahoi, a hnai teh a ca. Misur hai a poe teh a nei.

<sup>26</sup> A na pa Isak ni ahni koevah, ka capa na hnai nateh na paco haw telah atipouh.



<sup>27</sup> Hatdawkvah, a hnai teh a paco Ahni ni khohna hmui hah a thai teh yawhaw i a poe. Thaihaw! ka capa e hmui heh BAWIPA ni yawhawinae ram hmu itui patetlah ao roeroe. <sup>28</sup> Hatdawkvah, Cathut ni kalvan e tadamtui thoseh, talai hawinae thoseh, cakang moikapap hoi misur moikapap na poe naseh. <sup>29</sup> Miphunnaw ni na thaw taw awh naseh, miphun hah na hmalah tabaw awh naseh. Na hmaunawngghanaw e baw i lah awm nateh, na manu e canaw na hmalah tabaw awh naseh. Thoe na ka bo naw pueng thoebo lah ao vaiteh yawhawinae na ka poe e pueng hah yawhaw i awh naseh telah ati.

<sup>30</sup> Hahoi, hettelah ao. Isak ni Jakop yawhawinae phouk a poe nah Jakop teh a na pa koehoi nueng a tâco tahma vah Esaw teh samram a ceinae koehoi a tho. <sup>31</sup> Ahni ni hai katuipoung lah a thawng van teh, a na pa koevah a thokhai. A na pa koevah, na hringnae ni yawhaw i na poe nahanlah apa teh a thaw vaiteh, a capa ni thokhai e moi hah cat naseh telah ati.

<sup>32</sup> A na pa Isak ni ahni koevah, nang apimaw telah a pacei. Ahni ni na capa, na ca kacue Esaw doeh telah atipouh.

<sup>33</sup> Isak teh pueng hoi a pâyaw teh, moi ka hoi kai koe ka thokhai e teh apimaw. Nang na tho hoehnahlan ca vah koung ka ca teh yawhaw i ka poe e hah teh api namaw. Ahni teh yawhaw i lah ao roeroe han, telah ati.

<sup>34</sup> Esaw ni a na pa e lawk dei e a thai navah, pueng hoi a ka teh a na pa koevah, Oe apa, kai hai, yawhawinae na poe telah atipouh.

<sup>35</sup> Hateiteh, a na pa ni na nawngha ni na dum teh na yawhawinae na la pouh toe telah atipouh.

<sup>36</sup> Esaw ni a min lah Jakop tie heh ahman katang nahoehmaw. Kai heh vai hni touh na dum teh na tâ toe. Camin counghae na lah pouh. Atu ka yawhawinae bout na la pouh telah ati. Ahni roeroe ni yawhawinae na tat pouh hoeh maw, telah ati.

<sup>37</sup> Isak ni Esaw koe vah, khenhaw! ahni teh na baw i lah ka coung sak teh a hmaunawngghanaw pueng hai a san lah koung ka poe toe. Cakang hoi misur hoi ka kaw k toe. Ka capa nang hanlah bangmaw na sak pouh han telah atipouh.

<sup>38</sup> Esaw ni a na pa koevah, apa yawhawinae buet touh dueng maw na tawn Oe apa kai hai yawhaw i na poe lah telah ati. Hatdawkvah, Esaw teh ngawngngawng a ka. <sup>39</sup> A na pa Isak ni Esaw koevah, thai haw, na o nahane teh talai kahaw i hoi kahlun lahoi tadamtui hoi a kâhla han. <sup>40</sup> Na tahloi hoi na kâkaw k vaiteh na nawngha e thaw na taw k pouh han. Hahoi, hettelah ao han, kâhat laipalah na kâroe hnukkhu, a kahnam rui hah na lahuen daw k hoi a ling han telah atipouh.

<sup>41</sup> A na pa ni yawhaw i a poe dawkvah Esaw ni Jakop hah a hmuhma teh a lung hoi apa ka khuinae hnin teh a hnai toe. Hat hnukkhu ka nawngha Jakop teh ka thei han telah ati.

<sup>42</sup> A capa kacue Esaw ni a dei e lawk hah Rebekah koe a dei pouh awh. Rebekah ni a capa kanaw Jakop a kaw teh, thai haw, na hmau Esaw teh nang na thei to doeh a lungroum ti. <sup>43</sup> Hatdawkvah, atu ka dei e hah ngai. Thaw nateh Haran vah ka thangroi Laban koe vah yawng, <sup>44</sup> Na hmau a lungkhueknae a roum hoehroukrak thung teh haw vah awm ei. <sup>45</sup> Nange lathueng vah na hmau lungkhueknae a roum teh a lathueng vah na sak e heh a pahnim torei, tami ka patoun vaiteh na la sak han. Bangkongmaw hnin touh dawkvah nangmouh roi ka sung han telah ati.



<sup>46</sup> Rebekah ni Isak koevah, Heth canunaw kecu dawk kai hring hane ka ngai hoeh toe. Jakop ni hete ram dawk e canunaw patet e tami, a yu lah lat pawiteh, kai ka hringnae aphu bangmaw kaawm han tounng telah atipouh.

## 28

<sup>1</sup> Hatdawkvah, Isak ni Jakop hah a kaw teh yawhawinae a poe, tawngtang lawk a thui e teh, Kanaan canunaw thung e yu na lat mahoe. <sup>2</sup> Thaw nateh Paddanaram ram dawk na manu e a na pa Bethuel im vah cet. Haw e na manu e a thangroi Laban canunaw thung dawk hoi na yu lah lat. <sup>3</sup> Bangpueng ka sak thai e Cathut ni yawhawi na poe naseh, miphun moi kapap lah na pung thai nahanlah ca catoun moi na tawn sak teh na pungdaw sak naseh. <sup>4</sup> Imyin lah onae ram, Cathut ni Abraham koe a poe e heh na coe nahanlah Abraham yawhawinae teh na coe sak awh naseh, nang hoi na canaw hoi telah lawk a thui.

<sup>5</sup> Hatdawkvah, Isak ni Jakop teh yout a ceisak teh, Paddanaram ram e Jakop hoi Esaw e manu Rebekah e a thangroi Syria tami Bethuel capa Laban koevah a cei.

### *Esaw ni Mahalath a paluen*

<sup>6</sup> Isak ni Jakop hah yawhawi a poe teh a yu la hanlah Paddanaram ram lah a patoun. Yawhawi a poe nah Kanaan ram e tanglanaw yu lah na lat mahoe telah lawk a thui. <sup>7</sup> Jakop ni a manu hoi a na pa e lawk hah a ngai teh, Paddanaram ram dawk a cei. <sup>8</sup> Kanaan ram e tangla naw ni a na pa Isak lungyouk sak hoeh toe tie a hmu navah, <sup>9</sup> Esaw ni Ishmael koevah a cei teh a tawn tangcoung a yunaw hloilah, Abraham capa Ishmael e canu Mahalath Nebaioth tawncanu hah a yu lah a la.

### *Bethel vah Jakop lawkkamnae*

<sup>10</sup> Jakop teh Beersheba hoi a kamthaw teh Haran lah a cei. <sup>11</sup> Hmuen buet touh koe a pha teh kaniloum tounng dawkvah a roe. Talung buet touh hah a la teh lahounng lah a lahounng teh i hanlah a yan. <sup>12</sup> Hahoi, mang a mang teh talai van khalai a kâdo teh a donghmo ni kalvan a pha. Hote khalai dawk Cathut e kalvantaminaw a kumlun awh.

<sup>13</sup> A lathueng vah, BAWIPA a kangdue teh, Kai teh BAWIPA, na min Abraham e Cathut hoi Isak e Cathut lah ka o, na inae ram hah nang hoi na ca catounnaw ka poe han; <sup>14</sup> Na ca catounnaw teh talai e vaiphu yit touh a pha awh han. Kanitho, kaniloum, atunglah, akalah na pungdaw awh han. Nang pawlawk dawh hoi miphunnaw pueng ni yawhawinae a hmu awh han. <sup>15</sup> Khenhaw! nang koevah ka o. Na ceinae pueng koe na kountouk vaiteh, hete ram dawk bout na bankhai awh han. Nang koe ka dei e ka sak hoehnahlan pueng teh na cettakhai mahoe telah ati.

<sup>16</sup> Jakop ni a kâhlaw teh, hete hmuen koe BAWIPA teh ao roeroe ka panuek laipalah ka o, telah ati. <sup>17</sup> Hatdawkvah, a taki teh, het hmuen heh takikatho e lah ao! hete heh hmuen alouke nahoe, Cathut e im, kalvan longkha lah ao, telah ati. Jakop ni amom a thaw teh a lahounng e talung hah a lah teh talung lah a ung teh a van vah satui hah a awi. <sup>18</sup> Jakop ni amom a thaw teh a lahounng e talung hah a lah teh lungkhounng a ung teh, avan vah satui hah a awi. <sup>19</sup> Hote hmuen hah Bethel telah a phung. Hote kho teh hmaloe vah Luz lah ao. <sup>20</sup> Jakop ni, apa im dawh lungmawngcalah ka ban thai nahan, kai koe Cathut hah ao teh ka ceinae lam hah a ring teh, <sup>21</sup> ca han e vaiyei hoi kâkhu hane hni na poe boipawiteh, BAWIPA teh ka Cathut lah ao han. <sup>22</sup> Hete talung ka ung e haiyah Cathut e im lah ao han,



hahoi na poe hane naw pueng thung dawkh hoi hra touh dawkh buet touh teh na poe roeroe han, telah lawkkamnae hah a sak.

## 29

### *Jakop ni Rachel a kâhmo*

<sup>1</sup> Jakop ni pou a cei teh Kanîtholae taminaw e ram dawkh a pha. <sup>2</sup> A khet navah tuikhu kaawm e lawpam vah tuhu katham touh a kamkawn e hah a hmu. Bangkongtetpawiteh, tuikhu thung e tui hah tunaw ouk a pânei awh. Tuikhu koe lungsong ao. <sup>3</sup> Hote hmuen koe tunaw pueng pâkhueng lah ao han. Tuikhu khannae lungsong hah takhoe vaiteh, tu tui pânei hoi talung teh ama onae hmuen dawkh bout teng lah ao han.

<sup>4</sup> Jakop ni ahnimouh koevah, ka hmaunawngghanaw api kho maw, telah a pacei. Ahnimouh ni, Haran taminaw doeh telah atipouh awh.

<sup>5</sup> Ahni ni ahnimouh koevah, Nahor capa Laban na panue awh maw telah a pacei. Ahnimouh ni, Oe ka panue awh, telah atipouh awh.

<sup>6</sup> Ahni ni ahnimouh koevah, a hring rah maw, telah a pacei. Ahnimouh ni, Oe a dam rah doeh, kenhaw! a canu Rachel hai tu hoi a tho lahun, telah atipouh awh.

<sup>7</sup> Ahni ni, Kenhaw! Kanî asaw rah, saring pâkhueng hanelah khout hoe rah. Tunaw hah tui pânei awh nateh bout tha awh ei, telah atipouh.

<sup>8</sup> Hateiteh, ahnimouh ni, tuhunaw pueng pâkhueng teh tuikhu tengnae talung takhoe hoehnahlan pueng teh tui pânei thai lah awm awh hoeh. Takhoe hnukkhu to doeh tu heh tui ouk ka pânei awh, telah atipouh awh.

<sup>9</sup> Hottelah, lawk a kâpan navah, Rachel teh a na pa e tunaw hoi a tho, bangkongtetpawiteh ahni teh tu ka khoum e napui lah ao. <sup>10</sup> Hahoi, hettelah ao. Jakop ni a manu e a thangroi Laban e canu Rachel hoi tunaw a hmu toteh, a cei sin teh tuikhu tengnae talung hah a takhoe pouh teh a manu e a thangroi e tu hah tui a pânei pouh. <sup>11</sup> Hahoi, Jakop ni Rachel hah a paco teh ngawngngawng a ka. <sup>12</sup> Jakop ni Rachel koe a na pa e a na minca lah a onae hoi Rebekah e capa lah a onae kong hah a dei pouh. Hatdawkvah, Rachel ni a na pa koe ayawng teh a dei pouh.

<sup>13</sup> Hahoi, Laban ni a tawncanu e capa Jakop kong a thai tahma, ahni dawn hanelah ayawng. A tapam teh a paco hnukkhu, a im vah a hrawi. Jakop ni Laban koe hno kâhmo e akongnaw pueng a dei pouh.

<sup>14</sup> Laban ni ahni koe, nang teh ka misa katang doeh, telah atipouh teh ahni koevah thapa yung touh ao.

### *Jakop ni Leah hoi Rachel a paluen*

<sup>15</sup> Laban ni Jakop koevah, Ka minca lah na o dawkvah, apu laipalah ka thaw na tawkh han na maw. Bangmaw na poe han dei haw, telah atipouh.

<sup>16</sup> Laban ni canu kahni touh a tawn teh a camin teh Leah a phung, a cahnoung teh Rachel a phung. <sup>17</sup> Leah teh a mit roumkawt e lah ao. Hatei, Rachel teh a tungtang hoi a mei kahawi e tami lah ao. <sup>18</sup> Jakop ni Rachel a ngai dawkvah, na canu kanaw e Rachel hanlah kum sari touh na thaw ka tawkh han, telah atipouh.

<sup>19</sup> Laban ni, ayâ alouke ka poe hlak teh nang na poe e heh ahawihnawn han doeh, kai koe awmh, telah atipouh.

<sup>20</sup> Hatdawkvah, Jakop ni Rachel hanlah kum sari touh a thaw a tawkh pouh, a lungpataw poung dawkvah hnin dawngdengca e patetlah a pouk.

<sup>21</sup> Jakop ni Laban koe, ka ikhai thai nahanlah ka yu teh na poe leih, bangkongtetpawiteh, ahnintha teh akupe toe, telah atipouh.



<sup>22</sup> Laban ni khoca pueng a pâkhueng teh bu canae paw i sak. <sup>23</sup> Hahoi, kho a hmo nah a canu Leah a hrawi teh Jakop koevah a thak pouh teh a ikhai. <sup>24</sup> Laban ni a sannu Zilpah hah a canu Leah koevah san hanlah a poe.

<sup>25</sup> Khodai toteh, khenhaw! Leah lah a o, Jakop ni Laban koevah, ka lathueng vah na sak e heh bangmaw. Rachel ka yu nahanlah na thaw ka tawk hoeh na maw. Bangkongmaw na dum, telah atipouh.

<sup>26</sup> Laban ni, Ka ram daw k a hmau hoehnahlan a nawng a ceisak phung roeroe nahoe. <sup>27</sup> Hete napui hanlah hnin sari kuep sak ei, hahoi, kum sari touh ka thaw bout na taw k han e daw k alouknaw hai na poe han, telah atipouh e patetlah,

<sup>28</sup> Jakop ni hottelah a sak teh hnin sari touh a kuep sak teh Laban ni a canu Rachel haiyah a yu hanlah a poe. <sup>29</sup> Hahoi, Laban ni a sannu Bilhah hah a canu Rachel koevah a san hanlah a poe.

<sup>30</sup> Rachel bout a ikhai. Leah hlakvah Rachel heh a lung hoe a pataw dawkvah, Laban e thaw kum sari touh bout a taw k pouh. <sup>31</sup> BAWIPA ni Leah teh lungpataw hoeh tie a panue dawkvah a thun a kamawng sak. Hatei, Rachel teh a carôe. <sup>32</sup> Leah teh camo a vawn teh ca tongpa a khe, a min lah Reuben a phung. Bangkongtetpawiteh, BAWIPA ni runae ka kâhmo e a panue. Hatdawkvah, atu teh ka vâ ni na lungpataw han toe, telah ati. <sup>33</sup> Camo bout a vawn teh ca tongpa bout a khe. Kai na hnoun e BAWIPA ni a thai dawkvah, hete ca tongpa hai na poe telah ati teh Simeon telah min a phung. <sup>34</sup> Camo bout a vawn teh ca tongpa bout a khe. Atu teh ca tongpa kathum touh ka khe pouh toe dawkvah, ka vâ ni na tha mahoe toe, telah ati. Hatdawkvah, a min lah Levi h a sak. <sup>35</sup> Hahoi, camo bout a vawn teh ca tongpa bout a khe. Atu teh, BAWIPA ka pholen han, telah ati. Hatdawkvah, a min Judah a phung. Hahoi teh, camo khe hoeh toe.

## 30

<sup>1</sup> Rachel ni Jakop hanlah camo a khe pouh hoeh e a hmu toteh, a hmau hah a ut teh Jakop koe, Camo na poe, nahoe pawiteh ka due han, telah atipouh.

<sup>2</sup> Jakop teh Rachel koe a lungkhuek teh, ca khe han ka pasoung hoeh e Cathut yueng lah maw ka o, telah ati.

<sup>3</sup> Napui ni, khenhaw! ka sannu Bilhah heh ipkhai nateh kai ni hai ahni koehoi camo ka tawn thai nahanlah, ka phai daw k camo a khe han, telah ati.

<sup>4</sup> Hatdawkvah, a sannu Bilhah teh a yu hanlah a poe teh Jakop ni a ikhai.

<sup>5</sup> Bilhah ni camo a vawn teh Jakop hanlah ca tongpa a khe pouh. <sup>6</sup> Rachel ni, Cathut ni na pouk teh ka law k hai a thai dawkvah, ca tongpa na poe, telah ati. Hatdawkvah, a min lah Dan a phung. <sup>7</sup> Rachel e a sannu teh camo bout a vawn teh Jakop hanlah ca tongpa apâhni bout a khe pouh.

<sup>8</sup> Rachel ni, ka hmau hoi kâthe teh ka tâ toe telah ati. Hatdawkvah, a min lah Naptali a phung.

<sup>9</sup> Leah ni camo ka khe thai hoeh toe tie a kâpanue dawkvah, a sannu Zilpah hah a ceikhai teh a yu hanlah Jakop hah a poe. <sup>10</sup> Hatdawkvah, Leah e a sannu, Zilpah ni camo tongpa Jakop hanlah a khe pouh. <sup>11</sup> Leah ni, a yawhawi, telah ati teh, a min lah Gad a phung.

<sup>12</sup> Leah e a sannu Zilpah ni ca tongpa Jakop hanlah bout a khe pouh.

<sup>13</sup> Leah ni, Ka yaw ahawi, napuinaw ni a yaw kahawi poung katang e na ti pouh han, telah ati teh a min lah Asher a phung.



<sup>14</sup> Canga tue nah Reuben teh law vah a cei teh, hloisi hah a hmu teh a manu Leah koevah a thokhai. Hatdawkvah, Rachel ni Leah koevah, pahren lahoi na capa hloisi youn touh na poe haw, telah atipouh.

<sup>15</sup> Ahni ni, ka vâ na lawp e heh hno tica e lah maw na pouk, ka capa hloisi totouh lawp han e na kâcai telah atipouh. Rachel ni, hat boi pawiteh, na capa e hloisi yueng lah atu tangmin na ikhai han, telah atipouh.

<sup>16</sup> Tangmin lah Jakop teh law hoi a tho teh, Leah ni a dawn hanlah a thaw teh, Na ikhai roeroe han, bangkongtetpawiteh, ka capa koe e hloisi heh ka hlai toe, telah ati dawkvah, hote tangmin teh a ikhai.

<sup>17</sup> Cathut ni Leah e ratoumnae hah a tarawi, camo a vawn teh Jakop hanlah ca tongpa panganae a khe pouh. <sup>18</sup> Leah ni, Ka sannu hah ka vâ koe ka poe dawkvah, Cathut ni ka fawknae aphu hah na poe van, telah a titeh a min lah Issakhar a phung.

<sup>19</sup> Leah ni, Camo bout a vawn teh Jakop hanlah ca tongpa ataruknae bout a khe pouh. <sup>20</sup> Leah ni, Cathut ni kahawi poung e kamthoupnae hoi na pathoup, ka vâ hanelah ca tongpa taruk touh ka khe pouh tOUNg dawkvah, kai koe ao han toe, telah a titeh a min lah Zebulun a phung.

<sup>21</sup> Hathnukkhu, napuica bout a khe teh a min lah Dinah a phung.

<sup>22</sup> Cathut ni Rachel hah pahnim hoeh. Hatdawkvah, Cathut ni a ratoumnae a tarawi pouh teh, camo im a kamawng sak. <sup>23</sup> Hahoi, camo a vawn teh ca tongpa a khe. Cathut ni ka min mathoenae na ramuk pouh, telah ati. <sup>24</sup> Hahoi, BAWIPA ni capa alouke bout na poe ei naseh, a titeh a min lah Joseph a phung.

### *Jakop ni Laban hnâbokhainae*

<sup>25</sup> Rachel ni Joseph a khe hnukkhu hettelah ao. Jakop ni Laban koevah, ka onae ram lah ka ban thai nahanlah na cetsak leih. <sup>26</sup> Na thaw na tawk pouh toe. Hatdawkvah, ka yunaw hoi ka canaw na poe nateh na cetsak leih, bangkongtetpawiteh na thaw ka tawk e naw hah na panue, telah atipouh.

<sup>27</sup> Laban ni, Na pahren thai pawiteh, awm ei. Bangkongtetpawiteh, BAWIPA ni nang pawlawk dawk hoi yawhawinae na poe e hah ka mithmu vah ka panue, telah atipouh.

<sup>28</sup> Ama roeroe ni na hmu hane to nateh na poe han, telah ati. <sup>29</sup> Jakop ni ahni koevah, bangtelamaw na thaw ka tawk tie hoi na saring hah bangtelamaw kai koe ao ti hah na panue.

<sup>30</sup> Ka tho hoehnahlan teh yitca doeh na tawnh, atuteh moikapap a kampung. Pek ka tho hoi BAWIPA ni yawhawinae hah na poe. Nâtuék maw ka imthungkhu hanelah thaw ka tawk van han telah ati.

<sup>31</sup> Hatdawkvah ahni koe, bangmaw na poe han telah atipouh. Jakop ni, banghai na poe hanh. Hetheh na sak pouh boipawiteh, na saringnaw teh bout na khoum pouh han.

<sup>32</sup> Sahnin vah tuhu, hmaehu, thung ka cei teh, taracak e hmaenaw, humtamang e tunaw pueng hah kOUNg a kapek toe. Hathnukkhu ka taracak e hmae, humtamang e tunaw teh kai ni ka coe hane aphu lah ao han. <sup>33</sup> Hatdawkvah, atotovah kaie tawkpouh ka hmu hane teh na hmalah a pha to vah, ka lannae ni na pathung han doeh. Hmae thung dawk taracak lah a em ka pangaw hoeh e, a em kasawlah ka pangaw hoeh e, tu thung dawk ka tamang hoeh e kai koe na hmawt pawiteh, ka paru e lah na pouk han, telah atipouh. <sup>34</sup> Laban ni, Oe, na dei e patetlah tho lawish, telah ati.

<sup>35</sup> Hot hnin totouh hoi, hmaetan taracak ni teh kasawlah a em kaawmnaw pueng hoi, Hmae manu taracak ni teh kasawlah a em kaawm



e naw pueng, ka pangaw pueng hoi tu thung dawk ka tamangnaw pueng hah a kapek pouh teh a capanaw e a kut dawk a poe. <sup>36</sup> Ahni hoi Jakop rahak vah hnin thum lamcei koe ao sak teh, Jakop ni Laban e saringnaw pueng hah bout a thak pouh. <sup>37</sup> Jakop ni poplar hoi hazel hoi almond thing e akangnaw hah a la teh taracak lah a tarik. <sup>38</sup> Saringnaw ni tui ouk a neinae dokko hoi palang dawkvah, saringnaw e hmalah sonron hah a ta. Bangkongtetpawiteh, tui nei hanlah ouk a tho awh nah saring hah âvâ ouk a cu awh. <sup>39</sup> Hatdawkvah, saring hah sonron teng âvâ ouk a cu nah, a em taracak lah ouk a khe. <sup>40</sup> Hahoi, Jakop ni tucanaw a kapek teh, Laban e saringhu thung dawk e a em kaawm hoi katamangnaw pueng koe lah a kangvawi sak. Amae saring hah a kapek teh Laban e saring hoi rei hrueng hoeh.

<sup>41</sup> Atha bet kaawm hnawn e saring âvâcu toteh, sonron hmalah âvâcu thai nahanlah, Jakop ni tui a lawngnae koe saringnaw e a hmaitung vah, sonron hah ouk a ta pouh. <sup>42</sup> Hatei, saring hah kamsoe pawiteh tat pouh hoeh. Hottelah, ka kamsoe e a canaw teh Laban e lah ao teh, a tha bet kaawm e naw hah Jakop e lah ao. <sup>43</sup> Hatdawkvah, Jakop koe moi kapap lah a kampung teh saringhu moi kapap, sannu hoi sanpa naw hoi, kalauknaw hoi lanaw hah a tawn.

## 31

### *Laban koehoi Jakop a yawng*

<sup>1</sup> Laban e canaw ni, Jakop ni kaimae apa e hno pueng koug a la pouh dawkvah, hete tawnta e naw pueng heh a hmu e doeh, telah a dei awh e lawk hah Jakop ni a thai. <sup>2</sup> Jakop ni, Laban e minhmai a khet nah a hmoun e patetlah minhmai kahawi ka hmawt hoeh toe tie hah a panue.

<sup>3</sup> Hatdawkvah, BAWIPA ni Jakop koevah, na mintoenaw e ram hoi na imthungkhu lah ban nateh, nang koe vah ka o han, telah ati.

<sup>4</sup> Jakop ni tami a patoun teh Rachel hoi Leah hah saring onae law vah tho hanelah a kaw sak. <sup>5</sup> Ahnimouh roi koe, na pa e minhmai ka hmu navah, ahmoun e patetlah minhmai kahawi ka hmawt hoeh toe tie hah ka panue, hateiteh Apa Cathut teh kai koe ao toe. <sup>6</sup> Ka thayung abuemlahoi na pa e thaw ka tawk e hah na panue awh. <sup>7</sup> Hot nahlangva na pa ni na dum teh, ka hmu hane aphu hah vai hra touh na dum toe. Hatei patawnae na poe hane teh Cathut ni na pasoung hoeh. <sup>8</sup> Taracak e pueng hah aphu lah ao han telah a dei teh saring pueng ni taracak lah koug a khe. Taracak hoi kâkalawt lah a khe e pueng aphu lah ao han ati ei nakunghai, saring pueng ni taracak lah koug a khe. <sup>9</sup> Hottelah, Cathut ni na pa e saringhu hah a la pouh teh kai na poe e doeh.

<sup>10</sup> Hahoi hettelah ao. Saring âvâ yawng hane a kamtawng nah ka mang lah ka khet teh, khenhaw! âvâ ka cawt e a tan hah a em lah kaawm e hoi a em taracak e hoi, a em dakdak kaawm e naw hah ka hmu. <sup>11</sup> Ka mang lah Cathut e kalvantami ni, Jakop ati teh kai ni, hi vah ka i doeh, ka ti pouh. <sup>12</sup> Ahni ni, moug na teh, khenhaw! a tan ni âvâ a yawng e pueng hah a em kaawm hoi a em taracak e hoi a em dakdak kaawm naw seng doeh. Bangkongtetpawiteh, Laban ni nang dawk a sak e naw pueng hah be ka panue. <sup>13</sup> Kai teh talung na ungnae dawk satui na awinae, kai koe lawkkam na saknae Bethel, hote Bethel Cathut lah ka o. Atu thaw nateh hete ram heh tâcawt takhai, na khenae ram koe lah ban leih, telah ati. <sup>14</sup> Rachel hoi Leah ni a pathung roi teh, apa im e maimouh hanelah ham hane hoi râw ao rah maw. <sup>15</sup> Ahni ni imyin patetlah na pouk awh toun



nahoehmaw. Bangkongtetpawiteh, na yo awh teh maimae tangka hai be a ca awh toe. <sup>16</sup> Bangkongtetpawiteh, Cathut ni maimae na pa koehei a la e naw pueng teh, maimae canaw hane doeh. Hottelah Cathut ni nang koe a dei e pueng teh sak yawkaw, telah atipouh.

<sup>17</sup> Jakop hah a thaw teh, a capanaw hoi a yu roi hah kalauk daw k a kâcu sak. <sup>18</sup> Kanaan ram a na pa Isak koe cei hanelah a saringnaw hoi hnopai a pâtung e a hmu e saringnaw pueng, Paddanaram ram e a tawn e naw pueng be a sin awh. <sup>19</sup> Laban teh amae tu muen ngaw hanelah a cei teh Rachel ni a cei teh a na pa e Terah meikaphawk hah yout a la pouh. <sup>20</sup> Jakop teh Siria tami Laban panuek laipalah, arulaho i a cei. A cei hane hah dei pouh hoeh. <sup>21</sup> Hottelah a tawn e naw pueng hoi a yawng. A thaw teh palang a raka teh Gilead mon lah pâtam laho i a cei.

### *Laban ni Jakop a pâlei*

<sup>22</sup> Jakop a yawng tie hah apâthum hnin vah Laban koe a dei pouh awh. <sup>23</sup> A hmaunawngghanaw a hrawi teh, hnin sari touh thung a pâlei teh Gilead mon daw k rek a pha awh. <sup>24</sup> Hateiteh, Siria tami Laban koe karum a mang laho i Cathut a tho teh, Jakop koe a thoe hoi hawi banghai na dei hoeh nahanelah kâhruetcu et, telah atipouh.

<sup>25</sup> Hottelah Laban ni Jakop hah rek a pha. Jakop ni rim hah mon daw k a yap teh, Laban hoi a hmaunawngghanaw ni Gilead mon daw k ahnima e rim hah a yap awh van. <sup>26</sup> Laban ni Jakop koe, na sak e hno heh bangmaw. Ka thai laipalah dung na cei awh teh, tarantuknae koe man e patetlah ka canunaw na yawngkhai. <sup>27</sup> Bang kecu daw k maw, arulaho i tapueng hoi ratoung hoi na thak thai nahanlah dei laipalah na o. <sup>28</sup> Ka capanaw hoi ka canunaw ka paco han na pasoung hoeh. Hottela e pathuna e hno hah na sak. <sup>29</sup> Kai ni koug na raphoe thai han ei teh, na pa Cathut ni karum ka mang lah, Jakop koe a thoe hoi hawi banghai na dei hoeh nahanelah kâhruetcu et, telah na dei pouh. <sup>30</sup> Na pa im na rabui poung kecu daw kvah, na ka cet e katang lah na o. Hatei bang kecu daw k maw ka cathutnaw na paru pouh awh, telah ati.

<sup>31</sup> Jakop ni a pathung teh Laban koe, na canunaw heh thama lah na lawm vai tie hah ka puen daw k doeh. <sup>32</sup> Namae cathut ka lat e teh hring sak hanh. Ka hmaunawngghanaw mithmu vah na cathut kai koe kaawm e teh kahawicalah khi nateh, lat yawkaw, telah ati. Bangkongtetpawiteh, Rachel ni a paru e hah Jakop ni la panuek hoeh. <sup>33</sup> Laban teh Jakop e rim hoi Leah e rim hoi a sannu kahni touh roi e rim koe a tawng teh, hmawt hoeh. Haho i, Leah e rim hoi a tâco teh Rachel e rim daw k a kâen. <sup>34</sup> Rachel ni meikaphawk hah a la teh kalauk ni phunae hno thung vah a hro. Laban ni rim thung naw pueng hah pheng a pâphue eiteh hmawt hoeh.

<sup>35</sup> Rachel ni a na pa koe, na hmalah ka thaw ngai tho hoeh. Ka bawipa, na lungkhuek sak hanh, ka kampheng lahun lah ao daw k doeh, telah ati. Pheng a pâphue eiteh meikaphawk hah hmawt thai awh hoeh.

<sup>36</sup> Jakop teh a lungkhuek teh, Laban hah a yue. Jakop ni Laban koe, bang e phung maw ka ek, bangmaw ka yonnae ao teh, na lungkhuek laiho i na pâlei. <sup>37</sup> Ka hnopainaw pueng be na pâphue teh, namae hnopai bangmaw na hmu. Maimouh roi teh lawkkâceng thai nahan ka hmaunawngghanaw hoi nange hmaunawngghanaw e hmalah tat. <sup>38</sup> Kum 20 totouh nang koe ka o teh, na tu hoi na hmaenaw ni ca khe laipalah awm boihoeh. Na tuhu thung e a tan hai ka cat boihoeh. <sup>39</sup> Moimatheng ni a kei e hai nang koe ka



phatkhai boihoeh. Kai ni paleipalang kahmat e yueng lah ouk ka rawng. Kanithun lah a paru e naw karum lah a paru e naw hai na patho sak. <sup>40</sup> Hettelah ouk ka o. Kanithun khumbei um hai, karum a pading nahai, rucat um hai, ka taww. Ihmu boum lah ka ip boihoeh. <sup>41</sup> Hottelah kum 20 touh thung na im vah ka o teh, na canu roi ka hni touh kutphu e daww kum 14, na thaw ka taww. Na saring kutphu daww kum 6 ka taww teh, kutphu hah vai hra totouh bout na dum. <sup>42</sup> Apa Cathut, Abraham Cathut, Isak Cathut ni a taki e hah kai koe aww hoehpawiteh, atu patenghai tak caici lah ban sak han na noe. Cathut ni karucatnae hoi ka patangnae hah a panue, paduem vah na yue toe, telah ati.

<sup>43</sup> Laban ni a pathung teh, Jakop koe, napuinaw heh kaie canunaw doeh. Tongpanaw hai kaie capanaw doeh. Saringnaw hai kaie saringnaw doeh. Na tawn e naw pueng heh kaie seng doeh. Hateiteh, sahnin vah hete ka canunaw hoi a canaw e a lathueng vah bangmaw ka sak thai han. <sup>44</sup> Hatdawkvah, nang hoi kai lawkkamnae sak roi sei. Hothateh, nang hoi kai rahak daww kapanuekkhaikung lah aww seh, telah ati.

<sup>45</sup> Hottelah, Jakop ni talung a la teh talung hah a ung. <sup>46</sup> Telah Jakop ni a hmaunawngghanaw koevah, talung pung aww haw, telah ati. Talung hah a la aww teh, a pung aww. Hot van vah bu a ca aww. <sup>47</sup> Laban ni talung pung e hah Jegarsahdutha telah a phung. Hateiteh Jakop ni Galeed telah ati.

<sup>48</sup> Laban ni hete pung e talung heh sahnin vah, kai hoi nang rahak vah, laww kapanuekkhaikung lah ao telah ati. Hatdawkvah a min lah Galeed telah ati e lah ao. <sup>49</sup> Mizpah telah hai ati aww. Bangkongtetpawiteh, Laban ni kamphei aww hnukkhu hoi BAWIPA ni maimanaw na ring lawwih. <sup>50</sup> Ka canunaw heh roedeng na poe teh, yu alouke na tawn pawiteh, apihai maimouh koe aww hoeh eiteh, khenhaw! Cathut teh nang hoi kai rahak vah, kapanuekkhaikung lah ao, telah ati. <sup>51</sup> Laban ni Jakop koe hete talung ung e hoi hete talung pung e heh kai hoi nang rahak vah ka ta e lah ao. <sup>52</sup> Patawnae poe hanelah kai ni hete talung pung e hoi talung ung e hloilah ka tho mahoe, tie hoi nang ni hai hete talung pung e hoi talung ung e hloilah tapuet hoi na tho mahoe, telah hete talung pung e hah kapanuekkhaikung lah aww nateh, hete talung ung e hai kapanuekkhaikung lah aww naseh. <sup>53</sup> Abraham Cathut, Nahor Cathut, a na pa Cathut ni maimae rahak lawkceng naseh, telah ati. Hahoi Jakop ni a na pa Isak ni taki e noe lahoi thoe a bo. <sup>54</sup> Jakop ni mon dawkvah, thuengnae a sak teh a hmaunawngghanaw hah vaiyei ca hanelah a kaw teh, vaiyei hah a ca aww. Mon dawkvah a roe aww.

<sup>55</sup> Laban teh amom vah a thaw teh, a capanaw hoi a canunaw hah a paco teh yawhaw i poe hnukkhu Laban teh a ma onae koe lah a ban.

## 32

### *Jakop pankânginae*

<sup>1</sup> Jakop teh a cei teh, Cathut e kalvantaminaw ni a dawn. <sup>2</sup> Jakop ni hmu toteh hete Cathut roenae hmuen doeh telah a titeh, hote hmuen teh Mahanaim telah min a phung. <sup>3</sup> Jakop ni Edom ram e Seir ram daww a hmau Esaw koevah a hmalah patounenaw a patoun. <sup>4</sup> Ahnimouh koe laww a thui. Ka bawipa Esaw koe hettelah na dei aww han. Na san Jakop ni hettelah ati, Laban koe imyin lah ka o teh atu totouh ka o. <sup>5</sup> Maitotan hoi, la hoi tunaw hoi, hmaenaw hoi sanpa sannunaw hah ka



tawn. Hatdawkvah, na minhmai kahawi ka hmu thai nahanlah ka bawipa koe dei pouh hanelah, taminaw ka patoun ati, telah atipouh.

<sup>6</sup> Patounenaw hah Jakop koe a ban awh teh, na hmau Esaw koe ka pha awh. Tami 400 touh hoi nang na dawn hanelah ahni hai a kamthaw, telah a dei pouh awh.

<sup>7</sup> Hatdawkvah, Jakop ni a takipoung teh kângairu hoi ao. Ama koe kaawm e taminaw hoi tuhu hoi maitohu hoi kalauknaw hah hu kahni touh lah koung a kapek. <sup>8</sup> Jakop ni Esaw a kâhmo toteh, ahu buet touh e thet pawiteh a hu alouknaw teh ka yawngkhai thai han doeh, telah ati.

<sup>9</sup> Hottelah Jakop ni, oe apa Abraham Cathut, apa Isak Cathut, oe BAWIPA na ram hoi na imthungnaw koe ban nateh, kaimouh ka thet hane katetnaw,

<sup>10</sup> na san e lathueng vah lungmanae hoi yuemkamcunae pueng na kamcu sak e thung daw koi, kahoengpounge patenghai hmu hanelah ka kamcu hoeh. Bangkongtetpawiteh, Jordan palang hah ka sonron hoi dueng ka raka teh atuteh a hu kahni touh ka pha toe. <sup>11</sup> Pahren lahoi ka hmau Esaw e kut thung roeroe hoi na rungngang haw. Bangkongtetpawiteh, napui camonaw hoi kaimouh rekrek na saueng han doeh tie hah puenghoi ka tâsue. <sup>12</sup> Bangkongtetpawiteh, nama ni, na pungdaw sak vaiteh, na ca catounnaw hah touk thai hoeh e talî daw koe e sadi yit touh na pap sak han na tie hah, telah ati.

<sup>13</sup> Hate karum teh hawvah a roe awh. Hahoi a tawn e thung daw koi hmae manu 200, hmaetan 20, <sup>14</sup> Kalauk sanu kasu lahun e 30, a canaw khuehoi maito manu 40, maitotan 10, <sup>15</sup> La manu 20, la a kum kanaw e 10, hetnaw hah a hmau Esaw koe poehno lah poe hanelah a pasoum. <sup>16</sup> Hotnaw teh a huhu lahoi aloukcalah a sannaw kut daw koe a poe. Hahoi, ahnimouh koe, ka hmalah cet awh nateh, a louklouk lah rahak kaawm lahoi cet awh, ati.

<sup>17</sup> Hahoi lam kahrawikung koe vah, ka hmau Esaw hoi na kâhmo toteh, apie taminaw maw, na maw na cei awh han, nangmae na hmalah kaawmnaw hah apinaw maw, telah na pacei awh pawiteh, <sup>18</sup> Na san Jakop e naw seng doeh. Ka bawipa poe hanelah poehno na patawn e naw doeh. Khenhaw! ama hai kaimae hnuklah ao, na ti pouh awh han, telah lawk a thui.

<sup>19</sup> Apâhni e hoi apâthum e hoi saring kakhounnaw pueng koe hai, Esaw na kâhmo torei teh, hot patetlah na dei awh han. <sup>20</sup> Hahoi khenhaw! na san Jakop teh kaimae hnukkhu lah ao na ti pouh awh han, telah lawk a thui. Bangkongtetpawiteh, ka hmalah ka cet e poehno ni a lunghin ahawi sak han. Hathnukkhu hoi a mei ka hmu han, telah pawiteh, a lungroum yawkaw han telah ati.

<sup>21</sup> Hatdawkvah, poehno hah a hmalah a ceisak. Hatei, ama teh hote karum teh tamihunaw koe a roe.

### *Cathut hoi a kâthe*

<sup>22</sup> Karum vah a thaw teh a yu roi hoi a canaw hlaibun touh hah a ceikhai teh Jabbok palang hah a raka awh. <sup>23</sup> Ahnimouh hah a ceikhai teh palang hah a raka awh. A tawn e naw pueng hai a ceikhai. <sup>24</sup> Jakop amadueng ao nah tami buet touh hoi khodai totouh a kâthe roi. <sup>25</sup> Ahni ni ka tâ mahoe tie a panue toteh, Jakop e a sumbungghru kâcunae koe a khoe pouh. Hatdawkvah Jakop teh a khokkhem. <sup>26</sup> Ahni ni, na cetsak leih, bangkongtetpawiteh kho hai a dai toe telah ati. Hateiteh, ahni ni yawhaw na poe hoehpawiteh, na cetsak mahoe telah ati. <sup>27</sup> Ahni ni na min a pimaw telah a pacei navah, Jakop telah atipouh.



<sup>28</sup> Ahni ni na min Jakop teh Jakop tet mahoe h toe, Isarel ati awh han toe. Bangkongtetpawiteh Cathut hoi tami hai na the teh na tâ toe, telah ati.

<sup>29</sup> Jakop ni pahren lahoi na min apimaw telah a pacei. Ahni ni bang kecu daw k maw ka min na pacei telah ati. Hawvah yawhawinae a poe.

<sup>30</sup> Haw e hmuen teh Jakop ni Peniel, telah ati. Bangkongtetpawiteh, Cathut teh minhmai kâhmo lahoi ka hmu teh ka hringnae hah a pâhlung telah ati. <sup>31</sup> Hahoi Penuel hoi a tâco nah, kanî a tâco, Ahni teh a kamlang teh a phaihr u kecu daw k a dongkhawt. <sup>32</sup> Hatdawkvah, Jakop e phai hru kâcunae koe a khoe pouh dawkvah, sahnin totouh Isarel catounnaw ni phai hru kâcunae koe e tharui hah cat boi awh hoe h.

## 33

### *Esaw hoi Jakop a kâhmo roi*

<sup>1</sup> Hahoi Jakop ni a radoung teh, khenhaw! Esaw teh tami 400 touh hoi a tho. Hahoi a canaw hah Leah hoi a sannu koe vah a ta. <sup>2</sup> Hahoi a sannu hoi a canaw hah hma ahman, hat hnukkhu vah Leah hoi a canaw, Rachel hoi Joseph teh a hnukteng poung lah a ta. <sup>3</sup> Ama teh hma ahman teh, a hmau teng a pha toteh talai vaisari touh a tabo.

<sup>4</sup> Hatei ama kâhmo hanelah Esaw koe a yawng teh, a kâtapam roi teh, a kâpaco roi teh, a ka roi. <sup>5</sup> Esaw ni a khet teh, napui hoi camonaw hah a hmu. Hahoi teh na thokhai e naw hah tami bangpatetnaw na maw, telah atipouh. Ahni ni Cathut ni na lungma teh na san a poe e camonaw nan ma aw atipouh.

<sup>6</sup> A sannu hah a canaw hoi a tho teh a tabut. <sup>7</sup> Leah hai a canaw hoi a tho teh a tabut. Hahoi Rachel hoi Joseph hai a tho teh a tabut rawi.

<sup>8</sup> Esaw ni saringhu a kâhmo e naw pueng hah bangtelane, telah ati. Ahnimouh ni ka bawipa na minhmai kahawi ka hmu thai nahanelah ka sak e doeh, telah ati.

<sup>9</sup> Hatei Esaw ni ka nawnggha, moikapap ka tawn, na tawn e teh nama hane ma tat leih, atipouh.

<sup>10</sup> Jakop ni nahoe h bo, na minhmai kahawi ka hmawt pawiteh, pahren lahoi na poe e poehno hah na dâw pouh loe. Cathut mei hmu lah na mei ka hmu teh, kai lathueng na lung bout ahawi. <sup>11</sup> Cathut ni na pahren teh, moi ka tawn doeh. Pahren lahoi kai ni na poe e naw hah na dâw pouh yaw kaw, telah ati. Hottelah pou a pasawt teh a dâw pouh. <sup>12</sup> Hahoi Esaw ni kamthaw awh sei. Cet awh sei, na hmalah ka cei han atipouh.

<sup>13</sup> Hatei Jakop ni ahni koe na camonaw heh ek a naw rah. Tuhu hoi maitohu hoi kaimouh koe kaawm e naw teh ca ka cun e naw lah ao dawkvah, ka bawipa nang ni na panue doeh. Hnin touh mah karanglah ka hrui pawiteh be a due awh han doeh. <sup>14</sup> Ka bawipa, pahren lahoi na sannaw hmalah cet nateh, Seir mon daw k ka bawipa nang koe pha awh hoehroukrak, ka hmalah saring ka cet e naw, a cei thai awh e patetlah camonaw hai a cei thai awh e patetlah payai lahoi ka ceikhai han, telah ati.

<sup>15</sup> Esaw ni kai koe kaawm e a tangawn kangna teh, tat awh lawisei, telah ati. Hatei, ahni ni bangmaw a panki. Ka bawipa minhmai kahawi na hmawt sak leih telah ati.

<sup>16</sup> Hottelah, Esaw teh hat hnin vah Seir mon pâtam laihoi a ban. <sup>17</sup> Jakop teh Sukoth vah a cei teh, ama hanelah im a sak teh, a saringnaw hane haiyah impui a sak pouh. <sup>18</sup> Jakop teh lungmawngcalah paddanaram ram hoi Kanaan ram e kaawm sekem khopui koe a pha teh, khopui pui hmalah



rim pui hah a sak. <sup>19</sup> Hote rim a saknae hmuen teh sekem na pa Hamor capanaw koe tangka 100 touh hoi a ran e doeh. <sup>20</sup> Hawvah, khoungeoe a sak teh, El Elohim Isarel telah min a phung awh.

## 34

### *Dinah kâhmonae*

<sup>1</sup> Leah canu Dinah Jakop e a yu ni a khe pouh e hah haw e ram daw k e tanglanaw hmu han a ngai dawkvah a pai. <sup>2</sup> Hiv tami, haw e siangpahrang Hamor capa Shekhem ni a hmu, a man teh a ikhai teh a min a mathoe sak. <sup>3</sup> A hringnae teh Jakop canu Dinah koe dueng a lungthin ao, hote tangla teh a lungpatawpoung daw k lawk kahawi hoi dueng a pato.

<sup>4</sup> Shekhem ni a na pa Hamor koe, hote tangla hah kai hane yu lah na paluen pouh, telah ati. <sup>5</sup> Jakop ni a canu Dinah hah Shekhem ni a khin sak tie hah a panue, a capanaw hah law vah saringhu hoi a i awh teh, a tho hoehroukrak teh Jakop duem ao.

<sup>6</sup> Shekhem e a na pa Hamor teh Jakop pato hanelah a cei. <sup>7</sup> Jakop capanaw ni a thai awh tahma vah law hoi a ban awh. Jakop canu a ikhai e hoi, Isarelnaw thungvah kayayeirai sak hane hoi, sak hoe hane kawi yonnae a sak dawkvah, a lungmathoe awh teh a lung pueng hoi a khuek awh.

<sup>8</sup> Hateiteh, Hamor ni a pato teh ka capa Shekhem a hringnae teh na canu e lathueng dueng doeh ao, pahren lahoi a yu hanelah paluen sak leih.

<sup>9</sup> Kâpaluen awh sei, na canunaw na paluen sak awh haw, kaimae canu hai paluen van awh.

<sup>10</sup> Kaimouh koe na o awh vaiteh ram hai moi kalen lah ao doeh. Hivah awm awh nateh hno yawt awh nateh, moikapap tawnta awh telah ati.

<sup>11</sup> Shekhem ni tangla e na pa hoi a thangroinaw koevah na pahren awh loe. Kai koe na dei awh e pueng na poe awh han.

<sup>12</sup> Aphu hoi poehno teh na hei awh e yit touh na poe awh han. Bangtelah nakunghai tangla teh yu lah na paluen sak awh telah ati.

<sup>13</sup> Hateiteh, Jakop capanaw ni a canu Dinah a khinsak awh dawkvah, Shekhem hoi a na pa Hamor teh dumnae lahoi bout a dei pouh awh.

<sup>14</sup> Ahnimouh ni ahnimanaw koe vuensom ka a hoe h e naw koe ka canu na poe thai awh mahoe h. Bangkongtetpawiteh, hot hateh kaimouh hanelah min mathoenae doeh.

<sup>15</sup> Hateiteh, hettelah lawk na kâkam awh torei dueng doeh, nangmae lawk hah ka hnâbawt awh ti, nangmouh koe e tongpa pueng hah vuensoma awh nateh kaimanaw patetlah awm awh.

<sup>16</sup> Hat toteh, kaimae canu na paluen sak vaiteh, kaimouh ni hai nangmae canunaw hai ka paluen van awh han. Hahoi nangmouh koe ka o awh vaiteh, miphun buet touh lah o awh han.

<sup>17</sup> Hateiteh, kaimae lawk na ngai awh hoe h lah, vuensom na a awh hoehpawiteh, ka canu ka la vaiteh ka cei awh han toe telah ati.

<sup>18</sup> Hahoi ahnimae lawk ni Hamor hoi Hamor capa Shekhem hah a lunghaw i sak. <sup>19</sup> Hottelah thoundoun ni Jakop canu hah a ngai lawi vah, hothateh moikasaw e lah pouk laipalah tang a sak, ahni teh a na pa imthungnaw thung dawkvah bari poung e lah ao. <sup>20</sup> Hamor hoi a capa Shekhem ni a kho kalupnae longkha koe a pha awh teh, kho thung e taminaw hoi a kâpato awh. <sup>21</sup> Hote taminaw hoi maimouh hoi karoumcalah hoi kho a sak awh. Hatdawkvah hete ram daw k kho a sak awh vaiteh, hivah hno yawt awh naseh. Bangkongtetpawiteh, ahnimouh



han ram akawpoung doeh. A canunaw hah yu lah paluen awh vaiteh, maimae canunaw hai yu lah paluen van awh naseh.

<sup>22</sup> Hateiteh, miphun buet touh lah o awh thai nahan, hettelah lawkkam awh toreï dueng doeh ahnimouh ni hnâ na bo khai hanelah ao, vuensom ka a awh e patetlah mamouh thung e tongpa pueng hai vuensoma awh sei. <sup>23</sup> Ahnimae saringnaw, hnopainaw hoi a tawnta e naw pueng teh, maimae lah be kaawm han nahoehmaw. Ahnimae lawk teh hnâbawtkhai awh sei. Hottelah hoi maimouh koe kho a sak awh han telah ati awh.

<sup>24</sup> Hamor hoi a capa Shekhem ni a dei e hah kalupnae rapan koe kâen ka tâcawt e pueng ni a hnâbokhai awh teh, longkha koe kâen ka tâcawt e tongpa pueng teh vuensom kounge a a sak awh. <sup>25</sup> Hahoi hettelah doeh. A apâthum hnin a pataw poungnae dawkJakop capanaw thung hoi kahni touh e, Dinah e a thangroi Simeon hoi Levih ni amâmouh roi e tahloi a sin roi teh arulahoi khopui a tuk roi teh tongpa pueng he a thei roi. <sup>26</sup> Hamor hoi a capa Shekhem hai tahloi hoi a thei awh. Shekhem im dawkJ Dinah hah a tâcokhai awh teh a cei awh. <sup>27</sup> Jakop capanaw ni a thei awh e naw koe a pha awh van teh, a tawncanu a kamhnawng sin dawkvah khopui teh a raphoe awh. <sup>28</sup> A tuhunaw, maitohunaw, lahunaw hoi amamouh kho e kaawm e hnopainaw hah a la pouh awh. <sup>29</sup> A hnopainaw, a canaw hoi a yunaw imthungkhu kaawm e pueng hah he a lawp awh teh be a raphoe awh.

<sup>30</sup> Jakop ni Simeon hoi Levih koevah nangmanaw ni hete ram dawkJ e taminaw hoi Kanaannaw hoi Periznaw kecu dawkvah, kai heh min mathoenae na phu sak teh, lung na mathoe sak. Kai ka younca navah kai taranlahoi kamkhueng awh vaiteh, kai hoi ka imthungnaw hah na thet awh vaiteh, he na pahma awh han doeh telah ati.

<sup>31</sup> Hateiteh, ahnimouh ni kaimae tawncanu heh, kâyawt e napui patetlah a sak han na maw telah ati awh.

## 35

### *Jakop Bethel lah bout a ban*

<sup>1</sup> Cathut ni Jakop koevah, thaw nateh Bethel kho vah cet nateh hawvaw awh, na hmau Esaw koehoi na yawng nah nang koe ka kamnuek e Cathut hanelah thuengnae khounge hah sak telah ati.

<sup>2</sup> Jakop ni a imthung hoi ama koe kaawm e tami pueng koe, nangmouh koe Jentelnaw e cathut kaawm e hah tâkhawng awh, kamthoung awh, na khohna hah kâthung awh. <sup>3</sup> Bethel vah luen awh sei. Rucatnae kâhmo awh lahun navah, na pathung teh ka cei nah tangkuem koevah, na ka awmkhaikung Cathut hanelah khounge ka sak han ati.

<sup>4</sup> Hottelah hoi miphun alouke cathutnaw e a kut dawkJ e kaawm e pueng hoi a hnânaw dawkJ a pacap awh e naw hah Jakop a poe awh. Jakop ni Shekhem teng e kathen kung rahim vah a hro awh. <sup>5</sup> A cei awh teh, Cathut takinae hah a tengpam e khonaw pueng dawkJ ao teh Jakop capa hah pâlei awh hoe. <sup>6</sup> Jakop teh ama koe kaawm e naw pueng hoi Kanaan ram Luz vah a pha awh (Luz teh Bethel doeh). <sup>7</sup> Hawvaw khounge a sak teh, haw e hmuen teh El Bethel telah ati. Bangkongtetpawiteh a hmau koehoi a yawng lahun navah hawvaw ahni koe Cathut a kamnue.

<sup>8</sup> Rebekah ka awmkhaikung Deborah hah a due teh, khounge rahim e bengkengkung rahim vah a pakawp awh. Hottelah hoi hote bengkeng e a min teh Allon Bakuth telah ati awh.



<sup>9</sup> Jakop teh Padam Aram ram lahoi a ban toteh, ahni koe Cathut bout a kamnue teh yawhawi a poe. <sup>10</sup> Cathut ni ahni koe na min teh Jakop eiteh, na min teh Jakop telah tet awh mahoeah toe, na min teh Isarel ti han toe telah ati. Hottelah hoi a min hah Isarel telah ati. <sup>11</sup> Hahoi Cathut ni ahni koevah, kai teh Athakasaipounge Cathut lah ka o. Canaw pungdaw nateh, nange miphun dawkh hoi siangpahrangnaw a tâco han. <sup>12</sup> Abraham hoi Isak koevah, ka poe e ram heh nang na poe, na catounnaw totouh ka poe telah ati. <sup>13</sup> Hattoteh Cathut ni ahni a patonae hmuén koe hoi Jakop teh a luen takhai. <sup>14</sup> A patonae hmuén koe Jakop ni talung a ung. A ung e teh talung doeh. A lathueng vah nei thuengnae hah a awi teh, satui hai a van vah a awi. <sup>15</sup> Cathut ni a patonae hmuén hah Bethel telah min a phung.

### *Rachel duenae*

<sup>16</sup> Bethel hoi a cei awh teh, Ephrath a pha awh nahanelah ahlapoung. Rachel camo o hane a pataw teh pueng hoi patawnae a khang. <sup>17</sup> Hahoi, hettelah doeh. A patawnae a khang lahun nah camo kaawm sak e ni taket hanh ca tongpa alouke na khe han dawkh doeh telah atipouh. <sup>18</sup> Hahoi, a muitha a tâco tawmlei vah, a min hah Benoni ati teh, a na pa ni Benjamin telah a phung. <sup>19</sup> Rachel a due teh Epharath ceinae lamthung dawkh a pakawp awh. <sup>20</sup> A tangkom van vah Jakop ni talung a ung teh, hothateh nout nahanelah Rachel pakawpnae tangkom lah ao.

<sup>21</sup> Isarel teh pou bout a cei teh, Mikdaleder imrasang hloilah rim a sak. <sup>22</sup> Hahoi, Isarel teh haw e ram dawkh ao lahun navah, Reuben ni a na pa e ado Bilhah a ikhai e hah Isarel ni a thai.

### *Jakop catoun 12*

<sup>23</sup> Jakop capanaw teh 12 touh a pha awh. Leah capanaw thung dawkh Reuben teh Jakop e camin la ao teh Simeon, Levi, Judah, Issakhar hoi Zebulun tinaw doeh. <sup>24</sup> Rachel capanaw teh Joseph hoi Benjamin doeh. <sup>25</sup> Rachel e a san Bilhah capanaw teh Dan hoi Naphtali doeh. <sup>26</sup> Leah e sannu Zilpah canaw teh Gad hoi Asher doeh. Hetnaw teh Paddanaram Jakop ni khe e ca tongpanaw doeh.

### *Isak Duenae*

<sup>27</sup> Jakop ni Mamre Kiriatharba (Hebron) e a na pa Isak hoi Abraham onae koe a pha. <sup>28</sup> Isak a hringyung teh kum 180 touh a pha. <sup>29</sup> Isak ni hnukteng a kâha a phout teh a hnin pakhit lahoi a due. A due toteh a huikonaw koe pakawp e lah ao van teh a capa Esaw hoi Jakop ni a pakawp roi.

## 36

### *Esaw imthungnaw*

<sup>1</sup> Hetnaw heh Esaw (Edom doeh) e catounnaw doeh. <sup>2</sup> Esaw ni Kanaan napui thung dawkh e, Hit tami Elon canu Adah hoi Hit tami Zibeon e canu Anah canu Oholibamah hoi. <sup>3</sup> Ishmael canu Basemath, Nebaioth tawncanu hah a yu lah a la. <sup>4</sup> Adah ni Esaw teh, Eliphaz a khe pouh teh, Basemath ni Reuel hah a khe. <sup>5</sup> Oholibamah ni hai Jeush, Jalam, hoi Korah hah a khe. Hotnaw teh Esaw capanaw, Kanaan kho vah a khe e naw doeh.

<sup>6</sup> Esaw ni a yu, a ca tongpanaw napuinaw, a im dawkh kaawm e pueng, Kanaan kho vah a hmu e hnopai pueng hah a ceikhai teh, a nawngha Jakop koe hoi a tâco teh ram buet touh koe a cei. <sup>7</sup> Bangkongtetpawiteh, a tawn e hno moi apap dawkvah, cungtalaw awm thai awh hoeh toe. A



saringnaw kecu dawk imyin lah onae ni cawng awh hoech toe. <sup>8</sup> Hottelah Esaw teh Seir mon dawk kho a sak. Esaw teh Edom doeh.

<sup>9</sup> Hetnaw heh Seir mon e Edomnaw kakhekung Esaw catounnaw doeh.

<sup>10</sup> Hetnaw heh Esaw catounnaw doeh, a yu Adah capa Eliphaz, a yu Basemath capa Reuel. <sup>11</sup> Eliphaz capanaw teh Teman, Omar, Zepho, Gatam hoi Kenaz tinaw doeh.

<sup>12</sup> Timna teh Esaw capa Eliphaz e a yudo lah ao teh, Eliphaz hanlah Amalek a sak pouh. Hotnaw teh Esaw e yu Adah capanaw doeh.

<sup>13</sup> Hahoi, Reuel capanaw teh Nahath, Zerah, Shammah, Mizzah lah ao awh teh, Esaw yu Basemath capanaw doeh.

<sup>14</sup> Esaw yu, Zibeon canu Anah canu Oholibamah capanaw lah ao awh teh, Esaw hanelah Jeush, Jalam, Korah a sak pouh.

<sup>15</sup> Esaw catounnaw thung dawkhobawinaw teh, Esaw e camin Eliphaz capa, khobawi Teman, khobawi Omar, khobawi Zepho, khobawi Kenaz,

<sup>16</sup> khobawi Korah, khobawi Gatam, khobawi Amalek tinaw lah ao awh teh, ahnimanaw teh Edom kho e Eliphaz koehoi khe e khobawinaw doeh.

<sup>17</sup> Hetnaw teh Esaw capa Reuel capanaw doeh. Khobawi Nahath, khobawi Zerah, khobawi Shammah, khobawi Mizzah tinaw lah ao awh teh, ahnimanaw teh Edom kho e Esaw yu Basemath capa Reuel e khobawinaw doeh.

<sup>18</sup> Esaw yu Oholibamah e capanaw hai khobawi Jeush, khobawi Jalam, khobawi Korah tinaw ao awh teh, ahnimanaw teh Esaw yu, Anah canu, Oholibamah capanaw khobawinaw doeh.

<sup>19</sup> Hetnaw heh Edom tie Esaw capa khobawinaw doeh

### *Seir capanaw*

<sup>20</sup> Hetnaw teh Hor tami Seir capa, hote ram dawkaawmnaw doeh. Lotan, Shobal, Zibeon, Anah,

<sup>21</sup> Dishon, Ezer, Dishan tinaw teh Edom ram e Seir capa Hor koehoi ka khe e khobawinaw doeh.

<sup>22</sup> Lotan capa teh Hor hoi Heman lah ao teh, Timna teh Lotan e a tawncanu doeh.

<sup>23</sup> Shobal capanaw teh Alvan, Manahath, Ebal, Shepho, Onam doeh.

<sup>24</sup> Zibeon capanaw teh Aiah hoi Anah doeh, Anah teh a na pa Zibeon e la a khoum navah kahrawng e tuikhu kahmawtkung doeh.

<sup>25</sup> Anah capanaw teh Dishon hoi Anah canu Oholibamah tinaw doeh.

<sup>26</sup> Hahoi Dishon capanaw teh Hemdan, Eshban, Ithran hoi Keran doeh.

<sup>27</sup> Ezer capanaw teh Bilhan, Zaavan hoi Akan doeh.

<sup>28</sup> Dishan capanaw teh Uz hoi Aran doeh.

<sup>29</sup> Khobawinaw lah khobawi Lotan, khobawi Shobal, khobawi Zibeon, khobawi Anah.

<sup>30</sup> khobawi Dishon, khobawi Ezer, khobawi Dishan lah ao awh teh, ahnimanaw teh Seir kho vah khobawi lah kaawm khobawinaw doeh.

### *Edom siangpahrangnaw*

<sup>31</sup> Hetnaw teh siangpahrang ni Isarel miphun a uk hoehnahlan e Edom siangpahrangnaw doeh.

<sup>32</sup> Beor capa Bela ni Edom vah siangpahrang a tawknawah, khopui min teh Dinnabah doeh.

<sup>33</sup> Bela a due hnukkhu, Bozrah tami Zerah capa Jobab ni a yueng lah a uk.

<sup>34</sup> Jobab a due hnukkhu, Teman kho e Husham ni a uk.



<sup>35</sup> Husham a due hnukkhu, Bedad capa Hadad, Moab law vah Midian-naw kathetkung ni a yueng lah a uk, a khopui min te Avith doeh.

<sup>36</sup> Hadad a due hnukkhu, ahni yueng lah Masrekah tami Samlah ni a uk.

<sup>37</sup> Samlah a due hnukkhu, ahni yueng lah, tui teng Rehoboth tami Saul ni a uk.

<sup>38</sup> Saul a due hnukkhu, ahni yueng lah Akbor capa Baalhanan ni a yueng lah a uk.

<sup>39</sup> Akbor capa Baalhanan a due hnukkhu, ahni yueng lah Hadad ni a uk. Hatnavah khopui min teh Pau doeh. Hahoi, a yu min teh Mehetabel, Mezahab canu Matred canu doeh.

<sup>40</sup> Hahoi hetnaw heh a imthung hoi amamouh hoi, min paruinae patetlah Esaw capa khobawinaw e minnaw teh: khobawi Timna, khobawi Alvah, khobawi Jetheth,

<sup>41</sup> khobawi Oholibamah, khobawi Elah, khobawi Pinon,

<sup>42</sup> khobawi Kenaz, khobawi Teman, khobawi Mibzar,

<sup>43</sup> khobawi Magdiel, khobawi Iram doeh. Hetnaw teh a tawn awh e ram dawkvah, a khosaknae lahoi Edom catoun khobawinaw doeh. Esaw teh Edom miphun kakhekung doeh.

## 37

### *Joseph ni mang a sak*

<sup>1</sup> Jakop teh a na pa imyin lah a onae Kanaan ram dawk kho a sak.

<sup>2</sup> Hethateh Jakop catoun e lairui doeh. Joseph teh a kum 17 touh a pha nah a hmaunaw hoi saringnaw a khom awh. Ahni teh a camo rah dawkvah, a na pa e yu Bilhah hoi Zilpah capanaw koevah ao, hahoi Joseph ni hnokahawi hoeah a sak awh e kamthang kathout hah a na pa koe ouk a dei pouh.

<sup>3</sup> Isarel ni Joseph teh a matawng nah a khe e lah ao dawkvah, a canaw pueng hlak a lungpataw hnawn, angkidung a phun aloukcalah a khui pouh teh a poe. <sup>4</sup> A na pa ni a hmaunaw hlak a lungpataw hnawn tie hah a panue awh. Hottelah hoi ahni teh, hmawt ngai awh hoeah. Lawk kahawi hoi hai pato ngai awh hoeah.

<sup>5</sup> Joseph ni mang a sak teh a hmaunaw koe a dei pouh dawkvah, hoe hmawt ngai awh hoeah. <sup>6</sup> Ahni ni ahnimanaw koe pahren lahoi mang ka sak e hah thai awh haw. <sup>7</sup> Law vah cabong hah a thaw awh teh kaie cabong hai a thaw teh a kangdue. Hahoi thai awh haw, nangmae cabongnaw ni a kalup awh teh, kaie cabong hah a bawk awh, telah ati.

<sup>8</sup> A hmaunaw ni ahni koevah, nang ni kaimouh na uk katang han na maw. Nang heh kaimae lathueng vah kâ na tawn han na maw, telah atipouh awh. Hottelah hoi a mang hoi a dei e lawk kecu dawkvah, hoe a hmuhma awh.

<sup>9</sup> Hahoi mang alouke e bout a sak teh, a hmaunaw koevah bout a dei pouh. Thai awh haw, mang bout ka tawn. Kanî hoi thapa hoi âsinaw 12 touh ka hmalah be a tabut awh telah ati.

<sup>10</sup> A na pa hoi a hmaunaw koe a dei pouh navah, a na pa ni a yue teh, mang na sak e teh bangpatete mang han na maw. Kai hoi na manu hoi na hmaunaw ni na hmalah ka tabut han na maw telah ati. <sup>11</sup> A hmaunaw ni ahni teh a ut awh. Hateiteh, a na pa ni hno kaawm e hah a lung dawk a pâkuem.

*A hmaunaw ni Joseph a yo awh*



<sup>12</sup> A hmaunaw teh Shekhem vah a na pa e saring khoun hanelah a cei awh. <sup>13</sup> Isarel ni Joseph koe vah na hmaunaw ni Shekhem doeh saring a khoun awh khe, tho haw, ahnimouh koe na patoun han telah ati. Ahni ni na patoun yawkaw telah ati.

<sup>14</sup> A na pa ni ahnimouh koe cet nateh na hmaunaw hah a dam awh maw, saringnaw a dam maw, panue hanelah kamthaw haw, haw e kamthang kai koe bout na dei pouh han telah ati. Hottelah hoi Hebron tanghling koehoi a patoun teh Shekhem vah a pha.

<sup>15</sup> Law dawkwoutsout a kâhlai e hah tami buet touh ni a hmu teh ahni ni, bangmaw na tawng telah a pacei.

<sup>16</sup> Ahni ni, ka hmaunaw doeh ka tawng pahren lahoi saringhu a khounnae na dei pouh haw telah ati.

<sup>17</sup> Ahni ni hote hmuen koehoi yo a cei awh toe. Dothan vah cet sei ati awh e hah ka thai, telah ati. Hottelah hoi Joseph ni a hmaunaw teh a pâlei teh Dothan vah a hmaunaw a hmu.

<sup>18</sup> Ahnimouh ni ahlapoungnae koehoi a hmu awh teh, ahni koe a pha hoehnahlan vah, ahni thei nahane lah a kâdei awh toe. <sup>19</sup> Thai awh haw, mang ka sak e tami a tho toe. <sup>20</sup> Tho awh thei awh vaiteh, moimatheng ni a kei telah tet pouh awh sei. Hahoi a mangnaw teh bangne tie hah panue awh han telah buet touh hoi buet touh lengkaleng a kâti awh.

<sup>21</sup> Hateiteh, Reuben ni a thai teh ahnimae kut dawkw hoi a rungngang teh, thet lah thet awh hanh sei, telah ati. <sup>22</sup> Hateiteh, Reuben ni a kut thung hoi a rungngang teh a na pa koe a bankhai thai nahan, thet awh hanh, kahrawng e tangkom thung pabawt awh nateh na kut teh tha awh hanh telah ati.

<sup>23</sup> Joseph ni a hmaunaw koe a pha toteh, angkidung em kaawm e hah a rading pouh awh. <sup>24</sup> A ceikhai awh teh tangkom dawkw a pabo awh. Tangkom dawkw tui awm hoe. <sup>25</sup> Hottelah rawca ca hanelah, a tahung awh. Hahoi a radoung awh teh, Ishmael kahlawng ka cet e Gilead ram lahoi amamae kalaug hoi hmu itui hoi, thing tapi, murah phu e hoi Izip ram lah cei hanelah kamthawnaw hah a tho awh.

<sup>26</sup> Judah ni a hmaunawngghanaw koe maimae nawnggha thei awh teh, a thipalawng e paphat awh pawiteh, bangmaw cungkeinae kaawm han. <sup>27</sup> Tho awh, a lathueng kut tha laipalah Ishmaelnaw koe yawt awh sei. Bangkongtetpawiteh, ahni teh nawnggha maimae misa hoi kâkuen e doeh, telah ati teh, a hmaunawngghanaw ni a hnâ rip a bo khai awh. <sup>28</sup> Hottelah hoi Midian hno kayawtnaw teh a tho awh teh, Joseph teh tangkom dawkw hoi a rasa awh teh, Ishmaelnaw koe tangka 20 touh lah a yo awh. Hahoi Joseph teh Izip ram lah a ceikhai awh. <sup>29</sup> Hottelah hoi Reuben teh tangkom koe a tho teh, khenhaw! Joseph teh tangkom thung la awm hoe toe, hat toteh a khohna hah a ravei. <sup>30</sup> Hahoi a hmaunawngghanaw koe a cei teh, camo awm hoe toe. Kai teh na lane ka cei han toung telah ati. <sup>31</sup> Joseph e angkidung hah a la awh teh hmaetan a thei awh teh a thi dawkw a ranup awh. <sup>32</sup> Em la e angkidung hah a patawn awh teh, a na pa koe a poe awh. Hethateh ka hmu awh e doeh. Na capa e angkidung na ou, khenhaw! hottelah ati awh.

<sup>33</sup> A na pa ni a nout teh, ka capa e angkidung doeh. Moimatheng buetbuet touh ni a kei toung hah tayaw. Joseph hah vekrasen lah a hruek toe telah ati. <sup>34</sup> Hottelah hoi Jakop teh a khohna a ravei teh, buri a kâkhu laihoi a hnin moikasaw lah a capa hah a khui. <sup>35</sup> A capanaw pueng hoi a canunaw pueng hah ahni a lungpahawi hanelah a thaw awh, hateiteh, a na pa ni a lungpahawinae ngai pouh hoe. Khui nalaihoi phuen koe ka



capa koevah ka cei han toe telah ati. Hottelah hoi a na pa teh ahni a pouk lawi a khui a ka.

<sup>36</sup> Midiannaw ni Joseph teh Izip ram dawk a kâenkhai awh teh, Faro kut rahim e imkaringkung Potiphar koevah a yo awh.

## 38

### *Judah hoi Tamar*

<sup>1</sup> Hatnae tueng dawkvah, Judah teh a hmaunawnggha koehoi a cei teh, Adullam tami Hirah koevah ao. <sup>2</sup> Judah ni haw vah, Kanaan tami Shua canu hah a hmu. Ahni hah a paluen teh a ikhai. <sup>3</sup> Camo a vawn teh ca tongpa a khe. Judah ni a min lah Er a phung. <sup>4</sup> Camo bout a vawn teh ca tongpa bout a khe. A manu ni a min lah Onan telah a phung. <sup>5</sup> Ca tongpa alouke bout a khe teh, a min lah Shelah telah a phung. Hote ca tongpa a khe lahun navah, Judah teh Kezib vah ao.

<sup>6</sup> Judah ni a camin Er hah a yu a paluen pouh teh, a min teh Tamar doeh. <sup>7</sup> Hateiteh, Judah e camin teh BAWIPA e mithmu vah tamikathout lah ao dawkvah, BAWIPA ni ahni teh a thei. <sup>8</sup> Judah ni Onan koevah, na hmau e yu hah ipkhai nateh, na hmau e cati hah pout hoeh nahanlah sak pouh, telah ati. <sup>9</sup> Onan ni a canaw hah mae ca lah awm mahoe hie a panue dawkvah, a hmau e a yu a ikhai navah, a ca khe hoeh nahanlah alawilah atui yout a tâco sak. <sup>10</sup> A sak e hno ni BAWIPA a lunghawi sak hoeh dawkvah, Onan hai a thei.

<sup>11</sup> Judah ni a langa Tamar koevah, ka capa Shelah heh a cue hoehroukrak na pa im dawk lahmai lah awm ei, telah hoehpawiteh, ahni hai a hmaunaw patetlah a due payon han doeh telah ati. Tamar ni a cei teh a na pa im vah ao. <sup>12</sup> Atueng moi a ro hnukkhu, Judah e yu Shua canu teh a due. Judah teh a lungpahawi hnukkhu, Timnah kho dawk e tumuen kangawnaw koe vah, amae a hui Adullam tami Hirah hoi reirei a ceitakhang roi.

<sup>13</sup> A langa Tamar koevah, na pa teh tu muen ngaw hanelah Timnah vah cei hane a kâcai telah a dei pouh awh. <sup>14</sup> Ahni ni a lahmainae hni hah a rading teh, a minhmai a ramuknae hoi a kâramuk, a tak a kâyo teh Timnah kho longkha koelah a tahung. Bangkongtetpawiteh, Shelah teh a cue eiteh, a na pa ni a yu lah paluen pouh ngai hoeh. <sup>15</sup> Judah ni a hmu toteh, a minhmai a kâramuk dawkvah, kâyawt e lah a pouk.

<sup>16</sup> Hottelah hoi lam teng e napui a onae hah a pâtam teh, tho haw pahren lahoi rei ip roi sei telah ati. Bangkongtetpawiteh, a langa tie panuek hoeh. Napui ni na ipkhai pawiteh bangmaw na poe han telah ati.

<sup>17</sup> Ahni ni saringhu thung e hmaeca na patawn han telah ati, Hottelah hoi napui ni hot hah na patawn hoehnahlan vah na pâhung hane kawu na poe han na ou, telah ati. <sup>18</sup> Ahni ni bangmaw ka hung han telah telah ati. Napui ni na min na thutnae, arui hoi na sin e na sonron telah ati. Hottelah hoi a poe teh a ikhai, ahni teh camo a vawn.

<sup>19</sup> A thaw teh a minhmai ramuknae a hawng teh a lahmainae khohna hah bout a kho. <sup>20</sup> Judah teh napui koe hung e hno hah a ratang hanelah a hui Adullam koe vah hmaeca hah a patawn. Hateiteh, ahni ni napui hah hmawt hoeh. <sup>21</sup> Hottelah hoi haw e hmuen koe kaawm e taminaw koe lam teng e Enaim tak ka kâyawt e napui hah nâmau ao telah a pacei, ahnimouh ni hie hmuen koe tak ka kâyawt e awm hoeh telah ati awh.

<sup>22</sup> Judah koe a ban teh, ahni teh ka hmawt thai hoeh. Haw e Taminaw ni hie hmuen dawk tak ka kâyawt e awm boihoe telah ati awh, telah ati.



<sup>23</sup> Judah ni lat awh yawkaw naseh, hottelah hoehpawiteh, yeirai po payon vaih, khenhaw! hmaeca heh na patawn ei, ama na hmawt ka lawn hoeh, telah ati.

<sup>24</sup> Thapa yung pâthum hnukkhu vah ahnimouh ni Judah koe na langa Tamar teh kâyo hloilah cata a phu telah a dei pouh awh. Judah ni alawilah tâcawtkhai awh nateh hmaisawi e lah awm naseh telah ati.

<sup>25</sup> A tâcokhai awh lahun navah, Tamar ni hete hno katawnkung koe hoi nahoehmaw camo ka vawn telah a na pa koe Tami a patoun. Napui ni vah pahren lahoi hete min thutnae hoi arui hoi sonronnaw heh, apie ne, kahawicalah khenhaw! telah ati.

<sup>26</sup> Judah ni vah, hnopainaw teh amae lah ao tie a panue teh, ahni teh kai hlak atanghnawn toe. Bangkongtetpawiteh ka capa Shelah hane a yu lah ka lat pouh kalawn hoeh toe telah ati. Hahoi Judah ni ahni teh bout ipkhai hoeh toe.

<sup>27</sup> Hahoi a vawn a pataw lahun navah, camo im daw k camo samphei roi e ao. <sup>28</sup> Camo a khe navah, capa buet touh ni a kut a tâco sak. Camo ka khesakkung ni hethah a hmaloe ka khe e telah a kut daw k a kuet teh hlangpawi a yeng pouh awh. <sup>29</sup> A kut hah bout a kâhno toreih teh, pouk laipalah a nawngah hah a khe. Camo ka khe sak e naw ni, bangkongmaw khe na hanelah namahoima na sak, telah ati awh. Hatdawkvah, a min lah Perez telah a phung awh. <sup>30</sup> Hathnukkhu a hmau e a kut daw k hlangpawi yeng e a khe teh a min lah Zerah telah a phung.

## 39

### *Joseph hoi Potiphar*

<sup>1</sup> Joseph teh Ishmael taminaw koe Izip ram a thokhai awh teh, Izip siangpahrang Faro kut rahim imkaringkung lah kaawm e Potiphar ni a ran.

<sup>2</sup> BAWIPA teh Joseph koe ao teh, ahni teh a lam ka cawn e tami lah ao teh Izip tami a bawipa im vah ao. <sup>3</sup> A bawipa ni BAWIPA teh ahni koe a o, a hnosak tangkuem daw k a lamcawn tie hah a panue. <sup>4</sup> Joseph teh a bawipa e a lungyouk lah thaw ouk a taw k. A bawipa ni a imkaringkung kacue lah a ta teh, a tawn e hnonaw pueng ahnie kâtawnnae rahim koun g a ta pouh.

<sup>5</sup> Hahoi, imkaringkung lah a ta hnukkhu, BAWIPA ni Joseph pawlawk hoi Izip imthungkhu hah yawhawi a poe. <sup>6</sup> A tawn e pueng hah Joseph kut daw k be a ta pouh teh, a ca e vaiyei hloilah teh ahni koe kaawm e hnonaw pueng hah be a poe. Joseph teh a tungtang kahawi e lah ao teh a mei hai a hawi.

<sup>7</sup> Hathnukkhu, a bawipa e yu ni Joseph hah a noe teh, na ipkhai leih ti hoi pou a pasawt.

<sup>8</sup> Hatei ngai pouh hoeh. A bawipa e yu koe vah, khenhaw! ka bawipa ni hete im dawkvah, bang hno maw kaawm tie panuek hoeh, a tawn e naw pueng ka kut daw k koun g a ta. <sup>9</sup> Hete im daw k kai hlak ka len e apihai awm hoeh. A yu na tho patetlah nang hloilah kai hane a pasoung hoeh e banghai awm hoeh. Hatdawkvah, hethloilah kalen e thoenae hoi yonnae heh Cathut taranlahoi bangtelamaw khuet ka sak han vaw, telah ati.

<sup>10</sup> Hahoi, hnin touh hnukkhu hnin touh, Joseph hah a pasawt nakunghai a ikhai hane teh ngai pouh hoeh. <sup>11</sup> Hatei, a hnin hnin touh teh, Joseph imthungkhu thaw taw k hanelah a kâen teh, hatnae tueng daw k imthungkhu tami buet touh hai la awm hoeh. <sup>12</sup> Hahoi teh, napui ni na ipkhai leih telah a angki daw k a kuet pouh teh, a kut daw k angki pak rading teh alawilah a yawng takhai.



<sup>13</sup> Hahoi teh, a angki a kut dawк pak a rading teh a yawng takhai tie a panue toteh, <sup>14</sup> a im kaawmnaw hah a kaw teh, khenhaw! kai na kaya sak hanelah hete Hebru tami ni kai na yonkhai hanelah imthungkhu na kâen sin teh thayung hoi ka hram pouh. <sup>15</sup> Hahoi, ka lawk hoi thayung hoi ka hram toteh, kama koe a angki pak a rading teh a yawng takhai telah ati.

<sup>16</sup> A bawipa a tho hoehroukrak a hnicu teh ama koevah pou a hruек. <sup>17</sup> Hahoi teh a vâ koe telah a dei pouh. Hete Hebru tami san kai koe na thokhai e heh, yeiraipo sak hanelah hoi kai koe na kâen sin. <sup>18</sup> Hahoi, lawk hoi tha hoi ka hram tahma vah, a khohna a yawng takhai telah ati.

<sup>19</sup> Hahoi, a bawipa koe na san ni hettelah na sak tie a yu ni a dei e lawk hah a thai toteh a lungkhueк. <sup>20</sup> Hottelah a bawipa ni Joseph a ceikhai teh thongim siangpahrang ni tami khik katek hoi ouk tanae thongim thung a paung awh.

### *Joseph thongim a bo*

<sup>21</sup> Hateiteh, BAWIPA teh Joseph koe ao teh, a lathueng vah lungmanae a tawn teh thongim ka ring e hmalah minhmai kahawi a hmu sak. <sup>22</sup> Hahoi teh, thongim karingkung ni thongkabawtnaw pueng hah Joseph kut dawк kounг a ta teh, haw e sak e naw teh Joseph e tawк sak e lah kounг a coung. <sup>23</sup> BAWIPA teh ahni koe ao teh, a lamcawn sak dawкvah, thongim karingkung ni Joseph e kâtawnnae rahim kaawmnaw pueng hah banghai khen awh hoeh toe.

## 40

### *Joseph ni mang a deicai*

<sup>1</sup> Hathnukku hoi teh, Izip siangpahrang misur kapoekung hoi vaiyei kasakkung roi teh Izip siangpahrang koe lungyouк hoeh e lah ao roi. <sup>2</sup> Hatdawкvah, Faro teh a sannaw kahrawikung kacue kahni touh, misur kapoekung kacue hoi vaiyei kasakkungnaw dawк kacuepoung koe a lungphuen. <sup>3</sup> Hottelah ama karingkung Joseph a bonae thongim koe a pabo awh. <sup>4</sup> Im karingkung kacue ni ahnimouh teh Joseph kut dawк hnin moikasaw lah a poe teh thaw a tawк roi.

<sup>5</sup> Thongim thung katek laihoi kaawm roi e Izip siangpahrang misur kapoekung hoi vaiyei kasakkung roi teh tangmin buet touh dawк mang alouklouke reirei a sak roi. <sup>6</sup> A tangtho vah Joseph teh ahnimouh koe a kâen van teh, a kâhmo, hahoi a khet navah a minhmai a mathoe roi. <sup>7</sup> Hottelah Faro e im karingkung bawipa im e thongim ka bawт e tami koevah, bangkongmaw sahnin na minhmai a mathoe roi telah a pacei.

<sup>8</sup> Ahnimouh roi ni mang ka sak roi, ka deicaikung apihai awm hoeh telah ati roi. Joseph ni ahni koe mang dei thainae teh Cathut e nahoehmaw. Pahren lahoi na dei pouh haw atipouh.

<sup>9</sup> Hottelah misur kapoenaw kahrawikung ni a mang teh Joseph koe a dei pouh. Ahni koe ka mang lavah khenhaw! ka hmalah misurkung a la o.

<sup>10</sup> Misurkung dawкvah a cakang kathum touh ao. Ka dawn e patetlah ao teh, a peinau hah a pei. Hote a peinau ni ka hmin e misur paw a tâco sak. <sup>11</sup> Hahoi Faro manang hah ka kut dawк ao teh, misur paw hah ka khi. Faro e manang dawк kasu teh manang hah Faro kut dawк ka poe telah ati.

<sup>12</sup> Joseph ni ahni koe hettelah han doeh. A cakang kathum touh e teh, hnin thum touh doeh. <sup>13</sup> Hnin thum touh thung Faro ni na tawm takhang vaiteh, na tawк e thaw hah bout na tawк sak han. Hottelah misur



kapoekung lah na o navah, ouk na poe e patetlah Faro manang hah a kut dawk bout na poe han. <sup>14</sup> Hatei, onae hmuen kahawi dawk na pha navah, kai na pahnim hanh lah a. Pahren lahoi na pahrennae hah kai koehai kamnuék sak. Faro koe kaie konglam na dei pouh van lah a, hete im dawk hoi na tâcawt sak van loe. <sup>15</sup> Bangtelah tetpawiteh, Hebru taminaw e ram thung hoi tami ni arulahoi na paru awh e doeh. Hete ram thung dawk hoi thongim thung a thung patuen lah bo nahan hai banghai ka sak hoeh ei nan heh ma telah ati.

<sup>16</sup> Vaiyei ka sak e ni hete deicainae hah ahawi tie a panue toteh, Joseph koevah, kai hai mang ka sak van. Khenhaw! ka lû dawk ka pangaw e takho yung thum touh ao. <sup>17</sup> Avanelah kabang e takho dawk, Faro hanlah kahawi e vaiyei phunkuep ao. Hahoi ka lû dawk ka thueng e takho dawk e vaiyei hah tava ni a la ca telah ati.

<sup>18</sup> Joseph ni, takho yung thum touh teh hnin thum touh doeh, <sup>19</sup> Hnin thum touh thung Faro ni na lû tâtueng vaiteh, thing dawk bang e lah na o han. Hahoi tavanaw ni na moi hah a ca han telah ati. <sup>20</sup> Hahoi, apâthum hnin Faro khenae hnin a pha toteh, ahni ni a sannaw pueng hanelah buvennae paw i sak pouh. Hahoi misur kapoekung hoi vaiyei kasakkung naw e lû teh, a tawmrasang. <sup>21</sup> Joseph ni ahnimouh koe a deicai pouh e patetlah misur kapoekung teh amae tawk tangcoung e misur hah bout a poe teh, Faro kut dawk manang hai bout a poe. <sup>22</sup> Vaiyei kasakkung teh thing dawk a vo awh. <sup>23</sup> Hatei, misurtui kapoenaw kahrawikung ni Joseph hah panuek laipalah yout a pahnim.

## 41

### *Faro e mang*

<sup>1</sup> Kum hni touh a loun hnukkhu, Faro ni mang a sak teh, thaihaw, palang rai vah a kangdue. <sup>2</sup> A meikahawi ni teh kathâw e maitomanu hah tui thung hoi a tâco teh pho um vah apa. <sup>3</sup> Hahoi khenhaw! maitomanu sari touh, a meikahawi hoeh ni teh kamsoe e hah tui thung hoi a tâco van teh palang rai vah kangdout e maitomanu teng vah a kangdue. <sup>4</sup> Maitomanunaw a meikahawihoei ni teh kamsoe e naw ni a meikahawi ni teh kathâw e naw hah koug a ca awh. Hahoi teh Faro teh vak a kâhlaw. <sup>5</sup> Hahoi bout a i teh mang bout a sak. Khenhaw! cakung buet touh dawk kahawi ni teh kalen e cavui sari touh a tâco. <sup>6</sup> Hahoi khenhaw! kathoenca ni teh Kanîtholae kahli ni remke lah a hman e cavui sari touh bout a tâco. <sup>7</sup> Cavui kathoencae sari touh ni, cavui kalen ni teh kahawi e sari touh hah koug a payawp awh. Faro vak a kâhlaw teh khenhaw! mang lah ao.

<sup>8</sup> A tangtho tore i, a muitha a lungpuen teh tami a patoun. Izip ram e mitpaleikathoumnaw hoi tami lungang pueng a kaw teh Faro ni a mang hah a dei pouh. Hahoi Faro hanelah ka deicai thai e buet touh boehai awm hoeh.

<sup>9</sup> Hatnavah misurtui kapoenaw kaukkung ni Faro koevah, sahnin ka yonnae ka kâpanue. <sup>10</sup> A sannaw koevah, Faro a lungkhuek teh karingkungnaw kaukkung im vah kai hoi vaiyei kasakkungnaw kaukkung thongim ka bo roi navah, <sup>11</sup> mang reirei ka sak roi. Kaimouh roi e mang hah deingainae kâvan hoeh e doeh. <sup>12</sup> Hawvah kaimouh karingkung e san Hebru rami buet touh ao teh mang hah ka dei pouh roi. Ahni ni mang heh a deicai teh ka mang roi e patetlah a deicai van. <sup>13</sup> A deicai e patetlah mang teh reirei a tâco van. Kai teh thaw bout tawk sak lah ka o teh, ahni



teh kai thi sak e lah ao telah ati. <sup>14</sup> Hat toteh, Faro ni Joseph hah tang a kaw sak. Ka rang poung lah thongim thung a thung patuen daw k e a rasa awh teh, a pâkhamuen a ngaw hnukkhu a khohna a kâthung teh Faro koe a kâen. <sup>15</sup> Faro ni Joseph koe mang ka sak teh ka deicaikung apihai awm hoeh. Hatei nang ni mang heh na thaipanuek teh, na deicai thai telah ayânaw ni dei e hah ka thai telah ati.

<sup>16</sup> Joseph ni Faro koe hot teh kai koe awm hoeh. Cathut ni Faro koe roumnae lahoi a deicai han doeh telah ati. <sup>17</sup> Faro ni Joseph koe ka mang lavah khenhaw! palang rai ka kangdue. <sup>18</sup> Hahoi khenhaw! maitomanu a meikahawi ni teh kathâw e sari touh tuithung hoi a tâco teh pho um vah a pâ. <sup>19</sup> Hahoi alouke maitomanu a meikamathout niteh, ka kamsoe e hot patet e meimathout teh Izip ram pueng daw k patenghai ka hmu boihoeh e hah a tâco. <sup>20</sup> Hahoi a mei kathout ni teh ka kamsoe e maitomanunaw ni kathâw e maitomanunaw hah koung a ca awh. <sup>21</sup> Koung a ca awh hnukkhu patenghai yah apinihai a ca awh tie panuek kalawn hoeh. A ca awh hoehnahlan e patetlah a mei a mathoe awh mingming, hahoi vak ka kâhlaw.

<sup>22</sup> Hahoi ka mang lavah khenhaw! Cakung buet touh dawkvah, cavui kahawipoung e sari touh a tâco. <sup>23</sup> Hahoi khenhaw! cavui sari touh kanyai ni teh kathoengcae, Kanitholae kahlî ni remke lah a hman e a tâco e hah bout ka hmu. <sup>24</sup> Cavui kathoutnaw ni cavui kahawinaw sari touh hah koung a ca awh. Hote mang hah mitpaleikathoumnaw ka dei pouh ei, apinihai deicai thai awh hoeh, telah a dei.

<sup>25</sup> Joseph ni Faro koe Faro nange mang heh buet touh doeh. Cathut ni a sak hane hah Faro koe na panue sak e doeh. <sup>26</sup> Meikahawi e maitomanu sari touh teh kum sari touh doeh. Kahawi e cavui sari touh hai kum sari touh doeh. Mang teh buet touh doeh. <sup>27</sup> Hahoi a hnukkhu vah ka tâcawt e a mei kathout ni teh ka kamsoe e maitomanu sari touh hai kum sari touh doeh. Cavui sari touh Kanitholae kahlî ni remke lah a hman e hai kum sari touh doeh. <sup>28</sup> Hetheh, Faro koe ka dei e Cathut ni a sak hane Faro a panue sak e doeh. <sup>29</sup> Izip ram vah khobunae kum sari touh ao han. <sup>30</sup> Hatei, hat hnukkhu takangnae kum sari touh bout ao han. Hottelah takang ni ram teh voutthoup lah ao sak han dawkvah, khobunae kum pueng hah Izip ram teh pahnim e lah ao han. <sup>31</sup> Rek ka tho e takang teh puenghoi a pataw han dawkvah, khobunae kum hah pahnim lah ao han. <sup>32</sup> Hahoi mang vai hni totouh Faro a mangsaknae teh hete hno kecu daw k doeh. Sak hane teh Cathut ni a caksak teh Cathut roeroe ni karanglah a pha sak han.

<sup>33</sup> Hatdawkvah, Faro ni tami buet touh a lungkaang e hoi kho ka pouk thai e tawng nateh Izip ram vah kahrawikung lah awm sak naseh. <sup>34</sup> Faro ni hothel sak naseh, ram thung vah Izip ram cakang hah pung panga pung touh pâtung naseh. <sup>35</sup> Ahnimouh ni khobu kum cakang pung hah pâkhueng vaiteh Faro kâtawnnae rahim vah o hanelah kho tangkuem hmalah a hane pâtung naseh, khenyawn awh naseh. <sup>36</sup> Hottelah takang kecu daw k ram a rawk hoeh nahanlah, takangnae kum kum sari touh Izip ram ka phat hane dawkvah, kâhruetcuat lah ao han, telah ati.

### *Joseph kahrawikung lah a coung*

<sup>37</sup> Hottelah pouknae a poe e hah, Faro hoi a sannaw pueng ni ahawi rip ati awh. <sup>38</sup> Hottelah Faro ni a sannaw koe het patet e Cathut Muitha onae tami heh hmu thai awh han na ou telah ati. <sup>39</sup> Faro ni Joseph



koe Cathut ni hote hnonaw pueng hah na panue sak dawkvah, nang patetlae tami lungkaang hoi hno kaawm hane oang ka panuek e awm hoeh. <sup>40</sup> Nang teh kaie imthung karingkung lah na o han, ka taminaw pueng hah nange kâ lahoi ao awh han, bawitungkhung dueng hah nang hlak kai bet ka lenhnawn han telah ati. <sup>41</sup> Faro ni Joseph koe kenhaw! Izip ram pueng daw kâhrawikung lah na ta toe telah ati. <sup>42</sup> Faro ni kutnoutthutnae kuthrawt hah a rading teh, Joseph kut daw kâ buet pouh, hni loukloukkaang e hoi sak e hah a kâkhu sak teh a lahuen daw kâ sui dingyin hah a awi sak. <sup>43</sup> A tawn e leng kahni touh daw kâ kâcui sak teh, a hmalah tabut awh, telah a hram awh. Hottelah Izip ram thung kâhrawikung lah a coung sak. <sup>44</sup> Faro ni Joseph koevah, kai teh Faro doeh, nange kâpoe laipalah Izip ram thung pueng a kut hai thoseh, a khok hai thoseh, dâw thai mahoe telah ati. <sup>45</sup> Faro ni Joseph hah Zaphnath-Paaneah telah min a poe. On kho e vaihma Potiphar canu Asenath hah a yu lah a paluen pouh awh. Hahoi Joseph teh Izip ram kaukkung lah ahni koehoi a cei. <sup>46</sup> Joseph teh Izip siangpahrang Faro hmalah a kangdue navah, kum 30 touh doeh Joseph teh Faro koehoi a tâco teh Izip ram pueng daw kâ cei.

<sup>47</sup> Khobu kum kum sari touh thung talai ni puenghoi a pawhik a tâco sak. <sup>48</sup> Izip ram e khobu kum kum sari touh thung e cakang pueng hah a pâkhueng teh kho tangkuem tengpam e cakang hah a hmouk sak. <sup>49</sup> Joseph ni cakang hah tali teng e sadi patetlah kapappoung lah a pâtung, touk patenghai touk ngai hoeh toe, bangkongtetpawiteh, touklek hoeh toe.

<sup>50</sup> Hahoi takang a tho hoehnahlan vah Joseph ni capa kahni toun a tawn. Hotnaw teh On kho vaihma Potiphar canu Asenath ni a khe pouh e naw doeh. <sup>51</sup> Joseph ni a camin hah Manasseh telah a phung. Bangkongtetpawiteh, Cathut ni ka tawntamnae hoi apa imthung pueng na pahnim sak telah ati. <sup>52</sup> Hahoi a capa apâhni e min teh Ephraim telah a phung. Bangkongtetpawiteh, Cathut ni kaie runae ram daw kâ catounnaw na tawn sak telah ati. <sup>53</sup> Hottelah Izip ram ka phat e khobu kum teh a loun. <sup>54</sup> Hahoi takang kum kum sari touh Joseph ni a dei tangcoung patetlah a kamtawng teh ram pueng daw kâ pha. Hatei, Izip ram pueng daw kâ rawca ao. <sup>55</sup> Hottelah Izip ram pueng teh takang ni koung a pha toteh, Faro koe rawca hei hoi a hram awh. Faro ni Izipnaw pueng koe Joseph koe cet awh nateh, a dei e pueng sak awh telah atipouh. <sup>56</sup> Hahoi takang teh talai van pueng a pha teh, Joseph ni cakang pâtungnae tâsong pueng hah a paawng teh Izipnaw koevah a yo pouh. Izip ram vah takang teh puenghoi a pataw. <sup>57</sup> Talai van pueng daw kâ takang teh a pataw poung dawkvah, kho tangkuem e tami pueng teh cakang ran hanelah Izip ram e Joseph koe a cei awh.

## 42

### *Joseph hmaunaw Izip vah a cei*

<sup>1</sup> Jakop ni Izip ram vah cakang ao tie a panue teh, a capanaw koevah bangkongmaw sut na kâkhet awh. <sup>2</sup> Izip ram vah cakang ao tie ka panue dout laipalah hring awh nahanlah hawvah cet awh nateh mamouh hanlah ran awh haw, telah ati. <sup>3</sup> Hottelah Joseph hmaunaw hra touh teh cakang ran hanlah Izip ram a cei awh. <sup>4</sup> Hatei, Joseph e a nawnggha Benjamin teh a hmaunaw koe Jakop ni cetsak van hoeh. Bangkongtetpawiteh, runae kâhmo langvaih ati.



<sup>5</sup> Isarel canaw teh cakang ran hanelah a cei awh. Bangkongtetpawiteh Kanaan ram hai takang teh a tho van. <sup>6</sup> Joseph teh ram thung bawi a tawk teh, hote ram pueng koe cakang kayawtkung lah ao. Hottelah Joseph e hmaunaw a tho awh teh, a hmalah talai khet laihoi a tabo awh. <sup>7</sup> Joseph ni a hmaunaw hah a hmu teh a panue. Hatei, ka panuek hoe e patetlah a kâsak teh, ahnimouh koe lawkkahram lahoi nâhoi maw na tho awh atipouh. Ahnimouh ni cakang ran hanelah Kanaan ram hoi ka tho awh atipouh.

<sup>8</sup> Joseph ni a hmaunaw hah a panue, hatei ahnimouh ni ahni teh panuek awh hoe. <sup>9</sup> Joseph ni ahnimouh kong dawm mang a sak e hah a panue teh ahnimouh koe katuetnaw doeh, khoram caicinae khet hanelah kathonaw doeh atipouh.

<sup>10</sup> Ahnimouh ni nahoe bo ka bawipa, na sannaw hah cakang ran hanelah ka tho awh e doeh, ati awh. <sup>11</sup> Tami buet touh e capanaw doeh, tami kahawi doeh. Na sannaw heh katuetnaw nahoe, atipouh.

<sup>12</sup> Hatei ahni ni ahnimouh koe na yuem awh hoe, khoram caicinae khet hanelah na kathonaw doeh atipouh.

<sup>13</sup> Ahnimouh ni, na sannaw hah hmaunawngaha hlaikahni touh ka pha awh. Kanaan ram kaawm tami buet touh e capanaw doeh. Kanawpoung e teh apa koe ao. Buet touh e teh awm hoe toe, ati awh.

<sup>14</sup> Hatei Joseph ni ahnimouh koe katuetnaw doeh ka tie hah a tang doeh. <sup>15</sup> Hottelah tanouk e lah na o awh han. Kanawpoung e hah hi tho hoehpawiteh Faro hringnae noe lahoi hete hmuen koehoi na tâcawt awh mahoe. <sup>16</sup> Nangmouh dawm lawkkatang ao maw awm hoe maw, nangmae lawk tanouknae lah nangmouh thung dawm e buet touh patoun awh nateh, na nawngaha teh thokhai naseh. Nangmouh teh thongim thung na o awh han rah, hoehpawiteh Faro hringnae noe lahoi katuetnaw katang doeh ka ti han, telah ati. <sup>17</sup> Hottelah hnin thum touh abuemlah thongim a paung.

<sup>18</sup> Apâthum hnin vah Joseph ni ahnimouh koe hettelah sak awh na hring awh han. Bangkongtetpawiteh, Cathut hah ka taki, <sup>19</sup> tamikalan lah na awm awh pawiteh nangmouh thung dawm buet touh thongim bawt seh. Alouknaw teh ban awh nateh, takang ka tho e ni imthungnaw hanelah cakang hah phawt awh. <sup>20</sup> Hahoi kanawpoung e hah kai koe thokhai awh. Hat pawiteh, na lawk kanceng vaiteh na dout awh mahoe, atipouh teh hottelah a sak awh.

<sup>21</sup> Ahnimouh ni hmaunawngaha koe sak awh e hah payon poung awh toe, na pahren awh telah kâhei awh lahun nah a lungpuen e ka hmu awh eiteh, ka tarawi ngai awh hoe. Hatdawkvah hete temdengnae ni na thosin e doeh, telah buet touh hoi buet touh a kâdei awh. <sup>22</sup> Reuben ni ahnimouh koe camo taranlahoi yonnae sak hanh awh, telah nangmouh koe ka dei nahoehmaw. Na thai ngai awh yawmaw. Hatdawkvah khenhaw! a thipaling phu teh atu maimouh koe hei e lah ao toe, telah atipouh.

<sup>23</sup> Hatei Joseph ni lawk tâhlat hno lahoi lawk a dei dawkvah, kho a khan awh e hah Joseph ni a thai panuek doeh tie hah ahnimouh ni panuek awh hoe. <sup>24</sup> Hahoi ahnimouh koehoi alouklah a cei teh a ka. Ahnimouh koe bout a tho teh bout a pato, ahnimouh koehoi Simeon hah a hmu awmnae koe a katek.



<sup>25</sup> Joseph ni ahnimouh cawngko dawk cakang cui hane hoi ahnimae tangka hai cawngko dawk päseng hanelah kâ a poe. Hateh hottelah a sak awh.

<sup>26</sup> Ahnimouh ni cakang la dawk aphu sak awh teh a tâco awh. <sup>27</sup> Ahnimouh thung dawk tami buet touh ni a roe awhnae koe lanaw rawca poe hanelah cawngko a paawng teh tangka hah a hmu, cawngko som dawkvah ao. <sup>28</sup> Hottelah a hmaunawngghanaw koevah, kaie tangka bout a ta awh, khenhaw! hei, kaie cawngko dawk ao hei, telah ati. A lungphuen awh teh Cathut ni hettelah na sak aw hei. Bang ngainae han na vaimoe telah ati awh teh, pâyaw laihoi buet touh hoi buet touh a kâkhet awh.

<sup>29</sup> Kanaan ram a na pa Jakop koevah a pha awh, a kâhmo awh e pueng hah a dei pouh awh. <sup>30</sup> Hot ram dawk e bawi lah kaawm e ni ka matheng poung lah na pato awh teh, ram katuetnaw lah na o awh. <sup>31</sup> Hatei, kaimouh ni ahni koe, tamikalannaw doeh. Katuetkung lah khoeroe kaawm awh hoeh. <sup>32</sup> Hmaunawnggha hlaikahni touh ka o awh teh, apa e capa lah ka o awh. Buet touh teh awh hoeh toe. Kanawpoung e teh atu Kanaan ram vah apa koevah ao, telah ka ti pouh awh. <sup>33</sup> Hahoi hote ram dawk e bawi ni hettelahoi tamikalan lah na onae ka panue han. Na hmaunawnggha buet touh cettakhai awh nateh, na imthungnaw hanelah cakang hah phawt nateh cet awh. <sup>34</sup> Kanawpoung e hateh, kai koe thokhai awh, hat pawiteh katuetkung lah awh laipalah tamikalan doeh tie ka panue han. Hate ram dawk hno na yo awh han na ti pou, telah ati awh.

<sup>35</sup> Hahoi, cawngkonaw hah a rabu awh lahun navah, pouk laipalah tangka tangoung hah cawngko dawk ao teh, ahnimouh hoi a na pa ni tangka tangoung hah a hmu awh toteh a lungpuen awh.

<sup>36</sup> A na pa Jakop ni nangmouh ni ka canaw koung na kahma sak awh toe. Joseph awm hoeh toe, Simeon hai awm hoeh toe. Benjamin totouh ceikhai han na kâcai awh. Hete hnouaw pueng ni na ratet toe, telah ati.

<sup>37</sup> Reuben ni a na pa koevah, nang koe ka thokhai hoehpawiteh, ka capa roi heh thet yawkaw. Ahni heh ka kut dawh na poe nateh, nang koe bout ka thokhai han, telah ati. <sup>38</sup> Hatei ahni ni, ka capa heh nangmouh koe cet van mahoe, a hmau a due toe, ahni dueng doeh toe. Na ceinae lam dawh runae na kâhmo pawiteh, ka sampo heh lungmathoenae phuen dawh na loun sak awh han toe, telah ati.

## 43

### *Benjamin hoi Joseph koe a ban awh*

<sup>1</sup> Ram thung takang hoe a pataw poung. <sup>2</sup> Izip hoi cakang a thokhai awh e a baw toteh, a na pa ni, bout cet awh nateh mamouh hanelah cakang youn touh bang bout ran awh telah ati. <sup>3</sup> Hatei, Judah ni ahni koe hote tami ni, na nawnggha, nangmouh koe tho van hoehpawiteh, kai minhmai na hmawt awh mahoe toe telah kancengcalah kâhruetcuat na poe awh toe. <sup>4</sup> Nawngghaca hah kaimouh koe na cetsak pawiteh, cakang teh na ran pouh awh han. <sup>5</sup> Hatei na tha hoehpawiteh, ka cet awh mahoe. Bangkongtetpawiteh, ahni ni kaimouh koe nangmouh koe na nawngghaca tho van hoehpawiteh, ka minhmai na hmawt mahoe na ti pouh awh telah ati.

<sup>6</sup> Isarel ni, bangkongmaw nawnggha alouk tawnae kong patetnaw hah kuekluek na dei awh teh, kai hanelah hnokahawi hoeh poung na sak awh telah ati.



<sup>7</sup> Hatei, ahni ni hote tami ni na pa a hring rah maw, hmaunawngaha alouke na tawn awh maw telah kaimae kong hoi imthungkhu kong na pacei awh dawkw doeh. Hottelah lawk na pacei e patetlah ka pathung awh e doeh. Na nawnghaca thokhai awh ati hane hah apinimaw sut a panue thai han vaw telah ati awh.

<sup>8</sup> Judah ni a na pa Isarel koevah, kaimouh hoi nang, nawnghaca hoi dout laipalah hring thai awh nahanlah, nawnghaca teh kaimouh koe kâbang sak nateh, ka cei awh han toe. <sup>9</sup> Ahni kong dawkw kai ni kamngai vaiteh kai koe aphu teh na la han, ahni hah nang koe thokhai laipalah na hmalah kangdout sak hoehpawiteh, yonpennae pou ka phu han toe. <sup>10</sup> Bangkongtetpawiteh, kânawngkâai awh hanh lei sei, apâhni e patenghai yo tho hane boum hei telah ati.

<sup>11</sup> A na pa Isarel ni ahni koe, hattelâh pawiteh, hettelâh sak awh. Hete ram dawkw e hnokahawinaw thingtapi, khoitui, hmuitui, murah, câbuk paw a rakaww katha e, hoi almond pawnaw youn touh pawat awh. <sup>12</sup> Nangmae cawngko dawkw tangka a pâban e hah bout sin awh, a payon awh e paka han doeh. <sup>13</sup> Hahoi na nawnghaca hai hrawi awh nateh ahni koe thaw awh nateh bout cet awh leih. <sup>14</sup> Hote tami ni Benjamin na tha pouh nahanelah, Athakasaipounge Cathut ni na pahren awh naseh. Ka canaw teh ka sung pawiteh sung yawkaw toung vai khe, telah ati.

<sup>15</sup> Hottelah ahnimouh ni poehno hoi Benjamin hah a ceikhai awh teh, tangka hai let hni hoi a kâken awh. Hahoi a thaw awh teh Izip ram lah a cei awh teh Joseph hmalah bout a kangdue awh.

<sup>16</sup> Joseph ni ahnimouh koe kaawm e Benjamin a hmu tahma vah, imkar- ingkung hah a kaw teh ahnimanaw hah imthung kâenkhai nateh saring thet nateh coungkacoe rakueng haw. Bangkongtetpawiteh, ahnimouh teh kanithun bu kai koe a ca awh han telah ati. <sup>17</sup> Joseph ni kâ a poe e patetlah ahnimouh ni a tawkw awh teh, ahni ni ahnimanaw hah imthung a kâenkhai awh.

<sup>18</sup> Joseph ni imthung kâenkhaie lah ao dawkvah, ahnimouh teh a lungpuen awh teh, ahnimouh ni, ahmaloe e kaimae cawngko dawkw tangka a pâban dawkvah na kâenkhai e han doeh, maimouh hoi lanaw hoi san lah na man thai nahanelah toe hanlah a kâcai e han doeh, ati awh. <sup>19</sup> Joseph e imkaringkung koe vah a hnai awh teh takhang koe a pato awh.

<sup>20</sup> Oe, Bawipa, ahmaloe ka tho awh navah, cakang ran hanelah dueng doeh ka tho awh. <sup>21</sup> Hahoi hettelâh ao, roenae rim koe ka pha awh navah, cawngko ka paawng awh boteh kamamae tangka lengkaleng ka kuepcalah ao. Hatdawkvah bout ka thokhai awh. <sup>22</sup> Cakang ran nahane tangka alouke hai ka sin awh. Kaimae tangka heh apinimaw cawngko dawkw a hruek tie ka panuek awh hoe, telah ati. <sup>23</sup> Hatei ahni ni nangmouh koe roumnae awm seh, taket hanh awh. Nangmae cawngko dawkw nangmae Cathut hoi na pa e Cathut ni râw na poe awh e doeh, nangmae tangka hah ka hmu doeh, telah ati. Hahoi Simeon hah ahnimouh koe a thokhai awh.

<sup>24</sup> Hottelah ahni ni ahnimouh hah Joseph imthung a kâenkhai teh tui a poe teh, a khok a kâpasu awh teh, lanaw hah rawca a poe awh. <sup>25</sup> Hahoi aphu awh e poehno hah Joseph bu a ca hanelah a tho hoehnahlan coungkacoe ao awh. Bangkongtetpawiteh, hawvah, bu ca han tie hah a panue awh. <sup>26</sup> Joseph takhang koe a pha toteh a kut dawkw kaawm e poehnonaw hah ahni koe a kâenkhai awh teh a hmalah talai khet laihoi a tabut awh.

<sup>27</sup> Ahni ni kamthang a pacei, na dei awh e na pa matawng teh a hring rah maw. A tak a dam maw telah ati.



<sup>28</sup> Ahnimouh ni apa na san teh a hring doeh rah, a tak hai a dam rah, atipouh awh. Hahoi a mahmawk a lû a saling awh teh a tabut awh.

<sup>29</sup> Ahni ni a khet teh, a nawnggha Benjamin a manu e capa hah a hmu, ahni heh na nawnggha akong na dei awh e hah maw, telah ati. Hahoi ahni ni ka capa, Cathut ni na pahren naseh, telah ati. <sup>30</sup> Joseph ni a nawnggha a hmu toteh, a lungmathoe teh karangpounglah ka nahane hmuen a tawng. Imrakhan thung a kâen teh hawvah a ka. <sup>31</sup> A minhmai a pâhla teh bout a tâco teh puenghoi a kâsum. Rawca rakueng awh telah ati.

<sup>32</sup> Hottelah ahni hanlah aloukcalah, ahnimouh hanlah aloukcalah, a coun e Izipnaw hanlah aloukcalah, bangkongtetpawiteh, Izipnaw ni He-brunaw hoi bu rei cat khai boihoeh, hothateh Izipnaw hanlah panuettio e lah ao. <sup>33</sup> Hottelah capa kacue teh camin lah ao e hoi kanaw teh cahnoung lah ao e patetlah Joseph hmalah a tahung awh teh, kângai lah a ru awh. <sup>34</sup> Joseph ni ahnimouh ham hah amamouh koe a poe sak teh, Benjamin e ham teh ahnimae ham hlak let panga touh hoi apap. Hottelah a nei awh teh, ahni koe hroung a nawm awh.

## 44

### *Joseph e manang*

<sup>1</sup> Ahnimouh ni imkaringkung koevah, ahnimouh ni aphu thai yit touh, cawngko pakawi pouh nateh, amamae tangka rip hah amamae cawngko som koe lengkaleng tat pouh. <sup>2</sup> Hahoi kaie manang, ngun manang hah a cahnoung e cawngko som dawkvah cakang phu tangka hoi na ta pouh han, telah kâ a poe.

<sup>3</sup> Khodai tahma vah ahnimouh teh amamae lanaw hoi a kamthaw awh. <sup>4</sup> Kho thung hoi a kamthaw awh teh ahlapoungnae koe a pha awh hoehnahlan, Joseph ni imkaringkung koe thaw nateh ahnimanaw hah pâlei haw. Hahoi na pha toteh ahnimouh koe, bangkongmaw hawinae hah hawioehnae hoi na patho awh. <sup>5</sup> Hot hah, kaie bawipa e misur neinae hoi hma lae ka tho hane kong a panuenae nahoehmaw. Het patet lae na o awh e heh puenghoi na payon awh, na ti pouh han.

<sup>6</sup> Hahoi, rek a pha toteh hottelah a dei pouh. <sup>7</sup> Ahnimouh ni ahni koe, bawipa, bangkongmaw het patet lae lawk na dei, na sannaw ni hot patet e hno ka sak awh hoeh. <sup>8</sup> Khenhaw! kaimae cawngko som dawk ka hmu awh e tangka hoi Kanaan kho hoi nang koe bout ka thokhai awh nahoehmaw. Bangtelamaw na bawipa im e tangka hoi sui teh ka paru thai awh han namaw. <sup>9</sup> Na sannaw thung dawk hote hno na hmunae pueng dout seh. Kaimouh hai bawipa e san lah ka o awh yawkaw han, ati awh.

<sup>10</sup> Ahni ni bokheiyah, atu hai nangmae lawk patetlah lawiseh, hno ka hmunae tami hah ka san lah ao vaiteh, nangmouh teh toun kaawm hoeh lah na o awh han telah ati. <sup>11</sup> Hat nah tahma vah amamae cawngko lengkaleng a patue awh teh lengkaleng a paawng awh. <sup>12</sup> Ahni ni kacuepoung koehoi kanawpoung totouh a tawng pouh. Hattoteh Benjamin e cawngko dawk manang teh a hmu. <sup>13</sup> Hat nah tahma vah a khohna a phi awh, lanaw a phu sak awh teh kho dawk a ban awh.

<sup>14</sup> Judah hoi a hmaunawngghanaw teh Joseph im a pha awh, ama teh haw vah a la o rah. Hahoi a hmalah a tabo awh. <sup>15</sup> Hahoi Joseph ni bangmaw na sak awh. Kai patetlah tami ni hmalah ka tho hane hno a panue han tie na panuek awh hoeh maw, telah ati.



<sup>16</sup> Judah ni ka bawipa nang koe bangvai ka dei awh tounge. Bangmaw ka pâpha thai awh han. Cathut ni na sannaw yonnae teh a hmu toe. Khenhaw! ka bawipa kaimouh hoi ahnie kut dawkw manang a hmu e hoi na san lah doeh ka o awh toe telah ati. <sup>17</sup> Hatei ahni ni, hottelah khoeroe ka sak mahoe, a kut dawkw manang a hmunae dueng doeh ka san lah ao vaiteh nangmouh teh na pa koe karoumcalah cet awh, telah ati.

### *Judah ni Benjamin hanelah a kâhei*

<sup>18</sup> Hat nah tahma vah, Judah ni Joseph hah a hnai teh, Oe ka bawipa, pahren lahoi na san heh, ka bawipa na san heh na hnâthainae koe lawk kam touh na dei sak haw. Na lungkhueknae hah na san koe kaman sak hanh. Bangtelah tetpawiteh, nang teh Faro patetlah doeh na o. <sup>19</sup> Ka bawipa nang ni, na pa nakunghai, hmaunawnggha nakunghai na tawn maw telah na sannaw hah na pacei. <sup>20</sup> Kaimouh ni nang koe ka matawngpoung e na pa ka tawn awh. Matawng sawi a sak e camoca ka tawn awh teh buet touh teh a due toe, a manu ni a khe e dawkw ahni dueng ao teh a na pa ni a pahren poung, ka ti awh. <sup>21</sup> Nang ni, ahni ka hmu thai nahanlah kai koe thokhai awh ati. <sup>22</sup> Ka bawipa kaimouh ni tongpaca ni a na pa cettakhai thai mahoe, bangkongtetpawiteh, a na pa cettakhai pawiteh a na pa a due han doeh ka ti awh. <sup>23</sup> Hatei, nang ni na nawnggha cahnoung nangmouh koe tho van hoehpawiteh, ka mei na hmawt awh mahoe toe, ati.

<sup>24</sup> Hahoi, na sannaw apa koe ka pha awh toteh, ka bawipa, bawipa nange lawk hah ka dei pouh awh. <sup>25</sup> Apa ni bout cet awh nateh, mamouh hanelah cakang youn touh bout ran awh, ati. <sup>26</sup> Hatei kaimouh ni ka cet thai awh mahoe, nawnggha cahnoung kaimouh koe tho van pawiteh dueng doeh ka cei awh han. Bangkongtetpawiteh, nawnggha cahnoung kaimouh koe tho van hoehpawiteh ahnie mei ka hmawt thai awh mahoe toe, telah ka ti pouh awh. <sup>27</sup> Na san kaimae na pa ni, ka yu ni capa kahni touh na khe pouh tie na panue awh. <sup>28</sup> Buet touh teh kai koehoi a tâc teh kounge paset e lah ao mue toe, hahoi teh ahni ka hmawt boihoe toe. <sup>29</sup> Hahoi hete camo heh kai koe hoi na ceikhai teh, runae kâhmo pawiteh, ka sampo hah lungmathoenae lahoi phuen dawkw na loun sak awh toe, telah ati.

<sup>30</sup> Hatdawkvah, tongpaca heh kaimouh koe tho van laipalah na san apa koe ka tho pawiteh, a hringnae hoi tongpaca e hringnae mekkawme lah ao dawkvah, <sup>31</sup> tongpaca tho van hoeh tie hah a panue tahma kadout han doeh. Hattoteh na sannaw ni na san apa e sampo hah lungmathoenae hoi phuen koe ka loun sak yawkaw han doeh. <sup>32</sup> Bangtelah tetpawiteh, na san ni nang koe ka thokhai hoehpawiteh, a yungyoe na hmalah yonpen e lah ka o han telah apa koe tongpaca kong dawkw thoe yo ka bo toe. <sup>33</sup> Pahren lahoi na san hah tongpaca yueng lah ka bawipa, na san lah na awm sak nateh, tongpaca heh a hmaunaw hoi ban sak leih. <sup>34</sup> Bangkongtetpawiteh, kai koe tongpaca tho van hoehpawiteh bangtelamaw apa koe ka cei thai awh han vaw. Telah hoehpawiteh, apa koe ka phat hane thoenae teh ka hmu payon awh han doeh, telah ati.

## 45

### *Joseph ni a hmaunawngghanaw koe a kâpâpho*

<sup>1</sup> Joseph teh a teng kaawm e pueng hmalah kâsum thai hoeh tounge dawkvah, tami pueng kai koehoi kounge tâcawt awh, telah a hram. Hottelah Joseph ni a hmaunawngghanaw koe a kâpanuesak nah yunglam



apihai ahni teng kangdout awh hoeh. <sup>2</sup> Kacaipounglah a ka teh, Izipnaw ni a thai awh, Faro imthungkhu ni hai a thai awh. <sup>3</sup> Joseph ni a hmaunawngghanaw koe kai teh Joseph doeh, apa atu sittouh a hring rah maw, telah ati. Hatei pato thai laipalah a hmaunaw roumkalue awh teh a hmalah sut a kangdue awh.

<sup>4</sup> Joseph ni a hmaunawngghanaw koe, pahren lahoi na hnai awh haw, telah ati. Hateh a hnai awh. Ahni ni na hmaunawnggha Joseph, Izip ram vah na yo awh e hah ma. <sup>5</sup> Hatei, hivah cei hanelah na yo awh dawkvah, na lungmathout hanh awh, namamouh hoi namamouh hai kâhmuhma hanh awh, bangkongtetpawiteh, hringnae rungngang hanelah Cathut ni nangmouh hmalah na patoun e doeh. <sup>6</sup> Bangkongtetpawiteh, kum hni touh thung hete ram dawk takang a tho. Kum panga touh a ngai rah. Hat nah thung pueng teh laikaww kanaww awm mahoe. Canga e hai awm mahoe. <sup>7</sup> Hottelah talai van catoun ka tawn hanelah karingkung hoi rungngangnae kalen hoi na hringsakthai awh nahanlah, Cathut ni ahmaloe hoi nangmouh hmalah na patoun toe. <sup>8</sup> Hottelah hie hmuen koe na kacetsakkung hah nangmouh laipalah Cathut doeh. Ahni ni Faro hanelah na pa lah, imthungkhu kahrawikung, hoi Izip ram pueng kaukung lah na coung sak.

<sup>9</sup> Karanglah apa koe cet awh nateh, ahni koe na capa Joseph ni hettelah a dei, Cathut ni Izip ram pueng daww bawi lah na sak, kai koe tho awh, uet awh hanh leih. <sup>10</sup> Goshen ram vah na o han. Nang nama hoi, na capanaw hoi na mincanaw hoi, na tuhunaw, na maitohu hoi na tawn e puenghoi kai koe roeroe vah na o han. <sup>11</sup> Hawwah kai ni na kaww han. Bangkongtetpawiteh hawwah takang kum panga touh ao han rah. Hatdawkvah, na roedeng payon vaih nang hoi na imthung hoi na tawn e pueng hoi telah na ti pouh awh han. <sup>12</sup> Hahoi khenhaw! nangmae mit roeroe hoi ka nawnggha Benjamin e mit roeroe ni kaie ka pahni ni a dei lahun e hah na hmu awh. <sup>13</sup> Izip ram e ka bawilennae pueng hoi na hmu awh e hno pueng hah apa koe na dei awh vaiteh, apa teh karang poung lah na thokhai awh han, telah ati.

<sup>14</sup> Hahoi a lungtabue hoi Benjamin lungtabue rekkâbet lah a tapam teh a ka. Benjamin ni hai a tapam teh a ka. <sup>15</sup> A hmaunawnggha pueng a paco hnukkhu, a hmaunawngghanaw ni lawk a dei awh. <sup>16</sup> Joseph e hmaunawngghanaw a tho awh tiê kamthang teh Faro im vah a thai awh teh, hote kamthang ni Faro hoi a sannaw a lunghawi sak. <sup>17</sup> Faro ni Joseph koe, na hmaunawngghanaw koe, hettelah dei pouh, na saringnaw teh cakang phu sak hoi tâcawt awh nateh, Kanaan ram vah cet awh. <sup>18</sup> Hahoi na pa hoi a imthung hah kaimouh koe thokhai awh. Izip ram e hnokahawi na poe awh vaiteh, hete ram daww kaawm e hnokahawipoung hah na ca awh han telah dei pouh awh. <sup>19</sup> Kâ na poe, hettelah dei pouh. Na canaw hoi na canunaw hane hoi na yunaw hanelah Izip ram hoi lengnaw sin awh nateh, na pa hah thokhai awh. <sup>20</sup> Na hnopai kong daww lungpuen hanh awh. Bangkongtetpawiteh, Izip ram e hnokahawi pueng teh nangmae doeh, telah ati.

<sup>21</sup> Hahoi teh, Isarel canaw ni hottelah a sak awh. Joseph ni Faro kâpoe e patetlah leng hah ahnimouh koe a poe. Lam vah a ca awh hane hai a poe. <sup>22</sup> Ahnimouh abuemlah koe khohna kâthung hanelah a poe. Benjamin koe teh tangka cumthum touh hoi khohna kâthung hane panga touh a poe. <sup>23</sup> Hahoi a na pa koewah, la hra touh, Izip ram hnokahawi kapawtkung hoi lamanu hra touh, lam vah a na pa hane cakang hoi vaiyei hoi canei han kaphawtkung lah a patoun. <sup>24</sup> Hottelah a hmaunawngghanaw hah a patoun



teh a ceisak. Ahni ni lam vah na kâyue awh hoe h nahanlah kâhruetcueth awh telah ati.

<sup>25</sup> Izip hoi a tâco awh teh a na pa Jakop koe a pha awh. <sup>26</sup> Hatei, Joseph a hring rah Izip ram pueng ukkung lah ao telah a dei pouh awh. Jakop a lungmit teh, ahnimouh ni dei e tang thai hoe h. <sup>27</sup> Hatei, ahni koe Joseph ni lawk dei e pueng hah a dei pouh awh. Hahoi a kâcui hane leng Joseph ni a patawn e hah a hmu toteh, a na pa Jakop e lungthin bout a kâhlaw. <sup>28</sup> Isarel ni a khout toe, ka capa Joseph teh a hring doeh rah, ka cei vaiteh, ka due hoe h nahlan ka hmu han telah ati.

## 46

### *Izip vah Jakop a cei*

<sup>1</sup> Isarel teh a tawn e pueng hoi a tâco. Beersheba vah a pha teh a na pa Isak Cathut koe thuengnae a sak. <sup>2</sup> Cathut ni karum a mang lah Isarel koe lawk a dei teh, Jakop Jakop telah ati. Ahni ni, hivah ka o, telah ati.

<sup>3</sup> Ahni ni, kai teh Cathut nange Cathut lah ka o. Izip ram lah na cei hane hah taket hanh. Bangkongtetpawiteh, miphun kalen lah na coung sak han.

<sup>4</sup> Nang koe Izip lah ka cei van vaiteh, bout na hrawi han, hahoi Joseph ni na mit daw k na kut a hruek han telah ati.

<sup>5</sup> Hottelah hoi Jakop teh, Beersheba hoi a tâco teh, Isarel e capanaw ni, a na pa Jakop hoi a canaw hoi a yunaw a kâcui nahanelah Faro ni na patawn e leng daw k na kâcui sak han. <sup>6</sup> Jakop hoi a catoun pueng Kanaan ram e a hmu awh e a saringnaw hoi a hnopainaw hoi a tâcokhai teh Izip vah a cei awh. <sup>7</sup> A capa hoi a pahringcanaw hoi a miphun a catoun pueng hah Izip vah a kâenkhai awh.

<sup>8</sup> Hetnaw heh Isarel catoun Izip ram ka kâen e Jakop hoi a canaw e minnaw doeh. Jakop e camin Reuben,

<sup>9</sup> Reuben capanaw teh Hanok, Pallu, Hezron hoi, Karmi.

<sup>10</sup> Simeon capanaw teh Jemuel, Jamin, Ohad, Jakhin, Zohar hoi Kanaan napui koehoi e a capa Saul,

<sup>11</sup> Levih capanaw teh Gershon, Kohath hoi, Merari <sup>12</sup> Judah capanaw teh Er, Onan, Shelah, Perez hoi Zerah naw doeh. Hateiteh, Er hoi Onan teh Kanaan kho vah a due awh toe. Perez ca roi lah Hezron hoi Hamul ao.

<sup>13</sup> Issakhar capanaw teh Tola, Puvah, Jashub hoi Shimron,

<sup>14</sup> Zebulun capanaw teh Sered, Elon hoi Jaheel,

<sup>15</sup> Hetnaw teh Leah capanaw a canu Dinah hoi Paddanaram vah Jakop hanlah a khe pouh e naw lah ao. A capanaw hoi a canunaw teh abuemlahoi 33 touh a pha awh.

<sup>16</sup> Gad capanaw teh Ziphion, Haggi, Shuni, Ezbon, Eri, Arodi hoi Areli,

<sup>17</sup> Asher capanaw teh Imnah, Ishua, Ishvi, Beriah hoi a tawncanu Serah hoi Beriah capa teh Heber hoi Malkhiel tinaw doeh.

<sup>18</sup> Hotnaw teh Zilpah Laban ni a canu Leah koe vah a poe e capanaw doeh. Ahnimanaw teh tami 16 touh, Jakop ni a khe e naw doeh.

<sup>19</sup> Jakop yu Rachel capa roi teh Joseph hoi Benjamin doeh.

<sup>20</sup> Joseph ni Izip kho vah ao navah Manasseh hoi Ephraim a sak, hotnaw teh On kho e vaihma Potiphar canu Asenath ni a khe pouh e doeh.

<sup>21</sup> Benjamin capanaw teh Bela, Bekher, Ashbel Gera, Naaman Ehi, Rosh, Muppin, Huppim hoi Ard tinaw doeh. <sup>22</sup> Hotnaw teh Rachel ni Jakop hanlah a khe pouh e capanaw doeh, 14 touh a pha awh.

<sup>23</sup> Dan capa teh Hushim doeh.



<sup>24</sup> Naphtali capanaw teh Jahzeel, Guni, Jezer hoi Shillem doeh.

<sup>25</sup> Hotnaw teh Laban ni a canu Rachel koe a poe e Bilhah ni Jakop hanlah a khe pouh e naw doeh, abuemlahoi 7 touh a pha awh.

<sup>26</sup> Jakop e a capanaw e yu hmai touksin laipalah Jakop koe Izip ram rei ka cet e tami abuemlah 66 touh a pha awh. <sup>27</sup> Joseph ni Izip ram e a capa a khe e naw teh kahni touh a pha Jakop imthung Izip ram daw kâen e pueng teh 70 touh a pha awh.

### *Goshen vah Jakop a kamtue*

<sup>28</sup> Jakop ni Goshen lam pätue hanelah Judah teh Joseph koe hmaloe a ceisak teh, hottelah hoi Goshen ram lah a pha awh. <sup>29</sup> Joseph ni a leng hah coungkacoe a rakueng teh Goshen vah a na pa a dawn hanelah a cei. Ahni koe a kâpanuesak teh a lahuen daw k a tapam teh a tapam laihoi ngailawi a ka.

<sup>30</sup> Isarel ni Joseph koe vah, na hring rah dawkvah, na mei bout ka hmu toe, atuteh kadout lawi nakunghai yah, telah ati.

<sup>31</sup> Joseph ni a hmaunawnggha a na pa imthung koe vah, ka cei vaiteh, Faro koe ka dei pouh vaiteh, ahni koe vah, ka hmaunawnggha hoi apa imthung Kanaan ram kaawm e hah kai koe a pha awh toe. <sup>32</sup> Ahnimanaw teh saring kapacanaw lah ao teh tukhoumkung lah ao awh. Tuhu hoi maitohu hoi a tawn awh e pueng a thokhai awh toe telah ka dei han.

<sup>33</sup> Faro ni na kaw awh teh, bang thaw maw ouk na taw k awh na tet pouh pawiteh, <sup>34</sup> nangmouh ni na sannaw teh ka mintoenaw koehoi kamtawng teh camoca hoi atu totouh, saring ka paca awh e doeh, telah na ti awh han. Hottelah hoi Goshen ram daw k na o thai awh han, telah atipouh. Bangkongtetpawiteh, tu ka khoun e pueng teh Izip taminaw ni a panuet awh.

## 47

### *Faro ni Jakop a dawn*

<sup>1</sup> Joseph ni Faro koe vah, apa hoi ka hmaunawngghanaw tuhu, maitohu a tawn awh e naw pueng hoi Kanaan ram hoi a tho awh, atu Goshen ram vah ao awh telah ati.

<sup>2</sup> A hmaunawngghanaw thung hoi tami panga touh a hrawi teh Faro koe a ceikhai. <sup>3</sup> Faro ni a hmaunawngghanaw koe vah, bang thaw maw ouk na taw k awh telah a pacei. Ahnimanaw ni Faro koe vah, na sannaw teh ka mintoenaw se nah hoi atu totouh tu doeh ka khoun awh, telah ati awh. <sup>4</sup> Ahnimouh ni Faro koe vah, hete ram daw k o hanelah ka tho awh. Bangkongtetpawiteh, takang Kanaan ram daw k a pataw teh saringnaw hanlah hram awm hoe h toe. Hatdawkvah pahren lahoi na sannaw heh Goshen ram daw k na awm sak awh loe, telah ati awh.

<sup>5</sup> Faro ni Joseph a pato teh, na pa hoi na hmaunawngghanaw heh nang koe a tho awh toe. <sup>6</sup> Izip ram teh na hmalah doeh ao, na pa hoi na hmaunawngghanaw teh kahawi e ram daw k awm sak, Goshen ram daw k kho sak awh naseh. Ahnimouh thung daw k hno ka sak thai e tami na panue e awm pawiteh ka saringnaw lathueng kahrawikung lah na ta han, telah ati.

<sup>7</sup> Joseph ni a na pa Jakop hah a kâenkhai teh Faro hmalah a kangdue sak teh, Jakop ni Faro hah yawhaw i poe.

<sup>8</sup> Faro ni Jakop koe vah, kum nâyittouh maw na pha toung telah a pacei.

<sup>9</sup> Jakop ni Faro koe vah kahlawng ka ceinae hnin hoi ka kumnaw teh 130 touh a pha toe. Ka hringnae kumnaw a duem teh a ru, na kakhekungnaw



kahlawng ceinae hoi kumnaw hai khout hoeh telah ati. <sup>10</sup> Jakop ni Faro yawhawi a poe teh Faro koehoi a tâco. <sup>11</sup> Hottelah Joseph ni a na pa hoi a hmaunawngghanaw kho a sak sak. Faro ni kâpoe e patetlah Izip ram thung e kahawipoung e ram Raameses ram daw k e ram hah râw lah a poe. <sup>12</sup> Hahoi Joseph ni a na pa hoi a hmaunawngghanaw hoi a na pa imthungnaw pueng, a imthungnaw lahoi canei hanlah a poe.

### *Takang kâhmonae*

<sup>13</sup> Hote ramnaw pueng daw k canei hane awm hoeh toe. Bangkongtet-pawiteh, takang puenghoi a tho. Hote takang daw k Izip ram hoi Kanaan ram teh a patang poung awh. <sup>14</sup> Joseph ni cakang a ranae phu, Izip hoi Kanaan ramnaw pueng daw k hoi a hmu e tangkanaw hah Faro im lah a ceikhai. <sup>15</sup> Izip ram hoi Kanaan ram e tangkanaw abaw toteh, Izip taminaw pueng teh Joseph koe a tho awh teh, canei hanelah na poe awh haw, bangkongtetpawiteh, bangkongmaw na hmalah ka due awh han vaw, tangka awm hoeh toe, telah ati awh.

<sup>16</sup> Joseph ni saringnaw hah na poe awh. Tangka awm hoeh toung pawiteh, na saringnaw e phu lah canei hanlah na poe awh han, telah atipouh. <sup>17</sup> Hat toteh, a saringnaw Joseph koe a ceikhai awh teh, Joseph ni marang, tu, hoi maito hoi lanaw e phu lah canei hanlah a poe. Hatnae kum daw k teh saringnaw e phu lah canei poe e lahoi a kaw k.

<sup>18</sup> Kum a baw teh, kum katha daw k ahni koe bout a tho awh teh, kaimouh e tangkanaw pueng abaw toe. Saringnaw a bawnae kong daw k banghai ka paphat awh hoeh. Bawipa na mithmu vah kaimouh miphun hoi lawhmuen laipalah banghai awm hoeh toe. <sup>19</sup> Bangkongmaw na hmalah ka due awh han, kamamouh hai, lawhmuen hai na ran awh ngala lawih, telah pawiteh doeh kamamouh hoi lawhmuennaw pueng Faro e san lah ka o awh han, dout laipalah ka hring awh nahan hoi lawhmuennaw kingdi hoeh nahan, cati na poe leih telah ati awh.

<sup>20</sup> Hat toteh, Joseph ni Izip ram naw pueng Faro hanlah a ran pouh. Takang puenghoi a tho daw kvah Izip taminaw pueng ni lawhmuennaw he a yo awh teh, lawhmuennaw teh Faro e lah he ao. <sup>21</sup> Taminaw teh Izip ramri avanglah hoi avanglah totouh kho tangkuem daw k a kampuen awh. <sup>22</sup> Vaihmanaw e ram teh ran pouh hoeh. Bangkongtetpawiteh vaihmanaw ni Faro koehoi ham hane ao teh Faro ni ham a poe e naw hah a canei awh daw kvah, lawhmuen hah yawt awh hoeh. <sup>23</sup> Hat hnukkhu, Joseph ni taminaw pueng koe, khenhaw! sahnin daw k namamouh hoi na lawhmuennaw hah Faro hanlah ka ran toe. Khenhaw! haw vah cati ao. Talai daw k na tu awh han. <sup>24</sup> Hahoi cakang na hmu awh toteh, hettelah Faro hanlah pung panga pung touh na poe awh vaiteh, pung pali touh e teh namamouh hanelah ao han. Hottelah law daw k bout na tu hane hoi namamouh imthungnaw ca hane hoi na canaw ca hanelah na ta awh han telah ati.

<sup>25</sup> Ahnimouh ni, nang ni kaimouh hringnae na hlout sak toe. Ka bawipa ni na pahren naseh, Faro e san lah ka o awh han telah ati awh. <sup>26</sup> Hottelah Faro ni pung panga pung touh poe e hmunae daw k vah, Izip ram daw k atu totouh Joseph ni phung a sak. Vaihmanaw e lawhmuen dueng teh Faro e lah awm hoeh.

### *Jakop koe Joseph lawkkam*

<sup>27</sup> Hahoi Isarelnaw teh Izip ram e Goshen ram daw k kho a sak awh teh, hnopainaw a hmu awh teh ca catounnaw moikapap a pungdaw awh.

<sup>28</sup> Jakop teh Izip ram vah kum 17 touh ao. Hottelah Jakop hringnae kum



147 touh a pha. <sup>29</sup> Hattoteh Isarel due nahane a hnai tounge dawkvah, a capa Joseph hah a kaw teh a im vah, na lung ka youk pawiteh, pahren lahoi na kut hah ka phai rahak vah tat haw, na pahren nateh kaie lathueng vah atangcalah na sak han, pahren lahoi Izip ram dawh na pakawm hanh lah a. <sup>30</sup> Mintoenaw koe ka kâhat toteh nang ni Izip ram thung hoi na hrawm na teh, ahnimouh pakawpnae koe na pakawp van loe, telah ati. Ahni ni na dei e patetlah ka sak han, telah ati.

<sup>31</sup> Ahni ni kai koe thoe kâbo loe, telah atipouh teh, ahni koe thoe a kâbo. Hahoi Isarel teh amae ikhun dawh a tabo.

## 48

### *Jakop ni Joseph e canaw yawhawi a poenae*

<sup>1</sup> Hathnukkhu, Joseph koe, Thai haw, na pa a pataw, telah atipouh awh. A capa Manasseh hoi Ephraim hah a hrawi teh a ceikhai. <sup>2</sup> Jakop koevah, khenhaw! na capa Joseph nang koe a tho, telah atipouh awh. Hatdawkvah, Jakop teh tha a kâsangue teh ikhun dawh a tahung.

<sup>3</sup> Jakop ni Joseph koevah, Cathut Athakasaipounge teh Kanaan ram, Luz kho dawh kai koevah a kamnue teh yawhawinae na poe. <sup>4</sup> Kai koevah, ca catounnaw moikapap na poe han, na pungdaw sak han, tamihupui lah na sak han, hahoi hete ram heh ka tho hane na ca catounnaw koe râw lah na poe awh han, telah na ti pouh. <sup>5</sup> Na ca roi Izip ram, nang koe ka tho hoehnahlan na khe e haiyah kaie doeh. Manasseh hoi Ephraim heh, Reuben hoi Simeon patetlah kaie lah ao han. <sup>6</sup> Atu hoi bout na khe e teh namae lah ao han. A coe awh han e râw dawh a hmau roi e min hah a hmawng awh han. <sup>7</sup> Hatei, kaie kong dawh, Paddanaram ram hoi ka tho navah, Rachel teh Kanaan ram e lampui dawh, Ephrath kho hoi lam bet ahlanae koe kai teng vah a due teh hawvah Ephrath lam dawh ka pakawp. (Hot teh Bethlehem doeh).

<sup>8</sup> Hahoi, Isarel ni Joseph e capa roi a khet teh, hetnaw heh apinaw maw telah ati.

<sup>9</sup> Joseph ni a na pa koevah, ahnimouh roi teh ka capa roi doeh, Cathut ni hi vah na poe e roi doeh, telah atipouh. Ahni ni pahren lahoi kai koe thokhai haw, yawhawinae ka poe han, telah ati.

<sup>10</sup> Isarel teh a matawng tounge dawkvah a mit hah kacailah hmawt thai hoeh toe. Hahoi teh, hnai sak haw, ahni ni a tapam teh a paco. <sup>11</sup> Isarel ni Joseph koevah, Na mei hmu hane boehai ka ngaihaw hoh ei, Cathut ni na ca catounnaw e mei totouh na hmu sak, telah ati.

<sup>12</sup> Joseph ni ahnimouh teh a na pa e phai rahak hoi a la teh a hmalah a tabo sak.

### *Ephraim ni yawhawi ka talue a pang*

<sup>13</sup> Hahoi, Joseph ni kahni touh hoi a ceikhai teh Ephraim aranglae kut hoi Isarel e avoilaie kut koe lah a ceikhai. Manasseh hah avoilaie kut hoi Isarel e aranglae kut koe lah a ceikhai. <sup>14</sup> Hahoi, Isarel ni a kut a khingkhai teh aranglae kut hah kanaw e Ephraim e a lû dawh a tounge teh avoilaie kut hah Manasseh e lû van vah a tounge. Bangkongtetpawiteh, ahni teh camin lah ao. <sup>15</sup> Hottelah yawhawinae a poe teh kakhekung Abraham hoi Isak hmalah ouk kaawm pouh e Cathut, sânnin totouh ka hringyung thung pueng na kakawkkung Cathut.

<sup>16</sup> Hawihoehnae pueng thung hoi na karatangkung kalvantaminaw ni hete camo roi yawhawinae poe naseh, Abraham hoi Isak min teh



ahnimouh roi ni sin naseh. Hahoi, talai lungui vah tami moikapap lah pungdaw awh naseh telah ati.

<sup>17</sup> A na pa ni aranglae kut Ephraim e lû dawk a tOUNG e Joseph ni a hmu navah, a lungkuep hoeh dawkvah a na pa e kut Ephraim lû dawk a tOUNG e hah Manasseh e a lû dawk puen hanelah a tawm. <sup>18</sup> Joseph ni a na pa koevah, Apa hettelah mahoe. Bangkongtetpawiteh, het nahoehmaw a camin. Aranglae na kut a lû dawk na tOUNG hane vaw, telah atipouh.

<sup>19</sup> Hatei, a na pa ni a ngai hoeh dawk, ka panue ka ca, ka panue. Ahni haiyah miphun telah kaw han e kamcu lah ao vaiteh a lentoe van han. Hatei, a nawnggha heh ahni hlakvah hoe a lentoe vaiteh a ca catounnaw haiyah miphun moikapap lah ao awh han, telah ati.

<sup>20</sup> Hatdawkvah, hote hnin dawk yawhawinae a poe teh, nang pawlawk dawk Cathut ni Isarel teh yawhawinae poe naseh, nang teh Ephraim hoi Manasseh patetlah na tat naseh telah atipouh teh, Manasseh hmalah Ephraim ao sak.

<sup>21</sup> Hottelah, Isarel ni Joseph koevah, khenhaw! meimei ka due toe, hat eiteh Cathut teh nang koevah ao vaiteh mintoenaw e ram dawk na hrawi awh han. <sup>22</sup> Hothloilah, na hmaunawngghanaw hane thung hoi ham buet touh, tahloi hoi licung, Amor taminaw e kut dawk ka la e hah na thap pouh, telah ati.

## 49

### *A canaw koe Jakop e lawk*

<sup>1</sup> Jakop ni a capanaw a kaw teh ahnimouh koevah, hmalah nangmouh koe ka tho hane hnonaw ka dei thai nahanlah kamkhueng awh haw.

<sup>2</sup> Nangmouh Jakop canaw kamkhueng awh nateh, na pa Isarel e lawk thai awh haw.

<sup>3</sup> Reuben, nang teh ka ca camin, ka hnosakthainae, ka thaonae, aluepaw, karasangpoung hoi a tha kaawm poung e lah na o. <sup>4</sup> Hatei, tui patetlah kâhuen e lungthin na tawn. Taluenae koe na phat mahoe. Bangkongtetpawiteh, nang ni kaie ikhun dawk na luen teh na kamhnawng sak. Ka ikhun hah na tapam.

<sup>5</sup> Simeon hoi Levih teh hmaunawnggha roi doeh. Lungthin ponae senehmaica ao roinae hmuen koe ao roi. <sup>6</sup> Ka muitha ni ahnimouh roi ni hro e hno dawk kâen mahoe. Kaie bawilennae ni ahnimouh kamkhuengnae dawb baw van mahoe. Ahnimouh ni a lungkhuek teh tami a thei awh, ma ngainae pâlei teh khonaw a raphoe awh toe. <sup>7</sup> Ahnimouh lungkhueknae hah thoebonae lah awm naseh. Bangkongtetpawiteh, puenghoi a thasai. Ahnimouh lungkhueknae teh thoebo lah awm seh, bangkongtetpawiteh a kâoup awh. Jakop miphun Isarel catoun thung vah ahnimouh kâkaye sak han.

<sup>8</sup> Oe Judah nang teh, hmaunawngghanaw ni pholen e lah na o han. Na kut teh na tarannaw e lahuen dawb na tOUNG han. Na pa e capanaw ni na hmalah a tabut awh han. <sup>9</sup> Judah teh sendektanca doeh. Ka capa ni moi kei nah koe hoi na luen takhai hnukkhu, sendek hoi sendekmanu patetlah ka kâva ni teh ka kamkawn e hah apinimaw a pâhlaw ngam han. <sup>10</sup> Siangpahrang sonron ni Judah tâcawt takhai mahoe. Kâlawk kapoeung hai a khok rahak hoi kahmat mahoe. Shiloh a tho hoehroukrak teh miphun pueng ni a lawk a ngai pouh han. <sup>11</sup> Ahnie lanaw hah misurkung dawb a pen teh, lacanaw hah misurkung kahawi e dawb a pen. A hni hah misurtui dawb a pâsu teh a khohna hah misur thi



dawk a pâsu. <sup>12</sup> A mit teh misurtui hlak a paling teh, a hâ teh sanutui hlak a pangaw.

<sup>13</sup> Zebulun teh long kâhatnae tali teng kho a sak han. Long kâhatnae hmuen lah ao han. A khori teh Zidon totouh han.

<sup>14</sup> Issakhar teh mon rahak ka tabawk e a tha kaawm poun e doeh.

<sup>15</sup> Kâhatnae hah ahawi telah a pouk teh, a ram hah a nawm telah a pouk. Hno phu hanlah a loun a rahnoum sak teh, sannaw lah a coung awh.

<sup>16</sup> Dan ni a taminaw hah Isarel miphun rahak vah miphun buet touh patetlah lawkceng han. <sup>17</sup> Dan teh lam dawk kaawm e tahrûn doeh. Marang kâcui e tami hnuklah rawp sak hanlah lam rahak ao teh, marang khok ka khue e hrûnthoe doeh. <sup>18</sup> Oe BAWIPA, na rungngangnae teh ouk ka ngaihawi.

<sup>19</sup> Gad teh tarannaw ni tuk vaiteh, ahni ni hai bout a tuk van han.

<sup>20</sup> Asher teh canei koelah tawnta vaiteh, siangpahrang canei hanlah a tâco sak han.

<sup>21</sup> Naphtali teh sayuk patetlah dawkcawk vaiteh, lawk kahawi a dei han.

<sup>22</sup> Joseph teh a paw kara e a kang lah ao teh, a kangnaw teh rapan naw dawk a yam han. <sup>23</sup> Licung kathoumnaw ni puenghoi a lungmathoe sak awh han. A ka awh teh a maithoe awh han. <sup>24</sup> Hatei ahnie licung teh a thayoun hoe. Jakop Cathut e thaonae kut hoi thao sak e lah ao, Isarel ka khom lungsong pawlawk lahoi yah. <sup>25</sup> Na Cathut teh nang kabawm hane hoi Athakasaipoung ni teh talai hoi kalvan yawhawi hoi sanu hoi camo im yawhawi, nang yawhawi poe hanelah tha ao sak e doeh. <sup>26</sup> Na pa e yawhawi na poe e ni mintoenaw e yawhawi poe e hlak a yungyoe mon pout totouh, hotnaw teh Joseph e lû dawk ao vaiteh, a hmaunawngnaw thung hoi kapek e tami koe ao han.

<sup>27</sup> Benjamin teh Asui patetlah doeh ao. Amom vah a kei e moi a ca vaiteh, tangmin vah lawphno hah a thokhai han, telah ati.

<sup>28</sup> Hetnaw teh Isarel miphun hlaikahni touh lah ao awh teh, hethateh a na pa ni ahnimouh koe a dei pouh e lawknaw doeh. Yawhawi a poe teh yawhawi a poe e patetlah buet touh hnukkhu buet touh yawhawi a poe.

### *Jakop duenae hoi pakawpnae*

<sup>29</sup> Hahoi kai teh, ka mintoenaw koe ceikhai e lah ka o han toe. Hit tami Ephron lawhmuen dawk e talungkhu, Kanaan ram e Mamre hma lae Makkelah law e talungkhu, Abraham pakawpnae phuen, <sup>30</sup> Hit tami Ephron koevah lawhmuen khuehoi ran e dawk ka mintoenaw koe na pakawp awh loe. <sup>31</sup> Hawvah Abraham hoi a yu Sarah a pakawp awh teh, hawvah Isak hoi a yu Rebekah a pakawp awh teh, hawvah Leah a pakawp awh. <sup>32</sup> Lawhmuen hoi a thung e talungkhunaw teh Heth naw koehoi ran e doeh telah ati. <sup>33</sup> Hottelah Jakop ni a canaw lawk he a thui hnukkhu, a khok hah ikhun dawk a taphawng teh a due teh, mintoenaw koe a pakawp awh.

## 50

### *Jakop a kuem awh*

<sup>1</sup> Hat navah Joseph ni a na pa e mithmai a tabo sin teh ka laihoi a pahnuép. <sup>2</sup> Joseph ni tâsibawinaw hah a na pa e ro pawk hoe hahanlah tâsi hluk hane kâ a poe. Hatdawkvah, tâsibawinaw ni Isarel e ro teh a pawk hoe hahanlah tâsi a hluk awh. <sup>3</sup> A ro a rakuengnae dawk hnin 40



touh a ro. Bangkongtetpawiteh, ro a pawk thai hoeh nahanlah rakuengnae dawк hottelah ouk a ro. Hahoi, hnin 70 touh thung Izipnaw a khuika awh.

<sup>4</sup> Ahni khuinae hnin a baw totouh, Joseph ni Faro imthungkhu koe a dei pouh teh, na lung ka youk pawiteh, pahren lahoi Faro hnâthai vah, <sup>5</sup> Apa ni lawk na kam sak, khenhaw! ka due han toe, Kanaan ram phuen ka ran tangcoung e dawк, haw vah na pakawm loe, telah ati. Hatdawkvah, pahren lahoi apa heh na pakawm sak ei, bout ka ban han ati, telah na dei pouh awh, telah atipouh.

<sup>6</sup> Faro ni, thoe na bo sak e patetlah na pa teh pakawm, telah atipouh.

<sup>7</sup> Hatdawkvah, Joseph teh a na pa pakawp hanelah a cei. Faro e a sannaw pueng, imthungkhu dawк e kacue naw hoi Izip ram e kacuenaw pueng, <sup>8</sup> Joseph imthungkhunaw pueng, a hmaunaw hoi a na pa imthungkhunaw pueng hai a cei awh. A ca kanawnaw hoi tuhunaw hoi maitonaw teh Goshen ram dawк a ta awh. <sup>9</sup> Ahnimouh koevah, rangleng hoi marangransanaw hai a cei awh dawkvah, tamihupui lah ao. <sup>10</sup> Jordan namran e Atad cangkatinnae koevah a pha awh. Hote hmuen koe hnin sari touh thung a ka khai awh teh a tahungkhai awh. <sup>11</sup> Hote ram Kanaan taminaw ni Atad cangkatinnae koe vah a yu ro a tahungkhai awh e a hmu awh teh, hethesh Izipnaw e tami kadout tahungkhai e kalenpoung doeh, telah ati awh. Hatdawkvah, hote hmuen teh 'Abel-mizraim' telah ati awh. Hot teh, Jordan namran lah kaawm e doeh.

<sup>12</sup> A canaw ni kâ a poe e patetlah ahnimouh hanlah a sak awh. <sup>13</sup> A canaw ni Kanaan ram a kâenkhai awh teh Abraham ni kâpakawp nahane hmuen râw lah, Hit tami Ephron koe hoi law a ran e Mamre kho hmalah kaawm e Makpelah law e lungngoum thung vah a pakawp awh. <sup>14</sup> A na pa a pakawp awh hnukkhu, Joseph hoi a hmaunaw hoi a na pa pakawpnae koe kacetnaw pueng hoi cungtalah Izip ram lah a ban awh.

<sup>15</sup> Joseph e hmaunaw ni a na pa a due e hah a hmu navah, Joseph ni na hmawt ngai awh hoeh vaiteh, ahni koe sak awh e hnokahawi hoeh e naw pueng hah moi koung na pathung han vaimoe, telah a kâti awh.

<sup>16</sup> Hatdawkvah, Joseph koe dei hanelah tami a patoun awh teh, na pa ni a due hoehnahlan vah, hettelah Joseph koe na dei pouh han. <sup>17</sup> Nang lathueng yonnae a sak awh eiteh, pahren lahoi na hmaunaw e kâtapoenae hoi a yonnae teh ngaithoum loe, telah kâ na poe. Hatdawkvah, na pa Cathut e sannaw e kâtapoenae hah ngaithoum pouh, telah ati. Ahni koe a dei pouh navah, Joseph teh a ka. <sup>18</sup> A hmaunaw ni hai a cei awh teh a hmalah tabo laihoi khenhaw! na sannaw lah ka o awh, telah atipouh awh.

<sup>19</sup> Joseph ni ahnimouh koevah, taket awh hanh awh, Bangkongtetpawiteh, Cathut e yueng lah maw ka o. <sup>20</sup> Nangmouh ni ka lathueng vah, hawihoeahnae hah sak han na kâcai awh, hateiteh, Cathut ni sahnin vah tami moikapap hringnae rungngang hanelah hawinae hah sak han noenae lah ao. <sup>21</sup> Hatdawkvah, taket awh hanh. Nangmouh hoi na canaw teh pou na kawк awh han, telah atipouh. Hottelah lungmawng sak teh lawк kahawi hoi a pato.

### *Joseph a duenae*

<sup>22</sup> Joseph teh ama hoi a na pa imthungkhunaw hoi Izip ram vah kho a sak awh. Joseph teh kum 110 touh a hring. <sup>23</sup> Joseph ni Ephraim e a canaw, a na mincanaw hoi se thum totouh e a hmu. Manasseh capa, Makhir canaw hai Joseph e khokpakhu dawк a khe awh.

<sup>24</sup> Joseph ni a hmaunawnganaw koe, ka due han toe, hateiteh, Cathut ni na khet han. Hete ram dawк hoi na tâcokhai awh vaiteh, Abraham,



Isak hoi Jakop koe thoebo hoi lawkkam e ram dawk na ceikhai awh han, telah atipouh.

<sup>25</sup> Hatdawkvah, Joseph ni Isarel catounnaw hah lawkkamnae a sak teh, Cathut ni na khet awh roeroe han. Ka hru hah hete hmuén koehoi na ceikhai awh han, telah ati.

<sup>26</sup> Hatdawkvah, Joseph teh kum 110 touh a pha nah a due. A ro teh kapawk thai hoe hlah a sak awh teh Izip e thingkong buet touh thungvah a ta awh.



## TÂCONAE (Exodus)

### *Izip vah Isarelnaw puenghoi a pung awh*

<sup>1</sup> Izip ram vah Jakop hoi cungtalas, amamae imthungnaw ka phat awh e Isarelnaw teh; <sup>2</sup> Reuben, Simeon, Levi hoi Judah,

<sup>3</sup> Issakhar, Zebulun hoi Benjamin,

<sup>4</sup> Dan, Naphtali, Gad hoi Asher,

<sup>5</sup> Jakop canaw abuemlah tami 70 touh a pha awh. Joseph teh Izip ram vah yo la ao toe. <sup>6</sup> Joseph hoi a hmaunawngghanaw senae taminaw pueng teh koungh a due awh toe. <sup>7</sup> Isarelnaw teh ca moi a pungdaw awh, a thao awh teh ram pueng dawkh kho a sak awh.

### *Faro ni Isarel a rektap*

<sup>8</sup> Hathnukkuh, Izip ram dawkh Joseph ka panuek hoehe e siangpahrang katha a tâco. <sup>9</sup> Hote siangpahrang ni hai Isarelnaw teh maimanaw hlahk apap awh, a thasai awh. <sup>10</sup> Tho awh, lungangcalah hoi ahnimouh lathueng hno sak awh sei. Nahoeh pawiteh, ahnimouh teh hoe pungdaw awh vaiteh, hmalah tarankâtuknae awm pawiteh, maimae tarannaw koe lah kambawng awh vaiteh, maimouh hah na tuk vaiteh ram dawkh hoi a yawng awh han doeh telah a taminaw koe a dei pouh. <sup>11</sup> Hatdawkvah, Izip bawinaw ni puenghoi rektap hanelah kaukkung a ta pouh. Isarel taminaw teh hno pâtung nahanlah Pithom khopui hoi Raameses khopui hah a sak awh. <sup>12</sup> Hateiteh, rektapnae hoehe a khang awh e patetlah hoehe a pungdaw awh. Ahnimouh kecu dawkh Izipnaw teh a lungpuen awh. <sup>13</sup> Pueng hoi hoe a rektap awh. <sup>14</sup> Talung bonae hoi amhru saknae koe, law thawnaw pueng dawkh puenghoi a tawkh sak awh teh a tawkh e tangkuem dawkh ngét ka fawn lah a tawkh sak awh.

<sup>15</sup> Izip siangpahrang ni Hebru tami, camo ka khe sak roi e kahni touh, Siphrah hoi Puah koevah, <sup>16</sup> nangmouh roi ni Hebru napuinaw e camo khe sak roi nateh, a khenae hmuen koe na ring roi navah, ca tongpa khe pawiteh thet, napui khe pawiteh pâhlung roi haw telah atipouh. <sup>17</sup> Camo kakhesak roi e ni Cathut a taki dawkvah, Izip siangpahrang e kâpoe e patetlah sak laipalah ca tongpa hah a pâhlung roi. <sup>18</sup> Izip siangpahrang ni hai camo kakhesak e roi a kaw teh, nangmouh roi ni bangkongmaw camo tongpanaw na pâhlung roi telah a pacei navah,

<sup>19</sup> Ahnimouh roi ni Hebru napuinaw teh Izip napuinaw patetlah awm awh hoehe. Ahnimouh teh cao a yawi dawkvah, camo kakhesak e a tho hoehe nah camo yo a la khe toe telah atipouh roi.

<sup>20</sup> Hatdawkvah, Cathut ni camo kakhesak roi e lathueng vah, hawinae a sak pouh. Hote miphun haiyah a pungdaw awh teh a thao awh.

<sup>21</sup> Camo kakhesak e napui roi ni Cathut a taki roi dawkvah ahnimae imthungkhunaw hah a khetyawt roi. <sup>22</sup> Faro siangpahrang ni hai Isarelnaw dawkh ca tongpa khe e pueng teh Nai palang dawkh tâkhawng naseh, Napui pâhlung awh naseh, telah a taminaw pueng koe lawk a thui.



## 2

*Mosi khenae*

<sup>1</sup> Hatnae tueng nah, Levih tami tongpa buet touh ni Levih tami napui a yu lah a la. <sup>2</sup> Napui ni camo a vawn teh ca tongpa a khe. Hote ca tongpa teh meilam hawinae hah a manu ni a hmu dawkvah, thapa yung thum touh thung a hro. <sup>3</sup> Hateiteh, a hro thai hoehe torei teh, lungpumpung hoi sak e thingkong hah a la teh tuipan hoi thingtapi hoi a patô hnukkhu, hote thingkong dawc camo a ta teh, Nai palang rai lah lungpum um vah a ta. <sup>4</sup> A tawncanu ni bangtelah vaimoe ao han vaiyoe tie panue han a ngai dawkvah ahlahnawnnae koehoi a tuet. <sup>5</sup> Hat toteh, Faro canu teh tui kamhluk hanlah a tho. A sannunaw hoi tuipui rai lah a kâhlai awh navah, sumpanaw rahak vah thingkong a hmu teh la hanlah a sannu buet touh a patoun. <sup>6</sup> Thingkong e a khuem a paawng awh navah, ka kap e camo hah a hmu. Pahrennae lungthin a tawn dawkvah hete camo teh Hebru camo doeh telah ati.

<sup>7</sup> Camo e a tawncanu ni nang hanlah camo ka cun hane Hebru napui kai ni ka cei vaiteh, na kaw pouh han na ou telah Faro siangpahrang e canu koe a pacei navah, <sup>8</sup> Faro canu ni cet loe telah kâ a poe dawkvah, napuica ni a cei teh camo e a manu hah a kaw. <sup>9</sup> Hathnukkhu, Faro siangpahrang e canu ni hete camo heh lat nateh kai hanlah na kawc pouh la a, aphu na poe han telah atipouh e patetlah hote napui ni camo hah a la teh a kawc. <sup>10</sup> Camo a rount torei teh, Faro siangpahrang e canu koe a thak pouh teh, siangpahrang e canu ni a ca lah a ta teh, Mosi telah min a phung. Bangkongtetpawiteh, tui dawc hoi kai ni ka rasa e telah ati.

*Mosi Midian ram lah a yawng*

<sup>11</sup> Mosi teh a kum hruea a cue torei teh, amae a miphunnaw onae hmuen koe a cei teh, ahnimae thaw tawc a naw hah a khet. A miphun Hebru tami buet touh hah Izip tami ni a hem e a hmu navah, <sup>12</sup> A tenggam a khet teh apihai awm hoehe tie a panue navah, Izip tami hah a thei teh sadi dawc a pakawp. <sup>13</sup> Atangtho bout a tâco navah, Hebru tami kahni touh a kâyue roi e a hmu teh, nang ni namamouh roi reira hah bangkongmaw na hem telah ka yue e tami hah a pacei.

<sup>14</sup> Hote tami ni apinimaw nang teh kaimouh lathueng vah lawkcengkung lah na ta. Izip tami na thei e patetlah kai hah na thei han na ngai maw telah atipouh. Hatnavah, Mosi ni amae hno a sak e hah a kamphawng toe telah a panue dawkvah a taki. <sup>15</sup> Hote kamthang hah Faro siangpahrang ni a thai torei teh, Mosi thei hanlah a tawng. Mosi teh Faro siangpahrang koehoi a yawng teh, Midian ram vah kho a sak. Ahni teh, tuido teng a tahung navah, <sup>16</sup> Midian vaihma e canu sari touh teh a na pa e tu hoi hmaenaw tui pânei hanlah a tho awh teh tui a do awh hnukkhu, dokkonaw dawc tui a pakawî awh. <sup>17</sup> Hatnavah, tukhoumnaw a tho awh teh, tu hoi hmaenaw hah a hrui awh. Hatnavah, Mosi ni a thaw teh, hote napuinaw koe lah ao teh tu hoi hmaenaw hah tui a pânei pouh. <sup>18</sup> Hote napuinaw teh a na pa Reuel koe a pha awh navah, bangkong sahnin teh palang na tho awh bo telah atipouh.

<sup>19</sup> Ahnimouh nihaiyah Izip tami buet touh ni tukhoumnaw e kut dawc hoi na rungngang teh tui kakhoutlah a do teh tu hoi hmaenaw hah tui a pânei atipouh awh. <sup>20</sup> A na pa ni hai hote tami teh na maw ao. Bangkongmaw yout na ban takhai awh. Bu ca hanlah kaw awh, telah atipouh.



<sup>21</sup> Hottelah hoiyah Mosi teh ahnimouh hoi cungtaloh o hanelah, a hnâbo hnukkhu Reuel ni a canu Zipporah hah Mosi hoi a kâpaluen sak. <sup>22</sup> Hote napui ni ca tongpa a khe toteh Mosi ni Gershom telah min a phung. Bangkongtetpawiteh, kai teh ramlouk dawk imyin lah ka o toe telah ati. <sup>23</sup> A kumtha asaw toteh, Izip siangpahrang hai yo a due toe. Hattoteh Isarelnaw teh san lah ao awhnae koe a cingou khuika awh. Hottelah san lah onae koe hoi khuika hramki e lawk feh Cathut koe a pha. <sup>24</sup> Cathut ni ahnimae cingou khuika lawk teh a thai pouh. Hatnavah, Cathut ni Abraham, Isak, Jakop tinaw hoi lawkkam a sak e hah a pouk. <sup>25</sup> Hatdawkvah, Cathut ni Isarelnaw hah a hmu teh, a panue.

### 3

#### *Cathut ni Mosi a kaw*

<sup>1</sup> Mosi ni Midian vaihma, a masei Jethro e tu hoi hmaenaw a khounavah, thingyeiyawn e kaniloumlah a ceikhai teh, Horeb tie Cathut e mon koe a pha. <sup>2</sup> Hatnavah, BAWIPA e kalvantami teh buruk dawk hoi ka tâcawt e hmaito lahoi a kamnue. Mosi ni a khet navah, hmai a to ei, buruk teh a kak hoe e hah a hmu navah, <sup>3</sup> Bangkongmaw buruk kang laipalah ao. Hete kângairu e hno heh ka cei vaiteh ka khet han telah ati. <sup>4</sup> Mosi ni a khet e BAWIPA ni a hmu navah, Mosi, Mosi telah buruk thung hoiyah a kaw. Mosi ni hai ka o telah atipouh.

<sup>5</sup> Cathut ni hai hnai hanh. Na khokkhawm hah rading haw. Na kangduenae hmuen teh kathounge talai doeh. <sup>6</sup> Kai teh nange na pa e Cathut, Abraham e Cathut, Isak e Cathut, Jakop e Cathut, doeh telah atipouh. Mosi ni Cathut teh a khet ngam hoeh dawkvah a minhmai a ramuk.

<sup>7</sup> BAWIPA ni hai Izip ram kaawm e ka taminaw e a khang e rektapnae hah kai ni kheh ka hmu toe. Ahnimouh thaw ka tawksak e bawinaw kecu dawk ahnimae hramnae lawk ka thai teh, reithai khangnae hai ka panue. <sup>8</sup> Ahnimouh teh Izip ram, Izip taminaw e kut dawk hoi ratang vaiteh, Kanaannaw, Hitnaw, Amornaw, Periznaw, Hivnaw hoi Jebusitnaw onae ram, sanutui hoi khoitui a lawngnae ram dawk hrawi hanlah kai ka kum. <sup>9</sup> Atu haiyah, Isarelnaw khuika lawk kai koe a pha teh, Izipnaw ni ahnimouh rektapnae hai ka hmu toe. <sup>10</sup> Hatdawkvah, atu cet leih. Nang teh ka tami, Isarelnaw hah Izip ram hoi hrawi tâcokhai hanlah, nang teh Faro siangpahrang koe kai ni na patoun han telah atipouh.

<sup>11</sup> Mosi nihai, kai teh bang patet e tami lah maw ka o teh, Faro siangpahrang koe ka cei vaiteh, Isarelnaw hah Izip ram hoi hrawi tâcokhai han telah Cathut koe atipouh navah, <sup>12</sup> Cathut ni atangcalah kai teh nang koe lah ka o han. Kai ni nang na patounnae mitnoutnae teh, nang ni hote taminaw hah Izip ram hoi hrawi tâcokhai hnukkhu, hete mon dawk Cathut na bawk han telah atipouh.

<sup>13</sup> Mosi nihai, kai ni Isarelnaw onae hmuen koe ka pha teh, nangmae mintoenaw e Cathut ni kai teh nangmouh koe na patoun toe telah kai ni ka dei pawiteh, ahnimouh ni hote Cathut e min teh apimaw telah kai bout na pacei awh navah, bangtelamaw bout ka dei pouh han telah Cathut koe a pacei. <sup>14</sup> Cathut ni hai KAI teh KAI doeh. KAI ka tet e ni kai teh nangmouh na onae hmuen koe na patoun toe telah Isarelnaw koe bout dei pouh telah Mosi koe atipouh. <sup>15</sup> Cathut ni Mosi koe bout a dei pouh e teh, nangmae mintoenaw e Cathut, Abraham e Cathut, Isak e Cathut, Jakop e Cathut lah kaawm e BAWIPA ni kai teh nangmouh koe na patoun toe,



telah Isarelnaw koe na dei pouh han. Hote min teh a yungyoe e ka min lah ao teh catounnaw ni pahnim hoeh nahanelah ao. <sup>16</sup> Cet nateh Isarel kacuenaw hah pâkhueng nateh, nangmae mintoenaw e Cathut, Abraham e Cathut, Isak e Cathut, Jakop e Cathut lah kaawm e BAWIPA ni kai koe a kamnueh teh, nangmouh na khet awh navah, Izip ram vah nangmouh lathueng bangmaw a sak awh tie kamcengcalah ka hmu awh toe. <sup>17</sup> Izip ram vah na khang a e rucatnae dawh hoi nangmouh na ratang vaiteh, Kanaannaw, Hit naw, Amor naw, Periznaw, Hiv naw hoi Jebusitnaw ram, sanutui hoi khoitui a lawngnae ram dawh hrawi kâenkhai hanlah kai ni lawk ka kam telah ahnimouh koe dei pouh. <sup>18</sup> Ahnimouh ni nange lawk a ngâi awh vaiteh, nang ni Isarel kacuenaw hoi Izip siangpahrang koe na kâen vaiteh, Hebrunaw e BAWIPA Cathut teh kaimouh ni kâhmo awh toe. Ramke dawh hnin thum touh lam cei koe kamamae BAWIPA Cathut thuengnae sak thai hanelah, kâ na poe haw, telah na ti pouh han.

<sup>19</sup> Izip siangpahrang ni a thaonae kut laipalah teh, cei nahane kâ na poe awh mahoeih tie ka panue. <sup>20</sup> Kai ni hai kut ka daw vaiteh, Izip ram dawh ka sak hane kaie kângairunae hoi hote ram teh runae ka poe han. Hathnukkhu, Izip siangpahrang ni nangmouh teh na tâco sak awh han. <sup>21</sup> Hote miphun teh Izipnaw koe minhmai kahawi a hmu sak vaiteh, nangmouh ni na tâco awh navah, kuthrawng hoi na tâcawt awh mahoeih. <sup>22</sup> Bangkongtetpawiteh, napui pueng ni imri, amamae im dawh kaawm e koe sui ngun hoi khohnanaw a hei awh vaiteh, nangmae na canaw hah a pathoup awh vaiteh, Izipnaw e hnopai hah na lawp awh han telah Mosi koe a dei pouh.

## 4

### *Mosi koe mitnout a poe*

<sup>1</sup> Mosi ni, ahnimanaw ni kai na yuem awh mahoeih, ka lawk hai ngâi awh mahoeih, BAWIPA ni nang koe kamnuek mahoeih telah a ti awh han doeh atipouh.

<sup>2</sup> BAWIPA ni na kut dawh bang hno maw kaawm telah a pacei navah, sonron ao telah atipouh.

<sup>3</sup> Talai dawh tâkhawng haw atipouh e patetlah a tâkhawng navah, sonron teh tahrin lah a coung teh, Mosi ni a yawng takhai. <sup>4</sup> BAWIPA ni na kut hoi a mai dawh man hottelah atipouh e patetlah Mosi ni a kut hoi a man navah, a kut dawh sonron lah bout a coung pouh. <sup>5</sup> Hottelah, na sak pawiteh ahnimae mintoenaw e Cathut, Abraham e Cathut, Isak e Cathut, Jakop e Cathut lah kaawm e BAWIPA ni nang koe a kamnueh hah hote taminaw ni a yuem awh han telah atipouh. <sup>6</sup> BAWIPA ni na kut na lungtabue thung tapu haw bout atipouh e patetlah a kut a lungtabue thung a tapu teh a rasa navah, a kut teh a hrikbei.

<sup>7</sup> Na kut hah na lungtabue dawh bout tapu atipouh e patetlah a kut a lungtabue dawh bout a tapu teh a rasa navah, hmaloe e patetlah bout a coung. <sup>8</sup> Hote taminaw ni na yuem awh hoeh, hmaloe e mitnoutnae hai ngâi awh hoehpawiteh, apâhni e mitnoutnae teh a yuem awh han.

<sup>9</sup> Hote mitnoutnae kahni touh e hah yuem awh hoeh, na lawk hai ngâi awh hoehpawiteh, Nai tui youn touh lat nateh a oung lah rabawh, hottelah tuipei dawh e la e tui teh talai kaphui dawh thi lah ao han telah atipouh.

<sup>10</sup> Hat navah Mosi ni BAWIPA koe Oe ka Bawipa, kai teh ha hoehnahlan hai na san koe lawk na dei hnukkhu hai lawk ka dei thai e lah kaawm hoeh. Lawkdei khokpakhak e lah ka o atipouh. <sup>11</sup> BAWIPA ni hai tami e



pahni apinimaw a sak. Lawka, hnâpang, mitdawn, mitang hah apinimaw a sak. Kai, BAWIPA ni ka sak e nahoehmaw. <sup>12</sup> Hatdawkvah, atu cet leih. Na pahni dawk ka o vaiteh, nang ni bangtelamaw na dei han tie hah na cangkhai han telah atipouh. <sup>13</sup> Mosi ni Oe ka Bawipa, na ngai e tami e kut dawkh mah poe lawih telah atipouh navah,

<sup>14</sup> BAWIPA ni Mosi koe a lungkhuek teh Levih tami Aron teh na hmau nahoehmaw. Ahni teh lawk a dei thai tie ka panue. Ahni teh nang dawn hanelah a tho lahun. Na kâhmo torei a lunghawi han. <sup>15</sup> Nang ni ahni hoi kâpan nateh, ahni ni a dei hane lawk hah ka poe han. Nange pahni dawkh thoseh, ahnie pahni dawkh thoseh, Kai ka o vaiteh nangmouh roi ni bangtelamaw na sak han tie na cangkhai han. <sup>16</sup> Ahni ni nange yueng lah a dei vaiteh, ahni teh nange pahni patetlah, nang hai ahnie Cathut patetlah na han. <sup>17</sup> Nang ni mitnoutnaw na sak thai hanelah hete sonron haiyah, na kut dawkh pou na sin han telah atipouh.

### *Mosi Izip ram lah a ban*

<sup>18</sup> Mosi ni a masei Jethro koe a cei teh, Izip ram kaawm e ka miphunnaw ni paroup a hring rah maw telah khet hanelah, ahnimouh onae hmuen koe ka cei han telah a kâhei navah, Jethro ni lungmawngcalah hoi cet lawi bout atipouh. <sup>19</sup> Hat navah BAWIPA ni, Izip ram lah bout ban leih, nang na ka thet hane taminaw teh kOUNg a due awh toe telah midian ram dawkh Mosi koe atipouh.

<sup>20</sup> Hat navah, Mosi ni a yu hoi capa kahni touh la a kâcui sak teh, Cathut e sonron hah a kut dawkh a sin teh, Izip ram lah a ban. <sup>21</sup> BAWIPA ni hai nang ni Izip ram lah na ban teh na pha torei teh, na kut dawkh Kai ni na poe e kângairu hnônaw pueng hah Faro siangpahrang hmalah sak pouh. Hottelah, na sak nakunghai, Kai ni ahni teh a lung ka pata sak vaiteh, ahni ni Isarel taminaw hah cetsak mahoe. <sup>22</sup> Hattoteh nang ni Faro siangpahrang koe BAWIPA ni Isarel teh ka camin doeh. <sup>23</sup> Ka ca ni Kai na bawkh thai nahanlah cetsak loe, na cetsak hoehpawiteh, na camin hai Kai ni ka thei han telah na ti pouh han telah ati. <sup>24</sup> Kahlawng a cei lahun nah, BAWIPA ni Mosi hah rim dawkh a kâhmo teh thei hanlah a kâcai. <sup>25</sup> Hat navah, Zipporah ni lungtaw a la teh a capa e vuensom a a pouh hnukkhu, a vâ e khok a nep pouh hnukkhu, atangcalah nang teh thipaling ka lawngsakkung vâ lah doeh na o telah atipouh. <sup>26</sup> Hat navah, Mosi hah a ceisak. A yu ni vuensomanae yawhawinae kecu dawkh nang teh kai koe thipaling na ka palawng e vâ lah na o telah atipouh nae doeh.

<sup>27</sup> BAWIPA ni hai Mosi dawn hanelah kahrawng lah cet loe telah Aron koe atipouh e patetlah Aron ni a cei teh, Cathut e mon dawkh Mosi hah a kâhmo teh a paco. <sup>28</sup> Mosi ni hai ama ka patoun e BAWIPA e lawknaw pueng thoseh, lawk a thui e mitnoutnaw thoseh, Aron koe a dei pouh. <sup>29</sup> Hote hmaunawnggha kahni touh roi ni Isarel tami kacuenaw a pâkhueng roi hnukkhu, <sup>30</sup> Aron ni Mosi koe BAWIPA e a lawknaw pueng bout a dei teh, taminaw e hmalah mitnoutnaw a kamnue sak. <sup>31</sup> Hote taminaw ni hai a yuem awh. BAWIPA ni Isarel miphun hah a khetyawtnae thoseh, a khang awh e rektapnae thoseh, a hmu tie a thai awh toteh, a lûsaling awh teh a bawkh awh.



<sup>1</sup> Hathnukkhu, Mosi hoi Aron ni Faro siangpahrang koe a kâen teh Isarelnaw e BAWIPA Cathut ni ka taminaw teh kahrawng vah kai hane pawito hanlah patoun telah ati, atipouh.

<sup>2</sup> Faro siangpahrang ni hai BAWIPA lawk a ngâi teh Isarelnaw ka ceisak nahannah hote Cathut teh apimaw. BAWIPA tie ka panuek hoeh. Isarelnaw ka cetsak mahoe telah ati.

<sup>3</sup> Ahnimouh roi ni hai Hebrunaw e Cathut teh kaimouh hoi kâhmo awh toe. Thingyeiyawn hnin thum lamcei koe, kaimae BAWIPA Cathut bawk nahan kâ na poe haw. Nahoe pawiteh lacik, kâtheikârawngnae hoi maimouh na rek han telah atipouh. <sup>4</sup> Izip siangpahrang ni hai Mosi hoi Aron, nangmouh roi ni hete taminaw bangkongmaw thaw na pakak roi. Thaw koe cet nateh thaw tawk awh, atipouh.

<sup>5</sup> Hahoi, ram daw k hote taminaw moiapap awh. Thaw taw k hoeh hanlah nangmouh ni kâ na poe bo aw telah Faro siangpahrang ni ati. <sup>6</sup> Hote hnin daw k, Faro ni thaw kakuennaw hoi kauknaw a kaw teh, <sup>7</sup> Amhru sak nahane cakawng hmaloe e patetlah taminaw poe awh hanh. Ahnimouh ni cakawng hah amamouh hanlah tawng awh naseh. <sup>8</sup> Amhru teh hmaloe e yit touh na saksak han. Payoun sak hanh. Ahnimouh teh a pangak awh dawkvah, cei awh vaiteh maimae Cathut thuengnae ka sak awh han telah ouk a hram awh. <sup>9</sup> Hatdawkvah, thaw nget ka tawn lah a taw k sak awh. Tami kahawihoehe lawk ngâi a hanh telah atipouh.

<sup>10</sup> Hahoi thaw kakuennaw ni a cei awh teh Faro siangpahrang ni cakawng na poe hoeh. <sup>11</sup> Cakawng hah hmu thainae hmu en koe tawng awh. Hateiteh, na taw k hane thaw teh payoun mahoe telah kâlawk ao telah taminaw a thaisak awh.

<sup>12</sup> Hatdawkvah, taminaw ni cakawng hanlah songnawng tawng hanelah Izip ram pueng daw k a kâkapek awh. <sup>13</sup> Kauknaw ni hai cakawng hmuthainae a tue nah hnintangkuem a taw k awh e patetlah cum totouh taw k awh telah ahnimouh a hroecoe awh. <sup>14</sup> Faro siangpahrang e kaukungnaw ni a rawi e Isarel kahrawikungnaw hah nangmouh ni hmaloe na taw k a e patetlah bangkongmaw paduem hoi sahnin amhru sak e na cum sak awh hoeh telah atipouh teh a hemkhai awh.

<sup>15</sup> Hat navah, Isarel kahrawikungnaw ni Faro siangpahrang koe a cei awh teh, bangkongmaw nang ni na sannaw hettelah na sak. <sup>16</sup> Na sannaw heh cakawng na poe hoeh. Kaukungnaw ni hai amhru sak awh, telah ati awh teh kaimouh na hem awh. Na taminaw koe yonnae ao telah a hram awh. <sup>17</sup> Faro siangpahrang ni hai nangmouh teh na pangak awh. Na pangak awh. Hatdawkvah, kaimouh ka cei vaiteh BAWIPA thuengnae ka sak awh han telah nangmouh ni na ti awh. <sup>18</sup> Hatdawkvah, atu cet awh nateh taw k awh. Cakawng na poe awh mahoe. Hateiteh, amhru teh ama mingming lah pou na sak awh han telah atipouh.

<sup>19</sup> Hottelah, hnintangkuem a sak e amhru teh na payoun awh mahoe telah kâ ao dawkvah Isarel kahrawikungnaw ni runae kâhmo awh toe tie a kâpanue awh. <sup>20</sup> Faro siangpahrang koehoi a cei awh navah lam vah ahnimouh ka ring e Mosi hoi Aron a hmu awh navah,

<sup>21</sup> BAWIPA ni nangmouh roi na khet teh lawk na ceng naseh. Bangkongtetpawiteh, Faro siangpahrang hoi a thaw katawknaw ni kaimouh na panuet sak han hoi thei sak hanlah nangmouh roi ni na sak toe telah atipouh awh.



<sup>22</sup> Mosi ni hai BAWIPA koe a cei teh, Oe Cathut, nang ni hete taminaw hah bangkongmaw na rektap. Bangkong kai hah na patoun. <sup>23</sup> Kai ni nange kâ lahoi ka dei nahanlah Faro siangpahrang koe kâen hnin hoi kamtawng teh, ahni ni hete taminaw thoe a bo. Nang ni na taminaw khoeroe na runggang hoeh telah atipouh.

## 6

<sup>1</sup> BAWIPA ni Mosi koe, Kai ni Faro siangpahrang koe bangtelamaw ka sak han tie atu na panue han. Ahni ni thaonae kut a hmu vaiteh, ka taminaw a tâco sak han. Thaonae kut hmawt vaiteh ahnimouh teh a ram daw k hoi a pâlei han telah atipouh.

<sup>2</sup> Cathut ni Mosi koe bout a dei pouh e teh, Kai teh Jehovah doeh. <sup>3</sup> Kai ni Abraham, Isak, Jakop tinaw koe, Athakasaipounge Cathut tie min lahoi ka kamnue pouh eiteh, ka min teh Jehovah lah ahnimouh ka panuek sak hoeh. <sup>4</sup> Ahnimouh ni a hmuen pueng koe a kâva awh teh, imyin lah onae Kanaan ram ahnimouh poe han ka tie lawkkam ka caksak toe. <sup>5</sup> Izipnaw ni santoung sak e Isarelnaw e hramnae lawk ka thai toe. Ka lawkkam hah ka pahnim hoeh. <sup>6</sup> Hatdawkvah, Isarelnaw koe a dei pouh hane lawk teh; Kai teh BAWIPA doeh. Kai ni nangmouh, Izipnaw e kut daw k hoi na tâco sak vaiteh, ahnimae rektapnae daw k hoi na rasa han. Kutdawnae, ka patawpoung lah reknae lahoi nangmouh teh na ratang awh han. <sup>7</sup> Ka tami hanlah na la han. Kai teh nangmae Cathut lah ka o han. Kai teh Izipnaw e kut daw k hoi na ka tâcawt sak e BAWIPA Cathut lah ka o e na panue awh han. <sup>8</sup> Kai ni Abraham, Isak, Jakop ti koe poe hanlah lawk ka kam e ram daw k na hrawi awh vaiteh, râw lah na pang sak awh han. Kai teh BAWIPA doeh telah atipouh.

<sup>9</sup> Hottelah, Mosi ni Isarelnaw koe patuen a dei pouh eiteh, ahnimouh teh a lungthin puenghoi a pata awh teh, puenghoi rektapnae a khang awh dawkvah Mosi e lawk ngâi laipalah ao awh. <sup>10</sup> BAWIPA ni Izip siangpahrang Faro koe cet nateh, <sup>11</sup> Ahni ni Isarelnaw hah a ram daw k hoi tâco sak hanlah dei pouh telah Mosi koe atipouh.

<sup>12</sup> Mosi ni hai Isarelnaw ni patenghai ka lawk hah ngâi laipalah ao awh teh, vuensoma hoeh naw e pahni daw k hoi dei e kaie lawk hah Faro siangpahrang ni a ngai han namaw telah BAWIPA hmalah atipouh.

<sup>13</sup> Hatdawkvah, BAWIPA ni Mosi hoi Aron teh Isarelnaw Izip ram hoi tâcokhai hanelah, a kaw teh Isarelnaw koe thoseh, Izip siangpahrang Faro koe thoseh a patoun. <sup>14</sup> Isarel kacuenaw e a minnaw teh; Isarel e camin Reuben e canaw teh Enok, Pallu, Hezron hoi Karmi. Het teh Reuben miphun lah ao. <sup>15</sup> Simeon e a canaw teh Jemuel, Jamin, Ohad, Jakhin, Zohar hoi Kanaan napui e capa Saw, hetnaw teh Simeon miphun lah ao. <sup>16</sup> Levih e a canaw teh Gershon, Kohath hoi Merari. Levih teh a kum 137 touh a hring. <sup>17</sup> Gershon e a ca roi teh Libni hoi Shimeï lah ao. <sup>18</sup> Kohath e a canaw teh Amram, Izhar, Hebron hoi Uzziel lah ao. Kohath teh a kum 133 touh a hring. <sup>19</sup> Merari e a ca roi teh Mahli hoi Mushi lah ao. Hetnaw heh Levih miphunnaw lah ao. <sup>20</sup> Amram ni a na pa e tawncanu Jokhebed a yu lah a la teh, Aron hoi Mosi a sak. Amram teh a kum 137 touh a hring. <sup>21</sup> Izhar e a canaw teh Korah, Nepheg hoi Zikhri lah ao. <sup>22</sup> Uzziel e a canaw teh Mishaël, Elzaphan hoi Sithri lah ao. <sup>23</sup> Aron ni Elisheba, Amminadab canu, Nahshon tawncanu, a yu lah a la teh, Nadab, Abihu, Eleazar, hoi Ithamar hah a sak. <sup>24</sup> Korah e a canaw teh Assir, Elkanah hoi Abiasaph lah ao. Hetnaw heh Korah miphunnaw lah ao. <sup>25</sup> Aron capa Eleazar ni



Putiel canu a yu lah a la teh, hot hoi Phinehas a sak pouh. Hetnaw heh Levih miphun dawk hoi e kacuenaw lah ao awh. <sup>26</sup> BAWIPA ni Isarelnaw Izip ram dawk hoi tâcawtkhai leih telah atipouh.

<sup>27</sup> Isarel miphunnaw Izip ram hoi ka tâcotakhai hanelah, Faro siangpahrang koevah ka dei pouh hane tami teh Mosi hoi Aron doeh.

### *Aron teh Mosi hanelah lawk kadeikung doeh*

<sup>28</sup> BAWIPA ni Izip ram vah Mosi koe a pâpho pouh e teh; <sup>29</sup> Kai teh Jehovah doeh. Kai ni lawk na thui e pueng hah Izip siangpahrang Faro koe na dei pouh han telah Mosi koe atipouh.

<sup>30</sup> Mosi ni, kai teh vuensoma hoeh e pahni ka tawn dawkvah, Faro siangpahrang ni ka lawk hah bangtelamaw a ngâi thai han telah BAWIPA hmalah atipouh.

## 7

<sup>1</sup> BAWIPA ni Mosi koe, nang teh faro siangpahrang e cathut lah na o sak. Na hmau Aron teh na profet lah ao han. <sup>2</sup> Kâ na poe e naw pueng hah nang ni bout na dei han. Faro siangpahrang ni Isarelnaw hah a ram dawk hoi a tâco sak nahanlah na hmau Aron ni ahni koe a dei pouh han. <sup>3</sup> Kai ni hai Faro e lung ka pata sak vaiteh, Izip ram dawk kaie kângairu mitnoutnaw hah ka pung sak han. <sup>4</sup> Hateiteh, Faro siangpahrang ni nangmae lawk hah ngâi laipalah ao han. Kai ni hai Izip ram lathueng ka kut ka dâw vaiteh, kalenpounge lacik hoi ka ransahu, ka tami Isarelnaw hah Izip ram hoi ka tâcokhai han. <sup>5</sup> Hottelah, Izip ram lathueng ka kut ka dâw vaiteh, Isarelnaw ahnimouh koehoi ka tâcokhai toteh, Kai teh BAWIPA doeh tie Izipnaw ni a panue awh han telah Mosi koe atipouh.

<sup>6</sup> Mosi hoi Aron ni BAWIPA e kâpoelawk patetlah a sak roi. <sup>7</sup> Faro koe a dei pouh roi navah, Mosi teh a kum 80, Aron teh a kum 83 touh a pha roi.

### *Kângairu sonron*

<sup>8</sup> BAWIPA ni Mosi hoi Aron koe bout a dei pouh e teh, <sup>9</sup> Faro siangpahrang ni nangmouh koe kângairuhno na patue haw tetpawiteh, na sonron hah lat nateh a hmalah tâkhawng pouh telah Aron koe a dei pouh. Sonron haiyah tahrn lah a kangcoung han telah atipouh.

<sup>10</sup> Mosi hoi Aron ni Faro siangpahrang koe a kâen roi teh BAWIPA ni a dei e patetlah a sak pouh roi. Aron ni Faro siangpahrang hoi a sannaw e hmalah sonron a tâkhawng teh tahrn lah a kangcoung. <sup>11</sup> Hat navah, Faro siangpahrang ni lungkaangnaw camkathoumnaw hah a kaw teh Izip ram e mitpaleikathoumnaw nihai, hot patetlah a sak awh. <sup>12</sup> A sin awh e sonronnaw hah a tâkhawng awh teh tahrn lah a kangcoung awh. Hateiteh, Aron e sonron ni ahnimae sonronnaw hah kOUNG a payawp. <sup>13</sup> BAWIPA ni a dei e patetlah Faro siangpahrang teh a lungpata sak teh, ahnimae lawk hah ngâi laipalah ao.

### *Tui thi lah a coung*

<sup>14</sup> BAWIPA nihai, Faro siangpahrang e lung a pata sak teh Isarelnaw hah tâcawt sak hoeh. <sup>15</sup> Amom vah, Faro siangpahrang koe cet haw. Ahni ni tui namran lah a cei han. Ahni a pha hoehnahlan tuipei namran lah kangdout haw. Tahrn lah kangcoung e sonron hah na kut daw sin haw. <sup>16</sup> Hebru miphunnaw e Cathut Jehovah ni kaie taminaw ni kahrawng vah Kai na bawk hanelah, ahnimouh hah tâcawt sak leih telah kai heh nang koe na patoun toe. Nang ni atu totouh ngâi laipalah na o awh rah. <sup>17</sup> BAWIPA



ni Kai teh BAWIPA doeh tie hah nang ni bangtelamaw na panue thai han tetpawiteh, ka sin e sonron hoi tuipui ka hem vaiteh hote tui teh thi lah a coung han. <sup>18</sup> Tuipui dawc kaawm e tanganaw a due awh han. Tuipui hai a hmuí a tho han. Izipnaw ni tuipui tui a panuet awh han. Akóng hah bout dei pouh telah Mosi koe atipouh. <sup>19</sup> BAWIPA ni Mosi koe bout a dei pouh e teh, Aron koe, na sonron sin nateh Izip ram kaawm e palang, tuipui, tuikamuem tui, tuido hoi tuiphueknaw pueng e lathueng vah kut dâw haw. Izip ram pueng dawc thing manang, talung hlaamnaw pueng dawc thi ao hane kong hah dei pouh telah atipouh. <sup>20</sup> Mosi hoi Aron ni BAWIPA ni a dei e patetlah a sak roi teh, Aron ni Faro siangpahrang hoi a sannaw e hmalah sonron a pho teh tuipui a hem teh tui pueng teh thi lah a coung. <sup>21</sup> Tuipui dawc kaawm e tanganaw hai a due. Tuipui teh a hmuí a tho dawkvah Izip taminaw ni tuipui hah net thai awh hoe. Izip ram pueng dawc thi hah koug ao. <sup>22</sup> Izip miphun camkathoumnaw ni hai camthoumnaw lahoi hottelah a sak awh. BAWIPA ni a dei tangcoung patetlah Faro siangpahrang teh a lungpata teh ahnimae lawk ngâi laipalah ao. <sup>23</sup> Faro teh a im a ban teh hote hnonaw hah a lungthin dawc tat hoe. <sup>24</sup> Hat navah, Izipnaw ni tuipui tui hah a nei thai awh hoe dawkvah tui nei hane a hmuí thai a nahanlah tuipui rai lah tui a tai awh. <sup>25</sup> BAWIPA ni tuipui a hem hnukkhu hnin sari touh aloum sak.

## 8

### *Ekka a tho sak*

<sup>1</sup> BAWIPA ni Mosi koe, nang ni Faro siangpahrang koe cet nateh Ka taminaw ni Kai na bawc nahanelah tâcawt sak leih. <sup>2</sup> Ka tâcawt sak mahoe tetpawiteh na ram pueng ekka hoi bout ka rek han rah. <sup>3</sup> Tuipui ni ekka moi a tâco sak vaiteh na im dawc, inae rakhan dawc, ikhun van thoseh, na sannaw e im dawc thoseh, na taminaw e a lathueng thoseh, na takhuen dawc thoseh, tavai na kanawknaw kawlung dawc thoseh a luen han. <sup>4</sup> Nangmouh koehoi kamtawng vaiteh na taminaw, na sannaw pueng lathueng vah a luen awh han telah BAWIPA ni a dei e hah thaisak loe telah Mosi koe atipouh. <sup>5</sup> BAWIPA ni Mosi koe bout a dei pouh e teh, Aron ni palang, tuipui tui, talinaw e lathueng vah sonron a sin teh kut a dâw navah, Izip ram dawc ekkanaw luen sak hanelah dei pouh telah atipouh.

<sup>6</sup> Aron ni Izip ram dawc kaawm e tuinaw lathueng kut a dâw teh ekkanaw ni a tho teh Izip ram pueng koug a ramuk. <sup>7</sup> Camkathoumnaw ni hai camthoumnaw lahoi hottelah a sak teh ekkanaw Izip ram dawc a thokhai awh. <sup>8</sup> Hat navah, Faro siangpahrang ni Mosi hoi Aron a kaw teh, BAWIPA ni ekkanaw hah kai hoi ka taminaw koehoi takhoe hanelah dei pouh leih. Isarelnaw ni BAWIPA koe thuengnae kâ ka poe han toe telah atipouh.

<sup>9</sup> Mosi ni hai nang hoi na imnaw dawc hoi ekkanaw takhoe teh, tuipui dawc dueng o sak hanlah, nang hoi na sannaw, na taminaw hanlah, kai ni ngaithoumnaw tueng na khoe atipouh eiteh,

<sup>10</sup> tangtho ngaithoumnaw het leih atipouh teh, Mosi ni kaimae Cathut Jehovah hoi kâvan e cathut awm hoe tie na panue nahanlah na dei e patetlah, <sup>11</sup> Ekkanaw teh nang hoi na imnaw, na sannaw, na taminaw koehoi a tâco teh tuipui dawc dueng ao han telah Mosi ni a dei pouh hnukkhu,

<sup>12</sup> Aron hoi cungtalah ahni koehoi a tâco roi teh, Faro siangpahrang e lathueng vah a pha sak e ekkanaw kecu dawc Mosi ni a ratoum. <sup>13</sup> Mosi



ni a hei e patetlah BAWIPA Cathut ni a sak pouh teh, ekkanaw teh imnaw, khonaw, ayawnnaw dawk a due awh. <sup>14</sup> A ronaw a pâkhueng awh dawkvah ram pueng dawk a hmui a tho. <sup>15</sup> Faro siangpahrang ni ahawi toe ti a panue navah, BAWIPA ni a dei e patetlah a lungpata teh ahnimae lawk hah ngâi laipalah bout ao.

### *Tangkarang a pung sak*

<sup>16</sup> BAWIPA ni Mosi koe bout a dei pouh e teh, Izip ram e vaiphunaw pueng heh tangkarang lah o sak hanelah Aron ni sonron a pho teh vaiphu hah hem hanelah dei pouh atipouh e patetlah,

<sup>17</sup> Aron ni sonron a pho teh vaiphu hah a hem. Vaiphu teh tami dawk thoseh, saring koe thoseh, tangkarang lah ao. Izip ram pueng dawk kaawm e vaiphunaw pueng teh tangkarang lah a coung. <sup>18</sup> mitpaleikathoumnaw ni hai tangkarang lah coung sak hanelah a thoumnae lahoi hottelaha a sak a eiteh sak thai awh hoehe. Hatdawkvah, tami hoi saringnaw pueng dawk tangkarangnaw ao. <sup>19</sup> Hat navah, mitpaleikathoumnaw ni hote hno heh Cathut e kutdawn doeh telah Faro siangpahrang koe a dei pouh awh. Hateiteh, BAWIPA ni a dei e patetlah Faro siangpahrang teh a lungpata teh ahnimae lawk hah ngâi laipalah bout ao.

### *Bitsei a thoe sak*

<sup>20</sup> BAWIPA ni hai nang ni amom thaw haw. Tui namran lah ka cet e Faro siangpahrang hmalah kangdout nateh BAWIPA ni, ka taminaw ni Kai na bawk nahanelah cetsak leih. <sup>21</sup> Na cetsak hoehpawiteh, nang hoi na sannaw, taminaw, imnaw dawkvah bitsei hah kai ni ka patoun vaiteh Izipnaw onae im, kangduenae talai teh bitsei hoi akawi han. <sup>22</sup> Kai teh talai van pueng dawk BAWIPA lah ka o e na panue thai nahanelah kaie taminaw onae Goshen ram dawk teh hote hnin nah kapek vaiteh, hote ram dawk bitsei awm mahoehe. <sup>23</sup> Hottelaha ka taminaw hoi na taminaw rahak vah kapeknae ka o sak han. Tangtho vah hete mitnoutnaw teh ao han tie heh dei pouh telah Mosi koe atipouh. <sup>24</sup> Hottelaha BAWIPA ni a sak dawkvah Faro im hoi a kamtawng teh a sannaw e im hoi Izip ram pueng dawk bitsei moikapap a tho teh, hote bitseinaw kecu dawk Izip ram a rawk. <sup>25</sup> Hat navah, Faro siangpahrang ni Mosi hoi Aron a kaw teh, nangmouh ni hote ram dawk na Cathut koe thuengnae sak hanelah cet awh telah ati eiteh,

<sup>26</sup> Mosi ni hettelaha sak hane nahoeh. Ka sak awh pawiteh, Izipnaw ni a panuet e hno hoi BAWIPA Cathut koe thuengnae ka sak awh han nahoehmaw. Izipnaw e mithmu vah ahnimouh hanlah panuetho e hno hoi thuengnae ka sak awh boipawiteh, talung hoi na dei awh mahoehe na maw. <sup>27</sup> Hatdawkvah, kahrawng hnin thum lamcei koe, ka cei awh vaiteh kaimae BAWIPA Cathut ni a dei e patetlah thuengnae ka sak awh han telah a dei pouh.

<sup>28</sup> Faro siangpahrang ni hai nangmae BAWIPA Cathut hah kahrawng vah na thueng awh nahanelah na cei awh han. Hatei, kahlat lah na cet awh mahoehe. Kai hanlah na kâhet pouh ei telah ati.

<sup>29</sup> Mosi ni hai nang koehoi kai ni ka cei vaiteh bitseinaw ni Faro siangpahrang hoi a sannaw, taminaw koehoi tangtho a tâco hanelah BAWIPA koe ka kâhei han. Hateiteh, Isarelnaw ni BAWIPA koe thueng hane bout na pasoung laipalah na dum awh hanh telah a dei pouh hnukkhu,

<sup>30</sup> Mosi ni Faro koehoi a tâco teh, BAWIPA koe a kâhei pouh. <sup>31</sup> BAWIPA ni hai Mosi lawk a ngâi teh, Bitseinaw hah Faro siangpahrang hoi a



sannaw, a taminaw koehoi buet touh boehai ao hoeh nahanlah a takhoe pouh. <sup>32</sup> Hatnae tueng dawk haiyah, Faro siangpahrang lung bout a pata sak teh, Isarelnaw hah tha ngai laipalah bout ao.

## 9

### *Saringnaw a due*

<sup>1</sup> BAWIPA ni Mosi koe, Faro siangpahrang koe cet nateh dei pouh, Hebrunaw e Cathut Jehovah ni, ka taminaw ni Kai koe thuengnae a sak awh hanelah tâcawt sak leih. <sup>2</sup> Ka cetsak mahoei telah na câkâ rah boi pawiteh, <sup>3</sup> BAWIPA e thaonae kut teh ayawn e kaawm saring, marang, la, kalauk, tu, hoi maitonaw lathueng ka patawpoung e lacik ka pha sak han. <sup>4</sup> BAWIPA ni Isarelnaw e saring hoi Izipnaw e saring rahak kapeknae a tawn vaiteh Isarelnaw e saring teh buet touh boehai dout mahoei. <sup>5</sup> Bawipa ni tueng a khoe e patetlah tangtho vah BAWIPA ni hete ram daw k a sak han telah ati.

<sup>6</sup> A tangtho vah hote hno a sak teh, Izipnaw e saringnaw pueng koug a due. Hatei, Isarelnaw e saringnaw teh buet touh boehai dout hoei. <sup>7</sup> Faro siangpahrang ni tami a patoun teh, Isarelnaw e saring buet touh boehai dout hoei tie a panue. hat ei, a lung bout a pata teh Isarelnaw tâcawt sak hoei.

### *Yako a pataw sak*

<sup>8</sup> Bawipa ni takhuen daw k e hraba kut hoi pham nateh, Mosi ni Faro siangpahrang hmalah kahlun lah kahei naseh. <sup>9</sup> Hote hraba teh Izip ram pueng daw k vaiphu dikkaneng e lah ao vaiteh, ram pueng daw k e tami hoi moithangnaw koe parep hoi kakawi e patawnae kathout lah ao han telah Mosi hoi Aron koe a dei pouh e patetlah,

<sup>10</sup> ahnimouh roi ni takhuen daw k e hraba hah a pham teh Faro hmalah kangdue teh kahlun lah Mosi ni a kahei. Hote hraba teh tami hoi moithangnaw daw k parep hoi kakawi e yako patawnae lah ao.

<sup>11</sup> Mitpaleikathoumnaw ni yako kecu daw k Mosi hmalah kangdout ngam awh hoei. Hote yako teh mitpaleikathoumnaw koe thoseh, Izip taminaw koe thoseh, koug a kâkai. <sup>12</sup> BAWIPA ni Faro siangpahrang e lung a pata sak dawkvah, Mosi koe a dei pouh e patetlah ahnimae lawk hah ngai laipalah ao.

### *Roun a bo sak*

<sup>13</sup> BAWIPA ni Mosi koe, amom thaw nateh Faro hmalah kangdout nateh Hebrunaw e Cathut Jehovah ni, ka taminaw ni Kai na baw k thai nahanelah tâcawt sak leih. <sup>14</sup> Na hoehpawiteh, atu e tueng daw k teh, nang hoi na sannaw koe thoseh, na taminaw koe thoseh, Kaie reknae ka pha sak han. Kai patetlah e talai van pueng daw k awm hoei tie hah na panue han. <sup>15</sup> Ka kut ka dâw vaiteh nang hoi na taminaw hah lacik hoi ka rek han. Nang haiyah talai daw k hoi takhoe lah na o han. <sup>16</sup> Atangcalah, ka hnosakthainae hah nang patue hanelah, talai van pueng daw k ka min kamsawng nahanelah Kai ni nang teh na tawm toe. <sup>17</sup> Nang ni ka taminaw tâcawt sak laipalah na rektap rah maw. <sup>18</sup> Khenhaw! Izip ram kamtawngnae koehoi atu totouh kabawt boihoei e roun, tangtho atu e tueng daw k puenghoi ka rak sak han. <sup>19</sup> Hatdawkvah, kahrawng kaawm e saringnaw hoi kaawm e pueng pakhum sak leih. Im na pakhum hoehpawiteh ayawn daw k hmu e tami pueng hoi saringnaw pueng, roun



ni bawt sin vaiteh, kOUNg a due awh hane hah dei pouh telah Mosi koe atipouh.

<sup>20</sup> BAWIPA e lawk ka taket e Faro siangpahrang e a sannaw teh a san hoi a saringnaw im lah a yawng sak. <sup>21</sup> BAWIPA e lawk banglahai ka ngai hoeh e taminaw teh a sannaw hoi a saringnaw teh ayawn dawk a ta awh. <sup>22</sup> BAWIPA ni Izip ram kho ka sak tami pueng lathueng thoseh, saringnaw pueng lathueng thoseh, ayawn dawk e thingkung pueng lathueng thoseh, roun a bo nahanelah na kut kahlun lah dâw telah Mosi koe atipouh.

<sup>23</sup> Mosi ni a sonron kahlun lah a dâw navah, BAWIPA ni keitat hoi roun a patoun. Hmai hai talai dawk a bo. Hottelah BAWIPA ni Izip ram dawk, roun a bo sak dawkvah, <sup>24</sup> Izip ram kamtawngnae koehoi vai touh hai ka bawt boihoe e hmai hoi kâkalawt e roun puenghoi a bo. <sup>25</sup> Izip ram pueng, ayawn dawk kaawm e tami hoi saringnaw, phonaw, thingkungnaw pueng teh roun ni reprep a dei. <sup>26</sup> Hateiteh, Isarelnaw khosaknae Goshen ram dawk dueng doeh roun bawt hoeh. <sup>27</sup> Hat navah, Faro ni Mosi hoi Aron kaw hanlah tami a patoun. Hete hno dawk kai ka yon toe. BAWIPA teh a lan. Kai hoi ka taminaw teh ka yon awh. <sup>28</sup> A khout toe. Athakaawme keitat hoi roun puenghoi ka bawt e dap sak hanlah BAWIPA koe kâhet leih. Kai ni nangmouh ngang laipalah karanglah na ceisak han telah atipouh. <sup>29</sup> Mosi ni hai khopui thung ka cei nah BAWIPA hmalah ka kut ka dâw han. BAWIPA ni talai pui a uk tie nang panue sak hanelah kei hoi roun ka bawt e a roun sak han. <sup>30</sup> Hateiteh, nang hoi na sannaw ni BAWIPA Cathut na taket awh hoeh rah tie ka panue telah atipouh. <sup>31</sup> Pahla hoi catun hai roun ni a dei. Catun teh a paw hoi akawi. Pahla haiyah a paw a tang toe. <sup>32</sup> Catun hoi cang teh a pâw hoeh rah dawkvah roun ni dêi hoeh. <sup>33</sup> Mosi ni Faro koe khopui alawilah a cei hnukkhu, BAWIPA hmalah kuttabei a na teh, keitat hoi roun teh a roun. Talai kho hai rak hoeh toe. <sup>34</sup> Hottelah, kho a dep, keitat hoi roun ka bawt e hai a roun e Faro siangpahrang ni a hmu navah, bout a yon awh teh a sannaw hoi a lung bout a pata awh. <sup>35</sup> Faro siangpahrang a lung bout a pata sak dawkvah, BAWIPA ni Mosi koe a dei pouh e patetlah Isarelnaw tâcawt sak laipalah bout ao.

## 10

### *Samtong a tho sak*

<sup>1</sup> BAWIPA ni Mosi, Faro koe cet nateh Kai ni hete mitnoutnaw heh ahnie hmalah patue hane lah, <sup>2</sup> Izip ram dawk ka sak e hnonaw hoi Izip taminaw koe ka sak e mitnoutnaw heh, na ca catounnaw koe na dei pouh teh, Kai teh Jehovah doeh tie nangmouh ni na panue awh nahanelah thoseh, ahni hoi a sannaw e lung teh Kai ni ka pata sak telah atipouh.

<sup>3</sup> Mosi hoi Aron ni Faro siangpahrang koe a kâen roi teh Hebrunaw e Cathut Jehovah ni, nang ni ka hmalah na kârahnoum laipalah na sittouh maw na o han rah. Ka taminaw ni Kai na bawk na hanelah tâcawt sak leih. <sup>4</sup> Ka taminaw na tâcawt sak hoehpawiteh, khenhaw! na ram dawk tangtho samtongnaw ka patoun han. <sup>5</sup> Talai kamnuek laipalah ahnimouh ni talai muen a ramuk awh han. Roun ni be a dêi hoeh e kaawm rae naw pueng thoseh, nangmouh hanlah talai dawk kapâw e a kung pueng thoseh a ca awh han. <sup>6</sup> Na mintoenaw talai dawk khosak kamtawngnae koehoi atu totouh a hmu awh boihoe e hah na innaw, na sannaw e innaw, Izipnaw e innaw dawk akawi awh han telah a dei pouh roi hnukkhu Faro koehoi a kamlang roi teh a tâco roi.



<sup>7</sup> Faro siangpahrang e a sannaw ni hai hete taminaw ni maimouh na totouh maw na tarawk awh han. Hote taminaw ni amamae Cathut Jehovah koe thueng hanelah tâcawt sak leih. Izip ram a rawk e heh na panuek hoeh rah maw telah a dei pouh navah, <sup>8</sup> Mosi hoi Aron hah Faro siangpahrang koe bout a kâen sak awh teh, nangmae Cathut Jehovah thueng hanelah tâcawt awh. Hateiteh, apipi maw na ka cet awh han telah a pacei navah,

<sup>9</sup> Mosi ni, kaimouh teh camo, matawng, ka capanaw, ka canunaw, tu hoi maitonaw hoi ka cei awh han. Bangkongtetpawiteh, BAWIPA koe pawito han ao telah bout atipouh navah,

<sup>10</sup> Faro siangpahrang ni nangmouh hoi na canaw teh kai ni na tâco sak e patetlah BAWIPA teh nangmouh koe awm naseh. Kâhruetcueth awh. Kahawi hoeh e pouknae na tawn awh boma. <sup>11</sup> Hottelah mahoe. Hmaloe na hei e patetlah tongpa dueng cet awh nateh BAWIPA Cathut bawk awh, telah atipouh teh ahnimouh teh ama koehoi a pâlei.

<sup>12</sup> BAWIPA ni samtongnaw hah Izip ram daw koe patoun teh roun ni a dêi nawi e talai daw koe kaawm rae akungnaw pueng ca sak hanelah, Izip ram lah na kut dâw telah Mosi koe atipouh e patetlah, <sup>13</sup> Mosi ni a sonron hah Izip ram lathueng vah a dâw teh, hote kanîruirui, karum tuettuet Kanîtholah hoi BAWIPA ni kahlî a tho sak teh, amom toreih teh Kanîtholae kahlî ni samtongnaw hah a thokhai. <sup>14</sup> Hote samtong ni Izip ram pueng muen a ramuk teh ramrinaw pueng daw koe kâhat awh teh moiapap awh. Hote samtongnaw teh ayan hoi atu totouh awm boihoe. Ao hnukku hai bout awm mahoe. <sup>15</sup> Talai pueng muen ka tamang lah a ramuk teh ram pueng daw koe phovai kaawm pueng, roun ni a dêi nawi e a paw kaawm e naw pueng a ca dawkvah, Izip ram pueng daw koe kaawm e thingkung phokungnaw daw koe kahring e banghai awm hoeh. <sup>16</sup> Hat toteh, Faro siangpahrang ni Mosi hoi Aron hah karanglah a kaw teh, nangmae Cathut Jehovah koe thoseh, nangmouh koe thoseh ka yon toe. <sup>17</sup> Hatdawkvah, atu vai touh ka yonnae ngaithoum ei. Nangmae BAWIPA Cathut ni het duenae lacik buet touh dueng kai koehoi takhoe hanelah na kâ pouh ei, atipouh e patetlah,

<sup>18</sup> Mosi ni ahni koehoi a cei teh BAWIPA koe ngaithoumnae a hei. <sup>19</sup> BAWIPA ni a tha kaawm e kanîloumlae kahlî a patoun teh, hote kahlî ni samtongnaw hah a tawm teh thipaling tali daw koe pabo. Izip ram daw koe samtong buet touh boehai awm hoeh. <sup>20</sup> Hateiteh, BAWIPA ni Faro e a lung bout a pata sak dawkvah, Isarel canaw tâcawt sak laipalah bout ao.

### *Hmonae a pha sak*

<sup>21</sup> Hahoi, BAWIPA ni Izip ram daw koe rumram e hmonae tho laipalah thupthup payam e hmonae o sak hanelah na kut kahlun lah dâw haw telah Mosi koe a dei pouh e patetlah, <sup>22</sup> Mosi ni a kut kahlun lah a dâw navah Izip ram pueng daw koe kingkahmawt e hmonae hnin thum touh ao sak. <sup>23</sup> Hat navah, buet touh hoi buet touh hai kahmawt awh hoeh. Hnin thum touh tung apihaiyah a onae hmuen koehoi thaw awh hoeh. Hatei, Isarelnaw teh a onae hmuen koe angnae a hmu awh. <sup>24</sup> Hat navah, Faro siangpahrang ni Mosi hoi Aron a kaw teh BAWIPA baw koe hanelah tâcawt awh leih. Hatei, camonaw hrawi awh nateh tu, maitonaw teh cettakhai awh naseh, telah atipouh.

<sup>25</sup> Mosi ni hottelah boipawiteh, ka Cathut Jehovah ka thueng awh nahanelah satheinaw, hmaisawi thueng han hnopainaw hah nang ni poe hanelah a ngai han. <sup>26</sup> Kaimouh ni saringnaw hah ka hrawi awh han. Buet



touh boehai ka tat awh mahoe. Bangkongtetpawiteh, hotnaw thung daw k hoi kaimae Cathut Jehovah thueng nahanelah ka rawi awh han. BAWIPA bangpatet e saring hoi maw ka baw k awh han tie hote hmuen koe a pha awh hoehroukrak ka panuek awh hoeh telah atipouh navah, <sup>27</sup> BAWIPA ni Faro siangpahrang e a lung bout a pata sak dawkvah Isarelnaw tâcawt sak hoeh.

<sup>28</sup> Mosi hanlah kai koehoi tâcawt leih. Ka minhmai bout na hmu hoeh nahanlah kâhruetcu. Ka minhmai na hmunae hnin nah na due han atipouh.

<sup>29</sup> Mosi ni hai na dei e teh ahawi. Na minhmai bout kahmawt mahoe atipouh.

## 11

### *Camin duenae*

<sup>1</sup> Hat navah, BAWIPA ni Faro siangpahrang hoi Izip ram daw k lacik ka tho sak han. Hathnukkhu, nangmouh na tâco sak awh han. Na tâco sak awh toteh nangmouh pâlei lah na pâlei awh han. <sup>2</sup> Isarel tami tongpa ni imri tongpa koe thoseh, napui ni imri napui koe thoseh, sui, ngun hoi khohnanaw hei hanlah, taminaw koe dei pouh telah Mosi koe atipouh. <sup>3</sup> Ahnimouh ni a hei e patetlah Izip taminaw ni poe ngainae pahrennae lung hah BAWIPA ni a tawn sak. Mosi haiyah Izip ram daw k Faro siangpahrang e a sannaw hoi a taminaw hmalah bari kaawm e lah ao.

<sup>4</sup> Hat navah, Mosi koe BAWIPA ni a dei e teh karumsaning vah Izip ram ka kâva han. <sup>5</sup> Bawitungkhung daw k ta hung e Faro e capa camin koehoi cakang phawmnae koe kaawm e sannu e camin totouh, Izip ram kaawm e camin pueng hoi saringnaw e ca caminnaw pueng koug a due awh han.

<sup>6</sup> Izip ram pueng daw k ayan hoi kaawm boihoe e hoi hmalah hai bout kaawm hoeh hane kalenpounge khuikanae ao han. <sup>7</sup> Hateiteh, BAWIPA ni Izipnaw hoi Isarelnaw kapeknae a tawn ti na panue thai nahanelah, Isarel tami buet touh boehai ui ni rauk mahoe telah atipouh. <sup>8</sup> Na sannaw pueng ni hai kai koe tho awh nateh tabut laihoi cet ati han. Nang hoi na hnukkâbangnaw koug tâcawt telah a dei hnukkhu, kai ka cei han telah a dei pouh teh a lungkhuek teh Faro koehoi a tâco.

<sup>9</sup> BAWIPA ni hai kângairu e hnonaw Izip ram daw k moiapap nahan, Faro siangpahrang ni nangmae lawkngai laipalah ao han telah Mosi koe atipouh.

<sup>10</sup> Mosi hoi Aron ni Faro hmalah hete kângairunae a sak roi eiteh, BAWIPA ni Faro siangpahrang e a lungpata sak dawkvah Isarel canaw a ram daw k hoi tâconae kâ poe hoeh.

## 12

### *Ceitakhai paw*

<sup>1</sup> BAWIPA ni Izip ram vah Mosi hoi Aron koe a dei pouh e teh; <sup>2</sup> Hete thapa heh nangmouh hanelah a kum tangkuem daw k apasuekpoung e thapa lah ao han. <sup>3</sup> Nangmouh roi ni Isarel rangpuinaw koe lawk na thui roi hane teh; Hete thapa hnin hra touh hnin vah nangmanaw pueng ni mae imthungku tangkuem daw k im touh ni tuca buet touh rip na sin awh han. <sup>4</sup> Imthung katoeng teh tuca buet touh hoi kâki hoehpawiteh imri kahnai e koe a bawng vaiteh tami nâyittouh maw tie a parei hnukkhu, boung cakhuem hane tuca hah a sin han. <sup>5</sup> Tuca thoseh, hmaeca thoseh,



nangmouh ni na sin e saring teh kacueme hoi âvâ ka cawt hoeh rae a tan han. <sup>6</sup> Hote tucanaw hah hote thapa hnin hra hlaipali totouh ring vaiteh, tangmin vah Isarel miphun, kamkhuengnaw ni a thei awh han. <sup>7</sup> Tuca moi kacate im takhang tâphai hoi tangkhang dawk tu thi na hluk han. <sup>8</sup> A moi teh hmai pahai hnukkhu, hote tangmin dawk tonphuenhoehe, kakhat e anhna hoi na ca awh han. <sup>9</sup> Moi ka heng lah thoseh, thawng lahoi hai thoseh na cat awh mahoe. A lû, a khok, a kosanaw hoi cungtalai hmai pahai hnukkhu na ca awh han. <sup>10</sup> Hote moi hah khodai totouh na tat mahoe. Youn touh hai na cawi sak pawiteh, hmai na sawi han. <sup>11</sup> Bangtelamaw na ca awh han tetpawiteh, taisawm kâyeng hoi, khokkhawm hoi, sonron patuep lahoi karanglah na ca awh han. Hetteh, BAWIPA e ceitakhai pawî doeh. <sup>12</sup> Bangkongtetpawiteh, hote karum dawk Izip ram pueng dawk ka cei vaiteh Izipnaw e camin hoi saringnaw e ca caminnaw pueng ka thei han. Izipnaw e cathutnaw hah lawk ka ceng han. Kai teh BAWIPA doeh. <sup>13</sup> Tuca e a thi teh nangmouh na onae im dawk nangmae mitnoutnae lah ao han. Hote a thi ka hmu navah, Kai ni nangmouh teh na ceitakhai awh han. Hottelah, Izip ram ka rek nah nangmouh karaphoeung lacik teh nangmouh koe phat mahoe. <sup>14</sup> Hete hnin teh nangmouh hanlah pahnim thai hoeh e hnin lah ao vaiteh na ca catoun totouh, hete hnin dawk Cathut koe pawî a to awh han. Kâlawk lah ao dawkvah hote pawiteh pou na to awh han.

<sup>15</sup> Hnin sari touh thung tonphuenhoehe na ca awh han. Apasuek hnin nah ton hah imnaw dawk hoi na takhoe awh han. Apasuek hnin koehoi hnin sari totouh ton phuen e vaiyei ka cat e tami teh Isarel miphun dawk hoi takhoe lah ao han. <sup>16</sup> Apasuek hnin thoseh, asari hnin nah thoseh kathoung kamkhuengnae na sak awh han. Hote hnin dawkvah, taminaw ni canei hoi kâkuen e thaw hloilah alouke thaw tawk awh mahoe. <sup>17</sup> Hote tonphuenhoehe pawito ngainae teh, hote hnin dawk na taminaw Izip ram hoi ka tâco sak. Hatdawkvah, kâlawk ao e patetlah na ca catoun totouh hote hnin hah na ya awh han. <sup>18</sup> Thapa yung pasuek, hnin hra hlaipali hnin tangmin hoi kamtawng teh hnin 20 tangmin totouh, nangmouh ni tonphuenhoehe na ca awh han. <sup>19</sup> Hnin sari touh thung imnaw dawk ton na tat awh mahoe. Ton phuen e vaiyei kacate ramlouk tami thoseh, khoca thoseh Isarelnaw koehoi takhoe lah ao han. <sup>20</sup> Nangmouh na onae hmuen pueng koe ton phuen e vaiyei na cat awh mahoe. Tonphuenhoehe vaiyei dueng na ca han atipouh.

<sup>21</sup> Hot navah, Mosi ni Isarel tami kacuenaw hah a kaw teh, na imthung tangkuem ni tuca hah ceitakhai pawî hanlah thet awh. <sup>22</sup> Dingsala dawn lat awh nateh kawlung dawk ta e a thi dawk ranup nateh takhang dawk hluk awh. Hathnukkhu hoi amom totouh apihai ma im takhang alawilah na tâcawt a mahoe. <sup>23</sup> Bangkongtetpawiteh, BAWIPA teh Izipnaw thei hanlah a kâhlai han. Im takhang dawk e thi a hmu toteh BAWIPA ni takhang a ceitakhai han. Karaphoeung teh nangmouh reknae poe hanlah imthung kâen sak mahoe. <sup>24</sup> Nangmouh hoi na canaw koe lawkkamnae ao dawkvah hote hno heh pou na tarawi awh han. <sup>25</sup> BAWIPA ni poe hanlah kam e ram dawk na pha awh toteh, hete phunglam heh na sak awh han. <sup>26</sup> Nangmae ca catounnaw ni hete phung heh bang ngainae maw na sak telah na pacei pawiteh, <sup>27</sup> BAWIPA ni Izipnaw a thei navah maimae imthungnaw a hlout sak. Izip ram kho ka sak e Isarelnaw e imnaw a ceitakhai e, BAWIPA e ceitakhai pawî lah ao telah bout na dei pouh han telah Mosi ni a dei hnukkhu, ahnimouh ni a lûsaling awh teh a bawk awh.



<sup>28</sup> BAWIPA ni Mosi hoi Aron koe lawk a thui e patetlah Isarelnaw ni a sak awh.

<sup>29</sup> Karumsaning vah, BAWIPA ni bawitungkhung dawk ka tahung e Faro e camin koehoi kamtawng teh thongkabawtnaw e camin totouh, Izipnaw e camin pueng thoseh, saringnaw e camin pueng thoseh kOUNG a thei.

<sup>30</sup> Hote tangmin vah, Faro siangpahrang hoi a sannaw, Izipnaw ni a thaw awh teh, im tangkuem tami a due dawkvah, Izip ram pueng dawk khuikanae puenghoi a pha.

### *Tâcohloutnae*

<sup>31</sup> Hote tangmin vah, Mosi hoi Aron a kaw teh, nangmouh roi hoi Isarelnaw thaw awh nateh ka taminaw koehoi tâcawt awh. Na hei e patetlah cet awh nateh Jehovah hah bawk awh leih. <sup>32</sup> Nangmouh ni na hei e patetlah tu, maitonaw hrawi awh nateh cet awh. Kai haiyah yawhawinae na poe awh, telah atipouh.

<sup>33</sup> Izipnaw ni maimouh pueng hai tami kadout lah doeh kOUNG o awh toe telah ati awh teh, Isarelnaw Izip ram dawk hoi karanglah tâco sak hanlah a dei pouh awh. <sup>34</sup> Hote taminaw ni ton phuen hoehe rae tavai a la awh teh, tavai kanawknae kawlungnaw a la awh teh, hni hoi a tangOUNG awh teh a phu awh. <sup>35</sup> Mosi ni a dei e patetlah Isarelnaw ni Izipnaw koe suingun, khohnanaw hah a hei awh. <sup>36</sup> A hei awh e patetlah poe ngainae lungthin BAWIPA ni Izipnaw a tawn sak teh, Izipnaw e hnopainaw a lawp awh.

<sup>37</sup> Isarelnaw napui camo touk laipalah, tongpa ting taruk touh, Raameses khopui hoi a tâco awh teh Sukkoth lah a cei awh. <sup>38</sup> Alouklouke taminaw haiyah a tawn e tu, maito hoi saringnaw pueng hoi a kâbang awh. <sup>39</sup> Izip ram hoi a phu e tonphuenhoehe tavai a la awh teh, tonphuenhoehe a tau awh. Bangkongtetpawiteh, Izip ram hoi tang a pâlei awh dawkvah, canei kawi kâra kueng mang awh hoehe. <sup>40</sup> Isarelnaw teh Izip ram vah kum 430 touh imyin lah ao awh. <sup>41</sup> A kum 430 akuepnae hnin dawk BAWIPA e ransanaw teh Izip ram hoi a tâco awh. <sup>42</sup> Izip ram hoi a tâcokhai dawkvah hote tangmin teh BAWIPA hanlah a ya awh. Hatdawkvah, hote tangmin teh Isarelnaw ni pout laipalah pou a ya awh e tangmin lah ao.

### *Ceitakhai pawî phunglam*

<sup>43</sup> BAWIPA ni Mosi hoi Aron koe vah, ceitakhai pawî phunglam teh hettelah ao. Ceitakhai pawiteh alouke miphun ni cat mahoehe. <sup>44</sup> Hateiteh, tangka hoi ran e san ni teh vuensoma hnukkhu a ca han. <sup>45</sup> Miphun alouke hoi san lah hno e naw ni teh cat mahoehe. <sup>46</sup> Im buet touh dawk na ca han. A moi im alawilah na sin mahoehe. A hru hai na khoe mahoehe. <sup>47</sup> Isarelnaw pueng ni hote pawiteh na tarawi awh han. <sup>48</sup> Hahoi, nangmouh koe kârayen e Jentelnaw ni BAWIPA hanlah ceitakhai pawî sak han ngai awh pawiteh, tongpanaw pueng vuensoma awh naseh. Hathnukkhu hote tami teh khoca patetlah ao dawkvah pawî kâen naseh. Vuensom ka a hoehe e teh hote pawî cat thai hoehe. <sup>49</sup> Khocanaw hoi nangmouh koe kârayennaw hanlah phunglam buet touh dueng doeh kaawm telah BAWIPA ni Mosi hoi Aron koe a dei pouh. <sup>50</sup> Hottelah, BAWIPA ni Mosi hoi Aron koe a dei pouh e patetlah Isarelnaw ni a sak awh. <sup>51</sup> Hote hnin dawk BAWIPA ni Isarelnaw a ransanaw khue hoi Izip ram hoi a tâcokhai.



<sup>1</sup> BAWIPA ni Mosi a kaw teh Isarelnaw thung dawk hmaloe khe e, <sup>2</sup> tami thoseh, saring thoseh ca caminnaw pueng Kai hanlah thoung sak awh. Kaie hno lah ao telah atipouh.

### *Tonphuenhoehe vaiyei*

<sup>3</sup> Mosi ni hai nangmouh santoungnae Izip ram hoi tâconae hete hnin heh pahnim awh hanh. BAWIPA ni nangmouh teh a thaonae kut lahoi hote ram dawk hoi na hrawi awh toe. Ton phuen vaiyei cat awh hanh. <sup>4</sup> Abib thapa atu e hnin dawk nangmouh teh na tâco awh. <sup>5</sup> BAWIPA ni nangmouh poe hanlah mintoenaw koe lawk a kam e ram, Kanaannaw, Hitnaw, Amornaw, Hivnaw hoi Jebusitnaw e ram, sanutui hoi khoitui a lawngnae ram dawk na hrawi awh toteh, hete thapa dawk nangmouh ni hete hno heh na sak awh han. <sup>6</sup> Hnin sari touh thung tonphuenhoehe na ca awh vaiteh, hnin sarinae dawk BAWIPA han pawl lah ao han. <sup>7</sup> Tonphuenhoehe vaiyei hnin sari touh thung na ca awh navah, nangmouh koe ton na tat awh mahoe. Na onae hmuen pueng koehai hmu lah awm hanh naseh. <sup>8</sup> Kaimouh ni BAWIPA lungmanae dawk Izip ram hoi ka tâconae tueng nah, hettelah ka sak awh, telah na ca catounnaw koe na dei pouh han. <sup>9</sup> BAWIPA e kâlawk teh na pahni dawk pou ao thai nahan, hote hno teh na kut dawk mitnout kapanuekkhaikung, na mit rahak vah pahnim hoe hahanlah ao han. BAWIPA ni nang teh athakaawme a kut hoi Izip ram dawk hoi na hrawi awh toe. <sup>10</sup> Hatdawkvah, hete phunglam heh a kum tangkuem ama tueng nah na ya awh han. <sup>11</sup> Nangmouh hoi na mintoenaw koe thoseh lawk a kam e patetlah BAWIPA ni na hrawi awh teh, hote ram na poe awh toreih teh, <sup>12</sup> Nangmae ca caminnaw pueng hoi saringnaw e ca caminnaw pueng BAWIPA hanlah na hmoun awh han. A na tongpanaw pueng teh BAWIPA e lah ao han. <sup>13</sup> Hateiteh, La ni a khe e camin teh tuca hoi na ratang awh han. Ratang ngai hoehpawiteh, Laca e a lahuen na kapai pouh awh han. Taminaw dawk ca caminnaw na ratang awh han. <sup>14</sup> Na ca ni hmalah bangtelamaw telah na pacei pawiteh, BAWIPA ni santoungnae Izip ram hoi a kut tha kaawm hoi kaimouh na tâcokhai awh. <sup>15</sup> Faro siangpahrang ni kayawi lah na tâco sak awh hoeh toreih teh, Izip ram dawk tami thoseh, saring thoseh, ca tongpa caminnaw pueng BAWIPA ni koug a thei. Hatdawkvah, hmaloe ka khe e saring a na tongpanaw pueng heh BAWIPA koe na poe han. A tongpa thung dawk tongpa caminnaw pueng teh ratang hanlah na dei pouh han. <sup>16</sup> Hete hno haiyah nange mitnout kapanuekkhaikung, na mit rahak vah mitnout lah ao han. Bangkongtetpawiteh, BAWIPA ni athakaawme a kut hoi kaimouh Izip ram dawk hoi na tâco sak awh toe telah taminaw koe a dei awh.

### *Kahrawng lamthung*

<sup>17</sup> Faro ni Isarelnaw a tâco sak hnukkhu, Filistin lah ceinae lam kahnaica ao eiteh, Cathut ni hote lam dawk hrawi hoe. Bangkongtetpawiteh, ahnimouh ni tarantuknae a kâhmo awh navah, a lungpout teh Izip ram lah a ban payon han doeh ti a panue. <sup>18</sup> Hatdawkvah, Cathut ni ahnimouh teh tui puipaling kahrawng lam lahoi a hrawi. Isarelnaw ni Izip ram hoi ahuhu lahoi a tâco awh. <sup>19</sup> Joseph ni hmaloe vah, Cathut ni na khet awh han. Ka hrunaw hete hmuen koe na sin awh han telah Isarelnaw koe lawk a kam e patetlah Mosi ni ahnie a hrunaw ama koe a sin. <sup>20</sup> Ahnimouh ni Sukkoth hoi bout a tâco awh teh kahrawng teng, Etham khopui vah a roe awh. <sup>21</sup> Ahnimouh ni karum khodai a cei thai awh nahanelah, BAWIPA ni kanithun lah lam ka patue hane tâmaikhom hoi thoseh, tangmin lah



angnae ka poe hane hmaitokhom hoi thoseh, ahnimae hmalah a cei pouh. <sup>22</sup> Kanithun lah tâmaikhom, tangmin lah hmaitokhom hah ahnimae hmalah hoi takhoe pouh hoehe.

## 14

<sup>1</sup> BAWIPA nihai, <sup>2</sup> Isarelnaw ban teh Pihahiroth khopui teng, Migedan khopui hoi tuipui rahak, Baalazephon khopui hmalah rim tuk hanlah dei pouh. <sup>3</sup> Bangkongtetpawiteh, Faro siangpahrang ni Isarelnaw teh khikpacu awh toe. Ramke um lam awm hoehe toe telah ati han. <sup>4</sup> Kai ni hai Faro e lungthin ka pata sak vaiteh, ahni ni Isarelnaw a pâlei han. Kai teh BAWIPA doeh tie Izipnaw ni a panue nahanlah hote siangpahrang hoi a ransanaw lahoi ka bawilennae a kamnue han telah Mosi koe atipouh e patetlah ahnimanaw ni a sak awh.

### *Tuipui paling rakanae*

<sup>5</sup> Hote taminaw a yawng e kong Izip siangpahrang koe a thai sak awh navah, ahni koehoi a sannaw e lungthin bout a kamlang teh, maimouh ni hettelah sak awh teh Isarelnaw hah maimae thawtawaknae koehoi bangkongmaw a hlout awh han telah ati awh. <sup>6</sup> Hat navah, Siangpahrang ni rangleng coungkacoe a rakueng teh a taminaw hah akaw. <sup>7</sup> Rangeleng kahawi e cum taruk touh hoi Izip marangransanaw pueng hoi cungalalah, bawinaw pueng haiyah a ceikhai. <sup>8</sup> BAWIPA ni Faro e lungthin bout a pata sak dawkvah, ahni ni Isarelnaw hah a pâlei awh. Hat ei, Isarelnaw teh kut dâw laihoi a cei awh. <sup>9</sup> Hottelah, Faro siangpahrang e marangransanaw, rangleng ransanaw hoi Izip taminaw ni a pâlei awh teh, Pihahuroth khopui teng, Baalazephon khopui hmalah tuipui rai lah rim ka tuk e Isarelnaw hah a pha awh. <sup>10</sup> Faro ni a hnai nah Isarelnaw ni a khet awh teh Izipnaw ni pâlei e a hmu awh navah, pueng hoi a taki awh dawkvah BAWIPA koe a hramki awh. <sup>11</sup> Mosi koe hai, Izip ram dawkw phuenmon ao hoehe dawkvah maw, hi ramke um due hanlah kaimouh na hrawi awh. Kaimouh koe hettelah na sak teh, Izip ram hoi bangkong na hrawi awh. <sup>12</sup> Kaimouh teh Izipnaw koe san lah kaawm awh yawkaw nei telah Izip ram vah ka dei awh navah, hete hno khet laihoi ka dei awh hoehe na maw. Kaimouh hete kahrawngum due hlak teh Izipnaw koe san lah o e heh ahawihnawn telah ati awh.

<sup>13</sup> Mosi ni taket awh hanh. Lungmawngcalah awm awh. BAWIPA ni sahnin nangmouh hanlah rungngangnae a sak hane hah kenhaw. Sahnin nangmouh ni na hmu e Izipnaw heh bout na hmawt awh mahoehe toe.

<sup>14</sup> BAWIPA ni taran na tuk pouh han. Nangmanaw teh lungmawngcalah na o awh han telah taminaw koe a dei pouh.

<sup>15</sup> BAWIPA ni bangkongmaw KAI na kaw awh. Isarelnaw hmalah cei hanlah dei pouh. <sup>16</sup> Nang ni sonron na kut hoi tuipui van lah dâw nateh tuipui kâphi sak. Isarelnaw ni tui lungui, talai kaphui dawkw a cei awh han.

<sup>17</sup> KAI ni Izipnaw e a lungthin ka pata sak vaiteh, ahnimouh ni na pâlei awh han. Faro siangpahrang hoi a bawinaw, marang, marangransanaw lahoi ka lentoenae a kamnue han. <sup>18</sup> Hottelah, Faro siangpahrang hoi a marang, marangransanaw lahoi ka lentoenae a kamnue toteh, kai teh BAWIPA doeh tie hah Izipnaw ni a panue awh han telah Mosi koe a dei pouh.

<sup>19</sup> Hat navah, Isarelnaw e hmalah ka cet e Cathut e kalvantami ni a hnuk a pâlei teh, tâmai khom teh ahnimae hmalah hoi hnuklah a kampuen teh a kangdue. <sup>20</sup> Hottelah, Izip ransanaw hoi Isarel ransanaw rahak a pha nah,



Izipnaw koe kahmawt sak e tâmai lah ao teh, Isarelnaw koe teh angnae ka poe dawkvah karum tuettuet buet touh hoi buet touh kâhnai thai awh hoeh. <sup>21</sup> Mosi ni tuipui lathueng a kut a dâw nah karum tuettuet BAWIPA ni Kanîtholae kahlî katang hoi tuipui hah hnuklah a pâban teh talai rem a phui sak. <sup>22</sup> Isarelnaw ni tuipui lungui talai daw k a cei awh teh, tui teh ahnimae avoilah aranglah talung tapang patetlah ao. <sup>23</sup> Izipnaw, Faro siangpahrang ni a hrawi e marang, marangransanaw teh tuipui lungui a kâen awh. <sup>24</sup> Amom vah BAWIPA ni Izip ransanaw hah hmaikhom hoi tâmai daw k hoi a khet teh a taraw k. <sup>25</sup> Ahnimae rangleng cei a ru nahanlah a khok a kâhlehlaw k sak. Izipnaw ni hai Isarelnaw koehoi yawng awh leih sei, BAWIPA ni Isarelnaw koe lahoi Izip taminaw a tuk, telah ati awh.

<sup>26</sup> BAWIPA nihai, tuipui ni Izip taminaw, ranglengnaw, marangransanaw e lathueng vah tip sin hanelah, tupui lathueng na kut dâw atipouh e patetlah,

<sup>27</sup> Khodai toteh Mosi ni tuipui lathueng a kut a dâw teh, tuipui tui teh a thao teh bout a lawng. Izipnaw ni a yawng takhai ei, BAWIPA ni ahnimouh teh tuipui lungui vah a tâkhawng. <sup>28</sup> Hottelah, tuipui tui teh bout a lawng teh tuipui daw k a bo toteh, Faro siangpahrang e rangleng, marangransanaw pueng teh muen a ramuk dawkvah buet touh hai hlout awh hoeh. <sup>29</sup> Isarelnaw teh tuipui lungui talai kaphui daw k hoi a cei awh teh, tui teh ahnimae avoilah aranglah talung tapang patetlah ao. <sup>30</sup> Hottelah, BAWIPA ni Isarelnaw teh Izipnaw e kut daw k hoi a rungngang teh tuipui rai lah Izipnaw e ronaw teh a hmu awh. <sup>31</sup> Hottelah, BAWIPA ni Izipnaw koe hno ka len poung a sak e hah Isarelnaw ni a hmu awh navah, BAWIPA hah a taki awh. BAWIPA hoi a san Mosi hah a yuem awh.

## 15

### *Mosi la*

<sup>1</sup> Hat navah, Mosi hoi Isarelnaw ni BAWIPA koe la a sak awh e teh, BAWIPA ni a lentoenae hoi a tâ dawkvah ama pholennae la sak awh sei. Marang hoi marangransanaw tuipui thung koug a tâkhawng toe.

<sup>2</sup> BAWIPA teh ka thaonae hoi ka la lah ao.

Ama teh na ka rungngangnae lah ao.

Hote Cathut teh kai ni ka baw k e Cathut lah ao dawkvah, ka pholen han. Ka mintoenaw e Cathut lah ao dawkvah ka oup han.

<sup>3</sup> BAWIPA teh ransa lah ao.

A min teh Jehovah doeh.

<sup>4</sup> Faro siangpahrang e rangleng hoi a ransanaw teh

tuipui daw k koug a tâkhawng.

A rawi e bawinaw hai tuipui paling daw k koug a bo awh.

<sup>5</sup> Kadung poung e hmuen daw k muen a ramuk.

Talung patetlah thung a bo awh.

<sup>6</sup> Oe BAWIPA, Aranglae na kut teh

hnosakthainae hoi a lentoe teh,

Oe BAWIPA, aranglae na kut ni tarannaw koug a raphoe.

<sup>7</sup> Nang na ka tarannaw hah na lentoenae naw hoi

koug na tâkhawng. A lungkhueknae a patoun teh songnawng patetlah ahnimouh teh a kak.

<sup>8</sup> Na hngong daw k e kâha lahoi tui teh na kâcu sak teh,

Kalawng e tui barukbaruk a phuen sak teh, tuipui thung kadung poung e tui hah a kamkak.



- <sup>9</sup> Taran ni kai na pâlei han. ahnimouh ka pha han.  
Lawp e hno hah ka kêrei vaiteh ahnimouh koe ka ngainae akuiep han.  
Tahloi tabu dawk e ka rasa vaiteh,  
ka kut hoi ahnimouh teh kounge ka thei han telah a dei.
- <sup>10</sup> BAWIPA ni kahli a hmu teh,  
tuipui ni ahnimouh muen a ramuk teh  
katha kaawm poung e tui dawk talung patetlah a bo awh.
- <sup>11</sup> Oe BAWIPA, cathutnaw thung daw  
nang patetlae Cathut apine kaawm.  
Thoungnae lahoi ka lentoe e, pholen nah,  
taki kaawm e, kângairu hno ka sak e,  
Nang hoi bang patet e cathut maw ka kâvan.
- <sup>12</sup> Aranglae kut na dâw nah ahnimouh teh  
talai ni kounge a payawp.
- <sup>13</sup> Na taran e taminaw hah lungmanae lahoi na hrawi.  
Kathoung na onae hmuen koe tha onae lahoi na hrawi.
- <sup>14</sup> Miphunnaw ni kamthang a thai awh vaiteh a taki awh han.  
Filitin khocanaw teh a lungpuen awh han.
- <sup>15</sup> Edom kahrawikungnaw kângairunae,  
Moab ram e ransanaw teh pâyawnae,  
Kanaan khocanaw pueng teh  
lungpoutnae koe a pha awh han.
- <sup>16</sup> Oe BAWIPA, na taminaw ni a tapoung toteh,  
Na ran e taminaw ni a tapoung toteh,  
Hote miphunnaw pueng ni takinae lungthin,  
lungpuenna a tawn awh vaiteh,  
Na kut hno sakthainae daw ahnimouh teh  
talung patetlah duem ao awh han.
- <sup>17</sup> Oe BAWIPA, râw coe hane mon,  
Na o nahanelah na sak e hmuen koe  
na taminaw na kâenkhai han.  
Oe BAWIPA, na kut hoi sak e kathoung e  
hmuen koe hmuen na ta han.
- <sup>18</sup> BAWIPA ni a yungyoe uk na lawiseh telah la a sak awh.
- <sup>19</sup> Bangkongtetpawiteh, Faro siangpahrang e marangnaw, ranglengnaw,  
marangransanaw teh tuipui daw a kâen teh BAWIPA ni ahnimae lathueng  
tuipui hoi muenli sak. Isarel miphunnaw teh tuipui lungui vah talai daw  
a cei awh.

### *Miriam la*

<sup>20</sup> Aron e a tawn canu, profet napui Miriam ni cecak a sin teh, napuinaw  
pueng ni hai cecak khawng hoi a hnuk a kâbang awh. <sup>21</sup> Miriam ni hai  
BAWIPA teh a lentoe teh tânae a hmu dawkvah,  
Ama teh pholen awh sei.

Marang hoi marangransanaw hah tuipui thungvah  
kounge a pabo toe telah ahnimouh hoi cungtalah la a sak awh.

### *Tui kakhat e radipsaknae*

<sup>22</sup> Hahoi, Mosi ni Isarelnaw hah tuipui paling koe lahoi a hrawi teh,  
ahnimouh teh Sur kahrawngum vah a pha awh. Hote kahrawng daw  
hnin thum touh kahlawng a cei awh teh tui hmawt awh hoe. <sup>23</sup> Marah  
tie hmuen koe a pha awh navah, Marah tui teh akha dawkvah net thai awh



hoeh. Hatdawkvah, Hote hmuen hah Marah telah a kaw awh. <sup>24</sup> Taminaw ni Mosi yonpen awh teh bangtelamaw nei han ti hoi a phuenang awh. <sup>25</sup> Mosi ni BAWIPA a kaw teh BAWIPA ni thingkung buet touh a patue. Hote akung tui dawkw a tâkhawng nah tui teh a radip. Hote hmuen koe ahnimouh a tanouk teh phunglam a sak pouh e teh, <sup>26</sup> Nangmouh ni BAWIPA Cathut e lawk hah kahawicalah na ngai teh a ngai e hno na sak teh a kâpoelawknaw hah na ngai teh aphunglawknaw pueng na tarawi pawiteh, Izipnaw koe ka pha sak e Lacik hah nangmouh koe ka phat sak mahoe. Bangkongtetpawiteh, nangmae patawnae kadamssakung, BAWIPA lah ka o telah ati. <sup>27</sup> Hat hnukkhu, tuido hlaikahni touh, samtue 70 touh a onae Elim kho a pha awh teh, Hote hmuen dawkw tui onae koe tengpam vah rim a tuk awh.

## 16

### *Kalvan hoi e vaiyei*

<sup>1</sup> Hahoi, Isarel rangpuinaw teh Elim hoi a tâco awh teh kahlawng bout a cei awh. Izip ram hoi a tâco hnukkhu, thapa yung hni, Hnin hrahlaipanga nah, Elim hoi Sinai mon rahak Sin kahrawng dawkw a pha awh. <sup>2</sup> Hote kahrawng dawkw Isarel rangpuinaw ni, <sup>3</sup> Kaimouh teh Izip ram moi thawngnae hlaam teng tahung teh, ka boum lah ka ca awh navah, BAWIPA e kut hoi kadout awh pawiteh ahawihnawn. Atu vah, ka kamkhueng e taminaw kamlum sak hanelah, Hete kahrawng dawkw na hrawi awh vaw telah Mosi hoi Aron yonpen awh teh a phuenang awh.

<sup>4</sup> Hat navah, BAWIPA ni kenhaw! Kai ni nangmouh hanelah kalvan hoi vaiyei ka rak sak han. Taminaw ni hnin touh rawca rawi hanelah hnintangkuem a tâco awh han. Ka kâlawk patetlah a sak hoi, a sak hoe e hottelah lahoi ahnimouh ka tanouk han. <sup>5</sup> Hnin tangkuem rawi e hlak kapap lah, hnin taruk hnin teh let hni touh hoi rawi hanelah kârakueng awh, telah Mosi koe a dei pouh.

<sup>6</sup> Mosi hoi Aron nihai, BAWIPA ni nangmouh teh Izip ram hoi na hrawi a e hah atu tangmin vah na panue awh han. <sup>7</sup> Amom lahai BAWIPA e bawilennae na hmu awh han. BAWIPA koe na phuenangnae lawkw teh a thai toe. Kaimouh yon na pen awh teh na phuenang sin hanelah, Kaimouh teh bang patet e tami lah maw ka o awh, telah Isarelnaw koe atipouh roi. <sup>8</sup> Hahoi, Mosi ni, BAWIPA ni tangmin na ca awh han e moi thoseh, Amom kaboumlah na ca awh han e vaiyei thoseh, na poe awh toteh, hete lawkw heh kakuep han. Nangmouh ni na phuenangnae lawkw teh BAWIPA ni a thai toe. Kaimouh teh bang patet e tami maw. Nangmouh ni na phuenangnae e heh kaimouh roi koe na hoe, BAWIPA koe doeh na phuenang awh, telah atipouh.

<sup>9</sup> Hahoi, nangmae phuenangnae lawkw hah BAWIPA ni a thai dawkvah, Ama koe hnai awh, telah Isarel tamimaya pueng koe patuen dei pouh hanelah Aron koe lawkthui e patetlah,

<sup>10</sup> Aron ni Isarel tamimaya koe patuen bout a dei pouh navah, ahnimouh ni kahrawng lah a khet awh teh, tâmai dawkw BAWIPA e bawilennae kamnuék e hah a hmu awh.

<sup>11</sup> BAWIPA ni hai Isarelnaw e phuenangnae lawkw hah ka thai toe. <sup>12</sup> Tangmin lah nangmouh ni moi na ca awh han. Amom lahai vaiyei kaboumlah na ca awh han. KAI teh nangmae BAWIPA Cathut doeh tie hah na panue han telah ahnimouh koe dei pouh telah Mosi koe atipouh.



<sup>13</sup> Tangmin lah tamuemnaw teh rim koe a tho awh. Amom lahai rim petkâtue lah tadamtui a bo. <sup>14</sup> Tadamtui a kâkayaw toteh, tadamtui kamkak e patetlah titica kamhluem e talai dawk ao. <sup>15</sup> Hote hno Isarelnaw ni a hmu awh toteh, bangnaw ti a panue awh hoe h dawkvah, buet touh hoi buet touh a kâpacei awh. Mosi ni hete naw teh nangmouh na ca hanelah BAWIPA ni na poe e vaiyei doeh. <sup>16</sup> Tami pueng ni amae rim dawk kaawm e tami yit touh ni cakhuem, tami buet touh hanlah Omer buet touh rip rawi hanlah BAWIPA ni a dei e patetlah patuen bout a dei pouh.

<sup>17</sup> Isarelnaw ni hottelah a sak awh teh, tami kayoun kapap e patetlah a rawi awh. <sup>18</sup> Omer hoi a nue awh navah, kapap ka rawi e ni hoe tawn hoe h. Kayoun ka rawi e ni hai hoe vout hoe h. Abuemlah cakhuem kOUNg a rawi awh. <sup>19</sup> Mosi ni api nang hai amom totouh na tat awh mahoe h atipouh eite h, <sup>20</sup> Tami tangawn ni Mosi e lawk ngai laipalah, amom totouh a ta awh dawkvah a pâri teh a hmui a tho dawk Mosi teh a lungkhue k.

<sup>21</sup> Hote tami tangkuem ni amamouh cakhuem hnintangkuem a rawi awh. Khumbeithoe nah atui lah a tho. <sup>22</sup> A hnin taruk hnin navah, vaiyei let hni touh, tami buet touh hanelah Omer kahni touh rip a rawi awh. Hote akong hah tamimaya ka ukkungnaw ni Mosi koe a thai sak awh. <sup>23</sup> Ahni ni hai tangtho teh BAWIPA hmalah kathounge Sabbath hnin, Kâhatnae hnin lah ao. Vaiyei thawng hanlah na ngai e patetlah thawng awh. Bue hanlah na ngai pawite h bue awh. Kacawie teh tangtho amom hanelah na ta awh han telah BAWIPA ni a dei e hah bout a dei pouh.

<sup>24</sup> Mosi ni lawkthui a e patetlah atangtho amom hanelah hai a ta awh. Hotteh, a hmui tho hoe h. Pâri hai pâri hoe h. <sup>25</sup> Mosi ni hai kacawie sahnin cat awh. Sabbath teh BAWIPA e hnin doeh. Hote hno kahrawngum sahnin vah na hmawt awh mahoe h. <sup>26</sup> Hnin taruk touh thung a rawi awh. Sabbath hnin lah kaawm e hnin sari hnin nah awm hoe h, na hmawt hai na hmawt awh mahoe h telah ati.

<sup>27</sup> Hnin sari hnin nah, Tami tangawn ni rawi hanelah a tâco awh teh a tawng awh navah hmawt awh hoe h. <sup>28</sup> BAWIPA ni hai nangmouh ni kaie kâpoelawknaw hoi kâlawknaw na totouh maw na pahnawt awh han rah. <sup>29</sup> BAWIPA ni Sabbath hnin teh nangmouh na poe awh. Hatdawkvah, hnin taruk hnin nah, hnin hni touh hane vaiyei hah na poe awh. Taminaw pueng ama onae hmuen koe awm nase h. Hnin sari hnin nah, a onae hmuen koehoi nahai cetsak hanh telah Mosi koe atipouh. <sup>30</sup> Taminaw ni hnin sari hnin nah a kâhat awh han.

<sup>31</sup> Isarelnaw ni hote cakawi hah mana telah ati awh. Songsuenmu patetlah ao teh a pangaw. Khoitui hoi kalawt e vaiyei hoi a tuinae a kâvan.

<sup>32</sup> Mosi ni nangmouh Izip ram hoi na hrawi awh navah, Kahrawng na paca e vaiyei hah na ca catounnaw pueng ni a hmu a nahan e lah, Omer buet touh tat telah BAWIPA ni a dei e hah bout a dei pouh.

<sup>33</sup> Mosi ni Aron koe vah hlaam lat nate h, mana Omer buet touh athung vah tat. Na ca catoun totouh ta hanelah, BAWIPA hmalah na kuem han atipouh. <sup>34</sup> BAWIPA ni Mosi koe lawkthui e patetlah hote mana hah Aron ni pou a kuem hanelah lawkpanuesaknae hmalah a hung. <sup>35</sup> Isarelnaw ni khosaknae ram dawk a pha awh hoe h roukrak, a kum 40 touh thung mana a ca awh. Kanaan ramri koe a pha hoe h roukrak mana a ca awh. <sup>36</sup> Omer buet touh e teh ephah pung hra pung touh e kuk lah ao. (Omer buet touh teh ephah pung hra pung touh hoi a kâvan teh, ephah buet touh teh 22 liters hoi a kâvan)



## 17

*Lungsong koehoi e tui*

<sup>1</sup> Isarel rangpuinaw ni BAWIPA e kê patetlah Sin kahrawng dawkh hoi a tâco awh teh kahlawng bout a cei awh nah Rephidim vah rim a tuk awh. Hote hmuen koe taminaw nei hanelah tui awm hoeh. <sup>2</sup> Hatdawkvah, taminaw ni Mosi koe nei hane tui na poe telah a titeh Mosi a yue awh. Mosi ni bangkongmaw kai koe thoena na tawng awh. BAWIPA hah bangkongmaw na tanouk awh vaw telah atipouh.

<sup>3</sup> Taminaw tui a kahran dawkvah, Mosi yon a pen awh teh a phuenang awh. Kamamouh khue hoi ka canaw, saringnaw pueng tui kahran sak hanelah, Izip ram hoi bangkongmaw na hrawi telah atipouh awh.

<sup>4</sup> Hat navah, Mosi ni BAWIPA hah a kaw teh, hete taminaw heh kai ni bangtelamaw ka ti han. Talung hoi kai dêi hanelah meimei coungkacoe ao awh toe telah atipouh.

<sup>5</sup> BAWIPA ni hai taminaw e hmalah cet nateh, Isarel tami kacuenaw hah kaw. Tuipui na hemnae sonron hah sin nateh Horeb mon lah cet. <sup>6</sup> Hote hmuen koe kaawm e lungsong van vah kai ka kangdue han. Nang ni hote lungsong hah na hem han. Taminaw ni a nei hane tui hote lungsong dawkh hoi a tâco han telah Mosi koe atipouh. Mosi ni Isarel kacuenaw e hmalah hottelah a sak. <sup>7</sup> Isarelnaw ni BAWIPA teh kaimouh koe ao hoi ao hoeh e a tanouk awh dawkvah, hote hmuen teh Massah hoi Meribah telah ati awh.

*Amaleknaw tânae*

<sup>8</sup> Hat navah, Amaleknaw ni a tho awh teh Isarelnaw Refidim vah a tuk awh. <sup>9</sup> Mosi ni taminaw hah a rawi teh Amaleknaw tuk hanelah cet awh. Tangtho vah, Cathut e sonron ka sin vaiteh, mon vah ka kangdue han telah Joshua koe atipouh.

<sup>10</sup> Mosi ni a dei pouh e patetlah Joshua ni a sak teh Amaleknaw hah a tuk. Mosi, Aron hoi Hur tinaw mon vah a luen awh. <sup>11</sup> Mosi ni a kut a dâw nah, Isarelnaw ni a tâ awh. A kut a pabo nah, Amaleknaw ni a tâ awh. <sup>12</sup> Hatei, Mosi e kut tha a tawn dawkvah, ahnimouh ni talung a la awh teh, Mosi talung van a tahung sak hnukkhu, Aron hoi Hur ni avoivang lahoi a kut a tawm pouh roi. Hatdawkvah, Kanîloum totouh a kut teh ama paroup lah ao. <sup>13</sup> Joshua ni hai Amalek bawinaw hoi a taminaw hah tahloi hoi a thei. <sup>14</sup> BAWIPA ni hai hete hno dawkh pahnim hoeh nahanlah ca thut nateh touk telah Joshua koe atipouh. Bangkongtetpawiteh, kalvan rahim vah Amalek pahnimhoehnae hah kai ni ka takhoe han telah Mosi koe atipouh.

<sup>15</sup> Mosi ni khoungroe a sak teh BAWIPA teh ka tânae (Jehovah-nissi) doeh telah ati. <sup>16</sup> Bangkongtetpawiteh, Amaleknaw e kut ni BAWIPA e khoungroe e taran lah ao dawkvah, BAWIPA ni Amaleknaw teh a yungyoe hoi taran lah a tuk han telah ati.

## 18

*Jethro ni pouknae a poe*

<sup>1</sup> Cathut ni Mosi hoi a tami Isarelnaw hanelah a sak pouh e naw pueng thoseh, BAWIPA ni Isarelnaw Izip ram hoi a tâcokhainae thoseh, Midian Jethro, Mosi e a masei ni a thai nah, <sup>2</sup> Mosi ni a patoun e a yu hoi, <sup>3</sup> A ca kahni touh a hrawi teh a cei. A capa buet touh e min teh Gershom ka phung. Bangkongtetpawiteh, ayâ ram vah imyin lah ka o atipouh. <sup>4</sup> Alouk buet touh e min teh Eliezer ka phung. Bangkongtetpawiteh, Apa Cathut



teh kai na kabawmkung lah ao. Faro e tahloi dawk hoi na runngang telah atipouh. <sup>5</sup> Mosi e a masei Jethro ni Mosi e capa roi hoi a yu a hrawi teh kahrawngum rim tuknae koe Cathut mon dawk Mosi koe a tho awh. <sup>6</sup> A masei Jethro hoi na yu, na capa roi teh nang koe a tho telah Mosi koe a dei pouh awh navah,

<sup>7</sup> Mosi ni a masei hah dawn hanelah a tâco teh a paco. Na dam maw telah buet touh hoi buet touh a kâpacei awh hnukkhu, rim thung vah a kâen awh. <sup>8</sup> BAWIPA ni Isarelnaw hanelah Faro siangpahrang hoi Izipnaw koe hno a sak e naw pueng thoseh, lam a kâhmo awh e rucatnae naw pueng thoseh, hote rucatnae dawk hoi BAWIPA ni a runngang e thoseh, Mosi ni a masei koe a dei pouh. <sup>9</sup> BAWIPA ni Isarelnaw teh Izipnaw e kut dawk hoi a rasa teh a sak e lungmanae kecu dawk Jethro teh a lunghawi.

<sup>10</sup> Izipnaw e kut dawk hoi thoseh, Faro siangpahrang e kut dawk hoi thoseh, nang hoi taminaw ka runngang e BAWIPA teh yawhawinae awm naseh. <sup>11</sup> BAWIPA teh alouke cathutnaw pueng hlak, hoe a lentoe tie atu ka panue. Bangkongtetpawiteh, taminaw ni kâoupkâpawinaw thaw daw BAWIPA ni a tâ telah ati hnukkhu, <sup>12</sup> Mosi e a masei Jethro ni hmaisawi hane sathei hoi Cathut hanlah satheinaw hah a sin teh, Aron hoi Isarel tami kacuenaw ni Mosi e a masei hoi cungalalah Cathut hmalah rawca ca hanlah a tho awh.

<sup>13</sup> Atangtho vah, Mosi ni taminaw lawkceng hanlah a tahung. Amom hoi tangmin totouh, taminaw Mosi hmalah ao awh. <sup>14</sup> Mosi ni taminaw koe a sak e naw pueng hah a masei ni a hmu navah, hete taminaw koe bangtelamaw na sak Nang ni nama dueng na tahung teh taminaw pueng teh amom hoi tangmin lah totouh na hmalah bangkongmaw ao awh, telah atipouh.

<sup>15</sup> Mosi ni hete taminaw teh Cathut e pouknae hei hanelah kai koe ka tho e doeh atipouh. <sup>16</sup> Hahoi, ahnimouh ni lawkpungnae tawn awh boipawiteh, kai koe a tho awh teh, ahnimae lawkpung hah kai ni lai ka dei pouh. Cathut e kâlawnaw hah kai ka cangkhai telah a masei koe atipouh navah,

<sup>17</sup> A masei ni na sak e hno heh hawi hoeh. <sup>18</sup> Nang hoi nang koe kaawm e hete taminaw teh atangcalah a thayoun awh han. Hete thaw heh nang hanlah hnokari poung lah ao. Tami buet touh dueng ni sak thai kawi e nahoe. <sup>19</sup> Ka lawk hah thai haw. Kai ni pouknae na poe han. Cathut ni na okhai han doeh. Nang ni Cathut hoi kâkuen e hno daw taminaw e hnonaw hah Cathut koe na kâen vaiteh, na thai sak han. <sup>20</sup> Ahnimouh hai kâlawnaw na cangkhai han. Ahnimouh ni a dawn hane lamthung, a sak awh han e kawinaw hai na patue han. <sup>21</sup> Hothloilah, Cathut ka taket e tami, kalan e tami, hounlounnae ka panuet e taminaw hah taminaw thung daw hoi na rawi vaiteh, tami thongkhat kaukkung, tami cum touh kaukkung, tami 50 touh kaukkung, tami hra touh ka uk hanelah thaw na poe han. <sup>22</sup> Hote taminaw ni nâtuék haiyah taminaw hah lawkceng awh naseh. Lawkpung kalen daw hoi nang koe pouknae lat awh naseh. Kathoenge lawkpungnae teh ama ni lawkceng awh naseh. Hottelah boipawiteh, ahnimouh ni cungalalah thaw rei taw awh vaiteh nang na tha a dam han. <sup>23</sup> Hottelah, Cathut ni kâ na poe pawiteh, nang teh na cak han. Hete taminaw pueng teh amamae hmuén koe karoumcalah a cei awh han telah atipouh.

<sup>24</sup> Mosi ni a masei e lawk hah a ngai teh a dei pouh e patetlah a sak.

<sup>25</sup> Mosi ni ka uk thai hane taminaw hah Isarelnaw thung daw hoi a rawi



teh tami thongkhat kaukkung, tami cum touh kaukkung, tami 50 touh kaukkung, tami hra touh kaukkung hanlah thaw a poe. <sup>26</sup> Hote taminaw ni nâteuk haiyah taminaw hah lawk a ceng awh. Ka ru e lawkpung dawk teh Mosi e pouknae a la awh. Kayawi e lawkpung dawk teh amamouh lungpouk lawk a ceng awh. <sup>27</sup> Hathnukkhu, Mosi ni a masei ban hanlah a pasoung toung dawkvah ahni teh amae ram lah a ban.

## 19

### *Sinai mon vah Isarelnaw*

<sup>1</sup> Isarelnaw ni Izip ram hoi a tâco awh hnukkhu, thapa yung thum, apasuek hnin nah Sinai mon dawk a pha awh. <sup>2</sup> Refidim hoi a tâco awh teh Sinai mon dawk a pha awh teh, hote kahrawng dawk mon hmalah rim a tuk awh. <sup>3</sup> Mosi ni Cathut koe a luen nah BAWIPA ni mon hoiyah a kaw, nang teh Jakop e phun, Isarelnaw koe bout a dei e lawk teh, <sup>4</sup> Kai ni Izipnaw koe ka sak e thoseh, nangmouh langta rathei hoi na phu teh kama hanlah na la e thoseh, nangmouh ni na panue awh toe. <sup>5</sup> Hatdawkvah, nangmouh ni atu ka lawk hah atanglah na ngai awh teh, ka lawkkam na tarawi pawiteh, alouke miphunnaw pueng hlak nangmouh teh ka tawn hane râw lah na o awh han. Talai pueng heh kaie doeh. <sup>6</sup> Nangmanaw haiyah vaihma uknaeram, kathounge miphun lah kama koe na o awh han telah Isarelnaw koe patuen dei pouh atipouh.

<sup>7</sup> Mosi ni bout a tho teh taminaw thung dawk hoi kacuenaw hah a kaw hnukkhu, BAWIPA ni lawkthui e naw pueng hah bout a dei pouh.

<sup>8</sup> Taminaw pueng ni hai BAWIPA ni a dei e pueng teh kaimouh ni ka sak awh han telah lungkânging lahoi bout ati awh. Mosi ni ahnimae lawk hah BAWIPA koe bout a thai sak. <sup>9</sup> BAWIPA ni khenhaw! Nang hoi Kai ni dei nah taminaw ni a thai awh teh, nang pou na yuem thai awh nahanlah, tâmai khom dawk hoi nang koe Kai ka tho han telah Mosi koe atipouh. Mosi ni hai BAWIPA e lawk hah taminaw koe bout a dei pouh.

<sup>10</sup> BAWIPA ni hai taminaw aonae koe a cei teh, Sahnin hoi tangtho dawk ahnimouh thoung sak lah. Khohna hai pâsu sak awh teh, <sup>11</sup> Apâthum hnin dawk coungkacoe lah awm sak awh. Bangkongtetpawiteh, apâthum hnin nah, BAWIPA ni a taminaw hmalah Sinai mon dawk a kum han.

<sup>12</sup> Taminaw ni a tapuet awh hoe hane ngangnae hah mon petkâtue lah sak nateh, nangmouh ni mon dawk luen awh hanh. Mon khok hah na kâbet awh hoe hane nahanlah, kâhruetcueth telah dei pouh. Mon kâbet e taminaw teh atanglah dout awh naseh. <sup>13</sup> Hote tami hah kut hoi tek awh hanh. Atangcalah talung hoi dêi han. Nahoe pawiteh, tahroe hoi thut han. Tami thoseh, saring thoseh, hring mahoe. Mongka ueng lawk kasawlah a cai toteh, taminaw ni mon dawk a tho han telah Mosi koe a dei pouh.

<sup>14</sup> Mosi ni mon hoi taminaw onae koe a kum teh, ahnimouh hah a thongsak. Ahnimouh ni a khohnanaw a pâsu awh. <sup>15</sup> Mosi ni hai apâthum hnin nah coungkacoe lah awm awh. Yu koe ip awh hanh telah taminaw koe atipouh.

<sup>16</sup> Apâthum hnin amom vah, mon dawk keitat, sumpa palik hoi kho tâmai muen a tabo teh, hramki lawk hoi mongka lawk a cai teh rim dawk kaawm e taminaw pueng a pâyaw awh. <sup>17</sup> Mosi ni hai taminaw Cathut hoi kâhmo sak hanelah, rim dawk hoi a hrawi teh mon khok koe a kangdue awh. <sup>18</sup> BAWIPA teh hmai hoi kâkayo teh Sinai mon dawk a kum dawkvah, Sinai mon teh hmai a khu. Hmaikhu haiyah takhuen dawk e hmaikhu



patetlah a luen teh mon pueng hai a kâhuet. <sup>19</sup> Mongka ueng e kasawlah hoe a cai toteh, Mosi ni a kaw teh Cathut ni lawk hoi a pato. <sup>20</sup> BAWIPA teh Sinai monsom dawk a kum. Mosi hah mon vah a kaw dawkvah, Mosi teh mon vah a luen. <sup>21</sup> BAWIPA ni hai taminaw ni khet hanelah, Kai koe tho payon awh vaiteh taminaw a due awh han e hah puennae a tawn dawkvah, kum nateh kâhruetcuetae nae poe. <sup>22</sup> BAWIPA koe ka tho e vaihmanaw haiyah amahoima a kâthoung sak a han. Nahoeh pawiteh, BAWIPA ni a rek awh han telah Mosi koe atipouh.

<sup>23</sup> Mosi nihai, taminaw ni Sinai mon dawk luen thai awh hoe. Bangkongtetpawiteh, tapuet hoe hane ngangnae naw hah mon petkalup lah ka sak teh, thoungsak awh loe telah lawk yo ka thui toe telah BAWIPA koe bout a dei pouh.

<sup>24</sup> BAWIPA ni hai kum leih. Nang hoi Aron dueng doeh ka luen han. Vaihmanaw hoi taminaw teh BAWIPA koe luen hanelah tho awh hanh naseh. Nahoeh pawiteh, ahnimouh ka rek han telah ati.

<sup>25</sup> Mosi ni taminaw onae koe a kum teh a dei pouh.

## 20

### *Kâlawk hra touh*

<sup>1</sup> Hat navah, Cathut ni a dei e lawk teh, <sup>2</sup> Kai teh nangmouh santoungnae hmuen, Izip ram dawk hoi na ka tâcawtkhai e nangmae Cathut Jehovah doeh.

<sup>3</sup> Kai hlailah alouke cathut na bawk awh mahoe.

<sup>4</sup> Lathueng kalvan thoseh, rahim talai dawk thoseh, talai rahim tui dawk thoseh, kaawm e hno hoi mei kâvan lah, meikaphawk bawk hanlah na sak mahoe. <sup>5</sup> A hmalah tabo hoi na bawk mahoe. Bangkongtetpawiteh, nange Cathut kai Jehovah teh nang dawk yon ao telah tang ka yuem e Cathut, kai na kahmuhmanaw e ca catoun se thum, se pali totouh a napanaw e yon hah a capanaw koe ka pathung e Cathut lah ka o. <sup>6</sup> Kai hah lungpataw ni teh ka kâpoelawknaw ka tarawi e a ca catoun, a se thongsang totouh lungmanae ka kamnuek sak e Cathut lah ka o.

<sup>7</sup> Nange Cathut Jehovah e min hah laithoe lah dei awh hanh. Bangkongtetpawiteh, A min laithoe lah ka dei e tami teh yon tawn hoe telah BAWIPA ni pouk mahoe.

<sup>8</sup> Sabbath hnin thoung sak hanelah, hote hnin hah pahnim awh hanh. <sup>9</sup> Hnin taruk touh thung thaw panki hoi tawk awh. <sup>10</sup> Hnin sari hnin teh na BAWIPA Cathut e Sabbath hnin lah ao. Hote hnin dawk, nang hoi na canaw, na sannu sanpanaw, saring, nange longkha thung kaawm e imyinnaw hai thaw tawk awh mahoe. <sup>11</sup> Bangkongtetpawiteh, BAWIPA ni kalvan, talai, hmuen pueng koe kaawmnaw pueng hah hnin taruk touh thung a sak teh, hnin sari hnin nah, a kâhat. Hatdawkvah, BAWIPA ni hnin sari hnin hah yawhawi a poe teh a thongsak.

<sup>12</sup> Na Cathut Jehovah ni na poe e ram dawk na hringsaw nahanelah, na manu hoi na pa barih.

<sup>13</sup> Tami thet hanh.

<sup>14</sup> Uicuk hanh.

<sup>15</sup> Ayâ e hno parawt hanh.

<sup>16</sup> Na imri koe kalan hoe e kapanuekkhaikung lah awm hanh. <sup>17</sup> Imri e im, a yu, a sannu sanpa, maito, marang hoi hnopai buet touh haiyah lungthin radueknae tawn hanh telah atipouh.

*Tamimaya ni Cathut kamnuenae a taki awh*



<sup>18</sup> Taminaw ni keitat lawk, sumpapalik, mongka ueng lawk, mon hoi hmaikhu a tâco e naw hah a hmu awh toteh, a taki awh dawkvah, a kâhnawn awh teh ahlanae koe vah a kangdue awh. <sup>19</sup> Mosi koevah Nang ni lawk dei lah ka ngai awh han. Kaimouh koe Cathut lawk dei han naseh. Kaimouh ka due hane hah puen ao telah atipouh.

<sup>20</sup> Mosi ni hai na lungpuen awh hanh. Nangmouh tanouk hanelah thoseh, nangmouh teh sak payonnae dawk hoi hlout hanelah ama taki hanelah thoseh, Cathut a tho toe telah taminaw koe a dei pouh. <sup>21</sup> Taminaw ni ahlanae koe vah a kangdue awh. Mosi teh Cathut onae koe kinghmonae koe lah a hnai.

### *Thuengnae khoungroe kâlawk*

<sup>22</sup> BAWIPA ni Isarelnaw bout a dei pouh e teh, kai ni kalvan hoi nangmouh na pato e hah na panue awh toe. <sup>23</sup> Kai bawknae dawk namamouh hno hanlah ngun cathut thoseh, sui cathut thoseh na sak awh mahoe. <sup>24</sup> Kai hanelah talai khoungroe hah na sak awh han. Hote khoungroe dawk nange hmaisawi sathei, yonthanae sathei lah kaawm e nange tu, maitonaw hah na thueng awh han. Ka min na bawknae hmuen pueng dawk nang koe ka tho vaiteh yawhawinae na poe han. <sup>25</sup> Nang ni talung khoungroe hah kai hanlah na sak pawiteh, talung dei e hoi na sak mahoe. Sum hoi thuk e talung hoi sak e khoungroe teh khinnae ao. <sup>26</sup> Nang dawk kayanae ao hoe nahanelah, khoungroe dawk khalai hoi na luen mahoe telah ati.

## 21

### *San hoi kâkuen e kâlawk*

<sup>1</sup> BAWIPA nihai, nang ni Isarelnaw koe lawk na ceng hane teh, <sup>2</sup> Hebru tami san lah na ran pawiteh, kum taruk touh dueng san lah na ta han. Kum sari a pha toteh ratang laipalah na hlout sak han. <sup>3</sup> Santoung nah tami buet touh dueng santoung pawiteh, buet touh dueng a tâco han. A yuvâ kahni touh hoi santoung pawiteh, a yu hoi cungtalang na tâco sak han. <sup>4</sup> Nahoe pawiteh, a bawipa ni a yu a la pouh e awm pawiteh, hote a yu hoi canaw khe pawiteh, a yu hoi a canaw teh a bawipa ni a coe han. San teh ama dueng a tâco han. <sup>5</sup> Nahoe pawiteh, san ni ka bawipa hoi ka yu ka canaw ka lungpataw, tâco hane ka ngai hoe telah tet pawiteh, <sup>6</sup> A bawipa ni Cathut hmalah thoseh, im takhang koe thoseh, a hnâ caphuem hoi a kavi pouh hnukkhu, hote san teh a yungyoe san lah ao han.

<sup>7</sup> A na pa ni a canu san lah yawt pawiteh, hote napui teh san tongpa patetlah hlout mahoe. <sup>8</sup> A bawipa ni hote napui a la teh ngai hoehpawiteh, bout a ratang sak han. Ahni hah a dum dawkvah alouke miphunnaw koe yawt thai hoe. <sup>9</sup> A capa hanlah lat boipawiteh, a canu patetlah a khetyawt han. <sup>10</sup> Alouke napui bout lat pawiteh, hmaloe a la e napui e khohna hoi a yu lah onae hah raphoe pouh mahoe. <sup>11</sup> Hete hno kathum touh sak pouh hoehpawiteh, aphu het laipalah a hlout sak han.

### *Kâyuekâounnae hoi kâkuen e kâlawk*

<sup>12</sup> Tami hem boi lah daut pawiteh ama hai a due roeroe han. <sup>13</sup> Thei hanlah noenae awm laipalah Cathut ni a kut daw k hringnae poe boipawiteh, a yawng nahane hmuen hah na pouk pouh awh han. <sup>14</sup> A imri thei hanlah noenae a tawn teh, ka tuk e tami teh ka khoungroe kângue nakunghai, sawn vaiteh thei roeroe han. <sup>15</sup> A manu hoi a na pa ka hem e tami a due roeroe han. <sup>16</sup> Ka parawt e tami ni a paru e hno a yo nakunghai



thoseh, a kut dawk kaawm nakunghai thoseh, thei lah ao roeroe han. <sup>17</sup> A manu hoi a na pa thoe ka bo e tami teh thei lah ao han.

<sup>18</sup> Tami hoi tami kâyue teh buet touh ni talung hoi a dêi nakunghai thoseh, a kut hoi a thâw nakunghai thoseh, hemnae ka khang e tami kadout hoeh nakunghai, ikhun dawk sut ka yan nakunghai thoseh, <sup>19</sup> bout a thaw teh sonron hoi ka cet nakunghai thoseh, ka hem e tami han a yonnae ngaithoum han. Hatei, ka pataw e tami thaw a kamkak dawkvah, a dam nahan kâsatnae aphu a poe han. <sup>20</sup> A bawipa ni a sannu hoi a sanpa hah bongpai hoi a hem teh hote san dout pawiteh, a bawipa teh reknae ka patawpoung lah poe roeroe han. <sup>21</sup> Hatei, san teh hnin touh, hnin hni a pataw hoi dout hoehpawiteh, hote san teh a bawipa e lah ao dawkvah reknae dawk hoi a hlout han.

<sup>22</sup> Tami hoi tami kâyue teh camo ka vawn e napui a takit dawk camo a kamko teh alouke patawnae bang awm hoehpawiteh, a vâ ni a dei e patetlah rek lah ao han. Bawi ni a dei e patetlah a rawng han. <sup>23</sup> Alouke patawnae awm pawiteh, hringnae hanlah hringnae thoseh, <sup>24</sup> Mit hanlah mit thoseh, hâ hanlah hâ thoseh, kut hanlah kut thoseh, khok hanlah khok thoseh, <sup>25</sup> Hmai hanlah hmai thoseh, a hmâ hanlah a hmâ thoseh, hemnae hanlah hemnae thoseh a khang han.

<sup>26</sup> A bawipa ni a sannu a sanpa e a mit a rawk totouh hem pawiteh, a mit a rawk dawkvah a hlout sak han. <sup>27</sup> Hot patetvanlah, a sannu a sanpa e a hâ ka lawt lah hem pawiteh, a hâ a lawt dawkvah a hlout sak han.

### *Saring hoi kâkuen e kâlawk*

<sup>28</sup> Maito ni tami napui hoi tongpa a deng dawk dout pawiteh, hote maito hah atangcalah koug kadout lah dêi han. A moi hai cat mahoe. Katawnkung teh ngaithoum lah ao han. <sup>29</sup> Hot patetvanlah, tami ouk ka deng e maito, katawnkung ni tami ouk a deng e kong a thai nahlangva, pâkhit laipalah tat pawiteh, hote maito ni tami napui tongpa koug kadout lah deng pawiteh, hote maito teh talung hoi koug kadout lah dêi han. Katawnkung hai thei lah ao han. <sup>30</sup> Nahoe pawiteh, tangka rawng naseh telah dei pawiteh, dei e patetlah amae hringnae kâratang nahanlah a rawng han. <sup>31</sup> Ayânaw e canaw deng pawiteh, a dei e patetlah a khang han. <sup>32</sup> A sannu sanpa deng boipawiteh, maito katawnkung ni san katawnkung tangka 30 touh a rawng pouh han. Maito hai talung hoi koug kadout lah dêi han.

<sup>33</sup> Tami ni tangkom khuem paawng teh a tanae dawk thoseh, tangkom a tai teh teng laipalah a ta e dawk thoseh, ayânaw e marang hoi maito bawt pawiteh, <sup>34</sup> Tangkom ka tai e ni marang hoi maito phu hah a rawng vaiteh a ro a la han.

<sup>35</sup> Tami buet touh e maito ni ayâ louk e maito koug kadout lah deng pawiteh, maito ka tawn roi ni kahring e maito hah a yo roi vaiteh aphu a kêrei roi han. Kadout e maito hai a kêrei roi han. <sup>36</sup> Hot patetvanlah, maito ni ouk a deng tie katawnkung ni a panue nahlangva, pâkhit laipalah paktha pawiteh, maito ro ama ni a la han. Hote maito buet touh e a yueng lah maito buet touh a rawng han.

## 22

### *Tamru hoi kâkuen e kâlawk*

<sup>1</sup> Tami ni tu hoi maito hah a paru teh a thei nakunghai thoseh, a yo nakunghai thoseh, maito buet touh dawk maito panga touh, tu buet touh



dawk tu pali touh hoi bout a patho han. <sup>2</sup> Tamru ni imthung a kun nah ayâ ni a hmu teh ka thet nakunghai, due yueng lah dout mahoe. <sup>3</sup> Hatei, kanî tâcawt pawiteh, duenae phu a due van han. Bangkongtetspawiteh, bout a poe thai. Hno awm hoehpawiteh a paru e hno patho nahanlah amahoima a kâyo han. <sup>4</sup> Tamru e kut dawk tu maito hah a hring lah hmawt pawiteh, let hni hoi a patho han.

<sup>5</sup> Ayâ e laikawk hoi misur takha a ca sak nakunghai thoseh, saring ayâ e laikawk dawk khoun nakunghai thoseh, mae laikawk hoi misur dawk e kahawi poun e rasa vaiteh bout a poe han. <sup>6</sup> Hmaisawi nah phovai a kak dawkvah cabong, cakung, laikawk dawk kaawm e hnonaw kang pawiteh, hmai kasawikung ni a rawng han.

<sup>7</sup> Tami buet touh ni a imri buet touh koe suingun patet e hno buetbuet touh a hnawng teh, a hnawng e tami e im dawk hoi tamru ni parawt pawiteh tamru hah a hmu awh navah, tamru ni let hni hoi a rawng han.

<sup>8</sup> Tamru pâphawng hoeh boipawiteh, katawnkung ni a imri hah hno a la hoi a la hoeh e Cathut hmalah a pacei han. <sup>9</sup> Ayâ e hno la payonnae dawk maito, la, tu, khohna patet e kahmat e hno buetbuet touh a hmu teh, hete hno heh kaie doeh telah tami buetbuet touh ni tetpawiteh, hote tami roi teh Cathut hmalah pacei vaiteh ka sung e ni let hni hoi a rawng han.

<sup>10</sup> Tami ni a imri e laikawk dawk marang, maito, tu patet e saring buetbuet touh a hnawng teh hote saring dout nakunghai thoseh, a hmâtan a ca teh pataw nakunghai thoseh, kapanuekkhaikung awm laipalah ayâ ni oun ka hrawi nakunghai thoseh, <sup>11</sup> A hnawng e tami ni ka imri e hno ka lat hoeh telah kahni touh hoi hnâ a bo roi teh BAWIPA hmalah thoe kâ bo roi pawiteh hno katawnkung ni a hnâbo khai vaiteh, a hnawng e tami ni hai rawng mahoe. <sup>12</sup> Hat ei, ayâ ni oun parawt pawiteh, a hnawng e tami ni hno katawnkung bout a poe han. <sup>13</sup> Sarang ni kei pawiteh panuekhai nahanlah a ro patue naseh. A ro patue thai pawiteh rawng mahoe. <sup>14</sup> Tami ni a imri koe hno buetbuet touh a hlai teh katawnkung ao hoehnahlan, oun dout nakunghai thoseh, a hmâtan a ca teh pataw nakunghai thoseh, a rawng han. <sup>15</sup> Katawnkung awm pawiteh kahlaikung ni rawng mahoe. Aphu hoi hlai pawiteh, katawnkung ni a hlinae phu dueng a hei han.

<sup>16</sup> Tongpa buet touh ni a yu hanlah ham hoeh e tangla pasawtpanep hoi ipkhai pawiteh, aphu a poe vaiteh a yu lah a la roeroe han. <sup>17</sup> A na pa ni vâ sak hanlah ngaikhai hoehpawiteh, a ikhainae phu teh a rawng roeroe han. <sup>18</sup> Hmaui napui na hring sak awh mahoe. <sup>19</sup> Saring hoi ka ip e tami teh thei lah ao han. <sup>20</sup> Jehovah hloilah, alouke cathut hmalah thuengnae ka sak e tami teh thei lah ao han.

<sup>21</sup> Ram alouke imyin hah na pacekpahlek awh mahoe. Nangmouh haiyah Izip ram dawk imyin lah ouk na o awh toe. <sup>22</sup> Nara hoi lahmai hah pacekpahlek awh hanh. <sup>23</sup> Tami buetbuet touh na pacekpahlek awh teh ahnimouh ni kai koe tica hai hram awh boipawiteh, a hramnae lawk ka thai han. <sup>24</sup> Nangmouh koe ka lung puenghoi a khuek vaiteh, tahloi hoi na thei awh han. Na yunaw hai lahmai lah ao vaiteh, na canaw hai nara lah ao awh han. <sup>25</sup> Ka tami, ka roedeng e na imri koe tangka na cawi pawiteh, apung kacatnaw patetlah na cat mahoe. Apung hai na het mahoe. <sup>26</sup> Na imri ni a hni nang koe pâhung pawiteh, kho a hmo hoehnahlan bout na poe han. <sup>27</sup> Bangkongtetspawiteh, hni kâkhu hane alouke tawn hoe. Ama



a kâkhu hanelah a tho. Ahni teh bangtelamaw a i thai han. Kai na kaw pawiteh ka thai pouh han. Kai teh pahrennae ka tawn e lah ka o.

<sup>28</sup> Cathut hah kathout lah na dei mahoe. Na miphun ka uk e bawi hah thoe na bo mahoe. <sup>29</sup> Aluepaw hmaloe kahmin e hoi kasu e ratui hah hrawk laipalah na poe han. Ca tongpa camin haiyah kai koe na poe awh han. <sup>30</sup> Hot patetvanlah, tu hoi maitonaw hai na sak awh han. Hnin sari touh thung tu maitoca hah a manu hoi rei na ta awh vaiteh, hnin taroe hnin nah na poe han. <sup>31</sup> Nangmouh teh kai koe tami kathoung lah na o awh han. Sarang ni kahrawngum a kei e moi na cat awh mahoe. Uinaw hah na poe awh han.

## 23

### *Hno pueng dawk lannae*

<sup>1</sup> Nang ni laithoe e kamthang hah patuen na pathang mahoe, na dei mahoe. Tamikalanhoe hnaw hoi lungkânging teh kapanuekkhaikung lah na awm mahoe. <sup>2</sup> Tamikathoutnaw e hnukkâbang mahoe. Lawkceng navah tami kalen kambawng laihoi lamthung phensak hanlah na dei mahoe. <sup>3</sup> Mathoe koehai kapeknae na tawn mahoe. <sup>4</sup> Na taran e marang maito lam ka hman e na hmawt pawiteh bout na thak pouh awh han. <sup>5</sup> Nang na ka hmawt ngai hoe e tami e la hah a hno ni a ratet e na hmawt pawiteh, na kabawp ngai hoe hai na kabawp han. <sup>6</sup> Mathoe ni nang na oun nah kahawi hoe lah ahni lawk na ceng mahoe. <sup>7</sup> Kahmanhoe e hno na roun han. Yon ka tawn hoe e tamikalan hah na thet mahoe. Bangkongtetpawiteh, tamikathout teh kai ni ka ngaithoum mahoe. <sup>8</sup> Nang ni tadawngnae na cat mahoe. Tadawngnae ni tami lungkaangnaw hah mit a dawn sak teh tami kalannaw lawk a phen sak. <sup>9</sup> Ram alouke imyin hah rektap awh hanh. Nangmouh teh Izip ram dawk imyin lah ouk na o awh toung dawkvah, imyin ni a tawn e lungthin hah na panue awh. <sup>10</sup> Kum taruk touh thung laikaw na tawk vaiteh cakang na pâtung awh han. <sup>11</sup> A kum sari nah laikaw tawk laipalah na ta han. Hottelah, na sak pawiteh, mathoenaw ni a ca thai awh van han. Kacawie naw hai saringnaw ni a ca awh han. Hot patetvanlah, misur takha, olive takha hai na sak awh han. <sup>12</sup> Hnin taruk touh thung thaw na tawk awh han. A hnin sari nah na kâhat awh han. Hottelah, na sak pawiteh, na maito hoi lanaw ni kâhatnae tueng a tawn awh han. Na canaw, imyinnaw hai tha a dam awh han. <sup>13</sup> Ka dei e lawknaw pueng hah pâkuem awh. Alouke cathut min hah dei awh hanh. Na pahni dawk hoi dei e lawk ayâ ni thai hanh naseh.

### *Kum tangkuem e pawî kathum touh*

<sup>14</sup> Kum touh dawk vai thum touh kai hanlah pawî na sak awh han. <sup>15</sup> Tonphuenhoehe vaiyei pawî na sak awh han. Kâ na poe tangcoung e patetlah hnin sari touh thung tonphuenhoehe na ca awh han. Bangkongtetpawiteh, hote thapa dawknangmouh teh Izip ram hoi na tâco awh. Hote pawî na sak awh navah apihai kai koe a kuthrawng hoi tho hanh naseh. <sup>16</sup> Laikaw tawk teh cang a han nah, cang takhawknae thoseh, cakang koug kuem hoi kum abaw nah, cavanca pawî thoseh na sak awh han. <sup>17</sup> Nangmouh thung dawknang tongpa pueng teh kum touh dawk vai thum touh Bawipa Jehovah e hmalah minhmai na patue awh han. <sup>18</sup> Kai e sathei e thi hah ton phuen e vaiyei kalawt laihoi na poe mahoe. Kai e sathei e athaw hai amom totouh na tat awh mahoe. <sup>19</sup> Na law dawknaw e a pawhik kahawi poung e aluepaw hah na BAWIPA Cathut e im dawknaw na



thokhai awh han. Hmaeca hah a manu e sanutui hoi na thawng mahoe. <sup>20</sup> Khenhaw! lam vah nang na ring vaiteh, ka rakueng e hmuen koe hrawi hanelah na hmalah kalvantami ka patoun han.

### *Kalvannaw hoi lawkkamnaw*

<sup>21</sup> Hote kalvantami hah barinae tawn. A lawk hah ngai pouh. A kê ek hanh. Kâ na tapoenae hah ahni ni na ngaithoum awh mahoe. Kai e ka min teh ahni daw k ao. <sup>22</sup> Nang ni atangcalah a lawk na ngai teh, kaie kâlawk patetlah na sak pawiteh, nange tarannaw hah ka taran van han. Nang kangangnaw hah kai ni ka ngang van han. <sup>23</sup> Kaie kalvantami ni na hmalah a cei vaiteh Amor tami, Hit tami, Periz tami, Kanaan tami, Hiv tami hoi Jubusitnaw onae hmuen koe na hrawi awh vaiteh, ahnimouh teh koug ka pâlei han. <sup>24</sup> Ahnimae cathut hah na baw k awh mahoe. Ahnimae bawknaw patet lahai na sak awh mahoe. Koug na raphoe awh vaiteh kutsak cathutnaw hai phetrasei lah na dei pouh. <sup>25</sup> Nangmae BAWIPA Cathut hah na baw k awh han. Na vaiyei thoseh, tui thoseh yawhawinae a poe han. Lacik hai nange nathung hoi a takhoe han. <sup>26</sup> Na ram daw k camo ronae hoi carôenae awm mahoe. Na hringyung ka vang sak han. <sup>27</sup> Kai na takinae lungthin hah na hmalah ka patoun vaiteh, na phanae hmuen pueng koe e miphunnaw pueng hah ka raphoe han. Na tarannaw pueng hah hnuklah ka ban sak han. <sup>28</sup> Khoingannaw hah na hmalah ka patoun vaiteh, Hitnaw, Kanaannaw, Hivnaw hah na hmalah a pâlei han. <sup>29</sup> Hote taminaw kum touh hoi na hmalah lahoi koug ka pâlei mahoe. Koug ka pâlei pawiteh, ram daw k tami kingdi vaiteh sarang teh nang hanlah kapap han. <sup>30</sup> Nang ni na pungdaw teh ram daw k na kawi hoehnahlan pueng, ahnimouh teh payai lahoi ka pâlei han. <sup>31</sup> Na ramri teh tuipui paling tui koehoi Filistin tuipui totouh, thingyeiyawn hoi tuipui totouh kai ni ka khoe han. Hote khocanaw teh na kut daw k na poe vaiteh nang ni na pâlei han. <sup>32</sup> Ahnimouh hoi thoseh, ahnimae cathutnaw hoi thoseh, kâhuikonae na sak awh mahoe. <sup>33</sup> Nang ni kai koe yonnae na sak hanelah, ahnimouh ni a sak han tie puennae ao dawkvah, ahnimouh teh na ram daw k awm awh mahoe. Nang ni ahnimae cathut hah na baw k pawiteh, kamthuinae katang lah ao han telah Mosi koe atipouh.

## 24

### *Isarel ni yuemkamcu sak*

<sup>1</sup> Hahoi, BAWIPA ni Mosi koe, nang, Aron, Nadab, Abihu hoi Isarel kacue 70 touh hoi cungtalah, BAWIPA koe luen awh nateh ahnimouh teh ahlanae koehoi baw k awh naseh. <sup>2</sup> Nang dueng ni BAWIPA hah na hnai han. Alouknaw ni na hnai han naseh. Taminaw teh nang hoi cungtalah rei na luen mahoe telah Mosi koe atipouh.

<sup>3</sup> Mosi ni hai taminaw onae koe a tho teh, BAWIPA e lawknaw pueng thoseh, lawkcengnae naw pueng thoseh, a thai sak. Taminaw ni hai BAWIPA e lawk patetlah ka sak awh han telah rip bout ati awh.

<sup>4</sup> Mosi ni BAWIPA e lawknaw pueng a thut hnukkhu, amom a thaw teh mon khok koevah khoun groe thoseh, Isarel miphun hlaikahni touh hanelah talung hlaikahni touh thoseh a ung awh. <sup>5</sup> Isarel thoundounnaw a patoun e patetlah ahnimouh ni maitonaw a thokhai awh teh BAWIPA hmalah hmaisawinae sathei, rounnae sathei hah a thueng awh. <sup>6</sup> Mosi ni a thi tangawn hah kawlung daw k a hlun hnukkhu, atangawn e hah khoun groe van vah a kathek. <sup>7</sup> Lawkkamnae ca hah a la teh tamimaya



hmalah a touk hnukkhu, ahnimouh ni hai BAWIPA ni a dei e patetlah kaimouh ni ka sak awh han, ka ngâi awh han telah ati awh.

### *Cathut hoi mon daw*

<sup>8</sup> Mosi ni thi hah a la teh taminaw e lathueng vah a kâhei teh; hete thi teh hete hnonaw daw BAWIPA ni nangmouh koe e lawkkamnae thi lah ao telah atipouh. <sup>9</sup> Hat navah, Mosi, Aron, Nadab, Abihu hoi Isarel kacue 70 touh a luen awh teh, <sup>10</sup> Isarel miphunnaw e Cathut hah a hmu awh. A khok rahim lah Sapphire talung rem e patetlah thoseh, thoungnae teh kalvan pinkâhin e patetlah thoseh a kamnue. <sup>11</sup> Isarel kahrawikungnaw koe a kut phat sak hoe. Ahnimouh ni Cathut a hmu awh eiteh, a canei awh. <sup>12</sup> BAWIPA ni ka onae monsom vah luen nateh awm haw. Taminaw cangkhai hanelah lungphen daw thut e kâlawnaw heh nang koe na poe han telah Mosi koe atipouh.

<sup>13</sup> Mosi ni kabawmkung Joshua hoi a thaw teh Cathut e mon daw koe a luen roi. <sup>14</sup> Kacuenaw koe kaimouh roi ka tho hoe roukrak hete hmuen koehoi na ring awh. Aron hoi Hur teh nangmouh koe ao dawkvah rucat kâhmo e awm pawiteh ahnimouh roi koe cet naseh telah lawk a thui.

<sup>15</sup> Mosi ni mon vah a luen teh tâmai ni mon teh muen a kayo. <sup>16</sup> BAWIPA e bawilennae teh Sinai mon vah a kâhat teh tâmai ni hnin taruk touh thung muen a kayo. Hnin sari nah, tâmai thung hoi Mosi a kaw. <sup>17</sup> BAWIPA e bawilennae teh monsom vah hmai ka kang e patetlah kamnuek e Isarelnaw ni a hmu awh. <sup>18</sup> Mosi teh tâmai thung a kâen teh mon a pha. A hnin 40 touh thung mon vah ao.

## 25

### *Hmuen kathoung hanlah poenae*

<sup>1</sup> BAWIPA ni Mosi hah a pato teh, <sup>2</sup> kai koevah pasoumhno poe hanelah, Isarelnaw hah dei pouh. Lungthocalah hoi ka poe e pueng kaie pasoumhno lah na la han. <sup>3</sup> Hetnaw heh ahnimouh koehoi na la hane pasoumhno lah ao han. Sui, ngun, rahum <sup>4</sup> kamthim hni, âthi hni, hnipaling, loukloukkaang e lukkarei, hmae muen, <sup>5</sup> tu pho âthi bu e, a pho kahawi phu kaawm e hoi, anri thing, <sup>6</sup> paang hane satui, kâhluk e satui hoi hmu itui, <sup>7</sup> vaihma angki hoi lungtabue bet hanelah onyx talung phu kaawm, <sup>8</sup> hahoi ahnimouh koe ka o thai nahanlah hmuen kathoung na sak pouh awh naseh. <sup>9</sup> Lukkareim e mei hoi a puengcangnaw e mei pueng kai ni na hmu sak e patetlah na sak han.

### *Thingkong*

<sup>10</sup> Hahoi anri thing e thingkong ayung dong hni tangawn, adangka dong touh hoi a tangawn, arasang dong touh hoi tangawn hoi na sak han. <sup>11</sup> Athung avan suikathoung hoi na hluk vaiteh, sui hoi pangkhek na sak han. <sup>12</sup> Laikaw pali touh sui hoi na sak vaiteh, a khok daw na mahrawk han. Laikaw kahni touh hah avanglae a khok daw, alouke kahni touh hah avanglae a khok daw na mahrawk han. <sup>13</sup> Kâkayawtnae acung hah anri thing e na sak vaiteh, sui koun na hluk han. <sup>14</sup> Thingkong kâkayawt thai nahanelah, tapang daw e laikaw daw kâkayawtnae acung hah na hrawt han. <sup>15</sup> Thingkong e laikaw dawkvah kâkayawtnae acung teh pou na hrawt vaiteh, na rayu mahoe. <sup>16</sup> Thingkong thung vah lawkpanuesaknae kai ni na poe hane hah na ta han. <sup>17</sup> Lungmanae tungkhung hah ayung dong hni tangawn, adangka dong hni tangawn hoi



na sak han. <sup>18</sup> Lungmanae tungkhung apoutnae reira dawk cherubim kahni touh dei lah dei e sui hoi na sak han. <sup>19</sup> Avang lae apoutnae dawk cherubim buet touh, avanglae apoutnae dawk hoi cherubim buet touh na sak han. Lungmanae tungkhung hoi kâkuen lah apoutnae roi koe cherubim kahni touh na sak han. <sup>20</sup> Hottelah cherubim kahni touh minhmai kadangka lahoi lungmanae tungkhung hah a rathei kadai hoi a khu vaiteh, lungmanae tungkhung koe lah cherubim ni a khet han. <sup>21</sup> Hote thingkong van vah lungmanae tungkhung teh na ta awh vaiteh, na poe hane lawkpanuesaknae hah thingkong thung vah na ta han. <sup>22</sup> Hote hmuen dawk nang koe ka tho vaiteh, cherubim kahni touh rahak e lawkpanuesaknae thingkong van lungmanae tungkhung lahoi Isarel taminaw koevah kâ na poe hane pueng dawk lawk ka dei han.

### *Vaiyei caboi*

<sup>23</sup> Hahoi anri thing hoi caboi ayung dong hni, adangka dong touh, a rasang dong touh hoi tangawn hoi na sak han. <sup>24</sup> Kathounge sui hoi na hluk vaiteh, pangkhek hah sui hoi na pacawp sin han. <sup>25</sup> A phen kuttabei tittouh e hoi petkâkalup lah a hna na bet vaiteh, sui hoi na pacawp sin han. <sup>26</sup> Caboi hanlah sui laikaw pali touh na sak vaiteh, a khok pali touh onae takin pali touh dawk na ta han. <sup>27</sup> Caboi hah kâkayawt thai nahan, acung hrawt thai nahanelah, laikaw hah a hna hoi kamtawm lah na mawp han. <sup>28</sup> Caboi hah kâkayawt thai nahanlah anri thing e acung na sak vaiteh, sui tui hoi na hluk han. <sup>29</sup> Hote hno hanlah, tongben, pacen, kawlung hoi awi nahane manang haiyah sui hoi na sak han. <sup>30</sup> Caboi van vah vaiyei hah ka hmaitung vah pou na pâhung han.

### *Sui hmaiim tanae*

<sup>31</sup> Hahoi hmaiimkhok hah sui hoi na sak vaiteh dei lah dei e han. Hmaiikhom patet e kutnaw, manangnaw, a peimuemnaw, lili peinaw hah buet touh lah na dei han. <sup>32</sup> Hmaiimkhok avoivang lahoi kathum kathum touh a tâco vaiteh, a kut taruk touh ao han. <sup>33</sup> Hmaiimkhok dawk hoi ka tâcawt e a kut kathum touh dawk, a kut buet buet touh dawk a peimuem, lili pei, almond paw hoi mei kâvan e manang kathum touh ao han. <sup>34</sup> Hmaiimkhok dawk hai a peimuemnaw, lili peinaw, almond paw, mei kalmund paw hoi mei kâvan evan e manang pali touh ao han. <sup>35</sup> Hmaiimkhok dawk hoi ka tâcawt e a kut taruk touh ao e patetlah a kut kahni touh e rahim haiyah a peimuem buet touh rip ao han. Hmaiikhom abuemlah suikathoung hoi na dei han. <sup>36</sup> A peimuemnaw a kutnaw hah buet touh lah koung na kâkuetsak han. Abuemlah suikathoung hoi na dêi han. <sup>37</sup> Hote hno hanlah hmaiim sari touh na sak vaiteh, a hmalah a ang thai nahanlah hmaiim hah na paang han. <sup>38</sup> Paitei hoi padounnae haiyah suikathoung lah ao han. <sup>39</sup> Hmaiim tanae hoi a hnopai pueng saknae dawk suikathoung pong 100 touh na hno han. <sup>40</sup> Mon vah meilam na patue e patetlah bangpueng sak hanelah pahnim hanh.

## 26

### *Lukkareim*

<sup>1</sup> Hothloilah, lukkareim hah âthi hni, hnipaling, loukloukkaang e hni yung hra touh hoi sak e, cherubim em kahawicalah na la vaiteh, mek na sak sin han. <sup>2</sup> Yaphni e teh ayung dong 28 touh rip a kâvan han. Adangka dong 4 touh rip han. Abuemlahoi yaphni koung a kâvan han. <sup>3</sup> Yaphni e



hah buet touh hoi buet touh koug kâbet han. Alouke panga touh hai buet touh hoi buet touh koug a kâbet han. <sup>4</sup> Patawp e yaphni hah apasuek e a tâphai a poutnae dawk laikaw dik kamthim e hoi na sak han. Hottelah patawp e yaphni e apâhni e avanglae apoutnae dawk hai na sak han. <sup>5</sup> Yaphni buet touh dawkvah, laikaw 50 touh na sak han. Hahoi patawpnae apasueke tâphai dawk hai laikaw 50 touh na sak vaiteh, phouk kadangka lah ao awh han. <sup>6</sup> Tarennae 50 touh sui hoi na sak han. Hote tarennae ni yaphni hah hmai na taren sin vaiteh, lukkareiim teh buet touh lah na o sak han.

<sup>7</sup> Lukkareiim e a lemphu dawkvah, hmae muen hoi yaphni hah na sak han. Yaphni 11 touh hoi na sak han. <sup>8</sup> Yaphni teh ayung dong 30 touh rip a pha han. Adangka dong pali touh vaiteh, yaphni 11 touh e hah koug a kâvan han. <sup>9</sup> Yaphni panga touh e hah koug na patawp han. Hahoi yaphni taruk touh hah lukkareiim hmae lae yaphni taruk touh e hmalah koug na patawp han. <sup>10</sup> Patawp e yaphni pasuek e tâphai dawk laikaw 50 touh hoi na sak vaiteh, patawpnae apâhni e tâphai dawk laikaw 50 touh na sak han. <sup>11</sup> Hetsinnae 50 touh e hah rahum hoi na sak han. Rakhan buet touh lah ao thai nahanelah, hetsinnae hah tâphai lae laikaw dawk na bang han. <sup>12</sup> Lukkareiim e yaphni kacawie tangawn hah, lukkareiim e a hnuklah na bang han. <sup>13</sup> Hahoi lukkareiim avangvangelah kacawie yaphni som dong touh reira e hateh avangvangelah lukkareiim ramuknae a kahup lah a kâbang han. <sup>14</sup> Lukkareiim lemphu ramuk nahanelah tu pho paling bu e, hote tu pho van vah hmae pho hah na sak han. <sup>15</sup> Lukkareiim tungdum nahanelah thingpheknaw hah anri thing hoi na sak han. <sup>16</sup> Thingphek teh asaw e dong hra, akaw e dong touh hoi tangawn han. <sup>17</sup> Hote thingphek pueng dawk a khok kahni touh na sak han. <sup>18</sup> Lukkareiim akalâh kalup nahanelah thingphek 20 touh na sak han. <sup>19</sup> Hote thingphek 20 touh dawk e buetbuet touh e rahim vah, a khok kahni touh mawp nahanelah ngun khokpacawp 40 touh na sak han. A tangkhang hanelah ngun khokpacawp kahni touh lengkaleng na sak han. <sup>20</sup> Hot patetvanlah, lukkareiim atunglah kalup nahanelah thingphek 20 touh ao han. <sup>21</sup> Ngun khokpacawp 40 touh e hah thingphek buet touh hanelah kahni touh lengkaleng na sak han. <sup>22</sup> Lukkareiim a hnuk lae kalup nahanelah thingphek 6 touh na sak han. <sup>23</sup> A takin avoivang lah kalup nahane kahni touh na sak han. <sup>24</sup> Takin kahni touh dawk, a rahim lahai a lathueng lahai laikaw hah na bang han. <sup>25</sup> Hahoi thingphek 8 touh hah na kangdue nahanelah ngun laikaw 16 touh ao han, thingphek buet touh hanelah tarik e kahni touh lengkaleng ao han. <sup>26</sup> Anri thing hoi tapang e pangkhek hah na sak han. Lukkareiim avangvangelah hane thingphek panga touh lukkareiim avanglah hane thingphek panga touh. <sup>27</sup> Lukkareiim hnuklah kalupnae thingphek hrawt nahanelah tarennae acung yung panga touh na sak han. <sup>28</sup> A lungui tapang tâphai hah a tangkhang thingphek lungui hoi avanglah apoutnae koehoi avanglah a poutnae totouh na pha sak han. <sup>29</sup> Thingphek hah sui tui hoi na hluk han. Hahoi tapang e tâphai hrawtnae laikaw hah sui hoi na sak han, tapang tâphai hai sui tui hoi na hluk han. <sup>30</sup> Hottelah mon dawkvah, kai ni na patue e patetlah lukkareiim teh na sak han. <sup>31</sup> Kamthim hni, âthi hni, hnipaling loukloukkaang e hoi carouk e na sak han. A meikahawicalah cherubim mei na sak han. <sup>32</sup> Hote sui tui hluk e anri thing khom pali touh dawkvah yaphni hah na bang han. Hote khom teh sui hoi sak e hetnae hoi ngun khokpacawp pali touh dawk ung e lah ao



han. <sup>33</sup> Kacacalah na het vaiteh, yaphni hah na yap vaiteh, yaphni thung lah lawkpanuesaknae thing kong hah na ta han. Yaphni na yap e hah namamouh hane hmuen kathoung hoi hmuen kathoungpounge kapeknae lah ao han. <sup>34</sup> Lungmanae tungkhung hah hmuen kathoungpounge lawkpanuesaknae thingkong van na ta han. <sup>35</sup> Yaphni alawilah caboi hah na ta vaiteh, lukkareiim akalae hmaiimkhok, atunglah caboi buet touh hoi buet touh kadangka lah na ta han. <sup>36</sup> Hahoi lukkareiim takhang koe yaphni loukloukkaang e, carouk e lukkarei kamthim hni, âthi hni, hnipalingnaw, hoi, emlakathoum koe em la sak hoi na sak han. <sup>37</sup> Hahoi anri thing hoi yaphni yap nahane hah khom panga touh na sak vaiteh, sui tui kOUNg na hluk han. Bang nahanelah sui hoi na sak han. Hotnaw pâhung nahanelah, rahum khokpacawp panga touh na sak han.

## 27

### *Hmaisawi thuengnae khoungroe*

<sup>1</sup> Anri thing hoi khoungroe ayung dong panga, adangka dong panga, arasang dong thum, a takin pali touh lah na sak han. <sup>2</sup> Khoungroe hoi kâkuen lah a takin pali touh dawk a ki na sak vaiteh, rahum tui kOUNg na hluk han. <sup>3</sup> Hraha kawwnae ampaikêi, tawkso, ailo, cingco, hoi tawngben naw hah rahum e na sak han. <sup>4</sup> Hote khoungroe teh, rahum cuekkae na sak vaiteh, a takin pali touh dawk rahum laikaw pali touh na sak han. <sup>5</sup> Tamlawk ni khoungroe tangawn a pha thai nahanlah, a lungui totouh khoungroe hna a rahim lah na ta han. <sup>6</sup> Khoungroe kâkayawtnae acung anri thing hoi na sak vaiteh, rahum tui na hluk han. <sup>7</sup> Hote kâkayawtnae acung teh, laikaw dawk na hrawt vaiteh, kâkayawtnae acung hoi kâkayawt thai nahanelah, khoungroe teng vah, reirei ta han. <sup>8</sup> Hote khoungroe teh thingphek hoi athunglah vukkâko lah na sak han. Athung avan kâpicalah na sak han. Mon vah na patue e patetlah na sak han.

### *Lukkareiim thongma*

<sup>9</sup> Lukkareiim thongma hai na sak han. Akalah kalup nahanelah loukloukkaang e hni kawng e dong 100 touh kasaw na sak han. <sup>10</sup> Hote yaphni yap nahanelah khom 20, khokpacawp 20 touh hah rahum hoi na sak vaiteh, hetnae hoi pangkheknaw teh ngun hoi na sak han. <sup>11</sup> Hot patetlah, atunglae kalup nahanelah, ayung dong 100 touh ka phat e yaphni hoi cUNgtalah, ngun hetnae, ngun pangkhek, rahum khom 20, rahum khokpacawp 20 touh ao han. <sup>12</sup> Kalupnae a hnuklah kalup nahanelah ayung dong 50 touh e yaphni hoi khom hra touh, khokpacawp hra touh ao han. <sup>13</sup> Kalupnae a hma lae hai adangka dong 50 touh ao han. <sup>14</sup> Longkha avangvanglah yap hane ayung dong hlaipanga touh kasawe yaphni hoi, khom kathum touh, <sup>15</sup> khokpacawp kathum touh ao han. <sup>16</sup> Kalupnae longkha koe yap hane dong 20 touh kasawe yaphni teh kamthim hni, âthi hni, hnipaling, loukloukkaang e lukkarei carouk e hoi, khom pali touh, khokpacawp pali touh ao han. <sup>17</sup> Kalupnae petkâkalup lah kaawm e pueng teh, hetnae hah ngun, pangkhek hah ngun, khokpacawp hah rahum han. <sup>18</sup> Kalupnae teh ayung dong cum, adangka dong 50, arasang dong panga touh a pha vaiteh, loukloukkaang e lukkarei hoi rahum khokpacawp lah ao han. <sup>19</sup> Lukkareiim dawh hnopai e naw pueng hoi lukkareiim dawh hno e hetnae hoi, kalupnae dawh hno e hetnae pueng teh rahum hoi sak e lah ao han.



*Hmaiim satui*

<sup>20</sup> Hmaiim pou paang thai nahanelah, Olive paw phawm laihoi raci e olive satui kathoung hah, Isarelnaw ni a thokhai awh nahanlah kâ na poe han. <sup>21</sup> Lawkpanuesaknae yaphni yap e alawilah kamkhuengnae hmuen koe, Aron hoi a canaw ni tangmin hoi amom ditouh BAWIPA hmalah, hote thaw hah a tawk awh han. Hetheh, Isarel catounnaw ni catounnaw totouh a tarawi awh hane phunglam lah ao han.

**28***Vaihma puengcang*

<sup>1</sup> Aron hoi Aron capa Nadab, Abihu, Eleazar hoi Ithamar naw ni, kai koevah, vaihma thaw a tawk thai awh nahanelah, na hmau Aron hoi a capanaw hah Isarel catounnaw thung hoi lat haw. <sup>2</sup> Hahoi na hmau Aron hanelah, kathounge khohna ka bawilen sakkung meikahawisakkung lah na o sak han. <sup>3</sup> Kutsakkathoume, lungangnae muitha lahoi, kakawisaknaw pueng hah dei pouh. Aloukcalah kapek e koehoi Aron ni vaihma thaw kai hanelah a tawk thai nahan a khohna hah sak pouh naseh. <sup>4</sup> Hetheh khohna hanelah a khui awh hanelah doeh. Saiphei, angki, angkidung, Ephod, lupawk hoi taisawm. Na hmau Aron hoi a capanaw ni kai han vaihma thaw a tawk thai awh nahan, kathounge khohna na sak pouh han.

*Taisawm*

<sup>5</sup> Sui, kamthim, paling, loukloukkaang e pahla hoi na sak pouh han. <sup>6</sup> Vaihma angki teh kutsakkathoumnaw ni a sak e patetlah Sui, kamthim, âthi, paling, loukloukkaang e pahla hoi carouk e lahoi a sak han. <sup>7</sup> Apoutnae koe vah a loung dawk pâbawk e arui kahni touh ao vaiteh, hothateh pâbawk e lah ao han. <sup>8</sup> Sui, kamthim, âthi, paling, opaou, hoi loukloukkaang e angki dawkvah, yeng hane taisawm kahawipoung lah kawng e angki hoi, aphu kaawmpoung e hno han. <sup>9</sup> Hahoi aphu kaawm e talung kahni touh na la vaiteh, avan vah Isarel catounnaw e min hah na thut han. <sup>10</sup> Talung aphu kaawm e buet touh dawkvah, minnaw taruk touh, alouke talung dawkvah taruk touh, a tâconae lahoi na thut pouh han. <sup>11</sup> Min na thutnae talung thuk kathoumnaw ni a thuk awh e patetlah Isarel catounnaw e min hah talung kahni touh dawk na thuk han. Suihlaam dawk na pâseng han. <sup>12</sup> Isarel catounnaw pahnim hoeh nahanelah hote talung kahni touh hah angki rui dawk na bet han. Hottelah Aron ni ahnimae minnaw hah a loung roi dawk BAWIPA hmalah a bang han. <sup>13</sup> Suipahla vei e hai na sak vaiteh, <sup>14</sup> Suidingyin kahni touh, rui karawn e patetlah na vei vaiteh, na vei e dingyin teh karawn e hoi a kamtawp han.

*Ephod*

<sup>15</sup> Lawkcengnae Ephod hah na sak han. Sui, kamthim pahla, dikpaling pahla, opaou pahla, loukloukkaang pahla hoi kahawicalah kawng e vaihma angki na sak e patetlah na sak han. <sup>16</sup> Takin pali touh a tawn vaiteh bawkhni touh lah ao han. Ayung khap touh adangka khap touh han. <sup>17</sup> Hahoi talung phu kaawm than pali touh na pâthit han. Apasueke than dawkvah, sardius, topaz, hoi carbuncle han. <sup>18</sup> Apâhni e than dawkvah, emerald, sapphire hoi diamon han. <sup>19</sup> Apâthum e than dawkvah, Jacinth, agate, hoi amethyst han. <sup>20</sup> Apalinae than dawkvah, beril, onyx hoi jasper han. Hotnaw teh sui dawk koug bet e lah ao han. <sup>21</sup> Aphu kaawm talungnaw ni, Isarel catounnaw e minparui e patetlah hlaikahni touh ni min rip a tawn awh han. Min thutnae dawk thuk e patetlah miphun pueng



hah a minnaw patetlah miphun hlaikahni touh hane doeh. <sup>22</sup> Ephod a poutnae koevah, rui karawn e patetlah dingyin kathounge vei e hah sui hoi na sak han. <sup>23</sup> Hahoi Ephod hanelah suilaikaw kahni touh na sak han. Laikaw kahni touh hah Ephod a poutnae koe na bet han. <sup>24</sup> Suidingyin kahni touh vei e hah Ephod apoutnae koe e laikaw kahni touh dawh na kan han. <sup>25</sup> Vei e dingyin hmo a vang lae hah suipahla kahni touh vei e dawkvah na kan han. <sup>26</sup> Hahoi suilaikaw kahni touh na sak han. Hot teh Ephod kahni touh a pawl koe vaihma angki e a thung lah na mawp han. <sup>27</sup> Suilaikaw kahni touh alouklah na sak vaiteh, hot teh a hma lae vaihma angki kannae rahim lae kâpatawpnae koe kahawicalah kawng e, vaihma angki kannae van lah na mawp han. <sup>28</sup> Hahoi vaihma angki laikaw dawkvah, Ephod dawh e laikaw hah kamthim pahla hoi mekkhuisin han. Kahawicalah kawng e vaihma angki suinae teh avanlah ao thai nahane hoi Ephod hah vaihma angki hoi a kâphoi thai hoeh nahan, <sup>29</sup> hottelah Aron teh, hmuen kathoung koe a cei toteh, BAWIPA hmalah pou a kamnuu nahanelah, a lungthin dawh lawkcengnae ephod dawkvah, Isarel catounnaw e min lah ao han. <sup>30</sup> Urim hoi thummim hah lawkcengnae Ephod dawh na hruek vaiteh, BAWIPA hmalah a cei toteh, Aron e lungthin dawh ao han. Hottelah Aron ni BAWIPA hmalah Isarel catounnaw lawkcengnae hah a lung dawh pou ao han.

### *Angkidung*

<sup>31</sup> Hahoi vaihma angkidung hah kamthim pahla hoi dueng na kawng awh han. <sup>32</sup> A lungui vah lû mahrawk nahanelah na paaw pouh han. Ka aw e a vak hoeh nahanelah, angki lahuen patetlah arai na yep han. <sup>33</sup> Kamthim, dipaling, loukloukkaang e hoi sak e talepawnae hai angki petkâkalup lah na sak han. Hote rahak dawkvah, suidinghling hoi petkâkalup lah na sak han. <sup>34</sup> Hottelah angkidung dawkvah, suidinghling buet touh hoi talepaw, suidinghling hoi talepaw petkâkalup lah arai dawh na sak han. <sup>35</sup> Aron ni thaw a tawh navah, hottelah a kamthouh han. Hottelah BAWIPA e hmalah hmuen kathoung dawh kâen tâconae tueng nah a pawlawk thai laipalah a due hoeh nahanelah na sak pouh han.

### *Lupawh*

<sup>36</sup> Hahoi suikathoung phen na sak vaiteh, avan vah kutnouthutnae ca tarik e patetlah BAWIPA KOE THOUNGNAE telah na thut han. <sup>37</sup> Hot teh lupawh dawh ao nahanelah, lupawh e hmalah kamthim pahla rui hoi na bet han. <sup>38</sup> Hot teh, Aron tampa dawh ao han. Isarel catounnaw ni kathounge a poehnonaw pueng a thoungsaknae, payonpakainae kaawm e hah Aron ni koung a phu han. Hot teh BAWIPA hmalah dâw han kamcu e lah ao thai nahanelah, a tampa dawh pou a ta han.

### *Vaihma hnicu*

<sup>39</sup> Angkidung teh loukloukkaang e hoi kahawicalah na carouk vaiteh na kawng han. Loukloukkaang e hni hoiyah vaihma lupawh hah na sak vaiteh, taisawm hai na sak pouh han. <sup>40</sup> Aron capanaw hanlah, angkidung hah na sak pouh vaiteh, taisawm hai ahnimouh han na sak pouh han. A bawilen sak nahan hoi kahawisakkung lah a bawilakhung na sak pouh han. <sup>41</sup> Na hmau Aron hoi a capanaw hah na pathouh han, kai han vaihma thaw a tawh thai nahan satu na awi vaiteh, na hmoun vaiteh, na thoung sak han. <sup>42</sup> Hahoi caici lah a onae na ramuk nahanelah, loukloukkaang e hnadung na sak pouh vaiteh, a keng koehoi a phai totouh a pha han.



<sup>43</sup> Hot teh Aron hoi a capanaw kamkhuengnae lukkareiim koe kâennae tueng dawk thoseh, hmuén kathoung koe thaw tawk nahanlah bawknae khoungroe teng a cei nah thoseh a kamthoup awh han. Nahoe pawiteh, yonpen e lah awm vaiteh, dout awh langvaih. Hot teh amamouh hoi ka tho hane catounnaw totouh a yungyoe hanlah caksak e phunglam doeh toe.

## 29

### *Aron hoi a canaw hmounnae*

<sup>1</sup> Kai hanlah vaihma thaw tawk thai nahan kamthoung sak hanelah, ahnimae lathueng na sak hane teh, hethesh doeh. Maitotan kanaw e buet touh, tutan kanaw e kahni touh toun han kaawm hoeh e, <sup>2</sup> tonphuenhoehe hoi, tonphuenhoehe satui hoi sak e vaiyei phen, satui hoi sak e kanem e vaiyei tonphuenhoehe naw hah na la han, kanui e tavai hoi na sak han. <sup>3</sup> Hotehah tangthung dawk na ta vaiteh, maitotan hoi tutan kahni touh hoi tangthung hah na thokhai han. <sup>4</sup> Aron hoi a canaw hah kamkhuengnae lukkareiim takhang koevah na thokhai vaiteh, tui na pâsu han. <sup>5</sup> Khohnanaw na la vaiteh, angki, hni, ephod hah Aron na kho sak vaiteh, ka talue e angkidung hah taisawm hoi kâyeng sak han. <sup>6</sup> A lû dawk vaihmanaw e lupawk na kâ muk sak vaiteh, hote lupawk van vah kathoungnae lakhung na kâ muk sak han. <sup>7</sup> Hahoi awi hane satui na la vaiteh, a lû dawk na awi pouh vaiteh na hluk pouh han. <sup>8</sup> Hahoi, a capanaw na kaw vaiteh, na kho sak han. <sup>9</sup> Aron hoi a capanaw hah taisawm na kâyeng sak vaiteh, bawilakhung hai na kâ muk sak vaiteh, vaihma coungnae hah a yungyoe hanlah na caksak han. Hottelahoi Aron hoi capanaw teh na thoung sak han.

<sup>10</sup> Hahoi, kamkhuengnae lukkareiim hmalah maitotan na thokhai vaiteh, Aron hoi a capanaw ni maito e lû dawk kut a toung awh han. <sup>11</sup> Hottelah, kamkhuengnae lukkareiim tho teng vah, BAWIPA hmalah maitotan hah na thei han <sup>12</sup> Maitotan e thi hah na la vaiteh khoungroe ki dawk na kutdawn hoi na nep han. Hahoi kacawie thi hah khoungroe kung koe koutng na rabawk han. <sup>13</sup> A thung e a kosanaw hoi a thin dawk kaawm e a hmue, a kuen kahni touh hoi athawnaw na la vaiteh, khoungroe dawk hmai na sawi han. <sup>14</sup> Maitotan e a tak, a pho, a khoknaw teh rapan alawilah hmai na sawi han. Hot hah teh yon thuengnae doeh.

<sup>15</sup> Tutan buet touh na thokhai vaiteh, Aron hoi a capanaw ni a lû dawk kut a toung awh han. <sup>16</sup> Tutan na thei vaiteh, a thi teh khougroe tengpam vah abuemlahoi na kathek han. <sup>17</sup> A moi hah na tâtueng vaiteh, a ruenthin hoi a khok hoi a lûnaw hah na hruek han. <sup>18</sup> Hahoi tutan e tak abuemlahoi khoungroe dawk hmai na sawi han. Hothateh, BAWIPA hanlah hmaisawi thuengnae, BAWIPA koe hmai hoi hmutui hmaisawi thuengnae doeh.

<sup>19</sup> Hahoi tutan buet touh bout na thokhai han. Aron hoi a capanaw ni tutan e lû dawk a kut a toung awh han. <sup>20</sup> Tutan hah na thei vaiteh, a thi hah na la vaiteh, Aron e aranglae hnârakong koe, a capanaw e aranglae hnârakong koe, aranglae kutpui hoi a capanaw e aranglae khokpuinaw dawk na nep pouh vaiteh, khoungroe lathueng lah a thi hah na kathek han. <sup>21</sup> Hahoi khoungroe dawk e thi hoi hluk e satui hah na la vaiteh, Aron hoi a capanaw hoi, ahni koe kaawm e a capanaw e hninaw dawk na kathek han. Hahoi teh, a hni hoi ama hoi a capanaw hoi, ahnimouh koe kaawm e a capanaw e hninaw pueng teh, thoung sak lah ao han.



<sup>22</sup> Hahoi tutan e thaw, mai, ruen ka kayo e thâw, thin dawk kaawm e hmue, kuen kahni touh e hoi, aranglae loung hah na la han. Bangkongtetpawiteh, hothateh, kapek e tuca doeh. <sup>23</sup> Hahoi, tangthung dawk ta e tonphuenhoehe hah BAWIPA hmalah hung e vaiyei tueng buet touh hoi satui hoi sak e vaiyei phen, vaiyei ka rapam e kahni touh na la vaiteh, <sup>24</sup> Aron e kut hoi a capanaw e kut dawk na ta pouh han. BAWIPA hmalah kahek thueng nahanelah a kahek awh han. <sup>25</sup> Hote hah ahnimae kut dawk hoi na la pouh vaiteh, BAWIPA hanlah hmuítui lah thuengnae hmaisawinae khoungroe dawk sawi han. Hothateh BAWIPA hanlah hmaisawi thuengnae doeh.

<sup>26</sup> Hahoi, Aron e kapeknae lah tu takuep hah na la vaiteh, BAWIPA hmalah kahek thueng nahanlah na kahek han. Hot teh na ham lah ao han <sup>27</sup> Aron hoi a capanaw e ham lah kapek e tutan takuep hah kahek thuengnae hoi tawm thuengnae lah a phai kahek tangcoun e hoi tawm tangcoun e hah na thoung sak han. <sup>28</sup> Hothateh, Isarel catounnaw koe, Aron hoi a capanaw hanlah a yungyoe hoi kapek e lah ao han. Bangkongtetpawiteh, hothateh kahek thuengnae doeh. A loung kahek tangcoun e hoi tawm tangcoun e hah na thueng sak han.

<sup>29</sup> Hote hnonaw hoi a kamthoup awh teh, satui hluk teh kathounge lah ao thai awh nahan, kathounge Aron e khohna teh, a capanaw ni râw lah a coe awh han. <sup>30</sup> Hahoi, a capanaw yueng lah vaihma thaw ka tawk hane tami ni hmuen kathoung koe tawk awh hanelah, kamkhuengnae lukkareiim dawk a kâen navah, hnin sari touh thung a khohna han. <sup>31</sup> Hahoi, kapeknae tutan hah la vaiteh, a moi hah hmuen kathoung dawk a thawng awh han. <sup>32</sup> Hottelah, Aron hoi a capanaw ni tutan moi hoi tangthung dawk e vaiyei hah kamkhuengnae lukkareiim takhang koe a ca awh han. <sup>33</sup> Yonthanae, ama kapeknae hoi thoungnae dawk poe e moi hah a ca awh han. Kathounge lah ao dawkvah, alawilae taminaw ni cat thai mahoe. <sup>34</sup> Hote kapeknae moi hoi vaiyei hah a tangtho amom totouh cawi pawiteh, hmaisawi lah ao han. Hot teh kathounge lah ao dawkvah na cat mahoe. <sup>35</sup> Hahoi kâ na poe e naw pueng patetlah Aron hoi a capanaw lathueng vah ka sak han, hnin sari touh thung na kapek awh han. <sup>36</sup> Hnintanguem yontha nahanlah maitotan buet touh pou na poe awh han. Hahoi yon ngaithoumnae na sak navah, khoungroe hah na thoungsak han. Thoungsak hanelah satui na awi han. <sup>37</sup> Hnin sari touh thung khoungroe hanlah yonthanae na sak vaiteh, na thoung sak han. Hat toteh, khoungroe teh kathounge lah ao vaiteh, khoungroe ka tek e pueng teh, a thoung awh han.

<sup>38</sup> Hethateh, khoungroe dawk na poe hane naw doeh. Kathounge tuca kum touh e kahni touh na la vaiteh, <sup>39</sup> tuca buet touh e hah amom lah na poe vaiteh, alouke tuca buet touh e hah tangmin lah na poe han. <sup>40</sup> Tuca buet touh na poe e dawk e tavai ephah pung hra pung touh, satuim hin pung pali pung touh hoi na kalawt han ( hin teh galon buet touh doeh). Hahoi nei thueng hanelah misurtui hin pung pali pung touh na poe han. <sup>41</sup> Tuca buet touh e teh amom lah na poe vaiteh, hot teh amom vah ca hane poenae hoi nei hane poenae hmuítui, BAWIPA hanlah hmaisawi thuengnae lah na poe han. <sup>42</sup> Hot teh na ca catounnaw totouh kamkhuengnae lukkareiim takhang koevah, BAWIPA hmalah hmaisawi thuengnae pou poe hane doeh. Hote hmuen koevah, nang koe lawk deinae lahoi na kâhmo han. <sup>43</sup> Isarel catounnaw hoi hawvah kâpato vaiteh, kamkhuengnae lukkareiim teh bawilenna hoi thoungsak lah ao



han. <sup>44</sup> Kamkhuengnae lukkareiim hoi khoungroe kathoung sak han. Aron hoi a canaw hoi kai hanelah vaihma thaw tawk laihoi ka thaw a tawk thai awh nahan ka thoung sak han. <sup>45</sup> Hottelah Isarel catounnaw koevah, kho ka sak vaiteh, a cathut lah ka o han. <sup>46</sup> Izip ram hoi ka tâcawtkhaikung, kai teh ahnimae Cathut Jehovah lah ka o tie hah a panue awh han. Ahnimouh rahak vah kai Jehovah doeh ahnimae Cathut ka awm han.

## 30

### *Hmuitui sawinae khoungroe*

<sup>1</sup> Hahoi, hmuitui sawinae khoungroe anri thing hoi na sak han. <sup>2</sup> Ayung dong touh, adangka dong touh, a rasang dong touh hoi takin pali touh lah na sak vaiteh, a ki hateh khoungroe hoi a kâkuet han. <sup>3</sup> A lathueng lae hoi a tapang hoi a ki hah sui kathoung hoi na hluk awh vaiteh, petkâkalup lah sui hoi arai na pacawp han. <sup>4</sup> Arai pacawpnae rahim vah suilaikaw kahni touh na sak han. Avangvanglah na ta vaiteh, hothateh kâkayawtnae acung hrawt nahane doeh. <sup>5</sup> Acung teh anri thing hoi na sak vaiteh, sui tui hoi na bu sin han.

<sup>6</sup> Hothateh kai ni na pato nahane hmuen lawkpanuesaknae tanae thingkong ngue nahanelah yaphni hmalah hote khoungroe hah na hruek han. <sup>7</sup> Hottelah Aron ni hawvah, hmaisawi hane hmuitui hah a sawi han. Amom karawitawi hmaiim a rakueng navah a sawi han. <sup>8</sup> Aron ni tangmin lah hmaiim paangnae tueng dawkvah, hmuitui hah hmai a sawi han. Hothateh, na ca catounnaw totouh BAWIPA hmalah hmuitui lah ao han. <sup>9</sup> Hawvah hmuitui alouke thoseh, hmaisawi thuengnae thoseh, rawca thuengnae thoseh na poe mahoe. Hawvah, nei hane na poe e hai na awi mahoe. <sup>10</sup> Aron ni kum touh dawkvah yonthanae sathai thi hah a la vaiteh, kinaw dawkvah yonthanae a sak han. Na ca catounnaw totouh kum touh dawkvah yonthanae a sak awh han, hot teh BAWIPA hanelah kathoungpoung doeh.

### *Ratangnae tangka*

<sup>11</sup> BAWIPA ni Mosi koe, <sup>12</sup> Isarel catoun milu na touk toteh, milu na touk e yit touh tami pueng ni hringlu ratang nahanelah BAWIPA a poe awh han. Na touk toteh ahnimouh na touk dawkvah, ahnimouh koe lacik a pha hoe nahanelah, <sup>13</sup> hethah a poe awh hanelah ao. Touk tangcoung e naw pueng ni, hmuen kathoung koe hno khingnae a khing tangawn hah BAWIPA hanlah a poe awh han ( Khing touh teh gerah 20 touh doeh). <sup>14</sup> Touk tangcoung e kum 20 lathueng pueng ni, BAWIPA hanelah a poe awh han. <sup>15</sup> Na hringlu ratang nahanelah, BAWIPA hanelah na poe awh pawiteh, khing tangawn hlak kapap lah tami ka tawnta ni poe mahoe. Hahoi ka mathoe ni hai hothlak kayoun lah poe mahoe. <sup>16</sup> Isarel catounnaw yontha nahane tangka teh na la vaiteh, kamkhuengnae lukkareiim dawkvah thawtawknah lah na pouk han. Na hringlu yontha nahane BAWIPA hmalah Isarel catounnaw hanlah Pahnim hoe nahanelah ao nahan, telah a dei.

### *Rahum kawlung*

<sup>17</sup> BAWIPA ni Mosi koe, <sup>18</sup> kâpasu nahanlah rahum kawlung hoi pâhung nahanlah amkhong na sak han. Lukkareiim hoi khoungroe rahak na ta han. <sup>19</sup> Ahnimouh teh kamkhuengnae lukkareiim thung a kâen awh nakunghai thoseh, <sup>20</sup> BAWIPA koe hmaisawi thuengnae thueng hanelah, khoungroe koe a hnai nah thoseh, <sup>21</sup> due hoe nahanelah, amamae kut



khok hah a pâsu awh han. Hottelah ahnimouh hoi ahnimae ca catounnaw ni tarawi hane kâlawk lah ao telah ati.

### *Kathounge satui hluknae*

<sup>22</sup> Hothloilah BAWIPA ni Mosi koevah, <sup>23</sup> hmuituinaw thung dawk a hmui katuipounge murah sekel 500 touh hoi nakzik hmuittui khing 250, <sup>24</sup> nakzik phun louk khing 500, olive satui pong 12 touh (hin buet touh) na thokhai vaiteh, <sup>25</sup> hmuittui kasakkung ni a sak e patetlah hluk e satui hah kathounge satui lah na sak han. <sup>26</sup> Kamkhuengnae lukkareiim, lawkpanuesaknae thingkong, <sup>27</sup> caboi hnopainaw, hmaiimkhok, hmuittui hmaisawinae khongroe, <sup>28</sup> hmaisawi thuengnae khongroe hoi hnopainaw, kawlung hoi pâhungnae amkhong pueng hah hote hmuittui hoi koug na hluk han. <sup>29</sup> Kathoug katang e lah ao awh nahan, na thoug sak vaiteh, hote hno ka tek e pueng teh a thoug awh han. <sup>30</sup> Haw hanelah, vaihma thaw tawk laihoi, ka thaw a tawk thai awh nahanelah, Aron hoi a capanaw hah satui na awi vaiteh, na thoug sak han. <sup>31</sup> Isarel catounnaw koe, hote satui heh na ca catounnaw koe totouh kaie hluk e satui kathoug lah ao han. <sup>32</sup> Tami tak dawk na awi mahoe. Hete sak e hoi saknae kâvan e alouke hai na sak mahoe. Hethateh a thoug teh, nangmouh hanlah kathounge lah ao han. <sup>33</sup> Apipatethai het hoi kâvan lah a sak hai thoseh, ayâ alouk hanlah a hno hai thoseh, hote tami teh a miphun dawk hoi na takhoe han telah na dei han telah ati.

### *Hmuittui*

<sup>34</sup> BAWIPA ni Mosi koe a hmui katuipounge hmuittui satacte hoi onycha hoi galbanum hah na la han. Hmuittui poung e ka pâcim e frankinsen hah suekâvan lah na khing vaiteh, <sup>35</sup> hmuittui kasakkungnaw patetlah palawi na phuen vaiteh, ka pâcim lah kathoungcalah na sak han. <sup>36</sup> A tangawn teh katipcalah phawm hane doeh. Kai ni na pato nahane lukkareiim thung e lawkpanuesaknae hmalah na ta han. Hothateh, nang hanelah kathounge lah ao han. <sup>37</sup> Hote hmuittui na sak hane na pâtu e patetlah sak e teh, namamouh hanelah na sak mahoe. BAWIPA hanelah kathounge lah na pouk awh han. <sup>38</sup> Tami bangpatet nihai, phunep rumram hanelah hot patet e sak pawiteh, hote tami teh a miphun thung hoi, takhoe lah ao han telah ati.

## 31

### *Kutsakkathoumnaw hmounnae*

<sup>1</sup> BAWIPA ni Mosi koevah, <sup>2</sup> Khenhaw! Judah miphun thung dawk hoi Hur capa Uri, hote capa Bezalel hah ka kaw toe. <sup>3</sup> Ahni teh lungangnae, thounthainae, panuenae hoi bangpueng dawk kutsakkathoumnaw hoi, <sup>4</sup> sak hane Lungkaangcalah poukthainae hoi, <sup>5</sup> talung phu kaawm ka ta teh, bawng thainae, kâpicalah thing a thainae hoi bangpueng dawk kutsakkathoumnaw a tawn hanlah Cathut Muitha hoi kakawi sak toe. <sup>6</sup> Khenhaw! ahni koe thaw tawk hanlah, Ahisamak e capa Oholiab teh kai ni yo ka pouk toe. Tawk hanelah kâ ka poe e naw, <sup>7</sup> tamimaya kamkhuengnae lukkareiim, lawkpanuesaknae thingkong, avan vah lungmanae tungkhung hoi lukkareiim daw e hnopainaw pueng, <sup>8</sup> caboi hoi hnopai, kathounge sui hoi sak e hmaiimkhok hoi a hnopainaw pueng, hmuittui sawinae khongroe, <sup>9</sup> hmaisawi thuengnae khongroe hoi a hnopainaw pueng, hlaam, <sup>10</sup> khohna kahawicalah pathoupnae hoi vaihma thaw a tawk nah a



khohna hanelah, vaihma Aron hanlah kathounge khohna, <sup>11</sup> Kâhluk e satui hoi hmuítui kathoung hanlah hmuítui sak thai nahanlah kutsakthoumnae, lungangnae pueng ka poe. Tawk hanlah kâ ka poe e naw pueng hah a sak awh han telah a dei.

### *Sabbath hoi kâkuen e kâlawk*

<sup>12</sup> Hahoi BAWIPA ni Mosi koevah, <sup>13</sup> Isarelnaw koevah hettelah dei pouh, kaie sabbath hah na ya awh han, bangkongtetpawiteh na ca catounnaw totouh kai hoi nangmae rahak vah mitnoutnae lah ao. Kai teh nangmouh na kathoungsakkung Jehovah lah ka o tie hah na panuethai awh nahane doeh. <sup>14</sup> Hatdawkvah, sabbath heh na ya awh han. Bangkongtetpawiteh, hot teh nangmouh hanlah kathounge lah ao. Ka ek e pueng teh thei lah ao han. Hote hnin dawk Bangpatete thaw hai ka tawk e pueng teh a miphun koehoi takhoe lah ao han. <sup>15</sup> Hnin taruk touh thung thaw tawk awh naseh. A sari hnin teh kâhatnae sabbath, BAWIPA hanlah hnin kathoung doeh. Apihai sabbath hnin vah thaw tawk pawiteh, thei lah ao roeroe han. <sup>16</sup> Hatdawkvah, Isarelnaw ni sabbath teh a ca catoun totouh a yungyoe lawkkam lah awm seh. <sup>17</sup> Kai hoi Isarelnaw rahak vah, a yungyoe mitnoutnae doeh. Bangkongtetpawiteh, hnin taruk touh thung vah BAWIPA ni talai hoi kalvan a sak teh, asari hnin dawk a kâhat teh a thoung sak, na ti pouh han telah ati.

### *Lawkpanuesaknae lungphen kahni*

<sup>18</sup> Hottelah Sinai mon vah koung a kâpato hnukkhu, lawkpanuesaknae lungphen kahni touh, Cathut e kutdawn hoi thut e hah Mosi koe a poe.

## 32

### *Suimaitoca*

<sup>1</sup> Mosi teh mon hoi kum laipalah ngailawi ao toe tie tamimaya ni a panue awh toteh, tamimaya teh Aron koe a kamkhueng awh teh ahni koe thaw haw, kai mouh han lah na kahrawikung cathut sak haw. Bangkongtetpawiteh, Izip ram hoi na katâcawtkhaikung Mosi e bang pawlawk hai thai hoehe toe, telah ati awh.

<sup>2</sup> Aron ni, na yunaw hoi na capanaw hoi na canunaw a pacap awh e suihnapacap hah rading awh nateh kai koe thokhai awh atipouh.

<sup>3</sup> Hottelah tami pueng ni suihnapacap a pacap awh lahun e hah a rading awh teh Aron koe a thokhai awh. <sup>4</sup> Aron ni ahnimouh koe e a la teh, hreca hoi a thuk teh, maitoca meikaphaw lah a hlun. Hahoi ahnimouh ni Oe Isarelnaw, hetteh Izip ram hoi na katâcawtkhaikung nangmae cathut doeh, telah ati awh. <sup>5</sup> Aron ni a hmu toteh, a hmalah khoungroe hah a sak. Aron ni, tangtho vah BAWIPA hanlah paw awm naseh telah a oung sak. <sup>6</sup> Hottelah a tangtho vah, amom a thaw awh. Hmaisawi thuengnae a poe awh, roun thuengnae hah a poe awh teh, tamimaya teh canei hanelah a tahung awh teh lamtu hanlah a thaw awh, <sup>7</sup> BAWIPA ni Mosi a pato teh, kum leih. Bangkongtetpawiteh, na taminaw Izip ram hoi na tâcokhai e naw hah amamouh hoi amamouh koung a kâraphoe awh toe.

<sup>8</sup> Kaie kâpoelawk hah tang a phen takhai awh toe. Maitoca meikaphaw a sak awh teh a baw awh teh, hot koe thuengnae a sak awh teh, Oe Isarel hetheh Izip ram hoi na katâcawtkhaikung doeh ati awh telah ati.

<sup>9</sup> BAWIPA ni Mosi koe hete taminaw hah ka khet toe, a lung ka patak poung e miphun doeh. <sup>10</sup> Hatdawkvah, ahnimouh hmai koung sawi hanelah,



ahnimouh lathueng ka lungkhueknae heh kaman naseh, nang heh ka lentoe e miphun lah na sak han telah ati.

<sup>11</sup> Mosi ni, BAWIPA Cathut koe, BAWIPA bangkongmaw kalen e thaonae hoi thaonae kut hoi Izip ram hoi na tâcosak e na taminaw lathueng vah na lungkhueknae teh a kaman. <sup>12</sup> Bangkongmaw Izipnaw ni monsom vah patawnae poe hane hoi, thei hanelah a tâcokhai awh, telah a dei awh han. Puenghoi na lungkhueknae hah roun sak nateh, na taminaw lathueng vah, hawihoeahnae sak han na noe e heh kâhno lawih. <sup>13</sup> Na san Abraham hoi Isak hoi Isarel koevah kalvan e âsinaw yit touh na catounnaw ka pung sak vaiteh, ka dei tangcoung ram heh na catoun ka poe vaiteh, a yungyoe a coe awh han, telah amahoima noe lahoi lawk na kam tangcoung e hah pahnim hanh lah a telah a kâhei.

<sup>14</sup> Hot patetlah BAWIPA teh, a taminaw lathueng vah thoena ka sak han ati nakoehoi a kâhno. <sup>15</sup> Mosi teh a kamlang teh monsom hoi a kum teh, a kut dawkw lawkpanuesaknae lungphen kahni touh ao. Lungphen teh avoivang lah thut e doeh. <sup>16</sup> Lungphen teh Cathut ni sak e lah ao teh, thut e naw teh Cathut ma roeroe ni lungphen dawkw thut e doeh. <sup>17</sup> Hahoi Joshua ni tamimaya pawlawk a thai toteh, Mosi koevah, roena hmuen koe kâtuknae ao nahoehmaw telah ati.

<sup>18</sup> Hatei, ahni ni tânae pawlawk nahoe, tâ e naw e hramki lawk hai nahoe. Hateiteh, ka thai e heh la sak pawlawk doeh ati.

<sup>19</sup> Hahoi, roena teng a pha tahma hoi maitoca meikaphawk hoi kalamtunaw hah a hmu. Hottelah Mosi lungkhueknae teh a kaman teh lungphen a sin e hah a tâkhawng teh mon khok koe a kâbawng. <sup>20</sup> A sak awh e maitoca hah a la teh, hmai a phum teh vitkatip lah a phom. Tui dawkw a phuen teh Isarelnaw hah a nei sak. <sup>21</sup> Mosi ni Aron koevah, hettelah totouh yonnae kalen hah ahnimouh lathueng pha sak hanelah, hetnaw ni nang lathueng bangmaw a sak awh, telah atipouh.

<sup>22</sup> Aron ni ka bawipa lungkhueknae heh kaman payon hanh naseh. Hete tamimayanaw heh hawihoeahnae koe lah pou kangvawinaw doeh tie teh na panue toe. <sup>23</sup> Bangkongtetpawiteh, kai koevah, kaimouh na ka hrawi hanelah cathut hah na sak pouh. Bangkongtetpawiteh, Mosi Izip ram hoi na kahrawikung heh a kamthang banghai thai e lah awm hoehe toe telah ati awh. <sup>24</sup> Kai ni ahnimouh koe, sui katawnnaw ni rading awh naseh, ka ti pouh teh na poe awh. Hmai dawkw ka phum toteh hete maitoca meikaphawk heh a tâco telah ati. <sup>25</sup> Hahoi tamipueng khenyawn laipalah a ngai patetlah kho a sak awh tie hah a hmu teh, bangkongtetpawiteh, a tarannaw hmunae koe Aron ni khenyawn awh hoehe. <sup>26</sup> Mosi teh roena rim longkha koe a kangdue teh, BAWIPA koelah kampang e pueng kai koe tho awh naseh, telah ati. Hattoteh Levi h capanaw pueng teh ahni koe a cei awh. <sup>27</sup> Ahnimouh koe, BAWIPA Cathut ni, tami pueng ni na tahloi lat awh nateh, roena hmuen koe kâennae longkha koe hoi tâconae longkha koe totouh, na hmaunawngtha thoseh, na huiko thoseh, na imri thoseh thet awh atipouh.

<sup>28</sup> Hatdawkvah, Levi h capanaw ni Mosi ni dei e patetlah a sak awh teh, hot hnin vah tami 3, 000 tabang a due awh. <sup>29</sup> Hattoteh Mosi ni, sahnin yawhawinae na poe awh nahanelah, na mahmawkw BAWIPA hanelah kâhmoun awh. Bangkongtetpawiteh, tami pueng ni a capa hoi a hmaunawngtha hah a taran toe, telah ati.



<sup>30</sup> Hahoi, a tangtho vah Mosi ni tamimaya koevah, yonnae kalen na sak awh toe. Hatdawkvah, BAWIPA koe ka ceitakhang han. Na yonnae yontha thai han vaimoe, telah ati.

<sup>31</sup> Hottelah Mosi teh BAWIPA koe a ban teh, Oe hetnaw ni yonnae kalen a sak awh teh, sui cathut hah a sak awh. <sup>32</sup> Hatei nakunghai, a yonnae hah ngaithoum pouh haw. Hatei, na ngaithoum hoehpawiteh na cauk dawkw na thut e ka min hah raphoe hanelah ka kâhei atipouh.

<sup>33</sup> BAWIPA ni Mosi koevah, kai taranlahoi yonnae ka sak e pueng teh, ka cauk dawkw hoi a min ka raphoe han. <sup>34</sup> Hatdawkvah cet nateh, ka dei e hmuen koe tamimaya hah cetkhaih. Khenhaw! kaie kalvantaminaw na hmalah a cei han. Hatei, rek hanelah ka hloe awh nah hnin vah, a yonnae dawkw roeroe ka rek awh han telah ati.

<sup>35</sup> Hottelah Aron ni a sak e patetlah maitoca meikaphawk a sak awh dawkvah, BAWIPA ni tamimaya teh a rek.

## 33

### *Sinai tâco takhai hanelah kâ a poe*

<sup>1</sup> Hottelah BAWIPA ni Mosi hah a pato teh, hi hoi tâcawt awh nateh, Abraham, Isak hoi Jakop koevah, na catounnaw hanelah na poe han telah thoebo laihoi lawk ka kam e ram dawkw, nang hoi Izip ram hoi na tâcokhai e naw hoi cet takhang awh.

<sup>2</sup> Nangmae hmalah kalvantami ka patoun vaiteh, Kanaan taminaw, Amor taminaw, Hit taminaw, Periznaw, Hivnaw hoi Jubusitnaw hah ka pâlei han. <sup>3</sup> Khoitui hoi maitosanutui a lawngnae ram dawkw cet takhang awh. Bangkongtetpawiteh, kai teh nangmouh koe ka cet takhang van mahoe. A lung ka patak poung e lah na o awh dawkvah, lamlak vah koug na pathup payon han doeh telah ati. <sup>4</sup> Hottelah tamimaya ni hete kamthang kathout a thai awh toteh, a ka awh teh apihai kamthoup ngai awh hoe.

<sup>5</sup> Bangkongtetpawiteh, BAWIPA ni Mosi koe Isarel catounnaw koe vah, a lung ka patak poung e mipoun lah na o awh, nangmouh koe dongdeng ka o nakunghai, koug na pathup awh han. Hatdawkvah nangmouh koe ka sak hane ka panue thai nahanelah, na kamthoupnae pueng hah koug rading awh telah a dei toe. <sup>6</sup> Hatdawkvah Isarelnaw ni a kamthoupnae hah Horeb mon vah a kârating awh.

### *Mosi ni BAWIPA a hmu*

<sup>7</sup> Mosi ni Lukkareim hah a ceikhai teh, roenae lawilah betbet ahlanae koe ouk a yap. Hot hah kamkhuengnae lukkareim ati awh. Hahoi BAWIPA tawng ka ngai e pueng teh, roenae lawilah kamkhuengnae lukkareim dawkvah ouk a cei awh. <sup>8</sup> Hahoi, Mosi teh lukkareim pâtam hoi a cei lahun nah, tamimaya a thaw awh teh amamae rim takhang koe a kangdue awh teh, Mosi lukkareim thung a kâen totouh a khet awh. <sup>9</sup> Hahoi Mosi teh lukkareim dawkw a kâen tahma vah, tâmaikhom a kum teh lukkareim takhang koe a kangdue teh BAWIPA ni Mosi hah a pato. <sup>10</sup> Hahoi tamimaya ni lukkareim takhang koe tâmaikhom a kangdue e hah a hmu awh. Hat toteh, tamimaya teh a thaw awh teh, amamae rim takhang koehoi lengkaleng a bawkw awh. <sup>11</sup> Tami ni a hui a pato e patetlah, BAWIPA ni Mosi hah minhmai kâhmo laihoi a pato teh, roenae hmuen koe lah a ban. A san Nun capa thoundoun Joshua hateh lukkareim cettakhai boihoe.

### *Cathut ni okhainae lawkkam*



<sup>12</sup> Mosi ni BAWIPA koevah, khenhaw! nang ni kai koevah hetnaw heh luenkhai loe ati. Hatei apimaw kai koe na patoun han tie teh na panuek sak hoeh rah. Hatei, nang ni na min lahoi na panue teh, ka mit dawk minhmai kahawi ka hmu, na ti pouh. <sup>13</sup> Hatdawkvah, na mit dawk minhmai kahawi ka hmawt pawiteh, ka panue nahan hoi na mithmu vah pahrennae ka hmu thai nahanlah lamthung na panuek sak haw, telah ka kâhei. Hete miphun heh na tamimaya doeh tie hah pouk, telah ati.

<sup>14</sup> Ahni ni, nangmouh koe ka o vaiteh, kâhatnae na poe awh han atipouh.

<sup>15</sup> Ahni ni, kai koevah na cet hoehpawiteh, hete hmuen koehoi na tâcawt sak hanh. <sup>16</sup> Bangkongtetpawiteh, kaimouh koe na cet laipalah kai hoi na taminaw teh na mithmu vah lungmanae ka hmu awh tie hah, bangtelamaw ka panue awh han. Hottelah talai van kaawm e taminaw pueng koehoi kai hoi na taminaw teh ka pek e lah ka o awh han, atipouh.

<sup>17</sup> BAWIPA ni Mosi koevah, hot hai na dei e patetlah ka sak han. Bangkongtetpawiteh, ka mit dawk na kuep teh na min lahoi na panue telah atipouh.

<sup>18</sup> Ahni ni na bawilennae teh pahren lahoi na hmawt sak haw atipouh.

<sup>19</sup> Ahni ni, ka hawinae pueng heh na hmalah ka kamnue sak vaiteh, Jehovah min hah na hmalah ka pâpho han. Pahren han ka ngai e hah ka pahren vaiteh, ka lungma han ka ngai e pueng hah ka lungma han, atipouh.

<sup>20</sup> Hatei ahni ni, ka minhmai teh na hmawt thai mahoe, bangkongtetpawiteh na ka hmawt e tami hring boihoeh, ati.

<sup>21</sup> BAWIPA ni khenhaw! ka teng vah hmuen buet touh ao, lungsong van na kangdue han. <sup>22</sup> Hahoi, ka bawilennae ni na ceihlawi navah, kâbawng e lungsong thungvah na ta han, na ceitakhai hoehroukrak ka kut hoi na tabuem han. <sup>23</sup> Hahoi ka kut hah bout ka la vaiteh ka hnukthun hah na hmu han, hatei, ka minhmai teh na hmawt mahoe, atipouh.

## 34

### *Mosi ni lungphen a katha a sak*

<sup>1</sup> BAWIPA ni Mosi koevah, lungphen kahni touh a hmaloe e patetlah sak nateh hote lungphen dawkvah ahmaloe e patetlah bout ka thut han.

<sup>2</sup> Tangtho vah coungkacoe lah awmh, amom Sinai mon daw k luen nateh, monsom ka hmalah kangdout. <sup>3</sup> Nang koe apihai tho awh hanh naseh. Mon vah apihai kamnuek awh nahanh seh. Tuhu hoi maitohu naw hai mon teng vah pâ awh nahanh seh ati.

<sup>4</sup> Hottelah lungphen kahni touh hmaloe e patetlah a sak. Hahoi Mosi teh amom vah a thaw teh BAWIPA ni kâ a poe e patetlah lungphen kahni touh hah a sin teh, Sinai mon daw k luen. <sup>5</sup> BAWIPA teh tâmai hoi a kum teh, a teng vah a kangdue teh BAWIPA e min hah a pathang. <sup>6</sup> BAWIPA na ceihlawi teh Jehovah, Jehovah, lungmanae hoi kakawi e Cathut, pahrennae, lungsawnae lungmanae hoi lawkkatang hoi akawi. <sup>7</sup> Tami a thongsang koe pahrennae kamnueksakkung, payonnae hoi lawkeknæ hoi, hawihoehnæ kangaithoumkung, yonpennæ ka tâcawtkhai boihoeh e, napanaw payonnae daw kanaw catoun totouh, se thum se pali totouh karekkung doeh telah a pâpho.

<sup>8</sup> Mosi ni karanglah talai daw k tabo teh a baw. <sup>9</sup> Ahni ni, Atuvah BAWIPA na mit daw k minhmai kahawi ka hmawt pawiteh, kai koevah kaie BAWIPA heh cet van naseh telah ka kâhei. A lung ka patak e miphun



lah ka o awh nakunghai ka payonnae hoi ka yonnae hah na ngaithoum nateh, na râw lah na tawn lawih telah ati.

*Lawkkamnae bout a kathasak*

<sup>10</sup> Ahni ni, kenhaw! lawkkamnae ka sak. Talai pueng hoi miphun pueng dawk sak boihoeh e kângairu hno hah na taminaw pueng hmalah ka sak vaiteh, nangmouh kaawm e na taminaw pueng ni BAWIPA ni sak e hah a hmu awh han. Bangkongtetpawiteh, nangmouh koe ka sak hane heh takikathopounge lah ao han. <sup>11</sup> Sahnin vah kê na poe e naw heh pouk. Kenhaw! Amornaw, Kanaannaw, Hitnaw, Hivnaw, Periznaw hoi Jebusitnaw hah na hmalah hoi ka pâlei han. <sup>12</sup> Kâhruetcuete, hoehpawiteh na cei nahane ram dawk kaawmnaw hoi lawkkamnae na sak awh vaiteh, nangmouh hanlah karap lah awm payon vaih. <sup>13</sup> Hateiteh ahnimae khoeungroe hah, kounge na raphoe pouh han. Talung a ung awh e hai rekrek dei awh nateh, thing meikaphawk hah kounge tâtueng pouh awh. <sup>14</sup> A min patenghai dipma Jehovah lah ao, Cathut teh a dipma thai dawkvah Cathut alouke roeroe na bawk awh mahoe. <sup>15</sup> Hoehpawiteh hote ram dawk e taminaw hoi lawk na kam awh vaiteh, ahnimae cathut koe kêyo laihoi ahnimae cathut koe thueng laihoi buetbuet touh coun vaiteh, thuengnae moi hah ca hoi, <sup>16</sup> na capanaw hanelah ahnimae canunaw hah na paluen vaiteh, a canunaw ni a cathutnaw koe a kêyo awhnae koe, na capanaw hai kêyawt payon awh langvaih.

<sup>17</sup> Thuk e meikaphawk cathut hah na sak awh mahoe. <sup>18</sup> Tonphuenhoehe vaiyei pawî na sak han. Kê na poe awh e patetlah, hnin sari touh thung tonphuenhoehe hah Abib thapa dawk khoe e tueng nah na ca han. Bangkongtetpawiteh, Abib thapa dawkvah Izip ram hoi na tâco awh. <sup>19</sup> Camoim ka paawng e pueng kaie doeh. Na saring pueng maito hoi tu camin teh kaie doeh. <sup>20</sup> Hatei la camin teh tuca hoi na ratang han. Na ratang ngaihoeh pawiteh, a lahuen na kapai pouh han. Na capa camin teh na ratang han. Ka hmaitung vah apihai kuthrawng hoi na tâcawt awh mahoe. <sup>21</sup> Hnin taruk touh thung thaw na tawk han. Asari hnin dawk na kêhat han. Laikawk na tawk tue nah hoi canga tue nahai na kêhat han.

<sup>22</sup> Yat pawî, takhawk pawî, cavanca pawî na to han.

<sup>23</sup> Tongpa pueng kum touh dawk vai thum touh Bawipa Jehovah Isarel Cathut hmalah a tâco awh han. <sup>24</sup> Bangkongtetpawiteh, na hmalah miphunnaw ka pâlei vaiteh na ramri hah ka kaw sak han, kum touh dawk vai thum touh BAWIPA na Cathut hmalah na tâco awh nahanlah na cei toteh apinihai na ram hah noe awh mahoe.

<sup>25</sup> Kai hanelah thuengnae thipaling teh ton phuen e vaiyei hoi na poe mahoe. Ceitakhai pawî thuengnae haiyah atangtho totouh na awm sak mahoe.

<sup>26</sup> Na law dawk e aluepaw teh BAWIPA im dawk na thokhai han. Hmaeca e moi hah a manu e sanutui hoi mek na thawng mahoe.

<sup>27</sup> BAWIPA ni Mosi koe, hete lawknaw heh thun haw, bangkongtetpawiteh, hete lawknaw tarawi lahoi nang koehoi Isarel koevah lawkkamnae ka sak, telah ati. <sup>28</sup> Hawvah BAWIPA koe hnin 40 rum 40 touh ao teh, rawca cat laipalah ao teh, tui hai net hoe. Hahoi lungphen dawk lawkkam kêpoelawknaw hra touh a thut.



<sup>29</sup> Hahoi, Mosi teh lawkpanuesaknae lungphen kahni touh hah a kut hoi a sin teh Sinai mon hoi a kum navah, Mosi ni hottelah a kâpato dawkvah, ka minhmai vuen a ang tie hah panuek hoe. <sup>30</sup> Aron hoi Isarelnaw pueng ni Mosi a hmu awh toteh, khenhaw! minhmai vuen a ang teh hnai ngam awh hoe. <sup>31</sup> Mosi ni ahnimouh teh a kaw teh, Aron hoi kamkhueng e lawkengkungnaw pueng hah ahni koe a ban awh teh Mosi ni ahnimouh teh a pato. <sup>32</sup> Isarelnaw pueng ni a hnai awh hnukkhu Sinai mon vah BAWIPA hoi lawk a kâpato roi e naw pueng patetlah ahnimanaw hah kâ a poe. <sup>33</sup> Mosi ni lawk be a dei toteh, a minhmai teh minhmai ramuknae hoi a ramuk. <sup>34</sup> Hatei ahni hoi lawk kâpato hanelah BAWIPA hmalah Mosi a luen nah tangkuem vah, bout a pato hoehroukrak a minhmai ramuknae hah ouk a hawng. Hahoi a pato teh kâ a poe e naw hah Isarelnaw koe ouk a dei pouh. <sup>35</sup> Isarelnaw ni Mosi minhmai a khet awh nah tangkuem vah, Mosi minhmai vuen teh a ang. Hahoi Mosi teh Cathut hoi kâpato hanelah a kâen hoehroukrak a minhmai ramuknae hoi a minhmai teh ouk a ramuk.

## 35

### *Sabbath phung*

<sup>1</sup> Mosi ni Isarelnaw koug a kamkhueng sak teh ahnimouh koe, BAWIPA ni tarawi hanelah kâlawk na poe e naw teh hetnaw hah doeh. <sup>2</sup> Hnin taruk touh thung thaw na tawk awh toe. Asari hnin teh nangmouh hanelah hnin kathoung doeh. BAWIPA hanelah kâhatnae sabbath hnin doeh. Hot hnin vah thaw ka tawk e tami pueng teh na thei awh han. <sup>3</sup> Sabbath hnin vah kho na sak awhnae koe hmai na patawi awh mahoe.

### *Lukkareim khoungroe pasoumhno*

<sup>4</sup> Hahoi Mosi ni Isarel kamkhuengnaw pueng koevah, hethéh BAWIPA ni na poe e kâlawknaw doeh. <sup>5</sup> BAWIPA koe pasoumhno sin awh. A lungthung hoi poe han ka ngai e pueng ni BAWIPA hanelah thokhai seh. Sui, Ngun, Rahum, <sup>6</sup> kamthim hni, paling hni, âthi hni, loukloukkaang hni, hmaemuen, <sup>7</sup> paling bu e tu pho, saram pho, anri thing, <sup>8</sup> hmaiim hane satui hoi awi hane satui hoi hmaisawi hane hmuítui hoi, <sup>9</sup> ephod hoi saiphei nahanelah onyx talung hoi talungnaw sin hanelah poe awh naseh.

### *Lukkareim hnopainaw*

<sup>10</sup> Nangmouh thung daw kutsak ka thoum e pueng tho awh naseh. BAWIPA ni sak hanelah kâ a poe e hah sak awh naseh. <sup>11</sup> Lukkareim hoi lukkarei, lemphu, pangkhek, thingphek, tapang, khom hoi ung nahane pacawpnae naw hai thoseh, <sup>12</sup> thingkong hoi kâkayawtnae acung, lungmanae tungkhung, hoi rakkhan nahane yaphni hai thoseh, <sup>13</sup> caboi hoi kâkayawtnae acung hoi hnopainaw pueng hoi vaiyei tanae hai thoseh, <sup>14</sup> hmaiang hanlah hmaiimkhok hoi hnopainaw hoi hmaiim hoi paang hane satui hai thoseh, <sup>15</sup> hmuítui hmaisawinae khoungroe hoi kâkayawtnae acung hoi hluk e satui hoi hmaisawi hane hmuítui hoi lukkareim takhang koe e yap hane yaphninaw hai thoseh, <sup>16</sup> Hmaisawi thuengnae khoungroe rahum cuekkarue hoi kâkayawtnae acung hoi hnopainaw pueng, kawlung hoi pâhungnae hai thoseh, <sup>17</sup> Lukkareim thongma yaphni, khom hoi a tapang ungnae pacawpnae naw hoi kalupnae longkha yaphninaw hai thoseh, <sup>18</sup> Lukkarei hetnae hoi thongma



hetnae hoi ruinaw hai thoseh, <sup>19</sup> hmuén kathoung thaw tawknae koe, a meikahawicalah kawng e hnicu hoi vaihma thaw a tawk toteh kâkhu hane vaihma Aron hnicu kathoung hoi a capanaw hnicu hai thoseh BAWIPA ni lawk na thui e patetlah na sak awh hân telah patuen a dei.

### *Lukkareim pasoumhno a poe awh*

<sup>20</sup> Hottelah Isarel catoun kamkhuengnaw pueng teh, Mosi koehoi a ban awh. <sup>21</sup> Lungthonae katawnnaw hoi muitha lahoi pasoungnae ka tawn e pueng a tho awh teh, kamkhuengnae lukkareim hanelah hno hane hoi thaw tawk nahanelah a panki e pueng, kathoung hnicu hanelah BAWIPA hanelah lengkaleng a poe awh. <sup>22</sup> Napui hoi tongpa hoi poe ngainae lung ka tawn e pueng a tho awh teh, laikaw, hnâpacap, kuthrawt, hnawngpacap, sui hoi sak e hnopai pueng hah a sin awh. Sui poe hane ka tawn e pueng ni BAWIPA hanelah a poe awh. <sup>23</sup> Tami pueng ni, kamthim hni, âthi hni, paling hni, loukloukkaang hni, hmaemuen hoi tutan pho paling bu e hoi saram pho ka tawn e pueng ni a thokhai awh. <sup>24</sup> Hahoi tangka hoi rahum ka thokhai e tami pueng ni, BAWIPA hanelah poe hane hah a thokhai awh. Tami pueng ni anri thing, hnopai hanelah hno kamcu e hah a thokhai awh. <sup>25</sup> Kutsakkathoume napui pueng ni, pahla a san awh teh, a pakhit awh e pahla, kamthim, âthi hni, paling hni, Loukloukkaang e hah a thokhai awh. <sup>26</sup> Kutsakkathoume napui a lung a kathonaw ni hmaemuen hah a kawng awh. <sup>27</sup> Vaihma angki hoi angki akalae patawp hanelah ukkungnaw ni onyx talung hoi talung phu kaawmnaw hah a thokhai awh. <sup>28</sup> Hmuitui hoi satui hoi, paang hane hoi hluk hane satui hoi hmuitui hmaisawi hane thoseh, <sup>29</sup> Isarel catounnaw ni BAWIPA hanelah ngainae hoi poe e hno hah a poe awh teh, napui hoi tongpa lungthonae ka tawn e pueng ni sak hanelah BAWIPA ni Mosi koe kâ a poe e patetlah tawk nahanelah hnopainaw thoseh a poe awh.

### *Cathut ni kaw e kutsakkathoumnaw*

<sup>30</sup> Mosi ni Isarel catounnaw koevah, Khenhaw! BAWIPA ni Judah miphun thung hoi Hur capa Uri, a capa Bezalel hah <sup>31</sup> lungangnae hoi thaipanueknae, panuena hoi bangpueng koe kutsak thoumnae tawn hanelah Cathut Muitha hoi akawi sak toe. <sup>32</sup> Sak hane lungangcalah poukthainae, sui, ngun, rahum dêi thainae, <sup>33</sup> talung phu kaawm pâthit hanelah bawng thainae, meikahawicalah thing a thainae, bangpueng daw kutsak thoumnae tawn hanelah a kaw toe. <sup>34</sup> Hahoi ama hoi Dan miphun thung e Ahisamak capa Oholiab hoi ayâ cangkhai thainae hah a lungthung vah a ta pouh toe. <sup>35</sup> Ahni teh bangpueng daw kutsak thoumnae, ca thut thainae, mei thuk thainae, imthung pathoup thainae, kamthim, paling, âthi, Loukloukkaangnaw carouk thainae, hnikawngthainae, phunkuep taw k thainae, hoi taw k hane kahawicalah poukthainae tawn hanelah lungangnae hoi akawi sak toe.

## 36

<sup>1</sup> Bezalel hoi Oholiab tinaw ni kutsakkathoumnaw pueng BAWIPA ni kâ a poe e patetlah, hmuén kathoung daw k thaw a taw k thai awh nahanelah, thaw phunkuep a taw k thai awh nahanelah lungangnae hoi thaipanueknae a poe e naw pueng ni lengkaleng taw k hane doeh, telah ati.

### *Tamimaya ni panki e hloilah a poe awh*



<sup>2</sup> Mosi ni Bezalel hoi Oholiab tinaw kutsakkathoume, BAWIPA ni ahnimae lungthin dawk lungangnae a poe teh a thaw tawk hanelah a lungthin dawk lungthonae a poe e naw pueng hah a kaw. <sup>3</sup> Isarel catounnaw ni hmuen kathoung thawtawknae koe a tâcokhai awh e pueng hah Mosi koehoi a coe awh. Hahoi amom tangkuem nginae lahoi poe e hah ahni koe pou a poe awh. <sup>4</sup> Kutsakkathoumnaw pueng, hmuen kathoung thaw katawknae pueng ni thaw a tawk awh lahun e hah lengkaleng a ceitakhai awh teh, <sup>5</sup> Mosi koevah, BAWIPA ni tawk han kâ a poe e thaw tawk hanelah taminaw ni acawilah hno a sin awh, telah a pathang awh. <sup>6</sup> Mosi ni kâ a poe teh, hmuen kathoung hanelah poehno hah napui hai tongpa hai apihai poe hanelah kâcai awh nahanh lawiseh, telah roenae hmuen koe a ounge sak. Hottelah taminaw ni a poe awh e hah pasoung hoeh toe. <sup>7</sup> Bangkongtetpawiteh, a tawn awh tangcoung e hah panki e pueng sak nahanelah a khout toe. Atangcalah apap poung toe.

### *Lukkareim saknae*

<sup>8</sup> Ahnimouh thung dawk a lungkaangnaw pueng ni, lukkareim teh yaphni hra touh hoi a sak awh. Hote yaphni teh Loukloukkaang e hoi carouk e kamthim, paling, âthi naw hoi kathoumnaw ni cherubim mei a sak awh e hah kamnuek lah sak e lah ao. <sup>9</sup> Yaphni teh dong 28 touh lengkaleng a saw teh, akaw e teh dong pali touh rip a pha. Yaphni pueng ayung adangka koung a kâvan. <sup>10</sup> Yaphni panga touh a kâbet teh, alouke panga touh hai koung a kâbet. <sup>11</sup> Patawp e yaphni rui a poutnae koe vah, laikaw kamthim lah sak e lah ao. Hot patetlah patawp e yaphni avanglae a poutnae koe haiyah sak e lah ao. <sup>12</sup> Yaphni buet touh dawk laikaw 50 touh a sak teh alouke patawp e dawk haiyah, laikaw 50 touh a sak. Hote laikawnaw teh minhmai kâhmo lah ao awh. <sup>13</sup> Hahoi sui hetnae 50 touh a sak teh, hetnae naw ni yaphni hah a hetsin. Hottelah lukkareim teh rakkan buet touh lah a coung. <sup>14</sup> Hahoi lukkareim lempu ramuknae lah, Hmae muen yaphni hah hlaibun touh a sak. <sup>15</sup> Yaphni teh dong 30 touh saw sak lah ao teh, akaw e teh dong pali touh lengkaleng a pha. Yaphni hlaibun touh teh koung a kâvan. <sup>16</sup> Yaphni panga touh hah patawp e lah ao teh, yaphni taruk touh hai patawp e lah ao. <sup>17</sup> Patawp e yaphni buet touh a rai poutnae koe vah laikaw 50 touh a sak teh, yaphni patawp e avanglae arai dawh hai laikaw 50 touh a sak. <sup>18</sup> Lukkareim hah rakkan buet touh lah ao nahanelah, hetsin nahanelah hetsinnae 50 touh hah rahum hoi a sak. <sup>19</sup> Hahoi tutan pho paling bu e hoi lukkareim lempu ramuknae hoi hot van ramuk nahanelah saram pho hoi a sak.

<sup>20</sup> Lukkareim tapang thung hanelah anri thing hoi a sak. <sup>21</sup> Thingphek teh dong hra touh asaw teh, dong touh hoi tangawn akaw. <sup>22</sup> Thingphek tangkuem dawk a khok kahni touh hoi a kâkuetsak. Hottelah lukkareim tapang pueng teh a sak. <sup>23</sup> Lukkareim hanelah tapang thingphek hah a sak teh, akalae tapang hanelah thingphek 20 touh a sak. <sup>24</sup> Hote thingphek 20 touh a kangdue nahanelah ngun pacawp 40 touh a sak. Thingphek buet touh dawk a khok kahni touh pâhung nahanelah pacawp kahni touh rip a sak. <sup>25</sup> Lukkareim atunglae hanlah thingphek 20 touh hoi <sup>26</sup> ngun pacawp 40, thingphek buet touh hanelah pacawp kahni touh rip a sak. <sup>27</sup> Lukkareim kanîloumlah hane thingphek 6 touh a sak. <sup>28</sup> Lukkareim hnuk lae takin koe hanelah thingphek kahni touh hai a sak. <sup>29</sup> A rahim hoi a lathueng lae laikaw totouh a kâkuetsak. A takin roi koe hot patetlah



a sak. <sup>30</sup> Thingphek taroe touh, pâhung nahane ngun pacawp 16 touh hoi ao. Thingphek buet touh pâhung nahanelah pacawp kahni touh rip ao.

<sup>31</sup> Hahoi lukkareiim tapang pangkhek hanelah anri thing panga touh, <sup>32</sup> lukkareiim avanglah hane panga touh a sak. <sup>33</sup> A lungui e tarennae hah avoivang lae takin koe rek a pâcue sak. <sup>34</sup> Thingphek hah sui hoi a hluk. Tarennae hrawt nahanelah sui laikaw hai a sak teh, tarennae naw hah sui hoi a hluk. <sup>35</sup> Yaphni hanelah kamthim, âthi, paling, loukloukkaang e hni hoi cherubim meikahawicalah a sak. <sup>36</sup> Hot hanelah anri thing khom pali touh a sak teh sui tui hoi a hluk. Hahoi a bangnae naw teh sui hoi sak e doeh. Hotnaw pâhung nahanelah ngun pacawp pali touh a hlun.

<sup>37</sup> Hahoi lukkareiim takhang koe yap hanelah, kamthim, âthi, paling, Loukloukkaang e hoi carouk e kathoumnaw ni kahawicalah carouk e hoi a sak. <sup>38</sup> Hotnaw yap nahanelah khom panga touh, bang nahane naw hoi a sak. Hote khom a som kacoumnaw hoi yapnae khomnaw teh, sui tui hoi hluk e lah ao. Hotnaw pâhung nahanelah pacawp e panga touh hateh rahum hoi sak e doeh.

## 37

### *Lawkpanuesaknae thingkong saknae*

<sup>1</sup> Bezalel ni anri thing e thingkong hah ayung dong hni tangawn, adangka dong touh hoi tangawn, arasang dong touh hoi tangawn hoi a sak. <sup>2</sup> A thung hoi alawilah sui tui kathoung hoi hluk e lah ao teh, sui hoi a rai yep e lah ao. <sup>3</sup> A khok pali touh pâhung nahanelah, sui laikaw pali touh a hlun. Laikaw kahni touh e teh avanglah hane a tho teh, alouke kahni touh e teh avanglah hane a tho. <sup>4</sup> Hahoi anri thing hoi kâkayawtnae acung hah a sak teh, sui tui hoi a hluk. <sup>5</sup> Thingkong hah kâkayawt thai nahanelah a tapang daw koe laikaw daw koe hrawt. <sup>6</sup> Sui kathoung hoi lungmanae tungkhung hah a sak teh, ayung dong hni touh hoi tangawn, adangka dong touh hoi tangawn. <sup>7</sup> Hahoi cherubim kahni touh hah sui hoi a sak. Lungmanae tungkhung som daw koe roi teh dei lah a dei. <sup>8</sup> Avang lae apoutnae koe cherubim buet touh, avanglae apoutnae koe cherubim buet touh, lungmanae tungkhung hoi kâbet sak hanelah avoivang lah apoutnae koe vah cherubim hah a ta. <sup>9</sup> Cherubim hah minhmai kâhmo lah, lungmanae tungkhung hah a rathei a kadai teh a khu teh, lungmanae tungkhung koe lah a kangvawi.

### *Caboi*

<sup>10</sup> Hahoi anri thing hoi caboi hah a sak teh, ayung dong hni touh, adangka dong touh, arasang dong touh hoi tangawn. <sup>11</sup> Hot teh suitui kathoung hoi hluk lah ao teh sui hoi a tâphai hah a pacawp. <sup>12</sup> Kuttabei hlawk touh a tâphai a sak teh, sui hoi a pacawp. <sup>13</sup> Hot hanelah sui laikaw pali touh a hlun teh, hote laikaw pali touh hah caboi khok pali touh daw koe a bet. <sup>14</sup> Caboi teh kâkayawt thai nahanelah laikaw teh a tâphai teng vah a bang. <sup>15</sup> Caboi teh kâkayawt thai nahanelah acung hah anri thing hoi a sak teh sui tui hoi a hluk. <sup>16</sup> Caboi van vah hno hane tongben, pacen, awi nahane manangkhom hah sui kathoung hoi a sak.

### *Hmaikhom*

<sup>17</sup> Hahoi hmaiimkhok teh suikathoung hoi a sak. Hmaiimkhok teh dêi lah a dêi. A kutnaw, manangnaw, a peinaw teh koug kâkuen lah a dêi.



<sup>18</sup> Hmaiimkhok avoivang lah a kang kathum touh reira a tâco teh, a kut taruk touh ao. <sup>19</sup> Hmaiimkhok dawkwah hoi e a kang kathum touh dawkwah e a kang buet buet touh dawkwah, a peimuem, hoi almond paw hoi mei kâvan e manang kathum touh ao. <sup>20</sup> Hmaiimkhok dawkwah a peimuem hoi almond paw hoi mei kâvan e manang pali touh ao. <sup>21</sup> Hmaiimkhok dawkwah a kut taruk touh ao e patetlah avoivang lae a kut kahni touh e rahim vah a peimuem buetbuet touh rip ao. <sup>22</sup> A peimuem hoi a kutnaw hah buet touh lah koug a kâkuetsak teh abuemplahoi suikathoug hoi dei e doeh. <sup>23</sup> Hmaiim sari touh hoi, paitei, paitei tanae naw pueng hai suikathoug hoi a sak. <sup>24</sup> Hmaiim hoi hmaiim hnopai pueng hah suikathoug talen buet touh hoi a sak.

### *Hmuitui sawinae khongroe*

<sup>25</sup> Hahoi hmuitui sawi nahanelah anri thing hoi khongroe hah a sak. Ayung dong touh, adangka dong touh. Takin pali touh ao. Arasang dong hni touh. A kinaw hoi koug a kâkuet. <sup>26</sup> A lathueng lae a tapang hoi a kinaw teh, suikathoug tui hoi hluk lah ao teh suikathoug hoi a tâphai hah a pacawp. <sup>27</sup> A tâphai a rahim lae a rai reira dawkwah sui laikaw kahni touh a sak teh, a hmo a voivang lah kahni reira koe sak lah ao. Hot hah teh kâkayawtnae acung hrawt nahane doeh. <sup>28</sup> Hahoi anri thing hoi kâkayawtnae a sak teh suitui hoi hluk e lah ao.

### *Hluk e satui hoi hmuitui*

<sup>29</sup> Hahoi kathounge satui hluk e, kathounge hmuitui sawi nahanelah hmuitui ka sak thai e patetlah a sak.

## 38

### *Hmaisawi thuengnae khongroe saknae*

<sup>1</sup> Hahoi anri thing hoi hmaisawi thuengnae khongroe hah a sak. Ayung dong panga touh, adangka dong panga touh, takin pali touh ao. Arasang dong thum touh. <sup>2</sup> Takin pali touh som vah kinaw hah a sak. Hote kinaw teh khongroe hoi koug a kâkuet teh, rahum tui hoi hluk e lah ao. <sup>3</sup> Khongroe hanelah hno e hnopainaw pueng, hlaam, ampaikai, kawlung, cingco, hmaisanae lanae hah a sak. Hote hnopainaw pueng teh rahum hoi sak e seng doeh. <sup>4</sup> Hahoi khongroe hanelah rahum cuekkarue hah a sak teh khongroe keng koe rahim vah a ta. <sup>5</sup> Kâkayawtnae acung hrawtnae cuekkarue takin pali touh koe bang hanelah rahum laikaw pali touh a hlun. <sup>6</sup> Kâkayawtnae acung hah anri thing hoi a sak teh, rahum tui hoi a hluk. <sup>7</sup> Kâkayawt nahane khongroe rai e laikaw dawkwah, acung hah a hrawt. Khongroe teh a lûlahei pou a aw thai nahanlah thingphek hoi a sak.

### *Rahum kawlung*

<sup>8</sup> Hahoi rahum kawlung hoi pâhungnae a khok hah kamkhuengnae lukkareim takhang koe thaw ka taww awh e napuinaw e hlalang hoi a sak.

### *Lukkareim kalupnae*

<sup>9</sup> Hahoi lukkareim thongma hah a sak teh, akalae yaphni teh louk-loukkaang e hoi dong 100 touh hoi a sak. <sup>10</sup> Hote yaphni hanelah khom 20 touh, rahum khomkhok pacawp 20 touh a sak teh, khom hetnae, pangheknae teh ngun hoi a sak. <sup>11</sup> Atunglae yaphni teh dong 100 touh



a pha. Khom 20 touh, rahum khomkhok pacawp 20 touh a sak teh, khom hetnae, pangkheknaw teh ngun hoi a sak. <sup>12</sup> Kanîloumlae yaphni teh dong 50 touh a pha. Khom hra touh, pacawpnae hra touh. Khom hetnae, pangkheknaw teh ngun hoi a sak. <sup>13</sup> Kanîtholae yaphni teh dong 50 touh. <sup>14</sup> Longkha avoivang lae yaphni teh dong hlaipanga touh a pha. <sup>15</sup> Khom katham touh, pacawpnae katham touh. <sup>16</sup> Kalupnae yaphni pueng teh loukloukkaang e hoi sak e seng doeh. <sup>17</sup> Hahoi khom pacawpnae, hetnae, pangkheknaw teh rahum hoi sak e doeh. <sup>18</sup> Hahoi kalupnae longkha koe e yaphni teh, kamthim, âthi, paling, loukloukkaang e hoi carouk e ayung dong 20, rasang dong panga touh a pha. Kalupnae yaphni hoi rei a kâvan. <sup>19</sup> Kalupnae takhang khom teh pali touh, rahum khok pacawpnae pali touh, hetnae ngun, pangkhek ngun, ngun hoi sak e khom ramuknae naw ao. <sup>20</sup> Hahoi Lukkareim petkâkalup lah hetnae pueng teh rahum hoi sak e lah ao.

### *Alouke hnopainaw*

<sup>21</sup> Hetheh lukkareim hnopai, lawkpanuesaknae lukkareim hanelah hno e, Mosi ni kâpoe e patetlah Aron capa Ithamar hoi Levih miphunnaw ni a touk awh e doeh. <sup>22</sup> Judah miphun thung e Hur capa Uri, ahnie capa Bezalel ni BAWIPA ni Mosi koevah sak hanelah kâ a poe e naw pueng teh, koug a sak. <sup>23</sup> Ahni koe Dan miphun Ahisamak capa Oholiab ca thut kathoum, kutsak kathoum, kamthim, âthi, paling, loukloukkaang meikahawicalah ka carouk thai e ni hai a tawk. <sup>24</sup> Hmuen kathoung a pankinae pueng koe hno hane suinaw pueng, a poe awh e teh hmuen kathoung thung khingnae patetlah pong 2, 195 touh a pha. <sup>25</sup> Touk tangcoung e tamimaya koe kabawknaw ni a poe awh e ngun hmuen kathoung koe khingnae patetlah pong 7, 550 touh a pha. <sup>26</sup> Kum 20 lathueng touk tangcoung e tamimaya koe kacetnaw teh 603, 550 touh a pha teh, hmuen kathoung koe khingnae patetlah a poe awh e teh khing tangawn lengkaleng a pha. <sup>27</sup> Hahoi ngun thung hoi pong 7, 500 touh teh hmuen kathoung khomnaw pacawp hane hoi ung nahanelah a hno awh. Pacawpnae hah 100 touh a pha teh, pacawpnae buet touh ramuk nahanelah hno e teh pong 75 touh a pha. <sup>28</sup> Ka cawi e ngun pong 50 touh hoi khom dawk bangnae hah a sak teh, khom ramuknae teh ngun tui hoi hluok e lah ao. Hahoi yapnae pangkhek hah a sak. <sup>29</sup> A poe awh e rahum talen 70 touh hoi shekel 2,400 touh a pha. <sup>30</sup> Hot teh kamkhuengnae takhang khom pâhungnae khom pacawp hoi rahum khongrooe hoi rahum cuekkarue hoi, <sup>31</sup> lukkareim kamkhuengnae thongma petkâkalup lah khom pâhungnae khom pacawp hoi lukkareim hetnae pueng lah koug a hno awh.

## 39

### *Vaihma khohna*

<sup>1</sup> Hahoi kamthim, âthi, paling naw hoi hmuen kathoung thaw tawk nahanelah a meikahawicalah khohna hah a sak teh, BAWIPA ni Mosi koe kâ a poe e patetlah Aron hanelah kathoung khohna hah a sak.

### *Angkidung*

<sup>2</sup> Sui, kamthim, âthi, paling loukloukkaang e hoi carouk e vaihma angki hah a sak. <sup>3</sup> Sui hah ka rapamcalah a dêi teh ayung lahoi a bawng teh, kamthim, âthi, paling, loukloukkaang e kutsakkathoume ni a carouk teh



a sak. <sup>4</sup> Kâyeng e 20 touh lah a sak teh, angki a lathueng lae a rai roi a kâkuet nahanelah rui hoi a sui sin. <sup>5</sup> Angki van kâyeng hane taisawm meikahawicalah kawng e hah angki hoi kâvan e lah ao teh, BAWIPA ni Mosi koe kâ a poe e patetlah sui hoi kamthim, âthi, paling, loukloukkaang e carouk e hoi kawng e doeh. <sup>6</sup> Karnelian talung kahni touh a kata awh teh, sui tabu thung a bet awh. Kuthrawt dawk min thuk e patetlah Isarel miphunnaw e minnaw hah a thut. <sup>7</sup> BAWIPA ni Mosi koe lawk a thui e patetlah Isarel miphunnaw pahnim hoeh nahanelah, hote talung kahni touh hah vaihma angki kâyengnae dawk a bet awh.

### *Lungtabue ramuk*

<sup>8</sup> Saiphei hah vaihma angki sak e patetlah sui, kamthim, âthi, paling, loukloukkaang e carouk e hoi a sak. <sup>9</sup> Bawkhni touh lah thep e lah ao teh, takin pali touh lah a o, ayung khap touh, adangka khap touh, takin pali touh hoi rei a kâvan. <sup>10</sup> Saiphei dawk talung 40 touh lah a pâthit. Apasueke rui dawk Sardius, topaz, emerald doeh. <sup>11</sup> Apâhni e rui dawk emerald, sapphire hoi diamon doeh. <sup>12</sup> Apâthum e rui dawk Jacinth, agate hoi amethyst doeh. <sup>13</sup> Apali e rui dawk beril, onyx, hoi jasper doeh. Hotnaw teh sui tabu dawk a pâthit awh. <sup>14</sup> Isarelnaw miphun hlaikahni touh e hah noutnae min thut e patetlah, hote talungnaw dawkvah, hote hlaikahni touh e minnaw hah a thut teh, talung buet touh dawk min buet buet touh rip ao. <sup>15</sup> Hahoi saiphei van vah, tangron patetlae dingyin sui kathoung hoi a sak. <sup>16</sup> Sui pahla vei e kahni touh hoi sui laikaw kahni touh a sak teh, saiphei dawk laikaw kahni touh hah a bang. <sup>17</sup> Hahoi suibawtarui vei e kahni touh hah saiphei a tâphai lae rui dawk e laikaw dawkvah a sui. <sup>18</sup> A meikahawicalah vei e dingyin kahni touh avanglae asomnaw teh, sui pahla vei e kahni touh dawkvah, a patawp awh teh, vaihma angki a hma lae kâyengnae dawk a sui. <sup>19</sup> Sui laikaw kahni touh a sak teh, ephod rahim lah kaawm e saiphei rahim lae taki kahni touh dawk a bang. <sup>20</sup> Alouke sui laikaw kahni touh hai a sak teh, vaihma angki a hma lae rahimca hoi kâyengnae lathueng patawpnae koe angki hah avangvangelah a bet. <sup>21</sup> Saiphei sui laikaw kahni touh hah vaihma angki, sui laikaw kahni touh hoi mek sui teh, kamthim e pahlarui hoi a sak. Hottelah BAWIPA ni Mosi koe lawk a thui e patetlah saiphei teh kâyengnae dawkvah bang lah ao teh, vaihma angki hoi reirei pou ao.

### *Vaihma hnicu*

<sup>22</sup> Hahoi vaihma angkidung teh kamthim hoi dueng kawng e hoi a sak. <sup>23</sup> Angkidung lungui vah angki kutkaduem patetlah a aw sak. Ka aw e teh a kâphi hoeh nahanelah, a rai hah pou a yep. <sup>24</sup> Angkidung dawkvah, tale paw mei hah kamthim, âthi, paling, loukloukkaang e carouk e hoi a sak. <sup>25</sup> Hahoi sui kathoung hoi dinghlingnaw hah a sak teh, angki paw dawk e talepaw rahak vah cakhout laihoi a bang. <sup>26</sup> BAWIPA ni Mosi kâ a poe e patetlah dinghling buet touh hoi tale paw buet touh rip hah angki paw petkâkalup lah thaw tawk nahanelah kamthoupnae dawk a ta. <sup>27</sup> Hahoi Aron hoi a capanaw hanelah loukloukkaang e hoi kawng e hah a sak. <sup>28</sup> Loukloukkaang e hoi sak e vaihma lupawk hoi luhuem, loukloukkaang e hoi sak e hnadung hoi, <sup>29</sup> loukloukkaang e carouk e hoi kamthim, âthi, paling hoi meikahawicalah em la e hoi kathomnaw ni em la e taisawm hoi BAWIPA ni Mosi koe kâ a poe e patetlah a sak. <sup>30</sup> Hahoi bawilakhung hanelah sui phen hah sui kathoung hoi a sak, BAWIPA KOE THOUNGNAE



telah thut e hah a kamnue sak. <sup>31</sup> Hahoi BAWIPA ni Mosi koe kê a poe e patetlah vaihma lupawk a patunglah bet hanelah kamthim e rui hoi a sui.

### *Thaw cum lah ao*

<sup>32</sup> Hottelah kamkhuengnae lukkareiim, thaw pueng teh cum lah ao. BAWIPA ni Mosi koe sak hanelah kê a poe e naw patetlah Isarelnaw ni a tarawi awh. <sup>33</sup> Hahoi lukkareiim teh Mosi koe a ceikhai awh. lukkareiim hoi hnopainaw pueng, hetsinnae, tapang thingphek, tapang nahane tâphai, khom hoi khom pâhungnae naw hoi, <sup>34</sup> Tutan pho kapaling bu e khunae hoi saram pho hoi sak e a kânguena a kâkapek nahane yaphninaw hai thoseh, <sup>35</sup> Lawkpanuesaknae thingkong hai kâkayawtnae acung, lungmanae tungkhung hai thoseh, <sup>36</sup> caboi hoi hnopainaw pueng hoi vaiyei tanae hai thoseh, <sup>37</sup> suikathoung hoi sak e hmaiimkhok hoi hmaiim hoi, hnopai pueng hoi paang nahane satui hoi thoseh, <sup>38</sup> Sui khongroe, hluk e satui, sawi hane hmuituinaw hoi yaphni takhang koe yap hane yaphninaw hai thoseh, <sup>39</sup> Rahum khongroe, rahum cuekkaarue, acung, hnopai pueng, kawlung hoi pâhungnae, <sup>40</sup> Lukkareiim thongma e yaphni, khom, khom pâhungnae khompacawp, kalupnae longkha yaphni hoi a rui, hetsinnae, kâpatonae, lukkareiim thung e hnopai pueng thoseh, <sup>41</sup> hmuen kathoung koe thaw tawk nahanelah hnicu meikahawicalah kawng e vaihma Aron hoi a capanaw ni vaihma thaw a tawk awh torei teh a kâkhu awh hanelah kathoung hnicunaw hoi thoseh, <sup>42</sup> BAWIPA ni Mosi koe tawk hanelah kê a poe e pueng hah Isarelnaw ni a tawk awh. <sup>43</sup> Hahoi Mosi ni a tawk e pueng a khet teh, khenhaw! koug a cum awh toe. BAWIPA ni kâpoe e patetlah koug a cum awh teh, Mosi ni yawhawi a poe.

## 40

### *Lukkareiim saknae hoi hnawngnae*

<sup>1</sup> BAWIPA ni Mosi koe a dei pouh e teh, <sup>2</sup> apasueke thapa, apasuek hnin vah kamkhuengnae lukkareiim hah na sak han. <sup>3</sup> A thung vah lawkpanuesaknae thingkong hah na hruek vaiteh, yaphni hoi na ngue sak han. <sup>4</sup> Caboi hah na kâenkhai vaiteh, avan kaawm e hnopainaw hah na hruek han, hmaiimkhok hah na kâenkhai vaiteh, hmaiim hah na hruek han. <sup>5</sup> Hmuitu hmaisawinae sui khongroe hah lawkpanuesaknae hmalah na hruek vaiteh, lukkareiim takhang yaphni hah na yap han. <sup>6</sup> Hmaisawi thuengnae khongroe hah kamkhuengnae lukkareiim takhang hmalah na hruek han. <sup>7</sup> Kamkhuengnae lukkareiim hoi khongroe rahak vah kawlung na hruek vaiteh, hawvah tui na hlun han. <sup>8</sup> Lukkareiim petkâkalup lah kalupnae thungup thongma na sak vaiteh, kalupnae longkha dawk yaphni na yap han.

<sup>9</sup> Hluk e satui hah la vaiteh, lukkareiim hoi a thung kaawmnaw pueng hah hluk vaiteh, na thoung sak han, hnopainaw pueng hai hottelah a thoung awh han. <sup>10</sup> Hmaisawi thuengnae khongroe hoi hnopai pueng hah satui hluk vaiteh, khongroe hah na thoung sak han. Hottelah khongroe teh kathoungpoung lah ao han. <sup>11</sup> Kawlung hoi pâhungnae hah satui na hluk vaiteh na thoung sak han. <sup>12</sup> Aron hoi a capanaw hah kamkhuengnae lukkareiim takhang koelah, thokhai vaiteh, tui hoi na pâsu han. <sup>13</sup> Aron hah kathoung khoehna hah na kho sak vaiteh, vaihma thaw kai han a tawk thai nahanelah, satui na hluk vaiteh na thoung sak han. <sup>14</sup> A capanaw hai



thokhai vaiteh, angki na kho sak han. <sup>15</sup> Hottelah vaihma thaw kai han a tawk thai awh nahanelah a na pa satui na hluk e patetlah satui na hluk han. Satui hluk lah ao awh e heh a ca catounnaw totouh a yungyoe vaihma lah ao awh nahanelah pouk pouh e lah pou ao han telah ahnimouh hanlah mitnoutnae lah ao telah a dei.

<sup>16</sup> Hottelah, Mosi ni BAWIPA ni kâ a poe e patetlah kOUNg a sak. <sup>17</sup> Hahoi, apâhni kum, apasuek thapa, apasuek hnin vah, lukkareiim hah a sak awh. <sup>18</sup> Mosi ni lukkareiim hah a sak teh, khompacawpnae naw hah a ung teh, thingpheknaw hah a kangdue sak teh, pangkheknaw hah a hrawt teh, khomnaw hah a kangdue sak. <sup>19</sup> BAWIPA ni Mosi koe kâ a poe e patetlah lukkareiim van vah hni a padi teh, hote van vah patuen patuen a ramuk sin.

<sup>20</sup> Lawkpanuesaknae hah a la teh, thingkong thung vah a hruek. Thingkong dawK acung hah a hrawt teh, Thingkong van lungmanae tungkhung hah a hruek. <sup>21</sup> BAWIPA ni Mosi kâ a poe tangcOUNg e patetlah thingkong teh lukkareiim thung vah a hruek. RakhannaE yaphni hah a yap teh, lawkpanuesaknae thingkong teh rakhan thung vah ao.

<sup>22</sup> Caboi teh kamkhuengnae lukkareiim thung, atunglah yaphni lawilah a hruek. <sup>23</sup> BAWIPA ni Mosi kâ a poe tangcOUNg e patetlah BAWIPA hmalah caboi dawK vaiyei teh a pâhung. <sup>24</sup> Hmaiimkhok hah kamkhuengnae lukkareiim thung akalah, caboi hoi kadangka lah a hruek. <sup>25</sup> BAWIPA ni Mosi kâ a poe tangcOUNg patetlah hmaiim hah BAWIPA hmalah a hruek. <sup>26</sup> BAWIPA ni Mosi kâ a poe tangcOUNg patetlah sui khOUNgroE teh kamkhuengnae lukkareiim thung yaphni hmalah a hruek teh, <sup>27</sup> hot van hmuItui hmai a sawi. <sup>28</sup> Hahoi lukkareiim takhang yaphni hah a yap. <sup>29</sup> BAWIPA ni Mosi kâ a poe tangcOUNg patetlah kamkhuengnae lukkareiim takhang kung koevah, hmaisawi thuengnae khOUNgroE hah a hruek teh, hot van vah hmaisawi thuengnae hoi canei thuengnae hah a thueng. <sup>30</sup> BAWIPA ni Mosi kâ a poe tangcOUNg patetlah kawlung hah kamkhuengnae lukkareiim hoi khOUNgroE rahak vah a hruek teh, kâpasu nahanlah tui a hlun. <sup>31</sup> Mosi, Aron hoi a capanaw ni haw vah a kutnaw hoi a khoknaw hah a pâsu awh. <sup>32</sup> Kamkhuengnae lukkareiim thung a kâen han nah hoi, khOUNgroE teng a cei awh han nah ouk a pâsu awh. <sup>33</sup> Hahoi lukkareiim hoi khOUNgroE petkâkalup lah a kalup teh, thongma e longkha dawK yaphni hah a yap teh, hottelah Mosi ni thaw hateh a cum.

### *Tâmai hoi bawilennae*

<sup>34</sup> Hottelah kamkhuengnae lukkareiim teh tâmai ni muen a kayo teh, lukkareiim teh BAWIPA bawilennae hoi a kawî. <sup>35</sup> Hot patetlah tâmai a pâyam teh, BAWIPA bawilennae hoi lukkareiim muen akawî dawkvah, Mosi teh kamkhuengnae lukkareiim thung kâen thai hoeh. <sup>36</sup> Tâmai ni lukkareiim a kâtawm takhai toreî vah, Isarelnaw teh a cei awh nahane koe lah ouk a cei awh. <sup>37</sup> Hatei, tâmai ni kâtawm takhai hoehpawiteh, a kâtawm hoehroukrak kampuen laipalah ao awh. <sup>38</sup> Bangkongtetpawiteh, kahlawng a cei awh nah thung pueng, Isarelnaw pueng e mithmu vah, BAWIPA e tâmai teh kanîthun vah lukkareiim lathueng a pâyam teh, karum vah ahnimouh lathueng ouk a ang pouh.



## BAWKNAE (Leviticus)

### *Hmaisawi thuengnae*

<sup>1</sup> BAWIPA ni Mosi a kaw teh kamkhuengnae lukkareiim dawk hoi a pato. <sup>2</sup> Nang ni Isarel miphunnaw koe na dei pouh hane lawk teh, nangmouh thung dawk tami buetbuet touh ni BAWIPA koe hno poe hanelah ngai pawiteh, saring, tu, hmae hoi maito a sin han.

<sup>3</sup> Maito hah hmaisawi thuengnae lah a sak han ngai pawiteh, kacueme a na tongpa na thokhai vaiteh, Cathut lungyouk nahanlah kamkhuengnae lukkareiim takhang koe na poe han. <sup>4</sup> Thueng e maito lû dawk amae kut a toung vaiteh, ahnie yontha nahanlah a dâw han. <sup>5</sup> BAWIPA hmalah hote maito a thei awh hnukkhu, Aron e capanaw ni a thi hah a sin awh vaiteh, kamkhuengnae lukkareiim takhang teng sathei thuengnae khoungroe van petkâtue lah thi a kahei han. <sup>6</sup> Thuengnae ka sak e tami ni saring e pho a hlip vaiteh, thoukthouk a tâtueng han. <sup>7</sup> Aron e capa vaihmanaw ni sathei thuengnae khoungroe van, thing a paruen hnukkhu hmai a patawi vaiteh, <sup>8</sup> Thing van vah a lû, athaw hoi a takpatinaw na ta han. <sup>9</sup> A khok hoi a ruenthinnaw hah tui hoi hmaloe na pâsu han. Vaihma ni hote sathei abuemlahoi khoungroe van hmai hoi a sawi han. Hetteh, hmai hoi sathei thuengnae doeh. BAWIPA koe hmuitui hanlah hmai hoi thuengnae lah ao.

<sup>10</sup> Tu, hmae hah hmaisawi thuengnae lah sak han na ngai pawiteh, kacueme a na tongpa na thokhai vaiteh, <sup>11</sup> BAWIPA hmalah khoungroe atunglah na thei hnukkhu, Aron e capa, vaihmanaw ni a thi hah khoungroe petkâtue lah a kahei han. <sup>12</sup> Thuengnae ka sak e tami ni thoukthouk a tâtueng han. A lû hoi a moi hah a pâkhueng vaiteh vaihma ni khoungroe van e thing van a ta han. <sup>13</sup> A khok hoi a ruenthinnaw hah tui hoi hmaloe a pâsu han. Vaihma ni abuemlahoi a sin vaiteh khoungroe van hmai a sawi han. Hetteh, BAWIPA koe hmaisawi hmuitui thuengnae lah ao.

<sup>14</sup> BAWIPA koe tava hoi hmaisawi thuengnae sak hanlah na ngai pawiteh, bakhu thoseh, âbakhu thoseh, na thokhai vaiteh na poe han. <sup>15</sup> Vaihma ni khoungroe koe a thokhai hnukkhu, a lahuen a kapen vaiteh khoungroe van hmai a sawi han. A thi teh khoungroe teng a pacâ han. <sup>16</sup> A yoncapo hoi a cuezcaduen dawk e rawcanaw hah na la hnukkhu hraba tanae hmuen, khoungroe hmalah a tâkhawng han. <sup>17</sup> A rathei khuehoi tava a sei vaiteh vaihma ni khoungroe van e thing van hmai a sawi han. Hetteh, BAWIPA koe hmaisawi hmuitui thuengnae lah ao.

## 2

### *Tavai thuengnae*

<sup>1</sup> BAWIPA koe tavai hoi thuengnae sak hanlah na ngai pawiteh, tavai kaneng e na sin han. Tavai e avan satui na awi vaiteh, frankinsen hai na thum han. <sup>2</sup> Aron e capa, vaihma koe na sin vaiteh, vaihma ni tavai kut karum buet touh, satui youn touh, frankinsen kaawm e pueng a la vaiteh, khoungroe van hmaisawi awh han. Hetteh, BAWIPA koe hmaisawi hmuitui thuengnae doeh. <sup>3</sup> Kacawie tavainaw teh Aron hoi a



capanaw hanelah ao han. BAWIPA koe hmai hoi thuengnae thung dawk kathoungpounge lah ao.

<sup>4</sup> Hmai pâeng e vaiyei hoi thuengnae sak hanlah na ngai pawiteh, satui, tonphuenhoehe phen thoseh, satui hluk e vaiteh kamrâw tonphuenhoehe hai thoseh, thuengnae lah na sak awh han. <sup>5</sup> Ukkang dawk karê e vaiyei thuengnae lah sak han na ngai pawiteh, satui hoi kalawt teh tonphuenhoehe tavai hoi na sak han. <sup>6</sup> Hote vaiyei na raen vaiteh, satui na awi han. Tavai hoi thuengnae sak e doeh. <sup>7</sup> Ukkang dawk karê e vaiyei hoi thuengnae sak han na ngai pawiteh, satui hoi kalawt e tavai hoi na sak han.

<sup>8</sup> Hote tavai hoi thuengnae sak e naw pueng, BAWIPA koe a thokhai vaiteh vaihma koe a poe hnukkhu ahni ni khoungroe koe a thokhai han.

<sup>9</sup> Tavai hoi thuengnae dawk e a pham thai tawk a pham vaiteh khoungroe van hmai a sawi han. Hetteh, BAWIPA koe hmaisawi hmutui thuengnae lah ao. <sup>10</sup> Kacawie tavai teh Aron hoi a capanaw hanelah ao han. BAWIPA koe thuengnae thung dawk kathoungpounge hno lah ao.

<sup>11</sup> BAWIPA koe poe e tavai hoi thuengnae dawk ton phuen mahoe. BAWIPA koe hmai hoi thuengnae na sak navah, ton hmai na sawi mahoe. Khoitui hai hmai na sawi mahoe. <sup>12</sup> Aluepaw thuengnae dawk ton hoi khoitui hah BAWIPA koe poe thai ei nakunghai, hmutui hanelah khoungroe dawk teh hmai na sawi mahoe. <sup>13</sup> Tavai hoi thuengnae pueng dawk palawi na phuen han. Na sak e thuengnae dawk, BAWIPA e lawkkam palawi na phuen roeroe han. <sup>14</sup> Cavui aluepaw, BAWIPA koe thuengnae sak hanlah na ngai pawiteh, cavui hah hmai na pahai lahoi na kamkim sak vaiteh na kanawi hnukkhu, <sup>15</sup> Satui na awi vaiteh, frankinsen hai na thum han. Hetteh, BAWIPA koe tavai hoi thuengnae lah ao. <sup>16</sup> Na kanawi tangcoun e cakang youn touh, satui youn touh, frankinsen kaawm e puenghoi vaihma ni hmaisawi han. Hetteh, BAWIPA koe hmaisawi thuengnae lah ao.

### 3

#### *Roumnae thuengnae*

<sup>1</sup> Maito hoi room thuengnae sak hanlah na ngai pawiteh, kacueme atan nakunghai ala nakunghai buetbuet touh BAWIPA koe na sin han. <sup>2</sup> Maito lû van amae kut a tOUNg vaiteh, kamkhuengnae lukkareiim takhang teng a thei hnukkhu, Aron e capa vaihmanaw ni khoungroe petkâtue lah a thi a kahei awh han. <sup>3</sup> A ruen ka ramuk e athaw, a ruen hoi kâkuen e athaw, patuen dawk kaawm e kuen kahni touh dawk e athaw, <sup>4</sup> kuen hoi cungtalâh thin van kaawm e maimaranaw hah, room thuengnae sathei thung e la vaiteh, BAWIPA koe hmai hoi thueng hanelah poe hnukkhu, <sup>5</sup> Aron e a capanaw ni khoungroe van ta e sathei hoi cungtalâh hmai a sawi a han. Hetteh, BAWIPA koe hmutui hmaisawi thuengnae lah ao. <sup>6</sup> BAWIPA koe tu hoi hmae hah room thuengnae sak han na ngai pawiteh, toun kaawm hoe e atan nakunghai ala nakunghai buetbuet touh na sin han. <sup>7</sup> Tuca thuengnae lah sak han na ngai pawiteh BAWIPA hmalah na poe hnukkhu, <sup>8</sup> Tu e a lû van amae kut a tOUNg vaiteh kamkhuengnae lukkareiim hmalah a thei hnukkhu, Aron e capanaw ni thuengnae khoungroe van a thi petkâtue lah a kahei han. <sup>9</sup> Atak dawk e athaw, a kenghru tâtueng e, a moi abuemlah, a ruen ka ramuk e athaw, a ruen dawk e athaw, <sup>10</sup> Patuen dawk kaawm e kuen kahni touh dawk e athaw, kuen hoi thin dawk e maimaranaw, roomnae sathei dawk e na la



vaiteh BAWIPA koe thuengnae na sak hnukkhu, <sup>11</sup> Vaihma ni khoungroe van hmai a sawi han. BAWIPA koe hmaisawi thuengnae sak e rawca katuilah ao.

<sup>12</sup> Hmae hoi thuengnae sak han na ngai pawiteh BAWIPA hmalah a thokhai han. <sup>13</sup> Hmae lû dawk a kut toung vaiteh kamkhuengnae lukkareiim hmalah a thei hnukkhu, Aron e capanaw ni khoungroe petkâtue lah a thi hah a kahei han. <sup>14</sup> A ruen ka ramuk e athaw, a ruen dawk e athaw, <sup>15</sup> Patuen dawk kaawm e kuen kahni touh hoi cungtalah athin dawk e maimaranaw, ama ni thuengnae dawk e a la vaiteh, BAWIPA koe hmaisawi thuengnae sak hanlah a poe hnukkhu, <sup>16</sup> Vaihma ni khoungroe van hmai a sawi han. Hmuitui hanlah hmaisawi thuengnae lah ao. Athaw kaawm e pueng teh BAWIPA e lah doeh ao. <sup>17</sup> Na miphun catounnaw ni ao na tangkuem koe a thaw hoi a thi hah cat mahoei telah yungyoe e kâpoe e lah ao telah atipouh.

## 4

### *Yon thuengnae*

<sup>1</sup> BAWIPA ni Mosi koe, nang ni na miphunnaw koe patuen bout na dei pouh hane teh, <sup>2</sup> Phunglawk panuek awh hoei, kâlawk a tapoe teh a sak hoei hane kawi sakpayon pawiteh, <sup>3</sup> Satui awi e vaihma ni yon sak hanlah taminaw a tacuek teh ama hai yon pawiteh, hote yontha nahanelah yon ka tawn hoei e maitotanca hah <sup>4</sup> Rangpui kamkhuengnae lukkareiim takhang teng, BAWIPA hmalah a thokhai vaiteh BAWIPA koe a poe han. Hahoi, maito lû dawk a kut toung vaiteh BAWIPA hmalah maito a thei han. <sup>5</sup> Satui awi e vaihma ni maito thi a la vaiteh kamkhuengnae lukkareiim koe a sin hnukkhu, <sup>6</sup> Amae kutdawn hah thi dawk a ranup vaiteh, kathounge hmuen, lukkarei yap e hmalah, BAWIPA hmalah vai sari touh a kahei han. <sup>7</sup> Vaihma ni kamkhuengnae lukkareiim thung BAWIPA hmalah kaawm e hmuitui thuengnae khoungroe naw dawk maito thi a hluak vaiteh, kacawie a thi hah kamkhuengnae lukkareiim takhang hmalah kaawm e hmaisawinae khoungroe kung koe a rabawk han. <sup>8</sup> Roun thuengnae sathei dawk e maito thaw la e patetlah kâmai hawi nahanlah sak e maito ruen ka ramuk e athaw, a ruen dawk kaawm e athaw, <sup>9</sup> Patuen dawk kaawm e kuen kahni touh hoi thin dawk e maimara, athaw kaawm e pueng a la vaiteh, <sup>10</sup> Thuengnae khoungroe van hmai a sawi han. <sup>11</sup> Maito e a lû, a khok, a ruen, a ruen kanem hoi a vuen, a moi kaawm e pueng, <sup>12</sup> Maito buem hah lukkareiim alawilah hraba rabawknae hmuen kathoung koe a ceikhai vaiteh thing van hmai a sawi han. Hraba rabawknae hmuen koe hmai a sawi han.

<sup>13</sup> Isarel miphun abuemlah ni, phunglawk panuek laipalah sak kawi hoei e yon hoi kâlawk a tapoe teh yon sakpayon pawiteh, <sup>14</sup> Hottelah, a sak payonnae yon a kâpanue torei teh, hote yon hanlah tamimaya ni a kum kanaw e maitotan hah, kamkhuengnae lukkareiim hmalah a thokhai han. <sup>15</sup> Rangpui thung dawk a kum kacuenaw ni BAWIPA hmalah maito lû van kut toung vaiteh a thei han. <sup>16</sup> Satui awi e vaihma ni kamkhuengnae lukkareiim koe maito thi a sin hnukkhu, <sup>17</sup> A kutdawn hah thi dawk a ranup vaiteh BAWIPA koe lukkarei yap e hmalah vai sari touh a kahei han. <sup>18</sup> Vaihma ni kamkhuengnae lukkareiim thung, BAWIPA hmalah kaawm e thuengnae khoungroekinaw dawk thi a hlun vaiteh kacawie thi teh, kamkhuengnae lukkareiim takhang hmalah kaawm e hmaisawi thuengnae khoungroe kung koe a rabawk han. <sup>19</sup> Maito thaw pueng a



la vaiteh khoungee van hmai a sawi han. <sup>20</sup> Yontha nahanlah maito hoi thuengnae sak e patetlah vaihma ni taminaw hanelah yonthanae sak pawiteh, ahnimaee yontha lah ao han. <sup>21</sup> Hathnukkhu hoi maito hah rim alawilah a hrawi awh vaiteh, apasueke maito hmaisawi e patetlah hmai a sawi awh han. Hethateh, taminaw yontha nahanlah thuengnae sak e doeh.

<sup>22</sup> Ukkung ni hai phunglawk panuek laipalah, BAWIPA e kâlawk a tapoe teh sak hoeh hane kawi yon, sakpayon pawiteh, <sup>23</sup> Ama ni a sakpayon e yon a kâpanue torei teh, kacueme hmaetanca thueng nahanelah a thokhai han. <sup>24</sup> Hmae lû van amae kut a tounge vaiteh, BAWIPA hmalah, hmaisawinae, sathei theinae hmuen koe a thei han. Hethateh, yontha nahanlah sak e thuengnae doeh. <sup>25</sup> Vaihma ni yonthanae sathei thi hah, kutdawn hoi a la vaiteh, hmaisawi thuengnae khoungee kinaw daw k a hlun hnukkhu, kacawie thi hah, khoungee kung koe na rabaw k han. <sup>26</sup> Roun thuengnae sathei thaw sak e patetlah athaw pueng, khoungee van hmai a sawi han. Hot patetlah vaihma ni ukkung e yontha nahanlah sak pawiteh, yontha lah ao han.

<sup>27</sup> Mathoe buetbuet touh ni phunglawk panuek laipalah BAWIPA e kâlawk a tapoe teh sak kawi hoeh e yon sak pawiteh, <sup>28</sup> Ama ni a sak e yon a kâpanue torei teh, hote yon hanelah, kacueme hmaelaca a thokhai han. <sup>29</sup> Kâmaiawinae sathei, Hmae lû van, amae kut a tounge vaiteh, hmaisawinae sathei theinae hmuen koe hote hmae a thei han. <sup>30</sup> Vaihma ni a kutdawn hoi a thi a sin vaiteh khoungee kinaw daw k a hlun hnukkhu, kacawie hah, khoungee kung koe a rabaw k han. <sup>31</sup> Roun thuengnae sathei thaw la e patetlah athaw kaawm pueng a la vaiteh, BAWIPA koe hmuitui hanlah khoungee van hmai a sawi han. Hottelah, vaihma ni hote tami hanlah yonthanae sak pouh pawiteh, a yontha lah ao han.

<sup>32</sup> Tuca hoi yonthanae sak hanlah na ngai pawiteh kacueme napui na thokhai han. <sup>33</sup> Kâmaiawinae sathei tu lû van amae kut a tounge vaiteh, hmaisawinae sathei theinae hmuen koe a thei han. <sup>34</sup> Vaihma ni hote sathei thi a kutdawn hoi a la vaiteh, hmaisawi thuengnae khoungee kinaw daw k a hlun hnukkhu, a kahei vaiteh, kacawie thi hah khoungee kung koe a rabaw k han. <sup>35</sup> Rounnae thuengnae tuca thaw sak e patetlah athaw kaawm pueng la vaiteh, BAWIPA koe hmaisawi thuengnae hoi cungleh, khoungee van hmai a sawi han. Hottelah, vaihma ni hote tami a sakpayon e yon hanlah yonthanae a sak pouh pawiteh a yontha lah ao han.

## 5

<sup>1</sup> Tami buetbuet touh ni a hmu e hoi a panue e hno daw k, kapanuekkaikung lah ao teh, a pathang e thoebonae a thai nahlangva, dei laipalah awm pawiteh, yonpennae teh ama ni a khang han.

<sup>2</sup> Tami buetbuet touh ni kathounghoehe sarang, saring, vonpui hoi kâva e saring kathoung hoeh e kadout e ro tek pawiteh yonpen lah ao han.

<sup>3</sup> Hot hnukkhu hoi, tami hanelah kathounghoehe, kakhin e lah kaawm e hno, a kâbet payon e hah bout a panue torei teh yon pen lah ao han. <sup>4</sup> Tami buetbuet touh ni kahawi hno thoseh, kathout hno thoseh, sut pouk laipalah lawkkamnae a sak teh, thoe a bo. Hote lawkkamnae bout a kâpanue torei teh, yon pen lah ao han.

<sup>5</sup> Hetpatete yonpennae buet buet touh ao torei teh, Bangpatete nakung-hai ama ni yonpâpho naseh. <sup>6</sup> A sakpayon e yontha nahanlah tu thoseh, hmae thoseh, a napui ca buetbuet touh yon thueng nahanelah, Cathut koe



a thokhai hnukkhu, vaihma ni hote tami hanelah yon thuengnae a sak pouh han. <sup>7</sup> Tuca tawn hoehpawiteh, a sak payonnae yontha nahanlah sathei buet touh hmai thueng nahanlah buet touh, bakhu kahni touh, hoehpawiteh âbakhu kahni touh BAWIPA koe vaihma hmalah a thokhai han. <sup>8</sup> Vaihma ni yonthanae sathei hah hmaloe thuengnae a sak han. A lahuen a kapen vaiteh, a tâtueng han. A tak teh na sei mahoe. <sup>9</sup> Hote yon thuengnae sathei thi hah, khoungröe tapang daw k a kahei vaiteh, kacawie a thi teh, khoungröe kung koe a paca han. Hethateh, yon thuengnae doeh. <sup>10</sup> Apâhni e tava teh a lamthung patetlah hmai thuengnae patetlah thuengnae a sak han. Hottelah, Vaihma ni ahnie a sakpayon e yon hanlah yonthanae a sak pouh pawiteh, ahnie yon teh tha lah ao han.

<sup>11</sup> Bakhu kahni touh thoseh, âbakhu kahni touh thoseh, buetbuet touh coung thai hoehpawiteh, yon ka sak e tami ni yon thuengnae sathei yueng lah tavai ephah pung hra pung touh a thokhai han. Yon thuengnae lah ao dawkvah satui hoi frankinsen na awi mahoe. <sup>12</sup> Vaihma koe na thokhai hnukkhu, vaihma ni tavai vai touh kasum a la vaiteh, BAWIPA koe hmai thuengnae hoi cungtalah khoungröe van hmai a sawi han. Hethateh, yon thuengnae lah ao. <sup>13</sup> Hottelah, vaihma ni hote tami ni a sakpayon e yon hanelah yon thuengnae sak pawiteh ahnie yontha lah ao han. Kacawie teh tavai thuengnae patetlah vaihma hanelah ao han telah Mosi koe atipouh.

### *Kâtapoe thuengnae*

<sup>14</sup> BAWIPA ni Mosi koe bout a dei pouh e teh, <sup>15</sup> Tami buetbuet touh ni phunglawk panuek laipalah BAWIPA hoi kâkuen e hno daw payon pawiteh, hote payonnae hanlah yonthanae sathei tie tutan hmueng kathoung koe e patetlah ngun tangka a to vaiteh, BAWIPA koe a thokhai han. <sup>16</sup> Hottelah, BAWIPA hoi kâkuen e hno daw k, a sakpayon e hanlah, panga touh daw buet touh a thapsin vaiteh, vaihma koe a poe han. Vaihma ni hai yonthanae sathei lah kaawm e tu hoi hote tami hanelah yonthanae sak pouh pawiteh, ahnie yon teh tha lah ao han.

<sup>17</sup> Tami buetbuet touh ni BAWIPA ni kâ a poe e sakpayon pawiteh, a sak payonnae ama ni a panue hoeh nakunghai a sak hno teh ama ni a khang han. <sup>18</sup> Yonnae ngaithoum nahanelah, kacueme tutan, vaihma koe a thokhai han. Phunglawk panuek laipalah, a sakpayon nakunghai, amahoima yonnae kâpanuek hoeh e tami hanelah vaihma ni yonthanae sak pouh pawiteh, ahnie yon teh tha lah ao han. <sup>19</sup> Hottelah, BAWIPA ka taran niteh, kâ kaek katang e kâtapoe thuengnae doeh telah ati.

## 6

<sup>1</sup> BAWIPA ni Mosi koe bout a dei e teh, <sup>2</sup> Tami buetbuet touh ni a imri ni hnopai a kuem sak e daw laithoe dei nakunghai thoseh, ayâ e hnopai a lawp nakunghai thoseh, laithoe a dei teh a imri a dum nakunghai thoseh, <sup>3</sup> Kahmat e hno a hmu navah laithoe a dei teh thoe ka bo nakunghai thoseh, hot patet lae yonnae buetbuet touh a sak teh BAWIPA koe sakpayon pawiteh, <sup>4</sup> Hote tami teh a yon kecu dawkvah, a lawphno ayâ dum laihoi a hmu e hnopai, ayâ ni a kuem sak e hnopai, a pâphawng e hnopai, <sup>5</sup> Kahmanhoe hlahoi thoe a kâbo e hnopai phu, a hmu e a phu hoi cungtalah, yon thuengnae hnin dawkvah katawnkung koe panga touh daw pung touh, bout a poe sin han. <sup>6</sup> Yonnae a sak e daw thueng nahanelah, kacueme tutan hah BAWIPA koe, vaihma hmalah a thokhai han. <sup>7</sup> Vaihma ni hote tami hanelah, BAWIPA koe yonthanae sak pouh pawiteh, ahnie yonnae pueng teh ngaithoum lah ao han atipouh.



<sup>8</sup> BAWIPA ni Mosi koe bout a dei e teh, <sup>9</sup> Nang ni Aron hoi a capanaw koe, na dei pouh hane teh, hmaisawi thuengnae teh, sathei hah khoungroe hmai van karum tuettueth khodai totouh na o sak vaiteh, thuengnae khoungroe hmai teh pou na kamtawi sak han. <sup>10</sup> Vaihma ni lukkarei khohna a khohna vaiteh, khoungroe van e hraba a kawm vaiteh, khoungroe teng a ta han. <sup>11</sup> A khohna e bout a kâhleng vaiteh, hote hraba hah alawilah kathounge hmuen koe a sin han. <sup>12</sup> Thuengnae khoungroe hmai teh dout laipalah pou a kamtawi han. Vaihma ni amom tangkuem hmai a racum vaiteh thing van sathei a hruek han. Hote khoungroe van roum thuengnae sathei hai hmai a sawi han. <sup>13</sup> Thuengnae khoungroe hmai teh roum sak laipalah pou kamtawi sak han.

<sup>14</sup> Tavai thuengnae teh Aron e capanaw ni khoungroe hmalah BAWIPA koe a thokhai awh han. <sup>15</sup> Tavai vai touh kasum, satui youn touh, frankinsen abuemlah a la vaiteh, BAWIPA koe hmutui hanlah khoungroe van hmai a sawi han. <sup>16</sup> Kacawie naw teh Aron hoi a capanaw ni kamkhuengnae lukkareim thung hmuen kathoung koe tonphuenhoehe a ca awh han. <sup>17</sup> Hote tavai daw k ton phuen vaiteh, vaiyei lah na sak mahoe. Hmai hoi Kai koe thuengnae sak e thung daw kote vaiyei hah ahnimouh hanlah kai ni ka poe toe. Yontha thuengnae, kâtapoe thuengnae patetlah kathoungpounge lah ao. <sup>18</sup> Aron hoi a capanaw pueng ni a ca awh han. Hmai hoi BAWIPA koe thuengnae ka taw k e pueng teh a kamthoung awh han, telah nangmae miphun catounnaw totouh a sak hane kâlawk doeh telah ati. <sup>19</sup> BAWIPA ni Mosi koe bout a dei pouh e teh, <sup>20</sup> Aron hoi a capanaw ni satui a awinae hnin hoi, a yungyoe e thuengnae lah ao thai nahanlah, tavai ephah pung hra pung touh, amom lah tangawn tangduem lah tangawn BAWIPA koe thuengnae a sak awh han. <sup>21</sup> Hote tavai hah satui a awi vaiteh, ukkang daw k a karê vaiteh, vaiyei lah a sak hnukkhu, a thokhai awh vaiteh, a raen hnukkhu a kanuikapin naw hah BAWIPA koe hmutui hanlah thuengnae a sak han. <sup>22</sup> Aron e hmuen daw k satui awi lah kaawm e a capa ni hai hote thuengnae a sak han. BAWIPA hanelah a yungyoe e kâlawk lah ao. <sup>23</sup> Vaihma hanelah tavai thuengnae kaawm pueng hmai koug a sawi han. Khoeroe cat mahoe telah ati.

<sup>24</sup> BAWIPA ni Mosi koe bout a dei pouh e teh, <sup>25</sup> Nang ni Aron hoi a capanaw koe na dei pouh hane teh, yon thuengnae teh hmaisawi thuengnae sathei theinae hmuen koe, yonthanae sathei thei han. Hot teh, kathoungpounge lah ao. <sup>26</sup> yontha nahanlah thuengnae na ka sak pouh e vaihma ni kamkhuengnae lukkareim thung hmuen kathoung koe a ca han. <sup>27</sup> Hote moi kâbet e pueng teh a thoung. Thi ni a tâcawn sin e khohnanaw hmuen kathoung koe a pâsu han. <sup>28</sup> Hote moi thawngnae talai hlaam rek hem han. Rahum hlaam pawiteh, hma vaiteh tui hoi pâsu han. <sup>29</sup> Vaihma tongpa naw pueng ni a ca awh han. <sup>30</sup> Kathoung poung e lah ao. Yonthanae sathei thi hah hmuen kathoung koe yontha nahanelah, kamkhuengnae lukkareim thung a sin vaiteh, hote sathei moi hah cat mahoe. Hmai a sawi han.

## 7

<sup>1</sup> Kâtapoe thuengnae teh kathoungpounge lah ao. <sup>2</sup> Hmai thuengnae sathei, theinae hmuen koe, kâtapoe thuengnae sathei hah thei vaiteh khoungroe van petkâtuê lah a thi kahei han. <sup>3</sup> A mai hoi cungtalah a ruen ka ramuk e athaw, <sup>4</sup> Kuen kahni touh daw k e athaw, kuen hoi cungtalah athin van kaawm e maimara daw k e athaw pueng na poe han. <sup>5</sup> Vaihma



ni khoungröe van hmai a sawi vaiteh, Cathut koe hmai hoi thuengnae a sak han. Kâtapoe thuengnae lah ao. <sup>6</sup> A moi hai vaihma thung e tongpa pueng ni hmuen kathoung koe a ca awh han. Kathoung poung e lah ao.

<sup>7</sup> Kâtapoe thuengnae teh yon thuengnae hoi a kâvan teh thuengnae ka sak pouh e vaihma ni a coe han. <sup>8</sup> Tami buetbuet touh ni a sak e hmaisawi thuengnae ka sak pouh e vaihma ni sathei e a vuen teh a la han. <sup>9</sup> A karênae dawk a karê e tavai thuengnae puenghoi ukkang dawk a karê e pueng teh vaihma ni a coe han. <sup>10</sup> Satui a awi nakunghai thoseh, a awi hoeh nakunghai thoseh, tavai thuengnae naw pueng Aron e a capanaw pueng ni suetalah a kêrei awh han.

<sup>11</sup> BAWIPA koe rum thuengnae tie teh, <sup>12</sup> Lunghawilawkdinae dâw hanlah, thuengnae na sak pawiteh, lunghawilawkdinae sathei hoi cungtalâh satui kalawt e tonphuenhoehe phen, satui hoi sak e tonphuenhoehe kamrâw, satui kalawt e tavai hoi sak teh karê e vaiyeinaw hah na thueng han. <sup>13</sup> Hote vaiyei phen hloilah, rum thuengnae hoi kâseng e lunghawilawkdinae dâwnae sathei hoi cungtalâh tonphuenhoehe hai na thueng han. <sup>14</sup> Thuengnae pueng dawk e vaiyei buet touh BAWIPA koe thuengnae na sak vaiteh hote vaiyei hah rum thuengnae sathei thi kaheikung vaihma ni a coe han. <sup>15</sup> Lunghawilawkdinae lah thueng e rum thuengnae sathei moi hah thueng hnin vah na ca han, amom hanelah bout pek mahoe. <sup>16</sup> Hoehpawiteh, lawkkam laihoi thueng nakunghai thoseh, malungpouk thuengnae thoseh, thueng hnin vah sathei moi ca vaiteh kacawie moi hai atangtho bout ca han. <sup>17</sup> Kacawie a moi hah tawkkahnin hmaisawi han. <sup>18</sup> Rum thuengnae sathei moi, tawkkahnin vah yitca hai na cat payon pawiteh, a lungyouk hoeh e lah na o han. Thuengnae a sak e dâw pouh mahoe. Panuetkatho e lah ao han. Ka cat e tami teh yon phu a hmu han. <sup>19</sup> Kathounghoehe hno hoi kâbet e sathei moi cat mahoe. Hmaisawi han. Kathounge taminaw ni dueng hote sathei moi a ca awh han. <sup>20</sup> Apihai thoseh, kathounghoehe yon a tawn nahlangva, Cathut hoi kâseng e rum thuengnae sathei moi ka cat e tami teh, a miphun dawk hoi takhoe lah ao han. <sup>21</sup> Apihai thoseh, tami dawk thoung hoeh e hno, kathounghoehe moi, kathounghoehe pâri patet e hno buetbuet touh a kânep laihoi BAWIPA hoi kâkuen e rum thuengnae sathei moi cat pawiteh, hote tami teh a miphun dawk hoi takhoe lah ao han telah ati.

<sup>22</sup> BAWIPA NI Mosi koe bout a dei pouh e teh, <sup>23</sup> Maito thoseh, Tu thoseh, hmae thoseh, athaw na cat a mahoe. <sup>24</sup> Amahmawk kadout e saring e athaw hoi sarang ni a kei e athawnaw teh alouke hnonaw dawk na hno thai, eiteh na cat mahoe. <sup>25</sup> Apihai thoseh, Cathut koe hmaisawi thuengnae sathei thaw ka cat e tami teh, a miphun dawk hoi takhoe lah ao han. <sup>26</sup> Na onae hmuen tangkuem koe a thi thoseh, tava thi thoseh, thi tie pueng na cat mahoe. <sup>27</sup> Apihai thoseh thi kacate tami teh miphun dawk hoi takhoe lah ao han. <sup>28</sup> Cathut ni Mosi koe, na miphunnaw koe bout na dei pouh hane teh, <sup>29</sup> Cathut koe rum thuengnae sathei ka thueng e tami ni teh ama ni thueng hane sathei, BAWIPA koe poe hanelah a thokhai han. <sup>30</sup> Cathut hmalah takuep a sei vaiteh, takuep hoi athaw hah hmai hoi Cathut koe thueng e hah na thokhai han. <sup>31</sup> Vaihma ni athaw hah khoungröe van hmai a sawi vaiteh, Aron hoi a capanaw ni takuep teh a la awh han. <sup>32</sup> Rum thuengnae sathei thung dawk e aranglae aphai thueng hanelah. vaihma koe a poe han. <sup>33</sup> Aron e capanaw thung dawk rum



thuengnae sathei a thi hoi athaw thuengnae ka sak e tami ni aphai a ham han. <sup>34</sup> Isarel miphunnaw ni a sak e roum thuengnae satheinaw thung dawk e rek sei e takuep hoi aphai teh ka la vaiteh Isarel miphun Aron hoi a capanaw, yungyoe e aphung lah ka poe toe telah ati. <sup>35</sup> Hottelah, Aron hoi a capanaw ni Cathut hmalah vaihma thaw tawk hanelah, ahnimanaw a rawinae hnin dawk BAWIPA koe, hmai hoi canei kawi naw thuengnae thung dawk e ahnimouh ni a ham awh hane doeh.

<sup>36</sup> Isarel miphunnaw dawk hoi e hot patet lae a coe a nahanelah, ahnimanaw teh satui awinae hnin dawkvah BAWIPA ni kâ a poe toe. <sup>37</sup> Hete lawk teh Isarel miphunnaw ni Sinai kahrawng dawk Cathut koe thuengnae a sak hanelah, <sup>38</sup> Kâtapoenae hnin nah, Sinai mon dawk Cathut ni Mosi koe a poe e hmaisawi thuengnae, tavai thuengnae, yon thuengnae, kâtapoe thuengnae, thaw poe thuengnae hoi roum thuengnae naw doeh atipouh.

## 8

### *Aron hoi a capanaw thoungnae*

<sup>1</sup> Cathut ni Mosi koe bout a dei pouh e teh, <sup>2</sup> Aron hoi a capanaw ni a khohna hane naw, kâhluk han satui, yon thueng nahan maitotan, tutan, kahni touh, tonphuenhoehe tangthung buet touh a tho khai vaiteh, <sup>3</sup> Rangpui kamkhuengnae lukkareiim takhang hmalah, tamimaya abuemlah kamkhueng sak awh, telah Mosi koe kâ a poe e patetlah,

<sup>4</sup> Mosi ni a tawk teh, tamimaya teh lukkareiim takhang hmalah a kamkhueng awh. <sup>5</sup> Mosi ni hai tamimaya koe Cathut ni hettelah lawk na thui toe atipouh teh,

<sup>6</sup> Cathut ni lawkthui e patetlah Aron hoi a capanaw a kaw teh tui a pâhluk hnukkhu, <sup>7</sup> Aron hai angki a kho sak teh, taisawm a kâyeng sak. Angkidung a kho sak teh, vaihma angki a kâkhu sak. Vaihma angkikep khan nahan e a meikahawicalah kawng e angki a kho sak teh a khan pouh. <sup>8</sup> A lungtabue a ramuk sak teh athung vah, Urim hoi Thummim hah a hruek. <sup>9</sup> A lû dawkvah lupawk a pawk teh, kathounge sui phen lupawk hmalah a bet.

<sup>10</sup> Cathut ni lawkthui e patetlah Mosi ni a hluk nahane satui a la teh, lukkareiim hoi athung e puengcangnaw pueng hah a hluk teh a thoungsak. <sup>11</sup> Hote satui hah khoungroe puengcangnaw pueng thoseh, maroi hoi a khok hai thoseh, thoung sak hanelah a hluk. <sup>12</sup> Hluk nahan e satui hah Aron e lû dawk a awi pouh teh, thoung sak hanelah a hluk. <sup>13</sup> Aron e a capanaw hai angki a kho sak. Taisawm hai a kâyeng sak teh, bawilakhung a huem sak.

<sup>14</sup> BAWIPA ni a dei pouh e patetlah yon thueng nahanelah maitotan a hrawi teh, Aron hoi a capanaw ni a lû van a kut a tOUNg pouh han. <sup>15</sup> Maito a thei vaiteh, Mosi ni khoungroe petkâtue lah kinaw dawk thi hah a kutdawn hoi a la teh, khoungroe hah a thoung sak hnukkhu, kacawie a thi hah khoungroe kung koe a rabawk vaiteh, hote khoungroe van yon thueng nahanlah a thoungsak han. <sup>16</sup> A ruen ka ramuk e ahrei, athin van e maimara, kuen kahni touh dawk e athaw na la vaiteh, khoungroe van hmai na sawi han. <sup>17</sup> A vuen, a moi, a ei hoi cungtalah maito buem hah alawilah hmaisawi han.

<sup>18</sup> Cathut ni lawk na thui e patetlah hmaisawi thueng nahane hah a thokhai teh, Aron hoi a capanaw ni tu lû van kut a tOUNg sin awh. <sup>19</sup> Tu



a thei hnukkhu, Mosi ni khoungroe petkâtue lah a thi a kahei. <sup>20</sup> Tu hah kounge a raban hnukkhu, a lû, a moinaw hoi athaw hah hmai a sawi. <sup>21</sup> A von thung e naw hoi a khoknaw tui a pâsu teh, tu buem hah, khoungroe van hmai a sawi. Hmuitui hanlah hmaisawi thuengnae lah ao.

<sup>22</sup> Cathut ni lawkthui e patetlah alouke tu yueng lah, a rawi e tu a thokhai vaiteh, Aron hoi a capanaw ni tu lû van kut a toung pouh awh. <sup>23</sup> Tu a thei hnukkhu, Mosi ni thi a la teh, Aron e aranglae hnârakong dawkh thoseh, aranglae kut pui hoi aranglae khokpui dawkh thoseh, a hluk pouh. <sup>24</sup> Aron e a capanaw hai a kaw teh, ahnimouh e, aranglae hnârakong, aranglae kutpui hoi khokpui dawkh hai thoseh a hluk pouh hnukkhu, khoungroe van petkâtue lah a kahei. <sup>25</sup> A thaw, a mai, a ruen ka ramuk e a hrei, a thin ka ramuk e maimara, a kuen kahni touh hoi akuen ka ramuk e athaw, aranglae aphai, <sup>26</sup> Cathut hmalah tangthung dawkh ta e tonphuenhoehe buet touh, satui hoi sak e vaiyei a phen buet touh, vaiyei karé e buet touh a la teh, satui hoi aranglae aphai van a hruek hnukkhu, <sup>27</sup> Aron e a kut, a capanaw e a kut dawkh, hote hnouaw hah a hruek teh, Cathut e hmalah a kahek teh, kahek thuengnae a sak. <sup>28</sup> Mosi ni ahnimae a kut dawkh e a la teh, khoungroe van, hmaisawi thuengnae sathei hoi cungtalah hmai a sawi han. Hmuitui teh thaw poe thuengnae lah ao. BAWIPA koe hmai hoi thuengnae lah ao. <sup>29</sup> Hathnukkhu, Mosi ni takuep a la teh BAWIPA hmalah a kahek teh kahek thuengnae a sak. Tu takuep feh Mosi ham lah ao.

<sup>30</sup> Mosi ni khoungroe van kaawm e a thi hoi kâhluh hane satui a la teh, Aron hoi a khohna e dawkh thoseh, a capanaw hoi a khohna e naw dawkh hai thoseh, a kahei teh, Aron hoi a capanaw, khohnanaw a thoungsak.

<sup>31</sup> Mosi ni Aron hoi a capanaw koe, hote thi moi hah kamkhuengnae lukkareiim takhang teng a thawng awh. BAWIPA ni Aron hoi a capanaw ni hote moi, a ca awh han, telah kai koe lawk na thui e patetlah hote moi thoseh, thawpoe thuengnae tangthung dawkh kaawm e vaiyei thoseh, hote hmuen koe cat awh. <sup>32</sup> Kacawie moi hoi vaiyei teh hmai na sawi han. <sup>33</sup> Thawpoe thoungnae hnin sari akupep hoehnahlan kamkhuengnae lukkareiim takhang thung hoi alawilah na tâcawt mahoehe. Bangkongtet-pawiteh, hnin sari touh thung na kamthoung awh han. <sup>34</sup> Sahnin na sak a e patetlah nangmouh hane yon thuengnae na sak a hanelah Cathut ni lawk na thui awh toe. <sup>35</sup> Hatdawkvah, nangmouh duenae dawkh hoi na hlout a nahanelah, kamkhuengnae lukkareiim takhang teng vah, hnin sari touh thung karum khodai na o awh vaiteh, Cathut ni kâ na poe e na tarawi awh han. Hottelah Cathut ni lawk na thui toe tie patuen ka dei e lah ao teh,

<sup>36</sup> BAWIPA ni Mosi koehoi lawk thui e naw pueng Aron hoi a capanaw ni a sak awh.

## 9

### *Aron ni thueng e BAWIPA ni a dâw*

<sup>1</sup> A hnin taroe hnin dawkh Mosi ni Aron hoi a capanaw, Isarel miphun, kacuenaw a kaw teh, <sup>2</sup> Aron koe, nang ni yon thueng nahanelah, kacueme maito kum kanaw e buet touh, hmaisawi thueng nahanelah, kacueme tutan buet touh, na thokhai vaiteh, Cathut hmalah thuengnae sak loe.

<sup>3</sup> Isarel miphunnaw koehai thoseh, nangmouh ni yon thueng nahanlah, hmae kum kanaw e buet touh, hmaisawi thueng nahanlah, âva ka cawt hoehe rae maitoca buet touh, <sup>4</sup> Tuca buet touh, BAWIPA koe roum thueng nahanlah, maitotan buet touh, tutan buet touh, satui hoi kalawt e vaiyei



thuengnae hah thokhai loe. Sahnin nangmouh koe BAWIPA a kamnue han telah dei pouh loe atipouh.

<sup>5</sup> Mosi ni kê a poe e patetlah kamkhuengnae lukkareiim hmalah a thokhai hnukkhu, tamimaya naw ni a hnai teh, BAWIPA hmalah a kangdue awh. <sup>6</sup> Mosi ni hai nangmouh ni BAWIPA ni kê na poe e patetlah hottelah na sak awh teh, BAWIPA e bawilenna teh nangmouh koe a kamnue han telah atipouh. <sup>7</sup> Mosi ni Aron koe, khoungroe koe, cet nateh, Cathut ni kê na poe e patetlah nama e thuengnae, hmaisawi thuengnae sak nateh, nama hoi na taminaw hanelah, yonthanae sak awh. Taminaw ni a thokhai e sathei thuengnae a thueng teh taminaw hanlah yonthanae sak awh, telah atipouh.

<sup>8</sup> Aron ni hai khoungroe koe a cei teh, ama hanlah yon thuengnae maitoca a thei. <sup>9</sup> A capanaw ni a thi a sin awh teh, Aron ni a kutdawn thi daw k a ranup teh, khoungroe kinaw daw k a hlun hnukkhu, kacawie a thi hah khoungroe kung koe a rabaw k. <sup>10</sup> Yon thuengnae sathei thaw, akuen, athin van e maimara hah khoungroe van hmai a sawi. Hottelah, Cathut ni Mosi koe kê a poe. <sup>11</sup> A moi hoi a vuen teh alawilah hmai a sawi. <sup>12</sup> Hmaisawi thuengnae sathei hai a thei teh a capanaw ni Aron koe thi a poe teh ahni ni khoungroe petkâtue lah a kahei. <sup>13</sup> Ahnimanaw ni hmaisawi thuengnae sathei moi, takpatinaw hoi a lû hah a poe teh Aron ni khoungroe van hmai a sawi. <sup>14</sup> A vonthung e naw hoi a khoknaw hah a pâsu teh, khoungroe van kaawm e sathei hoi cungtalah hmai sawi.

<sup>15</sup> Taminaw ni thueng nahanelah a thokhai teh, taminaw e yon thuengnae lah kaawm e hmae a thei hnukkhu, ahmaloe e patetlah yon thuengnae a sak. <sup>16</sup> Hmaisawi thuengnae sathei hai a thokhai awh teh, hot patetlah a sak. <sup>17</sup> Tawai thuengnae hai a sin teh, vai touh kasum a la teh, khoungroe daw k amom lah hmaisawi thuengnae khoungroe daw k hmai a sawi.

<sup>18</sup> Taminaw hanelah roun thuengnae maitotan, tutan hai a thei awh teh, a capanaw ni thi a sin hnukkhu, khoungroe van petkâtue lah thi a kahei awh. <sup>19</sup> A mai hoi a ruen ka ramuk e ahrei, a kuen, a thin van e a maimaranaw, tu hoi maito e athaw hah, <sup>20</sup> A takuep van a toung vaiteh, khoungroe daw k hmai a sawi. <sup>21</sup> Takuep hoi aranglae aphai hah BAWIPA hmalah a kahek teh kahek thuengnae a sak. Hottelah, sak hanelah Mosi ni kê a poe.

<sup>22</sup> Aron ni amae kut a dâw teh, ayânaw yawhaw i a poe teh, yon thuengnae, hmaisawi thuengnae, roun thuengnae a sak hnukkhu, a kumcathuk. <sup>23</sup> Mosi hoi Aron ni kamkhuengnae lukkareiim thung bout a kâen teh a tâco hnukkhu, taminaw yawhawinae a poe teh, BAWIPA e bawilenna teh taminaw koe a kamnue. <sup>24</sup> Cathut koehoi hmai a tâco teh, khoungroe van kaawm e hmaisawi thuengnae sathei hoi athaw, hmai a kak. Hote taminaw ni a hmu awh navah a hram awh teh a tabo awh.

## 10

### *Nadab hoi Abihu duenae*

<sup>1</sup> Aron e a capa Nadab hoi Abihu ni hmai sinnae tawngben a la roi teh, hmai a hruek roi. Hmai daw k hmu itui a phuen hnukkhu, BAWIPA ni kê a poe hoeh e ka talue e hmai hoi thuengnae a sak roi. <sup>2</sup> Hatdawkvah, BAWIPA koehoi hmai a tâco teh, BAWIPA hmalah hmai a kak teh a due roi.



<sup>3</sup> Mosi ni Aron a kaw teh BAWIPA ni KAI teh kathounge lah ka o dawkvah, KAI koe kâhnai han kangainaw ni a pâkuem hane teh tami pueng ni ka lentoenae a bari awh han telah ka dei navah, Hot patetlah e doeh ka dei ngai telah ati hnukkhu, Aron teh lawkkamuem lah ao.

<sup>4</sup> Mosi ni Aron e a na pa kanaw, Uzziel e capa Mishael hoi Elzaphan a kaw teh, tho roi haw, na hmaunawngna roi hah, hmuen kathoung koehoi alawilah kâkayawn roi ei telah atipouh e patetlah,

<sup>5</sup> Ahnimouh roi ni a tho roi teh, angki khohna khue hoi rim alawilah a kâkayawt roi.

<sup>6</sup> Mosi ni Aron hoi a capa roi, Eleazar hoi Ithamar a kaw teh, nangmouh hai na due awh han. Taminaw pueng koe lungkhueknae phat payon vaih ti a ngaihri teh, na bawilakhung rading awh hanh, khohna phi awh hanh. Hmaunawngna Isarel miphun abuemlah Cathut ni hmai hoi a kak sak e duengma khuikapkhai awh. <sup>7</sup> Nangmouh na due awh hoe hanelah, tamimaya kamkhuengnae takhang alawilah, tâcawt awh hanh. BAWIPA e satui awinae nangmouh koe ao telah, Mosi ni a dei e patetlah a sak awh.

<sup>8</sup> BAWIPA ni Aron koe bout a dei pouh e teh, <sup>9</sup> Nang hoi na capanaw ni due awh hoe hanelah thoseh, kathoung hoi kathounghoehe, kakhin hoi <sup>10</sup> Kakhin hoe e hnonaw, na kapek thai nahanlah thoseh,

<sup>11</sup> BAWIPA ni Mosi koe a dei pouh e kâlawnaw hah, Isarel miphunnaw koe cangkhai thai nanelah thoseh, kamkhuengnae lukkareim daw na kâen awh navah, Misurtui hoi paruithai e naw net awh hanh. Na miphun, catounnaw totouh na tarawi awh han e phung lah ao telah atipouh.

<sup>12</sup> Mosi ni hai Aron hoi kahring rae capa Eleazar hoi Ithamar a kaw teh, BAWIPA koe hmaisawi thuengnae tavai kacawie lat nateh, tonphuenhoehe, khoungroe teng cat awh. Kathoung poung e lah ao. <sup>13</sup> Cathut koe hmai hoi thuengnae teh nang hoi na capanaw ni coe hane kaw lah ao dawkvah, hmuen kathoung koe na ca awh han. Bangkongtetpawiteh, Hottelah kâpoe e lah ao daw doeh. <sup>14</sup> Kahek e takuep hoi dâw e kahek e aphai teh, nama hoi cungtalah, na canaw hoi hmuen kathoung koe na ca awh han. Isarel miphunnaw ni roum thuengnae sathei thung daw e nang hoi na capanaw ni ham hane kaw lah ao. <sup>15</sup> Hmaisawi thuengnae sathei thaw hoi cungtalah dâw e aphai, kahek e takuep, BAWIPA hmalah a kahek vaiteh, BAWIPA ni kâ a poe e patetlah nama hoi na capanaw ni yungyoe a ham han kaw phung lah ao han telah ati.

<sup>16</sup> Mosi ni yon thuengnae hmae panki laihoi a tawng eiteh, pâphawng hoehe. Hmaisawi thuengnae lah oun a sak toe. Hatdawkvah, Aron e a capa Eleazar hoi Ithamar koe a lungkhuek teh, <sup>17</sup> Bangkongmaw, yon thuengnae sathei moi teh, a thoungpoung. Hatei, nangmouh ni rangpuinaw e yon na ham teh, BAWIPA hmalah ahnimouh hanelah yon thuengnae sak hanelah, hote sathei moi na poe a eiteh, bangkongmaw hmuen kathoung koe na ca awh hoehe vaw. <sup>18</sup> Hote sathei thi haiyah, hmuen kathoung koe na thokhai awh hoehe vaw. Kai ni lawk na thui e patetlah hmuen kathoung koe sathei moi ca han na tet awh pawiteh,

<sup>19</sup> Aron ni sahnin ahnimouh ni taminaw hanlah, yon thuengnae sathei, hmaisawi thuengnae sathei, yo a thueng awh han toe. Kai koe hot patetlah e hno a tho dawkvah, sahnin yon thuengnae sathei moi ka cat pawiteh, Cathut lungyouk han na maw telah Mosi koe atipouh. <sup>20</sup> Mosi ni hote lawk a thai navah a lungkuep.



# 11

## *Kathoung hoi kathounghoehe saring*

<sup>1</sup> BAWIPA ni Mosi hoi Aron bout a kaw teh, <sup>2</sup> Nangmouh roi ni Isarelnaw koe patuen bout na dei pouh hane teh, talai van kaawm e moithang pueng daw, <sup>3</sup> A khoksamen samka ni teh a thepkaai e moithangnaw teh ca thainae kâ ao. <sup>4</sup> Hatei, thepkaai ni teh khoksamen samka hoehe e moithang thung daw, ca hoehe hane moithangnaw teh Kalauk teh athepai hoehe eiteh khoksamen samka hoehe dawkvah nangmouh hanlah thoung hoehe. <sup>5</sup> Kovei teh thepkaai eiteh a khoksamen samka hoehe dawkvah nangmouh hanlah thoung hoehe. <sup>6</sup> Saveh teh thepkaai eiteh a khoksamen samka hoehe dawkvah nangmouh hanlah thoung hoehe. <sup>7</sup> Vok teh a khoksamen samka eiteh thepkaai hoehe dawkvah nangmouh hanlah thoung hoehe. <sup>8</sup> Hot patet e moithangnaw e a moi na cat awh mahoehe. Ro haiyah na tek awh mahoehe. Kathounghoehe lah na pouk awh han.

<sup>9</sup> Tuipui hoi sawkca daw kaawm e moithangnaw thung daw a rathei hoi a lakep kaawm e teh na ca awh han. <sup>10</sup> A rathei hoi a lakep kaawm hoehe e tuipui hoi sawkca daw kaawm e moithang pueng teh nangmouh hanlah thoung hoehe. <sup>11</sup> A rathei hoi a lakep kaawm hoehe e tui daw e moithang na cat awh mahoehe. <sup>12</sup> A ronaw hai panuetho e lah na pouk awh han. <sup>13</sup> Nangmouh ni panuetho e lah na pouk awh vaiteh na ca awh hoehe hane tavanaw teh: Mataw, Langta, Tawbu, <sup>14</sup> Mataw phun, <sup>15</sup> Vonga phun kuep, <sup>16</sup> Kalauk tava, bukbu phun kuep, batuiling phun kuep, <sup>17</sup> Kawhna hoi balengek, <sup>18</sup> Tuicawmpai, <sup>19</sup> Butakok phun kuep, Bongpi, Bongcakhat phun kuep,

<sup>20</sup> A rathei ka tawn ni teh a khok pali touh hoi kacetnaw pueng teh nangmouh hanlah kathounghoehe lah ao. <sup>21</sup> Hateiteh, a rathei a tawn teh a khok pali touh hoi ka cet e phun daw dawkcawk nahanlah a khok kasaw poung naw teh: <sup>22</sup> Samtong, pâluen, tawktaboe, Tawngkaruethnaw teh na ca awh han. <sup>23</sup> A rathei ka tawn ni teh a khok pali touh hoi ka cet e alouke moithang pueng teh nangmouh hanlah thoung hoehe.

<sup>24</sup> Hote moithang lahoi nangmae thoungnae hah a khin thai. Hot patet e ro katek e tami teh tangmin totouh thoung hoehe. <sup>25</sup> Hote kadout e ro ka sin e tami teh khohna a pâsu han, tangmin totouh thoung hoehe.

<sup>26</sup> A khoksamen samka hoehe e, a thepkaai hoehe e saring pueng teh nangmouh hanlah thoung hoehe. <sup>27</sup> A khoksamen samka hoehe e saring pueng teh nangmouh hanlah thoung hoehe. Hote ro ka tek e tami teh tangmin totouh thoung hoehe. <sup>28</sup> Hote ro ka phawt e tami pueng teh a khohna a pâsu han. Tangmin totouh thoung hoehe.

<sup>29</sup> Talai daw a vonpui hoi kâva e saring thung daw thangbui, moiham, Insi phun, <sup>30</sup> Tawkkei, Tawngkang, Cingkadawt, Dekko hoi Khaipadounnaw teh nangmouh hanlah thoung hoehe. <sup>31</sup> Hotnaw e ro katek e tami teh tangmin totouh thoung hoehe. <sup>32</sup> Hote kadout e a ro hah thingkawlung, khohna, a pho, cawngko patetlah e im daw e hno e buet touh van bawt pawiteh thoung hoehe. Tui daw ranup han. Tangmin totouh thoung hoehe. Hathnukkhu a thoung han. <sup>33</sup> Talai hlaam buetbuet touh van ro hah bawt pawiteh, Hote talai hlaam teh a thounghoehe dawkvah rek hem han. <sup>34</sup> Hote talai hlaam daw e tui cakawi moi van vah, bawt pawiteh moi thoung hoehe. Hote talai hlaam daw e nei hane tui hai thoung hoehe. <sup>35</sup> Takhuen daw thoseh, lungmu daw thoseh, hote hno buetbuet touh bawt pawiteh nangmouh hanelah a thounghoehe dawkvah,



peng raphoe han. <sup>36</sup> Hatei, sambuem, tai e tui im teh kathounghoehe lah awm hoehe. Ro ni a bosin e dueng doeh kathounghoehe lah ao. <sup>37</sup> Cati dawkhote ro bawtpawiteh, Cati teh kathounghoehe lah awm mahoehe.

<sup>38</sup> Tui dawkpading tangcoung e cati dawkhote ro bawtpawiteh cati teh nangmouh hanlah thong hoehe. <sup>39</sup> Nangmouh ni na ca han kawisaring dout pawiteh, ro katek e tami teh tangmin totouh thong hoehe. <sup>40</sup> Hote ro ka cat e tami teh a khohna a pâsu han. Tangmin totouh thong hoehe. Hote ro ka phawt e tami hai amae a khohna a pâsu han. Tangmin totouh thong hoehe.

<sup>41</sup> Talai dawkkâva e saringnaw pueng teh panuetho e lah ao dawkvah na cat awh mahoehe. <sup>42</sup> A khok tawn hoehe, a von hoi ka cet e thoseh, khok pali touh hoi ka cet e thoseh, khok pali hlak kapap e khok hoi ka cet e thoseh, talai dawkkâva e saring buet touh boehai na cat awh mahoehe. Panuetkatho e lah ao. <sup>43</sup> Kâva e saring buetbuet touh kecu namahoima kâkhinsak awh hanh. Hotnaw hoi nama kâkhinsak awh hanh. <sup>44</sup> Kai teh nangmae BAWIPA Cathut lah ka o. Kai teh kathoung dawkvah nangmouh haiyah namahoima kâthoung sak awh nateh thoungeae tawn awh. Talai dawkkâva e saring buet touh boe hoi hai kâkhinsak awh hanh. <sup>45</sup> Kai teh nangmae Cathut lah ka o nahanlah nangmouh teh Izip ram hoi na ka rasat e BAWIPA lah ka o. Kai teh kathoung dawkvah nangmouh hai thoungeae tawn awh.

<sup>46</sup> Hetnaw teh, kathoung, kathoung hoehe, cakawi hoi cakawi hoehe e saringnaw kapek thai nahanelah, <sup>47</sup> Moi, tava, tui dawkkawm e moithang, talai dawkkâva e moithangnaw puenghoi ka kâkuen e phunglawk doeh ati.

## 12

### *Camo khe hnukkhu kamthoungnae*

<sup>1</sup> Cathut ni Mosi koe bout a dei pouh e teh, nang ni Isarel miphunaw koe patuen na dei pouh hane teh, <sup>2</sup> Napui ni camo a wawn teh ca tongpa a khe hnukkhu, Kampheng nah hnin sari touh a thoungoehe e patetlah hnin sari totouh kathoung hoehe lah ao han. <sup>3</sup> Ataroe hnin nah vuensom a a pouh han. <sup>4</sup> Hat hnukkhu, thipaling kecu dawka manu teh hnin sari touh a kâthoung sak lah ao han. A kâthoung saknae hnin akuiep hoehroukrak kathoung hno tek mahoehe. Hmuen kathoung koehai cet mahoehe. <sup>5</sup> Hateiteh, napui khe pawiteh, kamphengnae patetlah yat hni touh thung kathounghoehe lah ao han. Thipaling kecu dawkhnin 66 touh a kâthoung sak han.

<sup>6</sup> Ca tongpa thoseh, napui thoseh, kâthoung saknae hnin akuiep toreitah, hmaisawi thueng nahanelah âvâ ka cawt hoehe rae tu ca buet touh, yonthueng nahanelah âbakhu buet touh, hoehpawiteh bakhu buet touh hah kamkuengnae lukkareim takhang hmalah, vaihma koe a thokhai han. <sup>7</sup> Vaihma ni BAWIPA hmalah thuengnae a sak vaiteh, hote napui hanlah yon thuengnae a sak pouh vaiteh, ahni teh thi kârabawkae yon dawkhoi a thong han. <sup>8</sup> Tuca coung thai hoehpawiteh, bakhu kahni touh thoseh, âbakhu ca kahni touh thoseh, hmaisawi thueng nahanlah buet touh, yon thueng nahanlah buet touh a thokhai vaiteh, vaihma ni ahni hanlah thuengnae a sak pouh vaiteh ahni teh a thong han. Hete phunglawk teh ca tongpa, ca napui ka khe e manu hoi kâkuen e phunglawk doeh telah atipouh.



## 13

*Hrikbei phunglawk*

<sup>1</sup> BAWIPA ni Mosi hoi Aron koe bout a dei e teh, <sup>2</sup> Tami ni a vuen dawk hluetkaco e thoseh, takpatha nakunghai thoseh, bahlaw thoseh, hrikbei mitnoutnae kamnuek pawiteh, hote tami hah vaihma Aron koe thoseh, a capa vaihma buetbuet touh koe thoseh, a thokhai han. <sup>3</sup> Vaihma ni hote tami e a vuen dawk e patawnae a khet vaiteh, patawnae dawk e a muen pangaw pawiteh patawnae teh vuen thung tak dawk ka phat e patetlah awm pawiteh ka hrikbei e doeh. Vaihma ni hote tami a khet hnukkhu, thoung hoeh telah a pouk han. <sup>4</sup> Bahlaw teh pangaw pawiteh vuen thung ka phat e mahoe. Muen pangaw hoehpawiteh vaihma ni ka pataw e tami hah hnin sari touh a paung han. <sup>5</sup> Asari hnin vaihma ni a khet navah a vuen dawk e patawnae kampai hoehpawiteh hnin sari touh bout a paung han. <sup>6</sup> Asari hnin bout a khet navah ama paroup ni teh meimei tamang pawiteh hote tami teh a thoung telah vaihma ni a pathang han. Ka pathak rumram e lah doeh ao. Amae khohna a pâsu vaiteh kathounge lah ao. <sup>7</sup> Thoung sak hanelah vaihma ni a khet hnukkhu, ka pathak e hoehoe lui pawiteh, <sup>8</sup> Hote tami teh kathounghoehe lah a pathang vaiteh ka hrikbei e tami lah a khoe han.

<sup>9</sup> Ka hrikbei e tami hah vaihma koe a ceikhai awh han. <sup>10</sup> Vaihma ni a khet navah, a vuen dawk ka pâphu ni teh a muen pangaw pawiteh, pâphu e dawc cawcawyu pawiteh, <sup>11</sup> Hrikbei karuem e doeh. Kathounghoehe tami telah vaihma ni a pouk vaiteh a paung han. <sup>12</sup> Ka hrikbei e tami teh atak buemlah a lû koehoi a khok koe totouh, vaihma ni a khet navah hrikbei kingkawi pawiteh, <sup>13</sup> Hot patet e atak dawc king kakawi e tami teh a thoung telah vaihma ni a pathang han. atak buemlah kouna a pangaw dawkvah ahni teh a thoung. <sup>14</sup> Hateiteh, atak dawc cawcawyu pawiteh thoung hoeh. <sup>15</sup> Vaihma ni atak dawc cawcawyu e a khet navah, hote tami teh kathounghoehe lah a pathang han. Atak dawc cawcaw ka yu e tami teh thoung hoeh, ka hrikbei katang e doeh. <sup>16</sup> Cawcaw ka yu e atak kâthung lah bout pangaw pawiteh vaihma koe bout a thokhai han. <sup>17</sup> Vaihma ni a khet navah patawnae bout pangaw e hah hmawt pawiteh vaihma ni a thoung telah a pathang vaiteh, ahni teh a thoung toe.

<sup>18</sup> Vuen dawc âhlut ao teh a dam hnukkhu, <sup>19</sup> Âhlut a onae a hmâ pangaw dawc a phing nakunghai thoseh, pangawpanang e hrikbei patetlah kamnuek pawiteh, vaihma ni a khet vaiteh, <sup>20</sup> Vuen thung lah a pha teh a muen pangaw pawiteh hote tami teh vaihma ni thoung hoeh telah a pathang han. Âhlut koehoi ka hrikbei e lah ao. <sup>21</sup> Vaihma ni a khet navah a muen ka pangaw e awm hoeh, vuen thung lah phat hoeh, meimei tamang pawiteh vaihma ni hote tami hah hnin sari touh a paung han. <sup>22</sup> Vuen dawc hmâ hoehoe len pawiteh hote tami teh vaihma ni thoung hoeh telah a pathang han. Hote tami teh ka hrikbei e doeh. <sup>23</sup> Hateiteh, kâlum e kampuen hoeh, kampai hoehpawiteh âhlut hmâ doeh. Hote tami teh a thoung telah a pathang han.

<sup>24</sup> Tak dawc vuen hmai a kak teh hmaikakhma cawcaw ka yu e dawc ka paling pangaw lah awm pawiteh, <sup>25</sup> Vaihma ni a khet han. A hmâ dawc e muen a pangaw teh vuen thung ka phat e patetlah awm pawiteh hmai kak dawc hoi ka tho e hrikbei doeh. Hote tami teh thoung hoeh telah vaihma ni a pathang han. Hrikbei patawnae doeh. <sup>26</sup> Vaihma ni a khet navah a hmâ dawc a muen pangaw e awm hoeh, vuen thung phat hoeh,



meimei tamang pawiteh vaihma ni hote tami teh hnin sari touh thung a paung han. <sup>27</sup> Apa sari hnin vaihma ni a khet navah, vuen dawk e hmâ hoe kampai pawiteh, hote tami teh thoung hoe, hrikbei ka pataw e doeh telah vaihma ni a pathang han. <sup>28</sup> Hateiteh, vuen dawk kâlum e kampuen hoe, kampai hoe, meimei tamang pawiteh hmaikakhma karado e doeh. Hote tami teh vaihma ni a thoung telah a pathang han. Hmaikak hmâ rumram doeh.

<sup>29</sup> Napui hoehpawiteh tongpa ni lû dawk thoseh, pâkha dawk thoseh, patawnae tawn pawiteh, <sup>30</sup> Vaihma ni a khet navah, vuen thung ka phat e lah ao teh a muen hai ka samenpanang lah awm pawiteh hote tami teh thoung hoe telah vaihma ni a pathang han. Lû dawk e hai thoseh, pâkha dawk e hai thoseh raipha patawnae doeh. <sup>31</sup> Vaihma ni hote patawnae a khet navah, vuen thung lah ka phat e lah awm hoe, a muen hai tamang hoehpawiteh, hote patawnae ka tawn e tami hah vaihma ni hnin sari touh a paung han. <sup>32</sup> A hnin sari hnin vaihma ni a khet navah, a hmâ kampai hoe, a muen hai samen hoe, vuen thung lah phat hoe pawiteh, <sup>33</sup> Hote tami e muen a ngaw pouh han. Hma dawk e muen teh ngaw pouh mahoe. Hnin sari touh bout a paung han. <sup>34</sup> A hnin sari hnin vaihma ni a khet navah, vuen dawk e hmâ kampai hoe, vuen thung lah hai phat hoehpawiteh vaihma ni a thoung telah a pathang han. Amae khohna hah a pâsu vaiteh ahni teh kathoung lah ao han. <sup>35</sup> a thoung toe telah a pathang hnukkhu, raipha patawnae bout kampai pawiteh, <sup>36</sup> Vaihma ni bout a khet vaiteh patawnae hoe kampai katang pawiteh vaihma ni a muen ka samen e tawng mahoe toe. <sup>37</sup> Hote tami teh thoung hoe. Hatei, raipha hah ama paroup lah a hmu teh a muen ka tamang e tâcawt pawiteh raipha a kahma teh, hote tami teh kathoung lah ao tawng dawkvah, vaihma ni hote tami hah a thoung toe telah a pathang han.

<sup>38</sup> Napui hai thoseh, tongpa hai thoseh a vuen dawk bahlaw awm pawiteh, <sup>39</sup> Vaihma ni a khet navah phouhou e awm pawiteh a vuen dawk e bahlaw doeh. Hote tami teh a thoung. <sup>40</sup> Sam ka sarut e tami teh a lû luengpalueng nakunghai thoseh a thoung. <sup>41</sup> Tampa sam ka sarut e tami teh a tampanga nakunghai a thoung. <sup>42</sup> A lû luengpalueng e thoseh, tampa ka nga e thoseh, ka pangaw ka paling tâcawt pawiteh, hote bahlaw teh hrikbei doeh. <sup>43</sup> Hat toteh, vaihma ni a khet vaiteh a vuen dawk hrikbei patetlah kamnuek pawiteh a nganae koe bahlaw pangaw paling lah tâcawt pawiteh, <sup>44</sup> Hote tami teh thoung hoe. Hrikbei patawnae ka tawn e doeh. Lû dawk patawnae a tâco dawk thoung hoe telah a pathang han.

<sup>45</sup> Ka hrikbei e tami teh a kapawn e khohna hah a khohna han. Luhuem laipalah atunglae pahni a huem vaiteh kathoung hoe, kathoung hoe telah a hram han. <sup>46</sup> Hote tami teh pou kathounghoehe, kakhin e tami lah ao. Kathounghoehe tami lah ao tawng dawkvah rim hlolah ao han.

<sup>47</sup> Ka hrikbei ni khohna e lukkarei thoseh, tu muen e thoseh, <sup>48</sup> Kawng e thoseh, phaivuen e thoseh, phaivuen hoi sak e khohna thoseh, <sup>49</sup> khohna ka kâbet e hmâ kahring ut lah, dukpaling lah kamnuek pawiteh, hrikbei patawnae doeh. Vaihma koe a patue han. <sup>50</sup> Vaihma ni khohna dawk ka kâbet e a khet vaiteh, hnin sari touh a paung han. <sup>51</sup> Asari hnin bout a khet vaiteh khohna dawk patawnae teh, kawng e khohna dawk thoseh, phaivuen dawk thoseh, phaivuen hoi sak e khohna dawk thoseh, thoung hoe hoe kampai pawiteh a patawnae teh tangpha a payang tawng dawkvah, thoung hoe. Hrikbei patawnae doeh toe. <sup>52</sup> Hote khohna



kawng e dawk thoseh, tu muen e thoseh, phaivuen e thoseh, phaivuen hoi sak e khohna thoseh, hmai a sawi han. Bangkongtetpawiteh, a hrikbei toe.

<sup>53</sup> Hateiteh, vaihma ni a khet navah, kawng e khohna, phaivuen hoi sak e khohna dawk patawnae kampai hoeh pawiteh, <sup>54</sup> Khohna a pâsu hanlah kê a poe vaiteh hnin sari touh bout a paung han. <sup>55</sup> A pâsu hnukkhu vaihma ni bout a khet navah, moihna hah kampai hoeh eiteh, patawnae amaproup lah awm pawiteh thoung hoeh, hmai a sawi han.

<sup>56</sup> Athunglah thoseh, alawilah thoseh hmâ cawcawyu pawiteh, a pâsu hnukkhu vaihma ni a khet vaiteh patawnae teh ka tamangpanang lah awm pawiteh, kawng e khohna, phaivuen dawk kêbet e hma kâlum e vek a phi han. <sup>57</sup> Kawng e khohna, khohna hanlah sak e phaivuen dawk thoseh, hmâ bout kamnuek pawiteh kampai thai e patawnae doeh. <sup>58</sup> Hot patet e patawnae kêbet e hnopai hmai a sawi han. Kawng e khohna, phaivuen hoi sak e khohna pueng, a pâsu vaiteh patawnae dam pawiteh apâhni lah bout a pâsu vaiteh a thoung han.

<sup>59</sup> Hete phunglam teh thoung hoi thounghoehnae pathang nahanelah, hrikbei kaman e hni, tumuen e khohna, kawng e khohna, phaivuen hoi sak e khohna kawi hoi kâkuen e kâlawk doeh telah ati.

## 14

### *Hrikbei kamthoungnae*

<sup>1</sup> Cathut ni Mosi koe, <sup>2</sup> Ka hrikbei e ni kamthoungnae hnin dawk a tarawi hane kawi phunglawk teh, <sup>3</sup> Hote tami hah vaihma koe a kaw hnukkhu, vaihma ni rim alawilah a tâco vaiteh a khet navah, hrikbei kahmat katang pawiteh, <sup>4</sup> Hote kathounge tami hanelah, kahring ni teh kathounge tava kahni touh, sidar thing, ka paling e pahla rui, dingsala dawn naw hah thokhai hanlah kê a poe han. <sup>5</sup> Vaihma ni tava buet touh e hah tui tanae talai hlaam thung a thei sak hnukkhu, <sup>6</sup> Sidar thingphek, pahla rui paling, dingsala dawn hoi cungtalah kahring e tava a thokhai vaiteh, tava thi kalawt tangcoun e thi dawk a ranup hnukkhu, <sup>7</sup> Hrikbei kathoung hane tami dawk vai sari touh a kahei vaiteh, hote tami teh a thoung toe telah a pathang han. Hat hnukkhu kahring e tava hah kahrawngum anganae koe a tha han. <sup>8</sup> Thoung sak hane tami hah amae khohna a pâsu vaiteh, a sam koun e ngaw hnukkhu, thoung nahanelah tui a kamhluk han. Hathnukkhu, rim dawk a kâen vaiteh, amae rim lawilah hnin sahnin touh ao han. <sup>9</sup> Asari hnin vah amae sam, pahnimuen, mitmuen, tak daw kaawm e muen pueng a ngaw vaiteh, amae khohna a pâsu hnukkhu, tui a kamhluk vaiteh, kathounge lah ao han.

<sup>10</sup> Apa taroe hnin dawk hai thoseh, kacueme âvâ ka cawt hoeh rae, tutanca kahni touh, a napui buet touh thoseh, tavai thoung hanelah, satui kalawt e tavai ephah pung hra pung touh, hoi satuium buet touh a thokhai han. <sup>11</sup> Kathoungsakkung vaihma ni thoungsak hane tami hah tamimaya kamkuengnae takhang teng BAWIPA hmalah a thokhai han. <sup>12</sup> Vaihma ni tutanca buet touh a la vaiteh, kâtapoe thueng nahanelah a thueng vaiteh, BAWIPA hmalah kahek thueng nahanlah satuim buet touh hoi a kahek han. <sup>13</sup> Tuca hah yon thuengnae sathei, hmaisawi thuengnae sathei theinae hmuen kathoung koe a thei han. Bangkongtetpawiteh, yon thuengnae hai vaihma ni a ham e doeh. Kathoung poung e lah ao. <sup>14</sup> Vaihma ni kâtapoe thuengnae sathei thi a la vaiteh, thoung sak lah



kaawm e tami e aranglae a hnârakong dawk thoseh, aranglae kutpui hoi aranglae khokpui dawk thoseh, a hluk han. <sup>15</sup> Satui hai youn touh a la vaiteh, amae kuttabei dawk a awi hnukkhu, <sup>16</sup> Hote satui hah, aranglae a kutdawn a ranup vaiteh, Cathut hmalah vai sari touh a kahek han. <sup>17</sup> A kut dawk e kacawie satui hah thoung sak lah kaawm e tami e a hnârakong dawk thoseh, aranglae kutpui hoi aranglae a khokpui dawk thoseh, kâtapoe thuengnae sathei thi a hluk han. <sup>18</sup> A kut dawk kacawi rae satui hah thoung sak lah kaawm e tami e a lû van a awi vaiteh, hote tami hanelah yonthanae BAWIPA hmalah a sak han. <sup>19</sup> Hothloilah, thoung sak lah kaawm e tami hanelah, yontha nahanlah yon thuengnae sathei a thueng vaiteh, hmaisawi thuengnae sathei hah bout a thei han. <sup>20</sup> Hmaisawi thuengnae hoi tavai thuengnae hah khoungröe dawk a thueng vaiteh, hote tami hanelah yonthanae a sak pouh vaiteh, hote tami teh a thoung han.

<sup>21</sup> Hote tami teh a mathoe dawk, hottelah totouh coung thai hoeh pawiteh, a kahek vaiteh, kâtapoe thueng nahanelah, yonthanae sathei, tutanca buet touh thoseh, tavai thueng nahanelah, satui kalawt e tavai ephah pung hra pung touh, satuium buet touh hoi a thokhai han. <sup>22</sup> Hathnukkhu, a coung thai e patetlah bakhu kahni touh, hoehpawiteh, âbakuha kahni touh hah, yon thueng nahanelah buet touh, hmaisawi thueng nahanelah buet touh, a thokhai han. <sup>23</sup> Ama kâthoung nahanelah, BAWIPA hmalah kamkhuengnae lukkareim takhang teng koe, vaihma koe ataroe hnin a thokhai hnukkhu, <sup>24</sup> vaihma ni kâtapoenae sathei, tuca hoi satuium buet touh a la vaiteh, BAWIPA hmalah kahek thuengnae a kahek han. <sup>25</sup> Hottelah, tuca a thei hnukkhu, thi a la vaiteh, thoungsak hane tami, aranglae hnârakong dawk thoseh, aranglae kutpui hoi aranglae khokpui dawk thoseh a hluk han. <sup>26</sup> Vaihma ni satui hai youn touh avoila kuttabei dawk a awi han. <sup>27</sup> Hote satui hah aranglae kutdawn hoi vai sari touh BAWIPA hmalah a kahei han. <sup>28</sup> A kut dawk e kacawie satui hah thoungsak lah kaawm e tami e aranglae hnârakong dawk thoseh, aranglae kutpui hoi aranglae khokpui dawk thoseh a hluk hnukkhu, kaawm e satui hah kâtapoe thuengnae sathei thi dawk thoseh a hlun han. <sup>29</sup> Ama koe kaawm rae satui hah, hote tami e a lû dawk a awi vaiteh, ahni hanlah yon thuengnae a sak pouh han. <sup>30</sup> Hote tami ni bakhu thoseh, âbaku thoseh, <sup>31</sup> Yon thueng nahanlah buet touh, tavai thuengnae hoi cungtalah, hmaisawi thueng nahanlah buet touh a thokhai vaiteh, Vaihma ni a thueng vaiteh, hote tami hanlah yonthanae BAWIPA hmalah a sak pouh awh han. <sup>32</sup> Hete phung teh ka hrikbei ni teh a thoung nahanlah ka tawn hoeh e mathoe hoi kâkuen e kâlawk lah ao telah atipouh.

<sup>33</sup> BAWIPA ni Mosi hoi Aron koe bout a dei pouh e teh, <sup>34</sup> Kai ni na poe e Kanaan ram coe hanlah na kâen awh toreit teh, na coe e ram buet touh dawm im buetbuet touh dawm Kai ni ka hrikbei sak pawiteh, <sup>35</sup> Imkung ni vaihma koe a cei vaiteh, Kaie im dawm ka hrikbei e ao patet telah tetpawiteh, <sup>36</sup> Hote im dawm kaawm e pueng thounghoehnae koe phat payon vai ti ngaihi ao dawkvah, vaihma ni ka hrikbei e hah a khet hoehnahlan, kaawm e pueng takhoe sak hanelah, kâ a poe han. Hathnukkhu, vaihma ni a khet hanelah imthung a kâen han. <sup>37</sup> Patawnae a khet nah tapang dawm kahring patet, ka paling patetlah ao teh tapang dawm a hmâ kâbet e patetlah awm pawiteh, <sup>38</sup> Imthung hoi alawilah a tâco vaiteh, hote im hah hnin sari touh thung tho a khan han. <sup>39</sup> Asari hnin



vaihma ni bout a khet vaiteh, tapang dawk patawnae hoe kampai pawiteh, <sup>40</sup> Hmâ kâbetnae talungnaw hah a la vaiteh, kho alawilah kakhin e hmuen koe tâkhawng hanelah kâ a poe han. <sup>41</sup> Hote imthung petkâtue lah a koe sak han. A koe e naw hah kho alawilah a khinnae hmuen koe a rabawk han. <sup>42</sup> Apasueke talung e hmuen koe alouke talung hah a la vaiteh, a ta hnukkhu, alouke lungphen hoi bout a pathoup han.

<sup>43</sup> Hottelah, talung a la vaiteh, im a koe e naw bout a pathoup hnukkhu, patawnae bout tawn rah pawiteh, <sup>44</sup> Vaihma ni a khet hanelah bout a tho navah hote im dawk patawnae hoe kampai pawiteh, tak kacate hrikbei doeh. Hote im hah thoung hoe e lah ao dawkvah, <sup>45</sup> talung, thing, tangpung kaawm e pueng a raphoe vaiteh, kho alawilah kakhin e hmuen koe a hruek han. <sup>46</sup> Hothloilah, hote imrakhan dawk kâen e pueng teh tangmin totouh thoung hoe. <sup>47</sup> Hote im dawk ka ip e tami, ka catnet e tami teh, amae khohna a pâsu han. <sup>48</sup> Im teh a pathoup hnukkhu, vaihma ni a khet navah, patawnae kampai hoehpawiteh, a dam toung dawkvah, hote im teh a thoung toe telah a pathang han. <sup>49</sup> Hote im a thoung nahanelah tava kahni touh, sidarthing, pahla paling hoi dingsala a sin vaiteh, <sup>50</sup> tui kalawng e tanae talai hlaam thung, tava buet touh e a thei han. <sup>51</sup> Sidarthing, dingsala, pahla paling hoi kahring e tava a la vaiteh, tava thi hoi kalawt e tui dawk a ranup hnukkhu, hote im dawk vai sari touh a kahei han. <sup>52</sup> Hottelah, tava thi, kalawng e tui, kahring e tava, pahla paling, dingsala hoi sidarthing hoi im thoung sak hnukkhu, <sup>53</sup> Kahring e tava hah a ngainae koe kho alawilah a tha vaiteh, hote im hanelah yonthanae a sak vaiteh, a thoung han.

<sup>54</sup> Hete phung heh hrikbei patawnae phunkuep hoi raipha patawnae, <sup>55</sup> Khohna daw kâbet e hrikbei hoi im daw kâbet e hrikbei. <sup>56</sup> Tak daw kâ pâphu e, ka pathak e, kâlum e hrikbei, hot patet e kong daw, <sup>57</sup> athoung hoi athounghoe e kapek vaiteh, panue thai nahanelah, poe e kâlawk doeh telah atipouh.

## 15

### *Tak daw hoi ka tâcawt e hno kathounghoehe*

<sup>1</sup> BAWIPA ni Mosi hoi Aron koe bout a dei pouh e teh, <sup>2</sup> Nangmouh roi ni Isarel miphunnaw koe na dei pouh hane teh, tongpa tie pueng atak daw kâ lapac tâcawt pawiteh, hote lapac teh thoung hoe. <sup>3</sup> Pou a tâco nakunghai thoseh, avaiwai a tâco nakunghai thoseh, hote tami teh thoung hoe.

<sup>4</sup> A inae, a tahungnae naw pueng hai thoung hoe. <sup>5</sup> Ahnie ikhun kâbet e tami, a tahungnae daw kâ tahung e tami teh, <sup>6</sup> Ahnie tak kâbet e tami hoi.

<sup>7</sup> Tamtui kâbet e tami teh amae e khohna a pâsu vaiteh tui a kamhluk han.

<sup>8</sup> Hote tami teh tangmin totouh thoung hoe.

<sup>9</sup> A kâcuinae rangdoun hai thoung hoe. <sup>10</sup> Hote tami e rahim kaawm e hno kâbet e tami teh tangmin totouh thoung hoe. Hote hno buetbuet touh ka sin e tami teh amae khohna a pâsu vaiteh tui a kamhluk han. Tangmin totouh thoung hoe. <sup>11</sup> Lacip ka tâcawt e tami ni a kut pâsu laipalah alouke tami a kut hoi tek pawiteh, hote tami teh a khohna a pâsu vaiteh tui a kamhluk han. Tangmin totouh thoung hoe. <sup>12</sup> Lacip ka tâcawt e tami ni a kâbet e talai hlaam rek hem han. Thingtongben teh tui hoi pâsu han.



<sup>13</sup> Lacip ka tâcawt e tami a patawnae a dam torei teh, a damnae hnin hoi a kamtaung vaiteh, hnin sari touh aloum hnukkhu, amae khohna a pâsu vaiteh, tui kalawng a kamhluk vaiteh a kamthoung han. <sup>14</sup> Ataroe hnin vah, bakhu kahni touh thoseh, âbakhu kahni touh thoseh buetbuet touh Cathut hmalah kamkhuengnae lukkareiim takhang koe a thokhai vaiteh vaihma koe a poe han. <sup>15</sup> Vaihma ni yon thueng nahanelah buet touh, hmaisawi thueng nahanelah buet touh a thueng vaiteh lacip ka tâcawt e tami hanelah BAWIPA hmalah yonthanae a sak pouh han.

<sup>16</sup> Tongpa ni a yangtui tâcawt pawiteh tui a kamhluk han. Tangmin totouh thoung hoe. <sup>17</sup> A yangtui kâbet e pueng teh tui hoi pâsu han. Ama hai tangmin totouh thoung hoe. <sup>18</sup> Tongpa ni napui hoi ip roi pawiteh tui a kamhluk roi han. Tangmin totouh thoung hoe.

<sup>19</sup> Napui ni kampheng pawiteh hnin sari touh thung thoung hoe. Ahni kâbet e tami hai tangmin totouh thoung hoe. <sup>20</sup> A kampheng lahun nah a inae hoi a tahungnae naw pueng hai thoung hoe. <sup>21</sup> Ahnie a inae hoi a tahungnae ka kâbet e tami teh amae khohna a pâsu vaiteh tui a kamhluk han. <sup>22</sup> Hote tami teh tangmin totouh kathounghoehe lah ao. <sup>23</sup> A inae ikhun dawk thoseh, a tahungnae dawk thoseh, a pacâ e thi ka kâbet e tami teh tangmin totouh thoung hoe. <sup>24</sup> Ka kampheng e napui hoi ka ip e tami teh hnin sari touh thung thoung hoe. A inae pueng haiyah thoung hoe.

<sup>25</sup> A kamphengnae hnin akuap hnukkhu, a thi khap hoe rah pawiteh, a thikhap hoehroukrak, kamphengnae tueng patetlah thoung hoe. <sup>26</sup> A thikui e a dam hoehroukrak ahnie a inae hoi a tahungnae teh a kamphengnae patetlah thoung hoe. <sup>27</sup> Hote hnonaw ka kâbet e tami hai a thounghoehe dawkvah amae e khohna a pâsu vaiteh tui a kamhluk han. Tangmin totouh thoung hoe. <sup>28</sup> Hote napui teh thikui e a khap hnukkhu, hnin sari touh loun pawiteh a thoung han. <sup>29</sup> Ataroe hnin vah, bakhu kahni touh thoseh, âbakhu kahni touh thoseh, buetbuet touh kamkhuengnae lukkareiim takhang koe, vaihma koevah a thokhai han. <sup>30</sup> Vaihma ni yon thueng nahanelah buet touh, hmaisawi thueng nahanelah buet touh a thueng vaiteh, kampheng nah kathounghoehe napui hanelah BAWIPA hmalah yonthanae a sak pouh han.

<sup>31</sup> Hottelah, Isarel miphunnaw ni ahnimouh koe kaawm e Kaie lukkareiim a khin sak awh teh, a thounghoehnae dawk a due awh hoe hahanlah a kamthoung awh han. <sup>32</sup> Hete phung teh tak dawk hoi lacip ka tâcawt e, a yangtui ka tâcawt ni teh kakhin e tami, ka kampheng e napui, <sup>33</sup> Napui tongpa o inae dawk tarawi hane kawi phung doeh atipouh.

## 16

### *Kâmaiawinae hnin*

<sup>1</sup> Aron e capa roi ni BAWIPA hmalah thuengnae a sak teh a due roi hnukkhu, BAWIPA ni Mosi koe a dei pouh e teh, <sup>2</sup> Na hmau Aron ni a due hoe nahanelah, hmuen kathoung dawk thingkong van, lungmanae tungkhung hmalah nâtuok hai kâen sak hanh. Kai teh thingkong van, lungmanae tungkhung hmalah tâmai dawk hoi ka kamnue han.

<sup>3</sup> Aron ni lukkarei hmuen kathoung thung bangtelah hoi maw a kâen han tetpawiteh, yon thueng nahanelah, a kum kanaw e maitotan buet touh, hmaisawi thueng nahanelah tutan buet touh a thokhai han.

<sup>4</sup> Kathoung lukkarei angki hoi hna a khohna vaiteh lukkarei taisawm a



kâyeng han. Lukkarei lupawk hai a pawk han. Hote khohnanaw teh a thoung dawkvah, tui a kamhluk hnukkhu a khohna han. <sup>5</sup> Isarel miphun tamimaya naw koe e, yon thueng nahanelah hmaeca kahni touh, hmaisawi thueng nahanelah tu buet touh a la han.

<sup>6</sup> Aron ni amae yon thueng nahanelah maito a thueng vaiteh, ama hoi a imthungkhunaw hanelah yonthanae a sak han. <sup>7</sup> Hmae kahni touh hai a thokhai vaiteh, kamkhuengnae lukkareiim takhang koe, Cathut hmalah a poe han. <sup>8</sup> Aron ni hmae kahni touh hane kong dawc cungpam a rayu han. Buet touh e Cathut hanelah a rayu vaiteh, bout touh e teh kahrawngum tha hanelah a rayu han. <sup>9</sup> Cathut e cungpam lah a rayu e hmae teh Aron ni a la vaiteh yon thueng nahanelah a thueng han. <sup>10</sup> Tha hanelah cungpam a rayu e hmae teh a hring lahoi Cathut hmalah a poe vaiteh, a lathueng yonthanae a sak hnukkhu, kahrawngum a nganae koe a tha han.

<sup>11</sup> Aron ni amae yon thueng nahanelah maito a thokhai hnukkhu, ama hoi a imthungkhunaw hanelah yonthanae a sak vaiteh, amae yon thuengnae maito a thei han. <sup>12</sup> Cathut hmalah khoungroe hmaisaaan hoi kakawi e tongben buet touh a la vaiteh, kanui lah phawm e hmuittui kutvang touh hoi, lukkarei yap e athunglah kâenkhai han. <sup>13</sup> Aron ni duenae dawc hoi a hlout nahanelah hmuittui e hmaikhu ni lawkpanuesaknae thingkong khuem hmuittui sak hanelah BAWIPA hmalah hmuittui van a phuen han. <sup>14</sup> Maito thi youn touh a la vaiteh, Kanitholah thingkong khuem van a kutdawn hoi a kahei han. Thingkong khuem a hmalah hai vai sari touh a kutdawn hoi a kahei han.

<sup>15</sup> Hathnukkhu, taminaw hanelah yon thuengnae hmae a thei vaiteh, a thi hah lukkarei yap e athunglah a kâenkhai hnukkhu, maito thi a kahei e patetlah thingkong khuem van thoseh, a hmalah hai thoseh, a kahei han. <sup>16</sup> Isarel miphunnaw e thounghoeahnae yon dawc thoseh, kâtapoenae yon pueng dawc thoseh, hmuen kathoung hanelah yonthanae a sak han. Hottelah, Isarel miphunnaw thounghoeahnae yon thung kaawm e naw kamkhuengnae lukkareiim hanelah a sak han. <sup>17</sup> Hmuen kathoung koe yonthanae sak hanelah, a kâen nah, ama hanelah a imthungnaw hanelah, Isarel miphun abuemlah hanelah, yonthanae a sak teh, a tâco hoehroukrak kamkhuengnae lukkareiim thung apihai awm mahoeah.

<sup>18</sup> BAWIPA hmalah khoungroe koe bout a tâco vaiteh, yonthanae a sak hanelah, maito thi, hmae thi, a la vaiteh khoungroe kinaw dawc a hlun han. <sup>19</sup> Thuengnae khoungroe van hai hote thi hah a kutdawn hoi vai sari touh a kahei vaiteh, Isarel miphunnaw e thounghoeahnae a thoung sak han.

<sup>20</sup> Hottelah, hmuen kathoung hanelah, kamkhuengnae lukkareiim hanelah, khoungroe hanelah, yonthanae a sak hnukkhu, hmae a hring lah a thokhai han. <sup>21</sup> Aron ni kahring e hmae lû van a kut kahni touh hoi a tounge vaiteh, Isarel miphunnaw e yonnae naw hoi a sakpayonnae pueng yonpâpho vaiteh, hmae lû van a tounge pouh hnukkhu, a rawi e tami buet touh ni kahrawngum a ceikhai han. <sup>22</sup> Ahnimae yonnae pueng tami ohoehnae hmuen koe ka cetkhai e hote hmae hah kahrawngum a tha han.

<sup>23</sup> Aron ni kamkhuengnae lukkareiim thung bout a kâen vaiteh, hmuen kathoung koe apasuek a kâen navah, a kho e loukloukkaang e khohna a kho e hah a rading vaiteh, hmuen kathoung koe a ta han. <sup>24</sup> Hmuen kathoung koe tui a kamhluk vaiteh amae khohna a khohna hnukkhu, bout a tâco vaiteh, Ama hoi taminaw hanelah hmaisawi thuengnae sathei hah



a thueng vaiteh, Ama hoi ayânaw hanelah yonthanae a sak han. <sup>25</sup> Yon thuengnae sathei thaw teh khoungroe van vah hmai a sawi han.

<sup>26</sup> Kahrawngum hmae ka tha e tami hai amae khohna a pâsu vaiteh tui a kamhluk hnukkhu, a onae rim dawk bout a kâen han. <sup>27</sup> Yon thuengnae maito hoi yon thuengnae hmae thi yonthanae sak hanelah hmuen kathoung koe kâenkhai e hah rim alawilah a ceikhai han. A pho, a moi, hoi a ei hah hmaisawi han. <sup>28</sup> Hmai ka sawi e tami hai amae khohna a pâsu vaiteh, tui a kamhluk han. Hathnukkhu, roenae rim koe a cei han.

<sup>29</sup> Nangmouh ni na tarawi awh hane phung teh Isarelnaw thoseh, nangmouh koe kaawm e imyinnaw thoseh, Asari e thapa, hnin hra hnin vah, thaw na tawk awh mahoe. Na kâhat awh han. <sup>30</sup> Bangkongtetpawiteh, BAWIPA hmalah nangmanaw yonnae pueng dawk hoi na thoung awh nahanelah, hote hnin dawk vaihma ni nangmouh na thoung a nahanelah yonthanae a sak han. <sup>31</sup> Hote hnin teh nangmouh na kâhat nahanelah sabbath hnin lah ao dawkvah duem na kâhat awh han. <sup>32</sup> A na pa e yueng lah vaihma thaw ka tawk hanelah, apasueke vaihma kut dawk hoi satu awi lah kaawm e tami ni yonthanae a sak han. Hote vaihma teh kathoung lukkaree khohna a khohna han. <sup>33</sup> Hmuen kathoung hanelah, kamkhuengnae lukkareim hanelah, khoungroe hanelah, vaihmanaw hanelah, tami pueng hanelah yonthanae a sak han.

<sup>34</sup> Hete phung teh Isarel miphunnaw ni a yonnae kaawm pueng dawk, kum touh dawk vai touh, yonthanae sak hanelah, nangmouh ni pou na tarawi a hanelah, kâpoe e lah ao telah Cathut ni Mosi koe lawkthui e patetlah Aron ni a sak.

## 17

### *Thuengnae hmuen*

<sup>1</sup> BAWIPA ni Mosi koe, <sup>2</sup> Nang ni Aron hoi a capa, Isarel miphunnaw koe bout na dei pouh han e teh, <sup>3</sup> Isarel miphun dawk e tami buetbuet touh ni tu, hmae maito hah rim thung a thei nakunghai thoseh, rim alawilah a thei nakunghai thoseh, <sup>4</sup> Cathut e lukkareim hmalah, Cathut koe thuengnae sak hanelah, kamkhuengnae lukkareim takhang koe thokhai hoehpawiteh, hote tami teh hringnae a thei dawk a yon telah pouk han. Thi ka palawng e hote tami teh a miphun dawk hoi takhoe lah ao han. <sup>5</sup> Isarel miphunnaw ni kahrawng um vah thueng e satheinaw hah kamkhuengnae lukkareim takhang hmalah, Cathut koe vaihma hmalah a thokhai vaiteh, roum thuengnae a sak han. <sup>6</sup> Vaihma ni hote sathei thi hah tamimaya kamkhuengnae takhang teng e khoungroe van a kahei vaiteh, athaw hai Cathut koe hmuitui hanlah hmai a sawi han. <sup>7</sup> Ahnimouh ni apasueke a kâyo awh e patetlah hmalah kahraituilinaw koe thuengnae bout sak awh mahoe. Hete kâlawk teh ahnimae miphun catounnaw ditouh a tarawi hane kâlawk lah ao.

<sup>8</sup> Isarel miphun thoseh, nangmouh koe kho ka sak e alouke miphun thoseh, hmaisawi thuengnae hoehpawiteh, alouke sathei buetbuet touh, a thueng navah, <sup>9</sup> BAWIPA koe thuengnae a sak han navah, kamkhuengnae lukkareim takhang koe a thokhai hoehpawiteh, hote tami teh a miphun dawk hoi na takhoe awh han telah ahnimouh koe na dei pouh awh han.

### *Thi ca cakânae*

<sup>10</sup> Isarel miphunnaw na hoehpawiteh, nangmouh koe kho ka sak e alouke miphunnaw, buetbuet touh ni thi cat pawiteh, hote tami teh kai ni ka maithoe vaiteh a miphun dawk hoi ka takhoe han.



<sup>11</sup> Bangkongtetpawiteh, tak hringnae teh thi dawk doeh ao. Nangmae na sak e yontha nahanelah, hote thi hah nang koe thuengnae khoungröe van ka poe toe. Tami e yon katha thai e teh thi doeh. <sup>12</sup> Hatdawkvah, nangmouh dawk apihai thi na cat awh mahoe. Nangmouh koe kho ka sak e alouke miphunnaw hai thi cat awh mahoe telah Isarel miphunnaw koe Kai ni kâ ka poe.

<sup>13</sup> Isarel miphunnaw hoehpawiteh nangmouh koe kho ka sak e alouke miphunnaw buetbuet touh ni a hrampa teh ca hanelah moithang tava man pawiteh, thi a palawng vaiteh talai hoi a paten han. <sup>14</sup> Thi teh moithang pueng e hringnae lah ao. Hatdawkvah, nangmouh ni moithang buetbuet touh e thi na cat awh mahoe telah Isarel miphunnaw koe kâ ka poe. Moithangnaw pueng ni a hringnae teh thi dawk ao dawkvah, thi ka cat e tami teh takhoe roeroe lah ao han. <sup>15</sup> Amahmawk kadout e saring, sarang ni a kei e caha ka cat e, mae miphun, alouke miphun thoseh, amae khohna a pâsu vaiteh tui a kamhluk han. Tangmin totouh kathounghoehe lah ao. <sup>16</sup> Khohna pâsu hoe, tui hai kamhluk hoehpawiteh amae a yonnae ama ni a khang han telah BAWIPA ni ati.

## 18

### *Kamsoumhoehe napui tongpa yon cakânae*

<sup>1</sup> BAWIPA ni Mosi koe, <sup>2</sup> nang ni patuen na dei pouh hane teh, Kai teh nangmae BAWIPA Cathut lah ka o. <sup>3</sup> Nangmouh ni ouk na onae Izip ram e nuencang thoseh, nangmouh na kâen khai nahane ram Kanaan ram e a nuencang thoseh, nangmouh ni na tarawi awh mahoe. Ahnimae lamthung hai na dawn awh mahoe. <sup>4</sup> Kai ni kâ na poe e patetlah na tarawi awh vaiteh, Kaie ka phunglam dawk na hring awh han. Kai teh nangmae Cathut Jehovah lah ka o.

<sup>5</sup> Hatdawkvah, Kaie ka phunglamnaw hah tarawi awh. Hote phung ka tarawi e tami teh hote phung lahoi a hring han. Kai teh BAWIPA doeh.

<sup>6</sup> Nangmouh thung dawk apihai ama hoi kâhnai e tami yonkhai mahoe. Kai teh BAWIPA doeh. <sup>7</sup> Nange na pa hoi kâkuen e na manu na ipkhai mahoe. Na manu lah ao dawkvah na yonkhai mahoe. <sup>8</sup> Na pa e yu koe na hnai mahoe. Na pa hoi kâkuen e lah ao. <sup>9</sup> Im touh dawk rei khe e thoseh, alouke kho dawk khe e thoseh, na tawncanu na ipkhai mahoe. <sup>10</sup> Na minca na ipkhai mahoe. <sup>11</sup> Manu Alouklouk ei teh, na pa buet touh e na tawncanu na ipkhai mahoe. <sup>12</sup> Na mani thoseh, <sup>13</sup> na manta thoseh, <sup>14</sup> na pa e hmaunawnggha hoi kâkuen e a yuca hai thoseh, <sup>15</sup> na capa e a yu, na langa hai thoseh, <sup>16</sup> hmaunawnggha hoi dueng kâkuen e na hmaunawnggha e a yu hai thoseh, na ipkhai mahoe. <sup>17</sup> Na yu hoi kâhnai lah kaawm e na yu e canu, na yu e minca na ipkhai mahoe. Hot patet hateh, kahawihoehe hno doeh. <sup>18</sup> Na yu a hring navah, runae na poe hoe hohanlah a nawnggha na lat mahoe. <sup>19</sup> Na yu a kampheng lahun nah na ipkhai mahoe.

<sup>20</sup> Ayâ yu na yonkhai mahoe. Ayâ yu yonkhainae teh mahoima kâkhinsaknae doeh. <sup>21</sup> Na canaw hah Molek koe thuengnae lah na sak mahoe. Na Cathut e min na pathoe mahoe. Kai teh BAWIPA doeh. <sup>22</sup> Napui hoi rei na i e patetlah tongpa hoi rei na ip mahoe. <sup>23</sup> Panuetkathoe e hno doeh. Ma kâkhinsaknae doeh. Saring na ka ipkhai mahoe. Napui hai thoseh, saring hoi na ip sak mahoe. Panuetkathoe e lah ao.



<sup>24</sup> Hot patet e hno hoi namamouh hoi namamouh na kâkhinsak awh mahoe. Bangkongtetpawiteh, hete hno a sak awh kecu daw, nangmae hmalah ka takhoe e miphunnaw ni hottelah a sak awh teh a khin awh toe. <sup>25</sup> Ahnmae ram hai a khin. A khin kecu daw Kai ni ka toun awh teh hote ram ni amae canaw a palo awh han. <sup>26</sup> Nangmouh teh Kai ni ka dei e phunglamnaw hah na tarawi awh han. <sup>27</sup> Hote ram ni hmaloe kaawm e miphunnaw a palo e patetlah bout na khin awh vaiteh, na palo awh hoe h nahanlah ram thung e tami thoseh, nangmouh koe kho ka sak e alouke miphunnaw thoseh, hot patet e panuetho e na sak awh mahoe. <sup>28</sup> Hot patet e hno panuetho e saknae lahoi ahnmae ram teh a khin toe.

<sup>29</sup> Hot patet e hno panuetho e ka sak e tami teh a miphun daw hoi takhoe lah ao han. <sup>30</sup> Hatdawkvah, hmaloe a sak a e panuetho e singyoe, nangmouh ni dawn laihoi na kâkhinsak awh hoe h nanelah, kâlawk tarawi awh. Kai teh nangmae BAWIPA Cathut doeh telah ati.

## 19

### *BAWIPA teh a thoung*

<sup>1</sup> BAWIPA ni Mosi koe, <sup>2</sup> Nang ni Isarel miphun, rangpuinaw koe bout na dei pouh hane teh, nangmae BAWIPA, Kai teh kathounge patetlah nangmouh hai thoung van awh. <sup>3</sup> Tami pueng ni na manu hoi na pa na bari awh han. Kaie sabbath hnin hai na ya awh han. Kai teh nangmae BAWIPA Cathut doeh. <sup>4</sup> Kutsak na baw awh mahoe. Ma hanelah hlun e cathutnaw na sak awh mahoe. Kai teh nangmae BAWIPA Cathut doeh. <sup>5</sup> Roun thuengnae sathei BAWIPA koe thuengnae na sak pawiteh, BAWIPA lung ka youk lah na thueng awh han. <sup>6</sup> Thuengnae hnin hoi atangtho hnin daw na ca awh han. Cawi pawiteh, a tawkkahnin teh hmai na sawi awh han. <sup>7</sup> Tawkkahnin daw yitca nakunghai na cat awh pawiteh, panuetho e lah ao. Lungyouk lah awh mahoe. <sup>8</sup> Ka cat e tami teh BAWIPA thoungnae a khinsak dawkvah, a yonnae phu teh ama ni a khang han. Hote tami teh a miphun daw hoi takhoe lah ao han.

### *Namahoima patetlah na imri lungpataw*

<sup>9</sup> Na law daw e cang na a torei teh, lawrai lae koun na a awh mahoe. Cabong bout na hrawm a torei hai na pahnim a e bout na hrawm awh mahoe. <sup>10</sup> Misur paw hai koun na khi awh mahoe. Kacawie a paw bout na khi awh mahoe. Hote a paw teh, kamathoe e tami, hoi imyinnaw hanelah, na pek awh han. Kai teh nangmae BAWIPA Cathut doeh. <sup>11</sup> Ayâ e hno na parawt awh mahoe. Ayâ na dum awh mahoe. Buetbuet touh laithoe na kâdei awh mahoe. <sup>12</sup> Kaie min lahoi kahmanhoe lah thoe na ka bo awh mahoe. Na Cathut e min mathout sak awh hanh. Kai teh BAWIPA doeh. <sup>13</sup> Na imri e hno kamsoum hoe lahoi lawm hanh. Thama lahoi lat pouh hanh. Counnae phu hah karum loun sak hanh. <sup>14</sup> Hnâpang thoe na bo mahoe. Mitdawn hmalah kamthui kawi hno na tat pouh mahoe. Na Cathut hah barih. Kai teh BAWIPA doeh. <sup>15</sup> Lawkcengnae koe kamsoum hoe lah lawk na ceng mahoe. Kamathoe e noutna laipalah awh hanh. Athakaawme tami minhmai khen hanh. Na imri hah kamsoum lah lawk na ceng han. <sup>16</sup> Ayânaw minhmai mathoenae kamthang hah dei hanelah na taminaw koe na kâhlai mahoe. Na imri runae kâhmo sak hanlah na kâcai mahoe. Kai teh BAWIPA doeh. <sup>17</sup> Na lung thung hoi na hmaunawnggha hmuhmanae na tawn mahoe. Na imri a payonnae hah pak khen laipalah na yue katang han. <sup>18</sup> Na taminaw ni



nang koe payon awh pawiteh, bout pathung hanh. A yonnae hah pâkuem pouh hanh. Na imri hah nama patetlah lungpataw. Kai teh BAWIPA doeh.

### *Kaie cangkhae na tarawi han*

<sup>19</sup> Kaie phunglawk na tarawi awh han. Aphun alouklouk e saring a napui, a na tongpa âvâ na yawng sak mahoe. Cati alouklouk e mak kâkalawt lah law dawk na patue awh mahoe. Pahla hoi tumuen carouk teh kawng e khohna na khohnat awh mahoe. <sup>20</sup> Paluen hanelah sut ham teh ratang hoe hae a sannu ka ipkhai e tami teh hemnae a khang han. Hote napui teh amae san lah ao dawkvah thei lah awm mahoe. <sup>21</sup> Tongpa ni hai kâtapoe thueng nahanelah, tutan buet touh kamkhuengnae lukkareim takhang koe BAWIPA koevah a thokhai han. <sup>22</sup> Hote tongpa ni a sakpayon e yontha nahanelah, kâtapoe thuengnae tutan hah, vaihma ni BAWIPA hmalah a thueng han. Hote tongpa teh yon ngaithoum lah ao han.

<sup>23</sup> Nangmouh koe Kai ni na poe e ram dawk na pha awh toteh, cakawi thingthai aphunphun na ung awh hnukkhu, kum thum touh thung kapaw e a pawnaw hah, vuensoma hoe e a paw telah na pouk awh vaiteh, na cat awh mahoe. <sup>24</sup> A kum palinae kapaw e a paw pueng teh a thoung dawkvah BAWIPA pholen nahanelah pasoum lah ao. <sup>25</sup> A kum panganae a pawnaw hah na ca awh han. Hottelah na sak pawiteh thingthainaw hoe a paw han. Kai teh nangmae BAWIPA Cathut lah ka o.

<sup>26</sup> A thi hoi bangpatet e a moi hai mek na cat awh mahoe. Tami na ân mahoe. Kut na khet hoi khueyue lawk na dei mahoe. <sup>27</sup> Na lû kâkalup lah na sam na ngaw mahoe. Pâkhamuen na ngaw mahoe. <sup>28</sup> Kadout e tami hanelah na tak na a mahoe. Mangkâkhuinae na sak mahoe. Kai teh BAWIPA doeh.

<sup>29</sup> Na canu kâyawt sak hanh. Hoehpawiteh ram ni kâyawt e koe kâbang vaiteh, kahawihoehe hno hoi akawi han. <sup>30</sup> Sabbath hnin hah na ya han. Kaie hnin kathoung hah na bari han. Kai teh BAWIPA doeh.

<sup>31</sup> Nama hoi nama kâkhinsak hanelah kahrai khueyue koe, kamlang hanh. Hmaui hai tawng awh hanh. Kai teh nangmae BAWIPA Cathut doeh.

<sup>32</sup> Sam ka po e hmalah kangdout nateh, matawng e minhmai na bari han. Na Cathut hah na taki han. Kai teh BAWIPA doeh. <sup>33</sup> Nangmouh koe kârayen e imyin hah na rektap mahoe. <sup>34</sup> Nangmouh koe kârayen e imyin hah na tami patetlah na pouk han. Nama patetlah na lungpataw han. Nangmouh teh Izip ram vah imyin lah ouk na o awh toe. Kai teh nangmae BAWIPA Cathut doeh.

<sup>35</sup> Banguenae, Khingnae, tonae dawkvah kamsoum hoe lah na sak mahoe. <sup>36</sup> Kahman e yawcu, khinglung, Kahman e ephah, kahman e hinnaw hah na hno han. Kai teh Izip ram hoi nangmouh ka tâcawtkhai e nangmae BAWIPA Cathut lah ka o. <sup>37</sup> Kaie phunglamnaw puenghoi lawk tâtueng e naw pueng hah na tarawi awh han. Kai teh BAWIPA doeh telah ati.

## 20

### *Camo thueng reknae*

<sup>1</sup> BAWIPA ni Mosi koe, nang ni Isarel miphunnaw koe bout na dei pouh hane teh, <sup>2</sup> Isarel taminaw thoseh, Isarelnaw koe kho ka sak e alouke miphunnaw thoseh, amae canaw Molek koe, ka poe e tami teh thei roeroe



han. Khocanaw ni talung hoi a dei awh han. <sup>3</sup> Kaie hmuen kathoung kakhin sak niteh, Ka min kathoung kamathout sak niteh, amae canaw Molek koe ka poe e tami teh, Kai ni mithmaithung sin vaiteh, a miphun dawk hoi ka takhoe han. <sup>4</sup> Amae canaw Molek koe ka poe e tami hah, khocanaw ni nout laipalah thet awh hoeh pawiteh, <sup>5</sup> Hottelah kaawm e tami hoi a imthungkhunaw hah, Kai ni mithmaithung sin vaiteh, ahni hai thoseh, ahni hoi cungtalaw Molek koe, ka kâyawtnaw hai thoseh, ahnimae miphun dawk hoi ka takhoe han.

<sup>6</sup> Lam ka phen ni teh kahrai khueyue koe kamlang e taminaw hoi camkathounnaw koe kâyawt e naw hah, mithmaithung sin vaiteh, a miphun dawk hoi ka takhoe han. <sup>7</sup> Nangmae BAWIPA KAI Cathut teh kathoung dawkvah nangmouh hai kâthoung sak awh nateh, kathoung lah awm awh. <sup>8</sup> Kaie ka phunglamnaw hah na tarawi awh han. Kai teh BAWIPA, nangmouh na kathoung sak e BAWIPA doeh.

<sup>9</sup> Apipatethai a manu, hoi a na pa thoe ka bo e tami pueng teh, thei roeroe lah ao han. A manu hoi a na pa thoe a bo dawkvah, a thi phu teh amae lû dawk a bo han.

### *Kamsoumhoehe napui tongpa yon reknae*

<sup>10</sup> Ayâ yu yonkhai pawiteh, ka uicuk e napui hoi tongpa hah mek thei lah ao han. <sup>11</sup> Apihai a na pa e yu yonkhai pawiteh, a na pa kaya sak e lah ao dawkvah, hote napui hoi tongpa mek thei lah ao han. Ahnimae thi phu teh amae lû dawk a bo han. <sup>12</sup> Apihai amae langa ipkhai pawiteh, ahnimouh roi panuetttho e hno hah a sak dawkvah, mek thei lah ao han. <sup>13</sup> Apihai napui ikhai e patetlah tongpa reira ipkhai pawiteh, ahnimouh roi teh panuetttho e hno a sak roi dawkvah, mek thei lah ao han. Ahnimouh roi e thi phu teh amamouh roi dawk a bo han. <sup>14</sup> Apihai a manu hoi canu a yu lah mek lat pawiteh, Hot teh, kahawihoehe hno doeh. Nangmouh koevah kahawihoehe hno ao hoeh nahanelah, ahnimanaw teh hmai na sawi awh han.

<sup>15</sup> Apihai saring ipkhai pawiteh, ahni teh thei lah ao han. Hote saring hai thei lah ao han. <sup>16</sup> Napui ni saring koe kâ ipkhai sak pawiteh, hote napui hoi saring teh mek thei lah ao han. Ahnie thi phu teh amae lû dawk a bo han. <sup>17</sup> Tongpa ni a tawncanu, a na pa e canu, na hoehpawiteh, a manu e canu a yu lah a paluen teh ipkhai pawiteh, hot hateh, kamsoumhoehe hno doeh. Ahnimouh roi teh a taminaw e hmaitung hoi takhoe lah ao han. Hote tongpa teh amae tawncanu a okhai dawkvah a yonnae phu ama ni a khang han. <sup>18</sup> Tongpa ni kampheng lahun e napui ipkhai pawiteh, thi palawng hanlah a lungkuep roi dawkvah, ahnimouh roi teh a miphun dawk hoi takhoe lah ao han. <sup>19</sup> Na mani hoi na manta na ipkhai mahoe. Hottelah, kâhnai e imthung hoi ka ipawm e tami teh amamae yonnae a khang han. <sup>20</sup> Tongpa ni a na pa e hmaunawnggha yu ipkhai pawiteh, a na pa e hmaunawnggha hoi dueng kâkuen e a ikhai dawkvah, ahnimouh teh amae yon phu teh amae lû dawk a bo han. Carôe laihoi a due han. <sup>21</sup> Tami ni a hmaunawnggha e yu ipkhai pawiteh, kakhin e hno lah ao. A hmaunawnggha hoi dueng kâkuen e a ikhai dawkvah, ahnimouh teh carôe laihoi a due han.

<sup>22</sup> Kai ni nangmouh na hrawi awh teh, kho na sak hane ram ni na palo awh hoeh nahanelah, Kaie phunglawknaw pueng na tarawi awh han.

<sup>23</sup> Nangmae hmalah ka takhoe e miphunnaw e singyoe hah na tarawi awh mahoe. Ahnimanaw ni hot patet e hno a sak awh dawkvah ka panuet.



<sup>24</sup> Ahnimae ram lah kaawm e sanutui hoi khoitui a lawngnae ram hah, nangmouh ni râw lah na coe awh hanelah, Kai ni khoeroe na poe awh han telah Kai ni kâ na poe awh toe. Kai teh alouke miphunnaw hoi nangmouh na kapek e nangmae BAWIPA Cathut lah ka o.

<sup>25</sup> Hatdawkvah, kathounge moi, kathounghoehe moi, kathounge tava, kathounghoehe tavanaw hah na kapek han. Kai ni kapek e patetlah Kathounghoehe moi, tava, talai dawk a von hoi kâva e saring buetbuet touh lahoi namahoima kâkhinsak awh hanh. <sup>26</sup> Kai Cathut, kathoung dawkvah nangmouh na panki teh Jentelnaw hoi na kapek dawkvah, Kai hanelah na kâthoung awh han.

<sup>27</sup> Tongpa thoseh, napui thoseh, kahrai khueyue, camkathoum lah kaawm e tami teh thei roeroe lah ao han. Hot patet e tami teh, talung hoi dei lah ao han. Amae thi phu amae lû dawk a bo han.

## 21

### *Thoungnae hoi Vaihmanaw*

<sup>1</sup> Cathut ni Mosi koe, nang ni Aron capa, vaihmanaw koe bout na dei pouh hane teh, na miphunnaw duenae dawk apihai na kâkhinsak awh mahoe. <sup>2</sup> Hateiteh, kahnai poung e manu napa, canaw, hmaunawnggha, <sup>3</sup> Vâ ka tawn hoeh rae na tawncanu hanelah, khin thinae kâ a tawn. <sup>4</sup> Na tami khobawinaw hanelah kâkhinsak hanelah awh hoeh.

<sup>5</sup> Vaihma teh lû hoi pâkhamuen ngaw mahoe. Atak hai kâbouk mahoe. <sup>6</sup> Ahni teh amamae Cathut hanelah a thoung han. Na Cathut e min mathout sak awh hanh. Cathut e canei a thueng awh dawkvah, a thoung han. <sup>7</sup> Ahni teh kâyawt e napui, a nuencang kahawihoehe napui, vâ hoi kamphei e napui hoi na kâyuva mahoe. Bangkongtetpawiteh, vaihma teh Cathut hanelah kâthoung e lah ao. <sup>8</sup> Vaihma teh na Cathut e vaiyei ka poe e lah ao dawkvah, amahoima kâthoung naseh. Nangmouh na kathoung sak e Kai BAWIPA teh kathoung dawkvah, ahni hai nangmouh hanlah kâthoung naseh. <sup>9</sup> Vaihma e canu ni amae tak a kâyo teh amahoima min mathoenae sak pawiteh, a na pa min kamathout sak e lah ao. Ahni teh hmai hoi sawi lah ao han.

<sup>10</sup> Hmaunawnggha thung dawk vaihma kacue lah rawi teh, a lû dawk satui awi lah kaawm e teh, a khohna ravek hanh naseh. A lû dawk e lupawk rading hanh naseh. <sup>11</sup> Ro koe cet hanh naseh. A manu hoi a na pa hanelah kathounghoehe lah awh hanh naseh. <sup>12</sup> Hmuen kathoung koehoi tâcawt mahoe. Amae Cathut e hmuen kathoung khin sak mahoe. Bangkongtetpawiteh, amae Cathut ni rawinae satui ahni dawk ao toe. Kai teh BAWIPA doeh.

<sup>13</sup> Tanglakacuem duengdoeh a yu lah a la han. <sup>14</sup> Lahmai thoseh, Ma e napui thoseh, Min mathoe ka phawt e napui thoseh, kâyawt e napui thoseh, yu lah lat mahoe. A miphun dawk e tanglakacuem dueng hah a la han. <sup>15</sup> Amae capa hah a taminaw koe min mathout sak mahoe. Kai Cathut teh ahnimanaw kathoung sak e doeh telah ati.

<sup>16</sup> BAWIPA ni Mosi koe, nang ni Aron koe bout na dei pouh hane teh, <sup>17</sup> Na miphunnaw, catounnaw dawk yon ka tawn e tami teh vaiyei thueng hanelah tho hanh naseh. <sup>18</sup> Mitdawn, khokkhem, a hnawng ka uek e, a kutkhok hloi kasaw e taminaw, <sup>19</sup> kut ka lawt e, a khok ka lawt e, <sup>20</sup> Hnamkhun, rahnoum, mitmawm, raipha, ngavangrawca, yangmukhe e taminaw teh bawk mahoe. <sup>21</sup> Vaihma Aron phun dawk e ka kuepcing



hoeh e tami buet touh ni boehai hmaisawi thuengnae hah hnai mahoe. Tak ka kuepcing hoeh e lah ao dawkvah, vaiyei poe hanelah hnai mahoe.

<sup>22</sup> Kathounge vaiyei thoseh, kathoungpounge vaiyei thoseh, amae Cathut e vaiyei teh a ca han. <sup>23</sup> Tak ka kuepcing hoeh dawkvah, hni yap e thung thoseh, thuengnae khongrooe thoseh, cet awh mahoe. Telah hoehpawiteh, Kaie hmuen kathoung khin payon vaih. Kai BAWIPA ni hote hmuennaw teh kathoung sak toe ati.

<sup>24</sup> Hottelah, Mosi ni Aron hoi capanaw, Isarel miphunnaw pueng koe patuen a dei pouh.

## 22

<sup>1</sup> BAWIPA ni Mosi koe bout a dei pouh e teh, <sup>2</sup> Aron hoi capanaw ni kai hanelah thoung sak laihoi ka min mathoe hoeh hanelah, Isarel miphunnaw e kathounge hnonaw hoi amamouh hoi kâhla sak hanlah dei pouh. Kai teh BAWIPA doeh. <sup>3</sup> BAWIPA hanelah Isarel miphunnaw thoung sak nateh, kathounge hnonaw hah, thoung laipalah ka hnai e vaihmanaw teh, Kai koehoi takhoe lah ao han. Kai teh BAWIPA doeh. <sup>4</sup> Ka hrikbei e hoi laci patawnae ka tawn e Aron e capanaw teh, a thoung awh hoehroukrak kathounge hno cat awh mahoe. Ro hoi kâkuen lah kathounghoehe hno ka tek e tami, a yangtui ka tâcawt e tami, <sup>5</sup> Ama kakhin sak thai e, a von hoi ka kâva e saring ka tek e tami, khinnae buetbuet touh hoi kâkhinsak e tami, hot patet e tami kâbet e taminaw teh, <sup>6</sup> Tangmin totouh kathounghoehe lah ao awh han. Tui kamhluk hoehpawiteh kathounge cat mahoe. <sup>7</sup> Kanî a khup hoi teh kathounge lah ao toung dawkvah, Kathounge hno teh ahnimae rawca lah ao dawkvah bout a ca han. <sup>8</sup> Ama pouk kadout e saring, sarang ni a kei e caha cat mahoe. Kai teh BAWIPA doeh. <sup>9</sup> Vaihmanaw ni ka phunglam a raphoe awh teh, a yonnae kecu dawka due awh hoeh nahanelah, Kaie phunglam a tarawi awh han. Kai teh nangmouh kathoung sak e BAWIPA doeh. <sup>10</sup> Alawilae tami ni kathounge hno poe e hah, cat mahoe. Vaihma im ka luen e imyin ni cat mahoe. Thaw taw hanlah hlai e tami ni hai cat mahoe. <sup>11</sup> Vaihma ni phoisa hoi a ran e tami, a kawka e taminaw ni hote rawca teh a ca han. <sup>12</sup> Vaihma canu teh alawilae tami ni a yu lah lat pawiteh, kathounge hno poe e hah cat mahoe. <sup>13</sup> Hateiteh, a vâ a due nakunghai thoseh, a vâ hoi kamphei nakunghai thoseh, ca khe laipalah a na pa im bout a ban teh a nawnae patetlah bout awm pawiteh, a na pa ni a ca e bout a ca han. Alawilae tami ni cat mahoe. <sup>14</sup> Tami ni kathounge hno panuek laipalah cat payon pawiteh, ca payonnae hno phu hoi pung panga touh dawka pung touh vaihma koe bout a sin han. <sup>15</sup> Isarel miphunnaw ni BAWIPA koe poe e kathounge hnonaw hah, khin sak mahoe. <sup>16</sup> Hote hnonaw ka cat payon ni teh sak payonnae yon teh amamouh ni a khang han. Bangkongtetpawiteh, Kai teh nangmouh kathoung sak e BAWIPA doeh.

### *Dâw kawi e thuengnae*

<sup>17</sup> BAWIPA ni Mosi koe, nang ni Aron hoi a canaw, Isarelnaw pueng koe patuen na dei pouh han e teh, <sup>18</sup> Isarel miphun thoseh, Isarelnaw koe kho ka sak e jentelnaw thoseh, lawkkam e lahoi poe e hno, lungtho lahoi poe e hno lah kaawm e hmaisawi thuengnae Cathut koe thueng han na ngai pawiteh, <sup>19</sup> Cathut lungyouk nahanelah kacueme tu, hmae, hoi maitotannaw hah na poe awh han. <sup>20</sup> Toun kaawm e saring na poe awh mahoe. Poe pawiteh Cathut ni a lungyouk mahoe.



<sup>21</sup> Lawkkam e lahoi poe e, lungtho e lahoi poe e tu, hmae, hoi maitonaw hah BAWIPA koe roun thuengnae lah poe han na ngai pawiteh, a lungyouk thai nahanlah, akuepcing han. Toun han buet touh boehai awm han naseh.

<sup>22</sup> A mit ka dawn e, A hru ka lawt e, a tak ka kuep hoehe e, a hmâ ka cat e, ka pâphu e, ka raipha e, hot patet e patawnae buet touh awm pawiteh, Cathut koe poe mahoehe. <sup>23</sup> Ma lungtho hoi poenae dawh teh, maito thoseh, tu thoseh, a takthai ka vout e lahoi poenae dawh teh hot patet e hah a lungyouk mahoehe. <sup>24</sup> A yangtuen buet touh ka khe e, hoehpawiteh, ka tangpawh e, hoehpawiteh phengcatai e teh Cathut koe poe mahoehe. Nangmae ram thung hot patet e thuengnae na sak awh mahoehe. <sup>25</sup> Hot patet e saring hah Jentelnaw ni ka poe nakunghai toun ao dawkvah na Cathut e pawî hanlah poe hanh naseh. Poe pawiteh a lungyouk mahoehe telah ati.

<sup>26</sup> BAWIPA ni Mosi koe bout a dei pouh e teh, <sup>27</sup> Tu, hmae hoi maito naw a khe navah, hnin sari touh thung a ca hoi a manu na papek awh mahoehe. A hnin taroe hnin hoi doeh, BAWIPA koe hmai thuengnae hanlah a khout.

<sup>28</sup> Maito thoseh, tu hoi hmae thoseh, a manu hoi a ca hnin touh dawh mek na thet mahoehe. <sup>29</sup> Hahoi, BAWIPA koe lunghawilawhkeinae thuengnae poe hanlah na ngai pawiteh a lungyouk lah poe haw. <sup>30</sup> Hnin touh hoi be na ca han. Atangtho ditouh na pek mahoehe. Kai teh BAWIPA doeh.

<sup>31</sup> Nangmouh ni kaie kâpoelawknaw na tarawi awh han. Kai teh BAWIPA doeh. <sup>32</sup> Ka min kathoung heh na khin sak awh mahoehe. Isarelnaw ni BAWIPA a thoung telah a panue awh han. <sup>33</sup> Kai teh nangmae Cathut lah ka o nahanlah, Izip ram hoi na ka tâcawt sakkung hoi na kathoung sakkung lah ka o. Kai teh BAWIPA doeh telah ati.

## 23

### *BAWIPA e Pawinaw*

<sup>1</sup> BAWIPA ni Mosi koe, nang ni Isarelnaw koe bout na dei pouh hane teh, <sup>2</sup> Nangmouh ni na sak e kathoung kamkhuengnae, Kai BAWIPA e pawinaw teh; Hnin taruk touh thung thaw na tawh awh han. Hnin sari hnin teh kâhatnae sabbath hnin, kathoung kamkhuengnae lah ao.

### *Sabbath*

<sup>3</sup> Hnin taruk touh thung thaw na tawh awh han. Hateiteh, hnin sari hnin teh kâhatnae, kamkhuengnae hnin kathoung lah ao dawkvah bang thaw haiyah na tawh awh mahoehe, na onae pueng koevah BAWIPA hanlah sabbath hnin lah ao.

### *Ceitakhai*

<sup>4</sup> Ama tueng nah nangmouh ni na pathang awh hane kathoung kamkhuengnae lah kaawm e Cathut pawinaw teh; <sup>5</sup> Apasueke thapa, hnin hlaipali, tangmin nateh BAWIPA e ceitakhai pawî doeh. <sup>6</sup> Hote thapa, hnin hlaipanga hnin teh BAWIPA hanlah tonphuenhoehe pawî lah ao. Hnin sari touh thung tonphuenhoehe na ca awh han. <sup>7</sup> Apasuek hnin vah kathoung kamkhuengnae na sak awh han. Bang thaw hai na tawh awh mahoehe. <sup>8</sup> Hateiteh, hnin sari touh thung BAWIPA koe rawca thuengnae na sak awh han. Asari hnin nah kathoung kamkhuengnae na sak han. Hat hnin nah, bang thaw hai na tawh mahoehe telah a ti.

### *Aluepaw*

<sup>9</sup> Cathut ni Mosi koe bout a dei pouh e teh, nang ni Isarel miphunaw koe patuen na dei pouh hane teh; <sup>10</sup> Kai ni na poe e ram dawh na pha awh



toteh, cang na a awh toteh, apasuek na a e cabong buet touh vaihma koe na thokhai awh han. <sup>11</sup> Nangmouh ni a lungyouk awh nahanlah vaihma ni sabbath hnin atangtho vah hote cabong hah Cathut hmalah a kahek han. <sup>12</sup> Cabong a kaheknae hnin dawkvah âvâ ka cawt hoeh rae tutanca hah BAWIPA hanlah hmaisawi thuengnae a sak han. <sup>13</sup> Hote thuengnae hoi ka kâkuen e tavai thuengnae teh Cathut koe hmuitui hanlah hmaisawi thuengnae lah kaawm e satui hoi kalawt e tavai ephah pung hra pung touh kalawt e lah ao han. Awi thuengnae teh misurtui buet touh han. <sup>14</sup> Na Cathut koe thuengnae hnin a pha hoehnahlan vah, vaiyei, vaicakuem karê e, anhla kahring a pawhik na cat awh mahoe. Hetteh, na onae hmuen pueng koe na catoun ditouh na tarawi hane phunglam lah ao.

### *A yat paw*

<sup>15</sup> Kahek thuengnae cabong na thokhainae hnin, sabbath hnin atangtho hoi sabbath avai sari totouh na touk awh han. <sup>16</sup> Sabbath avai sarinae atangtho amom hoiyah hnin 50 touh na touk hnukkhu, Cathut koe tavai thuengnae a tha lah bout na sak han. <sup>17</sup> BAWIPA hanlah aluepaw, ton ni a po sak e tavai ephah pung hra pung hni hoi sak e kahek hane vaiyei kahni touh na im hoi na sin awh han. <sup>18</sup> Hote vaiyei hoi âvâ ka cawt hoeh rae tuca sari touh, maitotanca buet touh, hmae kahni touh, tavai thuengnae, awi thuengnae hoi cungtalaw BAWIPA koe hmuitui nahanlah hmai hoi sawi e thuengnae lah kaawm e hmaisawi thuengnae sathei hah na thueng awh han. <sup>19</sup> Yon thuengnae lah hmaeca buet touh thoseh, roun thuengnae hanlah âvâ ka cawt hoeh rae tuca kahni touh thoseh, na thueng han. <sup>20</sup> Vaihma ni aluepaw, vaiyei hoi cungtalaw a kahek vaiteh, tuca kahni touh a sin vaiteh BAWIPA hmalah kahek thuengnae a sak han. Hote hnouaw haiyah vaihma hanlah BAWIPA hmalah kathounge hno lah ao. <sup>21</sup> Hote hnin dawc kathoung kamkhuengnae hah na sak awh han. Thaw banghai na tawc awh mahoe. Na onae hmuen pueng koe na ca catoun ditouh na tarawi awh hane phunglawk lah ao. <sup>22</sup> Na law dawc cang na a awh navah, lawri totouh koung na a awh mahoe. Cabong na pâhma e hah bout na racawng mahoe. Hotnaw teh karoedengnaw hoi imyinnaw hanlah na pek pouh han. Kai teh nangmae BAWIPA Cathut doeh telah a ti.

### *Mongka*

<sup>23</sup> BAWIPA ni Mosi koe, nang ni Isarel miphunnaw koe patuen bout na dei pouh hane teh, <sup>24</sup> Nangmouh ni tha sari, apasuek hnin nah mongka ueng pawl kathoung kamkhuengnae sabbath hnin hah na ya awh han. <sup>25</sup> Thaw na tawc awh mahoe. BAWIPA hanlah hmaisawi thuengnae na sak han telah a ti.

### *Rounnae hnin*

<sup>26</sup> Cathut ni Mosi koe bout a dei e teh, <sup>27</sup> Tha sari, hnin hra navah, yonthanae hnin, kathoung kamkhuengnae saknae hnin lah ao. Khang laihoi BAWIPA hanlah hmaisawi thuengnae na sak awh han. <sup>28</sup> Hote hnin dawc bang thaw hai na tawc mahoe. Na BAWIPA Cathut hmalah yonthanae hnin lah ao. <sup>29</sup> Hote hnin nah, ka ya hoeh e taminaw teh amae miphun dawc hoi takhoe lah ao han. <sup>30</sup> Hote hnin dawc thaw buetbuet ka tawc e tami teh a miphun dawc hoi a takhoe vaiteh ka raphoe han. <sup>31</sup> Bang thaw hai na tawc awh mahoe. Na onae hmuen pueng koe na ca catoun ditouh na tarawi awh hane phunglawk lah ao. <sup>32</sup> Hote hnin teh yanae hnin lah ao. Atako hnin tangmin lahoi atangtho tangmin



ditouh na ya awh han. <sup>33</sup> Cathut ni Mosi koe, nang ni Isarel miphunnaw koe patuen bout na dei pouh hane teh, <sup>34</sup> Nangmouh ni tha sari, hnin hrahlaipanga hnin hoi hnin sari touh thung Cathut hanelah lukkarei paw na sak awh han. <sup>35</sup> Apasuek hnin dawk kathoung kamkhuengnae na sak awh han. Thaw na tawk awh mahoe. <sup>36</sup> Hnin sari touh thung BAWIPA koe hmaisawi thuengnae na sak awh han. A hnin taroe hnin haiyah, kathoung kamkhuengnae hoi BAWIPA koe hmaisawi thuengnae hah na sak awh han. Ka talue e kamkhuengnae lah ao dawkvah thaw na tawk awh mahoe. <sup>37</sup> Hotnaw teh, BAWIPA e sabbath hnin, BAWIPA koe pasoumhno, <sup>38</sup> Lawkkamnae lahoi thuengnae, lungtho lahoi thuengnae hloilah hnin touh hoi hnin touh BAWIPA koe hmaisawi thuengnae, tavai thuengnae, sathei thuengnae hoi awi thuengnae naw sak e lah kathoung kamkhuengnae, BAWIPA e pawinaw lah ao. <sup>39</sup> Hotnaw hloilah, law dawk e caticamu pâkhueng hnukkhu, tha sari, hnin hrahlaipanga hnin hoi hnin sari touh thung BAWIPA koe paw na to awh han. Apasuek hnin hoi a taroe hnin vah sabbath na ya awh han. <sup>40</sup> Apasuek hnin dawk a paw kahawihloe e, samtue kang hoi a hna karung e thingkangnaw hah a sin awh teh, Nangmae BAWIPA Cathut hmalah hnin sari touh thung na lunghawi sak awh. <sup>41</sup> Hote paw hah kum kum touh dawk hnin sari touh thung Cathut hanlah na sak awh han. Na miphun na catoun ditouh tarawi hane kawi phunglawk lah ao. <sup>42</sup> Hote pawiteh thapa ayung sari nah na sak awh han. <sup>43</sup> Isarel miphunnaw Izip ram hoi tâcokhai navah, thingkang rim dawk o saknae hah na miphun, na catounnaw ni a panue thai nahanelah, Isarelnaw teh thingkang rim dawk hnin sari touh ao han. Kai teh nangmae BAWIPA Cathut doeh a ti. <sup>44</sup> Mosi ni hai BAWIPA e pawinaw hah Isarel miphunnaw koe na pathang pouh.

## 24

### *Hmaiimnaw*

<sup>1</sup> BAWIPA ni Mosi koe bout a dei e teh, <sup>2</sup> Rangpui kamkhuengnae lukkareiim dawk lawkpanuesaknae lukkarei yap e alawilah, hmaikhom dawk hmai pou a ang nahanlah, Olive paw na phawm vaiteh, na lae olive satui hah Isarel miphunnaw ni nang koe thokhai hanelah patuen dei pouh. <sup>3</sup> Aron ni hai tangmin hoi amom totouh Cathut hmalah hote thaw a tawk han. Na miphun na catounnaw ditouh tarawi hane kâ poe e lah ao. <sup>4</sup> Kathounge hmaiimkhok dawk hmaiimnaw hah Cathut hmalah Aron ni pou a rakueng han.

### *Lukkareiim hanelah vaiyei*

<sup>5</sup> Nang ni tavai na la vaiteh, ephah pung hra pung hni touh e hah vaiyei buet touh lah, vaiyei hrahlaikahni touh na sak hnukkhu, <sup>6</sup> BAWIPA hmalah kathounge caboi van vah, vaiyei taruk taruk touh hoi pung hni telah na pacoung han. <sup>7</sup> BAWIPA koe hmaisawi thuengnae lah kaawm e pahnim hoeh nahanelah, hote vaiyei pung hni touh e van vah, kathounge frankinsen na ta han. <sup>8</sup> Cathut e lawkkam patetlah Isarelnaw e kut dawk hoi dâw e vaiyei hah, Aron ni Cathut hmalah sabbath hnintangkuem pou a rakueng han. <sup>9</sup> Hote vaiyei teh Aron hoi a canaw e lah ao dawkvah hmuen kathoung dawk a ca awh han. BAWIPA koe hmaisawi thuengnae thung dawk hote vaiyei teh a yungyoe phunglam patetlah Aron hanlah kathoungpoung lah ao telah a ti.

### *Pathoenae*



<sup>10</sup> Hahoi Isarel napui e capa, a na pa teh Izip tami, Isarelnaw onae koe a cei teh, Isarel napui e capa hoi Isarel tami e capa teh roenae rim thung a kâyue roi. <sup>11</sup> Cathut e min a pacekpahlek teh thoe a bo. Ahnie a manu teh Dan miphun, dibri e canu Shelomith lah ao. <sup>12</sup> Ka payon e tami hah Mosi koe a thokhai awh teh, BAWIPA e ngainae a panue hoehroukrak a paung awh. <sup>13</sup> BAWIPA ni Mosi koe, <sup>14</sup> Thoe ka bo e tami hah rim alawilah a hrawi awh teh, ahnie lawk ka thai naw pueng ni a lû van kut a toung pouh hnukkhu, rangpuinaw ni talung hoi dei awh naseh. <sup>15</sup> Nang ni Isarel miphunnaw koe patuen na dei hane teh, Cathut thoe ka bo e tami teh ama ni a khang han. <sup>16</sup> Cathut e min ka pacekpahlek e tami teh thei roeroe lah ao han. Rangpuinaw ni hote tami hah talung hoi a dei katang awh han. A miphun thoseh, alouke miphun thoseh, a min pacekpahlek pawiteh thei lah ao han.

### *Mit hanelah mit*

<sup>17</sup> Tami ka thet e tami hai thei roeroe lah ao han. <sup>18</sup> Saring ka thet e tami hai katawnkung koe buet touh thet pawiteh buet touh apu a rawng pouh awh han. <sup>19</sup> Tami ni a imri lungpataw sak pawiteh, ahni koe a sak e patetlah ama ni a khang han. <sup>20</sup> A hru hanlah a hru, mit hanlah mit, hâ hanlah hâ, ahni koe patawnae na sak e patetlah nama hai patawnae na khang han. <sup>21</sup> Saring ka thet e tami teh buet touh hanelah buet touh bout a poe han. Tami ka thet e tami teh thei lah ao han. <sup>22</sup> A miphun thoseh, alouke miphun thoseh, ama dueng lahoi lawkcengnae teh a khang han. Kai teh nangmae BAWIPA Cathut doeh telah Mosi koe atipouh. <sup>23</sup> Thoe ka bo e tami teh rim alawilah a hrawi awh vaiteh talung hoi dei hanelah Mosi koe patuen a dei pouh teh, Cathut ni Mosi koe lawkthui e patetlah Isarel miphunnaw ni a sak awh.

## 25

### *Sabbath kum*

<sup>1</sup> Sinai mon daw, BAWIPA ni Mosi koe, nang ni Isarel miphunnaw koe patuen bout na dei pouh hane teh, <sup>2</sup> Kai ni na poe e ram daw na pha awh toteh, Hote ram ni BAWIPA hanlah sabbath ayâ han. <sup>3</sup> Kum taruk touh thung law hoi misur takha na sak awh vaiteh, apawhik na pâkhueng awh han. <sup>4</sup> Kum sarinae kum teh BAWIPA hanlah sabbath kum, ram thung kaawm e pueng kâhat vaiteh, sabbath yanae kum lah ao. Law na sak mahoe. Misur takha hai na rasoun mahoe. <sup>5</sup> Law daw, ama pouk kapâw e apawhik hai na khi mahoe. Na rasoun hoe e misur hai na khi mahoe. Ram pueng kâhatnae kum lah ao. <sup>6</sup> Ram thung sabbath kum nah ka tâcawt e apawhik pueng teh namamouh, napui hoi tongpa, na thaw ka taw e hoi, nang koe kaawm e imyinnaw hoi, <sup>7</sup> ram thung kaawm e saring pueng ni ca hane kawi lah ao han.

### *Jubili kum*

<sup>8</sup> Sabbath kum, kum sari touh na parei vaiteh, kum sari vai sari touh tie kum 49 akuap hnukkhu, <sup>9</sup> Tha sari, hnin 10, yonthanae hnin daw mongka hah ram pueng daw ueng sak han.

<sup>10</sup> Aruipanganae kum hah thong sak vaiteh, ram pueng daw khoca pueng koe hloutnae pathang han. Jubili kum lah ao dawkvah tami pueng amae talai, amae phun koe a ban han. <sup>11</sup> Hote aruipanganae kum teh Jubili kum lah ao dawkvah law na sak mahoe. ama pouk kapâw e hai



na a mahoe. Rasoun hoe e misur takha daw e a paw hai na khi awh mahoe. <sup>12</sup> Jubili kum teh kathounge kum lah ao dawkvah law daw e apawhik dueng ca han. <sup>13</sup> Jubili kum nateh tami pueng ni amae khoram lah a ban awh han. <sup>14</sup> Nangmouh ni buet touh hoi buet touh yorannae na sak pawiteh buet touh hoi buet touh kâyue awh hanh. <sup>15</sup> Jubili kum aloum teh a ngai rae kumnaw apawhik a paw nahan a kum parei vaiteh yorannae na sak han. <sup>16</sup> Hottelah, a paw paw na kum parei hoi yo e lah ao dawkvah, kum ayoun apap e patetlah aphu payoun, paluen lahoi yoran han. <sup>17</sup> Nangmouh teh buet touh hoi buet touh kâyue awh hanh. Na Cathut taket awh. Kai teh nangmae BAWIPA Cathut lah ka o.

<sup>18</sup> Nangmouh ni ka phunglam hah na tarawi pawiteh hote ram daw lungmawng lahoi kho na sak awh han. <sup>19</sup> Talai ni hai apawhik a tâco sak vaiteh, kaboumlah na ca awh vaiteh, lungmawng lah kho na sak awh han. <sup>20</sup> Nangmouh ni hai asari kum nah, kaimouh ni bangtelamaw ka ca awh han. Law ka sak awh hoe. Apawhik hai ka pâkhueng awh hoe na tet awh pawiteh, <sup>21</sup> A kum taruk nah, nangmouh yawhawinae na poe vaiteh, hote kum daw kum thum touh hane apawhik ka tâco sak han. <sup>22</sup> nangmouh ni a kum taroe nah law na sak teh a kum tako nah apawhik pâkhuengnae totouh a karuem e apawhik na ca awh han.

### *Hnopai rungngangnae*

<sup>23</sup> Talai hah ayâ pou tawn sak hanelah, yawt hanh. Talai teh Kaie doeh. Nangmouh teh Kai koe kârayen e imyin lah na o awh. <sup>24</sup> Nangmouh ni talai na tawn a e hmuen pueng bout ratangnae kâ na poe awh han. <sup>25</sup> Na hmaunawngghanaw ni roedeng boilah a tawn e talai yawt pawiteh, kahnai e hmaunawnggha ni a yo e talai hah bout ratangnae kâ ao han. <sup>26</sup> Hote talai hah ka ratang hane buet touh hai awm hoehpawiteh, ka tawn karuem ni ama ni bout ratang thai pawiteh, <sup>27</sup> A yonae kum hah a touk vaiteh, aphu yit touh bout poe naseh. Hote talai teh bout a coe han. <sup>28</sup> Bout poe thai hoehpawiteh, a yo e hno hah jubili kum totouh ka ran e kut daw e sak han. Jubili kum nah tha pawiteh, hmaloe e katawnkung e kut daw bout a pha han.

<sup>29</sup> Khopui daw e im hah imkung ni yawt pawiteh, kum touh thung ratang thainae kâ ao sak han. <sup>30</sup> Kum touh thung ratang thai hoehpawiteh, hote im ka ran e catounnaw ni pou a tawn han. Jubili kum ka phat nakunghai tha pouh mahoe toe. <sup>31</sup> Rapan ka tawn hoe e kho daw kaawm e im hah law patetlah a pouk vaiteh, ratang thainae kâ ao. Jubili kum pha toteh a tha pouh han.

<sup>32</sup> Hat navah, Levihnaw ni a tawn e khopui hoi khopui daw e imnaw teh nâtuék hai thoseh, ratang thainae kâ ao. <sup>33</sup> Levih ni a tawn e im hoi kho thoseh, ayâ ni ran pawiteh, Jubili kum a pha toteh a tha han. Bangkoktetpawiteh, Isarel miphun daw Levihnaw teh ama onae kho hoi im hloilah alouke hno tawn hoe. <sup>34</sup> Hateiteh, Levih kho daw kaawm e imlaw naw yawt mahoe. Pou a tawn awh han. <sup>35</sup> Nange na hmaunawnggha ni a roedeng lawi, imyin patetlah tho pawiteh, nang koe o sak hanlah na kabawp han. <sup>36</sup> Ahni koe apung na cat mahoe. Na hmaunawnggha hah, nang koe o sak hanelah, na Cathut taket loe. <sup>37</sup> Apung ngaihaw lahoi ahni koe tangka thoseh, canei thoseh na cawi mahoe. <sup>38</sup> Kai ni Kanaan ram na poe awh teh, nangmae Cathut lah ka o nahanlah nangmouh Izip ram hoi na ka tâcawtkhai e nangmae BAWIPA Cathut doeh.



<sup>39</sup> Na hmaunawngnga ni a roedeng dawkvah nang koe kâyawt pawiteh, san patetlah na hno mahoe. <sup>40</sup> Ahni teh hlai e patetlah thoseh, imyin patetlah thoseh, nang koe ao vaiteh, Jubili kum totouh na thaw a tawk han. <sup>41</sup> Hat navah, ahni teh a canaw hoi a tâco vaiteh amae a hmaunawngnga, a mintoenaw e talai koe lah bout a ban han. <sup>42</sup> Bangkongtetpawiteh, ahnimouh teh Izip ram hoi ka tâcokhai e ka thaw ka tawk e lah ao dawkvah san lah o hanelah na yawt mahoe. <sup>43</sup> Ahni teh puenghoi na rektap mahoe. Na Cathut hah taket.

<sup>44</sup> Nang ni na tawn hane sannu sanpa teh na tengpam kaawm e Jentelnaw koe na ran han. <sup>45</sup> Hothloilah, nangmouh koe kho ka sak e alouk ram e taminaw thoseh, na ram dawk a khe e a canaw thoseh, na ran vaiteh na tawn han. <sup>46</sup> Ahnimanaw teh san dawk hoi ka khe e lah ao teh, nang hoi na canaw ni râw lah na tawn han. Na hmaunawngnga, Isarel miphun dawk e tho pawiteh, buet touh hoi buet touh puenghoi na rektap mahoe.

### *Mathoe ratangnae*

<sup>47</sup> Nangmouh koe kho ka sak e alouke tami ni a tawnta ei teh, ahnie teng kho ka sak e na hmaunawngnga a roedeng teh, nang koe kho ka sak e alouke ram e taminaw koe thoseh, a ca catounnaw koehai thoseh, kâyawt awh pawiteh, <sup>48</sup> Yo hnukkhu, bout ratang thainae kâ ao han. A hmaunawngnga lah kaawm e buetbuet touh ni a ratang han. <sup>49</sup> A na hma, a panga, a hmaunawngnga koehoi rei ka tâcawt e imthung buetbuet touh ni a ratang han. Ama ni ratang thai pawiteh a ratang han. <sup>50</sup> Bawi hoi sannaw teh yorannae kum dawk hoi kamtawng vaiteh, Jubili kum totouh kum a parei hnukkhu, a kum ayoun apap e patetlah thoseh, a hlinae tueng khet lahoi thoseh, aphu teh to han. <sup>51</sup> Jubili kum a pha hoehnahlan a thawtawknæ kum ayoun apap e parei vaiteh, <sup>52</sup> A ngai rae a kumtha ayoun apap e patetlah ratang nahane aphu hah rannae phu dawk hoi rayu vaiteh bout a pâban han. <sup>53</sup> Ahni teh kum touh hnukkhu, kum touh hlai e patetlah ao han. Na hmaitung vah rektap lah awm hanh naseh. <sup>54</sup> Hottelah hoi ratang thai hoehpawiteh, Jubili kum a pha toteh, ahni teh a canaw hoi bawi e kut dawk hoi a hlout han. <sup>55</sup> Bangkongtetpawiteh, Isarelnaw teh ka thaw ka tawk e lah ao awh. Izip ram hoi ka tâcokhai e ka thaw ka tawk e lah ao awh. Kai teh nangmae BAWIPA Cathut doeh.

## 26

### *Lawkngainæ dawkwawhawinae*

<sup>1</sup> BAWIPA ni bawk hanlah kutsak thoseh, talung ung e thoseh, meilam thuk e talung thoseh, na sak awh mahoe. Kai teh nangmae BAWIPA Cathut doeh. <sup>2</sup> Kaie Sabbath hah na ya awh vaiteh ka hmuen kathoung na bari awh han. Kai teh BAWIPA doeh.

<sup>3</sup> Kaie phunglawknaw hoi kâpoelawknaw hah na tarawi pawiteh, <sup>4</sup> Ama tue nah kho ka rak sak han, talai ni apawhik a tâco sak vaiteh takha thung e thingthainaw ni a paw awh han. <sup>5</sup> Canganae teh misur paw khinae tueng totouh thoseh, misur paw khinae teh law tunæ tueng totouh thoseh, a pha vaiteh, nangmouh ni kaboumlah na ca awh vaiteh, na ram dawk lungmawngcalah kho na sak awh han. <sup>6</sup> Na ram dawk taran karoum sak vaiteh, katarengkung awm laipalah ihmutuï lah na i awh han. Sarangnaw hah na ram dawk hoi ka pâlei vaiteh na ram pueng ni tahloi duenæ dawk hoi a hlout awh han. <sup>7</sup> Nangmouh ni na tarannaw na pâlei awh vaiteh,



tahloi hoi na thei awh han. <sup>8</sup> Nangmouh thung dawk tami panga touh ni taran 100 touh na pâlei awh han. Tami 100 touh ni taran thong hra, touh na pâlei awh vaiteh, tahloi hoi na tâ awh han.

<sup>9</sup> Yawhawinae na poe awh vaiteh na pungdaw awh han. Nangmouh hoi lawkkam ka sak e pou ka caksak han. <sup>10</sup> Na pâtung e caruem abaw hoehnahlan, catha bout ao toung dawkvah caruem teh na pahoung awh han. <sup>11</sup> Kai ni panuet laipalah nangmouh koe lukkareiim ka o sak han. <sup>12</sup> Nangmouh koe ka o vaiteh nangmae Cathut lah ka o han. Nangmouh hai ka tami lah na o awh han. <sup>13</sup> Izip ram dawk san na tang awh hoeh nahanelah, Kai na BAWIPA Cathut ni na tâcokhai awh toe. Na kahnamrui ka a teh, kalan lah na ceisak toe.

### *Lawkngaihoeh dawkreknæ*

<sup>14</sup> Hateiteh, nangmouh ni ka lawk na ngai awh hoeh, kâpoelawk abuemlah na tarawi awh hoeh, <sup>15</sup> Ka phunglawknaw na panuet awh teh, banglahai noutna laipalah kâpoelawk na tarawi awh hoeh, lawkkam na raphoe awh pawiteh, <sup>16</sup> Nangmouh koe ka sak hane hnnonaw teh, mit rona, lungpuennæ, kaluekalapnae, kahawi thai hoeh e patawnae hoi patawnae aphunphun ka pha sak han. Cati na kahei eiteh, aphu awm hoeh. Tarannaw ni a ca awh han.

<sup>17</sup> Nangmouh na pahnawt awh vaiteh taran hmalah na sung sak awh han. Nangmanaw teh tarannaw ni na uk awh vaiteh apini na ka pâlei hoeh nakunghai na yawng awh han. <sup>18</sup> Hottelah na khang a eiteh, ka lawk bout na ngai awh hoehpawiteh, namae yon dawk let sari totouh na rek awh han rah. <sup>19</sup> Nangmae kâoupnae hah ka khoe han, kalvan hah sum patetlah thoseh, talai hah rahum patetlah thoseh, ka sak vaiteh,

<sup>20</sup> Nangmanaw teh yawmyin lah tha na patho awh han. Na talai ni rawca tâcawt sak mahoe. Takha daw koe thingthainaw ni paw mahoe. <sup>21</sup> Nangmouh ni ka lawk na ngai awh hoeh, Kai na taran awh pawiteh, na yonnae patetlah let sari touh e runae ka pha sak han.

<sup>22</sup> Nangmouh koe sarang katha vaiteh, na canaw a rakoung awh han, na saringnaw kei awh vaiteh, tami hoe na youn awh han, na lamthung hai kingdi han. <sup>23</sup> Hottelah, na khang a nakunghai, na ka panuek awh hoeh lah, Kai bout na taran awh pawiteh, <sup>24</sup> Kai ni hai na taran awh vaiteh na yonnae kecu daw koe let sari touh e runae hoi na rektap awh han. <sup>25</sup> Ka lawkkam na tapoe dawkvah lawkcengnae talai nangmouh lathueng ka pha sak han. Nangmouh ni kho daw koe kamkhueng awh navah, lacik ka pha sak vaiteh, taran kut daw koe na poe awh han.

<sup>26</sup> Nangmae rawca hah ka takhoe toteh, napui hra touh ni nangmae vaiyei hah takhuen buet touh daw koe a pâeng hnukkhu, hote vaiyei hah a khing pouh teh nangmouh ni na boum awh mahoe. <sup>27</sup> Hathnukkhu haiyah, ka lawk na ngai awh hoeh lah, Kai paroup na taran awh pawiteh, <sup>28</sup> Kai hai ka lungkhuek vaiteh, na taran awh han. Na yon kecu daw koe alet sari touh na rek awh han. <sup>29</sup> Nangmouh ni na canaw e a moi na ca awh han. <sup>30</sup> Na hmuen karasangnaw hah ka raphoe vaiteh, kutsak cathutnaw hah koung ka rawp sak han. Na ronaw hah hringnae ka tawn hoeh e kutsak cathut van vah, ka tâkhawng vaiteh na panuet awh han. <sup>31</sup> Nangmae khopuinaw ka raphoe hoi hmuen kathoung ka raphoe vaiteh nangmae hmuituinaw ka pahnuem mahoe. <sup>32</sup> Na ram pueng Kai ni ka raphoe e hah hote ram daw koe kaawm e na tarannaw ni a hmu navah, kângairu awh han.



<sup>33</sup> Alouke miphunaw koe na kampek sak awh vaiteh, tahloi hoi na pâlei awh han. Na khopui a rawk vaiteh na ram a kingdi han.

<sup>34</sup> Hottelah, nangmanaw teh na tarannaw e ram dawk na o awh vaiteh, na ram teh tami kingdi lah onae tueng pueng dawk, na ram kingdi vaiteh, Sabbath hninnaw dawk na nawm awh han. <sup>35</sup> Nangmouh na o nateh, Sabbath hninnaw dawkvah na ram teh kâhat mahoe. Tami kingdi lah onae tueng dawk na ram teh kâhat lah ao han.

<sup>36</sup> Taran ram dawk kaawm rae nangmae lungthin thung kaluene ka pakhum vaiteh, thinghna kâhuet pawlawk dawk na taki vaiteh, taran kut dawk hoi na yawng e patetlah na yawng awh han. Apinihai pâlei hoe nakunghai a rawp han. <sup>37</sup> Apinihai pâlei hoe eiteh taran kut dawk hoi ka yawng e patetlah buet touh van buet touh a rawp awh han. Taran hmalah kangdue thinae tawn mahoe.

<sup>38</sup> Na tarannaw e ram ni na payawp awh vaiteh Jentelnaw koe na sung awh han. <sup>39</sup> Kacawirae nangmouh ni taran ram dawk nangmae yon hoi mintoenaw e yon hah na khang awh vaiteh, mintoenaw hoi cungtalah na kahma awh han.

<sup>40</sup> Hateiteh, ahnimouh ni kai koe a yon awh teh, Kai na taran awh dawkvah, <sup>41</sup> Kai ni ahnimanaw ka taran vaiteh, a tarannaw e ram dawk ka thak han. Ma e yon, mintoenaw e yon hah pâpho laihoi kâhet awh pawiteh, vuensom ka a hoe e amamae lungthin hah kârahnoum awh teh, amamae yon daw reknae khang awh pawiteh, <sup>42</sup> Kai ni Jakop, Isak, Abraham tinaw hoi ka sak e lawkkam thoseh, hote ram thoseh pahnim mahoe. <sup>43</sup> Hote ram teh ahnimae kut dawk hoi a hlout vaiteh, ahnimouh awm laipalah kingdi lah ao navah, amae Sabbath hninnaw dawk a nawm awh han. Ahnimouh ni ka phunglam a panuet awh teh, banglahai noutna hoe lah a sak e yon kecu daw reknae a khang awh han.

<sup>44</sup> Hottelah tarannaw dawkvah ao awh navah, ahnimanaw ka raphoe vaiteh, ahnimouh hoi lawkkam e raphoe totouh, ahnimanaw Kai ni ka maithoe mahoe. Ka pahnavt mahoe. Kai teh ahnimae BAWIPA Cathut doeh.

<sup>45</sup> Kai teh ahnimae Cathut lah ka o nahanelah Jentelnaw hmalah Izip ram hoi ka tâcokhai e ahnimae mintoenaw hoi ka sak e lawkkam hah, ahnimouh hanlah ka pahnim mahoe. Kai teh BAWIPA doeh telah a ti. <sup>46</sup> Hote phunglawk hoi kâlawnaw hah Sinai mon dawkvah BAWIPA ni Isarelnaw hanlah Mosi koe a poe e doeh.

## 27

### *Lawkkam e phung*

<sup>1</sup> Cathut ni Mosi koe, nang ni Isarelnaw koe patuen na dei pouh hane teh, <sup>2</sup> Tami ni lawkkam e patetlah BAWIPA koe poe pawiteh, ka poe hane kawi naw, nang ni apu tâtueng tangcung e patetlah Cathut e hno lah ao han. <sup>3</sup> Nang ni bangtelamaw apu na tâtueng han tetpawiteh, tongpa a kum 20 hoi 60 totouh e teh ngun tangka 50 touh lah apu na tâtueng han. <sup>4</sup> Napui teh ngun tangka 30 touh lah apu na tâtueng han. <sup>5</sup> Kum panga koehoi kum 20 totouh e tongpa teh ngun tangka 20, napui teh ngun tangka pheh hra touh lah apu na tâtueng han. <sup>6</sup> Kum panga a rahim e tongpa teh ngun tangka pheh panga, napui teh pheh thum touh lah apu na tâtueng han. <sup>7</sup> Kumrui taruk lathueng e tongpa teh ngun tangka hlaipanga, napui teh pheh hra touh lah apu na tâtueng han. <sup>8</sup> Nang ni apu na tâtueng e patetlah poe thai hoehpawiteh, vaihma koe a cei vaiteh,



vaihma ni lawkkam ka sak e tami ni a poe thai e patetlah apu a tâtueng pouh awh han.

<sup>9</sup> Tami ni Cathut koe saring poe pawiteh, a poe e pueng teh a thoung han. <sup>10</sup> Kahawi thoseh, kahawihoehe thoseh, buet touh hoi buet touh na thung awh mahoehe. Thung han na ngai awh pawiteh, kahni touh hoi roi a thoung han. <sup>11</sup> Cathut koe poe kawi hoehe e kathounghoehe saring lah awh pawiteh vaihma koe patue vaiteh, <sup>12</sup> Ahawi hoi hawihoehe e patetlah vaihma ni apu a tâtueng han. Vaihma ni a tâtueng e patetlah apu teh ao han. <sup>13</sup> Kapoekung ni ratang hanelah ngai pawiteh, saring phu hoi pung panga touh dawp pung touh bout a poe sin han. <sup>14</sup> Tami ni BAWIPA hanlah a im poe pawiteh, im ahawi hoi hawihoehe e vaihma ni a khet vaiteh apu a tâtueng han. Vaihma ni apu a tâtueng e patetlah apu teh ao han. <sup>15</sup> Im kapoekung ni bout ratang hanlah ngai pawiteh, im phu hoi pung panga touh dawp pung touh bout a poe sin han.

<sup>16</sup> Tami ni a lawhmuen hah BAWIPA hanlah poe pawiteh, Cati patue e patetlah apu teh a tâtueng han. Cati hmuen touh patue e law hah ngun tangka 50 touh lah apu tâtueng han. <sup>17</sup> Jubili kum kamtawng nah a law hah poe pawiteh apu teh a tâtueng yit touh a poe han. <sup>18</sup> Jubili kum abaw hnukkhu law hah poe pawiteh, hmalae Jubili kum totouh e a ngai rae kumnaw hah vaihma ni a parei vaiteh, a tâtueng e law phu teh a payoun pouh han. <sup>19</sup> Law kapoekung ni bout ratang hanlah ngai pawiteh, a law phu hoi pung panga pung touh bout a poe sin han. <sup>20</sup> Ratang thai hoehe lah alouke tami koe yawt pawiteh, bout ratang han lawi naseh. <sup>21</sup> Jubili kum akuap toteh, hote law teh BAWIPA e lah ao vaiteh vaihmanaw ni a pang han.

<sup>22</sup> Tami ni a ran e law hah BAWIPA hanlah poe pawiteh, <sup>23</sup> Jubili kum totouh hane apu tâtueng e hah vaihma ni a kum a parei vaiteh, apu a tâtueng e patetlah hote tami ni hote hnin dawp a poe han. Hote teh BAWIPA e doeh. <sup>24</sup> Jubili kum a pha toteh, hote law hah ahmaloe ka tawn ni teh kayawtkung koe bout a poe han. <sup>25</sup> Apu tâtueng e pueng dawp ngun tangka lahoi na tâtueng han. Ngun tangka phek touh e teh gerah 20 touh hoi a kâvan. <sup>26</sup> BAWIPA e lah kaawm e saring camin pueng teh, apinihai ama hanlah lat mahoehe. Bangkongtetpawiteh, camin teh BAWIPA e doeh. Maito, tu hoi hmaecanaw teh BAWIPA e lah doeh ao. <sup>27</sup> Kathounghoehe saring lah awh pawiteh, apu tâtueng e patetlah a ratang vaiteh pung panga touh dawp pung touh bout a poe sin han. Ratang ngai hoehpawiteh, apu tâtueng e patetlah a yo han.

<sup>28</sup> Hateiteh, tami thoseh, saring thoseh, mae law thoseh, Cathut koe thoebo laihoi poe e pueng teh, apinihai bout ratang bout yawt nahanh lawi naseh. Thoebo laihoi poe e pueng teh Cathut hanlah kathoungpoune lah ao.

<sup>29</sup> Tami patenghai thoebo laihoi na poe pawiteh, bout na ratang mahoehe, na thei han. <sup>30</sup> Cakang thoseh, apawhik thoseh, talai dawp hoi ka tâcawt e apawhik pueng hra touh dawp buet touh e teh BAWIPA e hno doeh. BAWIPA hanelah kathounge lah ao. <sup>31</sup> Hra touh dawp buet touh e hah ratang hanelah na ngai pawiteh, Apu hoi pung panga touh dawp pung touh bout na poe sin han. <sup>32</sup> Maito thoseh, tu hoi hmae thoseh, sonron rahim vah kâen e ahranae pueng teh BAWIPA hanelah kathounge lah ao han. <sup>33</sup> Ahawi hoi hawihoehe e na khen awh mahoehe. Buet touh hoi buet



touh na thung awh mahoe. Thung han na ngai awh pawiteh, kahni touh hoi rei a thoung han. Bout na ratang mahoe telah na dei pouh han.

<sup>34</sup> Hete kâpoelawknaw teh Cathut ni Sinai mon daw k Isarelnaw hanlah Mosi koe kâ a poe e naw doeh.



## MILU PAREINAE (Numbers)

### *Isarel milu touk pasueknae*

<sup>1</sup> Izip hoi a tâco awh hnukkhu, kum hni nah kum, thapa yung pahni, apasuek hnin vah Sinai kahrawngum kamkhuengnae lukkareiim dawk BAWIPA ni Mosi hah a pato teh,

<sup>2</sup> Isarel tamihu pueng hah a miphun lahoi, a imthung lahoi, a min kâtarui lahoi tongpa pueng koug touk haw, <sup>3</sup> kum 20 lathueng Isarelnaw thung dawk hoi taran ka tuk thai e naw pueng nang nama hoi Aron ni ahuhu lahoi koug na touk awh han. <sup>4</sup> Nang koe e miphunnaw pueng thung dawk hoi imthung kahrawikung buet touh koug ao awh han.

<sup>5</sup> Hetnaw heh nang koe kaawm hane tami minnaw doeh.

Reuben dawk hoi Shedeur capa Elizur,

<sup>6</sup> Simeon dawk hoi Zurishaddai capa Shelumiel,

<sup>7</sup> Judah dawk hoi Amminadab capa Nahshon,

<sup>8</sup> Issakhar dawk hoi Zuar capa Nethanel,

<sup>9</sup> Zebulun dawk hoi Helon capa Eliab,

<sup>10</sup> Joseph casak Ephraim dawk hoi Ammihud capa Elishama hoi, Manasseh dawk hoi Pedahzur capa Gamaliel,

<sup>11</sup> Benjamin dawk hoi Gideoni capa Abidan,

<sup>12</sup> Dan dawk hoi Ammishaddai capa Ahiezer,

<sup>13</sup> Asher dawk hoi Okran capa Pagiel,

<sup>14</sup> Gad dawk hoi Deuel capa Eliasaph,

<sup>15</sup> Naphtali dawk hoi Enan capa Ahira Enan seh, atipouh.

<sup>16</sup> Hetnaw heh tamimaya thung dawk hoi rawi e a na mintoenaw miphun dawk hoi kahrawikung Isarel imthung kahrawikungnaw doeh.

<sup>17</sup> Hot patetlah Mosi hoi Aron ni min a kaw e hetnaw heh a ceikhai awh.

<sup>18</sup> Tamimaya hah thapa yung pahni, apasuek hnin vah koug a kamkhueng awh teh, a na pa hoi, imthungnaw hoi kakhekungnaw, khetsin lahoi yah, kum 20 lathueng pueng teh kakhekungnaw hah ama buet touh min lahoi a kaw awh.

<sup>19</sup> BAWIPA ni Mosi koe kâ a poe e patetlah Sinai kahrawngum vah a touk awh. <sup>20</sup> Isarel capa, a camin Reuben casak thung hoi a min kâtarui lah tongpa pueng kum 20 lathueng tarantuknae koe ka cet thai e, <sup>21</sup> Reuben miphun a touk awh e teh 46, 500 touh a pha awh.

<sup>22</sup> Simeon casak dawk hoi a miphun lahoi imthungkhu lahoi a min kâtarui e patetlah tongpa pueng kum 20 lathueng tarantuknae koe ka cet thai naw, <sup>23</sup> Simeon casak a touk awh e naw teh 59, 300 touh a pha.

<sup>24</sup> Gad catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng tarantuknae koe ka cet thai naw, <sup>25</sup> Gad miphun dawk a touk awh e teh 45, 650 touh a pha.

<sup>26</sup> Judah catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>27</sup> Judah miphun dawk a touk awh e teh 74, 600 touh a pha.

<sup>28</sup> Issakhar catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka



cet thai naw, <sup>29</sup> Issakhar miphun dawk a touk awh e teh 54, 400 touh a pha.

<sup>30</sup> Zebulun catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>31</sup> Zebulun miphun dawk a touk awh e teh 57, 400 touh a pha.

<sup>32</sup> Joseph catounnaw dawk hoi Ephraim catoun hai imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>33</sup> Ephraim miphun dawk a touk awh e teh 40, 500 touh a pha.

<sup>34</sup> Manasseh catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>35</sup> Manasseh miphun dawk a touk awh e teh 32, 200 touh a pha.

<sup>36</sup> Benjamin catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>37</sup> Benjamin miphun dawk a touk awh e teh 35, 400 touh a pha.

<sup>38</sup> Dan catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>39</sup> Dan miphun dawk a touk awh e teh 62, 800 touh a pha.

<sup>40</sup> Asher catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>41</sup> Asher miphun dawk a touk awh e teh 41500 touh a pha.

<sup>42</sup> Naphtali catounnaw dawk hoi a miphun lahoi a imthungkhu lahoi, a min kâtarui e patetlah tongpa pueng kum 20 lathueng tarantuknae koe ka cet thai naw, <sup>43</sup> Naphtali miphun dawk a touk awh e teh 53, 400 touh a pha.

<sup>44</sup> Hotnaw teh Mosi hoi Isarel kahrawikung hlaikahni imthung kahrawikungnaw hai a touk awh e doeh. <sup>45</sup> Hot patetlah Isarel imthung abuemlahoi kum 20 lathueng taranruknae koe ka cet thai e naw pung Isarel lah koug a touk awh teh, <sup>46</sup> a touk awh e naw pueng teh 603550 touh a pha.

<sup>47</sup> Hatei, ahnimouh thung dawk hoi Levihnaw kakhekung lah touk awh hoeh. <sup>48</sup> BAWIPA ni Mosi koevah, <sup>49</sup> Levih miphun teh na touk mahoeh. Isarel taminaw lahai na touksin mahoeh. <sup>50</sup> Bangkoktetpawiteh, Levihnaw teh lawkpanuesaknae lukkareiim hoi, hnopai khenyawnkung, haw e kaawm e naw pueng ka khenyawnkung lah na pouk awh han. Lukkareiim hoi a hnonaw pueng ka kâkayawt awh teh, ka khetyawt awh han. Bawknae rim a tengpam moi ao sin awh han. <sup>51</sup> Hote bawknae rim teh a tâcokhai hanlah ao toteh, Levihnaw ni a raphoe vaiteh, hote rim bout a thung awh han. Tami alouke miphun bawk pawiteh thei lah ao han.

<sup>52</sup> Isarelnaw ni amamouh o nah tangkuem koe ahuhu lahoi apap e lahoi lukkareiim teh a sak awh han. <sup>53</sup> Levihnaw a pâlei teh, kamkhueng e Isarelnaw lathueng vah a lungkhueknae ao hoeh nahan, Cathut onae im a tengpam vah a roe awh vaiteh, Levihnaw ni lawkpanuesaknae bawknae im teh, a khetyawt awh han. <sup>54</sup> Hot patetlah Isarelnaw ni BAWIPA ni Mosi koe kâ a poe e patetlah a sak awh.



## 2

*Miphun lahoi rawinae*

<sup>1</sup> BAWIPA ni Mosi hoi Aron a pato teh, <sup>2</sup> Isarelnaw ni a imthung mitnoutnae kOUNG a vo awh vaiteh, amamae hu lahoi lukkarei rim hah a yap awh han. Kamkhuengnae lukkareim hmalah kOUNG a kâhmo awh nahanelah, petkâkalup lah a yap awh han. <sup>3</sup> Kanîtholah hoi kanîloumlah kangvawi sak hoi a imthung mitnout hah a vo awh vaiteh, lukkareim ka yap kUNG teh Judah ransahu han doeh. Judah catoun kahrawikungnaw teh Amminadab capa Nahshon han. <sup>4</sup> A ransahu teh 74, 600 touh a pha. <sup>5</sup> A hnukthawi lukkareim kayapkung teh Issakharnaw han. Issakhar catoun kahrawikung teh Zuar capa Nethanel han. <sup>6</sup> A ransahu teh 54, 400 touh a pha. <sup>7</sup> A hnukthawi teh Zebulun doeh. Zebulun catoun kahrawikung teh Helon capa Eliab han. <sup>8</sup> A ransahu teh 51, 400 touh a pha. <sup>9</sup> A ransahu a pap e lahoi Judahnaw a touk e lahoi 186, 400 touh a pha awh teh, hetnaw heh roenae koehoi ahmaloe a tâco awh han.

<sup>10</sup> Reuben miphunnaw teh akalah ao awh han, a imthung mitnoutnae a vo awh han. Reuben catoun kahrawikung teh Shedeur capa Elizur han. <sup>11</sup> A ransahu teh 46, 500 a pha. <sup>12</sup> Hahoi mitnout ka yap hane teh Simeon miphun han. Simeon catoun kahrawikung teh Zurishaddai capa Shelumiel han. <sup>13</sup> A ransahu teh 59, 300 touh a pha. <sup>14</sup> Gad miphun doeh. Gad catoun kahrawikung teh Reuel capa Eliasaph han. <sup>15</sup> A ransahu teh 45, 650 a pha. <sup>16</sup> Reuben miphun teh a ransahu apap e lahoi, 151, 450 a pha awh. Hetnaw heh a hnuk rekkâbang hane tamî lah ao awh.

<sup>17</sup> Hot patetlah kamkhuengnae lukkareim khue hoi a cei awh han. Levihnaw hah a lungui vah ao awh vaiteh, a onae koehoi kamcunae hmuen koehai a huhu lahoi a cei awh han.

<sup>18</sup> A imthungkhu mitnoutnae a vonae koehoi kanîloumlah, Ephraim miphunnaw ao awh han. Ephraim catoun kahrawikung teh Ammihud capa Elishama han. <sup>19</sup> A ransahu teh 40, 500 a pha. <sup>20</sup> Hahoi Manasseh miphun han. Manasseh catoun kahrawikung teh Pedahzur capa Gamaliel han. <sup>21</sup> A ransahu teh 32, 200 a pha. <sup>22</sup> Hahoi Benjamin miphunnaw han. Benjamin catounnaw kahrawikung teh Gideoni capa Abidan han. <sup>23</sup> A ransahu teh 35, 400 a pha awh. <sup>24</sup> Ephraim catoun a ransahu a pap e lahoi touk e pueng teh, 108, 100 a pha. Hahoi rekkâbang hanelah a tâco awh han.

<sup>25</sup> A imthungkhu mitnoutnae a vonae koehoi Dannaw teh atunglah ao awh han. Dan catoun kahrawikung teh Ammishaddai capa Ahiezer han. <sup>26</sup> A ransanaw teh 62, 700 a pha. <sup>27</sup> Hahoi mitnout ka yap hane teh, Asher miphun han. Asher catoun kahrawikungnaw teh Okran capa Pagiel han. <sup>28</sup> A ransahu teh 41, 500 a pha awh. <sup>29</sup> Hahoi Naphtali catounnaw han. Naphtali catounnaw kahrawikung teh Enan capa Ahira han. <sup>30</sup> A ransahu teh 53, 400 a pha awh. <sup>31</sup> Dan miphun ransahu touk e pueng teh 157, 600 a pha awh. Hahoi ahnimouh teh, a huhu lahoi ka tâcawt e a hnukteng poung lah ao awh han. <sup>32</sup> Hetnaw heh Isarel catoun a na pa e imthungkhu lahoi a touk awh e naw doeh. A ransahu teh a sumkung lah 603, 550 touh a pha. <sup>33</sup> Hatei BAWIPA ni, Mosi koe kâ a poe e patetlah Levihnaw teh Isarelnaw koe touksin e lah awm hoeh. <sup>34</sup> BAWIPA ni Mosi koe kâlawk a poe e patetlah Isarelnaw ni a sak awh. Amamae ahu kâbang lahoi a roe awh. Hot patetlah a miphun lahoi imthung ao awh e patetlah a tâco awh.



## 3

*Aron catounnaw hoi Levih*

<sup>1</sup> Hetnaw heh, Sinai mon koehoi BAWIPA ni Mosi a pato navah, Aron hoi Mosi se nah a thut e doeh. <sup>2</sup> Aron capanaw e a min teh, camin lah Nadab. Hahoi Abihu Eleazar hoi Ithamar doeh. <sup>3</sup> Hetnaw heh vaihma hanlah satui awi e, vaihma thaw tawk hanlah hmoun e, Aron e capanaw e min doeh. <sup>4</sup> Nadap hoi Abihu teh Sinai kahrawngum vah kathounghoehe hmai, BAWIPA hmalah thuengnae a sak roi navah, BAWIPA hmalah a due roi, ahnimouh roi teh capa tawn roi hoeh. Eleazar hoi Ithamar teh a na pa a hring navah vaihma thaw a tawk roi. <sup>5</sup> BAWIPA ni Mosi a pato teh, <sup>6</sup> Levih miphun teh vaihma Aron koe cetkhai nateh, a thaw a tawk thai nahan, ahni koe awm naseh. <sup>7</sup> Ahnimouh ni lukkareiim dawk thaw a tawk awh vaiteh, kamkhuengnae lukkareiim hmalah ama hoi kamkhuengnaw ni panki e patetlah thaw a tawk awh han. <sup>8</sup> Hnopai pueng a khetyawt awh vaiteh, Isarel catounnaw ni a ham kawi e lah lukkareiim dawk thaw a tawk awh han. <sup>9</sup> Levihnaw teh Aron hoi a capanaw koevah, na poe awh vaiteh, Isarel catounnaw thung hoi ahnimouh hah na rawi awh vaiteh, kai koe ahnimouh na poe awh han. <sup>10</sup> Aron hoi a capanaw hah na pouk vaiteh, vaihma counгнаe hah pou a pang awh han. Ahnimouh koe miphun louk bawk pawiteh, thei lah ao han, telah a ti.

*Levihnaw milu touk hanelah kâ a poe*

<sup>11</sup> BAWIPA ni Mosi a pato teh, <sup>12</sup> khenhaw! Levihnaw heh Isarel catounnaw thung hoi camin camoim hmaloe ka paawng hanelah kai kama roeroe ni Isarel catounnaw thung hoi ka lae lah ao teh, Levihnaw teh kaie lah ao awh han. <sup>13</sup> Bangkongtetpawiteh, caminnaw pueng teh kaie lah ao han. Izip ram vah caminnaw pueng ka thei navah, Isarelnaw pueng teh camin hoi tami hoi moithang hoi kai kama hanelah ka thoung sak e lah ao. Kai teh Jehovah doeh telah atipouh. <sup>14</sup> BAWIPA ni Sinai kahrawngum vah, Mosi hah a pato teh, <sup>15</sup> Levih catounnaw hah a na pa imthung lahoi tongpa pueng thapa yung touh lathueng pueng teh koung na touk han atipouh.

<sup>16</sup> Hot patetlah Mosi koe kâ a poe e BAWIPA lawk patetlah koung a touk pouh. <sup>17</sup> Levih catounnaw e min teh Gershon, Kohath, hoi Merari naw doeh. <sup>18</sup> Gershon catoun imthungnaw e teh, Libni hoi Shimei doeh. <sup>19</sup> Kohath catoun imthungnaw e teh Amram, Izhar, Hebron hoi Uziel doeh. <sup>20</sup> Merari catoun imthungnaw teh, Mahli hoi Mushi doeh. Hetnaw heh a na pa imthung lahoi Levih catounnaw doeh. <sup>21</sup> Gershon teh Libni imthung hoi Shimei imthung kakhekung doeh. Hetnaw heh Gershom catounnaw doeh. <sup>22</sup> Thapa yung touh hoi lathueng tongpa pueng a touk awh e teh 7500 touh a pha. <sup>23</sup> Gershon catoun imthungnaw teh lukkareiim a hnuklah kanîloumlah a roe awh han. <sup>24</sup> Gershonnaw e imthung kahrawikung teh Lael capa Eliasaph han. <sup>25</sup> Gershon catounnaw thaw teh, lukkareiim lemphu ramuk nahane hoi kamkhuengnae takhang dawk hane yaphni hoi, <sup>26</sup> thongma takhang dawk hane yaphni hoi khoungroe petkâkalup e hnônaw hoi, hawvah hnônaw pueng a tawk awh hanelah ao han.

<sup>27</sup> Kohath teh Amram imthung, Izhar imthung, Hebron imthung hoi Uziel imthungnaw kakhekung doeh. Hetnaw heh Kohath catounnaw doeh. <sup>28</sup> Tongpa pueng thapa yung touh hoi lathueng hmuen kathoung ringnae koe tawk hanelah a poe e naw a touk awh navah 8600 a pha. <sup>29</sup> Kohath catoun imthungnaw teh lukkareiim akalah a roe awh han. <sup>30</sup> Kohath catoun imthung kahrawikung teh Uziel capa Elizaphan han. <sup>31</sup> Ahnimae



thaw teh, thingkong hoi caboi hoi satui hmaiimkhok hoi, thuengnae hoi, hmuen kathoung koe thaw tawk nahane, hlaamnaw, lukkarei yap e hoi haw e thaw tawknae koe e hnopainaw pueng lah ao han. <sup>32</sup> Hahoi vaihma Aron capa Eleazar teh Levihnaw kahrawikung a lû lah ao han. Hmuen kathoung karingkungnaw hah a hrawi han. <sup>33</sup> Merari teh Mahlinaw thung hoi Mushinaw imthung kakhekung lah ao. Hetnaw teh Merari imthungnaw doeh. <sup>34</sup> Tongpanaw pueng thapa yung touh lathueng a touk awh navah 6200 a pha. <sup>35</sup> Merari catounnaw e imthung kahrawikung teh Abihail capa Zuriel doeh. Hetnaw teh lukkareiim atunglah a roe awh han. <sup>36</sup> Merari capa hoi a tawk han kawi lah pouk e teh lukkareiim tapang, pangkhok, khom, a tâphai kepnae, a hnopainaw hoi a thaw tawknae hnopai lah ao awh. <sup>37</sup> Thongma petkâkalup lah khonaw teh, a kangdue nahane cemnaw pueng hoi a hetsinnae ruinaw hai a sak han. <sup>38</sup> Hothloilah lukkareiim kanîtholah kamkhuengnae lukkareiim hmalah ka roe e naw teh Mosi, Aron hoi a canaw han. Hmuen kathoung ringnae koe teh Isarel catounnaw a pankinae pueng koe a tawk awh han. Hatei alouke tami rek kahnai e awm pawiteh, thei lah ao han. <sup>39</sup> BAWIPA kâpoe e lahoi Levihnaw e a catoun tongpanaw thapa yung touh lathueng hoi Aron ni touk e naw teh 22, 000a pha awh.

### *Levihnaw camin ratangnae*

<sup>40</sup> BAWIPA ni Mosi koevah, Isarel catounnaw thung dawak camin tongpa thapa yung touh lathueng pueng nâyittouh maw ka phat tie a min lahoi koug touk loe. <sup>41</sup> Hahoi Levihnaw hah Isarel catoun thung dawak hoi caminnaw yueng lah kai hanelah na la vaiteh, Levihnaw e saring hai, Isarel catounnaw e saring camin pueng e yueng lah kai hanlah na la han. Kai teh Jehovah doeh atipouh.

<sup>42</sup> Mosi teh BAWIPA ni kâ a poe e patetlah Isarel catoun thung dawak caminnaw pueng hah a touk awh <sup>43</sup> A min phung e lahoi thapa yung touh lathueng tongpa camin pueng a touk awh e teh 22, 273 a pha.

<sup>44</sup> BAWIPA ni Mosi a pato teh, <sup>45</sup> Isarel catoun camin yueng lah Levihnaw hah lat nateh, a saring yueng lah, Levihnaw e saring lat pouh. Levihnaw teh kaie lah ao awh han. Kai teh Jehovah doeh. <sup>46</sup> Levihnaw hlak vah, bet kapap e Isarel catoun camin 273 ratang nahanelah, <sup>47</sup> tami buet touh hane hmuen kathoung khingnae tangka patetlah shekel panga touh rip na la awh han. Hmuen kathoung khingnae shekel teh gerah 20 touh a pha. <sup>48</sup> Ka cawi e ratang nahan hnopai teh Aron hoi a capanaw na poe han telah a ti.

<sup>49</sup> Hahoi Mosi ni Levihnaw ni a ratang awh hoe e ratangnae hnopai hah a la. <sup>50</sup> Isarel catoun caminnaw koe hoi hnopainaw a la teh hmuen kathoung shekel 1365 a la pouh. <sup>51</sup> BAWIPA ni Mosi kâ a poe e BAWIPA lawk patetlah Mosi ni a ratangnae hnopai teh Aron hoi a capanaw a poe awh.

## **4**

### *Kohath capanaw e thaw*

<sup>1</sup> BAWIPA ni Mosi hoi Aron a pato teh, <sup>2</sup> Levihnaw thung dawak Kohath capanaw a catoun lahoi a imthung lahoi, <sup>3</sup> kum 30 lathueng kum 50 totouh kamkhuengnae lukkareiim dawak thaw ka tawk hane naw teh koug a touk awh.



<sup>4</sup> Hete kamkhuengnae lukkareiim dawk kathoungpounge hno hoi kâkuen lah Kohath casaknaw e thaw lah ao. <sup>5</sup> Roenae koehoi a kampuen awh tangkuem vah, Aron hoi a capa a tho vaiteh, hmuén kathoung lukkareiim yap e hah a la vaiteh lawkpanuesaknae thingkong hah a ramuk han. <sup>6</sup> Hahoi phavuien hoi a ramuk vaiteh, kamthim hni hoi bout a ramuk han. Hahoi a tâphai hah a hrawt han.

<sup>7</sup> Caboi dawk kamthim hni a phai vaiteh, tongben, pacen, awi nahane kawlungnaw hoi, vaiyei hruek vaiteh. <sup>8</sup> Hot teh hni paling a ramuk awh vaiteh, saram pho hoi a ramuk vaiteh, a tâphai a hrawt awh han. <sup>9</sup> Hmaiimkhok hoi hawvah hno hane hmaiim, paitei hoi paitei tanae manang, satuiumnaw hah kamthim hni hoi a ramuk han. <sup>10</sup> Hote hno hoi a puengcangnaw teh saram pho hoi ramuk vaiteh kâkayawtnae dawk a tâ han. <sup>11</sup> Sui khoungroe hah kamthim hni hoi ramuk vaiteh, saram pho hoi a ramuk han. Hahoi a tâphai na hrawt han. <sup>12</sup> Hmuén kathoung koe thaw tawknae hnonaw pueng hah, koug a la vaiteh, kamthim hni hoi a taoung awh han. Saram pho hoi a ramuk awh han, kâkayawtnae a hrawt awh han. <sup>13</sup> Khoungroe dawk e hraba hah kathoungcalah kaw n vaiteh, avan vah hni paling a phai awh han. <sup>14</sup> Avan vah thaw a tawknae hlaamnaw pueng, hmaisawinae, cingco, tawko ka kaw e, maroi, hoi thuengnae khoungroe dawk a ta awh han. Saram pho hoi a ramuk awh vaiteh, a tâphai kâkayawtnae a hrawt awh han. <sup>15</sup> Hahoi Aron hoi a capanaw ni, a hmuén kathoung poung hoi hmuén kathoung hnopainaw koug a ramuk awh vaiteh, a onae hmuén a kampuen awh nah karawitawi Kohath capa ni kâkayawt hanelah a tho awh han. Hatei kathoung hno hah tek awh mahoe. Tek awh boipawiteh, a due awh han. Hetnaw heh kamkhuengnae lukkareiim hno, Kohath capanaw ni a tawk awh hane doeh. <sup>16</sup> Hahoi vaihma Aron capa Eleazar capa a tawk hane kawi teh, paang hane satui hoi hmuítui pout laipalah, tavai poenae, awi e satui hoi lukkareiim thung kaawm e hnonaw pueng, hmuén kathoung hoi hnopainaw ring hanelah ao telah a ti.

<sup>17</sup> BAWIPA ni Mosi hoi Aron a pato teh, <sup>18</sup> Kohath catoun imthungnaw hah Levihnaw thung dawk hoi kahmat sak hanh. <sup>19</sup> Hatei kathoungpounge hno hah ouk a hnai toteh, dout laipalah a hring awh nahan, hot hoi kâkuen lah het heh sak loe. Aron hoi a capa hah a kâen vaiteh, a tawk awh hane thaw hah amamouh lengkaleng pouk pouh naseh. <sup>20</sup> Hatei, kathoungpounge hno khet hanlah dongdeng hai kâen hanh awh. Hoehpawiteh a due awh han telah atipouh.

### *Gershon capanaw e thaw*

<sup>21</sup> BAWIPA ni Mosi a pato teh, <sup>22</sup> Gershon capanaw hoi a imthungkhu a catounnaw abuémah koug a touk awh. <sup>23</sup> kum 30 hoi a lathueng a lathueng kum 50 totouh, kamkhuengnae lukkareiim koe thaw ka tawk hane naw hah koug a touk awh. <sup>24</sup> Gershon catounnaw a tawk awh hanelah a kamngai awh e teh, <sup>25</sup> Lukkareiim dawk lukkarei yap e, kamkhuengnae lukkareiim takhang koe hni yap e hah, <sup>26</sup> Kalupnae hni yap e, kalupnae longkha koe yap e, bawknae rim thuengnae khoungroe teng kaawm e, arui hoi a hnopainaw pueng a phu awh vaiteh, tawksak a ngai e pueng a tawk awh han.

<sup>27</sup> Gershon capanaw a tawk awh nah tangkuem koe Aron hoi a capanaw ni thaw a poe awh e patetlah a tawk awh han. <sup>28</sup> Hetheh, kamkhuengnae



lukkareim Gershon capa imthungnaw e thaw a tho. Ahnmae thaw hah, vaihma Aron capa Ithamar kâtawnae rahim ao awh han.

<sup>29</sup> Merari capanaw kong daw k a catounnaw abuemlahoi imthungkhu lahoi koug na touk a han. <sup>30</sup> Kum 30 hoi a lathueng lah kum 50 totouh kamkhuengnae lukkareim daw thaw a taw awh hanelah ka kâen hane pueng na touk awh han. <sup>31</sup> Kamkhuengnae lukkareim daw k, ka ceitakhai han naw e thaw teh, hethah doeh. Bawknae im tapang, thing a tâphai hai, a khom, a kanâ, <sup>32</sup> thongma tumdumnae khom, a kanâ, cem, hoi ruinaw, hote hnopainaw pueng hoi alouke hnonaw kâkayawt hanelah, a min lahoi amamae ham na pouk pouh han. <sup>33</sup> Hethah vaihma Aron capa Ithamar kâtawnnae rahim vah, kamkhuengnae lukkareim hanelah Merari capa imthungnaw niyah a sak awh hane thaw la doeh ao telah atipouh.

### *Levihnaw touknae*

<sup>34</sup> Hahoi Mosi hoi Aron hoi tamimaya kahrawikungnaw ni Kohath capa a catoun abuemlahoi imthung abuemlahoi, <sup>35</sup> kamkhuengnae lukkareim daw k a taw awh hane hah kum 30 touh hoi a lathueng lah kum 50 totouh a touk awh. <sup>36</sup> A catoun abuemlahoi a touk awh e teh, 2, 750 a pha. <sup>37</sup> Hotnaw teh kamkhuengnae lukkareim daw k thaw ka taw k thai e Kohath casaknaw a touk awh e Mosi hno lahoi BAWIPA kâpoe e patetlah Mosi hoi Aron ni a touk roi e doeh. <sup>38</sup> Gershon capanaw kamkhuengnae lukkareim taw k a taw k hane teh, a na pa im hoi imthung abuemlahoi doeh. <sup>39</sup> Kum 30 touh hoi a lathueng kum 50 totouh touk e lah ao. <sup>40</sup> A imthung abuemlahoi a napanaw imthung abuemlah a touk awh e teh 2, 630 touh a pha. <sup>41</sup> Hetnaw teh Gershon capanaw e casaknaw kamkhuengnae lukkareim thaw katawnaw lah BAWIPA kâpoe e patetlah Mosi hoi Aron ni a touk e naw doeh. <sup>42</sup> Hahoi Merari capa ni kamkhuengnae lukkareim daw k thaw ka taw k hane teh a napanaw imthung hoi amamouh imthungnaw seng doeh. <sup>43</sup> Kum 30 hoi a lathueng kum 50 totouh touk e lah ao. <sup>44</sup> A na pa hoi imthung abuemlah a touk awh e teh, 3, 200 touh a pha. <sup>45</sup> Hetnaw heh Merari capanaw a touk awh e teh Mosi hno lahoi BAWIPA kâpoe e patetlah Mosi hoi Aron ni a touk roi e doeh. <sup>46</sup> Levihnaw thaw taw k hanelah kamkhuengnae lukkareim phu hanelah, hoi ouk ka phawt e a napanaw imthung lahoi a imthungkhu abuemlahoi <sup>47</sup> kum 30 lathueng kum 50 totouh Mosi hoi Aron Isarel kahrawikungnaw ni a touk awh. <sup>48</sup> A touk awh e naw teh, 8, 580 touh a pha <sup>49</sup> Mosi hno lahoi BAWIPA kâpoe e patetlah tami pueng ni a taw k awh hane teh, a ham awh e hoi ka kâvan lah a touksin awh. BAWIPA ni Mosi kâ a pou e patetlah a touk awh.

## 5

### *Ka khin e naw alawilah takhoenae*

<sup>1</sup> BAWIPA ni Mosi a pato teh, <sup>2</sup> Isarel catounnaw ka hrikbeinaw hoi moiinakathout hoi tami ro kâbet e hoi kakhin e napui tongpa naw hah roenae rim hloilah tâco sak hanelah kâ a pou. <sup>3</sup> A lungui vah, ka onae roenae hmuen hah a khin sak awh hoeh nahanelah, napui tongpa roenae hmuen lawilah na tâco sak han.

<sup>4</sup> Isarel catounnaw ni hot patetlah a sak awh teh, roenae hmuen alawilah ouk a tâco sak awh. BAWIPA ni Mosi koe a dei e patetlah Isarel catounnaw ni a sak awh.



### *Payon laisaknae*

<sup>5</sup> BAWIPA ni Mosi hah a pato teh, <sup>6</sup> Isarel catounnaw koe dei pouh loe. Tongpa thoseh, napui thoseh, BAWIPA taranlahoi yon bang patet e a sak awh teh yon pen e lah ao toteh, <sup>7</sup> a sak awh e yonnae hah pankângai hoi a kâhei awh han. Hahoi a sakpayon e yonnae phu teh ka kuepcalah a patho han. Hahoi a tak dawk hawioehnae a sak e hah pung panga touh dawk pueng touh a thap han. <sup>8</sup> Hatei, yon phu kacoekung ni a hmaunawnggha tawn hoehpawiteh, BAWIPA koe thueng e yon phu teh vaihma koe a poe han. Yontha nahanlah tutan a thueng e touksin laipalah yonthanae alouke a sak han. <sup>9</sup> Hahoi Isarel catounnaw ni a poe awh e pueng Isarelnaw hno kathoung pueng vaihma koe a thokhai e pueng teh amae lah ao han. <sup>10</sup> Tami tangkuem ni a poe awh e hno kathoung poung hah a ahnimae lah ao han. Tami pueng ni vaihma koe a poe awh e teh ahnimae lah ao han, telah a ti.

### *Yuemkamcu hoeh e yu*

<sup>11</sup> BAWIPA ni Mosi hah a pato teh, <sup>12</sup> Isarel catounnaw koe dei pouh loe. Ahnimouh koe, apipatet e a yu nakunghai, a vâ koe yuemkamcu lah awm laipalah alouke a ngai e awm pawiteh, <sup>13</sup> a payon lahun nah ayâ ni hmawt hoeh, kapanuekkhaikung awm hoeh eiteh, hote hah a pâpha teh, a vâ ni panue hoeh nakunghai thoseh, <sup>14</sup> ahni lathueng dipmanae muitha a pha hai thoseh, a yu a dipma nakunghai thoseh, hahoi napui a kamhnawng teh dipmanae muitha tongpa koe a tho hai thoseh, a yu hah a dipma ei, a yu kamhnawng hoeh pawiteh, <sup>15</sup> tongpa ni a yu hah vaihma koe a thokhai han, napui hanlah a panki e poehno catun ephah pung hra pung touh dawk buet touh, satui awi mahoe, hmuitui hai kalawt mahoe. Bangkongtetpawiteh, hethateh dipmanae canei thuengnae, pahnim hoeh nahan canei thuengnae, payonnae panue nahanelah pahnim hoeh nahane doeh.

<sup>16</sup> Vaihma ni napui hah a thokhai vaiteh, BAWIPA hmalah a kangdue sak han. <sup>17</sup> Vaihma ni talai hlaam dawk hoi tui kathoung a la vaiteh, lukkareiim khom koe e vaiphu a la vaiteh tui dawk a phuen han. <sup>18</sup> Vaihma ni napui hah BAWIPA hmalah a kangdue sak vaiteh, a sam a rathap sak han. Yu dipmanae tavai thuengnae kâhruetcuot poe nahanelah thuengnae hah a kut dawk a sin sak han. Hahoi vaihma ni thoebonae tui kakhat e hah a sin han. <sup>19</sup> Vaihma ni napui hah lawk a kam sak vaiteh, napui koe na vâ e kâtawnnae dawk na 0 navah, ayâ ni na ipkhai hoehpawiteh, na kamhnawngnae lam dawk na dawn hoeh boum teh hete thoebonae kaphawtkung kakhat e tui dawk hoi na hlout han. <sup>20</sup> Hatei, na vâ e kâtawnnae dawk na 0 navah, nama na kamhnawng teh ayâ ni na ipkhai boipawiteh telah na ti vaiteh, <sup>21</sup> vaihma ni napui hah thoebonae lawkkam rahim vah ao sak vaiteh, napui koe BAWIPA ni na phai a kamsae sak teh na von a phing sak toteh, BAWIPA ni na miphunnaw thung dawk thoebonae kaphawtkung lah na awm naseh. <sup>22</sup> Hahoi, thoebonae kaphawtkung hete tui ni na ruen dawk a kâen vaiteh, na von a phing sak vaiteh, na phai a kamsae sak han, telah ati han. Hahoi napui ni teh, Amen, hot patetlah thoseh ati han.

<sup>23</sup> Vaihma ni thoebonae lawk hah cauk dawk a thut vaiteh, kakhat e tui dawk a phum han. <sup>24</sup> Hahoi thoebonae kaphawtkung kakhat e tui hah, napui hah a pânei han. Hot patetlah thoebonae kaphawtkung a von thung a kâen vaiteh a kha han. <sup>25</sup> Hot patetlah vaihma ni dipmanae canei thuengnae a kahek vaiteh, a poe e napui e kut dawk hoi a la vaiteh,



BAWIPA hmalah tavai thuengnae a sin pouh vaiteh, thuengnae khoungroe koe a ceikhai han. <sup>26</sup> Vaihma ni panuenae tavai thuengnae hah kutvang touh a la vaiteh, khoungroe dawk a sawi han. Hathnukkuh, kakhat e tui hah napui a pânei han.

<sup>27</sup> Tui a nei sak toteh, hettelah han doeh. A la kamhnawng teh a vâ koe yonnae sak boipawiteh, thoebonae kaphawtkung lah ao dawk kakhat e tui teh a von thung a kâen vaiteh a kha han. A von a phing vaiteh, a phai hah a kamsoe han. Hahoi teh, hote napui teh a miphunnaw thung dawkvah, thoebo e lah ao han. <sup>28</sup> Hatei, napui teh kamhnawng hoe hah thoung boipawiteh, a hlout vaiteh, camo ka vawn thai e lah ao han.

<sup>29</sup> Hete napui ni a vâ e kâtawnnae rahim ao navah, kho louk lah radoung hoi a vâ hoe e tami alouke hoi koe ka kamhnawng e thoseh, <sup>30</sup> tongpa ni dipmanae lungthin ueue tawn pawiteh, a yu a dipma dawkvah, dipmanae kâlawk lah ao han. Hahoi teh napui hah BAWIPA hmalah a ceikhai vaiteh, vaihma ni hete kâlawknae pueng a tak dawk a sak pouh han. <sup>31</sup> Hottelah, tongpa teh payonpakainae koehoi a hlout han. Hatei, hete napui ni yonpennae naw heh a khang han, atipouh.

## 6

### *Nazirite kâlawk*

<sup>1</sup> BAWIPA ni Mosi hah a pato teh, <sup>2</sup> Isarel catounnaw koe dei pouh. Ahnimouh koe tongpa thoseh, napui thoseh BAWIPA koe ama Nazirite lawkkamnae la hanlah, a kâkapek teh a kâhmoun toteh, <sup>3</sup> misur hoi yamu tek mahoe. Misurtui hoi yamucang hai net mahoe. Misurtui nei e hoi misurpaw katha e khumbei dawk vaw teh kamyai e hai cat mahoe. <sup>4</sup> A kâkapek nah yunglam pueng teh misurkung dawk hoi a mu thoseh, atui thoseh cat awh mahoe.

<sup>5</sup> A kâkapeknae lawk a kam nah thung pueng teh, a lû ngaw mahoe. BAWIPA hmalah a kâpeknae hnin a pha hoehroukrak teh kathoung lah ao han. Hottelah a sam a hlung vaiteh, a sai sak han. <sup>6</sup> BAWIPA hanlah a kâkapeknae thung pueng teh, tami ro koe hnai mahoe. <sup>7</sup> A na pa thoseh, a manu thoseh, a hmaunawngtha thoseh, a tawncanu thoseh, a duenae kong dawk hai kâkhinsak hanh naseh. Bangkongtetpawiteh, Cathut hanlah a kâkapeknae a lû dawk ao. <sup>8</sup> A kâkapek yunglam teh BAWIPA hanlah kathoung lah ao han. <sup>9</sup> Ateng vah, pouk laipalah tami koe dout pawiteh, a kâkapeknae a lû dawk khin sak pawiteh, a kamthoung nah hnin vah, a lû a ngaw vaiteh, a hnin sari hnin vah a pâkhamuen a ngaw han. <sup>10</sup> A hnin taroe hnin vah, kamkhuengnae lukkareiim takhang koe e vaihma koe bakhu kahni touh thoseh, Âbakhu kahni touh thoseh a sin awh han. <sup>11</sup> Vaihma ni buet touh teh yon thueng nahanlah a poe vaiteh, alouke buet touh teh hmaisawi thueng nahan, tami kadout kecu dawk a sakpayon e dawk a yontha nahanlah a sak pouh han. Hot hnin vah a lû hah a thoung sak han. <sup>12</sup> Hahoi kâtapoe thuengnae dawkvah kum touh ka pha e tuca a tan a thokhai vaiteh, kâkapeknae hnin teh BAWIPA koe vah a katha lah a tâcokhai han. Bangkongtetpawiteh, kâkapeknae hah a khin sak toung dawkvah, ahmaloe e teh banglah tho mahoe toe.

<sup>13</sup> Hahoi Nazirite a kâkapeknae hnin a kuep toteh, a sak awh hane kâlawk doeh. Kamkhuengnae lukkareiim takhang koe na ceikhai awh han. <sup>14</sup> Hahoi BAWIPA koe thuengnae hah a poe han. Tutan kacueme hmaisawi thuengnae koe buet touh, yon thueng nahanelah tulaca



kacueme buet touh, rounm thueng nahanelah, kacueme tutanca buet touh, <sup>15</sup> tonphuenhoehe tavai hah a kanui e tavai satui hoi kanawh e tavai tueng buet touh satui hluk e tavai ka rapamca e a tabu buet touh, tavai thuengnae hoi lannae thueng hoi na poe awh han.

<sup>16</sup> Hahoi vaihma ni tavai hah BAWIPA hmalah a thokhai vaiteh, yon thuengnae hoi hmaisawi thuengnae hah a poe han. <sup>17</sup> Hahoi tutan hah tonphuenhoehe tavai tabu dawh hoi rounm thuengnae hah Bawipa koe a poe han. Vaihma ni tavai thuengnae, nei thuengnae hoi a poe sin han.

<sup>18</sup> Nazirite tami ni, kamkhuengnae lukkareiim takhang koe a sam hah a ngaw vaiteh, rounm thuengnae a saknae koe hmai hoi a sawi han. <sup>19</sup> Hahoi vaihma ni tutan e a louna a thawng e hoi tonphuenhoehe a tabu dawh a ta e vaiyei buet touh, tonphuenhoehe vaiyei ka rapam e phen buet touh, a la vaiteh, Nazirite niyah a kâhmounnae a sam kouna a ngaw hnukkhu hoi a kut dawh a ta han. <sup>20</sup> Hahoi vaihma ni kahek thuengnae dawkvah, BAWIPA hmalah a kahek han. Hetheh vaihma hman lah kaawm han. Hetheh vaihma e ham lah kaawm han. Kahek e a takuep hoi a kahek e a phai teh a thouna han, hahoi teh Nazirite tami ni misur a nei thai han toe, telah a ti.

<sup>21</sup> Hetheh Nazirite lawkkam a kâhmounnae hoi poehno e BAWIPA koe lawkkamnae kasakkung e kâlawk lah ao. Hothloilah a ma kut hoi ka dam sak e pueng hah lawkkamnae a sak e patetlah a kâhmounnae kâlawk patetlah a sak roeroe han. ;

### *Vaihma yawhawinae*

<sup>22</sup> BAWIPA ni Mosi hah a pato teh, <sup>23</sup> Aron hoi a capanaw koevah, het patetlah Isarel catounnaw yawhawi na poe han, ahnimouh koe, <sup>24</sup> BAWIPA ni yawhawi na poe awh teh, na khenyawn awh naseh. <sup>25</sup> BAWIPA ni a minhmai nangmouh koe kho lah a sei vaiteh, na pahren awh naseh. <sup>26</sup> BAWIPA teh nangmouh koelah kangvawi seh, rounmae na poe awh han, telah dei pouh awh telah a dei. <sup>27</sup> Hot patetlah sak e ni Isarel catounnaw koe ka min a kamnue sak awh han. Kai ni ahnimouh teh yawhawi ka poe han, telah a ti.

## 7

### *Kahrawikungnaw e poehno*

<sup>1</sup> Hahoi teh, hetetlah doeh. Mosi ni lukkareiim a sak teh, a cum toteh, a hnopainaw hoi a khouna hoi hlaam naw pueng hah satui a hluk teh a thouna sak. <sup>2</sup> Hahoi Isarel kahrawikung, a imthung kahrawikung, a miphun kahrawikungnaw a touk awh e ni poehno hane hah a poe awh. <sup>3</sup> A poe awh e naw hah BAWIPA hmalah a thokhai awh vaiteh, a lemphu kaawm e leng taruk touh, maitotan hlaikahni touh, kahrawikung kahni touh ni leng buet touh lengkaleng, buet touh ni maitotan buet touh lengkaleng lukkareiim hmalah a thokhai awh.

<sup>4</sup> BAWIPA ni Mosi a pato teh, <sup>5</sup> kamkhuengnae lukkareiim dawh thaw tawh navah a cungkei han dawkvah, ahnimouh koehoi dâw pouh. Levihnaw koe a thaw tawhnae hoi kâkuen lah na poe han, telah atipouh.

<sup>6</sup> Hahoi Mosi ni leng hoi maitotan a la teh, Levihnaw hah a poe. <sup>7</sup> Leng kahni touh hoi maitotan pali touh hah Gershon capa hah a thaw hoi kamcu lah a poe awh. <sup>8</sup> Leng pali touh hoi maitotan taroe touh hah vaihma Aron capa Ithamar, Merari capa hah a thaw hoi kamcu lah a poe awh. <sup>9</sup> Hatei,



Kohath capa teh poe awh hoeh. Bangkongtetpawiteh, hmuén kathing koe e thaw a ham e lah ao teh, aloung hoi kâkayawnkung lah ao.

<sup>10</sup> Thuengnae khoungroe hah satui awi hanlah ao toteh, kahrawikung-naw ni lungtho lahoi a poe awh e heh khoungroe daw k a ta awh. Hot patetlah pasoumhno a poe han telah ati. <sup>11</sup> Bangkongtetpawiteh, BAWIPA ni Mosi koe vah thuengnae khoungroe daw k poe hanelah, hnin touh daw k kahrawikung buet touh ni pasoumhno hah a poe han telah ati.

<sup>12</sup> Apasuek hnin vah, pasoumhno ka poe e teh, Judah miphun daw k hoi Amminadab capa Nahshon ni a poe. <sup>13</sup> A poe e teh shekel 130 ka ri e ngun hlaam buet touh, hmuén kathing shekel 70 touh ka ri e ngun kawlung buet touh, tavai thuengnae hanlah vaiui satui hoi kanaw k tangcoung e hote roi daw k ka kawi lah, <sup>14</sup> shekel hra touh ka ri e hmuítui hoi ka kawi e suipacen buet touh, <sup>15</sup> hmaisawi thueng nahane maitotan ca buet touh, tu buet touh, tutanca kum touh e buet touh, <sup>16</sup> yon thueng nahane maitotan kahni touh, <sup>17</sup> roun thueng nahanelah maitotan kahni, tu panga, hmaetan panga, tutanca kum touh e panga touh. Hetnaw heh Amminadab capa Nahshon ni a pasoung e naw doeh.

<sup>18</sup> Apâhni hnin vah, pasoumhno ka poe e teh, Issakhar kahrawikung Zuar capa Nethanel ni pasoumhno a poe. <sup>19</sup> A poe e teh shekel 130 ka ri e ngun hlaam buet touh, hmuén kathing shekel 70 touh ka ri e ngun kawlung buet touh, tavai thuengnae hanlah vaiui satui hoi kanaw k tangcoung e hote roi daw k ka kawi lah, <sup>20</sup> shekel hra touh ka ri e hmuítui hoi ka kawi e suipacen buet touh, <sup>21</sup> hmaisawi thueng nahane maitotan ca buet touh, tu buet touh, tutanca kum touh ka phat e buet touh, <sup>22</sup> yon thueng nahane hmaetan buet touh, <sup>23</sup> roun thueng nahanelah maitotan kahni, tutan panga, hmaetan panga, tutanca kum touh ka phat e panga touh. Hetnaw heh Zuar capa Nethanel ni a pasoung e naw doeh.

<sup>24</sup> Apâthum hnin vah, pasoumhno ka poe e teh, Zebulun catounnaw kahrawikung Helon capa Eliab ni pasoumhno a poe. <sup>25</sup> A poe e teh shekel 130 ka ri e ngun hlaam buet touh, hmuén kathing shekel 70 touh ka ri e ngun kawlung buet touh, tavai thuengnae hanlah vaiui satui hoi kanaw k tangcoung e hote roi daw k ka kawi lah, <sup>26</sup> shekel hra touh ka ri e hmuítui hoi ka kawi e suipacen buet touh, <sup>27</sup> hmaisawi thueng nahane maitotan ca buet touh, tutan buet touh, tutanca kum touh e buet touh, <sup>28</sup> yon thueng nahane hmaetan buet touh, <sup>29</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Helon capa Eliab ni a pasoung e naw doeh.

<sup>30</sup> Apali hnin vah, pasoumhno ka poe e teh, Reuben catounnaw kahrawikung Shedeur capa Elizur ni pasoumhno a poe. <sup>31</sup> A poe e teh shekel 130 ka ri e ngun hlaam buet touh, hmuén kathing shekel 70 touh ka ri e ngun kawlung buet touh, tavai thuengnae hanlah vaiui satui hoi kanaw k tangcoung e hote roi daw k ka kawi lah, <sup>32</sup> shekel hra touh ka ri e hmuítui hoi ka kawi e suipacen buet touh, <sup>33</sup> hmaisawi thueng nahane maitotan ca buet touh, tutan buet touh, tutanca kum touh e buet touh, <sup>34</sup> yon thueng nahane hmaetan buet touh, <sup>35</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Shedeur capa Elizur ni a pasoung e naw doeh.

<sup>36</sup> Apanga hnin vah, pasoumhno ka poe e teh, Simeon catounnaw kahrawikung Zurichadai capa Shelumiel ni pasoumhno a poe. <sup>37</sup> A poe e teh shekel 130 ka ri e ngun hlaam buet touh, hmuén kathing shekel 70 touh ka ri e ngun kawlung buet touh, tavai thuengnae hanlah vaiui



satui hoi kanawkw tangcoung e hote roi dawkw ka kawu lah, <sup>38</sup> shekel hra touh ka ri e hmuitui hoi ka kawu e suipacen buet touh, <sup>39</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>40</sup> yon thueng nahane hmaetan buet touh, <sup>41</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Zurishaddai capa Shelumiel ni a pasoung e naw doeh.

<sup>42</sup> Ataruk hnin vah, pasoumhno ka poe e teh, Gad catounnaw kahrawikung Deuel capa Eliasaph ni pasoumhno a poe. <sup>43</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawu lah, <sup>44</sup> shekel hra touh ka ri e hmuitui hoi ka kawu e suipacen buet touh, <sup>45</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>46</sup> yon thueng nahane hmaetan buet touh, <sup>47</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Deuel capa Eliasaph ni a pasoung e naw doeh.

<sup>48</sup> Asari hnin vah, pasoumhno ka poe e teh, Ephraim catounnaw kahrawikung Ammihud capa Elishama ni pasoumhno a poe. <sup>49</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawu lah, <sup>50</sup> shekel hra touh ka ri e hmuitui hoi ka kawu e suipacen buet touh, <sup>51</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>52</sup> yon thueng nahane hmaetan buet touh, <sup>53</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Ammihud capa Elishama ni a pasoung e naw doeh.

<sup>54</sup> Ataroe hnin vah, pasoumhno ka poe e teh, Manasseh catounnaw kahrawikung Pedahzur capa Gamaliel ni pasoumhno a poe. <sup>55</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawu lah, <sup>56</sup> shekel hra touh ka ri e hmuitui hoi ka kawu e suipacen buet touh, <sup>57</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>58</sup> yon thueng nahane hmaetan buet touh, <sup>59</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Pedahzur capa Gamaliel ni a pasoung e naw doeh.

<sup>60</sup> Atako hnin vah, pasoumhno ka poe e teh, Benjamin catounnaw kahrawikung Gideon capa Abidan ni pasoumhno a poe. <sup>61</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawu lah, <sup>62</sup> shekel hra touh ka ri e hmuitui hoi ka kawu e suipacen buet touh, <sup>63</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>64</sup> yon thueng nahane hmaetan buet touh, <sup>65</sup> roun thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Gideon capa Abidan ni a pasoung e naw doeh.

<sup>66</sup> A hnin hra navah, pasoumhno ka poe e teh, Dan catounnaw kahrawikung Ammishaddai capa Ahiezer ni pasoumhno a poe. <sup>67</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawu lah, <sup>68</sup> shekel hra touh ka ri e hmuitui hoi ka kawu e suipacen buet touh, <sup>69</sup> hmaisawi thueng



nahane maitotanca buet touh, tutan buet touh, tutanca kum touh e buet touh, <sup>70</sup> yon thueng nahane hmaetan buet touh, <sup>71</sup> roum thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Ammishaddai capa Ahiezer ni a pasoung e naw doeh.

<sup>72</sup> A hlaibun hnin vah, pasoumhno ka poe e teh, Asher catounnaw kahrawikung Okran capa Pagiel ni pasoumhno a poe. <sup>73</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawilah, <sup>74</sup> shekel hra touh ka ri e hmuitui hoi ka kawilah e suipacen buet touh, <sup>75</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>76</sup> yon thueng nahane hmaetan buet touh, <sup>77</sup> roum thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Okran capa Pagiel ni a pasoung e naw doeh.

<sup>78</sup> A hlaikahni hnin vah, pasoumhno ka poe e teh, Naphtali catounnaw kahrawikung Enan capa Ahira ni pasoumhno a poe. <sup>79</sup> A poe e teh shekel 130 ka ri e ngun hlaam buet touh, hmuen kathoung shekel 70 touh ka ri e ngun kawlung buet touh, tavai thuengnae hanlah vaiui satui hoi kanawkw tangcoung e hote roi dawkw ka kawilah, <sup>80</sup> shekel hra touh ka ri e hmuitui hoi ka kawilah e suipacen buet touh, <sup>81</sup> hmaisawi thueng nahane maitotanca buet touh, tutan buet touh, tutanca kum touh e buet touh, <sup>82</sup> yon thueng nahane hmaetan buet touh, <sup>83</sup> roum thueng nahanelah maitotan kahni, tutan panga, hmaetan panga, tutanca kum touh e panga touh. Hetnaw heh Gideon capa Abidan ni a pasoung e naw doeh.

<sup>84</sup> Hot patetlah thuengnae khoungroe satui awi nah hnin vah, Isarel kahrawikungnaw ni a pasoung awh e ngun hlaam hlaikahni touh, ngun kawlung hlaikahni touh, suipacen hlaikahni touh a pha. <sup>85</sup> Ngun hlaam teh shekel 130 touh a ri teh, ngun kawlung teh shekel 70 touh a ri. Ngun hlaamnaw pueng teh hmuen kathoung khingnae shekel 20,400 touh a ri. <sup>86</sup> Hmuitui suipacen 12 touh dawkw ka kawilah e teh, hmuen kathoung shekel 10 tabang hane a ri. Suipacen pueng teh shekel 120 touh a ri. <sup>87</sup> Hmaisawi thueng nahane maitotanca abuemlah 12, tutan 12, tutanca kum touh e 12, tavai thueng nahanlah a pasoung awh e pueng hoi yon thueng nahanelah hmaetan 12, <sup>88</sup> tutan 60, hmaetan 60, tutanca kum touh e 60 touh a pha. Hetnaw heh satui awi hnukkhu thuengnae khoungroe dawkw thueng nahanlah a poe awh e doeh. <sup>89</sup> Hot patetlah, kamkhuengnae lukkareim dawkw bawkw hanelah, Mosi a kâen navah, lawkpanuesaknae thingkong dawkw lungmanae tungkhung a lathueng lavah, cherubim kahni touh e rahak hoiyah, ama hoi lawkw kâthai lah a kâpato roi.

## 8

### *Hmaiim tanae nuencang*

<sup>1</sup> BAWIPA ni Mosi hah a pato teh, <sup>2</sup> Aron hah pato nateh ahni koe, hmaiim hah na paang toteh, hmaiim sari touh ni hmaiimkhok hmalah a ang awh han, telah atipouh.

<sup>3</sup> A dei e patetlah Aron ni a sak. BAWIPA ni Mosi kâ a poe e patetlah hmaiimkhok a hmalah a ang hanlah hmaiim teh a paang. <sup>4</sup> Hete hmaiimkhok teh sui hoi mek dêi sin e doeh. BAWIPA ni Mosi koe a meilam a kamnue sak e patetlah a sak pouh.

### *Levihnaw kamthoungnae*



<sup>5</sup> BAWIPA ni Mosi hah a pato teh, <sup>6</sup> Levihnaw hah Isarelnaw thung dawk hoi aloukcalah hmoun nateh, kamthoung sak. <sup>7</sup> Ahnimouh a kamthoung nahanelah, hettelah na sak han. Ahnimouh tak dawk thoungnae tui hah kaheisin nateh, a takbuem muen koung ngaw naseh, a khohna pâsu awh vaiteh, kamthoung naseh.

<sup>8</sup> Maitotanca buet touh hoi, tavai thuengnae a kanui e satui hoi kalawt e lat sak loe. Yon thuengnae maitotanca buet touh na ceikhai han. <sup>9</sup> Levihnaw hah kamkhuengnae lukkareiim koe a ceikhai vaiteh, Isarel catoun tamimaya teh cungtalah pâkhueng. <sup>10</sup> Hahoi teh, Levihnaw hah BAWIPA hmalah na thokhai awh han. Isarel catounnaw ni Levihnaw lathueng a kut a tounge pouh vaiteh, <sup>11</sup> Aron ni Levihnaw hah BAWIPA thaw a tawk awh thai nahan, Isarel catounnaw koe kahek thuengnae BAWIPA hmalah a poe awh han. <sup>12</sup> Levihnaw ni maitotanca e a lû dawk a kut a tounge awh vaiteh, Levihnaw han yontha nahanlah BAWIPA Cathut hmalah maito buet touh, hmaisawi thueng nahanlah buet touh na sak han.

<sup>13</sup> Levihnaw hah Aron hoi a canaw hmalah a kangdue vaiteh, BAWIPA koe kahek thuengnae patetlah na sak han. <sup>14</sup> Hot patetlah, Isarel catoun thung hoi Levihnaw hah na hmoun vaiteh, Levihnaw teh kai ka ham lah ao han. <sup>15</sup> Hathnukkhu hoi teh, Levihnaw ni kamkhuengnae lukkareiim koe a kâen awh han. Nang ni ahnimanaw thung sak hanlah, kahek thuengnae patetlah na sak pouh han. <sup>16</sup> Bangkongtetpawiteh, Isarel miphun thung dawk hoi ahnimanaw hah na rawi vaiteh, kai koe koung na poe han. Isarel miphunnaw ni hmaloe a khe awh e camin yueng lah ka la toe. <sup>17</sup> Izipnaw e caminnaw kai ni ka thei navah, Isarel miphun dawk teh tami thoseh, saring thoseh, caminnaw pueng teh kai ka ham doeh. <sup>18</sup> Hahoi Isarel catounnaw dawk camin hanlah Levihnaw teh kai ni ka la toe. <sup>19</sup> Ahnimanaw ni kamkhuengnae lukkareiim koe vah, Isarelnaw ni a tawk awh hane thaw a tawk awh thai nahan thoseh, Isarel miphunnaw ni kathoungpounge hmuen koe a cei awh toteh, Lacik dawk hoi a hlout awh thai nahan, yontha sak nahan hai thoseh, Isarel miphun thung hoi Levihnaw teh Aron hoi a canaw hah ka poe telah a ti.

<sup>20</sup> Levihnaw hanlah BAWIPA Cathut ni Mosi koe a dei e patetlah Mosi hoi Aron koehoi Isarel miphunnaw abuemlah hanelah Levihnaw ni a sak awh han. <sup>21</sup> Ahnimanaw ni thoungnae a hmu awh teh, amamae khohna a pâsu awh. Aron ni hai BAWIPA hmalah kahek thuengnae BAWIPA koe yonthanae ahnimouh han a sak teh a thoung awh. <sup>22</sup> Hahoi teh, Levihnaw hmalah Aron hoi a canaw hmalah a thaw tawk hanlah kamkhuengnae lukkareiim thung a kâen. Levihnaw kong dawk BAWIPA ni Mosi kâ a poe e patetlah ahnimouh koe a sak pouh.

<sup>23</sup> BAWIPA ni Mosi hah a pato teh, <sup>24</sup> Hetheh Levihnaw a coungnae doeh. Kum 25 touh lathueng ni kamkhuengnae lukkareiim dawk thaw a tawk awh han. <sup>25</sup> Kum 50 ka phat e ni thaw a kâhat han, tawk awh mahoe toe. <sup>26</sup> Hatei, kamkhuengnae lukkareiim khetyawt nae dawkvah, a hmaunawngghanaw a kabawp han. Thaw teh tawk mahoe. Het patetlah Levihnaw a thaw kong dawk, laideitatueng pouh loe telah atipouh.

## 9

### *Apâhni e ceitakhai pawî*

<sup>1</sup> Izip ram hoi a tâco hoi a kum pahni, thapa yung pasuek navah, BAWIPA ni Sinai ram kahrawngum vah, Mosi hah a pato teh, <sup>2</sup> Isarel catounnaw



ni ceitakhai pawī hah ama tueng dawḵ a sak awh naseh. <sup>3</sup> Atueng teh atu e thapa hnin hrahlaipali tangmin lah na sak awh han. Ama e phunglam patetlah na hno awh han telah atipouh.

<sup>4</sup> Hahoi teh, Mosi ni Isarelnaw hah ceitakhai pawī hno hanlah a dei pouh.

<sup>5</sup> Sinai kahrawngum vah thapa ayung pasuek hnin hrahlaipali tangmin lah ceitakhai pawī a sak awh. BAWIPA ni Mosi koe kâlawk a poe e patetlah Isarelnaw ni a sak awh.

<sup>6</sup> Hahoi tami bangpatet ni tami ro kecu dawḵ kathoung hoeh lah awm pawiteh, hot hnin vah ceitakhai pawī dawḵ bawḵ thai hoeh. Hot hnin vah Mosi hoi Aron hmalah a cei teh, <sup>7</sup> ahnimouh ni ama koe tami ro kecu dawḵ kathoung hoeh toe. Bangkongmaw Isarelnaw koevah, ama tue vah, BAWIPA koe thuengnae dawḵ na bawḵ sak hoeh telah ati awh.

<sup>8</sup> Mosi ni duem awm awh ei, nangmouh kong dawḵ BAWIPA ni bangtelamaw kâ na poe tie hah ka ring ei vai telah atipouh.

<sup>9</sup> BAWIPA ni Mosi hah a pato teh, <sup>10</sup> Isarel catounnaw koehoi nangmouh thung hoi thoseh, na catounnaw thung hoi thoseh, tami ro kecu dawḵ kathounghoehnaw thoseh, lamhla vah kahlawng kacetnaw thoseh, na awm payon pawiteh, BAWIPA hanlah ceitakhai pawī hah a hno thai awh.

<sup>11</sup> Thapa yung pahni hnin hrahlaipali hnin tangmin lah a hno thai awh han. Tonphuenhoehe vaiyei hah kakhat e a hna hoi a ca awh han.

<sup>12</sup> Tangtho hanlah bangcahai na tat awh mahoe. A hru na khoe mahoe. Ceitakhai pawī saknae lah a pouk e naw pueng a sak awh han. <sup>13</sup> Hahoi, a thoung ngoun ei, kahlawng hai cet hoeh ei, ceitakhai pawī dawḵ bawḵ hoehpawiteh, a miphun koehoi takhoe e lah ao han. Bangkongtetpawiteh, ama tueng dawḵvah, BAWIPA koe thuengnae a sak hoeh dawḵvah, ama koe yon a kantue han. <sup>14</sup> Hahoi, nangmouh koe kaawm e imyin ni BAWIPA hane ceitakhai pawī dawḵ bawḵ han ngai pawiteh, ceitakhai pawī dawḵ pouk e hoi kâlawk patetlah a sak van han. Ram thung e tami hoi imyin naw hanelah kâvancalah phunglam na tawn awh han, telah dei pouh atipouh.

### *Tâmai hoi hmai*

<sup>15</sup> Hot patetlah lukkareiim kangdue sak navah, lukkareiim, lawkpanue-saknae rim hah tâmai, hmai patetlah ka kamnuek e hah lukkareiim lathueng tangmin lahoi amom totouh ao. <sup>16</sup> Hot patetlah tâmai ni pou a ramuk teh tangmin teh hmai patetlah pou a kamnue. <sup>17</sup> Lukkareiim dawḵ e tâmai a kampuen toteh, Isarel catounnaw a cei awh han. Hahoi tâmai a kangdue tangkuem vah, Isarel catounnaw ni rim a sak awh han. <sup>18</sup> BAWIPA kâpoe e patetlah Isarelnaw hah a cei awh vaiteh, BAWIPA kâpoe e lahoi a roe awh han. Lukkareiim dawḵ tâmai a kangdue yunglam teh, rim thung vah pou ao awh.

<sup>19</sup> Lukkareiim dawḵ tâmai kasawlah kaawm nakunghai, Isarelnaw ni BAWIPA e kâ a ngai awh dawḵvah, cet laipalah ao awh. <sup>20</sup> Hahoi teh hettelah doeh. Tâmai teh lukkareiim dawḵvah, dongdeng ao navah, BAWIPA kâpoe e patetlah roenae rim dawḵ pou ao awh han. Hahoi BAWIPA kâpoe e patetlah a cei awh han. <sup>21</sup> Hahoi teh hettelah doeh. Tâmai teh tangmin lahoi amom totouh dueng doeh ao teh, amom lah tâmai a kampuen toteh, a cei awh han. Kanithun hai thoseh, amom hai thoseh, tâmai a kampuen boum teh a cei awh han. <sup>22</sup> Lukkareiim dawḵ tâmai ni hnin hni touh thoseh, thapa yung touh thoseh, kum touh thoseh koe awm pawiteh, Isarelnaw ni hote hmuen cettakhai laipalah, rim thung roup ao awh. Hatei, a lathueng lah a kâtawm toteh a cei awh. <sup>23</sup> BAWIPA



kâpoelawk patetlah a roe awh teh, BAWIPA kâpoelawk patetlah a cei awh. Mosi hno lahoi BAWIPA kâpoe patetlah ao awh.

## 10

### *Ngun Mongka kahni touh*

<sup>1</sup> BAWIPA ni Mosi hah a pato teh, <sup>2</sup> ngun mongka kahni touh, dêi lah dêi nateh sak loe. Tamimaya kawnae hoi tâcosak nahanlah na hno han. <sup>3</sup> Kahni touh hoi na ueng navah, taminaw teh kamkhuengnae lukkareiim takhang koe a kamkhueng awh han. <sup>4</sup> Hatei, buet touh dueng na ueng pawiteh, Isarel catoun kahrawikung a hu buet touh daw k kacuenaw hah nang koe a kamkhueng awh han.

<sup>5</sup> Kâhruetcuetnae na ueng pawiteh, Kanîtholae naw ni a kamthaw awh han. <sup>6</sup> Hahoi kâhruetcuetnae apâhni na ueng toteh, akalae naw ni a roenae koehoi a kamthaw awh han. A kamthaw awh nahanelah, kâhruetcuetnae pou na ueng pouh han. <sup>7</sup> Maya a kamkhueng nahanelah, hmaloe na ueng awh han. Hatei kâhruetcuetnae teh na ueng mahoe. <sup>8</sup> Aron e canaw, vaihmanaw ni mongka teh a ueng awh han. Hete hno heh nangmae se yunglam, yungyoe hanelah phunglam lah ao han.

<sup>9</sup> Na ram daw namamouh rep kacuengroekung, na taran tuk hanlah na cei navah, kâhruetcuetnae ueng lah na ueng awh han. Hottelah BAWIPA Cathut hmalah, pou na panue e lah pou awm vaiteh, na tarannaw thung hoi rungngang e lah ao han. <sup>10</sup> Na lunghawinae hnin thoseh, paw e tueng daw k thoseh, thapareinae daw k thoseh, hmaisawi thuengnae hoi roum thuengnae thoseh, mongka na ueng awh han. Hot patetlah na Cathut hmalah nangmouh han pahnimhoehnae lah ao han. Kai teh Jehovah na Cathut lah ka o telah atipouh.

### *Sinai tâcotakhainae*

<sup>11</sup> Hahoi a kum hni, thapa yung pahni, hote thapa 20 hnin teh, lawkpanuesaknae lukkareiim koehoi tâmai hah kahlun lah a kâtawm.

<sup>12</sup> Hahoi hmalah pâtam hoi Sinai kahrawng koehoi Isarelnaw teh a kamthaw. Hahoi Paran ram kahrawng daw k tâmai teh a kangdue. <sup>13</sup> Mosi hno lahoi BAWIPA kâpoe e patetlah avai pasuek a kamthaw awh.

<sup>14</sup> Ahmaloe poung lah Judah ransanaw hah a imthungkhu mitnoutnae sin hoi a tâco awh. A ransabawi teh, Amminadab capa Nahshon doeh.

<sup>15</sup> Issakhar miphun catounnaw ransabawi teh Zuar capa Nethanel doeh.

<sup>16</sup> Zebulun miphun catounnaw ransabawi teh Helon capa Eliab doeh.

<sup>17</sup> Hahoi lukkareiim hah a raphoe awh teh, Gershon catounnaw hoi Merari catounnaw ni lukkareiim kâkayawt hanlah a tâco awh.

<sup>18</sup> Hahoi Reuben ransanaw teh amamae mitnout sin laihoi a tâco awh. A ransabawi teh Shedeur capa Elizur doeh. <sup>19</sup> Simeon miphun catounnaw ransabawi teh Zurishaddai capa Shelumiel doeh. <sup>20</sup> Gad miphun catounnaw ransabawi teh Deuel capa Eliasaph doeh. <sup>21</sup> Hahoi, Kohathnaw ni kathounge hno a kâkayawt awh teh a tâco awh. Alouke a tho hoehnahlan vah lukkarei hah a rakueng awh.

<sup>22</sup> Hahoi Ephraim ransanaw teh, mitnout a sin awh teh, a tâco awh. A ransabawi teh Ammihud capa Elishama doeh. <sup>23</sup> Manasseh miphun catounnaw ransabawi teh Pedahzur capa Gamaliel doeh. <sup>24</sup> Benjamin miphun catounnaw ransabawi teh Gideon capa Abidan doeh.



<sup>25</sup> Hahoi, a hnuktengpoung lah Dan catoun ransanaw hah amamae mitnout a sin awh teh, a tâco awh. A ransabawi teh Ammishaddai capa Ahiezer doeh. <sup>26</sup> Asher miphun catounnaw ransabawi teh Okran capa Pagiel doeh. <sup>27</sup> Naphtali miphun catounnaw ransabawi teh Enan capa Ahira doeh. <sup>28</sup> Isarel catounnaw a kamthaw awh toteh, a ransanaw patuen patuen lahoi a ceinae nuencang la a tho.

<sup>29</sup> Mosi e a napu Midian tami Reuel capa Hobab koevah, Mosi ni nang koe na poe han telah BAWIPA ni ati e hmuen koevah, cei han a kâcai awh teh, kaimouh koe tho van leih, kahawicalah na tak dawk ka sak han, bangdawk tetpawiteh, Isarel koevah, BAWIPA ni hnokahawi a kam toe atipouh. <sup>30</sup> Ahnimouh ni nangmouh koe ka cet mahoe. Kamamouh e ram hmaunawnga koe doeh ka cei awh han atipouh awh.

<sup>31</sup> Hahoi teh Mosi ni hrumhram na cettakhai awh hanh. Bangkongtetpawiteh, kahrawngum roe nahan hmuen sak hane koe vah, na panue e patetlah hoi, na panue e yit touh kaimouh hanlah, mit lah doeh na awm awh ti. <sup>32</sup> Kaimouh koe na cet awh pawiteh BAWIPA ni hnokahawi na sak pouh e patetlah na sak pouh van han atipouh.

<sup>33</sup> Hahoi teh, BAWIPA e mon koehoi hnin thum lamcei dawk a cei awh. Ahnimouh han kâhatnae hmuen tawng hanlah BAWIPA lawkkam thingkong hah hnin thum touh thung a hmalah a cei pouh. <sup>34</sup> Rim koehoi a kamthaw awh toteh, kanîthun BAWIPA e tâmai ahnimouh lathueng vah awh. <sup>35</sup> Hahoi thingkong a tâco nah tanguem vah, Mosi ni oe, BAWIPA kang dout haw. Na taran hah kâkahei awh naseh. Na kahmuhmanaw hah na hmalah yawng awh naseh, telah ouk ati. <sup>36</sup> Hahoi, thingkong a kâhat nah tanguem vah, Oe BAWIPA, Isarelnaw a thongsang koe, kamlang haw telah ouk atipouh.

## 11

### *Runae dawk phuenangnae*

<sup>1</sup> Tamimaya a phuenang awh toteh, BAWIPA lunghawinae awmhoeh. Bangkongtetpawiteh, hote hah BAWIPA ni a thai toteh, a lungkhuek teh a lungkâan. Hat torei teh BAWIPA e hmai hah ahnimouh rahak vah paluk a to pouh teh, roenae hmuen alawilah, a tangawn kouna a kak pouh. <sup>2</sup> Hahoi teh, tamimaya ni Mosi koe a hram awh teh, Mosi ni BAWIPA koe a ratoum teh, hmai teh bout a roum. <sup>3</sup> BAWIPA e hmai hah ahnimouh rahak vah paluk a to pouh dawkvah, hote hmuen teh Taberah ati awh.

### *Rawca dawk phuenangnae*

<sup>4</sup> Hahoi ahnimouh rahak vah, mak kâkalawt e maya koehoi, takthai ngai awh e hah a tâco. Isarel canaw hai bout a khuika awh teh, apinimaw ca hane moi na poe awh han. <sup>5</sup> Aphu laipalah hoi Izip ram vah tanga moi canae hah ka pahnim thai awh hoe. Payin paw hoi angkem paw, rasonpaling, rasonpangaw, ankahringnaw hah ka rabuipoung awh toe. <sup>6</sup> Atuteh ka rakhing kouna a ke awh toe, Manna laipalah hoi banghai ka mit ni hmawt awh hoe toe telah ati awh.

<sup>7</sup> Manna teh songsuen mu patetlah a o, arong teh badellium patetlah ao. <sup>8</sup> Taminaw ni a racawng awh teh, a roe awhnae koe a phawm awh teh, hlaam dawk a thawng awh, vaiyei lah a sak awh, a ca awh toteh satui hoi karê e patetlah ao. <sup>9</sup> Tangminlah a roenae rim koe tadamtui a bo toteh manna hai ouk a bo van.



<sup>10</sup> Taminaw pueng teh imthung lahoi roenae rim takhang koe a ka awh tie Mosi ni a thai. Hahoi BAWIPA lungphuennae teh puenghoi a kân teh, Mosi hai a lunghawi hoeh. <sup>11</sup> Hot patetlah Mosi ni BAWIPA koe bangkongmaw na san heh runae na poe, bangkongmaw, na mitkhetcawp hoeh e maw, hete maya hnokarinaw heh kai ka van na patue. <sup>12</sup> Hete taminaw kai ni ka vawn e namaw. A na mintoenaw koe thoebonae ram koe ceikhai hanlah, camo kakhenaw ni sanu ka net lahun a tawm e patetlah na lungtabue dawkw tawm awh na ti hanelah ka khe e na ma. <sup>13</sup> Hete taminaw na poe hane moi teh nâhoi maw ka la han. Bangkongtetpawiteh, ka ca hane moi hah na poe telah khuika laihoi na cusin awh toe. <sup>14</sup> Hete taminaw pueng hah, kai kamadueng teh ka phawt thai hoeh toe. Kai hanlah a ri poung <sup>15</sup> Het patet e na sak hane pawiteh, na pahren nateh na thei leih, ka rei na thaisak hanh leih telah a ti.

### *Kacuenaw 70*

<sup>16</sup> BAWIPA ni Mosi koevah, Isarel kacuenaw, maya thung dawkw kacuenaw hoi bet a lungkaha lah na panue e naw tami 70 touh pâkhueng nateh, kai koe kamkhuengnae koe lukkareiim dawkw nang koe a ka due thai nahan thokhai loe. <sup>17</sup> Hattorei haw vah tho vaiteh na pato han. Na tak dawkw kaawm e muitha hah ka la vaiteh ahnimouh lathueng ka hruek han. Nang dueng ni phawt laipalah, maya e hmuenri hah ahnimouh ni na phu khai han.

<sup>18</sup> Nang ni tamimaya koe tangtho hanelah kamthoung awh nateh, moi teh na ca awh han. Moi na ca awh hane apinimaw na poe awh han, bangtelamaw Izip ram vah phu ka nep lah ka o teh telah BAWIPA hnâthainae koe na ka awh vaw. Hatdawkwah, BAWIPA ni moi na poe awh vaiteh na ca awh han. <sup>19</sup> Hnin touh hnin hni touh laipalah, apanga hnin hra touh laipalah, hnin 20 touh laipalah, <sup>20</sup> thapa yung touh thung hmawtcei hoi palopalai nunnun a tho toteh, na ca awh han. Bangkongtetpawiteh, nama koe kaawmnaw ni BAWIPA na dudam awh, Bangkongmaw Izip ram hoi kaimanaw na tâcokhai telah a hmalah, na ka awh telah tet pouh ati telah a ati. <sup>21</sup> Mosi ni kai koe kaawm e khok hoi kacetnaw ting taruk touh a pha teh, thapa yung touh ca hane moi ka poe han telah na ti. <sup>22</sup> Tuhu hoi maitohu naw hai thet pouh haw a boum awh han vaimoe. Tali dawkw e tanganaw pueng man pouh nakunghai a boum awh han vaimoe telah a ti.

<sup>23</sup> BAWIPA ni Mosi koevah, BAWIPA e kut teh a duem maw. Ka dei e hah nang koe a kuep hoi kuep hoeh e na panue han doeh telah a ti.

<sup>24</sup> Hahoi Mosi a tâco teh, BAWIPA lawk hah taminaw pueng koe a dei pouh. Tamihu kacuenaw 70 touh hah a kaw teh, lukkareiim petkâkalup lah a kangdue sak <sup>25</sup> Hahoi BAWIPA teh tâmai dawkw a kum teh a pato. Ahni koe kaawm e muitha hah kacuenaw 70 touh lathueng vah a ta. Ahnimouh tak dawkw muitha a pha teh, Lawk a pâpho awh. Hot patetlah ouk sak awh boihoe ei nan tung mah. <sup>26</sup> Hatei, roenae hmuen koe tami kahni touh pou ao. Buet touh e a min teh Eldad doeh. Alouk buet touh e min teh Medad doeh, Muitha hah ahnimouh koe ao. Touk e naw dawkw ka bawk awh e eiteh, kamkhuengnae lukkareiim koe cet vah hoeh. Roenae hmuen koe lawk hah a pâpho roi. <sup>27</sup> Hahoi thoundoun buet touh a yawng teh Mosi koe a dei pouh teh, Eldad hoi Medad ni lawk teh pâpho lahun telah atipouh. <sup>28</sup> Nun capa Joshua a nawsai lahoi yah. Mosi thaw ka tawkw pouh e ni a pathung teh, ka bawipa Mosi ahnimouh hah ngang haw ati pouh. <sup>29</sup> Mosi ni ahni koe, kai na dipma e na ou. BAWIPA ni taminaw pueng heh



profet lah kOUNg awm naseh, BAWIPA ni ahnimouh lathueng muitha hah ahnimouh van tat pouh naseh ka tie nahoehmaw. <sup>30</sup> Hahoi Mosi teh ama hoi Isarel a lungkahanaw hoi roenae hmuen koe a ban awh.

### *BAWIPA ni tamuem a tha pouh*

<sup>31</sup> Hahoi BAWIPA koehoi kahli a tho teh, tali koe lahoi tamuem hrut a palek pouh teh roenae rim avangvanglah hoi hnin touh lamcei reira dawK dong hni touh ka rasang lahoi a pabo pouh. <sup>32</sup> Hot patetlah tamimaya ni karum tuettuet kaniruirui a tangtho kaniruirui tamuem teh a racawng awh. Kayounpoung ka racawng e ni hai Homer 10 touh a racawng awh (homer teh ephah hra touh, 220 liters a cawng). Rim pueng koe amamouh hane lengkaleng a vaw awh.

<sup>33</sup> Hatei moi teh a la awh lahun nah, be a ca awh hoehnahlan tamimaya lathueng BAWIPA e lungkhueknae a kaan teh, tamimaya koe takikatho poung e lacik hoi BAWIPA ni a rek awh. <sup>34</sup> Hote hmuen teh a min Kiborthhattaavah telah ati. Bangkongtetpawiteh, haw vah, takthaingainae katawnnaw hah a pakawp awh.

<sup>35</sup> Kiborthhattaavah koehoi tamihupui teh Hazeroth lah a patam awh teh Hazeroth a roe awh.

## 12

### *Miriam hoi Aron lairoenae*

<sup>1</sup> Mosi ni Ethiopia tami a yu lah a la kecu dawkvah, Miriam hoi Aron ni Bangdawkmaw Ethiopia tami hah a yu lah a la titeh lairoekhai roi.

<sup>2</sup> Ahnimouh roi ni Mosi koe dueng maw, BAWIPA ni lawk a dei. Kaimouh koehai dei van hoeH na maw, telah atipouh roi e hah BAWIPA ni a thai.

<sup>3</sup> Mosi teh talai van pueng e taminaw hlak kârahnoumpoung e lah ao.

<sup>4</sup> Hahoi, Mosi, Aron hoi Miriam koevah BAWIPA ni katham touh hoi tâcawt awh. Kamkhuengnae lukkareim koe tho awh, telah atipouh. Hot patetlah katham touh hoi a tâco awh. <sup>5</sup> BAWIPA ni tâmai khom lahoi a kum teh, kamkhuengnae bawkim takhang koe a kangdue pouh. Aron hoi Miriam a kaw teh, kahni touh hoi hmalah a tâco roi.

<sup>6</sup> Ahni ni ka lawk hah thai roi haw, nangmouh rahak profet awm pawiteh, ahni teh kai BAWIPA ni vision ka panuesak han, a mang lahoi ka pato han.

<sup>7</sup> Ka san Mosi teh hot patetlah awm hoeH. Ka imthungnaw pueng kong dawkvah yuemkamcu.

<sup>8</sup> Arulahoi laipalah, minhmai pheK kadangka hoi kacaipinlah lawk ka dei pouh. BAWIPA meilam hai a hmu. Hot patetlah bangkongmaw ka san Mosi heh phuenang sin harlah louk na ngai roi vaw, telah atipouh.

<sup>9</sup> Hot patetlah BAWIPA ni ahnimouh roi koe a lungkhuek teh a ceitakhai.

<sup>10</sup> Hahoi lukkareim koehoi tâmai a kâawm teh, khenhaw, Miriam teh tadamtui patetlah a pangaw teh hrikbei lah a coung. Aron ni Miriam hah a khet teh, khenhaw a hrikbei toe hei ati. <sup>11</sup> Hahoi Aron ni Mosi koevah, Oe ka bawipa, kai koe hete yon heh kamtue sak hanh. Pathu lahoi ka sak teh ka payon toe. <sup>12</sup> Tami a manu von kâko hoi a tâco teh, kadout tangcoung e patetlah hete napui hah awm sak hanh telah ati.

<sup>13</sup> Mosi teh BAWIPA koevah a hram teh, Oe Cathut pahren lahoi hawi sak haw telah a ratoum.

<sup>14</sup> BAWIPA ni Mosi koevah, na pa ni a minhmai dawK a tamthawi e patenghai hnin sari touh teh kayak mahoeH maw. Roenae alawilah hnin sari touh kâhrawk naseh, hahoi bout kâenkhai awh naseh telah atipouh.



<sup>15</sup> Hot patetlah, Miriam teh roenae alawilah hnin sari touh a kâhro. Miriam a kâenkhai awh hoehroukrak, tamimaya teh cet awh hoeh  
<sup>16</sup> Hahoi, taminaw teh Hazeroth hoi a kamthaw awh teh, Paran kahrawngum vah a roe awh.

## 13

### *Kanaan a tuet awh*

<sup>1</sup> BAWIPA ni Mosi hah a pato teh, <sup>2</sup> Isarelnaw koe ka poe e Kanaan ram tuet sak hanlah, tami patoun leih. Miphun tangkuem kahrawikungnaw thung hoi tami buet touh rip na tha han atipouh.

<sup>3</sup> Hatdawkvah, Mosi ni Paran kahrawngum hoi BAWIPA kâpoe e patetlah a patoun. Abuemlahoi Isarel catoun kahrawikungnaw doeh. <sup>4</sup> Hotnaw e minnaw teh,

Reuben miphun dawk hoi Zakkur capa Shammua,

<sup>5</sup> Simeon miphun dawk hoi Khorî capa Shaphat,

<sup>6</sup> Judah miphun dawk hoi Jephunneh capa Kaleb,

<sup>7</sup> Issakhar miphun dawk hoi Joseph capa Igal,

<sup>8</sup> Ephraim miphun dawk hoi Nun capa Hosi,

<sup>9</sup> Benjamin miphun dawk hoi Raphu capa Palti,

<sup>10</sup> Zebulun miphun dawk hoi Sodi capa Gaddiel,

<sup>11</sup> Joseph miphun dawk hoi ( hot teh Manasseh miphun doeh) Susi capa Gaddiel,

<sup>12</sup> Dan miphun dawk hoi Gemalli capa Ammiel,

<sup>13</sup> Asher miphun dawk hoi Michael capa Sethur,

<sup>14</sup> Naphtali miphun dawk hoi Vophsi capa Nahbi,

<sup>15</sup> Gad miphun dawk hoi Makhi capa Geuel,

<sup>16</sup> Hetnaw heh ram tuet sak hanelah Mosi ni a patoun e naw doeh. Nun capa Hosi teh Mosi ni Joshua telah a kaw. <sup>17</sup> Hot patetlah Mosi ni Kanaan ram tuet hanelah ahnimouh teh a patoun. Ahnimouh koe akalae lam dawh hoi hmaloe cet awh nateh, mon dawh luen awh. <sup>18</sup> Ram teh bangtelah vaimoe. Haw e kho ka sak e taminaw hah a thasai awh maw, a thayoun awh maw, tami a pap maw ayoun maw tie hoi, <sup>19</sup> a onae ram teh kahawi na ou, a onae kho teh bangpatet lae na vaimoe. Rim na ou, rapanim kaawm na ou. <sup>20</sup> Ram teh ka tawnta na ou, ka takang awh na ou, ratu na ou. Tarankahawilah awm awh nateh, ram dawh e a paw phawt awh telah atipouh. Hote tueng teh misur paw a hminnae tueng hoi a kâvoe.

<sup>21</sup> Hottelah a kamthaw awh teh, a takhang awh. Ram teh Zin kahrawngum hoi Hamath kâennae Rehob totouh, Kanaan ram kOUNg a tuet awh. <sup>22</sup> Akalah hoi hmaloe a takhang awh teh Hebron vah a pha awh. Hawvah Anakim catounnaw, Ahiman Sheshai hoi Talmi taminaw ao awh. ( Hebron teh Izip ram hoi Zoan kho thawng hoehnahlan kum sari nah thawng e kho lah a o). <sup>23</sup> Hahoi Eshkol tanghling dawh a pha awh. Haw e misur paw hah abawm khuehoi a bouk awh teh, tami kahni touh ni a kâkayawt awh. Tale paw hoi thaibunglung paw hai a thokhai awh. <sup>24</sup> Haw e misur bawm Isarelnaw ni a bouk pouh dawkvah, hote hmueneh Eshkol tanghling ati awh. <sup>25</sup> Hnin 40 hnukkhu, Kanaan ram tuetnae koehoi a ban awh.

### *Kanaan e kamthang*

<sup>26</sup> Hot patetlah Paran kahrawng dawh Kadesh vah Mosi hoi Aron hoi a taminaw pueng koe bout a pha awh. Ahnimouh ni tamimaya koe lawk



a thokhai awh. Hot ram hoi e a pawnaw hah a patue awh. <sup>27</sup> Hahoi ahnimouh ni ahnimouh koe, na patounnae ram dawkvah ka cei awh teh, sanutui hoi khoitui a lawngnae tangngak doeh, hetheh haw e ram daw k e a pawnaw doeh. <sup>28</sup> Hatei, hote ram daw k khokasaknaw teh tami a thasai seng doeh. Khonaw hai rapan ka tawn e khopui seng doeh. Hothloilah Anakim catounnaw ka hmu awh. <sup>29</sup> Amaleknaw akalah ao awh teh, Hitnaw hoi Jebusitnaw, Amornaw monrui daw k ao awh. Hahoi Kanaannaw teh tali tengpam, Jordan palang rayaw k lah ao awh telah a dei pouh awh.

<sup>30</sup> Hottelah, Kalep ni Mosi hmalah taminaw pueng sairasuep lah ao sak teh, pâtam vaiteh lat awh sei. Bangkongtetpawiteh, tâ awh roeroe han telah a ti.

<sup>31</sup> Hatei, ahni hoi rei kacetnaw ni, hotnaw tuk hanlah ka cet thai awh mahoe. Bangkongtetpawiteh, maimouh hlak a thasai awh telah ati awh.

<sup>32</sup> Hottelah a tuet awh e ram kong teh Isarel catounnaw koe kamthang mathout lah a pathang awh, ramnaw pueng tuet hanelah ka cei awh navah, amamae a canaw patenghai a thei awh, ka hmu awh e naw teh a rasangpoung awh, a thasai seng doeh. <sup>33</sup> Hahoi hete hmu en koe vah Anakim catoun kalenpoungnaw ka hmu awh. Kaimanaw teh samtong patetlah doeh ka o awh ati awh.

## 14

### *Kanaan kâen hane Isarel ni ngai hoeh*

<sup>1</sup> Hahoi teh, kamkhuengnaw pueng ni hote tangmin puenghoi a khuika awh. <sup>2</sup> Isarel catounnaw pueng Mosi hoi Aron koe a phuenang awh. Kamkhueng e tamimaya koe vah, Izip ram vah dout awh ngala pawiteh, hoehpawiteh hete kahrawngum dout ngala pawiteh, <sup>3</sup> bangkongmaw, tahloi hoi thei vaiteh, yuca pueng taran kut daw k pha sak hanelah maw BAWIPA ni hete ram daw k na ceikhai. Izip ram bout ban pawiteh, maimouh han bet a hawihnawn nahoe hmaw telah ati awh. <sup>4</sup> Hahoi a kamkhueng awh teh kahrawikung rawi vaiteh, Izip ram vah ban awh sei telah ati awh.

<sup>5</sup> Mosi hoi Aron teh kamkhueng e Isarelnaw pueng e hmalah a tabo roi. <sup>6</sup> Hateiteh, Nun capa Joshua hoi Jephunneh capa Kalep, ram katu etnaw thung daw k ka baw k roi van e ni a hni a phi roi teh, <sup>7</sup> kamkhueng e Isarelnaw pueng koe tuet hanelah ka cei sin awh e ram teh, kahawi poung tangngak e doeh. <sup>8</sup> Maimouh koe BAWIPA a lunghawi pawiteh, ama ni na cetkhai awh vaiteh, khoitui hoi sanutui a lawngnae ram teh na poe han doeh. <sup>9</sup> BAWIPA taranlahoi taranthaw laipalah, hote ram daw k e tami taket laipalah, awm awh sei. Bangkongtetpawiteh, ahnimouh teh maimae rawca lah doeh awm awh ti, ahnimanaw teh a kângue awh e awm hoeh. BAWIPA teh maimouh koe ao. Ahnimouh teh taket awh hanh sei telah ati roi.

<sup>10</sup> Hahoi ka kamkhueng e pueng ni talung hoi dêi han a noe awh. Hahoi BAWIPA bawilennae teh kamkhuengnae lukkareim daw k hoi Isarelnaw pueng e hmalah a kamnue pouh.

### *Ka phuenang e Isarel tounnae*

<sup>11</sup> BAWIPA ni Mosi koe vah hete taminaw pueng nâtotouh maw na pahnawt awh han. Ahnimouh koe mitnoutnae ka sak pouh ei teh, nâtotouh maw yuem laipalah ao awh han. <sup>12</sup> Lacik hoi ka yue vaiteh, be ka pahma ngala han. Nang daw kvah, ahnimouh hlak ka sungren e



hoi hno ka tet thai e miphun ka kangdue sak han telah a ti. <sup>13</sup> Mosi ni BAWIPA koevah hot teh Izipnaw ni thai langvaih. Bangkongtetpawiteh, hete tamihupui heh na thao e lahoi na tâcokhai e naw doeh. <sup>14</sup> Hot teh hete ram taminaw koe a dei pou han. BAWIPA nang teh hete taminaw koevah na o teh, BAWIPA nang nama teh minhmai phek kadangka lah na hmu awh kanîthun tâmaikhom hoi karum lah hmaikhom hoi a hmalah na cei pouh tie a panue awh toe. <sup>15</sup> Hot patetlah hete tamimaya heh tami buet touh e patetlah na thei pawiteh, na min kamthang ka panuek e miphunnaw ni, <sup>16</sup> BAWIPA ni hete tamimayanaw heh thoebo hoi a kam e ram dawk a hrawi thai hoeh dawkvah, kahrawngum kouna a thei telah a dei awh han.

<sup>17</sup> BAWIPA ni a lungsaw teh lungmanae hoi ka kawi e, payonnae hoi kâtapoenae ka ngaithoumkung yonpen e naw kayawicalah hloutsak laipalah, <sup>18</sup> napanaw yonnae kecu dawc canaw, catounnaw se thum se pali totouh, ouk karekkung doeh na a telah na dei tangcoung e patetlah BAWIPA na hnosakthainae teh, hoe lentoe lawiseh. <sup>19</sup> Na lungmanae a pap e patetlah hoi Izip ram hoi atu totouh na ngaithoum e patetlah na tamimaya e payonnae naw hah ngaithoum pouh haw telah ka ratoum.

<sup>20</sup> Hat toteh, BAWIPA ni na lawk patetlah ka ngaithoum toe. <sup>21</sup> Hatei, ka hring e patetlah BAWIPA bawilennae hoi talai heh muen a kawi han. <sup>22</sup> Izip ram hoi kahrawngum ka sak e naw bawilennae hoi kângairunae a hmuen teh, vai hra totouh na tanouk teh, ka lawk ka ngaihoeh e naw pueng ni, <sup>23</sup> kakhekungnaw koe thoebo nalaihoi ka kam pouh e ram teh, hmawt awh roeroe mahoe. Ahnimouh rahak ka lawk banglahai ka ngaihoehnaw ni hmawt mahoe. <sup>24</sup> Hatei, ka san Kalep, aloukcalah kaawm e muitha hah tawn teh, atangcalah ka hnuk a kâbang dawc, ahni teh a pâtam e ram koe ka hrawi vaiteh, a catounnaw ni a coe awh han. <sup>25</sup> Atuvah, Amaleknaw hoi Kanaan taminaw hah ayawn dawc ao awh. Tangtho vah ban awh nateh tuipui paling lam koelah hoi kahrawng dawc kâen awh telah a ti.

<sup>26</sup> BAWIPA ni, Mosi hoi Aron a pato teh, <sup>27</sup> hete kamkhueng e tamikathoutnaw e phuenangnae heh, nâtotouh maw ka ring han. Kai taranlahoi Isarel catounnaw lai a roe awh e ka thai. <sup>28</sup> Ahnimouh koe ka hring e patetlah ka hnâthainae koe na dei awh e patetlah nangmouh lathueng ka sak han, telah BAWIPA ni a dei. <sup>29</sup> Nangmouh ni milu na parei awh teh na touk awh tangcoung e patetlah, kum 20 lathueng kai koe laikaroenaw pueng teh, hete kahrawngum vah ro lah a o awh han.

<sup>30</sup> Kai ni hete ram dawc na o sak awh awh han ka ti e ram dawkvah, Jephunneh capa Kalep hoi Nun capa Joshua laipateh api hai phat awh mahoe. <sup>31</sup> Hatei, thei hanelah doeh ao awh, na tie na canaw hah ka kâen sak vaiteh, na ngai awh hoeh ram dawc kho a sak awh han.

<sup>32</sup> Hatei, nangmanaw teh na ronaw ramke dawc kouna a kamlei han. <sup>33</sup> Na capanaw hah kahrawngum vah kum 40 touh a kâva awh vaiteh, ramke dawc a ro hah a pawk awh hoehroukrak, namamouh na kâyo phu na phu awh han. <sup>34</sup> Ram na tuetnae hnin 40 touh hah, hnin touh yueng lah kum touh telah to lahoi kum 40 touh thung kâtapoe phu na khang awh han. Ka noenae yo a kâthung toe tie na panue awh han. <sup>35</sup> Kai BAWIPA ni hete tamikathoutnaw kai taranlahoi kamkhueng e maya pueng koevah, hethah ka sak roeroe han ka ti toe. Hete kahrawngum vah kahmakata vaiteh, hawvah a due awh han ati telah a dei tet pouh loe.

<sup>36</sup> Hottelah ram tuet hanlah Mosi ni a patoun teh ka ban awh e ram kong kamthang kathout lah ka pathang e naw, ama taranlahoi tamimaya lai ka roe sak e hoi, <sup>37</sup> ram kong dawc kamthangmathout kaphawtnaw roeroe



hah BAWIPA hmalah lacik hoi a due awh. <sup>38</sup> Hatei, ram tuet han kacetnaw thung dawk Nun capa Joshua hoi Jephunneh capa Kalep teh a hring roi rah.

### *Cungkeihoehe kâcainae*

<sup>39</sup> Hat toteh, Mosi ni hote lawk teh Isarelnaw pueng koevah a dei pouh teh, taminaw pueng ni a thai awh teh a lung kOUNg a mathoe awh. <sup>40</sup> Hottelah amom vah a thaw teh, monsom vah a luen. Khenhaw, ka tho toe. BAWIPA ni na kam pouh e koelah ka cei han. Bangkong, ka payon toe telah a ti.

<sup>41</sup> Mosi ni, bangkongmaw BAWIPA kâpoelawk na ek awh, Bangkongtet-pawiteh, hete ni kuepcing sak thai mahoe teh. <sup>42</sup> Takhang awh hanh, telah hoehpawiteh, na tarannaw ni na tâ awh han, bangdawK nangmouh koe BAWIPA awm hoeh. <sup>43</sup> Nangmouh hmalah Ameleknaw hoi Kanaannaw a o, tahloi hoi be na thet awh langvaih. BAWIPA teh na kamlang takhai dawkvah nangmouh koe BAWIPA awm hoeh telah a ti. <sup>44</sup> Hatei, monsom cei han pou a kâcai awh. Hatei BAWIPA lawkkam thingkong hoi Mosi hai rim dawK hoi tâcawt hoeh. <sup>45</sup> Hottelah hot mon dawK kaawmnaw Ameleknaw hoi Kanaannaw hah a cathuk awh teh, a tuk awh. Hormah totouh a pâlei awh.

## 15

### *Thuengnae kâlawk*

<sup>1</sup> BAWIPA ni Mosi hah a pato teh, <sup>2</sup> Isarelnaw hah pato nateh ahnimouh koe Na o nahane ram kai ni na poe e ram koe na pha awh toteh, <sup>3</sup> BAWIPA koe hmai hoi thuengnae, hmaisawi thuengnae thoseh, lawkkam kuep sak nahanelah, ma lungtho lahoi pawito nah na poe awh e thuengnae thoseh, saringhu dawK hoi tuhunaw thung dawK hoi thoseh, BAWIPA hanlah hmuitui hanelah na poe awh toteh, <sup>4</sup> BAWIPA koe thuengnae ka poe e pueng ni, tavai thuengnae, tavaikanui ephah pung hra pung touh, satui pung pali pung touh kanawK e hoi, <sup>5</sup> nei hane thuengnae koevah, misurtui hnin pung pali pung touh, hmaisawi thuengnae koevah thoseh, poenae koevah tuca tangkuem hanelah na rakueng awh han.

<sup>6</sup> Telah hoehpawiteh, tutan buet touh dawkvah, tavai thuengnae a kanui e tavai ephah pung hra pung hni, satui pung thum pung touh hoi kanawK e, <sup>7</sup> BAWIPA hanlah nei thuengnae hmuitui dawK misurtui hin pung thum pung touh na poe awh han.

<sup>8</sup> Hmaisawi thuengnae thoseh, lawkkam kuepsaknae thuengnae thoseh, BAWIPA koe roum thuengnae dawK maitotan na rakueng awh toteh, <sup>9</sup> maitotan poenae hoi tavai thuengnae, tavaikanui ephah pung hra pung thum, satui hin tangawn hoi kanawK e, <sup>10</sup> nei thueng nahanelah misurtui hin tangawn, BAWIPA hanlah hmuitui hoi thuengnae na sak awh han. <sup>11</sup> Hot patetlah maitotan hanlah thoseh, tutan hanlah thoseh, tuca hoiyah hmaeca hanlah na sak awh han. <sup>12</sup> Ayoun apap e lahoi na rakueng awh vaiteh, ayoun apap e lahoi na sak awh han.

<sup>13</sup> Hote ram dawK hoi ka tâcawt e pueng ni, het patetlah BAWIPA hanlah hmuitui hmaisawi thuengnae a poe awh navah, a sak awh han. <sup>14</sup> Nangmouh koe kho ka sak e imyin thoseh, nangmouh se nah nangmouh koe kho ka sak e naw pueng ni, BAWIPA hanlah hmai hoi hmuitui thuengnae hah nama ni na sak e patetlah a sak awh van han. <sup>15</sup> Na se yunglam pueng dawkvah, kamkhueng e maya hoi nangmouh koe kaawm e imyin han haiyah, phung buet touh dueng doeh kaawm han. BAWIPA



hmalah imyin teh namamouh patetlah ao han. <sup>16</sup> Namamouh han hoi nangmouh koe imyin kaawm e hanlah kâlawk buet touh hoi sak kawî buet touh dueng doeh kaawm han, tet pout telah ati.

<sup>17</sup> BAWIPA ni Mosi hah a pato teh, <sup>18</sup> Isarelnaw pato nateh, ahnimouh koe ceikhai hanelah ka noe e ram dawh na pha awh toteh, <sup>19</sup> hote ram dawh vaiyei na ca awh toteh, BAWIPA koe kahek thuengnae na sak awh han. <sup>20</sup> Nangmouh koe hmaloe kanawh e, vaiyei heh kahek thuengnae koe na poe awh han. Kahek thuengnae na sak awh e patetlah na kahek awh han. <sup>21</sup> Na catounnaw totouh tavai hmaloe kanawh e hah BAWIPA koe kahek thuengnae na poe awh han.

### *Ceknoe laipalah sakpayon e kâlawk*

<sup>22</sup> Hete kâpoe BAWIPA ni Mosi koevah, a dei e pueng BAWIPA ni kâpoelawknaw a kamtawngnae koehoi na catounnaw hanelah, <sup>23</sup> Mosi hno lahoi kâpoelawh a poe e naw pueng hah dâw laipalah, ceknoe e awm laipalah hoi yonnae na sak awh pawiteh, <sup>24</sup> hot teh tamimaya panuek laipalah ceknoe hoeh hoi yonnae na sak awh pawiteh, tamimaya ni hmaisawi thuengnae, BAWIPA koevah hmuitui hanlah, maitotan kanaw e buet touh a poe vaiteh, tamimaya ni hmaisawi thuengnae, BAWIPA koevah hmuitui hanlah maitotan kanaw e buet touh a poe vaiteh, aphung patetlah tavai thuengnae hoi roum thuengnae hoi yon thueng nahanelah hmaetan buet touh na poe awh han. <sup>25</sup> Hottelah, vaihma ni, Isarel catoun tamimaya hanlah, yontha nahanlah a sak vaiteh, ngaithoum e lah ao han. Bangkongtetpawiteh, hot teh ceknoe laipalah sakpayon e doeh. BAWIPA koe thuengnae, hmai hoi sak e thuengnae, BAWIPA hmalah yon thuengnae, ceknoe e awm laipalah sakpayonnae hanlah a thokhai awh han. <sup>26</sup> Isarel catoun tamimaya teh, ahnimouh koe kho ka sak e, imyinnaw pueng hai ngaithoum e lah ao han. Bangkongtetpawiteh, taminaw pueng ni ceknoe awm laipalah a sak awh e doeh. <sup>27</sup> Hahoi tami buet touh ni ceknoe laipalah yonnae sak pawiteh, yontha thueng nahanlah hmaela âvâ ka cawt hoeh rae kum touh ka phat e a poe han. <sup>28</sup> Hahoi, ama hanlah yon thuengnae sak hanlah BAWIPA hmalah, ceknoe e awm laipalah payonnae koe a sak toteh, vaihma ni ceknoe e awm laipalah payonae ka sak e tami hanlah yontha nahan a sak vaiteh, yontha lah ao han. <sup>29</sup> Ceknoe e awm laipalah ka payonkung hanelah Isarel catounnaw thung dawh, amamanaw hoi ahnimouh koe kaawm imyin hanlah hai reikâvan lah kâlawk a tawn awh han.

### *Ceknoe hoi sakpayon kâlawk*

<sup>30</sup> Hatei ceknoe hoi yonnae ka sak e teh, ram thung tami thoseh, imyin thoseh, BAWIPA min mathoe sak e lah ao dawkvah, a miphun dawh hoi takhoe lah ao han. <sup>31</sup> Bangkongtetpawiteh, BAWIPA e lawh a dudam teh kâpoelawh a ek dawkvah, hote tami teh pahnavt roeroe lah ao han. Yonpennaeh lah a onae phu hah a phu han, tet pouh telah ati.

### *Sabbath kaekkung*

<sup>32</sup> Hottelah Isarel catounnaw kahrawngum ao awh navah, sabbath hnin thing a ei e hmawt pawiteh, <sup>33</sup> thing a ei e kahmawtkung ni Mosi hoi Aron tamimaya koe a ceikhai han. <sup>34</sup> Ahni hah bangtelamaw ti han tie deipan hoeh rah dawkvah thongim a pabo awh. <sup>35</sup> BAWIPA ni Mosi koe hote tami teh thei han roeroe lah ao, rapan alawilah taminaw pueng ni talung hoi dêi roeroe hanlah ao telah atipouh.



<sup>36</sup> BAWIPA ni Mosi koevah, kâ a poe e patetlah taminaw pueng ni rapan hloilah a ceikhai awh teh, talung hoi kông kadout lah a dei awh.

### *Akana*

<sup>37</sup> BAWIPA ni Mosi hah a pato teh, <sup>38</sup> Isarel catounnaw pato nateh, na catounnaw totouh, khohna pawî koe akana na sak awh vaiteh, kamthim e ralui hoi na na yep awh han. <sup>39</sup> Hote akananaw hah na hmu awh toteh, BAWIPA e kâpoelawknaw pou na panue awh teh na tarawî awh nahan hoi, ahmaloe vah ma ngainae pâlei awh teh, ma lungpouknae lahoi payon awh e patetlah payon laipalah, <sup>40</sup> kaie kâpoelawknaw pueng na panue awh teh na tarawî awh teh na Cathut hanelah na thoung awh nahan hottelah na sak awh han. <sup>41</sup> Kai teh nangmae Cathut lah ka o nahan, nangmouh hah Izip ram hoi ka tâcawtkhai e nangmae Cathut Jehovah doeh. Kai teh nangmae Cathut Jehovah doeh atipouh.

## 16

### *Korah phuenangnae*

<sup>1</sup> Levih miphun Kohath capa Izhar, ahnie capa Karah teh, Reuben miphun Eliab capa Dathan hoi Abiram, hoi Peleth capa On tinaw hah a ceikhai teh, <sup>2</sup> Isarel catoun thung hoi a min bet kamsawngnaw dawî hoi a lungkahanaw hoi lawkcengkung lah rawi e naw thung dawî hoi tami 250 touh Mosi hmalah a kangdue awh. <sup>3</sup> Mosi hoi Aron taranlahoi ahnimouh koe, hloi na lui awh toe. Bangdawî tetpawiteh a tamimaya kông a thoung awh teh, taminaw pueng koe BAWIPA ao doeh. Bangkongmaw BAWIPA e tamimaya van vah ka taluepoung lah na kâpouk roi telah atipouh.

<sup>4</sup> Hot hah Mosi ni a thai toteh a tabo teh, <sup>5</sup> Korah hoi a huinaw pueng koe, tangtho vah BAWIPA ni apimaw amae lah kaawm niteh, apimaw kathoung tie a kamnue sak vaiteh, ama rek hnai hanelah ati han doeh. <sup>6</sup> Hetheh sak awh, Korah hoi na huinaw pueng ni hmai lanae tongben lat awh nateh, <sup>7</sup> tangtho vah, athung vah hmai hah tat nateh hmuitui hah BAWIPA hmalah phum awh. Hahoi BAWIPA ni a rawi e pueng teh kathoung lah ao han. Nangmouh Levih capanaw ekvoi na lui awh toe telah a ti.

<sup>8</sup> Mosi ni Korah koevah, nangmouh Levih capanaw thaihaw, <sup>9</sup> BAWIPA bawknae rim dawkvah thaw a tawî teh tamimaya hmalah thaw tawî hanlah kangdout e Isarelnaw, Cathut ni ama hnai hanelah Isarel taminaw pueng koehoi a kapek e, <sup>10</sup> Levih capa na hmaunawngnanaw hoi ama hnai sak hanlah a ta e naw heh, hno kathoungcalah na pouk awh dawî maw vaihma lah onae na tawng awh rah. <sup>11</sup> Hatdawkvah, nang nama hoi na hu pueng teh BAWIPA taranlahoi na kamkhueng awh vaw. Aron heh bangpatet lae tami lah maw ao teh, ahni koevah na phuenang awh vaw telah a ti.

<sup>12</sup> Mosi ni Eliab capa Dathan hoi Abiram a kaw sak, hatei ahnimouh ni ka takhang awh mahoe. <sup>13</sup> Kahrawngum vah thei rumram hanelah sanutui hoi khoitui a lawngnae ram koehoi na tâcokhai e hah hno katoengcae na maw, kaimouh lathueng vah bawî lah o han thouk na ngai bo aw. <sup>14</sup> Sanutui hoi khoitui a lawngnae ram dawî na ceikhai laipalah law hoi misur takha hai râw hanlah na poe kalawn hoe. Hetnaw e mit heh ton na phuen pouh han na maw. Ka takhang awh roeroe mahoe telah a ti.

<sup>15</sup> Mosi teh a lungphuen poung teh, BAWIPA koe vah a poe awh e teh dâw pouh hanh. Ahnimae la buet touh boehai ka lat pouh hoe. Apihai patawnae ka poe hoe a ti.



<sup>16</sup> Mosi ni Korah koevah tangtho vah nang nama hoi na huinaw pueng Aron hoi BAWIPA hmalah la awm awh. <sup>17</sup> Hahoi hmai lanae tongben rip sin awh naseh. Hmuitui kOUNg phuen awh naseh. BAWIPA hmalah hmai lanae 250 touh hah sin awh naseh. Nang nama hoi Aron ni hai hmai na lanae tongben reirei sin roiheh telah atipouh.

<sup>18</sup> Hahoi teh tami pueng ni hmai lanae rip a sin awh teh, hmai a ta awh teh hmuitui a phuen awh. Mosi hoi Aron teh kamkhuengnae lukkareim takhang koe a kangdue roi. <sup>19</sup> Hahoi Korah ni tamimayanaw pueng hah ama taran lahoi kamkhuengnae lukkareim takhang koe a pâkhueng awh. Hahoi hote tamimaya lathueng BAWIPA bawilenna a kamnue. <sup>20</sup> Hahoi BAWIPA ni Mosi hoi Aron a pato teh, <sup>21</sup> hete tamiu heh tawkkadekca dawh be a kahma thai nahanlah ahnimouh koehoi alouklah awm awh telah a ti. <sup>22</sup> Hottelah ahnimouh a tabo awh teh, Oe! Cathut takthainaw pueng e muitha Cathut, buet touh yon kecu dawh taminaw pueng koe na lungkhuek han maw telah a ti.

<sup>23</sup> BAWIPA ni Mosi a pato teh, <sup>24</sup> taminaw pueng koe dei pouh. Korah hoi Dathan hoi Abiram tinaw e roenae rim dawh hoi yawng awh telah tet pouh.

<sup>25</sup> Mosi a thaw teh Dathan hoi Abiram koe a cei teh, Isarel kacuenaw a kambawng awh. <sup>26</sup> Hahoi taminaw pueng koe a dei teh, hete tamikayonnaw e rim koehoi a tâco awh. Banghai tek pouh hanh awh. Hoehpawiteh a yonae pueng dawh nangmouh hai na bawh awh langvaih telah tet pouh.

<sup>27</sup> Hahoi Korah hoi Dathan hoi Abiram tinaw kathum touh teh, kOUNg a tâcawttakhai awh. Dathan hoi Abiram teh amamae rim dawh hoi a tâco roi teh, amamae rim takhang koe a yucanaw hoi a kangdue awh.

<sup>28</sup> Mosi ni kai kama ngainae lahoi ka sak e nahoe. BAWIPA ni sak hanelah na patoun e doeh tie hah hete hnonaw dawh hoi na panue awh han. <sup>29</sup> Hete taminaw niyah ayânaw due e patetlah dout boilah, taminaw pueng rek e patetlah rek pawiteh Cathut ni na patoun hoe. <sup>30</sup> Hatei, BAWIPA ni a katha lah hno a sak teh, talai ni a kâko ang pawiteh, amamouh hoi kâkuen e pueng kOUNg a padoun hoiyah tangkom dawh a hringo kâen awh pawiteh, BAWIPA ni hete taminaw heh a pahnawt toe tie na panue awh han telah a ti.

<sup>31</sup> Hahoi, hete lawknaw kOUNg a dei hnukkhu hoi ahnimouh onae koe talai rak a kâbawng. <sup>32</sup> Hahoi teh talai ni a kâko a ang teh, imthung buemlahoi, Korah e taminaw pueng hoi hnopainaw pueng hoi he a payawp. <sup>33</sup> Hahoi amamouh hoi a tawn awh e naw pueng hah tangkom dawh a hringo kOUNg a bo awh. Talai ni a kâko a cakuep teh, ka kamkhueng e naw koehoi he a kahma awh. <sup>34</sup> Hahoi a tenggam e Isarelnaw pueng teh, hotnaw e hramki lawk dawh hoi a yawng awh teh, talai ni na payawm awh langvaih telah ati awh. <sup>35</sup> Hahoi BAWIPA koehoi hmai a tâco teh hmuitui ka thueng e tami 250 touh he a kak awh.

<sup>36</sup> BAWIPA ni Mosi a pato teh, <sup>37</sup> nang ni hmai hah tâkhawng nateh, vaihma Aron capa Elizur ni hmai thung e hmailanae tongben la hanelah dei pouh. Bangkongtetpawiteh, kathounge hno lah ao. <sup>38</sup> Amamouh hringnae dawh kapayonnaw e hmailanae tongbennaw hai lat nateh, khoungroe ramuk nahanelah dei lah awm naseh. Bangkongtetpawiteh BAWIPA hmalah poe e a tho dawkvah, kathounge lah ao teh, Isarel catounnaw hanelah mitnout lah ao han telah a ti.



<sup>39</sup> Hahoi Isarel catounnaw hanelah pahnim hoeh nahanelah Aron hoeh laipateh Jentelnaw BAWIPA hanlah hmuitui hmaisawi thueng hanelah a cei awh hoeh nahan. <sup>40</sup> Karah hoi a huinaw patetlah ao awh hoeh nahan, Mosi hno lahoi BAWIPA ni ahnimouh koe a dei pouh e patetlah bawknae khongroeg ramuk nahan a dêi awh.

### *Tamimaya phuenangnae*

<sup>41</sup> A tangtho vah, Isarel catoun tamihu teh Mosi hoi Aron taranlahoi a phuenang awh. BAWIPA e tamihunaw na thei awh atipouh awh.

<sup>42</sup> Mosi hoi Aron hah taminaw pueng ni a kamkhueng sin navah kamkhuengnae lukkareiim koelah a kangvawi awh teh, khenhaw! tâmai ni king a kayo awh teh, BAWIPA bawilenna e kamnue.

<sup>43</sup> Mosi hoi Aron teh kamkhuengnae lukkareiim hmalah a tho roi. <sup>44</sup> BAWIPA ni Mosi a pato teh, <sup>45</sup> hete taminaw thung hoi aloukcalah awm awh. Tawkkadecka kahma sak nahanelah, telah atipouh. Hahoi ahnimouh teh a tabo awh.

<sup>46</sup> Mosi ni Aron koevah, hmai lanae tongben sin loe, khongroeg dawh hmai hah tat, hmuitui hah phuen nateh, taminaw pueng koe karanglah cetkhaih. Ahnimouh hanlah yontha nahan sak pouh. BAWIPA koehoi lungkhueknae a tâco toe. Patawnae lacik a kamtawng toe telah atipouh.

<sup>47</sup> Aron ni Mosi ni dei e patetlah a sin teh, ka kamkhueng e naw koe lah a yawng. Hahoi teh khenhaw! Lacik teh taminaw pueng koe pataw a kamtawng toe. Hmuitui a phuen teh taminaw yontha sak nahanlah a sak. <sup>48</sup> Tami kadout hoi kahring rahak a kangdue teh lacik teh a thoung. <sup>49</sup> Hottelah Korah kong dawh hoi kadoutnaw touksin laipalah, lacik lahoi kadoutnaw teh 14700. <sup>50</sup> Aron teh kamkhuengnae lukkareiim takhang koe Mosi koe a ban teh laciknaw pueng teh a thoung.

## 17

### *Aron e sonron a kahlawng*

<sup>1</sup> BAWIPA ni Mosi hah a pato teh, <sup>2</sup> Isarel catounnaw pato nateh a miphun lahoi a napanaw imthung, Isarelnaw hlaikahni touh koe kahrawikungnaw lengkaleng poe hanelah sonron hlaikahni touh na la vaiteh, amamae min hah sonron dawh lengkaleng thut pouh. <sup>3</sup> Hahoi Levih sonron dawh, Aron min na thut han. Bangkongtewpawiteh, a na pa imthung kahrawikung hanelah sonron buet touh lah rip ao han. <sup>4</sup> Kamkhuengnae lukkareiim, lawkpanuesaknae hmalah na ta han. <sup>5</sup> Kai ni ka rawi e sonron teh a dawn a pei han. Hattoteh, nangmouh roi yon ka pen e Isarelnaw e phuenangnae teh ka takhoe pouh han, telah a ti.

<sup>6</sup> Hottelah Mosi ni Isarel catounnaw hah a pato teh, kahrawikungnaw ni a imthungkhu yueng lah kahrawikung buet touh ni sonron buet touh rip a sin teh, sonron hlaikahni touh hah a poe teh, Aron e sonron hai hotnaw rahak vah a baw van. <sup>7</sup> Mosi ni kapanuekkhaikung lukkareiim dawh BAWIPA hmalah sonron hah a ta.

<sup>8</sup> A tangtho vah Mosi teh kapanuekkhaikung lukkareiim dawkvah, a cei teh, Levih imthung e yueng lah Aron e sonron hah a dawn teh, a pei a muem, a pei a pei teh almond paw a paw. <sup>9</sup> Mosi ni BAWIPA hmalae sonronnaw pueng hah Isarel catounnaw pueng koe a ceikhai. A khet awh teh amamae sonron hah lengkaleng a la awh.

<sup>10</sup> Oe BAWIPA ni, laikaroenaw koe lah mitnout lah ao nahanelah, Aron e sonron hah lawkpanuesaknae kung koe tat leih. Hat pawiteh doeh



ahnimae phuenangnae hah ka mithmu hoi kâhat vaiteh dout awh mahoe, telah atipouh.

<sup>11</sup> BAWIPA ni Mosi lawk a thui e patetlah ahni ni a tarawi teh a sak.

<sup>12</sup> Isarel catounnaw ni Mosi koevah, kOUNg kahma awh teh, kOUNg ka due awh toe, kOUNg rawk awh katang toe. <sup>13</sup> BAWIPA lukkareiim kâhnai pueng ni a due awh. KOUNg kahmat lah due awh han namaw telah ati awh.

## 18

### *Vaihma hoi Levihdaw e thaw*

<sup>1</sup> BAWIPA ni Aron koevah, nangmouh hoi na capanaw hoi nang koe kaawm e na pa imthungdaw ni, hmuen kathoung hoi kâkuen e payonpakainae yon teh na phu awh han. Hahoi nama hoi nang koe kaawm e na capanaw hoi vaihma lah na onae hoi kâkuen e payonpakainae yo hah na phu awh han. <sup>2</sup> Na pa miphun, Levih miphun na hmaunawngghanaw ni kapanuekkhaikung lukkareiim hmalah na capanaw koe ao navah, nang hoi thaw cungtalai rei a tawk thai nahan, nang koe na thokhai han. <sup>3</sup> Na panki e thaw hoi lukkareiim thaw a panki e naw na kabawp han. Hatei, hmuen kathoung hlaamnaw hoi bawknâe khOUNgroe hah hnai awh hanh naseh, telah nahoe pawiteh, ahnimouh hai nangmouh hai na due awh han. <sup>4</sup> Ahnimouh ni na kabawp awh vaiteh, kamkhuengnae lukkareiim thaw pueng hah a panki e patetlah lukkareiim thaw a tawk awh han. Hatei alawilae tami ni na hnai awh mahoe.

<sup>5</sup> Isarel catounnaw lathueng vah lungkhueknâe ao hoe hah nahanlah, nang nama ni hmuen kathoung thaw hoi khOUNgroe thaw hah na ham lah na la han. <sup>6</sup> Khenhaw! kai ni na hmaunawnggha Levih taminaw hah Isarel catounnaw thung hoi ka la teh, kamkhuengnae lukkareiim koe thaw tawk hanlah, nangmouh hanlah BAWIPA koehoi poe e nangmouh koe poe e doeh. <sup>7</sup> Hatdawkvah, nang nama hoi na capanaw ni khOUNgroe hoi yaphni athung lae hnonaw pueng dawk vaihma na coungnae thaw heh poehno patetlah nang koe poe lah ao. Hatei, alawilae tami bawk pawiteh thei lah ao han.

### *Vaihma hoi Levih kabawpnae*

<sup>8</sup> BAWIPA ni Aron a pato teh, khenhaw! kai kama roeroe ni kahek thuengnae koe Isarel catounnaw poehno kathoungdaw pueng hah, nang nama hoi na capanaw e ham lah a yungyoe hane phung lah na poe. <sup>9</sup> Hmai sawi hoe e pueng nang han hno kathoung poung lah ao han. A pasoung awh e pueng, tavai thuengnae, yon thuengnae, hoi kâtapoe thuengnae, kai koe na poe awh e hah, nang hoi na capanaw hanlah ka thOUNg poung lah ao han. <sup>10</sup> Tongpa pueng ni hmuen kathoung poung koe na ca awh vaiteh, nangmouh hanlah ka thOUNg e lah ao han.

<sup>11</sup> Het hai na ham lah ao han, tavai thuengnae koe a poe awh e hno, Isarel catounnaw kahek thuengnae hnopoe pueng hah nang nama hoi na capa na canu naw hoi a yungyoe na ham lah na poe. Na im dawk tamikathoung kaawm e pueng ni a ca thai awh han. <sup>12</sup> Kahawipoung e satui hoi misur kahawipoung e hoi aluepaw BAWIPA hanlah a poe awh e hah na poe. <sup>13</sup> Ahnimae law daw e aluepaw hmaloe ka hmin e BAWIPA hanlah a poe awh e hah nange lah ao han. Na im dawk tamikathoung kaawm e pueng ni a ca thai awh han.

<sup>14</sup> Isarelnaw ni poehno e pueng teh nange lah ao han. <sup>15</sup> BAWIPA hanlah a poe awh e camoim ka paawng pasuek e pueng teh tami thoseh,



saring thoseh nange lah ao han. Hatei camin teh na ratang roeroe han. Kathounghoehe saring camin hai na ratang han. <sup>16</sup> Thapa yung touh e ratang hanlah kaawm e hah ratangnae phu na to vaiteh, hmuen kathoung koe hno e sekel panga touh hoi na ratang han (sekel teh gerah 20 touh doeh).

<sup>17</sup> Hatei maitotan camin hoi tu camin hoi hmae camin teh na ratang awh mahoe. Hotnaw teh a thoung awh. A thipaling teh khoungroe dawk na kathek vaiteh, BAWIPA han hmuittui lah athaw hah hmai hoi hmaisawi thuengnae koe na sawi awh han. <sup>18</sup> Kahek thuengnae koe a takuep hoi aloung teh nange lah ao e patetlah a moi hah nange lah ao han.

<sup>19</sup> Kathoung hno hoi kahek thuengnae koe Isarelnaw ni BAWIPA hanlah a poe awh e hah, a yungyoe na ham lah na poe. BAWIPA hmalah nang nama hoi na capanaw hoi na canu naw hoi yungyoe lawkkam lah ao han telah ati.

<sup>20</sup> BAWIPA ni Aron koevah, a ram dawk na ham kawi banghai awm mahoe, a thungup hai na ham kawi banghai awm mahoe. Kai doeh Isarel catoun thung dawk na ham hoi na coe e raw lah ka o.

### *Pung hra pung touh*

<sup>21</sup> Hahoi Levi catounnaw teh, khenhaw! thawtawknaw koe a thaw taw awh e lukkareim koe thaw taw phu lah Isarel ram e pung hra pung touh pueng teh na poe awh. <sup>22</sup> Atu totouh hoi teh Isarel catounnaw ni, kamkhuengnae lukkareim teh hnai awh roeroe hanh naseh. Telah hoehpawiteh, yonpennae phu hoi a due payon awh han doeh. <sup>23</sup> Hatei, Levihnaw ni kamkhuengnae lukkareim koe thaw a taw awh vaiteh, thaw abuemplahoi a la awh han. Hetnaw heh catounnaw ditouh phunglam lah ao han. Isarel catoun thung vah a ham kawi banghai awm mahoe. <sup>24</sup> Isarel catounnaw ni pung hra pung touh BAWIPA hanlah kahek thuengnae a poe awh e hah Levihnaw hanlah raw lah ka poe toe. Hatdawkvah, ahnimouh koe Isarel catounnaw thung dawk raw a coe kawi banghai awm mahoe telah yo ka ti pouh tounge tayaw telah ati.

### *Levihnaw e pung hra pung touh*

<sup>25</sup> BAWIPA ni Mosi hah a pato teh, <sup>26</sup> hothloilah Levihnaw hah pato nateh, ahnimouh koe na raw hanlah Isarel catounnaw pung hra touh dawk pung touh na poe e hah ahnimouh koehoi na hmu awh toteh, hote pung hra pung touh e thung hoi pung hra pung touh hah BAWIPA koe kahek thuengnae na poe awh han. <sup>27</sup> Hottelah nangmae kahek thuengnae teh cangkatinnae koe cakang aluepaw hoi misurtui ahruem patetlah pouk e lah ao han. <sup>28</sup> Hottelah Isarel catounnaw koehoi pung hra pung touh na hmu awh e pueng BAWIPA hanelah kahek thuengnae koe pou na poe awh han. Hahoi BAWIPA hanelah kahek thuengnae hah Aron na poe awh han. <sup>29</sup> Na hmu awh e pueng thung hoi, kahawipoung, kathoungpoung hah BAWIPA koe kahek thuengnae na poe awh han.

<sup>30</sup> Hatdawkvah ahnimouh koe, hotnaw thung dawk hoi kahawi poung e na kahek awh toteh, Levihnaw a cangkatin e dawk hoi ka tacawt e hoi misurtui ka lawng e patetlah pouk lah ao han. <sup>31</sup> Na e hmuen pueng koehai koug na ca thai awh han. Nangmouh hoi na imthung ni hai, bangkongtetpawiteh, kamkhuengnae lukkareim koe e thaw taw phu doeh <sup>32</sup> Kahawipoung e na kahek awh toteh, yonae yon phu lah awm mahoe. Hatei, Isarel catounnaw poehno kathoung hah na kamhnawng awh mahoe, telah hoehpawiteh, na due awh han tet pouh telah atipouh.



## 19

*Thoungsaknae kâlawk*

<sup>1</sup> BAWIPA ni Mosi hoi Aron hah a pato teh, <sup>2</sup> hethateh, BAWIPA kâlawk poe e phunglam kâlawk doeh. Isarel catounnaw hah maitola ka paling e kacuem e a laphu thueng pouh hoeh e, thokhai hanlah dei pouh. <sup>3</sup> Rapan hloilah ceikhai vaiteh, a hmalah thei thai nahanlah vaihma Eleazar koevah na poe han. <sup>4</sup> Vaihma Eleazar ni a kutcarei hoi thipaling youn touh a la vaiteh, kamkhuengnae lukkareiim hmalah, vai sari touh paloupalou a kathek han. <sup>5</sup> Hottelah maitola teh a pho, a moi, a thi hoi a ei hai a mithmu vah hmaisawi han. <sup>6</sup> Vaihma ni sidar thing hoi dingsala hoi langsan a la vaiteh, maitola hmaisawinae koe a tâkhawng han. <sup>7</sup> Vaihma ni a khohna a pâsu vaiteh, tui a kamhluk han. Hahoi roenae hmuen koe a cei han, tangmin totouh vaihma teh a khin han.

<sup>8</sup> Hmai kasawikung ni hai amae khohna a pâsu vaiteh tui a kamhluk han, tangmin totouh a khin han. <sup>9</sup> Kathounge ni maitola hraba hah a kawm vai teh, rapan hloilah thoungnae hmuen koe a ta vaiteh, Isarel catounnaw, tamimaya hanlah kamthoungnae tui daw k a hno han, hethateh yon thung hoi thoungnae doeh. <sup>10</sup> Hahoi maitola hraba kakawnkung teh, a khohna a pâsu vaiteh, tangmin totouh a khin han. Hethateh Isarel catounnaw hoi ahnimouh koe kaawm e imyinnaw hanlah a yungyoe phunglam lah ao han.

<sup>11</sup> Bangpatetlae tami ro nakunghai katekkung teh hnin sari touh thung a khin han rah. <sup>12</sup> Hahoi tami teh hnin thum hnin vah hraba hoi a kamthoung vaiteh, hnin sari hnin vah a thoung han. Apâthum hnin kamthoung hoehpawiteh, asari hnin totouh a khin han. <sup>13</sup> Tami bangpatet ni hai Bangpatete tami ro hai a tek awh teh kamthoung awh hoehpawiteh, BAWIPA lukkareiim kakhinsakkung lah ao teh, hote tami teh Isarel taminaw thung daw k hoi hnoun e lah ao han. Kamthoungnae tui ahnimouh koe kathek sin lah ao hoeh dawkvah, a khin han. A khinnae hah ahnimouh koe ao rah.

<sup>14</sup> Tami buet touh lukkareiim daw k dout pawiteh, hethah kâlawk lah ao han. Lukkareiim daw kâen e pueng teh lukkareiim daw k kaawm e pueng hnin sari touh thung a khin han. <sup>15</sup> Hahoi hlaam a khuem kâkhuem hoeh e puenghai a khin han. <sup>16</sup> Hahoi tami bangpatet ni law vah, tahloi hoi a thei awh e thoseh, ao navah kadout e ro thoseh, tami kadout e hru thoseh, tangkom daw k thoseh, tek pawiteh hnin sari touh a khin han. <sup>17</sup> Hahoi kathoung hoeh naw hanlah, yon thoung nahanlah hmaisawi e, maitola hraba teh a la vaiteh, amamae tongben daw k, ka lawng e tui a ta awh han. <sup>18</sup> Hahoi kathounge ni dingsala a la vaiteh, tui daw k a padung han. Hahoi lukkareiim hlaamnaw pueng hai haw e kaawmnaw pueng hraba thoseh, ka tek e pueng teh be a kahei sin han.

<sup>19</sup> Hahoi kathounge naw ni apâthum hnin hoi asari hnin vah kathoung hoeh pueng a kahei sin han, a khohna a pâsu hoi tui a kamhluk vaiteh tangmin lah teh a thoung han. <sup>20</sup> Hatei kakhin e ka kamthoung hoeh e niteh, BAWIPA e hmuen kathoung a khin sak dawkvah, hote tami teh kamkhueng e tamiu thung hoi takhoe e lah ao han. Kamthoungnae tui hah ahi koe kahei sin lah ao hoeh dawkvah, kakhin e lah ao. <sup>21</sup> Hethah ahnimouh han a yungyoe phunglam lah ao han. Kamthoungnae tui kahei sin e pueng ni a khohna a pâsu han, hahoi a kamthoungnae tui kateknaw pueng teh tangmin totouh a khin han. <sup>22</sup> Kathounghoehe naw ni a tek e



pueng teh kakhin e lah awm toung vaiteh, hot hno kateknaw pueng teh, tangmin totouh a khin han, telah a ti.

## 20

### *Lungsong tui*

<sup>1</sup> Hahoi Isarel catounnaw pueng teh, thapa yung pasuek dawkvah, Zin kahrawngum dawkvah a kâen awh. Taminaw pueng teh, Kadesh vah a hnin ao awh. Hawvah, Miriam a due teh hawvah a pakawp awh. <sup>2</sup> Hahoi taminaw pueng hanlah tui nei han awm hoehe toe. Hat toteh, haw vah Mosi hoi Aron taran lahoi a kamkhuengsin awh. <sup>3</sup> Taminaw pueng ni BAWIPA hmalah hmaunawngghanaw a due nah dout ngala boipawiteh, <sup>4</sup> bangkongmaw BAWIPA e taminaw hete kahrawngum vah kamamanaw hoi saringnaw abuemlah due hanlah na ceikhai. <sup>5</sup> Bangkongmaw het patet kahawihoehe ram dawkvah kâenkhai hanlah Izip ram hoi na tâcokhai. Tâsong, thaibunglung kung, misurkung, tale paw hai o hoehe nah koe, tui boehai nei hane ao hoehe nah koe, telah ati awh.

<sup>6</sup> Mosi hoi Aron teh tamimaya koehoi kamkhuengnae lukkareiim takhang koe a cei roi teh, a tabo roi. Hahoi ahnimouh roi koe BAWIPA bawilenna a kamnue.

<sup>7</sup> BAWIPA ni Mosi a pato teh, <sup>8</sup> sonron lat nateh, nang hoi na hmau Aron ni taminaw pâkhueng awh. Ahnimae mithmu vah lungsongpui koe lawk dei pouh. Tui a tâcosak han. Hot patetlah hoiyah, lungsongpui daw k hoi tui na tâcosak vaiteh, taminaw pueng hoi saringnaw hah na nei sak han telah ati.

<sup>9</sup> Hot patetlah Mosi ni BAWIPA hmalah sonron hah kâ a poe e patetlah a la. <sup>10</sup> Mosi hoi Aron ni taminaw pueng hah lungsongpui teng a pâkhueng teh, ahnimouh koe, taran ouk ka thaw e taminaw, atu thai awh haw! hete lungsong daw k hoi nangmouh han tui ka tâcosak roeroe han maw telah atipouh.

<sup>11</sup> Hahoi teh Mosi ni a kut a dâw teh, a sonron hoi lungsongpui hah vai hni touh a hem, hat toteh, tui kapap poung lah a tâco. Taminaw pueng hoi saringnaw ni a nei awh.

<sup>12</sup> BAWIPA ni Mosi hoi Aron koe kai na yuem hoehe teh, Isarel catounnaw mithmu vah, kai na barilawa hoehe dawkvah, hete taminaw pueng teh kai ni na poe awh e ram daw k na kâenkhai mahoehe, telah atipouh.

<sup>13</sup> Isarel catounnaw ni BAWIPA rek a cusin awh teh ahnimouh thung vah ama barilawa hanlah ao daw k hote tui teh Meribah ati awh.

### *Edom ni a ngang*

<sup>14</sup> Hahoi Mosi ni Kadesh hoi Edom siangpahrang koevah, patounenaw a patoun. Na hmaunawnggha Isarel ni hettelah a dei. Maimouh koe ka phat e runae kathonaw pueng, <sup>15</sup> mintoenaw Izip ram a cei awh teh, moikasaw lah Izip ram vah ka o awh teh, Izipnaw ni kai koe hoi mintoenaw totouh rucatnae na poe e hah na panue. <sup>16</sup> BAWIPA koe ka hram awh e lawk hah a thai teh, kalvantaminaw a patoun teh, Izip ram hoi na tâco sak. Khenhaw, na ram hoi ka hnai poung lah, Kadesh khopui dawkvah ka o awh. <sup>17</sup> Pahren lahoi na ram thung pou na rakan sak haw. Law thoseh, misur takha thoseh, ka coungroe awh mahoehe. tuikhu daw k e tui hai ka net mahoehe. Siangpahrang lamthungpui daw k doeh ka cei awh han, na ram ka tapoung hoehe roukrak avoilah aranglah hai kampuen awh mahoehe, telah ati. <sup>18</sup> Edom ni kai ka ram daw k na cet awh mahoehe, telah



hoehpawiteh, nangmouh tuk hanelah tahloi hoi kamthaw awh han, telah ati.

<sup>19</sup> Isarel catounnaw ni lamthungpui dawh hoi ka cei awh vaiteh kamamouh hoi ka saringnaw ni na tui ka net awh pawiteh, aphu na poe awh han, hno alouke banghai sak laipalah, raka lah doeh pou ka raka awh ti telah atipouh awh.

<sup>20</sup> Ahni ni na raka awh mahoeah atipouh. Hahoi teh, Edom teh tami moikapap hoi tami athakaawme taminaw hoi ahnimouh tuk hanlah a kamthaw awh. <sup>21</sup> Hot patetlah Isarel catounnaw teh Edom ni a ram dawh dei hanlah pasoung awh hoeah. Hahoi Isarel teh ahnimouh koehoi a kamlang takhai awh.

### *Aron duenae*

<sup>22</sup> Hothloilah Isarelnaw pueng teh Kadesh hoi a kamthaw awh teh, Hor mon koe a pha awh. <sup>23</sup> BAWIPA ni Mosi hoi Aron teh Edom khori koe Hor mon hoi a pato teh, <sup>24</sup> Aron teh a taminaw koe ceikhai han toe. Bangtelah tetpawiteh, Isarel catounnaw koe ka poe e ram dawh kâen mahoeah. Bangkongtetpawiteh, Meribah tui koe ka lawk taran lahoi taran a thaw awh. <sup>25</sup> Aron hoi a capa Eleazar hah Hor mon koe a luenkhai awh. <sup>26</sup> Aron e khohna rading awh nateh, a capa Eleazar kâkhu sak awh. Bangkongtetpawiteh, Aron teh a taminaw koe ceikhai vaiteh, haw vah a due han telah ati.

<sup>27</sup> Mosi ni BAWIPA kâ poe e patetlah a sak teh, taminaw pueng e mithmu vah Hor mon vah a luen awh. <sup>28</sup> Mosi ni Aron e khohna a rading pouh teh, Eleazar a kho sak teh, Aron teh monsom vah a due. Hottelah Mosi hoi Eleazar teh monsom hoi a kum roi. <sup>29</sup> Taminaw pueng ni Aron a due tie a thai awh toteh, Isarelnaw pueng ni Aron teh hnin 30 touh a khui awh.

## 21

### *Hormah vah Kanaannaw tânae*

<sup>1</sup> Kanaannaw Arad siangpahrang akalae kaawm e niyah, Isarelnaw, Atharim lam koe lah a tho awh ti a thai awh toteh, Isarelnaw hah a tuk awh teh, a tangawn san lah a man awh. <sup>2</sup> Hottelah Isarelnaw ni BAWIPA koevah lawk a kam awh teh, hetnaw heh kaimouh kut dawh na poe pawiteh, a khopui hah peng ka raphoe thai han telah ati awh.

<sup>3</sup> BAWIPA ni Isarelnaw e lawk a tarawi pouh teh, Kanaannaw teh a kut dawh poe lah ao. Amamouh hoi a khopuinaw hah he a raphoe teh, hote hmuen teh Hormah telah ati awh.

### *Rahum tahrûn*

<sup>4</sup> Hor mon koehoi tuipui paling koelah Edom ram lawngven lahoi a cei awh. Lam ekvoi a kâheh awh dawkvah, taminaw pueng teh a lungkuep laipalah, <sup>5</sup> Cathut hoi Mosi taranlahoi kahrawngum vah due hanelah bangkongmaw Izip ram hoi na tâcokhai. Vaiyei hai awh hoeah, tui hai awh hoeah, hete vaiyei karawcap e hai ka hringnae ni a panuet toe, telah ati awh.

<sup>6</sup> Hatdawkvah, BAWIPA ni hmai tahrûn a thasin teh, taminaw a khue dawkvah moikapap a due awh.

<sup>7</sup> Hatnavah taminaw ni Mosi koe a tho awh teh, BAWIPA hoi nang koe taranlahoi lawk ka dei e hah ka yon awh toe. Tahrûnnaw hah kaimouh koehoi takhoe hanlah BAWIPA koe na kâhet pouh leih, telah atipouh.

<sup>8</sup> BAWIPA ni Mosi koe hmai tahrûn hah sak nah teh khom dawh hoi pathout



pouh. Tahrún ni a khue e pueng ni hote hah a khet vaiteh a hring awh han telah atipouh.

<sup>9</sup> Hahoi Mosi ni rahum tahrún hah a sak teh, khom daw k a vo. Hahoi teh tahrún ni a khue e pueng rahum tahrún hah a khet awh teh a dam awh.

### *Hormon koehoi Moab vah*

<sup>10</sup> Isarel catounnaw teh, pou a kâtahruet awh teh, Oboth vah a roe awh. <sup>11</sup> Oboth hoi bout a cei awh teh, Kanîtholah Moab kahrawng teng Iyeabarim vah a roe awh. <sup>12</sup> Haw hoi a cei awh teh Zered tanghling daw k a roe awh. <sup>13</sup> Haw hoi bout a cei awh teh, Amornaw e ramri hoi pou kâkuen e Arnon namran lah a roe awh. Arnon teh Moab ramri, Moab hoi Amornaw rahak vah kaawm e doeh.

<sup>14</sup> Hatdawkvah, BAWIPA tarantuknae cauk daw k, Suphat hoi Vaheb Arnon, Arnon sawkcanaw hoi.

<sup>15</sup> Ar kho lahoi ka lawng e sawkcanaw hai, Moab ramri lahoi a teng poe ka lawng e telah a dei awh. <sup>16</sup> Hahoi, Beer lah a cei awh. Haw teh BAWIPA ni Mosi koevah, taminaw pueng hah kaw nateh, tui ka poe han ati nae tuikhu koe doeh.

<sup>17</sup> Hahoi hete la heh Isarelnaw ni a sak awh. Oe tuiphuek tâcaw t haw telah la heh a phueng awh

<sup>18</sup> Kahrawikungnaw a bonae tuikhu hah kâlawk kapoekung sonron hoi tai e, miphunnaw kahrawikung ni a tai e, ti hoiyah, hote kahrawng koehoi Mattanah lah a cei awh.

<sup>19</sup> Mattanah hoi Nahaliel, Nahaliel hoi Bamoth, <sup>20</sup> Bamoth hoi Moab ram kaawm e tanghling, Pigsaw som kho ouk khetnae hmuén, hmu thainae koe a kâtahruet awh.

### *Siangpahrang Sihon tânae*

<sup>21</sup> Isarelnaw ni Amornaw e siangpahrang Sihon koevah, na ram daw k hoi kaimouh na rakan sak haw. Na law daw k thoseh, misur takha daw k thoseh, ka cet awh mahoe h. Na tuikhu daw k e tui hai ka net awh mahoe h. <sup>22</sup> Na ram ka tapoung hoe h roukrak, siangpahrang lamthungpui daw k doeh ka cet awh ti telah patounenaw a patoun.

<sup>23</sup> Hatei, Sihon ni a ram daw k rakan sak hane pasoung hoe h. Hottelah Sihon ni a taminaw pueng a pâkhueng teh, Isarelnaw tuk hanlah kahrawngum a kamthaw awh. Jahaz vah a pha awh teh Isarelnaw hah a tuk awh. <sup>24</sup> Isarelnaw ni, kahran e tahloi hoi a tuk awh van teh a ram teh Arnon hoi Jabbok totouh, Ammon catounnaw ram totouh a la pouh awh. Bangkongtetpawiteh, Ammonnaw e ramri teh pou a patoup awh e doeh.

<sup>25</sup> Isarelnaw ni khonaw pueng koug a la awh. Hottelah Isarelnaw teh, Ammonnaw e khonaw pueng daw k Heshbon hoi khotenaw pueng daw k kho a sak awh. <sup>26</sup> Heshbon kho teh Ammornaw e siangpahrang Sihon onae kho doeh. Ahni teh Moab siangpahrang hoi taran a kâtuk teh a kut daw k e a ram naw pueng Arnon palang kalatkung doeh.

<sup>27</sup> Hatdawkvah, la ka phuengkung ni, Heshbon vah tho loe, Sihon khopui teh bout thawng awh sei, bout pathoup awh sei. <sup>28</sup> Bangkongtetpawiteh, Heshbon hoi hmai a tâco teh, Sihon khopui hoi hmai a to. Moab khopui Ar kho koug a kak. Arnon hmuénrasang bawinaw hoi, <sup>29</sup> Oe Moab na yawthoe, nang teh na kahma toe. Khemosh taminaw, Amornaw e siangpahrang koevah, a capanaw yawngkhai hane hoi, a canunaw a san lah a poe awh. <sup>30</sup> Hatei, kai ni na tâ awh toe. Heshbon teh Dibon totouh



a kahma. Hottelah Nophah kho totouh a raphoe teh, hot ni teh Medeba totouh a pha.

<sup>31</sup> Hot patetlah Amornaw e ram koe Isarelnaw teh kho a sak awh. <sup>32</sup> Hahoi Mosi ni Jazer tuet hanlah tami a patoun. Hote kho a la teh, haw vah kaawm e Amor taminaw a pâlei awh. <sup>33</sup> A ban awh teh, Bashan lam koe lah a takhang awh. Bashan siangpahrang Og teh ahnimouh tuk hanelah ama hoi a taminaw pueng hoi Edrei hoi tuk hanelah a kamthaw awh.

<sup>34</sup> BAWIPA ni Mosi koevah ahni teh taket hanh loe. Ama hoi a taminaw khuehoi a ram totouh na kut dawk na poe toe. Heshbon e kaawm e Amornaw e siangpahrang Sihon koevah na sak e patetlah na sak han telah atipouh.

<sup>35</sup> Hahoi teh ama thoseh, a capanaw thoseh, buet touh boehai pâhlung laipalah a taminaw pueng hoi a thei awh teh a ram teh hmawi a tawn pouh awh.

## 22

### *Balak ni Balaam a coun*

<sup>1</sup> Isarel catounnaw teh pou a cei awh teh, Jeriko kho namran lah Jordan palang na ran Moab tanghling dawk a roe awh. <sup>2</sup> Zippor capa Balak ni Isarelnaw ni Amornaw lathueng a sak e naw pueng a thai. <sup>3</sup> Tamimaya hah apap poun dawkvah, Moab ni taki lah a taki katang. Isarelnaw kecu dawk Moab teh kângairu lah ao. <sup>4</sup> Hottelah Moab ni Midian a lungkahanaw koe Maito ni hram koun a ai e patetlah hete taminaw ni kaimae tengpam e taminaw pueng koun a i han doeh telah ati. Hote tueng navah Zippor capa Balak teh Moab siangpahrang lah ao. <sup>5</sup> Ahni ni kenhaw! miphun buet touh Izip ram hoi ka tâcawt e ao teh, talai dawk muen a kawi awh. Kaimouh rahak vah sut ao awh. Pahren lahoi tho nateh hetnaw heh thoebo haw. Bangkongtetpawiteh kai hane teh a thasaipoun awh. <sup>6</sup> Ahnimanaw tâ vaiteh ram dawk hoi ka pâlei thai yawkaw han kai ma. Bangkongtetpawiteh, yawhawi na poe e teh yawhawi e lah ao, thoe na bo e pueng teh thoebo lah ao tie ka panue, telah kaw hanelah na catounnaw a onae ram, palang teng vah, Pethor e Beor capa Balaam koevah patounenaw a patoun.

<sup>7</sup> Hatdawkvah, Moab a lungkahanaw hoi Midian a lungkahanaw teh thoebo sak phu poe hanelah tadawngghno sin hoi a cei awh teh, Balaam koe a pha awh. Balak ni lawkthui e hah a dei pouh awh. <sup>8</sup> Ahni ni, atu tangmin lah teh awi hi vah roe awh. BAWIPA ni na dei pouh e patetlah nangmouh koe lawk na thui awh han telah atipouh. Hottelah, Moab tami kalennaw teh Balaam koe a roe awh.

<sup>9</sup> Balaam koe Cathut a tho teh nang koe kaawm e taminaw heh bangpatetnaw maw, telah atipouh.

<sup>10</sup> Balaam ni Cathut koevah, Zippor capa Moab siangpahrang Balak ni kai koevah, <sup>11</sup> kenhaw! Izip ram hoi ka tho e miphun ni talai dawk muen a kawi awh. Ahnimouh ka tâ vaiteh, ka pâlei thai nahanelah thoe na bo pouh haw, a titeh, taminaw a patoun e doeh telah atipouh.

<sup>12</sup> Cathut ni Balaam koevah, ahnimouh koe cet hanh, hotnaw teh thoe hai bo hanh. Bangkongtetpawiteh, ahnimouh teh yawkahawi e tami doeh, telah atipouh.

<sup>13</sup> Balaam teh amom a thaw teh Balak e tamikalennaw koe, na ram lah ban awh leih, bangkongtetpawiteh, BAWIPA ni nangmouh koe cei hanlah na pasoung hoe telah ati.



<sup>14</sup> Moab tamikalennaw teh, a thaw awh teh Balak koevah a cei awh. Ahni koe Balaam ni maimouh koe kâbang ngai hoeh atipouh.

<sup>15</sup> Balak ni ahnimouh hlak kapap, ahnimouh hlak minhmai khet kaawm, tamikalennaw hah bout a patoun. <sup>16</sup> Balaam koevah, a pha awh teh, Zippor capa Balak ni telah ati, kai koe na kâbang hane bang ni hai na ngang hanh naseh. <sup>17</sup> Bangkongtetpawiteh, barilawa kaawm lah na tawm katang han, kai koe na dei e pueng ka sak han, hatdawkvah, tho nateh hetnaw heh thoe na bo pouh haw ati telah ati.

<sup>18</sup> Balaam ni Balak e sannaw hah a pathung teh ahnimouh koe Balak ni a im hoi athung vah sui ngun khakkawi lah na poe han nakunghai, BAWIPA ka Cathut lawk hloilah banghai ka sak thai hoeh. <sup>19</sup> Hatdawkvah, BAWIPA ni kai koe bangmaw bout a dei han, atu tangmin teh hi roe awh ei telah atipouh.

<sup>20</sup> Hat hnin tangmin vah Balaam koe Cathut a tho teh, ahnimouh koe, hetnaw heh nang na kaw hanlah tho pawiteh, thaw nateh ahnimouh koe kâbang. Hatei nang koe ka dei e dueng na sak han, telah atipouh.

<sup>21</sup> Balaam teh amom vah a thaw teh, la hah a rakueng, Moab tamikalennaw koevah a kâbang.

### *Balaam e la hoi kalvan tami*

<sup>22</sup> Hottelah, a cei kecu dawkvah, Cathut lungkhueknae a kaman teh, BAWIPA kalvantami teh ama ngang hanelah lam dawk sut a kangdue. Ama teh la dawk kâcui niteh, a san kahni touh hoi haw vah ao. <sup>23</sup> La ni BAWIPA kalvantami ni tahloi patuep hoi lam dawk a kangdue e hah a hmu teh, lam a phen teh kahrawng lahoi a cei. Hottelah Balaam ni la teh lam dawk ban hanelah a hem. <sup>24</sup> BAWIPA kalvantami teh misur takha hoi takha rahak e lam koe bout a kangdue. <sup>25</sup> La ni BAWIPA kalvantami hah bout a hmu toteh, misur takha rai lah a kâhnawn dawkvah, Balaam khok pak a kuen. Balaam ni bout a hemkhai. <sup>26</sup> BAWIPA kalvantami ni teh, a hmalah rek bout a cusin teh avoilah, aranglah kamheithaihoehnae lamceknae koe a kangdue pouh. <sup>27</sup> La ni, BAWIPA kalvantami hah a hmu teh Balaam teh rawk a tabo khai. Hahoi, Balaam a lungkhuek teh, a sonron hoi la teh a hem.

<sup>28</sup> BAWIPA ni la hah a lawk a thosak. Balaam koevah nang na tak dawк bangmaw ka sak, vai thum touh totouh kai na hemkhai telah atipouh.

<sup>29</sup> Balaam ni la koevah, nang ni kai na noutna hoeh teyaw, tahloi ka sin nah pawiteh, na thei han ei nan maw atipouh.

<sup>30</sup> La ni Balaam koevah, sahnin totouh na kâcui e la nahoehmaw. Hottelah nang koe ouk ka sak boimaw, telah ati. Ahni ni na sak boihoeh bokheiyah telah atipouh.

<sup>31</sup> BAWIPA ni Balaam mit hah a ang sak teh, BAWIPA kalvantami tahloi hoi lam dawк sut a kangdue e hah a hmu. A saling teh talai dawк minhmai rek kâbet lah a tabo. <sup>32</sup> BAWIPA kalvantami ni ahni koe, bangkongmaw, vai thum totouh la na hem. Kenhaw! na cei hoeh nahan koelah na cei kecu dawkvah, nang ngang hanlah ka tâco. <sup>33</sup> La ni na hmu teh ka hmalah vai thum touh na roun. Na roun hoehpawiteh, la teh thet hoeh vaiteh, nang nama nouh thei lah na awm ei ti heh ma, telah atipouh.

<sup>34</sup> Balaam ni BAWIPA kalvantami koevah, ka yon toe, bangkongtetpawiteh, kai taranlahoi lam na kangdue tie ka panuek hoeh, hatdawkvah na lunghawihoehe pawiteh ka ban han telah atipouh.

<sup>35</sup> BAWIPA e kalvantami ni Balaam koevah, hetnaw koe vah cet, hateiteh, nang koe ka dei e dueng ahnimouh koe na dei pouh han telah atipouh.



Hahoi teh, Balaam teh Balak e tami kalennaw koe a cei. <sup>36</sup> Balak ni Balaam a tho tie hah a panue toteh, Arnon koelae ramri Moab khopui totouh a dawn awh. <sup>37</sup> Balak ni Balaam koelah, atangcalah nang la hanlah tami ka patoun nahoehmaw. Bangkongmaw kai koe na tho ngai hoe. Tamikalen poung lah na coung sak thai mahoe haw, telah atipouh.

<sup>38</sup> Balaam ni Balak koelah, khenhaw! nang koe vah ka tho toe. Bang hno pueng deithainae kâ ka tawn na maw. Cathut ni ka pahni daw koe a ta e dueng doeh ka dei tih, telah ati.

<sup>39</sup> Hottelah Balaam teh Balak koe a cei teh, Kiriath-huzoth vah a pha awh. <sup>40</sup> Balak ni maito hoi tu hoi thuengnae a sak. Balaam hoi ama koe kaawm e tamikalennaw koe youn touh a poe.

<sup>41</sup> Hahoi a tangtho vah, Balaam ni Balaam a hrawi teh, tamimaya hah pâtuê hanelah, Baal hmuenrasang koe a luenkhai.

## 23

### *Apasuek lawk deinae*

<sup>1</sup> Hahoi, Balaam ni Balak koelah, hivah thuengnae khounge sari touh na sak pouh loe. Maitotan sari touh, tutan sari touh kai hanlah na rakueng pouh loe telah a ti.

<sup>2</sup> Balak ni Balaam dei e patetlah a sak. Balak hoi Balaam ni bawknae khounge tangkuem vah, maitotan buet touh hoi tutan buet touh a poe awh. <sup>3</sup> Balaam ni Balak koelah, nang ni hmaisawi thuengnae teng vah, pou kangdout lah a, kai teh alouk lah yo ka cet eivai, BAWIPA ni kai pato hanlah a tho thai, hahoi na dei pouh e pueng kai ni nang koe na dei pouh han telah atipouh. Hahoi kacailum e hmuenrasang koe a cei. <sup>4</sup> Cathut ni Balaam a kâhmo teh ahnimouh ni ama koe bawknae khounge sari touh ka sak toe. Bawknae khounge buet touh daw koe maitotan buet touh, tutan buet touh rip ka poe toe telah a ti.

<sup>5</sup> Hottelah BAWIPA ni Balaam koe pahni daw koe lawk hah a ta pouh teh, ahni koe Balak koe ban nateh, hettelah patuen dei pouh telah a ti.

<sup>6</sup> Hahoi ahnimouh a ban teh, khenhaw, hmaisawinae a kung koe ama hoi Moab tami kalennaw teh pou a kangdue teh, <sup>7</sup> ahni ni lawk hah a pâpho pouh teh, a ram lahoi Balak ni a ceikhai teh, Kanitholae mon Moab siangpahrang ni tho haw, Jakop hah thoebo haw, tho haw, Isarel hah na pathoe pouh haw telah a ti. <sup>8</sup> Bangtelamaw, Cathut ni thoebo hoe e thoe louk ka bo han, bangtelamaw, Cathut ni pathoe hoe e louk ka pathoe han. <sup>9</sup> Bangkongtetpawiteh, lungsongpui daw koe ahnimouh teh ka hmu teh, monpui daw koe hoi ahnimouh teh ka khet. Khenhaw! miphun louk lah doeh ao awh. Jentelnaw koe pareisin hanlah awm hoe. <sup>10</sup> Jakop vaiphu teh apinimaw a touk thai han. Isarel pung pali pung touh teh apinimaw a touk thai han. Tamikalan due e patetlah dout van boipawiteh, ka poutnae teh a poutnae lah thoseh, telah a ti.

<sup>11</sup> Balak ni Balaam koelah, na sak e teh bangtelae na maw. Ka tarannaw thoebo hanlah na hrawi teh, yawhawi dai na poe atipouh. <sup>12</sup> Ahni ni BAWIPA ni ka pahni daw koe a ta e lawk ka dei mahoe na maw telah atipouh.

### *Apâhni lawk bout deinae*

<sup>13</sup> Balak ni alouklah cet ei, haw hoi teh na hmu thai nahanlah a onae hmuen ram pueng be na hmu han, abuemplahoi teh be na hmawt mahoe ei, hot hmuen koehoi ahnimouh teh thoe na bo pouh han telah a ti.



<sup>14</sup> Hottelah, Zophimnaw onae Pisgah monsom dawk a luenkhai. Thuengnae khoungroe sari touh a sak teh, hote thuengnae khoungroe tangkuem dawk maitotan buet touh hoi tutan buet touh rip a poe. <sup>15</sup> Balak koevah, hawvah, BAWIPA ka kâhmo navah, hmaisawi thuengnae a kung koe pou ka kangdout loe telah atipouh.

<sup>16</sup> BAWIPA ni Balaam a kâhmo teh a pahni dawk lawk a ta pouh. Balak koe ban nateh hettelah patuen dei pouh telah a ti.

<sup>17</sup> Ahni koe a cei sin teh, khenhaw! hmaisawi thuengnae akung koevah, a kangdue teh, Moab tami kalennaw hai ahni koe ao. Balak ni BAWIPA ni bangtelamaw a dei telah a ti. <sup>18</sup> Hahoi teh ahni ni lawk hah a pâpho teh, thaw haw, Balak ka lawk thai haw, Zippor capa ka lawk hah thai haw.

<sup>19</sup> Cathut teh laithoe ka dei e tami nahoe. Pankângai e tami capa lahai tho hoe. A dei e teh sak mahoe na maw. A dei tangcoung e hah kuep sak mahoe na maw. <sup>20</sup> Khenhaw! yawhawwi poe hanelah kâlawk ka hmu

teh, a yaw ahawi sak toung dawkvah, kâthung thai mahoe toe. <sup>21</sup> Jakop koe payonpakainae hmawt hoe niteh, Isarel hawihoe hnae hmawt hoe.

Jehovah a Cathut ni a okhai teh, siangpahrang hramnae lawk ahnimouh koe ao. <sup>22</sup> Izip ram hoi a tâcokhai teh, sakraktan patetlah a thaonae a tawn.

<sup>23</sup> Bangkongtetpawiteh, taân ni Jakop teh tâ thai hoe, hmaui ni Isarel teh tâ thai hoe. Jakop hoi Isarel koevah, Cathut hno sak e hah dei lah kaawm roeroe han.

<sup>24</sup> Khenhaw! taminaw teh sendekmanu patetlah a thaw teh, sendek patetlah a dawkcawk teh, a kei awh e moi a ca hoehroukrak teh, a kei awh e moi thi a nei hoehroukrak teh duem awm awh mahoe, telah a ti. <sup>25</sup> Balak ni Balaam koevah thoebo hanh leih. Yawhawwi hai poe hanh leih, telah a ti.

<sup>26</sup> Hatei Balaam ni a pathung, BAWIPA ni a dei e naw pueng teh ka sak roeroe hane doeh, telah ka dei nahoe hmau telah a ti.

### *Apâthum lawk bout deinae*

<sup>27</sup> Hahoi Balak ni Balaam koevah, tho haw, alouklah na ceikhai han, awi haw kangna teh Cathut ni thoe na bo sak hanelah ahawi ati ta panue maw, telah a ti.

<sup>28</sup> Hottelah Balak ni Balaam teh kahrawng khetnae Peor mon som a luenkhai.

<sup>29</sup> Balaam ni Balak koevah, hivah thuengnae khoungroe sari touh na rakueng pouh loe, telah atipouh.

<sup>30</sup> Balak ni Balaam dei e patetlah a sak pouh teh thuengnae khoungroe tangkuem maitotan buet touh hoi tutan buet touh rip a poe.

## 24

<sup>1</sup> Hot patetlah Isarel yawhawwi poe e hah BAWIPA a ngainae lah doeh ao tie hah Balaam ni a panue toteh, ahmoun ouk a sak e patetlah taânnae hno hanlah cet laipalah kahrawngum lah letlang a pâtam. <sup>2</sup> Balaam ni a khet teh Isarelnaw hah ama miphun aloukcalah ao e hah a hmu. Cathut e Muitha hah ahnimouh koe a pha.

<sup>3</sup> Hahoi lawk hah a pâpho teh, Beor capa Balaam mit a ang sak,

<sup>4</sup> Cathut lawk hah thai hoi, Athakasaipounge kamnuenae hah a hmu hoi, ka tabawk ni teh a mit ka padai e ni,

<sup>5</sup> Oe Jakop na rim teh ahawi. Oe Isarel na khosaknae teh ahawi doeh.

<sup>6</sup> Tanghling patetlah a kâphai. Palang teng e takha patetlah BAWIPA ni a ung e sumpakung hoi, palang teng e Sidar thing patetlah doeh ao.



<sup>7</sup> Khotui moikapap a coe vaiteh, tui apapnae koe cati a patue awh han. Agag hlah vah a siangpahrang a rasang vaiteh, a uknaeram teh tawmtakhang han.

<sup>8</sup> Izip hoi Cathut ni a tâcokhai teh, sakraktan patetlah a thao awh. A taran Jentelnaw hah cat awh vaiteh, a hru hah vitpatit lah a dêi awh han. A samtang hoi pawkkayawng lah a ka awh han.

<sup>9</sup> A tabut awh teh, sendekmanu patetlah a tabo teh apinimaw a pathaw ngam han. Yawhawi na kapoekung hah yawhawi poe nateh, thoe na ka bo naw hah thoebo awh telah a ti.

<sup>10</sup> Hat toteh, Balaam tak dawh Balaam a lung a kâan teh, Balak ni Balaam koevah, ka taran thoebo hanlah na kaw. Hatei, khenhaw! vai thum totouh yawhawi na poe. <sup>11</sup> Hatdawkvah, na onae koe kahmakata han lah cet. Ka taluepoung e lah tawmrasang hanlah ka kâcai e doeh. Khenhaw! hatei, BAWIPA ni tawmtakhang hanlah na pasoung hoeh toe telah a ti.

<sup>12</sup> Balaam teh Balak ni sui ngun yikkawi lah na ka poe nakunghai, <sup>13</sup> ahawinae koe lah thoseh, thoenae koelah thoseh, kai kama lung lahoi teh, BAWIPA lawk hloilah sak thai e banghai ka tawn hoeh. BAWIPA ni a dei e pueng ka dei han telah na patoun e patounenaw pueng koehai ka dei nahoehmaw. <sup>14</sup> Khenhaw! ka taminaw koe ka cei han toe. Tho haw hete taminaw ni, hma lae tueng dawh na taminaw koe a sak hane kong dawh pouknae na poe han telah a ti.

### *Ahnoungpoung lawk deinae*

<sup>15</sup> Ahni ni lawk hah a pâpho teh, Beor capa Balaam mit a ang sak teh, <sup>16</sup> Cathut lawk hah thai hoi, Lathueng Poung e panuenae tha panue hoi, Athakasaipoung vision a hmu teh, a tabo hoi a mit ka ang e ni <sup>17</sup> ama teh ka hmu, hatei atu nahoe. Ama teh ka khet, hatei kahnaicalah nahoe. Jakop koehoi Âsi a tâco han. Isarel koehoi siangpahrang sonron a tâco han. Moab ram pawkkayawng lah a cuek vaiteh, Sethnaw hai be a raphoe awh han.

<sup>18</sup> A taran lah ouk kaawm e Edom hoi Seir hai a coe han. Isarel kangduenae ahawi nah thung pueng teh, kaukkung buet touh a tawn awh han.

<sup>19</sup> Jakop koehoi kaukkung buet touh a tawn vaiteh, kacawirae khonaw hah a raphoe awh han.

<sup>20</sup> Amalek lah kangvawi hoi lawk hah a pâpho. Amalek teh miphun kung pui lah ao eiteh, hatei hnukteng teh rawkphainae lah ao.

<sup>21</sup> Kennaw lah kangvawi laihoi lawk a pâpho. Na onae hmuen teh a cak. Na tabu teh lungsong dawh na tuk.

<sup>22</sup> Hatei, Ken teh, hmaisawi lah ao vaiteh, Asshur ni san lah na hrawi totouh telah a ti.

<sup>23</sup> Lawk hah bout a pâpho teh, Aiyoe, Cathut ni hetheh a sak toteh apimaw ka hring thai han.

<sup>24</sup> Hatei, Cyprus tuilum koehoi long phat vaiteh, Asshur hoi Eber hah runae a poe han. Amalek a kahma totouh telah a ti.

<sup>25</sup> Hahoi teh Balaam a thaw teh a onae hmuen koe a ban teh, Balak hai a ban van.

## 25

### *Isarel ni Baal a bawh*

<sup>1</sup> Isarel teh shittim kho a sak navah, taminaw pueng teh Moab napui koe kâyo hanlah a kamtawng awh. <sup>2</sup> A cathut koe thuengnae a sak navah,



ouk a coun awh. Taminaw pueng ni a canei awh teh, a cathut koe ouk a tabo awh. <sup>3</sup> Isarel teh, Peor e hmuen koe Baal hoi a kâkuet awh teh, Isarel koe BAWIPA lungkhueknae teh a kâan. <sup>4</sup> BAWIPA ni Mosi koevah takikatho pounge e BAWIPA lungkhueknae teh, Isarel koe lahoi a roum thai nahanlah tamimaya kahrawinaw pueng hah a ceikhai awh teh, kanîthun vah, kâtapoenaw pueng hah BAWIPA hmalah kancengcalah kaithi sak haw telah a ti.

<sup>5</sup> Hatdawkvah, Mosi ni Isarel lawkcengkungnaw koevah, Peor hmuen koe Baal kabawknaw pueng kounge thet awh telah a ti.

<sup>6</sup> Khenhaw! Isarel catounnaw thung dawk tami buet touh ni kamkhuengnae lukkareiim takhang koe a khuika navah, Mosi mithmu hoi Isarel catoun tamimaya mithmu vah, Midian napui buet touh a hmaunawngnaw koe a thokhai. <sup>7</sup> Vaihma Aron e capa Eleazar capa Phinahas ni a hmu toteh, tamimaya koehoi a thaw teh tahroe hah a la. <sup>8</sup> Isarelnaw teh lukkareiim thung vah a pâlei teh kahni touh roi hoi pawkkayawng lah a thut. Isarel tami hoi napui teh a vawn dawk a thut teh, Isarel catounnaw koe lacik hah a roum. <sup>9</sup> Hote lacik hoi kadoutnaw teh 24000 touh a pha. <sup>10</sup> BAWIPA ni Mosi hah a pato teh, <sup>11</sup> vaihma Aron capa Eleazar capa Phinehas ni Isarel catounnaw koe ka lungkhueknae ka roum sak toe. Bangkongtetpawiteh, ka lungkhueknae ni Isarel catounnaw a raphoe hoe nahanelah, ahnimouh rahak ka dipmanae patetlah a kâdipma awh van han. <sup>12</sup> Hatdawkvah, khenhaw! roumnae ka lawkkam teh, ama koevah ka poe. <sup>13</sup> Ama hoi a catounnaw hanlah, a yungyoe vaihma lah a onae lawkkam lah ao han. Bangkongtetpawiteh, dipma Cathut teh, Isarel catounnaw hanlah yonthanae a sak tet awh telah a ti.

<sup>14</sup> Isarelnaw Midian napui hoi a thei awh e min teh Simeonnaw thung dawk imthungkhu kahrawikung Salu capa Zimri doeh. <sup>15</sup> Midian napui a thei awh e min teh Midian imthungkhu kahrawikung Zur canu Kozbi doeh. <sup>16</sup> BAWIPA ni Mosi a pato teh, <sup>17</sup> Midiannaw teh reksaueng nateh tuk awh. <sup>18</sup> Bangkongtetpawiteh, Peor kecu dawk lacik a tho navah, a tawncanu, Midiannaw kahrawikung canu Kozbi a thei awh e kong dawkvah, nangmouh lathueng kalanhoehe hno sak hoi na tarawk awh toe telah a ti.

## 26

### *Apâhni lah milu touknae*

<sup>1</sup> Lacik pawng a kâkayaw hoi BAWIPA ni Mosi hoi vaihma Aron capa Eleazar hah a pato teh, <sup>2</sup> Isarel catounnaw pueng hah kum 20 lathueng amamae miphun lahoi Isarel ram dawk e tarantuknae koe kacethainaw pueng hah be touk loe atipouh.

<sup>3</sup> Mosi hoi vaihma Eleazar ni Jeriko avanglah Jordan palang teng Moab tangling daw ahnimouh teh a pato teh, <sup>4</sup> BAWIPA ni Mosi hoi Izip ram hoi katâcawtnaw Isarel catounnaw koevah, kâ a poe e patetlah taminaw hah kum 20 hoi a lathueng e pueng touk loe atipouh.

<sup>5</sup> Isarel e camin teh Reuben doeh. Reuben capanaw teh, Hanok hoi Hanok imthungkhu, Pallu hoi Pallu imthungkhu. <sup>6</sup> Hezron hoi Hezron imthungkhu, Karmi hoi Karmi imthungkhu, <sup>7</sup> Reuben imthungkhunaw a touk awh teh 43,730 touh a pha. <sup>8</sup> Pallu catoun hoi Eliab, <sup>9</sup> Eliab capanaw teh, Nemuel, Dathan hoi Abiram doeh. Dathan hoi Abiram teh Mosi hoi Aron ka cusin e tamimaya yueng lah doeh ao awh. BAWIPA a taran awh



navah Korah hoi kambawng e lahai ao roi. <sup>10</sup> Hotnaw a due navah, talai ni rak a ang teh Korah hah kOUNG a payawp teh, hmai ni tami 250 kOUNG a kak navah, bangnue nae lah a coung awh. <sup>11</sup> Hatei, Korah catounnaw dout awh hoeh. <sup>12</sup> A imthungkhu lahoi Simeon capanaw teh; Nemuel hoi Nemuel imthungkhu, Jamin hoi Jamin imthungkhu, Jakhin hoi Jakhin imthungkhu, <sup>13</sup> Zerah hoi Zarah imthungkhu, Saul hoi Saul imthungkhu, <sup>14</sup> Simeon imthungnaw heh 22,200 touh a pha. <sup>15</sup> Gad capanaw hai ama imthungkhu lahoi, Zephon hoi Zephon imthungkhu, Haggi hoi Haggi imthungkhu, Shuni hoi Shuni imthungkhu, <sup>16</sup> Ozni hoi Ozni imthungkhu, Eri hoi Eri imthungkhu, <sup>17</sup> Arod hoi Arodi imthungkhu, Areli hoi Areli imthungkhu, <sup>18</sup> Hetnaw heh Gad imthungkhunaw 40,500 touh a pha. <sup>19</sup> Judah capa roi heh Er hoi Onan ei, Er hoi Onan teh Kanaan kho vah a due. <sup>20</sup> Judah capanaw ama imthungkhu lahoi, Shelah hoi Shelah imthungkhu, Perez hoi Perez imthungkhu, Zerah hoi Zarah imthungkhu, <sup>21</sup> Perez capanaw teh, Hezron hoi Hezron imthungkhu, Hamul hoi Hamul imthungkhu la ao awh. <sup>22</sup> Hetnaw heh Judah imthungkhunaw a touk awh e 76,500 touh a pha. <sup>23</sup> Issakhar capanaw a imthungkhu lahoi, Tola hoi Tola imthungkhu, Puvah hoi Puvah imthungkhu, <sup>24</sup> Jashub hoi Jashub imthungkhu, Shimron hoi Shimron imthungkhu, <sup>25</sup> Hetnaw heh Issakhar imthungkhu a touk awh e 64,300 touh a pha. <sup>26</sup> Zebulun capanaw a imthungkhu lahoi, Sered hoi Sered imthungkhu, Elon hoi Elon imthungkhu, Jahleel hoi Jahleel doeh. <sup>27</sup> Hetnaw heh Zebulun imthungkhu a touk awh e 60,500 touh a pha. <sup>28</sup> Joseph capanaw a imthungkhu lahoi, Manasseh hoi Ephraim. <sup>29</sup> Manasseh capa imthungkhunaw teh, Makhir hoi Makhir imthungkhu. Makhir ni Gilead a sak teh Gilead hoi Gilead imthungkhu lah ao. <sup>30</sup> Gilead capanaw teh, Iezer hoi Iezer imthungkhu, Helek hoi Helek imthungkhu, <sup>31</sup> Asriel hoi Asriel imthungkhu, Shekhem e Shekhem imthungkhu, <sup>32</sup> Shemida e Shemida imthungkhu, Hephher e Hephher imthungkhu, <sup>33</sup> Hephher capa Zelophehad heh a ca tongpa awm hoeh, napuinaw dueng doeh kaawm. Zelophehad canunaw e minnaw teh, Mahlah, Noah, Hogleh, Milkah hoi Tirzah. <sup>34</sup> Hetnaw teh Manasseh imthungkhu a touk awh e 52,700 touh a pha. <sup>35</sup> Ephraim capanaw a imthungkhu lahoi, Shuthela hoi Shuthela imthungkhu, Bekher hoi Bekher imthungkhu, Tahan hoi Tahan imthungkhu lah ao. <sup>36</sup> Shuthela capanaw teh, Eran hoi Eran imthungkhu lah ao. <sup>37</sup> Hetnaw teh Ephraim imthungkhu a touk awh e 32,500 touh a pha awh. Hetnaw heh Joseph capa imthungkhunaw doeh. <sup>38</sup> Benjamin capanaw a imthungkhu lahoi, Bela hoi Bela imthungkhu, Ashbel hoi Ashbel imthungkhu, Ahiram hoi Ahiram imthungkhu, <sup>39</sup> Shupham hoi Shupham imthungkhu, Hupham hoi Hupham imthungkhu lah ao. <sup>40</sup> Bela capa roi teh Ard hoi Naaman doeh. Ard imthungkhu hoi Naaman hoi Naaman imthungkhunaw doeh. <sup>41</sup> hetnaw heh Benjamin imthungkhunaw a touk awh e 45,600 touh a pha. <sup>42</sup> Dan capanaw a imthungkhu lahoi, Shuham hoi Shuham imthung lah ao. Hetnaw heh doeh ahnimae imthungkhu dawk hoi Dan imthungkhu lah kaawm. <sup>43</sup> Hetnaw heh Shuham imthungkhunaw a touk awh e 64,400 touh a pha. <sup>44</sup> Asher capanaw a imthungkhu lahoi, Imnah hoi Imnah imthungkhu, Ishvi hoi Ishvi imthungkhu, Beriah hoi Beriah imthungkhu, <sup>45</sup> Beriah ca roi, Heber hoi Heber imthungkhu, Malkhiel hoi Makhiel imthung lah ao. <sup>46</sup> Asher e canu min teh Serah doeh. <sup>47</sup> Hetnaw teh Asher capanaw imthungkhu lahoi a touk awh e 53,400 touh a pha.



<sup>48</sup> Naphtali capanaw a imthung lahoi, Jahzeel hoi Jahzeel imthung, Guni hoi Guni imthungkhu, <sup>49</sup> Jezer hoi Jezer imthungkhu, Shillem hoi Shillem imthungkhu lah ao. <sup>50</sup> Hetnaw heh Naphtali imthungkhu a touk awh e 45,400 touh a pha. <sup>51</sup> Hetnaw heh Isarel catounnaw a touk awh e 601,730 touh a pha.

<sup>52</sup> BAWIPA ni Mosi a pato teh, <sup>53</sup> Hete ramnaw heh apap e lahoi a kêrei awh han e naw doeh. <sup>54</sup> Bet kapap e teh ram bet kapap lah na poe awh vaiteh, kayoun e teh ram bet kayoun lah na poe awh han. Miphun lahoi râw teh a coe awh han. <sup>55</sup> Hatei cungpam rayu e lahoi ram teh rei lah ao han, a na mintoenaw hoi miphun min kâbang lahoi rem teh a coe awh han. <sup>56</sup> Cungpam rayu e lahoi apap hai ayoun hai a rei awh han. <sup>57</sup> Hetnaw heh Levihnaw e imthungkhu touk e lah ao. Gershon hoi Gershon imthungkhu, Kohath hoi Kohath imthungkhu, Merari hoi Merari imthungkhunaw doeh. <sup>58</sup> Hetnaw heh Levih imthungkhunaw doeh. Libni imthungkhu, Hebron imthungkhu, Mahli imthungkhu, Mushi imthungkhu, Korah imthungkhu lah ao. Kohath ni Amram a khe. <sup>59</sup> Amram e a yu min teh Jokhebed Levih canu, Izip ram hoi Levih koehoi ka tâcawt e doeh. Ahni ni Amram koehoi Aron hoi Mosi, hoi a tawncanu Miriam a khe. <sup>60</sup> Aron ni Nadab hoi Abihu, Eleazar hoi Ithamar a sak. <sup>61</sup> Hatei Nadab hoi Abihu teh BAWIPA hmalah hno hoeh kawi e hmai a hni dawk a due roi. <sup>62</sup> Ahnimae tami tongpa thapa yung touh lathueng touk e pueng teh, 23,000 touh a pha. Isarelnaw thung dawk kêrei e ram ka coe hoeh hanlah ao dawkvah, Isarelnaw koe mektouksin e lah awm hoeh. <sup>63</sup> Hetnaw heh Jeriko namran, Jordan palang teng Moab tanghling dawk Isarel catounnaw touk nah Mosi hoi vaihma Eleazar ni touk e doeh. <sup>64</sup> Hatei, Sinai kahrawng e Isarelnaw Mosi hoi vaihma Aron ni a touk e naw hah tami buet touh hai awm hoeh toe. <sup>65</sup> Bangkongtetpawiteh, BAWIPA ni kahrawngum vah a due awh roeroe han ati toe. Jephunneh capa Kalep hoi Nun capa Joshua laipalah teh apihai kahring e awm hoeh toe.

## 27

### *Canunaw râw pangnae kâlawk*

<sup>1</sup> Joseph capa Manasseh imthung, Makhir, ahnie capa Gilead, ahnie capa Hephher, ahnie capa Zelophehad e canu naw doeh. A canunaw e minnaw teh, Mahlah, Noah, Hoglah, Milkah hoi Tirzah tinaw doeh. <sup>2</sup> Kamkhuengnae lukkareim takhang koe Mosi hoi vaihma Eleazar hoi tamikalennaw kamkhuengnaw e hmalah a kangdue awh teh, <sup>3</sup> Kahrawngum vah maimae na pa a due teh, BAWIPA taranlahoi cusin hane tamiu, Korah tamiu koe bawk van hoeh. Hatei, ama yon e lahoi a due teh a capa hai tawn hoeh <sup>4</sup> Capa a tawn hoeh kecu dawkvah, bangkongmaw apa min teh miphun thung hoi a kahma han, mintoenaw thung dawkvah, ka ham kawi na poe van leih ati awh.

<sup>5</sup> Hot patetlah Mosi ni hote lawk teh BAWIPA koe a pha sak.

<sup>6</sup> BAWIPA ni Mosi hah a pato teh, <sup>7</sup> Zelophehad canunaw ni kathuem e a sak awh. A na pa hmaunawnganaw rahak vah, a ham kawi na poe awh roeroe vaiteh, a na pa ham hah na poe awh han. <sup>8</sup> Isarel catounnaw koevah, tami buet touh ca tongpa tawn laipalah dout pawiteh, a râw teh a canunaw na poe han. <sup>9</sup> Hahoi a canu tawn hoehpawiteh, a râw teh a hmaunawngna na poe han. <sup>10</sup> Hmaunawngna tawn hoehpawiteh, a na pa e hmaunawngna na poe pouh han. <sup>11</sup> A na pa ni hmaunawngna



tawn hoehpawiteh, a râw teh a huikonaw na poe vaiteh, ahnimouh ni a ham awh han. BAWIPA ni Mosi kâ a poe e patetlah Isarel canaw hanlah lawkcengnae phunglam lah ao han, telah dei pouh telah ati.

### *Mosi yueng Joshua*

<sup>12</sup> BAWIPA ni Mosi koevah, Abarim mon dawkvah luen nateh, Isarel catounnaw ka poe hane ram hah radoung haw. <sup>13</sup> Hahoi na hmu toteh, na hmaunawngaha Aron e a miphunnaw koevah, a ceikhai awh e patetlah nang hai na ceikhai awh han. <sup>14</sup> Bangkongtelpawiteh, Zin thingyei dawkw taminaw pueng ni a phuenang awh navah, a mithmu vah tui dawkw kai barilawa na poe nahanelah, kai ni kâ na poe e taranlahoi taran a thaw awh telah ati (hot teh Zin thingyei dawkw Kadesh hoi Meribah tie lah a o).

<sup>15</sup> Hahoi Mosi ni BAWIPA a pato teh, <sup>16</sup> moithangnaw pueng e hringnae kaukkung Cathut BAWIPA e taminaw hah kakhoumkung tawn laipalah tu patetlah ao hoeh nahanlah tamihu, <sup>17</sup> hmalah cei hoi ahnimouh tâcokhai hane hoi kâenkhah hane kahrawikung hah rawi seh, telah ati.

<sup>18</sup> BAWIPA ni Mosi koevah, Nun capa hnotithainae ka tawn e Joshua hrawi nateh, ahni van na kut toung pouh. <sup>19</sup> Vaihma Eleazar hoi ka kamkhuengnaw hmalah kangdout sak nateh, ahnimae mithmu vah caksak. <sup>20</sup> Isarel catounnaw pueng ni a lawk a ngâi pouh thai nahan, na kâtawnnae a tangawn hah na poe han. <sup>21</sup> Ahni teh vaihma Eleazar hmalah a kangdue vaiteh, ama ni BAWIPA hmalah, Urim hno lahoi lawkkamnae a la vaiteh, ama kâ lahoi Isarel catounnaw pueng teh a tâco a kâen awh han, telah ati.

<sup>22</sup> Mosi ni BAWIPA kâpoe e patetlah a sak, Joshua hah a hrawi teh, Eleazar hoi kamkhuengnaw hmalah a kangdue sak. <sup>23</sup> A lathueng vah kut a toung pouh teh, Mosi hno lahoi BAWIPA ni kâ a poe e patetlah kâtawnnae hah a poe.

## 28

### *Poenae kong*

<sup>1</sup> BAWIPA ni Mosi a pato teh, <sup>2</sup> Isarel canaw hah kâ poe nateh, ahnimouh koe kai hanelah poe han e hmaisawi thuengnae hmuittui, kaie rawca lah kaawm e kâhruetcuetcalah hoi atueng kahmancalah na poe awh han ati tet pouh.

### *Hnin tangkuem thuengnae*

<sup>3</sup> Ahnimouh koevah, hethah hmaisawi thuengnae BAWIPA koe na poe hane doeh. Tutanca kum touh e, kacueme hnintangkuem kahni touh hmaisawi thuengnae pou a poe awh han. <sup>4</sup> Tuca buet touh teh amom lah na poe awh han. Alouke buet touh teh tangmin lah na poe awh han. <sup>5</sup> Tavai thueng nahane dawkw a kanui e tavai, ephah pung hra pung touh, satui hin pung pali pung touh hoi kanawkw e, <sup>6</sup> BAWIPA hanlah hmaisawi thuengnae hmuittui thuengnae hanlah, Sinai mon hoi pouk e hmaisawi thuengnae hah pou na poe awh han. <sup>7</sup> Tuca buet touh poenae, nei thuengnae teh pung pali pung touh han. BAWIPA hanlah misur nei thuengnae hah, hmuen kathoung koe na rabawkw awh han. <sup>8</sup> Tuca kanaw buet touh teh, tangmin lah na poe awh han. Amom lah tavai thuengnae hoi hawvah, nei thuengnae patetlah BAWIPA koevah hmuittui hmaisawi thuengnae hah na poe awh han.

### *Sabbath hno poenae*



<sup>9</sup> Hahoi sabbath hnin vah, tucatan kum touh e kacueme kahni touh hoi tavai thueng nahanelah tavaikanui ephah pung hra pung hni, satui hoi kanaw e, hawvah nei thuengnae hai na poe sin han. <sup>10</sup> Hetheh sabbath hni tangkuem vah, hmaisawi thuengnae pou na poe e, nei thuengnae touksin laipalah poe hanelah poe hane doeh.

### *Thapa tangkuem poenae*

<sup>11</sup> Hahoi thapa katha tangkuem vah BAWIPA hanlah hmaisawi thuengnae na poe awh han. Maitotan kahni touh hoi tutan kum touh e, kacueme sari touh. <sup>12</sup> Maitotan tangkuem daw k tavai thueng nahanelah, tavaikanui satui hoi kanaw e ephah pung hra pung thum touh, hahoi tu buet touh daw k tavai thueng nahanelah tavaikanui satui hoi kanaw e ephah pung hra pung hni, <sup>13</sup> tuca kanaw e tangkuem tavai thueng nahanelah, tavaikanui satui hoi kanaw e, ephah pung hra pung touh, hetheh hmuitui thuengnae BAWIPA hanlah hmaisawi thuengnae doeh. <sup>14</sup> Hahoi nei thuengnae a poe awh e teh, maitotan buet touh daw k misur hin tangawn han. Tutan buet touh daw k teh, hin pung thum touh daw k pung touh. Hahoi tucanaw daw k teh, hin pung pali pung touh. Hetheh kum touh thung thapa tangkuem hmaisawi thuengnae lah ao. <sup>15</sup> BAWIPA koevah, yon thuengnae hmaetan buet touh hoi pou na poe awh e, hmaisawi thuengnae hoi nei thuengnae touksin laipalah na poe awh han.

### *Ceitakhai paw*

<sup>16</sup> Thapa yung pasauk, hlaipali hnin teh BAWIPA e ceitakhai paw doeh. <sup>17</sup> Hote thapa hlaipanga hnin teh paw hnin doeh. Hnin sari touh thung teh, tonphuenhoehe tavai hah na ca awh han. <sup>18</sup> Apasuek hnin vah, kathounge kamkhuengnae paw na to awh han. Bang thaw hai na taw awh mahoe. <sup>19</sup> Hmaisawi thuengnae palei teh, BAWIPA koe na poe awh han. Maitotan kanaw e kahni touh hoi, tutan kanaw e kum touh e sari touh, kacueme han. <sup>20</sup> Tavaikanui satui hoi kanaw e tavai thuengnae hoi, maitotan buet touh daw k ephah pung hra pung thum, tutan buet touh daw k ephah pung hra pung hni touh. <sup>21</sup> Tuca kanaw e sari touh teh, tuca kanaw e buet touh daw k ephah pung hra pung touh han doeh. <sup>22</sup> Hahoi yontha nahanlah yon thuengnae hmaetan buet touh. <sup>23</sup> Hetnaw heh amom e poehno hmaisawi thuengnae pou poe e touk laipalah, na poe awh han. <sup>24</sup> Het patetlah BAWIPA han hmuitui hmaisawi poenae, ca hanlah hnintangkuem hnin sari touh thung na poe awh han. Hetheh pou poe e hmaisawi thuengnae hoi nei thuengnae touksin laipalah na poe awh han. <sup>25</sup> Asari hnin vah, kathounge kamkhuengnae na tawn vaiteh, bang thaw hai na taw awh mahoe.

### *Yat paw daw hnopoe*

<sup>26</sup> Hahoi yat touh daw k e paw, canga pasuek e paw, BAWIPA hanlah hno katha tavai thuengnae hno poe hnin daw k hai, kathounge kamkhueng paw na tawn awh han, bang thaw hai na taw awh mahoe. <sup>27</sup> BAWIPA hanlah hmuitui thuengnae na poe awh han. Maitotan kahni, tutan buet touh, tuca kanaw e a tan kum touh e sari touh. <sup>28</sup> Tavai thuengnae tavaikanui satui hoi kanaw e maitotan kanaw e buet touh, ephah pung hra touh daw k pung thum, tutan buet touh daw k vah, ephah pung hra pung hni. <sup>29</sup> Tuca kanaw e sari touh, tuca kanaw e buet touh tangkuem daw k, ephah pung hra pung touh. <sup>30</sup> Nangmouh yontha awh nahanlah hmaetan buet touh hah, <sup>31</sup> toun khoeroe kaawm hoe e han. Pou poe e



hmaisawi thuengnae hoi tavai thuengnae touksin laipalah, hotnaw teh nei thuengnae hoi na poe awh han.

## 29

### *Kum katha pawī*

<sup>1</sup> Thapa yung sari, a hnin apasuek hnin vah, kathounge na kamkhueng awh vaiteh, thaw banghai na tawk awh mahoe. Nangmouh hanlah mongka uengnae hnin lah ao han. <sup>2</sup> BAWIPA hmalah hmuítui thuengnae hah na poe awh han. Maitotan buet touh, tu buet touh, tuca buet touh, kum touh ka phat e kacueme sari touh. <sup>3</sup> Tavai thuengnae daw k tavaikanui satui hoi kanaw k e maitotan buet touh dawkvah, ephah pung hra pung thum. <sup>4</sup> Tutan buet touh ephah pung hra pung hni, tuca kanaw e sari touh, buet touh daw k buet touh daw k lengkaleng ephah pung hra pung touh. <sup>5</sup> Yontha nahanelah hmaetan buet touh hoi, <sup>6</sup> thaparei hnin hmaisawi thuengnae hoi hot hoi tavai thuengnae ouk a sak awh e, BAWIPA hanlah hmuítui hmaisawi thuengnae tawk sin laipalah na poe awh han.

### *yon thuengnae*

<sup>7</sup> Hahoi thapa yung sari, ahra hnin vah, kathounge kamkhueng pawī na tawn awh han. Rawka na hai vaiteh, bang thaw hai na tawk awh mahoe. <sup>8</sup> BAWIPA koevah, hmuítui thuengnae hah na poe awh han. Maitotan kanaw e buet touh, tutan buet touh, tutan kanaw e a tan kum touh ka phat e sari touh, kacueme roeroe han. <sup>9</sup> Tavaithuengnae teh tavaikanui satui hoi kanaw k e maitotan buet touh dawkvah, ephah pung hra pung thum touh, tu buet touh daw k pung hra pung hni touh hoi, <sup>10</sup> tu ca kanaw e sari touh tung vah, buet touh daw k teh ephah pung hra pung touh rip han. <sup>11</sup> Yon thuengnae hanlah hmaetan buet touh hoi yontha nahanelah yon thuengnae hoi hmaisawi thuengnae pou na poe awh e hah tavai thuengnae hoi nei thuengnae touksin laipalah, pou na poe awh han.

### *Lukkareim pawī poehno*

<sup>12</sup> Thapa asari, hnin hlaipanga hnin vah kathounge kamkhuengnae na tawn awh han. Bang thaw hai na tawk awh mahoe. <sup>13</sup> BAWIPA han hmuítui hmaisawi thuengnae na poe awh han. Maitotan kanaw e hlaikathum, tutan kahni, tuca kum touh e hlaipali, kacueme seng han. <sup>14</sup> Tavai thuengnae daw k maitotan hlaikathum, maitotan buet touh daw k tavaikanui e satui hoi kanaw k e ephah pung hra pung thum, tutan kahni touh, tutan buet touh daw k ephah pung hra pung hni touh han. <sup>15</sup> tuca kanaw e hlaipali, tuca kanaw e buet touh daw k ephah pung hra pung touh han. <sup>16</sup> Yon thuengnae dawkvah, hmaetan buet touh hoi hmaisawi thuengnae pou na poe awh e, hote tavai thuengnae hoi nei thuengnae touksin laipalah, na poe awh han.

<sup>17</sup> Hahoi apāhni hnin vah maitotan hlaikahni, tutan kahni, tuca kanaw e a tan kum touh ka phat e kacueme hlaipali touh na poe awh han.

<sup>18</sup> Tavaithuengnae hoi nei thuengnae phung patetlah a younpap e patetlah maitotan thoseh, tutan thoseh, tuca thoseh, <sup>19</sup> yontha thuengnae hmaetan buet touh hoi hmaisawi thuengnae pou na poe awh e hah, tavaithuengnae hoi nei thuengnae touksin laipalah na poe awh han.

<sup>20</sup> Hahoi apāthum hnin vah, maitotan hlaibun, tutan kahni, tutan kum touh e kacueme hlaipali, <sup>21</sup> tavai thuengnae hoi nei thuengnae hah aphung patetlah a younpap e lahoi maitotan han e thoseh, tutan hane thoseh, tuca kanaw hane thoseh, <sup>22</sup> yontha thueng nahanelah hmaetan buet touh hoi



hmaisawi thuengnae dawk pou na poe awh e tavai thuengnae hoi nei thuengnae touksin laipalah na poe awh han.

<sup>23</sup> Hahoi, apali hnin vah, maitotan kanaw e hra, tutan kahni, tuca kum touh ka phat e kacueme hlaipali, <sup>24</sup> tavai thuengnae hoi nei thuengnae phueng patetlah a younpap e lahoi maitotan thoseh, tutan, tuca kanaw e thoseh, <sup>25</sup> yontha thueng nahanelah hmaetan buet touh hmaisawi thuengnae dawk pou poe lah kaawm e tavaithuengnae hoi nei thuengnae touksin laipalah na poe awh han.

<sup>26</sup> Hahoi, apanga hnin maitotan kanaw e tako, tutan kahni, tutanca kanaw e kum touh ka phat e kacueme hlaipali, <sup>27</sup> tavaithuengnae hoi nei thuengnae phueng patetlah a younpap e lahoi maitotan thoseh, tutan, tuca kanaw e thoseh, <sup>28</sup> yontha thueng nahanelah hmaetan buet touh hmaisawi thuengnae dawk pou poe lah kaawm e tavaithuengnae hoi nei thuengnae touksin laipalah na poe awh han.

<sup>29</sup> Hahoi a taruk hnin vah maitotan taroe, tutan kahni, tutanca kanaw e kum touh ka phat e kacueme hlaipali, <sup>30</sup> tavai thuengnae hoi nei thuengnae phueng patetlah a younpap e lahoi maitotan thoseh, tutan, tuca kanaw e thoseh, <sup>31</sup> yontha thueng nahanelah hmaetan buet touh hmaisawi thuengnae dawk pou poe lah kaawm e tavaithuengnae hoi nei thuengnae touksin laipalah na poe awh han.

<sup>32</sup> Hahoi asari hnin vah maitotan kanaw e sari, tutan kahni, tutanca kanaw e kum touh ka phat e kacueme hlaipali, <sup>33</sup> tavai thuengnae hoi nei thuengnae phueng patetlah a younpap e lahoi maitotan thoseh, tutan, tuca kanaw e thoseh, <sup>34</sup> yontha thueng nahanelah hmaetan buet touh hmaisawi thuengnae dawk pou poe lah kaawm e tavaithuengnae hoi nei thuengnae touksin laipalah na poe awh han.

<sup>35</sup> Hahoi ataroe hnin vah ka sungrenpoung lah kamkuengnae paw na tawn awh han. Bang thaw hai na tawk awh mahoe. <sup>36</sup> BAWIPA hanlah hmaisawi thuengnae na pou awh han. Maitotan kanaw e buet touh, tutan buet touh, tuca kanaw e kum touh ka pha e kacueme sari touh, <sup>37</sup> tavai thuengnae hoi nei thuengnae phueng patetlah a younpap e lahoi maitotan thoseh, tutan, tuca kanaw e thoseh, aphung patetlah a younpap lahoi, <sup>38</sup> yontha thueng nahanelah hmaetan buet touh, hmaisawi thuengnae dawk pou na poe awh e tavaithuengnae hoi nei thuengnae touksin laipalah, <sup>39</sup> lawk na kam awh e thoseh, nama ngai lahoi na poe awh e thoseh, tavaithuengnae hai thoseh, hmaisawi thuengnae thoseh, rum thuengnae thoseh, touksin laipalah, hetnaw heh atueng ka tawn e, paw patetlah hoayah BAWIPA koe na poe awh han tet pouh telah a ti.

<sup>40</sup> BAWIPA ni Mosi koe kâ a poe e naw pueng heh Mosi ni Isarel catounnaw koe a dei pouh.

## 30

### *Lawkkamnae kâlau*

<sup>1</sup> Mosi ni Isarel catounnaw hanlah, a miphun kahrawikungnaw a pato teh, BAWIPA ni lawk a thui e patetlah a dei pouh. <sup>2</sup> Tongpa buet touh ni BAWIPA koe lawk kam pawiteh, thoebonae hoi mahoima thoe kâbo nakung hai, aku ep sak roeroe han, a lawk dei patetlah koug a sak roeroe han. <sup>3</sup> Napui teh a na pa im a naw lahun nah BAWIPA koe lawk a kam hai thoseh, thoe a kâbo laihoi a mahoima a kâkin hai thoseh, <sup>4</sup> a na pa ni a lawkkam thoseh, a lawkkin e thoseh, a panue hoi duem awm takhai pawiteh, a lawkkam thoseh, a lawkkin e thoseh a sak roeroe han. <sup>5</sup> Hatei, a



na pa ni a panue nah hnin vah, pasoung hoehpawiteh, a lawkkam thoseh, a lawkkin e thoseh, a hlout thai han. A na pa ni koung a uk e a tho dawkvah, BAWIPA ni ahni teh a ngaithoum han.

<sup>6</sup> Napui teh a vâ ao hai lawk kam pawiteh, amae lungthin dawk lawkkin hanelah a dei navah, <sup>7</sup> a vâ ni a panue hnin hoi roup awm takhai pawiteh, a lawkkam thoseh, a lawkkin e thoseh, a kuepsak roeroe han. <sup>8</sup> Hatei, a vâ ni a panue hnin vah pasoung hoehpawiteh, pouk laipalah lawk a kam e dawh hoi ahni teh a hlout vaiteh, BAWIPA ni a ngaithoum han.

<sup>9</sup> Lahmai hoi ayâ ni amae naw teh a lawkkam thoseh, a lawkkin e thoseh, a kuepsak roeroe han.

<sup>10</sup> A vâ im vah ao lahunnae lawkkam hoi lawkkin e teh, <sup>11</sup> a vâ ni a panue nakunghai roup awm takhai lah oun hoehtoung pawiteh, a lawkkin e teh a kuepsak roeroe han. <sup>12</sup> Hatei, a vâ ni a panue hnin vah, raphoe pouh lah, haw pouh pawiteh, a lawkkam hoi a lawkkin e teh bout a kâhno han.

<sup>13</sup> Lawkkam hoi lawkkin e pueng teh a vâ ni hnâbo lahoi a raphoe thai.

<sup>14</sup> Hatei, a vâ ni a thai teh roup awm takhai pawiteh, a lawkkam hoi a lawkkin e patetlah a kuepsak roeroe han. Bangkongtetpawiteh, a panue nah hnin hoi roup ao takhai dawkvah, a caksak toe tie lah ao han. <sup>15</sup> A thai tahma hoi raphoe hoi haw pawiteh, napui e thoesaknae teh ama ni a phu han.

<sup>16</sup> Hetnaw heh tongpa hoi a yu rahak hane, na pa hoi a canu rahak, a naw nah a na pa im ao nah hane BAWIPA ni Mosi koe kâ a poe e lah ao.

## 31

### *Midiannaw koe moipathungnae*

<sup>1</sup> BAWIPA ni Mosi a pato teh, <sup>2</sup> Isarel catounnaw hanlah Midian taminaw koevah, moipathung nateh, hahoi teh na miphunnaw koevah na ceikhai han telah a ti.

<sup>3</sup> Hottelah Mosi ni taminaw pueng hah a dei pouh teh, Midian taminaw koevah, BAWIPA ni a moipathung hanelah puengcang kâmahrawk awh nateh, midiannaw tuk hanelah kamthaw naseh. <sup>4</sup> Isarel miphunnaw pueng thung dawh hoi miphun buet touh dawh hoi tarantuk hanlah tami 1,000 rip na patoun han telah a ti.

<sup>5</sup> Hottelah Isarelnaw moikapap thung dawh hoi tarantuknae koe cei hanelah, miphun buet touh thung dawh hoi tami tong touh rip a tâ awh teh asumkum tami 12,000 touh a tâco sak awh. <sup>6</sup> Hottelah Mosi ni a miphun tangkuem hoayah, 1,000 rip hoi vaihma Eleazar capa Phinehas ka thoung e hlaamnaw hoi kâhructuetnae mongka hah a sin awh teh, tarantuknae koe a ceisak awh. <sup>7</sup> BAWIPA ni Mosi kâ a poe e patetlah Midiannaw hah a tuk awh teh tongpa pueng a thei awh. <sup>8</sup> A thei awh e naw thung dawh Midiannaw e siangpahrang hai a baw van. Midian siangpahrang panga, Evi, Rekem, Zur, Hur hoi Reba tinaw doeh. Beor capa Balaam hai tahloi hoi a thei awh. <sup>9</sup> Hahoi Isarel catounnaw ni Midian napuinaw hah san lah koung a hravi awh. A saringhunaw pueng, a tuhunaw pueng, a hnopainaw pueng, hah lawphno lah koung a la pouh awh.

<sup>10</sup> A onae khonaw pueng hoi a roenae naw pueng hmai koung a sawi pouh awh teh, <sup>11</sup> tami hoi saring, san hoi lawphnonaw pueng teh koung a ceikhai awh.

### *Tarantuknae koehoi a ban awh*



<sup>12</sup> Hahoi san hoi man e naw pueng hoi lawphnonaw teh Mosi hoi vaihma Eleazar hoi Isarel catounnaw koevah, Jeriko namran Jordan palang teng Moab tanghling a roe awhnae koe a phakhai awh.

<sup>13</sup> Hottelah, Mosi hoi vaihma Eleazar hoi taminaw pueng ni longkha koehoi a dawn awh. <sup>14</sup> Hatei, Mosi teh ransabawi 1,000 touh kahrawikung, 100 touh kahrawikung kacuenaw hoi tarantuknae koehoi kabannaw lathueng vah a lungkhuek.

<sup>15</sup> Hottelah Mosi ni ahnimouh koe, napuinaw teh a hring lah na hlung awh na maw. <sup>16</sup> Khenhaw, Balaam khokhangnae kecu dawk Peor kong dawkvah, Isarel catounnaw ni BAWIPA taranlahoi kâtapoenae katâcawtsakkungnaw teh hete napuinaw doeh. BAWIPA e taminaw koe lacik a pha sak awh toe. <sup>17</sup> Hatdawkvah, camonaw thung dawk tongpanaw hah koung thet awh nateh, tongpanaw ni yo a ikhai e napuinaw hai thet awh. <sup>18</sup> Hatei, camohnawn e napuinaw tami ni a ikhai hoeh raenaw pueng teh, namamouh hanlah pâhlung awh.

<sup>19</sup> Hahoi longkha koe hnin sari touh roe awh. Bang patetlae tami nakunghai tami ka thet e hoi tami ro kateknaw pueng teh, apâthum hnin hoi asari hnin teh namamouh hoi na sannaw hoi kamthoung awh. <sup>20</sup> Kamthouppnae pueng hoi, phaivuen hoi sak e hnouaw pueng kong dawk be na kamthoung awh han telah atipouh.

<sup>21</sup> Hahoi, vaihma Eleazar ni hai tarantuknae koe ka cet e ransanaw hah a kaw teh, hethateh BAWIPA ni Mosi koevah kâ a poe e kâlawk doeh. <sup>22</sup> Sui, ngun, hoi rahum, hoi sum, samphei, hoi konlawk, <sup>23</sup> bangpatete hnouaw pueng haiyah, hmai ni a kak thai hoeh e pueng, hmai dawk pou ceisak vaiteh a thoung han. Bangpatet nakunghai yah pâsu hoi thoungthainae tui hoi pâsu vaiteh thoungsak hanlah ao. Hahoi hmai dawk phum han kahawihoehnaw pueng teh, khohna hoi tui dawk pekpâsu hanelah ao. <sup>24</sup> Hahoi asari hnin vah na hni na pâsu awh vaiteh, hahoi doeh roenae hmuen koe na kâen awh han.

### *Lawphno kêreinae*

<sup>25</sup> BAWIPA ni Mosi a pato teh, <sup>26</sup> nang nama hoi vaihma Eleazar hoi tami hu kaukkung kahrawikungnaw hoi hnopai na lawp awh e tami hoi saring hah be touk awh. <sup>27</sup> Lawphno kahni touh lah kapek awh. Tarantuknae koe ka cet ni teh tarankatuknaw hane hoi tamimaya hanlah, <sup>28</sup> hahoi tarantuknae koe kacetnaw e a hma thung dawk hoi tami hoi, maito, hoi la, hoi tu, hoi kahring e pueng dawk hoi 500 touh dawk buet touh BAWIPA han a ham lah ta hanlah na kapek han. <sup>29</sup> Hotnaw teh lat awh nateh, BAWIPA hanlah kahek thuengnae vaihma Eleazar hah na poe awh han. <sup>30</sup> Isarelnaw ni a ham awh e a tangawn thung dawk hoi tami, maito, la, tu totouh moithang phun 50 touh dawk buet touh, na la vaiteh, BAWIPA e lukkareim ka ring e Levihnaw hah na poe awh han, telah a ti.

<sup>31</sup> Hottelah BAWIPA ni Mosi kâ a poe e patetlah Mosi hoi vaihma Eleazar ni a sak roi. <sup>32</sup> Ransanaw ni a man awh e lawphno touksin laipalah a la awh e teh, tu 675,000, <sup>33</sup> maito 72,000, <sup>34</sup> la 61,000, <sup>35</sup> napui tongpa ni a ikhai hoeh rae 32,000, <sup>36</sup> tarantuknae koe kacetnaw tangawn ni a ham awh e tu 337,500, <sup>37</sup> BAWIPA ham tu 675, <sup>38</sup> maito 36,000 touh a pha teh BAWIPA ham teh 72 touh. <sup>39</sup> La 30,500 touh a pha teh BAWIPA ham teh 61 touh. <sup>40</sup> Tami teh 16,000 touh a pha teh BAWIPA ham teh 32 touh a pha. <sup>41</sup> BAWIPA ni Mosi kâ a poe e patetlah ham, BAWIPA koe kahek thuengnae Mosi ni vaihma Eleazar a poe.



<sup>42</sup> Mosi ni tarankatuknaw e a ham kOUNg a poe. Isarelnaw e a ham teh,  
<sup>43</sup> tu 337,500, <sup>44</sup> maito 36,000, <sup>45</sup> la 30,500, <sup>46</sup> tami 16,000 a pha.

<sup>47</sup> Isarelnaw ni a ham thung dawK hoi Mosi ni tami hoi saring 50 touh  
 thung dawK hoi buetbuet touh pou a la teh, BAWIPA kâpoelawK patetlah  
 BAWIPA lukkareiim kakhenyawnkung Levihnaw hah a poe awh.

<sup>48</sup> Hahoi ransanaw thung dawK tami 100 kaukkungnaw, 1,000 kaukkung-  
 naw ni Mosi koe a hnai awh teh, <sup>49</sup> Mosi koevah na sannaw niyah kaimae  
 kut dawK kaawm tarankatuknaw hah ka touk awh teh kakuep hoeH e  
 apihai kaawm awh hoeH. <sup>50</sup> Hatdawkvah, ka hring awh nahanlah BAWIPA  
 hmalah yontha sak hanelah tamipueng ni lengkaleng a coe awh e sui hoi  
 sak e, dingyin, laikaw, kuthrawt, hnongpacap, hnâpacap naw hah BAWIPA  
 koe thueng hanelah ka thokhai awh toe telah atipouh.

<sup>51</sup> Mosi hoi vaihma Eleazar ni, sui hoi sak e puengcangnaw hah a  
 la pouh. <sup>52</sup> 1,000 touh kahrawikung, 100 touh kahrawikungnaw ni  
 BAWIPA hanelah kahek thuengnae lah a poe awh e suinaw pueng teh  
 sekel 16,750 touh a pha. <sup>53</sup> Ransanaw ni a la awh e lawphnonaw  
 teh amamouh hanlah lengkaleng a la awh. <sup>54</sup> Hahoi Mosi hoi vaihma  
 Eleazar ni 1,000 kahrawikung, 100 kahrawikungnaw e sui teh a la pouh  
 teh, Isarel catounnaw pahnim hoeH nahanlah kamkhuengnae lukkareiim  
 dawK BAWIPA hmalah a tâcokhai awh.

## 32

### *Jordan kanîtho namran lae miphunnaw*

<sup>1</sup> Reuben hoi Gad miphunnaw ni saring moi a tawn awh teh, Jazer ram  
 hoi Gilead ram a hmu awh toteh, a hmuen teh saring o nahan ahawipoung  
 ati awh. <sup>2</sup> Hothateh, Gad, hoi Reuben catounnaw ni Mosi hoi Eleazar maya  
 kahrawikungnaw hah a pato awh teh, <sup>3</sup> Isarelnaw hmalah, BAWIPA ni a  
 ta e ram Ataroth, Dibon, Jazer, Nimrah, Heshbon, Elealeh, Sebam, Nebo  
 hoi Beon teh, <sup>4</sup> saring pâ nahanlah kahawipoung e ram lah ao teh, na  
 sannaw hai saring ka tawn awh. <sup>5</sup> Hatdawkvah na hnâ bawt pawiteh,  
 hete ram heh coe hanlah na poe awh loe. Jordan namran hrumhram na  
 takhangkhai awh hanh telah ati awh.

<sup>6</sup> Mosi ni Gad hoi Reuben catounnaw koevah, na hmaunawngnaw  
 tarantuknae koe a cei vaiteh, nangmanaw teh hi vah sut na o awh  
 han na maw. <sup>7</sup> Bangkongmaw, BAWIPA ni na poe awh e ram dawK  
 kâen hanlah Isarel catounnaw ni na lunghin thung na kâhnawn awh.

<sup>8</sup> Kadeshbarnea hoi ram tuet hanlah na patoun awh navah, hettelah na  
 mintoenaw ni ati awh toe. <sup>9</sup> Eshkol ravo koe a pha awh navah, ram teh  
 a hmu awh. BAWIPA ni na poe e ram kâen hoeH hanlah Isarelnaw a  
 lunghin a kamlang sak awh. <sup>10</sup> Hote hno niyah, BAWIPA lung a kâan  
 sak teh, <sup>11</sup> Izip ram hoi ka tâcawt e kum 20 lathueng pueng ni Abraham  
 hoi Isak hoi Jakop tinaw koe thoekâbo hoi ka poe e ram teh, apinihai  
 hmawt mahoeH. Bangkongtetpawiteh, kai hnukkâbang katang awh hoeH  
 telah thoe a kâbo awh. <sup>12</sup> Keniz tami Jephunneh capa Kaleb hoi Nun  
 capa Joshua teh BAWIPA hnuk a kâbang roi. <sup>13</sup> Isarelnaw koe BAWIPA  
 a lung a kâan teh BAWIPA mithmu vah hno kahawihoehe kasaknaw e se  
 pueng a kahma awh hoehroukrak kahrawngum vah kum 40 touh a kâva  
 sak. <sup>14</sup> Khenhaw! Isarelnaw koe BAWIPA lungkhueknae takikathopoung e  
 hah bout thapsin hanlah nangmouh sekatha tamikayonnaw ni mintoenaw  
 yueng lah na kâsak awh. <sup>15</sup> Bangtelamaw ahni hnukkâbang laipalah



na awm pawiteh hete kahrawngum vah bout na o sak awm vaiteh, hete tamimaya heh kahmasak han telah atipouh.

<sup>16</sup> Hahoi rek a hnai awm teh, ahni koe awi hivah saringnaw hoi tuhunaw hanlah a im sak pouh vaiteh, canaw hanlah kiothawng awm han, <sup>17</sup> hatei, kaimanaw teh, o awm nahane hmuen koe pha hoehroukrak, Isarel catounnaw hmalah cei hanelah puengcang coungkacoe kâmahrawk awm han, hete ram taminaw kecu dawk, canaw heh rapan ka tawn e kho dawk o sak awm han. <sup>18</sup> Isarel catounnaw ni a coe awm hane kawi hmuen be a coe hoehroukrak, ma im lah na ban awm mahoe. <sup>19</sup> Bangtelamaw tetpawiteh, coe hane kawi teh, hi namran lah Jordan kanîtholah a tho dawkvah, Jordan namran hoi ahlawilae teh coekhai awm han telah ati.

<sup>20</sup> Mosi ni hot patetlah na sak awm teh, tarantuk nah koevah, BAWIPA hmalah cei hanlah na kamthoup awm teh, <sup>21</sup> a hmalah a tarannaw a pâlei teh, BAWIPA hmalah ram na tâ awm hoehroukrak, nangmouh rahak puengcang kâmahrawk e naw pueng ni, BAWIPA hmalah Jordan be na raka awm pawiteh, a hnuk bout na kâbang awm vaiteh,

<sup>22</sup> BAWIPA lathueng hoi Isarelhaw lathueng vah, yonpen lah na awm awm mahoe. Hottelah ram te BAWIPA hmalah na coe awm han. <sup>23</sup> Hatei hottelah na sak awm hoehpawiteh, khenhaw!, BAWIPA koevah na yon e lah awm vaiteh, na yonnae na hmu awm roeroe han tie hah panuek awm. <sup>24</sup> Na camonaw hanlah kiothawng awm nateh, na tunaw hanlah im sak pouh awm telah ati.

<sup>25</sup> Hottelah Gad hoi Reuben catounnaw ni Mosi koevah, na sannaw ni mintoenaw e kâpoelawk patetlah ka sak han. <sup>26</sup> Ka yunaw hoi camonaw hoi tuhunaw hoi saringhunaw pueng teh, Gileadnaw e khoram dawk ao han. <sup>27</sup> Hatei, na sannaw tarantuk hanlah, puengcang hoi kâmahrawknaw pueng ni bawipa ni a dei pouh telah BAWIPA hmalah ka luen van awm han telah ati awm.

<sup>28</sup> Mosi ni ahnimouh kong kecu dawk vaihma Eleazar hoi Nun capa Joshua hoi Isarel miphun imthung kahrawikungnaw hah kâ a poe. <sup>29</sup> Mosi ni ahnimouh koe Gad canaw hoi Reuben canaw tarantuknae puengcang kâmahrawk e pueng ni, BAWIPA hmalah Jordan tui a rakakhai han. Ram teh na la hnukku, Gilead ram teh a coe awm hanlah na poe awm han. <sup>30</sup> Hatei puengcang kâmahrawk hoi na cetkhai awm hoehpawiteh, Kanaan ram vah nangmouh koe a bawk van han telah ati.

<sup>31</sup> Hahoi Gad canaw hoi Reuben canaw ni na sannaw koevah, BAWIPA ni a dei e patetlah ka sak han. <sup>32</sup> Puengcang kâmahrawk hoi BAWIPA hmalah, Kanaan ram takhang vaiteh kâen awm han. Hatei, coe awm hane ram teh, Jordan namran lah doeh pou coe awm ti telah a pathung awm.

<sup>33</sup> Mosi ni Gad catounnaw hoi Reuben catounnaw hah Joseph capa Manasseh miphun tangawn teh, Amor siangpahrang Sihon uknaeram hoi Bashan siangpahrang, Og uknaeram kaawm e khonaw pueng hoi, a tengpam khotenaw pueng hoi koung a poe awm. <sup>34</sup> Gad catounnaw ni Dibon, Ataroth hoi Aroer, <sup>35</sup> Aroth-shonphan, Jazer hoi Jobehah, <sup>36</sup> Bethnimrah hoi Bethharan kho a thawng awm teh, rapan ka tawn e khopui hoi tu imnaw a sak awm. <sup>37</sup> Reuben catounnaw ni Heshbon, Elealeh hoi Kiriathaim, <sup>38</sup> Nebo, Baalmeon, Sibmah hah a thawng awm. Hote kho a thawng awm e hah min louk lah a phung awm

<sup>39</sup> Manasseh capa Makhir catounnaw teh Gilead ram a cei awm teh a la awm. Amornaw haw kaawm pueng teh be a lawp awm. <sup>40</sup> Hatdawkvah, Mosi ni Gilead ram teh Manasseh capa Makhir koe a poe teh hawvah



khosak awh. <sup>41</sup> Manasseh capa Jair ni a cei teh khotenaw hah a la dawkvah, hotnaw hah Jair telah a phung awh. <sup>42</sup> Nobah hai a cei teh, Kenath khotenaw a la teh, a min lah Nabah telah a phung awh.

### 33

#### *Izip ram hoi Isarelnaw kahlawng ceinae*

<sup>1</sup> Hetnaw heh Mosi hoi Aron ni hrawi e lahoi IZip ram hoi ahuhu lahoi a tâco awh teh, a ceinae doeh. <sup>2</sup> BAWIPA ni kâ poe e patetlah a tâco pasuek hoiyah, a ceinae naw hah Mosi ni koug a thut. Hetheh kahlawng cei a kamtawngnae koehoi pou a deinae doeh.

<sup>3</sup> Thapa ayung pasuek, hnin hlaipanga hin vah Raameses hoi a tâco awh teh ceitakhai pawî hnin a tangtho amom vah Izipnaw e mithmu vah, <sup>4</sup> a caminnaw pueng BAWIPA ni a thei pouh e naw a pakawp awh lahun nah, Isarel catounnaw pueng lungtang lahoi a tâco awh. Bangkongtetpawiteh, BAWIPA ni ahnima cathut koehai lawk a ceng teh a rek pouh. <sup>5</sup> Hahoi teh Isarel catounnaw teh Raameses hoi a tâco awh teh, Sukkoth vah a roe awh.

<sup>6</sup> Sukkoth hoi a tâco awh teh kahrawngum Etham vah a roe awh. <sup>7</sup> Etham hoi a tâco awh teh Baalzephon teng Pihahiroth lah a ban awh teh Migdol vah a roe awh. <sup>8</sup> Pihahiroth hoi a tâco awh teh tali tapoung hoi kahrawngum vah a kâen awh. Hahoi Etham kahrawng dawk hnin thum touh a cei awh teh, Marah vah a roe awh. <sup>9</sup> Marah hoi a cei awh teh, Elim lah a pha awh. Haw vah tuiphuek hlaikahni touh hoi ungkung 70 touh ao teh haw vah a roe awh. <sup>10</sup> Elim hoi a cei awh teh tuipui paling teng vah a roe awh. <sup>11</sup> Tuipui paling koehoi a cei awh teh Sin kahrawngum vah a roe awh. <sup>12</sup> Sin kahrawngum koehoi a cei awh teh, Dophkah vah a roe awh. <sup>13</sup> Dophkah koehoi a cei awh teh Alush vah a roe awh. <sup>14</sup> Alush koehoi a cei awh teh, Rephidim vah a roe awh. Hatei, hawvah tui nei hane awm hoeh. <sup>15</sup> Rephidim koehoi a cei awh teh, Sinai kahrawngum vah a roe awh. <sup>16</sup> Sinai kahrawngum koehoi a cei awh teh, Kiborthhattaavah vah a roe awh. <sup>17</sup> Kiborthhattaavah koehoi a cei awh teh, Hazeroth vah a roe awh. <sup>18</sup> Hazeroth koehoi a cei awh teh, Rithmah vah a roe awh. <sup>19</sup> Rithmah koehoi a cei awh teh Rimmonperez a roe awh. <sup>20</sup> Rimmonperez koehoi a cei awh teh Libnah vah a roe awh. <sup>21</sup> Libnah koehoi a cei awh teh Rissah vah a roe awh. <sup>22</sup> Rissah koehoi a cei awh teh Kehelathah vah a roe awh. <sup>23</sup> Kehelathah koehoi a cei awh teh Shepher mon vah a roe awh. <sup>24</sup> Shepher mon koehoi a cei awh teh Haradah vah a roe awh. <sup>25</sup> Haradah koehoi a cei awh teh Makheloth vah a roe awh. <sup>26</sup> Makheloth koehoi a kampuen awh teh Tahath vah a roe awh. <sup>27</sup> Tahath koehoi a cei awh teh Terah vah a roe awh. <sup>28</sup> Terah koehoi a cei awh teh Mithkah vah a roe awh. <sup>29</sup> Mithkah koehoi a cei awh teh Hashmonah vah a roe awh. <sup>30</sup> Hashmonah koehoi a cei awh teh Moserah vah a roe awh. <sup>31</sup> Moserah koehoi a cei awh teh Benejaakan vah a roe awh. <sup>32</sup> Benejaakan koehoi a cei awh teh Horhagidgad vah a roe awh. <sup>33</sup> Horhagidgad koehoi a cei awh teh Jobathah vah a roe awh. <sup>34</sup> Jobathah koehoi a kampuen awh teh Abronah vah a roe awh. <sup>35</sup> Abronah koehoi a kampuen awh teh Eziongeber vah a roe awh. <sup>36</sup> Eziongeber koehoi a cei awh teh Kadesh e Zin kahrawng vah a roe awh. <sup>37</sup> Kadesh koehoi a cei awh teh Edom ram poutnae Hor mon vah a roe awh. <sup>38</sup> Hor mon vah vaihma Aron hai BAWIPA e lawk patetlah a luen teh, Izip hoi Isarelnaw a tâco awh hoi kum 40, thapa yung panga apasuek hnin,



hawvah a due. <sup>39</sup> Aron teh Hor mon dawk a due nah kum 120 touh a pha. <sup>40</sup> Hahoi Kanaannaw, Kanaan ram akalah kaawm e Arad siangpahrang ni Isarelnaw a tho awh e hah a thai. <sup>41</sup> Hor mon koehoi a kampuen awh teh Zalmonah vah a roe awh. <sup>42</sup> Zalmonah koehoi a kampuen awh teh Punon vah a roe awh. <sup>43</sup> Punon koehoi a kampuen awh teh Oboth vah a roe awh. <sup>44</sup> Oboth koehoi a kampuen awh teh Moab ramri Ijeabarim vah a roe awh. <sup>45</sup> Iyim koehoi a kampuen awh teh Gad Dibon vah a roe awh. <sup>46</sup> Gad Dibon koehoi a kampuen awh teh Almondiblathaim vah a roe awh. <sup>47</sup> Almondiblathaim koehoi a kampuen awh teh Nebo hma lae Abarim mon vah a roe awh. <sup>48</sup> Abarim mon koehoi a kampuen awh teh Jeriko tengpam Jordan palang teng Moab tanghling dawk a roe awh. <sup>49</sup> Jordan palang teng Bethjeshimoth koehoi Abelshittim totouh Moab tanghling dawk a roe awh.

### *Kanaan tâ nahanelah hmusaknae*

<sup>50</sup> Hahoi Jeriko tengpam Jordan palang teng Moab tanghling dawk BAWIPA ni Mosi hah a pato teh, <sup>51</sup> Isarel catounnaw hah pato nateh, ahnimouh koe Jordan tui na raka awh teh, Kanaan ram na kâen awh toteh, <sup>52</sup> hote ram dawk kaawmnaw pueng be na pâlei awh han. Ahnimae talung meikaphawknaw pueng be na raphoe pouh han, hmuenrasang hai be na raphoe pouh han. <sup>53</sup> Hahoi ram teh na coe awh vaiteh, hawvah kho na sak awh han, bangkongtetpawiteh, na coe hane ram teh na poe toe. <sup>54</sup> Hahoi a ma miphun lahoi cungpam na rayu awh vaiteh, ram teh na coe awh vaiteh, na kârei awh han, bet kapap e hah ram kakawhnawn na poe awh han. Kayoun e hah kabuenghnawn lah na poe awh han. Cungpam na rayu awh e patetlah kâvan lah na ham awh han. Na mintoenaw e phung patetlah na coe awh han. <sup>55</sup> Hatei, hote ram dawk kaawmnaw hah na pâlei awh hoeh e naw teh, na mit dawk mittanuen hoi na tak dawk pâkhing kaawm vaiteh, na onae ram dawk runae na poe awh han. <sup>56</sup> Hothloilah, ahnimouh koe sak han ka noe e hah namamouh koe letlang ka sak han tet pouh telah a ti.

## 34

### *Kanaan ramri khuennae*

<sup>1</sup> BAWIPA ni Mosi hah a pato teh, <sup>2</sup> Isarelnaw hah lawkthui nateh, hetheh Kanaan ram na pha awh toteh nangmouh ni na pang awh hane Kanaan ramri doeh atipouh.

<sup>3</sup> Akalah nangmae khori teh, Zin kahrawngum hoi Edom ram yunglam han, akalae khori teh palawi tali apoutnae koehoi Kanîtholae han. <sup>4</sup> Hahoi nangmae ramri teh, Akrabim takhangnae a rahim hoi a lawngven vaiteh, Zin pou a rakan vaiteh, Kadeshbarnea a rahim totouh han, hahoi Hazaraddar lah cet vaiteh, Azmon vah pou a cei tâphai han. <sup>5</sup> Hote ramri teh Azmon Izip palang totouh lawngven vaiteh, tuiyipaling koe a pout han.

<sup>6</sup> Kanîloumlah, tuiyipui hah khori lah na coe awh han, hetheh kanîloumlae na ramri lah ao han. <sup>7</sup> Hahoi hetheh atunglae na khori lah ao han, tuiyipui koehoi Hor mon pâum lahoi na sak han. <sup>8</sup> Hor mon koehoi Hamath kâennae koe totouh na sak awh han, haw hoi khori a tâconae teh Zedad koe han. <sup>9</sup> Khori teh, Ziphron pou tapoung vaiteh, Hazarenan vah a pout han, hetheh atunglae na ramri lah ao han.

<sup>10</sup> Hahoi Kanîtholae na khori teh, Hazarenan hoi Shepham totouh na sak awh han. <sup>11</sup> Na khori teh Shepham hoi Riblah hoi Ain kanîtholah pou



a cathuk vaiteh, haw hoi paloupalou cathuk vaiteh, Khinnereth kanitho talipui rai koelah a pha han. <sup>12</sup> Khorì teh Jordan lah cathuk vaiteh, palawi talì koe apout han, hethèh na khori lah ao tet pouh telah a ti.

<sup>13</sup> Hahoi teh, Mosi ni Isarelnaw hah kâ a poe teh, hethèh BAWIPA ni miphun tako touh hoi a tangawn poe hanelah, cungpam rayu hoi na coe aw hane ram doeh. <sup>14</sup> Bangkongtètpawiteh, Reuben miphun catounnaw ni a imthung lahoi, Gad miphun catounnaw ni a imthung lahoi, Manasseh miphun tangawn ni a imthung lahoi a coe aw hane teh be a coe aw hane toe. <sup>15</sup> Hete miphun kahni touh hoi tangawn ni a coe aw hane teh, kanitholah Jeriko tengpam, Jordan palang kanitholah a coe aw hane toe telah a ti.

### *Khori ka rei e khobawinaw*

<sup>16</sup> BAWIPA ni Mosi a pato teh, <sup>17</sup> hetnaw heh na coe aw hane ram nangmouh rahak vah kareikung min teh vaihma Eleazar hoi Nun capa Joshua doeh. <sup>18</sup> Hahoi na coe aw hane ram kareikung lah miphun tangkuem dawk hoi khobawi buet touh rip na rawi aw hane ati pouh.

<sup>19</sup> A minnaw teh hetnaw hah doeh.

Judah catoun dawk hoi Jephunneh capa Kaleb,

<sup>20</sup> Simeoncanaw dawk hoi Ammihud capa Samuel,

<sup>21</sup> Benjaminaw dawk hoi Khislon capa Elidad,

<sup>22</sup> Dan canaw dawk hoi khobawi Jogli capa Bukki,

<sup>23</sup> Joseph capa Manasseh canaw dawk hoi Ephod capa khobawi Hanniel,

<sup>24</sup> Ephraimcanaw e catoun dawk hoi Shiptan capa khobawi Kemuel,

<sup>25</sup> Zebuluncanaw dawk hoi Parnach capa khobawi Elizaphan,

<sup>26</sup> Issakharnaw dawk hoi Azzan capa khobawi Azzan,

<sup>27</sup> Asher canaw dawk hoi Shelomi capa khobawi Ahihud,

<sup>28</sup> Naphtalinaw dawk hoi Ammihud capa khobawi Pedahel, han atipouh.

<sup>29</sup> Hetnaw heh Kanaan ram e Isarel catounnaw ram coe hane kareikung lah BAWIPA ni a poe e naw doeh.

## 35

### *Leviwnaw hane khopui*

<sup>1</sup> Hahoi Jeriko teng Jordan palang teng vah Moab tanghling dawk BAWIPA ni Mosi hah a pato. <sup>2</sup> Isarel canaw hah kâpoe leih. A ram thung dawk Leviwnaw o nahanlah kho poe aw hane naseh. Saring a pâ nahanlah kho tengpam hah Leviwnaw na poe aw hane han. <sup>3</sup> Kho a saknae kho tawn aw hane vaiteh, a tengpam pueng teh a maito hoi saringnaw a paca aw hane e a pâ nahanlah aw hane naseh. <sup>4</sup> Kho tengpam Leviwnaw na poe aw hane teh, kho rapan petkâkalup lah dong 1000 touh akaw han. <sup>5</sup> Hahoi tumdumnae alawilah hoi na bangnue aw hane vaiteh, kanitholah dong 2000, akalah dong 2000, kaniloumlah dong 2000, atunglah dong 2000, alungui kho ao han. Hetnaw heh a ham aw hane khopuinaw rapan alawilah han.

<sup>6</sup> Leviwnaw na poe aw hane khonaw thung dawkvah, tamikathetnaw a yawng nahane taruk touh na rawi aw hane. Hothloilah kho 42 touh na thapsin han. <sup>7</sup> Leviwnaw na poe hane khonaw pueng teh, a ram hoi kho 48 touh a pha han. <sup>8</sup> Isarelnaw khosak nahan na poe e teh, kapap hah kapap na poe vaiteh, kayoun hah kayoun na poe han. Tami pueng ni a coe aw hane ram apap e patetlah Leviwnaw kho na poe aw hane.

### *Kânguenae khonaw*



<sup>9</sup> BAWIPA ni Mosi hah a pato teh, <sup>10</sup> Isarel canaw hah pato nateh, ahnimouh koe Jordan na raka awh teh, Kanaan ram na kâen toteh, <sup>11</sup> pouk laipalah tamikathet payon e teh a yawng vaiteh a kângue nahane kho na pouk pouh han. <sup>12</sup> Tamimaya hmalah lawkceng hanlah a kangdue hoehnahlan, tamikathet payon e teh, ama a due hoeh nahanelah, hote khonaw teh moipathungkung ni a tawng navah a kângue awh nahanelah ao han. <sup>13</sup> Hottelah, nangmouh hanlah kângue nahane kho na pouk awh hane teh kho 6 touh a pha han. <sup>14</sup> Jordan namran lah kho kathum touh na pouk awh vaiteh, Kanaan ram lah kho kathum touh na pouk awh han. Kânguenae kho lah ao han. <sup>15</sup> Isarel catounnaw hoi ahnimouh koe kaawm e imyinnaw hanlah kho 6 touh hah kânguenae kho lah ao han. Awi hawvah, tamikathet payonnaw ni a yawng awh han.

<sup>16</sup> Hatei, sum hoi tami hem boilah dout pawiteh, tamikathet e lah ao dawkvah, tamikathet e teh ama hai roup thei roeroe han. <sup>17</sup> Hahoi talung hoi tami kadout lah dei pawiteh, ayâ ka thet e lah ao dawkvah, ayâ ka thet e teh ama hai thei roeroe han. <sup>18</sup> Hahoi tami ni thing hoi tami kadout lah hem pawiteh, ayâ ka thet e lah ao dawkvah, ayâ ka thet e teh ama hai thei roeroe han. <sup>19</sup> Thiphu moipathungkung ni tami ka thet e teh tang a thei thai han. A hmu boum teh a thei han. <sup>20</sup> Hahoi tami a hmuhma kecu dawk puenghoi dei tanawt nakunghai thoseh, sut pawp laihoi kadout lah a dêi nakunghai thoseh, <sup>21</sup> kâoun hoi kut hoi thaw lah koe dout pawiteh, kathetkung hah thei van hane roeroe lah ao. Bangkongtetpawiteh, tamikathetkung doeh. Thipaling moipathungkung ni a hmu nah tangkuem koe a thei han.

<sup>22</sup> Hatei, kâoun kâtai dawk laipalah, a tanawt payon dawk nakunghai thoseh, lam hoi a pawp dawk tho laipalah, tami awm hoeh ti hoi a panue hoehnahlan vah, taran lah hai kaawm hoeh e, <sup>23</sup> pataw nahan poe hanlah hai kâcai hoeh eiteh, talung hoi koe dêi lah dout payon pawiteh, <sup>24</sup> tamimaya ni hete lawkcengnae kâlawk patetlah kathetkung hoi thipaling moipathungkung hanlah lawk a ceng awh han. <sup>25</sup> Hahoi tamimaya ni tamikathetkung hah thipaling moipathungkung koehoi a la ring awh vaiteh, tamimaya ni a yawng nahane kânguenae kho dawk ao sak awh han. Satu kathoung hoi awi e vaihma kacue ka tawk lahun e a due hoehroukrak haw vah ao han.

<sup>26</sup> Hatei, bangpatet e tueng pueng dawk hai tami ka thet e teh, a yawngnae kânguenae kho, khori hloilah cet pawiteh, <sup>27</sup> thipaling moipathungkung ni kânguenae kho hloilah hmawt boilah thet pawiteh, thipaling dawk yonpennae awm mahoe. <sup>28</sup> Bangkongtetpawiteh, vaihma kacue a due hoehroukrak, kânguenae kho dawk pou o hanlah ao. Vaihma a due hnukkhu, hote tami ka thet e teh ama onae kho dawk a ban han. <sup>29</sup> Hatei, hnouaw pueng hah na catounnaw totouh na o awh nah tangkuem koe lawkceng e lah ao han.

<sup>30</sup> Tami bangpatet ni nakunghai tami thet pawiteh, tamikathetkung teh kapanuekkhaikung e pahn dawk lawk a tâco sak e lawk lahoi thei lah ao han. Hatei, kapanuekkhaikung buet touh dueng e a pahn dawk e lawk pawiteh, thei khai nahanelah khout hoeh. <sup>31</sup> Tami kathetkung teh na ratang awh mahoe. Bangkongtetpawiteh, due han kamcu totouh yonpen e lah ao toung dawkvah, na thei awh roeroe han. <sup>32</sup> Kânguenae kho dawk ka yawng e tami teh, hatnae tueng dawk vaihma kacue ka tawk e a due hoehroukrak a onae khoruem dawk bout ban thai nahan, ratang thai mahoe. <sup>33</sup> Hatdawkvah, na onae ram na khin sak mahoe.



Bangkongtetpawiteh, thipaling ni ram hah a khin sak teh, ram a dam nahanlah, thipalawngkung e thipaling hoi dueng doeh yontha thai lah ao. <sup>34</sup> Hatdawkvah, a lungui e khosaknae na coe awh e ram teh, na khinsak awh mahoe. Bangkongtetpawiteh, kai Jehovah teh Isarel catounnaw koe ka o tet pouh telah ati.

## 36

### *Zelophehad canunaw e râw*

<sup>1</sup> Joseph imthung daw k hoi Manasseh capa Makhir capa Gilead catoun imthung kahrawikungnaw hmalah lawk a dei awh.

<sup>2</sup> Ahnimouh ni, BAWIPA ni Isarel catounnaw hah cungpam rayu hoi a coe awh hane ram poe hanlah, ka bawipa Mosi hah kâ a poe teh, hmaunawngah Zelophehad canunaw a coe hane râw hah BAWIPA ni ka bawipa koe kâ a poe toe. <sup>3</sup> Hatei, ahnimouh ni Isarel catoun thung daw k hoi miphun alouke capa koe vâ sak pawiteh, na mintoenaw e ram a coe awh e hah la pouh vaiteh, a vâ koelae ram miphun koe lah a kâthap han. Hottelah coe tangcoun e ram daw k hoi tâcokhai han. <sup>4</sup> Hahoi Isarel catounnaw e Jubili a pha toteh, a ram hah a vanaw e miphunnaw ni coe e ram lah thapsin lah ao han. Hottelah mintoenaw e miphun ram thung daw k hoi let na lawp pouh awh han telah ati.

<sup>5</sup> Hatdawkvah, Mosi ni BAWIPA lawk patetlah Isarel catounnaw hah kâ a poe teh, Joseph capa hoi miphunnaw ni a dei e a thuem. <sup>6</sup> Zelophehad canunaw kong dawkvah BAWIPA ni kâ a poe e teh hettelah doeh. Ahawi ati e pueng vâ naseh, hatei a napanaw e miphun hah vâ awh naseh telah ati. <sup>7</sup> Hatdawkvah, Isarel catounnaw e ram teh, miphun alouklouk koe voutsout puen laipalah, Isarel catounnaw ni a na mintoenaw e ram teh pou a ham awh han. <sup>8</sup> Isarel catounnaw thung daw k râw ka pang hane canunaw pueng teh, Isarel catounnaw ni a na mintoenaw e ram lah kaawm e pou a ham thai nahan, a na pa miphun thung e a yu a la hanlah ao. <sup>9</sup> Ram teh miphun alouklouk koe puen thai mahoe. Bangkongtetpawiteh, Isarel catounnaw ni amamae ram hah pou a pang awh e lah kaawm han telah a dei.

<sup>10</sup> Hottelah, BAWIPA ni Mosi kâ a poe e patetlah Zelophehad canunaw ni a sak awh van. <sup>11</sup> Zelophehad canunaw Mahlah, Tirtzah hoi Hoglah, Milkah hoi Noah tinaw ni a na pa e hmaunawngahanaw e capanaw hah a vâ awh. <sup>12</sup> Joseph capa Manasseh e capa hah a vâ awh teh, a ram teh a na pa miphunnaw ni a coe e râw lah pou a kangning. <sup>13</sup> Hetnaw heh Jeriko tengpam Jordan namran Moab tanghling dawkvah, BAWIPA ni Mosi hno lahoi Isarelnaw koevah, kâ a poe e kâpoelawknaw hoi lawkcengnaenaw doeh.



## KÂLAWK BOUT POENAE (Deuteronomy)

### *Horeb ceitakhai hanelah kê poenae*

<sup>1</sup> Kahrawngum, Jordan palang teng, Shuph khopui, Paran khopui, Tophel khopui, Hazeroth, Dizahab khopuinaw koevah, Mosi ni Isarelnaw koe bout a dei e lawk teh: <sup>2</sup> Kadeshbarnea hateh, Seir mon lam lahoi Horeb e a onae hoi hnin 11 lamcei ahla. <sup>3</sup> Mosi ni Heshbon khopui kaawm e, Amor Siangpahrang Sihon thoseh, Edrei ram, Ashtaroth khopui kaawm e Bashan siangpahrang Og thoseh, a thei hnukkhu <sup>4</sup> Kum 40 thapa yung 11 apasuek hnin daw k Moab ram <sup>5</sup> Jordan palang teng vah, Cathut ni lawk a poe tangcoung e patetlah Isarelnaw koe bout a dei e kâlawk hateh, <sup>6</sup> Maimae BAWIPA Cathut ni, Horeb hmuen daw k, na dei pouh e teh, nangmouh ni atueng a kuep ditouh hete mon daw k na o aw h toe. <sup>7</sup> Kamlang aw h nateh bout kamthaw aw h haw. Amor mon totouh thoseh, hote mon hoi kahnai e hmuen tanghling, akalah, tuipui teng, Kanaan ram, Lebanon mon, Euphrates tuipui totouh cet aw h haw. <sup>8</sup> Hote ram teh nangmouh hmalah ka hruek toe. Cathut ni, nangmae na pa Abraham, Isak, Jakop koehoi kamtawng teh a catounnaw ka poe han telah lawk a kam e ram hah kâen nateh coe aw h, telah atipouh.

### *Kacuenaw thaw poenae*

<sup>9</sup> Hatnavah, Kai ni nangmouh koe ka dei e thaw heh ka madueng ka phawt thai mahoe. <sup>10</sup> Nangmae BAWIPA Cathut ni nangmouh na pung sak aw h vaiteh, nangmouh teh kalvan âsi patetlah sahnin na o aw h. <sup>11</sup> Nangmae na pa BAWIPA Cathut ni nangmouh teh alet 1000 lahoi na pung sak naseh. Lawk a kam e patetlah yawhawi na poe a seh. <sup>12</sup> Na tawntamnae, thawtawknae, kâyuekâounnae hnokari kai ka madueng ni bangtelamaw ka phu thai han. <sup>13</sup> A lungkaangnaw, ka thaipanueknaw, hoi ka thouthainaw hah na miphun thung hoi rawi aw h. Ahnimanaw hah ka hrawikung lah ka hruek han telah dei aw h pawteh, <sup>14</sup> nangmouh ni, na dei e patetlah ahawi telah bout a dei aw h. <sup>15</sup> Hatdawkvah na miphunnaw daw k mitkhet kamcu e kacuenaw panuena e ka tawn naw ka rawi hnukkhu nangmouh koe kacue thaw ka taw k hanelah 1,000 ka uk hane, 100 ka uk hane, 50 ka uk hane, 10 ka uk hane ukkungnaw hah ka rawi. <sup>16</sup> Lawkcengkungnaw hai, na hmaunawngghanaw e kamcan hah a thai aw h vaiteh, hmaunawnggha reira e kamcan thoseh, Jentelnaw hoi e kamcan thoseh kalancalah lawkceng aw h. <sup>17</sup> Lawkcengnae dawkvah, apie minhmai hai khen hanh. Camo e lawk hah kacue e lawk patetlah pouk. Apihai taket hanh. Bangkongtetpawiteh, lawkcengnae teh Cathut e doeh. Na dei thai hoe e kamcan hah kai koe thokhai aw h. Kai ni hai ka thai han telah lawk a thui. <sup>18</sup> Nangmouh ni na sak aw h hane naw hai hatnavah kê na poe toe.

### *Kardeshbanea hoi tami patounnae*

<sup>19</sup> Kaimouh ni Horeb hmuen koehoi ka tâco aw h teh, Amor mon totouh ceinae lam teng vah, takikathopounge kahrawngum ka cei aw h teh Kadeshbarnea hmuen koe ka pha aw h. <sup>20</sup> BAWIPA ni kê na poe e patetlah hatnavah kai nihai, maimae BAWIPA Cathut ni na poe aw h e Amor mon



vah nangmouh ni na pha awh toe. <sup>21</sup> Nangmae BAWIPA Cathut ni ram kahawi teh nangmouh hmalah ka hruek toe. Nangmae napanaw e BAWIPA ni a dei e patetlah cet awh nateh lawm awh, taket awh hanh, na lung hai pout awh hanh telah a dei. <sup>22</sup> Hatnavah nangmanaw pueng ni kai koe na tho awh teh, kaimae hmalah taminaw ka patoun han. Ahnimouh ni hote ram hah a rip awh hnukkhu, kaimouh teh nâ lam cet pawiteh, bang khopui dawkh pha awh han doeh telah a dei awh han telah a dei awh e heh, <sup>23</sup> kai ni ka ngai dawkvah miphun buet touh dawkh tami buet touh, asumkum 12 touh hah na rawi awh. <sup>24</sup> Ahnimouh ni mon koe lah a kamlang awh teh Eshkol tanghling koe a pha awh teh a tuet awh. <sup>25</sup> Hote ram dawkh e a paw a hrawm awh teh a thokhai navah, maimae Cathut ni na poe e ram teh kahawi e ram doeh telah a dei awh eiteh, <sup>26</sup> Nangmouh ni na cet awh laipalah, namamae BAWIPA Cathut e kâ na ek awh. <sup>27</sup> Cathut ni maimouh na hmuhma teh raphoe sak han na ngai awh dawkvah, Amornaw e kut dawkh na poe hanlah, Izip ram hoi na tâcokhai awh khe. <sup>28</sup> Maimouh ni bangtelamaw cei awh han toung, hmaunawngghanaw ni hote kho dawkh e taminaw teh maimouh hlak a len awh. A rasang poung awh. Kalvan ka deng e khopui, rapan hai ao. Hote kho dawkh Anakim miphunnaw ka hmu awh telah maimae lungthin a raphoe toe telah nangmouh ni rimnaw dawkh na taran awh toe. <sup>29</sup> Hatnavah kai ni, puen hanh awh, ahnimouh taket a hanh awh. <sup>30</sup> Nangmae hmalah ka cet e nangmae Cathut ni na hmalae Izip ram hai thoseh, <sup>31</sup> nangmouh ni na dawn e lam, hete hmuen totouh a na pa ni a ca a tapam e patetlah nangmae Cathut ni nangmouh na tapam teh, lungmanaw na coenae kahrawng hai thoseh, nangmouh han a sak e patetlah nangmouh koe lah taran na kabawp awh han telah a dei nakunghai, <sup>32</sup> nangmouh ni rim tumpup nahan hmuen tawng awh nateh na cei awh nahan lam na patue hanelah karum vah hmai dawkh thoseh, khodai lah tâmai dawkh thoseh, <sup>33</sup> nangmae hmalah ka cet e Cathut e lawh hah hote kong dawkh nangmouh ni na yuem awm hoeh toe.

### *Isarelnaw reknæ*

<sup>34</sup> Nangmae lawk Cathut ni a thai nah a lungkhuek teh, <sup>35</sup> ahnimae mintoenaw ka poe han ka tie ka lawkkam ram kahawi hah Jephunneh capa Kalep hloilah hete kathoute Miphunnaw buet touh ni boehai kâen awh mahoe. <sup>36</sup> Ahni teh Cathut e hnuk roup a kâbang dawkh a kâen. A coungrøe e ram hah ahni koehoi kamtawng teh ahnie catounnaw ka poe han telah lawk ka kam. <sup>37</sup> Ahnimouh han Cathut ni, kai koehai a lungkhuek, nang teh hote ram na coe mahoe. <sup>38</sup> Na kut rahim e Nun capa Joshua ni a coe han. Ahni teh Isarelnaw raw ka coe sak hanelah ao dawkh. Ahni hah thapoe haw. <sup>39</sup> Taran ni a lawp e lah ao han na ti awh e camonaw, hatnavah thøe hoi hawi kapek thai hoeh rae canu capanaw ni, hote ram a coe awh vaiteh, kai ni ka poe e patetlah a lawp awh han. <sup>40</sup> Nangmouh teh na kamlang awh vaiteh tuipuipaling lam lahoi kahrawng lah bout cet awh ei telah a ti. <sup>41</sup> Nangmouh ni hai, kaimouh ni Cathut hah koe ka payon awh toe. Maimae Cathut ni lawk na thui awh e patetlah atu cei awh vaiteh taran tuk han telah na dei pouh teh, tami pueng puengcang rip a patuep awh teh, mon lah takhang hanelah coungkacoe ao awh. <sup>42</sup> Cathut ni hai tuk awh hanh, nangmouh koe lah kai kaawm hoeh, na tuk awh pawiteh taran hmalah na sung awh han telah kai ni ka dei e patetlah, <sup>43</sup> kai ni ka dei nakunghai nangmouh ni na tarawi awh hoeh. Cathut e kâ eknae hoi mon lah na luen awh. <sup>44</sup> Hatnavah mon dawkvah la kaawm e Amor miphunnaw ni nangmouh koe lah a tâco teh, khoi ni a rongyawn e patetlah



nangmouh na kayo awh teh Seir hoi Hormah khopui totouh na thei awh. <sup>45</sup> Nangmouh hai bout na tho awh teh, Cathut hmalah na khui na ka awh. Hatei nangmae na lawk hah Cathut ni thai hoeh. <sup>46</sup> Hatdawkvah Kadesh hmuen dawk yampa na o awh e patetlah moi ka saw lah na o awh.

## 2

### *Kahrawngum vah kum 40 touh*

<sup>1</sup> Cathut ni kai koe bout a dei e patetlah kaimouh ni kamlang awh vaiteh, Tuipui paling kahrawng lahoi ka cei teh Seir mon hah moi ka saw lah ka lawngven awh. <sup>2</sup> Cathut nihai, nangmouh ni atueng akuiep nahan hete mon hah na lawngven awh toe. <sup>3</sup> Atunglah bout cet awh ei. <sup>4</sup> Nang ni tami pueng koe na dei pouh hane teh, na hmau Esaw miphunnaw a onae Seir ram teng vah, nangmouh na cei awh toteh ahnimouh ni a taki awh han. Hatdawkvah kâhruetcueth awh. <sup>5</sup> Rek saueng hanh awh. Ahnimae ram hah, kai ni nangmouh na poe hoeh. Na coungroenae khok hmuen tittouh hai na poe hoeh. Seir mon hateh Esaw yo ka poe toe. <sup>6</sup> Nangmouh ni na canei nahane bu hoi tui hai thoseh, ahnimouh koe tangka hoi na ran awh han. <sup>7</sup> Nangmouh ni na tawksaknae pueng daw, nangmae Cathut ni yawhawinae a poe toe. Hete kahrawngpui daw, nangmouh na lawngven awh e a kongnaw a panue. A kum 40 touh thung nangmae BAWIPA Cathut ni nangmouh hoi cungtalai ao nah, banghai nangmouh daw, panki hoeh telah ati. <sup>8</sup> Seir ram kaawm e maimae hmau Esaw miphun koe cei awh teh, Elath khopui Eziongeber khopui hoi ka cet e lam tâphai koe ka dawn awh teh, haw hoi bout kamlang awh teh Moab kahrawng lam lahoi ka cei awh. <sup>9</sup> BAWIPA Cathut nihai, Moab khocanaw rucat poe awh hanh, tuk awh hanh, ahnimae ram kai ni na poe awh hoeh. Arab ram teh Lot miphunnaw kai ni yo ka poe toe telah ti pouh. <sup>10</sup> Ayan vah Anakim miphun patetlah ka rasang kalen e Em miphunnaw teh hote ram daw, ao awh. <sup>11</sup> Ahnimouh teh, Anakim miphunnaw patetlah ao e lah a pouk awh. Hatnavah Moab ram khocanaw ni ahnimanaw teh EM telah a kaw awh. <sup>12</sup> Ayan vah Hor taminaw teh Seir ram vah ao awh. Ahnimouh hah Esaw miphunnaw ni a thei awh teh, ahnimouh onae hmuen daw, ao awh. Hot patetlah Cathut ni a poe e ram hah Isarel miphunnaw ni ati awh. <sup>13</sup> Atu cet awh nateh Zered tui rakat awh haw telah a dei e patetlah Ahnimouh ni Zered tui a raka awh. <sup>14</sup> Kadeshbarnea hmuen koe ahmaloe phanae tueng koehoi ka tâco awh teh Zered tui rakanae tueng totouh kum 38 touh a ro. Cathut ni lawk a kam e patetlah ahmaloe e taran ka tuk thai e ransanaw pueng teh taminaw thungup hoi a due awh. <sup>15</sup> Ahnimouh raphoe hoeh roukrak, Cathut ni ahnimouh koehoi pâmit hanelah a kut a dâw. <sup>16</sup> Taran ka tuk thai e pueng tamihu thung e koun, a pâmit sak hnukkhu, <sup>17</sup> Cathut ni nang teh Moab ram, <sup>18</sup> Ar ram a lungui vah sahnin na cei han. <sup>19</sup> Ammon miphunnaw teng na pha toreï teh ahnimouh rucatnae poe awh hanh, reksaueng awh hanh. Ammon miphunnaw a onae ram hah kai ni nangmouh koe na poe hoeh. Hote ram teh Lot miphunnaw kai ni ka poe toe telah kai koe a dei. <sup>20</sup> Hote ram hai kalenpounge taminaw e hmuen doeh telah taminaw ni a pouk awh. Ayan e tueng daw, hot patetlah taminaw ni ao awh. Ahnimouh hah Ammon ram khocanaw ni Zamzumim telah a kaw awh. <sup>21</sup> Hote miphun teh Anakim miphunnaw patetlah kalenpoung kapap poung e taminaw doeh. <sup>22</sup> Hatei Seir ram daw, kaawm e Esaw miphun e hmalah Hor taminaw hah Cathut ni a raphoe dawkvah, ahnimae hmuen daw, Esaw miphunnaw ni sahnin totouh ao e



patetlah koug a pâmit teh ahnimae hmuén dawk Arnonnaw ni ao awh. <sup>23</sup> Hot patetlah Hazrim khopui koehoi Gaza khopui totouh ouk kaawm e naw Avvimnaw hai Kaptor khopui ka tâcawt e Kaptor taminaw ni a raphoe awh teh, ahnimanaw a onae hmuén dawk ao awh. <sup>24</sup> Nangmouh na thaw awh vaiteh cet awh haw, Arnon tuipui raka awh haw. Amor miphun, Heshbon siangpahrang Sihon hoi a talai hah nangmae kut dawk ka poe toung dawkvah, khosak awh nateh hote bawi hah tuk awh. <sup>25</sup> Tâmai rahim kaawm e pueng, miphunnaw ni sahnin nangmouh tâsue taki laihoi ao nahan ka sak han. Nangmae kamthang a thai awh vaiteh, puennae, pâyawnae, runae puenghoi a kâhmo awh han telah ati.

### *Sihon siangpahrang a tâ awh*

<sup>26</sup> Kai hai Kedemoth kahrawng hoi Heshbon siangpahrang Sihon koevah patounenaw ka patoun vaiteh, <sup>27</sup> Aram lungui vah na cetsak haw, na lam dawk dueng ka dawn han. Avoilah aranglah ka phen mahoe. <sup>28</sup> Seir ram kaawm e Esaw miphun, Ar ram dawk kaawm e Moab miphunnaw ni kai dawk a sak awh e patetlah ka ca hane rawca thoseh, nei hane tui hai thoseh, tangka hoi yawt lawih. <sup>29</sup> Kai teh Cathut ni na poe e ram lah Jordan palang ka raka vaiteh ka pha hoehroukrak Seir ram lungui dawk khok hoi ka cet haw nei telah kâhuikona lawk hoi ka dei nakunghai, <sup>30</sup> Kaimouh ka cei nahane Heshbon siangpahrang Sihon ni kâ na poe hoe. Bangkongtetpawiteh, sahnin kamnue e patetlah nangmae Cathut ni hote siangpahrang nangmae kut dawk na poe hanelah, lung a tha o sak, lungpatanae lungthin a poe. <sup>31</sup> Cathut ni hai Sihon siangpahrang hoi a talai hah na poe han. Hote talai hah râw lah na pang hanelah lat lawih telah a dei. <sup>32</sup> Hatnavah, Sihon siangpahrang teh amae tami puenghoi Jahaz vah maimanaw na tuk hanelah a tâco. <sup>33</sup> Maimae Cathut ni hote siangpahrang hah maimouh koe na poe teh, ama hoi a canaw hoi tami pueng ka thei awh. <sup>34</sup> Hatnavah ahnie khopui pueng ka tuk awh teh, napui tongpa, camonaw buet touh hai hlung laipalah koug ka pâmit awh. <sup>35</sup> Saringnaw, khopui dawk e hnopainaw dueng kamamouh hanlah ka la pouh awh. <sup>36</sup> Arnon tuipui teng kaawm e Aroer khopui hoi Gilead khopui totouh, tuipui teng kaawm e pueng khopuinaw thung, ka tâ thai hoe e buet touh hai khopui awm hoe. Maimae Cathut ni a cawngca pueng maimouh dawk na poe. <sup>37</sup> Hatnavah Ammon miphunnaw a onae talai, Jabbok tuipui hoi talai, mon dawk e khopui hoi maimae Cathut ni na cakâ pouh e bang buet touh hai ka hnai awh hoe.

## 3

### *Isarelnaw ni Bashan siangpahrang tânae*

<sup>1</sup> Hatnavah kaimouh kamlang awh teh Bashan lam lah ka cei awh. Bashan siangpahrang Og hai a taminaw hoi Edrei vah kaimouh na tuk hanlah a tho awh. <sup>2</sup> BAWIPA Cathut ni ahni hah taket awh hanh. Ama hoi a taminaw hai thoseh, a talai hai thoseh, nangmae kut dawk na poe awh han. Heshbon khopui dawk kaawm e Amor siangpahrang Sihon koe na sak e patetlah hete Siangpahrang koehai na sak han telah kai koe a dei. <sup>3</sup> Hottelah maimae BAWIPA Cathut ni Bashan Siangpahrang Og hoi a taminaw pueng hah maimae kut dawk na poe vaiteh, buet touh hai hlout laipalah, ka thei awh. <sup>4</sup> Hatnavah kaimouh ni khopui 60, Argob ram, Bashan ram, Og siangpahrang e uknaeram, khopui buet touh boehai hlung laipalah ka tuk awh. <sup>5</sup> Hote khopuinaw teh, ka rasang poug



e rapan, longkhanaw hoi kacakpounge khopui lah ao. Alouk lae kho moikapap hai ka la awh, ka tuk awh teh kOUNg ka raphoe awh. <sup>6</sup> Heshbon siangpahrang Sihon koe ka sak awh e patetlah napui camo pueng kOUNg ka thei awh. <sup>7</sup> Saringnaw hoi kho thung e hnopainaw teh kamamouh hanlah ka la awh. <sup>8</sup> Hatnavah Arnon palangpui hoi kamtawng teh, Hermon mon totouh, Jordan palang namran lah kaawm e Amor siangpahrang roi e kut dawK e Arnon yawn koehoi Hermon mon totouh e ram hah kaimouh ni ka la pouh awh. <sup>9</sup> Hermon mon hah Sidonnaw ni Sirion telah thoseh, Amornaw ni Senir telah thoseh a kaw awh. <sup>10</sup> Tanghling dawK e khopuinaw puenghoi Gilead uknaeram pueng Og siangpahrang Og khopui, Edrei khopui totouh, Bashan ram puengpa ka la pouh awh. <sup>11</sup> Kalenpounge miphun koehoi ka tho e Bashan siangpahrang Og ama duengdoeh ka hlout. Ayung dong 9, adangka dong 4 touh e sumikhun teh, Ammon ram Rabbah khopui vah ao nahoehmaw. <sup>12</sup> Hatnavah kaimouh ni la pouh e talai hah Arnon palang teng kaawm e Aroer khopui hoi kamtawng teh, Gilead mon a tangawn totouh khopuinaw hoi Reuben miphun hoi Gad miphunnaw ka poe toe. <sup>13</sup> Gilead mon a tangawn hoi Og siangpahrang ni a uknaeram kalenpounge hmuen telah kaw e Argob ram, Bashan ram pueng teh Manasseh miphunnaw atangawn ka poe toe. <sup>14</sup> Manasseh miphun Jair ni Argob ram pueng Geshur kho Maakath kho totouh a la pouh hnukkhu, Sahnin totouh amamae a min a ceisak e lahoi Havvoth- Jair ram telah a kaw awh. <sup>15</sup> Gilead khopui teh Makhir miphunnaw ka poe toe. <sup>16</sup> Reuben miphun, Gad miphunnaw teh, Gilead khopui hoi Arnon palangpui, alungui totouh Arnon ram khori Arabah palang pui totouh hai thoseh. <sup>17</sup> Jordan palang teng Kinnereth hoi Sodom tali e kanitholah kaawm e Arabah Pisgah khopui totouh e hai thoseh ka poe toe. <sup>18</sup> Hatnavah, kai ni, nangmae BAWIPA Cathut ni hete ram heh namamouh han roup na poe toe. <sup>19</sup> Hatnavah tarankahawi e pueng ni puengcang a kâmahrawk awh teh, na hmaunawngaha Isarel miphunnaw e a hmalah a cei awh han. <sup>20</sup> Cathut ni nangmouh karoumcalah na o sak awh van e patetlah hmaunawngahanaw ka poe hoeh roukrak thoseh, Jordan palang namran e nangmae BAWIPA Cathut ni na poe e talai ahnimouh ni a la hoehnahlan totouh thoseh. Na yu na canaw, saringnaw ni hai kai ni na poe e khopuinaw dawK ao awh han. Nama koe saring moi ao e kai ni ka panue. Thaw ka cum torei kai ni na la poe e patetlah nangmouh pueng teh lengkaleng na coe han kamcu e talai koe lah bout na ban awh han telah nangmouh kai ni lawk na thui awh. <sup>21</sup> Hatnavah Joshua hai, na BAWIPA ni hete siangpahrang kahni touh dawK a sak e hno pueng hah nang ni khei na hmu toe. Hot patetlah BAWIPA ni na phanae kho ramnaw dawK a sak han. <sup>22</sup> Nangmae Cathut ni nanfmouh koe lah kampangkhai dawkvah, ahnimanaw hah taket awh hanh.

### *Mosi teh Kanaan ram kâen hane pasoung hoeh*

<sup>23</sup> Hatnavah Cathut koe ka kâhei e teh, <sup>24</sup> Oe Bawipa Jehovah, na san kai koe lentoe e hai thoseh, thaonae kut hai thoseh, sak na kamtawng toe. Nang e thaonae na kamnue sak e patetlah kalvan hoi talai dawK bang patet e cathut ni maw a sak thai han. <sup>25</sup> Kai teh Jordan palang namran lah ka raka teh, kahawipoung e ram hoi Lebanon mon koehoi kamtawng teh kahawi e monnaw na hmawt sak haw telah ka kâhei nakunghai, <sup>26</sup> Cathut ni nangmouh kecu dawK kai koe a lungkhuek dawkvah, ka lawk hah na thai pouh hoeh. Cathut ni hai a khout toe. Hete hno hoi kâseng e lawk hah bout na dei pouh hanh lawih. <sup>27</sup> Pisgah mon som dawkvah luen nateh,



kanîtho, kanîloun, atung, aka lah kangvawi nateh ram hah khenhaw! Jordan tui rakat hanh. <sup>28</sup> Joshua hah lawk thui nateh, thapoe nateh ka bawm haw. Ahni ni hete miphun hmalah a cei vaiteh, na hmu e ram hah râw lah na pang sak han telah a ti. <sup>29</sup> Hottelah kaimouh teh Bethpeor namran lah kaawm e tanghling dawk ka o awh.

## 4

### *Mosi ni Isarelnaw lawkngai hanelah a hroecoe*

<sup>1</sup> Oe Isarelnaw nangmouh ni na hring awh teh, mintoenaw ni a bawk e BAWIPA Cathut ni na poe e ram na coe thai awh nahan, na sak awh hane kai ni na cangkhai e phunglawknaw hoi lawkcengnaenaw thai awh haw. <sup>2</sup> Kai ni kâ na poe e lawknaw dawk, bout na thap awh mahoe. Na rayu awh mahoe, nangmae BAWIPA Cathut e kâpoelawknaw hah na tarawi awh han. <sup>3</sup> Cathut ni Baalpeor kecu a sak e hah nangmouh ni na mit hoi na hmu awh toe. Baalpeor kângue pueng nangmae BAWIPA Cathut ni nangmouh thung hoi be a raphoe toe. <sup>4</sup> Nangmae BAWIPA Cathut dawk kângue e pueng teh, sahnin ditouh na hring awh. <sup>5</sup> Nangmouh ni na cei awh vaiteh na coe hane ram dawk na sak awh hane kaie BAWIPA Cathut ni kâ na poe e patetlah, kai ni phunglawknaw hoi lawkcengnaenaw na cangkhai awh toe. <sup>6</sup> Hatdawkvah, hotnaw hah tarawi awh. Hottelah na sak pawiteh, phunglawk ka thai e tami pueng e hmalah nangmae lungangnae hoi panuenae a kamnue han. Ahnimouh ni hete miphunpui teh, lungangnae hoi panuenae hoi ka kawi e miphun katang doeh telah ati awh han. <sup>7</sup> Maimouh ni ratoun na pueng koe maimae BAWIPA Cathut ni na khet na yawt teh, na pahrennae coe e patetlah alouke cathut ni pahren e miphun apimouh kaawm boi. <sup>8</sup> Kai ni sahnin nangmouh koe ka ta e kâlawk patetlah, phunglawk hoi kalan lah lawkcengnae ka tawn e miphun kalen, apimouh kaawm. <sup>9</sup> Nangmouh ni Horeb mon van na Cathut hmalah, na kangdue awh navah na mit hoi na hmu awh e naw hah pahnim payon avai. Na hringyung thung na pâkuem thai awh nahan, namamouh kâhruetcueth awh. Kâyawm lahoi tarawi awh. Hotnaw hah na catounnaw hai cangkhai awh. <sup>10</sup> Hatnavah BAWIPA ni, taminaw kai koe kamkhueng sak haw. Ahnimouh ni talai van a hring na thung kai na taki thai awh nahan a catounnaw a cangkhai sak nahanelah ka lawk hah na thaisak han telah kai koe a dei e patetlah, <sup>11</sup> Nangmouh ni rek na tho awh teh mon khok koe na kamkhueng awh. Hatnavah, monsom hmai a kak teh kalvan lungui teh duktamang, tâmai hoi akawi teh duk a kamthim. <sup>12</sup> BAWIPA Cathut ni hmai thung hoi na pato, nangmouh ni a mei na hmawt laipalah lawk duengdoeh na thai awh. <sup>13</sup> Nangmouh ni na tarawi awh hane kâpoelawk 10 touh hah a dei teh, lunghen 2 touh dawk a thut. <sup>14</sup> Nangmouh ni na cei awh teh na coe awh hane ram dawk na sak awh hane nangmouh koe na cangkhai e phunglawknaw hoi lawkcengnaenaw hai Cathut ni kai koe kâ na poe.

### *Kutsak na bawk mahoe*

<sup>15</sup> Horeb vah Cathut ni, hmai thung hoi nangmouh koe lawk a dei navah bang e meilam hai na hmu awh hoeh dawkvah, <sup>16</sup> Nangmouh ni tami napui tongpa mei <sup>17</sup> Talai van kaawm e saring mei, kalvan kamlang e tava mei, <sup>18</sup> Talai dawk vonpui hoi kâva e saring mei, talai thung tui dawk e tanga mei, hoi kâvan e kutsak hah, nangmouh ni bout na kamlang sin awh teh, namamouh han na sak hoeh nahanelah, <sup>19</sup> Kalvan lah na



khet teh, Kanî, Thapa, Âsinaw tie kalvan e hno pueng na hmu navah, nangmae BAWIPA Cathut ni, kalvan rahim kaawm e tami pueng koe a poe e hote hnonaw hah, na bawk awh nahane alouke taminaw ni na pasawt thai awh hoeh nahanelah, namahoima kâhruetcueth awh. <sup>20</sup> Nangmouh teh sahnin e patetlah BAWIPA Cathut e râw ka coe e miphun lah na o sak nahan, nangmouh teh Izip ram sum thawngnae takhuen koehoi na tâcokhai awh toe. <sup>21</sup> Hot dueng laipalah, nangmouh kecu dawkw, kai koe Cathut a lungkhuek, Jordan tui namran lah rakat laipalah, na coe awh hane Cathut ni na poe e ram thung vah kâen hoeh nahanelah lawk a kam toe. <sup>22</sup> Hatdawkvah, hete ram dawkw ka due han toe. Jordan tui ka rakat mahoe hane nangmouh ni na raka awh vaiteh hote kahawipoung e ram na coe awh han. <sup>23</sup> Nangmae BAWIPA Cathut ni nangmouh koe na ta pouh e lawkkam na pahnim awh teh, nangmae BAWIPA Cathut ni a cakâ e kutsak na sak awh hoeh nahan, namahoima kâhruetcueth awh. <sup>24</sup> Bangkoktetpawiteh, nangmae BAWIPA Cathut teh ka kang e hmai, dipma Cathut doeh. <sup>25</sup> Nangmouh ni na mincanaw na sak awh teh, hote ram dawkw moikasawlah na o awh hnukkhu, koug na rawk awh teh buetbuet touh e mei hoi kâlat lah kutsak na sak awh teh, nangmae BAWIPA Cathut a lung hoe na khuek sak awh pawiteh, <sup>26</sup> Jordan tui na raka awh teh na coe awh hane ram thung vah, a ro hoehnahan na kahma awh han. Moikasawlah kho na sak awh laipalah, khoeroe na kahmakata awh han telah nangmae kong dawkw na ka panuek khai e lah sahnin kalvan hoi talai ka palaw. <sup>27</sup> Cathut ni hai nangmouh teh Jentelnaw koe alouklouk lah na kâkapek sak vaiteh, hrek lah kaawm e Jentelnaw koe youn touh na cawi awh han. <sup>28</sup> Hote hmuen dawkw, tami kut hoi sak e, hmawt thai hoeh, thai thai hoeh, cat thai hoeh, a hmuï ka thai thai hoeh e thing cathut, talung cathutnaw hah nangmouh ni na bawk awh han. <sup>29</sup> Hateiteh, hote hmuen dawkw nangmae BAWIPA Cathut hah bout tawng han na ngai awh toteh, lungthin abuemlahoi na tawng awh pawiteh na hmu awh han. <sup>30</sup> Nangmouh ni hmalae tueng dawkw, rucatnae na khang awh toteh, hete hnonaw puenghoi na kâhmo awh navah, nangmae BAWIPA Cathut koe lah bout na ban awh teh, lawk na tarawi awh pawiteh, <sup>31</sup> nangmae Cathut teh pahrennae ka tawn e lah ao dawkvah, nangmanaw na pahnawt awh mahoe, na raphoe awh mahoe, lawk a kam e pahnim mahoe.

### *BAWIPA dueng doeh Cathut*

<sup>32</sup> Cathut ni talai dawkw tami sak kamtawng hoi nangmouh na o hoehnahan kaloum tangcoung e atueng dawkw e hnonaw pueng hah, kalvan apoutnae koehoi avanglah apoutnae koe totouh pacei awh. Het-telah e kalenpoung hno kaawm boi na ou. Het patetlah e hno kamthang thai boi awh na ou. <sup>33</sup> Cathut ni hmai thung hoi a dei e lawk nangmouh ni na thai awh e patetlah alouke miphun ni a thai teh hloutnae a coe awh boi na ou. <sup>34</sup> Nangmae BAWIPA Cathut ni, Izip ram nangmae hmalah a sak e patetlah mitnout panuenae hoi, kângairu hnonaw a saknae, kâtuknae a phasaknae, thaonae kut dâwnae, taki ka tho e vision a sak e lahoi, alouke cathut ni a cei teh, miphun buet touh koehoi buet touh ama hanelah ouk a la boi ou. <sup>35</sup> BAWIPA Cathut lah a onae hai thoseh, BAWIPA hoeh laipalah teh alouke cathut a ohoehnae hai thoseh, nangmouh na panue sak hanelah, hotnaw hah nangmouh koe a kamnue sak. <sup>36</sup> Nangmouh na cangkhai awh teh, kalvan hoi lawk na thaisak toe. Talai van vah kalenpoung hmai hai na hmu sak teh, hmai thung hoi lawk hah na thai awh toe. <sup>37</sup> Nangmae mintoenaw ka pahren dawkvah, a catoun hah



ka rawi toe. <sup>38</sup> Nangmouh hlak a tha a sai awh vaiteh, kapap pounge e miphunnaw nangmae hmalah hoi ka pâlei teh, sahnin e boiboe lah, a ram daw k a phakhai vaiteh, raw coe sak hanelah, hnotithainae lahoi, Izip ram lahoi na hmalah a hrawi toe. <sup>39</sup> Hatdawkvah, BAWIPA Cathut teh lathueng lae kalvan hoi rahim lae talai van hai thoseh, Cathut lah ao teh, alouke cathut awh hoe hoi tie hah, sahnin panuek awh, na lung thung pâkuem awh. <sup>40</sup> Nangmouh hoi na catounnaw ni khosak ahawi nahan, nangmae BAWIPA Cathut ni na poe e ram daw k, hingsaw nahan thoseh, sahnin kai ni lawk na thui awh e kâpoelawknaw hah, na tarawi awh han telah Mosi ni a dei.

### *Kânguenae khonaw*

<sup>41</sup> Hatnavah, imri hah taran laipalah, ka thet payon e tami teh, <sup>42</sup> a yawng vaiteh, a hring hlout nahanelah Jordan palang kanitholah khopui 3 touh Mosi ni a ta pouh. <sup>43</sup> Hete khopuinaw e min teh, Reuben miphun onae kahrawng, Bezer khopui, Gad miphun onae, Gilead ram daw k Ramoth khopui, Manasseh miphun onae Bashan ram Golan khopuinaw doeh.

### *Kâlawk bout a dei pouh*

<sup>44</sup> Hete kâlawk teh Mosi ni Isarelnaw koe a poe e lah ao. <sup>45</sup> Ahnimouh ni Izip ram hoi a tâco awh hnukkhu, Heshbon khopui kaawm e, Amor siangpahrang Sihon e ram thung, Jordan tui kanitholah, Bethpeor khopui daw k kaawm e tanghling daw k Mosi ni a dei e phunglawknaw hoi lawkcengnaenaw doeh. <sup>46</sup> Mosi hoi Isarelnaw teh Izip ram hoi a tâco awh hnukkhu hote siangpahrang hoi, <sup>47</sup> Bashan siangpahrang Og tie Jordan tui namran lah kanitholah, kaawm e Amon siangpahrang 2 touh a thei teh, <sup>48</sup> Ahnimae ram hah Arnon tui teng kaawm e Aroer khopui, Hermon mon tie Zion mon totouh thoseh, <sup>49</sup> Jordan tui kanitho hoi, kâkuen e talîpui teng, Arabah Pisgah totouh a lawp awh.

## 5

### *Kâlawk Hra touh*

<sup>1</sup> Mosi ni Isarelnaw a pâkhueng teh, Isarelnaw thai awh haw, na kamtu awh e kâhruetcueth lahoi na hringkhai thai awh nahan, sahnin ka dei e phunglawk hah kahawicalah thai awh haw. <sup>2</sup> Maimae BAWIPA Cathut ni Horeb mon daw k maimouh hoi, lawk a kam awh toe. <sup>3</sup> Hote lawkkam hah Cathut ni maimae mintoenaw hoi dueng a sak e tho hoe hoi, sahnin kahring rah niteh, hi kaawm e maimouh puenghoi hai sak e lah ao. <sup>4</sup> BAWIPA ni mon daw kvah hmai thung hoi, minhmai kadangka lah a dei toe. <sup>5</sup> Hatnavah nangmouh ni hmai na taki awh teh, mon daw k na luen ngam awh hoe hoi daw kvah, kai teh BAWIPA Cathut e lawk na poe e hah dei hanelah BAWIPA hoi nangmae rahak ka kangdue.

<sup>6</sup> A dei e lawk hateh, nangmouh san lah na onae Izip ram hoi na ka tâcawtkhai e nangmae BAWIPA Cathut doeh.

<sup>7</sup> Kai hloilah Cathut alouke na baw mahoe hoi.

<sup>8</sup> Kalvan hai thoseh, talai daw k hai thoseh, talai thung tui thung hai thoseh, kaawm e hoi kâvan e meikaphawk banghai namamouh han lah na sak awh mahoe hoi. <sup>9</sup> A hmalah tabo laihoi baw k hanh. Bangkongtetpawiteh, nangmae Cathut, Kai teh dipmasin Cathut, kai na kamaithoenaw e catoun, se thum se pali totouh a napanaw e yon hah a canaw daw k ka pathung e Cathut, <sup>10</sup> Kai hah lungpataw niteh, kaie kâpoelawk ka tarawi e a



catounnaw koe a thongsang totouh pahrennae kamnuek sak e Cathut lah ka o.

<sup>11</sup> Na BAWIPA Cathut e min hah laithoe koe lah na deirumram mahoe. Bangkongtetpawiteh, a min laithoe lah dei e yon a tawn telah BAWIPA ni a panue.

<sup>12</sup> Na BAWIPA Cathut ni lawk na thui e patetlah Sabbath hnin thoungsak hanelah ya awh. <sup>13</sup> Hnin taruk touh thung thaw na tawk han. <sup>14</sup> A hnin sari hnin teh BAWIPA Cathut e Sabbath hnin doeh, hote hnin dawk nama hoi na canaw, san napui, san tongpa, maito, la, na saring pueng, na imyin hai thaw tawk mahoe. Longkha thung duem na o e patetlah san napui san tongpanaw ni duem ao awh han. <sup>15</sup> Nang teh Izip ram san lah na onae thoseh, na BAWIPA Cathut ni a thaonae kut a dâw teh, hote ram hoi nang na tâcokhai e pouk haw. Hote a kong dawk nang ni Sabbath hnin na ya han telah BAWIPA Cathut ni a dei.

<sup>16</sup> BAWIPA Cathut ni na poe e ram dawkvah, na hring a saw teh na yawhawi nahanelah, BAWIPA Cathut ni lawk na thui e patetlah na manu hoi na pa barilawa.

<sup>17</sup> Tami thet hanh.

<sup>18</sup> Uicuk hanh.

<sup>19</sup> Ayâ e hno parawt hanh.

<sup>20</sup> Na Imri koe, kahmanhoe e kapanuekkhaikung lah awm hanh.

<sup>21</sup> Na imri e a yu lungraduek hanh. Na imri e im, law, a san napui, a san tongpa, la, maito, hoi hnopai pueng buet touh boehai noenae lungthin tawn hanh telah a ti.

<sup>22</sup> Hete lawknaw heh mon daw k hoi, hmai tâmai duk kamthim e kahmot e a thung hoi BAWIPA ni puenghoi kacaipounge lawk hoi nangmouh kamkhueng e rangpuinaw koe a dei. Rek bout dei hoe toe. Hote lawknaw haiyah lungphen kahni touh daw k a thut teh kai koe na poe. <sup>23</sup> Nangmouh ni hmo na thung e lawk na thai awh teh, Monsom hmai a kak lahun nah, nangmae catounnaw daw k e khobawinaw hoi kacuenaw kai koe a tho awh teh, <sup>24</sup> maimae BAWIPA Cathut ni a bawilenna hoi a lentoenae maimouh koe a kamnue sak toe. Hmai thung hoi lawk hah maimouh ni thai awh toe. Cathut teh tami hoi a kâhmo teh a kâpato eiteh, tami teh a hring rah tie panue awh toe. <sup>25</sup> Maimouh teh bangkongmaw atu due awh han waw. Hete taki ka tho poung hmai ni maimouh teh na kak awh han toe. Maimae BAWIPA Cathut e lawk dei e hah bout thai awh pawiteh, due awh han doeh toe. <sup>26</sup> Ka hring Cathut ni hmai thung hoi a dei e lawk hah, maimouh ni thai awh e patetlah, apipateh e tami ni maw ka thai ni teh ka hring waw. <sup>27</sup> Nang ni a tengpam cet nateh maimae BAWIPA Cathut ni a dei e pueng thai awh haw. Maimae BAWIPA Cathut ni kai koe na dei pouh e pueng patuen dei pouh haw. Kaimouh ni ka thai awh vaiteh ka tarawi awh han.

<sup>28</sup> Hottelah nangmouh ni kai koe na dei awh e lawk BAWIPA ni a thai. BAWIPA Cathut nihai, hete miphun ni nang koe a dei e lawk ka thai, a dei e lawk pueng teh ahawi. <sup>29</sup> Ahnimouh hoi a catounnaw ni ahawinae a hmu nahanelah, kai na taki awh teh kâpoelawknaw pueng hah pou a tarawi ngainae lungthin hoi kawi awh naseh. <sup>30</sup> Rimnaw koe lah bout ban a leih telah dei pouh. <sup>31</sup> Nang teh hete hmuen daw k ka teng kangdout. Ahnimouh kai ni ka coe sak e ram daw k a sak awh hane ahnimouh cangkhai hane kâpoelawk, phunglawk hoi lawkcengnae pueng ka dei han telah a ti. <sup>32</sup> Hatdawkvah maimae BAWIPA Cathut ni kâ na poe e patetlah nangmouh ni na sak awh nahan, na kâhruetcueth awh han. Avoilah nakunghai, aranglah nakunghai na phen takhai awh mahoe.



<sup>33</sup> Nangmouh na coe awh hane ram dawk, nangmouh ni duethinae dawk hoi na hlout awh vaiteh, hringyung saw nahanelah, nangmae BAWIPA Cathut ni a dei e lamthungnaw pueng dawk na dawn awh han.

## 6

### *Kalenpounge Kālawk*

<sup>1</sup> Nangmouh hoi na mincanaw ni namamae BAWIPA Cathut hah na taki awh vaiteh, <sup>2</sup> Kai ni na poe e naw, pueng hah hringyung thung na tarawi thai e hoi, na hringyung a vang sak thai nahan na cei awh vaiteh, na coe hane ram dawk, na sak awh hane kai ni na cangkhai hanlah, nangmae Cathut ni lawk na poe e kâpoelawknaw, phunglawknaw hoi lawkcengnaenaw hateh, <sup>3</sup> Oe Isarel miphun, mintoenaw e Cathut e lawkkam patetlah nang ni sanu tui, khoitui a lawngnae ram dawk na yawhawi awh teh, na pungdaw awh nahan thai awh, kâhruetcueth lahoi tarawi awh.

<sup>4</sup> Oe Isarel miphun thai awh haw, maimae BAWIPA Cathut teh buet touh dueng e BAWIPA la doeh ao. <sup>5</sup> Nange BAWIPA Cathut hah, na lungthin abuemplah, na hringnae abuemplah hoi thaonae abuemplahoi lungpataw haw. <sup>6</sup> Sahnin kai ni na poe e lawk hah na lung dawk na pâkuem han. <sup>7</sup> Hote lawk hah panki lahoi na canaw na cangkhai han. Im dawktahung nahai thoseh, cei nahai thoseh, i nahai thoseh, thaw nahai thoseh, hote lawk hah na dei pouh awh han. <sup>8</sup> Hote lawk hai na kut dawkmithnout nahanelah thoseh, na mit rahak hai thoseh na bet han. <sup>9</sup> Im takhang, khopui longkha dawktah hai na thut han. <sup>10</sup> Na kangdue sak hoehe e khopuinaw hai thoseh, hnokahawi hoi kakawi e imnaw hai thoseh, <sup>11</sup> tuikhu na tai hoehe e hai thoseh, na patue hoehe e misur takha hoi olivekungnaw hai thoseh, nang na poe hanelah na pa Abraham, Isak, Jakop, koe lawkkam e ram koe nangmae BAWIPA Cathut ni na hrawi awh vaiteh kaboumcalah na ca awh han. <sup>12</sup> San lah na onae Izip ram lahoi nangmouh na ka tâcawtkhai e BAWIPA Cathut na pahnim awh hoehe nahan, namamouh kâhruetcueth awh. <sup>13</sup> Na BAWIPA Cathut hah na taki awh han. Hote Cathut dueng na bawkt awh han. A min lahoi thoe hai na kâbo awh hanh. <sup>14</sup> Alouke Cathut, na tengpam e miphunaw e cathut hnuk na kâbang awh mahoehe. <sup>15</sup> Nangmae Cathut teh nangmouh dawkt dipma Cathut doeh. Nangmae BAWIPA Cathut teh nangmouh koe a lungkhuekt vaiteh, talai van hoi na raphoe han tie taki hane ao. <sup>16</sup> Nangmouh ni Massah hmuen dawkt na tanouk e patetlah na BAWIPA Cathut hah tanoukt awh hanh. <sup>17</sup> BAWIPA Cathut ni na hruekt pouh awh e kapanuekkhaikung, lawkkam, kâpoelawknaw hah panki lahoi na tarawi awh han. <sup>18</sup> Nang na hlout nahanelah, <sup>19</sup> BAWIPA Cathut e a lawkkam patetlah tarannaw pueng, nangmae hmalah hoi ka pâlei vaiteh, nangmae na mintoenaw koe ka kam e ram hah na coe awh vaiteh, na o sak nahan, BAWIPA Cathut hmalah kalan e hno sak awh. <sup>20</sup> Hmalae tueng dawkt na canaw ni, kaimae Cathut ni na poe e lawkpanuesaknae, phunglawknaw hoi lawkcengnaenaw hah bangmaw a deingai telah na pacei awh pawiteh, <sup>21</sup> Nang ni kaimanaw Izip ram dawkt Faro siangpahrang e san lah ka o awh nah BAWIPA e a thaonae kut hoi kaimanaw hah Izip ram hoi na tâcokhai awh. <sup>22</sup> BAWIPA nihai, lentoe kângairunae hah Izip ram hoi Faro imthungkhu lathueng hai thoseh, maimae hmaitung a sak hnukkhu, <sup>23</sup> Mintoenaw koe a kam e ram dawkt na kâenkhai teh hmuen na poe hanelah hote ram dawkt hoi na tâcokhai awh. <sup>24</sup> BAWIPA ni sahnin totouh



na lungma e patetlah hringnae na hlung pouh nahanelah, maimouh hawi nahanlah hete phunglawknaw pueng tarawi han. BAWIPA Cathut taki hanelah lawk na thui awh. <sup>25</sup> Hatdawkvah, maimae BAWIPA ni kê na poe e patetlah, hete kâpoelawknaw pueng a hmalah tarawi nahanelah, na kâhruetcuet pawiteh, lannae koe na pha awh han telah, bout na dei awh han.

## 7

### *Kanaannaw e kutsak na bawk mahoe*

<sup>1</sup> Nange BAWIPA Cathut ni na coe awh hane ram dawk na kêenkhai awh vaiteh, Hit, Girgashite tami, Amor tami, Kanaan tami, Parizzite tami, Hiv tami, Jubusitnaw nangmouh hlak kalen ka rasang e miphun 7 touh hah a pâlei teh, <sup>2</sup> nangmae kut dawk bout na poe awh navah, na thei awh vaiteh capingkacailah na raphoe awh han, ahnimouh hoi lawkkamnae na sak awh mahoe, na lungma awh mahoe. <sup>3</sup> Ahnimouh hoi yuvâ lah na awm awh mahoe, na canu hoi na capa, a capa hoi na canu na kâyuva sak mahoe. <sup>4</sup> Bangkongtetpawiteh, ahnimouh ni na ca hah kai koe thokhai laipalah, alouke cathut bawk hanelah a pasawt awh han. Hatnavah BAWIPA lungkhueknae hoi nangmouh tang na raphoe avai. <sup>5</sup> Hatdawkvah, ahnimouh dawk bangtelamaw ka sak han, ahnimae thuengnae pueng ka raphoe han, kutsak pueng ka raphoe han. Asherahkungnaw ka tâtueng han. Thuk e meeikaphawk pueng hmai ka pau pouh han.

### *BAWIPA hanelah kathounge miphun*

<sup>6</sup> Bangkongtetpawiteh, nang teh BAWIPA Cathut hanelah kathounge miphun doeh. Talai van kaawm e miphun hlak nange BAWIPA Cathut ni coe kamcu e miphun lah o sak nahan nang teh na rawi toe. <sup>7</sup> Nang teh alouke miphun hlak hoe na pap dawkvah, BAWIPA Cathut ni na lungpatawnae dawk na rawi e tho hoe, nang teh Jentelnaw hlak hoe na youn. <sup>8</sup> BAWIPA Cathut ni nang na lungma dawk thoseh, na mintoenaw koe lawkkam ka raphoe han ka ngai hoe dawk thoseh, san lah na onae Izip ram ka uk e Faro siangpahrang kut dawk hoi thaonae kut hoi nangmouh na tâcokhai awh toe. <sup>9</sup> Hatdawkvah, nangmae BAWIPA Cathut teh Cathut katang, yuemkamcu e Cathut, Bawipa ka lungpataw ni teh phunglawk katarawinaw e se a thongsang totouh lawkkam acak teh pahrennae kamnuek e Cathut, <sup>10</sup> BAWIPA kamaithoenaw raphoe hanelah, amamouh hmalah yon pathung e Cathut tie hah panuek awh. BAWIPA kamaithoenaw minhmai khen laipalah, amamae hmaitung yon moi a pathung han. <sup>11</sup> Hatdawkvah, sahnin na poe e phunglawknaw hoi kâpoelawknaw hoi lawkcengnaenaw hah na tarawi awh han.

### *Lawkngai yawhawinae*

<sup>12</sup> Hote lawkcengnaenaw nang ni na tarawi hanelah, lawk na ngâi pawiteh, na BAWIPA Cathut ni na mintoenaw hanlah lawk a kam e lawkkam hoi lungmanae hah nangmae lathueng a kangning sak han. <sup>13</sup> Ahni ni nang hah na lungpataw vaiteh, yawhawinae na poe han, na pungdaw sak han. Na poe hane na mintoenaw koe lawkkam e ram dawk, na khe e na canaw hai thoseh, nange talai, a pawhik, cang, misurtui, satui, maito a pungdaw, tuhunaw hai thoseh yawhawi ka poe han. <sup>14</sup> Nang teh miphun pueng hlak yawhawinae hoe ka coe e lah na o vaiteh, nang dawk ka ting e tongpa napui buet touh hai awm mahoe. Saringnaw dawk ka ting e tongpa napui buet touh hai awm mahoe. <sup>15</sup> Cathut



nihai, patawpanat pueng nang koehoi ka takhoe vaiteh, na panue e Izip ram e pataw kathoutnaw nang dawk ka phat sak mahoe. Nang ka maithoe e naw koe ka pha sak han. <sup>16</sup> Nange BAWIPA Cathut ni nang dawk na poe e miphun pueng a raphoe han. Na mit ni ahnimanaw na pahren mahoe. Ahnima cathut na bawk mahoe. Na bawk pawiteh, na kamthui na rawp nahanelah ao han. <sup>17</sup> Na lung thung hoi hete miphunnaw heh maimouh hlak hoe apaphnawn, bangtelamaw pâlei thai awh han na tet awh pawiteh, <sup>18</sup> ahnimouh taket hanh, BAWIPA Cathut ni Faro hoi Izip tami pueng koe a sak e hah pahnim hanh awh, <sup>19</sup> Tanouknae kalenpoung na mit hoi na hmu e naw hai thoseh, na BAWIPA Cathut ni na tâcokhai navah na patue e mitnoutnaw hai thoseh, thaonae kut a dâw e hai thoseh, kheikhei na pouk awh han. Hot patetvanlah, nang ni na taki e miphunnaw koe nange BAWIPA Cathut ni a sak han. <sup>20</sup> Hothloilah, ka cawi rah niteh, kâhrawknaw a due hoehroukrak nangmae BAWIPA Cathut ni, khoingannaw ahnimouh koe a patoun han. <sup>21</sup> Ahnimouh kecu dawk na lungpuen awh hanh. Bangkongtetpawiteh, takikathopoung nangmae BAWIPA Cathut teh nangmouh koe ao. <sup>22</sup> Nangmae BAWIPA Cathut ni hote miphunnaw teh paiyai lahoi nangmouh koehoi na pâlei pouh han. Kahrawng e sarangnaw nangmouh koe lah pung langvaih tie puen han ao teh, ahnimouh tang pâlei kawi nahoe. <sup>23</sup> Hatnavah Cathut ni ahnimouh nangmouh koe na poe vaiteh, koug a rawk totouh kalenpoung rawknae ka pha sak han. <sup>24</sup> Ahnima Siangpahrangnaw hai nangmae kut awh na poe vaiteh, ahnima min taluenae kalvan rahim vah raphoe han. Ahnimouh ka raphoe hoehroukrak nangmae hmalah apihai kang dout thai e awm mahoe. <sup>25</sup> A sak e meikaphawknaw pueng hmai pau pouh han. Kutsak dawk kaawm e sui ngun na noe mahoe, na lat mahoe, na lat pawiteh yon lah ao hane ngaihi kawi ao. Nangmae BAWIPA Cathut ni a panuet. <sup>26</sup> Panuet kawi na im dawk thokhai hanh, na thokhai pawiteh, nang teh hot patetlah theobo han kawi lah doeh na o tie taki ao. Hot patet e hno hah nang ni khoeroe na panuet han, theobo kawi e hno doeh.

## 8

### *Na Cathut hah pahnim hanh*

<sup>1</sup> Nang teh na hring vaiteh na pungdaw nahan BAWIPA Cathut ni na mintoenaw koe kam pouh e ram dawk na cei vaiteh, na coe nahanelah, sahnin kai ni lawk na poe e kâpoelawk pueng na tarawi nahanlah na kâhruetcuat han. <sup>2</sup> Nange BAWIPA Cathut ni kâpoelawk tarawi ngainae lung na tawn hoi tawn hoe e na tanouk awh teh, ka loun tangcoung kum 40 touh thung kahrawngum vah na hrawinae naw hah na pahnim awh mahoe. <sup>3</sup> Hottelah na lungthin rahnoum awh teh, kahaikahlam lah na o sak navah, na panue e nahoe, na mintoenaw ni panue boihoe e manna hoi na kaw awh teh, tami teh vaiyei hoi dueng hring hoe, BAWIPA e lawk lahoi doeh hring tie a panue sak. <sup>4</sup> Kum 40 touh thung hnicu hai pawn hoe na khok hai phing hoe. <sup>5</sup> A na pa ni a ca a toun e patetlah na BAWIPA Cathut ni na toun tie na lung hoi na pouk han. <sup>6</sup> Hatdawkvah, a lamthung na dawn teh BAWIPA taki lahoi kâpoelawknaw na tarawi han. <sup>7</sup> Bangkongtetpawiteh, na BAWIPA Cathut ni kahawi e ram, tanghling, mon daw k hoi ka phuek e tuipei, sokka, tuihnu, tuiim hoi ka kawi e ram, <sup>8</sup> catun, barli, misurkung, thaibunglungkungnaw, talekung, hoi ka kawi e ram, olive satui, khoitui hoi ka kawi e ram, <sup>9</sup> voutnae awm laipalah, ka boum lah canae ram, sumtalung hoi a kawi teh, mon



dawk hoi rahum tainae ram koe nangmouh hah na hrawi awh. <sup>10</sup> Kahawi poun e ram na poe awh dawkvah, kaboumcalah na ca awh toteh, na BAWIPA Cathut e a lungmanae na pholen awh han. <sup>11</sup> Sahnin kai ni na poe e kâpoelawknaw, phunglawknaw, hoi lawkcengnaenaw tarawihoeahnae lahoi Cathut na pahnim awh hoe hahanlah sahnin kai ni kâ na poe awh. <sup>12</sup> Ka boum lah na ca teh im kahawi dawk na o navah, <sup>13</sup> nangmae tu, maito, sui, ngun hoi hnopai naw apung toteh, <sup>14</sup> na kâoup teh, yampa vah santoungnae Izip ram hoi na ka tâcawtkhai e, <sup>15</sup> hmai tahrin, aikamnaw apap teh, tui kahran ti ohoehnae hmuen, takikathopounge kahrawngum dawk na ka hrawi niteh, hmai talung thung hoi tui ka tâcawt sak e, <sup>16</sup> nang hah na tanouk teh, a hnukteng na pahren nahanelah, na mintoenaw ni panue boihoe e mana hoi kahrawngum na kakawkkung nange BAWIPA Cathut hah na pahnim awh teh, <sup>17</sup> Ka Bahu, ka thaonae kut hoi hete hno kai ni ka tawn toe telah na lungthung hoi na pouk hoe hahan kâhruetcuat awh. <sup>18</sup> Na BAWIPA Cathut duengdoeh na pouk han, Bangkongtetpawiteh, na mintoenaw kam pouh e lawkkam hah, sahnin e patetlah caksak nahanelah, hnopai hmuthainae na kapoekung teh Cathut doeh. <sup>19</sup> Na BAWIPA Cathut na pahnim awh teh, alouke cathutnaw na hnai awh teh na bawk awh pawiteh, rawknae dawk na pha katang awh han. Sahnin kai teh nangmouh koe kapanuekkhaikung lah ka o. <sup>20</sup> Na BAWIPA Cathut e lawk hah na ngâi awh hoe hahan dawkvah jentelnaw nangmae na hmalah ka raphoe e patetlah nangmouh hai na raphoe awh han.

## 9

### *Kanaan ram e miphunnaw BAWIPA ni a raphoe*

<sup>1</sup> Oe Isarelnaw thai awh haw. Nangmouh hlak a thakasai e miphun hai thoseh, kalvan kadeng e rapan hoi ka kawi e khopuinaw hai thoseh, <sup>2</sup> Anakim miphun hmalah bangtelah vai kangdue thai tie lawk na thai teh, na panue e Anakim miphun tie kalenpounge miphun hai thoseh, tuk nateh lawp hanelah atu Jordan tui raka tawmlei toe. <sup>3</sup> Hatdawkvah, na BAWIPA Cathut ni na hmalah a cei teh, ka kang e hmai patetlah ao teh, ahnimouh a raphoe vaiteh, na hmaitung vah, a tabo han tie hah na lungkuep awh. Cathut ni a dei e patetlah nang ni ahnimouh na pâlei awh vaiteh karang poun lah na raphoe awh han. <sup>4</sup> BAWIPA na Cathut ni ahnimouh nang koehoi a pâlei hnukkhu, nang ni kaie lannae dawk doeh BAWIPA ni hete ram ka kut dawk na poe telah na pouk payon vaih. Hote miphunnaw hawihoe e dawk BAWIPA ni ka hmaitung hoi a pâlei telah pouk awh. <sup>5</sup> Na sak awh e hnokahawi dawk hai thoseh, lannae dawk hoi hai thoseh, hote ram a coe awh hane nahoe. Hete miphunnaw hawihoe dawk hoi thoseh, BAWIPA ni na pa Abraham, Isak, Jakop koe lawkkam e lawk hah, a caksak nahan na Cathut ni ahnimouh na hmalah hoi a pâlei e doeh. <sup>6</sup> Hatdawkvah, na BAWIPA ni nama e na hawinae dawk hoi, kahawipoun e ram na poe e nahoe, nang teh na lahuen ka cak e miphun doeh. <sup>7</sup> Nang ni kahrawngum vah BAWIPA lung na khuek sak e hah, pahnim hanh. Izip ram hoi na tâco pasuek nah, hete hmuen koe na pha a totouh, BAWIPA koe taran lah na thaw awh. <sup>8</sup> Horeb vah BAWIPA a lung na khuek sak awh teh, nangmouh raphoe hane totouh, BAWIPA hah a lungkhuek. <sup>9</sup> BAWIPA hoi lawkkamnae thutnae talung, lungphen la hanelah, mon lah ka luen navah, hnin 40 touh thung vaiyei hoi tui ka catnet laipalah, mon vah ka o. <sup>10</sup> BAWIPA Cathut ni lungphen kahni touh Cathut e kut hoi thut e na



poe. Na kamkhueng hnin vah, mon som hmai dawk hoi a dei e lawknaw ao. <sup>11</sup> Ahnin 40 arum 40 akuiep navah hote lawkkam lungphen kahni touh e teh, BAWIPA Cathut ni kai koe na poe. <sup>12</sup> Hahoi BAWIPA ni Thaw nateh karang cathuk leih. Izip ram hoi na tâcokhai e taminaw a rawk awh toe, tarawi hane ka poe e lânthung a phen awh toe. Kutsak meikapawk doeh a bawk awh toe.

### *Suimaitoca*

<sup>13</sup> BAWIPA ni, hete miphunnaw ka khet nah, a lahuen mangkhak e miphunnaw doeh. <sup>14</sup> Ka madueng na awm sak awh. Ahnimouh kai ni ka raphoe han. A min hai kalvan rahim vah ka raphoe han. Nang teh ahnimouh hlak tha na sai sak vaiteh, miphun ka pungdaw sak han telah a ti. <sup>15</sup> Hatnavah lawkkam talung kahni touh ka sin teh, ka kamlang teh hmai ka kang e mon dawk hoi ka kum. <sup>16</sup> Nangmouh ni, BAWIPA Cathut koe na yon awh teh, maito meikaphawk hlun awh teh, Cathut ni lawk na poe e lânthung karang poung lah, na phen awh toe tie ka hmu navah, <sup>17</sup> Kut roi hoi ka patuiep e lungphen, kahni touh e hah nangmae hmaitung vah ka raphei. <sup>18</sup> Nangmouh ni, BAWIPA lung na khuek sak nahanelah, a hmalah yonnae na sak awh e yon pueng dawkvah, yampa e patetlah BAWIPA hmalah ka tabo teh, hnin 40 rum 40 touh vaiyei hoi tui catnet laipalah ka o. <sup>19</sup> Bangkongtetpawiteh, BAWIPA ni nangmouh na raphoe hanlah, puenghoi lungkhueknae a tâco sak e kai ni ka taki. Hatnavah BAWIPA ni kaie ka lawk bout na thai pouh. <sup>20</sup> BAWIPA ni Aron raphoe hanelah a lung puenghoi a khuek dawkvah, Aron hane lahai ka ratoum. <sup>21</sup> Yonnae tie na sak awh e maitoca hah ka la teh, a tui lah kalawng sak. A kanuikapin lah rekrek ka kanawi teh, mon dawk hoi ka lawng e palang dawk ka tâkhawng. <sup>22</sup> Taberah, Messah hmuén, Kiborthhattaavah hmuén koe hai, nangmouh ni BAWIPA hah a lungkhuek nahanlah na sak awh. <sup>23</sup> Kadeshbarnea hoi BAWIPA ni cet awh nateh, kai ni na poe e ram hah lat awh. Nangmouh na patoun awh navah, nangmouh ni nangmae BAWIPA e kâ poe e na kangek awh. BAWIPA na yuem awh hoe, lawk hai ngâi laipalah na o awh. <sup>24</sup> Ka panue hnin hoi nangmouh teh BAWIPA hah na taran awh toe. <sup>25</sup> BAWIPA ni nangmouh na raphoe han telah a dei dawkvah, kai teh yampa e patetlah hnin 40 rum 40 touh ka tabo. <sup>26</sup> BAWIPA koe, Oe Bawipa Jehovah, lentoenae hoi na ratang teh, thaonae kut hoi Izip hoi na tâcokhai e, nange râw lah kaawm e hete taminaw hah raphoe hanh loe. <sup>27</sup> Nange san Abraham, Isak, Jakop hah pahnim hanh. Hete miphunnaw teh a lungpatanae, a yonnae hoi a hawioehnae pâkuem pouh hanh. <sup>28</sup> Hottelah hoe pawiteh, tâconae ram daw k e taminaw ni, Cathut ni a kam pouh e ram daw k, a thokhai thai hoe dawkvah, a hmu ngaihoe daw k na ou, kahrawngum thei hanelah a ngai daw k na ou ati han nahoehmaw. <sup>29</sup> Hetnaw teh lentoenae hoi, na kut na dâw teh, na tâcokhai e nange râwnaw doeh telah kai ni ka ratoum.

## 10

### *Kâlawk talung apâhni e*

<sup>1</sup> Hat navah, Cathut ni ahmaloe e talung kahni touh e patetlah talung kahni touh bout bo e, kai ka onae koe takhang loe, thingkong hai sak loe. <sup>2</sup> Na raphei e hmaloe e talung daw k thut e lawk patetlah apâhni e talung daw k bout ka thut han rak, hote talung teh thingkong thung na hruek han ati. <sup>3</sup> Kai ni Anri thing e thingkong ka sak teh ahmaloe e talung patetlah



talung kahni touh ka bo teh, hote talung ka sin teh mon lah ka luen. <sup>4</sup> Na kamkhueng awh hnin vah, BAWIPA ni mon vah hmai thung hoi a dei e kâpoelawk 10 touh hah, ahmaloe e ca thut e patetlah BAWIPA ni a thut teh kai hah na poe. <sup>5</sup> Ka kamlang teh mon hoi ka kum. Ka sak tangcoung e thingkong thung hote lungphen ka hrueh teh, BAWIPA ni dei e patetlah hote thingkong thung vah atu ao. <sup>6</sup> Mon dawkvah yampa ka onae tueng patetlah hnin 40 rum 40 touh bout ka o teh, hat nahai BAWIPA ni nangmouh raphoe hoeh nahan kaie ka lawk hah a thai. <sup>7</sup> BAWIPA ni, thaw haw, hete miphunnaw koe poe hanelah, na mintoenaw koe lawkkamnae ram koe lah a cei awh vaiteh, a lawp awh nahan ahnimae hmalah cet telah ati. <sup>8</sup> Isarelnaw teh Moserah hmuen koehoi a cei awh teh, Bennejaakan hmuen daw koe a roe awh. <sup>9</sup> Hote hmuen koehoi a kamthaw awh teh, Horakeikat hmuen koe a roe awh. Hote hmuen koehoi bout a kamthaw awh teh, sawkca tui apapnae koe Jotbathah hmuen koe a roe awh. Haw hoi bout a cei awh teh, Eziongeber hmuen koe a roe awh. Hote hmuen koehoi a cei awh teh, Zinahtokadesh hmuen koe a roe awh. Hote hmuen koehoi bout a cei awh teh, Moserah mon daw koe a roe awh. Hote hmuen koe Aron a due teh a pakawp awh. A capa Eleazar ni a na pa yueng lah a taw. <sup>10</sup> Levi miphunnaw teh Cathut lawkkam thingkong a hrawm sak hanelah thoseh, a hmalah kangdue vaiteh a thaw taw sak hanelah thoseh, a kâtawnnae hoi yawhawinae poe sak hanlah thoseh, sahnin totouh ahnimae lah ao. <sup>11</sup> Hatdawkvah, Levi miphunnaw teh a hmaunawngghanaw hoi ham reirei coe awh mahoe. Râw hah coe awh mahoe. Na BAWIPA Cathut ni lawk na kam pouh e patetlah BAWIPA teh a coe awh hane râw la doeh ao.

### *Na lungthin vuensomanae*

<sup>12</sup> Oe Isarel, BAWIPA na Cathut taket haw, a lamthung dawwnae, na BAWIPA Cathut hah na lungthin abuemlahoi, na hringnae abuem lahoi lungpataw nateh a thaw tawknae, <sup>13</sup> na hawi nahanlah sahnin ka dei e BAWIPA e phunglawk tarawinae hoeh laipalah teh na BAWIPA ni bang thaw mouh a hei va. <sup>14</sup> Kalvan hoi kalvannaw hai thoseh, talai hoi talai hno pueng hai thoseh, na BAWIPA ni a tawn e doeh. <sup>15</sup> Hatnavah, na BAWIPA ni na mintoenaw hah a lungpataw teh, sahnin e patetlah ahnimouh miphun lah kaawm e nang hah alouke miphunnaw hlak na rawi e lah ao. <sup>16</sup> Hatdawkvah, na lungthin vuensoma haw. Na lung bout patak sak hanh. <sup>17</sup> Bangkongtetpawiteh, na Cathut teh cathutnaw e Cathut, bawipanaw e BAWIPA, kalenpounge Cathut, a thakaawmpounge, taki ka tho e, tami minhmai khen hoeh, tadawngghno hai cat hoeh. <sup>18</sup> Lahmainu hoi naranaw lawk a ceng teh, imyin a lungpataw teh ca hane hoi khohna hane ka poe e BAWIPA doeh. <sup>19</sup> Hatdawkvah, imyinnaw hah lungpataw awh. Bangkongtetpawiteh, nangmouh Izip ram lah Imyin lah ouk na o boi awh toe. <sup>20</sup> Nangmae BAWIPA hah na taki awh vaiteh, a thaw na tawk awh han. BAWIPA koe na kâhnai awh han, a min lahoi lawkkamnae sak awh hanh. <sup>21</sup> BAWIPA teh na lentoenae na Cathut doeh. Nang ni na mit hoi na hmu e patetlah takikathopounge naw hah ka sak e lah ao toe. <sup>22</sup> Na mintoenaw teh, Izip ram lah a ceicathuk awh navah, tami 70 duengdoeh ka phat, atuteh kalvan Âsi patetlah Cathut ni apap sak toe.

## 11

### *BAWIPA lungpataw nateh a thaw taw*



<sup>1</sup> Hatdawkvah, nang teh na BAWIPA na Cathut lungpataw han, kâ na poe e phunglawk, lawkcengnae hoi kâpoelawknaw hah pou na tarawi han. <sup>2</sup> Nange BAWIPA ni na toun awh e hai thoseh, a lentoenae thoseh, a thaonae kut a dâw e thoseh, <sup>3</sup> mitnoutnae thoseh, Izip ram dawkw, Izip siangpahrang, Faro siangpahrang hoi khocanaw koe a sak e hno hai thoseh, <sup>4</sup> Izip ransanaw lah kaawm e a marang, rangleng lathueng hno a sak e thoseh, nangmouh na ka pâlei e naw hah tuipui paling a ramuk sak teh, sahnin totouh a thei e hai thoseh, <sup>5</sup> Hete a hmuen koe na pha totouh, kahrawng vah na kâhei awh navah nangmouh han a sak e hno hai thoseh, <sup>6</sup> Reuben miphun Eliab capa Dathan hoi Abiram ti koe ka sak e hno hai thoseh, talai ni a ang teh a imthungkhu abuemlah, a rimnaw, a tawnta e hnopainaw hoi Isarelnaw e rahak vah, a payon e thoseh, kahmawt awh hoeh e na canaw koe kai ni ka dei hoeh, hotteh namamouh ni panuek awh. <sup>7</sup> BAWIPA ni a sak e hno kalenpoungnaw pueng hah namamouh roeroe ni na hmu awh toe.

<sup>8</sup> Hatdawkvah nangmouh ni na cei awh vaiteh, na coe a hane ram sanutui hoi khoitui a lawngnae ram. <sup>9</sup> Na mintoe hoi catounnaw koe poe hane BAWIPA ni lawk a kam e ramnaw dawkw, moikasawlah kho na sak a thai nahan, a tu kâ na poe e kâ lawknaw pueng na tarawi a han.

<sup>10</sup> Nangmouh ni na cei awh teh na coe a hane ram laikaww patetlah cati ka hei teh khok hoi tui awi e ram nangmouh na tâconae Izip ram hoi kâ van hoeh. <sup>11</sup> Nangmouh ni na cei awh teh na coe awh hane ram teh monnaw, tanghlingnaw hoi a kawi vaiteh, kho ratui hah ka net e ram.

<sup>12</sup> BAWIPA cathut ni a khetyawt e kum touh thung a khetyawt e ram doeh.

<sup>13</sup> Nangmae BAWIPA Cathut hah na lungthin abuemlahoi, na hringnae abuem lahoi lungpataw awh. A thaw na tawkw awh nahanelah, sahnin kai ni kâ na poe e naw kâpoelawknaw hah na tarawi awh pawiteh,

<sup>14</sup> nangmouh teh cakang, misurtui, satuinaw hah na pâkhueng sak nahanelah, ratui kho, a hnukteng e kho hah nangmae ram ka rak sak han. <sup>15</sup> Kaboumcalah na ca nahan, na saringnaw han remke dawkw hram kanaw e ka sai sak han. <sup>16</sup> Nangmouh teh kahawihoehe koe lah na lungthin na kamlang awh vaiteh, Cathut alouknaw na bawkw awh hoeh nahan namamouh kâhruetcuwet awh. <sup>17</sup> Hoehpawiteh BAWIPA a lungkhuek vaiteh, khorak laipalah talai dawkw a pawhik tâcawt laipalah, kalvan hah a khan han. BAWIPA ni na poe e kahawipoung e ram dawkw karangpoung lah na kahmakata awh han.

<sup>18</sup> Hatdawkvah, kai ni ka dei e lawkw hah na lung dawkw pâkuem nateh, nout nahan na kut dawkw nout hanelah na kawm awh vaiteh, na mit rahak e rui patetlah na kawm awh han. <sup>19</sup> Hote lawkw hah nangmouh ni im dawkw na tahung nah thoseh, lam na cei nahai thoseh, na i na thaw nahai thoseh na dei awh vaiteh, na canaw hai na cangkhai awh han. <sup>20</sup> Im takhang dawkw hai thoseh, longkha dawkw hai thoseh na thut awh han. <sup>21</sup> Hottelah na sak awh pawiteh, na mintoenaw ka poe hanelah lawkw ka kam e ram dawkw nangmae hringnae, na canaw hringnae, kalvan hring sawnae patetlah talai van a hring a saw awh han. <sup>22</sup> Nangmouh teh namamae BAWIPA Cathut hah lungpatawnae hoi a lamthung dawkw na dawn awh vaiteh, BAWIPA dawkw na kâhnai thai nahan kai ni lawkw na poe e hete kâpoelawkw pueng hah tawksak hanlah kâhruetcuwet lahoi na tarawi awh pawiteh, <sup>23</sup> BAWIPA ni miphunnaw pueng hah nangmae hmalah hoi be pâlei vaiteh, nangmouh hlak athakaawme kapappoung e miphunnaw hah na uk awh han. <sup>24</sup> Nangmouh ni na khok hoi na coungroe e pueng namamouh hanlah



na la awh vaiteh, kahrawng hoi kamtawng vaiteh, Lebanon mon totouh Euphrates tuipui hoi kamtawng teh, talipui totouh thoseh, pou kâbet e talai hah nangmae ram lah ao han. <sup>25</sup> Nangmae hmalah apihai kangdout thai mahoe. Nangmouh ni na coungroe e hmuen daw kkaawm e naw teh, nangmanaw hah na taki awh vaiteh, nangmae BAWIPA Cathut ni, lawk a kam e patetlah a sak han.

<sup>26</sup> Khenhaw! Sahnin vah nangmae hmalah yawhawinae hoi thoebonae ka hruek. <sup>27</sup> Sahnin ka dei e nangmae BAWIPA Cathut e kâpoelawknaw hah na tarawi awh pawiteh, Yawhawî poenae, <sup>28</sup> nangmae BAWIPA Cathut e kâpoelawknaw na tarawi laipalah, sahnin lawk na thui e lamthung daw hoi na phen awh teh, na panue boihoe e alouke cathut hah na baw awh pawiteh, thoebo lah na o awh han. <sup>29</sup> Nangmouh ni na cei awh teh, na coe awh hane ram BAWIPA Cathut ni na kâenkhai awh toteh, yawhawinae teh Gerizim mon daw na hruek awh vaiteh, thoebonae teh Ebal vah na hruek awh han. <sup>30</sup> Hote monnaw teh, Jordan tuipui kaniloumlah, Kanaannaw a onae Moreh kathenkungnaw, Gilgal khopui, hoi kâkuen e na ram daw ao awh nahoe. <sup>31</sup> Nangmae BAWIPA Cathut ni na poe awh e ram hah na coe awh hanlah, Jordan tuipui namran lah na raka awh vaiteh, hote ram hah na coe awh vaiteh, na o awh han. <sup>32</sup> Sahnin nangmae hmalah ka hruek e phunglawk hoi lawkcengnae pueng na hringkhai awh han han.

## 12

### *Cathut ni a rawi e bawknae hmuen*

<sup>1</sup> Nangmouh ni talai daw na hring nathing na coe awh nahanelah, na mintoenaw ni a baw awh e BAWIPA Cathut ni na poe e ram daw na tarawi awh hane phunglawknaw hoi lawkcengnae hateh, <sup>2</sup> nangmouh ni na uk awh e miphunnaw ni, bawknae monnaw, monruinaw daw e thingkungnaw rahim kaawm e cathutnaw hai thoseh, bawknae hmuen puenghai thoseh koug na raphoe pouh awh han. <sup>3</sup> Ahnimae thuengnae khoungroenaw hai na raphoe pouh han. Meikaphawknaw hai na raphoe pouh han. Asherimnaw hai hmai hoi na sawi pouh han. Ahnimae cathut kutsaknaw hah na tâtueng awh han. Hote hmuen daw hote cathut min na raphoe awh han. <sup>4</sup> Hot patet lae hnnonaw hno lahoi BAWIPA Cathut na baw awh mahoe. <sup>5</sup> Hateiteh, BAWIPA Cathut ni na miphun thung hoi a min ao nahanelah, a rawi e hmuen hah na tawng awh vaiteh hote hmuen koe na cei awh han. <sup>6</sup> Hote hmuen koe nangmouh ni hmaisawi thuengnae naw hoi pung hra pung touh thueng e hno, kahek e hno lawkkamnae hoi kâkuen e thueng e hno, mahmaw sak e thueng e hno hoi maito, hmaloe ka khe e tunaw hah na thokhai awh han. <sup>7</sup> Hote hmuen koe nangmae BAWIPA Cathut hmalah na ca awh han. Na sak nah tangkuem daw nangmae BAWIPA Cathut ni yawhawî na poe dawkvah, nangmouh teh, nama hoi na imthungnaw, na kut hoi na taw e naw pueng dawkvah na lunghawi han.

<sup>8</sup> Atu e tueng, hete hmuen koe na sak e patetlah hote hmuen koe tami pueng ma pouknae rumram hoi na sak awh mahoe. <sup>9</sup> Bangkongtetpawiteh, nangmouh teh, kâhatnae ram daw thoseh, nangmae BAWIPA Cathut ni râw lah na poe e ram daw thoseh, na kâen awh hoe rah. <sup>10</sup> Nangmouh teh Jordan palang na raka awh toteh, na coe awh hane nangmae BAWIPA Cathut ni râw lah na poe e ram daw na o awh vaiteh, tarannaw e kut daw hoi nangmouh na rungngang teh karoumcalah na o awh han. <sup>11</sup> A min ao nahanelah, nangmae BAWIPA Cathut ni a rawi e hmuen haw vah ao han. Hote hmuen koe kai ni lawk



na thui e patetlah nangmae hmaisawi thuengnae, satheinaw, pung hra pung touh, na kut hoi na sak e hnonaw, BAWIPA koe lawk na kam e patetlah lawkkam e naw pueng hah na thokhai awh han. <sup>12</sup> Namamouh hoi nangmae capanaw, canunaw, sanpanaw, sannunaw, râw pang hane ao hoeh dawkvah, nangmae longkha thung kaawm e Levihnaw hoi cungtalah nangmae BAWIPA Cathut hmalah na lunghawi awh han. <sup>13</sup> Nangmouh teh, na hmu awh e hmuen pueng dawk hmaisawi thuengnae na sak awh hoeh nahanelah, na kâhruetcueth awh han. <sup>14</sup> Hatei, nange miphun thung dawh hoi phun touh koe kaawm e BAWIPA ni a rawi e hmuen dawkvah hmaisawi thuengnae hah na sak han. Hote hmuen koevah, kai ni lawk na thui e naw pueng hah na sak awh han.

<sup>15</sup> Hatnavah, BAWIPA Cathut ni yawhawi na poe e patetlah na onae kho tangkuem kaawm e na ca ngai e pueng na thei vaiteh longkha ca thinae kâ na tawn awh. Kathounge hoi kathounghoehe ni hai sayuk sakhi patetlah hote moi hah a ca thai. <sup>16</sup> Hatnavah, a thi na cat awh mahoe. Tui rabawk e patetlah talai dawh na rabawk awh han. <sup>17</sup> Na kho thung kaawm e nange cakang, nange misurtui, nange satui, nange maito, nange tu camin, lawk na kam e nange lawkkam abuemlah, na mahmawh na poe hno, na kut hoi na sak e hno pung hra pung touh hah na cat mahoe. <sup>18</sup> Hatei, nama hoi cungtalah, nange capa, nange canu, nange sanpa, nange sannu, nange longkha thung kaawm e Levihnaw ni nangmae BAWIPA Cathut ma ni a rawi e hmuen koe nangmae BAWIPA Cathut e hmalah na ca awh han. <sup>19</sup> Na ram thung na o awh roukrak, Levih miphunnaw na pahnim awh hoeh nahanelah kâhruetcueth awh.

<sup>20</sup> Nange BAWIPA Cathut ni nang hanelah lawkkam e patetlah na ram ramri a kaw sak toteh, nang ni moi ka cat haw nei telah na ti vaiteh, na lunghin ni moi ca hane a ngai dawkvah, nang ni na lungngai e patetlah moi na ca han. <sup>21</sup> Nangmae BAWIPA Cathut ni a min ao nahanelah na rawi pouh e hmuen teh, nang hoi hlatpoung pawiteh, nang koe ka dei e patetlah BAWIPA ni na poe e maito hoi tu hah na thei vaiteh, na longkha thungvah na lungngai patetlah na ca thai. <sup>22</sup> Sayuk sakhi moi na ca e patetlah hote moi hah na ca thai. Kathounge hoi kathounghoehe ni hai hote moi hah reirei a ca thai. <sup>23</sup> A thi na ca awh hoeh nahanelah kâhruetcueth sak awh. Bangkongtetpawiteh, thi teh hringnae doeh. Hringnae hoi a moi reirei na cat mahoe. <sup>24</sup> Na cat awh roeroe mahoe. Tui rabawk e patetlah talai dawh na rabawk han. <sup>25</sup> Nang teh BAWIPA e hmalah kalan e hno hah na sak dawkvah, nang hoi cungtalah, na catounnaw hawinae na coe awh nahan, a thi hah na cat awh mahoe. <sup>26</sup> Nang dawh kaawm e kathounge hnonaw hoi nange lawkkamnaw dueng hah na sin vaiteh, BAWIPA ni a rawi e hmuen koe na cet awh. <sup>27</sup> A moi hoi a thi na kalawt vaiteh, nange BAWIPA Cathut e hmaisawi thuengnae khounge van na thueng han. Sathei e a thi hah nange BAWIPA Cathut e thuengnae khounge van na awi vaiteh, a moi hah na ca han. <sup>28</sup> Nange BAWIPA Cathut hmalah kahawi ni teh kalan e hno na sak dawkvah, nang hoi na catounnaw hoi cungtalah, hawinae pou na coe awh nahan, nang koe kâ na poe e hete lawknaw hah na tarawi nahanelah kâhruetcueth loe.

### *Kutsak na bawh mahoe*

<sup>29</sup> Na cei vaiteh na coe hane ram dawh kaawm e miphunnaw hah, nange BAWIPA Cathut ni na hmalah a raphoe toteh, nang ni ahnimanaw hah na pâlei vaiteh, ahnima ram dawh kho na sak han. <sup>30</sup> Na hmalah ahnimouh a rawh awh hnukku, ahnimouh ni a sak awh e patetlah na sak awh teh



na yon awh hoeh nahanelah, hete miphunnaw ni amamae cathut hah bangtelamaw a bawk awh, kai hai hottelah ka bawk van han telah dei teh, ahnimae cathut kong pacei hoeh nahanelah mahoima kâhruetcuete loe. <sup>31</sup> Ahnimouh ni a sak awh e patetlah na BAWIPA Cathut koe na sak awh mahoe. Bangkongtetpawiteh, BAWIPA Cathut ni a ngaihoeh e panuetho e hno hah amamae cathut koe a sak awh teh, amamae capanaw hoi canunaw patenghai amamae cathut hanelah hmai a sawi awh. <sup>32</sup> Nang teh kai ni kâ na poe e pueng hah na sak nahanelah na kâhruetcuete han. Nang ni bout thapsin hanh, bout rayu hanh.

## 13

<sup>1</sup> Nangmouh koe profet hoehpawiteh, mang ka mang thai e buetbuet touh tâcawt boilah, mitnoutnae hoehpawiteh, kângairunae na poe awh teh, <sup>2</sup> hote mitnoutnae hoehpawiteh kângairunae hah akuiep nakunghai, nang ni na panue hoeh e alouke cathut koe cet awh sei, bawk awh sei telah ahni ni dei pawiteh, <sup>3</sup> hote e profet hoehpawiteh, mang ka mang e lawk hah na tarawi mahoe. Bangkongtetpawiteh, nangmouh teh nangmae BAWIPA Cathut hah na lungthin buemlahoi thoseh, na hringnae buemlahoi thoseh lung na pataw ou, pataw hoeh ou tie hah panue nahanelah nangmae BAWIPA Cathut ni nangmouh na tanouknae doeh. <sup>4</sup> Nangmae BAWIPA Cathut hnuk na kâbang awh han. Takinae lung hoi kâpoelawknaw hah na tarawi awh han. A lawk ngâi laihoi na bawk awh vaiteh, BAWIPA dawkw rek na kâhnai awh han. <sup>5</sup> San lah na onae hmuen Izip ram hoi nangmouh na katâcawtkhai e nangmae BAWIPA Cathut koehoi phen sak hanelah thoseh, nangmae BAWIPA Cathut ni lawk na thui e lam dawkw hoi phen sak hanelah a dei awh dawkvah, hote profet hai thoseh, mang ka mang thai e hai thoseh, a due nahanelah na thei awh han. Hottelah nangmouh koehoi yonnae hah na takhoe awh han.

<sup>6</sup> Nang ni na panue hoeh e, na mintoenaw ni hai a panue hoeh e alouke cathutnaw koe, cet awh sei, bawk awh sei, telah a dei teh, na hmaunawngah, na capanaw, na canunaw <sup>7</sup> Talai apoutnae koehoi avanglah apoutnae koe totouh, na tengpam vah, a hnai ahlanae koe kaawm e taminaw e cathutnaw ni na ka tacuek nakunghai thoseh, <sup>8</sup> nang ni na tarawi mahoe. A lawk na ngâi pouh mahoe. Na mit ni pahren mahoe. Ahni hah na pasai mahoe. Na hrawk mahoe. <sup>9</sup> Na thei roeroe han. Na thei nahanelah na kut hmaloe na pho vaiteh, hathnukkhu tami pueng ni kut a pho awh van han. <sup>10</sup> Santoungnae koe Izip ram hoi nangmouh na katâcawtkhai e na BAWIPA Cathut koehoi pâlei hanelah a kâcai dawkvah, ahni hah talung hoi na dei vaiteh na thei han. <sup>11</sup> Hote kamthang hah Isarelnaw pueng ni a thai awh vaiteh, hot patetlah e hno hah nangmouh thung dawkw bout sak laipalah ao awh nahane doeh. <sup>12</sup> Tami kahawi hoeh naw teh nangmouh thung hoi a tâco awh teh, nangmouh ni na panue awh hoeh e alouke cathut koe cei awh vaiteh bawkw awh sei telah a dei awh teh, <sup>13</sup> ahnimouh ni khocanaw a dum awh e hah, nange BAWIPA Cathut ni na o nahanelah na poe e kho buetbuet touh dawkw kamthang na thai pawiteh, hote kong hah kancengcalah na pacei han. <sup>14</sup> Kamthang na thai e patetlah kanceng boilah, hot patet e panuetho e hno sak katang pawiteh, <sup>15</sup> hote khocanaw hah tahloi hoi na thei han. Khopui hoi khopui dawkw kaawm e tami hoi saringnaw pueng koug na raphoe han. <sup>16</sup> Na lawp awh e hnopainaw pueng kho lungui lam dawkw na hmouk awh vaiteh, hote khopui dawkw hoi na lawp awh e pueng,



nangmae BAWIPA Cathut hanelah hmai na sawi awh han. Hote khopui teh songnawng lah pou ao han. A hnukkhu bout kangdout mahoe h toe. <sup>17</sup> BAWIPA ni a lungkhueknae hue a roum sak teh, na mintoenaw koe lawkkam e patetlah na rungngang vaiteh na pungdaw sak nahanelah, thoebo e hno buet touh boehai lat laipalah, abuemlahoi na tâkhawng han. <sup>18</sup> Sahnin kai ni lawk na thui e patetlah BAWIPA Cathut e lawk hah ngâi awh nateh, kâpoelawk pueng hah na tarawi vaiteh, BAWIPA Cathut e hmalah, kalan e hno hah sak awh nateh, BAWIPA Cathut e lawk hah tarawi awh.

## 14

### *Kathounge rawca hoi kathounghoehe rawca*

<sup>1</sup> Nangmouh teh, BAWIPA Cathut e ca lah na o awh. Kadoutnaw hanelah na tak na kâbouk mahoe h. Na mitmuen hai na ngaw mahoe h.

<sup>2</sup> Nangmouh teh BAWIPA Cathut hanelah kathounge miphun lah na o awh. BAWIPA ni talai van daw k kaawm e miphun pueng hlakvah, ama ni tawn e miphun lah na o awh nahanelah nangmouh na rawi awh toe.

### *Kathounge hoi kathounghoehe rawca*

<sup>3</sup> Panuetkatho e na cat mahoe h. <sup>4</sup> Na ca hane saringnaw teh, maito, tu, hmae, <sup>5</sup> sakhi, sazuk, saya, atha, savi, kahrawngmaito, mon daw k e tu ti e <sup>6</sup> khoksamen samka ni teh a thepkaai e pueng teh na ca thai awh. <sup>7</sup> Hatei, a thepkaai niteh, a khoksamen ka samka e naw thung daw k na ca hoe h hane naw teh, kalauk, saveh, cahi, naw heh athepai eiteh, a khoksamen a samka hoe h dawkvah kakhin e lah ao. <sup>8</sup> Vok teh a khoksamen a samka eiteh, athepai hoe h dawkvah, nangmouh hanelah a khin. a moi na cat awh mahoe h. A ro hai na tek awh mahoe h.

<sup>9</sup> Tui daw k kaawm e naw thung daw k hetnaw heh na ca awh han. A pathuet hoi a lakep kaawm pueng na ca thai awh. <sup>10</sup> A pathuet hoi a lakep kaawm hoe h e pueng na cat awh mahoe h, nangmouh hanelah a khin.

<sup>11</sup> Kathounge tava aphunphun na ca thai awh. <sup>12</sup> Na ca hoe h hane tavanaw teh, langta, tui langta, mataw, <sup>13</sup> masi, ungngang, <sup>14</sup> vonga, <sup>15</sup> kalaukva, basairek, batuiling, pingpit, <sup>16</sup> bukbu, kawhna, balengek, <sup>17</sup> tuicawmpai, <sup>18</sup> kahrawngcawmpai, bongpi, <sup>19</sup> a rathei a tawn ei, kâva e saring pueng teh nangmouh hanelah a thounge hoe h dawkvah, na cat awh mahoe h. <sup>20</sup> Kathounge tava pueng na ca thai awh.

<sup>21</sup> A mahmaw k kadout e moi na cat mahoe h. Na tengonaw ni a ca hanelah na poe han. Hoe hpawiteh, ramlouk e tami longkha thung kaawmnaw koe na yo han. Nangmouh teh nangmae BAWIPA Cathut hanelah kathounge miphun lah na o awh. Hmaeca hah a manu e sanutui hoi mek na thawng mahoe h.

### *Hra touh daw k buet touh poenae*

<sup>22</sup> Kum tangkuem na law daw k hoi ka tâcaw t e pueng pung hra pung touh na kapek awh han. <sup>23</sup> Nangmae BAWIPA Cathut ni a min ao nahanelah a rawi e hmuen koe cakang, misurtui, satui hoi tuhu, maitohu naw daw k e camin pung hra pung touh hah a hmalah na ca awh han.

<sup>24</sup> Nangmae BAWIPA Cathut ni yawhaw i na poe awh tore i teh, a min ao nahanelah a rawi e hmuen teh, ekvoi ahla dawkvah, pung hra pung touh na pawht thai awh hoe h pawiteh, <sup>25</sup> hote hno hah na yo vaiteh, tangka na sin vaiteh, na BAWIPA Cathut ni a rawi e hmuen koe na cei vaiteh, <sup>26</sup> ca han na ngai e patetlah maito, tu, misurtui, yamu tie ca han na ngai e pueng



hah na ran vaiteh, BAWIPA Cathut e hmalah, na imthung abuemlahoi na ca awh vaiteh, kanawm lah na o awh han. <sup>27</sup> Hatei, nangmae longkha thung kaawm e Levih miphunnaw teh, a ham awm hoe, rãw hai ao hoe, dawkvah, na hnoun awh mahoe.

<sup>28</sup> A kum thum daw na hmu awh e pueng hah pung hra pung touh na tâcokhai awh vaiteh, khothung longkha vah na pâkueng awh han. <sup>29</sup> Nangmouh koe kaawm e ham kaawm hoe e, rãw kaawm hoe e Levihaw koe kaawm van e Jentelnaw, naranaw, na longkha thung kaawm e lahmaw a tho awh vaiteh, a ca awh han. Hottelah na sak pawiteh, nangmae BAWIPA Cathut ni na sak e pueng daw yawhaw na poe awh han.

## 15

### *Sabbath kum laiba hloutnae*

<sup>1</sup> Kum sari touh daw vai touh laiba hloutnae na sak awh han. <sup>2</sup> Laiba hloutnae phung hateh, imri hah hno kacawi sak e ni, hote laiba hah a hlout sak han. BAWIPA e hloutnae tueng lah ao dawkvah, hote laiba hah na imri koe, na hmaunawnga koe na het mahoe. <sup>3</sup> Ramlouk koe teh heinae kã ao. Na hmaunawnga koe teh het laipalah na hlout sak han. <sup>4</sup> Nang daw mathoe ao hoe nahanelah hottelah na sak han. BAWIPA Cathut ni nama han rãw lah na poe e ram daw nang hah yawhaw moikapap na poe han. <sup>5</sup> Sahnin kai ni kã na poe e hete kãpoelaw hah na tarawi nahanelah, nangmae BAWIPA Cathut e lawk hah takuetluet thai haw. <sup>6</sup> Na BAWIPA Cathut ni lawk a kam e patetlah yawhaw na poe vaiteh, nang ni ayãw hah na cawi sak han. Ahnimouh ni teh nang na cawi sak mahoe. Nang ni miphunnaw hah na uk han. Ahnimouh ni nang na uk awh mahoe.

### *Mathoenaw câwisak e hno*

<sup>7</sup> Na BAWIPA Cathut ni na poe ram dawkvah, na longkha thung ka roedeng e na hmaunawnga reira awm pawiteh, hote ka roedeng e na hmaunawnga koe na lungmouk hanh. Na kut hai kasum hanh. <sup>8</sup> Na kut hah kakaw lah na kadai vaiteh, a roedengnae a kahma totouh na cawi sak han. <sup>9</sup> A kum sarinae hloutnae kum a pha han a hnai toe. Ka roedeng e hmaunawnga hah utsin laihoi banghai poe hane ngai laipalah, na lungthin daw kahawi hoe khopouknae ao hoe nahanelah kãhruetcuat awh. Hottelah nahoe pawiteh, ahni ni BAWIPA koe hram vaiteh, nang daw yon a pha hoe nahanelah kãhruetcuat. <sup>10</sup> Bangkongtetpawiteh, nang na onae koe ka roedeng pout mahoe. <sup>11</sup> Hatdawkvah, na onae ram daw, ka roedeng e hmaunawnganaw hanelah na kut ka kaw lah na kadai nahanelah lawk na thui.

### *Sannaw hloutsaknae*

<sup>12</sup> Na hmaunawnga reira, Hebru tami napui tongpa teh, nang koe san lah ao teh, kum taruk touh ao hnukkhu, a kum sarinae daw teh na hlout sak han. <sup>13</sup> Na hlout sak toteh kuthrawng na hlout sak mahoe. <sup>14</sup> Na BAWIPA Cathut ni yawhaw na poe e patetlah na tuhu thung e thoseh, cang katinnae thung e thoseh, misur na katinnae thung e thoseh moikapap na poe han. <sup>15</sup> Nang teh, Izip ram vah, san lah ouk na o boi e hai thoseh, na BAWIPA Cathut ni nang hah na hlout sak e hai thoseh na pouk han. Hatdawkvah, hete kãpoelaw hah sahnin kai ni na poe. <sup>16</sup> Hatei, san niyah, tâco hane ka ngai hoe. Nang hoi na imthungkhunaw hoi o e a nawm doeh tetpawiteh, <sup>17</sup> nang ni phuengvang na la vaiteh, takhang koe



a hnâ na kavi pouh vaiteh, ahni teh san lah pou ao han. Hot patetvanlah sannu koehai na sak awh han. <sup>18</sup> Na san na tha navah, arupoung telah pouk hanh. Bangkongtetpawiteh, kum taruk touh thung san thaw a tawk teh, aphu hoi hlai e hlak let hni touh hoi thaw a tawk toe. Na BAWIPA Cathut ni hai na tawksak e tangkuem dawk yawhawi na poe han.

### *Camin thuengnae*

<sup>19</sup> Na maitohu hoi tuhu naw thung dawk, camin atan kaawm e pueng teh, na BAWIPA Cathut hanelah a thoung han. Maito camin, tu camin hah na hno mahoe. <sup>20</sup> BAWIPA Cathut ni a rawi e hmuen koe, na BAWIPA Cathut e hmalah, a kum tangkuem pout laipalah, na imthungnaw hoi rei na ca awh han. <sup>21</sup> Hote maito tu naw dawkvah, khokkhem, mit ka dawn, a tak dawk yonnae, alouke toun han kawi lah kaawm e buetbuet touh awh pawiteh, na BAWIPA Cathut koe thuengnae na sak mahoe. <sup>22</sup> Na longkha thung na ca han. Sayuk sakhi moi na ca e patetlah kathounge tami, kathounghoehe taminaw ni hai reirei a ca awh han. <sup>23</sup> Hatei, a thi teh na cat awh mahoe. Tui rabawk e patetlah talai dawk na rabawk awh han.

## 16

### *Ceitakhai Pawi*

<sup>1</sup> Abib thapa hah ya e thapa lah pâkuem awh nateh, ceitakhai paw lah hno awh. Bangkongtetpawiteh, Abib thapa dawkvah, BAWIPA ni Izip ram hoi karum vah nangmouh na tâcokhai awh. <sup>2</sup> BAWIPA Cathut ni a min o nahanelah a rawi e hmuen koe maito hoi tu naw hah na thueng vaiteh, na BAWIPA Cathut hanelah ceitakhai paw na to han. <sup>3</sup> Nang ni Izip ram hoi na tâconae hnin hah na hringyung thung pahnim hoe nahanelah ceitakhai paw na to navah, tonphuene vaiyei hah na cat mahoe. Tonphuenhoehe tie runae vaiyei hah hnin sari touh thung na ca awh han. Bangkongtetpawiteh, Izip ram hoi karangpoung lah na tâco awh toe. <sup>4</sup> Hnin sari touh thung, na onae ram dawk tonphuene vaiyei awh sak hanh. Apasuek hnin tangmin vah, na thueng e sathai moi hah karuem tuettuet amom totouh na cawi sak mahoe. <sup>5</sup> Na BAWIPA Cathut ni na poe e kho longkha koe vah, ceitakhai paw sak thainae kâ kaawm e nahoe. <sup>6</sup> Na BAWIPA Cathut ni a min ao nahanelah a rawi e hmuen koevah, nang teh Izip ram hoi na tâconae tueng, kanî a khup nah tangmin vah, ceitakhai paw thuengnae hah na sak awh han. <sup>7</sup> Na BAWIPA Cathut ni a rawi e hmuen koe hmai na pahai awh vaiteh, na ca awh hnukkhu, amom vah im bout na ban awh han. <sup>8</sup> Hnin taruk touh thung tonphuenhoehe hah na ca awh han. A hnin sari hnin teh na BAWIPA Cathut hanelah kathounge kamkuengnae hah na sak han. Hote hnin dawk thaw na tawk awh mahoe.

### *Yat paw*

<sup>9</sup> Canga kamtawngnae koehoi na touk vaiteh, yat sari touh aloum hnukkhu, <sup>10</sup> na BAWIPA Cathut e hmalah na BAWIPA Cathut ni yawhawi na poe e patetlah lungthocalah hoi thueng hane hno hah na sin han. <sup>11</sup> Na BAWIPA Cathut ni a min ao nahanelah a rawi e hmuen dawk, na BAWIPA Cathut hanelah yat sari paw hah na to vaiteh, na capa, na canunaw, na sanpa sannu naw, nang koe kaawm e Levihnaw, imyinnaw, lahmai naranaw pueng ni a lunghawi awh han. <sup>12</sup> Nang teh Izip vah san lah ouk na o e hah na pouk vaiteh, phunglawknaw hah na tarawi han.



*Lukkarei im pawî*

<sup>13</sup> Cakang hoi misurtui hah na pâkhueng vaiteh, hnin sari touh thung lukkareiim pawî na to han. <sup>14</sup> Hote pawî na to navah, nama hoi na capa, na canunaw, na sanpa sannu naw, nang koe kaawm e Levihnaw, imyinnaw, lahmai naranaw na longkha thung kaawmnaw pueng ni a lunghawi awh han. <sup>15</sup> BAWIPA Cathut ni a rawi e hmuen koe hnin sari touh thung na BAWIPA Cathut hanelah kathounge pawî na to han. Na BAWIPA Cathut ni na kampungnae pueng koe, thaw na tawknae pueng koe, yawhawi na poe dawkvah, lunghawinae na sak han.

<sup>16</sup> Ton phuen hoeh pawitonaе tueng, yat sari pawitonaе tueng, lukkareiim pawitonaе tueng tie naw hah, kum touh dawк vai thum touh, nangmouh tongpanaw pueng teh, na BAWIPA Cathut ni a rawi e hmuen koe a hmalah na tâco awh han. Hatnavah, Cathut hmalah apihai kuthrawng hoi na tâcawt mahoe. <sup>17</sup> Na BAWIPA Cathut ni yawhawi na poe e patetlah tami pueng ni amamouh a coung thai e patetlah lengkaleng a sin awh han.

<sup>18</sup> Na BAWIPA Cathut ni yawhawi na poe e longkha kaawm e pueng dawк, lawkcengkung, bawinaw hah na onae kho tangkuem dawк na hruek awh han. Ahnimouh ni lawkceng kawinaw hah kalan lah lawк a ceng awh han. <sup>19</sup> Nang teh phunglawк dawк hoi na phen mahoe. Tami minhmai khet na tawn mahoe. Tadawngnae na dâw mahoe. Tadawngnae ni tami a lungkaang mit a dawn sak. Tami kalannaw e lawк hah a longkawi sak. <sup>20</sup> Na BAWIPA Cathut ni na poe e ram hah nang ni na hring teh na coe nahanelah, kalan e phunglawк dawк dueng na dawn han.

*Bawкnae koe sak hoe hane hno*

<sup>21</sup> Na BAWIPA Cathut hanelah na sak e thuengnae khounge teng vah, bangpatet e Asherah thing hai na ung mahoe. <sup>22</sup> Na BAWIPA Cathut ni a hmuhma e talung nama hanelah na ung mahoe.

**17**

<sup>1</sup> Maito thoseh, tu thoseh, toun kaawm e, kakuеp hoe hoi na BAWIPA Cathut koe thuengnae na sak mahoe. Hot patetlah e thuengnae BAWIPA Cathut ni a panuet e lah ao.

<sup>2</sup> Na BAWIPA Cathut ni na poe e khonaw dawkvah, <sup>3</sup> kanî, thapa, kalvan hno tie patetnaw, kai ni ka pasoung hoe hoi a louke cathutnaw koe na cei awh teh, na bawк awh teh, na BAWIPA Cathut e lawkkam na tapuet awh teh, a hmalah yonnae ka sakpayon e napui tongpa ao telah, <sup>4</sup> nang ni kamthang na thai teh akung na khei navah, Isarel miphun dawк hot patetlah e panuettho e hah sakpayon katang pawiteh, <sup>5</sup> hote yonnae ka sak e napui tongpa hah kho longkha koe na ceikhai awh vaiteh, talung hoi na dei awh vaiteh na thei awh han. <sup>6</sup> Lawkpanuesaknae kapanuekkhaikung kahni touh kathum touh awm pawiteh, due kamcu e tami teh na thei awh katang han. Lawkpanuesaknae kapanuekkhaikung buet touh dueng awm pawiteh, thet mahoe. <sup>7</sup> Hote tami hah thei hanelah kapanuekkhaikungnae ni hmaloe a kut a pho awh hnukkhu, tami pueng ni kut a pho awh han. Hottelah na sak awh pawiteh, nangmouh koehoi yonnae teh takhoe lah ao han.

*Vaihmanaw hoi lawkcengkungnae ni lawк tâtueng e*

<sup>8</sup> Na khouthung vah tami kâtheinae, kâyuenae, kâhuenae naw hah nang hanlah lawkcengnae ru poung pawiteh, na BAWIPA Cathut ni a rawi e hmuen koe na cei awh vaiteh, <sup>9</sup> hatnae tueng dawkvah, lawkcengkung



thaw ka tawk e, vaihma, Levihnaw e hmalah lawkceng lah ao awh han. Ahnimouh ni hai lawkcengnae hah a pathang awh han. <sup>10</sup> BAWIPA Cathut ni a rawi e hmuen koe kaawm e naw ni a dei e patetlah nang ni na sak han. Ahnimouh ni na cangkhai e patetlah na sak nahanelah na kâhruetcuethan. <sup>11</sup> Ahnimouh ni na cangkhai e lawkcengnae hoi a dei awh e lawk tâtueng e patetlah na sak han. Ahnimouh ni na patue e cangkhaing dawk hoi avoilah aranglah na phen mahoe. <sup>12</sup> BAWIPA Cathut hmalah thaw ka tawk e vaihmabawi, lawkcengkungnaw e lawk ngâi laipalah, tarankahawi lah ka sak e teh thei hanlah ao. Hottelah hoi, Isarelnaw thung hoi hot patet e yonnae hah na takhoe awh han. <sup>13</sup> Hote kamthang hah tami pueng ni a thai awh toteh, a taki awh vaiteh, hottelah taranhawi laihoi bout sak awh mahoe toe.

### *Isarel siangpahrangnaw hoi kâkuen e kâlawk*

<sup>14</sup> Na BAWIPA Cathut ni na poe e ram dawk na pha teh, hawvah kho na sak toteh, ka tengpam vah kaawm e Jentelnaw patetlah siangpahrang buetbuet touh tawn awh sei na tetpawiteh, <sup>15</sup> Na BAWIPA Cathut ni a rawi e na hmaunawnggha reirei duengdoeh siangpahrang lah na tawn a han. Na hmaunawnggha lah kaawm hoe e Jentelnaw hah siangpahrang lah na tawn awh mahoe. <sup>16</sup> Hote siangpahrang teh ama hanelah marang moikapap paca mahoe. Marang moikapap a tawn nahanelah Izip ram tami ban sak mahoe. Bangkongtetpawiteh, hote lamthung koe bout na ban mahoe telah BAWIPA ni ati. <sup>17</sup> Ahnie a lungthin a rawp hoe hanelah, yu moikapap lat mahoe. Suingun hai moikapap pâkhueng mahoe. <sup>18</sup> Hettelah ao han. A uknaeram bawitungkung dawk a tahung toteh, Levih tami, vaihma bawinaw ni a tarawi awh e kâlawk hah cauk lah ama hanelah a thut han. <sup>19</sup> Hote cauk teh ama koe ao vaiteh, hnintangkuem a touk han. Hottelah tetpawiteh, BAWIPA Cathut hah a taki nahanelah thoseh, hete kâlawnaw pueng a kuem nahanelah thoseh, a tarawi nahanelah thoseh, a kamtu thai han. <sup>20</sup> Ama e a lungthin hah a hmaunawngghanaw lathueng kâtawm thai hoe. Kâlawk dawk hoi avoilah aranglah kamlang thai hoe. Hottelah tetpawiteh, a ram thung Isarelnaw rahak vah, ama hoi a canaw teh a hring a saw awh han.

## 18

### *Vaihmanaw hoi Levihnaw e Ham*

<sup>1</sup> Vaihmanaw, Levih miphunaw pueng Isarelnaw hoi cungtalah râw tawn awh mahoe. Ahnimouh teh BAWIPA koe hmai hoi thuengnae a hamnaw hah a ca awh han. <sup>2</sup> Ahnimouh teh a hmaunawngghanaw hoi râw rei coe awh mahoe. BAWIPA ni kâ a poe e patetlah ahnimae râw teh ao. <sup>3</sup> Taminaw ni thuengnae a sak awh toteh, maito hai thoseh, tu hai thoseh, vaihmanaw e ham aloung vang, a tangboun roi, a ruennaw hai thoseh, <sup>4</sup> ahmaloe na a e cang, misur, satui hoi tumen na ngaw e naw hah na poe han. <sup>5</sup> Bangkongtetpawiteh, ahni koehoi a ca catounaw teh BAWIPA min lahoi a thaw pou tawk nahanelah, na BAWIPA Cathut ni na miphunaw thung dawkvah ahni hah a rawi toe.

<sup>6</sup> Isarel kho dawk kaawm e Levih tami buetbuet touh ni BAWIPA Cathut ni a rawi e hmuen koe bari laihoi tho pawiteh, <sup>7</sup> BAWIPA hmalah hmuen ka tawn tangcoung e Levihnaw patetvanlah, BAWIPA Cathut min lahoi athaw hah a tawk han. <sup>8</sup> Ama e râw a yo teh a hmu e hno touk laipalah, Levihnaw hoi reikâvan lah a coe van han.



*Thoebo kawi kêroenae*

<sup>9</sup> Na BAWIPA Cathut ni na poe e ram na pha awh toteh, hote ram dawkw kaawm e taminaw ni a sak awh e panuetho e hno hah na sak awh mahoe. <sup>10</sup> Nangmouh thung dawkw a canaw hah hmai hoi ka thueng e, ka tho hane naw hah ama pouk lahoi ka dei e, kutkhetkathoum e, kahawihoe theouthainae ka sak e, <sup>11</sup> ân ka thoum e, kahrai kamyawng e, hmaui lah kaawm e, tami kadout ka pacei e tami buet touh boehai awm mahoe. <sup>12</sup> Hottelah ka sak e pueng teh BAWIPA Cathut ni a panuet. Hote panuetho e hnonaw kecu dawkwah, BAWIPA Cathut ni hote miphunnaw teh nang na hmalah hoi a pâlei toe. <sup>13</sup> Nang teh, BAWIPA Cathut hmalah toun kaawm hoe hah na o awh han. <sup>14</sup> Na uk e taminaw teh kutkhetkathoum e, ka tho hane naw hah ama pouk lahoi kadeinaw e lawk hah ouk a ngai awh. Nang teh hottelah na sak nahanelah na BAWIPA Cathut ni kâ na poe hoe.

*Mosi patetlah e profet katha*

<sup>15</sup> Na BAWIPA Cathut ni, nange na hmaunawnganaw thung dawkw hoi, kai patetlah e profet buet touh nangmouh hanelah a tâco sak han. Hote profet lawk hah na ngai awh han. <sup>16</sup> Horeb vah na kamkhuengnae hnin navah nang ni, BAWIPA Cathut e a lawk hah bout ka thai awh hanh lawiseh. Hote kalenpounge hmai hah kahmawt awh hanh lawiseh. Ka due han doeh toe telah BAWIPA Cathut hmalah na kâhei e patetlah, <sup>17</sup> BAWIPA ni, ahnimae lawk teh ahawi doeh. <sup>18</sup> Amamae hmaunawnganaw thung dawkwah, ahnimouh hanelah profet buet touh ka tâco sak vaiteh, ahnie pahni dawkw, ka lawkna hah ka hruek pouh vaiteh, ahni ni patuen a dei pouh han. <sup>19</sup> Hote profet ni ka min lahoi a dei e lawk hah tarawi laipalah kaawm e teh, kai ni ka yue han. <sup>20</sup> Kai ni lawk ka poe laipalah, ka min lahoi ka dei e profet hoehpawiteh, alouke cathut min lahoi ka dei e profet teh kadout lah thei han telah kai ni kâ na poe. <sup>21</sup> Nang ni, BAWIPA Cathut ni a dei e hah bangtelah hoi maw ka panue han telah na pouk pawiteh, <sup>22</sup> profet ni BAWIPA min lahoi a dei e patetlah phat hoe, a dei lawk kuep hoehpawiteh, hote lawk teh BAWIPA ni a dei e nahoe. A taranhawi lahoi a dei e doeh. Ahni hah na taket mahoe.

**19***Kânguenaê kho hoi kâkuen e kâlawk*

<sup>1</sup> Na BAWIPA Cathut ni na poe e ram dawkw kaawm e miphunnaw hah, na BAWIPA Cathut ni a pahma teh, ahnimae kho, ahnimae im dawkw na o toteh, <sup>2</sup> BAWIPA Cathut ni na poe e hote ram thung kaawm e khopui katham touh na hmoun han. <sup>3</sup> Tami ka thet payon e pueng hote khopui dawkw a yawng thai awh nahan, na BAWIPA Cathut ni nama hanlah na poe e ram hah, katham touh lah na kapek vaiteh, lamthung hai koun na rasoun han.

<sup>4</sup> Tami ka thet payon e ni a hring hlout nahanelah, hote kho dawkw a yawng nahane hateh hettelah doeh. <sup>5</sup> Thing tâtueng hanelah a hui hoi kahrawng reirei a cei roi teh thing a tâtueng roi navah, cakâ pawk a kârakhing teh a hui a cusin teh a due dawkwah, tami ka thet hoi a kâvan. Hatei, hmuhmanaew awm laipalah, a hui hah pouk laipalah a thei payon dawkwah, hote kho buetbuet touh dawkw a yawng vaiteh, a hringnae a hlout han. <sup>6</sup> Hottelah hoehpawiteh, moipathung han ka ngai e ni hote tami hah pâlei vaiteh, lamhla dawkwah rekpatawt vaiteh a thei payon han doeh. Hottelah thei kawi nahoe. Bangkongtetpawiteh, ahni ni a hui hah



hmuhmanae a tawn hoeh dawkvah, thei hane kawi lah kamcu mahoe. <sup>7</sup> Hatdawkvah, kho katham touh na hmoun han telah kâ a poe. <sup>8</sup> Sahnin kai ni lawk na thui awh e hete kâpoelawknaw hah na tarawi awh teh, BAWIPA Cathut lungpatawnae lahoi a lamthung dawk pou na dawn awh pawiteh, <sup>9</sup> na BAWIPA Cathut ni na mintoenaw koe poe hanelah lawk a kam e ram kaawm e pueng hah na poe vaiteh, na mintoenaw koe lawk a kam e patetlah na ram hah kaw sak pawiteh, <sup>10</sup> na BAWIPA Cathut ni nama hanlah na poe e ram dawkvah, kadout kawi hoeh e ni a due teh, tami thei yonnae na kut dawk a pha hoeh nahanelah, ka dei tangcung e khopui katham touh hloilah, alouke khopui katham touh bout na hmoun han. <sup>11</sup> Hatei, a hui hah a hmuhma teh, thei hanelah a pahluem teh a thei dawkvah, hote khopui dawk ka yawng ni teh hawvhah ka phat nakunghai, <sup>12</sup> kacuenaw ni tami a patoun awh vaiteh, hote tami hah bout a hrawi awh vaiteh, moi ka pathung hane kut dawk a poe awh han. <sup>13</sup> Ahnimouh na lungma mahoe. Na hlout nahanelah, tami thei yonnae hah Isarelnaw koehoi na takhoe han.

### *Khori tahrueh hanh*

<sup>14</sup> Na BAWIPA Cathut ni nama hanlah na poe e ram daw, râw lah na coe e talai dawkvah, ayan mintoenaw ni a ung tangcung e na imri e lawrilung hah tahrueh hanh.

### *Kapanuekkhaikung hoi kâkuen e kâlawk*

<sup>15</sup> Tami ni a sakpayon e yon hah lawkceng torei teh, kapanuekkhaikung buet touh dueng pawiteh hote lawk teh cak mahoe. Kapanuekkhaikung kahni katham touh awm pawiteh, hote e lawk pueng teh a cak han. <sup>16</sup> Kahmanhoe e kapanuekkhaikung buet touh ni, ayânaw koelah kahmanhoe e kapanuekkhaikung lah kangdout pawiteh, <sup>17</sup> ka kâtoe roi e roi teh BAWIPA hmalah thoseh, hatnae tueng dawk vaihma, lawkcengkungnaw hmalah thoseh a tho awh teh, <sup>18</sup> lawkcengkungnaw ni kamcengcalah a pacei navah, hote kapanuekkhaikung ni a hui koe lahoi, kahmanhoe lah kampangkhai pawiteh, <sup>19</sup> a hui koe ka sak han telah a pouk e patetlah ahni dawk na sak han. Nangmouh koehoi yonnae hah hottelaho na takhoe awh han. <sup>20</sup> Alouknaw ni hai hote kamthang hah thai awh vaiteh, hot patet e yon hah bout sak laipalah ao awh han. <sup>21</sup> Na lungma mahoe. Hringnae hanelah hringnae, mit hanelah mit, hâ hanelah hâ, kut hanelah kut, khok hanelah khok na pathung awh han.

## 20

### *Tarantuknae hoi kâkuen e kâlawk*

<sup>1</sup> Taran tuk hanelah na kamthaw navah, namamouh hlak kapap e marang thoseh, rangleng thoseh, taminaw thoseh, na hmawt pawiteh taket hanh. Bangkongtetpawiteh, Izip ram hoi nangmanaw katâcawtkhai e BAWIPA Cathut teh nangmouh koe ao. <sup>2</sup> Taran tuk nahane tueng a hnai toteh, vaihmanaw ni a hnai awh vaiteh, <sup>3</sup> Oe Isarelnaw, sahnin taran tuk hanelah taran koe na hnai awh toe. Ahnimouh kecu dawk na lungpout awh hanh, taket awh hanh, pâyaw awh hanh, kalue awh hanh. <sup>4</sup> Bangkongtetpawiteh, nangmouh na ka rungngang hanelah, BAWIPA Cathut teh nangmouh hoi rei a kamthaw teh, na tarannaw hah na tuk pouh telah taminaw koe dei awh naseh. <sup>5</sup> Ransa kacuenaw nihai, im katha ka sak niteh, Cathut koe kâhnawng hoeh rae awm pawiteh, ama im ban yawkaw seh, a im hah hnawng naseh. Hoehpawiteh, taran tuknae koe



dout pawiteh, alouke ni im hah a hnawng han doeh tie ngaihiri han ao. <sup>6</sup> Misur takha ka sak niteh, a paw ka cat hoeh rae awm pawiteh, a im ban yawkaw seh. Hoehpawiteh, taran tuknae koe dout pawiteh, alouke ni hote misur paw a ca han doeh tie ngaihrinae ao. <sup>7</sup> A yu sut ka pacei niteh, ka paluen hoeh rae awm pawiteh, a im ban yawkaw seh. Hoehpawiteh, taran tuknae koe dout pawiteh, alouke ni a paluen han doeh tie ngaihrinae ao. <sup>8</sup> Hahoi, ransa kacuenaw teh, ka taket ni teh a lung ka pout e awm pawiteh, a im ban yawkaw seh. Hoehpawiteh, ahni a lungpout e patetlah a huinaw hai a lungpout han doeh tie ngaihrinae ao telah taminaw koe a dei awh han. <sup>9</sup> Ransa kacuenaw ni hottelah a dei awh hnukkhu, kâ kapoekungnaw ni taminaw hah taran tuk hanlah a kamthaw sak han.

<sup>10</sup> Kho buetbuet touh tuk hanelah na ceisin navah, roun nahanelah hmaloe na dei pouh han. <sup>11</sup> Hote kho teh, roun nahane lawk a dei teh kho longkha sut paawng pawiteh, hote kho dawk kaawm e pueng ni aphawng na poe awh vaiteh, na thaw a tawk awh han. <sup>12</sup> Roun nahane lawk hah ngâi awh hoeh lah, nangmouh na tuk awh pawiteh, hote kho hah na kalup awh vaiteh, <sup>13</sup> na BAWIPA Cathut ni nangmae kut dawk hote kho hah na poe torei, tongpa pueng hah tahloi hoi na thei han. <sup>14</sup> Napui camo saring kiothung na hmu e pueng teh, nama hanelah na la vaiteh, na BAWIPA Cathut ni taran kut dawk hoi na poe e hno hah na ca han. <sup>15</sup> Hete miphun onae kho hloilah, ahlanae koe e kho kaawm e pueng koe hottelah na sak han. <sup>16</sup> Na BAWIPA Cathut ni râw lah na coe hane kawi dawk hete miphunnaw e kho dawkvah, ka kâha e tami buet touh boehai na hring sak mahoe. <sup>17</sup> Hitnaw, Amornaw, Kanaannaw, Periznaw, Hivnaw, Jebusitnaw ni amamae cathutnaw koe a sak awh e panuetho e hno hah nangmouh na cangkhai awh teh, <sup>18</sup> na BAWIPA Cathut koe na yon hoeh nahanelah, na BAWIPA Cathut ni na cangkhai e patetlah hote tami pueng hah peng na raphoe han. <sup>19</sup> Kho buetbuet touh tuk hanelah, kasawlah na kalup pawiteh, thingkungnaw hah na tâtueng mahoe. Talai daw kâpaw e thingkungnaw teh, tami kâkaw nahanelah ao dawkvah, a paw dueng na ca han. Kho na kalup navah akung na tâtueng mahoe. <sup>20</sup> Hatei, cakawi hoeh e thingkungnaw teh na tâtueng vaiteh, na tuk e kho na tâ hoehroukrak, taran tuk nahanelah hnopai na sak na thai.

## 21

### *Tami kathetkung panue pha hoeh hanelah yontha thuengnae*

<sup>1</sup> Na BAWIPA Cathut ni coe hanelah na poe e ram daw kahrangvaw, tami ni a thei e ro na hmu teh kathetkung na panuek hoehpawiteh, <sup>2</sup> kacuenaw hoi lawkcengkungnaw a tho awh vaiteh, ro hoi a tengpam e khonaw hah a hnai ahla e a bangnue awh han. <sup>3</sup> Ro hoi kahnai poung e kho daw koe kacuenaw ni hno boihoe hae maitola a hrawi awh han. <sup>4</sup> Hote kacuenaw ni, hote maitola hah, thaw hoeh rae, cati kahei hoeh rae, pou kalawng e palang koe a hrawi awh vaiteh, hote hmuen koe palang vah maitola e lahuen a tâtueng pouh awh han. <sup>5</sup> Levih miphun vaihmanaw ni a thosin awh han. Bangkongtetpawiteh, a thaw taw hane hoi BAWIPA e min yawhawi poe sak hanelah, ahnimanaw hah BAWIPA ni a rawi toe. Ahnimae pahni daw hoi, kâyuenae pueng hoi kutkhok payonnae pueng teh pâbaw e lah ao han. <sup>6</sup> Ro hoi kahnai poung e kho daw koe kacuenaw pueng ni, palang vah a lahuen tâtueng pouh tangcoung e maito van a kut a pâsu awh han. <sup>7</sup> Hathnukkhu ahnimouh ni a dei awh hane teh,



kaimae kut ni hete a thi palawng hoeh, kaimouh ni kahmawt awh hoeh. Oe BAWIPA, na rawi teh na rungang e na tami Isarelnaw yontha pouh haw. A yonnae kaawm hoeh e tami e a thi palawngnae yon hah na tami Isarelnaw koe bawt sak hanh loe. Thi palawngnae yon teh tha pouh loe, telah a dei awh han. <sup>8</sup> Oe! BAWIPA na ratang e na tami Isarelnaw hah pahren haw. Due kamcu hoeh e tami theinae yon teh na tami Isarelnaw koe phat sak hanh loe telah na dei han. Hottelah na tet pawiteh, tami theinae yontha lah ao han. <sup>9</sup> Hottelah nang ni BAWIPA hma lah hawinae na sak navah, due kamcu hoeh e thi teh a fakhoe han.

<sup>10</sup> Nang ni taran na tuk teh, na BAWIPA Cathut ni na kut dawk na poe teh na man torei teh, <sup>11</sup> na man e taminaw hah a meikahawi e napui hah na hmu teh yu lah la hane na ngai pawiteh, <sup>12</sup> nama im na kaw vaiteh, ahni ni a lû a ngaw vaiteh, a kutpatin a raimen vaiteh, <sup>13</sup> na mannae khohna a rading vaiteh, thapa yung touh thung a manu na pa rabui laihoi na im vah ao hnukkhu, na yu lah na la vaiteh, ahni teh nange yu lah ao han. <sup>14</sup> Hathnukkhu ahni hah na ngai hoeh toung pawiteh, ama ngai nah koe na cei sak han. Ahni hah na kaya sak dawkvah, tangka lah na yawt mahoe. San lah na tat mahoe.

<sup>15</sup> Vâ ka pahren e hoi vâ ka hmuhma e yu roi ni a ca a khe roi teh, camin hah vâ ka hmuhma e capa lah awm pawiteh, <sup>16</sup> ahni ni a râw hah a rei toteh, hmuhma e capa hah pabo vaiteh, a pahren e capa hah na tawmtakhang mahoe. <sup>17</sup> Hmuhma e capa teh camin doeh telah na pâpho vaiteh, let hni touh e râw hah na poe han. Bangkongtetpawiteh, hote capa teh na pa e tha kamtawngnae doeh. Caminnae hmuen hoi a kamcu doeh. <sup>18</sup> Na pa koe capa kathout, a lungpata ni teh manu na pa e lawk ka ngai hoeh e, manu na pa ni a yue ei, banglah ka noutna hoeh e awm pawiteh, <sup>19</sup> manu na pa ni hote capa hah a sawn vaiteh, kho thung kacuenaw onae koe kho longkha koe a ceikhai vaiteh, <sup>20</sup> kaimae capa teh ka mathout e lah doeh a o. Ka carawng ni teh yamuhri lah kaawm e doeh telah kho thung kacuenaw koe a dei pou han. <sup>21</sup> Khoca tongpa pueng ni, hote capa hah talung hoi a dei awh vaiteh, a thei awh han. Hottelah nangmouh thung hoi payonnae hah na takhoe awh vaiteh, Isarelnaw pueng ni hote kamthang hah a thai awh vaiteh a taki awh han.

<sup>22</sup> Due kamcu e yon ka tawn e tami hah thing dawk na kaithi sak pawiteh, <sup>23</sup> hote ro hah thing dawk karum tuettuet na tat mahoe. Ama hot hnin roeroe vah talai dawk na pakawp roeroe han. Thing dawk kaithi sak e tami teh thoebo lah kaawm e tami doeh. Na BAWIPA Cathut ni na pang hanelah na poe e râw hah na khin sak awh hoeh nahanlah hottelah na sak awh han.

## 22

### *Kâlawk aphunphun*

<sup>1</sup> Na hmaunawngaha e maito hoehpawiteh tu kahmat e hah na hmu nahlangva laplap khi hanh. <sup>2</sup> Na hmaunawngaha ahlanae koe ao e hah na panue hoeh nakunghai na im vah na hrawi pouh han. Na hmaunawngaha ni a tawng hoeh roukrak na im vah na hruek pouh han. Hathnukkhu, na hmaunawngaha koe bout na poe han. <sup>3</sup> La hai thoseh, hnicu hai thoseh, buetbuet touh a kahma e hah na hmawt pawiteh, laplap khi laipalah, hottelah na sak han. <sup>4</sup> Na hmaunawngaha e maitotan nakunghai, la nakunghai lam dawk sut kamlet e na hmawt pawiteh, na kâhrawk takhai mahoe. Na pathaw roeroe han.



<sup>5</sup> Napui ni tongpa e khohna hah khohnat mahoe. Hottelah ka khohnat e teh nangmae BAWIPA Cathut ni a panuet.

<sup>6</sup> Lamthung teng thingkung dawk na ou, talai dawk na ou, tavacanaw hoi hoehpawiteh, a tadinaw khuehoi tavatabu na hmu teh, a manu ma ni awt boipawiteh, a canaw khuehoi a manu mek na lat mahoe. <sup>7</sup> Nang ni hnokahawi na coe teh na hrinyung vang nahanelah, a canaw na la nakunghai, a manu ma teh na tha han.

<sup>8</sup> Im katha na sak navah, lempu hah na tumdum han. Hottelah na sak pawiteh, tami buetbuet touh bawt payon pawiteh, nange im teh thipalawngnae im lah awm mahoe. <sup>9</sup> Misur dawk kâvan hoe e atimu na kahei mahoe. Hottelah na kahei pawiteh, misur paw hoi atimu paw mek a rawk han. <sup>10</sup> Maito hoi la cungtalai laikaw na thawn sak mahoe. <sup>11</sup> Pahla hoi tumuen kacokalei e khohna na khohnat mahoe.

<sup>12</sup> Na kâkayo e hni hah, arai pali touh dawk na yep han.

### *Kathounge yuvâ*

<sup>13</sup> Tami buet touh ni a yu a Paluen teh a ikhai hnukkhu a ma teh, <sup>14</sup> kai ni hete napui teh ka yu lah ka la toe. Ka ikhai hnukkhu, ahni teh, kacuem e nahoe tie ka panue telah ati teh, dudamnae lahoi a min mathout sak pawiteh, <sup>15</sup> hote napui e a manu hoi na pa ni, tanglakacuem lah a onae hah, kacuenaw koe kho longkha koe a thokhai awh han. <sup>16</sup> Hote napui e a na pa ni kacuenaw koe a dei hane teh, kai ni ka canu teh, hete tongpa koe a yu lah ka poe toe. Hatei, ahni ni a pahnawt. <sup>17</sup> Khen haw, nange canu teh kacuem e nahoe ati teh, dudamnae lahoi a min a mathoe sak. Hatei, hetnaw teh ka canu tanglakacuem lah a onae doeh, telah a dei han. Ahnimouh ni kacuenaw e hmalah hni hah a kadai awh han. <sup>18</sup> Hathnukkhu, kacuenaw ni hote tongpa hah a hem awh vaiteh a yue awh han. <sup>19</sup> Ahnimouh ni ahni hah shekel 100 touh a rawng sak awh vaiteh, napui e a na pa hah a poe awh han. Bangkongtetpawiteh, Isarelnaw e tanglakacuem koe min mathoenae hah a sak daw doeh. Hote napui teh ahni e yu lah ao han. A due hoe roukrak hote napui hoi kampek mahoe. <sup>20</sup> Hatei, tongpa ni a dei patelah, awm boi, napui e tanglakacuem lah a onae patue thai hoe pawiteh, <sup>21</sup> khothung e tongpanaw ni hote napui hah a na pa im takhang koe a tâco khai awh vaiteh, talung hoi ka dout lah a dei awh han. Bangkongtetpawiteh, a na pa im vah tak a kâyo e lahoi Isarelnaw koe min mathoenae a kamnue sak toe. Hatdawkvah, nangmouh thung hoi yonnae hah na takhoe awh han.

<sup>22</sup> Tongpa buet touh teh, a vâ ka tawn e napui buet touh hoi a i roi e hah hmawt pawiteh, napui koe ka ip e tongpa hoi hote napui mek thei han. Hottelah Isarelnaw thung hoi yonnae hah na takhoe awh han.

<sup>23</sup> Tanglakacuem hah tongpa ni a hâ hnukkhu, alouke tongpa ni a kho thung vah a hmu teh, ipkhai pawiteh, <sup>24</sup> hote napui ni kho thungvah a hram hoe daw thoseh, tongpa hai a imri e a yu thama lahoi a ikhai daw thoseh, nangmouh ni ahni maroi hah kho longkha koe na ceikhai awh vaiteh, talung hoi kadout lah na dei awh han. Hottelah hoi nangmouh thung hoi yonnae hah na takhoe awh han.

<sup>25</sup> Tongpa buet touh ni tongpa buet touh hoi sut kâhâ tangcoung e napui hah a hmu teh, a man teh hote napui hah ipkhai pawiteh, hote napui ka ipkhai e tongpa dueng hah na thei han. <sup>26</sup> Hatei, hote napui hah bangtelah hai na tet mahoe. <sup>27</sup> Bangkongtetpawiteh, tongpa ni hote napui hah kahrawngum a hmu teh, a hâ tangcoung e napui ni a hram eiteh, ahni



kabawm hanelah apihai ao hoeh dawkvah, hote lai teh tami reira kâthei e hoi a kâvan.

<sup>28</sup> Tongpa buet touh ni hâ hoeh rah e tanglakacuem hah a hmu teh a man teh, ipkhai pawiteh, <sup>29</sup> ahni ka ipkhai e tongpa teh shekel 50 touh napui e a na pa koe a poe vaiteh, hote napui teh, hote tongpa e yu lah ao han. Ahni ni hote napui hah thama lahoi a ikhai dawk doeh. Ahni ni hote napui hah a hringyung thung kapek mahoe. <sup>30</sup> Apinihai na pa e yu hah lat pouh mahoe. A na pa e hni hawng pouh mahoe.

## 23

### *Rangpui thung hoi takhoenae*

<sup>1</sup> Tuenla hoehpawiteh, tongpa e puengcang tâtueng lah kaawm e teh BAWIPA e tamihu dawk kâen mahoe.

<sup>2</sup> Cataca teh, BAWIPA e tamihu dawk kâen mahoe. Se hra totouh kâen mahoe.

<sup>3</sup> Amon miphun hoi Moab miphun hai BAWIPA e tamihu dawk kâen mahoe. Se hra totouh kâen mahoe. <sup>4</sup> Bangkongtetpawiteh, nangmouh ni Izip ram hoi na tâco awh navah, ahnimouh ni vaiyei hoi tui a sin awh teh na dawn awh hoe. Nangmouh thebo sak hanelah, Mesopotamia ram, Pethor kho e Beor capa Balaam hah a hlai awh. <sup>5</sup> Hatei, nange BAWIPA Cathut ni Balaam e lawk tarawi pouh hoe. Nang na pahren dawkvah, thebonae hah yawhawinae lah a kâthungsak. <sup>6</sup> Nang teh ahnimae bawirengnae hoi a hnopai na hringyung thung na khen mahoe. <sup>7</sup> Edom miphunnaw hah, na pahnawt awh mahoe. Ahni teh nange hmaunawnga lah ao. Izipnaw hai na pahnawt mahoe. Ahnimae ram daw san lah ouk na o boi toe. <sup>8</sup> Ahnimae catoun teh se thum touh hnukkhu BAWIPA e tamihu dawk a kâen thainae kâ ao.

### *Thoungnae phunglawk*

<sup>9</sup> Taran tuknae koe na kamthaw nah, kamsoumhoehe hno pueng rounh. <sup>10</sup> Nangmouh thung dawk tami bangpatet hai amae a tâco dawk thounghoehnae awm pawiteh, roenae alawilah a tâco han. Roenae thung kâen mahoe. <sup>11</sup> Tangminlasa a pha toteh tui hoi a pâsu han. Kanî a khup torei roenae thung bout a kâen han. <sup>12</sup> Vaipuen ceinae teh roenae alawilah na ta awh han. Hote hmuen koe alawilah na cei awh han. <sup>13</sup> Na hnopainaw daw sumtaboung na tawn han. Nang ni a alawilah na tahung toteh, hot hoi tangkawm na tai vaiteh, na kamlang sin vaiteh, na vaipuen hah na pakawp han. <sup>14</sup> Bangkongtetpawiteh, nange BAWIPA Cathut ni nang hah na rungngang vaiteh, na tarannaw hah nang koe na poe nahanelah, roenae thung a kâhlai toe. Hatdawkvah, BAWIPA teh nang koe a tho navah, nangmouh koe kathounghoehe hah hmawt vaiteh, nangmouh koehoi a kamlang hoe nahanelah, roenae teh a thoung han.

### *Khosak nahane phunglawknaw*

<sup>15</sup> A bawipa koehoi ka yawng niteh, nang koe ka tho e san teh a bawipa koe na ban sak mahoe. <sup>16</sup> Nangmouh koe kho a sak thai nahan a ngai poung e hmuen a rawi vaiteh, ao van han. Na pacekpahlek mahoe. <sup>17</sup> Isarel napuinaw thung takkâyawt e awm hanh naseh. Napuitongpanaw awm hanh naseh. <sup>18</sup> Takkâyona phu hoi ui phu hah na BAWIPA Cathut e im daw poe nahanelah na sin mahoe. Hot patetlah e hno teh, na BAWIPA Cathut hanelah panuetttho e lah ao.



<sup>19</sup> Na hmaunawnggha koe apung la hanelah, tangka, rawca, apung la thai e hnopai pueng na cawi mahoe. <sup>20</sup> Jentelnaw koe apung la hanelah na cawi sak awh han. Na cei awh teh na coe awh hane ram, na BAWIPA Cathut ni yawhawi na poe awh nahanelah, na hmaunawnggha koe apung la hanelah na cawi sak awh mahoe.

<sup>21</sup> Nange BAWIPA Cathut koe lawk na kam pawiteh, na kam e patetlah sak laipalah awm hanh. Nange BAWIPA Cathut ni atangcalah, a hei han. Na sak laipalah na awm pawiteh, nang koe a yonae a pha han. <sup>22</sup> Hatei, lawk na kam hoehpawiteh, yon mahoe. <sup>23</sup> Na pahni dawk hoi ka tâcawt e lawk hah na kâhruetcuethan. Na BAWIPA Cathut koe nama lungtho lahoi na kam e patetlah na sak han.

<sup>24</sup> Nang teh, na imri e misur takha koe na kâen navah, misur paw na ngai totouh na ca han, hatei, na yawngya dawk hoi na phawt pouh mahoe.

<sup>25</sup> Na imri e laikaw na cei navah, na kut hoi cavui hah na pahroe thai. Hatei, na imri e cavui hah tangkoun hoi na ca mahoe.

## 24

### *Yuvâ kampheinae*

<sup>1</sup> Tongpa buet touh ni yu a la teh, a paluen hnukkhu, yon pen hanelah ao dawkvah, a lungkuep hoehpawiteh, manae ca a thut vaiteh, a poe hnukkhu a cei sak han. <sup>2</sup> Hote napui teh a vâ im hoi a cei hnukkhu alouke tongpa e yu lah o thainae kâ ao. <sup>3</sup> Bout a vâ e ni hai hmawt ngai hoehpawiteh, manae ca a thut teh a kut dawk a poe teh, a im dawk hoi a ceisak nakunghai thoseh, a vâ kadout nakunghai thoseh, <sup>4</sup> ahmaloe e tongpa ni hote kamhnawng e napui hah a yu lah bout lat mahoe. BAWIPA hmalah panuettho e lah ao. Na Cathut BAWIPA ni râw lah na poe ram dawk yon na thokhai mahoe. <sup>5</sup> Yu nuengnueng ka paluen e teh taran tuknae koe cet mahoe. Rangpui thaw hai patoun mahoe. Kum touh thung im ao vaiteh, a yu hah a khetyawt han.

<sup>6</sup> Talung sum avan lae hai thoseh, athung lae hai thoseh, apini hai laiba dawk na lat pouh mahoe. Hottelah na lat pawiteh, a hringnae na la pouh e hoi a kâvan. <sup>7</sup> Tami ni amae hmaunawnggha hai thoseh, Isarelnaw hah a paru teh san lah a ta hai thoseh, a yo hai thoseh, hote tamru hah na hmawt pawiteh, na thei awh han. Nang koehoi yonnae hah hottelah na takhoe awh han.

<sup>8</sup> Hrikbei patawnae dawkvah, Levih ca vaihmanaw ni na pâtu e patetlah na sak awh han. <sup>9</sup> Nangmouh teh, Izip ram hoi na tâco awh teh, kahlawng na cei awh lahun nah, nangmae BAWIPA Cathut ni Miriam koe a sak e hno hah pouk awh.

<sup>10</sup> Nang ni nama e pacanaw koe hno na cawi sak pawiteh, pâhung e hno la hanelah ahnie im thung na kâen mahoe. <sup>11</sup> Nang teh alawilah na kangdue vaiteh, a pâhung e hno hah nang na onae koe alawilah a sin han. <sup>12</sup> Ahni teh roedeng pawiteh, a pâhung e hno poe hanelah kanî na loun sak mahoe. <sup>13</sup> Ahni ni amae hni a kâkhu laihoi a i vaiteh, nang yawhawi na poe nahanelah, a pâhung e hno hah kanî khum pawiteh, na poe mingming han. Hottelah sak e teh, na BAWIPA Cathut hmalah kalan e hno doeh.

<sup>14</sup> Paca reira thoseh, na kho dawk kaawm e Jentelnaw hai thoseh, ka roedeng e hah na rektap mahoe. <sup>15</sup> A hnintangkuem amae thaw tawk phu hah na poe han. Poe laipalah kanî loun sak hanh. Ahni teh a mathoe dawkvah, a hmu hane aphu dawk a lungpen han. Poe laipalah



na awm pawiteh, ahni ni BAWIPA koe hram vaiteh, nang koe yonpennae phat langvaih tie ngaihrinae ao.

<sup>16</sup> Na pa teh capa e yon kecu dawkh thoseh, capa teh na pa e yon kecu dawkh thoseh, thet mahoe. Tami pueng amae yon kecu dawkh duenae a khang awh han.

<sup>17</sup> Kalan lah lawkcengnae koe, Jentelnaw hoi naranaw hah na phen mahoe. <sup>18</sup> Nang teh Izip ram vah san lah ouk na o e hai thoseh, na BAWIPA Cathut ni hote ram thung hoi na ratang e hai thoseh, na pouk han. Hatdawkvah, hete phunglawk hah na hruek pouh awh.

<sup>19</sup> Nang ni na laikawkh dawkh cang na a toteh, na pahnim e cabong hah bout na lat mahoe. Na tawksak e pueng dawkh na BAWIPA Cathut ni yawhawi na poe nahanelah, hote cabong hah, Jentelnaw hane, naranaw hane, lahmaw hanelah na hruek han. <sup>20</sup> Nange olive paw na karuek toteh, kacawie naw hah bout na karuek mahoe. Jentelnaw, naranaw, lahmaw hanelah na hruek pouh awh han. <sup>21</sup> Na misur takha dawkh, misur paw na khi toteh, kacawiraenaw hah bout na khi mahoe. Jentelnaw, naranaw, lahmaw hanelah na hruek pouh awh han. <sup>22</sup> Nangmouh teh Izip ram vah san lah ouk na o awh e hah na pouk awh han. Hatdawkvah, hete phunglawk hah na hruek pouh awh.

## 25

<sup>1</sup> Tami reira kâyue pawiteh, lawkcengim vah a cei awh vaiteh, lawkcengkung ni ahnimanaw hah lawk a ceng han. Kalan e tami hah yon hloutsak nahanelah thoseh, ka yon e teh sungsak nahanelah thoseh lawk na ceng han. <sup>2</sup> Ka yon e hah hem kamcu pawiteh, lawkcengkung ni a hmalah ao sak vaiteh, a yon hoi kamcu lah nâyittouh tie hoi a hem han. <sup>3</sup> Hatei, avai 40 hlak kapap lah na hem mahoe. Hot hlak kapap lah na hem pawiteh, na hmaunawngaha teh na hmalah yeirai a phu han doeh.

<sup>4</sup> Cangkatin lahun e maito hah a pahni moum pouh hanh.

### *Leviwnaw e kâpaluennae*

<sup>5</sup> Reirei kaawm e hmaunawngahanaw thung dawkvah, buetbuet touh ni ca sak laipalah dout pawiteh, hote napui teh alouke tamikathan hoi kâyuva mahoe. A vâ e nawngaha ni a paluen vaiteh, a yu lah awm khai naseh. <sup>6</sup> Isarel miphun dawkh hmau min a kahma hoe nahanelah, camin teh, kadout e na pa kacue e min a phu han. <sup>7</sup> A nawngaha ni a hmau e yu hah la hane ngai hoehpawiteh, napui ni kacuenaw onae koe, kho longkha koe a cei vaiteh, ka vâ e nawngaha ni, a hmau e min hah Isarel miphun thung caksak hanelah ngai hoe. A sak hane kawi hai sak hane ngai hoe telah dei pawiteh, <sup>8</sup> khothung vah kacuenaw ni ahni hah a kaw awh vaiteh, a pacei awh han. Ahni ni hai hote napui hah ka lat ngai hoe telah muentakuen lah awm pawiteh, <sup>9</sup> a hmau e yu ni kacuenaw e hmalah, ahni koe rek a cei vaiteh, ahnie khokkhawm hah a rading pouh vaiteh, a minhmai dawkh a tamthawi pouh vaiteh, hmau e im kangdue sak hanlah ka ngai e tami koe hettelah ti hanelah ao telah a dei pouh awh han. <sup>10</sup> A hnukkhu vah, ahni hah khokkhawm rading e miphun telah kaw lah ao han. <sup>11</sup> Tami reira a kâyue awh navah, buet touh e a yu ni amae vâ kabawp hah a ngai dawkvah, alouke tongpa e minro hah sawn pouh boipawiteh, <sup>12</sup> hote napui e kut hah tâtueng pouh han. Na pahren mahoe.

<sup>13</sup> Na yawngya dawkh kalen e khinglung, kathounge khinglung tie kâvan hoe e khinglung na awm sak mahoe. <sup>14</sup> Nama im vah khingnae kalen kathoung na awm sak mahoe. <sup>15</sup> Na BAWIPA Cathut ni na poe e ram



dawk na hringyung a vang nahanelah, kahman e khinglung, kahman e yawcu dueng hah na hno han. <sup>16</sup> Dei tangcoung e hno ka sak e tami pueng hoi kamsoum hoeh lah ka sak tami pueng teh, nange BAWIPA Cathut ni a panuet.

<sup>17</sup> Nang teh Izip ram hoi na tâco teh kahlawng na cei toteh, <sup>18</sup> na tha a baw teh na tawn lahun nah, na hnukkâbangnaw, a thakayounnaw hah Amaleknaw ni lamthung dawkvah a thei awh e hai thoseh, Cathut hah a taki awh hoeh e hai thoseh, pouk la a. <sup>19</sup> Hatdawkvah, BAWIPA Cathut ni râw lah na poe e ram dawk, na tengpam kaawm e taran pueng e kut dawk hoi na hlout sak teh yawhawi na poe toteh, Amaleknaw heh pouknae ao hoeh nahanelah, kalvan rahim vah na raphoe awh han. Hot hah na pahnim mahoe.

## 26

### *Aluepaw hoi Hra touh dawk buet touh thuengnae*

<sup>1</sup> Nange BAWIPA Cathut ni râw lah na poe e ram dawk, na kâen teh, na coe hnukkhu hawvah kho na sak awh toteh, <sup>2</sup> nange na BAWIPA Cathut ni na poe e na ram dawk e na khi e talai a pawhik a phunphun dawk e aluepaw na la vaiteh, tangthung dawk na raseng vaiteh, na BAWIPA Cathut e min ao nahanelah rawi e hmuen koe na ceikhai han. <sup>3</sup> Hatnae tueng dawkvah, vaihmanaw koe na cei vaiteh, ahnimouh koe na dei pouh han e teh, maimouh na poe hanelah mintoenaw koe Cathut ni a kam e ram dawk pha awh toe, telah nange BAWIPA Cathut koe sahnin ka pathang telah na dei awh han. <sup>4</sup> Vaihma ni tangthung a la vaiteh, BAWIPA e hmalah a pâhung han.

<sup>5</sup> Nang ni na BAWIPA e hmalah na dei hane teh, ka kâva e Aram miphun teh kaie na pa doeh. Ahni teh Izip ram lah a ceicathuk teh, tami youn touh hoi imyin patetlah ao. Hatei, hote hmuen koevah, puenghoi a kampung awh teh, a thao awh. <sup>6</sup> Izipnaw ni kaimanaw hah na rektap awh teh, kaimouh van vah, thaw karunaw hah a tounng awh. <sup>7</sup> Hat toteh, kaimouh ni BAWIPA koe ka hram awh teh, BAWIPA ni kaimae lawk hah a thai teh, kaimae runae, thatawnnae, hoi rektapnae hah na hmu pouh. <sup>8</sup> Hatdawkvah, BAWIPA ni a dâw e thaonae kut hoi, takikatho poung e hoi, mitnout hoi, kângairu hnonaw hoi kaimanaw hah Izip ram thung hoi na tâcokhai awh. <sup>9</sup> Hete khoitui hoi maito sanutui a lawngnae hmuen hah kaimouh na poe awh. <sup>10</sup> Atu khenhaw! Oe BAWIPA, nang ni na poe e ram thung e aluepaw hah na thokhai toe telah na dei awh han. Hathnukkhu, nang ni hote aluepaw hah na BAWIPA Cathut e hmalah na pâhung vaiteh, na BAWIPA Cathut e hmalah na bawk han. <sup>11</sup> Na BAWIPA Cathut ni na poe e kahawi e hno pueng dawkvah, nama hoi na imthungkhu hoi, Levihnaw hoi, nangmouh koe kaawm e imyinnaw hoi cungtalâh na lunghawikhai awh han.

<sup>12</sup> Nang ni, na hmu e thung dawk, hra touh dawk buet touh poenae kum a kum thum kum dawkvah, pung hra pung touh na hruek toteh, Levihnaw, imyinnaw, naranaw, hoi lahmmainunaw hah na poe han. Hottelah na sak pawiteh, ahnimouh hai a von a paha van han. <sup>13</sup> Hathnukkhu, nang ni na BAWIPA Cathut e hmalah na dei hane teh, kai ni ka talue sak e poe hane hno im hoi ka takhoe teh, nang ni na dei kâpoelawknaw patetlah imyinnaw, Levih naranaw, hoi lahmmainunaw hah ka poe toe. Kai teh nange kâpoelawknaw ka tapoe hoeh. Ka pahnim hoeh. <sup>14</sup> Kai teh kadoutnaw hanelah ka lungmathoe toteh, hote hnonaw hah ka cat hoeh.



Ka khin nah hote hno hah kai ni ka takhoe hoeh. Kadoutnaw hanelah hote hno hah ka poe hoeh. Ka BAWIPA Cathut e lawk hah ka tarawi toe. Kai hanelah na dei pouh e patetlah ka tawksak toe. <sup>15</sup> Kathounge na onae hmuen kalvan hoi na khét navah, na tami Isarelnaw hoi kaimae mintoenaw koe lawk na kam e ram, khoitui hoi maitosanutui a lawngnae ram yawhawi poe haw telah na dei han. <sup>16</sup> Sahnin hete phunglawknaw hoi lawkcengnaenaw hah na tarawi nahanelah na BAWIPA Cathut ni na poe toe. <sup>17</sup> Sahnin vah a lamthung dawn laihoi phunglawk, kâpoelawk, lawkcengnae hoi a lawk ngâi hanelah BAWIPA teh na Cathut lah ao nahan na pathang toe. <sup>18</sup> BAWIPA ni nang teh amae miphun lah na o titeh a pathang toe. Hatdawkvah, nang ni amae kâpoelawk pueng hah na tarawi hanelah ao toe. <sup>19</sup> Hathloilah, a sak e miphun pueng e lathueng vah oupnae, kamthangnae, barinae lah na o sak han. Ama ni lawk a kam tangcounge e patetlah nang teh BAWIPA Cathut hanelah kathounge miphun lah na o han.

## 27

### *Lungphen dawk thut e kâlawk*

<sup>1</sup> Hathnukkhu, Mosi hoi Isarel kacuenaw ni taminaw koe a dei awh e teh, sahnin kai ni ka hruek e kâpoelawk pueng hah tarawi awh. <sup>2</sup> Nang ni Jordan palang na raka teh, BAWIPA Cathut ni na poe e ram dawk na pha toteh, kalen e talungnaw hah ung nateh, thungpangaw hoi na hluk han. <sup>3</sup> Mintoenaw ni a bawk awh e Cathut BAWIPA ni a lawkkam ao e patetlah nang na poe e ram, khoitui hoi maitosanutui a lawngnae ram kâen hanelah na raka hnukkhu, hete kâlawk dawk e lawklung pueng hah hotnaw dawk na thut han. <sup>4</sup> Jordan palang raka hnukkhu, sahnin kai ni lawk na thui e talungnaw hah, Ebal mon dawk na ung vaiteh, mirangtalai hoi na kanan han. <sup>5</sup> Hote hmuen koehai na BAWIPA Cathut hanelah, <sup>6</sup> thuengnae khounge hah talung hoi na sak awh han. Sum hno laipalah, pathei hoehe talung hoi na sak han. Nang BAWIPA Cathut hah hote khounge dawk hmaisawi thuengnae na thueng han. <sup>7</sup> Roum thuengnae hai na thueng vaiteh, hote hmuen koe na canei awh vaiteh, a hmalah nawmnae na sak awh han. <sup>8</sup> Hote talung dawkvah, hete lawknaw hah kancengcalah na thut han.

<sup>9</sup> Hathnukkhu, Mosi hoi vaihmanaw, Levihnaw niyah, Oe Isarel miphun, kâhruetcuete laihoi thai haw. Sahnin nang teh, BAWIPA Cathut e miphun lah na o toe. <sup>10</sup> Hatdawkvah, na BAWIPA Cathut e lawknaw hah na tarawi han. Sahnin kaimouh ni patuen ka dei awh e kâpoelawknaw hoi phunglawknaw hah tarawi telah Isarelnaw pueng hah a dei pouh awh.

### *Ebal mon hoi thoebonae*

<sup>11</sup> Mosi ni hot hnin vah, taminaw koe kâ a poe e teh, <sup>12</sup> nangmouh ni Jordan palang na raka awh hnukkhu, taminaw yawhawi poe hanelah Gerizim mon dawk ka kangdout hane naw teh: Simeon, Levi, Judah, Issakhar, Joseph, hoi Benjamin tinaw doeh. <sup>13</sup> Thoebo hanelah Ebal mon dawk ka kangdout hane naw teh: Gad, Reubeb, Asher, Zebulun, Dan, hoi Naphtali tinaw doeh. <sup>14</sup> Hatnavah, Levihnaw ni Isarelnaw koe puenghoi a hramkhai hane lawk teh,

<sup>15</sup> BAWIPA ni a panuet e hno, kutsak hlun e meikaphawk ka sak niteh, a kamnuhoehnae koe ka tat e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.



<sup>16</sup> Manu hoeh pawiteh na pa ka dudam e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>17</sup> Imri e lawrilung ka puen e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>18</sup> Mittedawn lam ka phen sak e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>19</sup> Kalan lah lawkceng navah, miphun alouknaw, naranaw, lahmawinaw hah kamsoum hoeh lah ka sung sak e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>20</sup> Na pa hoi dueng kâkuen e na pa e a yu hah ka ipkhai e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>21</sup> Saringnaw buetbuet touh ka ipkhai e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>22</sup> Na pa e canu, manu e canu, mae tawncanu ka ipkhai e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>23</sup> Yu e manu ka ipkhai e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>24</sup> Imri hah arulahi ka thet e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>25</sup> Yon ka tawn hoehe tami thei hanelah aphu ka lat e tami teh yawthoenae awm lawiseh telah thoe a bo awh vaiteh, tami pueng ni Amen ati awh han.

<sup>26</sup> Hete kâlawk dawk e lawklungnaw ka cak sak hoehe teh yawthoenae awm lawiseh telah thoe a bo awh vaiteh, tami pueng ni Amen ati awh han.

## 28

### *Lawkngainae dawk yawhawinae*

<sup>1</sup> Sahnin kâ na poe e kâpoelawknaw na tarawi nahanelah, na BAWIPA Cathut e lawk hah na ngai pawiteh, BAWIPA Cathut ni nang teh miphunnaw lathueng na tawm han. <sup>2</sup> Na BAWIPA Cathut e lawk hah na tarawi pawiteh, nang koe ka tho hane yawhawinaw hateh: <sup>3</sup> Nang teh khothung vah yawhawi, kahrawngum hai yawhawi lah na o han. <sup>4</sup> Canaw lahoi thoseh, talai a pawhik lahoi thoseh, saring ni a khe e a canaw lahoi thoseh, tu hoi maitonaw lahoi thoseh, yawhawinaw lah na o han. <sup>5</sup> Tangthung dawk thoseh, tavai kanawknae kawlung dawk thoseh, yawhawinaw ao han. <sup>6</sup> Na im thung na kâen nah yawhawinaw ao han. Alawilah na tâco nah yawhawinaw ao han.

<sup>7</sup> Nang na ka tuk hane tarannaw hah na hmalah BAWIPA ni a sung sak han. Ahnimouh teh lamthung buet touh hoi nang koe a tho awh eiteh, lamthung sari touh hoi a yawng awh han. <sup>8</sup> Nange hnoim dawk thoseh, na tawksaknae tangkuem dawk thoseh, BAWIPA nang koe yawhawinaw pha sak hanelah a dei pouh awh han. BAWIPA Cathut ni na poe e ram dawknang yawhawinaw na poe han. <sup>9</sup> Nang teh na BAWIPA Cathut e kâpoelawknaw na tarawi teh, a lamthung dawknang na dawn pawiteh, BAWIPA ni thoebo e patetlah nang hah BAWIPA hanlah, kathounge miphun lah pou na o sak han. <sup>10</sup> Nang teh, BAWIPA e min lahoi kaw lah na o tie miphun pueng ni a panue teh, na taki awh han. <sup>11</sup> BAWIPA ni nang koe na poe hanelah, mintoenaw koe thoebo e ram dawknang hnopai, na canaw, saring pungdawnae hoi talai dawknang pawhik a pung sak han. <sup>12</sup> BAWIPA ni atueng a pha torei



teh, nange ram dawk kho a rak sak hane thoseh, na sak nah tangkuem dawk yawhawî poe hane thoseh, kalvan hnoim a paawng han. Nang ni miphunnaw hah câwisaknae kê ao han. Ahnimouh ni nang na cawî sak mahoe. <sup>13</sup> BAWIPA ni nang teh a mai lah na awm sak laipalah, a lû lah na o sak dawkvah, nang teh rahim lah na awm laipalah, lathueng lah onae kê na tawn han. <sup>14</sup> Sahnin kai ni kê na poe e lawknaw thung hoi avoillah, aranglah phen laipalah, alouknaw e cathut bawk laipalah na awm awh pawiteh, hottelah e hawinae hah na coe awh han.

*BAWIPA lawk kangaihoehnaw thoebo yawthoenae*

<sup>15</sup> Sahnin ka dei e BAWIPA Cathut ni lawk na poe e pueng na tarawî hanelah, lawk na ngâi hoehpawiteh, na lathueng ka phat hane thoebonae hateh: <sup>16</sup> Nang teh khothung hai thoseh, kahrawngum hai thoseh yawthoe lah na o awh han. <sup>17</sup> Tangthung dawk thoseh, tavai kanawknae kawlung dawk thoseh, thoebo lah ao han. <sup>18</sup> Canaw lahoi thoseh, talai a pawhik lahoi thoseh, saring ni a khe e a canaw lahoi thoseh, tu hoi maitonaw lahoi thoseh, thoebo lah na o han. <sup>19</sup> Na im thung na kêen nah thoebo lah na o han. Alawilah na tâco nah thoebo lah ao han. <sup>20</sup> BAWIPA na pahnawt teh na sakpayon e yon kecu dawk, karang poung lah rawknae koe na pha hoehroukrak, na tawksak e pueng dawk rektapnae, tarawknae, pathoenae naw teh na lathueng vah a pha sak han. <sup>21</sup> Na cei teh na coe hane ram dawk hoi be na raphoe hoehroukrak, lacik ka pha sak han. <sup>22</sup> BAWIPA ni laheipatawnae, vairoe, ekkhu, vuenpatawnae, tahloi hoi theinae, kahli hoi thingthairompo due saknae, ahri ni ca e lahoi thingthairompo due saknae, khokangnae naw hoi na rawk totouh, hote laciknaw ni na pâlei han. <sup>23</sup> Na lathueng e kalvan teh na lû dawk rahum patetlah thoseh, na rahim e talai hai sum patetlah ao han. <sup>24</sup> BAWIPA ni na ram dawk ka rak e kho hah lailo hoi vaiphu lah o sak dawkvah, na rawk hoehroukrak kalvan lahoi na van a bo sak han.

<sup>25</sup> Na tarannaw hmalah BAWIPA ni lacik na poe han. Lamthung buet touh dueng dawk hoi na cei sin ei, lamthung sari touh dawk hoi na yawng awh vaiteh, talai van kaawm e khoram tangkuem na kampuen awh han. <sup>26</sup> Na ro teh tavanaw, kahrawng e moithangnaw ni ca hanelah ao han. Hote moithangnaw hah apinihai pâlei mahoe. <sup>27</sup> BAWIPA ni nang hah Izip ram e âhlut, baksa, takpatha e lahoi lacik na poe han. <sup>28</sup> Pathunae, mitdawnnae, lungpuennae lacik a pha sak vaiteh, <sup>29</sup> mitdawn ni hmonae koe a payam e patetlah nang teh kanithun vah thupthup na payam han. Na sak e hno dawk na cum laipalah, rektapnae, lawpnae na khang vaiteh, apinihai na rungngang mahoe. <sup>30</sup> Yu na paluen eiteh, ayânaw ni a ikhai han. Im na sak eiteh, na awm nah mahoe. Misur na yung eiteh, a paw na khi mahoe. <sup>31</sup> Na maito hah na hmalah a thei awh eiteh, nama ni na cat mahoe. Nange la hah na hmalah thama lahoi a ceikhai awh eiteh, bout na poe awh mahoe toe. Nange tunaw hah taran kut dawk poe toteh, ka rungngang hane awm mahoe. <sup>32</sup> Na canaw teh ayâ kut dawk a pha teh, na mit ni kanîrui a khet vaiteh, a tha a baw han. Na kut hai a tha awm mahoe. <sup>33</sup> Na panuepaca hoe e miphun ni na ram dawk e a pawhik hai thoseh, na tawk teh na hmu e hnonaw hai thoseh a ca awh han. Nang teh rektapnae dueng doeh pout laipalah na khang ti. <sup>34</sup> Hottelah, ma ni kheh kâhmo e dawkvah, nang teh na pathu han. <sup>35</sup> BAWIPA ni na khokpakhu hoi na khok hloilah, na khoktabei koehoi kamtawng teh, na laduem koe totouh, kahmat thai hoe e lacik a pha sak han.



<sup>36</sup> BAWIPA ni nang ni na tawm e siangpahrang hah, nang hoi na mintoenaw ni a panue boihoe e miphun koe, na thak vaiteh, nang teh alouke cathut, thing cathut, talung cathutnaw hah na bawk han.

<sup>37</sup> BAWIPA ni nang na thaknae ram tangkuem dawkvah, nang teh, kângairunae, bangnuebangta nahane, pathoe hanelah na o han. <sup>38</sup> Nang ni cati moikapap laikaw koe na sin eiteh, awsinaw ni a ca dawkvah, cakang youn touh ca doeh na a ti. <sup>39</sup> Misur takha na sak teh, misur ka ung nakunghai, ahri ni a ca dawkvah, nama ni misur paw na khi mahoe. Misur tui hai na net mahoe. <sup>40</sup> Na onae koe olivekung ao eiteh, a paw hmin hoehnahlan a sarut dawkvah, nang teh olive satui na kâhluk mahoe. <sup>41</sup> Canu capa na khe eiteh, ahnimouh hoi na nawm mahoe. Taran ni san lah a man han. <sup>42</sup> Na onae ram dawkvah, thing kaawm e pueng, talai a pawhik kaawm e pueng, awsi ni a ca han. <sup>43</sup> Nang hoi rei kaawm e imyinnaw teh, rasang vaiteh, nang van a luen awh han. Nang law teh rahim lah na kum han. <sup>44</sup> Ahni ni nang na cawi sak vaiteh, nang ni ahni na cawi sak mahoe. Ahni ni a lû lah awm vaiteh nang law teh a mai lah na o han.

<sup>45</sup> Bawi ni na poe e kâpoelawknaw hoi BAWIPA e phunglawknaw hah tarawi nahanelah na BAWIPA Cathut e lawk na ngâi hoe dawkvah, nang teh, na rawk totouh hete thoebonae teh nang lathueng phat vaiteh, na pâlei vaiteh rek na patawt han. <sup>46</sup> Nang lathueng thoseh, na catounnaw lathueng thoseh, pout laipalah mitnoutnae kângairu hno lah ao han. <sup>47</sup> Hnopai na tawn toteh, lunghawinae hoi BAWIPA Cathut e a thaw hah na taw awh hoe dawkvah, <sup>48</sup> BAWIPA ni a patoun e tarannaw e thaw hah vonhlan hoi, tui kahran hoi, caici lah onae hoi bangpueng dawk roedeng laihoi na taw awh han. Na rawk awh hoehroukrak na lahuen dawk sumkahnna a bang awh han. <sup>49</sup> Ahla poungnae koe e miphunnaw hah nangmouh tuk sak hanelah, BAWIPA ni patoun vaiteh, mataw kamleng e patetlah a tho awh han. <sup>50</sup> A lawk na thai awh hoe e miphun, kacuenaw hai ka bari hoe e miphun, kanawnaw hai ka pahren hoe e miphun, ka matheng e miphun lah ao awh han. <sup>51</sup> Na rawk awh hoehroukrak, taran ni na tuca, maitoca, talai a pawhik ca hane, cakang, misurtui, satui pueng nang hanelah pek mahoe.

<sup>52</sup> Na ram dawk e na kâuep e khopui rapannaw pueng a tip awh hoehroukrak, na khoram kaawm e pueng a kalup awh han. Na BAWIPA Cathut ni na poe e na ram kaawm e pueng, na khoram kaawm e pueng dawk hai thoseh a kalup awh han. <sup>53</sup> Na taran ni khik na kalup dawkvah, na BAWIPA Cathut ni na poe e canu capa camosennaw e moinaw hah na ca awh han. <sup>54</sup> Na onae kho hah taran ni khik a kalup toteh, <sup>55</sup> a nuen kahawi e tongpa ni a takang lawi vah, amae hmau, a pahren e a yu, hoi a pek e a canu capanaw patenghai yah, rei van laipalah a ca han. <sup>56</sup> Na onae kho hah taran ni khik a kalup teh runae na kâmo toteh, a takthai a naw lawi vah, talai patenghai ka coungroe boihoe e napui ni hai, a pahren e a vâ, a canu hoi a capa patenghai hmawt ngai mahoe. <sup>57</sup> A khe e camonaw hoi a thunnaw patenghai arulaho a ca awh han.

<sup>58</sup> Na BAWIPA Cathut, ka lentoe ni teh takikatho poung e min hah taki hanelah thoseh, hete kâlawk dawk thut lah kaawm e hete lawklungnaw pueng hah kâhructuet lahoi na tarawi hoe pawiteh, <sup>59</sup> nange lacik hoi na ca catounnaw koe ka phat hane lacik hah atueng ka saw sak vaiteh, dam thai hoe e kângairu han kawi hah BAWIPA Cathut ni a tho sak han.

<sup>60</sup> Hotnaw e hmalah, nang ni na taki e Izip ram e patawnae pueng hai



BAWIPA ni nang dawkh a pha sak han. Hotnaw teh nang dawkh a kâbet awh han.

<sup>61</sup> Hothloillah, hete kâlawk cauk dawkh thut lah kaawm hoehe e pataw-panatnae lacik kaawm naw pueng hai, na rawk hoehroukrak BAWIPA ni nang dawkh a pha sak han. <sup>62</sup> Kalvan e âsi yit touh na kapap awh nakunghai, BAWIPA Cathut e lawk na ngâi awh hoehe dawkhvâh, kayounca lah na o awh han. <sup>63</sup> BAWIPA ni nangmouh hanlah hawinae sak e hoi pungdaw sak hanelah a ngai e patetlah nangmouh lathueng rawknae pha sak hane hoi nangmouh raphoe e dawkh a lunghawi teh, coe hanelah na kâen sin awh e ram thung hoi phawkh lah na o awh han. <sup>64</sup> BAWIPA Cathut ni talai poutnae koehoi avanglah apoutnae koe totouh, miphun pueng koe na kâkahei sak han. Hawvâh, na mintoenaw ni a panue awh hoehe e thing cathut, talung cathutnaw hah na bawkh awh han. <sup>65</sup> Hote miphunnaw rahak vah, nang teh roumnae awm mahoehe. Na khok kâhatnae awm mahoehe. Lungtâsuenae, mit thayounnae, hoi lungthoengnae hah BAWIPA ni na poe han.

<sup>66</sup> Nang teh karum khodai pout laipalah, lungpuennae hoi, kadout han na ou, ka hlout han na ou tie panuek laipalah na o han. <sup>67</sup> Na lungthung vah takinae, na mit hoi na hmu e hno dawkhvâh, nang ni amom vah tangmin a pha lei saw na ti vaiteh, tangmin vah, amom a pha lei saw na ti han. <sup>68</sup> Hote lam hah bout na hmawt awh mahoehe toe ka tie lam dawkh hoi BAWIPA ni nang hah Izip ram lah lawng hoi bout na thakh dawkhvâh, hote ram dawkh sanpa sannu lah o hanelah, tarannaw koe na yo awh han. Hateiteh, apinihai nang hah na ran ngaihoehe telah Isarelnaw koe a dei awh han.

## 29

### *Moab ram vah BAWIPA hoi Isarelnaw lawkkamnae*

<sup>1</sup> Hethateh, Horeb hmuene koe Isarelnaw hoi BAWIPA ni lawkkam e hloilah, Moab ram dawkh Isarelnaw hoi lawkkam hanelah, Mosi koe a dei pouh e lawkkam lawk doeh.

<sup>2</sup> Mosi ni Isarelnaw pueng ama koe a kaw teh, nangmouh ni patuen bout na dei awh hane teh, Izip ram Faro siangpahrang hoi a taminaw hoi a ram pueng e lathueng na mithmu roeroe vah, BAWIPA ni a sak e pueng teh be na hmu awh toe. <sup>3</sup> Tanouknae, mitnoutnaw, hoi kângairu hnônaw hah na mit hoi roeroe na hmu awh. <sup>4</sup> Hatei, thaipanueknae lung, hmuthaina mit, thaithaina hnânaw hah sahnin ditouh na poe awh hoehe rah. <sup>5</sup> A kum 40 touh thung kahrawngum vah nangmouh na hrawi awh toe. Nangmae khohna pawn hoehe. na khokkhawm hai pawn hoehe. <sup>6</sup> BAWIPA teh nangmae BAWIPA Cathut lah ao tie na panue awh nahanelah, nangmouh ni vaiyei na cat awh hoehe, misur hoi yamu hai na net awh hoehe. <sup>7</sup> Hete hmuene koe na pha awh navah, Heshbon siangpahrang Sihon hoi Bashan siangpahrang Og tinaw teh, kaimouh na tuk hanelah a tho awh teh, kaimouh ni ka tâ awh. <sup>8</sup> Aram ka la awh hnukkuh Reuben, Gad, Manasseh miphun tangawn naw hah râw lah ka poe awh. <sup>9</sup> Na tawksak awh e hno pueng dawkhvâh, hawinae na coe awh nahanelah, hete lawkkam heh kuen awh nateh hringkhai awh.

<sup>10</sup> Atuvah miphun kahrawikung abuemlahoi, <sup>11</sup> kacuenaw hoi kahrawikungnaw, Isarelnaw pueng, camosennaw, na yunaw, na imlunenaw, na thing katâtuengnaw, na tui kadonaw totouh, <sup>12</sup> sahnin BAWIPA ni nangmouh koehav, thoebo lah kaawm e lawkkam thungvah na kâen awh



thai nahane hoi, <sup>13</sup> na pa Abraham, Isak, hoi Jakop hoi nangmouh koe lawk a kam teh a dei tangcoung patetlah nangmae Cathut lah ao thai nahane hoi a tami lah na o thai nahanelah caksak lah na o awh nahan, <sup>14</sup> thoebonae hoi lawkkamnae hah nangmouh koe dueng ka sak e tho hoeh. <sup>15</sup> Sahnin BAWIPA Cathut hmalah kangdout e hoi atu hi kaawm hoeh e naw koehai a sak e doeh.

<sup>16</sup> (Bangkongtetpawiteh, Izip ram vah bangtelamaw khosak awh tie hoi nangmouh ni na ceinae miphunnaw e rahak vah bangtelamaw na cei awh tie hai na panue awh. <sup>17</sup> Ahnimae panuetho e hnopainaw hoi, ahnimouh koe kaawm e thing, talung, sui, ngun naw hoi sak e ahnimae meikaphawknaw hah nangmouh ni na hmu awh toe. ) <sup>18</sup> BAWIPA Cathut koehoi phen hane ngainae lungpouk na tawn awh teh, hote miphunnaw e cathutnaw koe na cei awh teh, tongpa, napui, imthung thoseh, miphunnaw hoi ka cet e, kakhat e a paw lungkhueknae a paw, a khongyang teh nangmouh daw k a paw han tie thoseh, <sup>19</sup> hot patetlae tami teh, thoebonae lawk a thai navah, a lungpata e patetlah ka sak vaiteh, tui kahrannae daw k paruinae mek bawksak nakunghai, lungmawng lah ka o han ka tet e awm langvaih tie ngaihrinae ao. <sup>20</sup> Ahni teh BAWIPA ni pasai hoeh, dipmanae, lungkhueknae hmaikhu a tâco teh, Cakathoung daw k thut e thoebonae naw ahnimae lathueng ao han. BAWIPA ni ahnie min teh, kalvan rahim a raphoe han. <sup>21</sup> Hete kâlawk cauk daw k thut e thoebonae lawkkam e patetlah Isarel miphun pueng thung hoi BAWIPA ni a kapek han. <sup>22</sup> Ram thungvah BAWIPA ni a poe hane lacik hoi patawnae hah na hnuklah ka tho hane sekatha na catounnaw hoi ahlanae koehoi ka tho hane ramlouk e taminaw ni a hmu awh toteh, <sup>23</sup> Ram thungvah gan, palawi, hoi hmaisaan, cati patue thaihoehnae, apawhik a tâcohoehnae, a lungphuenna e hoi a lungkhueknae hoi BAWIPA ni a tâkhawng e Sodom hoi Gomorrah hoi Admah hoi Zebaiim patetlah a tâkhawng e a hmu awh toteh, <sup>24</sup> miphun pueng ni, bangkongmaw BAWIPA ni hete ram heh hettelah a sak. Hete kalenpounge lungkhueknae heh bang nama aw ati awh han. <sup>25</sup> Hattoteh taminaw ni, Izip ram hoi a tâcokhai navah, ahnimouh hoi lawk a kam e ahnimae mintoenaw e BAWIPA Cathut e lawkkam hah a ceitakhai awh teh, <sup>26</sup> ahnimouh hanelah banghai ka pouk thai hoeh e cathut alouke, a panue awh boihoeh e cathut thaw a taw k awh daw k doeh ati awh han. <sup>27</sup> Hete cakathoung daw k thut lah kaawm e thoebonae pueng, hete ram daw k phasak hanelah, BAWIPA a lungkhuek. <sup>28</sup> BAWIPA ni lungphuenna e, puenghoi lungkhueknae, Lungphuenna e hoi ahnimae ram daw k hoi ahnimouh hah a rasa teh, sahnin e patetlah alouke ram daw k a pâlei toe tie hah doeh. <sup>29</sup> Kamnuek hoeh rae naw teh BAWIPA Cathut mae doeh. Hatei, pâpho e naw teh maimouh hoi maimae canaw hanelah pout laipalah ao teh, hete kâlawnaw pueng teh tarawi nahanelah doeh.

## 30

### *BAWIPA koe bout bannae*

<sup>1</sup> BAWIPA Cathut ni na hreknæ miphunnaw pueng koe kaawm e na hmalah ka hruek e yawhawinae hoi thoebonae hah na panue awh teh, <sup>2</sup> BAWIPA koe bout na ban awh teh, atu kâ na poe e patetlah nama hoi na canaw hoi na lungthin, hringnae abuemailahoi a lawk na tarawi awh pawiteh, <sup>3</sup> BAWIPA Cathut ni san coungræ koehoi na ban sak awh vaiteh, na pahren awh han. Hahoi BAWIPA ni miphun pueng koe kâkayeinae



koehoi bout na pâkhueng awh han. <sup>4</sup> Nangmouh thung dawk talai pout totouh pâlei e awm pawiteh, BAWIPA na Cathut ni hote hmuen koehoi bout na pâkhueng awh vaiteh, hote hmuen koehoi bout na tâcokhai awh han. <sup>5</sup> Mintoenaw ni a pang e ram koelah, bout na hrawi awh vaiteh, na pang a han. Hatnavah bout na pahren awh vaiteh mintoenaw hlak hoe na pung sak han. <sup>6</sup> Na hring thai nahan, BAWIPA na Cathut hah lunghin, hringnae abuemlahoi lungpataw sak hanlah, BAWIPA na Cathut ni na lunghin hoi na catounnaw e lunghin vuensom a a pouh han. <sup>7</sup> Nang na ka taran ni teh na kapacekpahlekna, lathueng hai thoseh, ka dei tangcoung patetlah theobonae pueng ka pha sak han. <sup>8</sup> Bout na ban vaiteh, BAWIPA e a lawk dei e na tarawi vaiteh, sahnin na poe e kâpoelawknaw pueng na tarawi awh han. <sup>9</sup> Nang ni na BAWIPA Cathut e lawk hah na tarawi teh, <sup>10</sup> kâlawk cauk dawk thut e lah kaawm e phunglawk pueng na tarawi pawiteh, na BAWIPA Cathut koe na lunghin abuemlahoi bout na ban pawiteh, na tawk e pueng dawk tânae na hmu awh nahan hoi na canaw, saringnaw, apawhiknaw pung sak vaiteh, nang han hawinae na sak pouh han. BAWIPA teh na mintoenaw koe a lunghawi e patetlah nang dawk a lunghawi vaiteh, nang hanelah ahawinae lah a sak han.

### *Hringnae hoi duenae*

<sup>11</sup> Sahnin na poe e lawk teh na thaipanuek hoeh e lawk nahoe. <sup>12</sup> Nang hoi kâhlat hoeh. A lawk ngâi awh teh tarawi nahanelah, kalvan vah apimouh ka luen vaiteh, maimouh koe ka thokhai tie hah pacei sak hanelah kalvan vah kaawm e nahoe. <sup>13</sup> A lawk teh maimouh ni ngâi awh teh, tarawi awh nahan, talî apimaw ka rakat ni teh maimouh koe ka thokhai han telah ka pacei hanelah talî namran lah kaawm e nahoe. <sup>14</sup> A lawk teh na tarawi nahanelah nang hoi a hnai poun. Na pahni daw thoseh, na lung daw thoseh ao. <sup>15</sup> Khenhaw! hringnae hoi hawinae, duenae hoi thoenaeh heh sahnin na hmalah ka hruek <sup>16</sup> Na hring teh na pungdaw nahan hoi na pang hane ram daw na BAWIPA Cathut ni yawhawi na poe nahan na Cathut hah na lungpataw han, a hnuk na kâbang vaiteh, kâpoelawknaw, phunglawknaw, hoi lawkcengnaenaw hah tarawi loe telah lawk na thui. <sup>17</sup> Hatei, na lunghin hah alouklah a kamlang teh, lawkngai laipalah tami dumnae koelah na kamlang teh alouke cathut na baw pawiteh, <sup>18</sup> Jordan tui na raka teh na pang hane ram daw na hring saw mahoe. Atangcalah rawknae koe na pha han telah sahnin kâhruetcuetnae na poe. <sup>19</sup> Hringnae hoi duenae, yawhawi poenae hoi theobonae naw na hmalah ka hruek. Nama hoi na canaw ni hring nahanlah rawi lawih. Kapanuekkung kalvan hoi talai ka kaw. <sup>20</sup> Hatdawkvah, nang hoi na catounnaw ni na hring nahan hoi nange BAWIPA Cathut na lungpataw teh a lawk na tarawi dawkvah, hring sawnae na kapoekung BAWIPA hah na kâhnai nahan thoseh, BAWIPA ni na mintoe Abraham, Isak, Jakop koe theobo e ram daw o hane hoi kâvan e hringnae rawi loe telah thoseh Isarel miphun koe a dei pouh.

## 31

### *Isarel kahrawikung katha Joshua*

<sup>1</sup> Mosi ni a cei teh Isarel miphun pueng koe bout a dei pouh e lawk teh, <sup>2</sup> kai kum 120 a kuep toe. Nangmouh koe ka kâhlai thai hoeh toe, BAWIPA ni hai Jordan palang na rakat mahoe ati toe. <sup>3</sup> Nangmae BAWIPA Cathut ni na hmalah a raka teh hote khocanaw a raphoe vaiteh, ahnimae hmuen



nangmouh ni na pang awh han. BAWIPA ni a dei e patetlah Joshua ni nangmae hmalah a raka han. <sup>4</sup> BAWIPA ni hai Amor siangpahrang Sihon hoi Og dawk thoseh, a raphoe e ahnimae ram dawk thoseh, a sak e patetlah hote khocanaw dawk a sak han. <sup>5</sup> BAWIPA ni ahnimouh nangmouh koe na poe vaiteh, lawk na poe e patetlah ahnimouh dawk a sak han. <sup>6</sup> Tha kâlat awh nateh, na taranhawi awh. Na lungtâsue awh hanh. Ahnimouh taket awh hanh. BAWIPA teh nangmae Cathut lah ao. Nangmouh hoi rei ka cet e teh BAWIPA doeh. Na hnoun mahoe, na cettakhai mahoe telah ati.

<sup>7</sup> Joshua bout a kaw teh, tha kâlat nateh na taranhawi haw. Bangkongtetpawiteh, BAWIPA ni hete tami koe poe hanlah, mintoenaw koe thoebo e ram koelah ahnimouh hoi rei na cei vaiteh, râw na pang awh han. <sup>8</sup> Na hmalah BAWIPA a cei han, nang hoi rei ao han, hnuklah na kamlang takhai mahoe, tâsue hanh, na lungpout hanh, telah Isarel miphunnaw hmalah a dei.

### *Kum sari nah tangkuem kâlawk touk han*

<sup>9</sup> Mosi ni hete kâlawk a thut teh, BAWIPA e lawkkam thingkong kâkayawn e Levih miphun vaihmanaw, Isarel miphun kacuenaw koe a poe teh, <sup>10</sup> Lawk a thui e teh, kum sari akuap nah sannaw hlout nahan sut oup e lukkareiim paw tueng a pha navah, <sup>11</sup> Nangmae BAWIPA Cathut ni rawi e hmuen koe Isarel miphun pueng teh, a ham lah kâpâtue hanelah a tho awh toteh, hete kâlawk hah tamimaya hmalah na touk pouh han. <sup>12</sup> Tongpa, napui, camonaw nangmouh koe kaawm e imyinnaw ni a thai awh teh a kamtu awh teh BAWIPA na Cathut hah a taki awh teh hete kâlawk pueng hah kâhruetcuat laihoi a hringkhai awh nahanlah, <sup>13</sup> ka thai hoe hae a canaw ni hai a thai awh nahanlah Jordan palang namran lah cei vaiteh na pang awh hane ram dawk na o awh nathung BAWIPA na Cathut takinae a kamtu thai awh nahanlah pâkhueng loe telah kâ a poe.

### *Isarelnaw taranthaw nahane sut a dei*

<sup>14</sup> BAWIPA ni Mosi koe, na due nahane tueng a hnai toe, Joshua kaw nateh kamkhuengnae lukkareiim koe hnai awh. Ahni lawk ka thui han telah atipouh. Hateh Mosi hoi Joshua teh kamnue hanelah kamkhuengnae lukkareiim koe a cei roi. <sup>15</sup> BAWIPA ni lukkareiim daw k tâmaikhom hoi a kamnue pouh teh, tâmaikhom ni lukkareiim takhang koe a kangdue.

<sup>16</sup> BAWIPA ni Mosi koe, na mintoenaw hoi na i han toe. Hete miphunnaw ni atu a pâmaw awh e ram daw k kaawm e Jentelnaw ni a baw k e cathutnaw hoi a yon awh teh kai na pahnawt awh vaiteh lawkkam a raphoe awh han. <sup>17</sup> Hat toteh, kai ka lungkhuek vaiteh, ahnimouh ka kamlang takhai han. A rawk awh vaiteh lungpoutnae hoi rucatnae puenghoi a kâhmo awh han, hatnavah ahnimouh ni Cathut ni maimouh koe ao hoe hae daw k hete rucatnae maimouh lathueng a pha nahoe hmau telah a dei awh han. <sup>18</sup> Ahnimouh ni alouke cathut koe a kamlang awh e yonae daw k, kai ni minhmai ka hro han. <sup>19</sup> Hatdawkvah, hete la heh ahnimouh han thun pouh. Isarelnaw cangkhaih, Isarelnaw e kong daw k kapanuekkhaikung lah ao nahan a pahni daw k hrueng pouh. <sup>20</sup> Bangkongtetpawiteh, a na mintoenaw koe thoe ka bo e sanutui hoi khoitui a lawngnae ram koe ka hrawi awh vaiteh, ka boum lah a ca awh hnukkuh a thaw awh vaiteh cathut alouke koelah a kamlang awh han. A thaw taw k awh vaiteh kai na taran awh han, ka lawkkam a raphoe awh han. <sup>21</sup> Rucatnae hoi yawthoenae pueng a kâhmo awh navah, hete la heh amamouh



kapanuekkhaikung lah ao nahan a catounnaw e pahni dawk hai pahnim awh mahoe. Kai ni thoeboe e ram dawk ka ceikhai hoehnahlan atu patenghai a pouknae ka panue toe telah ati.

<sup>22</sup> Mosi ni hai hote hnin navah la a thut teh Isarelnaw a cangkhai.

<sup>23</sup> Nun capa Joshua koe, tha kâlat nateh na taranhawi sak. Kai ni thoe ka bo e ram dawk Isarelnaw na kâenkhai han. Kai ni na okhai han, atipouh.

### *Mosi ni maya lawk a thui*

<sup>24</sup> Mosi ni hete kâlawnaw cauk dawk be a pakhum hnukkhu, <sup>25</sup> Lawkkam thingkong ka hrawm e Levihnaw a kaw teh, <sup>26</sup> Hete kâlawnaw cauk lat awh nateh, namamouh na kapanuekkhaikung lah BAWIPA e lawkkam thingkong hmalah hrueng awh. <sup>27</sup> Nangmae miphun teh taranthawnae, lungpatanae na tawn awh tie ka panue. Kenhaw! sahnin na hringkhai nah patenghai BAWIPA na taran awh nahoehmaw. Ka due hnukkhu nah tawng teh hothlak na sak awh han rah. <sup>28</sup> Nangmae miphun dawk kacuenaw, kaukkungnaw abuemlah kai koe kamkhueng awh naseh. Hete lawknaw hah ahnimouh koe ka dei pouh vaiteh, kalvan hoi talai ka kaw han. <sup>29</sup> Bangkongtetpawiteh, kai ka due hnukkhu teh, khoeroe na rawk awh vaiteh, kai ni lawk na thui e lamthung dawk hoi na phen awh han tie hah ka panue. Hmalah toteh BAWIPA hmalah yonnae na sak awh vaiteh, na kut hoi na sak awh e lahoi a lungkhueknae na hroecoe awh dawkvah, nangmouh teh runae hoi na kâhmo awh han telah kâhruetcuetae na poe.

### *Mosi e la*

<sup>30</sup> Hottelah Mosi ni Isarel maya thinae koe hettelah lawknaw heh apout totouh kouna a dei pouh.

## 32

<sup>1</sup> Oe kalvannaw thai awh haw, lawk ka dei han. Oe talai ka dei e lawk thai haw. <sup>2</sup> Kaie phunglawk teh kho patetlah masimmasim a rak han. Ka lawk teh tadamtui patetlah a bo han. Patue e naw dawk ka rak e kho patetlah thoseh, phonaw dawk moikapap e kho patetlah thoseh ao han. <sup>3</sup> BAWIPA e min teh ka pâpho, maimae Cathut lentoenae teh pâpho awh. <sup>4</sup> Ama teh lungsongpui doeh, a tawksak e akuap. Bangkongtetpawiteh, a lamthung teh a lan, yuemkamcu e Cathut, yon tawn hoe, katang e hoi kalan e BAWIPA lah ao. <sup>5</sup> Ahnimouh a rawk awh toe. Cathut e ca lah awm awh hoe, toun hoe kawi lah awm awh hoe. A lungthin a longkawi teh ka payon e miphun lah ao awh. <sup>6</sup> Oe lungangnae ka tawn hoe e kapathunaw, BAWIPA e pahrennae hettelamaw na pathung awh han. Ka kawkhikkung na pa nahoehmaw, na sak awh teh na caksak awh hoe maw. <sup>7</sup> Ayan e taminaw pahnim hanh awh, Se moi kaloum tangcoun e pouk awh, na pa pacei nateh na dei pouh han, kacuenaw pacei nateh ahnimouh ni a dei awh han. <sup>8</sup> Lathueng Poung ni Adam catoun lah kaawm e naw hah a kapek teh, râw a rei navah, Isarelnaw a youn a pap e hah a khet teh miphun onae hmuen a khuen pouh. <sup>9</sup> BAWIPA e ham teh a taminaw doeh. Jakop teh a coe e râw doeh. <sup>10</sup> Tami kingdinae koe sarang a hram, thingyeiyawn koe Jakop a hmu toteh, khik a vuiluk teh mitmu patetlah a ring. <sup>11</sup> Mataw ni a tabu a raphoe teh, a canaw lathueng a rathei a kadai teh, a canaw a rathei hoi a tawm e patetlah, <sup>12</sup> BAWIPA dueng ni doeh Jakop a hrawi, alouke cathut ahni koe awm hoe. <sup>13</sup> Talai rasangnae koe hmuen a poe teh, talai a pawhik hah a ca teh, lungha dawk e khoitui



hai thoseh, lungtaw dawk e satui hai thoseh, <sup>14</sup> Tuca thaw, Bashannaw e tutan, maitotan, hmae thaw, satun, kuen dawk e ahrei, maito sanutui, tu sanutui nei hane hoi misur tui thipaling na nei.

<sup>15</sup> Hatei, Jeshurun teh a thâw dawk khok hoi a pâthui. Na thâw, na len, ahrei hoi na kawi dawkvah, na kasakkung Cathut na pahnawt teh rungngangnae lungsong banglahai na noutna hoeh. <sup>16</sup> Ahnimouh teh alouke cathut lahoi utsin sak awh. Panuet ka tho e hno lahoi a lungkhuek sak awh. <sup>17</sup> Cathut hoeh e kahrai, panue boihoeh e cathut, mintoenaw ni a taki awh hoeh e cathut koe thuengnae a sak awh. <sup>18</sup> Na kasakkung lungsong banglahai na ngâi awh hoeh. Na pa lah kaawm e Cathut hah na pahnung toe. <sup>19</sup> BAWIPA ni hot hah a hmu nah, a lungkhuek, a canu capanaw ni a pahnawt dawkvah. <sup>20</sup> Kai ni ka minhmai ka hro han, bangtelamaw apoutnae ao han tie ka khet han, lungkapatak e miphun, yuemkamcu hoeh e canaw lah ao awh. <sup>21</sup> Cathut lah kaawm hoeh e hno lahoi utsinnae tawn sak hanelah a sak awh toe. Ayawmyin e hnopai lahoi lung na khuek sak awh toe. Hatdawkvah, miphun lah kaawm hoeh e lahoi ahnimouh utsin sak hanelah lungkaang hoeh e miphun lahoi lungkhueksak hanelah ka sak han. <sup>22</sup> Ka lungkhuek teh hmai ka sawi. Kadung poung e sheol totouh a kak han. Talai dawk e a pawhik kamtawisak vaiteh mon kamhungnae totouh a kak han. <sup>23</sup> Ahnimouh lathueng runae ka thueng pouh han, kaie palanaw hah koug ka han. <sup>24</sup> Vonhlamrinci a khang awh han. Kâanna, puenghoi rawknae lahoi a rawk awh han. Sarangnaw e hâ thoseh, talai dawk kaawm e tahrunsue thoseh, ahnimouh koe ka patoun han. <sup>25</sup> Alawilah tahloi hoi duenae, imthung taki ka tho e runae ni thoundoun tanga thoseh, sanu ka net lahun e camo hoi a sam ka po tangcung e matawng thoseh a raphoe han. <sup>26</sup> Taran kâoupnae ka taket hoeh nakunghai thoseh, <sup>27</sup> Tarannaw a kâoup awh teh, hete hnopueng BAWIPA ni sak hoeh, ka lentoe e maimae kut ni doeh a sak ati han. Kai lungpuen han ka tawn hoeh nakunghai ahnimouh hah talai pout totouh kampek sak vaiteh, apinihai a pouk hoeh nahanlah ka raphoe han telah pouknae ka tawn. <sup>28</sup> Bangkongtetpawiteh, lungangnae tawn awh hoeh, poukthinae hai tawn awh hoeh. <sup>29</sup> Lungangnae tawn awh pawiteh, hete hno heh a thaipanuek awh han ei, hmalae kong hah a pouk awh han ei telah a ti.

<sup>30</sup> A kângue awh e lungsong ni ahnimouh yawt awh hoeh, BAWIPA ni ahnimouh poe hoehpawiteh, tami buet touh ni tami 1,000 touh bangtelamaw a pâlei thai han. Tami kahni touh ni tami thong hni touh bangtelamaw yawngsak thai han. <sup>31</sup> Maimae tarannaw ni a hmunae dawk teh ahnimae lungsong hoi maimae lungsong kâvan hoeh. <sup>32</sup> Ahnimae misurkung teh Sodom ram e doeh. Gomorrah talai dawk ka pâw e a kung doeh. Ahnimae misurpaw teh kakhat e a kung dawk e a paw lah ao teh, misurbomnaw teh kakhat e hoi doeh a kawi. <sup>33</sup> Ahnimae misurtui teh khorui sue, ka patawpoung e hrnthoe sue lah doeh ao. <sup>34</sup> Hothateh kai koe a pâtung toe. Hnoim dawk hruek lah awm hoehnamaw. <sup>35</sup> Moipathungnae teh kai ni ka sak hane doeh. Atueng akuiep toteh ahnimae khok a tâlaw han. Ahnimouh koe runae pha nahane tueng a hnai toe. A kâhmo awh hane runae karangpounglah a tho han toe. <sup>36</sup> BAWIPA ni a taminaw hanelah lawk a ceng han. A taminaw teh bahu a baw toe, a paung e ka hlout e buet touh boehai ao hoeh e hah a hmu navah, ahnimouh pahren vaiteh, <sup>37</sup> Ahnimae cathut, ahnimouh ni a kângue awh e talung nâne ao. <sup>38</sup> Ahnimouh ni a thuengnae a thâw hah a ca awh



teh, nei thuengnae misur kanetnaw teh namaw ao. Thaw awh naseh, nangmouh na kabawm awh naseh. <sup>39</sup> Kai, kama roeroe Cathut tie thoseh, kai hloilah alouke cathut awmhoeh tie thoseh, khenhaw! ka thei thai, ka hringsakthai, moihna ka thosak thai, ka damsak thai, ka kut dawk hoi apini na lawm thai mahoe. <sup>40</sup> A yungyoe kahring e doeh telah kalvan lah ka kut ka dâw teh thoe ka kâbo. <sup>41</sup> Loukloukkaang e tahloi ka kata teh, lawkcengnae ka patuep teh, ka tarannaw koe moi ka pathung han. Kai na kahmuhmanaw koe kamculah ka pathung han. <sup>42</sup> Ka palanaw hah thipaling hoi ka paruisak vaiteh, ka tahloi ni a moi a ca han. Thei lah kaawm e sannaw e thipaling hoi taranbawinaw e a lû a ca pouh han. <sup>43</sup> Jentel miphunnaw nangmouh ni Cathut e a taminaw hoi lung rei hawi awh haw. Bangkongtetpawiteh, kaie sannaw theinae yon hoi kâki lah runae ka rek teh, a tarannaw koe yon moipathung han toe. A ram hoi a taminaw yontha pouh han.

<sup>44</sup> Mosi hoi Nun capa Joshua a tho roi teh hete la lawknaw pueng hah tami pueng koe a dei pouh roi. <sup>45</sup> Hottelah hete lawknaw Mosi ni Isarelnaw koe he a dei hnukkhu, <sup>46</sup> Nangmouh koe sahnin ka pâpho e lawknaw pueng heh na lungthung pâkuem awh. Na canaw ni hete kâlawk pueng hah a tarawi awh nahanelah, ahnimouh koe bout dei pouh awh. <sup>47</sup> Hete hno heh rumram e nahoe, nangmouh na hringnae hoi kâkuen e doeh. Jordan palang na raka awh teh na pang awh hane ram dawk hete hno na tarawi pawiteh, na hring a saw awh han telah a dei.

### *Mosi duenae*

<sup>48</sup> Hot hnin vah BAWIPA ni Jeriko namran Moab ram Abiram monrui Nebo monsom a luen teh, <sup>49</sup> Isarelnaw hah kai ni ka poe e ram hah khenhaw. <sup>50</sup> Na hmau Aron teh Hor mon vah a due teh a taminaw a kamkhuengnae koe a pha e patetlah nang hai na luennae hete mon dawk dout nateh na taminaw kamkhuengnae koe phat lawih. <sup>51</sup> Bangkongtetpawiteh, nangmouh ni Zin thingyeyiawn, Kadesh kho Meribah tui teng vah, Isarelnaw hmalah kai barinae tawn laipalah na yon awh toe. <sup>52</sup> Hatdawkvah, Isarelnaw koe ka poe e ram hah nang ni na mit hoi na hmu nakunghai, hote ram dawk na kâen mahoe telah Mosi koe a dei pouh.

## 33

### *Mosi ni Yawhawi poenae*

<sup>1</sup> BAWIPA e tami Mosi ni a due hoehnahlan Isarelnaw yawhawi a poenae lawk hateh, <sup>2</sup> BAWIPA teh Sinai mon hoi a tho. Seir mon koehoi Isarelnaw koe kani patetlah a tâco teh, Paran mon koehoi raeng ni pheng a tue. Tami kathoung moikapap hoi rei a tho awh. Isarelnaw hanelah aranglae kut dawk hoi kâlawk hmai a tâco.

<sup>3</sup> Atangcalah BAWIPA ni a taminaw hah a lungpataw. A tami kathoung-naw pueng teh na kut dawk doeh ao awh. Ahnimouh ni na khok koe a tabo awh teh, na lawk hah a dâw awh.

<sup>4</sup> Mosi ni kaimouh hanelah kâlawk na poe awh. Jakop miphunnaw e râw lah ao.

<sup>5</sup> Taminaw kahrawikungnaw teh Isarelnaw hoi rei a kamkhueng awh toteh, Jeshurun khovah nang teh siangpahrang lah na o.

<sup>6</sup> Reuben teh dout laipalah hring naseh. A taminaw pung naseh.



<sup>7</sup> Judah miphun hanelah a dei e teh, Oe BAWIPA Judah e a lawk na thai teh a hmaunawngnga aonae koe thokhai haw, a kutnaw hah thapoe haw. Tarannaw kut daw k hoi rungngang haw.

<sup>8</sup> Levih miphun hanelah a dei e teh, nange Thummim hoi nange Urim teh Massah vah na tanouk teh, Meribah tui teng vah na taran e na tami kathoungnaw koe poe haw.

<sup>9</sup> A manu hoi a na pa koevah ka hmawt boihoe hoi ka tet e ni, a hmaunawngnga hah nout hoe hoi. A canaw hai panuek hoe hoi. Bangkongtetpawiteh, na lawk a ngai awh teh na lawkkam hah a tarawi awh.

<sup>10</sup> Ahnimouh ni nange lawkcengnaenaw hah Jakop miphun koe thoseh, na kâlawk hah Isarelnaw koe thoseh a cangkhai awh han. Ahnimouh ni hmuitui hah na hmalah thoseh, abuemlah hmaisawi thuengnae hah thuengnae khoungroe daw k thoseh a ta awh han.

<sup>11</sup> Oe BAWIPA, ahnie hnopai hah yawhawi na poe teh a kut hoi a sak e hah dâw pouh haw. Ahnimouh kahmawt ngaihoe hoi naw a kâroe thai hoe hoi nahanlah ahnimae a keng hah khoe pouh haw.

<sup>12</sup> Benjamin miphun hanelah a dei e teh, BAWIPA ka pahren e teh, BAWIPA koe karoumcalah ao han. Pou ramuk vaiteh, a loung rahak vah a ta han.

<sup>13</sup> Joseph miphun hanelah a dei e teh, ahnie a ram teh aphu kaawm e kalvan e hno, tadamtui hoi rahimlah kaawm e adungnae koe e tui hoi cungtalah yawhawinae poe naseh.

<sup>14</sup> Kanî koehoi e aphu kaawm hnonaw hoi thoseh, thapa koehoi e aphu kaawm hnonaw hoi thoseh, <sup>15</sup> ayan e monnaw daw k e kahawipoung e hnonaw hoi thoseh, pou kangning e monruinaw e aphu kaawm hnonaw hoi thoseh, <sup>16</sup> talai daw k e aphu kaawm e hno, hote kuepnae hoi hmai ka kang e buruk daw k kaawm e pahrennae hoi thoseh, yawhawinae na poe seh. Yawhawinae teh Joseph e lû van thoseh, a hmaunawngghanaw daw k kacuenaw e lû van bawilakhung daw k thoseh, phat lawiseh.

<sup>17</sup> A raimonae teh maito camin a lentoenae patetlah, a kinaw teh Savitannaw e kinaw patetlah awm lawiseh. Hot ni vah miphun pueng hah talai pout totouh a deng han. Ahnimouh teh Ephraim 10,000, Manasseh 1,000 touh lah ao a ti.

<sup>18</sup> Zebulun miphun hanelah a dei e teh, Zebulun, na tâconae daw k hai thoseh, Issakhar, na rim daw k hai thoseh, lunghawi haw. <sup>19</sup> Ahnimouh ni miphunnaw hah mon koe kaw awh vaiteh, hote hmuen koe nei thuengnae hah a thueng awh han. Bangkongtetpawiteh, tuipei bawirengnae hoi sadi thung kâhrawk e hnonaw hah a rasa awh han.

<sup>20</sup> Gad miphun hanelah a dei e teh, Gadnaw ka pakaw e teh a yawkahawi e lah awm naseh. Hote miphun teh sendek manu patetlah ao vaiteh, kutbuembue hoi lû vuen hah a hlip han. <sup>21</sup> Ahni teh ama hanelah kahawipoung e a kârawi toe. Atangcalah kâlawkkapoekung e ham hah hote hmuen koe aloukcalah a ta pouh toe. BAWIPA e lannae hoi lawkcengnae hah Isarel miphun hoi cungtalah a taw k telah a ti. <sup>22</sup> Dan miphun hanelah a dei e teh, Dan teh sendekca lah ao teh Bashan kho hoi a dawkcaw k han telah a ti.

<sup>23</sup> Naphtali miphun hanelah a dei e teh, Oe Naphtali, pahren e lah na o teh, BAWIPA e yawhawinae hoi kaw sak lah na o teh, kaniloumlae hoi akalae hah coe loe.

<sup>24</sup> Asher miphun hanelah a dei e teh, Asher teh canaw e lathueng vah yawhawinae hoe a coe. Ahni teh a hmaunawngghanaw lahoi yawhawi poe e lah ao teh, a khok hah satui daw k ranup naseh. <sup>25</sup> Nange longkha



tarennae teh sum hoi rahum lah ao vaiteh, na hringyung thung na thayung lah ao han. <sup>26</sup> Nang kabawp hanelah kalvannaw ka kâcui niteh, lentoenae hoi tâmainaw daw k ka kâcuie Jeshurun Cathut patetlah apihai awm hoe h.

<sup>27</sup> A yungyoe Cathut teh na kângue e lah ao teh, a thaonae kut hoi nang teh na doun. Ahni ni, na tarannaw hah na hmalah hoi na pâlei pouh teh, raphoenae kâ hah na poe. <sup>28</sup> Isarel miphun teh a hlout vaiteh, amamouh dueng ao awh han. Jakop catoun teh cakang, misurtui hoi kakawi e ram daw k hmuen a tawn awh vaiteh, kalvan hoi tadamtui hai a bo han.

<sup>29</sup> Oe Isarel miphun na yawhawi. BAWIPA ni a rungngang e miphun, nang teh api hoi maw na kâvan. Hote BAWIPA teh nang na ka ngue e bahling, na taluenae tahloi lah ao. Na tarannaw teh, na hmalah a sung awh vaiteh, nang ni ahnimae hmuen rasangnae koe na coukdouk awh han.

## 34

### *Mosi duenae*

<sup>1</sup> Hathnukkhu Mosi ni Moab tanghling koehoi a cei teh, Jeriko khopui namranlah Nebo mon Pigsaw monsom vah a luen. BAWIPA ni ram pueng hah a pâtué. Gilead ram Dan kho totouh, <sup>2</sup> Napthali ram buemlah, Ephraim ram hoi Manasseh ram buemlah, Judah ram pueng tui pui kanîloumlah totouh, <sup>3</sup> akalae ram hoi ungkung kho tie Jeriko khopui yawn Zoar kho totouh. <sup>4</sup> BAWIPA ni hete ram teh Abraham, Isak, Jakop tinaw koe vah na catounnaw ka poe han telah thoebo laihoi lawk ka kam e ram doeh. Na mit hoi hmuna e kâ teh na poe, hatei, nang teh hote ram koe na cet mahoe h atipouh.

<sup>5</sup> Hatdawkvah, BAWIPA ni a dei e patetlah Mosi teh Moab ram dawkvah a due. <sup>6</sup> Bethpeor namran lah Moab tanghling daw k ahni teh a pakawp. Hatei, sahnin ditouh ahni pakawpnae hmuen hah apinihai panuek hoe h.

<sup>7</sup> Mosi a due navah a kum 120 touh a pha. A mit hai mom hoe h, a tha hai youn hoe h rah. <sup>8</sup> Isarelnaw ni Mosi teh Moab tanghling daw k hnin 30 touh a khuikakhai awh. Hottelah hoi Mosi khuikakhainae hnin teh a pout.

<sup>9</sup> Hahoi Nun capa Joshua teh lungangnae muitha hoi a kawi. Bangkongtetpawiteh, Mosi ni ahnie van vah a kut a toung pouh. BAWIPA ni Mosi koe lawk a poe e patetlah a sak teh, Isarelnaw ni ahnie lawk a ngâi awh. <sup>10</sup> BAWIPA ni minhmai rek kâhmo laihoi a panue e Mosi patetlah Isarel miphun daw k bangpatet e profet hai bout tâcawt hoe h toe.

<sup>11</sup> Faro e hmaitung hoi a sannaw pueng e hmaitung hoi a ram thung pueng hanelah, Izip ram daw k sak hanelah BAWIPA ni a patoun e mitnoutnae hoi kângairu hnonaw hah ahni ni a sak. <sup>12</sup> Thaonae bahu pueng hoi Mosi ni a sak e takikatho e kângairu hno pueng hah Isarelnaw hmaitung vah Mosi ni a sak.



## JOSHUA (Joshua)

### *Cathut ni Joshua a patoun*

<sup>1</sup> BAWIPA Cathut e san Mosi a due hnukkhu Mosi e yueng lah thaw ka tawk han e, Nun capa Joshua teh, BAWIPA Cathut ni, <sup>2</sup> Kaie ka san Mosi te a due toe. Hatdawkvah nama hoi na taminaw pueng atu thaw awh nateh Jordan palang namran lah rakat awh leih. Isarel miphunnaw kai ni na poe e ram dawk kâen sak leih. <sup>3</sup> Mosi koe lawk ka kam e patetlah nang ni na coungroe e talai pueng teh nangmouh na poe han. <sup>4</sup> Kahrawng pueng hoi Lebanon mon koehoi, Euphrates palangpui koehoi Hitnaw e ram abuemlah hoi, kanfiloumlah tuipui totouh nangmae ram lah ao han. <sup>5</sup> Na hringyung thung pueng nange na hmalah apihai kangdout thai mahoe. Mosi koe kai ka o e patetlah nang koehai kai ka o han. Kai ni na pahnawt mahoe, na cetkhai mahoe.

<sup>6</sup> Tha kâlat nateh, taranhawi haw. Mintoenaw koe na poe han ka tie kai ni lawk ka kam e ramnaw hah râw lah a coe awh nahanlah na rei han. <sup>7</sup> Hatdawkvah kaie ka san Mosi koe ka poe e kâlawk pueng tarawi nahanelah, tha kâlat nateh, taranhawinae tawn haw. Na ceinae tangkuem koe tânae na hmu thai nahan, avoilah aranglah phen hanh. <sup>8</sup> Hote kâlawk cauk dawk thut e pueng heh na tarawi thai na hanelah, Cakathoung hah touk laipalah awm hanh. Karum khodai pout laipalah luepluep na pouk han. Hottelah na sak pawiteh, nang ni kho na khang e dawk tânae na hmu han. <sup>9</sup> Nang teh kai ni lawk na thui nahoehmaw. Tha kâlat nateh taranhawinae tawn haw, taket hanh, na lungpout hanh. Na cei nah tangkuem koe nang hoi rei ka o atipouh.

### *Jordan raka hanelah kâ a poe.*

<sup>10</sup> Hahoi Joshua ni kahrawikungnaw hah a kaw teh, <sup>11</sup> Ransanaw a onae tangkuem koe cet awh. Nangmae BAWIPA Cathut ni na poe awh e ram thung kâen awh nahanelah, hnin thum touh thung hete Jordan palang namran lah raka hanelah ao dawkvah, lamvon sin hanelah taminaw hah patuen dei pouh leih telah lawk a thui. <sup>12</sup> Hahoi Joshua ni Reuben miphun, Gad miphun, Manasseh miphun, tangawn hah a kaw teh, <sup>13</sup> BAWIPA Cathut e san Mosi ni nangmanaw lawk na thui e heh pahnim awh hanh. Nangmae BAWIPA Cathut ni nangmouh hanelah hete ram thung hmuen na ta pouh awh toe. <sup>14</sup> Na yunaw na canaw, hoi saringnaw hah Jordan palang kanîtholah Mosi ni na poe e ram thung ao awh han. Hateiteh, senehmaica ka patuem e a thakaawme na hmaunawnggha ransanaw pueng e hmalah na raka vaiteh, ahnimanaw hah na kabawp han. <sup>15</sup> Cathut ni nangmanaw hmuen na ta pouh e patetlah hmaunawngghanaw hah hmuen na poe awh hoehnahlan nangmae BAWIPA Cathut ni na poe awh e ram heh, ahnimanaw ni ram be a la hoehroukrak, a tha kaawm e, taran ka tuk e abuemlah ni senehmaica patuep nalaihoi hmaunawngghanaw e hmalah a raka awh vaiteh, na tawmdawm han tie lawk hah pouk awh. Cathut e san Mosi ni Jordan palang Kanîtholae ram koe lah bout na ban han atipouh.

<sup>16</sup> Hottelah, ahnimouh nihai, nang ni na dei e pueng teh, kaimouh ni ka sak awh han na patoun e pueng koe ka sak awh han. <sup>17</sup> Bang pueng dawk hai Mosi e lawk ka ngâi awh e patetlah nange lawk ka ngâi awh han.



Hatdawkvah nange BAWIPA Cathut ni Mosi koe a okhai e patetlah nang koe haiyah awm van lawiseh. <sup>18</sup> Nange kâ ka ek e tami pueng hoi nange lawk ka ngaihoeh e tami pueng, nange kâlawk ka tapoe e tami pueng teh thei lah ao han. Hatdawkvah, tha kâlat nateh na taranhawi hottelah Joshua koe bout atipouh awh.

## 2

### *Rahab ni katuetnaw hronae*

<sup>1</sup> Nun e capa Joshua ni Shittim khopui koehoi tuet hanelah arulah hoi tami kahni touh a patoun. Kanaan ram Jeriko khopui lah cet awh nateh, kenhaw atipouh e patetlah ahnimouh roi ni a cei roi teh, ka kâyawt e Rahab im a kâen roi teh, hawvah ao roi.

<sup>2</sup> Kho thung e tami tangawn ni hai hote ram heh tanouk hanelah Isarel miphun tangawn ni paduem tangmin lah khopui thung kâen awh toe ati awh teh, Jeriko siangpahrangnaw a thaisak toung dawkvah, <sup>3</sup> Jeriko siangpahrang ni Rahab koe na im ka tho ni teh kaluennaw hah tâcawt sak. Ahnimanaw teh khopui thung tanouk hanelah a tho awh toe telah kâ a poe awh.

<sup>4</sup> Rahab ni hote tami roi hah a kâhro sak teh, kai koe tami a tho bokheiyah. Hatei nâhoi maw a tho tie teh ka panuek hoeh. <sup>5</sup> Kho hmo longkha khan tawmlei nah ahnimouh roi teh a tâco roi toe. Nâ lah maw a cei roi tie ka panuek hoeh toe. Karang lah pâlei awh. Na pha awh han doeh atipouh. <sup>6</sup> Telah a dei eiteh hotnaw hah im van a luen sak teh lempu vah a hro toe. <sup>7</sup> Thoundounnaw ni Jordan palang rakanae lam koe lah a pâlei awh. Khopui alawilah a pha hoiyah khopui longkhanaw pueng koung a khan awh.

<sup>8</sup> A hro e naw a i hoehnahan, napui teh ahnimanaw a onae lempu vah a luen teh, <sup>9</sup> BAWIPA Cathut ni nangmanaw hete ram na poe toe tie hah nangmouh koe kaimouh ni pueng hoi ka tâtue awh teh, nangmouh kecu dawk ram thung e tami pueng a lungro awh toe tie kai ni ka panue.

<sup>10</sup> Nangmouh teh Izip ram hoi na tâco awh navah, Edom tuipei BAWIPA Cathut ni a hak sak tie hai thoseh, Jordan palang namran kaawm e pueng na raphoe awh teh, Amor siangpahrang, Sihon hoi Og dawkvah nangmouh ni hno na sak e pueng hai thoseh kaimouh ni ka thai awh toe. <sup>11</sup> Hote kamthang ka thai awh navah, kaimouh teh, nangmouh kecu dawk tami buet touh dawk hai taranhawinae awm hoeh toe. Bangkongtetsawiteh, nangmae BAWIPA Cathut teh, a Lathueng Poug e BAWIPA Cathut lah ao.

<sup>12</sup> Hatdawkvah, nangmouh dawk sannu ni hawinae ka sak e dawkvah, nangmouh ni hai rei ka tâcawt e kaimouh dawk hai hawinae sak awh nateh, <sup>13</sup> kaie anu apa, hmaunawngaha, ka thangroinaw koe, ahnimouh hoi kâkuen e pueng hai thet laipalah a hringnae hlout sak hanelah Cathut koe lawkkamnae sak awh nateh, thoe kâbo awh. Mitnoutnae hno hai na poe haw atipouh.

<sup>14</sup> Ahnimanaw ni hai nang ni kaimouh hoi sak hane na kamnuek sak hoehpawiteh, nang na hring na hanelah kaimae hringnae teh, laicei lah awm naseh. Hete ram het BAWIPA Cathut ni na poe torei teh, nang dawk yuemkamcu lah ka o vaiteh, hawinae ka sak han telah ati awh.

<sup>15</sup> Hote napui a onae im teh, khopui tungdumnae ateng lah ao dawkvah, ahnimanaw hah hlalangaw dawk rui hoi a pabo teh



<sup>16</sup> nangmanaw na pâlei e taminaw koehoi na hlout thai awh nahan mon lah yawng awh nateh, hnin thum touh kâhrawk awh. Nangmouh katawngnaw a ban hnukkhu hoi cet awh atipouh.

<sup>17</sup> Ahnimanaw ni nang ni thoekâbo sak e daw kaimouh koe yon phat sak hanh. <sup>18</sup> Hete ram daw kaimouh ka pha toteh, atu kaimouh na pabonae hlalangaw daw hete langsarui hah pen nateh, manu napa, na thangroinaw hoi na imthungkhunaw abuemlah na im daw koug na pâkhueng han. <sup>19</sup> Na im daw hoi alawilah ka tâcawt e tami teh dout pawiteh, a ma dawkvah khang naseh. Kaimouh teh yon daw hoi ka hlout awh han. Na imthungkhunaw ka thet payon awh pawiteh kaimouh ni ka khang awh han. <sup>20</sup> Kaimae thaw hai na dei pouh boipawiteh, atu thoe na kâbo sak e daw hoi kaimouh hai ka hlout awh han.

<sup>21</sup> Napui ni hai lawk na dei awh e patetlah awm lawiseh ati teh a ceisak. Napui ni hai rui paling e hah hlalangaw daw a pakhi. <sup>22</sup> Ahnimanaw teh mon daw a pha hoehroukrak a cei awh teh, kapâleinaw a ban hoehroukrak hnin thum touh ao awh. Kapâleinaw ni a tawng awh eiteh hmawt awh hoeh. <sup>23</sup> Ahnimouh roi teh mon hoi a kum teh tui a raka roi. Nun e capa Joshua koe a pha teh, a kâhmo e hnonaw pueng hah a dei pouh.

<sup>24</sup> BAWIPA Cathut ni hote ram abuemlah maimae kut daw na poe toe. Maimouh kecu daw ram thung kaawm e tami pueng a lungpuen awh telah Joshua koe a dei pouh awh.

### 3

#### *Isarelhaw ni Jordan a raka awh.*

<sup>1</sup> Joshua teh amom a thaw teh Isarel miphun abuemlah hoiyah Shittim khopui hoi a kampuen awh teh, Jordan tui a raka awh hoehnahlan palang teng rim a sak awh. <sup>2</sup> Hnin thum touh a pha toteh, ransabawinaw ni ransahu onae tangkuem koe a cei awh. <sup>3</sup> Nangmae BAWIPA Cathut e lawkkam thingkong ka hrawm e vaihma bawi Levih miphunnaw ni a kâkayawt lahun e na hmu torei teh, nangmanaw ni hai hmu ena kampuen awh vaiteh, na kâbang awh han. <sup>4</sup> Thingkong hoi nangmae a rahak vah, dong thong hni touh na kâhla awh han. Na kâbang hane lamthung na panue thai awh nahane thingkong rek na hnai awh mahoe. Hete lam teh nangmouh ni vai touh hai na cet awh hoeh rah telah tami pueng hah lawk a thui.

<sup>5</sup> Joshua ni nangmanaw pueng namahoima kâthoung sak awh. Bangkongtetpawiteh, tangtho e hnin teh, BAWIPA Cathut ni kângairu e hnonaw nangmouh koe a sak han toe telah taminaw lawk a thui.

<sup>6</sup> Hahoi vaihmanaw kaw nateh, nangmanaw ni lawkkam thingkong hrawm na laihoi taminaw e hmalah rakat awh leih. Joshua ni a dei e patetlah ahnimanaw teh lawkkam thingkong a kâkayawt awh teh, taminaw hmalah a cei awh.

<sup>7</sup> BAWIPA Cathut ni Joshua a kaw teh, kai ni Mosi ka okhai e patetlah nang koe ka o e hah Isarelhaw abuemlah ni a panue awh nahanelah, ahnimae hmaitung vah sahnin kai ni na kamsawng sak han. <sup>8</sup> Lawkkam thingkong ka hrawm e vaihma bawinaw Jordan palang teng a pha awh torei teh, Jordan tui daw a kangdue awh han telah patuen na dei pouh awh han atipouh. <sup>9</sup> Joshua ni tho awh leih, nangmae BAWIPA Cathut e lawk teh ngâi awh hottelah Isarel miphunnaw abuemlah a kaw awh.



<sup>10</sup> BAWIPA Cathut teh nangmouh koe ao, nangmae hmalah, Kanaannaw, Periznaw, Amornaw, Jebusitnaw, Hitnaw, Girgashitenaw hah a pâlei han tie hah panuek awh. <sup>11</sup> Talaivan abuemlah ka uk e BAWIPA Cathut e lawkkam thingkong teh nangmae hmalah Jordan tuipui dawk a rakakhai awh toe. <sup>12</sup> Hatdawkvah Isarel miphunnaw thung hoi miphun tangkuem e tami buetbuet touh abuemlah tami hlaikahni touh rawi awh. <sup>13</sup> Talai van abuemlah ka uk e Bawipa Jehovah e thingkong hah ka hrawm e vaihma bawinaw ni khoksampha hoi Jordan tuipui a coungroe tahma vah atunglae tui a kâhat vaiteh, a kamuem han.

<sup>14</sup> Taminaw teh Jordan tuipui raka awh hanelah rimnaw dawk hoi a kampuen vaiteh, lawkkam thingkong ka hrawm e vaihma bawinaw ni taminaw e hmalah a cei awh han. <sup>15</sup> Jordan tuipui koe a pha awh hoi ka poum e tui hah khoksampha hoi a coungroe awh toteh, canganæ a tue navah hote tuipui teh, palang rai dawk ouk a poum eiteh, <sup>16</sup> atunglah hoi ka lawng e tui a kâhat teh ahlanæ koe e Zarethan khopui teng kaawm e Adam khopui totouh a kamuem. Arabah tuipui palang koe ka lawng e tui hai a kâhat teh, taminaw pueng ni Jeriko khopui koelah a raka awh. <sup>17</sup> Tami moikapap teh Jordan namran a pha hoe roukrak BAWIPA Cathut e lawkkam thingkong ka hrawm e vaihma bawinaw ni tuipui lungui talai dawk kacaklah a kangdue awh teh, Isarel miphunnaw abuemlah ni talai dawk a cei awh.

## 4

### *Pahnimhoehnae talung*

<sup>1</sup> Taminaw abuemlah ni Jordan tuipui a raka awh hnukkhu hoi BAWIPA ni, <sup>2</sup> miphun buet touh dawk tami buet touh, tami hrahlaikahni touh rawi awh. <sup>3</sup> Ahnimanaw ni, tuipui lungui vaihmanaw ni kacaklah a kangduenæ hmuem koe e talung hrahlaikahni touh a la awh vaiteh, hatnae tangmin a roe awh nahane rim koe na hruek awh han telah Joshua koe atipouh.

<sup>4</sup> Joshua ni miphun buet touh dawk tami buet touh a rawi e hrahlaikahni touh hah a kaw teh, <sup>5</sup> Nangmae BAWIPA Cathut e thingkong hmalah Jordan tuipui lungui rakat awh nateh, Isarel miphun milu pha e yit touh tami buet touh ni talung buet touh lat awh nateh, hrawm awh. <sup>6</sup> Telah na sak pawiteh ka panuek khai e ao han toe. Hmalæ atueng nah nangmae na canaw ni vah, hete talungnaw hah bangtelæ maw tet awh boipawiteh, <sup>7</sup> nangmouh ni, BAWIPA e thingkong ni Jordan tui a raka navah, thingkong e hmalah Jordan tui thouk a pet telah na dei pouh awh han. Hote talungnaw teh pout laipalah, Isarel miphunnaw ni pahnim thai hoe nahanelah Joshua koe lawk a thui.

<sup>8</sup> BAWIPA Cathut ni Joshua koe a dei pouh e patetlah Isarel miphun milu a pha e yit touh Jordan tui dawk e talung hrahlaikahni touh a la awh teh, roenæ hmuem koe a ta awh. <sup>9</sup> Lawkkam thingkong ka hrawm e vaihmanaw ni a coungroe e hmuem Jordan tui lungui e talung hrahlaikahni touh e hah Joshua ni a ung teh sahnin totouh ao.

<sup>10</sup> Joshua koe Mosi ni lawk a thui e patetlah a taminaw hah BAWIPA Cathut ni kâ a poe e pueng koun a sak totouh thingkong ka hrawm e vaihmanaw teh, Jordan tui lungui a kangdue awh. Taminaw hai kâyawm laihoi a raka awh. <sup>11</sup> Taminaw abuemlah ni koun a raka hnukkhu hoi BAWIPA e thingkong hoi vaihmanaw teh, taminaw e hmaitung vah a raka awh. <sup>12</sup> Reuben miphun, Gad miphun, Manasseh miphun tangawn teh Mosi ni a dei pouh e patetlah senehmaica hoi Isarelhaw e hmalah a raka



awh. <sup>13</sup> Hote miphunnaw teh milu abuemlah 40000 touh a pha awa. Taran tuk hanelah a kâra kueng awa laihoi BAWIPA e hmalah Jeriko tanghling koe a cei awa. <sup>14</sup> Hote hnin nah BAWIPA ni Isarel miphun abuemlae hmalah Joshua hah a kamsawng sak teh Mosi a taki awa e patetlah Joshua hai a hringyung thung pueng a taki awa.

<sup>15</sup> Hahoi BAWIPA ni Joshua koe a dei pouh e teh, <sup>16</sup> lawkpanuesaknae thingkong ka hrawm e vaihmanaw ni Jordan tui daw k hoi a tâco awa han telah kâ a pou e patetlah,

<sup>17</sup> Jordan tui daw k hoi tâcawt awa leih telah vaihmanaw hah Joshua ni kâ a pou.

<sup>18</sup> BAWIPA e lawkkam thingkong ka hrawm e vaihmanaw teh Jordan tui lungui hoi a tâco awa teh, khoksampha ni a oung lah a coungroe navah Jordan tui teh ama lawngnae hmuen daw k bout a lawng. <sup>19</sup> Apasueke thapa hnin hra hnin vah, taminaw teh Jordan tui daw k hoi a tâco awa teh, Jeriko kanitholah Gilgal e hmuen koe rim a sak awa. <sup>20</sup> Jordan tui daw k e a la awa e talung hrahlaikahni touh e hah Joshua ni Gilgal e hmuen koe a ung. <sup>21</sup> Isarel miphunnaw ni hmalae atueng nah a napanaw koe a canaw ni hete talungnaw hah bangtelae maw telah pacei awa boipawiteh, <sup>22</sup> Nangmouh ni Isarel miphunnaw ni talai daw k cei e patetlah Jordan tui a raka awa telah na canaw koe vah na dei pouh awa han. <sup>23</sup> BAWIPA Cathut ni tui pui paling be a raka awa hoehrourak, nangmouh hmalah a hak sak e patetlah BAWIPA Cathut ni Jordan palang be na raka awa hoehrourak a hak sak van. <sup>24</sup> Hatdawkvah, miphun pueng ni BAWIPA thaonae kut a panue awa vaiteh, nangmouh ni hai BAWIPA Cathut pou na taki thai awa nahanelah doeh atipouh.

## 5

### *Se apâhni vuensomanae*

<sup>1</sup> BAWIPA ni Isarel miphunnaw raka sak hanelah, Jordan palang a hak sak tie hah, Jordan palang kaniloumlah kaawm e Amor siangpahrang abuemlah, tui pui teng kaawm e Kanaan siangpahrang abuemlah ni a thai awa torei teh, a taranhawinae awm awa hoe. Isarel miphunnaw kecu daw k a lung koug apout awa.

<sup>2</sup> Hahoi Cathut ni Joshua a kaw teh, lungtaw ramanaw sak nateh, Isarel miphunnaw vuensom bout na a pouk han atipouh. <sup>3</sup> Hatdawkvah, Joshua ni lungtaw ramanaw a sak teh, Gilgal e hmuen koe Isarel miphunnaw e vuensom a a pouh. <sup>4</sup> Hottelah vuensom a a pouh ngainae teh Izip ram hoi ka tâcawt e ransa tongpa pueng kahrawngum koug a due awa daw k doeh. <sup>5</sup> Hote ram daw k hoi ka tâcawt e pueng teh vuensoma e lah ao awa toe. Kahrawngum a cei awa nah ka khe e pueng teh vuensoma e lah awm hoe rah. <sup>6</sup> Izip ram hoi ka tâcawt e taran ka tuk thai e pueng teh Cathut e lawk a ngâi hoe daw kvah be a due totouh Isarel miphunnaw kum 40 touh thung kahrawngum a kâhei awa. Cathut ni, na pou han ti teh na mintoenaw koe ka kam pouh e ram, sanutui hoi khoitui ka lawng e ram hah, hotnaw ni hmawt awa mahoe ti teh thoe a bo. <sup>7</sup> Ahnimaie yueng lah a canaw ni lam vah, vuensom a a awa e a hmu hoe rah daw kvah, Joshua ni vuensom bout a a pouh. <sup>8</sup> Taminaw pueng vuensom a a hnukkhu hoi, a hmâ hawihoe roukrak rim daw k ao awa.



<sup>9</sup> Cathut ni Izip ram e dudamnae nangmouh koehoi sahnin kai ni kounk ka takhoe toe, telah Joshua koe atipouh. Hatdawkvah, hote hmuén teh sahnin totouh Gilgal telah ati awh.

<sup>10</sup> Isarel miphunnaw teh Gilgal hmuén koevah rim a sak awh teh, hote thapa hnin hrahlaipali hnin tangmin Jeriko tanghling dawkvah ceitakhai pawí a sak awh. <sup>11</sup> Ceitakhai pawí a sak awh hnukkhu, a tangtho hnin vah Kanaan kho e cakang hoi a sak awh e tawn thum hoe e vaiyeinaw hoi capanaw hnin touh thung a ca awh. <sup>12</sup> Kanaan kho hoi ka tâcawt e a ca awh teh, a tangtho hoi teh mana teh apout toe. Hatnae kum dawkh hoi Kanaan ram hoi ka tâcawt e a paw hah a ca awh.

### *BAWIPA e ransabawi*

<sup>13</sup> Joshua ni Jeriko kho teng aonae koehoi a khet nah tami buet touh ni tahloi a tabu dawkh hoi a rasa teh, ka kangdout e a hmu navah, ahni koe lah a cei teh, nang hah kaimouh koe lah kampang e maw, kaimae taran lah kaawm e maw telah a pacei.

<sup>14</sup> Hatnavah, ahni ni telah nahoe, BAWIPA Cathut e ransahu ka hrawi e lah kai teh atu nang koe ka tho e doeh atipouh. Joshua ni talai dawkh a tabo teh, a bawkh. BAWIPA, na san koe bangmaw na dei han telah a pacei.

<sup>15</sup> BAWIPA e ransabawi ni na khokkhawm hah rading, nang ni na coungröe e hmuén teh kathoung e doeh atipouh e patetlah Joshua ni a sak.

## 6

### *Jeriko kho a rawknae*

<sup>1</sup> Isarel miphunnaw kecu dawkh Jeriko khopui teh khik a kâkhan awh teh, ka tâcawt e, ka kâen e, buet touh hai awm hoe. <sup>2</sup> Hat toteh, BAWIPA Cathut ni kenhaw! Jeriko khopui, Jeriko siangpahrang hoi athakaawme ransa pueng teh nange kut dawkh na poe toe. <sup>3</sup> Hatdawkvah khopui teh, na lawngven awh han Isarel ransanaw abuemlah ni hnin taruk touh thung na lawngven awh han. <sup>4</sup> Vaihma sari touh ni thingkong hmalah Jubili mongka sari touh a sin awh han. Hnin sari hnin nah vai sari touh khopui lawngven vaiteh, vaihmanaw ni mongka teh a ueng awh han. <sup>5</sup> Jubili mongka a rui kasawlah a ueng awh vaiteh, mongka lawk na thai awh toreí tami pueng ni kacaipounglah a hram awh han. Khopui e rapan teh abuemlah kounk a tip han. Hahoi taminaw ni kalancalah na kamyun awh han telah Joshua koe atipouh.

<sup>6</sup> Nun e capa Joshua ni vaihmanaw a kaw teh, nangmouh ni lawkkam thingkong hah na kâkayawt awh vaiteh, BAWIPA e thingkong hmalah vaihma sari touh ni Jubili mongka sari touh e hah na sin awh han.

<sup>7</sup> Taminaw koehoi, nangmouh ni na cei awh vaiteh, khopui hah lawngven awh. Senehmaica kapatuemnaw ni BAWIPA e thingkong hmalah cet awh telah atipouh.

<sup>8</sup> Joshua ni taminaw koe lawk a thui hnukkhu, Jubili mongka sari touh ka sin e vaihma sari touh ni BAWIPA e hmalah mongka ueng na laihoi a cei awh. BAWIPA e lawkkam thingkong teh, ahnimae hnukkhu lah a kâbang awh. <sup>9</sup> Mongka ka ueng e vaihmanaw hmalah, Senehmaica kapatuemnaw ni a cei awh teh, vaihmanaw ni mongka ueng na laihoi a cei awh navah, hnuk lae ransanaw ni thingkong hnuklah a kâbang awh.

<sup>10</sup> Joshua ni nangmouh teh, kai ni hram hanelah lawk na thui e hnin a pha hoehnahan, na hram awh mahoe. A pawlawk buet touh hai na tho sak awh mahoe. Lawkkam touh hai na tho awh mahoe. Hote a hnin a pha



torei na hram awh han telah lawk na thui awh toe. <sup>11</sup> Hottelah BAWIPA Cathut e thingkong teh khopui vai touh a lawngven awh hnukkhu hoi rim thung bout a ban awh teh, rum touh a loun sak awh. <sup>12</sup> Amom Joshua ni a thaw teh, vaihmanaw ni BAWIPA e thingkong hah a hrawm sak. <sup>13</sup> BAWIPA e thingkong hmalah Jubili mongka sari touh ka sin e vaihmanaw sari touh ni pou a cei awh na laihoi mongka a ueng awh. Senehmaica kapatuemnaw ni ahnimaie hmalah a cei awh teh, vaihmanaw ni mongka ueng na laihoi a cei awh nah vah, hnuk lae ransanaw teh, BAWIPA e thingkong hnukkhu lah a kâbang awh. <sup>14</sup> A pahni hnin khopui vai touh a lawngven awh hoi rim koe lah bout a ban awh. Hottelah hnin taruk thung a sak awh. <sup>15</sup> Asari hnin amom khodai tahma vah, a thaw awh teh, ahmoun e patetlah vai sari totouh khopui hah a lawngven awh. Hot hnin teh vai sari touh khopui a lawngven awh. <sup>16</sup> Apa sari hnin teh, vaihmanaw ni mongka a ueng torei teh, Joshua ni hram awh leih, BAWIPA ni khopui nangmouh koe na poe awh han toe. <sup>17</sup> Khopui hoi khopui thung kaawm e pueng abuemlah theobo vaiteh BAWIPA koe poe han toe. Hateiteh tak kâyawt e Rahab teh maimouh ni patoun awh e patounenaw hah a hro dawkvah, ahni hoi a imthungkhu abuemlah a hringnae na hlout sak awh han. <sup>18</sup> Nangmouh ni theobo e hnnonaw hah kâhruetcuat laihoi roun awh. Hote hnnonaw hah na lat awh pawiteh, nangmouh dawkhai, Isarel ransa dawkhai, theobo e lah awm vaiteh a rucatnae na poe vaih tie lakueng hanelah ao. <sup>19</sup> Sui, Ngun, hoi rahum, sumpai abuemlah BAWIPA hanelah thoung sak awh nateh, BAWIPA e hnopai thung vah na hruek awh han telah a taminaw koe Joshua ni atipouh. <sup>20</sup> Hot patetvanlah mongka a ueng awh teh, taminaw ni a hram awh. Mongka lawk a thai awh nah kacaipounglah a hram awh torei teh, khopui kalupnae rapan teh, koun a tip, khopui thung a kâen sin awh teh, khopui teh a la awh. <sup>21</sup> Khopui thung kaawm e tongpa, napui, kacue, kanaw, Tu, Maito, La kaawm e pueng tahloi hoi koun a tâtueng awh.

<sup>22</sup> Hote ram ka tuet e tami roi koe, Joshua ni nangmouh roi ni thoe na bo e patetlah kâyawt e napui im dawkh cet nateh, ahni khuehoi ahni koe kaawm e abuemlah tâcawtkhai awh, atipouh.

<sup>23</sup> Hatdawkvah, ka tuet roi e ni a kâen roi teh, Rahab hoi a manu, a napa, a thangroi naw, ahni koe kaawm e abuemlah hoi amae a hmaunawnggha pueng hai a tâco sak teh, Isarelnaw e rim alawilah ao sak. <sup>24</sup> Khopui khuehoi khopui thung kaawm e abuemlah hmai a sawi awh. Hateiteh, Sui, Ngun, hoi rahum e hno, sumpainaw hai, BAWIPA e hno kuemnae dawkh a hruek awh. <sup>25</sup> Joshua ni tak kâyawt e Rahab hoi amae phun, Ama koe kaawm e abuemlah hring hloutnae a poe teh, ahni teh Isarel miphun dawkvah sahnin totouh ao. Bangkongtetpawiteh, Jeriko khopui ka tuet hane Joshua e patounenaw hah a hro dawkh doeh. <sup>26</sup> Hahoi Joshua ni apihai yah Jeriko khopui bout kangdout sak e teh, BAWIPA hmalah, theobo e tami lah awm seh. Camin se nah adu a ung vaiteh, cahnoung se nah kho longkhanaw hah sak naseh, telah thoe a bo. <sup>27</sup> Hottelah BAWIPA ni Joshua hoi rei ao teh, ahnie min teh ram pueng dawkh a kamthang.

## 7

### *Akhan yonnae*

<sup>1</sup> Hateiteh, Judah miphun, Jerah, Zabdi, Karmi e capa Akhan ni theobo e hno hah a la teh, hote hno dawkh hoi Isarel miphunnaw ni payonnae yon lah ao dawkvah, BAWIPA teh, ahnimouh koe a lungkhuek. <sup>2</sup> Joshua



ni Jeriko khopui hoi taminaw hah a patoun teh, nangmouh ni Bethel kho kanitholah Bethaven kho teng kaawm e Ai kho cet awh nateh, hote ram hah tuet awh atipouh e patetlah ahnimouh ni a cei awh teh, Ai kho a tuet awh. <sup>3</sup> Joshua koe bout a ban awh teh, hete taminaw abuemlah cetsak hanh tami 2000 hoehpawiteh 3000 tabang cei vaiteh, Ai kho tuk awh naseh. Hote kho dawk cei hane hah, hate tami pueng patang sak hanh. Kho thung e tami pap awh hoeh atipouh. <sup>4</sup> Hatdawkvah, tami 3,000 tabang a cei awh, hatei Ai kho e taminaw hmalah a yawng awh. <sup>5</sup> Ai kho e taminaw ni tami 36 touh a thei awh. Kho longkha koehoi Sebarim hmuen totouh a pâlei awh. Hote hmuen koe a kum awh navah a thei awh dawkvah, tami pueng e lungthin teh, tui lah a kamyawt teh, tui patetlah ao. <sup>6</sup> Joshua ni amae khohna a phi teh, Isarel miphunnaw, kacue kanaw abuemlah a lû dawkvahphu a kâphuen awh teh, BAWIPA e thingkong e hmalah karumsaning totouh a tabo awh. <sup>7</sup> Joshua ni, oe BAWIPA nang ni hete tami pueng heh, Amor miphunnaw e kut dawkvah na poe vaiteh, raphoe sak hanelah Jordan palang namran lah bangkongmaw na hrawi awh. Kaimanaw ni lungkuepnae lungthin ka tawn awh dawkvah, Jordan palang kanitholah na awm sak haw. <sup>8</sup> Oe BAWIPA, Isarel miphunnaw ni tarannaw hmalah hnuklah kamlang takhai toung dawkvah, kai ni bangtelamaw ka dei han toung. <sup>9</sup> Kanaan taminaw a onae ram thung taminaw ni, hote kamthang a thai awh navah, kaimanaw na ven awh vaiteh, kaimae ka min teh, talai dawk hoi na takhoe awh han toe. Nange na min lentoe nahanelah bangtelamaw na ti han toung telah atipouh awh. <sup>10</sup> BAWIPA ni thaw haw, bangkong sut na tahung, <sup>11</sup> Isarel miphunnaw na yon awh toe. Kai ni lawk na thui awh e lawkkam hah na raphoe awh toe. Thoe ka bo e hno na paru awh teh, dumyennae na sak awh teh, namamae hno thung na hruek awh toe. <sup>12</sup> Hottelah Isarel miphunnaw ni thoebo e tami lah na o dawkvah, na tarannaw e hmalah na kangdout thai awh hoeh. Hnuklah na kamlang takhai awh. Thoebo kawi lah kaawm hane tami hah nangmouh thung daw hoi na takhoe hoehpawiteh kai teh nangmouh hoi rei kaawm mahoe. <sup>13</sup> Thaw nateh, na taminaw hah thong sak haw. Tangtho e hnin hanlah namahoima thong sak haw atipouh. Isarel miphunnaw e BAWIPA ni kâ na poe e teh, oe Isarel miphunnaw, thoebo e hno teh, nangmae thung vah ao. Hote hno hah nangmouh koehoi na takhoe awh hoehroukrak na tarannaw hmalah na kangdout thai awh mahoe. <sup>14</sup> Tangtho amom miphun miphun lahoi kai koe ka hnai lah na tho awh han. BAWIPA ni a la e miphun teh, a miphun lahoi na hnai awh han. BAWIPA ni a la e imthungkhu kuep lahoi na hnai awh han. BAWIPA ni a la e imthungkhu teh, tami buetbuet touh hoi na hnai awh han. <sup>15</sup> Thoebo e hno ka sin e teh, a la e tami hoi a tawn e hno pueng hoi hmaisawi han. Bangkongtetpawiteh, ahni ni BAWIPA e lawkkam hah a raphoe teh, Isarel miphun thung daw kaya ka tho e hno a sak toe telah Joshua koe atipouh. <sup>16</sup> Amom lah Joshua a thaw teh, Isarel miphunnaw a miphun lahoi a thokhai teh, Judah miphunnaw hah a la. <sup>17</sup> Judah miphunnaw a thokhai teh, Zerahnaw hah a la. Zerah imthungkhu pueng hah a thokhai teh, Zebdi imthungnaw hah a la. <sup>18</sup> Hote imthung daw hoi tami buet touh hoi a thokhai teh, Judah miphun Zerah, Zabdi, Karminaw daw hoi ka tho e Akhan hah a la. <sup>19</sup> Joshua ni ka ca Isarel miphunnaw e BAWIPA pholen nateh, a hmalah na yonnae pâpho haw. Nang ni na sakpayon e hno hah, kai koe na dei pouh haw, hrawk hanh telah Akhan hah atipouh. <sup>20</sup> Akhan ni ka payon toe. Isarel miphunnaw e BAWIPA koe ka yon toe. <sup>21</sup> Kai ni ka yon e hno



teh, Lawp awh e hno thung daw k a phu kaawm poun e Babilon hnicu, ngun shekel cum hni, Sui shekel 50, kai ni ka noe teh, ka kuem toe. Kama e rim thung talai daw k ka pakawp teh, ngun teh, athungpoun lah ao telah Joshua koe a dei poeh. <sup>22</sup> Hahoi Joshua e patounenaw ni rim koe lah a yawng awh teh, hote hnonaw rim thung talai daw k a pakawp e ngun hah a hmu awh toteh, <sup>23</sup> rim thung e a la awh teh, Joshua koe, Isarel miphunnaw hmalah a sin awh teh, BAWIPA e hmalah a ta awh. <sup>24</sup> Joshua hoi Isarel miphunnaw abuemlah ni Zerah e capa Akhan koehoi, ngun, hnicu, suitueng, a canaw, tu, maito, la, rim khuehoi a ma koe kaawm e pueng, Akhor tanghling daw k a ceikhai awh teh, <sup>25</sup> Joshua ni kaimanaw han bangkongmaw runae na poe, sahnin BAWIPA ni nang teh runae na poe van han atipouh teh, Isarel miphunnaw abuemlah ni talung hoi a dei awh. A dei awh hnukkhu hmai a sawi awh. <sup>26</sup> Ahni e a van vah talung a pum awh teh, sahnin totouh ao. BAWIPA e a lungkhueknae a room. Hote hmuen teh sahnin totouh Akhor tanghling telah a phung awh.

## 8

<sup>1</sup> Hahoi BAWIPA ni nang ni taket hanh. Na lungpout hanh, nang koe kaawm e ransanaw abuemlah kaw nateh, thaw nateh Ai kho lah cet haw. Ai siangpahrang hoi ahnie taminaw ahnie khopui, ahnie talai, nange na kut daw k na poe han. <sup>2</sup> Jeriko khopui hoi siangpahrangnaw e lathueng na sak awh e patetlah Ai kho hoi siangpahrangnaw e lathueng hai na sak awh han. Hatei teh na lawp awh e hno, saringnaw hah namamouh hanelah na la awh han. Khopui e hnukkhu lah ramveng hah na ta awh han telah Joshua koe a dei pouh. <sup>3</sup> Joshua hoi ransanaw abuemlah ni Ai kho tuk hanelah a kamthaw awh. Joshua ni athakaawme ransanaw 30,000 touh a rawi teh, karumsaning vah a patoun. <sup>4</sup> Nangmouh ni hote kho tuk hanelah abuemlahoi coungkacoe awm awh. Khopui hoi kahlatlah cet awh hanh. Lungkanging lahoi kâhruetcuetcalah awm awh. <sup>5</sup> Kai hoi rei kaawm e abuemlah ni khopui rek ka hnai awh han. Taminaw ni ahmoun e patetlah na tuk awh hanelah a tâco awh toteh, maimouh ni ahnimae hmalah yawng awh. <sup>6</sup> Ahnimouh ni hai na pâlei awh nahanelah khopui thung hoi tâcawt awh vaiteh, khopui hoi a kâhla awh e hah panuek awh hoeh vaiteh, na pâlei awh han. Bangkongtetpawiteh, ahmoun e patetlah maimae hmalah a yawng awh toe ati awh han. <sup>7</sup> Hahoi nangmouh ni taran ring na laihoi hmuen alouklouk hoi na thaw awh vaiteh, khopui na tuk awh pawiteh, nangmae BAWIPA ni nangmae kut daw k na poe awh han. <sup>8</sup> Na tuk teh, na tâ awh toreï hmai na sawi awh han. BAWIPA ni kâ na poe e patetlah na sak awh han telah kai ni bout ka dei telah ahnimanaw koe lawk na thui. <sup>9</sup> Joshua ni a patoun e patetlah ahnimouh ni taran a ring awh teh, Bethel kho hoi Ai kho a rahak daw k Ai khopui hnukkhu lah ao awh. Joshua teh hote karum vah ahnimouh koe ao. <sup>10</sup> Amon vah a thaw teh, taminaw hah a parei hnukkhu, Isarel miphun kacuenaw hoi cungtalah Ai kho hmaloe a cei sin awh. <sup>11</sup> Joshua e ransanaw abuemlah ni a pâlei awh teh, khopui teng a pha awh toreï teh, kho e atunglah rim a sak awh. Ahnimouh hoi khopui a rahak ravo buet touh ao. <sup>12</sup> Hahoi Ai kho a hnukkhu, Bethel khopui a rahak daw k taran ring sak hanelah, tami 24,000 touh hane a ta. <sup>13</sup> Hottelah khopui koe lahoi Ransanaw a pawp sak teh, hnukkhu lahoi hai taran koun a ring sak teh, Joshua ni hote karum vah, ravo lungui ao.

<sup>14</sup> Hote hnonaw hah Ai siangpahrang ni a hmu navah kho thung tongpanaw pueng teh, karanglah kâra kueng awh leih, Siangpahrang teh,



tami abuemlah hoi Isarel miphunnaw tuk hanelah, kâdawkw e atueng dawkw, hmuen tanghling koe a cei awh. Kho e hnukkhu lah ramveng ao tie hah panuek awh hoeh. <sup>15</sup> Joshua hoi Isarel miphunnaw abuemlah ni ka sung e patetlah kâsak awh teh, kahrawng lah a yawng awh. <sup>16</sup> Ahnimanaw pâlei hanelah, Ai siangpahrang ni kho thung kaawm e tongpanaw pueng hah a kaw teh, Joshua a pâlei awh. Kho hoi a kâhla toe tie panuek laipalah hoehoe a pâlei awh. <sup>17</sup> Isarel miphunnaw ka pâlei hoeh e Ai hoi Bethel kho thung vah, tongpa buet touh hai awh hoeh. Kho teh a aw lah a ceitakhai teh, Isarel miphunnaw hah a pâlei awh.

<sup>18</sup> BAWIPA ni nang ni na patuep e tahroe hah Ai kho koe lah nue haw, hote kho teh nange kut dawkw na poe han atipouh e patetlah, Joshua ni a patuep e tahroe teh hote kho koe lah a nue. <sup>19</sup> A nue navah ramvengnaw ni tang a thaw awh teh, karanglah a yawng awh, khothung a kâen awh teh hmai a sawi awh. <sup>20</sup> Ai khonaw ni hnuklah a khet navah kho thung ka kang e hmaikhu teh, kalvan lah a luen e a hmu awh navah, na lahai yawng hane awh hoeh toe. Kahrawng lah ka yawng e taminaw hai ka pâlei e naw ni bout a tuk awh. <sup>21</sup> Ramvengnaw ni kho thung e hmaikhu ka luen e hah Joshua hoi Isarel miphunnaw abuemlah ni a hmu navah, bout a ban awh teh, Ai khonaw a thei awh. <sup>22</sup> Alouke taminaw ni kho thung hoi a tâco awh teh, khikpacu laihoi a tuk awh dawkvah, Ai kho e taminaw hah buet touh hai pâhma laipalah a thei awh. <sup>23</sup> Ai siangpahrang hah a hring lah a man awh teh, Joshua koe a hrawi awh. <sup>24</sup> Isarel miphunnaw ni tanghling dawkw kaawm e naw, kahrawngum kaawm e naw, Ai miphunnaw abuemlah tahloi hoi koug a tâtueng awh hnukkhu, kho thung bout a kâen awh teh, tahloi hoi a thei awh. <sup>25</sup> Hot hnin vah, Ai kho e tami tongpa napui 12,000 touh hane a due awh. <sup>26</sup> Ai kho thung e tami pueng abuemlah be a raphoe awh hoehroukrak Joshua ni tahroe a nue e kut teh hno hoeh. <sup>27</sup> Hateiteh, BAWIPA Cathut ni Joshua koe lawk a thui e patetlah saringnaw hoi, kut hoi a hmu awh e hnouaw hah Isarel miphunnaw ni amamouh hane a kuem awh.

<sup>28</sup> Joshua ni Ai kho hmai a sawi teh, sahnin totouh, raphoe e songnawng lah ao awh. <sup>29</sup> Ai siangpahrang teh, tangduem totouh, thing dawkw a bang awh teh, khohmo toreî Joshua ni lawk a ceng e patetlah, a ro teh thing dawkw e a la awh teh, kho longkha koe a tâkhang awh. A ro e van vah talungnaw a racawt sin awh. Hote talung a racawt awh e teh, sahnin totouh ao.

### *Joshua ni lawkkam katha a sak*

<sup>30</sup> Hahoi Joshua ni Ebal mon dawkw Isarel miphunnaw e BAWIPA Cathut hanelah thuengnae khoungroe a sak awh. <sup>31</sup> BAWIPA e san Mosi ni Isarel miphunnaw hah lawk a thui e teh, Mosi e kâlawk cauk dawkw thut e patetlah sum hoi sak e hnopai hno mahoe. A hoeh rae talungnaw hoi thuengnae khoungroe na sak vaiteh, BAWIPA hanelah, hmaisawi thuengnae sathei, roum thuengnae satheinaw hoi a bawkw awh. <sup>32</sup> Joshua ni hote talung dawkvah Mosi e kâlawk phung hah Isarelnaw e a hmalah bout a thut. <sup>33</sup> Isarel miphunnaw yawhawî poe han a ngai dawkvah BAWIPA e san Mosi ni lawk a thui e patetlah Isarel miphunnaw, kacuenaw, ukkungnaw, lawkcengkungnaw, vaihmanaw, Levihnaw ni a hrawm awh e BAWIPA lawkkam thingkong, aovivang lah a kangdue awh teh, miphun katang hoi, ramlouk e taminaw khuehoi, Gerizim mon dawkw tami tangawn, Ebal mon dawkw tangawn ao awh. <sup>34</sup> Kâlawk cauk dawkw thut



e patetlah yawhawinae lawk hoi, thoebonae lawknaw pueng hah a touk pouh. <sup>35</sup> Joshua ni Mosi e lawk thui e pueng lawklung buet touh hai pâhma hoe. Napui camo ramlouk e khuehoi, Isarel miphunnaw rangpuinaw hmalah koug a touk pouh.

## 9

### *Gibeonnaw ni Joshua dumnae*

<sup>1</sup> Jordan tui kaniloumlah mon dawkvah, tanghling Lebanon mon namran tuipei tenggam pueng kaawm e, Hitnaw, Amornaw, Kanaannaw, Periznaw, Hivnaw, hoi Jebusitnaw e siangpahrang pueng ni kamthang a thai toteh, <sup>2</sup> Joshua hoi Isarelnaw tuk hanelah lung kângingcalah a kamkhueng sak awh. <sup>3</sup> Hahoi Gibeon kaawm e taminaw ni Jeriko kho, Ai kho dawkvah Joshua ni a sak e hno a thai awh toteh, <sup>4</sup> huenghai hoi laicei patetlah a kâsak teh, la dawkvah ka pon e yawngyanaw a phu sak awh, ka pon ni teh a bo awh e misurumnaw a sin awh. <sup>5</sup> Karuem e a bo awh e khokkhawmnaw a khawm awh teh, karuem e khohnanaw a khohna awh. Amo ka cawt e naw hah lamvon lah a sin awh. <sup>6</sup> Joshua onae Gilgal rim koe a pha toteh, kaimanaw teh, kâhuiko hanelah, kahlatpoung e ram koehoi ka tho awh telah Joshua hoi Isarelnaw koe ati awh.

<sup>7</sup> Isarel miphunnaw ni nangmanaw teh kaimae teng na o hoi na o hoe hane hai ka panuek thai awh hoe. Bangtelah hoi maw lawkkamnae na sak thai telah atipouh navah, <sup>8</sup> ahnimouh ni kaimanaw teh, nangmae san doeh telah Joshua koe atipouh awh. Joshua ni nangmanaw teh bangtelae tami maw, na lahoi maw na tho awh telah a pacei.

<sup>9</sup> Ahnimouh ni nange BAWIPA Cathut min kecu daw kange na sannaw ni ka hlatpoung e ram koehoi ka tho awh toe. BAWIPA Cathut e kamthang hah Izip ram hoi a sak e hnonaw hoi, <sup>10</sup> Jordan palang kanitholah kaawm e Amor siangpahrang Heshbon, Sihon, Ashtaroth kaawm e Bashan Siangpahrang Og dawkvah a sak e pueng hah a thai awh toe. <sup>11</sup> Hatdawkvah kaimouh koe vah kacuenaw hoi kho ka sak e abuemlah ni lamvon sin awh vaiteh, ahnimouh dawn hanelah cet awh. Maimanaw teh, ahnimae san lah o hane hoi kâhuiko hanelah kâhei awh han telah lawk na thui toe. <sup>12</sup> Nang koe tho hanelah kamthaw hnin vah lamvon hanelah kamamouh im hoi na sin awh e vaiyai teh, ka bethuepcalah, ao rah. Atu khenhaw! ka ke ni teh a mocu toe. <sup>13</sup> Misur ka kawi e misurumnaw hai a katha e ei, khenhaw! a kâbawng toe. Khohna e, khokkhawmnaw hai ka hlatpoung e lah ao dawkvah a ruem toe ati awh.

<sup>14</sup> Isarelnaw ni BAWIPA koe pacei laipalah ahnimae lamvon teh a ca awh. <sup>15</sup> Joshua ni hai ahnimouh teh, kâtuknae daw koe hoi hlout sak teh, hlout awh nahanelah kâhuikokhai awh. Rangpui kahrawinaw hai thoe kâbonae sak.

<sup>16</sup> Kâhuikonae a sak awh hnukku, hnin thum touh a loum toteh, ahnimanaw teh, kho thung kaawm e telah Isarel miphunnaw a panue awh. <sup>17</sup> Hat toteh, apâthum hnin vah, ahnimae khonaw daw a pha awh. Ahnimouh khonaw teh, Gibeon, Kephirah, Beeroth, Kiriath-jearim doeh. <sup>18</sup> Rangpui kahrawinaw ni Isarel miphunnaw e BAWIPA Cathut koe thoe kâbonae lawkkam a sak awh toung dawkvah Isarel miphunnaw ni ahnimanaw teh thet awh hoe. Rangpuinaw ni kahrawikungnaw yon a pen awh.

<sup>19</sup> Kahrawikungnaw ni maimanaw teh Isarel miphunnaw e BAWIPA Cathut koe thoe bonae lawkkam toung dawkvah, ahnimanaw hah tek thai awh mahoe toe. <sup>20</sup> Ahnimouh koe thoe bonae sak awh toung dawkvah, a



lungkhueknae phat langvaih tie a taki awh. A hringnae hlout sak dawkvah bangtelamaw ti han tie teh, <sup>21</sup> Kahrawikungnaw ni lawk a kam e patetlah a hringnae hlout sak vaiteh, rangpuinaw hanelah thing ka bouk hane, tui ka do hanelah o sak han telah rangpuinaw koe atipouh.

<sup>22</sup> Joshua ni ahnimanaw a kaw teh, nangmanaw teh kaimae teng na o awh nahlangva, ka hlatpoung koehoi ka tho e na kâti awh teh, bangkongmaw kaimouh na dum awh. <sup>23</sup> Atuteh nangmanaw ni thoe na kâbo awh toung dawkvah, san lah na o awh vaiteh, kaie Cathut e im hanelah, thing bouk, tuido, e thaw buet touh hai na hlout awh mahoe, atipouh.

<sup>24</sup> Ahnimouh ni hai hete ram pueng hah nangmanaw na poe teh, khocaramca pueng teh, nangmae hmalah be thei hanelah, nange BAWIPA Cathut ni amae san Mosi koe lawk a thui tie hah, kaimouh ni khei ka thai awh teh ka panue awh dawkvah, nangmae kut daw due hanelah ka takipoung dawkvah, hete hno hah ka sak awh toe. <sup>25</sup> Atu kaimouh teh nange kut daw ka o awh. Kaimouh daw ka sak hanelah a kamcu tie na pouk e patetlah sak yawkaw telah Joshua koe atipouh awh. <sup>26</sup> Hottelah Joshua ni a sak teh, ahnimae a hring hlout nahanelah, Isarelnaw e kut daw hoi a rungngang. <sup>27</sup> BAWIPA ni a rawi e hmuen koe thuengnae khoungroe hane hoi rangpuinaw hanelah ahnimanaw ni atu totouh thing a bouk awh teh, tui do nahanelah, hatnae tueng dawkvah lawk a tâtueng awh.

## 10

### *Kanî a kangdue*

<sup>1</sup> Joshua ni Jeriko kho hoi siangpahrang koe a sak e patetlah Ai kho Siangpahrang a tuk teh a raphoe e, Gibeon taminaw hoi Isarel miphunnaw kâhuikonae a sak awh teh, cungtalah rei ao awh e Jerusalem Siangpahrang Adonizedek ni a thai torei teh, <sup>2</sup> Gibeon kho teh kalenpounge khopui, Ai kho hlak a len teh, kho thung tongpanaw pueng a thakaawmpoung lah ao dawkvah a takipoung awh. <sup>3</sup> Hatdawkvah Jerusalem Siangpahrang Adonizedek ni Hebron Siangpahrang Hoham, Jarmuth siangpahrang Piram, Lakhish siangpahrang Japhia hoi Eglon Siangpahrang Debir tinaw koe a patoun teh, <sup>4</sup> Gibeon kho teh Joshua koehoi Isarel miphunnaw hoi kâhuikonae a sak dawkvah, hote kho hah tuk hanelah, kai koe a tho awh teh, kai hoi rei kâkabawm sei ati awh e patetlah, <sup>5</sup> Jerusalem Siangpahrang, Hebron siangpahrang Amor Siangpahrang, Lakhish siangpahrang Eglon siangpahrang tie siangpahrang panga touh a kamkhueng awh teh, amamae ransanaw puenghoi a kamthaw awh teh, Gibeon kho hah a tuk awh.

<sup>6</sup> Gibeonnaw teh, Joshua aonae koe Gilgal kho lah a patoun awh teh, nange na sannaw hah banglahai ngai hoe e lah awh hanh. Karang lah na rungngang haw, mon daw kaawm e Amor siangpahrangnaw abuemlah, kaimouh tuk hanelah a kamkhueng awh toe ati awh.

<sup>7</sup> Joshua ni Tarantuk kathoumnaw a thakasainaw, tarankahawinaw, abuemlah Gilgal hoi a cei sin awh.

<sup>8</sup> BAWIPA Cathut ni ahnimanaw hah taket awh hanh. Nangmae kut daw kai ni na poe toe. Nangmae hmalah tami buet touh hai kangdout thai mahoe telah Joshua koe atipouh.

<sup>9</sup> Joshua ni Gilgal hoi karum khodai a cei awh teh, tarannaw kâpanuek sak laipalah a tuk awh. <sup>10</sup> BAWIPA Cathut ni ahnimanaw teh, Isarelnaw e



hmalah a sung sak teh, Gibeon kho teng hoi a thei awh teh, Bethhoron kho ceinae lam koe lah a pâlei awh teh, Azekah, hoi Makkedah totouh a thei awh. <sup>11</sup> Ahnimanaw teh, Isarelnaw e hmalah a yawng awh teh, Bethhoron kho lah a cathuk navah, BAWIPA ni kalvan lahoi kalenpounge talungnaw hah Azekah totouh ahnimouh koe a bo sak. Ahnimanaw teh, Isarelnaw e tahloi dawkh hoi a due awh e hlak roun dawkh hoi kapap lah a due awh.

<sup>12</sup> Hottelah Amornaw teh, Isarelnaw e kut dawkh a poe hnin hoi Joshua ni Cathut koe a ratoum teh, kanî nang teh, Gibeon kho dawkvah, oe thapa nang teh, Aijalon tanghling dawkvah kâhat haw telah, Isarelnaw e hmalah atipouh e patetlah, <sup>13</sup> Isarelnaw teh a tarannaw hah a tâ awh hoehroukrak kanî hai a kâhat teh, thapa hai a kangdue. Jashar e ca dawkh kaawm e teh kalvan lungui tueng vah kanî teh a kangdue, khum laipalah hnin touh thung ao. <sup>14</sup> BAWIPA ni tami e lawk hai a ngâi pouh teh, hot patet e hnin, hnin touh hai awm boihoe. Atuhoi hai bout awm mahoe. Bangkongtetpawiteh, BAWIPA Cathut ni Isarelnaw koelah a kampangkhai teh, taran a tuk. <sup>15</sup> Hahoi Joshua teh, Isarelnaw abuemlah hoi Gilgal rim koe lah a ban awh.

### *Amor siangpahrangnaw theinae*

<sup>16</sup> Siangpahrang panga touh teh a yawng awh teh, Makkedah lungngoum thung a kâhro awh. <sup>17</sup> Makkedah lungngoum thung kâhrawk e siangpahrang panga touh teh, ka hmu awh toe telah Joshua koe a thai sak awh. <sup>18</sup> Joshua ni lungngoum kâko koe talung kalenpounge naw racawt awh nateh, ka ring e taminaw hai tat awh. <sup>19</sup> Nangmanaw teh, tarannaw hah pâlei awh nateh, na pha awh e tami pueng hah, thet awh. Kho thung kâen sak hanh awh. Nangmae BAWIPA Cathut ni ahnimouh teh, nangmae kut dawkh na poe toe atipouh. <sup>20</sup> Joshua hoi Isarelnaw ni a tarannaw koungh a thei awh teh, kaawm rae taminaw teh kacakpounge khopui thung a kâen awh teh, ao awh. <sup>21</sup> taminaw abuemlah ni Joshua a onae Makkedah rim koe duem a ban awh. Isarelnaw buet touh boehai apinihai yon pen awh hoe. <sup>22</sup> Joshua ni lungngoum a paawng teh, hote siangpahrang panga touh hah lungngoum thung hoi tâcawt sak awh nateh, kai koe thokhai awh atipouh e patetlah, <sup>23</sup> Ahnimouh ni a sak awh teh, Jerusalem siangpahrang, Hebron siangpahrang, Jarmuth siangpahrang, Lakhish siangpahrang, hoi Eglon siangpahrang, panga touh hah lungngoum thung hoi a hrawi awh. <sup>24</sup> Joshua koe a thokhai hnukkhu Joshua ni ama hoi cungtalah taran ka tuk e, ransabawinaw hoi Isarelnaw abuemlah a kaw teh, tho awh, hete siangpahrangnaw e lahuen dawkh khok toung awh hottelah ransabawinaw koe a dei e patetlah, ahnimouh ni a tho awh teh, siangpahrangnaw e a lahuen dawkh a counghoe pouh awh. <sup>25</sup> Joshua ni nangmouh ni na tuk awh e na tarannaw abuemlah, BAWIPA Cathut ni hottelah a sak han dawkvah taket awh hanh. Lungpout sak hanh, tha kâlat awh nateh, taranhawinae tawn awh atipouh teh, <sup>26</sup> Hote siangpahrangnaw hah tahloi hoi a thei awh teh, thingkung panga touh dawkh a bang awh. Tangmin lah totouh thingkung dawkh a kâbang. <sup>27</sup> Kanî a khup torei teh, Joshua ni dei e patetlah thingkung dawkh e a la awh teh amamanaw a kâhronae lungngoum koe a tâkhawng awh teh lungngoum kâkhu koe talung kalenpoung naw a racawt sin awh. Hote talung a racawt awh e teh, sahnin totouh ao.

### *Amor ram tânae*



<sup>28</sup> Hot hnin nah Joshua ni Makedah kho a tuk teh, kho hoi siangpahrangnaw tahloi hoi a thei hnukkhu siangpahrang hoi kho thung e abuemlah buet touh hai pahlout laipalah be a raphoe. Jeriko siangpahrang koe a sak e patetlah Makedah siangpahrang koehai a sak awh.

<sup>29</sup> Hathnukkhu Joshua ni Isarelnaw abuemlah hoi Makedah kho hoi Libnah kho a tuk awh. <sup>30</sup> BAWIPA ni kho hoi siangpahrang teh Isarelnaw e kut daw k a poe. Kho hoi kho thung e taminaw abuemlah buet touh hai pâhlung laipalah, tahloi hoi a thei awh teh, Jeriko siangpahrang koe a sak e patetlah hote siangpahrang koehai a sak awh. <sup>31</sup> Joshua ni Isarelnaw abuemlah hoi Libnah kho hoi Lakhish kho lah a cei awh teh a tuk awh. <sup>32</sup> BAWIPA Cathut ni hote kho teh Isarelnaw e kut daw k a poe teh hnin pahni hnin a la pouh awh. Libnah kho a sak e patetlah kho hoi khocanaw abuemlah tahloi hoi a thei awh. <sup>33</sup> Hahoi Gezer siangpahrang Horam ni Lakhish kho kabawp hanelah a tho dawkvah Joshua ni hote siangpahrang hoi taminaw abuemlah buet touh hai pâhlung laipalah koug a thei awh.

<sup>34</sup> Hahoi Joshua ni Isarelnaw abuemlah hoiyah Lakhish kho hoi Eglon kho lah a cei awh teh a tuk awh. <sup>35</sup> Hot hnin vah a la awh teh Lakhish kho daw k a sak awh e patetlah kho hoi khocanaw abuemlah tahloi hoi a thei awh teh, hnin touh hoi koug a raphoe awh.

<sup>36</sup> Hahoi Joshua ni Isarelnaw abuemlah hoi Eglon kho hoi Hebron kho lah a cei awh teh a tuk awh. <sup>37</sup> A la awh torei teh Eglon kho daw k a sak e patetlah kho hoi siangpahrang naw, hote kho hoi kâkuen e pueng, kho kaawm e pueng, kho thung e taminaw pueng, buet touh hai pâhlung laipalah tahloi hoi a thei awh teh, kho hoi taminaw abuemlah koug a raphoe awh. <sup>38</sup> Hahoi Joshua ni Isarelnaw abuemlah hoi Debir kho lah a ban awh teh a tuk awh. <sup>39</sup> Kho hoi siangpahrang naw, kho daw k kaawm e abuemlah a la awh teh, tahloi hoi a thei teh, kho thung taminaw abuemlah buet touh hai pâhlung laipalah, koug a raphoe awh. Hebron kho, Libnah kho e siangpahrangnaw koe a sak awh e patetlah Debir kho hoi siangpahrangnaw koehai a sak awh. <sup>40</sup> Hottelah Isarelnaw e BAWIPA Cathut ni kâ a poe awh e patetlah Joshua ni Mon daw k e, akalah tanghling daw k e, palang daw k kaawm e pueng hah, siangpahrangnaw abuemlah a thei teh, kahring e buet touh hai pâhlung laipalah koug a raphoe. <sup>41</sup> Kadeshbarnea kho koehoi kamtawng teh, Gaza kho totouh, Goshen ram abuemlah hoi, Gibeon kho totouh, a thei awh. <sup>42</sup> Isarelnaw e BAWIPA Cathut ni Isarelnaw koe lahoi taran a tuk dawkvah, hote ramnaw hoi siangpahrangnaw abuemlah vaitalahoi a tâ awh. <sup>43</sup> Hathnukkhu Joshua teh Isarelnaw abuemlah hoi Gilgal rim koe lah a ban awh.

## 11

### *Jabin tânae*

<sup>1</sup> Hote kamthang teh Hazar siangpahrang Jabin ni a thai torei teh, Madon siangpahrang Jobab, Shimron siangpahrang Akshaph siangpahrangnaw koehai thoseh, <sup>2</sup> Mon daw k atunglah Khinneroth kho koe lah, tanghling daw k kaawm e, kaniloumlah kaawm e Dor ram daw k kaawm e, siangpahrangnaw koehai thoseh, <sup>3</sup> Kanitho, kaniloumlah kaawm e Kanaannaw, mon daw k kaawm e Amornaw, Hitnaw, Periznaw, Jebusitnaw, Mizpah ram, hermon mon rahim kaawm e Hivnaw, aonae koe lah, a patoun teh, <sup>4</sup> Hote siangpahrangnaw teh, palang e sadi touk thai hoeh e yit touh, marangnaw, ranglengnaw, ransanaw, hoi a tâco awh. <sup>5</sup> Hote siangpahrang



abuemlah ni a kamkhueng awh teh, Isarelnaw tuk hanelah, a tho awh teh, Merom tui e teng vah cungtalah a roe awh.

<sup>6</sup> BAWIPA ni ahnimanaw taket hanh awh. Kai ni tangtho e hnin dawk Isarelnaw hmalah ahnimouh abuemlah kadout tangcoung e lah na poe awh han. Marang e khok tharuinaw na bouk awh han. Ranglengnaw hah hmai na sawi awh han telah Joshua koe kâ a poe.

<sup>7</sup> Joshua ni amae ransanaw abuemlah hoi Merom tie hmuen koe pouk laipalah a cei teh a tuk awh. <sup>8</sup> BAWIPA ni ahnimouh teh, Isarelnaw e a kut dawk a poe teh a thei awh. Sidon kho, Misrephothmaim kho, kanitholah Mizpah tanghling totouh, a pâlei awh teh, buet touh hai pâhlung laipalah a thei awh. <sup>9</sup> BAWIPA ni kâ poe e patetlah Joshua ni marang e khok tharuinaw a bouk pouh teh ranglengnaw hmai a sawi pouh awh.

<sup>10</sup> Hahoi Joshua ni Hazar kho bout a tuk teh, siangpahrang hah tahloi hoi a thei. Hatnae tueng dawkvah, Hazor kho ni hote ramnaw hah a uk.

<sup>11</sup> Kho thung e tami pueng hah tahloi hoi a thei awh teh, buet touh hai hring sak awh hoe. Koug a raphoe awh teh, kho hai hmai a sawi awh.

<sup>12</sup> BAWIPA Cathut e san Mosi koe kâ a poe e patetlah hote siangpahrangnaw ni a uk e khonaw pueng hoi siangpahrangnaw abuemlah, Joshua ni a tuk teh, tahloi hoi koug a thei. <sup>13</sup> Hatei, Hazor kho dei laipalah, alouklah mon daw kaaawm e kho pueng teh, Isarelnaw ni hmaisawi awh hoe. Hazor kho buet touh dueng hah Joshua ni hmai a sawi. <sup>14</sup> Hote khonaw daw k e hnopainaw hoi saring kaaawm e pueng Isarelnaw ni amamouh hane a la awh. Taminaw koug a thei hoehroukrak tahloi hoi a thei awh. Buet touh hai kahring e awm sak awh hoe. <sup>15</sup> BAWIPA Cathut ni amae san Mosi koe kâ a poe e patetlah Mosi ni Joshua koe patuen a dei pouh. Joshua ni hai telah a sak. BAWIPA ni Mosi koe kâ a poe e pueng a sak hoe e buet touh hai awm hoe.

### *Joshua ni ram a tâ*

<sup>16</sup> Hote Seir lam daw kaaawm e Halak mon koehoi Harmon mon a rahim, <sup>17</sup> Lebanon tanghling daw kaaawm e Baalgad kho totouh, mon daw k e, mon hoi akalae hmuen Goshen ram tanghlingnaw, Isarel mon, Isarel tanghling hoi hote ram abuemlah Joshua ni a la teh, siangpahrangnaw abuemlah a tâ teh, koug a thei. <sup>18</sup> Hote siangpahrangnaw pueng hah atueng moikasawlah a tuk. <sup>19</sup> Hivnaw, Gibeon khonaw dei laipalah Isarelnaw hoi huikona e ka tawn e kho buet touh hai awm hoe. Alouke khonaw pueng a tuk awh teh, a tâ e pueng a la awh. <sup>20</sup> Bangkongtetpawiteh, BAWIPA Cathut ni Mosi koe kâ a poe e patetlah hote taminaw koe pahrennae awm laipalah, abuemlah koug pâmit sak hanelah a ngam totouh a lunghin ka patak sak e lah, BAWIPA Cathut a ma ngainae doeh.

<sup>21</sup> Hatnae tueng nah, Joshua ni a cei teh, Anakim taminaw mon daw kaaawm e Hebron kho, Debir kho, Anab kho, Judah mon, Isarel mon kaaawm e pueng, khonaw koug a raphoe teh, hote khonaw khuehoi koug a raphoe. <sup>22</sup> Gaza kho, Gath kho, Asdod kho, hoe laipalah, Isarel ram thung daw kaaawm e Anakim taminaw buet touh hai awm hoe.

<sup>23</sup> BAWIPA ni Mosi koe kâ a poe e patetlah Joshua ni hote ram pueng a la teh, Isarelnaw râw lah lengkaleng a poe teh, ram pueng daw k taran teh a roum.



<sup>1</sup> Jordan palang kanitholah Arnon palang hoi kamtawng teh, Hermon mon totouh, Kanitholae tanghling pueng, Isarelnaw ni a thei teh, ram a la awh e kaukkung siangpahrangnaw teh, <sup>2</sup> Arnon kho teng e, Armor kho, palang tangawn, Gilead ram tangawn, Ammon ram tangawn, Jakop palang totouh, <sup>3</sup> Kanitholah tanghling koehoi kamtawng teh, Khinneroth tuipui totouh, Sodom kanitholah, Bethjeshimoth kho lah ceinae lam, Pisgah kho, teng akalah hoi thonae lam totouh ka uk niteh, Heshbon kho kaawmnaw Armor siangpahrang Sihon, <sup>4</sup> Hermon mon hoi Salkah ram, Geshurnaw, Maakathnaw, a onae ram totouh, <sup>5</sup> Bashan ram pueng, Heshbon siangpahrang, Sihon ni a uknaeram totouh, Gilead ram tangawn, a uk e a ram totouh, Edrei kho kaawm e miphun kalenpounge thung dawh hoi kaawm e Bashan siangpahrang Og, <sup>6</sup> Hote siangpahrang kahni touh roi hah Cathut e san Mosi hoi Isarelnaw ni a thei teh, BAWIPA e san Mosi ni ahnimae ram teh, Reubennaw, Gadnaw, Manasseh tangawn hah a poe.

<sup>7</sup> Jordan palang kaniloum koe Lebanon tanghling koe kaawm e Baalgad kho hoi kamtawng teh, <sup>8</sup> Seir lam koe lah kaawm e Halak mon totouh, mon dawh, tanghling dawh, palang dawh, kahrawng dawh, akalae, Hitnaw, Amornaw, Kanaannaw, Periznaw, Joshua hoi Isarelnaw ni a thei teh, Joshua ni Isarel miphunnaw koug a poe e ram hah, ka uk e siangpahrangnaw teh,

<sup>9</sup> Jeriko siangpahrang buet touh, Bethel kho teng e Ai siangpahrang buet touh,

<sup>10</sup> Jerusalem siangpahrang buet touh, Hebron siangpahrang buet touh,

<sup>11</sup> Jarmuth siangpahrang buet touh, Lakhish siangpahrang buet touh,

<sup>12</sup> Eglon siangpahrang buet touh, Gezer siangpahrang buet touh,

<sup>13</sup> Debir siangpahrang buet touh, Geder siangpahrang buet touh,

<sup>14</sup> Hormah siangpahrang buet touh, Arad siangpahrang buet touh,

<sup>15</sup> Libnah siangpahrang buet touh, Adullam siangpahrang buet touh,

<sup>16</sup> Makkedah siangpahrang buet touh, Hephher siangpahrang buet touh,

<sup>17</sup> Tappuah siangpahrang buet touh, Hephher siangpahrang buet touh,

<sup>18</sup> Aphek siangpahrang buet touh, Lasharon siangpahrang buet touh,

<sup>19</sup> Madon siangpahrang buet touh, Hazor siangpahrang buet touh,

<sup>20</sup> Shimron buet touh, Merom siangpahrang buet touh, Akshaph siangpahrang buet touh,

<sup>21</sup> Taanakh siangpahrang buet touh, Megiddo siangpahrang buet touh,

<sup>22</sup> Kedesh siangpahrang buet touh, Karner mon e Jokneam siangpahrang buet touh,

<sup>23</sup> Dor ram e Dor siangpahrang buet touh, Gilgal ram e Goiim siangpahrang buet touh,

<sup>24</sup> Tirzah siangpahrang buet touh, siangpahrang abuemlah 31 touh a pha.

## 13

### *Tâ han rae ramnaw*

<sup>1</sup> Joshua teh a matawng a kumcue tounge dawkvah, BAWIPA Cathut ni, nang teh na matawng toe. Na la hane talai hai moi ao rah. <sup>2</sup> Kaawm rae talainaw teh, Filistin ram hoi kamtawng teh, Geshurit ram pueng, <sup>3</sup> Izip ram kanitholah Shihor palang hoi kamtawng teh, atunglah Ekron khorit totouh, Kanaannaw a onae ram, Filistin siangpahrang panga touh,



Gazanaw Asdodnaw, Askelonnaw, Gitnaw, Ekronnaw, Avvimnaw onae ram,

<sup>4</sup> aka lahoi kamtawng teh, Amor ram, Aphek kho totouh, Kanaan ram pueng hoi Sidon ram a tengpam kaawm e Mearah ram,

<sup>5</sup> Kanitholah Hermon mon rahim kaawm e Baalgad kho hoi kamtawng teh, Hamath kho kaennae totouh, Gebal ram, Lebanon ram totouh ao rah.

<sup>6</sup> Lebanon mon hoi kamtawng teh, Misrephothmaim kho totouh, mon daw k kaawm e naw hoi Sidonnaw abuemlah, Isarelnaw e a hmalah kai ni ka pãlei han. Hatdawkvah, kai ni kã na poe e patetlah cungpam khoe sak nateh, hote talai hah Isarelnaw ram lah kãrei sak.

### *Judah Kanitholae ram kãreinae*

<sup>7</sup> Atuteh hete ram hah Isarel miphun tako touh hoi Manasseh miphun tangawn hah rãw lah kãrei sak.

<sup>8</sup> Reuben miphun, Gad miphun, Manasseh miphun tangawn hah, Jordan palang kanitholah Mosi ni raphoe awh e patetlah, namamae rãw talai hah na dãw awh toe atipouh.

<sup>9</sup> BAWIPA Cathut e san Mosi a poe e talai teh, Arnon palang teng kaawm e Aroer kho palang teng kaawm e abuemlah, khonaw hoi Dibon kho totouh, Medeba tanghling daw k kaawm e pueng, <sup>10</sup> Amor ram a pout totouh, Heshbon kho siangpahrang ka taw k e Ammon siangpahrang, Sihon ni a uk e khonaw pueng, <sup>11</sup> Gilead ram Geshurnaw, Maakathnaw onae ram, Hermon mon kaawm e pueng, Salkah ram totouh, Bashan ram pueng, <sup>12</sup> kalenpounge miphunnaw thung hoi kaawm rae naw, Ashtaroth kho, Edrei kho, siangpahrang ka taw k e Bashan siangpahrang, Og e uknaeram abuemlah ao awh. Hote siangpahrangnaw hah Mosi ni koug a thei teh koug a raphoe. <sup>13</sup> Hatei Isarelnaw ni Geshurnaw, Maakathnaw hah, pãlei awh hoeh. Hote miphunnaw teh, sahnin totouh Isarelnaw hoi rei ao awh.

<sup>14</sup> Levih miphunnaw teh, rãw poe awh hoeh.. Isarelnaw e BAWIPA Cathut ni hmai hoi thuengnae naw hah, a dei pouh e patetlah ahnimaie rãw lah ao.

<sup>15</sup> Mosi ni Reuben miphun rãw a poe e ramnaw teh, <sup>16</sup> Arnon palang teng kaawm e, Aroer kho palang teng kaawm e khonaw hoi Medaba tanghling pueng <sup>17</sup> Heshbon kho hoi tanghling daw k kaawm e kho pueng, Dibon kho, Barmoth kho, Bethbaal kho, <sup>18</sup> Jahaz kho, Kedemoth kho, Mephaath kho, <sup>19</sup> Kiriathiam kho, Sibmah kho, tanghling mon daw k kaawm e Zerethsahar kho, <sup>20</sup> Bethpeor kho, Pishgah kho, Bethjeshimoth kho, <sup>21</sup> tanghling daw k kaawmnaw pueng, Heshbon kho siangpahrang katawnaw, Amor siangpahrang katawnaw, Amor siangpahrang Sihon ni uknaeram abuemlah, hote siangpahrang teh a oup awh. Ahnie ram daw k kaawm e, Midian siangpahrang panga touh, Evi, Rekem, Zur, Hur, Reba hah Mosi ni a thei. <sup>22</sup> Profet ka taw k e Beor e capa Balaam hai a thei awh e naw hoi rei ao dawkvah, Isarelnaw ni tahloi hoi a thei awh. <sup>23</sup> Reuben miphun a onae hmuen a kapek awh teh, Jordan palang hoi a tengpam e pueng, Hetnaw hah Reubennaw ni a pang e khoramnaw lah ao.

<sup>24</sup> Mosi ni Gad miphunnaw ama lengkaleng, rãw lah a poe e ramnaw teh, <sup>25</sup> Jazer kho hoi kamtawng teh, Gilead kho kaawm e pueng hoi Rabbah kho e a hmalah kaawm e Roer kho totouh Ammon ram tangawn, <sup>26</sup> Heshbon kho hoi kamtawng teh, Ramoth Mizpeh kho, Betonim kho totouh, Mahanaim kho hoi kamtawng teh, Debir kho totouh kaawm e ram, <sup>27</sup> Tanghling dawkvah, Bethharam kho, Bethnimrah kho, Sukkoth kho,



Zaphon kho a kamtawng koehoi Jordan palang kanîtholah, Jordan palang kâkapeknae, Khinneroth, tuipui totouh, Heshbon siangpahrang, Sihon ni a uknaeram kaawm e hah pueng a poe. <sup>28</sup> Hetnaw heh Gad miphun lahoi râw lah a coe e khonaw lah ao.

*Manasseh miphun tangawn ni coe e ramnaw*

<sup>29</sup> Mosi ni Manasseh miphun tangawn râw a poe teh, Manasseh miphun tangawn ni a miphun lahoi râw lah a hmu e ramnaw teh, <sup>30</sup> Mahanaim kho hoi kamtawng teh, Bashan ram pueng, Bashan siangpahrang Og ni a uknaeram pueng, Bashan ram daww kaawmnaw, Jair kho, 60 touh hah râw lah a hmu awh. <sup>31</sup> Gilead ram tangawn, Bashan uknaeram Og ni a uk e kho hoi, Ashtaroth kho hoi Edrei khonaw hah Manasseh e capa Makhir e catounnaw tangawn ni a miphun lahoi a tawn awh. <sup>32</sup> Hetnaw hah Mosi ni Jordan palang kanîtholah Jeriko kho Moab tanghling daww râw lah a rei e ramnaw lah ao. <sup>33</sup> Levih miphunnaw teh, râw poe hoe. Bangkongtetpawiteh, BAWIPA Cathut ni kâ a poe e patetlah Isarel miphunnaw e BAWIPA Cathut teh, ahnimae râw lah ao.

## 14

*Kanîloumlae ram kêreinae*

<sup>1</sup> Kanaan ram dawkwah, vaihma Eleazar, Nun e capa Joshua hoi Isarelnaw miphun daww e khobawinaw ni râw a rei awh teh, Isarelnaw ni râw teh a coe awh. <sup>2</sup> BAWIPA Cathut Mosi koe lawk a thui e patetlah Isarel miphunnaw phun tako touh hoi tangawn ni cungpam a khoe awh teh râw a coe awh. <sup>3</sup> Mosi ni Isarel miphun hlaikahni touh hoi tangawn hah Jordan palang kanîtholah râw lah a poe toe. Levihnaw teh a louk e miphunnaw hoi kâkalawt lah râw poe awh hoeh. <sup>4</sup> Joseph miphun, Manasseh miphun, Ephraim miphun, miphun kahni touh lah ao teh, Levihnaw ni a onae kho, Ahnimae saring hoi hnopainaw hah, a ta nahane kho hloilah alouke talai poe awh hoeh. <sup>5</sup> Mosi koe BAWIPA ni lawk a thui e patetlah Isarel miphunnaw ni talai teh a kêrei awh.

<sup>6</sup> Hahoi Judah miphunnaw teh Gilgal kho hoi Joshua koe a tho awh teh, Keniz miphun Jephunneh e capa Kaleb ni BAWIPA Cathut teh, Kadeshbarnea e hmuen koe nang hoi kai panue saknae lah Cathut e tami Mosi koe kâ a poe e lawk teh, nang ni na panue. <sup>7</sup> Hete ram tuet hanelah BAWIPA e san Mosi ni kai heh Kadeshbarnea vah na patoun nah, kai teh kum 40 ka pha toe. Kai teh kama e lung thung kaawm e patetlah bout ka dei pouh. <sup>8</sup> Kai hoi rei ka cet e hmaunawngghanaw ni taminaw lung a pout sak awh eiteh, BAWIPA Cathut hnuk doeh khoeroe ka kâbang. <sup>9</sup> Hat hnin vah Mosi ni, nang teh kaie BAWIPA Cathut e hnuk dueng na kâbang dawkwah, nang ni na cungroe e talai pueng teh, a yungyoe nange râw, nange catounnaw e râw lah ao han telah thoe a bo.

<sup>10</sup> Isarelnaw ni kahrawngum kêhei awh navah, Cathut ni hottelah, Mosi koe kâ a poe nah hnin hoi atu totouh, kum 45 touh thung kai heh na hring sak teh, atuteh kum 85 touh ka pha toe. <sup>11</sup> Hateiteh, Mosi ni na patoun na hnin e ka thao e patetlah, atu hai ao rah. Hat navah tâco kâennae, taran tuknae koe kêroe thai e patetlah, atu hai kêroe thai rah. <sup>12</sup> Hatdawkwah hat hnin BAWIPA ni kâ poe e, hete mon hah kai na poe haw. Hete mon dawkwah Anakim taminaw a onae, kalenpounge ka cak pounge e khopuinaw a kawî hah, hat hnin vah nang ni na thai toe. Hatei



Cathut teh, kai hoi rei awm pawiteh, kê na poe e patetlah hotnaw hah pâlei hanelah, kai ni ka ti thai atipouh.

<sup>13</sup> Hat torei teh, Joshua ni yawhawi a poe. Hebron ram hai Jephunneh e capa Kaleb ni râw coe hanelah a poe. <sup>14</sup> Hatdawkvah, Keniz miphun Jephunneh e a capa Kaleb ni Isarelnaw e BAWIPA Cathut e hnuk a kâbang dawkvah, Hebron ram teh sahnin totouh Kaleb e râw lah ao. <sup>15</sup> Hebron kho teh, yampa vah, Kiriath-Arba lah ao. Arba teh, Anakim miphunnaw dawk kacue lah ao. Hat navah, ram thung tarantuknae a roum.

## 15

### *Judah ni a coe e ram*

<sup>1</sup> Judahnaw ni cungpam a khoe awm teh, a miphun lahoi râw a coe e talai teh, Mon dawkvah Edom khori totouh, Teman ram a pout na koehoi, Zin kahrawng totouh a pha. <sup>2</sup> Akalae khori teh, Sodom tuipui dawk hoi akalah hoi a tâco teh, <sup>3</sup> akalah kamlang e a teng, Akrabbim monrui lah a cei teh, Zin kho totouh a pha. Hahoi akalah kamlang e a teng Kadeshbernea, Hezron, Addar, Karh, <sup>4</sup> Azmon kho koehoi Izip palang koe tuipui dawk a kâcu.

<sup>5</sup> Kanîtholah Sodom tuipui teh Jordan palang cum totouh kanîtholah kâkapek e lah ao. Atunglah khori teh, Jordan tui dawk a bo teh Sodom tuipui hoi a tâco teh, <sup>6</sup> Bethhoglah kho koe lahoi Bethrabah kho atunglah a cei teh, Reuben e ca Bohan e talung koe lah a pha. <sup>7</sup> Akhor tanghling atunglah hoi tâco teh, Debir kho koe lah palang e akalah Adummin monrui dawk kaawm e Gilgal kho dawk a pha hoi Enshemesh tuipui Enrogei kho e lam koe lah, <sup>8</sup> Hinnom capa e tanghling teng Jerusalem khopui lah ao teh, Jebusit e hmuen mon e teng vah a cei teh, Hinnom tanghling kanîloumlah, Raphaim tanghling atunglah kaawm e mon koe lah a luen. <sup>9</sup> Hote monsom hoi bout a kum teh Nephtoah tuiphuek koe a cei teh, Ephron mon kâkuen e khonaw koe lah, Kiriath Jearim, Baalah kho koe lah, <sup>10</sup> Baalah kho kanîloumlah a cei teh, Seir mon koe lah, Cheasalon mon tie Jearim mon, atunglah ka cet niteh, Bethshemesh, Timnah kho koe lah. <sup>11</sup> Ekron kho tung lahoi ka cet niteh, Shikkeron kho koe lah, Baalah mon koe lah, Jabneel kho koe a pha teh, tuipui dawk a pout.

<sup>12</sup> Kanîloumlah tuipui kalen hoi tuipui tengpam teh, kanîloumlae khori lah ao. Hetnaw teh, Judah miphunnaw a miphun lahoi e ramri lah ao.

### *Kaleb ni Hebron Debir la*

<sup>13</sup> BAWIPA Cathut ni lawk a thui e patetlah, Joshua ni Judah miphun dawkvah, Jephunneh e capa Kaleb hanelah, Hebron kho tie hah Anakim na pa e kho hah a hruek pouh. <sup>14</sup> Hote kho dawk hoi Kaleb ni, Anakim e capa kathum touh, Sheshai, Ahiman, Talmai naw hah a pâlei hnukkhu, <sup>15</sup> Kiriath-sepher a min karuem lah Debir kho taminaw aonae koe bout a cei teh, <sup>16</sup> Kiriath-sepher kho hah ka tuk e tami teh, kai ni ka canu Aksah ka poe han ati teh, <sup>17</sup> Kaleb e nawngah Kanaz e capa Othniel ni hote kho hah a tuk, Kaleb ni a canu Aksah hah ahni hane yu lah a poe. <sup>18</sup> Hote napui ni kahlawng a cei nah law buet touh a na pa koe hei hanelah a vâ hoi a kâpan hnukkhu la dawk hoi a kum. A na pa Kaleb ni bangmaw na panki e kaawm telah a pacei.

<sup>19</sup> A canu ni yawhawi poe sak han ka ngai. Nang ni akalah kaawm e hmuen pueng na poe toe. Tuiphuek kaawm e naw hai na poe ei titeh a



hei e patetlah, a na pa ni atunglah kaawm e tuiphuek, akalah kaawm e tuiphueknaw hai a poe sin.

### *Judah khopuinaw*

<sup>20</sup> Hetnaw teh, Judah miphun, miphun lahoi a coe awh e râw talai lah o. <sup>21</sup> Judah miphun ni a tawn e khonaw teh, Edom ram hoi kâhnai e Kaleb, Eder, Jagur, <sup>22</sup> Kinah, Dimonah, Adadah, <sup>23</sup> Kedesh, Hazor, Ithnan, <sup>24</sup> Ziph, Telem, Bealoth, <sup>25</sup> Hazar kho katha, Hadatah khoruem tie Kerioth Hezron, <sup>26</sup> Amam, Shema, Moladah, <sup>27</sup> Hazargaddah, Heshmon, Bethpelet, <sup>28</sup> Hazarshual, Beersheba, Biziothiah, <sup>29</sup> Baalah, Iim, Ezem, <sup>30</sup> Eltolad, Chesil, Hormah, <sup>31</sup> Ziklag, Madmannah, Sansannah, <sup>32</sup> Lebaoth, Shilhim, Ain, Rimmon, hoi khopui abuemlah 29 touh a pha teh khotenaw hai a poe sin.

<sup>33</sup> Tanghling dawkvah Eshtaol, Zorah, Ashnah, <sup>34</sup> Zanoah, Engannim, Tappuah, Enam, <sup>35</sup> Jarmuth, Adullam, Sokoh, Azekah, <sup>36</sup> Shaaraim, Adithaim, Gederah, Gederothaim, hoi abuemlah kho 14 a pha touh a pha teh khotenaw pueng hai a poe sin. <sup>37</sup> Zenan, Hadashah, Migdalgad, <sup>38</sup> Deleam, Mizpeh, Joktheel, <sup>39</sup> Lakhish, Bozkath, Eglon, <sup>40</sup> Kabbon, Lahmam, Kitlish, <sup>41</sup> Gederoth, Bethdagon, Naamah, Makkedah, hoi 16 touh. <sup>42</sup> Libnah, Ether, Ashan, <sup>43</sup> Jephthah, Ashnah, Nezib, <sup>44</sup> Keilah, Akhzib, Mareshah kho hoi 9 touh. <sup>45</sup> Ekron kho hoi kâkuen e khonaw pueng, <sup>46</sup> Ekron kho hoi kamtawng teh tuipui totouh, Ashdod kho hoi ka hnai e khonaw pueng, <sup>47</sup> Ashdod kho hoi kâkuen e khonaw pueng, Izip palang, tuipui kalen, tuipui a tengpam totouh, Gaza kho hoi kâkuen e khonaw pueng.

<sup>48</sup> Mon dawk hai, Shamir, Jattir, Sokoh, <sup>49</sup> Dannah, Debir kho tie Kiriathsannah, <sup>50</sup> Arab, Eshtemoa, Anim, <sup>51</sup> Goshen, Holon, Giloh, hoi 11 touh, <sup>52</sup> Arab, Dumah, Eshan, <sup>53</sup> Janim, Bethtappuah, Aphekah, <sup>54</sup> Humtah, Hebron kho tie Kiriatharba, Zior, hoi 9 touh, <sup>55</sup> Maon, Karmel, Ziph, Juttah, <sup>56</sup> Jezreel, Jokdeam hoi, Zanoah, <sup>57</sup> Kain, Gibeah, Timnah, khopui hoi khote asumkun kho 10 touh. <sup>58</sup> Halhul, Bethzur, Gedor, <sup>59</sup> Maarath, Bethanath, Eltekon, khopui hoi khote asumkun kho 9 touh, <sup>60</sup> Kiriath Jearim ti e, Kiriathbaal, Rabbah, khopui hoi khote asumkun kho 2 touh,

<sup>61</sup> Kahrawng vah Betharabah, Middin, Sekakah, <sup>62</sup> Nibshan, Palawi, Engedi, kho 6 touh, <sup>63</sup> Hateiteh Jerusalem kho kaawm e Jubusitnaw teh Judahnaw ni pâlei laipalah ahnimouh teh sahnin totouh Judahnaw hoi Jerusalem kho ao awh.

## 16

### *Ephraim ni coe e naw*

<sup>1</sup> Joseph catounnaw ni cungpam a khoe awh teh a pang awh e râw talai ramri teh, Jordan palang teng, Jeriko kho kanîtholah Jeriko kho tui koehoi kahrawng lam lahoi Bethel mon pueng dawkvah a cei. <sup>2</sup> Bethel hoi Luz kho lah, Ataroth e Ark taminaw e khorî totouh, <sup>3</sup> kanîloumlah, Japhlet kho lah, Beththoron kho lah, Gezer kho lah a pha teh tuipui dawk a pout. <sup>4</sup> Hottelah Joseph e ca Manasseh hoi Ephraim naw ni râw teh a coe awh.

<sup>5</sup> Ephraim ni imthung lahoi kaawm e talai ramri teh kanîtholah, Atarothaddar kho hoi Beththoron koe lah, <sup>6</sup> atunglah tuipui teng, Mikmethath kho koe a tâco. Hahoi kanîtholah Taanathshiloh kho, kanîtholah a cei teh, <sup>7</sup> Janoah kho koe lah, Ataroth, Naarah, Jeriko lah a pha teh,



Jordan palang dawk a pout. <sup>8</sup> Tappuah kho hoi kanîloumlah a cei teh Kanah palang koe lah a cei teh, tuipui dawk a pout. <sup>9</sup> Hetheteh Manasseh miphunnaw râw a coe awh e talai dawk Ephraim miphunnaw hanelah a khuen pouh e khonaw hoi Ephraim miphun imthung lahoi râw a coe awh e khonaw lah ao. <sup>10</sup> Gezer kho dawk kaawm e kanaan naw hah pâlei laipalah ahnimouh teh sahnin totouh Ephraim miphunnaw hoi rei ao awh teh aphawng a cawng awh.

## 17

### *Manasseh miphun tangawn ni coe e*

<sup>1</sup> Joseph e a camin Manasseh ni cungpam a rayu awh teh, râw lah a coe awh e talai hateh, Manasseh e ca, Gilead e a na pa Makhir teh ransa lah ao dawk Gilead ram hoi Bashan ram a poe. <sup>2</sup> Joseph e ca lah kaawm Manasseh capanaw teh Abiezer capa, Halek capa, Asriel capa, Shekhem capa, Hepher capa, Shemida capa, naw ni imthung lahoi cungpam bout a rayu awh.

<sup>3</sup> Hateiteh, Manasseh, Makhir, Gilead, Hepher naw dawk hoi ka tho e Zelophehad teh ca tongpa awm hoeh. Canu dueng doeh kaawm. Ahnie canunaw teh Mahlah, Noah, Hoglah, Milkah, Tirzah doeh. <sup>4</sup> Hote napuinaw teh, vaihma bawi Eleazar, Nun e capa Joshua, kahrawinaw e hmalah a tho teh, kaimouh hoi rei tâcawt e hoi cungtalâh râw coe hane kâ hah kaimouh hoi na poe van hanelah, BAWIPA ni Mosi koe a dei pouh toe atipouh teh, BAWIPA ni a dei pouh e patetlah a na pa e hmaunawngnanaw hoi râw rei a coe awh hane kâ a poe. <sup>5</sup> Telah Manasseh e canunaw teh a capanaw hoi râw rei a coe awh teh, <sup>6</sup> Manasseh e capa tangawn ni Gilead ram hah a coe dawkvah, Jordan palang kanîtholah, Gilead ram hoi Bashan ram hoi a louk Manasseh catounnaw ni 10 touh a coe awh rah.

<sup>7</sup> Manasseh ram khori teh, Asher ram hoi Shekhem kho kanîtholah kaawm e Mikhmethat kho lah ka cet e aranglah, Entappuah kho lah a cei. <sup>8</sup> Tappuah khori teh Manasseh a tawn e lah ao ei, Manasseh e khori teng kaawm e Tappuah kho teh Ephraim ni tawn e lah ao. <sup>9</sup> Hahoi khori teh, Kanah palang akalah a cei teh Manasseh kho dawkvah Ephraim kho tangawn ao eiteh, palang hoi atunglae talai teh Manasseh e talai lah ao teh, tuipui dawk a pout. <sup>10</sup> Akalah Ephraim e talai, atunglah Manasseh e talai lah ao. Tuipui dawk a kâri teh, atunglah Asher ram, kanîtholah Issakhar ram ao.

<sup>11</sup> Hote ram dawkvah Manassehnaw ni a coe e ram kathum touh e teh, Bethshem kho hoi khotenaw, Ibleam kho hoi khotenaw, Dor kho hoi khotenaw dor kho hoi khotenaw, Endor kho hoi khotenaw, Taanakh kho hoi khotenaw, Megiddo kho hoi khotenaw, hah a coe sin awh rah.

<sup>12</sup> Hateiteh, Manasseh miphunnaw ni hote khonaw hah a pâlei thai hoeh dawkvah, Kanaannaw teh a tâ totouh hote hmuen koe ao awh.

<sup>13</sup> Isarelnaw teh a tha hoe a sai awh toreî teh, Kanaannaw hah kOUNg pâlei laipalah aphawng a rawng sak awh.

### *Manasseh ni Ephraim hanlah ram bout a hei*

<sup>14</sup> Joseph miphunnaw ni hai kaimanaw teh, BAWIPA Cathut ni na poe awh e yawhawi ka hmu teh miphun kalen poung lah ka o teh, nang ni ram buet touh dueng hah na poe telah Joshua hah pacei. <sup>15</sup> Joshua ni nangmanaw teh, miphun kalenpounge lah na o teh, Ephraim mon e ram bueng pawiteh ratu koe cet nateh, Periz ram, Refadimnaw e



ram dawkvah o nahane lah sak awh atipouh. <sup>16</sup> Joseph miphunnaw ni hai Ephraim mon teh kaimouh hanelah khout mahoe. Tanghling e hmuen Bethshean khonaw daw, Jezreel tanghling daw, kaawm e Kanaan taminaw abuemlah, ni sumrangleng koun a tawn awh toe telah bout atipouh awh.

<sup>17</sup> Joshua ni nangmanaw teh, miphun kalenpounge thakaawmpounge lah na o dawkvah, buet touh dueng hah na lat awh mahoe. <sup>18</sup> Mon hai nangmouh hanelah ao han. Ratu lah awm pawiteh na tâtueng han. Tâco nahan lamnaw hai nangmouh hanelah ao han. Kanaan taminaw teh a tha o awh teh sumrangleng ka tawn awh ni teh a tha kaawm awh nakunghai, ahnimanaw teh, na pâlei mingming han telah, Ephraim miphun, Manasseh miphun lah kaawm e Joseph phunnaw koe a dei pouh.

## 18

### *Kacawie ram kêreinae*

<sup>1</sup> Isarel miphun tamimaya abuemlah ni Shiloh kho daw a kamkhueng awh teh, tamimaya kamkhueng nahane lukkareim hah a sak awh. Ahnimaeh hmalah ram pueng teh a kêrahnoum awh. <sup>2</sup> Hahoi tore Isarel miphunnaw Sari touh ni râw talai teh a hmu hoe rah dawkvah, <sup>3</sup> Joshua ni nangmae mintoenaw e BAWIPA Cathut ni na poe awh e talai teh, nangmouh ni lat laipalah nâ sittouh maw na o awh han rah. <sup>4</sup> Nangmouh thung daw miphun buet touh daw tami kathum touh rawi nateh, kai ni ka tha han. Ahnimouh ni ram tangkuem daw a cei vaiteh, râw coe han kamcu e patetlah, a thut awh hnukkhu, kai koe bout a tho han. <sup>5</sup> Ahnimouh ni ram teh Sari touh lah a khuen awh han. Judah miphunnaw ni akalah amamae hmuen koe ao han. Joseph miphunnaw ni atunglah amamae hmuen koe ao han. <sup>6</sup> Ram teh sari touh lah a khuen awh hnukkhu, ram kong na thut e hah kai koe na sin vaiteh maimae BAWIPA Cathut e hmalah nangmouh hane cungpam rayu han. <sup>7</sup> Levihnaw teh nangmouh hoi kâkalawt e buet touh hai lat mahoe. BAWIPA Cathut e vaihma thaw teh ahnimaeh râw lah ao. Gadmi phun, Reuben miphun, Manasseh miphun tangawn ni Jordan palang kanitholah Cathut e san Mosi ni a poe e patetlah râw talai teh a coe toe telah Isarelnaw koe a dei pouh.

<sup>8</sup> Hote taminaw ni a cei teh, Joshua ni hai ram thung pueng daw cet awh nateh, be na tuet hoi kai koe bout tho awh. Shiloh kho vah BAWIPA Cathut e hmalah nangmouh hanelah, cungpam khoe han telah ram kong thut hanelah, ka cet e taminaw hah lawk a thui e patetlah, <sup>9</sup> ahnimouh teh, ram thung pueng daw a cei awh teh khopuinaw kaawm e patetlah, hmuen sari touh lah a khuen awh hnukkhu cauk daw a thut awh teh, Joshua onae koe Shiloh bout a tho awh.

<sup>10</sup> Joshua ni Shiloh kho daw BAWIPA Cathut hmalah cungpam a khoe teh, Isarel miphunnaw lengkaleng talai a khuen pouh.

### *Benjamin miphun ni coe e ram*

<sup>11</sup> Benjamin miphunnaw ni cungpam a rayu awh teh, imthung lahoi a coe awh e talai teh Judah miphunnaw hoi Joseph miphunnaw a rahak daw a bo awh. <sup>12</sup> Talai kâkhuennae teh, atunglah Jordan palang hoi kamtawng teh, Jeriko kho atunglah kaniloumlah mon daw, a cei teh, Bethaven ramke totouh a pha. <sup>13</sup> Hahoi akalah a cei teh, Bethel kho teng daw a cei teh, Bethoron kho, akalah kaawm e mon rahim Atarathaddar kho daw a pha hoi teh, <sup>14</sup> Hote mon daw hoi a tâco teh, tuipei akalah



Judah miphun a onae Kiriath Jearim kho tie Kiriathbaal, kho dawk a tâco. Hetheteh, kanîloumlae ramri lah ao. <sup>15</sup> Akalah ramri teh, Kiriath Jearim kho poutnae koehoi kanîloum koe atunglah, Nephtoah tuiphuek koe a pha. <sup>16</sup> Hinnom e capa e tanghling e hmalah, Rephaim tanghling atunglah kaawm e mon rahim lah a tho teh, Jebusit kho akalah Hinnom tanghling koe lah, Enrogl kho koe lah, <sup>17</sup> atunglah atengvah, Enshemesh kho koe lah, Adummin monrui namran Geliloth kho koe lah, Reuben e capa Bohan e talung koe lahoi a cathuk teh, <sup>18</sup> Arabah kho atunglah, kamlang a cei teh, Arabah kho lah a pha. <sup>19</sup> Bethhoglah kho atunglah a cei teh, Palawi tuipui atunglah Jordan tui dawk a pout. Hetheteh akalae ramri lah ao. <sup>20</sup> Jordan tui teh kanîtholae ramri lah ao. Hetheteh, Benjammaw ni imthung lahoi râw lah a coe awh e ram doeh.

<sup>21</sup> Benjamin miphunnaw ni imthung lahoi a tawn e khonaw teh: Jeriko, Bethhoglah, Emekkeziz, <sup>22</sup> Betharabah, Zemaraim, Bethel, <sup>23</sup> Avvim, Parah, Ophrah, <sup>24</sup> Kepharammoni, Ophni, Geba, hoi kho 12 touh a pha. <sup>25</sup> Gibeon, Ramah, Beeroth, <sup>26</sup> Mizpeh, Khephirah, Mozah, <sup>27</sup> Rekem, Irpeel, Taralah, <sup>28</sup> Zelah, Eleph, Jerusalem tie Jebusit, Gibeah, hoi Kiriath, kho hoi khotenaw hoi 14 touh a pha. Hetheteh, Benjamin miphunnaw ni imthung lahoi a tawn e râw lah ao.

## 19

### *Simeon ni coe e ram*

<sup>1</sup> Apâhni e cungpam a rayu teh, Simeon miphunnaw ni imthung lahoi Judah e râw talai dawk râw a coe awh. <sup>2</sup> Ahnimae râw talai dawk kaawm e khonaw teh, Beersheba, Moladah, <sup>3</sup> Hazzarshual, Balah, Ezem, <sup>4</sup> Eltolad, Bethul, Hormah, <sup>5</sup> Ziklag, Bethmarkhaboth, Hazarsusah, <sup>6</sup> Bethlebaoth, Sharuh, hoi kho 13 touh hoi khotenaw. <sup>7</sup> Ai, Rimmon, Ether, Ashan, kho 4 touh. <sup>8</sup> Hothloilah akalah kamlang e, Ballathbeer totouh, a lathueng dei tangcoung e kho tengpam e pueng. Hetnaw teh Simeon miphunnaw ni imthung lahoi a coe awh e râw lah ao. <sup>9</sup> Simeonnaw ni coe e râw talai teh Judahnaw ni coe e thung thum pou lah ao. Judahnaw e teh a len poung dawk ahnimae râw thung dawk e Simeonnaw ni râw a coe van awh.

### *Zebulun miphun ni coe e ram*

<sup>10</sup> Apâthum e cungpam a rayu bo teh, Zebulunaw ni imthung lahoi râw a coe awh. Ahnimae râw talai kâkhuennae teh, Sarid kho hoi a tâco teh, <sup>11</sup> Kanîloumlah a cei teh, Maralah kho, Dabbesheth kho lah, Jokneam kho e hmalah kaawm e palang koe a pha. <sup>12</sup> Hahoi Sarid kho kanîtholah kamlang teh Khislothabor kho, Daberath kho totouh a pha teh Japhia kho totouh a luen. <sup>13</sup> Hote kho hoi kamtawng teh, kanîtholah a cei. Gath Hepher kho, Ethkazin kho, Neah khori Rimmon kho totouh a pha. <sup>14</sup> Atunglah khori teh Hannathon kho dawk a pha teh, Iphtahel tanghling dawk a pout. <sup>15</sup> Hahoi Kattath kho, Nahalal kho, Shimron kho, Idalah kho, Bethlehem, kho tie kho hoi 12 touh a pha. <sup>16</sup> Hetheteh, khopui, kote khuehoi Zebulun miphunnaw ni imthung lahoi a coe awh e râw lah ao.

### *Issakhar miphun ni coe e ram*

<sup>17</sup> Apalinae cungpam a rayu bo teh Issakharnaw ni imthung lahoi râw lah a coe awh. <sup>18</sup> Ahnimae khori teh, Jezreel kho, Khesulloth kho, Shunem kho, <sup>19</sup> Hapharaim kho, Shion kho, Anaharath kho, <sup>20</sup> Rabbith kho, Kishion



kho, Ebez kho, <sup>21</sup> Remeth kho, Engannim kho, Enhadah kho, Bethpazzez kho, <sup>22</sup> Tabor kho, Shahazumah kho, Bethshemesh kho, dawk a pha teh, hote khori teh Jordan palang dawk a pout. Khopui khote 16 touh a pha. <sup>23</sup> Hetheteh, khopui khote khuehoi Issakharnaw ni imthung lahoi a coe awh e rāw lah ao.

### *Asher miphun ni coe e ram*

<sup>24</sup> Apanga e cungpam a rayu bo teh, Ashernaw ni imthung lahoi rāw lah a coe awh. <sup>25</sup> Ahnimae khori teh, Helkath kho, Hali kho, Beten kho, Akshaph kho, <sup>26</sup> Allammelek kho, Amad kho, Mishal kho, Kanīloumlah Karmel kho, Shihorlibnath kho dawk a pha. <sup>27</sup> Hahoi kanītholah, kamlang teh, Bethdagon kho, Zebulun ram Jephthah El tanghling dawk a cei teh, atunglah Bethemek kho, Neiel kho, Kabul kho, <sup>28</sup> Ebron kho, Rehob kho, Hammon kho, Kanah kho, Sidon kho, tui totouh a pha teh, <sup>29</sup> Ramah kho, kacakpounge Taire kho, Hosah kho, koe lah kamlang teh, tuipui daw hoi kamtawng teh, Akhzib kho totouh tuipui dawk a pout. <sup>30</sup> Ummah kho, Aphek kho, Rehob kho, hoi 22 touh a pha. <sup>31</sup> Hetheteh, Ashernaw ni imthung lahoi a coe awh e rāw lah ao.

### *Naphtali miphun ni coe e ram*

<sup>32</sup> Ataruk e cungpam a rayu bo teh Naphtalinaw ni imthung lahoi rāw lah a coe awh. <sup>33</sup> Ahnimae khori teh, Heleph kho, Zaanannim kho kathen kung, Adaminekeb kho, Jabneel kho, Lakkum kho khuehoi Jordan tui dawk a pout. <sup>34</sup> Hahoi kanīloumlah kamlang teh, Aznothtabor kho, Hukkok kho dawk a pha teh, akalah Zebulun ram, kanīloumlah Asher ram, Kanītholae Jordan tui dawk ramri lah ao. <sup>35</sup> Kacakpounge khopuinaw teh, Ziddim, Zer, Hammath, Rakkath, Khinnereth, <sup>36</sup> Adamah, Ramah, Hazor, <sup>37</sup> Kedes, Enhazor, Edrei, <sup>38</sup> Iron, Migdalel, Horem, Bethanath, Bethshemesh hoi 19 touh hoi khotenaw. <sup>39</sup> Hetheteh khopui, khote khuehoi Naphtalinaw ni imthung lahoi a coe awh e rāw lah ao.

### *Dan miphun ni coe e ram*

<sup>40</sup> Asari e cungpam a rayu bo teh, Dannaw ni imthung lahoi rāw lah a coe awh. <sup>41</sup> Ahnimouh ni rāw lah a coe awh e khonaw teh: Zorah, Eshtaol, Irshemesh, <sup>42</sup> Shaalabin, Aijalon, Ithlah, <sup>43</sup> Elon, Timnah, Ekron, <sup>44</sup> Eltekeh, Gibbethon, Baalath, <sup>45</sup> Jehud, Beneberak, Gathrimmon, <sup>46</sup> Mejarkon, Rakkon, Joppa, hmalah kaawm e talai khuehoi. <sup>47</sup> Dannaw ni a coe awh e talai teh, abueng dawkvah Leshem kho a tuk awh teh, hmuena a aw. Leshem kho teh miphun e a na pa Dan min ka sin lah, Leshem hah Dan kho telah min a phung awh. <sup>48</sup> Hetheteh khopui, khote khuehoi Dannaw ni imthung lahoi a coe awh e rāw lah ao.

<sup>49</sup> Hottelah Isarel miphunnaw ni talai teh a kâkhuen awh, a kârei awh teh, rāw be a coe awh hoi, Nun e capa Joshua hah rāw talai a poe awh. <sup>50</sup> Ahni ni a hei e kho, Ephraim mon dawkvah, Timmathserah kho hah Cathut ni kâ a poe e patetlah a poe awh teh, ahni ni khoah a thawng teh kho a sak. <sup>51</sup> Hetheteh, vaihma bawi Eleazar, Nun e capa Joshua Isarel miphun thung dawkvah, imthung lae kacuenaw ni Shiloh kho vah, Cathut hmalah kamkhuengnae lukkareim takhang teng vah, lengkaleng a kârei awh e rāwnaw lah ao. Hahoi teh, ram kâreinae thaw a cum awh toe.



## 20

*Kânguenae khonaw*

<sup>1</sup> Hahoi BAWIPA Cathut ni Joshua hah a kaw teh, <sup>2</sup> nang ni Isarel miphunnaw, <sup>3</sup> tami thei hanelah pouknae awm laipalah, ka tet payon e tami ni, a yawng nahane khonaw hah kêrawi awh. Kut pathungnae koehoi hlout nahane kho lah ao han.

<sup>4</sup> Hote kho buetbuet touh dawk ka yawng e tami teh, kho e longkha koe kangdue vaiteh, hote kho dawk kacuenaw koe amae kong hah a thaisak vaiteh, ahnimouh ni kho thung a kaw vaiteh, amamouh koe hmuen a poe han. <sup>5</sup> Kut ka pathung hane tami ni pâlei pawiteh, ahnie kut dawk poe mahoe. Bangkongtetpawiteh, ahni ni amae a hui hah kâtarannae awm laipalah a thei payon toe. <sup>6</sup> Ahni teh tamimaya hmalah a kangdue teh, lawkcengnae a khang hoehnahlan, hatnae tueng nah vaihma kacue a due hoehnahlan, hote kho dawk ao han. Hathnukkhu hoi a yawng takhai e kho, ama a onae im koe bout ban vaiteh o thainae kê ao han. <sup>7</sup> Ahnimouh ni Galilee ram, Naphtali mon dawk Kedesah vah, Ephraim mon dawk Shekhem kho, Judah mon dawk Hebron kho tie Kiriath-Arba khonaw hai thoseh, <sup>8</sup> Jordan palang namran, Jeriko kho, Kanîtholah Reuben ram, Kahrawngum dawk e Bezer kho, Gad ram, Gilead ram dawk Ramoth kho, Manasseh ram, Bashan ram dawk Golan khonaw hah a rawi awh. <sup>9</sup> Hete khonaw teh, Isarel miphun dawk hai thoseh, ahnimouh koe kaawm e Jentelnaw hai thoseh, pouk laipalah tami thet payon pawiteh, ka thet e tami ni kut pathungnae dawk hoi a hlout vaiteh, tamimaya hmalah a pha hoehnahlan a yawng vaiteh, ao thai nahanelah rawi e khonaw lah ao.

## 21

*Levîh khopuinaw*

<sup>1</sup> Levîh imthung kacuenaw teh, vaihma bawi Eleazar, Nun e capa Joshua, Isarel miphun thung dawk e imthung kacuenaw koe a tho awh teh, <sup>2</sup> Kaimouh ka o nahane khonaw, saringnaw a pâ nahanelah, Cathut ni Mosi koe a poe toe telah Kanaan ram Shiloh kho vah atipouh awh teh, <sup>3</sup> Isarel miphunnaw ni BAWIPA ni a dei pouh e patetlah amamouh ni râw a coe awh e talai dawk e kho hoi a ramnaw a poe awh. <sup>4</sup> Cungpam rayu teh Kohath imthungnaw ni râw a coe torei teh, Levîh vaihma bawi Aron e ca catounnaw ni cungpam rayu e dawk hoi Judah ram, Simeon ram Benjamin ram thung dawk e kho 13 touh a hmu awh. <sup>5</sup> Kaawm rae Kohathnaw ni Ephraim ram, Dan ram Manasseh ram tangawn thung dawk e kho 10 touh a coe awh. <sup>6</sup> Gershonnaw ni cungpam rayu e dawk hoi Issakhar ram, Asher ram, Naphtali ram, Bashan ram, dawk e Manasseh ram tangawn dawk e kho 13 touh a coe awh. <sup>7</sup> Merarinaw ni imthung lahoi Reuben ram, Gad ram, Zebulun ram, dawk e kho 12 touh a coe awh. <sup>8</sup> BAWIPA ni Mosi koe a dei pouh e patetlah Isarel miphunnaw ni cungpam rayu teh, hote khonaw hah khori khuehoi Levîhnaw hah a poe awh.

<sup>9</sup> Judah ram, Simeon ram thung dawk e a poe teh, <sup>10</sup> Levîhnaw lah kaawm Kohath imthung, Aron catounnaw ni apasueke cungpam rayu e dawk hoi a coe e khonaw teh, <sup>11</sup> Judah ram mon rahak dawk Kiriath Arba petkâkalup lae ramnaw khuehoi a poe awh. Arba teh Anakim e a na pa doeh. Ahni teh Hebron doeh. <sup>12</sup> Hateiteh, kho hoi a tengpam lawnaw, khotenaw teh, Jephunneh e capa Kaleb hah a poe awh. <sup>13</sup> Tami ka thet payon e tami ni a kânguenae kho lah ao nahanelah, Hebron kho



lah khori khuehoi vaihma bawi Aron e catounnaw a poe awh. <sup>14</sup> Libnah kho hoi khori, Jattir kho hoi khori, Eshtemoa kho hoi khori, <sup>15</sup> Holon kho hoi khori, Debir kho hoi khori, <sup>16</sup> Ain kho hoi khori, Juttah kho hoi khori, Bethshemesh kho hoi khori, Hote ram kahni touh thung dawk e kho 9 touh e naw, <sup>17</sup> Benjamin ram thung dawk e Gibeon kho hoi khori, Geba kho hoi khori, <sup>18</sup> Anathoth kho hoi khori, Almon kho hoi khori, abuemlah kho 14 touh a poe. <sup>19</sup> Aron e catoun vaihma bawinaw ni a coe e kho abuemlah kho 13 touh a pha.

<sup>20</sup> Kaawm e Kohathnaw imthung lah kaawm e Levihnaw ni cungpam rayu teh, Ephraim ram thung e a coe awh e patetlah, <sup>21</sup> tami ka thet payon e tami ni a kânguenae kho lah ao thai nahanelah, Ephraim mon dawk Shekhem kho hoi khori a poe awh. <sup>22</sup> Gezer kho hoi khori, Kibzaim kho hoi khori, Bethhoron kho hoi khori, abuemlah kho 4 touh, <sup>23</sup> Dan ram thung dawk e, Eltekeh kho hoi khori, Gibbethon kho hoi khori, <sup>24</sup> Aijalon kho hoi khori, Gathrimmon kho hoi khori, abuemlah kho 4 touh, <sup>25</sup> Manasseh ram tangawn dawk e, Taanakh kho hoi khori, Gathrimmon kho hoi khori kho 2 touh a poe. <sup>26</sup> Kaawm e Kohath imthungnaw ni a coe e kho abuemlah kho 10 touh a pha.

<sup>27</sup> Levih imthungnaw, Gershonnaw hai Manasseh ram tangawn dawk e tami ka thet payon e tami ni a kângue nahane kho lah, Bashan ram dawk Golan kho hoi khori, Beeshterah kho hoi khori, abuemlah kho 2 touh. <sup>28</sup> Issakhar ram dawk e Kishion kho hoi khori, Daberath kho hoi khori, <sup>29</sup> Jarmuth kho hoi khori, Engannim kho hoi khori, abuemlah kho 4 touh. <sup>30</sup> Asher ram thung dawk e, Mishal kho hoi khori, Abdon kho hoi khori, <sup>31</sup> Helkath kho hoi khori, Rehob kho hoi khori, abuemlah kho 4 touh. <sup>32</sup> Naphtali ram dawk e tami ka thet payon e ni a kângue nahane kho lah, Galilee ram dawk, Kedesh kho hoi khori, Hommothdor kho hoi khori, Kartan kho hoi khori, abuemlah kho 3 touh a poe awh. <sup>33</sup> Gershonnaw ni imthung lahoi a coe e khori hoi kho abuemlah, 13 touh.

<sup>34</sup> Kaawm rae Levihnaw, Merari imthungnaw teh, Zebulun ram dawk e, Jokneam kho hoi khori, Kartah kho hoi khori, <sup>35</sup> Dimnah kho hoi khori, Nahalal kho hoi khori abuemlah kho 4 touh. <sup>36</sup> Reuben ram dawk e tami ka thet payon e ni a kângue nahane kho lah, Bezer hoi khori, Jahaz hoi khori, <sup>37</sup> Kedemoth hoi khori, Mephaath hoi khori, abuemlah kho 4 touh. <sup>38</sup> Gad miphun thung e tami ka thet payon e ni a kângue nahane kho lah, Gilead ram Ramoth hoi khori, Mahanaim hoi khori, <sup>39</sup> Heshbon hoi khori, Jazer hoi khori, abuemlah kho 4 touh. <sup>40</sup> A imthungkhu lahoi Levih imthung, Merari catounnaw hanelah khopuinaw teh amamae ham dawk hoi kho 12 touh. <sup>41</sup> Isarel catounnaw e ham dawk hoi Levihnaw e khopuinaw teh khopui 48 touh hoi khorinaw hah hah doeh.

<sup>42</sup> Khopui pueng ni khori kalupnae kOUNg a tawn awh teh, hote khopui pueng teh hot patetlah ao awh.

### *Lawkkam a kuep*

<sup>43</sup> Hottelah mintoenaw koe na poe han telah lawk a kam pouh e pueng teh BAWIPA ni Isarel koe a poe teh, amamae ham hah a coe awh teh a thung vah kho a sak awh. <sup>44</sup> BAWIPA ni mintoenaw koe thoebo laihoi lawk a kam tangcoung patetlah a tengpam pueng roumnae a poe. BAWIPA ni a tarannaw pueng hah a kut dawk a poe teh, a tarannaw thung dawk hoi tami buet touh boehai ahnimouh taranlahoi a lungkuep e awmhoeh.



<sup>45</sup> Isarel imthung koe BAWIPA ni a dei e hawinae pueng hah, lawklung buet touh hai a pakuep hoeh e awm hoeh. Abuemlah hoi kouna a kuep.

## 22

### *Kanitholae miphunnaw a ram daw k a ban awh*

<sup>1</sup> Hahoi Joshua ni Reuben catoun, Gad catoun, Manasseh catoun tangawn hah bout a kaw teh, <sup>2</sup> Cathut e san Mosi a dei pouh e pueng, nangmouh ni na sak teh, kai ni ka dei e pueng lawk hai na ngai awh toe. <sup>3</sup> Sahnin totouh atueng moikasaw na thung nangmouh ni hmaunawngghanaw na pahnavt laipalah, nangmae BAWIPA Cathut ni lawk na thui e naw pueng hah na tarawi awh toe. <sup>4</sup> Atuteh nangmae BAWIPA Cathut ni a lawkkam e patetlah hmaunawngghanaw hah karoumcalah o thainae ka na poe dawkvah, nangmanaw ban nateh, nama na onae im daw k, Jordan namran vah BAWIPA e san Mosi a poe e patetlah namamae talai daw k cet awh. <sup>5</sup> Hateiteh, na hringnae buemlahoi, na lungthin buemlahoi, amae thaw taw k hane hoi, kacaklah ama kuet hane hoi kapoelaw k hringkhai hane hoi a lamthung pueng tarawi hane hoi BAWIPA Cathut lungpataw hane hoi kapoelaw k hoi kalaw k, BAWIPA e san Mosi ni ka na poe e naw hah, sak hanelah kahruetcuat awh telah a ti.

<sup>6</sup> Hottelah Joshua ni yawhawi a poe teh a ceisak teh, amamae rim daw k a cei awh. <sup>7</sup> Manasseh miphun tangawn hah Mosi ni Bashan ram daw k talai teh a poe toe. Hatei, miphun tangawn hah Joshua ni Jordan palang kaniloumlah, a hmaunawngghanaw hoi cungalal talai teh a poe. <sup>8</sup> Joshua ni nangmanaw teh hnopai moikapap na coe awh dawkvah, saringnaw, Sui, Ngun, Rahum, Sum, Hnicu naw sin awh nateh, namamouh onae im lah ban awh leih, tarannaw koe e na lawp awh teh, na hmu e hnopainaw hah na hmaunawngghanaw hoi karei awh telah lawk a thui. Yawhawi a poe teh, amamouh onae im lah a cei sak.

<sup>9</sup> BAWIPA ni Mosi koehoi ka a poe e patetlah Reuben catoun, Gad catoun, Manasseh catoun tangawn ni tawn han kamcu e talai, Gilead ram daw k cei hanelah, Isarel miphun aonae koe Kanaan ram, Shiloh kho hoi a tãco awh.

### *Jordan palang teng thuengnae khoungroe*

<sup>10</sup> Kanaan ram Jordan palang teng a pha torei, Reuben catoun, Gad catoun, Manasseh catoun tangawn ni, Jordan palang teng thuengnae khoungroe kalen poung a sak awh. <sup>11</sup> Hottelah Reuben miphun, Gad miphun, Manasseh miphun tangawn ni Kanaan ram namran Jordan palang teng Isarel miphunnaw a rakanae hmuen koe thuengnae khoungroe a sak toe tie Isarelhaw ni kamthang a thai awh. <sup>12</sup> Hote kamthang a thai awh navah, Isarel miphun tamimaya abuemlah ni tuk hanelah, Shiloh kho daw k a kamkhueng awh.

<sup>13</sup> Isarel miphunnaw ni Gilead ram Reuben catounnaw hoi Gad catounnaw hoi Manasseh catounnaw tangawn koe vah, vaihma Eleazar e capa Phinehas a patoun awh. <sup>14</sup> Ahni koe khobawi hra touh, Isarel miphunnaw thung daw k hoi imthung kahrawikung buetbuet touh, hotnaw teh Isarel miphunnaw thung daw k hoi imthung kaukkungnaw doeh. <sup>15</sup> Hote kahrawikungnaw teh, Reuben catoun, Gad catoun, Manasseh catoun, tangawn ao teh Gilead ram totouh a pha awh. <sup>16</sup> BAWIPA e tamimaya abuemlah koe lawk a thui e teh, nangmouh ni Cathut hah, na taran awh teh, thuengnae khoungroe na sak awh dawkvah, BAWIPA e hnuk na kabang awh hoeh. Sahnin lam phen hanelah Isarelhaw e



Cathut koe na yon teh bangtelae maw <sup>17</sup> Nangmouh ni Cathut e hnuk na kâbang awh hoe, na phen awh han toe ti e, Peor e yon teh maimouh hanelah khout hoe, rah maw BAWIPA e tamimaya koe runae kalen a pha eiteh, sahnin totouh hote yon hah na panuek thai awh hoe, rah. <sup>18</sup> Nangmouh ni BAWIPA hah sahnin na taran teh, tangtho e hnin Isarel miphun tamimaya abuemlah koe a lungkhuek han toe. <sup>19</sup> Hatei nangmouh ni na tawn awh e talai hah thoung hoehpawiteh, BAWIPA ni a ma hanelah a la teh, lukkareiim onae talai koe lah rakat nateh kaimouh hoi cungtalaw tawn e lah lat awh. Maimae BAWIPA Cathut e sathei thuengnae khongroe laipalah, alouke sathei thuengnae khongroe ma hanelah, sak e lahoi BAWIPA taran hanh awh. Kaimouh hai na taran hanh awh. <sup>20</sup> Zerah e capa Akhan ni thoebo e hno daw, a payon teh a lungkhueknae hah Isarel miphun, rangpuinaw e a lathueng vah a pha nahoe, maw Ahni ni a payon e yon daw, ama buet touh dueng nahoe, telah ati awh.

<sup>21</sup> Hahoi teh, Reuben catoun, Gad catoun, Manasseh catoun tangawn ni Isarel miphun daw, tami thawng touh ka uk e kacuenaw koe vah bout a dei pouh e teh, <sup>22</sup> Cathutnaw e Cathut, cathutnaw e BAWIPA Cathut, Jehovah ni a panue, Isarel ni hai panuek naseh. BAWIPA koe taranthaw hanelah a kâcai awh teh, a hnukkâbang laipalah phen hanelah kaimanaw ni khongroe ka sak awh katang pawiteh, sahnin pâhlung awh hanh lawih. <sup>23</sup> Hote thuengnae khongroe van hmaisawi thuengnae sathei, tavai thuengnae, roum thuengnae, thueng hanelah kâcainae kaawm nakunghai BAWIPA ma roeroe ni pâphue lawiseh. <sup>24</sup> Hmalae tueng daw nangmae catounnaw ni, Oe Reuben catounnaw, Gad catounnaw nangmouh teh, Isarel miphunnaw e Cathut hoi bangtelamaw na kâkue, awh.

<sup>25</sup> BAWIPA ni kaimouh hoi nangmae rahak daw kâkapeknae Jordan palang teh a ta toe. Nangmouh ni BAWIPA hoi khoeroe na kâkuen hoe, telah kaimae ca catounnaw koe na dei awh dawkvah, kaimae ca catounnaw ni BAWIPA taket laipalah khesak hanelah nangmae ca catounnaw ni sak awh langvaih tie hah puen hanelah ao dawkvah, hete hno teh ka sak awh toe nahoe, maw.

<sup>26</sup> Hatdawkvah maimouh ni sathei thuengnae khongroe hah sak hanelah pathoup leih sei ati awh navah, hmaisawi thuengnae sathei hoi thueng hane na kâcai awh hoe. <sup>27</sup> Maimouh ni hmaisawi thuengnae sathei pueng hoi sathei e phung, roum thuengnae sathei aphunphun sak awh teh, BAWIPA e thaw hah a hmalah taw, hanelah, hmalae tueng daw nangmae catounnaw ni nangmouh teh BAWIPA hoi khoeroe na kâkuen awh hoe, telah maimae catounnaw koe a dei awh hoe nahanelah, hete thuengnae khongroe teh, kaimouh hoi nangmae rahak, kaimae ca catounnaw hoi nangmae ca catounnaw rahak kapanuekkhaikung lah ao nahanelah sak awh toe.

<sup>28</sup> Hmalae tueng daw ahnimouh ni maimouh hoi maimae ca catounnaw koe hottelah dei pawiteh, maimouh ni maimae napanaw ni, hmaisawi thuengnae sathei thueng hanelah nahoe. Maimouh hoi nangmae rahak daw kapanuekkhaikung lah ao nahane, sak e BAWIPA e khongroe hah khenhaw! telah bout dei thai nahanlah ka kâpan awh toe. <sup>29</sup> Lukkarei im hmalah kaawm e maimae Cathut e sathei thuengnae khongroe laipalah, alouke sathei thuengnae khongroe sak pawiteh, hmaisawi thuengnae sathei pueng hoi, sathei phun, tavai thuengnae thueng awh teh, hnukkâbang laipalah tarannae yon teh kaimouh hoi kâhlat lawiseh telah bout a dei awh.



<sup>30</sup> Vaihma Phinehas hoi tamimaya kahrawikungnaw, Isarel miphun daw k hoi tami 1,000 touh ka uk e kacuenaw ni, Reuben catoun, Gad catoun, Manasseh catounnaw ni a dei awh e lawk hah a thai awh torei teh a lung a kuep awh.

<sup>31</sup> Vaihma Eleazar e capa Phinehas ni hai nangmouh teh, BAWIPA koe na yon awh hoe haw dawkvah, Bawipa ni kaimouh koe na okhainae hah sahnin maimouh ni panue awh toe. Nangmouh ni Isarel miphunnaw hah, Cathut e kut daw k hoi atuvah na hlout sak awh toe telah, Reuben catoun, Gad catoun, Manasseh catounnaw koe a dei pouh awh.

<sup>32</sup> Hahoi vaihma Eleazar e capa Phinehas hoi kahrawikungnaw ni Reuben catoun, Gad catounnaw a onae, Gilead ram hoi Isarelnaw a onae Kanaan ram lah bout a tho teh kamthang a thaisak awh. <sup>33</sup> Isarel miphunnaw ni lunghawinae a tawn teh Cathut e pahrennae hah a pholen awh. Hathnukku hoi Reuben catoun, Gad catounnaw a onae ram hah thei hane, tuk hanelah noenae awm hoe haw toe. <sup>34</sup> Reuben catoun, Gad catounnaw ni hai BAWIPA teh Cathut la ao tie hah, hete sathei thuengnae khoungroe teh, kaimae rahak dawkvah kapanuekkhaikung lah awm seh telah a titeh, hote khoungroe teh, Ed telah a min a phung awh.

## 23

### *Joshua ni lawkthuinae*

<sup>1</sup> BAWIPA ni a tengpam kaawm e tarannaw abuemlae kut daw k hoi Isarel miphunnaw a hlout sak teh, roumnae hah atueng moikasawlah a poe hnukku, Joshua teh a kumcue teh a matawng toung dawkvah, <sup>2</sup> Isarel miphun a kum kacuenaw, bawinaw, lawkcengkungnaw hah a kaw teh, kai teh ka kumcue toung dawkvah, ka matawng toe. <sup>3</sup> Nangmae Cathut teh nangmouh hanelah, hete miphun abuemlah dawkvah, a sak e pueng hah nangmouh ni na panue awh toe. Nangmae BAWIPA ni nangmouh koe lah, taran a tuk toe.

<sup>4</sup> Jordan palang hoi kamtawng teh, kaniloum tuipui totouh, kai ni ka ta e miphunnaw hoi kaawm rae hete miphun a onae ram hah, nangmae miphunnaw ni raw coe hanelah, cungpam ka rayu awh teh, kai ni na rei awh toe. <sup>5</sup> Nangmae BAWIPA ni lawkkam e patetlah hete miphunnaw hah, palei awh nateh, nangmouh ni na hmu hoe haw nahanlah, a palei vaiteh, ahnimae talai hah, nangmouh ni abuemlah na coe awh han.

<sup>6</sup> Hatdawkvah, nangmouh ni Mosi e phunglawk cauk daw k e lamthung hoi aranglah, avoilah phen laipalah, kaawm e patetlah na tarawi hanelah thoseh, <sup>7</sup> nangmouh koe kaawm rae, hete miphunnaw hoi kâkalawt awh hanh. Ahnimae cathut min lahoi thoebo awh han, a hmalah khokcuengkhuem awh hanh, na lûsaling sin awh han. <sup>8</sup> Sahnin totouh na tarawi e patetlah, nangmae BAWIPA Cathut daw k kâhnai awh nahanelah taranhawinae lungthin tawn awh.

<sup>9</sup> Bangkongtetpawiteh, kalen ni teh a thakaawmpounge miphunnaw hah, BAWIPA ni nangmae hmalah a palei teh sahnin totouh nangmae hmalah, pihai kangdout thai hoe haw. <sup>10</sup> Nangmouh buet touh ei nakunghai alouke tami 1,000 touh na yawng sak awh han. Bangkongtetpawiteh, nangmae BAWIPA ni lawkkam e patetlah nangmouh koe lah taran a tuk.

<sup>11</sup> Hatdawkvah nangmae BAWIPA teh, na lungpataw thai nahan, takthai lungthin kâhruetcueth awh. <sup>12</sup> Nahoe haw pawiteh, nangmouh ni na kamlang teh nangmouh koe kaawm rae naw hah, hete miphunnaw na kângue awh teh, na kâpaluen awh pawiteh, <sup>13</sup> Nangmae BAWIPA ni hete miphunnaw



hah nangmae hmalah hoi bout pâlei mahoe h toe. Nangmae BAWIPA ni na poe e kahawipoung e ram daw k nangmouh teh kahmakata hoe hroukrak, ahnimouh teh nangmouh hanelah karap, tangkhek, na nâ daw k hemnae rui, na mit daw k pâk hing lah ao han telah kamcengcalah panuek awh.

<sup>14</sup> Kai teh talai tami pueng ceinae lam daw k sahnin ka cei han toe. Nangmae BAWIPA ni nangmouh hanelah, na poe e hawinae buet touh hai payoun hoe h. Abuemlah a kuep sak tie hah, nangmouh ni na lungthin thung vah na panue awh. <sup>15</sup> Nangmae BAWIPA ni lawk a kam e patetlah hawinae pueng teh, nangmae lathueng vah a pha patetlah nangmae BAWIPA ni na poe e, hete ram kahawi e daw k hoi nangmanaw hah kOUNg na raphoe hoe hroukrak, BAWIPA ni nangmae lathueng vah rucatnae naw hah a pha sak han. <sup>16</sup> Nangmanaw teh, nangmae BAWIPA ni na ta pouh e lawkkam hah na payon awh teh, alouke cathut koe na cei teh, lû na saling pawiteh, BAWIPA a lungkhuek vaiteh, na poe tangcoung e ram kahawi daw k hoi nangmanaw teh karanglah na thup awh han telah a pathang pouh.

## 24

### *Shekhem vah lawkthuinae*

<sup>1</sup> Hahoi Joshua ni Isarel miphunnaw abuemlah Shekhem kho daw k a kamkhueng sak teh, Isarel miphun daw k e kacuenaw, kaukkungnaw, lawkcengkungnaw bawinaw hah a kaw teh, ahnimouh ni Cathut e hmalah a hnai awh. <sup>2</sup> Hahoi Joshua ni taminaw abuemlah koe a pathang e teh, Isarelnaw e BAWIPA ni kâ a poe e teh, Abraham hoi Nahor e a na pa Terah koehoi kamtawng teh, nangmae mintoenaw ni, a yan e tueng daw k tuipui namran lah ao awh teh, alouke cathutnaw hah a baw k awh. <sup>3</sup> Nangmae na pa Abraham teh tuipui namran lah, ka kaw teh, Kanaan ram e hmu en koe ka hrawi teh, ahnie miphunnaw ka pung sak teh Isak hah ka poe. <sup>4</sup> Isak koehoi Jakop hoi Esaw hah kai ni ka poe teh, Esaw hai Seir mon hah ka poe. Jakop hoi ahnie canaw ni Izip ram lah a cei awh.

<sup>5</sup> Mosi hoi Aron teh kai ni ka patoun teh, Izip taminaw koe a sak e patetlah Izip ram hah ka toun hnukkhu nangmanaw hah na tâco sak.

<sup>6</sup> Telah nangmae mintoenaw hah Izip ram hoi kai ni ka tâco sak teh, ahnimouh ni Edom tuipui koe a pha awh. Izip taminaw ni rangleng hoi marangransanaw hoi tuipui totouh a pâlei awh. <sup>7</sup> BAWIPA koe a hram awh tore i teh, nangmouh hoi Izip taminaw a rahak hmonae hah kai ni ka ta teh, ahnimanaw hah, tuipui hoi muen ka ramuk sak. Izip ram daw k kai ni ka sak e hno hah, namamouh roeroe ni na hmu awh. Kahrawng daw k hai atueng moikasawlah na o awh.

<sup>8</sup> Hathnukkhu, Jordan palang kanitholah kaawm e Amornaw e ram daw k nangmanaw hah kai ni na hrawi teh, ahnimouh ni na tuk awh navah ahnimouh teh nangmae kut daw k kai ni na poe teh, ahnimae talai hah, nangmouh ni na la pouh awh. Ahnimouh teh nangmae hmalah, kai ni kOUNg ka raphoe. <sup>9</sup> Moab siangpahrang Zippor e capa Balak ni a thaw teh, Isarelnaw hah a tuk teh nangmanaw hah, thoebo sak hanelah, Beor e capa BaLaam hah a kaw tore i teh, <sup>10</sup> BaLaam e lawk kai ni ka ngâi pouh hoe h dawkvah, yawhawinae hah letlang a poe teh, ahnie kut daw k hoi nangmanaw hah kai ni na hlout sak awh.

<sup>11</sup> Hahoi nangmanaw ni Jordan palang na raka teh, Jeriko kho daw k na pha toteh, Jeriko tami, Amor tami, Periz tami, Kanaan tami, Hit tami, Gigashite tami, Hiv tami, Jubusitnaw hah na tuk awh teh, ahnimanaw



hah nangmae kut dawk kai ni na poe. <sup>12</sup> Nangmouh dawk tahloi hoi licung awm laipalah, nangmae hmalah khoingan hah ka tha teh, Amor siangpahrang kahni touh nangmae hmalah kai ni ka pâlei. <sup>13</sup> Nangmouh ni kho na thawng awh hoei e khonaw hah kai ni na poe awh teh, nangmouh ni na o nah awh. Namamouh ni na ung hoei e misur takha, olive takha naw hah, na ca awh telah, BAWIPA ni atipouh.

<sup>14</sup> Atuteh, Cathut hah, taket nateh, lungthin kathoung hoi, yuemkamcu-nae hoi bawk awh. Tuipui namran dawk, Izip ram dawk, mintoenaw ni a bawk e cathutnaw hah pahnawt nateh, BAWIPA duengma bawk awh.

<sup>15</sup> Nahoei pawiteh, BAWIPA hah bawk hanelah awmhoeh telah na pouk pawiteh, tuipui namran lae, mintoenaw ni a bawk e cathut, nangmouh na onae Amor ram dawk e cathutnaw thung dawk bangpatet e cathutnaw maw na bawk awh han tie hah sahnin kêrawi awh leih. Kai hoi ka imthung niteh, Jehovah duengdoeh ka bawk awh han ati navah, <sup>16</sup> Taminaw ni alouke cathutnaw hah bawk hanelah Cathut hah pahnawtnae teh kaimouh hoi kâhlât naseh.

<sup>17</sup> Kaimae BAWIPA ni san lah onae Izip ram hoi mintoenaw hoi kaimanaw hah na tâco sak teh, kalenpounge mitnoutnaw hah kaimae mithmu vah a kamnué sak. Kaimouh kâ ceinae hmuen pueng koe, ka cei sin e miphunnaw koe na okhai. <sup>18</sup> BAWIPA ni hai hete ram dawk kaawm e Amornaw abuemlah kaimae hmalah hoi a pâlei toe. BAWIPA hah ka bawk han. Hote BAWIPA teh kaimae Cathut doeh telah bout ati awh.

<sup>19</sup> Joshua ni vah nangmouh ni BAWIPA hah na bawk thai mahoei. Hote BAWIPA teh, kathoung Cathut, dipma ka sin e BAWIPA lah ao. Nangmouh ni na payon e yonnaw hah, na ngaithoum thai mahoei. <sup>20</sup> Nangmouh ni BAWIPA hah na pahnawt teh, ram alouke cathutnaw hah, na bawk pawiteh, nangmouh dawk hawinae ka sak hnukkhu bout ka kamlang vaiteh, na rektap awh vaiteh na raphoe awh han telah atipouh navah, <sup>21</sup> Taminaw ni, telah nahoei, BAWIPA duengdoeh ka bawk han bout ati awh.

<sup>22</sup> Joshua ni hai nangmouh ni Cathut hah bawk hanelah, na kêrawi awh toe telah, namamouh hoi namamouh doeh kapanuekkhaikung lah na kaawm awh telah atipouh navah, ahnimouh ni kapanuekkhaikung lah ka o awh ati awh teh, <sup>23</sup> Joshua ni telah pawiteh, nangmouh koe kaawm e ram alouke cathutnaw hah pahnawt awh nateh Isarelnaw e BAWIPA Cathut koelah na lungthin kamlang awh ati pou.

<sup>24</sup> Taminaw ni kaimae BAWIPA hah ka bawk han. A lawk ka ngâi pouh han telah ati awh.

<sup>25</sup> Joshua ni hat hnin vah taminaw hoi lawkkam a sak teh, Shekhem kho vah, kêlawk, phunglamnaw a hruek pouh. <sup>26</sup> Hote lawknaw hah BAWIPA e kêlawk cauk dawk a thut teh, BAWIPA e kathoungpounge hmuen teng kaawm e kathen kung rahim vah talung kalen poung a ung teh, <sup>27</sup> hete talung teh maimanaw kapanuekkhaikung lah ao han. Cathut ni kê na poe e lawk ka kuepcalah thai awh toe. Hatdawkvah nangmouh ni Cathut hah, na pahnawtnae hoi na hlout thai nahanelah, nangmanaw hah, kapanuekkhaikung lah na o han telah tami abuemlah koe a dei pouh hnukkhu, <sup>28</sup> amamouh lengkaleng râw a coe awh e hmuen koe bout a ban sak.

### *Joshua hoi Eleazar duenae*

<sup>29</sup> Hathnukkhu BAWIPA e san, Nun capa Joshua teh kum 110 touh a pha teh a due. <sup>30</sup> Ephraim mon dawk Gaash monrui atunglah kaawm e ahnie



râw a coe e, Timnath-serah kho e talai dawk a pakawp awh. <sup>31</sup> Joshua e kut dawk ao nathung pueng Isarelnaw ni BAWIPA teh a bawk awh. BAWIPA ni Isarel miphunnaw hanelah a sak e naw pueng hah a panue awh teh, Joshua a due hnukkhu kahring rae kacuenaw e kut rahim hai BAWIPA hah a bawk awh. <sup>32</sup> Isarel miphunnaw ni Izip ram hoi a sin e Joseph e hrunaw hah, Shekhem a napa, Hamor e canaw koe ngun tangka cum touh hoi Jakop ni a ran e Shekhem kho e talai dawk a pakawp awh. Hote talai teh, Joseph capanaw e râw talai lah ao.

<sup>33</sup> Aron e ca vaihma bawi Eleazar hai a due. Ahnie capa Phinehas hai a yunaw ni a poe e Ephraim mon, Phinehas monrui dawk a pakawp awh.



## LAWKCENGKUNG (Judges)

### *Kanaannaw e tânae*

<sup>1</sup> Joshua a due hnukkhu, Isarelnaw ni Kanaannaw tuk hanelah, apimaw maimouh hanlah hma ka hman han telah BAWIPA hah a pacei awh.

<sup>2</sup> BAWIPA ni, Judah a cei han. A kut dawk ram teh ka poe toe, telah a ti. <sup>3</sup> Judah ni a hmau Simeon koevah, Kanaannaw tuk thai nahanelah, ka ham e ram koe kai na pue haw, kai ni hai nang ni na ham e ram koe na pue van han, atipouh. Hahoi teh, Simeon ni ahni koe a kâbang pouh.

<sup>4</sup> Judah ni a kamthaw teh Kanaannaw hoi Periznaw hah BAWIPA ni a kut dawk a poe teh, Bezek vah tami 10, 000 touh a thei awh. <sup>5</sup> Bezek kho vah Adonibezek siangpahrang a hmu awh teh, Kanaannaw hoi Periznaw a thei awh toteh, <sup>6</sup> siangpahrang teh a yawng eiteh, Judahnaw ni a pâlei awh teh, bout a man awh. A kutpui, a khokpui soumsoum a tâtueng pouh awh.

<sup>7</sup> Adonibezek ni kutpui hoi khokpui a tâtueng pouh e siangpahrang 70 touh ni, kaie caboi rahim buramei a luep awh. Kai ni ouk ka sak e patetlah, BAWIPA ni kai dawk moi na pathung toe ati. Hote siangpahrangnaw teh, Jerusalem a ceikhai awh teh, hawvah a due.

<sup>8</sup> Hahoi Judahnaw ni Jerusalem teh tahloi hoi kOUNG a thei awh hnukkhu, hmai a sawi awh. <sup>9</sup> Hathnukkhu hoi teh, mon dawk kaawmnaw hai thoseh, akalae kaawmnaw hai thoseh, ayawn dawk kaawmnaw hai thoseh, Kanaannaw hai thoseh, a tuk awh. <sup>10</sup> Hahoi minruem Kiriath-Arba a phung awh e Hebron kho kaawm e Kanaannaw aonae koe a cei awh teh, Sheshai Ahiman, Talmainaw a thei awh.

<sup>11</sup> Haw hoi teh, Debir kaawm e naw hah a cei sin awh. Debir teh ayan e min lahoi teh Kiriath-sepher doeh. <sup>12</sup> Hahoi Kalep ni, Kiriath-sepher khopui ka tâ thai e tami teh kai ni ka canu Akasah a yu lah ka poe han telah a ti. <sup>13</sup> Kalep e a nawngah Kenaz e capa Othniel ni a tâ teh a canu Akasah teh a yu lah a poe. <sup>14</sup> Hote napui kahlawng a cei navah, A na pa koe lawhmuennaw hei hanlah a kâpan roi hnukkhu, marang dawk hoi a kum. A na pa ni bangmaw na ngai e kaawm telah a pacei navah, <sup>15</sup> a canu ni yawhawi na poe hanelah ka ngai. Akalae ram na poe boum teh, tuidonaw hai hmawi na poe sin loe atipouh. A na pa ni atunglae tuido hoi akalae tuido puenghai a poe.

<sup>16</sup> Mosi masei e a na minca lah kaawm e Ken miphunnaw hateh, Judahnaw hoi ungkung kho thung kaawm e, Arad ram teng kaawm e, Judah ram dawk a kâbang van teh, kho cungalalah a sak awh. <sup>17</sup> Hahoi teh, Judah ni a hmau Simeon hoi a cei roi teh, Zephath kho kaawm e Kanaannaw a thei roi teh, khopui hai he a raphoe roi. Hatdawkvah, Hormah telah a phung awh. <sup>18</sup> Hahoi Judah ni Gaza hoi ateng e khonaw, Askelon hoi ateng e khonaw, Ekron hoi ateng e khonaw hai kOUNG a la pouh. <sup>19</sup> BAWIPA teh Judah hoi cungalalah ao dawkvah, ahni ni mon dawk e naw pueng he a pâlei. Hateiteh, ayawn dawk kho ka sak e naw teh, sumrangleng a tawn awh dawkvah, pâlei thai awh hoeh. <sup>20</sup> Hahoi Mosi ni a dei e patetlah Hebron teh Kalep a poe awh. Anakim e capa kathum touh teh, hote kho hoi a pâlei awh. <sup>21</sup> Hatei Benjamin miphunnaw niteh,



Jerusalem kaawm e Jebusitnaw hah pâlei awh hoeh dawkvah, atu totouh, Jebusitnaw hah Benjaminaw hoi Jerusalem vah reirei ao awh.

<sup>22</sup> Joseph miphunnaw nihai, Bethel a tuk awh navah, BAWIPA teh ahnimouh koe ao. <sup>23</sup> Joseph miphun niteh, Bethel tuet hanlah, a patoun awh. Hote kho min teh ayan teh Luz tie doeh. <sup>24</sup> Katuettaw ni kho thung hoi ka tâcawt e tami buet touh a hmu awh teh, kho thung kêennae lam na patue haw. Hat pawiteh, na hlout han atipouh. <sup>25</sup> Hote tami ni kho thung kêennae lam a patue teh, ahnimouh ni khocanaw hah tahloi hoi he a tâtueng awh. Hatei, hote tami hoi imthungkhunaw teh a hlout sak awh. <sup>26</sup> Hote a hlout sak awh e imthung teh, Hit ram lah a cei awh teh hawvah kho a sak awh. Ahnimae kho min teh Luz telah a phung awh. Sahnin totouh a min lah pou ao.

### *sungae*

<sup>27</sup> Manasseh miphun niteh, Bethshean khonaw, Tanak khonaw, Dor khonaw, Ibleam khonaw, Megiddo khonaw hah pâlei laipalah, Kanaanaw hoi Hote ram dawк cungtalai rei pou ao awh. <sup>28</sup> Isarelnaw a tha ao toteh, Kanaanaw teh pâlei hoeh eiteh, a kut rahim thaw a tawк sak awh.

<sup>29</sup> Ephraim niteh, Gezer kaawm e Kanaanaw pâlei awh hoeh. Hatei, Kanaanaw hoi mak kâkalawt lah kho a sak awh. <sup>30</sup> Zebulun ni Kitron kaawm naw thoseh, Nahalal kaawmnaw thoseh, pâlei awh hoeh. Hatei, Kanaanaw hoi cungtalai kho a sak awh teh, a kut rahim thaw a tawк sak awh. <sup>31</sup> Hot patetvanlah, Asher miphun ni hai Akko kho kaawmnaw, Sidon kho kaawmnaw, Ahlab kho kaawmnaw, Akhzib kho kaawmnaw, Helbah kho kaawmnaw, Aphik kho kaawmnaw, Rehob kho kaawmnaw a pâlei awh hoeh dawkvah, <sup>32</sup> Asher miphunnaw teh, Kanaanaw koe kho a sak awh.

<sup>33</sup> Naphtali miphun ni Bethshemesh kho kaawmnaw, Bethanath kaawmnaw pâlei awh hoeh. Kanaanaw hoi mak kâkalawt lah kho a sak awh. Bethshemesh hoi Bethanathnaw teh, a kut rahim thaw a tawк sak awh. <sup>34</sup> Amornaw nihai, Dannaw teh mon lah a pâlei awh teh, ayawn dawк teh awm sak awh hoeh. <sup>35</sup> Amornaw teh, Heres, Aijalon hoi Shaalvim vah pou ao awh. Hahoi teh, Joseph miphunnaw a tha ao awh teh, Amornaw a kut rahim thaw a tawк sak awh. <sup>36</sup> Amornaw e khori teh, Akkrabbim lah ka takhang niteh, Sela e a lathueng lah pou a cei.

## 2

### *Isarel lawk ngaihoehnae*

<sup>1</sup> BAWIPA e kalvantami teh Gilgal kho hoi Bokhim kho a tho teh, na mintoenaw koe kai ni lawк ka kam e ram dawк Izip ram hoi kai ni na hrawi awh. Nangmouh hoi kai ni lawкkam ka sak e teh, ka raphoe boi mahoe.

<sup>2</sup> Nangmanaw teh hote ram dawк kaawm naw hoi huikonae na sak awh mahoe. Ahnimae thuengnae khoungroenaw raphoe pouh awh ka ti ei, nangmouh ni ka lawк na ngâi awh hoeh. Bangkongmaw telah na sak awh.

<sup>3</sup> Hahoi bout a dei pouh e teh, ahnimanaw teh nangmouh hmalah ka pâlei mahoe. Hatei, nangmouh na ka tuk e lah ao awh han. Ahnimae cathut teh nangmouh hanelah karap lah ao han atipouh. <sup>4</sup> BAWIPA e kalvantami niyah, Isarelnaw koe telah a dei pouh toteh, taminaw pueng ni hramki laihoi a ka awh. <sup>5</sup> Hete hmuen teh, Bokhim a phung awh teh, BAWIPA koe thuengnae a sak awh.

### *Joshua duenae*



<sup>6</sup> Joshua ni taminaw a patoun toteh, Isarelnaw ni amamouh ni a ham awh hane ram koelah lengkaleng a cei awh. <sup>7</sup> Hote taminaw niteh, Joshua a hring nathung hoi, Joshua hnukkhu ka hring e a lungkahanaw, Isarelnaw hanlah BAWIPA ni a patoun teh, ka tawk e kahmawtnaw pueng ni teh, BAWIPA e thaw a tawk awh. <sup>8</sup> Nun e capa Joshua, Bawipa e san teh, a kum 110 nah a due. <sup>9</sup> Ephraim mon, Gaash mon patung lah Timnath-heres thung amae râw a coe nahane hmuen koe a pakawp awh. <sup>10</sup> Hatnae se dawh teh, tamipueng teh a na mintoenaw koe a pâkhueng awh. Hahoi, ahnimouh hnukkhu e ca catounnaw niteh, BAWIPA hai thoseh, Isarelnaw hanelah thaw a tawk pouh e naw hai thoseh panuek awh hoeh toe.

### *Isarel yuemkamcuhoehnae*

<sup>11</sup> Hahoi teh, Isarelnaw ni BAWIPA mithmu vah hno kahawihoehe yonnae hah a sak awh teh, Baal a bawh awh toe. <sup>12</sup> Izip ram hoi ka tâcawtkhai e a na mintoenaw e BAWIPA Cathut hah a pahnavt awh. Atengpam kaawm e cathutnaw hnuk vah a kâbang awh teh, a hmalah a tabo pouh awh. BAWIPA teh a lung hoe a khuek sak awh. <sup>13</sup> BAWIPA a pahnavt awh teh, Baal hoi Ashtaroth hah a bawh awh. <sup>14</sup> Hatdawkvah, BAWIPA lungkhueknae teh Isarelnaw koe a kân teh, kahuenawnnaw kut dawh a poe teh, a tengpam e tarannaw kut dawh a yo teh, tarannaw hmalah bout kangdout thai awh hoeh. <sup>15</sup> Ahnimouh teh a ceio awh nah tanguem koe BAWIPA ni thoe a bo e patetlah a kut a nâ sin teh, hoe roedengnae hah a kâhmo sak.

### *BAWIPA ni lawkcengkungnaw a tâco sak*

<sup>16</sup> Hahoi teh, BAWIPA ni kahuenawnnaw e kut dawh hoi hlout sak hanelah, lawkcengkungnaw a tâco sak. <sup>17</sup> Hateiteh, ahnimouh ni lawkcengkungnaw e lawk hah ngâi kalawn awh hoeh. Alouke cathutnaw hoi a kâyo awh teh, a bawh awh. <sup>18</sup> A na mintoenaw ni kahring Cathut e kâpoelawknaw a tarawi awh e lamthung dawh hoi karanglah a phen awh. BAWIPA ni lawkcengkungnaw a tâco sak toreih teh, ahnimouh hoi rei a okhai teh, a kut dawh ao yunglam, taran e kut dawh hoi Isarelnaw a hlout sak awh. Bangkongtetpawiteh, ahnimanaw rektap hoi kâhram lawk BAWIPA ni a thai pouh toteh, bout a pahren. <sup>19</sup> Lawkcengkung ni a due takhai toteh, a na mintoenaw hlak hoe a mathoe awh teh, alouke cathut hnuk a kâbang awh teh a bawh awh. Amamae lunglenpansa lah onae lamthung ceitakhai han ngâi awh hoeh. <sup>20</sup> BAWIPA Cathut teh Isarelnaw koe puenghoi a lungkhuek teh, Hete taminaw ni ka lawk ngâi awh hoeh, a na mintoenaw koe lawk ka kam pouh e a raphoe awh toung dawkvah, <sup>21</sup> Joshua a due hnukkhu, a miphunnaw e hmalah hoi Kai ni ka pâlei pouh mahoe toe. <sup>22</sup> A na mintoenaw patetlah BAWIPA e lamthung hah a tarawi ou, tarawi hoeh ou tie panue nahan, Isarelnaw ma tanouk nahanelah, ahnimouh teh ka hno han telah a ti. <sup>23</sup> Hatdawkvah, BAWIPA ni hete miphunnaw vai touh haiyah, he pâlei laipalah, a tara teh, Joshua kut dawh hai poe hoeh.

## 3

<sup>1</sup> Hete miphunnaw teh BAWIPA ni tuk boihoe hae Isarelnaw tanouk nahanelah a pâhlung pouh e naw doeh. <sup>2</sup> Taran tuknae ka thoum hoeh rae naw naran tuk a thoum nahanelah, BAWIPA ni a hruék pouh e miphunnaw teh, <sup>3</sup> Filistinnaw bawi panga touh hoi, Kanaannaw, Sidonnaw, Lebanon mon dawh kaawm e Hivnaw, Baalhermon mon koehoi Lebohamath lam



totouh. <sup>4</sup> BAWIPA ni a na min Mosi hno lahoi a na mintoenaw koe lawk a thui e kâpoelawknaw patetlah a tarawi maw tarawi hoeh maw tie kamnue sak nahanelah, Isarel miphunnaw tanouk nahanelah doeh. <sup>5</sup> Hottelah, Isarelnaw teh Kanaannaw, Hitnaw, Amonnaw, Perizinaw, Hivnaw, Jebusitnaw rahak vah ao awh teh, <sup>6</sup> a canunaw hoi a kâpaluen a kâha awh, a cathutnaw hah a bawk pouh awh.

### *Othniel*

<sup>7</sup> Isarelnaw ni BAWIPA mithmu hno kahawihoehe a sak awh. BAWIPA a pahnavt awh teh, Baal, Asherah hah a bawk awh. <sup>8</sup> Hatdawkvah, BAWIPA teh Isarelnaw koe puenghoi a lungkhuek teh, Mesopotamia siangpahrang Kushan-rishathaim kut dawk a yo, Isarelnaw teh Kushan-rishathaim e san lah kum taroe touh ao awh. <sup>9</sup> Hatei, Isarelnaw BAWIPA bout a kaw awh toteh, BAWIPA ni rungngangkung buet touh a tâco sak. Ahni teh, Kalep nawnggha Kenaz capa Othniel doeh. <sup>10</sup> BAWIPA e Muitha teh a tak dawk a pha, Isarelnaw a uk teh taran a thaw khai. Mesopotamia siangpahrang Kushan-rishathaim hah BAWIPA ni a kut dawk a poe teh, a tâ. <sup>11</sup> Hatdawkvah, ram teh kum 40 thung a roun. Hahoi teh, Kenaz capa Othniel teh a due.

### *Ehud*

<sup>12</sup> Hahoi Isarelnaw ni BAWIPA mithmu vah hno kahawihoehe bout a sak awh. BAWIPA ni Moab siangpahrang Eglon teh Isarelnaw tuk hanlah a kamthaw sak. Bangkongtetpawiteh, BAWIPA mithmu vah hno kahawihoehe a sak awh. <sup>13</sup> Ammonnaw hoi Amaleknaw hah a pâkhueng teh Isarelnaw a tuk sak. Ahnimouh ni a tâ awh teh, ungkung kho hah a la pouh awh. <sup>14</sup> Isarelnaw teh Moab siangpahrang Eglon san lah kum 18 touh ao awh.

<sup>15</sup> Hatei, Isarelnaw ni BAWIPA bout a kaw awh teh, BAWIPA ni ahnimouh hanlah rungngangkung bout a poe. Benjamin miphun Gera capa, avoilaie kut ka hno e Ehud doeh. Isarelnaw ni Ehud koehoi Moab siangpahrang Eglon hanelah hno a patawn awh. <sup>16</sup> Hahoi Ehud ni ayung dong touh ka saw ni teh avoivang kahran e tahloi hah a sin teh, aranglae khok dawk a hna thung a kawm. <sup>17</sup> Hahoi Moab siangpahrang Eglon koe hno teh a poe. Eglon teh ka thaw poung e lah ao. <sup>18</sup> Ehud ni hno a poe hnukkhu, hno aphu sak e naw a cei sak. <sup>19</sup> Hatei, ama teh, Gilgal kho koe e lungdon koehoi let a ban teh, Oe siangpahrang, nang hanlah arulaho laidei hane buet touh ka sin atipouh. Hahoi taica atipouh teh, a sannaw teh ama koehoi kounng a tâco awh. <sup>20</sup> Imthungkhu a tungkhung dawk a tahung navah, Ehud ni a tho sin teh, nang hanelah Cathut koehoi lawk buet touh ka sin ati pouh teh, ahni teh tungkhung dawk hoi hluet a thaw navah, <sup>21</sup> Ehud ni avoilaie kut hoi aranglae a pha hna thung e tahloi a rayu teh, a von dawk a thut pouh. <sup>22</sup> A hlong hroung ka muem lah a thaw ni tahloi hah muen a kayo teh awh ei a tâco. <sup>23</sup> Hahoi Ehud alawilah a tâco teh, a onae rakhannaw pueng he a khan teh a taren pouh.

<sup>24</sup> A ceitakhai hnukkhu a sannaw a tho teh, a onae rakhannaw he a kâtaren e a hmu awh torei teh, alouke imthungkhu dawk vai ao vah telah a pouk awh. <sup>25</sup> Ngailawi a ring awh eiteh, a bawipa ni tho a paawng hoeh toung dawkvah, ahnimouh ni cabi a la awh teh, tho a paawng awh toteh, amamae bawi teh carawng dawk due laihoi kamlet e hah a hmu awh. <sup>26</sup> Hottelah a ring awh lahunnah, Ehud teh a la yawng toe. Lungdonnaw a tapoung teh, Seirah kho vah pou a pha. <sup>27</sup> Ephraim mon dawkvah mongka a ueng teh, Isarelnaw ni a hnuk a kâbang awh teh, mon hoi a kum awh.



<sup>28</sup> Hahoi ahni ni, ka hnukkâbang awh. Bangkongtetpawiteh, na taran Moabnaw teh BAWIPA ni ka kut dawк na poe toe atipouh. Hahoi a kâbang sin awh teh, Moab ram lah ceinae lam Jordan palang rakanae lam hah a ngang awh teh, api buet touh hai cet thai awh hoeh. <sup>29</sup> Hote tueng dawк Moabnaw 10, 000 touh a thei awh. Athakaawme taminaw seng doeh, buet touh hai hlout awh hoeh. <sup>30</sup> Hatdawкvah, hote hnin dawк teh Moabnaw teh Isarelnaw kut dawк a sung awh. Hote ram teh kum 80 touh a roum.

### *Shamgar*

<sup>31</sup> Ahni hnukkhu teh, Anath capa Shamgar a tâco teh, Filistinnaw 600 touh bongpai pasum hoi a thei awh teh, Isarel miphunnaw a hlout sak.

## 4

### *Deborah hoi Barak*

<sup>1</sup> Ehud a due hnukkhu hoi Isarelnaw ni Cathut hmalah hno kahawihoe bout a sak awh. <sup>2</sup> BAWIPA ni Kanaan ram Hazor kho dawк siangpahrang lah kaawm e Jabin koe a yo awh. A ransabawi teh Harosheth-hagoyim kaawm e Sisera doeh. <sup>3</sup> Hahoi teh, Isarelnaw ni Bawipa koe kabawpnae a hei awh teh a kaw awh. Bangkongtetpawiteh, Jabin ni sumrangleng 900 touh a tawn. Isarelnaw teh kum 20 touh thung puenghoi a rektap awh.

<sup>4</sup> Hatnae tueng dawкvah Lappidoth tami profet napui Deborah teh, Isarelnaw hah a uk. <sup>5</sup> Ephraim mon dawк e hmuen, Ramah hoi Bethel rahak kaawm koe Deborah teh samtue rahim vah a tahung teh, haw hoiyah Isarelnaw lawк ouk a ceng. <sup>6</sup> Tami a patoun teh, Abinoam capa Barak hah Naphtali ram Kedesh kho hoi a kaw teh, nang ni, Naphtali miphun, Zebulun miphun dawк e tami 10, 000 touh Tabor mon koe pâkhueng awh. <sup>7</sup> Jabin ransabawi kalenpounge Sisera teh a marangnaw, a kaw e naw khuehoi nang na dawn hanelah, Kishion tui teng vah ka hrawi vaiteh, ahni teh na kut dawк na poe han telah, Isarelnaw e BAWIPA Cathut ni lawк na thui atipouh. <sup>8</sup> Hahoi Barak ni ahnimouh koe, na cetkhai pawiteh ka cei van han, na cet hoehpawiteh ka cet van mahoe atipouh. <sup>9</sup> Hahoi ahnimouh ni, na ceikhai roeroe han. Hatei na ceinae lamthung ni nama teh minhmai kahawi na hmawt mahoe. Bangkongtetpawiteh, BAWIPA ni Sisera teh napui buet touh e kut dawк a yo han telah ati. Hathnukkhu, a thaw teh, Barak hoi Kedesh kholah a cei. <sup>10</sup> Barak ni Zebulun hoi Naphtali hah Kedesh vah a kaw teh, tami 10, 000 touh a cei teh Deborah hai a kâbang van.

<sup>11</sup> Ken miphun Heber teh, Mosi e a masei napui Hobab e catoun, Ken miphunnaw hoi a kampek awh teh Kedesh teng, Zaanannim kaawm e kathen kung koe, rim a sak teh ao awh.

<sup>12</sup> Abinoam capa Barak teh, Tabor mon dawк a luen tie Sisera koe a dei pouh toteh, <sup>13</sup> Sisera ni marang a tawn e naw hoi, a tawn e sumrangleng 900 touh hoi Harosheth-hagoyim hoi Kishion palang totouh a taminaw a pâkhueng. <sup>14</sup> Deborah ni Barak teh, thaw haw, Sisera teh BAWIPA ni na kut dawк poenae hnin a pha toe. BAWIPA teh na hmalah yo a cei toe vaiyaw telah atipouh. Barak ni Tabor mon dawк hoi a hnukkâbang tami 10, 000 touh hoi a cathuk sin. <sup>15</sup> Hahoi, BAWIPA ni Sisera hoi a marangnaw hoi a ransanaw pueng teh, Barak hmalah koung a thei pouh. Sisera ma teh, amae rangleng dawк hoi a kum teh, a khok hoi a yawng. <sup>16</sup> Hahoi Barak ni rangleng hoi ransanaw hoi Harosheth-hagoyim kho totouh a pâlei teh, Sisera ransanaw pueng teh tahloi hoi he a thei awh. Buet touh boehai hlout a hoeh.



<sup>17</sup> Hateiteh, Sisera teh a khok hoi Ken tami Hiber e yu Jael e rim dawk a yawng. Bangkongtetpawiteh, Hazor siangpahrang Jabin hoi Ken tami Haber rim imthungkhunaw hoi a kâhuiko awh. <sup>18</sup> Jael ni Sisera kâhmo hanlah a tâco teh, bawipa kâen leih, kai koe kâenh, taket hanh atipouh. A rim thung a kâen sak teh, hni hai a khu. <sup>19</sup> Hahoi ahni ni, pahren lahoi tui nei hane na poe haw, tui kahran poung atipouh. Hateh, napui ni, maito sanu bom a paawng teh a nei sak hnukkhu hni bout a khu. <sup>20</sup> Hahoi ahni ni, tho koe kangdout nateh tami buetbuet touh ni tongpa hah ao maw telah na pacei pawiteh, awm hoeh telah tet pouh lah a, atipouh. <sup>21</sup> Hatei, Haber e a yu Jael ni rim a hetnae cawt hoi cakkim a la teh, ngawt a tawn dawk a i lahun nah, arulaho duem a cei sin teh, a hnâlakheng dawk pawk a het pouh teh, talai dawk moncawm a um, hateh a due. <sup>22</sup> Khenhaw! Barak ni Sisera a pâlei navah, Jael ni kâhmo hanlah a tâco sin teh, tho leih, na tawng e tami teh na patue han atipouh teh, Barak rim thung a kâen navah, Sisera teh a hnâlakheng dawk cawt hoi pawk kâpâcûe lah ao e hah a hmu.

<sup>23</sup> Hat hnin vah, BAWIPA ni Kanaan siangpahrang Jabin teh, Isarelnaw hmalah a sung sak. <sup>24</sup> Isarelnaw teh a tha hoehoe ao awh teh, a hnukteng vah Kanaan siangpahrang Jabin hah a raphoe awh.

## 5

### *Deborah hoi Barak thasainae*

<sup>1</sup> Hat nah hnin vah, Deborah hoi Abinoam capa Barak ni la a sak roi. <sup>2</sup> Kahrawikung bawinaw ni Isarelnaw a hrawi teh, taminaw ni amamouh lunghotalah hoi a kâhmoun awh teh, BAWIPA teh a pholen awh.

<sup>3</sup> Oe siangpahrangnaw thai awh haw, Oe bawinaw thai awh haw, BAWIPA koe la ka sak vai, Isarelnaw e BAWIPA Cathut koe la hoi ka pholen vai.

<sup>4</sup> BAWIPA nang ni Sisera mon lahoi na tho teh, Edom kahrawng hoi taran na tuk navah, talai a kâhuet teh, tâmai dawk hoi kho thouk na rak sak. <sup>5</sup> BAWIPA hmalah monnaw teh a kâhuet. Isarelnaw e BAWIPA Cathut hmalah vah, Sinai mon a kâhuet.

<sup>6</sup> Anath capa Shamgar se nah, Jael se nahaiyah lamthungnaw teh kingdi dawkvah, kahlawng kacetnaw ni lamtalawi dawk hoi a cei awh.

<sup>7</sup> Isarel miphunnaw koe bawi kâkuen laipalah ao. Kai Deborah ka tâco hoehnahlan, Isarel miphun dawk a manu a tâco hoeh nah totouh, bawi kâkuen laipalah ao. <sup>8</sup> Isarelnaw ni cathut kathanaw hah a kârawi awh. Hat toteh, ahnimae khopuinaw hah tarannaw ni a tuk pouh awh. <sup>9</sup> Isarel miphun 40, 000 touh teh, bahling, tahroe buet touh hai tawn awh hoeh.

<sup>10</sup> Nangmouh marang pangaw dawk kâcuinaw, kalan lah lawkcengkungnaw, lam dawk na ka cet e naw, <sup>11</sup> a coe awh e hnopainaw hah, tuido teng a kârei awh e lawk na thai awh navah, la sak awh. BAWIPA e lannae, Isarel khocanaw koe lannae lahoi thaw tawksae naw hah hote hmuen koe a pholen awh han. Hahoi teh, amamouh onae kho koelah, BAWIPA e taminaw teh bout a ban awh toe. <sup>12</sup> Kâhlaw leih, kâhlaw leih, Deborah kâhlaw leih. Kâhlaw leih, la sak leih. Tho haw Barak, na man e taminaw hah thokhai haw, Oe Abinoam capa.

<sup>13</sup> Na man awh e taminaw thokhai haw. Kacawie naw teh ransanaw koe a ban awh. BAWIPA e taminaw ni a tha kaawm, athakaawme taminaw tuk hanlah kai hanlah a cei awh. <sup>14</sup> Amalek tengpam kaawm e naw niyah, Ephraim hoi a kamthaw awh. Ahnimae hnuklah, na ransabawinaw thung dawk e Benjaminaw teh a kâbang awh. Makhir bawinaw, Zebulun kâ



kapoekungnaw teh a kamthaw awh. <sup>15</sup> Issakhar bawi hai Deborah hoi a tho teh, Issakhar teh Barak ni a kâuep e lah ao awh. Barak hnuk vah ayawn dawk a pâlei awh. Reuben miphunnaw teh lungthin kâounnae a tawn awh.

<sup>16</sup> Nang ni tu hram lawk thai hanelah, bangkongmaw mon rahak vah sut na tahung. Reuben miphunnaw teh lung koug a samphei awh. <sup>17</sup> Gilead teh Jordan namran lah ao. Dannaw teh long kâhatnae koe bangkongmaw sut ao awh vaw. Ashernaw teh long kâhatnae koe a kongteng vah, kâroe laipalah bangkongmaw sut ao rumram awh vaw. <sup>18</sup> Zebulunaw teh hring poe ditouh a lungsa awh. Naphtalinaw hai ka rasang e kahrawngnaw dawk a lungsa awh.

<sup>19</sup> Siangpahrangnaw ni a tho awh teh, a tuk awh. Kanaan siangpahrangnaw ni Megiddo tui Taanakh kho teng a tuk awh ei, sui ngun hnopai lawm thai awh hoeh. <sup>20</sup> Kalvan lahoi taran tuk a kabawp awh teh, Âsinaw a kâhei awh navah, Sisera teh a tuk awh. <sup>21</sup> Ahnimanaw teh kalawng e Kishion tui ni he a pâyo awh. Oe ka muitha nang ni athakasaipoung e na tâ toe. <sup>22</sup> Hat toteh, marangransanaw ni marangnaw a yawng sak awh teh, marangnaw ni talai hah khoktabei hoi a takhawi laihoi a yawng awh.

<sup>23</sup> Meroz teh thoebo hottelah BAWIPA e kalvantami ni ati. Athung e kaawm e puenghai thoebo haw. Bangkongtetpawiteh, BAWIPA a kabawp hoeh dawk doeh. Athakaawme tuk han BAWIPA kabawp hoeh dawkvah.

<sup>24</sup> Ken tami, Heber e a yu Jael teh, napui thung dawk a yawkahawipoung e lah awmseh. Rim thung kaawm e napui thung dawk, a yawkahawipoung e lah awmseh. <sup>25</sup> Tui a hei nah, Jael ni maito sanutui a pânei. Bawi manang dawk hoi maito sanutui a poe. <sup>26</sup> Rim hetnae cawt a la teh, aranglae kut hoi thaw tawknae cakkin hoi Sisera teh a hem teh, a hnâlakheng dawk pawkkayawng lah a hem. <sup>27</sup> A khok koe a rawp teh a rawpnae hmuen koe a due.

<sup>28</sup> Hlalangaw dawk hoi a khet teh Sisera manu ni a khui. Bangkongmaw ahnie sumranglengnaw teh, bangkongmaw a tho hnai hoeh. Rangleng khoknaw teh bangkongmaw a hnawng telah a khui. <sup>29</sup> A lungkaang e napuinaw ni a dei pouh e hloilah, amahoima ni a kâpathung e teh, <sup>30</sup> amamouh ni a hmu awh e hnaw a kârei awh mue toe. Ransanaw koe tanglakacuem buet touh hoehpawiteh kahni touh, Sisera hanlah, asî bu e khohna, a em kaawm lah asî bu e khohna, a lahuen dawk awi hane, ka talue e khohna hah a lawp awh teh, a kârei awh mue toe telah ouk a khui.

<sup>31</sup> Hot patetlah a tarannaw pueng teh, be rawk naseh. Hateiteh, BAWIPA ka lungpataw naw teh kanî a tâco e patetlah, a tho onae hah kho lah yansei seh, telah la a sak awh.

Hahoi hote ram teh kum 40 touh a roum.

## 6

### *Midian ni Isarel rektapnae*

<sup>1</sup> Isarelnaw ni BAWIPA mithmu vah hno kahawihoehe a sak awh, hatdawkvah, BAWIPA ni Midian kut dawk kum 7 touh san a tounng sak. <sup>2</sup> Midiannaw ni Isarelnaw teh a rektap dawkvah, Isarelnaw ni kâhro nahanlah mon dawk talai kâkhu ka cak poung lah a tai awh.

<sup>3</sup> Bangkongtetpawiteh, Isarelnaw ni law a sak awh nah tangkuem koe Midiannaw, Amaleknaw, hoi Kanîtholae taminaw ni pou a tho sin awh



teh, pou a tuk awh. <sup>4</sup> Isarel ram thungvah tungpup rim a sak awh teh, talai daw k e ka paw e caticamu pueng Gaza totouh a raphoe pouh awh. Isarelnaw ni kâkawnae banghai tat pout laipalah, tu, maito, la totouh pek pouh awh hoeh. <sup>5</sup> Bangkongtetpawiteh, ahnimouh ni saring hoi rim khuêhoi samtong yit touh ka phat lah a tho awh. Amamouh hoi kalauknaw teh touk thai lah awh hoeh. Isarel ram raphoe hanelah a tho awh. <sup>6</sup> Midian kecu daw k Isarel teh puenghoi roedeng a khang awh dawkvah, BAWIPA a kaw awh.

<sup>7</sup> Midiannaw kecu daw k Isarel ni BAWIPA a kaw toteh, <sup>8</sup> Isarelnaw koe BAWIPA ni profet buet touh a tha pouh. <sup>9</sup> Na ka rektap e Izip kut daw k hoi thoseh, na ka pacekpahleknaw kut daw k hoi thoseh, nangmanaw na taran ahawi awh teh, ahnimanaw hah nangmouh hmalah ka pâlei vaiteh, a ram roup na poe awh han. <sup>10</sup> Kai teh nangmae BAWIPA Cathut doeh. Nangmouh na onae daw k kaawm e Amonnaw e cathutnaw hah taket awh hanh, ka ti eiteh, ka lawk hah na ngai awh hoeh atipouh.

### *Gideon kawnae*

<sup>11</sup> Hahoi BAWIPA e kalvantami a tho pouh teh, Ophrah kho, Abiezrit capa Joash e kathen kung rahim vah a tahung. Joash e capa Gideon teh amae cang hah Midiannaw ni a pâphawng hoeh nahanelah, misur katinnae teng vah a katin pouh. <sup>12</sup> BAWIPA e kalvantami ni ahni koe a kamphawng pouh teh, athakaawme ransa, BAWIPA teh nang koe ao atipouh navah, <sup>13</sup> Oe BAWIPA Cathut teh maimouh koe awh pawiteh, bangkongmaw hete hnonaw teh maimouh koe a pha sak vaw. Mintoenaw teh BAWIPA ni Izip ram hoi a tâco sak awh nahoehmaw, kai koe ouk a dei awh e kângairuhnonaw te nâne. Hatei, atuteh BAWIPA ni na pahnawt teh, Midian kut daw k na poe toe khe telah a ti. <sup>14</sup> Hahoi Bawipa ni a kamlang sin teh, atu na tawn e thaonae kâuep hoi cet haw, Midian kut daw k hoi Isarel teh rasat haw, Kai ni na patoun e nahoehmaw atipouh. <sup>15</sup> Hahoi teh Gideon ni, BAWIPA kaimouh ni Isarelnaw bangtelah hoi maw ka rasa thai awh han vaw. Ka miphun teh Manasseh thung daw k hoe ka mathoe e, kama hai thoseh ka hmaunawnggha thung daw k kathoungpounge lah ka o. <sup>16</sup> Hahoi BAWIPA ni a pato teh, hatei nang koe ka o han, Midiannaw teh tami buet touh na thei e patetlah na thei han doeh atipouh. <sup>17</sup> Gideon ni nang koehoi minhmai kahawi ka hmawt pawiteh, nang hoi atu kâpatonae panue nahanelah, kamnuenae hno buet touh na hmawt sak haw. <sup>18</sup> Hno buetbuet touh ka sin vaiteh, na hmalah ka thokhai hoehroukrak hete hmuen koehoi na kampuen pouh hanh ei a telah ka kâhei navah ahni ni, na ban hoehroukrak ka o han a ti.

<sup>19</sup> Gideon ni a cei teh, hmaeca buet touh, tavai ephah buet touh, tonphuenhoehe vaiyeinaw hah a sin teh, hmae moi hah tangthung daw k a pâseng teh, hmae moi hang teh hlaam daw k a ta teh, kalvantami aonae koe bengkengkung rahim a sin teh a poe. <sup>20</sup> Hahoi Cathut e kalvantami ni ahni koe, moi hoi tonphuenhoehe hah lat loe, hete talung van hrueng loe, a hang hoi awi loe atipouh. Hottelah a sak pouh. <sup>21</sup> Hahoi teh, BAWIPA e kalvantami ni a kut daw k a sin e sonron a dâw teh, moi hoi tonphuenhoehe vaiyei hah a nep. Hahoi talung thung hoi a tâco teh, moi hoi tonphuenhoehe vaiyei hmai he a kak pouh. BAWIPA e kalvantami teh yout a kahma pouh. <sup>22</sup> Hat torei teh, Gideon ni BAWIPA e kalvantami tie a panue. Hahoi teh, Oe Bawipa Jehovah, atuteh BAWIPA e kalvantami minhmai rek ka hmu toe a ti. <sup>23</sup> BAWIPA ni na lungpuen hanh. Yawhawinae awmseh. Nang teh na dout mahoe. <sup>24</sup> Hote hmuen



koe Gideon ni Bawipa hanlah thuengnae a sak teh, BAWIPA teh roumnae (Jehovah-shaloam) telah a phung. Abiezrit capa e hmuén koe Ophrah kho dawk sahnin ditouh ao.

<sup>25</sup> Hote hnin tangmin vah BAWIPA ni na poe e maito matawng hoi apâhni e kum sari touh e maitotan hah sin nateh, na pa ni a sak e Baal cathut thuengnae khoungröe hah raphoe nateh, khoungröe teng kaawm e Asherah thing hah tâtueng loe. <sup>26</sup> Kai ni ka dei e patetlah hete talung van vah, BAWIPA hanlah thuengnae khoungröe na sak hnukkhu, na tâtueng e thing hoi apâhni e maito hah hmaisawi thuengnae lah sak loe atipouh. <sup>27</sup> Gideon ni amae sannaw 10 touh a kaw teh, BAWIPA ni a dei e patetlah a sak, a na pa e imthungkhuñaw thoseh, khocanaw thoseh a taki teh, kanîthun vah a sak ngam hoeh dawkvah tangmin vah a sak.

### *Gideon ni Baal thuengnae khoungröe a raphoe*

<sup>28</sup> Amom khocanaw a thaw awh navah, Baal cathut e khoungröe peng a kâraphoe teh, ateng kaawm e Asherah thing hai a rawp teh, a hnukkhu sak e thuengnae khoungröe van vah, apâhni e maitotan thueng e hah a hmu awh. <sup>29</sup> Hat toteh, hete hno heh apimouh ka sak telah buet touh hoi buet touh akung a kâkhei awh navah, hete hno teh Joash capa Gideon ni a sak telah tami tangawn ni ati awh. <sup>30</sup> Hattoteh khocanaw ni Joash koe, nange capa ni Baal cathutnaw e khoungröe peng a raphoe teh, ateng kaawm e Asherahkung hah a tâtueng dawkvah, ahni teh thei hanelah tâcawt sak hottelah atipouh awh. <sup>31</sup> Hateiteh, Joash ni ahnimouh koe nangmouh teh Baal cathut koelah maw na kampang awh han, hotnaw na rungngang awh han, ahni koelah kampang e tami teh, khodai hoehnahlan dout lawiseh. Baal teh cathut katang pawiteh, ahnie thuengnae khoungröe a raphoe kecu dawk, ama ni a sak e teh amamouh ni khang na lawiseh, telah bout atipouh. <sup>32</sup> Hottelah Baal cathut e khoungröe ka raphoe e tami teh, amamouh ni a sak e patetlah ahni ni khang sak lawiseh, ati teh, amae capa hah hat hnin vah, Jerubbaal telah a min a phung.

<sup>33</sup> Hattoteh Midian tami, Amalek tami, Kanîtholae tami pueng a kamkhueng awh teh, Jezreel yawn tanghling dawk a roe awh. <sup>34</sup> BAWIPA e Muitha teh Gideon koe a pha. Gideon ni mongka a ueng teh, Abiezer capanaw ni a hnuk a kâbang awh. <sup>35</sup> A patounenaw hah Manasseh ram pueng dawk a patoun teh, Manasseh miphun pueng ni a kâbang awh. Asher ram, Zebulun ram, Naphtali ram koe lahai a patounenaw bout a patoun teh, ahnimanaw hai kamkhuengnae koe a tho awh.

### *Tumuen mitnout*

<sup>36</sup> Gideon ni Cathut koe nang ni na dei e patetlah Isarel miphunnaw hah kaie kut dawk hoi na hlout sak katang han na pawiteh, <sup>37</sup> kai ni tu buet touh e muen hah thongma dawk ka ta han. Hote tumuen teh tadamtui cukrui bawm boilah, talai remphui pawiteh, na dei e patetlah Isarel miphunnaw kaie kut dawk hoi na rungngang han tie hah ka panue han. <sup>38</sup> Hatteh ka hei e patetlah ao. Amom a thaw teh, tumuen a kasu boteh tadamtui kawlung buet touh yikkawi. <sup>39</sup> Gideon ni na lung khuek sak hanh ei, vai touh bout ka dei einei. Tu buet touh e muen hoi atu vai touh dueng na tanouk sak ei. Talai pueng tadamtui a duk vaiteh, tumuen remphui naseh, telah Cathut koe a hei e patetlah, <sup>40</sup> hote karum hai Cathut ni a sak pouh teh, talai pueng a duk teh tumuen remphui lah ao.



*Gideon e tami 300 touh*

<sup>1</sup> Hottelah Jerubbaal (ahni teh Gideon doeh) hoi ahni koe kaawm e tamihu pueng hah amom vah a thaw awh teh, Harod tuikhu teng vah a roe awh. Hottelah Midiannaw roenae teh a onae atunglah Moreh mon teng, tanghling dawk doeh. <sup>2</sup> BAWIPA ni Gideon koe ahnimae kut dawk Midiannaw pek nahanelah nang koe kaawm e naw teh kai hanelah ekvoi apap awh. Hoehpawiteh, Isarel ni kamamae kut roeroe ni ka rungngang awh e doeh ti hoi, kai na taran awh vaiteh, a kâoup payon awh han doeh. <sup>3</sup> Hatdawkvah, atu tamimaya thai nah koe, ka taket ni teh ka pâyaw e pueng Gilead mon koehoi tang ban awh naseh telah na dei pouh han telah ati. Hottelah tamimaya thung hoi tami 22, 000 touh a ban awh teh, 10,000 touh a cawi awh. <sup>4</sup> Hatei, BAWIPA ni Gideon koevah, tami apap poung rah. Tui koe cetkhai nateh haw vah ka tanouk han. Hat toteh, hete tami heh nang koe cet naseh ka tie teh, nang koe cet naseh, hahoi hete tami teh nang koe cet han naseh ka tie teh cet han naseh.

<sup>5</sup> Hottelah tamimaya teh tui koe a ceicathuk khai. Hat toteh, BAWIPA ni Gideon koe, ui patetlah a lai hoi tui ka palem e pueng hah na kapek han, hot patetvanlah tabut laihoi tui ka sarawp e pueng hai na kapek han, telah atipouh. <sup>6</sup> A kuttabei hoi tui ka duek ni teh ka palem tami 300 touh a pha. Hatei, tami alouk pueng teh khokpakhu cuengkhuem laihoi tui ka sarawp e seng doeh. <sup>7</sup> BAWIPA ni Gideon koevah, palem lah ka palem e tami 300 touh hno lahoi na rungngang awh vaiteh, Midiannaw hah nangmae kut dawk na poe awh han. Tami alouk pueng teh amamae onae koe koug ban awh naseh, telah atipouh. <sup>8</sup> Hottelah, tami pueng ni a ca awh hane hoi mongka hah a la awh teh, kacawi e Isarelnaw pueng teh amamae rim koe a ban sak awh teh, tami 300 touh a kamcin sak awh. Midiannaw roenae teh akalah doeh.

<sup>9</sup> Hatnae tangmin vah, BAWIPA ni ahni koe, thaw nateh ahnimouh roenae koe cathuk sin haw, na kut dawk na poe toe. <sup>10</sup> Hatei, cathuk sin hane na taket pawiteh, na san Purah hoi rim koe cathuk roi haw. <sup>11</sup> A dei awh e na thai vaiteh, hat hnukkhu ahnimae roenae taran lahoi cei hanelah na kut hah thaosak lah ao han, telah ati. Hattoteh a san Purah hoi roenae hmuen karingkungnaw onae koe a takhang roi. <sup>12</sup> Hahoi Midiannaw hoi Amaleknaw hoi Kanitholae taminaw pueng teh tanghling dawk samtongnaw patetlah numnum a kâli awh. Ahnie kalauknaw teh boeba touk thai hoeh, tuipui teng e sadi patetlah doeh a o. <sup>13</sup> Hatteh, Gideon a tho toteh tami buet touh ni a hui koe a mang hah a rui pouh, thaihaw! mang ka tawn. barli vaiyei phen heh Midiannaw tungpupnae koe a kamlei teh, tungpupnae rimnaw bungling lah a rawp nahane lah reprep a ten pouh, telah a ti. <sup>14</sup> A hui ni, hothateh Isarel tami Joash capa e tahloi laipalah alouk mahoe. Cathut ni Midiannaw hoi a rimnaw pueng teh a kut dawk a poe toe tinae doeh, telah a ti. <sup>15</sup> Hahoi, Gideon ni mang hoi a deicainae a thai toteh, Cathut hah a baw. Isarel roenae hmuen koe a ban teh, thaw awh haw, bangkongtetpawiteh, BAWIPA ni Midiannaw roenae hmuen teh nangmae kut dawk a poe toe, telah a ti. <sup>16</sup> Hote tami 300 touh e hah hu thum touh lah a kapek teh, ahnimae kut dawk mongka hoi hlaam hrawng hoi a thung vah hmaito khue hoi rip a poe. <sup>17</sup> Ahnimouh ni ahni koe, na khen awh nateh ka sak e patetlah na sak awh van han. Hahoi khenhaw! roenae hmuen koe ka pha toteh, ka sak e patetlah ruengrueng na sak awh han. <sup>18</sup> Kai hoi kai koe kaawm e pueng ni mongka ka ueng



awh toteh roenae rim petkâkalup lah kaawm e pueng ni lengkaleng na ueng van awa vaiteh, BAWIPA hoi Gideon e tahloi, na ti awa han.

### *Gideon ni Midiannaw a tâ*

<sup>19</sup> Hottelah Gideon hoi ama koe kaawm e tami 100 touh teh karum ramvengnaw nuengnueng a kâhleng awa nah kalekkalak vah, roenae rim koe a pha awa. Hahoi mongka a ueng awa teh a kut dawka e hlaam hah lengkaleng rek a hem awa. <sup>20</sup> Avoi lahoi hmaito a sin awa teh arang lahoi ueng hane mongka a sin awa teh, BAWIPA hoi Gideon e tahloi, telah a târue awa. <sup>21</sup> Roenae rim petkâkalup lah kaawm awa e tami pueng ni amamouh onae lengkaleng koe a kangdue awa teh ransanaw pueng teh a yawng laihoi a kangheng awa. <sup>22</sup> Hahoi 300 touh ni mongka a ueng awa torei teh, BAWIPA ni a roenae hmuen koe amamouh hoi amamouh tahloi hoi a kâbouk sak teh, ransanaw hah Zererah koelae Beth-shittah, Tabbath teng e Abel-meholah ramri totouh a kangheng awa. <sup>23</sup> Isarelnaw teh hmuen touh koe Naphtali, Asher, hoi Manasseh pueng ni a kamkhueng awa teh Midiannaw hah a pâlei awa.

<sup>24</sup> Hottelah Gideon ni Ephraim mon pueng koe patounenaw a patoun teh, Midiannaw tuk hanelah cathuk awa nateh, Beth-barah hoi Jordan totouh tui a onae hah sut pawm awa, telah ati. Hottelah Ephraimnaw pueng teh a kamkhueng awa teh Beth-barah hoi Jordan totouh koung a la awa. <sup>25</sup> Hahoi Midian ransabawi kahni touh Oreb hoi Zeeb hah a man awa. Oreb teh Oreb lungsong koe a thei awa teh, Zeeb teh Zeeb misur katinnae tangkom dawka a thei awa. Midiannaw hah a pâlei awa teh, Oreb hoi Zeeb e lû teh Jordan palang namran lah Gideon koe a poe awa.

## 8

### *Gideon ni Midian a ta*

<sup>1</sup> Ephraim ni nang ni Midiannaw na tuk navah, Bangkongmaw kaimanaw hai na kaw awa hoe haw. Kaimouh bangmaw ka sak telah thok a kâoun awa.

<sup>2</sup> Gideon ni nangmouh ni na sak e patetlah kai ni bangmaw ka sak. Abiezer misur khi e hlakvah Ephraim misur pâkhueng e ahawihnawn.

<sup>3</sup> Cathut ni Midiannaw e ransabawi Oreb hoi Zeeb teh nangmae kut dawka na poe toung nahoe haw. Nangmouh ni na sak awa e patetlah kai ni bangmaw ka sak tie lawk bout a dei pouh e lawk ahnimouh ni a thai torei teh a lungupti awa. <sup>4</sup> Gideon ni Jordan tui koe a pha awa torei teh, ama koe kaawm e tami 300 touh ni pueng hoi tawn nalaihoi a pâlei teh Jordan a raka awa. <sup>5</sup> Sukkoth khonaw hanelah kai ka hnukkâbangnaw hah vaiyei poe haw. Ahnimouh teh nget a tawn awa toe, Midian siangpahrang Zebah hoi Zalmunna hah atu ka pâlei awa atipouh.

<sup>6</sup> Sukkoth bawinaw ni Zebah hoi Zalmunna hah na kut dawka kaawm tangcoung e patetlah maw ransanaw hah vaiyei ka poe han haw telah ati awa.

<sup>7</sup> Gideon ni hete hno kecu dawka BAWIPA ni Zebah hoi Zalmunna ka kut dawka na poe toteh kahrawng kawthaknaw hoi na tak dawka kâpawrayak lah na hem han telah atipouh.

<sup>8</sup> Hahoi Penuel kho lah a cei teh, hot patetvanlah, ahnimouh koe a dei pouh eiteh, Penuehnaw ni hai Sukkoth khonaw ni a dei e patetlah a dei pouh awa. <sup>9</sup> Gideon ni kai karoum lahoi bout ka tho toteh, hete imrasang heh he ka raphoe han atipouh.



<sup>10</sup> Hahoi tahloi ka patuem e tami 120000 a due awh toe. Kanitholae ransanaw thung daw k e ka cawi rae 15000 tabang a hrawi teh Zebah hoi Zalmunna teh Kakor kho ao awh. <sup>11</sup> Gideon ni Nobah kho hoi Jobehah kanitholah im daw k kho ka sak e naw a cei teh a roenae rim hah ring laipalah onae tueng daw k ransanaw hah a tuk awh. <sup>12</sup> Zebah hoi Zalmunna a yawng roi toteh Gideon ni a pâlei teh rim a raphoe pouh. Midian siangpahrang kahni touh Zebah hoi Zalmunna a man awh teh, ransanaw pueng teh koung a kayei awh. <sup>13</sup> Hahoi, Joash capa Gideon teh kanitho hoehnahlan tarantuknae koehoi bout a ban teh, <sup>14</sup> Sukkoth kho e thoundoun buet touh a man awh teh lawk a pacei. Ahni niyah Sukkoth kho e kaawm bawinaw a lungkahanaw e tami min 77 touh a dei pouh. <sup>15</sup> Gideon ni Sukkoth khonaw koe a cei teh, Zebah hoi Zalmunna teh khenhaw! hete taminaw ni manaw Zebah Zalmunna teh na kut daw k kaawm e patetlah a tha a tawn naw vaiyei na poe han maw na ka tet ni teh, na ka pacekpahlek e khe atipouh.

<sup>16</sup> Hahoi kho daw k e a lungkahanaw a kaw teh, kahrawngum e kawthak hoi Sukkoth kho e taminaw hah a hem. <sup>17</sup> Penuel kho imrasang hai a raphoe pouh awh teh, khocanaw hai be a thei awh.

<sup>18</sup> Zebah hoi Zalmunna koevah Tabor kho daw k e na thei e naw tami nâyittouh maw ka phat telah ati. Ahnimouh ni nang nama patet doeh. Siangpahrang capa hoi koung a kâvan awh atipouh.

<sup>19</sup> Ahnimouh ni ka hmaunawnggha anu e capa doeh, BAWIPA a hring e patetlah ahnimouh teh pâhlung awh pawiteh kai ni na thet awh mahoe e atipouh. <sup>20</sup> Hahoi a camin Jether koevah, thaw nateh thet haw atipouh. Hatei ahni ni a tahloi rayu hoeh. Bangkongtetpawiteh, a naw rah ni teh a taki.

<sup>21</sup> Hathnukkhu hoi Zebah hoi Zalmunna ni nang nama thaw nateh na thet leih. Bangkongtetpawiteh tongpa na tho e patetlah na thayung hai te lah doeh ao rah atipouh. Hahoi Gideon ni a thaw teh, Zebah hoi Zalmunna teh a thei teh, ahnimae kalauk lahuen daw k awi sak e dingyin hah a rading pouh.

### *Gideon Ephod*

<sup>22</sup> Hot patetlah Isarelnaw niyah Gideon koe nang nama ni na uk awh leih, na capa hoi na ca catoun ditouh. Bangkongtetpawiteh, Midiannaw e kut daw k hoi na rungngang toe atipouh awh. <sup>23</sup> Hateiteh, Gideon ni kai ni na uk awh mahoe. Ka capa ni hai na uk awh mahoe. BAWIPA ni na uk awh han atipouh. <sup>24</sup> Gideon ni nangmouh koe hno buet touh hei han ka ngai. Tami pueng ni na tarannaw kut daw k e na lae hnâpacapnaw hah be na poe haw atipouh. Bangkongtetpawiteh, tarannaw teh Ishmael miphun lah ao awh dawkvah sui hnâpacap koung a tawn awh.

<sup>25</sup> Ahnimouh ni lungthocalah hoi na poe han atipouh awh. Hahoi hni a phai pouh awh teh taminaw pueng ni amamouh ni a la awh e hnâpacapnaw hah a poe awh. <sup>26</sup> Sui hnâpacap a hei e naw teh Shekel 17000 touh a pha. Dingyin hoi laikaw, Midian siangpahrangnaw ni a kâkhu awh e hni paling hoi kalauk ni a lahuen daw k awi e naw hai bout a hmu sin. <sup>27</sup> Gideon ni a poe awh e sui hoi Ephod a sak teh a onae Ophrah kho vah a ta. Hote hmuen koe Isarelnaw pueng ni a yon awh. Gideon hoi imthungkhunaw hanelah hai karap lah ao.

<sup>28</sup> Hot patetlah Midiannaw teh Isarel catounnaw koe a sung awh teh kâroe thai awh hoeh toe. Hahoi Gideon a hring na thung hote ram teh kum 40 touh thung karoumcalah ao.



*Gideon duenae*

<sup>29</sup> Joash capa Jerubbaal teh a cei teh ama im vah ao. <sup>30</sup> Gideon ni a ma thung hoi ka tâcawt e capa 70 touh a tawn. Bangkongtetpawiteh, a yu moi a pap dawkvah. <sup>31</sup> Shekhem kho kaawm e ado ni hai capa a khe teh a min lah Abimelek a phung. <sup>32</sup> Joash capa Gideon a matawng toteh a due teh, Abiezrit tami Ophrah kho e Joash tangkom dawh a pakawp awh.

<sup>33</sup> Joash capa Gideon a due tahma hoi Isarel catounnaw Baal cathut koe a kâyo awh dawkvah, Baalberith hah a cathut lah a ta awh. <sup>34</sup> A tengpam e tarannaw kut dawh hoi ka rasat e amamae BAWIPA Cathut hah a pahnim awh. <sup>35</sup> Isarelnaw lathueng vah hawinae ka sak e Jerubbaal (Gideon) imthungkhu koe boehai pahrennae kamnuek sak ngai awh hoeh.

## 9

*Abimelek ni bawi a tawk.*

<sup>1</sup> Jerubbaal capa Abimelek teh Shekhem kho vah a manu e a thangroi koe a cei teh, a manu a na pa imthungkhunaw hah a kâhmo teh, <sup>2</sup> Shekhem kho e taminaw pueng be ka thai lah a dei e lawk teh, Jerubbaal capa abuemlah 70 touh ni na uk awh e maw ka hawihnawn han, tami buet touh ni na uk e maw kahawi han, dei haw kai hai nangmae thitak hoi kâkuen e doeh tie hah pahnim awh hanh.

<sup>3</sup> A manu e thangroinaw ni Shekhem kho e taminaw pueng be ka thai lah a dei pouh. Hahoi teh Abimelek hnukkâbang hane a lung koung a tho awh, bangkongtetpawiteh, ama teh maimae hmaunawnggha doeh ati awh.

<sup>4</sup> Hahoi Baalberith bawkim hoi tangka 70 touh a poe. Hote tangka hoi Abimelek ni lunglenpansa lah kaawmnaw a coun teh, ahnimouh ni ama hnuk a kâbang awh. <sup>5</sup> Ophrah kho a na pa im vah a cei teh, Jerubbaal capa a hmaunawngghanaw 70 touh talung buet touh van koung a thei. Hateiteh, Jerubbaal capa a cahnoung Jotham teh a kâhro teh a hring. <sup>6</sup> Hahoi Shekhernaw pueng hoiyah, Bethmillo taminaw pueng a kamkhueng awh teh, Abimelek teh Shekhem kho talung a ungnæ kung koe kathen kung koevah siangpahrang lah a sak awh.

<sup>7</sup> Hote kong Jotham ni a thai torei teh, Gerizim mon a cei teh, monsom a kangdue teh a lawk hoi tha hoi a hramkhai e teh, Oe Shekhemnaw voi Cathut ni nangmae lawk a tarawi thai nahan kaie ka lawk hah thai awh haw.

<sup>8</sup> Thingkungnaw ni siangpahrang lah satui awi hanelah a cei awh teh olive thing hanelah, nang ni kaimouh na uk loe atipouh awh. <sup>9</sup> Hatei, olive thing ni ahnimouh koe, Cathut hoi tami barinae ka satui heh poutsak vaiteh, thingkung nangmouh koe maw kai ka kap han toung telah atipouh.

<sup>10</sup> Hahoi thingkungnaw ni thaibunglung koevah, nang ni kaimouh na uk leih, atipouh. <sup>11</sup> Hatei, thaibunglung ni ahnimouh koevah, ka radipnae hoi a pâw ka thawnnae poutsak vaiteh, thingkungnaw koe maw ka kap han toung, telah atipouh

<sup>12</sup> Hahoi thingkungnaw ni Misurkung koevah, nang ni na uk awh hottelah atipouh. <sup>13</sup> Misurkung ni ahnimouh koe Cathut hoi tami a lungkahawi sak e ka tui ka hang heh poutsak vaiteh, thingkungnaw koe maw ka kap han toung telah atipouh.

<sup>14</sup> Hahoi thingnaw pueng ni pâkhing nang kaimouh na uk leih atipouh. <sup>15</sup> Pâkhing ni thing koevah, na siangpahrang hanlah satui na awi katang pawiteh, tho awh haw ka tâhlip dawkvah kângue awh. Hatei, satui koe



na awi awh hoehpawiteh pâkhing dawk hoi hmai tâcawt vaiteh, Lebanon mon dawk kaawm e Sidar thing koug kang naseh atipouh.

<sup>16</sup> Atuteh nangmouh ni Abimelek teh siangpahrang lah na sak awh dawkvah, a lawkkamnae kalancelah a caksak teh Jerubbaal hoi ahnie miphunnaw hah kahawicalah a khet teh, coe hane kamcu e ahni dawk na sak awh toung maw. Lungma hane kâkilah na sak pouh boum teh, <sup>17</sup> kaie apa ni ahnimouh hanlah ransa a thaw teh a hringnae a kâhmoun khai hoi nangmanaw teh Midiannaw e kut dawk hoi na rungngang awh. <sup>18</sup> Nangmanaw ni apa imthungkhu dawk ransa na thaw awh teh, a capa 70 touh talung buet touh van koug na thei awh teh, na hmaunawngah lah kaawm e a sannu capa Abimelek hah Shekhemnaw hane siangpahrang lah na sak awh. <sup>19</sup> Atuteh nangmanaw ni Jerubbaal hoi a miphunnaw koe Atangcalah lawk na kam awh boum teh Abimelek koevah na lunghawi awh. Ama hai nangmouh koevah a lunghawi naseh. <sup>20</sup> Telah hoehpawiteh, Abimelek koehoi hmaisaan tâcawt naseh. Shekhemnaw hoi Bethmillo taminaw hah koug kang naseh. Hahoi Shekhem hoi Bethmillo koehoi hmai tâcawt naseh, Abimelek hah kang naseh telah a ti. <sup>21</sup> Jotham teh karanglah a yawng, a hmau Abimelek a taki kecu dawkvah, Beer kho a cei teh hawvah ao.

### *Abimelek bonae*

<sup>22</sup> Abimelek ni Isarelnaw kum thum touh a uk hnukkhu hoi, <sup>23</sup> Cathut ni Abimelek hoi Shekhemnaw e rahak vah ka mathout e muitha hah a tha pouh teh, Shekhem kho e taminaw ni Abimelek e lawkkam e a raphoe awh. <sup>24</sup> Hot teh Jerubbaal capa 70 touh tak dawk kahawihoe hoi a sak kecu dawkvah, amamae tak dawk moipathung hane a pha thai nahan hoi, kathetkung Abimelek tak dawk hai a hmaunawngahanaw thei sak hanlah kampangkhaie Shekhem a lungkahanaw koevah a thi phu a um nahanelah doeh. <sup>25</sup> Shekhemnaw niyah Abimelek teh lawp han a ngai awh dawkvah, taminaw monsom a pawp sak awh. Ahnimanaw ni kahlawng ka cet e naw pueng hnopainaw a lawp awh teh a la pouh awh. Hote kamthang hah Abimelek ni a thai.

<sup>26</sup> Ebed capa Gaal ni amae hmaunaw hoi cungtalah Shekhem kho a kâen awh teh, Shekhemnaw ni a kângue awh. <sup>27</sup> Takha dawk e misurpaw naw a khi awh teh a phunep sak awh. Hahoi amamae cathut im dawk a cei awh teh, Abimelek teh thoe a bo awh. <sup>28</sup> Hahoi Ebed e capa Gaal ni Abimelek teh apimaw, Shekhem teh apimaw, a thaw khuet tawk pouh han vaw. Jerubbaal capa nahoehmaw. Zebul heh a bawi nahoehmaw. Shekhem na pa Hamornaw e thaw hah tawk pouh naseh. Bangkongmaw ahnimae thaw khuet tawk pouh han vaw. <sup>29</sup> Kâtawwnae rahim vah hete taminaw ni ao to duengvah, Abimelek teh ka takhoe han telah ati. Hahoi Abimelek koevah na ransanaw kârokueng nateh kamthaw awh atipouh.

<sup>30</sup> Ebed e capa Gaal ni a dei e lawk khobawi Zebul ni a thai toteh, a lung thouk a khuek. <sup>31</sup> Hat toreteh, arulahoi Abimelek koevah patounenaw a patoun awh teh khenhaw! Ebed capa Gaal hoi a hmaunaw Shekhem vah a tho awh teh, khenhaw! nang nama na taran hanelah hoiyah khocanaw a tacuek awh. <sup>32</sup> Hatdawkvah, atu na taminaw hoi karum lah kamthaw nateh, law hoi nangmouh ni pawm awh lawih. <sup>33</sup> Hahoi teh hettelah han. Amom kanitho tahma kho hah tuk awh lawih. Khenhaw! ama hoi a taminaw ni na tuk awh toreteh, nangmouh ni atueng kahawi na hmu awh e lahoi yah tuk awh lawih atipouh.



<sup>34</sup> Hot patetlah, Abimelek hoi a taminaw teh, karum vah a thaw awh teh, phu pali touh lah a kâkapek awh teh, Shekhem kho king a kalup awh.

<sup>35</sup> Ebed e capa Gaal teh a tâco teh, kho thung kâennae longkha koe a kangdue. Hahoi Abimelek ni a taminaw hoi pawpnae hmuén koehoi a tâco awh <sup>36</sup> Gaal ni taminaw a hmu toteh, Zebul koevah khenhaw! mon dawkhohiyah taminaw a tho awh telah atipouh. Zebul ni teh mon a tâhliip vaiyaw tamihu patetlah na hmu payon awh atipouh.

<sup>37</sup> Gaal ni khenhaw, mon lahoi a kumcathuk e tami tangawn teh Meonenim kathen kung koe lahoi ka tho e naw doeh telah bout atipouh.

<sup>38</sup> Zebul ni ahni koevah, Abimelek teh apimaw, a thaw khuét tawkh pouh han vaw telah ati e na lawk hah nâmay yo na thak. Hetnaw heh hroung na hnepnnap e naw nahoehmaw. Tâcawt sin nateh tuk kanouk khe atipouh.

<sup>39</sup> Hahoi teh Gaal ni Shekhemnaw hah a hrawi teh, Abimelek hah a tuk awh. <sup>40</sup> Abimelek ni a pâlei awh teh Gaal teh a yawng. Kho thung kâennae longkha koe totouh tami moikapap hmâtan hoi a kamlei awh teh a due awh. <sup>41</sup> Hathnukkhu hoi Abimelek teh Arumah khopui dawkh ao teh, Zebul ni Gaal hoi a hmaunawngnahanaw hah Shekhem kho o thai hoe hahanlah hoi a pâlei awh.

<sup>42</sup> Atangtho e hnin dawkvah, taminaw pueng teh kho alawilah a tâco han tie hah, Abimelek ni a thai toteh, <sup>43</sup> a taminaw phu thum touh lah a kapek teh, kahrawng lahoi a pawp sak awh. Hahoi bout a khet torei teh, taminaw pueng kho thung hoi a tâco awh teh, ahnimanaw hah a tuk awh.

<sup>44</sup> Abimelek ni amae a tami phu touh hoi kho longkha koe a yawng sin teh, rek a ngang awh. Alouke phu hni touh ni teh kahrawng lae kaawmnaw hah a yawng sin teh a thei awh. <sup>45</sup> Abimelek ni hote hnin dawkh teh, hote khopui hah kanîruirui a tuk. Khopui hah a lawp awh teh, khocanaw teh he a thei awh. Khopui hai he a raphoe awh hnukkhu palawi mak a phuen awh.

<sup>46</sup> Shekhem imrasang dawkh kaawmnaw ni hote kamthang a thai awh toteh, Elberith im doeh ka cak ati awh teh, haw e rapanim thung a yawng awh. <sup>47</sup> Hahoi Shekhem e imrasang thung kaawm e naw pueng teh king a kamkhueng awh toe tie Abimelek ni a thai navah, <sup>48</sup> Abimelek hai ama koe kaawm e naw pueng hoi Zalmon mon dawkh a luen awh teh Abimelek ni cakâ a sin. Thingkang a bouk teh a sin teh a taminaw koevah, ka sak e hah na hmu awh e patetlah nangmouh ni hai karanglah sak awh, atipouh. <sup>49</sup> Hahoi teh, taminaw pueng ni thingkang bouk e a sin awh teh Abimelek hnuk a kâbang awh. Shekhem kalupnae rapanim hmai tuet a sawi pouh awh. Hottelah, Shekhem imrasang thung kaawm e napui tongpa 1,000 touh hmeng a due awh.

<sup>50</sup> Hahoi Abimelek teh Thebez vah a cei. Thebez a tuk teh a tâ. <sup>51</sup> Hahoi teh khopui dawkh kacakpounge imrasang buet touh ao. Kho thung e napui tongpa pueng hote rapan thung koug a yawng awh. Tho king a taren awh teh, hote imrasang van a luen awh. <sup>52</sup> Abimelek ni imrasang tuk hanelah rek a hnai teh, takhang koe rek a hnai teh hmai ka sawi han toe ati navah, <sup>53</sup> Napui buet touh ni cakang phawmnae sum avan e talung hoi Abimelek e lû dawkh a dei pouh teh a lû rak a kâbawng. <sup>54</sup> Ama e senehmaica ka sin e tami hah karanglah a kaw teh, napui ni Abimelek a thei tie lah ao hoe hahan, nama e tahloi lat nateh kai hah na thun leih atipouh. A san ni a thut teh a due. <sup>55</sup> Abimelek a due toe tie Isarelnaw ni a thai awh toteh, taminaw pueng amamouh onae hmuén koe lengkaleng a ban awh.



<sup>56</sup> Hot patetlah Abimelek ni hmaunawnggha 70 touh a thei e hoi a na pa koe a sak e kathoute hah Cathut ni ama koe moi a pathung. <sup>57</sup> Shekhem khonaw ni a sak e kathout hno pueng teh Cathut ni amamae lû daw k koun a pha sak. Jerubbaal capa Jotham ni thoebonae hai amamouh koe a pha.

## 10

### *Tola*

<sup>1</sup> Abimelek hnukkhu Isarelnaw ka rungngang hanlah Issakhar miphun thung e Dodo capa, Puah capa Tola a tâco teh Ephraim mon Shamir vah ao.

<sup>2</sup> Kum 23 touh thung Isarelnaw a uk teh, hat hnukkhu hoi a due. Shamir vah a pakawp awh.

### *Jair*

<sup>3</sup> Ahni hnukkhu Gilead tami lawkcengkung Jair a tâco. Kum 22 touh thung Isarel hah a uk. <sup>4</sup> A capa 30 touh lacanaw daw k ouk kâcui e a tawn. Gilead ram daw k kaawm e kho 30 touh hai a tawn. Hahoi atu totouh Havath Jair telah ati awh. <sup>5</sup> Hahoi Jair teh a due toe. Kamon vah a pakawp awh.

### *Jephthah*

<sup>6</sup> Isarelnaw ni BAWIPA mithmu vah yonnae bout a sak awh. Baal hoi Ashtaroth, Siria cathut hoi Sidon cathut, Moab cathut, Ammon cathutnaw e a thaw hoiyah Filistinnaw e cathut thaw hah a taw k awh. Jehovah a pahnavt awh teh, a thaw taw k awh hoe h toe. <sup>7</sup> Hahoi BAWIPA ni Isarelnaw taranlahoi a lungkhuek teh Filistin hoi Ammonnaw e kut daw k koun a yo. <sup>8</sup> Jordan palang namran Amor catounnaw e ram Gilead ram kaawm e Isarel catoun kaawm e pueng hah hatnae kum hoi kamtawng teh kum 18 touh thung a rektap awh. <sup>9</sup> Ammon miphunnaw ni hai Jordan palang a raka awh teh, Judah miphun, Benjamin miphun, Ephraim miphunnaw a tuk awh teh, Isarelnaw teh puenghoi a reithai awh. <sup>10</sup> Hahoi Isarelnaw ni, mamae BAWIPA pahnavt awh teh BAWIPA koe yon awh toe. Baal cathut e thaw ka taw k awh toe telah BAWIPA koe a hram awh.

<sup>11</sup> BAWIPA ni Isarelnaw koe Izipnaw hoi Amornaw, Ammonnaw hoi Filistinnaw thung hoi kai ni na rungngang awh nahoe h maw. <sup>12</sup> Sidonnaw, Ameleknaw, Moannaw ni hai na rektap awh navah, kai na kaw awh teh, a kut daw k hoi na rungngang awh. <sup>13</sup> Hatei, nangmouh ni kai na pahnavt awh teh, alouke cathutnaw e thaw na taw k takhai daw kvah, kai ni bout na rungngang awh mahoe h toe. <sup>14</sup> Na kârâwi awh e cathut koe hram awh lawih khe. Ama ni na reithainae tueng daw k na rungngang naseh, telah atipouh.

<sup>15</sup> Isarelnaw niyah, BAWIPA koe ka payonae awh toe. Nang nama ni ahawi na tie lahoi kaimouh ka tak daw k sak nateh, atu vai touh dueng mah kaimouh na rungngang ei hottelah atipouh. <sup>16</sup> Hottelah alouke cathutnaw a pahnavt awh teh, BAWIPA e thaw a taw k awh. Hahoi teh, Isarelnaw ni rucatnae kecu daw k a lungpataw awh. <sup>17</sup> Hahoi Ammonnaw ni cungtalah a kamkhueng awh teh, Gilead vah a roe awh. Hahoi Isarelnaw ni king a kamkhueng awh teh, Mizpah vah a roe awh. <sup>18</sup> Gilead kahrawikungnaw tami buet touh hoi buet touh a kadei awh teh, apinimaw Ammonnaw hmaloe a tuk han, hote tami teh Gilead kho lathueng vah kahrawikung lah awm seh atipouh.



## 11

*Jephthah*

<sup>1</sup> Gilead tami Jephthah teh a thakaawmpounge ni teh tarankahawi pounge e a tho, Gilead ni Jephthah a khe. A manu teh kâyawt e doeh. <sup>2</sup> Gilead yu ni a khe pouh e a capanaw a lungah toteh, Jephthah teh a hrek awh. Kaimouh koe awm hanh lawih, apa e râw cungtalâh na pang pawm mahoe. <sup>3</sup> Jephthah teh a hmaunaw koehoi a yawng teh, Tob ram daww kho a sak. Jephthah koe ka cungkeihoehe naw a kamkhueng awh teh a kâbang awh. <sup>4</sup> Ammonnaw ni Isarel naw a tuk hnukkhu hoi atueng sitca daww hettelah ao. <sup>5</sup> Ammonnaw ni Isarel a tuk awh toteh, Gilead e a lungkahanaw ni Tob ram hoi Jephthah la hanlah a cei awh. <sup>6</sup> Hottelah Jephthah koe vah, Ammonnaw tuk thai nahanlah tho leih, ransabawi lah na awm pou leih atipouh awh. <sup>7</sup> Jephthah ni Gilead e kacuenaw koe na hmuha awh teh, apa im hoi na pâlei awh nahoe hmau. Bangkongmaw atu na ngaikhaww torei teh kai koe bout na tho awh telah atipouh. <sup>8</sup> Gilead e kacuenaw ni Jephthah koe vah, hete kecu daww nahoe hmau Ammonnaw tuk hanelah nang koelah bout ka kamlang awh vaw. Hahoi Gilead kaawmnaw pueng lathueng vah a lû lah awm loe atipouh awh. <sup>9</sup> Jephthah ni Gilead e kacuenaw koe, Ammonnaw tuk hanelah im bout na bankhai awh teh, BAWIPA ni ahnimanaw koe, koe na poe pawiteh kahrawikung lah kaawm katang han vaimoe telah atipouh. <sup>10</sup> Gilead e kacuenaw ni, na lawk patetlah lah ka sak awh hoehpawiteh, BAWIPA ni mamouh rahak vah kapanuekkhaikung lah awm seh atipouh awh. <sup>11</sup> Hahoi, Jephthah ni Gilead e kacuenaw koe a cei teh, lû hoi ransabawi lah a coung. Mizpah kho vah, Jephthah ni BAWIPA hmalah hote lawknaw pueng hah a dei. <sup>12</sup> Jephthah ni Ammonnaw e siangpahrang koe vah, kai na tarankhai hanelah bangmaw kaawm. Kai tuk hanelah ka ram daww na tho awh, telah patounenaw a patoun. <sup>13</sup> Ammonnaw e siangpahrang ni, Isarel naw Izip ram hoi a tâco navah, ka ram hah Arnon hoi Jabbok hoi Jordan totouh na la awh kecu daww vah, hote ramnaw hah pâdingsuelah duem na poe leih, telah Jephthah e patounenaw koe a dei pouh awh. <sup>14</sup> Jephthah ni Ammonnaw e siangpahrang koe patounenaw bout a patoun. <sup>15</sup> Ahni koe Jephthah ni hettelah a dei pouh. Isarel naw ni Moab ram na lat pouh hoe. Ammonnaw e ram hai bout lat hoe. <sup>16</sup> Bangkongtetpawiteh, Izip ram hoi a tâco navah, kahrawngkadi pueng daww vah, tuipei paling totouh paloupalou a cei awh teh Kadesh a pha awh. <sup>17</sup> Hahoi teh Isarel ni Edom siangpahrang koe vah, pahren lahoi na ram daww kai pou na cetsak lah titeh patounenaw a patoun. Hatei, Edom siangpahrang ni a hnâ bawt pouh hoe. Moab siangpahrang koe laicei bout a patoun haiyah, ceinae kâ poe hoe. Hahoi Isarel naw teh Kadesh vah sut ao awh. <sup>18</sup> Ramke koelah pou a cei awh teh, Edom hoi Moab hah a roun awh. Moab ram kanitho lahoi a cei awh teh, Arnon namran lah a roe awh. Moab ram thung daww roeroe kâen awh hoe. Bangkongtetpawiteh, Arnon palang teh Moab ramri doeh. <sup>19</sup> Hahoi Isarel naw ni Amor siangpahrang Sihon, Heshbon siangpahrang koe patounenaw a patoun. Isarel naw ni ahnimouh koe kamamae hmuen koe ka pâtam navah pahren lahoi na ram daww pou ka cei awh han atipouh. <sup>20</sup> Hatei, Sihon ni Isarel naw ni a ram daww a raka hane a yuem hoe daww vah, a taminaw pueng a pâkhueng teh Jahaz kho king a kalup awh teh, Isarel naw hah a tuk awh. <sup>21</sup> BAWIPA Isarel Cathut ni Sihon siangpahrang hoi a taminaw pueng hah Isarel kut daww a poe teh, he



a thei awh. Hahoi Isarelnaw ni hote Amornaw onae ram teh kounge a pang awh. <sup>22</sup> Hahoi Amornaw e khori thung dawkw Amor palang koehoi Jabbok palang totouh, ramke hoi Jordan palang totouh a pang awh. <sup>23</sup> Hottelah Isarel BAWIPA Cathut ni, a tami Isarelnaw hmalah Amornaw ram hah a lawp pouh. Telah pawiteh, nang ni a ram na lawp han toung. <sup>24</sup> Na cathut Kemosh ni na ham lah na poe e pueng teh na pang hane nahoehmaw. Hottelah, BAWIPA Cathut ni, kaimouh ka hmalae a lawp e pueng teh ka pang han bokhei. <sup>25</sup> Moab siangpahrang Zippor capa Balak hlak na hawimaw. Ahni ni Isarel a taran teh, runae a poe boimaw. Ahni ni Isarel a tuk boimaw. <sup>26</sup> Isarel hah Heshbon hoi a khonaw, Aroer hoi a khonaw, Ammon khori khopuinaw pueng koe kum 300 totouh kho a sak awh navah, bangkongmaw tuk laipalah na o awh vaw. <sup>27</sup> Hatdawkvah, nangmouh koe bang yonnae ca boehai ka sak awh hoehe. Nangmouh ni tuk han na ngai dawkvah, kaimouh tak dawkw yonnae na sak awh. BAWIPA lawkcengkung ni atuvah, Isarelnaw hoi Ammonnaw rahak vah, lawkceng na lawiseh, atipouh. <sup>28</sup> Hatei, Jephthah ni lawk a thui e hah Ammon siangpahrang ni ngai pouh hoehe.

### *Jephthah lawkkam hoi tânae*

<sup>29</sup> Hahoi teh, BAWIPA e Muitha Jephthah tak dawkw a pha teh Gilead hoi Manasseh ram hah a rakan teh, Gilead ram Mizpah vah pou a cei awh. Hahoi Gilead hoi Mizpah hoi Ammonnaw koe pou a cei awh. <sup>30</sup> Jephthah ni BAWIPA koe lawk a kam teh, Ammonnaw heh ka kut dawkw na poe katang pawiteh, <sup>31</sup> hettelah ao han. Ammonnaw koehoi hnâroumcalah ka ban pawiteh, ka im takhang koehoi hmaloe na ka dawn e pueng teh, BAWIPA nange lah ao han. Hmaisawi thuengnae koe ka hno han telah a ti. <sup>32</sup> Hahoi teh, Jephthah teh Ammonnaw tuk hanlah a kamthaw teh, BAWIPA ni ahnimouh teh a kut dawkw a poe. <sup>33</sup> Aroer hoi Minnith totouh khopui 20 touh a tâ. Abelkeramim vah kâtheikârawngnae kalenpoung ao. Hot patetlah, Ammonnaw teh Isarelnaw hmalah a sung awh.

### *Jephthah canu*

<sup>34</sup> Jephthah teh a onae im Mizpah a pha toteh, hawvah a canu ni cecak khawng hoi lam laihoi a dawn hanelah a tho. A canu a tawn e dueng doeh, alouke pihai awm hoehe. <sup>35</sup> Oe hahoi teh hettelah doeh. A canu lawn a hmu toteh, ahni a ravei teh, Oe ka canu rahim doeh na pabo toe, nang teh kai runae na kapoekung lah na o toe. Bangkongtetpawiteh, BAWIPA koe ka pahni yo ka ang toe. Hote hah bout ka hno thai mahoehe toe, telah a ti. <sup>36</sup> Napui ni a na pa koe, apa BAWIPA koe na pahni yo na ang boum teh na kâko hoi ka tâcawt e na lawk patetlah kai ka tak dawkw sak yawkaw. Bangkongtetpawiteh, BAWIPA ni na taran Ammonnaw hah na lungkuep nahan na tâ sak toe. <sup>37</sup> Hahoi teh a na pa koe vah telah ka sak vai, thapa yung hni touh thung, kamadueng vaiteh, mon dawkvah, tanglakacuem lah ka onae, ka huinaw hoi ka khuikapkhai eivai, atipouh. <sup>38</sup> Ahni ni cet awh yawkaw atipouh. Hateh thapa yung hni touh o hanelah a kamthaw. A cei awh teh, ama hoi a huinaw hoi mon dawkw tanglakacuem lah onae a khui awh. <sup>39</sup> Hahoi thapa yung hni touh ao hnukkhu, a na pa koe bout a tho teh, ahni ni lawk a kam e patetlah a tak dawkw a sak teh, tongpa panuek hoehe toe. <sup>40</sup> Hahoi Isarelnaw thung dawkvah, Isarel canunaw ni Gilead tami Jephthah canu teh kumtanguem hnin pali touh thung lungmathoe khuikanae lah pou a hno pouh awh. Hothateh, Isarelnaw e phung doeh.



## 12

### *Jephthah hoi Ephraim rahak kâpohoehnae*

<sup>1</sup> Ephraim teh cungtalah king a kamkhueng awh. Zaphon pâtam hoi a cei awh teh, Jephthah koevah, bangkongmaw Ammonnaw tuk hanelah na kamthaw navah, kai hai na coun van hoe vaw. Na imnaw hmai ngeng na sawi pouh han atipouh. <sup>2</sup> Jephthah ni ahnimouh koe Ammonnaw heh ka taminaw hoi atangcalah ka tuk awh. Na kaw awh navah, na kut dawkh hoi na rungngang kalawn hoe. <sup>3</sup> Hottelah nangmouh ni na rungngang hoe toe tie ka panue toteh, due han hai pouk laipalah, Ammonnaw tuk hanlah ka cei awh. Hahoi BAWIPA ni ahnimanaw teh ka kut dawkh na poe. Bangkongmaw kaimouh tuk hanelah sahnin vah na kamthaw awh vaw atipouh. <sup>4</sup> Hahoi Jephthah ni Gileadnaw pueng a pâkhueng teh, Ephraim hah a tuk awh. Ephraim ni nangmouh teh Ephraim miphun, Manasseh miphunnaw dawkh hoi na yawng awh teh, kathounghoehe miphun doeh telah Gilead miphunnaw hanlah ouk na pathoe awh dawkvah, Ephraim miphunnaw hah ka tuk awh. <sup>5</sup> Hahoi, Gileadnaw ni Jordan namran lah a pha hoehnhlan, Ephraim hah a man awh. Hahoi teh hettelah. Ephraim kayawngnaw ni na luen sak haw ati navah, Gileadnaw ni ahnimouh koe, Ephraim na ou, atipouh. Ahnimouh ni Ephraim nahoe ati awh toreï vah, <sup>6</sup> ahnimouh koe Shibboleth telah dei haw atipouh awh navah, ahnimanaw ni Sibboleth ati awh toteh, kacaicalah dei panuek awh hoe. Telah hoiyah a man awh teh, Jordan tui rakanae koe a thei awh. Hot patetlah tui a rakanae koe Ephraim hah 42000 touh a thei awh. <sup>7</sup> Hahoi Jephthah ni Isarel hah kum 6 touh a uk. Hahoi Gilead tami Jephthah teh a due. Ama kho Gilead kho vah a pakawp awh.

### *Ibzan, Elon, Abdon*

<sup>8</sup> Ahni hnukkhu hoi Bethlehem tami Ibzan ni Isarel hah a uk. <sup>9</sup> Ahni ni capa 30 touh a tawn teh a canu 30 touh ram alouklah a ceisak awh. Hahoi a capanaw hanlah ramlouk e canu 30 touh a la pouh. Isarel hah kum 7 touh a uk. <sup>10</sup> Ibzan a due toreï teh, Bethlehem vah a pakawp awh. <sup>11</sup> Ahni hnukkhu hoi Zebulun tami Elon ni Isarel hah kum 10 touh thung a uk. <sup>12</sup> Zebulun tami Elon teh a due. Zebulun ram Aijalon vah a pakawp awh. <sup>13</sup> Ahni hnukkhu Pirathon tami Hillel capa Abdon ni Isarel hah a uk. <sup>14</sup> Ahni ni capa 40 touh hoi minca 30 touh ao teh mincanaw teh la 70 touh dawkh a kâcui awh. Ahni ni Isarel kum 8 touh thung a uk. <sup>15</sup> Hahoi Pirathon tami Hillel capa Abdon teh a due. Ephraim ram, Ameleknaw e monsom Pirathon vah a pakawp awh.

## 13

### *Samson khenae*

<sup>1</sup> Isarelnaw ni BAWIPA hmalah yonnae bout a sak awh. BAWIPA ni kum 40 touh thung Filistinaw e kut dawkh ao sak.

<sup>2</sup> Hatnavah, Dan miphun, Zorah tami buet touh ao, a min teh Manoah doeh. Ahni teh a carôe, ca tawn roi hoe. <sup>3</sup> BAWIPA ni kalvantami hah napui koe a kamphawng sak teh, ahni koe khenhaw! ca na roe teh, camo na vawn boïhoe. Hatei, camo na vawn vaiteh, capa na khe han atipouh. <sup>4</sup> Hatdawkvah, misurtui hoi yamu net laipalah, kâhruetcuet, kathounghoehe banghai cat hanh. <sup>5</sup> Bangkongtetpawiteh, khenhaw! camo na vawn vaiteh, capa na khe han. A lû dawkh lûngawnae na hno mahoe. Bangkongtetpawiteh, camo teh manu von thung hoi Cathut hanelah,



Nazirite tami lah ao han. Ahni ni Isarelnaw hah Filistin kut dawkh hoi a runngang han telah atipouh. <sup>6</sup> Napui ni a vâ koe vah, Cathut e tami buet touh kai koe a tho teh, a mei teh kalvantami patetlah doeh ao. Bari kaawm poung e lah ao. Hatei, nâ lae tami maw tie ka pacei hoeh. A min hai dei hoeh. <sup>7</sup> Kai koe khenhaw! camo na vawn vaiteh, capa na khe han. Misur hoi yamu roeroe net hanh. Ka thoung hoeh e hai net hanh. Camo teh manu von thung aonae koehoi a due totouh, Cathut hanlah Nazirite tami lah ao han telah ati.

<sup>8</sup> Manoah ni, BAWIPA koevah a ratoum teh, Oe BAWIPA, Cathut e tami na tha e hah kai koe bout tho sak nateh, ka tâcawt hane camo tak dawkh bangmaw ka sak han, na patue naseh atipouh. <sup>9</sup> Cathut ni Manoah lawk a thai pouh teh, napui law a tahungnae koe kalvantami teh bout a tho pouh. A vâ Manoah teh haw la awm hoeh. <sup>10</sup> Hote napui teh, karanglah a yawng teh, a vâ koe a dei pouh. A vâ koe, khenhaw! yampouh ka dei e hah kai koe bout a kamphawng atipouh. <sup>11</sup> Manoah teh a thaw teh, a yu hnuk a kâbang. Hote tami koe a pha teh, Nang na maw, napui koe lawk na ka dei e vaw atipouh. Ahni ni hai, oe atipouh. <sup>12</sup> Manoah ni na lawk patetlah kuep lawiseh. Camo teh bangtelamaw ao han. Bangmaw a tawh han telah a pacei. <sup>13</sup> BAWIPA kalvantami ni, napui koe ka dei e naw pueng hah kahawicalah pouk. <sup>14</sup> Misurkung dawkh hoi ka tâcawt e pueng cat mahoe. Misurtui hoi Yamu net mahoe. Kathoung hoeh e naw pueng hai banghai cat mahoe. Kai ni kâ na poe e naw pueng kahawicalah na pâkuem han atipouh.

<sup>15</sup> Manoah ni BAWIPA e kalvantami koevah, pahren lahoi na haw einei, nang hanelah hmaeca ka thet einei telah atipouh. <sup>16</sup> BAWIPA kalvantami ni, na ka haw nakunghai, nange rawca teh ka cat mahoe. Hahoi, hmaisawi thuengnae na sak boipawiteh, BAWIPA koe poe loe atipouh. Bangkongtetpawiteh, Manoah ni BAWIPA kalvantami doeh tie panuek hoeh. <sup>17</sup> Manoah ni, BAWIPA e kalvantami koevah, na dei e patetlah akuetporei teh, kai ni na pholen thai nahanelah, na min apimaw telah a pacei. <sup>18</sup> BAWIPA e kalvantami ni, bangkongmaw ka min na pacei. Kângairu e doeh atipouh. <sup>19</sup> Hottelah, Manoah ni ca hanelah hmaeca thuengnae dawkh hoi a la teh, lungsong van BAWIPA koe a poe. Manoah hoi a yu ni a khet lahun nah, ahni ni kângairu hno a sak pouh. <sup>20</sup> Hatnavah, thuengnae khoungroe dawkh hoi hmaito kalvan lah a luen navah, BAWIPA kalvantami teh, hote hmai dawkh hoi a luen. Manoah hoi a yu ni hote a hmu roi navah, talai dawkh a tabo roi.

<sup>21</sup> Hahoi teh, BAWIPA kalvantami teh, Manoah hoi a yu koe bout kamphawng pouh hoeh toe. Hahoi teh, Manoah ni BAWIPA kalvantami tie hah a panue. <sup>22</sup> Manoah ni, a yu koevah, Cathut hmu awm dawkvah, due mingming han doeh toe atipouh. <sup>23</sup> Hatei, a yu ni, BAWIPA ni thei han na nout pawiteh, hmaisawi thuengnae hoi rawca thuengnae hah maimae kut dawkh hoi a dâw han yaw maw, hetnaw hai atuvah na dei pouh mahoe telah atipouh. <sup>24</sup> Hahoi teh, napui ni ca tongpa a khe. A min Samson telah a phung. Hote camo a rounng teh, BAWIPA ni yawhawi a poe. <sup>25</sup> Zorah hoi Eshtaol rahak e Mahaneh, Dan vah BAWIPA e Muitha hah a tak dawkh kâroe hanlah a kamtawng.



<sup>1</sup> Samson teh Timnah kho vah a cei teh, Filistinnaw e a canu napui buet touh a hmu. <sup>2</sup> A manu hoi na pa koe a dei pouh. Timnah vah, Filistin tami napui buet touh ka hmu. Hatdawkvah, ka yu lah na lat pouh loe telah atipouh. <sup>3</sup> A manu hoi na pa nyah, na hmaunawngghanaw ni canu a tawn hoeh dawkw maw, vuensom ka a hoeh e Filistin tami thung dawkw e hah na yu lah khuet na tawng, telah atipouh. Samson ni, na lat pouh awh. Bangkongtetpawiteh, ahni teh ka ngai poung telah atipouh.

<sup>4</sup> Hatei, a manu hoi na pa ni hot teh, BAWIPA koehoi e doeh tie hah panuek roi hoeh. Bangkongtetpawiteh, Filistinnaw hanelah atueng a kâremnae a tawngnae doeh. Bangkongtetpawiteh, hatnae tueng nah Filistinnaw ni Isarelnaw hah a uk.

<sup>5</sup> Hottelah, Samson teh a manu hoi na pa hoi Timnah vah a cei awh. Timnah misur hmuen koe a pha awh navah, sendektan ni hramki laihoi a cusin awh. <sup>6</sup> BAWIPA Muitha ni a tha kaawm poung lahoi a tak dawkw a pha. A kut dawkw banghai sin hoeh ei, hmaeca raphei e patetlah a raphei teh a thei. Hatei, a sak e hah a manu hoi na pa koe banghai dei pouh hoeh.

<sup>7</sup> A cei teh hote tangla hoi a kâpan roi teh Samson mit dawkw hote napui teh atueng.

<sup>8</sup> Hathnukku hoi la hanelah a cei navah, Sendek e ro teh khet hanelah a phen teh, khenhaw! Sendek e a ro dawkvah khoi ao, a ratui hai ao. <sup>9</sup> Hot teh, a la teh, a cei laihoi a ca. A manu hoi na pa hai a poe. Hatei, khoitui teh Sendek dawkw e a la e tie hah dei pouh hoeh.

<sup>10</sup> Hahoi, a na pa teh hote napui koe a cei teh, thoundounnaw ni ouk a sak awh e patetlah, Samson ni pawu bu a paca awh. <sup>11</sup> Hahoi teh, hettelah doeh. Haw e taminaw ni Samson a hmu torei teh, a huinaw 30 touh ni a kâbang sin awh. <sup>12</sup> Samson ni kai ni pâveinae lawkw buet touh na pacei awh han. Pawu sak hnin hnin sari hnin na dei thai awh pawiteh, kai ni hni yung 30, angki yung 30 na poe awh han. <sup>13</sup> Hatei, na dei thai awh hoehpawiteh, hnin yung 30, angki yung 30 nangmouh ni kai na poe awh han atipouh. Ahnimouh ni hote ka panuek thai nahanelah, pâveinae lawkw hah na dei pouh haw atipouh awh.

<sup>14</sup> Hat toteh, ahni ni a dei pouh, kacatkung thung hoi cakawi a tâco teh, athakaawme dawkw hoi ka radip e a tâco.

Hote pâveinae hah hnin thum touh thung dei thai awh hoeh.

<sup>15</sup> Hatei, hnin sari hnin Samson e yu koevah, pâveinae hah ka panuek thai awh nahan, na vâ hah pasawt haw. Telah hoehpawiteh, nang nama hoi na pa imthungkhu abuemlah hmai ngeng na sawi awh han. Ka tawn awh e hnonaw hah lawp hanelah na coun e namaw telah Samson e yu koe atipouh awh. <sup>16</sup> Hottelah, Samson e a yu teh, a hmalah thouk a ka teh, kai lung na pataw hoeh teh, na hmawt ngai hoeh toe khe, ka taminaw na pâvei teh, kai koehai na dei kalawn hoeh atipouh. Samson ni anu hoi apa patenghai ka dei pouh hoeh, nang koe khuet ka dei han yaw maw atipouh.

<sup>17</sup> Hahoi, pawu ao hoehnahlan, hnin sari touh thung a yu ni a khuika sin. Napui ni kâhat laipalah pou a pacei toteh, napui koe a dei pouh toe. Hahoi teh, napui ni hote pâveinae lawkw hah amamouh kho e a taminaw koe a dei pouh toe. <sup>18</sup> A khocanaw teh asari hnin kanî a loun hoehnahlan a tho awh teh,

khoitui hlak bangmaw ka radip, Sendek hlak athakaawme bangmaw kaawm telah a dei pouh awh. Samson ni, nangmouh ni kaie maitola hoi na thawn awh hoeh pawiteh, kaie pâveinae teh na dei thai awh mahoe, atipouh.



<sup>19</sup> Hahoi teh, BAWIPA Muitha heh a tha kaawm poun lah Samson koe a pha teh, Askelon vah a cei teh, tami 30 touh a thei. Angki hoi hninaw a lawp teh, pâveinae lawk ka dei thai naw koe a poe. Hahoi a lung puenghoi a phuen teh, a na pa im lah a ban. <sup>20</sup> Hahoi Samson e a yu teh, a hui hah oun a poe pouh awh.

## 15

### *Samson ni Filistinnaw a tâ*

<sup>1</sup> Hathnukkhu hoi canga lahun navah, Samson ni hmaeca a sin teh, a yu a pâmam. Ahni ni, ka yu koe roe hanelah rakhan thung na kâen sak haw atipouh. Hatei, a na pa ni kâen han pasoung pouh hoe.

<sup>2</sup> A na pa ni, ka canu hah na pahnavt toe telah ka pouk dawkvah, na hui koe yô ka poe toe. A nawngah teh ahni hlak a mei ahawi nahoehmaw. A hmau e yueng lah a nawngah ma lat lawih atipouh.

<sup>3</sup> Samson ni ahnimouh koe, atuteh, Filistinnaw heh patawnae puenghoi ka poe nakunghai, kai teh pathoe han awm hoe toe telah atipouh.

<sup>4</sup> Hahoi teh, Samson a cei teh, Asuihu 300 touh a man teh, a mai dawh hmaito koug a kawm pouh. <sup>5</sup> Hmaitonaw hah hmai a toteh, Filistinnaw e law um a yawng sak teh, cang hai thoseh, cabongnaw hai thoseh, misur takha, olive takhanaw hai thoseh koug a kak pouh.

<sup>6</sup> Filistinnaw ni, het heh apimaw ka sak ati awh. Ahnimouh ni Timnah e cava Samson ni doeh ati awh. A yu a lawp awh teh, a hui a poe pouh awh dawkvah ati awh. Hahoi teh, Filistinnaw ni hote napui hoi a na pa im hmai ngeng a sawi pouh awh. <sup>7</sup> Samson ni hettelah na sak awh dawkvah, nangmouh koe let na pathung awh roeroe han. Hathnukkhu doeh duem kaawm ti atipouh. <sup>8</sup> A cusin awh teh, buet touh hai hlout laipalah he a thei. Hahoi ka yawng ni teh Etam lungah kâko dawh a kâhro awh.

<sup>9</sup> Hahoi Filistinnaw teh a takhang awh teh, Judah kho vah a roe awh. Lehi vah tueng a kâyat awh. <sup>10</sup> Hahoi Judahnaw ni bangkongmaw kaimouh tuk hanlah na tho awh atipouh awh. Ahnimouh ni, Samson man hane hoi, kaimouh ka tak dawh a sak e patetlah a tak dawh sak hanelah ka tho awh atipouh. <sup>11</sup> Hottelah, Judahnaw 3,000 touh Etam lungah kâko dawh a yawng awh teh, Samson koevah, Filistinnaw ni na uk awh e heh na panuek awh hoe maw telah ati. Ahni ni, ahnimouh koe kai ka tak dawh a sak e patetlah ka sak pouh e doeh telah ati.

<sup>12</sup> Hatei, ahnimouh ni, ama koe Filistinnaw kut dawh na poe nahanelah, nang man hanelah, ka tho atipouh awh. Na thet mahoe tie lawk kâkam ei telah atipouh awh. <sup>13</sup> Ahnimouh ni na thet awh mahoe. Hatei, kacaklah na katek awh vaiteh, a kut dawh na poe awh han telah atipouh awh. Hahoi tangron katha yung hni touh hoi a katek awh teh, lungsong koe hoi a takhangkhah awh.

<sup>14</sup> Lehi a pha awh toteh, Filistinnaw a tho awh teh, a hramki sin awh. BAWIPA e Muitha a thakaawmpounge hah a tak dawh a pha teh, a kut dawh kateknae ruinaw pueng teh hmai hoi thoukthouk ka kang e patetlah a kut dawh hoi pak a ca pouh. <sup>15</sup> La e a kamhru katha a pâphawng teh, hot hoi Filistinnaw 1,000 touh a thei. <sup>16</sup> Samson ni telah ati.

La e kamhru hoi thouk ka mawk teh,  
La kamhru hoi tami 1,000 touh ka thei toe.

<sup>17</sup> Hottelah lawk a dei hnukkhu, la e kamhru a sin e hah a tâkhawng teh, hote hmuen teh Ramathlehi telah ati awh. <sup>18</sup> Hahoi, tui hroung a kahran teh, BAWIPA hah a kaw. Nang ni na san e kut heh hno lahoi lentoe e lahoi



na rungngang. Atu tui kahran lawi meimei ka due toe. Vuensom ka a hoeh naw e kut dawm maw kai ka kâpoe han tounge.

<sup>19</sup> Cathut ni Lehi hmuen koe a kavi pouh teh, tui a tâco. Hote a nei toteh, a kâha teh a tha bout akawi. <sup>20</sup> Hottelah, Filistinnaw senah, Isarelnaw hah kum 20 touh a uk.

## 16

### *Samson hoi Delilah*

<sup>1</sup> Samson teh Gaza vah a cei. Hawvah kâyawt e napui a hmu teh a ikhai. <sup>2</sup> Hahoi, Samson hi a tho tie hah Gazanaw koe a dei pouh awh. Hatteh king a kalup awh. Khopui kâennae longkha totouh a kâyat awh teh, karum tuettuet khodai totouh a pawp awh. Khodai toteh, thei han telah ati awh. <sup>3</sup> Samson teh karumsaning totouh a i teh, hahoi karumsaning a thaw teh, khopui kalupnae longkha hoi a khom kahni touh a kuet teh, tarennae khuehoi a phawk teh, a lound hoi a hrawm teh, Hebron mon dawm a tâkhawng.

<sup>4</sup> Hahoi, Sorek yawn e napui buet touh hah a ngai. A min teh Delilah doeh. <sup>5</sup> Filistin bawinaw hah ahni koe a tho awh teh, ahni hah king katek vaiteh rektap thai nahan, a thaonae kungpui panue thai nahanlah pasawt haw, telah na panuek pawiteh, kaimouh ni tangka 1,100 touh rip na poe awh han atipouh awh. <sup>6</sup> Hahoi teh, Delilah ni Samson koevah, hettelah e na thaonae hah na dei pouh haw. Bangkongtetpawiteh, katek vaiteh rektap thai nahanelah atipouh.

<sup>7</sup> Samson ni, napui koevah, rui kahring ni teh ka ke hoeh rae yung sari touh hoi king na katek awh pawiteh, ka tha awm hoeh vaiteh, ayânaw patetlah doeh kaawm titoe atipouh. <sup>8</sup> Hahoi, Filistin bawinaw ni rui kahring e sari touh a sin awh teh, a katek awh. <sup>9</sup> Im e khan dawm arulaho kapawmnaw a tâco awh teh, Samson koevah, Samson Filistinnaw ni na cusin toe atipouh. Ahni ni hote ruinaw hah hmai hoi sawi teh doukkâlat e rui patetlah ruinaw hah a tapo. Hatei, ahnie thaonae hah panuek awh hoeh.

<sup>10</sup> Delilah ni, Samson koevah, khenhaw! na dumyen teh, laithoe na dei. Bangtelah hoi maw na katek thai han dei leih atipouh. <sup>11</sup> Ahni ni, napui koevah, hno boihoe hae tangron katha hoiyah, king na katek pawiteh, ka tha awm hoeh vaiteh, ayânaw patetlah doeh kaawm titoe atipouh. <sup>12</sup> Hahoi Delilah ni tangron katha e a lâ teh, a katek hnukkhu, Samson Filistinnaw ni na cusin toe atipouh. Imrakhan koehoi arulaho kapawmnaw ao. Hahoi a kut kateknae hah pahlarui tapo e patetlah soun a tapo.

<sup>13</sup> Delilah ni Samson koevah, laithoe doeh na dei rah. Bang patetlah hoi maw na katek han tie hah na dei pouh haw atipouh. Hat toteh, Samson ni ka sam sari touh kapek nateh, hni hoi mak na kawng sin vaiteh, tapang dawm khak hetsin pawiteh, ka thayoun vaiteh, ayânaw patetlah doeh kaawm titoe atipouh. <sup>14</sup> Delilah ni a sam sari touh lah a kapek pouh teh, hni dawm mak a kawngsin teh, tapang dawm khak hetsin. Samson Filistinnaw nang ka tuk hane a tho awh toe atipouh. A hnikawng e naw khuehoi a thaw teh a cei.

<sup>15</sup> Delilah ni nang ni kai lungpataw katang laipalah, bangtelamaw khuet na dei han vaw. Khenhaw! vai thum touh na dum toe. Na thaonae teh na dei hoeh rah. <sup>16</sup> Hot patetlah Delilah ni hnintangkuem a lung ka rek lah a dei pouh. Due han totouh a lung a ro sak. <sup>17</sup> Hahoi teh, Samson ni a lungthin abuemlah hoi he a dei pouh. Kaie ka sam teh ka ngaw boihoe.



Anu e von thung ka o nah hoi, Cathut e Nazirite tami lah ka o. Atuvah ka lû ka ngaw pawiteh, ka thaonae buemlah he a kahma han. Ka tha awm mahoe hoi. Ayânaw patetlah doeh kaawm titoe telah atipouh.

<sup>18</sup> A lungthin thung e abuemlahoi a dei toe tie hah Delilah ni a panue. Filistin bawinaw teh bout tho awh leih, a lungthin abuemlahoi a dei toe telah lawk a thui khai. Hahoi Filistin a lungkahanaw teh a tho awh teh, tangka a sin awh. <sup>19</sup> Delilah ni, Samson teh a phai daw k a i sak. Tami buet touh a kaw teh, a sam he a ngaw sak. Rektap hanlah a noe awh toe. A thaonae hai a kahma pouh toe. <sup>20</sup> Samson Filistinnaw ni na cusin toe atipouh. Hahoi a inae koehoi a thaw teh, ahmoun e patetlah ka tâco han bout ka hlout han doeh ati. Hatei, BAWIPA ni na ceitakhai toe tie panuek hoe hoi. <sup>21</sup> Filistinnaw ni a man teh, a mitmu a cawngkhaw pouh awh. Gaza kho a ceikhai awh teh, Rahum bawtarui hoi khakpâkhi awh. Thongim thung vah cakang a phawm sak awh. <sup>22</sup> Samson a lûngaw hnukku hoi a sam bout a sai.

### *Samson duenae*

<sup>23</sup> Filistinnaw ni amamae cathut dagon koe vah, kalen e thuengnae sak hane hoi nawmnae sak hanelah a kamkhuengkhai awh. Mamae cathut ni taran Samson teh maimae kut daw k na poe awh toe telah ati awh. <sup>24</sup> Tami moikapap ni a hmu navah, cathut a pholen awh. Maimae cathut ni taran teh kut daw k na poe awh toe. Ram karaphoekung, tami moi kathetkung teh maimae kut daw k na poe toe ati awh. <sup>25</sup> A lunghawikhai awh lahun nah, Samson hah paitun nahanelah, kaw awh ati awh. Hahoi Samson teh thongim thung hoi a tâcokhai awh teh, hmalah panuikhai hanlah, a ta awh. Khom hoi khom rahak a kangduesak awh. <sup>26</sup> Hahoi, Samson ni, kut daw k hoi ka hrawi e camo koe, hete im a kangduenae khom na tek sak haw, ka kamngawi haw nei atipouh. <sup>27</sup> Hote im daw k napui tongpa yikkawi awh. Filistin bawinaw pueng hai haw vah king a kaw i awh. Samson panuikhai hanlah, kakhennaw napui tongpa hoi 3, 000 tabang a pha awh.

<sup>28</sup> Samson ni BAWIPA hah a kaw teh, Oe Bawipa Jehovah pahren lahoi na pahnim hanh lah a. Pahren lahoi atu vai touh dueng ma thaonae bout na poe haw. Oe Cathut, ka mit kahni touh e phu lah Filistinnaw koe na patho sak haw atipouh. <sup>29</sup> Hahoi, Samson ni bawkim lungui vah a dounnae khompui kahni touh hah, aranglae kut hoi buet touh, avoilah e kut hoi buet touh, ama cawt kamngawi laihoi a kuet. <sup>30</sup> Samson ni Filistinnaw hoi mek na dout sak lawih atipouh. Hahoi, a tha a kâla teh, bawinaw hoi a thung e kaawm taminaw pueng bawkim pui ni koung a ten awh. A hring nah a thei e hlak a duekhai e hah a paphnawn. <sup>31</sup> Hahoi teh, a hmaunawnganaw hoi a imthungkhu abuemlah a tho awh teh, a takhangkhaw awh. Zorah hoi Eshtaol rahak a na pa Manoah pakawpnae hmuen koe a pakawp awh. Hottelah kum 20 touh thung Isarelhaw hah a uk.

## 17

### *Mikah hoi Levih tami*

<sup>1</sup> Ephraim mon daw k tami buet touh ao. A min teh Mikah doeh. <sup>2</sup> Ahni ni a manu koe vah, tangka 1, 100 touh na la pouh e hah nang ni kama ka thainae koe roeroe vah thoe na bo haw. Khenhaw! hote tangka teh kai koe ao. Kai ni ka la payon toe ati. A manu ni, ka capa BAWIPA ni yawhaw pouh naseh atipouh. <sup>3</sup> Hahoi tangka 1, 100 touh a manu bout a poe toteh, a manu ni, hete tangka heh, kai kama e kut daw k roeroe hoi ka capa



hanlah, meikaphawk sak nahan hoi meikaphawk dêi nahanelah, BAWIPA koe, atuvah bout na poe han atipouh. <sup>4</sup> Hot patetlah tangka hah a manu koe a pâban. Hahoi, a manu ni tangka cumhni touh a la teh, nguntui ka hlun koe a poe. Ahnimouh ni meikaphawk a sak teh, a hlun pouh awh. Hot teh Mikah im vah ao. <sup>5</sup> Mikah ni bawkim a tawn. Ephod hoi Terah cathut a sak teh, a capa buet touh hah vaihma thaw a tawk sak. <sup>6</sup> Hote tueng nah, Isarel ram siangpahrang awm hoe. Taminaw pueng ni ama ni ahawi ati e patetlah kho a sak awh.

<sup>7</sup> Hahoi, Judah ram Bethlehem kho e Levih miphun thoundoun buet touh ao teh, Bethlehem khovah a roe teh, <sup>8</sup> haw hoi, bout a cei teh, a roe nahane hmuen a tawng teh, Ephraim mon daw. Mikah im vah a pha. <sup>9</sup> Mikah ni, nâ lahoi maw na tho atipouh. Ahni ni, Judah ram Bethlehem e Levih tami doeh. O nahan hmuen tawng hoi ka kâva atipouh. <sup>10</sup> Mikah ni, kai koe ma awm lawih. Kai koe na pa lah, vaihma lah awm nateh, kum touh daw. ngun phen hra touh na poe han. Khohna yung touh hoi na cakawi hai na poe han atipouh. Hahoi, Levih tami teh a kâen toe. <sup>11</sup> Hahoi Levih tami ni hote tami koe o hanelah a hnâbo teh, hote thoundoun teh a capa buet touh patetlah ao. <sup>12</sup> Mikah ni Levih tami thoundoun teh, vaihma lah a coung sak teh, Mikah im vah ao. <sup>13</sup> Hahoi teh, Mikah ni, atuteh Levih tami teh kaie vaihma lah ka tawn toe. BAWIPA ni kai koe hawinae a sak han tie ka panue telah ati.

## 18

### *Dannaw ni Levihnaw hoi meikaphawk a sawn awh*

<sup>1</sup> Hatnae tueng nah Isarel teh siangpahrang tawn awh hoe. Hatnae tueng nah Dan miphunnaw ni kho a sak nahan ram a tawng awh. Bangkongtetpawiteh, hatnae tueng totouh Isarelnaw ni râw coe hane totouh râw coe awh hoe rah. <sup>2</sup> Hot patetlah Dannaw ni a miphun abuemlae thung daw. tongpatang panga touh ram tuet han hoi panue hanelah Zorah hoi Eshtaol hoi a tho awh. Ahnimouh koe, cet awh nateh, ram hah tuet awh atipouh. Hahoi teh, Ephraim mon daw. Mikah im a pha teh hawvah a roe awh. <sup>3</sup> Mikah im ao awh navah, Levihnaw e thoundoun lawk a thai awh. Ahnimouh koe lah hrue a hnai teh, apinimaw hivah na hrawi awh. Hete hmuen koe bangmaw na sak awh. Bang telah hoi maw hi kho na sak awh atipouh awh. <sup>4</sup> Ahnimouh ni, ahnimouh koe Mikah ni hettelah na sak awh. Na hlai awh teh, vaihma lah ka o ati pouh. <sup>5</sup> Ahnimouh ni ahnimouh koe ka ceinae a lam ka cawn han na ou, cawn mahoe ou ti panue thai nahan, Cathut koe na het pouh haw atipouh awh. <sup>6</sup> Vaihma ni ahnimouh koevah, lungmawngcalah cet awh, na ceinae lam dawkvah, BAWIPA ni na okhai awh telah atipouh.

<sup>7</sup> Hahoi tami panga touh a tâco awh teh, Laish vah a cei awh. Hote taminaw teh Sidonnaw patetlah lungmawngcalah ao awh e hah a hmu awh. Hote ram daw. teh kaukung hai awm hoe. Sidonnaw hoi hai hroung a kâhla awh. Api hoi hai kâkuekâmmainae tawn awh hoe. <sup>8</sup> Hote katuetnaw teh Zorah hoi Eshtaol a hmaunawngghanaw koe a luen awh. A hmaunawngghanaw ni, bang kamthang maw na phu awh atipouh awh. <sup>9</sup> Ahnimouh ni, thaw awh leih, tuk awh leih sei. Bangkongtetpawiteh, ram teh ka hmu awh. Ahawi hai ahawipoung. Kâroe laipalah maw na o awh rah. Hote ram teh lawp hanelah cuhrucuhru tet awh hanh leih. <sup>10</sup> Na cei navah, lungmawngcalah kaawmnaw koe na pha awh han. A ram hai hroung akaw na a. Bangkongtetpawiteh, Cathut ni na kut daw. na poe toe.



Talai van e kaawm e hno thung dawk teh, a voutnae banghai kaawm hoeh e hmuen doeh na a. <sup>11</sup> Hahoi, Zorah hoi Eshtaol kaawm e Dan miphunnaw teh, tarantuknae kamthoup e tami 600 touh a tâco awh. <sup>12</sup> A takhang awh teh, Judah ram KiriathJearim vah a roe awh. Hatdawkvah, hote hmuen teh atu totouh, Mahaneh-dan telah a phung awh. Hottelah KiriathJearim karîloumlah kaawm e naw doeh. <sup>13</sup> Haw hoi pou a tapoung awh teh, Ephraim mon koe Mikah im a pha awh.

<sup>14</sup> Hottelah, Laish ram katuetnaw tami panga touh ni a tho sin teh, a hmaunawngghanaw koevah, hlun e meikaphawk, dêi e meikaphawk ao tie na panue maw. Hatdawkvah, bangtelamaw na ti awh han, pouk awh leih atipouh awh. <sup>15</sup> Hot hmuen koehoi a ban awh teh, Levih miphun thoundoun onae hmuen Mikah im a pha teh, a kut a man awh. <sup>16</sup> Dan miphunnaw thung dawk hoi tami 600 touh tarantuknae puengcang kâmahrawk e naw hah longkha koe a kangdue awh. <sup>17</sup> Tami panga touh ram katuetnaw a luen awh teh, Mikah im a kâen awh. A hlun awh e meikaphawk, Ephod Terah cathut, dêi e meikaphawk hah a la pouh awh. Hahoi vaihma teh tami 600 touh tarantuknae puengcang kâmahrawknaw koe a tumdumnae longkha koe a kangdue van. <sup>18</sup> Hote taminaw ni, Mikah im a kâen teh, hlun e meikaphawk, Ephod Terah cathut, dêi e meikaphawk, hah a la awh toteh, vaihma ni bangmaw na sak awh telah atipouh. <sup>19</sup> Ahnimouh ni lungmawngcalah awm, na kut hoi na pahni tabuem nateh, kaimouh koe kâbang, na pa lah, vaihma lah, kaimouh koe awm khe. Nang hanelah imthungkhu buet touh koe vaihma lah o e maw kahawi, Isarelnaw rahak miphun buet touh koe vaihma lah o e maw kahawi telah atipouh. <sup>20</sup> Hahoi, vaihma teh a lung ahawi. Ephod hoi Terah cathut hoi hlun e meikaphawk hah a la teh, ahnimouh koe a kâen toe.

<sup>21</sup> Hottelah, a tâcokhai teh, a camonaw hoi a saringnaw hnopai hmalah a ta teh a ceikhai. <sup>22</sup> Mikah im hoi kahlathnawn lah a cei hnukkhu hoi, Mikah e a sannaw a kamkhueng awh teh, Dan miphunnaw hah a pâlei awh teh, rek a pha awh. <sup>23</sup> Dan e a catounnaw a kaw awh teh, hahoi a hnuk lahoi a khet awh teh, Mikah koevah, bangkongmaw het yit touh taminaw na thokhai ati awh. <sup>24</sup> Mikah ni, ka sak e cathutnaw hoi vaihma hah oun na ceikhai awh teh, bang vai kai ka tawn tOUNg. Paleipalang bangmaw na sak koe na ti awh vaw atipouh. <sup>25</sup> Dannaw ni ahnimouh koevah, kaimouh rahak vah, lawk hrumhram dei hanh. Hoehpawiteh, kut na nounng payon vaih atipouh awh. <sup>26</sup> Hahoi, Dannaw teh a cei awh. Mikah ni tuk han a taki teh, im a ban takhai awh.

<sup>27</sup> Hahoi Mikah ni a sak e hnonaw hoi a vaihma hah a ceikhai awh teh, lungmawngcalah kaawm e Laish vah a pha awh. Tahloi hoi a thei awh teh, a kho hai hmai a sawi pouh awh. <sup>28</sup> Sidon hoi hroung ahla dawkvah, ka ratang e api awm hoeh. Api hoi hai kâkuetnae tawn awh hoeh. Bethrehob tengpam tanghling dawkvah kaawm e naw doeh. Hahoi hote kho bout a kangdue sak awh teh, hawvah kho a sak awh. <sup>29</sup> Hahoi a kho min lavah, Isarel ca kakhekung Dan patetlah ao dawkvah Dan atipouh awh. Hote kho min karuem teh Laish doeh. <sup>30</sup> Hahoi Dan miphun ni, Mikah ni hlun e meikaphawk teh, amamouh hanlah a hung awh. Gershom capa Jonathan, Mosi capa, hoi a capanaw teh hote ram a la awh hoehroukrak, Dan miphunnaw e vaihma lah ao awh. <sup>31</sup> Hot patetlah Shiloh e cathut im vah, ao na yunglam, Mikah ni a hlun e meikaphawk a sak awh e teh, amamouh hanlah a pâhung awh.



## 19

*Levih tami e a yudo*

<sup>1</sup> Hatnae tueng dawkw, Isarel siangpahrang awm hoeh. Levih miphun buet touh teh, Ephraim mon poutnae koe kahlawng a cei. Judah ram, Bethlehem kho e napui a yudo lah a tawn. <sup>2</sup> Hatei hote a yudo teh a kâyo dawkvah, a vâ koehoi a na pa im Judah kho vah oun a cei teh hawvah thapa yung pali touh ao. <sup>3</sup> A vâ ni a san kahni touh hoi la kahni touh a hrawi teh, a lungpahawi vaiteh bout bankhai hanlah a pâlei awh. A pha awh toh napui ni a na pa im a kâenkhai. A masei ni a cava a hmu toteh, a lunghawikhai van. <sup>4</sup> Hahoi a masei tongpa ni ama koe o hanelah a haw teh, ahni koe hnin thum touh ao pouh. Hawvah a tahung taben awh teh, a ca a nei awh. <sup>5</sup> Hahoi teh, apali hnin teh amom tâco hanlah a thaw teh, tangla e a na pa ni a cava hanlah, vaiyei youn touh vondang lah cat nateh, hahoi na cei han atipouh. <sup>6</sup> Hahoi teh, a tahung roi teh, rei a ca roi. Hahoi, napui e a na pa ni lunghawicalah roe roi lawih. Na lungthin nep roi nah nei atipouh. <sup>7</sup> Hote tami teh cei hanelah a thaw navah, a masei ni tha hoi a haw dawkvah, bout a roe. <sup>8</sup> Hahoi a hnin panga hnin amom teh, a tâco hanlah a kâcai teh a thaw. Napui e na pa ni na lungthin bout kâpahawi ei haw. Tangminlasa totouh teh awm ei haw atipouh. Hahoi kahni touh hoi be rei bout a ca roi. <sup>9</sup> Hote tami teh, a yudo hai a san hai tâco hanlah a kamthaw toteh, a masei niyah, khenhaw! kanî aloum toe. Atu tangmin teh roe awh lawih. Khenhaw! kho hai meimei bout a hmo toe. Na lungthin bet ahawi nahan hivah roe awh nateh, tangtho amom teh na thaw awh vaiteh, na ban awh han toe telah atipouh.

<sup>10</sup> Hatei, a cava ni roe hane a ngai hoeh toun dawkvah, a thaw teh a kamthaw teh Jebusit namran lah Jerusalem koe a pha. La kahni touh a ceikhai teh a yudo hai a cei van. <sup>11</sup> Jebusit imteng a pha toteh, karumpui a tho toun dawkvah, a san ni tho haw, hete Jebusit khopui dawkvah, kâen vaiteh, roe awh lawih sei atipouh. <sup>12</sup> A bawipa ni, Isarelnaw e kho hoeh laipalah teh, kâen vaiteh roe mahoe. Gibeah lah na pâmam sei atipouh. <sup>13</sup> Hahoi a san koevah, Thohaw, hete hmuen buet touh koe pâmam sei. Gibeah hoehpawiteh, Ramah vah roe sei atipouh. <sup>14</sup> Hottelah hoi paloupalou a cei awh teh, Benjaminaw e kho Gibeah teng vah a pha awh teh, kanî a khup toe. <sup>15</sup> Hottelah Gibeah roe hanelah a kâen awh teh, kho lungui sut a tahung awh. Apinihai a im luen sak hanelah ngai awh hoeh. <sup>16</sup> Khenhaw! matawng buet touh teh law lahoi thaw koehoi a ban. Hote tami teh Ephraim mon e tami doeh. Gibeah vah la ka kâhat e doeh. Hote hmuen koe kaawm e naw teh, Benjamin miphunnaw doeh. <sup>17</sup> Hahoi kho a radoung navah, khothung e imyin hah a hmu. Ahni ni namaw na cei han, nâ lahoi maw na tho atipouh. <sup>18</sup> Ahni niyah, Judah ram Bethlehem kho hoiyah Ephraim mon apoutnae koe totouh cei han ka ti teh ka kâcai e doeh. Hawvah kaawm e doeh. Judah ram Bethlehem vah ka cei teh, atu BAWIPA e im vah cei han ka kâcai. Hatei, apinihai a im luen sak hane na kaw ngai awh hoeh. <sup>19</sup> Kaie la hanelah cakong rawca ka tawn. Hahoi kai kama hoi na sannu hoi na tengo koe kaawm e, thoundoun han haiyah, vaiyei hoi misurtui hai ao. Banghai a voutnae awm hoeh atipouh. <sup>20</sup> Matawng ni, nang koe roumnae awm seh. Na panki e naw pueng teh kai ni kOUNg na khang pouh han. Kho lungui teh hrumhram roe hanh leih atipouh. <sup>21</sup> Hahoi a im a ceikhai teh, la hah rawca a paca awh. A khoknaw a pâsu awh teh, cungtalah a canei awh.



*Gibeahnaw e thoena*

<sup>22</sup> Hot patetlah a phu a nep awh lahun nah, khothung e tami kaponaw ni king a kalup awh teh, tho hah thouk a takhawng pouh awh. Im katawnkung matawng koevah, nang im e ka luen e tami hah tâcawt sak, ka ikhai awh han ati awh. <sup>23</sup> Im katawnkung teh, ahnimouh koe a tâco teh, telah nahoe. Hmaunawngghanaw koe hot patetlah totouh tailai teh yonnae sak awh hanh. Hete tami heh ka imyin doeh. Het patetlah e yonnae kalen teh, sak awh hanh. <sup>24</sup> Khenhaw! awi hivah, ka canu tanglakacuem ao. Ahnie a yunaw hai ao. Ka tâco sak han. Ahnimouh heh ipkhai awh nateh, ahawi na ti awh e patetlah ahnimouh tak daw koe awh. Hateiteh, tami tongpa daw koe teh hot patetlah e yonnae kalen teh sak awh hanh atipouh. <sup>25</sup> Hatei, ahnimanaw ni a dei e patetlah ngai awh hoe. Hahoi Levi hoi tami ni a yudo hah alawilah a tâcokhai teh, ahnimouh koe a poe. Ahnimouh ni thouk a ikhai awh teh, khodai hoehroukrak a pacekpahlek awh. Khodai toteh a ceisak awh. <sup>26</sup> Hahoi hote napui teh, khodai hoi a cei teh, a bawipa a luennae takhang koe vung a rawp teh, khodai totouh hawvaw ao.

<sup>27</sup> Hahoi a bawipa teh amom vah a thaw teh, tho a paawng. Cei han kâcai hoi a tâco navah, a yudo teh takhang koe takhang kuet laihoi sut a kamlei e hah a hmu. <sup>28</sup> Ahni ni napui koe thaw leih, cet leih sei atipouh. Hatei, napui ni pathung hoe toe. Hahoi, a la daw koe a thueng teh a onae koelah a cei. <sup>29</sup> Im a pha toteh, sarai a la teh, a yudo hah a kut a khok khuehoi pung hra hlaikahni touh lah a raban teh Isarel ram pueng koe koug a patawn. <sup>30</sup> Hahoi teh, hote kahmawtnaw pueng ni, Isarelnaw Izip ram hoi pek tâconae koehoi het patetlah e hno sak e awm boihoe. Hmawt hai hmawt boihoe. Kho kahawicalah pouk awh haw sei. Be kâdei awh haw a kâti awh.

**20***Isarel ni Benjamin a tuk*

<sup>1</sup> Hahoi Isarelnaw teh pouknae buet touh lah a kamhluem awh teh, Dan hoi Beersheba totouh Gilead ram e naw hoi Mizpah vah BAWIPA koe a kamkhueng awh. <sup>2</sup> Hahoi taminaw kahrawikungnaw hoi, Isarelnaw abuemlah Cathut taminaw a kamkhuengnae hmuen koe, koug a baw koe awh. Tahloi ka patuem e ransa Naw 400000 touh a pha. <sup>3</sup> Benjaminaw ni, Isarelnaw hah, Mizpah vah a takhang awh tie a panue awh. Hahoi Isarelnaw ni bangkongmaw hettelah tailai thoena hah khuet na sak awh vaw. Na dei pouh awh loe atipouh awh. <sup>4</sup> Levi hoi miphun, a yu a thei pouh e a vâ ni, Benjamin miphun onae Gibeah kho roe hanelah noe laihoi a kâen. <sup>5</sup> Hahoi Gibeahnaw ni na cusin awh teh, karum vah kai kecu daw im teh a ven awh. Thei han na noe awh ei, kai na thei yueng lah, ka yu ado a pacekpahlek awh teh, a due sak awh. <sup>6</sup> Hottelah ka yu ado ro hah ka la teh, koug ka raban. Isarelnaw ao awh nah tangkuem koe koug ka patawn. Bangkongtetpawiteh, Isarel ram vah panuetho e hno hoi pathunae hno hah a sak awh. <sup>7</sup> Nangmouh Isarelnaw abuemlahoi na pouknae hah ahawi na ti awh e patetlah dei awh haw telah ati.

<sup>8</sup> Hahoi teh, tamimaya teh lungkânging lah a tahung awh teh, apihai mae im daw kâen awh hanh. Apihai mae rim thung kâen awh hanh. <sup>9</sup> Hatei, Gibeahnaw tak daw koe sak hane kong daw koe teh cunggam rayu hoi tuk awh sei. <sup>10</sup> Isarelnaw tak daw koe kamhnaungnae hno a sak awh dawkvah, Gibeahnaw tuk navah, taminaw hane rawca ka thak hanlah,



Isarel miphunnaw thung dawk 100 touh dawk 10 touh, 1000 touh dawk 100 touh, 10,000 touh dawk 1,000 touh rawi awh sei telah ati awh. <sup>11</sup> Hottelah hoi Isarelnaw pueng teh khopui tuk hanelah, lungthin buet touh lah a kamhluem awh.

<sup>12</sup> Hahoi, Isarel miphunnaw ni Benjamin miphunnaw pueng koe, nangmouh koe het patetlah e hno kaawm e heh, bang dawk na maw. <sup>13</sup> Gibeah e tami kaponaw thokhai awh. Hot patetlah Isarel ram e yon pâmen nahanelah, ka thei awh han titeh, tami a patoun awh. Hatei, Benjamin miphunnaw ni a hmaunawngaha Isarelnaw ni a dei e hah ngai awh hoeh. <sup>14</sup> Benjamin miphunnaw teh, Isarelnaw tuk hanlah khopui thung hoi a tâco awh teh, Gibeah vah a kâen awh. <sup>15</sup> Hot hnin vah, Benjaminlaw tahloi ka patuem hoi, katâcawtnaw teh, Gibeah vah a rawi awh e tami 700 touh touksin laipalah, 26,000 touh a pha awh. <sup>16</sup> Hotnaw hloilah, avoilah ka hno thai e tami 700 touh ao. Abuemlahoi pahlarui payang e thaw laipalah, talungdêikathoum e seng doeh. <sup>17</sup> Isarelnaw teh Benjaminlaw touksin laipalah, tahloi ka patuem thai e 400000 touh a pha awh. Hotnaw pueng teh taran ka tuk thai e seng doeh.

<sup>18</sup> Isarelnaw ni a thaw awh teh, Bethel lah a takhang awh. Benjaminlaw hah apinimaw hmaloe a tuk han telah Cathut koe pouknae a pacei awh. BAWIPA ni Judahnaw hmahman naseh atipouh.

<sup>19</sup> Hottelah Isarelnaw teh amom vah a thaw awh teh, Gibeah tuk hanlah a roe awh. <sup>20</sup> Isarelnaw teh Benjamin tuk hanlah a kamthaw awh teh Gibeah vah, a tuk awh. <sup>21</sup> Hahoi Benjaminlaw teh Gibeah hoi a tâco awh teh, hot hnin vah Isarelnaw 22,000 touh a thei awh. <sup>22</sup> Isarelnaw pueng ni tha a kâla awh teh, apasuek hnin kâtuknae hmuen koe, bout a kâtuk awh. <sup>23</sup> (Hahoi Isarelnaw teh a takhang awh teh, Cathut hmalah tangmin totouh a khuika awh. Ka nawngaha Benjaminlaw tuk hanlah bout kathâw awh han maw telah BAWIPA koe a pacei awh. BAWIPA ni bout tuk awh ati pouh).

<sup>24</sup> Apâhni hnin Isarelnaw ni Benjaminlaw hah a hnaisin awh. <sup>25</sup> Benjaminlaw hai apâhni hnin bout kâtuk hanlah Gibeah hoi a tâco awh. Isarelnaw hah 18,000 bout a thei awh. Hetnaw teh tahloi ka patuem seng doeh. <sup>26</sup> Hottelah Isarelnaw teh a takhang awh teh, Bethel vah a cei awh teh, a khuika awh. BAWIPA hmalah a tahung awh teh, hat hnin teh, tangmin totouh rawca a hai awh. Hahoi BAWIPA koe hmaisawi thuengnae hoi roun thuengnae hah a poe awh. <sup>27</sup> Isarelnaw ni BAWIPA koe pouknae a hei awh. ( Hatnae tueng dawk Cathut lawkkam thingkong teh haw vah a o). <sup>28</sup> Hatnae tueng nah Aron Capa Eleazar e capa Phinehas ni thaw ouk a tawk). Hmaunawngaha Benjamin teh ka tuk awh han rah maw, ka o takhai awh han toung ou telah ati awh. BAWIPA ni takhang sin awh. Bangkongtetpawiteh, tangtho teh na kut dawk na poe awh han toe telah atipouh.

<sup>29</sup> Isarelnaw ni Gibeah teng vah arulaho lampawp a ta awh. <sup>30</sup> Hahoi Isarelnaw teh Benjamin tuk hanlah apâthum a kamthaw awh teh, a hmoun e patetlah Gibeah kho tuk hanlah bout a kâcai awh. <sup>31</sup> Hahoi Benjaminlaw teh, tuk hanlah kho dawk hoi a tâco awh. Ahmoun e patetlah tuk vaiteh, thei han a kamtawng awh. Law hoi Bethel lah takhangnae koe Gibeah lam koevah, Isarelnaw 30 touh a thei awh. <sup>32</sup> Benjaminlaw ni yampa e patetlah a sung awh toe ati awh. Isarelnaw ni yawng awh vaiteh, ahnimanaw hah khopui lamthung koe tâcawt sak sei telah ati awh. <sup>33</sup> Hottelah Isarelnaw ni amamae hmuen hah a ceitakhai



teh, Baaltamar hmuen koe a kamtue awh. Hahoi arulahoi ka pawm e Isarelnaw hah a pawpnae Geba hmuen koe a tâco awh. <sup>34</sup> Isarelnaw thung dawkhohi rawi e 10000 touh hah Geba kho lahoi a tho teh, puenghoi a kâtuk awh. Hatei, Benjamin naw ni a tak dawkhawnae a pha hane panuek awh hoeh. <sup>35</sup> BAWIPA ni, Benjamin naw teh Isarelnaw hmalah, a tâ pouh. Hahoi Isarelnaw ni hot hnin dawkhaw 25100 touh a thei awh. Hotnaw teh tahloi ka patuem seng doeh.

<sup>36</sup> Hot patetlah Benjamin naw ni a sung awh e hah a hmu awh. Isarelnaw ni Gibeah tuk hanlah arulahoi lampawp a ta awh e hah, a kâuep awh dawkvah, Benjamin naw hah hnuklah a kâhnawn takhai awh e doeh. <sup>37</sup> Arulahoi kapawmnaw ni Gibeah kho dawkhaw saung awh teh, a khocha pueng hah tahloi hoi kounghaw thei awh. <sup>38</sup> Isarelnaw hoi lampawp katahungnaw lawk a kâkam awh e teh, a khopui hmai lah muengkhu sak hane doeh. <sup>39</sup> Hahoi Isarelnaw teh hnuklah bout a kâhnawn awh teh, Benjamin naw ni a saueng awh. Isarelnaw 30 tabang a thei awh. Kâtuk pasueknae patetlah maimae hmalah a sung awh toe ati awh. <sup>40</sup> Hatei, khopui dawkhaw hmaikhu a kangdue navah, Benjamin naw teh a kamlang awh teh, khenhaw! khopui e hmaikhu teh kalvan lah a luen parai toe. <sup>41</sup> Hahoi Isarelnaw teh hnuklah a kamlang awh teh, Benjamin naw ni runae a kâhmo awh toe tie a panue awh navah, <sup>42</sup> Isarelnaw hmalah, kahrawng lah a yawng awh. Hatei, pou a pâlei awh. Hahoi, khopui thung hoi ka tâcawt e naw hah hawvah a thei awh. <sup>43</sup> Benjamin naw teh he a kalup awh. A pâlei awh teh, kanîtholah Gibeah kho teng kâhatnae koe a pha awh teh, a katin awh. <sup>44</sup> Benjamin naw teh tami 18000 touh a due awh. Abuemlahoi athakaawme taminaw hoi a tarankahawinaw seng doeh. <sup>45</sup> Hahoi kaawm e naw ni, a ban awh teh, ramke lae Rimmon lungsong koe lah a yawng awh. Tami 5,000 touh teh lam vah hmawi a man awh. Gidom totouh pou a pâlei awh teh, tami 2,000 touh a thei awh. <sup>46</sup> Hottelah, hat hnin Benjamin naw kadoutnaw pueng hah, tahloi ka patuem e 25,000 touh a pha. Abuemlahoi athakaawme taminaw hoi a tarankahawinaw seng doeh. <sup>47</sup> Hatei, tami 600 touh teh, ram ka ke koelah, Rimmon lungsong koe a yawng awh teh, hawvah, thapa yung pali touh ao awh. <sup>48</sup> Hahoi Isarelnaw niteh, Benjamin naw koe bout a kamthaw awh teh, a khopui thung taminaw pueng hoi saring thoseh, a hmu awh e naw pueng hah tahloi hoi a thei awh. Hothloilah, kho a hmu awh e naw pueng hai hmai a sawi pouh awh.

## 21

### *Benjamin miphun naw hanelah yu a poe awh*

<sup>1</sup> Isarelnaw ni Mizpah vah, maimouh thung dawkhohi apihai Benjamin naw ni a yu lah lat hanh seh telah lawkkamnae a sak awh. <sup>2</sup> Tamimaya teh, Bethel vah a cei awh teh, Cathut hmalah tangmin totouh a tahung awh. Puenghoi a hram awh teh a ka awh. <sup>3</sup> Ahnimouh ni Oe BAWIPA, Isarelnaw e Cathut, bang dawkhaw maw Isarelnaw rahak vah het patet e hno heh ao. Sahnin vah, Isarelnaw dawkvah, miphun buet touh a vout. Bang kecu dawkhaw vaimoe telah ati awh. <sup>4</sup> Hahoi teh, hettelah doeh. Atangtho teh tamimaya ni amom a tho awh teh, hawvah, bawkhaw khuongroe a sak awh. Hmaisawi thuengnae hoi lungmawng thuengnae a poe awh. <sup>5</sup> Isarelnaw ni, Isarel miphun naw pueng thung dawkhaw, BAWIPA koe ka kamkhueng hoeh e apimaw kaawm telah atipouh. Bangkongtetpawiteh, Mizpah vah BAWIPA koe ka cet hoeh e naw pueng teh, thei han telah



lawkkamnae kalenpoung a sak awh toe. <sup>6</sup> Hahoi Isarelnaw pueng ni, a hmaunawnggha Benjaminnew koe pankângai awh leih. Sahnin Isarelnaw thung daw k hoi miphun buet touh pahma awh toe. <sup>7</sup> Kaawm rae thung daw k hoi a yu nahanelah bangtelamaw ti awh han. Maimae canunaw heh a yu lah la sak hoe hanelah BAWIPA koe thoebo hoi lawk yo bout kam awh toe telah ati awh.

<sup>8</sup> Ahnimouh ni Isarel miphun thung hoi bang miphun maw Mizpah BAWIPA koe ka tho hoe haw telah ati. Hahoi khenhaw! ka kamkhueng-naw onae hmu en koe Jabesgileadnew hah buet touh hai awh hoe h bo. <sup>9</sup> Taminaw hah a parei awh navah, Jabesgilead ram kaawm e buet touh hai awh hoe h. <sup>10</sup> Hahoi kamkhuengnaw ni a tarankahawi e tami 12000 touh a patoun awh. Cet nateh, Jabeshgilead ram daw k e kaawmnaw hah napui camo hai abuemlah tahloi hoi thet awh. <sup>11</sup> Na sak awh hane dawkvah, hettelah han. Tongpanaw hoi napuinaw ni a ikhai tangcoung e naw pueng hah na thei awh han telah kâ a poe awh. <sup>12</sup> Hahoi Jabeshgilead ram e kaawmnaw thung daw k, tangla 400 touh, tongpa ni a ikhai hoe h rae a pâphawng awh. Hat tore i teh, a onae Shiloh be a thokhai awh. Hot teh Kanaan ram doeh.

<sup>13</sup> Hahoi kamkhuengnaw pueng ni tami a tha awh teh, Rimmon talung koe kaawm e Benjaminnew hah a patopahlai awh teh, ahnimouh koe roumnae lawk a dei pouh awh. <sup>14</sup> Telah ati awh tahma vah, Benjaminnew tang a ban awh teh, Jabesgilead napui a hlung awh e naw hah a poe awh. Hate i napuinaw khout hoe h rah. <sup>15</sup> Hahoi tamimaya teh, Benjamin kecu daw k pankângai awh. Bangkongtetpawiteh, BAWIPA ni Isarel miphun thung ruengruengtinae a pha sak dawkvah.

<sup>16</sup> Hottelah kamkhueng e maya a lungkahanaw ni ka hring e naw a yu hane teh, bangtelamaw ti han. Bangkongtetpawiteh, Benjaminnew thung daw k napuinaw heh koug bout thei pouh awh toe telah ati awh. <sup>17</sup> Ahnimouh ni Isarel daw k hoi miphun a kahma hoe h nahanelah, Benjaminnew la kaawmnaw heh, bangtelamaw râw tawn sak thai han. <sup>18</sup> Maimae canunaw hai a yu lah lat thai awh hoe h ati awh. Bangkongtet-pawiteh, Isarelnaw ni tami bangpatet hai, Benjaminnew a yu lah ka lat e teh, thoebonae awh seh telah lawk bout kâkam toe. <sup>19</sup> Ahnimouh ni khenhaw. Bethel ceinae lam, kanitholah, Lebanon monsom kaawm e Shiloh vah, kum tangkuem BAWIPA hanlah paw i ouk ao telah ati awh.

<sup>20</sup> Hatdawkvah, ahnimouh ni, Benjaminnew koe vah, cet awh nateh, misur takha koe arulahi pawm awh. <sup>21</sup> Khenhaw! Shiloh vah tanglanaw ni lamnae hmu en koe, a tâco toteh, misur takha koe hoi tâcawt awh nateh, tami pueng ni Shiloh tangla hah yu lah man awh. Hahoi tore i, Benjamin ram vah cet awh. <sup>22</sup> Hahoi, a na pa toseh, a thangroi toseh, lairoe hanlah tho pawiteh, ahnimouh koe vah; Kaimouh kecu daw k ahnimouh hah pahren awh. Bangkongtetpawiteh, taran tuknae koe ka yu hanelah, na man pouh mahoe h toe. Bangkongtetpawiteh, ahnimouh ni hai atu totouh napui na poe kalawn awh hoe h. Namamouh e lawkkam daw k yon na kâhnei awh telah tet pouh awh. <sup>23</sup> Benjaminnew teh, hot patetlah a sak awh. Ka lamnaw hah amamae yu hanelah lengkaleng a man awh teh, yout a ceikhai awh. A ram daw k a phakhai awh teh, khopui hah bout a pathoup awh, hawvah kho a sak awh. <sup>24</sup> Hottelah, Isarelnaw teh, amamae miphun rip hoi amamae imthungkhu rip hai, hote hmu en koe hoi a tâco awh teh, amamae kho tangkuem vah a ban awh.

<sup>25</sup> Hote tueng nah, Isarel vah siangpahrang awh hoe h. Tami pueng ni a mahoima hmu nae daw k ahawi tie patetlah kho a sak awh.



## RUTH (Ruth)

### *Elimelek imthung Moab lah a cei*

<sup>1</sup> Lawkcengkung ni a uknae tueng nah Isarel ram takang a tho teh, Judah ram Bethlehem tami buet touh teh a yucanaw hoi Moab kho kampuen hanlah a cei awh. <sup>2</sup> Ahnie min teh Elimelek. A yu min teh Naomi, a ca roi e a min teh Mahlon hoi Khilion. Ahnimouh teh Judah ram, Bethlehem kho, Ephraim tami lah ao. Moab ram lah a cei teh hawvah ao awh. <sup>3</sup> Naomi teh a vâ, Elimelek a due hnukkhu a capa roi hoi cungtalah kho a sak awh. <sup>4</sup> A ca roi ni Moab napui, Orpah hoi Ruth hah a yu lah a la roi. <sup>5</sup> Hote ram daw kum hra touh hane ao awh hnukkhu, hote a capa roi Mahlon hoi Khilion hai a due roi dawkvah Naomi teh a vâ hoi a ca laipalah ao.

<sup>6</sup> Cathut ni a taminaw a khet teh khobu a tho sak tie Moab ram hoi a thai navah, Moab ram hoi ban hanlah a langa roi hoi a kamthaw awh teh, <sup>7</sup> Judah ram lah a cei awh.

<sup>8</sup> Hatei, Naomi ni a langa roi hanlah na manu im lah ban roi leih, kadout tangcung naw hoi kai koe na saknae phu teh Cathut ni yawhawi na poe roi lawiseh. <sup>9</sup> Nangmouh roi ni na vâ alouke na sak roi hnukkhu kanawmcalah na o roi nahan yawhawinae na poe lawiseh ati teh, a kut a man roi. Ahnimouh roi hai a khuika roi. <sup>10</sup> Bangtelah hai thoseh nama hoi cungtalah, na miphunnaw koe kâbang han atipouh roi.

<sup>11</sup> Naomi nihai, ka canu roi, ban roi leih. Bangkongmaw kai koe na kâbang roi han. kai teh nangmouh roi hanlah ka vonthung ca tongpa ka tawn rah maw. <sup>12</sup> Ka canu roi, ban roi leih. kai teh nangmouh roi na ngaihawi nahanelah ka kumcue tOUNg dawkvah vâ hai ka tawn thai mahoe toe. Hatei, vâ ka tawn nakunghai thoseh, sahnin tangmin vah ca tongpanaw ka khe ei nakunghai thoseh, <sup>13</sup> Ahnimouh a nawsai ditouh na ring thai han na maw. Vâ laipalah ahnimanaw ngaihawi rah vaw, ka canu roi hottelah nahoe. Cathut e kut teh kai koe ao hoe tOUNg dawkvah nangmouh roi hanlah lungpatawnae ka tawn atipouh navah

<sup>14</sup> Ahnimanaw teh puenghoi bout a ka awh. Hahoi, Orpah ni a mani hah a paco teh a imthungnaw koe a ban takhai. Hatei, Ruth teh a mani hoi cungtalah o hane a kârawi.

<sup>15</sup> Naomi ni na hmau teh na miphun cathut koe a ban toe. Na hmau e hnuk vah kâbang van leih atipouh navah, <sup>16</sup> Ruth ni nang hoi na kampek sak hanh. Nang koe ka cei hoe nahanlah sak hanh. Na ceinae pueng koe ka cei han. Na inae koe ka i han. Na miphun teh ka miphun lah ao han. Na Cathut teh ka Cathut lah ao han.

<sup>17</sup> Na duenae koe ka due vaiteh kâpakawp han. Duenae laipalah bang ni hai kapek pawiteh Cathut ni kai koe het hlak hai hno sak naseh, telah atipouh. <sup>18</sup> Ruth ni lungtang lahoi a hnukkâbang han ati e Naomi ni a hmu navah lawkkamuem lah a o

<sup>19</sup> Ahnimouh roi teh a kamthaw roi teh Bethlehem a pha roi navah, taminaw ni ruengrueng ati awh teh, hethah, Naomi namaw telah a pacei awh. <sup>20</sup> Naomi ni kai heh Naomi telah na kaw awh hanh lawih. Marah telah na kaw awh lawih. Bangkongtetpawiteh, a Thakasaipounge ni kakhat e hno na poe. <sup>21</sup> Kai teh bawirengnae hoi ka tâco. Hatei, roedeng



teh takcaici hoi Cathut ni bout na bankhai. A Thakasaipounge ni kai na pabo teh na roedeng sak dawkvah bangkongmaw Naomi telah na kaw awh, atipouh. <sup>22</sup> Hottelah, Moab kho hoi ka kâbang e Moab napui, a langa hoi Bethlehem kho vah canga tue nah a pha roi.

## 2

### *Ruth teh Boaz hoi a kâhmo*

<sup>1</sup> Naomi e a vâ Elimelek e a miphun dawkvah a tha kaawm ni teh ka tawnta pounge e a pawiya buet touh ao. Ahnie min teh Boaz doeh.

<sup>2</sup> Moab ton, Ruth niyah kai teh laikawwk koe ka cei vaiteh ka lung ni a youk e hnukkâbang vaiteh cavui a pâhma awh e ka rakhun han telah Naomi koe a kâhei. Naomi ni ka canu cet khe atipouh.

<sup>3</sup> Ruth ni cang ka a naw e a hnukkhu a cei teh cavui a pâhma awh e a rakhun navah, Elimelek e a miphun Boaz e laikawwk daww pouk laipalah a pha.

<sup>4</sup> Hatnavah, Boaz ni Bethlehem kho lahoi ka tho e nangmouh koe Cathut teh cungtalah awm naseh telah cang ka a naw hanelah atipouh navah, ahnimouh ni nama haiyah Yungyoe Cathut ni yawhawinae na poe naseh ati a pouh awh.

<sup>5</sup> Boaz ni hai hote napuica teh api hoi maw a kâkuet telah laikawwk daww kâ katawnkung koe a pacei navah, <sup>6</sup> Laikawwk daww kâ katawnkung ni Moab kho lahoi Naomi hoi rei ka tho e Moab ton doeh atipouh awh.

<sup>7</sup> Ahni ni hai kai teh cang ka a naw ni a pâhma e cavui, law um e ka rakhun han, telah a kâhei teh amom hoi atu hi lawbu a kâhat ditouh a taww toe atipouh navah, <sup>8</sup> Boaz ni Ruth hah a kaw teh thai haw ka canu alouke laikawwk daww cet hanh, a pâhma e cavui rakhun hanh, lat hanh. Hi hoi cet laipalah ka sannunaw koe mah awm lawih. <sup>9</sup> Law hma vah cang ka a naw hah khi nateh ahnimaie hnukkâbang lawih. Thoundounnaw ni taraww hoeh na hanlah ka dei pouh toe. Tui na kahrana navah hlaam hrueknae koe cet nateh thoundoun ni a do e tui net leih atipouh navah, <sup>10</sup> Ruth ni talai daww a tabo teh kai teh Jentel tami ka tho dawkvah ka bawipa nange na lung a kuep nahane bangtelamaw ka ti han ti teh a pacei.

<sup>11</sup> Boaz ni hai na vâ a due hnukkhu, na mani na khetyaww e thoseh, na khoram hoi na manu na pa na ceitakhai teh na panue hoeh e khoram daww na pha tie thoseh, kai koe kamcengcalah a dei awh toe. <sup>12</sup> Na tawksak pueng daww Cathut ni na patho lawiseh. Nang ni a rathei rahim o hanlah na hnaisin e Isarel Cathut ni tawwkphu na poe lawiseh atipouh <sup>13</sup> Ruth nihaiyah, bawipa kai haiyah na hmalah minhmai kahawi kahmaww naseh. Kai teh nange na sannunaw hoi ka kâvan hoeh eiteh, nama ni lawkkamuem lahoi na dei pouh teh lung yo na pahawi toe telah atipouh.

<sup>14</sup> Boaz nihai, canei nahane atueng kuep toe. Tho nateh, vaiyei cat haw. Misurtui daww ranup hottelah atipouh e patetlah, Ruth teh cang ka a naw hoi cungtalah a tahung navah, Boaz ni vaiyei a poe teh, kaboumcalah a ca hnukkhu, bout a pek. <sup>15</sup> Cavui pâhma e racawng hanlah a thaw teh a cei navah, Boaz ni avaicanaw koe, hote napui teh pâhma e cabong racawng naseh. Yeirai poe awh hanh. <sup>16</sup> A tangcoung e cabong hai lem pek pouh awh, hrawm van naseh. Toun awh hanh, telah lawk a hai.

<sup>17</sup> Ruth ni hote laikawwk daww tangmin totouh cavui pâhma e a racawng teh a katin hnukkhu catun ephah, buet tabang a pha. <sup>18</sup> Hote cakang aphu teh, kothung a kâenkhai. A hmu e cakang hai a mani a patue.



Kaboumlah a ca hnukkhu a pek e vaiyei hai a rasa teh bout a poe. <sup>19</sup> A mani ni hai sahnin nâmwaw cavui na racawng. Nâmwaw thaw na tawk. Nang na ka panuek e tami teh a yawhawî seh telah atipouh hnukkhu, Ruth ni sahnin ka tawknae tami e min teh Boaz doeh telah atipouh. <sup>20</sup> A mani ni kahring e tami, kadout e taminaw koe lungmanae pout laipalah ka sak pouh rae Cathut ni yawhawinae na poe lawiseh. Hote tami teh maimouh hoi kambawng e tami, kâhnai e miphun lah ao toe telah a langa koe atipouh. <sup>21</sup> Hote tami ni cang ka a e ka cum hoe roukrak ka taminaw koe awm ei telah Moab napui Ruth koe a dei pouh navah, <sup>22</sup> Naomi ni, ka canu nang teh ahnie a sannunaw hoi cungtalah na awm pawiteh ahawi. Alouke laikawk daw kahnimouh ni na hmawt payon vaih, telah Ruth koe a dei pouh. <sup>23</sup> Ahni teh barli, canga e abaw totouh Boaz e a sannunaw koe ao teh, cavui pâhma e rakhun hanelah a cei teh a mani koe ao.

### 3

#### *Ruth ni Boaz a nem*

<sup>1</sup> Hahoi, a mani Naomi ni ka canu, nang na hlout thai nahanlah kai ni roumnae hmuen nang hanelah ka tawng mahoe h namaw. <sup>2</sup> Na huiko lah kaawm e maimae bawipa Boaz teh maimae huiko nahoe h maw. Sahnin, tangmin laikawk daw barli cakang a karue. <sup>3</sup> Nang teh tui kamhluknae, satui kâhluknae, kamthoupnae khohnat nateh laikawk koe cet leih, ahni ni rawca be a ca hoe h nahlan teh kâpâtue hanh. <sup>4</sup> Ahni a inae patoup nateh a i navah kâen, a khok a khu e hni hawng pouh nateh ip la a. Nang ni na sak hane kawi hah a dei han atipouh. <sup>5</sup> Ahni ni a mani koe, na dei e pueng ka sak han atipouh.

<sup>6</sup> Laikawk koe a cei teh a mani ni lawkthui e patetlah a sak. <sup>7</sup> Boaz teh canei teh lunghawi lai hoi laikawk koe a cei teh a i navah, Ruth ni duem a hnai teh a khok daw k a khu e hni hah a hawng teh a i.

<sup>8</sup> Karumsaning vah tongpa teh lounkalue, a kamlang navah, napui a khok koe ao e hah a hmu. <sup>9</sup> Api nang maw telah a pacei navah, kai teh bawipa nange na san Ruth doeh, bawipa nang teh ratang thai e miphun lah na o daw k, bawipa na sannu hnipo i hoi na khu leih atipouh navah, <sup>10</sup> Ahni ni ka canu kahring Cathut ni yawhawinae na poe seh. Nang teh ka tawnta e tongpa, ka roedeng e tongpa buetbuet touh na kângue hoe h. Hmaloe na sak e pahrennae hlak a hnukkhu na sak e pahrennae hoe a len. <sup>11</sup> Ka canu na lungpuen hanh. Na hei e pueng teh ka sak han. Nang teh a nuen kahawi e napui lah na o e ka miphun onae kho pueng ni a panue. <sup>12</sup> Kai teh ratang thainae ka tawn e miphun katang lah ka o. Hateiteh, kai hlak vah ratang thainae ka tawn e miphun buet touh ao rah. <sup>13</sup> Sahnin tangmin teh awm ei, ahni ni ratang thainae paca lah sak ngai pawiteh sak naseh, sak ngai hoe hpawiteh Cathut a hring e patetlah kai ni ka sak han, amom totouh ip ei atipouh.

<sup>14</sup> Ruth ni amom totouh a khok koe vah a i teh buet touh hoi buet touh panuena e atueng a pha hoe h nahlan vah a thaw. Tongpa ni hai napui koe hete laikawk koe na tho e api hai panuek sak hanh telah atipouh. <sup>15</sup> Hathnukkhu, nang ni na sin e cauithun hah patueng atipouh e patetlah a patueng. Barli cakang omer taruk touh a nue pouh. A lû daw k a thueng teh im a ban. <sup>16</sup> A mani koe a pha toteh bangtelamaw telah a pacei. Nang dawkvah ahni ni a sak e thoseh, <sup>17</sup> ahni ni nang teh na mani koe kuthrawng hoi cet hanh telah barli cakang taruk touh a poe e hai thoseh a dei pouh.



<sup>18</sup> A mani ni hai ka canu hete hno bangtelah hoi maw abaw han tie na panue hoeh totouh tahung ei. Tongpa ni sahnin hete hno abaw hoehnahan muengmueng awm hoeh telah a dei pouh.

## 4

### *Boaz ni Ruth a paluen*

<sup>1</sup> Hatnavah, Boaz teh khopui longkha koe a cei teh a tahung. Paduem a dei e pacanaw ni a cei e a hmu navah, a kamlang teh, api nang maw, tahung leih atipouh e patetlah a kamlang teh a tahung. <sup>2</sup> Hahoi, khopui thung e kacuenaw tami hra touh a kaw teh, hi tahung atipouh e patetlah a tahung. <sup>3</sup> A pacanaw ni hai Moab kho hoi ka tho e Naomi ni maimae hmau, Elimelek e talai a yo han dawkvah, <sup>4</sup> nang na thai sak. Khocanaw, kaimae pacanaw dawh hoi kacuenaw e hmalah ran leih telah dei hanlah pouknae ka tawn. Nang ni ratang na ngai pawiteh ratang leih. Na ratang ngai hoehpawiteh kai koe bout dei lawih. Kai laipalah alouke ka ratang thai e awm hoeh. Nange na hnukkhu lah kai ka o atipouh navah paca ni kai ni ka ratang hane telah ati.

<sup>5</sup> Boaz ni hai hote laikawh hah Naomi koe rannae hnin navah kadout e raw lahoi a minhmai khet hanelah a yu Moab napui Ruth hah a ran sin telah ati navah, <sup>6</sup> A paca ni kai ni kama hanlah ka ratang thai mahoe. Ka ratang pawiteh ka raw raphoe e lah ao han ti a lakueng. Kai ni ka ratang hoeh toun dawkvah kaie ratangthainae hah, nama hanlah ratang lawih telah atipouh.

<sup>7</sup> Isarelnaw e singyoe patetlah ratangnae, hno kâthung e a kangning thai nahanlah buet touh ni amae khokkhawm a rading vaiteh buet touh koe ouk a hnawng. Hottelah, sak e lahoi, Isarel miphunnaw koe panuekhainae teh acak.

<sup>8</sup> Hatdawkvah, a paca ni, ma hanelah ran leih telah Boaz koe a dei pouh e patetlah Boaz ni amae khokkhawm teh a rading.

<sup>9</sup> Boaz ni hai Elimelek e hno, Khilion e hno hoi Mahlon e hnaw pueng Naomi kut dawh e ka ran teh, <sup>10</sup> Kadout e min hah ahnie hmaunawngtha thung hoi thoseh, a onae khopui longkha koehoi thoseh ahnie raw lahoi a min pâpout hoeh nahanelah, Mahlon e a yu Moab napui Ruth heh ka yu lah ao thai nahan, ka ran tie hah nangmanaw teh sahnin kapanuekkhaikung lah na o awh.

<sup>11</sup> Longkha koe kaawm e kacuenaw, taminaw pueng ni kapanuekkhaikung lah ao awh. Na im ka tho e napui ni Isarel miphun kangdout sak e napui kahni touh teh kaimouh koe, Rachel hoi Leah patetlah ao nahan, BAWIPA ni sak lawiseh. Nang hai Epharath kho dawh thao thasainae hoi na kawi vaiteh, Bethlehem khopui dawh min kamthang lawiseh, <sup>12</sup> Karoung takhang e hete napui koe, Cathut ni a poe hane cati lahoi, nange catounnaw teh, Judah e a yu Tamar ni a khe e Parez catoun patetlah awm naseh telah a dei awh.

<sup>13</sup> Boaz ni Ruth a paluen teh, a okhai navah Cathut lungmanae lahoi ca a von teh ca tongpa a khe.

<sup>14</sup> Napuinaw ni hai Naomi koevah nang na khenyawn hanelah na miphun ka cettakhai hoeh e Cathut yawhawinae awmseh. Atu na khe e na miphun heh Isarel miphun dawh kamthangnae awm lawiseh, <sup>15</sup> Ahni teh na hringnae ka khenyawn e tami, na matawng navah na ka kawh e tami lah awmseh. Nang lung na ka pataw e tawngpa sari touh hlak hai hoe kahawi e na langa ni ca tongpa a khe toe atipouh awh. <sup>16</sup> Naomi ni



camo hah a la teh, a tawm teh a okhai <sup>17</sup> Imri e napuinaw ni hai Naomi ni a ca tongpa a khe ati awh teh, hote camo teh Obed telah min a phung awh. Obed capa Jesi, Jesi capa Devit.

<sup>18</sup> Perez e catounnaw teh: Perez capa Hezron, <sup>19</sup> Hezron capa Ram, Ram capa Amminadab, <sup>20</sup> Amminadab capa Nahshon, Nahshon capa Salmon, <sup>21</sup> Salmon capa Boaz, Boaz capa Obed, <sup>22</sup> Obed capa Jesi, Jesi capa Devit lah ao.



# 1 SAMUEL

## (The First Book of Samuel)

### *Elkanah imthung*

<sup>1</sup> Ephraim mon, Ramathaim kho dawk tami buet touh ao. A min teh Elkanah, Ephraim kho e Zuph capa, Tohu capa, Elihu capa, Jeroham capa doeh. <sup>2</sup> Ahni teh a yu kahni touh a tawn, buet touh e min teh Hannah, buet touh e teh Peninnah, Peninnah teh a ca a tawn, Hannah teh ca tawn hoeh. <sup>3</sup> Elkanah teh ransahu BAWIPA bawk hane hoi thueng hanelah amae kho hoi Shiloh kho kumtanguem ouk a cei. Hote kho dawk Eli e capa roi Hophni hoi Phinehas teh Bawipa e vaihma lah ao roi.

<sup>4</sup> Thuengnae tueng a pha navah Elkanah ni a yu Peninnah hoi a canaw e ham a rei. <sup>5</sup> Hatei Hannah teh coe hane let hni touh a poe. Bawipa ni Hannah ca khe hane kâ poe hoeh ei Hannah a pahren dawk a poe. <sup>6</sup> Bawipa ni Hannah hah ca khenae a poe hoeh dawkvah, Hannah hoi kâpo hoeh e napui ni, Hannah a lungmathoe nahanelah voutsout a sak. <sup>7</sup> Hottelah kumtanguem, Bawipa im a cei navah, lungmathoenae a poe, a khuika teh bu hai cat laipalah Hannah teh ao. <sup>8</sup> A vâ Elkanah ni Hannah bangkongmaw bu na ca hoeh. Bangkongmaw na lung a mathoe. Capa hra touh hlak nang hanelah kahawi nahoehmaw telah atipouh.

### *Hannah lawkkam*

<sup>9</sup> Shiloh kho vah a canei awh hnukkhu vaihma teh BAWIPA e bawkim longkha koe a tahung navah, <sup>10</sup> Hannah a thaw teh, lungthin ka rek lah khuika laihoi BAWIPA koe a ratoum. <sup>11</sup> Hannah ni ransahu BAWIPA, nange sannu e rucatnae na hmu teh kai na pahnim hanh. Na sannu pou na pouk lah, capa na poe pawiteh hote capa teh a hring nathing BAWIPA koe ka poe han. A sam hai ka ngaw pouh mahoe telah lawkkamnae a sak.

<sup>12</sup> Hannah teh, BAWIPA hmalah pou a ratoum nah Eli ni apâhni a khet pouh. <sup>13</sup> Hannah ni a lungthung hoi a ratoum. A pahni dueng a kâroe teh a lawk a thai hoeh dawkvah, yamu a parui telah Eli ni a pouk. <sup>14</sup> Nâsittouh maw na parui lahoi na o han. Misurtui hah takhoe leih telah atipouh. <sup>15</sup> Hannah ni nahoe bawipa, lungmathoenae hoi kaawm e doeh. Misur thoseh, yamu thoseh ka net hoeh. BAWIPA hmalah kahringnae ka rabawk e doeh. <sup>16</sup> Na sannu tami kahawihoehe lah pouk hanh. Ka phuenang laihoi atu sittouh ka hei telah bout a dei navah,

<sup>17</sup> Eli ni karoumcalah cet haw, BAWIPA koe na hei e teh, Isarel miphun e Cathut ni na poe lawiseh telah atipouh.

<sup>18</sup> Hannah ni hai na sannu kai teh, na minhmai kahawi kahmawt naseh telah a dei hnukkhu, a minhmai kapan lahoi a cei teh bu a ca toe.

### *Samuel hnawngnae*

<sup>19</sup> Ahnimouh teh amom a thaw awh teh, BAWIPA a bawk awh teh Ramah kho amamouh im vah a pha awh. Elkanah teh a yu Hannah hoi a kâpanue roi teh BAWIPA ni Hannah teh pahnim hanh. <sup>20</sup> Hannah ni camo a von teh atueng akupe navah ca tongpa a khe. Hete ca teh BAWIPA koe ratoum lahoi hmu e lah ao dawkvah, Samuel telah a min a phung.

<sup>21</sup> Elkanah hoi a imthungnaw teh BAWIPA koe kumtanguem ouk a sak awh e thueng hanelah lawk a kam e kuep sak hanelah a cei. <sup>22</sup> Hannah



ni a vâ koe, camo sanu a kamphei torei doeh BAWIPA hmalah, ka ceikhai vaiteh BAWIPA koe pou ao han toe telah atipouh.

<sup>23</sup> A vâ Elkanah ni ahawi na tie patetlah sak lawih. Camo sanu na pâphei totouh awm lawih. BAWIPA e lawkkam mah kuep sak telah atipouh. Hatdawkvah Hannah ni a ca sanu a pânei teh sanu pâphei totouh a im vah ao.

<sup>24</sup> A ca sanu a pâphei hnukkhu kum thum touh e maitotan buet touh, tavai kawlung buet touh, misurtui um touh hoi a ca hah a ceikhai, camo a nawca rah eiteh, Shiloh e BAWIPA e im dawk a ceikhai. <sup>25</sup> Maito a thei hnukkhu camo hah Eli koe a thokhai.

<sup>26</sup> Hannah ni oe ka bawipa nang na hring e patetlah kai teh yampa vah hete hmuen koe nang koevah, ka kangdue lahoi BAWIPA koe ouk ka ratoum e napui kai hah doeh. <sup>27</sup> Hete camo ka hmu thai nahan ka ratoum teh ka hei e patetlah Bawipa ni na poe toe. <sup>28</sup> Hatdawkvah, kai ni BAWIPA koe ka hnawng toe a hring nathung BAWIPA koe hnawng e lah ao toe, a titeh hote hmuen koe BAWIPA hah a bawk.

## 2

### *Hannah ratoumnae*

<sup>1</sup> Hannah ni a ratoum e teh,  
BAWIPA dawk ka lunghawi poung.

Ka ki hah BAWIPA ni a tawm toe.

Nange Rungngangnae dawk ka lung ahawi teh  
ka tarannaw hmalah ka minhmai a pan.

<sup>2</sup> BAWIPA a thoung e patetlah apihai thoung hoeh.  
Nang patetlah e awm hoeh.

Kaimae Cathut patetlah kângue hane talung awm hoeh.

<sup>3</sup> Hot patetlah e kâoupnae lawk dei hanh leih.

Na pahni dawk hoi lunglennae lawk tâcawt hanh naseh.

Bangkongtetsawiteh, BAWIPA teh  
bangpueng ka panuek e Cathut lah ao teh,  
sak awh e pueng hah a khing.

<sup>4</sup> Athakaawme taminaw e licung a kâkhoe teh  
a thakayounnaw thaonae a poe.

<sup>5</sup> A von kapahanaw ca hane kawi a hmu nahan a tawng awh teh,  
a von kahlamnaw vonhlan awh hoeh toe.

Napui cakaroe e ni vai sari touh ca a khe toe.

A ca moikapap ka khe e napui a tha a tâwn toe.

<sup>6</sup> BAWIPA teh duesakthainae,  
hringsakthainae,

phuén totouh duesaknae hoi thawsaknae kâ a tawn.

<sup>7</sup> BAWIPA ni roedengsaknae, tawntasaknae,  
a pabo teh tawmthainae kâ a tawn.

<sup>8</sup> A ma ni pabo e vaiphu dawk hoi a tawm teh,  
a tha kayoun e hraba dawk hoi a tawm teh,  
tami katawntanaw hoi

rei tahuhthainae bawilennae bawitungkhung a poe.

Bangkongtetsawiteh, talai dupuinaw teh BAWIPA e lah ao.

Hote adu pui dawk BAWIPA ni talaivan a kamtue sak.

<sup>9</sup> Ama ni a tami kathoungnaw e a khok a khetyawt han.

Tamikathoutnaw teh a hmo thung dueng ao awh han.

Ma e thasainae hoi apihai tâ mahoe.



<sup>10</sup> BAWIPA ka taran e pueng reppasei lah a ta han.

Kalvan hoi khoparit lawk hoi a tuk han.

BAWIPA ni talai apout totouh lawk a ceng han.

Ama e siangpahrang hah thasainae a poe han.

Satu e awi e hah tawmdawm han telah a ti.

<sup>11</sup> Hathnukkhu hoi Elkanah teh Ramah kho e a im vah a pha. Hatei camo teh vaihma Eli koe BAWIPA e thaw a tawk.

### *Eli capanaw cungkeihoehnae*

<sup>12</sup> Eli capanaw teh a rawk teh BAWIPA panuek a hoeh. <sup>13</sup> Tamimaya koe vaihmanaw oangnae teh, thuengnae moi a thawng lahunnah, vaihma e a san buet touh hoi moi sonae sum kathum samphei e a sin teh a tho.

<sup>14</sup> Ukkang thung thoseh, hlaam dawkh thoseh, thawngnae hlaam dawkh thoseh a cuek awh teh moi sonae sum kathum samphei hoi a rasa e moinaw hah vaihma ni ouk a la, hot patetlah hawvah ka tho e Isarel tami pueng koe Shiloh vah a sak awh. <sup>15</sup> Hatnavah, a thâw a karê hoehnahan, vaihma san a tho teh thuengnae ka sak e koevah vaihma hanelah pahai e moi na poe haw. Bangkongtetpawiteh, nang koe e thawng e moi lat mahoe. Thawng hoeh e doeh a ngai telah a dei.

<sup>16</sup> Ahni koevah ahrei hah hmaloe karê seh, hat hnukkhu vah na ngai yit touh na la han atipouh navah, ahni ni na hoeh bo atu roeroe na poe. Na poe hoehpawiteh, beng na lawp han ouk atipouh.

<sup>17</sup> Hatdawkvah, vaihma thoundounnaw teh a yonnae BAWIPA mithmu vah a lenpoung. Bangkongtetpawiteh, BAWIPA e thuengnae noutna hoeh e lah a hno awh toe. <sup>18</sup> Camo Samuel teh vaihma e angkidung a khohna teh BAWIPA hmalah thaw a tawk. <sup>19</sup> Hothlailah, angkidung a manu ni a khui pouh teh, kumtanguem thuengnae poe hanelah a vâ hoi a tho navah ouk a sin pouh. <sup>20</sup> Eli ni Elkanah hoi a yu teh yawhawi a poe teh, BAWIPA hanelah hno na poe e heh hete napui hno lahoi BAWIPA ni na patho naseh telah atipouh. Hottelah hoiyah im lah a ban awh.

<sup>21</sup> BAWIPA ni Hannah teh a khetyawt teh camo a vawn teh ca tongpa kathum napui kahni touh a khe. Camo Samuel hai BAWIPA hmalah a rounng.

### *Eli ni a capanaw a yue*

<sup>22</sup> Eli teh a matawng poung toe. Isarel pueng koe a canaw ni a sak yoe e pueng hoi kamkhuengnae lukkareiim takhang koe kamkhueng e napuinaw a ikhainae kong a thai a teh, <sup>23</sup> Ahnimouh koe bang kecu dawkh maw het patetlah e hno hah na sak. Bangkongtetpawiteh, hetnaw koehoi e na sak awh e hnokahawi hoeh e kong hah ka thai. <sup>24</sup> Hawi hoeh ka canaw, BAWIPA e taminaw ni a dei awh e kamthang teh kamthang kahawi nahoe. BAWIPA e taminaw lawk na ek sak. <sup>25</sup> Tami reira hah Tami buet touh ni yonnae sak pawiteh, ahni teh, lawkcengkung ni lawk a ceng han. Tami buet touh ni BAWIPA dawkh yon pawiteh, apinimaw a kâhei pouh han telah ati. Hatei a na pa e lawk ngai laipalah a onae teh BAWIPA ni thei han a ngai dawkh doeh. <sup>26</sup> Camo Samuel teh a rounng takhang teh Cathut hoi tami e lungngai lah ao.

### *BAWIPA ni Eli imthung a pahnawt*

<sup>27</sup> BAWIPA e tami buet touh Eli koe a tho teh, BAWIPA ni hettelah a dei. Izip ram Faro im ao awh navah na pa e na catoun koe kamcengcalah ka kamnue nahoehmaw. <sup>28</sup> Ka thuengnae khoungröe koe cei hane hmuitui sawi hane, ka hmalah vaihma angki kho hane, Isarel miphun dawkh hoi



ahni teh ka rawi e lah awm hoeh namaw Isarel miphunnaw e hmaisawi thuengnae hai na pa e miphun koe kai ni ka poe. <sup>29</sup> Ka im dawkw, kâ na poe e thuengnae hnônaw bangkong na khok hoi na coungroe awh. Kai hlak vah na capanaw na barihnawn, nama na kâthaw saknae dawkw ka tami Isarelhaw ni thuengnae kahawi kahawi e na hno, telah a ti. <sup>30</sup> Hatdawkwah, BAWIPA Isarelhaw e Cathut ni kai ni na imthung hoi na pa imthung hah, a yungyoe ka hmalah ka thaw na tawkw awh han telah kai ni na dei pouh ei, sahnin BAWIPA ni a dei e teh ka lawkkam teh kai hoi hlat naseh. Kai ka tawm e naw teh, kai ni ka tawm van han, kai bang lah ka noutna hoeh e naw teh bang lah ka noutna van mahoe. <sup>31</sup> Na imthung dawkw matawng ka phat hoeh lah na kut hoi na miphun e a kut hah a tâtuengnae tueng a pha han. <sup>32</sup> Ka im dawkw e a rucatnae nang ni na hmu han. Isarel miphun lathueng kahawi hno ka sak e pueng kai ni ka poe nakunghai nange miphun dawkw nâtuek hai a kum kacue matawng ka phat sak mahoe. <sup>33</sup> Kaie thuengnae khoungroe dawkw hoi ka raphoe hoeh e nange miphun teh na mit a ro vaiteh, lungthin kamathoesakkung lah ka o sak han. Na catounnaw ni a thoundoun lahun nah a due han. <sup>34</sup> Na ca roi hnin touh dawkw rei a due roi han. Hethateh na ca Hophni hoi Phinehas dawkw ka phat hane hno doeh.

<sup>35</sup> Yuemkamcu vaihma ka lungthin hoi ka pouknae dawkw kaawm e ka sak e tami hah ka kangdue sak han. Kacakpounge imthung lah ka kangdue sak vaiteh a yungyoe hoi satui ka awi e hmalah ao han. <sup>36</sup> Na im vah ka cawi rae pueng tangka hoi vaiyei a hei lahoi a cei awh han. A hmalah tabut awh vaiteh, vaiyei youn touh ka ca hanelah ka hmu thai nahan, pahren lahoi vaihma thaw na tawkw sak yawkaw ati awh han telah a ti.

### 3

#### *BAWIPA ni Samuel a kaw*

<sup>1</sup> Camo Samuel teh Eli hmalah BAWIPA e thaw a tawkw. Hat na tueng dawkw BAWIPA e lawkw ayounca dawkwah, vision awm hoeh.

<sup>2</sup> Hatnae hnin dawkw Eli teh a mit amom teh amae ikhun dawkw a i lahun nah,

<sup>3</sup> Cathut thingkong a onae BAWIPA Cathut e hmaiim hmai due hoehnahlan, BAWIPA e Bawkim dawkw Samuel a yan navah, <sup>4</sup> BAWIPA ni Samuel a kaw teh, ahni ni hivah ka o atipouh.

<sup>5</sup> Eli koe a yawng teh nang ni na kaw dawkw kai ka tho telah atipouh. Eli ni ka ca kai ni na kaw hoeh, bout ip leih telah atipouh. Samuel teh a cei teh bout a i.

<sup>6</sup> BAWIPA ni Samuel bout a kaw, Samuel a thaw teh Eli koe bout a cei teh, hivah ka o bangkong kai na kaw telah atipouh. Ahni ni ka ca na kaw hoeh bo bout ip leih telah atipouh.

<sup>7</sup> Hatnae tueng dawkw Samuel ni BAWIPA panuek hoeh rah. BAWIPA e lawkw hai ahni koe pâpho hoeh rah. <sup>8</sup> BAWIPA ni Samuel hah apâthum lah bout a kaw, hatnavah a thaw teh, Eli koe a cei teh, bangkong kai na kaw hivah ka o atipouh. Hattoteh Eli ni camo heh BAWIPA ni a kaw tie a panue. <sup>9</sup> Samuel koe cet nateh bout ip, bout na kaw pawiteh, BAWIPA lawkw dei, na san kai ni ka thai na ti pouh han. Hottelah Samuel teh ama hmuen koe bout a i.

<sup>10</sup> BAWIPA teh ahmaloe e patetlah a tho teh kangdue laihoi Samuel Samuel telah a kaw. Samuel ni Oe BAWIPA dei haw, na san ni ka thai telah atipouh. <sup>11</sup> BAWIPA ni Samuel koevah thai haw, Isarel dawkwah kathainaw e hnâ kahni touh hoi kha sak hanelah, Isarel miphun dawkw



hno buetbuet touh ka sak han. <sup>12</sup> Hot hnin vah a imthung kong ka dei e pueng a kamtawngnae koehoi apout totouh Eli koe lah ka sak han.

<sup>13</sup> A imthungnaw kai ni pout laipalah lawk ka ceng han telah ahni koe ka dei pouh toe. Bangkongtetpawiteh, ahnie a canaw teh, kahawi hoeh hno a sak awh nahlangva a canaw yue laipalah a onae yon dawkhoeh.

<sup>14</sup> Hatdawkvah Eli imthungnaw e yon teh thuengnae hoi thuengnae hno ni tha thai hoeh, pou a cak han telah Eli imthung koe thoe ka bo toe.

<sup>15</sup> Samuel te amom totouh a i hnukkhu BAWIPA im takhang a paawng. Samuel ni vision hah Eli koe dei hane a taki. <sup>16</sup> Eli ni Samuel a kaw teh, ka capa Samuel atipouh. Ahni ni kai hivah ka o telah atipouh.

<sup>17</sup> Eli ni nang koe BAWIPA ni a dei e hah bangmaw Kai koe bangcahai hrawk hanh. Nang koe a dei e naw pueng hah ka hmalah na hrawk pawiteh, nang koe Cathut ni sak naseh. Hothlak hoe kapaplah sak naseh telah atipouh.

<sup>18</sup> Samuel ni hno pueng koug a dei teh a hro e bang boehai tawn hoeh. Eli ni hai ahawi na tie patetlah BAWIPA ni sak na lawiseh telah a dei.

<sup>19</sup> Samuel a roug teh BAWIPA ni ahni koe a okhai teh, a lawkkam touh boehai talai dawkhawt sak mahoe. <sup>20</sup> Samuel teh BAWIPA e a lawk ka tarawi e profet lah ao tie Dan kho hoi kamtawng teh, Beersheba kho apout totouh Isarel miphun pueng ni a panue awh. <sup>21</sup> BAWIPA ni Shiloh vah bout bout a kamnue pouh. BAWIPA e a lawk lahoi Samuel hah lawk a ploe.

## 4

### *Cathut thingkong kuetnae*

<sup>1</sup> Isarel miphun pueng koevah Samuel ni a dei e lawk a kamthang. Isarelnaw ni Filistinnaw tuk hanelah a cei awh teh, Ebenezer kho teng a roe awh teh, Filistinnaw Aphek kho vah a tungpup awh. <sup>2</sup> Filistin taminaw teh Isarel miphunnaw kâtuknae a pataw poung dawkh Isarelnaw a sung awh teh ransa 4,000 tabang hane a due. <sup>3</sup> Ransanaw teh pupim koe a pha awh toteh Isarel kacuenaw ni, bangkongmaw sahnin vah Filistin hmalah BAWIPA ni na sung sak awh vaw. Shiloh kho hoiyah BAWIPA e lawkkam thingkong hah kai koe thokhai awh. Hattorei doe tarannaw e kut dawkh hoi kai ni na rungngang awh han. <sup>4</sup> Shiloh khovah tami a patoun awh teh Cherubim van ka tahung e ransahu BAWIPA e lawkkam thingkong a thokhai awh. Eli capa kahni touh: Hophni hoi Phinehas hoi Cathut lawkkam thingkong koe ao roi van.

<sup>5</sup> BAWIPA e lawkkam thingkong teh pupim hmuen koe a pha toteh, Isarel tami pueng teh puenghoi talai ka tuen lah a hram awh. <sup>6</sup> Filistin miphunnaw ni a hram e lawk a thai awh navah Hebrunaw e roenae pupim koe hramnae pawlawk bangtelane telah a pacei awh. BAWIPA e thingkong pupim koe a tho tie a panue awh navah, <sup>7</sup> Cathut teh pupim rim koe pha toe telah a dei awh teh, Filistin miphunnaw ni a taki awh. Maimouh yawthoe awh toe, het patetlah vai touh hai awhm boihoe. <sup>8</sup> Maimouh yawthoe awh toe. Apinimaw maimouh teh thakaawme cathutnaw kut dawkh hoi na rungngang han vai. Izip miphunnaw kahrawng vah runae aphunphun hoi ka thet e teh hete cathutnaw doe ati awh. <sup>9</sup> Filistinnaw na tha kâlat awh, tongpa katang lah awhm awh. Hottelah nahoe pawiteh nangmouh dawkh Hebrunaw san lah ao e patetlah nangmouh hai ahnimouh koe san lah na o awh han. Hatdawkvah ,tongpatang lah awhm awh nateh tuk awh.

<sup>10</sup> Filistinnaw ni a tuk awh navah Isarel miphunnaw a sung awh teh amamae rim dawkh lengkaleng a yawng awh. Kâtheikârawngnae a pataw



poung dawk Isarel ransa 30000 touh a due. <sup>11</sup> BAWIPA e thingkong a lawp awh teh Eli capa Hophni hoi Phinehas hai a thei awh.

### *Eli duenae*

<sup>12</sup> Hat hnin navah Benjamin phun buet touh taran hmuen koehoi a yawng teh Shiloh kho a pha. Ahni a ravei teh a lû dawk vaiphu a kâphuen teh, <sup>13</sup> a pha navah Eli ni BAWIPA e thingkong hanelah a lungtâsue teh, lam teng tungkhung dawk hoi a khet. Ahni ni khopui a pha teh akongnaw a dei navah kho abuemlahoi a khuika awh. <sup>14</sup> Eli ni a khuikanae a thai toteh, hramkinae pawlawk bang nama telah a pacei navah, hote tami teh karang poung lah a cei teh Eli koe a dei. <sup>15</sup> Eli teh kum 98 a pha tOUNG dawkvah a mit hmawt thai hoeh toe. <sup>16</sup> Hote tami ni Eli koe kâtuknae koehoi ka tho e doeh. Sahnin taranum hoi ka yawng e doeh telah ati navah, Eli ni ka ca, bangtelane telah a pacei. <sup>17</sup> Kamthang ka thokhai e ni Isarelnaw teh Filistin hmalah hoi a yawng awh teh taran tuknae koe kadout e hai moi apap. Nange na ca roi Hophni hoi Phinehas hai a due toe. BAWIPA e thingkong hai na lawp awh toe telah a dei. <sup>18</sup> BAWIPA e thingkong e akong a dei tahma Eli teh longkha teng tungkhung van hoi pathan lah a rawp teh a lahuen a kâkhoe dawkvah a due. Ahni ni Isarel miphun kum 40 touh a uk. <sup>19</sup> A langa Phinehas e a yu teh camo a vawn e khe tawmlei toe. BAWIPA e thingkong na lawp awh toe tie a marang hoi a vâ a due tie a thai toteh a tabut teh a ca a khe. <sup>20</sup> A due tawmlei nah ateng kaawm e napuinaw ni na lungpuen hanh. Ca tongpa na khe toe telah a dei pouh awh nakunghai, banghai dei hoeh. Banglahai noutna hoeh. <sup>21</sup> Isarel miphun a bawilennae a kahma toe ati teh a ca hah Ikhahod telah a min a phung. Cathut e thingkong oun a la awh toe, a marang hoi a vâ hai a due toe atinae lah a min a phung. <sup>22</sup> Hathnukkhu hoi BAWIPA e thingkong a la awh tOUNG dawkvah, Isarel miphun a bawilennae a kahma toe telah a dei.

## 5

### *Filistinnaw hoi lawkkam thingkong*

<sup>1</sup> Filistinnaw ni BAWIPA e thingkong hah a la awh hnukkhu, Ebenezer kho hoi Asdod kho vah a ceikhai awh. <sup>2</sup> BAWIPA e thingkong hah Dagon Bawkim thung a kâenkhai awh teh, Dagon meikaphawk teng a hruek awh. <sup>3</sup> Asdod taminaw amom vah a thaw awh toteh, khenhaw! BAWIPA thingkong hmalah Dagon pakhup lah talai dawk a rawp e a hmu awh teh, Dagon teh amae hmuen koe bout a hruek awh. <sup>4</sup> Atangtho amom a thaw awh toteh, Dagon pakhup lah talai dawk a rawp e a hmu awh teh, Dagon teh amae hmuen koe bout a hruek awh. <sup>5</sup> Hatdawkvah, Asdod kho daw sahnnin totouh Dagon e vaihmanaw, Dagon imthung kâen buet touh ni hai Dagon im e longkha teh atu totouh coungroe ngam awh hoeh toe.

<sup>6</sup> BAWIPA ni Asdod khocanaw lathueng a kut ka ri e a tOUNG. Asdod kho hoi hote kho teng kaawm e taminaw hah tak pâphu patawnae lahoi runae a poe teh moi a pathung. <sup>7</sup> Asdodnaw ni hot patetlah e hno kaawm e hah a hmu awh navah Isarelnaw e Cathut thingkong kaimouh koe pou awm hanh naseh. Bangkongtetpawiteh, kaimouh hoi Cathut Dagon lathueng kut a tOUNG e a patawpoung telah ati awh.

<sup>8</sup> Taminaw a patoun awh teh, Filistin siangpahrangnaw a kamkhueng sak awh teh, Isarelnaw e Cathut e thingkong hah bangtelamaw ti han telah a pacei awh navah, siangpahrangnaw ni Isarelnaw e Cathut thingkong hah



Gath kho lah cetkhai awh naseh ati awh teh thingkong hah a ceikhai awh. <sup>9</sup> A ceikhai awh hnukkhu hote khopui daw BAWIPA ni kut a toung teh tami pueng lungthin a tâlueng sak. Khoca kathoung kalennaw koe totouh pâphu patawnae teh a pha sak.

<sup>10</sup> Hatdawkvah, Cathut e thingkong hah Ekron kho lah a patoun awh. BAWIPA e thingkong teh Ekron kho a pha toteh a khocanaw ni Isarelnaw e Cathut e thingkong hah maimouh hoi taminaw due sak hanelah a pha sak awh toe telah a hram awh.

<sup>11</sup> Tami a patoun awh teh, Filistin siangpahrangnaw a kamkhueng sak awh teh, ahnimouh ni maimouh hoi taminaw a due sak hoe hahan Isarelnaw e Cathut e thingkong hah patoun awh lawih. Ama a onae hmuen koe bout tat awh lawih telah a dei pouh awh. Bangkongtetpawiteh, Cathut e a kut karipoung e maimouh koe phat vaiteh, khopui thungvah due kawi patawnae a pha han. <sup>12</sup> Ka dout hoe hae naw teh tak pâphunae ni a tho sin teh khopui hram lawk kalvan totouh a pha.

## 6

### *Isarelnaw koe lawkkam thingkong bout a ban*

<sup>1</sup> BAWIPA e thingkong teh Filistin ram daw thapa yung sari touh ao hnukkhu, <sup>2</sup> Filistinnaw ni vaihmanaw, profetnaw a kaw awh teh, BAWIPA e thingkong bangtelamaw ti han toung. Ama e hmuen koe bangtelamaw bout patoun han dei awh haw telah atipouh navah, <sup>3</sup> Ahnimouh ni Isarelnaw e Cathut thingkong hah bout na patawn awh pawiteh thingkong a madueng lahoi bout patawn awh hanh. Yon thuengnae hno hoi na patawn awh han. Hottelah pawiteh patawnae dam sak lah o han. Bangkong a kut na tahrue pouh hoe tie na panue awh han atipouh.

<sup>4</sup> Bang patet e kâtapoe thuengnae hno poe hane teh bangmaw. Ahnimouh ni Filistin bawi touk e yit touh, suimarang <sup>5</sup>, suimoiham <sup>5</sup>, na patawn awh han. Nangmouh hoi nangmae siangpahrangnaw teh patawnae phun touh dueng lah ao dawkvah.

<sup>5</sup> Marang mei kaphawk, nangmae ram ka raphoe moiham meikaphawk na sak awh teh Isarelnaw e Cathut bawilennae hah na poe awh han. A kut teh nangmae ram hoi nangmae Cathut naw lathueng thoseh, nangmouh lathueng thoseh nangmae talai thoe seh, a pâhaw sak han.

<sup>6</sup> Faro Siangpahrang hoi Izip miphunnaw lungpatanae e patetlah nangmae lungthin na pata sak a van. Ahnimae lathueng ka pataw poung lah lawk a ceng navah. Isarel miphunnaw ahnimouh ni a hlout sak awh teh, Isarel miphunnaw a tâco awh nahoehmaw. <sup>7</sup> Atuvah leng katha e buet touh sak awh nateh, leng lahuen daw bang hoe hae a ca k cun e maito a manu kahni ta hah leng daw kawm awh nateh takha thung pen awh. <sup>8</sup> BAWIPA e thingkong hah lat awh nateh, leng dawkvah toung awh. Kâtapoe thuengnae hno hanelah na patawn e sui hnopainaw hah alouke thingkong thung e ateng vah hrueng awh nateh, tha awh nateh cet awh naseh. <sup>9</sup> Thingkong teh amamae ram lah a ceinae lam Bethshemesh kho totouh, kâbang pawiteh hote Cathut ni hete runae kalenpounge hah maimouh daw a pha sak toe. Hatei cet hoehpawiteh maimouh lathueng ka phat e kahawihoehe hno hah a ma ni a sak e nahoe. Ama ngai pou ka phat e han doeh telah a ti.

<sup>10</sup> Hottelah, taminaw ni a sak awh. Sanu ka pânet lahun e maito manu roi a ceikhai awh teh, leng daw kawm awh. A ca roi teh takha thung a pen pouh awh. <sup>11</sup> BAWIPA thingkong hah leng van vah a thueng awh.



Moihnam meikaphawk kaawm e thingkongnaw hai a thueng awh. <sup>12</sup> Maito roi teh Bethshemesh lam lah tuetue a cei teh, avoillah aranglah hai phen laipalah, lamthung pui daw k tuetue a parawng teh a cei. Filistin bawinaw ni Bethshemesh khori totouh a kâbang sin awh. <sup>13</sup> Bethshemesh khocanaw teh a yon daw k catunnaw a a awh teh, a khet awh navah, thingkong hah a hmu awh navah a lunghawi awh. <sup>14</sup> Leng teh Bethshemesh tami Joshua e law vah a kâen teh, kalenpounge lungsong aonae koe a kangdue. Hote leng thing hah a raboung awh teh maito manu roi hah BAWIPA koe vah hmaisawi thuengnae lah a sak. <sup>15</sup> Levihnew ni Bawipa thingkong teh aphu kaawm poung e sui onae thingkong hoi a la awh teh, lungsong van vah a hruek awh. Bethchemesh ni hote hnin dawkvah hmaisawi thuengnae hoi thuengnae hah BAWIPA koe vah a poe awh. <sup>16</sup> Filistin baw panga touh ni a khet awh hnukku hot hnin navah EKron kho lah a cei awh. <sup>17</sup> BAWIPA koe yonthueng nahanelah Filistinnaw ni a patawn e (Tumor meikaphawk, moihnam meikaphawk) naw hah Asdod kho han buet touh, Gaza kho hanelah buet touh, Askelon hanelah buet touh. Gaza kho hanelah buet touh Ekron kho hanelah buet touh. <sup>18</sup> Suimoihnam meikaphawknaw teh, Filistin baw panga touh ni a tawn e khote totouh, khopui khote abuemlah hoi e doeh. BAWIPA e thingkong a hrueknae lungsong teh, Bethshemesh kho e Joshua e laikaw k daw k sahnin ditouh ao rah.

<sup>19</sup> Bethshemesh khocanaw teh, BAWIPA e thingkong thung a khet awh dawkvah BAWIPA ni a rek teh tami 50000 touh hoi tami 70 touh a thei. BAWIPA ni taminaw moikapap a duesaknae hoi a reknae dawkvah ahnimouh a khuika awh. <sup>20</sup> Bethshemesh khocanaw ni kathoungpounge BAWIPA Cathut e hmalah apimaw ka kangdout thai han va. Maimouh koehoi api koe maw a cei han telah a ti.

<sup>21</sup> Ahnimouh ni Kiriath Jearim khocanaw koe vah patounenaw a patoun awh teh, Filistin taminaw ni BAWIPA e thingkong hah bout a patawn awh toe. Cet awh nateh namamouh koe cetkhai awh lawih telah atipouh.

## 7

<sup>1</sup> Kiriath Jearim khocanaw a tho awh teh, BAWIPA e thingkong hah a ceikhai awh. Mon e Abinadab im a kâenkhai awh teh, thingkong ka khenyawn hanelah a capa Eleazar hah a kamthoung sak awh.

### *Samuel ni Isarelnaw a uk*

<sup>2</sup> Kiriath Jearim kho daw k thingkong ao nathung kum 20 touh a ro toe. Isarel phunnaw teh BAWIPA daw k pouk dounnae a tawn awh. <sup>3</sup> Samuel ni Isarel miphun pueng koe BAWIPA koe lah lungthin abuemlah bout na ban awh pawiteh, nangmouh rahak ram alouke cathutnaw hoi Ashtaroth cathut hah tâkhawng awh nateh BAWIPA daw k na lungthin pen awh. BAWIPA e thaw ma taw k awh. Hottelah na sak awh pawiteh Filistinnaw e kut daw k hoi nangmouh na rungngang han telah a ti. <sup>4</sup> Hatdawkvah, Isarel miphunnaw ni Baal cathut Ashtaroth hah a pahnawt awh teh, BAWIPA e thaw hah a taw k awh.

<sup>5</sup> Samuel ni Mizpah kho daw k Isarel miphun pueng hah kamkhueng sak nateh nangmouh hanelah BAWIPA koe ka ratoum han telah a ti.

<sup>6</sup> Ahnimouh teh Mizpah kho a kamkhueng awh teh tui a do awh teh, BAWIPA e hmalah a rabaw k awh. Hote hnin nah rawca a hai awh teh, maimouh ni BAWIPA koe yonnae sak awh toe telah ati awh. Samuel ni Mizpah khovah Isarelnaw hah law k a ceng.

<sup>7</sup> Isarelnaw hah Mizpah kho daw k a kamkhueng awh e Filistinnaw ni a thai awh toteh, Filistin siangpahrangnaw teh Isarelnaw tuk hanelah a



cei awh. Hote a kong hah Isarelnaw ni a thai awh toteh Filistinnaw a taki awh. <sup>8</sup> Isarelnaw ni Samuel koe kaimanaw hah Filistinnaw e kut dawkh hoi na rungngang thai nahan kaimae BAWIPA Cathut koe kâhat laipalah ratoum loe atipouh awh. <sup>9</sup> Samuel ni sanu ka net lahun e tuca buet touh a la teh, BAWIPA koe abuemlahoi hmaisawi thuengnae a poe teh, Isarelnaw hanelah BAWIPA koe ratoum pouh teh, BAWIPA ni a thai pouh. <sup>10</sup> Samuel ni hmaisawi thuengnae a sak lahun nah Filistinnaw ni Isarelnaw tuk hanelah rek a hnai awh. Hatei BAWIPA ni Filistinnaw koe kho puenghoi a parit sak teh Isarelnaw e hmaitung taran a sung awh. <sup>11</sup> Isarelnaw hah Mizpah kho hoi a tâco awh teh Bethkhar kho rahim totouh a pâlei awh teh Filistinnaw a thei awh.

<sup>12</sup> Samuel ni talung buet touh a la teh, Mizpah kho hoi Shem kho rahak dawkh a ung hnukkhu, BAWIPA ni maimouh sahnin totouh na kabawp awh toe telah a dei teh, hote talung teh Ebenezer telah min a poe. <sup>13</sup> Filistinnaw teh a sung awh. Isarelnaw e ram dawkh bout tho awh hoeh toe. Samuel a hring na thung pueng Filistinnaw e lathueng BAWIPA e a kut a pha sak. <sup>14</sup> Filistinnaw ni Isarelnaw e kho a la e Ekron kho hoi kamtawng teh Gath kho totouh Isarelnaw bout a poe awh teh a ram hah Isarelnaw ni Filistinnaw e kut dawkh hoi bout a lawp awh teh, Isarelnaw hoi Amornaw hanelah rounnae a sak awh.

<sup>15</sup> Samuel ni a hring nathung pueng Isarel a uk. <sup>16</sup> Kumtangkuem ahni ni Bethel hoi Gilgal kho Mizpah khonaw a rip hnukkhu hote khopuinaw thung Isarelnaw hah a uk. <sup>17</sup> Hathnukkhu hoi a onae im kaawm e kho Ramah vah a ban. Hote khothung vah Isarelnaw lawk a ceng teh BAWIPA hanelah hote hmuen koe thuengnae khoeungroe a sak.

## 8

### *Isarelnaw ni siangpahrang heinae*

<sup>1</sup> Samuel a matawng toung dawkvah a capanaw hah Isarelnaw lawk-cengkung lah ao sak. <sup>2</sup> A capa camin e min teh Joel doeh. Apa hni e a capa teh Abijah Beersheba kho dawkh lawkceng bawi lah ao. <sup>3</sup> Hateiteh a capanaw ni a lamthung patetlah dawn awh hoeh. Ahnimouh teh tangga e hnuk a kâbang awh teh lam a phen awh. Tadawngghno a ca awh teh lawkngai awh hoeh.

<sup>4</sup> Hatdawkvah, Isarel kacuenaw a kamkhueng awh teh Ramah kho vah kaawm e Samuel koe a cei awh. <sup>5</sup> Ahni koe na matawng poung toe. Na capanaw ni hai na lamthung dawn awh hoeh toe. Jentelnaw patetlah kaimae lathueng siangpahrang na poe leih telah a dei awh. <sup>6</sup> Kaimanaw lawkkaceng hane siangpahrang na poe leih atipouh e ni Samuel a lunghaw i sak hoeh. Hatdawkvah, BAWIPA koe a ratoum.

<sup>7</sup> Hattoteh BAWIPA ni Samuel koe taminaw ni nang koe a dei e lawk thai pouh. Bangkoktetpawiteh, nang hah na pahnawt awh hoeh. Kai hai ahnimanaw ukkung lah o hoeh nahan kai doeh na pahnawt awh toe. <sup>8</sup> Izip ram hoi ka tâcokhai hnin hoi sahnin totouh, kai na pahnawt awh teh alouke cathutnaw hah a bawkh awh toe. Kaie lathueng a tawksak awh e patetlah nange lathueng hai a sak awh toe. <sup>9</sup> Hatdawkvah, ahnimae lawkngai pouh haw. Hatei kâhruetcuetnae poe nateh ahnimanaw ka uk e siangpahrang e nuencang hah hmawt sak loe telah atipouh.

### *Samuel ni kâhruetcuetnae a poe*



<sup>10</sup> Samuel ni BAWIPA e a lawknaw hah, siangpahrang kahetnaw koe bout a dei pouh. <sup>11</sup> Nangmae lathueng kaukkung hane siangpahrang o ang teh, hef hah doeh. Na capanaw a la vaiteh, amae leng, ranglengnaw, marangransanaw thaw na poe vaiteh, a tangawn hai ahnie rangleng mhalah a yawng awh han. <sup>12</sup> Ransa 1,000 touh kaukkung 50 touh kaukkung, ransabawi thaw a poe. Laikawk ka thaw hane hoi cang ka a hane hoi tarantuknae puengcang kasakkung hoi rangleng puengcang kasakkung lah lengkaleng thaw a poe awh han. <sup>13</sup> Nangmae na canunaw hai a la vaiteh, hmutui katawkkung, rawca ka khenyawnkung lah thoseh, vaiyei kathakkung lah thoseh, thaw a poe awh han. <sup>14</sup> Nangmae lawnaw, misur takhanaw, Olive takhanaw hai a la vaiteh, a sannaw koe a poe awh han. <sup>15</sup> Nangmae caticamu, a pawhik pung hra pung touh na la pouh vaiteh thaw katawknaw hoi kacuenaw koe a poe awh han. <sup>16</sup> Nangmae na sannu sanpanaw, na thoundoun kahawi kahawinaw hoi lanaw a la vaiteh a thaw taw awh nahanelah a hno awh han. <sup>17</sup> Nangmae Tu pung hra pung touh a la vaiteh nangmouh teh ahnimae san lah na o awh han. <sup>18</sup> Na rawi awh e siangpahrang kecu daw k na khui na ka awh han. Hote hnin daw k na hram na ki awh eiteh, BAWIPA ni na thai pouh mahoehtelah kâhruetcuetnae a poe.

### *Isarel ni hei e BAWIPA ni a poe*

<sup>19</sup> Hatei taminaw ni Samuel e lawk a ek awh teh, ahnimouh ni telah nahoeht. Kaimouh ka uk hane siangpahrang doeh ka ngai. <sup>20</sup> Hattorei doeh kaimouh hai alouke ramnaw hoi kâvan awh han. Kamamouh e siangpahrang ni lawk na ceng pouh han. Ka miphun heh a hrawi vaiteh taran na tuk pouh han. Telah bout a dei awh.

<sup>21</sup> Samuel ni tamipueng e lawk a ngai teh BAWIPA koe bout a dei pouh. <sup>22</sup> BAWIPA ni Samuel koe ahnimae lawk tarawi haw, ahnimouh han siangpahrang rawi pouh haw telah ati. Samuel ni Isarelnaw koe vah namamouh kho lengkaleng ban awh telah atipouh.

## 9

### *Sawl Siangpahrang lah a rawi awh.*

<sup>1</sup> Benjamin miphun, Aphiah capa, Bekorath capa, Zeror capa, Abiel capa, Kish kâphung e Benjamin miphun buet touh ao. Ahni teh athakaawme lah ao. <sup>2</sup> Ahni ni capa a tawn teh, a min Sawl a phung a meilam hroung ahawi. Isarelnaw thung dawkvah ahni hlak a mei kahawi e awm hoeht. A rasang e hai alouknaw ni aloung koe hmouk a vout pouh.

<sup>3</sup> Sawl e a na pa Kish e a lanaw teh a kahma. Kish ni a capa Sawl koe vah thaw nateh san thoundoun buet touh cetkhai nateh, la hah tawng awh haw atipouh. <sup>4</sup> Ahnimouh ni Ephraim mon Shalisha ram pheng a katin awh teh a tawng awh ei, pâphawng awh hoeht. Shaalim ram daw k a tawng awh eiteh, hmawt awh hoeht. Hatdawkvah, Benjaminaw e ram daw k bout a tawng awh, hatei hmawt awh hoeht.

<sup>5</sup> Zuph ram lah a pha awh toteh Sawl ni ama koe kaawm e a san koe vah, tho awh ban awh lei sei, telah hoehpawiteh, apa ni la hah pouk toung laipalah, maimouh doeh na lungpuenkhai ti toe telah ati. <sup>6</sup> A san ni vah, hete kho daw k Cathut e tami bari kaawm e ao. Ahni ni a dei e pueng a kuep katang. Ahni koe cet awh sei. Maimouh cei nahane lam hai na dei pouh thai han doeh telah atipouh. <sup>7</sup> Sawl ni a san koe vah, maimouh cei awh vaiteh ahni bangmaw poe awh han. Vaiyei hai abaw toe. Cathut e



tami koe sin hane banghai awm hoeh toe. Bangmaw tawn awh rah telah a pacei. <sup>8</sup> A san ni Sawl koe shekel pung pali pung touh dawkw pung touh kut dawkw ao rah. Cathut e tami koe poe han. Ahni ni maimouh cei nahan lamthung na dei pouh han doeh telah bout a dei. <sup>9</sup> Ayan e tueng dawkw Isarelnaw ni Cathut pacei hane cet awh sei ati awh navah, kahmawtkung koe cet awh sei ouk ati awh. Profet telah kaw e hah ayan e tueng dawkw kahmawtkung telah a kaw awh dawkw doeh. <sup>10</sup> Sawl ni hai a san koe ahawi. Cet awh sei atipouh teh, Cathut e tami a onae kho koe lah a cei awh.

<sup>11</sup> Khopui a onae mon lah a luen awh navah tui ka do hane napui ka tho e a hmu awh teh, hivah kahmawtkung tami ao nama telah a pacei. <sup>12</sup> Ahnimouh ni ao, nangmae na hmalah a la pha toe karanglah cet awh. Sahnin taminaw ni hmuen karasang koe thuengnae sak hanelah ao dawkvah, sahnin kho dawkw a tho awh toe. <sup>13</sup> Kho thung a kâen tahma, hmuen karasang koe bu a ca hoehnahlan vah, tang na hmu awh han doeh. Thuengnae yawhawi kapoekung lah ao dawkvah, a pha hoehroukrak rangpuinaw ni bu cat awh mahoe. Hathnukkuh coun e naw ni ouk a ca awh. Hatdawkvah, atu karanglah cet awh leih, tang na hmu awh han doeh telah a dei pouh. <sup>14</sup> Ahnimouh teh khopui vah a cei awh teh, a kâen awh navah, Samuel hmuen karasang koe luen hanelah a kaw nah ahnimouh ni a kâmo.

<sup>15</sup> Sawl a tho hoehnahlan BAWIPA ni Samuel koe sut a dei pouh teh, <sup>16</sup> tangtho, atu e tueng navah Benjamin ram hoi tami buet touh nang koe ka patoun han. Filistinnaw e kut dawkw hoi ka taminaw rungngang hanlah, ka tami Isarelnaw e lathueng vah kâ kapoekung lah satui na awi han. Bangkongtetpawiteh a hramnae kai koe a pha dawkvah, kai ni ka taminaw han kho ka pouk pouh toe telah ati.

<sup>17</sup> Samuel ni Sawl a hmu toteh, BAWIPA ni ahni koevah, khenhaw! nang koe ka dei e teh ahni doeh. Ahni ni ka taminaw a uk han telah ati. <sup>18</sup> Khopui takhang dawkw Sawl ni Samuel koe rek a hnai teh, kahmawtkung e im teh nâmwaw ao na dei pouh haw atipouh. <sup>19</sup> Samuel ni Sawl koe kai doeh kahmawtkung toe atipouh. Kahma lahoi hmuen karasang koelah cet nateh, sahnin vah kai koe bu na ca vaiteh, tangtho torei na ceisak han. Na lungthung kaawm e puenghai kai ni ka dei han. <sup>20</sup> Hnin thum touh kaloum tangcoung e nange na kong hah teh mueng pouk hanh. Bangkongtetpawiteh, a hmu awh toe. Isarelnaw han lentoenae teh api hane nama. Na pa hoi na pa im kaawm e pueng hane nahoehmaw telah atipouh. <sup>21</sup> Sawl ni Isarel miphun thung dawkw kathoengcae Benjamin miphun nahoehmaw Bangdawkw hah namaw hettelah kai koe lawk na dei thai telah bout atipouh.

<sup>22</sup> Samuel ni Sawl hoi a sannaw hah imyin onae a khan dawkw a ceikhai awh teh, a coun awh e tami 30 touh thung hlak vah barinae hmuen koe a tahung sak. <sup>23</sup> Samuel ni bu kathawngkung koe nang koe aloukcalah hmoun e na poe e hno hah lat hottelah ati. <sup>24</sup> Bu ka thawng e ni a loung dawkw hoi a hrawm teh Sawl e hmalah a hruek. Samuel ni hai, pek e lah kaawm e hah lat nateh cat haw, coun e naw koe yo ka dei pouh e patetlah nang hanelah atu totouh ka hruek e doeh ati teh hat hnin vah Sawl teh Samuel hoi rawca rei a ca roi. <sup>25</sup> Hmuenrasang koehoi a kum awh teh khopui thung a kâen awh toteh, Samuel hoi Sawl teh lempu van vah lawk a kâpan roi. <sup>26</sup> Amom a thaw teh, kho a sei navah, Samuel ni thaw haw kai ni nang na ceisak han toe telah Sawl hah lempu hoi a kaw. Sawl a thaw teh ahnimouh roi teh alawilah a tâco roi.



<sup>27</sup> Kho a poutnae koe lah a pha toteh, Samuel ni Sawl koe na sannaw hah maimae hmalah cetsak atipouh. Sannaw teh a cei awh. Hatei Cathut lawk nang koe ka dei thai nahan nang teh kang dout ei telah atipouh.

## 10

### *Sawl satui awinae*

<sup>1</sup> Samuel ni satuium a la teh Sawl e a lû dawk a awi hnukkhu, a paco teh, BAWIPA ni nang koe amae raw miphun lathueng siangpahrang hanelah satui na awi toe nahoehmaw. <sup>2</sup> Sahnin kai koehoi na cei toteh, Benjamin ram khori Zelzah kho Rachel tangkom koevah tami kahni touh na hmu han. Ahnimouh roi ni na tawng awh e la a hmu awh toe. Na pa ni la kong hah pouk mahoehtoe. Ka capa hanelah bangmaw ka sak han vai ati telah nang koe na dei pouh awh han.

<sup>3</sup> Hote hmuen koehoi pou na cei vaiteh Tabor hmuen koe kaawm e kathen kung koe na pha han. Hmae katham touh ka sin e tami buet touh, alouke tami ni vaiyei katham touh a sin vaiteh, tami buet touh ni misur um a sin han. <sup>4</sup> Ahnimouh ni nangmouh koe ka dam lah ati awh vaiteh kut na man awh han. Vaiyei kahni touh na poe awh han. Nangmouh ni ahnimouh koe e vaiyei na dâw awh han. <sup>5</sup> Hathnukkhu hoi, Filistinnaw onae koe Cathut mon dawka na pha awh han. Kho koe na pha awh navah, hmuen rasang koehoi ka kum e profetnaw na hmu awh han. Ahnimae a hmalah ratoung, tapueng, vovit, tâbaw khawng awh vaiteh profet lawk a dei awh han. <sup>6</sup> BAWIPA e Muitha ni na lathueng a pha vaiteh ahnimouh koe profet lawk na dei vaiteh tami aloukcalah na o han. <sup>7</sup> Nang dawka mitnoutnaw ao toteh kamcu lah sak loe. Bangkongtetpawiteh, Cathut nang koe ao. <sup>8</sup> Gilgal vah ka hmalah la cet leih. Kai hai hmaisawi thuengnae hoi roun thuengnae sak hanelah nang koe ka tho han. Nang koe ka tho hoehroukrak hnin 7 touh na ring han. Na sak hane kawî na dei pouh awh han.

<sup>9</sup> Sawl teh Samuel koehoi a kamlang teh a cei han ati navah, Cathut ni alouke lungthin a poe teh, hote mitnoutnae pueng teh hote hnin dawka be a kuep. <sup>10</sup> Mon koe a pha toteh, profetnaw ni a kâhmo navah BAWIPA e Muitha ni Sawl e lathueng a pha teh ahnimouh koe profet lawk a pâpho van. <sup>11</sup> Sawl teh profetnaw hoi cungtalâh profet lawk a pâpho e hah hoehnahlan, ahni la kapanueknaw ni a hmu awh navah, Kish capa dawka hno kaawm e bangtelane. Sawl hai profetnaw koe ka bawka van e na ou telah a kâ pacei awh. <sup>12</sup> Hawvah kaawm e tami buet touh ni, ahnimae a na pa hah apimaw telah a pacei nah, Sawl hai profet lah ao na maw tie lawk teh panuilai lah a hno awh. <sup>13</sup> Sawl teh profet lawk a pâpho hnukkhu hmuen karasang koe a cei.

<sup>14</sup> Sawl e panga ni nâ lah maw na cei awh telah ama hoi a sannaw a pacei navah, la naw ka tawng awh ka hmu awh hoeht dawka Samuel koe ka cei awh telah atipouh awh. <sup>15</sup> Sawl e panga ni, Samuel ni nang koe bangmaw a dei, na dei pouh haw telah a pacei. <sup>16</sup> Sawl ni lanaw ka hmu awh toe tie na dei pouh telah a panga koe bout a dei pouh. Hatei uknae kong Samuel ni a dei e hah dei hoeht.

### *Sawl siangpahrang lah pathangnae*

<sup>17</sup> Samuel ni Mizpah kho dawka taminaw BAWIPA koe a kamkueng sak. <sup>18</sup> Isarelnaw koe Isarel BAWIPA Cathut ni hettelâh a dei. Izîp taminaw e kut thung hoi a khok hoi a coungrôe e ram pueng dawka hoi ka rungngang.



<sup>19</sup> Hatei sahnin vah na reithainae, rucatnae pueng thung hoi nangmouh ka rungngang e Cathut roeroe hah na ngai awh hoe. Ahni koe siangpahrang mah kaimouh han na rawi pouh awh telah na dei awh. Hatdawkvah, na miphun, na imthungkhu lahoi BAWIPA hmalah hnai awh atipouh.

<sup>20</sup> Samuel ni Isarel miphunnaw hah ama koe a tho sak teh Benjamin miphun hah a rawi. <sup>21</sup> Benjamin miphunnaw a imthung lahoi a tho sak teh Matri imthungnaw a rawi. Kish capa Sawl hah a rawi. Ahnimouh ni a tawng awh eiteh hmawt awh hoe. <sup>22</sup> Ahnimouh ni BAWIPA hah bout a pacei awh teh, ka tho hane tami ao rah maw, telah ati. BAWIPA ni khenhaw! hnaw a rahak a kâhro telah atipouh. <sup>23</sup> Ayawng sin awh teh a thokhai awh. Taminaya koe a kangdue nah ahnimanaw hlak a rasang poun apinihai aloung tapuet pouh hoe. <sup>24</sup> Samuel ni taminaw koe, BAWIPA ni a rawi e na hmu awh maw. Taminaw thung daw k ahni patet e buet touh hai awmhoeh telah ati teh taminaya ni a hram awh teh siangpahrang hring saw naseh ati awh.

<sup>25</sup> Samuel ni taminaw koe a sakyoe e a dei pouh. Cauk daw k a thut pouh teh, BAWIPA e hmalah a hruek awh. Hahoi Samuel ni taminaw ama im lah be a cei sak. <sup>26</sup> Sawl hai Gibeah kho ama im vah a ban van. Cathut ni a lung ka youk e taran kahawinaw ahni hoi rei a cei awh. <sup>27</sup> Hatei taran ka thaw e tami tangawn ni hete tami ni maimanaw bangtelamaw na rungngang thai han telah ati awh teh, a dudam awh teh, poehno hai poe awh hoe. Hatei Sawl ni duem ao.

## 11

### *Ammonaw Sawl ni a tâ*

<sup>1</sup> Ammon tami Nahash a luen teh, Gilead ram, Jabesh kho teng a tungpup awh. Jabesh khocanaw ni Nahash koe kaimouh koe lawkkam nateh, nange na thaw ka taw k han telah a dei awh. <sup>2</sup> Ammon phun Nahash ni nangmouh pueng e aranglae mit hah cawngkhawi vaiteh, Isarelnaw pueng hane min mathoenae hoi kaya sak torei doeh ahnimouh hoi lawkkam han telah bout atipouh. <sup>3</sup> Jabesh kho e kacuenaw ni ahni koe Isarel ram pueng daw k patounenaw patoun thai nahan, hnin 7 touh atueng na poe ei. Kaimouh ka rungngang hane buet touh boehai awm hoehpawiteh, hattorei doeh nang koe vah ka tâco awh han telah atipouh awh. <sup>4</sup> Patounenaw teh Sawl a onae Gibeah kho a pha awh teh, taminaw a thai nahan hote akong a dei awh teh, taminaw teh a khuika awh.

<sup>5</sup> Hatnae tueng nah Sawl teh maito a khoumnae koehoi a tho. Taminaw a khuika awh e bangkongmaw telah a pacei navah, ahnimouh ni Jabeshnaw ni a dei e law k hah a dei pouh awh. <sup>6</sup> Hote law k Sawl ni a thai toteh Sawl e lathueng Cathut e Muitha a pha teh a lung puenghoi a khuik. <sup>7</sup> Hahoi maito kahni touh a thei teh a moi koun a raban teh Isarel ram pueng daw k patounenaw a rei sak teh, taran tuknae koe Sawl hoi Samuel hnukkâbang hoe e tami pueng e maito hah, hettelah sak han telah pathang pouh. BAWIPA takinae taminaw koe a pha teh cungtalak koun a tâco awh. <sup>8</sup> Bezek kho daw k tami a pâkhueng teh, Isarelnaw 30000, Judahnaw 30000 touh a pha. <sup>9</sup> Hahoi ka tho awh e patounenaw koe, Jebesh Gilead taminaw koe, hettelah na dei pouh han. Tangtho khumbei a thoe lahun nah kabawpnae na hmu awh han, na ti pouh han atipouh. Patounenaw ni a cei awh teh, Jebesh khocanaw hah a dei pouh navah, a lung ahawipoung awh. <sup>10</sup> Hatdawkvah, Jebesh taminaw ni, tangtho nangmouh koe ka tâco awh vaiteh, nangmouh ni ahawi na tie patetlah kaimae lathueng sak lawih telah atipouh awh. <sup>11</sup> Atangtho vah Sawl ni taminaw hah ahu kathum



touh lah a kapek. Tarannaw tumpupnae koe amom vah a pha awh teh, Ammonnaw teh kanîthun khumbeithoe lahun totouh a thei awh. Kahlout e tami buet touh hoi buet touh boehai cungtalah o thai hoeh totouh a kâkayei awh.

<sup>12</sup> Hatnaw taminaw ni Samuel koe, Sawl ni na uk awh han namaw, ka tet e api nama. Thei thai nahan hi thokhai awh haw telah atipouh.

<sup>13</sup> Hatei Sawl ni sahnin dawh teh tami buet touh hai thet hanh sei. Bangkongtetpawiteh, sahnin BAWIPA ni Isarel taminaw koe rungngangnae akuepsak telah a ti. <sup>14</sup> Hathnukkuh Samuel ni taminaw koe tho awh. Gilgal kho lah cet awh sei. Hote hmuen koe uknaeram hah bout candout sak awh sei telah atipouh. <sup>15</sup> Taminaw pueng teh Gilgal kho lah a cei awh teh, haw vah BAWIPA e hmalah Sawl hah siangpahrang lah a tawm awh. Hote hmuen koe roum thuengnae BAWIPA koe a sak awh. Sawl hoi Isarelnaw teh puenghoi a lunghawi awh.

## 12

### *Sawl Siangpahrang bawilakhung kâ muknae*

<sup>1</sup> Samuel ni Isarelnaw pueng koe, khenhaw! kai koe na dei awh e pueng hah ka tarawi teh nangmouh siangpahrang na poe awh. <sup>2</sup> Atu khenhaw! siangpahrang ni na hrawi awh toe. Kai hateh kamatong toe. Ka sam hai a po toe. Khenhaw! ka capanaw teh nangmouh koe ao awh teh, a nawca hoi sahnin totouh na hrawi awh toe. <sup>3</sup> Hivah ka o, BAWIPA hmalah hoi satui a awi e hmalah ka o. Dei awh haw. Apie maito maw ouk ka lawp. Apie la maw ouk ka lawp. Apimaw ouk ka hmuhma. Apimaw ouk ka pakekpahlek. Ka mit dawn sak hanlah api kut dawh e tadawngnae maw ouk ka ca. Koung na patho awh han telah atipouh. <sup>4</sup> Ahnimouh ni na dum boi awh hoeh. Na pakekpahlek boi awh hoeh. Apie kut dawh e hno hai na lat boihoeh atipouh awh. <sup>5</sup> Samuel ni hai kaie kut dawh buetbuet touh hai nangmouh ni na hmu awh hoeh e hah BAWIPA teh nangmouh koe lah kapanuekkhaikung lah ao. Satui awi lah kaawm e hai kapanuekkhaikung lah ao telah ati. Ahnimouh ni hai ahni teh kapanuekkhaikung lah ao telah ati awh.

<sup>6</sup> Samuel ni taminaw koe, Mosi hoi Aron thaw ka poe niteh, Izip ram hoi na mintoenaw ka tâcawtkhai e hai BAWIPA doeh. <sup>7</sup> Hatdawkvah, na mintoenaw koe hno kalan a saknae hah BAWIPA e hmalah pouk pouh thai nahanlah, atu sairasuepcalah kangdout awh. <sup>8</sup> Jakop ni Izip ram a pha hnukkuh nangmae mintoenaw ni BAWIPA koe a hram awh navah, Mosi hoi Aron hah Cathut ni a patoun teh, ahnimouh ni nangmae mintoenaw hah Izip ram hoi a tâcokhai hnukkuh, ahnimanaw teh hete ram dawh ao sak awh. <sup>9</sup> BAWIPA Cathut hah a pahnim awh navah Hazar ransabawi Sisera kut dawh thoseh, Filistinnaw e kut dawh thoseh, Moab siangpahrang kut dawh thoseh, a yo teh ahnimanaw ni, ahnimanaw ni ahnimouh a tuk awh. <sup>10</sup> BAWIPA koevah a hram awh teh, BAWIPA a pahnawt awh. Baal hoi Ashtaroth e thaw tawh awh kecu dawkvah, yon awh toe. Hatei sahnin tarannaw e kut dawh hoi na rungngang nateh na thaw ka tawh awh han telah a ti. <sup>11</sup> BAWIPA ni Jerubbaal, Bendan, Jephthah, hoi Samuel tinaw a patoun teh, nangmanaw na tengpam e taran kut dawh hoi na rungngang awh teh, nangmanaw runae awm laipalah lungmawng lah na o awh. <sup>12</sup> Ammon miphunnaw e siangpahrang Nahash ni nangmouh na tuk awh hane hah, nangmouh ni na hmu awh navah nangmae Cathut teh nangmae siangpahrang nahlangva, telah nahoe.



Siangpahrang ni ma kaimouh na uk seh telah na ti awh. <sup>13</sup> Atu na hei e nangmouh ni na rawi e siangpahrang khenhaw! khenhaw! BAWIPA ni nangmae lathueng siangpahrang a rawi toe. <sup>14</sup> Nangmouh ni BAWIPA na taki awh teh, BAWIPA e thaw na tawk awh pawiteh, BAWIPA e lawk na tarawi na ngâi awh pawiteh, nangmouh hoi nangmouh koe lawkcengkung siangpahrang hoi BAWIPA Cathut e hnuk na dawn awh pawiteh ahawi. <sup>15</sup> Hatei Cathut e lawk na tarawi awh hoeh lah kâlawk na tapoe awh pawiteh, BAWIPA e a kut teh na mintoenaw e lathueng, runae a pha sak e patetlah nangmouh koehai a pha han. <sup>16</sup> BAWIPA ni nangmae na mithmu hno ka lentoe poun a sak hane hah, duem awm awh nateh khenhaw. <sup>17</sup> Sahnin catun anae tueng nahoehmaw. Kho rak sak hane hoi khoparit sak hanelah, kai ni Cathut ka kaw han. Hatnavah, siangpahrang na heinae kong daw, BAWIPA mithmu vah yonnae kalenpoun na sak awh e na kâpanue awh vaiteh na hmu awh han telah a ti. <sup>18</sup> Samuel ni BAWIPA a kaw teh, BAWIPA ni hote hnin daw, kho a parit sak teh, kho a rak sak. Hat torei teh taminaw ni BAWIPA hoi Samuel hah a taki poun awh.

<sup>19</sup> Tamihunaw ni Samuel koevah, due awh hoeh nahan, BAWIPA na Cathut koe sannaw hanelah na ratoum pouh haw. Hettelah e Siangpahrang ka hei awh e heh, ka payonae kâthap sin e lah ao telah ati awh. <sup>20</sup> Samuel ni taminaw koevah, taket awh hanh. Kahawi hoeh e heh na sak awh katang doeh. Hatei BAWIPA e hnuk na kabang awh e phen laipalah, BAWIPA e thaw na lungthin katang hoi tawk awh. <sup>21</sup> Banglahai ka cungkeihoehe hnukkâbang e lahoi phen awh hanh. Hawinae na poe mahoehe na rungngang thai mahoehe. Hotnaw teh a yawmyin doeh. <sup>22</sup> Bangkongtetpawiteh, ka lentoe e min kecu daw BAWIPA ni a taminaw cettakhai mahoehe. Bangkongtetpawiteh, a tami lah coung sak e hah BAWIPA a lunghawinae doeh. <sup>23</sup> Kai hateh, nangmouh han ratoumnae kâhatnae lahoi BAWIPA koe ka yonnae hoi kâhlat naseh. Kai ni nangmouh hah kahawi ni teh ka lamkahawi hoi lamkatang na pâtue awh han. <sup>24</sup> Nangmouh ni BAWIPA dueng mah taket awh haw, lungthin abuemlahoi yuemkamcu lah amae thaw tawk awh haw. Bangkongtetpawiteh, nangmouh hanelah, a sak e hno kalenpoun hah pouk awh haw. <sup>25</sup> Nangmouh ni thoena na sak awh rah pawiteh, nangmouh hoi nangmae siangpahrang khuehoi koun pâmît lah na o awh han telah atipouh.

## 13

### *Sawl ni Filistinnaw a tuk*

<sup>1</sup> Sawl ni kum touh a uk teh Isarelnaw apâhni kum a uknae kum daw, <sup>2</sup> Sawl ni Isarelnaw tami 3,000 touh a rawi. Tami 2000 touh teh Mikmash hoi Bethel mon daw Sawl koe ao awh teh, 1,000 touh teh Benjamin ram Gilead vah Jonathan koe ao awh. Alouknaw pueng teh amamouh onae koe rim daw lengkaleng a ban sak. <sup>3</sup> Jonathan ni Geba vah Filistin kho ramveng a thei e hah Filistinnaw ni a thai awh. Sawl ni Hebrunaw ni hai thai naseh a titeh, ram pueng daw mongka a ueng sak. <sup>4</sup> Isarel miphunnaw ni Filistin kho ramveng Sawl ni a thei e hah, Filistinnaw han Isarelnaw teh panueththopounge lah ao e a thai awh navah, Gilgal kho kaawm e Sawl koe cei hanelah tamimaya teh a kaw awh.

<sup>5</sup> Filistinnaw teh Isarelnaw tuk hanelah, a kamkhueng awh. Rangleng 30,000, marangransanaw 6,000 hoi tuipui rai e sadi patetlah kapap e ransanaw ao awh teh Bethaven kho Kanîtholae Mikmash kho daw a



roe awh. <sup>6</sup> Isarelnaw ni takikatho pounge e thung ka o tie a panue awh navah, atangawn talung kâko, buruk thung, atangawn talungnaw e rahak vah, tumdum e thung, talai kâko dawk a kâhro awh. <sup>7</sup> Hebru miphunnaw tangawn Jordan tui namran Gad hoi Gilead ram dawk a kâran awh. Sawl teh Gilgal vah ao. Tamihi ni taki pâyaw laihoi a hnuk a kâbang awh.

### *Sawl ni sak hoeh hane thuengnae a sak*

<sup>8</sup> Samuel ni hnin a khoe e patetlah hnin 7 touh a ring. Hatei Samuel teh Gilgal vah tho hoeh, a hnukkâbang e naw ni ahni teh a kâran takhai awh. <sup>9</sup> Sawl ni hmaisawi thuengnae hoi roun thuengnae kai koe thokhai awh atipouh. Hottelah hmaisawi thuengnae a sak. <sup>10</sup> Hmaisawi thuengnae a sak hnukkhu, Samuel a tho teh Sawl ni ahni kâhmo hanelah a dawn. <sup>11</sup> Samuel ni bangmaw na sak atipouh. Sawl ni taminaw ni be na kâran takhai teh, atueng khoe e hnin dawk na tho hoeh. Filistinnaw Mikmash vah be a kamkhueng awh toe tie ka thai. <sup>12</sup> Hatdawkvah, Filistinnaw ni Gilgal vah na la tuk awh toe. BAWIPA koe pahrennae hei hane hai ka sak hoeh rah. Hatdawkvah, hmaisawi thuengnae teh sak hoeh laipalah coung hoeh toe telah ati. <sup>13</sup> Samuel ni Sawl koe pathu pounge lahoi na sak toe. BAWIPA Cathut e kâpoelawk na tarawi hoeh toe. Na tarawi pawiteh BAWIPA ni Isarelnaw lathueng uknaeram kâ pou a caksak han. <sup>14</sup> Atuteh nange uknaeram cak mahoehe toe. BAWIPA ni ama lungkayouk e a tawng teh, a tami lathueng vah kahrawikung lah o hane BAWIPA ni kâ a poe toe. Bangkongtetpawiteh, BAWIPA e kâpoelawk na tarawi hoeh toe. <sup>15</sup> Samuel a thaw teh Gilgal kho hoi Benjamin ram Gibeah vah a takhang. Sawl ni ama koe kaawm e a touk teh 600 tabang a pha. <sup>16</sup> Sawl hoi a capa Jonathan hoi ahnimouh koe rei kaawm e Benjamin ram Geba vah ao awh rah. Hatei, Filistinnaw teh Mikmash vah a tungpup awh. <sup>17</sup> Filistinnaw e roenae hmuen koehoi taran ahu katham touh ni a cei awh teh, Shual ram, Ophrah lah a cei awh. <sup>18</sup> Ahu buet touh ni, Bethhoron koelae lam, ahu buet touh ni Zeboim yon kahrawngum khor koelae lam a dawn awh.

<sup>19</sup> Isarel abuemlah dawk sumkadêinaw buet touh boehai hmu hane awh hoeh. Bangkongtetpawiteh, Filistinnaw ni Hebrunaw teh tahroe hoi tahloi sakpayon vaih telah ati awh dawk doeh. <sup>20</sup> Hottelah, Isarel taminaw teh tawkso thoseh, thunha thoseh, cakâ, tangkounnaw kata hanelah Filistinnaw koe ouk a ceikhai awh. <sup>21</sup> Tawkso, thunha, a hâ katham touh samphei e tawkso, cakâ hoi sâw aphu teh Shekel pheh touh doeh. <sup>22</sup> Hatdawkvah, taran tuknae hnin dawk Sawl hoi Jonathan tinaw hoi rei kaawm e ransanaw e kut dawk, tahloi tahroe awh hoeh. Sawl hoi Jonathan koe dueng doeh ao. <sup>23</sup> Hat hoi Filistin ramvengnaw teh Mikmash rakan hanelah hoi a cei awh.

## 14

### *Jonathan ni Filistinnaw a tâ*

<sup>1</sup> Hnin touh hnin vah, Sawl e capa Jonathan ni sene ka sin e thoundoun buet touh koevah tho, namran lah kaawm e Filistinnaw e taran ka ring e ransanaw aonae koe cet atipouh. A na pa koe dei pouh hoeh.

<sup>2</sup> Sawl teh Gibeah ram apoutnae koelae Migron ram e talekung a rahim vah ao teh, ahni koe kami 600 tabang ao. <sup>3</sup> Shiloh kho e BAWIPA e vaihma bawi Eli capa Phinehas capa Ikhabod e a hmau Ahitub capa Ahijah ni vaihma angki a kho. Hatei Jonathan a cei tie taminaw ni panuek hoeh.



<sup>4</sup> Filistinnaw e roenae hmuen koe Jonathan ni rakan han noenae mon lam vah, avoivang lah lungngoum ao teh buet touh e min teh Bozez, alouke buet touh e min Seneh doeh. <sup>5</sup> Lungngoum buet touh teh atunglah Mikmash kho koe lah thoseh, alouke buet touh e teh akalah Geba kho lah thoseh a kangvawi. <sup>6</sup> Jonathan ni sene ka sin pouh e thoundoun koe tho, vuensom ka a hoeh e roenae hmuen koe cet awh sei. Ayoun nakunghai, apap nakunghai nang ni hai BAWIPA rungngang hoeh nahan a cakâ thai hoeh han dawkw, BAWIPA ni maimouh han na sak pouh tâ panue telah a dei.

<sup>7</sup> Sene ka sin e ni ahni koe na lung dawkw kaawm e pueng sak. Na pouknae patetlah cet, nang koe ka o doeh telah atipouh. <sup>8</sup> Jonathan ni ahawi ahnimouh koe cei awh vaiteh kâpâtue awh sei. <sup>9</sup> Ahnimouh ni awm awh, kaimouh ka tho awh han tetpawiteh, ahnimouh koe cet laipalah o awh han.

<sup>10</sup> Hatei ahnimouh ni, kaimouh koe takhang awh, telah dei awh pawiteh, takhang awh han. Bangkongtetpawiteh, BAWIPA ni kut dawkw na poe awh toe. Maimouh hanelah noutnae lah ao han telah ati. <sup>11</sup> Hottelah, kahni touh hoi Filistin ramveng ransa aonae koe vah, a kamnue roi. Filistinnaw ni, khenhaw! Hebrunaw a kâhronae khu dawkw hoi a tâco telah ati awh. <sup>12</sup> Ramveng ransa onae koe kaawm e naw ni Jonathan hoi sene ka sin e koevah, kaimouh koe takhang awh haw, hno buet touh na hmu sak awh han telah a kaw awh. Jonathan ni sene ka sin e koevah, kâbang haw. Bangkongtetpawiteh, BAWIPA ni ahnimouh teh Isarel kut dawkw a poe toe telah ati.

<sup>13</sup> Jonathan teh kâ laihoi a cei. Sene ka sin pouh e ni a kâbang sin. Ahnimouh teh Jonathan e hmalah a rawp awh teh sene ka sin e ni a thei awh. <sup>14</sup> Jonathan hoi sene ka sin e ni law ekah tangawn hmuen ka len e thungup tami 20 tabang a thei awh. Het heh apasuek kâtuknae doeh.

<sup>15</sup> Tungpupnae hmuen, law, hoi tami pueng koe pâyawnae teh a pha. Ramveng ransa hoi tarankatuknaw hai a pâyaw awh. Tâli puenghoi a no dawkvah puenghoi a pâyaw awh.

<sup>16</sup> Benjamin ram Gibeah e Sawl taran karingkungnaw ni a radoung awh teh, khenhaw! tamihupui teh avoivang lah koung a yawng awh toe, tie a hmu awh. <sup>17</sup> Hatnavah Sawl ni ama koe kaawm e tamihu koevah, kâparei awh haw. Apimaw kaawm hoeh, khen awh telah ati. A kâparei awh navah pouk laipalah Jonathan hoi sene ka sin e hah awm hoeh.

<sup>18</sup> Sawl ni Ahijah koevah, Cathut e thingkong hah hi thokhai awh telah ati. Bangkongtetpawiteh hatnae tueng dawkw Cathut e thingkong teh Isarelnaw koe ao. <sup>19</sup> Sawl ni vaihma bawi a pato lahun nah Filistinnaw roenae hmuen koe e rucatnae hoe apap. Hahoi Sawl ni vaihma bawi koevah na kut hno leih telah atipouh.

<sup>20</sup> Sawl hoi ama koe kaawm e pueng teh a kamkhueng awh teh tarantuknae koe a cei awh. Khenhaw! amamouh hoi amamanaw tahloi a kâbouk awh teh runae kalen poung ao. <sup>21</sup> Hothloilah haw tapat e ram dawkw ka cet e, hat hoehnahlan Filistin koe lah kaawm e Hebru taminaw hai Sawl hoi Jonathan koevah kaawm e Isarelnaw koe lah a kamlang awh.

<sup>22</sup> Hot patetvanlah, Ephraim mon dawkvah kâhrawk e Isarelnaw ni Filistinnaw a yawng awh tie a thai awh toteh tarantuknae koe a bawkw awh teh pou a pâlei awh. <sup>23</sup> Hote hnin navah BAWIPA ni hottelah Isarelnaw hah a rungngang teh Bethaven kho totouh a tuk awh.

<sup>24</sup> Hote Sawl ni thoebonae e hnin dawkw Isarelnaw teh a kângairu awh. Bangkongtetpawiteh, Sawl ni ka tarannaw lathueng moi ka pathung hoe



roukrak, tangmin a pha hoehroukrak bu ka cat e tami teh thoebo lah awm seh telah taminaw koe lawkkamnae a ta pouh, apinihai rawca cat a hoeh.

<sup>25</sup> Tami pueng teh ratu daw k a pha awh teh, khoitui onae koe ao awh.

<sup>26</sup> Kahrawng a kâen awh nah khoitui dekdek a ca e a hmu awh. Thoe a bo e a taki awh dawkvah, apihai a kutdawn hoi hai palem awh hoeh.

<sup>27</sup> Jonathan teh a na pa ni tami thoebo lahoi lawk a kam sak e panuek hoeh. A sin e sonron hmo hoi khoipha a cuek teh a palem. Hatnavah a mit vuk a ang. <sup>28</sup> Ransa buet touh ni a dei pouh, na pa ni sahnin daw rawca ka cat e pueng teh thoebo lah awm seh telah tami pueng lawkkam a poe.

<sup>29</sup> Jonathan ni apa ni ram runae a poe. Hete khoitui yitca ka patek e lahoi ka mit banghloimaw a ang sak, khenhaw. <sup>30</sup> Taminaw ni a taran kut daw k e a la e rawca a ngai patetlah catnet awh haw pawiteh aw, banghloimaw a phu ao han. Atu Filistin taminaw thei hane yit touh thet thai hoeh toe hei.

<sup>31</sup> Hate hnin navah Mikmash hoi Aijalon totouh Filistinnaw hah a pâlei awh. Tami pueng a tawntam poung awh. <sup>32</sup> Taminaw ni hnopai hah a cusin awh teh tu maitotan hoi a ca hah a man awh teh talai daw k a thei awh teh, taminaw ni a thi hoi hmai a ca awh. <sup>33</sup> Khenhaw! thi hoi hmai a ca awh daw k taminaw ni BAWIPA daw k a yon awh toe telah Sawl koe a dei pouh awh teh, ahni ni nangmouh teh yuem na kamcu hoeh toe. Sahnin vah talung kalenpounge kai koe palet awh telah atipouh.

<sup>34</sup> Sawl ni taminaw koe cet awh nateh ahnimouh koe lengkaleng namamae tu, maitonaw hah kai koe thokhai awh nateh, hie hmuen koe thet nateh cat awh haw. Thi hoi hmai ca e lahoi BAWIPA koe yonnae sak awh hanh atipouh e patetlah hat nae tangmin vah taminaw ni lengkaleng amamae maitonaw hah a thokhai awh teh hote hmuen koe a thei awh.

<sup>35</sup> Sawl ni BAWIPA hanelah thuengnae khongroe a sak, hote thuengnae khongroe teh apasuekpoung BAWIPA hanelah sak e lah ao. <sup>36</sup> Sawl ni Filistinnaw koe karum vah Filistinnaw pâlei awh nateh khodai totouh buet touh hai hlout hoeh nahan thet awh telah a dei pouh. Ahnimouh ni hai ahawi na tie patetlah sak, telah bout a dei awh. Hatei vaihma bawi ni hete hmuen koe Cathut koe hnai awh ei atipouh.

<sup>37</sup> Sawl ni Filistinnaw ka tuk han rah maw ahnimanaw Isarelnaw kut daw k na poe han maw, Cathut koe a pacei eiteh, hote hnin daw k lawk dei pouh hoeh.

<sup>38</sup> Sawl ni nangmouh tamihu ka uk e pueng tho awh, sahnin vah hete yonnae bangnaw maw tie panue hoi hmu hane kâyawm awh haw.

<sup>39</sup> Isarelnaw e BAWIPA a hring e patetlah ka capa Jonathan nakunghai a due roeroe han telah ati. Hatei taminaw thueng daw k lawk ka pathung e buet touh hai awm hoeh.

<sup>40</sup> Sawl ni Isarelnaw koe nangmouh hmuen buet touh koe lah awm awh. Kai hoi ka capa Jonathan teh hmuen buet touh koe ka o han ati teh, ahawi na tie patetlah sak yawkaw taminaw ni telah Sawl koe atipouh awh. <sup>41</sup> Sawl ni BAWIPA Isarelnaw e Cathut koe a tang e hah kamnuek sak awh atipouh navah Sawl hoi Jonathan daw k cungpam a pabo teh taminaw pueng a hlout awh.

<sup>42</sup> Sawl ni kai hoi ka capa Jonathan hah cungpam rayu awh haw atipouh teh Jonathan e van a bo. <sup>43</sup> Sawl ni Jonathan koe vah nang ni bang hno maw na sak dei haw atipouh. Jonathan ni ka kut daw k e sonron hoi khoitui ka tek katang toe. Khenhaw! kai ka due han toe telah Sawl koe bout a dei pouh.



<sup>44</sup> Sawl ni na due katang han. Na dout hoehpawiteh Cathut ni hot hlak hoe sak naseh. <sup>45</sup> Taminaw ni Isarelnaw dawk kalen pounng rungngangnae ka sak e Jonathan a due han namaw, khuet dout ti. BAWIPA a hring e patetlah a lû dawk e sam buet touh boehai talai dawk bawt mahoe. Sahnin vah Cathut hoi rei a tawki ati awh. Hottelah taminaw ni Jonathan a rungngang awh teh dout hoeh. <sup>46</sup> Hathnukkhu Sawl ni Filistinnaw pâlei e hah a ban takhai awh teh a onae hmuen koe kounng a ban awh.

### *Sawl tarantuknae kâhat hoeh*

<sup>47</sup> Sawl ni Isarelnaw lathueng a uknaeram a caksak teh avangvang lae Zobah siangpahrangnaw hoi Filistinnaw a tuk awh. A tuk awh nah tangkuem a tâ awh. <sup>48</sup> Ransanaw a pâkhueng teh, Amalek taminaw a tuk awh. Isarelnaw hah ahnimae kut dawki hoi a rungngang awh.

<sup>49</sup> Sawl e capanaw teh Jonathan, Ishvi hoi Malkhishua doeh. A canu roi e min teh, kacue e Merab, kanaw e teh Mikhal doeh. <sup>50</sup> Sawl e a yu teh Ahinoam Ahimaaz canu doeh. Ransabawi e min teh Abner. Sawl e a na pa kanaw teh Ner capa doeh. <sup>51</sup> Kish teh Sawl e a na pa doeh. Abner e na pa Ner teh Abiel capa doeh.

<sup>52</sup> Sawl a hringyung thung Filistinnaw hoi puenghoi a kâtuk awh, athakaawme taminaw thoseh a tarankahawinaw thoseh a hmu e pueng hah ama hanelah a pâkhueng.

## 15

<sup>1</sup> Samuel ni Sawl koe BAWIPA ni nang teh na taminaw lathueng Isarelnaw lathueng siangpahrang hanelah satui awi hane na patoun, hatdawkvah atu BAWIPA e lawk ngâi haw. <sup>2</sup> Kalvan ransabawi ni hettelah a dei. Izip ram hoi na tâco awh navah lamlak vah Amaleknaw ni Isarelnaw a ngang awh dawkvah, kai ni ahnimanaw hai ka pathung han. <sup>3</sup> Atuvah cet nateh Amaleknaw hah tuk haw. Ahnimouh ni a tawn awh e pueng he raphoe. Buet touh hai hlung hanh. Napui, tongpa, camo, sanu ka net lahun e, maito, tu, kalauk hoi la pueng kounng na thei han atipouh.

<sup>4</sup> Sawl ni taminaw a pâkhueng teh, Telaim vah a touk. Ransanaw 200, 000 touh hoi Judah tami 10, 000 touh a pha. <sup>5</sup> Sawl teh Amalek khopui vah a pha teh, tanghling dawki hoi a pawp.

<sup>6</sup> Sawl ni Ken taminaw koe, tâcawt awh haw. Amalek taminaw koehoi aloukcalah awm awh. Hottelah hoehpawiteh hmai na thet awh payon vaih. Bangkongtetpawiteh, Isarelnaw Izip ram hoi ka tâcawt e pueng na pahren awh, telah ati. Ken taminaw teh Amaleknaw koehoi a tâco awh.

<sup>7</sup> Sawl ni Amaleknaw teh Havilah hoi Izip kanitholah kaawm e Shur kho totouh a thei awh. <sup>8</sup> Amalek siangpahrang Agag hai a hring lah a hlung awh teh, a man e pueng tahloi hoi be a thei. <sup>9</sup> Hatei Sawl hoi taminaw ni Agag teh a hlung awh teh, tu kahawi e maito kahawi e kathâw e tuca kathâwnaw hoi kahawi e pueng thei han ngai awh hoeh. Ka cungkeihoeh e, hnephnap e naw teh he a thei awh.

<sup>10</sup> BAWIPA e lawk Samuel koe a pha teh, <sup>11</sup> Sawl siangpahrang lah ka tawn e pan ka kângai. Ahni teh kaie ka hnuk a kâbangnae koehoi bout a kamlang toe. Kaie kâpoelawknaw hah tawki hoeh toe telah ati teh Samuel ni a lungkhuek teh BAWIPA koe a lungmathoe laihoi karum khodai a hram.

<sup>12</sup> Samuel ni Sawl kâhmo hanelah amom a thaw navah, Sawl teh Karmel kho lah a cei, haw vah pahnim hoeh nahan talung a ung hnukkhu bout a ban. Pou a cei teh Gilgâl kho lah pou a ceicathuk telah Samuel koe a dei pouh awh.



<sup>13</sup> Samuel Sawl koe a cei teh Sawl ni BAWIPA ni yawhawi na poe e lah na o. BAWIPA e kâpoelawk pueng be ka tarawi telah a ti. <sup>14</sup> Samuel ni hah pawiteh kaie ka hnâ dawkw hram pawlawk ka thai e maito parawng lawk hah teh bangtelah atipouh. <sup>15</sup> Sawl ni Amaleknaw koe e hetnaw ka la toe. Bangkongtetpawiteh BAWIPA na Cathut koehoi thuengnae sak nahanelah taminaw ni tu kahawi maito kahawi kahawi a pâhlung awh e doeh, alouknaw teh kOUNG ka thei awh telah a ti.

<sup>16</sup> Samuel ni Sawl koevah awm ei, paduem tangmin BAWIPA ni kai koe a dei e na dei pouh han atipouh, Sawl ni dei haw atipouh.

<sup>17</sup> Samuel ni nange na hmunae lah tami ka thOUNGCA nakunghai, Isarel miphunnaw e lû lah na awm hoeh namaw. Isarel siangpahrang lah BAWIPA ni satui na awi e nahoehmaw. <sup>18</sup> BAWIPA ni na patoun teh, cet nahet tamikayon Amaleknaw hah be thet lawih, he kahma hoehroukrak thet lawih telah ati nahoehmaw. <sup>19</sup> Bangkongmaw BAWIPA e lawk na ngâi laipalah hnopai na lawp teh BAWIPA mithmu hno kahawihoeh na sak telah atipouh.

<sup>20</sup> Sawl ni Samuel koevah BAWIPA e lawk atangcalah ka tarawi toe. BAWIPA ni na patoun e thaw ka tawkw teh Amalek siangpahrang Agag ka thokhai teh, Amalek taminaw he ka pâmit. <sup>21</sup> Taminaw ni BAWIPA na Cathut Koe gilgal kho dawkw thueng nahane lawp e hno thung dawkw hoi maito, tunaw kahawipoung e ka la toe telah a dei.

<sup>22</sup> Samuel ni BAWIPA lawkngainae dawkw a lunghawi e patetlah hmaisawi thuengnae dawkw a lunghawi han na ou, thai haw lawkngainae teh thuengnae hlak ahawihnawn. Tarawinae teh tu kathâw hlak hoe ahawihnawn.

<sup>23</sup> Lawkeknaw teh taân sin e patetlah thoseh, lungpatanae teh meikaphawkw bawknaw patetlah thoseh yonnae kalenpoung doeh. BAWIPA e lawk na pahnavt dawkwah, BAWIPA ni hai siangpahrang lah na onae koehoi na pahnavt toe telah atipouh.

<sup>24</sup> Sawl ni Samuel koevah yonnae ka sak katang toe. Bangkongtetpawiteh, BAWIPA kâpoelawkw hai ka ek toe. Bangkongtetpawiteh, tamimaya ka tak dawkwah a lawk ka ngâi pouh toe. <sup>25</sup> Hatdawkwah na pahren nateh ka yonnae ngaihoum haw, BAWIPA ka bawkw thai nahanlah bout na bankhai loe atipouh.

<sup>26</sup> Hatei Samuel ni Sawl koevah, na bankhai mahoe. Bangkongtetpawiteh, BAWIPA e lawk na pahnavt toe. BAWIPA ni hai Isarel siangpahrang dawkw hoi na pahnavt toe atipouh.

<sup>27</sup> Samuel a cei hane a kamlang navah, Sawl ni a hni a kuwet pouh teh a paw a kâphi.

<sup>28</sup> Samuel ni sahnin vah nang koehoi BAWIPA ni Isarel uknaeram a ravei toe. Nang hlak kahawi e na imri hah a poe toe. <sup>29</sup> Isarel miphun e pou kacakpoung BAWIPA teh a laithout hoeh. A lung hai kâthung hoeh a lungkâthung e tami patet nahoe telah a ti.

<sup>30</sup> Sawl ni ka yon toe. Hateiteh pahren lahoi ka tami kacuenaw e hmalah hoi Isarel hmalah atu barinae na poe haw, BAWIPA na Cathut ka bawkw thai nahan na bankhai haw, hottelah a kâhei.

<sup>31</sup> Samuel ni Sawl a bankhai teh Sawl ni BAWIPA a bawkw.

<sup>32</sup> Samuel ni Amalek siangpahrang Agag teh kai koe thokhai awh haw telah ati. Hatnavah Agag teh kâhruetcuwet lahoi a cei. Agag ni duenae kakhat e teh ka tapoung toe a ti.



<sup>33</sup> Hatei Samuel ni na tahloi ni napuinaw ca sak apout sak e patetlah na manu hai napui thung dawk ca ka tawn hoeh e lah ao van han telah ati. Samuel ni Agag hah Gilgal vah BAWIPA hmalah tawntarawn lah a tâtueng.

<sup>34</sup> Samuel teh Ramah kho vah a cei teh Sawl teh, Gibeah kho ama im vah a cei takhang. <sup>35</sup> Sawl a due totouh Samuel ni bout hloe hoeh toe. Hatei Samuel ni Sawl kong dawk a lungmathoe. BAWIPA teh Isarel siangpahrang lah Sawl a rawi e pan a kângai.

## 16

### *Devit siangpahrang lah satui awinae*

<sup>1</sup> BAWIPA ni Samuel koe Isarel lathueng hoi ukkung lah onae dawk hoi ka pahnavt e na hmu eith Sawl kecu dawk bangkong na lung a mathoe han. Na ki dawk satui hlun nateh cet haw. Bethlehem kho e Jesi koe na patoun han. Bangkongtetpawiteh, a capanaw thung dawk siangpahrang lah tami buet touh ka pouk tangcoun e ao telah atipouh.

<sup>2</sup> Samuel ni bangtelamaw khuet ka cei thai han. Sawl ni thai pawiteh na thei han doeh telah ati. BAWIPA ni maitolaca lat nateh BAWIPA koe thueng hanelah ka tho han ti pouh han.

<sup>3</sup> Jesi haiyah thuengnae koe coun nateh, na sak hane na patue vaiteh, nang koe ka dei e hah kai hane satui na awi han telah atipouh.

<sup>4</sup> Samuel ni, BAWIPA e kâ poe e patetlah a sak teh Bethlehem vah a cei, a thonae ni kho thung e kacuenaw a tâlueng sak. Rounnae hoi na tho maw telah atipouh awh. <sup>5</sup> Samuel ni rounnae hoi doeh. BAWIPA koe thuengnae ka sak hanelah ka tho. Kamthoung awh nateh thuengnae koe tho van awh atipouh. Jeese hoi a capanaw a kamthoung sak awh hnukkhu ahnimanaw hah thuengnae koe a coun. <sup>6</sup> Ahnimouh a tho awh toteh Samuel ni Eliab hah a hmu toteh BAWIPA ni satui a awi e tami teh het han doeh telah ati navah,

<sup>7</sup> BAWIPA ni a meilam a tungtang khen hanh, Kai ni ahni teh ka pahnavt toe. Kai teh tami ni a khet e patetlah ka khen hoeh. Tami ni teh avanlah doeh a khet. BAWIPA teh a lungthin ka khen e doeh telah ati.

<sup>8</sup> Jesi ni Abinadab a kaw teh Samuel hmalah a ceisak. Ahni ni het hai BAWIPA ni a rawi e nahoeh telah ati.

<sup>9</sup> Jesi ni Samah bout a ceisak ahni hai BAWIPA ni a rawi e nahoeh telah ati. <sup>10</sup> Jesi ni a capa 7 touh Samuel hmalah a ceisak. Samuel ni Jesi koe vah BAWIPA ni hetnaw rawi hoeh telah ati. <sup>11</sup> Samuel ni Jesi koe hi vah na canaw koun a kuep maw, atipouh. Ahni na cahnoung ao rah, hatei tu a khoun telah bout a dei pouh navah, tami patoun nateh kaw sak haw, hi a tho hoehroukrak tahung awh mahoe telah Samuel ni atipouh.

<sup>12</sup> Hatdawkvah tami a patoun teh a kaw teh a kâenkhai, ahni teh a sam palingvuek, a mit padai e hai a kamcu teh a mei hai ahawi. BAWIPA ni het nan mah thaw nateh ahni hah satui awi haw atipouh.

<sup>13</sup> Hottelaho Samuel ni ki dawk hoi satui a la teh a hmaunaw rahak ahni teh satui a awi. Hat na hnin totouh hoi teh BAWIPA e Muitha teh Devit van a pha. Samuel a thaw teh Ramah kho lah a cei.

<sup>14</sup> BAWIPA e Muitha teh Sawl dawk hoi a kampuen teh BAWIPA koehoi e muitha kathout ni a lungpuen sak. <sup>15</sup> Sawl e a sannaw ni ahni koe vah, khenhaw! BAWIPA koehoi e muitha kathout ni runae a poe e doeh. <sup>16</sup> Nang koe kaawm awh e na sannaw hah ratoung ka kueng thai e tawng hanelah atu kâ na poe awh haw. Cathut koe e Muitha mathout a tho toteh, ahni ni a kut hoi ratoung a kueng vaiteh na hawi han doeh telah atipouh awh.



<sup>17</sup> Sawl ni a sannaw koe ka kueng thai e na tawng pouh nateh kai koe thokhai awh telah ati.

<sup>18</sup> A sannaw thung dawk e buet touh ni khenhaw! Bethlehem kho e Jesi capa ratoung kueng kathoum poung e a thakaawme, taran ka tuk thai e, lawkdei kathoum e, a mei ka hawi poung e, ka hmu toe. Ahni koe BAWIPA ao atipouh. <sup>19</sup> Sawl ni Jesi koe patounenaw a patoun teh tu ka khoum e capa hah kai koe patoun haw telah atipouh.

<sup>20</sup> Jesi ni la buet touh a la teh ca hane naw, vaiyei hoi misurtui um touh hoi hmaeca hoi a capa Devit hah Sawl koe a patoun. <sup>21</sup> Devit ni Sawl koe a pha toteh a hmalah a kangdue, ahni ni a lung hroung a pataw teh senehmaica kasinkung lah a hruek. <sup>22</sup> Sawl ni Jesi koevah, pahren lahoi Devit heh kai koe awm na nei. Bangkongtetpawiteh, ka lungyouk telah dei pouh hane tami a patoun.

<sup>23</sup> Cathut koehoi muitha mathout teh Sawl koe a phanae tueng dawk Devit ni ratoung a la teh a kueng. Sawl teh bout a thanguem teh, bout a dam. Muitha mathout ni hai a kangheng takhai.

## 17

### *Devit hoi Goliath*

<sup>1</sup> Filistinnaw ni taran tuk hane ransanaw a pâkhueng teh Judah ram Sokoh kho dawk a kamkhueng awh teh Sokoh hoi Azekah a rahak Ephesdammin hmuem koe a tungpup awh. <sup>2</sup> Sawl hoi Isarelnaw hmuem buet touh koe a kamkhueng awh teh Elah yawn dawk a tungpup awh teh, Filistinnaw tuk hanelah a kâcai awh.

<sup>3</sup> Filistinnaw teh avanglae mon dawk a kangdue awh teh, Isarelnaw teh avanglae mon dawk a kangdue awh, rahak dawkvah a yawn pui ao.

<sup>4</sup> Filistin ransa thung dawk hoi, Gath kho e Goliath a min kâphung e a tâco, a rasang e dong taruk touh hoi khap touh a pha. <sup>5</sup> Rahumluhuem a kâ muk teh Bahling angki a kho, hote angki teh rahum shekel 5000 tabang a ri. <sup>6</sup> A khokrangian dawk rahum a pada teh a loung hoi a loung rahak rahum tahroe a ka va. <sup>7</sup> A tahroecung teh hni kawng kalawng e patetlah. Tahroe hmo teh shekel 600 tabang a ri teh, bahling ka sin e hah a hmalah a cei.

<sup>8</sup> A kangdue teh Isarelnaw a hram sin. Bangdawkmaw taran hanelah, na tâco awh. Kai teh Filistin tami buet touh lah ka o. Nangmanaw teh Sawl e a san nahoehmaw, tami buet touh roi awh nateh kai koe tho sak awh. <sup>9</sup> Ahni ni kai na tâ pawiteh nangmouh koe san lah ka o awh han. Ahni hah kai ni ka tâ lah ka thet pawiteh, ka san lah na o awh vaiteh kaimae thaw na tawk awh han telah atipouh.

<sup>10</sup> Filistin tami kai ni sahnin Isarel ransanaw na savek awh. Kai koe tami buet touh patoun awh. Kai hoi kâhmo roi han telah a ti.

<sup>11</sup> Sawl hoi Isarelnaw ni hote lawk a thai awh navah, pueng hoi a taki teh a pâyaw awh.

<sup>12</sup> Devit teh Judah ram, Bethlehem kho Jesi e capa doeh. Jesi ni capa a tawn e ataroe e doeh. Ahni teh a matawng poung toe. <sup>13</sup> Jesi e a ca kacuenaw kathum touh teh Sawl e hnuk a kâbang awh. A capa kathum touh taran tuknae koe ka cet e a minnaw teh, kacuepoung e Eliab, apâhni e Abinadab, hoi apâthum e Shammah tinaw doeh. <sup>14</sup> Devit teh cahnoung poung e capa doeh. A capa kacue e kathum touh ni Sawl koe a kâbang awh ei, <sup>15</sup> Devit hateh Sawl koehoi Bethlehem kho koe lah a na pa e tu khounnae koe atu hoi tu a cei.



<sup>16</sup> Filistin tami ni amom tangmin ahnimouh koe a hnai pouh teh hnin 40 touh a kamnue pouh.

<sup>17</sup> Jesi ni a capa Devit koe vah atu na hmaunaw hanlah cai ephah buet touh, hete vaiyei 10 touh lat nateh na hmaunaw aonae koe lah karanglah cet haw. <sup>18</sup> Maito sanu kamkak e tueng 10 touh hai ransa 1, 000 kaukkung hanlah sin pouh. Na hmaunaw a dam hoi dam hoeh e na khet hnukkhu, ahnimouh koehoi hno buet buet touh sin la atipouh.

<sup>19</sup> Sawl hoi Isarelnaw teh Elah yawn vah ao awh telah a ti.

<sup>20</sup> Devit amom a thaw teh, tunaw ka khoun hane tami buet touh koe a ceitakhai teh, Jesi ni kâ a poe e patetlah rawca a sin teh a cei. Isarel ransanaw taran tuk han a hramki awh lahun nah tungpup im koe a pha.

<sup>21</sup> Isarel ransanaw hoi Filistin ransanaw teh a kâtuk awh hanelah rek a kâhnai awh. <sup>22</sup> Devit ni hno ka khen hane koe a kut dawka poe teh ransa aonae koe lah a yawng teh, a hmaunaw hah kut a man. <sup>23</sup> Ahnimouh hoi lawk a kâdei lahun nah Gath kho e Filistin tami Goliath teh Filistin ransanaw e hmalah hoi a tâco teh ouk a dei e patetlah lawk bout a dei e Devit ni a thai. <sup>24</sup> Isarel ransanaw ni a hmu awh navah, a takipoung awh. Ahnie a hmalah hoi a yawng awh.

<sup>25</sup> Isarelnaw ni ka tâcawt e tami na hmu awh ou, Isarelnaw a savek hanelah a tho toe. Ahni ka thet e teh, siangpahrang ni moikapap e poehno hoi a bawi sak han. Hothloilah, a canu hai a poe han. Ahnie imthungnaw hai a ngai patetlah ao sak han.

<sup>26</sup> Devit ni ateng kangdoutnaw koe, hete Filistin tami ka thet niteh, Isarelnaw min mathoenae kahawi sak e tami teh bangtelamaw sak hanelah ao han. Vuensom ka a hoeh e Filistin tami heh bangpatet e tami na maw, ka hring Cathut e ransa ka savek e tami nahoehmaw atipouh.

<sup>27</sup> Tami pueng ni, hete tami ka thet e teh ka dei awh e patetlah sak pouh han telah atipouh awh.

<sup>28</sup> Ahnimouh hoi Devit lawk a kâdei e hah kacuepoung e Eliab ni a thai nah, Devit koe a lung hmatara a khuek. Kahrawng e tu hah apimaw na khoun sak. Na kâoupnae na lung poannae na lungthin ka panue. Kâtuknae khet hane doeh na tho tie ka panue telah a ti.

<sup>29</sup> Devit ni atu bangmaw ka sak, a lamthung kaawm nahoehmaw telah a ti.

<sup>30</sup> Ahni koehoi alouklah a kangvawi takhai teh, ouk a dei patetlah bout a dei pouh.

<sup>31</sup> Devit ni a dei e lawk a thai awh teh, Sawl e hmalah a dei pouh awh nah, Devit hah a kaw. <sup>32</sup> Devit ni Sawl koe ahni kecu dawka buet touh hai na lungpout sak hanh awh. Na san kai ni ka cei vaiteh hote Filistin tami ka tuk han telah a dei pouh.

<sup>33</sup> Sawl ni hote Filistin tami na tuk thai hane kawi lah awm hoeh. Nang teh na naw rah, ahni teh a nawca hoi tarantuk ka thoun e doeh telah Devit koe a dei pouh navah,

<sup>34</sup> Devit ni Sawl koe tunaw na san kai ni ka khoun nah, sendek thoseh, tavom thoseh, a tho navah, tuhu dawka e tu a la navah, <sup>35</sup> Ka pâlei teh a pahni dawka e ka lawp, hahoi na cusin navah, a pâkhamuen dawka man pouh teh ka thei. <sup>36</sup> Sendek hoi Tavom na san kai ni ka thei na maw, Cathut e ransanaw ka savek vuensom ka a hoeh e Filistin tami hai hote buet buet touh e patetlah han doeh atipouh.

<sup>37</sup> Sendek kut hoi tavom kut dawka hoi thoseh, kai na ka rungngang e BAWIPA ni hote Filistin kut dawka hoi hai na rungngang han doeh telah



Devit ni bout a dei navah cet leih, Cathut teh nang hoi rei awm naseh telah Devit koe atipouh.

<sup>38</sup> Sawl ni amae a puengcang a kho sak teh, a lû dawк rahumluhuem a kâ muk hnukkhu saiphei a kho sak. <sup>39</sup> Devit ni a angki van Sawl e tahloi a kava teh a cei bo teh, ouk a khohna boihoeв dawкvah, Sawl koe Devit ni kut a cet thai mahoeв telah atipouh. Devit ni hot naw be a rading pouh. <sup>40</sup> Amae sonron hah a kut hoi a sin teh palang dawк e talung kâpica e 5 touh a rawi. Tu khounnae koe a sin e yawngya dawк a pâseng. A kut dawк tâyai hoi Filistin tami teh a pâtam.

<sup>41</sup> Filistin tami ni a tho teh Devit koe lah rek a hnai. Ahnie hmalah bahling ka sin e hai ao. <sup>42</sup> Filistin tami ni a khet navah, Devit a hmu teh sam palingvuek, a mei a hawi teh khet ahawi, camo lah ao dawк banglahai noutna hoeв. <sup>43</sup> Hote Filistin tami ni, Devit koe kai ui lah maw ka tho teh, bongpai hoi khuet na tho sin vaw atipouh teh, Filistin tami ni a cathut noe lahoi Devit thoe a bo. <sup>44</sup> Devit koevah kai koe tho haw, na moi hah kalvan e tava hoi kahrawng sarangnaw koe ka poe han telah bout a ti.

<sup>45</sup> Devit ni Filistin tami hanelah, kai koevah tahloi, tahroeca, tahroepui, hoi na tho, kai teh nang ni na savek e Isarel ransabawi Cathut, ransabawi Jehovah min hoi doeh nang koe ka tho. <sup>46</sup> Cathut ni sahnin nang hah teh kaie kut dawк na poe e lah ao vaiteh, nang hah kai ni na thei hnukkhu na lû tâtueng han. Hahoi Filistin ransanaw e ro hah kalvan e tava hoi talai dawк e moithangnaw ka poe han. Isarelnaw koe Cathut ao tie talai van pueng ka panue sak han. <sup>47</sup> Hete tamihunaw ni hai BAWIPA ni tahloi hoi tahroe hoi na runggang hoeв tie a panue awh han. Bangkongtetpawiteh, tarantuknae teh BAWIPA e doeh. Ama ni nangmanaw teh kaimae kut dawк na poe han telah a ti. <sup>48</sup> Filistin tami teh a tho teh, Devit kâhmo hane rek a hnai nah, Devit ni Filistin tami kâhmo hane karanglah a yawng. <sup>49</sup> Devit ni a yawngya thung a tapu teh, athung e talung buet touh a rasa hnukkhu tâyai hoi a yai teh, Filistin tami e tampa dawк a yai pouh. A tampa hlut ati teh talai dawк pakhup lah rawk a tabo. <sup>50</sup> Hottelah, Devit ni tâyai hoi talung buet touh hoi hote Filistin tami a tâ teh a thei, a kut dawк tahloi sin hoeв. <sup>51</sup> Devit ni a yawng sin teh, Filistin tami van a kangdue teh, ahnie tahloi tabu dawк e tahloi a rayu teh, a lahuen mon a tâtueng pouh. Filistinnaw ni a thakaawmpounge a due e a hmu awh torei teh, kounг a yawng awh. <sup>52</sup> Isarel hoi Judah ransanaw a thaw awh teh, hram laihoi ayawn apout ditouh thoseh, Ekron longkha totouh thoseh, a pâlei awh. Hahoi Filistin tami thung dawк e a hmâ kacatnaw teh Shaaraim lam koehoi Gath hoi Ekron totouh a kamlei awh.

<sup>53</sup> Isarelnaw teh Filistinnaw pâleinae koehoi bout a ban awh teh, ahnimae pupimnaw be a raphoe pouh awh. <sup>54</sup> Devit ni Filistin tami e a lû hah a la teh, Jerusalem kho totouh a sin. A puengcangnaw teh a rim dawк a hrueк pouh.

<sup>55</sup> Sawl ni Filistin tami tuk hanelah Devit a cei e a hmu navah, ransanaw kaukkung Abner koe, Abner hete nawsai heh apie capa maw telah a pacei. Abner ni oe siangpahrang na hring e patetlah kai ni ka panueк hoeв telah a ti.

<sup>56</sup> Hottelah Siangpahrang ni hete camo heh api capa maw pacei haw, telah atipouh.

<sup>57</sup> Hote Filistin tami a theinae koehoi Devit a tho nah Abner ni ahni hah a kaw teh, Sawl koe a ceikhai. Filistin tami e a lû a kut dawк a sin.



<sup>58</sup> Sawl ni ahni koe thoundoun nang apie capa maw telah a pacei. Devit ni Bethlehem kho e na san Jesi capa telah a ti.

## 18

### *Sawl ni Devit a ut*

<sup>1</sup> Devit ni Sawl koe lawk be a dei hnukkhu, Jonathan hringnae teh Devit hringnae hoi mekkâkuet. Hottelah Jonathan ni a hringnae a lungpataw e patetlah Devit hah a lung a pataw. <sup>2</sup> Hot hnin hoi teh Sawl ni Devit a kaw teh a na pa im bout ban sak hoech toe. <sup>3</sup> Jonathan ni Devit hah amae hringnae a lungpataw e patetlah a lungpataw dawkvah, ahni hoi lawkkamnae a sak roi. <sup>4</sup> Jonathan ni a kâkhu e a hni a rading teh Devit hah a poe. Tarantuknae puengcang, angki, tahloi, licung, taisawm pateng haiyah a poe. <sup>5</sup> Sawl ni a patoun e pueng koe Devit ni a cei teh, kahawicalah a tawk teh tânae a hmu. Hatdawkvah, ransanaw kaukkung lah ao sak teh, ransanaw mithmu hoi Sawl e a sannaw mithmu vah ngai ka tho e lah ao.

<sup>6</sup> Devit ni Filistin tami a theinae koehoi a tho nah, Isarel napuinaw ni Sawl siangpahrang a dawn awh hanlah la a sak awh teh, lamtu lahoi ka cairing e ratoung, cecak tumkhawng awh teh, Isarel kho koehoi a tho awh. <sup>7</sup> Napuinaw ni Sawl thong touh, thong touh. Devit thong hra, thong hra a thei toe telah la a sak awh.

<sup>8</sup> Hote lawk ni Sawl a lungkhuek sak teh, a lunghawihoech. Ahnimouh ni Devit 10,000, kai teh 1,000 touh dueng na poe awh. Uknae hloilah a tawn e bangmouh a poe thai ati teh, hote lawk dawku puenghoi a lungkhuek. <sup>9</sup> Hot hnin hoi Sawl ni Devit teh pou a patoup.

<sup>10</sup> Atangtho vah Cathut koehoi e muitha kathout ni Sawl e lathueng a pha teh, impui dawk lawk a dei. Devit ni ouk a kueng boi e patetlah ratoung a kueng. Sawl teh a kut dawk tahroe a sin. <sup>11</sup> Devit hah tapang dawkhik kâbet lah ka tâkho han ati teh, Devit a tâkho eiteh ahnie hmalah hoi vai hni touh a roun thai.

<sup>12</sup> Hottelah BAWIPA ni Sawl koehoi a tâco teh Devit hoi rei ao dawkvah, Sawl ni Devit teh a taki. <sup>13</sup> Sawl ni a hmaitung hoi Devit a kampuen sak teh 1,000 touh kaukkung lah a hruek. Devit ni taminaw hmalah a tâco a kâen.

<sup>14</sup> BAWIPA teh Devit hoi rei ao dawk a cei na tangkuem koe tânae a hmu.

<sup>15</sup> Sawl ni Devit ni tânae kalenpounge a hmu navah hoe a taki. <sup>16</sup> Isarel hoi Judah miphunnaw ni kahawicalah a hrawi dawkvah, Devit a lungpataw awh. <sup>17</sup> Sawl ni Devit koe khenhaw! ka canu kacue e Merab hah na yu lah na poe han, tarankahawilah awm. BAWIPA e taran maha tuk lah a atipouh. Kaie ka kut hah ahnie lathueng phat sak laipalah, Filistinnaw e kut maha ahni lathueng phat seh telah Sawl ni a pouk.

<sup>18</sup> Devit ni kai teh Siangpahrang e cava lah ka o nahan bang patet e tami lah maw khuet ka o vaw. Ka hringnae hoi ka imthung hai Isarel dawkh bangtelamaw a talue telah Sawl koe atipouh. <sup>19</sup> Sawl canu Merab hah Devit koe poe hane tueng akuap nah Meholath tami Adriel koevah a yu lah yo la a poe toe. <sup>20</sup> Sawl canu Mikhal ni Devit a lungpataw. Sawl koe a dei pouh awh teh, hote ni a lunghawi sak. <sup>21</sup> Sawl ni ka canu na poe han. Filistinnaw e a kut ahnie lathueng pha sak hanlah kâmannae tangkam lah ka o sak awh han. Sawl ni Devit koe nang teh ka cava lah na o toe telah apâhni lah bout a dei. <sup>22</sup> Sawl ni a sannaw koe kâ a poe teh, Devit hoi lawk duem a kâdei awh. Siangpahrang teh nang koe a lung ahawi. A sannaw ni hai na lungpataw. Hatdawkvah, siangpahrang e cava lah awm lawih na ti awh han telah atipouh. <sup>23</sup> Sawl e sannaw ni hote lawk Devit ni ka thai



lah a dei awh. Tami ka roedeng ni, banglahai noutna hoeh e hah namaw, siangpahrang e cava lah khuek o rumram hanelah maw na pouk awh vaw telah ati.

<sup>24</sup> Sawl e a sannaw ni, Devit ni he telah a dei telah Sawl koe a dei pouh awh nah, <sup>25</sup> Sawl ni, Devit koe hettelah na dei pouh awh han, Siangpahrang ni a tarannaw a pathung navah Filistinnaw vuensom 100 touh hoeh e laipalah apfu alouke banghai ngai hoeh, ati telah dei pouh awh atipouh. Hatei Sawl ni Devit hah Filistinnaw e kut dawk due sak hanelah a pouk e doeh.

<sup>26</sup> Hahoi, a sannaw ni hote lawk hah Devit koe a dei pouh awh toteh, Devit teh siangpahrang cava lah ao hane hah a lung ahawipoung. Hahoi atueng khoe e hnin teh loun hoeh rah. <sup>27</sup> Devit hoi a taminaw a thaw awh teh, Filistinnaw 200 touh a thei awh. Devit ni ahninae vuensomnaw a sin teh, siangpahrang e cava lah ao nahanelah, ka kuepcalah siangpahrang koe a poe. Sawl ni hai a canu Mikhal hah a yu lah a poe. <sup>28</sup> Devit koe Cathut ao tie kacaicalah Sawl ni a panue. Sawl e canu ni ahni teh a lungpataw. <sup>29</sup> Sawl ni Devit hoe a taki teh, Sawl teh Devit e taran lah pou ao. <sup>30</sup> Filistin bawinaw teh a kamthaw awh. A kamthaw awh hnukkhu Devit teh Sawl e a sannaw hlak a kâhruetcuet dawkvah a min hoe a kamthang.

## 19

<sup>1</sup> Devit thei hanelah, Sawl ni a capa Jonathan hoi a sannaw koe a dei pouh. Hatei Sawl capa Jonathan ni Devit lung a patawpoung. <sup>2</sup> Jonathan ni Devit koe, Apa Sawl ni na thei hane a kâcai. Hatdawkvah amom totouh kâhruetcuet, soumtinae koe kâhrawk. <sup>3</sup> Ka cei vaiteh na onae law vah apa e ateng ka kangdue han. Nange kong apa hoi kâpan roi han. Ka thai e lawk nang koe ka dei han telah kâhruetcuetnae a poe.

<sup>4</sup> Jonathan ni a na pa Sawl koe Devit hah a oup teh, ahni koe siangpahrang ni a san Devit koelah yonnae rumram lah sak hanh naseh. Ahni ni nang koe yonnae sak hoeh. Bangkongtetpawiteh, a sak e hnonaw nang hane apfu hroung ao. <sup>5</sup> Amae hringnae pasai laipalah, Filistin tami hah a thei. BAWIPA ni kalenpoung tanae Isarelnaw koe a pha sak e na hmu teh na lung ahawi. Hatdawkvah, kayonhoehe a thipaling yon kaawm hoeh e Devit khuet na thei han vaw telah Sawl koe atipouh.

<sup>6</sup> Sawl ni Jonathan dei e lawk hah a ngai. Sawl ni BAWIPA min dawk thoe a kâbo teh ahni teh thet mahoe telah a ti. <sup>7</sup> Jonathan ni Devit a kaw teh, hote lawknaw a dei pouh hnukkhu, Devit teh Sawl koe a hrawi teh, ahmoun e patetlah ahni koe bout ao.

<sup>8</sup> Tarankâtuknae bout ao teh, Devit ni Filistinnaw hoi kâtuk hanelah a cei teh tami moikapap a thei.

<sup>9</sup> Sawl ni a im dawk tahroe hoi a tahung nah BAWIPA koehoi e muitha kathout ni a tho sin. Devit ni ratoung a kueng pouh. <sup>10</sup> Sawl ni tapang dawk khik kâbet lah a thut hanelah a noe. Hatei Sawl e hmalah hoi a roun thai teh, tahroe tapang dawk moncawm a um. Hottelah Devit a yawng teh hote karum dawk a hlout. <sup>11</sup> Sawl ni Devit hah im vah pawp vaiteh, thei hanelah amom vah patounenaw a patoun, Devit e a yu Mikhal ni, atu tangmin na hringnae na khenyawn hoehpawiteh, tangtho vah na thei awh han telah atipouh.

<sup>12</sup> Mikhal ni Devit hah hlalangaw dawk hoi a kumsak teh Devit a kâran teh a hlout. <sup>13</sup> Mikhal ni meikaphawk hah a la teh, ikhun dawk a i sak a lû koe lah hmae muen e bawilakhung a hruek teh hni a khu. <sup>14</sup> Devit



man hanelah Sawl ni patounenaw a patoun nah Mikhal ni a tak a pataw atipouh.

<sup>15</sup> Sawl ni Devit khet hanelah patounenaw a patoun teh ka thei thai nahan a ikhun hoi kê ka yawn awh atipouh.

<sup>16</sup> Patounenaw a kêen awh navah a ikhun daw k meikaphawk a lû koelah hmae muen ka lahoun e a hmu awh.

<sup>17</sup> Sawl ni Mikhal koevah kai hah bangkongmaw hete lah na dum, a hlout nahanelah ka taran na tâco sak atipouh. Mikhal ni ahni ni kai hanelah kai na cetsak haw, nahoe pawiteh na thei han telah ati telah Sawl koe a dei pouh.

<sup>18</sup> Devit teh yout a yawng teh a hlout. Ramah kho Samuel koe a pha. Ahni koe Sawl ni a sak e pueng a dei pouh. Samuel hoi a cei roi teh Naioth vah ao.

<sup>19</sup> Sawl koe Devit teh Ramah kho hoi Naioth hmuen koe ao telah a dei pouh.

<sup>20</sup> Devit man hanelah Sawl ni a patounenaw bout a patoun, lawk ka dei e profet hu touh dueng hah a hmu awh. Samuel a kangdue teh, profetnaw a hrawi nah Cathut e Muitha ni Sawl e patounenaw lathueng a pha pouh teh, ahnimouh hai profet lawk a dei awh. <sup>21</sup> Ahnimouh ni hote a kong hah Sawl koe a dei pouh awh navah, Sawl ni alouke a patounenaw bout a patoun. Ahnimouh hai profet lawk a dei awh. Sawl ni apâthum lah patounenaw bout a patoun nah, ahnimouh hai profet lawk a dei awh. <sup>22</sup> Sawl ama hai Ramah kho a cei teh, Seku e tuiim kalen poung koe a pha nah, Samuel hoi Devit na maw ao telah a pacei nah Ramah kho Naioth hmuen koe ao telah tami buet touh ni a dei pouh.

<sup>23</sup> Sawl teh Ramah kho Naioth hmuen koe lah a cei. Cathut e Muitha ahnie lathueng vah a pha van, a cei laihoi profet lawk Ramah kho hoi Naioth hmuen koe a pha totouh a dei. <sup>24</sup> A khohna e rading teh, Samuel e a hmalah profet lawk a dei. Karum khodai hote hnin daw k caici lah a i. Hatdawkvah, ahnimouh ni Sawl hai profetnaw koe ka baw k e namaw telah ati awh.

## 20

### *Jonathan ni Devit a kampangkhai*

<sup>1</sup> Devit teh Ramah kho Naioth hmuen koehoi a yawng teh Jonathan koe a pha. Bangmaw ka sak, ka yonnae bang hah namaw, na pa koe bang yonnae maw ka sak teh thei hane na noe telah a dei. <sup>2</sup> Jonathan ni ahni koevah, na dout mahoe. Apa ni kai panuek laipalah, kathoe kalen hai sak mahoe. Bangkong hah na maw hete lawk heh kai koe a hro han, het heh a laithoe vai aw, bout atipouh.

<sup>3</sup> Devit ni kai heh nang ni lung na pataw e hah na pa ni atangcalah a panue. Jonathan ni hethateh panuek hanh naseh, a lung mathout vaih ati daw k han doeh atipouh. BAWIPA a hring e hoi nang na hring e patetlah atangcalah ka dei, duenae hoi maimouh roi rahak khoktakan vai touh doeh kaawm atipouh.

<sup>4</sup> Jonathan ni Devit koevah na ngai e pueng na sak pouh han telah a ti.

<sup>5</sup> Devit ni kenhaw! tangtho teh thapa rei hnin doeh. Siangpahrang koe buven roeroe hane doeh. Hatei kai na cetsak lawih. Apâthum hnin tangmin totouh law lah kâhro hanelah na cet sak. <sup>6</sup> Na pa ni ka o hoe e hah panuek pawiteh, Devit ni a onae Bethlehem vah cei hanelah



atangcalah na dei pouh. Bangkongtetpawiteh, a imthungkhu hane kum tangkuem thuengnae tueng lah ao telah a dei pouh.

<sup>7</sup> Ahawi tetpawiteh, a san hah a runngang han. A lungkhuek pawiteh hnokahawi hoeh e sak han a kâcai tie panuek lawih. <sup>8</sup> Na san e lathueng lungmanae tawn. Bangkongtetpawiteh, na san heh BAWIPA lawkkamnae thung na kâkuekhai toe. Hatei kai dawk ka payonnae na poe koe kuekluek na ceikhai han telah a ti.

<sup>9</sup> Jonathan ni khuet na dout ti, bangkongtetpawiteh apa ni na lathueng hno kahawihoe a sak e ka panuek pawiteh dei laipalah ka o han na maw telah a ti. <sup>10</sup> Devit ni Jonathan koe na pa ni lawk kahram lahoi na pato teh apinimaw na dei pouh han telah a ti.

<sup>11</sup> Jonathan ni Devit koe law cet roi sei telah ati. Hottelah kahni touh hoi law a cei roi. <sup>12</sup> Jonathan ni Devit koe Isarel BAWIPA Cathut teh kapanuekkaikung lah awm naseh, tangtho atu e tueng dawk thoseh, apâthum thoseh apa ka tanouk han. Devit kong dawk a hawinae koelah pawiteh nang koe tami ka patoun laipalah, dei laipalah ka o han nama.

<sup>13</sup> Hatei apa ni na lathueng hno kahawihoe a sak hanelah kâcai pawiteh, na thaisak han. Kahawicalah na cei thai nahan na tha han, telah ka sak hoehpawiteh BAWIPA ni Jonathan dawk hot hlak hoe sak naseh. Apa koe BAWIPA ouk ao e patetlah nang koehai awm seh. <sup>14</sup> Ka hring nathing dawk dueng laipalah, ka hringnae abaw nah hai BAWIPA pahrennae kai dawk sak hoeh laipalah awm hanh. <sup>15</sup> Nange pahren lungmanae hai kaie imthung koehoi nâtuek hai pâpout hanh. BAWIPA ni Devit e taran talai dawk hoi he a pahma totouh pâpout hanh telah a ti.

<sup>16</sup> Jonathan ni Devit e imthungnaw hoi lawkkamnae a sak. Hot hah na raphoe pawiteh, Devit e taran kut dawk hoi BAWIPA ni pathung naseh.

<sup>17</sup> Jonathan ni amahoima lungpataw e patetlah Devit koe lawk bout a kam.

<sup>18</sup> Jonathan ni Devit koe tangtho thaparei hnin na tahungnae a houg han dawkvah, na awm hoeh tie a kamnue han. <sup>19</sup> Apâthum hnin hnukkhu, karanglah cathuk nateh hete hno ao hnin hoi na kâhronae hmuen koe cet nateh, Ezel talung koe na o han. <sup>20</sup> Nue e hmuen dawk ka e patetlah, pala katham touh talung teng vah ka ka han. <sup>21</sup> Khenhaw! cet nateh, pala hah tawng telah camo ka patoun han. Camo koevah khenhaw! pala teh na hnukkhu lah ao. Lat nateh hi tho, ka tetpawiteh BAWIPA a hring e patetlah nang hane damnae, rounnae lah ao han. Taki hane awm mahoe. <sup>22</sup> Hatei camo koevah khenhaw! pala hah ahla na koe ao ka tetpawiteh, na cei han. Bangkongtetpawiteh, BAWIPA ni na ceisak e han doeh. <sup>23</sup> Nang hoi kai ni dei roi e hno kong dawkvah khenhaw! nang hoi kaie rahak vah BAWIPA teh pou ao doeh telah a ti.

<sup>24</sup> Devit teh law vah a kâhmo, thaparei nah siangpahrang teh bu ven hanelah a tahung. <sup>25</sup> Siangpahrang teh ouk a tahungnae hmuen tapang koe a tahung. Jonathan a kangdue teh Abner teh Sawl e a teng a tahung. Hatei Devit e hmuen teh a houg. <sup>26</sup> Hatei hote hnin nah Sawl ni banghai dei hoeh, hno buet buet touh mue toe. A thounghoe dawk mue, thounghoe katang mue telah a pouk.

<sup>27</sup> Thaparei hnin tangtho vah Devit e bawitungkhung teh paroup a houg rah. Sawl ni a capa Jonathan koevah bangkongmaw Jesi capa heh paduem hoi sahnin hai buvennae koe a tho hoeh telah a paei. <sup>28</sup> Jonathan ni Sawl koe, Devit ni Bethlehem cei hanelah pou a kâhei. <sup>29</sup> Na cetsak yawkaw bangkongtetpawiteh, ka imthungnaw ni thuengnae a sak awh teh ka hmaunawngghanaw ni awm van loe telah lawk a thui. Na pahren



pawiteh na cetsak loe. Ka hmaunawngghanaw na hmawt sak telah ati. Hatdawkvah siangpahrang caboi koe a thohoeahnae doeh telah a ti.

<sup>30</sup> Jonathan koe Sawl ni a lung hmatara a khuek teh, napui ka mathout e a ca, Jesi capa teh yeirai na po nahane hoi na manu caici lah onae yeiraipo hanelah na rawi tie ka panuek hoe h maw. <sup>31</sup> Jesi capa heh talai daw k a hring nah yunglam nang hoi na ram kangning mahoe h. Atu karanglah kaw sak nateh, kai koe thokhai a due roeroe han telah Jonathan koe a dei pouh. <sup>32</sup> Jonathan ni Devit bang daw k maw a due han bang hno maw a sak telah a na pa Sawl hah a pacei. <sup>33</sup> Sawl ni tahroe hoi thei hanlah a noun g. Hote hno daw k Jonathan ni apa ni Devit a thei hanelah a noun g roeroe tie a panue. <sup>34</sup> Lungkhuek lahoi Jonathan teh caboi koehoi a thaw teh apâhni hnin thapareinae daw k, bu ven van hoe h. Bangkongtetpawiteh, a na pa ni Devit hah yeiraipo sak daw kvah a lungmathoe.

<sup>35</sup> Amom vah Jonathan teh Devit hoi lawk a kâta roinae koe camo hoi law lah a cei roi. <sup>36</sup> Camo koe ahni ni licung pali touh, hoi palanaw hah tawng telah atipouh. Camo a yawng lahun nah a hmalah palacung buet touh a pathui pouh. <sup>37</sup> Jonathan ni kâ e pala a bonae koe a pha nah na hnukkhu lah doeh atipouh.

<sup>38</sup> Jonathan ni camo a hnuk lahoi a tanawt teh karangbat lah yawng atipouh. Camo ni Jonathan ni a kâ e pala hah a racawng teh a bawipa koe lah a ban. <sup>39</sup> Camo ni banghai panuek hoe h. Jonathan hoi Devit ni dueng hote kaawm hno hah a panue roi. <sup>40</sup> Jonathan ni amae senehmaica naw hah camo koe a poe teh cet lawih, khopui daw k cetkhai atipouh. <sup>41</sup> Camo a cei hnukkhu Devit teh akalâh a onae hmuen koehoi a thaw teh, talai daw k a hmaibei hoi vai thum touh a tabo. A kâpaco roi teh kahni touh hoi rei a ka roi. Devit teh hoe kacailah a ka.

<sup>42</sup> BAWIPA ni nang hoi kaie a rahak thoseh, na miphun hoi ka miphun rahak thoseh, pout laipalah awm seh telah a dei teh, maimouh roi BAWIPA min lahoi lawkkam roi toung daw kvah, Devit koe karoumcalah cet lawi atipouh.

## 21

### *Devit hoi ka thoung e vaiyei*

<sup>1</sup> Devit teh Nob kho e vaihma Ahimelek koe vah a pha. Ahimelek ni Devit a hmu navah a kalue teh ahni koe nama dueng maw na hui buet touh hai na tawn hoe h namaw telah atipouh.

<sup>2</sup> Devit ni vaihma Ahimelek koe, siangpahrang ni kai koe thaw buet touh na poe. Taw k hane hoi kâ na poe e apinihai panuek sak hanh telah a dei. Hatdawkvah sannaw hie hmuen koe haw e hmuen koe na hruek pouh. <sup>3</sup> Atuvah na kut daw k bangmaw kaawm. Vaiyei panga touh hoe hpawiteh na tawn e pueng na poe telah atipouh.

<sup>4</sup> Vaihma ni Devit koe tami pueng ni ca thai e vaiyei ka kut daw k awm hoe h eiteh, sannaw ni napui koe ma na thoung aw h pawiteh, kathoung e vaiyei teh ao, atipouh.

<sup>5</sup> Devit ni vaihma koe atu hnin thum touh thung teh, napui koehoi kathoung aw h katang doeh. Ka tâco aw h han nahai na sannaw e hnopai hai a thoung. <sup>6</sup> Vaihma ni hmaitung e vaiyei hloilah alouke vaiyei ao hoe h daw kvah, kathoung e vaiyei hah a poe. Hote hmaitung e vaiyei yueng lah vaiyei katha hruek hanelah BAWIPA hmaitung hoi yo la takhoe toe.



<sup>7</sup> Hot hnin dawk Sawl e a sannaw thung e tami buet touh BAWIPA hmalah ka tek e ao. A min teh Doeg doeh. Ahni teh Edom tami, Sawl e saring kakhoumkung thung dawk e kacue poun e lah o.

<sup>8</sup> Devit ni Ahimelek koevah, tahroe thoseh tahloi thoseh, na tat hoeh na maw. Siangpahrang teh huerang a panki dawkvah, tahloi thoseh ka puengcang buet buet touh ka kut dawk ka sin mang hoeh telah atipouh.

<sup>9</sup> Vaihma ni Filistin tami Goliath, Elah tanghling dawk na theinae tahloi hah, khenhaw! Ephod hnuklah hni hoi tangoung e sut ao. Na ngai pawiteh hot hah lat, hoté hloilah alouke awm hoeh toe telah ati. Devit ni het patetlah tahloi phun awm hoeh, kai na poe telah atipouh.

### *Devit teh Gath lah yawng*

<sup>10</sup> Devit ni a thaw teh Sawl hmalah hoi a yawng teh, Gath siangpahrang Akhish koe a cei. <sup>11</sup> Akhish e a sannaw ni ahni koevah, hete tami heh a ram daw e siangpahrang Devit nahoehmaw, Sawl ni thong touh thong touh a thei teh, Devit ni thong hra, thong hra a thei telah lamtu lahoi a kong hah la lahoi a sak awh e nahoehmaw ati awh. <sup>12</sup> Devit ni hote lawk a lung thung a hruek teh, Gath siangpahrang Akhish teh a taki poun e.

<sup>13</sup> Hatdawkvah ahnimae hmalah a sakyoe e naw a kâthung teh hmaitung vah ka pathu patetlah a kâsak. Thonaw hah a takhaw teh a pâkhamuennaw daw tamtui do do a lawi sak. <sup>14</sup> Akhish ni a sannaw koe, khenhaw! tamipathu tie na panue awh nahlangva, bangkong kai koe na thokhai awh. <sup>15</sup> Kai daw k pathu e panki teh ka hmalah ka pathu e a kamnue nahane lah maw nangmouh ni ka imthung na kâen sak awh han maw telah a sannaw koe atipouh.

## 22

### *Devit e tami 400*

<sup>1</sup> Devit ni hote hmuen koehoi tâco takhai teh Adullam talung koevah a yawng. A hmaunawngaha hoi a na pa imthungnaw ni a thai awh nah ahni koe a cei awh. <sup>2</sup> Ka rucat e tami, lai ka tawn e, lungthin reithai poun e hoi kakhangnaw ahni koe a kamkhueng awh teh, Devit teh ahnimouh kahrawikung lah ao. Tami 400 tabang hoi rei ao awh. <sup>3</sup> Devit teh hote hmuen koehoi, Moab ram Mizpeh kho lah a cei teh, Moab siangpahrang koe Cathut ni kaimouh hanlah bangmaw a sak han tie kai ni ka panue nahan atueng totouh, ka manu ka napanaw nang koevah o nahan kâ na poe lah atipouh.

<sup>4</sup> Ahnimouh ni Moab e hmalah vah a thokhai awh, Devit rapanim thung ao nathing ahni koe ao van.

<sup>5</sup> Profet Gad ni Devit koe rapainim thung awm hanh. Tâcawt nateh Judah ram lah cet atipouh. Hottelah, Devit ni a thaw teh, Hereth ratu thung a kâen.

<sup>6</sup> Sawl ni Devit hoi a sannaw hah a hmu awh tie a thai. Sawl teh Gibeah e ram vah kho vah bengkung thing rahim a tahroe hoi a tahung teh, a tengpam vah a sannaw a kangdue sak. <sup>7</sup> Sawl ni a tengpam e a sannaw koevah nangmanaw Benjamin taminaw thai awh haw. Jesi capa ni law hoi misur takhanaw na poe han namaw, nangmouh pueng ransa 1,000 touh ukkung hoi 100 touh ukkung lah na ta awh han namaw. <sup>8</sup> Nangmouh abuemlahoi kai koe lah taran na thaw awh maw. Ka capa teh Jesi e capa hoi lawk a kam roi nah, kai koe buet touh ni hai na dei pouh hoeh. Sahnin e patetlah ka thaw katawkaw ni na pawp hanlah ka capa ni kai na taran



e kai koe api buet touh ni hai na dei awh hoe. Kai hanelah api buet touh hai na lungmathout awh hoe atipouh.

<sup>9</sup> Sawl e a thaw katawnaw hoi rei ka kang dout e Edom miphun dueng ni a dei e teh, Jesi capa teh Nob kho Ahitub e capa vaihma Ahimelek koe a tho e kai ni ka hmu. <sup>10</sup> Ahni ni BAWIPA koe pouknae a hei pouh, ca hanelah a poe teh Filistin tami Goliath e tahloi hai a poe telah ati.

### *Vaihma a thei*

<sup>11</sup> Siangpahrang ni Ahitub capa vaihma Ahimelek hoi a na pa im thung Nob kho e vaihma pueng a kaw sak teh, siangpahrang koe kouna a tho awh. <sup>12</sup> Sawl ni, nang Ahitub capa thai haw telah ati, ahni ni apa hivah ka o atipouh.

<sup>13</sup> Sawl ni ahni koe sahnin vah ahmoun e boiboe lah kai na taran teh, na ka pawm hanelah vaiyei hoi tahloi hah na poe teh, BAWIPA koe pouknae hei pouh hane bang dawh hah namaw nang hoi Jesi capa ni na taran roi vaw telah ati. <sup>14</sup> Ahimelek ni siangpahrang lawk a pathung teh, siangpahrang cava, pouknae na hei ka tang e, na imthung dawh bari han kamcu Devit patetlah yuemkamcu e na sannaw dawh apimaw kaawm.

<sup>15</sup> Sahnin Cathut ka bawknae kamtawngnae maw, nahoe. Siangpahrang ni teh a san thoseh apa imthungnaw thoseh, na pakung rumram hanh naseh, bangkongtetpawiteh, na sannaw ni hete kong heh banghai ka panuek hoe telah ati.

<sup>16</sup> Siangpahrang ni Ahimelek nama hoi na pa imthungnaw hoi na due awh roeroe han telah atipouh. <sup>17</sup> Siangpahrang ni a teng kangdout e a ransa koevah, kamlang sin awh nateh, BAWIPA e vaihma hah thet awh, bangkongtetpawiteh, Devit koe lah kampang teh a kâran tie a panue awh ei kai koe dei awh hoe telah ati, hatei a sannaw ni BAWIPA e vaihma hem hanelah a kut pho ngai hoe.

<sup>18</sup> Siangpahrang ni Doeg koevah, nangmouh ni kamlang sin nateh, vaihma hah thet telah ati. Edom teh Doeg ni a kamlang sin teh a hem. Hot hnin navah vaihma angkidung ka kho e tami 85 a thei awh. <sup>19</sup> Nob vaihma kho teh tahloi hoi a tuk awh teh napui tongpa camo sanu ka net lahun totouh maito thoseh, la thoseh, tu thoseh tahloi hoi be a thei. <sup>20</sup> Ahitub capa Ahimelek capanaw thung e tami buet touh a min Abiathar teh a hlout. Devit koevah a yawng. <sup>21</sup> Abiathar ni Sawl ni BAWIPA vaihmanaw a thei e konglam Devit koe a dei pouh. <sup>22</sup> Devit ni Abiathar koevah Edom tami Doeg haw vah kaawm e roeroe ni Sawl koe a dei pouh han tie ka panue tangcoung e doeh toe. Na pa imthungnaw teh kai kecu dawh kadout a e doeh. <sup>23</sup> Kai koe awm nateh, taket hanh, bangkongtetpawiteh kai thei han ka kâcai e ni nang hai thei han a kâcai van han. Hatei kai koe na lungmawng han telah ati.

## 23

<sup>1</sup> Ahnimouh ni khenhaw! Filistinnaw ni Keilah khopui a tuk awh teh, cangkatinnae a la awh e hah, Devit ni a thai toteh,

<sup>2</sup> Kai ni hote Filistinnaw hah ka cei vaiteh ka tuk han namaw telah BAWIPA koe a pacei. BAWIPA ni, cet haw. Filistinnaw hah tuk nateh, Keilah khopui haw rungang haw telah Devit koe a dei pouh.

<sup>3</sup> Devit e taminaw nihai, maimouh ni Judah ram dawh patenghai taki awh toe. Keilah khopui cei awh vaiteh, Filistin tuk hane teh taki ka tho poung na bo aw telah a dei awh.



<sup>4</sup> Devit ni BAWIPA koe bout a pacei teh, BAWIPA ni, cet awh nateh, Filistinnaw teh nange kut dawk na poe han telah atipouh.

<sup>5</sup> Devit hoi a taminaw teh, Keilah khopui koelah a cei awh teh, Filistinnaw hoi a kâtuk awh. Saringnaw a la pouh awh, ahnimanaw moikapap a thei awh. Hottelah Devit ni Keilah khopui hah a rungangang.

<sup>6</sup> Ahimelek capa Abiathar teh, Devit aonae koe Keilah khopui koelah a yawng navah, Ephod a sin laihoi a tho.

<sup>7</sup> Devit teh Keilah khopui a cei tie Sawl ni a thai toteh, Cathut ni ka kut dawk na poe toung nahoehmaw. Kho longkha hoi tarennae kaawm e khopui thung a kâen teh paung awh toe telah ati. <sup>8</sup> Keilah khopui tuk hanelah Devit hoi a taminaw kalup hanelah, amae taminaw pueng a kamkhueng sak.

<sup>9</sup> Devit ni ka lathueng vah, Sawl ni hnokathout a sak tie hah a panue teh, vaihma Abiathar koevah Ephod hah hi thokhai haw atipouh.

<sup>10</sup> Devit ni Oe Isarel BAWIPA Cathut, Sawl ni kai kedu dawkvah, Keilah khopui raphoe hanelah a kâcai awh tie ka thai.

<sup>11</sup> Keilah khocanaw ni kai hah a kut dawk na poe han na maw. Na san ni ka thai e patetlah Sawl teh a tho han namaw. Isarel miphun e BAWIPA Cathut, na san koe uren dei haw telah ka pacei navah, BAWIPA ni, a tho han doeh, telah ati pou.

<sup>12</sup> Devit ni Keilah taminaw hoi ka taminaw teh Sawl kut dawk na poe han na maw telah a pacei. BAWIPA ni na poe awh han telah ati.

<sup>13</sup> Hottelah hoi Devit hoi a taminaw 600 tabang a thaw awh teh, Keilah khopui hoi a tâco awh teh, a coung thai e patetlah a cei awh. Devit teh Keilah khopui hoi a yawng e hah Sawl ni a thai dawkvah, cet hoeh toe.

### *Devit kahrawngum taranum onae*

<sup>14</sup> Devit teh, Zeph monrui kahrawngum rapanimnaw dawkvah ao. Sawl ni hnintangkuem a tawng eiteh, Cathut ni a kut dawk Devit vah poe hoeh.

<sup>15</sup> Devit ni, Sawl ni na thei han tie a panue dawkvah, ahni teh Ziph ramke ratu thung vah ao. <sup>16</sup> Sawl capa Jonathan a tho teh, Devit aonae koe Horesh lah a cei teh, Cathut dawk tha a kâla nahanelah a kabawp. <sup>17</sup> Na lungpuen hanh. Isarelnaw e siangpahrang lah na o vaiteh, kai teh nang kabawmkung lah ka o han tie hah Sawl ni a panue.

<sup>18</sup> BAWIPA e hmalah lawk rei a kam roi. Devit teh kahrawng vah pou ao teh, Jonathan teh a ma im lah a ban.

<sup>19</sup> Ziphnaw teh Sawl onae koe Gibeah kho lah a cei awh teh, Devit teh maimouh onae koe Jeshimon khopui akalah, Hakhilah monrui Horesh rapanim vah a kâhro. <sup>20</sup> Oe Siangpahrang na cei han na ngainae patetlah cet leih. Ahni hah nange kut dawk poe hane thaw teh kaimae thaw lah awm lawi seh atipouh.

<sup>21</sup> Sawl, BAWIPA ni yawhawi na poe seh. Bangkongtetpawiteh, nangmanaw ni kai hah na pahren awh toe. <sup>22</sup> Atu cet awh nateh, kârakueng awh. Ahni a kâhronae hmuem hah thoseh, la a hmu awh e hai thoseh ripdawng awh. Ahni teh a lung hroung a ang tie ka thai.

<sup>23</sup> Hatdawkvah, ahni a kâhronae a hmuennaw hah kamcengcalah na radoung awh hnukkhu, kai koe bout na tho awh pawiteh, nangmouh hoi rei ka cei han. Ahni teh hote ram dawkmaw pawiteh, Judahnaw a thong moikapap dawkmaw ka hmu roeroe han telah ati.

<sup>24</sup> Hahoi a thaw awh teh Sawl a cei hoehnahlan Ziph lah a cei awh. Hatei Devit hoi a taminaw teh, Jeshimon akalae tanghling dawkmaw Moan kahrawng vah ao awh. <sup>25</sup> Sawl teh a taminaw hoi rei a kamthaw awh teh, a tawng



awh e hah Devit ni bout a thai toteh, talung rahak hoi a yawng teh, mon kahrawngum vah ao. Sawl ni bout a thai toteh, mon vah Devit bout a tawng.

<sup>26</sup> Sawl teh avanglae mon dawk thoseh, Devit hoi a taminaw teh avanglae mon dawk thoseh, a cei awh teh hlout hane a kâyawm awh navah, Sawl hoi a taminaw ni Devit hoi a taminaw man hanelah a kalup awh. <sup>27</sup> Hatnavah patoune a tho teh, Sawl koe karanglah tho leih, Filistinnaw ni ram hah a tuk awh toe telah a dei awh dawkvah,

<sup>28</sup> Devit pâleinae koehoi a ban teh, Filistin taminaw tuk hanelah a cei. Hatdawkvah, hote hmuén hah Selahhahmahlekoth, kânguenae lungsong ati awh. <sup>29</sup> Devit teh hote hmuén koehoi a cei teh, Engedi ram rapanim vah ao.

## 24

### *Devit ni Sawl a pasai*

<sup>1</sup> Filistinnaw pâleinae koehoi ka ban e ni Sawl koe Devit teh Engedi kahrawngum vah ao telah a dei pouh. <sup>2</sup> Hateh, Sawl ni Isarelnaw thung dawk hoi tami 3000 touh a kaw teh, a thaonae lungsong tie ram dawk Devit hoi a taminaw tawng hanelah a cei awh. <sup>3</sup> Lam teng vah tutakha onae lungngoum koe a pha awh. Sawl teh vaipuen cei hanelah lungngoum thung a kâen. Devit hoi a taminaw teh hote lungngoum thung vah ao awh. <sup>4</sup> Devit e taminaw ni, BAWIPA ni na taran hah na kut dawk na poe han. Ahni dawk na sak ngai e patetlah saknae kâ ao han ati e teh, sahnin doeh toe atipouh awh. Hateh Devit ni a thaw teh, Sawl e angki pawí hah arulahoí duem a a pouh. <sup>5</sup> Hottelah Devit ni Sawl e angki pawí a a e dawk a lungrei a thai sak. <sup>6</sup> Hahoi a taminaw koevah BAWIPA ni satui awi e doeh tie panue nahlangva hoi runae poe hanelah ka kut ka dâw teh BAWIPA ni satui awi e ka bawipa lathueng hete hno ka sak e coung thai hoeh telah ati. <sup>7</sup> Hottelah hoi Devit ni a taminaw hah hote lawk lahoi a haw thai teh, Sawl thei hanelah ka cet hane naw hah pasoung hoeh. Hahoi teh Sawl haiyah lungngoum thung hoi a tâco teh a cei. <sup>8</sup> Hathnukkhu Devit a thaw teh, lungngoum thung hoi a tâco teh Sawl e hnuk lahoi, ka bawipa siangpahrang, telah a hram. Hahoi Sawl ni hnuk lah a kamlang teh a khet navah, Devit ni a tabut teh a minhmai talai rekkâbet lah a tabo. <sup>9</sup> Devit ni nang runae poe hanlah a kâcai telah taminaw ni a dei e hah bangkongmaw khuet na tang vaw.

<sup>10</sup> Sahnin BAWIPA ni nang hah ka kut dawk na poe e hah khenhaw! Nang thei hanelah ayânaw ni na hroecoe eiteh, kai ni na pasai teh ka bawipa teh BAWIPA ni satui awi e lah na o dawkvah, runae poe hanelah ka kut ka dâw mahoe telah ka pouk.

<sup>11</sup> Hothloilah apa khenhaw! na hni pawí hai ka kut dawk ao hei. Na hni pawí ka a thai e hoi na thei hoeh e ni, ka kut dawk hawihoe hoi tarantuknae awm hoeh tie hoi ka hringnae thei hanelah pou na tawng ei nakunghai, nang taranlahoi yonnae ka sak hoeh tie hah khoeroe pahnim hanh.

<sup>12</sup> BAWIPA ni kai hoi nang rahak lawkceng na seh. Hatei kai ni teh nang dawk ka kut ka tha mahoe. Nang koe ka yonnae hah BAWIPA ni na pathung na seh.

<sup>13</sup> Ayan cingthuinae dawkvah, tamikathout koehoi thoenae a tâco. Hatei, ka kut teh nang dawk phat hanh naseh.



<sup>14</sup> Isarel siangpahrang teh api tawng hanelah maw a tho. Ui ro maw a tawng, uihli maw a tawng.

<sup>15</sup> Hatdawkvah, BAWIPA teh lawkcengkung lah awm lawiseh. Kai hoi nang rahak vah lawkceng lawiseh. Na pouk pouh vaiteh, na dei pouh lawiseh. Na kut dawk hoi a ma ni na rasat lawiseh telah Sawl koe a dei pouh.

<sup>16</sup> Hottelah Devit ni Sawl koe be a dei hnukkhu, Sawl ni ka capa Devit, ka thai e lawk hah nange lawk namaw ati teh a khuika.

<sup>17</sup> Kai hlak nang te hoe na lan doeh. Bangkongtetpawiteh, nang ni teh hawinae hoi na pathung teh, kai ni teh hawihoeahae hoi na pathung.

<sup>18</sup> Kai koe hawinae bangtelamaw na sak tie sahnin na kamnue sak toe. Bangkongtetpawiteh, BAWIPA ni kai hah na kut dawk na poe ei, nang ni na thet laipalah na o toe.

<sup>19</sup> Tami ni a taran hah hmawt pawiteh, duem a hlout sak han namaw. Hatei, nang ni sahnin kai koe na sak e hawinae hah BAWIPA ni na patho lawiseh. <sup>20</sup> Atuvah, nang teh atangcalah siangpahrang lah na o han. Isarel uknaeram hai na kut dawk a kangning han tie hah kacailah ka panue awh katang toe. <sup>21</sup> Hatdawkvah, ka catounnaw hah na raphoe hoe nahane hoi, ka imthungnaw thung hoi ka min na kahma sak hoe nahanelah, BAWIPA min lahoi kai koe lawk kam haw atipouh. <sup>22</sup> Hottelah Devit ni Sawl koe lawk a kam teh, Devit hoi a taminaw teh rapanim koe a cei awh.

## 25

### *Samuel duenae*

<sup>1</sup> Hathnukkhu, Samuel a due navah, Isarelnaw pueng teh a khuika awh. Ahni teh Ramah kho a onae im koe a pakawp awh. Devit teh Paran kahrawngum lah a cei.

### *Devit hoi Nabal e a yu*

<sup>2</sup> Maon vah tami buet touh ao. Hote tami teh, Karmel kho dawk ka tawnta pounge lah ao teh tu 3000 touh hoi hmae 1000 touh a tawn. Karmel vah tumuen ouk a ngaw. <sup>3</sup> Hote tami min teh Nabal doeh. A yu e min teh Abigail. Hote e napui teh, a lungkaang e hoi a meikahawi e lah ao. Hatei a va teh, a lung ka patak e hoi a nuen kamathout e lah ao. Ahni teh Kaleb catounnaw doeh. <sup>4</sup> Devit ni kahrawngum hoi Nabal ni tumuen a ngaw e hah a panue. <sup>5</sup> Hatdawkvah, Devit ni thoundounnaw 10 touh a patoun teh, hatnavah thoundounaw hah Devit ni Karmel lah takhang awh nateh, Nabal koe na cei awh vaiteh, ka min lahoi kut man awh. <sup>6</sup> Hahoi, ka tawnta pounge tami koe hettelah na dei pouh han, nang dawk thoseh, na imthung dawk thoseh, na tawnta e pueng lathueng thoseh roumnae awm seh. <sup>7</sup> Na tumuen ka ngaw e tami ao tie ka thai, na tu kakhounnaw kai koe ouk ao awh teh, runae banghai na poe awh hoe. Karmel mon dawk ao nathung vah, bang buet touh hai kahmat boihoe. <sup>8</sup> Na thoundounnaw pacei haw, a dei awh han doeh. Ka thoundounnaw ni nang koe minhmai kahawi hmawt awh naseh. Kaimanaw teh paw hnin dawk ka pha awh. Pahren lahoi nang koe kaawm e pueng hah na sannaw hoi na capa Devit poe loe telah tet pouh awh titeh lawk a thui. <sup>9</sup> Devit e thoundounnaw a pha toteh, Devit ni lawk a thui e patetlah Nabal koe a dei pouh awh teh, duem ao awh.

<sup>10</sup> Hatei, Nabal ni Devit e a sannaw koe, Devit teh apimaw. Jesi capa teh apimaw. Atuvah a bawipa ka taran e sannaw nahoehmaw.



<sup>11</sup> Ka vaiyei, ka tui, hoi ka tumuen kangawnaw hanelah ka thei pouh e heh nâ lahoi maw a tho awh tie ka panue hoeh e taminaw hah ka poe han namaw.

<sup>12</sup> Hatdawkvah, Devit e thoundounnaw karanglah a ban awh teh, Devit koe Nabal ni a dei e naw hah a dei pouh awh.

<sup>13</sup> Devit ni a taminaw koevah, na tahloi kOUNg kava awh telah atipouh teh, tahloi kOUNg a kava awh. Devit ma hai tahloi a kava van. Tami 400 touh ni Devit hnuk a kâbang awh. Tami 200 touh ni hnopainaw a la ring awh.

<sup>14</sup> Hahoi, thoundoun buet touh ni Nabal e a yu Abigail koevah, khenhaw! Devit ni kahrawngum hoi maimae bawipa kut man hanelah a patounenaw a patoun teh, ahni ni a yue.

<sup>15</sup> Hatei, ahnimanaw teh maimouh koe hroung ahawi awh. Runae banghai na poe boi awh hoeh. Law dawk ao awh nathung bang hno hai pasai awh hoeh.

<sup>16</sup> Tu ka khoum awh navah, ahnimouh koe ka o awh nathung tahroe hoi taran na ring pouh awh.

<sup>17</sup> Hatdawkvah, bangmaw na sak han. Kahawicalah pouk haw. Bangkongtetpawiteh, maimae bawipa hoi imthungnaw koe thoena e sak han toe. Ahni teh tamikahawi hoeh e lah ao dawkvah, apinihai dei thai hoeh telah atipouh.

<sup>18</sup> Abigail ni karanglah vaiyei phen 200 touh, misurum kahni touh hoi thawng tangcoung e tu buem panga touh, tavai phen sum panga touh, misurpaw phen 100 touh, thaibunglung ka radip e 200 touh a sin teh, la a phu sak.

<sup>19</sup> Hahoi ama koe kaawm e thoundounnaw koevah, ka hmalah pou cet awh. Nangmae hnuklah ka tho han atipouh. Hatei, a vâ Nabal koe dei pouh hoeh. <sup>20</sup> La dawk a kâcui teh mon rahim a pha navah, Devit hoi a taminaw ahni koe a cathuk e hah a hmu teh, a kâhmo. <sup>21</sup> Devit ni ahnie hno buet touh boehai a kahma hoeh nahanelah kahrawngum vah, a tawn e pueng kai ni ayawmyin lah ka ring pouh. Ka hawinae heh thoena e hoi na pathung. <sup>22</sup> Tangtho amom khodai totouh a tawn e pueng thung dawk hoi tongpa camo buet touh kangna ka hlung pawiteh Cathut ni Devit heh taran kut dawk a ngai patetlah na tet lawiseh. Hothlak hai hoe na tet yawkaw seh telah lawk yo a kam toe. <sup>23</sup> Abigail ni Devit a hmu navah, la van hoi karanglah a kum teh, Devit hmalah a minhmai talai rekkâbet lah a tabo. <sup>24</sup> A khok koe a tabo teh, kai dawk roeroe vah thoe saknae bawt seh. Na sannu ni na hnâthainae koe, lawk ka dei vaiteh, na sannu ni lawk ka dei e hah na thai pouh haw. <sup>25</sup> Ka bawipa tamikayon Nabal hah banglahai noutna hanh. A min phung e patetlah doeh ao. Nabal tie patetlah ka pathu e doeh. Kai na sannu ni bawipa nang ni na patoun e thoundounnaw ka hmu hoeh dawk doeh atipouh. <sup>26</sup> Hatdawkvah, ka bawipa atuteh, BAWIPA a hring e hoi nang na hring e patetlah khoeroe ka hmawt hoeh. BAWIPA ni thi palawng hoeh hane hoi na kut hoi a moi na pathung hoeh hanelah, na tarannaw hoi bawipa nang dawk a thoena e katawngnaw teh, Nabal patetlah tho awh lawiseh. <sup>27</sup> Hahoi ka bawipa nang hanelah na sannu ni poehno ka sin e heh, ka bawipa nang koe ka kâbang e thoundounnaw poe lah awm lawiseh. <sup>28</sup> Na sannu ni ka payon e naw hah pankângai ei. Ka bawipa nang teh BAWIPA koe lah taran na tuk dawk thoseh, na hring nathung nang dawk yonpen hane ao hoeh dawk thoseh, BAWIPA ni nang hanelah kacakpounge imthung a kangdue sak han doeh telah atipouh. <sup>29</sup> Nang ka pâlei hane hoi nang ka thet hanelah



taminaw ni na ka tawng nakunghai nange BAWIPA Cathut ni ka bawipa e hringnae teh, kahringnaw rahak vah mek a tangoung sin han doeh. Nang e tarannaw e hringnae teh, tàyai hoi pathui e patetlah a thui vaiteh a kahma awh han. <sup>30</sup> BAWIPA ni nang daw k hnokahawi na kam pouh e pueng ka bawipa nang daw k kuep sak teh, Isarel siangpahrang lah na rawi torei teh, <sup>31</sup> A khuekhaw awm laipalah, tami na thet hoe. Ka bawipa ni moi na pathung hoe e hah nang hanlah lungmathoenae lah awm roeroe mahoe. Ka bawipa hanlah lungkuep hoe nahanlah awm roeroe mahoe. BAWIPA ni ka bawipa tak daw k hnokahawi a sak toteh, na sannu heh pahnim hanh atipouh. <sup>32</sup> Devit ni hai, sahnin nang hoi kâhmo sak hanelah, nang na ka patoun e Isarelnaw e BAWIPA Cathut teh, yawhawi lah awm lawiseh. <sup>33</sup> Na khopouk thainae teh yawhawinae lah ao vaiteh, sahnin kai teh tami hringnae thei hanelah ka kâcai hoe nahan, ka kut hoi moipathung laipalah, na kangangkung hai yawhawinae awm lawiseh. <sup>34</sup> Bangkongtetpawiteh, nang hah runae na poe hoe nahanlah hoi, ka ngang e Isarel BAWIPA Cathut teh a hring e patetlah kai hoi kâhmo hanelah karanglah na tho hoehpawiteh, tangtho amom vah Nabal hanelah tongpa buet touh boehai ka pâhlung mahoe telah Abigail koe a dei pouh. <sup>35</sup> Ahni ni a sin e poehno a kut daw k e Devit ni a la pouh teh, na onae im koe lah karoumcalah cet haw, nange na lawk ka ngai toe, na minhmai hai ka khet han telah atipouh. <sup>36</sup> Abigail ni hai Nabal koe bout a cei teh, ahni teh siangpahrang e pawibu patetlah bu a ca, puenghoi a parui dawkvah, a tangtho khodai hoehnahlan totouh banghai dei pouh hoe. <sup>37</sup> Amom lah Nabal teh misur parui e a thanguem toteh hote hnonaw hah a yu ni a dei pouh. Ama teh a lung a due pouh teh, talung patetlah ao. <sup>38</sup> Hnin 10 touh hnukkhu BAWIPA ni a hem teh a due. <sup>39</sup> Nabal a due e hah Devit ni a thai toteh, Nabal ni na pacekpahleknæ koehoi na rasa teh, na san kai heh thoenæ hno daw k hoi na ka hlout sak e BAWIPA teh a min pholennæ awm lawiseh. BAWIPA Cathut ni Nabal hawihoehnæ hah amæ lathueng bout a pha sak toe telah a dei. Devit ni Abigail teh a yu hanelah tami a patoun. <sup>40</sup> Devit e a sannaw teh Abigail onæ Karmel mon koe a pha awh toteh, Devit ni a yu hanelah a san kaimouh na patoun awh toe telah atipouh. <sup>41</sup> Abigail a thaw teh a hmalah talai daw k a tabo teh, na khenhaw! na sannu he ka bawipa e sannaw e khok pâsu hanelah doeh ka o atipouh. <sup>42</sup> Hathnukkhu Abigail a thaw teh, la daw k a kâcui. A hnukkâbang e a sannu 5 touh hoi Devit ni patounenaw koe a kâbang teh Devit e yu lah ao. <sup>43</sup> Hatnavah, Devit ni Jezreel tami Ahinoam hah a yu lah la a tawn toe. Hattoteh kahni touh hoi yu lah reirei a la. <sup>44</sup> Hatnavah, Sawl ni a canu Mikhal Devit e a yu teh Gallim tami Laish capa Palti koe yo la a kâhâ toe.

## 26

### *Devit ni Sawl hringnae bout a pâhlung*

<sup>1</sup> Ziph tami ni Gibeah kho a tho teh, Sawl koe vah Devit teh Hakhilah mon Hakhilah kho daw k a kâhro nahoehmaw, atipouh. <sup>2</sup> Hahoi, Sawl a thaw teh, a rawi e Isarelnaw tami 300 touh a hrawi teh, Ziph ram koelah Devit tawng hane a cei awh. <sup>3</sup> Sawl teh Jeshimon ram Hakhilah mon daw k a roe. Hatei, Devit teh kahrawngum vah ao teh, Sawl ni na tawng hanelah kahrawng vah a tho tie hah a panue. <sup>4</sup> Hatdawkvah, Devit ni katuetkungnaw a patoun teh Sawl a tho katang tie hah a panue. <sup>5</sup> Devit ni a thaw teh, Sawl tungpupnae koe vah a cei. Devit ni Sawl hoi ransanaw



kaukkung Ner capa Abner a inae hah a hmu. Sawl teh pupim lungui vah a i teh rangleng ransanaw ni a kalup. <sup>6</sup> Devit ni Hit tami Ahimelek hoi Joab e nawngaha Zeruiah capa Abisai koevah, Sawl roenae koe apimaw kai koe ka kâbang han telah a pacei navah, Abisai ni nang koe kai ka kâbang han atipouh. <sup>7</sup> Devit hoi Abisai teh Sawl tinaw onae koe tangmin vah a cei roi, khenhaw! Sawl te pupim lungui vah a i, a lû koevah tahroe hah talai dawk a thoe sak teh, Abner hoi ransanaw teh a tengpam vah a i awh. <sup>8</sup> Abisai ni Devit koevah, sahnin vah Cathut ni na tarannaw teh na kut dawk na poe toe. Hatdawkvah, na san ni tahroe hah talai dawk vaitahoi na takho sak haw, vai hni touh ka takho mahoev atipouh. <sup>9</sup> Hateiteh, Devit ni Abisai koe hawi hoeh, bangkongtetpawiteh, BAWIPA Cathut ni satui awi e tami lathueng vah kut a tha teh, ngaithoum e tami apimaw kaawm boi telah atipouh.

<sup>10</sup> Hothloilah, Devit ni BAWIPA a hring e patetlah BAWIPA a ma ni a hem han doeh. Hoehpawiteh, a duenae hnin a pha han doeh. Hoehpawiteh taran tuknae koe cet vaiteh a due han doeh.

<sup>11</sup> BAWIPA ni satui awi e tami lathueng vah ka kut ka pho hane teh, BAWIPA ni na pasoung hoeh. Hatei, a lû koe e tahroe hoi tuium teh la vaiteh cet leih sei atipouh.

<sup>12</sup> Hahoi teh, Devit ni Sawl e lû koe kaawm e tahroe hoi tuium hah a la teh a cei. Apinihai hmawt hoeh, ahnimanaw pueng teh mat a i awh dawkvah, api buet touh hai a kâhlah hoeh dawkvah, .

<sup>13</sup> Devit teh kakaw e a yawn namran lah a cei teh, kahlat e monruisom vah a kangdue.

<sup>14</sup> Devit ni tamihupui hoi Ner capa Abner hah a oung teh, Abner na pato mahoev maw atipouh. Hahoi Abner ni siangpahrang ka oung ngam e tami api nang maw atipouh.

<sup>15</sup> Devit ni Abner hanelah na tongpa hoeh maw. Isarelnaw e rahak vah nang patetlah e apimaw kaawm. Bangkongmaw siangpahrang na bawipa hah na ring thai hoeh maw. Tangmin vah tami buet touh ni siangpahrang na bawipa thei hanelah a tho toe.

<sup>16</sup> Na sak e hno hawihoeh. Bawipa a hring e patetlah Bawipa ni satui awi e na bawipa hah kahawicalah na ring hoeh dawkvah, due hanelah na kamcu. Siangpahrang lû koe e tahroe hoi tuium hah nâmwaw ao khenhaw! atipouh.

<sup>17</sup> Sawl ni Devit e lawk a thai navah, ka thai e lawk he ka capa Devit nange lawk maw atipouh navah, Devit ni oe kaie lawk doeh ka bawipa atipouh.

<sup>18</sup> Bangkongmaw ka bawipa ni a san hah a pâlei. Bangmaw ka sak. Bangmaw ka kut dawk yonnae kaawm.

<sup>19</sup> Hatdawkvah siangpahrang ka bawipa na sanpa e lawk he thai haw. Kai na taran hanelah na lung tha kaawmsakkung hah Bawipa lah awm pawiteh, thuengnae heh coe naseh. Hateiteh, tami lah awm pawiteh, Bawipa hmalah thoebo naseh. Bangkongtetpawiteh, ahnimouh ni cet lawih, alouke cathutnaw e thaw hah taw lawih telah ati awh teh, Bawipa e râw talai dawk o hoeh nahanelah sahnin na pâlei awh toe hei.

<sup>20</sup> Hatdawkvah, ka thipaling teh Bawipa ni hmu hoeh e talai dawk lawng naseh. Bangkongtetpawiteh, tamuem tawng hanelah mon dawk kâva e patetlah Isarel siangpahrang teh uihli tawng hanelah a kâva atipouh.

<sup>21</sup> Sawl ni ka payon toe ka capa Devit bout ban leih. Bangkongtetpawiteh, na mithmu vah ka hringnae he aphu o pounng dawkvah thoe bout na bo mahoev toe. Khenhaw! pathunae hno ka sak teh ka payon toe ati. <sup>22</sup> Devit



ni oe ka bawipa na tahroe khenhaw! na thoundoun buet touh koe bout lat sak atipouh. <sup>23</sup> BAWIPA ni tami pueng amamae tahroe hoi yuemkamcunae dawk aphu poe naseh. Sahnin vah Bawipa ni nang hah ka kut dawk na poe, hateiteh Bawipa ni satui awi e tami lathueng vah kut ka tha mahoe atipouh. <sup>24</sup> Khenhaw! sahnin vah na hringnae teh ka mithmu vah aphu o e patetlah Bawipa ni ka hringnae hah aphu awm sak naseh. Runae pueng thung hoi na rungngang naseh atipouh. <sup>25</sup> Sawl ni Devit koe vah, ka capa Devit, hawinae awm seh. Na sak e hno puengpa dawk tânae na hmawt naseh, telah a dei pouh hnukkhu, Devit teh a ban, Sawl hai a ma onae koe a ban van.

## 27

### *Devit hoi Filistinnaw a kambawng awh*

<sup>1</sup> Devit ni a lungthung hoi, hnin hnin touh teh Sawl kut hoi kadout han doeh, Filistinnaw koe ka yawng hoehpawiteh kai hanelah ahawinae awm mahoe. Sawl ni Isarel ram thung pueng na tawng e heh a lungpout vaiteh, a kut dawk hoi ka hlout han telah ati. <sup>2</sup> Hahoi Devit teh a thaw teh, ama hoi ateng kaawm e a tami 600 touh hoi Maok capa Gath siangpahrang Akhish koe vah a cei. <sup>3</sup> Devit teh ama hoi a yu roi Jezreel tami Ahinoam hoi Nabal yu Karmel tami Abigail hoi Gath kho Akhish koe a cei awh. <sup>4</sup> Gath vah Devit a yawng toe tie Sawl koe a dei pouh awh toteh, bout tawng hoeh toe. <sup>5</sup> Devit ni Akhish koe vah na minhmai kahawi ka hmawt pawiteh, na ram thung kho buet touh dawk kho ka sak thai nahanelah, o nahane na poe haw. Bangkongmaw na san ni siangpahrang khopui dawk nang koe kho khuet ka sak thai han vaw telah atipouh. <sup>6</sup> Hat toteh, hat hnin râw vah Akhish ni, Ziklag kho a poe. Hatdawkvah Ziklag teh atu totouh Judah ram siangpahrangaw e lah ao. <sup>7</sup> Filistin ram thung Devit teh kum touh hoi thapa yung pali touh ao. <sup>8</sup> Devit hoi a taminaw ni a takhang awh teh, Geshur taminaw hoi Girzi taminaw hoi Amaleknaw hah a tuk awh. Hote miphunnaw teh Shur hoi Zur ram koe lah Izip ram totouh pou kâkuen e doeh. <sup>9</sup> Devit ni taran a tuk tangkuem napui tongpa a hlung e awm boihoeh. Tu, La, Maito, Kalauk, hoi khohnanaw a la pouh teh a bankhai, hahoi Akhish koe a cei awh.

<sup>10</sup> Akhish ni, sahnin nâlaenaw maw na tuk awh telah atipouh. Devit ni, Judah akalah, Jerahmeel taminaw, akalae ram hoi Kennaw akalae ramnaw doeh atipouh.

<sup>11</sup> Filistin ram ao nah yunglam, Devit ni hettelah pou a sak tet langvaih a titeh, Devit ni napui tongpa Gath kho ceikhai hanelah hlung boihoeh.

<sup>12</sup> Akhish ni, Devit ni dei e hah a yuem teh, a tami Isarelnaw abuemlah hoi ama kapanuekkung lah a coung sak. Hatdawkvah, kai koe ka san lah pou na o han atipouh.

## 28

<sup>1</sup> Hate tueng dawk Filistinnaw ni a ransanaw hah Isarelnaw tuk hanelah a pâkhueng. Akhish ni Devit koe vah nama hoi na taminaw hah ransanaw koe cei van han tie hah kamcengcalah panuek atipouh. <sup>2</sup> Devit ni Akhish koe vah a san ni bangmaw a sak thai tie hah panuek atipouh. Akhish ni Devit koe vah, hatdawkvah ka tengo lah na ta han atipouh.

### *Sawl ni khueyue hoi a kamyawng*

<sup>3</sup> Samuel teh a due toung dawkvah, Isarelnaw pueng ni a khuika awh teh, amae kho Ramah vah a pakawp awh toe. Sawl ni khueyue hoi



tonghmanaw pueng hai a ram thung hoi kOUNG a pâlei toe. <sup>4</sup> Filistinnaw teh a kamkhueng awh teh Shunem kho vah a tungpup awh. Sawl ni Isarelnaw a pâkhueng teh Gilboa khovah a tungpup awh. <sup>5</sup> Sawl ni Filistin ransanaw a hmu toteh a taki dawkvah, puenghoi a lung thung a pâyaw. <sup>6</sup> Sawl ni BAWIPA a pacei navah, BAWIPA ni a mang hoi hai, Urim hoi hai, profet hoi hai pato hoeh toe. <sup>7</sup> Sawl ni a sannaw koe khueyue koe pouknae kahei thai nahanlah na tawng pouh awh atipouh. A sannaw ni khenhaw! Endor kho vah khueyue napui buet touh ao kaima atipouh awh. <sup>8</sup> Sawl teh a mei loukcalah a kamthoup teh, khohna alouke a kho teh alouke tami kahni touh hoi tangminlah hote napui koe a cei teh, na kamyawngkhai e kahrai kângue lahoi kai ni ka dei hane tami hah na kaw pouh haw atipouh. <sup>9</sup> Napui ni khenhaw. Sawl ni a sak e na panue. A ram thung e khueyue hoi tonghma pueng hah kOUNG a raphoe toe. Bangkongmaw ka due nahanelah kahringnae karap na patung atipouh.

<sup>10</sup> Sawl ni BAWIPA min thoebo laihoi, BAWIPA a hring e patetlah hete hno kecu dawK maw nang dawK reknae phat mahoeH telah ahni koe lawk a kam.

<sup>11</sup> Napui ni apimaw na kaw pouh han telah a pacei. Ahni ni Samuel na kaw pouh haw atipouh.

<sup>12</sup> Napui ni Samuel a hmu navah kacaipounglah a hram. Napui ni Sawl koe bangkongmaw na dum. Nang teh Sawl nahoeHmaw atipouh.

<sup>13</sup> Siangpahrang ni napui koevah, taket hanh, bangmaw na hmu atipouh. Napui ni talai thung hoi muitha buet touh a tâco e ka hmu atipouh.

<sup>14</sup> Ahni ni napui koevah Bangpatete a meilam lah maw ao atipouh. Napui ni tongpa matawng pOUNG e a tâco teh angkidung a kho atipouh. Sawl ni Samuel doeh tie a panue teh talai dawK a tabo.

<sup>15</sup> Hahoi Samuel ni Sawl koevah, bang kecu dawK maw kai hah runae na poe atipouh. Sawl ni ka kângai hroung a ru dawK doeh. Bangkongtetpawiteh, Filistinnaw ni na tuk teh Cathut ni na ceitakhai toe. Profet lahoi hai mang lahoi hai na pato hoeh toe. Hatdawkvah, ka tawK hane na ka dei pouh hanelah, na kaw e doeh atipouh.

<sup>16</sup> Samuel ni BAWIPA ni hnamthun takhai teh na taran lah a cOUNG toe tie hah na panue nalaihoi bangkongmaw lawk na pacei.

<sup>17</sup> Kai hno lahoi lawk ouk a dei e patetlah BAWIPA ni nang dawkvah a sak toe. Uknaeram teh BAWIPA ni na kut dawK e na lawp teh na imri Devit koe roeroe a poe toe.

<sup>18</sup> BAWIPA e lawk na ngâi hoeh dawkvah, Amaleknaw dawK puenghoi a lungkhuek e patetlah na sak hoeh kecu dawK atu nang dawK hete hno heh a pha toe.

<sup>19</sup> Hathloilah, BAWIPA ni nang hoi Isarelnaw hai Filistinnaw e kut dawK na poe awh han. Hahoi tangtho vah nama hoi na capa teh kai koe na o roi han. BAWIPA ni Isarel ransanaw hai Filistinnaw e kut dawK a poe awh han atipouh. <sup>20</sup> Hottelah Samuel ni a dei e lawk hah Sawl ni a takipOUNG teh, talai dawK a rawp, a thayung khoeroe aww hoeh, karum khodai banghai catnet hoeh. <sup>21</sup> Napui teh Sawl koe a cei teh, kângai hroung ka ru pOUNG lah ao e hah a panue dawkvah, khenhaw! na san ni na dei e hah ka yuem teh due hai due tihoi kai koe na dei e hah ka tarawi toe. <sup>22</sup> Hatdawkvah, nang ni hai na sannu ni a dei e hah tarawi van haw, bu youn touh na poe han, na ban navah na thayung bet ao nahanelah na ca han atipouh. <sup>23</sup> Hateiteh, ka cat mahoeH ati. A sannaw ni napui hoi ngangngang a pasawt awh teh ahnimae lawk hah a tarawi pouh dawkvah a thaw teh



ikhun dawk a tahung. <sup>24</sup> Hahoi napui ni maitotan ka thaw poung e a tawn e hah karanglah a thei pouh teh, favai hoi kanaw koe a tawn phuen hoe h e vaiyei a sak. <sup>25</sup> Hottelah Sawl hoi a sannaw e a hmalah a pátoum pouh teh a ca awh. Hahoi a thaw awh teh tangminlah a cei awh.

## 29

### *Filistinnaw ni Devit ngai awh hoe h*

<sup>1</sup> Hot patetlah Filistinnaw ni a ransanaw hah Aphek kho a pàkhueng. Hahoi Isarelnaw Jezreel vah kaawm e tuikhu koe a tungpup awh. <sup>2</sup> Filistin bawinaw teh, a cum lahoi a thong lahoi a cei parai teh, Devit hoi a taminaw teh Akhish hoi a hnuklah a tho awh. <sup>3</sup> Hot patetlah Filistin bawinaw ni hete Hebru taminaw ni bangmaw a sak awh telah ati. Akhish ni Filistin bawinaw koe vah, hete Devit Isarel siangpahrang Sawl e a san, kasawlah kai koe ao toe, kai koe a poung hnin hoi sahnin totouh a yonnae ka hmawt hoe h telah atipouh. <sup>4</sup> Hatei Filistin bawinaw ni ahni dawk a lungphuen awh teh, hote tami teh hmu en na poe e koe koug ban sak. Taran tuk nah maimouh koe tho nahanh seh, telah hoe hpawiteh, taran tuknae koe tarannaw koelah kambawng vaiteh, maimae taminaw lûkalatkung lah awm payon vaih, a bawipa hoi bout kâpo roi vaih. <sup>5</sup> Hete Devit nahoe hmaw, lam laihoi, Sawl thong touh thong touh, Devit thong hra, thong hra titeh ahni hah la lah a sak awh e hah ati awh.

<sup>6</sup> Hat tore i teh, Akhish ni Devit teh ama koe a kaw teh, BAWIPA a hring e patetlah tamikalan lah na o tangngak, ransa thung hoi kai koe na tho na cei e ka hmu navah ahawi toungloug. Kai koe na tho hoi sahnin totouh nang koe hawioehnae bangcahai ka hmawt hoe h. Hatei, bawinaw ni na kângue awh hoe h. <sup>7</sup> Hatdawkvah, bawinaw ni a lungkuep nahanlah ban nateh lungkuepcalah ban lawih atipouh. <sup>8</sup> Devit ni, Akhish koe vah, telah pawiteh bang hno maw ouk ka sak. Nang koe ka o yunglam sahnin totouh ka bawipa ka bawi poung taran hah tuk laipalah ka ban nahane hah na sannaw koe bangmaw a panue awh e kaawm telah atipouh. <sup>9</sup> Akhish ni Devit ma koe, ka mithmu teh Cathut kalvantami patetlah na hawi. Hatei, Filistin bawinaw ni taran tuknae koe kaimouh koe cet hanh naseh ati awh dawk doeh.

<sup>10</sup> Hatdawkvah, nang koe ka cet e na bawipa sannaw hoiyah amom vah thaw awh. Amom vah na thaw awh teh, khodai tahma vah na cettakhai awh lawih telah atipouh.

<sup>11</sup> Hahoi teh Devit hoi a taminaw hah Filistin ram vah amom ban hanelah palang a thaw awh teh, Filistinnaw teh Jezreel lah a takhang awh.

## 30

### *Devit hoi Amaleknaw rahak runae*

<sup>1</sup> Hnin thum touh a loum hnukkhu, Devit hoi a taminaw teh Ziklag kho a pha awh navah, Amaleknaw ni akalae ram hoi Ziklag kho hah a tuk awh. Ziklag kho a thei awh teh, hmai yo la a sawi awh toe. <sup>2</sup> Kho thung kaawm e napui camo matawng buet touh hai thet laipalah san lah koug a hrawi awh toe. <sup>3</sup> Devit hoi a taminaw teh hote kho dawk a pha awh navah, khenhaw! kho hmai a sawi awh teh, a yunaw, a canu capanaw hai san lah koug a ceikhai awh toe ti e a hmu navah, <sup>4</sup> thouk a ka awh teh tha baw ditouh thouk a ka awh. <sup>5</sup> Devit e yu roi, Jezreel tami



Ahinoam hoi Karmel tami Nabal yu Abigail hai a ceikhai awh toe. <sup>6</sup> Devit teh puenghoi a lungrei a thai. Taminaw hai a lungrei a thai awh teh, Devit hah talung hoi dei hanelah a dei awh. Hatei, Devit teh BAWIPA doeh a kâuep. <sup>7</sup> Devit ni Ahimelek capa vaihma Abiathar koe Ephod hah pahren lahoi na lat pouh haw atipouh. Abiathar ni Ephod hah Devit koe a thokhai. <sup>8</sup> Devit ni ahnimanaw hah ka pâlei awh pawiteh, ka pha awh han vaimoe telah BAWIPA koe a pacei. Ahni ni pâlei loe na pha mingming han, abuemlahoi kOUNg na rungngang han doeh atipouh. <sup>9</sup> Hatdawkvah, Devit hoi a taminaw 600 touh ni a cei awh teh, Besor palang a pha awh navah, a tangawn teh hawvah a la o awh.

<sup>10</sup> Devit hoi tami 400 touh ni a pâlei awh.

<sup>11</sup> Hahoi a yon dawK Izip tami buet touh a hmu awh teh, Devit koe a thokhai awh. Vaiyei a poe awh teh a ca, tui hai a nei sak awh.

<sup>12</sup> Hahoi thaibunglung paw phen buet touh, misurpaw phen kahni touh a poe awh. Ahni ni a ca teh a tha bout ao. Hnin thum touh thung catnet laipalah kahai lah ao toe.

<sup>13</sup> Devit ni ahni koe nang teh api hoi maw na kâkuet, nâhoi maw na tho telah a pacei. Ahni ni kai teh, Amaleknaw koe san lah kaawm e Izip tami doeh, hnin thum touh hoehnahlan ka pataw dawkvah, ka bawipa ni na cei takhai.

<sup>14</sup> Khereth ram akalah Judah ram akalah, Kalep ram akalah ka tuk awh teh, Ziklag kho hah hmai ka sawi awh toe.

<sup>15</sup> Devit ni ahnimanaw onae koe lam na patue thai han maw atipouh navah, ahni ni kai hah na thei hoe hah nahan ka bawipa koe na poe hoe nahan, Cathut koe lawkkam hoi thoekâbo ei, hat pawiteh doeh ahnimouh onae koe lam na patue han ati e patetlah Devit ni thoe a kâbo.

<sup>16</sup> Hote camo ni lamthung a patue teh hawvah Devit a pha navah, ahnimanaw teh Filistin ram hoi Judah ram e hnopainaw dawkvah a canei awh teh a lamtu awh teh, talai dawK a kâyat awh.

<sup>17</sup> Devit ni tangmin hoi a tangtho tangmin totouh a thei teh, kalauk hoi ka yawng e thoundoun 400 touh hloilah tami buet touh hai hlout hoe h.

<sup>18</sup> Ameleknaw ni a lawp e pueng Devit ni bout a la teh, a yu roi hoi bout a hloutkhai.

<sup>19</sup> Tami kacue kanaw canu capa hnopai lawp lah kaawm e pueng buet touh boehai pek laipalah, Devit ni kOUNg bout a la. <sup>20</sup> Hahoi Devit ni tuhu hoi maitohu naw hah a la teh, saring alouknaw hmalah a khoun teh, hetnaw teh Devit doeh ati awh. <sup>21</sup> Hahoi tami 200 touh a tâwn awh teh, Devit hnuk a kâbang thai awh hoe hah dawkvah, Besor palang vah ao saknae koe Devit teh bout a pha. Ahnimouh teh Devit hoi a thokhaienaw dawn hanelah a tâco awh. Devit ahnimouh koe a pha toteh kut a man awh. <sup>22</sup> Hatnavah, Devit hoi rei ka cet e taminaw thung dawK e tamikathoutnaw ni, ahnimouh teh maimouh hoi rei a cei awh van hoe hah dawkvah, maimouh ni pang awh e hnopai thung dawK, amamae yuca hloilah bang hno hai poe mahoe h. Amamae yucanaw hah lat awh nateh, cet awh naseh atipouh awh. <sup>23</sup> Devit ni hmaunawngghanaw, maimouh ni tuk awh e naw hah maimae kut dawK na ka poe e BAWIPA ni na poe e hnopainaw hah hottelah tet awh hanh. <sup>24</sup> Hete hno dawK nangmae lawK hah apinimaw a tarawi han. Taran tuknae koe ka cet e ni a pang e patetlah hnopai karingkungnaw ni hai pang vah naseh. Suekâvan lah reirei pang van naseh telah a ti. <sup>25</sup> Hat hnin hoayah Isarel miphunaw hanelah, hottelah e phunglam hoi kâlawk teh a sak awh. <sup>26</sup> Devit ni Ziklag kho bout a pha toteh, hetheth



BAWIPA e taran kut dawk hoi e hnonaw doeh. Poehno lah na patawn awh telah lawk a thui teh, <sup>27</sup> Bethel kaawmnaw, Ramoth akalah kaawmnaw, Jattir kaawmnaw, <sup>28</sup> Aroer kaawmnaw, Siphmoth kaawmnaw, Eshtemoa kaawmnaw, <sup>29</sup> Rekal kaawmnaw, Jerahmeel kaawmnaw, Ken kaawmnaw, <sup>30</sup> Hormah kaawmnaw, Khorshan kaawmnaw, Atha kaawmnaw, <sup>31</sup> Hebron kaawmnaw, Devit hoi a taminaw khosaknae koe kaawmnaw abuemlah Judah a hui kacuenaw koe a patawn.

## 31

<sup>1</sup> Hot patetlah Filistinnaw ni Isarelnaw hah a tuk awh teh, Isarelnaw teh Filistinnaw hmalah a yawng awh teh, Gilboa mon vah a thei awh. <sup>2</sup> Filistin taminaw ni Sawl hoi a capa hah poe a pâlei awh teh, Sawl capa Jonathan hoi Abinadab hoi Malkhishua hah a thei awh. <sup>3</sup> Sawl hah pueng hoi rek a saueng awh teh, pala kapatuemnaw ni a ma hah rek a pha awh teh, hmâ puenghoi a ca sak awh. <sup>4</sup> Hot patetlah Sawl ni amae senehmaica ka sin koe, na tahloi hah rayu nateh, poukkayawng lah na thun leih. Hottelah na tet hoehpawiteh, vuensom ka a hoehnaw ni na pacekpahlek awh langvaih atipouh. Hatei, senehmaica ka sin e ni, thun ngai hoeh. Bangkongtetpawiteh, a taki poun. Hat toreih teh, Sawl ni a tahloi hah a la teh a tabo sin. <sup>5</sup> Hahoi senehmaica ka sin e tami ni Sawl a due e hah a hmu toteh, ahni ni hai a tahloi a tabo sin van teh, cungtalah a due roi. <sup>6</sup> Hot patetlah Sawl hoi a capa kathum touh hoi senehmaica ka sin e hoi a taminaw pueng hoi hot hnin roeroe vah a due awh. <sup>7</sup> Ravo namran lah kaawm e Isarelnaw hoi Jordan namran lah kaawmnaw ni Isarelnaw a sung awh toe tie hoi Sawl hoi a capanaw a due awh toe tie a thai awh toteh, kho a tâco takhai awh teh a yawng awh. Hahoi Filistinnaw ni rek ao sin awh. <sup>8</sup> Hahoi teh, Filistinnaw ni a thei awh nae tangtho vah, senehmaica ka sin e a cei sin awh navah, Sawl hoi a capa kathum touh Gilboa mon koe a due awh e hah a hmu awh. <sup>9</sup> A lû a tâtueng pouh teh senehmaica a rading pouh awh. A kamthaw nah meikaphawk bawknae bawkim tangkuem hoi taminaw pueng koe pathang hanelah Filistin ram pueng dawk a pathang awh.

<sup>10</sup> Hote senehmaica teh, Ashtaroth im vah a ta awh. A ro teh Bethshan kalupnae tapang dawk a vo awh.

<sup>11</sup> Jabesh Gilead vah kaawmnaw ni Filistinnaw ni Sawl ro dawk a sak awh e a hmu awh toteh,

<sup>12</sup> Tami tarankahawi poun ni a thaw teh, karum khodai a cei awh teh, Bethshan kalupnae tapang dawk e Sawl hoi a capanaw ro hah a la awh. Jabesh a pha awh toteh, hawvah a pâeng awh.

<sup>13</sup> A hru hah a la awh teh, Jabesh e bengkeng thing rahim vah a pakawp awh teh hnin sari touh rawca a hai awh.



## 2 SAMUEL

### (The Second Book of Samuel)

#### *Sawl duenae*

<sup>1</sup> Sawl a due hnukkhu, Devit teh Amaleknaw a theinae koehoi a ban teh, Ziklag kho hnin hni touh ao. <sup>2</sup> A hnin thum hnin vah tami buet touh amae hni a ravei teh a lû dawkw vaiphu a kâphuen nalaihoi a tho. Devit koe a pha navah talai dawkw a tabo. <sup>3</sup> Devit ni vah nâ lahoi maw na tho telah a pacei. Ahni ni Isarelnaw e tumpupnae koehoi ka yawng telah ati.

<sup>4</sup> Devit ni hethenh bang e hno nama, dei haw atipouh. Ahni ni Isarelnaw teh, tarantuknae hmuén koehoi taminaw a yawng awh teh, tami moikapap a due. Sawl hoi a capa Jonathan hai a due toe telah bout a dei pouh.

<sup>5</sup> Devit ni kadeikung thoundoun koe, bangtelah hoi maw Sawl hoi a capa Jonathan a due tie na panue telah atipouh.

<sup>6</sup> Hote thoundoun ni, kai teh Gilead mon dawkw ka pha navah, Sawl ni a tahroe a vaiteh leng hoi marangransanaw ni rek a pâlei awh. <sup>7</sup> Sawl ni hnukkhu lah a khet navah kai hah na hmu teh na kaw. <sup>8</sup> Kai ni vah, ka o ka ti pouh. Nang hah apimaw telah na pacei. Kai teh, Amalek tami doeh telah bout ka ti pouh.

<sup>9</sup> Sawl ni kai koe tho nateh, kai na thet leih, kai ka due thai hoeh dawkvah, puenghoi patawnae ka khang telah ati e patetlah. <sup>10</sup> Ahni koe ka kangdue teh ka thei. Bangkongtetpawiteh, hottelah a rawp toung dawkvah hring mahoehtoe tie ka panue. A lû dawkw kâmw e bawilakhung hoi a kut dawkw a buet e cawce hah ka rading pouh teh, ka bawipa koevah ka sin telah a dei.

<sup>11</sup> Devit ni ahni hah a ravei, hot patetlah a taminaw ni lengkaleng a sak van awh. <sup>12</sup> Sawl hoi a capa Jonathan Bawipa e taminaw hoi Isarel imthungnaw ni, tahloi hoi a due dawkvah ahni hanlah tangmin totouh a khuika awh teh rawca a hai awh.

<sup>13</sup> Hote kamthang ka dei e thoundoun koe Devit ni, nang teh nâ lahoi maw na tho telah a pacei. Kai teh Jentel miphun Amelek tami doeh telah a dei. <sup>14</sup> Devit ni ahni koe, BAWIPA ni satui awi e thei hanelah bangkong maw na kut na pho. <sup>15</sup> Hahoi, Devit ni thoundoun buet touh a kaw teh, ahni hah thet lawih atipouh e patetlah thoundoun teh a thei.

<sup>16</sup> Devit ni na thipaling teh nama e na lû van bawt naseh. Bangkongtetpawiteh, nama e na pahni roeroe hoi BAWIPA satui awi lah kaawm e ka thei na ti telah atipouh. <sup>17</sup> Devit ni Sawl hoi Jonathan hah a khui.

<sup>18</sup> Judahnaw koe a cangkhai hane lilava la tie hateh, Jashar e cauk dawkw thut e la hah doeh. <sup>19</sup> Isarel na bawilenna, na hmuén rasang dawkw, duenae na khang toe. Tami athakaawme taminaw hai a due awh toe.

<sup>20</sup> Gath vah pathang awh hanh. Askelon khopui e lam dawkw thaisak awh hanh. Filistin canunaw a lunghawi awh langvaih. Vuensom ka a hoeh e napuinaw ni a lunghawi awh langvaih tie ngaihri han ao. <sup>21</sup> Oe Gilboa monnaw, nangmae lathueng tadamtui hoi khotui bawt hanh naseh. Law ni thueng kawi e a pawhik tâcawt sak hanh naseh. Bangkongtetpawiteh, hote hmuén koe athakaawme ni a sin e saiphei, Sawl ni a sin e bahling, satui hoi hluh hoe e saiphei patetlah tâkhawng awh. <sup>22</sup> Thei e naw e thi koehoi, thaonae athâw koehoi, Jonathan e pala teh hnuklah bout ban hoeh. Sawl e tahloi hai ayawm lah ban hoeh. <sup>23</sup> Sawl hoi Jonathan teh



a hringnae ngai a tho, a due roi nahai kâkapek roi hoeh. Mataw hlak a hue a rang teh sendek hlak a tha ao roi. <sup>24</sup> Oe Isarel canunaw Sawl hah khui awh haw. Ngai kaawm e hni paling ka khohnat sak e, sui hoi talung aphu kaawm e hoi na ka pathoupkung doeh. <sup>25</sup> Taran kâtuknae koe athakaawme taminaw a due awh toe. Oe Jonathan nange karasangpoung e a hmuennaw dawk nang teh na due toe khe. <sup>26</sup> Ka nawnggha Jonathan nang dawk ka kângairu. Nang teh ka hui kahawipoung lah na o teh, kai na lungpatawnae teh kângairu, napuinaw lungpataw e a cei takhai. <sup>27</sup> Thakaawmnaw hai a due awh toe. Tarantuknae senehmaicanaw hoi kOUNg a kahma toe.

## 2

### *Devit satui awinae*

<sup>1</sup> Hotnaw hnukkhu hoi Devit ni BAWIPA hah a pacei. Judah ram kho buetbuet touh dawk ka cei han maw telah ati. BAWIPA ni cet loe atipouh. Devit ni nâ lah maw ka cei han atipouh. Hebron kho lah atipouh. <sup>2</sup> Devit e a yu roi Jezreel kho e Ahinoam hoi Karmel tami Nabal e a yu Abigail hoi a cei awh. <sup>3</sup> Ama koe kaawm e taminaw, imthungnaw hai Devit ni a kaw teh ahnimanaw teh, Hebron khonaw dawk kho a sak awh. <sup>4</sup> Judah taminaw a tho awh teh, Devit hah siangpahrang hanelah satui a awi awh. Ahnimouh ni Devit koe, Sawl ka pakawm naw hah Jabesh Gilead taminaw doeh telah a dei pouh awh.

<sup>5</sup> Hatdawkvah Jabesh Gilead taminaw koe Devit ni patounenaw a patoun teh, ahnimouh koevah nangmae bawipa Sawl dawk na lungmanae kamnue sak awh teh, na pakawp awh dawkvah BAWIPA ni yawhawinae na poe awh naseh. <sup>6</sup> BAWIPA ni a lungmanae hoi a hawinae nangmouh dawk kamnuek sak naseh. Hete hno na sak awh dawkvah na lungmanae kai ni na patho awh han. <sup>7</sup> Atuvah, tha kâlat awh nateh, taranhawi awh, nangmae bawi Sawl teh a due toe. Judah imthungnaw ni a siangpahrang lah ka o hanelah satui na awi awh toe telah a ti.

### *Ishbosheth Isarel Siangpahrang lah o*

<sup>8</sup> Sawl e ransabawi Ner capa Abner ni Sawl e capa Ishbosheth hah Mahanaim kho lah a ceikhai. <sup>9</sup> Gilead ram Ashurnaw Jezreel khocanaw Ephraim ram, Benjamin hoi Isarelnaw pueng e lathueng vah siangpahrang hmuen koe a hruek awh. <sup>10</sup> Sawl capa Ishbosheth teh Isarelnaw uknae a kamtawng navah, kum 40 touh a pha. Kum hni touh a uk. Judahnaw ni dueng Devit e hnuk a kâbang awh. <sup>11</sup> Hebron vah Devit ao teh Judah phun a uknae kum teh kum 7 touh hoi thapa yung 6 touh doeh.

### *Isarel hoi Judah a kâtuk*

<sup>12</sup> Ner capa Abner hoi Sawl capa Ishbosheth e a san hah Mahanaim hoi Gibeon kho koe lah a cei. <sup>13</sup> Zeruiah capa Joab hoi Devit e sannaw a tâco awh teh, Gibeon tuikamuem koevah, a kâhmo awh, rek kadangka lah a tahung awh.

<sup>14</sup> Abner ni Joab koevah thoundounnaw hah ka hmalah tâcawt awh naseh, ka hmalah kâhmo awh naseh. Joab ni tâcawt awh naseh telah a ti.

<sup>15</sup> Sawl e capa Ishbosheth e tami Benjamin phun 12 touh hoi Devit e san 12 touh teh a thaw awh teh a cei awh. <sup>16</sup> A tarannaw e lû dawk lengkaleng a kâkuet awh teh a na dawk tahloi hoi a kâthut awh teh kOUNg



a rawp awh. Hatdawkvah Gibeon vah kaawm e naw ni haw e hmuen teh Helkathhazzurim (tahloi hruepatue hmuen) telah ati awh.

<sup>17</sup> Hote hnin daw kâtheinae a patawpoung. Abner hoi Isarelnaw Devit e a sannaw hmalah a sung awh. <sup>18</sup> Hawvah Zeruiah capa Joab hoi Abisai hoi Asahel hai ao. Asahel teh sayuk patetlah a hue a rang. <sup>19</sup> Asahel ni Abner hah avoilah aranglah phen laipalah a pâlei. <sup>20</sup> Abner ni a kamlang sin teh, nang hah namaw Asahel telah ati. Ahni ni oe kai doeh telah atipouh. <sup>21</sup> Abner ni ahni koevah, avoilah aranglah phen haw, thoundoun buetbuet touh e puengcang hah lat pouh telah ati. Hatei Asahel ni ama a pâlei e hah phen takhai han ngai hoeh. <sup>22</sup> Abner ni Asahel koevah na phen takhai lei bang kecu daw k maw talai daw rep ka tabaw k lah na thut han. Na hmaunawng ha Joab mei ka hmu ngam han namaw telah bout atipouh.

<sup>23</sup> Hatei Asahel ni lawk ngai pouh hoeh dawkvah, Abner ni tahroe hoi a von koehoi a thut teh a hnukthun lah tahroehmo pawk a yawng teh, hote hmuen koe a rawp teh a due. Asahel a rawp teh a duenae hmuen koe ka tho pueng ni ouk a kangdue awh. <sup>24</sup> Joab hoi Abisai ni Abner hah pou a pâlei roi, Gibeon ram thung e lam teng Giah teng e Ammah mon koe a pha nah kanî a khup .

<sup>25</sup> Benjaminaw teh, Abner koe a kamkhueng awh teh, ahu buet touh lah ao awh teh mon daw k a kangdue awh. <sup>26</sup> Abner ni, Joab a hram sin teh, tahloi ni pou na bouk han namaw apoutnae daw k kâhat han tie na panuek hoeh maw. Bangkongmaw taminaw hah a hmaunawng ha ni a pâleinae koehoi, ban hanelah dei pouh laipalah na o han atipouh.

<sup>27</sup> Joab ni Cathut a hring e patetlah dei laipalah awm haw, atangtho ditouh ka taminaw ni na pâlei awh han rah atipouh.

<sup>28</sup> Joab ni mongka a ueng teh, taminaw a kangdue awh. Isarelnaw pâlei awh hoeh. Tuk awh hoeh toe. <sup>29</sup> Abner hoi a taminaw teh karum tuettuet ayawn daw k a cei awh teh, Jordan tui a raka awh hnukkhu Bithron ram a tapuet awh teh Mahanaim a pha awh.

<sup>30</sup> Joab teh Abner a pâleinae koehoi a ban teh, taminaw a pâkhueng navah, Devit hoi Asahel e taminaw 19 touh awm hoeh, a due awh toe. <sup>31</sup> Hatei teh Devit e taminaw ni Benjaminaw hoi Abner taminaw 360 touh a thei awh. <sup>32</sup> Asahel e a ro a la awh teh Bethlehem e a na pa e tangkom daw k a pakawp awh. Joab hoi a taminaw karum tuettuet a cei awh teh khodai nah Hebron vah a pha awh.

### 3

#### *Devit e capanaw*

<sup>1</sup> Sawl imthung hoi Devit imthung hah atueng moi kasawlah a kâtuk awh. Devit imthung hoehoe a thao awh. Sawl imthung teh hoehoe a tha ayoun awh. <sup>2</sup> Devit ni Hebron kho vah capa a tawn. Camin Amnon, Jezreel tami Ahinoam koehoi e doeh. <sup>3</sup> Apâhni e teh, Khileab, Karmel tami Nabal e yu Abigail koehoi e doeh. Apâthum e teh Absalom, Geshur siangpahrang Talmai canu Maakah capa doeh. <sup>4</sup> Apali e teh, Adonijah Haggith capa doeh. Apanga e teh, Shephatiah, Abital capa doeh. <sup>5</sup> Ataruk e teh, Ithream Devit e yu Eglah koehoi e doeh. Hetnaw teh Devit capanaw Hebron kho daw k a khe e naw doeh.

#### *Abner Devit koe lah a kampang*

<sup>6</sup> Sawl imthung hoi Devit imthung a kâtuk awh navah, Abner teh Sawl imthung koe lah a tha pou a sai. <sup>7</sup> Sawl ni ado a tawn, A min teh Rizpah,



Aiah canu doeh. Ishbosheth ni Abner koevah bangkong apa e ado koe na kâen telah atipouh.

<sup>8</sup> Ishbosheth lawk a dei e ni Abner hah a lung puenghoi a khuek sak. Judah taminaw e ui e lû namaw, sahnin ditouh na pa Sawl imthungnaw hoi a hmaunawngaha hoi a huikonaw koe lungmanae kamnue sak e lahoi Devit e kut dawkh ka poe awh hoeh. Nang ni hete napui kong dawkh yonnae ka sak e patetlah na pouk. <sup>9</sup> Sawl imthung dawkh hoi uknae la pouh han Isarel hoi Judah lathueng vah Dan hoi Beersheba to touh. <sup>10</sup> Devit e bawitungkhung kangdwe sak hanelah BAWIPA ni Devit koe lawk a kam e patetlah ka sak hoehpawiteh, Cathut ni Abner heh a ngainae patetlah sak naseh, hothlak kapap lahai sak naseh.

<sup>11</sup> Abner hah a taki toung dawkvah Ishbosheth lawkkam touh boehai pathung hoeh. <sup>12</sup> Abner ni amae yueng lah Devit koe patounenaw a patoun teh hete ram heh apie maw kai koe lawkkamnae sak haw. Isarelnaw nang koe lah kampang hanelah, ka kut heh nang koe lah a kampang han telah a ti.

<sup>13</sup> Devit ni ahawi nang koe lawkkamnae ka sak han. Hateiteh hno buet touh ka hei han. Kai na kâhmo hanelah na tho navah, Sawl canu Mikhal na thokhai hoehpawiteh, ka mei na hmawt mahoe telah a ti.

<sup>14</sup> Devit ni Sawl e capa Ishbosheth koevah Filistin tami vuensom 100 touh hoi ka ran e ka yu Mikhal hah na poe telah patounenaw a patoun. <sup>15</sup> Ishbosheth ni tami a patoun teh, a vâ Laish capa Paltiel kut dawkh e a thokhai. <sup>16</sup> A vâ teh a kâ laihoi a cei teh, Bahurim kho totouh a kâbang. Abner ni ahni koe cet nateh ban lawih telah atipouh teh a ban. <sup>17</sup> Abner ni Isarel kacuenaw a pâkhueng teh, ahnimouh koe, hah hoehnahan teh Devit heh siangpahrang lah na ngai awh e doeh. <sup>18</sup> Atuvah tawmrasang awh leih. Bangkongtetpawiteh, BAWIPA ni Devit kong dawkh ka san Devit kut dawkh hoi ka tami Isarel hah Filistinnaw kut dawkh hoi na rungngang han telah a dei atipouh. <sup>19</sup> Abner ni Benjamin taminaw a thainae koehai a dei. Hottelah Abner ni Isarel taminaw hoi Benjamin imthungnaw ni ahawi ati awh e pueng Hebron vah Devit koe dei pouh hanelah a cei awh. <sup>20</sup> Abner ni tami 20 touh hoi Devit aonae koe Hebron kho lah a cei teh, Devit ni roipu a sak teh, Abner hoi a taminaw a ca sak. <sup>21</sup> Abner ni Devit koevah, kathâw vaiteh, nang koe lawkkamnae a sak thai awh nahane hoi na pouknae patetlah lawk ka ceng thai nahan, Isarelnaw pueng ka bawipa koe pâkhueng hanelah, ka cei han telah ati. Devit ni Abner a patoun teh duem a cei.

### *Joab ni Abner a thei*

<sup>22</sup> Hatnavah, Joab hoi Devit e a sannaw teh taran a pâleinae koehoi a ban awh teh, hnopai moi a sin awh. Abner teh Devit hoi Hebron kho dawkh rei awm roi hoeh. Devit ni a patoun toung dawkvah karoumcalah a cei. <sup>23</sup> Joab hoi ama koe kaawm e taminaw pha awh navah, Ner capa Abner hah, siangpahrang koe a tho teh, ahni ni a ban sak toung dawkvah karoumcalah a cei telah Joab koe a dei pouh han. <sup>24</sup> Joab teh Siangpahrang koe a kâen teh, bawipa, bangtelamaw na sak e hah kenhaw! Abner teh nang koe tho teh, bangkongmaw yout na cei sak. <sup>25</sup> Ner capa Abner teh na panue, nang dum hanelah, na tâco na kâen, na sak e pueng panue han a ngai dawkh ka tho e doeh telah a ti. <sup>26</sup> Devit koehoi Joab a tâco navah, Abner hah pâlei hanelah patounenaw a patoun. Sirah tuikhu koehoi bout a bankhai. Hatei teh Devit panuek hoeh. <sup>27</sup> Abner ni Hebron kho a pha



navah, Joab ni rapan longkha koe arulahoi lawk kâpan hanelah a ceikhai teh a hmaunawngnga Asahel thi a palawngnae koe a von daw k a thut teh a due. <sup>28</sup> Hathnukkhu, Devit ni a thai navah, Ner capa Abner thi palawngnae kong daw k kai hoi ka uknaeram teh, BAWIPA hmalah pou ka kamthoung han. <sup>29</sup> Joab hoi a na pa imthungnaw e lû daw k bawt na seh, Joab imthung daw k thihnaipatawnae, hrikbei, hnamkhun, tahloi hoi duenae, takangnae pout hanh naseh, telah a ti. <sup>30</sup> Hottelah, Joab hoi a nawngnga Abisai ni Abner hah a thei van, bangkongtetpawiteh, Asahel hah Gibeon kâtuknae koe a thei daw k vah.

### *Abner daw k Devit a kângai kâthungnae*

<sup>31</sup> Devit ni hai Joab hoi ama koe kaawmnaw koe na hni hah ravek awh nateh Buri kâkhu awh. Abner hanelah khuikanae sak awh atipouh teh, Devit ni ro hah a kâbang sin. <sup>32</sup> Abner teh Hebron vah a pakawp awh teh, siangpahrang hoi taminaw teh Abner phuen koe a ka awh. <sup>33</sup> Siangpahrang Abner a ka khai awh teh, Abner teh tamipathu due la maw a due han. <sup>34</sup> Na kut hai katek hoe h, na khok hai hlong buet hoe h. Tamikapo kut daw k hoi kadout e patetlah duenae na tawng toe telah ati. Taminaw hai bout a kâ awh. <sup>35</sup> Khohmo hoe hnahlan Devit teh rawca ca sak hanelah taminaw a tho awh. Hatei Devit ni kanî a khup hoe hnahlan rawca thoseh, alouknaw hai thoseh ka cat pawiteh, Cathut ni a ngai e patetlah na tet naseh, hothlak kapap lahai na sak naseh telah thoe a kâbo. <sup>36</sup> Hote hah taminaw ni a thai toteh, a lunghawi awh. Siangpahrang ni a sak e pueng taminaw ni a ngai awh teh a lunghawi sak awh. <sup>37</sup> Bangkongtetpawiteh, tamihi hoi Isarelnaw pueng ni hat hnin vah Ner capa Abner thei e hah siangpahrang khokhangnae nahoe h tie a panue awh. <sup>38</sup> Siangpahrang ni a taminaw koe sahnin vah Isarelnaw daw k bawi hoi tami kalen a due tie na panuek awh hoe h maw. <sup>39</sup> Kai teh satuî awi e lah ka o eiteh, sahnin ka tha ayoun. Zeruiah capa lah kaawm e hetnaw teh kai hlak a thao awh. Ka hawihoeh e patetlah BAWIPA ni pathung naseh telah a ti.

## 4

### *Ishbosheth theinae*

<sup>1</sup> Sawl e capa Ishbosheth ni Hebron vah Abner a due tie a thai navah, a tha a youn. Isarelnaw pueng a puen awh teh kângairu awh. <sup>2</sup> Sawl capa Ishbosheth ni ransanaw kaukkung kahni touh a tawn teh, buet touh e min teh Baanah, alouke buet touh e min teh Rekhah doeh. Benjamin capa Beeroth tami Rimmon capa doeh. Bangkongtetpawiteh, Beeroth teh Benjamin ram e lah a pouk awh. <sup>3</sup> Beerothnaw teh Gittaim vah a yawng awh teh, atu sittouh haw vah ao awh.

<sup>4</sup> Sawl capa Jonathan ni capa khokkhem a tawn teh, kum 5 a pha navah Jezreel kho lahoi Sawl hoi Jonathan e kamthang a thai navah, ka kheyawn e ni a tawm teh a yawngkhai navah, karanglah a yawng dawkvah, camo hah a bo teh a khokkhem. Hote camo min teh Mephibosheth doeh. <sup>5</sup> Beeroth phun Rimon capa Rekhah hoi Baanah hah a cei roi teh, Ishbosheth im vah kanîthun vah a pha. Hatnae tueng daw k Ishbosheth teh ouk a i. <sup>6</sup> Haw e hmaunawngnga Rekhah hoi Baanah teh, cakang ka lat hane patetlah a kâsak roi teh im lungui a kâen roi. <sup>7</sup> A inae khan daw k a inae koe Ishbosheth e von daw k a thut, a lû a tâtueng roi teh, ayawn lam lahoi karum tuettuet a yawng roi teh a hlout roi. <sup>8</sup> Ishbosheth e a lû Hebron kho Devit koe a thokhai teh, siangpahrang koe vah khenhaw! hi



vah nang thei han ka kâcai e na taran Sawl capa Ishbosheth lû hei, Bawipa ni ka bawipa e moi, sahnin vah Sawl hoi a catoun koevah a pathung toe.

<sup>9</sup> Hatei, Devit ni Beeroth tami Rimmon capa Rekhav hoi a hmaunawngna Baanah koe kho pouk runae thung hoi na ka ratang e BAWIPA a hring e patetlah, <sup>10</sup> Kamthang kahawi ka phawt e lah pouk vaiteh, khenhaw! Sawl teh koe a due toe telah tami buet touh ni a dei. Ahni ka man teh Ziklag vah ka thei. Hothateh kamthang kahawi ka phawt e a tawkpheu lah ka poe e doeh. <sup>11</sup> Hot dueng nahoeah rah, tamikaponaw ni tamikalan hah a imthung e a inae koe thet pawiteh, hoe sak hane kawi nahoehmaw. Atu roeroe ahnie thi hah nangmouh dawh ka hei vaiteh nangmouh hah talai van hoi he pahma hanelah a kamcu nahoehmaw telah ati.

<sup>12</sup> Devit ni a thoundoun hah kâ a poe teh, a thei hnukkhu a kut a khok a tâtueng pouh. Hebron tui kamuem koe a bang awh. Ishbosheth e lû teh a la pouh teh, Hebron e Abner e tangkom koe a pakawp awh.

## 5

### *Devit ni Isarelnaw a uk*

<sup>1</sup> Isarel miphunnaw Hebron kho Devit aonae koe a tho awh. Kaimanaw hah na hru hoi na thitak katang doeh. <sup>2</sup> Ayan vah kaimae lathueng Sawl siangpahrang lah ao navah, Isarelnaw katâcawtkhaikung hoi kâenkhaikung lah ao. BAWIPA ni ka tami Isarelnaw na paca han, na uk han telah nang koe ati telah a ti. <sup>3</sup> Hatdawkvah, Isarel kacuenaw Hebron kho siangpahrang koevah a tho awh. Devit siangpahrang ni Hebron vah BAWIPA e hmalah ahnimouh hoi lawkkamnae ka sak. Devit teh Isarelnaw e siangpahrang lah satui a awi awh. <sup>4</sup> Devit ni uknae a kamtawng navah kum 30 a pha teh kum 40 touh a uk. <sup>5</sup> Hebron kho dawh ao teh, Judahnaw kum 7 thapa 6 touh a uk. Jerusalem vah Isarel hoi Judahnaw kum 33 a uk.

### *Jerusalem tânae*

<sup>6</sup> Siangpahrang ni a taminaw a kaw teh, hote ram dawh kho ka sak e Jebusit tami onae koe Jerusalem kho lah a cei awh. Ahnimanaw ni hete kho dawh na kâen awh mahoeah. Mitdawn hoi khokkhemnaw ni hai Devit teh hete kho thung kâen mahoeah, ahnimouh ni na ngang awh han telah ati awh.

<sup>7</sup> Hateiteh, Devit ni Devit khopui tie Zion rapanim a tuk teh a tâ. <sup>8</sup> Hote hnin dawh Devit ni, Devit hringnae ni a hmuhma e Jebusit tami mitdawn hoi khokkhem thei hanelah tui pat ka raka e ransa pueng teh ransabawinaw e lû lah ka o sak han, hatdawkvah mitdawn hoi khokkhemnaw teh im thung kâen mahoeah telah a ti.

<sup>9</sup> Devit teh rapanim dawh ao teh, Devit khopui telah min a phung. Millo hmuen a tengpam thoseh, a thung lahai thoseh a sak. <sup>10</sup> Hottelah hoi Devit teh hoe a rông teh ransahu BAWIPA Cathut hoi rei ao.

<sup>11</sup> Taire siangpahrang Hiram ni Devit koe patounenaw a patoun teh, Sidar thing, imsakkathoum, talungdêikathoum a patoun awh teh, Devit hane im a sak pouh awh. <sup>12</sup> BAWIPA ni Isarelnaw koe siangpahrang lah ahni teh a caksak e hoi, a tami Isarelnaw hanelah uknaeram a tawmrasang tie Devit ni a panue.

<sup>13</sup> Devit ni Hebron kho hoi a kampuen hnukkhu, Jerusalem kiothung e yu a puidonaw bout a la teh, a ca moikapap bout a tawn. <sup>14</sup> Jerusalem kho sak Devit ni a khe e a canaw e min teh: Shammua, Shobab, Nathan, Solomon, <sup>15</sup> Ibhar, Elishua, Nepheg, Japhia, <sup>16</sup> Elishama, Eliada hoi Eliphelet naw hah doeh.



### *Filistin tânae*

<sup>17</sup> Filistinnaw ni Devit hah Isarelnaw koe siangpahrang lah ao nahan satui a awi tie a panue awh navah, Filistinnaw pueng ni Devit tawng hanelah a cei awh. Devit ni hote hah a thai toteh rapanim dawkh hoi a kum. <sup>18</sup> Filistinnaw hai a cei awh teh, Rephaim yawn dawkh phang a kâkayei awh. <sup>19</sup> Devit ni Filistinnaw tuk hanelah ka cei han maw, ka kut dawkh na poe han maw telah BAWIPA a pacei. BAWIPA ni Devit koe, cet loe. Kai ni Filistinnaw na kut dawkh na poe han telah atipouh.

<sup>20</sup> Devit teh Baalperazim lah a cei teh, hawvah Devit ni ahnimouh a thei. BAWIPA ni, tui ni a raphoe e patetlah katarannaw hah ka hmaitung vah koug na raphoe pouh telah ati. Hatdawkvah, hote hmuen hah Baalperazim telah min a phung. <sup>21</sup> Hote hmuen koe Filistinnaw ni a ceitakhai e meikaphawknaw hah Devit hoi a taminaw ni koug a raphoe pouh.

<sup>22</sup> Filistinnaw bout a tho awh teh, Rephaim yawn dawkh phang a kâkayei awh. <sup>23</sup> Devit ni BAWIPA koe a pacei navah, ahni ni takhang awh hanh, a hnuk lahoi kalup awh nateh batue kahrawng koehoi rongyawn awh. <sup>24</sup> Batuekung koe a pawlawk na thai toteh tuk awh loe, bangkongtetpawiteh, Filistinnaw tuk hanelah na hmalah BAWIPA a la cei toe tinae doeh.

<sup>25</sup> BAWIPA ni kâlawk a poe e patetlah Devit ni a sak. Filistinnaw hah Geba hoi Gezer totouh a thei.

## 6

### *Jerusalem lah lawkkam thingkong a ceikhainae*

<sup>1</sup> Devit ni Isarelnaw thung dawkh hoi a rawi e 3,000 touh hah a pâkhueng.

<sup>2</sup> Devit ni a thaw teh, Judah ram e Baalejudah hoi Cherubim rahak kaawm e ransahu BAWIPA min lahoi kaw e Cathut e thingkong hah thokhai hanelah ama koe kaawmnaw hoi a cei awh. <sup>3</sup> Cathut e thingkong teh leng katha dawkh a hruek awh teh, mon e Abinadab im thung e a rasa awh. Abinadab capa Uzzah hoi Ahio ni leng katha a tanawt roi. <sup>4</sup> Uzzah teh Cathut e thingkong e ateng thoseh, Ahio teh thingkong hmalah thoseh a cei. <sup>5</sup> Devit hoi Isarelnaw teh ratoung, tamawi, tâbaw, vovit, cecak naw a sin awh teh, BAWIPA e hmalah thaothue hoi a tumkhawng awh.

<sup>6</sup> Nakhon hmuen a pha awh toteh, maito roi ni Cathut e thingkong a kâhuat sak dawkvah, Uzzah ni a kut hoi thingkong hah a kuet. <sup>7</sup> BAWIPA ni Uzzah koe a lungkhuek teh a payonnae kecu dawkh Cathut ni haw e hmuen koe a thei teh, Cathut e thingkong koevah a due. <sup>8</sup> Uzzah hah BAWIPA ni a thei dawkvah, Devit a lungkhuek teh hote hmuen teh Perez Uzzah telah ati, sahnin totouh a dei awh. <sup>9</sup> Hot hnin dawkvah, Devit ni BAWIPA a taki teh, bangtelamaw BAWIPA thingkong hah kai koe a pha thai han telah ati. <sup>10</sup> Devit ni BAWIPA thingkong teh, Devit kho dawkh hrueng laipalah Git tami Obed-Edom im vah a hruek. <sup>11</sup> BAWIPA thingkong teh Git tami Obed-Edom im vah thapa yung thum touh ao. Obed-Edom hoi a imthung pueng BAWIPA ni yawhawi a poe.

<sup>12</sup> Siangpahrang Devit koevah, Cathut thingkong lahoi Obededom imthung hoi a im hoi lawnaw pueng BAWIPA ni yawhawi a poe tie a dei pouh awh. Bout a cei teh Devit ni Cathut e thingkong hah Obededom im dawkh hoi Devit kho lah lunghawicalah hoi a sin. <sup>13</sup> BAWIPA e thingkong kahrawmnaw teh vai taruk touh a takan hnukkhu hoi, maitotan hoi kathâw e tu hoi thuengnae a sak awh. <sup>14</sup> Devit ni Ephod hah a kho



teh thaonae abuemlahoi BAWIPA hmalah a lam. <sup>15</sup> Hottelah Devit hoi Isarelnaw ni a hrawm awh. Mongka ueng laihoi, BAWIPA e thingkong hah a ceikhai awh. <sup>16</sup> BAWIPA e thingkong teh Devit kho a kâen navah, Sawl e canu Mikhal ni hlalangaw dawk hoi a khet teh Devit siangpahrang BAWIPA hmalah a lam teh a dawkcawk laihoi a tho e hah a hmu navah, a lungthung hoi banglahai noutna hoeh e lah a pouk.

<sup>17</sup> BAWIPA e thingkong a kâenkhaw awh teh a hruek awh nahan Devit ni a yap e hni thung amae hmuen dawk a hruek awh teh, Devit ni hmaisawi thuengnae hoi roun thuengnae a sak. <sup>18</sup> Devit ni hmaisawi thuengnae hoi roun thuengnae a sak hnukkhu, ransahu BAWIPA min lahoi taminaw pueng yawhawinae a poe. <sup>19</sup> Isarelnaw tongpa napui pueng koe vaiyei phen buet touh, moi ham buet touh, misur phen buet touh a rei hnukkhu, tami pueng amamanaw onae koe koun a cei awh.

<sup>20</sup> Devit teh a imthungnaw yawhawi poe hanelah a cei teh a pha navah, Sawl e canu Mikhal ni a dawn. Sahnin e Isarel siangpahrang teh a sungrenpoung. Kayayeirai ka panuek hoeh e patetlah a sannu a sanpanaw e hmaitung vah caici lah doeh ao telah ati.

<sup>21</sup> Devit ni a na pa hoi na imthung pueng e a yueng lah na rawi e lah ka o teh, BAWIPA e tami Isarelnaw lathueng siangpahrang lah na karawikung BAWIPA e hmalah ka sak mahoe na maw. BAWIPA hmalah tumkhawng roeroe hanelah ao, telah atipouh. <sup>22</sup> Hethlak hai kayakhai hane kawilah ka o han, kama hoi kama totouh hai kâkayakhai han. Na dei e sannunaw ni teh kai hah na oup awh han telah Mikhal hah bout a dei pouh.

<sup>23</sup> Hatdawkvah, Sawl canu Mikhal teh a due totouh ca sak hoeh toe.

## 7

### *Devit koe Cathut lawk a kam*

<sup>1</sup> A hmuen pueng koe kaawm e a tarannaw e kut dawk hoi BAWIPA ni a hloutsaknae hah, siangpahrang ni a coe teh a im dawk karoumcalah ao navah, <sup>2</sup> Siangpahrang ni profet Nathan hah kaw teh, khenhaw! kai teh Sidar thing im dawk ka o. Cathut e thingkong teh lukkarei yap e thung sut ao.

<sup>3</sup> Nathan ni cet nateh na lung dawk kaawm e patetlah sak. Bangkongtet-pawiteh, nang koe BAWIPA ao telah atipouh. <sup>4</sup> Hote tangmin vah BAWIPA e lawk hah Nathan koe a pha. <sup>5</sup> Ka san Devit koe cet nateh dei pouh, BAWIPA ni hettelah a dei, ka o nahane im nang ni na sak pouh han na maw. <sup>6</sup> Isarelnaw hah Izip ram hoi ka tâcokhainae koehoi im dawk kaawm hoeh, lukkareiim dawk doeh ka o. <sup>7</sup> Isarelnaw koe ka cei nah tangkuem dawk hoi ka tami Isarelnaw kawkhik sak hanelah kai ni ka patoun e lawkcengkungnaw koe nang teh kai hanelah Sidar thing hoi im hah, bangkongmaw na sak hoeh ka ti boimaw.

<sup>8</sup> Hatdawkvah, ka san Devit koevah, ransahu BAWIPA ni a dei e teh, tu a pânae hmuen koe tu na khoun navah, ka tami Isarelnaw uk hanelah na rawi toe. <sup>9</sup> Na cei nah tangkuem koe kai ka o vaiteh tarannaw pueng na hmaitung ka thei vaiteh talai dawk a min ka lentoe e a min patetlah ka lentoe poung e min hah na poe toe. <sup>10</sup> Ka tami Isarelnaw a onae hmuen hah ka rakueng pouh toe. Ahnimanaw bout a kampuen awh hoeh nahan, amamae hmuen koe o sak hanelah, ka caksak han. Tami kathoutnaw teh ayan e tueng dawk hoi thoseh, <sup>11</sup> Ka tami Isarelnaw thung e lawkcengkungnaw hah ka rawinae tueng dawk thoseh, dudam e patetlah bout dudam awh mahoe toe. Nang hai tarannaw e kut dawk hoi na kâhat sak teh, na imthung hah a kangdue sak han telah BAWIPA ni a dei toe.



<sup>12</sup> Na hnin akuiep teh, mintoenaw hoi na kâhat toreï teh, na thitak dawk hoi ka tâcawt e na capa hah ka tawmrasang vaiteh, a ram ka kangdue sak han. <sup>13</sup> Ahni ni ka min o nahane im a sak han. A uknaeram bawitungkhung a yungyoe ka caksak han. <sup>14</sup> A na pa lah ka o vaiteh, ahni teh ka capa lah ao han. Payonpakainae sak pawiteh tami ni a hno e bongpai hoi ka yue han. Tami ni a hem e patetlah ka hem han. <sup>15</sup> Hatei na hmalah ka takhoe e Sawl dawk hoi kai ni na pahrennae ka lae patetlah nange na ca dawk hoi ka lat mahoe. <sup>16</sup> Na imthung hoi na uknaeram teh yungyoe caksak e lah ao vaiteh, na bawitungkhung hah yungyoe caksak e lah ao han. Ka san Devit koe dei pouh, telah ati.

<sup>17</sup> Hete lawknaw pueg hoi kamnuenae dawk kamnuek e naw patetlah Nathan ni Devit koe a dei pouh.

### *Cathut koe Devit a lunghawinae*

<sup>18</sup> Hatnavah siangpahrang Devit ni a kâen teh, BAWIPA e hmalah a tahung. Oe Bawipa Jehovah, bang patetlae tami lah maw ka o teh ka imthung hai bang patetlae na maw. Hettelah na hrawi. <sup>19</sup> Oe Bawipa Jehovah, het hai na mithmu vah hno titca rah doeh. Hateiteh, na san imthung kong heh kum moikapap hanelah yo na la dei toe. Oe Bawipa Jehovah, hete hnônaw hai taminaw ni hottelâh a sak awh e doeh. <sup>20</sup> Devit ni nang nama koe bangmaw a hloilah a dei han. Bangkongtetpawiteh, na san heh Oe Bawipa Jehovah nang ni koug na panue. <sup>21</sup> Na lawk kecu hoi na lungpouk e boiboe lah na sak e hno ka lentoe e hah na san koe na panue sak. <sup>22</sup> Hatdawkvah, Oe Bawipa Jehovah, nang teh na lentoe poung. Bangkongtetpawiteh, ka hnâ hoi ka thainae lah nang patet e awm hoe. Nang nama hoe laipalah Cathut alouke khoeroe awm hoe. <sup>23</sup> Izip ram miphun kuep hoi a cathutnaw thung hoi nama hanlah na ratang e, na taminaw hmalah ka lentoe e hno hoi na uk nahane dawk takikatho poung e hno ka sak hane hoi, a ma hanelah a rawi e, na tami Isarelnaw patetlah e, talai dawk miphun alouke apimaw kaawm. <sup>24</sup> Bangkongtetpawiteh, na tami Isarelnaw hah a yungyoe na tami lah o nahane na coung sak teh BAWIPA nang nama teh a Cathut lah na o. <sup>25</sup> Oe BAWIPA Cathut, na san dawk thoseh, ka imthung dawk thoseh, na dei e lawk hah a yungyoe caksak haw. Na dei tangcoung e patetlah sak lawih. <sup>26</sup> Ransahu BAWIPA teh Isarelnaw ka uk e Cathut doeh telah na min hah yungyoe rasang lawi naseh. Nange na san Devit e imthung, na hmaitung caksak e lah ao han. <sup>27</sup> Bangkongtetpawiteh, oe ransahu BAWIPA Isarel Cathut, na san koevah na imthung kangdue sak han telah lawk na dei toe. Hatdawkvah, na san ni a lunghin hoi hete ratoum ngainae na hmaitung sak hanelah a hmu toe. <sup>28</sup> Oe Bawipa Jehovah nang teh Cathut lah na o. Na lawk teh atangcalah ao. Na hawinae na san dawk lawk na kam toe. <sup>29</sup> Hatdawkvah, na san imthung heh, na hmalah yungyoe pou ao thai nahanelah yawhawinae poe haw. Bangkongtetpawiteh, Oe Bawipa Jehovah, nama ni yo na dei toe. Na yawhawinae hoi na san imthungnaw teh yungyoe hoi yawhawinae awm seh telah ati.

## 8

### *Devit ni pou tânae*

<sup>1</sup> Hathnukku hoi Devit ni Filistinnaw hah a tuk teh a tâ. Hahoi Devit ni Metheg Ammah kho hah Filistinnaw e kut dawk hoi a la. <sup>2</sup> Moabnaw a tuk awh teh, talai dawk a yan sak. Rui hoi a bangnue teh ahu katham touh dawk hu hni touh a thei awh. Hottelâh Moabnaw teh Devit ni imhu



cawngnae kho lah a coung teh imhu ouk a poe awh. <sup>3</sup> Zobah siangpahrang Rehob e capa Hadadezer ni Euphrates tui teng e talai ram la hane a cei navah, Devit ni a thei teh, <sup>4</sup> marangransa 1,700, ransa 20,000, a man teh leng 100 touh ama han a hruek hnukkhu alouke lengnaw pueng kOUNG a tâtueng.

<sup>5</sup> Damaskas kho e Siria tami Zobah siangpahrang Hadadezer kabawp hanelah ka cet e hah Devit ni Sirianaw thung dawK e tami 22000 touh a thei. <sup>6</sup> Hahoi Devit ni Siria ram Damaskas kho dawK ransa a sak, Sirianaw teh Devit koe san a tOUNG awh teh, imhu a cawng awh. Devit a cei nah tangkuem BAWIPA ni tânae a poe. <sup>7</sup> Devit ni Hadadezer taminaw koehoi e suisaipheinaw a lawp awh teh, Jerusalem kho vah a thokhai. <sup>8</sup> Devit ni Hadadezer kho Betah hoi Berothai hoi rahum moikapap a la.

<sup>9</sup> Hamath siangpahrang Toi ni Hadadezer ransa pueng Devit ni kOUNG a tâtueng tie a thai. <sup>10</sup> Hadadezer a tuk teh a tâ dawkvah, kâhuiko hane hoi yawhawi poe hanelah Toi capa Joram hah Devit koe a patoun. Bangkongtetpawiteh, Adadezer ni Toi hah ouk a tuk boi toe. Joram ni suimanang, ngunmanang, rahummanang hah a sin pouh. <sup>11</sup> Hote manangnaw hah Devit siangpahrang ni BAWIPA koe thuengnae a sak. <sup>12</sup> Siria, Moab, Ammon taminaw hoi Filistinnaw, Amaleknaw hoi Zobah siangpahrang Rehob capa Hadadezer koehoi e hnopai a la e naw doeh.

<sup>13</sup> Devit ni palawi yawn dawK hoi a ban lampa Sirianaw 18000 a thei dawkvah a min a kamsawng. <sup>14</sup> Edom ram tangkuem koe ransa a hruek. Edom khocanaw teh Devit koe san a tOUNG awh. Devit ni a ceinae tangkuem dawK BAWIPA ni tânae a poe.

<sup>15</sup> Hottelah Devit ni Isarelnaw a uk. A taminaw pueng lannae hoi a uk.

<sup>16</sup> Zeruiah capa Joab teh ransanaw kaukkung kacuepOUNG lah ao. Ahilud capa Jehoshaphat teh kamthang kathutkung lah ao. <sup>17</sup> Ahitub capa Zadok hoi Abiathar capa Ahimelek hah vaihma lah ao roi. <sup>18</sup> Jehoiada capa Benaiah teh, Kereth tami hoi Peleth taminaw e kacue lah ao. Devit capanaw teh ram kaukkung bawi lah ao awh.

## 9

### *Devit ni Mephibosheth lung a pataw*

<sup>1</sup> Jonathan koe pahrennae ka kamnue sak nahanelah, Sawl imthungnaw dawK hoi kaawm rae ao maw telah Devit ni ati. <sup>2</sup> Sawl e sannaw thung e tami buet touh, a min Ziba ao teh Devit koe cei hanelah a kaw awh. Siangpahrang ni nang teh Ziba maw telah atipouh boteh, ahni ni, bokheiyah, na san kai doeh telah atipouh.

<sup>3</sup> Siangpahrang ni Cathut lungpatawnae ka kamnue sak nahan Sawl imthungnaw thung dawK e kaawm rae awm hoeh na maw telah atipouh. Ziba ni, Jonathan ni capa buet touh a tawn teh a khokkhem telah atipouh.

<sup>4</sup> Siangpahrang ni nâmw ao telah a pacei. Ziba ni khenhaw! Lodebar kho e Ammiel capa Makhir im vah ao telah atipouh.

<sup>5</sup> Hattoteh siangpahrang Devit ni tami a patoun teh, Lodebar kho e Ammiel capa Makhir im hoi ahni teh a thokhai awh.

<sup>6</sup> Sawl capa Jonathan e capa Mephibosheth teh Devit koe a tho teh, a minhmai talai dawK tabei laihoi a tabut. Devit ni Mephibosheth telah a kaw, na san kai teh hivah ka o telah atipouh.

<sup>7</sup> Devit ni na lungpuen hanh, na pa Jonathan kecu dawK na pahren hanelah, Sawl ni a tawn e pueng kai ni bout na poe han. Kaie caboi dawK bu pou na ven han toe telah atipouh.



<sup>8</sup> A lûsaling teh kai ui ro patet e na san kai heh banglamaw khuek na pouk telah ati.

<sup>9</sup> Siangpahrang ni Sawl e a san Ziba hah ama koe a kaw teh, Sawl hoi a imthung e hnopai pueng hah na bawipa e capa he ka poe toe. <sup>10</sup> Nama hoi na capa, na sannaw hoi lai na tawn pouh vaiteh, na bawi capa ni a ca hane kawi ao thai nahan, na tawk e a pawhik hah na tho khai han. Hateiteh, na bawipa e capa Mephibosheth ni ka caboi dawк bu pou a ven han telah atipouh. Ziba ni a ca 15 touh hoi a san 20 touh a tawn.

<sup>11</sup> Ziba ni siangpahrang koevah, siangpahrang ka bawipa ni na san koe kâ na poe e patetlah na san ni ka sak han telah ati. Siangpahrang ni Mephibosheth teh ka caboi dawк siangpahrang capa buet touh patetlah bu pou a ca han toe telah ati.

<sup>12</sup> Mephibosheth ni capa cahnoung Mika a min phung e buet touh a tawn. Ziba im dawк kaawm e pueng teh Mephibosheth e san lah ao awh. <sup>13</sup> Mephibosheth teh, Jerusalem kho dawк ao teh, hnintangkuem siangpahrang e caboi dawк bu a ven, a khok kahni touh hoi a khem.

## 10

### *Ammonnaw hoi Sirianaw tânae*

<sup>1</sup> Hathnukkhu, Ammon siangpahrang teh a due. A capa Hanun ni a na pa e yueng lah siangpahrang a tawk.

<sup>2</sup> Devit ni Hanun e a na pa Nahash teh kai koe ahawinae a sak dawкvah, pahrennae ka kamnue sak van han telah ati. A na pa a due nah lungpahawi hanelah a sannaw a patoun teh, Devit e sannaw teh Ammonnaw e ram koe a pha awh. <sup>3</sup> Ammon miphun kacuenaw ni amamae a bawipa Hanun koevah, Devit ni na barilawa dawкvah, nang koe lungmawng nahanelah, tami a patoun e na yuem maw. Devit ni hete khopui a raphoe thai nahan ka tuet hanelah nang koe a patoun awh nahoehmaw telah atipouh awh.

<sup>4</sup> Hanun ni Devit e a sannaw a man teh, a pâkhamuen tangawn a ngaw pouh. A khohna hai a laheibaw totouh a a pouh hnukkhu a cei sak.

<sup>5</sup> Hote kamthang hah Devit ni a thai toteh, ahnimanaw teh a kaya poung dawкvah, ahnimanaw dawn sak hanelah a patoun teh, nangmouh teh pâkhamuen a saw hoehroukrak Jeriko kho dawкvah awm awh. Hahoi torei bout tho awh telah atipouh.

<sup>6</sup> Ammonnaw ni vah, maimouh teh Devit e hmaitung panuetttho e lah o awh han tie a panue awh teh, taminaw a patoun awh teh, Bethrekhab kho hoi Aramzobah kho e Siria ransa 20,000, hoi siangpahrang Maakah e tami 1,000, hoi Tob ram e tami 12,000 touh hah a hlai awh. <sup>7</sup> Devit ni hote kamthang a thai toteh, Joab hoi athakaawme ransanaw hah a patoun. <sup>8</sup> Ammonnaw hah a tâco awh teh, kho longkha koe a tungpup awh. Aramzobah kho, Rehob, Tob kho hoi ka tho e Siria tami hoi Maakah siangpahrang e taminaw teh aloukcalah law vah ao awh. <sup>9</sup> A hnukhma lahoi tuk hane na kâcai awh tie Joab ni a thai navah, Isarelhaw thung dawк hoi kahawi kahawi e a rawi teh, Sirianaw tuk hanelah namranlah a tungpup awh. <sup>10</sup> Aloukenaw pueng hah a hmaunawnggha Abisai kut dawк koug a hruek teh, Ammon tami tuk hanelah a tungpup sak awh.

<sup>11</sup> Siria taminaw ni kai na tâ pawiteh, nangmouh ni na kabawp han. Ammonnaw ni nangmanaw na tâ pawiteh, kaimouh ni na kabawp han.

<sup>12</sup> Tarankahawi lah awm awh. Ka taminaw hoi mamae Cathut khonaw hanelah thapatung awh nateh, tuk awh. BAWIPA ni a ngainae patetlah a sak han doeh atipouh.



<sup>13</sup> Ama koe kaawm e taminaw hoi Siria taminaw tuk hanelah a pátam awh teh, Sirianaw a yawng awh. <sup>14</sup> Sirianaw a yawng awh e Ammonnaw ni a hmu awh navah, ahnimouh hai Abisai hmalah a yawng awh teh, kho thung vah a kâen awh. Joab hai Ammon ram hoi a tâco teh Jerusalem kho lah a cei.

<sup>15</sup> Sirianaw ni Isarelnaw e a hmalah amamanaw a sung e a kâpanue awh navah bout a kamkhueng awh. <sup>16</sup> Hadadezer ni tami a patoun teh, tui namran lah kaawm e Sirianaw a thokhai teh, Hadadezer ransa kacue e Shobak ni a hrawi awh teh, Helam kho lah a cei awh.

<sup>17</sup> Hote kong Devit koe a dei pouh. Isarelnaw pueng koug a pâkhueng teh, Jordan tui a raka awh teh, Helam kho a pha awh. Sirianaw ni Devit tuk hanelah a kampawp awh teh a tuk awh. <sup>18</sup> Sirianaw teh Isarelnaw e hmalah hoi a yawng awh. Devit ni Siria tami leng dawk kâcuinaw 700 hoi marangransanaw 40,000 touh a thei. Ransabawi Shobak hai a thei awh teh hawvah a due. <sup>19</sup> Hadadezer koe san ka toung e siangpahrangnaw pueng teh, Isarelnaw e hmaidung vah amamanaw a sung e a kâpanue awh navah, Isarelnaw hoi roumnae a sak awh teh, a thaw a tawk pouh awh. Hottelah Sirianaw ni Ammonnaw hah bout kabawm ngai awh hoehe toe.

## 11

### *Devit hoi Bathsheba*

<sup>1</sup> Kum a kamtawng teh siangpahrangnaw ni tarantuk hanelah a kamthawnae tueng navah Devit ni Joab hah a taminaw hoi Isarelnaw pueng hah a patoun. Ammonnaw a thei awh teh Rabbah kho hai a kalup awh. Hatei, Devit teh Jerusalem kho vah ao.

<sup>2</sup> Tangminlasa Devit teh a ikhun dawk hoi a thaw teh, imvan lemphu a kâhlai navah, a meikahawi poung e napui tui kamhluk e hah a hmu.

<sup>3</sup> Devit ni tami a patoun teh a pacei navah, Eliam canu Hit tami Uriah e a yu Bathsheba doeh atipouh.

<sup>4</sup> Patounenaw bout a patoun navah, haw e napui hah ahni koe a thokhai awh teh a ikhai. Napui ni a kamthoung hnukkhu a ma im lah a cei.

<sup>5</sup> Hottelah napui hah camo a vawn. Camo ka vawn telah Devit koe a thai sak. <sup>6</sup> Devit ni Joab koevah, Hit tami Uriah hah kai koe tho sak telah lawk a thui teh, Joab ni Uriah teh Devit koe a cei sak. <sup>7</sup> Uriah a pha toteh, Joab hoi a taminaw bangtelah a dam awh maw. Tarantuknae koe ahawi ngoun maw telah a pacei. <sup>8</sup> Devit ni Uriah koevah, na im lah cet nateh na khok pâsu telah atipouh. Uriah teh siangpahrang im dawk hoi a tâco teh siangpahrang e canei kawi ni tang a pâlei. <sup>9</sup> Hatei, Uriah teh ama im lah cet hoehe, a bawipa e sannaw koe im takhang koevah a i.

<sup>10</sup> Devit koevah, Uriah ama im lah cet hoehe telah a dei pouh awh. Devit ni Uriah koevah kahlawng ceinae koehoi na tho nahoehmaw, bangkongmaw nama im vah na cei hoehe telah atipouh.

<sup>11</sup> Uriah ni Devit koevah, thingkong, Isarel hoi Judah taminaw rim dawkvah ao awh teh, ka bawipa Joab hoi a sannaw kahrawngum a roe awh navah, kai teh kama im ka cei vaiteh ka canei vaiteh, ka yu koe ka i han na maw. Nang na hring e patetlah na san kai ni khoeroe ka sak mahoehe telah ati.

<sup>12</sup> Devit ni Uriah koevah, Sahnin hai hivah awm nateh tangtho toreia na ceisak han telah atipouh. Uriah ni hot hnin a tangtho hnin totouh Jerusalem kho vah ao. <sup>13</sup> Devit ni a kaw teh a hmalah a canei teh a parui sak. Tangmin a ma im cet laipalah a sannaw hoi i hanelah a cei.



*Uriah a due*

<sup>14</sup> Amom vah Devit ni ca a thut teh Joab a patawn, Uriah koe a phu sak. <sup>15</sup> Ca a patawn e dawkvah, Uriah teh taran apapnae koe hmalah cetsak nateh a thei awh vaiteh a due nahan yawng takhai awh telah ca dawkvah ao.

<sup>16</sup> A dei e patetlah Joab ni kho hah a khet teh a tha ka sai e taran aonae koe Uriah ao sak. <sup>17</sup> Khocanaw teh a tâco awh teh Joab hah a tuk awh. Devit e sannaw tangawn a due teh Hit tami Uriah hai a due van.

<sup>18</sup> Joab ni hote kamthangnaw hah Devit koe thaisak hanelah tami a kaw teh, <sup>19</sup> a patoun e koevah, siangpahrang koe tarankâtuknae naw na dei pouh toteh, <sup>20</sup> siangpahrang teh a lungkhuek, tarantuk hanelah kho hah rek na hnai awh, rapan van hoi na tuk awh han doeh tie na panuek awh hoeh maw. <sup>21</sup> Jerubbesheth capa Abimelek hah apinimaw a thei hah. Thebez khovah napui buet touh ni cakang phawmnae a lû lae talung hoi rapan dawkh hoi a pabo sin teh a thei. Bangkongmaw tungdumnae totouh na cei awh tetpawiteh, na san Hit tami Uriah hai a due telah na dei han telah lawk a thui.

<sup>22</sup> Joab ni lawk a thui e patetlah patoune ni Devit koe a dei pouh. <sup>23</sup> Tarannaw ni kaimanaw atangcalah na tâ awh. Kahrawngum totouh na pâlei awh, na tuk awh. Kaimanaw ni hai kho longkha totouh ka tuk awh. <sup>24</sup> Tarannaw ni rapan dawkh hoi na sannaw na tuk awh teh, na san a tangawn a due awh. Na san Hit tami Uriah hai a due telah atipouh.

<sup>25</sup> Devit ni hete hno kaawm e dawkh na lungpout sak hanh awh. Kâtuknae koe ouk due phung doeh, thakâlat awh nateh, puenghoi khopuinaw raphoe awh telah Joab koe tami a patoun teh lawk a thui.

<sup>26</sup> Uriah a due e a yu ni a thai toteh, a vâ hah a khui. <sup>27</sup> A khuinae tueng a pâpout toteh, Devit ni tami a patoun teh hote napui hah a im dawkh a kaw teh a yu lah a la. Hote napui ni ca tongpa a khe pouh. Hateiteh, Devit ni a sak e hno ni BAWIPA lunghaw sak hoeh.

**12***Devit yon pâphona*

<sup>1</sup> BAWIPA ni Devit koe Nathan hah a patoun. Nathan ni a kâen teh Oe siangpahrang, kho buet touh dawkh tami kahni touh ao, buet touh teh ka tawnta e tami, buet touh teh ka roedeng e tami. <sup>2</sup> Ka tawnta e ni teh maito hoi tu moikapap a tawn. <sup>3</sup> Ka roedeng e tami teh tulaca buet touh a ran teh a paca e hloilah alouke hno banghai tawn hoeh. Hote tulaca teh ama hoi a canaw hoi rei ao awh teh a roungh awh. Rawca hai rei a hmawng awh. Tui hai rei a nei awh. A bawipa e a lungtabue dawkh kaawm e a canu patetlah doeh ao.

<sup>4</sup> Ka tawnta e im dawkh imyin buet touh a tho teh imyin paca hanelah amae tu hoi maitonaw thei hane a pasai teh ka roedeng e tulaca hah a la teh imyin hanelah a thawng pouh, telah atipouh.

<sup>5</sup> Devit teh hote tami lathueng puenghoi a lungkhuek teh, Nathan koevah BAWIPA a hring e patetlah hot patetlah hno ka sak e teh a due hane roe doeh. <sup>6</sup> Pahrennae tawn laipalah, hot patetlah hno a sak dawkvah, tulaca yueng lah let pali touh hoi patho naseh telah ati.

<sup>7</sup> Nathan ni Devit koe ahni teh alouke tami nahoe. Nang hah doeh. Isarel BAWIPA Cathut ni a dei e teh, Isarel siangpahrang lah satu na awi teh Sawl e kut dawkh hoi na hlout sak. <sup>8</sup> Na bawipa im dawkh e râwnaw na coe sak, na bawipa e yunaw hai na lungtabue dawkh ka hruek, Isarel



imthung hoi Judah imthung hai na poe. Hotnaw hah youn rah pawiteh alouke hno hai na poe sin han rah. <sup>9</sup> Nang teh BAWIPA e kâlawk poe e na noutna hoehe. Bangkongmaw ka hmaitung vah kahawihoehe hno na sak. Hit tami Uriah hringnae tahloi hoi na thei teh, a yu hah na lawp. Ammonnaw hoi ahni teh tahloi hoi na thei. <sup>10</sup> Nang ni kai banglahai na noutna hoehe teh Hit tami Uriah e yu na la dawkvah, na imthungnaw teh tahloi hoi pou a kâhmo awh han toe.

<sup>11</sup> BAWIPA ni a dei e teh, na imthung dawk hoi hno kahawihoehe ka tho sak han. Na hmaitung vah na yunaw ka la vaiteh, na imri hah ka poe vaiteh, kanîthun vah a ikhai awh han. <sup>12</sup> Bangkongtetpawiteh, nang ni arulahoi na sak, hatei kai ni Isarelnaw hmaitung kanî hmalah kamnue sak han telah ati.

<sup>13</sup> Devit ni Nathan koevah, kai ni BAWIPA koe ka payon toe telah ati. Nathan ni Devit koevah, BAWIPA ni hai na yonnae na la pouh toe. Na dout mahoehe. <sup>14</sup> Hateiteh, nang ni hottelah na payonnae lahoi BAWIPA e tarannaw koe dudam nahanelah na poe dawkvah, atu na hmu e na ca hah a due roeroe han telah atipouh. Hahoi Nathan ni a im lah a ban takhai.

### *Devit capa a due*

<sup>15</sup> Uriah e yu ni Devit hanelah a khe pouh e capa hah BAWIPA ni a hem teh ka nut lah a pataw. <sup>16</sup> Hatdawkvah, Devit ni camo hanelah Cathut koe a kâhei. Rawcahai laihoi karum tuettuet talai dawka yan. <sup>17</sup> A imthungnaw dawka e kacuenaw a thaw awh teh a pathaw awh hanelah a teng vah a kangdue awh. Hatei thaw ngai hoehe, ahnimouh koe rawcahai cat hoehe.

<sup>18</sup> Asari hnin vah camo teh a due. Camo a due tie a sannaw ni Devit koe dei ngam awh hoehe. Bangkongtetpawiteh ahnimouh ni camo a hring nah maimouh ni dei e lawk hah thai han ngai hoehe, camo a due toe telah bangtelamaw maimouh ni dei ngam awh han. Amahoima runae kâpoe payon vaih telah ati awh.

<sup>19</sup> Devit ni hottelah a sannaw ni arulawka duem a dei e a thai navah, camo a due tie Devit ni a panue. Hatdawkvah, Devit ni a sannaw koevah, camo a due tounge maw telah ati. Ahnimouh ni oe a due toe telah atipouh awh.

<sup>20</sup> Devit teh talai dawka hoi a thaw teh hak a kâpasu teh satui a kâhluk, a khohna a kâpahoung teh BAWIPA e im lah a cei teh a bawka. A im lah bout a ban teh bu ca hane a hei navah, a sannaw ni a rakueng pouh awh teh a ca.

<sup>21</sup> A sannaw ni na hno na sak e hah bangmaw, camo a hring navah rawca nahai teh na khuika, hatei camo a due toteh na thaw teh rawca na ca telah atipouh awh.

<sup>22</sup> Devit ni Oe, camo a hring navah rawca kahai teh ka ka, camo heh a hring thai nahan BAWIPA ni a pahren talang teh tie apinimaw a dei thai han ka ti dawka doeh. <sup>23</sup> Atuteh camo a due toe, bangkongmaw rawca kahai han vaw, bout ka hring sak thai han na maw. Ahni koe kai ka cei han, ahni teh kai koe bout ban mahoehe toe telah ati.

### *Solomon a khe*

<sup>24</sup> Devit ni a yu Bathsheba hah a lung a pahawi. Ahni koe a kâen teh a ikhai. Ahni ni ca tongpa buet touh a khe teh Solomon telah min a phung. Ahni teh BAWIPA ni a lung a pataw. <sup>25</sup> Profet Nathan hah a patoun teh camo e min teh BAWIPA e Jedidiah telah min a phung.

### *Rabbah kho a la*

<sup>26</sup> Joab ni Ammon ram Rabbah kho hah a tuk teh khopui hah a la. <sup>27</sup> Joab ni Devit koe patounenaw a patoun teh kai ni Rabbah kho ka tuk, tui



kapoekung khopui hah ka la. <sup>28</sup> Atuvah, ka cawi rae taminaw pâkhueng awh, khopui teng tumpup awh nateh tuk awh nateh lat awh. Khopui ka la vaiteh kama e ka min lahoi ka kaw han telah ati.

<sup>29</sup> Devit ni tami pueng a pâkhueng teh Rabbah vah a cei awh, a tuk awh teh a la awh. <sup>30</sup> Hahoi ahnimaie siangpahrangnaw e bawilakhung a kâ muk e a la pouh awh. Sui talen buet touh a ri, aphukaawm e talung hai ao. Devit a kâ muk sak awh. Kho thung e hno moi a lawp awh. <sup>31</sup> Kho thung e khocanaw a tâco sak awh teh, hlaw hoi sumtaboung hoi cakâ hoi thaw a tawk sak awh teh, amhru hai a sak sak awh. Ammonnaw e khopuinaw hah hottelah a sak awh. Devit hoi a taminaw pueng Jerusalem kho lah a ban awh.

## 13

### *Amnon hoi Tamar*

<sup>1</sup> Devit e capa Absalom ni a tawncanu a meikahawi poung e buet touh a tawn. A min teh Tamar doeh. Devit e a capa Amnon ni ahni hah a ngai.

<sup>2</sup> Amnon teh Tamar a ngai lawi a takpatawkhai. Ahni teh tanglakacuem doeh. Ahni koevah bangpatet e hno a sak e hai Amnon hanelah coung thai hoeh. <sup>3</sup> Hatei, Amnon ni hui a tawn, a min teh Jonadab doeh. Ahni teh Devit e hmau Shimeah capa doeh. Jonadab teh huenghai kaawm e lah ao. <sup>4</sup> Nang teh siangpahrang e capa lah na o eiteh, hnin touh hnukkhu hnin touh bangkongmaw na kamsoe. Kai koe na dei ngai han na ou telah atipouh. Amnon ni ka nawnggha Absalom e a tawncanu Tamar ka lungpataw lawi doeh telah atipouh.

<sup>5</sup> Jonadab ni vah, na ikhun dawk ka pataw lah kâsak loe. Na pa ni na khet navah, ka tawncanu kai koe tho naseh. Vaiyei ka ca hane na poe naseh. Ahni ni a thawng e cakawi kai ni ka hmu vaiteh, a kut dawk e ka ca hanelah ka hmalah thawng naseh na ti pouh han telah pouknae a poe.

<sup>6</sup> Amnon teh pataw lah a kâsak teh a yan. Siangpahrang ni a khet navah Amnon ni siangpahrang koevah, pahren lahoi ka tawncanu hi tho sak nateh ka hmaitung vah vaiyei a phen kahni tabang na sak pouh seh, a kut dawk e ka ca han telah atipouh.

<sup>7</sup> Devit ni Tamar koevah, na thangroi Amnon im vah cet nateh, ca hane kawi thawng pouh telah tami a patoun.

<sup>8</sup> Tamar teh Amnon im a cei. Ahni teh ikhun dawk a yan. A kanawk e vaiyei hah a hmaitung vah a karê. <sup>9</sup> Ailo dawk hoi a sin teh a hmalah a pâtoum pouh. Hatei cat pouh ngai hoeh. Amnon ni taminaw be tâcawt sak ei telah ati dawkvah taminaw teh a tâco awh. <sup>10</sup> Amnon ni Tamar koevah, na kut dawk e ka ca hanelah ikhun koe thokhai telah atipouh. Tamar ni vaiyei phen a sin teh a thangroi Amnon e irakhan thung a ceikhai. <sup>11</sup> Amnon ca hanelah a sin pouh navah a kut a kuet pouh teh ka tawncanu kai hoi ip roi sei atipouh.

<sup>12</sup> Tamar ni telah nahoe hah a thangroi, kai hah na pacekpahlek hanh. Isarel miphun dawk het patet e hno sak kawi nahoe hah. Kahawihoe hah e hno sak hanh. <sup>13</sup> Na sak pawiteh kayanae koe hoi bangtelamaw hlout thai han vaw. Nang hai Isarel miphunnaw dawk tamipathu lah doeh na awm ti. Hatdawkvah, siangpahrang koe dei pouh. Kangek mahoe hah mue telah atipouh.

<sup>14</sup> Hatei, ahni ni a lawk ngai pouh hoeh, a tawncanu hlah a tha ao dawkvah a tapam teh a ikhai.



<sup>15</sup> Hahoi, Amnon ni a tawncanu hah bout a hmuhma, ahmaloe a lungpatawnae hlak a hmuhmanae hoe a len. Amnon ni thaw nateh cet leih atipouh.

<sup>16</sup> A tawncanu ni vah telah nahoe. Het patetlah hrumhram na hrek e kai na yonkhai e hlak atu na hrek e doeh yonnae hoe kalen telah ati. Amnon ni noutna pouh hoe.

<sup>17</sup> A san buet touh a kaw teh, hete napui heh pâlei leih. Tho taren sin haw atipouh.

<sup>18</sup> Tanglakacuem siangpahrang canu ni ouk a khohna e patetlah a em kaawm e angkidung a kho. A san ni a hrek teh tho king a taren sin.

<sup>19</sup> Tamar ni hraba a kâphuen teh a hni ka dung a em kaawm e koun a phi. A lû daw k a kut a toun teh a cei laihoi pueng hoi a khuika.

<sup>20</sup> A thangroi Absalom ni, na hmau Amnon ni na pacekpahlek na maw. Lawkkamuem lah awmh. Ahni teh na thangroi doeh. Hete hni heh na lungthung vah thouk pouk hanh, telah atipouh. Hottelah Tamar teh a thangroi Absalom im vah, oru laihoi ao.

### *Absalom ni Amnon a thei*

<sup>21</sup> Hateiteh, siangpahrang Devit niteh, hote hno a thai navah, a lung puenghoi a khuek. <sup>22</sup> Absalom ni a hmaunawngaha Amnon koe banghai dei hane ngai hoe. A tawncanu a pacekpahlek dawkvah, Absalom ni Amnon a maithoe.

<sup>23</sup> Kum hni touh a kuep hnukkhu Absalom teh Ephraim kho teng Baalhazor kho hoi, tu muen ngaw saknae paw koe siangpahrang e canaw pueng a coun. <sup>24</sup> Absalom teh siangpahrang koe a cei teh, na san ni tu muen a ngaw pouh. Na sannaw kaw nateh, ka sannaw koe nama hoi rei cet awh telah atipouh.

<sup>25</sup> Siangpahrang ni Absalom koe vah, telah nahoe, ka capa abuemlahoi he ka cet awh mahoe. Bangkongtetpawiteh, hmuenri phu lah awm payon vaih telah ati. Absalom ni a coun eiteh, cet ngai hoe. Yawhawinae hah a poe. <sup>26</sup> Absalom ni hottelah pawiteh, ka nawngaha Amnon hateh kaimouh koe tho van seh telah atipouh navah, siangpahrang ni bangkongmaw khuet a cei han telah atipouh.

<sup>27</sup> Hateiteh, Absalom ni Amnon hoi siangpahrang e a canaw hah cei hanelah bout a coun. <sup>28</sup> Absalom ni a sannaw hah khenhaw! Amnon teh misurtui nei hoi a nawm lahun navah, Amnon hah thet awh ka ti navah na thei awh han. Taket awh hanh. Kâ na poe awh toe nahoehmaw. Tarankahawilah awm awh telah lawk a thui.

<sup>29</sup> Hottelah Absalom e a sannaw ni Amnon daw k Absalom ni kâ a poe e patetlah a sak awh. Siangpahrang e a canaw a thaw awh teh amamae la daw k lengkaleng a kâcui awh teh a yawng awh.

<sup>30</sup> Ahnimanaw a pha hoehnahlan, aloukenaw a tho awh teh, Absalom ni, siangpahrang e a canaw he a thei toe, buet touh hai hlung hoe telah Devit koe a thaisak awh.

<sup>31</sup> Siangpahrang ni a thaw teh, a hni hah a ravei teh talai daw k a kamlei. A sannaw ni hai a hni a ravei awh teh a teng vah a kangdue awh.

<sup>32</sup> Devit e a hmau Shimeah capa Jonadab ni, ka bawipa ni siangpahrang e a canaw heh a thei tie yuem hanh naseh. Bangkongtetpawiteh, kadout e teh Amnon dueng doeh. A tawncanu Tamar pacekpahleknae koehoi hete hno heh Absalom ni kâ a poe e patetlah sut pouk e lah ao toe.

<sup>33</sup> Hatdawkvah, ka bawipa siangpahrang e a canaw heh a due telah pouk hanh naseh. Bangkongtetpawiteh, kadout e teh Amnon dueng doeh telah a ti. <sup>34</sup> Absalom teh a yawng. Ramveng ni a radoung teh a khet nah, ahnie a



hnuklah monhleple lae lam dawka cet e tami moikapap a hmu. <sup>35</sup> Jonadab ni siangpahrang capanaw a tho toe, na san ni a dei e patetlah doeh ao telah atipouh.

<sup>36</sup> Siangpahrang e a canaw teh a tho awh teh kacaipounglah a ka awh. Siangpahrang hai a sannaw hoi kacaipoung a khuika awh.

<sup>37</sup> Hatei Absalom a yawng teh Geshur siangpahrang Ammihud capa Talmai koelah a cei. Devit ni hnintangkuem a capa hah a khui. <sup>38</sup> Absalom teh Geshur koelah a yawng teh kum thum touh hawvah ao. <sup>39</sup> Hahoi siangpahrang Devit ni Absalom koe cei hanelah dikedik a doun. Amnon due e dawka te, a lung yo a kâpahawi toe.

## 14

### *Jerusalem lah Absalom teh a ban*

<sup>1</sup> Zeruiah capa Joab ni siangpahrang e lungthin teh Absalom koe ao tie a panue. <sup>2</sup> Joab ni Tekoa kho dawka tami a patoun. Haw e napui a lungkaang poung e hah a ma koe a kaw teh, lungkamathout e patetlah na o pouh han. Ro hni hah kâkhu nateh, satui hai kâhluk hanh. Ro koe atueng moikasawlah ka kap e napui patetlah na o pouh han. <sup>3</sup> Siangpahrang koe na cei vaiteh ahni koe hettelah na dei pouh han telah ati. Hottelah Joab ni a cangkhai teh a pâtu.

<sup>4</sup> Tekoa kho e napui ni siangpahrang koe lawka a dei nah talai dawka minhmai kâbet lah a tabo. Oe siangpahrang na kabawm loe telah a ti.

<sup>5</sup> Siangpahrang ni napui koevah, bangpatet lae runae maw na tawn telah ati. Napui ni ka vâ a due toe. <sup>6</sup> Na sannu koe capa kahni touh ao. Hote capa roi teh law vah a kâhmak roi teh katarakung ao hoe dawkvah, buet touh e ni buet touh e hah a thei. <sup>7</sup> A imthungnaw ni na sannu hah a tuk awh. Ka hmaunawngka kâthetkung ka thei thai nahan na poe awh haw. Râw kapangkung hai ka thei awh han telah ati. Hottelah tet awh pawiteh, kai dawka cawi rae hmaisaan ahnimouh ni a padue awh han doeh. Ka vâ e min thoseh, ca catoun awm laipalah talai dawka hoi koug a thei awh han doeh telah atipouh.

<sup>8</sup> Siangpahrang ni napui koevah, nama im lah cet lawih. Nange kong dawka kai ni ka dei han telah a ti.

<sup>9</sup> Tekoa kho e napui ni siangpahrang koevah, oe siangpahrang ka bawipa, hete yonnae phu teh, kai hoi apa imthung koe bawt naseh. Siangpahrang hoi a bawitungkung ni yon phawt hanh naseh telah a ti.

<sup>10</sup> Siangpahrang ni nange kong dawka yon na ka pen e pueng hi tho sak, a rucatnae bout na poe awh mahoe toe telah atipouh.

<sup>11</sup> Napui ni thi ka palawng naw koe kaie ka canaw a thei awh hane ka ngaihi dawkvah, ahnimouh ni a thei hoe nahan, siangpahrang na BAWIPA Cathut teh, pahnim roeroe hanh naseh. Nahoe pawiteh, ka capa a thei payon awh han telah ati. Ahni ni BAWIPA a hring e patetlah na capa e samrui buet touh boehai talai dawka bawt mahoe telah atipouh.

<sup>12</sup> Hatdawkvah napui ni, na sannu ni ka bawipa siangpahrang koe lawka kam touh bout dei naseh telah ati. Ahni ni dei loe atipouh.

<sup>13</sup> Napui ni hai telah pawiteh, bangkongmaw Cathut e taminaw koe taranae lahoi hettelah sak hane na kâcai. Siangpahrang ni a hrek e tami bout a kaw hoe dawkvah, siangpahrang ni yon a pen tinae doeh.

<sup>14</sup> Bangkongtetpawiteh, abuemlahoi he due awh han. Talai dawka tui rabawka e bout duek thai hoe e patetlah doeh o awh. Cathut teh tami



minhmai a khet ei nakunghai, pâlei lah kaawm e tami teh, ama koehoi pou pâlei e lah kaawm e nahoe.

<sup>15</sup> Hatdawkvah siangpahrang ka bawipa koevah, hete lawk dei hane ka thonae hai tami ka taki dawk doeh. Na sannu ni siangpahrang koevah dei haw khe, ka kâhei e patetlah siangpahrang ni a kuep sak han doeh.

<sup>16</sup> Siangpahrang ni kai hoi ka capa heh Cathut e râw coe hoeh nahanlah thei hanelah kakâcainaw thung hoi na sannu heh na rungngang hanelah na thai pouh han doeh telah ka ti. <sup>17</sup> Na sannu ni siangpahrang ka bawipa e lawk teh, hnâroumnae lah awm seh. A thoe hoi hawi kapek nahanelah siangpahrang ka bawipa teh, Cathut e kalvantami patetlah doeh ao. BAWIPA Cathut teh nang koe awm naseh ka ti, telah a ti.

<sup>18</sup> Siangpahrang ni napui koevah, kai ni na pacei e pueng banghai hrawk hanh telah ati. Napui ni siangpahrang ka bawipa dei yawkaw telah atipouh.

<sup>19</sup> Hot patetlah siangpahrang ni hete kong dawkvah, Joab hai a bawk maw telah ati. Napui ni siangpahrang ka bawipa na hring e patetlah siangpahrang ka bawipa ni a dei tangcoung e teh aranglah thoseh, avoilah thoseh apinihai roun thai mahoe. Bangkongtetpawiteh, na san Joab ni na patoun teh hete lawk pueng na sannu na cangkhai e doeh. <sup>20</sup> Na dum vaiteh, hettelah kâsak hanelah na san Joab ni a sak e doeh. Ka bawipa teh talai dawk hno kaawm e pueng panuethainae Cathut kalvantami patetlah a lungkaang e doeh telah atipouh.

<sup>21</sup> Siangpahrang ni Joab koevah, bokheiyah hete lawk kai ni ka dei han. Cet nateh thoundoun Absalom hah thokhai haw telah atipouh.

<sup>22</sup> Joab teh talai dawk minhmai kâbet lahoi a tabo hnukkhu, siangpahrang koe lunghawi lawk a dei. Joab ni Oe siangpahrang ka bawipa ni, na san ni ka kâhei e patetlah minhmai kahawi na hmaitung vah ka hmu e ka lung a kuep e ka panue telah atipouh.

<sup>23</sup> Joab teh a thaw teh Geshur kho lah a cei teh, Absalom hah Jerusalem kho lah a thokhai. <sup>24</sup> Siangpahrang ni a ma im cet naseh, ka mei hmawt hanh naseh telah ati. A dei e patetlah Absalom ni a im lah a cei teh siangpahrang e minhmai hmawt hoeh.

### *Devit ni Absalom a ngaithoum*

<sup>25</sup> Isarelnaw thung dawk Absalom patetlae a meikahawi, oup e lah kaawm e apihai awm hoeh. Khoktabei koehoi a lû totouh toun kawu buet touh hai awm hoeh. <sup>26</sup> A sam a ngaw navah, siangpahrang e yawcu dawk a khing navah kum touh dawk shekel 200 touh a pha.

<sup>27</sup> Absalom ni ca tongpa 3 touh hoi, a canu Tamar a min phung e a tawn. A canu teh a meilam hroung ahawi. <sup>28</sup> Absalom ni siangpahrang e a minhmai hmawt laipalah kum 2 touh thung Jerusalem kho vah ao hnukkhu, <sup>29</sup> Joab hah siangpahrang koe a patoun hanelah lawk a thui. Hateiteh, thao han ngai hoeh. Apâhni lawk bout a thui, tho han bout ngai hoeh. <sup>30</sup> A sannaw koevah, khenhaw! Joab e law teh kaie law e a teng ca doeh ao. Catun hah cet awh nateh, hmaisawi pouh awh telah atipouh. Hottelaho Absalom e a sannaw ni law teh hmai a sawi pouh awh.

<sup>31</sup> Joab ni Absalom koe a cei teh na sannaw ni kaie law bangkongmaw hmai a sawi awh telah a pacei. <sup>32</sup> Absalom ni Joab koevah, bangkongmaw Geshur hoi ka tho. Haw e kho dawk pou kaawm pawiteh kai hane kahawi hane eiteh telah siangpahrang koe na patoun hanelah lawk na thui. Hatdawkvah, atuvah siangpahrang e mei na hmawt sak haw. Kai



dawk yonnae awm pawiteh, ahni ni na thet yawkaw naseh, telah a dei pouh.

<sup>33</sup> Joab ni siangpahrang koe a cei teh a dei pouh. Absalom hah a kaw teh siangpahrang koe a cei teh siangpahrang hmalah talai dawk rekkâbet lahoi a lûsaling teh a tabo. Siangpahrang ni Absalom teh a tapam teh a paco

## 15

### *Absalom taranthawnae*

<sup>1</sup> Hathnukkhu hoi Absalom ni lengnaw hoi marangnaw hoi amae hmalah ka cet hane tami 50 touh a rakueng. <sup>2</sup> Absalom teh amom a thaw teh, longkha koe ouk a kangdue. Siangpahrang koe rucat kâhmo e dei han ka tawn e pueng hah, Absalom ni a kaw teh api kho maw ouk atipouh. Ahnimanaw ni Isarel miphun thung e doeh ouk atipouh awh.

<sup>3</sup> Absalom ni ahni koevah na lawk dei e naw teh atang doeh. Hatei, nange kong ka dei hane siangpahrang hoi apinihai thai mahoe telah ouk atipouh.

<sup>4</sup> Kai teh hete ram dawk lawkcengkung siangpahrang lah na sak awh haw pawiteh, lawk dei hane ka tawn e pueng kai koe a tho awh vaiteh, kalanalah kai ni lawk ka ceng pouh han telah ouk atipouh.

<sup>5</sup> Tami buetbuet touh barilawa lahoi a tho nah, Absalom ni a kut a dâw laihoi a kuet teh ouk a paco <sup>6</sup> Isarel siangpahrang koevah lawk dei hane ka tho pueng koe, Absalom ni hottelah ouk a sak. Hottelah Absalom ni Isarelnaw e a lungthin a paru pouh.

<sup>7</sup> Kum pali touh aloum hnukkhu, Absalom ni siangpahrang koevah, Hebron kho vah BAWIPA koe e ka lawkkam a kuep nahan ka cei sak.

<sup>8</sup> Bangkongtetpawiteh, na san ni Siria ram Geshur kho ka o navah, BAWIPA ni Jerusalem kho bout na cetsak pawiteh, BAWIPA e thaw ka tawk han telah lawk ka kam toe telah a ti.

<sup>9</sup> Siangpahrang ni karoumcalah cet atipouh. Hat navah, Absalom ni a thaw teh, Hebron lah a cei.

<sup>10</sup> Absalom ni mongka lawk na thai awh tahma, Absalom teh Hebron kho dawk siangpahrang doeh telah na hram awh han telah Isarel miphun pueng koe arulaho katuettaw a patoun.

<sup>11</sup> Absalom ni a kaw e tami 200 touh e Jerusalem kho thung hoi a cei van awh. A lung kathoungpincalah banghai panuenae awm laipalah a cei awh.

<sup>12</sup> Devit e lawkcengkung Giloh koe e Ahithophel teh ama onae Giloh kho dawk, thuengnae a sak navah Absalom a kaw. Absalom hnukkâbangnaw teh tami moi a pap teh kâtarannae hoe a len.

<sup>13</sup> Patoune buet touh Devit koe a tho teh, Isarelnaw e lungthin teh, Absalom koelah koug a kamlang toe telah atipouh.

<sup>14</sup> Devit ni maimanaw thaw awh vaiteh, yawng awh leih sei. Yawng hoehpawiteh Absalom kut dawk hoi hlout awh mahoe toe. Karanglah cet awh sei. Hottelah nahoe pawiteh, ahni ni tang na tuk awh vaiteh, maimae lathueng runae phatsak awh vaiteh, khopui hah tahloi hoi a tuk awh han doeh telah Jerusalem kho ama koe kaawm e sannaw koe a dei pouh.

<sup>15</sup> Siangpahrang e sannaw ni, siangpahrang nang ni na dei e pueng ka sannaw ni sak hanelah coungkacoe ka o awh han telah ati awh. <sup>16</sup> Hahoi siangpahrang teh a imthungnaw hoi a cei awh. a im a ring sak hanelah a yudonaw 10 touh a hruek. <sup>17</sup> Siangpahrang a tâco teh taminaw ni a



hnukkâbang awh teh, im a poutnae koe a kâhat awh. <sup>18</sup> A taminaw ni a yawngtahrei awh. Kerethnaw, Pelethnaw, Gitnaw, Gath kho e hoi a hnukkâbangnaw 600 touh teh, siangpahrang e hmalah a cei awh.

<sup>19</sup> Siangpahrang ni Git tami Itai koevah bangkongmaw kaimouh koe na kâbang. Ban nateh siangpahrang koe awmh. Nang teh miphun louk doeh. Hatdawkvah na onae koe lah ban lawih. <sup>20</sup> Paduem tangmin doeh nueng na tho. Kaimouh koe avoivang lah na cei han namaw. Nâ lah maw ka cei han tie ka panuek hoe. Ban lawih, na hmaunawngghanaw kaw nateh ban leih. Pahrennae hoi yuemkamcunae teh nang koevah awm seh telah atipouh.

<sup>21</sup> Itai ni siangpahrang koe, BAWIPA hoi siangpahrang a hring e patetlah siangpahrang ka bawipa na onae pueng koe na san heh, due hai due, hring hai hring pou ao han doeh telah atipouh.

<sup>22</sup> Devit ni Itai koe, cet awh nateh pou cet awh, telah ati. Hottelah Git tami Itai teh a taminaw hoi a canaw hoi pou a cei awh. <sup>23</sup> Khocanaw teh puenghoi a khuika awh. A hnukkâbangnaw ni a cei awh teh, siangpahrang ama roeroe ni Kidron palang a raka teh taminaw pueng ni hai a raka awh teh, kahrawng lam koelah hoi a cei awh.

<sup>24</sup> Zadok hoi Levihnaw pueng Cathut e thingkong a kâyawt laihoi thingkong a patue awh. Taminaw ni kho a tâco takhai hoehroukrak Abiathar teh thuengnae a sak. <sup>25</sup> Siangpahrang ni Zadok koevah, Cathut e thingkong teh khopui thung bout bankhai awh. BAWIPA hmalah minhmai kahawi ka hmawt pawiteh, na bankhai awh vaiteh, Cathut e thingkong hoi a onae bout ka hmu han. <sup>26</sup> Hateiteh, nang dawkvah lunghawinae khoeroe ka tawn hoeh tetpawiteh, kai hi ka o, ahawi ati e patetlah kai daw sak naseh telah a ti.

<sup>27</sup> Siangpahrang ni vaihma Zadok koe hai, nang teh kahmawtkung nahoehmaw, na capa Ahimaaz hoi Abiathar e capa Jonathan hai kaw nateh khopui thung ban awh.

<sup>28</sup> Nangmanaw ni na thaisak hoehroukrak, kai ni kahrawngum e ayawn koe na ring awh han telah a ti. <sup>29</sup> Zadok hoi Abiathar ni Cathut e thingkong hah Jerusalem kho a ceikhai awh teh hawvah ao awh.

<sup>30</sup> Devit teh a khuika laihoi a lû a ramuk teh, a khokkhawm a rading teh khok caici lahoi Olive Mon daw k a takhang. A hnukkâbang e pueng ni a lû a ramuk awh teh, khuika laihoi a takhang awh.

<sup>31</sup> Absalom koelah kambawngnaw thung daw k, Ahithophel hai a baw van telah Devit koe a dei pouh awh. Devit ni Oe BAWIPA, Ahithophel ni pouknae a poe e hah pathunae lah coung sak haw telah a kâhei. <sup>32</sup> Mon koe a pha toteh Devit ni Cathut a baw k. Arki tami Hushai ni hai angki a ravei teh a lû daw k vaiphu a kâphuen laihoi ama kâhmo hanelah a tho.

<sup>33</sup> Devit ni kai koe na cet van pawiteh, kai na taraw k han doeh. <sup>34</sup> Khopui koelah na ban vaiteh, Absalom koevah Oe bawipa kai teh nang koe san lah ka o han. Na pa koe san lah ouk ka o e patetlah atu na san lah ka o han na tetpawiteh, Ahithophel khopouknae ka ngang pouh kung lah doeh let na awm tih. <sup>35</sup> Haw vah vaihma Zadok hoi Abiathar hai ao nahoehmaw. Hatdawkvah siangpahrang im e lawk na thai e pueng hah vaihmanaw koe bout na dei han. <sup>36</sup> Zadok capa Ahimaaz hoi Abiathar capa Jonathan capa kahni touh ao. Na thai e pueng bout na thaisak nahanelah, ahnimanaw kai koe pou na patoun han telah atipouh.

<sup>37</sup> Devit e a hui Hushai teh kho thung vah a cei. Absalom hai Jerusalem kho koelah a pha.



## 16

*Ziba ni Devit a kabawp*

<sup>1</sup> Devit ni monsom kuet a tapoung navah, Mephibosheth e a san Ziba ni a dawn nahan la kahni touh a rakueng. Vaiyei tueng 200, misur bom ka ke e 100, thaibunglung paw 100, touh hoi misur um buet touh la dawk a phu sak. <sup>2</sup> Siangpahrang ni Ziba koevah, bangtelah na sak hane maw hete hno heh na sin atipouh. Ziba ni la heh siangpahrang imthung a kâcui nahane, vaiyei hoi a pawnaw teh thoundounnaw ni a ca hane, misurtui hai kahrawngum a tha katawnnaw ni a nei hane doeh telah atipouh.

<sup>3</sup> Siangpahrang ni na bawipa e capa hah namaw ao telah a pacei. Ziba ni Jerusalem kho dawk ao. Sahnin vah Isarelnaw ni apa e uknae hah na poe han telah ati doeh na a telah atipouh.

<sup>4</sup> Siangpahrang ni Ziba koe vah Mephibosheth ni a tawn e hno pueng nange lah ao toe telah atipouh. Ziba ni na hmalah kârahnoum laihoi ka tho. Oe siangpahrang ka bawipa, na minhmai kahawi ka hmu thai nahan pou kâyawm han telah atipouh.

*Shimei ni Devit thoe a bo*

<sup>5</sup> Devit siangpahrang teh Bahurim kho a pha toteh, Sawl imthung Gera capa a min Shimei teh thoebo laihoi a tho. <sup>6</sup> Devit hoi siangpahrang e a sannaw hah talung hoi a dêi awh. Taminaw hoi athakaawme taminaw teh avoilah aranglah ao awh. <sup>7</sup> Shimei ni thoebo nalaihoi cet leih khe, cet leih khe, nange thi ka palawng e hoi tamikayon, <sup>8</sup> Sawl e a uknae a la teh, Sawl imthung e a thi paling nange na lû dawk BAWIPA ni a pha sak teh, a uknaeram teh na capa Absalom a poe toe. Thi ka palawng e lah na o dawkvah, namahoima runae na kâpoe e doeh telah atipouh.

<sup>9</sup> Zeruiah capa Abishai ni siangpahrang koevah, bangkongmaw ui ro ni ka bawipa thoe a bo. A lû ka tâtueng pouh han telah atipouh.

<sup>10</sup> Siangpahrang ni nangmouh Zeruiah capanaw, nangmanaw hoi kai teh bangpuibangpa nahoe. BAWIPA ni Devit hah thoebo lah awmseh, telah ahni koe lawk thui pawiteh thoebo yawkaw naseh. Hatdawkvah, bangkongmaw hettelah na sak telah apinihai tet pouh mahoe toe.

<sup>11</sup> Devit ni Abishai hoi a sannaw koe, ka thung hoi ka tâcawt e ka capa ni, thei hanelah na nung pawiteh, Benjamin miphunnaw ni hothlak thei han na nung han doeh. Bangtelah hai tet awh hanh. Thoe na bo yawkaw naseh. BAWIPA ni a sak sak e doeh. <sup>12</sup> BAWIPA ni ka rucatnae a hmu vaiteh, ahni ni thoe na bo e heh ahawinae koe lahoi BAWIPA ni na pathung e lahai ao han telah Abishai hoi a sannaw koe a dei pouh.

<sup>13</sup> Devit hoi a taminaw teh lam dawk a cei awh lahun navah, Shimei teh Devit hoi phekkadangka lah mon langboun a cei teh, thoebo nalaihoi talung hoi a dei teh, vaiphu a kahei sin. <sup>14</sup> Siangpahrang hoi a hnukkâbangnaw teh a tawn poung awh. Jordan tui koe a pha awh teh a kâhat awh.

*Ahithophel ni pouknae a poe*

<sup>15</sup> Absalom hoi a taminaw pueng Jerusalem kho a pha awh teh, ahni koe Ahithophel hah ao. <sup>16</sup> Devit e a hui Arki tami Hushai teh Absalom koe a pha toteh, Hushai ni Absalom koevah, siangpahrang na hring saw naseh, siangpahrang na hring saw naseh telah yawhawinae a poe.

<sup>17</sup> Absalom ni Hushai koevah, hettelamaw na hui na lungpataw, bangkongmaw na hui koe na cei hoe telah ati.



<sup>18</sup> Hushai ni Absalom koevah, ka cet mahoe, Cathut ama hoi ahnimouh Isarelnaw ni a rawi awh e koe a san lah ka o han, ahni koe ka o han atipouh. <sup>19</sup> Apie thaw maw ka tawk han. A capa koe thaw ka tawk han nahoehmaw. Na pa e hmalah thaw ka tawk e patetlah nange hmalah ka tawk han telah atipouh.

<sup>20</sup> Absalom ni Ahithophel koe bangtelamaw ka sak han, pouknae na poe haw telah atipouh.

<sup>21</sup> Ahithophel ni na pa e a yudo im karingkungnaw a ta e naw koe kâen sin. Isarelnaw ni na pa ni na maithoe tie panuek awh vaiteh, nang koe kaawm e naw e kut teh a tha a sai awh han atipouh.

<sup>22</sup> Hottelah imvan vah Absalom hanelah rim a sak pouh awh. Hottelah Isarelnaw e a hmaitung vah, a na pa e yudonaw koe a kâen. <sup>23</sup> Hatnae tueng nah Ahithophel ni pouknae a poe e teh, Cathut lawk patetlah ouk pouk pouh e lah ao. Hot patetlah Ahithophel ni Devit hoi Absalom pouknae a poe e pueng teh, pouk pouh e lah ao.

## 17

### *Hushai ni Devit a pahnawt*

<sup>1</sup> Ahithophel ni Absalom koevah, tami 12, 000 rawi naseh. Sahnin tangmin ka thaw vaiteh Devit ka pâlei han. <sup>2</sup> A tha a tawn teh a kut tha a youn navah, ka tuk vaiteh, a lung ka puen sak han. Ahni koe kaawm e pueng hah a yawng awh vaiteh, siangpahrang dueng hah ka thei han. <sup>3</sup> Taminaw pueng nang koe ka thokhai han na tawng e teh tami pueng hoi a kâvan han. Tami pueng bout a ban awh vaiteh, karoumcacah ao awh han telah ati.

<sup>4</sup> Hote lawk hah Absalom hoi Isarelnaw miphun kacuenaw ni a ngai awh. <sup>5</sup> Absalom ni Arki tami Hushai hai kaw haw, a dei e hah maimouh ni thai pouh haw sei telah ati. <sup>6</sup> Hushai ni Absalom koe a pha toteh, Absalom ni Ahithophel ni hettelah a dei. A dei e patetlah sak han na maw, sak awh mahoe maw. Nahoe pawiteh, nang hai dei van haw telah atipouh.

<sup>7</sup> Hushai ni Absalom koe a pha toteh, Absalom ni Ahithophel ni pouknae a thokhai e heh hawi hoeh.

<sup>8</sup> Hushai ni, na pa hoi a taminaw teh na panue toe. Athakaawme tami, ka matheng katang e tavom manu a ca la pouh e patetlah, doeh ao awh. Hahoi, na pa teh taran ka tuk e lah ao teh, taminaw koe roe mahoe. <sup>9</sup> Khenhaw! atuvah, lungngoum buetbuet touh koe a kâhro han doeh. Nahoe pawiteh, alouke hmuen koe a kâhro han doeh. Tami tangawn ahmaloe la rawm lah dout awh pawiteh, hote kamthang ka thai e ni Absalom hnukkâbangnaw teh, a due awh toe telah a dei awh han.

<sup>10</sup> Tarankahawi e tami, sendek e lungthin ka tawn e patenghai a lung a pout han. Bangkongtetpawiteh, Isarelnaw pueng ni na pa teh athakaawme hoi ama koe kaawm e naw teh tami a thakasai e sêng doeh tie hah a panue awh. <sup>11</sup> Hatdawkvah pouknae na poe han ka ngai e teh, Dan kho hoi Beersheba kho totouh, Isarelnaw teh tuipui teng e sadi yit touh nang koe a kamkhueng awh teh, nangmanaw hai tarantuknae koe cet van awh nateh, <sup>12</sup> hottelah kâhmo thainae a hmuen pueng koe, talai dawktadamtui ka bawt e patetlah muen na ramuk awh vaiteh, ama hoi ahni koe kaawm pueng buet touh hai pâhlung awh mahoe. <sup>13</sup> Hothloilah, khopui buet touh koe kâen pawiteh, Isarelnaw pueng ni tangron sin vaiteh hote kho dawktui cei awh vaiteh, talungcanaw buet touh boehai ao hoeh totouh, palang vah koug sawn awh han telah ati. <sup>14</sup> Absalom



hoi Isarelnaw ni Arki tami Hushai ni pouknae a poe e teh Ahithophel ni pouknae a poe e hlak ahawi telah ati awh. Bangkongtetpawiteh, BAWIPA ni Absalom e lathueng runae a pha sak thai nahan BAWIPA ni kahawipoung e Ahithophel pouknae a poe e a tapuet sak han a ngai dawk doeh.

*Hushai ni Devit yawng hanelah kâhruetcuetnae a poe*

<sup>15</sup> Hushai ni vaihma Zadok hoi Abiathar koevah, hottelah Ahithophel ni Absalom hoi Isarelnaw hah pouknae a poe, hahoi kai ni hai pouknae hot patetlah ka poe toe telah ati. <sup>16</sup> Hatdawkvah, atu tangmin vah, kahrawngum ayawn dawk roe laipalah, pou cet awh. Nahoe h pawiteh, siangpahrang hoi a taminaw pueng teh koung a thei payon awh han doeh telah Devit koe karanglah dei pouh awh telah ati.

<sup>17</sup> Jonathan hoi Ahimaaz teh Enrogel vah ao awh teh, sannu buet touh ni ahnimouh koe ouk a dei pouh teh, ahnimouh ni Devit koe patuen ouk a dei pouh awh. Bangkongtetpawiteh, khopui thung kâen e hah apinihai hmu hanelah awm hoeh. <sup>18</sup> Hatei, camo ni a hmu awh teh, Absalom koe a dei pouh. Hottelah kahni touh hoi vai touh lahoi a yawng roi. Bahurim tami buet touh thongma dawk tuikhu ka tawn e im dawk a kâen roi teh tuikhu dawk a kâhro roi. <sup>19</sup> Hahoi, a yu ni tuikhu teh a khuem hoi a khuem teh cakang muen a vaw sin dawkvah apinihai panuek hoeh.

<sup>20</sup> Absalom e a sannaw hote im koe a pha awh navah, Ahimaaz hoi Jonathan hah namaw ao roi telah napui koe a pacei awh. Napui ni, palang namran lah yo a pha han doeh toe telah atipouh. Ahnimouh ni a tawng awh teh hmawt awh hoeh toe. Hateh Jerusalem lah a ban awh.

<sup>21</sup> Hahoi, a ban awh hnukkhu, Ahimaaz hoi Jonathan teh tuikhu dawk hoi a tâco roi teh, Devit siangpahrang koe a dei pouh roi. Devit koevah thaw awh nateh karanglah cet awh leih. Bangkongtetpawiteh, hettelah Ahithophel ni nang na taranlahoi pouknae a poe telah atipouh.

<sup>22</sup> Devit hoi ama koe kaawm e pueng a thaw awh teh, Jordan tui a raka awh. Khodai nah be a raka awh toe. Ka rakat hoeh e tami buet touh hai awm hoeh. <sup>23</sup> Ahithophel ni pouknae a poe e hah tarawi awh hoeh tie a thai awh toteh, la a rakueng awh teh ama kho lah a cei awh. A imthungnaw kho a saknae kong kahawicalah cing a thui hnukkhu a kaithi. A mintoenaw e phuen koe a pakawp awh.

<sup>24</sup> Devit ni Mahanaim kho koe a pha navah, Absalom teh Isarelnaw hoi Jordan tui a raka awh. <sup>25</sup> Absalom ni Joab e yueng lah Amasa hah ransabawi lah a hruék. Amasa teh Joab e a manu Zeruiah e a nawnggha Nahash canu Abigail ka ipkhai e Ishmael miphun Ithra capa doeh. <sup>26</sup> Isarel miphunnaw hoi Absalom teh Gilead ram dawk a tungpup awh. <sup>27</sup> Devit teh Mahanaim kho a pha toteh, Ammon ram Rabbah tami Nahash capa Shobi hoi Lodebar, Amiel capa Makhir hoi Rogelim hoi Gilead tami Barzillai tinaw ni, <sup>28</sup> Hote taminaw teh kahrawngum vah a vonhlam awh, a tawntam awh, tui a kahran awh telah ati awh dawkvah, Devit hoi a taminaw ni canei hanelah catun, barli, pe a phunphun, <sup>29</sup> khoitui, sanutuikamkak, tu, iphah, ailo, kawlung naw hah a sin pouh awh.

## 18

*Absalom duenae*

<sup>1</sup> Devit ni ama koe kaawm e naw a touk teh 1000 kaukkung, 100 touh kaukkung kahrawikungnaw a rawi pouh. <sup>2</sup> Devit ni tami a patoun teh hu thum touh dawk hu touh Joab ni a uk. Hahoi alouke hu thum touh dawk



hu touh hah Joab e nawngah Zeruiah capa Abisai ni a uk. Kaawm rae hu touh hah Git tami Ittai ni a uk. Siangpahrang ni taminaw koe kai kama roeroe hai nangmouh koe ka cei van han telah ati.

<sup>3</sup> Taminaw ni cet hanh. Bangkongtetpawiteh, kaimanaw ka yawng awh nakunghai banglah pouk mahoe. Kaimanaw tangawn kadout awh nakunghai banglah pouk mahoe. Nang nama teh kaimanaw 10, 000 touh hlak apu na o hnawn. Hatdawkvah, kaimanaw hah khopui thung hoi na kabawm pawiteh hoe kahawi han telah atipouh.

<sup>4</sup> Siangpahrang ni ahawi na ti awh e patetlah ka sak van han, telah ati. Siangpahrang teh rapan longkha koe a kangdue. Taminaw 100 touh, 1000 touh e ransanaw lahoi a cei awh. <sup>5</sup> Siangpahrang ni kaie minhmai na khet awh vaiteh, ka capa Absalom heh paiyai lah tet awh telah Joab, Abisai, Ittai tinaw koe lawk a thui. Hottelah siangpahrang ni Absalom hane lawk a thui navah, ransa kacuenaw ni lawk a thui e hah a thai awh.

<sup>6</sup> Taminaw teh Isarel naw tuk hanelah tarantuknae hmuen a pâtam awh. A kâtuknae a hmuen teh Ephraim ratu daw k doeh. <sup>7</sup> Isarel naw teh Devit e a sannaw e hmaitung vah a sung awh teh, haw e hnin daw k puenghoi kâtheinae lahoi tami 20, 000 touh a due awh. <sup>8</sup> A hmuen tangkuem a kâtuk awh teh hat hnin daw k tami ni thei e hlak ratu daw k kadout e hoe a pap awh.

<sup>9</sup> Devit e a sannaw ni Absalom hah a kâhmo awh. Ahni teh la a daw k tahung lahoi a bu ka rung poung e thingkung rahim a kâen teh a lû teh hote thingkung daw k a mang pouh. Kahlun langboun a kâbang teh la a madueng a yawng. <sup>10</sup> Kahmawt e tami buet touh ni Joab koe vah, kathen daw k Absalom a kâbang e ka hmu telah atipouh.

<sup>11</sup> Joab ni na hmu katang e pawiteh bangkongmaw na thei hoe. Talai vah na bo sak hoe. Hottelah na sak pawiteh, tangka shekel 10 touh hoi taisawm na poe hane nahoe hmwah telah atipouh.

<sup>12</sup> Ahni ni Joab koe vah, tangka 1,000 touh ka hmu hane nakunghai siangpahrang e capa daw k ka kut ka pho mahoe. Bangkongtetpawiteh, ka hnâthai roeroe vah siangpahrang ni nang hoi Abisai, Ittai koe thoundoun Absalom teh api nang ni hai tek hanh awh telah lawk na thui toe. <sup>13</sup> Kai ni ka thet pawiteh, kama ka kâdum e lah ka o teh, ka hringnae a loun hanelah ka o. Siangpahrang ni a panue hoe e banghai awm hoe. Nang hai a hmalah na kangdue van han telah ati.

<sup>14</sup> Joab ni hettelah pawiteh, nang koe kasawlah kaawm thai mahoe, telah ati. Tahroe kathum touh ka sin ni teh kathen kung daw k a hring lah ka kâbang e Absalom e a lung daw k pouk a thut pouh. <sup>15</sup> Joab e senehmaica ka sin e thoundoun 10 touh ni a kalup awh teh, Absalom teh kadout lah a thei awh.

<sup>16</sup> Joab ni mongka a ueng teh, Isarel naw ka pâlei e hah koun a ban awh. Joab ni abuemlahoi a ngang awh. <sup>17</sup> Absalom e ro a la teh, kahrawng e tangkom kadung poung e thung vah, a tâkhawng awh teh avan vah, talung a pung sin awh. Isarel naw teh amamanaw aonae koe lengkaleng a ban awh.

<sup>18</sup> Absalom ni a hring nah siangpahrang yaw n daw kvah lungdon sut la a sak toe. Bangkongtetpawiteh, ka min a kahma hoe nahanelah, ka capa hai ka tawn hoe, telah ati. Hote lungdon hah a min a phu sak awh teh, atu totouh Absalom pahnim hoe nahanelah ati awh.



<sup>19</sup> Zadok capa Ahimaaz ni BAWIPA ni a taran moi a pathungnae kamthang hah siangpahrang koe ka dei han telah ati. <sup>20</sup> Joab ni sahnin teh kamthang hah dei hanh ei, alouke hnin dawkwah na dei vainei. Siangpahrang e capa a due dawkwah, sahnin teh bang e kamthang hai dei hanh ei, telah atipouh.

<sup>21</sup> Joab ni Kushi tami koe, cet nateh na hmu e hah dei loe telah atipouh. Kushi tami ni Joab koe a lûsaling teh kut a man teh a yawng. <sup>22</sup> Zadok capa Ahimaaz ni Joab koe vah, bangtelah nakunghai Kushi tami ka pâlei han telah ati. Joab ni ka capa kamthang kahawicalah kaawm hoeh e hah bangkongmaw yawngkhai han khuet na ngai telah atipouh. <sup>23</sup> Bangtelah hai ka yawng han telah ati dawkwah, yawng loe atipouh. Hatnavah, Ahimaaz teh kahrawng lam lahoi a yawng teh Kushi tami a yawngtahrei.

<sup>24</sup> Devit teh rapan longkha a rahak vah a tahung. Ramveng teh longkha van lah a luen teh a khet navah a madueng ka yawng e tami a hmu.

<sup>25</sup> Ramveng ni a hram teh siangpahrang koe vah a dei. Siangpahrang ni tami buet touh dueng pawiteh, kamthang dei hane a phu han doeh telah ati. A yawng teh rek a hnai toteh, <sup>26</sup> ramveng ni alouke tami ka yawng e bout a hmu. Ramveng ni tami buet touh a madueng ka yawng e ka hmu telah takhang ka ring e a kaw teh, siangpahrang ni ahni ni hai kamthang a phu dawkwah doeh atipouh.

<sup>27</sup> Ramveng ni ahmaloe e ka yawng e teh Zadok capa Ahimaaz e a yawng e doeh telah ka panue telah ati. Siangpahrang ni ahni teh tamikahawi doeh. Kamthang kahawi a phu dawkwah han doeh telah ati.

<sup>28</sup> Ahimaaz ni a hram teh, siangpahrang koe ahawi doeh, telah ati. Siangpahrang hmalah a minhmai talai dawkwah rekkâbet lah a tabut teh, bawipa, ka bawipa, siangpahrang nang koe kut pho hanelah kakâcainaw hah kangangkung BAWIPA Cathut min pholennae awm seh, telah ati.

<sup>29</sup> Siangpahrang ni Absalom a hlout maw telah a pacei. Ahimaaz ni siangpahrang e na san Joab ni kaie ka san hah a patoun navah, ruengruengti awh e ka hmu. Hateiteh, kamceng lah ka panuek hoeh telah ati.

<sup>30</sup> Siangpahrang ni kaie ka teng kangdout haw atipouh teh, ahni teh a teng vah a kangdue.

<sup>31</sup> Kushi tami a tho teh, siangpahrang, kamthang ka thokhai, nang na ka taran e naw hah BAWIPA ni ahnimanaw a yonnae patetlah a pathung toe telah atipouh.

<sup>32</sup> Siangpahrang ni ka capa Absalom a hlout maw telah a pacei, Kushi tami ni siangpahrang e na tarannaw, nang ka dudam e naw pueng teh hote thoundoun patetlah koug awm naseh telah ati.

### *Devit ni Absalom a khui*

<sup>33</sup> Siangpahrang teh a lung rei a thai. kho longkha e a lathueng lah a cei teh, a cei laihoi, Oe ka capa Absalom, ka capa, ka capa Absalom nange a yueng lah kai ka due hoeh aw. Oe Absalom, ka capa ka capa telah a khuika.

## 19

### *Devit ni Absalom a khui*

<sup>1</sup> Siangpahrang teh Absalom hanelah a khui a ka tie Joab koe a dei pouh awh. <sup>2</sup> Hot hnin e tânae teh tami pueng hanelah lungmathoe nahanelah doeh ao. Siangpahrang ni a capa pou a khuikakhai tie hah a thai awh.

<sup>3</sup> Tarantuknae koehoi ka yawng e naw ni kayanae lahoi khothung duem



a kâen awh e patetlah hot hnin navah arulahoi khothung duem a kâen awh. <sup>4</sup> Siangpahrang ni a minhmai a ramuk teh, Oe ka capa Absalom, Oe Absalom, ka capa, ka capa telah kacaipounglah a khuika.

<sup>5</sup> Joab ni siangpahrang koe a cei teh, imthungkhu a kâen, na hringnae na canu na capa a hringnae hoi na yu hoi na yudonaw a hringnae karungngangnaw hah sahnin vah na kaya sak awh toe. <sup>6</sup> Nang na kamaithoenaw lung na pataw teh, nang lungpataw naw law teh na maithoe toe. Bangkongtetpawiteh, kacuenaw hoi ransanaw teh nama hanelah bang hoeh lah sahnin na kamnue sak. Absalom hring pawiteh, kaimanaw hah sahnin be kadout awh pawiteh, na lung a hawi han doeh telah sahnin ka hmunaeh lah ao atipouh.

<sup>7</sup> Thaw nateh alawilah tâcawt nateh, na sannaw hnâroumnae lawk dei pouh leih. Na tâcawt hoehpawiteh, tami buet touh hai atu tangmin nang koe kaawm awh mahoehtoe. Hote hno teh na nawca hoi sahnin totouh nang dawkkawm e hlak hoe kathout han, telah BAWIPA thoebo laihoi ka dei telah atipouh. <sup>8</sup> Siangpahrang teh a thaw teh, rapan longkha koe a tahung. Siangpahrang rapan longkha koe a tahung e taminaw ni a thai awh toteh, ahni koe a cei awh. Isarelnaw teh amamae rim koelah be a kâran awh.

### *Jerusalem kho lah Devit a ban*

<sup>9</sup> Isarel miphunnaw dawkkawm buet touh hoi buet touh kâounnae ao. Siangpahrang ni taran kut dawkkawm hoi na rungngang. Filistinnaw e kut dawkkawm hoi na rungngang. Atuvah Absalom kecu dawkkawm ram thung hoi a yawng. <sup>10</sup> Maimouh ni satui awi awh e Absalom teh tarantuknae koe a due toe. Bangkongmaw siangpahrang bout bankhai awh hane na dei awh hoehtoe. Bangkong lawkkamuem lah na o awh telah a kâpakung awh. <sup>11</sup> Siangpahrang Devit ni vaihma Zadok hoi Abiathar koe, Judah kacuenaw koe bangkongmaw siangpahrang hah a im lah ceisak hane, bangkong hnuk na teng awh. Isarelnaw ni a dei awh e lawk patenghai siangpahrang koe a pha teh a thai toe. <sup>12</sup> Nangmanaw teh ka hmaunawngaha ka hru, ka tak doeh. Siangpahrang koe bout thaisak hane hah bangkong hnuk na teng awh.

<sup>13</sup> Amasa koevah, nang hah kaie ka hru, ka tak lah na awm hoehtoe maw. Joab yueng lah ka hmaitung ransabawi lah na awm sak hoehpawiteh, Cathut ni ahawi ati e patetlah kai dawkkawm sak naseh, telah dei pouh awh, telah tami a patoun.

<sup>14</sup> Hottelah Judah miphunnaw hah lungthin buet touh e patetlah ao sak. Siangpahrang koevah, a taminaw hoi ban awh telah dei pouh hanelah taminaw hah a patoun.

<sup>15</sup> Siangpahrang teh a ban teh, Jordan tui koe a pha. Judahnaw ni siangpahrang a dawn awh teh, Jordan tui namran lah thak hanelah Gilgal kho koelah a cei awh. <sup>16</sup> Benjamin miphun Bahurim kho e tami Gera capa Shimei teh karanglah siangpahrang dawn hanelah Judahnaw koe a cei van. <sup>17</sup> Benjamin miphun 1, 000, Sawl imthung e a san Ziba hoi a capa 15 touh hoi a san 20 touh a tho awh teh, siangpahrang e a hmaitung vah Jordan tui a raka awh. <sup>18</sup> Siangpahrang imthungnaw a thak sak nahanelah, a panki e sak nahanelah, a ceikhai awh. Jordan tui a raka awh navah, Gera capa Shimei teh siangpahrang hmalah a tabo.

<sup>19</sup> Ka bawipa ni payonnae ka tawn e lah na pouk hanh naseh. Siangpahrang ka bawipa ni Jerusalem a tâcotakhai hnin vah, na san ni kalan hoehtoe e lah sak e hah, na pâkuem pouk hanh. Siangpahrang ni a lung dawkkawm hanh naseh. <sup>20</sup> Na san ni yonnae ka sak e hah na san



kai ni ka panue. Hateiteh, Joseph imthungnaw daw, ka bawipa dawn hanelah ahmaloe ka tho e doeh telah ati.

<sup>21</sup> Zeruiah capa Abisai ni BAWIPA ni satui a awi e thoe a bo dawkvah, Shimei hah dei hane nahoehmaw telah ati.

<sup>22</sup> Devit ni nangmanaw Zeruiah capanaw sahnin kai na taran hane, kai hoi bangmaw na kâseng awh. Sahnin Isarel ka kâtet pueng thei hanelah maw kai teh sahnin Isarel siangpahrang lah ka o tie ka panuek hoe, na maw telah ati.

<sup>23</sup> Siangpahrang ni Shimei koe vah, na dout mahoe telah lawk a kam.

### *Devit hoi Mephibosheth kâhmonae*

<sup>24</sup> Sawl capa Mephibosheth teh siangpahrang dawn hanelah a tho. Siangpahrang a cei hnin hoiyah karoumcalah bout a tho hoe nahlan totouh, a khok pâsu hoe, a pâkhamuen ngaw hoe, a hni hai pâsu hoe. <sup>25</sup> Siangpahrang dawn hanelah Jerusalem kho koe a pha navah, siangpahrang ni Mephibosheth, bangkong kai koe na cei van hoe telah ati.

<sup>26</sup> Oe siangpahrang ka bawipa, ka san ni na dum. Bangkongtetpawiteh, na san ni siangpahrang koe cei hanelah la kâcui thai nahanlah kârasoup han ka ti ei, na san teh ka khokkhem. <sup>27</sup> Siangpahrang ka bawipa nang koe vah, na san heh na pathoe. Hateiteh, siangpahrang ka bawipa teh, Cathut kalvantami patetlah ao. Ahawi na tie patetlah sak lawih. <sup>28</sup> Bangkongtetpawiteh, imthungnaw heh siangpahrang hmaitung be thei hanelah a kamcu. Hatei, na san teh caboi daw rawca ka ven e lah na o sak. Hatdawkvah, siangpahrang koe vah kai ni hno alouke ka hei ngam hane bangmaw kaawm telah atipouh.

<sup>29</sup> Siangpahrang ni nange kong bangmaw dei hanelah kaawm. Nang hoi Ziba ni lawhmuen na kârei roi han telah kai ni ka dei toe tayaw telah ati.

<sup>30</sup> Mephibosheth ni siangpahrang koe vah, siangpahrang teh ama im vah karoumcalah a pha dawkvah, ama ni abuemlahoi lat lawi naseh telah atipouh.

### *Devit ni Barzillai a pahren*

<sup>31</sup> Gilead tami Barzillai hah Rogelim kho lahoi a tho teh, siangpahrang teh Jordan tui rakakhai hanelah ahni koe a cei van. <sup>32</sup> Barzillai teh a kum 80 touh a pha toe. A matawng toe. Mahanaim vah siangpahrang ao nah tung teh canei hane kawi ouk a poe. Bangkongtetpawiteh, ahni teh ka tawnta poung e lah ao.

<sup>33</sup> Siangpahrang ni Barzillai koe vah, kai koe tho van nateh, Jerusalem kho kai koe awm nateh, na kaw han telah atipouh.

<sup>34</sup> Barzillai ni siangpahrang koe vah, nâsittouh maw ka hring rah vaiteh, Jerusalem siangpahrang koe ka cei van han vaiyoe. <sup>35</sup> Sahnin kai teh kum 80 touh ka pha toe. A thoe hoi hawi kapek thai hoe, toe. Kai ni ka canei e a tui hoi tui hoe e hai ka panue yaw tounge. Tongpa napui naw e la sak pawlawk hai ka thai hoe, toe. Na san kai ni siangpahrang ka bawipa hanelah, hmuenri lah khuet ka o han vaw. <sup>36</sup> Na san ni siangpahrang koe, Jordan tui na raka totouh dueng doeh ka tho thai ti. Bangkong nama siangpahrang ni het patetlah tawkpau khuet na poe han vaw. <sup>37</sup> Na san kai teh ka onae kho daw, apa e tangkom koe ka due hanelah na ban sak leih. Na san Khimham ao doeh. Siangpahrang hoi rei cet sak. Ahawi na tie patetlah na sak han telah atipouh.



<sup>38</sup> Siangpahrang ni Khimham teh kai hoi rei ka cei roi han. Ahawi na tie patetlah ahni dawk ka sak han. Na hei e pueng hai na sak pouh han telah atipouh.

<sup>39</sup> Tami pueng hai Jordan tui namran lah a raka awh. Siangpahrang ama dueng a raka hnukkhu, Barzillai hah a tapam a paco teh yawhawi a poe teh aonae koe lah a ban.

### *Siangpahrang kong dawk kâounnae*

<sup>40</sup> Siangpahrang teh Gilgal kho a cei. Khimham hai ahni koe a cei van. Judahnaw ni siangpahrang teh a thak awh. Isarel taminaw ni hai a thak awh van. <sup>41</sup> Isarelnaw pueng siangpahrang koe a tho awh teh, bangkongmaw hmaunawngaha Judahnaw ni hoe a hnai awh teh, siangpahrang hoi a imthungnaw hoi Jordan tui namran lah kounge a ceikhai awh telah ati awh.

<sup>42</sup> Judahnaw ni siangpahrang teh kaimouh hoi kâhnai e lah ao dawkvah, bangkongmaw hete kong dawk na lungkhuek. Siangpahrang e rawcanaw kaimouh ni ka ca ka nei awh maw. Kaimouh koe na poe awh e hno ao maw telah Isarelnaw hanelah atipouh.

<sup>43</sup> Isarelnaw ni Judahnaw koe kaimouh ni siangpahrang dawk hra touh coe hane ka tawn awh. Devit dawkvah nangmanaw hlak pang hane hoe ka tawn awh. Siangpahrang ban sak hane kong dawk kaimouh hoi apuengcue kâpannae awm laipalah, bangkong kaimanaw na dudam awh telah Judahnaw koe bout a dei pouh awh. Judahnaw e lawk hah Isarelnaw e lawk hlak hoe a hram.

## 20

### *Sheba taranthawnae*

<sup>1</sup> Benjamin miphun Bikhri capa a min teh Sheba tie taran ka thaw e buet touh ao. Ahni ni mongka a ueng teh Oe Isarel miphun maimouh teh Devit koevah, buet touh hai coe hane tawn awh hoeh. Jesi capa koevah raw coe hane kamcu awh hoeh. Isarelnaw namamae rim koe lengkaleng cet awh telah atipouh.

<sup>2</sup> Isarelnaw ni Devit hnukkâbang awh hoeh toe. Bikhri capa Sheba hnuk a kâbang awh. Judahnaw ni Jordan hoi Jerusalem kho totouh siangpahrang koe a kâhnai awh.

<sup>3</sup> Devit ni Jerusalem ama im a pha toteh, siangpahrang ni a yudo 10 touh im ka ring hanelah a hruek e hah a ceikhai teh, a paung. A canei kapoenaw ni canei kawi a poe awh ei teh, amamouh koe kâen awh hoeh. A due hnin totouh a paung awh teh lahmaw patetlah ao awh.

<sup>4</sup> Siangpahrang ni Amasa koevah, hnin thum touh thung Judahnaw hah kamkhueng sak nateh, ahnimouh hoi rei na tho han telah atipouh.

<sup>5</sup> Judahnaw kamkhueng sak hanelah Amasa teh a cei. Hatei, Devit teh a hnin a khoe e hlak hnuk a teng.

<sup>6</sup> Devit ni Abishai koevah Bikhri capa Sheba ni Absalom hlak hai runae na poe han, na bawipa e sannaw kaw nateh ahnimanaw pâlei awh telah hoehpawiteh, ahni teh kacakpounge kho buetbuet touh kâen vaiteh, maimae kut dawk hoi a hlout han doeh telah Abishai koe a dei pouh.

<sup>7</sup> Joab e taminaw Kereth tami, Phelet taminaw hoi tami a thakasainaw ni a hnukkâbang awh. Jerusalem hoi Bikhri capa Sheba pâlei hanelah a kamthaw awh. <sup>8</sup> Gideon kho dawk e lungsong onae koe a pha awh toteh, Amasa ni ahnimanaw a dawn. Joab ni puengcang a kâmahrawk teh a keng dawk taisawm hoi tahloi a neng. A cei nalaihoi tahloi a yut teh a bo.



<sup>9</sup> Joab ni Amasa koevah, ka nawngah na dam ou telah ati. Joab ni a kâsak teh a paco han a dei teh a pâkhamuen a rang lae kut hoi a kuet. <sup>10</sup> Joab ni avoillae kut dawk sarai a sin e hah Amasa ni a pouk hoe hah dawkvah, a von dawk a thut pouh teh a ruen hah talai dawk a bo. Bout thun hoe toe. Amasa teh a due. Joab hoi a nawngah Abishai ni Bikhri capa Sheba hah a pâlei roi.

<sup>11</sup> Ahni e a teng Joab e tami buet touh a kangdue teh, Joab hoi Devit koelah ka kampang e pueng ni Joab heh pou ring naseh telah a ti. <sup>12</sup> Amasa teh lam dawkvah a thi hoi pukkâkaawk. Ka tho pueng ni a hmu awh teh a kangdue awh. Joab e tami ni taminaw a kangdue e a hmu awh toteh, Amasa e a ro hah lam dawk hoi a la awh teh, kahrawng vah a puen awh teh hni hoi a ramuk awh. <sup>13</sup> Haw e lam dawk hoi a puen awh hnukkhu, Bikhri capa Sheba pâlei hanelah taminaw ni, Joab e hnuk a kâbang awh.

<sup>14</sup> Joab ni Bethmaakha ram Abel kho totouh Isarel ram pueng koe a cei. Bere taminaw koehai a cei teh taminaw a pâkhueng teh, Sheba hnuk a kâbang awh.

<sup>15</sup> Sheba a luennae Bethmaakha ram Abel kho hah a kalup awh. A kho teng vah talai avoivang lah a paten awh. Rapan raphoe hanelah thouk a phom awh. <sup>16</sup> Hatnavah, a lungkaang e napui buet touh ni khothung hoi a hram teh a dei e teh, thai awh haw, thai awh. Kai ni Joab hoi lawk ka dei thai nahanelah tho loe telah Joab koe dei pouh awh telah a ti.

<sup>17</sup> Joab rek a hnai teh napui ni nang hah Joab vai khe, telah a pacei. Oe kai doeh atipouh. Napui ni kaie lawk thai haw atipouh navah, Joab ni ka thai doeh telah atipouh.

<sup>18</sup> Ayan teh Abel kho vah kho a khang awh han rah, ouk ati awh. Hottelah laidei pou a tâtueng awh. <sup>19</sup> Kai teh Isarelnaw daw k roumnae ka ngai e hoi yuemkamcu e lah ka o. Nang teh Isarel kho kOUNg raphoe hanelah na kâcai. Bangkongmaw BAWIPA e raw hah he pahma hanelah na kâcai telah a dei.

<sup>20</sup> Joab ni he pâhma hane, raphoe hane kâcainae awm hoe h bo. <sup>21</sup> Hottelah nahoeh bo, Ephraim mon daw k e Bikhri capa a min teh Sheba ni amae siangpahrang hah a taran toe. Ahni hah na poe awh haw. Na poe awh pawiteh kho daw k hoi ka tâco han telah ati. Napui ni Joab koe vah, kenhaw! a lû teh rapan hloilah ka tâkhawng han telah a ti.

<sup>22</sup> Hote napui teh a lungang e patetlah taminaw koe a cei hnukkhu, Bikhri capa Sheba lû a tâtueng awh teh Joab koelah alawilah a tâkhawng pouh awh. Joab ni mongka a ueng teh taminaw teh hote kho daw k hoi amamouh onae koe bout a ban awh. Hahoi, Joab teh Jerusalem siangpahrang koe a ban.

### *Devit kut rahim e kacuenaw*

<sup>23</sup> Joab teh Isarel ransanaw e ransabawi lah ao. Jehoiada capa Benaiah teh Kereth tami hoi Pelet taminaw kaukkung lah ao. <sup>24</sup> Adoram teh tamuk thaw ka kuen e lah ao. Ahilud capa Jehoshaphat teh kamthang kathutkung lah ao. <sup>25</sup> Sheva teh ca kathunkung lah ao. Zadok hoi Abiathar teh vaihma lah ao. <sup>26</sup> Jair tami teh Devit e ram kaukkung bawi lah ao.

## 21

<sup>1</sup> Devit e tueng daw k kum thum touh rawca takang a tho teh, Devit ni BAWIPA koe lawk a pacei, BAWIPA ni Sawl hoi a imthung, thipalawngnae kecu daw k doeh, Gibeon taminaw a thei awh telah ati.



<sup>2</sup> Siangpahrang ni Gibeon taminaw a kaw. Gibeon taminaw heh Isarel miphun e a canaw nahoe. Amor tami daw k e ka cawi e doeh. Isarelnaw ni ahnimouh koe lawk a kam awh toe. Sawl ni Isarel miphunnaw hoi Judahnaw hanelah a panki pouh e kecu daw k thei hane ouk a kâcai awh.

<sup>3</sup> Devit ni Gibeonnaw koe bangmaw na sak pouh awh han. BAWIPA e râw hah yawhawi na poe awh thai nahan, bangpatet lae yonthanae maw ka sak han telah atipouh.

<sup>4</sup> Gibeonnaw ni ahnimanaw koe, Sawl hoi a imthungnaw daw k tangka hoi sui ka het awh hoe. Isarelnaw buet touh hai thei thainae ka tawn awh hoe telah ati. Ahni ni na dei e pueng kai ni na sak pouh han telah atipouh.

<sup>5</sup> Ahnimouh ni siangpahrang thei hane ka kâcai e hoi Isarel ram roeroe daw k ao hoe nahanelah, na kayouknaw, <sup>6</sup> a capa sari touh na poe awh haw. BAWIPA ni a rawi e Sawl onae Gibeah vah BAWIPA hmaitung kâbang awh han telah ati. Siangpahrang ni na poe awh han telah atipouh.

<sup>7</sup> Hateiteh, siangpahrang ni BAWIPA koe vah, Devit hoi Sawl e capa Jonathan rahak, ahnimouh roi a rahak e lawk a kam e kecu daw k Sawl e capa Jonathan e capa Mephibosheth hah a hlout sak. <sup>8</sup> Siangpahrang ni Aiah canu Rizpah ni Sawl hanelah ca tongpa kahni touh, Armoni hoi Mephibosheth, Sawl canu Mikhal ni Meholath tami Barzillai capa Adriel hanlah a sak pouh e ca tongpa panga touh a la teh, <sup>9</sup> Gibeonnaw e kut daw k a poe. Ahnimanaw ni BAWIPA hmalah mon daw kvah a bang awh. Hottelaho sari touh e naw teh a due awh. Canga tue nah hnin touh daw k a thei awh teh, a due awh.

<sup>10</sup> Aiah canu Rizpah ni burihni a la teh, canga a kamtawng koehoi kho a rak hoehnahlan totouh, napon hah a la teh, talung van daw k a i nahan a phai. Kanithun vah ro e a van vah tava a cu hane hoi tangmin vah sarang ni ca hane a pasoung hoe teh a ring.

<sup>11</sup> Aiah canu Sawl e a yudo Rizpah hno a sak e Devit koe a dei pouh awh.

<sup>12</sup> Filistinnaw ni Gilboa mon daw k Sawl a thei awh teh, a ro hah a bangnae, Bethshan lam hoi kaparawtnaw Jabesh hoi Gilead ram e khocanaw aonae koe siangpahrang ni a cei teh, Sawl e a hru hoi a capa Jonathan e a hru hah a la awh. <sup>13</sup> Hote hmu en koehoi Sawl hoi Jonathan e a hru a ceikhai awh teh, a bang awh e hru hai a la awh. <sup>14</sup> Sawl hoi a capa Jonathan e a hru hah Benjamin ram e Zelah kho e a na pa Kish e tangkom daw k a pakawp awh teh, siangpahrang ni kâ a poe e patetlah a sak. Hathnukku a ram hane ratoumnae lawk hah Cathut ni a thai.

### *Filistin tami kalen theinae*

<sup>15</sup> Filistinnaw ni Isarel hah bout a tuk awh. Devit teh a taminaw hoi a cathuk awh teh, Filistinnaw hah a tuk awh nah, Devit teh hroung a tawn.

<sup>16</sup> Ephraim miphun Ishbibenob tami Rapha catoun Ishbibenob, a tahroe a ri e rahum shekel 300, tahloi a katha e hoi Devit thei hanelah a kâcai.

<sup>17</sup> Zeruiah capa Abishai ni a kabawp teh, Filistin tami hai a thei. Hatnavah, Devit e a taminaw ni, Isarel angnae roum langvaih tie hah a ngaihri awh daw kvah, nang teh kaimanaw hoi na cet mahoe telah lawk a kam awh.

<sup>18</sup> Goba kho vah, Filistinnaw a tuk awh navah, Hushath tami Sibbekhai ni Ephraim miphun Saph hah a thei.

<sup>19</sup> Filistinnaw hoi Goba khovah, bout a kâtuk awh. Bethlehem kho e Joaareoregim capa Elhanan ni Git tami Goliath hah a thei. A tahroecung teh hni kawng kalawng e patetlah ao.



<sup>20</sup> Gath khovah kâtuknae bout ao teh, hawvah, ka rasang poung e aranglae kut roi daw k kutarei taruk touh, avanglae a khok roi daw k a khokcarei taruk, asumkum 24 touh ka tawn e ao. Filistin miphun tamikalennaw doeh. <sup>21</sup> Isarelnaw a tuk navah, Devit e a hmau Shimei capa Jonathan ni ahni hah a thei.

<sup>22</sup> Ahnimanaw pali touh e naw teh, Gath kho daw k kaawm e Rapha tami kalenpoung capa lah ao teh, Devit hoi a sannaw e kut daw k hoi a due awh.

## 22

### *Devit e lunghawi la*

<sup>1</sup> Devit ni, Sawl hoi a taran pueng e kut thung hoi BAWIPA ni a rungngang nah hnin vah, BAWIPA e hmaitung a sak e lanaw teh:

<sup>2</sup> BAWIPA teh kaie lungsong, kaie rapan, kai na kahloutsakkung bawi.

<sup>3</sup> Ka thaonae kaie Cathut, kai ni ka kâuep e, ka bahling hoi kai rungngangnae ki, ka rapanim kânguenae lah ao. Kaie rapan lah na o. Rektapnae thung hoi na rungngang haw.

<sup>4</sup> Pholen han kamcu e BAWIPA teh ka kaw vaiteh, taran kut daw k hoi na rungngang han.

<sup>5</sup> Duenae tuicapa ni na kalup teh Cathut banglah noutnahoeahnae tuicapa ni na taki sak.

<sup>6</sup> Sheol lungmathoenae ni na kalup awh teh, duenae karapnaw ni sut na pawp.

<sup>7</sup> Ka lungreithai navah, BAWIPA ka kaw teh, ka Cathut koevah ka hram. Bawkim daw k hoi ka lawk a thai teh, ka hramnae lawk hah a hnâ thung a kâen.

<sup>8</sup> Hatnavah, a lungkhueknae lahoi talai a kâhuetsak, kalvan du ditouh lengleng a kâhuet.

<sup>9</sup> A hnawng daw k hoi hmaikhu a tâco teh, a pahni daw k hoi hmaikaknae lahoi, hmaisaan kaman sak.

<sup>10</sup> Ama ni kalvan hai a pakui teh, a khoktabei rahim kho lah a hmo.

<sup>11</sup> Cherubim a kâcui teh a kamleng. Bokheiyah, kahlîlaw e rathei van a hmu awh.

<sup>12</sup> A hmonae hah ama kalupkung lah a sak teh, tui hoi katha poung e tâmainaw a pâkhueng teh,

<sup>13</sup> a hma lae angnae lahoi hmaisaan a kaman sak.

<sup>14</sup> BAWIPA teh kalvan vah a cairing teh, ka lentoe poung e Cathut ni lawk a dei.

<sup>15</sup> Licung samtang a pathui teh, ahnimanaw a kâkayei sak. Sumpapalik sak teh ahnimanaw hah a rawk sak.

<sup>16</sup> BAWIPA ni yuenae hoi a hnawng daw k hoi kahlî a tâco sak e lahoi, tuipei a dengnae koehoi talaivan adu ungnae hah koug a kamnue sak.

<sup>17</sup> A rasangnae hmuen koehoi a kut a kâyp teh, tui moikapap thung hoi na rasa.

<sup>18</sup> A thakasaipoung e taran kut thung hoi na rungngang. Ahnimouh ni kai na hmuhma awh teh, kai hlak a thasai awh.

<sup>19</sup> A rucatnae koe ka phanae tueng daw k, na ngang awh nakunghai, BAWIPA teh kaie kânguenae lah ao.

<sup>20</sup> Kai hah kalenpoung hmuen koe na ceikhai awh teh, kai daw k a lunghawi dawkvah, na hlout sak.

<sup>21</sup> BAWIPA ni ka lannae patetlah na tawkpou na poe teh, ka kut a thoug e patetlah na patho.



<sup>22</sup> Bangkongtetpawiteh, BAWIPA e a lamthung hah pou ka dawn teh, kaie Cathut koehoi yon hoi kahmat boihoe.

<sup>23</sup> A lawkcengnae pueng hah ka hmaitung vah ao. A phunglam ka cettakhai boihoe.

<sup>24</sup> A hmaitung hai toun hane kawi lah kaawm hoe. Ka payonpakainae daw k hoi na hlout sak.

<sup>25</sup> Hatdawkvah, ka lannae patetlah na pathung. A mithmu vah kathounge patetlah na patho.

<sup>26</sup> Pahrennae ka tawn e koe pahrennae ka tawn e patetlah na kamnue teh, tamikalan koe tamikalan lah na kamnue van han.

<sup>27</sup> Tamikathoung koe, kathounge lah na kamnue vaiteh, tami lungkap-ataknae koe a lungpatanae lahoi na kamnue van han.

<sup>28</sup> Kârahnom e tami hah na rungngang teh, kâoupnaw na pabo hanelah pou na khet.

<sup>29</sup> Oe BAWIPA, nang teh kaie hmaiim lah na o. BAWIPA ni kaie hmonae a ang sak han.

<sup>30</sup> Kai ni nang na kângue e lahoi ransahu ka tâ teh, rapan hai ka yawngtapue thai.

<sup>31</sup> Cathut e a lamthung teh a kuep. Yuemkamcu lawk teh tanouk lah ao. Kâuepnaw pueng hanelah bahling lah ao.

<sup>32</sup> BAWIPA hoe e laipalah Cathut alouke ao maw. Cathut laipalah, lungsong alouke ao maw.

<sup>33</sup> Cathut teh ka thaonae hoi ka kângue e lah ao, ka lamthung a hmacawn sak.

<sup>34</sup> Ka khok heh sayuk e a khok patetlah a hue a rang sak teh, a hmuen karasang e koe na o sak.

<sup>35</sup> Ka kut teh tarantuk nahan a cangkhai. Hottelah rahum licung hai ka sawn thai.

<sup>36</sup> Nama ni rungngangnae saiphei hah na poe teh, a lungsawnae lahoi kai teh na tawm rasang e lah ka o.

<sup>37</sup> Kai ni ka cei nahane lamthung na pacei teh, ka khoknaw hai thawn hoe.

<sup>38</sup> Ka tarannaw ka pha teh ka thei, kOUNG ka thei hoehroukrak kai ni ka ban hoe.

<sup>39</sup> Kaie ka khok rahim a rawp awh teh, a thaw thai awh hoe nahanelah, katinkaawi teh ka thei.

<sup>40</sup> Bangkongtetpawiteh, tarantuk sak hanelah, nang ni thaonae hoi na pathoup teh, kai na katuknaw hah kaie rahim na sung sak.

<sup>41</sup> Kai na ka hmuhma e a lahuennaw hah kai koe na poe teh, nama ni kai na katuknaw hah hnuklah na kamlang sak.

<sup>42</sup> A hram awh ei, ka rungngang hane tami awmhoe. BAWIPA teh a khet awh ei, pato awh hoe.

<sup>43</sup> Hatnavah, kai ni ahnimanaw hah vaiphu patetlah reppasei lah ka phawm teh, lam daw songnawng patetlah ka coungroe awh teh, kaheikalai awh.

<sup>44</sup> Nang ni ka taminaw hoi hawihoe hane daw k hoi na rungngang teh, Jentelnaw e kaukkung lah na o sak nahanelah, na ring e ka panuek boihoe e naw ni, kaimae thaw a taw awh han.

<sup>45</sup> Jentelnaw hah kai koe a kâpoe awh vaiteh, a thai awh tahma ka lawk a ngai awh han.

<sup>46</sup> Jentelnaw a tâco awh han.



<sup>47</sup> BAWIPA teh yungyoe a hring. Kaie lungsong, pholennae lah awm seh. Kaie rungngangnae lungsong Cathut teh, tawmrasang e lah awm naseh.

<sup>48</sup> Kai koe lah moi ka pathung pouh e hoi miphun pueng kaie rahim ka papawt e teh katâkung Cathut doeh.

<sup>49</sup> Tarannaw e kut dawk hoi, na hlout sak. Kai na ka taran naw e a lathueng vah, na tawm teh, ka mathoutmakainaw e kut dawk hoi na hlout sak.

<sup>50</sup> Hatdawkvah, Oe BAWIPA, kai teh Jentelnaw koevah, lunghawinae lawk ka dei vaiteh, na min pholennae la ka sak han.

<sup>51</sup> Cathut teh a siangpahrang hanelah, rungngangnae imrasang lah ao teh, satui a awi e Devit hoi a canaw koe lathueng vah yungyoe hoi yungyoe totouh, pahren lungmanae a kamnue sak.

## 23

### *A hnukteng Devit e lawk*

<sup>1</sup> Hetnaw teh a hnukteng Devit ni lawk a dei e naw doeh. Jesi capa Devit a rasangnae koe tawmrasang e lah ao teh, Jakop Cathut ni satui a awi e, Isarel hanelah la kahawi ka phuengkung ni hettelah a dei. <sup>2</sup> BAWIPA e Muitha ni kai hno lahoi a dei. A lawk teh ka lai dawk ao. <sup>3</sup> Isarel Cathut Isarel lungsong ni, kai koevah a dei. Taminaw kaukkung teh, a lan roeroe vaiteh, Cathut taki nalaihoi a uk han. <sup>4</sup> Khopâui hoeh, kanî ka tâcawt e amom e angnae patetlah thoseh, khorak hnukkhu, kanî a tâco teh talai dawk hoi phokahring ka cawn e patetlah thoseh ao han. <sup>5</sup> Ka imthung teh Cathut hoeh laipalah nakunghai, a yungyoe lawkkamnae kai hoi ka sak roi toe. Hote lawkkam teh tangka kuep hoeh nakunghai, kaie rungngangnae hoi kai ni ka ngainae lah ao. <sup>6</sup> Kai cungkeihoehe taminaw teh, tâkhawng e pâkhig patetlah ao. Bangkongtetpawiteh kut hoi la thai lah awm hoeh. <sup>7</sup> Ka tek e tami ni sum hoi tahroe hah hno han a ngai. Hahoi teh, amamae hmuen dawk hmai hoi koug sawi lah ao han telah na pato a ti.

### *Devit e tami a thakasainaw*

<sup>8</sup> Hetnaw heh Devit e athakaawme taminaw doeh. Takhemon tami Joshebbashebeth teh ransa kacuenaw thung dawk kacuepoung e lah ao. Ahni teh tahroe hah a sin teh, tami 800 touh vaitalahoi a thei.

<sup>9</sup> Ahni hnuk vah, Aho capa Dodo, Dodo capa Eleazar doeh. Ahni teh taran ka tuk hanelah kamkhueng e Filistinnaw hoi a kâtâ awh lahun hah, Isarelnaw koug a yawng navah, Devit koe e athakaawme taminaw katham touh thung dawk e buet touh lah ao.

<sup>10</sup> Ahni teh a thaw teh, Filistinnaw koe a kut a pho teh a kut nget a tawn totouh Filistinnaw hah a bouk. Hot hnin vah BAWIPA ni lentoenae lahoi a tâ pouh. Ahnimanaw teh tarannaw e hnopai hah a la hanelah doeh a ban awh toe.

<sup>11</sup> Ahni hnuk vah, Hararite tami Agee capa Shammah doeh. Baphoungkung a thanae hmuen koe Filistinnaw a kamkhueng awh teh, taminaw ni Filistinnaw a yawng takhai awh. <sup>12</sup> Ahni teh hote hmuen koe a kangdue teh a ring. Filistin tami hah a thei teh, BAWIPA ni kalenpoung e tânae a poe.

<sup>13</sup> Ransa tarankahawi e thung dawk 30 touh a cathuk awh teh, canganae tueng dawk, Devit aonae koe Adullam talungkhu dawk a cei awh teh, Filistin ransanaw teh Rephaim yawng dawk a tungpup awh. <sup>14</sup> Hatnae tueng navah, Devit teh rapan dawk ao teh, Filistinnaw teh Bethlehem kho vah ao awh. <sup>15</sup> Devit ni dik a doun nalaihoi Bethlehem e tuikhu tui



rapan teng e hah nei hane na kapoekung awm haw pawiteh aw telah a ti. <sup>16</sup> Athakaawme taminaw kathum touh ni Filistin ransahu pat a raka teh rapan teng e Bethlehem kho e tuikhu tui hah a do awh. Devit koe a ceikhai awh teh, ahni ni net ngai hoe. BAWIPA e hmaitung vah a rabaw. <sup>17</sup> Oe BAWIPA hete tui heh kai ni ka net mahoe. Due hane hai taket laipalah kacetnaw e thi phu hah ka nei han namaw, telah ati. Net laipalah ao. Athakaawme taminaw kathum touh e ni a sak awh e doeh.

<sup>18</sup> Zeruiah capa Joab e a hmaunawngaha Abshai teh kathum touh thung daw kaciepoung lah ao. A tahroe hoi tami 300 touh a thei dawkvah, kathum touh thung daw kminhawinae a hmu. <sup>19</sup> Kathum touh thung dawkvah, oup hane nahoehmaw. Hatdawkvah, kacue e lah ao. Hateiteh, a hmaloe e tarankahawi e ransanaw phat hoe.

<sup>20</sup> Kebzeel tami tarankahawi capa Jehoiada capa Binaiah ni thaonae hno moikapap a sak. Moab tami a min kamthang sendek patet e tami kahni touh a thei. Kasik thapa daw k hai alouk lae lungngoum thung kaawm e sendek hah a thei. <sup>21</sup> Tami kalenpoung Izip tami hah a thei. Izip tami ni tahroe a sin eiteh, Benaiah ni sonron dueng hah a sin teh, a cei. Izip tami e a kut daw k e tahroe a lawp teh hot e tahroe hoi ama hah a thei. <sup>22</sup> Jehoiada capa Benaiah niteh, hot patet lae hno hah a sak dawkvah, athakaawme taminaw kathum touh thung daw kminhawinae a hmu. <sup>23</sup> Tami 30 touh hlak bari hane kaw i lah ao. Hateiteh, ahmaloe e kathum touh phat hoe. Devit ni ama karingkungnaw e kacue lah a hruek.

<sup>24</sup> Joab e nawngaha Ashahel teh, tami 30 touh thung daw k buet touh lah ao. Bethlehem kho e Dodo capa Elhanan, <sup>25</sup> Harod tami Shammah, Harod tami Elika, <sup>26</sup> Palti tami Helez hoi Tekoa tami Ikkesah capa Ira, <sup>27</sup> Anathoth tami Abiezer hoi Khushathi tami Mebunnai, <sup>28</sup> Aho tami Zalmon hoi Netophah tami Maharai, <sup>29</sup> Netophah tami Baanah capa Heleb, Benjamin casaknaw Gibeah tami Ribai capa Ittai, <sup>30</sup> Pirathon capa Benaiah, Gaash yawn daw k e Hiddai, <sup>31</sup> Arbath tami Abialbon hoi Barhum tami Azmaveth, <sup>32</sup> Shaalbon tami Eliahba hoi Jashen casaknaw thung daw k e Jonathan, <sup>33</sup> Hararite tami Shammah, Hararite tami Sharar capa Ahiam, <sup>34</sup> Maakath casak Ahasbai capa Eliphelet, Giloh tami Ahithophel capa Eliam, <sup>35</sup> Karmel tami Hezro hoi Arab tami Paarai, <sup>36</sup> Zobah tami Nathan capa Igal, Gad tami Bani, <sup>37</sup> Ammon tami Zelek, Zeruiah capa Joab e senehmaica kaphawtkung Beeroth tami Naharai, <sup>38</sup> Ithrite tami Ira hoi Ithrite tami Gareb, <sup>39</sup> Hit tami Uriah, abuemplahoi 37 touh a pha awh.

## 24

### *Devit ni Judah hoi Isarelnaw a touk*

<sup>1</sup> BAWIPA teh Isarelnaw koe a lungkhuek teh, Isarelnaw hoi Judahnaw hah touk haw, telah Devit hroecoe sak hanelah a lungthin a tacuek.

<sup>2</sup> Siangpahrang ni ama koe kaawm e ransabawi Joab koe Isarel miphun pueng Dan kho hoi Beersheba kho totouh cet awh nateh, tami nayittouh maw tie ka panue thai nahan touk awh haw atipouh.

<sup>3</sup> Joab ni siangpahrang koe vah, BAWIPA na Cathut ni taminaw moikapap lah bout a pung sak teh, a let 100 touh haiyah na hmu hanelah siangpahrang ka bawipa ni, bangkongmaw hot hah panue han na ngai telah atipouh.



<sup>4</sup> Hateiteh siangpahrang e lawk ni Joab hoi a ransanaw hah a tâ dawkvah, Joab hoi ransa kacuenaw ni taminaw touk hanelah ahni koehoi a tâco awh.

<sup>5</sup> Jordan tui a raka awh teh, Gad yawn lungui kaawm e Jazer koelae Aroer kho a roe awh. <sup>6</sup> Gilead ram hoi Tahtimhodshi ram vah a pha awh. Danjaan ram hoi Sidon tengpam ram totouh a kalup awh. <sup>7</sup> Taire rapanim koe a pha awh teh, Hiv khonaw, Kanaan taminaw e khopuinaw koe a pha awh. Judah ram akalah thoseh, Beersheba totouh thoseh thouk a cei awh.

<sup>8</sup> Ram tangkuem be a katin awh teh, thapa yung tako touh hoi a hnin 20 touh a kuep hnukkhu, Jerusalem kho dawk a pha awh. <sup>9</sup> Joab ni milu cayin hah siangpahrang koe a poe. Isarel dawk tahloi ka sin ni teh tarankahawi e tami 800, 000 Judahnaw dawk 500, 000 touh a pha awh.

<sup>10</sup> Tami be a touk hnukkhu, Devit ni amahoima yon a kâpen. Devit ni BAWIPA koevah, ka sak e hno dawk puenghoi ka payon toe. Oe BAWIPA na san kaie yon na takhoe pouh haw. Pathu laihoi doeh hno ka sak toe telah a ti.

### *Devit tounnae*

<sup>11</sup> Devit teh amom a thaw navah, BAWIPA e lawk hah Devit e profet Gad koe a pha. <sup>12</sup> Cet nateh, Devit koe hettelah dei pouh. Hno kathum touh nang koe na patue. Nang dawk kai ni ka sak hane buetbuet touh na rawi han, telah a dei e lawk hah patuen dei pouh haw telah atipouh.

<sup>13</sup> Gad teh Devit koe a cei teh, Na ram dawk kum thum touh thung takang ka tho sak maw na ngai, Nahoe pawiteh, thapa yung thum touh tarannaw ni na pâlei maw na ngai, Nahoe pawiteh, hnin thum touh thung Lacik ka phasak maw na ngai. Na kapatoukung koe bangtelamaw ka dei pouh han, kâpouk nateh, dei haw telah atipouh.

<sup>14</sup> Devit ni Gad koevah, kângailah a ru toe. BAWIPA e kut dawk bawt naseh. Bangkongtetpawiteh, a lungmanae teh a len. Tami e a kut dawk teh na phat sak hanh telah Gad koe a dei pouh.

<sup>15</sup> BAWIPA ni Isarelnaw koe amom hoi atueng a khoe e totouh, patawnae a pha sak. Dan kho hoi Beersheba kho totouh tami 70, 000 touh a due awh.

<sup>16</sup> Kalvan tami ni Jerusalem kho hah ka raphoe han telah, a kut a dâw navah, BAWIPA ni haw e runae dawk hoi a kamlang teh, tami ka raphoe e kalvantami koevah, a khout toe na kut dâw hanh lawi telah atipouh. Hatnavah BAWIPA e kalvantami teh, Jebusit tami Araunah e cangkatinnae teng vah ao.

<sup>17</sup> Taminaw kathetkung kalvan tami hah Devit ni a hmu navah, kai ka payon toe, hnokahawi hoe e ka sak toe. Hatei teh hete tunaw ni bangmaw a sak awh, na kut teh kai hoi apa imthung dawk phat naseh telah BAWIPA koe a ti.

<sup>18</sup> Hote hnin dawk Gad ni Devit koe a tho teh, cet haw. Jebusit tami Araunah e cangkatinnae teng vah BAWIPA hanelah thuengnae khoungroe na sak han telah atipouh.

<sup>19</sup> BAWIPA ni a dei e patetlah Devit ni a cei. <sup>20</sup> Hottelah siangpahrang teh a taminaw hoi a tho e hah Araunah ni a khet teh a hmu navah, alawilah a tâco teh, siangpahrang e a hmalah a tabo.

<sup>21</sup> Kaie bawipa siangpahrang teh a san koe bangkongmaw a tho telah atipouh. Devit ni taminaw koe Lacik a kangkhong thai nahan BAWIPA hanelah thuengnae sak hanelah ka ngai teh nange laikaw ka ran hanelah ka tho telah atipouh.

<sup>22</sup> Araunah ni Devit koevah, siangpahrang ka bawipa, ahawi na tie patetlah thueng yawkaw naseh. Hmaisawi thueng nahanelah maitotannaw



ao. Thing hanelah laikawk puengcang, maitonaw e puengcangnaw hai ao telah atipouh.

<sup>23</sup> Oe siangpahrang, hetnaw pueng Araunah ni siangpahrang koevah a poe telah ati. Araunah ni siangpahrang koevah, BAWIPA na Cathut ni na coe lawi naseh telah atipouh.

<sup>24</sup> Siangpahrang ni Araunah koevah telah nahoeh, apfu hoi na ran pouh han. Banghai pâbaw laipalah BAWIPA ka Cathut koe hmaisawi thuengnae ka poe mahoe telah ati. Devit ni tangka shekel 50 touh hoi cangkatinnae hmuén hoi maitonaw hah a ran. <sup>25</sup> Devit ni haw e a hmuén koe BAWIPA hanelah thuengnae a sak teh, hmaisawi thuengnae hoi roun thuengnae a poe. BAWIPA ni Isarel ram hanelah ratoumnae lawk hah a thai teh Lacik teh a kangkhong toe.



# 1 SIANGPAHRANG

## (The First Book of the Kings)

### *Adonijah ni siangpahrang hanelah a kâpouk*

<sup>1</sup> Siangpahrang Devit teh a matawng poung toe, hni a kâkhu hai a phubet hoeh toe. <sup>2</sup> Hatdawkvah, a sannunaw ni ahni koevah, siangpahrang bawipa nang hanelah tanglakacuem buet touh ka tawng awh vai. Siangpahrang e a teng ao vaiteh, khenyawn naseh. Siangpahrang bawipa a phubet thai nahanelah a lungtabue daw k i sak han telah ati awh. <sup>3</sup> Hahoi, Isarel ram pueng daw k tangla a meikahawi a tawng awh teh, Shunam tami Abishag a hmu awh teh, siangpahrang koevah a thokhai awh. <sup>4</sup> Hote tangla teh a meihawipoung teh siangpahrang hah kahawicalah a khetyawt teh, a thaw naw a taw k pouh. Hatei, siangpahrang ni ipkhai hoeh.

<sup>5</sup> Hatnavah, Haggith capa Adonijah ni a mahoima a kârasang teh siangpahrang ka taw k han telah rangleng hoi marangransanaw hoi tami 50 touh a hmalah yawng sak hanelah a kâcai. <sup>6</sup> A na pa ni nâtuék hai bangkongmaw het patet lae hno na sak telah yue boihoe. Ahni teh a meikahawi poung e tami lah ao teh, a manu ni Absalom hnukkhu, a khe e doeh. <sup>7</sup> Zeruah capa Joab hoi vaihma Abiathar hah law k a kâpankhai teh, ahnimouh roi hai Adonijah koelah a kambawng roi. <sup>8</sup> Hatei, vaihma Zadok hoi Jehoiada capa Benaiah hoi, profet Nathan, Shimei, Rei hoi Devit koe e athakaawme taminaw teh, Adonijah koelah kambawng awh van hoeh. <sup>9</sup> Hahoi Adonijah ni tu hoi maitotan kathâw poung e hah Zohelath lungsong koevah a thei. Hothateh, Enrogel teng vah kaawm e doeh. Siangpahrang capa, hmaunawngghanaw abuemlahoi Judah ram e siangpahrang e sannaw abuemlah a kaw. <sup>10</sup> Hatei, profet Nathan hoi athakaawme taminaw hoi a nawng ha Solomon teh coun van hoeh.

### *Nathan hoi Bathsheba ni heinae*

<sup>11</sup> Hatnavah, Nathan ni Solomon e manu Bathsheba koevah, siangpahrang capa Adonijah hah maimae bawipa Devit ni panuek laipalah siangpahrang lah a kârasang toe tie hah na panuek hoeh maw. <sup>12</sup> Tho nateh, na hringnae hoi na capa Solomon e hringnae rungngang thai nahanelah, ratoumnae lahoi pouknae na poe vai. <sup>13</sup> Siangpahrang Devit koevah karanglah kâen nateh, ahni koevah oe siangpahrang ka bawipa, na sannu koevah na capa Solomon heh kai hnuk vah siangpahrang lah ao roeroe han, ahni teh kaie bawitungkhung daw k a tahung han telah law k na kam toe nahoehmaw. Bangkongmaw Adonijah ni siangpahrang khuet a taw k han vaw telah dei pouh. <sup>14</sup> Khenhaw! siangpahrang hoi na kâpatawn roi lahun nah kai hai ka tho van vaiteh, na dei e daw k na kabawp van han telah atipouh.

<sup>15</sup> Hahoi teh, Bathsheba teh siangpahrang e imthung a kâen. Siangpahrang teh a matawng poung toung dawkvah, Shunam tami Abishag ni thaw a taw k pouh. <sup>16</sup> Bathsheba ni siangpahrang koe tabo laihoi kut a man teh, siangpahrang ni bangmaw na panki telah atipouh.

<sup>17</sup> Hahoi ahni ni ka bawipa, na BAWIPA Cathut min lahoi na sannu koe, na capa Solomon heh kai hnuk vah siangpahrang lah ao mingming vaiteh, ahni ni ka bawitungkhung daw k a tahung han telah law k na kam.

<sup>18</sup> Khenhaw! atuvah, Adonijah teh, siangpahrang lah ao toe. Siangpahrang



ka bawipa nang ni hote kongnaw hah na panuek hoeh. <sup>19</sup> Kathâw e maitotan, saringnaw hoi tunaw a thei awh teh, siangpahrang capanaw abuemlah, vaihma Abiathar hoi ransanaw kaukkung Joab hah a coun awh. Hatei, na san Solomon teh coun awh hoeh. <sup>20</sup> Oe siangpahrang ka bawipa atuvah, Isarelnaw ni siangpahrang ka bawipa e bawitungkhung daw, ahni hnukkhu apimaw ka tahung han tie na dei hane ring laihoi sut a pawp awh. <sup>21</sup> Nahoe pawiteh, hettelah han doeh. Siangpahrang ka bawipa heh mintoenaw koe a kâhat van toteh, kai hoi ka capa Solomon teh hnoun e lah doeh kaawm roi titoe telah atipouh.

<sup>22</sup> Khenhaw! hottelah siangpahrang koe a dei pouh lahun nah, profet Nathan hai a kâen van <sup>23</sup> Khenhaw! profet Nathan a tho telah siangpahrang koe a dei pouh awh. Siangpahrang koe a pha toteh, siangpahrang e hmalah a minhmai talai daw rekkâbet lahoi a tabo. <sup>24</sup> Hahoi Nathan ni Oe siangpahrang ka bawipa, kai hnuk vah Adonijah heh siangpahrang lah ao vaiteh, kaie bawitungkhung daw a tahung han telah na dei boimaw. <sup>25</sup> Sahnin vah a ceicathuk teh, kathâw e saring, maitotan hoi, tu naw hah a thei awh teh, siangpahrang capanaw hoi ransa kaukkungnaw hoi vaihma Abiathar tinaw hah a coun, reirei a canei awh teh, siangpahrang Adonijah na hring saw naseh telah atipouh awh. <sup>26</sup> Hateiteh, na san kai hoi vaihma Zadok hoi Jehoiada capa Benaiah hoi na san Solomon kaimanaw teh na coun van awh hoeh.

<sup>27</sup> Hote hnonaw heh siangpahrang ka bawipa ni kâ na poe daw, sak e na pawiteh, siangpahrang ka bawipa ni a hnuk vah bawitungkhung daw ka tahung hane hah apimaw tie na sannaw koe na la dei hoeh e han namaw, telah atipouh.

### *Solomon siangpahrang lah pathangnae*

<sup>28</sup> Hahoi siangpahrang Devit ni a pathang e teh, Bathsheba hah na kaw pouh haw atipouh e patetlah siangpahrang teng vah a tho teh a hmalah a kangdue. <sup>29</sup> Siangpahrang ni lawk a kam teh rucatnae pueng thung daw hoi ka hringnae ka ratang e Bawipa Cathut a hring e patetlah, <sup>30</sup> nang koevah Isarel BAWIPA Cathut min lahoi na capa Solomon heh kai hnuk vah siangpahrang lah ao roeroe han. Kaie yueng lah ka bawitungkhung daw a tahung han telah lawk a kam tangcoun e patetlah sahnin ka sak roeroe han telah a ti.

<sup>31</sup> Bathsheba ni minhmai talai rekkâbet lah a tabo laihoi siangpahrang e a kut a kuet teh, ka bawipa siangpahrang Devit teh a yungyoe pou hring lawiseh, telah a ti.

<sup>32</sup> Siangpahrang Devit ni vaihma Zadok hoi profet Nathan, Jehoiada capa Benaiah tinaw hah na kaw pouh awh haw ati teh, ahnimouh ni a hmalah a kâen awh. <sup>33</sup> Siangpahrang ni ahnimouh koe vah, na bawipa e sannaw hrawi awh nateh, ka capa Solomon hah kaie la daw kâcui sak nateh, Gihon lah cetkhai awh. <sup>34</sup> Vaihma Zadok hoi profet Nathan ni hote hmuen koe Isarel siangpahrang lah satui awi naseh. Mongka ueng awh nateh, siangpahrang Solomon hring saw na seh telah a hram awh han. <sup>35</sup> Ahnie hnuk na kâbang awh vaiteh, ka bawitungkhung daw na tahung vaiteh, kaie yueng lah siangpahrang lah ao han. Bangkongtetpawiteh, Isarel hoi Judah kaukkung lah ka hruek toe telah a ti.

<sup>36</sup> Jehoiada capa Benaiah ni siangpahrang koevah, Amen siangpahrang ka bawipa, Bawipa Jehovah ni, hnâbawtkhai naseh. <sup>37</sup> Siangpahrang ka bawipa koevah Jehovah ao van e patetlah, Solomon koehai awmikai



naseh. Ka bawipa siangpahrang Devit e bawitungkhung hlak hai ka bawipa e bawitungkhung teh hoe len naseh telah a ti.

<sup>38</sup> Hahoi teh, vaihma Zadok hoi profet Nathah hoi Jehoiada capa Benaiah capa, Kereth taminaw hoi Peleth taminaw a cei awh teh, Solomon teh Devit e la a kâcui sak awh teh, Gihon lah a ceikhai awh. <sup>39</sup> Hahoi vaihma Zadok ni, lukkareim thung hoi satui tanae ki hah a la teh, Solomon hah a awi. Hahoi mongka a ueng awh teh, taminaw pueng ni siangpahrang Solomon teh hring saw naseh telah a hram awh. <sup>40</sup> Taminaw ni a hnukkâbang awh. Vovit a ueng awh teh talai meimei kâbawng lah lunghawi poung laihoi a hramki awh. <sup>41</sup> Hahoi teh, Adonijah hoi a sannaw ahni koe kaawm e taminaw pueng ni, rawca he a ca awh hnukkhu, hote pawlawknaw a thai awh. Joab ni mongka lawk a thai toteh, kho thung kamthang e pawlawknaw teh bang namaw telah a ti. <sup>42</sup> Hottelah a dei lahun nah, vaihma Abiathar capa Jonathan a tho teh, Adonijah ni tho haw, nang teh tamikahawi lah na o e patetlah kamthang kahawi e na thokhai han doeh telah atipouh.

<sup>43</sup> Jonathan ni Adonijah koevah, ka thokhai hoeh bawipa, siangpahrang Devit ni Solomon teh siangpahrang lah a ta toe. <sup>44</sup> Ahni koe vah vaihma Zadok, profet Nathan, Jehoiada capa Benaiah, Kereth taminaw hoi Peleth taminaw hah siangpahrang ni a patoun. <sup>45</sup> Vaihma Zadok hoi profet Nathan ni, Gihon vah siangpahrang hanlah satui a awi roi, hatei, hmuen koehoi lunghawi laihoi a takhang awh teh, hote kamthang dawk khopui thung ruengruengti awh. Hothateh, na thai awh e kamthang doeh. <sup>46</sup> Solomon teh bawitungkhung dawk a tahung.

<sup>47</sup> Siangpahrang e a sannaw ni na Cathut ni nange min hlak Solomon e min teh, tawmrasang naseh. Na bawitungkhung hlak a bawitungkhung teh len sak na seh telah ka bawipa Devit hah lunghawikhai hanlah a tho awh. Hahoi siangpahrang teh ikhun dawk a tabo. <sup>48</sup> Siangpahrang ni hai hettelah a dei. Bawipa Isarelnaw e Cathut, sahnin ka bawitungkhung dawk ka tahung hane na kaopoekung teh pholen e lah awm naseh. Ka mit roeroe ni a hmu telah a ti.

<sup>49</sup> Hahoi teh Adonijah ni a hrawi e pueng ni, a taki awh, a thaw awh teh amamae lam dawk lengkaleng a cei awh. <sup>50</sup> Adonijah ni Solomon hah a taki. A thaw teh a cei teh thuengnae khoungroe ki hah a kuet.

<sup>51</sup> Hahoi khenhaw! Adonijah ni siangpahrang Solomon a taki teh, siangpahrang Solomon ni a san heh a thei hoeh hanelah kai koe lawk kam naseh telah thuengnae khoungroe ki a kuet telah Solomon koe a dei pouh awh.

<sup>52</sup> Yuemkamcu lah onae kamnuek pawiteh, a sam buet touh boehai talai dawb bawt mahoe. Hatei, yonnae a tawn tie ka thai pawiteh a due han telah a ti.

<sup>53</sup> Hahoi siangpahrang Solomon ni tami a patoun teh thuengnae khoungroe koehoi a hrawi. Hahoi a cei teh, siangpahrang Solomon hah kut a man. Solomon ni ahni koevah, nama im ban leih atipouh.

## 2

### *Devit ni Solomon a cangkhai*

<sup>1</sup> Devit a due han a hnai tOUNG dawkvah, a capa Solomon hah kâ a poe. <sup>2</sup> Talai phung patetlah ka cei han toe. Hatdawkvah, thakâlat nateh tongpatang lah awm loe. <sup>3</sup> Na sak e hno pueng hoi na ceinae naw pueng koe a lamcawn nahanlah Mosi e kâlawk dawk thut e patetlah



BAWIPA na Cathut ni a lamthung dawn hane hoi a phunglam, kâpoelawk, lawkcengnae hoi na panuesaknae naw tarawi hanelah lawk na poe e naw hah tarawi haw. <sup>4</sup> BAWIPA ni kaie kong dawk hoi na capanaw ni lungthin buemlahoi a hringnae buemlahoi a ceinae koe kâhruetcueth lahoi ka hmalah yuemkamcu lah awm pawiteh, Isarelnaw e bawitungkhung dawk ka tahung hane na vout awñ mahoe, telah a dei e hah a caksak han.

<sup>5</sup> Hathloilah, Zeruiah capa Joab ni kai dawk a sak e naw hah na panue. Isarel ransanaw kaukung kahni touh, Ner capa Abner hoi Jether capa Amosa a theinae dawk a sak e naw hah, roumnae tueng nah tarantuknae thipaling a lawng sak teh a keng dawk a kâyeng e taisawm dawk hai thoseh, a khokkhawm dawk hai thoseh, tarantuknae koe kânep e naw hah pahnim hanh. <sup>6</sup> Hatdawkvah, na lungang e patetlah tawk haw, a sam kaponaw phuén vah karoumcalah loun sak hanh.

<sup>7</sup> Gilead tami Barzillai tinaw koe teh lungmanae kamnuek sak. Na caboi dawk rawca kavenkung lah sak. Bangkongtetpawiteh, na hmau Absalom koehoi ka yawng nah kai koe a tho awñ. <sup>8</sup> Hahoi, khenhaw! Bahurim kho e tami Benjamin catoun Gera capa Shimei heh nang koe ao. Ahni ni, Mahanaim hmuén koe ka cei navah, Atangcalah thoe na bo. Hatei, Jordan vah kai na dawn hanelah a tho teh, hote hmuén koe tahloi hoi thei hoe hanelah Cathut min hno lahoi lawk yo ka kam toe.

<sup>9</sup> Hatdawkvah, yonnae ka tawn hoe e patetlah pouk hanh. Bangkongtetpawiteh, nang teh tami lungkaang lah na o. A lathueng vah bangtelamaw ka sak han tie hah na panue han doeh. Phuén dawk a sam kaponaw teh thipaling hoi na ceisak han telah atipouh.

### *Devit duenae*

<sup>10</sup> Hahoi Devit teh a na mintoenaw koe a i teh, Devit khopui dawk a pakawp awñ. <sup>11</sup> Devit ni Isarel a uknae tueng kum 40 touh a pha. Hebron vah kum 7 touh a uk teh, Jerusalem vah kum 33 touh a uk. <sup>12</sup> Hahoi, Solomon teh a na pa e bawitungkhung dawk a tahung teh a uknaeram teh hoe a caksak.

### *Solomon ni Adonijah a thei*

<sup>13</sup> Haggith capa Adonijah teh Solomon e manu Bathsheba koe a tho. Manu ni roumnae hoi maw na tho telah a pacei. Roumnae hoi ka tho doeh telah atipouh.

<sup>14</sup> Hahoi, ahni ni nang koe lawk dei hane ka tawn atipouh. Manu ni dei haw atipouh.

<sup>15</sup> Ahni ni ram hateh kaie lah ao tie hoi Isarelnaw pueng ni hai kai ni uknaeram hanlah a pouknae naw kai dawk a bo tie hai na panue. Hatei, ram hateh, ka nawngnae koe a pha toe. Bangkongtetpawiteh, BAWIPA khokhangnae teh ahni hanelah doeh ao. <sup>16</sup> Atuvah, hno buet touh hei hane ka tawn, na ek pouh hanh leih atipouh. Manu ni dei leih bout atipouh.

<sup>17</sup> Pahren lahoi siangpahrang Solomon na pato pouh. Bangkongtetpawiteh, na lawk teh ek mahoe. Shunam tami Abishag hah yu lah na paluen sak haw naseh atipouh.

<sup>18</sup> Bathsheba ni, oe siangpahrang koe ka dei pouh han atipouh.

<sup>19</sup> Hahoi, Bathsheba teh Adonijah e lawk dei pouh hanelah, siangpahrang Solomon koe a cei. Siangpahrang teh a manu a dawn hanelah a thaw teh, a hmalah a tabo teh a bawitungkhung dawk bout a tahung. Siangpahrang e manu hanelah bawitungkhung hah a hruek pou teh, aranglah a tahung



pouh. <sup>20</sup> Hahoi, hno buet touh ka hei hane ao. Na lungkuepkhai loe atipouh. Siangpahrang ni het loe anu, ka ek mahoe atipouh.

<sup>21</sup> Ahni ni, Shunam tami Abishag he na hmau Adonijah e yu lah paluen sak loe atipouh.

<sup>22</sup> Siangpahrang Solomon ni, bangkongmaw Shunam napui Abishag hah Adonijah hanelah na hei. Uknaeram hai het pouh bokhe. Bangkongtet-pawiteh, ahni teh ka hmau nahoehmaw. Ahni hane hoi vaihma Abiathar hoi Zeruiah capa Joab hane hai het pouh bokhe atipouh.

<sup>23</sup> Siangpahrang Solomon ni BAWIPA e min lahoi Adonijah ni a hei e heh ama due nahane nahoe pawiteh, Cathut ni a ngai e patetlah kai dawk sak lawiseh, hothlak ka pataw lahai yah ati. <sup>24</sup> BAWIPA e lawkkam patetlah na caksak teh apa Devit e bawitungkhung dawk na tahung sak teh ka imthung kangdout sak e hringnae lahoi ka dei. Adonijah het sahnin roeroe thei e lah awm seh telah lawk a kam.

<sup>25</sup> Hahoi teh, siangpahrang Solomon ni Jehoiada capa Benaiah a patoun teh ahni ni a hem teh a due.

### *Abiathar takhoenae*

<sup>26</sup> Hahoi, vaihma Abiathar koevah, siangpahrang ni, Anathoth kho e nang nama im ban leih. Due hanlah na kamcu, hatei apa Devit hmalah Bawipa Jehovah e thingkong na hrawm teh apa ni a khang e runae naw hai na khangkhai van dawkvah, atu teh na thet mahoe rah atipouh.

<sup>27</sup> Hahoi teh, Cathut ni Shiloh kho vah Eli imthungnaw hno lahoi a dei e a kuep nahanelah, Solomon ni Abiathar teh BAWIPA e vaihma thaw dawk hoi a takhoe.

### *Joab a thei*

<sup>28</sup> Hote lawk hah Joab ni a thai. Bangkongtetpawiteh, Joab teh Absalom koelah bawk hoe eiteh, Adonijah koelah ka bawk e tami lah ao. Hahoi Joab teh BAWIPA e lukkareiim dawk a yawng teh thuengnae khoungroe ki hah a kuet. <sup>29</sup> Hahoi, BAWIPA e lukkareiim dawk Joab a yawng, thuengnae khoungroe koe ao telah Solomon koe a dei pouh awh. Hahoi siangpahrang Solomon ni Jehoiada capa Benaiah koe cet nateh, thet atipouh.

<sup>30</sup> Benaiah teh BAWIPA lukkareiim koe lah a ceitakhang teh ahni koevah siangpahrang ni tâcawt loe ati atipouh. Ahni ni nahoe hete hmuen koe doeh ka due han atipouh. Benaiah ni Joab ni hettelah a dei, hettelah na pato telah siangpahrang koe a thai sak.

<sup>31</sup> Siangpahrang ni hai yon ka tawn hoe e tami Joab ni a thei e yonnae teh kai hoi apa imthungnaw kâbet hoe hanelah a dei e patetlah thet nateh pakawm awh atipouh. <sup>32</sup> Hat toteh, ama hlak kalan e kahawi e tami kahni touh Ner capa Abner Isarel ransanaw kaukkung hoi Jether capa Amsa Judah ransanaw kaukkung hah apa Devit ni panuek laipalah a tuk teh, tahloi hoi a thei dawkvah, BAWIPA ni a thipaling teh amae a lû dawk a pha sak han. <sup>33</sup> Hottelah, thipaling teh Joab e lû dawk hoi a catounnaw e lû dawk yuengyoe ban vaiteh, Devit e lathueng thoseh, a ca catounnaw e lathueng thoseh, a imthungnaw e lathueng thoseh, a bawitungkhung dawk BAWIPA koehoi rounmae yuengyoe ao han atipouh.

<sup>34</sup> Jehoiada capa Benaiah ni a cei teh a thei. Hahoi kahrawngum amae im dawk a pakawp. <sup>35</sup> Hahoi siangpahrang ni Jehoiada capa Benaiah teh, ransabawi lah a hruek teh, vaihma Zadok hah siangpahrang ni Abiathar e a yueng lah a hruek.

### *Shimei thei lah a o*



<sup>36</sup> Hahoi siangpahrang ni Shimei a kaw sak teh, ahni koevah Jerusalem vah im sak nateh, hawvah awmh. Hote hmuen koehoi nahai tâcawt hanh. <sup>37</sup> Bangkongtetpawiteh, na tâco hnin, Kidron palang na raka hnin roeroe vah na due han tie hah panuek. Na thipaling teh nama e na lû dawk ao han atipouh.

<sup>38</sup> Shimei ni siangpahrang koevah, bokheiyah, siangpahrang ka bawipa ni na dei e patetlah na san ni ka sak han atipouh. <sup>39</sup> Shimei teh Jerusalem vah ka saw hnawn lah ao. Kum thum touh a ro toteh, Shimei koe kaawm e sannaw thung hoi tami kahni touh teh, Gath siangpahrang Maakah capa Akhish koe a yawng. Thaihaw, na san teh Gath vah ao telah Shimei koe a dei pouh awh.

<sup>40</sup> Shimei a thaw teh, la a rakueng teh a san tawng hanelah Gath vah Akhish koe a cei. Hahoi Shimei ni Gath kho e a san hah a thokhai. <sup>41</sup> Shimei teh Jerusalem kho dawk hoi a tâco teh Gath kho lah a cei teh, bout a ban telah Solomon koe a dei pouh awh. <sup>42</sup> Siangpahrang ni Shimei a kaw sak teh, ahni koevah na tâco hnin, ram louk lah na cei hnin vah na due roeroe han telah BAWIPA e min noe lahoi lawk kâkam teh na thaisak nahoehmaw. Hahoi nang ni hai na dei e ka thai e heh ahawi na ti. <sup>43</sup> Bangkongmaw BAWIPA e lawkkam hoi kâlawnaw na tarawi hoeh atipouh.

<sup>44</sup> Siangpahrang ni Shimei koe, na hawihoeahnae apa Devit koe na sak e hah na lungthin ni na panue. Hatdawkvah, BAWIPA ni na hawihoeahnae patetlah nange lathueng vah a ban sak han. <sup>45</sup> Hatei, siangpahrang Solomon teh yawhawi e lah ao vaiteh, Devit bawitungkhung teh BAWIPA hmalah yungyoe caksak lah ao han telah atipouh.

<sup>46</sup> Hat toteh, siangpahrang ni Jehoiada capa Benaiah koe kâ a poe teh a thei. Hat toteh, uknaeram teh Solomon kut dawk a caksak.

### 3

#### *Solomon ni lungangnae a hei*

<sup>1</sup> Solomon ni Izip siangpahrang Faro hoi huikonae a sak. Faro canu yu lah a paluen teh, amae im, BAWIPA e im hoi Jerusalem rapan a cum hoehroukrak teh Devit khopui vah ao sak. <sup>2</sup> Hatnae tueng dawk taminaw pueng ni hmuen rasang koe thuengnae ouk a sak awh. Bangkongtetpawiteh, hatnae tueng dawk BAWIPA hane im sak hoeh rah. <sup>3</sup> Rasangnae hmuen koe thuengnae hoi hmutui hmaisawinae ouk a sak. Solomon ni BAWIPA hah a lungpataw teh, na pa Devit e phunglamnaw hai a tarawi.

<sup>4</sup> Siangpahrang teh Gibeon lah thuengnae sak hanelah a cei. Bangkongtetpawiteh, hothateh, alawkpui poung e hmuen lah a o. Solomon ni khounge dawkvah, hmaisawi thuengnae 1000 touh a poe. <sup>5</sup> Hahoi Gibeon vah BAWIPA teh Solomon koevah, tangmin a mang lah a kamnue pouh. Cathut ni bangmaw na poe han het loe atipouh.

<sup>6</sup> Solomon ni na sanpa apa Devit ni na mithmu vah lawkkatang hoi lannae hoi kathounge lungthin a tawn e patetlah nang ni ahni koevah, pahrennae kalen poung hah na kamnue sak, nang ni hete pahrennae kalenpounge dawk nang ni a bawitungkhung dawk ka tahung e a capa hah na poe toe.

<sup>7</sup> Oe, BAWIPA ka Cathut, nama ni na sanpa heh apa Devit e a yueng lah siangpahrang lah na o sak toe. Hatei, camo lah doeh ka o rah. Bangtelamaw ka kâen vaiteh, bangtelamaw ka tâco han tie boehai ka panuek hoe. <sup>8</sup> Na sanpa heh na tami hoi na rawi e taminaw apap awh



teh, apap awh lawi touklek hoeh e hoi nâyittouh maw tie panue thai hoeh e rahak vah ka o. <sup>9</sup> Hatdawkvah, na taminaw hane lawkceng pouh hanelah na sanpa heh a thoe hoi hawi kapek thai nahanelah lungangnae lungthin na poe haw. Bangkongtetpawiteh, hettelah kapap e na taminaw heh, apinimaw lawk a ceng han vaw atipouh.

<sup>10</sup> Solomon ni a hei e hoi a dei e lawk ni BAWIPA lungyouk sak. <sup>11</sup> Cathut ni ahni koevah, hring saw hane na het laipalah, hete hno na hei e heh, tawnta hane hoi na tarannaw due hane hai na het laipalah, lawkceng thounnae na hei dawkvah, <sup>12</sup> khenhaw! na lawk patetlah ka sak toe. Khenhaw! lungangnae hoi panuethainae lungthin na poe han. Nang hoehnahlan nang patet e tami ao boihoeh rae patetlah atu hoi hai nang patetlah tami bout awm mahoehe toe. <sup>13</sup> Na hei hoeh e tawntanae hoi barinae hai na poe han. Na hringyung thung siangpahrangnaw thung dawk, nang hoi kâvan e awm mahoehe. <sup>14</sup> Na pa Devit ni a tarawi e patetlah ka phunglam hoi ka kâpoelawknaw na tarawi pawiteh, na hringnae hai a saw han.

<sup>15</sup> Solomon a kâhlaw teh mang lah ao. Jerusalem lah a cei teh, BAWIPA e lawkkamnae thingkong hmalah a kangdue. Hmaisawi thuengnae hoi rum thuengnae a sak teh a sannaw pueng hanelah rawca vennae a sak pouh.

### *Solomon lungangnae*

<sup>16</sup> Hatnavah, ka kâyawt e napui kahni touh, siangpahrang koevah a cei roi teh, a hmalah a kangdue roi. <sup>17</sup> Buet touh e napui ni, oe ka bawipa hete napui hoi im buet touh dawk reirei ka o roi. Hote im dawk ka o navah, ca ka khe. <sup>18</sup> Hahoi, ca ka khenae hnin thum touh hnukkhu, hete napui hai ca a khe van. Cungtalah reirei kaawm roi e lah ao teh, kaimouh laipalah alouke imyin hai awmhoeh. <sup>19</sup> Hahoi, hete napui ni karum vah a ca heh rep a yan sin teh a ca teh a due. <sup>20</sup> Hahoi teh, bawipa, karumsaning vah a thaw teh, na sannu muet a i nah ka capa ka teng e hah a la teh, oun a tapam. Kadout e a capa hah kai na tapam sak. <sup>21</sup> Amom vah ka ca ka sanu ka pânei han ka ti torei teh, khenhaw! oun a la due toe. Hatei, kahawicalah kheh ka khet torei teh, ka khe e ka capa nahoeh, atipouh. <sup>22</sup> Hahoi buet touh e napui nihai, kahring e heh kaie capa, kadout e doeh nange na capa telah atipouh van. Buet touh ni hai nahoeh, kadout e heh nange capa, kahring e heh kaie ka capa telah atipouh van. Hottelah siangpahrang e hmalah a dei roi. <sup>23</sup> Siangpahrang ni het ni kahring e heh kaie capa, kadout e heh nange capa ati. Hot ni kahring e heh kaie capa, kadout e heh nange capa bout ati.

<sup>24</sup> Hahoi, siangpahrang ni tahloi na poe awh, telah ati. Hat toteh, siangpahrang koe tahloi a thokhai awh. <sup>25</sup> Siangpahrang ni, kahring e camo hah kahni touh lah sei awh nateh, avanglae hah hote napui poe awh nateh, avanglae hah hote napui poe awh, atipouh.

<sup>26</sup> Hat toteh, camo kahring e a manu ni siangpahrang koevah, aw, ka bawipa kahring e camo heh ahni ma poe yawkaw lawih, thet nateh thet camo hah atipouh. Bangkongtetpawiteh, a capa lathueng pahrennae a tawn. Hatei, buet touh e napui niteh, kaie lahai awm hoeh, ahnie lahai awm hoeh, thet awh telah ati.

<sup>27</sup> Hahoi, siangpahrang ni hmaloe e napui koe kahring e camo hah poe awh. Thet awh roeroe hanh. Ahni e capa doeh telah atipouh. <sup>28</sup> Isarel taminaw pueng ni hote kong dawk siangpahrang ni lawkceng e a thai awh navah, siangpahrang hah a taki awh. Bangkongtetpawiteh, kângingcalah lawkceng thainae Cathut lungangnae teh ahni koe ao tie a panue awh.



## 4

*Solomon uknae*

<sup>1</sup> Hahoi, Siangpahrang Solomon teh Isarel taminaw pueng e lathueng vah siangpahrang lah ao. <sup>2</sup> Hetnaw teh a kut rahim e bawinaw doeh. Zadok capa Azariah teh vaihma lah ao. <sup>3</sup> Shisha capa Elihoreph hoi Ahijah teh cakathutkungnaw lah ao roi teh, Ahilud capa Jehoshaphat teh cayin ka kuenkung lah ao. <sup>4</sup> Jehoiada capa Benaiah teh ransanaw kahrawikung lah ao. Zadok hoi Abiathar teh vaihma lah ao roi. <sup>5</sup> Nathan capa Azariah teh ram kaukkung bawinaw e lathueng vah bawi lah ao. Nathan capa Zabud teh vaihmanaw hoi siangpahrangnaw e huiko lah ao. <sup>6</sup> Ahishar teh imthungkhu kaukkung lah ao. Abda capa Adoniram teh thaw katawknaw kahrawikung lah ao.

<sup>7</sup> Solomon ni Isarel taminaw lathueng kahrawikung 12 touh a tawn. Ahnimanaw ni siangpahrang hoi a imthungnaw canei hanelah kho ouk a khan pouh awh. Tami buet touh ni kum touh dawk thapa yung touh thung canei hanelah kho ouk a khan pouh awh. <sup>8</sup> Ahnimae minnaw teh Ephraim mon dawkvah Benhur, <sup>9</sup> Bendeker, Makaz, Shaalbm, Bethshemesh hoi Elonbeth. <sup>10</sup> Arubboth vah Benhesed, ahni ni Sokoh hoi Hephher ramnaw pueng hai a pang sin. <sup>11</sup> Dor kho ram daw e monnaw pueng daw Abinadab capa, ahni ni Solomon canu Taphath hah a yu lah a la. <sup>12</sup> Taanakh vah Ahilud capa Baana, Megiddo hoi Jezreel kho totouh, Zarethan kho teng kaawm e Bethshan ramnaw pueng hoi Bethshean hoi Abelmeholahnaw hoi Jokmeam ramri totouh, <sup>13</sup> Ramothgilead vah Bengeber, ahni ni Manasseh capa Jair kho, Gilead ram e kaawm e naw hai a pang sin. Bashan ram e Argob ram kalenpounge kho 60, rapan hoi tarennae rahumnaw pueng hai a pang sin. <sup>14</sup> Mahanaim vah Iddo capa Ahinadab, <sup>15</sup> Naphtali vah Ahimaaz, ahni ni Solomon canu Basemath hah yu lah a la. <sup>16</sup> Asher hoi Bealoth vah Hushai capa Baana, <sup>17</sup> Issakhar vah Paruah capa Jehoshaphat, <sup>18</sup> Benjamin vah Ela capa Shimei, <sup>19</sup> Gilead ram vah Uri capa Geber, Amor siangpahrang Sihon hoi Bashan siangpahrang Og ram, hote ram daw ahni dueng doeh ukkung lah kaawm.

*Solomon e rawca*

<sup>20</sup> Judah taminaw hoi Isarel taminaw teh tali teng e sadi patetlah apap awh teh, kanawm poung lah a canei awh. <sup>21</sup> Hahoi, Solomon ni palang hoi Filistinnaw ram hoi Izip ramri totouh, e ramnaw pueng daw lawk a ceng. Tamuknaw a thokhai awh teh, a hring nathung Solomon e thaw a tawk awh.

<sup>22</sup> Solomon ni hnin touh daw lawca a pâbaw e teh tavai nuenae 30 touh hoi cakang nuenae 60 touh ( nuenae buet touh teh galon 58 touh). <sup>23</sup> Kathâw e maitotan 10 touh, kahrawng e maito 20 touh hoi tu 100 touh a pha. Hahoi sakhi, sayuk, hoi sayukhrenaw hoi tavanaw hai a thei.

<sup>24</sup> Bangkongtetpawiteh, tui namran e ramnaw pueng Tiphseh hoi Gaza totouh, tui namran hoi siangpahrang pueng a uk. A ramnaw pueng dawk roumnah hoi kho a sak awh. <sup>25</sup> Hahoi, Solomon ni hring nathung Judah tami hoi Isarel taminaw teh, Dan hoi Beersheba totouh taminaw pueng ni mae misur, mae thaibunglung kung, rahim vah lungmawngcalah kho a sak awh.

<sup>26</sup> Hahoi Solomon ni rangleng ka sawn e marang 4,000 touh hoi marang kâcuikathoum e tami 12,000 touh a tawn. <sup>27</sup> Kahrawikungnaw ni ma ni kâtarui e thapa daw Solomon siangpahrang caboi kavennaw hane pueng canei a pouk pouh awh teh, vouthoupnah awm boihoeh.



<sup>28</sup> Taminaw pueng ni tawk hanelah ao e patetlah a onae hmuen dawk marang hoi la thakasaipounge saringnaw hanelah cakong hoi cakang ouk a ta pouh awh.

<sup>29</sup> Hottelah Cathut ni Solomon teh lungangnae hoi panuethainae kalen-pounge hoi lungsawnae hai a poe. <sup>30</sup> Bangkongtetpawiteh, Solomon e lungangnae ni Kanitholae canaw lungangnae naw hoi Izipnaw e lungangnae naw pueng hah kounge a tapuet.

<sup>31</sup> Bangkongtetpawiteh, taminaw pueng hlak a lungang. Mahol capanaw, Ezra tami Ethan, Heman, Khalkol hoi Dardanaw hlak hai a lungang. Hat toteh, a tengpam e miphunnaw koe a min teh a kamthang.

<sup>32</sup> Cingthuilawk 3000 touh a pha teh, la 1005 touh a pha.

<sup>33</sup> Thing kong dawkh hai thoseh, Lebanon mon e Sidar thing hoi rapan teng ka pâw e dingsala totouh a dei. Saring kong hoi sarang kong, tava kong hoi vonpui hoi kâvanaw kong, tanga kong totouh a dei.

<sup>34</sup> Solomon lungangnae ka panuek e taminaw pueng ni talai siang-pahrangnaw hoi miphun thung dawkh hoi a lungangnae lawk thai hanelah ouk a tho awh.

## 5

### *Solomon ni Bawkim sak a kâcai*

<sup>1</sup> Taire siangpahrang Hiram ni Solomon koe a tami a patoun. Bangkongtetpawiteh, a na pa yueng lah siangpahrang hanelah satui awi tie hah a panue. Bangkongtetpawiteh, Hiram teh Devit a kâuep yungyoe.

<sup>2</sup> Solomon ni Hiram koevah, <sup>3</sup> apa Devit ni, a hmuennaw pueng koe tarantuknae dawkh BAWIPA ni tarannaw a khok rahim a ta hoeh rah dawkvah, BAWIPA Cathut e min hanelah im sak thai hoeh tie hah na panue. <sup>4</sup> Hatei, atuteh BAWIPA ka Cathut ni hmuen pueng dawkh roumnae na poe toe, taran hai ao hoeh e tounge dawkvah, yawthoenae hai awm mahoehtoe. <sup>5</sup> Khenhaw! BAWIPA ni apa Devit koevah, na capa teh nange yueng lah na bawitungkhang dawkh ka tahung sak hane ni ka min ao nahane im a sak han telah a dei tangcoung e patetlah BAWIPA ka Cathut e min hanlah im sak hanelah ka kâcai.

<sup>6</sup> Hatdawkvah, Lebanon mon e Sidar thing tâtueng hanelah kâ na poe pouh loe. Ka sannaw hai na sannaw hoi cungtalai rei a tawkh awh han. Nang ni na dei e patetlah na sannaw e kutphu teh ka poe han. Sidonnaw patetlah thing ka tâtueng thai e kai koe apihai awm hoehtie na panue telah lawk a thui.

<sup>7</sup> Hahoi, hettelah ao, Hiram ni Solomon e lawk a thai navah, puenghoi a lung ahawi. Hettelah tami kapap e lathueng vah, lawkceng kathoum niteh, lungangnae capa Devit kapoekung BAWIPA teh sahnin vah pholen lah awm seh, telah ati.

<sup>8</sup> Hiram ni Solomon koevah, lawk na thui e ka thai. Sidar thing hoi hmaica thing hah na panki e pueng na sak pouh han. <sup>9</sup> Ka sannaw ni Lebanon mon koe hoi tali totouh a thokhai awh han. Hote hmuen koe ramri sak vaiteh, na dei e patetlah tali lam hoi thokhai vaiteh, hote hmuen koe na dâw han. Hahoi nang ni hai ka imthungnaw canei hane hoi panki e naw pueng na pouk pouh van han telah tami a patoun.

<sup>10</sup> Hat toteh, Hiram ni Sidar thing hoi hmaica thing hah Solomon ni a panki e patetlah a poe. <sup>11</sup> Solomon ni Hiram imthungnaw a canei hanelah kum touh dawkh cakang nuena 20,000 touh hoi satuim nuena 20 touh a poe.



<sup>12</sup> BAWIPA ni lawkkam e patetlah Solomon teh lungangnae a poe. Hiram hoi Solomon e rahak vah roumnae ao teh lawkkamnae a sak roi.

### *Solomon e thaw*

<sup>13</sup> Solomon ni Isarelnaw pueng dawk tami 30,000 touh thaw a poe. <sup>14</sup> Lebanon mon dawk thapa yung touh dawk pou kâthung hanelah tami 10,000 touh a patoun. Thapa yung touh Lebanon vah ao awh teh, thapa yung hni touh ama im vah ao awh. Adoniram teh ahnimouh kaukkung lah ao. <sup>15</sup> Solomon ni hno ka phawt e tami 70,000 touh hoi talungdêikathoum e 80,000 touh a tawn. <sup>16</sup> Hotnaw dei laipalah Solomon ni thaw ka tawh e kahrawikungnaw khetyawt hanelah tami 3,300 touh a tawn. <sup>17</sup> Hahoi siangpahrang ni kâ a poe e patetlah im du ung hanelah dei tangcoun e talung kalenpounge aphu kaawm pounge a la awh. <sup>18</sup> Hahoi, im kasaknaw Solomon e taminaw hoi Hiram e faminaw hoi Gebal taminaw ni talung a dei awh teh, im sak hane thing hoi talungnaw a rakueng awh.

## 6

### *Solomon ni Bawkim a sak*

<sup>1</sup> Hahoi hettelah ao. Isarel catounnaw Izip ram dawh hoi a tâco nahoi kum 480, Isarelnaw Solomon ni a uknae kum 4 nah, Ziv thapa, ayung hni nah BAWIPA e im sak hane a kamtawng awh. <sup>2</sup> Solomon ni BAWIPA e im a sak e teh ayung dong 60, adangka dong 20, arasang dong 30 touh a pha. <sup>3</sup> Hahoi im hmuen kathoung imhma lae alawilah teh, adangka hoi kâvan lah dong 20 touh a saw teh, a hma lae adangka teh dong 10 touh a pha. <sup>4</sup> Im dawh ang sak nahanelah kathounge hlalangawnaw hai a sak.

<sup>5</sup> Bawkim tapang hoi kâkuen lah imrakhan buet touh a sak teh, hot ni yah bawkim tapang koun a kalup. Thoungnae hoi athungpoung lae hmuen kathoung hai mek a kalup sin teh, petkâkalup lah rakhancanaw hah a sak. <sup>6</sup> A rahim lae rakhan teh dong 5, alungui e rakhan teh dong 6, a lathueng e rakhan teh dong 7 touh a pha. Bangkongtetpawiteh, rakhannaw teh im e tapang dawh kâen hoeh. <sup>7</sup> Hahoi, Bawkim a sak awh nah, hote hmuen koe sin hoehnahlan dêi tangcoun e talungnaw hoi sak e lah ao dawkvah, cakkin, cakâ, sum pawlawk bawkim thung thai e lah awm hoeh.

<sup>8</sup> A rahim e rakhan dawh kâennaeh tho teh, bawkim e arasang lah a o, alungui e rakhan dawh teh khalai hoi luen lah ao teh, alungui e rakhan dawh hoi a lathueng e khan dawh luen lah ao. <sup>9</sup> Hottelah bawkim teh a cum awh. Bawkim e parei thingtunaw hah Sidar thing e pangkhek hoi thingphek hoi a ramuk awh. <sup>10</sup> Bawkim petkâkalup lah sak e a dotnaw teh, a rasang dong 5, imhmawt teh bawkim dawh a kâkuetsak.

<sup>11</sup> BAWIPA e lawk Solomon koe a pha teh, <sup>12</sup> Na sak lahun e bawkim kong dawh, ka phunglam, lawkcengnae hoi kâpoelawknaw pueng na tarawi pawiteh, na pa Devit koe ka dei tangcoun e kâlawk hah na lathueng vah ka cak sak han. <sup>13</sup> Isarel catounnaw koe kho ka sak vaiteh, ka tami Isarelnaw heh ka cettakhai mahoehtelah a ti.

<sup>14</sup> Hottelah, Solomon ni bawkim a sak teh a cum.

<sup>15</sup> Bawkim a thung lae tapang teh Sidar thing hoi a sak. Carawng hoi lempu, tapang totouh a thung e rakhan totouh, koun a bet, carawng teh hmaica thing hoi a sak. <sup>16</sup> Hmuen kathoung hoi kathoungpoung hmuen hanlah ayung, adangka dong 20 touh ka kaw e im hah rakhan teh carawng teh Sidar thing hoi a sak. <sup>17</sup> Hote rakhan hmalah sak e bawkim teh, ayung dong 40 touh a pha. <sup>18</sup> Bawkim thungvah, Sidar thingpheknaw dawh



tuiumpaw, a peinau hoi akawi, talung kamnué hoeh nahanelah Sidar thing hoi a ramuk.

<sup>19</sup> Hottelah, BAWIPA e lawkkam thingkong hruek nahanelah, bawkim thungvah hmuén kathoung a rakueng awh. <sup>20</sup> Hote hmuén kathoung téh ayung dong 20, adangka dong 20, arasang dong 20 touh a pha. Hot téh, kathoungé suitui hoi a hluk téh, Sidar khoungroe hai a hluk. <sup>21</sup> Hottelah, Solomon ni bawkim thung téh kathoungé suitui hoi koug a hluk. <sup>22</sup> Bawkim téh abuémahoi suitui hoi a hluk téh hmuén kathoung téng e khoungroe hai satui hoi a hluk.

<sup>23</sup> Hmuén kathoung koevah dong 10 reira ka rasang e Cherubim kahni touh olive thing hoi a sak. <sup>24</sup> Cherubim rathei avanglae dong 5 touh a pha téh, avanglae hai dong 5 touh a pha. A rathei hmo buet touh hoi buet touh rahak vah dong 10 touh a pha. <sup>25</sup> Cherubim buet touh dawk dong 10 touh a rasang. Cherubim buet touh e hai hottelah doeh. <sup>26</sup> Hote cherubim téh im e athunglah a hruek awh téh, a ratheinaw téh a kadai. <sup>27</sup> Buet touh e rathei ni tapang a kâbet téh cherubim buet touh e rathei ni hai avanglae tapang hah a kâbet. Hahoi alungui vah cherubim rathei kahni touh e hah a kâhmo roi. <sup>28</sup> Cherubim téh satui hoi a hluk.

<sup>29</sup> Bawkim a thung lae tapang hoi alawilae tapang dawk thuk e cherubim mei hoi a pei ka pei e samtuekung mei naw hai ao. <sup>30</sup> Hahoi, bawkim thung e carawng hoi alawilae carawng naw téh suitui hoi a hluk. <sup>31</sup> Athung lae hmuén kathoung kâennae takhang téh, olive thing hoi a sak. Tho tâphai hoi tho tangkhang téh tapang pung panga touh dawk pung touh hoi a kâvan. <sup>32</sup> Hottelah olive thing hoi tho kahni touh a sak téh, hawvah cherubim hoi apei ka pei e samtuekungnaw dawk hai suitui a hluk. <sup>33</sup> Hot patetlah, hmuén kathoung thung kâennae tho takhangnaw hai olive thing hoi a tâphai, a tangkhang naw sak lah ao. <sup>34</sup> Tho buet touh dawk tâbaw kahni touh hoi, kâhei thai e hmaicathing hoi tho kahni touh hai a sak. <sup>35</sup> Tho koevah, cherubim hoi a pei ka pei e samtuekung e mei naw a sak téh, a em suitui hoi kahawicalah a hluk. <sup>36</sup> Athung lae thongma hai bo e talung than thum touh hoi, Sidar thingphek dot touh hoi patuen patuen a sak sin. <sup>37</sup> A kum 4, Ziv thapa nah BAWIPA e im téh adu a ung awh. <sup>38</sup> Hahoi, kum 12, Bul thapa, thapa yung taroe nah im téh a kâcai awh e patetlah hnônaw pueng hé a cum awh téh, kum 7 touh a ro awh.

## 7

### *Solomon ni a sak e alouklouke imnaw*

<sup>1</sup> Solomon ni kum 13 touh thung amae im hah a sak téh, a cum.

<sup>2</sup> Hote im hah Lebanon ratu thung e thing hoi a sak, ayung dong 100, adangka dong 50, rasang dong 30 touh a pha. Sidar khom 30 touh dawk tounge e sidar thing kalannaw daw sak e doeh. <sup>3</sup> Than touh dawkvah hlaipanga touh a pha téh khom 45 touh a pha, avan vah sidar thing koug a phai téh thingphek hoi a kup sin. <sup>4</sup> A ang nahanelah hlalangaw 30 touh kadangka lah avoivang lah ao. <sup>5</sup> Thônaw pueng hoi thokhomnaw pueng téh ayung adangka koug a kâvan.

<sup>6</sup> Khomnaw, pangkehknaw hoi sak e vaikhap hai ao téh, ayung dong 50, adangka dong 30 touh a pha. <sup>7</sup> Lawkcengnae vaikhap tie lawkcengnae bawitungkhung hungnae vaikhap hai a sak, carawng téh avoivang lah totouh sidar thingphek koug a phai.



<sup>8</sup> Ama a onae im hai a hnukkhu a sak e lawkcengnae vaikhap boiboe lah a sak. Solomon ni a yu lah a la e Faro canu hanelah hai im buet touh a sak pouh.

<sup>9</sup> Hotnaw pueng teh apfu kaawm pounge e talung, boung kâcatcalah dêi e, hlav hoi a e hoi sak e lah ao. Athunglah hai, alawilah hai, akung koehoi a som totouh kâennae imka ka kaw pui lah sak e lah ao. <sup>10</sup> Adu hateh talung kalenpounge dong hra touh hoi dong taroe touh e hoi pacoung e lah ao. <sup>11</sup> A lathueng lae teh boung kâcatcalah dêi e talung hoi sidar thing hoi sak e doeh. <sup>12</sup> Petkâkalup lah kalupnae thung imka teh dêi tangcoung e talung than thum touh hoi sidar thing than touh hoi sak e doeh. BAWIPA im kalupnae a thung lae imka hoi vaikhap patetlah sak e doeh.

### *Kutsak ka thoum e Hiram*

<sup>13</sup> Solomon ni tami a patoun teh Taire tami Hiram hah a kaw. <sup>14</sup> Hote tami teh Naphtali miphun lahmainu e capa doeh. A na pa teh Taire tami rahum dei ka thoum e doeh. Ahni teh rahum koe lah kutsak ka thoum pounge lah ao. Siangpahrang Solomon koe a tho teh thawnaw pueng hah a tawk pouh.

### *Bawkim hanelah rahum khomnaw*

<sup>15</sup> Hahoi rahum khom kahni touh a hlun teh, khom kalen e buet touh teh a rasang e dong 18 touh a pha. A len e teh, petkâkalup lah dong hlaikahni touh a pha. <sup>16</sup> Khom som daw k bungling hanelah rahumluhem kahni touh a sak teh, bawilakhung buet touh a rasang dong 5 touh, alouke buet touh e hai a rasang e dong 5 touh a pha. <sup>17</sup> Tamlawk patetlah tarikcik lah tarik e hoi sumbawtarui patetlah a meikahawicalah tarik e kahni touh khompui a som daw k bungling hanelah a sak. Luhuem buet touh hanelah tamlawk buet touh, alouke bawilakhung buet touh hanelah tamlawk buet touh a sak. <sup>18</sup> Hot patetvanlah, khompui som daw k e bawilakhung ramuknae tamlawk buet touh dawkvah, petkâkalup lah talepaw 20 touh lah a sak. Alouke bawilakhung hanelah hai hot patetvanlah a sak. <sup>19</sup> Vaikhap daw k ung e khomsomnaw teh lili pei patetlah ao teh dong pali touh a pha. <sup>20</sup> Luhuem teh khompui kahni touh e som daw k tamlawk patetlah sak e teng e tâbumlum e lungui ao teh, tale paw cumhni touh hah than hni touh lahoi petkâkalup lah pâthit e lah ao. Hahoi alouke khompui daw k hoi hot patetvanlah ao. <sup>21</sup> Bawkim alawilah khompui teh a ung awh. Aranglae khompui teh a kangdue sak awh teh a min lah Jakhin ati. Avoilae khompui teh a kangdue sak teh a min lah Boaz a ti. <sup>22</sup> Khompui som daw k lili pei mei kamnue sak e thaw teh a cum awh.

### *Rahum tuiim hoi maitotan*

<sup>23</sup> Rahum tuiim avanglae a rai koehoi avanglae a rai koe totouh dong hra touh a pha. Arasang e teh dong panga touh. Petkâkalup lah bangnue toteh dong 30 touh a pha. <sup>24</sup> Arai rahim dong 30 touh daw k tuiumkung mei ao teh, tuiim hah a longlei. Hahoi tuiumkung mei teh 20 touh lah ao teh, a hlun awh navah mek hlun sin e doeh. <sup>25</sup> Hothateh maitotan hlaikahni touh daw k tounge doeh. Kathum touh kanîloumlah a kangvawi awh, kathum touh kanîtholah a kangvawi, kathum touh atunglah a kangvawi, kathum touh akalaha a kangvawi. Hahoi tuiim teh hotnaw e van ta e lah ao. A mainaw teh a thung lah kounge a kangvawi. <sup>26</sup> Rahum teh sum touh a tha teh, arai teh lili pei patetlah manang rai patetlah ao teh bath 2000 touh a cawng ( bath buet touh teh galon 6 touh bang e doeh).

### *Puen thai e kawlung*



<sup>27</sup> Hahoi pâhungnae hra touh rahum hoi a sak. Pâhungnae buet touh teh dong pali touh a saw. Adangka hai dong pali touh a saw teh arasang e teh dong thum touh a pha. <sup>28</sup> Pâhungnae saknae teh hettelah doeh. Hote pâhungnae dawk petkâkalup lah a rai ao teh, hote rai dawkvah, <sup>29</sup> sendek, maitotan, cherubim mei a kamnue. Hahoi a khom dawk hai sendek hoi maitotan mei a patung a paka lah meikahawicalah pathoup e ao. <sup>30</sup> Hahoi pâhungnae dawkvah rahum lengkhok pali touh, rahumcung hoi rip ao. A takin pali touh dawk dounnae kounng ao. Rahum rahim dounnae tapang dawkvah, a meikahawicalah pathoup e laikawcanaw hah mek a hlun sin awh. <sup>31</sup> Kawlung arai teh a thung hoi a rai totouh dong touh a pha. A rai teh a tâbuengluengkueg teh a kaw e dong touh hoi tangawn a pha. Arainaw teh ayung adangka suetalah ao teh a em hoi king a kawi. <sup>32</sup> Lengkhok pali touh e teh, pâhungnae rahim ao awh teh, acungnaw teh pâhungnae hoi a kâkuet, lengkhok teh dong touh hoi tangawn a rasang. <sup>33</sup> Lengkhok teh rangleng khok hoi a kâvan. Acung, acung tabu, a mangnaw hai a hlun sin. <sup>34</sup> Pâhungnae takin pali touh koe pou kâkuen lah hlun e dounnae pali touh ao dawkvah, <sup>35</sup> hote dounnae dawkvah, petkâkalup lah khap touh ka phat e laikaw hah a mawp teh, pâhungnae dawkvah arainaw hoi kuet nahanelah, pâhungnae hoi mek hlun sin e lah ao. <sup>36</sup> Kuet nahane hoi pâhungnae dawkvah, cherubim, sendek, olivekung emnaw hah lengkaleng a kamnue. <sup>37</sup> Hottelah abuemlahoi reikâvan lah kawlung hungnae hra touh a hlun teh a cum. <sup>38</sup> A rai dong pali touh ka kaw niteh, tui bath 40 touh ka cawng e rahum kawlung hra touh hai a sak teh, pâhungnae buet touh dawk kawlung buet touh rip pâhung lah ao. <sup>39</sup> Im aranglah panga touh, avoilah 5 touh, a ta teh, tuiim hateh, im aranglah kanitho akalah ao.

<sup>40</sup> Hiram ni hlaamnaw, hrabakawwnae, kawlungcanaw, hah a sak teh, Solomon siangpahrang hanelah BAWIPA e im dawk a cum e naw teh: <sup>41</sup> khom kahni touh, khomsom lukhung ka hni touh, <sup>42</sup> khomsom lukhung ramuknae tamlawk kahni touh, ramuk nahane tamlawk buet touh dawk tale paw arui kahni touh, abuemlah 400 touh, <sup>43</sup> pâhungnae hra touh, pâhungnae van hung e rahum kawlung hra touh, tuiim buet touh, <sup>44</sup> tuiim ka doun e maito hrahlaikahni touh, hlaamnaw, hrabakawwnae naw, hoi kawlungcanaw hah doeh. <sup>45</sup> Solomon siangpahrang hanelah Ahiram ni a sak e BAWIPA e im puengcangnaw pueng teh, loukloukkaang e rahum hoi cum lah ao. <sup>46</sup> Jordan tanghling Sukkoth hoi Zerethan rahak vah, amhrusak hane kahawi e talai dawk siangpahrang ni a hlun. <sup>47</sup> Hote hnopainaw appoung dawkvah, Solomon ni khing laipalah a ta. Rahum e a khing teh apinihai panuek hoeh.

<sup>48</sup> Hahoi Solomon ni BAWIPA e imthung kaawm e hnopainaw pueng a touk teh, sui khoungroe, vaiyei pâhung nahane caboi, <sup>49</sup> Suikathoung hoi sak e hmaiimkhok, hmuen kathoung hmalah aranglah, 5, avoilah 5 touh kaawm e a pei, hmaiim, paitei sui hoi sak naw doeh. <sup>50</sup> Manang, paitei, tongben, pacen, hraba kawwnae hlaamnaw hmuen kathoung a thung tho hoi bawkim alawilah e tho dawk bang e suitâbaw hai a sak. <sup>51</sup> Hottelah, Solomon siangpahrang ni BAWIPA e im hanlah a sak e naw pueng teh a cum. Hahoi, a na pa Devit ni a poe e hno, ngun, sui, hoi hnopai naw a kâenkhai teh BAWIPA e im râw kuemnae thingkong thung a ta.



*Bawkim thung lawkkam thingkong*

<sup>1</sup> Solomon ni Isarel kacuenaw hoi miphun a lû lah la kaawmnaw hai Isarel catoun imthungkhu tongpanaw hah Devit khopui Zion hoi Bawipa thingkong kâkayawt hanelah Jerusalem e siangpahrang Solomon koevah ceikhai hanelah a pâkhueng awh. <sup>2</sup> Hatdawkvah, Isarelnaw pueng teh, Ethanin thapa yung sari nah, pawî dawk siangpahrang Solomon koevah a kamkhueng awh.

<sup>3</sup> Isarel kacuenaw pueng ni a tho awh teh, vaihmanaw ni BAWIPA thingkong hah a la awh. <sup>4</sup> BAWIPA e thingkong teh, kamkhuengnae hoi bawknae rim dawk e kathounge hlaamnaw pueng hah a la awh teh, vaihma hoi Levihnew ni a ceikhai awh. <sup>5</sup> Siangpahrang Solomon hoi ahni koe kamkhuengnaw Isarel maya pueng hah thingkong hmalah ao awh teh, tu hoi maitotan apap lawi touklek thai hoeh e hoi panue thai hoeh totouh thuengnae hah a sak awh. <sup>6</sup> Hahoi vaihmanaw ni, Bawipa lawkkam thingkong a onae hmuen bawkim thung athung patuen hmuen kathoung thung vah, cherubim a rathei kadai e rahim vah hmuen kathoungpoung hmuen koe a kâenkhai awh. <sup>7</sup> Cherubim ni a rathei kahni touh hah thingkong onae lathueng a kadai teh, cherubim ni thingkong hoi kâkayawtnae acung hah a ramuk. <sup>8</sup> Kâkayawtnae acung a saw poun dawkvah, athung patuen hmuen kathoung koehoi a kâhmu thai han eiteh, alawilah hoi kâhmawt thai hoeh. Sahnin totouh hawvah ao. <sup>9</sup> Izip ram hoi a tâco awh teh, BAWIPA ni Isarel catounnaw koe lawkkamnae a sak navah, Mosi ni Horeb mon dawk e lungphen kahni touh a la e hloilah thingkong thung banghai awm hoeh.

<sup>10</sup> Hahoi vaihmanaw hmuen kathoung koehoi a tâco awh toteh, BAWIPA im teh tâmai muen a kawî. <sup>11</sup> Tâmai kecu dawk vaihma ni thaw kahawicalah tawk thai hoeh. Bangkongtetpawiteh, BAWIPA bawilennae hoi BAWIPA im muen akawî.

<sup>12</sup> Solomon ni lawk a dei e teh, kathapoung e tâmai dawk ka o han telah BAWIPA ni a ti. <sup>13</sup> A yungyoe na onae hmuen tawmrasang e im teh, ka sak pouh katang toe telah a ti.

<sup>14</sup> Kamkhueng e Isarelnaw pueng ni a kangdue awh teh, siangpahrang ni a hnuklah a kamlang teh. ka kamkhueng e Isarelnaw pueng hah yawhawî a poe.

<sup>15</sup> Ahni ni Isarel BAWIPA Cathut, apa Devit koevah, amae pahni dawk hoi roeroe vah, Izip ram hoi ka tami Isarel ka tâcokhai nah hnin hoi Isarel miphunnaw thung dawk nâ lahai ka min ao nahane im sak hanlah rawi boihoe.

<sup>16</sup> Hatei ka tami Isarel kaukkung hanlah, Devit heh ka rawi e doeh telah kadeikung ama kut dawk hoi roeroe ka kuepsakkung teh pholen lah awm seh.

<sup>17</sup> Apa Devit niyah Isarel BAWIPA min lahoi im sak hanlah a lungthung hoi pou a noe.

<sup>18</sup> Hatei BAWIPA ni apa Devit koevah, na lungthin hoi ka min hanlah im sak hane ouk na noe e lungthin na tawn e hah ahawî.

<sup>19</sup> Hatei, nang ni teh im na sak mahoe. Hatei, na capa nange cati dawk hoi ka tâcawt e ni ka min hanlah im teh a sak han telah ati toe. <sup>20</sup> BAWIPA ni a kam tangcung e hah a caksak teh, BAWIPA e a kam e patetlah apa Devit e hmuen teh ka coe teh, Isarel bawitungkhung dawk ka tahung teh, Isarel BAWIPA Cathut min hanlah, im teh ka sak toe. <sup>21</sup> Hawvah, thingkong



o nahane hmuen lah ka pouk teh, hawvah, Izip ram hoi a tâcokhai navah, mintoenaw koe a kam e BAWIPA lawkkam ao telah a ti.

*Poe hanelah Solomon ratoumnae*

<sup>22</sup> Solomon teh BAWIPA koe thuengnae khoungroe hmalah vah, kamkhueng e Isarelnaw pueng ni a hmunae koe a kangdue teh, kalvan lah a kut hah a dâw teh, <sup>23</sup> Isarel BAWIPA Cathut kalvan hai thoseh, talai thung hai thoseh, a lungthin abuemlah na hmalah kahawicalah kaawm e naw koevah, lawkkam hoi pahrennae kakuepsakkung nang patet lae Cathut awm hoeh. <sup>24</sup> Na san apa Devit koevah, lawk na kam e hah na pahnim hoeh teh, na pahni hoi na dei e hah na kut hoi na kuepsak. Sahnin totouh nama paroup lah na o. <sup>25</sup> Hatdawkvah, Isarel BAWIPA Cathut, na san apa Devit koevah, na capanaw ni a hringnae nuencang kâhruetcueth teh, ka mithmu vah, hring awh pawiteh, ka hmaitung vah Isarel bawitungkhung daw k ka tahung hane vout mahoe h na ti telah na kam e hah kuep sak haw. <sup>26</sup> Oe Isarel Cathut, na san Devit koevah na dei e kuep sak haw telah ka ratoum. <sup>27</sup> Hatei Cathut nang teh, talai van kho na ka sak han tanggak na maw. Khenhaw, kalvan hoi kalvannaw daw k patenghai na ka cawng hoeh e, hete ka sak e im dawkvah, banghloimaw cawng laipalah hoe ao han vai. <sup>28</sup> Hatei Oe BAWIPA Cathut, sahnin vah na san ni na kaw e hoi ka ratoumnae hoi ka dei e na thai pouh haw. Na san ni ratoumnae hoi ka heinae hah na thai pouh haw. <sup>29</sup> Hete hmuen koe ka min a kamtue han na tie patetlah, hete hmuen hoi hete impui hah karum khodai pou khen nateh, na san ni hete hmuen koe ka ratoum e lawk hah na thai pouh haw. <sup>30</sup> Na san hoi na tami Isarelnaw ni hete hmuen koelah kangvawi haw. A ratoum awh toteh a hei awh e hah thai pouh haw. <sup>31</sup> Tami bang patet ni hai a imrinaw koe yon a sak awh toteh, thama lahoi lawk hah kam sak pawiteh, hete na bawkim khoungroe hmalah a tho hoi lawk a kam toteh, <sup>32</sup> Kalvan lahoi na thai pouh nateh, tami kathoungnaw e tawksaknae teh amamae lû daw k letlang phat sak haw. Tami kalan teh, a lannae patetlah yonpen laipalah na san heh lawkceng pouh. <sup>33</sup> Na tami Isarelnaw ni nang taranlahoi yonnae a sak awh kecu, a tarannaw ni tâ awh pawiteh, nang koe a kamlang awh teh, na min hah a pâpho awh teh, hete bawkim daw k ratoum awh pawiteh, hno a hei awh navah, <sup>34</sup> Kalvan hoi thai pouh nateh, na tami Isarelnaw e yonnae hah ngaithoum haw. A na mintoenaw koe na poe e ram lah bout bankhai haw. <sup>35</sup> Nang taranlahoi yonnae sak kecu daw k kalvan hah a pâbing, kho a rak hoeh toteh, het hmuen koe kangvawi a ratoum teh, na min a pâpho teh, a pataw nahan na poe e thung hoi a yonnae kamlang takhai pawiteh, <sup>36</sup> Kalvan hoi thai pouh nateh, a cei nahane lam kalan pâtu nateh, râw lah na poe e ram daw k kho a rak thai nahanlah na san Isarelnaw e yonnae ngaithoum pouh haw. <sup>37</sup> Ram daw k takang a tho teh, lacik thoseh, kehramnae thoseh, pawknae thoseh, samtong thoseh, ahriai thoseh awm boilah, a taran ni a khopui longkha koehoi koe kalup awh pawiteh, patawnae lacik aphunphun a pha toteh, <sup>38</sup> Tami bangpatet ni hai ratoum hoi kâheinae a sak nakunghai, na tami Isarelnaw pueng ni, amae a lungthin hoi lacik ao e hah a panue awh teh, hete bawkim koe kangvawi hoi a kut a dâw awh toteh, <sup>39</sup> Na onae hmuen kalvan hoi thai pouh haw. Ngaithoum haw. Kâroe haw. Lungthin na kapanuekkung nang ni a hringnae hoi kamcu e hah, poe haw. Bangkongtetpawiteh, nang dueng doeh tami lungthin na kapanuekkung lah na o. <sup>40</sup> A mintoenaw na poe e ram daw k hoi nang na taki nahanlah, <sup>41</sup> Hothloilah, na tami Isarel lah kaawm hoeh e miphun alouke na min



kecu ram ahlanae koehoi kathonaw kong dawkw, <sup>42</sup> Na lentoenae na min hoi thaonae kut hoi na kut na dâwnae kong hah a panue awh han doeh. Hotnaw ni hai hete bawkim dawkw a ratoum awh toteh, <sup>43</sup> Na onae hmuen kalvan hoi thai pouh haw. Na tami Isarelnaw patetlah talai miphun tangkuem ni na min a panue hoi nang barilawa na ta awh teh, hete ka sak e bawkim heh na min lahoi kaw e doeh ti a panue thai awh nahan, nang koe ka kâhet e miphun ni a hei awh e naw pueng hah sak pouh haw. <sup>44</sup> Na taminaw ni a tarantuk han na tha awhnae koe a cei awh toteh na rawi e khopui koe kangvawi hoi na min hanlah sak e bawkim koe kangvawi hoi BAWIPA koe a ratoum awh toteh, <sup>45</sup> A ratoumnae hoi a kâheinae hah kalvan hoi na thai pouh haw. A lawknaw hah pouk pouh haw. <sup>46</sup> Na tak dawkw yonnae a sak awh teh, bangtelamaw yonnae ka sak hoe e apihai awm hoe h bo. Ahnimouh koe na lungkhuek teh, a taran kut dawkw na poe teh ahlanae koe thoseh, a hnainae koe thoseh, a tarannaw ni san lah man pawiteh, <sup>47</sup> San lah a ceikhainae ram dawkw a lung a ang awh teh, pan a kângai awh teh, yonnae koe ka sak awh toe, kalan hoe e hno hoi, puenghoi yonnae ka sak awh toe titeh, san lah a hrawinae hmuen koehoi kâhet awh pawiteh, <sup>48</sup> A taran lah kahrawikungnaw e ram hoi a lungthin katang hoi a hringnae katang hoi nang koelah kangvawi hoi a na mintoenaw koevah, na poe e hoi na rawi e khopui hoi nang han ka sak e bawkim koe lah kangvawi laihoi nang koe a ratoum awh toteh, <sup>49</sup> A ratoumnae hoi a kâheinae hah kalvan na onae koehoi thai pouh nateh a lawknaw hah pouk pouh haw. <sup>50</sup> San lah kamankungnaw ni a pahren awh thai nahan, na hmalah pahren sak awh haw. Nang koe yonnae kasaknaw hoi na hmalah, kâtapoenae kong dawkw na taminaw e kâtapoenae naw pueng hah ngaithoum haw. <sup>51</sup> Bangkongtetpawiteh, ahnimouh teh, na taminaw teh Izip ram hoi sumthawngnae tahmanghmai thung hoi na tâco sak e naw doeh. <sup>52</sup> Na kaw awh toteh, na thai pouh nahanelah, na san ni a kâheinae hai na tami Isarel ni a kâheinae koe lah, na mit na ta thai nahan, <sup>53</sup> Bangtelane Oe Bawipa Jehovah, ka na mintoenaw Izip ram hoi na tâcokhai navah, na san Mosi hno lahoi na dei tangcoung e patetlah miphunnaw pueng thung hoi na râw lah na kapek telah a ti.

### *Solomon ni tamimaya yawhawi a poe*

<sup>54</sup> Solomon ni BAWIPA koevah ratoumnae hoi a kâheinae naw pueng koug a dei hnukkuh, BAWIPA e thuengnae khoungroe koelah a khokpakhu a cuengkhuem teh, kalvan lah kut a dâwnae koehoi a thaw. <sup>55</sup> A kangdue teh lawk kacaipoung lahoi, <sup>56</sup> a lawkkam patetlah a tami Isarelnaw hanlah, kâhatnae kapoekung BAWIPA teh pholen lah awm naseh. A san Mosi hno lahoi kahawi e lawkkamnaw pueng hah, lawklung buet touh hai phen hoe. <sup>57</sup> Maimae BAWIPA ka Cathut teh, mintoenaw koevah ao e patetlah maimouh koehai awm naseh. Maimanaw hah khoeroe na pahnawt hanh naseh. <sup>58</sup> A lamnaw pueng tarawi hane hoi mintoenaw koe kâ a poe tangcoung e patetlah kâpoelawknaw, phunglamnaw hoi, lawkcengnaenaw dâw pouh hanlah, maimae lungthin ama koe lah a kangvawi thai nahan, <sup>59</sup> Cathut Jehovah lah a onae, alouke awm hoe h tie miphun pueng ni a panue thai awh nahan, a san kong dawkw thoseh, <sup>60</sup> A tami Isarelnaw kong dawkw thoseh, a panki e patetlah hnin touh hoi hnin touh a kâroe thai nahan, hete ka dei e naw pueng hah, BAWIPA hmalah ka kâhei e pueng hah karum khodai pouk laipalah, BAWIPA Cathut hmalah pou kangning lawiseh. <sup>61</sup> Hatdawkvah, sahnin e na o e boiboelah,



a phunglawknaw dawk na hring awh teh, kâpoelawknaw tarawi hane hoi, maimae BAWIPA Cathut koe na lungthin hah yuemkamcu lah awm seh telah Isarelnaw pueng hah yawhawinae a poe. <sup>62</sup> Siangpahrang hoi Isarelnaw pueng ni BAWIPA e hmalah sathei thuengnae hah a poe awh.

<sup>63</sup> Solomon ni BAWIPA hanelah a poe e roun thuengnae maitotan 22, 000 hoi, tu 120, 000 touh a poe awh. Hottelah siangpahrang hoi Isarelnaw pueng ni BAWIPA e im dawk a poe awh.

<sup>64</sup> Hat hnin vah, siangpahrang ni BAWIPA im e a thongma hah a thoung sak. Hawvah, hmaisawi thuengnae hoi tavai thuengnae e hoi, roun thuengnae satui hah a poe awh. Bangkongtetpawiteh, BAWIPA e hmalah rahum khoungroe hah kapoenaw hanelah a thoungca. <sup>65</sup> Hatnavah, Solomon hoi Isarelnaw pueng kamkhueng e ni Hamath kho kâennae koehoi, Izip ram palang totouh, kaawm e naw hah, maimae BAWIPA hmalah hnin 7 touh hoi hnin 7 kâhlat lah hnin 14 touh thung pawl a sak awh. <sup>66</sup> Hnin 8 hnin vah tamimaya teh a ban sak awh. Siangpahrang teh ahnimouh ni yawhawi a poe awh teh, BAWIPA ni a san Devit hoi a tami Isarelnaw hanelah, a sak e ahawinae naw kecu dawk lungthin nawmnae hoi, lunghawinae hoi, amamae rim dawk a cei awh.

## 9

### *Solomon koe Cathut apâhni a kamnuenae*

<sup>1</sup> Solomon ni BAWIPA im hoi siangpahrang im hah a sak teh, a tawk hane a noe e pueng a cum torei teh, <sup>2</sup> Gibeon vah a kamnue pouh e patetlah Solomon koe BAWIPA teh apâhni lah bout a kamnue pouh. <sup>3</sup> BAWIPA ni ahni koe ka hmalah ratoumnae hoi kâheinae na sak e hah, ka thai toe. Hete im sak e heh, yungyoe ka min o nahanelah kathoung sak toe. Ka mit hoi ka lungthin teh hawvah poe ao han toe. <sup>4</sup> Kalan e hoi yuemkamcu e lungthin hoi sak hanelah, kâ na poe e pueng hah na sak teh, na pa Devit patetlah ka hmalah na hring teh, ka phunglam hoi kâ na poe e hah na tarawi pawiteh, <sup>5</sup> Isarel bawitungkhung dawk e, ka tahung hane tami na vout mahoe, telah na pa Devit koe lawk ka kam tangcoung e patetlah Isarelnaw e lathueng vah, na uknaeram na bawitungkhung teh, yungyoe hanelah ka caksak han. <sup>6</sup> Hateiteh, nang nama thoseh, na capa hai thoseh, ka hnuk na kâbang hoe hah lamthung na phen awh teh, kaie kâpoelawknaw hoi kaie phunglawknaw na panuesak e hah na tawm hoe hah cathut alouke hah na bawk awh pawiteh, <sup>7</sup> Kai ni na poe e ramnaw thung hoi Isarel hah ka raphoe vaiteh, hete im ka min hanlah, kathoung sak tangcoung e hah ka hmaitung hoi ka takhoe han. Isarel teh miphun pueng ni lairui hoi panuilai lah a coung han. <sup>8</sup> Hahoi, tawmrasang lah kaawm e hete im heh ka tapuet e pueng ni kângairunae hoi lungroumsinnae, a hnong tangkhuek sin vaiteh, bang kecu dawk maw BAWIPA ni hete ram hoi im heh hettelah a sak vai, telah ati awh han. <sup>9</sup> Hahoi tami ni, Izip ram hoi a na mintoenaw ka tâcawtkhai e amamae BAWIPA Cathut a ceitakhai teh, cathut alouknaw hah a bawk awh teh, a thaw a tawk pouh dawkvah, BAWIPA ni het patet e rawknae pueng teh a pha sak e doeh telah, bout a dei awh han telah a ti.

### *Solomon hoi Hiram hno poe kâthungnae*

<sup>10</sup> Solomon ni im kahni touh, BAWIPA im hoi siangpahrang im a sak nathung kum 20 touh aloum hnukkhu,



<sup>11</sup> Taire siangpahrang Hiram ni Solomon hah Sidar thing hoi hmaica thing hoi, sui hah panki e yit touh a poe teh, siangpahrang Solomon ni, Hiram teh Galilee ram e kho 20 touh a poe aw h.

<sup>12</sup> Hiram Taire kho hoi Solomon ni a poe e khonaw khet hanelah a cei teh, a ngai e phun lah aw m hoeh.

<sup>13</sup> Ahnimouh ni hmaunawng hah na poe e khonaw heh, bangpatet e khonaw maw telah ati. Hatdawkvah, atu totouh, Kabul ram telah a ti.

<sup>14</sup> Hottelah Hiram ni siangpahrang sui talen 120 a patawn.

### *Solomon ni a sak e alouklouk e naw*

<sup>15</sup> Solomon siangpahrang ni, thaw ka taw k hane a ta ngainae teh, BAWIPA im hoi amae im ka sak hanelah, Millo kho hoi Jerusalem rapan hoi Hazor kho hoi, Maggido kho, Gezer khonaw ka sak nahane doeh.

<sup>16</sup> Izip siangpahrang Faro hah a tuk teh, Gezer a la teh hmai a sawi. Hote kho ka sak e Kanaan taminaw, koug a thei teh, amae canu, Solomon e a yu e phu lah a poe toe.

<sup>17</sup> Hahoi Solomon ni Gezer kho hoi Bethhoron akalah kaawm e

<sup>18</sup> Baalath kho hoi Judah ram thung kahrawng e Tamar kho, <sup>19</sup> Solomon ni hnopai kuemnae khonaw pueng, leng a kuemnae khonaw hoi, marang kâcuinaw onae khonaw hoi, Jerusalem tenggam thoseh, Lebanon mon daw k thoseh, a uknaeram thung pueng e Solomon ni sak han a noe e pueng hah koug a sak. <sup>20</sup> Isarel catoun laipalah, kaawm rae Amornaw, Hit taminaw, Periznaw, Hivnaw hoi, Jubusitnaw pueng, <sup>21</sup> Ahnimae a hnukkhu hoi a catounnaw hote ram daw k ka'awm rae Isarelnaw ni be a thei hoeh e hah, Solomon thaw ka taw k hanelah atu totouh san lah ao sak. <sup>22</sup> Hateiteh, Isarel catounnaw teh Solomon ni thaw taw k sak aw h hoeh. Taran ka tuk hane hoi kahrawikung kacuenaw, a ransa kahawi e leng kaukkung, marang kâcui e naw kahrawikung lah a ta. <sup>23</sup> Aloukenaw teh Solomon ni taw k e thaw daw kvah, kahrawikung thaw katawknaw ka ring hanelah, 550 touh ao aw h. <sup>24</sup> Hateiteh, Faro e canu teh, Devit khopui hoi amae im Solomon ma ni a sak pouh e daw k, a kampuen teh, Millo kho hah a sak. <sup>25</sup> Solomon ni BAWIPA hanelah khougroe a saknae daw kvah, kum tangkuem kum touh daw k vai thum hmaisawi thuengnae hoi roun thuengnae hah ouk a poe. BAWIPA hma lae khougroe daw k hmuitui hai ouk a sawi. Hottelah bawkim teh a cum. <sup>26</sup> Siangpahrang Solomon ni Edom ram e tuipui paling a tenggam vah, Eloth kho teng kaawm e Eziongeber khovah, longnaw kâhat nahane hai a sak. <sup>27</sup> Hiram ni long hoi tuipui daw k ouk ka cet e a sannaw hoi Solomon e a sannaw hoi cungtalah reirei taw k hanelah a patoun aw h. <sup>28</sup> Ophir kho daw k a cei aw h teh, hote sui talen 420 aphu aw h teh, Siangpahrang Solomon koe a thokhai aw h.

## 10

### *Sheba siangpahrangnu*

<sup>1</sup> BAWIPA e min daw k Solomon e kamthang hah Sheba ram e siangpahrangnu ni a thai toteh, law k karunaw pacei hane hoi tanouk hanelah a tho. <sup>2</sup> Hmuitui a phunkuep hoi sui moikapap, talung phu kaawmnaw ka phawt e kalauknaw hoi a tho. Jerusalem kho daw k Solomon siangpahrang koe a pha toteh, a lung daw k kaawm e hah koug a pâpho. <sup>3</sup> Law k a pacei e pueng Solomon ni a dei thai hoeh e, a phi thai hoeh e, a thai panuek hoeh e buet touh hai aw m hoeh. <sup>4</sup> Sheba siangpahrangnu ni Solomon siangpahrang e lungangnae pueng thoseh, im a sak e thoseh, <sup>5</sup> a caboi daw k ca hane rawcanaw, thaw katawknaw e oang thoseh, a kamthouph aw h e thoseh,



manang kapoenaw hoi BAWIPA im dawk a poe e hmaisawi thuengnae naw thoseh a hmu toteh, kângairu lahoi sut ao. <sup>6</sup> Napui ni siangpahrang koevah, na lungangnae kamthang ka ram koehoi ka thai e heh atang bokheiyah. <sup>7</sup> Hateiteh, kama ka tho toteh, ka mit ni a hmue hoehnahlan teh hote lawk hah ka yuem hoeh. Atuteh, ka thai tangcoung e a tangawn boehai na dei pouh hoeh. Nange lungangnae hoi na hnopai teh ka thai e hlak puk a tapuet. <sup>8</sup> Na hmalah pou kaawm awh niteh, lungangnae ka thai e na taminaw hoi na sannaw teh a yawhawi awh. <sup>9</sup> Nange lathueng a lunghawi awh teh, BAWIPA Cathut, Isarel bawitungkhung dawk katahungsakkung teh pholennae lah awm seh. Bangkongtetpawiteh, BAWIPA ni Isarel a lungpataw yungyoe. Hatdawkvah, yuemkamcu hoi kalan lah lawkceng hanelah siangpahrang lah na rawi awh e doeh telah atipouh.

<sup>10</sup> Siangpahrang koe sui talen 120 hoi hmutui moikapap hoi talung phu kaawmnaw hah a poe. Sheba siangpahrangnu ni siangpahrang Solomon a poe e patet e hmutui bout tâcawt hoeh toe. <sup>11</sup> Khiram long hoi Ophir kho lahoi sui ka phawt e ni hai Ophir kho hoi Almur thing moikapap hoi talung aphu kaawm hah a phu awh. <sup>12</sup> Siangpahrang ni Almur thing hah BAWIPA e im hoi siangpahrang im tungdum nahane hoi la kasaknaw hane ratoung, vovit sak nahane totouh a hno. Hot patetlae Almur thing teh bout thokhai awh hoeh toe. Sahnin totouh kamphawng hoeh. <sup>13</sup> Siangpahrang Solomon ni lungthonae lahoi a poe e hloilah Solomon ni Sheba siangpahrangnu teh a ngai e hoi a hei e pueng a poe. Hottelah hoi ama hoi a sannaw hoi amae ram koelah a ban.

### *Solomon e tawntanae*

<sup>14</sup> Solomon koe kum touh dawk e sui ka kâen e a khang talen 666 touh a pha. <sup>15</sup> Hetheh hno kayawtnaw, leng kamawngnaw, Arabia siangpahrangnaw ukkung bawinaw koehoi e a poe e hai ao rah. <sup>16</sup> Solomon ni kalen e saiphei 200 touh dei e sui hoi a sak nah, buet touh hanelah sui shekel 600 touh a hno. <sup>17</sup> Dei e sui saiphei 300 touh hai a sak. Saiphei buet touh dawk sui mina kathum touh, hotnaw hah siangpahrang ni Lebanon ratu thung e thing hoi a sak e im dawk a hruek. <sup>18</sup> Siangpahrang ni kasaino hoi bawitungkhung kalenpounge a sak teh, suitui hoi a pathoup. <sup>19</sup> Bawitungkhung dawk luennae lakhout 6 touh ao teh, a hnuklah a kâkalup. Bawitungkhung avangvanglah kut toungeah ao teh, kut toungeah teng vah sendek kahni touh a kangdue. <sup>20</sup> Lakhout coung taruk touh e a van vah, avangvanglah sendek 12 touh a kangdue. Hot patetlae tungkhung teh apie ram dawk hai awm hoeh. <sup>21</sup> Solomon ni a neinae manang pueng hoi Lebanon ratu thung e thing hoi sak e im dawk a hno e manang pueng teh, ngun manang nahoe, suimanang seng doeh. Solomon se nah ngun hah banglahai noutna awh hoeh. <sup>22</sup> Siangpahrang ni tui dawk hno a yonae long hoi Khiram siangpahrang e long hoi reirei a patoun. Kum thum touh dawk vai touh Tarshish e long teh bout a ban. Sui, ngun, kasaino, kalainaw, awtawnaw a phu awh. <sup>23</sup> Siangpahrang Solomon ni talai van e siangpahrang pueng hah bawinae koe lahoi lungangnae koe lah koung a tapuet. <sup>24</sup> Solomon e a lungthin dawk Cathut ni a hruek pouh e lungangnae hah Talai tami pueng ni a thai awh hanelah Solomon koe ouk a tho awh. <sup>25</sup> Lengkaleng ka tho e naw ni suimanang, ngunmanang, khohna, tarantuknae puengcang, hmutui phunkuep, marang, la naw hah kum tangkuem a poe awh. <sup>26</sup> Solomon ni rangleng hoi marang kâcuinaw a pâkueng teh, rangleng



1,400 touh hoi marangransanaw 12,000 touh a tawn. Hotnaw teh, rangleng a hrueknae khonaw hoi Jerusalem siangpahrang a onae koe ao sak awh. <sup>27</sup> Siangpahrang ni Jerusalem kho dawk ngun hah talung patetlah thoseh, Sidar thingnaw hah a yawn dawk e thailahei kungnaw patetlah thoseh apap sak. <sup>28</sup> Solomon ni a tawn e marangnaw teh, Izip ram, Keveh kho lahoi a thokhai e naw doeh. Siangpahrang e hno kayawtnaw ni Keveh kho lahoi a thokhai awh teh tangka hoi a ran awh e doeh. <sup>29</sup> Izip ram lahoi leng buet touh hah ngun shekel 600 hoi thoseh, marang buet touh hah ngun shekel 150 hoi thoseh pou a yo awh. Hot patetlah Hit siangpahrang hoi Siria siangpahrangnaw koe Izip marang hoi lengnaw ouk a kâthungkhai.

## 11

### *Solomon ni BAWIPA a kamlang takhai*

<sup>1</sup> Solomon siangpahrang ni Faro canu dueng laipalah Isarel miphun hoeh e Moab, Amon, Edom, Sidon hoi Hit miphun napuinaw hai a ngai. <sup>2</sup> BAWIPA ni nangmanaw Jentel miphun hoi kâpaluennae na sak mahoe. Atangcalah ahnimouh teh, amamae cathutnaw e hnuk vah na lungthin a kamlang sak hane telah Isarelnaw koe a dei pouh nakunghai, Solomon ni Jentel miphun napuinaw radueknae lung a tawn. <sup>3</sup> A yu 700 hoi ado 300 touh a tawn teh, a yunaw ni a lungthin a kamlang sak. <sup>4</sup> Solomon teh a kumcue navah, a yunaw ni a lungthin hah cathut louk koe a kamlang sak. Hottelah a na pa Devit patetlah Cathut Jehovah koelah yuemkamcu hoeh toe. <sup>5</sup> Sidon cathut Ashtoreth hoi panuetho e Ammonnaw e cathut milkom e hnuk a kâbang. <sup>6</sup> Solomon ni BAWIPA e hmaitung vah yonnae hah a sak teh, a na pa Devit patetlah BAWIPA hah khoeroe tarawi hoeh. <sup>7</sup> Solomon ni Jerusalem Kanitholae mon daw k panuethopounge Moabnaw e cathut Khemosh hoi panuethopounge Ammonnaw e cathut Molek hanelah hmuen rasang a kangdue sak. <sup>8</sup> Jentel napuinaw ni a cathut koe thuengnae hmuittui hmaisawi patetlah ahni ni a sak van. <sup>9</sup> Alouke cathut koe a cei hoeh nahanelah, Isarel Cathut Jehovah ni vai hni totouh a kamnue pouh. <sup>10</sup> Kâ kapoekung hah a lungthin hoi a kamlang takhai dawkvah, Solomon e lathueng BAWIPA a lungkhuek. Bangkongtetpawiteh, BAWIPA ni lawk a poe e tarawi hoeh. <sup>11</sup> Hatdawkvah, BAWIPA ni Solomon koe hettelah na sak teh, ka lawkkam hoi phunglawk na tarawi hoeh dawkvah, na uknaeram heh nang koehoi ka la vaiteh, na san koevah ka poe han. <sup>12</sup> Hateiteh, na pa Devit kecu daw k na hring nathung teh hote hah ka sak mahoe. Na capa kut daw k ram kâbawng sak han. <sup>13</sup> Hatei, ram abuemlah hoi ka lat mahoe. Ka san Devit hoi ka rawi e Jerusalem kecu daw k miphun buet touh teh na capa koe a ka poe han telah ati.

### *Solomon e tarannaw*

<sup>14</sup> BAWIPA ni Edom tami hah Hadad hah Solomon e taran lah a kangdue sak, ahni teh Edom ram e siangpahrang catoun lah ao. <sup>15</sup> Edom ram daw k Devit a la o teh, a thei e naw pakawp hanelah ransabawi Joab a cei teh, Edom miphun tongpa pueng a thei hnukkhu, <sup>16</sup> Joab hoi Isarel pueng teh, thapa yung taruk touh thung Edom ram e tongpa pueng he a thei hoehroukrak ao awh. <sup>17</sup> Hadad teh a na pa e san Edom miphun a tangawn naw hoi Izip ram koe pha hanelah a yawng awh. Hadad teh camo ka rah. <sup>18</sup> Midian ram hoi a tâco awh teh Paran ram koe a pha awh. Paran e tami tangawn a kaw awh teh, Izip ram, Izip ram siangpahrang koe a pha awh toteh, siangpahrang ni im hoi talai hmuen a poe teh a kaw k.



<sup>19</sup> Hadad teh Faro e mit khét a kantak. A yu e nawnggha, siangpahrang Tahpenes e nawnggha hah a yu hanelah a poe. <sup>20</sup> Tahpenes e a nawnggha ni, a capa Genubath a khe pouh. Ahni teh Faro im vah Tahpenes ni sanu a pâphei, Genubath teh Faro im vah Faro e a canaw koe kho a sak. <sup>21</sup> Devit teh a na mintonaw koe a i tie hoi Joab hai a due toe tie Hadad ni Izip ram hoi a thai toteh, kai hai kamae ram koelah cei hanelah kâ na poe leih telah, Faro siangpahrang koe a kâhei.

<sup>22</sup> Faro siangpahrang ni, nang teh nama e ram koe lah ban na ngainae na tawn hanelah kai koe bangmaw na ngai rah. Banghai ka ngai hoe. Hatei, cei hane kâ na poe telah bout atipouh.

<sup>23</sup> Cathut ni Solomon e taran hanelah Eliada capa Rezon khobawi Hadadezer, Zobah siangpahrang koehoi ka yawng e hah bout a kangdue sak. <sup>24</sup> Devit ni Zobahnaw a thei navah, ama ni taminaw a pâkhueng teh, ransanaw kaukung lah yo ao toe. Damaskas kho koe lah a cei teh, kho hah a uk. <sup>25</sup> Hadad ni runae a poe e bout a thap sin lahoi Solomon a hringyung thung Isarelnaw e taran lah ao. Siria ram hah a uk teh, Isarelnaw hah puenghoi a hmuhma.

### *Jeroboam taranthawnae*

<sup>26</sup> Nebat capa Jeroboam Zeradah kho e Ephraim tami Solomon e a san ni hai Solomon teh a taran, a manu e min teh Zeruah, lahmai lah a o <sup>27</sup> Siangpahrang a tarannae a kong lam teh hettelah doeh. Solomon ni Millo kho hah a kangdue sak, a na pa Devit e kho rapan ka rawk e a pathoup.

<sup>28</sup> Jeroboam teh athakaawme tami lah ao. Solomon ni hote thoundoun teh tami a thakaawm tie hah a panue dawkvah, Joseph imthung thaw ka tawk e lathueng vah kacue e lah a hruek. <sup>29</sup> Hatnae tueng dawk hettelah doeh.

Jeroboam hah Jerusalem a tâco navah, Shiloh tami profet Ahijah ni lam vah a kâhmo. Ahijah teh hni katha a kâkhu, amamouh roi dueng law vah ao roi. <sup>30</sup> Ahijah ni a kâkhu e hni katha hah a la teh, hlaikahni touh lah a ravei. <sup>31</sup> Jeroboam koevah hete hra touh hah lat nateh, BAWIPA Isarel Cathut ni hettelah a dei. Uknaeram heh kut dawk hoi ka la vaiteh, miphun

10 touh e hah nang koe na poe han. <sup>32</sup> Ka san Devit hanelah Isarel ram thung dawk kai ni ka rawi e Jerusalem kho kecu dawk Solomon ni ram buet touh a la han. <sup>33</sup> Ram hra touh la pouh ngainae teh, Sidonnaw e cathut napui Ashtoreth hoi Moabnaw e cathut Mikomnaw hah a bawk awah. A na pa Devit patetlah ka hmaitung kalan e sak hanelah kaie lamthung dawn hoe.

<sup>34</sup> Hatei, a uknaeram abuemlahoi kOUNg ka lawm mahoe. Bangkoktetpawiteh, kaie kâpoelawknaw hoi phunglawknaw ka poe e a tarawi dawkvah, ka rawi e ka san Devit kecu dawk a hringyung ukkung lah ka o sak han. <sup>35</sup> Solomon e capa kut dawk hoi a uknaeram ka la pouh vaiteh, ram hra touh e nang koe na poe han. <sup>36</sup> Ka min ao nahane ka rawi e Jerusalem kho daw, ka hmalah ka san Devit e hmaiim teh pou ka ang e lah ao nahan Solomon capa koe ram buet touh kai ni ka poe han.

<sup>37</sup> Nang hah kai ni na la vaiteh, na lungngaie patetlah na uk teh Isarelnaw e lathueng siangpahrang lah na o awah han. <sup>38</sup> Nang teh, kai ni kâ na poe e naw na tarawi teh, ka san Devit ni a dawn e patetlah kaie phunglawknaw hoi kâpoelawknaw hah na dawn teh, ka hmaitung kalan e na sak pawiteh, nang hoi rei ka o vaiteh, Devit hanelah ka cak poung e im sak e patetlah nang hanelah ka sak vaiteh, Isarel hah nang koe na poe han. <sup>39</sup> Hete a kong daw Devit catoun a runae ka poe han. Hatei a yungyoe runae ka poe mahoe telah ati.



<sup>40</sup> Solomon ni Jeroboam hah thei hanelah a kâcai. Hatei, Jeroboam a thaw teh, Izip ram, Izip siangpahrang Shishak koe a yawng. Solomon a due totouh Izip ram vah ao.

### *Solomon duenae*

<sup>41</sup> Solomon ni a sak e hno kaawm rae naw hoi ahnie lungangnae naw teh, Solomon ni a thutnae cauk dawkhut e lah ao nahoehmaw. <sup>42</sup> Solomon ni Jerusalem kho dawkhut ao teh, Isarel ram puengkum 40 touh thung a uk. <sup>43</sup> A na mintoenaw hoi reirei a i awh, a na pa Devit kho dawkhut pakawp awh. A capa Rehoboam ni a na pa e yueng lah a uk.

## 12

### *Rehoboam taranlahoi taranthawnae*

<sup>1</sup> Isarel miphun pueng ni Rehoboam hah siangpahrang lah tawm hanelah Shekhem kho koelah a cei awh teh, ahni hai a cei van. <sup>2</sup> Solomon siangpahrang koehoi Izip koelah ka yawng e Nebat capa Jeroboam ni hote kamthang hah a thai teh, Izip ram lahoi bout a ban. <sup>3</sup> Isarelnaw ni ahni koe tami a patoun awh teh, a kaw sak. Kamkhueng e tamihunaw teh ahni hoi Jeroboam koe rei a cei awh. <sup>4</sup> Na pa ni kaimouh dawkhut karipoung e na phu sak awh toe. Hatdawkvah, na pa ni nget ka tawn lah thaw na tawkhut sak e hoi ka ri poung e kahnam hah bet pâhaw sak haw. Hottelah pawiteh, na thaw ka tawkhut awh han telah ati awh.

<sup>5</sup> Ahni ni, nangmanaw cet awh ei, hnin thum thum a loum hnukkhu bout tho awh atipouh. Taminaw hai a cei awh. <sup>6</sup> Siangpahrang Rehoboam ni a na pa Solomon a hring nah ahni koe ouk kaawm e kacuenaw hah taminaw koe bout dei pouh hane bangtelamaw pouknae na poe han telah a pacei. <sup>7</sup> Ahni ni sahnin hetnaw e a san lah na o teh, a thaw na tawkhut lah lawk kahawi hoi bout na dei pawiteh, na san lah pou ao awh han telah a dei pouh awh.

<sup>8</sup> Kacuenaw ni pouknae a poe e hah, Rehoboam ni tarawi hoe. Rei kaawm awh e thoundounnaw koe pouknae a hei teh, <sup>9</sup> ahnimouh ni, na pa ni kaimouh koe na phu sak e kahnam hah pâhaw sak haw telah ati awh dawkvah, bangtelamaw ka dei pouh han, pouknae na poe awh haw telah ati.

<sup>10</sup> A hui thoundounnaw ni ahni koevah, na pa ni kaimouh e kahnam a ri sak toe, bet pâhaw sak haw, telah nang koe ka tet e naw koe hettelah na dei han. Ka kutcarei heh apa e a keng hlak hoe a tha han. <sup>11</sup> Apa ni ka ri poung e kahnam hah nangmanaw na phu sak awh toe. Kai ni hai bout ka thap sin han rah. Apa ni ruitaboung hoi na hem awh. Kai ni teh aikam hoi na hem awh han rah telah bout dei pouh telah ati awh.

<sup>12</sup> Siangpahrang ni apâthum hnin vah bout tho awh telah ahnimouh a dei pouh e patetlah, apâthum hnin dawkhut Jeroboam hoi taminaw teh Rehoboam koe a tho awh. <sup>13</sup> Siangpahrang teh kacuenaw ni pouknae a poe awh e hah ngai hoe. Taminaw hah lawk kahram hoi a pato. <sup>14</sup> Thoundounnaw ni pouknae a poe e patetlah apa ni kahnam a ri sak e hah kai ni hoe ka thap sin han, apa ni ruitaboung hoi na hem awh ei, kai ni teh aikam hoi na hem awh han rah telah lawk kahram lahoi bout a dei pouh.

<sup>15</sup> Siangpahrang ni taminaw ni a dei e hah tarawi hane ngai hoe. Bangkongtetpawiteh, BAWIPA ni Shiloh tami Ahijah hno lahoi Nebat capa Jeroboam koe yo a dei pouh e lawk hah a kuep sak nahanelah doeh.

<sup>16</sup> Isarelnaw ni a dei e hah siangpahrang ni tarawi ngaihoe tie a thai



awh navah, maimanaw Devit hoi bangmaw kâkuetnae kaawm. Jesi capa hoi bangtelamaw râw coe awh han. Oe Isarelnaw namamouh onae rim koe cet awh. Oe Devit namae na imthung kong hah pouk telah bout a dei awh teh, Isarelnaw teh amamouh onae koe bout a ban awh. <sup>17</sup> Hateiteh, Judah khopui thung kaawm e Isarelnaw teh Rehoboam ni a uk awh. <sup>18</sup> Siangpahrang Rehoboam ni tamuk ka cawng e Adoniram a patoun teh, Isarelnaw pueng ni talung hoi a dei awh teh a due. Hatdawkvah, siangpahrang Rehoboam teh, rangleng dawk a kâcui teh Jerusalem kho lah a yawng. <sup>19</sup> Hottelah Isarelnaw ni sahnin totouh Devit imthung hah a taran awh.

### *Rehoboam teh Jerusalem vah*

<sup>20</sup> Isarelnaw ni Jeroboam bout a ban tie hah a thai awh toteh, kamkhuengnae hmuen koe tho hanelah a kaw awh teh, Isarelnaw ka uk e siangpahrang lah a tawm awh. Judah miphun hoe e laipalah teh, Devit imthung koe ka bawk e awm hoe. <sup>21</sup> Rehoboam teh Jerusalem kho koe a pha toteh, Solomon capa Rehoboam koe uknaeram bout pha sak nahanelah Isarelnaw tuk hanelah, Judahnaw pueng hoi Benjamin miphun tarankahawi rawi e 180,000 totouh a kamkhueng sak. <sup>22</sup> Hateiteh, Cathut e lawk teh Cathut e tami Shimaiah koe a pha. <sup>23</sup> Judah ram siangpahrang Solomon capa Rehoboam koehoi Judah hoi Benjamin imthung pueng koehoi tami pueng koe hai, <sup>24</sup> BAWIPA ni hettelah a dei. Na hmaunawnggha Isarelnaw tuk hanelah, cet hanh awh. Tami pueng amamouh im bout ban awh naseh. Hethateh kai ni ka sak e doeh. telah dei pouh awh telah ati. Hottelah BAWIPA e lawk a tarawi awh teh, BAWIPA e lawk patetlah a ban awh.

### *Jeroboam e suimaitoca*

<sup>25</sup> Jeroboam ni Ephraim mon dawkvah Shekhem kho a kangdue sak teh haw vah kho a sak. Haw e kho koehoi a cei teh, Penuel kho hai a kangdue sak. <sup>26</sup> Jeroboam ni a lungthung hoi hete uknaeram heh Devit siangpahrang imthung koe bankhai e lah ao thai. <sup>27</sup> Khocanaw ni BAWIPA e bawkim dawkvah, thuengnae poe hanelah Jerusalem kho koelah cet pawiteh, ahnimae lungthin teh amamae bawi Judah siangpahrang Rehoboam koelah bout a ban awh vaiteh, kai hah na taket awh vaiteh, Judah siangpahrang Rehoboam koelah bout a ban awh han telah ati. <sup>28</sup> Siangpahrang ni pouknae a hei teh, suimaitoca meikaphawk kahni touh a sak teh, taminaw koe nangmouh hanelah, Jerusalem kho yo cei hanelah a ru poug. Oe Isarelnaw khenhaw. Izip ran hoi na katâcawtkhaikung na cathutnaw hei telah ati.

<sup>29</sup> Bethel kho vah buet touh, Dan kho vah buet touh a hruek. <sup>30</sup> A payon nahanelah a sak. Taminaw ni maitoca hah a bawk awh hanelah Dan kho totouh a cei awh. <sup>31</sup> Jeroboam ni karasangpoug e hmuen dawk im a sak teh, Levi hoi hoe e tami rumramnaw dawk hoi vaihma lah a hruek. <sup>32</sup> Jeroboam ni Judah ram e paw i a tawn awh e patetlah thapa yung taroe, hnin hlaipanga hnin hah paw i hnin lah a khoe. Khoungroe koe a cei teh, Bethel kho vah maitoca a sak e naw koe thuengnae a sak. Karasang e hmuen koe a hruek e vaihmanaw hah Bethel kho vah a hruek. <sup>33</sup> Ama ni a ngainae tueng a khoe e thapa yung taroe hnin hlaipanga hnin vah, Bethel kho a sak e khoungroe dawk thuengnae a sak. Isarelnaw hanelah paw i a sak pouh teh khoungroe dawk thuengnae a sak teh hmu itui hah hmai a sawi.



## 13

*Cathut tami lawkthuinae*

<sup>1</sup> Jeroboam teh hmuítui hmaisawi hanelah khoun groe teng a kangdue navah, Cathut e tami buet touh teh Bawipa e lawk patetlah Judah ram lahoi Bethel kho vah a tho. <sup>2</sup> BAWIPA e lawk patetlah khoun groe koe hram laihoi, Oe khoun groe, khoun groe, BAWIPA ni hettelah a dei. Devit imthung dawk e Josiah a min kâphung e a khe han. Nange lathueng hmuítui hmaisawi vaiteh, hmuen rasang koe vaihma thaw katawknaw hah ahni ni na lathueng thuengnae a thueng vaiteh, tami kadout e hrúnaw hah hmai a sawi han ati telah ati.

<sup>3</sup> Hote hnín dawkvah, mitnoutnae a poe teh, BAWIPA ni a dei e mitnoutnae hateh, khoun groe a tip roeroe han. Khoun groe e van kaawm e hraba hah koun g a yut han telah ati.

<sup>4</sup> Hottelah Cathut e tami ni, Bethel kho e khoun groe dawk a hram e hah Jeroboam siangpahrang ni a thai toteh, khoun groe dawk hoi a kut a kâ yap teh man awh telah ati. A man nahanlah a kâ yap e kut hah a kamkhuen teh a kut bout lat thai hoeh toe. <sup>5</sup> Cathut e tami ni BAWIPA e a lawk a poe e patetlah mitnoutnae hoi kâvan lah khoun groe a tip teh, hraba hai khoun groe dawk hoi he a yut.

<sup>6</sup> Siangpahrang ni ka kut bout a dam thai nahanelah kai hane ratoum nateh, na BAWIPA Cathut e hmalah, pahrennae het haw atipouh. Cathut e tami ni BAWIPA koe a hei pouh navah, siangpahrang e kut teh bout a dam. Ahmaloe e boiboe lah bout ao.

<sup>7</sup> Siangpahrang ni Cathut e tami koe, kai koe tho nateh na thapatho, tawkp hu na poe han telah atipouh.

<sup>8</sup> Cathut e tami ni siangpahrang koe vah, na im tangawn na ka poe nakunghai nang koe ka tho mahoe h. Hete hmuen dawk vaiyei hoi tui hai ka net mahoe h. <sup>9</sup> BAWIPA e lawk ni vaiyei cat hanh, tui hai net hanh. Na thonae lam dawk hoi ban han telah kai koe lawk na poe toe telah siangpahrang koe a dei pouh.

<sup>10</sup> Bethel lam lahoi a thonae lam hah a roun teh, alouke lae lam lahoi a ban.

*Cathut tami duenae*

<sup>11</sup> Hatnae tueng dawkvah, Bethel kho vah, profet matawng buet touh ao. A capanaw a tho awh teh, hot hnín vah Cathut tami ni Bethel kho a sak e pueng hah a dei pouh. Siangpahrang koe a dei pouh e hai a na pa koe a dei pouh. <sup>12</sup> Judah ram lahoi ka tho e Cathut e tami teh, na lae lam dawk hoi maw a cei tie a panue awh dawkvah, a na pa ni ahni na lae lam dawk hoi maw a cei tie a pacei.

<sup>13</sup> A capanaw koe vah la hah, hni padoun haw ati e patetlah a canaw ni hni a padoun pouh teh a kâcui. <sup>14</sup> Cathut e tami hah a pâlei. Kathen e rahim a tahung e a hmu nah nang teh Judah ram lahoi na ka tho e Cathut e tami maw telah a pacei. Oe kai doeh atipouh.

<sup>15</sup> Profet ni kai hoi rei cei roi han, ka im totouh kâbang nateh, vaiyei hai cat loe telah a coun.

<sup>16</sup> Kai teh nang hoi rei ka cet mahoe h. Na im dawk ka kâen mahoe h. Hie hmuen dawk vaiyei ka cat mahoe h, tui hai ka net mahoe h. <sup>17</sup> BAWIPA ni hote a hmuen koe, vaiyei cat hanh, tui net hanh, na thonae lam dawk hoi ban hanh loe kai koe na dei pouh telah ati.

<sup>18</sup> Profet ni kai hai nang patetlah profet lah ka o. Nang teh vaiyei na ca vaiteh, tui na nei sak nahanelah nang ka im dawk na coun nahanelah,



kalvantami ni BAWIPA e a lawk lahoi na dei pouh toe telah laithoe sin teh a dei pouh. <sup>19</sup> Cathut e tami teh, profet hoi a ban roi teh, a im dawk vaiyei a ca teh tui hai a nei.

<sup>20</sup> Caboi dawkrei a tahung roi nah, ka ban khai e profet koevah, BAWIPA e lawk a pha. <sup>21</sup> Judah ram lahoi ka tho e Cathut e tami koe BAWIPA ni hettelah a dei. BAWIPA e lawk dei e na tarawi hoehe. BAWIPA Cathut e kâpoe e na ngai hoehe. <sup>22</sup> Hie hmuen koe vaiyei cat hanh, tui net hanh telah lawk na poe e hmuen koe vaiyei na ca teh, tui na nei dawkvah, na ro heh na mintoenaw e tangkom koe phat mahoehe telah a pâpho.

<sup>23</sup> Vaiyei hoi tui a canei hnukkhu, hote profet ni ka ban e profet hanelah amae la hah hni a padoun pouh teh a cei sak. <sup>24</sup> Lam vah Sendek a kâhmo teh, a kei. A ro teh lam dawka yan. Sendek hoi la teh a teng vah a kangdue.

<sup>25</sup> A ro teh lam dawka yan teh Sendek hoi la teh a teng vah a kangdue pouh e kahlawng ka cet e ni a hmu nah, ka matawng e profet koe a cei teh a dei pouh. <sup>26</sup> La hoi ka bankhai e profet ni hote lawka a thai toteh, Cathut e tami BAWIPA e lawk ka ngai hoehe e han doeh. Hatdawkvah, BAWIPA ni ahni koe a dei pouh e a lawk patetlah BAWIPA ni Sendek koe a poe teh, vekrasen lah a hruek, a thei tayaw telah ati.

<sup>27</sup> A capanaw koe la hni na padoun pouh awh atipouh e patetlah a padoun pouh awh. <sup>28</sup> A cei teh lam dawka yan e a ro hoi a teng kangdout e sendek hah a hmu. Sendek ni a ro la cat hoehe rah. La hai runae poe hoehe rah. <sup>29</sup> Profet ni Cathut e tami e a ro hah a kayo teh la van a phu teh a bankhai. Profet matawng a onae kho dawka khuikakhai teh, pakawp hanelah a ma kho lah a ceikhai. <sup>30</sup> A ro teh amae tangkom dawka pakawp teh, Oe ka nawngah telah a khuikakhai awh.

<sup>31</sup> A pakawp hnukkhu a canaw koevah, ka due toteh Cathut e tami pakawpnae tangkom dawka na pakawp awh. A hru teng vah kaie hru hai tat awh. <sup>32</sup> Bethel kho khoungroe hoi Samaria kho ram dawka e hmuenrasang koe sak e innaw a vang lah Cathut e a lawk patetlah ka hram e lawk teh a kuep katang han telah ati.

<sup>33</sup> Hathnukkhu Jeroboam ni amae lamthung kahawihoehe roun hoehe. Hmuenrasang koe tami rumramnaw vaihmanaw lah bout a hruek. Vaihma tawka hane ka ngai e pueng a tawmrasang teh, ahnimouh teh hmuenrasang koe vaihma lah ao awh. <sup>34</sup> Hottelah a sak dawkvah, Jeroboam catoun hah talai dawka hoi koungh ka mit sak hane hoi kong ka raphoenae yon teh a pha.

## 14

### *Jeroboam imthung koe lawkcengnae*

<sup>1</sup> Hatnae tueng nah Jeroboam e a capa Abijah teh a tak a pataw. <sup>2</sup> Jeroboam ni a yu koevah, thaw haw, Jeroboam e a yu tie a panue awh hoehe nahan, na kâsak vaiteh, Shiloh kho cet. Hawvah profet Ahijah, hetnaw e lathueng siangpahrang lah ka o nahan kadeikung ao. <sup>3</sup> Vaiyei 10 touh, vaiyei phen youn touh, khoitui um buet touh na sin vaiteh, profet koe cet haw. Camo dawka bangtelah ao han tie ahni ni a dei han telah a ti.

<sup>4</sup> Jeroboam e a yu teh, a thaw teh, Shiloh kho dawka Ahijah im koe lah a cei. Hatnavah, Ahijah teh a matawng toung dawkvah, a mit amom toe. <sup>5</sup> BAWIPA ni Ahijah koevah, khenhaw! Jeroboam e a yu teh a capa e kong dawka pouknae hei hanelah nang koevah a tho. Bangkongtetpawiteh, ahni teh a pataw. Ahni koe hettelah na dei pouh han. Ahni a tho toteh, napui alouke patetlah a kâsak han telah Ahijah koe atipouh.



<sup>6</sup> Ahijah ni hottelah takhang dawk a kâen navah, a lamcei lawk a thai teh, Kâen haw, Jeroboam e yu, Bangkong alouke tami patetlah na kâsak. Lungmathoenae kamthang dei sak hanelah nang koe vah kai hah na patoun. <sup>7</sup> Cet nateh, Jeroboam koe, Isarel BAWIPA Cathut ni hettelah a dei. Taminaw thung hoi na rawi teh ka tami Isarelnaw kaukkung lah na hruek. <sup>8</sup> Devit imthung hah uknaeram ka lawp teh nang koe na poe. Hatei, nang teh ka san Devit patetlah na awm hoe. Ahni teh kaie kâpoelawknaw a tarawi. Ka hmaitung vah kahawi e hno dueng hah a sak telah a lungthin abuemlah kai koe a kâhnawng. <sup>9</sup> Hatei, yampa e naw hlak vah, yonnae moi na sak. Bangkongtetpawiteh, ka lungkhuek nahanelah cathut alouke koe na kangheng teh, meikaphawk na sak teh, kai hah hnam na thun takhai.

<sup>10</sup> Hatdawkvah, Jeroboam imthung dawk, rucatnae ka pha sak han. Isarel ram khonaw dawk, san thoseh, kahlout thoseh, Jeroboam catoun tongpa pueng ka thei han. Tami ni songnawng he a tâkhawng e patetlah kacawirae Jeroboam catoun hah ka tâkhawng han. <sup>11</sup> Jeroboam catoun teh khopui thung dout pawiteh, a ro uinaw ni a ca han. Kho lawilah dout pawiteh, kalvan e tavanaw ni a ca awh han telah BAWIPA ni a dei toe. <sup>12</sup> Thaw nateh na im cet lawih. Na khok ni khopui a kâen navah, camo teh a due han. <sup>13</sup> Isarelnaw ni a khuai awh vaiteh, a pakawp awh han. Jeroboam imthungdaw dawk hote camo dueng doeh tangkom dawp pakawp e lah ao awh han. Bangkongtetpawiteh Jeroboam catoun dawp, haw e camo buet touh ni Isarel catoun e BAWIPA Cathut dawp lungthin ahawinae hmu e lah ao. <sup>14</sup> BAWIPA ni ama hanelah, sahnin roeroe dawp Jeroboam imthung karaphoekung Isarel dawkvah siangpahrang ka tâco sak han. Nâtuek han nama atipouh navah, atu raw doeh toe a ti. <sup>15</sup> Tui van lungpungkung kâhuen e patetlah BAWIPA ni Isarel a kahuet han. BAWIPA lungkhueknae thing meikaphawk a sak awh dawkvah, a mintoenaw koe a pha tangcoung e hah, kahawi e ram thung hoi Isarelnaw phawk vaiteh, tui namran lah be a kâkayei awh han. <sup>16</sup> Ama hai ka payon niteh, Isarel miphunnaw hai ka payon sak e, Jeroboam e yonnae kecu dawp Isarel miphunnaw ka pahnavt han telah a ti.

<sup>17</sup> Jeroboam e a yu a cei teh, Tirzah takhang koe a pha nah a ca teh a due. <sup>18</sup> BAWIPA ni a san profet Ahijah lahoi a dei e patetlah camo hah a pakawp awh teh, Isarelnaw teh a khuika awh.

### *Jeroboam duenae*

<sup>19</sup> Jeroboam ni a sak e kaawm rae naw, tarantuknae, a uknae naw tie a kong hah Isarel siangpahrangnaw setouknae cauk dawp thut lah ao nahoehmaw. <sup>20</sup> Jeroboam ni kum 22 touh a uk hnukkhu, mintoenaw hoi rei a i awh. A capa Nadab ni ahni yueng lah a uk.

### *Rehoboam ni Judah a uk*

<sup>21</sup> Solomon e capa Rehoboam ni Judah ram hah a uk. Uk a kamtawng nah a kum 41 touh a pha. BAWIPA ni a min ao nahanelah, Isarel kho ram thung hoi e Jerusalem kho dawp kum 17 touh a uk. A manu e min teh Naamah, Ammon tami doeh. <sup>22</sup> Judahnaw ni BAWIPA e hmaitung vah yonnae a sak awh teh, mintoenaw a payon awh e hlak payonnae yon lahoi lungkhueknae a kampai sak awh. <sup>23</sup> Karasangpoung e mon naw thoseh, kahring e thingkungnaw rahim thoseh, monruinaw, meikaphawknaw, Asherahkungnaw thoseh a sak awh. <sup>24</sup> Judah ram dawp napuitongpa moikapap lah ao teh, Isarelnaw e hmaitung BAWIPA ni a hruek awh e miphunnaw ni, a sak awh e hno panuetho e naw a sak



awh. <sup>25</sup> Siangpahrang Rehoboam a uknae kum 15 nae dawk vah, Izip siangpahrang Shishak hah Jerusalem kho tuk hanlah a tho. <sup>26</sup> Bawkim dawk e hnonaw hoi siangpahrang im e hnonaw a la awh. Solomon ni a sak e sui saiphei pueng a la pouh. <sup>27</sup> Siangpahrang Rehoboam ni suisaiphei yueng lah rahum saiphei naw a sak teh, siangpahrang im takhang ka ring e koe a kuem sak. <sup>28</sup> Siangpahrang ni BAWIPA e im dawk a cei na tangkuem karingkungnaw ni saiphei a sin awh teh, karingkungnaw a onae koe bout a hruek awh han. <sup>29</sup> Rehoboam ni a sak e thung dawk hoi kaawm rae naw hoi a sak e pueng siangpahrangnaw setouknae cauk dawk a thut awh nahoehmaw. <sup>30</sup> Rehoboam hoi Jeroboam a hringyung thung a rahak vah kâtuknae ao. <sup>31</sup> Rehoboam hai a mintoenaw koe a i teh, Devit kho dawk ahnimouh hoi rei pakawp e lah ao. A manu min teh Ammon Naamah doeh. A capa Abijam ni a na pa yueng lah a uk.

## 15

### *Judah siangpahrang Abijam*

<sup>1</sup> Nebat capa siangpahrang Jeroboam ni kum 18 a uknae kum dawk Abijam teh Judahnaw e siangpahrang lah ao. <sup>2</sup> Jerusalem kho kum 3 touh a uk. A manu e min teh Abishalom canu Maakah doeh.

<sup>3</sup> A na pa ni yonnae a sak e pueng a sak van teh, a na min Devit lungthin patetlah BAWIPA e hmaitung yuemkamcu lah awm hoe. <sup>4</sup> Hateiteh, Devit e minhmai khet lahoi BAWIPA Cathut ni a capa hah a tawmrasang teh, Jerusalem kho a caksak teh, haw e kho dawk Devit e hmaiim hah a ang sak. <sup>5</sup> Bangkongtetpawiteh, Devit ni Hit miphun Uriah kong hoe laipateh, a hringyung thung BAWIPA ni kâ a poe e phen boihoe. Kalane hno a sak nahane dawk doeh.

<sup>6</sup> A hringyung thung Rehoboam hoi Jeroboam e rahak vah kâtuknae ao. <sup>7</sup> Abijam ni a sak e naw pueng teh Judah siangpahrang setouknae cauk dawk thut lah ao nahoehmaw. Abijam hoi Jeroboam rahak vah kâtuknae ouk ao. <sup>8</sup> Abijam teh a na mintoenaw hoi rei a i teh Devit khopui dawk a pakawp awh. A capa Asa ni a na pa yueng lah a bawi.

### *Judah siangpahrang Asa*

<sup>9</sup> Jeroboam ni Isarel siangpahrang lah a bawinaw kum 20 nah Asa teh Judah siangpahrang lah ao. <sup>10</sup> Jerusalem kho dawk kum 41 touh a bawi. A manu min teh Abishalom canu Maakah doeh.

<sup>11</sup> Asa teh a na min Devit patetlah BAWIPA e hmaitung vah hawinae a sak. <sup>12</sup> Napuitongpa thoseh, a mintoenaw ni a sak awh e meikaphawknaw pueng thoseh, ram thung hoi koug a raphoe pouh. <sup>13</sup> A manu Maakah ni hai panuetho e Asherah a sak dawkvah, siangpahrangnu dawk hoi a kâtaakhoe. Asa ni napui panuetho e meikaphawh hah a raphoe teh, Kidron palang teng hmai hoi a sawi. <sup>14</sup> Hateiteh, hmuenrasangnaw teh, takhoe hoe. A hringyung thung Asa e lungthin BAWIPA hmaitung yuemkamcu lah ao. <sup>15</sup> A na pa ni a pasoumhno, ama ni a pasoumhno, sui, ngun naw pueng bawkim dawk koug a ceikhai.

<sup>16</sup> A hringyung thung Asa hoi Isarel siangpahrang Baasha e rahak vah tarankâtuknae ao. <sup>17</sup> Isarel siangpahrang Baasha ni Judahnaw hah a tuk. Judah siangpahrang Asa koevah apihai a kâen a tâco sak hoe nahan Ramah kho hah a thawng. <sup>18</sup> Hat navah, Asa ni BAWIPA e bawkim hoi siangpahrang im vah kaawm e râw sui hoi ngunnaw a la teh, a sannaw e kut dawk a poe. Siangpahrang Asa ni Damaskas vah kaawm



e Siria siangpahrang Hezion capa Tabrimmon capa Benhadad koevah a poe. <sup>19</sup> Nang hoi kai thoseh, na pa hoi apa rahak thoseh, kâhuikonae ao dawkvah, sui hoi ngun poehno lah na poe. Isarel siangpahrang Baasha ni kai koehoi ceisak hanelah, ahni hoi kâhuikonae hah raphoe nateh, tho loe telah lawk a thui.

<sup>20</sup> Siangpahrang Benhadad ni siangpahrang Asa e lawk hah a ngai pouh teh, Isarel kho tuk hanelah a ransanaw kaukung hah a patoun. Ijon, Dan, Abelbethmaakah hoi Kinneroth ram pueng hoi Naphtali ram pueng a tuk awh. <sup>21</sup> Haw e kamthang BAASha ni a thai toteh, Ramah kho hah pacum laipalah Tirzah kho dawkvah ao. <sup>22</sup> Siangpahrang Asa ni Judah ram pueng dawkw kamthang a pathang teh, apihai awm rumram laipalah, Baasha ni Ramah kho dawkw a hno e hnopainaw a hno e lahoi siangpahrang Asa ni Mizpah kho hoi Benjamin ram e Geba kho hah a thawng.

<sup>23</sup> Asa ni a sak e thung dawkw hoi kaawm rae pueng hoi a thaonae pueng, a sak e pueng, kho a kangdue sak e pueng hah Judah siangpahrang setouknae cauk dawkw thut lah ao nahoehmaw. Hateiteh a matawng toteh, a khok dawkw patawnae ao. <sup>24</sup> Asa teh a mintoenaw koe a i teh a na min Devit kho dawkw a pakawp awh. A capa Jehoshaphat ni a yueng lah a bawi.

### *Isarel siangpahrang Nadab*

<sup>25</sup> Jeroboam capa Nadab teh, Judah siangpahrang a bawinae a kum 2 nah Isarelnaw hah kum 2 touh a uk. <sup>26</sup> BAWIPA e hmaitung vah kathout hno a sak teh, Isarelnaw yonnae ka saksakkung a na pa e lamthung hah a dawn. <sup>27</sup> Nadab hoi Isarelnaw ni Gibbethon kho a kalup awh nah, Issakhar imthung Ahijah capa Baasha ni a coun teh, Filistin ram e taminaw ni, a coe e Gibbethon kho vah Baasha ni a thei. <sup>28</sup> Judah siangpahrang a bawinae kum 3 nah Baasha ni Nadab siangpahrang a thei teh a yueng lah a uk.

<sup>29</sup> Siangpahrang lah ao toteh, Jeroboam imthungnaw pueng koug a thei. BAWIPA ni amae san Shiloh kho e tami Ahijah hno lahoi a dei tangcung e patetlah ka hring e pueng teh, Jeroboam hanelah a hlung e buet touh hai awm hoeh. <sup>30</sup> Isarel BAWIPA Cathut lungkhueknae teh, Jeroboam ni a sak e yonnae hoi Isarelnaw ka payon sak e yonnae kecu dawkw doeh. <sup>31</sup> Nadab siangpahrang a kâroenae thung hoi kaawm rae hoi a sak e pueng hah Isarel siangpahrangnaw setouknae cauk dawkw thut e lah ao nahoehmaw. <sup>32</sup> A hringyung thung vah Asa hoi Isarel siangpahrang Baasha e rahak taran kâtuknae ao.

### *Isarel siangpahrang Baasha*

<sup>33</sup> Judah siangpahrang a bawinae kum 3 nah, Ahijah capa Baasha teh, Tirzah kho vah Isarelnaw uknae a kamtawng teh kum 24 touh a uk. <sup>34</sup> BAWIPA e hmaitung vah yonnae a sak teh, Isarelnaw ka payonsakkung Jeroboam yonnae lamthung hah a dawn awh.

## 16

<sup>1</sup> Bawipa e lawk Baasha ka taran e Hanani capa Jehu koe ka phat e teh, <sup>2</sup> nang teh vaiphu dawkw hoi na tawm teh, ka tami Isarel miphun na uk sak hanelah, na tawmrasang eiteh, nang ni Jeroboam e lamthung na dawn. Isarelnaw na payon sak teh, kai lungkhuek hanelah na sak dawkvah, <sup>3</sup> nange miphun ca catounnaw koug ka raphoe vaiteh, nange imthung Nebat capa Jeroboam e a imthung patetlah kai ni ka o sak han.



<sup>4</sup> Baasha imthung teh khopui thung dout pawiteh, a ro hah uinaw ni a ca han. Khopui lawilah dout pawiteh, kalvan e tavanaw ni a ca han telah ati.

<sup>5</sup> Baasha ni a tawksak e pueng teh Isarel siangpahrangnaw e setouknae cauk dawk thut e lah ao nahoehmaw. <sup>6</sup> Baasha teh a na mintoenaw koe a i teh, Tirzah kho a pakawp awh. Hahoi a capa Elah ni a yueng lah a uk. <sup>7</sup> Baasha teh Jeroboam imthung hoi a kâvan teh, BAWIPA hmaitung a sakpayon e naw hoi a lungkhuek sak hanelah kut hoi a sak e hoi ahnimouh a theinae lahoi Baasha hoi a imthung kong dawk BAWIPA e lawk hai Hanani capa profet Jehu hno lahoi a pha.

### *Isarel siangpahrang Elah*

<sup>8</sup> Judah siangpahrang Asa a bawinae kum 26 nae dawk, Baasha capa Elah ni Tirzah kho hoi Isarel ram kum 2 touh a uk. <sup>9</sup> A san Zimri, rangleng tangawn kahrawikung ni, Tirzah e imthungkhu kahrawikung Arza im vah, yamu a nei teh, a parui lahun nah, ahni taranlahoi a thei. <sup>10</sup> Judah siangpahrang a bawinaw kum 27 nae dawk Zimri ni a kâen teh a hem teh a thei, ahnie yueng lah let a bawi.

<sup>11</sup> Uk a kamtawng teh, a bawitungkhung dawk a tahung tahma, Baasha imthung pueng koug a thei. A hmaunawngaha hoi a huikonaw thung dawk hoi a na pa capa buet touh hai pâhlung hoeh.

<sup>12</sup> Hottelah BAWIPA ni profet Jehu hno lahoi Baasha koelah lawk a dei e patetlah Zimri ni Baasha imthungnaw be a thei. <sup>13</sup> Bangkongtetpawiteh, hottelah Baasha a yonae pueng hoi a capa Elah e yonnae pueng amamouh ni a sak e hoi Isarelnaw a payon sak e hoi, Isarel BAWIPA a lungkhuek sak dawk doeh.

<sup>14</sup> Elah a tawksaknae dawk hoi ka cawi rae hoi a sak e pueng Isarel siangpahrangnaw setouknae cauk dawk thut lah ao nahoehmaw.

### *Isarel siangpahrang Zimri*

<sup>15</sup> Judah siangpahrang Asa a bawinae kum 27 nae dawk Zimri teh Tirzah kho dawk hnin 7 touh a bawi. <sup>16</sup> Zimri ni a kâcoun awh teh, siangpahrang ka thei telah Filistin ram Gibbethon kho e a hmalah katungpupnaw ni a thai nah, hote hnin dawkvah kacue e Omri hah Isarel siangpahrang lah a tungpupnae hmuen koe a tawmrasang awh. <sup>17</sup> Omri teh Isarelnaw hoi Gibbethon kho hoi a tâco awh teh, Tirzah kho hah a kalup awh. <sup>18</sup> Zimri ni kho a la toe tie a panue tahma vah, siangpahrang im a kâen teh, siangpahrang im vah hmai hoi a kâsawi teh a due.

<sup>19</sup> Bangkongtetpawiteh, BAWIPA e hmaitung vah kahawi hoeh e sak payonnae hoi Isarel yonnae a sak hanelah ka sak e Jeroboam ni a dawn e lamthung a dawn awh. <sup>20</sup> Zimri a tawksaknae dawk hoi ka cawi rae naw hoi youknae taran hai Isarel siangpahrangnaw setouknae cauk dawk thut lah ao nahoehmaw.

### *Isarel siangpahrang Omri*

<sup>21</sup> Hatnae tueng dawk Isarelnaw phu hni touh lah a kâkapek awh. A tangawn ni Ginath capa Tibni hah siangpahrang lah o sak hane a ngai awh teh a hnuk a kâbang awh. A tangawn ni Omri hnuk a kâbang awh. <sup>22</sup> Hatei, Omri e hnuk ka kâbangnaw ni Ginath capa Tibni hnuk ka kâbangnaw a tâ awh. Tibni a due teh Omri ni a uk.

<sup>23</sup> Judah siangpahrang Asa a bawinae kum 31 nah Omri ni Isarel hah uknae a kamtawng teh, kum 12 touh a uk. Tirzah kho dawk kum 6 touh a uk. <sup>24</sup> Samaria mon buet touh hah Shemer koe tangka 20 touh hoi a ran.



Hottelah hoi mon dawkvah, kho a kangdue sak. A kangdue sak e khopui teh mon katawnkung Shemer min lahoi Samaria teh a phung.

<sup>25</sup> Omri ni BAWIPA e hmaitung vah kahawihoehe ouk a sak. Ha hoehnahlan e taminaw hlak kahawihoehe hno a sak e a paphnawn. <sup>26</sup> Nebat capa Jeroboam e lamthungnaw a dawn awh teh, meikaphawk ni Isarel BAWIPA a lungkhuek sak hanelah Isarel ka payonsakkung yonnae hah a sak. <sup>27</sup> Omri ni a tawksak e daw k hoi kacawirae hoi a thasainae a kamnue sak e naw hah Isarel siangpahrangnaw setouknae cauk daw k thut e lah ao nahoehmaw. <sup>28</sup> Omri teh a na mintoenaw koe a i teh, a capa Ahab ni a yueng lah a bawi.

### *Isarel siangpahrang Ahab*

<sup>29</sup> Judah siangpahrang Asa, a bawinae kum 38 nah Omri capa Ahab ni Isarelnaw hah uknae a kamtawng. Omri capa Ahab ni Isarelnaw hah Samaria kho daw k hoi kum 22 touh a uk. <sup>30</sup> Omri capa Ahab ni ama hoehnahlan tami pueng hlak BAWIPA e hmaitung kahawihoehe hno a sak. <sup>31</sup> Nebat capa Jeroboam yonnae lamthung dawn e hah ahni hanelah yonnae ka phouhoucalah a pouk teh, Sidon siangpahrang Ethbaal canu Jezebel hah a yu lah a paluen teh Baal cathut hah a baw k. <sup>32</sup> Samaria kho daw k Baal cathut e baw kum daw k Baal cathut hanelah khoun groe a sak. <sup>33</sup> Ahab ni thing meikaphawk hah a sak teh, ahni hoehnahlan e Isarelnaw hlak Ahab ni BAWIPA Isarelnaw e Cathut lungkhuek saknae hno lah hoe kapap lah a sak.

<sup>34</sup> Ahab se nah Bethel kho e tami Hiel ni Jeriko kho a thawng. BAWIPA ni Nun capa Joshua hno lahoi a dei tuncoung e patetlah a camin Abiram se nah kho rapan adu a ung teh, a ca cahnoung Segub se nah kho longkhanaw hah a kangdue sak.

## 17

### *Elijah ni khokang nahan a dei*

<sup>1</sup> Gilead ram Tishbit tami Elijah ni Ahab koe vah, kai ni ka baw k e Isarel BAWIPA Cathut teh a hring e patetlah hete kum daw k tadamtui baw t mahoe h kho hai rak mahoe h telah atipouh.

<sup>2</sup> BAWIPA e lawk teh ahni koe a pha. <sup>3</sup> Kanitholae Jordan teng kaawm e Kherith sawkca daw k kahrawk. <sup>4</sup> Hahoi hote sawkca tui hah na nei vaiteh, na ka kaw k hanelah vonga ka yo ka poe toe telah atipouh.

<sup>5</sup> Hatdawkvah, BAWIPA e lawk patetlah a cei teh a sak. Jordan teng kaawm e Kherith sawkca daw k ao. <sup>6</sup> Vonga ni amom lah vaiyei hoi moi a poe. Tangmin lahoi vaiyei hoi moi hah a poe teh sawkca tui hah a nei. <sup>7</sup> Hathnukku hoi hote ram daw k kho a rak hoe h dawkvah, sawkca teh a hak.

### *Elijah hoi lahmai ni*

<sup>8</sup> Hahoi BAWIPA e lawk hah ahni koe a pha teh, <sup>9</sup> thaw nateh, Sidon ram Zarephath lah cet nateh, hote hmuen koe vah awmh. Khenhaw! na ka kaw k hanelah lahmainu buet touh ka yo ka poe toe telah atipouh.

<sup>10</sup> Hatdawkvah a thaw teh, Zarephath lah a cei. Hote kho longkha koe a pha nah lahmainu buet touh teh thing a ei. Elijah ni a kaw teh, ka nei hane tui manang daw k hoi sin haw atipouh.

<sup>11</sup> Lahmainu ni tui la hane a cei nah, bout a kaw teh vaiyei youn touh na kut daw k hoi sin la a telah atipouh.



<sup>12</sup> Lahmainu ni BAWIPA na Cathut a hring e patetlah vaiyei teh ka tawn hoeh. Hlaam dawk vaiyei kanui e kutvang touh hoi satuium dawk satu yitca dueng doeh kaawm. Kama hoi ka capa hanlah karê vaiteh, ca hnukkhu ka due roi han toe ti hoi atu thingtaboung kahni touh atu ka ei hei telah atipouh.

<sup>13</sup> Elijah ni, lahmainu koevah, taket hanh. Na dei e patetlah sak. Hateiteh kai hanlah buet touh hmaloe sak nateh thokhai haw. Hathnukkhu, nama hoi na capa hanelah sak. <sup>14</sup> Bangkongtetpawiteh, Isarel BAWIPA Cathut ni hettelah a dei. BAWIPA ni talai van kho a kang sak nathung, tavai hlaam a hrawng lah awm mahoe. Satuium hai hak mahoe atî telah a dei pouh.

<sup>15</sup> Elijah ni a dei e patetlah a sak teh, ama hoi a imthung hoi Elijah hoi hnin moikasawlah a ca aw. <sup>16</sup> Elijah ni BAWIPA e lawk a dei e patetlah tavai hlaam ahrawng lah awm hoeh, satuium hai hak hoeh.

### *Elijah ni lahmainu e capa a hring sak*

<sup>17</sup> Hote hnonaw ao hnukkhu, im katawnkung lahmainu e capa teh a pataw. A patawnae teh a nung poung dawkvah a due. <sup>18</sup> Lahmainu ni Elijah koevah, oe Cathut e tami nang koe bang hno maw ka sak. Ka yonnae kapanueksakkung hoi ka capa thei hanelah maw na tho telah atipouh.

<sup>19</sup> Ahni ni ahni koe na capa teh na poe haw atipouh. Hottelah sut a tapam e a capa hah, a la pouh teh a onae rakhan dawk a luenkhai teh a ikhun dawk a payan. <sup>20</sup> Oe BAWIPA ka Cathut, ka luennae hete lahmainu koe runae na sak teh a capa hah na due sak han namaw telah BAWIPA hah a kaw.

<sup>21</sup> Hote camo van vah vai thum touh a tabo teh, oe BAWIPA ka Cathut, hete camo e hringnae ama koe bout ban sak hanlah ka hei telah BAWIPA hah a kaw.

<sup>22</sup> BAWIPA ni Elijah e lawk hah a thai pouh teh camo e a hringnae teh ama koe bout a ban teh, camo teh a kâhlaw. <sup>23</sup> Elijah ni camo hah a lathueng e rakhan dawk hoi a rahim lah a thokhai teh, khenhaw! na capa teh bout a hring telah atipouh teh a manu koe a poe.

<sup>24</sup> Ahni ni Elijah koevah nang teh Cathut e tami doeh. Na pahni daw e BAWIPA e lawk teh, lawkkatang doeh tie atu ka panue toe telah atipouh.

## 18

### *Elijah ni Ahab lawk a thui*

<sup>1</sup> Ahnintha moi a loun hnukkhu, hettelah ao. A kum thum dawk Elijah koevah, BAWIPA e lawk teh a pha. Cet nateh Ahab koe kâpâtue. Hahoi talai van kho a rak sak han telah a ti.

<sup>2</sup> Elijah ni Ahab koevah kâpâtue hanlah a cei. Hatnavah Samaria ram daw k puenghoi takang a tho. <sup>3</sup> Ahab ni a imthungkhu kaukkung Obadiah hah a kaw teh (Obadiah teh BAWIPA ka taket poung e lah a o), <sup>4</sup> bangkongtetpawiteh, Jezebel ni BAWIPA e profet a thei lahun na, lungngoum thungvah 50, 50 touh hoi a hro teh, vaiyei, tui hoi a kaw. <sup>5</sup> Ahab ni Obadiah koevah, ram pueng daw k tuiphueknaw, palangnaw yuengyoe tawng hanelah cet. Saringnaw pueng ni a due hoeh nahan marang hoi lanaw ni hring hlout nahanelah, hram kanawnaw na hmu yawkaw han doeh telah atipouh.

<sup>6</sup> Hottelah ram katin hanlah a kârei aw. Hah, Ahab teh amadueng lam alouke daw k a cei teh, Obadiah hai a madueng lam alouke daw k a cei.

<sup>7</sup> Hottelah Obadiah ni a cei lahun nah, Elijah hah tang a kâhmo. Ahni ni a panue teh a tabo. Nang namaw ka bawipa, Elijah telah atipouh.



<sup>8</sup> Elijah ni Obadiah koevah, Oe kai doeh, cet nateh haw vah Elijah ao telah na bawipa koe dei pouh telah atipouh.

<sup>9</sup> Ahni ni bang yonnae maw ka sak teh na san heh thei hanelah Ahab e kut dawk poe hanelah na ngai. <sup>10</sup> BAWIPA na Cathut a hring e patetlah ka bawipa ni nang na tawnghoehnae miphun hoi uknaeram awm hoehtoe. Hivah awm hoehtelah ati awh navah, nang na hmuhoehnae kong dawk miphun hoi ram hah lawk a kam sak.

<sup>11</sup> Atuvah nang ni cet nateh, Elijah hawvah ao telah na bawipa koe dei pouh telah na ti. <sup>12</sup> Hottelah ao han. Na ceitakhai toteh, BAWIPA e Muitha ni ka panue hoehtoe e hmuen koe na cet khai vaiteh, Ahab ka dei pouh vaiteh, na hmawt thai awh hoehpawiteh, kai heh na thei awh han. Hatei, na san ni ka nawca hoi BAWIPA teh ka taki. <sup>13</sup> Jezebel ni BAWIPA e profetnaw a thei lahun nah, BAWIPA e profetnaw tami 100 touh lungngoum thung ruipanga ruipanga touh hoi ka hro teh, vaiyei hoi tui hoi ka kawknah kong hah dei awh hoehtamaw. <sup>14</sup> Atuvah nang ni cet nateh, Elijah haw ao telah deihtelah, telah na ti. Kai heh na thei roeroe han doeh telah atipouh.

<sup>15</sup> Elijah ni ka bawk e ransahu BAWIPA teh a hring e patetlah kai ni sahnin Ahab koe ka kâpâtue roeroe han telah atipouh.

<sup>16</sup> Hatdawkvah, Obadiah teh Ahab kâhmo han la a cei teh a dei pouh. Hahoi Ahab ni Elijah kâhmo hanlah a cei. <sup>17</sup> Ahab ni Elijah a hmu toteh, nang maw Isarelnaw runae na ka poe e tongpa telah atipouh.

<sup>18</sup> Ahni ni Isarelnaw runae ka poe hoehtelah. Nang hoi na pa imthungkhunaw ni BAWIPA e kâpoelawknaw hah na kamlang takhai awh teh, Baal na bawk dawkvah, Isarelnaw runae na poe. <sup>19</sup> Atuvah Isarelnaw pueng Baal profet 450 touh hoi Jezebel e caboi dawk bu ouk ka ven awh e Asherah profet 400 touh hah kai koe vah Karmel mon dawk kamkhueng hanlah kaw sak telah atipouh.

### *Karmel mon dawk Elijah ni tânae*

<sup>20</sup> Hottelah Ahab ni Isarelnaw pueng koe, tami a patoun teh profetnaw Karmel mon dawk a pâkhueng. <sup>21</sup> Elijah ni tamiu pui hah a hnai teh, nangmouh ni, bawknah kahni touh rahak vah nâsittouh maw yuem payonnae lungthin hoi kho na sak awh rah. Jehovah teh Cathut katang lah awm pawiteh, ama hah bawk awh. Baal hah cathut katang lah awm pawiteh ama hah bawk awh. Hatei tami pueng ni lawk kam touh hai a pathung awh hoehtelah. <sup>22</sup> Elijah ni BAWIPA e profet kaawm dueng e teh kai dueng doeh toe. Hatei Baal profet teh 450 touh a pha. <sup>23</sup> Hatdawkvah, maitotan kahni touh na poe awh haw. Ahnimouh ni buet touh a rawi awh vaiteh koug a tâtueng hnukkhu, thing van vah thueng awh naseh. Hmaisawi sak awh hanh. Hahoi kai ni maitotan buet touh ka rawi van vaiteh, thing van vah ka ta han. Hmai ka sawi van mahoehtelah, <sup>24</sup> Nangmouh ni na cathutnaw e min hah kaw awh nateh, kai ni hai Jehovah e min hah ka kaw van han. Hmai hoi ka kang sak e Cathut teh Cathut katang lah awm naseh telah taminaw koe a dei pouh. Taminaw ni hai, Elijah e lawk teh a hawi telah ati awh.

<sup>25</sup> Elijah ni Baal profetnaw koe vah nangmouh teh tami na pap awh dawkvah, maito buet touh hmaloe kârawi awh nateh, sak awh, hmaisawi laipalah na cathutnaw min hah kaw awh telah atipouh e patetlah, <sup>26</sup> Taminaw ni a poe e maito hah a la teh, thing van a ta hnukkhu, Oe Baal cathut, kaimouh na pato awh haw telah amom hoi kanithun totouh Baal e min a kaw awh. Hateiteh kamthang banghai awm hoehtelah. Ka pathung e tami haiyah awm hoehtelah. A sak awh e thuengnae khoungroe hanlah a



lamtu awh. <sup>27</sup> Kanî tuengtalung a thun nah Elijah ni, kacaipounglah kaw awh ei. Na cathut teh a phuenang boma, ahni teh houng hoeh rah boma, ahni teh kahlawng lah boma a cei va, ahni teh muet ka ip boma, pâhlaw awh ei, telah a panuikhai teh a dei pouh.

<sup>28</sup> Kacaipoung lahoi a kaw awh teh, ouk a sak awh e patetlah sarai hoi tahroe hoi thi pukkâkaawk lah a kâbouk awh. <sup>29</sup> Kanî a loun teh tangmin lae thuengnae tueng totouh pou a dei awh rah. Hateiteh, kamthang thoseh, kapathangkung thoseh, alawkpui lah kapoukkung thoseh, awm roeroe hoeh. <sup>30</sup> Hatdawkvah, Elijah ni tamihunaw pueng koevah, kai na hnai awh haw telah atipouh teh, tamihupui ni ama teh a hnai awh. Hahoi katim e BAWIPA e khoungroe hah a pathoup awh. <sup>31</sup> Na min teh Isarel ti han telah BAWIPA lawk ka dâw e Jakop casaknaw miphun yit touh, Elijah ni talung hlaikahni touh a la. <sup>32</sup> Hote talung hoi BAWIPA hanelah khoungroe hah a sak. Hote khoungroe petkâkalup lah cati pung hni tabang ka cawng lah tuilam a tai. <sup>33</sup> Thing hah a mawk teh maitomoi a tâtueng e hah thinghong van a ta. Hahoi hlaam pali touh daw k tui pakawi awh nateh, thueng hane hoi thing hah tui hoi awi awh telah atipouh. <sup>34</sup> Bout awi awh telah atipouh e patetlah bout a awi awh. Bout awi awh ei telah atipouh teh bout a awi awh rah. <sup>35</sup> Tui teh khoungroe petkâkalup lah a lawng teh tai e a tuilam daw k yikkawi sak.

<sup>36</sup> Tangmin lah thuengnae atueng a pha toteh, hettelah ao. Elijah ni a hnai teh, Oe, Jehovah, Abraham Isak hoi Isarel Cathut, nang teh Isarel ram daw k Cathut lah na o. Kai teh na san lah ka o. Hete hnaw pueng heh nange kâ lahoi ka sak tie heh sahnin panuek awh naseh. <sup>37</sup> Ka lawk na thai pouh haw. Hete taminaw niyah nang teh Jehovah Cathut doeh tie thoseh, hete taminaw e lungthin hah a kamlang sak tie thoseh, ahnimouh ni a panue thai awh nahanelah, kaie lawk hah na thai pouh haw, Oe BAWIPA na thai pouh haw telah a ratoum.

<sup>38</sup> Hottelah BAWIPA e hmai a bo teh hmaisawi thuengnae thing hoi talung hoi vaiphu hah a kak teh tai e tuilam daw k e tui koug a hak sak. <sup>39</sup> Taminaw pueng ni hote a hmu awh toteh, a tabo awh teh, Jehovah teh Cathut doeh, Jehovah teh Cathut doeh telah ati awh.

<sup>40</sup> Elijah ni ahnimouh koe vah, Baal profetnaw hah man awh nateh, buet touh boehai hlout sak awh hanh atipouh. A man awh teh, Elijah ni Kishion palang koe a ceikhai awh teh, hawvah koug a thei. <sup>41</sup> Elijah ni Ahab koevah, canei hanelah luen leih, bangkongtetpawiteh, kho a kâcaw toe telah atipouh.

<sup>42</sup> Ahab teh canei hanelah a luen. Elijah teh Karmel mon daw k a luen. Talai daw k a tabo teh a khokpakhu rahak vah a minhmai a hro. <sup>43</sup> Hahoi a san koevah luen nateh, tuipui hah khenhaw! telah atipouh. A luen teh a khet, banghai awm hoeh telah atipouh. Ahni ni vai sarî totouh cet telah atipouh.

<sup>44</sup> Avai sarinae daw k hettelah ao. Khenhaw! tuipui daw k hoi kutkasum tit touh tâmai hah a luen telah atipouh. Ahni ni bout cet haw, Ahab koevah, leng rakueng nateh cet leih, bangkongtetpawiteh, kho ni na ngang payon vaih telah tet pouh telah a ti.

<sup>45</sup> A ro hoehnahlan vah hottelah ao. Kalvan teh kahli hoi tâmai muen a tamang teh kho teh puenghoi a rak. Ahab teh leng van a kâcui teh Jezreel lah a cei. <sup>46</sup> BAWIPA e kut teh Elijah koe a pha teh ahni teh taisawm hah a kâyeng teh Ahab hmalah Jezreel kâennae longkha totouh a yawng.



## 19

*Jezebel kut dawk hoi Elijah a hlout*

<sup>1</sup> Elijah ni tahloi hoi profetnaw pueng kOUNg a theinae kong dawkvah, Ahab ni Jezebel koe a dei pouh. <sup>2</sup> Jezebel ni, hotnaw thung dawK e tami buet touh e hringnae patetlah tangtho tuektue vah na hringnae ka sak hoehnahlan teh, cathutnaw ni a ngai awh e patetlah na sak awh naseh, hot hlak ka pataw lahai yah, telah Elijah koe patoune a patoun.

<sup>3</sup> Hote hah a thai toteh, a thaw teh a yawng. Judah ram Beersheba vah a pha teh hawvah, a san heh a hruek. <sup>4</sup> Ama teh kahrawngum hnin touh lamcei koe a cei teh, samphokung rahim a tahung teh, a due nahanelah a ratoum. A khout toe, Oe BAWIPA atuvah, ka hringnae hah lat yawkaw lawih. Bangkongtetpawiteh, mintoenaw hlak haiyah, kahawihrawn kalawn hoeH, telah a ti.

<sup>5</sup> Hottelah samphokung rahim a yan teh a i. Hahoi khenhaw! kalvantaminaw ni a tek awh teh, ahni koe, thaw nateh cat haw, telah a ti.

<sup>6</sup> A kamlang teh khenhaw! vaiyei hmai pahai e phen touh hoi tuium a lû koe ao e hah a hmu teh, a ca teh bout a i. <sup>7</sup> BAWIPA e kalvantami buet touh a tho teh bout a tek, thaw nateh cat. Bangkongtetpawiteh, kahlawng na cei nahane ahlapoung dawkvah, na khang thai hoeH langvaiH atipouh.

<sup>8</sup> A thaw teh a ca teh a nei, hottelah rawca a ca e lahoi Cathut e mon Horeb totouh hnin 40 rum 40 touh a cei. <sup>9</sup> Lungngoum buet touh a hmu teh hawvah ao. Hahoi khenhaw! BAWIPA e lawk ahni koe a pha teh, Elijah, hivah bangmaw na sak, telah a pacei.

<sup>10</sup> Ahni ni BAWIPA ransabawi Cathut hanelah thouk ka kâyawm teh, bangkongtetpawiteh, Isarel catounnaw ni, na lawkkam hah hnamthun takhai awh teh, na khoungroe hah a raphoe awh teh, na profet hah tahloi hoi a thei awh, kaawm e teh kai dueng doeh toe, ka hringnae hai thei hanlah a kâcai awh, telah a ti.

*Elijah koe Cathut a kamnue*

<sup>11</sup> Ahni ni tâcawt nateh, BAWIPA hmalah mon vah kangdout haw, telah ati. Hahoi khenhaw! BAWIPA a tho. Katangpounge kahlî ni BAWIPA hmalah mon hah a hman teh, lungsongnaw kOUNg a kâbawng. Hatei, BAWIPA teh kahlî dawK awm hoeH. Kahlî be a roum hoi Tâlî a no. Hatei, Tâlî dawK BAWIPA teh awm hoeH. <sup>12</sup> Tâlî be a no hnukkhu hmai a tâco. Hatei, hmai dawK BAWIPA teh awm hoeH. Hmai a roum toteh, lawkkanem pâdingsue lah a tho. <sup>13</sup> Elijah ni hot hah a thai toteh, a tâco teh lungngoum rai koe a kangdue. Hahoi thaihaw lawk ni, Elijah hivah bangmaw na sak, atipouh.

<sup>14</sup> Ahni ni, BAWIPA ransabawi Cathut hanelah thouk ka kâyawm. Bangkongtetpawiteh, Isarel catounnaw ni na lawkkam hah a hnamthun awh teh, na khoungroe hah a raphoe awh teh, na profetnaw hah tahloi hoi a thei awh. Kai dueng doeh kaawm toe. Kai hah na thei hanlah a kâcai awh, telah a ti. <sup>15</sup> BAWIPA ni ahni koe, ban nateh, kahrawngum hoi Damaskas lah cet, na tho toreî Siria siangpahrang hanelah Hazael hah satui na awi han. <sup>16</sup> Isarel siangpahrang hanelah Nimshi capa Jehu hah satui na awi han. Hahoi nang yueng lah profet ka tawk hane Abelmelholath tami Saphat capa Elisha hah satui bout na awi han. <sup>17</sup> Hazael tahloi hoi kahlout e pueng teh, Jehu ni a thei han, Jehu tahloi hoi kahlout e pueng teh Elisha ni a thei han. <sup>18</sup> Hatei, Isarel ram vah, Baal



hmalah a khokpakhu ka cuengkhuem boihoeh ni teh ka pahnuem boihoeh e tami 7000 touh kama hanelah ka ta toe, telah a ti.

### *Elisha ni Elijah a kâbang*

<sup>19</sup> Haw hoi a tâco teh, Saphat capa Elisha hah a hmu. A hmalah maitotan bo hlaikahni touh ni talai a thawh teh, a hlaikahni e dawkvah ama teh ao. Elijah ni a ceihlawi navah, a hni hoi ahni teh a dêi. <sup>20</sup> A maitotan a ceitakhai teh, Elijah a hnuk lahoi a pâlei teh apa hoi anu ka paco han rah, hahoi ka kâbang han telah atipouh. Ahni ni, bout ban, bangkongtetpawiteh, nang hanlah bangmaw ka sak, telah a ti.

<sup>21</sup> Haw hoi a ban teh, maitotan bo touh hah a thei teh, talai thawhnae thing hoi a thawng teh, khocanaw a poe teh a ca awh. Hahoi a thaw teh Elijah hnuk a kâbang teh, a san lah a coung.

## 20

### *Ahab ni Sirianaw a tâ*

<sup>1</sup> Siria siangpahrang Benhadad ni, a ransanaw pueng a pâkhueng teh, siangpahrang 32 touh ahni koe ao. Marang hoi leng hoi a takhang awh teh, Samaria kho hah a kalup awh teh a tuk awh. <sup>2</sup> Isarel siangpahrang koe khopui thung patounenaw a patoun teh ahni koe Benhadad ni hettelah ati. <sup>3</sup> Na tangka hoi sui hateh kaie doeh. Na yuca hoi hnokahawi pueng kaie doeh telah ati.

<sup>4</sup> Isarel siangpahrang ni, oe siangpahrang ka bawipa na dei e patetlah doeh. Kai hoi ka tawn e pueng teh nange doeh telah ati.

<sup>5</sup> A patounenaw ni bout a cei awh teh, Benhadad ni hettelah ati, na tangka hoi sui hoi na yu hoi na canaw hah na poe han telah taminaw bout a patoun. <sup>6</sup> Hatei, tangtho tuektue nah ka taminaw nang koe ka patoun han, na im hoi na tami hoi, nim hah a tawng awh han. Na mit ni a noe e pueng hah a la awh vaiteh, kOUNg a thokhai awh han telah ati.

<sup>7</sup> Isarel siangpahrang ni a ram daw koe kacuenaw pueng kOUNg a kaw teh, pahren lahoi pâkuem awh. Bangkongtetpawiteh, hete tami ni runae tâcosak hanlah a kâcai. Bangkongtetpawiteh, kai koe tami a patoun teh, ka yu hoi ka ca hoi, ka tangka hoi ka suinaw hah a hei, kangek e hai nahoe telah ati.

<sup>8</sup> Kacuenaw hoi tamimaya ni ahni koe ahnimae lawk hai banglahai noutna hanh, na lung hai kuepkhai hanh telah atipouh awh.

<sup>9</sup> Hottelah Benhadad ni patounenaw koe siangpahrang ka bawipa koevah, na san koe patounenaw na patoun teh, ahmaloe na hei e pueng heh ka tarawi yawkaw han, hatei hete teh ka tarawi thai mahoe ati, telah na dei pouh awh han telah ati. Patoun e naw teh a cei awh teh hote lawk hah a dei pouh awh.

<sup>10</sup> Benhadad ni ahni koe tami bout a patoun teh, ka hnukkâbangnaw pueng ni, Samaria khovah, vaiphu kutvang touh rip hmawt thai awh pawiteh, cathutnaw ni a ngai e patetlah na sak na lawiseh, hothlak ka pataw lahoi na sak naseh telah ati.

<sup>11</sup> Isarel siangpahrang ni, ayâ ni ransa puengcang a kâmahrawk navah, a ransa puengcang ka rading e patetlah kâoup boihoeh telah dei pouh awh telah ati.

<sup>12</sup> Hahoi, ama hoi siangpahrangnaw ni, kâhatnae rim daw yamu a nei awh lahunnah, hote lawk hah Benhadad ni a thai teh, a taminaw koe kârakueng awh haw, atipouh. Hottelaho, kho tuk hanelah a kâcai awh.



<sup>13</sup> Hahoi khenhaw! profet buet touh ni Isarel siangpahrang Ahab koe a cei sin teh, BAWIPA ni hettelah a dei. Hete kapap poung e tamihu hah na hmu maw. Khenhaw! sahnin na kut dawk na poe han, hahoi kai teh BAWIPA doeh tie na panue han telah ati.

<sup>14</sup> Ahab ni api hno lahoi maw telah ati, ahni ni BAWIPA ni telah a dei, khobawi a sannaw hah ka hno han telah ati. Ahni ni apinimaw tarantuknae kho a khang han telah ati. Ahni ni nang ni atipouh.

<sup>15</sup> Hottelah ahni ni ram ukkungnaw hoi a sannaw a pâkhueng teh 232 touh a pha. <sup>16</sup> Kani tuengtalueng a thun nah a tâco awh teh, hatnavah, Benhadad hoi siangpahrang a ma kabawm hane siangpahrang 32 touh teh, kâhatnae rim dawk yamu a la parui awh. <sup>17</sup> Hateh, ram ukkung bawi thoundoun hmaloe a tâco. Benhadad ni kâhmo hane a patoun teh, ahni koe Samaria kho hoi tami ka tâcawt e ao telah a dei pouh.

<sup>18</sup> Ahni ni roum nahanelah ka tâco e lah awm pawiteh, a hring lahoi man awh. Tarantuk hanelah hoi ka tâcawt hanelah ao haiyah a hring lahoi man awh, telah ati.

<sup>19</sup> Hottelah ram ukkung thoundoun hah a hnukkâbang e ransa hoi khopui thung hoi a tâco awh. <sup>20</sup> Hahoi tami pueng ni amae tami lengkaleng a thei awh. Hottelah Sirianaw a yawng awh teh, Isarelnaw ni a pâlei awh. Siria siangpahrang Benhadad teh, marang a kâcui teh marang kâcuinaw hoi a hlout awh. <sup>21</sup> Isarel siangpahrang a tâco teh, marang hoi leng hoi a tuk awh teh, Sirianaw moi a thei awh.

### *Sirianaw bout a tâ awh*

<sup>22</sup> Hahoi, profet ni Isarel siangpahrang koe a hrawi teh, ahni koe tha kâlat nateh, na sak hane kahawicalah pouk. Bangkongtetpawiteh, kompawi toteh Siria siangpahrang ni bout na tuk awh han, telah atipouh.

<sup>23</sup> Siria siangpahrang e sannaw ni ahni koe, ahnimae cathutnaw teh mon cathutnaw lah ao. Hatdawkvah maimouh hlak a tha ao hnawn awh telah ati awh. <sup>24</sup> Hahoi, hettelah na ti han, siangpahrangnaw hah koung tha nateh, amamae hmuen koe ram ukkung lah hrueng. <sup>25</sup> Hahoi ransa hoi leng na raphoe e yit touh ransa bout sak. Hottelah tanghling dawk na tuk awh vaiteh, ahnimouh hlak thao awh mingming han doeh telah ati awh. A lawk hah a caksak awh teh, hottelah a sak awh.

<sup>26</sup> Hahoi, kompawi toteh, hettelah ao. Benhadad ni Sirianaw hah a pâkhueng teh. Isarel tuk hanelah Aphek vah a takhang awh. <sup>27</sup> Isarel catounnaw teh a kamkhueng awh teh, rawca a rakueng pouh awh teh, tarantuk hanelah a tâco awh. Isarelnaw hmaehu yitca e hu hni touh e patelah a kangdue sin awh. Sirianaw teh a ram dawk king a kawi awh.

<sup>28</sup> Hahoi Cathut e tami ni Isarel siangpahrang koe a hnai teh, ahni koe, BAWIPA ni hettelah a dei, Sirianaw ni Jehovah teh mon cathut lah ao teh, tanghling cathut lah awm hoeh ati awh. Hatdawkvah, hete tami moikapap e naw heh na kut dawk na poe han, hottelah hoi kai heh BAWIPA lah ka o tie hah na panue awh han telah ati.

<sup>29</sup> Hnin sari touh thung avoivang lah a tungpup awh. Ahni sari hnin vah a kâtuk awh. Isarelnaw ni Sirianaw hah hnin touh dawk ransa 100, 000 a thei awh. <sup>30</sup> Alouknaw teh Aphek kho thung vah a yawng awh. Kacawie tami 27, 000 touh teh rapan katim e ni koung a ten. Benhadad teh a yawng teh, khopui dawk imrakhan thung a kâen. <sup>31</sup> A taminaw ni ahni koe khenhaw! Isarelnaw e imthungnaw thung dawk, Siangpahrang heh pahrennae ka tawn e siangpahrangnaw doeh telah ka panue awh. Burihni



kâkhu hoi kaimae lû dawk rui hoi pâkhit nateh, Isarel siangpahrang koe na cetkhai yawkaw. Ama ni na pâhlung yawkaw han doeh telah ati awh.

<sup>32</sup> Hottelah buri hni a kâkhu awh teh, a lû dawk rui hoi a pâkhi awh teh, Isarel siangpahrang koe a cei awh. Na san Benhadad ni pahren lahoi na pâhlung na seh ati telah ati awh. Ahni ni a hring rah maw, ahni teh ka hmaunawngna nahoehmaw, telah ati.

<sup>33</sup> Hotnaw ni pouknae kahawi hoi a lungthung hoi a dei katang e han doeh ati awh teh, na hmaunawngna Benhadad doeh atipouh awh. Ahni ni cet awh nateh, ahni hah thokhai awh atipouh. Hottelah Benhadad teh a tâco teh, ahni koe a cei teh ahni ni leng dawk a kâcui sak. <sup>34</sup> Benhadad ni ahni koe, apa ni na pa koe kho a la e hah bout na poe han. Hahoi, apa ni Samaria kho hno yonae hmuen a sak e patetlah Damaskas kho vah hno yonae hmuen na sak van han telah ati. Hottelah ahni koe lawkkamnae a sak sak teh a cei sak.

### *Ahab khangnae*

<sup>35</sup> Hahoi Profet capanaw thung hoi tami buet touh ni, BAWIPA e lawk patetlah a hui koe vah, kai na hem haw telah atipouh. Hote tami ni na hem ngai hoeh atipouh.

<sup>36</sup> Hat toteh, ahni koevah, BAWIPA e lawk na tarawi ngaihoeh dawkvah, khenhaw! nang ni na ceitakhai tahma vah, Sendek ni na kei han atipouh e patetlah a cei teh Sendek ni a hmue teh a kei. <sup>37</sup> Hahoi alouke tami bout a hmu teh, kai na hem haw atipouh teh ahni ni a hem. <sup>38</sup> Hahoi profet teh a cei teh, lam vah siangpahrang a pawp, a tampa dawk a yeng e hoi mit a huem teh, a phunloukcalah a kâsak. <sup>39</sup> Siangpahrang a tho toteh siangpahrang a kaw teh, na sanpa heh tarankâtuknae hmuen lungui vah ka cei teh, khenhaw! tami buet touh ni kai koe tami buet touh a thokhai. Hete tami heh kahawicalah ring, yawng payon pawiteh, a hringnae yueng lah na hringnae ka hma han, hoehpawiteh, tangka talen buet touh na poe han telah ati. <sup>40</sup> Na sanpa heh puenghoi ka rucat dawkvah, ka yawng takhai telah ati. Isarel siangpahrang ni nang nama ni lawk na tâtueng e patetlah na lathueng vah lawkcengnae ka phat e doeh telah atipouh.

<sup>41</sup> Ahni ni minhmai huemnae hah a rading teh, Isarel siangpahrang ni profet buet touh doeh tie hah a panue. <sup>42</sup> Profet ni ahni koevah, BAWIPA ni hettelah a dei, thoe ka bo e tami na hlout sak dawkvah, ahnie hringnae yueng lah nange hringnae, ahnie taminaw yueng lah nange taminaw na sung sak han telah ati.

<sup>43</sup> Hahoi Isarel siangpahrang teh minhmai mathoe lungmathoe laihoi a ban teh Samaria kho a pha.

## 21

### *Naboth duenae*

<sup>1</sup> Hathnukkuh vah, hettelah ao. Jezreel tami Naboth ni misur takha a tawn. Hot teh, Jezreel e Samaria siangpahrang Ahab e im teng vah ao. <sup>2</sup> Ahab ni Naboth koe na misur takha heh ka im teng ao dawkvah, saring khom nahanlah na poe lawih. A yueng lah takha ka hawihnawn e na poe han. Nahoeh pawiteh, tangka lah na ngai pawiteh tangka lah na poe han telah atipouh.

<sup>3</sup> Hateiteh, Naboth ni Ahab koevah, ka mintoenaw e râw nang poe hane teh BAWIPA ni na ngang naseh telah ati.

<sup>4</sup> Jezreel tami Naboth ni ka mintoenaw e râw teh nang koe na poe mahoe telah a dei dawkvah, Ahab teh minhmai mathoe hoi lungphuen



laihoi a im dawk a kâen. A ikhun dawk a yan teh avangvanglah a kamlang teh rawca cat ngai hoeh. <sup>5</sup> Hateiteh, a yu Jezebel ni ahni koe a cei teh, bangkongmaw na muitha lungmathoe laihoi ao teh, rawca ca hanelah na ngai hoeh telah atipouh.

<sup>6</sup> Ahni ni Jezebel koevah, Jezreel tami Naboth koevah, na misur takha hah na ran sak, nahoe pawiteh, na ngaihnawn e awm pawiteh misur takha alouke na poe han telah ka ti pouh. Ahni ni, ka misur takha na poe mahoe telah na pathung dawkvah, telah atipouh.

<sup>7</sup> A yu Jezebel ni ahni koevah, nang ni Isarel uknaeram hah kâawwnae na tawn hoeh na maw. Thaw nateh lunghawicalah rawca cat leih. Jezreel tami Naboth e misur teh kai ni na poe han telah ati.

<sup>8</sup> Hatdawkvah, Ahab e min lahoi ca a thut teh, kuthrawt hoi a dei teh, ca hah Naboth a onae kho dawk ahni hoi rei kaawm e kacuenaw hoi bawinaw koe a patawn. <sup>9</sup> Rawcahainae kong oung nateh, Naboth hah tami pueng e hmalah barinae hmuen koe tahung naseh. <sup>10</sup> Tamikayon kahni touh ahmalah tahung sak vaiteh, Cathut hoi siangpahrang na pahnawt telah yon kapenkung lah sak awh, telah atipouh.

<sup>11</sup> A onae khocanaw, a onae kho dawk e kaawm e kacuenaw hoi bawinaw ni Jezebel ni a thut e ca patetlah a sak awh. <sup>12</sup> Rawcahainae kong hah a pathang awh teh, tamipueng thung dawk hoi Naboth teh hmalah a tahung sak awh. <sup>13</sup> Tamikayon kahni touh a hmalah a tahung teh, tamikayon roi ni tami pueng e hmalah, Naboth ni Cathut hoi siangpahrang a pahnawt telah Naboth hah yon a pen roi. Hottelah, kho thung hoi a sin awh e talung hoi kadout lah a dêi awh. <sup>14</sup> Hatdawkvah, Naboth teh talung hoi kadout lah a dêi awh teh a due toe telah Jezebel koe kamthang a thaisak awh.

<sup>15</sup> Jezebel ni Naboth teh talung hoi kadout lah a dêi awh toe tie a panue toteh, Ahab koevah, hettelah atipouh. Thaw nateh, Jezreel tami Naboth e misur takha, tangka lah yo hane a pasoung hoeh e hah lat leih. Bangkongtetpawiteh, Naboth teh hring hoeh toe, a due toe telah atipouh.

<sup>16</sup> Ahab ni Naboth a due toe tie a thai navah, Jezreel tami Naboth e misur takha dawk cei vaiteh, la hanelah Ahab teh a kamthaw.

### *BAWIPA ni Ahab yon a pen*

<sup>17</sup> Hahoi, BAWIPA e lawk hah Tishbit tami Elijah koevah a pha. <sup>18</sup> Thaw nateh, Samaria kho kaawm e Isarel siangpahrang Ahab kâhmo hanelah cet. Ahni teh Naboth e misur takha la hanelah a cei teh haw vah ao. <sup>19</sup> Ahni koevah, BAWIPA ni hettelah a dei. Uinaw ni Naboth e thi a palemnae hmuen daw nange thi hai uinaw ni a palem van han telah na ti pouh han telah ati.

<sup>20</sup> Ahab ni Elijah koevah, kâhmo roi toe khe, ka taran telah atipouh. Ahni ni Oe kâhmo roi toe. Bangkongtetpawiteh, BAWIPA e hmaitung vah hawioehnae sak hanlah namahoima na kâyo hah te telah atipouh.

<sup>21</sup> Khenhaw! nange lathueng vah, rawknae ka pha sak han. Koung na raphoe awh han. Ahab totouh hoi na ca catounnaw pueng, Isarel ram daw tami ka hlout thoseh, ka hlout hoeh thoseh, koung ka pâmit han.

<sup>22</sup> Nang ni ka lungkhueknae na pahrue teh, Isarel naw yonnae na sak sak dawkvah, Nebat capa Jeroboam imthungkhu hoi Ahijah capa Baasha imthungkhu patetlah na imthungkunaw hai ka o sak han telah ati.

<sup>23</sup> BAWIPA ni Jezebel e kong hai a dei toe. Jezreel kalupnae koe uinaw ni Jezebel heh a ca han. <sup>24</sup> Ahab imthungkhu daw hoi khopui daw kadout



e hah uinaw ni a ca vaiteh, kahrawng kadout e pueng teh kalvan e tava ni a ca han telah ati.

<sup>25</sup> A yu Jezebel ni a tacuek teh BAWIPA e mithmu vah, hawihoeahnae sak hanlah, ka kâyawt e Ahab patet e tami apihai awm hoeah. <sup>26</sup> BAWIPA ni Isarelnaw koehoi a pâlei e Amor taminaw e sak e patetlah. meikaphawk hah bawk hoi panuettho e hnonaw hah ouk a sak awh.

<sup>27</sup> Ahab ni hote lawk a thai toteh, a hni a phi teh, burihni hah a kâkhu, rawca a hai teh rawca burihni kâkhu hoi a i teh paiyaica hoi a kâroe. <sup>28</sup> Hahoi, BAWIPA e lawk teh Tishbit tami Elijah koevah a pha. <sup>29</sup> Ka hmalah Ahab a kârahnoumnae hah na hmu maw. Ka hmalah a kârahnoum dawkvah, ahnie se nateh hawihoeahnae ka phat sak mahoeah. A capa se nah a imthungkhu dawk hawihoeahnae ka pha sak han telah ati.

## 22

### *Mikaiah ni Ahab kâhruetcuetnae a poe*

<sup>1</sup> Kum thung touh thung Siria hoi Isarel rahak vah tarankâtuknae awm hoeah. <sup>2</sup> A kum pâthumnae dawk Judah siangpahrang Jehoshaphat teh Isarel siangpahrang koevah a cei. <sup>3</sup> Isarel siangpahrang ni a sannaw koevah, Gilead ram e Ramoth teh kaie ti a panue nahlangva, bangkongmaw Siria siangpahrang lawm laipalah o awh han, telah ati.

<sup>4</sup> Hatdawkvah, ahni ni Jehoshaphat koevah, Ramothgilead teh na tuk khai ngai han na ou, telah atipouh. Jehoshaphat ni Isarel siangpahrang koevah, kai hoi nang, ka taminaw hoi na taminaw teh buet touh lah o awh teh, kaie marang hoi nange marangnaw hai buet touh doeh telah atipouh.

<sup>5</sup> Jehoshaphat ni Isarel siangpahrang koevah, BAWIPA e lawk hah ring ei telah atipouh.

<sup>6</sup> Hatdawkvah, Isarel siangpahrang ni profet cumpali tabang a kaw teh, ahnimouh koevah, Ramothgilead tuk hanelah ka cei han maw, ka cet mahoeah maw telah a pacei. Ahnimouh ni cet yawkaw, bangkongtetpawiteh, BAWIPA ni siangpahrang kut dawk na poe han telah ati awh.

<sup>7</sup> Jehoshaphat ni hivah BAWIPA Cathut e profet buetbuet touh pouknae hei hanelah awm hoeah tounge maw, telah ati.

<sup>8</sup> Isarel siangpahrang ni Jehoshaphat koevah, BAWIPA koe na kâhet pout hane tami buet touh Imlah capa Mikaiah tie ao. Hateiteh, ahni teh ka hmuhma e lah ao. Bangkongtetpawiteh, kaie kong dawk a thoenae hloilah hawinae koelah banghai dei hoeah telah atipouh.

<sup>9</sup> Hatdawkvah, Isarel siangpahrang ni bawi buet touh a kaw teh, Imlah capa Mikaiah hah karanglah thokhai haw telah atipouh.

<sup>10</sup> Isarel siangpahrang hoi Judah siangpahrang Jehoshaphat teh Samaria kalupnae longkha kâennaeng teng e cangkatinnaeng yawn daw, siangpahrang khohna hoi a kamthoup roi teh, a bawitungkhang lengkaleng daw a tahung roi. Hahoi, profetnaw ni ahnimouh roi e hmalah lawk hah a pâpho awh. <sup>11</sup> Khenanah e capa Zedekiah ni sumki hah a sak pouh teh, BAWIPA ni hettehlah a dei, hete kinaw hoiyah Siria taminaw hah kounge kadout lah na deng awh han telah atipouh.

<sup>12</sup> Hot patetvanlah, profetnaw pueng nihai, Ramothgilead vah luen awh nateh, tâ awh. Bangkongtetpawiteh, BAWIPA ni siangpahrang kut daw na poe awh han telah a dei pouh awh.

### *Mikaiah lawk*



<sup>13</sup> Mikaih kaw hanlah patoune ni, khenhaw! profetnaw ni kâvan e lawk buet touh hah a kueta awh teh, kahawi e lah dueng siangpahrang koevah, lawk rip a dei awh toe. Ahnimouh ni a dei awh e patetvanlah, nang ni hai dei van leih, kahawi e lah dei van haw telah atipouh.

<sup>14</sup> Mikaiah ni BAWIPA a hring e patetlah BAWIPA ni kai koe a dei e doeh kai ni teh ka dei tih telah atipouh.

<sup>15</sup> Siangpahrang koe a pha toteh, siangpahrang ni Ramothgilead tuk hanlah ka cei han maw, ka cet mahoe h maw telah a pacei. Ahni ni siangpahrang koevah, cet nateh tâ, bangkongtetpawiteh, BAWIPA ni siangpahrang kut dawk na poe han telah atipouh.

<sup>16</sup> Siangpahrang ni lawkkatang laipalah kai oe BAWIPA min lahoi dei hoe h hanlah avai nâyittouh maw lawk na kam sak han, telah ati.

<sup>17</sup> Ahni ni, Isarelnaw pueng teh khoumku ng ka tawn hoe h e tu patetlah mon dawk kou ng a kâkahei awh e hah ka hmu. BAWIPA ni hete taminaw ni kahrawiku ng tawn awh hoe h toe. Amae im dawk lengkaleng lungmawngcalah ban awh naseh, telah ati atipouh.

<sup>18</sup> Isarel siangpahrang ni Jehoshaphat koevah, kaie kong dawk thoenae hloilah kahawi e koelah banghai dei mahoe h telah yo ka dei toe telah atipouh.

<sup>19</sup> Hatdawkvah, Mikaiah ni, BAWIPA e lawk heh thai haw. BAWIPA teh a bawitungkhu ng dawk kalvan vah a tahung teh kalvantaminaw pueng avoilah aranglah a kangdue e ka hmu. <sup>20</sup> Hahoi, BAWIPA ni Ahab heh Ramothgilead vah a luen vaiteh taran kut dawk due hanlah apinimaw a tacuek telah atipouh. Buet touh ni hettelah a dei teh, alouke ni hottelah ati. <sup>21</sup> Hatdawkvah, muitha buet touh a tâco teh, BAWIPA hmalah a kangdue. Kai ni ka tacuek han telah atipouh.

<sup>22</sup> BAWIPA ni ahni koevah, bangtelamaw telah atipouh. Ahni ni ka cei vaiteh a profetnaw pueng e pahni dawk laithoe muitha lah ka o han telah atipouh. Hahoi, BAWIPA ni, na tacuek pawiteh na tacuek thai han doeh. Cet nateh hottelah sak telah atipouh.

<sup>23</sup> Hatdawkvah, khenhaw! BAWIPA ni hete na profetnaw pueng e a pahni dawk laithoe muitha hah a ta teh, BAWIPA ni nangmouh rawk nahane kong hah a dei toe telah atipouh.

<sup>24</sup> Hottelah Kenaanah e capa Zedekiah ni rek a hnai teh, Mikaiah e tambou ng dawk a tambei. Nang koe lawk dei hanelah BAWIPA ni a patoun e muitha ni na lae lam dawk hoi maw kai koe hoi a cei telah atipouh.

<sup>25</sup> Mikaiah ni, khenhaw! kâhro hanlah imrakhan thung hoi na kâen hnin vah na panue han telah atipouh.

<sup>26</sup> Hat toteh, Isarel siangpahrang ni, Mikaiah heh khopui kaukkung Ammon e capa Joash koevah cetkhai awh leih. <sup>27</sup> Hahoi, hete tami heh thongim pabawt awh nateh, roumnae hoi ka ban hoehroukrak, rawka hoi tui yitca dueng poe awh tet pouh atipouh. <sup>28</sup> Hateiteh, Mikaiah ni, karoumcalah na ban awh pawiteh, BAWIPA ni kai hno lahoi lawk dei hoe h tinae lah ao han telah atipouh. Ama ni, nangmanaw pueng ni kahawicalah pâkuem awh telah letlang ati.

### *Ahab duenae*

<sup>29</sup> Hottelah Isarel siangpahrang hoi Judah siangpahrang Jehoshaphat teh Ramothgilead vah a takhang roi. <sup>30</sup> Isarel siangpahrang ni Jehoshaphat koevah, ka mei kâthung vaiteh, tarantuknae koe ka cei van han. Nang teh siangpahrang khohna hah kho telah atipouh. Hatdawkvah, Isarel siangpahrang teh a mei a kâthung teh tarantuknae koe a cei.



<sup>31</sup> Siria siangpahrang ni leng kâcuinaw 32 touh koevah, Isarel siangpahrang laipalah, tami kathoen kalen apihai tuk awh hanh telah kâ a poe.

<sup>32</sup> Leng kaukkungnaw ni Jehoshaphat a hmu awh toteh, hetteh Isarel siangpahrang roeroe doeh, telah ati awh. Hatdawkvah, ahni tuk hanelah a kamlang awh dawkvah, Jehoshaphat teh a hram. <sup>33</sup> Hateiteh, leng kâcuinaw ni Isarel siangpahrang nahoe tie a panue awh toteh, ahni pâleinae koehoi a ban takhai awh.

<sup>34</sup> Tami buet touh ni noe laipalah, samtang a pathui boteh, Isarel siangpahrang e saiphei rahak vah pala teh a kâen dawkvah, ahni ni leng ka mawng koevah, kamlang nateh, tarankâtuknae hmuen koehoi na tâcawtkhai leih. Bangkongtetpawiteh, a hmâ ka ca toe telah atipouh.

<sup>35</sup> Hote hnin dawkrantuknae teh a patawpoung teh siangpahrang teh a leng van vah Sirianaw e hmuen dawkrantuknae sak awh teh, tangmin lah a due. A hmâ dawkrantuknae hoi leng van vah a thi teh a kui. <sup>36</sup> Kanî aloum tawmlei nah ransanaw thung dawkrantuknae hoi tami pueng amae kho tangkuem dawkrantuknae, tami pueng mae ram lah koun ban awh naseh telah thouk a oung awh.

<sup>37</sup> Siangpahrang teh hottelah a due. Samaria vah a kâenkhah awh teh, hawvah siangpahrang teh a pakawp awh. <sup>38</sup> Samaria tuikamuem rai lah leng hah a pâsu awh teh, BAWIPA ni a dei e lawkrantuknae kâyawtnaw tui kamhluknae koe uinaw ni a thi hah a palem.

<sup>39</sup> Hottelah Ahab kâroenae thung dawkrantuknae hoi kacawiraenaw hoi a sak e naw pueng hoi kasaino hoi a sak e im hoi a sak e khonaw pueng hah Isarel siangpahrangnaw setouknae cauk dawkrantuknae thut lah awm hoehtamaw.

<sup>40</sup> Hottelah, Ahab teh a na mintoenaw koevah, a i teh a capa Ahaziah ni a yueng lah a bawi

### *Judah siangpahrang Jehoshaphat*

<sup>41</sup> Hahoi Isarel siangpahrang Ahab a bawinae a kum pali nah Asa capa Jehoshaphat teh Judah taminaw lathueng vah siangpahrang lah ao.

<sup>42</sup> Jehoshaphat teh siangpahrang lah a tawkrantuknae nah a kum 35 touh a pha. Jerusalem kho vah, a kum 25 touh a uk. A manu min teh Azubah, ahni teh Shilhi canu doeh. <sup>43</sup> A na pa Asa ni a dawn e lamthung pueng hah a dawn van teh, phen laipalah, BAWIPA e mithmu vah hnokahawi a sak. Hateiteh, hmuenrasang teh puen awh hoehtamaw. Bangkongtetpawiteh, hmuenrasang dawkrantuknae taminaw ni a thueng awh teh, hmuftui hah hmai a sawi awh rah.

<sup>44</sup> Hahoi Jehoshaphat ni Isarel siangpahrang hoi roumnae a sak.

<sup>45</sup> Hottelah, Jehoshaphat kâroenae thung dawkrantuknae hoi kacawiraenaw hoi a hno sakthainae a kamnue saknae hoi taran a tuknae kongnaw hah Judah siangpahrangnaw setouknae cauk dawkrantuknae thut lah awm hoehtamaw.

<sup>46</sup> Hahoi, a na pa Asa a hring nah napuitongpanaw hah a ram dawkrantuknae hoi koun a pâlei. <sup>47</sup> Edom ram dawkrantuknae siangpahrang ao hoehtamaw, siangpahrang a yueng lah kaawm e ni a uk awh. <sup>48</sup> Jehoshaphat ni Ophir ram dawkrantuknae a patoun teh, sui phu hanelah Tarshish long hah a sak. Hateiteh, cet awh hoehtamaw. Bangkongtetpawiteh, Eziongeber vah long hah a rawk.

<sup>49</sup> Ahab capa Ahaziah ni Jehoshaphat koevah, ka taminaw heh na taminaw hoi long dawkrantuknae hoi rei cet awh naseh telah ati. Hatei Jehoshaphat ni ngai hoehtamaw. <sup>50</sup> Jehoshaphat teh a na mintoenaw koe a i teh a na mintoenaw koe, a na min Devit e khopui dawkrantuknae a pakawp awh. Hahoi a capa Jehoram ni a yueng lah a uk.



*Isarel siangpahrang Ahaziah*

<sup>51</sup> Judah siangpahrang Jehoshaphat siangpahrang a tawknae kum 17 navah, Ahab capa Ahaziah teh Samaria khovah, Isarelnaw e siangpahrang lah ao. Isarel hah kum 2 touh a uk. <sup>52</sup> BAWIPA hmaitung vah thoenae a sak teh, a manu hoi a na pa ni dawn e lamthung hoi Nebat capa Jeroboam, Isarelnaw ka yonsakkung ni dawn e lamthung hai a dawn. <sup>53</sup> Bangkongtetpawiteh, a na pa ni a sak e pueng a sak teh, Baal e thaw hah a tawk teh, a bawk dawkvah, Isarel BAWIPA Cathut a lungkhuek sak.



## 2 SIANGPAHRANG (The Second Book of the Kings)

### *Cathut ni Ahaziah lawk a ceng*

<sup>1</sup> Ahab a due hnukkhu, Moab ram teh Isarel siangpahrang ni a tuk.

<sup>2</sup> Ahaziah siangpahrang teh, Samaria kho amae imvan hoi a bo teh, a hmâ a ca. Patounenaw a patoun teh, ahni koevah cet awh haw. Ekron cathut Baalzebub koe hete hmâ ka ca e daw k hoi kahawi thai nahanelah pacei awh haw telah atipouh.

<sup>3</sup> Hateiteh BAWIPA kalvantami niyah, Tishbit tami Elijah koevah, thaw nateh Samaria kho e siangpahrang ni a patounenaw kâhmo hanelah cet haw, ahnimouh koevah, Isarel ram Cathut ao hoe haw daw k maw, Ekron cathut Baalzebub koevah, pouknae pacei hanelah na cei awh vaw.

<sup>4</sup> BAWIPA ni hettelah a dei pouh. Ikhun daw k na luen hoi na kum mahoe h toe. Na due roeroe han telah a dei, telah atipouh teh, Elijah teh a cei.

<sup>5</sup> A patounenaw bout a ban awh teh, bangkongmaw na ban telah atipouh.

<sup>6</sup> Ahnimouh ni ahni koevah tami buet touh kaimouh kâhmo hanlah a tho teh, kaimouh koehoi cet leih, na kapatounkung siangpahrang koevah ban leih, ahni koe BAWIPA ni hettelah a dei. Isarel ram vah Cathut ao hoe haw daw k maw, Ekron cathut Baalzebub pacei hanlah na patoun. Ikhun daw k na luen teh na kum mahoe h toe na due roeroe han.

<sup>7</sup> Hettelah dei pouh awh telah na ti pouh han, ati. Siangpahrang ni nangmanaw dawn hanlah ka tho e het patetlah ka dei e hah apimaw, atipouh.

<sup>8</sup> Ahnimouh ni phaivuen kâkhu ni teh a keng daw k phaivuen taisawm kâyeng e doeh atipouh. Ahni teh Tishbit tami Elijah doeh atipouh.

<sup>9</sup> Hahoi teh Siangpahrang ni ransa 50 touh kaukkung hoi a uk e taminaw a patoun teh, ahnimouh koe a takhang. Khenhaw! ama teh mon vah a tahung. Ahnimanaw ni nang Cathut e tami siangpahrang ni nang ca thuk loe ati atipouh awh. <sup>10</sup> Elijah ni a pato e teh, ransa 50 touh ka uk e koevah, Cathut e tami ka tho katang boipawiteh, kalvan hoi hmai bawt naseh, nang hoi na uk e tami 50 touh hah be kang naseh atipouh. Hahoi kalvan hoi hmai a bo teh ama hoi a tami 50 touh hmai koug a kak awh. <sup>11</sup> Hahoi ahni koe alouke ransa 50 touh kaukkung hoi a uk e naw bout a patoun. Nang Cathut e tami siangpahrang ni karanglah ca thuk naseh ati telah atipouh awh. <sup>12</sup> Elijah ni ahnimouh koe, Cathut e tami lah kaawm katang pawiteh, kalvan hoi hmai bawt naseh, nang hoi na taminaw 50 touh hah be kang naseh atipouh. Hahoi kalvan hoi hmai bout a bo teh ama hoi a taminaw 50 touh hmai koug a kak awh. <sup>13</sup> Hahoi alouke ransa 50 touh kaukkung hoi a uk e naw bout a patoun, ransa 50 touh kaukkung teh ahni koe a ceitakhang teh, Elijah hmalah khokpakhu a cuengkhuem teh, a hmalah oe Cathut e tami ka hringnae hoi na sannaw tami 50 touh e hringnae heh, na mithmu vah sungren naseh. <sup>14</sup> Khenhaw! kalvan hoi hmai a bo teh, ransa 50 touh kaukkung kahni touh hoi a uk e 100 touh hoi koug a kak nakunghai kai ka hringnae teh na mithmu vah na hlung pouh loe telah a kâhei. <sup>15</sup> Hahoi BAWIPA kalvantami ni Elijah koevah cet nateh taket hanh, atipouh. Hahoi a thaw teh siangpahrang koevah a cei. <sup>16</sup> BAWIPA Cathut ni a dei e teh Ekron cathut Baalzebub koe pouknae na hei hane patounenaw



na patoun e hah Isarel ram pouknae hei hanelah Cathut ao hoeh dawkwah. Hatdawkvah ikhun dawkwah na luennae koehoi na kum mahoehtoe na due roeroe han atipouh. <sup>17</sup> Elijah ni patuen a dei e BAWIPA e lawk patetlah ahni teh a due. Ca tongpa a tawn hoeh dawkvah, Judah siangpahrang Jehoshaphat capa Jehoram a bawinae kum navah, Joram teh a yueng lah siangpahrang a tawkwah. <sup>18</sup> Ahaziah ni a tawksaknae thung dawkvah ka cawirae hoi a sak tangcounge naw teh Isarel siangpahrangnaw setouknae cauk dawkvah thut lah ao nahoehmaw.

## 2

### *Elijah kalvan a luen*

<sup>1</sup> BAWIPA ni Elijah heh bongparui hoi kalvan lah tawm hanlah ao tounge dawkvah, Elijah teh Elisha hoi Gilgal hoi a cei roi. <sup>2</sup> Elijah ni, Elisha koevah pahren lahoi hi la awm loe. Bangdawkwah tet pawiteh, BAWIPA ni Bethel vah pou cei hanelah na patoun atipouh. Hatei Elisha ni BAWIPA hoi na hringnae a hringe e patetlah kaawm mahoehtoe ati teh Bethel lah a ceicathuk roi.

<sup>3</sup> Bethel kaawm e profet capanaw Elisha koe a tho awh teh, sahnin vah BAWIPA ni na bawipa hah na la pouh han tie na panue maw telah a pacei awh. Oe ka panue doeh, duem awm awh atipouh.

<sup>4</sup> Elijah ni, Elisha koe pahren lahoi hi la awm. BAWIPA ni Jeriko kho pou ceitakhai hanelah na patoun atipouh. Hatei BAWIPA a hringe e hoi nang na hringe e patetlah kaawm mahoehtoe ati teh Jeriko vah pou a cei roi. <sup>5</sup> Jeriko kaawm e profet capanaw teh Elisha koe a cei teh, sahnin vah BAWIPA ni na bawipa he na la pouh han toe tie na panue maw atipouh awh. Oe ka panue bokheiyah duem awm awh telah a pathung.

<sup>6</sup> Elijah ni pahren lahoi hi ma la awm lawih. BAWIPA ni Jordan pou cei hanelah, na patoun telah atipouh. BAWIPA hoi nang na hringe e patetlah kaawm mahoehtoe atipouh teh kahni touh hoi rei a cei roi.

<sup>7</sup> Hahoi profet capanaw thung dawkwah hoi tami 50 touh a cei teh kahni touh hoi Jordan palang a kangdue navah, ahnimouh koe lahoi kahlathnawn a kamlang roi teh kahlathnawn lah a kangdue roi. <sup>8</sup> Elijah ni a hni hah a la teh, a taoung hnukkhu, tui hah a hem teh a vangvang lah a kâkapek. Hahoi ahnimouh roi teh talai kaphui dawkwah a cei roi. <sup>9</sup> Palang namran lah a pha roi torei teh, Elijah ni Elisha koe kai hoi kamphei hoehnahlan vah, bangmaw na sak pouh han, het leih atipouh. Elisha ni nang ni na coe e muitha let hni touh na poe loe atipouh.

<sup>10</sup> Ahni ni ka ru poung e doeh na hei, ka ru nakunghai thoseh, nang koehai kai yout la e lah ka o navah na hmawt pawiteh, na coe han. Na hmawt hoehpawiteh, na coe mahoehtoe atipouh. <sup>11</sup> Hahoi teh cungtalaih reirei pou a cei roi teh, khenhaw! hmaileng hoi hmairarang a kamnuet teh a rahak roi dawkwah a bo teh, a kâkapek roi. Elijah teh bongparui dawkwah hoi, kalvan a luen. <sup>12</sup> Hahoi Elisha ni a hmu teh, Apa, Apa Isarelnaw e leng hoi marangransanaw hoi kâvan e, telah a hram teh, ama teh hmawt hoeh toe. A hni hah a kueth kahni touh lah a phi.

<sup>13</sup> Elijah koehoi e ka bawt e hni hah a la, hahoi a ban teh Jordan palang teng a kangdue. <sup>14</sup> Ka bawt e Elijah e hni hah a la teh, tui a hem nah, BAWIPA, Elijah Cathut teh nâmwaw ao telah ati. Hahoi tui bout a hem torei teh avangvanglah a kâkapek teh Elisha teh namran lah a takhang.

<sup>15</sup> Jeriko kho e profet capanaw ni Elisha a hmu awh toteh, Elijah e muitha Elisha koe ao toe telah ati awh. Ahni kâhmo hanlah a cei awh teh talai



dawkvah a tabo awh. <sup>16</sup> Ahnimouh ni ama koe khenhaw! na sannaw ni, athakaawme tami 50 touh ni na okhai han, pahren lahoi na bawipa tawng sak hanlah kamthaw sak. BAWIPA e a Muitha ni a luenkhai e patetlah mon dawh na ou, hoe pawiteh tangling dawh na ou bout a pabo yawkaw han doeh ati awh. Elisha ni apihai patoun hanh leih atipouh.

<sup>17</sup> Hatei, ahnimouh ni kayatho totouh a kâhei awh toteh, ti boum teh patoun lawih atipouh. Hat torei teh tami 50 touh a patoun awh. Hnin thum touh thung a tawng awh hat ei hmawt awh hoeh toe. <sup>18</sup> Jeriko kho ao navah, ahnimouh bout a tho torei teh ahnimouh koevah, cet hanh awh ka ti nahoehmaw atipouh.

### *Elisha ni kângairunae a sak*

<sup>19</sup> Hote khonaw ni, Elisha koevah khenhaw! hete kho heh bawipa ni na hmu e patetlah phuneppoung e doeh. Hateiteh tui hawihoe dawkvah camo koung a ro atipouh awh. <sup>20</sup> Ahni ni tuium katha e na poe aw palawi theng awh ati pouh teh, a poe aw. <sup>21</sup> Tuiphuek koe a cei teh, hote hah a thung vah a phuen pouh teh BAWIPA ni hettelah a dei. Hete tui teh ka thoung sak toe. Atu hoi teh duenae hoi camo rawknae awm hoeh toe. <sup>22</sup> Elisha ni a dei e patetlah atu totouh tui teh a thoung.

<sup>23</sup> Hahoi teh Bethel lah a takhang. Hote lam a cei aw navah, nawsainaw a tho aw. Koe a panuikhai aw teh, lû luengpalueng e cet takhang haw. Lû luengpalueng e cet takhang haw atipouh aw. <sup>24</sup> A kamlang sin teh, ahnimanaw a hmu toteh BAWIPA min lahoi thoe a bo. Kahrawngum hoi tavom manu ka hni touh a tâco teh, ahnimouh koe e camo 42 touh a kei pouh. <sup>25</sup> Hahoi teh Karmel mon lah a cei aw teh Samaria kho vah a ban aw.

## 3

### *Moab ni Isarel a tuk*

<sup>1</sup> Judah siangpahrang Jehoshaphat a bawi kum 18 nah, Ahab capa Jehoram teh Isarel naw lathueng Samaria vah siangpahrang lah ao teh kum 12 touh a uk. <sup>2</sup> BAWIPA mithmu vah thoenae a sak. Hatei a manu hoi a na pa patetlah na hoe. Bangkongtetpawiteh, a na pa ni Baal talung a ung e hah a tâkhawng. <sup>3</sup> Hateiteh, Isarel naw e yonnae ka saksakkung Nebat capa Jeroboam, yonnae koe a baw van teh, cettakhai hoe.

<sup>4</sup> Moab siangpahrang Mesha teh tu ka khom e doeh. Isarel siangpahrang koe vah, tuca ting touh e muen hoi, tutan ting touh e muen hoi, kum tangkuem tamuk hah ouk a poe. <sup>5</sup> Hatei Ahab a due hnukkhu teh, Moab siangpahrang teh Isarel siangpahrang koe taran lah a thaw. <sup>6</sup> Hote atueng nah, siangpahrang Jehoram teh Samaria kho hoi a tâco teh Isarel taminaw pueng hah a pâkhueng. <sup>7</sup> A tâco teh, Judah siangpahrang Jehoshaphat koe vah, Moab siangpahrang ni na tuk teh, Moab naw heh na tuk khai ngai han na ou telah tami a patoun. Ahnimouh ni oe na tuk khai han bo khe, kai hoi nang, ka tami hoi na tami, teh buet touh lah o teh, ka marang hoi na marang buet touh lah doeh ao atipouh.

<sup>8</sup> Pawiteh, nâ lam hoi maw takhang han vaw telah ati. Edom kahrawng lam koehoi cei han atipouh.

<sup>9</sup> Hot patetlah, Isarel siangpahrang teh, Judah siangpahrang hoi Edom siangpahrang naw hoi a cei aw. Hnin sari touh thung lawngven laihoi a cei aw teh, ransanaw hoi saringnaw nei hane tui awm hoe.



<sup>10</sup> Isarel siangpahrang ni Aiyoe! BAWIPA ni siangpahrang kathum touh heh, hete Moabnaw koe poe hanelah na ceikhai awh e han doeh toe telah ati.

<sup>11</sup> Hateiteh, Jehoshaphat ni, awi hi vah, BAWIPA koe na ka het pouh kung BAWIPA e profet apihai awm hoeh namaw telah ati. Isarel siangpahrang a san buet touh ni Elijah kut daw k tui ouk ka awi e Shaphat capa Elisha hah atu hi ao atipouh.

<sup>12</sup> Jehoshaphat ni ahni koe BAWIPA e lawk ao telah ati. Hahoi teh Isarel siangpahrang hoi Jehoshaphat hoi Edom siangpahrang teh ahni koe vah a cei awh.

<sup>13</sup> Elisha ni Isarel siangpahrang koe nang hoi kai kâkuetnae bangmaw kaawm. Na pa profetnaw hoi na manu profetnaw koe cet awh khe atipouh. Hatei, Isarel siangpahrang ni ahni koe ka cet mahoe. Bangkongtetpawiteh, siangpahrang kathum touh heh, Moabnaw kut daw k poe hane BAWIPA ni na kaw awh teh na pâkhueng awh e doeh telah ati.

<sup>14</sup> Elisha ni, a hmalah ouk ka kangduenae ransahu BAWIPA a hring e patetlah Judah siangpahrang Jehoshaphat heh barilawa ka tawn hoehpawiteh nang koelah kamlang hoiyah hmu patenghai na hmawt ngai mahoe ei. <sup>15</sup> Bangtelah nakunghai, ratoung ka kueng panuek e na kaw pouh awh telah ati. Hahoi ratoung ka kueng panuek e ni a kueng pouh toreih teh, BAWIPA e kut teh a tak daw k a pha. <sup>16</sup> BAWIPA Cathut ni telah a dei. Hete a yawn heh tuikhu hoi kaw sak awh. <sup>17</sup> Bangkongtetpawiteh, BAWIPA ni telah a dei. Kahlî thoseh, kho ka rak e thoseh na hmawt awh mahoe toe, hatei hete tangkom heh tui hoi koug akawi han. Hahoi teh, namamouh hoi na saringnaw, moithangnaw ni a nei thai awh han telah ati. <sup>18</sup> Hetheh BAWIPA han teh hno titca e doeh. Moabnaw hai na kut daw k na poe awh han. <sup>19</sup> Kacakpounge khonaw pueng hoi khopui kahawinaw pueng haiyah, na raphoe vaiteh, thing kahawi naw pueng hai na tâtueng awh han. Tuikhunaw pueng koug na paten awh vaiteh, hmuen kahawi naw pueng hah talung koug na paten awh han atipouh.

<sup>20</sup> Hahoi a tangtho amom tavai thuengnae tueng navah, pouk laipalah Edom ram lahoi tui a lawng teh a ram teh tui yikkawi. <sup>21</sup> Moabnaw pueng ni ama tuk hanelah siangpahrang a kamthaw ti a panue navah, taran katukthai pueng a pâkhueng teh khorî koe vah sut a pawp awh. <sup>22</sup> Hahoi teh, amom vah a thaw awh teh, kho a sei nah tui daw k khumbei a bet e hah, namran lahoi teh tui hah thi patetlah Moabnaw ni a hmu awh. <sup>23</sup> Ahnimanaw ni thi tangngak doeh toe. Siangpahrangnaw hah amamouh hoi amamouh a kâtuk awh teh, a kâthei awh mue toe, Moabnaw tho awh leih. A hnopainaw lawm awh lei sei a kâti awh.

<sup>24</sup> Isarelnaw e roenae hmuen koe a pha toteh, Isarelnaw a thaw awh teh, Moabnaw hah a tuk awh teh, koug a yawng awh. Moabnaw hah noenoe a thei awh teh, a ram totouh a pâlei awh. <sup>25</sup> Khonaw a raphoe pouh awh teh hmuen kahawinaw pueng hai talung hoi a dei pouh awh teh talung muen akawi. Tuikhunaw pueng muen a paten pouh awh teh, thing kahawinaw pueng hai koug a tâtueng awh. Hatei, Kirhareth, rapan tumdum e teh tek awh hoe. Hatei, tâyai kathoumnaw ni, a kalup awh teh a tâ awh.

<sup>26</sup> Moab siangpahrang ni na tuknae heh ka khang thai mahoe tie a panue toteh, Edom siangpahrang koe pou yawng takhai hanlah a kâcai teh, lahloi ka patuem e cum sari touh a ceikhai. Hatei tapoung thai awh hoe. <sup>27</sup> Hahoi teh a camin ama yueng lah ka bawi hane hah rapan van vah, hmaisawi thuengnae lah a hno teh, Isarel taranlahoi lungkuephoe nae



haw vah ao. Hottelah a ban takhai awh teh, amamae ram dawk a ban awh.

## 4

### *Elisha hoi lahmainu e satui*

<sup>1</sup> Profet capa a yunaw thung dawk hoi napui buet touh ni, Elisha koe na san e a vâ teh a due toe. Na san ni teh, BAWIPA a taki tie hai na panue. Laiba ka ba pouh e tami niyah, ka ca roi heh san lah hrawi hane a tho toe telah runae kong hah a dei pouh.

<sup>2</sup> Elisha ni napui koevah, bangmaw na sak pouh han. Im vah bangmaw na tawn, na dei pouh haw, telah atipouh. Napui ni, satuium buet touh hloilah teh banghai im dawk ka tawn e awm hoeheh atipouh.

<sup>3</sup> Ahni ni cet nateh na imrinaw e hlaam a tawn e hlai loe atipouh. <sup>4</sup> Hahoi kâen awh nateh, nang nama hoi na capanaw hoi imthung vah tho kâkhan awh nateh, hlaamnaw pueng dawk satui hah hlun awh nateh kakawi e naw pueng teh alouklah tat awh atipouh.

<sup>5</sup> Ahni koehoi a cei teh, ama hoi a capanaw hoi im tho a kâkhan awh teh, hlaam a dâw pouh teh, ahnimouh ni a hlun awh. <sup>6</sup> Hlaam akawi hoi a capa koe, Hlaam na poe ei atipouh. Ahni ni hlaam awm hoeheh toe ati hoi teh satui roup a hak.

<sup>7</sup> Hahoi teh Cathut tami ni cet awh lawih, satui hah yawt awh nateh na laiba teh patho lawih. Ka cawi e teh na canaw hoi na khosak na koe hno awh lawih telah atipouh.

### *Elisha ni Shunam napui e capa a thaw sak*

<sup>8</sup> Hnin touh teh, Elisha hah Shunem kho a cei. Hawvah ka tawnta e napui ao teh, hote napui ni bu a kaw khai. Hottelah a cei nah tangkuem haw vah bu ca hanlah ouk a luen pouh. <sup>9</sup> Napui ni a vâ koevah khenhaw! maimouh roi pou na ka pâtam e heh Cathut e tami kathoung doeh tie ka panue. <sup>10</sup> Tho haw, im van kathoungcalah, sak pouh haw sei, ikhun caboi, tungkhung hoi hmaiimkhok hrueng pouh haw sei, hahoi teh maimouh koe a tho karoitawi a kâen, a luen nahanlah atipouh. <sup>11</sup> Hnin touh hnin teh bout a cei teh, im a sak pouh e dawkvah a roe. <sup>12</sup> Hahoi a san Gehazi koe hete Shunam napui heh kaw haw atipouh. A kaw teh a hmalah a kangdue sak.

<sup>13</sup> Elisha ni nang ni na khetyawt, nang hanlah bangmaw na sak pouh han, siangpahrang thoseh, ransabawi thoseh, na pato pouh hanelah na ngai maw telah napui koe a dei pouh. Napui ni ka hmaunawnggha hoi miphunnaw koe doeh kho ka sak atipouh.

<sup>14</sup> Elisha ni, bangmaw kai ni na sak pouh han vai atipouh. Gehazi ni, atangcalah tetpawiteh, a capa tawn roi hoeheh ni teh a vâ haiyah a matawng toe atipouh.

<sup>15</sup> Ahni ni napui kaw haw, atipouh, a kaw teh napui teh takhang koe a kangdue.

<sup>16</sup> Elisha ni atu e tuektue a pha toteh ca tongpa na tawm han atipouh. Napui ni telah nahoeheh ka bawipa, nang Cathut e tami na sannu koe laithoe dei hanh atipouh.

<sup>17</sup> Hahoi napui teh camo a vawn. Elisha ni ahni koe a dei e patetlah hote tue nah camo a khe.

<sup>18</sup> Camo teh a roung teh hnin touh teh a na pa canganaw koe a cei van. <sup>19</sup> Hahoi teh a na pa koe ka lû a pataw, ka lû a pataw, telah a dei pouh. A sanpa koevah a manu koe cetkhai haw atipouh.



<sup>20</sup> A ceikhai teh a manu koe a phakhai toteh a phai dawk kanithun totouh a tahung teh oun a due. <sup>21</sup> Napui ni im van a luenkhai teh Cathut tami e ikhun dawk a payan. Tho khik a khan teh a tâco takhai. <sup>22</sup> A vâ hah a kaw teh, pahren lahoi na san hoi la buet touh na rakueng pouh haw, Cathut e tami koe ka yawng vaiteh, bout ka ban han atipouh.

<sup>23</sup> A vâ ni, bangkongmaw sahnin kuekluek ahni koe cei han na kâcai. Thapa hai rei hoeh rah, sabbath hnin lah hai tho hoeh atipouh toteh, napui ni telah ma, ahawi doeh atipouh.

<sup>24</sup> La e a hnukthun a padoun pouh teh, a sanpa koe yawng sak haw, pou cetsak lawih. Kâ na poe hoehroukrak hnawng sak hanh loe atipouh.

<sup>25</sup> A cei teh, Cathut e tami koe Karmel mon vah a cei. Cathut e tami ni ahla poungnae koehoi a hmu nah, a sanpa Gehazi koevah, khenhaw! hot teh Shunam napui doeh khe. <sup>26</sup> Ahni dawn hanelah, yawng nateh ahni koevah na dam maw, na vâ a dam maw, camo hah a dam maw telah tet pouh. Napui ni ka dam doeh atipouh.

<sup>27</sup> Hahoi mon vah Cathut e tami koe a pha toteh, a khok a tapam pouh teh, ahni ngang hanelah, Gehazi teh a tho. Hatei Cathut tami ni ngang hanh. Bangkongtetpawiteh, a lungreithai dawk doeh atipouh. BAWIPA ni kai koe a hro rah na dei pouh hoeh rae doeh telah atipouh. <sup>28</sup> Napui ni, ka bawipa, capa hah kai ni kahei maw Na dum han loe ka ti nahoehmaw telah atipouh. <sup>29</sup> Ahni ni, Gehazi koevah, na hni na keng dawk yeng leih. Na sonron heh sin nateh cet, na kâhmo e naw pueng a kut man hanh. Ayâ ni na kut ka man nakunghai man hanh. Kaie ka sonron heh camo e minhmai van toung pouh loe atipouh. <sup>30</sup> Camo manu ni, BAWIPA hoi nang na hring e patetlah kai ni na tha roeroe mahoe. Hahoi a thaw teh a kâbang.

<sup>31</sup> Gehazi ni, hmalah pou a yawngtahrei teh, sonron teh camo e minhmai dawk a toung pouh. Hatei camo teh kâroe hoeh a lawk tho hoeh. Hahoi teh ama kâhmo hanlah bout a ban teh. Ama koe camo teh kâhlaw hoeh atipouh. <sup>32</sup> Elisha teh im a kâen navah, khenhaw! camo teh yo a due dawkvah, ikhun dawkvah a payan roi. <sup>33</sup> Hatdawkvah a kâen teh tho rouk a khan. BAWIPA koevah a ratoum. <sup>34</sup> Im van a luen teh camo e van vah a tabo. Apâhni hoi a pahni a mit hoi mit, a kut hoi kut a ta sin teh, a tabo sin. Hottelah hoi camo e tak teh phubet hruethruet ao. <sup>35</sup> A kum teh imvan vah a kâhlai, bout a luen teh, a van rek a tabo sin, hahoi camo teh vai sari touh a ekthi teh a mit a padai.

<sup>36</sup> Gehazi a kaw teh, Shunam napui kaw haw atipouh. A kaw teh ahni koe a pha awh toteh, na capa tawm haw atipouh. <sup>37</sup> Hahoi imthung a kâen teh a khok koe a tabo pouh. A capa teh a tawm teh a tâcokhai.

### *Elisha ni hlaam dawk thawng e a thoung sak*

<sup>38</sup> Elisha teh Gilgal vah a ban teh, a ram dawk takang a tho. Hahoi profet capanaw a hmalah a tahung teh, a sanpa koevah hlaam kalen pui dawkvah, profet capanaw hane anhang dam pouh loe atipouh. <sup>39</sup> Hahoi tami buet touh kahrawng lah a tawng teh kahrawng tangdun hah a hmu teh, kahrawng tuium pawnaw hah a khi teh be a bawng hnukkuh, a thawng e dawk a thum. Bangnama aw ti teh panuek hoeh. <sup>40</sup> Hahoi a ca hanlah a so teh, hote anhang a pahra navah Aiyoe! oe Cathut tami hlaam dawk duenae ao atipouh teh, cat thai awh hoeh. <sup>41</sup> Ahni ni, vaiyei na poe awh haw atipouh. Hlaam dawk a thum pouh teh hetnaw heh ca



hanelah so haw, atipouh. Hahoi teh hlaam dawk banghai takinae awm hoeh toe.

### *Elisha ni tami 100 touh bu a paca*

<sup>42</sup> Baalshalisha koe lahoi tami buet touh a tho teh, Cathut e tami hanlah cang aluepaw hoi yei e vaiyei, 20 touh hoi apawhiknaw hai cawngko dawk hoi a sin pouh. Elisha ni hete taminaw paca loe atipouh. <sup>43</sup> Hatei a sannaw ni, bangtelane, hete tami 100 touh hmalah ka tâcokhai han na maw atipouh. Oe hetnaw a ca hanelah poe loe. Bangkongtetpawiteh, BAWIPA ni telah a dei. Cat awh vaiteh puk a cawi han atipouh. <sup>44</sup> Hahoi teh a paawng awh teh a ca awh. BAWIPA ni a dei e patetlah pukcawi pouh.

## 5

### *Naaman Hrikbei*

<sup>1</sup> Siria siangpahrang ransabawi Naaman teh BAWIPA ni Sirianaw e bawilah ouk a hno dawkvah, a bawipa hanlah, tami kalen hoi barilawa kaawm lah ao. Ahni teh athakaawme tami hoi minkamthang e buet touh a tho. Hatei ama teh ka hrikbei e lah ao.

<sup>2</sup> Sirianaw taran a thaw awh teh, Isarel ram hoi camo napui ca buet touh san lah a hrawi awh. Ahni ni Naaman yu e thaw hah a tawk pouh. <sup>3</sup> Napui ca niyah, ka bawipa heh, Samaria kho e profet koevah cet haw pawiteh tie ka ngaikhai. Bangkongtetpawiteh, a hrikbei hah a dam sak han doeh atipouh.

<sup>4</sup> Naaman teh a bawipa koe a kâen teh, Isarel ram e, napui ca ni a dei e patetlah a dei pouh. <sup>5</sup> Siria siangpahrang ni cet leih, Isarel siangpahrang koe ca ka patawn han atipouh. Hahoi teh a kamthaw, ngun talen hra, sui shekel 6, 000 hoi hnicu yung hra touh a sin. <sup>6</sup> Hete ca, na hmu toteh, ka san Naaman e hrikbei na dam sak nahanelah, nang koe ka patoun e doeh tie ca hah Isarel siangpahrang koe a poe.

<sup>7</sup> Isarel siangpahrang ni hote ca, a touk navah, a angki a phi teh tami ka thet ni teh kahrang sak thai e Cathut lah maw ka tho, hete tami ni hrikbei dam sak hanelah kai koe khuet a patoun. Hatdawkvah pouk awh haw. Kai ka tak dawk thoe ka tawng e doeh tie hah panuek awh. <sup>8</sup> Hahoi Cathut e tami Elisha ni Isarel siangpahrang ni, amae angkinaw a phi tie a thai toteh, bangkong na angki hah na phi, pahren lahoi hote tami hah kai koe tho sak telah siangpahrang koe tami a patoun.

<sup>9</sup> Naaman teh a rangleng hoi a cei teh, Elisha e takhang koe a kangdue. <sup>10</sup> Elisha ni, Jordan palang vah, cet nateh vai sari touh kâ pâsu, na tak teh yampa e patetlah ao han na thoung han telah patoune a patoun.

<sup>11</sup> Naaman teh a lungphuen laihoi a cei. Khenhaw! ama hah kai koe tho vaiteh ka kangdout han. BAWIPA Cathut min hah kaw vaiteh, ka hrikbeinae koe a kut toung vaiteh a tek han a dam sak han doeh telah ka pouk. <sup>12</sup> Damaskas kho e palang Abanah hoi Phapar tui naw teh Isarel ram palangnaw thung dawk kahawipoung e nahoehmaw. Awi haw ma kâpasu vaiteh ka thoung han nahoehmaw telah ati. Hahoi teh a kamlang teh lungphuen laihoi a cei.

<sup>13</sup> A sannaw ni rek a hnai teh ama koevah, ka ru e hno sak hanlah na patoun pawiteh na sak han na vai yaw. Kâpasu na thoung han tie hateh hoe sak hane nahoehmaw telah atipouh.

<sup>14</sup> Hahoi teh, Cathut tami ni a dei e patetlah a cei ca thuk teh Jordan tui dawk vai sari touh a kâranup. A takthai teh camosenca e tak patetlah a thoung.



<sup>15</sup> Ama hoi a sannaw pueng hai Cathut e tami onae koe lah be a ban awh teh, a hmalah vah a kangdue pouh awh. Khenhaw! Isarel ram laipalah hoi talai van pueng dawkvah, Cathut awm hoehe tie ka panue toe. Hahoi na san koe e poehno na dâw pouh loe atipouh.

<sup>16</sup> Hatei ahni ni a hmalah ouk ka kangdue pouh e BAWIPA a hring e patetlah bangchahai ka lat mahoehe atipouh. A dâw hanlah voutsout a poe ei teh lat pouh ngai hoehe.

<sup>17</sup> Naaman ni teh lat hoehpawiteh, na san kai heh la kahni touh phu hane talai na lat sak loe. Bangkongtetpawiteh, atu hoi teh na san kai ni Jehovah koe laipalah hoi teh hmaisawi thuengnae hoi thuengnae naw heh alouke cathut koe ka poe mahoehe toe. <sup>18</sup> Hete hnonaw hoi BAWIPA ni a san kai heh na ngaithoum naseh, ka bawipa, hete Rimmon cathut bawk hanelah, ka tabut teh Rimmon bawkim dawkw ka kâen. Rimmon bawkim dawkw ka tabonae dawkw, BAWIPA ni a san heh na ngaithoum naseh telah a ti.

<sup>19</sup> Elisha ni lungmawngcalah cet leih atipouh. Ahni koehoi a tâco teh kahlat lah a cei toe.

### *Gehazi hounlounnae*

<sup>20</sup> Cathut tami e san, Gehazi ni yah, khenhaw! ka bawipa ni Siria tami Naaman ni a sin e poehno buet touh boehai lat laipalah a ceisak. Hatei BAWIPA a hring e patetlah ka pâlei vaiteh buet buet touh ngoun teh ka la pouh han telah a pouk.

<sup>21</sup> Gehazi ni Naaman teh a pâlei teh a pha toteh a kâhmo hanelah leng dawkw hoi a kum.

<sup>22</sup> Ahni ni awiya ahawinae lah doeh ao. Ka bawipa ni Ephraim mon dawkw profet capanaw dawkw hoi thoundoun kahni touh kai koe pouk laipalah, a tho. Ahni teh ngun talen buet touh hoi hna yung hni touh poe la ati teh kai heh na patoun atipouh.

<sup>23</sup> Naaman ni talen kahni touh hah lat atipouh. Talen kahni touh la hanelah a poe. Hna yung hni touh hoi cawngko kahni touh dawkw a thun pouh teh, a san kahni touh ni a phu roi teh hmalah a ceikhai. <sup>24</sup> Mon dawkw a pha toteh a la teh imthungkhu lah a ta, ka phawt e tami hah a cei sak.

<sup>25</sup> Ama teh a kâen teh a bawipa hmalah a kangdue teh Elisha ni, na lahoi maw na tho Gehazi telah a pacei. Ahni ni na san heh nahai ka cet hoehe bo atipouh.

<sup>26</sup> Elisha ni, ahni koe nang ka hmo hanelah rangleng dawkw hoi a kum navah, ka lungthin heh nang koe cet van hoehe namaw, tangka, khohna, olive takha, hoi misur takha, tu, maitotan hoi sannu, sanpanaw hah la hane atueng na maw. <sup>27</sup> Hatdawkvah Naaman e hrikbei teh nang koehoi na catounnaw koe a yungyoe phat naseh, atipouh e patetlah Gehazi teh a hrikbei teh tadamtui patetlah a pangaw teh, a bawipa teh a tâco takhai toe.

## 6

### *Cakâ a kâlâw*

<sup>1</sup> Profet capanaw ni Elisha koevah, khenhaw! nang koe khosaknae hmueng heh, maimouh hanelah a thoungca toe. <sup>2</sup> Pahren lahoi Jordan palang na cetsak awh nateh, Hawvâh thing tâtueng awh han, mamouh khosak nahanelah sak awh han telah atipouh. Elisha ni oe cet awh leih telah kâ a poe.



<sup>3</sup> Tami buet touh ni, na sannaw koe ka cei han telah ati. Oe cet van lawih atipouh.

<sup>4</sup> Hahoi teh ahnimouh koe a cei van. Jordan palang a pha toteh, thing a tâtueng awh. <sup>5</sup> Tami buet touh ni, thing a tâtueng lahun nah, cakâ hah tui thung a bo teh ahni ni Aiyoe! ka bawipa, ka hlai e doeh, telah a hram.

<sup>6</sup> Cathut e tami ni, nâtueng tapat maw a bo telah atipouh. Ahni ni a bonae tueng hah a patue. Hahoi thing buet touh a tâtueng hote hmuen koe a tâkhawng teh cakâ teh avanlah a kâlaw. <sup>7</sup> Hatdawkvah ahni ni, racawng leih, atipouh hahoi a kâypa teh a racawng.

### *Siria mitdawnnaw*

<sup>8</sup> Siria siangpahrang ni Isarel hah a tuk teh awi haw vah, awi hi vah pawm awh sei telah a sannaw hah a dei pouh.

<sup>9</sup> Cathut e tami ni, Isarel siangpahrang koe vah, hote hmuen koe cei hoeh hanlah kâhructuet. Bangkongtetpawiteh hote hmuen koehoi Sirianaw ni na tâco sin awh han telah tami a patoun.

<sup>10</sup> Isarel siangpahrang ni, Cathut tami ni a dei e hmuen, panue thai nahanlah tami a patoun. Awi haw hoi teh vai touh vai hni touh nahoeh. Voutsout a kârunngang awh toe. <sup>11</sup> Hatdawkvah, hote kecu dawk Siria siangpahrang teh a lungreithai poung. A sannaw hah a kaw awh teh, ahnimouh koe vah, maimouh thung dawk hoi, apimaw Isarel Siangpahrang koe lah kampang e kaawm awh vai tie hah kai na panuek sak awh mahoe haw atipouh. <sup>12</sup> A sannaw thung dawk hoi tami buet touh ni, apihai panuesaknae awh hoeh. Siangpahrang ka bawipa, hatei Isarel ram e kaawm profet Elisha ni na i khan koe na dei e lawk patenghai yah Isarel siangpahrang koe ouk a dei pouh dawk doeh atipouh. <sup>13</sup> Siangpahrang ni tami hah a patoun teh, man thai nahanelah na maw ao, tawng awh leih atipouh. Khenhaw! Dothan kho ao atipouh awh.

<sup>14</sup> Marang hoi leng hoi, ransa moikapap lah a patoun. Karum vah a cei awh teh, kho hah a kalup awh. <sup>15</sup> Cathut tami e a san teh amom vah a thaw teh, a tâco toteh khenhaw! ransanaw ni marang hoi leng hoi kho hah king a kalup awh. A sanpa ni a bawipa koe ayâ ka bawipa bangtelamaw ti han toung atipouh. <sup>16</sup> Ahni ni, taket hanh, ahnimouh koelae hlak vah, maimouh koelae a paphnawn atipouh. <sup>17</sup> Elisha ni a ratoum teh BAWIPA a hmu thai nahan a mit ang sak haw atipouh. Hahoi BAWIPA ni hote thoundoun e mit a ang sak teh a hmu thai van. Elisha tengpam e mon dawkvah, hmaimarang hoi rangleng hoi akawi.

<sup>18</sup> Siria taminaw ni ateng a pha awh toteh, Elisha ni BAWIPA koe vah a ratoum. Hetnaw heh a mitdawn sak haw atipouh. Elisha e lawk patetlah a mit a dawn sak. <sup>19</sup> Elisha ni ahnimouh koe, het heh lam nahoeh. Kho hai kho nahoeh. Ka hnukkâbang awh, na tawng e tami koe na ceikhai awh han telah atipouh. Hottelah hoi Samaria vah a ceikhai awh. <sup>20</sup> Samaria a pha toteh, Elisha ni BAWIPA koe vah a ratoum hetnaw heh a mit a hmu thai nahan a mit padai sak haw atipouh. Hahoi BAWIPA ni a mit a padai sak awh teh, koug a ang pouh. Khenhaw! Samaria doeh ao awh.

<sup>21</sup> Isarel siangpahrang ni a hmu awh toteh Elisha koe vah apa ka thei awh han maw, thet laipalah maw ka ta han telah atipouh. <sup>22</sup> Hatei ahni ni thet hanh. Na tahloi hoi na lilava hoi na man e san hah, na thei han na maw, vaiyei hoi tui hah poue awh na teh cat net awh naseh, a bawipa koe bout phat awh naseh. <sup>23</sup> Hahoi teh canei kawi moi a poue awh teh be a canei awh hoi teh, a ban sak awh. A bawipa koe koug a pha awh, hahoi teh Sirianaw ni Isarel ram taran bout thaw awh hoeh toe.



*Takang navah Siria ni Samaria a kalup*

<sup>24</sup> Hahoi teh hettelah doeh. Siria siangpahrang Benhadad ni ransanaw a pâkhueng teh Samaria king a kalup awh. <sup>25</sup> Samaria teh takangnae a patawpoung. Khenhaw! king a kalup awh teh, la e a lû hah tangka 80 touh lah a yo awh. Bakhu ei, pung pali touh daw kung touh tangka shekel panga touh lah a pâphu awh. <sup>26</sup> Isarel siangpahrang teh, rapan koe a cei navah, napui buet touh ni, oe siangpahrang ka bawipa na kabawm ei atipouh. <sup>27</sup> Siangpahrang ni BAWIPA laipalah hoi kai ni bangtelah hoi maw na kabawp thai han aw, cangkatin nah koe, misur katinnae koe lahoi atipouh.

<sup>28</sup> Siangpahrang ni napui koevah, Bangpatete runae maw bout atipouh. Napui ni, hete napui kai koe sahnin vah na capa heh ca hanelah thei roi han. Tangtho vah kaie capa hah ca roi han atipouh. <sup>29</sup> Hatdawkvah, ka capa hah ka thawng teh ka ca roi toe. Atangtho teh kai ni hai na capa ca hanelah thet van leih ka ti pouh toteh, a capa te oun a hro telah atipouh.

<sup>30</sup> Siangpahrang ni hote napui ni a dei e a thai toteh, amae angki a phi teh, rapan van a kâhlai lahun nah, tami moikapap ni a khet toteh, burihni hah un a kâkhu. <sup>31</sup> Siangpahrang ni Shaphat capa Elisha e a lû teh sahnin a tak hoi kâkapek laipalah awm rah pawiteh, Cathut ni a ngai e patetlah na sak naseh, hot hlak ka pataw lahai yah a ti.

<sup>32</sup> Hatei Elisha ni a im van a tahung teh a lungkahanaw hai a tahung awh van. Siangpahrang ni ahni koe patoune a patoun. Hatei hote a patoune a tho hoehnahlan vah, Elisha ni tami ka thet e a ca teh kaie lahuen tâtueng hanlah, a patoun e na panuek awh hoeh maw. Hote a patoun e a tho toteh tho na khan awh teh, takhang teng vah ahni hah ngang awh. Ahnie a hnuklah a bawipa e lamcei pawlawk tho hoeh maw a ti.

<sup>33</sup> Hot patetlah ahnimouh a pato lahun nah, patoune thet ahnimouh koe a pha, hahoi a patoun e naw ni khenhaw! rawkphainae heh BAWIPA ni a patoun e doeh. BAWIPA teh bangkong bout ka ring han vaw telah a ti.

## 7

<sup>1</sup> Elisha ni, BAWIPA lawk thai awh haw. BAWIPA ni telah a dei. Tangtho atu e tuektue vah, rapan longkha teng vah, tavai sum touh hah, sekel buet touh lah yo han, catun sum hni touh hah sekel buet lah yo awh han ati.

<sup>2</sup> Siangpahrang kut ka kângue e ransabawi ni Cathut e tami hah a pathung. Khenhaw! BAWIPA ni kalvan vah hlalangkawnaw paawng pawiteh hottelah a coung thai yawkaw han doeh atipouh. Elisha ni oe hatei, na mit ni a hmu vaiteh na cat mahoeht telah atipouh.

*Sirianaw a yawng awh*

<sup>3</sup> Hahoi kêennae longkha koe, hrikbeinaw pali touh ao awh. Bangkong-maw maimouh ni due han totouh awi hivah khuet tahung awh han vaw

<sup>4</sup> Kho thung kêen nakunghai takang kecu daw due awh han. Awi hi pou ka tahung awh nakunghai due mingming awh han. Hatdawkvah Siria ransanaw koe kâhmoun ngala awh sei. Na hlung awh pawiteh hring awh han, na thet awh pawiteh due awh han, telah buet touh hoi buet touh a kâdei awh.

<sup>5</sup> Hahoi teh Sirianaw roenae hmuen koe cei hanlah, khodai hoehnahlan a kamthaw awh. Sirianaw roenae koe a pha toteh, khenhaw! apihai awm hoeh. <sup>6</sup> Bangkongtetpawiteh, BAWIPA ni Siria ransanaw e rangleng lawk hoi marang yawng pawlawk, ransa moikapap e pawlawk lah a thai sak. Khenhaw! Isarel siangpahrang ni Hitnaw e siangpahrang



hoi Izip siangpahrang hah maimouh tuk hanelah a kaw i mue toe ati awh. <sup>7</sup> Hatdawkvah, kho vumpava a dai navah koug a yawng awh. Ahnimae rimnaw hoi rangleng hoi lanaw hoi roenae rimnaw pueng teh ama hottelah koug a yawng takhai awh.

<sup>8</sup> Hahoi hrikbeinaw ni, a roenae rim koe a pha toteh buet touh e rim daw k a kâen awh. Haw e kaawmnaw hai a la awh teh bout a hro awh. <sup>9</sup> Hathnukkhu hoi maimouh teh, hnokahawi sak awh hoeh toe. Sahnin teh kamthang a phanae hnin toe, hatdawkvah maimouh ni lungmawng lah awm hanh, khodai e ring awh pawiteh, reknae buet buet touh kâhmo awh mingming han doeh. Hatdawkvah tho awh leih. Siangpahrang imthungkhu koe dei awh leih sei ti teh buet touh hoi buet touh a kâdei awh. <sup>10</sup> Hahoi, a cei awh teh, kho longkha ka ring e hah a kaw awh teh, ahni koe Sirianaw a roenae koe ka cei awh teh, khenhaw! apihai la awm hoeh. Tami pawrin lawk hai banghai tho hoeh. Marang hoi lengnaw teh koug a kâpen, rimnaw hai ama telah roup a ta awh telah a dei pouh awh. <sup>11</sup> Hat torei teh, longkha karingkung ni siangpahrang imthungkhu koe patuen a dei pouh.

<sup>12</sup> Siangpahrang teh karum vah a thaw teh a sannaw koevah Sirianaw ni na sak awh e heh na dei pouh vai, maimouh vonhlam e hah a panue awh teh, khopui thung hoi a tâco toteh, a hring lahoi man kong ati awh teh, hahoi khotung kâen sin sei ati awh e muema toe. Kahrwang a kâhro awh e han doeh, hatdawkvah roenae rim a ceitakhai e han doeh telah ati. <sup>13</sup> A san bout touh niyah, a pathung teh, pahren lahoi yah khopui daw k kacawirae marang panga touh hoi tami nâyittouh ni ne cetkhai naseh. Khenhaw! Isarelnaw ka la awm e naw patetlah doeh ao awh. Atangcalah dei pawiteh ka rawk tangcounghaw thung daw k hoi Isarel e a hu lah pouk e lah ao thai nahanlah tha awh sei atipouh.

<sup>14</sup> Hahoi leng ka sawn e marang kahni touh a ceikhai awh teh siangpahrang ni, khenhaw! telah, Siria ransanaw pâlei hanelah a patoun toe.

<sup>15</sup> Jordan palang totouh, a pâlei awh teh, khenhaw! Sirianaw karang poung lah a yawng awh dawkvah, a tâkhawng awh e angki, hna, hnopai naw lam vah nawinawi a kâkaye telah patounenaw ni a ban awh teh siangpahrang koe a dei awh. <sup>16</sup> Hahoi teh taminaw ni, a tâco awh teh Sirianaw e rimnaw a lawp awh. Hahoi teh, BAWIPA lawk patetlah tavai sum touh daw k sekel buet touh lah, catun sum hni touh daw k sekel buet touh lah a yo awh. <sup>17</sup> Hahoi siangpahrang ni, amae kut ka kângue e ransabawi hah kalupnae longkha karingkung lah a sak. Hahoi tami tangkuem ni kalupnae longkha koe ahni hah kawt a katin awh teh, Cathut tami ni siangpahrang koe a tho nah a dei e patetlah a due. <sup>18</sup> Hahoi teh, Cathut e tami ni siangpahrang koevah, tangtho het tuektue nah, Samaria kalupnae longkha koevah, tavai sum touh daw k sekel buet lah a yo awh vaiteh catun sum hni touh daw k sekel buet lah a yo awh han ati teh, <sup>19</sup> ransabawi ni Cathut tami hah a pathung teh, BAWIPA ni kalvan longkha paawng pawiteh hottelah a coud yawkaw han doeh ati navah, ahni ni na mit hoi na hmu han, hatei na cat mahoe telah a dei pouh e hah, a tak daw k a pha pouh.

<sup>20</sup> Bangkongtetpawiteh, khopui longkha koe tamimaya ni longkha koe a katinkaawi awh teh kawt a due.

## 8

*Siangpahrang ni Shunam tami lawhmuen a poe*



<sup>1</sup> Elisha ni a capa a hring sak e napui koevah, thaw haw, nang nama hoi na imthungkhunaw na o thainae hmuen koe lah awm awh. Bangkongtetpawiteh BAWIPA ni takang tho sak vaiteh, hete ram daw kum 7 touh thung takang a tho han telah a ti.

<sup>2</sup> Napui ni a thaw teh Cathut tami e lawk patetlah a sak teh, Filistinnaw e ram daw kum 7 touh ao. <sup>3</sup> A kum 7 kuep toteh hote napui teh Filistin ram hoi a ban. Hahoi a im hoi a law hmuen naw siangpahrang koe hei hanlah a cei.

<sup>4</sup> Siangpahrang ni Cathut tami e a san, Gehazi koe Elisha ni hno kângairu a sak e hah na dei pouh haw tie a hei lahunnae tueng doeh.

<sup>5</sup> Hahoi tami buet touh kadout tangcoung e a hringsaknae kong a dei navah, hettelah doeh. Khenhaw! a capa a hring sak e napui ni, a im hoi a lawhmuen hah, siangpahrang koe a hei van. Gehazi ni oe siangpahrang ka bawipa hete napui nan mah, Elisha ni a capa a hring sak e heh ma atipouh. <sup>6</sup> Siangpahrang ni napui a pacei toteh, a dei pouh. Hot patetlah siangpahrang ni a lungkaha buet touh a pouk pouh. Hete ram a tâcotakhai hnin hoi atu totouh a taw k e pueng totouh be poe awh loe atipouh.

### *Elisha hoi Siria siangpahrang Benhadad*

<sup>7</sup> Elisha teh, Damaskas kho vah a cei, hahoi Siria siangpahrang Benhadad a pataw, hat tore i teh Cathut e tami, hi tho haw telah a dei pouh awh.

<sup>8</sup> Siangpahrang ni, Hazael koevah poehno sin nateh Cathut e tami kâhmo hanlah cet, ka patawnae bout ahawi thai han vaimoe. BAWIPA koe na het pouh haw pawiteh atipouh. <sup>9</sup> Hezael teh, ahni kâhmo hanlah a cei, poehno poe hanlah, Damaskas kho e hnokahawi phunkuep kalauk 40 touh a phu sak teh, a hmalah a kangdue. Na capa Siria siangpahrang Benhadad ni, ka patawnae he bout kahawi thai han vaimoe tie dei hanlah kai na patoun atipouh.

<sup>10</sup> Elisha ni, ahni koe cet leih, ahni koe na hawi mingming han doeh ati telah dei pouh. Hatei a due roeroe hanelah BAWIPA ni na hmu sak telah atipouh.

<sup>11</sup> Hahoi mit pakhap laipalah a kaya han totouh takuetluet a khet teh, Cathut e tami a ka.

<sup>12</sup> Hezael ni bangkongmaw ka bawipa teh a ka ati. Ahni ni, Isarel catounnaw koe na sak hane hawihoeahnae ka panue daw k doeh. A rapanim teh hmai hoi sawi awh vaiteh, a thoundounnaw hah tahloi hoi a thei awh han. A canaw hah talai daw k rekrek a suk awh han. Camo ka vawn e naw hah, a paset awh han, telah atipouh.

<sup>13</sup> Hezael ni, kai na san ui patetlah kaawm e ni, hot patet e hno ka lentoe e ka sak thai han namaw atipouh. Elisha ni, Sirianaw e siangpahrang lah na kaawm han doeh tie hah, BAWIPA ni na panue sak telah atipouh.

<sup>14</sup> Hahoi teh Elisha koehoi a tâco teh, a bawipa koevah a cei. Ahni ni Elisha ni bangmaw a dei atipouh. Ahni ni bout na hawi han doeh na ti pouh telah atipouh.

<sup>15</sup> Hatei a tangtho vah telah ao han, ka tha poung e khohna hah a la teh tui daw k a phum, a minhmai muen a kayo pouh teh a due. Hahoi Hazael teh ahnie yueng lah a bawi.

### *Jehoram ni Judah a uk*

<sup>16</sup> Isarel siangpahrang Ahab capa Joram a bawinae kum panga nah, Jehoshaphat capa Jehoram teh, Judah siangpahrang thaw taw k nueng a kamtawng. <sup>17</sup> Siangpahrang lah ao navah, kum 32 touh a pha, Jerusalem vah kum 8 touh a uk. <sup>18</sup> Ahab imthungkhunaw patetlah Isarel



siangpahrangnaw ni a dawn awh e lamthung a dawn van teh, Ahab canu hah yu lah a la. Hottelah hoi BAWIPA mithmu vah, hawihoeahnae a sak. <sup>19</sup> Hatei, BAWIPA ni, a san Devit kecu dawk Judah ram hah raphoe han ngai hoe. Bangkongtetpawiteh a catounnaw totouh han hmaiim lah ang hanelah lawk a kam toe.

<sup>20</sup> Amamouh se nah, Edomnaw teh Judahnaw e kâawnnah hah a taran awh, amamouh lathueng siangpahrang hanelah amamouh hoi amamouh a kârawi awh. <sup>21</sup> Hahoi teh, Joram ni a ranglengnaw pueng hoi Zair vah a cei, karum vah a kamthaw teh, ama ka kalupnaw Edom taminaw e rangleng dawk e a lungkahanaw hah a tuk pouh awh teh, rim dawkvah koug a yawng awh. <sup>22</sup> Hot patetlah Edomnaw hah atu totouh, Judahnaw e kâawnnah hah a taran awh. Hote tueng dawk Libnah hai taran a thaw van. <sup>23</sup> Joram thawtawknae thung dawk hoi kaawm rae naw hoi a tawksak e naw pueng teh Judah siangpahrangnaw setouknae cauk dawk koug thut lah ao nahoehmaw. <sup>24</sup> Joram teh a na mintoenaw koe ka ip ni teh a napanaw koe Devit, khopui dawk a pakawp awh. Hahoi a capa Ahiziah ni a yueng lah a uk.

### *Ahiziah ni Judah a uk*

<sup>25</sup> Isarel siangpahrang Ahab capa Joram heh siangpahrang a tawknae kum 12 nah Judah siangpahrang Jehoram capa Ahaziah teh siangpahrang lah ao. <sup>26</sup> Ahaziah ni a uk han a kamtawng na a kum 22 touh a pha teh, Jerusalem vah kum touh a uk. A manu min teh Athaliah, Isarel siangpahrang Omri canu doeh. <sup>27</sup> Ahab imthungnaw ni a dawn e lamthung a dawn van awh. Ahab imthungkhunaw patetlah BAWIPA mithmu vah, hawihoeahnae hah a sak. Bangkongtetpawiteh, Ahab imthungnaw e a cava lah ao.

<sup>28</sup> Ahni teh Ahab capa Joram ni Ramothgilead hoi Siria siangpahrang Hazael a tuknae koe ka baw van e Sirianaw ni, Joram hah a hmâ a paca awh. <sup>29</sup> Siangpahrang Joram teh, Siria siangpahrang Hazael a tuk navah Sirianaw ni Ramah vah hmâ a ca sak awh e hah, ahawi nahanlah Jezreel vah a ban awh. Judah siangpahrang Jehoram capa Ahaziah teh Ahab capa Joram a pataw dawkvah hloe hanelah Jezreel kho lah a cei.

## 9

### *Isarel siangpahrang lah Jehu satui a awi awh*

<sup>1</sup> Profet Elisha ni Profet capa thung dawk e buet touh hah a kaw teh, ahni koe, coungkacoe awm la a, hete satuium heh sin nateh Ramothgilead vah cet loe. <sup>2</sup> Na pha toteh, Nimshi ca Jehoshaphat capa, Jehu hah tawng loe, kâen sin nateh a hmaunawngghanaw koehoi tâcawt nateh imrakhan buet touh dawk kâenkhai. <sup>3</sup> Hahoi satuium hah lat nateh, a lû dawk awi pouh. BAWIPA ni hettelah a dei. Isarelnaw koe siangpahrang lah o hanelah nang teh satui na awi. Telah na ti pouh han. Hahoi tho paawng nateh pou yawng takhai, kânawngkâai hanh atipouh. <sup>4</sup> Hot patetlah, Profet e san thoundoun teh Ramothgilead vah a cei. <sup>5</sup> A pha toteh, khenhaw! ransabawi hah a tahung, ahni ni yah ransabawi, nang koevah lawk dei han ka tawn atipouh. Jehu ni api koe vaimoe atipouh. Ahni ni ransabawi nang nama koe doeh atipouh. <sup>6</sup> A thaw teh imthungkhu vah a kâenkhai teh, a lû dawk satui hah a awi pouh teh Isarel siangpahrang BAWIPA Cathut ni hettelah a dei, BAWIPA e tamihu Isarel lathueng vah, siangpahrang hanelah satui na awi. <sup>7</sup> Ka san profetnaw e thi phu hoi BAWIPA e a sannaw e thi phu



Jezebel koehoi ka pathung thai nahan lah. <sup>8</sup> Bangtelane tetpawiteh, Ahab imthungkhunaw teh be kahmakata awh vaiteh, Ahab koehoi kamtawng teh a ca tongpa pueng teh, Isarel ram thung hoi kahlout e thoseh, kahlout hoeh e thoseh, be ka pahma han. <sup>9</sup> Ahab imthungkhu teh, Nebat capa Jeroboam imthungkhu hoi Ahijah capa Baasha imthungkhu patetlah ka tho sak han. <sup>10</sup> Uinaw ni Jezebel teh, Jezreel kho kalupnae rapan kung koe a ai vaiteh, kapakawpkung awm mahoeah ati telah atipouh. Hahoi tho a paawng teh a yawng. <sup>11</sup> Hot patetlah Jehu teh BAWIPA e a sannaw koe a cei teh tami buet touh ni ahni koe koug ahawi maw, hote tami ka pathu hah, bangkongmaw nang koe a cei atipouh. Ahnimouh ni ama ni a phuenang e teh be na thai awh toung tayaw atipouh. <sup>12</sup> Ahnimouh ni ka thai awh hoeh bo, na dei pouh haw khe, atipouh awh. Hettelah nahoehmaw ka ti pouh awh. BAWIPA ni hettelah a dei Isarelnaw han siangpahrang lah na o nahanelah, satui na awi toe telah a dei e hah patuen dei pouh telah a ti. <sup>13</sup> Hahoi tami pueng ni, a hni hah lengkaleng a la awh teh khalai daw k a phai awh. Mongka a ueng awh teh, Jehu teh siangpahrang doeh telah a pathang awh.

### *Isarel tami Joram thei e lah a o*

<sup>14</sup> Hahoi Nimshi capa Jehoshaphat capa Jehu ni Joram teh a youk. Siria siangpahrang ni Hazael a taran dawkvah Joram hoi Isarelnaw pueng ni, Ramothgilead kho hah a ring awh. <sup>15</sup> Siangpahrang Joram teh, Siria siangpahrang Hezeal hoi a kâtuknae daw k Sirianaw ni hmâ a ca sak awh e naw hah, ahawi nahanlah Jezreel kho vah a ban awh toe. Jehu ni kai koe lah na kampang e lah na awm pawiteh, apihai yah Jezreel kho vah hete lawk dei hanlah kho thung hoi tâcawt awh hanh loe atipouh.

<sup>16</sup> Hahoi Jehu teh, rangleng daw k a kâcui teh, Jezreel kho vah a cei. Bangkongtetpawiteh, Joram teh haw vah a yan. Hahoi Judah siangpahrang Ahaziah hai Joram khet hanlah a cei. <sup>17</sup> Jezreel e imrasang van ramveng ni a kangdue teh, ahni ni Jehu hoi a taminaw a tho e hah a hmu. Tami moikapap ka hmu atipouh. Joram ni marang daw k kâcuinaw dawn hanelah patoun haw, rounnae koe la vaimoe, tet pouh haw seh telah atipouh.

<sup>18</sup> Hahoi tami buet touh marang kâcui e ni dawn hanlah a cei. Siangpahrang ni, hettelah a dei, rounnae koe lah vaimoe telah ati. Jehu ni, rounnae lawk hah nang ni na thai hanelah bangmaw kaawm ka hnuklah cet loe atipouh. Hahoi ramveng ni, patoune nang koe a tho vaiyaw, hatei bout ban hoeh toe atipouh.

<sup>19</sup> Hahoi tami buet touh marang kâcui e bout a patoun. Hot haiyah ahnimouh koe a pha teh, siangpahrang ni telah a dei pouh. Rounnae koelae vaimoe, ati telah ati. Jehu ni, rounnae koe lah teh nang ni na thai han bangmaw kaawm. Ka hnuklah cet ngoun atipouh.

<sup>20</sup> Ramveng ni, ahni haiyah ama koe ka phat ei nan ma, bout ban hoeh toe. Hahoi a yawng sak e hai, Nimshi capa Jehu ni a yawng sak e patet doeh. Bangkongtetpawiteh, kahlî patetlah doeh thouk a kamleng telah atipouh.

<sup>21</sup> Joram ni, coungkacoe lah awm awh telah ati. Leng hah sut a rakueng pouh awh teh, Isarel siangpahrang Joram hoi Judah siangpahrang Ahaziah teh amamouh roi e rangleng reira hoi a tâco roi teh Jehu dawn hanlah a cei roi. Jezreel tami Naboth e takha daw k a kâhro awh. <sup>22</sup> Hahoi Joram ni, Jehu a kâhmo toteh hettelah doeh, rounnae koelae vaimoe. Jehu atipouh.



Ahni ni na manu Jezebel ni hettelah kapap lah a tak a kâyo teh taân a sin e hah maw, bangtelah hoi maw rounnae lah ao thai han vaw atipouh.

<sup>23</sup> Joram teh a kamlang hoi a yawng. Ahaziah koevah na dum awh e doeh Ahaziah atipouh. <sup>24</sup> Jehu ni licung hah a thaothue hoi a sawn teh, Joram teh aloung hoi aloung rahak vah roum a ka pouh teh, pala ni hai a lung pawk a kâ pouh teh, a leng van a kamlei teh a due. <sup>25</sup> Jehu ni, a ransabawi Bidkar koevah dawk tawm nateh Jezreel tami Naboth takha thung tâkhawng. Bangkongtetpawiteh, Ayan vah nang nama hoi na pa Ahab hnuk vah marang kâcui hoi pâlei navah, BAWIPA ni hete hmuenri heh na tak dawk a patue e pahnim hanh. <sup>26</sup> BAWIPA ni paduem vah Naboth thi hoi a canaw e thi hah ka hmu toe telah a dei. BAWIPA ni hete hmuen koe roeroe vah lû ka la han telah bout ati. Hot patetlah BAWIPA ni a dei e patetlah hete ro hah tawm nateh hete hmuen koe roeroe tâkhawng telah atipouh.

### *Judah tami Ahaziah a thei awh*

<sup>27</sup> Hatei, Judah siangpahrang Ahaziah ni hote hmu toteh, Bethhaggan lah a yawng. Jehu ni a pâlei teh ama haiyah a leng dawk ka ngala awh atipouh. Hahoi lbleam teng Gur lah takhangnae koe, amae ranglang van vah a ka awh. Megiddo lah a yawng teh haw vah a due. <sup>28</sup> A taminaw ni leng hai Jerusalem lah a ceikhai awh teh a na minnaw koe, Devit khopui vah a pakawp awh. <sup>29</sup> Ahab capa Joram kum hlaibun touh a bawinae kum vah, Ahaziah teh Judahnaw e siangpahrang lah ao.

### *Jezebel utsinnae*

<sup>30</sup> Jehu teh Jezreel kho a kâen navah, Jezebel ni a thai, hahoi teh a mit hah pathoup teh a sam hai a pathoup teh, hlalangaw dawk hoi a radoung. <sup>31</sup> Kalupnae longkha koe Jehu a kâen navah rounnae koe lah vaimoe na bawipa na ka thet e Zimri telah atipouh. <sup>32</sup> Ahni ni hlalangaw lah khet hoi kalvan lah radoung hoi, apimaw kai koe lah kambawng telah ati. Tuenla e tami kahni kathum touh ni ahni koe lah a khet awh. <sup>33</sup> Jehu ni napui hah tâkhawng awh telah ati. Hahoi a tâkhawng awh teh siangpahrang im tapang dawk thoseh, marang van hai thoseh a thi naw koung a tâcawn sin, Jehu ni a khok hoi a coungroe. <sup>34</sup> A kâen teh a canei theobona kahmawt e napui ka hawi lah kuemyawt awh teh pakawp awh. Bangdawk ahni teh siangpahrang canu doeh a ti. <sup>35</sup> Pakawp hanlah a cei navah, lû hru hoi a khokcareinaw hoi a kutcareinaw laipalah teh pâphawng hoeh toe. <sup>36</sup> A tho teh a dei pouh awh ahni ni het heh BAWIPA ni a san Tishbit tami Elijah hno lahai Jezreel kalupnae kung koe uinaw ni Jezebel teh a ai han. <sup>37</sup> Jezebel ro teh Jezreel longkha kung koe eitaboung patetlah kaawm han, hethateh Jezebel nan ma aw, ati awh hoeh nahanelah telah dei e lawk doeh telah ati awh.

## 10

### *Ahab canaw 70 touh a thei awh*

<sup>1</sup> Ahab ni, Samaria vah, capa 70 touh a tawn. Jehu ni Samaria vah, Jezreel ka uk e kacuenaw hoi Ahab capanaw kakawkkungnaw koevah, <sup>2</sup> Hete ca heh nangmouh koe a pha tahma vah na bawipa e capa nangmouh koe kaawm e patetlah rangleng hoi, marang kalup e kho senehmaica hai na tawn awh. <sup>3</sup> Na bawipa e a capanaw thung dawk kahawi poung e kakuep poung e hah rawi awh nateh, a na pa e bawitungkung dawk tahu ng sak awh. Na bawipa imthungkhu, ka tuk e taran hah tuk khai awh telah



ca a patawn. <sup>4</sup> Ahnimouh ni a takipoung teh, khenhaw! siangpahrang kahni touh ni hai a khang thai awh hoe e doeh, maimouh ni bangtelavai khang thai awh vaw telah ati awh. <sup>5</sup> Siangpahrang imthungkhu daw k e kahrawikung hoi, khopui kaukung hoi camonaw kakhenkungnaw ni, Jehu koe vah na san ka tho awh, sak hane kaawm e naw pueng teh, ka sak awh han. Apihai siangpahrang lah ka rawi mahoe. Nang ni ahawi na tie patetlah hoi sak lawih telah tami a patoun. <sup>6</sup> Ahnimouh koe, kai koe lah na kambawng awh boilah, kaie kâ na ngai awh hane pawiteh, na bawipa hoi a lû hah tangtho het tuektue a pha hoehnahlan, Jezreel kho kai koevah thokhai awh telah ca bout a patawn. Siangpahrang capanaw teh 70 touh a pha awh. Kho thung e kalentoenaw ahnimouh koe ao awh. <sup>7</sup> Ca patawn e a hmu awh teh, telah doeh. Siangpahrang e a capanaw hah a man awh teh 70 touh, abuemlah hoi a thei awh, a lûnaw hah tangthung daw k a rasoup awh teh, Jezreel kho vah ahnimouh koe a patawn awh. <sup>8</sup> Hahoi laicei a tho teh, siangpahrang capanaw e lû hah a la awh telah a dei. Ahnimouh ni kalupnae longkha kâen nah koevah, hmuen kahni touh lah a pung awh tangtho totouh awm seh atipouh. <sup>9</sup> Atangtho hettelah doeh toe. A tâco teh taminaw pueng koe tamikalan doeh khenhaw! ka bawipa teh ka youk teh ka thei ka tang toe. Telah pawiteh, hetnaw pueng he apinimaw a thei vaw. <sup>10</sup> BAWIPA ni Ahab imthungkhu kong a dei e, BAWIPA lawk nâtuék hai yawmlah bawt boi mahoe tie hah panuek awh. <sup>11</sup> Hot patetlah Jehu ni Jezreel kho vah, Ahab imthungkhu kaawm e naw hoi a tami kalentoenaw hoi a vaihmanaw pueng hoi buet touh hai hlung laipalah koun g a thei awh. <sup>12</sup> Hahoi a thaw teh, a tâcotakhai awh teh, Samaria lah a cei awh.

### *Ahaziah hmaunawngaha 42 touh thei lah a o*

Lam vah tukhoumnaw e hmuen Bethoked a pha awh toteh, <sup>13</sup> Jehu ni, Judah siangpahrang Ahaziah hmaunawngahanaw a hmu. Api nang maw telah a paei. Ahnimouh ni Ahaziah e hmaunawngahanaw doeh atipouh awh. Siangpahrang e capanaw hoi siangpahrang canunaw e kut ka man awh han telah a pathung awh. <sup>14</sup> Jehu ni a hring o lah man awh telah ati. Hahoi a hring lah a man awh teh Bethoked tangkom teng vah a thei awh, abuemlah 42 touh a pha teh buet touh hai hlung awh hoe h.

### *Kacawirae Ahab imthungkhunaw pueng a thei awh*

<sup>15</sup> Haw hoi a tâco hnukkhu, ama dawn hanlah ka tho e, Rekhab capa Jehonadab hah a hmu awh, a kut a man pouh teh ahni koe nang na tak daw k kalan e lungpouk ka tawn e patetlah na lung pouk alan vaimoe telah atipouh. Jehonadab ni ka lungpouk a lan doeh atipouh. Telah pawiteh na kut sin haw atipouh teh, a kut teh a dâw pouh. Ahnie leng dawkvah pou a kâenkhai. <sup>16</sup> Ahnimouh ni, kai koe tho leih. BAWIPA hanlah kâyawm e hah panuek van telah atipouh. Hahoi amae leng van a kâcui sak. <sup>17</sup> Samaria a pha awh toteh, Elijah koevah dei e BAWIPA e a lawk patetlah Samaria kaawm Ahab imthungkhunaw be a thei awh hoe h roukrak teh paloupalou a thei awh.

### *Baal kabawknaw a thei awh*

<sup>18</sup> Jehu ni taminaw pueng a kaw teh ahnimouh koe Ahab ni Baal e thaw hah a taw k rawkrak e doeh. Jehu ni pawiteh a taw k katang han doeh. <sup>19</sup> Hatdawkvah, Baal koevah, thuengnae kalen poung poe hanelah ka tawn. Pâhma e naw pueng teh apihai hring awh mahoe telah ati. Hatei Jehu ni Baal kabawknaw pueng hah thei hanlah, huenghai hoi a youk e doeh. <sup>20</sup> Jehu ni, Baal hanelah ka lentoe e, kamkhuengnae



pathang awh atipouh teh hot teh a pathung awh. <sup>21</sup> Jehu ni, Isarel ram pueng dawk a patawn teh, Baal kabawknaw pueng teh a tho awh. A pâhma e roeroe awm hoe, Baal bawkim dawk a kâen awh teh, Baal bawkipui teh imhmalah takhang koehai imhlei lah totouh yikkawi awh. <sup>22</sup> Kamthouppnae hnica ka khenyawnnaw koevah Baal kabawknaw pueng hah, kamthouppnae hni kâkhu sak awh ati. Hottelah kamthouppnae hnina hah a poe awh. <sup>23</sup> Jehu teh, Rekhah capa Jehonadab hoi Baal bawkim vah a kâen. Baal kabawknaw pueng koe awi hi vah Baal ka bawk hoe e Jehovah e tami kaawm payon vaimoe, tawng ei haw kahawicalah khei awh atipouh. <sup>24</sup> Hahoi thuengnae sak hane hoi hmaisawi thuengnae poe hanelah, a kâen awh. Jehu ni alawilah tami 80 touh a kangdue sak teh hete na kut dawk na poe awh e naw heh buet touh haiyah na hlout sak awh pawiteh a hringnae yueng lah na hringnae na sung awh han telah atipouh. <sup>25</sup> Hmaisawi thuengnae be a poe tahma vah hettelah doeh ao. Jehu ni ransabawi hoi a ransanaw koevah, kâen sin nateh, thet awh lawih. Buet touh boehai hlung han awh atipouh. Tahloi hai koug a tâtueng awh teh ransabawi hoi ransanaw ni he pâmit awh. Hahoi Baal bawkim a onae kho vah a cei awh. <sup>26</sup> Baal bawkim dawk kaawm e meikaphawk a la awh teh hmai a sawi awh. <sup>27</sup> Baal talung ung e hah, he a kayei pouh awh. Baal bawkim hah a raphoe awh teh, eim lah atu totouh a hno awh. <sup>28</sup> Hot patetlah, Jehu ni, Isarel ram hoi Baal teh he a kayei pouh. <sup>29</sup> Hatei Isarelnaw hah, ka payon sak e Nabat capa Jeroboam e a payonnae Bethel kho hoi Dan kho kaawm e sui maitocanaw hah pahnawt awh hoe. <sup>30</sup> BAWIPA ni, Jehu koevah ka mit daw kakupecalah na sak teh ka lung hoi ka pouk e patetlah Ahab imthungkhu daw k na sak dawkvah, na capanaw hah se pali totouh Isarelnaw e bawitungkhu daw k a tahung han atipouh. <sup>31</sup> Hatei, Jehu ni, Isarel BAWIPA Cathut, kâlawk teh na lungthin abuemlah, na tawm hoe dawkvah, Jeroboam ni Isarel yonnae a sak sak e yon hah kâhat awh hoe.

### *Jehu duenae*

<sup>32</sup> Hatnavah BAWIPA ni Isarel hnamthun takhai han a kamtawng toe. Hahoi teh, Hazeel ni, Isarelnaw pueng teh pou a tâ toe. <sup>33</sup> Jordan hoi Kanîtholae ram Gilead ramnaw pueng, Gad, Reuben, Manasseh, hoi Arnon yawn hoi Aroer hoi Gilead hoi Bashan ram totouh a tâ. <sup>34</sup> Jehu tawksaknae, thung daw k hoi kaawm rae naw pueng teh Isarel siangpahrangnaw e setouknae cauk daw k a thut awh nahoehmaw. <sup>35</sup> Hahoi Jehu teh a na mintoenaw koe a kâhat. Samaria vah a pakawp awh. A capa Zehoahaz ni a yueng lah a uk. <sup>36</sup> Hatnavah, Samaria vah Jehu ni Isarel kum 28 touh thung a uk.

## 11

### *Athaliah ni Judah a uk*

<sup>1</sup> Ahaziah manu, Athaliah ni a capa a due tie a thai toteh, a thaw teh siangpahrang imthungkhu râw kacoekungnaw hah be a thei. <sup>2</sup> Hatei Ahaziah capa Joash teh, Jehosheba ni siangpahrang capa a thei awh e thung daw k hoi a yawngkhai teh, ka khenyawnkung hoi inae imthungkhu vah, Athaliah ni a hmuhoehnae koe a hro pouh dawkvah, thet thai hoe. <sup>3</sup> Kum taruk touh thung Athaliah ni ram a uk yung lam, ahni hoi napui teh Bawipa e im vah a kâhro roi.



*Judah siangpahrang lah Joash bawilukhung a kâ muk sak awh*

<sup>4</sup> Kum 7 navah, Jehoiada ni Kereth taminaw hoi ka khenyawn e ransahu thung hoi ransabawi a kaw sak awh. BAWIPA im vah a kâenkhai awh teh, ahni koe lawkkamnae a sak awh. Bawipa im vah, thoebonae lawkkam hah a sak sak teh siangpahrang capa a khet sak awh. <sup>5</sup> Jehoiada ni, na sak awh hane teh hettelah doeh. Nangmouh koe Sabbath hnin ka tho e naw teh, pung thum pung touh ni siangpahrang im takhang na ring awh han. <sup>6</sup> Pung touh ni Sur takhang koe na o awh vaiteh, pung touh ni kataroukung e hnuklah kalupnae longkha koe kangangkung lah na o awh han.

<sup>7</sup> Nangmouh thung daw k phun hni touh sabbath hnin thaw ka taw k hoeh e ni siagpahrang teng vah BAWIPA e im a ring awh han. <sup>8</sup> Taminaw pueng ni, senehmaica koug patuep hoi siangpahrang petkâkalup lah na kalup awh vaiteh, tami bangpatet haiyah kalupnae thung vah kâen e teh na thei awh han. Hahoi siangpahrang ma teh, a tâco nah na kâ bang sin awh han telah kâ a poe awh.

<sup>9</sup> Ransabawi ni, vaihma Jehoiada koe kâpoelaw k a poe e patetlah a sak. Hahoi a uk awh e thung daw k hai sabbath hnin vah ka tho hane naw hoi ka ban hane naw hah a ceikhai teh vaihma Jehoiada koe a cei awh. <sup>10</sup> Vaihma ni ransanaw hah BAWIPA im kaawm e Devit e tahroe hoi bahling hah a poe awh. <sup>11</sup> Ramveng ransanaw ni senehmaica sin hoiyah im aranglah hoi avoilah totouh thueng e khoungroe hoi im rahak vah siangpahrang a kangdue teh a kalup awh.

<sup>12</sup> Hahoi siangpahrang capa teh a tâcokhai awh teh, bawilukhung kâ muk sak awh teh, lawkpanuesaknae hah a poe awh. Siangpahrang lah a sak awh teh satui a awi awh. Hahoi a kuttawng awh teh, siangpahrang a hring saw seh ati awh.

*Athaliah duenae*

<sup>13</sup> Hahoi ramveng ransanaw e a kamthang hoi taminaw pueng e a kamthang hah, Athaliah ni a thai to teh, BAWIPA im e tami moikapap koe vah a cei. <sup>14</sup> Napui ni a khet teh, khenhaw! siangpahrang ni Judahnaw e phung lah khomkung koe a kangdue. Ransabawinaw hoi, mongka kauengnaw hah siangpahrang teng a kangdue awh. Hote ram daw k e taminaw pueng teh a lung hroung ahawi awh. Mongka hai a ueng awh. Hahoi Athaliah ni a khohna a ravei teh youknae taran doeh, youknae taran doeh telah a oung <sup>15</sup> Vaihma Jehoiada ni, ransanaw thung daw k kacue lah a pouk awh e ransabawi hah kâlawk a poe teh ahni koe kountouknae thungup a rahim lah, alawilah tâcawtkhai awh. Ahni hnukkâ bang pueng teh tahloi hoi thei lah ao han telah ati. Bangkongtetpawiteh, vaihma ni, BAWIPA im vah napui hah thet hanh awh telah a dei toe. <sup>16</sup> Hahoi napui hah a man awh teh marang kâennae lam koe siangpahrang im vah ceinae koe haw vah a thei awh. <sup>17</sup> Jehoiada ni BAWIPA hai siangpahrang hoi tami moikapap e rahak vah, BAWIPA e tami lah ao thai nahan lawkkamnae a sak. Siangpahrang hoi tamimaya hmalah hai lawkkamnae a sak. <sup>18</sup> Hot ram daw k e tami naw pueng teh Baal bawkim a cei awh teh a raphoe awh. Thuengnae khoungroe hoi meikaphawknaw pueng te rekrek a hem awh. Baal e vaihma bawi Mattan hai thuengnae khoungroe koe a thei awh. Hahoi vaihma ni BAWIPA im ka ring hanelah thaw a poe. <sup>19</sup> Ransanaw hoi Kereth tami ka ring e ransanaw pueng hoi taminaw pueng a cei awh teh, BAWIPA im hoi siangpahrang im lah a ceikhai awh. Karingnaw e takhang koe lahoi a kâen awh teh siangpahrang im a ceikhai awh. Hahoi teh siangpahrang bawitungkhung daw k a tahung. <sup>20</sup> Hahoi teh hote ram



dawk e tami pueng a lunghawi awh. Khopui teh runae hmawt laipalah ao. Athaliah teh siangpahrang im vah tahloi hoi a thei awh. <sup>21</sup> Jehoash teh siangpahrang lah ao nah kum 7 touh doeh ka phat rah.

## 12

<sup>1</sup> Jehu a bawinae kum 7 navah, Jehoash teh siangpahrang lah ao. Jerusalem vah kum 40 touh a uk, a manu min teh Zibiah Beersheba kho e tami doeh. <sup>2</sup> Vaihma, Jehoiada ni Jehoash a pâtu nathung pueng teh BAWIPA mithmu vah, hawinae hah ouk a sak. <sup>3</sup> Hatei hmuenrasang lah puen kalawn hoeh. Hmuenrasang dawk tami moikapap ni Cathut thuengnae hmuítui a sawi awh.

### *Jehoash ni bawkim a pathoup*

<sup>4</sup> Jehoash ni vaihmanaw koe BAWIPA im vah kâenkhai e hno kathoung ratangnae, hnopainaw pueng, milu touk tangcoungnaw koe kacetnaw pueng hanelah, khoe lah kaawm e kâratangnae hnonaw hoi bangpatet e tami ni BAWIPA im vah a ceikhai teh a pasoung awh e naw hah, <sup>5</sup> vaihmanaw ni, amamae a uk awh e thungup lat van naseh. Bawkim a rawknae hmuen tangkuem koe rem awh naseh atipouh. <sup>6</sup> Hatei siangpahrang Jehoash teh kum 23 touh a bawi nakunghai vaihmanaw ni bawkim ka rawk e naw heh pathoup kalawn awh hoeh. <sup>7</sup> Hottelah siangpahrang Jehoash ni vaihma Jehoiada hoi vaihma alouknaw hah a kaw teh, ahnimouh koe, bangkongmaw bawkim ka rawk e hmuennaw hah na pathoup awh hoeh. Atu hoi teh, na uknae thung e tami koe e tangka lat awh hanh lawih. Bawkim ka rawk e pathoup nahanlah poe awh lawih telah a ti.

<sup>8</sup> Vaihmanaw ni hai ayânaw koe tangka toung laipalah, bawkim ka rawk e hai pathoup hoeh hanelah a hnâbo awh. <sup>9</sup> Hot patetlah, vaihma Jehoiada ni thingkongca a la teh, a khuem hah a paawng. BAWIPA im kâennaw aranglah thuengnae khoungroe teng vah a tâ teh a sin awh e tangkanaw pueng hah, takhang ka ring e vaihma ni paloupalou a ta pouh. <sup>10</sup> Hahoi teh hettelah doeh. Thingkong dawk tangka apap toe tie a panue awh toteh, siangpahrang e cakathutkung hoi vaihma kacue ni, a ceikhai teh BAWIPA im vah tangka kaawm e pueng a touk awh. <sup>11</sup> A touk awh e tangka teh thaw katawknaw, BAWIPA im kasakkungnaw, imsakkathoumnaw e kut phu, talung kadeinaw hoiyah talung katâcawtsaknaw e kut phu hoi, <sup>12</sup> Bawipa e Bawkim ka rawk e naw pathoup nahanlah thing hoi talung kuennae hoi im a rawknae koe, a pankinae hmuen pueng koe a hno awh.

<sup>13</sup> Hatei BAWIPA imthungkhu tangka a sin awh hoi BAWIPA im hanlah, ngun, rahum, hoi hmai paduena hoi Ailo ka dung hoi mongka hoi suihlaamnaw, ngunhlaamnaw hah hote tangka hoi sak hoeh. <sup>14</sup> Hatei, thaw katawkkungnaw ouk a poe awh teh BAWIPA e im pathoup nahanlah a hno awh. <sup>15</sup> Thaw katawkkungnaw, poe hanlah tangka a kuem sak awh e naw hoi kuekluek parei pouh hoeh toe. Bangkongtetpawiteh, yuemkamculah a tawk awh. <sup>16</sup> Kâtapoe thuengnae tangka hoi yon thuengnae tangka teh BAWIPA im dawk kâen sak a hoeh. Hot teh vaihmanaw e ham doeh.

### *Hazael ni Jerusalem he a kâkawn*

<sup>17</sup> Siria siangpahrang Hazael ni, Gath a tuk. Be a la hnukkhu Hazael teh Jerusalem ban hanlah a noe. <sup>18</sup> Judah siangpahrang Jehoash ni a na pa hoi Jehoshaphat hoi Jehoram hoi Ahaziah tinaw ni ouk a poe awh e kathounge



hnonaw pueng, amamouh ni thoung sak awh e hnonaw hoi BAWIPA im kaawmnaw pueng hoi siangpahrang im vah kaawm, suinaw pueng a la awh teh, Siria siangpahrang Hazael a patawn awh. Hahoi teh Jerusalem a kamlang takhai awh.

<sup>19</sup> Hot patetlah, Joash a tawksaknae naw thung dawk e kaawm rae naw, a sakyoe e naw pueng teh Judah siangpahrang setouknae cauk dawkvah kOUNg thut lah ao nahoehmaw. <sup>20</sup> Hahoi a taminaw a thaw awh teh a kâcoun awh. Joash teh Silla lah ceinae lam, Millo im vah, a hem awh teh a thei awh. <sup>21</sup> A san Shimeath capa Jozakhar koevah, Devit khopui dawk a pakawp awh teh a capa Amaziah teh a yueng lah a bawi.

## 13

### *Isarel siangpahrang Jehoahaz*

<sup>1</sup> Judah siangpahrang Ahaziah capa Joash a bawinae kum 23 navah, Jehu capa Jehoahaz teh Isarelnaw koe vah Samaria siangpahrang tawk a kamtawng hoi kum 17 touh a uk. <sup>2</sup> BAWIPA mithmu vah kahawihoehe hno ouk a sak. Isarel ka payonsakkung Nebat capa Jeroboam yonnae hah ouk a sak teh cettakhai hoeh. <sup>3</sup> BAWIPA lungphuenna Isarel koe a kân teh, Siria siangpahrang Hazael kut hoi Hazael capa Benhadad kut dawk pou a poe.

<sup>4</sup> Jehoahaz ni BAWIPA koe pou a kâhei teh, BAWIPA ni a lawk hah a ngai pouh. Bangkongtetpawiteh, Isarelnaw repcOUNgroe dawkvah Siria siangpahrang ni repcOUNgroe e naw hah pou a hmu. <sup>5</sup> Hahoi teh, BAWIPA ni Isarelnaw hah ka rungngangkung a poe awh. Hahoi Siria kut dawk hoi a tâco awh. Yampa e patetlah Isarelnaw teh, amamouh im vah lungmawng-calah ao awh. <sup>6</sup> Hatei Isarel kapayonsakkung Jeroboam imthungkhunaw yonnae hah ceitakhai laipalah, pou a sak dawkvah, Samaria kho vah thingmeikaphawk hah pou ao rah. <sup>7</sup> Bangkongtetpawiteh, Jehoahaz ni a taminaw thung dawkvah marangransanaw 50 touh hoi leng 10 touh, ransa 10, 000 touh dueng doeh a tawn. Bangkongtetpawiteh, Siria siangpahrang ni, be a raphoe pouh teh, cangkatinnae vaiphu mungpOUNg e patetlah doeh a kayei awh.

<sup>8</sup> Jehoahaz tawksaknae hoi hnosakthainae naw teh Isarel siangpahrang-naw, setouknae cauk dawkvah be thut lah ao nahoehmaw. <sup>9</sup> Jehoahaz teh a na mintoenaw koe a kâhat teh, Samaria vah a pakawp awh. A capa Johash ni a yueng lah a uk.

### *Jehoash ni Isarel a uk*

<sup>10</sup> Judah siangpahrang Joash a bawi kum 37 navah Jehoahaz capa Jehoash teh Samaria vah, Isarel siangpahrang lah bawi a kamtawng teh, kum 16 touh a uk awh. <sup>11</sup> BAWIPA mithmu vah hawihoehnae a sak. Isarel kapayonsakkung Nebat capa Jeroboam yonnae naw cettakhai laipalah pou a sak awh rah.

<sup>12</sup> Joash tawksaknae thung dawk hoi kaawm rae pueng hoi a sak e naw pueng teh Judah siangpahrang Amaziah a tuk nah e hnosakthainae naw pueng teh, Isarel siangpahrangnaw setouknae cauk dawkvah thut lah ao nahoehmaw. <sup>13</sup> Joash teh a na mintoenaw koe a kâhat teh, Jeroboam teh a bawitungkhung dawk a tahun. Joash teh Samaria kho Isarel siangpahrangnaw koe a pakawp awh.

### *Elisha a duenae*



<sup>14</sup> Elisha teh a duekhai hane patawnae hoi a pataw toe. Hahoi Isarel siangpahrang Joash teh ahni koe a cei teh a ka khai Apa Apa Isarel rangleng hoi marangransanaw lah na o atipouh. <sup>15</sup> Elisha ni na lilava lat haw atipouh. A lilava hah a la. <sup>16</sup> Isarel siangpahrang koe na licung hah kuen haw atipouh teh a licung hah a kuet. Elisha ni siangpahrang kut dawkvah a kut hah a toung. <sup>17</sup> Kanitholae hlalangaw paawng haw atipouh teh a paawng pouh. Elisha ni, ka haw, atipouh teh a ka. Ahni ni BAWIPA tânae senehmaica, sirianaw tânae senehmaica doeh ka tho. Bangkongtetpawiteh, Aphek kho vah Sirianaw, be a rawk hoehroukrak na tâ han atipouh.

<sup>18</sup> Hahoi teh, na samtang hah lat haw bout atipouh teh a la. Isarel siangpahrang koevah talai hem haw atipouh navah, vai thum touh a hem. <sup>19</sup> Cathut e tami teh ahni koe a lungphuén. Vai panga vai taruk tabang na hem vai lah, Sirianaw teh be a mit totouh na tâ awh han ei. Hatei Sirianaw hah vai thum touh dueng doeh na tâ awh han tinae doeh toe atipouh.

<sup>20</sup> Elisha teh a due hoi a pakawp awh. Kawmpoi tue a pha toteh Moabnaw ni Isarel naw teh a tuk awh. <sup>21</sup> Tami buet touh pakawp han ati awh navah, Khenhaw! ransahu lawt a hmu awh. Hatdawkvah, hote ro hah Elisha e tangkom dawk pum a pabo awh. Hote ro ni Elisha hru a kâbet tahma a hring teh amae khok dawk a kangdue.

### *Isarel ni, Siria koe khopui hah bout a la*

<sup>22</sup> Siria siangpahrang Hazael ni, Jehoahaz se navah Isarel hah, pou a hnep awh. <sup>23</sup> Hatei, BAWIPA ni, Abraham hoi Isak, Jakop koe lawk a kam dawkvah ahnimouh teh, a pahren, a lungma awh teh a ngaikhai awh. Ahnimouh teh raphoe ngai hoeh ni teh ama koehoi tâkhawng ngai hoeh.

<sup>24</sup> Siria siangpahrang Hazael teh a due toe. A capa Benhadad ni a yueng lah a uk. <sup>25</sup> Jehoahaz capa Jehoash ni, Hazael capa Benhadad ni, a na pa Jehoahaz hah a tâ teh kho a la pouh e naw hah Joash ni vai thum touh a tâ teh Isarel khopui hah bout a la.

## 14

### *Amaziah ni Judah a uk*

<sup>1</sup> Isarel siangpahrang Jehoahaz capa Joash a bawinae kum hni navah, Judah siangpahrang Joash capa Amaziah teh siangpahrang nueng kamtawng. <sup>2</sup> A kum 25 nah uk han nueng a kamtawng teh, Jerusalem vah kum 29 touh a uk. A manu min teh Jehoaddin, Jerusalem tami doeh. <sup>3</sup> BAWIPA mithmu vah kalan e hno hah ouk a sak. Hatei Devit hoi teh kâvan hoeh. A na pa Joash ni a sak e hah ouk a sak. <sup>4</sup> Hatei hmuen ka rasang lah phat thai hoeh. A hmuenrasang koevah taminaw pueng ni, thuengnae sak awh teh, hmutui hoi hmaisawinae a sak awh.

<sup>5</sup> A uknaeram a caksak tahma vah, a tami hoi a na pa siangpahrang kathetnaw hah toungloun a thei. <sup>6</sup> Hatei Mosi cauk dawkvah, canaw kecu dawk na pa naw na thet ama hoeh. Napanaw kecu dawk canaw thet mahoe. Tami pueng ma yon kecu dawk due han telah BAWIPA ni kâ a poe e patetlah ayâ ka thet e canaw thet thet hoeh. <sup>7</sup> Edomnaw teh palawi yon dawk 10, 000 touh a thei awh. Sela naw a tuk awh teh a la awh. A min lavah Joktheel telah ati awh teh, atu totouh pou atipouh awh. <sup>8</sup> Amaziah ni, Isarel siangpahrang Jehu capa Jehoahaz ca, Jehoash koevah, tho haw, minhmai rek kâhmo lah, kâkhen sei telah patounenaw a patoun.



<sup>9</sup> Isarel siangpahrang Jehoash ni Judah siangpahrang Amaziah koevah, Lebanon mon e pâkhing ni, Lebanon mon e sumpa thing koevah, na canu hah ka capa e yu lah lat sak haw telah lawk a thui. Hahoi Lebanon mon e saringnaw a tho teh, pâkhing teh kOUNg a katin awh. <sup>10</sup> Edomnaw hah na tâ teh, na lung na kârasang sak awh. Bawilennae na hmu e teh nama im awm khaih. Bangkongtetpawiteh, nang nama hai na teng kaawm Judahnaw hanelah tâlaw sak vaiteh rucatnae, kâhmo sak hanlah nang ni na nout vaw atipouh. <sup>11</sup> Hatei, Amaziah ni hote teh ngai pouh hoe. Hahoi Isarel siangpahrang Jehoash teh a takhang, Judah siangpahrang Amaziah hoi Judah ram, Bethshemesh vah, minhmai rek kâhmo lah a kâkhet awh katang. <sup>12</sup> Judah teh Isarelnaw ni a tâ teh, tami pueng amamouh im vah lengkaleng a yawng awh. <sup>13</sup> Isarel siangpahrang Jehoash ni Judah siangpahrang Amaziah capa Jehoash capa, Amaziah ni Bethshemesh a thei. Jerusalem vah a cei teh Jerusalem kalupnae rapan teh, Ephraim kalupnae longkha koehoi rapan kalupnae takin longkha koe totouh a dong cumpali touh a raphoe pouh. <sup>14</sup> BAWIPA im hoi siangpahrang im vah a ta awh e, râw sui hoi ngun, hlaam, kaawm e naw pueng hoi cawngket e naw pueng he a la pouh teh Samaria kho a ban.

### *Jehoash duenae*

<sup>15</sup> Jehoash tawksaknae kaawm rae pueng hoi a hno sakthainae hoi Judah siangpahrang Amaziah, a tuknae kongnaw teh, Isarel siangpahrangnaw setouknae cauk dawkvah be thut tOUNg nahoehmaw. <sup>16</sup> Jehoash teh amae mintoenaw koe a kâhat teh Samaria kho Isarel siangpahrangnaw koe a pakawp awh. Hahoi a capa Jeroboam ni a yueng lah a uk. <sup>17</sup> Judah siangpahrang Joash e capa Amaziah teh Isarel siangpahrang Jehoahaz capa Jehoash a due hnukkhu kum 15 touh a hring. <sup>18</sup> Hahoi Amaziah tawksaknae thung daw k hoi kaawm rae naw teh, Judah siangpahrangnaw setouknae cauk daw k thut lah ao nahoehmaw. <sup>19</sup> Jerusalem kho vah, Amaziah thei hanlah a dum awh dawkvah Amaziah teh Lakhish vah a yawng, hatei Lakhish vah tami a pâlei sak teh haw vah a thei awh. <sup>20</sup> A ro teh marang daw k hoi a ceikhai awh teh, a na mintoenaw koe Devit khopui Jerusalem vah a pakawp awh.

<sup>21</sup> Hahoi Judahnaw pueng ni, kum 16 touh ka phat e Azariah hah a ceikhai awh teh, a na pa Amaziah yueng lah, siangpahrang lah a sak awh.

<sup>22</sup> Ahni ni Elath kho hah a pathoup teh Judah ram daw k a kâen sak. Hahoi siangpahrang teh a na mintoenaw koe a kâhat.

### *Jeroboam ni Isarel a uk*

<sup>23</sup> Judah siangpahrang Joash capa Amaziah siangpahrang lah a onae kum 15 nae dawkvah, Isarel siangpahrang Joash capa, Jeroboam teh Samaria vah siangpahrang lah ao teh, kum 41 touh a uk. <sup>24</sup> BAWIPA mithmu vah hawioehnae ouk a sak. Isarel ka payon sakkung, Nebat capa Jeroboam yonnae naw, cettakhai thai awh hoe.

<sup>25</sup> Isarel BAWIPA Cathut ni a san Gathhepher tami Amittai capa profet Jonah hno lahoi lawk a dei e patetlah Hamath kâennae koehoi, Arabah tali totouh Isarel ram lah bout a pakhum awh. <sup>26</sup> Bangkongtetpawiteh, BAWIPA ni Isarel a khang awh e naw hah ka pataw poung lah a panue pouh. San thoseh, kahlout e thoseh, Isarelnaw kabawmkung pihai awm hoe. <sup>27</sup> BAWIPA ni, Isarel min heh, kalvan rahim vah be a pahma han tie teh dei hoe. Hatei Joash capa Jeroboam hno lahoi letlang a rungang.



<sup>28</sup> Hot patetlah, Jeroboam e kêroekâkhawinae thung dawk hoi kaawm rae naw teh, a hnosakthainae naw hoi, tarantuknae kong hoi, ha hoehnahlan, Judah ram kapangnaw lah mek touksin e naw, Damaskas hoi Hamath, Isarel naw han a lanaw kongnaw teh, Isarel siangpahrangnaw setouknae cauk dawk pakhum lah ao nahoehmaw. <sup>29</sup> Jeroboam teh a na mintoenaw, Isarel siangpahrangnaw koevah, a kâhat teh, a capa Zekhariah ni ahnie yueng lah a uk.

## 15

### *Azariah ni Judah a uk*

<sup>1</sup> Isarel siangpahrang Jeroboam kum 27 a bawi kum vah, Judah siangpahrang Amaziah capa Azariah teh siangpahrang lah ao. <sup>2</sup> Siangpahrang lah ao nah kum 16 touh boung a pha. Jerusalem vah kum 52 touh a uk. A manu min teh Jekoliah, Jerusalem tami doeh. <sup>3</sup> A na pa Amaziah ni a sak e pueng a sak van teh, BAWIPA mithmu vah hawinae ouk a sak. <sup>4</sup> Hatei hmuenrasang koe lah teh kampuen thai hoeh. Hmuenrasang koe teh tami ni thuengnae a sak awh teh, hmuittui ouk a thueng awh rah.

<sup>5</sup> BAWIPA ni siangpahrang a hem teh, a due hnin totouh hrikbei a tawn sak teh, im louk lah ao. Hahoi siangpahrang capa Jotham teh, a ram daw koe taminaw e lawk a ceng pouh teh, imthungkhu daw kahrwakung lah ao.

<sup>6</sup> Azariah, tawksaknae thung daw koe hoi kaawm rae hoi a sakyoe e pueng teh, Judah siangpahrang, setouknae cauk dawkvah thut lah ao nahoehmaw. <sup>7</sup> Azariah teh, a na mintoenaw koe a kâhat teh a na mintoenaw koe, Devit khopui daw k a pakawp awh. Hahoi a capa Jotham ni a yueng lah a uk.

### *Zekhariah ni Isarel a uk*

<sup>8</sup> Judah siangpahrang Azariah kum 38 a bawi kum navah, Jeroboam capa Zekhariah teh, Samaria vah thapa yung taruk touh a bawi. <sup>9</sup> A na minnaw ni a sak awh e hno kahawihoehe hah BAWIPA mithmu vah a sak. Isarel kapayonsakkung Nebat capa Jeroboam yonnae hah cettakhai awh hoeh.

<sup>10</sup> Jebesh capa Shallum ni, ahni hah a dum, maya hmalah a thei teh a yueng lah ama ni a uk. <sup>11</sup> Zekhariah tawksaknae daw koe hoi kaawm rae teh, khenhaw! Isarel siangpahrangnaw setouknae cauk dawkvah a thut awh nahoehmaw. <sup>12</sup> Hot teh BAWIPA ni Jehu koevah na capanaw teh a se, se pali touh bawitungkhung daw k a tahung han, telah a dei e patetlah khoup akuap tangngak.

### *Shallum ni Isarel a uk*

<sup>13</sup> Judah siangpahrang Uziah a bawi kum 39 navah, Jebesh capa Shallum teh siangpahrang lah ao. Samaria vah thapa yung touh a uk. <sup>14</sup> Gadi capa Menahem teh Tirzah hoi a takhang teh, Samaria vah a cei. Jebesh capa Shallum teh Samaria vah a thei awh teh, a yueng lah ama ni a uk. <sup>15</sup> Hot patetlah Shallum tawksaknae thung hoi kaawm rae teh kâyawmnae naw pueng teh Isarel siangpahrang setouknae cauk daw k thut lah ao toe.

<sup>16</sup> Hot patetlah, Menahem ni, Tirzah hoi Tiphshah totouh hoi a thung kaawmnaw pueng hoi a ramnaw hah a tuk pouh. Bangkongtetpawiteh amamouh kâhmoun ngai awh hoeh. Athung vah camo kavawnnaw hai a paset pouh awh.

### *Menahem ni Isarel a uk*



<sup>17</sup> Judah siangpahrang Azariah a bawi kum 39 navah, Gadi capa Menahem teh Isarelnaw koe siangpahrang lah ao. Samaria vah kum 10 touh a uk awh. <sup>18</sup> BAWIPA mithmu vah hawihoeahnae hah ouk a sak. Isarel kapayonsakkung Nebat capa Jeroboam e yonnae naw a hringyunglam ceitakhai awh hoeh. <sup>19</sup> Assiria siangpahrang Pul ni a ram a tuk teh a uknaeram teh kacakcalah a tawn awh thai nahan Menahem ni Pul teh tangka talen 1000 a poe. <sup>20</sup> Menahem ni Assiria siangpahrang poe hanelah, Isarel tami athakaawme ni teh katawntanaw pueng koe tangka shekel 50 touh a cawng teh, hahoi Assiria siangpahrang awm laipalah let a ban.

<sup>21</sup> Hahoi Menahem tawksaknae dawh hoi kaawm rae teh, a sakyoe e naw pueng teh, Isarel siangpahrang setouknae cauk dawh be thut lah ao nahoehmaw. <sup>22</sup> Menahem teh a na mintoenaw koevah a kâhat teh, a capa Pekahiah ni a yueng lah a uk.

### *Pekahiah ni Isarel a uk*

<sup>23</sup> Judah siangpahrang Azariah a bawi kum 50 navah, Menahem capa Pekahiah teh, Samaria vah Isarel siangpahrang lah ao teh kum hni touh a uk. <sup>24</sup> BAWIPA mithmu vah thoenae a sak. Isarel kapayonsakkung Nebat capa Jeroboam yonnae hah ceitakhai hoeh.

<sup>25</sup> Ransabawi, Remaliah capa Pekah ni ahni teh pouk a youk teh Samaria e siangpahrang im rapan thung vah Argob hoi Arieah mek a thei. Hatei, Gileadnaw 50 touh a bawh awh. Hahoi Pekah teh a thei awh teh, a yueng lah ama ni roup a uk <sup>26</sup> Hahoi Pekah e tawksaknae dawh hoi kaawm rae teh, a sakyoe e naw pueng teh khenhaw! Isarel siangpahrang setouknae cauk dawh be thut lah ao nahoehmaw.

### *Pekah ni Isarel a uk*

<sup>27</sup> Judah siangpahrang Azariah a bawi kum 52 navah Remaliah capa Pekah teh Samaria vah Isarel siangpahrang lah ao teh kum 20 touh a uk. <sup>28</sup> BAWIPA mithmu vah thoenae a sak. Isarel kapayonsakkung Nebat capa Jeroboam yonnae cettakhai awh hoeh.

<sup>29</sup> Isarel siangpahrang Pekah ni a uk navah Siria siangpahrang Tiglath-pileser ni Ijon, Abelbethmaakah, Janoah, Kadesh, Hazar, Gilead, Galilee ramnaw hoi Naphtali ramnaw pueng a la teh Assiria ram san lah a hrawi awh. <sup>30</sup> Elah capa Hosi ni, Remaliah capa Pekah teh pouk a youk teh a thei. Uziah capa Jotham a bawi kum 20 touh navah a yueng lah a uk. <sup>31</sup> Pekah tawksaknae dawh hoi kaawm rae, a sakyoe e naw pueng teh khenhaw! siangpahrangnaw setouknae cauk dawh a pakhum awh nahoehmaw.

### *Jotham ni Judah a uk*

<sup>32</sup> Isarel siangpahrang Remaliah capa Pekah a bawi kum 2 navah, Judah siangpahrang Uziah capa Jotham teh siangpahrang lah ao. <sup>33</sup> Siangpahrang lah ao nah kum 25 touh nueng a pha. Jerusalem vah kum 16 touh a bawi. A manu min teh Jerusha, Zadak canu doeh. <sup>34</sup> A na pa Uziah ni a sak e tangkuem a sak dawkvah, BAWIPA mithmu vah hawinae ouk a sak. <sup>35</sup> Hatei hmuenrasang teh takhoe hoeh. Hmuenrasang koe teh tami ni thuengnae a sak awh teh hmuittui hah hmai a sawi awh. BAWIPA im a Lathueng Pong takhang a sak awh.

<sup>36</sup> Hot patetlah, Jotham tawksaknae dawh kaawm rae teh, Judah siangpahrangnaw setouknae cauk dawh pakhum e lah ao nahoehmaw. <sup>37</sup> Hote tueng dawh Siria siangpahrang Rezin hoi Remaliah capa Pekah teh Judahnaw tuk hanlah BAWIPA ni patoun hanlah a kamtawng. <sup>38</sup> Jotham



teh mintoenaw koe a kâhat. A na mintoenaw koe a na min Devit kho vah a pakawp awh. Hahoi a capa Ahaz ni a yueng lah a uk.

## 16

### *Ahaz ni Judah a uk*

<sup>1</sup> Remaliah capa Pekah, a bawi nah kum 17 navah, Judah siangpahrang Jotham capa Ahaz teh siangpahrang lah ao. <sup>2</sup> Ahaz teh siangpahrang a tawh nah kum 20 touh a pha. Jerusalem kum 16 touh a uk. A na pa Devit patetlah BAWIPA Cathut mithmu vah hawinae sak laipalah, Isarelnaw ni a dawn awh e lam hah a dawn. <sup>3</sup> BAWIPA ni Isarelnaw hmalah a pâlei e miphunnaw ni panueththopoung e hno ouk a sak e patetlah a capanaw hah hmai hoi thuengnae a sak awh. <sup>4</sup> Hmuenrasang hoi mon tangkuem hoi thingkung rahim tangkuem vah, thuengnae a sak awh teh, hmuitui hmai a sawi awh.

<sup>5</sup> Hot patetlah, Siria siangpahrang Rezin hoi Isarel siangpahrang Remaliah capa Pekah teh, Jerusalem tuk hanlah a kamthaw teh, Ahaz hah king a kalup awh eiteh, tâ awh hoeh. <sup>6</sup> Hote tueng navah, siangpahrang Rezin ni Elath teh Siria ram hanlah, bout a la. Judahnaw Elath hoi a pâlei awh teh, Sirianaw hah Elath vah a cei awh teh, atu totouh haw vah kho a sak awh.

<sup>7</sup> Ahaz ni Siria siangpahrang Tiglath Pileser koevah na san hoi na capa lah nahoehmaw ka o, kai tuk hanlah ka tho e Siria siangpahrang hoi Isarel siangpahrangnaw e kut dawh hoi na rungngang haw, ti teh patounenaw a patoun.

<sup>8</sup> Ahaz ni BAWIPA im e suingun kaawmnaw pueng siangpahrang im vah pâtung e râwnaw hai a la teh, Siria siangpahrang koevah ayawmlah a patawn. <sup>9</sup> Assiria siangpahrang ni a dei e hah a tang teh, Damaskas kho a tuk teh a la. A taminaw hah Kir ram vah san lah a hrawi awh teh Rezin hah a thei awh.

<sup>10</sup> Siangpahrang Ahaz teh, Siria siangpahrang Tiglath Pileser kâhmo hanlah, Damaskas kho vah a cei teh, Damaskas kho e thuengnae khoun-groe hah a hmu. Hot patetlah siangpahrang Ahaz ni, hote khoun-groe e a meilam teh a sak e boiboe lah a khetkhai vaiteh, sak van hanlah, vaihma Urijah koevah a mei hah a patawn. <sup>11</sup> Vaihma Urijah, ni thuengnae khoun-groe teh a sak hoi siangpahrang Ahaz ni, Damaskas kho hai a patawn awh e boiboe lah, vaihma Urijah ni Damaskas kho hai Ahaz siangpahrang a pha hoehnahlan a la cum toe. <sup>12</sup> Damaskas kho hoi siangpahrang a pha toteh, siangpahrang ni thuengnae khoun-groe teh a hmu. Siangpahrang ni thuengnae khoun-groe a pâtam teh a van vah a luen. <sup>13</sup> Thuengnae dawkvah, hmaisawi thuengnae hai a poe. Tavai thuengnae hai a poe. Nei thuengnae hah a awi teh, roum thuengnae thi hah a awi sin. <sup>14</sup> Hahoi BAWIPA hmalah, rahum khoun-groe, khoun-groe hoi BAWIPA im rahak kaawm e, im hmalah kaawm e hah a puen awh teh, khoun-groe e atung lah a ta.

<sup>15</sup> Siangpahrang Ahaz ni ka len e khoun-groe katha thuengnae dawkvah, amom lah, hmaisawi thuengnae, tangmin lah tavai thuengnae siang-pahrang hmaisawi thuengnae, tavai thuengnae, nei thuengnae pueng hai hmaisawi nateh poe lawih. Hahoi a van vah, hmaisawi thuengnae pueng hoi thuengnae thinaw pueng haiyah, na kahei sin han. Rahum khoun-groe teh ka bawh nahanelah ao han, vaihma Urijah hah kâ a poe. <sup>16</sup> Hot patetlah, vaihma Urijah ni, siangpahrang kâ poe patetlah a sak.



<sup>17</sup> Hahoi siangpahrang Ahaz ni rahum khoungröe ca hah a takhoe teh maroi hai a tahrüet. Rahum tuiim hai rahum maito van hai a la teh talung van a pâhung. <sup>18</sup> Assiria siangpahrang kecu dawkvah, sabbath hnin hanlah, lempu padi e lam siangpahrang imthungkhu vah sak e hoi, siangpahrang hanlah a lawilah hoi kâennae BAWIPA im koehoi a puen awh.

### *Ahaz duenae*

<sup>19</sup> Ahaz tawksakna kaawm rae teh, Judah siangpahrangnaw e setouknae cauk dawk koug thut lah ao nahoehmaw. <sup>20</sup> Ahaz teh a na mintoenaw koe a kâhat. Devit kho thung, a na mintoenaw koe a pakawp awh, hahoi a capa Hezekiah ni a yueng lah a uk.

## 17

### *Hosi ni Isarel a uk*

<sup>1</sup> Judah siangpahrang Ahaz, a bawinae kum 12 navah, Elah capa, Hosi teh Isarelnaw koe Samaria vah siangpahrang lah ao teh kum 9 touh a uk. <sup>2</sup> BAWIPA mithmu vah thoenae ouk a sak. Hatei a yon e Isarel siangpahrangnaw ma patetlah teh sak hoe. <sup>3</sup> Assiria siangpahrang Shalmaneser ni a tuk teh, Hosi teh Salmaneser e san lah ao teh kum tangkuem tamuk a poe. <sup>4</sup> Hathnukku hoi kum tangkuem a poe e tamuk hah poe hoe. Izip siangpahrang So koe vah patounenaw a patoun teh, ahnimouh youk hanelah pouknae hah, Assiria siangpahrang ni a panue dawkvah, Hosi teh a man awh teh thawng pabo awh.

### *Assiria vah Isarel san lah a hravi awh*

<sup>5</sup> Assiria siangpahrang Shalmaneser ni, Isarel ram a tuk teh Samaria khopui kum thum touh thung koug a kalup. <sup>6</sup> Hosi a bawinae kum 9 navah, Assiria siangpahrang ni Samaria hah a la. Isarelnaw teh Assiria vah a ceikhai awh teh Halah ram hoi Gozan ram, Harbor palang teng Midiannaw e kho dawk ao sak awh.

<sup>7</sup> Hot patetlah a onae teh, Isarelnaw ni Izip siangpahrang Faro kut dawk hoi Izip ram hoi katâcawtkhaikung Jehovah Cathut koe vah yonnae a sak awh teh alouke cathut hah alawkpui lah a pouk awh dawk doeh. <sup>8</sup> BAWIPA ni, Isarelnaw hmalah a pâlei pouh e miphunnaw e phunglawk hah, Isarel siangpahrang ni a tarawi dawkvah hote phunglam patetlah kho a sak awh dawk doeh. <sup>9</sup> Isarelnaw ni BAWIPA Cathut koe thoenae hah, arulahoï meng a sak awh dawkvah a khonaw pueng dawk ramveng imrasang koehoi kamtawng teh rapan ka tawn e kho totouh hmuenrasang a sak awh. <sup>10</sup> Mon karasang pueng hoi thingkung tâhlip vah talung a ung awh teh thing dawk meikaphawk hah a sak awh. <sup>11</sup> Hahoi hmuenrasang pueng koe, BAWIPA ni a hmalah a pâlei e miphunnaw ni a sak awh e patetlah hmutui hah hmai hoi a sawi awh teh, BAWIPA lungphuen sak hanelah thoenae a sak awh. <sup>12</sup> Bangkongtetpawiteh, BAWIPA ni ahnimouh koe hete hno heh na sak awh mahoeht ati e meikaphawk thaw na tawk awh. <sup>13</sup> Hot um hoi hai BAWIPA ni na yonnae kamlang takhai awh. Na mintoenaw ka poe e kâpoelawknaw hoi phunglawknaw pueng ka san profet ka patoun e naw ni a dei awh patetlah a profetnaw hoi kahmawtkungnaw hno lahoi a panue sak awh.

<sup>14</sup> Hatei, ngai pouh hoe teh, a na mintoenaw ni, BAWIPA Cathut yuem ngai laipalah, a lunglen awh e patetlah a lungpata sak awh. <sup>15</sup> A phunglam hoi a na mintoenaw koe a lawkkam ahnimouh koe a panue



sak e lawk hah, banglahai noutna awh hoeh teh cungkeihoehnaw a panki awh teh, banglahai yah tho kalawn hoeh. Ahnimouh kong dawk BAWIPA ni hot patetlah sak van awh hanh telah a dei tangcoung e hah, a teng kaawm e miphunnaw ni a sak awh e patetlah a kamtu awh. <sup>16</sup> BAWIPA Cathut e kâpoelawknaw pueng hah, a hnamthun takhai awh teh, maitoca meikaphawk kahni touh a sak awh. Kalvan e kaawmnaw pueng hah a bawk awh. Baal thaw a tawk awh. <sup>17</sup> A lungphuennae a kâan sak nahanelah, a canu a capanaw hah, hmai hoi thuengnae a sak awh. Camthoumnaw hoi taân a sin awh teh, BAWIPA mithmu thoenae sak hanelah ka yo awh.

<sup>18</sup> Hatdawkvah, BAWIPA teh Isarelnaw koe a lungphuen poung teh a hmaitung hoi a takhoe awh. Bangkongtetpawiteh, Judah miphun hloilah kacawie awm hoeh toe. <sup>19</sup> Judahnaw ni hai BAWIPA Cathut e kâpoelawknaw a tarawi awh hoeh teh Isarel phunglam hah a dawn awh. <sup>20</sup> BAWIPA ni Isarel catounnaw hah a pahnawt teh a mithmu vah he kahmat lah a puen hoehroukrak a rek teh ahni katuknaw kut dawk a poe.

<sup>21</sup> Isarel teh Devit imthung dawk hoi a phen teh hahoi Nebat capa Jeroboam hah siangpahrang lah a la awh. Jeroboam ni Isarelnaw e BAWIPA lam a dawn e hah lam a phen sak teh kalenpounge yonnae hah a sak sak awh. <sup>22</sup> Isarel catounnaw ni Jeroboam ni a sak e yonnae hah a sak awh. Hote hnonaw pueng teh, BAWIPA ni a profetnaw hno lahoi a dei pouh tangcoung patetlah a hmuhoehnae hmuen koe he a takhoe hoehroukrak cettakhai hoeh toe. <sup>23</sup> Hahoi Isarelnaw teh, amamouh ram koehoi Assiria ram vah a hrawi teh atu totouh ao awh.

### *Assirianaw, Samaria vah ao awh*

<sup>24</sup> Assiria siangpahrang ni, Babilon Kuthah, Ivvah, Hamath, Sepharvaim, hoiyah khocanaw a thokhai teh, Samaria khopui dawkvah, Isarel catoun yueng lah a lawp sak. Hottelah hoi Samaria vah kho a sak awh, a khopui a lawp awh. <sup>25</sup> Hote kho dawk ao pasuek nah, BAWIPA barilawa tawn awh hoeh. BAWIPA ni ahnimouh koe sendek a tha pouh teh tami tangawn koug a kei. <sup>26</sup> Hahoi Assiria siangpahrang koevah na takhoe awh e miphun Samaria khopui na khawng sak e naw ni hete ram dawk e cathut bawknae nuencang panuek awh hoeh. Hatdawkvah, ahnimouh koe sendek a tha sin teh khenhaw! het ram cathut bawknae nuencang a panue awh hoeh kecu dawk koug a kei telah a dei awh.

<sup>27</sup> Assiria siangpahrang ni, haw e san lah a la e naw koehoi vaihma buet touh ban sak nateh Cathut bawknae nuencang pâtu naseh telah kâ a poe.

<sup>28</sup> Hahoi Samaria ram hoi a ceikhai e naw thung dawk hoi vaihma buet touh hah, Bethel kho vah ao teh BAWIPA barilawa awh thai nahan a pâtu awh.

<sup>29</sup> Hatei miphun tangkuem ni, amamae cathut lengkaleng a sak awh, Samarianaw ni hmuenrasang a sak awh e hah, miphun tangkuem ni amamouh onae kho tangkuem vah a ta awh. <sup>30</sup> Babilonnaw ni Sukkothenoth a sak awh teh Kuthahnaw ni, Nergal a sak awh. Hamathnaw ni Ashima a sak awh teh, <sup>31</sup> Avvitnaw ni Nibbaz hoi Tartak a sak awh. Hahoi Sepharvaim ni Sepharvaim e cathut Adrammelek hoi Anamalek vah a canaw hah hmai a sawi awh. <sup>32</sup> BAWIPA teh barilawa a tâ awh teh, amamouh thung dawk hoi hmuenrasang vaihma hah a sak awh teh ayânaw hanlah, thuengnae a sak pouh awh.



<sup>33</sup> BAWIPA teh a taki awh ngoun eiteh, a tâcotakhai awh e, amamae ram e phunglam, a cathut thaw hah ouk a tawk awh. <sup>34</sup> Ha hoehnahlan e ouk a sak awh, e patetlah atu totouh a sak awh rah. BAWIPA teh taket awh hoeh. BAWIPA ni, Jakop catounnaw, Isarel telah a phung e naw koe, <sup>35</sup> Cathut alouke taket hanh awh. Ahnimouh teh bawk hanh awh, a thaw hai tawk pouh hanh awh. Ahnimouh koe thuengnae sak hanh awh. <sup>36</sup> BAWIPA ni a lentoenae hnosakthainae hoi a dâw e kut hoi Izip ram hoi na ka hrawi e BAWIPA hah taket awh nateh bawk awh thuengnae poe awh. <sup>37</sup> Phunglawk, kâlawk, kâpoelawk yungyoe na hringkhai awh hanelah, ama ni na thut pouh e doeh. Alouke cathutnaw hah taket han awh. <sup>38</sup> Nangmouh koe ka kam e lawkkam hah na pahnim awh mahoe. Cathut alouke hah na taket awh mahoe. <sup>39</sup> BAWIPA Cathut na taki awh han, hahoi na tarannaw e kut daw k hoi na rungngang han telah a ti.

<sup>40</sup> Hatei ahnimouh ni tarawi han ngai awh hoe, yampa e a sak e patetlah pou a sak awh. <sup>41</sup> Hot patetlah, hete miphunnaw ni BAWIPA teh a taki awh. Hatei a sak awh e meikaphaw k thaw hai a tawk awh. A catounnaw totouh, a na mintoenaw ni a sak awh e patetlah sahnin totouh pou a sak awh rah.

## 18

### *Hezekiah ni Judah a uk*

<sup>1</sup> Isarel siangpahrang Elah capa Hosi a bawinae kum pâthum navah, Judah siangpahrang Ahaz capa Hezekiah teh siangpahrang lah ao. <sup>2</sup> Bawi a kamtawng navah, ahni teh kum 25 touh a pha. Jerusalem vah 29 a bawi teh a manu min teh Abi, Zekhariah canu doeh. <sup>3</sup> A na min Devit ni a sak e pueng a sak teh BAWIPA mithmu vah kalan e hah ouk a sak. <sup>4</sup> Hmuenrasang hah a pahnavt teh meikaphawknaw a raphoe awh. Mosi ni a sak e rahum tahrin hah rep a dei awh. Hote atueng totouh Isarelnaw ni ahni koe hmuיתי a thueng awh teh, hot teh Nehushta atipouh awh.

<sup>5</sup> Ahni teh Isarel BAWIPA Cathut a kângue. Hahoi ahni hnukkhu hoi Judah siangpahrangnaw thung daw k ahni patetlah apihai awh hoe, a hnukkhu hai awh hoe. <sup>6</sup> Bangkongtetpawiteh, BAWIPA hah kacaklah a kuet. A hnuk pou a kâbang. BAWIPA ni Mosi koe a kâpoelawknaw a poe e hah a tarawi.

<sup>7</sup> BAWIPA ni ahni koe ao pouh, a tâco a ceio nah pueng koe a lamcawn pouh. Assiria siangpahrang hah a tuk teh a san lah awh pouh hoe. <sup>8</sup> Filistinnaw hoiyah, Gaza totouh kacakpounge khopuinaw hoi ramvengimnaw hah koug a tâ awh.

<sup>9</sup> Hezekiah siangpahrang a bawinae kum 4 navah Isarel siangpahrang Elah capa Hosi a bawinae kum 7 nah hettelah doeh ao. Assiria siangpahrang Shalmaneser ni Samaria a tuk teh king a kalup. <sup>10</sup> A kum pâthum abaw tawmlei nah a la. Hezekiah a bawi kum 6 navah Isarel siangpahrang Hosi a bawi kum 9 nah Samaria koug a la. <sup>11</sup> Isarelnaw ni BAWIPA e kâpoelawk a ngâi awh hoe, kecu daw k Samaria teh Assiria ni a la awh. BAWIPA e san Mosi koehoi Isarelnaw hai BAWIPA e lawkkam a sak awh e teh a ek awh teh, tarawi ngai awh hoe. Lawk ngai awh hoe teh a lawkkam hai tarawi awh hoe. <sup>12</sup> Assiria siangpahrang ni Isarelnaw hah, Assiria ram koug a hrawi teh, Gozan palang teng, Medes khopui Halah, Habor naw dawkvah a ta.

<sup>13</sup> Siangpahrang Hezekiah ni Judah ram a uknae kum 14 nah, Assiria siangpahrang Sennacherib ni Judah ram thung rapan hoi king kalup e khopuinaw a tuk teh koug a tâ. <sup>14</sup> Lakhish ni Assiria siangpahrang



koevah, Judah siangpahrang Hezekiah ni ka payon toe. Na ban takhai teh, kai van na toung e pueng teh ka tawk han telah lawk a thui. Assiria siangpahrang ni Judah siangpahrang Hezekiah koe tangka talen 300 touh hoi sui talen 30 touh a hei. <sup>15</sup> Hahoi teh, Hezekiah ni, BAWIPA im hoi siangpahrang im a ta awh e tangka hoi suinaw pueng a poe.

<sup>16</sup> Hezekiah ni, BAWIPA bawkim takhang a hlun awh e Judah siangpahrang Hezekiah ni khom sui e a hlun e hah abuemlah he a la teh Assiria siangpahrang a poe.

### *Senakherib BAWIPA taranlahoi a kâoup*

<sup>17</sup> Hahoi Assiria siangpahrang ni ransabawi Rabsaris, Rabshakeh, hoi ransa moikapap hoi Lakhish hoi Jerusalem Judah siangpahrang Hezekiah koe vah, a patoun teh, Jerusalem a pha awh. A pha toteh hnicu kapasunaw law lam tuikamuemnae kanitholah, kaawm e tui lanae a teng vah a kangdue awh. <sup>18</sup> Siangpahrang hah a kaw a toteh, imthung kahrawikung, Hilkiah capa Eliakim hoi cakathutkung Shebna, hoi lairui kathutkung Asaph capa Joab hah ahnimouh koe a tâco.

<sup>19</sup> Rabshakeh ni, Hezekiah koevah dei pouh awh, siangpahrang ka lentoe Assiria siangpahrang ni, telah a dei, apimaw na kângue teh na lungmawngkhai vaw. <sup>20</sup> Ransa thaw nahane teh, thaonae hoi khokhangthoumnae ka tawn na ti nahoehmaw. Hatei, hot teh lawk rumram na dei e doeh. Kai tuk hanelah, apimaw na kângue. <sup>21</sup> Khenhaw! kâkhoe e lungpum sonron Izip na kângue teh hot patetlae tami ngaihawi pawiteh, a kut a ruk pouh han, Izip siangpahrang Faro ka kângue e pueng teh, hot patetlah doeh ouk ao awh. <sup>22</sup> Nahoe pawiteh, kai koevah BAWIPA Cathut hah ka kângue na teh awh pawiteh, ahni teh Hezekiah ni, Judahnaw hoi Jerusalem hanlah, Jerusalem e thuengnae khoungroe hmalah, hmuennasang koe na bawk awh han na ka tet ni teh hote khoungroe ka raphoe e hah ahni nahoehmaw telah a ti.

<sup>23</sup> Hot patetlah, ka bawipa Assiria siangpahrang hoi lawkkamnae sak awh. Havan kâcui hane na hmawt thai pawiteh, marang 2,000 touh na poe han. <sup>24</sup> Bangtelamaw marang hoi marangransanaw kecu daw k Izipnaw koe na yuemnae na patue pawiteh, bawipa e sannaw thung daw k ka thoungca e kahrawikung buet touh heh na rungngang thai han vaw. <sup>25</sup> BAWIPA laipalah hoi maw na ram heh ka tuk teh ka raphoe awh vaw. BAWIPA ni kai koevah, hete ram tuk hanlah cet haw, be raphoe haw na ti pouh daw k doeh.

<sup>26</sup> Hilkiah capa Eliakim hoi Shebna hoi Joab ni Rabshakeh koevah pahren lahoi na sannaw hah, Aramaih lawk hoi ka pato awh toe. Bangkongtetpawiteh, hot teh ka thai awh ngoun. khopui kalupnae thung kaawmnaw a thai nahanlah Hebru lawk hoi na pato hanh lawih telah ati awh. <sup>27</sup> Hatei, Rabshakeh ni a hni koe, ka bawipa ni na bawipa koe nangmouh koe dueng maw, hete lawk dei hanelah, na patoun vaw. Rapan van ka tahung e amae payungpaei ka cat ka net naw koe maw na patoun vaw telah a ti.

<sup>28</sup> Rabshakeh teh a kangdue teh, Hebru lawk hoi kacaipounglah a hram teh, ka lentoe Assiria siangpahrang lawk hah ngai awh haw. <sup>29</sup> Siangpahrang ni telah a dei. Hezekiah ka dum e lah awm hanh awh. Bangkongtetpawiteh ama ni, a kut daw k hoi na rungngang thai mahoe. <sup>30</sup> Hezekiah ni, BAWIPA ni na rungngang roeroe vaiteh hete khopui heh Assiria siangpahrang kut daw k poe lah awm mahoe telah BAWIPA hah kângue awh hanh naseh.



<sup>31</sup> Hezekiah lawk hah yuem hanh awh. Assiria siangpahrang ni hettelah a dei. Kai koe roumnae sak awh nateh hi tho awh. Na ram patetlah cakang hoi misur e ram, vaiyei hoi misur takha, <sup>32</sup> Olive hoi khoitui ram, dout laipalah hringnae ram, koe na ceikhai hoehroukrak teh tami pueng ni mae misurkung dawk hoi a paw cat awh nateh tami pueng ni, mae thaibunglung dawk e a paw rip ca vaiteh tami pueng ni mae tuikhu tui rip net awh. Hezekiah ni BAWIPA ni na rungngang awh han doeh telah na ka pasawt nakunghai tang awh hanh loe. <sup>33</sup> Miphun tangkuem e cathutnaw ni, a ram teh Assiria siangpahrang koehoi ouk na rangngang awh boimaw. <sup>34</sup> Hamath hoi Arpad cathutnaw hah namaw koug ao awh vaw. Sepharvaim hoi Hena hoi Ivvah naw e cathutnaw hai namaw koug ao awh. Samaria hah kai koehoi na rungngang thai awh maw. <sup>35</sup> Ram tangkuem cathutnaw pueng thung dawk hoi apimaw kai koehoi ka rungngang thai. BAWIPA ni Jerusalem kho heh kai koehoi a rungngang han taya telah a ti.

<sup>36</sup> Ahnimanaw teh duem ao awh teh kam touh boehai pathung awh hoeh. Bangkongtetpawiteh, siangpahrang ni kâlawk poe e patetlah ahnimanaw teh pathung awh hanh loe atipouh. <sup>37</sup> Hahoi teh, siangpahrang imthung kahrawikung Hilkiah capa Eliakim hoi cakathutkung Shebna hoi lairui kathutkung Asaph capa Joab hah a phi awh e khohna a kâmahrawksak teh, Hezekiah koevah a cei awh teh, Rabshakeh ni a dei e lawk hah a dei pouh awh.

## 19

### *Isaiah ni rungngangnae a cai sak*

<sup>1</sup> Siangpahrang Hezekiah ni hote hah a thai toteh, a khohna hah a phi teh, burihni a kâkhu teh BAWIPA im vah a kâen. <sup>2</sup> Imthung kahrawikung Eliakim hoi cakathutkung Shebna hoi vaihma kacuenaw ni burihni a kâkhu awh teh Amos capa profet Isaiah koevah a patoun awh. <sup>3</sup> Siangpahrang ni Isaiah koevah, sahnin teh rucatnae hoi yuenae hoi pacekpahleknae hnin doeh. Bangkongtetpawiteh, camo a khenae tue yo a pha ei teh khe nahane a tha awm hoeh. <sup>4</sup> A bawipa Assiria siangpahrang ni, kahring Cathut pacekpahlek hanlah, a patoun e Rebshakeh ni a dei e lawknaw pueng hah BAWIPA Cathut ni thai vaiteh BAWIPA Cathut ni a thai e lawk dawk hoi a yue thai. Hote kecu dawk kaawmnaw hanlah ratoum pouh naseh.

<sup>5</sup> Hahoi teh, Siangpahrang Hezekiah e taminaw teh Isaiah koevah a cei awh. <sup>6</sup> Isaiah ni, ahnimouh koe na bawipa koe hettelah na dei awh han, BAWIPA ni hettelah a dei, na thai awh e lawk Assiria siangpahrang e taminaw ni na pacekpahlek awh e hah taket hanh awh. <sup>7</sup> Khenhaw! ahnimouh koe muitha buet touh ka patoun han. Kamthang a thai vaiteh, ama ram lah a ban han. Hahoi teh amae ram dawk roeroe vah, tahloi hoi ka kamlei sak han telah atipouh.

### *Senakherib ni hnepnae hoi Hezekiah ratoumnae*

<sup>8</sup> Hahoi Rebshakeh teh, a ban teh Assiria siangpahrang ni, Libnah a tuk nah a hmu, bangdawk Lakhish hai yo a tâco toe tie hah a thai. <sup>9</sup> Hahoi khenhaw! nang hoi kâtuk hanelah, a kamthaw toe telah, Tirhakah, Ethiopia siangpahrang kong ayâ ni a dei e hah a thai. Hahoi Hezekiah koe patounenaw bout a patoun.



<sup>10</sup> Hettelah Judah siangpahrang Hezekiah koe na dei pouh han, na kângue awh e na Cathut ni, Jerusalem heh Assiria siangpahrang kut daw koe mahoe na ti awh e hah, telah na dum hanh naseh. <sup>11</sup> Khenhaw! Assiria siangpahrangnaw ni, ramnaw pueng koug a raphoe teh, ahnimouh lathueng a sak e naw na thai toe. Nang hah na rungngang han tanggak ma aw <sup>12</sup> Kaie mintoenaw ni a raphoe e Gozan, Haran, Rezeph, Eden tami Telassar ahnimae cathutnaw ni a rungngang awh nama aw. <sup>13</sup> Hamath siangpahrang, Arpad siangpahrang, Sepharvaim khopui siangpahrang, Hamath siangpahrang hoi lvvah siangpahrangnaw hateh, namaw koug ao awh vaw telah atipouh.

<sup>14</sup> Hezekiah ni, a patounenaw kut daw koe ca hah a hmu teh a touk pouh. Hahoi teh Hezekiah teh BAWIPA im a kâen teh BAWIPA hmalah ca teh a kadai. <sup>15</sup> Hezekiah ni BAWIPA hmalah a ratoum teh Oe Bawipa, Cherubim rahak vah kho ka sak e Isarel Cathut, nang nama dueng doeh talai van pueng uknaeram thung Cathut lah na kaawm, talai hoi kalvan hai nang ni na sak e doeh. <sup>16</sup> Oe BAWIPA, na hnâpakeng haw nateh, na thai pouh haw. Oe BAWIPA na mit padai nateh khenhaw! kahring Cathut pakepahlek e Sennacherib ni lawk a dei e hah thai haw. <sup>17</sup> BAWIPA, Assiria siangpahrangnaw ni, miphunnaw hoi a ramnaw teh a raphoe ei. <sup>18</sup> A cathutnaw hai hmai daw koug a phum pouh ei. Bangkongtetpawiteh, hotnaw teh cathutnaw ka tang na hoe. Tami kut hoi sak e, thing hoi talung doeh, hatdawkvah a raphoe awh. <sup>19</sup> Hatdawkvah oe BAWIPA, kaimae Cathut nang nama dueng doeh, BAWIPA Cathut lah na kaawm tie talai uknaeramnaw pueng ni, nang na panue thai nahan, na kut hoi na rungngang lah, telah atipouh.

### *Sennacherib kong daw koe BAWIPA lawk*

<sup>20</sup> Hote tueng daw Amos capa Isaiah ni, Hezekiah koe vah Isarel BAWIPA Cathut ni telah a dei. Assiria siangpahrang Sennacherib taran lahoi yah, kai koe a ratoum e teh ka thai toe. <sup>21</sup> Hetheh, hot kong daw hoi BAWIPA ni a dei e doeh. Zion canu tanglakacuem ni, pakepahlek hoi na panuikhai e hah, Jerusalem canu ni a lû a kahek. <sup>22</sup> Apimaw a min na mathoe sak teh, na pakepahlek. Apimaw lawk hoi na hram sin, na mit na ueng sin, Isarel tami kathing koe kai ma.

<sup>23</sup> Na patounenaw hno lahoi BAWIPA teh na pakepahlek. Kaie rangleng moikapap hoi Lebanon ram kadung poung hoi monnaw koe ka pha teh, haw e sidar thing kahawinaw hoi hmaica thingnaw ka tâtueng vaiteh, talai ahawinae ratu, kho a rasang na koe hoe a dung nah koe vah, ka kâen han. <sup>24</sup> Ram alouknaw e tui hah ka tai teh, ka tâco sak teh ouk ka nei, ka khoktabei ni Izip ramnaw pueng koug ka hak sak han telah ati.

<sup>25</sup> Kai ni ayan hai ka sak e nahoehmaw, Atu teh kai ni ka sak e ti teh na panuek hoe haw. Vaipuen lah a coung nahan raphoe e khopui rapan lah na o nahanelah, hottelah atu koug kahma sak toe. <sup>26</sup> Hatdawkvah a thung a kaawm e taminaw teh, tha a youn awh dawkvah, a yawng awh teh yeirai a phu awh. <sup>27</sup> Hatei na onae hmuen na kâen, na tâco, kai taranlahoi na lungphuen tie ka panue.

<sup>28</sup> Bangkongtetpawiteh, kai taranlahoi na lungphuen pawiteh, kai koe ut na sin e teh ka hnâ koe koug a pha toe. Hatdawkvah na hnawng daw koe hradang ka ta vaiteh, na pahni hah khakkhui vaiteh, hahoi na thonae koe lam hoi bout na ban sak han.

<sup>29</sup> Hetheh, nang hanlah kamnue nae lah ao han. Takum teh amahmaw koe paw e hah, na khan awh vaiteh, palawng haiyah, amahmaw koe paw



e na khan awh han. A kum pâthum teh, cang tu awh nateh, misur takha hah sak awh nateh a paw hah cat awh. <sup>30</sup> Judah imthungkhunaw thung daw k ka hlout ni teh kacawiraenaw ni, rahim lah khongyang a pabo vaiteh lathueng lah a paw a paw awh han. <sup>31</sup> Bangtelah tetpawiteh, kaawm e naw hah Jerusalem lahoi a ban awh han. Zion mon daw k kacawiraenaw hah a cei awh han. Ransahu BAWIPA ngaikhainae lahoi hothateh, a sak han. <sup>32</sup> Hatdawkvah BAWIPA ni Assiria siangpahrang kong teh, telah doeh a dei. Ahni teh hete khopui kâen mahoe h. Khokhu daw k pala pathui mahoe h. Khopui hmalah bahling hah patue mahoe h, kho lawi vah talai na paten mahoe h. <sup>33</sup> A thonae lam koe lahoi a ban vaiteh, khopui thung kâen mahoe h. <sup>34</sup> Kai kecu daw k hoi thoseh, ka san Devit kecu daw k hoi thoseh, hete khopui teh ka rungngang hanelah ka ring han, BAWIPA ni ati, telah tami a patoun.

### *Sennacherib duenae*

<sup>35</sup> Hahoi teh hote tangmin vah, BAWIPA kalvantami hah a cei teh, Assirianaw ni a roenae hmuen daw k 185,000 a thei awh. Amom maya a thaw toteh khenhaw! ro doeh patkâhai toe. <sup>36</sup> Hahoi Assiria siangpahrang Sennacherib teh, a tâco, im vah a ban teh Nineveh kho vah pou ao.

<sup>37</sup> Hahoi, a cathut Nisroch im vah a baw k lahun nah a capa Adrammelek hoi Sharezer ni, tahloi hoi a thei roi teh, Ararat ram vah a yawng roi. Hahoi a capa Esarhaddon ni a yueng lah a uk.

## 20

### *Hezekiah hringnae a thapsin*

<sup>1</sup> Hote tueng nah, Hezekiah teh a pataw teh meimei a due. Hahoi Amos capa profet Isaiah a tho teh ahni koe BAWIPA ni telah a dei. Na imthungkhu hah, cingthui leih. Bangkongtetpawiteh, na due han, na hring mahoe h toe telah atipouh.

<sup>2</sup> Hahoi tapang koe lah a kamlang teh BAWIPA koe vah, <sup>3</sup> Oe BAWIPA na hmalah yuengkamcu e lungthin hoi ka o e hoi na mithmu vah hawinae ka sak e hah na pahnim pouh hanh, telah Hezekiah teh a khuika laihoi a ratoum.

<sup>4</sup> Isaiah teh khopui lungui a pha hoe hnahlan, BAWIPA e lawk hah ahni koe a pha pouh. <sup>5</sup> Ban nateh ka taminaw kahrawikung Hezekiah koe vah dei pouh. BAWIPA Devit e BAWIPA Cathut ni hettelah a dei. Ratoumnae ka thai teh na mitphi ka hmu toe. Na dam sak mingming han. Apâthum hnin vah BAWIPA im vah bout na cei han. <sup>6</sup> Hahoi na hringnae hah kum hlaipanga touh ka thap sin han. Assiria siangpahrang kut daw k hoi nang nama hoi na khopui hah, ka rungngang vaiteh, kai hoi ka san Devit kecu daw k hete khopui heh ka ring han telah a ti.

<sup>7</sup> Hahoi Isaiah ni, thaibunglung paw buem buet touh thokhai awh haw atipouh e patetlah, a thokhai teh, a hmâ daw k a bet teh pin ahawi.

<sup>8</sup> Hezekiah ni Isaiah koe vah BAWIPA ni na dam sak han, apâthum hnin vah, BAWIPA im vah bout na cei han tie mitnout teh bang han na maw telah a pacei. <sup>9</sup> Isaiah ni, BAWIPA ni a dei e hah a sak roeroe han tie nang hanlah BAWIPA koehai mitnout lah kaawm han. Tâhlip hah, lakhout hra touh luen sak maw na ngai, hoehpawiteh hra touh kum sak maw na ngai atipouh.



<sup>10</sup> Hezekiah ni a pathung teh tâhlip lakhout hra touh a luen hane teh ayawica dawkvah telah teh tho na hanh seh. Tâhlip hah lakhout hra touh kum naseh telah atipouh.

<sup>11</sup> Hottelah profet Isaiah ni BAWIPA hah a kaw toteh, Ahaz e kanîsuimilam daw k e a tâhlip lakhout hra touh ka cet tangcoung e hah lakhout hra touh a ban sak.

### *Babilon hoi e laiceinaw*

<sup>12</sup> Hote tueng nah, Babilon siangpahrang Baladan capa Berodakbaladan ni ca hoi poehno hoi Hezekiah teh a patawn. Bangkongtetpawiteh, Hezekiah teh a pataw tie a panue. <sup>13</sup> Hottelah Hezekiah ni, ahnimanaw teh im a luen sak awh. Hno Aphu kaawmnaw tanae pueng hoi sui hoi ngun, hmuithui hoi, aphu kaawm poung e satui hoi tarantuknae puengcangnaw tanae imthung hoi râw onae naw pueng hai a khet sak. A im thoseh, a ram thung kaawm e thoseh, Hezekiah ni a khet sak hoeh e banghai awm hoeh. <sup>14</sup> Hote tueng nah, profet Isaiah ni, siangpahrang Hezekiah koe a cei teh, ahni koe vah, hote taminaw ni bangmaw a dei awh. Na lahoi maw a tho awh telah atipouh. Hezekiah ni kahlatpoung e ram Babilon hoi kathonaw doeh atipouh.

<sup>15</sup> Ahnimouh ni, na imthungkhu bangmaw a hmu awh atipouh. Hezekiah ni ka imthungkhu kaawmnaw teh be ka patue teh, hnoim thung e ka pâtrue hoeh e banghai awm hoeh atipouh.

<sup>16</sup> Isaiah ni, Hezekiah koevah, BAWIPA e lawk heh thai haw. <sup>17</sup> Khenhaw! na imthungkhu kaawmnaw puenghoi sahnin totouh na mintoenaw ni a pâtung e naw heh Babilon kho vah a ceikhainae tueng ka phat han, banghai a ceitakhai e awm mahoehtelah BAWIPA ni a ti. <sup>18</sup> Hahoi na imthungkhu daw k na khe awh han rae na canaw hah a ceikhai awh vaiteh, Babilon siangpahrang im vah tuenlanaw lah a coung sak han telah atipouh.

<sup>19</sup> Hezekiah ni Isaiah koevah na dei e BAWIPA lawk hah ahawi. Bangkongtetpawiteh, kaie ka se dawkvah roumnae hoi lawkkatang hah awm mahoehtoung maw atipouh.

### *Hezekiah duenae*

<sup>20</sup> Hot patetlah Hezekiah tawksaknae thung daw k hoi kaawm rae naw, a sakyoenae pueng tuim hoi tui lanae a sak teh khopui thung daw k tui lanae kong teh, Judah siangpahrang setouknae cauk daw k thut lah ao nahoehmaw. <sup>21</sup> Hezekiah teh a na mintoenaw koe vah a kâhat teh a capa Manasseh ni a yueng lah a uk.

## 21

### *Manasseh ni Judah a uk*

<sup>1</sup> Manasseh teh siangpahrang lah ao nah, kum 12 touh a pha. Jerusalem vah kum 55 siangpahrang lah ao. A manu min teh Hephzibah doeh. <sup>2</sup> Isarel catounnaw hmalah BAWIPA ni a pâlei e miphunnaw ni panuetho e hnokahawi hoeh e ouk a sak awh e naw hah BAWIPA mithmu vah ouk a sak awh. <sup>3</sup> Bangtelane tetpawiteh, A na pa Hezekiah ni a raphoe e hmuennrasang hah bout a sak dawkvah, Isarel siangpahrang Ahab ni ouk a sak e Baal bawknae khoungeh lah bout kangdue teh thingmeikaphawk a sak awh, kalvan kaawmnaw pueng hah a baw awh teh a thaw hah a taw k pouh awh. <sup>4</sup> BAWIPA ni Jerusalem vah ka min ka o sak han ati e patetlah BAWIPA im vah thuengnae khoungeh a sak awh. <sup>5</sup> BAWIPA bawknae im



thongma kahni touh dawkvah, kalvan âsinaw bawk nahanelah thuengnae khouengroe a sak awh. <sup>6</sup> Amae a ca hah, hmaisawi thuengnae lah a sak teh kutkhetkathounnaw a khet sak teh, sueânnæ hah a hno awh. Hmaui hoi kahrainaw hah a kambawngkhah awh. Cathut e lungkhueknae hoe a kân sak awh teh, BAWIPA hmalah yonnae kalen a sak awh.

<sup>7</sup> BAWIPA ni, Devit hoi a capa Solomon koevah hete im hoi Jerusalem, Isarel miphunnaw pueng thung hoi ka rawi e dawkvah, ka min teh yungyoe ka o sak vaiteh, <sup>8</sup> Kâ na poe e pueng hoi ka san Mosi koe kâ ka poe e naw pueng patetlah na tarawi awh pawiteh, na mintoenaw koe ka poe tangcoung e, ram thungup hai Isarelnaw teh nâtuék hai a khok paheng sak mahoe atipouh e imthung vah, thingmeikaphawk a sak awh e hah a ta awh. <sup>9</sup> Hatei banglahai noutna awh hoeh teh, BAWIPA ni Isarel catounnaw hmalah a pâlei awh e miphunnaw ni a sak awh e hlak hai ka mathout lah sak hanlah, Manasseh ni ayânaw a pasawt.

<sup>10</sup> Hatdawkvah, BAWIPA ni a san profet hno lahoi a dei e teh, <sup>11</sup> Judah siangpahrang Manasseh ni, het hloi e panuetho e hno hah ayan vah Amornaw hlak hai hoe ka nut lah a sak awh teh Judahnaw hah meikaphawk hno lahoi yonnae a saksak. <sup>12</sup> Hatdawkvah Isarel BAWIPA Cathut ni, hettelah a dei, khenhaw! Jerusalem hoi Judahnaw koe kamthang ka thai tangkuem koe a hnâ kahni touh hoi hoe ka tâdeng sak han.

<sup>13</sup> Jerusalem khopui koe Samaria bangnue nae rui hoi Ahab imthungnaw ka bangnue e patetlah, Jerusalem ka bangnue han. Ailo pâle hnukkhu det pakhup e patetlah ka ta han. <sup>14</sup> Kacawie hnônaw teh ka tâkhawng vaiteh a taran kut dawka poe pouh han. Hottelah, a na mintoenaw Izip ram hoi a tâco hnin hoi sahnin totouh ka mithmu vah, hnokathout a sak awh teh ka lungkhueknae na pahrué awh toe telah ati. <sup>15</sup> Hatdawkvah, mintoenaw ni, Izip ram hoi na tâconae hnin hoi sahnin totouh nangmae catounnaw ni kai ka hmalah, yonnae doeh pou na sak awh.

<sup>16</sup> Hothloilah BAWIPA mithmu vah, hawihoe hnae hah a sak awh teh Judahnaw pueng yonnae a saksak hloilah, Jerusalem avangvanglah totouh, Manasseh ni yon ka tawn hoe haw e thi moi a palawng.

### *Manasseh duenae*

<sup>17</sup> Hahoi Manasseh tawksaknae hoi kaawm rae, yon a sak e naw teh Judah siangpahrangnaw setouknae cauk dawka thut e lah ao nahoe hmau.

<sup>18</sup> Manasseh teh a na mintoenaw koe a kâhat teh, Uziah takha amae imteng vah a pakawp awh. Hahoi a capa Amon ni a yueng lah a uk.

### *Judah siangpahrang Amon*

<sup>19</sup> Amon teh siangpahrang lah ao nah kum 22 touh a pha. Jerusalem vah kum 2 touh a bawi, a manu min teh Meshullemeth, Jotbah kho e Haruz canu doeh. <sup>20</sup> A na pa Manasseh ni, ouk a sak e patetlah BAWIPA mithmu vah thoenae a sak. <sup>21</sup> A na pa ni a dawn e lamnaw hah a dawn van teh, a na pa ni meikaphawk thaw a tawka hah a tawka teh a bawka. <sup>22</sup> A na mintoenaw e BAWIPA Cathut a ceitakhai teh BAWIPA lamthung dawn hoeh. <sup>23</sup> Amon e a taminaw ni pouk a youk awh teh, siangpahrang teh ama im vah a thei awh. <sup>24</sup> Hatei hote ram e taminaw ni pouk ka youk e Amon e taminaw pueng hah be a thei awh. Hahoi teh hote ram e taminaw ni a capa Josiah teh a yueng lah siangpahrang a tawka sak awh.

<sup>25</sup> Amon tawksaknae dawka hoi kaawm rae teh, Judah siangpahrangnaw setouknae cauk dawka be thut lah ao toung nahoe hmau. <sup>26</sup> Hahoi Uzzah e



takha thung, amae tangkom dawkvah a pakawp awh teh a capa Josiah ni a yueng lah a uk.

## 22

### *Josiah ni Judah a uk*

<sup>1</sup> Josiah teh siangpahrang a tawh nah kum 8 touh boung a pha. Jerusalem vah kum 31 touh siangpahrang a tawh. A manu min teh Jedidah, Bozkath kho e Adaiah e canu doeh. <sup>2</sup> BAWIPA mithmu vah hnokahawi pou a sak. A na pa Devit ni a dawn e lamnaw pueng a dawn teh avoilah aranglah phen hoeh.

### *Hilkiah ni kâlawk cauk a hmu*

<sup>3</sup> Siangpahrang Josiah a bawi kum 18 nah hettelah ao. Meshullam capa, Azaliah capa cakathutkung Shaphan hah a patoun teh, <sup>4</sup> vaihma kacue Hilkiah koevah cet nateh, longkha karingkungnaw ni taminaw koe a la awh teh BAWIPA e im dawh a thokhai e tangkanaw hah touk naseh. <sup>5</sup> Hahoi, BAWIPA im dawh thaw katawnaw khenyawnkung koe poe nateh ahni ni a rawknae koe e pathoup nahanelah, BAWIPA im vah thaw katawnaw hoi, <sup>6</sup> thingkong kasakkung, im kasakkung hoi im rawknae kapathoupkung naw ni, a rawknae pathoup nahane dawh thing hoi talung naw ran nahanelah poe naseh, telah BAWIPA im lah a patoun.

<sup>7</sup> Hateiteh tangka ka sin sak e naw ni touk hai touk awh hoeh. Bangkongtetpawiteh, yuemkamculah a hno awh.

<sup>8</sup> Vaihma kacue Hilkiah ni cakathutkung Shaphan koevah, BAWIPA im dawh kâlawk cauk hah ka hmu telah atipouh. Hilkiah ni cauk teh Shaphan koe a poe teh ahni ni a touk.

<sup>9</sup> Hahoi, cakathutkung Shaphan ni siangpahrang koe a cei teh, siangpahrang koevah kamthang ka thokhai. Na taminaw ni im dawh e tangka a hmu e naw hah BAWIPA e im dawh thaw katawnaw a poe toe telah atipouh.

<sup>10</sup> Cakathutkung Shaphan ni, vaihma Hilkiah ni cauk na poe na a telah siangpahrang koe a dei pouh teh, Shaphan ni siangpahrang e hmalah a touk.

<sup>11</sup> Hahoi, siangpahrang ni kâlawk cauk dawh e lawh a thai toteh angki hah a phi. <sup>12</sup> Siangpahrang ni, vaihma Hilkiah, Shaphan capa Ahikam, Mikaiah capa Akbor, cakathutkung Shaphan hoi siangpahrang e a san Asaiah koevah, <sup>13</sup> kai hoi maya hoi Judahnaw pueng hanelah, hete cauk dawh hmu e lah ao patetlah BAWIPA koe na het pouh awh. Bangkongtetpawiteh, sak awh hane hete mintoenaw ni a sak hoeh kecu dawh maimouh tak dawh BAWIPA lungkhueknae teh hoe a len telah a ti.

<sup>14</sup> Hahoi vaihma Hilkiah, Ahikam, Akabor, Shaphan hoi Asaiah a hnicu khenyawnkung Harhas capa Tikvah capa, Shallum napui profet Huldah koevah a cei awh teh a kâhno awh. (Agni teh Jerusalem kho hnuklah ao) <sup>15</sup> Napui ni ahnimouh koe Isarel BAWIPA Cathut ni hettelah a dei, kai koe kapatounkung koe, <sup>16</sup> kenhaw! hete hmuen koehai thoseh, athung e kho kasaknaw koehai thoseh, Judah siangpahrang ni cauk dawh a touk e rawkphainae patetlah rawkphainae hah a pha sak han. <sup>17</sup> Bangkongtetpawiteh, na ceitakhai awh teh cathut alouke koe hmutui a thueng awh teh, a kut hoi a sak awh e ni ka lung na khuek sak awh dawkvah, hete hmuen koevah ka lungkhueknae hmai hoe ka pataw lah ka kaman sak vaiteh roum mahoe toe. <sup>18</sup> Hatei kai koe hei hane a patoun e naw Judah siangpahrang koevah BAWIPA Cathut ni hettelah a dei. Na



thai e lawk kong dawk, <sup>19</sup> hete hmuen hoi athung kaawm e taminaw heh ka rawk e hoi thoebo e lah ao awh han telah ka dei e hah na thai toe. Na lung a nem teh BAWIPA hmalah kârahoun laihoi na angki na phi teh ka hmalah na ka dawkvah, kai ni hai na lawk ka thai telah, BAWIPA ni a ti. <sup>20</sup> Hottelah, kenhaw! na mintoenaw koe na cei vaiteh na tangkom dawk karoumcalah na cei han. Hete hmuen koe rawknae kâhmo hane naw teh na mit ni koung hmawt mahoei ati telah na dei pouh awh han telah atipouh. Hottelah kamthang teh siangpahrang koevah a dei pouh awh.

## 23

### *Josiah ni lawkkatang dawk tha a patho*

<sup>1</sup> Siangpahrang ni tami a patoun teh, Judah hoi Jerusalem kacuenaw ka kamkhueng awh. <sup>2</sup> Siangpahrang teh Judah ram e tami pueng hoi Jerusalem kaawm e pueng hoi, vaihma hoi profetnaw hoi tami kathoung kalen pueng hoi BAWIPA e im lah a cei awh teh, BAWIPA im dawk a hmu awh e a lawkkamnae cauk dawk kaawm e pueng ahnima e hmalah koung ka thai lah a touk pouh. <sup>3</sup> Siangpahrang ni khomkung koe a kangdue teh cauk dawk kaawm e lawkkamnae lawk hah, caksak hane hoi lunghin abuemlahoi muitha abuemlahoi BAWIPA tarawi hane kâpoelawk poe e hoi, a panuesaknaenaw, hoi phunglawknaw tarawi hanelah BAWIPA hmalah a lawk a kam. Tami pueng ni lawkkamnae a caksak awh.

<sup>4</sup> Vaihma kacue Hilkiah hoi kadoungkung vaihmanaw hoi takhang karingkungnaw hah BAWIPA im thung e Baal hoi Asherah hoi kalvan kaawm e hnouaw hanelah a sak e hnopai pueng a tâcokhai hanelah kâ a poe. Jerusalem alawilah Kidron kahrawngum vah hmai a sawi teh hraba hah Bethel lah a ceikhai. <sup>5</sup> Meikaphawk ka bawk e vaihma, Judah siangpahrangnaw ni Judah ram khonaw hmuenrasangnaw hoi Jerusalem tengpam e hmuitui kasawinaw hah a pahnawt awh teh, Baal, kanî, thapa, âsi hane hoi kalvan kaawm e pueng hane hmuitui hmai ouk kasawinaw hah a pahnawt awh. <sup>6</sup> BAWIPA im dawk thing hoi meikaphawk hah Jerusalem kho lawilah Kirdron palang vah a ceikhai awh teh, Kirdron palang dawh hmai a sawi awh. Kanuikapin lah a hruek awh teh kanuikapinnaw hah mathoenaw e tangkom dawk a pasa awh. <sup>7</sup> Hahoi thing meikaphawk, hni kakawngkung napuinaw a onae hoi BAWIPA im napuitongpanaw onae imnaw a raphoe awh.

<sup>8</sup> Vaihma pueng Judah khonaw koehoi a kaw sak awh teh, ahnimouh ni hmuitui hmaisawinae hmuenrasangnaw hah Geba hoi Beersheba totouh a khin sak awh teh, Jerusalem e khobawi Joshua e longkha avoila e kâennae longkha pueng be a raphoe awh. <sup>9</sup> Hmuenrasang koe e vaihmanaw hah Jerusalem BAWIPA thuengnae khoungroe koe cet awh hoei ei teh, a hmaunawngnanaw koe tonphuenhoei ouk a ca awh.

<sup>10</sup> Apinihai amamae a canaw hah Molek cathut koe hmai hoi a thueng awh hoei nahan, Hinnom e a ca tangling dawh kaawm e Topheth hai a khin sak awh. <sup>11</sup> BAWIPA im alawilae siangpahrang karingkung Nathan Molek im teng e Judah siangpahrangnaw ni kanî koe a poe awh e marangnaw hah he a takhoe pouh teh, kanî rangleng hah hmai koung a sawi awh.

<sup>12</sup> Ahaz im a tungtengtue e dawh a hruek e khoungroenaw hoi Manasseh ni BAWIPA im thongma kahni touh koe a sak e khoungroenaw hah siangpahrang ni he a raphoe teh Kidron palang dawkvah a tâkhawng.



<sup>13</sup> Isarel siangpahrang Solomon ni, Jerusalem kanitholah a raphoe e aranglae mon dawk panuetho e Sidon cathut Ashtoreth, panuetho e Moab cathut, Kemosh thoseh panuetho e Ammon cathut Milkom hanelah a hmuenrasangnaw hah siangpahrang ni a khin sak. <sup>14</sup> Meikaphawknaw hah rekrek a hem teh, thing meikaphawknaw be a tâtueng hnukkhu, hote hmuen koe tami hrunaw hoi akawi sak.

<sup>15</sup> Hothloilah Isarel ka payon sakkung Nebat capa Jeroboam ni Bethel vah khoungroe hoi a hmuenrasangnaw hoi khoungroe hai a raphoe pouh. Hmuenrasang hmai a sawi teh kanuikapin lah koung a hruek teh thingmeikaphawk hai hmai a sawi. <sup>16</sup> Josiah teh a kamlang teh mon dawk e phuen hah a hmu, hottelah phuen e tami hrunaw hah a la sak teh, Cathut e tami ni a pâpho e BAWIPA e lawk patetlah khoungroe dawk hmai a sawi teh, a khin sak. <sup>17</sup> Josiah ni hai kai ni ka hmu e noutnae talung teh, apie phuen namaw telah ati. Cathut e tami Judah ram lahoi ka tho e Bethel vah khoungroe dawk na sak e hno ka pâpho e phuen doeh telah a dei awh.

<sup>18</sup> Siangpahrang ni apinihai a hru hah puen hanh naseh, ahnie a hrunaw hah Samaria lahoi ka tho e profetnaw e a hrunaw hoi kâbet hoeh.

<sup>19</sup> Isarelnaw ni BAWIPA lungkhuek sak awh teh, a sak awh e Samaria ram dawk e hmuenrasangnaw pueng Josiah ni koung a takhoe teh, Bethel vah a sak e patetlah a sak pouh. <sup>20</sup> Hottelah haw e hmuenrasang e vaihmanaw pueng hah khoungroe van a thei teh, haw vah tami hru a pâeng teh Jerusalem lah bout a ban.

<sup>21</sup> Hahoi siangpahrang ni tami pueng koe, hete lawkkamnae cauk dawk kaawm e patetlah BAWIPA, nangmae Cathut hanlah ceitakhai pawito awh telah kâ a poe. <sup>22</sup> Isarel lawkcengkungnaw ni lawk a ceng totouh hoi, Isarel siangpahrangnaw ni a uknae thung pueng hoi, Judah siangpahrang ni a uknae thung pueng haiyah ceitakhai pawito awh boihoeh. <sup>23</sup> Josiah siangpahrang a bawinae kum 18 navah, hote ceitakhai pawito teh Jerusalem vah BAWIPA hanelah a tawn awh lah ao.

<sup>24</sup> BAWIPA im dawk e vaihma Hilkiah ni, a hmu e cauk dawkvah kâlawk hah caksak nahanelah, kahrathawtawknae hoi taânsinnae hoi, meikaphawk hoi, cathut meikaphawknaw, Judah ram hoi Isarel kho e hno panuetho a hmu awh e pueng hah Josiah ni koung a raphoe. <sup>25</sup> Mosi e kâlawk pueng patetlah lungthin abuemlah, muitha hoi thaonae abuemlahoi BAWIPA koe lah a kamlang teh, ahni patetlah ahni hoehnahlan siangpahrang apihai awh hoeh. Ahni hnukkhu hai ahni patetlah apihai awm mahoehtoe.

### *Judah lathueng lawkcengnae*

<sup>26</sup> Hatei, BAWIPA ni puenghoi a lungkhueknae Manasseh ni a lungkhuek-saknae naw pueng kecu dawkvah, Judahnaw taranlahoi kâan e a lungkhueknae hmai teh, roum thai kalawn hoeh. <sup>27</sup> BAWIPA ni Isarel ka puen e patetlah Judah hai ka hmuhoehnae koe ka puen van han. Hete ka rawi e Jerusalem roeroe haiyah, haw vah ka min ao han ka tie im hah ka puen han, telah a ti.

### *Josiah tarantuknae koe a due*

<sup>28</sup> Hottelah Josiah tawksaknae thung dawk kaawm rae naw hoi, a tawk pueng teh Judah siangpahrangnaw setouknae cauk dawk a kâ thut mahoehtoe. <sup>29</sup> Siangpahrang lah ao navah, Izip siangpahrang Faro Neko teh, Assiria siangpahrang tuk hanelah, Euphrates palang vah a ceitakhang. Siangpahrang Josiah ni ahni a tuk teh ahnimouh ni ahni teh a hmu awh



tahma vah, Megiddo vah a thei awh. <sup>30</sup> A taminaw ni Megiddo hoi a ro hah rangleng hoi a ceikhai awh teh, Jerusalem vah a kâenkhai awh teh amae tangkom dawkwak a pakawp awh. Hottelah hote khonaw ni Josiah capa Jehoahaz teh a ceikhai awh teh, satui a awi awh teh, a na pa yueng lah a bawi sak awh.

### *Jehoahaz uknae hoi mannae*

<sup>31</sup> Jehoahaz teh siangpahrang a tawkwak navah, kum 23 touh a pha. Jerusalem vah thapa yung thum touh a bawi. A manu min teh Hamutal, Libnah kho e Jeremiah canu doeh. <sup>32</sup> A na mintoenaw ni ouk a sak awh e patetlah BAWIPA mithmu vah thoenae hah ouk a sak. <sup>33</sup> Faro Neko ni hote siangpahrang Jerusalem kho a uk thai hoe nahanelah, Hamath ram e Riblah kho vah thongim a pabo. Hahoi Judah ram vah a pabo. Hahoi Judah ram vah ngun talen 100 touh hoi sui talen buet touh imhu a cawng sak. <sup>34</sup> Hahoi Faro Neko ni Josiah capa ELiakim hah a na pa Josiah yueng lah a bawi sak. A min hah Jehoiakim telah a thung pouh. Jehoahaz teh Izip vah a ceikhai awh teh haw vah a due.

### *Jehoiakim ni Judah a uk*

<sup>35</sup> Jehoiakim ni Faro hah ngun tangka hoi sui a poe teh, ahnimae ram teh Faro ni kâ a poe e patetlah tangka lah poe hane tamuk a cawng van. Faro Neko koe poe hanlah, tami pueng rawng hanelah a khoe pouh e patetlah hote ram thung e khocanaw hah sui hoi tangka a rawng sak awh. <sup>36</sup> Jehoiakim teh siangpahrang a tawkwak navah, kum 25 touh a pha. Jerusalem vah kum 11 touh a bawi. A manu min teh Zebudah Ramah kho e Pedaiiah canu doeh. <sup>37</sup> Hahoi a na mintoenaw ni a sak awh e patetlah BAWIPA mithmu vah thoenae hah a sak.

## 24

### *Taran ni Judahnaw a pakhuppathan*

<sup>1</sup> Ahnie se navah Babilon siangpahrang Nebukhadnezar ni a muk. Hatdawkvah Jehoiakim teh san lah kum thum touh a tounge. Hathnukkuh, bout a kamlang teh Nebukhadnezar a tuk. <sup>2</sup> BAWIPA ni a san profetnaw hno lahoi a dei tangcoung e patetlah BAWIPA ni Khaldean tamihu, Siria tamihu, Moab tamihu hoi Ammon tamihu naw hah Judahnaw tuk hane hoi raphoe hanelah a patoun. <sup>3</sup> Manasseh ni a sak e pueng, tamikayon hoe e naw a thi palawng e hoi, kayonhoeahnaw e thi paling hoi Jerusalem akawi sak dawkwah, BAWIPA ni ngaithoum hane ngai hoe. <sup>4</sup> Judahnaw a hmaitung hoi takhoe hanelah BAWIPA e kâpoelawkwak teh a pha katang. <sup>5</sup> Hottelah Jehoiakim tawksaknae thung hoi kacawiraenaw hoi a kâroenae naw pueng teh Judah siangpahrangnaw e setouknae cauk dawkwak thut lah ao nahoehmaw. <sup>6</sup> Jehoiakim teh mintoenaw koe a kâhat teh a capa Jehoiakhin ni a yueng lah a uk. <sup>7</sup> Izip siangpahrang teh a ram thung hoi tho hoe toe. Bangkongtetpawiteh, Babilon siangpahrang ni Izip palangnaw koehoi a kamtawng teh Euphrates palang totouh Izip siangpahrang uknae pueng hah kounge a la toe.

### *Jehoiakhin uknae hoi santounge*

<sup>8</sup> Jehoiakhin siangpahrang thaw tawkwak kamtawng nah a kum 18 touh a pha. Jerusalem vah thapa yung thum touh a bawi. A manu e min teh Nehushta, Jerusalem kho e Elnathan canu doeh. <sup>9</sup> A na pa ni a sak e patetlah BAWIPA mithmu vah thoenae a sak. <sup>10</sup> Hatdawkvah Babilon siangpahrang Nebukhadnezar e taminaw Jerusalem lah a ceitakhang awh



teh, kho king a kalup awh. <sup>11</sup> Hahoi Babilon siangpahrang Nebukhadnezar khopui daw k a tho navah a sannaw ni khopui teh kOUNg la a kalup awh toe. <sup>12</sup> Judah siangpahrang Jehoiakhin ni a manu, a sannaw, ukkungnaw hoi a sannaw hoi Babilon siangpahrang koe a tâco awh. Hatdawkvah a bawinae kum 8 nah Babilon siangpahrang ni a man. <sup>13</sup> BAWIPA ni a dei tangcoung e patetlah BAWIPA e im daw k e hno hoi siangpahrang im daw k e hnonaw pueng kOUNg a la teh, BAWIPA e bawkim daw k hanelah Isarel siangpahrang Solomon ni a sak e sui hnopai pueng reprep kOUNg a dei pouh. <sup>14</sup> Jerusalem e tami pueng ka lentoe e taminaw hoi a thakaawme taminaw 10, 000 touh, hnikawng kathoumnaw hoi sumdêikathoumnaw pueng kOUNg a hrawi. Hahoi ram thung e ka roedeng e tami hoi cungkeihoehe tami laipateh pihai cettakhai awh hoe h. <sup>15</sup> Jehoiakhin e a sannaw hoi hote ram daw k e tami thakaawme taminaw Jerusalem hoi Babilon lah santOUNg hanlah a ceikhai awh. <sup>16</sup> Babilon siangpahrang ni thakasai e tami 7, 000 hni kawng kathoum e hoi sumdêikathoum e tami 1, 000 touh hoi tarantuk kathoumnaw Babilon lah kOUNg a ceikhai.

### *Zedekiah ni Judah a uk*

<sup>17</sup> Babilon siangpahrang ni Jehoiakhin yueng lah, a panga Mattaniah hah siangpahrang thaw a taw k sak awh teh Zedekiah telah a min a palang pouh awh. <sup>18</sup> Zedekiah siangpahrang a taw k navah kum 21 touh a pha. Jerusalem vah kum 11 touh a bawi. A manu e min teh Hamutal, Libnah kho e Jeremiah canu doeh. <sup>19</sup> Jehoiakhin ni a sak e hno pueng a sak teh BAWIPA mithmu vah thoenae a sak. <sup>20</sup> Judahnaw hoi Jerusalem e taminaw e hmaitung hoi a takhoe hoehroukrak BAWIPA teh a lungkhuek. Hahoi Zedekiah ni Babilon siangpahrang a tuk.

## 25

### *Judah rawpnae hoi santOUNgnae*

<sup>1</sup> Hahoi a bawinae kum 6 nae thapa yung 10, hnin 10 hnin vah hettelah ao. Babilon siangpahrang Nebukhadnezar hoi a ransanaw pueng hoi Jerusalem taranlahoi a tho awh teh a roe sin awh. A tengpam abuemlah tarantuknae tangkom kOUNg a tai awh. <sup>2</sup> Hottelah siangpahrang Zedekiah a bawinae kum 11 totouh kho teh a kalup awh.

<sup>3</sup> Thapa yung 4 nah hnin 9 hnin vah ram thung e taminaw hanelah rawca laipalah ka patawpoung e takang a tho. <sup>4</sup> Hahoi khopui kalupnae tapang hah vak a muk awh teh, karum lah tarankatuknaw teh siangpahrang takha teng e kalupnae tapang kahni touh e rahak kalupnae longkha koe lah a yawng awh. Khaldean taminaw ni kho hah king a ring awh teh siangpahrang teh tanghling lam koe lah a cei. <sup>5</sup> Hatei teh, Khaldean ransanaw ni siangpahrang hah pâlei awh teh, Jeriko tanghling daw k a pha awh, a ransanaw pueng ni dung a yawng takhai awh. <sup>6</sup> Siangpahrang hah a man awh teh Riblah vah Babilon siangpahrang koe a hrawi awh teh law k a ceng awh. <sup>7</sup> Zedekiah e capa hah a mithmu vah a thei awh. Zedekiah e a mitmu hah a cawngkhawi awh teh, king a katek nalaihoi Babilon vah a hrawi awh.

<sup>8</sup> Hottelah Babilon siangpahrang Nebukhadnezar a bawinae kum 9, thapa yung 5, hnin 7 hnin vah Babilon siangpahrang karingkungnaw kahrawikung, Nebuzaradan teh Jerusalem vah a kâen. <sup>9</sup> BAWIPA im hoi siangpahrang im hah hmai a sawi awh teh Jerusalem imnaw pueng im kalennaw pueng hah hmai kOUNg a sawi awh. <sup>10</sup> Karingnaw



kahrawikungnaw koe kaawm e Khaldean ransanaw pueng ni Jerusalem rapannaw pueng hah a raphoe awh. <sup>11</sup> Khopui thung kaawm rae naw pueng hoi, Babilon siangpahrang koe lah kaawm e taminaw pueng hoi, karingkungnaw kahrawikung Nebuzaradan ni san lah a hrawi awh. <sup>12</sup> Hote ram daw koe e karoedengnaw, banghai cungkeihoehe naw karingkungnaw kahrawikung ni takhakatawkkungnaw hoi law kaphawnaw lah a ta awh. <sup>13</sup> Bawipa im daw koe e rahum khompui hoi, rahum e tui im, tui kamhluknae naw hah Khaldean taminaw ni rakrak a hem awh teh rahum naw hah Babilon vah a sin awh. <sup>14</sup> Hlaam hoi hraba kawnae, hmaiim, paitei, pacen hoi, rahum ailo, tongben pueng, thawngnae hnopai pueng koug a la awh. <sup>15</sup> Tongben hoi, hlaam, sui hoi ngun hoi sak e hnopainaw pueng karingkungnaw kahrawikung ni koug a la pouh.

<sup>16</sup> Solomon ni BAWIPA im hanelah a sak e khom kahni touh hoi rahum tuiim hoi rahum pahungae amkhong, rahum a ri e teh panue thai hanelah awh hoeh. <sup>17</sup> Khom ka rasang poung e teh dong 18 touh a pha teh, a som vah rahum khom pasum e ao. Hate rahum khom pasum e teh dong 3 touh a rasang, rahum khom pasum e daw koe rahum em hoi, rahumnaw hoi akawi. Alouke khomnaw hai hottelah ao teh, rahum emnaw hoi akawi.

<sup>18</sup> Karingkungnaw kahrawikung ni vaihma bawi Seraiah hoi vaihma Zephaniah hoi tho ka ring e kathum touh a man. <sup>19</sup> Taran ka tuk e ransabawi buet touh hoi siangpahrang ouk a kâhmonae khopui daw koe hmu e 5 touh hoi cakathutkung hoi khopui thung hmu e naw hah ram thung e 60 touh hoi khopui thung hoi a man awh. <sup>20</sup> Karingkungnaw kahrawikung Nebuzaradan ni Riblah hoi Babilon siangpahrang koe vah a ceikhai. <sup>21</sup> Babilon siangpahrang ni Hamath ram e Riblah vah a thei awh. Hahoi teh, Judahnaw teh a ram daw koe hoi san lah a hrawi awh.

### *Judah bawi Gedaliah*

<sup>22</sup> Hahoi Babilon siangpahrang Nebukhadnezar ni, Judah ram a ta e tami thung daw koe Shaphan capa, Ahikam capa Gadaliah hah bawi lah a ta awh.

<sup>23</sup> Hahoi teh, ransa kahrawikungnaw pueng hoi a kut rahim e naw ni Babilon siangpahrang ni, Gadaliah teh bawi lah a sak toe tie a panue awh toteh, Mizpah vah Gadaliah koe vah a cei awh. Hotnaw teh, Nathaniah capa Ishmael, Kareah capa Johanan, Netophah tami Tanhumeth capa Seraiah, Maakath capa Jaazaniah hoi a kut rahim e naw doeh. <sup>24</sup> Gedaliah ni hote taminaw hoi a taminaw koe vah, lawkkamnae a sak teh ahnimouh koe Khaldeannaw e san lah o hanelah taket hanh awh. Het ram daw koe pou awh awh. Babilon siangpahrang kâ ngainae rahim vah awh awh nateh, namamouh hane kahawi han atipouh.

<sup>25</sup> Hatei thapa yung 7 nah, siangpahrang catoun Elishama capa Nathaniah capa Ishmael ni tami 10 touh a ceikhai teh, Gedaliah teh Mizpah e Judahnaw koe kaawm e Khaldean taminaw hoi a tuk awh teh be a thei awh. <sup>26</sup> Hottelah taminaw pueng kalen, kathoung ransabawinaw hoi a tâco teh, Izip ram vah a cei awh. Bangkongtetpawiteh, Khaldean taminaw, a taki awh daw koe doeh.

### *Jehoiakhin thongim hoi a hlout*

<sup>27</sup> Hahoi Jehoiakhin san lah a onae kum 37, thapa 12, hnin 27 nah Babilon siangpahrang, Evilmerodak ni a bawinae kum nah Judah siangpahrang Jehoiakhin teh, thongim thung hoi a hlout sak. <sup>28</sup> Kahawicalah kho a pouk teh Babilon vah ahni koe kaawm e siangpahrangnaw hlak ka rasang poung e tungkhung a poe. <sup>29</sup> Jehoiakhin teh, thongim a bonae khohna a kâthung teh a hringyung thung pueng siangpahrang hmalah a



ca a nei. <sup>30</sup> A hringyung thung hnintangkuem a ca hanelah siangpahrang  
ni a poe teh a coe sak.



# 1 SETOUKNAE

## (The First Book of the Chronicles)

### *Adam koehoi Abraham totouh*

<sup>1</sup> Adam, Seth, Enosh, <sup>2</sup> Kenan, Mahalalel, Jared, <sup>3</sup> Enok, Methuselah, Lamek, <sup>4</sup> Noah, Shem, Ham, hoi Japheth.

<sup>5</sup> Japheth capanaw teh: Gomer, Magog, Madai, Javan, Tubal, Meshek hoi Tiras. <sup>6</sup> Gomer capanaw teh: Ashkenaz, Riphath hoi Togarmah. <sup>7</sup> Javan capanaw teh: Elishah, Tarshish, Kittim hoi Rodanim.

<sup>8</sup> Ham capanaw teh: Kush, Mizraim, Put hoi Kanaan. <sup>9</sup> Kush capanaw teh: Seba, Havilah, Sabtah, Raamah hoi Sabteka. Raamah capanaw teh: Sheba hoi Dedan. <sup>10</sup> Kush ni Nimrod a sak teh ahni teh talai van dawk athakaawme kantawng pasuek e lah ao.

<sup>11</sup> Mizraim ni Ludim, Anamim, Lehabim, Naptuhim a sak. <sup>12</sup> Pathrusim, Kasluhim teh Philistin hoi Kapthorim tâconae lah ao.

<sup>13</sup> Kanaan ni a camin Sidon hoi Kheth, <sup>14</sup> Jebusit, Amor, Girgashite,

<sup>15</sup> Khivee, Arkit hoi Sinit, <sup>16</sup> Arvad, Zemarit hoi Hamathite naw hah a khe.

<sup>17</sup> Shem capanaw teh: Elam hoi Assyria, Arphaxad hoi Lud, Aram hoi Uz, Hul, Gether hoi Meshek. <sup>18</sup> Arphaxad ni Shelah hah a khe teh Shelah ni Eber a khe. <sup>19</sup> Eber ni capa kahni touh a khe, buet touh e min teh Peleg doeh. Bangkongtetpawiteh, hatnae se nah talai a kêrei awh e lah ao. A nawngah e min teh Joktan doeh. <sup>20</sup> Joktan ni Almodad hoi Sheleph, Hazarmaveth hoi Jerah, <sup>21</sup> Hadoram, Uzal, Diklah, <sup>22</sup> Ebal, Abimael, Sheba, <sup>23</sup> Ophir, Havilah hoi Jobab. Hetnaw pueng teh Joktan e capanaw doeh.

<sup>24</sup> Shem, Arphaxad, Shelah, <sup>25</sup> Eber, Peleg, Reu, <sup>26</sup> Serug, Nahor, Terah, <sup>27</sup> Abram heh Abraham doeh.

### *Abraham Catounnaw*

<sup>28</sup> Abraham capanaw teh Isak hoi Ishmael doeh. <sup>29</sup> Hetnaw teh Ishmael casaknaw doeh. Ishmael e camin teh Nebaioth doeh. Hahoi, Kedar, Adbeel hoi Mibsam, <sup>30</sup> Mishma, Dumah, Massa, Hadad, Tema, <sup>31</sup> Jetur, Naphish hoi Kedemah. Ahnimanaw teh Ishmael casaknaw doeh. <sup>32</sup> Abraham e ado Keturah ca sak naw teh Zimran hoi Jokshan, Medan hoi Midian, Ishbak hoi Shuah, Jokshan casak teh Sheba hoi Dedan. <sup>33</sup> Midian casak teh Ephah, Epher, Enok, Abida hoi Eldaah. Hetnaw teh Keturah casaknaw doeh. <sup>34</sup> Abraham ni Isak a sak. Isak casaknaw teh, Esaw hoi Isarel. <sup>35</sup> Esaw casaknaw teh Eliphaz, Reuel, Jeush, Jalam hoi Korah. <sup>36</sup> Eliphaz casaknaw teh, Teman, Omar, Zepho, Gatam, Kenaz, Timna hoi Amalek. <sup>37</sup> Reuel casaknaw teh, Nahath, Zerah, Shammah hoi Mizzah.

### *Seir imthung*

<sup>38</sup> Seir casaknaw teh: Lotan, Shobal, Zibeon, Anah, Dishon, Ezer hoi Dishan. <sup>39</sup> Lotan casak naw teh: Khori, Homam hoi Lotan tawncanu Timna. <sup>40</sup> Shobal casaknaw teh: Alvan, Manahath, Ebal, Shepho hoi Onam. Zibeon casaknaw teh: Aiah hoi Anah. <sup>41</sup> Anah casak teh: Dishon. Dishon casaknaw teh: Hamran, Eshban, Ithran hoi Keran. <sup>42</sup> Ezer casaknaw teh: Bilhan, Zaavan, Jaakan. Dishon casaknaw teh: Uz hoi Aran.

### *Edom siangpahrangnaw*



<sup>43</sup> Isarel catounnaw dawk siangpahrang ao hoehnahlan vah, Edom ram e siangpahrangnaw teh, Beor capa Bela ao teh a khopui min teh Dinnabah doeh. <sup>44</sup> Bela a due hnukkhu teh Bozrah koehoi Zerah capa Jobab teh ahni yueng lah a uk. <sup>45</sup> Jobab a due hnukkhu ahni yueng lah Temani ram dawh hoi Husham ni a uk. <sup>46</sup> Husham a due hnukkhu ahni yueng lah Moab ram vah Midian ka thet e Bedad capa Hadad ni a uk. A khopui min teh Avith doeh. <sup>47</sup> Hadad a due hnukkhu ahni yueng lah Masrekah hoi Samlah ni a uk. <sup>48</sup> Samlah a due hnukkhu teh ahni yueng lah Rehoboth palang hoi Sawl ni a uk. <sup>49</sup> Sawl a due hnukkhu teh ahni yueng lah Akbor capa Baalhanan ni a uk. <sup>50</sup> Baalhanan a due hnukkhu ahni yueng lah Hadad a bawi. A khopui min teh Pau doeh, a yu min teh Mezahab napui Matred canu Mehetabel doeh. <sup>51</sup> Hadad a due hnukkhu Edom khobawi lah kaawmnaw teh, khobawi Timna, khobawi Alvah, khobawi Jetheth, <sup>52</sup> khobawi Oholibamah, khobawi Elah, khobawi Pinon, <sup>53</sup> khobawi Kenaz, khobawi Teman, khobawi Mibzar, <sup>54</sup> khobawi Magdiel, khobawi Iram hetnaw teh Edom khobawi lah ao.

## 2

### *Isarel imthung*

<sup>1</sup> Isarel imthung hateh Reuben, Simeon, Levi, Judah, Issakhar hoi Zebulun, <sup>2</sup> Dan, Joseph, Benjamin, Naphtali, Gad hoi Asher.

### *Judah catoun*

<sup>3</sup> Judah casaknaw teh: Er, Onan hoi Shelah. Hate katham touh teh Kanaan napui Bathshua hoi a sak e naw doeh. Er teh Judah e camin lah ao ei, BAWIPA mithmu vah tamikathout lah ao dawkvah a due sak. <sup>4</sup> A langa Tamar ni hai ahni hanlah Perez hoi Zerah a khe pouh dawkvah, Judah casak heh abuemlah panga touh a pha awh. <sup>5</sup> Perez casaknaw teh: Khetsron hoi Hamul. <sup>6</sup> Zerah casaknaw teh: Zimri, Ethan, Heman, Khalkol hoi Dara hoi abuemlah panga touh a pha awh. <sup>7</sup> Karmi casak teh Akhar doeh. Isarelnaw runae ka poe e, thoebo e ka parawt e Akhan doeh. <sup>8</sup> Ethan casak Azariah. <sup>9</sup> Khetsron casak Jerahmeel ni ahni hanlah Ram hoi Khelubai a sak pouh. <sup>10</sup> Ram ni Amminadab a sak. Amminadab ni Judah casak khobawi Nahshon a sak. <sup>11</sup> Nahshon ni Salma hah a sak teh Salma ni Boaz hah a sak. <sup>12</sup> Boaz ni Obed a sak teh Obed ni Jesi a sak. <sup>13</sup> Jesi ni a camin Eliab a sak. Apâhni lah Abinadab, apâthum lah Shimea, <sup>14</sup> apali nah Nethanel, apanga nah Raddai, <sup>15</sup> ataruk nah Ozem, asari nah Devit a sak. <sup>16</sup> A tawncanu hai ao teh Zeruiah hoi Abigail heh a tawncanu doeh. Zeruiah casak Abishai, Joab, Asahel hoi katham touh a pha awh. <sup>17</sup> Abigail ni Amasa a sak. Amasa na pa teh Ishmael Jether doeh. <sup>18</sup> Khetsron capa Kaleb ni a yu Azubah hoi Jerioth koehoi ca a sak. Ahnie canaw teh: Jesher, Shobab hoi Ardon. <sup>19</sup> Azubah a due hoi Kaleb ni Epharath hah ama koe a la teh ahni hanlah Hur a sak pouh. <sup>20</sup> Hur ni Uri hah a sak teh Uri ni Bezalel a sak. <sup>21</sup> Hahoi Khetsron ni Gilead tami Makhir canu a ikhai teh, Khetsron hah a la teh kum 60 a pha toteh, Khetsron hanlah Segub a sak pouh. <sup>22</sup> Segub ni Jair a sak teh Gilead ram e khopui 23 touh hah ahnie lah ao. <sup>23</sup> Hatei, Geshur, Aram khocanaw hoi Jair, hotnaw thung hoi Kenath hoi a khotenaw, khopui 60 touh a la sin. Hotnaw pueng teh Gilead na pa Makhir casaknaw e doeh. <sup>24</sup> Hahoi



Khetsron teh Kalebephratha kho dawk a due. Khetsron yu Abijah ni ahni hanlah Tekoa na pa Ashhur a sak pouh. <sup>25</sup> Khetsron e camin Jerahmeel casaknaw a camin Ram hoi Bunah, Oren hoi Ozem hoi Ahijah naw doeh. <sup>26</sup> Jerahmeel teh a yu bout a la teh, a min teh Onam manu Atarah doeh. <sup>27</sup> Jerahmeel camin Ram casaknaw teh Maaz, Jamin hoi Eker naw doeh. <sup>28</sup> Onam casak teh Shammai hoi Jada lah ao teh Shammai casak teh Nadab hoi Abishur lah ao. <sup>29</sup> Abishur e yu min teh Abihail doeh, ahni ni Ahban hoi Molid a sak pouh. <sup>30</sup> Nadab casak teh Seled hoi Appaimnaw doeh, Seled teh ca sak laipalah a due. <sup>31</sup> Appaim casak teh Ishi, Ishi casak teh Sheshan, Sheshan casak teh Ahlai. <sup>32</sup> Shammai e nawngah Jada casak teh Jether hoi Jonathan lah a o, Jether teh ca sak laipalah a due. <sup>33</sup> Jonathan casak teh Peleth, Zaza. Hetnaw teh, Jerahmeel casak lah ao awh. <sup>34</sup> Sheshan teh ca tongpa awm hoeh, napuinaw dueng doeh kaawm. Sheshan koevah, Izipsan, a min lah Jarha ao. <sup>35</sup> Sheshan ni a canu teh a san Jarha koevah a yu lah a poe dawkvah ahni hanlah Attai a sak pouh. <sup>36</sup> Attai ni Nathan a sak teh Nathan ni Zabad a sak. <sup>37</sup> Zabad ni Ephlal a sak teh Ephlal ni Obed a sak. <sup>38</sup> Obed ni Jehu a sak teh Jehu ni Azariah a sak. <sup>39</sup> Azariah ni Helez a sak teh Helez ni Eleasah a sak. <sup>40</sup> Eleasah ni Sismai a sak teh Sismai ni Shallum a sak. <sup>41</sup> Shallum ni Jekamiah a sak teh Jekamiah ni Elishama a sak. <sup>42</sup> Jerahmeel nawngah Kaleb casak Ziph na pa Mesha hah a camin teh Mareshah casak Hebron na pa lah ao. <sup>43</sup> Hebron casak teh Korah, Tappuah, Rekem hoi Shema doeh. <sup>44</sup> Shema ni Jorkeam na pa Raham a sak teh Rekem ni Shammai a sak. <sup>45</sup> Shammai casak Moan doeh, Maon teh Bethzur na pa doeh. <sup>46</sup> Kaleb e ado Ephah ni Haran, Moza hoi Gazez a sak. Haran ni Gazez a sak. <sup>47</sup> Jahdai casak teh Regem, Jotham, Geshan, Pelet, Ephah hoi Shaaph doeh. <sup>48</sup> Kaleb e ado Maakah ni Sheber hoi Tirhannah a sak. <sup>49</sup> Madmannah na pa Shaaph, Makhbena na pa Sheva hoi Gibeon na pa hai a sak. Aksah heh Kaleb canu doeh. <sup>50</sup> Hetnaw heh Kaleb casak lah ao awh. Hur casak a camin lah Epharath lah ao teh, Kiriathjearim na pa Shobal. <sup>51</sup> Bethlehem na pa Salma, Bethgader na pa Hareph hai ao. <sup>52</sup> Kiriathjearim na pa Shobal casak thung hoi Manahati tangawn, Haroehnaw hai ao rah. <sup>53</sup> Kiriathjearim casak dawkvah Ithrite hoi Puthit, Shumati, Mishraitinaw ao awh teh, hetnaw koehoi Zorath hoi Eshtaol lah a tâco. <sup>54</sup> Salma casak Bethlehem, Netophah, Atrothbethjoab hoi Manahati tangawn Zorithnaw hah doeh. <sup>55</sup> Cakathutkungnaw casak lah kaawm e teh Jabez, Tirathites, Shimeathi hoi Shukathi doeh. Hetnaw heh Rekhab imthung e a na pa Khammath koehoi ka tâcawt e Keninaw doeh.

### 3

#### *Devit imthung*

<sup>1</sup> Hetnaw heh Devit casaknaw lah ao awh. Ahni hanlah Hebron vah Jezreel Ahinoam ni a camin Amnon a sak pouh. Apâhni lah Karmel Abigail ni Daniel a sak pouh. <sup>2</sup> Apâthum nah siangpahrang Geshur Talmai canu Maakah capa Absalom, apali nah Haggith capa Adonijah. <sup>3</sup> Apanga nah Abital capa Shephatiah, ataruk nah a yu Eglah capa Ithream, <sup>4</sup> Hebron vah hete capa taruk touh heh a sak toe. Hawvah, kum sari touh hoi thapa yung taruk touh a uk teh, Jerusalem vah kum 33 touh a uk. <sup>5</sup> Jerusalem vah a sak e naw teh: Shimea, Shobab, Nathan, Solomon naw doeh. Ammiel canu Bathshua hoi pali touh a sak. <sup>6</sup> Hathnukku, Ithar, Elishama hoi Eliphelet,



<sup>7</sup> Nogah, Nepheg hoi Japhia. <sup>8</sup> Elishama, Eliada hoi Eliphelet, tako touh a pha awh. <sup>9</sup> Hetnaw pueng teh Devit casaknaw doeh, adonaw e casaknaw hai ao rah. Hahoi Tamar teh ahnimae tawncanu doeh.

### *Judah siangpahrangnaw*

<sup>10</sup> Solomon casaknaw teh: Rehoboam, Rehoboam capa Abijah, Abijah capa Asa, Asa capa Jehoshaphat. <sup>11</sup> Jehoshaphat capa Joram, Joram capa Ahaziah, Ahaziah capa Joash, <sup>12</sup> Ahaziah capa Amaziah, Amaziah capa Azariah, Azariah capa Jotham. <sup>13</sup> Jotham capa Ahaz, Ahaz capa Hezekiah, Hezekiah capa Manasseh. <sup>14</sup> Manasseh capa Amon, Amon capa Josiah. <sup>15</sup> Josiah casak teh a camin he Johanan, apâhni lah Jehoiakim, apâthum lah Zedekiah, apali lah Shallum. <sup>16</sup> Jehoiakim casaknaw daw, Jehoiakim capa Jekoniah, Jekoniah capa Zedekiah.

### *Devit catounnaw*

<sup>17</sup> San lah kaawm e Jekoniah casak daw, Jekoniah capa Shealtiel. <sup>18</sup> Malkiram, Pedaiah, Shenazzar, Jekamiah, Hoshama hoi Nedabiah. <sup>19</sup> Pedaiah casak teh Zerubbabel hoi Shimei, Zerubbabel casak teh Meshullam hoi Hananiah hoi a tawncanu Shelomith. <sup>20</sup> Hashubah hoi Ohel, Berekhiah hoi Hasadiah, Jushabhesed hoi panga touh a pha awh. <sup>21</sup> Hananiah casak teh Pelatiah hoi Isaiah, Rephaiah casak, Arnon casak, Obadiah casak, Shekaniah casak. <sup>22</sup> Shekaniah casak teh Shemaiah, Shemaiah casak teh Hattush, Igal, Bariah, Neariah, Shaphat hoi taruk touh a pha awh. <sup>23</sup> Neariah casak teh Elieoenai, Hezekiah, Azrikam hoi katham touh a pha awh. <sup>24</sup> Apâthum e Elieoenai casak koe hoi Hodaviah, Eliashib, Pelaiah, Akkub, Johanan, Delaiah, Anani hoi sari touh a pha awh.

## 4

### *Judah casak*

<sup>1</sup> Judah casak teh Perez, Khetsron, Karmi, Hur, Shobal. <sup>2</sup> Shobal capa Reaiah ni Jahath a sak. Jahath ni Ahumai hoi Lahad a sak. Hetnaw teh Zorath e casaknaw doeh <sup>3</sup> Etam na pa e canaw teh Jezreel, Ishma hoi Idbash doeh, a tawncanu min teh Hazzelelponi doeh. <sup>4</sup> Gedor na pa Penuel hoi Hushah na pa Ezer. Hetteh Bethlehem na pa Epharath e camin Hur casak doeh. <sup>5</sup> Tekoa na pa Ashhur heh a yu kahni touh, Helah hoi Naarah a tawn. <sup>6</sup> Ahni hanlah Naarah ni Ahuzzam, Hepher, Temeni, Haahashtari a sak pouh. Hetnaw heh Naarah casak lah ao. <sup>7</sup> Helah casaknaw teh: Zereth, Zohar hoi Ethan. <sup>8</sup> Koz ni Anub hoi Zobeab a sak teh Harum capa Aharhel casak lah ao. <sup>9</sup> Telah ao navah, Jabez teh a hmaunawngnaw thung daw, minhmai khet e tami lah ao. A manu ni reithai nalaihoi ka khe e doeh ati teh, a min teh Jabez a phung. <sup>10</sup> Jabez teh Isarel Cathut koevah, Yawhawi na poe roeroe haw, ka ram teh kaw sak haw, na kut hoi na awmkhai nateh, lungmathoenae kai koe a pha hoe nahanelah, yonnae thung hoi na hlout sak haw, telah a hram teh, ahni ni a hei e hah a poe.

<sup>11</sup> Shuhah e a nawngna Kelub ni Eshton na pa Mehira a sak. <sup>12</sup> Eshton ni Bethrapha, Paseah, Nahash khopui na pa Tehinah a sak. Hetnaw heh Rekah taminaw doeh. <sup>13</sup> Kenaz casaknaw teh: Othniel, Seraiah. Othniel casak teh Hathath. <sup>14</sup> Meonothai ni Ophrah a sak teh Seraiah ni Gekharashim na pa Joab a sak. <sup>15</sup> Jephunneh capa Kaleb casak teh Iru, Elah hoi Naam, Elah e capa teh Kenaz doeh. <sup>16</sup> Jehallelel casak teh Ziph, Ziphah, Tiria hoi Asarel. <sup>17</sup> Ezraah casak teh Jether, Mered, Ephraim,



Jalon doeh. Miriam ni Shammai hoi Eshtemoa na pa Ishbah a khe pouh.  
<sup>18</sup> Ahnie yu Jehudijah ni Gedor na pa Jered, Sokoh na pa Heber, Zanoah na pa Jekuthiel a sak. Hetnaw teh Mered ni a la e Faro canu Bithiah canaw doeh. <sup>19</sup> Hodiah yu casak teh Karmi Keilah na pa Naham tawncanu hoi Maakath Eshtemoa doeh. <sup>20</sup> Shimon casak teh Amnon, Rinnah, Benhanan, Tilon. Ishi casak teh Zoheth hoi Benzoheth. <sup>21</sup> Judah capa Shelah casak teh Lekah na pa Er, Mareshah na pa Laadah doeh. Ashbe imthung dawk teh loukloukkaang e lukkarei ka sak thai e hai ao. <sup>22</sup> Jokim hoi Kozeba tami hoi Joash, Moab vah yu ka lat e Seraph hoi Jashubilehem. Palang thut e naw doeh. <sup>23</sup> Hetnaw teh Netaim hoi Gederah vah kho ka sak e hlaam ka bo e naw doeh, siangpahrang koe tawngtang kho a sak awh.

### *Simeon caksak*

<sup>24</sup> Simeon casak teh Nemuel, Jamin, Jarib, Zerah, Sawl. <sup>25</sup> Sawl capa Shallum, Shallum capa Mibsam, Mibsam capa Mishma. <sup>26</sup> Mishma casak lah, Mishma capa Hammuel, Hammuel capa Zakkur, Zakkur capa Shimei. <sup>27</sup> Shimei te capa hlaitaruk touh hoi canu taruk touh ao awh ei, a hmaunawngghanaw teh ca moi tawn awh hoeh. Hatdawkvah, ahnimae canaw pueng teh Judah casak patetlah la pung awh hoeh. <sup>28</sup> Beersheba, Moladah, Hazarshual, <sup>29</sup> Bilhah, Ezem, Tolad, <sup>30</sup> Bethuel, Hormah, Ziklag, <sup>31</sup> Bethmarkaboth, Hazarsusim, Bethbiri, Shaaraim vah kho a sak awh. Hetnaw heh Devit a bawi nah totouh ahnimae khopui lah ao. <sup>32</sup> Ahnimae khotenaw teh Etam, Ayin, Rimmon, Tokhen, Ashan hoi kho panga touh. <sup>33</sup> Ahnimae khote pueng teh khopui tenggam vah Baal totouh ao awh. Hetnaw teh khosaknae lah ao awh teh, a napanaw e konglam thut e hai a tawn awh. <sup>34</sup> Meshobab, Jamlekh hoi Amaziah capa Joshah. <sup>35</sup> Joel hoi Asiel casak Seraiah, Joshibiah capa Jehu. <sup>36</sup> Elioenai, Jaakobah, Jeshohaiah, Asaiah, Adiel, Jesimiel hoi Benaiah. <sup>37</sup> Shiphi capa Ziza, Allon capa Shiphi, Jedaiah capa Allon, Shimri capa Jedaiah, Shemaiah capa Shimri. <sup>38</sup> Hete a min kaawm e naw teh casaknaw ka hrawi e lah ao teh, imthung teh moikapap a kamphung awh. <sup>39</sup> Ahnimanaw teh Gedor kaennae tanghling kanitholah totouh saringnaw pâ nahane tawng hanelah a cei awh. <sup>40</sup> Saringnaw pâ nahane, hram ca hane kahawipoung e ram lah a hmu awh. A ram a kaw teh karoumcalah onae hmuen lah ao. Hmaloe la kaawm e teh Ham catounnaw doeh. <sup>41</sup> Hetteh Judah siangpahrang Hezekiah tue navah a min hoi a thut e naw doeh kamnuek. Hatnavah, ahnimae rimnaw hoi Mehunimnaw teh a thei awh teh atu totouh hote hmuen koe ao awh. Bangkongtetpawiteh, saringnaw a pâ nahanlah ao dawkvah. <sup>42</sup> Simeon casak tami 500 touh hane Seir mon dawka luen awh. Hatnavah Ishi canaw Pelatiah, Neariah, Rephaiah hoi Uzziel tinaw teh a lû lah ao awh. <sup>43</sup> Amalek miphun, ka yawng e naw dawka hoi kaawm e naw hah a tâ awh teh, atu totouh kho a sak sin awh.

## 5

### *Reuben casak*

<sup>1</sup> Isarel e camin teh Reuben e capanaw katang doeh. Hateiteh, a na pa e ikhun a khin sak dawkvah, camin lah a onae hah Isarel e capa Joseph e capanaw koe poe e lah ao. Hatdawkvah, setouknae dawka camin lah a onae hah pakhum e lah awm hoeh. <sup>2</sup> Judah teh a hmaunawngghanaw hlak a tha a sai teh, ahni dawka hoi kaukkung a tâco. Camin lah a onae teh Joseph ni a coe. <sup>3</sup> Isarel camin Reuben e casaknaw teh Hanok, Pallu,



Hezron hoi Karmi. <sup>4</sup> Joel casak teh, a capa Shemaiah, Shemaiah capa Gog, Gog capa Shimei. <sup>5</sup> Shimei capa Maikah, Mikah capa Reaiah, Reaiah capa Baal. <sup>6</sup> Baal capa Beerah. Ahni teh Reuben e khobawi lah ao eiteh, Assyria siangpahrang Tiglathpileser ni san lah a hrawi. <sup>7</sup> Amae a nawnggha Jeiel hoi Zekhariah, ahnimouh roi teh ca catoun separuinae pakhumnae dawkvah, imthungnaw kahrawikung lah ao. <sup>8</sup> Azaz capa Bela, Shema capa Azaz, Joel capa Shema ni Aroer hoi Nebo Baalmeon totouh kho a sak. <sup>9</sup> Kanitholah Euphrates palang hoi kahrawng thung kaennae totouh, a coe awh. Bangkongtetpawiteh, Gilead ram dawk saringnaw hah a pungdaw toe. <sup>10</sup> Sawl se navah Hagri miphunnaw hoi a kâtuk awh teh, Gilead kanitholah totouh, rimnaw dawk kho a sak awh.

### *Gad casak*

<sup>11</sup> Gad e casaknaw teh avangvanglah Bashan ram dawk Salkah totouh ao awh. <sup>12</sup> Bashan vah a lû lah Joel, apâhni lah Shapham, Janai hoi Shaphat tinaw doeh. <sup>13</sup> A na pa imthung hoi a hmaunawngghanaw Michael, Meshullam, Sheba, Jorai, Jakhan, Zia, Eber hoi sari touh a pha awh. <sup>14</sup> Hetnaw teh Huri capa Abihail e capanaw doeh. Ahni teh Jaorah capa doeh. Gilead capa, Michael capa, Jeshishai capa, Jahdo capa, Buz capa lah ao. <sup>15</sup> Guni capa, Abdiel capa, Ahni teh imthung kahrawikung lah ao. <sup>16</sup> Hatdawkvah, Gilead hoi Bashan khotenaw tenggam e ram pueng khori totouh kho a sak awh. <sup>17</sup> Hote hnonaw pueng teh, Judah siangpahrang Jotham e se hoi Isarel siangpahrang Jeroboam e se teh setouknae dawk thut lah ao toe. <sup>18</sup> Reuben casak, Gad casak, hoi Manasseh miphun tangawn dawh hoi tarankahawinaw, bahling, tahloi ka patuem thai e naw, likathoumnaw, taran ka tuk thai e naw 44, 760 touh a pha awh. <sup>19</sup> Hatnavah, Hagri, Jetur, Naphish hoi Nodabnaw hoi a kâtuk awh. <sup>20</sup> Kâtuk nahaiyah Cathut koe a hram awh teh, ama a kâuep awh dawkvah, ahnimouh teh a kabawp awh. Hatdawkvah, Hagrinaraw hoi ahnimouh koe kaawm e abuemlah a kut dawh hoi a rungngang awh. <sup>21</sup> Saringnaw a man pouh awh teh, kalauk 50000, tu 250000, hoi la 2000 hoi tami 100000 a la awh. <sup>22</sup> Tarantuknae teh Cathut e lah ao dawkvah, tami moikapap a due awh. San tounge totouh a onae hmuen koe ao awh.

### *Manasseh miphun tangawn*

<sup>23</sup> Manasseh miphun tangawn teh, haw e ram dawk kho a sak awh. Bashan hoi Baalhermon hoi Senir hoi Hermon mon totouh tami teh a pungdaw awh. <sup>24</sup> Hetnaw heh a imthungnaw kahrawikung lah a o: Ephraim, Ishi, Eliel, Azriel, Jeremiah, Hodaviah, Jahdiel. Ahnimanaw teh tami a thakaawme, min kamthang e, imthung kahrawikung lah ao awh. <sup>25</sup> Mintoenaw e Cathut koe yuemkamcu awh hoeh dawkvah, ahnimae hmaitung Cathut ni a raphoe teh, hote ram dawh e cathutnaw koe a kâyo awh. <sup>26</sup> Hottelah Isarel Cathut ni Assiria siangpahrang Pul, Assiria siangpahrang Tiglathpileser e lungthin a tho sak teh, Reuben hoi Gad, Manasseh miphun tangawn hah san lah a man awh teh, Halah, Habor, Hara tinaw hah Gozan palang a ceikhai awh teh atu totouh ao awh.

## 6

### *Levi casak*

<sup>1</sup> Levi casaknaw teh: Gershon, Kohath hoi Merari. <sup>2</sup> Kohath casaknaw teh: Amram, Izhar, Hebron hoi Uzziel. <sup>3</sup> Amram casaknaw teh: Aron, Mosi hoi Miriam. Aron casaknaw teh: Nadab, Abihu, Eleazar hoi Ithamar.



<sup>4</sup> Eleazar ni Phinehas a sak teh Phinehas ni Abishua a sak. <sup>5</sup> Abishua ni Bukki a sak teh Bukki ni Uzzi a sak. <sup>6</sup> Uzzi ni Zerachiah a sak, Zerachiah ni Meraioth a sak. <sup>7</sup> Meraioth ni Amariah a sak, Amariah ni Ahitub a sak. <sup>8</sup> Ahitub ni Zadok a sak, Zadok ni Ahimaaz a sak. <sup>9</sup> Ahimaaz ni Azariah a sak, Azariah ni Johanan a sak. <sup>10</sup> Johanan ni Azariah a sak. Ahni teh Solomon ni Jerusalem vah a sak e im dawkwaihma thaw a tawkw. <sup>11</sup> Azariah ni Amariah a sak teh Amariah ni Ahitub a sak. <sup>12</sup> Ahitub ni Zadok a sak teh Zadok ni Shallum a sak. <sup>13</sup> Shallum ni Hilkiah a sak teh Hilkiah ni Azariah a sak. <sup>14</sup> Azariah ni Seraiah a sak teh Seraiah ni Jehozadak a sak. <sup>15</sup> BAWIPA ni Judah hoi Jerusalem teh, Nebukhadnezar kut dawkw a poe navah, Jehozadak hai a cei. <sup>16</sup> Levih casaknaw teh: Gershom, Kohath hoi Merari. <sup>17</sup> Gershom casaknaw e min teh, Libni hoi Shimei. <sup>18</sup> Kohath casaknaw teh: Amram, Izhar, Hebron hoi Uzziel. <sup>19</sup> Merari casaknaw teh: Mahli, Mushi naw doeh. Hetnaw teh Levih casaknaw e napanaw doeh. <sup>20</sup> Gershom casaknaw teh: Gershom capa Libni, Libni capa Jahath, Jahath capa Zimmah. <sup>21</sup> Zimmah capa Joah, Joab capa Iddo, Iddo capa Zerah, Zerah capa Jeatherai. <sup>22</sup> Kohath casaknaw teh: Kohath capa Amminadab, Amminadab capa Korah, Korah capa Assir. <sup>23</sup> Assir capa Elkanah, Elkanah capa Ebiasaph, Ebiasaph capa Assir. <sup>24</sup> Assir capa Tahath, Tahath capa Uriel, Uriel capa Uziah, Uziah capa Sawl. <sup>25</sup> Elkanah casaknaw teh: Amasai hoi Ahimoth. <sup>26</sup> Ahimoth capa Elkanah, Elkanah casaknaw teh: Elkanah capa Zuph, Zuph capa Nahath. <sup>27</sup> Nahath capa Eliab, Eliab capa Jeroham, Jeroham capa Elkanah. <sup>28</sup> Samuel casaknaw teh: a camin Joel, apâhni e teh Abijah doeh. <sup>29</sup> Merari casaknaw teh: Mahli capa Libni, Libni capa Shimei, Shimei capa Uzzah. <sup>30</sup> Uzzah capa Shimea, Shimea capa Haggiah, Haggiah capa Asaiah.

### *La kahrawikungnaw*

<sup>31</sup> Hetnaw teh lawkkam thingkong a ta hnukkhu, BAWIPA e im dawkw kahrawikung hanelah Devit ni a ta e naw lah ao. <sup>32</sup> Solomon ni Jerusalem BAWIPA im a sak hoehoukrak, kamkhuengnae lukkareim dawkw la hoi thaw a tawkw awh. A huhu lahohi thaw tawkw a kâhlai awh. <sup>33</sup> Hotnaw teh thaw katawnaw lah ao awh. A canaw hoi Kohath catounnaw teh la ka sak e Heman doeh. <sup>34</sup> Elkanah capa Samuel, Jeroham capa Elkanah, Eliel capa Jeroham, Toah capa Eliel. <sup>35</sup> Zuph capa Toa, Elkanah capa Zuph, Mahath capa Elkanah, Amasai capa Mahath. <sup>36</sup> Elkanah capa Amasai, Joel capa Elkanah, Azariah capa Joel, Zephaniah capa Azariah. <sup>37</sup> Tahath capa Zephaniah, Assir capa Tahath, Ebiasaph capa Assir, Korah capa Ebiasaph. <sup>38</sup> Izhar capa Korah, Kohath capa Izhar, Levih capa Kohath, Isarel capa Levih. <sup>39</sup> A hmaunawngna e aranglah ka tahung e Asaph, Berekhiah capa Asaph, Shimea capa Berekhiah. <sup>40</sup> Michael capa Shimea, Baaseiah capa Michael, Malkhijah capa Baaseiah. <sup>41</sup> Ethni capa Malkhijah, Zerah capa Ethni, Adaiah capa Zerah. <sup>42</sup> Ethan capa Adaiah, Zimmah capa Ethan, Shimei capa Zimmah. <sup>43</sup> Jahath capa Shimei, Gershom capa Jahath, Levih capa Gershom. <sup>44</sup> Hahoi avoilah kaawm e hmaunawngna Merari casak teh: Kishi capa Ethan, Abdi capa Kishi, Malluck capa Abdi. <sup>45</sup> Hashabiah capa Malluck, Amaziah capa Hashabiah, Hilkiah capa Amaziah, <sup>46</sup> Amzi capa Hilkiah, Bani capa Amzi, Shemer capa Amzi. <sup>47</sup> Mahli capa Shemer, Mushi capa Mahli, Merari capa Mushi, Levih capa Merari.

### *Aron casak*



<sup>48</sup> A hmaunawngghanaw thung dawk e Levih imthungnaw teh, Cathut onae lukkareiim dawk thaw ka tawk hanelah poe e lah ao awh. <sup>49</sup> Aron e casaknaw ni Cathut e san Mosi ni kâ a poe e naw pueng teh, hmuen kathoungpounge koe thaw tawk hane a coe awh. Isarelnaw yontha hanelah sathai hoi hmuithui hah hmaisawi thuengnae khoungroe dawk ouk a poe awh. <sup>50</sup> Aron casaknaw teh: Aron capa Eleazar, Eleazar capa Phinehas, Phinehas capa Abishua. <sup>51</sup> Abishua capa Bukki, Bukki capa Uzzi, Uzzi capa Zerariah. <sup>52</sup> Zerariah capa Meraioth, Meraioth capa Amariah, Amariah capa Ahitub. <sup>53</sup> Ahitub capa Zadok, Zadok capa Ahimaaz.

### *Levih Khohmuen*

<sup>54</sup> Hetnaw teh amamae ram thung a onae hmuen a nepnae koe lengkaleng kho a sak awh. Aron e capa Kohath miphunnaw teh, cungpam a khoe awh e patetlah, <sup>55</sup> Judah ram hoi Hebron hoi a tengpam e pueng hah poe e lah ao awh. <sup>56</sup> Hateiteh, khopui hoi a tengpam e ramnaw hoi khotenaw teh Jephunneh e capa Kaleb hah a poe awh. <sup>57</sup> Aron capanaw teh, kângue e khopui, Hebron, Libnah hoi a tengpam hai, Jattir hoi Eshtemoa tengpam e khonaw hai. <sup>58</sup> Hilan tengpam e khonaw hai, Debir tengpam e khonaw hai. <sup>59</sup> Ashan tengpam e khonaw, Bethshemesh tengpam e khonaw hai. <sup>60</sup> Benjamin miphunnaw thung dawk hoi Geba hoi tengpam e khonaw, Alemeth tengpam hoi khonaw hai. Anathoth tengpam e khonaw hai a poe awh. A miphunnaw koe a poe awh e khonaw teh, kho 13 touh a pha. <sup>61</sup> Kohath miphun imthungnaw hanelah Manasseh miphun tangawn naw ni a coe awh e dawk hoi khopui 10 touh cungpam a khoe awh teh a poe awh. <sup>62</sup> Gershom casaknaw teh, a miphun lahoi Issakhar miphun ni a coe e dawk hoi, Asher miphun a coe e dawk hoi, Naphtali miphun coe e dawk hoi, Manasseh miphun coe e dawk hoi, Bashan ram Manasseh coe e naw dawk hoi khopui 13 touh a poe awh. <sup>63</sup> Merari casaknaw teh: amamae imthung lahoi Reuben coe e dawk hoi, Gad coe e dawk hoi, Zebulun coe e dawk hoi, cungpam khoe e lah kho 12 touh a poe awh. <sup>64</sup> Isarelnaw ni Levih miphunnaw teh khopui hoi a tengpam e naw hah a poe awh. <sup>65</sup> Judah miphun coe e thung dawk hoi, Simeon miphun coe e thung dawk hoi, Benjamin miphun coe e thung dawk hoi, cungpam khoe e lahoi a poe awh. <sup>66</sup> Kohath miphun coe e hoi Ephraim miphun coe e khopui hai a coe awh. <sup>67</sup> Ephraim mon dawkvah, kângue e khopui Shekhem e tengpamnaw hai a poe awh. Gezer hoi a tengpamnaw hai a poe awh. <sup>68</sup> Jokmeam hoi a tengpamnaw hai, Bethhoron hoi a tengpamnaw hai, <sup>69</sup> Aijalon hoi a tengpamnaw hai, Gathrimmon hoi a tengpamnaw hai, <sup>70</sup> Manasseh miphun tangawn ni coe e thung dawk e Kohath catounnaw hanelah, Aner hoi a tengpamnaw hai, Balaam hoi a tengpamnaw hai, Kohath capa imthung abuemlah hanelah a poe awh. <sup>71</sup> Manasseh miphun tangawn ni coe e thung dawk hoi Gershom capanaw a poe awh e teh, Ashtaroth hoi a tengpamnaw hai, <sup>72</sup> Issakhar miphun coe e Kedesh hoi a tengpamnaw hai, Daberath hoi a tengpamnaw hai, <sup>73</sup> Ramoth hoi a tengpamnaw hai, Anem hoi a tengpamnaw hai <sup>74</sup> Asher miphun ni a coe e thung dawk hoi Mashal hoi a tengpamnaw hai, Abdon hoi a tengpamnaw hai, <sup>75</sup> Hukkuk hoi a tengpamnaw hai, Rehob hoi a tengpamnaw hai, <sup>76</sup> Naphtali miphun ni coe e thung dawk hoi Galilee ram e Kedesh hoi a tengpamnaw hai, Hammon hoi a tengpamnaw hai, Kiriathaim hoi a tengpamnaw hai, <sup>77</sup> Zebulun miphun coe e thung hoi Merari e catounnaw abuemlah hanelah Rimmon hoi a tengpamnaw hai,



Tabor hoi a tengpamnaw hai, <sup>78</sup> Jeriko kho e Jordan tui namran kanîtholah Reuben miphun coe e thung dawk hoi Bezer hoi a tengpamnaw hai, Jahzah hoi a tengpamnaw hai, <sup>79</sup> Kedemoth hoi a tengpamnaw hai, Mephaath hoi a tengpamnaw hai, <sup>80</sup> Gad miphun coe e thung dawk hoi Gilead e Ramoth hoi a tengpamnaw hai, Mahanaim hoi a tengpamnaw hai, <sup>81</sup> Heshbon hoi a tengpamnaw hai, Jazer hoi a tengpamnaw hai a poe awh.

## 7

### *Issakhar casak*

<sup>1</sup> Issakhar casaknaw teh: Tola, Puvah, Jashub, Shimron hoi pali touh a pha awh.

<sup>2</sup> Tola casaknaw teh: Uzzi, Rephaiah, Jeriel, Jahmai, Ibsam hoi Samuel heh a na pa imthung dawk a lû lah ao awh. Tola teh catoun imthung dawk athakaawme lah ao. Devit a hring nah tami 22, 600 touh a pha awh.

<sup>3</sup> Uzzi casaknaw teh: Izrahiah, Izrahiah casaknaw teh: Michael, Obadiah, Joel, Isshiah hoi panga touh a pha awh, abuemlahoi a lû lah kOUNg ao awh. <sup>4</sup> A imthung milu separeinae lahoi 36, 000 a pha awh. A yucanaw moikapap a tawn awh. <sup>5</sup> Issakhar imthungnaw separuinae dawK parei sin e hmaunawngnanaw teh thakaawme tami 87, 000 a pha awh.

### *Benjamin casak*

<sup>6</sup> Benjamin casaknaw teh: Bela, Bekher, Jediael hoi kathum touh a pha awh. <sup>7</sup> Bela casaknaw teh: Ezbon, Uzzi, Uzziel, Jerimoth, Iri hoi panga touh a pha awh. A napanaw imthung dawK a lû lah kaawm e hoi athakaawme tami lah ao awh. Imthung separuinae dawK parei sin e hmaunawngnanaw teh 22, 034 touh a pha awh. <sup>8</sup> Bekher casaknaw teh: Zemirah, Joash, Eliezer, Elioenai, Omri, Jerimoth, Abijah, Anathoth hoi Alemeth. Hetnaw teh abuemlahoi Bekher casaknaw doeh. <sup>9</sup> Ahnimouh teh imthung separuinae dawK parei sin e patetlah imthung dawK a lû lah kaawm e hoi athakaawme taminaw lah ao awh teh, 20, 200 touh a pha awh. <sup>10</sup> Jediael casaknaw teh: Bilhan, Bilhan casaknaw teh: Jeush, Benjamin, Ehud, Kenaanah, Zethan, Tarshish hoi Ahishahar. <sup>11</sup> Hetnaw pueng heh a na pa imthung dawkvah, lû lah kaawm e naw hoi a thakaawme taminaw lah ao awh teh 17, 200 touh a pha awh. <sup>12</sup> Ir casaknaw teh: Shuppmim hoi Huppmim, Aher casak teh Hushim.

### *Naphtali casak*

<sup>13</sup> Naphtali casaknaw teh: Jahziel, Guni, Jezer, Bilhah casak teh Shallum.

### *Manasseh casak*

<sup>14</sup> Manasseh e ado Aramaih tami ni Asriel hah a sak pouh teh Gilead na pa Makhir hai a sak pouh. <sup>15</sup> Makhir ni a yu hah Huppmim hoi Shuppmim tami a yu lah a la. A tawncanu min teh Maakah doeh. Apâhni e min teh Zelophehad. Hatei Zelophehad koehoi ca napuinaw doeh kaawm. <sup>16</sup> Makhir yu Maakah ni capa a khe teh a min lah Peresh a phung. A nawngna min teh Sheresih doeh, ahnie ca roi teh Ulam hoi Rekem. <sup>17</sup> Ulam casak teh Bedan. Hetnaw heh Manasseh capa Makhir e a ca Gilead casaknaw doeh. <sup>18</sup> A tawncanu Hammoleketh ni Ishhod, Abiezer hoi Mahlah a sak. <sup>19</sup> Shemida casaknaw teh: Ahian, Shekhem, Likhi hoi Aniam doeh.

### *Ephraim casak*



<sup>20</sup> Ephraim casak teh Shuthela doeh. Shuthela capa Bered, Bered capa Tahath, Tahath capa Eleadah, Eleadah capa Tahath. <sup>21</sup> Tahath capa Zabad, Zabad casaknaw teh: Shuthela, Ezer hoi Elead. Hote ram dawkw ka tâcawt e Gad taminaw ni saringnaw lawp hane a ngai awh dawkvah, a thei awh. <sup>22</sup> A na pa Ephraim ni ahnin moikasawlah a khui. A hmaunawngghanaw ni lungpahawi hanelah a tho sin awh. <sup>23</sup> Hahoi a yu koe a i teh, a yu te camo a vawn. Capa a khe pouh toteh a imthung dawkw yawthoe a kâhmo dawkvah a min teh Beriah a phung. <sup>24</sup> Ahnie canu teh Sheerah doeh, atunglah kaawm e Bethhoron kho hoi akalah kaawm e Uzzenasherah kho ka thawng e doeh. <sup>25</sup> Ahnie casaknaw teh: Rephah hoi Resheph doeh. Resheph capa teh, Telah. Telah capa teh Tahan. <sup>26</sup> Tahan capa Ladan, Ladan capa Ammihud, Ammihud capa Elishama. <sup>27</sup> Elishama capa Nun, Nun capa Joshua. <sup>28</sup> A coe awh e hoi a khosaknae teh, Bethel hoi khotenaw hoi kanitholae Naaran, kaniloumlae Gezer hoi khotenaw, Shekhem hoi khotenaw, Ai hoi khotenaw koe totouh. <sup>29</sup> Manasseh casaknaw khori lungui vah, Bethshean hoi khotenaw, Taanakh hoi khotenaw, Megiddo hoi khotenaw, Dor hoi khotenaw heh Isarel capa Joseph casaknaw ni hawvah kho a sak awh.

### *Asher casaknaw*

<sup>30</sup> Asher casaknaw teh: Imnah, Ishua, Ishvi, Beriah hoi a tawncanu Serah. <sup>31</sup> Beriah casaknaw teh: Heber, Birzaith na pa Malkhiel hoi Birzaith. <sup>32</sup> Heber ni Japhlet, Shomer, Hotham hoi a tawncanu Shua a sak. <sup>33</sup> Japhlet casak Pasakh, Bimhal, Ashvath doeh, hetnaw heh Japhlet casaknaw doeh. <sup>34</sup> Shemer casak Ahi, Rohgah hoi Hubbah Rohgah, Hubbah hoi Aram. <sup>35</sup> A hmaunawnggha Helem casaknaw teh: Zophah, Imna, Shelesh hoi Amal. <sup>36</sup> Zophah casak Suah, Harnepher, Shual, Beri hoi Imrah. <sup>37</sup> Bezer, Hod, Shammah, Shilshah, Ithran hoi Beera. <sup>38</sup> Jether casaknaw teh: Jephunneh, Pispah, Ara. <sup>39</sup> Ulla casaknaw teh: Arah, Hanniel hoi Rizia. <sup>40</sup> Hetnaw pueng teh Asher dawkw hoi imthung dawkw lû lah kaawmnaw, thakaawme taminaw doeh. Hottelah imthung separuinae hoi taran ka tuk thai naw parei navah tami 26, 000 touh a pha awh.

## 8

### *Benjamin casak*

<sup>1</sup> Benjamin ni a camin lah Bela, apâhni lah Ashbel, apâthum lah Aharah a sak. <sup>2</sup> Apali lah Nohah, apanga lah Rapha. <sup>3</sup> Bela casak teh: Addar, Gera, Abihud. <sup>4</sup> Abishua, Naaman, Ahoah. <sup>5</sup> Gera, Shephuphan, Hiram doeh. <sup>6</sup> Hetnaw teh Ehud capanaw doeh. Geba kho ka sak e imthungnaw kahrawikung lah Manahath kho dawkw ngangngang ceisak e naw doeh. <sup>7</sup> Naaman, Ahijah, Gera tinaw heh ngangngang ceisak e naw doeh. Ahni ni Uzzah hoi Ahihud hah a sak. <sup>8</sup> Shaharaim ni ahnimouh a bansak hnukkhu hoi a yu Hushim hoi Baara ni Moab ram dawkw ca catounnaw moi a sak. <sup>9</sup> A yu Hodesh koehoi Jobab, Zibia, Mesha, Milkom, <sup>10</sup> Jeuz, Sakia, Mirmah a sak. Ahnie casaknaw teh napanaw e lû lah ao awh. <sup>11</sup> Hushim koehoi Abitub hoi Elpaal a sak. <sup>12</sup> Elpaal casak teh: Eber, Misham, Shemmed. Ahni teh Ono, Lod hoi khotenaw kathawngkung lah ao. <sup>13</sup> Beriah hoi Shema teh Aijalon vah kho ka sak e napanaw e lû lah ao awh. Ahnimouh roi doeh Gath vah kho ka sak naw hai ka yawng sak. <sup>14</sup> Hathnukkhu, Ahio, Shashak hoi Jerimoth. <sup>15</sup> Zebadiah, Arad hoi Eder. <sup>16</sup> Michael, Ishaph,



Beriah casak Joha. <sup>17</sup> Zebadiah, Meshullam, Hizki hoi Heber. <sup>18</sup> Ishmerai, Izliah hoi Elpaal casak Jobab tinaw doeh. <sup>19</sup> Jakim, Zikhri hoi Zabdi. <sup>20</sup> Elienai, Zillethai hoi Eliel. <sup>21</sup> Adaiah, Beriah hoi Shimei casak Shimrath. <sup>22</sup> Ishpan, Eber hoi Eliel. <sup>23</sup> Abdon, Zikhri hoi Hanan. <sup>24</sup> Hananiah, Elam hoi Anthothijah. <sup>25</sup> Iphdeiah hoi Shashak casak Penuel. <sup>26</sup> Shamsherai, Shehariah hoi Athaliah. <sup>27</sup> Jaareshiah, Elijah hoi Jeroham casak Zikhri. <sup>28</sup> Amamae separuinae dawkvah imthung kahrawinaw lah ao awh teh, Jerusalem vah kho a sak awh. <sup>29</sup> Gibeon vah Gibeon na pa ni kho a sak teh a yu min teh Maakah doeh. <sup>30</sup> Ahnie casak teh: a camin teh Abdon doeh, Zur, Kish, Baal hoi Nadab. <sup>31</sup> Gedor, Ahio, Zeker. <sup>32</sup> Mikloth ni Shimeah hah a sak. Ahnimouh hai Jerusalem vah a hmaunawngghanaw e teng vah kho a sak awh. <sup>33</sup> Ner ni Kish a sak, Kish ni Sawl a sak, Sawl ni Jonathan, Malkishua, Abinadab, Eshbaal a sak. <sup>34</sup> Jonathan casak teh: Meribbaal doeh, Meribbaal ni Maikah a sak. <sup>35</sup> Maikah casak teh: Pithon, Melek, Tarea hoi Ahaz. <sup>36</sup> Ahaz ni Jehoaddah a sak, Jehoaddah ni Alemeth, Azmaveth hoi Zimri a sak. Zimri ni Moza a sak. <sup>37</sup> Moza ni Binea a sak. Binea capa Rapha, Rapha capa Eleasah, Eleasah capa Azel. <sup>38</sup> Azel teh capa taruk touh ao teh, hotnaw e min teh Azrikam, Bokeru, Ishmael, Sheariah, Obadiah, Hanan. Ahnimanaw teh Azel casak seng doeh. <sup>39</sup> A hmaunawnggha Eshek casak lah a camin te Ulam doeh, apâhni e teh Jeush, apâthum e teh Eliphelet. <sup>40</sup> Ulam casaknaw teh a thakasai e, tarankahawi e, licung ka patuem thai e naw doeh. A canaw a pungdaw awh teh, a ca catounnaw abuemlah 150 touh a pha awh. Hetnaw pueng teh Benjamin casak seng doeh.

## 9

### *Santoungnae*

<sup>1</sup> Hahoi teh, Isarelnaw pueng imthung lahoi separuinae teh, Isarel siangpahrangnaw cauk dawkvah a thut awh. Hateiteh, Judah teh yuemkamcu lah ao hoeh dawkvah, Babilon vah san lah a hrawi awh. <sup>2</sup> A coe awh e khonaw dawkhmaloe kaawm e naw teh Isarelnaw, vaihmanaw, Levihnaw, Nethinimnaw doeh.

### *Jerusalem kho kasaknaw*

<sup>3</sup> Jerusalem vah Judah casak, Benjamin casak, Ephraim hoi Manasseh casak naw hai kho a sak awh. <sup>4</sup> Judah capa Perez casak Bani, Benjamin capa Imri, Imri capa Omri, Omri capa Ammihud, Ammihud capa Uthai. <sup>5</sup> Shiloh e a camin Asaiah hoi ahnie casaknaw, <sup>6</sup> Zerah casak Jewel hoi a hmaunawnggha 690 touh a pha awh. <sup>7</sup> Benjamin casak Hassenuah capa Hodaviah, Hodaviah capa Meshullam, Meshullam capa Salu. <sup>8</sup> Jeroham capa Ibneiah, Uzzi capa Elah, Mikhri capa Uzzi, Shephatiah capa Meshullam, Reuel capa Sephatiah, Ibnijah capa Reuel. <sup>9</sup> Ahnimanaw teh a hmaunawngghanaw 956 a pha awh. Hetnaw pueng teh, miphun dawkvah imthung kahrawikungnaw doeh.

### *Jerusalem e vaihmanaw*

<sup>10</sup> Vaihmanaw teh Jedaiah, Jehoiarib hoi Jakhin. <sup>11</sup> Cathut im dawkhawikung lah kaawm awh e Ahitub capa Meraioth, Meraioth capa Zadok, Zadok capa Meshullam, Meshullam capa Hilkiah, Hilkiah capa Azariah. <sup>12</sup> Jeroham capa Adaiah, Pashhur capa Jeroham, Malkhijah capa Pashhur, Adiel capa Maasai, Jahzerah capa Adiel, Meshullam



capa Jahzerah, Meshillemith capa Meshullam, Immer capa Meshillemith.  
<sup>13</sup> Ahnimouh a hmaunawngghanaw hai a napanaw e imthung dawk a lû lah kaawmnaw doeh. Hotnaw teh Cathut im dawk thaw ka tawk thai awh e lah ao awh teh, tami 1760 touh a pha awh.

### *Jerusalem e Levihnaw*

<sup>14</sup> Levi, Merari casaknaw teh Hasshub capa Shemaiah, Azrikam capa Hasshub, Hashabiah capa Azrikam. <sup>15</sup> Bakbakkar Heresh hoi Galal, Mikha capa Mattaniah, Zikhri capa Mikha, Asaph capa Zikhri. <sup>16</sup> Shemaiah capa Obadiah, Galal capa Shemaiah, Jeduthun capa Galal, Asa capa Berekhiah, Elkanah capa Asa teh Netophah kho dawk kho a sak awh.

### *longkha ka ring e Levihnaw*

<sup>17</sup> Longkha karingkungnaw teh Shallum, Akkub, Talmon hoi Ahiman. Shallum teh lû lah ao. <sup>18</sup> Ahni teh ha hoehnahlan vah, atunglah kaawm e lah ao. Ahnimouh teh Levi e catounnaw roenae hmuene longkha karingkungnaw lah ao awh. <sup>19</sup> Kore capa Shallum, Ebiasaph capa Kore, Korah capa Ebiasaph hoi a hmaunawngghanaw. Mintoenaw e BAWIPA im dawk thaw katawnaw, kêennae longkha karingkungnaw lah ao awh. <sup>20</sup> Eleazar capa Phinehas teh BAWIPA ni a okhai teh kahrawikung lah ao. <sup>21</sup> Meshelemiah capa Zekhariah teh kamkhuengnae lukkareim takhang ka ring e lah ao. <sup>22</sup> Longkha ka ring hanelah a rawi e naw teh, 212 touh a pha awh. Devit hoi Samuel ni a taw awh hane a pouk e naw teh, mae kho lengkaleng a tâconae patetlah separuinae dawktut e lah ao. <sup>23</sup> Hettelah amamouh hoi a catounnaw haiyah BAWIPA e lukkareim longkha ka ring hanelah ao awh. <sup>24</sup> Kanitho, kaniloum, atunglah, akalah, petkâtue lah longkha karingkungnaw thaw poe lah ao. <sup>25</sup> Khote lae a hmaunawngghanaw teh hnin sari touh thung hanelah hnin touh hoi hnin touh, a kâhlai awh vaiteh, meng a tho awh hane doeh. <sup>26</sup> Bangkongtetpawiteh, longkha karingkungnaw pali touh teh Levihnaw doeh. Cathut e im dawk a hruek awh e hnopai karingkung lah ao awh. <sup>27</sup> Hottelah amom tanguem longkha paawng e hah thaw poe e lah ao dawkvah, Cathut e im petkâkalup lah a roe awh.

### *Levi tangawn thaw poe e*

<sup>28</sup> Tangawn ni thaw tawaknae puengcangnaw a ring awh, a kuem awh, a la awh, ouk a touk awh. <sup>29</sup> Tangawn teh hnopai hmuene kathoung dawktut e puengcangnaw hah, tavai, misur, satui, hmuיתי a kuemyawt awh teh a ring awh. <sup>30</sup> Vaihma capa tangawn ni hmuיתי hah ouk a sak awh. <sup>31</sup> Korah tami Shallum e capa kacuepoung Levi tami Mattithiah teh vaiyei karê thaw a tawktut. <sup>32</sup> Kohath capanaw thung dawktut hoi a hmaunawnggha tangawn teh Sabbath hnintangkuem hanelah, vaiyei ka rakueng e lah ao. <sup>33</sup> Hetnaw heh la ka sak e Levihnaw a na pa imthung kahrawikung, bawkim rakhan karingnaw, lah ao awh teh, alouke thaw kâbet awh hoehtut. Bangkongtetpawiteh, karum khodai thaw katawnaw lah ao awh. <sup>34</sup> Levi imthung kacuenaw teh, amamae se dawktut kacue e lah Jerusalem vah pou ao awh.

### *Sawl Imthung*

<sup>35</sup> Gibeon na pa Jeiel, Jeiel teh Gibeon vah kho a sak teh, a yu min teh Maakah doeh. <sup>36</sup> A camin teh Abdon doeh. Hahoi Zur, Kish, Baal, Ner hoi Nadab. <sup>37</sup> Gedor, Ahio, Zekhariah hoi Mikloth naw a sak. <sup>38</sup> Mikloth ni



Shimeah a sak. Ahni hai Jerusalem vah a hmaunawngghanaw koe ao. <sup>39</sup> Ner ni Kish a sak, Kish ni Sawl a sak, Sawl ni Jonathan, Malkhishua, Abinadab hoi Eshbaal a sak. <sup>40</sup> Jonathan casak Meribbaal doeh, Meribbaal ni Maikah a sak. <sup>41</sup> Maikah casak teh Pithon, Melek hoi Tahrea. <sup>42</sup> Ahaz ni Jarah a sak, Jarah ni Alemeth, Azmaveth hoi Zimri a sak. Zimri ni Moza a sak. <sup>43</sup> Moza ni Binea a sak teh Binea capa Rephaiah, Rephaiah capa Eleasah, Eleasah capa Azel. <sup>44</sup> Azel teh capa taruk touh a tawn. A minnaw teh: Azrikam, Bokeru, Ishmael, Sheariah, Obadiah hoi Hanan doeh. Hetnaw teh Azel capanaw doeh.

## 10

### *Sawl imthung duenae*

<sup>1</sup> Filistinnaw ni Isarelnaw a tuk awh teh, Isarelnaw teh tarannaw hmalah a yawng awh teh, Gilboa mon daw k thengpatheng lah a kamlei awh teh a due awh. <sup>2</sup> Filistinnaw ni Sawl hoi a capa hah, phat a pâlei awh teh, Sawl capa Jonathan, Abinadab, Malkhishua hah a thei awh. <sup>3</sup> Sawl teh a tarannaw ni rek a pâlei awh teh, licung ka kathoum e ni pala hoi a ka awh teh hmâ a ca sak awh. <sup>4</sup> Sawl ni amae senehmaica ka patuem e koevah, na tahloi hah rayu nateh, pawkkayawng lah na thun. nahoe pawwiteh, vuensom ka a hoehnaw ni lung na paroum nah awh langvaih atipouh. Hateiteh, amae senehmaica ka patuem e ni thun ngai hoeh. Bangkongtetpawwiteh, a taki. Hatdawkvah, Sawl ni amahoima tahloi a vai teh a tabosin. <sup>5</sup> Senehmaica ka patuem e ni Sawl a due toe tie hah, a hmu torei teh, ahni hai amahoima tahloi hoi a kâthei van. <sup>6</sup> Sawl hoi a capanaw kathum touh a due awh.

<sup>7</sup> Tanghling daw k kaawm e Isarelnaw pueng teh, a yawng awh. Sawl hoi a capanaw a due toe tie a thai awh torei teh, kho a tâco takhai awh teh, a yawng awh. Hot dawkvah Filistinnaw ni ao na awh. <sup>8</sup> A tangtho vah Filistinnaw ni a thei awh e naw daw k, senehmaica hah la hanelah a cei awh navah, Gilboa mon daw k Sawl hoi a capanaw kadout e hah a hmu awh. <sup>9</sup> Senehmaica hah a rading awh teh, a lû hoi senehmaicanaw hah meikaphaw k imnaw hoi a taminaw e meikaphawknaw koe pathang hanelah kamthang a pathang awh. <sup>10</sup> A senehmaica teh amamae cathut im daw k a hruet awh teh, a lû teh dagon im daw k a vo awh.

<sup>11</sup> Sawl daw k Filistinnaw ni a sak e naw hah Jabesh Gilead kaawmnaw pueng ni a thai awh torei teh, <sup>12</sup> tami tarankahawinaw ni a kamthaw sin awh teh, Sawl hoi a capa e ro hah a la awh teh, Jabesh kho lah a ceikhai awh teh, a hruhrawngnaw hah kathen kung rahim vah a pakawp awh. Hnin 7 touh thung rawcahai laihoi ao awh.

<sup>13</sup> BAWIPA taranlahoi a sak e, yuemkamcu lah ao hoeh kecu daw k Sawl teh a due. Bangkongtetpawwiteh, BAWIPA e law k hah tarawi laipalah, khueyueni koe pouknae a hei. <sup>14</sup> Hateiteh, BAWIPA koe teh pouknae a hei hoeh dawkvah, ahni hah a due sak teh, a uknaeram hah Jesi capa Devit koe a pœe pouh.

## 11

### *Devit siangpahrang lah a sak*

<sup>1</sup> Isarelnaw pueng teh Hebron kho koe a tho awh. Khenhaw! kaimanaw teh na hru hoi na tak lah ka o awh. <sup>2</sup> Hnu k lae atueng daw k Sawl a baw nah haiyah, Isarelnaw ka tâcawtkhai e hoi kâenkhai e lah na o.



BAWIPA Cathut ni nang koevah, ka tami Isarel tukhoumking lah na o vaiteh, kahrawikung lah na o han ati telah atipouh awh. <sup>3</sup> Hatdawkvah, Isarel kacuenaw pueng teh Hebron kho siangpahrang koe a tho awh teh, Devit ni Hebron kho BAWIPA e hmalah, ahnimouh hoi lawkkamnae a sak. Samuel hno lahoi BAWIPA e lawk patetlah Isarel siangpahrang hanelah Devit teh satui a awi awh.

### *Devit e khopui*

<sup>4</sup> Devit hoi Isarelnaw pueng teh Jubusitnaw khosaknae Jerusalem lah a cei awh. Jerusalem teh Jebusitnaw khosaknae doeh. <sup>5</sup> Jebusit kho kaawmnaw ni Devit hi vah khoeroe kaen hanh, telah atipouh awh. Hateiteh, Devit ni Zion rapanim a lawp pouh teh Devit khopui tie lah ao. <sup>6</sup> Devit ni Jubusitnaw hmaloe ka tuk e teh, ransabawi hoi kahrawikung lah ao han telah ati. Hatdawkvah, Zeruiah capa Joab teh hmaloe poung lah a cei teh kahrawikung kacue lah a sak.

<sup>7</sup> Devit teh rapanim thung lah kho a sak dawkvah, Devit khopui ati awh. <sup>8</sup> Millo e hmuen koehoi khopui petkâkalup lah rapan teh a kangdue. Joab ni khopui pueng hah a pathoup. <sup>9</sup> Hatdawkvah, Devit teh hoehoe a len teh, ransahu BAWIPA ahni koevah ao.

### *Devit e tami a thakasainaw*

<sup>10</sup> Hetnaw teh Devit ni a tawn e thakaawme taminaw doeh. Isarelnaw pueng hoi ama hoi a uknaeram hanlah amamouh hoi amamouh tha a kâpoe awh teh, Isarel kong daw BAWIPA e lawk patetlah siangpahrang o thai nahanelah kangdoutkhainaw doeh.

<sup>11</sup> Hetheh Devit ni a tawn e tami athakaawme taminaw doeh. Hakmonite tami e capa Jashobeam, tami 30 touh e hu kahrawikung, tahroe a patuep teh vai touh hoi tami 3,00 ka thet e doeh. <sup>12</sup> Ahni hnukkhu hoi Aho tami Dodo e capa Eleazar tami athakaawme taminaw 3 touh dawkvah, buet touh lah ao. <sup>13</sup> Ahni teh Pasdammim e hmuen Devit koevah ao. Hawvah Filistinnaw teh, tarantuk hanelah a kamkhueng awh teh, hawvah catun hoi kakawi e tanghling ao. Taminaw pueng teh Filistinnaw e hmalah a yawng awh. <sup>14</sup> Hatei, ahnimouh teh, law lungui hmuen a la teh Filistinnaw a thei awh. Hottelah BAWIPA ni kalentoenaw, tânae a kamnue sak. <sup>15</sup> Ransa 30 touh thung daw e tami a thakasai e tami 3 touh teh Adullam lungngoum, Devit onae lungsong koe a cathuk awh. <sup>16</sup> Hatdawkvah, Devit teh rapanim thungup ao. Filistin ransanaw teh Bethlehem vah ao awh. <sup>17</sup> Devit ni a rabuipoung teh, Bethlehem tuikhu daw e tui, rapan longkha teng e hah ka nei hanelah na ka poe thai e awm pawiteh, ka ngaipoung eite telah a ti. <sup>18</sup> Ransa kathum touh ni Filistin ransanaw a roenae hah pat a rakan awh teh, rapan longkha teng e Bethlehem tuikhu daw e tui hah a do awh teh, Devit koevah a thokhai awh. Hateiteh, Devit ni net ngai hoe. BAWIPA hanelah a rabaw. <sup>19</sup> Ahni ni, Oe BAWIPA hethateh khoeroe ka net mahoe. Athakaawme taminaw kathum touh ni a sak e hno doeh. <sup>20</sup> Joab e a nawnga Abishai teh, kathum touh thung daw e kacue lah ao. Tami 300 touh hah tahroe hoi a thei dawkvah, tami kathum touh thung daw e a min kamthang e lah ao. <sup>21</sup> Tami kathum touh thung daw ahni teh kahni touh hlak oup hanelah ao. Hatdawkvah kacuepoung lah ao. Hateiteh, hmaloe e kathum touh dawkvah baw hoe. <sup>22</sup> Jehoiada e capa Benaiah teh, Kabzeel kho e tami thakaawme capa hno moikapap ka sak e lah ao. Ahni ni sendek patetlah athakaawme Moab tami tarankahawi e kahni touh a thei. Hahoi bout a cei teh, tadamtui a bo nah a khu daw kaawm e sendek buet touh bout a thei. <sup>23</sup> Ka rasang katang e Izip tami dong 5 touh



e hah a thei. Izip tami e kut daw k hni kawng kalawng tittouh e tahroe hah a patuep. Benaiah sonron hoi a yawng sin teh, Izip tami e kut daw k e tahroe hah a lawp teh hote tahroe hoi letlang a thei. <sup>24</sup> Hete hnonaw hah Jehoiada e capa Benaiah ni a sak e, tami a thakasai katham touh dawkvah barinae a poe awh. <sup>25</sup> Tami 30 touh hlakvah bari kamcu lah ao katang. Hateiteh, hmaloe katham touh koe baw k thai hoeh. Hahoi Devit ni ama karingkungnaw thung daw k kacuelah a ta. <sup>26</sup> Athakaawme ransanaw teh: Joab e hmaunawnggha Asahel, Bethlehem kho e tami Dodo e capa Elhanan tinaw doeh. <sup>27</sup> Harorite tami Shammoth, Pelonit tami Helez. <sup>28</sup> Tekoa tami Ikkesah capa Ira, Anathoth tami Abiezer. <sup>29</sup> Hushath tami Sibbekhai hoi Ahoh tami Ilai. <sup>30</sup> Netophah tami Maharai hoi Netophah tami Baanah capa Heled. <sup>31</sup> Benjamin casak Gibeah tami Ribai capa Ittai. Pirathon tami Benaiah. <sup>32</sup> Gaash yawn e Hurai hoi Arbat tami Abiel. <sup>33</sup> Baharum tami Azmaveth hoi Shaalbim tami Eliahba. <sup>34</sup> Gizon tami Hashem casaknaw dawkvah Hararite tami Shagee capa Jonathan. <sup>35</sup> Hararite tami Sakar capa Ahiam, Ur capa Eliphal. <sup>36</sup> Mekerath tami Hephher hoi Pelonit tami Ahijah. <sup>37</sup> Karmel tami Hezro hoi Ezbai capa Naari. <sup>38</sup> Nathan e hmaunawnggha Joel hoi Hagri capa Mibhar. <sup>39</sup> Ammon tami Zelek hoi Zeruiah capa Joab senehmaica ka sin pouh e Beeroth tami Naharai. <sup>40</sup> Ithrite tami Ira hoi Ithrite tami Gareb. <sup>41</sup> Hit tami Uriah hoi Ahlai capa Zabad. <sup>42</sup> Reuben tami Shiza capa Adina hoi ama koe kaawm e tami 30 touh kahrawikung lah ao. <sup>43</sup> Maakah capa Hanan hoi Mithini tami Joshaphat. <sup>44</sup> Ashtrarity tami Uzzi, Shamma, Jeuel hoi Jeiel. Aroerite tami Hotham casaknaw. <sup>45</sup> Shimri capa Jediael hoi a nawnggha Tizit tami Joha. <sup>46</sup> Mahavit tami Eliel, Jeribai, Elnaam casak Joshavi, Moab tami Ithmah. <sup>47</sup> Eliel, Obed hoi Mezobah tami Jaasiel.

## 12

### *Devit kabawm e ransanaw*

<sup>1</sup> Kish capa Sawl koehoi Devit a yawng teh Ziklag kho ao nah, ahni koe ka tho e naw teh, hetnaw hah doeh. Ahnimouh teh tarantuknae koe lah ama kabawm e tami athakaawme taminaw doeh. <sup>2</sup> Likathoumnaw lah ao awh teh, samtang ka pathui thai e, tãyai ka dei thai e, avoilah aranglah hoi ka thoum e naw lah ao awh. Ahnimanaw teh Benjamin taminaw, Sawl e a imthungnaw lah ao awh. <sup>3</sup> Ahnimouh kahrawikung lah Ahiezer doeh. Ahni hnuk Gibeah tami Shemaah casak Joash, Jeziel, Azmaveth casak Pelet, Berakah, Anathoth tami Jehu. <sup>4</sup> Tami 30 lathueng hoi 30 rahak daw k e athakaawme Gibeon tami Ishmaiah, Jeremiah hoi Jahaziel, Johanan hoi Gederath tami Jozabad. <sup>5</sup> Eluzai, Jerimoth, Bealiah, Shemariah, Haruph tami Shephatiah. <sup>6</sup> Elkanah, Isshiah, Azarel, Joezer hoi Korah tami Jashobeam. <sup>7</sup> Joelah hoi Gedor tami Jeroham capa Zebadiah. <sup>8</sup> Gad taminaw daw k hoi athakaawme taminaw, taran ka tuk thai, saiphei hoi tahroe ka hno thai tangawn hah kahrawngum e rapanim daw k kaawm e Devit koe a kãhmoun awh. <sup>9</sup> Apasueke teh Ezer, apãhni e teh Obadiah, apãthum e teh Eliab. <sup>10</sup> Apali e teh Mishmannah, apanga e teh Jeremiah. <sup>11</sup> Ataruk e teh Attai, asari e teh Eliel. <sup>12</sup> Ataroo e teh Johanan, atako e teh Elzabad. <sup>13</sup> A hra e teh Jeremiah, a hlaibun e teh Makhbannai. <sup>14</sup> Hetnaw teh Gad casaknaw thung hoi e doeh. Ahnimouh thung daw k hoi a thakayoun e tami 100 tabang ao. A thakaawme 1000 tabang ao. <sup>15</sup> Hotnaw teh thapa yung pasueknae daw k Jordan palang tuiko muenkawi nah ka



rakat thai e naw, hahoi tanghling dawk kaawm e pueng kanîtholah hoi kanîloumlah ka yawng sak e naw doeh. <sup>16</sup> Benjamin hoi Judah casaknaw thung hoi rapanim koe Devit teng a tho awh. <sup>17</sup> Devit ni ahnimouh dawn hanelah a cei teh, roumnae hane dawkvah, kabawp hanelah na tho awh pawiteh, ka lungthin na poe awh han. Hateiteh, ka kut ni runae banghai sak hoe tie na panue nalaihoi, kai pahnawt hanelah na tho awh pawiteh, mintoenaw e Cathut ni na khet vaiteh lawk na ceng awh naseh, telah atipouh.

<sup>18</sup> Hottelah tami 30 touh thung dawk e kahrawikung Amasai tak dawk muitha a tho teh, Devit na tami lah ka o awh. Jesi capa nang koe lah kam-pang e naw doeh. Nang dawk roumnae awm naseh. Bangkongtetpawiteh, na Cathut ni na kabawp tet loe atipouh. Hatdawkvah, Devit ni ahnimouh a la teh ransahu ka hrawi e lah ao sak.

<sup>19</sup> Filistinnaw hai Sawl tuk hanelah a cei awh navah, Manasseh e tami tangawn hai Devit koelah a cei awh. Ama hoi a taminaw ni Filistinnaw koelah kabawm awh hoe. Amamae bawi Sawl koelah kamlang awh vaiteh, maimae lû tâkhawng payon langvaih telah a kâpan awh teh a ban sak awh. <sup>20</sup> Ziklag a cei awh navah, Manassehnaw thung hoi ransa 1000 ka hrawi e Adnah hoi Jozabad, Jediael hoi Michael, Jozabad, Elihu hoi Zillethai naw teh ahni koe ao awh. <sup>21</sup> Hetnaw teh Devit taran tuk navah, kabawm e naw lah ao awh. Bangkongtetpawiteh, abuemlah hoi athakaawme taminaw teh, kahrawikungnaw lah ao awh. <sup>22</sup> Hatnae tueng dawh hoi Devit kabawm hane hnin touh hoi hnin touh meng a tho awh teh, Cathut e ransahu patetlah kalenpounge ransahu lah a coung.

### *Hebron e Devit e ransanaw.*

<sup>23</sup> BAWIPA e lawk patetlah Sawl uknaeram hah Devit koe lah a kamlang teh, Hebron vah Devit koe e tarantuknae puengcang kâmahrawk hanelah kacetnaw teh, hettelah ao. <sup>24</sup> Judah capanaw puengcang kâmahrawknaw, saiphei hoi tahroe ka patuem e tami 6, 800 touh a pha awh. <sup>25</sup> Simeon e capanaw tarantuknae koe athakaawme taminaw teh 7, 100 a pha awh. <sup>26</sup> Levih e casaknaw 4, 600. <sup>27</sup> Jehoiada teh Aron imthung kahrawikung lah ao teh, ahni koe tami 3700 touh ao awh. <sup>28</sup> Thoundoun Zadok teh tami athakaawme, a imthung dawh ransanaw kahrawikung 22 touh ao. <sup>29</sup> Benjamin e capanaw Sawl imthung lah kaawm e 3000 touh a pha. Ha hoehnahlan vah ka paphnawn teh Sawl koelah a kampang awh. <sup>30</sup> Ephraim capanaw tami athakaawme hoi tarankahawi imthung dawh hoi 20, 800 touh a pha awh. <sup>31</sup> Manasseh casak tangawn dawh hoi Devit siangpahrang lah ao thai nahane ka tho e naw teh 18, 000 touh a pha. <sup>32</sup> Issakhar capa tueng navah, ka panuek thai e hoi, Isarel ni bangmaw a sak hane telah ka panuek thai e, kahrawikung 200 touh a pha. A hmaunawngaha abuemlah amae uknae rahim vah ao awh. <sup>33</sup> Zebulun imthungnaw dawh hoi taran ka tuk thai e, senehmaica ka patuem ni teh ka bouk thai e 50, 000 a pha awh teh lungthin kacue e lah ao awh. <sup>34</sup> Naphtalinaw imthung hoi ransa ka hrawi e 1, 000 touh, saiphei, tahroe ka patuem e 37, 000 touh a pha. <sup>35</sup> Dan imthung dawh hoi senehmaica ka patuem e 28, 600 touh a pha. <sup>36</sup> Asher imthung dawh hoi taran ka tuk thai e, bouk ka thoum e 40, 000 touh a pha. <sup>37</sup> Jordan namran e Reuben taminaw, Gad taminaw hoi Manasseh casak tangawn koehoi hai puengcang phunkuep hoi kamthoup e tami 120, 000 touh a pha. <sup>38</sup> Hotnaw pueng teh taran ka tuk e, bouk ka thoum e naw lah ao awh. Devit teh Isarelnaw pueng dawkvah, siangpahrang lah ao hane lungthin buet touh



lah a tawn teh, Hebron lah a cei awh. Isarel alouknaw pueng nihai, Devit teh siangpahrang lah o sak hanelah lungthin buet touh lah ao awh. <sup>39</sup> Devit koevah, hnin thum touh thung a canei awh. Bangkongtetpawiteh, a hmaunawngghanaw ni a rakueng pouh e doeh. <sup>40</sup> Hothloilah, imthung hmaunawngghanaw, Issakhar, Zebulun hoi Naphtali la hoi kalaauk hoi marang, maitotan naw, ca hane vaiyei, hoi thai pawnaw, misurtui hoi satuinaw, a phu awh teh, maitotan hoi tu, moikapap a thokhai awh. teh Isarel ram dawc lunghawinae a kawi.

## 13

### *Lawkkam thingkong bout a bankhai*

<sup>1</sup> Devit ni kahrawikungnaw pueng koe, 1, 000 kaukkungnaw hoi, 100 touh kaukkungnaw koe pouknae a hei. <sup>2</sup> Devit ni kamkhueng e Isarelnaw koe, ahawi na tet awh boilah, BAWIPA Cathut a ngainae awm pawiteh, Isarel ram thung e hmaunawnggha kaawm e naw pueng, tengpam e kho kaawm e pueng, vaihmanaw hoi Levih taminaw hai maimouh koe cungtalah kamkhueng hanelah, coun awh sei atipouh. <sup>3</sup> Cathut e thingkong hah maimouh koe bankhai awh sei. Bangkongtetpawiteh, Sawl a bawi hoi teh, a lawkpui lah pouk awh hoech toe telah ati.

<sup>4</sup> Kamkhueng e pueng ni hottelah sak e hah hnâ rip a bo khai. Bangkongtetpawiteh, hot teh tami pueng pouknae dawc ka kalan e doeh.

<sup>5</sup> Hatdawkvah, Devit ni Izip palang Shihor, hoi Hamath kâennae totouh Isarelnaw hah Kiriathjeaream e Cathut e thingkong hah bankhai hanelah a kamkhueng sak awh. <sup>6</sup> Hatdawkvah, Devit hoi tami pueng teh, Judah ram e Baalah Kiriath-Jeaream ati awh e koevah, cherubim dawkvah, ka tahung e BAWIPA min a onae lawkkam thing kong la hanelah a cei awh.

<sup>7</sup> Cathut e thingkong teh, Abinadab im e hah leng ka tha hoi a ceikhai awh. Uzzah hoi a hui ni leng teh a mawng.

<sup>8</sup> Devit hoi Isarelnaw pueng ni la sak na laihoi ratoung hoi tamawi hoi mawngleng hoi cecak hoi mongka hoi Cathut hmalah a thaonae puenghoi a tumkhawng awh. <sup>9</sup> Kidron cangkatinnae koe a pha awh navah, maitonaw ni thingkong a kâhuet sak dawkvah, Uzzah ni thingkong hah kuets hanelah a kut a kâyp. <sup>10</sup> BAWIPA e lungkhueknae teh Uzzah tak dawc vai touh hoi a pha teh, thingkong a kuets kecu dawkvah a thei teh, Cathut hanlah a due.

<sup>11</sup> Uzzah tak dawc BAWIPA e lungkhueknae a pha dawkvah, Devit teh a lungkhuek. Hote hmuen teh sahnin totouh Perezuzzah telah a phung awh. <sup>12</sup> Hat na hnin hoi Devit ni Cathut teh a taki. Bangtelah hoi maw Cathut e thingkong teh ka bankhai thai han telah ati. <sup>13</sup> Devit ni thingkong teh Devit khopui a ma koe hrueng laipalah Git tami Obededom im vah a hruek. <sup>14</sup> Cathut e thingkong teh Git tami Obededom imthung vah thapa yung thapa yung thum touh ao. Obededom e a tawn e naw pueng teh BAWIPA ni yawhawinae a poe.

## 14

### *Jerusalem vah Devit a o*

<sup>1</sup> Taire siangpahrang Hiram ni, Devit koevah patounenaw a patoun. Ahni hane im sak pouh hanelah, Sidar thing hoi talungdêikathoum e, hoi im sak ka thoum e naw hah a patoun. <sup>2</sup> Isarelnaw dawc siangpahrang lah BAWIPA ni a caksak tie hah Devit ni a kâpanue.



Bangkongtetpawiteh, Isarelnaw kecu dawkvah, a uknaeram hah ka rasang poung lah tawmrasang e lah ao.

<sup>3</sup> Devit ni Jerusalem vah a yu alouknaw hai a la teh, ca napui tongpa moi a sak. <sup>4</sup> Jerusalem vah a sak e a canaw teh Shammua, Shobab, Nathan hoi Solomon. <sup>5</sup> Ibhar, Elishua hoi Eliphelet. <sup>6</sup> Nogah, Nepheg hoi Japhia. <sup>7</sup> Elishama, Beeliada hoi Eliphelet.

### *Filistinnaw tânae*

<sup>8</sup> Filistinnaw ni Devit teh Isarelnaw e siangpahrang lah satu awi lah ao toe tie a thai awh toreih teh, Filistinnaw pueng ni Devit tawng hanelah a cei awh. Devit ni a thai toteh, ahnimouh tuk hanelah a kamthaw. <sup>9</sup> Filistinnaw hah Rephaim tanghling dawka yawng awh. <sup>10</sup> Devit ni Filistinnaw tuk hanelah ka cei han maw, ka kut dawka na poe han maw, telah BAWIPA a pacei. BAWIPA ni cet leih, ahnimouh teh na kut dawka na poe han telah atipouh.

<sup>11</sup> Hatdawkvah, Baalperazim vah a cei awh teh, Devit ni ahnimouh teh a tuk teh a tâ awh. BAWIPA ni ka tarannaw teh tuicapa ka thaw e a room sak e patetlah be a raphoe telah ati. Hatdawkvah, hote hmuen teh Baalperazim telah min a phung. <sup>12</sup> Hete hmuen koe meikaphawknaw hah a cettakhai awh. Devit ni kê a poe teh, hmai kOUNg kOUNg a sawi pouh awh.

<sup>13</sup> Filistinnaw teh tanghling dawka bout a yawng awh. <sup>14</sup> Hahoi Devit ni Cathut koe bout a pacei teh, ahnimanaw pâlei hanelah cet hanh. Kingkalup awh nateh, batuekung koe pawm awh. <sup>15</sup> Hahoi hettelah ao han. Batuekung e a van a cei awh e a pâlawk na thai awh toteh, tuk hanelah na tâco awh han. Bangkongtetpawiteh, Filistinnaw roenae tuk hane na hmalah Cathut a tho tie hah na panue han atipouh.

<sup>16</sup> Cathut ni kê a poe e patetlah Devit ni a sak teh, Filistin e ransanaw hah, Gibeon hoi Gezer totouh a pâlei awh. <sup>17</sup> Hottelah ram pueng dawka Devit e min a kamthang teh, BAWIPA ni ama takinae hah miphun tangkuem koe a kamthang sak

## 15

### *Jerusalem vah thingkong a cekhai*

<sup>1</sup> Devit ni Devit khopui vah ama hane im a sak teh Cathut e thingkong ao nahane hmuen hah a rakueng pouh teh lukkareiim a yap pouh. <sup>2</sup> Devit ni Cathut e thingkong heh Levihnaw hoeh laipalah teh, apinihai kâkayawn thai mahoe. Bangkongtetpawiteh, Cathut e thingkong teh meng kâkayawt hane hoi a thaw ka tawka hanelah BAWIPA ni a rawi e naw doeh telah a ti.

<sup>3</sup> Devit ni BAWIPA e thingkong ta nahane a rakueng pouh e hmuen koevah, ceikhai hanelah Jerusalem vah Isarelnaw pueng a pâkhueng. <sup>4</sup> Hatdawkvah, Devit ni Aron e casaknaw hoi Levih casaknaw hah a pâkhueng. awh. <sup>5</sup> Kohath e casaknaw thung kacuepoung e Uriel hoi a hmaunawnggha 120 touh a pha <sup>6</sup> Merari casaknaw thung kacuepoung e Asaiah hoi a hmaunawngghanaw 220 touh a pha awh. <sup>7</sup> Gershom e casaknaw thung dawka kacuepoung e Joel hoi a hmaunawngghanaw 130 touh a pha awh. <sup>8</sup> Elizaphan casaknaw thung dawka kacuepoung e Shemaiah hoi a hmaunawngghanaw 200 touh a pha awh. <sup>9</sup> Hebron casaknaw thung dawka kacuepoung e Eliel hoi a hmaunawngghanaw 80



touh a pha awh. <sup>10</sup> Uziel casaknaw thung dawkwacuepoung e Aminadab hoi a hmaunawngghanaw 112 touh a pha awh.

<sup>11</sup> Devit ni vaihma Zadok, Abiathar, Levi, Uriel, Asaiah, Joel, Shemaiah, Eliel, hoi Aminadab tinaw hai a kaw. <sup>12</sup> Nangmanaw teh Levihnaw thung dawkwacuepoung lah na o awh. Isarel BAWIPA Cathut e thingkong hah ka rakueng e hmuen koevah, thokhai hanelah nama hoi na hmaunawngghanaw kamthoung awh. <sup>13</sup> Ahmaloe e dawkwacuepoung hai nangmouh ni na kâkayawt awh hoeh dawkwacuepoung BAWIPA Cathut ni mamouh dawkwacuepoung lungkhueknae a pha sak. Bangkongtetpawiteh, amae lamthung patetlah sak hane hah ama koe pacei awh hoeh telah a ti.

<sup>14</sup> Hatdawkwacuepoung, Isarel BAWIPA Cathut e thingkong hah kâkayawt hanelah vaihmanaw hoi Levihnaw hah a kamthoung awh. <sup>15</sup> BAWIPA kâpoe e Mosi ni a dei e patetlah Levihnaw ni a loung dawkwacuepoung hoi thingkong teh a kâkayawt awh.

<sup>16</sup> Devit ni Levi kacuenaw hah a hmaunawnggha thung dawkwacuepoung la ka sak hane, ratoung ka tum hane, tamawi, cecak, hoi kacaipounglah tumkhawng vaiteh, lunghawi nalaihoi la sak hanelah a dei pouh.

<sup>17</sup> Hatdawkwacuepoung, Levihnaw ni Joel capa Heman hoi a hmaunawnggha thung hoi Berekhiah e capa Asaph, a hmaunawnggha Merari e capanaw thung hoi Kushaiah capa Etham hah a rawi awh. <sup>18</sup> Hmaunawngghanaw thung hoi Zekhariah casak Jaaziel, Shemiramoth, Jehiel, Unni, Eliab, Benaiah, Maaseiah, Mattithiah, Eliphelehu, Mikneiah, Obededom hoi tho ka ring e Jeiel tinaw a rawi awh. <sup>19</sup> Hatdawkwacuepoung, la ka sak hane Heman, Asaph, Ethan, hah cecak kacaipounglah tumkhawng hanelah a rawi awh.

<sup>20</sup> Zekhariah, Aziel, Shemiramoth, Jehiel, Unni, Eliab, Maaseiah, Benaiah teh Alamothe lawk hoi ratoung tum hanelah a rawi awh. <sup>21</sup> Mattithiah, Eliphelehu, Mikneiah, Obededom, Jeiel, Azaziah teh Sheminithe lawk lahoi tamawi hoi hrawi hanelah a rawi awh. <sup>22</sup> Levihnaw kacue e Kenaniah, teh la sak a thoum la kahrawikung lah ao. <sup>23</sup> Berekhiah hoi Elkanah teh thingkong tho karingkung lah ao roi.

<sup>24</sup> Vaihmanaw Shebaniah, Joshaphat, Nethanel, Amasai, Zekhariah, Benaiah hoi Eliezer naw ni Cathut e thingkong hmalah mongka a ueng awh. Hahoi, Obededom hoi Jehiah teh thingkong e longkha karingkung lah ao awh. <sup>25</sup> Hahoi Devit hoi Isarel kacuenaw ransa 1000 kauknaw teh Obededom im e BAWIPA thingkong la hanelah, lunghawi nalaihoi a cei awh. <sup>26</sup> Hatdawkwacuepoung, BAWIPA thingkong kâkayawn e Levihnaw hah, Cathut ni a kabawp teh maitotan sari touh hoi, tutan sari touh hoi thuengnae a sak awh.

<sup>27</sup> Devit hoi thingkong kâkayawn e Levihnaw pueng, la kasaknaw, la ka hrawi e Kenaniah naw teh, lukkarei loukloukkaang e hoi a kamthoung awh. Devit hai lukkarei loukloukkaang e vaihma angki hah a kho. <sup>28</sup> Hottelah mongka hoi tu ki hoi, cecak lawk hoi a parawi awh teh, Isarelnaw pueng ni, hramki nalaihoi, BAWIPA lawkkam thingkong a ceikhai awh teh, la puenghoi a sak awh teh, ratoung tamawi kacaipounglah a tumkhawng awh. <sup>29</sup> Hahoi BAWIPA lawkkam thingkong Devit kho dawkwacuepoung kâenkhai awh navah, Sawl e canu Mikhal ni hlalangaw koehoi a khet navah, siangpahrang Devit a lamtu laihoi a cawkdawkwacuepoung e hah a hmu teh, a lungthung hoi a panuikhai.

## 16

### *Lukkareim dawkwacuepoung a hruek awh.*

<sup>1</sup> Hottelah Cathut e thingkong teh a thokhai awh teh, hruek nahanelah Devit ni rim a yap pouh e dawkwacuepoung a hruek awh. Hmaisawi thuengnae,



roum thuengnae naw hah Cathut koe e poe awh. <sup>2</sup> Devit ni hmaisawi thuengnae, roum thuengnae naw hah a poe hoiyah BAWIPA e min lahoi taminaw hah yawhawinae a poe. <sup>3</sup> Isarelnaw pueng teh, napui tongpa abuemlah vaiyei atueng buet touh hoi moituen buet touh, misurphen buet touh rip a poe. <sup>4</sup> Isarel BAWIPA Cathut pahnim hoeh nahan, lunghawilawk dei e, hoi pholen nahanelah, BAWIPA e thingkong hmalah, thaw ka tawk lah Levihnaw tangawn hah a rawi awh. <sup>5</sup> Kahrawikung lah Asaph, apâhni lah ratoung ka kueng e Zekhariah, Jeiel, Shemiramoth, Jehiel, Mattithiah, Eliab, Benaiah, Obedom, Jeiel ni ratoung hoi tamawi a tum, Asaph cecak a khawng. <sup>6</sup> Vaihma Benaiah hoi Jahaziel ni Cathut e lawkkam thingkong e hmalah mongka kamrawicalah a ueng roi.

### *Devit e lunghawi la*

<sup>7</sup> Hot nah hnin hoi BAWIPA koe lunghawilawk dei hane Devit ni hete la heh Asaph hoi a hmaunawngaha koe hmaloe poung lah a poe.

<sup>8</sup> Oe BAWIPA koevah lunghawilawk dei awh nateh, a min lahoi hram awh. Miphunnaw pueng koe a sak e hno hah panuek sak awh.

<sup>9</sup> Ama koe la sak awh haw, oupnae hoi ama teh pholen awh. A sak e hno kângairunae pueng hah dei awh.

<sup>10</sup> A min kathoung hah oup awh. BAWIPA ka tawng e naw a lungthinnaw teh haw awh naseh.

<sup>11</sup> BAWIPA e thasainae tawng awh haw, A minhmai hah hoe tawng awh.

<sup>12</sup> A sak e kângairu hnonaw hah pahnim awh hanh. A sak e kângairunae hoi a pahni daw k hoi lawkcengnae hai.

<sup>13</sup> Oe a san Isarel catounnaw, a rawi e tami Jakop catounnaw,

<sup>14</sup> Ama teh BAWIPA Cathut lah ao. A lawkcengnae teh talai van abuemlah daw kâ a tawn.

<sup>15</sup> A lawk kam hah a yungyoe pâkuem awh haw, se 1000 totouh lawk a kam e naw hah.

<sup>16</sup> Abraham koe lawk a kam e naw hah, Isak koe lawk a kam e naw hah,

<sup>17</sup> Hot patetlah Jakop koe kâlawnaw a cak sak, Isarelnaw koe yungyoe e lawkkam pouh e hah a cak sak.

<sup>18</sup> Kanaan ram teh na coe e râw lah na poe awh han telah a ti.

<sup>19</sup> Tami kayounca lah na o awh, Oe tami younca, imyin patetlah ka o awh navah,

<sup>20</sup> miphun tangkuem koe hmanghmang kâva e lah, uknaeram tangkuem hoi miphun tangkuem koe,

<sup>21</sup> Apinihai ka pacekpahlek hanlah pasoung hoeh. Ahnimouh kecu daw k siangpahrangnaw hai a yue awh.

<sup>22</sup> Satui ka awi e hah tek awh hanh awh, kaie profetnaw hah patawnae poe awh hanh haw telah a ti.

<sup>23</sup> Talai taminaw pueng ni BAWIPA pholennae la sak awh nateh, hnintangkuem vah rungngangnae lawk hah pathang awh haw.

<sup>24</sup> Miphun tangkuem koe a bawilennae hah dei awh nateh, tami tangkuem koe a sak e kângairunae pathang awh.

<sup>25</sup> BAWIPA teh a bawilen poung dawkvah, pholen hanelah ao. Ama teh Cathut pueng hlak vah taki hanelah ao.

<sup>26</sup> Bangkongtetpawiteh, miphun alouke cathutnaw teh, meikaphawknaw doeh. Hateiteh, BAWIPA ni kalvan teh a sak.

<sup>27</sup> Barinae hoi taluenae teh a hmalah ao. A thaonae hoi lunghawinae ama koe ao.



<sup>28</sup> Oe miphunnaw hoi imthungnaw pueng BAWIPA koe poe awh, BAWIPA koe bawilennae hoi a thasainae hah poe awh.

<sup>29</sup> BAWIPA teh a min hoi kamcu e bawilennae poe awh. Poe hanlah kaawm e pueng sin awh nateh, a hmalah tâcawtkhai awh. A meihawinae thoungnae hoi BAWIPA teh bawk awh.

<sup>30</sup> Talai taminaw pueng amae hmalah pâyaw awh. Kâhuethai hoeh nahanlah talaivan teh a cak sak.

<sup>31</sup> Kalvannaw hai lunghawi naseh, talai hai lunghawi naseh, BAWIPA ni a uk telah miphun tangkuem koe pathang awh.

<sup>32</sup> Tuipui hoi a thung kaawm e pueng ni hram awh naseh, law hoi a thung kaawm e pueng ni lunghawi awh naseh.

<sup>33</sup> Kahrawng e thing kaawm e pueng ni BAWIPA e hmalah lunghawi nalahoi la a sak awh han. Bangkongtetpawiteh, talai daw lawkceng hanelah a tho han.

<sup>34</sup> Oe BAWIPA koevah, lunghawinae lawk dei awh. Bangkongtetpawiteh, ama teh ahawi. A lungmanae teh a yungyoe a kangning.

<sup>35</sup> Oe kaimae Rungngangnae Cathut na rungngang haw, ka thoung e na min pholen hane hoi, na pholennae hoi tâ hanelah, Jentelnaw thung hoi na rungngang haw. Cungtalah na pâkhueng haw tet awh naseh.

<sup>36</sup> Yungyoe hoi yungyoe totouh Isarel BAWIPA Cathut teh, pholennae awm lawiseh, tami pueng ni Amen ati awh teh, BAWIPA teh a pholen awh.

### *Lawkkam thingkong ka ring e Levihnaw*

<sup>37</sup> Hatdawkvah, BAWIPA lawkkam thingkong hma lae hnintangkuem a panki e patetlah thaw ka tawh hane Asaph hoi a hmaunawngghanaw a ta. <sup>38</sup> Obededom hoi a hmaunawnggha 68 touh ni a kabawp awh vaiteh, Jeduthun capa Obededom hoi Hosah teh longkha ka ring hanelah ao han. <sup>39</sup> BAWIPA ni Isarelnaw kâ a poe BAWIPA e kâlawk dawktut e patetlah hmaisawi thuengnae khoungroe dawkvah, amom tangmin Gibeon hmuenrasang dawktut, <sup>40</sup> BAWIPA e lukkareiim hmalah, sathei thuengnae meng ka poe hanelah, vaihma Zadok hoi a hmaunawnggha vaihma lah a rawi awh. <sup>41</sup> Amae pahrennae teh, a yungyoe a kangning dawkvah, BAWIPA koe lunghawi lawk dei hanelah, Heman hoi Jeduthun, hoi alouke taminaw hoi rawi e lah ao awh. <sup>42</sup> Heman hoi Jeduthun teh mongka cecak, kacai e phunkuepnaw hoi cungtalah tumkhawng hane ka khenyawn hanelah ao awh. <sup>43</sup> Hahoi tami pueng teh ama im lengkaleng a ban awh teh, Devit hai a imthungkhunaw yawhaw hoi poe hanelah a ban van.

## 17

### *Devit koe Cathut lawkkamnae*

<sup>1</sup> Hahoi Devit teh im ao nah profet Nathan koe Devit ni khenhaw! kai teh sidar thing im dawktut ka o. Hateiteh BAWIPA lawkkam thingkong teh lukkarei rim dawktut ao telah atipouh.

<sup>2</sup> Nathan ni Devit koe, na lunghin dawktut kaawm e patetlah sak yawkaw, bangkongtetpawiteh, nang koe Cathut ao telah atipouh.

<sup>3</sup> Hateiteh, hatnae karum dawkvah, Nathan koe Cathut e lawk teh a tho.

<sup>4</sup> Ka san Devit hah dei pouh. BAWIPA ni hettelah ati. Ka o nahanelah nang ni im na sak pouh mahoe. <sup>5</sup> Bangkongtetpawiteh, Isarelnaw Izip ram hoi ka tâcokhai hnin hoi atu totouh im dawktut awm laipalah lukkarei rim hoi buet touh hoi buet touh ka kampuen teh ouk ka o. <sup>6</sup> Isarelnaw hoi ka ceinae tangkuem dawktut hai ka taminaw khom hanelah kâ na poe e



Isarelnaw lawkcengkungnaw koevah, bang dawkw maw sidar thing im sak pouh hoeh telah ka ti boihoeh vaw.

<sup>7</sup> Hatdawkvah, ka san Devit koe hettelah na dei pouh han. ransahu BAWIPA ni hettelah a dei. Tu pânae hmuen tu na khoumnae koehoi ka tami Isarelnaw dawkw siangpahrang lah o hane na la teh, <sup>8</sup> Na cei nah tangkuem dawkw nang koe ka o. Na tarannaw hai na tâ pouh, talai dawkw ka lentoe poung e na min ka lentoe sak han. <sup>9</sup> Hothloilah, ka tami Isarelnaw hane hmuen ka rawi vaiteh, yuengyoe kampuen toung laipalah, amamae hmuen koe kho a sak thai nahanelah, ahnimouh teh ka ung han.

<sup>10</sup> Yampa hai ka tami Isarelnaw dawkw lawkcengkung ka ta pouh nah hai, kahawihoehe canaw ni rep a coungroe awh e patetlah runae poe awh laipalah, na tarannaw pueng hai koung ka sung sak han. Hothloilah, BAWIPA ni na imthungnaw a kangdue sak han telah na dei pouh awh.

<sup>11</sup> Hahoi na hnin a pout torei na mintoenaw koe na cei navah, hettelah ao han. Nama dawkw hoi ka tâcawt e na capa buet touh ni a kangdue vaiteh, a uknaeram ka caksak han. <sup>12</sup> Ahni ni im na sak pouh vaiteh, a bawitungkhung hai a yungyoe ka caksak han. <sup>13</sup> Hattorei a na pa lah ka o vaiteh, ahni hai ka capa lah ao han. Nang koe ka lungma e ka lae patetlah ahni koe e bout ka lat mahoehe toe. <sup>14</sup> Ka im hoi ka uknaeram teh ahni koe yungyoe ka caksak han. A bawitungkhung hai a yungyoe ka caksak han telah ati.

<sup>15</sup> Hete lawknaw pueng hoi vision pueng teh, Nathan ni Devit koe a dei pouh.

<sup>16</sup> Hatdawkvah, siangpahrang Devit ni a kâen teh, BAWIPA e hmalah a tahung nah laihoi, Oe BAWIPA Cathut, bangpatet lae tami lah maw ka o teh, ka imthung hai bangpatet lae tami lah maw ao awh teh, hettelah totouh na tawm teh na hrawi. <sup>17</sup> Oe Cathut hete hno heh na mit dawkw hno kahoengcae doeh. Hahoi Oe BAWIPA Cathut, na san imthung hma lae kong hah kum moikasaw hane na dei toung dawkvah, kangduenae hmuen ka rasang e tami buet touh lah na pouk. <sup>18</sup> Na san bari lah onae kong dawkvah, Devit ni nang koe bangmaw ka dei han rah, bangkongtetpawiteh, na san hah na panue. <sup>19</sup> Oe BAWIPA, na san kecu dawkw na lungthin dawkw kaawm e patetlah ka lentoe e hno na sak teh, tami pueng na panue sak. <sup>20</sup> Oe BAWIPA, hnâ hoi ka thainae dawkvah, nama patetlae khoeroe awm hoeh. Nama laipalah Cathut alouke khoeroe awm hoeh. <sup>21</sup> Izip ram hoi na ratang e taminaw e hmalah, Jentelnaw na pâlei e hnin ka lentoe e hah, kângairunae na sak e dawkw hoi, namae min lentoenae kamnue sak hanelah, Cathut ni amae tami lah o thai nahanelah ratang han a ngai e Isarelnaw patet e talai van miphun alouke ao boimaw.

<sup>22</sup> Bangkongtetpawiteh, na tami Isarelnaw teh yungyoe na tami lah o hane na sak e doeh. Hatdawkvah, nama teh ahnimae BAWIPA Cathut lah na o.

<sup>23</sup> Oe BAWIPA, na san kong hoi na imthung kong dawkvah, na dei e teh, yungyoe hanelah caksak nateh, na dei e patetlah caksak yawkaw. <sup>24</sup> Hahoi, ransabawi Cathut, Isarel Cathut teh Isarel Cathut doeh telah na min teh, a yungyoe caksak nateh, pholennae awm seh. Na san Devit imthungnaw teh, na hmalah cak naseh. <sup>25</sup> Bangkongtetpawiteh, Oe ka Cathut, na san koevah na imthung ka kangdue sak han telah na kamnue sak toe. Hatdawkvah, na san ni nama koe ka ratoum ngamnae doeh. <sup>26</sup> Oe BAWIPA nama teh Cathut lah na o dawkw na hawinae teh, na san koe lawk yo na kam toe.

<sup>27</sup> Na san imthungnaw heh na hmalah a yungyoe ao thai awh nahanelah, yawhawinae na poe toe. Bangdawkw tetpawiteh, Oe BAWIPA nama ni yaw na hawi sak e teh, yungyoe yawhawinae doeh telah ati.



## 18

*Devit taran hoe a tânae*

<sup>1</sup> Hathnukkhuh hoi hettelah ao. Devit ni Filistinnaw a tuk teh a tâ. Gath hoi khotenaw hah Filistinnaw e kut dawkh hoi a lawp. <sup>2</sup> Moabnaw bout a tuk teh, Moabnaw teh Devit e san lah ao awh teh, tamuk ouk a poe awh.

<sup>3</sup> Euphrates palang teng e a uknae caksak hanelah, a cei nah Devit ni Zobah siangpahrang Hadadezer hai Hamath totouh a tâ. <sup>4</sup> Devit ni rangleng 1, 000 hoi marangransanaw 7, 000, hoi ransa 20, 000 hah ahni koe e la a poe. Devit ni leng la sawn e marangnaw pueng hah be a raphoe pouh teh leng ka sawn e 100 touh dueng a pâhlung pouh. <sup>5</sup> Damaskas, Assirianaw hah Zobah siangpahrang Hadadezer ka bawm hanelah a tho awh navah, Devit ni Sirianaw 22, 000 a thei. <sup>6</sup> Hatdawkvah, Devit ni Siria ram Damaskas khovah, ransanaw a ta. Sirianaw ni hai Devit tamuk ka poe e lah ao awh. BAWIPA ni Devit teh a cei na tangkuem koe tânae a poe. <sup>7</sup> Devit ni Hadadezernaw e sui saipheinaw a la pouh teh, Jerusalem vah a ceikhai. <sup>8</sup> Hadadezer khopui dawkh e Tibhath kho hoi Kun kho dawkh hoi, rahum moikapap a thokhai. Hote rahum hoi Solomon ni rahum tuiim, rahum khom, rahum puengcang aphunphun lah a sak.

<sup>9</sup> Hamath siangpahrang Toi ni Zobah siangpahrang, Hadadezer, ransanaw pueng Devit ni a tâ tie hah a thai awh torei teh, <sup>10</sup> Hadadezer hah a tuk teh a tâ dawkvah, kut man hanelah lunghawikhai hanelah, a capa Hadoram teh Devit koe a patoun. Bangkongtetpawiteh, Hadadezer ni Toi hah a tuk. Hahoi suingun rahum, hlaamnaw phunkuep hah a hni koe a patawn. <sup>11</sup> Hote hnonaw hoi miphunnaw pueng Edom, moab, Ammon, Filistin hoi Amaleknaw koe e sui ngun a la e naw hoi Devit ni BAWIPA koe a pathung.

<sup>12</sup> Hothloilah, Zeruiah capa Abishai ni Edomnaw 18, 000 touh hah palawi tanghling dawkh a thei awh. <sup>13</sup> Edom hai ransa a ta teh, Edomnaw pueng teh Devit ni tamuk a cawngnae kho lah ao awh. BAWIPA ni Devit teh a ceinae tangkuem koe tânae a poe.

*Devit uknae*

<sup>14</sup> Hottelah Devit ni Isarelnaw a uk teh, a taminaw dawkvah, kalanalah lawk a ceng. <sup>15</sup> Zeruiah capa Joab teh ransahu ka hrawi e bawi lah ao. Ahilud e capa Jehoshaphat teh kamthang kathutkung lah ao. <sup>16</sup> Ahilud capa Zadok hoi Abiathar capa Abimelek teh vaihma lah ao awh teh, Shavsha teh cakathutkung lah ao. <sup>17</sup> Jehoiada capa Benaiah teh Kerethnaw hoi Pheletnaw kahrawikung lah ao teh, Devit capanaw teh, siangpahrang thaw dawkh kho kakhangkungnaw lah ao awh.

## 19

*Ammonnaw hoi Sirianaw tânae*

<sup>1</sup> Hathnukkhuh, hettelah ao. Ammonnaw e siangpahrang Nahash a due hoi a capa ni a yueng lah a bawi. <sup>2</sup> Devit ni Nahash e capa Hanun koevah, pahrennae kamnue sak han. Bangkongtetpawiteh, a na pa ni kai koe pahrennae a kamnue sak toe telah ati. Hatdawkvah, Devit ni a na pa e kong dawkh lungpahawi hanelah, patounenaw a patoun teh. Ahni lungpahawi hanelah, Devit e a sannaw teh Ammon catounnaw e ram Hanun koe a pha awh. <sup>3</sup> Hateiteh, Ammonnaw kahrawikung Hanun koevah, Devit ni nang lungpahawi hanelah a patoun e taminaw heh na pa barinae a poe katang dawkh doeh, telah na pouk maw. A sannaw teh ram



tuet hane hoi raphoe hane ngai dawk doeh a tho awh e nahoe hmaw, telah ati awh.

<sup>4</sup> Hatdawkvah, Hanun ni Devit e sannaw hah a man teh, a pâkhamuen kOUNg a ngaw pouh teh a khohna hah a laheibaw koe totouh a a pouh teh a ban sak.

<sup>5</sup> A patoun e a sannaw kong hah Devit koe tami buet touh ni a dei pouh teh, hotnaw hah puenghoi yeirai a po sak dawkvah, ahnimanaw kâhmo hanelah laiceinaw a patoun. Siangpahrang ni, na pâkhamuen a sai hoehroukrak Jeriko kho dawk awh awh ei, pâkhamuen a sai torei ban awh telah atipouh.

<sup>6</sup> Ammonnaw ni, Devit ni a hmuhma e sak awh toe tie a panue awh toteh, Hanun hoi Ammonnaw ni Mesopotamianaw hoi Sirianaw Maakah hoi Zobahnaw koe leng hoi marangransanaw hlai nahanlah ngun tangka talen 1, 000 a patawn awh. <sup>7</sup> Hottelah leng 32, 000 Maakah siangpahrang hoi a taminaw hoi a hlai awh teh, Madeba kho e a hmalah a tungpup awh. Ammonnaw teh a kho tangkuem hoi a tâco awh teh, tuk hanelah a cei awh.

<sup>8</sup> Devit ni hote kamthang a thai torei teh, Joab hoi athakaawme ransahu pueng hah a patoun. <sup>9</sup> Ammonnaw a tâco awh teh, khopui longkha teng vah, tuk hanlah a kamkhueng awh. Kabawm hane siangpahrangnaw teh kahrawng dawk alouklouk lah ao awh. <sup>10</sup> Hottelah hmalah hoi hnuk lahoi, tuk hanelah kaawm e hah Joab ni a panue torei teh, Isarelnaw thung dawk kahawipoung e a rawi teh, Sirianaw tuk hanlah a cei awh. <sup>11</sup> Alouke taminaw pueng teh a hmaunawngaha Abishai kut dawk a poe teh Ammonnaw tuk hanelah a cei van awh. <sup>12</sup> Joab ni, Sirianaw hah ka tâ thai mahoe na tetpawiteh, na kabawp awh han. Hahoi Ammonnaw hah na tâ thai mahoe pawiteh, na kabawp awh han. <sup>13</sup> Tarankahawi lah awh awh nateh, maimae taminaw hoi mamae Cathut, khopuinaw hanelah tongpatang lah awh awh sei. BAWIPA ni ahawi tie patetlah sak yawkaw seh ati awh.

<sup>14</sup> Hottelah Joab hoi ama koe kaawm e naw ni, tarantuk hane Sirianaw koe rek a hnai awh teh, a hmaitung kOUNg a yawng awh. <sup>15</sup> Ammonnaw ni Sirianaw kOUNg a yawng awh tie hah a panue torei teh, ahnimouh hai a hmaunawngaha Abishai e hmalah a yawng awh teh, kho thung a kâen awh. Hatdawkvah, Joab teh Jerusalem vah a ban. <sup>16</sup> Sirianaw ni Isarelnaw e a hmalah kangdue e hmuen hawihoeh tie a panue torei teh, patounenaw a patoun awh teh, palang namran kaawm e Sirianaw hah a kaw awh. Hadadezer ransabawi Shophate ni hai ahnimouh a uk.

<sup>17</sup> Hote kong teh Devit koe a dei pouh awh. Ahni ni Isarelnaw pueng a kaw teh, Jordan namran vah a cei awh teh, Sirianaw hah a tuk awh. <sup>18</sup> Sirianaw teh, Isarelnaw e a hmalah, a yawng awh teh, Devit ni Sirianaw e leng 7, 000 touh dawk kâcui e naw hoi ransa 40, 000 touh a thei teh ransabawi Shophate hai a thei. <sup>19</sup> Hatdawkvah, Hadadezernaw ni Isarelnaw e a hmalah kangdout thai hoeh toe tie a panue torei teh, Devit koe vah roumnae a sak awh teh, tamuk ka cawng e kho lah ao awh. Hatdawkvah, Sirianaw ni Ammonnaw teh kabawp han ngai awh hoeh toe.

## 20

### *Rabbah kho a lanæ*

<sup>1</sup> Kawmpoi e tueng a pha nah, siangpahrangnaw ni tarantuk hane ouk a tâco awh. Joab ni ransahu a ceikhai teh Ammonnaw e ram hah a tuk teh



Rabbah kho a kalup awh. Devit teh Jerusalem vah ao Joab ni Rabbah kho a tâ teh a la. <sup>2</sup> Devit ni hote siangpahrang e bawilakhung hah a la pouh. Ai e teh sui talen buet touh a ri. talung phu kaawmnaw hai ao. Devit hah a kâ muk sak awh teh, khopui thung e hno moikapap a lawp awh. <sup>3</sup> Hote hmuén koehoi taminaw hah a ceikhai teh, thing a e kawî, laikaw kanawknae hnopainaw, cakânaw, hno nahanelah thaw a tawk sak awh. Hot patetlah Ammonnaw e khopui abuemlah Devit ni a sak hnukkhu, Devit hoi a taminaw pueng teh Jerusalem vah a ban awh.

### *Izip tami kalen a theinae*

<sup>4</sup> Hathnukkhu, Filistinnaw hoi Gezer vah tarankâtuknae bout ao. Hushath Sibbekhai ni Rapha catoun thung dawk e Sippai hah a thei awh teh a sung sak awh.

<sup>5</sup> Filistinnaw hoi bout kâtuk awh teh, Jair kho e Jair capa Elhanan ni Git tami Goliath e nawngah Lahmi hah a thei. A tahroecung teh hni kawng kalawng e patetlah ao.

<sup>6</sup> Gath khovah kâtuknae bout ao teh, hawvah, ka rasang poung e aranglae kut roi dawk kutcarei taruk touh, avanglae a khok roi dawk a khokcarei taruk, asumkum 24 touh ka tawn e ao. Filistin miphun tamikalen poung e miphunnaw e casak doeh.

<sup>7</sup> Ahni ni Isarelnaw a ka pacekpahlek dawkvah, Devit e a nawngah Shimei capa Jonathan ni ahni hah a thei.

<sup>8</sup> Hotnaw teh Gath kho dawk kaawm e Rapha tami kalenpounge casak lah ao teh, Devit hoi a sannaw e kut dawk hoi a due awh.

## 21

### *Isarel hoi Judah milu touknae*

<sup>1</sup> Hahoi Setan ni Isarelnaw taran lahoi a thaw teh, Isarelnaw milu touk sak hanelah Devit hah a tacuek. <sup>2</sup> Hatdawkvah, Devit ni Joab hoi a taminaw kahrawikung koe, Isarel miphun pueng Dan kho hoi Beersheba kho totouh cet awh nateh, tami nâyittouh maw tie ka panue thai nahan touk awh nateh kai koe bout na dei awh han telah atipouh.

<sup>3</sup> Hatei, Joab ni siangpahrang koevah, BAWIPA ni taminaw teh a let 100 touh haiyah pungdaw sak naseh, siangpahrang ka bawipa e misa lah koug kaawm nahoehmaw, ka bawipa ni bangkongmaw hot hah panue han na ngai, bangdawkmaw Isarelnaw kâtapoe sak hanelah na sak vaw atipouh.

<sup>4</sup> Hateiteh siangpahrang e lawk teh Joab ni ek thai hoe. Hatdawkvah, Joab ni Isarel ram pueng dawk a cei teh, Jerusalem vah bout a ban.

<sup>5</sup> Joab ni tami kaawm e yit touh Devit koe bout a dei pouh. Isarel ram dawk tahloi ka patuem e 1, 100, 000 touh a pha awh. <sup>6</sup> Hateiteh, Levihnaw hoi Benjaminaw teh touk awh hoe. Bangkongtetpawiteh, siangpahrang e lawk teh Joab hanelah panuet a tho. <sup>7</sup> Hote kong teh Cathut ni a ngai hoe dawkvah, Isarelnaw hah a thei.

<sup>8</sup> Devit ni Cathut koe hete ka sak e dawkvah puenghoi ka payon toe. Hatei nakunghai na sanpa kai ni ka payon, kai heh na pahren nateh, na ngaithoum yawkaw ei. Bangkongtetpawiteh, pathunae hno ka sak toe telah ati.

### *Devit tounnae*



<sup>9</sup> BAWIPA ni Devit e profet Gad koe vah, <sup>10</sup> Cet nateh, Devit koe hettelah dei pouh. Hno kathum touh nang koe na patue. Nang dawk kai ni ka sak hane buethuet touh kârawi leih telah dei pouh telah atipouh.

<sup>11</sup> Gad teh Devit koe a cei teh, BAWIPA ni hettelah a dei, na ngai e kârawi leih. <sup>12</sup> BAWIPA ni a dei e teh, kum thum touh thung takang ka tho sak maw na ngai, Nahoe pawiteh, thapa yung thum touh tarannaw ni na pâlei maw na ngai, Nahoe pawiteh, hnin thum touh thung Lacik ka phasak maw na ngai. Na kapatoukung koe bangtelamaw ka dei pouh han, atu kâpouk nateh, dei haw telah atipouh.

<sup>13</sup> Devit ni Gad koe vah, ka lung rei a thai, kho lah king a bing. BAWIPA e kut dawk ka bawt yawkaw naseh. Bangkongtetpawiteh, a lungmanae teh a len. Tami e a kut dawk teh na phat sak hanh telah atipouh.

<sup>14</sup> Hatdawkvah, BAWIPA ni Isarelnaw thung lacik a pha sak teh, Isarelnaw tami 70, 000 touh a due awh. <sup>15</sup> Hahoi Jerusalem raphoe hanelah, Cathut ni kalvantami a patoun teh, raphoe hane a kâcai navah, BAWIPA ni a khet teh, hawihoe hane sak han a noe e hah bout a kâhno. Ka raphoe e kalvantami koe vah, a khout toe na kut dâw hanh lawi telah atipouh teh, BAWIPA e kalvantami teh Jebusit tami Ornan e cangkatinnae teng vah a kangdue.

<sup>16</sup> Devit ni kho a radoung teh, BAWIPA kalvantami tahloi a rayu nalaihoi Jerusalem koelah a nue teh, talai hoi kalvan a rahak dawk a kangdue e hah a hmu. Hatdawkvah, Devit hoi kacuenaw ni buri a kâramuk awh teh, talai dawk a tabo awh.

<sup>17</sup> Devit ni Cathut koe taminaw touk hane kâ kapoekung teh kai nahoe haw. Kai heh yonnae ka sak e, kahawihoehe poung lah hno ka sak e teh kai doeh. Hetnaw ni bangmaw a sak awh. Oe BAWIPA ka Cathut, kai hoi ka imthungnaw dawk na kut pho nateh, na taminaw ni lacik hah khang awh hanh naseh, telah ati.

<sup>18</sup> Hatdawkvah, BAWIPA kalvantami ni Jebusit tami Ornan e cangkatinnae koe vah Devit a cei vaiteh, BAWIPA hanelah thuengnae khoungroe kangdue sak hanelah, Devit koe dei pouh hanelah Gad koe kâ a poe.

<sup>19</sup> A dei e patetlah Gad ni BAWIPA min lahoi a dei pouh e patetlah Devit teh a cei. <sup>20</sup> Ornan ni a kamlang teh kalvantami hah a hmu. Ahni koe kaawm e a capa 4 touh a kâhro. Ornan ma teh cang a katin.

<sup>21</sup> Hottelah Devit ni Ornan koe a pha teh, Ornan ni a khet navah, Devit hah a hmu. Cang a katin e pak a tha teh, Devit e hmalah talai dawk a tabo.

<sup>22</sup> Devit ni BAWIPA hanelah thuengnae khoungroe ka sak thai nahanelah cangkatinnae hmuen hah na poe haw. Taminaw koehoi lacik a kâkayaw thai nahanelah, ka kuepcalah a phu na poe han telah atipouh.

<sup>23</sup> Ornan ni Devit koe lat yawkaw, siangpahrang ka bawipa ni ahawi na tie patetlah sak yawkaw, kenhaw! hmaisawi thuengnae sak nahanelah maitotan hoi thueng hanelah cakong, tavai hoi thueng nahanelah cakong hai na poe han. Abuemlahoi koug na poe telah atipouh.

<sup>24</sup> Siangpahrang Devit ni Ornan koe vah, telah nahoe. Aphu hoi kâran han. Bangkongtetpawiteh, BAWIPA hanlah nange ka lat mahoe. Banghai baw laipalah thuengnae sathei hah ka poe mahoe atipouh.

<sup>25</sup> Hatdawkvah, Devit ni hote hmuen teh Ornan koe sui shekel 600 touh hoi a ran. <sup>26</sup> Devit ni hote hmuen koe BAWIPA hanlah khoungroe a sak teh, sathei thuengnae hoi roum thuengnae sathei poenae a sak. BAWIPA a kaw teh khoungroe dawkvah kalvan lahoi hmai hoi a pato.



<sup>27</sup> BAWIPA ni kalvantaminaw hah kâ a poe teh, tahloi teh a tabu dawkw bout a păseng. <sup>28</sup> Devit ni Jebusit tami Ornan e cangkatinnae koehoi BAWIPA ni na pato tie hah a panue toreî teh, hawvah thueng a sak. <sup>29</sup> Hatnae tueng dawkvah, Mosi ni kahrawngum BAWIPA e lukkareim hoi hmaisawinae khoungroe a sak e hah, Gibeon kho e hmuernasang doeh ao rah. <sup>30</sup> Hateiteh, Cathut koe pouknae hei hanelah Devit ni a hmalah cet thai hoeh. Bangkongtetpawiteh, BAWIPA e kalvantami e tahloi hah a taki.

## 22

### *Devit ni bawkim sak sak hanelah a kâcai*

<sup>1</sup> Devit ni hetteh BAWIPA Cathut e im lah ao teh, hethateh Isarelnaw hanelah hmaisawi thuengnae khoungroe doeh telah ati.

<sup>2</sup> Hatdawkvah, Devit ni Isarel ram e miphun alouke kaawm e naw hah, cungalal pâkhueng teh, Cathut e im sak hanelah, talungdêikathoumnaw hah thaw a poe. <sup>3</sup> Devit ni longkha, tho sak nahanelah sum moikapap hoi rahum moikapap a ta pouh. <sup>4</sup> Sidar thing hai moikapap a ta pouh. Sidonnaw hoi Tairenaw ni Devit koevah, Sidar thing moikapap a sin pouh awh. <sup>5</sup> Devit ni ka capa Solomon teh a camo rah dawkvah, banghai panuek hoeh rah. A sak hane BAWIPA im teh a raim kaawm poung e, a min kamthang poung e, hoi ka lentoe e, ram pueng dawkw pathang hanelah ao han. Hatdawkvah, sut ka rakueng pouh han telah ati. Devit ni a due hoehnahan vah sut a rakueng pouh.

<sup>6</sup> A capa Solomon a kaw teh, BAWIPA Isarel Cathut e im sak hanelah kâ a poe. <sup>7</sup> Devit ni a capa Solomon koevah, ka capa BAWIPA ka Cathut im hanelah im ka sak pouh hanelah ka kâcainae ao. <sup>8</sup> Hatei, nang teh thi moikapap na lawng sak. Taran kalenpoungnaw hai na tuk. Kaie mithmu vah talai van thi moikapap na lawng sak. Ka min hane im na sak mahoe. <sup>9</sup> Khenhaw! capa na tawn vaiteh, ahni teh roumnae tami lah ao han. A tenggam e tarannaw e thung hoi roumnae ka poe han. A min teh Solomon na ti han. Ahnie se dawkw Isarelnaw teh lungmawngnae hoi roumnae hoi ao han. <sup>10</sup> Ahni ni kaie min o nahane im a sak han. Ahni teh ka capa lah ao vaiteh, kai teh a na pa lah ka o han. Isarelnaw dawkw uknaeram a bawitungkhung a yungyoe ka caksak han, telah BAWIPA e lawk teh kai koe a tho.

<sup>11</sup> Hatdawkvah, ka capa, BAWIPA teh nang koe ao teh, na lam a cawn sak vaiteh, na dei tangcoung e patetlah nang ni nange BAWIPA Cathut e im hah na sak han. <sup>12</sup> BAWIPA ni lungangnae hoi thouthainae na poe seh. Isarelnaw dawkw uknae na poe seh. BAWIPA na Cathut e phunglawk teh na tarawi thai han. <sup>13</sup> Hottelah Isarel kong dawkw phung hoi lawkcengnae BAWIPA ni Mosi koe a poe e naw hah na tarawi pawiteh, na lam a cawn han doeh. Na tha awm sak, na taranhawi sak, taket hanh, na lungpout sak hanh.

<sup>14</sup> Khenhaw! sut ka rakueng tangcoung e BAWIPA e im hanelah sui talen 1, 000 hoi ngun talen 1, 000, 000 touh a ta pouh. Rahum hoi sumnaw hai moikapap lah ao toe. Thing hoi talungnaw hai ka rakueng toe. Youn na sak thai han toe. <sup>15</sup> Hahoi thaw ka tawkw hane, thing ka a hane, talung ka dêi hane, insakkathoumnaw kOUNG ao toe. <sup>16</sup> Moikapap lah suinaw hoi ngunnaw, rahumnae, sumnaw hai ao. Thaw nateh tawkw hane youn kamtawng leih, BAWIPA teh nang koe ao atipouh.

<sup>17</sup> Devit ni Isarel kahrawikungnaw pueng teh a capa Solomon kabawp awh hanelah kâ a poe. <sup>18</sup> BAWIPA nangmae Cathut teh nangmouh koe ao



nahoehmaw. Hmuen tangkuem vah roumnae na poe nahoehmaw. Hete ram dawkw e taminaw teh ka kut dawkw na poe teh a ram hai BAWIPA hoi a taminaw hmalah tâ lah ao toe. <sup>19</sup>BAWIPA na Cathut hah tawng hanelah, na hringnae hoi na lungthin dawkw tat awh. Hatdawkvah, BAWIPA lawkkam thingkong hoi Cathut e hnpai kathounge naw hah BAWIPA min lahoi sak hane im dawkvah, kâenkhai hanelah, BAWIPA Cathut e hmuen kathounge teh thaw nateh sak awh telah ati.

## 23

### *Levihnaw hoi vaihmanaw e thawtawknæ*

<sup>1</sup> Devit teh a matawng tOUNg dawkvah, a capa Solomon teh Isarel siangpahrang lah a sak awh. <sup>2</sup> Isarel kahrawikungnaw pueng hoi vaihmanaw, Levihnaw hah kOUNg a kamkhueng sak. <sup>3</sup> Levihnaw teh kum 30 touh hoi lathueng e naw hah touk e lah ao teh, tongpa 38, 000 a pha. <sup>4</sup> Hotnaw thung dawkw hoi 24, 000 teh BAWIPA e im ka sak hane naw hoi ka ring hane naw lah ao awh teh, 6000 teh kahrawikungnaw hoi lawkcengkungnaw lah ao awh. <sup>5</sup> Hahoi 4000 teh, longkha karingkungnaw lah ao awh. Alouke 4000 teh pholennæ koe tumkxawng hanelah ka sak e naw, Devit ni a sak e hah a hno awh teh, BAWIPA kapholennaw lah ao awh.

<sup>6</sup> Levih e capanaw thung dawkw hoi a hu louklouk lah a kâkapek awh. Gershon casaknaw Kohath hoi Merari. <sup>7</sup> Gershonnaw teh Ladan hoi Shimei. <sup>8</sup> Ladan casaknaw teh Jehiel, Zetham hoi Joel, abuemlah katham touh a pha awh. <sup>9</sup> Shimei casaknaw teh Shelomith hoi Haziël, Haran hoi abuemlah katham touh a pha awh. Hetnaw teh Ladan catoun imthung kahrawikung lah ao awh. <sup>10</sup> Shimei casaknaw teh Jahath, Zina, Jeush hoi Beriah. Hetnaw pali touh teh Shimei casaknaw doeh. <sup>11</sup> Jahath teh kacuepOUNg lah ao. Zizah teh apâhni e lah ao. Jeush hoi Beriah teh ca pung awh hoeh. Hatdawkvah, imthung buet touh e patetlah a pouk awh. <sup>12</sup> Kohath casaknaw teh Amram, Izhar, Hebron, Uzziel hoi pali touh a pha awh. <sup>13</sup> Amram casaknaw teh Aron hoi Mosi doeh. Aron hoi a catounnaw teh, yungyoe hanelah kathounge hnonaw hah thOUNg sak hane, BAWIPA hmalah hmuitui sawi e thaw hah tawkw vaiteh, amae min lah hoi yawhaw i ka poe hanelah aloukcalah kapek e lah ao. <sup>14</sup> Cathut e tami Mosi e capanaw teh Levih miphun dawkw hmai touksin e lah ao.

<sup>15</sup> Mosi casak teh Gershom hoi Eliezer. <sup>16</sup> Gershom casak thung dawkw hoi kacuepOUNg e teh Shubael doeh. <sup>17</sup> Eliezer casak lah kaawm e thung hoi kacuepOUNg e Rehabiah doeh. Eliezer ni ca tongpa alouke tawn hoeh. Hateiteh, Rehabiah casak teh moi a pung awh. <sup>18</sup> Izhar casak thung dawkw hoi kacuepOUNg e teh Shelomith doeh. <sup>19</sup> Hebron casaknaw thung dawkw hoi kacuepOUNg e teh Jeriah doeh. Apâhni e teh Amariah doeh. Apâthum e teh Jahaziel doeh. Apali e teh Jakameam doeh. <sup>20</sup> Uzziel casak dawkw hoi kacuepOUNg e teh Mikah, apâhni e teh Isshiah doeh. <sup>21</sup> Merari casak teh Mahli hoi Mushi, Mahli casak teh Eleazar hoi Kish. <sup>22</sup> Eleazar teh ca tongpa tawn hoeh. Napui dueng doeh a tawn. Kish e capanaw ni ahnimouh teh yu lah a la awh. <sup>23</sup> Mushi casaknaw teh Mahli, Eder, Jerimoth hoi katham touh a pha awh.

<sup>24</sup> Hetnaw teh Levih capanaw dawkw a imthung lah hoi touk awh e dawkw, imthungnaw kahrawikung BAWIPA im sak hanelah kum 20 lathueng e thaw katawknaw lah ao awh. <sup>25</sup> Bangkongtetpawiteh, Devit ni Jerusalem vah yungyoe kho a sak thai nahane Isarel BAWIPA Cathut ni a taminaw hah



karoumcalah o thai nahan a poe e doeh. <sup>26</sup> Levihnaw ni hai lukkareiim hoi a thaw tawk nahanelah puengcangnaw kâkayawt hanelah ngai mahoehe toe, telah a ti. <sup>27</sup> Bangkongtetpawiteh, Devit ni kâpoe e ao dawkvah, Levihnaw kum 20 lathueng hah touk e lah ao awh. <sup>28</sup> Hatdawkvah, Levihnaw teh Cathut e im dawk thaw ka tawk e Aron e capanaw thaw kabawp hane, longkha thung e, im khan thung e, kathounge hno pueng thoung sak hane, BAWIPA e im dawk thaw ka tawk e lah ao awh. <sup>29</sup> Pâtoum hane vaiyei hoi tavai, thueng nahane tavai kanui e, tonphuenhoehe ka rapamca e, hmai pahai e thoseh, karê e thoseh, kathoung kalen pueng hai ao. <sup>30</sup> Amom tangminlah hnintangkuem BAWIPA koe lunghawi lawk dei hanelah ao awh. <sup>31</sup> Sabbath hnin thoseh, thaparei hnin thoseh, pawî hnin thoseh, sak hane patetlah BAWIPA koe thuengnae pueng poe hanelah thaw katawkna w lah ao awh. <sup>32</sup> Hahoi, kamkhuengnae lukkareiim ka ring hane hoi, hmuen kathoung ka ring hane hoi, BAWIPA im dawk thaw ka tawk hane hmaunawnggha Aron e capanaw ni sak hane pueng teh ahnimae thaw lah ao.

## 24

### *Vaihmanaw thaw reinae*

<sup>1</sup> Aron capanaw thaw reinae teh hettelah ao. Aron casaknaw teh Nadab, Abihu, Eleazar hoi Ithamar tinaw hah doeh. <sup>2</sup> Nadab hoi Abihu teh a na pa a due hoehnahlan a due roi teh, capa tawn roi hoeh. Hatdawkvah, Eleazar hoi Ithamar ni vaihma thaw teh a tawk roi. <sup>3</sup> Devit ni Eleazar casak Zadok hoi Ithamar casak Ahimelek tinaw hoi rei ka tawk hane thaw a kapek pouh. <sup>4</sup> Ithamar casaknaw hlak vah, Eleazar casaknaw ni kahrawikung kapap lah ao awh. Eleazar casak daw k hoi imthung kahrawikungnaw 16 touh a pha awh. Ithamar casak daw k hoi imthung kahrawikungnaw 8 touh a pha awh. <sup>5</sup> Hottelah cungpam a khoe awh teh, suetalah a kârei awh. Bangkongtetpawiteh, Eleazar casaknaw hoi Ithamar casaknaw daw k hmuen kathoung daw k e kahrawikung hoi Cathut e im hanelah kahrawikung lah ao awh.

<sup>6</sup> Levih tami cakathukung Nethanel capa Shemaiah ni siangpahrang hoi kahrawikungnaw hah vaihma Zadok hoi Abiathar capa Ahimelek, hoi vaihmanaw hah Levih imthung kahrawikungnaw e mithmu vah a thut. Imthung kahrawikung buet touh ni a coe e teh, Eleazar imthung daw k a bo. Buet touh e teh Ithamar imthung daw k a bo.

<sup>7</sup> Hottelah cungpam apasuek e teh Jehoiarib daw k a bo. Apâhni e teh Jedaiah daw k a bo. <sup>8</sup> Apâthum teh Harim daw k a bo. Apali e teh Seorim daw k a bo. <sup>9</sup> Apanga e teh Malkhijah daw k a bo. Tangla, ataruk e teh Mijamin daw k a bo. <sup>10</sup> Asari e teh Hakkoz daw k a bo. ataroe e teh Abijah daw k a bo. <sup>11</sup> Atako e teh Jeshua daw k a bo, ahra e teh Shekaniah daw k a bo. <sup>12</sup> ahlaibun e teh Eliashib daw k a bo, ahlaikahni e teh Jakim daw k a bo. <sup>13</sup> Ahlaikathum e teh Huppah daw k a bo, ahlaipali e teh Jeshebeab daw k a bo. <sup>14</sup> ahlaipanga e teh Bilgah daw k a bo, ahlaitaruk e teh Immer daw k a bo. <sup>15</sup> ahlaisari e teh Hezir daw k a bo, ahlaitaroe e teh Hapozzez daw k a bo. <sup>16</sup> ahlaitako e teh Pethahiah daw k a bo, aruihni e teh Ezekiel daw k a bo. <sup>17</sup> aruihnbuet e teh Jakhin daw k a bo, aruihnikahni e teh Gamul daw k a bo. <sup>18</sup> aruihnikathum e te Delaiah daw k a bo, aruihnpali e teh Maaziah daw k a bo.

<sup>19</sup> Hetteh BAWIPA Isarel Cathut ni na pa Aron koe a poe e BAWIPA e im daw k thaw a taw k awh hanelah a kâparei awh e lah a ao.



*Alouke Levih*

<sup>20</sup> Levih casaknaw kaawm rae teh Amram casaknaw thung dawk hoi Shubael, Shubael casak thung dawk hoi Jedeiah. <sup>21</sup> Rehabiah casaknaw thung hoi Isshiah teh a camin lah ao. <sup>22</sup> Izharnaw thung hoi Shelomoth, Shelomoth casak thung hoi Jahath. <sup>23</sup> Hebron casaknaw teh a camin Jeriah, apâhni e teh Amariah, apâthum e teh Jahaziel, apali e teh Jekameam. <sup>24</sup> Uzziel casak thung hoi Maikah, Maikah casak thung hoi Shamir. <sup>25</sup> Maikah nawngna Isshiah, Isshiah casak thung hoi Zekhariah. <sup>26</sup> Merari casaknaw teh Mahli hoi Mushi doeh. Jaaziah casak thung hoi Beno. <sup>27</sup> Merari casaknaw teh Jaaziah thung hoi Shoham, Zakkur hoi Ibri. <sup>28</sup> Mahli koehoi capa ka tawn hoeh e Eleazar doeh. <sup>29</sup> Kish koehoi capa Jerahmeel. <sup>30</sup> Mushi casak teh Mahli, Eder, Jerimoth doeh. Hetnaw teh Levih casaknaw dawk hoi imthung kahrawikungnaw doeh.

<sup>31</sup> Ahnimouh ni hai Aron casaknaw teh a hmaunawngna patetlah siangpahrang Devit hoi Zadok hoi Ahimelek hoi vaihmanaw hoi, Levihnaw imthung kahrawikungnaw mithmu vah, cungpam a rayu van awh. Imthung kahrawikung kacuepoung ni a nawngna cahnoung ni a sak e patetlah a sak awh.

## 25

*La kahrawikungnaw*

<sup>1</sup> Hahoi teh, Asaph, Heman, Jeduthun casak tangawn ni ratoung hoi tamawi, cecaknaw hoi tumkhawng hanelah Devit hoi ransabawinaw ni lengkaleng thaw a poe awh.

<sup>2</sup> Thaw ka tawk hane naw teh, Asaph casak dawk hoi Zakkur, Joseph, Nathaniah hoi Asarelah. Ahnimouh teh Asaph casaknaw siangpahrang ni kâpoe e patetlah lawk kadeikung Asaph e kâ rahim vah kaawm e naw doeh.

<sup>3</sup> Jeduthun dawk hoi Jeduthun casaknaw teh Gedaliah, Zeri, Isaiah, Hashabiah, Mattithiah hoi taruk touh a pha awh. Ratoung hoi BAWIPA koe lunghawinae lawk kadeikung a na pa e kâ rahim kaawm e naw doeh.

<sup>4</sup> Heman dawk hoi Heman casaknaw teh Bukkiah, Mattaniah, Uzziel, Shubael, Jerimoth, Hananiah, Hanani, Eliathah, Giddalti, Romamtiezer, Joshbekashah, Mallothi, Hothir, Mahazioth. <sup>5</sup> Hotnaw pueng teh siangpahrang hanelah kahmawtkung Heman casak a ki ka tawmrasang e lah ao awh. Cathut ni Heman teh ca tongpa 14 touh hoi canu 3 touh a poe.

<sup>6</sup> Hotnaw pueng teh, BAWIPA im dawk cecak, tamawi, ratoung hoi Cathut e im dawk thaw ka tawk nahanelah, la ka sak naw a na pa e kâ rahim kaawm e naw doeh. Asaph, Jeduthun hoi Heman naw teh, siangpahrang kâtawnnae rahim kaawm e naw doeh. <sup>7</sup> Ahnimouh teh a hmaunawngnanaw hoi BAWIPA hanelah la ka cang naw, ka thoum tangcoung naw abuemlah 288 touh a pha awh. <sup>8</sup> Kathoung kalen, kacangkhaihaw hoi, kacangnaw, a coe awh hane suetalah cungpam a khoe pouh.

<sup>9</sup> Hottelah cungpam a khoe e apasueke teh Asaph e capa Joseph tak dawk a bo. Apâhni e teh Gedaliah hoi a hmaunawngnanaw capa 12 dawk a bo. <sup>10</sup> Apâthum e teh Zakkur, a capanaw hoi a hmaunawngnanaw 12 touh dawk a bo. <sup>11</sup> Apali e teh Izri hoi a capa hoi a hmaunawngnanaw 12 touh dawk a bo. <sup>12</sup> Apanga e teh Nathaniah hoi a capa hoi a hmaunawngnanaw 12 touh dawk a bo. <sup>13</sup> Ataruk e teh Bukkiah hoi a capa



hoi a hmaunawngghanaw 12 touh dawk a bo. <sup>14</sup> Asari e teh Jesharelah hoi a capa hoi a hmaunawngghanaw 12 touh dawk a bo. <sup>15</sup> Ataroe e teh Isaiah hoi a capa hoi a hmaunawngghanaw 12 touh dawk a bo. <sup>16</sup> Atako e teh Mattaniah hoi a capa hoi a hmaunawngghanaw 12 touh dawk a bo. <sup>17</sup> Ahra e teh Shimei hoi a capa hoi a hmaunawngghanaw 12 touh dawk a bo. <sup>18</sup> Ahlaibun e teh Azarel hoi a capa hoi a hmaunawngghanaw 12 touh dawk a bo. <sup>19</sup> Ahlaikahni e teh Hashabiah hoi a capa hoi a hmaunawngghanaw 12 touh dawk a bo. <sup>20</sup> Ahlaikathum e teh Shubael hoi a capa hoi a hmaunawngghanaw 12 touh dawk a bo. <sup>21</sup> Ahlaipali e teh Mattithiah hoi a capa hoi a hmaunawngghanaw 12 touh dawk a bo. <sup>22</sup> Ahlaipanga e teh Jerimoth hoi a capa hoi a hmaunawngghanaw 12 touh dawk a bo. <sup>23</sup> Ahlaitaruk e teh Hananiah hoi a capa hoi a hmaunawngghanaw 12 touh dawk a bo. <sup>24</sup> Ahlaisari e teh Joshbekashah hoi a capa hoi a hmaunawngghanaw 12 touh dawk a bo. <sup>25</sup> Ahlaitaroe e teh Hanani hoi a capa hoi a hmaunawngghanaw 12 touh dawk a bo. <sup>26</sup> Ahlaitako e teh Mallothi hoi a capa hoi a hmaunawngghanaw 12 touh dawk a bo. <sup>27</sup> Aruihni e teh Eliathah hoi a capa hoi a hmaunawngghanaw 12 touh dawk a bo. <sup>28</sup> Aruihnibuet e teh Hothir hoi a capa hoi a hmaunawngghanaw 12 touh dawk a bo. <sup>29</sup> Aruihnikahni e teh Giddalti hoi a capa hoi a hmaunawngghanaw 12 touh dawk a bo. <sup>30</sup> Aruihnikathum e teh Mahazioth hoi a capa hoi a hmaunawngghanaw 12 touh dawk a bo. <sup>31</sup> Aruihnipali e teh Romantiezzer hoi a capa hoi a hmaunawngghanaw 12 touh dawk a bo.

## 26

### *Longkha karingnaw*

<sup>1</sup> Longkha karingkungnaw thaw kêreinae teh, Korah koehoi Asaph casaknaw Kore capa Meshelemiah. <sup>2</sup> Meshelemiah casak koehoi Zekhariah teh a ca camin, apâhni e teh Jediael, apâthum e teh Zebadiah, apali e teh Jathniel,

<sup>3</sup> apanga e teh Elam, ataruk e teh Jehohanan, asari e teh Elioenai,

<sup>4</sup> Obededom casaknaw teh a camin Shemaiah, apâhni e teh Jehozabad, apâthum e teh Joah, apali e teh Sakar, apanga e teh Nethanel, <sup>5</sup> ataruk e teh Ammiel, asari e teh Issakhar, ataroe e teh Peulthai, ahni teh Cathut ni yawhawi a poe. <sup>6</sup> Shemaiah casaknaw thung hoi hai imthung kahrawinaw ao van. Bangkongtetsawiteh, tarankahawi ni teh athakaawme taminaw lah ao awh. <sup>7</sup> Shemaiah capanaw teh Othni, Rephael, Obed, a hmaunawnggha Elzabad, hno katetthai capa Elihu hoi Semakiah. <sup>8</sup> Hetnaw teh Obededom casaknaw doeh. A capanaw hoi a hmaunawngghanaw teh thaw ka tawk thai poung e lah ao. Obed-edomnaw teh 62 touh a pha awh.

<sup>9</sup> Meshelemiah casaknaw hoi a hmaunawnggha a thakaawm capa 18 touh ao awh.

<sup>10</sup> Merari casak koehoi Hosah ni hai capanaw a tawn. Shimri te camin la ao hoeh nakunghai a na pa ni kacuepoung lah a ta. <sup>11</sup> Apâhni e teh Hilkiyah, apâthum e teh Tabaliah, apali e teh Zekhariah. Hosah casak hoi a hmaunawngghanaw abuemlah 13 touh a pha. <sup>12</sup> Hetnaw teh a hmaunawngghanaw patetlah BAWIPA e im dawkhaw ka tawkhaw e longkha ka ring hanelah ao awh. <sup>13</sup> Kacue kanaw a imthungnaw lahoi longkha tangkuem ring hanelah cungpam a rayu awh.

<sup>14</sup> Kanitholae cungpam teh Shelemiah a bo. A lungkaang poung e lawkcengkung capa Zekhariah hanelah cungpam a rayu awh teh tung lae



hah a coe. <sup>15</sup> Akalae Obededom a coe dawk hnopai tanae im teh a capanaw ni coe e lah ao. <sup>16</sup> Shuppim hoi Hosah ni coe e teh kaniloumlae takhangnae Shalleketh longkha hoi thongim a voivang lae hah doeh.

<sup>17</sup> Kanitholae Levihnaw 6 touh ao awh teh, hnin touh dawk atunglah 4, akalah 4, hahoi hnoim dawk 2, reirei ao. <sup>18</sup> Kaniloumlae hoi rapan thung kâen nahanelah 4 touh, kalupnae thung 2 touh. <sup>19</sup> Hetnaw teh Korah e capanaw hoi Merari e capanaw, longkha ka ring hanelah a kapek e naw doeh.

### *Hnopai thaw kakuennaw*

<sup>20</sup> Levihnaw thung hoi Ahijah teh Cathut im dawk hnopai poe e karingkung lah ao. <sup>21</sup> Ladan e catounnaw teh Ladan koehoi Gershonnaw lah kaawm e lah ao. Gershonnaw ni Ladan imthung dawk kahrawikung lah ao awh. Hotnaw teh <sup>22</sup> Jehieli casak koehoi Zetham hoi a nawngah Joel teh BAWIPA im dawk e hnopai karingkung lah ao.

<sup>23</sup> Amram koehoi hai, Izhar koehoi hai, Hebron koehoi hai, Uzziel koehoi hai ao awh. <sup>24</sup> Mosi capa Gershom casak Shubael hai hnopai karingkung-naw dawk kacue lah ao. <sup>25</sup> Eliezer dawk hoi a hmaunawngghanaw teh Eliezer capa Rehabiah, a capa Isaiah, a capa Joram, a capa Zikhri, a capa Shelmoth. <sup>26</sup> Shelomoth hoi a hmaunawngghanaw hai siangpahrang Devit hoi a imthung kahrawikung ransa 1000 kaukkung bawi, 100 touh kaukkung bawi lah ao awh. Ransabawinaw ni a poe e hnopai karingkung lah ao awh. <sup>27</sup> Taran a tuknae koe e lawphno a sin awh e teh, BAWIPA e im pathoup nahanelah a poe awh. <sup>28</sup> Kahmawtkung Samuel hoi Kish capa Sawl, Ner capa Abner, Zeruiah capa Joab tinaw ni a poe tangcoung e naw hoi poe hanelah kaawm e hnopaw teh Shelomoth hoi a hmaunawngghanaw e kut dawk a kuem awh.

<sup>29</sup> Izharnaw dawk hoi Kenaniah hoi a capanaw teh Jerusalem rapan alawilae Isarelnaw dawk kahrawikungnaw hoi lawkcengkungnaw lah ao awh. <sup>30</sup> Hebronnaw dawk hoi Hashabiah hoi a hmaunawngghanaw teh hno katetthai e tami 17000 touh teh Jordan namran kaniloumlah BAWIPA e thawnaw hoi siangpahrang e thawnaw dawk Isarel ram karingkungnaw lah ao awh. <sup>31</sup> Hebronnaw koehoi Jerijah teh Hebronnaw e a na pa a tâconae patetlah kahrawikung lah ao. Devit a bawinae kum 40 touh a pha navah, Gilead ram e Jazer vah ahnimouh thung dawk e athakaawme hoi tarankahawi e moikapap a hmu awh. <sup>32</sup> Cathut hane hoi siangpahrang e thaw dawkvah, Reuben, Gad, Manasseh casaknaw tangawn lathueng kahrawikungnaw hah Devit ni a ta. Imthungnaw ka hrawi hane dawk hoi hno katetthai e a hmaunawngghanaw teh 2, 700 touh a pha. awh.

## 27

### *Devit e ransabawinaw*

<sup>1</sup> Isarel catounnaw ayoun a pap e dawk hoi a imthung kahrawikung hane ransa 1, 000 kaukkung, 100 kaukkung ransabawinaw, siangpahrang thaw katawknaw pueng kum touh thung hane thapa yung touh hoi yung touh a kâhlai awh teh, thaw a tawk awh. Ahu thung tami 24, 000 ao awh.

<sup>2</sup> Apasueke thapa dawk ahu buet touh kahrawikung teh Zabdiel capa Jashobeam ni a hrawi teh ahu thung tami 24, 000 ao. <sup>3</sup> Ahni teh Perez casak lah ao teh hmaloe pasuek e thapa dawk e ransahu kahrawikungnaw hlak ransabawi kacue lah ao.



<sup>4</sup> Apâhni e thapa dawk ahu kahrawikung teh Aho tami Donai doeh. Ahu dawk Mikloth hai kahrawikung lah ao. Ahu thung tami 24, 000 touh ao awh.

<sup>5</sup> Apâthum e thapa dawk ahu kahrawikung teh vaihma Jehoiada capa Jehoiada capa Benaiah doeh. Ahu thung tami 24, 000 touh ao awh.

<sup>6</sup> Benaiah teh tami 30 lathueng hoi 30 rahak dawk e tami athakaawme lah ao. A capa Ammizabad hai ahu thung a bawk van. <sup>7</sup> Apalinae thapa dawk ahu kahrawikung teh Joab e nawngaha Asahel doeh. Ahnie a capa Zebadiah doeh. Ahu thung tami 24, 000 touh ao awh. <sup>8</sup> Apanga e thapa dawk ahu kahrawikung teh Izrah tami Shamhuth doeh. Ahu thung tami 24, 000 touh ao awh. <sup>9</sup> Ataruk e thapa dawk ahu kahrawikung teh Tekoa tami Ikkesh capa Ira doeh. Ahu thung tami 24, 000 touh ao awh. <sup>10</sup> Asari e thapa dawk ahu kahrawikung teh Ephraim casak Pelonit tami Helez doeh. Ahu thung tami 24, 000 touh ao awh. <sup>11</sup> Ataroe e thapa dawk ahu kahrawikung teh Zerahit catoun Hushath tami Sibbekhai doeh. Ahu thung tami 24, 000 touh ao awh. <sup>12</sup> Atako e thapa dawk ahu kahrawikung teh Benjamin casak Anathoth kho e Abiezer doeh. Ahu thung tami 24, 000 touh ao awh. <sup>13</sup> A hra e thapa dawk ahu kahrawikung teh Zerahit catoun Netophah tami Maharai doeh. Ahu thung tami 24, 000 touh ao awh. <sup>14</sup> A hlaibun e thapa dawk ahu kahrawikung teh Ephraim casak Pirathon tami Benaiah doeh. Ahu thung tami 24, 000 touh ao awh. <sup>15</sup> A hlaikahni e thapa dawk ahu kahrawikung teh Othniel koehoi Netophah tami Heldai doeh. Ahu thung tami 24, 000 touh ao awh.

### *Miphun kahrawikungnaw*

<sup>16</sup> Isarel miphunnaw dawkvah, Reuben miphun dawk hoi Zikhri capa Eliezer teh bawi kalen lah ao. Simeon miphunnaw hanelah Maakah capa Shephatiah, <sup>17</sup> Levih miphunnaw hanelah Kemuel capa Hashabiah, Aron miphunnaw hanelah Zadok, <sup>18</sup> Judah miphunnaw hanelah Devit e hmaunawngnanaw thung dawk hoi Elihu, Issakar miphunnaw hanelah Michael capa Omri, <sup>19</sup> Zebulun miphunnaw hanelah Obadiah capa Ishmaiah, Naphtali miphunnaw hanelah Azriel capa Jerimoth, <sup>20</sup> Ephraim casak miphunnaw hanelah Azariah capa Hosi, Manasseh casak tangawn naw hanelah Pedaiah capa Joel, <sup>21</sup> Gilead ram e Manasseh miphun tangawn hanelah Zekhariah capa Iddo, Benjamin miphunnaw hanelah Abner capa Jaasiel, <sup>22</sup> Dan miphunnaw hanelah Jeroham capa Azarel. Hotnaw teh Isarel miphun kahrawikungnaw lah ao awh.

<sup>23</sup> Hateiteh, Devit ni kum 20 rahim naw hah touk hoe. Bangkongtetpawiteh, Isarel teh kalvan e âsi yit touh ka pung sak han telah BAWIPA ni yo a la dei toe. <sup>24</sup> Zeruiah capa Joab ni touk hanelah ati eiteh, boeba touk thai hoe. Bangkongtetpawiteh, milu touk kecu dawkvah, Isarel naw daw a lungkhueknae a pha. A touk awh e yit touh siangpahrang Devit ni setouknae daw thut e lah awm hoe.

### *Ram kahrawikung alouknaw*

<sup>25</sup> Siangpahrang e hnopai ka ring e teh, Adiel capa Azmaveth doeh. Law daw hai, khopui daw hai, khote daw hai, hnoim daw hai, hnopainaw kakhenyawnkung teh Uziah capa Jonathan doeh. <sup>26</sup> Laikaww kanawknaw ka khenyawnkung lah Kelub capa Ezri doeh. <sup>27</sup> Misur takha kakhenyawnkung lah Ramathit tami Shimei doeh. Misur takha thung e misurkatin e kakhenyawnkung teh Shipmit tami Zabdi doeh. <sup>28</sup> Tanghling daw kaawm e olive thing hoi thailahei kungnaw kakhenyawnkung lah



Gaderi tami Baalhanan doeh. Satuinau tanae kakhenyawunkung lah Joash doeh. <sup>29</sup> Sharon dawak ka pâ e saringnaw kakhenyawunkung lah Sharon tami Shitrai doeh. Tanghling dawak e saringnaw kakhenyawunkung lah Adlai capa Shaphat doeh. <sup>30</sup> Kalauknaw kakhenyawunkung lah Ishmael tami Obil doeh. Lanaw kakhenyawunkung lah Meronoth tami Jedeiah doeh. <sup>31</sup> Tuhunaw ka khenyawunkung lah Hagri tami Jaziz doeh. Hotnaw pueng teh Devit e hnopai khenyawunkung lah ao awh. <sup>32</sup> Devit e a napu Jonathan teh a lungkaang poung e hoi, cakathoum e, kho ka pouk thai e tami lah ao. Hakmonite capa Jehiel teh siangpahrang e capanaw kacangkhaukung lah ao. <sup>33</sup> Ahithophel teh siangpahrang khokhankhaukung lah ao. Arki tami Hushai teh siangpahrang e huiko lah ao. <sup>34</sup> Ahithophel hnukkhu teh Benaiah capa Jehoiada hoi Abiathar doeh. Joab te siangpahrang e ransanaw ka hravi e doeh.

## 28

### *Im sak hanelah Solomon a patoun*

<sup>1</sup> Devit ni Isarel kahrawikungnaw pueng, miphun tangkuem dawak e kahrawikungnaw hoi siangpahrang thaw tawknaw dawak hoi ouk kâhlai e kahrawikungnaw ransa 1, 000 kauknaw, 100 kauknaw, siangpahrang hoi a canaw ni a tawn e hnopainaw pueng ka khenyawnnaw thakaawme taminaw hoi tami athakaawme taminaw pueng hah Jerusalem vah a kaw awh. <sup>2</sup> Siangpahrang Devit ni a kangdue teh, ka hmaunawnga hoi ka taminaw ka lawk thai awh haw. BAWIPA lawkkam thingkong tanae hoi maimae Cathut khok tanae im ka sak han telah ka pouk e hah hote sak nahane hai moikapap ka tawn toe. <sup>3</sup> Hateiteh, Cathut ni nang teh taran ka tuk e hoi thi ka lawng sak e lah na o dawkvah, kaie ka min onae im na sak mahoei telah ati.

<sup>4</sup> Hat nakunghai Isarel BAWIPA Cathut ni apa imthungnaw dawak hoi Isarel siangpahrang lah o hane na rawi. Bangkongtetpawiteh, Judah teh kaukung lah a rawi teh, Judah miphun thung dawak hoi, apa imthung e capanaw dawak hoi, Isarelnaw dawkvah siangpahrang lah o hane teh a ngainae doeh. <sup>5</sup> Hatdawkvah, ka capanaw thung dawak hoi BAWIPA ni ca tongpa moikapap na poe. Isarelnaw dawak BAWIPA e uknaeram bawitungkhung dawak tahung hanelah ka capa Solomon teh a rawi toe. <sup>6</sup> Hatdawkvah, kai koe ka imthung hoi ka thongma ka kangdout sak hane teh, na capa Solomon doeh. Ahni teh ka capa lah ao hane ka rawi toung dawkvah, a na pa lah ka o han. <sup>7</sup> Hothloilah kâpoelawknaw hoi, ka lawkcengnae yuemkamcu lah awm pawiteh, a uknaeram hah a yungyoe ka caksak han. Sahnin e patetlah pou tarawi pawiteh telah ati.

<sup>8</sup> Hatdawkvah, hete kahawi e ram hah na coe han. Ca catounnaw hanelah yungyoe e raw lah na coe thai nahane BAWIPA e tamihu Isarelnaw pueng e mithmu hoi Cathut e hnâthainae dawak, BAWIPA na Cathut ni kâpoelawknaw hah tang nateh, pâkuem awh.

<sup>9</sup> Hahoi ka capa Solomon, na pa Cathut hah panuek nateh yuemkamcu e lungthin hoi lungthocalah hoi a thaw tawk pouh. Bangkongtetpawiteh, BAWIPA ni lungthin dawak pouknae naw pueng, noe e naw pueng hah be a panue thai. Ama hah na tawng pawiteh na hmu han. Hateiteh, na kamlang takhai pawiteh, yungyoe na pahnawt han. <sup>10</sup> Atu pouk haw, bangkongtetpawiteh, hmuen kathoung hane im sak hanlah BAWIPA ni na rawi e lah na o. Tha kâlat nateh, hot teh sak telah atipouh.



<sup>11</sup> Hatdawkvah, Devit ni a capa Solomon teh Bawkim hoi alawilae im hoi hnoimnaw hoi, a thung e khan hoi lungmanae tungkhung meilamnaw hah a poe. <sup>12</sup> Muitha ni a tawn sak e lungngailawk a pâpho sak e naw pueng, BAWIPA e im kalup thung e thongma meilamnaw hoi tengpam rakhan kaawm e naw pueng e meilam hoi Cathut im e hnopai cawng nahane im meilamnaw hoi, ya e hnongaw ta nahane im meilam hah a poe.

<sup>13</sup> Vaihmanaw hoi Levihnaw teh, amamae ahu thung lengkaleng ao awh nahanelah, im e meilam hoi BAWIPA e im dawkwaw tawkwaw nahane pueng, puengcangnaw pueng meilam totouh. <sup>14</sup> Thaw tawkwaw nahanelah hlaam phunkuep, sui hlaam hanelah hno hane sui hoi thaw tawkwaw nahanelah ngun hlaam hanelah a panki e yit touh ngun hoi, <sup>15</sup> Sui hmaiimkhoknaw hoi sui hmaiimnaw a panki e yit touh sui hno hane hoi, hmaiimkhok hoi hmaiim hanelah a panki e yit touh hno hane hoi, hmaiimkhok nahanelah hno a panki e yit touh hno hane ngun hmaiimkhok a panki e yit touh hno hane yit touh hoi. <sup>16</sup> Vaiyei hung nahane caboi, buet touh rip hanelah sui a panki e yit touh hoi, ngun caboi hanelah a panki e yit touh. <sup>17</sup> Kathounge sui moi sonae sum kut hoi, rahum, manang, suimanang khom hoi manang khom buet touh rip dawkwaw a panki e yit touh hoi, <sup>18</sup> kathounge sui hoi sak e hmuithu hmaisawinae khongroe hane hoi cherubim ni a rathei kadai teh, BAWIPA lawkkam thingkong kayo e kamnuenae meilam patetlah sak hane a panki e yit touh suinaw hoi.

<sup>19</sup> Devit ni, a sakyoenaw hoi a pouk tangcung e kamceng sak hanelah, BAWIPA ni amamae kut roeroe hoi a thut e roup lah ao telah atipouh.

<sup>20</sup> Devit ni a capa Solomon koevah, tha kâlat nateh taran kahawicalah awm haw. Hot teh sak, taket hanh. na lungpout hanh. Bangkongtetpawiteh, Jehovah Cathut ka Cathut teh nang koe ao. BAWIPA im dawkwaw e thaw hah a cum hoehroukrak teh, nang na cettakhai mahoe atipouh. <sup>21</sup> Hahoi, khenhaw! Cathut e im dawkwaw thaw phunkuep ka tawkwaw e vaihmanaw hoi Levihnaw ao awh teh, thaw tawkwaw kathoumnaw, lungthocalah hoi kabawmnaw hah nang koe pou ao han. Kahrawikungnaw hoi tami pueng ni kâ na poe e pueng a tarawi awh han telah atipouh.

## 29

### *Bawkim sak nahane poehno*

<sup>1</sup> Hahoi siangpahrang Devit ni taminaw koevah, Cathut ni a rawi e ka capa Solomon hah, a camo rah, a hmu thai e awm hoe. A tawkwaw hane teh a len poung. Bangkongtetpawiteh, bawkim teh tami hane tho hoe niteh, BAWIPA Cathut hane doeh. <sup>2</sup> Hatdawkvah, ka Cathut im hane sui hnongae dawkwaw sui, ngun hnongae dawkwaw ngun, rahum hnongae dawkwaw rahum, sum hnongae dawkwaw sum, thing hnongae dawkwaw thingnaw hah be ka rakueng toe. A mei pathoup nahanelah, onyx talung pangaw hoi a meikahawi e talungpangawnaw hoi, pathoup nahane talung a phukaawm e a phunphun hoi talungpangawnaw hai moikapap a ta toe <sup>3</sup> Hothloilah ka Cathut e im teh sak ngainae kalen poung lah ao dawkvah, kamae hnopai sui hoi ngunhaw hai im kathoung hanelah be ka rakueng e naw hloilah, ka Cathut im hanelah ka poe toe. <sup>4</sup> Hahoi tapang sak nahane ophir sui talen 3,000 hoi kathounge ngun talen 7,000.

<sup>5</sup> Hnongae a phunphun dawkwaw, kathoumnaw ni a hno hane, sui hno hane dawkwaw sui, ngun hno nahane dawkwaw ngun. Sahnin BAWIPA hanelah lunghawicalah poe pasoung e na yit touh maw ao telah a ti.

<sup>6</sup> Hottelah imthungkhu kahrawikung Isarel mipun ka hrawi naw hoi, 1,000 kauknaw hoi, 100 touh kauknaw, siangpahrang thaw ka tawkwaw e



kahrawikungnaw hoi lunghawicalah hoi a poe awh. <sup>7</sup> Cathut e im saknae dawkvah sui talen 5,000 hoi Darik 10, 000 hoi rahum talen 18, 000, sum talen 100, 000 a poe awh. <sup>8</sup> Talung phu kaawmnaw ni Gershon tami Jehiel ni a khetyawt e BAWIPA e hno dawk a ta awh. <sup>9</sup> Hatdawkvah, taminaw teh a lung hroung a hawi poung awh. Pouknae buet touh dawk lunghawinae, BAWIPA hno a poe awh dawkvah, Siangpahrang Devit hai a lung hroung ahawi.

### *Devit ni Cathut a pholen*

<sup>10</sup> Hatdawkvah, Devit ni tamipueng e hmalah BAWIPA a pholen. Kaimae BAWIPA Cathut, nang teh yungyoe hoi yungyoe totouh pholennae awm seh. <sup>11</sup> Oe BAWIPA na lennae, na bahu, na bawilennae, na tânae, hoi na taluenaeh teh namae doeh. Bangkongtetpawiteh, kalvan hoi talai dawk kaawmnaw pueng, namae doeh. Oe BAWIPA uknaeram teh nama e doeh. Nang teh bangpuengpa dawk a Lathueng Poung lah na o. <sup>12</sup> Tawntanae hoi barinae teh nama koehoi ka tho e naw doeh. Bangpuengpa na uk teh, na thaonae hoi hnotithainae naw hah na kut dawk ao. Na kut dawk tami pueng lentoe saknae hoi thasainae hah ao. <sup>13</sup> Hatdawkvah, kaimae Cathut, nama koe lunghawinae lawk ka dei. Ka lentoe e na min teh ka pholen awh.

<sup>14</sup> Hatei, tami bangpatet e lah maw ka o teh, ka taminaw hai bang lah maw ao awh teh, hete hnonaw heh lunghawicalah hoi a poe thai awh. Bangkongtetpawiteh, hnonaw pueng heh nama koehoi ka tâcawt e naw lah ao teh, nama koe e doeh kaimouh ni letlang na poe awh. <sup>15</sup> Kaimae mintoenaw patetlah kaimouh teh na hmalah imyin, tami koe kho ka sak e patetlah doeh ka o awh. Het talai van ka hring nathung e a hninnaw teh tâhlip thung e patetlah doeh ao. Ngaihawinae banghai awm hoe. <sup>16</sup> Oe Jehovah, kaimouh e Cathut na tamikathoungnaw hanlah im ka sak nahanelah, hete hno sut ka rakueng e hnonaw heh na kut dawk hoi ka tâcawt e lah ao teh namae lah koung ao. <sup>17</sup> Ka Cathut, nama ni lungthin ouk na tanouk teh lannae teh na lunghawinae lah ao tie hah ka panue. Kai ni hete hnonaw pueng heh lungthin katang hoi lunghawicalah hoi na poe. Atu hiva na taminaw ni lunghawicalah hoi a poe e naw hai ka hmu navah, ka lunghawi awh tangnak. <sup>18</sup> Oe BAWIPA, kaimae na pa Abraham, Isak, Isarel Cathut, na taminaw ni het patet e lungthin pou a tawn thai nahanelah, a lungthin hah nama hanelah caksak haw. <sup>19</sup> Hahoi ka capa Solomon heh kâpoelawknaw, na panuesaknaenaw, hoi na phunglawknaw tarawi hane, hotnaw pueng teh sak hane hoi, ka rakueng tangcoung e im hah sak hane, yuemkamcu e lungthin poe ei telah Devit ni atipouh.

<sup>20</sup> Hahoi Devit ni kamkueng e taminaw pueng koe atuvah, BAWIPA na Cathut teh pholen awh telah ati. Hottelah tamihupui ni a mintoenaw e BAWIPA Cathut teh a pholen awh teh BAWIPA hoi siangpahrang e hmalah a lûsaling awh teh a tabut awh. <sup>21</sup> Hahoi a tangtho vah BAWIPA koe hmaisawi thuengnae sak hanelah maitotan 1000, hoi tutan 1000, tuca 1000, hoi sathei poenae hoi Isarelnaw pueng hane sathei poenae moikapap lah a poe awh.

### *Solomon a bawinae*

<sup>22</sup> Hatnah hnin vah lunghawinae kalen poung hoi BAWIPA e hmalah a canei awh. Apâhni e dawk Devit capa Solomon teh siangpahrang lah ao sak awh teh, kahrawikung lah ao nahanelah BAWIPA e hmalah satui a awi awh. Hahoi vaihma lah kaawm hane Zadok hah satui a awi awh. <sup>23</sup> Hottelah Solomon teh BAWIPA e bawitungkung dawk a na pa Devit e a yueng siangpahrang lah a tahung. A lamcawn teh, Isarelnaw pueng ni



a lawk teh a ngâi pouh awh. <sup>24</sup> Kahrawikungnaw pueng hoi athakaawme taminaw pueng hoi, siangpahrang Devit e capa alouknaw pueng hah siangpahrang Solomon koe a kâpoe awh. <sup>25</sup> Hottelah BAWIPA ni Solomon teh Isarelnaw pueng e mithmu dawk a kamsawng sak. Isarel ram dawk ahni hoehnahlan siangpahrangnaw thung dawk apinihai a coe boihoeh e taluenae hah a coe sak.

*Devit e a lairui*

<sup>26</sup> Jesi capa Devit ni Isarelnaw pueng a uk. <sup>27</sup> Isarelnaw a uk nathung teh kum 40 touh a pha. Hebron vah kum 7 a uk teh Jerusalem vah kum 33 touh a uk. <sup>28</sup> A kum kacuepoung lah matawng totouh a hring teh a hring nathung a tawnta e hoi pholennae, oupnae hoi a due. A capa Solomon ni amae yueng lah a uk. <sup>29</sup> Khenhaw! siangpahrang Devit kong teh, kamtawngnae koehoi a pout totouh kahmawtkung Samuel cauk dawk profet Nathan e cauk dawk, kahmawtkung Gad e cauk naw dawk hai a thut awh na a. <sup>30</sup> A uknaeram pueng hoi, a bawilennae naw pueng hoi, ama hai Isarelnaw, ramnaw pueng a uknae dawkvah, ka tho e hno pueng teh ka kuepcalah thut e lah ao.



## 2 SETOUKNAE (The Second Book of the Chronicles)

### *Solomon ni lungangnae a hei*

<sup>1</sup> BAWIPA Cathut ni Devit capa Solomon a okhai dawkvah, ahnie a uknaeram teh hoehoe a cak teh, puenghoi a tawmtakhang. <sup>2</sup> Solomon ni Isarelnaw abuemlah ransa 1000 touh kaukkungnaw, 100 touh kaukkungnaw, lawkcengkungnaw, Isarel ram kahrawikungnaw hoi imthung kahrawikungnaw abuemlah koe lawk a dei pouh. <sup>3</sup> Hahoi, BAWIPA e san Mosi ni a sak e rangpuinaw kamkhuengnae, Cathut e lukkareiim teh, Gibeon kho hmuen rasang koe ao dawkvah rangpuinaw abuemlah hoi Solomon hoi cungalaha a cei awh. <sup>4</sup> Cathut e lawkkam thingkong teh Devit ni a rakueng tangcoung e hmuen, Jerusalem kho, a sak tangcoung e lukkareiim dawkw, Kiriath-Jearim kho hoi a thokhai awh. <sup>5</sup> Hatei, Hur capa lah kaawm e Uri capa Bezalel ni a sak e rahum, thuengnae khoungroe hah BAWIPA e lukkareiim hmalah a hruek awh dawkvah, Solomon hoi taminaw teh hote thuengnae khoungroe koe a cei awh. <sup>6</sup> Hottelah kamkhuengnae lukkareiim hmalah, BAWIPA hmalah kaawm e rahum thuengnae khoungroe koe Solomon a cei teh, hmaisawi thuengnae sathei 1000 touh hoi thuengnae a sak. <sup>7</sup> Hote karum vah, Solomon koe Cathut a kamnue teh, Bangmaw na poe han het haw, atipouh.

<sup>8</sup> Solomon ni Cathut koe vah, apa Devit koe pahrennae moikapap na sak teh a yueng lah siangpahrang e hmuen koe na hruek toe. <sup>9</sup> Hatdawkvah, oe BAWIPA Cathut, vaiphu patetlah e taminaw e siangpahrang hmuen koe na hruek toung dawkvah, apa Devit koe lawk na kam e kuep sak loe. <sup>10</sup> Hete taminaw hmalah ka tâco kâen thai nahanelah, lungangnae hoi panuethainae na poe haw. Hettelah kapap e taminaw hah apinimaw a uk thai han, telah atipouh.

<sup>11</sup> Cathut ni Solomon koe vah, hottelah pouknae na tawn teh, hnpai tawntanae, barinae hoi tarannaw e hringnae, na het laipalah nang koe siangpahrang na coungsaknae dawkw ka taminaw na uk thai nahanelah lungangnae hoi panuethainae na hei dawkvah, <sup>12</sup> Lungangnae hoi panuethainae teh na poe toe. Hothloilah, hma lae kaawm e siangpahrangnaw hoi hmalah bout kaawm hane siangpahrangnaw ni, a tawn boihoe e hnpai tawntanae hoi barinae na poe sin han telah atipouh.

<sup>13</sup> Hatdawkvah, Solomon teh hmuen karasang koe e lukkareiim a onae Gibeon kho hoi Jerusalem lah a ban teh Isarelnaw a uk.

### *Solomon e rangleng hoi marang*

<sup>14</sup> Solomon ni rangleng hoi marangransanaw a pâkhueng parai teh, rangleng 400 hoi marang kâcuie tami 12,000 touh a tawn. Hotnaw teh rangleng tanae kho dawkw thoseh, Jerusalem siangpahrang onae koe thoseh, hawvah a ta awh. <sup>15</sup> Siangpahrang teh Jerusalem kho vah, sui, ngun hah talung patetlah sidar thingnaw hah ayawn dawkw kapâw e thailahei kungnaw patetlah thoseh apapsak. <sup>16</sup> Solomon ni a tawn e marangnaw teh, Izip ram lahoi a thokhaenaw doeh. Siangpahrang e hno kayawtnaw ni aphu kâki lah Kue kho e ouk a ran awh. <sup>17</sup> Izip ram rangleng buet touh ngun shekel 600, marang buet touh ngun shekel 150 touh hoi



ouk a yo awh. Hit siangpahrang hoi Siria siangpahrangnaw pueng koehai  
ouk a yo pouh awh.

## 2

### *Solomon Bawkim sak han a kâcai*

<sup>1</sup> Hahoi Solomon ni BAWIPA min hanelah Bawkim buet touh hoi ama siangpahrang hanelah buet touh sak hanelah a kâcai. <sup>2</sup> Solomon ni hno ka phawt hane tami 70, 000 touh, thing ka bouk hane 80, 000 touh hoi ka taroun hanelah tami 3, 600 touh a rawi. <sup>3</sup> Solomon ni Taire siangpahrang Huram koevah, apa Devit hanelah hno na sak pouh teh, ao nahane im sak pouh hanelah sidar thing na poe e patetlah na poe van haw. <sup>4</sup> Khenhaw! BAWIPA Cathut hanelah Bawkim buet touh sak hane ka kâcai. Hmuitui sawi vaiteh BAWIPA bawk nahane hmuén, Isarelnaw ni pou sak hane kâpoelawk, vaiyei ta nahane thuengnae, sabbath hoi, thapa rei nah hnin, BAWIPA Cathut min lahoi pawí hnin amom tangmin hmaisawi thuengnae pou sak hane, naw doeh. Hathateh Isarelnaw hanelah yungyoe e phunglam doeh. <sup>5</sup> Ka sak hane Bawkim teh kalenpounge lah ao han. Bangkongtetpawiteh, Cathut teh cathutnaw pueng hlak a lenpoung daw. <sup>6</sup> Kakaw pounge kalvan patenghai khout hoeh e Cathut teh apinimaw Bawkim a sak pouh thai han. Kai patetnaw ni hmuitui sawi nahane im hoeh laipateh, bangtelamaw im ka sak pouh thai han vaw. <sup>7</sup> Hatdawkvah, apa Devit ni a hmoun tangcoung e, Judah ram thung e hoi Jerusalem kho daw e sui, ngun, rahum, sum, hahoi opaou, âthi, kamthim hni, hete hnoung daw thouthainae hoi, kakuép e tami buet touh kai koe kaawm e hoi kâ kabawm hanelah patoun haw loe.

<sup>8</sup> Lebanon e sidar thing hmaica thing hoi Algun thingnaw na patawn haw. Bangkongtetpawiteh, na taminaw teh lebanon thing tâtueng a thoum poung tie ka panue. <sup>9</sup> Thing moikapap rakueng hanelah ka sannaw teh nange na sannaw koe kambaw van naseh. Bangkongtetpawiteh, sak han ka noe e Bawkim teh kalen pounge hoi kângairu hane kawilah ao. <sup>10</sup> Thing ka bouk e na sannaw hanelah, satun kor 20, 000, misur bath 20, 000 hoi satui bath 20, 00 ka poe a han telah lawk na thui.

<sup>11</sup> Taire siangpahrang Huram ni, BAWIPA ni a taminaw lungpataw dawkvah ahnimae siangpahrang lah na coung sak e doeh telah Solomon koe ca lahoi bout a patawn. <sup>12</sup> Huram ni, Isarelnaw e BAWIPA Cathut, talai hoi kalvan kasakkung BAWIPA hanelah Bawkim hoi siangpahrang im sak hanelah lungangnae hoi panuethainae a capa siangpahrang Devit koe kapoekung teh yawhawinae awmseh.

<sup>13</sup> Hatdawkvah thouthainae hoi ka kuep e Huram heh ka patoun. <sup>14</sup> A manu teh dan miphun, A na pa teh Taire miphun lah ao. Huram teh sui, ngun, rahum, sum, talung hoi thing hetnaw hoi aphunphun ka sak thai e tami lah ao. Âthi hni, opaou hni kamthim hni hoi lukkarei naw hai koung a kawng thai, Hatdawkvah BAWIPA na pa Devit e thaw katawknaw hoi cungtalah rei tawk naseh. <sup>15</sup> Ka BAWIPA ni a dei tangcoung e patetlah satun, barli, satui hoi misur naw hah ka sannaw koe patawn awh lawih. <sup>16</sup> Hottelah, kaimouh ni Lebanon mon daw e thingnaw, na ngai yit touh ka tâtueng vaiteh tui daw hoi Joppa totouh na phu han telah atipouh.

<sup>17</sup> Solomon ni Isarel ram daw e a na pa Devit ni a touk tangcoung e miphun alouke tami bout a touk navah 153, 600 touh a pha. <sup>18</sup> Hahoi hno ka phawt hanelah tami 70, 000 hoi, mon daw e thing ka tâtueng hane



80, 000, hoi thaw katawknew khenyawnkung lah, 3,600 touh, touh lah a hmoun.

### 3

#### *Solomon ni lungangnae a hei*

<sup>1</sup> Solomon ni BAWIPA e im teh Jerusalem kho a na pa Devit koe BAWIPA ni a kamnuenae, Moriah mon dawk sak a kamtawng. Hote hmuen teh Jebusit tami Ornan e cangkatinnae hmuen, Devit ni sut a rakueng pouh e hmuen dawk a sak. <sup>2</sup> A bawinae kum 4, thapa ayung pahni, apâhni hnin vah sak a kamtawng. <sup>3</sup> Hahoi Solomon ni Cathut im sak a kamtawngnae teh, asaw dong 60, akaw dong 20 touh a pha. <sup>4</sup> Hmuen Kathoung a hmalah, im alawilae khom hoi akaw a kâvan teh asaw dong 20, a rasang dong 120 touh a pha. Athung lae teh kathoung suiteuici hoi a hluk. <sup>5</sup> Kalenhnawn lae imrakhan teh hmaica hoi a tapang teh suikathoung hoi a hluk hnukkhu, samtuenaw, sumbawtaruinaw hoi a sak. <sup>6</sup> Im a meihawi nahanelah, talung aphu kaawm poung e a bet teh sui hai Parvaim ram e sui hoi a hluk. <sup>7</sup> Im dawk e pangkheknaw khom, tapang, takhangnaw teh sui hoi a hluk. Tapang dawk cherubim mei a thuk.

<sup>8</sup> Hahoi, hmuen kathoung poung a sak teh, im ayung hoi adangka reikâvan lah asaw dong 20, akaw dong 20 touh hoi a sak teh suiteuici talen 600 touh hoi a hluk. <sup>9</sup> A hetnae sum teh sui shekel 50 touh a pha. Imvan e naw hai sui hoi a hluk. <sup>10</sup> Hmuen kathoung poung dawk cherubim mei kahni touh a thuk teh sui hoi a hluk. <sup>11</sup> Cherubim e a ratheinaw teh dong 20 touh asaw. Cherubim e avanglae rathei dong 5 touh a pha teh cherubim kahni touh hoi a rathei hmo rekkâbet roi teh rathei avangvanglae ni tapang rek a kâbet. <sup>12</sup> Cherubim buet touh e a rathei teh dong 5 touh a pha teh, tapang dawk rek a kâpha, a rathei avanglae buet touh hai dong 5 touh a pha teh, cherubim buet touh e rathei rek a kâbet. <sup>13</sup> Cherubim roi teh imthungkhu lah a kangvawi laihoi a kangdue. A rathei a kadai e dong 20 touh akaw. <sup>14</sup> Hni opaou, âthi hni, kamthim hni loukloukkaang hoi a kawng tangcoung e cherubim mei hoi sak e lukkarei pangaw e hai a sak.

<sup>15</sup> Khom dong 35 touh kasawe kahni touh imhmalah a ung teh, khom dawngmo dawk luhuem, dong 5 touh kasawe a kâ muk sak. <sup>16</sup> Lahuen dawk awi e patetlah sumbawtaruinaw a sak teh, khom dawngmo dawk a hruek. Talepaw 100 touh a sak teh hote sumbawtarui dawk a pâthit. <sup>17</sup> Bawkim e hmalah khom, aranglah buet touh, avoilah buet touh a ung teh, aranglae teh Jakhin telah min a phung teh, avoilaie teh Boaz telah min a phung.

### 4

#### *Bawkim pahlawngnae*

<sup>1</sup> Hahoi, rahum khoungroe, ayung dong 20, adangka dong 20, arasang dong 10 touh a sak.

<sup>2</sup> Hahoi rahum tuiim hah, a tâphai hoi a tâphai rahak dong 10, arasang dong 5 touh e hah a sak. A tâphai petkâkalup lah dong 30 touh a pha. <sup>3</sup> A tâphai rahim lah tuium ka yam e mei ni koug a ramuk teh dong touh dawk hrahra touh rahum tuiim petkâkalup lah ao. Tuiumkung mei teh 20 touh lah ao teh, rahum tuiim dawk mek hlunsin lah ao. <sup>4</sup> Hahoi, maitotan 12 touh dawk patue e lah ao. Kathum touh atunglah a kangvawi teh,



kathum touh kanîloumlah a kangvawi, kathum touh akalah a kangvawi teh, kathum touh kanîtholah a kangvawi. A hnuklah laheibaw kOUNg a kâhmo sak. <sup>5</sup> Tuiim teh kut sum touh hane a tha, a tâphai teh manang tâphai patetlah ao teh, lili pei hoi pahlawng e lah ao teh, bath tuium 3,000 touh a cawng.

<sup>6</sup> Pâsu nahanelah kawlung 10 touh a sak teh, avoilah panga touh, aranglah panga touh a ta. Hotnaw teh hmaisawi thuengnae poe hane pâsu nahanelah ao teh, rahum tuiim teh vaihmanaw kamhluk nahanelah doeh. <sup>7</sup> Sui hmaikhoknaw hra touh hai ahmaloe e patetlah a sak teh, Bawkim thung avoilah panga touh, aranglah panga touh a hruek. <sup>8</sup> Caboi hra touh a sak teh, Bawkim thung avoilah panga touh, aranglah panga touh a hruek. Hahoi suikawlung 100 touh hai a sak.

<sup>9</sup> Hothloilah, vaihmanaw hanelah thongma hoi, alawilah thongma kakawpOUNg hah a sak teh, thopui hai a sak teh, tho teh rahum hoi a betsin.

<sup>10</sup> Tuiim teh im e aranglah, kanîtholah, akalah kangvawi lah a hruek.

<sup>11</sup> Huram ni hlaam hoi hraba kawwnae hoi kawlung hah a sak. Hottelah Cathut im hanelah siangpahrang Solomon ni a sak pouh e thaw teh, Huram ni a cum pouh. <sup>12</sup> Hlaam patetlah ka co e khom kahni touh e a som vah, ailo patetlah ka co e kahni touh hoi khom e som dawk e ailo patetlah ka co ni teh ka kâkayo e dawk tarikcik e kahni touh hoi, <sup>13</sup> Hote kâkayONae tarikcik kahni touh hanelah talepaw cumpali touh hoi, khom kahni touh e som dawk ailo patetlah ka co e kayo nahane tarikcik reira lah talepaw a rui kahni touh reira hoi a sak. <sup>14</sup> KhOUNgroE hoi khOUNgroE dawk pâhung e kawlung hai a sak. <sup>15</sup> Tuiim buet touh hoi a rahim vah maitotan 12 touh hoi hlaamnaw, hrabanaw kawwnae hoi, cingconaw, hoi hlaumhlaamnaw pueng hai a sak. <sup>16</sup> Solomon siangpahrang hanelah Huram ni a sak e BAWIPA e im dawk e puengcangnaw pueng teh loukloukkaang e rahum hoi kOUNg sak e lah ao. <sup>17</sup> Hotnaw teh, Jordan tanghling Sukkoth kho hoi Zeredah kho rahak tangpung talai hmuen koe siangpahrang ni a sak. <sup>18</sup> Hot patetlah, Solomon ni hnopai moikapap a sak teh, rahum teh boeba khING thai lah awm hoeh.

<sup>19</sup> Solomon ni Cathut im vah hnopai kaawm e pueng a sak. suikhOUNgroE, vaiyei tanae caboi, <sup>20</sup> A hmuen kathOUNge koe paang hane hmaiimkhoknaw, hote hmaiim teh suituici hoi doeh a sak. <sup>21</sup> A pei hoi hmaiimnaw, paiteinaw hai suituici hoi a sak. <sup>22</sup> Paitei, tongben, pacen, hraba hlaamnaw pueng suituici hoi doeh sak e lah ao. Imthung kathOUNgpOUNge hmuen athung lae tho hoi Bawkim alawilah e thonaw hai sui hoi doeh a sak.

## 5

<sup>1</sup> Hottelah Solomon ni BAWIPA e im a sak e teh kOUNg a cum, Solomon koe a na pa Devit ni a poe e sui, ngun hoi hnopai pueng teh Cathut e hnoim dawk a thokhai teh a hruek.

### *Bawkim thung lawkkam thingkong a kâenkhai*

<sup>2</sup> Hahoi, Solomon ni Isarel kacuenaw, miphun kahrawikUNgaw, Isarel imthung kahrawikUNgaw abuemlah, Devit khopui Zion hoi BAWIPA e lawkkam thingkong hah kâkayawt hanelah, Jerusalem khovah a kamkhueng awh. <sup>3</sup> Isarelnaw abuemlah thapa ayung sarinae pawI dawk siangpahrang koevah a tho awh.



<sup>4</sup> Isarel kacuenaw abuemlah hoi a tho awh teh Levihnew ni lawkkam thingkong a kâkayawt awh. <sup>5</sup> BAWIPA e thingkong, tamimaya kamkhuengnae lukkareiim, lukkareiim thung e kathounge hnopai pueng teh vaihma Levihnew ni a kâkayawt awh. <sup>6</sup> Siangpahrang Solomon hoi kamkhueng e Isarelnaw abuemlah, ahnimouh koe kamkhuengnew hoi thingkong hmalah kaawmnaw ni tu hoi maitotan touklek thai hoeh e hoi thuengnae a sak awh. <sup>7</sup> Vaihmanaw ni BAWIPA e lawkkam thingkong hah imthung bawknae hmuen, Hmuen Kathoung poung koe, cherubim rathei roi e rahim amae hmuen koe a ta awh. <sup>8</sup> Cherubim roi e ratheinaw teh thingkong e lathueng lah a kadai teh thingkong hoi hrawmnae acung koug a ramuk. <sup>9</sup> Hrawmnae acung teh a saw poung dawkvah, bawknae hmuen, Hmuen Kathoung poung koehoi hmu thai lah ao. Hatei alawilah hoi kâhmawt hoeh. Atu totouh hote hmuen koe ao rah. <sup>10</sup> Izip ram hoi a tâco awh navah BAWIPA ni Isarel taminaw koe lawkkamnae a sak navah Mosi ni Horeb mon daw koe lungphen kahni touh a hruek e hloilah hote thingkong daw alouke hno awm hoeh.

<sup>11</sup> Hmuen Kathoung koehoi vaihma a tâco navah vaihmanaw pueng abuemlah hoi koug a kâthoung awh. <sup>12</sup> La ka sak e Levih miphun abuemlah hoi, Asaph, Heman hoi Jeduthun e capanaw, a hmaunawnganaw hoi lukkarei pangawpekye ke kamthoupnaw, cecak, vovit hoi ratoung khuehoi kanîtholah thuengnae khougroe koe a kangdue awh teh, ahnimouh koe vaihma mongka ka ueng e 120 touh ao. <sup>13</sup> Mongka kauengnew hoi la kasakkungnew ni BAWIPA pholennae hoi lunghawilawk deinae lahoi a kueng awh navah, lawk buet touh lah a tâco thai nahanlah mongka cecak hoi tumkhawng e lawk alouklouk lah a tâco teh, BAWIPA teh ahawi a lungpatawnae teh yungyoe akangning, telah a pholen awh navah, BAWIPA im daw koe tami king akawi.

<sup>14</sup> Hottelah tâmai kecu dawkvah vaihmanaw teh amamae thaw patenghai taw koe thai awh hoeh. Bangkongtetpawiteh, BAWIPA e bawilennae ni im daw koe akawi.

## 6

<sup>1</sup> Hottelah Solomon ni, BAWIPA ni, puenghoi kingkahmawt e hmonae daw koe ka o han telah BAWIPA ni ati. <sup>2</sup> Hatei, kai ni ama o nahane im hoi ayungyoe na o nahane hmuen teh ka sak toe atipouh.

### *Thaw cumnae daw koe Solomon lawk deinae*

<sup>3</sup> Hahoi Isarelnaw abuemlah a kangdue lahun nah, siangpahrang teh hnukhma lah a kangvawi teh, kangdout e Isarelnaw yawhawinae a poe. <sup>4</sup> Hahoi, Isarel BAWIPA Cathut teh yawhawinae awmseh, A pahni hoi apa Devit koe a dei e lawkkam teh, a kut hoi a kuep sak. <sup>5</sup> Izip ram hoi ka tami Isarelnaw ka tâcokhai hnin hoi, Isarel miphunnaw thung daw koe kho daw koe hoiyah, ka min o nahane im sak hanelah, ka rawi boihoe, ka tami Isarelnaw ka uk hane hai ka rawi boihoe. <sup>6</sup> Hatei, ka min o nahanelah, Jerusalem kho ka rawi teh, ka tami Isarelnaw uk hanelah Devit ka rawi e doeh telah ati. <sup>7</sup> Apa Devit e lungthung Isarel BAWIPA Cathut min hanelah im sak hane yo a pouk toe. <sup>8</sup> Hatei, ka min o nahanelah apa Devit koe, ka min hanelah im sak hane na lungthung na pouk. Hottelah na pouk e ahawi poung. <sup>9</sup> Hatei, im teh nang ni na sak mahoe, na capa na thung hoi ka tâcawt hane ni ka min hanelah im teh a sak han telah yo a dei pouh toe.



<sup>10</sup> BAWIPA ni a dei e lawk teh, a kuep sak tounge dawkvah, apa Devit e yueng lah ka kangdue. Hahoi BAWIPA ni lawk a kam tangcoung e patetlah Isarel bawitungkhung dawk ka tahung teh Isarel BAWIPA Cathut min hanelah Bawkim ka sak awh.

<sup>11</sup> Hote hmuen koe Isarelnaw hoi sak e BAWIPA lawkkam thingkong teh ka hruek toe telah ati.

### *Solomon ratoumnae*

<sup>12</sup> Hahoi, BAWIPA e thuengnae khounge kung koe kamkhueng e Isarelnaw abuemlae hmaitung vah a kangdue teh kut a dâw. <sup>13</sup> Solomon ni rahum e tungkhung buet touh asaw dong panga, akaw dong panga, arasang dong thum touh e a sak teh, hote van a kangdue teh, kamkhueng e Isarelnaw abuemlae hmaitung vah khokpakhu cuengkhuem laihoi a tabo teh, kalvan lah kut a dâw. <sup>14</sup> Oe BAWIPA, Isarel Cathut, kalvan hoi talai rahak nang patet e Cathut alouke awm hoe. A lungthin abuemlahoi na lamthung ka dawn awh e na sannaw lathueng vah lawkkamnaw na caksak teh ouk na lungma. <sup>15</sup> Na san apa Devit koe na lawkkam na kuep sak teh, atu na pahni hoi na dei tangcoung e, na kut hoi na kuep sak toe. <sup>16</sup> Hatdawkvah, Isarelnaw e BAWIPA Cathut, na san apa Devit koe na catounnaw nama patetlah a hringnae dawk a kâhruetcuethai nahan, kaie kâlawk tarawi awh pawiteh, ka hmalah Isarel bawitungkhung dawk ka tahung hane tami pout mahoe telah lawk na kam e hah kuep sak haw.

<sup>17</sup> Oe Isarelnaw e BAWIPA Cathut na san Devit koe na dei e lawk kuep sak haw. <sup>18</sup> Hatei, Cathut lah kaawm e nang ni tami koe na o katang han maw. Khenhaw! hettelah kakaw e kalvan patenghai, na khout hoe, hete ka sak e Bawkim dawk na khout han na maw. <sup>19</sup> Hatei, Oe BAWIPA Cathut na san ni na kawnae hoi a ratoumnae thai pouh nateh, na san ni ratoumnae hoi kâheinae a lawkpui lah, na pouk pouh haw. <sup>20</sup> Hete hmuen koe ka min a kangning han na tie patetlah hete hmuen hoi Bawkim hah karum khodai pout laipalah khenyawn nateh, na san ni hete hmuen koehoi, <sup>21</sup> Na san hoi na tami Isarelnaw ni, hete hmuen koehoi a ratoum awh navah, a hei awh e thai pouh haw, na onae hmuen kalvan hoi hnâpakeng pouh haw, na thai toreì teh ngaithoum haw.

<sup>22</sup> Tami buet touh ni a imri koe yonnae a sak telah yon a pen teh, a yonhoehnae thoe a bo teh, lawkkamnae sak hanelah, Bawkim thuengnae khounge hmalah a thokhai navah, <sup>23</sup> kalvan hoi hnâpakeng nateh, tamikayon teh amae yonnae patetlah sung sak hane hoi, tamikalan teh amae lannae patetlah aphu hmu sak hanelah na sannaw koe lawk na ceng pouh haw. <sup>24</sup> Na tami Isarelnaw ni nang na tarannae yon kecu daw tarannaw hmalah a sung awh navah, nang koe lah bout kamlang awh teh, na min kampangkhai awh teh, hete Bawkim dawk ratoum awh pawiteh, <sup>25</sup> kalvan hoi thai pouh nateh, na tami Isarelnaw e a yonnae ngaithoum pouh haw. Ahnimouh hoi mintoenaw koe na poe e ram daw, bout cetkhai haw. <sup>26</sup> Nang na taran awh teh, yonnae a sak awh kecu daw kalvan na khan pouh teh khorak laipalah na rek kecu dawkvah, amamae yonnae a ceitakhai awh teh, hete hmuen koehoi a ratoum awh teh na min kampangkhai awh pawiteh, <sup>27</sup> kalvan hoi thai pouh haw. A cei awh nahane lamthung hmawt sak nateh, na san hoi na tami Isarelnaw e yonnae ngaithoum pouh haw, na taminaw râw lah na poe e ram daw khorak sak haw. <sup>28</sup> Ram daw takang a tho teh, Lacik thoseh, ramkenae thoseh, rawkphainae thoseh, samtong thoseh, ahriainaw thoseh, ao teh, tarannaw ni kho a tuk awh teh, pali patawnae hoehpawiteh, patawnae aphunphun



a tho navah, <sup>29</sup> patawnae hoi lungreithainae ka panuek e taminaw ni hete Bawkim dawk a kut a dâw awh teh, amadueng thoseh, tamimaya thoseh a ratoum awh navah, <sup>30</sup> Na onae kalvan hoi thai pouh nateh ngaithoum haw. Taminaw e lungthin hoi pouknae pueng teh, nang ni kOUNg na panue. Amamae tawksaknae patetlah lawkceng nateh, <sup>31</sup> mintoenaw koe na poe e ram dawk hringyung thung na lamthung a dawn awh vaiteh nang na taki nahane doeh. <sup>32</sup> Hahoi alouke miphunnaw ni, ka lentoe poung e na min hoi thaonae kut na dâw kecu dawk ram hlanae koehoi a tho teh, hete Bawkim dawk hoi a ratoum awh navah, <sup>33</sup> Na onae kalvan hoi thai pouh haw. Jentelnaw ni na kaw e patetlah ahnimouh koe sak pouh haw. Hottelah na tami Isarelnaw patetlah talai van e miphun pueng ni na min a panue awh vaiteh, na taki awh han. Hete Bawkim kasaknaw ni na min a panue awh han. <sup>34</sup> Na taminaw tarantuk hanelah kâ na poe teh, a cei awh navah, hete na rawi e khopui, nang hanelah ka sak e Bawkim koe lah, kangvawi laihoi ratoum awh pawiteh, <sup>35</sup> ahnimaе ratoumnae hoi a heinae teh, nang ni kalvan hoi thai pouh nateh, sak pouh haw. <sup>36</sup> Ka yon hoehe e tami buet touh hai ao hoehe e patetlah nang koe yonnae a sak awh teh ahnimouh koe na lungkhuek teh, tarannaw kut dawk na poe teh, ram ahlanae koe thoseh, a hnainae koe thoseh san lah a hrawi awh navah, <sup>37</sup> hote ram dawk thongim a bo awh teh, ahnimanaw ni bout a kâhlaw awh teh, kaimanaw ka yon awh toe. Kahawi hoehe e hno, kakhin e hno ka sakpayon awh toe telah lungthin kâthung laihoi a kâhei awh teh, <sup>38</sup> A hrawinae tarannaw e ram dawk ao navah, lungthin abuemlahoi nang koe bout kamlang awh teh, mintoenaw na poe e ram hoi na rawi e khopui, na min hanelah ka sak e Bawkim koelah kangvawi laihoi ratoum awh pawiteh, <sup>39</sup> ahnimaе ratoumnae lawk na onae kalvan hoi thai pouh nateh, pouk pouh haw. Nang koe yonnae ka sak e na taminaw e yon hah ngaithoum haw. <sup>40</sup> Oe Cathut na mit padai nateh, na khenhaw. Hete hmuen koehoi ratoumnae lawk na thai pouh haw. <sup>41</sup> Hatdawkvah, Oe BAWIPA Cathut, atu thaw nateh, na thaonae lawkkam thingkong hoi na onae hmuen koe cet leih. Oe BAWIPA Cathut na vaihmanaw rungngangnae puengcang hoi pathoup nateh, na tamikathounghaw na hawinae dawk konawm sak haw. <sup>42</sup> Oe BAWIPA Cathut, satui na awi e tami hnamthun takhai hanh. Na san Devit ni coe e pahrenlungmanae hah pahnim hanh, telah a ratoum.

## 7

### *Solomon ni Bawkim a hnawng*

<sup>1</sup> Hottelah Solomon ni ratoumnae a pâpout hnukkhu, kalvan hoi hmai a bo teh, hmaisawi thuengnae hoi satheinaw hmai kOUNg a kak teh, BAWIPA e bawilennaе teh bawkim dawk akawi. <sup>2</sup> BAWIPA e bawilennaе hoi BAWIPA e im teh akawi dawkvah, BAWIPA e im dawk vaihmanaw kâen thai hoehe. <sup>3</sup> Isarelnaw ni kalvan hoi hmai a bo e hoi BAWIPA e bawilennaе hah a hmu awh navah, lungphenphai e dawk minhmai kâbet lah a tabo awh teh, ahni teh ahawi, a pahrennae teh yungyoe a kangning telah a bawk awh teh, lunghawilawk a dei awh.

<sup>4</sup> Hottelah Solomon siangpahrang hoi taminaw pueng ni, BAWIPA hmalah thuengnae a sak awh. <sup>5</sup> Solomon siangpahrang ni maitotan 22000, tu 120000 hoi thuengnae a sak. Hottelah siangpahrang hoi taminaw pueng ni thuengnae a sak awh. <sup>6</sup> Vaihmanaw ni amamae hmuen koe a kangdue awh teh, Levihnaw teh, BAWIPA e pahrennae a yungyoe a kangning dawkvah BAWIPA pholen nahanelah Devit ni ouk a hno e tumkxawngnaw



a khawng awh teh, Devit e sam la a sak awh. Vaihmanaw ni mongka a ueng awh teh, Isarelnaw abuemlah a kangdue awh. <sup>7</sup> Solomon ni BAWIPA e imhmalah e rapan thungup e hmuen a thoung sak, bangkongtetsapawiteh rahum thuengnae khoungröe a thoung sak teh hmaisawi thuengnae, tavai thuengnae, athawnaw thueng nahanelah ek a thoungca dawkvah, hmaisawi thuengnae hoi roum thuengnae satheinaw hah hote hmuen koehoi thuengnae a sak.

<sup>8</sup> Hatnavah Solomon ni ama koe kaawm e Isarelnaw pueng hoi, Hamath kho kâennaeh koehoi Izip ram palang totouh, avoivang lahoi ka tho e taminaw abuemlah hoi hnin sari touh paw i sak awh. <sup>9</sup> Ataroo hni daw kalen poung kamkuengnae a tawn awh. Hnin sari touh thung thuengnae khoungröe hnawngnae lah a hno awh teh, hahoi hnin sari touh paw i bout a sak awh.

<sup>10</sup> Thapa ayung sarinae hnin 23 navah taminaw pueng a ban sak. BAWIPA ni Devit Solomon hoi a tami Isarelnaw lathueng vah hawinae a kamnue sak dawkvah, lunghawicalah hoi taminaw pueng im lah a ban awh.

### *Solomon koe Cathut apâhni a kamnue*

<sup>11</sup> Hottelah Solomon ni BAWIPA e im hoi siangpahrang im teh koug a cum. Solomon ni a lungthung hoi a noe e patetlah BAWIPA im hoi a ma im ka kuepcalah koug a cum. <sup>12</sup> Hahoi karum vah Solomon koe BAWIPA a kamnue teh, na ratoum e naw ka thai toe. Hete hmuen teh thuengnae khoungröe hmuen lah kama hanelah ka rawi toe. <sup>13</sup> Kho rak laipalah kai ni takang ka tho sak nakunghai, samtongnaw ni law daw k e a pawnaw ca hanelah kâ ka poe nakunghai, ka taminaw koe lacik ka tho nakunghai, <sup>14</sup> ka min lahoi ka kaw e taminaw ni, a kâ rahnoum awh teh, ka minhmai tawng laihoi a ratoum awh teh, thoenae lamthung roun awh pawiteh, kai ni kalvan hoi ka thai pouh vaiteh, ahnimae yonnae ka ngaithoum vaiteh, a ram ka dam sak han. <sup>15</sup> Hete hmuen koehoi a ratoum awh navah, ka mit ka padai vaiteh, ka hnâ ka pakeng han. <sup>16</sup> Bangkongtetsapawiteh, hote hmuen koe ka min a yungyoe o thai nahanelah, hete im kâ rawi teh ka thoung sak toe. Hote hmuen koe ka mit hoi ka lungthin teh pou ao han.

<sup>17</sup> Hahoi na pa Devit koe kâ ka poe e patetlah nang hai kâ na poe e hah na tarawi teh, ka phunglam hoi ka lawkcengnae na hringkhai pawiteh, <sup>18</sup> Na uknaeram daw k ukkung pout mahoe hoi na pa Devit koe law k kam tangcoung e patetlah na bawinae bawitungkhung pou ka caksak han.

<sup>19</sup> Hatei na hmalah ka hruek e kâpoelawknaw hoi phunglawknaw hah na pahnawt awh teh, alouke cathut thaw hah na taw k awh boilah na baw k awh pawiteh, <sup>20</sup> na poe e ram thung hoi na takhoe awh vaiteh, ka min hanelah ka thounsak tangcoung e hete im hai ka hmaitung hoi ka takhoe han. Miphun tangkuem koe thoebonae hoi pacekpahleknaw lah na o sak awh han. <sup>21</sup> Hete ka rasang e im heh, atengpam ka cet e taminaw pueng ni kângai a ru awh vaiteh, bangkongmaw hete ram hoi im heh BAWIPA ni hettelah a sak vaw telah ati awh navah,

<sup>22</sup> BAWIPA, a na mintoenaw e Cathut, Izip ram hoi ka tâcawtkhai e, hnamthun takhai awh teh, cathut alouke thaw a taw k awh teh, a baw k awh dawkvah hettelah e rawkphainae pueng heh ahnimae lathueng a pha sak e doeh telah ati awh han telah a ti.



<sup>1</sup> Solomon ni BAWIPA im hoi amae im a sak teh, kum 20 touh akuep navah, <sup>2</sup> Huram ni Solomon a poe e ramnaw hah Solomon ni bout a pathoup teh Isarelnaw ao sak. <sup>3</sup> Hahoi Solomon ni Hamathzobah lah a cei teh hote kho hai a la. <sup>4</sup> Kahrawngum vah Tadmor kho hoi Hamath kho e hno pátungnae kho a thawng awh. <sup>5</sup> Beththoron atunglah kaawm e hoi akalalah kaawm e hai kalupnae rapannaw, longkhanaw hoi tarennae hai a sak awh. <sup>6</sup> Baalath kho hnopai pátungnae kho abuemlahoi rangleng tanae kho, marang kâcuinaw a onae kho, Jerusalem kho, Lebanon kho, hoi a uknaeram thung daw k a ngai e patetlah kho a thawng.

<sup>7</sup> Isarel taminaw lah kaawm hoeh e Hit taminaw, Amor taminaw, Periznaw, Hiv taminaw, Jebusit taminaw, <sup>8</sup> Isarelnaw ni a raphoe hoeh e hote ram daw k kaawmnaw hah Solomon ni thaw ka taw k hane sannaw hoi hnephnap e taminaw lah atu totouh ao sak. <sup>9</sup> Isarelnaw teh Solomon ni san patetlah thaw taw k sak e buet touh hai awm hoeh. Ahnimanaw teh, tarankatuknaw lah, ransa kaukungnaw lah, kahrawikungnaw lah, rangleng hoi marang kâcuie kaukungnaw lah ao sak. <sup>10</sup> Hote taminaw teh taminaw kahrawikung hoi Solomon kabawmkung lah ao awh teh, tami 250 touh a pha.

<sup>11</sup> Solomon ni Faro canu hah Devit khopui hoi a kaw teh, ama hane im a sak pouh e daw k a hrawi. Bangkongtetpawiteh, BAWIPA lawkkam thingkong a phanae hmuen teh a thoung dawkvah, ka yu teh Isarel siangpahrang Devit e im daw k ao kawi nahoe telah ati.

<sup>12</sup> Solomon ni imhmalah a sak e BAWIPA e thuengnae khoungroe daw k Mosi e kâpoelaw k patetlah hnintangkuem hmaisawi thuengnae BAWIPA koe a sak. <sup>13</sup> Hothloilah sabbath hnin hoi thapa rei hnin hoi kum touh daw k vai thum touh tonphuenhoehe vaiyei paw i hoi yat tangkuem sak e paw i, kum katha paw i hninnaw daw k thuengnae ouk a sak. <sup>14</sup> A na pa Devit ni a uknae patetlah vaihmanaw ni atueng khoe e patetlah vaihma thaw thoseh, Levihnaw ni hnintangkuem baw k a ngai e patetlah vaihmanaw hoi cungtalah pholennae la a sak awh teh amamae thaw daw k thoseh, longkha karingkungnaw ni atueng khoe e daw k thoseh, amamae thaw lengkaleng taw k hanelah a hmoun awh. Hottelah Cathut e tami Devit ni law k a thui. <sup>15</sup> Siangpahrang ni vaihmanaw hoi Levihnaw kâ a poe e patetlah bang patet e hno daw k thoseh, hnopai koe lahoi thoseh, oupvout e awm hoeh. <sup>16</sup> BAWIPA e im sak a kamtawngnae koehoi a cum totouh Solomon ni a noe e patetlah BAWIPA e im teh a cum.

<sup>17</sup> Solomon teh Edom ram tuipui teng kaawm e Eziongeber hoi Eloth kho lah a cei. <sup>18</sup> Huram ni tuipui e a konglam ka panuek e amae sannaw hoi Solomon e a sannaw teh lawng kathoengcae hoi Ophir ram lah a cei teh, hote hmuen koe e sui talen 450 touh a phu awh teh, Solomon siangpahrang koe a thokhai awh.

## 9

### *Sheba siangpahrang ni Solomon a oup*

<sup>1</sup> Sheba ram ka uk e siangpahrangnu ni Solomon e kamthang a thai navah, law k paceinae ka ru poung e naw hoi tanouk hanelah Solomon koe Jerusalem vah a tho. Tami moikapap a kâbang awh teh, hmuituinaw, talung apu kaawmpoungnaw hoi sui moikapap a phaw t e kalauknaw hoi a tho. Solomon koe a pha awh navah, a lungthung ka'awm e pueng koug a rasa teh, law k a pacei. <sup>2</sup> Law k a pacei e naw pueng Solomon ni koug a dei pouh. Solomon ni siangpahrangnu koe a dei pouh thai hoeh



e banghai awm hoeh. <sup>3</sup> Sheba siangpahrangnu ni Solomon e lungangnae, im a sak e, <sup>4</sup> caboi daw k e rawca, a kut rahim e bawinaw ni tahungnae, ka tho ka cet e sannaw hoi a khohnanaw, manang kapatuemnwaw hoi a khohnanaw, BAWIPA e im daw k hmaisawi thuengnae hoi a thuengnae a hmu navah, kângai a ru teh kâha yo a phout.

<sup>5</sup> Siangpahrang koevah, na lungangnae hoi na tawksak e kama ram hoi kamthang ka thai e heh a tang katang doeh. <sup>6</sup> Hatei, ka mit hoi khei ka hmu hoehnahan teh, ka yuem hoeh. Khenhaw! na lungangnae teh ka thai e apasuek ka thai e ni tangawn boehai phat hoeh. Ka thainae kamthang hlak hoe a bawilen. <sup>7</sup> Na taminaw a yawhaw poun awh. Na sannaw hai nang koe pou kaawm niteh, nange lungangnae lawk ka thai e naw teh, a yawhaw poun awh. <sup>8</sup> Nang daw k a lung kahawi e BAWIPA na Cathut, bawitungkhung daw k na ka tahung sak e BAWIPA na Cathut teh bawilennae awm seh. Bangkongtetpawiteh, na Cathut ni Isarelnaw teh yungyoe a caksak hanelah a pahren. Hatdawkvah, kalan lah lawkceng hanelah ahninae siangpahrang hanelah na sak awh e doeh, telah ati. <sup>9</sup> Hottelah sui talen 120, hmuítui moikapap hoi, aphu kaawm e naw hah siangpahrang a poe. Sheba siangpahrangnu ni Solomon a poe hmuítui patetlah e alouklah khoeroe awm hoeh. <sup>10</sup> Hahoi Solomon e a sannaw hoi Hiram e a sannaw, Ophir kho hoi sui kaphawtnaw ni hai Algum thing hoi talung aphu kaawm e a phu awh. <sup>11</sup> Siangpahrang ni Algum thing hah BAWIPA im, siangpahrang im kalupnae hoi la kasaknaw hanelah ratoung hoi tamawi lah a sak. Hot patet lae thing teh Judah ram daw k ayan hoi hmawt boihoeh.

<sup>12</sup> Solomon siangpahrang Sheba siangpahrangnu ni a poe e hno touk laipalah, a lungkuap nahanelah a hei e puenghai koun a poe. Hath-nukkuh, a sannaw hoi ama ram lah a ban awh.

### *Solomon tawntanae*

<sup>13</sup> Solomon koe kum touh daw k sui kâen e talen 666 touh a pha. <sup>14</sup> Hetnaw teh hno kayawtnaw hoi kasaknaw ni a thokhai e touk laipalah, kâen e doeh. Arabia siangpahrangnaw pueng hoi ram kaukkungnaw ni Solomon koe sui hoi ngun ouk a thokhai awh.

<sup>15</sup> Solomon ni suibahling kalen e 200 touh a sak. Bahling kalen e buet touh daw k sui talen 600 touh abaw. <sup>16</sup> Hlun e suibahling kathoung e 600 touh a sak. Bahling kathoung e buet touh daw k sui shekel 300 touh abaw. Hotnaw teh Lebanon ratu thung e thing hoi sak e im daw k a hruek. <sup>17</sup> Hahoi siangpahrang ni kasaino bawitungkhung kalenpoung e a sak teh, suikathoung hoi a hluk. <sup>18</sup> Bawitungkhung daw k luennae lakhout taruk touh hoi sui hoi sak e khokpadoun hai a tawn teh, tungkhung hoi pou a kamtawp. Tungkhung avoivang lah, kut tounngnae atengvah, sendek meikaphawk kahni touh a kangdue sak. <sup>19</sup> Luennae daw k avoivang lah sendek 12 touh a kangdue. Hot patetlah, nâ e uknaeram daw k hai awm boihoeh. <sup>20</sup> Siangpahrang Solomon e manangnaw pueng teh, suituici seng doeh. Lebanon kahrawngum e thing hoi sak e im daw k e hnopai pueng hai suituici seng doeh. Solomon e se nah ngun teh banglahai noutna hoeh. <sup>21</sup> Siangpahrang e lawng teh Hiram e a sannaw hoi Tarshish kho lah ouk a cei, kum thum touh daw k vai touh a tho teh, sui, ngun, kasaino, kalainaw hoi awtawnaw ouk a thokhai awh.

<sup>22</sup> Hottelah Solomon siangpahrang ni talai van e siangpahrang pueng, tawntanae hoi lungangnae koelah koun a tapuet. <sup>23</sup> Cathut ni a lungthin thung a hruek pouh e lungangnae lawk thai hanelah talai van



e siangpahrang pueng ni Solomon a pâtam awh. <sup>24</sup> Ka tho e tami pueng ni suimanang, ngunmanang, khohna, tarantuknae senehmaica, hmuituinaw, marangnaw hoi lanaw kum tangkuem ouk a poe awh. <sup>25</sup> Solomon ni rangleng hoi marangnaw tanae hmuen 4,000 touh a tawn. Marangransanaw 12000 touh a tawn teh, ahnimanaw teh marang hrueknae hmuen hoi Jerusalem siangpahrang koevah ao sak. <sup>26</sup> Euphrates tuipui koehoi, Filistin ram hoi, Izip ram totouh siangpahrangnaw koug a uk. <sup>27</sup> Siangpahrang ni Jerusalem kho dawk ngunnaw hah talung patetlah Sidar thing hah ayawn dawk e thailahei kungnaw patetlah a pap sak. <sup>28</sup> Izip ram hoi alouke ramnaw koehoi Solomon hanelah marangnaw hah ouk a thokhai awh. <sup>29</sup> Solomon e konglam kaawm rae naw, kamtawng hoi apout totouh e pueng teh, profet Nathan ni a thut e cauk, Shiloh tami Ahijah e sutdeilawk dawk hoi Nebat capa Jeroboam e kong dawk profet Iddo kamnuenae cauknaw dawk thut lah ao nahoehmaw. <sup>30</sup> Solomon ni Jerusalem kho dawk Isarelkaw abuemlah kum 40 touh a uk. <sup>31</sup> Solomon teh mintoenaw koe a kâhat teh, a na pa Devit khopui dawk a pakawp awh. Hahoi a yueng lah a capa Rehoboam ni siangpahrang a tawk.

## 10

### *Rehoboam taranlahoi taranthawnae*

<sup>1</sup> Isarelkaw abuemlah Shekhem kholah siangpahrang rawi hanelah a cei awh. Rehoboam hai a cei vah. <sup>2</sup> Solomon siangpahrang koehoi Izip ram lah ka yawng e Nebat capa Jeroboam teh hote kamthang a thai navah Izip ram hoi bout a tho. <sup>3</sup> Tami a patoun teh ahni hah a kaw awh. Jeroboam hoi Isarelkaw abuemlah a tho awh teh, Rehoboam koevah, <sup>4</sup> Na pa ni hmuen ka ri pueng hai na phu sak awh. Hatdawkvah, na pa ni nget ka tawn lah na taw sak e hoi hnokari na phu sak e heh bet pâhaw sak haw, telah pawiteh na thaw ka tawk awh han telah atipouh awh.

<sup>5</sup> Ahni ni hnin thum touh aloum hnukkhu bout tho awh atipouh navah, taminaw ni koug a taki awh.

<sup>6</sup> Siangpahrang Rehoboam ni hete tami lawk bout a pathung hanelah bangtelamaw pouknae na poe awh han telah a na pa a hring nah ateng ouk kaawm e kacuenaw koe pouknae a hei.

<sup>7</sup> Ahnimanaw ni hete taminaw heh na pahren pawiteh lung na hawi sak pawiteh, lawkkanemcalah na dei pawiteh, na tami lah pou ka o awh han telah atipouh. <sup>8</sup> Hatei, kacuenaw ni pouknae a poe e hah dâw laipalah ateng kaawm e a hui thoundounnaw koe pouknae a hei. <sup>9</sup> Rangpuinaw ni na pa ni hnokari a patue e pâhaw sak leih ati awh dawkvah, ahnimanaw koe bout ka dei pouh hanelah, bangtelamaw pouknae na poe awh han telah a pacei navah,

<sup>10</sup> a hui thoundounnaw ni na pa ni hnokari na phu sak katetnaw koe hettelah dei pouh, kaie kutcarei teh, apa e keng hlak a tha han. <sup>11</sup> Apa ni hnokari na phu sak awh toe. Kai ni het hlak hoe ka ri e na phu sak awh han rah. Apa ni nangmanaw ruitaboug hoi na hem awh. Kai niteh, aikam hoi na hem awh han telah tet pouh loe, atipouh awh.

<sup>12</sup> Siangpahrang ni apâthum hnin bout tho awh atipouh e patetlah apâthum hnin dawk Jeroboam hoi taminaw pueng teh Rehoboam koe a tho awh. <sup>13</sup> Hatnavah Rehoboam siangpahrang ni kacuenaw ni a poe e pouknae a hnoun teh, a hui thoundounnaw ni a poe e pouknae patetlah, <sup>14</sup> Apa ni nangmanaw hnokari poung e na phu sak awh toe. Kai ni het hlak hoe na phu sak awh han rah. Apa ni nangmanaw ruitaboug hoi na



hem awh. Kai niteh, aikam hoi na hem awh han rah telah puenghoi bout a dei pouh.

<sup>15</sup> Siangpahrang ni khocanaw ni a dei e lawk a tarawi ngaihoehnae teh, BAWIPA ni Shiloh tami Ahijah hno lahoi Nebat capa Jeroboam koe a dei pouh e lawk a kuep sak hane a ngai dawk doeh.

<sup>16</sup> Isarelnaw abuemlah ni, siangpahrang ni lawk a ngai hoeh e a hmu awh navah, bangmaw Devit koe coe hane ka tawn awh, Jesi capa koe coe hane raw ka tawn awh hoeh. Oe Isarelnaw, namamae rim koe lah ban awh leih. Oe Devit namae imthung khenhaw! telah atipouh awh. Hottelah Isarelnaw teh amamae rim koe lah lengkaleng a ban awh. <sup>17</sup> Hatei, Judah ram lah kaawm e Isarelnaw teh Rehoboam ni a uk awh.

<sup>18</sup> Hahoi, siangpahrang Rehoboam ni thaw katawknaw ka uk e Adoniram teh Isarelnaw koe a patoun. Hatei ahnimanaw ni talung hoi mat a dei awh. Hatdawkvah, siangpahrang Rehoboam teh rangleng dawkaranglah a kâcui teh, Jerusalem lah a yawng.

<sup>19</sup> Hottelah Isarelnaw ni, atu totouh Devit catounnaw a taran awh.

## 11

<sup>1</sup> Rehoboam Jerusalem a pha navah Isarelnaw a tuk teh, a uknaeram hah Rehoboam e a kut dawkbout pha sak hanelah, Judah hoi Benjamin imthung dawke ransa 180,000 touh a pâkhueng. <sup>2</sup> Hatei Cathut e tami Shimei koevah BAWIPA e lawk ka tho e teh, <sup>3</sup> Judah ram hoi Benjamin ram dawke Isarelnaw pueng koe, <sup>4</sup> BAWIPA ni hettelah a dei, na hmaunawngghanaw tuk hanelah cet hanh awh. Abuemlah nama im lah koug ban awh leih. Bangkongtetpawiteh, hete hno teh kai ni ka tâcosak e doeh, telah dei pouh atipouh. Hottelah BAWIPA ni a dei e a tarawi awh teh, Jeroboam tuk laipalah bout a ban awh.

### *Rehoboam ni kho a kalup*

<sup>5</sup> Rehoboam teh Jerusalem vah ao teh, Judah ram ring nahanelah, khopuinaw a thawng. <sup>6</sup> Bethlehem, Etam, Tekoa, <sup>7</sup> Bethzur, Sokoh, Adullam, <sup>8</sup> Gath, Mareshah, Ziph, <sup>9</sup> Adoraim, Lakhish, Azekah, <sup>10</sup> Zorah, Aijalon hoi Hebron khonaw a kangdue sak. Hote khonaw teh Judah ram hoi Benjamin ram dawke rapan ka tawn e khonaw doeh. <sup>11</sup> Hete khonaw teh, kacakpounglah a tungdum awh teh, rapanim dawke ransabawinaw satu, misurtui hoi, lamvonnaw hawvah a hruek awh. <sup>12</sup> Kho tangkuem bahling hoi tahroenaw a hruek awh teh kacakpounglah a sak. Judah ram hoi Benjamin ram teh ama koe lah a kampang sak.

### *Vaihmanaw hoi Levihnaw Judah ram lah a kampuen*

<sup>13</sup> Isarel ram dawke kaawm e vaihmanaw hoi Levihnaw teh amamouh aonae koehoi ahni koe a pâtam awh. <sup>14</sup> Bangkongtetpawiteh, Levihnaw ni a ram hoi a onae a tâcotakhai awh teh, Judah ram Jerusalem kho lah a cei awh. Jeroboam hoi a capanaw ni BAWIPA e vaihma thaw dawke hoi a kâhat sak awh. <sup>15</sup> Hahoi, kahrai hoi sakcawp e maitotan meikaphawknaw hanelah hmuennasang dawke vaihma thaw a tawke sak awh. <sup>16</sup> Isarel BAWIPA Cathut tawng hanelah a lungthin kapoenaw ni Isarel miphun kacetkhaie Levi miphunnaw e hnuk a kâbang awh teh, mintoenaw e BAWIPA Cathut koe thuengnae sak hanelah Jerusalem kho dawke a tho awh. <sup>17</sup> Ahnimanaw ni Judah uknaeram a tho sak awh teh, Solomon capa Rehoboam hah kum thum touh thung a caksak awh. Kum thum touh thung Devit e lamthung hoi Solomon e lamthung a dawn awh.



### *Rehoboam imthung*

<sup>18</sup> Rehoboam ni Devit capa Jerimoth e canu Mahalath hoi Jesi capa Eliab e canu Abihail hah a yu lah a la. <sup>19</sup> Capa kathum touh a khe teh, Jeush, Shemariah hoi Zaham telah min a phung. <sup>20</sup> Hathnukkhu Absalom e canu Maakah bout a la teh, Abijah, Attai hoi Ziza a khe. <sup>21</sup> Rehoboam ni a yu 18 touh, ado 60 touh a la teh, ca tongpa 28 touh, napui 60 touh a khe. Absalom e canu Maakah teh alouke a yunaw hoi adonaw hlak hoe a lungpataw.

<sup>22</sup> Rehoboam ni Maakah capa Abijah teh a hmaunawngghanaw hlakvah hoe ka talue lah a hruek. Bangkongtetpawiteh, siangpahrang lah rawi hane a ngai dawk doeh. <sup>23</sup> Lungangcalah hoi kho a pouk teh, capanaw pueng hah Judah ram hoi Benjamin ram pueng dawk e rapan kaawm e khonaw dawk ao sak teh a kapek. Canei hane moikapap a hruek pouh teh, yu moikapap a tawng pouh.

## 12

### *Izip ni Judah a tuk*

<sup>1</sup> Rehoboam uknaeram a cak teh ama roeroe a tha a sai torei teh, ahni koe kambawng e Isarel naw abuemplahoi BAWIPA e kâlawk a pahnawt awh.

<sup>2</sup> Rehoboam siangpahrang a tawknaw kum 5 navah, Izip siangpahrang Shishak ni Jerusalem tuk hanelah a luen takhang. Bangkongtetpawiteh, BAWIPA a taran awh teh, kâ a tapoe awh. <sup>3</sup> Izip lahoi kathonaw teh, rangleng 12,000, marangransanaw 6,000, hahoi touklek thai hoe e taminaw, Lubimnaw, Sukkiimnaw hoi Ethiopia taminaw doeh. <sup>4</sup> Judah ram daw k e rapan ka tawn e khonaw a la awh teh, Jerusalem kho daw k a pha awh.

<sup>5</sup> Rehoboam hoi Judah kahrawikungnaw, Shishak taki kecu daw k Jerusalem kamkhuengnaw koe profet Shemaiah a tho teh, ahnimouh koe vah, BAWIPA ni telah a dei, kai na pahnawt awh dawkvah kai ni Shishak kut daw k na hnawng van awh, telah atipouh. <sup>6</sup> Hat torei teh, Isarel kahrawikungnaw hoi siangpahrang rahim lah a kârahnoum awh teh, BAWIPA teh a lan, telah ati awh.

<sup>7</sup> BAWIPA ni a kârahnoum awh e a hmu torei teh, BAWIPA e lawk Shemaiah koe bout ka tho e teh, a kârahnoum awh dawkvah, ka raphoe mahoe. Hatei, a tangawn teh ka rungngang vaiteh, Shishak kut daw k e ka lungkhueknae teh Jerusalem lathueng ka rabaw mahoe. <sup>8</sup> Hatei, ka thawtawknaw hoi mipun alouke uknaeram koe thawtawknaw a panue vaiteh, kapek thai nahanelah ahnimouh koe san a thung awh han.

<sup>9</sup> Izip siangpahrang Shishak ni Jerusalem tuk hanelah a takhang teh, BAWIPA e im daw k e hnopai, siangpahrang e im daw k e hnopai hoi alouke hnopainaw pueng hai koug a la. Solomon ni a sak e suibahlingnaw hai koug a la. <sup>10</sup> Siangpahrang Rehoboam ni a yueng lah rahum bahling lah a sak teh siangpahrang im takhang karingkungnaw hoi ransanaw koe a ring sak awh. <sup>11</sup> Siangpahrang teh BAWIPA e im daw k a kâen tangkuem karingkungnaw ni a sin awh teh, hathnukkhu ama onae koe bout a hruek awh. <sup>12</sup> Hottelah a kârahnoum torei teh, koug raphoe hoe hanelah BAWIPA ni a lungkhueknae bout a roum sak teh, Judah ram teh kanawmcalah kho bout a sak awh.

### *Rehoboam uknae apout*

<sup>13</sup> Hahoi siangpahrang Rehoboam teh Jerusalem lah a cei teh bout a uk. Rehoboam siangpahrang a tawknaw teh kum 41 touh a pha teh, BAWIPA ni a min o thai nahanelah Isarel ram thung daw k a rawi e Jerusalem kho



dawk kum 17 touh a uk. A manu e min teh Ammon tami Naamah doeh. <sup>14</sup> BAWIPA tawngngainae lungthin a tawn hoeh dawkvah, kathout hno a sak.

<sup>15</sup> Rehoboam thawtawaknae a kamtawng hoi apout totouh e teh profet Shemaiah e cauk hoi profet Iddo ni thut e setouknae cauk dawk thut lah awm hoeh na maw. Rehoboam hoi Jeroboam teh a hring nathing pou a kâtuk roi. <sup>16</sup> Hahoi, Rehoboam teh mintoenaw koe a i teh Devit khopui dawk a pakawp awh. Ahnie yueng lah a capa Abijah ni siangpahrang let a tawk.

## 13

### *Abijah ni Judah uknae*

<sup>1</sup> Siangpahrang Jeroboam a bawinae kum 18 navah, Abijah teh Judah ram dawk siangpahrang thaw a kamtawng. <sup>2</sup> Jerusalem kho dawk kum thum touh a bawi. A manu e min teh Mikhaiah, Gebeah tami Uriel e canu doeh. Hatnavah Abijah hoi Rehoboam teh a kâtuk roi.

<sup>3</sup> Abijah ni tarankahawi ni teh tarantuk kathoum e 400,000 touh a rawi teh a tuk. Jeroboam ni hai tarankahawi ni teh taran katukthai tami 800,000 touh a rawi teh a tuk van. <sup>4</sup> Abijah teh Ephraim ram dawk e mon Zemaraim mon dawk a kangdue teh, Oe Jeroboam Isarelnaw abuemplahoi thai awh haw. <sup>5</sup> Isarel BAWIPA Cathut ni palawi hoi lawkkamnae, Isarel uknaeram teh Devit hoi a ca catounnaw koe yungyoe hanelah a poe toe tie hah na panuek awh hoeh maw. <sup>6</sup> Hateiteh, Devit capa Solomon e san Nebat capa Jeroboam ni a bawipa a taran toe. <sup>7</sup> Solomon e capa Rehoboam teh a camo dawkvah pouklaknae hai a tawn hoeh rah dawkvah, a ngang thai hoeh toreih teh, cungkeihoehe taminaw hoi tamikathoutnaw teh Rehoboam koe lah a kamkhueng awh.

<sup>8</sup> Atu hai nangmouh ni Devit ca catounnaw kut dawk kaawm e BAWIPA e uknaeram tuk thai hanelah na pouk awh. Nangmanaw teh na pap poung awh. Jeroboam ni cathut lah na sak pouh e suimaitotanca hai nangmouh koe ao. <sup>9</sup> BAWIPA e vaihmanaw, Aron e capanaw hoi Levihnaw na takhoe teh, alouke miphunnaw ni a sak e patetlah vaihmanaw na hruek awh. Maitotanca hoi tu sari touh hoi kamthoung e tami pueng teh, na cathutnaw e vaihma lah na coung sak awh nahoehmaw.

<sup>10</sup> Hatei, kaimanaw teh Cathut ka pahnawt awh hoeh. Hote Cathut teh kaimae BAWIPA doeh. BAWIPA e thaw ka tawk e vaihmanaw teh Aron miphunnaw doeh. Levihnaw hai amamae thaw lengkaleng a tawk awh.

<sup>11</sup> Amom hoi tangminlah tangkuem BAWIPA hanelah hmaisawi thuengnae hoi hmuitui ouk a thueng awh. Paawng e vaiyei hai kathoung caboi dawk a hruek awh. Tangminlah tangkuem hmaisawi hanelah sui hmaiimkhok dawk hmaiim paang teh, kaimouh ni teh BAWIPA Cathut e kâpoelawknaw ka tarawi awh. Hatei, nangmouh ni teh ahni hah na pahnawt awh.

<sup>12</sup> Khenhaw! Cathut teh kaimouh koe ao teh, kaimae lû lahai ao. Vaihmanaw hai nangmanaw na tuk navah amamae kâhruetcuetae mongka hah kâhruetcuetae nahanlah ueng han lah ao awh. Oe Isarelnaw mintoenaw e BAWIPA Cathut tuk hanelah kâcai hanh awh. Na tuk awh pawiteh, na sung awh han telah atipouh.

<sup>13</sup> Hatei, Jeroboam ni a ransa tangawn hah Judah ransanaw a hnuklah arulah hoi pawp hanelah a patoun. Hahoi a tangawn teh hmalah hoi kalup vaiteh tuk hanelah a noe. <sup>14</sup> Judahnaw ni hnukhma lahoi a pawp awh e a panue toteh BAWIPA a kaw awh. Vaihmanaw ni hai mongka a ueng awh.



<sup>15</sup> Hahoi Judahnaw a thaw awh teh puenghoi a hramki awh. Hottelah Judahnaw a hramki torei teh, Abijah hoi Judahnaw hmalah Jeroboam hoi Isarelnaw pueng Cathut ni taran a sung sak. <sup>16</sup> Isarelnaw teh Judahnaw e hmalah a yawng awh teh, Cathut ni ahnimae kut dawk a poe. <sup>17</sup> Abijah hoi a taminaw ni tami moikapap a thei awh teh, a rawi e tami 500000 touh a thei awh. <sup>18</sup> Judahnaw ni mintoenaw e BAWIPA Cathut kâuep awh dawkvah, Isarelnaw teh hatnavah taran a sung awh.

<sup>19</sup> Hahoi Abijah ni Jeroboam a pâlei teh, Bethel khopui hoi khotenaw, Jeshanah khopui hoi khotenaw, Ephraim khopui hoi khotenaw, ahnie kut dawk hoi a lawp. <sup>20</sup> Abijah a hring nathung Jeroboam teh a tha bout sai thai hoeh. BAWIPA ni a hem teh a due.

<sup>21</sup> Hatei, Abijah teh athakaawme lah ao teh a yu 14 touh a la, ca tongpa 22 touh hoi napui 16 touh a tawn. <sup>22</sup> Abijah ni a tawksak e kaawm rae hoi a nuencang a deipan e lawklungnaw teh profet Iddo e lairui cauk dawk thut lah ao.

## 14

<sup>1</sup> Abijah teh mintoenaw koe a i teh Devit khopui dawk a pakawp awh. Hahoi a yueng lah a capa Asa ni a uk. Ahnie tueng navah kum 10 touh rounnae ao.

### *Asa ni Judah a uk*

<sup>2</sup> Asa ni BAWIPA Cathut hmalah hawinae hoi lannae hno a sak. <sup>3</sup> Jentelnaw e thuengnae khoungroenaw hoi hmuenrasangnaw kOUNg a takhoe. Talung ungenaw hai kOUNg a raphei teh meikaphawk thingnaw hai kOUNg a tâtueng. <sup>4</sup> Judahnaw ni mintoenaw e BAWIPA Cathut tawng vaiteh, kâlawnaw tarawi hanelah kâ a poe. <sup>5</sup> Judah kho tangkuem dawk e hmuenrasangnaw hoi meikaphawk a takhoe awh teh, a uknaeram teh karoumcalah ao. <sup>6</sup> Judah ram dawk e khopuinaw rapan hoi kOUNg a kalup teh BAWIPA ni rounnae a poe dawkvah, kum moikasawlah kâtuknae awh hoeh. <sup>7</sup> Hahoi Judahnaw koevah, hete khopuinaw sak awh vaiteh, rapan hoi kOUNg kalup awh sei. Radoung nahane imrasang hoi longkha taren nahane hai sak awh seh. BAWIPA Cathut e a ngainae tawng dawkvah, maimae ram teh kahawicalah uk thai awh. Hatdawkvah ahni ni kho tangkuem rounnae na poe awh telah atipouh. Hahoi a dei e patetlah a sak teh hoehoe a rOUNg awh.

<sup>8</sup> Asa ni Judahnaw bahlingnaw hoi tahroenaw ka patuem e tami 300,000 touh a tawn. Benjamin mipnhaw dawk bahlingnaw hoi lilava ka patuem e tami 280,000 touh a tawn teh, hete taminaw pueng teh thakasaipOUNg naw hoi tarankahawi pOUNg e naw doeh. <sup>9</sup> Ethiopia tami Zerah teh ransa 1,000,000, rangleng 300 touh hoi ahnimanaw tuk hanelah Mareshah kho dawk a pha. <sup>10</sup> Asa ni ahnimanaw tuk hanelah a tâco teh, Mareshah kho teng e Zephathah yawn dawk taran a kâtuk awh.

<sup>11</sup> Asa ni BAWIPA Cathut a kaw teh Oe BAWIPA nang teh athakaawme hoi athakayounnaw rungngang hanelah na cOUNg thai dawkvah, Oe BAWIPA Cathut na rungngang awh haw. Kaimanaw ni nang na kâuep awh teh, na min lahoi hete tamihupui tuk hanelah ka cei awh. Oe BAWIPA nang teh kaimae Cathut lah na o teh taminaw ni na ta hanh seh telah a ratoum.

<sup>12</sup> Hottelah BAWIPA ni Asa hoi Judahnaw hmalah, Ethiopia taminaw a tuk teh kOUNg a yawng awh. <sup>13</sup> Asa hoi a taminaw ni Gerar kho totouh a pâlei awh. Ethiopianaw ni bout a tuk thai hoeh dawkvah, a kâhno awh toe. Bangkongtetpawiteh, BAWIPA hoi a ransanaw hmalah sung sak lah



ao teh, hnopai moikapap a la pouh awh. <sup>14</sup> Gera kho teng e naw pueng kOUNg a tâ awh. Bangkongtetpawiteh, BAWIPA takinae ahnimae thung a pha teh, khopuinaw hai kOUNg a raphoe awh. Hnopai moikapap a la awh. <sup>15</sup> Saring hrueknae imnaw hai kOUNg a raphoe awh teh, tu hoi kalauknaw moikapap a lawp awh teh Jerusalem lah a ban awh.

## 15

### *Asa a tha bout kâlanae*

<sup>1</sup> Cathut e Muitha teh Oded capa Azariah koe a pha teh, <sup>2</sup> Asa dawn hanelah a cei teh, ahni koevah, Asa Judahnaw abuemlah hoi Benjaminaw ka lawk thai awh haw. BAWIPA na kampangkhai awh pawiteh, ahni ni na kampangkhai van han. Ahni na tawng awh pawiteh na hmu awh han. Ahni na pahnawt awh pawiteh, na pahnawt awh van han. <sup>3</sup> Tueng moikasawlah Cathut katang tawn awh hoe. Vaihmanaw cangkhae hoi kâlawk tawn laipalah ao awh. <sup>4</sup> Rucatnae a kâhmo awh toteh, BAWIPA Isarel Cathut koelah bout a ban awh. A tawng awh teh bout a hmu awh. <sup>5</sup> Hatnae tueng daw kâennaehoi tâconae daw kroumnae awm hoe. Ram thung kho ka sak e pueng koe lungpuen tâsuenae hoi doeh a kawi. <sup>6</sup> Ram buet touh hoi buet touh kho buet touh hoi buet touh a kâ raphoe awh. Bangkongtetpawiteh, Cathut ni runae phunkuep hoi tarannaw kut daw kâhmo sak. <sup>7</sup> Hatei, nangmouh teh tha kâlât awh nateh na kut hno awh hanh. Na sak awh e patetlah tawkpouh na hmu awh han telah atipouh.

<sup>8</sup> Asa ni hote lawk hoi profet Oded e sutdeilaw k a thai navah, taran bout ahawi teh, Judah ram hoi Benjamin ram pueng Ephraim mon daw k e a la e khonaw e panueththopoung naw pueng kOUNg a tâkhawng teh, BAWIPA e im hmalah kaawm e BAWIPA thuengnae khoungroe bout a pathoup. <sup>9</sup> Hahoi Judah ram hoi Benjamin ram thung e tami pueng ahni koe kho ka sak e Ephraim, Manasseh hoi Simeon ram thung e tami pueng kOUNg a kaw. Bangkongtetpawiteh, BAWIPA Cathut ahni koelah ao e a hmu navah Isarel ram thung e tami moikapap ahni koe a tho awh.

<sup>10</sup> Hottelah Asa ni a uknae kum 15, thapa yung pâthum navah Jerusalem kho daw k a kamkhueng awh. <sup>11</sup> Hatnae hnin daw k a lawp e maitotan 700, tu 7000 touh hoi BAWIPA koe thuengnae a sak awh. <sup>12</sup> A lungthin hoi a hringnae abuemlah mintoenaw e BAWIPA Cathut tawng hane hoi, <sup>13</sup> Isarelnaw e BAWIPA Cathut ka tawng ngaihoe e tami bangpatethai thoseh, tami kathoung kalen, napui tongpa abuemlah kOUNg thei hanelah lawkkamnae a sak awh. <sup>14</sup> BAWIPA min lahoi hote lawkkamnae tarawi hanelah mongka hoi tuki kacaipounglah a ueng awh teh, thoebonae lahoi a hramki awh. <sup>15</sup> Judahnaw abuemlah hoi hote lawkkamnae daw k a lunghawi awh teh, lungthin abuemlah hoi lawkkamnae a sak awh teh a hringnae abuemlah hoi ama a tawng awh. Hahoi ama a hmu awh teh, BAWIPA ni hmuen tangkuem koe roumnae a poe. <sup>16</sup> Siangpahrang Asa e manu Maakah hai panueththo e meikaphawk Asherah a sak kecu dawkvah, siangpahrangnu daw k hoi a kâhat sak. Meikaphawk teh Asa ni kOUNg ka rawm lah a hem teh, a raphoe hnukkhu, Kidron palang teng vah hmai a sawi. <sup>17</sup> Hatei, Isarel ram daw k e hmuenrasangnaw teh takhoe lah awm hoeh rah. Asa e lungthin teh a bawi nathing yuemkamcu e lah ao. <sup>18</sup> A na pa ni a poe e hnopainaw, ama ni a poe e hnopainaw sui hoi gunnaw teh Cathut e im daw k a hruek.



<sup>19</sup> Asa siangpahrang kum 35 touh a tawk. A tawk nathing tarankâtuknae banghai awm hoeh.

## 16

### *Asa hoi Sirianaw lawkcengnae*

<sup>1</sup> Asa siangpahrang a bawinae kum 36 navah, Isarel siangpahrang Baasha ni Judahnaw a tuk teh, siangpahrang Asa koe apihai a kâen a tâco thai hoeh nahanlah Ramah kho a kangdue sak. <sup>2</sup> Hatnavah, Asa ni BAWIPA e im hoi siangpahrang im dawk e sui, ngun, kaawm e pueng a la teh, Damaskas kho kaawm e Siria siangpahrang a patawn teh ahni koevah, <sup>3</sup> lawkkamnae kai hoi nang rahak, apa hoi na pa rahak ao. Khenhaw! kai ni nang koe sui hoi ngun na patawn. Hatdawkvah, Isarel siangpahrang Baasha koe cet nateh, lawkkamnae raphoe nateh kai koe tho haw, " telah lawk a thui.

<sup>4</sup> Siangpahrang Benhadad ni siangpahrang Asa e lawk a tang teh, Isarel ram dawk e khopuinaw tuk hanelah ransabawinaw a patoun. Ijon, Dan, Abelman hoi Naphtali ram dawk e hnopai hrueknae khonaw pueng a tuk. <sup>5</sup> Baasha ni hote kamthang a thai toteh, Ramah kho a thawng lahun e a kâhat. <sup>6</sup> Hottelah siangpahrang Asa ni Judahnaw abuemlahoi a ceikhai teh, Baasha ni Ramah kho a thawng nahanelah talungnaw hoi thingnaw a rakueng e koug a la teh, Geba hoi Mizpah kho thawngnae koe a hno.

### *Asa koe Hanani ni lawkthuinae*

<sup>7</sup> Hatnavah profet Hanani teh Judah siangpahrang Asa koe a tho teh, ahni koevah, BAWIPA na Cathut na kângue laipalah, Siria siangpahrang na kângue. Hatdawkvah, Siria siangpahrang e ransanaw teh na kut daw k hoi koug a hlout toe. <sup>8</sup> Ethiopia taminaw hoi Lubim taminaw teh ransanaw, ranglengnaw hoi marangransanaw nahoehmaw. Hatei, BAWIPA na kâuep dawkvah, ahni ni na kut daw k a hnawng <sup>9</sup> Ama koe yuemkamcu e lungthin ka tawn e tami koevah, athakaawme taminaw a kamnue sak hanelah, talai van pueng daw k BAWIPA ni a mit hoi pou a radoung. Hete hno daw k pathu lahoi thaw na taw k daw kvah, atu hoi teh taran na tawn han toe telah atipouh. <sup>10</sup> Hahoi Asa teh profet koe a lungkhuek daw kvah, thongim a pabo. Bangkongtetpawiteh, a dei pouh e lawk kecu daw k a lung thouk a khuek. Hahoi Asa ni tami tangawn hai a rek.

### *Asa patawnae hoi a duenae*

<sup>11</sup> Asa thaw taw k nae a kamtawng hoi a pout totouh e Judah hoi Isarel siangpahrangnaw e cauk daw k thut lah ao. <sup>12</sup> Asa a bawinae kum 39 navah, a khok daw k patawnae a tawn teh, patawnae teh puenghoi a nut. Hatei patawnae daw k BAWIPA tawng laipalah tâsibawinaw dai a tawng. <sup>13</sup> A uknae kum 41 touh navah, Asa teh mintoenaw koe a kâhat. <sup>14</sup> Devit khopui daw k ama hanelah a ran e phuen daw k a pakawp awh. Hmuitui kasaknaw ni aphunphun daw k a sak awh e ikhun daw k a yan sak. Barinae lah hmaikonpui a patawi sak awh.

## 17

### *Jehoshaphat ni Judah a uk*

<sup>1</sup> Asa capa Jehoshaphat ni a na pa yueng siangpahrang a taw k teh, Isarel tuk hanelah tha a sai sak. <sup>2</sup> Judah ram daw k rapan ka tawn e kho pueng



koe ransanaw a hruek. Judah ram hoi a na pa Asa ni a la e Ephraim ram daw k e khonaw daw k ramvengnaw a hruek.

<sup>3</sup> Jehoshaphat koe BAWIPA ao, bangkongtetpawiteh, a na pa Devit ni a dawn e lamthung a dawn teh Baal cathut tawng hoe h. <sup>4</sup> A na pa e Cathut dueng a tawng teh, Isarel lamthung a roun teh kâpoelaw k a tarawi. <sup>5</sup> Hatdawkwah, BAWIPA ni ahnie kut daw k uknaeram a caksak teh, Judah ram e tami pueng ni, Jehoshaphat koe tamuk a poe, dawkvah, a tangreng teh a bawilen poung. <sup>6</sup> BAWIPA e lamthung daw k a lunghawi teh, Judah ram daw k e karasang e hmuennaw hoi meikaphaw k thingnaw pueng koun g a raphoe.

<sup>7</sup> A bawinae kum thum navah, kahrawikung Benhail, Obadiah, Zekhariah, Nethanel hoi Mikhaiah tinaw hah taminaw cangkhai hanelah Judah ram khopuinaw koe a patoun. <sup>8</sup> Levih tami Shemaiah, Nethaniah, Zebadiah, Asahel, Shemiramoth, Adonijah, Tobiah hoi Tobadinijah taminaw hai a baw k van. Hahoi vaihma Elishama hoi Jehoram hai a baw k roi van. <sup>9</sup> BAWIPA e kâlaw k cauk a sin awh teh, Judah ram daw k a cangkhai awh.

<sup>10</sup> Judah tengpam e uknaeram pueng ni hai BAWIPA a taki awh teh, apinihai Jehoshaphat tuk ngam hoe h. <sup>11</sup> Filistin e tami tangawn ni hai Jehoshaphat poehno a poe awh. Tamuk hanelah ngun tangka a poe awh. Arabianaw ni hai tu 7700, hmae 7700 touh a poe awh. <sup>12</sup> Jehoshaphat teh a tha hoe hoe a sai teh Judah ram daw k ramveng im hoi hnopai hruek nahane a sak. <sup>13</sup> Judah khopuinaw daw k thaw moi a tawn teh, Jerusalem vah tarankahawi ni teh athakaawme taminaw moikapap a tawn. <sup>14</sup> Hetnaw teh a napanaw imthung lahoi touk e doeh. Judah thung hoi ransabawi 1,000 touh, Adnah hoi a kut rahim kaawm e tarankahawi ni teh athakaawme tami 300,000, <sup>15</sup> Apâhni lah Jehoshaphat ni 280,000 a uk. <sup>16</sup> A pâthum lah Zekhariah capa Amasiah teh a ma lungtho lahoi BAWIPA koe a kâpasoung teh, tarankahawi ni teh athakaawme 200,000 touh a uk. <sup>17</sup> Benjamin imthung daw k e a thakasai, tarankahawi e, sene hoi bahling ka patuem e tami 200000 touh Eliada ni a uk.

<sup>18</sup> A hnukkhu Jehozabad ni tarankahawi ni teh athakaawme 180000 touh a uk.

<sup>19</sup> Hetnaw pueng teh siangpahrang e thaw katawkkungnaw doeh. Hetnaw hloilah Judah ram rapan ka tawn e kho tangkuem koe siangpahrang ni a hruek e ao rah.

## 18

### *Mikah ni Ahab kâhruetcuetnae a poe*

<sup>1</sup> Jehoshaphat teh ka tangreng poung e lah ao teh, barinae a tawn. Ahab hoi a kâkue t roi. <sup>2</sup> Kum moikasaw aloum hnukkhu Samaria e Ahab koe a cei. Ahab ni Jehoshaphat hoi a taminaw hanlah maitotan hoi tunaw moikapap a thei pouh. Hahoi Gilead ram Ramoth kho tuk hanelah a coun.

<sup>3</sup> Isarel siangpahrang Ahab ni Judah siangpahrang Jehoshaphat koe, kai koe Gilead ram Ramoth kho na tho han maw, telah a pacei. Ahni ni, kai hoi nang, ka taminaw hoi na taminaw teh cungtalah doeh. Hatdawkwah taran rei tuk awh sei atipouh.

<sup>4</sup> Jehoshaphat ni Isarel siangpahrang koevah, BAWIPA e law k na ring mahoe h maw, telah a pacei.

<sup>5</sup> Hatnavah Isarel siangpahrang ni, profet 400 touh a kaw teh, ahnimouh koevah, Gilead ram Ramoth kho tuk hanelah ka cei han maw, ka



cet mahoe h maw, telah atipouh. Ahnimouh ni cet yawkaw Cathut ni siangpahrang kut daw k na poe han, telah atipouh awh.

<sup>6</sup> Hatei, Jehoshaphat ni BAWIPA e profet buet touh boehai awm hoe h maw atipouh.

<sup>7</sup> Isarel siangpahrang ni Jehoshaphat koe, BAWIPA koe ka pacei pouh hane buet touh ngoun teh ao. Hatei, ahni teh ka hmuhma e doeh. Bangkongtetpawiteh, ahawinae dei boihoe h. Ahni teh Imlah capa Mikah doeh atipouh. Jehoshaphat ni, siangpahrang ni hottelah dei hanh naseh atipouh.

<sup>8</sup> Hat tore i teh, Isarel siangpahrang ni kahrawikung buet touh a kaw teh, karanglah Imlah capa Mikah hrawi haw, atipouh.

<sup>9</sup> Isarel siangpahrang hoi Judah siangpahrang teh Samaria longkha hmalah, siangpahrang e khohna a khohna roi teh, bawitungkhung daw k rei a tahung roi. Hahoi profetnaw pueng ni profet lawk a dei pouh awh.

<sup>10</sup> Kenan capa Zedekiah ni sumki a sak teh, BAWIPA ni hettelah a dei, hete kinaw ni Sirianaw koun g raphoe ditouh na deng han, telah atipouh.

<sup>11</sup> Hottelah profet alouknaw nihai, Gilead ram Ramoth kho daw k takhang nateh tuk leih, BAWIPA ni siangpahrang kut daw k a hnawng han doeh, telah ati awh.

<sup>12</sup> Mikah kaw hanelah patoune ni, khenhaw! profetnaw ni lawk rip kânging lah siangpahrang koe lawk kahawi a dei awh. Hatdawkvah nang ni hai lawk kahawi dei pouh, telah atipouh.

<sup>13</sup> Mikah ni, BAWIPA a hring e patetlah ka Cathut ni a dei e patetlah ka dei han atipouh.

<sup>14</sup> Siangpahrang koe a pha toteh, siangpahrang ni ahni koe, Mikah Gilead ram Ramoth kho tuk hanelah ka cei han maw, ka cet mahoe h maw, telah a pacei. Ahni ni tuk awh na ta awh yawkaw han doeh, na kut daw k a hnawng han doeh, telah atipouh.

<sup>15</sup> Siangpahrang ni ahni koe, lawkkatang hoe h laipalah teh kai koe BAWIPA min lahoi dei hoe h hanelah vai nâyittouh maw lawk na kam sak han, telah atipouh.

<sup>16</sup> Ahni ni, khoumkung ka tawn hoe h e tu patetlah Isarelnaw pueng teh mon daw k pareng kâkapek e ka hmu. Hahoi BAWIPA ni hetnaw teh kahrawikung tawn awh hoe h daw kvah, ma im lengkaleng ban awh lawiseh, ati telah atipouh. <sup>17</sup> Isarel siangpahrang ni Jehoshaphat koe vah, kaie kong a thoenae hoe h laipalah teh ahawinae dei boi mahoe h telah ka ti toung nahoehmaw, telah atipouh.

<sup>18</sup> Mikah ni, hatdawkvah BAWIPA e lawk thai awh haw, Bawipa teh a bawitungkhung daw k a tahung teh, kalvantaminaw pueng avoilah aranglah a tahung e ka hmu. <sup>19</sup> BAWIPA ni Isarel siangpahrang Ahab teh Gilead ram Ramoth khovah a cei vaiteh, due hanelah apinimaw a tacuek han telah ati. Hahoi buet touh ni hettelah doeh, alouke ni hottelah doeh atipouh.

<sup>20</sup> Hahoi muitha buet touh a tho teh, BAWIPA hmalah a kangdue teh, kai ni ka dum han telah ati navah, BAWIPA ni ahni koe vah, nâ lah maw atipouh.

<sup>21</sup> Ahni ni ka cei vaiteh a profetnaw pueng e pahni daw k laithoe ka dei e muitha lah ka coung han, atipouh. Ahni ni dum haw, na dum thai han doeh. Hatdawkvah, cet nateh hottelah sak loe atipouh.

<sup>22</sup> Hatdawkvah, khenhaw! BAWIPA ni hete profetnaw e a pahni daw kvah laithoe muitha a hruek toe. Hahoi BAWIPA ni nang na rawk nahane yo a dei toe telah atipouh.



<sup>23</sup> Kenan capa Zedekiah ni rek a hnai teh Mikah e hmaihei dawk a tambei teh, nang koe lawk dei hanelah BAWIPA e Muitha teh nâ lahoi maw kai koehoi a tâco, telah atipouh.

<sup>24</sup> Mikah ni, kenhaw! kâhro hanelah imthungkhu na kâen hnin vah na panue han atipouh.

<sup>25</sup> Isarel siangpahrang ni, Mikah heh khobawi Ammon hoi siangpahrang capa Joash koevah cetkhai awh.

<sup>26</sup> Hahoi siangpahrang ni hettelah a dei, hete tami heh thongim pabawt awh. Roumnae hoi ka ban hoehroukrak reknae bu hoi tui poe awh, telah atipouh.

<sup>27</sup> Mikah ni roumnae hoi bout na ban pawiteh, BAWIPA ni kai dawk hoi lawk a dei hoeh e han doeh, atipouh. Hahoi ahni ni nangmouh pueng ni hai thai awh, atipouh.

### *Tarantuknae koe Ahab a due*

<sup>28</sup> Hatdawkvah, Isarel siangpahrang hoi Judah siangpahrang Jehoshaphat teh Gilead ram. Ramoth khovah a takhang roi. <sup>29</sup> Isarel siangpahrang ni Jehoshaphat koevah, nang teh tarankâtuknae koe vah, siangpahrang puengcang kâmahrawk loe, kai tet tami rumram e patetlah ka khohna han atipouh. Hottelah Isarel siangpahrang teh tami rumram patetlah hoi tarankâtuknae koe a cei.

<sup>30</sup> Siria siangpahrang ni rangleng kauknaw koe, Isarel siangpahrang hoeh laipalah teh, tamikathoung kalen apihai tuk awh hanh telah kâ a poe.

<sup>31</sup> Hahoi rangleng kaukkungnaw ni Jehoshaphat a hmu navah, Isarel siangpahrang nahoehmaw ati awh. Ahni tuk hanelah a kalup awh navah Jehoshaphat teh thouk a hram. BAWIPA ni a kabawp teh Cathut ni koung a ban sak. <sup>32</sup> Rangeleng kaukkungnaw ni Isarel siangpahrang nahoeh tie a panue toteh, pâlei laipalah a ban takhai awh.

<sup>33</sup> Hahoi, tami buet touh ni noe laipalah pala hoi a ka teh, Isarel siangpahrang e saiphei rahak a ka dawkvah, rangleng ka mawng koevah, kai na tâcawtkhai leih, hmâ ka ca e a patawpoung telah ati. <sup>34</sup> Hat hnin vah, puenghoi a kâtuk awh. Hahoi Isarel siangpahrang teh tangmin lah totouh rangleng dawk a tahung laihoi, Sirianaw koelah kangvawi lahoi tami dawk a kamngawi teh kani khup tawmlei vah a due.

## 19

<sup>1</sup> Judah siangpahrang Jehoshaphat teh, karoumcalah Jerusalem a im vah a ban. <sup>2</sup> Hatei Hanani capa Jehu ni a dawn teh, siangpahrang koevah, Tamikathoutnaw na kabawp teh, BAWIPA kamaithoenaw na pahren han na maw. Hatdawkvah, BAWIPA lungkhueknae teh nang dawk ao. <sup>3</sup> Hatei, ram thung e thingmeikaphawknaw na raphoe teh, BAWIPA na tawng dawkvah, hawinae lamthung teh na tawn rah, telah atipouh.

<sup>4</sup> Jehoshaphat teh Jerusalem vah ao. Hahoi Beersheba teh Ephraim mon totouh a taminaw koe a cei teh, mintoenaw e BAWIPA Cathut koe a bankhai. <sup>5</sup> Judah ram thung rapan ka tawn e kho tangkuem dawk, lawkcengkungnaw a hruek. <sup>6</sup> Lawkcengkungnaw koe, na sak e hno kahawicalah pouk laihoi sak awh. Bangkongtetpawiteh, taminaw koe lawk na ceng e nahoeh. BAWIPA hane doeh, lawk na ceng awh navah nangmouh koe ao van. <sup>7</sup> Hatdawkvah, BAWIPA takinae lungthin tawn awh nateh, kâhruetcuat laihoi sak awh. Bangkongtetpawiteh, maimae



BAWIPA Cathut teh, payonpakainae, tami kapeknae hoi tadawng hno awm hoeh, atipouh.

<sup>8</sup> Hothloilah Jerusalem vah, BAWIPA e lawkcengnae hoi kâtoe nah lawkceng hanelah, Jehoshaphat ni Levihnew, vaihmanaw hoi Isarel kahrawikungnew a hruek. <sup>9</sup> Hahoi nangmouh ni lungthin katang hoi BAWIPA na taki awh teh, yuemkamcu lahoi lawkceng awh. <sup>10</sup> Kho tangkuem koe kaawm e hmaunawng hanaw koe tami theinae, kâlawk hoi kâpoelawk dawkw thoseh, phunglawk hoi lawkcengnae dawkw thoseh, nangmouh koe a pha torei teh, kâhruetcuetae na poe awh han. Hottelah nahoe pawiteh, BAWIPA taran vaiteh, kâ a tapoe awh han. Nangmouh hoi hmaunawng hah lathueng vah, lungkhueknae a pha payon han. Hottelah na sak awh pawiteh, yon penna dawkw hoi na hlout awh han. <sup>11</sup> BAWIPA e hnocawngca pueng dawkw, vaihma bawi Amariah hoi Isarel capa Zebadiah, Judah imthung kaukung nangmouh koe ao. Hahoi siangpahrang hno pueng dawkw Levihnew hah nangmouh koe kahrawikung lah ao han. Taranhawi laihoi sak awh. BAWIPA teh hnokahawi kasaknew koelah a kampang telah lawk a thui.

## 20

### *Ammon, Moab hoi Seir mon tânae*

<sup>1</sup> Hathnukku, Moabnew hoi Ammonnew, hothloilah tami alouknew hoi Jehoshaphat tuk hanelah a tho awh. <sup>2</sup> Taminaw a tho teh Jehosaphat koe vah, nang tuk hanelah tamihupui tuipui namran Siria lahoi a tho. Khenhaw! Hazezontamar vah ao awh, (hot teh Engedi doeh) telah atipouh awh.

<sup>3</sup> Jehoshaphat ni a taki teh BAWIPA tawng hanelah a kâpoe. Judah ram pueng dawkw rawcahai hanelah a pathang. <sup>4</sup> Hottelah Judahnew ni BAWIPA kabawpnae tawng hanelah a kamkhueng awh teh, Judah kho tangkuem lahoi BAWIPA tawng hanelah a tho awh.

<sup>5</sup> Jehoshaphat teh BAWIPA e im thongma katha hmalah, Judahnew hoi Jerusalem kamkhuengnew e hmalah a kangdue teh, <sup>6</sup> Oe mintoenaw e Cathut Jehovah, nang teh kalvan kaawm e Cathut nahoe hnew, miphun tangkuem e uknaeram pueng ka uk e nahoe hnew. Na kut dawkw hnotithainae hoi bahu ao teh, apinihai khang thai hoeh. <sup>7</sup> Nang teh kaimae Cathut lah na o. Na tami Isarelnew hete ram dawkw a tho navah, hete ram dawkw kaawm e alouke miphunnaw na takhoe teh, na hui Abraham e catounnew koe hete ram teh, yungyoe e ram lah o hanelah na poe nahoe hnew. <sup>8</sup> Athung vah kho a sak awh teh, athung vah nang hane hoi na min hanelah hmuen kathoung a sak awh. <sup>9</sup> Kaimouh koe vah hawihoe hnew, tahloi, lawkcengnae, lacik hoi takang a tho navah, hete im hoi na hmalah ka kangdue awh han. Bangkongtet pawiteh, nange na min teh hete im dawkw ao. Ka temdeng navah nang koe ka hram awh vaiteh, nang ni na thai pouh vaiteh na rungngang han. <sup>10</sup> Khenhaw! Ammon, Moab hoi Seir mon dawkw e taminaw, Izip ram dawkw hoi a tâco awh navah, Isarelnew ni tuk hanelah na pasoung hoeh niteh, a ban takhai e taminaw ni, <sup>11</sup> coe hanelah na poe e ram thung hoi pâlei teh moipathung hanelah a noe awh e na thai pouh haw. <sup>12</sup> Oe kaimae Cathut, ahnimouh koe lawk na ceng mahoe hnew. Kaimouh tuk hanelah ka tho e hete taminaw heh ka ngang thai awh mahoe hnew. Bangtelamaw ti han ka panuek awh hoeh. Nang dueng doeh na khet awh telah a ratoum.



<sup>13</sup> Judahnaw abuemlah camo, yu, canaw hoi BAWIPA hmalah a kangdue awh. <sup>14</sup> Hat toreì teh, tamimaya rahak kaawm e Jahziel koevah, BAWIPA e Muitha teh a tho. Ahni teh Zekhariah e capa doeh. Zekhariah teh Benaiah e capa doeh. Benaiah teh Jeiel e capa doeh. Jeiel teh Mattaniah e capa doeh. Mattaniah teh Levih miphun Asaph e catoun doeh. <sup>15</sup> Ahni ni Judahnaw abuemlah, Jerusalem kaawm e abuemlah hoi siangpahrang Jehoshaphat nangmanaw ni thai awh haw, BAWIPA ni nangmouh koe telah lawk a dei, taket hanh awh. Na lungpout hanh awh. Bangkongtetpawiteh, tarantuknae teh nangmae nahoeh, BAWIPA e doeh. <sup>16</sup> Tangtho vah tuk awh. Khenhaw! Ziz kho dawkl luennae lam dawkl hoi a tho awh navah, Jeruel kahrawng teng, thingyei apoutnae koe na kâhmo awh han. <sup>17</sup> Hete taran teh nangmouh ni na tuk ngai mahoe. Kacaklah kangdout awh. Nangmouh koe kaawm e BAWIPA e rungngangnae ma hah khen awh. Oe Judahnaw hoi Jerusalem e taminaw, taket hanh awh, na lungpout hanh awh. Tangtho vah tuk hanelah tho awh. Bangkongtetpawiteh, BAWIPA teh nangmouh koe ao telah atipouh.

<sup>18</sup> Hottelah Jehoshaphat teh minhmai talai dawkl kâbet lah a tabo teh, Judahnaw abuemlah hoi Jerusalem e taminaw abuemlah BAWIPA e hmalah a tabo awh teh, BAWIPA a bawkl awh. <sup>19</sup> Levih miphun Kohath catounnaw hoi Korah catounnaw teh kacaipounglah BAWIPA Cathut pholen hanelah a kangdue awh.

<sup>20</sup> Tangtho amom vah a thaw awh. Tekoa kahrawngum vah a cei awh. A cei laihoi Jehoshaphat a kangdue teh, Oe Judahnaw hoi Jerusalem e taminaw, ka lawkl thai awh haw. Nangmae BAWIPA Cathut hah yuem awh haw, caksak lah na o awh han. Profetnaw yuem awh haw tãnae na hmu awh han, telah atipouh. <sup>21</sup> Taminaw pueng lawkl a thui hnukkhu, ransanaw hmalah a cei laihoi BAWIPA pholennae la hoi thoungnae la ka sak hanelah a pouk awh. BAWIPA pholen awh, bangkongtetpawiteh a lungmanae teh a yungyoe a kangning, telah sak awh atipouh.

<sup>22</sup> La saknae hoi pholennae a kamtawng navah, Judah taranlahoi ka tho e Ammon, Moab hoi Seir mon e taminaw BAWIPA ni a sung sak. <sup>23</sup> Ammonnaw hoi Moabnaw ni Seir mon dawkl kaawm e taminaw thei hane hoi raphoe hanelah a taran awh. Seir mon dawkl e taminaw koug a raphoe hnukkhu, amamouh hoi amamanaw kâtuk hanelah bout a kamtawng awh. <sup>24</sup> Judahnaw kahrawngum ramvengim a pha awh navah, taminaw koelah a kangvawi awh teh, khenhaw! tamiro teh talai dawkl petkâkahai, ka yawng e buet touh boehai awm hoe. <sup>25</sup> Hottelah Jehoshaphat hoi a taminaw ni hnopai a ceitakhai awh e la hanelah a cei awh. Ahnimouh koe e hnopai, khohna hoi talung aphu kaawm e moi a hmu awh. Phu thai hoe totouh a la awh. Apap lawi a la awhnae koe hnin thum touh a ro awh. <sup>26</sup> A hnin pali navah Berakah yawng dawkl a kamkhueng awh. Hote hmuen koe BAWIPA a pholen awh. Hatdawkvah, atu totouh hote hmuen teh Berakah yawng telah ati awh. <sup>27</sup> Hottelah tarannaw kong dawkl BAWIPA ni lunghawinae a poe dawkvah, Jehoshaphat ni hma ahman teh, Jerusalem e taminaw hoi Judahnaw teh lunghawi laihoi Jerusalem khopui lah a ban awh. <sup>28</sup> Hahoi tamawi, ratoung hoi mongka tumkhawng laihoi Jerusalem BAWIPA im dawkl a pha awh.

<sup>29</sup> BAWIPA ni Isarel ka taran e naw a tuk tie a thai awh navah, uknaeram tangkuem kaawm e taminaw ni Cathut a taki awh. <sup>30</sup> Hottelah Jehoshaphat uknae teh karoumcalah ao. Bangkongtetpawiteh, atengpam e taminaw koe hoi BAWIPA ni roumnae a poe.



### *Jehoshaphat uknae apout*

<sup>31</sup> Hottelah kum 35 navah, Jehoshaphat teh Judahnaw koe siangpahrang thaw tawuknae a kamtawng teh Jerusalem vah kum 25 touh a bawi. A manu e min teh Silhi canu Azubah doeh.

<sup>32</sup> BAWIPA e hmatung vah, hnokahawi a sak teh, a na pa Asa e lamthung phen laipalah a dawn. <sup>33</sup> Hatei hmuenrasangnaw a takhoe hoeh dawkvah, taminaw pueng ni mintoenaw e Cathut koe pouknae hrueng awh hoeh.

<sup>34</sup> Khenhaw! Jehoshaphat e a tawksaknae pueng teh, kamtawngnae koehoi apout totouh, Hanani capa Jehu kong thutnae dawkw thut lah ao. Hottelah Isarel siangpahrangnaw e cauk dawkw pakhum lah ao. <sup>35</sup> Hathnukkuh Judah siangpahrang Jehoshaphat teh, Isarel siangpahrang Ahaziah hoi a kambawng roi, ahni ni hawihoeahnae ouk a sak. <sup>36</sup> Eziongeber vah Tarsis lah cei nahane lawng cungtalai rei a sak roi. <sup>37</sup> Hatei, Moreshah tami Dodavah capa Eliezer ni Jehoshaphat koevah, Ahaziah hoi na kambawng roi dawkvah, BAWIPA ni sak han na noe e na raphoe pouh e doeh, telah atipouh. Hottelah lawng kung a raphoe pouh teh Tarsis lah cet thai hoe toe.

## 21

### *Jehoram ni Judah a uk*

<sup>1</sup> Jehoshaphat teh mintoenaw koe a kâhat teh, Mintoenaw koe Devit khopui vah a pakawp awh. Hahoi a capa Jehoram ni a yueng lah siangpahrang a tawkw. <sup>2</sup> Jehoshaphat e capa Jehoram ni hmaunawnggha taruk touh a tawn. Azariah, Jehiel, Zekhariah, Azariah, Mikhael hoi Shefatiah tinaw doeh. Hetnaw pueng heh Judah siangpahrang Jehoshaphat e capanaw doeh. <sup>3</sup> A na pa ni sui, ngun hoi aphu kaawm poung e hnopai moikapap hoi Judah kho kalupnae rapan ka tawn e pueng hah a poe. Hatei, uknaeram teh Jehoram koe a poe. Bangkongtetpawiteh, camin lah ao dawkw doeh. <sup>4</sup> Jehoram ni a na pa e uknaeram a coe navah, amahoima tha ao sak teh, a hmaunawngghanaw pueng teh Isarel kahrawikungnaw hoi tahloi hoi a thei awh.

<sup>5</sup> Jehoram kum 32 touh a pha navah, siangpahrang thaw a tawkw. Jerusalem vah kum 8 touh a bawi. <sup>6</sup> Ahab imthung ni a tawkw e patetlah Isarel siangpahrangnaw e lamthung a dawn. Ahab canu a yu lah a la teh, BAWIPA mithmu vah thoenae a sak. <sup>7</sup> Hatei, Devit koe lawk a kam e hoi ama hoi a ca catoun totouh hmaiim pou tawn hanelah, lawkw yo a kam tounge dawkvah, BAWIPA ni Devit imthung raphoe hanelah ngai hoeh.

<sup>8</sup> Ahnie se navah Edomnaw ni Judah kâtawnnae a taran awh teh, taran a thaw awh. Hahoi siangpahrang hah a mahmawkw a kârawi awh. <sup>9</sup> Jehoram teh a ransabawinaw hoi lengnaw a buemlah hoi a tho. Karum vah a thaw teh, ama kalup e hoi leng kaukkung Edomnaw hah a tuk awh. <sup>10</sup> Hottelah Edomnaw teh atu totouh Judahnaw e kâtawnnae a taran awh teh taran a thaw awh. Hahoi mintoenaw e BAWIPA Cathut a ceitakhai awh dawkvah, hatnae tueng dawkw Libnahnaw hai ahnimanaw a taran awh teh taran a thaw van awh. <sup>11</sup> Judah ram mon dawkvah hmuenrasang a sak awh teh, Jerusalem e taminaw tak a kâyo sak teh Judahnaw a kahmakhai.

<sup>12</sup> Profet Elijah koehoi ahni koe ca patawn e a pha teh, na pa Devit e BAWIPA Cathut ni hettelah a dei, na pa Jehoshaphat e lamthung na dawn hoeh, Judah siangpahrang Asa e lamthung hai na dawn hoeh. <sup>13</sup> Isarel siangpahrangnaw e lamthung na dawn kecu dawkw thoseh, Judahnaw hoi Jerusalem kaawm e taminaw, Ahab imthung patetlah tak na kâyo sak teh,



na hmaunawngaha imthung dawk e nangmouh hlak bet kataluenaw na thei kecu dawk thoseh, <sup>14</sup> Khenhaw! BAWIPA ni na taminaw, na canaw, na yunaw hoi na saringnaw lacik hoi a hem han. <sup>15</sup> Nang e na ruen teh hnin touh hoi hnin touh a tâco vaiteh na von thung puenghoi patawnae na tawn han telah ca dawk thut lah ao. <sup>16</sup> Hottelah Ethiopia taminaw e tengpam kaawm e, Filistinaw hoi Arab taminaw e lungthin hah Jehoram tuk hanelah BAWIPA ni a tahrue. <sup>17</sup> Hahoi Judahnaw a tuk awh teh, siangpahrang im e hno abuemlah, a capanaw hoi a yunaw koug a la awh. Ahni hanlah buet touh boehai cettakhai hoeh. Cahnoungca e Jehoahaz duengdoeh a ceitakhai awh. <sup>18</sup> Hathnukkhu, BAWIPA ni dam thai hoeh totouh ruen patawnae hoi a pataw sak. <sup>19</sup> Hahoi, hettelah doeh. kum hni touh a ro hnukkhu, patawnae kecu dawk a ruen a bo teh, takikatho poung e patawnae hoi a due. A taminaw ni mintoenaw koe tahmanghmai a hawng pouh e patetlah a hawng pouh awh.

<sup>20</sup> A kum 32 navah a bawi teh Jerusalem vah kum 8 touh a bawi. Apinihai pasai laipalah a due teh Devit khopui dawk a pakawp awh ei, siangpahrangnaw e phuen koe nahoe.

## 22

### *Ahaziah ni Judah a uk*

<sup>1</sup> Jerusalem kho ka sak e taminaw ni, Jehoram capa cahnoung e Ahaziah teh, a na pa e yueng lah siangpahrang a taw sak awh. Bangkongtetpawiteh, a hmaunaw pueng teh Arabianaw hoi ka tho e ransanaw teh, rim thung a kâen awh teh, a capa kacuenaw koug a thei awh dawk doeh. <sup>2</sup> Ahaziah teh kum 42 touh a pha navah, bawi thaw a kamtawng teh Jerusalem vah kum touh a bawi. A manu e min teh Athaliah, Omri e canu doeh.

<sup>3</sup> A manu ni thoeneae sak hanelah pouknae a poe dawkvah, ahni hai Ahab imthung ni a dawn e lamthung dawk a dawn vah. <sup>4</sup> Ahab imthung patetlah BAWIPA mithmu vah thoeneae a sak. A na pa a due hnukkhu, ahnimanaw teh thoeneae sak hanelah pouknae kapoekung lah ao awh.

<sup>5</sup> Ahnimouh ni pouknae a poe e a tarawi dawkvah, Gilead ram Ramoth khovah, Siria siangpahrang Hazael tuk hanelah Isarel siangpahrang Ahab capa Jehoram koe a cei awh teh, Sirianaw ni Joram teh a hmâ a paca awh. <sup>6</sup> Siria siangpahrang a tuknae koe Ramah kho a hmâ a ca e dam sak hanelah, Jezreel kho lah a cei. Hottelah Judah siangpahrang Jehoram capa Azariah teh Ahab capa Jehoram a patoun dawkvah, hloe hanelah Jezreel kholah a cei. <sup>7</sup> Jehoram koevah, Ahaziah a cei teh, a dueneae teh Cathut ni a pouk tangcoung e doeh. Bangkongtetpawiteh, a pha navah Ahab imthung koug pâmit hanelah Cathut ni satui a awi e Nimshi capa Jehu tuk hanelah Jehoram koe a cei. <sup>8</sup> Hahoi hettelah doeh. Ahab imthung raphoe hanelah, a tuk lahun nah, Judah kahrawikungnaw hoi Ahiziah e a hmau e capanaw ni Ahaziah thaw a taw lahun nah a hmu teh a thei awh. <sup>9</sup> Samaria vah ka kâhrawk e Ahiziah a tawng awh teh, a man awh tore i Jehu koe a thokhai hnukkhu a thei awh teh a pakawp awh. Hahoi ahni teh lungthin abuemlah hoi BAWIPA ouk ka tawng e Jehoshaphat e capa doeh ati awh. Hat toteh, Ahaziah imthung ni a uknaeram dawk kâ tawn thai hoeh toe.

### *Athaliah ni Judah a uk*

<sup>10</sup> Ahaziah manu Athaliah ni a capa a due e a thai tore i teh, a thaw teh Judah siangpahrang imthungnaw pueng koug a thei.



<sup>11</sup> Hatei, Ahaziah capa Joash teh siangpahrang canu Jehoshabeath ni siangpahrang e a canaw a thei e thung hoi a yawngkhai teh, kakhoumkung napui hoi irakhan thung a hro. Siangpahrang Jehoram e canu Jehoshabeath ni a hro dawkvah, Athaliah ni thet thai hoeh.

<sup>12</sup> Athaliah ni ram a uk navah kum 6 touh thung Cathut e im dawk ama koe hro lah ao.

## 23

### *Judah siangpahrang Joash bawilakhung kâ muknae*

<sup>1</sup> A kum sarinae dawk Jehoiada teh, amahoima a thakâla teh, ransa 100 touh kahrawikungnaw Jehoram capa Azariah, Jehohanan capa Ishmael Obed capa Azariah, Adai capa Maaseiah, <sup>2</sup> hahoi, Judah ram a lawngven awh teh, Judah ram kho tangkuem e Levihnaw hoi Isarel imthung kahrawikungnaw a pâkhueng awh teh, Jerusalem lah bout a tho awh.

<sup>3</sup> Kamkhuengnaw pueng ni Cathut im dawk siangpahrang hoi lawkkam-nae a sak awh. Hahoi Jehoiada ni ahnimouh koevah, khenhaw! BAWIPA ni Devit capanaw e kong dawk a dei tangcoung e patetlah, a uknaeram bawitungkhung dawk siangpahrang lah ao hanelah ao. <sup>4</sup> Nangmouh ni na sak awh hane teh, sabbath hnin vah ka tho e vaihmanaw hoi Levihnaw thung dawk hu thum touh dawk hu touh ni longkha a ring awh han. <sup>5</sup> Hu touh teh siangpahrang im dawk ao awh vaiteh, hu touh teh longkha koe, alouknaw pueng teh BAWIPA im thongma dawk na o awh han. <sup>6</sup> Hatei, vaihmanaw hoi Levihnaw hoeh laipateh, apihai BAWIPA im dawk kâen mahoe. Ahnimouh teh a kâen thai awh. Bangkongtetpawiteh, ahnimouh teh a thoung awh. Taminaw pueng teh BAWIPA hah ring awh naseh. <sup>7</sup> Levihnaw ni senehmaica patuep laihoi siangpahrang kalup awh naseh. Hahoi imthung kâennaw pueng teh thei lah ao han. Siangpahrang a tâco, a kâen nah pou awm sin awh telah lawk a thui.

<sup>8</sup> Hottelah Judahnaw hoi Levihnaw pueng ni vaihma Jehoiada e kâpoelawk patetlah a sak awh. Lengkaleng a uk awh e patetlah sabbath hnin vah ka tho hane hoi sabbath hnin vah ka ban hane naw hah a ceikhai awh. Bangkongtetpawiteh, vaihma Jehoiada ni ka ban hane naw ban sak hoeh rah. <sup>9</sup> Vaihma Jehoiada ni Cathut im dawk e Devit e tahroenaw, bahling kathoungnaw hoi kalennaw a la teh ransa 100 touh kauknaw koe a poe. <sup>10</sup> Senehmaica ka patuem e tami pueng teh, siangpahrang petkâkalup lah avoila im takin koe hoi aranglae im takin totouh thuengnae khoungroe hoi im takin totouh a hruek awh. <sup>11</sup> Hottelah siangpahrang capa a tâcokhai awh teh, bawilukhung a kâ muk sak hnukkhu, lawkpanuesaknae a poe awh teh, siangpahrang a tawk sak awh. Jehoiada hoi a capanaw ni satui a awi awh teh, siangpahrang hringsaw seh, telah ati awh.

### *Athaliah duenae*

<sup>12</sup> Taminaw a yawng awh e pawlawk hoi siangpahrang a pholen awh e Athaliah ni a thai toteh, BAWIPA im dawk e taminaw koe a cei. <sup>13</sup> A khet navah, im takhang koe e khomkung koe siangpahrang a kangdue teh, ateng e ransabawinaw hoi mongka kauengkungnaw, hote ram daw koe taminaw pueng teh, a lung thouk ahawi awh. Mongka thouk a ueng awh teh, la kasaknaw ni tumkhawng khawng laihoi pholen la a sak awh. Hahoi Athaliah ni a khohna a phi teh, youknae taran doeh, youknae taran doeh, telah a hram. <sup>14</sup> Vaihma Jehoiada ni BAWIPA e im thung thet awh hanh. Alawilah hrawi awh. Ahni koelah kampang e tami teh tahloi hoi thet awh telah ransa 100 touh ka uk e ransabawi koe lawk a thui tangcoung



e patetlah. <sup>15</sup> Athaliah a man awh teh, siangpahrang im ceinae marang kâennae lamthung koe a pha awh navah a thei awh.

### *Jehoiada ni pathoupnae*

<sup>16</sup> Hahoi Jehoiada ni ama hoi a taminaw pueng hoi siangpahrang rahak vah BAWIPA e tami lah ao thai nahanelah lawkkamnae a sak. <sup>17</sup> Taminaw pueng teh Baal im vah a cei awh teh a raphoe awh. Thuengnae khoungroenaw hoi meikaphawknaw reprep a dei awh teh, Baal vaihma Mattan hah thuengnae khoungroenaw e hmalah a thei awh. <sup>18</sup> Jehoiada ni Mosi e kâlawk cauk dawk a thut e patetlah lunghawinae la sak laihoi Devit ni, BAWIPA im dawk BAWIPA koe hmaisawi thuengnae thueng sak hanelah, a pouk tangcoung e vaihma, Levihnaw e kut rahim thaw taw hanelah Devit ni kâ a poe e patetlah BAWIPA im ka khenyawn hanelah a hmoun. <sup>19</sup> Kathounghoehe tami kâen thai hoeh nahanelah, BAWIPA im longkha ka ring hanelah a rawi. <sup>20</sup> Tami 100 touh kahrawikung hoi tamimaya kahrawikung hanelah, ram thung e taminaw a la teh, ahnimanaw ni BAWIPA im dawk hoi siangpahrang a thokhai awh teh, lathueng lae longkha koe lahoi siangpahrang im dawk a thokhai awh. Hahoi siangpahrang teh bawitungkung dawk a tahung sak awh. <sup>21</sup> Hatdawkvah, ram thung e tami pueng teh a lunghawi awh. Tahloi hoi Athaliah a thei awh hnukkhu khopui teh a roun.

## 24

### *Judah siangpahrang Joash*

<sup>1</sup> Joash teh kum sari touh a pha navah, siangpahrang a taw. Jerusalem vah kum 40 touh a bawi. A manu e min teh Beersheba tami Zibiah doeh. <sup>2</sup> Vaihma Jehoiada a hring nah thung, Joash teh BAWIPA mithmu hnokahawi a sak. <sup>3</sup> Jehoiada ni a yu kahni touh a la pouh teh, ca tongpanaw hoi napuinaw a sak.

### *Im pathoupnae*

<sup>4</sup> Hathnukkhu BAWIPA im pathoup hanelah, Joash ni a kâcai. <sup>5</sup> Vaihmanaw hoi Levihnaw a kaw teh, Judah ram e khonaw koe cet awh nateh, kum tanguem Cathut im pathoup nahanelah, Isarelnaw koe tangka cawng awh. Karanglah tang kâroe awh, telah atipouh. Hatei, Levihnaw ni karanglah kâroe pouh hoeh.

<sup>6</sup> Hatdawkvah, siangpahrang ni vaihma bawi e Jehoiada a kaw teh ahni koe, bangkongmaw Levihnaw hah BAWIPA e san Mosi hoi Isarel rangpuinaw lawkpanuesaknae lukkareim hanelah cawng e tamuk hah judahnaw hoi Jerusalem e taminaw koe na dei pouh hoeh vaw. <sup>7</sup> Napui kathout Athaliah e capanaw ni, Cathut im koug a raphoe awh toe. Hahoi BAWIPA im dawk e hnopai pueng hai Baal koevah a poe awh toe, telah atipouh.

<sup>8</sup> Hatdawkvah, siangpahrang kâpoelaw patetlah thingkong buet touh a sak awh teh, BAWIPA im alawilah longkha teng a hruek awh. <sup>9</sup> Hahoi kahrawngum vah Cathut e san Mosi ni, Isarelnaw tamuk cawng hanelah a dei e hah, BAWIPA hanelah koug a thokhai nahan, Judah ram pueng hoi Jerusalem vah a pathang awh. <sup>10</sup> Hat navah, ukkungnaw hoi taminaw pueng teh a lunghawi awh teh, tangka teh a thokhai awh. Koug a cawng awh hoehnahlan vah, thingkong dawka ka paphnawn lah a pâseng awh toe. <sup>11</sup> Levihnaw ni siangpahrang kabawmkungnaw koe thingkong a thokhai awh teh, tangka moikapap ao tie a panue awh toreih teh, siangpahrang



e ca kathutkungnaw hoi vaihma bawi kabawmkungnaw ni, thingkong daw k e tangka a la awh hnukkhu, thingkong teh amae hmuen koe bout a hruek awh. Hottelah hnintangkuem a sak awh teh, tangka moikapap a pátung awh. <sup>12</sup> Hahoi siangpahrang Jehoiada ni BAWIPA e im daw k thaw katawkkungnaw kut daw k a poe awh. BAWIPA e im pathoup nahanelah, talung kadeinaw hoi kutsakkathoumnaw a hlai awh teh, BAWIPA e im pathoup nahanelah, sum hoi rahum kahlunthainaw hai a hlai awh.

<sup>13</sup> Hottelah thaw katawkkungnaw ni thapatho lahoi na taw k awh dawkvah, Cathut im teh apasueke boiboe lah a pathoup awh teh a caksak awh.

### *Joash lamthung kahmanae*

<sup>14</sup> A cum awh torei teh kacawie tangkanaw pueng teh, siangpahrang hoi Jehoiada koe a thokhai awh. Hote tangka hoi BAWIPA e im daw k thaw taw k nahanelah, hnopai, thueng nahanelah hnopai hoi pacen, sui hoi ngun manang naw lah a sak awh. Hottelah Jehoiada a hringyung thung teh BAWIPA im daw k hmaisawi thuengnae pout laipalah pou a sak awh.

<sup>15</sup> Hatei Jehoiada teh a matawng poung toun dawkvah a due. A due navah a kum 130 touh a pha. <sup>16</sup> Isarelnaw thung daw k Cathut hoi a im daw k hawinae a sak kecu daw k Devit khopui daw k siangpahrangnaw koe a pakawp awh.

<sup>17</sup> Jehoiada a due hnukkhu, Judah kahrawikungnaw a tho awh teh, siangpahrang koe a tabo awh. Hahoi siangpahrang ni ahnima law k a tarawi pouh. <sup>18</sup> Hottelah mintoenaw e Cathut im a hnamthun takhai awh teh, thingmeikaphaw k hoi meikaphaw k a baw k awh. Hahoi a yon awh dawkvah, Judahnaw hoi Jerusalem lathueng lungkhueknae a pha. <sup>19</sup> Hatei, BAWIPA koe bout bankhai hanelah, profetnaw a patoun teh a yonae a panue sak ei, ngai awh hoe h. <sup>20</sup> Hahoi vaihma Jehoiada e capa Zekhariah koe Cathut e Muitha teh a pha. Ahni ni rangpuinaw koe a kangdue teh ahnimouh koe, Cathut ni hettelah a dei, bangkongmaw hawinae na hmu awh hoe h hanelah BAWIPA e kâpoelawknaw na tapoe awh. BAWIPA na pahnavt awh dawkvah, ahni ni hai nangmouh na pahnavt awh telah atipouh.

<sup>21</sup> Hatdawkvah, ahni a taran awh teh, siangpahrang ni kâpoe e patetlah BAWIPA im kalupnae thung talung hoi koun g kadout lah a dei awh.

<sup>22</sup> Hottelah, siangpahrang Joash ni a na pa Jehoiada e lungpatawn nae pou k laipalah, a capa a thei pouh. A due han toteh, BAWIPA ni a pou k vaiteh moi a pathung han doeh telah a ti.

### *Joash duenae*

<sup>23</sup> Hote kum abaw navah, Siria ransanaw ni a tuk awh. Judah ram hoi Jerusalem a kâen awh teh, kahrawikungnaw pueng koun g a thei awh teh, Damaskas siangpahrang koe vah, lawphno pueng koun g a patawn awh.

<sup>24</sup> Judahnaw ni mintoenaw e BAWIPA Cathut a pahnavt kecu daw k tami moiapap eiteh, kayouna e Siria ransanaw e kut daw k BAWIPA ni a poe teh, Sirianaw ni Joash koe runae a pha sak . <sup>25</sup> Hahoi puenghoi a pataw lahunnah a ban takhai hnukkhu, amamouh letlang ni vaihma Jehoiada e thipaling kecu daw k a sannaw ni a kâcoun awh teh, ikhun daw k a i lahun nah a thei awh. Hatdawkvah, ahni teh a due. Devit khopui daw k a pakawp awh. Hatei, siangpahrangnaw e phu en koe pakawm awh hoe h.

<sup>26</sup> Ahni ka thet e tami teh Ammon napui Shimeath capa Zabad hoi Moab napui Shimrith capa Jehozabad doeh. <sup>27</sup> Hottelah a capanaw e kong hoi amae kong dei e naw hoi Cathut im kahawicalah bout pathoupnae kong



naw teh, khenhaw! siangpahrangnaw e kong caisaknae cauk dawk thut lah ao nahoehmaw. Hahoi, a yueng lah a capa Amaziah ni a bawi.

## 25

### *Judah siangpahrang Amaziah*

<sup>1</sup> Amaziah teh siangpahrang a tawk navah, kum 25 touh a pha. Jerusalem vah kum 29 touh a bawi teh, a manu teh Jerusalem tami Jehoaddin doeh. <sup>2</sup> BAWIPA e mithmu vah, hawinae a sak, hatei yuemkamcunae lungthin hoi nahoe. <sup>3</sup> Hahoi a uknaeram a cak torei teh, a na pa ka thet e sannaw hah a thei. <sup>4</sup> Hatei, a canaw teh thet hoe. Mosi e cauk dawk thut e, canaw kecu dawk a napanaw due hanelah awm hoe. Niteh, a napanaw kecu dawk canaw hai due hanelah awm hoe. Tami pueng mae yon kecu dawk due hanelah a o, telah BAWIPA ni ka a poe e patetlah a sak.

### *Edom hoi kâtuknae*

<sup>5</sup> Amaziah ni Judahnaw a pâkhueng teh Judah hoi Benjaminaw pueng a imthung lahoi 1000 ka uk e rahim thoseh, 100 touh hoi lathueng ka uk e rahim thoseh koug ao sak. Kum 20 touh hoi lathueng lae a touk teh, tahroe hoi saiphei ka hno thai ni teh taran ka tuk thai e 300, 000 touh a pha. <sup>6</sup> Isarel ram e tarankahawi ni teh athakaawme 100, 000 touh ngun tangka talen 100 touh hoi a hlai.

<sup>7</sup> Hatei ahni koe Cathut e tami buet touh a tho teh, Oe siangpahrang, Isarel ransanaw nang koe baw hanh naseh, bangkongtetpawiteh, BAWIPA teh Isarelnaw (Ephraim catounnaw mek touksin hoe) koelah awm hoe. <sup>8</sup> Hatei na cet pawiteh taranhawi laihoi tarantuknae hmuen koe kâroe telah nahoe pawiteh Cathut ni tarannaw hmalah na sung sakpayon vaih. Bangkongtetpawiteh, Cathut teh kabawphtainae hoi pahnawthainae thaonae a tawn telah atipouh.

<sup>9</sup> Amaziah ni Cathut e tami koevah, telah pawiteh, Isarel ransanaw koe talen 100 touh rip ka poe e hah bangtelamaw ka ti han telah atipouh. Cathut e tami ni, BAWIPA ni hethlak kapap bout na poe thai, telah atipouh.

<sup>10</sup> Hottelah, Amaziah ni Ephraim ram e ransanaw bout ban hanelah a kapek. Hatdawkvah, Judahnaw koe a lung pueng hoi a phuen teh, lungphuon laihoi a ban awh. <sup>11</sup> Amaziah ni tha a kâla teh, a taminaw a hrawi teh, palawi yawn dawk a cei awh teh, Seir catounnaw 10, 000 touh a thei awh. <sup>12</sup> Alouke 10, 000 touh teh, Judahnaw ni a hring lahoi a man awh teh lungsong koe a ceikhai awh teh, lungsong van hoi a tanawt awh teh, reppasei lah a bo awh.

<sup>13</sup> Hatei, Amaziah ni tarantuknae hmuen koe cei hoe hanelah a ban sak e ransanaw ni Samaria kho koehoi Bethhoron totouh Judah khonaw a tuk awh teh, tami 3, 000 touh a thei awh teh, lawphno moikapap a la awh.

<sup>14</sup> Hahoi Amaziah teh Edomnaw theinae koehoi a ban navah, Seir catounnaw e cathut a bankhai teh, a cathut hanelah a kangdue sak teh, a bawk teh hmuitui thuengnae a sak. <sup>15</sup> Hatdawkvah, Amaziah koe BAWIPA a lungkhuek teh, ahni koe profet a patoun teh, ahni koevah, na kut daw hoi a taminaw ka rungngang thai hoe e cathut bangkongmaw na tawng, telah atipouh.

<sup>16</sup> Hahoi ahni koe lawk a dei lahun nah, siangpahrang ni siangpahrang lawkcengkung lah na sak maw, duem awmh telah atipouh. Bangkongmaw na hringnae due sak hanelah na ngai. Hottelah, profet ni, Cathut ni



hettelah na sak teh, ka pouknae banglahai na noutna hoeh dawkvah, raphoe hanelah na noenae ka panue telah ati teh, duem ao.

### *Isarel ni Judah a tâ*

<sup>17</sup> Judah siangpahrang Amaziah ni pouknae a hei teh, Isarel siangpahrang Jehu capa lah kaawm e Jehoahaz capa Joash koe vah, tho haw minhmai kâhmo vaiteh, kâkhen roi haw sei telah tami a patoun. <sup>18</sup> Isarel siangpahrang ni Judah siangpahrang Amaziah koe vah, Lebanon mon pâkhing ni Lebanon mon e Sidar thingkung koevah, na canu hah ka capa e yu hanlah na poe telah lawk a thui. Hahoi Lebanon mon e sarang a tho teh, pâkhingnaw koug ka rawm lah a katin. <sup>19</sup> Nang ni khenhaw! Edom teh ka tâ telah na kâoup. Nama im duem awmh. Nama hoi Judah ram rawkphainae hah bangkongmaw na tâco sak han telah tami a patoun.

<sup>20</sup> Hatei, Amaziah ni banglahai noutna hoeh. Bangkongtetpawiteh, Edomnaw e cathut a tawng kecu dawkw, Judah ram teh a taran kut dawkw poe thai nahanelah Cathut ni a noe e doeh. <sup>21</sup> Hottelah Isarel siangpahrang Joash teh, a takhang teh, Judah siangpahrang Amaziah hoi Judah ram Bethshemesh vah minhmai kâhmo hoi kheh a kâkhet roi. <sup>22</sup> Hahoi Judah teh Isarel hmalah a sung teh tamipueng a ma im lah koug a yawng awh. <sup>23</sup> Isarel siangpahrang ni Judah siangpahrang Ahaziah e capa lah kaawm e Jehoahaz capa Amaziah teh Bethshemesh vah a man awh. Jerusalem lah a ceikhai teh, Jerusalem rapan teh, Ephraim rapan longkha koehoi, rapan takin longkha totouh dong 400 touh koug a raphoe pouh. <sup>24</sup> Hatnavah, sui, ngun hoi hnopai pueng Obededom hoi Cathut im dawkw e a hmu e hnopai pueng siangpahrang im dawkw a pâkhueng e hnopai naw hoi san lah man e hai, Samaria lah a bankhai.

### *Amaziah duenae*

<sup>25</sup> Judah siangpahrang Joash capa Amaziah teh, Isarel siangpahrang Jehoahaz capa Joash a due hnukkhu kum 15 touh a hring rah. <sup>26</sup> Amaziah thaw tawknaw dawkw hoi kaawm rae naw teh a kamtawng hoi a pout totouh, Judah hoi Isarel siangpahrangnaw e cauk dawkw thut lah awm hoeh namaw. <sup>27</sup> Hottelah Amaziah ni BAWIPA hnukkâbangnae koehoi a kâhat tahma Jerusalem vah arulaho a kamkhueng awh teh, Lakhish kho lah a yawng. Hateh, Lakhish kho lah tami a pâlei sak teh haw vah a thei awh, <sup>28</sup> A ro teh marang hoi a phu teh mintoenaw koe Judah khopui dawkw a pakawp awh.

## 26

### *Judah siangpahrang Uziah*

<sup>1</sup> Hahoi Judahnaw abuemlah ni kum 16 touh ka phat e Uziah hah a ceikhai awh teh a na pa Amaziah e yueng lah siangpahrang a tawkw sak awh. <sup>2</sup> Hote siangpahrang teh a na pa a due hnukkhu, Eloth kho a thawng teh, Judah ram thung bout kâen sak.

<sup>3</sup> Uziah siangpahrang a tawkw navah, kum 16 touh nueng a pha teh, Jerusalem vah kum 52 touh a bawi. A manu e min teh Jekoliah, Jerusalem tami doeh. <sup>4</sup> A na pa Amaziah ni a sak e pueng a sak van teh, BAWIPA mithmu vah hawinae a sak. <sup>5</sup> Ahni teh Cathut e kamnuenae kapanuekkung Zekhariah tueng navah, Cathut ka taket e lah ao. Hatdawkvah, BAWIPA a tawngnae tueng pueng nateh, Cathut ni yawhawi a pœ.

<sup>6</sup> Hahoi a kamthaw teh Filistinnaw a tuk. Gath rapan, Jabneh rapan hoi Asdod rapannaw a raphoe pouh. Asdod ram thung hoi Filistin ram thung



khonaw a thawng. <sup>7</sup> Cathut ni Filistinnaw Gurbaal kaawm e Arabianaw hoi Meunimnaw tuk hanelah ouk a kabawp. <sup>8</sup> Ammonnaw ni Uzziyah koevah tamuk ouk a poe awh. Hottelah a thao pounng dawkvah, Izip ram totouh a kamthang. <sup>9</sup> Uzziyah ni Jerusalem vah takin longkha hoi ayawn longkha hoi rapan longkawi nah koevah, imrasang a sak teh a kalup. <sup>10</sup> Thingeyiaw hoi imrasang a sak teh, tuikhu moikapap a tai. Bangkongtetpawiteh, saring moikapap a tawn. Ravo hoi tanghling dawkw law katawnnaw hoi takhakatawkkungnaw hah monruinaw hoi talai kahawi koe a hruek. Bangkongtetpawiteh, lawsak ka panki e lah a o

<sup>11</sup> Uzziyah ni ransa taran ka tuk thai e, siangpahrang e ransanaw kahrawikung Hananiah e kut rahim, cakathutkung Jeil hoi kahrawikung Mosi tinaw ni a pouk e patetlah ahuhu lah tarankatuknaw a tawn. <sup>12</sup> A tarankahawi ni teh athakaawme, imthung kahrawikung abuemlah 2,600 touh a pha. <sup>13</sup> Kâtawnnae rahim vah, ransa 307, 500 taranum siangpahrang kabawmkung tarantuk thaonae bahu hai ao. <sup>14</sup> Uzziyah ni ransanaw abuemlah hanelah saiphei, tahroe, sumlukhung, sumangki, palacung, tâyai hoi talungnaw hai a rakueng pouh. <sup>15</sup> Jerusalem vah imrasang hoi rapan takin tangkuem koe hruek e pala hoi talung kalenpounge pathui nahane, kutsakkathounnaw ni a sak e seh hai a sak. Hatdawkvah, a min teh kho tangkuem a kamthang. Tami a thakasai pounng totouh, kângairu lahoi kabawp e lah ao.

### *Uzziyah kâoupnae hoi reknae*

<sup>16</sup> Hatei a tha o hnukkhu ama rawk nahan totouh a pouknae a kârasang. BAWIPA e Bawkim thung, thuengnae khoungroe koe hmuitui thueng hanelah a kâen teh BAWIPA Cathut a taran teh kâ a poe. <sup>17</sup> Ahnie hnuk vaihma Azariah hoi tarankahawi pounng e BAWIPA e vaihma 80 touh a kâbang. <sup>18</sup> Siangpahrang Uzziyah teh a puen teh, ahni koe, Uzziyah BAWIPA hanelah hmuitui thuengnae heh na thaw nahoe. Hmuitui thuengnae teh vaihma Aron capanaw e thaw doeh. Hmuen kathoung koehoi tâcawt, na payon toe. BAWIPA Cathut koehoi barinae na coenae hai nahoe, telah atipouh awh. <sup>19</sup> Hatdawkvah, Uzziyah teh a lungkhuek. Hahoi hmuitui thueng nahanelah tongben a sin. Hottelah vaihmanaw koe a lungkhuek lahun nah BAWIPA im dawkw hmuitui thuengnae a kung koe vaihmanaw hmalah a tampa dawkw hrikbei a kamnue. <sup>20</sup> Vaihma bawi Azariah hoi vaihma alouke pueng ni a khet awh teh, khenhaw! a tampa dawkw hrikbei ao e hah a hmu awh dawkvah, hote hmuen koehoi alawilah a pâlei awh. Ama hai karanglah a tâco, bangkongtetpawiteh, BAWIPA ni a hem. <sup>21</sup> Hahoi siangpahrang Uzziyah teh a due totouh ka hrikbei e tami lah ao dawkvah, im aloucalah ao. Hahoi BAWIPA im dawkw kâen nahanelah kâpoe awh hoe toe.

<sup>22</sup> Uzziyah tawksaknae dawkw hoi kaawm rae naw kamtawng hoi apout totouh Amoz capa profet Isaiiah ni a thut. <sup>23</sup> Hottelah Uzziyah teh mintoenaw koe a kâhat teh siangpahrangnaw pakawpnae koe a na mintoenaw koe a pakawp awh. Ahni teh ka hrikbei e tami doeh, telah ati awh. Hahoi a capa Jotham teh ahnie yueng lah a bawi.

## 27

### *Judah siangpahrang Jotham*

<sup>1</sup> Jotham teh siangpahrang a tawkw navah, kum 25 touh a pha. Jerusalem vah kum 16 touh a bawi. A manu min teh Jerusha, Zadok e canu doeh. <sup>2</sup> A



na pa Uziah ni a sak e hno a sak van teh, BAWIPA e mithmu vah hawinae ouk a sak. BAWIPA e im dawk teh kâen hoe. Hatei khocanaw ni teh thoena a sak pouh awh rah. <sup>3</sup> BAWIPA im dawk lathueng lae longkha a sak. Hahoi Ophel rapan thung vah im moikapap a sak. <sup>4</sup> Judah ram monrui dawkhopui moikapap hoi ratu dawkh im kalennaw hoi imrasangnaw a sak. <sup>5</sup> Ammonnaw e siangpahrang a tuk teh a tâ. Hahoi Ammonnaw ni hote kum dawkh ngun tangka talen 100 touh hoi cakang tangthung 10, 000 touh hoi, catun tangthung 10, 000 touh a poe awh. Hottelah Ammonnaw ni kum pahni hoi kum pâthum nah hai a poe awh. <sup>6</sup> Jotham ni BAWIPA Cathut hmalah, lamthung kahawicalah a pouk dawkvah a thao.

<sup>7</sup> Hottelah Jotham tawksaknae dawkh e kaawm rae pueng hoi taran a tuknae naw pueng hoi khosaknae naw pueng teh, khenhaw! Isarel hoi Judah siangpahrangnaw e kong thutnae dawkvah thut lah ao. <sup>8</sup> Siangpahrang a tawkh navah, kum 25 touh a pha teh, Jerusalem vah kum 16 touh a bawi. <sup>9</sup> Jotham teh mintoenaw koe a i teh Devit khopui dawkh a pakawp awh. Hahoi a capa Ahaz ni a yueng lah a bawi.

## 28

<sup>1</sup> Ahaz teh siangpahrang a bawi na kum 20 touh boung a pha, Jerusalem kum 16 touh a uk. A na pa Devit patetlah BAWIPA mithmu vah hawinae sak hoe. <sup>2</sup> Isarel siangpahrang naw e lamthung a dawn teh Baal hanelah meikaphawknaw a sak. <sup>3</sup> Hinnom capa e thingyei yawn dawkh hmuithui hmai a sawi. BAWIPA ni Isarelnaw hmalah a pâlei e miphunnaw ni, panueththopounge hno ouk a sak awh e patetlah a canaw hmai hoi thuengnae a sak. <sup>4</sup> Hmuenrasang hoi monsomnaw hoi thingkung rahim tangkuem vah, thuengnae a sak teh hmuithui hmai a sawi.

### *Siria hoi Judah ni Isarel a tâ*

<sup>5</sup> Hatdawkvah, Cathut ni Siria siangpahrang kut dawkh a poe. A tuk awh teh a taminaw moikapap san lah a man awh teh, Damaskas lah a ceikhai awh. Isarel siangpahrang kut dawkh hai a poe teh ahni ni moikapap a thei. <sup>6</sup> Hahoi Remaliah capa Pekah ni Judah ram dawkh hnin touh dawkh 120, 000 a thei, abuemlah hoi tami tarankahawinaw seng doeh. Bangkongtetpawiteh, mintoenaw e BAWIPA Cathut a hnoun awh dawkh doeh.

<sup>7</sup> Hahoi Ephraim tami athakaawme Zikhri ni siangpahrang capa Maa-seiah hoi imthung kahrawikung Azrikam hoi Elkanah, siangpahrang kabawmkungnaw a thei awh. <sup>8</sup> Isarelnaw ni a hmaunawnggha 200, 000 touh a manu, a capanaw hoi a canunaw san lah a hrawi awh. Hno moikapap a lawp awh teh Samaria lah a ceikhai awh.

### *Isarel ni san lah a man e naw bout a bankhai*

<sup>9</sup> Hatei, hote hmuen koe BAWIPA e profet ao teh, a min teh Oded doeh. Samaria lahoi ka tho e ransanaw hmalah a cei teh, ahnimouh koe, khenhaw! na mintoenaw e BAWIPA Cathut teh Judahnaw koe a lungkhuek dawkvah, nangmae kut dawkh na poe awh. <sup>10</sup> Hahoi Judah hoi Jerusalem e taminaw sannu sanpa lah coung sak hanelah na noe awh. Hatei, namamouh hai BAWIPA Cathut hmalah yonpen lah letlang na o awh van nahoehmaw. <sup>11</sup> Hatdawkvah, ka lawkh tarawi awh nateh, na hmaunawnggha san lah na man e naw hah ban sak awh leih. Bangkongtetpawiteh, BAWIPA e lungkhuek kamannae teh nangmae lathueng vah ao telah atipouh.



<sup>12</sup> Hahoi, Ephraim kahrawikung, Johanan capa Azriah, Meshillemoth capa Berekhiah, Shallum capa Hezekiah, Hadlai capa Amasa, naw ni tarantuknae koehoi kathonaw hah kangdue laihoi a ngang awh. <sup>13</sup> Ahnimouh koe sannaw na kâen thai awh mahoe. Bangkongtetpawiteh, BAWIPA lungkhuek sak awh toe. Mamae yonnae hoi yonpennae hah thapsin hanlah bout na noe awh. Yonpennae a len poung toe, Isarelhaw koe lungkhuek kamannae ao telah atipouh awh.

<sup>14</sup> Hottelah ransanaw ni kahrawikungnaw hoi tamimayanaw e hmalah san hoi lawphnonaw hah a cei takhai awh. <sup>15</sup> Hahoi min a kaw e naw pueng a thaw awh teh, sannaw hah a ceikhai awh teh, lawphno a la awh e hnicunaw hah, tawngtai lah kaawm e naw hah a khohna sak awh. Khokkhawm a khawm sak awh teh, canei a poe awh teh satui a hluk awh. Tami thakayounnaw hah la daw koe a kâcui sak awh teh, a hmaunawngnanaw onae koe Jeriko kho tie samtue khopui daw koe a thak awh teh, ahnimouh teh Samaria kho lah a ban awh.

### *Siria ni Judah kabawm ngai hoe*

<sup>16</sup> Hatnae tueng daw siangpahrang Ahaz ni Siria siangpahrang koevah, ama kabawp hanelah tami a patoun. <sup>17</sup> Edomnaw ni Judahnaw a tuk awh teh, san lah bout a man awh. <sup>18</sup> Filistinnaw ni hai a rahim lae ram hoi akalae Judah ram, Bethshemesh, Aijalon, Gederoth, Sokoh, hoi khotenaw; Timnah hoi khotenaw; Gimzo hoi khotenaw a la awh teh, hote hmuen daw koe ao sin awh. <sup>19</sup> Isarel siangpahrang Ahaz kecu daw koe BAWIPA ni Judah hah rahim lah a pabo. Bangkongtetpawiteh, ahni ni Judahnaw e pouknae a raphoe pouh teh, BAWIPA hanelah yuemkamcu hoe lah ao sak. <sup>20</sup> Siria siangpahrang Tiglathpileser hai ahni koe a tho teh kabawm laipalah lungrei hoe a thai sak. <sup>21</sup> Ahaz ni BAWIPA im, siangpahrang im hoi kahrawikungnaw kho hoi hnopai a la teh, Siria siangpahrang a poe, Hatei kabawm ngai kalawn hoe.

### *Ahaz lamphennae hoi duenae*

<sup>22</sup> Khopouk a deng nahaiyah siangpahrang Ahaz teh, BAWIPA koe yuemkamcu hoe lah hoe hoe ao. Hethateh, Ahaz siangpahrang e a counghae doeh. <sup>23</sup> Ama ka tâ e Damaskas e cathut koe thuengnae a sak teh, Siria siangpahrang cathutnaw ni a kabawp awh dawkvah, na kabawp van hanelah ahnimouh koe thuengnae sak hanelah ao telah a ti. <sup>24</sup> Ahaz ni Cathut im daw koe hnopai pueng a pâkhueng teh, reprep koug a dei. BAWIPA im thonaw koug a taren teh, Jerusalem takin pueng koe thuengnae khoungroe a sak. <sup>25</sup> Judah ram kho moikapap koe cathut alouknaw hanlah hmuittui sawi nahane hmuenrasang a sak teh, a na mintoenaw e Cathut hah a lungkhuek sak. <sup>26</sup> A tawksaknae thung daw koe kaawm rae pueng hoi a khosaknae pueng kamtawng hoi apout totouh, khenhaw! Judah hoi Isarel siangpahrangnaw e lairui thutnae daw koe thut lah ao. <sup>27</sup> Ahaz teh a na mintoenaw koe a i teh, Jerusalem khopui daw koe a pakawp awh. Hatei, Isarel siangpahrangnaw e phuen daw koe nahoe. Hahoi a capa Hezekiah ni a yueng lah a bawi.

## 29

### *Judah siangpahrang Hezekiah*

<sup>1</sup> Hezekiah teh siangpahrang a taw koe navah kum 25 touh a pha teh Jerusalem kum 29 touh a uk. <sup>2</sup> A na pa Devit e a sak e pueng a sak teh, BAWIPA e mithmu vah hawinae a sak.



<sup>3</sup> Siangpahrang a tawknae kum thapa yung pasueknae dawkvah, BAWIPA im takhangnaw a paawng teh a pathoup. <sup>4</sup> Vaihmanaw hoi Levihnaw a hrawi teh, kanitholah hmuén akawnae koe a pâkhueng teh, <sup>5</sup> ahnimouh koevah, nangmouh Levihnaw ka lawk thai awh haw. Na mamanaw hmaloe kamthoung awh haw. Na mintoenaw e BAWIPA Cathut im thoung sak awh nateh, hmuén kathoung dawkw e kakhinnaw hah tâkhawng awh. <sup>6</sup> Mamae mintoenaw ni kâ a tapoe awh teh, BAWIPA Cathut hmalah hawihoeahnae a sak awh teh, a pahnawt awh. BAWIPA onae hmuén hah a hnamthun takhai awh. <sup>7</sup> Longkha takhang a khan awh. Hmaimim a padue awh teh, Isarel Cathut hmuén kathoung dawkw hmuítui hai sawi awh hoe. Hmaisawi thuengnae hai sak awh hoe. <sup>8</sup> Hatdawkvah, BAWIPA lungkhueknae teh Judahnaw hoi Jerusalem taminaw e lathueng a pha. Na mit hoi na hmu awh e patetlah ram tangkuem hoi hmuén tangkuem vah, rucatnae, lungpuenna, hoi pathoena lah na coung awh han. <sup>9</sup> Khenhaw! maimae mintoenaw teh, tahloi hoi a due awh teh, maimae capanaw hoi canunaw hoi yunaw teh san a toung awh. <sup>10</sup> Hatdawkvah, puenghoi a lungkhueknae a roum thai nahanelah, BAWIPA Isarel Cathut koe lawkkamnae sak hanelah ka noe e doeh. <sup>11</sup> Ka canaw, rap awm awh hanh leih. Bangkongtetpawiteh, nangmouh teh BAWIPA ni, a hmalah na kangdue awh vaiteh, thaw taww hane hoi ama koevah hmuítui sawi hanelah na rawi awh e doeh, telah atipouh.

<sup>12</sup> Hat torei teh, Levih tami Amasa capa Mahath, Kohath tami Azariah capa Joel, Merari capanaw dawkw e Addi capa Kish, Jehallelel capa Azariah, Gershon tami Zimmah capa Joah, Joab capa Eden. <sup>13</sup> Elizaphan capanaw thung dawkw e Shimri hoi Jewel, Asaph capa thung dawkw e Zekhariah hoi Mattaniah. <sup>14</sup> Heman capa thung dawkw e Jehiel hoi Shimei, Jeduthun capa thung dawkw e Shemaiah hoi Uzziel, ahnimanaw a kangdue awh.

<sup>15</sup> A hmaunawngaha a pâkhueng awh teh, a kamthoung awh. BAWIPA e lawk hoi kâvan lah siangpahrang ni kâ a poe e patetlah BAWIPA imthoung thoung sak hanelah a kâen awh.

<sup>16</sup> Hottelah vaihmanaw teh thoung sak hanelah BAWIPA im a thung lae rakhan dawkw a kâen awh. BAWIPA im dawkw kakhin e a hmuennaw pueng hah BAWIPA im hmalah a tâcokhai awh teh, Levihnaw ni a la awh teh Kidron palang lah a ceikhai awh. <sup>17</sup> Thapa yung pasuek, apasuek hnin a kamtawng awh teh, hote thapa hnin taroe hnin vah, BAWIPA im alawilah totouh, a thoung sak awh. Hathnukkhu, BAWIPA im hnin taroe touh thung a thoung sak awh teh, thapa yung pasuek e hnin hlaitaruk hnin a cum awh.

<sup>18</sup> Hottelah siangpahrang Hezekiah koe, siangpahrang im a kâen awh teh, BAWIPA im e hmaisawi thuengnae khoungroe hoi hawvah, hno e hnopai pueng vaiyei pâhungnae caboi hoi hnopai pueng koug ka thoung sak awh toe. <sup>19</sup> Hahoi siangpahrang Ahaz a bawi navah, yonnae a sak teh, a hnoun e hnopai pueng hai koug ka thoung sak awh. Khenhaw! BAWIPA e thuengnae khoungroe hmalah ao awh, telah atipouh awh.

### *Hezekiah ni bawkim bout a pathoup*

<sup>20</sup> Hatnavah, siangpahrang Hezekiah teh amom a thaw teh, khothung e kahrawikungnaw a kaw teh, BAWIPA im dawkw a cei. <sup>21</sup> Uknaeram hoi hmuén kathoung Judah hanelah yon thueng nahane maitotan sari, tutan sari, tuca sari touh hoi hmaetan sari touh a ceikhai. Aron capa vaihmanaw hah BAWIPA e thuengnae khoungroe koe thuengnae sak hanelah kâ a poe. <sup>22</sup> Maitotannaw a thei awh teh, vaihma ni a thipaling a la teh, thuengnae khoungroe dawkw a kathek. Hahoi tutannaw hai a thei awh



teh, a thipaling hah thuengnae khoungröe dawk a kathek awh. Hahoi tucanaw hai a thei awh teh, a thipaling hah thuengnae khoungröe dawk a kathek awh. <sup>23</sup> Hmaetannaw teh yon thueng nahanlah siangpahrang hoi rangpuinaw e hmalah a thokhai awh teh, a lathueng vah a kut a toun sin awh. <sup>24</sup> Vaihmanaw ni a thei awh teh, thipaling hoi Isarelnaw pueng e yontha nahanelah thuengnae khoungröe dawk yon thuengnae a sak. Isarelnaw abuemlah hanelah hmaisawi thuengnae hoi yon thueng nahanelah siangpahrang ni kâ a poe.

<sup>25</sup> Devit siangpahrang hoi ahnimae profet hah profet Nathan e kâpoelawk patetlah BAWIPA im dawk Levihnaw teh cekak, tamawi hoi ratoung, tumkhawng hanelah a hruek. Bangkongtetpawiteh, kâpoelawk teh BAWIPA ni profetnaw hno lahohi a poe e doeh. <sup>26</sup> Levihnaw teh Devit ni sak e tumkhawngnaw hoi vaihmanaw teh mongkanaw patuep hoi a kangdue awh.

<sup>27</sup> Hezekiah ni thuengnae khoungröe dawk hmaisawi thuengnae thueng hanelah, kâ a poe. Hahoi hmaisawi thuengnae a kamtawng awh navah, mongka hoi Devit ni a sak e tumkhawng khawng laihoi, BAWIPA a pholen awh. <sup>28</sup> Rangpuinaw ni Cathut a bawk awh teh, la kasaknaw ni la a sak awh. Mongka kauengnaw ni mongka a ueng awh. Hmaisawi thuengnae abaw hoehroukrak hottelah kâhat laipalah a sak awh. <sup>29</sup> Hahoi, thuengnae abaw toteh, siangpahrang hoi ahni koe kaawm e pueng ni tabo laihoi Cathut a bawk awh. <sup>30</sup> Siangpahrang Hezekiah hoi kahrawikungnaw Levihnaw hah Devit hoi profet Asaph ni a phueng e pholen la sak hanlah kâ a poe. Hahoi lunghawinae hoi pholennae la sak laihoi a tabo awh teh Cathut a bawk awh.

<sup>31</sup> Hottelah, Hezekiah ni, BAWIPA hanelah na thoung awh toe, tho awh haw, BAWIPA im dawk thueng hane hoi lunghawi lawk dei thueng nahanelah poe awh haw, telah atipouh. <sup>32</sup> Hahoi rangpuinaw ni sathei thueng hane hoi lunghawi lawk dei thueng hane a poe awh. Poe han a lung ka tho pueng ni a poe e naw pueng teh, maitotan 70, tutan 100 touh hoi tuca 200 touh a pha. <sup>33</sup> Hno poe e abuemlah maitotan 600, tutan 3000 touh a pha.

<sup>34</sup> Hatei, vaihmanaw ayounca dawkvah, hmaisawi thuengnae sathei be thet thai awh hoeh. Hatdawkvah, a hmaunawngna Levihnaw ni pâbaw hoehroukrak, vaihmanaw kamthoung totouh a kabawp awh. Levihnaw teh vaihmanaw hlak kamthoung hane lungthin a lan awh. <sup>35</sup> Hmaisawi thuengnae apap poung dawkvah, hmaisawi thuengnae pueng koe, roun thuengnae sathei thaw hoi nei thueng nahane hai apap poung. Hottelah BAWIPA im dawk thaw tawknae hah a khuekhawcalah a tawk awh.

<sup>36</sup> Rangpuinaw hanelah Cathut ni a rakueng pouh e hno kecu dawk Hezekiah hoi taminaw pueng teh puenghoi a lunghawi awh. Bangkongtetpawiteh, pouk laipalah ka tho e hno doeh.

## 30

### *Hezekiah ni ceitakhai paw i a sak*

<sup>1</sup> Hahoi Hezekiah ni Isarel ram hoi Judah ramnaw dawk a tami a patoun teh, Ephraim hoi Manasseh ram dawk hoi Isarel BAWIPA Cathut hanlah ceitakhai paw i sak hanelah Jerusalem khovah BAWIPA im dawk tho hanlah ca a patawn. <sup>2</sup> Bangkongtetpawiteh, siangpahrang hoi kabawmkungnaw hoi taminaw pueng ni thapa yung pahni dawk ceitakhai paw i sak hanlah a rawi awh. <sup>3</sup> Hatnae tueng nah vaihma



kamthounghaw pap hoeh rah. Jerusalem vah tami pueng a kamkhueng thai awh hoeh rah dawkvah, paw hah sak thai awh hoeh. <sup>4</sup> A pouk awh e hno hah siangpahrang hoi tami pueng pouknae dawkgai e lah ao. <sup>5</sup> Hatnavah, Isarel ram pueng, Beersheba hoi Dan totouh Jerusalem vah tho vaiteh, Isarel BAWIPA Cathut hanlah ceitakhai paw sak hanelah kamthang pathang hanlah a sak sak awh. Bangkongtetpawiteh, hottelah sakhoehnae a saw toe.

<sup>6</sup> Hottelah, ca kaphawtnaw ni siangpahrang hoi kabawmkungnaw e ca hah a sin teh Isarel hoi Judah ram a deng totouh rei hanlah siangpahrang kâpoe e patetlah a tâco awh. Isarelnaw teh Abraham, Isak hoi Isarel BAWIPA Cathut koe ban awh. Hat pawiteh, Siria siangpahrang kut dawkgai hoi ka hlout ni teh kaawm rae naw koe a ban awh han. <sup>7</sup> Nangmouh teh na mintoenaw hoi na hmaunawngah, a na mintoenaw e BAWIPA Cathut koe yonnae a sak awh teh, a hnam ka thun takhai e taminaw na hmu awh e patetlah awh hanh. <sup>8</sup> Na mintoenaw patetlah lungpata hoi awh awh hanh. Hatei, BAWIPA koe kâhnawng awh nateh, yungyoe hanlah kathounge hmuen kathoung dawkgai hoi BAWIPA na Cathut thaw hah tawkgai awh. Hat boipawiteh, puenghoi a lungkhueknae teh nangmouh koe a roum han. <sup>9</sup> BAWIPA koe lah na kamlang awh pawiteh, na hmaunawngahanaw hoi na canaw hah san lah kamannaw ni pahren awh vaiteh, hete ram dawkgai a tho awh han. Bangkongtetpawiteh, BAWIPA na Cathut teh pahren lungmanae lahoi kakawi e lah ao. Ama koelah na kamlang awh pawiteh, na cettakhai roeroe mahoehtelah ati awh.

<sup>10</sup> Hottelah ca kathaknaw teh, Ephraim ram, Manasseh ram, hoi Zebulun ram totouh, kho touh hnukkuh kho touh a cei awh. Hateiteh, ahnimouh ni a panuikhai awh teh, a ka pacekpahlek awh. <sup>11</sup> Hateiteh, Asher taminaw, Manasseh taminaw hoi Zebulun tami tangawn ni lawkpui poung lah a pouk awh teh, Jerusalem lah a tho awh.

<sup>12</sup> BAWIPA lawk dawkgai siangpahrang hoi kahrawikungnaw e kâpoe tarawi hoi lungthin suetalah a tawn awh nahan, Cathut kut teh Judah lathueng vah ao.

<sup>13</sup> Hottelah thapa yung pahni navah, tonphuenhoehe paw sak hanelah Jerusalem vah tami moikapap a kamkhueng awh. <sup>14</sup> Ahnimouh ni a thaw awh teh, Jerusalem kaawm e thuengnae khoungroenaw thohseh, hmuithui sawinae khoungroe dawkgai kaawm e naw pueng thohseh, a la awh teh Kidron tui dawkgai a tâkhawng awh. <sup>15</sup> Hottelah thapa yung pahni, hnin hlaipali nah ceitakhai paw hanlah a thei awh. Vaihmanaw hoi Levihnaw a kaya awh dawkvah, a kâthoung sak awh teh, hote thuengnae hah BAWIPA im dawkgai a kâenkhai awh. <sup>16</sup> Cathut e tami Mosi e kâlawk patetlah amamae hmuen dawkgai lengkaleng a kangdue awh. Hote vaihmanaw ni, Levihnaw koehoi e thi hah a kathek awh. <sup>17</sup> Bangkongtetpawiteh, taminaw thung kamthoung hoeh rae moi ao. Hatdawkvah, BAWIPA hanlah kamthoung hanlah, kathounghoehnaw e thaw dawkgai Levi hiphunnaw ni ceitakhai paw sak han lah a thei. <sup>18</sup> Bangkongtetpawiteh, Ephraim tami, Manasseh tami, Issakhar tami, hoi Zebulun tami moikapapnaw hah thoung awh hoeh. Hateiteh, phung laipalah ceitakhai paw rawca teh a ca awh. <sup>19</sup> Hatei, Hezekiah ni, tami pueng a lungthin hoi Cathut, a na mintoenaw e Jehovah Cathut tawng hanlah kâraukungnaw pueng hmuen kathoung phung patetlah kamthoung awh hoeh nakunghai, kahawi e BAWIPA ni yontha awh naseh, telah ahnimouh hanlah a ratoum pouh. <sup>20</sup> BAWIPA ni Hezekiah e ratoumnae hah a thai pouh teh taminaw pueng hah a dam sak. <sup>21</sup> Jerusalem kaawm e Isarelnaw ni, tonphuenhoehe pawiteh hnin sari



touh thung lunghawicalah a hno awh. Hahoi Levihnaw hoi vaihmanaw ni ratoum hoi BAWIPA a pholen awh. Hottelah BAWIPA hah la hoi hnin touh hnukkhu hnin touh a pholen awh. <sup>22</sup> Hezekiah ni BAWIPA kahawicalah ka panuek e kacangkhaikung Levihnaw pueng hah tha a poe. Hottelah, a na mintoenaw e BAWIPA Cathut koe yon ngaithoumnae hei hoi roun thuengnae pueng hoi hnin sari touh thung rawca a ca awh.

<sup>23</sup> Tami pueng ni hnin sari touh pawl bout to hanlah a kâra kueng awh dawkvah, lunghawi hoi hnin sari touh pawl bout a to awh.

<sup>24</sup> Bangkongtetpawiteh, Judah siangpahrang Hezekiah ni taminaw hah maitotan 1, 000, tu 7, 000 touh thei hanlah a poe. Kahrawikungnaw nihai, tami pueng hah maitotan 1, 000 hoi tu 10, 000 a poe awh teh, vaihma moikapap ni a kâthoung sak awh. <sup>25</sup> Hottelah, Judahnaw pueng ni vaihmanaw hoi Levihnaw hoi Isarel ram kathonaw pueng hoi, miphun alouke e Isarel ram hoi kathonaw hoi, Judah ram kaawmnaw hoi a lunghawi awh. <sup>26</sup> Hottelah lunghawinae kalen poung Jerusalem vah ao. Bangkongtetpawiteh, Isarel siangpahrang Devit capa Solomon koehoi hot patet e Jerusalem vah awm boihoe.

<sup>27</sup> Hottelah vaihma hoi Levihnaw ni a thaw awh teh, taminaw pueng yawhawinae a poe awh. A lawk a ngai pouh teh, a ratoum awh e teh kathounge kalvan vah a pha.

## 31

### *Hezekiah thakâlanae*

<sup>1</sup> Hote hnonaw pueng koung a sak hoiyah, hawvah kaawm e Isarelnaw pueng ni, Judah ram pueng hoi, Benjamin ram hoi, Ephraim ram hoi, Manasseh ram kaawm e talung ung e hah reprep koung a hem awh. Thing meikaphawk hah a tâtueng awh teh, hmuenrasang hoi thuengnae hah koung a raphoe hoehroukrak, Judah ram kho tangkuem dawk a cei awh. Hahoi Isarel catounnaw hah amamae ram hoi kho dawk lengkaleng a ban awh.

<sup>2</sup> Hezekiah ni vaihmanaw hoi Levihnaw hah amamae ahuhu lahoi tami pueng e vaihma hoi Levihnaw ni amamae thaw lengkaleng dawk hmaisawi thuengnae hoi roun thuengnae sathei thuengnae ka poe hane hoi thaw katawnaw hoi lunghawilawk ka dei hane hoi, BAWIPA onae longkha ka ring hane hu hah a sak pouh. <sup>3</sup> BAWIPA e kâlawk dawk kaawm e patetlah amom lae hoi tangmin lae, hmaisawi thuengnae hoi sabbath hoi thapareinae hoi pawl hnin hanelah, siangpahrang ni a tawn e dawk hoi a poe pouh awh. <sup>4</sup> Hothloilah, Jerusalem e tami hah BAWIPA e kâlawk dawkvah tha kâla thai nahanelah, vaihmanaw hoi Levihnaw hah a ham poe awh van nahanlah kâ a poe. <sup>5</sup> Kâ poe e hah koung a pathang awh tahma hoi, Isarel catounnaw ni cakang aluepaw, hoi misur hoi satu, khoitui hoi law dawk e pung hra pung touh hah a poe awh. <sup>6</sup> Isarel hoi Judah catoun, Judah ram khote lah kaawmnaw pueng ni, maito hoi tu hra touh dawk buet touh BAWIPA Cathut ni coe hanelah, a poe awh teh, moikapap a pâkhueng awh. <sup>7</sup> Thapa yung pâthumnae dawk pâkhueng hane a kamtawng awh teh, thapa yung sarinae dawk pâkhueng e thaw a cum awh. <sup>8</sup> Hezekiah hoi kahrawikungnaw ni a hmu awh toreih teh, BAWIPA hoi a tami Isarelnaw hah a oup awh.

<sup>9</sup> Hottelah Hezekiah ni hno a pâkhueng e kong dawkvah vaihma hoi Levihnaw la a pacei. <sup>10</sup> Zadok tami, vaihma bawi Azariah ni a pathung teh, tami ni BAWIPA im daw hno poe e kamtawng totouh hoi kakhoutlah meng a ca awh teh, moikapap a cawi rah. BAWIPA ni a taminaw yawhawih



pou na poe teh, hete kacawie naw hah ca awh e dawk hoi kacawie naw doeh telah ati.

<sup>11</sup> Hahoi Hezekiah ni BAWIPA im dawk hnoim sak hanelah kâ a poe teh a sak awh. <sup>12</sup> Hahoi hno poe e hoi hra touh dawk buet touh poe e hoi Cathut ni coe e naw hah yuemkamculah a kâenkhai awh. Kahrawikungnaw teh, Levih tami Konaniah doeh. A hmaunawnggha Shimei teh kabawm e lah ao. <sup>13</sup> Konaniah hoi a hmaunawnggha Shimei kut rahim vah, siangpahrang Hezekiah hoi Cathut im dawk e kahrawikung Azariah e kâ poe e lahoi ka khenyawnkung lah Jehiel, Azaziah, Nahath, Asahel, Jerimoth, Jozabad, Eliel, Ismakhiah, Mahath, hoi Benaiah tinaw hah ao awh.

<sup>14</sup> Hahoi Levih tami Imnah capa Kore, Kanitholae, longkha ka ring e teh, Cathut koevah ama lungthocalah hoi hno poe e kakhenyawnkung hoi Cathut hanelah hno poe e hoi hno kathoung kareikung lah ao.

<sup>15</sup> Amae a rahim vah, vaihma a onae khonaw dawk, Eden, Meniamin, Jeshua, Shemaiah, Amariah, Shekaniah tinaw hah ao awh. Hotnaw ni a hmaunawngghanaw ahuhu lahoi kathoung kalennaw koevah a coe awh e hah a rei awh. <sup>16</sup> A tâconae dawkvah thut e tongpa kum thum hoi a lathueng lae, hnintangkuem BAWIPA im dawk thaw tawk hane a tawn e, amamae ahu e phung patetlah ouk a ceinae naw touksin laipalah, <sup>17</sup> a napanaw e imthung patetlah a tâconae lahoi thut e vaihma koevah, kâkapeknae hoi a thaw tawk e lengkaleng dawk hoi Levih tami kum 30 totouh hoi a lathueng lae naw pueng koehoi, <sup>18</sup> a tâconae dawk hoi thut e naw pueng koe, a camonaw hoi, a yunaw hoi a canu capanaw, ahu abuemlahoi a rei awh. Bangkongtetpawiteh, yuemkamcunae hoi thoungnae dawkvah a kamthoung awh. <sup>19</sup> Vaihma Aron capanaw e khopui tengpam khonaw koe kaawm e khopui tangkuem vah, vaihmanaw thung hoi tongpa pueng a ham rei hanelah a min lahoi pakhum e naw hoi Levihnaw a tâconae cayin dawk ka bawk e pueng a ham rei hanelah, acawilah pouk pouh e lah ao.

<sup>20</sup> Hot patetlah Judah ram pueng dawk Hezekiah ni a sak BAWIPA Cathut e hmaitung vah kahawi e hoi kalan e hoi yuemkamcu e hno hah ouk a sak . <sup>21</sup> Cathut im e thaw tawknae kong dawk thoseh, kâlawk dawk thoseh, kâpoelawknaw dawk thoseh, Cathut a tawngnae dawk thoseh, a sak e pueng dawk lungthin abuemlahoi a sak dawkvah, a lamcawn pouh.

## 32

### *Sennacherib ni Judah a muk*

<sup>1</sup> Yuemkamcu lah hno a sak awh hnukkhu, Assiria siangpahrang Sennacherib hah a tho teh, Judah ram lah a kâen. Kalup e khopui la hanelah noe lahoi a kalup awh. <sup>2</sup> Sennacherib hah a tho teh, Jerusalem tuk han a noe e hah Hezekiah ni a thai toteh, <sup>3</sup> kho alawilah kaawm e tuinaw tapuet hanelah, kahrawikungnaw hoi athakaawme taminaw koe pouknae a hei teh ahni hah a kabawp awh. <sup>4</sup> Hot patetlah tami moikapap a kamkhueng awh teh, tuinaw pueng hoi kho dawk ka lawng e naw hah a paka awh. Bangkongmaw, Assiria siangpahrang a kâen vaiteh, tui moikapap a tawn han, telah a ti. <sup>5</sup> Hottelah hoi kalupnae katimnaw pueng tha a patho awh teh a sak awh. Imrasang hah alawilah kalupnae hoi a sak. Devit kho e Millo rapan a caksak awh teh, senehmaica hoi bahling moikapap lah a sak.

<sup>6</sup> Tarantuknae koe kahrawikung kacuenaw a rawi awh. Khopui longkha koe a kamkhueng sak awh. <sup>7</sup> Thasai lahoi tarankahawilah awm awh



haw. Assiria siangpahrang hoi ahni koe kaawmnaw takhek awh hanh. Na lungpout awh hanh. Bangkongtetpawiteh, maimouh koelah kampang e teh, ahnimouh koelah kampang e hlak a thasaihawn. <sup>8</sup> Ahnimouh koe kampang e teh takthai ransa lah ao. Na kabawm hane hoi na ka tuk khai hane maimouh koe lah ka kampang e teh Cathut doeh telah thapoena lawk a dei. Taminaw ni Judah siangpahrang Hezekiah ni a dei e daw k a kâuep awh.

<sup>9</sup> Hathnukkhu Assiria siangpahrang Sennacherib ni ama hoi a ransanaw teh, Lakhish vah ao awh. Judah siangpahrang Hezekiah hoi Jerusalem e Judah taminaw pueng koe vah, <sup>10</sup> Assiria siangpahrang Sennacherib hettelah a dei, Jerusalem la hanelah bangkongmaw na yuem awh hoeh. <sup>11</sup> Hezekiah ni, BAWIPA Cathut ni Assiria siangpahrang kut daw k hoi na rungngang han telah vonhlan tui kahran laihoi na due awh nahane daw k na pasawt awh nahoehmaw. <sup>12</sup> Hezekiah ni doeh Cathut e hmuenrasang hoi khoungroenaw a pahnawt teh, khoungroe buet touh e hmlah nangmouh ni na baw k awh han. Hote khoungroe van vah, hmutui hah hmai na sawi awh han telah Judah khoca, Jerusalem khocanaw hah kâ poe hoeh namaw.

<sup>13</sup> Kai hoi mintoenaw ni ram tangkuem ka sak awh e na panuek awh hoeh maw. Bangpatetlae miphun Cathut ni nakunghai, ka kut thung hoi a ram hah a rungngang thai yaw maw. <sup>14</sup> Bangpatete miphun cathut maw, ka mintoenaw ni a raphoe awh hoeh e, ka kut thung hoi ka hlout e hoi a rungngang thai e ouk kaawm. Na Cathut ni hai ka kut thung hoi na rungngang thai han namaw. <sup>15</sup> Hatdawkvah, Hezekiah ni na dum awh nahanh seh. Hot patetlah na tacuek awh nahanh seh. Ahni teh yuem awh hanh. Bangkongtetpawiteh, bangpatet lae miphun cathut hoi, bangpatet e uknaeram cathut nihai, ka kut thung hoi ka mintoenaw e kut thung hoi na ka rungngang thai hane awm boihoeh. Bangtelamaw, nangmae cathut ni bout na rungngang thai awh han rah, telah Jerusalem vah tami a patoun.

<sup>16</sup> A taminaw ni hothlak hoe kacaihnawn lah BAWIPA Cathut hoi a san Hezekiah kong daw k kathout lahoi lawk a dei awh. <sup>17</sup> Isarel BAWIPA Cathut a lungkhuek sak hane hoi dudam lahoi ca a thut. Ram pueng miphun pueng cathutnaw ni ka kut thung hoi a taminaw a rungngang thai hoeh e patetlah Hezekiah Cathut nihai, ka kut daw k hoi a taminaw rungngang thai mahoe telah a ti.

<sup>18</sup> Khopui a la thai awh nahan, a pakhi awh teh a lungpuen sak awh nahan Jerusalem kalupnae koe kaawmnaw hah Hebru lawk lahoi kacaipounglah pou a hram sin awh. <sup>19</sup> Jerusalem Cathut teh, tami kut hoi sak e talai cathut patetlah a dudam awh.

### *Sennacherib tânae hoi duenae*

<sup>20</sup> Siangpahrang Hezekiah hoi Amoz capa profet Isaiah niteh, haw e hno daw k a ratoum teh kalvan kaawm e hah a kaw. <sup>21</sup> BAWIPA ni kalvantami a patoun teh, ama ni Assiria siangpahrang a roenae koe e tarankahawi ni teh athakaawme taminaw hoi kahrawikung kacuenaw hah a thei awh. Hottelaho minhmai ka mathout lahoi a ram koelah a ban. A cathut im vah a cei lahun nah, a thung hoi e a canaw roeroe ni tahloi hoi a thei awh. <sup>22</sup> Hot patetlah BAWIPA ni Hezekiah hoi Jerusalem taminaw teh Assiria siangpahrang Sennacherib kut daw k hoi alouke tami kut daw k hoi a rungngang teh a tengpam e naw thung hoi a ring awh.

### *Hezekiah kârahnoumnae*



<sup>23</sup> Tami moikapap ni Jerusalem vah BAWIPA hanlah hno a sin awh. Aphu kaawm poung e hnaw hah Judah siangpahrang Hezekiah koe vah a poe awh. Hatnae tueng hoi teh, miphun pueng e mithmu vah oup e lah ao. <sup>24</sup> Hatnae tueng dawh Hezekiah teh meimei kadout lah a pataw. BAWIPA koe vah a ratum, lawk a dei pouh teh mitnoutnae a poe. <sup>25</sup> Hatei teh Hezekiah ni ahni hanelah hawinae sak ngai hoe. Bangkongtetpawiteh, a kâoup. Hatdawkvah, ama hoi Judah tami hoi Jerusalem lathueng lungkhueknae a pha. <sup>26</sup> Hezekiah ni a lungthin a kâoupnae hah pankângai lahoi amahoima Jerusalem taminaw hoi a kârahnom awh. Hottelah Hezekiah a hring nathing vah, BAWIPA lungkhueknae hah a lathueng phat pouh boihoe toe.

### *Hezekiah a bawinae hoi barinae*

<sup>27</sup> Hezekiah teh hnopai moikapap a tawn dawkvah a bari awh. Ngun, sui, talung aphu kaawm, hmuitui, bahling, kahawi e hnopai hrueknae im hai a sak. <sup>28</sup> Capainaw, misurtui, satui, pätungnae im hai a sak. Hahoi saring phunkuep hoi tu hrueknae imnaw hah a sak. <sup>29</sup> Khoha a thawng teh, tuhu hoi maitohu moikapap a tawn. Bangkongtetpawiteh, Cathut ni a tawnta sak. <sup>30</sup> Hezekiah ni Gihon palang hah a pauem teh, Devit khopui kanîloumlah a lawng sak. Hottelah Hezekiah teh a sak nah tangkuem a lamcawn. <sup>31</sup> Babilon bawinaw ni laicei a patoun teh a ram e kângairu hno a sak e a paceinae dawkvah, a lungthin dawh kaawm e pueng a panue thai awh nahan Cathut ni a tanouk teh, hnamthun takhai.

### *Hezekiah duenae*

<sup>32</sup> Hezekiah tawksaknae pueng dawh hoi kaawm rae hawinae a sak e naw teh, khenhaw! Amoz capa profet Isaia kamnuenae cauk, Judah Isarel siangpahrangnaw setouknae dawh a thut awh nahoehmaw. <sup>33</sup> Hezekiah teh, a na mintoenaw koe a i teh, Devit capanaw e phuen dawh, kahawipoung e tangkom koe a pakawp awh. Judahnaw hoi Jerusalem taminaw ni Hezekiah a due toteh a sungren sak awh. A capa Manasseh ni a yueng lah a uk.

## 33

### *Judah siangpahrang Manasseh*

<sup>1</sup> Manasseh teh siangpahrang a tawh nah kum 12 touh a pha teh, Jerusalem vah kum 35 touh a bawi. <sup>2</sup> Hahoi, BAWIPA mithmu vah hawioehnae, Isarel naw e hmalah BAWIPA ni a pâlei e naw ni a sak e panuetho e hno hah a sak. <sup>3</sup> Bangkongtetpawiteh, a na pa Hezekiah ni raphoe e hmuenrasang hah bout a pathoup, Baal hanelah thuengnae a sak. Thingmeikaphawknaw kalvan kaawm e naw hai a bawh awh teh thaw a tawh pouh awh. <sup>4</sup> Jerusalem vah ka min yungyoe ao han, BAWIPA ni a dei e hmuen BAWIPA im dawh khongrooe hah a sak. <sup>5</sup> BAWIPA e im thongma kahni touh dawh kalvan kaawm e naw pueng hanelah thuengnae a sak. <sup>6</sup> Amae capa hah Hinnom yawn dawh hmaisawi thuengnae lah a sak. Kahraikawnae hoi ânnae hah a hno teh, khueyuenaw, hmauinaw haiyah kâ a poe. BAWIPA lungkhuek sak nahanlah a hmaitung vah yonnae a sak. <sup>7</sup> Cathut ni Devit hoi a capa Solomon koe, hete im Jerusalem kho Isarel miphunnaw thung hoi ka rawi e naw koe ka min teh yungyoe hoi ka o sak han. <sup>8</sup> Kaie kâlawnaw hoi kâpoelawnaw pueng, phunglamnaw hoi tarawi hane naw, Mosi hno lahoi kâpoe e naw hah na tarawi pawiteh, mintoenaw koe ka poe tangcoung e ram thung hoi Isarel naw e khok teh



ka cetsak mahoe, telah a dei e, Cathut e im dawkvah ama ni sak e meikaphawk hah a ta. <sup>9</sup> Manasseh ni Judah taminaw hoi Jerusalem e taminaw hah yonnae a sak sak. Hat toteh, BAWIPA ni Isarelnaw e hmalah a raphoe e miphunnaw hlak yonnae hoe kapap lah a sak awh.

### *Manasseh pankângainae*

<sup>10</sup> BAWIPA ni Manasseh hoi a taminaw koevah, Lawk ouk a dei ei, banglahai ngai awh hoe. <sup>11</sup> Hatdawkvah, BAWIPA ni Assiria ransa kahrawikungnaw a patoun teh, Manasseh hah pâkhing um a man awh teh, sumbawtarui hoi a pâkhi awh teh, Babilon lah a hrawi awh. <sup>12</sup> Puenghoi kângairu lah ao toteh, BAWIPA hah a tawng teh, mintoenaw e Cathut hmalah puenghoi a kârahnoum. <sup>13</sup> A ratoumnae teh, BAWIPA ni a thai pouh teh, Jerusalem kho amae uknaeram lah bout a hrawi. Hahoi Manasseh ni Jehovah teh Cathut doeh tie hah a panue.

<sup>14</sup> Hahoi teh Devit khopui alawilae Gihon kaniloumlae ayawn koe tanga longkha kêennae totouh rapan a sak. Ophel rapan teh rasang poung lah a sak. Judah kho rapan katawnnaw koe tarankahawi e kahrawikungnaw a hruék.

<sup>15</sup> Hahoi BAWIPA im daw k kaawm e ramlouk e cathutnaw hoi meikaphawknaw pueng hah a takhoe. BAWIPA e im rahim hoi Jerusalem e thuengnae a sak e naw pueng hah kho alawilah he a tâkhawng. <sup>16</sup> Hahoi BAWIPA hanlah thuengnae khoungroe a sak teh, roun thuengnae hoi lunghawilawkdeinae a sak teh, Judahnaw hah Isarelnaw e BAWIPA Cathut e thaw taw k hanelah kâ a poe. <sup>17</sup> Taminaw teh hmuen rasang poung koe thuengnae a sak awh eiteh, amamae BAWIPA Cathut koe doeh a sak awh.

### *Manasseh duenae*

<sup>18</sup> Manasseh tawksaknae thung daw k hoi kaawm rae naw, Cathut koevah a ratoumnae hoi Isarel BAWIPA Cathut min lahoi profet ni ahni koevah lawk a dei e dawkvah, khenhaw. Isarel siangpahrangnaw e lairui cauk daw k thut lah ao nahoehmaw.

<sup>19</sup> A ratoumnae hoi Cathut ni a lungmanae kong hoi a kârahnoum hoehnahlan yonnae pueng hoi hmuenrasang a sak teh, thingmeikaphawk a sak e naw pueng, khenhaw! Hozai cauk daw k thut lah ao. <sup>20</sup> Hahoi Manasseh teh a mintoenaw koe a i teh, ama im vah a pakawp. Hahoi a capa Ammon ni a yueng lah a uk.

### *Judah siangpahrang Ammon*

<sup>21</sup> Ammon siangpahrang a taw k nah 22 touh a pha teh, Jerusalem vah kum 2 touh a bawi. <sup>22</sup> A na pa Manasseh ni a sak e patetlah BAWIPA e hmaitung hawihoehnae a sak. A na pa Manasseh ni a sak e meikaphawknaw koevah, Ammon ni thuengnae a sak teh, thaw a taw k pouh. <sup>23</sup> A na pa Manasseh ni a kârahnoum e patetlah BAWIPA hmaitung kârahnoum ngai hoe. Ammon teh hoehoe a payon. <sup>24</sup> A sannaw ni a youk awh teh, ama im vah a thei awh. <sup>25</sup> Hatei Ammon ka youk e taminaw teh khocanaw ni he a thei awh. Hahoi khocanaw ni a capa Josiah teh a yueng lah siangpahrang a taw k sak awh.

## 34

### *Judah siangpahrang Josiah*

<sup>1</sup> Josiah teh siangpahrang a taw k navah, kum 8 touh a pha teh, Jerusalem vah kum 31 touh a bawi. <sup>2</sup> Hote siangpahrang teh BAWIPA hmaitung



hawinae hah a sak teh, avoilah aranglah phen laipalah a na min Devit e lamthung a dawn.

<sup>3</sup> Bangkongtetpawiteh, a bawi nah kum 8 touh a pha teh, camo lah ao raei, a na min Devit e Cathut hah tawngnae a kamtawng. Hahoi, a bawinae kum 12 touh a pha navah, Judah ram hoi Jerusalem e hmuenrasangnaw hoi thingmeikaphawk hoi sakhlawn e meikaphawknaw hoi thukhlawn e meikaphawknaw hah kOUNg a takhoe. <sup>4</sup> Baal thuengnae khOUNgroenaw hah a mithmu vah a raphoe teh, khOUNgroe van pâhung e meikaphawknaw hah a tâtueng teh, thingmeikaphawknaw hah vitkatip lah a phawm teh, hot koe thuengnae ouk kasaknaw e phuen dawK a rabawK. <sup>5</sup> Vaihmahu hru hah ahnimae thuengnae khOUNgroe van hmai a sawi teh, Judah ram hoi Jerusalem hah a thOUNg sak. <sup>6</sup> Hot patetvanlah, Manasseh, Ephraim, Simeon, Naphtali kho totouh a sak. <sup>7</sup> Thuengnae khOUNgroenaw hah a raphoe teh, thingmeikaphawknaw hoi sakhlawn e meikaphawknaw hah kOUNg a phawm. Isarel ram e meikaphawK pueng kOUNg a tâtueng teh Jerusalem lah a ban.

### *Hilkiah ni kâlawk cauk a hmu*

<sup>8</sup> Hahoi a bawinae kum 18 navah, a ram hoi bawkim a thOUNg sak nah kum vah, Azaliah capa Shaphan, kho ukkung Maaseiah, Jehoahaz capa ca kathutkung Joab hah BAWIPA Cathut im pathoup hanelah a patoun awh.

<sup>9</sup> Vaihma kacue Hilkiah koe a pha awh toteh, longkha karingkung Levih taminaw ni, Manasseh, Ephraim kaawm rae Isarelnaw pueng, Judah, Benjaminaw pueng hoi, Jerusalem vah a bankhai awh e tangka a pâtung awh e heh Cathut im vah a thokhai awh teh, ahnimouh koe a poe awh.

<sup>10</sup> Hottelah BAWIPA im dawK thaw katawkkungnaw kut dawK palang a poe awh teh, BAWIPA im dawK thawtawkkungnaw hoi im kapathoupkung, hoi im kasakkungnaw hah a poe awh. <sup>11</sup> Judah siangpahrangnaw ni a raphoe awh e im pathoup nahanelah, talung dêi e hoi pangkheknaW, patung, palOUNg, thing ran nahane hoi, kutsakkathoumnaw hoi im kasakkungnaw hah a poe awh.

<sup>12</sup> Taminaw ni thaw hah yuemkamcu lah a tawK awh. Khenyawnkungnaw teh Merari capanaw thUNG dawK e Levih tami Jahath hoi Obadiah hoi, Kohath capanaw thUNG dawK e Zekhariah hoi Meshullam hoi, Levih tami alouke tumkhawng katumthainaw hah doeh. <sup>13</sup> Hnokari kaphawtnaw khenyawnkung lahai ao teh, thaw katawkkungnaw ni tawK hane thaw kareikung lahai ao awh. Levihnaw tangawn teh cakathutkungnaw hoi longkha karingkung lah ao awh.

<sup>14</sup> BAWIPA im dawK a thokhai awh e tangka hah a rabawK awh toteh, vaihma Hilkiah ni Mosi hno lahoi poe e BAWIPA kâlawk cauk hah a hmu.

<sup>15</sup> Hilkiah ni cakathutkung Shaphan koevah, BAWIPA im dawK kâlawk cauk ka hmu awh telah ati. Hahoi, Hilkiah ni cauk hah Shaphan a poe.

<sup>16</sup> Shaphan ni cauk hah siangpahrang koe a ceikhai teh, na sannaw ni sak hanelah pouk e pueng hah a sak awh. <sup>17</sup> BAWIPA im dawK kaawm e tangka a rabawK awh toteh, kahrawikung hoi khenyawnkungnaw hah a poe awh telah lawK a thai sak.

<sup>18</sup> Hahoi cakathutkung Shaphan ni, vaihma Hilkiah ni cauk na poe telah siangpahrang koe a dei pou teh, Shaphan ni siangpahrang hmalah a touk.

<sup>19</sup> Hahoi hettelah doeh. Siangpahrang ni kâlawk dawK e lawK a thai toteh, a hni hah a ravei. <sup>20</sup> Siangpahrang ni Hilkiah, Shaphan capa Ahikam, Mikah capa Abdon, ca kathutkung Shaphan hoi siangpahrang e san Asaiah tinaw hah kâ a poe teh, <sup>21</sup> cet awh nateh cauk na hmunaE kong dawK kai



hoi Isarel hoi Judah vah kaawm rae baw hanelah BAWIPA koe kâhet awh haw. Bangkongtetpawiteh, BAWIPA puenghoi lungkhueknae teh maimouh lathueng awi lah ao toe. Bangkongtetpawiteh, hete cauk dawkw, tarawi hanelah thut e pueng heh mintoenaw ni BAWIPA e lawkw tarawi awh hoeh toe telah ati.

### *Huldah e lawkw pâpho*

<sup>22</sup> Hottelah siangpahrang ni kâ a poe e naw hoi Hilkiah teh hnicu hrueknae khenyawnkung Hasrah capa Tokhath capa Shallum e yu profet napui Huldah koe a cei awh ( Ahni teh Jerusalem kho vah a o). Hateh hote kong hah a dei pouh awh. <sup>23</sup> Ahnimouh ni Isarel BAWIPA Cathut ni hettelah a dei. Kai koe na ka patoun e koe dei pouh awh nateh, <sup>24</sup> BAWIPA ni hettelah a dei, khenhaw! hete hmuen hoi a thung kaawmnaw koe thoenae ka tho sak han. Judah siangpahrang hmalah a touk awh e cauk thung vah kaawm e thoebonae pueng hoi, <sup>25</sup> amamae kut dawkw hoi letlang ka lungkhuek sak nahanelah, hnam na thun takhai awh teh, alouke cathutnaw hanelah hmuittui a sawi awh kecu dawkwah, hete hmuen koe ka lungkhueknae hah awi lah ao vaiteh, roum sak lah awm mahoeht telah ati. <sup>26</sup> Hateiteh, BAWIPA koe kâhei hanelah nangmouh na kapatouunkung Judah siangpahrang koevah hettelah dei pouh awh. Isarel BAWIPA Cathut ni hottelah a dei, hote na thai tangcoung e lawkw dawkw, <sup>27</sup> hete hmuen hoi a thung kaawmnaw tarannae lawkw hah na thai toteh, na lunghin a nem teh, Cathut hmalah na kârahnoum teh, ka hmalah na kârahnoumsak teh, na khohna hah na ravei teh, ka hmalah na ka dawkwah, kai ni hai na lawkw hah ka thai toe telah BAWIPA ni ati. <sup>28</sup> Khenhaw! na mintoenaw koe na ceisak vaiteh, ahnimouh koe karoumcalah na cei vaiteh, het hmuen hoi a thung kaawmnaw koe ka tho sak hane thonaie pueng hah teh, na mit ni hmawt mahoeht telah dei pouh awh, telah a dei pouh. Hahoi siangpahrang koe hote lawkw teh ka thokhai awh.

### *Lawkkam a ca sak*

<sup>29</sup> Hottelah siangpahrang ni tami a patoun teh Judah ram hoi Jerusalem e kacuenaw pueng hah a pâkhueng. <sup>30</sup> Hahoi siangpahrang hoi Judahnaw pueng, Jerusalem taminaw pueng, vaihmanaw hoi, Levihnaw hoi, taminaw pueng, kathoung kalen pueng, BAWIPA im vah a cei awh. BAWIPA dawkw a hmu awh e lawkkamnae lawkw dawkw e lawknaw pueng hah, a hnâthainae koe a touk awh. <sup>31</sup> Hahoi siangpahrang teh amae hmuen koe a kangdue teh, cauk dawkw thut e lawkkamnaw hah a caksak teh a lunghin buemlah, muitha buemlah hoi BAWIPA tarawi hane hoi kâpoelawknaw hoi lawkpanuesaknae hoi a phunglawknaw tarawi hanelah BAWIPA koe lawkkamnae a sak.

<sup>32</sup> Jerusalem hoi Benjaminaw pueng teh hot patetlah o hanelah lawkw a kam awh. Hahoi, Jerusalem khocanaw ni Cathut, a na mintoenaw e Cathut lawkkam boiboe lah a sak awh.

<sup>33</sup> Josiah ni Isarel ram dawkw a kâen sak e thung dawkw panuetho e hno pueng teh, koung a tâkhawng awh. Isarel ram dawkw kaawm e pueng hah Cathut thaw a tawkw sak. Hahoi a na mintoenaw e BAWIPA Cathut hanlah a hring nah thung phen takhai awh hoeh toe.

## 35

### *Josiah ni ceitakhai paw i sak*

<sup>1</sup> Josiah ni Jerusalem vah BAWIPA hanlah ceitakhai paw i sak. Thapa yung pasuek, hnin hlaipali hnin vah, ceitakhai paw i hanlah a thei.



<sup>2</sup> Vaihma hah thaw a poe teh, BAWIPA im dawk thaw tawk hanlah tha a poe. <sup>3</sup> Isarelnaw kacangkhaikung lah Cathut hanlah hmoun e Levihnaw koe, Isarel siangpahrang Devit capa Solomon ni im a sak e dawk kathounge thingkong hah hrueng awh leih. Na loungh hoi hrawm hanlah ngai mahoe hoi. BAWIPA na Cathut hoi a tami Isarelnaw thaw hah tawk awh leih.

<sup>4</sup> Isarel siangpahrang Devit hoi a capa ni thut e patetlah imthungkhu kahrawikungnaw hoi kamcu lah ahuhu lahoi o hanlah kâra kueng awh.

<sup>5</sup> Na hmaunawngghanaw imthungkhu kahrawikung hoi ka kamcu lah Levi haminaw hanlah hmuen ao e patetlah kathounge hmuen koe awh awh.

<sup>6</sup> Ceitakhai pawu thuengnae hah thet awh nateh, kâthoung sak awh. Mosi hno laihoi BAWIPA ni a dei e patetlah sak thai awh nahan na hmaunawngghanaw hanlah kâra kueng awh.

<sup>7</sup> Josiah ni hote hmuen koe kaawm e taminaw han hoi ceitakhai pawu koe kaawm e tami pueng hanelah, saring dawk tu hoi hmaeca 30, 000 touh hoi maitotan 3, 000 touh a poe awh. Hotnaw teh siangpahrang hnopai daw k hoi e doeh.

<sup>8</sup> Hahoi, kahrawikungnaw ni ma lungtho lahoi tamipueng hane, vaihma hane, hoi Levihnaw hanelah a poe awh. Cathut im kaukung Hilkiah Zekhariah, Jehiel tinaw ni ceitakhai pawu hanelah tu hoi hmaeca 2,600 touh hoi maitotan 300 touh vaihma koe a poe awh. <sup>9</sup> Konaniah hoi a nawnggha Shemaiah, Nathanel hoi Levihnaw kaukungnaw e kaukung Hashabiah, Jeiel, Jozabad tinaw nihai, ceitakhai pawu hanlah Levihnaw hah tu hoi hmaeca 5, 000 touh hoi maitotan 500 touh a poe awh.

<sup>10</sup> Hottelah thaw tawknae teh a kâra kueng awh teh, siangpahrang ni kâpoe e patetlah vaihmanaw teh amae hmuen koevah, a kangdue awh teh, Levihnaw haiyah ahuhu lahoi a kangdue awh. <sup>11</sup> Hote ceitakhai pawu hanlah a thei awh teh, vaihmanaw ni a thi hah a kathek awh. Levihnaw ni a pho hah a ho awh. <sup>12</sup> Mosi cauk daw k kaawm e patetlah a imthungkhu lahoi lengkaleng thaw a rei e patetlah BAWIPA koe poe hanelah hmaisawi han satheinaw hoi maitonaw hah a kârei awh. <sup>13</sup> Hote ceitakhai pawu ca hanelah, aphung patetlah kahmin lah a pâeng awh. Hateiteh, poe e moi kathounge hah hlaam, arai kaawm hoeh e hlaam hoi sum hlaam daw k a thawng awh teh, taminaw koe a ceikhai awh. <sup>14</sup> Hathnukkhu, amamouh hoi vaihmanaw hanlah bout a kâra kueng awh. Bangkongtetpawiteh, Aron e capa vaihmanaw teh hmaisawi thuengnae khoungroe daw k moi thaw hah poe hoi tangmin totouh a taw k awh. Hatdawkvah, Levihnaw ni amamouh hoi Aron e capa vaihmanaw hanlah bout rakung hanlah a ngainae doeh.

<sup>15</sup> Hahoi, Devit, Asaph, Heman hoi siangpahrang profet Jeduthun naw ni kâ poe e patetlah la ka sak e Asaph capanaw teh amamae hmuen daw k a kangdue awh. Hote longkha karingkungnaw teh, longkha tangkuem koevah, ao awh. Bangkongtetpawiteh, a hmaunawnggha Levihnaw ni a rakung pouh dawkvah, a thaw hah ceitakhai awh han ngai hoeh.

<sup>16</sup> Hottelah, siangpahrang Josiah ni kâ poe e patetlah ceitakhai pawu sak han hoi, BAWIPA e khoungroe daw k hmaisawi thuengnae poe hanelah hote hnin daw k BAWIPA thaw tawknae hnoung pueng hah a rakung awh.

<sup>17</sup> Hote hmuen koe kaawm e Isarelnaw ni hote hnin daw k ceitakhai pawu hah a sak awh. Tonphuenhoehe vaiyei pawu haiyah hnin sari touh thung a hno awh. <sup>18</sup> Profet Samuel se nahoi Isarel ram vah hot patetlah ceitakhai pawu sak awh boihoe. Isarel siangpahrang apinihai Josiah, vaihmanaw, Levihnaw hoi Judah tami pueng hoi Isarelnaw ni a sak e patetlah sak awh boihoe. <sup>19</sup> Josiah a bawinae kum 18 nah ceitakhai pawiteh a sak awh.



### *Josiah tarantuknae koe a due*

<sup>20</sup> Hathnukkhu hoi Josiah ni bawkim be a pathoup hnukkhu, Izip siangpahrang Neko teh, Kakhemish tuk hanelah Euphrates palang a cei teh Josiah ni a tuk. <sup>21</sup> Hatei, ahni ni nang Judah siangpahrang kai hoi nang bangmaw kâtuk hanelah kaawm. Sahnin vah nang na tuk hanelah, ka tho hoeh bo. Ka tuk lahun e tuk hanelah doeh ka tho. Cathut ni na huerang hanelah kâ na poe. Kai koe lah kampang e Cathut hah taran hanh. Na raphoe payon vaih telah laicei a patoun.

<sup>22</sup> Hatei, Josiah ni ban takhai hane ngai hoeh. A tuk thai nahan a meilam a kâthung teh, Cathut e a pahni dawk hoi ka tâcawt e Neko ni dei e hah tarawi ngai pouh hoeh. Megiddo tanghling vah, ahnimouh tuk hanelah a cei. <sup>23</sup> Licung kapatuemnaw ni Josiah hah a kâ awh teh siangpahrang ni a sannaw koevah, kai hah na cetkhai awh leih. Bangkongtetpawiteh, hmâ puenghoi ka ca toe telah a ti.

<sup>24</sup> A sannaw ni leng dawk hoi a la awh teh, alouke leng dawk a hruek awh. Jerusalem a ceikhai awh teh, a due hnukkhu a na mintoenaw e phuen dawk a pakawp awh. Judahnaw hoi Jerusalem kaawm e naw ni Josiah a khui awh. <sup>25</sup> Jeremiah ni Josiah hah a khui. La ka sak e napui tongpa naw ni a na minca totouh Josiah khuinae a dei awh rah. Isarel ram dawk phung a tawn awh teh, khenhaw! khuinae la dawkvah a thut awh.

<sup>26</sup> Josiah a kâroenae dawk hoi kaawm rae pueng BAWIPA e kâlawk dawk ao e patetlah hnokahawi ka sak e, <sup>27</sup> ahmaloe hoi a hnukteng e hai khenhaw! Isarel siangpahrang hoi Judah siangpahrang lairui thutnae cauk dawk thut e lah ao.

## 36

### *Judah siangpahrang Jehoahaz*

<sup>1</sup> Hahoi, khocanaw ni Josiah capa Jehoahaz hah a ceikhai awh teh, Jerusalem vah a na pa yueng lah siangpahrang a tawk sak awh.

<sup>2</sup> Jehoahaz teh siangpahrang a tawk nah kum 23 touh a pha teh, Jerusalem vah thapa yung thum touh a bawi. <sup>3</sup> Izip siangpahrang ni Jerusalem siangpahrang lah onae a kâhat sak. A ram heh ngun tangka talen 100 touh hoi sui talen 4 touh a rawng sak.

### *Judah siangpahrang Jehoiakim*

<sup>4</sup> Izip siangpahrang ni a nawngna Eliakim teh Judah hoi Jerusalem siangpahrang lah a tawk sak. A min teh Jehoiakim telah a thung pouh teh, Neko ni a nawngna Jehoahaz teh Izip ram a ceikhai. <sup>5</sup> Jehoiakim teh siangpahrang a tawk nah, kum 25 touh a pha teh, Jerusalem vah kum 11 touh a bawi. BAWIPA Cathut e hmaitung hawihoeahnae ouk a sak. <sup>6</sup> Babilon siangpahrang Nebukhadnezar ni ahni tuk hanelah a tho teh, Babilon lah ceikhai hanelah, sum bawtarui hoi a ka tek. <sup>7</sup> Nebukhadnezar ni BAWIPA e im dawk e hnopainaw hah Babilon lah a ceikhai awh teh, Babilon e a Cathut e im dawk a ta.

<sup>8</sup> Jehoiakim kâroenae kaawm rae naw pueng hoi, panuethatho e hno a sak e naw hoi, a khosaknae naw teh khenhaw! Isarel hoi Judah siangpahrangnaw e lairui cauk dawk thut lah ao. Hahoi a capa Jehoiakim ni a yueng lah let a bawi.

### *Jehoiakim*

<sup>9</sup> Jehoiakim teh siangpahrang a tawk nah kum 18 touh a pha. Jerusalem vah thapa yung thum touh hoi hnin hra touh a bawi. BAWIPA e



hmaitung hawihoeahnae ouk a sak. <sup>10</sup> Hote kum abaw toteh, siangpahrang Nebukhadnezar ni a tami a poun teh ahni teh, BAWIPA im dawk e hnopai kahawi poung e hoi Babilon lah a hrawi awh. A nawngha Zedekiah hah Judah ram hoi Jerusalem vah, siangpahrang a tawk sak awh.

### *Judah siangpahrang Zedekiah*

<sup>11</sup> Zedekiah teh siangpahrang a tawk nah, kum 21 touh a pha. Jerusalem vah kum 11 touh a uk. <sup>12</sup> BAWIPA Cathut hmaitung kahawihoehe hno a sak teh, BAWIPA lawk ka dei e profet Jeremiah e hmalah kârahnoum ngai hoeh.

### *Jerusalem rawknae*

<sup>13</sup> Cathut min lahoi lawk ka kam kung siangpahrang Nebukhadnezar taranlahoi taran a thaw. A lung a pata sak teh, Isarel BAWIPA Cathut koe lah, kamlang hoeh nahanlah a lungtang sak. <sup>14</sup> Vaihmanaw pueng hoi, tamimayanaw pueng nihai, Cathut ka panuek hoeh naw ni a sak awh e patet e panuetkatho poung e hno hah a sak awh. Jerusalem kathoung sak e BAWIPA im hai a khin sak awh. <sup>15</sup> A na mintoenaw e BAWIPA Cathut ni kâhruetcuetnae poe hanelah amom a thaw teh, patounenaw hah ahnimouh koe a patoun. Bangkongtetpawiteh, tamimaya hoi a onae hmuen hai a pouk. <sup>16</sup> Hateiteh, ahnimouh taranlahoi BAWIPA lungkhuek sak teh, a roun hoeh totouh Cathut e patounenaw hah a panuikhai awh teh, a lawk hah a dudam awh teh, a profet hah a dudam awh. <sup>17</sup> Hatdawkvah, Khaldean siangpahrang hah ahnimouh koe a matheng sak teh, ahni ni thoundounnaw hah hmuen kathoung koe a thei. Thoundoun tanga hoi hnamthun e matawng totouh pahrennae tawn laipalah ahnimae kut daw koug a poe. <sup>18</sup> Cathut im daw koug aawm e hlaamnaw pueng kathoung kalen hoi BAWIPA im daw koug ta e hnopai pueng, siangpahrang hno pâtung e hoi kahrawikungnaw e hno pâtung e totouh, Babilon vah a ceikhai. <sup>19</sup> Cathut e im hai hmai a sawi awh teh, Jerusalem kalupnae hai koug a raphoe awh. Haw e im kalenpui hah hmai a sawi awh teh, haw e hlaam kahawihnawn kaawm e pueng hai, koug a raphoe awh.

<sup>20</sup> Persia uknaeram ni a uk hoehnahlan totouh, ama hoi a capa san lah a coung roinae hmuen koe, tahloi daw koug hoi ka hlout e hah Babilon lah a ceikhai awh teh, <sup>21</sup> Isarel ram ni sabbath hnin a lunghawi hoehroukrak, Jeremiah pahni hno lahoi, BAWIPA e lawk akuep nahanelah doeh. Kum 70 kuepsaknae hnin dawkvah, tami kingdi lah onae tueng pueng daw ram ni sabbath hah a ya han.

### *Sairus lawk pâphonae*

<sup>22</sup> Hat toteh, siangpahrang Sairus a bawi hoi Jeremiah e pahni hno lahoi BAWIPA lawk a kuep thai nahanelah, uknaeram pueng daw koug pathang hane hoi thut hane hai BAWIPA ni Persia siangpahrang Sairus lungthin hah a tho sak. <sup>23</sup> Persia siangpahrang Sairus ni hettelah a dei. Talai siangpahrang uknaeramnaw pueng teh, kalvan e BAWIPA Cathut ni na poe toe. Hahoi Judah ram daw koug aawm e Jerusalem vah im sak pouh hanelah kâ na poe. Amae taminaw pueng koe apimaw kaawm. BAWIPA Cathut hah ahni koe aawm naseh, luen sak awh.



## EZRA (Ezra)

### *Babilon santoung a poutnae*

<sup>1</sup> Persia Siangpahrang Sairus a bawi kum pasuek nah, profet Jeremiah e pahni hno lahoi BAWIPA e lawk akuep nahanelah, a uknaeramnaw pueng dawк pathang hanelah, BAWIPA ni Sairus e lungthung a tahrue pouh.

<sup>2</sup> Persia siangpahrang Sairus ni a dei e teh, talai uknaeramnaw pueng teh, kalvan kaawm e BAWIPA Cathut ni kai koe na poe toe. Hatdawkvah, Judah ram Jerusalem vah im sak pouh hanelah kâ na poe. <sup>3</sup> Nangmouh thung dawк apimaw amae tami lah na kaawm awh. Ahni koe Cathut ni rei awm khai naseh. Judah ram Jerusalem vah cei vaiteh, Isarelnaw e BAWIPA Cathut e im hah sak naseh. Jerusalem vah kaawm e teh BAWIPA doeh. <sup>4</sup> Hmuen alouklouk lah kho kasaknaw ni, amamouh aonae koehoi Jerusalem e Cathut im hanelah a lungtho laihoi poe awh e hloilah ngun, tangka hoi sui, hnopai hoi saringnaw hoi kabawm awh naseh atipouh.

<sup>5</sup> Hahoi teh, Judah hoi Benjamin miphun imthung kahrawikungnaw hoi vaihmanaw, Levihnaw ni Jerusalem e BAWIPA im sak hanelah Cathut ni lungthin dawк thaw tawк pouh e taminaw pueng hoi a kamthaw awh.

<sup>6</sup> Amamouh lungtho lahoi poe e dei laipalah, atengpam kaawmnaw ni hai ngun hnopai, sui, saringnaw hoi aphu kaawm poung e hnouh hoi kabawp awh. <sup>7</sup> Siangpahrang Sairus hoi Nebukhadnezar ni BAWIPA e im dawк e hnopai Jerusalem hoi a sin teh, Cathut e im dawк a ta e naw, hah he a la pouh. <sup>8</sup> Hote hnopainaw teh, Persia siangpahrang Sairus ni hno karingkung Mithredath kut dawк hoi a la sak teh Judah kahrawikung Sheshbazzar koevah be a parei hnukkhu vah a poe.

<sup>9</sup> Hote hno kaawmnaw teh, sui 30, ngun 1,000, sarai 29. <sup>10</sup> Suimanang 30, a phunlouk e ngun 410, alouke hno 1000 touh hoi. <sup>11</sup> Sui hoi ngun hnopai abuemlah 5400 touh a pha. Sannaw teh Babilon hoi Jerusalem lah a cei kh ai navah Sheshbazzar ni hete hnouh a sin awh.

## 2

### *Santoungnae koehoi Jerusalem lah bout ka ban e naw*

<sup>1</sup> Babilon siangpahrang Nebukhadnezar ni san lah Babilon vah a hrawi teh amamouh onae khonaw dawк, Judah hoi Jerusalem lah san thung hoi a ram thung lah bout kabannaw doeh. <sup>2</sup> Zerubbabel koe kabannaw teh, Jeshua, Nehemiah, Seriah, Reelaiah, Mordekai Bilshan, Mispar, Bigvai, Rehum hoi Baanah tinaw doeh. Isarel tongpa touk e naw teh, <sup>3</sup> Paroshnaw 2, 172. <sup>4</sup> Shephatiahnaw 372. <sup>5</sup> Arahnaw 775. <sup>6</sup> Pahathmoabnaw, Jeshua hoi Joab totouh 2812.

<sup>7</sup> Elamnaw 1, 254. <sup>8</sup> Zattunaw 945. <sup>9</sup> Zakkainaw 760. <sup>10</sup> Baninaw 642. <sup>11</sup> Bebainaw 623. <sup>12</sup> Azgadnaw 1, 222. <sup>13</sup> Adonikamnaw 666. <sup>14</sup> Bigvainaw 2, 056. <sup>15</sup> Adinnaw 454. <sup>16</sup> Hezekiah hoi Aternaw 98. <sup>17</sup> Bezainaw 323. <sup>18</sup> Jorahnaw 112. <sup>19</sup> Hashumnaw 223. <sup>20</sup> Gibbarnaw 95. <sup>21</sup> Bethlehemnaw 123. <sup>22</sup> Netophahnaw 56. <sup>23</sup> Anathothnaw 128. <sup>24</sup> Azmavethnaw 42. <sup>25</sup> Kiriathjearim, Kephirah hoi Beerothnaw 743. <sup>26</sup> Ramah hoi Gebanaw 621. <sup>27</sup> Mikmashnaw 122. <sup>28</sup> Bethel hoi Ainaw 223. <sup>29</sup> Nebo canaw 52. <sup>30</sup> Magbishnaw 156. <sup>31</sup> Alouke Elamnaw 1254. <sup>32</sup> Harimnaw 320. <sup>33</sup> Lod, Hadid hoi Ononaw 725. <sup>34</sup> Jerikonaw 345. <sup>35</sup> Senaahnaw 3, 6300.



<sup>36</sup> Vaihmanaw, Jeshua imthung dawk hoi Jedaiahnaw 973. <sup>37</sup> Immernaw 1, 052. <sup>38</sup> Pashhurnaw 1, 247. <sup>39</sup> Harimnaw 1, 017. <sup>40</sup> Levih miphun. Hodaiah capa, Jeshua hoi Kadrielnaw 74. <sup>41</sup> La kasaknaw, Asaph capanaw 128. <sup>42</sup> Longkha karingnaw, Shallum capanaw, Ater capanaw, Talmon capanaw, Akkub capanaw, Hatita capanaw, Shobai capanaw abuemlah 139 touh a pha awh.

<sup>43</sup> Nethinimnaw: Ziha capanaw, Husupha capanaw, Tabbaoth capanaw, <sup>44</sup> Keros capanaw, Siaha capanaw, Padon capanaw. <sup>45</sup> Lebana capanaw, Shalmal capanaw, Hanan capanaw. <sup>46</sup> Hagab capanaw, Shalmal capanaw, Hanan capanaw. <sup>47</sup> Giddel capanaw, Gahar capanaw. Reaiahnaw: <sup>48</sup> Rezin capanaw, Nekoda capanaw, Gazzam capanaw. <sup>49</sup> Uzzah capanaw, Paseah capanaw, Besai capanaw. <sup>50</sup> Asnah capanaw, Mehunim capanaw, Nephusim capanaw. <sup>51</sup> Bakbuk capanaw, Hakupha capanaw, Harhur capanaw. <sup>52</sup> Bazluth capanaw, Mehida capanaw, Harsha capanaw. <sup>53</sup> Barkos capanaw, Sisera capanaw, Temah capanaw. <sup>54</sup> Neziah capanaw, Hatipha capanaw. <sup>55</sup> Solomon koe kaawmnaw, Sotai capanaw, Sophereth capanaw, Peruda capanaw. <sup>56</sup> Jaala capa naw, Darken capanaw, Giddel capanaw. <sup>57</sup> Shephatiah capanaw, Hattil capanaw, Hazzebaim hoi Pokhereth capanaw, Ami capanaw.

<sup>58</sup> Nethinim tami abuemlah Solomon koe kaawm e 392 touh a pha. <sup>59</sup> Hahoi, Telmelah, Telharsha, Kherub, Addon hoi Immer, koehoi katâcawtnaw doeh, Hatei Isarel miphun hoi catoun hoeh e hah a na mintoenaw hoi a imthungkhunaw, kacaicalah kamnuek sak thai awh hoeh. <sup>60</sup> Delaiah capanaw, Tobiah capanaw hoi Nekoda capanaw 652 touh a pha awh. <sup>61</sup> Hahoi, Vaihma miphun thung hoi e, Habaiah capanaw, Hakkoz capanaw, Koz capanaw, Gilead tami Barzillai canu thung e yu lah a la teh a minkhang min ka kâphung e Barzillai capanaw. <sup>62</sup> Mintoenaw e min thutnae dawk amamae min a hmu awh hoeh dawkvah vaihma lah touksin lah awh hoeh toe. <sup>63</sup> Ram kaukkung ni Urim hoi thummim koe e vaihma a tho hoehnahlan teh rawca kathounge cat thai mahoeht atipouh.

<sup>64</sup> Tamihupui abuemlah 42, 360 touh a pha awh. <sup>65</sup> Hahoi san napui tongpa 7, 337 touh hoi la kasakkung napui tongpa 200 touh a tawn. <sup>66</sup> Marang 736 touh hoi la 245 touh a pha. <sup>67</sup> Kalauk 435 touh hoi la canaw 6, 720 touh a pha.

<sup>68</sup> Jerusalem BAWIPA e im dawk a pha awh toteh, imthung kahrawikung tangawn ni Cathut e im teh amae hmuen koe, bout sak hanelah hno a poe awh. <sup>69</sup> A poe thai totouh pasoumhno hoi im sak nahanelah sui darik 61, 000, tangka 5, 000 touh hoi vaihma e khona 100 touh a poe awh. <sup>70</sup> Hahoi vaihma, Levih miphun, alouke tami tangawn, la kasaknaw, longkha karingkungnaw hoi Nethinimnaw teh amamae khonaw dawka ao awh teh, Isarelnaw pueng hai amamae khonaw dawka lengkaleng ao awh.

### 3

#### *Jerusalem vah Cathut bawka kamtawng awh*

<sup>1</sup> Thapa yung sari touh akuiep toteh, Isarelnaw teh khopui vah ao awh teh, tamihupui teh, tami buet touh e patetlah Jerusalem vah a kamkhueng awh. <sup>2</sup> Hahoi, Zadok capa Jeshua hoi a hmaunawnggha vaihmanaw hoi Shealtiel capa Zerubbabel hoi a hmaunawngghanaw a thaw awh teh, Cathut e tami Mosi e kâlawk dawka thut e patetlah hmaisawi thuengnae hah Isarelnaw e Cathut thuengnae khounge hah a sak awh. <sup>3</sup> A tengpam



kaawm e taminaw ni a taki awh nakunghai, khoungröe teh amae hmuen koe a ta teh, amom tangmin hmaisawi thuengnae hah, ahnimouh roi ni BAWIPA koevah hmaisawi thuengnae a sak roi. <sup>4</sup> Lukkarei pawî hai a sak awh, thut tangcung e patetlah hnintangkuem sak hanelah, a pouk awh e hoi a langri a sak awh e patetlah hmaisawi thuengnae hah a thueng awh. <sup>5</sup> Hathnukkhu hnintangkuem poe a sak a e hmaisawi thuengnae hoi thaparei katha hanelah a poenae hoi, BAWIPA hanelah a pouk e pawinaw pueng hoi ama lunghthocalah lahoi, BAWIPA koe ouk thueng e hah a thueng awh. <sup>6</sup> BAWIPA e bawkim adu ung hoe hah rah eiteh, thapa yung sari apasuek hnin hoi kamtawng teh, hmaisawi thuengnae hah, BAWIPA koe thuengnae a kamtawng awh.

### *Bawkim bout sak hanelah a kamtawng awh*

<sup>7</sup> Talungdêikathoumnaw hoi imsakkathoumnaw hai tangka a poe awh teh, Persia siangpahrang Sairus ni a hnâbo e patetlah sidar thing teh Lebanon tali koehoi, Joppa totouh thokhai hanelah Sidonnaw hoi Tairenaw hah ca hane rawcarawnei ca hane hoi satuinaw a poe awh. <sup>8</sup> Jerusalem Cathut e im a pha awh nae, kum 2, thapa yung 2 nah Shealtiel capa Zerubbabel hoi Jozadak capa Jeshua hoi a hmaunawnggha vaihmanaw, Levih miphunnaw hoi san daw k hoi thaw taw k hanelah a kamtawng awh teh, Levih miphun kum 20 touh a lathueng lae naw teh, BAWIPA im saknae koe kahrawikung lah a pouk awh. <sup>9</sup> Hahoi, Jeshua hoi a capa, a hmaunawngghanaw, Kadmiel hoi a capanaw hoi, Judah capanaw, a thaw awh teh Cathut e im kasaknaw hah hmuen touh koe a khetyawt awh. Henadad capanaw a capanaw hoi a hmaunawnggha Levihnaw hoi.

<sup>10</sup> BAWIPA e bawkim kasaknaw ni adu a ung awh toteh, vaihmanaw ni khohnanaw a kho awh teh, mongka patuep laihoi Levih tami Asaph capanaw hah Isarel siangpahrang Devit ni a dei e patetlah, BAWIPA pholen hanelah a kangdue awh. <sup>11</sup> Ama teh ahawi, Bangkongtetpawiteh, a lungmanae teh Isarelnaw e lathueng a yungyoe a cak, telah BAWIPA pholen awh teh lunghawi lawk dei laihoi la a sak awh. Hottelah BAWIPA pholen a toteh tamihupui abuemlah ni pueng hoi a hram awh. Bangkongtetpawiteh, BAWIPA e im adu ung awh daw k doeh. <sup>12</sup> Hateiteh, vaihma, Levihnaw hoi imthung kahrawikung tangawn, ahmaloe e im kahmawt e matawngnaw ni teh a hnukkhu e im adu ung e a hmu navah pueng hoi a khuika awh. Hatei tami tangawn teh a lunghawi daw k hoi a hram awh. <sup>13</sup> Hat toteh, taminaw ni lunghawi hramnae lawk hoi khuika hramnae lawknaw hah kapek thai awh hoe h. Bangkongtetpawiteh, tamihupui teh poung hoi a hram awh dawkvah, kahlatpoung koehoi a ka thai.

## 4

### *Bawkim bout sak nah ka tarannaw*

<sup>1</sup> Hat toteh, Isarel BAWIPA Cathut e bawkim hah san lah kaawmnaw ni a sak awh tie hah Judah hoi Benjamin katarankungnaw ni a thai awh toteh, <sup>2</sup> Zerubbabel hoi imthung kahrawikungnaw koe a tho awh teh, im na sak khai awh van han, Bangkongtetpawiteh, nangmouh ni na tawng awh e Cathut doeh ka tawng van awh. Hi na ka hrawi e Assiria siangpahrang Esarhaddon a bawi tahma vah thuengnae ouk ka sak awh telah ati awh.

<sup>3</sup> Hatei Zerubbabel, Jeshua hoi Isarel imthung kahrawikungnaw ni ahnimouh koe vah, kaimae Cathut im saknae daw k nangmouh na baw k hane lamthung awm hoe h, Persia siangpahrang Sairus hanelah ka sak awh han, telah atipouh awh.



<sup>4</sup> Hatnavah, khocanaw ni Judahnaw hah a lungkhuek sak awh teh im sak hane dawk runae a poe awh. <sup>5</sup> Persia siangpahrang Sairus a bawinae kum hoi Persia siangpahrang Darius a bawi kum toteh sak hanelah, kâcai awh e naw hah a coung thai hoeh nahanelah lawk laicei a ta awh.

<sup>6</sup> Hat toteh, Ahasuerus ni a uk pasuek nah Judah ram hoi Jerusalem kaawmnaw kâtarannae ca a thut pouh. <sup>7</sup> Artaxerxes e tueng nahai Bishlam, Mithredath, Tabeel, hoi alouke a huinaw hoi Persia siangpahrang Artaxerxes koe ca a patawn awh, hote ca teh Aramaih lawk, Aramaih ca lahoi a thut awh.

<sup>8</sup> Kaukkung Rehum hoi cakathutkung Shimshai ni Jerusalem e taminaw tarannae lah Persia siangpahrang Artaxerxes teh hettelah ca a patawn. <sup>9</sup> Ca kapatawnkungnaw teh, kaukkung Rehum hoi cakathutkung Shimshai hoi alouke a huinaw Dinai tami, Afasatkhi tami, Tarpelit tami, Persia tami, Erech, Babilon hoi Shushan tami, Dehaites tami hoi Elam tami. <sup>10</sup> Kaawm rae miphun thung e kacuenaw hoi ka talue e Osnapper ni san lah a hrawi teh Samaria kho dawk kaawmnaw hoi tui namran lah kaawmnaw ni,

<sup>11</sup> Siangpahrang Artaxerxes koe ca a patawn awh e teh, ka bawi poung e Artaxerxes, tui namran lah kaawm e na sannaw ni kut na man awh.

<sup>12</sup> Nang koehoi ka tho e Judahnaw ni kaimouh koe Jerusalem vah a pha awh teh, ka rawk e hoi tarankathaw e khopui hah bout a pathoup awh teh rapannaw hai a cum awh teh, a dunaw a sak awh lahun tie hah siangpahrang ni panuek na seh. <sup>13</sup> Hete khopui a pathoup awh teh rapan he a cum awh toteh, tamuknaw hoi hnopai phu naw, laikaw phu naw poe han na ngai awh hoeh vaiteh, a hnukkhu toteh siangpahrang hanelah rawknae koe a pha han tie hah siangpahrang ni panuek naseh.

<sup>14</sup> Siangpahrang im e palawi ka palem e lah o awh dawkvah, siangpahrang ni banghai ngai hoeh e kâhmo han ka ngai awh hoeh. <sup>15</sup> Hatdawkvah, mintoenaw ni hno pâkhuengnae noutnae cauk dawk a tawng awh nakunghai, hote cauk dawk a hmu toteh, hete kho heh tarankathaw kho doeh tie hai, siangpahrang ni a uk nahanelah a thakasai e doeh tie hoi, taran poe a thaw awh kecu dawkvah, ka rawk e doeh tie panue thai nahanelah, hete ca na patawn awh teh, siangpahrang na na thaisak awh e doeh. <sup>16</sup> Hete kho pathoup awh teh na cum awh pawiteh, tui namran lah uk thainae kâ na tawn thai mahoe toe tie siangpahrang nang koe na thaisak awh, telah atipouh awh.

<sup>17</sup> Hattoteh siangpahrang ni ca let a patawn, kaukkung Rehum, cakathutkung Shimshai hoi alouke a huinaw hoi Samaria ram hoi tui namran lah kaawm e nangmouh koe roumnae awh naseh. <sup>18</sup> Kaimouh ca na patawn e teh ka hmalah kahawicalah a touk awh. <sup>19</sup> Hahoi kâ ka poe e patetlah a tawng awh. Hete kho heh yampa vah siangpahrang koe taran a thaw awh teh hatnae tueng dawk taranthawnae hoi runae ouk ao bawi tie hah ka panue. <sup>20</sup> Jerusalem vah, athakaawme siangpahrang, tui namran totouh ka uk thai e siangpahrang hai la ao bawi toe, tamuk hoi hnopai phu hoi laikaw phuonaw hai a canei awh. <sup>21</sup> Ahnimanaw hah kâhat sak awh, kâ ka poe hoe roukrak teh kho hah pathoup awh na hanh naseh. <sup>22</sup> Bangkongmaw siangpahrang hanelah rawknae koe ka phat sak hane hno hah a sak awh han vaw, telah a ti.

<sup>23</sup> Hattoteh siangpahrang Artaxerxes e ca hah Rehum hoi cakathutkung Shimshai hoi a huinaw ni a touk awh hnukkhu, karang poung lah Jerusalem Judahnaw onae koe a cei awh teh a thawaw hah thama lahoi a ngang pouh awh.



<sup>24</sup> Hat toteh, Jerusalem e BAWIPA im saknae a kâhat awh. Persia siangpahrang Darius a bawinae kum hni totouh sak thai awh hoeh.

## 5

### *Bawkim sak bout a kamtawng awh*

<sup>1</sup> Hatnavah, profet Haggai hoi Iddo capa Zekhariah e taminaw ni Judah ram hoi Jerusalem kaawm e Judah taminaw koe Isarel Cathut min lahoi lawk a dei awh. <sup>2</sup> Hat toteh, Shealtiel capa Zerubbabel hoi Jozadak capa Jeshua ni Jerusalem kaawm e Cathut e im sak hanelah bout a kamtawng awh. Ahnimouh kabawm hanelah Cathut e profet teh ahnimouh koevah ao.

<sup>3</sup> Hatnavah, tui namran ka uk e Tattenai hoi Shetharbozenai hoi a huinaw a cei awh teh, hettelah ahnimouh koe a dei pouh awh. Hete im sak hane hoi rapan cum hanelah apini maw kâ na poe, telah atipouh. <sup>4</sup> Hete ka sak e tami e min hah apimaw telah a pacei awh ei, <sup>5</sup> Darius siangpahrang koe e ca a tho hoehroukrak thaw kâhat hoeh nahanelah, Cathut ni Judah tami kacuenaw hah a mit hoi a khet. Hatdawkvah, kaukkungnaw ni thaw ngang thai pouh hoeh.

<sup>6</sup> Hethateh, Tattenai taminaw ca a patawn awh e doeh. Tui namran kaukkung hoi Setharbozenai hoi a hui tui namran kaawm e Afasat tinaw ni Darius koe ca a patawn awh. <sup>7</sup> Hettelah a thut awh teh a patawn awh. Siangpahrang Darius koevah rounnae awh lawiseh. <sup>8</sup> Hete hno heh siangpahrang ni panuek naseh, Judah ram vah Cathut e bawkim talung kalenpounge naw hoi lungphen e avan vah thingnaw a ta awh teh karanglah a sak awh e naw koe ka cei awh. <sup>9</sup> Hahoi, hete im sak hane hoi rapan cum hanelah apinimaw kâ na poe telah kacuenaw ka pacei awh. <sup>10</sup> Kahrawikungnaw e min ka thut awh teh kamcengcalah ka panue awh nahanelah ka pacei awh.

<sup>11</sup> Ahnimouh ni hettelah a dei awh, Talai hoi kalvan Cathut e san lah doeh ka o awh. Kaloum tangcoung e kumnaw daw koe sak tangcoung e, Isarel siangpahrang kalenpounge tami buet touh ni sak tangcoung e hah kaimouh ni ka pathoup awh e doeh. <sup>12</sup> Mintoenaw ni kalvan e Cathut a lungkhuek totouh ao awh dawkvah, Khaldean tami Babilon siangpahrang Nebukhadnezar e kut daw koe a poe awh. Ahni ni hete im a raphoe teh taminaw hah Babilon lah a hrawi. <sup>13</sup> Hatei, Babilon siangpahrang Sairus, a bawinae apasuek kum vah, siangpahrang Sairus ni Cathut im bout sak hanelah kâ a poe. <sup>14</sup> Hahoi Cathut e im daw koe e sui ngun hoi sak e hnopai Jerusalem Cathut bawkim thung hoi Nebukhadnezar ni a la teh Babilon e bawkim thung vah a kâenkhai e hah siangpahrang Sairus ni bawkim thung hoi bout a tâcokhai teh tami buet touh Sheshbazzar ram kaukkung hanelah a poe. <sup>15</sup> Hahoi ahni koevah, hete hnopai lat nateh cet lawih, Jerusalem e bawkim daw koe hrueng hanh. Hote bawkim teh amae hmuen koe sak naseh telah ati. <sup>16</sup> Hahoi teh, Sheshbazzar hai a cei van, Jerusalem bawkim adu ung teh hahoi atu totouh sak e doeh.

<sup>17</sup> Hatdawkvah, siangpahrang ni ahawi tetpawiteh, hotnaw teh atangkatang maw, Babilon siangpahrang hnopai im daw koe tawng naseh. Hahoi, siangpahrang ni hete kong daw koe a ngai e patetlah dei naseh, telah ati awh.

## 6

### *Darius kâpoe e*



<sup>1</sup> Hahoi siangpahrang Darius ni kâ a poe teh Babilon râw kuemnae koe, cauk tânae dawk a tawng awh. <sup>2</sup> Hat toteh, Medes ram Akhametha kho e siangpahrang im vah cakalawng e a hmu awh. Hawvah kahawicalah tâ hanelah hettelah thut lah ao.

<sup>3</sup> Jerusalem e Cathut e im teh siangpahrang Sairus ni a bawinae kum nah hettelah kâ a poe, thuengnae khoungroe im teh bout sak e lah awm seh, adu hai kacaklah ung naseh. <sup>4</sup> A rasang e dong 60, akaw e dong 60, talung kalenpounge coung thum touh lah pacoung hnukkhu, a katha e thing hoi boutbout pacoung sin naseh. Aphunaw hateh siangpahrang e hnopai hoi poe lah ao han. <sup>5</sup> Hahoi Cathut e im dawk e sui, ngun hoi hnopai Nebukhadnezar ni Jerusalem lah a ceikhai teh Babilon vah a kâenkhai e naw hah bout poe naseh, Jerusalem e bawkim amae hmuen koevah ceikhai vaiteh Cathut e im dawk bout hrueng naseh.

<sup>6</sup> Hatdawkvah, tui namran kaukkung Tattenai hoi Setharbozenai hoi tui namran lah kaawm e a hui Afasat taminaw hah hnai awh hanh. <sup>7</sup> Hete BAWIPA e bawkim sak e dawk runae poe awh hanh. Judah kahrawikungnaw hoi Judah kacuenaw ni Cathut e im teh amae hmuen koe bout sak naseh. <sup>8</sup> Hahoi sak e kabawp hanelah kâ na poe awh, thaw a hmacawn nahanelah, tui namran kaniloumlae tamuk teh, siangpahrang e hnopai thung hoi poe lah ao han.

<sup>9</sup> Panki e patetlah kalvan Cathut koe hmaisawi thueng nahanelah maitoca thoseh, tutan thoseh, tuca thoseh, cakang, misur, satui hai thoseh, Jerusalem kaawm e vaihmanaw ni a dei e patetlah hnintangkuem hnan laipalah, poe awh naseh. <sup>10</sup> Hat toteh, kalvan Cathut koe hmuitui thuengnae pout laipalah siangpahrang hoi a ca hringsaw thai nahanlah a ratoum thai awh han. <sup>11</sup> Hete lawk ka ek e tami teh, a im khom phawk pouh vaiteh bout ung e dawk ama hai bang vaiteh, a im teh vaipuen lah tho sak han telah, kâ ka poe. <sup>12</sup> Hahoi, hawvah a min kaawm sak e BAWIPA ni Jerusalem e Cathut im raphoe hanelah a kâcai. teh, kut ka dâw e siangpahrang hoi a ram pueng teh raphoe pouh e lah awm naseh telah, kai Darius ni kâ poe e patetlah roup tarawi naseh.

### *Bawkim cumnae hoi hnawngnae*

<sup>13</sup> Hahoi teh, tui namran lah kaukkung Tattenai hoi Setharbozenai hoi a huinaw ni Darius e ca a hmu awh e patetlah a sak awh, <sup>14</sup> Hahoi profet Haggai hoi Iddo capa Zekhariah ni a dei roi e lawk kecu dawk Judah kahrawikungnaw ni kahawicalah a sak awh. Isarel Cathut e kâpoelawk patetlah Persia siangpahrang Sairus hoi Darius hoi Artaxerxes tinaw ni kâ poe e patetlah a sak awh teh a cum awh. <sup>15</sup> Hote im teh siangpahrang Darius a bawi kum 6nae, Adar thapa hni 3 nah a cum awh.

<sup>16</sup> Isarel catoun, vaihmanaw hoi Levih miphun, san dawk hoi ka tâcawt e ni Cathut e im teh pout laipalah lunghawicalah a sak awh. <sup>17</sup> Hete im saknae dawkvah maitotan 200, tuca 400 touh a poe awh. Hahoi Isarelnaw hanelah yon thuengnae dawk Isarel miphun yit touh hoayah hmae 12 touh. <sup>18</sup> Mosi e cauk dawk thut e patetlah Jerusalem e Cathut im thaw tawh hanelah vaihmanaw hoi Levihnaw hah ahuhu lahoi ao sak awh.

### *Ceitakhai pawî hnonae*

<sup>19</sup> Hahoi, san dawk hoi kahloutnaw ni thapa pasuek, hnin 14 nah ceitakhai pawî a sak awh. <sup>20</sup> Vaihmanaw hoi Levih miphunnaw amamouh kâthoung sak teh abuemlahoi a thoung awh. Hahoi ceitakhai pawî nah san dawk hoi kahloutnaw hoi a hmaunawngna vaihmanaw hanelah tu a



thei awh. <sup>21</sup> Hahoi Isarel catoun san daw k hoi kahlout ni teh Isarel BAWIPA Cathut ka tawng ni teh alouke ramnaw e lawk ngai laipalah, a yonnae naw thoung sak e pueng hoi a canei awh. <sup>22</sup> Lung kanawmcalah tawn phuen hoeh e paw hah hnin sari touh thung a sak awh. Bangkongtetpawiteh, BAWIPA ni ahnimanaw teh a lunghawi sak. Isarel Cathut e im saknae daw k a kut tha ao sak nahanelah Assiria siangpahrang e lungthin hah ahnimouh koe lah a kamlang sak.

## 7

### *Ezra a thonae*

<sup>1</sup> Hathnukkuh, Persia siangpahrang Artaxerxes a bawi lahun nah Ezra teh Babilon hoi a tho. Seraiah teh Azariah capa doeh, Azariah teh Hilkiah capa doeh. <sup>2</sup> Hilkiah teh Shallum capa doeh, Shallum teh Zadok capa doeh, Zadok teh Ahitub capa doeh. <sup>3</sup> Ahitub teh Amariah capa doeh, Amariah teh Azariah capa doeh.. Azariah teh Meraioth capa doeh. <sup>4</sup> Meraioth teh Zerariah capa doeh, Zerariah teh Uzzi capa doeh, Bukki teh Abishua capa doeh, Abishua teh Phinehas capa doeh. <sup>5</sup> Phinehas teh Eleazar capa doeh, Eleazar teh vaihma bawi Aron capa doeh. <sup>6</sup> Babilon hoi ka tho e cakathutkung Ezra teh Isarel BAWIPA Cathut ni Mosi koe poe e kâlawknaw kathoum poung e lah ao. Ahnie lathueng vah BAWIPA Cathut ni a kut hoi a okhai e patetlah siangpahrang ni a hei e naw pueng hah a poe. <sup>7</sup> Hahoi, siangpahrang Artaxerxes a bawinae kum 7 nah, Isarel catoun tangawn, vaihma tangawn, Levih catoun tangawn, la kasaknaw tangawn, longkha karingkungnaw tangawn, Nethinim taminaw tangawn teh Jerusalem lah a ceitakhang awh. <sup>8</sup> Hahoi siangpahrang a bawinae kum 7 thapa yung 5 nah, Ezrah teh Jerusalem vah a pha. <sup>9</sup> Thapa yung apasuek apasuek hnin vah Babilon hoi a tâco teh Cathut ni ahni koe a okhai teh, thapa ayung panga, apasuek hni vah Jerusalem vah a pha. <sup>10</sup> Bangkongtetpawiteh, Ezra ni Cathut e lawk a tawng teh tarawi hane hoi Isarelnaw phunglam hoi hringnuen cangkhai hanelah a lungthin hoi a kâcai.

<sup>11</sup> Hethateh, siangpahrang Artaxerxes ni vaihma Ezra, ca kathutkung, BAWIPA e kâpoelawknaw hoi Isarelnaw hanelah, phunglawknaw kathoum e tami koe a patawn e ca doeh. <sup>12</sup> Siangpahrangnaw e siangpahrang Artaxerxes ni vaihma Ezra, kalvan e Cathut e kâlawk ka thut e koe kakuep e roumnae awm lawiseh. <sup>13</sup> Ka ram thung kaawm e Isarelnaw, vaihmanaw hoi Levihnaw hah Jerusalem lah cei hane ka ngai e tami pueng nang koe cei hanelah kâ ka poe. <sup>14</sup> Na sin e Cathut e kâlawk patetlah Judah ram hoi Jerusalem e kong teh rip hane lah, <sup>15</sup> Jerusalem kaawm e Isarel Cathut daw k lungthoungnae lahoi siangpahrang hoi lawkcengkungnaw ni poe e tangka hoi suinaw ceikhai hanelah siangpahrang hoi lawkcengkung 7 touh a patoun e doeh. <sup>16</sup> Babilon ramnaw daw k na hmu e naw pueng sui ngun na lunghonae lahoi taminaw hoi vaihmanaw ni a poe e Jerusalem e Cathut im hanelah lunghawicalah poe e naw doeh. <sup>17</sup> Hahoi hote sui ngun hoi maitotan thoseh, tutan thoseh, tuca thoseh ca hane hoi nei kawi thueng nahanelah, tawngtang na ran awh han. Telah pawiteh Jerusalem vah kaawm e nangmae Cathut im daw k e khoungroe daw k na thueng awh han. <sup>18</sup> Sui ngun hai kacawie naw pueng teh na Cathut a hnâbo e patetlah nang hoi na hmaunawngghanaw hoi ahawi na ti awh e patetlah na kâdei awh han. <sup>19</sup> Na Cathut im thawtawknae daw k hnopai poe e naw pueng teh Jerusalem



e Cathut im dawk na tâ awh han. <sup>20</sup> Na Cathut e im saknae dawk panki e alouke awm pawiteh siangpahrang e hnopai na hno awh han. <sup>21</sup> Kai siangpahrang Artaxerxes ni tui namran lae hnopai kakhoumkungnaw teh, vaihma Ezra, kalvan Cathut e kâlawk kathutkung ni a hei e naw pueng hah, <sup>22</sup> ngun talen 100, cakang hmuen 100, misurtui um 100, satuium 100, palawi naw poe awh loe telah kâ ka poe. <sup>23</sup> Kalvan Cathut ni kâ poe naw pueng, hot patetlah kalvan Cathut e im hanelah sak naseh, lungkhueknae teh siangpahrang hoi a canaw e lathueng bangkongmaw khuet ao han vaw. <sup>24</sup> Vaihmanaw hoi Levih miphunnaw, la kasaknaw hoi longkha karingkungnaw hoi Nethinimnaw, hete Cathut e im dawk thaw katawnknae heh tamuk thoseh, hnopai phu thoseh, laikawk phu thoseh na cawi sak awh mahoe telah na thaisak awh. <sup>25</sup> Nang Ezra, na tawn e Cathut ni lungangnae na poe e patetlah tui namran lah kaawmnaw lawkceng pouh hane kahrawikungnaw hoi lawkcengkungnaw hoi Cathut e kâlawk kapanueknaw hah thaw poe awh, ka panuek hoehe e naw hah pâtu awh. <sup>26</sup> Na Cathut e kâlawk hoi siangpahrang e kâlawk ka ngai hoehe e tami teh a due totouh thoseh, ram thung hoi pâlei totouh thoseh, hnopai la pouh e totouh thoseh, thongim paung e totouh thoseh, lawkcengnae ao han, telah a ti. <sup>27</sup> Jerusalem e BAWIPA im ahawi nahanelah siangpahrang heh, hettelah e lungthin ka tawn sakkung hoi, lawkcengkungnaw hmalah hoi siangpahrang kalen min kamthang katang naw e hmalah kai lathueng lungmanae kamnueksakkung mintoenaw e Jehovah Cathut teh, pholen lah awmseh. <sup>28</sup> Hottelah kaie Cathut BAWIPA bawilennae kecu dawk, kai teh ka thao teh, kai hoi cungtalah kâbang hane Isarel kacuenaw hah ka kamkhuengsak.

## 8

### *Imthung kahrawikung koe kabawinaw*

<sup>1</sup> Hetnaw teh siangpahrang Artaxerxes a bawi lahun nah Babilon hoi kai koe ka tho e imthung kahrawinaw ca catounnaw doeh. <sup>2</sup> Phinehas capanaw thung hoi Gershom, Ithamar capanaw thung hoi Daniel, Devit capanaw thung hoi Hattush. <sup>3</sup> Shekaniah capanaw, Parosh capanaw, Zekhariah koe touk lah kaawm e tongpa 150. <sup>4</sup> Pahathmoab capa thung hoi Zerahiah capa Eliehoenai koe kaawm e tongpa 200. <sup>5</sup> Shekaniah capanaw thung hoi Benjahaziel koe kaawm e tongpa 300. <sup>6</sup> Adin capanaw, Jonathan capa, Ebed koe kaawm e tongpa 50. <sup>7</sup> Elam capanaw thung hoi Athaliah capa Jeshaiiah koe kaawm e tongpa 70. <sup>8</sup> Shephatiah, capanaw thung hoi Maikel capa Zebadiah koe kaawm e tongpa 80. <sup>9</sup> Joab capanaw thung hoi Jehiel capa Obadiah koe kaawm e tongpa 218. <sup>10</sup> Shelomith capanaw thung hoi Benjosiphiah koe kaawm e tongpa 160. <sup>11</sup> Bebai capanaw thung hoi Bebai capa Zekhariah koe kaawm e tongpa 28. <sup>12</sup> Azgad capanaw thung hoi Hakkatan capa Johanan koe kaawm e tongpa 110. <sup>13</sup> Adomikam capanaw thung hoi hnukteng e taminaw teh Eliphelet, Jeuel, Shemaiah hoi tongpa 60. <sup>14</sup> Bigvai capanaw thung hoi Uthai hoi Zabud, koe kaawm e tongpa 70 touh hoi. <sup>15</sup> Ahava palang vah ka kamkhueng awh teh hawvah hnin 3 touh ka o awh. Hahoi, tamihupui hoi vaihmanaw ka khet navah Levih catounnaw ka hmawt hoehe.

### *Bawkim thaw katawnkaw*

<sup>16</sup> Hahoi teh, kahrawikungnaw, Eliezer, Ariel, shemaiah, Elnathan, Jarib, Elnathan, Nathan, Zekhariah hoi Meshullam kahrawikungnaw lawk ka



thaipanuek e Joiarib hoi Elnathan tinaw hai. <sup>17</sup> Kasiphia hmuen ka uk e Iddo koevah tami ka patoun teh Cathut e im dawk thaw katawknaw thokhai hanelah Kasiphia hmuen e Iddo hoi a hmaunawngna Nethinim taminaw koevah bangtelamaw dei han tie lawk ka thui. <sup>18</sup> Cathut ni na pahrennae dawkvah hnâ kathaipanueknaw, Mahli capa thung hoi Levih capanaw, Isarel thung hoi Sherebiah capanaw a hmaunawngnanaw 18 touh hoi. <sup>19</sup> Hashabiah, Merari capanaw thung hoi Jeshaiiah, a hmaunawngnanaw hoi a capanaw 20 touh. <sup>20</sup> Nethinim taminaw, Devit hoi kahrawikungnaw ni Levih taminaw thaw tawk hanelah poe e naw thung dawk hoi Nethinim tami 220 touh hoi kai koe a thokhai teh abuemlah a min thut pouh e lah ao.

### *Roum nahanelah rawcahai ratoumnae*

<sup>21</sup> Hahoi, kamamouh, camonaw hoi hnopainaw abuemlahoi ama koe lamkalan ka hmu thai awh nahan hoi kamamouh Cathut hmalah kârahnomoum thai awh nahan, Ahava palang teng vah rawcahai hane ka dei pouh. <sup>22</sup> Bangkongtetpawiteh, Cathut minhmai kahawi ka tawng e taminaw koe a lungmanaw teh a o, a bahu hoi a lungkhueknae teh ama ka cettakhai e taminaw lathueng vah a o, telah siangpahrang koe ka dei pouh toung dawkvah, lam tarannaw e kut dawk hoi na kabawm hanelah ransa hoi marangransanaw siangpahrang koe ka dei pouh hane hah kaya tho e lah ka pouk. <sup>23</sup> Hahoi, rawca ka hai awh teh, Cathut koe Atangcalah ka hei awh teh, ka hei awh e patetlah na thai pouh.

### *Bawkim hanlah hno poe e*

<sup>24</sup> Hahoi teh, vaihma kahrawikungnaw thung dawk hoi 12 touh, Sherebiah hoi Hasabiah a hmaunawngnanaw thung hoi 10 touh hah ka hmoun. <sup>25</sup> Hahoi, siangpahrang lawkcengkungnaw hoi kahrawikungnaw hoi hawvah kaawm e Isarel taminaw abuemlah ni Cathut e im hanelah e hno, ngun, sui hoi hnopainaw teh yawcu dawk ka khing teh ahnimae kut dawk ka poe. <sup>26</sup> Yawcu dawk khing hnukkhu ahnimae kut dawk ka poe e teh ngun talen 650, ngun hlaam talen 100, sui talen 100 touh. <sup>27</sup> Ka phu e suimanang 20 touh, rahum loukloukkaang ni teh sui patetlah aphu kaawm e manang kahni touh hai ka poe. <sup>28</sup> Hahoi, ahnimouh koevah Cathut hanelah thoung sak e lah na o awh teh hnopainaw hai kathoung e lah ao. Ngun hoi suinaw teh mintoenaw e BAWIPA Cathut hanelah lungthocalah hoi poe e naw doeh. <sup>29</sup> Vaihma kacuenaw, Levihnaw hoi Isarel kahrawikung hmalah Jerusalem kaawm e BAWIPA imrakhan dawk na tâ awh hoehrourak teh kahawicalah khenyawn awh telah, ka dei pouh. <sup>30</sup> Hahoi vaihmanaw Levihnaw ni Jerusalem kaawm e BAWIPA im dawk ceikhai hanelah ngun, suinaw hoi hnopainaw hah a dâw awh.

### *Jerusalem bannae*

<sup>31</sup> Hahoi, Jerusalem lah cei hanelah thapa pasuek, hnin 12 nah Ahava palang hoi ka tâco awh. Hahoi BAWIPA ni na pahren awh teh tarannaw e kut hoi lam vah arulaho ka pawm e a kutnaw dawk hoi na ring awh. <sup>32</sup> Jerusalem ka pha awh teh hnin thum touh kâhat awh. <sup>33</sup> Hnin 4 hnin teh ngun, sui hoi hnopainaw hah BAWIPA e im dawk tâ hanelah vaihma Uriah capa Meremoth e kut dawk ka poe. Ahni koe Phinehas capa Eleazar ao. Hahoi ahni koe Levih miphun Jeshua capa Jozabad hoi Benui capa Noadiah ao. <sup>34</sup> A khing e abuemlah hoi kung khing awh teh kong a poe awh, Hatnavah a khing hot yit touh tie kong a thut awh. <sup>35</sup> San lah hrawi e camonaw, san lah onae koehoi kahloutnaw ni Isarel



cathut koevah hmaisawi thuengnae a sak awh teh Isarelnaw abuemlah hanelah maitotan 12, tutan 96, tuca 77, yon thueng nahanelah hmaetan 12 touh. Hetenaw abuemlah he BAWIPA koe hmaisawi thuengnae naw doeh. <sup>36</sup> Siangpahrang e kâlawk patetlah, siangpahrang imthung thaw katawnaw hoi tui na ram kaukungnaw koe a dei pouh awh. Hot patetlah Cathut im hai tamimaya koevah hno a poe awh.

## 9

### *Meikaphawk kabawknaw hoi kâyuwanae*

<sup>1</sup> Hathnukkhu, kahrawikungnaw ni Isarelnaw hoi vaihmanaw, Levih-naw hoi ram thung kaawmnaw hoi a kambawng awh teh Kanaan, Hit, Periz, Jebusit, Ammon, Moab, Izip taminaw hoi Amor taminaw panuetho e hno a sak awh. <sup>2</sup> Bangkongtetpawiteh, a canu hoi a capanaw a kâokhai sak awh. Hat toteh, ka thoung e cati teh ram thung kaawmnaw hoi a kâkalawt toe. Kahrawikungnaw hoi lawkcengkungnaw ni doeh a kamtawng awh, telah ati awh.

<sup>3</sup> Hote kong ka thai navah ka angki hoi ka hni ka phi teh ka sam hoi ka pâkhamuen ka phawk teh ngaihmanah lah sut ka tahung.

<sup>4</sup> Hahoi, san dawkh hoi ka hlout e taminaw e yon kecu dawkh Isarel Cathut e lawk ka ngai e taminaw teh kai koe a tho awh teh tangmin lah thuengnae tueng totouh sut ka tahung. <sup>5</sup> Hahoi tangmin thuengnae tueng nah ka angki hoi ka hni ka phi e hoi kathâw teh, ka khok ka cuengkhuem laihoi ka BAWIPA Cathut koe lah kut ka dâw. <sup>6</sup> Oe ka Cathut nang koe kamlang e kaya teh ka minhmai kOUNg paling toe. Oe ka Cathut kaimouh ni ka sakpayon e naw teh kamamouh e lû hlak a rasang teh, yonpenae teh kalvan totouh a pha toe. <sup>7</sup> Mintoenaw koehoi kamtawng teh atu totouh yonpen e lah ka o awh. Kaimouh ka yon kecu dawkh siangpahrangnaw vaihmanaw hoi kamamouh atu totouh ramlouk e siangpahrangnaw kut dawkh ka pha awh teh, tahloi hoi theinae, santoungnae lawpnae, yeirainae kâhmo awh. <sup>8</sup> Atuvah, maimae BAWIPA Cathut ni, maimanaw na hlout sak teh, na hring sak hnukkhu, ka thoung hmuen koe na o sak e heh lungmanae doeh. Maimae BAWIPA ni san dawkh hoi na hlout sak teh kâhatnae bout na poe awh. <sup>9</sup> Bangkongtetpawiteh, maimouh teh san lah doeh o awh, hateiteh san onae dawkvah Cathut ni na cettakhai hoeh. Maimanaw bout hlout nahanelah Cathut im kangdue sak teh ka rawk tangcOUNg e bout pathoup hane hoi Judah ram Jerusalem rapan bout tawn nahanelah, Persia siangpahrangnaw e mithmu vah maimouh lathueng vah a lungmanae kalen lah hoeh a kamnue sak.

<sup>10</sup> Oe ka Cathut atu bangmaw ka dei awh han toung. Bangkongtetpawiteh, nange kâpoelawknaw teh ka pahnawt awh toe. <sup>11</sup> Na san profetnaw hno lahoi kâ na poe teh, coe hanelah na kâennae ram teh ram thung e tami kamhnawngnae niyah, a khinsak e ram lah ao teh, panuethonae hoi kamhnawngnae ni, abuemlahoi a khinsak e doeh. <sup>12</sup> Hatdawkvah, na tha o awh teh hote ram dawkh hnokahawi na canei thai awh teh, ca catounnaw hanelah na parâw thai nahanelah, na canunaw hoi a capanaw kâyuvasak hanh awh. Na capanaw hoi a canunaw kâpaluensak hanh. Ahnimae hnopai hoi tawnta e naw noe awh hanh, telah a ti. <sup>13</sup> Hahoi, maimae BAWIPA Cathut ni maimouh ni kamcu e yon phu na khang sak laipalah, maimouh ni payon e kahawi hoe e hno, kalenpOUNg yonnae dawkh, hettelah kâhmo awh nakunghai BAWIPA ni hloutnae bout na poe awh hnukkhu, <sup>14</sup> Kaimouh ni na kâpoelawknaw bout ka pahnawt awh teh,



panueththo poung e hno ka sak e taminaw hoi bout kaawm awh pawiteh, buet touh hai hlout laipalah na lungkhueknae hoi kaimouh na raphoe han na vaiyaw. <sup>15</sup> Oe Isarel BAWIPA Cathut, nang teh na lan. Hatei kaimouh teh kacawirae ca doeh. Sahnin ka counгнаe patetlah na khenhaw! na hmalah yonpen e lah ka o awh. Hetnaw kecu dawк hoi hmalah kangdout thai e apihai kaawm awh hoe, telah ka ti.

## 10

### *Kamsoum hoe, lah kâpaluennae kecu dawк yonpâphonea*

<sup>1</sup> Hahoi Cathut im koelah kangvaw, tabo teh, ka laihoi Ezra ni yon ngaithoumnae a kâhei. Hatnavah Isarelнаw tamihupui napui, tongpa, camonaw ahni koe a kâracut awh teh, tamihupui teh puenghoi a khuika awh. <sup>2</sup> Elam catoun thung hoi Jehiel capa Shekariah ni Ezra koevah, maimouh Cathut koevah yon sak awh tanggak toe, hahoi hete ram dawк e miphun alouke canunaw hah yu lah paluen awh toe. Hatei Isarelнаw hanelah ngaihawinae ao rah doeh. <sup>3</sup> Hatdawкvah, bawipa ni pouknae na poe e patetlah Cathut e kâpoelawк ka bari e tami ni, yucanaw ceitakhai vaiteh maimae Cathut koe lawkkamnae sak awh vaiteh kâlawк patetlah tarawi awh sei. <sup>4</sup> Thaw leih, bangkongtetpawiteh, hete heh nange thaw doeh, kaimouh hai nang koe lah doeh kampang awh. Lung kacakcalah awm nateh, tawк leih, telah ati awh.

<sup>5</sup> Hahoi, Ezra a thaw teh, vaihma bawinaw, Levih miphunnaw hoi Isarel taminaw abuemlah, hote lawк patetlah lawkkamnae a sak sak teh, Hot patetlah lawkkamnae a sak awh. <sup>6</sup> Hahoi, Ezra ni Cathut e im dawк hoi a thaw teh, Eliashib capa Jehohanan e imthung a kâen teh, hawvaw rawca hai cat hoe, tui hai net laipalah ao. Bangkongtetpawiteh, san dawк hoi ka hlout e taminaw yonnae kecu dawк khuika laihoi ao.

<sup>7</sup> San dawк hoi ka hlout e taminaw pueng Jerusalem vah kamkhueng hanelah, <sup>8</sup> Kahrarikungnaw hoi kacuenaw ni a dei e patetlah hnin 3 touh thung ka tho hoe e tami teh, san hloutnae dawк hoi pâlei vaiteh, a tawnta e hnopai pueng lawp vaiteh, ama hai pâlei lah ao han telah, Jerusalem hoi kamtawng teh Judah ram totouh a pathang awh. <sup>9</sup> Hot patetvanlah Judahnaw hoi Benjamin miphun tongpanaw teh hnin 3 touh thung Jerusalem vah a kamkhueng awh. Thapa yung 9, hnin 21 nah kho puenghoi a rak dawкvah, taminaw teh Cathut e im hmalah sut a tahung awh teh a pâyaw awh. <sup>10</sup> Hatnavah, vaihma Ezra ni a thaw teh ahnimouh koevah yonnae na sak awh toe, Isarel miphun dawк yonnae a len nahanelah miphun alouke napuinaw hoi na kâpaluen awh. <sup>11</sup> Hatdawкvah, mintoenaw e BAWIPA Cathut koe yon ngaithoum het awh, a ngainae hah sak awh nateh, hete ram dawк e miphun alouke e na yunaw hoi kâkapek awh, telah ati.

<sup>12</sup> Hahoi, taminaw ni puenghoi kacailah a dei awh e teh, bokheiyah na dei e patetlah ka sak awh roeroe han. <sup>13</sup> Hateiteh, tami moipap awh teh khoraknae tueng lahai bout ao, alawilah kaimouh pou kangdout thai mahoe, hahoi hnin hnin touh hoi sak hane lahai tho hoe, bangkongtetpawiteh, hete hno dawк tami moikapap ni yonnae sak awh toe. <sup>14</sup> Tamimaya e yueng lah kahrarikungnaw ni mah na pouk pouh lawiseh. Kaimae lathueng vah kalenpounge BAWIPA lungkhueknae a roum nahanelah mae kho dawк Jentelnaw yu lah paluen e khonaw dawк e kahrarikungnaw hoi lawkcengkungnaw ni a tueng khoe e dawк rip tho awh naseh telah, ati awh. <sup>15</sup> Asahel capa Jonathan hoi Tikvah



capa Jahaziah ni hnâ bawt roi hoe, hatei Levih miphun Meshullam hoi Shabbethai ni teh hnâ a bo roi. <sup>16</sup> Hahoi san daw, hoi kahloutnaw ni hottelah a sak awh. Vaihma Ezra ni imthung kahrarikungnaw thung hoi minnaw a la e patetlah thapa ayung 10 nae, apasuek hnin navah hote kong kâdei hanelah a kamkhueng awh. <sup>17</sup> Hahoi Thapa yung pasuek, apasuek hnin nah, miphun alouke yu lah ka lat e kong kâdei e teh a cum awh.

*Miphun alouke yunaw pahnawt awh*

<sup>18</sup> Hahoi, vaihma capanaw thung daw, hoi miphun alouke yu lah ka lat e taminaw teh, Jeshua hoi a hmaunawngah thung e Jozadak capa hoi a hmaunawngah Maaseiah, Eliezer, Jarib hoi Gedaliah tinaw doeh. <sup>19</sup> Ahnimanaw ni a yunaw kapek hanelah lawk a kam awh. Yon pâphonae daw, ngaithoum lah o nahanelah, tutan buet touh hoi thuengnae a sak awh. <sup>20</sup> Immer catoun thung hoi Hanani hoi Zebadiah. <sup>21</sup> Harim catoun thung hoi Maaseiah, Elijah, Shemaiah, Jehiel hoi Uziah. <sup>22</sup> Pashhur catoun thung hoi Eliezer, Maaseiah, Ishmael, Nethanel, Jozabad hoi Eleasah tinaw doeh. <sup>23</sup> Levih miphunnaw thung hoi Jozabad, Shimei, Kalaiah, Pethahiah, Judah hoi Eliezer tinaw doeh. <sup>24</sup> La kasaknaw thung hoi Eliashib, longkha karingkungnaw thung hoi Telem hoi Uri tinaw doeh. <sup>25</sup> Isarelnaw thung hoi Parosh capa thung hoi Ramiah, Jeriah, Malkijah hoi Benaiah. <sup>26</sup> Elam capa thung hoi Mattaniah, Zekhariah, Jehiel, Abdi, Jerimoth hoi Elijah tinaw doeh. <sup>27</sup> Zattu capanaw thung hoi Eliezer, Eliashib, Mattaniah Jerimoth, Zabad hoi Aziza tinaw doeh. <sup>28</sup> Bebai capanaw thung hoi Jehohanan, Hananiah, Zabai hoi Athlai. <sup>29</sup> Bani capanaw thung hoi Meshullam, Malluck, Adaiah, Joshub, Sheal hoi Jerimoth tinaw doeh. <sup>30</sup> Phathmoab capanaw thung hoi Adna, Khelal, Benaiah, Maaseiah, Mattaniah, Bezalel, Binnui, hoi Manasseh tinaw doeh. <sup>31</sup> Harim capanaw thung hoi Eliezer, Isshijah, Malkijah, Shemaiah, Simeon. <sup>32</sup> Benjamin, Malluck hoi Shemariah tinaw doeh. <sup>33</sup> Hashum capanaw thung hoi Mattaniah, Mattattah, Zabad, Eliphelet, Jeremai, Manasseh hoi Shimei tinaw doeh. <sup>34</sup> Bani capanaw thung hoi Maadai, Amram, Uel. <sup>35</sup> Benaiah, Bedeiah, Kheluh. <sup>36</sup> Vaniah, Meremoth, Eliashib. <sup>37</sup> Mattaniah, Mattaniah, Jaasu. <sup>38</sup> Bani, Binnui, Shimei. <sup>39</sup> Shelemiah, Nathan, Adaiah. <sup>40</sup> Maknadebai, shashai, Sharai. <sup>41</sup> Azarel, Shelemiah, Shemariah. <sup>42</sup> Shallum, Amariah, hoi Joseph tinaw doeh. <sup>43</sup> Nebo capanaw thung hoi Jeiel, Mattithiah, Zabad, Zebina, Iddo, Joel hoi Benaiah tinaw doeh. <sup>44</sup> Hetnaw pueng teh miphun alouke yu lah ka lat e taminaw doeh, tami tangawn ni a yunaw koehoi ca catoun a hmu awh.



## NEHEMIAH (The Book of Nehemiah)

### *Jerusalem bout a ban awh*

<sup>1</sup> Hacialiah capa Nehemiah e lawk teh, Artaxerxes abawinae kum 20, Khislev thapa, siangpahrang khopui Shushan im ka o navah, <sup>2</sup> ka nawngna Hanani hoi Judah ram e tami tangawn a tho awh teh Judah taminaw san daw k hoi ka hlout ni teh kaawm rae naw hoi, Jerusalem e a kongnaw hah ka pacei. <sup>3</sup> Ahnimouh ni kai koevah, san thung hoi ka tâcawt ni teh hot ram daw k kaawm awh rae naw ni, kalenpounge roedengnae hoi hnepnapnae thung ao awh. Jerusalem rapan pueng a rawp teh longkhanaw hmai kOUNg a kak telah a dei awh.

### *Nehemiah ratoumnae*

<sup>4</sup> Hote lawk ka thai navah ka tahung teh ka kâ. A hnin moikasawlah ka lung a mathoe teh rawcahai lahoi kalvan kaawm Cathut koe ka ratoum e teh, <sup>5</sup> Oe kalvan kaawm e Jehovah Cathut, kalen ni teh takikatho poung e Cathut, nang lungpataw niteh, na kâpoelawknaw ka tarawi e lathueng vah, lawkkam na kuep sak teh lungmanae kamnuksakkung, <sup>6</sup> Isarelnaw hanelah, na hmalah amom tangmin ka ratoum teh Isarelnaw lah kaawm e kaimouh ni ka sakpayon e yonnaw ka pâpho awh teh ka kâhei awh e naw hah sahnin na thai pouh haw. <sup>7</sup> Kai hoi ka miphunnaw ni ka payon awh toe. Cathut nang koe ka yon awh teh, panuethopounge hno ka sakpayon awh toe. Na san Mosi koe na poe e kâpoelawknaw, phunglawknaw, lawkcengnaenaw ka tarawi awh hoe h toe.

<sup>8</sup> Na san Mosi koe vah yuemkamcu lah na awm awh hoehpawiteh miphun pueng kâkapek sak han. <sup>9</sup> Hatei kai koe bout na ban awh teh kâpoelawknaw bout na tarawi awh pawiteh kalvan rahim ahla poungnae koe pâlei e lah na o awh nakunghai, hote hmuén koehoi bout na pâkhueng vaiteh ka min o nahan ka rawi e hmuén koe na ceikhai han telah Mosi koe lawk na poe e hah pahnim hanh lah. <sup>10</sup> Atuvah taminaw teh kalenpounge na thaonae hoi karang poung e na kut hoi na ratang e taminaw doeh. <sup>11</sup> Oe BAWIPA na san ni ratoumnae hoi na min ka bari e na sannaw ratoumnae lawk hah na thai pouh haw. Na san heh sahnin yawhawinae poe haw. Hete tami hmalah minhmai kahawi na hmawt sak haw telah ka ratoum. Hatnavah kai teh siangpahrang e manang kuenkung lah ka o.

## 2

### *Nehemiah Jerusalem a cei*

<sup>1</sup> Siangpahrang Artaxerxes bawi kum 20, Nisan thapa nah misurtui ka la teh, siangpahrang hah ka poe. Ha hoehnahlan teh, a hmalah ka minhmai mathout boi hoh. <sup>2</sup> Siangpahrang ni bangkongmaw na minhmai a mathoe. Patawnae hai na tawn hoe h. Alouke bang mahoe h, na lungthung hoi lungmathoe e doeh kaawm telah na ti pouh.

<sup>3</sup> Kai ni hai siangpahrang na hringsaw seh. Ka mintoenaw onae khopui a rawk teh longkhanaw hmai kOUNg a kak navah, minhmai mathout laipalah bangtelamaw ka o thai han telah ka ti pouh.

<sup>4</sup> Siangpahrang ni bangmaw hei han na ngai telah na pacei. Hahoi, kalvan kaawm e Cathut koe ka ratoum.



<sup>5</sup> Siangpahrang koevah, siangpahrang na lungkuep boilah, na san ni minhmai kahawi kahmawt pawiteh, ka mintoenaw onae khopui bout ka pathout thai nahanelah, Judah kho ka cei thai nahanlah ka kâhei telah ka ti pouh.

<sup>6</sup> Siangpahrangnu hai ateng vah a tahung teh, siangpahrang ni nâyittouh maw na ro han. Nâtuek maw bout na ban han telah na pacei. Hahoi kai ni atueng ka khoe teh, siangpahrang ni lunghawicalah na cei sak.

<sup>7</sup> Hahoi siangpahrang koevah, siangpahrang na lungkuep pawiteh tui namran lah kaawm e lawkcengkungnaw ka kâhmo nah Judah ram totouh ka cei thai nahanlah ca na thun pouh haw. <sup>8</sup> Siangpahrang e ratu ka ring e Asaph koe, Bawkim longkha hoi longkha khomnaw hane, khorapan hoi ka o nahane im han lah thing na poe nahane hoi kâpoenae ca hai na poe nahanelah ka hei e patetlah, Cathut pahren lahoi Siangpahrang ni kai koe na poe. <sup>9</sup> Hahoi tui namran lah kaawm e khobawinaw koe ka pha teh siangpahrang koe e ca hah ka poe. Hahoi siangpahrang ni kai koevah ransabawi hoi marangransanaw hah a tha. <sup>10</sup> Isarel miphunnaw hanlah hnokahawi ka sak hane tami buet touh a tho tie Horon tami Sanballat hoi Ammon tami san lah kaawm e Tobiahnaw ni a thai awh navah puenghoi a lungkhuek awh.

<sup>11</sup> Hahoi Jerusalem vah ka pha teh hnin thum touh hawvah ka o. <sup>12</sup> Tangmin vah ka thaw teh kama koe ka hrawi e tami tangawn hoi Jerusalem hanelah Cathut ni ka lungthin dawk na poe e hah alouke tami api koehai ka dei pouh hoeh. Ka kâcuie marang hloilah saring alouke banghai ka sin hoeh. <sup>13</sup> Hat hnin tangmin vah, ayawn longkha koehoi ka tâco teh khorui longkha hoi vaipuen longkha koe lah ka cei. Jerusalem rapan ka rawk e hoi longkha ka kang e naw hah ka khet. <sup>14</sup> Tuikhu longkha koehoi siangpahrang tuiim totouh ka cei hatei, ka kâcuie marang a cei nahan lamthung awmhoeh. <sup>15</sup> Hahoi tangmin vah palang kahrawng teh rapannaw ka khet. Hahoi bout ka ban teh ayawn longkha dawk hoi bout ka kâen. <sup>16</sup> Ka lawkcengkungnaw ni nâdaw ka cei tie hoi bangmaw ka sak tie panuek awh hoeh. Judahnaw, vaihmabawinaw, lawkcengkungnaw, hoi alouke thaw katawkkungnaw koe banghai ka dei pouh hoeh rah.

<sup>17</sup> Hahoi teh ahnimouh koevah maimouh ni khang e roedengnae Jerusalem a rawk e, kho longkha hmai kakangnaw hai na hmu awh toe tho awh haw pathoenae dawh hoi hlout nahanelah Jerusalem khopui teh bout sak lei sei telah ka dei pouh.

<sup>18</sup> Hahoi lathueng Cathut ahawinae hoi siangpahrang ni ca a thut e naw hah ka dei pouh teh, ahnimouh ni thâw awh vaiteh sak awh leih sei telah ati awh. Hahoi teh hote thaw kahawi tawh hanelah a kuttha ao sak awh. <sup>19</sup> Hatnavah, Horon tami Sanballat san lah kaawm e Ammon miphun Tobiah, Arab tami Geshem tinaw ni a thai awh toteh na panuikhai awh ni na hnephnap awh. Hno na sak e naw heh bangmaw. Siangpahrang na taran awh e doeh khe telah na ti pouh awh.

<sup>20</sup> Hatnavah ahnimae lawk teh ka pathung; kalvan e Cathut ni kaimouh hanelah a kuep sak han. Hatdawkvah, Cathut e san lah kaawm e kaimouh ni ka thaw awh vaiteh ka sak awh han. Hatei, nangmouh teh Jerusalem e coe hane thoseh, kâtawn hane hai thoseh, pâkuem hane hai thoseh na tawn awh hoeh telah ka ti pouh.



<sup>1</sup> Hottelah vaihma kacue Eliashib teh, a hmaunawngnga vaihmanaw hoi a thaw awh teh, tu longkha a pathoup awh. Hote a thounsak hnukkhu tho a sak awh. Meah imrasang hoi Hananel imrasang totouh a pathang awh teh, a thounsak awh. <sup>2</sup> Hathnukkhu, Jeriko taminaw ni a pathoup awh. Hathnukkhu Imri capa Zakkur ni a pathoup.

<sup>3</sup> Tanga longkha teh Hassenaah capanaw ni a pathoup awh. A taren nahanelah takhang, takhang tâphai, a rawngkhan nahanelah sumtaboung a sak awh teh, a taren awh. <sup>4</sup> Ahnimae hnukkhu, Uriah capa Hakkoz e cava Meremoth ni a pathoup. Hathnukkhu, Berekhiah capa, Meshezabel e cava Meshullam ni a pathoup. Hahoi Baana capa Zadok ni a pathoup. <sup>5</sup> Hathnukkhu, Tekoanaw ni a pathoup awh. Hateiteh khothung e a lungkahanaw ni a bawipa e thaw, aloung dawk patue han ngai awh hoe.

<sup>6</sup> Hothloilah, longkha karuem teh Paseah capa Jehoiada, hoi Besodeiah capa Meshullam ni a pathoup. A taren nahanelah tho lawng takhangnaw a sak awh. <sup>7</sup> Hathnukkhu, Gibeon tami Melatiah hoi Meronoth tami Jadon ni tui namran lah kaawm e Gibeonnaw Mizpah taminaw hoi pathoup awh. <sup>8</sup> Hathnukkhu, sui kahlun e thung hoi Harhaiah capa Uziah ni a pathoup. Hahoi hmuitui ka sak e thung hoi Hananiah ni a pathoup teh rapan kakawpoung tie Jerusalem totouh a kalup awh. <sup>9</sup> Hathnukkhu, Jerusalem khopui tangawn ka uk e Hur capa Rephaiah ni a pathoup.

<sup>10</sup> Hahoi, Harumaph capa Jedaiah hoi a imhma lae ni pathoup. Hahoi Hashabneiah capa Hattush ni a pathoup. <sup>11</sup> Harim capa Malkhijah hoi Pahathmoab capa Hasshub ni bout a pathoup teh imrasang daw k e takhuen hai a pathoup. <sup>12</sup> Hathnukkhu, Jerusalem khopui tangawn ka uk e, Hallohesh capa Shallum ni a canunaw hoi a pathoup awh.

<sup>13</sup> Ayawn daw k e longkha teh Hanun hoi Zanoah ni a pathoup. Tho taren nahane hoi longkha hai tawngtang a sak. Songnawng longkha totouh rapan a pathoup e dong 10, 000 touh a pha.

<sup>14</sup> Songnawng longkha teh Bethhakerem khopui kaukkung Rekhav capa Malkhijah ni a pathoup. Tho a taren nahane naw hoi rawngkhan nahane naw hai tawngtang a sak.

<sup>15</sup> Mizpah khopui kaukkung Kolhozeh capa Shallum ni tuikhu longkha a pathoup teh lempu hai a padi hnukkhu, longkha taren nahane hai tawngtang a sak. Siangpahrang takha teng e Shiloh tuiim rapan teh Devit khopui hoi cathuknae lam totouh a pathoup. <sup>16</sup> Ahni hnukkhu Bethzur khopui atangawn ka uk e, Azbuk capa Nehemiah ni Devit phuen tuiim hoi athakaawme taminaw e im totouh a pathoup. <sup>17</sup> Hathnukkhu, Levih tami Bani capa Rehun ni a pathoup. Hahoi Keilah khopui tangawn ka uk e Hasabiah ni amae khopui hanelah a pathoup. <sup>18</sup> Hahoi Keilah khopui tangawn kaukkung Henadad capa Bavvainaw ni a pathoup awh. <sup>19</sup> Ahni hnukkhu, Mizpah kho kaukkung Jeshua capa Ezer ni kâtuknae puengcang hrueknae koelah luennae a pathoup. <sup>20</sup> Hathnukkhu, Zabbai capa Baruk ni lungthocalah hoi, alouk lae hmuen, kho takin koehoi vaihma kacue Eliashib e im takhang totouh a pathoup. <sup>21</sup> Ahni hnukkhu vah Koz capa, Uriah capa Meremoth ni Eliashib im takhang koehoi Eliashib im apout totouh a pathoup. <sup>22</sup> Ahni hnukkhu atenggam e vaihmanaw ni a pathoup awh. <sup>23</sup> Ahni hnukkhu Benjamin hoi Hasshub ni a imhma totouh a pathoup roi. Hathnukkhu teh Ananiah capa, Maaseiah capa Azariah ni a im hma han a pathoup. <sup>24</sup> Ahni hnukkhu Henadad capa Binnui ni Azariah im koehoi khopui rapan longkawinae koehoi khopui takin totouh a pathoup. <sup>25</sup> Uzzai capa Palal ni imrasang longkawinae koehoi thongim



teng siangpahrang im sak e im totouh a pathoup. Hathnukkhu Parosh capa Pedaiah ni a pathoup. <sup>26</sup> Hothloilah, Nethinim tami Ophel vah kho ka sak e taminaw ni kanitholah e tui longkha totouh hoi imrasang totouh a pathoup awh. <sup>27</sup> Hathnukkhu, Tekoa taminaw ni alawilah kadangka lae rapan koehoi Ophel imrasang totouh a pathoup awh.

<sup>28</sup> Marang longkha a lathueng lae teh, vaihmanaw ni a imhma lae lengkaleng a pathoup awh. <sup>29</sup> Ahni hnukkhu, Immer capa Zadok ni a imhma lae a pathoup. Kanitholae longkha ramvengkung Shekaniah capa Shemaiah ni a pathoup. <sup>30</sup> Hahoi, Shelemiah capa Hananiah hoi Zalaph capa ataruk e Hanunnaw ni alouklouk lae a pathoup awh. Ahni hnukkhu, Berekhiah capa Meshullam ni a onae hmalae a pathoup. <sup>31</sup> Hathnukkhu, sui kahlunkung thung hoi Malkhijah ni Miphkad longkha hmalae Nethinim taminaw e im hoi hno kayawtnaw e im totouh hoi, a takin koe lah ceinae tangkham totouh a pathoup awh. <sup>32</sup> Hahoi, a takin koe lah ceinae tangkham hoi Tu longkha rahak e teh suikahlunnaw hoi hno kayawtnaw ni a pathoup awh. -

## 4

### *Thaw tawk a tarawk awh*

<sup>1</sup> Hateiteh, hettelah ao. Sanballat ni rapan pathoupnae akong a thai toteh, puenghoi a lungkhuek teh Judahnaw hah a dudam. <sup>2</sup> A hmaunawngnanaw hoi Samaria ransanaw e hmalah lawk a dei teh, hate Judahnaw a tha kaawm hoehnaw ni bangmaw a sak thai awh han vai. Khopui bout kangdue sak hane maw a noe awh vai, thuengnae bout sak hanelah vaimoe ka kang tangcoung e talungnaw songnawng um e rasa vaiteh bout pathoup awh han vaimoe telah a dei pouh. <sup>3</sup> Ateng kaawm e Ammon tami Tobiah ni sak e rapannaw hah Asui ni mah luen sin pawiteh, ei ka rawm ka han atipouh.

<sup>4</sup> Oe ka Cathut na khenhaw! dudam e tami lah ka o awh. Kaimouh na pathoe e naw amamae lû dawkwaw bawt naseh. Ahnimouh hai alouke ram buetbuet touh dawkwaw yeirapo van seh. <sup>5</sup> Lawkkamnae hah ramuk pouh hanh. A yonnae teh na hmalah roun sak hanh. Bangkongtetpawiteh, rapan kapathoupnaw hmalah nang lung na khuek sak awh.

<sup>6</sup> Hateiteh, kaimouh ni khopui rapan hah ka pathoup awh. Ka pathoup e taminaw teh a lungmanae a len dawkwaw, khopui a tengpam hoi khopui rapan rasang tangawn totouh ka pacoung awh.

<sup>7</sup> Hat navah, Sanballat hoi Tobiah hoi Arab taminaw, Ammonnaw hoi Asdodnaw ni Jerusalem rapan te pou a pathoup awh tie kong a thai awh navah, puenghoi a lungkhuek awh. <sup>8</sup> Hahoi teh, Jerusalem tarantuk hane hoi runae poe hanelah a kâcai awh. <sup>9</sup> Hateiteh, kaimouh ni Cathut koe ka ratoum awh teh, amom tangmin kâhat laipalah ramveng ka ta awh.

<sup>10</sup> Judahnaw ni thaw katawkkungnaw teh a tâwn poung awh toe. Songnawngnaw hai apap poung, rapan pathoup thai mahoehtoe ati awh. <sup>11</sup> Tarannaw ni hai ahnimanaw kâhruetcuat awh hoehtah cei awh vaiteh, thawnav raphoe pouh sei ati awh. <sup>12</sup> Ahnimae ateng kaawm e Judahnaw ni, tarannaw teh onae alouklouk lahoi tho awh vaiteh nangmouh na tuk awh han toe telah boutbout a dei awh. <sup>13</sup> Hatdawkwaw, rapan e a hnukkhu lah, ka rahnoum e hmuen kathoung, hmuen dawkwaw tahloi, tahroe, licung ka sin e taminaw hah a miphun lahoi thaw ka poe. <sup>14</sup> Ka thaw teh ka khet. Bawinaw, lawkcengkungnaw hoi alouke taminaw ka kaw teh, tarannaw taket awh hanh, kalenpoung hoi takikatho poung e



Cathut pahnim laipalah, hmaunawngghanaw, canunaw, yunaw hoi innaw karoumcalah o thai nahan tawh awh ka ti pouh.

### *Thaw bout kamtawng awh*

<sup>15</sup> Tarannaw ni a noe awh e naw hah Cathut ni a raphoe pouh tie na panue sak e ka panue awh toteh, rapan pathoup hanelah mae hmuen koe lengkaleng ka ban awh teh ka tawh awh. <sup>16</sup> Hahoi teh, tangawn ni thaw a tawh awh, tangawn ni tahroe bahling, sumangkinaw a patuep awh. Hahoi lawkcengkungnaw teh Judah imthung e a hnuklah ao awh. <sup>17</sup> Rapan pathoup nahanlah hno kaphawtnaw ni hai kutvang hoi thaw tawh awh teh, kutvang hoi senehmaica a patuep awh. <sup>18</sup> Kaphathoupkungnaw ni tahloi hah a keng dawk a neng laihoi a tawh awh. Mongka kauengnaw teh ka teng vah, a kangdue awh. <sup>19</sup> Thaw a len poung teh akawpoung dawkvah, rapan e a van vah buet touh hoi buet touh kâhlat poung lah ka tawh awh. <sup>20</sup> Hatdawkvah, mongka lawk na thai awh toteh, alouklouk lahoi kai koe na tho awh vaiteh, maimae Cathut ni taran na tuk pouh han telah, bawinaw, lawkcengkungnaw hoi alouke taminaw koe ka dei pouh. <sup>21</sup> Hottelah thaw teh ka tawh awh. tami tangawn ni khodai hoi e tangmin Âsi kamnue totouh senehmaica a patuep awh. <sup>22</sup> Hahoi kai ni, taminaw pueng tangmin teh Jerusalem kho thung vah ip awh. Khodai vah thaw tawh awh vaiteh, karum vah kâletta lahoi ramveng ratawng awh han telah taminaw koe ka dei pouh. <sup>23</sup> Hahoi, ka nawngghanaw thoseh, ka sannaw thoseh, ka hnukkâbangnaw thoseh, amamae khohna rading laipalah, ka o awh.

## 5

### *Nehemiah ni repcoungroenae a kâhat sak*

<sup>1</sup> Hatnavah, napui tongpanaw ni a miphun lah kaawm e Judahnaw hah a taran awh teh puenghoi a hramki awh. <sup>2</sup> Tangawn ni kaimae canunaw hoi capanaw moi apap. Ahnimanaw ka paca hane nâ e rawca namaw ka la awh han ati awh. <sup>3</sup> Tangawn ni kaimae law, takha, innaw hoi ka pâhung awh toe. Canei takangnae atueng nâ e maw ka hmu awh han vah ati awh. <sup>4</sup> Tangawn ni kaimouh ni siangpahrang koe aphawng poe hanelah law, takha naw hane tangka ka cawi awh toe. <sup>5</sup> Atuvah maimae takthainaw teh miphun buet touh e takthai patetlah doeh ao. Maimae canaw teh ahnimaie canaw patetlah doeh ao awh. Maimae canaw hah yo vaiteh, san lah o sak han namaw. San dawk kaawm e canunaw patenghai ratang thai awh hoeh. Law hoi misur takhanaw pueng ayânaw e kut dawk a pha toe ati awh.

<sup>6</sup> Hottelah hramnae lawk ka thai navah puenghoi ka lungkhuek. <sup>7</sup> Hahoi, kahawicalah kho ka pouk teh bawinaw hoi lawkcengkungnaw ka kaw teh, nangmouh ni na hmaunawnggha koe bangkongmaw apung na ca awh vaw telah ka yue teh, hote kong kâpankhai nahanelah taminaw teh ka kamkhueng sak. <sup>8</sup> Jentelnaw koe kaawm e hmaunawnggha Judah taminaw hah a coung thai totouh ka ratang awh teh, nangmouh ni hmaunawngghanaw bout na yo awh han rah maw, nangmouh ni hmaunawngghanaw bout na kâyo awh han rah maw telah ka yue teh lawkkamuem duem ao awh teh, pathung nahane lawk tawn awh hoeh toe. <sup>9</sup> Hahoi kai ni, nangmouh ni na sak e hnonaw hawihoe. Maimae taran lah kaawm e Jentelnaw ni na dudam awh han. Nangmouh ni Cathut taki laihoi hnokahawi sak kawi nahoehmaw ka ti pouh. <sup>10</sup> Kai hoi



hmaunawngnga, ka sannaw ni taminaw koehoi e hnopai hoi cainaw kêrei thai awh van nahoehmaw. Apung canae teh pâpout awh leih. <sup>11</sup> Sahnin roeroe vah ahnimae law, takha, Olive takhanaw hoi imnaw amamouh koehoi na kêreikhai e cai, misurtui hoi satuinaw 100 touh dawkw buet touh na la awh e pueng hai bout poe awh leih ka ti pouh. <sup>12</sup> Ahnimouh ni hai bout ka poe awh han toe. Banghai bout ka lat awh mahoehtoe. Na dei e patetlah ka sak awh han ati awh. Hahoi vaihmanaw ka kaw teh lawkkam e patetlah tawkw hanelah lawkkamnae ka sak sak. <sup>13</sup> Kai ni hai kâkhu e ka kathuek teh, hete lawkkam ka tarawi hoehtoe e tami teh Cathut ni im dawkw hoi thoseh, a thaw dawkw hoi thoseh kathuek van naseh telah taminaw koe ka dei navah ahnimouh ni Amen telah ati awh. BAWIPA a pholen awh. Hahoi teh taminaw pueng ni lawkkam patetlah a tawksak awh.

### *Nehemiah hring pasoungnae*

<sup>14</sup> Judah ram ukkung lah ka o navah siangpahrang Artaxerxes kum 20 touh hoi kamtawng teh kum 32 totouh, kum 12 touh thung kai hoi kmaunawngghanaw ni ukkung e tamuk ka lat boi awh hoehtoe. <sup>15</sup> Ahmaloe ukkungnaw teh taminaw hanelah hnokari poung lah ao awh. Vaiyei hoi misurtui hai thoseh, hnin touh dawkw sekel 40 touh a poe awh. Hothloilah a sannaw koehoi dumyennaehai a kâhmo awh. Hatei kai teh Cathut ka taki dawkvah hottelah ka sak hoehtoe. <sup>16</sup> Hothloilah, kai teh khopui rapan doeh pou ka pathoup. Kai hoi ka sannaw ni la ka ran awh hoehtoe. Khopui rapan pathoup hane doeh lungkângingcalah kâyawm awh. <sup>17</sup> Hahoi miphun alouke hoi ka tho e dei laipalah, Judah miphunnaw hoi lawkcengkungnaw 150 touh ni ka caboi dawkw rawca pou a ven awh. <sup>18</sup> Hnintangkuem maito buet touh, tu 6 touh hoi ânaw pou a thei awh hloilah, hnin 10 touh dawkw vai touh misurtui aphunpun ka nei awh. Hettelah ka baw nakunghai taminaw ni puenghoi thaw a tawkw awh dawkvah, khobawi ni pang hane kaw ka het boi awh hoehtoe. <sup>19</sup> OE ka Cathut, hete taminaw hanelah hnokahawi ka sak e dawkvah kai heh kahawi nahanelah na pahnim pouh hanh lah a.

## 6

### *Nehemiah a tarawkw awh*

<sup>1</sup> Hatnavah, khopui longkha ka cum awh hoehtoe rah eiteh, khopui rapan teh a cak toe tie Sanballat hoi Tobiah hoi Arab tami Geshem hoi alouke tarannaw ni kamthang a thai awh toteh, <sup>2</sup> Sanballat hoi Geshem ni tho haw, Ono hmuen koe kâhmo awh sei telah kahawihoehtoe pouknae hoi lawk na thui. <sup>3</sup> Kai ni hai, patounenaw ka patoun teh, kai teh thaw kalenpounge ka tawkw dawkvah ka tho thai mahoehtoe. Bangkong hete thawngaw ka ceitakhai vaiteh, nangmouh koe khuet ka tho han vaw telah lawkw bout ka thaisak van. <sup>4</sup> Hottelah, vai pali touh hane lawkw na thui eiteh, hettelah doeh boutbout ka dei pouh. <sup>5</sup> Hat toreitoe teh, Sanballat ni hottelah ca bout a thut teh, paawng tangcoung e ca a sanpa buet touh koe a phu sak. <sup>6</sup> Ca dawkw thut lah kaawm e teh, nang hoi Judahnaw ni kâtaran hane na noe awh dawkvah, rapan na pathoup awh titeh alouke miphunnaw ni a dei awh. Geshem ni hai a dei. Hete lawkw hoi kâkuen lah nang teh Judah siangpahrang lah o han na ngai dawkw doeh. <sup>7</sup> Judah ram dawkw siangpahrang ao telah na kong hah siangpahrang koevah karanglah a kamthang han. Hatdawkvah, tho nateh kâdeikâpan sei telah ca a thut. <sup>8</sup> Hatnavah, kai ni hai lawkw na dei e naw buet touh hai atang nahoehtoe. Na pouk e na dei rumram e doeh telah tami buet touh ka tha te ka dei



sak. <sup>9</sup> Bangkongtetpawiteh, ahnimouh ni a tawk e thawnew teh cum thai awh mahoe, thayoun awh han doeh telah pouk lahoi na pakhinae doeh. Hatdawkvah, atuteh oe Cathut ka kutnew hah tha awm sak haw.

<sup>10</sup> Hahoi, Mehetabel capa, Delai capa Shemaiah ni kâhronae im dawc ka cei navah ahni ni Cathut e im Bawkim thung kâhmo awh vaiteh, Bawkim thonaw khan awh sei. Nang ka thet hane taminaw a tho awh han, tangmin nakunghai a tho awh han telah a ti. <sup>11</sup> Kai nihai, kai patetlah e tami ni khuet ka yawng han namaw. Kai hoi kâvan e tami ni a hring nahanelah Bawkim thung kâen han namaw, ka kâen mahoe ka ti pouh. <sup>12</sup> Hahoi kai ni ka thai panuek e teh, Cathut ni a tha e nahoe. Kai hoi kâtaran lah sutdeilawc a pathang e doeh. Tobiah hoi Sanballat ni a hlai roi e doeh. <sup>13</sup> Bangkongtetpawiteh, hottelah ka sak lahoi yonnae sak sak vaiteh, na pathoe hane a ngai dawc, a hlai e doeh. <sup>14</sup> Oe ka Cathut, hettelah ka sak e Tobiah hoi Sanballat hoi profet napui Noadiah hoi alouke profetnew hah pahnim han.

### *Tapang a cum awh*

<sup>15</sup> Rapan a cum awh teh, hnin 52 hnukkhu, Elul thapa hnin 25 nah ka cum awh. <sup>16</sup> Hote kamthang teh tarannaw ni a thai awh teh, alouke miphunnaw ni rapan a hmu awh navah, puenghoi a taki awh teh, hete hnonaw heh Cathut ni a sak e doeh tie a panue awh. <sup>17</sup> Hatnavah, Judah bawinaw ni Tobiah koe ca moi a patoun awh teh, Tobiah koe e ca hai a hmu awh. <sup>18</sup> Tobiah teh Arah capa, Shekaniah e cava lah ao teh, a capa Jehohanan Berekhiah, capa Meshullam, canu hoi ao roi dawkvah, Judahnaw ni Tobiah koe lawc a kam awh. <sup>19</sup> Ahnimouh ni Tobiah hnokahawi a sak e naw hah kai koe bout a dei awh. Kaie lawc hai ahni koe bout a dei pouh awh. Ahnimouh ni hai kai ni taki sak nahane ca bout na poe.

## 7

<sup>1</sup> Rapannaw ka pathoup awh teh longkhanaw ka cum awh hnukkhu, longkha karingkung hoi la kasakkung lah Levih miphunnaw hah thaw ka poe. <sup>2</sup> Yuemkamcu lah kaawm ni teh Cathut ka taket e ransabawi Hananiah hoi ka nawngah Hanan teh Jerusalem ka uk sak. <sup>3</sup> Jerusalem longkhanaw teh kanî a tâco hoehnahlan vah paawng sak hanh. Tangmin lah karingkungnew ni longkha kacaklah taren awh naseh. Hahoi khocanaw ni amamouh onae hmuen koehai thoseh, a imnew koehoi thoseh ramveng awh naseh. <sup>4</sup> Bangkongtetpawiteh, santoungnae koehoi, bout ban nateh, khopui teh akaw eiteh khotung kaawm e taminaw ayounca dawkvah, imnew sak thai awh hoech rah.

### *Santoungnae koehoi bout kabannaw*

<sup>5</sup> Ka Cathut ni ka lungthung vah, bari e naw hoi lawkcengkungnew hoi tamimaya a kaw teh, a tâconae patetlah min thut hanelah na dei pouh. Hahoi ahmaloe kabannaw kakhekungnew min thutnae cauk hah ka hmu. Hot dawkvah hettelah thut e lah ao.

<sup>6</sup> San dawc hrawi lah kaawm e, Babilon siangpahrang Nebukhadnezar ni hrawi lah kaawm niteh, san dawc hoi a tâco teh Jerusalem hoi Judah ram e amamouh onae koe bout ka ban ni teh kho ka sak e milunaw teh, <sup>7</sup> Jerusalem koe ka tho e naw teh, Joshua, Nehemiah, Azariah, Raamiah, Nahamani, Mordekai, Bilshan, Mispereth, Bigvai, Nehum hoi Baanah. Ahnimanaw hoi cingtalalah ka tho e Isarel miphunnaw teh; <sup>8</sup> Parosh ca catounnew 2, 172 <sup>9</sup> Shefatiah ca catounnew 372 <sup>10</sup> Arah ca catounnew



652 <sup>11</sup> Jeshua hoi Joab catoun thung hoi e Pahathmoab ca catounnaw 2, 818 <sup>12</sup> Elam ca catounnaw 1, 254 <sup>13</sup> Zattu ca catounnaw 845 <sup>14</sup> Zakkai ca catounnaw 760 <sup>15</sup> Binnui ca catounnaw 648 <sup>16</sup> Bebai ca catounnaw 628 <sup>17</sup> Azgad ca catounnaw 2322

<sup>18</sup> Adonikam ca catounnaw 667 <sup>19</sup> Bigvai ca catounnaw 2, 067 <sup>20</sup> Adin ca catounnaw 655 <sup>21</sup> Hezekiah capa thung hoi e Ater ca catounnaw 98 <sup>22</sup> Hashum ca catounnaw 328 <sup>23</sup> Bezai ca catounnaw 324 <sup>24</sup> Hariph ca catounnaw 112 <sup>25</sup> Gibeon ca catounnaw 95 <sup>26</sup> Bethlehem hoi Netophah taminaw 188 <sup>27</sup> Nathoth ca catounnaw 128 <sup>28</sup> Bethazmaveth ca catounnaw 42 <sup>29</sup> KiriathJearim, Kephirah hoi Beeroth tami 143 <sup>30</sup> Ram hoi Geba ca catounnaw 621 <sup>31</sup> Mikmas ca catounnaw 122 <sup>32</sup> Bethel hoi Ai tami 123

<sup>33</sup> Nebo alouke ca catounnaw 52 <sup>34</sup> Elam alouke ca catounnaw 1, 254

<sup>35</sup> Harim ca catounnaw 231 <sup>36</sup> Jeriko ca catounnaw 345 <sup>37</sup> Lod, Hadiel hoi Ono ca catounnaw 721 <sup>38</sup> Senoah ca catounnaw 3, 930

<sup>39</sup> Vaihmanaw: Jeshua imthungkhu Jedaiah ca catounnaw 973 <sup>40</sup> Immer ca catounnaw 1052 <sup>41</sup> Pashhur ca catounnaw 1247 <sup>42</sup> Harim ca catounnaw 1017

<sup>43</sup> Levih ca catounnaw : Hodaviah capa thung hoi e Kadmiel tami Jeshua ca catounnaw 74 <sup>44</sup> La kasakkung: Asaph ca catounnaw 148 <sup>45</sup> longkha ka ring e naw: Shallum ca catounnaw, Akkub ca catounnaw, Hatita ca catounnaw hoi Shobai ca catounnaw 138 <sup>46</sup> Nethin tami: Ziha ca catounnaw, Hasupha ca catounnaw, Tabbaoth ca catounnaw <sup>47</sup> Keros ca catounnaw, sia ca catounnaw, padon ca catounnaw <sup>48</sup> Lebana ca catounnaw, Hagaba ca catounnaw, Salmal ca catounnaw <sup>49</sup> Hanan ca catounnaw, Giddel ca catounnaw, Gahar ca catounnaw <sup>50</sup> Reaiah ca catoun, Rezin ca catoun, Nekoda ca catoun, <sup>51</sup> Gazzam ca catoun, Uzza ca catoun, Paseah ca catoun <sup>52</sup> Besai ca catoun, Meunim ca catoun, Nefishesim ca catoun, <sup>53</sup> Bakkub ca catoun, Hakupha ca catoun, Harhur ca catoun, <sup>54</sup> Bazlith ca catoun, Mehida ca catoun, Harsha ca catoun, <sup>55</sup> Barkos ca catoun, Sisera ca catoun, Tamah ca catoun, <sup>56</sup> Nezhiah ca catoun, Hatipha ca catoun,

<sup>57</sup> Solomon koe kaawm e naw; Sotai catoun, Sofereth ca catoun, Perida ca catoun, <sup>58</sup> Jaala ca catoun, Darkon ca catoun, Giddel ca catoun, <sup>59</sup> Shefatiah ca catoun, Hattil ca catoun, Pokhereth Hazzebaim ca catoun, Ammon ca catoun,

<sup>60</sup> Nathil taminaw hoi Solomon koe kaawm e abuemlah 392 touh a pha.

<sup>61</sup> Telmelah, Telharsha, Kherub, Addoh, Immer ni a moan e naw teh hetnaw doeh. A mintoe, imthungkhu hoi catounnaw hah Isarel miphun katang hoi katang hoeh e hah parui thai awh hoeh toe. <sup>62</sup> Hotnaw teh: Delaiah ca catoun, Tobiah ca catoun Nekoda ca catoun 642 <sup>63</sup> Vaihma miphun thung hoi: Habaiah ca catoun Koz ca catoun Gilead tami Barzillai canu yu lah ka lat e Barzillai ca catoun. <sup>64</sup> Ahnimanaw ni milu touknae dawk amamae milu thut e a hmu awh hoeh dawk kakuep hoeh e miphun vaihma thaw taw mahoe. <sup>65</sup> Umri hoi Thumim ni hrawi e Profet a tho hoeh roukrak teh ahnimouh ni kathoungpounge rawcanaw cat mahoe. <sup>66</sup> Telah kho bawi ni atipouh.

### *Taminaw ni hnopai poe e naw*

<sup>66</sup> Tamihupui abuemlah 42, 360 a pha <sup>67</sup> Sannu, sanpanaw 7, 337; la ka sak e napui tongpa 245 touh a pha. <sup>68</sup> Marangnaw 736 touh a pha teh ka kalen phunnaw 245 touh a pha. <sup>69</sup> Kalauknaw 435 lanaw 6, 720 touh a pha.



<sup>70</sup> Hahoi kahrawikung tangawn ni thaw tawk nahanelah hnopai a poe awh. Khokung ni hai sui derik 1,000, maroi 50, hoi vaihmanaw e khohna 530 touh a poe. <sup>71</sup> Kahrawikung tangawnnaw ni im sak nahanelah sui darik 20,000 touh hoi ngun khing 2, 200 touh a poe awh. <sup>72</sup> Hahoi alouke taminaw ni poe e naw teh sui derik 20, 222 touh hoi ngun khing 2,000 touh hoi vaihmanaw e khohna 67 touh a pha.

<sup>73</sup> Hahoi, vaihma, Levih miphun, longkha ka ring e naw, la kasaknaw, tami tangawn, Nethin miphunnaw hoi Isarelnaw teh amamae kho dawк lengkaleng ao awh. Hahoi thapa yung sari touh a kuep toteh, Isarel catounnaw teh amamae khopui dawк ao awh.

## 8

### *Ezra ni kâlawk a touk*

<sup>1</sup> Thapa yung sari a pha hoi, hmuen tangkuem koe kaawm e Isarelnaw pueng teh, a tho awh teh Tui longkha koe a kamkhueng awh. Isarelnaw koe lawk a poe e teh, Mosi kâlawk cauk sin loe telah kâlawk kacangkhaie Ezra koe a hei e patetlah. <sup>2</sup> Vaihma Ezra ni vah kâlawk teh, napui tongpa hoi ka thai panuek hane ka kamkhuengnaw e hmalah thapa yung sari, apasuek hnin vah a thokhai. <sup>3</sup> Tui longkha hmalah kaawm e thongma lah kangvawi laihoi amom hoi tangmin totouh, ka thai panuek hane napui tongpa hmalah, kâlawk hah a touk pouh teh taminaw ni kahawicalah a thai awh. <sup>4</sup> Ahnimouh ni a sak awh e lawkdeinae tungkhung van a kangdue teh ahnie atengvah aranglah, Mattithiah, Shema, Anaiah, Uriah, Hilkiah hoi Maaseiah, hahoi avoilah, Pedaiiah, Mishaël, Malkhijah, Hashum, Hashbaddanah, Zekhariah hoi, Meshullam a kangdue awh. <sup>5</sup> Ezra ni cauk hah taminaw e mithmu vah a kadai. Ahni teh taminaw hlakvah hmuen rasang koe a kangdue. A kadai toteh tami pueng a kangdue awh. <sup>6</sup> Ezra ni BAWIPA a lentoenae a pholen teh, taminaw ni a kut a dâw awh teh, Amen, Amen, telah a dei awh teh, a lûsaling laihoi BAWIPA a bawк awh. <sup>7</sup> Taminaw ni a onae hmuen koe be ao awh lahun navah, Levih tami Jeshua, Bani, Sherebiah, Jamin, Akkub, Shabbethai, Hodiah, Maaseiah, Kelita, Azariah, Jozabad, Hanan, Pelaiah naw ni hai taminaw kâlawk a panue awh nahanelah a thaisak awh. <sup>8</sup> Cathut e kâlawk cauk thung e kâmcengcalah a touk awh teh, a ngainae a dei pouh dawкvah, taminaw ni a touk awh e hah a thai panuek awh.

### *Sahnin teh hnin kathoung*

<sup>9</sup> Hahoi ukkung bawi lah kaawm e, Nehemiah hoi vaihma hoi kâlawk kangkhaikung Ezra hoi taminaw kacangkhaie Levihnaw ni vah, taminaw koe sahnin heh, Bawipa na Cathut e hnin kathoung doeh. Na lung mathout hanh awh. Kap hai kap awh hanh atipouh awh. Bangkongtetpawiteh, kâlawk a thai awh navah taminaw teh a khuika awh. <sup>10</sup> Cet awh haw. Bu katuicalah cat awh nateh, misurtui karadip e net awh. Banghai ka tawn hoeh e koe kâreikhai awh. Bangkongtetpawiteh, sahnin heh Bawipa e hnin kathoung doeh. BAWIPA dawк na lunghawinae teh na thayung lah ao dawкvah, na lungmathout hanh awh atipouh. <sup>11</sup> Hatdawкvah, Levihnaw ni taminaw sairasuep lah ao sak. Sahnin teh hnin kathoung lah ao dawкvah, sairasuepcalah awh awh. Na lungmathout awh hanh atipouh. <sup>12</sup> Taminaw ni a dei e lawknaw a thai panuek awh dawкvah, canei kawi sak hane hoi alouknaw hai kâreikhai hane hoi lunghawi nawmnae kalen poung sak hanelah be a cei awh.



*Rim ya pawî*

<sup>13</sup> Apâhni hnin navah, a imthungkhu dawk e kacue lah kaawm e hah vaihmanaw hoi, Levihnaw teh phunglawk kamtu hanelah, cungtalâh kâlâwk kacangkhaikung Ezra koe a kamkhueng awh. <sup>14</sup> Phunglawk thung vah BAWIPA ni Mosi koe kâlâwk a poe teh, a thut e hah a hmu awh. Hote thung vah Isarelnaw teh, thapa yung sarinae pawî dawk teh im ao awh hane doeh. <sup>15</sup> Kho tangkuem hoi Jerusalem khopui vah pathang pouh hane hoi, mon vah cet awh nateh, olivekungnaw hoi kahrawng e olive hna, tuihan hna, samtue hna hoi, a hna kahawi e a kang pueng rim sak nahanelah lat awh. Hahoi rim teh hettelah na sak awh han tie patetlah na sak awh han tie hah ca a thut. <sup>16</sup> Hatdawkvah, a cei awh teh, a la awh. A im dawk thoseh, thongma dawk thoseh, Cathut e im thoseh, Tui longkha lawilah thoseh, Ephraim longkha alawilah thoseh, rim lengkaleng a sak awh. <sup>17</sup> San dawk hoi kahlout pueng ni rim lengkaleng a sak awh teh, rim thungvah ao awh. Hothateh, Nun capa Joshua tueng hoi hot hnin totouh, Isarelnaw ni a sak awh boihoe e lunghawinae kalen poung a tawn awh. <sup>18</sup> Kamtawng hnin koehoi apoutnae hnin totouh, Cathut e kâlâwk cauk hah pou a touk awh. Pawî teh hnin sari touh a sak awh teh, ataroe hnin vah amamae singyoe patetlah kamkhuengnae pawî hai a sak awh.

## 9

*Isarel Maya ni amamae yonnae a pâpho awh*

<sup>1</sup> Hot patetlah, hate thapa 24 hnin nah Isarelnaw teh rawcahai hoi buri kâkhu teh, vaiphu a kâphueng awh teh kamkhueng awh. <sup>2</sup> Isarelnaw teh ram alouknaw koehoi aloukcalah ao awh teh, a yonnae naw hoi mintoenaw e payonnae hah kangdue laihoi a pâpho awh. <sup>3</sup> Amamouh onae hmueng koe lengkaleng a kangdue awh teh, hnin touh hah pali touh lah a kapek awh teh, amamae hmueng koe lengkaleng a kangdue awh teh, buet touh dawk BAWIPA Cathut e kâlâwk a touk awh. Buet touh dawk, yon a pâpho awh teh, buet touh dawk BAWIPA Cathut hah a bawk awh. <sup>4</sup> Hot patetlah, Levi haminaw khalai rasang dawk Jeshua, Bani, Kadmiel, Shebaniah, Bunni, Sherebiah, Bani hoi Kenani naw hah a kangdue awh teh, kacaipounglah BAWIPA Cathut hah a kaw awh. <sup>5</sup> Hot patetlah, Levi haminaw, Jeshua hoi Kadmiel, Bani, Hashabneiah, Sherebiah, Hodiah, Shebaniah, hoi Pethahiah naw ni kang dout awh nateh Jehovah Cathut teh a yungyoe hoi a yungyoe pholen awh. Pholennae a Lathueng Poung lah kaawm e, na min lentoenae teh pholennae awm seh telah ati awh.

<sup>6</sup> Hahoi maya ni nang duengdoeh Jehovah lah na kaawm. Nama ni kalvan hah na sak. Kalvannaw e kalvan hoi athung kaawmnaw pueng hoi, talai hoi athung kaawmnaw pueng hoi, tali hoi athung kaawm e pueng hah na sak teh, abuemlah na khetyawt. Nang teh kalvan kaawm pueng ni na bawk awh. <sup>7</sup> Nang ni Abraham na rawi teh, Khaldean ram Ur kho hoi na tâcokhai teh, a min lah Abraham telah na ka phung e Jehovah Cathut lah na o. <sup>8</sup> A lungthin teh na hmalah yuemkamcu lah na hmu teh, Kanaan tami, Hit tami, Amor tami, Periz tami, Jebusit tami hoi Girgashite taminaw e ram hah, ca catounnaw poe hanelah lawkkam na sak. Na lawk teh na kuep sak. Kongkongtawitewit nang teh na lan. <sup>9</sup> Izir ram e mintoenaw rucât khangnae hah na hmu teh, tui puipaling teng e a hramki awh e lawk hah na thai. <sup>10</sup> Faro hoi ama koe kaawm e pueng hoi a ram dawk e tami pueng e lathueng vah, mitnoutnae kângairu hah na kamnue sak.



Bangkongtetpawiteh, polainae nama dawk ouk a sak awh e hah, nama ni na panue. Hatdawkvah, nama hane na min hah na sak. Sahnin e kaawm e patetlah. <sup>11</sup> Hahoi ahnimae hmalah tui hah na kapek teh talai kaphui dawk na cei awh. Ahnimouh thoe ka bo e hah kadung e tui thung, athakaawme tui thung vah talung patetlah na tâkhwng. <sup>12</sup> Kanithun vah tâmaikhom hoi na hrawi teh, karum lah a cei awh nahane lamthung dawk ka tue hanelah hmaikhom hoi a hrawi. <sup>13</sup> Sinai mon dawk hoi na kum teh, kalvan hoi ahnimouh koe lawk na dei. Kalan e lawkcengnae, kalan e kâlawk, phunglawknaw hoi kâpoelawk hah na poe. <sup>14</sup> Kathounge Sabbath hah na panue sak. Mosi hno lahoi kâ na poe. Phunglawknaw, kâpoelawknaw, hoi kâlawk hah na poe. <sup>15</sup> Hahoi a vonhlam navah, kalvan hoi vaiyei na poe. Tui kahran awh navah, lungsong dawk hoi tui na tâcosak teh, poe hanelah na noe pouh e ram hah ao awh nahan na poe.

<sup>16</sup> Hateiteh ahnimouh hoi mintoenaw ni polainae hoi a lungpata sak awh. Kâpoelawknaw hah tarawi awh hoeh. <sup>17</sup> Tarawi han ngai awh hoeh. Kângairu hno na sak e naw hai thai han ngai awh hoeh toe. A lung hah a pata sak awh teh, taran a thaw awh teh san lah a onae koe lah ban hane kahrawikung hah a rawi awh. Hatei nang teh ngaihoum hanelah coungkacoe lah kaawm e Cathut, pahrennae lungmanae, hoi ka kaw e, lung kasawe, hawisaknae moi ka tawn e lah na o teh, ahnimouh teh na cettakhai boihoeh. <sup>18</sup> Meikaphawk maitoca a sak awh teh, Izip ram hoi ka tâcawtkhai e Cathut teh puenghoi a lungkhuek nahanlah a sak awh nakunghai, <sup>19</sup> Lungmanae kalenpounge dawk hoi kahrawngum vah na cettakhai boihoeh. Lam ka hrawi hane tâmaikhom ni cettakhai boihoeh. Lam a hmu thai na hanelah karum lah hmaikhom ni cettakhai boihoeh. <sup>20</sup> Ahnimouh ka cangkhai hanelah, kahawi e na Muitha hah na poe teh, mana hoi na kawt teh nei hanelah tui na poe. <sup>21</sup> Kahrawngum kum 40 touh thung na kawt. Banghai vouthouppnae awmhoeh. Hnicu a pawnae awmhoeh. A khoknaw hai phing hoeh.

<sup>22</sup> Hahoi uknaeram hoi miphun hah na poe teh ram buet touh hnukkhu buet touh na rei. Hottelah, Heshbon siangpahrang Sihon ram e, Bashan siangpahrang Og ram hah a la awh. <sup>23</sup> Ca catounnaw teh kalvan e âsi yit touh na pung sak teh a coe awh hane mintoenaw koe na dei pouh e patetlah, ram dawk na kâenkhai. <sup>24</sup> Hot patetlah, ca catounnaw ni ram teh a coe awh. Nama ni hote ram dawk kaawm e Kanaan taminaw hah, ahnimae a hmalah na sung sak teh, a ngai patetlah a sak awh hanelah siangpahrangnaw hoi a ram e taminaw hah a kut dawk na poe. <sup>25</sup> Ka cak e khopuinaw hoi, kahawipoung e ramnaw hah a la awh teh, hnokahawi phunkuep hoi kakawi e innaw, tai tangcoung e tuikhunaw hoi misur takha hoi, olive takhanaw hoi thingthaikungnaw a pang awh. Hottelah a ca awh teh, a von a paha awh. A thaw teh na lentoenae, na hawinae dawk a phunep awh. <sup>26</sup> Hateiteh, ahnimouh teh lawkngai awh hoeh. Na taran awh teh, kâlawk hah amamae hnuklah a ta awh teh, nang koe bout ban hanelah, ka yue e profet hah a thei awh teh, puenghoi a tounkhok awh. <sup>27</sup> Hatdawkvah, ahnimouh hah amamae taran kut dawk na poe toe. Runae a kâhmo awh teh nang koe a hram awh toteh, kalvan hoi na thai pouh teh, lungmanae hoi na kaw e dawkvah, taran kut dawk hoi rungngangkung hah na poe. <sup>28</sup> Hatei a kâhat awh toteh, na hmalah vah, hawihoeahnae bout a sak awh dawkvah, taran kut dawk bout na poe. Ahnimouh ni bout a tho awh teh, nang koe bout a hram awh toteh, kalvan hoi na thai pouh teh lungmanae hoi na kaw e dawkvah, boutbout na rungngang.



<sup>29</sup> Nange kampangkhai e bout tarawi hanelah, na yue eiteh, ahnimouh ni ngái awh laipalah, a kâoup awh. Katarawinaw koe hringnae lah kaawm e kâpoelawknaw hah a taran awh. Katepoung e lahuen hoi, lunglennae hoi tarawi laipalah ao awh. <sup>30</sup> A kum moikapap ahnimouh na panguep teh, na Muitha lahoi na profetnaw hno lahoi na yue nakunghai, ahnimouh ni ngái awh hoeh. Hatdawkvah, ram alouknaw e kut dawh na poe toe. <sup>31</sup> Hatnavah nang ni pahrenlungmanae hoi kakawi e Cathut lah na o teh, pahrennae a len dawkvah, ahnimouh khoeroe na raphoe hoeh, na pahnawt hoeh.

<sup>32</sup> Hatdawkvah, maimae Cathut, kalen, athakaawme, takikatho e Cathut, pahrennae hoi lawkkam kacakpoung, Assiria siangpahrang uknae koehoi sahnin totouh, kaimae siangpahrang bawi, vaihma, profet, a tami pueng e lathueng ka phat e runae pueng, banglahai noutna hoeh e lah awm hoeh. <sup>33</sup> Nang ni kaimae lathueng na pha sak e hnonaw teh a kamsoum. Kaimanaw teh, kamsoum hoeh lah hno ka sak awh toe. Nang ni teh yuemkamcu lah na sak. <sup>34</sup> Maimae siangpahrang hoi ukkungnaw, maimae vaihma hoi mintoenaw ni hai, kâlawk tarawi awh hoeh. Kâpoelawkh hoi na panuesaknae, na yuenae thai ngai awh hoeh. <sup>35</sup> Ahnimanaw teh na uknaeram thung vah, kakaw poung, kahawipoung na poe e dawh thaw tawh ngai awh hoeh. Kahawi hoeh lah tawknae hai kâhat ngai awh hoeh. <sup>36</sup> Khenhaw! atuvah san lah o awh. Athung e canei katui e hoi hnokahawinaw hah yampa mintoenaw koe na poe e ram dawkvah san lah ka o awh toe. <sup>37</sup> Ka yon awh dawkvah, siangpahrangnaw ni kaimouh lathueng vah a bawi awh nahanelah, kaimae takthai hoi hnopainaw e lathueng a ngai awh e patetlah kâ a tawn awh toe. Ka lungreithai awh tangngak toe telah a dei awh. <sup>38</sup> Hnopainaw dawkvah, kacakpoung lawkkam ka sak awh teh, ka thut awh hnukkhu kacuenaw, vaihmanaw hoi Levih taminaw ni tacik a kin awh.

## 10

### *Lawkkamcaknae*

<sup>1</sup> Hot patetlah lawkkamnae kacaksakkung teh, hetnaw doeh. Hakaliah capa ram ukkung Nehemiah hoi Zedekiah, <sup>2</sup> Seraiah, Azariah, Jeremiah, <sup>3</sup> Pashhur, Amariah, Malkhijah <sup>4</sup> Hattush, Shebaniah, Malluck, <sup>5</sup> Harim, Meremoth, Obadiah <sup>6</sup> Daniel, Ginnethon, Baruk, <sup>7</sup> Meshullam, Abijah, Mijamin, <sup>8</sup> Maaziah, Bilgai, hoi, Shemaiah hetnaw he vaihmanaw lah ao. <sup>9</sup> Levihnaw: Azaniah capa Joshua, Henadad capanaw thung dawh hoi Binnui hoi Kadmiel. <sup>10</sup> A hmaunawnggha, Shebaniah, Hodiah, Kelita, Pelaiah, Hanan, <sup>11</sup> Mikha, Rehob, Hashabiah, <sup>12</sup> Zakkur, Sheribiah, Shebaniah, <sup>13</sup> Hodiah, Bani, Beninu, <sup>14</sup> Kacuenaw: Parosh, Pahathmoab, Elam, Zattu, Bani, <sup>15</sup> Bunni, Azgad, Bebai, <sup>16</sup> Adonijah, Bigvai, Adin, <sup>17</sup> Ater, Hezekiah, Azzur, <sup>18</sup> Hodiah, Hashum, Bezai, <sup>19</sup> Hariph, Anathoth, Nebai <sup>20</sup> Magpiash, Meshullam, Hezir, <sup>21</sup> Meshezabel, Zadok, Jaddua, <sup>22</sup> Pelatiah, Hanan, Anaijah, <sup>23</sup> Hosi, Hananiah, Hasshub, <sup>24</sup> Hallohesh, Pilha, Shobek, <sup>25</sup> Rehun, Hashabnah, Maaseiah, <sup>26</sup> Ahijah, Hanan, Anan, <sup>27</sup> Malluck, Harim, Hoi Baanah tinaw doeh.

### *Lawkkamcaknae*

<sup>28</sup> Kacawirae vaihmanaw hoi Levihnaw hoi takhang karingnaw, la kasaknaw, Nethinimnaw hoi Cathut e kâlawk tarawi kangainaw teh, Hote ram e taminaw thung dawh hai, aloukcalah kaawmnaw a yu, a capa,



a canunaw oang panuek tangcounghaw ni <sup>29</sup> a hmaunawnggha hoi tami kalentoenaw hah, tha laipalah a kuet awh. Cathut e san Mosi koe poe e kâlawk tarawi han hoi Bawipa, maimae BAWIPA e kâpoelawknaw pueng, lawkcengnaenaw hoi phunglawknaw tarawi hanelah, pâkuem hanelah thoseh, <sup>30</sup> hote ram dawk e taminaw ni, canunaw a la hoeh nahanlah capanaw hanlah a canunaw lat pouh laipalah, <sup>31</sup> hote ram dawk e taminaw ni, Sabbath hnin a yo awh e hno thoseh, canei hane phunkuep a yo han a sin e thoseh, Sabbath hnin hai thoseh, yanae hnin hai thoseh, pâtu laipalah, kum sari touh thung law dawk e ka tâcawt e lat laipalah, laibanaw pueng patho laipalah, o hane thoekâbo e hai taket laipalah, lawkkamnae hah a sak awh.

<sup>32</sup> Cathut im thaw tawk nahanelah shekel pung thum pung touh, kum tangkuem poe hanelah phung ka sak awh. <sup>33</sup> Rathap tangcounghaw e vaiyei hai thoseh, tavai thueng pouh hane hai thoseh, hmaisawi thuengnae pou sak hane thoseh, sabbath hnin hane thoseh, thaparei tueng thoseh, atueng khoe pawinaw han thoseh, kathounge hno hane thoseh, Isarelhaw yontha nahanelah yon thuengnae thoseh, Cathut e im thawnaw pueng hanelah, <sup>34</sup> mintoenaw e imthungkhu tangkuem ni kumtangkuem atueng khoe e kâlawk cauk dawk thut e patetlah BAWIPA Cathut thuengnae koe, thing thueng e thing tangoung, Cathut im ka puen hanelah vaihma bawinaw hoi Levihnaw tamimaya hoi cungpam ka rayu awh. <sup>35</sup> Hahoi kumtangkuem, law dawk e aluepawhaw, thingthai hmaloe kapawhaw, BAWIPA im kâenkhai hanelah, <sup>36</sup> Kâlawk dawk thut tangcounghaw patetlah capa caminnaw, saring caminnaw hoi maitohu hoi, tuhu thung dawk hmaloe ka khe e naw hai Cathut e im thaw ka tawk vaihma bawinaw koe Cathut im vah ceikhai hane hai, <sup>37</sup> Cathut e imthungkhu vah, vaihmanaw koe tavai thuengnae hmaloe sak e thueng e pueng, thingthai phunkuep misurtui hoi satuinaw hai, law dawk e ka tâcawt pueng hra touh dawk pung touh, Levihnaw koe poe hane phung ka sak awh. Bangkongtetpawiteh, Levihnaw ni law ka sak e naw pueng thung e, pung hra pung touh ouk a la awh. <sup>38</sup> Levihnaw ni pung hra pung touh a la navah Aron catoun vaihma bawi teh Levihnaw koe ao hanelah ao. Levihnaw ni pung hra pung touh a la e thung dawk hoi pung hra pung touh teh Cathut im râw pâkuemnae imthungkhu a ta awh han. <sup>39</sup> Isarel catoun hai Levih catounnaw cakang hoi misur, satui thuengnae pueng hmuen, kathoung, hlaumhlaam hoi thaw katawknaw, vaihma bawi takhang ka ring e la kasakkungnaw onae imthungkhu a ta han. Hot patetlah Cathut im vah pamda hoeh nahane phung ka sak awh.

## 11

### *Jerusalem e kahrawikungnaw*

<sup>1</sup> Hatnavah taminaw koe bawi thaw katawknaw teh Jerusalem vah ao awh. Alouke taminaw teh kathounge hmuen, Jerusalem vah hra touh dawk buet touh, hahoi alouke khonaw dawk tako touh o hanelah cungpam a rayu awh. <sup>2</sup> Hahoi Jerusalem kaawm hane naw hah taminaw ni yawhaw a poe awh.

<sup>3</sup> Hetnaw teh, ram uk hanelah Jerusalem vah kaawm e naw doeh. (Hateiteh Judah kho e naw teh a hnopai onae kho dawk ao awh. Ahnimanaw teh Isarel tami vaihma Levih tami hoi Nethinin tami hoi Solomon e a sannaw doeh). <sup>4</sup> Jerusalem vah Judah catounnaw hoi Benjamin catounnaw ao awh. Judah catounnaw teh: Uziah capa Athaiah, Zekhariah capa, Amariah capa, Shephatiah, capa Mahalalel capa, Perez



capanaw hoi, <sup>5</sup> Baruk capa Maaseiah, Kolhozeh capa, Hazaiah capa, Adaiah capa, Joarib capa, Zekhariah capa, Shilon capanaw doeh. <sup>6</sup> Perez canaw Jerusalem kaawm e abuemlah 468 touh a pha.

<sup>7</sup> Benjamin canaw teh hetnaw doeh: Meshullam capa Sallu, Joed capa, Pedaiah capa, Kolaiah capa, Maaseiah capa, Ithiel capa, Jeshaiiah capa, <sup>8</sup> hahoi Gabbai hoi Sallai abuemlahoi 928 touh a pha awh. <sup>9</sup> Zikhri capa Joel teh ahnimouh kahrawikung lah ao. Hassenuah capa Judah teh kho ukkung lah ao.

<sup>10</sup> Vaihmanaw thung hoi Joarib capa Jedaiah hoi Jakhin, <sup>11</sup> Hilkiyah capa Seraiah, Meshullam capa, Zadok capa Meraioth capa, Ahitub capanaw teh Cathut e imthung kahrawikung lah ao awh. <sup>12</sup> Im dawk thaw ka tawk e hmaunawngnga abuemlah 822 touh a pha. Hahoi Jeroham capa Adaiah, Pelaliah capa, Amzi capa, Zekhariah capa, Pashhur capa, Malkhijah capa hoi, <sup>13</sup> A hmaunawngnga kahrawikungnaw teh 242 touh a pha. Hahoi Azarel capa Amashai, Ahzai ca catoun Meshillemoth capa Immer capanaw hoi, <sup>14</sup> A hmaunawngnghaw tarankahawi ni teh athakaawme taminaw 128 touh a pha awh. Ahnimouh kahrawikung teh Haggadolim capa Zabdiel doeh.

<sup>15</sup> Hahoi Levih imthungnaw teh: Hasshub capa Shemaiah, Azrikam capa, Hashabiah capa, Bunni capa, <sup>16</sup> Levih tami kahrawikungnaw thung dawkhoi Cathut im alawilae thaw kakhenkung teh Shabbethai hoi Jozabad doeh. <sup>17</sup> Mikha capa Mattaniah, Zabdi capa, Asaph capa ratoumnae dawklunghawilawkdeinae ka dei e Mattaniah. Hahoi, a hmaunawngnga thung hoi Bakbukiah hoi Jeduthun capa Galal, Galal capa Shammua, Shammua capa Abda tinaw doeh. <sup>18</sup> Kathounge kho dawkhawm e Levih miphun abuemlah 24 a pha.

<sup>19</sup> Hathloilah, longkha karingkung Akub, hoi Talmon hoi hmaunawngnga rapan longkha karingkungnaw 172 touh a pha awh. <sup>20</sup> Kacawie Isarelnaw, vaihmanaw hoi Levihnaw teh, Judah ram kho tangkuem amamae thaw dawkhaw lengkaleng ao awh. <sup>21</sup> Hatei, Nethinim taminaw teh Ophel vah ao awh. Ziha hoi Gispha teh Nethinim taminaw kahrawikung lah ao roi.

<sup>22</sup> Jerusalem kaawm e Levihnaw kahrawikung Asaph capa, la kasaknaw thung dawkhoi Mika, Mika capa Mattaniah, Mattaniah capa Hasabiah, Hasabiah capa Bani, Bani capa Uziah tinaw doeh. Cathut e im e thaw tawkhaw dawkhaw katatuengkung lah ao awh. <sup>23</sup> Bangkongtetpawiteh, ahnimouh dawkhaw siangpahrang ni kalawkhaw poe e ao. Lakasaknaw hnintanguem rawca poe han telah atipouh. <sup>24</sup> Judah ca catoun hoi Zerakh ca catoun thung hoi Meshezabel capa Pethahiah teh, taminaw hoi hno puengpa e lathueng vah siangpahrang e a yueng lah ukkung lah ao.

### *Jerusalem lawilah e khotenaw*

<sup>25</sup> Hahoi kho hoi ram dawkhaw, Judah ca catoun tangawn teh, Kiriath Arba khote hoi Didon khote, Jakabzeel khote, <sup>26</sup> Jeshua, Moladah, Bethpelet; <sup>27</sup> Hazarshual hoi Beersheba khote, <sup>28</sup> Ziklag hoi Mekonah hoi khote, <sup>29</sup> Enrimmon, Zorah, Jarmuth, <sup>30</sup> Zanoah, Adullam hoi khotenaw hoi Lakhish hoi ram, Azekah hoi khotenaw dawkhaw ao awh. <sup>31</sup> Benjamin ca catounnaw hoi Geba im Mikmas vah kho a sak awh. Hahoi, Ai hoi Bethel khotenaw teh, <sup>32</sup> Anathoth, Nob, Ananiah, <sup>33</sup> Hazar, Ramah, Gittaim, <sup>34</sup> Hadid, Zeboiim, Neballat, <sup>35</sup> Lod hoi Ono hoi kutsakkathoumnae e ayawn dawkhaw ao awh. <sup>36</sup> Hahoi Judah ram oukhawm e Levih tami tangawn teh, Benjamin ram dawkhaw ao awh.



## 12

<sup>1</sup> Shealtiel capa Zerubbabel hoi Jeshua hnukkâbang e vaihmanaw hoi Levihnaw teh, Seraiah, Jeremiah, Ezra, <sup>2</sup> Amariah, Malluck, Hattush, <sup>3</sup> Shekaniah, Rehum, Meremoth, <sup>4</sup> Iddo, Ginnethon, Abijah, <sup>5</sup> Mijamin, Maa-diah, Bilgah, <sup>6</sup> Shemaiah, Joiarib, Jedaiah, <sup>7</sup> Salu, Amok, Hilkiah, Jedaiah, hetnaw teh Jeshua se navah vaihmanaw hoi amamae hmaunawngghanaw dawkvah kahrawikungnaw doeh.

<sup>8</sup> Hahoi Levihnaw teh, Jeshua, Binnui, Kedmiel, Sherebiah, Judah hoi Mathaniah, Mathaniah teh a hmaunawngghanaw hoi lunghawilawkdinae koe kahrawikung lah ao. <sup>9</sup> Ahnimae hmaunawnggha Bakkukiah hoi Unni teh la a sak awh navah kadangka lahoi kangdue laihoi a ring awh.

<sup>10</sup> Hahoi, Jeshua capa Joiakim, Joiakim capa Eliashib, Eliashib capa Joiada,

<sup>11</sup> Joiada capa Jonathan, Jonathan capa Jaddua.

<sup>12</sup> Hahoi, Joiakim se navah, imthung lahoi na pa lah kaawm e kacue e vaihmanaw teh; Seraiah imthung dawk Meraiah, Jeremiah imthung dawk Hananiah, <sup>13</sup> Ezra imthung dawk Meshullam, Amariah imthung dawk Jehohanan, <sup>14</sup> Malluckhi imthung dawk Jonathan, Shebaniah imthung dawk Joseph, <sup>15</sup> Harim imthung dawk Adna, Meraioth imthung dawk Helkai, <sup>16</sup> Iddo imthung dawk Zekhariah, Ginnethon imthung dawk Meshullam, <sup>17</sup> Abijah imthung dawk Zikhri, Miniamin imthung dawk (hitueng min buet touh a kahma), Moadiah imthung dawk Piltai, <sup>18</sup> Bilgah imthung dawk Shammua Shemaiah imthung dawk Jehonathan, <sup>19</sup> Joiarib imthung dawk Mattenai, Jedaiah imthung dawk Uzzi, <sup>20</sup> Sallai imthung dawk Kallai, Amok imthung dawk Eber, <sup>21</sup> Hilkiah imthung dawk Hashabiah, Jedaiah imthung dawk Nethanel,

<sup>22</sup> Eliashib, Joiada, Johanan hoi Jaddua tinaw e senah, vaihma lah kaawm niteh, napanaw dawk lû lah lengkaleng kaawm e naw hah, Persia tami Darius se totouh, cungpam dawk min pakhum e lah ao. <sup>23</sup> Eliashib capa Johanan se totouh, Levihnaw imthung lahoi lû lah kaawmnaw hah cungpam dawk min pakhum e lah ao. <sup>24</sup> Levihnaw dawk kacuenaw: Hashabiah, Sherebiah hoi Kadmiel capa Jeshua tinaw teh, Cathut e tami Devit e kâpoelawk patetlah a hmaunawngghanaw hoi cungtalalah pholen hane hoi, lunghawi lawk dei hanelah, kâletta lahoi a tawk awh. <sup>25</sup> Mattaniah, Bakkukiah, Obadiah, Meshullam, Telmon hoi Akkub tinaw teh, takhang teng e hnopai ta e hoi takhang ka ring e lah ao awh. <sup>26</sup> Ahnimanaw teh Jozadak capa, Jeshua capa, Joiakim se nah, ram ukkung Nehemiah hoi kâlawk kacangkhaikung vaihma Ezra se nah ao awh.

### *kalupnae rapan hnawngnae*

<sup>27</sup> Jerusalem rapan hah hnawngnae a sak toteh, cecak, ratoung, tamawi, tum laihoi la sak laihoi, nawmnae, lunghawilawkdinae hoi cungtalalah hnawngnae sak nahanelah, Levihnaw hah a tawng awh teh, a onae hmuen tangsum koehoi Jerusalem vah a kaw awh. <sup>28</sup> La kasakhainaw teh Jerusalem kho tengpam koe lah thoseh, Netophah kho hoi thoseh, <sup>29</sup> Gilgal im hoi thoseh, Geba hoi Azmaveth ram koehoi thoseh, a mahmawk a kamkhueng awh. <sup>30</sup> Vaihma hoi Levihnaw hai amahoima thoseh, taminaw thoseh, kho longkha thoseh, kho rapan thoseh a thoung sak awh.

<sup>31</sup> Hattoteh Judah bawinaw hah rapan van ka ceikhai teh, pholen la ka sak hanelah, phu hni touh lah ka kapek. Phu touh teh aranglah hoi a kâhei teh vaipuen longkha koe kho rapan van a cei awh. <sup>32</sup> Ahnimouh hnuk vah Hoshaiiah hoi Judah kacuenaw tangawn, <sup>33</sup> Azariah, Ezra, Meshullam,



<sup>34</sup> Judah, Benjamin, Shemaiah hoi Jeremiah tinaw a kâbang awh. <sup>35</sup> Hahoi mongka ka patuem e vaihmanaw, Jonathan capa, Zekhariah, Shemaiah capa, Mathaniah capa, Michaiiah capa, Zakkur capa, Asaph capa, <sup>36</sup> Hahoi a hmaunawngna, Shemaiah, Azarel, Milalai, Gilalai, Maai, Nethanel, Judah hoi Hanani tinaw ni, Cathut e tami Devit e tumkhawngnaw heh a patuap awh teh, a kâbang awh. Kâlawk kacangghaikung Ezra teh ahnimae hmalah a cei. <sup>37</sup> Ahnimae kadangka lah kaawm e tuiphuek khu longkha koe a pha awh toreï, khorapan luennae Devit kho khalai hoi a luen awh teh, Devit im lathueng kanîtholah, Tui longkha totouh a cei awh.

<sup>38</sup> La kasakkung tangawn teh avoilah a kamlang awh teh, kai hoi tangawn teh, khorapan van, takhuen imrasang koehoi, khorapan akawnae koe totouh a kâbang awh. <sup>39</sup> Ephraim longkha, longkha karuem, tanga longkha, Hananel imrasang, Meah imrasang koehoi kamtawng teh, tu longkha totouh a kâbang awh hnukkhu, thongim longkha koe a kangdue awh. <sup>40</sup> Hahoi la kasakkung phu hni touh teh, Cathut im vah a kangdue awh teh, a tangawn e bawinaw teh kai hoi cungtalah, <sup>41</sup> Mongka ka patuem e vaihma Eliakim, Maaseiah, Miniamin, Mikaiah, Elioenai, Zekhariah hoi Hananiah, <sup>42</sup> Hahoi, Maaseiah, Shemaiah, Eleazar, Uzzi, Jehohanan, Malkhijah, Elam hoi Ezer tinaw hai cungtalah a kangdue awh. La kasakkungnaw teh kahrawikung Jezrahiah hoi cungtalah puenghoi la a sak awh. <sup>43</sup> Hot hnin vah vaihmanaw ni thuengnae moikapap a sak awh teh, a konawm awh. Puenghoi konawmnae Cathut ni a poe awh dawkvah, yunaw hoi canaw hai a konawm awh. Hatdawkvah, Jerusalem konawmnae hah ahlanæ koehoi patenghai thai e lah ao.

### *Bawkim dawk thaw katawnaw*

<sup>44</sup> Hatnavah Bawkim dawk thaw kakuennaw, vaihmanaw hoi Levihnaw teh karingkung lah ao awh dawkvah, Judahnaw teh a lungkuap awh teh, vaihmanaw hoi Levi ni a pang awh hane pasoumhno aluepaw, pung hra pung touh hah, kho tangkuem hoi a pâkhueng awh teh, hmoun nahane rakhannaw karingkung hanelah thaw a poe awh. <sup>45</sup> La kasakkungnaw hoi tho karingkungnaw hai Devit capa Solomon e kâpoelawk patetlah amamae Cathut thaw hoi thoungnae thaw hah a tawk awh. <sup>46</sup> Devit hoi Asaph se navah, Cathut koe lunghawilawkdinae kahrawikungnaw teh ao awh. <sup>47</sup> Zerubbabel hoi Nehemiah se nahai la kasakkungnaw hoi tho karingkungnaw hah, hnintangkuem a pang awh hane rawca hah a poe awh. Levihnaw hah ka thoung hnônaw a poe awh. Levihnaw ni hai Aron capanaw coe hanelah a kapek pouh awh.

## 13

### *Nehemiah ni a hnukteng a pathoupnae*

<sup>1</sup> Hot hnin vah, Mosi e cauknaw hah taminaw e hmâ lah a touk awh teh, Hote cauk dawkvah Ammonnaw hoi Moabnaw teh Cathut e taminaw kamkhuengnae hmuen koevah, bawk awh van mahoehtelah thut e lah ao. <sup>2</sup> Bangkongtetpawiteh, Isarelnaw vaiyei hoi tui hoi dawn laipalah, ahnimanaw thoebo sak hanelah Baalam a hlai awh. Hateiteh, kaimae Cathut ni thoebonae hah yawhawinae lah a coung sak. <sup>3</sup> Hahoi, hote kâlawnaw koun a thai awh hnukkhu, miphun katang hoeht e taminaw teh, Isarel miphun thung hoi a takhoe awh.

<sup>4</sup> Ha hoehnahlan teh Cathut imrakhan daw kâtawnnae ka tawn e vaihma Eliashib teh Tobiah hoi a kâkuet awh. <sup>5</sup> Hatnavah Levi ni tami lakasakkung longkha karingkungnaw hoi vaihmanaw ni thueng hane



kâlawk poe e hoi thuengnae, hahoi hmuítui, hlaumhlaam pung hra pung touh, misurtui hoi satui pung hra pung touh, pâkuemnae hah Tobiah hanelah a sak awh. <sup>6</sup> Hateiteh, hatnae tueng dawkvah, kai teh Jerusalem vah kaawm hoeh. Bangkongtetpawiteh, Babilon siangpahrang Artaxerxes a bawinae kum 32 nah, siangpahrang koe ka ban toe. Hahoi ka saw lah ka o hnukkhu siangpahrang koe ca hoi tâco thainae ca bout ka hmu. <sup>7</sup> Hahoi Jerusalem ka pha toteh Cathut im dawk rakhan ka sak pouh teh, Tobiah hanelah Eliashib ni a sak e hawioehnae teh ka panue. <sup>8</sup> Ka lungkuep hoeh tanglang dawkvah, Tobiah imthung hoi e hnopainaw pueng alawilah be ka tâkhawng pouh. <sup>9</sup> Imrakhannaw thung sak hanelah kâ ka poe teh, Cathut im thung vah hnopainaw, caneikawinaw hoi, hmuítuinaw hah bout ka ta.

<sup>10</sup> Hahoi Levih taminaw, la kasakkungnaw teh ham ka poe hoeh. Bangkongtetpawiteh, hote thaw ka tawk e Levihnaw hoi lakasakkungnaw teh amamae lawnaw koe he a cei awh tie hah bout ka panue. <sup>11</sup> Cathut e im hah bangkongmaw na pahnawt awh vaw telah bawinaw hah yon a pen teh, Levihnaw hah a kamkhueng sak hnukkhu, amamae hmuén koe bout a hruek awh. <sup>12</sup> Hatnavah, Judah ram pueng ni cakang, misurtui, satui pung hra pung touh hah hnoim dawk bout a thokhai awh. <sup>13</sup> Vaihma, Shelemiah, kâlawk kacangkhaikung Zadok hoi, Levihnaw thung dawk e Pedaiiah hah thaw ka poe teh, kabawmkung lah Mathaniah capa Zakkur e capa Hanan hah thaw ka poe. Ahnimanaw teh, yuenkamcu hnokahawi ka sak e lah ao teh, a hmaunawngghanaw koe thaw a rei. <sup>14</sup> Oe ka Cathut, hete kong dawk kai na pahnim hanh. Kaie Cathut im hanelah, a thaw ka tawk hane kai ni ka sak e hah raphoe hanh.

<sup>15</sup> Hatnae tueng navah, Judah ram thungvah sabbath hnin nah misur katinnae tangkom dawk misur bawm hoi cabong moikapap a hrawm awh teh, la e van a thueng awh e thoseh, misurtui hoi, misur paw, thai paw, hotnaw na thueng awh teh, Jerusalem khopui koe lah na phu awh e thoseh ka hmu. Hah hoi ca kawi yo hnin vah kâhruetcuetnae ka poe. <sup>16</sup> Hote hmuén koe kaawm e Tairenaw ni hai, tanga hoi hnopainaw hah Jerusalem khopui koe a phu awh teh, sabbath hnin dawk Judahnaw koe ouk a yo awh. <sup>17</sup> Hatnavah kai ni, nangmouh ni sabbath hnin hah na raphoe awh teh, na yon awh e bangtelah namaw. <sup>18</sup> Mintoenaw ni hottelah a sak awh dawkvah, hettelah e kalenpoung roedeng runae hah maimouh dawk thoseh, hete khopui dawk thoseh, Cathut ni phat sak hoeh namaw. Nangmouh ni sabbath hnin na raphoenae lahoi hoe kapatawpoung lah a lungkhueknae hah Isarelnaw koe bout na pha sak han rah maw telah Judah bawinaw hah ka yue.

<sup>19</sup> Sabbath hnin navah Jerusalem longkhanaw koe khohmo teh, longkha khan han telah kâ ka poe teh, Sabbath hnin abaw hoehnahan, paawng mahoe telah kâ bout ka poe. Sabbath hnin nah, bang hno hai kâenkhai hoeh nahanelah, ka sannaw thung e a tangawn longkha ka ring sak. <sup>20</sup> Hno kayawtnaw, hnocawngca kayawtnaw teh, Jerusalem khopui alawilah avaivai a i awh. <sup>21</sup> Hot patetlah a lan hoeh e ka panue teh, ahnimouh koe, bangkongmaw rapan kung koe na roe awh. Het patetlah bout na sak awh bawi pawiteh, na tak dawk ka kut ka pho han telah ka ti pouh. Hat totouh hoi teh Sabbath hnin vah tho awh hoeh toe. <sup>22</sup> Hahoi Levihnaw hah kamthoung sak vaiteh, Sabbath a thoungsak nahanelah, rapan longkha a ring awh hanelah kâ ka poe toe. Oe ka Cathut, hete kong dawk hai na pahnim hanh. Kalenpoung na pahrennae hoi na hlung haw.



<sup>23</sup> Hat navah, Judah tami Ashdod, Amom hoi Moab napuinaw a yu lah a la e hah ka hmu awh. <sup>24</sup> A canaw hah Ashdod lawk a pan awh. Hote lawk hloilah teh, Hebru lawk hai pan thai awh hoeh. <sup>25</sup> Ahnimouh hah ka yue teh, thoe ka bo. Atangawn teh ka hemkhai, a sam ka sawn pouh. Na canunaw hah a capanaw la sak hoeh hane hoi ahnimae canu hah na capanaw ni la hoeh hanelah, ahnimouh han thoseh, mamouh han thoseh, canu capa yuvâ hoeh hanelah thoseh, Cathut noe lahoi lawk ka kam sak. <sup>26</sup> Isarel siangpahrang Solomon hai hot patetlah yonnae a sak nahoehmaw. Hateiteh miphun moikapapnaw thung daw, ahni patet e siangpahrang awm hoeh. Cathut ni a pahren e doeh. Cathut ni Isarelnaw lathueng vah siangpahrang lah a sak. Hatei, hot patenghai yah talai napuinaw ni yonnae a sak sak awh. <sup>27</sup> Hot patetlah ram alouknaw yu lah la vaiteh, Cathut lathueng vah kahawihoehe hno sak hanelah tarawi han nama, telah ka ti pouh.

<sup>28</sup> Vaihma kacue Eliashib capa, Jehoiada capa buet touh teh, Haron tami Sanballat e cava lah ao dawkvah, kai koehei tang ka pâlei sak.

<sup>29</sup> Oe Cathut, vaihma lah onae, vaihma lah lawkkamnae, Levihnav e lawkkamnae, kamhnawng sak dawkvah, pahnim hanh la a. <sup>30</sup> Hot patetlah talai hnonaw pueng daw hoi kathoung sak, vaihmanaw hai Levih ni amamae thaw lengkaleng taw hanelah, <sup>31</sup> khoe e atueng dawkvah, thuengnae thing hah, aluepaw ahmaloe e totouh thokhai hanelah, ka pouk pouh. Oe ka Cathut, hawi nahanelah na pahnim hanh.



## ESTA (The Book of Esther)

### *Siangpahrang e pawî*

<sup>1</sup> India hoi Ethiopia totouh a ram 127 touh ka uk e Ahasuerus siangpahrang ni, <sup>2</sup> Shushan khopui vah bawitungkhung dawk a tahungnae a kum thum nah, <sup>3</sup> Persia hoi Media ram e kâ ka tawn naw, ram ka ukkungnaw hoi kahrawikungnaw a kaw teh, a bawinaw hoi a sannaw hanlah pawî a to pouh. <sup>4</sup> Hatnavah, a uknaeram tawntanae hoi a taluenae hah hnin 180 touh thung vah a pătue.

<sup>5</sup> Hote ahnintha abaw toteh siangpahrang ni Shushan khopui dawk ka kamkhueng e tami kathoung kalen pueng hanlah siangpahrang takha um vah hnin sari touh thung pawî a to pouh. <sup>6</sup> Ngunlaikawnaw bang e talung pangaw khomnaw dawkvah, lukkarei rui hoi, thung e, kapangaw, kahring, kaopaou, naw hoi thoseh, phai e lungphen ka paling, kaopaou, kapangaw, katamangnaw e van ta e sui ngun tahung tabennaenaw hoi takha teh a pathoup.

<sup>7</sup> Siangpahrang a tawnta e patetlah misur teh suimanang dawk hoi a nei awh. <sup>8</sup> Misur teh a nuencangcalah a nei awh teh apihai ngawt ka parui lah net awh hoe. Tami pueng ni amamouh ngainae patetlah a sak nahanlah siangpahrang ni a im e kahrawikungnaw pueng koe a dei pouh. <sup>9</sup> Hahoi, siangpahrangnu Vashti ni hai Ahasuerus siangpahrang im vah napuinaw hanlah pawî a to pouh van.

### *Siangpahrangnu Vashti ni a kangek*

<sup>10</sup> A hnin sari hnin nah siangpahrang e a lungthin teh misur ni a nawm sak toteh, tuenla e sari touh, siangpahrang Ahasuerus hmalah thaw ouk ka tawk naw; Mehuman, Biztha, Harbona, Bigtha, Abagtha, Zethar hoi Karkas tinaw hah,

<sup>11</sup> Siangpahrang ni Vashti teh a bawilukhung kâ muk hoi, tami puenghoi tami kalen naw koe a meihawinae patue hanlah siangpahrang hmalah thokhai hanelah kâ a poe.

<sup>12</sup> Hateiteh, siangpahrangnu Vashti teh tuenlanaw niyah tho hanlah siangpahrang ni kâpoe e lawk a dei pouh awh navah ngai hoe. Hatdawkvah siangpahrang teh a lung puenghoi a khuek. A lungkhueknae hah hmisaan patetlah a kaman.

<sup>13</sup> Hatdawkvah, siangpahrang ni hno kaawm e ka thai panuek e tami lungkaangnaw koe, bangkongtetpawiteh, kâlawk hoi lannae kong ka panuek e naw pueng hah siangpahrang ni pouknae ouk a pacei.

<sup>14</sup> A kut rahim thaw katawnaw teh; Karshena, Shethar, Admatha, Tarshish, Meres, Marsena, Memukan, Persia hoi Media ram tami kalen sari, siangpahrang pou kâhmo thainae kâ katawnaw thungvah hmuen-rasang poung koe ka tahung e bawinaw lah ao.

<sup>15</sup> Tuenlanaw ni patuen a thaisak awh ei, kai siangpahrang Ahasuerus e kâpoe e hah siangpahrangnu Vashti ni a ngai hoe dawkvah, aphung patetlah ahni hah bangtelamaw lawkceng han, telah a pacei navah,

<sup>16</sup> Memukan ni siangpahrang hoi tami kalen naw hmalah, Siangpahrangnu Vashti ni siangpahrang koe dueng yonnae sak hoe, bawinaw hoi siangpahrang ni a uk e ramnaw pueng koehai a sak e lah ao.



<sup>17</sup> Bangkongtetpawiteh, siangpahrang Ahasuerus ni siangpahrangnu Vashti a kaw navah, tho pouh hoehe tie peng a kamthang dawkvah, siangpahrangnu e nuencang hah napuinaw pueng ni thai awh vaiteh a vanaw hah a hnephnap awh han.

<sup>18</sup> Siangpahrangnu ni a sak e Persia hoi Media bawinunaw ni a thai awh toteh, a kut rahim thaw ka tawk e bawinaw puenghai, hottelah bout dei awh vaiteh, minhmai khethoehnae hoi lungkhueknae hoehe a pung sak awh han.

<sup>19</sup> Vashti hah siangpahrang Ahasuerus koevah bout kâen sak hoehe nahanlah ngainae awm pawiteh kâen hoehe nahanlah kâ pouh. Kâthung hoehe e kâpoenae ao thai nahanlah Persia hoi Midiannaw koe thun sak. Hahoi, Vashti hlak kahawi e napui hah siangpahrangnu lah lat telah atipouh awh. <sup>20</sup> Hottelah, na sak pawiteh siangpahrang ni kâpoe e hah na uknaeram pueng dawkw pathang torei teh, napuinaw pueng ni a vanaw hah a bari awh han, telah a ti. <sup>21</sup> Hote lawk hah siangpahrang hoi a tami kalen naw ni a lung a kuep dawkvah siangpahrang ni Memukan ni a dei e patetlah a sak. <sup>22</sup> Siangpahrang uknae hoi ram tangkuem dawkvah a ma ca lahoi, miphun pueng a ma lawk lahoi, tongpa ni ma imthungkhu tangkuem dawkw kâtawn hanlah ao tie lawk hah a pathang.

## 2

<sup>1</sup> Hahoi, siangpahrang Ahasuerus teh a lungkhueknae a roum navah, Vashti hai thoseh, ahni ni a sak e hoi ahni hanlah a sak e naw hai thoseh, bout a pouk <sup>2</sup> Siangpahrang pouknae kapoekungnaw ni ahni koevah, "Siangpahrang hanlah tanglakacuem a meikahawi tawng awh sei, <sup>3</sup> Ram pueng dawkw bawi rawi nateh, ahnimouh ni na ram thung e tanglakacuem a meikahawi naw pueng thokhai naseh, na khopui Susan vah Siangpahrang im hrawi awh naseh, siangpahrang im dawkw napuinaw ka uk e tuenla Hegai koevah hrawi awh naseh, kamthoupnae kamtu awh naseh. <sup>4</sup> Tangla na ngai poung e hah na rawi han, Vashti e yueng lah siangpahrangnu lah na ta han, telah atipouh awh. Siangpahrang ni ahawi ati dawkvah hottelah a sak awh. <sup>5</sup> Hatnavah, Susan khopui dawkw Judah tami buet touh Zair capa Mordekai ao. Ahni teh Benjamin phun, Kish capa, Simei capa lah a tho. <sup>6</sup> Ahni teh Babilon siangpahrang ni Judah siangpahrang Jekoniah tinaw a man navah, Jerusalem hoi mak man e doeh. <sup>7</sup> Ahni ni a na pa kanaw e canu Hadassah tie Esta hah a kawkw. Hote napui teh a manu hoi na pa tawn hoehe, hateiteh, a meihawi teh nuencang haiyah ahawipoung. A manu hoi a na pa a due hnukkhu, Mordekai ni a canu lah a tawn e lah ao. <sup>8</sup> Hatdawkvah, siangpahrang kâpoenae hoi laideitâtueng e hah a thai torei teh, Susan khopui dawkw napuinaw ka uk e Hegai koe tanglanaw a poe awh navah, Esta haiyah siangpahrang im e napui ka uk e Hegai koe a poe awh. <sup>9</sup> Esta teh Hegai e lung a youk dawkvah minhmai kahawi a hmu teh, Hegai ni kâpicaenae tâsinaw hoi khohna hah karanglah a poe. Siangpahrang im dawkw rawi e napui sari touh a poe vaiteh, Esta hoi a sannunaw teh tanglanaw onae khan hoe taluenae koe ao sak.

<sup>10</sup> Esta ni api miphun maw, apimaw a imthungkunaw ti hai dei hoehe. Bangkongtetpawiteh, Mordekai ni dei hoehe hanlah a cakâ dawkw vah.

<sup>11</sup> Esta teh bangmaw ati, bangtelamaw ao tie panue hanlah a ngai dawkvah Mordekai ni hnintangkuem siangpahrang im vah napuinaw onae khan a hmalah e thongma dawkw ouk a kâhlai.

<sup>12</sup> Siangpahrang yu hanlah pathoupnae tueng heh kum touh ouk a ro. Thapa yung taruk touh thung murah satui, alouke thapa yung taruk touh



thung teh kâpikâcainae hmuítui hoi kâpi kâcainae lahoi atueng a loun sak awh.

<sup>13</sup> Siangpahrang koevah cei hanlah tueng a pha torei teh tangla ni a ngai e pueng hah a hei teh napuinaw e im dawkh hoi siangpahrang im vah ouk a sin awh.

<sup>14</sup> Tangmin lah siangpahrang koe a hrawi awh teh amom toteh tuenlanaw, a donaw, siangpahrang e a donaw onae khan, tuenla Shâshagaz ni a ring e napui onae khan apâhni e im dawkh a ta awh. Siangpahrang ni a ngai teh a min lahoi kaw hoehpawiteh bout cet awh hoeh toe.

### *Esta siangpahrangnu lah a coung*

<sup>15</sup> Ama e canu patetlah Mordekai ni a kawkh e a na pa kanaw Abihail canu Esta tueng a pha teh siangpahrang koe a kâen navah, napuinaw karingkung siangpahrang hanlah tuenla, Hegai ni a sak pouh e hno hloilah banghai het hoeh. Esta heh kahmawt naw pueng ni a lungpataw awh.

<sup>16</sup> Siangpahrang Ahasuerus a bawinae a kum sari nah, thapa yung hra Tebet thapa dawkh Esta teh siangpahrang koevah a hrawi awh.

<sup>17</sup> Siangpahrang ni Esta teh tangla alouknaw pueng hlakvah hoe a ngai teh a ngai poung dawkvah bawilukhung hah a kâ muk sak teh Vashti yueng lah siangpahrangnu lah a tawm.

<sup>18</sup> Hatnavah, siangpahrang ni Esta min lahoi, tami kalennaw hoi a taminaw hanlah pawî a to pouh. Hote hnin nah, ram pueng dawkh kâhatnae hnin lah a pathang, a thaw katawkaw a patoun teh a bawî e patetlah poehno a poe sak.

<sup>19</sup> Tanglakacuemnaw apâhni lah bout a kamkhueng awh navah, Mordekai teh siangpahrang im dawkh takhang ka ring naw ukkung lah ao. <sup>20</sup> Esta teh Mordekai ni a kawkhnae tueng nah lawk a ngai e patetlah lawk pou a ngai pouh teh Mordekai ni a dei e patetlah a miphun hoi a imthungkunaw e kong dei laipalah ao. <sup>21</sup> Mordekai teh siangpahrang im vah takhang karingkungnaw ukkung lah ao navah, siangpahrang hanlah tuenla, tami kahni touh Bigthan hoi Teresh takhang ka ring roi e a lungkhuek roi teh siangpahrang Ahasuerus hah thei hanlah a kâcai roi. <sup>22</sup> Hote hno hah Mordekai ni a panue teh siangpahrangnu Esta koevah a dei pouh. Hahoi, Esta ni Mordekai ni a dei e patetlah siangpahrang koe a dei pouh. <sup>23</sup> Hote hno akungkhei awh navah atang tie a panue awh dawkvah, hote tami kahni touh roi hah thingsoi vah a kaithi sak awh. Hote hno hah siangpahrang hnosaeknae cungpam cauk dawkh a thut awh.

## 3

### *Haman ni Judahnaw raphoe han a kâcai*

<sup>1</sup> Hat hnukkhu, siangpahrang Ahasuerus ni Agag tami Hammedatha capa Haman hah thaw a luen sak teh alouke tami kalen naw pueng hlakvah ka rasang poung koe a tahung sak. <sup>2</sup> Hahoi, siangpahrang thongma longkha koe kaawm e a taminaw pueng ni Haman hah barinae a poe awh teh, a hmalah ouk a tabo pouh awh. Bangkongtetpawiteh, siangpahrang ni hot patetlah sak hanelah kâ a poe dawkh doeh. Hateiteh, Mordekai ni a hmalah tabo hoi barinae hah poe ngai hoeh. <sup>3</sup> Siangpahrang e sannaw hoi longkha thung kaawm e naw pueng ni Mordekai koevah, bangkongmaw siangpahrang e kâ na tapoe telah atipouh awh. <sup>4</sup> A hnintangkuem kâhruetcuetae a poe awh ei, a ngai pouh hoeh torei teh, Mordekai e lawk a cak hoi a cak hoeh e panue hanlah a ngai awh dawkvah Haman koe a dei pouh awh. Bangkongtetpawiteh, Mordekai ni



Judah tami lah ao e yo a dei pouh toe. <sup>5</sup> Mordekai ni a hmalah tabo hoi barinae poe hane a ngaihoehnae hah Haman ni a panue toteh, puenghoi a lungkhuek. <sup>6</sup> Hateiteh, Mordekai dueng thei hane teh ka lung bet hoe. Bangkoktetpawiteh Mordekai teh api miphun dawkhoei e maw ti a dei awh toe. Hatdawkvah, Ahasuerus uknaeram thung kaawm e Judah tami Mordekai e tami pueng koug thei hanlah a kâcai.

<sup>7</sup> Siangpahrang Ahasuerus a bawinae kum 12, apasuek e thapa Nisan dawkvah, Haman hmalah ahninha a touk, thapa 12 nah Adar thapa totouh Haman hmalah Purim tie cungpam ouk a rayu awh. <sup>8</sup> Haman ni siangpahrang Ahasuerus koevah, Na ram thinghmueng tangkuem dawkhoei miphun buet touh miphun alouke hoi kâvan hoe e aloukcalah kaawm e ao. Ahnimae kâlawk teh alouknaw e kâlawk hoi khoeroe kâvan hoe. Siangpahrang e kâlawk hai ngai awh hoe. Hatdawkvah, hottelah o sak e heh siangpahrang hanlah kamcu hoe. <sup>9</sup> Siangpahrang na hnâ bawt pawiteh, koug thei hanlah ao tie kâ poe loe, siangpahrang rawca tanae dawkhoei ngun tangka thong hra, touh ka ta han telah, atipouh.

<sup>10</sup> Siangpahrang ni hai hote tangka teh kai ni nang let na poe.

<sup>11</sup> Hote miphunnaw koe sak han na ngai e patetlah sak thainae kâ na poe a titeh, a kuthrawt a rading teh, Judahnaw e taran Agag tami Hammedatha capa Haman koe a poe.

<sup>12</sup> Hottelah, thapa yung touh, hnin 13 nah siangpahrang ni cakathutkungnaw a kaw teh, Haman ni kâ poe e patetlah siangpahrang e tami kacuenaw hoi, ram kaukungnaw hoi, miphun pueng e kahrawikung koe ca koug a patawn. Ram pueng dawkvah amamae lawk hoi siangpahrang Ahasuerus e kâpoe e patetlah ca a thut awh teh, siangpahrang e kuthrawt hoi tacik a kin awh.

<sup>13</sup> Siangpahrang uknaeram pueng dawkhoei Judahnaw pueng, nawsai, matawng, camo hoi napuinaw totouh, hnin touh hoi, thapa hlaikahni nah, Adar thapa hnin 13 nah raphoe, thei, tâkhawng vaiteh a hnopai teh koug la pouh hanlah ca a patawn.

<sup>14</sup> Hote hnin hanlah coungkacoe o hanlah ca teh ram tangkuem e tami pueng koevah pathang hanlah ao.

<sup>15</sup> Siangpahrang ni kâ a poe hoi ca kareinaw hah karanglah a patoun awh. Kâpoe e teh siangpahrang khopui Susan vah a pathang awh. Hatdawkvah, siangpahrang hoi Haman teh yamu nei hanlah a tahung roi, hatei, Susan khopui teh ngaihman hoi ao awh.

## 4

### *Esta ni ka taminaw hanelah ka kâhei han ati*

<sup>1</sup> Mordekai ni hote hnonaw pueng a panue toteh a angki a phi teh buri kâkhu laihoi vaiphu a kâphuen, khothung a cei teh, lungrek laihoi puenghoi a ka. <sup>2</sup> Siangpahrang thongma longkha totouh a cei. Bangkoktetpawiteh, apihai buri kâkhu hoi siangpahrang thongma dawkhoei kân han pasoug awh hoe. <sup>3</sup> Siangpahrang ni kâpoe e ca a phanae ram pueng dawkhoei Judahnaw koe cingounae, rawcahainae, khuikanae a sak awh teh, taminaw ni buri hoi vaiphu dawkhoei a yan awh. <sup>4</sup> Hottelah, Esta ni a okhai e napui hoi tuenlanaw ni a dei pouh teh siangpahrang yu teh a lung puenghoi a mathoe, Mordekai hah buri kâkhu yueng lah lukkarei kâkhu hanlah a patawn. Hatei, dâw pouh hoe. <sup>5</sup> Hatdawkvah, Esta ni ama ka ring hanlah tuenla e tami buet touh, Hathakh a kaw teh, hote hno teh bangmaw, bangkongmaw ti panue han a ngai dawkvah Mordekai koevah



a patoun. <sup>6</sup> Hatdawkvah, Hathakh ni siangpahrang thongma longkha koe kaawm e Mordekai koe a cei. <sup>7</sup> Mordekai ni a lathueng ka phat e hnonaw pueng hai thoseh, Judahnaw thei hanelah siangpahrang hnoim dawk Haman ni tangka poe hane lawk a kam e totouh thoseh, totouh kOUNg a dei pouh. <sup>8</sup> Hahoi, Esta hah khen sak nateh deingainae deicai pouh han hoi siangpahrang koe kâhei hanlah a patoun. Ama thei nahanelah Susan im vah ca pathang e hai a poe. <sup>9</sup> Hathakh ni Esta koe Mordekai ni lawkthui e naw pueng a dei pouh.

<sup>10</sup> Esta ni Hathakh koe a dei pouh e teh; <sup>11</sup> siangpahrang sannaw puenghoi a uknaeram thung kaawm e taminaw pueng ni napui thoseh, tongpa thoseh, apihai kaw laipalah siangpahrang koevah a thung e rapan thung kâen pawiteh phunglam buet touh duengdoeh ao tie teh tami pueng ni panue awh. Hote phunglam teh siangpahrang ni a hring nahanlah sui sonron hah dâw pouh hoeh pawiteh apihai thoseh thei hanelah ao. Hahoi, atu hnin 30 touh kâen hanlah na kaw hoeh toe, telah Mordekai koe dei pouh hanlah lawk a thui.

<sup>12</sup> Esta ni lawkthui e teh Mordekai koe a dei pouh.

<sup>13</sup> Mordekai ni Esta hah lawk bout a pathung e teh, “Judahnaw pueng ni a roun thai hoeh e, siangpahrang im dawk teh ka roun thai han doeh telah pouk hanh.

<sup>14</sup> Bangkongtetpawiteh, het patet e tueng nah duem na awm pawiteh, alouke Judahnaw hanlah rounnae hoi hloutnae kaawm nakunghai, nang hoi na pa imthungkhunaw pueng teh kOUNg due awh han. Het patetlae thaw na tawk hanelah nahoehmaw nang teh siangpahrangnu lah uknaeram dawk ka o tie na panuek hoeh maw.

<sup>15</sup> Hatdawkvah, Esta ni Mordekai e lawk pathung hanlah bout a patoun teh,

<sup>16</sup> Cet nateh, Susan kho kaawm e Judahnaw pueng kOUNg kaw nateh, kai hanlah hnin thum, rum thum rawcahai awh. Kai hoi kai koe kaawm e napuinaw van hai rawcahai awh han. Hahoi, phunglam laipalah siangpahrang koe ka kâen han. Ka due hanlah awm pawiteh ka due han, telah a ti.

<sup>17</sup> Hatdawkvah, Mordekai teh Esta ni kâ a poe e patetlah a cei teh a sak.

## 5

### *Esta ni paw i a to*

<sup>1</sup> Hahoi, apâthum hnin nah, Esta ni siangpahrang puengcang a kho teh siangpahrang im kalupnae thungvah a kangdue. Siangpahrang teh takhang hoi kadangka lah a bawitungkhung dawk a tahung. <sup>2</sup> Hahoi, siangpahrangnu Esta teh siangpahrang imthung kalupnae thung a kangdue e hah siangpahrang ni a hmu navah, a lathueng vah a lunghawi dawkvah siangpahrang ni sui sonron a sin e hah Esta koelah a dâw pouh. Hatdawkvah, Esta ni a vâ a hnai teh siangpahrang e sonron hah dek a tek pouh.

<sup>3</sup> Siangpahrang ni, A yu Esta koe bangmaw na ngai, ka uknaeram a tangawn totouh hai na poe han, telah atipouh. <sup>4</sup> Esta ni, Siangpahrang nang ni ahawi na tetpawiteh, bu sut kalawng e ven hanlah sahnin Haman hoi rei tho roi ei, telah atipouh.

<sup>5</sup> Siangpahrang ni, Esta ni a dei patetlah Haman karanglah kaw awh, telah atipouh. Hatdawkvah, siangpahrang hoi Haman teh Esta ni sut lawng e paw i koe bu ca hanlah a cei roi. <sup>6</sup> Misur bout neinae hmu



koevah, siangpahrang ni Esta, bangmaw hei han na ngai. Ka uknaeram a tangawn totouh na poe han, telah atipouh.

<sup>7</sup> Esta ni ka ngai e hoi ka hei e teh het hah doeh. <sup>8</sup> Siangpahrang minhmai kahawi ka hmu teh, ka heinae siangpahrang ni na poe hanlah na pasoung teh, kahei e hah kuepsak pawiteh, tangtho vah bu vennae koe Haman hoi bout tho roi ei, tangtho teh na dei e patetlah ka ngai e ka dei han toe telah atipouh.

### *Haman ni Mordekai kaithi sak nahanelah khom a ung*

<sup>9</sup> Hatdawkvah, Haman teh hote hnin navah lunghawi ca lahoi a tâco. Hatei, Haman ni siangpahrang thongma kalupnae longkha e a hmalah, Mordekai ni bari laihoi thaw hoe, kâroe laipalah ao e hah a hmu navah, Mordekai koe puenghoi a lungkhuek.

<sup>10</sup> Hatei, Haman teh a kâ cakuep laihoi a im vah a ban. A hui hoi a yu Zeres hah a kaw sak.

<sup>11</sup> Hatdawkvah, Haman ni a bawilennae hoi a bawirengnae kong hoi, ca catoun moi a tawnae kong, siangpahrang ni a tawm teh thaw ka rasang a poenae naw puenghoi alouknaw hlakvah ka rasang poung lah a tanae kong naw hah ahnimouh koevah a dei pouh.

<sup>12</sup> Hothloilah, siangpahrangnu Esta ni buvennae a sak e daw k kai laipalah siangpahrang koevah apihai kâpa sak hoe. Tangtho vah siangpahrang hoi bout na coun rah.

<sup>13</sup> Hatei, siangpahrang thongma kalupnae longkha koe ka tahung e Mordekai ka hmu nathung teh hetnaw pueng heh kai hanlah banghai cungkei hoe, a ti.

<sup>14</sup> Hatdawkvah, a yu Zeres hoi a hui naw pueng ni ahni koevah, Dong 50tuh karasang e kaithinae hah sak sak nateh Mordekai hah kaithi sak hanlah amom vah siangpahrang koe dei pouh nateh buvennae koe vah lung kanawmcalah siangpahrang hoi rei cet roi haw atipouh awh. Hote lawk ni Haman a lungkuep sak teh kaithinae teh a sak sak.

## 6

### *Siangpahrang ni Mordekai barinae a poe*

<sup>1</sup> Hote tangmin vah siangpahrang teh ip thai hoe. Siangpahrang setouknae cungpam cauk thokhai hanlah tami buet touh kâ a poe teh siangpahrang hmalah a touk. <sup>2</sup> siangpahrang im ka ring e tuenla Bigthana hoi Teresh ni siangpahrang Ahasuerus thei hanlah a kâcai roinae hoi Mordekai ni a panue e kong hah a hmu.

<sup>3</sup> Hatdawkvah, siangpahrang ni, Hote hno kecu daw k Mordekai ni bangpatet e barinae maw a hmu toung, telah a pacei. Siangpahrang e thaw ka tawk naw ni, Banghai sak pouh hoe rah, telah atipouh awh.

<sup>4</sup> Siangpahrang ni, Thongma e kaawm e apimaw telah a pacei. Hatnae tueng navah Haman teh kaithi sak hanelah a sak e daw k Mordekai hah kaithi sak nahane kong dei hanlah siangpahrang thongma alawilah vah a kâen lahun.

<sup>5</sup> Siangpahrang e sannaw ni ahni koevah, Khenhaw thongma ka kangdout e teh Haman doeh, telah atipouh. Hahoi, siangpahrang ni, kâen naseh, telah atipouh.

<sup>6</sup> Hatdawkvah, Haman teh a kâen teh siangpahrang ni ahni koevah, siangpahrang ni bari poe han a ngai e tami hah bangtelah sak pawiteh maw ahawi han vai, telah atipouh. Haman ni, Siangpahrang ni bari poe han a ngai e tami teh kai hloilah ao han rah maw, telah a lungthung hoi a



pouk. <sup>7</sup> Haman ni siangpahrang koevah, Siangpahrang ni bari a poe han a ngai e tami teh, <sup>8</sup> Siangpahrang ni ouk a kho e angki hoi siangpahrang ni ouk a kâcuie marang hoi siangpahrang lukhung, siangpahrang ni ouk a kâ muk e hah la pouh lah awm naseh. <sup>9</sup> Hote khohna hoi marang hah ka talue e siangpahrang e kut rahim thaw ka tawk e buet touh koe a poe hnukkhu, siangpahrang ni a tawm han a ngai e tami hah hote khohna hoi a pathoup teh, marang a kâcui sak teh, kho thung lam daw k hrawi vaiteh, siangpahrang ni a tawm han a ngai e tami koe hettelah sak e lah ao ti hoi ahnie hma lah oung aw h naseh telah siangpahrang koe bout atipouh.

<sup>10</sup> Hatdawkvah, siangpahrang ni Haman koevah, Na dei e patetlah siangpahrang e hni hoi marang lat nateh, siangpahrang e im longkha koe ka tahung e, Judah tami Mordekai koevah sak haw, na dei e patetlah buet touh boehai pâhma hanh, telah atipouh.

<sup>11</sup> Hat toteh, Haman ni siangpahrang e khohna hoi marang hah a la teh Mordekai a kâcui sak teh, khopui lam daw k hrawi teh, Siangpahrang ni bari poe hanelah a ngai e tami teh hettelah sak lah ao, telah pou a pathang.

<sup>12</sup> Hathnukkhu, Mordekai teh siangpahrang e longkha koevah bout a ban. Haman teh minhmai puenghoi mathoe lahoi a lûsaling teh a im lah karanglah a ban. <sup>13</sup> Hahoi, Haman ni a yu Zeresh hoi a hui naw pueng koe a lathueng ka phat e hnonaw pueng a dei pouh. Hatdawkvah, a tami lung ka-ang naw hoi a yu Zeresh ni ahni koevah, Na Kâhmo payon, Mordekai teh Judah tami lah awm pawiteh na khang thai mahoe, a hmalah na sung roeroe han, telah atipouh.

### *Esta ni Haman pouknae a pâpho pouh*

<sup>14</sup> Hottelah, ahni koe a dei pouh aw h navah, tuenlanaw a tho teh, ahnimouh ni, Esta ni sut lawng e buvennae koe Haman teh karanglah a ceikhai aw h.

## 7

<sup>1</sup> Hatdawkvah, siangpahrang hoi Haman teh siangpahrangnu, Esta e bu a ven roi. <sup>2</sup> Hahoi, hnin pahni nah e misur a ven roi navah, siangpahrang ni siangpahrangnu Esta koevah, Siangpahrangnu bangmaw na ngai. Na poe han. Bangmaw na hei han. Uknaeram atangawn totouh na poe han, telah bout atipouh. <sup>3</sup> Hatdawkvah, siangpahrangnu Esta ni, Oe bawipa, na lungyouk teh, siangpahrang hnâbonae lah awm pawiteh, ka ngai e teh kahringnae na pâhlung pouh han hoi ka miphunnaw e hringnae pâhlung pouh hane hah doeh. <sup>4</sup> Bangkongtetpawiteh, kai hoi ka miphunnaw teh raphoe teh koung thei hanlah ka o toe, napui hai tongpa hai san lah yo han tie pawiteh banghai ka dei mahoe. Hateiteh, koung pâmit hanelah ka o aw h. Siangpahrang, nang hanelah hai sungnae katang lah ao han atipouh.

<sup>5</sup> Hatdawkvah, siangpahrang ni Esta koevah, Hete hno sak hanlah a lung hoi a kâcai teh khokhan ngam e apimaw, na maw ao, telah a pacei. <sup>6</sup> Esta ni, na katarankung hoi na katukkung teh tami kahawihoehe Haman doeh, telah atipouh. Hatdawkvah, siangpahrang hoi siangpahrangnu e a hmalah Haman teh a taki teh a pâyaw.

### *Haman a kaithi sak aw h*

<sup>7</sup> Hahoi, siangpahrang teh misur venna koe hoi lungkhuek laihoi karanglah a thaw teh takha thung a kâen. Haman teh siangpahrangnu Esta koevah a hringnae pâhlung nahanlah kâhei laihoi a kangdue. Bangkongtetpawiteh, siangpahrang ni a lathueng vah hno a sak hane a



kâpanue toe. <sup>8</sup> Hatdawkvah, siangpahrang teh siangpahrang dum hoi misur vennae koe bout a tho navah, Haman teh Esta tahungnae tungkhung teng vah a tabo e a hmu navah, siangpahrang ni hete im dawk ka mithmu roeroe vah siangpahrangnu teh na yonkhai han na maw, telah atipouh. Siangpahrang e kâpoe e patetlah Haman e minhmai hah a kawm pouh awh. <sup>9</sup> Hatdawkvah, siangpahrang hanlah tuenla e tami Harbonah ni, Khenhaw! siangpahrang hmalah lawk kahawi ka dei e Mordekai bang nahanlah dong 50 ka rasang e Haman ni a sak tangcoun e khom Haman im vah ao, telah atipouh. Siangpahrang ni haw vah bang awh, atipouh.

<sup>10</sup> Hatdawkvah, Mordekai bang nahane hmuen dawkvah Haman teh a bang awh. Siangpahrang e lungkhueknae teh a roum toe.

## 8

### *Esta ni Judahnaw a rungang*

<sup>1</sup> Hote hnin dawkvah, siangpahrang Ahasuerus ni Judahnaw e taran Haman im hah siangpahrangnu Esta koe a poe. Esta ni Mordekai hoi bangtelamaw kâkuetnae ao tie kong a dei dawkvah Mordekai teh siangpahrang koe a kâen. <sup>2</sup> Siangpahrang ni hai Haman kut dawki hoi a la e kuthrawt hah a rading teh Mordekai hah a poe. Esta ni hai Haman e im hah Mordekai a poe.

<sup>3</sup> Hahoi, Esta ni siangpahrang khok koe a tabo teh, Agag tami Haman ni a sak e yon, Judahnaw koe a kâcainae naw raphoe pouh hanlah mitphi hoi a kâhei. <sup>4</sup> Siangpahrang ni sui sonron hah Esta koelah a dâw pouh. Hatdawkvah, Esta ni a thaw teh siangpahrang hmalah a kangdue teh, <sup>5</sup> siangpahrang, ahawi na tetpawiteh, na lung ka youk pawiteh; siangpahrang hmunae dawk a lan teh lung kahawi sak e lah kaawm pawiteh, Agag tami Hamedatha capa Haman ni kho a khang e ca, siangpahrang uknaeram pueng dawk kaawm e Judahnaw pueng koug thei hanlah telah a pathang e ca hah raphoe hanlah ca bout thun sak loe atipouh. <sup>6</sup> Bangkongtetpawiteh, ka miphunnaw koe hawihoehnae ka tho hane runae hoi thoseh, ka miphunnaw a raphoenae hai thoseh, kai ni ka khet hanelah bangtelamaw ka khang thai han, telah atipouh. <sup>7</sup> Siangpahrang ni hai Haman ni Judahnaw koe kutpho hane a kâcai kecu dawkvah a im hah siangpahrangnu Esta koe ka poe toe. Ama haiyah khom dawk yo kaithi sak toe. <sup>8</sup> Hahoi, siangpahrang kuthrawt hoi tacikkin e siangpahrang kâlawk hah apinihai raphoe thai mahoe. Na lungngai e patetlah Judahnaw hanlah ca bout thun nateh, kuthrawt hoi tacikkin han telah siangpahrangnu Esta hoi Judah tami Mordekai koe atipouh.

<sup>9</sup> Hatnavah, Sivan thapa ayung pâthum, hnin 23 navah kathutkung-naw a kaw teh India ram hoi Êthiopia ram totouh a ram 127 touh dawk kaawm e Judahnaw, ka ukkungnaw hoi kahrawikungnaw koe vah Mordekai ni kâ a poe e patetlah Judahnaw e lawk lahoi miphun pueng e lawk lahoi, <sup>10</sup> Siangpahrang Ahasuerus min lahoi ca a thut awh teh, siangpahrang e kuthrawt hoi tacik a kin hnukkhu, Marang, La, Kalauk kâcui laihoi ca kareinaw ni a poe awh. <sup>11</sup> Hatdawkvah, siangpahrang ni ram pueng dawk kaawm e Judahnaw pueng kamkhueng awh nateh, hringnae kâhruetcuethan hoi tuk hanlah ka tho e ransanaw pueng hah a yucanaw hoi koug thet awh nateh a hnopai hai la thainae kâ hah siangpahrang ni a poe. <sup>12</sup> Siangpahrang Ahasuerus uknaeram pueng dawk teh thapa hlaikahni, Adar thapa hnin 13 nah, Judahnaw koug thei hanlah khokhangnae hnin dawk hno hanlah ao. <sup>13</sup> Hete lawk teh,



hatnae hnin roeroe nah a tarannaw e lathueng vah moipathung thai nahan hoi Judahnaw sut coungkacoe lah ao thai awh nahan, kho tangkuem vah kOUNg patawn teh taminaw pueng koe pathang han, telah atipouh.

<sup>14</sup> Hote kâpoe e ca teh Shushan khopui dawK a pathang awh hnukkhu, siangpahrang ni kâpoe e patetlah marang kâcuie naw ni siangpahrang e marang a kâcui awh teh, karanglah a yawngkhai awh.

<sup>15</sup> Mordekai ni siangpahrang e angki pangaw opaou e a kho teh, suilukhung kalenpoung kâ muk hoi, kawng e hni paling opaou e a kâkhu teh, <sup>16</sup> Susan khopui dawK e taminaw teh a lunghawi awh. Judahnaw teh lunghawinae, thahmeinae hoi barinae hah a coe awh. <sup>17</sup> Siangpahrang e kâpoe e ca a phanae ram pueng dawkvah, Judahnaw ni lunghawinae, pawitona, yawhawinae hnin yanae hah a sak awh teh, khoca ramca moi kapapnaw ni Judahnaw hah a taki awh dawkvah Judah phung lah a kâen awh.

## 9

### *Judahnaw ni a tarannaw a raphoe awh*

<sup>1</sup> Hatdawkvah, ahlaikahni e thapa Adar, hnin 13 hnin, siangpahrang ni kâpoe e patetlah a sak awh nahane hnin teh a hnai toe. Hote hnin nah, Judahnaw e tarannaw ni kaimouh ni ka tâ awh han telah a ngaihaw i awh. Hatei, Judahnaw ni ahnimouh letlang tânae hnin lah ao. <sup>2</sup> Siangpahrang Ahasuerus e ram pueng dawK kaawm e Judahnaw ni ahnimouh koe thoena katawngnaw koe moipathung hanlah a ona khopueng dawkvah a kamkhueng awh teh apinihai ngang thai awh hoeH. Bangkongtetpawiteh taminaw pueng koe takinae a pha. <sup>3</sup> Hote ram thung vah bari kaawm e taminaw hoi kahrawikungnaw hoi ram ka ukkungnaw hoi siangpahrang e thaw katawknaw ni Mordekai hah a taki awh dawkvah Judahnaw hah a kabawp awh. <sup>4</sup> Bangkongtetpawiteh, Mordekai teh siangpahrang im dawkvah takhang karingkungnaw kaukung lah ao, ram pueng dawkvah a min a kamthang teh hnin touh hnukkhu hnin touh a min hoehoe a kamthang. <sup>5</sup> Hote hnin nah, Judahnaw ni a tarannaw pueng hah tahloi hoi kOUNg a thei awh. Ahnimouh kahmawt ngai hoehnaw koevah a ngai e patetlah a sak awh. <sup>6</sup> Shushan khopui dawK tami 500touh a thei awh. <sup>7</sup> Hamedatha, Judahnaw katarankung Haman canaw hra touh, <sup>8</sup> Parshandatha, Dalphon, Aspatha, <sup>9</sup> Poratha, Adalia, Aridatha, Pamashta, Arisai, <sup>10</sup> Aridai, Vaizatha hah a thei awh. Hateiteh, a hnopai teh lat pouh awh hoeH.

<sup>11</sup> Hat hnin vah shushan kho dawK kadout e cayin hah siangpahrang koe a thaisak awh. <sup>12</sup> Siangpahrang ni siangpahrangnu Esta hah a kaw teh, Judahnaw ni Shushan khopui dawK Haman canaw hra touh hoi tami 500touh a thei awh. Alouke ramnaw dawK teh bangtelamaw a sak awh han. Nang ni teh bangtelamaw na ngai. Na ngai e patetlah na sak pouh han. Bangmaw hei han na ngai rah. Na hei e pueng na poe han atipouh. <sup>13</sup> Esta ni siangpahrang na ngainae lah tho pawiteh, Shushan khopui kaawm Judahnaw ni sahnin kâpoe e patetlah tangtho haiyah sak naseh. Haman canaw teh pathout awh naseh, telah atipouh. <sup>14</sup> Hahoi, siangpahrang ni hot patetlah sak hanlah kâ bout a poe dawkvah Shushan khopui dawK kâpoe e hah a pathang awh teh Haman capanaw hra touh hah a pathout awh. <sup>15</sup> Shushan kaawm e Judahnaw ni Adar thapa, hnin 14nah haiyah bout a kamkhueng awh teh, Shushan khopui dawK tami 300touh a thei awh. Hateiteh, a hnopai teh lat pouh awh hoeH.



<sup>16</sup> Siangpahrang uknae alouklah kaawm e Judahnaw hai a kamkhueng awh teh taran kut dawk hoi lungmawng nahanlah amamouh hoi amamouh a kâring awh. A tarannaw 75000tough a thei awh. Hateiteh, a hnopai lat pouh awh hoe. <sup>17</sup> Adar thapa hnin 13nah hote hno a sak awh. Hahoi, hnin 14nah a kâhat awh teh pawitonaen hnin hoi lunghawinae hnin lah a hno awh. <sup>18</sup> Hateiteh, Shushan kaawm e Judahnaw teh hnin 13 hoi 14 nah a kamkhueng awh teh hnin 15 nah a kâhat awh teh pawitonaen hoi lunghawinae hnin lah a hno awh. <sup>19</sup> Hatdawkvah, rapan ka tawn hoe e kho dawk kaawm e Judahnaw nihaiyah Adar thapa hnin 14nah lunghawi laihoi pawitonaen hnin, yawhawinae hnin buet tough hoi buet tough hno ouk kâpoenae hnin lah, ka sungren poung lah a hno awh.

### *Purim paw*

<sup>20</sup> Mordekai ni hote kongnaw pueng a thut teh siangpahrang Ahasuerus uknaeram dawk kaawm e Judahnaw pueng koevah a patawn. <sup>21</sup> Adar thapa hnin 14 hoi 15 hnin heh a kum tangkuem ahnimouh hanlah, ka lentoe e hnin lah caksak hanlah a pathang awh. <sup>22</sup> Hote hnin dawk Judahnaw ni a taran kut dawk hoi a hlout teh lungmawngnae hnin, a lungmathoenae hoi a kanae, a kahma teh lunghawinae hoi nawmnaenae koe a phanae hnin lah ao dawkvah, a kum tangkuem hote hnin nah a kâhat awh teh pawitonaen hnin, lunghawinae hnin, buet tough hoi buet tough hno a kâpoe awh teh, karoedengnaw hah hno poenae hnin lah kaawm e singyoe hah sak hanlah, siangpahrang Ahasuerus ram pueng dawk kahnai kahlat kaawm e Judahnaw pueng koe ca hah a patawn.

<sup>23</sup> Judahnaw ni hai nueng a sak e Mordekai a dei e patetlah pou sak a hanlah a lungkupe awh. <sup>24</sup> Judahnaw pueng e taran lah kaawm e Agag tami Hamedatha capa Haman ni Judahnaw teh thei hanlah khokhangnae a tawn dawkvah Purim cungpam a rayu awh toe. Hot teh, ahnimouh koun thei nahanelah a tho. <sup>25</sup> Hateiteh, Esta ni siangpahrang koe a cei teh Judahnaw koe Haman e kahawihoehe khokhangnae hah amae lû dawk bout bo sak hanlah, ama hoi a canaw haiyah thingsoi vah pathout hanlah, ca lahoi kâ a poe. <sup>26</sup> Purim cungpam tie tarawi teh hote hninnaw hah Purim cungpam hnin telah a kaw awh. <sup>27</sup> Judahnaw ni amamouh koehoi ca catoun, ahnimouh koe kambawngnaw pueng haiyah, hote hninhnin tough teh Mordekai e ca dawk kaawm e patetlah kum tangkuem a ya awh. <sup>28</sup> Hote hnin teh Judahnaw dawk kahmat hoe, ca catounnaw ni hai pahnim awh hoe. Ram pueng dawk kaawm e a ca catounnaw ni a pahnim hoe nahanlah a ya hanlah hnâ a bo awh.

<sup>29</sup> Hatnavah, Abihail canu, siangpahrangnu Esta hoi Judah tami Mordekai ni Purim cungpam kong dawk apâhni ca patawnnae hah rek caksak hanlah kâtawwnae lahoi ca bout a thut. <sup>30</sup> Judah tami Mordekai hoi siangpahrang ni lawkthui e patetlah Judahnaw ni amamouh hoi ca catoun hanlah a sak e khoe e tueng nah rawcahainae, ratounnae hoiyah Purim hninnaw hah pou ya hanlah, <sup>31</sup> Ahasuerus ni uknaeram 127 tough dawk kaawm e Judahnaw pueng koe roumnae yuemkamcu e ca hah Mordekai ni a poe. <sup>32</sup> Hottelah, cungpam kong teh Esta ni kâpoe e lahoi a caksak awh teh siangpahrangnaw e cungpam dawkvah a thut awh.



<sup>1</sup> Siangpahrang Ahasuerus ni talai van hoi tuilum daw k kaawm e taminaw pueng koe tamuk a cawng. <sup>2</sup> A hnosakthainae, a thaonae hoi a sak e naw puenghoi Mordekai a lentoe saknae, siangpahrang ni a tawmnae hah kakuepcalah Media hoi Persia siangpahrangnaw se touknae cauk dawkvah thut lah ao. <sup>3</sup> Bangtelamaw, Judah tami Mordekai teh siangpahrang Ahasuerus kut rahim vah ka talue poung e thaw a hmu teh Judahnaw thung daw k ka lentoe poung e lah ao. A taminaw e hawinae hah a tawng teh, a taminaw pueng koe minhmai kahawi a hmu teh, a taminaw e kâponae lawk hah a dei.



## JOB (The Book of Job)

### *Uz ram vah Job hoi a imthung*

<sup>1</sup> Uz ram dawk tami buet touh ao teh, a min teh Job doeh. Ahni teh toun hane awm hoeh, tamikalan, Cathut ka taket e, kahawihoehe lamthung ka roun e lah ao. <sup>2</sup> Capa 7 touh hoi canu 3 touh a tawn. <sup>3</sup> A tawn e naw teh, tu 7,000, kalauk 3,000, maitotan 500, lamanu 500, hoi a sannaw moikapap a tawn. Ahni teh Kanitholae taminaw pueng hlak tami ka lentoe poung e lah ao.

<sup>4</sup> A capanaw ni kum tangkuem amamae a khenae paw i a sak awh navah, amamae im dawk bu canae paw i a sak awh teh a kamkhueng awh navah, a tawncanunaw ka 3, touh hai canei hanelah ouk a coun. <sup>5</sup> Hottelah bu canae paw i abaw hnukkhu vah, Job ni a kaw awh teh, ouk a kamkhueng sak awh. Amom a thaw teh ahnimae milu kuep lah hmaisawi thuengnae sathei ouk a poe. Bangkongtetpawiteh Job ni ka capanaw ni yonnae sak awh vaiteh, a lungthin hoi Cathut hah pahnawt awh langvaih telah ati. Hottelah, Job ni pou a sak.

### *Setan ni Job hringnae a taran*

<sup>6</sup> Cathut e capanaw BAWIPA e hmalah tâconae hnin a pha torei teh, Setan hai ahnimouh koe a tho van. <sup>7</sup> BAWIPA ni Setan koe nâ lahoi maw na tho atipouh. Setan ni BAWIPA talai van ka kâhei teh ka kumluennae koehoi, atipouh.

<sup>8</sup> BAWIPA ni Setan koe ka san Job he na pouk boimaw. Talai van dawk ahni patetlae toun han kaawm hoeh e, tamikalan Cathut ka taket e hoi, kahawihoehe lamthung ka roun e awm hoeh, telah atipouh.

<sup>9</sup> Setan ni BAWIPA a pathungnae teh, Job ni Cathut hah a khuekhaw awm laipalah maw a taki. <sup>10</sup> Ahni teh a imthung hoi, a tawn e naw pueng hoi, a tengpam pueng pet na kalup teh, a kut hoi a taw k e naw pueng hah yawhawi na poe teh, na kamphung sak nahoehmaw. <sup>11</sup> Atuvah na kut pho nateh a tawn e hnaw pueng hah tek pouh haw, na hmaitung roeroe vah nama tang na pahnawt han doeh atipouh. <sup>12</sup> BAWIPA ni, Setan koe, kenhaw! a tawn e naw pueng teh, nange na kut daw k ao. Ama teh tek hanh atipouh. Hahoi Setan teh BAWIPA koehoi a tâco.

<sup>13</sup> Hnin touh hnin teh, a canu hoi a capanaw teh, a hmau kacue im dawkvah a ca awh teh misurtui a nei awh lahun nah, <sup>14</sup> Job koe patoune buet touh a yawng teh, maitotannaw talai a kanaw k awh lahun nah, lanaw hai ateng a pâ awh lahun navah, <sup>15</sup> Sheba taminaw ni na tuk awh teh, koug a la awh toe na sannaw hah tahloi hoi a thei awh teh, kai buet touh dueng doeh, nang koe dei hanelah ka hlout atipouh. <sup>16</sup> A dei lahun nah tami alouke bout a tho. Kalvan hoi Cathut e hmai a bo teh, tu hoi na sannaw hah koug a kak teh be a kahma toe. Kai buet touh dueng doeh nang koe dei hanelah ka hlout e lah ka o atipouh.

<sup>17</sup> A dei lahun nah tami alouke bout a tho. Khaldean taminaw ahu katham touh lah ao awh teh, kalauknaw hah koug na lawp awh, na sannaw hai tahloi hoi be a thei awh. Kai buet touh dueng doeh nang koe dei hanelah ka hlout atipouh.



<sup>18</sup> A dei lahun nah tami alouke bout a tho. Na canu hoi na capanaw ni, a hmau kacuepoung e im vah a ca awh teh misurtui a nei awh lahun navah, <sup>19</sup> Khenhaw! kahrawng lahoi kahli katang poung e a tho teh, innaw hah a hmanh teh, thoundoun, tanglanaw hah koug a ratet teh koug a due. Kai buet touh dueng doeh nang koe dei hanelah ka hlout atipouh.

<sup>20</sup> Hahoi Job ni a thaw teh, ahni a ravei, a lû luengpalueng lah a ngaw teh, talai dawh a tabo teh a bawh. <sup>21</sup> Anu e von thung hoi tak caici lah ka tâco teh, tak caici lah bout ka ban han. BAWIPA ni na poe teh BAWIPA ni bout a la. BAWIPA min teh pholennae awm seh telah a ti. <sup>22</sup> Hetnaw dawkhah Job ni yonnae sak laipalah Cathut yonpennae tawn hoeh.

## 2

### *Setan ni Job tanouknae*

<sup>1</sup> Cathut e capanaw BAWIPA e hmalah a tâconae hnin bout a pha toteh, Setan hai BAWIPA e hmalah kamnue van hanlah ahnimouh koe a tho van.

<sup>2</sup> BAWIPA ni Setan teh nâ lahoi maw na tho atipouh. Setan ni BAWIPA a pathungnae teh, talai van ka kâhei teh, ka kumluennae koehoi, atipouh.

<sup>3</sup> BAWIPA ni Setan koevah, ka san Job heh na pouk boimaw. Ahni patetlah toun han kaawm hoeh e, tamikalan, Cathut ka taket e hoi, kahawihoehe lamthung ka roun e, apihai awm hoeh. Bang hoeh e dawh na ka raphoe nakunghai ama min la doeh poe awm ti atipouh.

<sup>4</sup> Setan ni BAWIPA hah a pathung teh, vuen hanlah vuen lah doeh ao, tami ni a tawnta e pueng hah a hring nahanelah a kâpasoung yawkaw han. <sup>5</sup> Hateiteh, atu na kut pho nateh, a hru hoi atak tek pouh haw, na hmaitung vah na pahawt han doeh atipouh.

<sup>6</sup> BAWIPA ni Setan koe, khenhaw! ahni teh na kut dawh ao. Hateiteh a hringnae hah pâhlung atipouh. <sup>7</sup> Setan teh BAWIPA e hmaitung hoi a tâco teh, Job hah a khok koehoi a lû totouh, ka patawpoung e moihna hoi a kawi sak. <sup>8</sup> A kâkoe nahanelah Job ni ampaikê hah a la teh hraba dawh a tahung.

<sup>9</sup> A yu ni, na lannae hah pou na kuet han rah maw. Na Cathut hah thoebo nateh, dout lawih atipouh. <sup>10</sup> Hateiteh ahni ni napui koe, ka pathu e napui ni lawk a dei e patetlah na dei. Bangtelamaw Cathut koehoi hawinae ka hmu katang teh, thoenae hai hmawt mahoe haw, telah atipouh. Hete hno pueng dawh Job ni apâhni dawh hoi yonnae dei hoeh.

### *Job hoi a huinaw kathum*

<sup>11</sup> Job e a hui kathum touh ni, het patet e hawihoe hnae ni a pha sin e a thai awh toreih teh, amamouh aonae koehoi lengkaleng a tho awh. Teman tami Eliphaz Shuhi tami Bildad hoi, Naamath tami Zophar, bangkongtetpawiteh, ahni lungpahawi hane, lungmawng sak hanelah a kamkhueng awh teh a kâpan awh. <sup>12</sup> Ahnimouh ni ahlanae koehoi Job hah a khet awh navah, nout thai awh hoeh. Kacaipounglah a ka awh teh, khohnanaw hah vekvek a ravei awh teh, a lûnaw dawh vaiphu a kâphuen awh. <sup>13</sup> Hottelah hnin sari touh hoi rum sari touh thung talai dawh a tahungkhah awh teh, apinihai ahni koe lawk kam touh hai dei awh hoeh. Bangkongtetpawiteh, a lungmathoe poung tie hah a panue awh.

## 3

### *Job ni a khenae hnin thoe a bo*

<sup>1</sup> Hathnukkuh, Job ni a pahni dawh hoi a khenae hnin hah thoe a bo.



- <sup>2</sup> Job ni ati e teh,  
<sup>3</sup> ka khenae hnin hah kahmat pawiteh,  
capa a vawn ati e tangmin hai kahmat pawiteh,  
<sup>4</sup> Hatnae hnin hah hmonae lah awm pawiteh,  
Cathut ni lathueng lahoi khen hanh naseh.  
Hoehpawiteh, angnae ang hanh naseh.  
<sup>5</sup> Hmonae hoi duenae tâhlip ni ramuk naseh,  
tâmai ni ramuk e, kanîthun e hmonae ni pakhi naseh.  
<sup>6</sup> Hatnae tangmin hah hmonae ni kuen naseh,  
hatnae kum dawk e hninnaw dawkvah lunghawi van hanh naseh.  
Thapa touknae dawk hai bawk hanh naseh.  
<sup>7</sup> Oe, hatnae tangmin hah kingkadi e tangmin lah awm pawiteh,  
lunghawinae kamthang pai hanh naseh.  
<sup>8</sup> Tuitam thaw sak hane coungkacoe kaawmnaw ni, hatnae hnin hah,  
thoekâbonaw ni thoebo awh naseh.  
<sup>9</sup> Hatnae tangmin amom lae âsi hah mawm naseh,  
angnae hah tawng awh naseh. Hateiteh, hmawt awh hanh naseh.  
Kanî a tâco e hai, hmawt hanh naseh.  
<sup>10</sup> Bangkongtetpawiteh, anu e thun hah khan hoeh eiteh,  
ka mithmu vah, ka lungmathoenae hah kâhrawk hoeh.  
<sup>11</sup> Bangkongmaw ka tâco tahma vah, ka due hoeh va.  
Bangkongmaw von dawk hoi ka tâco nah, kahmakata hoeh va.  
<sup>12</sup> Bangkongmaw phai dawk tawm e lah ka o,  
bangkongmaw ka nei hane sanutui na pânei.  
<sup>13</sup> Bangkongtetpawiteh, ka i vaiteh, karoumcalah ka o han ei,  
mat ka i vaiteh, ka kâhat hane boum.  
<sup>14</sup> Talai siangpahrang hoi khokhangkungnaw,  
ka rawk e bout ka kangdout sakkungnaw hoi vah,  
<sup>15</sup> hoehpawiteh, sui ka tawn e tami ka lentoe e,  
a im dawk ngun hoi kakawi sak naw hoi vah,  
<sup>16</sup> hoehpawiteh, thakoup hoehnahlan ka khe e camo,  
angnae kahmawt boihoe e, camo patetlah, kapawk e lah ka o hoeh  
va.  
<sup>17</sup> Hawvah tamikathoutnaw ni, runae a sak e hah a kâhat awh teh,  
hawvah thakatawnnaw hah a kâhat awh.  
<sup>18</sup> Hawvah thongkabawt e cungtalah a kâhat awh teh,  
repcoungroe pawlawk hai thai hoeh toe.  
<sup>19</sup> Hawvah tami kathoung kalen naw cungtalah ao awh teh,  
a sannaw hah a bawi koehoi a hlout.  
<sup>20</sup> Bangkongmaw runae ka khang e koevah, angnae poe e lah ao teh,  
bangdawkmaw a lung ka mathout e koe hringnae hah poe e lah ao.  
<sup>21</sup> Due han a ngai poung, hateiteh, tho hoeh.  
Pakawp e râw hlak vah, hoe ka pataw e ka tawng e,  
<sup>22</sup> phuen a hmu awh navah,  
dei thai hoeh e a lung kahawi katang e koevah,  
<sup>23</sup> bangdawkmaw a lamthung hro lah kaawm e koevah,  
angnae hah poe e lah ao. Cathut ni rapan hoi kalupsin e koevah,  
<sup>24</sup> Bangkongtetpawiteh, rawca yueng lah ka cingou teh  
ka khuikanae mitphi hai tui ka lawng e palang patetlah doeh ao.  
<sup>25</sup> Bangkongtetpawiteh, ka takipoung e hah,  
ka tak dawk a pha teh, ka ngaihri poung e ni na thosin.



- <sup>26</sup> Ka phunep hoeh dawk duem kaawm thai hoeh.  
 Kâhat panuek hoeh, bangkongtetpawiteh, rucatnae ni a pha telah ati.

## 4

### *Eliphaz ni lawk a dei*

- <sup>1</sup> Hahoi Teman tami Eliphaz ni ahni koe bout a dei e teh,  
<sup>2</sup> nang koe lawk kam touh ka dei haw vai, na thaima han vaimoe.  
 Hatei apinimaw dei laipalah ao thai han.  
<sup>3</sup> Tami moikapap na cangkhai toe.  
 Kut tha kaawm hoeh e tha na o sak.  
<sup>4</sup> Na lawk ni karawmnaw hah a thaw sak teh,  
 khokpakhu tha kaawm hoeh e tha ao sak.  
<sup>5</sup> Hateiteh, atu nama koe a pha teh,  
 na lung sut a pout.  
 Na tek teh, na ngaihman.  
<sup>6</sup> Na barilawa e hoi na kâuepkhai e nahoehmaw,  
 kakuep e lamthung hah na ngaihwai e nahoehmaw.  
<sup>7</sup> Atu pouk haw, kayonhoehe apimaw kahmakata boi vai.  
 Hat hoehpawiteh, tamikalan hah nâmw tâkhawng e lah ao boi.  
<sup>8</sup> Kahmanae dawkvah payonpakainae,  
 talai kanawk teh runae ka tu e ni doeh ouk a a.  
<sup>9</sup> Cathut e kâha dawk a kahma awh teh,  
 a lungkhueknae kâha dawk be a kak awh.  
<sup>10</sup> Sendek huk e pawlawk hoi,  
 ka matheng poun e sendektan kanaw e a hâ hah a kâkhoe.  
<sup>11</sup> Ca hane ao hoeh dawkvah Sendek matawnngaw a kamlum teh,  
 Sendek manu e a canaw teh kounng kâkapek awh.  
<sup>12</sup> Atu arulahoi kai koe lawk a pha teh,  
 ka hnâ ni arulahoi pouk e hah a thai.  
<sup>13</sup> Karoumcalah a i awh lahun navah,  
 karum vah vision hah pouk lahun navah,  
<sup>14</sup> Takinae hoi pâyawnae kai koe a pha.  
 Ka hrnaw pueng kounng kâhlehlawk sak e han,  
<sup>15</sup> Hottelah muitha teh,  
 ka hmalah a kâhlai teh,  
 ka muen rueng a thaw.  
<sup>16</sup> Hote muitha hah a kangdue teh, ka kamnuek e hah kapek thai hoeh.  
 Ka mithmu vah hno buet touh a kamnue, duem ao teh lawk hah ka  
 thai.  
<sup>17</sup> Ka dout thai e tami heh, Cathut hlak vah a lan thai maw,  
 tami heh kasakkung hlak vah a thoung thai na maw.  
<sup>18</sup> A sannaw patenghai kâuepkhai hoeh niteh, kalvantaminaw hai na  
 payon tet pouh pawiteh,  
<sup>19</sup> amhru im dawkh kho ka sak niteh, a kungpui teh,  
 vaiphu lah ao teh, ahnimanaw teh, khakbara ni patenghai a tâ thai e  
 hah  
 bangtelamaw hoe a yuem thai han.  
<sup>20</sup> Amon hoi tangmin totouh katipcalah a kâbawng teh,  
 apinihai tek laipalah a yungyoe a kahma awh.  
<sup>21</sup> Ahawi pounngae naw hai kounng takhoe lah ao teh,



lungangnae awm laipalah be a due awh telah atipouh.

## 5

- 1 Atu kaw haw, na ka pato hane ao awh han vaimoe.  
Kathounge tami, nâ lah maw na kamlang han.
- 2 Bangkongtetpawiteh, lungkhueknae ni tamipathu a thei teh,  
utsinnae ni kamawngrame a thei.
- 3 Tami ni khawngyang a pabo e hah ka hmu,  
hateiteh kho a saknae hmuen hah thoe tangka bo.
- 4 A capanaw teh, a hlout nahane awm hoeh,  
longkha koe a rawp awh vaiteh, a katin awh han.  
Ka rungngang hane awm hoeh.
- 5 Bangkongtetpawiteh, a von ka hlam e ni a a e cang hah be a ca pouh teh,  
pâk hingum e patenghai hnopainaw hah a lawp awh.
- 6 Bangkongtetpawiteh, khangnae teh talai dawkh hoi ka tho e nahoe.
- 7 Rucatnae hai talai dawkh hoi ka tho e na hoeh.
- 7 Hmaitali kahlun lah a luen e patetlah,  
tami teh rucat hane doeh a khe.
- 8 Hateiteh, kai niteh, Cathut ka tawng vaiteh,  
ka rucatnae teh Cathut e hmalah ka dei pouh han.
- 9 A bawilenna hoi dei thai hoeh e, touk thai hoeh e,  
kângairuna kasakthaie koe vah.
- 10 Talai dawkh kho a rak sak teh,  
law dawkh tui a lawng sak.
- 11 Kangduenna hmuen ka rahnoum e hah, a rasang sak teh,  
lung kamathoutnaw hah, roumnae hmuen dawkh a luen sak.
- 12 Huenghai kaawmnaw khokhangnae hah a kahma sak teh,  
a kut hoi a noe e naw koun a raphoe pouh.
- 13 Tami lungkaang huenghai kaawm e hah,  
a thouthainae ni a man awh teh, huenghai kaawm naw e khokhang-  
nae hah,  
amamouh dawkh tang a pha han.
- 14 Kanîthun angnae dawkh hmonae hoi a kâhmo awh teh,  
kanî tuengtalueng thun nah tangmin e patetlah thupthup a payam  
awh.
- 15 Hateiteh, tahloi hoi tami ka voutthoup e hah a rungngang teh,  
athakaawme taminaw e apâhni hoi a kut ni a rungngang awh.
- 16 Ka roedengnaw ni ngaihawinae a tawn awh teh,  
lanhoehnae ni a pahni a cakuep pouh.
- 17 Khenhaw! Cathut ni a toun e tami teh, tami a lung kahawi e doeh.  
Hatdawkvah Athakasaipounge ni phepnae teh, noutna laipalah awm  
hanh.
- 18 Bangkongtetpawiteh, ama ni a hem teh, a hmâ hah ama ni a kawm pouh.  
Ama ni a hmâ a ca sak teh, a kut hoi a dam sak.
- 19 Ama ni runae taruk touh dawkh hoi a tâco sak e dueng khout laipalah,  
sari touh thung dawkh hoi hai kahawihoehe ni tek awh mahoe.
- 20 Ama ni takang duenna thung hoi a ratang awh vaiteh,  
taran um e tahloi thaonna thung hoi a ratang awh han.
- 21 Lawkthoeumkha thung hoi hro lah na o vaiteh,  
rawkphainae a pha torei teh, na taket mahoe.
- 22 Rawkphainae hoi takangnae na panui sin vaiteh,  
talai e sarangnaw hah na taket mahoe.



- 23 Bangkongtetpawiteh, kahrawng e talungnaw hoi rei kambawng vaiteh,  
kahrawng e sarangmathengnaw hoi karoumcalah na o awh han.
- 24 Na onae rim daw k karoumcalah na o e hah na panue han.  
Na khosaknae hah na khet navah voutthoupnae banghai awm mahoe.
- 25 Na ca catoun moiapap hane hah a panue vaiteh,  
nage na miphunaw talai daw phovai patetlah ao e hah na hmu han.
- 26 Atueng pha toteh cabong taoung e patetlah na kumcue toteh,  
phueng koe na pha han.
- 27 Khenhaw! heteheh ka pakhingpalang awh teh, kalan e doeh ka tho.  
Thaihaw, nama hane doeh tie hah panuek, telah atipouh.

## 6

### *Job ni Eliphaz a pathung*

- 1 Job ni a pathung teh,
- 2 Oe, ka kangairunae heh, yawcu daw k khing haw pawiteh,  
ka khang e runae naw hai, yawcu khingnae daw phat naseh.
- 3 Bangkongtetpawiteh, palang teng e sadi hlak hai a ri han doeh.  
Hatdawkvah ka dei payon toe.
- 4 Bangkongtetpawiteh, Athakasaipoung e ni a ka e pala teh kai thung vah  
ao,  
ahnimae a sue hah ka muitha ni a nei.  
Cathut takinae hah ka hmalah a kamnue.
- 5 Kahrawng e la ni hram a papnae koe a hram boimaw,
- 6 Atuinae kaawm hoe e bu teh palawi laipalah ca thai han maw.  
Aduirakei ka pangaw e daw atuinae bangmaw kaawm.
- 7 Ka hringnae ni, a tek han a ngai hoe e,  
kai hanelah, panuettho e rawcanaw doeh.
- 8 Oe, kahei e heh ka hmawt haw pawiteh,  
Cathut ni ngai poung e na poe haw pawiteh.
- 9 Pahren lahoi Cathut ni vek na khei haw na seh,  
A kut na pho sin nateh vitkatip lah, na tátueng haw naseh,
- 10 Hottelah nakunghai, ka lungmawngnae ka tawn rah.  
Patawnae ni na tha hoe nakunghai ka lunghawi han rah.  
Bangkongtetpawiteh, tami kathounge lawk hah kâhrawk mahoe.
- 11 Bangpatete thaonae maw ka tawn teh, ka ngai haw han rah.  
Ka poutnae hah, banglamaw ao teh, ka hringnae ni a saw sak han rae  
te,
- 12 Ka thaonae heh lungsong thaonae lah maw ao.  
Ka takthai he rahum lah maw a tho.
- 13 Ka thung vah kabawmkung awmhoeh namaw,  
ka kuepcingnae naw pueng kai koehoi be kampuen toung na-  
hoehmaw.
- 14 Bangpueng katetthai takinae a ceitakhai nakunghai,  
patawnae ka khang e koe vah, a hui koehoi a lungmanae kamnue sak  
hane doeh.
- 15 Ka hmaunawnganaw teh palang tui patetlah yuengyoe kampuen e  
doeh,  
dawngdengca daw kahmat e palang tui patetlah ao awh.
- 16 Tui a kamkak e kecu dawkvah a tamang teh,  
a thungvah ka kâhrawk e tadamtui patetlah ao.



- 17 Abet toreì teh, be kahma awh teh,  
a kâan toreì teh amamae hmuen koehoi kahmakata awh.
- 18 Amamae a lamthung dawkh oi a kamlang awh teh,  
nâ lahai cet laipalah kahmakata awh.
- 19 Teman miphun kahlawng kacetnaw ni a khet awh teh,  
Sheba kahlawng kacetnaw ni a ngaihawì awh.
- 20 A ngâhawì awh dawkvah, a lungpout awh.  
Hawvah a pha awh toreì teh, a kaya awh.
- 21 Bangkongtetpawiteh, atuvah banglahai na tho awh hoehtoe.  
Takikatho e na hmu awh teh, na lung a puen awh.
- 22 Na poe awh haw, telah ka dei boimaw, hoehtoe pawiteh,  
na hnopainaw dawkh oi, kai na ratang nahanelah poe awh ka ti  
boimaw,
- 23 Hoehtoe pawiteh, ka tarannaw e kut dawkh oi na rungngang awh haw, ka  
ti boimaw,  
hoehtoe pawiteh, kai ka hnephnap e koehoi na ratang awh ka ti boimaw.
- 24 Na cangkhai awh haw, duem ka o han,  
lawkkalan hah na panuek sak awh.
- 25 Lannae teh, banghloimaw a tha ao.  
Hateiteh, na lawknaw ni bangmaw a kamceng sak.
- 26 Lawk ka dei e naw heh yonpen hane maw na ngai awh.  
Ngaihawinae ka tawn hoehtoe e tami ni a dei e lawk teh, kahli patetlah  
doehtoe.
- 27 Nangmouh niteh, naranaw hah na ka pacekpahlek awh,  
na huinaw hanelah tangkom na tai pouh awh.
- 28 Hatdawkvah, pahren lahoi khi awh haw,  
bangkongtetpawiteh, nangmae hmalah ka lai kathout mahoehtoe.
- 29 Ban awh nateh, lanhoehtoe hah awm sak awh hanh,  
atu totouh ka kangdout e ka lannae heh tawm awh.
- 30 Ka lai dawkh lanhoehtoe ao maw,  
katui hoi katui hoehtoe e na kapekkaboe thai awh hoehtoe maw.

## 7

- 1 Talaivan dawkvah tami hanelah thaw ka ru e thaw a onae tueng ouk ao  
nahoehtoe maw,  
a hninnaw hai kutkapânaw e hnin patetlah awm hoehtoe namaw.
- 2 Tâhlip dik ka doun e san patetlah,  
kutkapânaw ni kutphu hmu han a ngai hawì e patetlah.
- 3 Bang hoehtoe e dawkh thapa moikapap lah ka hno teh,  
khohmo runae naw hah kai hanelah ao toe.
- 4 Ka i na koehoi, nâtuék maw ka thaw han.  
Karum heh baw nah lawiseh ka ti.  
Bangkongtetpawiteh, khodai totouh kamhmei kamlang hoi ka o.
- 5 Ka takthai teh, pâri hoi songnawng ni muen na kayo teh,  
ka vuen hai cupei teh koun a kâhnoum.
- 6 Ka hninnaw teh, hnikawngnae yawngyen hlak hai a rang teh,  
ngaihawinae awm laipalah a loum.
- 7 Ka hringnae teh kahli doehtoe tie hah pahnim hanh,  
ka mit ni ahawinae bout hmawt mahoehtoe toe.
- 8 Na kahmawtnaw e mit ni bout na hmawt mahoehtoe toe.  
Na mit ka tak dawkh a um navah, kaawm mahoehtoe toe.
- 9 Tâmai kâhin teh, a kahma e patetlah,



- duenae tangkom thung ka cet e ni bout ban mahoe h toe.
- <sup>10</sup> A im vah bout ban hoe h vaite h,  
a onae hmuen ni ama teh panuek mahoe h toe.
- <sup>11</sup> Hatdawkvah ka pahni ka caku ep mahoe h.  
Ka mui tha rek na lai hoi ka dei vaite h,  
kakhat e ka hringnae hoi lai ka roe han.
- <sup>12</sup> Kai teh, tali lah maw ka tho.  
Nahoe h pawite h, tali daw k e khorui lah maw ka tho teh,  
na karingkung hah na ta pou h.
- <sup>13</sup> Ka ikhun ni ka ngai a mawng sak han.  
Ka yanna e ikhun ni ka phuenangnae a roum sak han telah ka ti navah,
- <sup>14</sup> Tangmin mang laho i na pakhi teh,  
kamnuenae laho i kai na kalue sak.
- <sup>15</sup> Ka hringnae ni ka lahuen a kara hoi duenae hah,  
ka takthai ni a ngaihnawn.
- <sup>16</sup> Ka hringnae he ka hnueai teh, yungyoe ka hring mahoe h.  
Kama dueng na awm sak awh.  
Bangkongtetpawite h, ka hringnae teh a kahû lah doe h ao.
- <sup>17</sup> Tami he banglamaw ao teh, hettelah na tawmrasang teh,  
a lathueng vah na lungthin pou na ta.
- <sup>18</sup> Amon tangkuem na tho sin teh,  
nâtu e k e atueng daw k hai pou na tanouk.
- <sup>19</sup> Nâtu e k hai na kamlang takhai laipalah, pou na khet vaite h,  
ka tamtui ka padoun nahai ka madueng na tat hoe h.
- <sup>20</sup> Yonnae ka tawn maw,  
oe taminaw ka ring e,  
nang lathueng vah bangmaw ka sak.  
Bangdawkmaw na hmaitung vah telah na o sak teh,  
kama hoi kama hnori lah na o sak.
- <sup>21</sup> Bangdawkmaw na kâ ka eknae hah na ngaithoum laipalah,  
ka payonpakainae hah na lat pou h hoe h.  
Bangkongtetpawite h, vaiphu daw k ka i vaite h,  
nama ni kai na tawng han, hatei kaawm mahoe h toe atipou h.

## 8

### *Bildad ni lawk a dei*

- <sup>1</sup> Shuhi tami Bildad ni a pathung teh,
- <sup>2</sup> Nâsittou h maw he e hnonaw he h dei han,  
na pahni daw k hoi ka tâcaw t e lawk hah athakaawme kahlî patetlah  
ao han.
- <sup>3</sup> Cathut ni kalan hoe h lah lawk a ceng boimaw,  
nahoe h pawite h, Athakasaipounge ni, lanna e a kamlang takhai  
boimaw.
- <sup>4</sup> Na capanaw ni ama taranlahoi yon awh pawite h,  
kâtapoenae kecu daw k a tâkhawng han.
- <sup>5</sup> Cathut hah atangcalah hoi, na tawng teh,  
Athakasaipounge koe vah, kâheinae na sak pawite h,
- <sup>6</sup> Tamikathoung tamikalan lah na awm pawite h,  
nang hanelah atu roeroe thaw vaite h,  
lanae hmuen koe hawinae na coe sak han.
- <sup>7</sup> Na kamtawngnae a thoung nakunghai,



na poutnae a len katang han.

- <sup>8</sup> Bangkongtetpawiteh, pahrennae hoi a yan e hnonaw hah pakhingpalang haw,  
na mintoenaw ni a hmu e hnonaw hah pouk haw.
- <sup>9</sup> Bangkongtetpawiteh, paduem e tami la o awh teh,  
banghai panuek awh hoe. Bangdawk tetpawiteh, talai van e hnin tha  
naw teh,  
tâhlip patetlah doeh ao.
- <sup>10</sup> Ahnimae lungthin thung hoi ka tâcawt e lawknaw ni, na dei pouh awh  
teh,  
na cangkhai hoe namaw.
- <sup>11</sup> Tuinawk laipalah lungpum a rountg thai han namaw.  
Tui laipalah capi teh a rountg thai han namaw.
- <sup>12</sup> A hring nah tâtueng hoe nakunghai,  
alouke akungnaw hlak palang a kamyai.
- <sup>13</sup> Cathut kapahnimnaw e a lamthung teh, hot patetlah ao.  
Tami kahawihoe hnaw e ngaihawinae teh a kahma han.
- <sup>14</sup> A kâuepkhai awh e teh, tâkhawng pouh lah ao han,  
a kâuepkhainae teh, Bombarui patetlah doeh ao.
- <sup>15</sup> A im dawk a kamngawi ei kangdout thai hoe.  
Kacakcalah a kuet ei pou cak thai ma hoe.
- <sup>16</sup> Khobetnae koe dikkahringcala a rountg teh,  
a kangnaw ni takha kountg tahloi awh.
- <sup>17</sup> A tangpha ni talung khakdeng teh,  
talung um vah a tangpha a payang nahane a tawng.
- <sup>18</sup> Amae hmuen koehoi phawk lah ao torei teh,  
pou kakak mahoe, telah a kâpahnawt han.
- <sup>19</sup> Khenhaw! het hateh, lunghawinae lamthung lah a o,  
talai dawk hoi aloukenaw hah a pâw han.
- <sup>20</sup> Khenhaw! Cathut ni toun han kaawm hoe e na tâkhawng hoe vaiteh,  
thoe ka sak e teh kangdout sak mahoe.
- <sup>21</sup> Na kâko teh panuinae hoi akawi sak vaiteh,  
na pahni hai lunghawinae lawk hoi akawi sak han.
- <sup>22</sup> Nang kahmuhanaw hah yeirapo sak vaiteh,  
tamikathoutnaw e rim teh awm mahoe toe telah a ti.

## 9

### *Job ni Bildad a pathung*

- <sup>1</sup> Job ni bout a pathung teh,
- <sup>2</sup> Hetheh doeh tie hah atangcalah ka panue,  
hateiteh, Cathut e hmalah bangtelamaw tami teh a lan thai han.
- <sup>3</sup> Ama oun han ka ngai e awm pawiteh,  
avai 1,000 touh dawkvah vai touh boehai pathung thai mahoe.
- <sup>4</sup> Cathut teh, lungkaang poung e, athakaawme thayung lah ao.  
Ama taranlahoi lung ka patak sak e,  
a lam ka cawn e apimaw kaawm boi.
- <sup>5</sup> Monnaw hah a puen teh, a lungkhueknae hoi  
a pathung torei teh, panuek awh hoe.
- <sup>6</sup> Talai a onae hmuen koehoi a kâhuet teh,  
a khomnaw hah kountg a kâhuet sak.



- 7 Kanî hah kê a poe teh, tâcawt hoeh.  
Âsi angnae hah muen a ramuk.
- 8 Ama dueng lahoi kalvan hah a ramuk teh, tuipui tuicapa van a cei.
- 9 Ama ni Latum, Kangduetaphai, Baritca,  
hoi akalae âsinaw hah a sak.
- 10 Be panue thai hoeh e hnokalen e hai,  
tokk thai hoeh e kângairu hnonaw hah a sak.
- 11 Ka teng vah a cei ei ama teh, ka hmawt hoeh.  
Na ceihlawi e hai ka panuek hoeh.
- 12 Ama ni lat pawiteh, apinimaw a haw pouh thai han.  
Apinimaw bangmaw na sak, atipouh thai han.
- 13 A lungkhueknae dawh hoi, Cathut ni kamlang takhai mahoe toe.  
A khok rahim vah tami kâoup e kabawmnaw teh a tabut awh.
- 14 Kai ni ama teh bangtelamaw, ka pathung thai han.  
Ama oun nahanelah, bangpatet e lawk maw kêrawi han
- 15 Bangtelah kalan nakunghai, ama teh ka pathung thai mahoe.  
Kai lawkcengkung koe pahrennae doeh ka hei hnawn han.
- 16 Ka kaw pawiteh, ama ni na pato han.  
Ama ni ka lawk na thai pouh hane ka yuem hoeh.
- 17 Bangkongtetpawiteh, kahlî kathout ni na hmang teh,  
a khuekhaw awm laipalah ka hmânaw hah a kampai sak.
- 18 Ka kêha thai laipalah, reithai hoi na kawi sak.
- 19 A thasainae dawkvah ama teh, athakaawme lah ao.  
A lannae, kong dawh tetpawiteh,  
lawkcengnae dawh apinimaw ka hnin hah a khoe thai han.
- 20 Ka kuep nakunghai, ka pahni ni yon na pen han,  
tanouk hanelah kaawm hoeh nakunghai, ka lanhoe hah a  
kamnue sak han.
- 21 Toun hoeh nahanlah ka o.  
Hateiteh, ka kâpanuek hoeh, ka hringnae heh ka hnueai toe.
- 22 Be kâvan doeh.  
Hat dawh nahoe haw, tamikathoutnaw hoi toun han kaawm hoeh e  
hoi,  
be raphoe han telah ka dei vaw.
- 23 Hemnae ni vai touh hoi thet boipawiteh,  
kayonhoehe khangnae teh, a panuikhai han.
- 24 Talai heh tamikathout e kut dawh poe lah ao teh,  
a lawkcengkungnaw e minhmai a ramuk.  
Ahi hoeh pawiteh, api han na maw.
- 25 Ka hninnaw hateh, ka yawng e hlak hai hoe a rang,  
a kamlang awh teh, hawinae hmawt awh hoeh.
- 26 Karang poung e lawng patetlah a khup teh,  
Mataw ni moithang a ka cawp e patetlah a rang.
- 27 Ka phuenangnae ka pahnim vaiteh,  
ka lungmathoenae minhmai he ka ta vaiteh,  
minhmai kapancala ka o han ka ti navah,
- 28 Ka khangnae naw pueng heh, makkhak ka taki teh,  
tamikayon hoeh e lah na pouk hoeh langvaih tie hah ka panue.
- 29 Yon pen e lah kaawm pawiteh,  
bangdawkmaw ahrawnghrang e meng ka tawh han.
- 30 Tadamtui hoi ka kamhluk nakunghai,



- ka kut heh sapet hoi ka kamsin nakunghai,  
<sup>31</sup> tangdong dawk na tâkhawng teh,  
 ka khohna ni patenghai na panuet han doeh.  
<sup>32</sup> Bangkongtetpawiteh, lawkcengnae koe rei cet vaiteh,  
 ama teh ka pathung thai nahanelah, ama teh tami lah tho hoeh.  
<sup>33</sup> Maimouh roi e van kut ka toung hanelah,  
 maimae rahak laicei awm hoeh.  
<sup>34</sup> Kai koe e sonron lat naseh  
 taki a thonae ni na taket sak hanh seh.  
<sup>35</sup> Hatdawkvah ama taket laipalah lawk hah ka dei han.  
 Hateiteh, kai koevah hottelah bout awm kalawn hoeh.

## 10

- <sup>1</sup> Kamae ka hringnae ka panuet.  
 Ka phuenangnae ka pâpho ngala han.  
 Ka hringnae a rek hoi lawk ka dei han.  
<sup>2</sup> Cathut koe yon na pen hanh, bangdawkmaw na taran,  
 na hmawt sak haw, telah ka ti han.  
<sup>3</sup> Tami repcounroe lahoi na kutsak tami hah dudam teh,  
 tamikathoutnaw khokhang e hnâbokhaie heh, ahawi telah na pouk  
 maw.  
<sup>4</sup> Takthai e mit maw na tawn,  
 tami ni a hmu e patetlah maw na hmu van maw.  
<sup>5</sup> Namae hninnaw hai tami e hnin patetlah maw ao.  
 Namae kumnaw teh, tami e hnin patetlah maw ao.  
<sup>6</sup> tamikathout lah ka ohoehnae hah na panue eiteh,  
 na kut dawk hoi ka rungngang thai e awm hoeh tie hah na panue  
 nahlangva,  
<sup>7</sup> Ka payonpakai e naw hah na tawng teh,  
 ka yonnae hah na pâphue.  
<sup>8</sup> Namae na kut hoi na sak teh,  
 ka kuepcingcalah na pathoup.  
 Hateiteh, namae kut ni bout na raphoe.  
<sup>9</sup> Nama ni talai e na sak tie hah na pahnim hoeh nahan ka kâhei,  
 vaiphu lah maw bout na coung sak han.  
<sup>10</sup> Nama ni sanutui patetlah na rabawk teh,  
 sanutui kamkak patetlah na pahlawm nahoehmaw.  
<sup>11</sup> Nama ni ka vuen hoi takthai na ramuk.  
 Ka hru hoi ka tharui hoi na caksak nahoehmaw.  
<sup>12</sup> Nama ni ka hringnae hoi pahrennae na poe teh,  
 na khetyawtnae ni ka muitha teh a lungmawng sak.  
<sup>13</sup> Hete hnonaw heh na lungthin thung vah na hro teh,  
 namae thung vah ao tie hah ka panue.  
<sup>14</sup> Ka yon pawiteh nama ni na panue han.  
 Ka payonpakai e dawk hoi na hlout sak hoeh.  
<sup>15</sup> Tamikathout lah kaawm pawiteh, yawthoe lah ka o han,  
 tamikalan lah ka o nakunghai, minhmai kahawi kahmawt thai  
 mahoe.  
 Kayayeirai hoi runae hoi kakawi e la ka o.  
<sup>16</sup> Ka kâoup pawiteh, ka matheng e Sendek patetlah,  
 hmâ na ca sak. Kai taranlahoi takikathopounge bout na kamnue sak.  
<sup>17</sup> Kai na ka taran hane ka panuekkhaie patuen patuen na tha teh,



- kai dawk na lungkuephoehtae na pung sak.  
 Dmyennae hoi tarantuknae hah, kai koe pou ao.
- 18 Bangdawkmaw camo im dawk hoi na tâcosak.  
 Oe apinihai na hmawt laipalah kadout boi pawiteh;
- 19 Kaawmhoeh patetlah ka o han ei,  
 Camo im thung hoi phuen lah ceikhai lah ka o han ei.
- 20 Ka hninnaw heh, ka younca e nahoehtaw.  
 Ka cei vaiteh bout ka ban thai hoeh nahanlah,  
 duenae tâhlip hoi hmonae ram dawk ka cei hoehtahlan vah.
- 21 Lungmawngnae dawngdeng hai ka hmu nahanelah,  
 ka kâhat pawiteh, ka mahmawk na awm sak awh.
- 22 Ama lungpouk ka hmawt e, kingkhamawt e ram,  
 duenae tâhlip patetlah, banghai ka awmhoeh e,  
 angnae hai hmonae patetlah a onae hmuen koe, telah ati.

## 11

### *Zophar ni lawk a dei*

- 1 Naamath tami Zophar ni a pathung e teh,
- 2 Hettelae lawk kapap e heh pathung laipalah ao thai han namaw,  
 Lawk moikapap ka dei e pueng ni maw kayonhoehe la o awh han.
- 3 Na dei e lawk hrawngthang ni, tami a roum sak thai han namaw,  
 Tami na panuikhai nah buet touh ni hai yue mahoehtaw.
- 4 Bangkongtetpawiteh, ka yuemnae teh a thung.  
 Na mithmu vah kathoung telah na ti.
- 5 Hateiteh, oe Cathut ni na dei pouh seh,  
 nang kâtaran lahoi pahni ang naseh.
- 6 Ama ni lungangnae arulawk hah na hmu sak yawkaw han,  
 bangkongtetpawiteh, na lungangnae alet hni touh apap.  
 Hatdawkvah na payonpakai e dawk hoi kayounhnawn lah Cathut ni  
 a sak tie panuek.
- 7 Kadungpoung e Cathut e hno hah na pakhingpalang thai na maw,  
 Athakasaipoung counghae hah  
 na tawng teh koung na hmuthai maw.
- 8 Kalvan hlak hai a rasang teh, nang ni bangmaw na sak thai,  
 Phuennaw hlak hai hoe adung teh, nang ni bangmaw na panue.
- 9 A bangnuehtaw teh, talai hlak hai asaw.  
 Tuipei hlak hai hoe akaw.
- 10 A man teh thongim dawk paung hoi lawkceng hanelah pâkhueng  
 pawiteh,  
 apinimaw ahni teh a rungngang thai han.
- 11 Bangkongtetpawiteh, huenghai ao a e hah a panue,  
 thoe sak e hai a hmu.  
 Ama ni pouk laipalah maw ao han.
- 12 Bangkongtetpawiteh, kahrawng e laca patetlah tami a khe toreih teh,  
 tamipathu teh a lungang han.
- 13 Na lungthin hah kâakueng nateh  
 Cathut koe na kut dâw haw.
- 14 Na kut dawk na payonpakai e awm boipawiteh, ahlanae koe tâkhueng  
 haw.  
 Kathoute hah na im dawk awm hanh seh.



- 15 Hottelah tounnae awm laipalah, na minhmai hah a kamnue han doeh.  
Kacakcalah na o vaiteh, na taket mahoe.
- 16 Bangkongtetpawiteh, na rucatnae hah na pahnim vaiteh,  
poun ka lawng e tui patetlah pahnim hanh.
- 17 Na hringnae teh kanithun e hlak hai hoe a ang han,  
a hmonae hah amom patetlah ao han.
- 18 Karoumcalah na o han,  
bangkongtetpawiteh, ngaihawinae ao.  
Na tengpam e hno na sung nakunghai karoumcalah na kâhat han.
- 19 Na i vaiteh, apinihai tâsuenae na poe mahoe,  
tami moikapap ni nang koe a kâhei awh han.
- 20 Hateiteh, tamikathoutnaw e mit teh, dawn vaiteh,  
hlout awh mahoe.  
A ngaihawi awh e hringnae teh a sung awh han telah a ti.

## 12

### *Job ni Zophar a pathung*

- 1 Job ni a pathung teh,
- 2 Lunghringnae awm laipalah  
nangmanaw nahoehmaw tami lungkaangnaw lah na kaawm awh heh,  
namamouh hoi lungangnae teh rei a due han.
- 3 Hateiteh, nangmouh patetlah panuethainae ka tawn van.  
Nangmouh hlak vah hoe ka rahnoum hoe.  
Het patet e hno panue hoe e apimaw kaawm.
- 4 Kai teh, huikonaw ni panuikhaie lah ka o teh,  
Cathut a kaw teh, ama ni a pathung e kai heh,  
tamikalan, toun han awmhoeh,  
a panuikhaie kâhmo e lah ka o.
- 5 Kanawmcalah kaawmnaw e khopouknae dawkvah,  
yawthoenae heh panuikhainae lah ao teh,  
a kamthui nahanlah coungkacoe paloung pouh e lah ao.
- 6 Dingcanaw e rim law teh a hmacawn teh,  
Cathut lungkhueksakkungnaw law teh a room awh.  
Bangkongtetpawiteh Cathut ni a kut hoi a kawkhik.
- 7 Hateiteh, atu moithangnaw koe pacei nateh, na cangkhai awh han doeh.  
Kalvan e kamleng e tavanaw hai pacei haw, na dei pouh han doeh.
- 8 Hoeh pawiteh, talai koe vah dei pouh haw, na cangkhai han doeh,  
Tali daw koe tanganaw ni nangmouh teh  
kamcengcalah na panue sak han doeh.
- 9 Hete hnonaw daw BAWIPA ni a sak tie hah,  
ka panuek hoe e nangmouh thung daw apimaw kaawm.
- 10 A kut daw hringnae katawnnaw puenghoi,  
tami pueng e kâhane ao.
- 11 Kâko ni rawca a patek e patetlah  
hnâ ni lawk hah a tanouk nahoehmaw.
- 12 Kacuenaw koe lungangnae ao teh,  
a kumcue toreih teh, panuethainae ao.
- 13 Ahni koe lungangnae hoi thaonae ao.  
Ahni ni khokhangnae hoi panuethainae a tawn.
- 14 Hno heh raphoe hnukkhu hoi teh, bout sak thai hoe toe,  
tami khak paung hoi teh tâco thai nahan a ru toe.



- 15 Tui hah pahak hoi teh a ke toe,  
 tui bout tha toreï teh talai dawk bout a kamuem.  
 16 Ama koe thasainae hoi rounnae a onae hoi  
 ka payonsakkung teh amae doeh.  
 17 Khokhangkungnaw hah be kahma lah a ceikhai teh,  
 lawkcengkung hah be a pathu sak.  
 18 Siangpahrangnaw kateknae hah a rathap pouh teh,  
 a kengnaw dawk taisawm a kâyeng sak awh.  
 19 Bawinaw hah takcaici lah a hrawi teh,  
 athakaawme taminaw hah a rawp sak.  
 20 A kâuepkhai awh e lawknaw hah a hnoun pouh teh,  
 kacuenaw e panuethainae hah a takhoe pouh awh.  
 21 Bawinaw lathueng vah dudamnae a rabawk teh,  
 tami tha kaawm naw hah kutcaici lah ao sak.  
 22 Hmonae thung hoi kadung pounge e hno kounge a kamnue sak,  
 Duenae tâhlip hah angnae dawk a tâcokhai,  
 23 Miphunnaw hah a len sak teh bout a raphoe.  
 Miphunnaw hah a kâthap sak teh bout a hrawi.  
 24 Talai e tamihu kahrawinaw hah panuethainae naw a kahma sak teh,  
 kahrawngum lamthung a ohoehnae koe a kâva sak.  
 25 Angnae awm laipalah hmonae thung thupthup a payam awh,  
 ka parui e tami patetlah rawraw a cu sak.

### 13

- 1 Khenhaw! he e hnounaw pueng heh, ka mit hoi ka hmu.  
 Ka hnâ ni a thai teh a thaipanuek.  
 2 Nangmouh ni na panue e teh, kai ni hai ka panue van.  
 Nangmouh hlak hoe ka rahnoum hoeh.  
 3 Hateiteh, Athakasaipounge koevah, ka dei haw nei,  
 Cathut hoi rei pouk hanelah ka ngai pounge.  
 4 Hateiteh, nangmouh teh  
 laithoe ka dei e lah na o awh.  
 5 Duem awm awh haw, hottelah pawiteh,  
 na lungangnae la ao han ei.  
 6 Ka pouknae heh thai awh haw,  
 ka pahni dawk hoi ka tâcawt e kâheinae heh alawkpui lah pouk awh.  
 7 Cathut hanelah kahawihoe pounge lah a dei awh han maw,  
 Ahni hanelah laithoe na dei awh han maw.  
 8 Ahni hanelah kapeknae na tawn awh na maw,  
 Cathut teh na oun awh han maw  
 9 Ama ni nangmanaw hah rek na toun awh pawiteh, ahawi han namaw.  
 Tami a panuikhaie patetlah ama hah na panuikhai han namaw.  
 10 Arulahoï kapeknae na tawn awh pawiteh,  
 ama ni na yue awh roeroe han doeh.  
 11 Ahawinae ni na lungpuen sak awh mahoe haw.  
 Taki thonae hah nangmouh dawkvah bawt mahoe haw  
 12 Namamae cingthuinae lawk hah,  
 hraba cingthuinae lawk doeh.  
 Na kângainaie khorapan hai tangpung hoi pacawp rumram e la doeh  
 ao.  
 13 Duem awm awh haw, lawk na dei sak haw.



- Ka tak dawk banghai phat na yawkaw seh.
- 14 Bangdawkmaw ka tak hah ka hâ hoi ka kei vaiteh,  
ka hringnae hah ka kut dawk ka ta han.
- 15 Na ka thet nakunghai ama teh kâuepkhai han doeh.  
Hottelah nakunghai a hmalah yonthanae lawk bout ka dei han.
- 16 Ama teh kaie rungngangnae lah ao han.  
Bangkongtetpawiteh, tamitongthoenaw teh a hmalah tho thai mahoe.
- 17 Ka dei e heh kahawicalah thai awh haw,  
ka pâpho e heh na hnâ dawk kâen sak.
- 18 Khenhaw! ka dei e kong dawkvah yo ka pouk e doeh toe,  
yon na ngaithoum han tie hah ka panue.
- 19 Apimaw na ka oun hane kaawm.  
Awm boipawiteh, duem ka o vaiteh, ka due yawkaw han.
- 20 Kai dawk hno kahni touh dueng heh sak hanh yawkaw,  
hottelah pawiteh nang koehoi kâhrawk mahoe.
- 21 Kai koehoi na kut hah ahla poungnae koe kampuen sak,  
taki na thonae e ni ka lungpuen sak hanh naseh.
- 22 Hottelah pawiteh na kaw nah na pathung han.  
Hoeh pawiteh lawk na dei sak haw, nama ni na pathung.
- 23 Ka payonpakai e hoi ka yonnae hah nâyittouh maw apap vai,  
kâtapoenae hoi ka yonnae hah na panuek sak haw.
- 24 Bangdawkmaw na minhmai na hro teh, na taran lah na pouk.
- 25 Kahlî ni a palek e lengle teh, na pâlei han na maw,  
Cakong hah na pâlei han namaw
- 26 Bangkongtetpawiteh, kakhat e hno hah,  
kai na taranlahoi na thut teh,  
ka nawca nah payonpakai e naw hah na phu sak.
- 27 Ka khok hlong na buet teh,  
ka lamthung pueng hah kahnaicalah na khet.  
Ka khoksampha hanelah rui khoup na payang.
- 28 Tami teh kahmawn e hno patetlah atum teh,  
khakbara ni a ca e hnicu patetlah doeh ao.

## 14

- 1 Napui ni a khe e tami teh,  
a hring kaduem ni teh runae hoi kakawi e doeh.
- 2 A pei patetlah a kamdat teh bout a kamyai.  
Tâhlip patetlah a kampuen teh, bout awm hoeh toe.
- 3 Hot patetlah dawkvah, na mit na padai teh,  
lawkcengnae dawk nama koe na ceikhai han na maw.
- 4 Apinimaw kathounghoehe dawk hoi,  
na thounge e a la thai han,  
apinihai lat thai mahoe.
- 5 A hninnaw hah atueng khoe hnukkhu hoi,  
thapa nâyittouh maw tie hah na kut dawk ao.  
A tapuet thai hoeh nahanelah khori hoi a ngang pouh.
- 6 Kut ka pâ e tami patetlah a hninnaw aloum totouh,  
a kâhat thai nahanelah ahni teh kamlang takhai haw.
- 7 Bangkongtetpawiteh, thing teh tâtueng nakunghai  
bout a bawt hane letlang hngaihawinae ao rah.  
A cakang bout a bawt han.



- 8 Talai dawk a khawngyang kahmawn nakunghai  
kadout nakunghai.
- 9 Tui kahû dawk bout bawt vaiteh,  
ung e patetlah a cakang a tâco han doeh.
- 10 Hateiteh, tami teh a due hoi pakawp teh a kahma toe,  
tami teh a kâha a baw teh namaw ao.
- 11 Tali dawk e tui a kahma teh,  
tuipui hai a hak teh be a ke.
- 12 Hot patetlah tami hai a yan teh thaw hoeh toe.  
Kalvannaw ao hoeh totouh hai kâhlaw hoe toe.  
Hoeh pawiteh, muet a inae koehoi kâhlaw mahoehtoe.
- 13 Oe phuen koe na hrawk sak haw,  
na lungkhueknae a roum hoeh roukrak  
na hrawk haw, atueng hah na pouk pouh nateh,  
na pahnim hanh.
- 14 Ka kâthungnae atueng a pha totouh,  
tami dout pawiteh, bout a hring han namaw  
Ka ru e ka thawnaw dawkt hoi ka ring han.
- 15 Na kaw vaiteh, na pato han.  
Nama ni na kut hoi na sak e teh na pahren han.
- 16 Bangkongtetpawiteh, ka khokhnuknaw pueng be na touk.  
Hateiteh, ka yonnae naw hah na khen pouh hanh.
- 17 Kâtapoenae hah, yawngya thung khakkin e naw lah ao teh,  
ka payonpakai e hah na ramuk.
- 18 Hateiteh, mon katim e patetlah,  
talung teh a onae hmuen koehoi puen e patetlah,
- 19 tui ni talung pekpacin e patetlah,  
tuikalen ni talai kahawi a ceikhai e patetlah,  
tami e ngaihawi e hah na raphoe.
- 20 Ama teh poe na tâ teh, be a kahma awh.  
A mei na kâthungsak teh, alouklah na cei sak.
- 21 A capanaw a tawmrasang e hah panuek awh hoeh.  
Ahnimouh pabo lah o awh e hai kâhmawt thai hoeh.
- 22 Hateiteh, a takthai hah patawnae dawkt ao vaiteh,  
a hringnae ni ama a khui han telah a ti.

## 15

### *Eliphaz ni Job yon a pen*

- 1 Hahoi Teman tami Eliphaz ni a pathung. <sup>2</sup> Hat navah,  
Tami a lungkaang ni ahrawnghrang panuenae hoi maw a pathung han.  
Kanitholae kahlî hoi a von a paha sak han namaw.
- 3 Bang patopatang kaawm hoeh e lawk hno lahoi thoseh,  
hawinae ka sak thai hoeh e lawk ni a poukkhai han maw.
- 4 Cathut takinae hoi ama koe ratoum e hah na ngang pouh.
- 5 Bangkongtetpawiteh, na payonpakainae ni,  
na pahni hah a cangkhai teh, huenghai onae lawk hah na kârawi.
- 6 Kai ni nang yon na pen hoeh.  
Na pahni roeroe ni doeh yon na pen.
- 7 Hmaloe poungh khe e lah maw na o,  
hoeh pawiteh monnaw ao hoehnahlan vah sak e lah na o toungh maw.



- 8 Cathut e khokhangnae hah na panue tounge maw,  
Lungangnae he nang hane dueng lah maw ao.
- 9 Kaimouh ni ka panue hoeh e bangmaw na panue,  
kaimouh dawk kaawm hoeh e bangmaw na panue thai.
- 10 Kaimouh thung dawkvah sampo ka po e hoi kacuepoung e,  
na pa hlak hai kacuehnawn e ka o awh kaima.
- 11 Cathut ni a dei e lungmawngnae lawk kanem teh  
nang hanlah a patawpoung maw
- 12 Bang kecu dawk maw, na lungthin ni na kahmakhai,  
bang kecu dawk maw avangvanglah pou na hmaiet.
- 13 Na muitha ni Cathut taranlahoi pou a kamlang teh,  
hot patet e lawknaw na pahni dawk hoi na tâco sak.
- 14 Tami teh banglamaw ao teh, a thounge thai han.  
Napui ni a khe e teh, banglamaw ao teh, a lan thai han.
- 15 A tamikathounnaw patenghai,  
Cathut ni kâuepkhai hoeh.  
A mithmu vah kalvan patenghai thounghoeh pawiteh,
- 16 Panuet ka tho e, kakhin e, payonpakainae hah,  
tui patetlah ka net e teh, banghloimaw hoe kathounghoehe la ao han.
- 17 Thaihaw, ka dei vai,  
ka hmu e hah ka pâpho han.
- 18 Tami a lungkaangnaw ni ouk a dei e  
mintoe koehoi e hmu e hno a hro awh hoeh e hah.
- 19 Ahnimouh dueng a poe e ram,  
ram alouknaw a othaihoenae hah.
- 20 Tamikathoutnaw ni a hring na thung patawnae a khang.  
Amamouh kum yit touh rep kacuengroenaw koe a hro.
- 21 Takitho e pawlawk hah amamae hnâ ni a thai teh,  
hnopai a tawn nah, ka raphoe hane naw ni a thosin awh.
- 22 Hmonae thung hoi kamlang hane hah yuem hoeh.  
Bangkongtetpawiteh, ahni teh tahloi ni a ring toe.
- 23 Ca hane tawng hanelah a kâva teh,  
nâmaw hote teh ao telah a ti.  
Hmonae hnin teh a kut dawk a pha toe tie hah a panue.
- 24 Rucatnae hoi kângairunae ni a lungpuen sak,  
tarantuk hanelah coungkacoe kaawm e siangpahrang patetlah tâ e la  
ao.
- 25 Bangkongtetpawiteh, Cathut taranlahoi a kut a dâw teh,  
Athakasaipounge taranlahoi kâoupnae hoi a kâroe.
- 26 Bahling katha poung e hoi, lung ka patak poung e lahoi  
Cathut tuk hanelah a yawng sin.
- 27 Athaw ni a minhmai muen a ramuk teh,  
a keng thouk kathâw nakunghai,
- 28 kingkadi e khopui dawk kho a sak teh,  
apinihai a ohoehtae, kingdi e kho dawk ao.
- 29 Tawnta mahoeht, hoeh pawiteh, a tawnta e hnopainaw kangning  
mahoeht,  
hoeh pawiteh a tawn e hah talai dawk pungdaw mahoeht.
- 30 Hmonae thung hoi tâcawt mahoeht.  
Hmaipalai ni a kangnaw hah a kak han,  
a pahni dawk e kahlî hoi be a kahma sak han.



- 31 Amahoima a kâdum teh, bang hoeh e hah kâuep han seh,  
bangkongtetpawiteh, a tawkpheu teh banghai bang nahoe.
- 32 Atueng akuiep hoehnahlan vah, kuep sak lah ao awh vaiteh,  
akangnaw hah naw mahoe toe.
- 33 Misurkangnaw patetlah ka hmin hoeh rae a paw a sarut totouh kahû en  
vai teh,  
Olive thing patetlah a pei hah kouna a sarut han.
- 34 Bangkongtetpawiteh, tamikathoutnaw hoi kamyawng e teh,  
caici lah ao han. Tadawngnae hoi sak e im teh, hmai ni be a kak han.
- 35 Kahawi hoeh e hah a vawn teh, bang hoeh e hah a khe awh.  
A von dawklathoe a vawn awh telah a ti.

## 16

### *Job ni Eliphaz a pathung*

- 1 Hahoi Job ni a pathung teh,
- 2 Hot patet e hno teh, moikapap ka thai toe,  
nangmouh abuemlae lungpahawinae haiyah thathoenae hrum doeh.
- 3 Kahlî lawk teh poutnae ao maw,  
Hettelah pathung hane bang ni maw na tha a hmei sak.
- 4 Ka kangduenae hmuen heh na kangduenae hmuen lah awm pawiteh,  
kai ni hai na dei awh e hah ka dei thai van han.
- 5 Hateiteh, ka pahni ni tha na o sak awh han.  
Ka pahni dawklathoe hoi lungroumnae lawk ni na lungmathoenae a kahma  
sak han.
- 6 Lawk ka dei nakunghai ka lungmathoenae roum sak thai hoeh.  
Duem ka o nakunghai bang alânae awm hoeh.
- 7 Hateiteh, ama ni na tawn sak teh,  
ka huikonaw puenghai kingdi sak toe.
- 8 Nama ni khakkatek teh,  
hot ni kai hanelah kapanuekkhaikung lah ao.  
Ka kamsoenae ni yon na pen teh, hot ni ka minhmai dawklathoe ka panuek  
khai e lah ao.
- 9 A lungkhueknae ni rekrek na sei teh, na hmuhma.  
A hâkam na kata sin teh, ka taran ni na hmaiet.
- 10 Pahni na ang sin awh teh,  
lungroukatetlah ka tangboun dawklathoe na tambei.  
Kai na taran hanelah cungtalah a kamkhueng awh.
- 11 Cathut ni Cathut banglah ka ngaihoeh naw koe na pâseng,  
tamikathoutnaw kut dawklathoe na tâkhawng.
- 12 Kanawmcalah ka o eiteh, ama ni rekrek na bawng.  
Ka lahuen dawklathoe na man teh, bengbeng na kahuet teh,  
rek ka kâbawng, kai teh tâkhawng hanelah ka o.
- 13 Ahnie pala kakanaw ni na kalup awh.  
Ka lung poukkayawng lah na ka teh,  
na pahren hoeh, talai dawklathoe ka hmu e tui hah a ka rabawklathoe.
- 14 Ka hmâ dawklathoe patuen patuen hmâ na paca  
ka pahngawpahrae e ransanaw patetlah na cusin.
- 15 Ka lûen dawklathoe, burihni ka khui sin teh,  
ka lû teh vaipheu dawklathoe ka hruek.
- 16 Ka ka lawi vah ka minhmai a paling teh,  
ka mit dawklathoe duenae tâhlip ao.



- 17 Ka kut dawk kahawihoehe hno kasake awm hoeh.  
 Ka ratoumnae teh a thoung ei te.
- 18 Oe talai, ka thipaling heh ramuk han haw.  
 Ka kanae ni kâhatnae hmuen tawn hanh naseh.
- 19 Atu patenghai, kapanuekkhaikung teh  
 a rasangnae koevah ao.
- 20 Ka huinaw ni na dudam awh.  
 Cathut koe ka mitphi a lawng.
- 21 Tami ni imri hanelah, a kâhei pouh e patetlah,  
 oe Cathut koe na kâhet pouh hane awm haw pawiteh,
- 22 Bangkongtetpawiteh, kum nâsittouh abaw hoehnahlan,  
 bout ban hoeh nae lamthung dawk ka cei han telah ati.

## 17

- 1 Ka hringnae hah a kâbawng teh, ka hninnaw hai aloum toe.  
 Kai hanelah phuen hai coungkacoe lah ao toe.
- 2 Ka panuikhai e hah kai koe awm awh hoeh maw.  
 Ka lung ka khuek sak e lawk ka mit a um nahoehmaw.
- 3 Nama dueng lahoi kai hanelah, lawkkamnae hah sak,  
 kut na ka man e teh api han namaw.
- 4 Bangkongtetpawiteh, panuethainae dawk hoi, a lungthin hah na hro.  
 Hatdawkvah ahnimouh teh, na rasangsak mahoe.
- 5 A huiko koe dumnae hoi oupnae lawk ka dei e teh,  
 a canaw e mit totouh a mawm han.
- 6 Hateiteh, taminaya koe kâpankhai rumram hanelah na sak teh,  
 ahnimae hmalah tamtui pathasin rumram hanelah ka o.
- 7 Ka lungmathoenae kecu dawk ka mit totouh a mawm teh,  
 ka takthai pueng heh tâhlip rumram la ao.
- 8 Tamikalannaw ni hetheh kângairu ati awh han,  
 kayonhoehe taminaw ni cathutlaipa e taminaw a taran awh han.
- 9 Hateiteh, tamikalan ni a lamthung hah a kuet vaiteh,  
 ka thoung e kut ka tawn e teh hoe a thao han.
- 10 Hateiteh, abuemlahoi pahren lahoi bout ban awh.  
 Bangkongtetpawiteh, nangmouh thung dawkvah  
 tamilungkaang ka hmawt pawm mahoe.
- 11 Ka hninnaw hai aloum toe.  
 Ka lungthung hoi ka pouk teh, ka noe e naw hai yawmyin lah doeh  
 ao.
- 12 Tangmin hah kanîthun lah a kâthungsak teh,  
 khohmo thung hai angnae a hnai toe ati awh.
- 13 Phuen hah ka im patetlah ka ring teh,  
 hmonae thung vah ikhun ka sak pawiteh,
- 14 rawkphainae hah apa doeh ka ti teh,  
 tangraet koe nang teh anu hoi ka tawncanu doeh ka tetpawiteh,
- 15 ka ngaihawinae teh, nâ lah maw ao vai,  
 ka ngaihawinae teh, apinimaw a hmu.
- 16 Duenae kho takhang koe lah, a kamleng awh vaiteh,  
 vaiphu dawk rei ka kâhat han namaw, telah ati.

## 18

*Bildad lawk: tami kathoutnaw teh ouk rektap awh*



- 1 Shuhi tami Bildad ni a pathung teh,
- 2 Nâsittouh maw pout laipalah, lawk heh na tawng han,  
thaipanueknae tawn awh, hahoi lawk na dei pouh han.
- 3 Bang kecu dawk maw moithang patetlah touksin lah o awh teh,  
nangmae mithmu vah tamipathu patetlah ka kâpouk.
- 4 Lungkhueknae hoi namahoima na kâraphoe.  
Nang hanelah talai heh ceitakhai lah ao han maw,  
Hoeh pawiteh, lungsong heh aonae koehoi puen lah ao han maw.
- 5 Tamikathoutnaw e angnae teh roup padue pouh lah ao teh,  
a hmaiang hai ang hoeh.
- 6 Rim e angnae hah a hmo teh,  
ateng e hmaiim teh padue e lah ao.
- 7 A khoksampha a thaonae hah duem sak la ao teh,  
amae khokhangnae ni a tâkhawng han.
- 8 A khok ni tamlawk dawk a kâman sak teh,  
karap thung vah a cei sak.
- 9 A khoksampha dawk tamlawk a man teh,  
ama hah karap dawk a bo.
- 10 Ama hanelah karap hah talai dawk hro e la ao teh,  
lamthung dawk ama hane karap a patung.
- 11 Avoivang hoi takikatho e ni a pakhi teh,  
a hnuk lahoi a pâlei.
- 12 A thaonae hah a thayoun toun dawkvah,  
atengpam vah rawkphainae coungkacoe lah ao.
- 13 Hote runae ni a vuen hah a ca pouh teh,  
duenae camin ni a kutkhok hah a ca pouh.
- 14 A kângue e rim hoi ahni teh takhoe lah ao teh,  
takikatho pounge siangpahrang hmalah tâcokhai e lah ao.
- 15 A tami hoeh e hah rim dawk kho a sak awh teh,  
kho a saknae dawk gan a phuen pouh awh.
- 16 A rahim e a tangpha hah koun a ke teh,  
a lathueng lae akangnaw teh a kamyai.
- 17 Ama pahnim thai hoeh nahanlah talai dawk hoi a kahma teh,  
a mûn kamthangnaw e um vah a min awm hoeh.
- 18 Ahni teh angnae koehoi hmonae dawkvah a hrek teh,  
talai dawk hoi pâlei e lah ao.
- 19 A taminaw thung dawk hoi a capa hoi a na mincanaw tawn hoeh.  
Hoeh pawiteh, a khosaknae dawkvah a imthung buet touh hai cawi  
mahoeh.
- 20 Ahnie tueng nah kaawm e taminaw ni a taki awh e patetlah,  
ahni hnukkhu kaawm e naw ni hai ahni kecu a kângai a ru awh han.
- 21 Tamikathoutnaw khosaknae koe teh, hot patetlah ao han.  
Hetheteh Cathut ka panuek hoeh naw a onae hmuen doeh telah a ti.

## 19

### *Job ni Bildad a pathung*

- 1 Job ni a pathung teh,
- 2 Atueng nâsittouh maw ka hringnae he runae na poe awh teh,  
lawk hoi kai na raphoe awh han.
- 3 Vai hra totouh na pathoe awh e ka tak dawkvah



- na payon awh nakunghai na kayak awh hoeh.
- 4 Ka payon katang pawiteh,  
ka payonnae teh kai dawk pou ao han.
- 5 Kai na taranlahoi na kâoup awh teh,  
kai kayanae heh kai na tarannaeh lah na hno awh pawiteh,
- 6 kai dawkvah Cathut a payon tie hoi,  
a tamlawk hoi na ramuk tie hah panuek awh.
- 7 Payonnae kong dawkvah ka hram pawiteh, na thai pouh mahoe.
- Puenghoi ka hram nakunghai lannaeh hah awm hoeh.
- 8 Ka tapuet thai hoeh nahanlah ama ni ka lamthung hah a pâbing.  
Ka lamthung dawk hmonae hah a ta.
- 9 Ka bawilennaeh hah na rading pouh teh,  
ka lû dawk e bawilukhung hah na la pouh.
- 10 Avoivang hoi vekvek na phi te ka kahma toe.  
Ka ngaihawinaeh teh, thingkung patetlah na phawk pouh.
- 11 Kai na taranlahoi a lungkhueknaeh hah a kâan sak teh,  
a taran buet touh e patetlah na touksin.
- 12 A ransahu hah a kamkhueng awh teh,  
kai na taran lahoi lamthung a rasoun awh,  
ka lukkareirim tengpam petkâkalup lah na ven awh.
- 13 Ka hmaunawngghanaw hah ahla nah koelah na puen pouh teh,  
ka panue e naw hah tamitavan lah kounge ao awh.
- 14 Ka imthungnaw hai ka hmawt thai hoeh toe.  
Ka huikahawinaw ni kounge na pahnim awh toe.
- 15 Ka im dawk kho kasaknaw,  
ka sannunaw ni imyin lah na pouk awh. Ahnimaeh mithmu vah imyin  
lah ka o.
- 16 Ka sannaw hah ka kaw eiteh, na pato awh hoeh toe.  
Lawkkanem hoi pasawt a ngai toe.
- 17 Ka hringnaeh teh ka yu hanelah a hnueai e lah ao teh,  
rei ka tâcawt e hmaunawngghanaw hanelah ngai ka tho e la awm hoeh  
toe.
- 18 Camoca ni patenghai na dudam awh.  
Ka thaw navah kai taranlahoi lawk a dei awh.
- 19 Ka huiko kamyawng pueng ni na panuet awh.  
Ka lungpataw e naw ni hai kai tarankung lah kounge ao awh.
- 20 Ka vuen hoi ka tak hai ka hru dawk rapkâbet.  
Kahâhli duengdoeh kaawm toe.
- 21 Oe, nangmouh ka huinaw, na pahren awh haw, na pahren awh haw,  
bangkongtetpawiteh Cathut e kut hoi na hem e la ka o toe.
- 22 Bang kecu dawk maw Cathut na rektap e patetlah kai hah na rektap  
awh.  
Ka takthai dawk ka khangnaeh he na khout sak awh hoeh rah maw.
- 23 Oe, ka lawknaw he ca lah ka thun pawiteh,  
cauknaw dawk pakhum boipawiteh,
- 24 thutnaeh sum hoi, talung dawk thut e  
a yungyoe hanelah awm pawiteh,
- 25 kai na karatangkung teh a hring tie hah ka panue.  
A hnuktengpoung nah talai van bout a kangdue han.
- 26 Ka vuen heh raphoe hnukkhu hoi,  
ka takthai hoi Cathut hah ka hmu han tie hah ka panue.



- 27 Kai kama roeroe ni ka hmu vaiteh, ayâ alouk ni a hmu dueng laipalah,  
kai ni kamae mit hoi roeroe ka hmu han.  
Banghloimaw ka thung e ka lungthin ni a rabui.
- 28 Hno counгнаe a kung teh, kai dawkvah hmu awh eiteh,  
bangtelamaw, ahni teh rektap han, na tet awh boipawiteh,
- 29 Namamouh ni tahloi teh taket awh.  
Bangkongtetpawiteh, lungkhueknae ni tahloi hoi reknae hah tâco sak.  
Lawkcengnae ao tie hah panuethai nahan telah ati.

## 20

### *Zophar lawk*

- 1 Hahoi Naamath tami Zophar ni a pathung teh,  
2 Hatdawkvah ka pouk lawi, pathung nahane na poe,  
bangkongtetpawiteh, ka thung e lungreithai kecu dawk doeh.
- 3 Tounnae ni na yue e hah ka thai toe.  
Ka muitha ni thaipanueknae hoi pathungnae na sak pouh.
- 4 Ayan hoi talaivan  
tami ao totouh hoi,
- 5 tamikathoutnaw tânae tueng teh a duem.  
Cathut bang lah kangaihoehnaw e lunghawinae teh,  
dawngdengca doeh tie hah na panuek awh hoe h maw.
- 6 A kâoupnae hah kalvan totouh a pha teh,  
a lû ni tâmai hah ka phat nakunghai,
- 7 A payungpaei patetlah a yungyoe kahmat vaiteh,  
ahni kahmawtnaw pueng ni na maw ao telah ati awh han.
- 8 Mang patetlah yout kahmat vaiteh, hmawt mahoe h toe.  
Karum e mang patetlah yout kahma e patetlah ao han.
- 9 Ahni kahmawt e mit ni vah hmawt mahoe h toe.  
Hoeh pawiteh, hmuen ni hai kuen mahoe h toe.
- 10 A canaw ni tami ka roedeng minhmai kahawi hah tawng awh vaiteh,  
a kut hoi hnopai hah bout a bankhai han.
- 11 A hrunaw teh nawcanae thaonae hoi akawi han.  
Hateiteh, vaiphu dawk a ikhai han.
- 12 A pahni dawk kahawihoehe a radip.  
A lai rahim vah a hro nakunghai,
- 13 Pasoung laipalah a pâkuem.  
A kâko dawkvah a hro nakunghai,
- 14 A rawca teh, a vonthung vah a ui vaiteh,  
tahrunsue lah a kangcoung han.
- 15 A tawnta e hnopai hah padoun vaiteh bout a palo han.  
Cathut ni a von thung hoi a tâkhawng pouh.
- 16 Tahrun sue hah a pahap teh,  
tahrun lai ni a ma a thei han.
- 17 Kalawng e palang, khoitui hoi maito sanutui kamkak vaiteh,  
ka lawng e hmawt mahoe h.
- 18 A taw k e thaw ni a coung sak han ei,  
von paha nahanelah hno mahoe h.
- 19 Karoenaw hah a ceitakhai hoi, a coungroe teh,  
Ama ni a sak hoe h e im hah a lawp.
- 20 A lung thung hoi rounnae hah a panue hoe h dawk.  
A ngai e hno buet touh boehai cawi mahoe h.



- 21 A ca hanelah a pek e banghai awm hoeh.  
Hatdawkvah a nawmnae ni kasaw awm mahoe.
- 22 A nawm lahun nah kângairu vaiteh,  
ama taranlahoi kângairu patawpoung e kut daw k a pha han.
- 23 A von a paha lahun nah Cathut ni  
a lungkhueknae hmai hah ahni koe a tha poeh han.  
A ca lahun nah a lathueng vah lungkhueknae kho a rak pouh han.
- 24 Sum e senehmaica teh, a yawng takhai han ei,  
rahumpala ni pawkkayawng lah a ka awh han.
- 25 Pala teh a phawk, a tak daw k hoi a tâco pouh.  
Loukloukkaang e a hmo hah hmue thung hoi a tâco.  
Takikatho poung e a lathueng vah a pha.
- 26 Runae pueng teh ama hanelah pâtung lah ao.  
Tami ni patawi hoeh e hmai ni be a kak vaiteh,  
a im daw k kaawm e pueng ama hoi a kak han.
- 27 Kalvannaw ni a payonnae hah a pâpho han,  
talai ni ama hah a taran han.
- 28 A im e hnopainaw hah be kahmat vaiteh,  
a lungkhueknae hnin daw k hnokahawinaw  
hah tui patetlah a lawng han.
- 29 Hetheteh Cathut koehoi tamikathoutnaw ni a coe hanelah ao.  
Cathut ni a coe hane râw a pouk pouh e doeh telah a ti.

## 21

### *Job ni Zophar a pathung*

- 1 Hahoi Job ni a pathung teh,
- 2 Ka lawk he kahawicalah na thai pouh haw,  
Hetheh nangmouh lungmawng nahanelah awmseh.
- 3 Ka dei navah panguep awh ei,  
be ka dei hnukkhu hoi na panuikhai awh vai nei.
- 4 Ka phuenangnae heh tami tarannae lah maw ao.  
Hottelah awm pawiteh, bang kecu daw k maw, ka lung a saw thai hoeh.
- 5 Na khen awh haw, kângairu awh naseh.  
Na pahni hah tabuem awh.
- 6 Ka pouk nah ka pâyaw  
takinae ni ka kâha a uek sak.
- 7 Bang kecu daw k maw tamikathoutnaw ni a matawng totouh a hring awh  
teh,  
thaonae daw k bahu ao han vaw.
- 8 A ca catounnaw hah amamae mithmu vah a kung acaksak awh,  
amamae miphun hah amamae hmalah acaksak awh.
- 9 A imnaw hah takinae thung hoi a hlout teh,  
Cathut e sonron hah ahnimae a lathueng bawt boihoeh.
- 10 Maitotan ni cati tu laipalah awm boihoeh.  
Maitomanu ni ca khe laipalah awm boihoeh.
- 11 Saringhu patetlah a canaw a tâco sak teh,  
a canaw teh a lam awh.
- 12 Tamawi hoi ratoung kueng laihoi la a sak awh,  
Tamawi e a lawk daw k hoi a lunghawi awh.
- 13 Hringnawmnae hoi atueng aloum sak awh teh  
dongdengca daw k phuen vah a cei awh.



- 14 Hateiteh, Cathut koe  
na cettakhai yawkaw,  
na lamthung panue hane heh ka ngai awh hoeh.
- 15 Athakasaipounge, a thaw ka tawk pouh hane teh apimaw,  
Ama koe ka ratoum navah ahawinae bangmaw ka mek telah ati awh.
- 16 A tawn awh e hno hah amamae kut daw kkaawm e ka tang nahoe, h,  
tami kathoutnaw khokhangnae teh, kaimouh koehoi kahlatpoung la  
ao.
- 17 Tamikathoutnaw e hmaiim teh, bangmaw atuhoitu a due teh,  
amamae rawkphainae teh, bangmaw atuhoitu a pha.  
Lungmathoenae hah Cathut ni a lungkhueknae daw k hoi lawk ouk a  
ceng boimaw
- 18 Kahlî daw k e cakong patetlah ao teh,  
kahlî ni palek e vaikong patetlah ao awh.
- 19 Cathut ni a canaw hanelah, payonpakai nahan a ta telah a ti.  
Panuethai awh nahanelah, ahnimouh teh ama ni patho naseh.
- 20 A rona e hah a mit hoi hmawt sak awh,  
Athakasaipounge lungkhueknae manang hah net sak awh.
- 21 Bangkongtetpawiteh, a thapa aku e p totouh atueng baw sak lah o teh,  
ama a rawk hnukkhu hoi a im teh, banglahai tho hoeh.
- 22 Karasang lah kaawm e hai lawkcengkung Cathut teh  
apinimaw panuenae a cangkhai thai han.
- 23 Lungmawngcalah hoi karoumcalah ao nah koe,  
tami buet touh a thao lahun nah a due.
- 24 A sanunaw hai sanutui abuem awh teh,  
a hrunaw hai rakhing hoi akawi.
- 25 Tami alouke buet touh, a nawmnae roeroe awm laipalah,  
lungmathoe nalaihoi a due.
- 26 Vaiphu daw k reikâvan lah a i roi,  
tangraet ni muen a kayo.
- 27 Khenhaw! na pouknae naw hah ka panue.  
Ka lan hoe h poung e kai daw k  
sak han na noe e hah ka panue.
- 28 Nâmaw bawi im teh a o,  
nâmaw tamikathoutnaw khosaknae  
rim teh ao telah na ti awh.
- 29 Kahlawng ka cet e hah na pacei boihoe h na maw.  
Mitnoutnae naw hah na panuek awh hoe h maw
- 30 Tamikathoutnaw teh, lawkcengnae hnin hanelah  
pouk tangcoung e lah ao awh.  
Lungkhueknae hnin nah tâcokhai lah ao awh han,  
tie hah na panuek hoe h maw
- 31 Apinimaw a hmaitung vah na lamthung hah hawihoe h atipouh han.  
Apinimaw a sak e hah a patho han.
- 32 Hateiteh, phuen koe ceikhai lah ao teh,  
phuen hah meng kountouk hanelah ao.
- 33 Ayawn daw k e kacounnaw hah,  
ahnimouh hanlah, a radip vaiteh, tami pueng ni a kâbang han.  
A hmalah touklek hoe h e ka cet tangcoungnaw patetlah  
taminaw pueng a duksawn han telah a ti.
- 34 Hottelah namamae pahni daw k laithoe pou ao lahun nah,  
bangtelamaw hrawnghrang lawk hoi



lung khuet na pahawi thai awh han, telah a ti.

## 22

### *Eliphaz lawk*

- <sup>1</sup> Teman tami Eliphaz ni a pathung teh,
- <sup>2</sup> Tami teh Cathut hanelah a cungkeinae a tawn thai han namaw,  
A lungkaang e hai ama hanelah doeh cungkeinae ao.
- <sup>3</sup> Tamikalan lah na onae hah, Athakasaipounge, a lungkahawi sak e lah ao  
han namaw  
Toun han awm laipalah na sak e na lamthung hah ahni hanelah a  
meknae ao han namaw
- <sup>4</sup> Ama na taki kecu dawk maw na toun teh,  
lawkcengnae dawk na kâenkhai.
- <sup>5</sup> Na hawihoehnae hah a len poun teh,  
pout laipalah na payonnae kecu dawk nahoehmaw.
- <sup>6</sup> A khuekhaw awm laipalah na hmaunawnggha e hno hah na man pouh  
teh,  
caici lah kaawm e hnicu hah na la pouh.
- <sup>7</sup> Tha ka tawn e koe, nei hane tui hah na poe hoehteh,  
von kahlamnaw hanelah vaiyei hah na pasoung pouh hoehteh.
- <sup>8</sup> Hateiteh, tami athakaawme ni ram a coe teh,  
a thung vah bari kaawm e tami ni kho a sak awh.
- <sup>9</sup> Lahmainu hah kut caici lah na ceisak awh teh,  
manu ka tawn hoehteh e naranaw e kut hah na khoe pouh awh.
- <sup>10</sup> Hatdawkvah na tengpam e karap ni na kalup teh,  
puennaen rucatnae na poe awh.
- <sup>11</sup> Na hmu thai hoehteh nahanelah,  
hmonae hoi tuikalen poun ni muen a khu awh.
- <sup>12</sup> Kalvan arasang nah koe, Cathut awm hoehteh namaw  
Karasangpoun e âsinaw hah kenhaw! banghloimaw arasang.
- <sup>13</sup> Nang ni, Cathut ni bangmaw a panue,  
Hmonae hloilah lawk a ceng thai maw.
- <sup>14</sup> A hmu thai hoehteh nahanelah, katha poun e tâmai ni a ramuk teh,  
kalvan lathueng lah a kâhlai, telah na ti.
- <sup>15</sup> Tamikathoutnaw ni karaw e lam karuem daw  
meng na cei han namaw
- <sup>16</sup> Apimaw atueng kuep hoehteh nahlan vah la e lah kaawm niteh,  
apini a ung e maw tuikalen ni a la.
- <sup>17</sup> Cathut koe, na cettakhai yawkaw,  
Athakasaipounge ni ahnimouh hanelah bangmaw a sak thai telah ati  
awh.
- <sup>18</sup> Hateiteh a imnaw hah hnokahawi hoi akawi sak.  
Hateiteh tamikathout e khokhangnae teh, kai koehoi kahlatpoun lah  
ao.
- <sup>19</sup> Tamikalan ni a hmu teh, a lunghaw.  
Yonnae ka tawn hoehteh e ni dudamkungnaw hah a panuikhai awh.
- <sup>20</sup> Ka tarannaw teh, raphoe katang lah ao teh,  
kacawie naw hah hmai ni a kak han.
- <sup>21</sup> Ama koe kâpanuek sak nateh, karoumcalah awm,  
haw hoi nang hanelah hnokahawi a tâco han.



- 22 Pahren lahoi amae kâko hoi ka tâcawt e hringnae na cangkhai e hah dâw haw.  
Na lungthin thungvah amae lawk hah kahawicalah kuem.
- 23 Athakasaipounge, koevah na ban pawiteh, kangdout thai e lah o han.  
Na payonpakai e hah na im dawk hoi kahlatpoung lah na takhoe han.
- 24 Nange sui teh, vaiphu dawk na ta han.  
Ophir sui hah sawkca thung e, sadinaw patetlah na pâtung han.
- 25 Athakasaipounge teh,  
nage sui hoi aphu kaawm e ngun lah ao han.
- 26 Hottelah Athakasaipounge dawkvah na lunghawi han.  
Cathut koe lah na khet han toe.
- 27 Ama koe na ratoum vaiteh, na thai pouh han.  
Na lawkkam hah na kuep sak han.
- 28 Hno buet touh na kâcai vaiteh, nama hanelah caksak lah ao han.  
Hot patetvanlah na lamthung dawk angnae ni a tue han.
- 29 Na tâkhawng navah tawmrasang e lah na o han telah na ti han.  
Hottelah kârahnoum e hah ama ni a rungnang han.
- 30 Ka yon hoehe e hah a rungnang han.  
Na kut thoungnae hoi rungnang lah ao han, telah a ti.

## 23

### *Job Eliphaz a pathung*

- 1 Hahoi Job ni a pathung teh.
- 2 Sahnin hai ka phuenangnae a patawpoung.  
Ka kâhram lawi vah ka kut ni thayung awm hoehe toe.
- 3 Oe, ama teh nâ lah maw ao tie hah ka panue vaiteh,  
a tahungnae koe ka phat haw pawiteh.
- 4 A hmalah ka kong heh ka phakhai vaiteh,  
ka pahni teh na lawkpanuesaknae hoi a kawî han ei.
- 5 Na pathungnae lawk hah ka panue vaiteh,  
kai koe a dei hane hah ka thaipanuek han ei.
- 6 Ka lentoe e hnotithainae hoi na taran han namaw  
Na taran mahoehe, ka kong hah hoe na pouk pouh han doeh.
- 7 Hawvah ama hoi tamikalan ni pouk thai awm vaiteh,  
lawkcengkungnaw koehoi yungyoe ka hlout han toe.
- 8 Khenhaw! hmalah ka cei, hateiteh ama la awm hoehe.  
Hnuklah bout ka ban eiteh, ama teh ka hmawt thai hoehe.
- 9 Avoilae kut hoi a tawk navah ama teh ka khen thai hoehe.  
Aranglae kut dawk a kamlang toteh ama hah ka hmawt thai hoehe.
- 10 Hateiteh, ka dawn e lamthung hah ama ni a panue.  
Na tanouk toteh sui patetlah ka tâco han.
- 11 A khok dawk ka khok ni kacakcalah a kamtung teh,  
a lamthung hah phen laipalah ka dawn.
- 12 A pahni dawk hoi kâpoelawk hah ka cettakhai hoehe.  
A pahni dawk hoi ka tâcawt e lawk hah  
ka panki e rawca hlak hai ka pâtung.
- 13 Hateiteh, ama teh buet touh lah ao dawkvah,  
apinimaw a dum thai han.  
A hringnae ni a sak han a ngai e pueng hah a sak.
- 14 Kai hanelah a pouk e hah a sak.



Ama dawk hot patet e hah moikapap ao.

15 Hatdawkvah, a hmalah o e hah ka taki.

Hetheh ka pouk navah ama ka taki.

16 Cathut ni ka lung a pout sak teh,  
Athakasaipounge hah na taki sak.

17 Hatei, hmonae dawk hoi na kapek hoeh teh,  
ka hma lae hmonae kadung pounge dawk na ramuk hoeh.

## 24

1 Bangkong maw atuengnaw heh Athakasaipounge ni  
a hro hoeh vaw,

ama kapanueknaw ni

amamae ahnin hah a hmu thai awh hoeh vaw.

2 Tangawn ni khori hah a puen awh.

Saringnaw hah a lawp awh teh ama hanelah a paca awh.

3 Naranaw e la hah a pâlei pouh awh teh,  
lahmai e maitotan hah lawkkamnae lah a pangen pouh awh.

4 Tami kavoutthoupnaw hah lamthung a phen sak awh.

Ram thung e karoedengnaw hah pâkhueng teh, kâhro hoi ao awh.

5 Thingeyiawn ramke dawk e la patetlah,

rawca tawng hanelah, thaw tawh han lah a cei awh.

Amamouh hoi a canaw hanelah ram ni ca hane rawca a tâco sak.

6 Law dawk e saringnaw e rawca hah a pâkhueng teh,

tamikathoutnaw e misurpaw hah a pâtung awh.

7 Khohna e awm laipalah karum khodai caici lah a i awh.

Pâding nah kâkhu hane tawn awh hoeh.

8 Mon dawk kho ka rak e ni cupkâkasu lah a pâsin teh,

a phui nahanelah lungsongpui a kângue awh.

9 A na pa kaawm hoeh e camo teh, a manu e sanu hoi a pâphei sak.

Karoedengnaw hah amamae hno hah a pâhung sak.

10 Karoedengnaw, hah caici lah ao sak awh.

A von kahlamnaw koe e cabong hah a la pouh awh.

11 Ayânaw im vah satui hah a kuen awh teh,

misurpaw katin nalaihoi tui a kahran awh.

12 Khopui thung vah hmenghmeng a due awh teh,

a hramki awh. Hmâ a ca awh teh, hringnae hah a kaw awh.

Hateiteh, Cathut ni a ratoum awh e hah pato hoeh.

13 Angnae hah taranlahoi tarankathawnaw hah ao.

A lamthung hah panuek awh hoeh teh,

angnae lamthung hah ngai awh hoeh.

14 Tamikathetnaw ni angnae dawk hoi a thaw awh teh,

karoedengnaw hoi kavoutthoupnaw hah a thei awh.

Karum e tami tamru patetlah ao awh.

15 Ayâ yu yonkhai hane mit ni khohmo a ngaihaw.

Minhmai a hro teh, apini na hmawt mahoehtelah a pouk.

16 Kanîthun lah mitnout a ta e im hah karum lah a muk awh teh,

angnae hah panuek awh hoeh.

17 Bangkongtetpawiteh, ahnimouh hanelah teh,

amom hah duenae tâhlip patetlah ao.

Tami ni panuek awh boipawiteh,

takikatho pounge duenae tâhlip doeh ati awh han.



- 18 Tui hoi karanglah pâyo sak lah ao awh han.  
 Talai dawkvah coe hane thoebo lah ao han.  
 Hatdawkvah, apihai misur takha lamthung koe lah kamlang mahoe.
- 19 Kawmpoi khumbei kâan e ni tadamtui a kamyawt sak.  
 Hot patetvanlah, phuen ni yonnae ka sak e hah a payawp awh.
- 20 Camo im ni a pahnim awh vaiteh,  
 tangraet ni katuipoung lah a ca awh han.
- 21 Bangkongtetpawiteh, cakaroe e hah a rektap teh,  
 lahmainu hanelah hnokahawi lah awmhoe.
- 22 Hateiteh, Cathut ni athaonae hoi,  
 tami athakaawme taminaw e lamthung hah a raphoe pouh.  
 Hring hane kamcenglah a panue hoe nakunghai, Ama ni a thaw sak.
- 23 A kângue hane a poe teh, hawvah a kâhat sak.  
 A mit teh ahnimae lamthung daw k ao.
- 24 Vai touh hoi tawm lah ao teh, hat hnukku hoi a kahma awh.  
 Rahnoum sak la ao teh, ayânaw patetvanlah a kâhmo van han. Cavui  
 patetlah a ke awh.
- 25 Hot patetlah awm hoe pawiteh,  
 apini maw na laithoe a tithai han.  
 Ka dei e heh bang hoe e lah  
 ka coung sak thai e na o awh maw telah a ti.

## 25

### *Bildad lawk*

- 1 Hahoi Shuhi tami Bildad ni a pathung teh,  
 2 Uknae hoi takinae teh amae naw doeh.  
 Hmuenrasang dawkvah rounnae naw a sak.
- 3 A ransanaw hah apinimaw a touk thai han.  
 Apie lathueng maw na angnae hah tâcawt laipalah ao boi.
- 4 Bangtelamaw Cathut e hmalah tami a lan thai han.  
 Hoe pawiteh, bangtelamaw napui ni khe e hah a thoung thai han.
- 5 Thapa patenghai ang laipalah, âsinaw hai amae mithmu vah  
 thoung awh hoe pawiteh,
- 6 Pâri hoi tangraet rumram lah kaawm e taminaw natawng teh  
 bangtelamaw hoe thoung thai han vaw, telah ati.

## 26

### *Job ni Bildad a pathung*

- 1 Hatei Job ni a pathung teh,  
 2 Hnotithainae ka tawn hoe e teh, bangtelamaw na kabawp,  
 thaonae ka tawn hoe e kut teh, bangtelamaw na runngang thai.
- 3 Lungangnae ka tawn hoe e teh, bangtelamaw na toun thai,  
 tami moikapap koevah kalan e pouknae hah bangtelamaw na poe thai.
- 4 Api koe maw lawk teh na pâpho pouh.  
 Apie muitha maw nama koe ka phat.
- 5 Tami kadout hah a pâyaw teh, tui rahim vah ao teh,  
 haw vah kaawm e naw hoi a pâyaw awh.
- 6 A hmalah duenae caici lah ao.  
 Rawkphainae ni ramuknae tawn hoe.
- 7 Kalvan teh ahrawnghrang daw k a kangdue.



- Talai hai ahrawnghrang dawk a kâbang.
- <sup>8</sup> Katha pounge e tâmai dawk tui hah mek a racut teh,  
a rahim e tâmai hah kâbawng awh hoeh.
- <sup>9</sup> A bawitungkhung e hmalah a ramuk teh,  
a lathueng vah tâmai a tabo sak.
- <sup>10</sup> Angnae hoi hmonae langri a ta nahanelah  
tui dawk a langri a ruen pouh.
- <sup>11</sup> Kalvan toenae khom a kâhuet teh,  
a tounnae hah kângai lah a ru.
- <sup>12</sup> A hnotithainae lahoi tuipui a thaw sak.  
Bahu lahoi tûilî hah thawk a kapek.
- <sup>13</sup> A muitha lahoi kalvan a pathoup sak.  
Kamleng e khorui hai a kut hoi a sak.
- <sup>14</sup> Khenhaw! hetnaw heh lamthung nueng kamtawngnae doeh.  
Ahnimouh koe e thai awh e hrolawk teh, banghloimaw a thoung.  
Hateiteh, keitat hnotithainae hah, apinimaw a panue thai.

## 27

### *Job ni a lannae a kampang*

- <sup>1</sup> Job ni a dei e hah bout a patawp teh,
- <sup>2</sup> Cathut ni ka lannae, na la pouh teh,  
Athakasaipounge, ka hringnae ka pataw sak e teh a hring e patetlah,
- <sup>3</sup> Ka thung e a thakaawm sak e Cathut e kâha teh  
ka hnong dawk ao thung pueng teh,
- <sup>4</sup> Ka pahni ni kathoute lawk dei mahoe.
- <sup>5</sup> Ka lai ni dumnae tâcawtsak mahoe.
- <sup>5</sup> Na lan awh tie hah ka dei hane savisava doeh.  
Ka due totouh ka lannae heh khoeroe ka pahnawt mahoe.
- <sup>6</sup> Ka lannae heh kacakcalah ka kuet teh, kahmat sak mahoe.  
Ka hring thung pueng ka lungthin ni kama yon na pen mahoe.
- <sup>7</sup> Ka taran hah tamikathout patetlah awm awh naseh.  
Kai na taranlahoi ka kangdout e hah tami kalan hoeh lah awm awh naseh.
- <sup>8</sup> Bangkongtetpawiteh, tami kahawihoehe naw ngaihawinae teh, banghai nahoe.
- Moi ka tawn nakunghai Cathut ni a hringnae lat pawiteh,
- <sup>9</sup> a lathueng vah runae a pha torei teh,  
a cingounae hah Cathut ni a thai pouh han maw.
- <sup>10</sup> Athakasaipounge, lah amahoima a lunghawi han namaw,  
Cathut hah pou a kaw han namaw.
- <sup>11</sup> Cathut e kut hoi a sak e hah na dei pouh vai.  
Athakasaipounge, koevah kaawm e hah ka hrawk mahoe.
- <sup>12</sup> Hot teh abuemlah ni na hmu katang awh.  
Hottelah pawiteh, bangkongmaw bang hoeh e dawk pou na panui awh.
- <sup>13</sup> Hetteh, Cathut koehoi tamikathoutnaw coe hanelah ao.  
Tami kahnephnapnaw e a coe e raw.  
Athakasaipounge, koehoi a hmu awh e teh,
- <sup>14</sup> a catounnaw a kamphung nakunghai tahloi hanelah doeh ao.  
A canaw ni vonhlam hoi kho a sak awh han.



- 15 Kaawm rae naw teh, duenae dawk pakawp la ao awh han.  
Lahmainaw ni khuikapkhai mahoe.
- 16 Vaiphu patetlah ngunnaw ka pátung nakunghai,  
tangdong patetlah hnopai ka pátung nakunghai,
- 17 a pátung thai han. Hateiteh, tamikalan ni a khohna han,  
kayonhoehnaw ni ahnie ngun hah a kârei awh han.
- 18 Bomba patetlah im a sak teh,  
ramveng ni rim a sak e patetlah doeh ao.
- 19 Tami ka tawn pounng ni a due torei teh, pakawp e lah awm mahoe.
- A mit a padai nah teh kounng a kahma toe.
- 20 Takithopounng e ni ahni teh tuikalen patetlah a la.  
Karum lah tûilî ni a kahma sak.
- 21 Kanîtholah kahlî ni a palek teh awmhoe toe.  
A onae hmuen koehoi a palek.
- 22 Pek e awm laipalah ama khuehoi a palek.  
A thasainae thung hoi kounng a kahma han.
- 23 Taminaw ni a kuttawng sin han.  
Terawseh tet awh vaiteh aonae koehoi a pâlei awh han.

## 28

### *Lungangnae kong dawk Job ni lawk a dei*

- 1 Ngun tainae tangkom ao katang,  
sui sôlêinae a hmuen hai ao.
- 2 Sum teh talai dawk hoi la e lah a o,  
raham teh talung dawk hoi thawng e lah ao.
- 3 Tami ni hnonae dawk a pout sak teh,  
a hmuen kingkadi e pueng totouh a tawng awh,  
duenae tâhlip hoi hmonae thung vah  
a cei awh teh a tawng awh.
- 4 Tami a ohoeahnae koe vah tangkom a tai teh,  
khok ni a pahnim e hmuennaw hah  
tami hoi a kâhlanae hmuen koe a bang awh teh,  
pou a kâhuet awh.
- 5 Talai e tui dawk hoi rawca tâconae lah a o,  
a rahim lah teh hmai ni talai a kâthungsak e patetlah ao.
- 6 Hote talungnaw teh, sapphire talung a phukaawm  
a tâconae a kung lah ao. Sui kanuinaw hai ao.
- 7 Hote lamthung teh tavanaw ni panuek hoe,
- mataw e mit ni hai hmawt hoe.
- 8 Ka po e sendek ni hai counngroe hoe,  
ka matheng e sendek hai cet boihoe.
- 9 Talung dawk tami ni kut a toung teh,  
mon hah a kung koehoi pakhuppathan lah dek a palei.
- 10 Lungsongpui hah a kavi teh, ravohong a sak teh,  
a mit hoi a phukaawm pounng e hno hah a hmu.
- 11 Tui ka phuek e hah a tawng teh,  
kâhrawk e hnonaw hah angnae dawk a tâcokhai.
- 12 Hateiteh, nâ lah maw lungangnae hmuthainae teh,  
nâ lah maw panuethainae hmuen hah ao.
- 13 Aphu onae tami ni panuek hoe,



- Tami onae ram dawk hmu thai lah awm hoeh.
- 14 Kadunge ni kai koe awm hoeh telah a ti,  
talî ni kai koe awm hoeh a ti.
- 15 Sui hoi ran thai lah awm hoeh,  
aphu teh ngun hoi hai bangnue thai lah awm hoeh.
- 16 Ophir talung phu kaawm ni hai phat thai hoeh,  
aphu kaawm poun e onyx hoi  
sapphire ni hai phat thai hoeh.
- 17 Sui hoi talung phukaawm ni hai phat thai hoeh,  
sui kathoung hoi hai thung thai lah awm hoeh.
- 18 Koral hoi jasper hai deipan han kamcu hoeh,  
Bangkongtetpawiteh, lungangnae phu teh,  
Rubies talung hlak hai a phu hoe a rasang.
- 19 Ethiopia ram e topaz talung phu kaawm ni phat thai hoeh,  
sui kathoung ni hai aphu onae phat thai hoeh.
- 20 Hot patet lae lungangnae teh,  
nâhoi maw a tho,  
thoumthainae hmuen teh nâ lah maw ao.
- 21 Kahringnaw pueng e mit ni a khet teh hmawt thai hoeh,  
kalvan e tavanaw ni hai a tawng teh hmawt thai hoeh.
- 22 Rawkphainae hoi duenae ni a dei awh e kamthang hah,  
ka hnâ ni a thai telah ati awh.
- 23 Cathut ni a lamthung hah a panue pouh teh,  
hmuen hai a panue
- 24 Bangkongtetpawiteh, ama ni talai apout totouh a khet,  
kalvan rahim pueng hah a hmu.
- 25 Kahlî teh khing hane hoi,  
tûi teh bangnuenae hoi bangnue hane,
- 26 kho a rak nahanelah lamthung a sak pouh teh,  
khoparitnae hoi sumpapalik nahane lamthung a sak pouh navah,
- 27 Lungangnae a hmu teh a pâpho,  
a caksak teh a tawng.
- 28 Tami koe khenhaw! BAWIPA takinae teh lungangnae doeh,  
kahawihoehe ceitakhai e teh  
panuethainae doeh telah a ti.

## 29

### *Job ni a lannae a kampangkhai*

- 1 Job ni a dei lawk hah bout a patawp teh,
- 2 Oe ka loun tangcoun e a kum hoi thapa naw dawk bout kaawm haw  
pawiteh,  
Cathut ni na kountouknae a hnin patetlah
- 3 ka lû dawk hmaiim a ang teh,  
a angnae dawk hoi hmonae ka tapuet thai navah,
- 4 Ka roun takhangnae a tueng,  
ka im dawk Cathut hoi kâhuikonae tueng,  
hatnae patetlah bout kaawm haw pawiteh,
- 5 Athakasaipounge, kai koe na okhai e hoi,  
ka canaw ka teng vah petkâkalup lah ao awh navah,
- 6 Ka ceinae lamthung dawk maito sanutui a lawng,



- lungsongpui ni kai hanelah satui pou a lawng sak navah,  
 7 khopui kêennae longkha koe ouk ka cei navah,  
 thongma daw koe ka tahungnae koe ka ceikhai navah,  
 8 Thoundounnaw ni na hmu awh teh, a kâhro awh.  
 Kacuenaw ni a thaw awh teh a kangdue awh.  
 9 Bawinaw ni lawk dei hane pahni a cakuep awh.  
 A kut hoi pahni a tabuem awh.  
 10 Bawinaw hai lawkkamuem lah duem ao awh teh,  
 a lai teh adangka daw rapkâbet pouh.  
 11 A hnâ ni a thai toreih teh, yawhawi na poe awh.  
 A mit hoi a hmu awh toreih teh na panuikhai awh.  
 12 Bangkongtetpawiteh, karoedengnaw hah ka rungngang teh  
 na pa hoi kabawmkung ka tawn hoe h e naw hah ouk ka kabawp.  
 13 Kahmatkatanaw e yawhawinaw hah, ka lathueng vah a pha.  
 Lahmainaw e lungthin hah lunghawinae la ka sak sak.  
 14 Lannae hah ka khohna teh,  
 ka lannae teh angkidung hoi bawilakhung patetlah ao.  
 15 Mitdawnnaw hanelah mit lah ka o teh,  
 khokkhemnaw hanelah khok lah ka o.  
 16 Karoedengnaw, hanelah na pa lah ka o teh,  
 ka panue hoe h e naw e lawk hai ka ngai pouh.  
 17 Tamikathoutnaw e a no hah ka khoe pouh teh,  
 a hâ hoi a kei e hah ka rasa pouh.  
 18 Hottelah ka tabu thung ka due vaiteh,  
 ka hninnaw teh sadi patetlah ka pung sak han.  
 19 Tui aonae koe vah ka tangphanaw ka payang vaiteh,  
 ka kangnaw daw karum khodai tadamtui ao han.  
 20 Ka bawilennae teh ka thung vah bout a katha teh,  
 ka pala teh ka kut daw a tha hoi a kawi han.  
 21 Taminaw ni na ring teh na rabui awh.  
 Ka khokhangnae daw duem ao awh.  
 22 Ka dei hnukkhu hoi banghai dei awh hoe h toe.  
 Ka dei e teh ahnimouh koe tadamtui patetlah a bo.  
 23 Khotui patetlah na ring awh teh, a hnukteng e kho ka rak e patetlah  
 kakawpoung lah pahni a ang awh.  
 24 Ka panuikhai pawiteh yuem awh mahoe h.  
 Ka minhmai a angnae teh, hmonae lah awm sak awh hoe h.  
 25 Ahnimouh hane lamthung ka rawi teh,  
 kahrawikung patetlah ka tahung.  
 Hottelah ransanaw thung vah siangpahrang patetlah kho ka sak.  
 A lung ka mathoutnaw lungpahawi e patetlah ka o.

## 30

- 1 Hatei, atuteh kai hla k ka camo e naw ni  
 Kai na pathoe awh.  
 A napanaw hah kai ni ka panuet teh,  
 kaie tuhu ka ring e uinaw koe patenghai baw van hoe h.  
 2 A thaonae hah kai hanelah bangmaw cungkeinae kaawm.  
 A thayung tawn awh hoe h toe.  
 3 Takangnae hoi voutthoup daw a kamsoe awh teh,  
 kahrawngum kingdinae hmuen koe tang a yawng awh.



- 4 Pho um e angmai hna a la awh teh,  
samphokung e a tangpha hah rawca hanelah a tai awh.
- 5 Ahnimouh teh, tami koehoi pâlei awh teh,  
tamru patetlah a hramsin awh.
- 6 Tangkom thung hoi lungngoum thung o hanelah doeh ao awh.  
Talai hoi talung kâko dawk ao awh.
- 7 Caprapum vah a hram awh teh,  
pâkhingum vah a tabo awh.
- 8 Ahnimouh teh tamipathu e canaw doeh.  
Bang pato patang hoeh e canaw doeh.  
Ram thung hoi hrek e naw doeh.
- 9 Atu teh la lah na sak awh hanelah ka o toe.  
Na pathoe e lah ka o toe.
- 10 Na panuet awh teh kai hoi kâhlât lah na o awh.  
Ka minhmai na tamthawi awh.
- 11 Bangkongtetpawiteh, lirui hah a rasu awh teh, na ka pacekpahlek awh.  
Ka hmalah kammoumrui a rasu awh.
- 12 Kaie aranglah nawsainaw a kangdue teh, ka khok hah a phen awh.  
A rawkphainae lamthung hah kai taranlahoi a sak awh.
- 13 Ka lamthung hah a raphoe awh.  
Kai ka tâlaw nahanelah a kâyawm awh.  
Ahnimouh kâhruetcueth ka poe hane apihai awm hoeh.
- 14 Ka kaw poung e kâko dawk hoi a tho awh teh,  
ningkatim rahim vah na kalup awh.
- 15 Takithopoung e ka lathueng vah a pha.  
Bari lah ka onae hah kahlî patetlah a pâlei awh.  
Ka tawn e naw hah tâmai patetlah a kahma.
- 16 Ka kângairunae ni ka hringnae teh a rabawk toe.  
Ka khangnae hninnaw ni khak na kueth.
- 17 Karum lah ka hru hah koung a thut teh,  
ka tharui patawnae ni roum thai hoeh.
- 18 Ka patawpoung e ni hnicu hoi kayo e patetlah na kayo teh,  
angki lahuen patetlah na katek.
- 19 Tangdong dawk na tâkhawng teh,  
hraba hoi vaiphu patetlah ka o toe.
- 20 Nama koe ka hram, hateiteh, na pato hoeh.  
Ka kangdue teh na kheth.
- 21 Hatei, kai hanelah ka pahngawpahrahk e lah na o.  
Na kut thasainae ni na taran.
- 22 Kahlî dawk na tawm teh,  
a lathueng vah na kâcui sak.
- 23 Bangkongtetpawiteh, nama ni duenae dawk na ceikhai hane hah ka panue.  
Hringnae katawnnaw pueng hanelah,  
na pouk pouh tangcoung e im dawkvah.
- 24 BAWIPA ni a kut a dâw toreih teh,  
a kâheih nakunghai, banglah tho hoeh toe. A raphoe toreih teh,  
a hram nakunghai hawinae awm hoeh toe.
- 25 Runae ka kâhmonaw hanlah ouk ka ka nahoehmaw.  
Karoedengnaw hanlah lungreithai hoi kaawm boihoe haw.
- 26 Hateiteh, hawinae ka tawng navah,



- hno kahawihoehe hah ka lathueng vah a pha.  
 Angnae ka ring navah hmonae a pha.
- 27 Ka lungthin a tāsue teh roun thai hoeh.  
 Ka khangnae hninnaw ni na tho sin.
- 28 Panuinae koelah tho hoeh niteh, lungmathoe koelah ka cei.  
 Kamkhuengnaw rahak vah, ka kangdue teh, kabawpnae ka hei teh ka hram.
- 29 Kahrawnguinae e hmaunawngaha lah ka o.  
 Kalauk tavanaw hoi huiko lah ka o.
- 30 Ka vuen teh hoehoe a tamang teh kai koehoi a bo,  
 Ka hrunaw teh puenghoi a kâan
- 31 Ka ratoung teh ka lungmathoenae lah a coung,  
 ka tamawi teh kâlawk lah a coung.

### 31

- 1 Ka mit ni lawkkamnae a sak,  
 Bang kecu dawm maw tangla hah ka mit ni a khet han.
- 2 Hatdawkvah, lathueng lae Cathut koehoi ka coe hane hoi,  
 Athakasaipounge koehoi a parâw e teh bangmaw.
- 3 Tamikathoutnaw raphoe teh,  
 payonpakaina e ka sak e naw rawkphaina e nahoehmaw.
- 4 Ama ni ka lamthung hah a hmu teh,  
 ka khokhnuk pueng hai be a touk nahoehmaw.
- 5 Kalan hoeh e lah ka hring pawiteh, hoeh pawiteh,  
 dumyennae hoi ka khok a hue rang pawiteh,
- 6 Kânging e yawcu khingnae hoi na khing haw,  
 Cathut ni ka lanna e hah a panue thai han.
- 7 Ka pahni ni lamthung phen boipawiteh,  
 ka mit hoi ka hmu e patetlah lungthin ka tawn pawiteh,  
 ka kut dawm ka tamang e kâbet pawiteh,
- 8 Cati na tu sak haw, ayâ louk ni cat naseh,  
 ka a hane be phawng naseh.
- 9 Napui ni ka lungthin na pasawt payon pawiteh,  
 ka imri e takhang arulahoi ka tuet pawiteh,
- 10 ka yu ni ayâ hane cakang phawm naseh.  
 Ayâ ni ipkhai naseh.
- 11 Bangkongtetpawiteh, hot teh kathoute lah awm vaiteh,  
 lawkcengnae koe tâcokhai hanelah  
 kamcu e payonnae lah ao han.
- 12 Bangkongtetpawiteh, raphoe hanelah hmai ni a kak e lah ao han,  
 Ka tawn e abuemlah be kahmat e lah ao han.
- 13 Ka sannu sanpanaw ni kai koe a phuenang awh navah,  
 noutna laipalah kaawm pawiteh,
- 14 BAWIPA a thaw torei teh, kai ni bangmaw ka sak han.  
 Na toun navah bangtelamaw ka pato han.
- 15 Von thung vah kai ka sak e ni,  
 ahnimouh hai sak hoehnamaw,  
 ama ni manu e von thung rei na sak hoehnamaw.
- 16 Karoedengnaw, e a ngaina e hah poe laipalah kaawm pawiteh,  
 lahmaw lung ka pout sak pawiteh,
- 17 naranaw hah canei hane rei laipalah,



- kama dueng ouk ka cat pawiteh,
- 18 Hateiteh, ahni hah ka nawca hoi a na pa patetlah ka okhai,  
anu e von thung hoi lahmai patetlah ka khetyawt toe.
- 19 Tami bangpatet hai hnicu laipalah kadout e hoi,  
tami karoedengnaw kâkhu han ka tawn hoeh e  
ka hmawt boipawiteh,
- 20 A lungthin hoi kai yawhawi na poe hoeh teh,  
ka tumuen hoi phu ka bet sak hoehpawiteh,
- 21 longkha koe e kabawpnae ka hmu toreih teh,  
naranaw taranlahoi ka kut ka dâw pawiteh,
- 22 ka kut heh ka loung dawh hoi kârakhing naseh,  
ka lounghrunaw hah kâkhoe naseh.
- 23 Bangkongtetpawiteh, Cathut koehoi rawkphainae teh,  
kai hanelah taki a tho poung, bangkongtetpawiteh,  
a lentoenae teh ka khang thai mahoe.
- 24 Sui hah ngaihawinae hoi ka sak teh,  
nang teh ka lungmawngnae doeh,  
telah suikathoung koe ka dei boipawiteh,
- 25 ka kut hoi ka tawh e ni moikapap a hmu teh,  
ka tawntanae a len poung dawkvah,  
lunghawinae ka tawn boipawiteh,
- 26 kanî a sei toreih ka pouk teh,  
a angnae hoi ka cet e thapa hah a lawkpui lah ka pouk teh,
- 27 hottelah ka lungthin hah arulahoi a pasawt teh,  
ka pahni ni ka kut pahnuem pawiteh,
- 28 het haiyah lawkcengnae hmuen koe  
phakhai han kamcu e payonnae doeh.  
Bangkongtetpawiteh, lathueng la kaawm e  
Cathut hah pahnawt e lah ao.
- 29 Ka hmuhma e lathueng vah, rawkphainae a pha navah,  
ka lunghawi teh, a lathueng vah kathout e ka hmu navah,  
kai kâoup pawiteh,
- 30 Ka pahni ni yonnae dawh thoseh,  
a hringnae hah thoebo hane kâpoe hanelah  
ka pasoung hoeh e thoseh,
- 31 Lukkareim dawh taminaw ni a teng vah kaawm e  
apimaw von ka hlam e kaawm boi,
- 32 Hateiteh, imyin ni lam vah roe boi hoeh,  
Bangkongtetpawiteh, kahlawng ka cet naw hanelah  
ka im vah tho ouk ka paawng pouh.
- 33 Adam patetlah kâtapoenae hah ka ramuk teh,  
ka payonpakainae hah ka lungtabue thung ka hrawk pawiteh,
- 34 Tamimaya a pap poung dawkvah, ka taki teh  
ka imthungnaw dudamnae ka taki kecu dawkvah,  
duem ka o e hoi alawilah tâco thai hoeh e lah kaawm pawiteh,
- 35 Oe, kapanuekkhaikung buet tabang awm haw pawiteh,  
khenhaw! hetteh kaie kutnout doeh, Athakasaipounge ni,  
na pato haw pawiteh, kai na katarannaw ni  
cauk dawh thut haw pawiteh,
- 36 Ka loung dawh hoi roeroe ka sin vaiteh,  
bawilukhung patetlah ka kâmuk han ei .



- <sup>37</sup> Ka khokhnuknaw pueng hai ama koe ka pâpho han,  
bawi patetlah ama teh ka hnai han ei.
- <sup>38</sup> Ka ram ni kai taranlahoi a hram teh,  
laikawk kongnaw ni cungtalai khui awh pawiteh,
- <sup>39</sup> aphu poe laipalah a pawnaw hah ka ca teh,  
katawnkungnaw hringnae sung sak e lah kaawm boipawiteh,
- <sup>40</sup> hottelalah cang yueng lah pâkhing paw naseh,  
Catun yueng lah phovainaw paw naseh telah a ti,  
Job e lawk a pâpout toe.

## 32

### *Elihu ni Job e a huinaw a oun*

- <sup>1</sup> Job ni amahoima tamikalan a kâti dawkvah, tami kathum touh ni  
Job pathung awh hoehe toe. <sup>2</sup> Hottelalah Barakel e capa Elihu, Buz tami  
Ram catoun Elihu teh pueng hoi a lungkhuek. Cathut hlak amahoima  
tamikalan a kâti dawkvah, Job koe a lungkhuek. <sup>3</sup> Job e a hui kathum  
touh koehai a lungkhuek. Bangkongtetpawiteh, Job hah na payon atipouh  
eiteh, bout pathung nahane panuek awh hoehe. <sup>4</sup> Ahnimouh teh, ama hlak  
vah kacuehnawn lah ao. Elihu ni Job koevah lawk dei hanelah meng a  
ring. <sup>5</sup> Elihu ni hetnaw kathum touh e pahni dawke hoi pathung nahan  
awm hoehe tie hah a panue toreih teh, a lung puenghoi a khuek.
- <sup>6</sup> Hottelalah, Barakel e capa Elihu, Buz tami ni hettelalah a pathung. Kai teh  
kum kanaw teh, nangmouh teh na kumcue poung awh toe. Hatdawkvah,  
na taki awh teh, ka pouknae hai ka dei ngam hoehe.
- <sup>7</sup> Kum ni dei naseh, kum moikapap ni  
lungangnae cangkhai naseh ka ti.
- <sup>8</sup> Hateiteh, tami e thung kaawm e muitha,  
Athakasaipounge kâha hah  
panuethainae kapoekung lah ao.
- <sup>9</sup> Tamikalannaw ni hoe lungangnae awh hoehe  
kum kacuenaw ni lannae hoe panuethainae awh hoehe.
- <sup>10</sup> Hatdawkvah, na thai pouh awh haw,  
kai ni hai ka pouknae ka pâpho han.
- <sup>11</sup> Khenhaw! na lawknaw hah ka thai teh,  
dei hanelah ao telah na pouk lahun nah  
na panuesaknae hah ka panue toe.
- <sup>12</sup> Kahawicalah na thai pouh haw  
lawk ka pathung thai e  
Job e a lung pan ka cai sak e, nangmouh thung dawke  
buet touh hai na awh awh hoehe maw.
- <sup>13</sup> Lungangnae ka hmu toe, tami nahoehe niteh,  
Cathut ni ama teh a tâ han na tet awh payon vaih.
- <sup>14</sup> A lawknaw ni rep na tâdue hoehe  
nangmae lawk patetlah ahni teh bout ka pathung mahoehe.
- <sup>15</sup> A lung a pout awh teh, pathung awh hoehe toe,  
lawkkamuem ao awh toe.
- <sup>16</sup> Lawk a dei awh hoehe tounge dawkvah,  
ka ring rah, bangkongtetpawiteh,  
pathung tounge laipalah duem a kangdue awh.
- <sup>17</sup> Kai ni hai kama hane ka pathung van han,



ka pouknae teh ka pâpho van han.

- 18 Bangkongtetpawiteh, lawk hoi ka kawi teh,  
ka thung e muitha ni dei hoeh laipalah,  
na awm sak thai hoeh.
- 19 Ka thung lae hah misurtui tâconae  
kâko kaawm hoeh e patetlah ao.  
Misurtui um katha patetlah kâbawng hane coungkacoe ao toe.
- 20 Ka kâha a tâco thai nahanelah, lawk ka dei han,  
Ka pahni roeroe ka ang vaiteh ka pathung han.
- 21 Apipi nakunghai, kapeknae kamnue sak hoeh nahanlah  
tami bangpatet hai ka oup hoeh nahanlah ka ratoum.
- 22 Bangkongtetpawiteh, tami oupnae hah ka thoun hoeh,  
telah nahoe pawiteh, kasakkung ni  
palang na lat payon vaih.

### 33

#### *Elihu ni Job a oun*

- 1 Hateiteh Job, pahren lahoi ka dei e heh na thai pouh haw,  
ka lawk ka dei e heh na ngai pouh haw.
- 2 Atu ka pahni ka ang teh,  
ka pahni dawh hoi ka lai ni lawk a dei.
- 3 Ka lawknae heh kalan e ka lungthung hoi a tâco teh,  
ka pahni ni kathoung panuena a pâpho.
- 4 Cathut e Muitha ni na sak teh,  
Athakasaipoung kâha ni hringnae na poe.
- 5 Na pathung thai pawiteh na pathung haw,  
ka hmalah na lawk hah bout kâpouk haw.
- 6 Atangcalah tetpawiteh, kai teh Cathut hmalah lawk ka dei pouh e lah ka  
o,  
kai hai vaiphu hoi sak e lah ka o van.
- 7 Kai dawh kaawm hoeh e takinae ni na takisak roeroe han,  
nahoe pawiteh, ka kut heh na tak dawh ri poung mahoe.
- 8 Ka hnâthainae dawh na dei toun dawkvah,  
na lawk teh ka thai toe.
- 9 Na lawk ka ek hoeh dawkvah ka thoun,  
Yonnae ka tawn hoeh, payonpakainae kai dawh awm hoeh.
- 10 Hatei, kai taran nahane atueng kahawi a hmu teh,  
a taran patetlah na pouk.
- 11 Ka khok hah hlong na buet teh,  
ka lamthung pueng hah a khet na ti.
- 12 Khenhaw! hivah nang teh na lan hoeh, na pathung han,  
bangkongtetpawiteh, Cathut teh tami hlak a len.
- 13 Ama ni a lawk bangpatethai noutna mahoe telah,  
bangkongmaw ama hah na pathoe.
- 14 Bangkongtetpawiteh, Cathut ni lam alouklah hoi lawk a dei thai,  
hatei, tami ni hmawt panuek hoeh.
- 15 Karum a i navah vision dawh mat ka ip e,  
ikhun dawh a i lahun nah,
- 16 Tami e hnâkâko hah a ang sak teh,  
amae cangkhae hah a cak sak.
- 17 A sak e thung dawh hoi tami a ban teh,



- a kâoupnae dawk hoi hro lah ao thai nahanelah,  
<sup>18</sup> a hringnae hah tangkom thung hoi a kountouk teh,  
 tahloi hoi duenae thung hoi a hringnae a rungngang.  
<sup>19</sup> Tami teh a ikhun dawk patawnae hoi a yue teh,  
 a hrinaw hah puenghoi patawnae hoi a pataw sak.  
<sup>20</sup> Hottelah a hringnae ni rawca a panuet teh,  
 katuipounge rawca hai a hringnae ni a panuet.  
<sup>21</sup> A takthai a kamsoe teh,  
 kamnuek boihoe e a hrinaw hah a kamnue.  
<sup>22</sup> A hringnae ni tangkom hah a hnai teh,  
 a hringnae ni kathetkung hah hoehe a hnai.  
<sup>23</sup> Ahni hanelah laiceinaw awm boipawiteh,  
 kâponae kasakkung 1000 thung dawk tami buet tabang awm pawiteh,  
 tami ni amae lannae hah a hmu sak thai nahanelah.  
<sup>24</sup> Ama ni tami hah a pahren teh,  
 tangkom thung bonae koehoi ama teh a rungngang han,  
 ratangnae buet touh ka hmu toe telah a ti.  
<sup>25</sup> A takthai teh camo e takthai patetlah bout ao vaiteh,  
 a nawcanae patetlah bout ao han.  
<sup>26</sup> Cathut koevah a ratoum vaiteh, ama teh a lathueng vah a lunghawi han,  
 a minhmai hah lunghawi hoi a hmu han,  
 bangkongtetpawiteh, ama ni tami teh a lannae hoi bout a ban sak.  
<sup>27</sup> A huikonaw a khet teh ka yon toe,  
 tamikalan hah ka rawp sak toe,  
 hot teh kai hanelah banghai cungekinae awmhoe telah a ti.  
<sup>28</sup> Tangkom thung e a hringnae hah a ratang vaiteh,  
 a hringnae ni angnae a hmu han.  
<sup>29</sup> Khenhaw! Cathut ni hete hnopueng heh,  
 vai hni, atangcalah vai thum totouh tami koe a sak.  
<sup>30</sup> Hringnae angnae ni a ma hah a tue thai nahanelah,  
 a hringnae tangkom thung hoi a tâco sak.  
<sup>31</sup> Na hnâpakeng nateh, Job na thai pouh haw,  
 duem awm haw ka dei han.  
<sup>32</sup> Dei hanelah na tawn pawiteh, na pathung haw, dei haw,  
 bangkongtetpawiteh, yon ngaithoum hane na ngaikhai poun.  
<sup>33</sup> Telah nahoe pawiteh, na thai pouh haw,  
 duem awm haw, lungangnae na dei pouh han.

## 34

### *Elihu ni Cathut lannae a pâpho*

- <sup>1</sup> Elihu ni rekrek a pathung teh,  
<sup>2</sup> Nangmouh a lungkaangnaw ka lawk heh thai awh,  
 Nangmouh panuenae katawnnaw, na hnâpakeng awh.  
<sup>3</sup> Bangkongtetpawiteh, ka kâko ni rawca atuinae a patek e patetlah,  
 hnâ ni lawk hah a tanouk van.  
<sup>4</sup> Maimouh roeroe ni lannae teh, kêrawi awh haw sei.  
 Ahawinae hah bangmaw tie hah maimae thung hoi panuek awh haw  
 sei.  
<sup>5</sup> Bangkongtetpawiteh, Job ni kai teh ka lan,  
 hateiteh, Cathut ni ka lannae a la  
<sup>6</sup> Ka lannae e kong dawk ka laithoe han na maw,



- kâtapoenae ka tawn hoeh nakunghai ka hmâ teh,  
 ka dam thai hoeh e doeh toe, telah a ti.
- 7 Panuikhainae hah tui patetlah ka net e,  
 Job patetlah apimaw kaawm.
- 8 Payonnae kasaknaw hoi kamyawng e,  
 tamikathoutnaw hoi ka cet e apimaw kaawm.
- 9 Bangkongtetpawiteh, Cathut koe lunghawi e heh,  
 tami ni banghai hawinae awm hoeh telah ati toe
- 10 Hatdawkvah, panuethainae katawnnaw na thai pouh haw,  
 kathoute ka sak e teh, Cathut hanelah roeroe coung thai hoeh,  
 yonnae ka sak e teh, Athakasaipounge hanelah khoeroe coung thai  
 hoeh.
- 11 Bangkongtetpawiteh, tami hah a sak e patetlah ama ni a patho han,  
 tami pueng a tawksak e hoi kamcu lah tawkpheu kamcu lah a poe han.
- 12 Cathut ni kahawihoehe poung lah sak mahoehe,  
 nahoehe pawiteh, Athakasaipounge ni lannae teh,  
 khoeroe kamlang takhai mahoehe.
- 13 Apinimaw ama teh talai e thaw a poe,  
 talai van pueng heh apinimaw ama a uk sak.
- 14 Ama ni tami teh a ngainae awm hoeh pawiteh,  
 kai e hringnae kâha hah lat boipawiteh,
- 15 Takthai pueng reirei a kahma han  
 tami teh vaipheu lah bout a ban han.
- 16 Thaipanueknae na tawn awh pawiteh, Kâlawk pawlawk heh thai awh  
 haw.
- 17 Lannae ka hmuhma e ni a uk han namaw,  
 Kalan ni teh athakaawme hah, yon na pen thai namaw.
- 18 Nang teh banghai cungkeinae na awm hoeh telah, siangpahrang koe dei  
 pouh han.
- 19 Hateiteh, ahni ni bawi hai kapeknae tawn hoeh,  
 Tami tangreng hoi roedeng hoi kapeknae ka tawn hoeh e doeh.  
 Bangkongtetpawiteh, abuemlahoi amae kutsaknaw doeh.
- 20 Karumsaning tawkkadek a due awh teh,  
 taminaw pueng hah a kâhuet awh teh, kounge a kahma awh,  
 tami athakaawme hai tami e kut laipalah be kahmat lah a la pouh.
- 21 Bangkongtetpawiteh, a mit teh tami e lamthung dawk ao teh,  
 a khoktakan puenghai be a hmu,
- 22 Yonnae kasaknaw, amamouh kâhro nahane hmuen awmhoeh,  
 duenae tâhlep hai awm hoeh.
- 23 Bangkongtetpawiteh, Cathut e hmalah lawkceng hane cei hanelah,  
 tami e kong bout pouk hane ama ni panki hoeh.
- 24 A kung rek kheh ngai laipalah athakaawme taminaw hah kounge a  
 tâtueng han,  
 ahnimae hmuen dawk tami alouke o nahanelah ka poe han.
- 25 Hatdawkvah, ahnimouh ni a sak e pueng hah a panue teh,  
 karum vah ama ni a tâkhawng teh kounge a kâbawng.
- 26 Tami ni a hmu thai e hmuen koe,  
 tamikathoutnaw patetlah a hem awh.
- 27 Bangkongtetpawiteh, ama hah a kamlang takhai awh,  
 a lamthung hah pouk raw pouk awh hoeh.
- 28 Hottelah karoedengnaw e lawk hah a hmalah a pha,  
 Bangkongtetpawiteh rektapnaw e lawk hah a ma ni a thai.



- 29 BAWIPA ni roumnae a poe torei teh, apinimaw rucatnae a poe thai han,  
a minhmai a hro torei teh, apinimaw a hmu thai han,  
miphun buet touh taranlahoi thoseh, tami buet touh taranlahoi thoseh,
- 30 Tamikahawihoe e ni a uk hoe h nahanlah,  
telah nahoe pawiteh, tami pueng koug kaithi payon han.
- 31 Tami ni Cathut koehoi tounnae ka hmu toe.  
Kai teh hawihoe hnae ka sak mahoe toe.
- 32 Ka hmu hoe e hah na cangkhai haw, Payonnae hah ka sakpayon  
pawiteh, bout ka sak mahoe toe.
- 33 Na lawkkamnae na pahnawt dawkvah, na sak e boiboelah na pathung  
han na maw.  
Kai ni na hoe h, nang ni roeroe na kârawi han.  
Hatdawkvah, na panue e hah dei h.
- 34 Panue thinae katawnnaw hoi,  
ka lawk ka thai e lungkaangnaw ni kai koe vah,
- 35 Job ni panuenae tawn laipalah lawk hah a dei,  
a lawk hah lungangnae kaawm hoe e naw doeh telah a dei awh.
- 36 Oe Job heh a pout totouh tanouknae lah awm yawkaw naseh,  
bangkongtetpawiteh, lawk pathungnae hah tamikathoutnaw lawk  
pathungnae patetlah ao.
- 37 Bangkongtetpawiteh, a yonnae daw k taranthawnae a thap sin,  
maimouh koevah, kut tambei teh,  
Cathut taranlahoi lawk a pap telah a ti.

## 35

- 1 Hahoi Elihu ni a pathung e teh,
- 2 Heteheh, a lan telah na pouk maw,  
Cathut lannae hlak ka lan telah na dei maw.
- 3 Bangkongtetpawiteh, ka yonnae hah pap boipawiteh,  
hot teh, nang hanelah bangmaw a hawinae, meknae hoe ka hmu telah  
na ti.
- 4 Nama koe kaawm e naw hoi na pathung han.
- 5 Kalvan lah moug nateh khenhaw! khenhaw!  
nang hlak hoe ka rasang e tâmainaw hah,
- 6 Yonnae na sak pawiteh, ama taranlahoi bangmaw hoe na kuepcing sak,  
nahoe pawiteh kâtapoenae hah pap pawiteh, ama hanelah bang-  
maw na sak,
- 7 Tamikalan lah na awm pawiteh, ama hah bangmaw na poe,  
Nahoe pawiteh, ama ni na kut daw hoi bangmaw a hmu.
- 8 Na hawihoe hnae ni nang patetlah kaawm e tami hah a ratet,  
na lannae ni tami capa buet touh a ratet.
- 9 Hnephnap e a pap kecu dawkvah a hramki awh,  
athakaawme taminaw e rektapnae kecu dawkvah,  
kabawpnae a panki hoi a hram awh.
- 10 Hateiteh, apinihai nâ maw kasakkung Cathut,  
karum lah la sak han ka poe e hah ao telah dei awh hoe h.
- 11 Talai e sarang hlak hai apinimaw na cangkhai awh.  
Kalvan e tava hlak lung na ang sak awh.
- 12 Tamikathoutnaw a kâoup kecu daw k,  
hawvah a hram awh ei, pathung awh hoe h.
- 13 Banghai bang hoe e lawk hah Cathut ni khoeroe thai mahoe h,  
Athakasaipounge, ni hai banglahai noutna mahoe h.



- 14 Ama teh na hmawt hoeh telah na dei nakunghai,  
amae hmalah lannae ao teh, ama teh na ring raw na ring han.
- 15 Bangkongtetpawiteh, atuvah a lungkhueknae dawk hoi na rek hoeh  
niteh,  
pathunae hnonaw pueng hah pâkuem hoeh.
- 16 Hatdawkvah, Job ni a khuekhaw awm laipalah,  
a pahni a ang teh, panuenae laipalah lawk a pap sak.

## 36

### *Elihu ni Cathut hawinae a pâpho*

- 1 Elihu ni hettelah bout a dei,
- 2 Na ngaithoum awh ei,  
na hmusak awh han rah.  
Cathut yueng lah lawk dei hane ka tawn rah.
- 3 Ka panuenae hah ahlanae koe e ka la han rah,  
lannae hah kasakkung koe kamnue sak han.
- 4 Bangkongtetpawiteh, ka lawknaw heh yawmyin lah khoeroe ao hoeh  
dawkvah,  
panuenae kuep katawnkung teh nang koe ao.
- 5 Khenhaw! Cathut teh a thasai eiteh, apihai dudam hoeh.  
Ama teh athao teh thonae thaipanueknae hoi a kawi
- 6 Tamikathoutnaw hah pâhlung hoeh.  
Hateiteh, hnepnap e naw hah lannae a poe.
- 7 Tamikalan teh khien laipalah awm hoeh,  
hateiteh, siangpahrang hah bawitungkhang dawk yungyoe hanelah a  
tahung sak teh,  
ahnimouh teh tawmrasang e lah ao awh.
- 8 Puenghoi kacaklah katek e lah o awh teh,  
rucat khangnae rui hoi katek e lah awm boipawiteh,
- 9 Kâtapoenae hoi a sak e hah  
lungpata lahoi sakyoenae hoi a kamnue sak.
- 10 Cangkhainae koelah hna a ang sak teh,  
yonnae dawk hoi bout a ban nahane kâ a poe.
- 11 Lawkngai laihoi amae thaw taw awh pawiteh,  
hnpai tawnta e dawk nawm awh vaiteh,  
hnin, thapa, kum naw hah lunghawinae hoi a loun sak han.
- 12 Hateiteh, lawkngai awh hoeh pawiteh,  
tahloi hoi kahmat ka ta awh vaiteh,  
panuenae tawn laipalah due awh han.
- 13 Hateiteh, tamikathout e lungthin ni lungkhueknae a pâtung teh,  
ama ni a katek toreih teh, kabawpnae hei hanelah hram awh hoeh.
- 14 A nawca nah a due awh teh,  
a hringnae hah tami kahawihoehnaw hoi rei a pout.
- 15 Ama ni tami ka roedeng hah reithainae thung hoi a hlout sak.  
Hnephnapnaw hno lahoi a hnâ a ang sak.
- 16 Takithopoung e kângairunae thung hoi ama ni a hlout sak han.  
Khorikaawm hoeh e, hmuen kakawpoung koe,  
tawntanae dawka kâenkhai han,  
na caboi teh tawntanae hoi kawi vaiteh a poum sak han.
- 17 Hateiteh, tamikathoutnaw ni hmu han kamcu e lawkcengnae hoi,



- na kâvan teh, lawkcengnae hoi lannae ni na kuet.
- 18 Lungkhueknae ao dawkvah, kâhruetcueth.  
Nahoeh pawiteh, vai touh hemnae dawk ama ni na cetkhai payon vaih.  
Bangkongtetpawiteh, ratangnae kalen poungh ni na hlout nahane na kabawm mahoe.
- 19 Na tawntanae hoi na thaonae, na bahu onae pueng ni,  
na kângairunae dawh hoi na hlout sak han na maw.
- 20 Karum hah kâuepkhai hanh.  
Taminaw karum dawh kahmanae tueng lah ao.
- 21 Yonnae dawkvah kamlang hoe hah nahanlah kâhruetcueth,  
bangkongtetpawiteh, reithai khangnae hlak hai na kârawi e lah ao.
- 22 Khenhaw! Cathut teh hnotithainae dawh hoi tawmrasang e lah ao.  
Apinimaw ama patetlah a cangkhai boi.
- 23 Apinimaw a lamthung hah a poukkhai boi.  
Apinimaw na sak e hah na payon telah atipouh boi.
- 24 A tawh e thaw hah len sak hanelah pahnim hanh,  
tami ni la lah a sak awh e hah.
- 25 Tami pueng ni a hmu awh teh, tami ni ahlanae koehoi a radoung awh.
- 26 Khenhaw! Cathut teh a lentoe poungh,  
maimouh ni panuek thai awh hoe.
- 27 Bangkongtetpawiteh, tui ka ca e naw hah,  
a lathueng lah a sawn teh, tuikahu kaawm e patetlah kho a rak sak.
- 28 Hote tâmai dawh hoi a rak sak teh,  
tami e lathueng vah, kho a nan sak.
- 29 Tâmai ka tabawh e hoi ama ni a lathueng vah a ramuk e khoparitnaw  
hah,  
apinimaw a panue thai han.
- 30 Khenhaw! a lathueng vah a angnae pheng a tue sak teh,  
kadung poungh e tuipuinaw hah pheng a ramuk.
- 31 Bangkongtetpawiteh, hete hnonaw lahoi, tami hah lawh a ceng teh,  
rawca koungh kakhoutlah a poe.
- 32 Na kut hah sumpapalik hoi a ramuk teh,  
ka hanelah kâ a poe.
- 33 Khoparit e ni a kamnue sak teh,  
saringnaw ni hai tûilî a thonae hah a kamnue sak.

### 37

- 1 Hete hnonaw ni hai ka lungthin a pâyaw sak teh,  
lung paluekpaluek ati sak.
- 2 Khoparit pawlawh hah kahawicalah thai haw,  
a pahni dawh hoi ka tâcawt e ka cairing e naw hah.
- 3 Kalvan rahim pueng a tha teh,  
a angnae teh talai apout touh.
- 4 Hahoi lawh a tâco teh, a lentoenae lawh hah a kampaw sak.  
A lawh a thai awh nakunghai kâhat sak hoe.
- 5 Cathut ni kângairunae hoi a lawh a kampaw sak,  
a lentoenae hno panue thai awh hoe e hah a sak.
- 6 Bangkongtetpawiteh, tadamtui koe vah, talai dawh bawt haw telah ati.  
Hot patetlah, athaonae hoi khorak kayoun hoi khorak kapap koehai a  
dei pouh.



- 7 Tami pueng ni a sak e a panue awh thai nahanelah,  
 tami pueng e kut hah mitnout a ta pouh.  
 8 Moithangnaw ni lungngoum thung a kâen awh teh,  
 a onae hmuen dawk lengkaleng ao awh.  
 9 Aka lahoi bongparui a tâco teh,  
 Atunglah hoi kahlî pâding a tâco.  
 10 Cathut e a kâha ni tui a kamkak sak teh,  
 kakawpoung lah kâkadai e tui hah a kamkak sak.  
 11 Tâmai dawk hoi kho a rak sak teh,  
 a raeng hoi tâmai a kâhin sak.  
 12 Talaivan pueng dawkvah kâ a poe e naw pueng hah a sak awh  
 nahanelah,  
 amae hrawinae dawk hoi a kamlang awh teh, meng a ban awh.  
 13 Hring tounnae dawk thoseh, a ram hane dawk thoseh,  
 a lungmanae dawk thoseh, ao sak e doeh.  
 14 Oe Job, hetheh thai haw, duem awm nateh, kangdout haw.  
 Kângairu Cathut ni a sak e hah pouk haw.  
 15 Cathut ni ka ang e tâmai hah ang hanelah,  
 nâtuék vaimoe a patoun tie hah na panue maw.  
 16 Tâmai a tawmnae hoi panuenae kakueplah ka tawn e ni,  
 a sak e kângairunae hah na panue maw.  
 17 Bangdawkmaw na hnicunaw a phubet teh,  
 nâtuék maw akalae kahlî ni talai a pâding sak.  
 18 Hlun e rahum hlalang patetlah  
 a tha ka sai e kalvan hah ama hoi reirei na phai roi boimaw.  
 19 Ama koe dei awh hanelah na cangkhai awh haw,  
 bangkongtetpawiteh, hmonae kecu dawk,  
 banghai kârakueng thai awh hoeh.  
 20 Dei han ka ngai telah, ama koe dei hane na maw.  
 Tami buetbuet touh dei sak boipawiteh, a payon roeroe han.  
 21 Kahlî a tho teh kalvan hah pin a kâhin sak toreî teh,  
 tami ni a angnae hah khen thai hoeh.  
 22 Atung lahoi sui raimonae patetlah a tâco teh,  
 Cathut hoi takitho taluenae lah ao.  
 23 Athakasaipounge, teh hmawt thai hoeh.  
 Ama teh ahlawilah hnotithainae a tawn teh,  
 a lannae hoi lawkcengnae dawk hnephnapnae awm hoeh.  
 24 Hatdawkvah, ama teh tami ni a taki awh.  
 A lungkaang e taminaw koe hai,  
 kapeknae tawn hoeh telah ati.

## 38

### *BAWIPA ni Job pathunae a kamnue sak*

- 1 Hottelah BAWIPA ni Job hah bongparui thung hoi a pathung teh,  
 2 Panuenae laipalah e lawk hoi,  
 khokhangnae kahmawtsakkung teh apimaw.  
 3 Atuvah tongpatang lah namahoima kârakueng haw,  
 lawk na pacei vaiteh na pathung haw.  
 4 Talai ka kamtawng nah nâmaw na o,



- na thai panuek pawiteh na dei pouh haw.  
5 Apinimaw bangnue nae a panue thai,  
na panue thai na maw.  
Apinimaw bangnue nae a rui hah a lathueng lah a payang.  
6 Apinimaw adu hah a ung teh  
bang ni maw adu hah a casak.  
7 Tempalo âsinaw hah cungtalah la a sak awh navah,  
Cathut e capanaw teh lunghawi hoi hram awh hoeh maw.  
8 Talinaw teh thun thung hoi a tâco navah,  
apinimaw tho a khan sin.  
9 A hnicu hanelah tâmai ka sak pouh teh,  
a kâkhu hanelah hni lah katha poug e hmonae,  
10 a langri ka khuen pouh teh,  
tho tarennae ka hruek pouh.  
11 Hi totouh na tho vaiteh, a hloilah na tapuet mahoe.  
Hivah na kâoupnae hoi tuicapa hah pout naseh telah ka ti.  
12 Talai a pout totouh a kuet teh,  
tamikathoutnaw peng a tâco thai nahanelah.  
13 Na tâco tahma hoi amom heh kâ na poe teh,  
a tâconae hmuen na panue sak boimaw.  
14 Mitnoutnae rahim vah talai patetlah meilam a sin teh,  
hnicu patetlah a kangdue sak.  
15 Tamikathoutnaw koehoi angnae hah a la pouh teh,  
a dâw e kut hah a khoe pouh.  
16 Tuipui a tâconae dawk a kâen boimaw.  
Adungnae bangnue hanelah koug na rip toun maw.  
17 Duenae takhang hah nang koe a kamnue sak toun maw.  
Nahoeh pawiteh, duenae tâhlip takhang hai na hmu boimaw.  
18 Talai akawnae naw heh be na panue maw.  
Hetnaw pueng he na panuek pawiteh, na dei pouh haw.  
19 Nâ lah maw angnae, khosaknae lamthung ao.  
Hmonae a hmuen hai nâ lah maw ao.  
20 Hot teh khori dawk na hravi thai teh,  
a lamthung hah na panue thai nahanelah.  
21 Hatnae tueng dawk na tâco teh,  
nage hnin hah apap poug dawkvah,  
hot teh na panue ngoun vaiyaw.  
22 Tadamtui pâtungnae hmuen koe na kâen toun maw.  
Roun kamtungnae hmuen te na hmu thoun maw.  
23 Rucatnae atueng hanelah ka ta e hoi  
tarankâtuk nahane hnin hanelah ka ta e doeh.  
24 Nâ lae lamthung hoi maw angnae ni pheng a tue teh,  
talai van vah kanîtholah kahlîlaw a kâkahei.  
25 Tui ka poum e a lawngnae ravo hoi,  
keitat lamthung hah apinimaw a sak.  
26 Apihai a ohoehnae ram hoi  
apihai a ohoehnae kahrawngum dawk khorak sak hane hoi,  
27 King ka di e talai ni kanaw e phovai a dawnnaw tâco sak hanelah,  
ka poum e khotui a lawngnae lamthung,  
khôparit hoi sumpapalik lamthung apinimaw a kamawng sak.  
28 Khotui ni a na pa a tawn maw.



- Tadamtui ka bawt e hah apinimaw a khe.  
 29 Apie von dawk hoi maw tui kamkak a tâco.  
 Kalvan hoi ka bawt e tadamtui hah apini a khe e na maw.  
 30 Tui hah talung patetlah a te sak teh,  
 tui adungnae hai be kamkak.  
 31 Baritca hah na pâkhueng thai teh,  
 kangduetaphai rui hah na rathap thai maw.  
 32 Mazzaroth hah amae tueng nah na tâco sak thai maw.  
 Latum teh a canaw hoi na ceikhai thai maw.  
 33 Kalvan e caksak e naw hah na panue teh,  
 talai heh na uk sak thai maw.  
 34 Kho pueng hoi ka sak e ni na ramuk thai nahanelah,  
 tâmai totouh na lawk na cai sak thai maw.  
 35 Sumpapalik e hah nang koe a tho teh,  
 hivah ka o telah nang koe dei hanelah na patoun thai maw.  
 36 Apinimaw pouknae dawk lungangnae a poe.  
 Apinimaw lungthin hah panuethainae a poe.  
 37 Apinimaw lungangnae hoi tâmai a touk thai han.  
 Apinimaw kalvan e tuium rabawk thai han.  
 38 Vaiphu hah a te sak teh,  
 tangdong dawk buet touh lah a kâbet toteh,  
 39 a kâkhu dawk hoi a pawp teh,  
 kei hanlah a pawp lahun nah,  
 40 Sendek hane rawca tawng pouh hane  
 sendektanacanaw kaboumlah paca thai maw.  
 41 Vongacanaw vonhnam hoi a kâva teh, Cathut koe a hram awh toteh,  
 apinimaw rawca a poe.

### 39

- 1 Mon dawk e Atha ca khenae tueng hah na panue maw,  
 Sayuk ca khenae tueng te na pâkuem thai maw.  
 2 Thapa nâyittouh maw a vawn tie hah na panue thai maw,  
 a khenae tueng te na panue thai maw.  
 3 A tabo awh teh a ca a khe,  
 a canaw teh a pâ sak.  
 4 A canaw hah a dam awh teh kahrawngum a rounng awh.  
 A tha ao awh.  
 5 Kahrawng e lanaw hah apinimaw a ngai patetlah a pâ sak.  
 Kahrawng e la penna rui apinimaw a rasu.  
 6 Kahrawng hah apie im lah maw ka sak teh,  
 kahrawngum hah api khosak nahanelah maw ka sak.  
 7 Runae ka kâhmo e khopui a dudam teh,  
 kahrekkungnaw e hramnae lawk hah noutna pouh hoeh.  
 8 Mon teh a pawngpanae lah ao teh,  
 hram kanaw hah a tawng awh.  
 9 Savitan ni nange thaw a tawng ngai han na maw,  
 na saring im dawk a roe ngai han na maw.  
 10 Savitan hah a lahuen dawk laikaww kanawknae laphu hah na thueng  
 thai han na maw.  
 Na hnuk lae tangkom a paten ngai han na maw.  
 11 A thao poung dawkvah na kâuepkhai maw.



- Na thaw hah ahni dawk na patue thai han na maw.
- <sup>12</sup> Na cakang hah im lah a phu hane hoi,  
cangkatinnae koe cabong pâkhueng sak hanelah,  
na kâuepkhai thai maw.
- <sup>13</sup> Kalauk vâ ni a rathei hah a kâoup nalaihoi ouk a kamphuet,  
hatei a rathei hai a muennaw ni lungmanae a tawn maw.
- <sup>14</sup> Bangkongtetpawiteh, talai dawk a tadui a ceitakhai teh,  
vaiphu dawk a phu a bet sak.
- <sup>15</sup> Tami ni rakkâbawng lah a coungroe thai,  
moithangnaw ni a kâbawng sak thai tie hah panuek hoeh toe.
- <sup>16</sup> A canaw hah a ca hoeh e patetlah puenghoi a rek teh,  
a thaw tawk e a hrawnghrang lah ao e hah bang lahai pouk hoeh.
- <sup>17</sup> Bangkongtetpawiteh, Cathut ni lungangnae a lawp teh,  
thoumthainae hoi pathoup hoeh.
- <sup>18</sup> A rasangnae koe amahoima a kâtawm toteh,  
marang hoi marang dawk kâcui e hah a dudam.
- <sup>19</sup> Marang thaonae hah na poe e na maw,  
a lahuen dawk khoparit hoi na pathoup boimaw.
- <sup>20</sup> Samtong patetlah na pakhi thai maw,  
ahnie hnawng dawk hoi kacaie lawk teh taki a tho.
- <sup>21</sup> Tanghling hah a khok hoi a kaphai teh, a thaonae dawkvah a nawm,  
tarankâtuknae puengcang thung vah karang poung lah a yawng.
- <sup>22</sup> Takithopoung e hah a panuikhai teh, lungpuennae awm boihoeh.  
Hoehpawiteh, tahloi taki hoi ban boihoeh.
- <sup>23</sup> A lathueng vah palabom hah poe a kâroe teh, pala hoi tahroe hah poe  
a kâhlai.
- <sup>24</sup> Takitho e hoi lungkhuek nah laihoi, mongka lawk ni hai kacakcalah  
kangdout sak thai hoeh.
- <sup>25</sup> Mongka lawk a cai torei teh, awhaw! telah a ti.  
Taran kâtuknae hah ahlanae koehoi a hmui lah a thai.  
Kahrawikungnaw a hramnae lawk hoi târuetâho lawk a thai.
- <sup>26</sup> Cangkhainae lahoi mataw ni a rathei a kadai teh,  
akalah a kamleng thai maw.
- <sup>27</sup> Karasangpoung lah a kamleng teh,  
karasangpoung lah tabu a tuk e hah,  
nang ni kâ na poe e namaw.
- <sup>28</sup> Lungha dawk kho a sak teh,  
karasang e lungha kânguenae rapanim koe ouk a roe.
- <sup>29</sup> Haw hoi a ca hane hah a tuet teh,  
a mit ni ahla poungnae koe e hai a hmu thai.
- <sup>30</sup> A canaw ni thi ouk a du awh teh,  
kadout e moikong onae pueng koe ao awh.

## 40

- <sup>1</sup> Hahoi BAWIPA ni lawk a pathung teh,
- <sup>2</sup> Athakasaipounge, hoi lawk ka oun e ni ama teh a yue han na maw,  
Cathut ma ni pathung yawkaw seh khe, telah atipouh.
- Job ni Cathut a pathungnae*
- <sup>3</sup> Job ni BAWIPA hah a pathung teh,



- <sup>4</sup> Khenhaw! kai teh banghai cungkeihoehe lah ka o,  
 bangtelamaw ka pathung han,  
 ka pahni teh ka tabuem toe.
- <sup>5</sup> Vai touh ka dei tOUNg dawkvah, ka pathung mahoehe toe.  
 Vai hni touh e teh bout ka dei mahoehe toe telah a ti.

*Cathut ni Job rek a pathung*

<sup>6</sup> Hottelah Cathut ni Job hah bongparui thung hoi a pathung teh hettelah a dei:

- <sup>7</sup> Atuvah tongpatang lah cOUNgkacoe awmh.  
 Lawk na pacei vaiteh na pathung han.
- <sup>8</sup> Ka lawkcengnae hah na pathung katang han maw,  
 na yon hoehe nahanlah yon na pen han maw.
- <sup>9</sup> Cathut patetlah kut na tawn maw,  
 ama patetlah pawlawk na cai sak thai maw.
- <sup>10</sup> Taluena hoi raimona hah kamthoup haw,  
 bawilenna hoi na meihawinae kamthoup.
- <sup>11</sup> Na lungkhueknae e hah tâcawt sak haw,  
 Kâoup e pueng hah khen nateh pabawt haw.
- <sup>12</sup> Kâoup e pueng hah khen nateh rahnoum sak haw,  
 tamikathoutnaw hah a onae hmuen dawkvah repcOUNgroe sin awh.
- <sup>13</sup> Vaiphu dawkvah cungtalang be hrawk awh,  
 kâhrawk e hmonae hoi a minhmai hah ramuk awh.
- <sup>14</sup> Hottelah aranglae na kut ni na rungngang thai e hah,  
 kai ni hai ka pâpho han.
- <sup>15</sup> Khenhaw! nama patetlah ka sak e Behemoth heh  
 maitotan patetlah pho kahring a ca van.
- <sup>16</sup> A keng dawkvah e thaona hoi a vonpui dawkvah e  
 tharui hnotithaina hah khenhaw!
- <sup>17</sup> A mai teh sidar thing patetlah a kâroe sak teh,  
 a phai dawkvah e tharuinaw teh a bawkvah bawkvah lah ao.
- <sup>18</sup> A hrUNaw teh rahum khom patetlah ao teh, a nâhru teh sum khom  
 patetlah ao.
- <sup>19</sup> Cathut e lamthung dawkvah hoi ahni te pasuek e lah a o,  
 ahni dueng doehe kasakkung ni tahloi hoi kâhnai sak e lah ao.
- <sup>20</sup> Monnaw ni ca hane a tâco sak,  
 hawkvah moithangnaw pueng ni a pai awh.
- <sup>21</sup> Lotus thingkung rahim vah a tabo teh,  
 lungpum rahim hoi tuinawkvah hai ouk ao.
- <sup>22</sup> Lotus thingkung tâhlip ni a ngue awh,  
 palang rai e sumpakungnaw ni a kalup.
- <sup>23</sup> palang tui teh a len thai,  
 hateiteh banglah noutna hoehe,  
 apâhni totouh Jordan tui kalen nakunghai a lungmawng.
- <sup>24</sup> A mit hoi a khet lahun nah,  
 naphai do thai han namaw.

## 41

- <sup>1</sup> Leviathan hah hradang hoi alawilah pawkvah na sawn thai han namaw,  
 rui hoi a lai hah a kam dawkvah na kawm thai maw.
- <sup>2</sup> A hnawng dawkvah hnâpacap na pacap sak teh,



- Tamboung dawk laikaw na buen sak han na maw.
- 3 Nang koe ka hei vaiteh,  
lawk kanemca hoi lawk a dei han na maw.
- 4 Nang hoi lawkkamnae sak vaiteh,  
yungyoe okhai hanelah na la thai han na maw.
- 5 Tavaca patetlah ahni hoi reirei na pai han na maw.  
Nama e yu lah la hanelah, na pâkhi thai han na maw.
- 6 Na huikonaw ni ama hoi buvennae hah a sak vaiteh,  
hno kayawtnaw koe, ama teh a rei awh han namaw.
- 7 Tahroe donghmo hah a vuen dawk a kawi sak vaiteh,  
tanga kamannaw hah tahroe hoi a lû dawk a kawi sak thai na-  
hoehmaw.
- 8 A lathueng vah a kut toung nateh, tarantuknae hah pahnim hoeh,  
khoeroe bout sak hanh lawi.
- 9 Ama tâ hane ngaihawinae hah a hrawnghrang doeh,  
a mithmu vah a tâ thai hoeh e ao han namaw.
- 10 Ama lungtho sak hanelah apihai a lungtang mahoe.
- Hottelah pawiteh, apimaw ka hmalah ka kangdout thai han.
- 11 Kai ni ka patho hanelah apinimaw hmaloe na poe,  
kalvan rahim e hnocawngca pueng hah kaie seng doeh.
- 12 A kut khok thoseh, athaonae pueng thoseh,  
a takthai a thaonae, a meihawinae hah ka hrawk pouh mahoe.
- 13 Alawilae a pho hah apinimaw a rading pouh thai han,  
a tamboung hru bawk hni touh kâpâbaw e hah apinimaw rek a hnai  
thai han.
- 14 Apinimaw a minhmai takhang hah a paawng thai han,  
takikathopounge a hânaw hah.
- 15 A keng daw e a pho, a lakepnaw hah a kâoupnae naw lah a o,  
mitnoutnae patetlah kacakcalah khan e lah ao.
- 16 Buet touh hoi buet touh khikkâcat teh,  
a rahak daw kahlî hai kêen thai hoeh.
- 17 Hotnaw teh buet touh hoi buet touh kounng kâkuet teh,  
kapek thai lah awm hoeh.
- 18 A hâ tangawn ni angnae a tâco sak teh,  
a mit hah kho nueng kadai e patetlah ao.
- 19 A kâko hoi hmaito angnae a tâco teh,  
hmaitali a tangpei.
- 20 A hnawng daw hoi hmaikhunaw a tâco teh,  
moi thawngnae hlaam daw ka tangdaw e hoi,  
ka kang e buruk patetlah ao.
- 21 A kâha ni hmaisaeinaw a kak teh,  
a pahni daw hoi hmaito a tâco.
- 22 A lahuen daw thaonae ao teh,  
a hmalah lungmathoenae hah a len.
- 23 A takthai hoi tharuinaw teh khakkâkuet teh,  
kâtahruet thai hoeh e kacakpounge lah ao.
- 24 A lungthin teh talung patetlah a te,  
Cakang phawmnae a rahim lae talung patetlah a te.
- 25 A thaw torei teh, athakaawme taminaw ni a taki awh,  
a thao e a taki awh dawkvah, ka pathu e patetlah ao awh.
- 26 Ahni koe tahloi ka phat nakunghai tâ thai mahoe,



- pala, tahroe ni hai tâ thai mahoe.
- <sup>27</sup> Sum hah cakong patetlah a pouk,  
rahum hah thingke patetlah a pouk.
- <sup>28</sup> Licung ni yawng sak thai mahoe,
- Talung hoi dêi e hah ahni hanelah teh cakongkung patetlah ao.
- <sup>29</sup> Bongpai hah cakong patetlah a pouk teh,  
pala dawk hoi duenae hah koe a panuikhai.
- <sup>30</sup> A vonpui vuen hah kahran poung e hlaam kâbawng e patetlah doeh a  
o,  
tangdong um vah cangkatin e seh patetlah a tabo.
- <sup>31</sup> Ka dungpoung e tui hah hlaam patetlah a tangdo sak teh,  
talî kadung poung e hah satuium patetlah a sak.
- <sup>32</sup> A cei tangcoungae dawk angnae hah a hruek teh,  
tami ni a dungpoung ati e tui hah sampo patetlah a pouk.
- <sup>33</sup> Takinae tawn laipalah, sak e lah ao teh,  
talai van dawk ahni patetlae awm hoe.
- <sup>34</sup> Ka rasang poung e hno pueng hah a khet nah,  
ahni teh kâoup e catoun pueng dawk siangpahrang doeh telah a ti.

## 42

### *Job pankângainae hoi Cathut ni a coenae*

- <sup>1</sup> Hottelah Job ni BAWIPA hah a pathung teh hettelah a dei.
- <sup>2</sup> Bangpuengpa na sak thai tie hah ka panue,  
na noenae hah ngang thai lah awm hoe.
- <sup>3</sup> Apimaw kaie panuenae laipalah khokhangnae ka hrawk e hah telah na  
pacei.  
kai hanelah kângairu poung e lah, ka panue hoe e ka pâpha e lah  
ao hah ma.
- <sup>4</sup> Pahren lahoi thai nateh, lawk na dei sak haw.  
Lawk na pacei vaiteh na pathung haw telah na ti.
- <sup>5</sup> Nang teh hnâ hoi dueng doeh na thai rah,  
hatei, atu teh ka mit hoi na hmu toe.
- <sup>6</sup> Hatdawkvah, kama hoi kama ka kâpanuet teh,  
hraba hoi vaiphu dawk ka tahung teh,  
pan ka kângai toe telah a ti.
- <sup>7</sup> BAWIPA ni Job koevah lawk be a dei hnukkhu, BAWIPA ni Teman tami  
Eliphaz koevah, nang hoi na hui roi koevah ka lungkhueknae a kân.  
Bangkongtetpawiteh, ka san Job patetlah kaie kong dawk, lawkkatang hah  
na dei awh hoe. <sup>8</sup> Hatdawkvah, maitotan 7, tutan 7 hrawi nateh, ka san  
Job koevah cet awh nateh, nangmouh hanelah thuengnae hah poe awh.  
Hahoi ka san Job ni nangmouh hanelah a ratoum vaiteh, hote kai ni ka  
coe pouh han. Nahoe pawiteh, na pathu awh e patetlah na lathueng  
lawk na ceng awh han. Bangkongtetpawiteh, ka san Job patetlah kaie  
kong dawkvah, lawkkatang na dei awh hoe telah a ti. <sup>9</sup> Hottelah Teman  
tami Eliphaz hoi Shuhi tami Bildad hoi Naamath tami Zophar tinaw a cei  
awh teh, BAWIPA ni kâ a poe e patetlah a sak awh teh, BAWIPA ni Job  
kâheinae hah a coe pouh.
- <sup>10</sup> Hahoi Job ni a huinaw kathum touh hanelah, a ratoum pouh torei  
teh, BAWIPA ni Job kangduenae hmuen hah bout ahawi sak teh, BAWIPA  
ni Job teh yampa e a tawnta e hlakvah, let hni touh bout a poe. <sup>11</sup> Hottelah



a hmaunawngghanaw hoi a tawncanunaw pueng teh, yampa kapanueknaw pueng ni a im dawk a tho awh teh, rawca a ca awh. BAWIPA ni a lathueng vah kathoute a phasak e naw pueng dawk a lungpahawi awh teh a lungmawng sak awh. Tami pueng ni ahni koevah, ngun hoi suinaw hah a poe awh.

<sup>12</sup> Hottelah BAWIPA ni ahmaloe e hlaak a hnukteng yawhawinae kapap poung lah a poe. Tu 14,000, kalauk 6,000, maitotan a bo lah 1,000, hoi la manu 1,000 a tawn. <sup>13</sup> Ca tongpa 7 touh hoi canu 3 touh hai a tawn.

<sup>14</sup> Apasuekpoung e min teh Jemimah, apâhni e teh Keziah, apâthum e teh Kerenhappukh. <sup>15</sup> Ram thung pueng dawk Job e canu patetlah meikahawi e awm hoe. A na pa ni ahnimouh teh a thangroinaw koe râw a rei van.

<sup>16</sup> Hathnukkhu hoi Job teh kum 140 a hring teh a ca capanaw hoi a na mincanaw se pali totouh a hmu rah. <sup>17</sup> Hottelah Job a matawng teh hninthakuep lahoi a due.



# SAM (The Book of Psalms)

## 1

### *Tami kathout hoi tamikalannaw e lamthung*

Kasakkung: Panuekhoeh

- <sup>1</sup> Tamikathoutnaw e khokhangnae koe ka cet hoeh e tami,  
tamikayonnaw e lamthung dawk kangdout hoeh e tami,  
kadudamnaw e kamkhuengnae koe hai ka tahung hoeh e tami,
- <sup>2</sup> BAWIPA e lawk ka ngâi niteh,  
a kâlawnaw hah karum khodai luepluep ka pouk e tami teh a  
yawhaw.
- <sup>3</sup> Ahni teh tui teng vah ung e,  
a tue a pha torei ka paw niteh,  
a hna hai kamyai hoeh e thingkung hoi a kâvan.  
A tawksak e naw dawk hawinae a hmu han.
- <sup>4</sup> Tamikathoutnaw teh, hottelah laipalah,  
kahli ni a palek e cahik hoi a kâvan awh.
- <sup>5</sup> Hatdawkvah, tamikathoutnaw teh, lawkcengnae hnin navah kangdout  
thai awh mahoe.
- Tamikayonnaw hai tami kalannaw e kamkhuengnae dawk bawk thai  
mahoe.
- <sup>6</sup> Bangkongtetpawiteh, BAWIPA ni tami kalannaw e lamthung teh a panue.  
Tamikathoutnaw e lamthung teh rawknae koe a pha han.

## 2

### *Messiah tânae hoi uknae*

Kathutkung: Devit

- <sup>1</sup> Miphunnaw teh bangkongmaw ruengruengti awh.  
Tamimaya teh bangkongmaw ayawmyin hno a sak awh.
- <sup>2</sup> BAWIPA hoi Messiah taran lahoi, talai bawinaw cungtalah a kamkhueng  
awh teh,  
lawkcengkungnaw cungtalah kho a khang awh.
- <sup>3</sup> Tho awh. A kâkateknae naw hah ratham pouh sei.  
Kâkateknae rui hah tâkhawng pouh sei.
- <sup>4</sup> Kalvan ka tahung e ni panuikhai vaiteh,  
Bawipa ni panuilai lah a sak han.
- <sup>5</sup> Hahoi, lungkhuek laihoi ahnimouh koe lawk dei vaiteh,  
puenghoi a lungrei a thaisak han.
- <sup>6</sup> Hateiteh, kaie mon kathoung Zion vah,  
ka siangpahrang ka ta toe.
- <sup>7</sup> BAWIPA ni nang teh ka Capa doeh.  
Sahnin vah na khe telah kai koe a dei e hah ka pâpho han .
- <sup>8</sup> Kai koe het haw. Râw lah miphunnaw na poe vaiteh,  
talai pout ditouh na coe hanelah na poe han.
- <sup>9</sup> Sumtaboung hoi na uk vaiteh,  
talai hlaamkabokung ni a hem e patetlah rek na hem han.
- <sup>10</sup> Hatdawkvah, Oe siangpahrangnaw, na lungang awh leih.



Talai lawkcengkungnaw yuenae kâhmo awh haw.

<sup>11</sup> Taki laihoi BAWIPA thaw tawh awh haw.

Pâyaw laihoi konawm awh.

<sup>12</sup> Capa teh pahnuem awh.

Hoehpawiteh, a lungkhuek payon vaih.

Dongdeng a lungphuen toteh, lam vah koun na kahmat payon vaih.

Ama kâuep e pueng teh tami yawkahawi e doeh.

### 3

#### *BAWIPA ni a taminaw runae a kabawp*

Kathutkung: Devit, Devit ni a sak e la: A capa Absalom koehoi a yawng nah sak e

<sup>1</sup> Oe BAWIPA, kaie tarannaw teh apap poung.

Kai na ka tarannaw apap poung.

<sup>2</sup> Taminaw ni, ahni teh Cathut koehoi e kabawpnae awmhoeh

telah kai hanelah a dei awh. Selah.

<sup>3</sup> Hatei, Oe BAWIPA, nang teh kai hanlah kânguenae bahling,

kaie bawilennae lah na o teh, kaie lû katawmkung lah na o.

<sup>4</sup> Kai ni hram laihoi, BAWIPA hah ka kaw toteh,

ahni ni kathounge mon dawh hoi kai hah na pato. Selah.

<sup>5</sup> BAWIPA ni na kabawp dawkvah,

kai teh ka i thai teh, ka kâhlaw thai.

<sup>6</sup> Kai hah avoivang lahoi na kalup niteh,

na ka tuk e tami thong hra touh ka phat hai ka taket hoeh.

<sup>7</sup> Oe BAWIPA, thaw haw. Kaie Cathut, na rungngang haw.

Bangkongtetpawiteh, nang ni ka tarannaw pueng e kamhru hah,

na hem pouh teh, tamikathoutnaw e a hâ hah na khoe pouh.

<sup>8</sup> Rungngangnae teh BAWIPA e doeh.

Nange yawhawinae teh,

na taminaw koe phat lawiseh. Selah.

### 4

#### *Yuemkamcunaw rounnae*

Kathutkung: Devit

<sup>1</sup> Oe lannae Cathut,

na kaw toteh na thai pouh haw.

Ka runae hah na hlai haw.

Na pahren haw, ka ratoumnae hah na thai pouh haw.

<sup>2</sup> Oe tami capanaw,

ka bawilennae hah nâtotouh maw kayanae lah na coung sak awh han.

Nâtotouh maw yawmyin hno hah na lungpataw awh vaiteh,

payonnae hah na tawng awh han. Selah.

<sup>3</sup> BAWIPA ni cathutlae tami teh a rawi tie hah panuek awh haw.

Ka kaw toteh BAWIPA ni na thai pouh han.

<sup>4</sup> Na lungkhuek yawkaw, yonnae teh sak hanh.

Na ikhun dawh na lung hoi pouk nateh duem awm.

<sup>5</sup> Lannae thuengnae hah poe nateh,

BAWIPA hah kâuep haw.

<sup>6</sup> Apinimaw hawinae na hmusak han na ka tet pouh e moi ao awh.

BAWIPA kaimouh koe na minhmai angnae hoi na tue haw.

<sup>7</sup> Cakang hoi misur moikapap a hmu awh dawh



konawmnae hlak kalenhnawn e konawmnae hah  
ka lung thung na ta toe.

- <sup>8</sup> Duem ka yan vaiteh, ka i han toe.  
Bangkongtetpawiteh, Oe BAWIPA,  
nang ni dueng doeh karoumcalah na o sak thai.

## 5

### *Lam hmusak nahan ratoumnae*

Kathutkung: Devit

- <sup>1</sup> Oe BAWIPA, ka lawk na thai pouh haw.  
Ka khopouknae hah na pouk pouh haw.
- <sup>2</sup> Ka siangpahrang hoi ka Cathut,  
ka hramnae hah na thai pouh haw.  
Nang koevah, ka ratoum.
- <sup>3</sup> Oe BAWIPA, amom vah, ka lawk na thai han.  
Amom vah nang koe lah kangvawi laihoi,  
lathueng lah ka khet han.
- <sup>4</sup> Bangkongtetpawiteh, nang teh thoenae dawk  
a lung kahawi e Cathut nahoe.  
Thoenae hai nang koe awm hoe.
- <sup>5</sup> Na hmithmu vah kâoupnaw teh kangdout thai mahoe.  
Payonnae ka sak e pueng teh na hmuhma.
- <sup>6</sup> Laithoe kadeinaw hah na raphoe teh,  
dumyenna hoi tami theikahrannaw hah Bawipa ni a panuet.
- <sup>7</sup> Hatei kai teh, na lungmanae apap kecu dawk na im vah ka tho han.  
Nang taki laihoi kathounge Bawkim koelah kangvawi laihoi na baw  
han.
- <sup>8</sup> Oe BAWIPA, ka tarannaw kecu dawk na lannae hoi na hrawi haw,  
ka hmalah na lam hah lan sak haw.
- <sup>9</sup> Bangkongtetpawiteh, a pahni dawk yuemkamcunae awmhoeh.  
Athung lae teh rawknae doeh.  
A lawkron teh kamawng e tangkom doeh.  
A laihoi dueng doeh ayânaw a oup awh.
- <sup>10</sup> Oe Cathut, yon pen haw.  
Amamouh ni a sak awh e dawk letlang bawt awh naseh.  
Kâtapoenae moipap dawkvah, tâkhawng haw.  
Bangkongtetpawiteh, nang taran laihoi taran a thaw awh.
- <sup>11</sup> Hatei, nang ka kâuep e pueng, konawm awh naseh.  
Na ngue dawkvah, konawm laihoi hram awh naseh.  
Na min ka lungpataw naw hai nang dawk konawm awh naseh.
- <sup>12</sup> Bangtelane Oe BAWIPA, tamikalan yawhawi na poe vaiteh,  
minhmai kahawi hoi bahling patetlah na ramuk han.

## 6

### *Runae thung hoi yuemkamcu ratoumnae*

Kathutkung: Devit

- <sup>1</sup> Oe BAWIPA, lungkhuek laihoi na yue hanh,  
na lungphuen laihoi na yue hanh.
- <sup>2</sup> Oe BAWIPA, na pahren haw. Ka tha a youn.  
Oe BAWIPA, na dam sak haw.  
Ka hrnaw teh runae a kâhmo toe.



- <sup>3</sup> Ka hringnae hai a ru toe.  
Oe BAWIPA, nâsittouh maw na ro han.
- <sup>4</sup> Oe BAWIPA, bout ban nateh, na rungngang haw.  
Oe na lungmanae hoi na rungngang haw.
- <sup>5</sup> Bangkongtetpawiteh, duenae koehoi nang pouknae awmhoeh,  
apinimouh phuen koehoi lunghawinae lawk a dei han.
- <sup>6</sup> Ka cingounae koe ka tâwn.  
Kho pei ka dai lah ka ikhun dawk ka ka teh,  
ka mitphi ni lahoun koun a duk sak.
- <sup>7</sup> Lungmathoenae kecu dawk ka mit koun a ro teh,  
ka tarannaw kecu dawk a mawm toe.
- <sup>8</sup> Payonnae kasaknaw pueng,  
na cettakhai awh leih.  
Bangkongtetpawiteh, BAWIPA ni ka kanae lawk hai a thai.
- <sup>9</sup> BAWIPA ni ka kâheinae hah a thai toe.  
BAWIPA ni ka ratounnae hah a dâw han.
- <sup>10</sup> Ka taran pueng kaya laihoi ru awh naseh.  
Ban awh naseh, vaitalahoi kayak awh naseh.

## 7

### *Taran kut thung hoi rungngang nahanlah ratounnae*

Kathutkung: Devit, Devit teh Benjamin tami Kush e lawk kecu dawk BAWIPA hmalah a sak e la

- <sup>1</sup> Oe BAWIPA, ka Cathut, nang teh na kâuep.  
Na ka pacekpahlek e pueng koehoi na rungngang nateh na hlout sak haw.
- <sup>2</sup> Hoehpawiteh, sendek patetlah na kei vaiteh,  
rungngangkung ao hoehnahlan vah, na paset awh han doeh.
- <sup>3</sup> Oe BAWIPA ka Cathut, kai ni hottelah ka sak vaiteh,  
ka kut dawk payonnae kaawm nakunghai,
- <sup>4</sup> Kai koe duem kaawm e hah thoenae hoi ka patho teh,  
ka tarannaw hah a khuekhaw awm laipalah ka coungroe pawiteh,
- <sup>5</sup> taran ni na pâlei naseh, na phat naseh.  
Kahringnae hah talai dawk repcoungroe awh naseh.  
Minhmai barinae hah vaiphu dawk tat awh naseh. Selah.
- <sup>6</sup> Oe BAWIPA, lungkhuek laihoi thaw haw,  
ka tarannaw e lungkhueknae hah ngang haw.  
Kâ na poe tangcoung patetlah kai han lawkceng hanlah thaw haw.
- <sup>7</sup> Miphunnaw kamkhueng awh vaiteh,  
nang hah na kalup awh han.  
Ahnimouh hanlah arasangnae koe ban haw.
- <sup>8</sup> BAWIPA ni lawk a ceng han.  
Oe BAWIPA, ka lannae hoi ka thung kaawm e yuemkamcu lah  
ka o e patetlah lawk na ceng haw.
- <sup>9</sup> Oe tamikathoutnaw,  
thoenae teh poutsak lah awm lawiseh.  
Hatei, lannae teh caksak lah awm seh.  
Bangkongtetpawiteh, ka lan e Cathut ni lungthin hoi  
pouknae hah ouk a tanouk.
- <sup>10</sup> Lungthin kalannaw rungngangkung Cathut teh  
kai kânguenae lah ao.
- <sup>11</sup> Cathut teh kalan e lawkcengkung lah ao teh,



Cathut teh tamikathoutnaw koe hnintangkuem a lungkhuek.

- 12 Pankângai hoehpawiteh, a tahloi hah kata vaiteh,  
licung hah sawn vaiteh, coungkacoe lah ao han.
- 13 Duenae senehmaica hai ahni hanlah a rakueng teh,  
hmai kang thai e samtang hah a sak awh.
- 14 Tamikathout ni yonnae hah a khe.  
Runae hah a vawn teh laithoe ouk a khe.
- 15 Tangkom kadungpoung lah a tai teh,  
a tai e tangkom dawk ama letlang a bo.
- 16 A sak e runae hah amae lû van bout ban vaiteh,  
a tâcosak e thoenae teh amae lû van bout a pha han.
- 17 BAWIPA teh a lan e patetlah ka pholen han.  
Lathueng Poung BAWIPA min pholen hoi la ka sak han.

## 8

### *Hno sak e dawk BAWIPA lentoenae*

Kathutkung: Devit

- 1 Oe kaimae Bawipa, Jehovah teh,  
talai van pueng dawk na min ahawi toungloun.  
Na bawilennae teh kalvannaw lathueng vah na ta.
- 2 Bangkongtetpawiteh, na tarannaw kecu dawk  
moipathungkung hoi taran na roum sak thai nahanlah,  
sanu ka net e camonaw pahni dawk hoi thaonae hah na cak sak.
- 3 Na kutdawn hoi na sak e kalvannaw hoi  
na caksak e thapa hoi âsinaw hah ka khet navah,
- 4 tami heh banglamouh ao teh,  
na lungthung hoi na pouk.  
Tami capa heh banglamouh ao teh khuet na pai sin.
- 5 Bangkongtetpawiteh, ahni hah kalvantaminaw hlak bet ka rahnoum lah  
na sak teh,  
bawilennae hoi pholennae hah na kâ muk sak.
- 6 Na kutsaknaw koe kê na tawn sak teh,  
a khok rahim bangpuengpa na hruek pouh.
- 7 Maitotan hoi tu pueng hai,  
kahrawngum e saring pueng hoi,
- 8 kalvan e tavanaw hoi, talî thung e tanganaw hoi,  
talaipui thung kaawm e pueng hoi,
- 9 Oe BAWIPA, kaimae Bawipa,  
talai van pueng dawk na min teh ahawi toungloun.

## 9

### *BAWIPA lawkcengnae dawk lunghawî lawk dei ratoumnae*

Kathutkung: Devit

- 1 Oe BAWIPA, ka lungthin abuemplahoi na pholen han.  
Na sak e kângairu hno pueng ka dei han.
- 2 Nang dawk konawm lahoi ka nawm han.  
Oe Lathueng Poung, na min pholen hoi la ka sak han.
- 3 Ka tarannaw a ban awh toteh,  
na hmalah tâlaw awh naseh, rawk awh naseh.
- 4 Bangkongtetpawiteh, bawitungkhung dawk tahung hoi  
lannae hoi lawk na ceng teh,



- ka lannae hoi counгнаe hah na cak sak.
- 5 Miphunnaw hah na yue teh,  
tamikathoutnaw hah na raphoe teh,  
ahnimae min teh ayungyoe hoi a yungyoe totouh na raphoe toe.
- 6 Oe ka tarannaw, rawknae teh a yungyoe poutnae koe a pha toe.  
Khopui teh na raphoe teh noutnae ao hoe hoi totouh a kahma toe.
- 7 Hatei, BAWIPA teh a yungyoe a kangning.  
Lawkceng nahanelah bawitungkhung teh a rakueng toe.
- 8 Lannae lahoi talaivan heh lawkceng vaiteh,  
a lannae dawk lawkcengnae hah taminaw hanelah a cak sak.
- 9 BAWIPA teh repcoungronaw hane lahai rapanim lah ao teh,  
runae kâhmo nah kâhronae lah ao han.
- 10 Na min kapanueknaw ni nang na kâuep awh han.  
Bangkongtetpawiteh, BAWIPA,  
nang katawngnaw teh na cettakhai boihoe.
- 11 Zion kaawm e naw, BAWIPA pholen hoi la sak awh.  
A sak e hno hah taminaw koe pâpho awh.
- 12 Thipaling phu moi a pathung toteh, pahnim hoe.
- 13 Oe BAWIPA, na pahren haw.  
Na kahmuhmanaw kecu dawk ka runae hah pouk haw.  
Nang teh duenae longkha thung hoi na kahloutsakkung doeh.
- 14 Hottelah, nang pholennae pueng hah,  
Zion canu longkha koehoi roeroe ka pâpho thai nahanlah,  
na runngangnae dawk ka konawm han.
- 15 Miphunnaw teh amamouh ni a tai awh e tangkom dawk koug a bo awh.  
Arulaho i a patung awh e tangkam dawk a khok a kâman awh.
- 16 BAWIPA teh lawk a ceng e patetlah panue thai.  
Tamikathoutnaw teh amamouh ni a sak e hno dawk a kâman awh.
- 17 Tamikathoutnaw teh Cathut ka pahnim e  
miphunnaw hoi sheol dawk a kak awh han.
- 18 Bangkongtetpawiteh, kavoutthoupnaw teh pahnim lah pou awh awh mahoeh.  
Karoedengnaw, e ngaihawinae hai pou kahmat mahoeh.
- 19 Oe BAWIPA thaw haw, tami ni na tâ hanh naseh.  
Miphunnaw teh na mithmu vah lawkceng lah awh awh naseh.
- 20 Oe BAWIPA, miphunnaw ni tami lah  
ao awh e a panue awh nahanelah,  
lungpuennae dawk tat haw. Selah.

## 10

### *Cathut ni yon a tânae dawk lungmawngnae*

Kathutkung: Panuekhoeh

- 1 Oe BAWIPA, bangkongmaw ahlanae koe na kangdue.  
Bangkongmaw runae tueng nah na kâhro.
- 2 Tamikathoutnaw ni kâoupnae lahoi  
tami karoedengnaw hah a rektap awh.  
A sak awh e ni amamouh letlang man naseh.
- 3 Tamikathoutnaw teh amamae lungngainae dawk  
ouk a kâoup awh.



- Kahounlounnaw ni BAWIPA a hnoun awh teh,  
a dudam awh.
- <sup>4</sup> Tamikathoutnaw ni kâoupnae lahoi  
Cathut tawng ngai awh hoeh.  
A pouknae dawkvah, Cathut awm hoeh ati awh.
- <sup>5</sup> Lawkcengnae teh ahni hoi ahla arasang dawkvah,  
a tarannaw pueng hah a dudam.
- <sup>6</sup> A lungthung hoi, kâhuen mahoe, h,  
nâtuek hai runae kâhmo mahoe telah a pouk.
- <sup>7</sup> A pahni teh thoebonae,  
dumnae hoi repcoungroena lawk hoi akawi.  
A lai rahim vah runae hoi payonnae teh ao.
- <sup>8</sup> Kho tangkuem lampawp koe a tahung teh,  
tami ni hmuhoehnae koe yonnae ka tawn hoeh e naw hah a thei awh.  
Tami ka roedeng e hah arulahi a pawp awh.
- <sup>9</sup> Sendek ni a kâkhu daw k hoi a pawp e patetlah  
arulahi tami ouk a pawp.  
Tami ka roedeng hah man hanlah a pawp.  
A tamlawk hoi a sawn toteh tami ka roedeng a kâman.
- <sup>10</sup> Hottelah, karoedengnaw hah a thaonae lahoi rawp sak nahanlah,  
ka rahnoumca lah a tabo awh.
- <sup>11</sup> A lungthung hoi, Cathut ni a pahnim toe.  
A minhmai hai a hro toe.  
Nâtuek hai hmawt mahoe toe telah a pouk.
- <sup>12</sup> Oe BAWIPA, thaw haw.  
Oe Cathut, na kut dâw haw.  
Kârahnoumnaw hah pahnim hanh.
- <sup>13</sup> Bangkongmaw tamikathoutnaw ni Cathut banglahai a noutna awh hoeh.  
A lungthung hoi, banglah pouk mahoe ouk ati awh.
- <sup>14</sup> Hateiteh, lungreithai hoi runae teh na pakhingpalang teh,  
na kut hoi moipathung hanlah na hmu toe.  
Karoedengnaw, teh nang koe a kâhnawng awh teh,  
nang teh, na pa ka tawn hoeh naw kabawmkung lah na o.
- <sup>15</sup> Tamikathoutnaw hoi tamikayonnaw e kut hah khoe pouh nateh,  
ceitakhai e awm laipalah, hawihoe hnae pueng koug pâphue pouh  
haw.
- <sup>16</sup> BAWIPA teh a yungyoe hoi a yungyoe totouh siangpahrang doeh.  
A ram thung hoi miphunnaw koug a kahma awh.
- <sup>17</sup> Repcoungröe e hoi na pa ka tawn hoeh naw koe vah,  
kângingnae sak hanelah,  
talai taminaw ni repcoungröe hoeh nahanelah,
- <sup>18</sup> BAWIPA, kârahnoumnaw e ngainae teh na panue teh,  
ahnimouh lawkceng hanelah na hnâ teh na pakeng pouh.

## 11

### *BAWIPA lannae daw kâuepnae*

Kathutkung: Devit

<sup>1</sup> BAWIPA daw k kâuep.

Bangkongtetpawiteh, ka hringnae koe vah,  
na monsom vah tavaca patetlah kamlang telah na dei thai.

<sup>2</sup> Bangtelah tetpawiteh, na kenhaw!



Tamikhouthnaw ni licung a sawn awh teh,  
lungthin kalannaw arulahoï ka hanelah, lirui dawk pala coungkacoe  
a mawp awh toe.

- <sup>3</sup> Adunaw hah raphoe lah awm pawiteh,  
tamikalan ni bangmouh a sak thai han.
- <sup>4</sup> BAWIPA teh kathounge Bawkim dawk ao teh,  
BAWIPA bawitungkhung teh kalvan vah ao.  
A mit hoi a khet teh, tami capanaw teh a mitlakhuem hoi a tanouk.
- <sup>5</sup> BAWIPA ni tamikalan hah ouk a tanouk.  
Hatei, tamikhouth hoi thama lah kalawmnaw teh,  
a hringnae hoi a hmuhma.
- <sup>6</sup> Tamikhouthnaw koe hmaisaaan hmaïto a rak sak vaiteh,  
hmaï hoi gan hoi hmaïkahli teh a coe awh hane manang lah ao han.
- <sup>7</sup> Bangkongtetpawiteh, BAWIPA teh a lan.  
Lannae hah lung a pataw teh, tamikalan teh a khet. □

## 12

### *Cathut yuemkamcu lah onae*

Kathutkung: Devit

- <sup>1</sup> BAWIPA na kabawm haw.  
Bangkongtetpawiteh, cathutlae tami awm hoeh toe.  
Tami capanaw dawk yuemkamcu e awm hoeh toe.
- <sup>2</sup> A imrinaw hoi laithoe lawk a kâdei awh teh,  
lungsamphei laihoï lawk a dei awh.
- <sup>3</sup> BAWIPA ni pasawtpanepnae pahni hoi,  
kâoupnae lai hah tâtueng naseh.
- <sup>4</sup> Ahnimouh ni, ka lai hoi ka tâ han.  
Ka pahni hai kama e doeh.  
Apimouh kaimouh lathueng ka bawi han telah ati awh.
- <sup>5</sup> BAWIPA ni, repcounroe e tami ka roedeng e hoi,  
vouthoup laihoï kacingounaw hanlah,  
atu ka thaw vaiteh, a ngaihawi awh e rounnae hmuen koe  
ka o sak han telah ati.
- <sup>6</sup> BAWIPA e lawknaw teh, ka thoung e lawk doeh.  
Talai hoi thoung sak nahanelah,  
hmaï dawk vai sari touh sôlêi tangcoun e ngun patetlah ao.
- <sup>7</sup> Oe BAWIPA, nang ni na khetyawt.  
Hete senaw thung dawk hoi a yungyoe na roun sak.
- <sup>8</sup> Tami capanaw ni tamikapo a tawmrasang awh toteh,  
tamikhouthnaw teh hmuen tangkuem a kâva awh.

## 13

### *BAWIPA rungngangnae kâuepnae*

Kathutkung: Devit

- <sup>1</sup> Oe BAWIPA, nâtotouh maw na pahnim yungyoe han.  
Nâtotouh maw kai koehoi na minhmai na hro han rah.
- <sup>2</sup> Kai teh, ka lung pou a mathoe.  
Nâtotouh ne kamadueng lungreithai hoi ka i han vai.  
Nâtotouh ne ka lathueng ka taran ni a kâoup han rah vai.
- <sup>3</sup> Oe BAWIPA ka Cathut, kangyawï nateh ka lawk hah na thai pouh haw.  
Ka mit ang sak haw. Hoehpawiteh, duenae patetlah ka ip payon vaih.



- <sup>4</sup> Hoehpawiteh, ka taran ni ahni ka tâ toe ati han doeh.  
Hoehpawiteh, ka kâroe navah, runae na kapoenaw a konawm awh langvaih.
- <sup>5</sup> Hatei, na lungmanae hah ka kâuep teh,  
na rungngangnae dawk ka lungthin a konawm han.
- <sup>6</sup> BAWIPA koe la ka sak han.  
Bangkongtetpawiteh, ka lathueng ahawi tangngak.

## 14

### *Cathut laipalah pathunae doeh*

Kathutkung: Devit

- <sup>1</sup> Tamipathu ni a lungthung hoi,  
Cathut awmhoeh ati. A rawk toe.  
Panuet ka tho e hno doeh a sak.  
Hawinae ka sak e awm hoeh toe.
- <sup>2</sup> Cathut ka tawng niteh,  
ka panuek thai e ao han na ou tie panue han ngai dawk,  
BAWIPA ni kalvan hoi tami capanaw hah a khet cathuk.
- <sup>3</sup> Abuemlahoi lam a phen awh teh,  
cungtalah koung a rawk awh toe.  
Hawinae kasakkung apihai awmhoeh. Buet touh boehai awmhoeh.
- <sup>4</sup> Payonnae kasaknaw ni panuenae tawn awh hoeh ma aw.  
Rawka ca e patetlah ka taminaw hah a ca awh teh,  
BAWIPA kaw awh hoeh.
- <sup>5</sup> Hawvah, takinae kalen koe ao awh.  
Bangkongtetpawiteh, Cathut teh tami kalannaw koelah ao.
- <sup>6</sup> Tami karoedengnaw e pouknae teh a kaya sak awh.  
Hatei, BAWIPA teh ahnimae kânguenae doeh.
- <sup>7</sup> Oe Isarel rungngangnae teh Zion hoi tâcawt naseh.  
BAWIPA ni san lah kaawm e taminaw a bankhai toteh,  
Jakop teh konawm naseh. Isarel hai lunghawi naseh.

## 15

### *Cathut hoi rei hringnae nuen*

Kathutkung: Devit

- <sup>1</sup> BAWIPA, na lukkareiim dawk apimouh kangning han.  
Na mon kathoung dawk apimouh kaawm han.
- <sup>2</sup> Kângingnae hoi ka hring niteh,  
lannae a sak laihoi a lung hoi lawkkatang ka dei niteh,
- <sup>3</sup> a lai hoi tamthoe ka dei boihoeh niteh,  
a imri lathueng thoenae sak laipalah,  
a huinaw min hai ka pathoe boihoeh niteh,
- <sup>4</sup> tami ka pacekpahleknaw hah a mit hoi khen hoeh,  
hatei, BAWIPA ka taketnaw hah a bari teh,  
thoebo laihoi lawk ka kam e teh ama pataw nahanelah ao nakunghai kamlang laipalah,
- <sup>5</sup> a pung lahoi tangka ka cawi boihoeh niteh,  
yonnae ka tawn hoeh e koe tadawngghno ka lat boihoeh e naw han doeh.  
Hot patet e hno ka sak e naw teh, nâtuék hai kâhuen mahoe.



## 16

*Yuemkamcu ngaihawinae*

Kathutkung: Devit

- <sup>1</sup> Oe Cathut, na roum sak haw.  
Bangkongtetpawiteh, nang doeh na kângue.
- <sup>2</sup> Oe ka hringnae, Jehovah koe nang teh ka Bawipapa doeh,  
nang laipateh ka hawinae hah banghai bang hoeheh lah ao telah dei haw.
- <sup>3</sup> Talaivan kaawm e tami kathoungnaw hanelah,  
ahnimouh teh tami kahawi katang,  
ka konawmnae pueng onae doeh telah ka ti.
- <sup>4</sup> Karangpoung lah cathut louk hnukkâbangnaw teh,  
rucatnae moi a khang awh han. Awi hane thuengnae thi hah ka poe mahoeheh.  
Ka pahni hoi a min hai ka dei mahoeheh.
- <sup>5</sup> Oe BAWIPA, nang teh ka ham hoi ka manang lah na o teh,  
ka ham hah na cak sak.
- <sup>6</sup> Ka khori teh, kai hanlah kahawipoung e ram dawke a kâen.  
Kahawi katang e râw teh ka coe han.
- <sup>7</sup> Pouknae na kapoekung BAWIPA teh ka pholen han.  
Karum hai ka lungthin ni kahringnae a hroecoe.
- <sup>8</sup> BAWIPA teh kahma lah pou ka hruek.  
Ama teh aranglae kut lah ao dawkvah, ka kâhuen mahoeheh.
- <sup>9</sup> Hatdawkvah, ka lungthin a lunghawi teh, ka bawilennaeh teh a konawm.  
Ka takthai hai ngaihawinae hoi a kâhat han.
- <sup>10</sup> Bangkongtetpawiteh, ka muitha teh phuen vah na cettakhai mahoeheh.  
Na tami kathoung teh pawklawi e na pasoung mahoeheh.
- <sup>11</sup> Hringnae lamthung na hmu sak han.  
Nang koe konawmnae ka kuep teh ao.  
Nange aranglae kut dawke a yungyoe nawmnae teh ao.

## 17

*A hnukteng rungngang nahanlah yuemkamcu ratoumnae*

Kathutkung: Devit

- <sup>1</sup> Oe BAWIPA, lannaeh koe lah awm nateh,  
ka hramnae hah na thai pouh haw.  
Dumnae ka dei boihoeh e pahni hoi ka ratoumnae hah na thai pouh haw.
- <sup>2</sup> Ka kong dawke lawk tâtuengnae hah na hmalah tâcawt naseh,  
na mit teh kalan e hno dawke um naseh.
- <sup>3</sup> Ka lungthin teh na tanouk toe. Karum vah na pai toe.  
Na tanouk teh banghai na hmawt hoeheh.  
Ka pahni ni payon hoeheh nahanelah ka noe toe.
- <sup>4</sup> Taminaw ni sak e kong dawke,  
karaphoekungnaw e lam hah na lawk lahoi ouk ka roun toe.
- <sup>5</sup> Na lamthung dawke ka dawn lahun nah  
ka tâlaw payon hoeheh nahanlah, na ka bawm haw.
- <sup>6</sup> Oe Cathut, nang ni na thai pouh dawkvah, kai ni ka hei.  
Na hnâ pakeng nateh, ka lawke hah na thai pouh haw.
- <sup>7</sup> Nang kâuepnaw hah, katarankungnaw e kut dawke hoi,  
rungngangkung Cathut, pahrenlungmanaeh hah kamnuek sak haw.



- 8 Kai rep na kacuengroe e tamikayonnaw hoi  
kai thei hanlah na kalup e tarannaw kut dawkh hoi,
- 9 Mitmu patetlah kai hah na ring haw.  
Na rathei rahim vah na ramuk haw.
- 10 Ahnimouh teh amamae thâwnae hah a kâuep awh teh,  
kâoup laihoi lawk a dei awh.
- 11 Ka ceinae lam hah a kalup awh teh,  
talai dawkrawp sak hanelah a mit pakhap laipalah na khet awh.
- 12 Sendek ni a kei e moi ca han thouk a ngai e patetlah thoseh,  
sendek kanaw ni arulahoï a pawp e patetlah thoseh ao awh.
- 13 Oe BAWIPA, thaw haw.  
Kangdout sin nateh, rawm sak haw.  
Tamikathoutnaw e kut dawkh hoi na tahloi hoi na rungngang haw.
- 14 Oe BAWIPA, talai tami lah kaawm e hotnaw e kut dawkh hoi  
na rungngang haw.  
Ahnimouh teh atuvah, amamouh hanelah, a pang awh toe.  
Ahnimae ngainae hah hnopai hoi a kawï sak.  
A canaw hai a tawnta awh teh,  
a catounnaw koe a hnopainaw hah a parâw pouh awh.
- 15 Kai niteh, lannae lahoi na minhmai ka hmu han.  
Nang patetlah ka kâhlaw toteh ka lung a kuep han.

## 18

### *Lathueng Poug rungngangkung Cathut*

Kathutkung: Devit, Bawipa e san, Devit ni Sawl koehoi taran kut dawkh hoi,  
hloutsaknae hawinae coe torei teh, BAWIPA hmalah sak e la

- 1 Oe ka thaonae BAWIPA,  
nang teh na lungpataw han.
- 2 BAWIPA teh kaie lungsong,  
kaie rapan, kaie rungngangkung lah ao.  
Kaie Cathut, ka thaonae,  
ka kâuep e bahling hoi ka rungngangnae ki hoi ka rapanim lah ao.
- 3 Pholen kamcu BAWIPA teh ka kaw vaiteh,  
ka tarannaw um hoi rungngang lah ka o han.
- 4 Due patawnae ni na kalup,  
Cathut takihoeahnae tuikalen ni na taki sak.
- 5 Sheol lungmathoenae ni na kalup teh,  
duenae tangkam ni na kangdue sin.
- 6 Kângairu kecu dawkh BAWIPA ka kaw teh,  
ka Cathut koe ka hram.  
A Bawkim koehoi na thai pouh teh,  
a hmalah ka hramnae hah a hnâ koe a pha.
- 7 Hottelah, talai a kâhuet teh a pâyaw.  
A lungkhuek dawkvah, mondunaw totouh a pâyaw teh,  
a kâhuet awh.
- 8 A hnawng dawkh hoi hmaikhu a luen takhang teh,  
a pahni dawkh hoi ka tâcawt e hmai ni, koung a kak awh teh,  
hote e niyah hmaisaan a kaman sak.
- 9 Ama ni kalvan a kamkuisak teh, a kum cathuk.  
A khok rahim vah hmonae teh ao.
- 10 Cherub a kâcui teh a kamleng.  
Kahlî rathei van vah a kamleng.



- 11 Hmonae teh ka dungpoung e hmuen lah a coung sak.  
Tui hmonae hoi kathapoung e kalvan tâmai hah  
ama kangangkung lah ao.
- 12 A hmalae angnae ni, kathapoung e tâmai a kâhin sak teh,  
roun hoi hmaisaan a bo.
- 13 BAWIPA ni kalvan hoi khoparit sak,  
A Lathueng Poung Cathut ni a lawk a tâcosak.
- 14 A lipala hah a pathui teh, a taran hah a pâyaw sak.  
Sumpa a palik sak teh, koung a tâ.
- 15 Oe BAWIPA, na yuenae hoi na hnawng dawk e kâha ni a hmu dawkvah,  
tali laheipadin teh koung a kamnue teh,  
talaivan e dunaw teh a kamnue awh.
- 16 Lathueng hoi na kut na dâw teh,  
moikapap e tui thung hoi na rasa toe.
- 17 A thakaawmpoung ka taran kut dawk hoi na rungngang teh,  
na ka hmuhma ni teh athakaawmpoung naw koe hoi  
haiyah na rungngang.
- 18 Ahnimouh ni runae ka kâhmo navah, na kangdue sin awh.  
Hatei, BAWIPA teh ka kâuep e doeh.
- 19 A hmuen kaw poung koe kai hah na thak.  
Kai dawk a lûnghawi dawkvah, na rungngang.
- 20 BAWIPA ni, ka lannae patetlah aphu na poe.  
Ka kut a thoung e patetlah na patho toe.
- 21 Bangkongtetpawiteh, BAWIPA e lamthung hah ka pâkuem teh,  
ka Cathut teh kahawihoeh lahoi ka cettakhai boihoeh.
- 22 Bangkongtetpawiteh, a lawkcengnae pueng teh ka hmalah ao teh,  
a coungnae hah ka tâkhawng boihoeh.
- 23 A hmaitung toun awm laipalah ka o teh,  
payonnae hah ka roun.
- 24 Hatdawkvah, BAWIPA ni ka lannae patetlah na patho.  
A mithmu ka thoungnae patetlah na patho.
- 25 Tami ka pahren e koe pahrennae na kamnue sak vaiteh,  
tamikalan koe lannae hah na kamnue sak han.
- 26 Tami kathoung koe na thoungnae na kamnue sak vaiteh,  
tami ka taran e koe tarannae hah na kamnue sak han.
- 27 Bangkongtetpawiteh, kârahnoumnaw hah,  
na rungngang teh, kâoupnaw hah na pabo han.
- 28 Ka hmaim hah na ang sak teh,  
BAWIPA ka Cathut ni kaie hmonae hah a ang sak han.
- 29 Nang pawlawk lahoi ransahu hah ka raphoe han.  
Ka Cathut pawlawk lahoi khorapan ka kawi thai han.
- 30 Cathut e lamthung teh a kuep.  
BAWIPA e lawk teh a thoung dawkvah,  
Ama kâuep e tami pueng hanelah bahling lah ao.
- 31 Bangkongtetpawiteh, BAWIPA laipateh,  
bangpatet e Cathut alouke maw kaawm.
- 32 Thaonae hoi na kapathoupkung teh Cathut doeh.  
Ka lamthung hai a kuep sak.
- 33 Ama ni ka khok heh sayuk khok patetlah a sak teh,  
a hmuen rasangnae koe na o sak.
- 34 Ka kut heh tarantuknae a cangkhai.



- Hatdawkvah, ka kut ni rahum licung patenghai a sawn thai.
- 35 Na rungngangnae bahling hai na poe toe.  
Aranglae kut hoi na kuet,  
na panguepnae ni na tawmdawm.
- 36 Ka ceinae lamthung na kaw sak dawkvah,  
tâlaw laipalah ka o.
- 37 Ka taran ka pâlei teh ka pha.  
Koung ka raphoe hoehrourakrâk ka ban takhai boihoe.
- 38 Bout a thaw thai hoe nahanelah, hmâ ka paca teh,  
ka khok rahim koung a rawp awh.
- 39 Tarantuk hanelah na pathoup toung dawkvah,  
na katarankung teh ka rahim vah tâ lah ao.
- 40 Ka taran teh na yawng sak.  
Hottelah na kahmuhmanaw heh ka raphoe.
- 41 Ahnimouh teh a hram awh.  
Hatei, ahnimouh rungngangkung awm hoe.
- 42 Hottelah, vaiphu kahli ni a palek e patetlah  
dikkaneng lah ka nep teh,  
lamthung dawk e songnawng patetlah ka tâkhawng.
- 43 Ka yonnaw thung hoi na rungngang teh,  
miphunnaw e lû lah na coung sak.  
Ka panue hoe e naw ni ka thaw a tawk awh han.
- 44 Ka lawk a thai awh tahma vah, a tarawi awh teh,  
ramlouk taminaw hai kai koe a kâhei awh.
- 45 Ramlouk taminaw teh koung a yawng awh teh,  
a kâhronae hmuene koehoi, taki laihoi a tâco awh.
- 46 BAWIPA teh a hring.  
Kaie lungsong teh pholen lah awm seh.  
Kaie rungngangnae Cathut teh tawm lah awm seh.
- 47 Cathut teh moipathung pouh kung lah ao teh,  
ka rahim e taminaw katâkung lah ao.
- 48 Ka tarannaw koehoi na rungngang teh,  
na katarankungnaw lathueng vah, na tawm.  
Rektapnaw kut dawk hoi na rungngang.
- 49 Hatdawkvah BAWIPA, Jentelnaw rahak vah,  
nang koe lunghawilawk ka dei vaiteh,  
na min pholen hoi la ka sak han.
- 50 A siangpahrang koe vah, ka len e hloutnae a poe teh,  
satui awi e Devit hoi, a catounnaw lathueng vah,  
a yungyoe hoi a lungmanae a kamnue sak.

## 19

### *Ka kuep e BAWIPA kamnuenae*

Kathutkung: Devit

- 1 Kalvannaw ni Cathut bawilennae a pathang awh.  
Kakaw poung e kalvan ni a kutsak tie a kamnue sak.
- 2 Khosei ni khodai koe lawk a dei teh,  
karum ni karum koe a cangkhai.
- 3 Lawk dei e, lawk kâpan e  
ahnimae pahni dawk hoi thai hoe eiteh,



- 4 ahnimae lawk teh talai van pueng a cei teh,  
talai poutnae koe totouh a pha.  
Ahnimouh koevah, kanî hanelah lukkareim a ta pouh.
- 5 Hahoi, kanî teh, yupaluenkung imrakhan thung hoi ka tâcawt e patetlah  
ao teh,  
yawngkâtânae koe a tha kaawm poung e, konawm laihoi ka yawng  
hane patetlah ao.
- 6 Avang lae kalvan apoutnae koehoi, a tâco teh,  
avanglae kalvan apoutnae koe totouh, a kâhei dawkvah,  
a kâanna dawk hoi kahlout e awm hoeh.
- 7 BAWIPA e kâlawk teh akuap dawkvah,  
hringnae a rounng sak.  
BAWIPA e lawkpanuesaknae teh a kamceng dawkvah,  
kamawngrame hah a lung a ang sak.
- 8 BAWIPA e phunglawk teh a lan teh, lungthin a konawm sak.  
BAWIPA ni kâpoe e teh a thoung teh, mit a ang sak.
- 9 BAWIPA takinae teh a thoung teh, a yungyoe a kangning.  
BAWIPA lawkcengnae teh a lan teh, katang e lah ao.
- 10 Sui hlak hai sôlêi e sui hlak hai ngai hanelah ao.  
Khoitui hoi khoipha hlak hai a radiphnawn.
- 11 Hothloilah, hotnaw hno lahoi na san hah kâhructuet na poe teh,  
hote lawknaw tarawinae tawkpheu teh a len poung.
- 12 Apimaw mae payonnae ka panuek thai.  
Pâpha e payonnae dawk hoi na thoung sak haw.
- 13 Na san heh yonnae ka sak hoeh nahanlah,  
thama lahoi na kuen nateh,  
hotnaw teh ka lathueng vah kâ tawn sak hanh.
- 14 Oe BAWIPA, ka thaonae hoi na ka ratangkung,  
ka dei e dawk hoi ka pouk e naw heh,  
na mithmu vah na lung ka youk lah awm seh.

## 20

### *Cathut rungngangnae thaw*

Kathutkung: Devit

- 1 Runae hnin dawk BAWIPA ni na pato naseh.  
Jakop Cathut min lahoi na roum sak naseh.
- 2 Hmuen kathoung koehoi kabawpnae teh tâcawt sak naseh.  
Zion hoi tha awm sak naseh.
- 3 Na thuengnae pueng na thai pouh naseh.  
Hmaisawi thuengnae hai dâw naseh.
- 4 Na ngainae patetlah na poe naseh,  
na pouknae patetlah kuep sak naseh.
- 5 Na rungngangnae dawk ka konawm awh vaiteh,  
Cathut min lahoi lukkarei a yap awh han.  
BAWIPA ni na hei e pueng kuep sak lawiseh.
- 6 BAWIPA ni satui awi e a rungngang tie atuvah panue awh toe.  
Kathoung kalvan hoi a rungngangnae aranglae kut,  
athakaawme hoi na pato han.
- 7 Atangawn ni leng a kâuep awh teh,  
atangawn ni marang a kâuep awh.  
Hatei, kaimouh teh, BAWIPA Cathut min hah pou ka kâuep awh han.



- <sup>8</sup> Ahnimouh teh tabut hoi a rawp awh.  
 Hatei, kaimouh teh ka thaw awh teh, kalancalah ka kangdue awh.
- <sup>9</sup> BAWIPA rungngang haw.  
 Ka kaw toteh siangpahrang ni na pato naseh.

## 21

### *BAWIPA rungngangnae dawk konawmnae*

Kathutkung: Devit

- <sup>1</sup> Oe BAWIPA, na thaonae dawk siangpahrang ni a konawm han.  
 Na rungngangnae dawk banghloimaw a konawmnae a tawn han,
- <sup>2</sup> Apâhni hoi a kâhei e hah na oun hoeh niteh,  
 a lungthin ngainae hah na poe toe. Selah.
- <sup>3</sup> Bangkongtetpawiteh, hawinae yawhawawi hoi na dawn teh,  
 a lû dawk suikathoung bawilukhung hoi na kâmuk sak.
- <sup>4</sup> Nang koe a hei e hringnae,  
 a yungyoe hoi a yungyoe totouh hringsawnae hah na poe.
- <sup>5</sup> A bawilennaeh teh na rungngangnae dawkvah a len,  
 barinae hoi taluenaeh teh ahni dawh na patue toe.
- <sup>6</sup> Bangkongtetpawiteh, a yungyoe hane yawhawinae lentoe kacoekung lah  
 na sak feh,  
 na hmalah puenghoi a lung kahawi hanelah na coung sak.
- <sup>7</sup> Bangkongtetpawiteh, siangpahrang ni BAWIPA hah a kâuep.  
 Lathueng Poung lungmanae lahoi kâhuen mahoe.
- <sup>8</sup> Na kut ni na taran pueng hmawt vaiteh,  
 aranglae na kut ni na ka hmuhma e pueng hah a hmu han.
- <sup>9</sup> Na lungkhuek toteh, ahnimouh hah takhuen patetlah na coung sak han.  
 BAWIPA ni ahnimouh teh,  
 a lungkhueknae lahoi payawp vaiteh,  
 a hmai ni koug a kak awh han.
- <sup>10</sup> A catounnaw hah talai van hoi koug takhoe pouh vaiteh,  
 a catounnaw hah miphunnaw thung hoi na takhoe han.
- <sup>11</sup> Bangkongtetpawiteh, nang taran lahoi,  
 hawihoeahnae hah sak han a kâcai awh teh,  
 a sak thai awh hoeh e hah sak han a kâcai awh.
- <sup>12</sup> Hatdawkvah, ahnimouh teh na yawng sak vaiteh,  
 ahnimae a mithmainaw dawh na licung hoi coungkacoe na nue toe.
- <sup>13</sup> Oe BAWIPA, na thaonae dawh tawm lah na o.  
 Na thaonae pholen hoi la ka sak han.

## 22

### *Messiah rektap khangnae*

Kathutkung: Devit

- <sup>1</sup> Ka Cathut, ka Cathut, bangkongmaw na cei takhai.  
 Bangkongmaw ka kâhramnae lawk thai laipalaw,  
 na kabawp hoeh nahanlah ahlanae koe na o.
- <sup>2</sup> Oe Cathut, khodai lah kâhram ei, nang ni na thai pouh hoeh.  
 Karum lahai duem ka onae awm hoeh.
- <sup>3</sup> Hatei, nang teh, na thoung.  
 Isarelnaw ni pholen e lah na o.
- <sup>4</sup> Ka mintoenaw ni na kâuep teh,  
 na rungngang.



- 5 Na kaw awh teh, na rungngang.  
Na kâuep awh teh, yeiraipo boi awh hoeh.
- 6 Hatei, kai teh tangraet lah doeh ka o.  
Ayâ ni pathoe e hoi pacekpahlek e lah ka o.
- 7 Na ka hmawt e pueng ni na panuikhai, a pahni na ke sin awh.  
A lû na saling sin awh.
- 8 BAWIPA a kâuep nahoehmaw, ama ni rungngang na haw seh.  
Agni dawk a ngainae awm pawiteh,  
atu roeroe rungngang na haw seh, telah ati awh.
- 9 Hatei, nang teh anu von thung hoi na karasatkung doeh.  
Sanu ka nei lahun nah puennae na takhoe pouh.
- 10 Pek khe hoi nang dawk hruek e lah ka o.  
Anu von thung hoi patenghai, nang teh ka Cathut lah yo la na o toe.
- 11 Kai koehoi ahlanae koe awm hanh.  
Bangkongtetpawiteh, runae a hnai teh kabawmkung awm hoeh.
- 12 Maitotan moikapap ni na kalup.  
Bashan ram e athakaawme maitotannaw ni na kalup.
- 13 A pahni na ang sin awh teh,  
sendek patetlah a cairing awh.
- 14 Tui patetlah rabawk lah ka o teh,  
ka hruhrawng pueng teh koung a kâla.  
Ka lungthin teh khoilai patetlah ka thung vah, a kamyawt toe.
- 15 Ka tharui teh ampaikai patetlah a ke teh,  
ka lai hai ka dangka dawk a kâbet teh,  
duenae vaiphu dawk na ceikhai.
- 16 Bangkongtetpawiteh, uinaw ni na kalup awh.  
Tamikathoutnaw ni na kalup awh.  
Ka kut hoi ka khok pawkkayawng lah a thut awh.
- 17 Ka hru pueng koung ka touk thai.  
Pout laipalah na khet awh teh, a lungkhuekti awh.
- 18 Ka khohna a kârei awh teh,  
ka angki hah cungpam a rayu awh.
- 19 Oe BAWIPA na hlat takhai hanh.  
Oe ka thaonae karanglah na kabawm haw.
- 20 Senehmaica hoi na rungngang haw,  
ka hringnae ka sungren e heh uinaw thaonae koehoi  
na rungngang haw.
- 21 Sendek kâko dawk hoi na rungngang nateh,  
savi ki dawk hoi na rungngang haw. Na pato leih.
- 22 Ka hmaunawngghanaw koe na min ka pâpho vaiteh,  
kamkhuengnaw koe na pholen han.
- 23 Nangmouh BAWIPA kataketnaw, ama teh pholen awh.  
Jakop catounnaw pueng ama teh tawmrasang awh nateh,  
Isarel catounnaw pueng ama teh taket awh.
- 24 Bangkongtetpawiteh, runae ka khang e runae hah,  
dudam hoeh niteh, agni koehoi a minhmai hai hrawk hoeh.  
Hatei, agni koe a hram toteh a thai.
- 25 Kalen e kamkhuengnae koe ka pholen e teh nang han doeh.  
Ama kataketnaw hmalah ka lawkkam hah ka kuep sak han.
- 26 Tami ka roedeng ni cat vaiteh a von a paha han.  
Ama katawngnaw ni BAWIPA teh a pholen han.



Na lungthin hah pou kâhlaw seh.

- <sup>27</sup> Talai poutnae pueng ni a pâkuem awh teh,  
BAWIPA koe a kamlang awh vaiteh, miphun pueng ni na bawk awh han.
- <sup>28</sup> Bangkongtetpawiteh, uknaeram teh BAWIPA e doeh.  
Miphunnaw hah a uk.
- <sup>29</sup> Talaivan katawntanaw pueng ni cat awh vaiteh a bawk awh han.  
Ma e hringnae ring thai awh hoeh.  
Vaiphu lah ka ban e pueng a hmalah a tabo awh han.
- <sup>30</sup> Ahnimae catounnaw ni hai a bawk awh vaiteh,  
catounnaw ni hai BAWIPA e kamthang hah a dei awh han.
- <sup>31</sup> A lannae, pâpho hanelah a tho awh vaiteh,  
khe lah kaawm hane naw koe  
BAWIPA ni hetheh a sak telah a pâpho awh han.

## 23

### *Tukhoumkung kahawi*

Kathutkung: Devit

- <sup>1</sup> BAWIPA teh kaie tukhoumkung lah ao dawkvah,  
vouthoup hoi kaawm mahoe.
- <sup>2</sup> Pho kahring um vah na tabo sak teh,  
kâhatnae tui teng vah na hrawi.
- <sup>3</sup> Ka hringnae a katha sak teh,  
amae min lahoi lannae lam dawk na hrawi.
- <sup>4</sup> Duenae tâhlip ravo dawk ka cet nakunghai,  
yawthoenae hai ka taket mahoe.  
Bangkongtetpawiteh, kai koelah nang na o,  
na sonron hoi na tahroe ni ka lung na mawng sak.
- <sup>5</sup> Ka tarannaw hmalah rawca na poe,  
ka lû dawk satui na awi teh,  
kaie manang teh poum lah a poum.
- <sup>6</sup> Ka hring nathung lungmanae hoi  
hawinae ni na kâbang sin vaiteh,  
BAWIPA im dawk a yungyoe ka o han.

## 24

### *Lentoenae siangpahrang*

Kathutkung: Devit

- <sup>1</sup> Talai hoi athung e hno kaawm naw pueng BAWIPA e doeh.  
Talai hoi avan e kaawm e taminaw pueng hai amae doeh.
- <sup>2</sup> tuipui dawk adu a ung teh,  
tuinaw dawk acaksak.
- <sup>3</sup> BAWIPA mon dawk apimaw ka luen thai han.  
A bawkim kathoung vah apimaw ka kâen thai han
- <sup>4</sup> Tawksaknae hoi lungthin a thoung teh,  
kahrai ka bawk hoeh e, dumpyennae lawkkamnae ka sak hoeh e naw  
hah  
a luen thai awh vaiteh a kâen thai awh han.
- <sup>5</sup> BAWIPA ni yawhawinae a poe vaiteh,  
ahnimouh kaie rungngangnae Cathut ni  
na yon hoeh atipouh awh han.



- <sup>6</sup> Hot patetlah, taminaw teh  
Cathut koe ka phat thai e taminaw doeh.  
Jakop e Cathut hmalah ka tâcawt thai e doeh.
- <sup>7</sup> Oe longkhanaw na lû lounoug awh haw.  
Yungyoe takhangnaw lounoug awh haw.  
Bawilennae Siangpahrang teh a kâen han.
- <sup>8</sup> Ka lentoe e Siangpahrang teh apimaw  
BAWIPA teh athakasai ni teh athakaawme,  
BAWIPA teh taran tuknae hmuen koe athakaawme doeh.
- <sup>9</sup> Oe longkhanaw na lû lounoug awh haw  
Yungyoe takhangnaw lounoug awh haw.  
Bawilennae Siangpahrang teh a kâen han.
- <sup>10</sup> Bawilennae Siangpahrang teh apimaw  
Ama teh ransahu BAWIPA,  
ka lentoe e Siangpahrang doeh.

## 25

### *Ngaihoumnae hoi rungngangnae*

Kathutkung: Devit

- <sup>1</sup> Oe BAWIPA nang koe ka ratoum.
- <sup>2</sup> Oe ka Cathut nang teh na kâuep dawkvah,  
Kayanae koe na phat sak hanh,  
ka tarannaw ni na tâ hanh naseh.
- <sup>3</sup> Nang na karingnaw teh kayak awh mahoe.  
Hatei, nang taran hanlah a hue karangnaw teh a kaya awh han.
- <sup>4</sup> Oe, BAWIPA na lamthung hah  
na cangkhai nateh na panuek sak haw.
- <sup>5</sup> Nang teh kaie rungngangnae lah na o dawkvah  
na lawkkatang boiboe lah hringnae teh na cangkhai haw.  
Amon hoi kaniloum ditouh nang hah na kâuep han.
- <sup>6</sup> Oe BAWIPA yampa hoi ka lathueng vah  
na la kamnue sak e lungpatawnae, pahrennae teh pahnim hanh.
- <sup>7</sup> Ka naw nah ka yonnae hoi ka payonnae teh  
na ngaithoum haw, kacakpounge na lungmanae hoi  
na hawinae kecu dawk kai teh na pahnim hanh Bawipa.
- <sup>8</sup> BAWIPA teh a lan teh ahawi.  
Tamikayonnaw ni a dawn e lamthungnaw hai a cangkhai.
- <sup>9</sup> A lungthin kârahnoum e teh lam kalan dawk a hrawi teh  
angnae hno hah a cangkhai.
- <sup>10</sup> A lawkkam hoi kâlawk katarawinaw teh  
lungpatawnae hoi a hrawi teh yuemkamculah a ceikhai.
- <sup>11</sup> Oe, Cathut ka yonnae teh banghloi kalen nakunghai  
na min lahoi na ngaithoum haw.
- <sup>12</sup> BAWIPA kâlawk ka tarawi e teh  
a dawn hane lamthung a panue han.
- <sup>13</sup> Lungnem lahoi na o vaiteh na canaw teh  
hete ram dawkvah phu kanepcalah kho a sak awh han.
- <sup>14</sup> BAWIPA e kâlawk katarawinaw e hui lah  
ao teh a lawkkam teh a cangkhai awh.
- <sup>15</sup> BAWIPA teh kâuep yungyoe,  
hatdawvak tangkam dawk hoi ka khoh hah a rasa han.



- 16 Oe, BAWIPA kai koe lah kangvawi nateh na pahren haw,  
bangdawkw tetpawiteh ka o a ru teh ka thayung abaw.
- 17 Ka lung reithainae naw pueng teh na panue patetlah  
ka runae pueng koehoi na rungngang haw.
- 18 Ka reithainae puenghoi ka khangnae naw pueng hah,  
na pouk pouh teh, ka yonnae naw pueng teh na ngaithoum haw.
- 19 Ka tarannaw apap e hoi,  
kai puenghoi na hmuhma awh e hah pouk haw.
- 20 Ka hringnae ring nateh na rungngang haw.  
Hloutnae hmu ka ngai dawkvah nang teh na pátam.  
Yeirapo hoi na awm sak hanh.
- 21 Nang teh na kâuep dawkvah ka hawinae hoi  
laithoehoehnae ni na la ngue lawi seh.
- 22 Oe, BAWIPA Isarelnaw runae koehoi  
rungngang haw.

## 26

### *Ratang nahanelah ratoumnae*

Kathutkung: Devit

- 1 BAWIPA, nang ni kai lawk na ceng haw,  
lungcaknae hoi ka cei teh  
BAWIPA nang na kâuep dawkvah ka kâhuen mahoe.
- 2 Kai hah na noumcai nateh, oe BAWIPA,  
ka lung ni a ngai e naw hoi ka pouknae hah na khen pouh haw.
- 3 Ka cak e na lungpatawnae lamthung kai na patue haw,  
yuemkamcunae ni pou na hrawi.
- 4 Dumyenna hoi cungtalalah ka hmawng hoe.
- 5 Tami kahawihoehnaw hai ka hmawng hoe.
- 6 Tami kahawihoehnaw e kamkhuengnae hah ka hmuhma,  
Tamikathoutnaw hoi reirei ka tahung hoe.
- 7 Ka kut heh thoungnae hoi ka pâsu teh  
BAWIPA namae thuengnae ka lawngven.
- 8 Lunghawilawkdinae la ka sak teh  
kângairu hno na sak e hah ka dei.
- 9 BAWIPA na onae im hah kai lungpataw teh  
na bawilenna hmuon hah kai ni ka ngai.
- 10 Tamikayonnaw koe kai mek thei sin hanlah  
tami kathetnaw koe kai na tâkhawng sin hanh.
- 11 Ahnimouh teh hawihoehnaw yungyoe a sak awh.  
Tadawngno ka ngai e taminaw doe.
- 12 Kai teh hnokahawi hoe e ka sak,  
na pahren nateh na rungngang haw.
- 13 Hnâroumcalah tanghling dawkw ka kangdue teh  
maya a kamkhuengnae koe BAWIPA nang na pholen.

## 27

### *Yuemnae dawkw lunghawinae*

Kathutkung: Devit

- 1 BAWIPA nang teh angnae hoi kaie rungngangnae doe.  
Apihai ka taket ma hoe. BAWIPA nang teh na kanguekung



- ka rapan la doeh na o ka lungpuen mahoe.
- <sup>2</sup> Tami kahawihoeahnaw ni na tuk teh  
thei hanlah na nout navah ouk a rawp awh teh ouk a tâlaw awh.
- <sup>3</sup> Ransahu kalenpoung ni na kalup nakunghai ka lungpuen mahoe.
- Taran ni na ka tuk nahai Cathut nang teh na kângue mingming han.
- <sup>4</sup> BAWIPA koe hno hei han ka ngai e hno buet touh doeh kaawm.  
Hothateh ka hring yunglam BAWIPA imthung o hane hoi yah,  
kângai runae lahoi lam na hrawi tie hah doeh.
- <sup>5</sup> Rucatnae atueng dawkvah hnâroumcalah a rathei rahim na o sak.  
A bawkim thung vah hnâroumcalah na ta,  
ka rasang e lungsong van na thueng.
- <sup>6</sup> Hatdawkvah ka tengpam e kaawm e ka taran teh katâ han  
lunghawinae pawlawk hoi a bawkim thungvah  
thuengnae teh ka poe han.
- <sup>7</sup> BAWIPA pahren lahoi, kai ni na kaw navah ka lawk  
na thai pouh nateh kahei e na thai pouh haw.
- <sup>8</sup> Kai koe, Tho haw na ka tet e  
BAWIPA koe ka tho han.
- <sup>9</sup> Kai koe na minhmai hrawk hanh.  
Kai koe na lungphuen hanh, na san heh na pâlei hanh lah a.  
Oe Cathut kaie rungngangnae nang teh kabawmkung doeh.  
Na cettakhai hanh. Pak na tha hanh lah a.
- <sup>10</sup> Anu hoi apa ni na ka pahnawt nakunghai  
BAWIPA nang ni pou na khenyawn lah a.
- <sup>11</sup> Oe, BAWIPA taran ka tawn dawkvah rounnae lam koe lahoi na cetkhai  
lah a.  
Na ngainae na pâtu haw.
- <sup>12</sup> Laithoe hoi pou na ka yue e  
taran koe na tat hanh.
- <sup>13</sup> A taminaw lathueng BAWIPA hawinae  
ka hmu roeroe han telah ka yuem.
- <sup>14</sup> BAWIPA teh kângue awh, yuemnae tawn awh,  
na lungpout awh hanh.  
BAWIPA teh kângue awh.

## 28

### *BAWIPA teh ka tha hoi kânguena*

Kathutkung: Devit

- <sup>1</sup> Oe BAWIPA nang teh na kaw.  
Ka lungsong, lawkkamuem na awm mahoe.  
Nang ni banglahai na ngaihoeh lah, lawkkamuem na awm pawiteh,  
kai teh tangkom dawk ka bawt e patetlah doeh ka o toe.
- <sup>2</sup> Bawipa nang koe ka hramki laihoi kabawpnae ka hei nahai thoseh,  
Bawipa nange hmuengkathoung, a thung lah ka kut ka dâw to hai  
thoseh,  
kai ni ka hei e hah na thai pouh haw.
- <sup>3</sup> Tamikathoutnaw hoehpawiteh,  
yonnae ka sak e naw hoi cungtalah kai hah na sawn hanh la.
- <sup>4</sup> Ahnima sakyoenae hoi kathoute nuencang patetlah patho haw.  
Amamae kut hoi a sak awh e patetlah patho haw.  
Ahnimouh ni a khang kawi e hah amamae van bout phat sak haw.



- <sup>5</sup> Ahnimouh teh, BAWIPA e thawnew hai thoseh,  
A kutsaknew hai thoseh,  
kâhructuet laihoi a pouk awh hoeh dawkvah,  
ahnimanaw hah raphoe vaiteh,  
nâtuek hai ahnimouh teh bout thaw thai mahoe toe.
- <sup>6</sup> BAWIPA teh yawhawinae awmseh.  
Bangkongtetpawiteh, ka heinae lawk hah a thai toe.
- <sup>7</sup> BAWIPA teh kaie ka thaonae hoi kaie e bahling lah ao.  
Ka lungthin ni a kâuep teh, kabawpnae hah a coe.  
Hatdawkvah, puenghoi ka konawm. Kai ni la hoi ka pholen han.
- <sup>8</sup> BAWIPA teh a miphunnaw e tha lah ao teh,  
satui awi e naw ni kâuep e rungngangnae lah ao.
- <sup>9</sup> Na miphun hah rungngang na teh,  
Nange râw hah yawhawi poe haw.  
Ahnimae tukhoumkung lah awm na teh,  
ahnimanaw hah a yungyoe sin haw.

## 29

### *BAWIPA lawk*

Kathutkung: Devit

- <sup>1</sup> Oe nangmouh athakaawmnaw,  
BAWIPA teh pâtam awh haw.  
BAWIPA koe bawilennae hoi thayung hah poe awh.
- <sup>2</sup> BAWIPA koe a min hoi kamcu e bawilennae hah poe awh  
BAWIPA teh thoungnae kamthoup lahoi bawk awh.
- <sup>3</sup> BAWIPA lawk teh tui dawk ao teh,  
Cathut bawilennae teh puenghoi a cai,  
BAWIPA teh tui moikapap dawk ao.
- <sup>4</sup> BAWIPA lawk teh bahuonae hoi a kawi.  
BAWIPA lawk teh taluenae hoi a kawi.
- <sup>5</sup> BAWIPA lawk ni sidar thingnaw a khoe,  
BAWIPA ni Lebanon mon e sidar thingnaw a pâyaw sak.
- <sup>6</sup> Maitoca patetlah a cawkdawk sak teh,  
Lebanon hoi Sirion hah savica patetlah a cawkdawk sak.
- <sup>7</sup> BAWIPA lawk ni hmaisaa hah a kapek.
- <sup>8</sup> BAWIPA lawk ni kahrawng hai a kahuet,  
BAWIPA ni Kadesh kahrawng hai a kahuet.
- <sup>9</sup> BAWIPA lawk ni sayuk ca a khe sak teh,  
kahrawng e thinghna pueng koug a due.  
A bawkim dawk tami pueng ni 'a sungren' telah ati awh.
- <sup>10</sup> Tuikalen dawkvah bawitungkhung dawk  
BAWIPA teh a tahung  
BAWIPA teh siangpahrang patetlah pou a tahung.
- <sup>11</sup> BAWIPA ni a taminaw hah a thaosak teh,  
BAWIPA ni a taminaw hah rounnae lahoi  
yawhawi a poe han.

## 30

### *Ratoum patonae yawhawi*

Kathutkung: Devit

- <sup>1</sup> Oe BAWIPA na pholen han.



- Bangkongtetzpawiteh, na tawmrasang.  
 Ka tarannaw ni na panuikhai hane na pasoung hoeh.
- 2 Oe BAWIPA, ka Cathut, nang koe ka hram teh,  
 na kabawp teh na dam sak.
- 3 Oe BAWIPA, ka hringnae heh phuen thung hoi na rasa teh,  
 tangkom daw koe ka hoeh nahanlah na hring sak.
- 4 A tamikathoungnaw, BAWIPA pholen hoi la sak awh.  
 A min kathoung pahnim hoeh nahanlah, konawm lawk dei awh.
- 5 A lungkhueknae teh tawkkadek doeh,  
 a ngaikhainae teh hringyung hane doeh.  
 Kanae teh tangmin vah a roe. Hatei, amom vah konawmnae a pha.
- 6 Ka tawnta nateh,  
 ka vout mahoe hoi toe ka ti.
- 7 BAWIPA na ngaikhainae lahoi,  
 ka mon teh kacaklah na kangdue sak.  
 Na minhmai na hro toteh, ka lungrei a thai.
- 8 Oe BAWIPA nang koe ka hram teh,  
 BAWIPA koe ka kâhei.
- 9 Tangkom daw koe ka bo toteh,  
 ka thi ni bang hawinae maw a tawn.  
 Vaiphu ni na pholen vaiteh  
 na lawkkatang hah a pâpho han na maw.
- 10 Oe BAWIPA, ka lawk na thai pouh haw.  
 Na pahren haw. BAWIPA kabawmkung lah pou awm haw.
- 11 Ka cingounae hah  
 lamnae lah na coung sak.
- 12 Apout totouh ka bawilenna ni kâhat laipalah na pholen teh, la a sak  
 thai nahanlah,  
 Oe BAWIPA ka Cathut, a yungyoe hoi konawmnae lawk ka dei han.

## 31

### *Tarannaw koehoi BAWIPA kânguenae*

Kathutkung: Devit

- 1 Oe BAWIPA, nang doeh na kâuep.  
 Kaya hoi na awm sak hanh. Na lanna hoi na rungngang haw.
- 2 Kai koelah na hnâpakeng nateh, karanglah na rungngang haw.  
 Ka kâhronae lungsong hoi rungngang nahanlah  
 ngangnae rapan lah awm haw.
- 3 Bangkongtetzpawiteh, nang teh ka lungsong hoi ka kâhronae lah na o.  
 Hatdawkvah, na min kecu daw koe ka hrawi nateh, na patue haw.
- 4 Kai hanlah, arulaoi a phai awh e tamlawk daw koe ka rasat haw.  
 Bangkongtetzpawiteh, nang teh ka thaonae doeh.
- 5 Oe BAWIPA, lawkkatang Cathut,  
 na kut daw koe ka muiitha ka hruek.
- 6 Cungkeihoehe meikaphaw alawkpui lah kahruengnaw hah ka hmuhma.  
 Hatei, kai teh BAWIPA ka kâuep.
- 7 Na pahrennae lahoi, ka konawm vaiteh, ka lung pou ahawi han.  
 Bangkongtetzpawiteh, ka runae hah ouk na hmu pouh.  
 Runae thung ka hringnae hah na panue.
- 8 Taran kut daw koe ka poe laipalah,  
 A hmuen kawnae koe ka khok hah ouk na hruek.



- <sup>9</sup> Oe BAWIPA, na pahren haw.  
 Bangkongtetpawiteh, runae thungvah ka o.  
 Ka lungmathoe lawi ka mit kOUNg a ro toe.  
 Bokheiyah, ka muitha hoi ka takthai totouh a ro toe.
- <sup>10</sup> Bangkongtetpawiteh, ka hringnae heh  
 lungmathoenae hoi kOUNg ka hno toe.  
 Kum moikasawlah ka cingou.  
 Ka payonnae ni ka thaonae a baw sak.  
 Ka hru hai kOUNg a hmawn toe.
- <sup>11</sup> Ka tarannaw ni pathoe hanelah doeh ka o.  
 A lawkpui lah, ka imrinaw hanelah hoe ka o.  
 Ka hui kahawi ni na panuet teh,  
 lam dawK na ka hmawT e ni na yawng takhai.
- <sup>12</sup> Tami kadout patetlah pahnim lah ka o teh,  
 ampaikEi patetlah ka o.
- <sup>13</sup> Bangkongtetpawiteh, tami moikapap ni a dei awh e ka thai.  
 A hmuen tangkuem takinae ao.  
 Ka hringnae la hanelah kâcai laihoi a kamkhueng awh teh,  
 kho a khan awh.
- <sup>14</sup> Hatei, Oe BAWIPA, kai ni teh nang doeh na kâuep.  
 Ka Cathut doeh ka ti.
- <sup>15</sup> Kaie tuengnaw teh na kut dawK ao.  
 Ka tarannaw kut dawK hoi, na kapahuipalamnaw kut dawK hoi,  
 na rungngang haw.
- <sup>16</sup> Na san koe na mei ang naseh.  
 Na pahrennae lahoi na rungngang lawiseh.
- <sup>17</sup> Oe BAWIPA, kaya hoi na awm sak hanh.  
 Bangkongtetpawiteh, nang teh na kaw toe.  
 Tamikathoutnaw teh, kaya laihoi phueng vah  
 duem awm awh naseh.
- <sup>18</sup> Tamikalannaw taran lahoi, kâoupnae,  
 hoi matheng laihoi lai thoe deinae pahni teh,  
 lawkkamuem lah o sak lah awm seh.
- <sup>19</sup> Oe nang kataketnaw hanelah,  
 na pâkhueng e hoi tami capanaw mithmu vah,  
 nang kâuepnaw hanelah,  
 na noe e na hawinae hah banghloimaw a bawilen.
- <sup>20</sup> Taminaw e arulahoi khokhangnae thung hoi,  
 hlout sak nahanelah, ahnimanaw teh,  
 na onae koe na hmalah na hro han.  
 Tamthoe kadeinaw e lai dawK hoi na rungngang vaiteh,  
 na rim dawK na hro han.
- <sup>21</sup> BAWIPA teh pholen lah awm seh.  
 Bangkongtetpawiteh, kângairu a pahrennae teh,  
 kacakpounge khopui dawK na hmu sak.
- <sup>22</sup> Bangkongtetpawiteh, kai teh na mithmu vah,  
 tâkhawng lah yo ka o toe telah tang ka dei.  
 Hatei, ka hram teh pahrennae ka hei e lawk hah na thai.
- <sup>23</sup> Oe tamikathounnaw pueng,  
 BAWIPA teh lungpataw awh.  
 Bangkongtetpawiteh, BAWIPA ni yuemkamcu e hah a khetyawt teh,  
 kâoupnaw hah moi a pathung.
- <sup>24</sup> BAWIPA kâuepnaw pueng, tarankahawi lah awm awh,



na lungthin a thao sak han.

## 32

### *Ngaithoumnae hoi konawmnae*

Kathutkung: Devit

- <sup>1</sup> Kâtapoenae ngaithoum lah kaawm e hoi  
a yonnae ramuk pouh lah kaawm e teh a yawkahawi e doeh.
- <sup>2</sup> BAWIPA ni yonnae ka tawn hoehe e lah a pouk e hoi,  
a muitha dawk dumyennae kaawm hoehe e teh,  
tami a yawkahawi e doeh.
- <sup>3</sup> Yon pâpho laipalah ka o teh, kanîruihui ka cingou navah,  
ka hrunaw teh kounge a hmawn toe.
- <sup>4</sup> Bangkongtetpawiteh, kanîruihui nange kut ni ka van vah a ri teh,  
ka thaonae teh kawmpoi kân e patetlah rem a phui.
- <sup>5</sup> Ka yonnae hah nang koe ka pâpho.  
Ka payonnae hai ka ramuk hoehe.  
BAWIPA koe ka yonnae ka pâpho han ka ti.  
Hahoi, nang ni, ka yonnae hah na ngaithoum.
- <sup>6</sup> Bangkongtetpawiteh, hmu thai lah na o navah,  
Cathudae tami pueng ni, nang koe ratoum naseh.  
Tûili ka tho nakunghai, ahnimouh teh phat mahoehe.
- <sup>7</sup> Nang teh kai hanlah, kâhronae hmuen doeh.  
Runae thung hoi na hlout sak han.  
Hloutnae la hoi na kalup han. Selah.
- <sup>8</sup> Na cei nahane lamthung na patue han.  
Na cangkhai vaiteh, ka mit hoi khet laihoi na hrawi han.
- <sup>9</sup> Thaipanueknae ka tawn hoehe e marang hoi la patetlah awm hanh.  
Hotnaw teh nang koe a hnai awh hoehe dawkvah,  
pahnimoum hoi sawn lah ao han.
- <sup>10</sup> Tamikathoutnaw teh lungreknæ moi a khang awh.  
Hatei, BAWIPA kâuep e naw teh a pahrennae ni a kalup han.
- <sup>11</sup> Tami kalannaw, BAWIPA dawke lunghawih awh nateh,  
lannaedawke konawm awh.  
Lungthin kalan e tami pueng,  
lunghawih awh nateh hram awh haw.

## 33

### *BAWIPA dawke hringnae*

Kathutkung: Panuekhoeh

- <sup>1</sup> Oe, tamikalannaw, BAWIPA dawke konawm awh nateh, la sak awh.  
Pholennaedawke lungthin kalannaw hanelah a kamcu doeh.
- <sup>2</sup> Ratoung hoi BAWIPA teh pholen awh.  
rui hra touh e ratoung hoi pholen awh.
- <sup>3</sup> Ama koe la katha sak awh nateh,  
lunghawilawke hoi kathoum katang lahoi kueng awh.
- <sup>4</sup> Bangkongtetpawiteh, BAWIPA lawke teh a lan,  
a tawke e pueng teh yuemkamculah ao.
- <sup>5</sup> Lannaedawke hoi kângingnae hah a lungpataw teh,  
talai teh BAWIPA hawinae hoi kounge akawi.
- <sup>6</sup> BAWIPA e lawke hoi kalvannaw sak lah ao teh,



- kalvan kaawm e pueng hai a kâko hoi e kâha hoi sak e seng doeh.
- <sup>7</sup> Talîpui tuinaw hah a pâkhueng teh,  
kadungpoung e tuinaw hah ao nahane hmuen koe a hruek.
- <sup>8</sup> Talai pueng ni BAWIPA taket naseh,  
talaivan kaawm e pueng ni ama teh taket awh naseh.
- <sup>9</sup> Bangkongtetpawiteh, lawk a dei boteh ao.  
Kâ a poe boteh, kacaklah hmawi a kangdue.
- <sup>10</sup> BAWIPA ni miphunlouknaw e kâpannae teh a takhoe toe.  
Tamimaya ni sutpouknae hai banghai bang hoeh lah a coung sak.
- <sup>11</sup> BAWIPA ni kâpankhai e teh a yungyoe a kangning.  
Sut a pouk e teh catounnaw hane totouh a cak.
- <sup>12</sup> A Cathut Jehovah lah kaawm e miphun teh a yawhawi.  
Ama ni râw lah a rawi e miphun teh, tami yawkahawi e doeh.
- <sup>13</sup> BAWIPA ni kalvan hoi a khet teh,  
tami capa pueng koung a hmu.
- <sup>14</sup> A onae hmuen koehoi talai van  
kaawm e pueng koung a radoung.
- <sup>15</sup> Tami pueng e lungthin koung a pathoup teh,  
a sak e puenghai koung a pouk pouh.
- <sup>16</sup> Siangpahrang teh ransa moikapap a tawn daw  
rungngang lah awm hoeh.  
Tami a tha kaawm hai a thaonae ni rungngang mahoe.
- <sup>17</sup> Marang teh rungngang nahanelah  
cungkeihoehe ngaihawinae doeh.  
Thaonae kalen ni hai rungngang thai hoe.
- <sup>18</sup> Duenae koehoi hringnae rasa hane hoi  
takang daw due hoe nahanlah,
- <sup>19</sup> khenhaw! BAWIPA e mit ni  
ama ka taketnaw koe pou a khet.
- <sup>20</sup> Ka hringnae ni BAWIPA a ring,  
ama teh kabawmkung hoi ka bahling doeh.
- <sup>21</sup> Bangkongtetpawiteh, ka lungthin teh ama daw a konawm han.  
Bangkongtetpawiteh, a min kathoung teh kâuep awh.
- <sup>22</sup> Oe BAWIPA, nang daw ngaihawinae ka tawn awh e patetlah  
na pahrennae teh, kaimouh lathueng awm lawiseh.

## 34

### *Cathut kâuepnaw konawmnae*

Kathutkung: Devit, Abimelek hmalah pathu a kâsak nah ahni ni a hrek teh, a ceitakhai nah sak e la

<sup>1</sup> BAWIPA teh pou ka pholen han.

Ama pholenna teh ka kâko hoi pou tâcawt seh.

<sup>2</sup> Ka hringnae ni BAWIPA daw a kâoup han.

Kârahnoumnaw ni a thai awh vaiteh, a lunghawi awh han.

<sup>3</sup> Oe BAWIPA teh na pholen khai awh haw.

A min teh rei kâoupkhai awh sei.

<sup>4</sup> BAWIPA ka tawng navah, ama ni na thai pouh.

Ka takinae pueng thung hoi na rasa.

<sup>5</sup> Ama kakhennaw teh, minhmai a pan awh.

Nâtuek hai kayanae awm mahoe.



- 6 Hete mathoe ni a hram teh, BAWIPA ni a thai.  
Runae pueng thung hoi a rasa.
- 7 Ama kataketnaw teh, BAWIPA e kalvantami ni  
a teng vah petkâkalup lahoi a tungpup sin awh teh, ouk a rasa awh.
- 8 Oe, BAWIPA hawinae patek awh nateh khien awh haw.  
Ama kâuepnaw teh tami a yawkahawinaw doeh.
- 9 Oe, a tamikathoungnaw, BAWIPA teh taket awh.  
A ma kataketnaw teh voutthoup hoi awm boihoe.
- 10 Sendektancanaw patenghai ca hane tawn laipalah  
vonhlah hoi ouk ao awh.  
Hatei, BAWIPA katawngnaw teh, hnokahawi tawn laipalah,  
awm awh mahoe.
- 11 Camonaw tho awh haw, ka lawk thai awh haw.  
BAWIPA takinae na cangkhai awh han.
- 12 Apimaw nuenkahawi hoi hring han ka ngai.  
Apimaw hnokahawi hmu hanlah hring saw ka ngai.
- 13 Na lai teh yonnae thung hoi ring nateh,  
na pahni hah dumnae lawk dei hoe hahanlah ring haw.
- 14 Yonnae cettakhai nateh hawinae sak.  
Roumnae tawng nateh pâleih.
- 15 BAWIPA mit ni tamikalannaw a khet teh,  
a hramnae lawk thai hanelah a hnâ a pakeng.
- 16 BAWIPA minhmai ni hawihoe hnae kasakkungnaw hah a taran.  
Talai van ahnimouh pou pouknae tâkhawng pouh lah ao han.
- 17 Tamikalan a hram toteh, BAWIPA ni a thai pouh teh  
runae thung hoi a rasa.
- 18 A lungkareknaw hanelah,  
BAWIPA a hnai teh, muitha lungkamathoutnaw a rungngang.
- 19 Tamikalannaw ni runae moi a kâhmo awh.  
Hatei, BAWIPA ni hotnaw thung hoi a rungngang.
- 20 A hru pueng a ring pouh,  
buet touh boehai khoe lah awm mahoe.
- 21 Hawihoe hnae ni tamikathout thet vaiteh,  
tamikalan kahmuhmanaw teh thoebo lah ao awh han.
- 22 BAWIPA ni a sannaw hringnae hah a ratang teh,  
ama kâuepnaw teh buet touh boehai thoebo lah awm mahoe.

## 35

### *A taminaw hanlah BAWIPA ni moipathungnae*

Kathutkung: Devit

- 1 Oe BAWIPA, kai na ka tarannaw hah, taran van haw.  
Kai na katuknaw hah tuk van haw.
- 2 Taisawm hoi bahling lat nateh,  
kai kabawp hanelah kangdout haw.
- 3 Tahroe hai patuem nateh, na kapâleinaw hah ngang haw.  
Ka hringnae koe vah na kaie rungngangnae doeh tie dei haw.
- 4 Ka hringnae la hanelah, kakâcainaw hah kayayeirai hoi awm sak nateh,  
runae poe hanlah kakâcainaw hah yawng sak nateh,  
lungpout hoi awm sak haw.
- 5 Kahlî ni vaikong palek e patetlah awm awh naseh.  
BAWIPA e kalvantami ni kOUNg kahmat lah pâlei naseh.



- <sup>6</sup> Ahnimouh ni a dawn awh e lamthung teh, kahmot e,  
ka pâhnan e lam lah awm naseh.  
Hawvah, BAWIPA e kalvantaminaw ni pâlei naseh.
- <sup>7</sup> Bangkongtetpawiteh, a khuekhaw awm laipalah,  
ka kâman nahanelah arulahoi tamlawk a yap awh toe.  
A khuekhaw awm laipalah, ka bo nahane tangkom a tai awh.
- <sup>8</sup> Pouk laipalah ahnimouh teh rawk awh naseh.  
Arulahoi tamlawk a yap awh e dawk amamouh kâman awh naseh.  
Amamae tangkom dawk amamouh bawt awh naseh.
- <sup>9</sup> Ka hringnae heh BAWIPA dawk a lunghawi vaiteh,  
a rungngangnae dawk a konawm han.
- <sup>10</sup> Ka hru pueng ni, BAWIPA nang patetlah apimaw kaawm.  
Ahnimouh hlah a tha kaawmnaw thung hoi mathoenaw hah na rasa.  
Bokheiyah, mathoe hoi ka voutthoup e hah,  
ahnimouh karaphoekung thung hoi na rungngang toe, ati awh han.
- <sup>11</sup> Kapanuekkhai kaphawk a tho awh teh,  
ka panue hoe e naw hah na pacei awh.
- <sup>12</sup> Ka muitha lungmathoe sak nahanelah,  
hawinae hah thoenae hoi a patho awh.
- <sup>13</sup> Hatei, kai niteh, a pataw awh navah, buri ka kâkhu,  
rawcahai hoi kârahnoum hoi ka o.  
Hahoi, ka ratournae teh ka lungthin koe letlang a ban.
- <sup>14</sup> Hui hoi hmaunawngnga ka khui e patetlah,  
manu hoi ka khui e patetlah ka kâhlai teh ka tabut.
- <sup>15</sup> Hatei, ahnimouh niteh, ka kangduenae a mathoe toteh,  
konawm laihoi a kamkhueng awh.  
Na ka tarannaw teh cungtalah a kamkhueng awh teh,  
hot hah ka panuek hoe. Kâhat laipalah, kounng na phi awh.
- <sup>16</sup> Cathutlaipa e naw ni,  
pawibu venna koe na panuikhai awh teh, a hâkam na kata sin awh.
- <sup>17</sup> BAWIPA nâtotouh maw sut na khet han.  
Raphoe hanlah kâcainae thung hoi na rungngang haw.  
Sendek koehoi ka hringnae hah hlout sak haw.
- <sup>18</sup> Ka lentoe e kamkhuengnae koe,  
konawmnae lawk hah ka dei vaiteh,  
tami moikapap hmalah ka pholen han.
- <sup>19</sup> Laithoehravnghrang lahoi ka tarannaw ni kai dawk a konawm hanh  
naseh.  
A khuekhaw awm laipalah, na kahmuhmanaw ni,  
na hmaiet hanh naseh.
- <sup>20</sup> Bangtelah tetpawiteh, roumnae lawk hah dei awh hoe niteh,  
hete ram taminaw duem ao awh lahunnah,  
dumnae lawk dueng doeh a dei awh.
- <sup>21</sup> A pahni na ang sin awh teh,  
vehveh, ka mit hoi ka hmu toe ati awh.
- <sup>22</sup> Oe BAWIPA, het heh na hmu doeh.  
Duem awm hanh. Oe BAWIPA, na hlat takhai hanh.
- <sup>23</sup> Ka Cathut hoi ka BAWIPA,  
kai dawk ka phat e lawkceng hane kabawp hanelah,  
kâhlaw nateh, thaw haw.
- <sup>24</sup> Oe BAWIPA, ka Cathut, na lanna lahoi lawk na ceng pouh haw.  
Kai dawk a konawm awh nahanh seh.



- 25 Ahnimouh ni a lung thung hoi  
maimae lungngai akuep han toe,  
kOUNg payawp awh han toe tet awh hanh naseh.
- 26 Ka rucatnae dawk a lungkahawi e naw hah, kayak awh naseh.  
Kai lathueng kâoupnaw hah kayayeirai hoi awm awh naseh.
- 27 Ka lannae dawk kanawmkhaikung teh,  
lungnaw hoi la sak naseh.  
A san dawk a lung ka hawi e BAWIPA teh,  
pholen lah awm seh telah pou dei awh naseh.
- 28 Hahoi, ka lai ni na lannae lawk a dei vaiteh,  
kanîrui nang na pholen han.

## 36

### *Tami thoenae hoi Cathut kuepcingnae*

Kathutkung: Devit

- 1 Tamikathoutnaw ni kâtapoenae dawk  
ka lungthung hoi ka tâcawt e teh,  
ahnimae mit dawk Cathut takinae banghai awm hoe.
- 2 A payonnae hmawt hoe,
- panuek hoe telah, a mithmu vah amahoima  
tamikalan lah a kâsak awh.
- 3 A dei e lawk teh, thoenae hoi dumnae dueng doe.
- Kahawi hno sak hane hoi  
lungang hane hah a pahnawt awh.
- 4 A ikhun van hawihoe hane hah a pouk teh,  
kahawihoe he lamthung thama lahoi a dawn teh,  
yonnae hah panuet hoe.
- 5 Oe BAWIPA na pahrennae teh kalvan ao teh,  
yuem na kâmcunae ni tâmai koe a pha.
- 6 Na lannae teh kalen e mon patetlah ao teh,  
na lawkcengnae teh ka dungpoung e tui patetlah ao.  
Oe BAWIPA, tami hoi saringnaw hah ouk na khetyawt.
- 7 Oe Cathut, na lungpatawnae teh banghloimaw a sungren.  
Hatdawkvah, tami capanaw ni na tâhlip hah a kâuep awh.
- 8 Na imthung vah, kapap e hnokahawi hoi na boum sak teh,  
na konawmnae palangtui na nei sak.
- 9 Nang koe vah hringnae tuikhu teh ao.  
Na angnae dawkvah, angnae hah ka hmu awh.
- 10 Oe, nang kapanueknaw koe,  
na lungpatawnae pou awm na seh,  
lungthin kalannaw koe na lannae kammuek naseh,
- 11 Kâoupnae khok teh kai taranlahoi  
tho nahanh seh.
- 12 Haw tueng vah, tamitongthoenaw kOUNg a rawp awh toe.  
Tâkhawng lah ao awh teh, thaw awh mahoe toe.

## 37

### *Tamikalan ni coe e raw hoi tamikathout ni coe e raw kahmanae*

Kathutkung: Devit

- 1 Thoenae kasaknaw kecu dawk lungmathoe hoi awm hanh awh.  
Payonnae kasaknaw hai ut awh hanh.



- 2 Bangkongtetpawiteh, phokahring patetlah palang kamyai aw h vaiteh,  
anhna kahring patetlah palang a due aw h han.
- 3 BAWIPA kâuep nateh, hawinae hah sak haw.  
Ram thung awm nateh, yuemkamcunae hah hringkhaih.
- 4 BAWIPA daw kkonawm haw.  
Na lungngai e hah na poe han.
- 5 Na lamthung hah BAWIPA koe poe haw,  
ama kâuep haw, ama ni a sak han.
- 6 Na lannae teh angnae patetlah tâcawt sak vaiteh,  
na kângingnae hah kanîthun patetlah ao sak han.
- 7 BAWIPA daw k kâhat nateh, lungsaw laihoi ring haw.  
Amamae lamthung daw k tânae kahmawtnaw kecu daw k thoseh,  
thoenae a noe e naw daw k a kâvoe aw h kecu daw k thoseh,  
na lungmathout hanh.
- 8 Na lungphuen sak hanh,  
lungkhueknae cettakhai haw.  
Lungmathoe hoi awm hanh.  
Hot ni teh, hawihoe hnae koe doeh na hrawi.
- 9 Bangtelah tetpawiteh, thoenae kasaknaw teh, raphoe lah ao aw h han.  
Hatei, BAWIPA ka ngai hawi e naw ni, talai heh râw lah a coe aw h han.
- 10 Bangtelah tetpawiteh, tamikathoutnaw teh dongdengca daw k awm aw h  
mahoe h toe.  
Bokheiyah, a onae hmuen koe kahawicalah na tawng han,  
hatei, awm mahoe h toe.
- 11 Hatei, a lungkanem e ni talai râw a coe vaiteh,  
kapap e roumnae daw k a lunghawi aw h han.
- 12 Tamikathout ni tamikalan a youk teh,  
a hâkam a kata sin.
- 13 Hatei, Bawipa ni tamikathout teh a panui sin.  
Bangkongtetpawiteh, ahnimae hnin ka tho hane hah a panue.
- 14 Mathoe hoi kavoutthoupnaw kamlei sak hane hoi,  
kalan lah kahringnaw thei hanelah,  
tamikathoutnaw ni amamae tahloi sut a rayu aw h teh,  
licung sut a sawn aw h toe.
- 15 Hatei, amamae tahloi teh amamae lung daw k kâen vaiteh,  
ahnimae licung teh khoe lah ao han.
- 16 Tamikathout ni tawnta e hlak,  
tamikalan ni younca a tawn e ahawihnawn.
- 17 Bangtelah tetpawiteh, tamikathout e kut teh khoe lah awm vaiteh,  
tamikalan e kut teh BAWIPA ni a kabawp han.
- 18 BAWIPA ni tamikalannaw e hnin a panue pouh teh,  
a coe aw h e râw teh a yungyoe kangning e doeh.
- 19 Ahnimouh teh, atueng mathoe nahaiyah,  
yeyrai phawt aw h mahoe h.  
Takang tue nahaiyah, a von a paha aw h han.
- 20 Hatei, tamikathout teh a kahma han.  
BAWIPA e tarannaw teh,  
ka sungren e phokahring patetlah kahmat aw h vaiteh,  
hmaikhu lah a pâyam aw h vaiteh a kahma aw h han.
- 21 Tamikathout niteh, a cawi e patho hoe h toe.  
Hatei, tamikalan niteh, a pahren teh a poe.



- 22 Bangtelah tetpawiteh, yawhawi poe lah kaawmnaw ni  
talai râw a coe awh han.  
Thoebo lah kaawmnaw teh raphoe lah ao awh han.
- 23 Tamikalannaw e khoktabei teh BAWIPA ni a caksak teh,  
a ceinae lamthung hah a ngai pouh.
- 24 A tâlaw nakunghai, poutnae koe phat mahoe.  
Bangkongtetpawiteh, BAWIPA ni ahnie kut a kuet pouh.
- 25 Thoundoun lah ka o teh ka matawng toe.  
Tamikalan ceitakhai e ka hmawt boihoeh.  
A ca catounnaw kutdaw lah ao e ka hmawt boihoeh.
- 26 Ayâ a lungma teh, a cawi sak dawkvah,  
a ca catounnaw teh yawhawinae a coe awh.
- 27 Yonnae cettakhai nateh, hawinae sak nateh,  
hete ram daw pou awm haw.
- 28 Bangkongtetpawiteh, BAWIPA ni kângingnae hah a lungpataw.  
A tamikathoungnaw cettakhai boihoeh.  
Lungmawng lah pou ao sak.
- 29 Tamikalan ni ram heh râw lah a coe vaiteh,  
a thung vah kho pou a sak awh han.
- 30 Tamikalan e pahni ni lungangnae lawk a dei teh,  
a lai ni kângingnae hah a pâpho.
- 31 A Cathut e kâlawk teh a lungthin thung ao dawkvah,  
a cei toteh tâlaw mahoe.
- 32 Tamikathout ni tamikalan a pawp teh,  
thei hanelah ouk a tawng.
- 33 Hatei, BAWIPA ni ahnie kut daw tamikalan hah tâkhawng mahoe.  
Lawkceng lah ao nakunghai yonpen lah awm mahoe.
- 34 BAWIPA hah ring haw.  
A lamthung hah dawn haw.  
Hete ram coe hanelah, na tawmrasang han.  
Tamikathoutnaw koun raphoe lah ao e hah na hmu han.
- 35 Tamikathout hoi tamitongthoenaw teh, ung e thingkung patetlah,  
hluthlut a naw awh e hah ka hmu toe.
- 36 Hatei, a due teh, khenhaw! ahni teh awm hoe toe.  
Bokheiyah, ka tawng eiteh, hmu hane awm hoe toe.
- 37 Kuepnae hah pouk nateh, lannae hah lueplueppouk haw.  
Bangkongtetpawiteh, hmâ lah a coe hane teh,  
lungmawngnae doeh.
- 38 Hatei, tamikayonnaw teh,  
koun raphoe lah awm vaiteh,  
tamikathoutnaw ni a coe hane haiyah,  
raphoenae hah doeh.
- 39 Tamikalan rungngangnae teh, BAWIPA koehoi doeh.  
Ahni teh runae tueng nah kânguenae im doeh.
- 40 BAWIPA ni kabawm vaiteh, a rungngang han.  
Ama a kâuep dawkvah, tamikathoutnaw thung hoi  
a rasa teh ouk a rungngang.

## 38

*Yuenae tueng nah ratoumnae*

Kathutkung: Devit



- 1 Oe BAWIPA lungphuen laihoi na yue hanh lah a.  
Puenghoi lungkhuek laihoi hai na yue hanh.
- 2 Na tahroe ni kai hah na thut dawkvah,  
na kut ni hoe na nam sin.
- 3 Na lungphuennae kecu dawk, ka takthai dawk damnae awm hoeh.  
Ka yonnae kecu dawk ka hru damnae awm hoeh.
- 4 Ka payonnae ni ka lû a ramuk dawkvah,  
ka phu thai hoeh e hno patetlah doeh ao.
- 5 Ka pathunae kecu dawk, ka hmâ dukhnai teh,  
a hmui a tho toe.
- 6 Patawnae khang hoi ka kâkalawng teh,  
kanîruihui lungmathoe hoi ka cingou.
- 7 Bangkongtetpawiteh, ka laheibawnaw a kâan poung dawkvah,  
ka takthai dawk damnae roeroe awm hoeh.
- 8 Ka tawn poung teh ka lung a rek dawkvah,  
ka lung a kâraphei teh ka cingou.
- 9 BAWIPA, ka ngainae pueng teh na hmalah ao.  
Ka cingounae hai kouna na panue.
- 10 Ka lung a duem teh tha ka tawn hoeh toe.  
Ka mit angnae hai takuettakuet a mawm toe.
- 11 Ka patawnae dawk ka pahren e naw hoi huikonaw ni,  
na hnai ngai awh hoeh toe.  
Ka imthungnaw ni hai na roun awh toe.
- 12 Ka hringnae la han kakâcainaw nihai,  
kai hanlah karap a patûng awh.
- 13 Hatei, kai teh, hnâpang patetlah ka thai hoeh,  
lawka patetlah doeh ka o.
- 14 Hottelah, ka thai hoeh e patetlah ka o teh,  
ka pato thai hoeh e patetlah ka o.
- 15 Oe BAWIPA, nang dawk ngaihawinae ka tawn dawkvah,  
Oe BAWIPA, ka Cathut, na thai pouh haw.
- 16 Na thai pouh haw, hoehpawiteh, kai dawk a konawm awh vaiteh,  
ka khok a thawn toteh, kai taranlahoi kâoup awh payon vaih ka ti.
- 17 Kai teh rawp hane coungkacoe ka o dawkvah,  
ka lungmathoenae teh pou ka pouk.
- 18 Ka yonnae ni ka lung a puen sak dawkvah,  
peng ka pâpho ngala toe.
- 19 Hatei, ka tarannaw teh, a tak a dam awh, a thao awh.  
A khuekhaw awm laipalah na kahmuhmanaw teh, apap awh.
- 20 Hawinae hah yonnae hoi kapathonaw hai,  
hawinae ka tarawi kecu ka taran lah ao awh.
- 21 Oe BAWIPA, na cettakhai hanh.  
Oe ka Cathut, na hlat takhai hanh.
- 22 Oe rungngangnae BAWIPA,  
karanglah na kabawm haw.

## 39

### *Lungangnae hoi ngaithoumnae*

Kathutkung: Devit

- 1 Lawk hoi boehai ka payon hoeh nahanelah,  
kai teh ka kâhruetcuethan.



- Tamikhouthnaw ka hmalah ao awh lahun nah,  
ka pahni ka moum han telah ka ti.
- <sup>2</sup> Lawk dei laipalah duem ka o.  
Hawinae boehai dei laipalah duem ka o teh,  
ka lung hoehoe a mathoe.
- <sup>3</sup> Ka lungthin teh ka thung vah a kâan.  
Luepluep ka pouk lahun nah, hmai a kak.  
Hat toteh, ka kâko hoi lawk ka dei.
- <sup>4</sup> BAWIPA ka thayounnae ka panue thai nahan,  
ka poutnae na panuek sak haw.  
Ka hringnae hnin hai na panuek sak haw.
- <sup>5</sup> Bokheiyah, ka hringyung heh khap touh dueng na sak teh,  
ka kumnaw hai na hmalah, banghai bang hoeh lah doeh ao.
- <sup>6</sup> Tami pueng teh tâhlip patetlah doeh koug a loum awh.  
Banghai bang hoeh e doeh a pâlei awh.  
Hnopaï thouk a pâkhueng awh teh,  
apie lah maw ao han vai tie panuek awh hoeh.
- <sup>7</sup> Bawipa, atu ka panue e heh bang na maw.  
Nang teh ka ngaihawi e lah na o.
- <sup>8</sup> Kâtapoenae pueng thung hoi na rasat haw,  
tamipathunaw ni panuikhai hanelah na awm sak hanh.
- <sup>9</sup> Nang teh, kasakkung lah na o dawkvah,  
ka kâko ka ang laipalah duem ka o.
- <sup>10</sup> Na reknae heh na takhoe pouh leih,  
na kut hoi hemnae ni koug na raphoe toe.
- <sup>11</sup> Taminaw e payonnae hah na yue teh,  
na rek pawiteh ahriai ni a ca e patetlah,  
taminaw e taluenae teh, na kahma sak.  
Atangcalah, tamipueng ahrawnghrang doeh.
- <sup>12</sup> Oe, BAWIPA, ka ratoumnae na thai pouh haw.  
Ka hramnae lawk koelah, na hnâpakeng haw.  
Ka mintoenaw patetlah imyin hoi kahlawng ka cet rumram e lah ka o.
- <sup>13</sup> Kaawm tOUNG laipalah, ka khup hoehnahlan vah,  
ka ko bout a nawm nahanelah, na pasai haw.

## 40

### *Tanouknae dawk kacaklah yuemnae*

Kathutkung: Devit

- <sup>1</sup> BAWIPA teh lungsaw laihoi ka ring.  
Kai koe lah a kamlang teh, ka hram e lawk hah a thai.
- <sup>2</sup> Rawknae tangkom hoi tangdong thung hoi na rasa.  
Ka khok hah talung van a hruek teh, kacaklah na kangdue sak.
- <sup>3</sup> Maimae Cathut pholennae la katha hah ka pahni dawk a hruek.  
Tamimaya ni hot hah hmawt vaiteh, a taki awh vaiteh,  
BAWIPA a kâuep awh han.
- <sup>4</sup> Ka kâoupnaw hoi cathutkaphawk koe lah lam kaphennaw koe lam ka  
phen hoeh niteh,  
BAWIPA ka kâuepnaw teh tami yawkahawi e doeh.
- <sup>5</sup> Oe BAWIPA kaie Cathut, kângairu hno na sak e naw hoi,  
kaimouh hanlah na pouk e naw hah moi apap.



- Na hmalah boeba hai ka dei thai lek hoeh.  
 Ka dei vaiteh, ka pâpho pawiteh, touk thai e hloilah doeh ao.
- <sup>6</sup> Thuengnae hoi poenae hah na ngai e nahoe.  
 Hmaisawi thuengnae hoi yon thuengnae hah na hei e nahoe.  
 Ka hnâ teh na ang sak.
- <sup>7</sup> Hatnavah, kenhaw! cakalawng dawk kaie kong thut e patetlah  
 kai teh ka tho.
- <sup>8</sup> Oe Cathut, na lungngai sak e heh ka konawmnae doeh.  
 Na kâlawk hai ka lungthung vah ao.
- <sup>9</sup> Kalenpounge kamkhuengnae koe vah, lannae kamthang hah ka pâpho  
 toe.  
 Dei hanelah ka kâcakuap hoeh.  
 Oe BAWIPA, nang nama ni roeroe na panue doeh.
- <sup>10</sup> Na lannae teh, ka lungthung vah ka hro teh,  
 yuemkamculah na onae hoi na rungngangnae hah ouk ka pâpho.  
 Puenghoi kamkhuengnae koe na pahrennae hoi na lawkkatang teh  
 duem kaawm khai thai hoeh.
- <sup>11</sup> Oe BAWIPA, ngai kaawm e na lungmanae teh  
 na pasoung laipalah awm hoeh.  
 Na pahrennae hoi na lawkkatang ni, pout laipalah na ngue lawiseh.
- <sup>12</sup> Bangkongtetpawiteh, touklek hoeh e runae ni na kalup,  
 ka payonnae ni na tâ.  
 Hatdawkvah, lathueng lah ka khien thai hoeh.  
 Ka lû dawk e sam hlawk apap. Hatdawkvah, ka lungthin teh a tâwn.
- <sup>13</sup> Oe BAWIPA, pahren lahoi na rungngang haw.  
 Oe BAWIPA, karanglah na kabawm haw.
- <sup>14</sup> Ka hringnae raphoe hanlah katawngnaw teh,  
 kaya laihoi awm awh naseh.  
 Kai thoenae dueng kangainaw teh,  
 kaya laihoi pâlei lah awm naseh.
- <sup>15</sup> Ekeh, Ekeh, katetnaw hah  
 a pouknae kadeng lah kayak awh naseh.
- <sup>16</sup> Nang katawngnaw pueng teh,  
 nang dawk konawm laihoi lunghaw awh naseh.  
 Na rungngangnae ka lungpataw naw ni,  
 BAWIPA teh tawmrasang lah awmseh telah pout laipalah tet awh  
 naseh.
- <sup>17</sup> Kai teh tamimathoe hoi tamikavout doeh.  
 Hatei, BAWIPA ni ouk na pouk.  
 Nang teh na kabawmkung hoi rungngangkung doeh.  
 Hnawngcawn hanh lawi a ka Cathut.

## 41

### *Cathut e tami khangnae hoi yawhawinae*

Kathutkung: Devit

- <sup>1</sup> Tamimathoe hanelah ka pouk pouh e tami teh a yawkahawi e doeh.  
 Runae tueng nah ahni hah BAWIPA ni a hlout sak han.
- <sup>2</sup> BAWIPA ni a hlout sak vaiteh, a pasai han.  
 A tarannaw koe poe hanlah na pasoung mahoe.
- <sup>3</sup> A pataw teh sut a yan navah BAWIPA ni thapoe vaiteh,  
 amae hmalah bout na thaw sak han.
- <sup>4</sup> BAWIPA na pahren haw, ka hringnae heh dam sak haw.



Bangkongtetpawiteh, nang taranlahoi ka yon toe telah ka ti.

- 5 Ka tarannaw ni nâtuék maw a due vaiteh a min raphoe lah ao han telah, thoenaé koelah dueng na dei awh.
- 6 Na tho sin nahaiyah laithoe duengdoeh a dei awh.  
A lungthin ni payonnaé dueng hah a pâkhueng teh,  
alawilah a tâco nah tangkuem koe ouk a dei.
- 7 Na kahmuhmanaw pueng ni kai taranlahoi arulawk a kêdei awh teh,  
kai pataw nahane dueng doeh a kêdei awh.
- 8 Patawnaé kathout ni a man tOUNg dawkvah, atu sut a yan toe,  
thaw mahoeH toe telah a kêdei awh.
- 9 Ka hui kahawi, ka kâuep e, kaie rawca ka cat e niyah,  
kai taranlahoi a khokpaimai na tawm sin.
- 10 Hatei, Oe BAWIPA, ahnimouh moi ka pathung thai nahanlah,  
na pahren nateh, bout na thaw sak haw.
- 11 Hete kong dawK kai dawK na lunghawî doeh tie ka panue.  
Bangkongtetpawiteh, ka tarannaw ni na tâ awh hoeH.
- 12 Kai teh pouknaé kalan ka tawn dawkvah,  
na tawm nateh na hmalah pou na hrueng haw.
- 13 Isarel BAWIPA teh, a yungyoe hoi a yungyoe totouh  
pholen lah awm lawiseh.  
Amen hoi Amen.

## 42

### *Runae koeHoi Cathut dounnae*

Kathutkung: Korah capanaw

- 1 Sakhi ni tuisi a doun e patetlah Oe Cathut,  
ka hringnae ni nang na doun.
- 2 Ka hringnae ni Cathut, ka hring Cathut hah a kahran.  
Nâtuék ne Cathut koe ka pha vaiteh, ka minhmai ka patue van han  
vai.
- 3 Ayânaw ni na Cathut teh nâmourh ao vâ pou ati awh dawkvah,  
karum khodai ka mitphi teh khap laipalah ka rawca lah ao.
- 4 Tamimaya hoi Cathut im rei cei awh navah, konawm laihoi,  
pholen la rei sak awh navah,  
tamimaya hoi pawî koe rei cei awh e naw hah,  
bout ka pouk toteh, ka hringnae heh ka thung vah ka rabawK.
- 5 Oe, ka hringnae bang dawK ne sut na ngam.  
Bangkongmaw ka thungvah runae na kâhmo.  
Cathut hah ngaihawî haw.  
Bangkongtetpawiteh, ama teh ka pholen han rah,  
na ka rungangkung hoi ka Cathut.
- 6 Ka hringnae teh ka lungthung a lungmathoe dawkvah,  
Jordan ram, Hermon ram hoi Mizar,  
mon koeHoi nang teh pou na pouk.
- 7 Na tuitâto pawlawk dawK,  
tui kadung hoi tui kadung a kâpan teh,  
na tuicapa ka thaw e ni kOUNg na ramuk toe.
- 8 BAWIPA ni khodai lah a pahrennae hah na poe teh,  
karum lah pholennaé la sak laihoi,  
ka hringnae Cathut koe ratoum laihoi ka o.
- 9 Ka lungsong, Cathut koevah, bangkongmaw na pahnim.



Bangkongmaw ka tarannaw ni  
na pahuipalam awh kecu daw  
ka lung a mathoe han rah, telah ka dei han.

- 10 Ka tarannaw ni nâmouh na Cathut teh ao telah  
na panuikhai kecu daw,  
ka hru koug a khoe awh mue toe telah ka pouk.
- 11 Ka hringnae bangkongmaw na lung a mathoe.  
Bangkongmaw ka thungvah, runae na kâhmo.  
Cathut hah kâuep haw.  
Bangkongtetpawiteh, ama teh ka pholen han rah.  
Na kabawmkung hoi na ka damsakkung doeh.

## 43

### *Runae thung hoi Cathut koe ratoumnae*

Kathutkung: Korah capanaw

- 1 Oe Cathut, lawk na ceng pouh haw.  
Cathutlaipa e miphunnaw hmalah  
ka kong heh lawk na ceng pouh haw.  
Oe tamikathoutnaw hoi kadumyennaw koehoi na rungngang haw.
- 2 Bangkongtetpawiteh, nang teh kaie Cathut rapanim doeh.  
Bangkongmaw na hnoun.  
Bangkongmaw na ka tarannaw kecu ka lung ouk a mathoe.
- 3 Oe, na angnae hoi lawkkatang hah patoun haw.  
Hot niyah na hrawi naseh.  
Na mon kathoung hoi na onae lukkareiim daw na phatkhai naseh.
- 4 Hottelah Cathut e thuengnae khoungroe,  
ka konawmnae Cathut koe ka cei han.  
Oe Cathut, ka Cathut, ratoung hoi na pholen han.
- 5 Oe ka hringnae Bangkongmaw na lung a mathoe.  
Bangkongmaw ka thung vah, runae na kâhmo.  
Cathut hah kâuep haw, ama teh ka pholen han.  
Na kabawmkung hoi na kadamsakkung Cathut doeh.

## 44

### *Yeiraiponae koehoi ratangnae pahnimhoehnae*

Kathutkung: Korah capanaw

- 1 Oe Cathut, ayan vah mintoenaw se nah na sak e hah,  
a dei awh teh ka hnâ ni a thai.
- 2 Na kut hoi miphunlouknaw hah na pâlei.  
Hatei, mintoenaw hah a hmuen na poe,  
ayânaw hah runae na poe teh na pâlei.
- 3 Bangkongtetpawiteh, ram teh tahloi hno lahoi a la awh e nahoe.  
A kut hoi kârungngang awh e hai tho hoe.  
Hatei, na thaonae kut hoi na minhmai angnae lahoi ram a la awh e  
doeh.
- 4 Oe Cathut, nang teh kaie Siangpahrang doeh.  
Jakop hanelah tânae kâ poe haw.
- 5 Nang pawlawk lahoi ka taran hah ka tâ awh han.  
Na min lahoi ka tarannaw hah rep ka coungroe awh han.
- 6 Bangkongtetpawiteh, kaie licung hah ka kâuep mahoe.  
Kaie senehmaica ni na rungngang mahoe.



- 7 Hatei, ka taran thung hoi na rungngang teh,  
na kahmuhmanaw hah yeiraipo hoi na o sak.
- 8 Hnintangkuem Cathut dawk ka kâoup teh,  
a min hah pou ka pholen.
- 9 Hatei atu teh hnam na thun takhai teh, yeiraipo hoi na o sak.  
Kaimae ransanaw koe bout na cet boihoeh.
- 10 Taran hmalah na yawng sak teh,  
na ka tarannaw ni a ngai patetlah na lawp awh.
- 11 Tu thei hane patetlah na ceikhai teh,  
miphun pueng koe kOUNg na kathek awh.
- 12 Na taminaw hah banghai bang hoeH lah na yo teh,  
aphu teh na bawi khai kalawn hoeH.
- 13 Imrinaw lungkuep nahane hoi,  
tengpam e taminaw ni dudam e hoi,  
panuikhai hanelah na coung sak awh toe.
- 14 Miphunlouknaw ni lairui lah rui hane hoi,  
taminaw ni lûsaling sin hanelah na coung sak awh toe.
- 15 Na kapathoenaw hoi na kahmuhmanaw e lawk kecu hoi,  
tarannaw hoi moi ka pathungnaw kecu dawK,
- 16 kayanae teh ka hmalah pout laipalah ao teh,  
ka kayanae ni ka minhmai a ramuk.
- 17 Hotnaw pueng ni na bo sin.  
Hatei, na pahnim boihoeh.  
Na lawkkam hai ka tapoe boihoeh.
- 18 Kaimae lungthin hnuk kâhnawn hoeH niteH,  
na lamthung hai ka phen boi awh hoeH.
- 19 Hatei nang ni kahrawnguinaw onae koe kOUNg na phi teh,  
kaimouh lathueng duenae tâhlip hoi na ramuk awh.
- 20 Kaimouh ni, kamamae Cathut min ka pahnim awh teh,  
ramlouk cathut koe ka kut ka dâw awh pawiteH,
- 21 Cathut ni tang panuek mahoeH maw.  
BangkongtetpawiteH, lungthin e arulawK hai kapanuekkung doeH.
- 22 Nang hanelah hnintangkuem thei lah ka o awh.  
A thei hane tu patetlah doeH na pouk awh.
- 23 Kâhlaw haw, Oe BAWIPA, bangkongmaw muet na i.  
Thaw nateH hnamthun takhai hanh leih.
- 24 Bangkongmaw na minhmai pou na hro teh,  
runae hoi kapahuipalamnaw kâhmo awh e heh ouk na pahnim.
- 25 Talai dawK minhmai rekkâbet lah ka tabut teh,  
vaiphu dawK ka tabo.
- 26 Na kabawmkung hanelah tho haw,  
na lungmanae lahoi na ratang haw.

## 45

### *Messiah hoi a langa bawilennae*

Kathutkung: Korah capanaw

- 1 Ka lungthin heh hnokahawi hoi a poum teh,  
Siangpahrang kong hah ka dei han.  
Ka lai teh ca kathutkung e cacung patetlah coungkacoe ao.
- 2 Nang teh tami capanaw hlak na mei ahawihnawn.  
Na pahni dawK pahrennae awi lah ao.



- Hatdawkvah, Cathut ni yawhawi pou na poe.
- <sup>3</sup> Oe athakaawme, na bawilennae hoi na taluena hoi, na tahloi teh na keng dawk kâyeng haw.
- <sup>4</sup> Lawkkatang hoi kârahnoumnae hoi lannae kecu dawkvah, na taluena hoi ka tânae lahoi marang daw kâcui haw. Hottelah, aranglae kut hoi kângairu hnonaw hah na cangkhai han.
- <sup>5</sup> Ka pasum e tahroe hoi siangpahrang e tarannaw e lung teh poukkayawng lah thun naseh. Na lungtabue daw koun rawm awh naseh.
- <sup>6</sup> Oe Cathut, na bawitungkhung teh a yungyoe kangning e doeh. Lannae na sonron hai na ram sonron lah doeh ao.
- <sup>7</sup> Lannae hah lung na pataw teh, thoenae hah na hmuhma. Hatdawkvah, Cathut, na Cathut ni, satui hah na awi toe. Na huinaw hlak hai, konawmnae satui hah na awi toe.
- <sup>8</sup> Na khohna pueng daw hoi murah hoi aloenaw hoi, khasia hmuittui a hmui teh, kasaino hoi pathoup e siangpahrang innaw ni na lunghawi sak.
- <sup>9</sup> Bari kaawm e napui na tawn e naw thung dawkvah, ramlouk siangpahrangnaw e canunaw hai a bawk teh, nange aranglah Ophir sui hoi kamthoup e siangpahrangnu teh a tahung.
- <sup>10</sup> Oe, Canu thai haw, pouk nateh na hnâpakengh. Na taminaw hoi na pa im kaawm e naw hai pahnim haw.
- <sup>11</sup> Hottelah pawiteh, siangpahrang ni na meihawinae hah a ngai katang han, ahni teh na bawpa doeh, bari haw.
- <sup>12</sup> Taire canu ni poehno sin vaiteh, tamimaya thung daw hoi na tawnta e ni na minhmai hawi a tawng awh han.
- <sup>13</sup> Siangpahrang im e siangpahrang canu teh, a sungrenpoung teh, a khohna teh sui hoi pathoup e lah ao.
- <sup>14</sup> Pathoup e hni kahawi kâkhu hoi siangpahrang koe cektхай awh vaiteh, tanglakacuemnaw ama hnukkâbang hane naw hah ahni koe a thokhai awh han.
- <sup>15</sup> Lunghawi thahmeica lahoi thokhai awh vaiteh, siangpahrang im a kâen awh han.
- <sup>16</sup> Napanaw yueng lah na canaw awh awh vaiteh, ahnimouh teh talai van pueng daw siangpahrang lah na o sak han.
- <sup>17</sup> Na min teh se pueng daw panue hanelah ka sak han. Hatdawkvah, tami ni pou na pholen han.

## 46

### *Kânguenae Cathut*

Kathutkung: Korah capanaw

- <sup>1</sup> Cathut teh ka kânguenae hoi ka thaonae doeh. Runae tueng navah kabawmkung kahnai poung e doeh.
- <sup>2</sup> Hatdawkvah, talai heh kampuen niteh, monnaw teh tali daw k baht nakunghai, ka taket mahoe.
- <sup>3</sup> Tuinaw teh hramki laihoi ka phuen nakunghai, tuicapa ni mon totouh ka thaw nakunghai, ka taket mahoe.
- <sup>4</sup> Palang buet touh ao teh, a cakang teh Cathut khopui, Lathueng Poung onae koe totouh, ka konawmsakkung lah ao.
- <sup>5</sup> Cathut teh a thung vah ao teh, kâhuen mahoe.



Khodai toteh Cathut ni a kabawp han.

<sup>6</sup> Miphun pueng teh a hramki awh.

Uknae pueng teh a kâhuet.

Ahni ni a lawk a tho boteh, talai teh a kamyawt.

<sup>7</sup> Ransahu BAWIPA teh, maimouh koe ao teh,

Jakop Cathut teh kânguenae doeh.

<sup>8</sup> Tho awh haw, BAWIPA ni a sak e naw hoi

talai van e hno a raphoe e naw pueng hah khenhaw.

<sup>9</sup> Ama ni tarantuknae hah talai pout totouh a roum sak teh,  
licung hah a khoe.

Tahroe hah a tâtueng teh, lengnaw hah hmai hoi koung a sawi.

<sup>10</sup> Duem awm awh nateh, Cathut lah ka o e heh panuek awh.

Miphunnaw koe tawm lah ka o vaiteh,

talai van vah tawm lah ka o han.

<sup>11</sup> Ransahu BAWIPA teh, maimouh koe ao.

Jakop Cathut teh kânguenae doeh,

## 47

### *Talai ukkungnaw Cathut pholen awh*

Kathutkung: Korah capanaw

<sup>1</sup> Oe taminaw pueng, na kuttabawng awh nateh,

tânae lawk hoi Cathut koe hram awh sei.

<sup>2</sup> Jehovah Lathueng Poug teh takitho poung.

Ama teh talai pueng e Siangpahrang kalen doeh.

<sup>3</sup> Maimae rahim tamipueng tabut sak vaiteh,

maimae khok rahim miphunnaw a tabut sak han.

<sup>4</sup> A lungpataw e Jakop hanelah, kahawipoug e bawilennae lah kaawm e,

maimae râw hah maimouh hanlah na rawi pouh.

<sup>5</sup> Cathut teh hram laihoi a luen teh,

BAWIPA teh mongka lawk hoi a luen.

<sup>6</sup> Cathut pholen hoi la sak awh nateh, pholen hoi la sak awh.

Maimae Siangpahrang koe pholen hoi la sak awh nateh,

pholen hoi la sak awh.

<sup>7</sup> Cathut teh talai pueng e Siangpahrang doeh.

Sam la hoi pholen la sak awh.

<sup>8</sup> Cathut teh miphun pueng lathueng Siangpahrang lah ao teh,

Cathut teh a bawitungkhung dawkwawceng laihoi a tahlung.

<sup>9</sup> Miphun pueng e tami kacuenaw teh,

Abraham Cathut e miphun koe a kamkhueng awh.

Bangkongtetpawiteh, talai siangpahrangnaw teh,

Cathut ni a tawn e doeh. Ama teh hoe tawmrasang lah ao.

## 48

### *Zion vah Cathut bawilennae*

Kathutkung: Korah capanaw

<sup>1</sup> BAWIPA teh a lentoe poung.

Cathut khopui dawkwawceng poung lah,

amae mon kathoung dawkwawceng pholen hanlah a kamcu.

<sup>2</sup> Zion mon atunglah kaawm e teh

arasang teh a meihawi.

<sup>3</sup> Cathut teh a im dawkwah ao teh,



- a kânguenae rapan tie panue lah ao.
- <sup>4</sup> Bangkongtetpawiteh, siangpahrangnaw a kamkhueng awh teh, cungtalah a dei awh.
- <sup>5</sup> A hmu awh toteh, a kalue awh teh koun a yawng awh.
- <sup>6</sup> Kanîtholah e kahli hoi Tarshish long kalennaw ouk a raphoe e patetlah,
- <sup>7</sup> Haw tueng vah, takinae ni a man awh teh, napui camokhe pataw e patetlah a man awh.
- <sup>8</sup> Panue awh tangcoun e hoi hmu awh tangcoun e patetlah, ransahu BAWIPA khopui, maimae Cathut khopui teh, Cathut ni a yungyoe hanelah a caksak han.
- <sup>9</sup> Oe Cathut, na bawkim lungui vah, na pahrenlungmanae ouk ka pouk awh.
- <sup>10</sup> Oe Cathut, na min patetlah nang pholennae ni, talai pout totouh a pha teh, nange aranglae kut teh lannae hoi akawi.
- <sup>11</sup> Na lawkcengnae dawkvah, Zion mon teh lunghawi naseh, Zion canu hai konawm naseh.
- <sup>12</sup> Zion hah lawngven awh nateh, imrasangnaw hah parei awh haw.
- <sup>13</sup> Sekatha daw kaawm han rae naw koe patuen na dei thai awh nahanlah, kalupnae hah pâkuem awh nateh, siangpahrang innaw hah pouk awh haw.
- <sup>14</sup> Bangkongtetpawiteh, Cathut teh a yungyoe maimae Cathut doeh. Ahni teh maimouh due totouh hai na kahrawikung lah ao.

## 49

### *Pathu lungmawngnae*

Kathutkung: Korah capanaw

- <sup>1</sup> Tamimaya hetheh thai awh haw. Talai van kaawm e pueng thai awh haw.
- <sup>2</sup> Ka rahnoum hoi ka rasang, ka tawnta hoi ka mathoe pueng cungtalah thai awh haw.
- <sup>3</sup> Ka kâko ni lungngnae lawk a dei han. Hahoi, ka lungthin khopouknae ni panuethainae a poe han.
- <sup>4</sup> Cingthuilaw koe lah ka hnâ ka pakeng vaiteh, lawk ka ru ka dei e hah, ka ratoung hoi ka cai sak han.
- <sup>5</sup> Thoenae ni na kalup navah, bangkongmaw hnin kathout nah ka taki han.
- <sup>6</sup> Ahnimouh teh amamae hnopai hah a kâuep awh teh, a tawnta awh e daw k ka kâoup awh nakunghai,
- <sup>7</sup> amamae hmaunawnggha apinihai ratang thai mahoe. Ratangnae phu Cathut koe poe thai hoe.
- <sup>8</sup> Ahnima hringnae ratang nahane aphu apap poung. Hatdawkvah, nâtuek hai poe hane khout thai hoe.
- <sup>9</sup> Ratang pawiteh, a yungyoe a hring han doeh. Pawknae koe phat mahoe.
- <sup>10</sup> Tamilungkaang hai a due.



- Hot patetvanlah, tamipathu hoi  
 bangpuihangpa lah kaawm hoeh e hai a due van.  
 Hahoi, hnopainaw hah ayânaw hanelah  
 a ceitakhai awh tie hah a hmu awh.
- 11 A lungthung hoi teh amamae im hah  
 a yungyoe kangning hanelah a pouk awh.  
 A onae im hah se pueng dawk kangning hanelah a pouk awh.  
 Amamae ram hah a min a phu sak awh.
- 12 Hatei, tami heh bari lah ao eiteh, kangning hoeh.  
 Kahmakatanae koe ka phat e saring patetlah doeh ao.
- 13 Hethateh tamipathunaw e lamthung doeh.  
 Hahoi, a catounnaw hai a dei awh e patetlah ao awh.
- 14 A duenae hmuen koelah ceikhai e tu patetlah ao awh.  
 Duenae ni a ca awh han.  
 Tamikalannaw ni khodai toteh a uk awh han.  
 A onae hmuen koehoi ahlanae hmuen koe  
 a takthai meihawinae naw teh,  
 phuen vah koun a pawk han.
- 15 Hatei, ka hringnae hateh,  
 Cathut ni phuen thaonae koehoi a ratang han.  
 Bangkongtetpawiteh, ama ni na coe han.
- 16 Tami buet touh a tawnta teh, a imthungkhu bawilennae hoi  
 hoehoe a kâthap navah, taket hanh.
- 17 Bangkongtetpawiteh, a due toteh banghai sin thai kalawn mahoe.  
 A bawilennae ni hai kâbang sin kalawn mahoe.
- 18 A hring nathung yawhawi kacoepounge lah kâpouk nakunghai,  
 na tawnta dawkvah tami ni ka pholen nakunghai,
- 19 a napanaw ceinae koe a cei van vaiteh,  
 nâtuék hai kho ang hmawt thai awh mahoe toe.
- 20 Tami ni bari e lah ao eiteh, panuethainae ka tawn hoeh e teh,  
 saring kahmakata e patetlah doeh ao.

## 50

### *Lannae lahoi lawkcengkung Cathut*

Kathutkung: Asaph

- 1 Athakaawme, BAWIPA Cathut ni lawk a dei.  
 Talai heh kanîtho koehoi kanîloum totouh ka kaw.
- 2 Meihawinae kuep Zion hoi  
 Cathut teh a ang han.
- 3 Maimae Cathut tho vaiteh, duem awm mahoe.  
 A hmalah hmai kang vaiteh, petkâkalup lah kahli a tho han.
- 4 A taminaw lawkceng thai nahanlah,  
 lathueng lae kalvannaw kaw vaiteh, talai hai a kaw han.
- 5 Thuengnae lahoi kama koe lawkkamnae ka sak e ka tamikathounnaw,  
 kai koe kamkhueng awh ati han.
- 6 Kalvannaw ni a lannae pâpho naseh.  
 Bangkongtetpawiteh, Cathut ma roeroe heh lawkcengkung doeh.
- 7 Oe ka taminaw, thai awh haw, lawk ka dei vai.  
 Oe Isarel, nang taranlahoi ka dei han. Kai heh Cathut na Cathut doeh.
- 8 Nange thuengnae dawk na yue mahoe.  
 Ka hmalah pout laipalah kaawm e hmaisawi thuengnae dawk



hai na yue mahoe.

<sup>9</sup> Na imthung e maitotan ka lat mahoe.

Na saring thung e hmaetan hai ka lat mahoe.

<sup>10</sup> Bangkongtetpawiteh, ratu daw k e sarang pueng teh kaie doeh.

Mon 1,000 touh daw k ka pâ e moithangnaw hai kaie doeh.

<sup>11</sup> Monsom e tavaca pueng ka panue.

Mon 1,000 touh daw k ka pâ e moithangnaw hai kaie doeh.

<sup>12</sup> Ka vonhnam pawiteh nang koe ka dei mahoe.

Bangkongtetpawiteh, talaivan hoi a thung e kaawm e pueng teh kaie doeh.

<sup>13</sup> Maitotan moi ka ca han namaw.

Hmae thi ka nei han namaw.

<sup>14</sup> Lunghawilawkdeinae thuengnae hah Cathut koe poe haw.

Lathueng Poug koe na lawkkamnae hah kuep sak haw.

<sup>15</sup> Runae na kâhmo navah kai hah na kaw haw.

Kai ni na rasa han, nang ni hai kai hah na bawilen sak han.

<sup>16</sup> Hatei Cathut ni tamikathout koevah,

bangkongmaw ka coungnae hah na pâpho teh,

na pahni hoi ka lawkkam hah na pâpho.

<sup>17</sup> Kaie yuenae hah na hmuhma teh,

ka lawk hah hnuklah na tâkhawng.

<sup>18</sup> Tamru na hmu toteh tang na kamyawngkhai teh,

uicuknaw na hmu toteh tang na kambawngkhai.

<sup>19</sup> Na kâko hah thoenae koe na hno teh,

na lai hah dmyenna koe bout na hno.

<sup>20</sup> Na tahung teh, na hmaunawnggha tounkhounae lawk na dei.

<sup>21</sup> Hottelae na o nahlangva kai ni duem na o takhai navah,

nama patetlah kai hah na pouk.

Hatei, na yue vaiteh na yonnae hah na hmaitung vah peng ka dan han.

<sup>22</sup> Nangmouh Cathut na kapahnimnaw hetheh pouk awh haw.

Hoehpawiteh, kai ni koung na phi payon vaih.

Karasatkung na tawn mahoe.

<sup>23</sup> Lunghawilawkdeinae thuengnae ka sak e pueng teh,

kai ka bawilen sak e lah ao.

A cei nahan lamthung ka pouk e tami koe

Cathut e rungngangnae lamthung ka pâtué han.

## 51

### *Yon pankângai ratoumnae*

Kathutkung: Devit

<sup>1</sup> Oe Cathut, na pahren han ngai e patetlah na pahren haw.

Kapap ni teh kahawi e na lungmanae dawkvah,

kâtapoenae hah na tha pouh haw.

<sup>2</sup> Ka sakpayon e pueng kathoungcalah na pâsu pouh haw.

Ka yonnae daw k hoi na thoung sak haw.

<sup>3</sup> Kâtapoenae hah ka panue toe.

Ka yonnae teh pou ka pouk.

<sup>4</sup> Nang taranlahoi nang koe roeroe ka yon toe.

Na mithmu vah hawihoeahnae ka sak toe.

Ka kong na dei toteh atang doeh.



- Lawk na ceng toteh, toun han awm hoeh.
- <sup>5</sup> Kai teh payonnae lahoi khe e lah ka o teh,  
anu ni yon hoi doeh na vawn toe.
- <sup>6</sup> Lungthin kalan e hah na ngai dawkvah,  
ka lungthin thung lungangnae hah na cangkhai haw.
- <sup>7</sup> Dingsala hoi na hui haw, ka thoung han.  
Na pâsu haw tadamtui patetlah ka pangaw han.
- <sup>8</sup> Na khoe tangcoung e hrunaw konawm nahanlah,  
konawmnae hoi lunghawinae lawk na thaisak haw.
- <sup>9</sup> Ka yonnae dawk hoi na minhmai hrawk nateh,  
ka yonnae pueng hah na takhoe pouh haw.
- <sup>10</sup> Oe Cathut, ka thungvah lungthin kathoung bout sak nateh,  
kai dawk kacakpounge muitha hah bout rounng sak haw.
- <sup>11</sup> Nang koehoi na pâlei hanh lah a.  
Na Kathoung Muitha teh kai koehoi na lat pouh hanh.
- <sup>12</sup> Na rungngangnae dawk konawmnae hah bout na poe haw.  
Hringpasoungnae na Muitha hoi na kuen haw.
- <sup>13</sup> Hottelah, kâtapoenaw hah na lamthung ka cangkhai vaiteh,  
tamikayonnaw teh nang koe a kâthung awh han.
- <sup>14</sup> Oe Cathut, kaie rungngangnae Cathut,  
tami thei e yon hoi na hlout sak haw.  
Na lannae hah ka lai ni kacaipounglah la a sak han.
- <sup>15</sup> Oe BAWIPA, ka pahni heh paawng nateh,  
ka pahni ni na pholen han.
- <sup>16</sup> Bangkongtetpawiteh, thuengnae hah na ngai e nahoe.  
Hoehpawiteh, yo na poe han doeh toe.  
Hmaisawi thuengnae dawk hai na lungyouknae awm hoeh.
- <sup>17</sup> Cathut ngai e patetlah thuengnae hateh, muitha rek e hah doeh.  
Lungthin rek laihoi pankângai e heh,  
Oe Cathut, banglahai noutna laipalah na awm mahoe.
- <sup>18</sup> Zion vah na ngai e hawinae hah sak haw,  
Jerusalem rapan hah kangdout sak haw.
- <sup>19</sup> Hottelah hoiyah, lannae thuengnae hoi hmaisawi thuengnae hoi  
takbuem hmaisawi thuengnae dawk na lunghawi vaiteh,  
na thuengnae khoungroe van vah, maitotan hah a thueng awh han.

## 52

### *Tamikathout poutnae hoi Cathut tami roumnae*

Kathutkung: Devit

- <sup>1</sup> Oe athakaawme tami, bangkong ne thoenae hoi na kambawng.  
Cathut hawinae teh a kangning yungyoe.
- <sup>2</sup> Na lai ni rawknae heh a sak teh, sam ngawnae pataca patetlah  
dumyenna hah na sak.
- <sup>3</sup> Hawinae hlak thoenae hah na ngaihnawn teh,  
lannae hlak hai laithoe dei e hah na ngaihnawn. Selah.
- <sup>4</sup> Nang kadumyenkung lai,  
pathoenae pueng hah na doun.
- <sup>5</sup> Hot patetlah Cathut ni kho na saknae hmuen koehoi na pâlei han.  
Kahringnaw onae ram koehoi na phawk vaiteh, na raphoe vaiteh,  
a yungyoe na kahma han. Selah.
- <sup>6</sup> Tamikalannaw ni hmawt awh vaiteh



a taki awh han.

- <sup>7</sup> Cathut kâuep laipalah, mae tawnta e kâuep niteh,  
mae hawihoehnae dawk mangkhak kaawm e hei,  
khenhaw! hei, tet awh vaiteh, a panuikhai awh han.
- <sup>8</sup> Kai teh Cathut e im dawk olive thing dikhring e patetlah ka o teh,  
Cathut e a lungmanae teh a yungyoe ka kâuep han.
- <sup>9</sup> Nang ni na sak dawkvah, a yungyoe na pholen han.  
Na tami kathoungnaw hmalah na min ka ngaihawi han.  
Bangkongtetpawiteh, hetteh ahawi.

## 53

### *Cathut laipalah pathunae*

Kathutkung: Devit

- <sup>1</sup> Tamipathu niteh, a lungthung hoi Cathut awm hoeh ati awh.  
Ka rawk niteh, panuet ka tho e payonnae hah a sak awh teh,  
hawinae kasakkung awm awh hoeh.
- <sup>2</sup> Thaipanueknae ka tawn e tami hoi  
Cathut ka tawng e tami ao han vaimoe titeh panue han a ngai  
dawkvah,  
Cathut ni kalvan hoi talai van a khet cathuk.
- <sup>3</sup> Tami pueng koug a payon awh teh, koug a rawk awh.  
Hawinae kasakkung awm hoeh.  
Buet touh boehai awm hoeh.
- <sup>4</sup> Vaiyei ca e patetlah ka taminaw hah a ca awh teh,  
Cathut ka kaw hoeh e tamikathoutnaw panueknae tawn laipalah  
maw ao awh.
- <sup>5</sup> Taki hane ohoehnae koe puenghoi a taki awh.  
Bangkongtetpawiteh, nang na kalup niteh,  
na ka tarannaw e hru teh Cathut ni paringparang a kâyat sak.  
Ahnimouh teh Cathut ni a takhoe dawkvah,  
kayayeirai phu hoi ao sak han.
- <sup>6</sup> Oe Isarel rungngangnae teh Zion hoi tâcawt naseh.  
San lah kaawm e taminaw Cathut ni bout a tâcokhai toteh,  
Jakop konawm naseh, Isarel lunghawi naseh.

## 54

### *Katarankung koehoi hloutnae*

Kathutkung: Devit

- <sup>1</sup> Oe Cathut, na min lahoi na rungngang haw.  
Na thaonae hoi lawk na ceng pouh haw.
- <sup>2</sup> Oe Cathut, ka ratoum e heh thai haw.  
Ka dei e lawk heh na thai pouh haw.
- <sup>3</sup> Bangkongtetpawiteh, ramlouknaw ni kai taranlahoi a thaw awh teh,  
rep kacuengroenaw ni thei hanlah a kâcai awh.  
Cathut minhmai khoeroe khen awh hoeh. Selah.
- <sup>4</sup> Khenhaw! Cathut teh na kabawmkung doeh.  
BAWIPA teh ka hringnae karingkungnaw koe ao.
- <sup>5</sup> A tawksak awh e thoenae hah ama ni a patho han.  
Ahnimouh teh na lawkkatang hoi raphoe haw.
- <sup>6</sup> Kai hai lungthocalah hoi nang koe thuengnae ka sak han.  
Oe BAWIPA, na min teh ka pholen han.



Bangkongtetzpawiteh, nang teh na hawi.

- 7 Kai hah runae phunkuep thung hoi na hlout sak teh,  
ka tarannaw koe ka phat e hah ka mit ni kheh a hmu toe.

## 55

*Yuemkamcu hoeh e hui kong dawk Cathut kâuepnae*

Kathutkung: Devit

- 1 Oe Cathut, ka ratoumnae hah na thai pouh haw,  
nang koe kâhei navah na kâhrawk takhai hanh.
- 2 Na thai pouh haw, na pato haw.  
Ka reithainae dawkvah, pou ka phuenangnae kâhat thai hoeh.
- 3 Bangkongtetzpawiteh, ka tarannaw pawlawk hoi,  
tamikathoutnaw ni repcongrogenae kecu daw,  
runae kai daw a pha sak teh, lungkhuek laihoi na hmuhma awh.
- 4 Ka lungthin teh ka lung thung puenghoi a pataw teh,  
due takinae ni na tho sin.
- 5 Takinae hoi pâyawnae ni na tho sin teh,  
kaluenae ni na ramuk.
- 6 Oe bakhu patetlah rathei tawn ka ngai.  
Hottelah ka tawn pawiteh, vi kamleng vaiteh, duem kâhat han eite.
- 7 Ahlane koe ka cei vaiteh,  
kahrawng vah ka o han eite. Selah.
- 8 Hete kahlî tûilî ka tho e hoi ka hlout nahanlah,  
karanglah ka yawng han toe telah ka pouk.
- 9 Oe BAWIPA, ahnima lawk hah a kahma nahanlah,  
koung kâkapek sak haw. Bangkongtetzpawiteh,  
kho thung vah, thamanae hoi lawpnae ka hmu.
- 10 Karum khodai pout laipalah, rapan daw hoi a kâhêi awh teh,  
kho thung vah thoenae hoi runae lah ao awh,
- 11 Kho thung vah thoenae ao teh,  
repcongrogenae hoi dumnae teh lamnaw daw ao.
- 12 Kai na ka pathoe e teh ka taran nahoe.  
Hoehpawiteh, ka pouk thai han ei.  
Na ka taran ni teh kai na ka hmuhma e hai ka taran nahoe.  
Hoehpawiteh, ahni hah ka roun thai han ei.
- 13 Hottelah ka tet e tami teh nang doeh.  
Kai hoi kâtakawi e ka hui, ka kâpanuek e doeh.
- 14 Buet touh hoi buet touh lawk kapan e,  
Cathut im daw tamimaya hoi reirei ka cet e doeh.
- 15 Duenae ni man naseh.  
Hringo hoi sheol daw cet naseh.  
Bangkongtetzpawiteh, hawihoeahnae teh ahnimouh koe ao.
- 16 Kai teh Cathut ka kaw vaiteh,  
BAWIPA ni na rungngang han.
- 17 Amom, kanîthun, tangmin lah ka ratoum han.  
Kacaipounglah ka hram vaiteh, ka lawk hah a thai han.
- 18 Kai taranlahoi na tuknae hmuen koehoi,  
ka hringnae heh karoumcalah a ratang toe.  
Kai koelah kaawm e teh apap awh.
- 19 Ayan hoi kangning e Cathut ni a thai teh,  
ahnimouh hah a khang sak han. Selah.



- Ahnmouh teh a kâthung awh hoeh dawkvah, Cathut taket awh hoeh.
- 20 Ahnmouh teh hui hah a taran awh teh,  
lawkkam a raphoe awh.
- 21 Apâhni hoi a dei awh e lawk teh,  
maito sanutui kamkak e hlak a pâhnan.  
Hatei, a lungthung tarankâtuknae ao.  
A lawk teh satui hlak a nem eiteh,  
rayu tangcoun e tahlai lah doeh ao.
- 22 Na hnokari hah BAWIPA dawk patue haw, ama ni na hlai han.  
Tami kalan rawp hane pasoung hoeh.
- 23 Oe Cathut, alouknaw teh rawknae tangkom daw koun na pabo han.  
Tamikathetnaw hoi yuemkamcuhoeh e naw teh,  
a hringyung tangawn patenghai hring awh mahoe.
- Kai teh nang doeh na kâuep han.

## 56

### *Runae kapoekung thung hoi hlout nahanlah ratoumnae*

Kathutkung: Devit, Devit teh Gath kho vah, Filistin kut daw k a pha nah a sak e la

- 1 Oe Cathut, kai na pahren haw.  
Taminaw ni padoun hanelah hnintangkuem na tuk teh,  
na rektap awh.
- 2 Ka tarannaw ni hnintangkuem na kaven awh.  
Oe Lathueng Poun, na ka tarannaw teh apap poun.
- 3 Ka lung a puen toteh,  
nang na kâuep han.
- 4 Cathut daw (a lawk ka pholen han),  
Cathut ka kâuep dawkvah, taki han awm hoeh.  
Tami ni kai daw bangmouh a sak thai han.
- 5 Ahnmouh teh kaie lawk hah hnintangkuem  
alouklah a pouk awh.  
Kai daw kahawihoehe pouknae dueng doeh a pouk awh.
- 6 Kai thei hanelah a kâcai awh teh,  
cungtalah a kamkhueng awh teh,  
ka khokhnuk hah mitnout a ta awh.
- 7 Ahnmouh teh a payonnae daw hoi a hlout awh han namaw.  
Oe Cathut, na lungkhuek nateh, ahnimanaw hah koun pâlei haw.
- 8 Ka kâvanae hah na touk teh,  
tuium daw ka mitphi hah na ta.  
Na cauk daw ao nahoehmaw.
- 9 Nang koe ka hram toteh, ka tarannaw koun a yawng awh han.  
Hetheh ka panue.  
Bangkongtetpawiteh, Cathut teh kaie doeh.
- 10 Cathut daw (a lawk hah ka pholen han),  
BAWIPA daw (a lawk hah ka pholen han).
- 11 Cathut ka kâuep dawkvah, ka taket mahoe.  
Tami ni kai daw bangmouh a sak thai han.
- 12 Oe Cathut, nang koe ka lawkkamnae ni na katek teh,  
nang koe vah, pholenna e dei han.
- 13 Bangkongtetpawiteh, ka hringnae heh duenae thung hoi na rungngang.  
Kahringnaw e angnae rahim vah,



Cathut hmalah ka pai thai na han,  
ka khok kamthui hoeh nahan,  
na rungngang toe nahoehmaw.

## 57

### *Taran kut dawk hoi roum nahanlah ratoumnae*

Kathutkung: Devit, Sawl koehoi lungngoum dawk a yawng navah, a sak e la

- <sup>1</sup> Na pahren haw, Oe Cathut, na pahren haw.  
Bangkongtetpawiteh, ka hringnae ni na kâuep .  
Hete yawthoenae heh a baw hoehroukrak na rathei tâhlip dawk ka kâhro han.
- <sup>2</sup> Lathueng Poung Cathut, bangpuengpa na kasakpouhkung,  
ka Cathut teh na kaw han.
- <sup>3</sup> Kalvan hoi a patoun vaiteh, na rungngang han,  
payawp hanlah kakâcainaw hah a yue han. Selah.
- <sup>4</sup> Cathut ni lungmanae hoi lawkkatang hah a patoun han.  
Ka hringnae heh sendek um doeh ao.  
Lungkhueknae hmai ka kang lahun e taminaw um vah ka i.  
Ahnimae hânaw teh tahroe hoi palanaw patetlah ao awh.  
Ahnimae lai hai kahran e tahloinaw patetlah ao awh.
- <sup>5</sup> Oe Cathut, kalvannaw lathueng vah, pholen lah awm haw.  
Na bawilennae teh talai van pueng awm lawiseh.
- <sup>6</sup> Ka khok hanlah, tamlawk a yangda awh teh, ka hringnae teh a tabut.  
Ka hmalah tangkom a tai awh.  
Hatei, a lungui vah amamouh letlang a bo awh. Selah.
- <sup>7</sup> Ka lungthin teh a cak doeh, Oe Cathut,  
ka lungthin teh a cak doeh, pholennae hoi la ka sak han.
- <sup>8</sup> Ka bawilennae kâhlaw haw, ratoung hoi tamawinaw kâhlaw awh haw.  
Kai ni teh kho ka dai khai han.
- <sup>9</sup> Oe BAWIPA, tamimaya koe na pholen han.  
Miphun pueng koe nang pholen hoi la ka sak han.
- <sup>10</sup> Bangkongtetpawiteh, na lungmanae ni kalvan a pha teh,  
na lawkkatang ni tâmai a pha.
- <sup>11</sup> Oe Cathut, kalvan vah pholen lah awm naseh,  
na bawilennae teh talai van pueng awm lawiseh.

## 58

### *Tamikathoutnaw hanlah kalan e lawkcengnae*

Kathutkung: Devit

- <sup>1</sup> Nangmouh duem na kaawm e naw,  
lannae lawk hah na dei awh katang maw.  
Oe tami capanaw kalanlah lawk na ceng awh maw.
- <sup>2</sup> Na ceng awh hoeh, na lungthung vah, hawihoehnae na sak awh.  
Talaivan na kut hoi thamanae yawcu hoi na khing awh.
- <sup>3</sup> Tamikathoutnaw teh, von thung hoi lam a payon awh toe.  
A tâco awh tahma vah, laithoe dei laihoi lam a payon awh.
- <sup>4</sup> Asue teh hrunthoesue patetlah ao.  
A hnâ ka pang e tahrûn a hnâ pahru e patetlah ao.
- <sup>5</sup> Hote tahrûn ni teh tahrûn camnae lawk hai thai thai hoeh.  
Camnae la sak e hai thai thai hoeh.



- <sup>6</sup> Oe Cathut, a kâko e hâ hah khoe pouh haw.  
Oe BAWIPA, athakaawme sendek nôñaw hah khoe pouh haw.
- <sup>7</sup> Ka lawng lahun e tui patetlah kahmat awh naseh.  
Licung a sawn awh toteh, ahnimae palanaw teh kounng kâkhoe naseh.
- <sup>8</sup> A cei lahun nah kahmat e kongkaraw patetlah kahmat awh naseh.  
Camo karaw e ni kanî a hmu hoe e patetlah awh naseh.
- <sup>9</sup> Pâkhing pho hoi patawi e hmai, hlaam a bet hoehnahlan vah,  
kahring e pâkhing pho hoi hmai ka kang e pâkhing phonaw teh,  
bongparui ni cetkhai naseh.
- <sup>10</sup> Tamikalannaw ni hot patetlah  
e reknae hah a hmu awh toteh,  
a konawm awh han.
- <sup>11</sup> Tamikathoutnaw e thi daw k a khok a pâsu awh han.  
Hottelah tami ni, ayânaw hanelah tawkpheu ao tie hoi  
lawkcengkung Cathut ao katang ati awh han.

## 59

### *Tamikathout lawkcengnae*

Kathutkung: Devit, Sawl ni a patoun e naw ni Devit thei hanelah im a ring  
awh navah sak e la

- <sup>1</sup> Oe ka Cathut, ka taran kut daw k hoi na rungngang haw.  
Na ka tarannaw koehoi na hlout sak haw.
- <sup>2</sup> Ka payonnew koehoi na rungngang haw.  
Tami kathetnaw kut daw k hoi na rungngang haw.
- <sup>3</sup> Ahnimouh ni thei hanelah na pawp awh.  
Athakaawmnaw teh, kai taranlahoi a kamkhueng awh.  
Oe BAWIPA, ka yonnae hoi kâtapoenae daw k nahoe.
- <sup>4</sup> Ka payon hoe e daw k hoi a yawng awh teh, a kâcai awh.  
Thaw nateh, khenhaw! na kabawm haw.
- <sup>5</sup> Hatdawkvah, oe ransahu BAWIPA Cathut, Isarel Cathut,  
miphun pueng rek hanlah thaw haw,  
kâtapoe e tamikathoutnaw hah pahren hanh. Selah.
- <sup>6</sup> Tangmin vah a ban awh teh,  
khopui a lawngven awh teh,  
ui patetlah a rauk awh.
- <sup>7</sup> Ahnimouh teh, dudamnae lawk a dei awh teh,  
ahnimae pahni daw k tahloi ao teh,  
apinimouh a thai han aw ati awh.
- <sup>8</sup> Hatei, oe BAWIPA, ahnimouh teh na panuikhai han.  
Miphun pueng teh nang hanlah panui ka tho e lah ao awh.
- <sup>9</sup> Oe nang, a tha kaawm e, pou na ring han.  
Bangkongtetpawiteh, Cathut teh kânguenae doeh.
- <sup>10</sup> Lungmakung Cathut ni, na dawn han.  
Cathut ni ka tarannaw lathueng,  
ka ngainae a pha sak e hah na hmu sak han.
- <sup>11</sup> Ahnimouh teh thet hanh.  
Hoehpawiteh, ka taminaw ni a pahnim payon awh han doeh.  
Oe BAWIPA, kaie bahling, na thaonae hoi kapek nateh,  
kounng rahnoun sak haw.
- <sup>12</sup> Bangkongtetpawiteh, a pahni daw k hoi a tâco sak e dei payonnae lawk  
kecu dawkvah,



- a kâoupnae dawk kâman awh naseh.  
Thoebonae hoi laithoe a dei awh.
- 13 Lungkhuek laihoi kahmat sak haw.  
Hahoi Cathut ni Jakop lathueng vah,  
lawk a ceng tie hah talai poutnae koe totouh panuek awh naseh.
- 14 Tangmin lah ban awh naseh.  
Ui patetlah rauk laihoi khopui hah lawngven awh naseh.
- 15 Ca hane rawca a tawng awh teh,  
a von a paha hoehroukrak a rauk awh.
- 16 Hatei, na thaonae hah la hoi ka sak han.  
Amom vah na lungmanae hah,  
kacaipounglah la hoi ka sak han.  
Bangkongtetpawiteh, nang teh ka kânguenae hoi  
lungpout navah, ka yawngnae lah na o.
- 17 Oe ka thaonae, nang koe pholennae la ka sak han.  
Bangkongtetpawiteh, Cathut teh ka kânguenae lah ao teh,  
lungmakung Cathut lah ao.

## 60

### *Cathut ngaikhainae dawk ratoumnae*

Kathutkung: Devit Mesopotamia hoi Siria Zabathnaw a tuk teh, Joab a ban teh, Palawi yawn dawk tami 12, 000 touh a thei navah a sak e la

- 1 Oe Cathut, na lungkhuek dawkvah,  
kaimouh na pahnawt teh,  
kho tangkuem na kathek toe.  
Bout na rounng sak haw.
- 2 Talai heh na pâyaw sak teh na kâbawng sak.  
Kâbawng e naw hah bout pâbing haw, pou a kâhuet hei.
- 3 Na taminaw heh ka ru e hno na hmu sak teh,  
runae misur hah na pânei.
- 4 Nang kataketnaw hah lawkkatang pâwlawk dawk ung vaiteh,  
yap hanelah lukkarei na poe.
- 5 Na pahren e naw hah rungngang lah ao awh nahanlah,  
nage aranglae kut hoi rungngang haw.
- 6 Cathut ni a thoungnae lahoi a dei toe.  
Ka konawm vaiteh, Shekhem kho kapek vaiteh,  
Sakut yawn hah ka bangnue han.
- 7 Gilead teh kaie doeh, Manasseh teh kaie doeh.  
Ephraim hai kaie bawilakhung doeh.  
Judah teh kaie kâlawk kapoekung doeh.
- 8 Moab teh ka kamhluknae kawlung doeh.  
Edom ram teh, ka khok coungroenae lah ao han.  
Kai kecu dawk Filistin lathueng tânae hram lawk a tâco han.
- 9 Kacake khopui dawk, apimaw na hrawi han.  
Edom vah, apimaw na hrawi han.
- 10 Oe Cathut, na kapahnawtkung teh, nang nahoehmaw.  
Ransanaw koe ka cet hoeh e hah teh, nang nahoehmaw.
- 11 Runae um vah, na kabawm haw.  
Bangkongtetpawiteh, tami kabawpnae teh cungkeihoeh.
- 12 Cathut pawlawk dawk taranhawi laihoi namnei awh han.



Bangkongtetpawiteh, ama ni maimae tarannaw hah rep a coungroe han.

## 61

### *Cathut ni yungyoe ringnae*

Kathutkung: Devit, La kahrawikung hanlah, rui thueng e tumkhawng hoi ni sak e la

- <sup>1</sup> Oe Cathut, ka hramnae lawk heh na thai pouh haw.  
Ka ratoumnae heh na thai pouh haw.
- <sup>2</sup> Ka lung tha a tawn teh, talai poutnae koehoi nang koe ka hram.  
Kai hlak ka rasang e lungsong koe na hrawi haw.
- <sup>3</sup> Bangkongtetpawiteh, nang teh kai hanlah kânguenae lah na o teh,  
tarannaw hmalah kacakpounge imrasang lah na o.
- <sup>4</sup> Na rim dawk pou ka o han.  
Na rathei hoi na ramuknae koe ka kângue han.
- <sup>5</sup> Bangkongtetpawiteh Oe Cathut,  
ka lawkkam hah na thai pouh haw.  
Na min kabarinaw e râw hah kai na poe.
- <sup>6</sup> Siangpahrang, hringyung na saw sak teh,  
a kum hai se moikasaw kangning naseh.
- <sup>7</sup> Cathut hmalah a yungyoe a kangning han.  
Oe ahni roum sak nahanlah,  
lungmanae hoi lawkkatang hah rakueng pouh haw.
- <sup>8</sup> Ka lawkkam hah hnintangkuem ka kuep sak nahan  
a yungyoe a min pholen hoi la ka sak han.

## 62

### *Cathut rungngangnae duem ringnae*

Kathutkung: Devit, La kahrawikung Jeduthun koe sak e la

- <sup>1</sup> Atangcalah ka hringnae ni Cathut teh duem a ring.  
Kai rungngangnae teh ama koehoi doeh a tho.
- <sup>2</sup> Ama dueng doeh ka lungsong hoi ka rungngangnae lah kaawm.  
Ama teh rapan lah ao, ka kâhuen mahoeh.
- <sup>3</sup> Bangkongmaw tami buet touh heh na uk han.  
ka rawm e rapan hoi kâhuen e tapang patetlah  
nâtotouh maw na raphoe awh han.
- <sup>4</sup> Arasangnae koehoi pabo hanelah a kâpan awh.  
Laithoe deinae koe a lunghawi awh teh.  
A pahni hoi yawhawi a poe awh ei teh,  
a lungthung hoi thoe a bo awh.
- <sup>5</sup> Ka hringnae, Cathut dueng maha duem ring lawih.  
Bangkongtetpawiteh, ka ngaihawinae teh a ma koehoi doeh a tho.
- <sup>6</sup> Ama dueng doeh ka lungsong hoi rungngangnae lah ao.  
Ka kâhuen mahoeh.
- <sup>7</sup> Ka rungngangnae hoi bawilennaeh teh, Cathut daw k ao.  
Ka thaonae lungsong hoi ka kânguenae teh ka Cathut daw k ao.
- <sup>8</sup> Tamimaya, ama teh a yungyoe kâuep awh haw.  
A hmalah na lungthin rabaw k awh haw.  
Cathut teh maimouh kânguenae doeh.
- <sup>9</sup> Kangduenae hmuen kârahnoumnaw ahrawnghrang lah ao awh teh,



kangduenae hmuen ka rasangnaw teh, laithoe doeh.

Yawcu hoi khing pawiteh, hotnaw teh ahrawnghrang hlak a pâhaw awh.

<sup>10</sup> Rektapnae hah kâuep awh hanh.

Thama lahoi lawp e daw kâuep awh hanh.

Hno tawnta e daw k na lungpen awh hanh.

<sup>11</sup> Cathut ni vai touh a dei toe.

Apâhni bout ka thai e lawk teh, bahu teh Cathut daw k ao.

<sup>12</sup> Oe BAWIPA, nang teh pahrennae hoi na kawi.

Nang ni tamipueng amamae tawksak e patetlah ouk na poe.

## 63

### *Cathut hoi kâhuiko konawmnae*

Kathutkung: Devit, Judah kahrawngum ao navah a sak e la

<sup>1</sup> Oe Cathut, nang teh ka Cathut doeh.

Amom vah na tawng han.

Ka hringnae ni nang na kahran.

Ka takthai ni nang na rabui.

Kenae hoi tui kahranne, tui ohoehnae ram daw k kaawm e lah ka o.

<sup>2</sup> Na bawilenna hmu hanlah,

hmuen kathoung thung na tawng toe.

<sup>3</sup> Na pahrennae teh hringnae hlak hai a hawihnawn dawkvah,

ka pahni hoi ka pholen han.

<sup>4</sup> Hot patetlah ka hringyung thung na pholen han.

Na min lahoi ka kut ka dâw han.

<sup>5</sup> Ka hringnae heh rakhing hoi a thaw kaboum lah ca e patetlah a lungkuep han.

Hateh, konawm pahni hoi na pholen han.

<sup>6</sup> Ka ikhun daw k hoi ka pouk navah,

karumsaning totouh ouk ka pouk.

<sup>7</sup> Bangkongtetpawiteh, nang teh na kabawmkung doeh.

Hatdawkvah, na rathei rahim vah ka konawm han.

<sup>8</sup> Ka hringnae ni kahnaicalah na hruiyun teh,

nama e aranglae kut hoi na kuet.

<sup>9</sup> Hatei, ka hringnae thei hanlah katawngnaw teh,

adungpoungnae koe talai thung vah a cei awh han.

<sup>10</sup> Tahloi hoi dout awh vaiteh,

Asuinaw ni ca hanelah, ao han.

<sup>11</sup> Hatei, siangpahrang teh Cathut daw k konawm vaiteh,

Cathut noe laihoi thoekâbo e pueng ni, a pholen awh han.

Hatei laithoe kadeinaw e pahninaw teh, tabuem lah ao awh han.

## 64

### *Tamikathout repcoungroenae hoi BAWIPA lunghawinae*

Kathutkung: Devit

<sup>1</sup> Oe Cathut, ka phuenangnae daw k, ka lawk na thai pouh haw.

Ka tarannaw ka takinae koehoi ka hringnae na khetyawt lawih.

<sup>2</sup> Tamikathoutnaw e kâdeikâpannae koehoi thoseh,

Payonnae kasaknaw kamkhuengnae koehoi thoseh, na ngue haw.

<sup>3</sup> Ahnimouh ni amamae lai hah,

tahloi patetlah a hran sak awh.



- <sup>4</sup> Yonnae ka tawn hoeh e tami hah arulahoi ka hanelah,  
lawkthoeumkha pala hoi a nue awh teh,  
takinae tawn laipalah vaitalahoi ouk a ka awh.
- <sup>5</sup> Hawihoehnae dawk buet touh hoi buet touh a kâhroecoe awh.  
Tangkhek patung hanelah a kâpan awh teh,  
apinimouh na hmu han vah ouk ati awh.
- <sup>6</sup> Hawihoehnae hah ma hanelah a pâphue awh.  
Ngit a pâphue awh.  
Lungthin thung lengkaleng a pouknae teh a dungpoung.
- <sup>7</sup> Ahnimouh teh Cathut ni pala hoi a ka vaiteh,  
pouk laipalah hmâ a ca awh han.
- <sup>8</sup> A dei awh e lawk dawk letlang a rawp sak vaiteh,  
ka hmawt e pueng ni a yawng takhai awh han.
- <sup>9</sup> Tami pueng ni taket vaiteh,  
Cathut ni a sak e doeh tie a pâpho awh han.  
Bangkongtetpawiteh, hmantang a sak awh e hah a pouk awh han.
- <sup>10</sup> Tamikalan teh BAWIPA dawk konawm vaiteh,  
ama hah a kâuep han.  
A lungthin kalan e pueng ni a pholen awh han.

## 65

### *Rungngangnae hoi khetyawtnae dawkvah, Cathut pholen*

Kathutkung: Devit

- <sup>1</sup> Oe Cathut pholennae niyah na ring,  
lawkkamnae teh nang koe ka sak awh han.
- <sup>2</sup> Oe, ratoumnae lawk kathaikung,  
tami pueng nang koe a tho awh han.
- <sup>3</sup> Payonnae ni na taran teh, kâtapoenae ni na ka tâ nakunghai,  
kaimae yonnae hah nang ni yontha pouh toe.
- <sup>4</sup> Na thongma dawk ao thai nahan,  
nang koe hnai hanlah na rawi e tami yawkahawi e lah ao.  
Na im hawinae hoi na bawkim hawinae dawk ka lungkuep han toe.
- <sup>5</sup> Lannae dawk kângairu hnosak e lahoi na pato han.  
Oe ka rungngangnae Cathut,  
nang teh talipui namran lah kaawmnaw hoi, talai poutnae koe  
kaawmnaw hoi,
- <sup>6</sup> thaonae hoi kamthoup niteh,  
thaonae hoi monnaw kacaksakkung,
- <sup>7</sup> Ka cairing lahun e talipui hoi tuicama ka thaw lahun e hoi,  
taminaya ruengruengtinae karoumsakkung, lah na o.
- <sup>8</sup> Ahla poungnae koe kaawmnaw nihai,  
na mitnoutnae hah a taki awh.  
Amom tangmin kaphatnaw koe konawmnae na phu sak.
- <sup>9</sup> Talai heh na rip teh, kho thouk na rak sak teh,  
tui hoi ka kawi e Cathut e palangnaw hah tawntanae hoi na pathoup.  
Hottelah, talai heh na pathoup teh,  
talai van kaawmnaw a pawhik na rakueng pouh.
- <sup>10</sup> Laikongnaw hah tui na awi teh, laikawknaw hah na cak sak.  
Khotui hoi na nem sak teh, caticamu ka paw e naw hah yawhawoi ouk  
na poe.
- <sup>11</sup> A kumnaw hah na hawinae hoi na ramuk teh,



- na khoknaw ni a thâw a lawi sak.  
<sup>12</sup> Kahrawng e thingkung ni dik kahringcalah ao teh,  
monruinaw hai a lunghawi awh.  
<sup>13</sup> Pho kahringnaw onae koe saringnaw akawi teh,  
ayawn hai rawca kung hoi akawi teh,  
konawm laihoi la a sak awh.

## 66

### *Hno kalan a sak e dawkvah, Cathut pholen*

Kathutkung: Panuekhoe

- <sup>1</sup> Talaivan pueng Cathut koe  
konawm hoi hram awh haw.  
<sup>2</sup> A min bari laihoi la sak awh nateh,  
ka sungren poung lah pholen awh.  
<sup>3</sup> Cathut koe, na sak e heh banghloi kangai lah a ru.  
Kângairu na sak e dawkvah,  
na tarannaw hah nang koe a poe han.  
<sup>4</sup> Talai van pueng ni, bawk laihoi nang koe pholen la sak awh vaiteh,  
na min pholen laihoi la a sak awh han  
telah tet awh naseh. Selah.  
<sup>5</sup> Tho awh nateh Cathut ni sak e naw hah khenhaw.  
Tami capanaw hanelah, a sak e naw hah kângairu hanelah ao.  
<sup>6</sup> Ama ni talipui hah talai kaphui lah a coung sak teh,  
talipui dawkhok hoi a cei awh.  
Hawvah ama dawkhok a konawm awh.  
<sup>7</sup> A thaonae hoi pou a uk, A mit hoi miphun pueng hah a khet.  
Tarankathawnaw teh kâphokâlen awh hanh naseh. Selah.  
<sup>8</sup> Oe tamimaya, maimae Cathut teh pholen awh haw.  
Pholennae lawk heh thai kamcu lah sak awh.  
<sup>9</sup> Kahringnaw koe maimouh hringnae hah a kueth teh,  
maimouh kamthui hane hai na pasoung hoe.  
<sup>10</sup> Bangkongtetpawiteh, Oe Cathut, nang ni na tanouk teh,  
ngun tanouk e patetlah na tanouk.  
<sup>11</sup> Tamlawk hoi na man teh,  
kaimae loung dawkhok hnori hah na patue.  
<sup>12</sup> Kaimae lû dawkhok tami na kâcui sak teh,  
hmai hoi tuikalen hah na raka.  
Hatei, kakuep e tawntanae hmuene koe na hrawi.  
<sup>13</sup> Hmaisawi thuengnae hoi kathâw e saring hoi  
hmuitui tuca hoi na im dawkhok a kâen han.  
<sup>14</sup> Hat hateh, runae ka kâhmo navah,  
ka pahni hoi ka dei e patetlah ka pâpho tangcoung e doeh.  
<sup>15</sup> Hmaisawi thuengnae dawkvah,  
kathâw e saring hoi hmuitui tuca hoi ka poe vaiteh,  
maitotan hah hmae hoi ka poe han. Selah.  
<sup>16</sup> Cathut ka taket e pueng, tho awh nateh thai awh haw.  
Ka hring nahanelah a sak e hah na pâpho pouh vai.  
<sup>17</sup> Ka pahni hoi ama koe ka hram teh,  
ka lai hoi ama teh ka tawm.  
<sup>18</sup> Ka lungthin ni payonnae hah noutna hoe pawiteh,  
Bawipa ni na thai pouh mahoe.  
<sup>19</sup> Hatei, Cathut ni na thai pouh katang teh,



- ka hramnae lawk hai kahawicalah a thai.  
 20 Ka ratoumnae pahnawt hoeh niteh,  
 kai koehoi a lungmanae ka puen hoeh e,  
 Cathut teh pholen lah awm seh.

## 67

### *Ratoumnae hoi pholennae la*

Kasakkung: Panuekhoeh

- 1 Cathut ni na lungma awh teh,  
 yawhawi na poe awh naseh.  
 A minhmai angnae teh maimouh koe ang lawiseh.  
 2 Talai van vah na lamthung pnue lah ao teh,  
 na rungngangnae teh miphun pueng koe panue lah awm lawiseh.  
 3 Oe Cathut, taminaw ni na pholen naseh.  
 Tami pueng ni na pholen naseh.  
 4 Oe miphun pueng lunghawi laihoi la sak awh naseh.  
 Bangkongtetpawiteh, tami pueng hah kalanlah lawk a ceng teh,  
 talai van e miphunnaw hah na uk. Selah.  
 5 Oe Cathut, taminaw ni na pholen naseh.  
 Tami pueng ni na pholen naseh.  
 6 Hottelah, talai ni a pawhik hoehoe tâcawt sak vaiteh,  
 Cathut, maimae Cathut ni yawhawi na poe han.  
 7 Cathut ni yawhawi na poe vaiteh,  
 tami pueng ni a ma a taki awh han.

## 68

### *Isarel koe hawinae dawk Cathut pholennae*

Kathutkung: Devit

- 1 Cathut, thaw nateh tarannaw koug kâkayeï naseh.  
 Cathut kahmuhmanaw teh ama koehoi yawng awh naseh.  
 2 Hmaikhu a kahma e patetlah ahnimouh teh koug kahmat naseh.  
 Khoilai teh hmai hma lah a kamyawt e patetlah,  
 tamikathoutnaw teh Cathut hmalah kahmat awh naseh.  
 3 Hatei, tamikalannaw teh lunghawi laihoi  
 Cathut hmalah konawm awh naseh.  
 Bokheiyah, puenghoi konawm awh naseh.  
 4 Cathut koe la sak hoi a min pholen la sak awh.  
 Tâmai daw kâcuie hateh pholen awh nateh, a min teh BAWIPA,  
 pholen laihoi a hmalah lunghawi awh.  
 5 Na pa ka tawn hoeh naw e napa, lahmainunaw karingkung,  
 Cathut teh hmuen kathoung koe ao.  
 6 Cathut ni amadueng kho ka sak e hah imthung a poe teh,  
 paung e naw hai tawntanae hmuen koe a hrawi.  
 Hatei, tarankathawnaw teh kenae hmuen koe ao sak.  
 7 Oe Cathut na taminaw hrawi hanelah na tâco teh,  
 kahrawngum vah hmalah na cei navah, Selah.  
 8 Talai a kâhuët teh, Cathut hmalah kalvan ni kho a rak sak.  
 Sinai mon teh Cathut hmalah, Isarel Cathut hmalah a kâhuët.  
 9 Oe Cathut nang ni kho thouk na rak sak teh,  
 na râw taminaw ka patang e hah na kabawp.  
 10 Hawvah na tamimaya teh kho a sak awh.



Oe Cathut, nang ni ka mathoenaw hah na hawinae hoi na kawk.

- 11 BAWIPA ni lawk a dei teh,  
hote kong ka dei e tamimaya teh ao.
- 12 Siangpahrang e ransanaw teh a yawng awh teh,  
im ka ring e napuinaw ni lawphno a kârei awh.
- 13 Tutakha thung na ka ip nakunghai,  
ngun hoi pathoup e bakhu rathei patetlah thoseh,  
sui hoi pathoup e rathei muen patetlah thoseh, na o awh han.
- 14 Athakasaipounge Cathut ni siangpahrangnaw a kayei navah,  
Zalmon mon dawk e ka pangaw e tadamtui patetlah ao.
- 15 Bashan mon teh Cathut e mon lah ao teh,  
Bashan mon dawk monsom moikapap ao.
- 16 Monsomnaw bangkongmaw utsinnae mit hoi na hmaiet awh.  
Hetheh, Cathut ni o han ngainae mon lah ao.  
BAWIPA teh hawvah pou ao han.
- 17 Cathut e lengnaw teh a thong thong hra hlak moi apap.  
BAWIPA teh Sinai mon, hmuengkathoung koe ao e patetlah ahnimouh  
koe ao.
- 18 Arasangnae koe na luen teh, tami moikapap na man teh,  
BAWIPA Cathut teh taminaw koe ao thai nahanlah,  
tami koehoi dueng laipalah,  
ka taran e taminaw koe totouh poehno hah a dâw.
- 19 Hnintangkuem hnori na ka hlai e Bawipa,  
rungngangnae Cathut teh pholen lah awm lawiseh.
- 20 Cathut teh rungngangnae Cathut doeh.  
Duenae koehoi hloutnae hai Bawipa Jehovah e doeh.
- 21 Hateiteh, Cathut ni a tarannaw lû thoseh,  
yon pou kasaknaw e sam onae lû roeroe thoseh, hmâ a ca sak han.
- 22 Bawipa ni Bansan hoi ka bankhai vaiteh,  
ka dungpoung e talipui koehoi bout ka bankhai han.
- 23 Na khok ni na taran thi coungroe vaiteh,  
na uinaw ni hai a palem awh han telah ati.
- 24 Oe Cathut, hmueng kathoung koe na tho e,  
ka Cathut, kaie Siangpahrang na tho e hah a hmu awh toe.
- 25 La kasakkungnaw hmalah a cei awh teh,  
tumkhawng katumnaw ni a kâbang awh.  
A lungui vah tanglanaw ni tâbaw a khawng awh.
- 26 Kamkhueng e maya thung dawk,  
Cathut Isarel hringnae a kung,  
BAWIPA teh pholen awh.
- 27 Hawvah, cahnoun Benjamin hoi kahrawikung ao.  
Judah bawinaw a huinaw ni a kâbang teh Zebulun hoi  
Naphtali bawinaw ni a kâbang awh.
- 28 Na Cathut ni na thaonae teh kâ a poe toe.  
Oe Cathut kaimouh hanlah na sak tangcoung e patetlah hoehoe thasai  
sak haw.
- 29 Jerusalem e na bawkim kecu,  
siangpahrangnaw ni poehno a sin awh han.
- 30 Lungpum um e sarangnaw hai thoseh, maitotannaw hoi,  
maitolanaw hai thoseh, a yue teh, tangka hoi kârahnoum awh naseh.  
Tarantuk ka ngai e miphunnaw hah, koung kayei naseh.



- <sup>31</sup> Izip hoi laiceinaw tho awh vaiteh,  
Ethiopianaw ni Cathut koe karang pounge lah a kut a dâw awh han.
- <sup>32</sup> Talai siangpahrang uknae Cathut koe la sak laihoi  
Bawipa pholen laihoi la sak awh. Selah.
- <sup>33</sup> Ayan vah, kalvannaw e kalvan kâcuie koevah,  
athakaawme lawk, a lawk roeroe a tâco sak.
- <sup>34</sup> Cathut koe thaonae hah poe awh.  
A lawkpuilah, ahawinae hah Isarelnaw lathueng ao.  
A thaonae teh tâmai dawkvah ao.
- <sup>35</sup> Oe Cathut, na hmuen kathoung hlak hai takithohnawn.  
Isarel Cathut teh a taminaw thaonae hoi hnotithainae kapoekung  
doeh.  
Cathut teh pholen lah awm lawwih.

## 69

### *Runae thung hoi ratoumnae*

Kathutkung: Devit

- <sup>1</sup> Oe Cathut, na rungngang haw.  
Bangkongtetpawiteh, tui ni ka lahuen totouh na muem toe.
- <sup>2</sup> Ka dung e tangdong dawk ka bo teh, kangdue nahan awm hoeh.  
Tui kadung, tuicapa ni na ramuknae koe ka pha.
- <sup>3</sup> Ka hram lawi ka tâwn toe.  
Ka dangka a ke toe.  
Ka Cathut ngaihawi laihoi ka mit a tâwn toe.
- <sup>4</sup> A khuekhaw awm laipalah na kahmuhmanaw teh,  
ka sam hlak apap awh.  
Ayawmyin lah na taran awh teh,  
raphoe hanlah kakâcainaw teh, a thao awh.  
Banghai ka parawt hoeh ei, boutbout pathoe hanelah ao.
- <sup>5</sup> Oe Cathut, ka pathunae heh ka panue.  
Ka yonnae heh ka hrawk hoeh.
- <sup>6</sup> Oe Jehovah, ransahu Cathut,  
na karingkungnaw teh kai kecu dawk kayak awh nahanh seh.  
Oe Isarel Cathut, nang katawngkung hah kai kecu dawk  
a lungpout awh nahanh seh.
- <sup>7</sup> Nang kecu dawk pathoenae ka kâhmo teh,  
kayanae ni ka minhmai a ramuk.
- <sup>8</sup> Ka hmaunawngghanaw thung dawk imyin lah ka o teh,  
manu buet touh ni na khe e thung dawk patenghai  
ramlouk e tami lah ka o.
- <sup>9</sup> Na im hanlah pouknae ni na ca teh,  
na kapathoenaw e lawk teh kai dawk a pha.
- <sup>10</sup> Rawcahai hoi ratoum hringnae dawk doeh na pathoe awh.
- <sup>11</sup> Buri ka khohna toteh, na panuikhai awh.
- <sup>12</sup> Longkha koe katahungnaw ni ka kong a dei awh teh,  
yamuhurinaw ni la lah na sak awh.
- <sup>13</sup> Hatei, kai hanelah teh ka ratoumnae heh nang koe doeh.  
Oe BAWIPA, ngai kaawm e tueng dawk Oe Cathut,  
na lungmanae apap e patetlah,  
na rungngangnae lawkkatang hoi ka lawk heh na thai pouh haw.
- <sup>14</sup> Kai hah tangdong dawk hoi na rasat haw, na bawt sak hanh.



- Na kahmuhmanaw kut dawk hoi thoseh,  
tui kadung thung hoi thoseh, na hlout sak haw.
- 15 Tui kalen ni na muem teh, tui kadung ni na payawp hanh naseh.  
Tangkom kadung ni na pakhum hanh naseh.
- 16 Oe BAWIPA na thai pouh haw.  
Bangkongtetpawiteh, na lungpatawnae teh ahawi.  
Lungmanae kapap hoi kai koe lah kamlang haw.
- 17 Na san koe hoi na minhmai hrawk hanh.  
Bangkongtetpawiteh, runae koe ka pha toe.  
Karang poung lah na thai pouh haw.
- 18 Ka hringnae koe hnai nateh, na ratang haw.  
Ka tarannaw ao dawkvah, na rungngang haw.
- 19 Kayanae, yeiraiponae hoi na barihoehnae teh na panue.  
Ka taran pueng teh na hmalah kOUNg ao.
- 20 Pathoenae ni ka lung a pout sak teh a lungpuen sak.  
Na kapahrenkung ka tawng teh buet touh hai ka hmawt hoeh.  
Lungpahawikung ka tawng teh buet touh hai ka hmawt hoeh.
- 21 Ka rawca lah kakhat e na poe awh teh,  
tui kahran toteh misurtui kathut e hah na poe awh.
- 22 Ahnimae caboi teh amamouh hanelah karap lah thoseh,  
tangkhak lah thoseh, a kang hanelah thoseh, coung awh naseh.
- 23 A hmu thai awh hoeh nahanlah a mitmawm naseh.  
A laheibaw thouk payaw naseh.
- 24 Na lungkhueknae hah ahnimouh lathueng awi nateh,  
na lungphuennae ni rekpatawt naseh.
- 25 Ahnimouh khosaknae hmuen teh kingkadi lah awm naseh,  
ahnimae im dawk apihai awm hanh naseh.
- 26 Bangkongtetpawiteh, na rek e hah a rektap awh teh,  
hmâ na ca sak e naw hah, rek a panai awh.
- 27 ahnimae yon dawk yon rek poe nateh,  
na lannae dawk kâen hanh naseh.
- 28 Hringnae cauk dawk hoi raphoe lah awm awh naseh.  
Tamikalannaw hoi rei thut lah awm hanh naseh.
- 29 Hateiteh kai teh mathoe hoi lung ka mathout e lah ka o.  
Oe Cathut, na rungngangnae ni a rasangnae koe na tat naseh.
- 30 Cathut min teh la hoi ka pholen han.  
Lunghawilawkdeinae hoi ama teh ka tawm han.
- 31 BAWIPA ni ki hoi khoksamen hoi kaawm e maitotan a ngai e hlak,  
hote hringnuen hah a ngaihawn.
- 32 Ka kârahnounmaw ni hethah a hmu awh vaiteh, a lunghawi awh han.  
Nangmouh Cathut katawngnaw e lung teh thaonae hoi akawi han.
- 33 Bangkongtetpawiteh, ka mathoenaw e lawk hah a thai pouh teh,  
thongim ka bawt e amae taminaw hah pacekpahlek hoeh.
- 34 Talai hoi kalvan ni ama teh a pholen teh,  
talipui hoi a thung kaawm e pueng ni, ama teh, pholen naseh.
- 35 Cathut ni Zion a rungngang teh,  
Judah kho hah a kangdue sak teh,  
Ahnimouh ni ao awh teh a pang awh.
- 36 A san catounnaw ni hai pang awh vaiteh,  
a min ka lungpataw e teh athung vah kho a sak awh han.



## 70

*Katarankung koehoi hlout nahanlah ratoumnae*

Kathutkung: Devit

- <sup>1</sup> Oe Cathut, kai rungngang hanlah karanglah kêroe haw.  
Kai kabawp hanlah karanglah kêroe haw.
- <sup>2</sup> Kai thei hanlah kakâcainaw teh  
kayayeirai po laihoi awm awh naseh,  
runae poe hanlah kakâcainaw heh  
yawng awh naseh.
- <sup>3</sup> Vehveh, na katetsinnaw teh  
kaya laihoi yawng awh naseh.
- <sup>4</sup> Nang na ka tawng pueng teh,  
nang dawkhaw thahmeica lah awm awh naseh.  
Na rungngangnae ka lungpataw naw ni pout laipalah,  
Cathut teh pholen lah awm seh, telah tet awh naseh.
- <sup>5</sup> Hatei, kai teh tami ka mathoe hoi ka vouthoup e lah ka o.  
Oe, Cathut, karang na pâm leih.  
Nang teh ka rungngangkung hoi kabawmkung doeh.  
Oe BAWIPA ngailawi awm hanh leih.

## 71

*Rungngangnae lungsong Cathut*

Kathutkung: Panuekhoeh

- <sup>1</sup> Oe BAWIPA, nang doeh na kêuep.  
Kaya hoi na awm sak hanh.
- <sup>2</sup> Na lannae hoi na rungngang nateh, na hlout sak haw.  
Kai koe lah na hnâpakeng nateh na rungngang haw.
- <sup>3</sup> Kai ni pou ka pâm teh ka onae lungsong lah awm haw.  
Kai rungngang hanelah kê na poe teh,  
kaie lungsong, kaie rapan lah na o.
- <sup>4</sup> Oe ka Cathut, tamikathout kut dawkhaw thoseh,  
tamikalanhoehe hoi tamitongthoe kut dawkhaw thoseh,  
na rungngang haw.
- <sup>5</sup> Bangkongtetpawiteh, oe Bawipa Jehovah,  
nang teh ka camo nahoi na kêuep e lah na o.
- <sup>6</sup> Pek ka khe hoi na kuet teh,  
nang teh anu von thung hoi na ka lat e lah na o.  
Nang teh pou na pholen han.
- <sup>7</sup> Tami moikapap kângai karusakkung lah ka o.  
Hatei, nang teh kacake kânguenae doeh.
- <sup>8</sup> Ka pahni teh nang pholennae hoi akawi teh,  
hnintangkuem nange pholennae hoi kawi naseh.
- <sup>9</sup> Ka matawng toteh na hnoun hanh lah a.  
Ka tha a youn toteh na cettakhai hanh lah a.
- <sup>10</sup> Bangkongtetpawiteh, ka tarannaw ni na pathoe awh.  
Kai thei han a ngai awh dawkvah, pouknae a kêpoe awh teh, na pawp awh.
- <sup>11</sup> Cathut ni a ceitakhai toe.  
Pâlei awh nateh man awh.  
Bangkongtetpawiteh, ka rungngang hane awm hoe telah ati awh.



- 12 Oe Cathut, na hlat takhai hanh.  
Oe ka Cathut, karanglah na kabawm haw.
- 13 Ka hringnae ka tarannaw hah kayayeirai hoi rawknae koe phat awh naseh.  
Runae poe hanlah kakâcainaw hah pahuipalamnae hoi yeiraiponae ni ramuk awh naseh.
- 14 Hatei, pou ka ngaihawi vaiteh,  
hoehoe ka pholen han.
- 15 Ka pahni ni na lannae a dei vaiteh,  
na rungngangnae heh hnintangkuem a hramkhai han.  
Bangkongtetpawiteh, a lungmanae parei teh baw thai hoeh.
- 16 Bawipa Jehovah, thaonae dawk ka cei han.  
Na lannae nange lannae dueng doeh ka dei han.
- 17 Oe Cathut, ka camo nah hoi na cangkhai toe,  
Atu totouh kângairu hno na sak e hah ka pâpho.
- 18 Sekatha taminaw hoi ka tâcawt hane naw koe na thaonae hoi  
na hnotithainae ka pâpho hoeh roukrak,  
ka matawng teh ka sam a po toteh, Oe Cathut na cettakhai hanh.
- 19 Oe Cathut, na lannae hai a rasang poung.  
Oe Cathut, hnokalen kasakkung, nang patetlah  
apimouh ouk kaawm va.
- 20 Kalen ni teh ka patawpoung e runae  
na kâhmosakkung nang ni na rounng sak nateh,  
kadung poung e talai thung hoi bout na rasat haw.
- 21 Ka tawntanae na pung sak vaiteh,  
lung bout na pahawi han.
- 22 Tamawi hoi na pholen han.  
Oe Cathut, yuemkamcu lah na onae hah ka pholen han.  
Oe Isarel e Kathoung Cathut,  
ratoung hoi la sak laihoi na pholen han.
- 23 Nang pholen laihoi la ka sak toteh,  
ka pahni teh a lunghawi katang han.  
Na ratang e ka hringnae hai a lunghawi han.
- 24 Ka lai ni hai kanîruirui pout laipalah na lannae a dei han.  
Bangkongtetpawiteh, runae poe hanlah kakâcainaw hah  
lungpout laihoi yeiraipo sak lah ao toe.

## 72

### *Messiah uknae Bawilennae hoi lentoenae*

Kathutkung: Solomon

- 1 Oe Cathut, na lawkcengnae heh siangpahrang poe nateh,  
na lannae hah siangpahrang capanaw hanelah hrueng pouh haw.
- 2 Ahni ni na taminaw hah lannae hoi lawkceng vaiteh,  
nange karoedengnaw hah
- 3 Monnaw ni tamimaya koe rounnae poe vaiteh,  
monruicanaw ni lannae hah na poe awh han.
- 4 Ama ni ka mathoe e tamimaya koe kângingnae thokhai vaiteh,  
ka vouthoup e catounnaw hah rungngang vaiteh,  
rep kacuengroenaw hah a rek awh han.
- 5 Kanî hoi thapa a kangning roukrak,  
tami kâkuen e pueng ni nang teh na taki awh han.



- <sup>6</sup> Ama teh pho kahring va hoehnahlan e kho ka rak e patetlah thoseh,  
talai kakawkkung kho a rak e patetlah thoseh a kum han.
- <sup>7</sup> Ama se nah teh, tamikalannaw kâroe vaiteh,  
thapa ao roukrak teh, lungkuep roumnae ao han.
- <sup>8</sup> Ama ni talipui avanglah hoi avanglah totouh,  
talipui koehoi talai pout totouh a uk han.
- <sup>9</sup> Kahrawngum vah kho kasaknaw ni  
a hmalah tabawk awh vaiteh,  
a tarannaw ni vaiphu hah a palem awh han.
- <sup>10</sup> Tarshish ram hoi tuilum siangpahrangnaw ni,  
hno poe hane sin awh vaiteh,  
Sheba hoi Seba siangpahrangnaw ni hai  
poehtonaw hah a poe awh han.
- <sup>11</sup> Bokheiyah, siangpahrangnaw pueng,  
a hmalah tabawk awh vaiteh,  
miphun pueng ni a thaw a taw awh han.
- <sup>12</sup> Bangkongtetpawiteh, kavoutthoupnaw a hram awh toteh, a rungngang  
han.  
Mathoenaw hoi kabawmkung ka tawn hoe hah a kabawp han.
- <sup>13</sup> Mathoe hoi vouthoup naw hah pahren vaiteh,  
vouthoup hringnae hah a rungngang han.
- <sup>14</sup> Repcungroenae hoi kaisuenae thung hoi  
a hringnae ratang vaiteh,  
a thipaling teh a mithmu vah ka sungren poung e lah ao han.
- <sup>15</sup> Ama teh a hring vaiteh, Sheba sui hah ama koe poe lah ao han.  
Ratounnae hai ama koe pou poe lah awh vaiteh,  
hnintangkuem pholen lah ao han.
- <sup>16</sup> Ram daw kacakang moi awh vaiteh,  
monsom e a pawhiknaw hah Lebanon patetlah kâhuen vaiteh,  
kothung e taminaw teh,  
talai phokahring patetlah a kâhuet awh han.
- <sup>17</sup> A min teh a yungyoe roum mahoe toe.  
Kanî a ang roukrak a min ao yungyoe han.  
Ama daw ayânaw ni yawhawi hmawt awh vaiteh,  
miphun pueng ni tami yaw kahawi e ati awh han.
- <sup>18</sup> BAWIPA Cathut, Isarel Cathut,  
kângairu hno kasakkung dueng pholen lah awh lawiseh.
- <sup>19</sup> A min sungren teh a yungyoe pholen lah awh naseh.  
Talai abuemlah a sungrennae hoi  
kawi lawiseh. Amen hoi Amen.
- <sup>20</sup> Jesi Capa Devit ratounnae a pout toe.

## 73

### *Tamikathout poutnae hoi BAWIPA kâuep yawhawinae*

Kathutkung: Asaph

- <sup>1</sup> Cathut teh Isarel hane hoi lungthin  
kathounnaw hanelah ahawi tangngak.
- <sup>2</sup> Hatei, kai raitat meimei ka rawp teh,  
meimei ka thawn toe.
- <sup>3</sup> Bangkongtetpawiteh, tamikathoutnaw e  
yawhawi ka hmu navah, kakaisuenaw hah ka ut toe.



- 4 Ahnimouh teh a due awh hoehroukrak  
patawnae khang awh hoeh, a tha pou ao awh.
- 5 Ayânaw patetlah runae dawk awm awh hoeh,  
ayânaw patetlah kuekluek pataw awh hoeh.
- 6 Hatdawkvah, kâoupnae teh awi lah a awi awh teh,  
rektapnae khohna hah a khohna awh.
- 7 A thâw awh lawi vah, a mitkatueng awh.  
A pouk awh e hlaik ka paphnawn a tawn awh.
- 8 Repcoungroenae hah a panuikhai awh teh,  
kâoupnae lawk a dei awh.
- 9 A lawk dei e ni kalvan totouh a taran teh,  
a lai ni talai pueng a katin.
- 10 Hatdawkvah, a taminaw teh ahnimouh koe a ban awh teh,  
túi moikapap e hah kouna a nei awh.
- 11 Bangtelah hoi maw Cathut ni a panue.  
Lathueng Pouna dawc panuenae ao maw telah ati awh.
- 12 Khenhaw! hetnaw heh Cathut ka bari hoeh e,  
banghai pouk laipalah ka hring e lah ao awh teh,  
hoehoe a tawnta awh.
- 13 Ka lungthin kathoung sak nakunghai,  
atangalah cungkeihoe.  
Yon thuengnae lahoi ka kut ka pâsu nakunghai cungkeihoe.
- 14 Hnin tangkuem tarawknae hoi  
amom karoitawi yuenae doeh ka khang.
- 15 Hottelah ka dei han ka tet pawiteh,  
khenhaw! na catounnaw koe torei teh,  
tamikalan hoeh lah kaawm han.
- 16 Hetheh, thaipanuek nahanelah ka pouk torei teh,  
hothateh kai hanelah ka pataw katang e lah ao.
- 17 Cathut hmuen kathoung koe kâen toteh,  
ahnimouh poutnae heh ka thaipanuek katang toe.
- 18 Ahnimouh teh pâhnannae koe na ta teh,  
rawkphainae hmuen koe na tâkhawng.
- 19 Oe, bangtelah, tawkkadek dawc rawknae koe louk a pha awh vaw.  
Takitho e ni kouna louk a ca awh vaw.
- 20 Kâhlaw toteh, karum mang patetlah,  
Bawipa na pâhlaw toteh,  
ahninae meikaphawc hah na pacekpahlek pouh han.
- 21 Hot patetlah ka lungthin a pataw teh,  
ka pouknae hai a ru.
- 22 Panuenae ka tawn hoeh e hoi tamipathu lah ka o teh,  
na hmalah saring patetlah doeh ka o.
- 23 Hatei nakunghai, nang koe pou ka o teh,  
aranglae kut dawc na kuet pouh.
- 24 Na mae kâpankhainae lahoi lam na hrawi teh,  
hathnukkuh bawilennae hah na coe pouh.
- 25 Kalvan vah nang laipalah apimouh ka tawn.  
Talaivan hai nang laipalah,  
ka ngai e alouke awm hoeh toe.
- 26 Ka takthai hoi ka lungthin teh a tâwn.  
Hatei, Cathut teh, a yungyoe hoi



ka lungthin thaonae hoi ham lah ao.

<sup>27</sup> Bangkongtetpawiteh, nang hoi kâhlat e teh,  
kahmat awh roeroe han doeh.

Nang koe kâyawt e pueng teh raphoe lah ao han.

<sup>28</sup> Hateiteh, kai hanelah teh Cathut hnai e heh ahawi.  
Na sak e hno pueng heh ka kamnue sak thai nahanlah,  
Bawipa Jehovah dawk doeh ka kâuep toe.

## 74

### *Repcongroyenae koehoi hlout nahanlah kâheinae*

Kathutkung: Asaph

<sup>1</sup> Oe Cathut bangkongmaw na pahnawt vaw.

Bangkongmaw na saring a pânae koe e na tuhunaw  
taranlahoi na lungkhueknae hmaikhu a pâyam rah bo vaw.

<sup>2</sup> Kamkhueng e tamimaya, yampa na ran e,  
râw lah na pang e miphun,  
na ratang e naw heh pahnim hanh.

<sup>3</sup> Raphoe tangcoung e hmuen koe tho haw.  
Hmuen kathoung dawk e hno pueng hah  
taran ni koug a raphoe toe.

<sup>4</sup> Na taminaw a kamkhuengnae hmuen koe,  
na tarannaw teh a hramki awh teh,  
mitnoutnaw hah a vo awh.

<sup>5</sup> Ratu thing ka tâtueng hane patetlah,  
cakânaw teh a palik awh.

<sup>6</sup> Dongdengca dawk bawkim hnonaw hah  
amamae cakâ, cakkinnaw hoi a raphoe awh.

<sup>7</sup> Thoungnae hmuen hah hmai a sawi awh teh,  
na min onae hmuen hah a khin sak awh toe.

<sup>8</sup> Koug raphoe awh sei ati awh teh,  
ram thung e Cathut bawknae hmuen pueng hah hmai koug a sawi  
awh.

<sup>9</sup> Kaimouh teh mae mitnoutnae ka hmawt awh hoech toe.  
Profet hai awm hoech toe.

Bangkong han nama aw,  
telah kapanuekkung kaimouh koe awm hoech toe.

<sup>10</sup> Oe Cathut, bangkongmaw na tarannaw ni na pathoe han.  
Taran ni na min pou a pacekpahlek han na maw.

<sup>11</sup> Bangkongmaw na kut aranglae hah na dâw hoech vaw.  
Bout dâw nateh, ahnimanaw hah koug raphoe haw.

<sup>12</sup> Bangtelah tetpawiteh, Cathut teh ayan hoi talai taminaw koe  
rungngangnae kasakkung kaie Siangpahrang doeh.

<sup>13</sup> Na thaonae lahoi talipui hah na kapek teh,  
tui thung tuitamnaw e lû hah na khoe pouh.

<sup>14</sup> Leviathan lû hah koug na khoe pouh teh,  
kahrawng kaawmnaw ni ca hanelah na poe.

<sup>15</sup> Tuikhu hoi palangnaw hah na palang pouh teh,  
palangpuinaw hah na hak sak.

<sup>16</sup> Khodai hoi karum hai nange doeh  
Kanî hoi angnae hah na sak toe.

<sup>17</sup> Talai khori pueng hai thoseh,



kompawi hoi kasik pueng hai thoseh na sak toe.

- 18 Oe BAWIPA, taran ni na pathoe e hoi  
tamipathunaw ni na min a pacekpahlek e hah pahnim hanh.
- 19 Oe, na bakhu hringnae heh sarang koe poe hanh.  
Ka mathoe e na taminaw e hringnae heh  
a yungyoe pahnim hanh.
- 20 Lawkkam hah bari haw. Bangkongtetpawiteh,  
talai a hmonae hmuennaw hah rektap lawpnae hoi akawi.
- 21 Oe, repcoungror e naw heh,  
kaya laihoi ban sak hanh.  
Mathoe hoi a reikathainaw ni na min pholen naseh.
- 22 Oe Cathut, thaw nateh, na kong hah kangdoutkhai haw.  
Tamipathu ni hnintangkuem  
na pathoe e hah pahnim hanh.
- 23 Na tarannaw lawk heh pahnim hanh.  
Nang na ka tarannaw e ruengruengtinae lawk teh  
hoehoe a kampaw e hah pahnim hanh.

## 75

### *Kalan Cathut lawkcengnae lunghawi lawk dei ratoumnae*

Kathutkung: Asaph

- 1 Oe Cathut, nang koe lunghawi lawk ka dei, lunghawi lawk ka dei.  
Bangkongtetpawiteh, na sak e kangairu hnnonaw ni  
na min a hnainae a kamnue sak.
- 2 Kâdaw koe e tueng a pha toteh,  
kânging lah lawk na ceng han.
- 3 Talai hoi a thung kaawm e naw pueng raphoe lah ao teh,  
a khom hah kacaklah a ung. Selah.
- 4 Mithmaikhet e naw koevah, minhmai khen hanh awh.  
Tamikathoutnaw koe na ki hno hanh.
- 5 Na ki teh a lathueng lah saw sak hanh awh.  
Lahuen pata lahoi lawk dei hanh awh telah ka ti.
- 6 Bangkongtetpawiteh, tawmnae teh kanitho,  
kaniloum, akalah hoi tho hoeh.
- 7 Hateiteh, Cathut teh lawkcengkung doeh.  
Buet touh a rahnoum sak teh alouke a rasang sak.
- 8 Bangkongtetpawiteh, Cathut kut daw k manang ao teh,  
misurtui teh a paling.  
Koung kalawt hnukkuh a rabaw.  
A laheipadin totouh talai van e tamikayonnaw ni  
koung a nei awh han.
- 9 Hateiteh, Jakop Cathut teh, ka pholen han,  
a yungyoe ka pholen han.
- 10 Tamikayon e ki pueng teh,  
koung ka tâtueng han.  
Hateiteh, tamikalan e ki teh,  
tawm lah ao han.

## 76

### *Lawkcengnae koe Cathut lentoenae*

Kathutkung: Asaph



- <sup>1</sup> Judah vah Cathut panue lah ao teh,  
Isarel vah a min teh a lentoe.
- <sup>2</sup> Salem haiyah lukkareiim ao teh,  
Zion vah a onae hmuen ao.
- <sup>3</sup> Hawvah, licung pala, tarantuknae,  
bahling hoi tahloinaw hah  
a khoe awh. Selah.
- <sup>4</sup> Nang teh, tarantuknae monnaw hlak  
na sungren teh na hawihnawn.
- <sup>5</sup> A tarankahawinaw lawp lah ao teh,  
mat a i awh toe.  
Tami a tha kaawm apinihai a kut dâw thai awh hoeh.
- <sup>6</sup> Oe Jakop Cathut, na yuenae dawk hoi  
marang hoi ranglengnaw teh kadout e patetlah  
koung a rawp awh.
- <sup>7</sup> Nang teh taki na tho doeh.  
Na lungkhuek pawiteh, na hmalah  
apimouh kangdout thai han.
- <sup>8</sup> Talai vah repcoungröe e naw rungngang teh  
lawkceng hanelah Cathut a kangdue toteh,
- <sup>9</sup> Na lawkcengnae lawk hah kalvan hoi na patoun teh,  
talai teh taki laihoi duem ao. Selah.
- <sup>10</sup> Taminaw e lungkhueknae ni na pholen roeroe han.  
Ka cawi e lungkhueknae hai na keng dawk na kâyeng han.
- <sup>11</sup> BAWIPA na Cathut koevah,  
lawkkam awh nateh, kuep sak awh.  
Atengpam kaawm e pueng ni,  
taki hanelah kaawm e koevah, poehno hah poe awh.
- <sup>12</sup> Ama ni lawkcengkungnaw e lung hah, a rahnoum sak han.  
Talai siangpahrangnaw hanelah takikatho poung e lah ao.

## 77

### *Cathut ratangnae panuena dawk lungpahawinae*

Kathutkung: Asaph

- <sup>1</sup> Ka lawk hoi Cathut koe ka hram.  
Ka lawk roeroe hoi Cathut koe ka hram teh,  
ama ni na thai pouh.
- <sup>2</sup> Runae kâhmo navah Bawipa teh ka kaw.  
Karum vah ka kut hah pou ka dâw teh,  
ka hringnae ni duem awm ngai hoeh.
- <sup>3</sup> Cathut ka pouk teh ka cingou.  
Luepluep ka pouk teh,  
ka muitha ngawt a tâwn. Selah.
- <sup>4</sup> Ka mit pou na padai sak teh,  
pou ka kâroe dawkvah, lawk ka dei thai hoeh.
- <sup>5</sup> Yampa e hninnaw hoi  
ayan e kumnaw hah ouk ka pouk.
- <sup>6</sup> Karum vah lanaw hah pahnim hoeh nahanlah ka pouk teh,  
ka lungthung hoi ouk ka pouk.  
Ka muitha ni hai atangcalah a tawng.
- <sup>7</sup> Bawipa ni pou na pahnim han na maw.  
Lunghawi laipalah maw ao han aw.



- 8 A lungmanae teh ka pout han na maw.  
A lawkkam hai kuep laipalah maw pou ao han toung.
- 9 Cathut ni pahrennae a pahnim han na maw.  
Lungkhuek laihoi a ngai e lungmanae hah a khan toe khe.
- 10 Hete ni ka lung a pataw sak.  
Hatei, Lathueng Poung aranglae kut  
a kamnue lahunnae kum hah ka pahnim mahoe hah ka ti.
- 11 BAWIPA ni ayan e kângairu hno a sak e naw hah  
ka pahnim mahoe hah.
- 12 Na sak e naw puenghai ka pouk teh,  
na tawk e hah ka dei han.
- 13 Oe Cathut, na lam teh hmuen kathoung koe ao.  
Ka Cathut patetlah ka lentoe e Cathut teh apimaw .
- 14 Nang teh, kângairu hno ka sak e Cathut doeh.  
Tamimaya koe na thaonae hah na kamnue sak.
- 15 Na taminaw hoi Jakop hoi Joseph catounnaw hah  
na kut hoi na ratang. Selah.
- 16 Oe Cathut, tuinaw ni na hmu.  
Tuinaw ni na hmu awh teh, na taki awh.  
Kadung poung e tui hai a kâhuet.
- 17 Tâmainaw ni tui a rabaw awh teh,  
kalvannaw a caining teh,  
na palanaw teh avoivang lah a yawng awh.
- 18 Na khoparit lawk teh, bongparui daw k ao teh,  
sumpapalik ni talai pheng a ang sak.  
Talai teh a kâhuet teh a pâyaw.
- 19 Na lam teh talipui daw k ao teh,  
na lamthung teh kakaw e tui daw k ao teh,  
na khokhnuk teh panue e lah awm hoe hah.
- 20 Mosi hoi Aron kut hoi na taminaw hah  
tu hu patetlah na hrawi.

## 78

### *Isarel taranthawnae koe Cathut lungmanae*

Kathutkung: Asaph

- 1 Oe, ka taminaw ka kâlawk hah tarawi awh nate hah,  
ka dei e lawk hah na hnâpakeng awh.
- 2 Bangnue nae lahoi ka pahni ka ang vaite hah,  
ayan e lawkkaru hah ka pâpho han.
- 3 Hothate hah, ka thai teh, ka panue tangcoung e  
mintoenaw ni a dei awh e doeh.
- 4 A canaw koehoi kâhrawk mahoe hah.  
Ka tho hane senaw koe vah,  
BAWIPA pholenna e, a thaonae,  
hoi hno kângairu a sak e hah ka dei han.
- 5 Bangtelah tetpawite hah, mintoenaw hah kâ a poe teh,  
a ca catounnaw koe a panue sak awh nahanlah,  
Jakop koe lawkpanuesaknae hah acak sak teh,  
Isarel koe kâlawk hah a poe.
- 6 Kaawm han rae se hoi ka tâcawt han rae camonaw ni,  
a catounnaw koe a dei awh vaite hah,



- a panue awh nahanlah,  
<sup>7</sup> Cathut dawk a ngaihawi awh nahan hoi  
 Cathut hnosak hah pahnim laipalah  
 kâpoelawknaw a pahnim awh hoeh nahanlah,  
<sup>8</sup> Mintoenaw patetlah lungpatanae,  
 taranthawnae, kalan e hno dawk a lung kaawm hoeh e,  
 Cathut hanelah yuemkamcu hoeh e muitha lah ao awh hoeh nahane  
 doeh.  
<sup>9</sup> Ephraim catoun teh tarantuknae a khohna teh licung a patuep ei,  
 tarantuk hnin navah a yawng.  
<sup>10</sup> Cathut lawkkam tarawi awh hoeh.  
 Kâlawk tarawi e ngai awh hoeh.  
<sup>11</sup> A sak e hoi hno kângairu a sak e hah,  
 a pahnim awh.  
<sup>12</sup> A na mintoenaw e mithmu vah,  
 kângairu hno hah Izip ram  
 Zoan tanghling dawk a sak.  
<sup>13</sup> Talîpui hah a kapek teh ahnimanaw hah a cei sak.  
 Tui hah hnopai patetlah a pâhlawp.  
<sup>14</sup> Kanîthun hai tâmai hoi a hrawi teh,  
 tangmin karoitawi hmaiang hoi a hrawi.  
<sup>15</sup> Kahrawngum vah, lungsong a bawng teh,  
 talîpui tui patetlah moikapap e tui a pânei.  
<sup>16</sup> Lungsong thung hoi tui a tâco sak teh,  
 palangpui patetlah a lawng sak.  
<sup>17</sup> Hatei, ama taranlahoi hoehoe a yon awh teh,  
 kahrawngum vah Lathueng Poug taranlahoi taran a thaw awh.  
<sup>18</sup> Ca han a ngai poung awh e hah a hei awh teh,  
 a lungthin hoi Cathut hah a tanouk awh.  
<sup>19</sup> Bokheiyah, Cathut taranlahoi a dei awh e teh,  
 kahrawngum vah Cathut ni  
 rawca na poe thai awh han na maw, telah ati awh.  
<sup>20</sup> Khenhaw! tui a tâco teh,  
 tuiko muen ka kawi lah a lawng nahan lah  
 lungsongpui hah a hem.  
 Rawca hai a poe thai namaw.  
 A taminaw hah moi a poe thai han na ou, telah ati awh.  
<sup>21</sup> Hatdawkvah, BAWIPA ni hote lawk hah a thai teh a lungkhuek.  
 Hat toteh, Jakop taranlahoi hmaito a tâco teh,  
 Isarel taranlahoi a lungkhuek.  
<sup>22</sup> Bangkongtetzpawiteh, Cathut hah yuem awh hoeh.  
 A rungangangnae hai kâuep awh hoeh.  
<sup>23</sup> Hottelah nahlangva, lathueng lae tâmai hah kâ a poe teh,  
 kalvan longkha hah a paawng pouh.  
<sup>24</sup> Ca hane mana hah ahnimouh lathueng a rak sak teh,  
 kalvanlae rawca hah a poe.  
<sup>25</sup> Taminaw ni thaonae  
 rawca hah a ca awh teh,  
 kaboumlah ca hane a patawn.  
<sup>26</sup> Kanîtholae kahlî hah kalvan a tho sak teh,  
 a hnotithainae lahoi a cum lae kahlî hah a tho sak.



- 27 Vaiphu patetlah moi hah a rak sak teh,  
rathei ka tawn e tavanaw hah tuirai e  
sadi yit touh apap awh.
- 28 A roenae tengpam  
petkâkalup lah a bo pouh.
- 29 Hateh, a ca awh teh king a boum awh.  
Bangkongtetpawiteh, a ngai awh e patetlah a poe.
- 30 Hatei, a ngai awh e rawca a hmawt awh hoehnahlan,  
a ca awh lahun navah,
- 31 Cathut lungkhueknae teh ahnimouh koe a pha.  
A tami tha kaawmnaw hah a thei teh,  
Isarel thoundounnaw hah kOUNg a rawp sak.
- 32 Hottelah nahlangva, hoehoe a yon awh teh,  
hno kalen a sak awh e hai bout yuem awh hoeh.
- 33 Hatdawkvah, hringyung hnin hah ayawmyin lah a coung sak awh teh,  
lungpuennae hoi a kum teh a baw sak awh.
- 34 Ahnimanaw hah a thei awh teh,  
a ma tawng hanelah a ban awh teh,  
atangcalah Cathut heh a tawng awh.
- 35 Cathut teh amamae lungsongpui doeh tie a panue awh teh,  
Lathueng POUNg Cathut teh na  
karatangkung doeh tie a panue awh.
- 36 Hateiteh, ama teh a pahni hoi a pholen teh,  
lai hoi laithoe a dei awh.
- 37 Bangkongtetpawiteh, ahnimae lungthin teh a hmalah lan hoeh,  
a lawkkam dawK yuemkamcu awh hoeh.
- 38 Hatei, ama teh lungmanae hoi akawi teh,  
a payonnae heh a ngaithoum teh,  
koung raphoe hoeh.  
Bokheiyah, avai moikapap lungkhueknae a roum sak teh,  
a lungphuennae kaman sak ngai hoeh.
- 39 Bangkongtetpawiteh, takthai lah ao awh teh,  
bout ban hoeh hanelah, kâha a poe e tie hah pahnim awh hoeh.
- 40 Thingyeiyawn vah vai nâyittouh maw  
a lungkhuek sak awh teh, ramke vah avai nâyittouh maw  
a lungmathoe sak awh toe.
- 41 Bokheiyah, atuhoitu Cathut a tanouk awh teh,  
Isarelnaw e Tami Kathoung hah a taran awh.
- 42 A thaonae pâkuem ngai awh hoeh,  
a tarannaw koehoi a rungngang ei nakunghai,  
pâkuem ngai awh hoeh.
- 43 Izip ram hoi Zoan yawn dawK  
kângairu hno a sak e hoi.
- 44 Ahnimae palang hah thipaling lah a coung sak teh,  
ahnimae tuikhunaw hai nei thai hoeh hanlah  
thipaling lah kOUNg a coung sak.
- 45 Ahnimouh ka kei e bitseinaw hoi,  
ahnimouh karaphoekung ekkanaW hah a tha pouh.
- 46 Ahnimae a pawhiknaw hah,  
ahri ni ca hanelah a poe teh,  
a tawksak awh e a pawhik hah samtongnaw a poe pouh.
- 47 Ahnimae misurnaw teh roun ni kOUNg a raphoe pouh teh,



- thailahei kungnaw hai tadamtui ni kOUNg a thei pouh.
- 48 Ahnimae saringnaw hai roun ni dêi hanelah a poe pouh teh,  
saringnaw hah kei ni a ka pouh.
- 49 Takitho e a lungkhueknae hah  
ahnimouh lathueng a rabawk teh,  
lungkhueknae, lungpoutnae, hoi runae hah  
ahnimouh koe thoena kaphawtkung  
kalvan tami totouh a tha pouh.
- 50 A lungkhueknae hanlah lamthung a sak,  
a hringnae hah duena hlak pasai laipalah,  
lacak mathout hah letlang a poe.
- 51 Izip vah camin pueng hoi Ham e rim  
a thaonae hmaloe pOUNg e hoi kOUNg a raphoe.
- 52 Hatei, a taminaw teh tu patetlah a hrawi teh,  
saringnaw patetlah kahrawngum vah a hrawi.
- 53 Karoumcalah a hrawi teh, taki hane banghai awm hoeh.  
A tarannaw teh talipui ni kOUNg a ramuk.
- 54 Hahoi, ramri kathoung, aranglae kut hoi a tawn e,  
mon totouh a hrawi.
- 55 Ahnimae hmalah, alouke miphunnaw hah a pâlei pouh.  
A pang awh hane râw hah a bangnue pouh teh,  
alouklouk lah hmuen a poe.
- 56 Hat nahlangva, Lathueng POUNg Cathut hah  
a tanouk awh teh, a lungkhuek sak awh teh,  
a panuesaknae lawk hah tarawi awh hoeh.
- 57 A na mintoenaw patetlah a kamlang awh teh,  
yuemkamcu hoeh lah a kâroe awh.  
Dumyenna licung patetlah a kâkamei awh.
- 58 Bangkongtetpawiteh, ahnimae hmuerasangnaw ni  
a lungkhuek sak teh,  
a sak awh e meikaphawknaw ni dipma sinnae a tâco sak.
- 59 Hetheh Cathut ni a thai toteh,  
puenghoi a lungkhuek teh,  
Isarel hah puenghoi a panuet.
- 60 Hatdawkvah, taminaw koe a ta e  
Shiloh rim koe totouh a ceitakhai.
- 61 A thaonae teh san lah a coung sak teh,  
a lentoena teh a tarannaw kut dawK a poe.
- 62 A taminaw tahloi a kâhmo sak teh,  
râw lah a coe e naw koe a lungkhuek.
- 63 A thoundounnaw teh hmai ni a kak awh teh,  
a tanglanaw ni vâ kâhmo awh hoeh.
- 64 A vaihmanaw teh tahloi hoi a thei awh eiteh,  
lahmainaw ni khui awh hoeh.
- 65 BAWIPA teh ka ip e patetlah a kâhlaw teh,  
misurtui kecu dawK ka hram e athakaawme tami patetlah a hram.
- 66 A taran hah a pâlei teh,  
a yungyoe min mathoena hah a poe.
- 67 Hothloilah Joseph rim hah a pahnavt teh,  
Ephraim miphun hah rawi ngai hoeh.
- 68 Ama koehoi Judah miphun,  
Zion mon ka pahren e heh a rawi.



- 69 A hmuen kathoung hah karasang e patetlah a sak teh,  
talai patetlah a yungyoe acak sak.
- 70 A san Devit hai a rawi teh  
tutakha thung hoi a la.
- 71 Tumanu, a canaw ouk a hrawi e patetlah,  
a tami Jakop hoi a coe e râw Isarelnaw  
khenyawnkung hanelah a la.
- 72 Hothloilah, a lungthin ahawi e patetlah,  
a khetyawt teh, a thounnae kut hoi a hrawi awh.

## 79

### *Isarel khuinae hoi ratoumnae*

Kathutkung: Asaph

- 1 Oe Cathut, miphun louknaw teh  
nange râw thung a kâen awh teh,  
Bawkim kathoung a khin sak awh teh,  
Jerusalem hah a raphoe awh toe..
- 2 Na sannaw e ro hah kalvan tavanaw  
rawca lah a poe awh teh,  
na tami kathoungnaw e moi teh kahrawng sarangnaw a paca awh.
- 3 A thipaling teh Jerusalem vah tui patetlah a rabawk awh teh,  
kapakawpkung buet touh boehai awm hoe.
- 4 Imrinaw ni pathoe e lah ka o awh teh,  
tengpam e naw ni na dudam awh teh na panuikhai awh.
- 5 BAWIPA nâtotouh ne na lungkhuek han vai.  
Nâtotouh ne na lung roum laipalah, hmai patetlah a kak han vai.
- 6 Nang panue hane ka ngai hoe e miphun hoi  
na min ka kaw ngaihoe e ram koevah,  
na lungkhueknae hah awi haw.
- 7 Bangkongtetpawiteh, Jakop catoun hah a kâphi awh teh,  
ahnie hmuen hai a raphoe awh.
- 8 Oe, ayan e payonnae hah kaimouh taran nahanelah pâkuem hanh,  
na lungmanae ni karang poung lah na kabawm naseh.  
Bangkongtetpawiteh, puenghoi  
rahnoum sak lah ka o awh toe.
- 9 Oe rungangnae Cathut, na kabawm haw.  
Bangkongtetpawiteh, na min lentoe nahan lah  
na rungang haw.  
Na min kecu dawh ka yonnae hah yonthanae na sak pouh haw.
- 10 Bangkong alouke miphunnaw ni,  
nâmour ahnima Cathut te, ati awh.  
Na sannaw e thipaling phu moi na pathung e hah  
ka mithmu vah miphun pueng ni, panuek awh naseh.
- 11 Thongkabawtnaw kâhramnae lawk teh, nang koe phat naseh.  
Ka lentoe e na hnotithainae patetlah  
due hanlah a pouk awh e hah, hlout sak haw.
- 12 Oe Jehovah, na min a mathoesaknae hah,  
ka imrinaw e phai dawh roeroe vah,  
let sari touh hoi patho haw.
- 13 Hottelah, nang koe ka pawngpa awh e,  
tuhu lah kaawm e na tami kaimanaw ni nang teh



pou na pholen awh vaiteh, pholennae teh,  
se pueng koe ka pâpho awh han.

## 80

### *Isarel ban nahanlah ratoumnae*

Kathutkung: Asaph

- <sup>1</sup> Oe Isarel Tukhoumkung, tuhu patetlah  
Joseph kahrawikung na thai pouh haw.  
Nang Cherubim koe na kaawm e ang haw.
- <sup>2</sup> Ephraim, Benjamin, hoi Manasseh hmalah  
na thaonae hah hroecoe nateh,  
tho nateh, na rungngang haw.
- <sup>3</sup> Oe Cathut, na rount sak haw,  
na minhmai hah ang sak nateh,  
rungngang lah ka o awh han.
- <sup>4</sup> Oe ransahu Cathut BAWIPA,  
na taminaw ratoumnae taranlahoi  
bangkong na lungkhuek.
- <sup>5</sup> Mitphi rawca hoi na kaw k te h,  
mitphi hah ka boum lah na pânei.
- <sup>6</sup> Imrinaw ni yue hanelah na o sak teh,  
ka tarannaw ni na panuikhai awh.
- <sup>7</sup> Oe Cathut, na rount sak haw,  
na minhmai hah ang sak nateh,  
rungngang lah ka o awh han.  
Oe ransabawi Cathut na rount sak haw.  
Na minhmai hah ang sak nateh, rungngang lah ka o han.
- <sup>8</sup> Izip hoi misurkung na la teh,  
Jentelnaw na pâlei teh na ung.
- <sup>9</sup> Ahni hane hmuen na hmoun pouh.  
Kadung poung lah tangpha na payang teh  
ram pueng kount kaw i.
- <sup>10</sup> Mon hah a tâhlip hoi a ramuk teh,  
a kang teh kalen e sidar patetlah ao.
- <sup>11</sup> A kangnaw ni talîpui a pha teh,  
a dawn teh tuipui koe a pha.
- <sup>12</sup> Lam daw k kacetnaw pueng ni,  
a paw a khi awh nahanelah,  
Bangkongmaw tumdumnae rapan hah a raphoe awh.
- <sup>13</sup> Ratu thung e pangan ni a hre teh,  
kahrawng sarang ni a ca awh.
- <sup>14</sup> Oe ransabawi Cathut, ka kâhei.  
Bout ban nateh, kalvan hoi hete misurkung hah,  
khen nateh, ring haw.
- <sup>15</sup> Aranglae kut hoi na ung teh,  
nang hanlah thao sak e  
cakang misur patetlah ao han.
- <sup>16</sup> Hmai daw k pâeng lah ao teh, tâtueng lah ao.  
Mei hoi mei kâhmo lah na yue e hah,  
khang thai laipalah kount a kahma awh.
- <sup>17</sup> Aranglae kut daw k kaawm e tami,



nang hanelah thao sak e tami capa lathueng vah,  
     na kut hah awm lawiseh.

18 Hottelah pawiteh, nang koehoi kamlang awm mahoe.  
     Na hring sak haw, na min ka kaw han.

19 Oe Cathut, na rounng sak haw,  
     na minhmai hah ang sak nateh,  
     rungngang lah ka o awm han.  
     Oe ransahu Cathut na rounng sak haw.  
     Na minhmai hah ang sak nateh, rungngang lah ka o han.

## 81

*Isarel yon pankângai nahanlah kâheinae.*

Kathutkung: Asaph

1 Maimae thaonae Cathut koe kacaipounglah la sak awm.  
     Jakop Cathut koe konawm laihoi hram awm.

2 La sak awm nateh cecak hah khawng awm.  
     A lawk kahawi e ratoung tamawi hah kueng awm.

3 Thapa rei hnin, kamhluem hnin,  
     pawi hnin vah mongka ueng awm.

4 Bangkongtetpawiteh, hethateh,  
     Isarelnaw hanlah phunglam lah ao teh,  
     Jakop Cathut kâlawk lah ao.

5 Hethateh, Izip ram pueng a cei awm teh,  
     thai panuek hoe e lawk thainae hmuen koe vah,  
     lawkpanuesaknae Joseph koe a sak e doeh.

6 A lounng daw e hrawm e hnori hah a puen pouh teh,  
     a kut hoi a tawm e a bawm hah a kuem pouh.

7 Rucat navah na kaw teh na rungngang awm.  
     khoparitnae hmuen koehoi na pato awm teh,  
     Meribah tui koehoi na tanouk awm. Selah.

8 Oe ka taminaw thai awm haw,  
     lawk na thui vai.  
     Oe Isarel ka lawk tarawi awm haw.

9 Miphun louk cathut nangmouh koe awm mahoe.  
     Miphun louk cathut na bawk awm mahoe.

10 Kai teh Cathut Jehovah,  
     Izip ram hoi na kahrawikung doeh.  
     Ka kaw lah na pahni ang awm nateh, ka kawi sak han.

11 Hatei, ka taminaw ni ka lawk hah ngai awm hoe.  
     Isarelnaw ni banglahai na pouk awm hoe.

12 Amamae lungpatanae koe ka poe teh,  
     amamouh ngai patetlah ao awm.

13 Oe ka taminaw ni ka lawk hah ngai boilah,  
     Isarel ni ka lamthung dawn haw pawiteh khe.

14 A taran tang ka tâ pouh vaiteh,  
     ahnimouh katarankungnaw koe  
     ka kut ka dâw pouh han eite.

15 BAWIPA kahmuhmanaw ni  
     a hmalah kâhet awm vaiteh,  
     ka taminaw teh pou a kangning awm han eite.

16 Kahawi poung e tavai hoi ka kawk vaiteh,  
     lungsong thung e khoitui hoi a lungkhuekti sak han eite.



## 82

*Lan nahanlah kâheinae*

Kathutkung: Asaph

- <sup>1</sup> Cathut teh cathutnaw a kamkhuengnae koe a kangdue teh,  
cathutnaw lawk a ceng.
- <sup>2</sup> Nâtotouh ne kânging hoeh lah lawk na ceng awh vaiteh,  
tamikathoutnaw hah na kapek awh han vai. Selah.
- <sup>3</sup> Mathoe hoi naranaw hanlah lawkceng pouh nateh,  
runae kâhmonaw hoi kavoutnaw hah  
kânging lah lawkceng awh.
- <sup>4</sup> Mathoe hoi kavoutnaw hah rasat awh nateh,  
tamikathoutnaw kut dawk hoi tâcawt sak awh,
- <sup>5</sup> Panuek awh hoeh, thai panuek awh hoeh,  
hmonae koe a kâva awh teh, talaidu pueng teh a kâhuet.
- <sup>6</sup> Nangmouh teh cathutnaw doeh,  
Lathueng Poung e canaw lah na o awh.
- <sup>7</sup> Hatei, tami patetlah na due han,  
bawi thung dawk e buet touh patetlah  
na rawp awh han.
- <sup>8</sup> Oe Cathut thaw haw, talai heh lawkceng haw.  
Bangkongtetpawiteh,  
miphun pueng heh râw lah na pang han.

## 83

*Isarel hlout nahanlah ratoumnae*

Kathutkung: Asaph

- <sup>1</sup> Oe Cathut, duem awm hanh leih,  
lawk tho laipalah duem awm hanh.  
Oe Cathut duem awm hanh.
- <sup>2</sup> Na tarannaw teh ruengruengti awh.  
Nang kahmuhmanaw teh a lounouk awh.
- <sup>3</sup> Na taminaw taranlahoi hnephnap hoi kho a khan awh teh,  
na hro e na taminaw taran laihoi pouknae a kâoup awh.
- <sup>4</sup> Tho awh, miphun lah aonae koehoi raphoe awh sei,  
Isarel min hai panue hoeh nahanlah ati awh.
- <sup>5</sup> Lungpouk buet touh lah, a kâpan awh teh,  
nang taranlahoi lawkkamnae teh a sak awh.
- <sup>6</sup> Edom hoi Ishmael rim dawk kaawmnaw,  
Moab hoi Hagar,
- <sup>7</sup> Gebal hoi Amon, Amalek hoi Filistin,  
hoi Taire kaawm e naw hoi lawkkam a sak awh.
- <sup>8</sup> Assyria hai ahnimouh koelah a kambawng teh,  
Lot catounnaw hah a kabawp. Selah.
- <sup>9</sup> Ahnimouh teh Midian koe na sak e patetlah,  
Kishion palang vah Sisera koehoi Jabin koe na sak e patetlah,  
bout sak pouh haw.
- <sup>10</sup> Ahnimouh teh Endor vah a due awh teh,  
talai dawk vaipuen lah a coung awh.
- <sup>11</sup> A tami kalennaw teh Oreb hoi Zeeb patetlah sak nateh,  
Bokheiyah, ahnimae siangpahrang pueng hah  
Zeeb hoi Zalmunna patetlah sak haw.



- 12 Hotnaw ni Cathut e saring pânae hmuen koehoi,  
kamamouh hanlah ka la awh han ati awh.
- 13 Oe Cathut ahnimouh teh vaiphu kahlî ni palek e hoi  
vaikong kahlî ni a palek e patetlah coung sak haw.
- 14 Hmai ni thing a kak e hoi,  
mon hah hmai ni a kak e patetlah coung sak haw.
- 15 Ahnimouh teh na kahlî kathout hoi pâlei nateh,  
puenghoi katang e kahlî hoi pakhi haw.
- 16 Oe BAWIPA, na min a tawng awh nahan lah  
a minhmai ka paling lah kayak sak ngala haw.
- 17 Nang dueng doeh BAWIPA min ka sin e hoi  
talai van pueng dawk Lathueng Poug  
lah na o e hah na panue thai awh nahanelah,
- 18 Yeiraipo hoi rucat hoi pou awm sak haw.  
Bokheiyah, kaya hoi awm sak nateh,  
koug kahmat naseh.

## 84

### *Cathut im khosak yawhawinae*

Kathutkung: Korah capanaw

- 1 Oe ransahu BAWIPA, na onae teh  
banghloimaw ngai ao.
- 2 Ka hringnae ni a rabui, Bokheiyah,  
BAWIPA thongma rabui laihoi ka tâwn.  
Ka lungthin hoi ka takthai ni  
kahring Cathut teh atangcalah a kaw.
- 3 Oe ransahu BAWIPA, ka Siangpahrang hoi ka Cathut,  
na thuengnae khoungroe dawp pusu ni tabu a tuk teh,  
pingpit ni hai a canaw ta nahanelah tabu a tuk.
- 4 Na im dawp kaawmnaw teh,  
a yaw kahawi e doeh.  
Pou na pholen awh han. Selah.
- 5 Nang thaonae lah ka hnonaw hoi  
hmuen ka thoung koe cei ngainae  
lungthin ka tawn naw teh tami a yaw kahawi e doeh.
- 6 Baca yawp dawp a cei awh navah,  
tuiphuek tâconae lah a coung sak teh,  
khotui hai a kamuem sak.
- 7 Thaonae koehoi thathoenae koe lah cei awh teh,  
buet touh hnukkhu buet touh  
Zion Cathut hmalah a kamnue awh.
- 8 Oe ransahu Cathut BAWIPA,  
ka ratoumnae heh na thai pouh haw.  
Oe, Jakop Cathut, na hnâpakeng haw.
- 9 Oe Cathut, ka bahling khen nateh,  
Satui na awi e mei hah khenhaw!
- 10 Bangkongtetpawiteh,  
na thongma dawp hnin touh o e teh,  
alouklah hnin 1,000 touh o e hlak ahawihnawn.  
Thoenae rim dawp o e hlak teh  
Cathut im longkha ring e ka ngaihawn.
- 11 Bangkongtetpawiteh, BAWIPA Cathut teh



kanî hoi bahling doeh.

BAWIPA ni lungmanae hoi bawilennae a poe han.

- <sup>12</sup> Oe ransahu BAWIPA,  
nang kâuep e teh a yaw kahawi e doeh.

## 85

*Ram hanlah BAWIPA koe ratoumnae*

Kathutkung: Korah capanaw

- <sup>1</sup> Oe, BAWIPA, na ram hah na lungyouk teh,  
Jakop catoun san lah a hrawi e naw hah  
bout na bankhai toe.
- <sup>2</sup> Na taminaw e payonnae hah na ngaithoum teh,  
a yonnae pueng na ramuk pouh toe.
- <sup>3</sup> Na lungkhueknae pueng hai na dam sak teh,  
na lungkâannaen pueng hai na kamlang takhai toe.
- <sup>4</sup> Oe ka rungngangnae Cathut,  
bout na rounng sak haw,  
ka lathueng na lungkhueknae teh na takhoe pouh haw.
- <sup>5</sup> Kaimouh koe na lung pou a khuek han maw.  
Na lungkhueknae teh se pueng dawh na caksak han na maw.
- <sup>6</sup> Nang dawh na taminaw a konawm thai awh nahan,  
bout na pâhlaw mahoeu toung na maw.
- <sup>7</sup> BAWIPA, na lungmanae na hmawt sak nateh,  
na rungngangnae na poe haw.
- <sup>8</sup> BAWIPA Cathut ni a dei hane lawk hah ka tarawi han.  
Bangkongtetpawiteh, a taminaw hoi  
a tamikathoungnaw koevah,  
lungmawngnae lawk hah a dei han.  
Hatei, pathunae koe lah teh kamlang awh hanh.
- <sup>9</sup> Maimae ram dawh bawilennae ao thai nahan,  
a rungngangnae teh ama ka taketnaw hoi a hnai tangngak.
- <sup>10</sup> Lungmanae hoi lawkkatang a kâhmo teh,  
lannaen hoi lungmawngnae a kâpahnuetp.
- <sup>11</sup> Lawkkatang teh talai dawh hoi a dâwn teh,  
lannaen ni kalvan hoi a khet.
- <sup>12</sup> Bokheiyah, BAWIPA ni hnokahawi a poe.  
Maimae ram ni a tâcokhai e a pawhik teh a pung han.
- <sup>13</sup> A hmalah lannaen a cei vaiteh,  
khokhnuk teh lamthung lah a sak han.

## 86

*BAWIPA pouk laihoi lungmanae hei ratoumnae*

Kasakkung: Devit

- <sup>1</sup> Oe BAWIPA, na hnâpakeng nateh, na thai pouh haw.  
Bangkongtetpawiteh, mathoe hoi ka vout e lah ka o.
- <sup>2</sup> ka hringnae heh na khetyawt teh, ka thoung e lah ka o.  
Ka Cathut lah na o.  
Nang kâuep e na san hah na rungngang haw.
- <sup>3</sup> Oe BAWIPA, na pahren haw.  
Bangkongtetpawiteh, kanîloum totouh nang teh pou na kaw.



- 4 Na san hringnae heh lunghawi sak haw.  
Bangkongtetpawiteh, Oe Bawipa,  
ka hringnae ni nang dueng doeh na khet.
- 5 Bangkongtetpawiteh, Bawipa, nang teh na hawi.  
Ngaithoum hanelah coungkacoe na kâcai teh,  
na ka kaw e pueng koe pahrennae moikapap na ka tawn e lah na o.
- 6 Oe BAWIPA, ka ratoumnae heh na thai pouh haw.  
Pahrennae ka hei e heh na thai pouh haw.
- 7 Runae kâhmo navah na kaw han.  
Bangkongtetpawiteh, nang ni teh na pato han.
- 8 Oe BAWIPA, cathutnaw thung daw  
nang hoi kâvan e awm hoeh.  
Na sak e patetlah ka sak thai e hai awm hoeh.
- 9 Oe Bawipa na sak e miphun pueng,  
na hmalah tho vaiteh na bawk awh vaiteh,  
na min a pholen awh han.
- 10 Bangkongtetpawiteh, nang teh na lentoe teh,  
kângairuhno ouk na sak.  
Nang dueng doeh Cathut.
- 11 Oe BAWIPA, na lam heh na cangkhai haw.  
Na lawkkatang daw ka o han.  
Na min bari nahanelah lungthin buet touh lah na tawn sak haw.
- 12 Oe Bawipa ka Cathut, ka lungthin abuemplahoi na pholen vaiteh,  
na min teh a yungyoe hoi ka tawmrasang han.
- 13 Bangkongtetpawiteh, kai daw  
na lungmanae teh a len poung.  
Ka dungpoung e Sheol hoi ka muiitha teh na rungngang toe.
- 14 Oe Cathut, tami kâoupnaw ni na taran teh,  
tamimathoutnaw ni ka hringnae a tawng awh,  
a hmalah nang hah na tat awh hoeh.
- 15 Hatei, Oe BAWIPA, nang teh, lungmanae,  
lungpatawnae, lungsawnae, poukthainae,  
hoi lawkkatang hoi kakawi e Cathut doeh.
- 16 Kai koelah kamlang nateh na pahren haw.  
Na san koe thaonae na poe haw,  
na sannu capa heh na rungngang haw.
- 17 Hawinae hanlah mitnoutnae kamnuek sak haw.  
Na kahmawt ngaihoeheh naw ni a hmu awh toteh, kayak awh naseh.  
BAWIPA nang ni na kabawp teh lung na pahawi.

## 87

### *Cathut khopui bawilennae*

Kathutkung: Korah capanaw

- 1 Khopui teh mon ka thoung daw ka kangdue sak.
- 2 Jakop khosaknae pueng hlak hai BAWIPA ni  
Zion longkha a lungpatawhnawn.
- 3 Oe Cathut e khopui, na kong heh  
ka sungren poung lah ouk a dei awh. Selah.
- 4 Na kapanueknaw koe Rahab hoi  
Babilon kong hah ka dei han.  
Khenhaw! Oe Filistin hoi Taire, Ethiopia,



hethéh, haw hoi ka tâcawt e doeh ati awh han.

<sup>5</sup> Zion kong dawk hettelah a dei awh han.

Het hoi hot teh ama dawk hoi ka tâcawt e doeh.

Lathueng Poung ni a ma teh, a caksak telah ati awh han.

<sup>6</sup> BAWIPA ni tami pueng min a thut toteh,

hethateh, haw e ka tâcawt e doeh telah mitnout a ta awh han.

<sup>7</sup> La kasaknaw hoi tumkhawng kakhawngnaw ni,

tuiphuek pueng nang koe ao telah ati awh han.

## 88

### *Lungpoutnae hoi kabawp heinae*

Kasakkung: Korah Capa Heman

<sup>1</sup> Oe BAWIPA kaie rungngangnae Cathut,  
na hmalah karum khodai ka hram.

<sup>2</sup> Na hmalah ka ratoumnae phat naseh,  
ka hramnae heh na thai pouh haw.

<sup>3</sup> Ka hringnae teh runae hoi a kawí teh,  
Sheol phuen teng rek ka pha toe.

<sup>4</sup> Tangkom dawk kâennaw hoi mek touksin lah ka o teh,  
thaonae ka tawn hoeh e patetlah ka o.

<sup>5</sup> Taran ni a thei teh tangkom dawk pakawp e patetlah,  
tami kadoutnaw koe tâkhawng lah ka o teh,  
pouk hoeh e kabawp hoeh e patetlah ka o.

<sup>6</sup> Tangkom dawk a dengnae koe, adungnae koe,  
a hmo poungnae koe vah na ta.

<sup>7</sup> Na lungkhueknae ni na ratet teh,  
na tuicapa ni na ramuk. Selah.

<sup>8</sup> Ka panue e naw hah kai koehoi ahlanae koe na ta teh,  
ahnimouh hanlah panuetho e lah na coung sak.  
na taren sin teh ka tâcawt thai hoeh toe.

<sup>9</sup> Runae kecu ka mít a mom.  
Hnintangkuem BAWIPA ka kawí teh, ka kut nang koe ka dâw.

<sup>10</sup> Tami kadoutnaw hanlah kângairu na sak han na maw.  
Tamikadout thaw vaiteh, na pholen han na maw. Selah.

<sup>11</sup> Na lungpatawnae teh phuen koe pâpho vaiteh,  
yuemkamcu lah na onae hah  
duenae hmuen koe pâpho han na maw.

<sup>12</sup> Kângairu na sak e hah hmonae koe panue han na maw.  
Na lannae teh pahnim e ram dawp panue thai han na maw.

<sup>13</sup> Hatei, Oe BAWIPA, nang koevah ka hram.  
Amom ka ratoumnae nang koe a pha han.

<sup>14</sup> BAWIPA bangkongmaw ka hringnae hah na tâkhawng.  
Bangkongmaw kaimouh koehoi na minhmai na hro.

<sup>15</sup> Ka camo nah hoi runae ka khang teh, due hane coungkacoe ka o toe.  
Taki na thonae hah ka khang teh  
kabawmkung ka tawn hoeh.

<sup>16</sup> Na lungkhueknae ni na ramuk teh,  
taki na thonae ni na raphoe toe.

<sup>17</sup> Hotnaw ni tui patetlah kanîloum totouh  
pou na ramuk teh na kalup.

<sup>18</sup> Ka pahren e hoi ka huikonaw heh ahlanae koe a ta teh,



ka panue e naw hai hmonae koe na o sak.

## 89

### *Cathut lawkkam*

Kasakkung: Ethan

- 1 BAWIPA lungmanae teh la hoi pou ka sak han.  
Yuemkamcu lah na onae teh se pueng dawk  
ka pahni ni a pholen han.
- 2 Lungmanae teh a kangning.  
Yuemkamcu lah na onae teh kalvan roeroe vah,  
acak telah ka dei toe.
- 3 Ka rawi e koevah lawk ka kam toe.  
Ka san Devit koe thoe ka bo toe.
- 4 Na catoun hah pou ka caksak han.  
Na bawitungkhang hah se pueng dawk  
kangdue sak han. Selah.
- 5 Oe BAWIPA, kalvannaw ni kângairu lah  
na onae hah a pholen awh teh,  
tamikathoungnaw kamkhuengnae koe  
yuemkamcu lah na onae hai, a pholen awh han.
- 6 Bangkongtetpawiteh, kalvan vah BAWIPA hoi  
bangnue thai e apimouh kaawm.  
Athakaawmnaw thung dawk  
BAWIPA patet e ao han na ou.
- 7 Tamikathoungnaw kamkhuengnae koe Cathut teh,  
lentoe poung lahoi taki hanelah ao.  
A tengpam e tami pueng ni a bari awh hanelah ao.
- 8 Oe, kalvan ransabawi Cathut BAWIPA,  
nang patetlah athakaawm ao nama,  
Oe, BAWIPA, yuemkamcu lah na onae ni kOUNg na kalup.
- 9 Talípui tuicapa ka thaw e hai na uk teh,  
tuicapa a thaw teh na roum sak.
- 10 Tami ni taran a thei e patetlah,  
Rahab hah na raphoe teh, kOUNg na kayei.  
Na taran hah na kut thaonae hoi kOUNg na pâlei.
- 11 Kalvannaw hah nange lah ao teh,  
talai hai nange doeh.  
Talaivan hoi a thung kaawm e pueng hah na kangdue sak toe.
- 12 Atung aka heh na sak e lah ao teh,  
Tabor hoi Hermon teh na min dawk a konawm.
- 13 Athakaawme kutbuembue hah na tawn.  
Na kut heh a tha a sai teh aranglae  
kut teh hoe a rasang.
- 14 Lannae hoi kângingnae teh,  
na bawitungkhang kamtuenae lah ao teh,  
lungmanae hoi lawkkatang teh na hmalah a cei.
- 15 Lunghawinae kamthang ka thai e teh,  
tami yawkahawi e doeh.  
Oe BAWIPA, ahnimouh teh na minhmai  
angnae dawk kho a sak awh.
- 16 Na min dawkvah hnintangkuem a lunghawi awh teh,  
na lannae dawkvah tawm lah ao awh.



- 17 Bangkongtetpawiteh, nang teh ka sungren e  
a thaonae lah na o.
- 18 Bangkongtetpawiteh, BAWIPA teh maimae  
bahling lah ao teh, Isarelnaw e Kathoung E,  
maimae siangpahrang lah ao.
- 19 Hottelah, na tamikathoung koe kamnuenae lahoi  
lawk na dei teh, athakaawme hah kabawp teh,  
tamimaya thung hoi rawi e teh ka pholen.
- 20 Ka san Devit hah ka hmu teh,  
kathounge satui hoi ka awi toe.
- 21 Ka kut hoi kacaklah ka kuet vaiteh,  
ka kutbuembue ni a tha ao sak han.
- 22 Taran ni na dum thai mahoeih,  
tami ni patawnae na poe thai mahoeih.
- 23 Ama ka tarannaw hah a hmalah ka parawp vaiteh,  
ama kahmuhmanaw hah ka hem han.
- 24 Ama koe yuemkamcu lah ka onae hoi,  
lungmanae teh pou ao han.  
Ka min kecu dawk a ki hah tawm lah ao han.
- 25 A kut hai talipui dawk ka ta vaiteh,  
aranglae kut hah palangpui dawk ka ta han.
- 26 Ama ni kai koe vah, nang teh apa ka Cathut,  
ka rungngangnae lungsongpui lah  
na o telah a hram han.
- 27 Ama teh ka camin lah ka coung sak vaiteh,  
talai siangpahrang ka rasang poung lah ka coung sak han.
- 28 Ka lungmanae hoi pou ka ring vaiteh,  
ahni koe ka lawkkam teh kacaklah a kangdue han.
- 29 A catoun hai yungyoe ka kangning sak vaiteh,  
a bawitungkhung hai kalvan  
a kangning roukrak ka kangning sak han.
- 30 A canaw ni ka kâlawk a kamlang takhai awh teh,  
ka lawkcengnae patetlah awm laipalah,
- 31 ka phunglam a tapoe awh teh,  
kaie kâpoelawknaw tarawi awh hoeih pawiteh,
- 32 Kâtapoenae dawk sumtaboung hoi ka rek vaiteh,  
payonnae dawk ka hem awh han.
- 33 Hatei, ka lungmanae teh  
ahni koehoi koung ka lat pouh mahoeih.  
Yuemkamcu lah ka onae hah  
ayawmyin lah ao hane ka pasoung hoeih.
- 34 Ka lawkkam ka raphoe mahoeih,  
ka pahni dawk hoi ka tâcawt e lawk heh  
ka thung mahoeih toe.
- 35 Vai touh kaie thoungnae hoi thoe ka bo teh,  
Devit koe laithoe ka dei mahoeih.
- 36 A catoun hah a yungyoe a kangning vaiteh,  
a bawitungkhung teh ka hmalah,  
kanî patetlah a kangdue han.
- 37 Thapa patetlah a yungyoe hanelah caksak lah awm vaiteh,  
kalvan yuemkamcu panuekkhaikung patetlah ao han. Selah.
- 38 Hatei, nang ni hnamthun takhai hoi na panuet teh,



- satui awi e dawkvah na lungkhuek.
- 39 Na san hoi lawkkamnae na raphoe teh,  
a bawilakhung talai dawk a bo teh  
banglah na ngai pouh hoeh.
- 40 Kalupnae tapangpueng na raphoe teh,  
na rapanim hah he na raphoe.
- 41 Lam dawk ka cet e pueng ni hno a la pouh awh teh,  
a tengpam e naw ni a pathoe awh.
- 42 A tarannaw e kut tha na o sak teh,  
a tarannaw pueng hah a lung na tho sak.
- 43 Ka hran e tahlai hah na ban sak teh,  
tarantuknae koe na kabawm hoeh toe.
- 44 A lentoenae hah na pout sak teh,  
a bawitungkhung hah talai dawk na tâkhawng pouh.
- 45 A nawsainae tueng na duem sak teh,  
yeirai hni hah na kâkhu sak.
- 46 BAWIPA bangkong ngailawi na o han.  
Pou na kâhro han maw.  
Na lungkhueknae teh hmai patetlah  
pou a kaman han maw.
- 47 Ka tueng a duemnae hah na pahnim pouh hanh.  
Bangkongtetpawiteh, tami catounnaw hah  
cungeihoeh lah na sak.
- 48 Apipatet mouh duenae kâhmo laipalah ka hring thai.  
Phuen thaonae dawk hoi kârungngang thai e apimouh kaawm.
- 49 BAWIPA, Devit koe thoe na bo e  
ahmaloe e lungpatawnae teh, nâne ao toung.
- 50 BAWIPA, na sannaw pathoe lah a onae pahnim hanh.  
Athakaawme tami moikapap ni pathoenae hah kai ni ka khang.
- 51 Oe BAWIPA, na taran ni na pathoe teh,  
satui awi e a cei nah pueng koe a pathoe awh.
- 52 BAWIPA teh a yungyoe hoi a yungyoe  
pholen lah awm lawiseh.  
Amen hoi Amen.

## 90

### *Cathut e tami Mosi ratoumnae*

Kasakkung: Mosi

- 1 BAWIPA nang teh se pueng dawk  
ka onae doeh.
- 2 Montamnaw na sak hoehnahlan,  
talai hoi talai hnonaw na sak hoehnahlan hoi,  
nang teh a yungyoe hoi a yungyoe e Cathut lah na o.
- 3 Tami teh rawkphainae koe na ban sak teh,  
tami canaw ban awh leih na ti.
- 4 Bangkongtetpawiteh, na mithmu vah  
kum 1,000 touh heh kaloum  
tangcoung e paduem patetlah ao teh,  
tangmin buet touh patetlah ao.
- 5 Ahnimouh teh tuikalen patetlah na loum sak teh,  
vai touh muet ka ip e patetlah na o sak.



- Amom e phokahring ka nâw e patetlah doeh ao.
- <sup>6</sup> Amom vah dikhring lah a nâw teh,  
tangmin lah tâtueng lah ao teh a kamyai awh.
- <sup>7</sup> Bangkongtetpawiteh, na lungkhueknae lahoi  
rawkphainae koe pha awh toe.  
Na lungkhueknae lahoi na pakhi awh toe.
- <sup>8</sup> Ka payonnae teh na hmalah thoseh,  
ka hro awh e yonnae teh,  
na minhmai angnae koe thoseh, pheng dan lah ao.
- <sup>9</sup> Bangkongtetpawiteh, ahninnaw teh  
na lungkhueknae dawk a loun awh teh,  
ka kumnaw teh cingounae dawk ka baw sak awh.
- <sup>10</sup> Hringyung teh kum 70 touh doeh.  
Thao dawkvah, kum 80 touh hai a pha thai.  
Hatei, kum sawnae teh,  
thatawnnae hoi lungmathoenae lah doeh ao.  
Bangkongtetpawiteh, tang a loun teh  
maimouh hai tang due awh.
- <sup>11</sup> Na lungkhuek thaonae heh apinimouh a panue.  
Na lungkhueknae heh taki han totouh apinimaw a taki.
- <sup>12</sup> Hottelah lungangnae lungthin  
tawn thai awh nahanelah,  
ahnintha pareinae na cangkhai haw.
- <sup>13</sup> Oe BAWIPA, bout ban haw.  
Nâtotouh maw na o han.  
Na sannaw heh pahren haw.
- <sup>14</sup> Ka hringyung thung ka lunghawi awh teh,  
kanawm thai awh nahanelah,  
na lungmanae hoi karanglah lung na kuep sak haw.
- <sup>15</sup> Hno kathout hmonae kum pueng hoi,  
na rektapnae hninthapa pueng hah  
ka lunghawinae lah coung sak haw.
- <sup>16</sup> Na sak e hah na sannaw koe kamnue sak nateh,  
na bawilennaeh teh a canaw koe kamnuek naseh.
- <sup>17</sup> BAWIPA Cathut na lunghawinae teh,  
kai koe awm naseh.  
Ka kut ni a tawk e naw teh, maimouh hanlah cak seh.  
Ka kut ni a tawk e naw teh, caksak lah awm lawiseh.

## 91

### *Cathut hmalah pou o e doeh roumnae*

Kasakkung: Panuekhoeh

- <sup>1</sup> Lathueng Poung ni nguenae hmuen koe kaawm e teh,  
Athakasaipounge a tâhlip dawk ao han.
- <sup>2</sup> Ama teh ka kânguenae hoi ka rapanim,  
ka Cathut, ka kâuep e lah ao,  
telah BAWIPA hah ka dei han.
- <sup>3</sup> Ama ni karap dawk hoi thoseh,  
lacik kathout dawk hoi thoseh na rungngang han.
- <sup>4</sup> A rathei hoi na ramuk vaiteh,  
a rathei rahim na lung a mawng han.  
A lawkkatang teh na lungmawngnae bahling lah ao han.



- 5 Karum lae runae hoi khodai lae  
 pala hai na taket mahoe.  
 6 Khohmo nah ka tho e lacik na taket mahoe,  
 kanithun ka tho e rawkphainae hai na taket mahoe.  
 7 Na teng vah thong touh kamlet niteh,  
 aranglah thong hra touh kamlet nakunghai,  
 nang koe hnai mahoe.  
 8 Na mit hoi khen nateh,  
 tamikathoutnaw ni a kâhmo awh e teh,  
 na hmu han doeh.  
 9 BAWIPA teh kânguenae lah ao telah na dei teh,  
 Lathueng Poug dawk na o nahanelah na sak dawkvah,  
 10 thoene banghai nang koe phat mahoe.  
 Na onae koe lacik kathout tho mahoe.  
 11 Na lamthung pueng khenyawnkung lah,  
 kalvan taminaw hah kâ a poe han.  
 12 A kut hoi na tawm vaiteh,  
 na khok hoi talung na kamthui mahoe.  
 13 Sendek hoi hrnthoe van na luen vaiteh,  
 Sendek hoi khorui hah na khok hoi na coungroe han.  
 14 Ahni ni na lungpataw dawkvah,  
 kai ni ka rungngang han.  
 Ka min a panue dawkvah ka tawm han.  
 15 Na kaw toteh ka pato han.  
 Runae a kâhmo toteh, ahni koe ka o vaiteh,  
 ka rungngang vaiteh, ka bari han.  
 16 Hringsawnae hoi a lung ka kuep sak vaiteh,  
 ka rungngangnae hah ka pâdue han.

## 92

### *Yuemkamcunae hoi lungpatawnae dawk Cathut pholennae*

Kasakkung: panuekhoe

- 1 Bawipa koe lunghawilawk dei e heh ahawi.  
 Oe a Lathueng Poug Cathut,  
 na min pholen teh la sak e heh ahawi tangngak.  
 2 Rui hra touh thueng e ratoung hoi  
 tamawi hoi lawk phunkuep kacai e tumkhawng e hoi,  
 3 a pahrennae hoi yuemkamcunae naw teh,  
 amom karoitawi tangmin karoitawi pâpho hanelah ahawi tangngak.  
 4 Oe BAWIPA, na hnosak e naw ni banghloimaw  
 lung na hawi sak.  
 na kutsaknaw dawk  
 lunghawi hoi la ka sak han.  
 5 Oe BAWIPA na tawk e hah banghloimaw a len.  
 Na pouknae naw teh adung tangngak.  
 6 Tamipathu ni teh panuek hoe,  
 thaipanuek hoe.  
 7 Tamikathoutnaw teh phokahring patetlah a cawn awh teh,  
 ka payonnaw pueng a tawnta awh toteh,  
 a yungyoe a rawk awh nahanelah, letlang a coung.  
 8 Hatei, BAWIPA nang teh



- a rasangnae koe na o yungyoe.
- <sup>9</sup> Oe BAWIPA, na tarannaw heh khenhaw!  
Bangkongtetpawiteh, khenhaw!  
na tarannaw kOUNg a kahma han.  
Payonnae ka sak e naw pueng teh, kOUNg kayei lah ao han.
- <sup>10</sup> Hatei, ka ki heh sakrak e ki patetlah na saw sak teh,  
satui katha hoi awi lah ka o.
- <sup>11</sup> Ka tarannaw koe phat seh  
ka tie hah ka mit ni a hmu toe.  
Na ka taran e tamikathout koe ka pouk e a kuep teh, ka hnâ ni a thai.
- <sup>12</sup> Tamikalan teh samtue patetlah kâhuen vaiteh,  
Lebanon mon e Sidar thing patetlah a rOUNg han.
- <sup>13</sup> BAWIPA im dawk ung e naw teh,  
Cathut thongma dawk a kâhuet awh han.
- <sup>14</sup> A matawng totouh a pawhik katha lah tâcawt vaiteh,  
pou a kâhuet awh han.
- <sup>15</sup> BAWIPA teh a lan tie kamnue saknae lah,  
ama teh lungsong lah ao teh,  
ama dawk lanhoehnae banghai awm hoeh.

## 93

### *A yungyoe BAWIPA uknae*

Kasakkung: panuekhoeh

- <sup>1</sup> BAWIPA ni a uk, taluena hoi a kamthoup.  
BAWIPA kamthoupnae lah ao teh,  
thaonae hah a keng dawk a kâyeng.  
Talaivan heh a kâhuet thai hoeh nahanlah caksak lah ao.
- <sup>2</sup> Na bawitungkhang teh ayan hoi caksak lah ao teh,  
nang teh a yungyoe hoi na o toe.
- <sup>3</sup> Oe BAWIPA, tuikalen a thaw,  
tuikalen ni a cairing teh  
tuikalen ni tuicapa a thaw sak.
- <sup>4</sup> A rasangnae koe kaawm e BAWIPA teh,  
tui moikapap pawlawk hoi,  
talîpui tuicapa thaonae hlak hai a thaohnawn.
- <sup>5</sup> Na lawkpanuesaknae naw teh, a kamceng.  
Oe BAWIPA, a yungyoe hoi na im teh  
thoungnae hoi pathoup e lah ao.

## 94

### *Tami kalan hanelah kânguenae Cathut*

Kasakkung: Panuekhoeh

- <sup>1</sup> Oe BAWIPA Cathut, moipathungnae katawnkung,  
Oe Cathut moipathungnae katawnkung, ang haw.
- <sup>2</sup> Talai taminaw lawkcengkung,  
thaw haw, ka kâoupnaw hah moipathung haw.
- <sup>3</sup> Oe BAWIPA, tamikathoutnaw teh nâtotouh ne,  
nâtotouh ne a lunghawi awh han vai.
- <sup>4</sup> A ngai patetlah lawk a dei awh teh,  
a lawk a hram awh teh,  
nâtotouh ne a kâoup awh han vai.



- 5 Oe BAWIPA, na taminaw hah a pacekpahlek awh teh,  
nange râw hah a rektap awh.
- 6 Lahmainu hoi imyinnaw hah a thei awh teh,  
na pa kaawm hoeh e naw hah ouk a thei awh.
- 7 BAWIPA ni hmawt mahoe, h,  
Jakop Cathut ni hai panuek mahoe, h ati awh.
- 8 Maya thung daw, k e tamipathunaw,  
panuek awh haw,  
Nâtuek maw na lungang awh han vai.
- 9 Thainae hnâ kasakkung ni thai mahoe, h ou.  
Mit kasakkung ni hmawt mahoe, h ou.
- 10 Miphunnaw kacangkhaikung hoi  
panuenae kacangkhaikung ni panuek mahoe, h ou.
- 11 BAWIPA ni taminaw e pouknae  
banghai bang hoeh e hah a panue.
- 12 Oe BAWIPA, na kâlawk daw, k hoi na cangkhai teh,  
na yue e naw teh a yawkahawi e lah ao.
- 13 Tamikathout hanelah tangkom tai hoe, hroukrak,  
runae daw, k hoi na kâhat sak thai mahoe, h.
- 14 Bangkongtetpawiteh, BAWIPA ni  
a taminaw hah hnoun mahoe, h,  
a râw takhoe mahoe, h.
- 15 Hatei, tamikalan koe lawkcengnae ban vaiteh,  
a lungthin kalan e pueng ni a tarawi awh han.
- 16 Yonnae kasaknaw taran hanelah  
apimouh kai hanlah ka thaw han.  
Payonnae kasaknaw taran hanelah  
apimaw kai yueng lah kangdout han.
- 17 BAWIPA teh kabawmkung lah awhm hoeh pawiteh,  
duem onae koe ka hringnae yout kahmat han doe, h toe.
- 18 Kangduenae hawihoe, h ka tet pawiteh,  
Oe BAWIPA, na lungmanae ni na kuet han.
- 19 Ka lung mak pathu navah,  
lung na pahawinae ni ka lung ahawi sak.
- 20 Payonnae bawitungkhung,  
hawihoe, hnae phung hai a sak awh e teh,  
nang hoi kâhuiko thai han vaimoe.
- 21 Ayânaw hringnae taranlahoi a kâhmo teh,  
yonnae ka tawn hoeh naw hah yon a pen awh.
- 22 Hatei, BAWIPA teh ka kânguenae doe, h.  
Ka Cathut teh ka lungsong doe, h.
- 23 A payonnae hah amamouh lathueng phat sak nateh,  
hawihoe, hnae a sak awh lahun nah  
koung a tâtueng awh han.  
BAWIPA maimae Cathut ni koung a tâtueng awh han.

## 95

*Kâlawk tarawi hane hoi baw, k hanelah counnae*

Kasakkung: panuek, hoe, h

- 1 Oe, tho awh haw, BAWIPA koe la sak awh sei.  
Maimae rungngangnae lungsong hah



- pholen laihoi lunghawi hoi hram awh sei .  
<sup>2</sup> Lunghawilawkdeinae lahoi a hmalah cet awh sei.  
 Lunghawinae la hoi ama koe hram awh sei.  
<sup>3</sup> BAWIPA teh ka lentoe e Cathut lah ao,  
 cathut pueng e Siangpahrang kalen lah ao.  
<sup>4</sup> Talai a dungpoungnae teh a kut dawh ao teh,  
 mon karasangnaw hai amae doeh.  
<sup>5</sup> Talîpui hai a sak teh, amae doeh.  
 Talai hai a kutsak doeh.  
<sup>6</sup> Tho awh, tabo laihoi bawh awh sei.  
 BAWIPA na kasakkung hmalah  
 khokcuengkhuem awh sei.  
<sup>7</sup> Ama teh maimae Cathut doeh.  
 Maimouh hai ama koe ka pawngpa e  
 a kut rahim e tuhu lah o awh.  
<sup>8</sup> Sahnin vah nangmouh teh  
 a lawk na thai awh nahlangva  
 na lungpatak sak hanh awh.  
<sup>9</sup> Nangmae mintoenaw ni kum 40 touh thung,  
 kai hah aphunphun lah na tanouk awh teh,  
 kaie thaw a hmunae kahrawngum vah,  
 kai na taran awh teh,  
 na tanouk awh e patetlah awm awh hanh leih.  
<sup>10</sup> Hote miphunnaw hah kai ni ka panuet teh,  
 a lungthin lam pou ka payon e lah ao awh.  
 Kaie lamthung hah panuek thai awh hoeh.  
<sup>11</sup> Hatdawkvah, ka lungkhuek teh,  
 kaie kâhatnae hmuen koe na kâen awh mahoeh, telah thoe ka bo.

## 96

### *Ka tho hane lawkcengnae dawh Cathut pholennae la*

Kasakkung: Devit

- <sup>1</sup> Oe BAWIPA koe la katha sak awh.  
 Talai taminaw pueng, BAWIPA koe la sak awh.  
<sup>2</sup> BAWIPA koe la sak awh nateh,  
 a min teh pholen awh.  
 Rungngangnae kamthang kahawi teh hnintangkuem pathang awh.  
<sup>3</sup> Miphun pueng koe a bawilennae teh pâpho awh haw.  
 Tami pueng koe kângairu lah a onae hah pâpho awh.  
<sup>4</sup> BAWIPA teh a len, puenghoi pholen hanelah ao,  
 Cathut pueng hlak taki hanelah ao,  
<sup>5</sup> Miphunlouknaw e cathut pueng teh ayawmyin doeh.  
 BAWIPA ni teh kalvan hah a sak.  
<sup>6</sup> A hmalah barinae hoi taluenaeh teh ao.  
 A hmuen kathoung koe thaonae hoi meihawinae teh ao.  
<sup>7</sup> Oe, tami pueng hoi imthung pueng,  
 BAWIPA teh bawilennae hoi thaonae hah poe awh.  
<sup>8</sup> BAWIPA e min teh, bawilennae poe awh.  
 Pasoung hno sin laihoi a thongma koe tho awh.  
<sup>9</sup> Oe, thoungnae kamthoup laihoi BAWIPA bawh awh.  
 Talai taminaw pueng a hmalah pâyaw awh.



- 10 Miphun pueng koe BAWIPA ni a uk tet awh.  
Talaivan hai kacaklah kangdue sak teh, kâhuen mahoe.  
Ama ni kalan lah lawk a ceng han.
- 11 Kalvan teh lunghawi naseh,  
talai hai konawm naseh.  
Talipui hoi a thung e kaawm e pueng  
ni hai cairing naseh.
- 12 Law hoi a thung e kaawm e pueng lunghawi naseh.  
kahrawng e kaawm e pueng nihai  
BAWIPA koe konawm laihoi la sak naseh.
- 13 Bangkongtetpawiteh, ama teh a tho.  
Talai taminaw lawkceng hanelah a tho.  
Talaivan hah lannae hoi lawkceng vaiteh,  
a lawkkatang hoi tami lawk a ceng han.

## 97

### *BAWIPA daw k hringnae pholen la*

Kasakkung: panuekhoeh

- 1 BAWIPA ni a uk, talai lunghawi seh.  
Tuilum naw hai lunghawi awh naseh.
- 2 Tâmai hoi hmonae ni a ramuk teh,  
lannae hoi kângingnae teh  
a bawitungkhung a kamtuenae doeh.
- 3 A hmalah hmai a cei teh,  
ka kalup e tarannaw teh a kak awh.
- 4 Sumpapalik ni talai a ang sak teh,  
talai ni a hmu toteh a pâyaw.
- 5 Monnaw pueng teh BAWIPA hmalah,  
talai van pueng teh Bawipa hmalah  
khoilai patetlah koun a kamyawt.
- 6 Kalvan ni a lannae hah a pâpho teh,  
tami pueng ni a bawilennae hah a hmu awh.
- 7 Meikaphawk thaw ka taw k e pueng,  
ayawmyin daw k kakâoupnaw pueng teh,  
kaya laihoi awh awh naseh,  
cathutnaw pueng ama teh baw k awh haw.
- 8 Bangkongtetpawiteh, Oe BAWIPA  
nange lawkcengnae daw kvah,  
Zion a lunghawi teh Judah canunaw hai a konawm awh.
- 9 Oe BAWIPA, nang teh talai van pueng hla k a lathueng poung lah na o.  
Cathut pueng lathueng vah tawm lah na o.
- 10 Nangmouh Cathut lungpataw naw,  
kathoute hah panuet awh nateh,  
ama ni a tamikathounaw e hringnae hah a khetyawt teh,  
tamikathoutnaw e kut daw k hoi a rungngang.
- 11 Tamikalannaw koe a ang teh lungthin  
kalannaw koe konawmnae teh ouk a pha.
- 12 Nangmouh tami kalannaw,  
BAWIPA koe konawm awh haw.  
A min kathoung hah pholen awh.



## 98

*A lawkcengnae hoi rungngangnae dawk BAWIPA pholennae la*  
Kasakkung: panuekhoeh

- <sup>1</sup> Oe, BAWIPA koe la katha sak awh.  
Bangkongtetpawiteh, kângairu hno hah a sak.  
Aranglah a kut hoi kathoung e  
kut ni tânae teh a pang toe.
- <sup>2</sup> BAWIPA ni a rungngangnae teh a kamnue sak toe.  
A lannae teh miphun pueng koe a kamnue sak.
- <sup>3</sup> Isarel imthung koe a lungmanae hoi  
yuemkamcu lah a onae hah pahnim hoeheh.  
Talai van pueng ni Cathut rungngangnae teh  
hmu awh toe.
- <sup>4</sup> Talai taminaw pueng BAWIPA pholen hoi,  
konawm laihoi hram awh haw.  
La sak laihoi lunghawi awh haw.  
Pholen la hah sak awh haw.
- <sup>5</sup> Ratoung hoi BAWIPA koe la sak awh.  
Ratoung kueng lawk hoi pholennae  
la kahawi hoi pholen awh.
- <sup>6</sup> Mongka hoi tuki hoi Siangpahrang BAWIPA hmalah,  
lunghawicalah hoi hram awh haw.
- <sup>7</sup> Talí hoi a thung kaawm e pueng hoi,  
talai hoi a thung kaawm e pueng ni  
a lawk tâcawt sak awh.
- <sup>8</sup> Palangnaw ni a kuttabawng naseh.  
Monnaw hai BAWIPA hmalah konawm naseh.
- <sup>9</sup> Bangkongtetpawiteh, talai lawkceng hanlah a tho.  
Talaivan heh lannae hoi lawk a ceng vaiteh,  
suetalah taminaw lawk a ceng han

## 99

*BAWIPA teh a thoung dawkvah pholen awh*  
Kasakkung: panuekhoeh

- <sup>1</sup> BAWIPA ni a uk, tami pueng pâyaw naseh.  
Ama teh cherubim rahak ao.  
Talai kâhuen naseh.
- <sup>2</sup> BAWIPA teh Zion vah a lentoe teh,  
tami pueng hlak tawm lah ao.
- <sup>3</sup> Ka lentoe e hoi takikatho e na min hah,  
pholen awh naseh, ama teh a thoung.
- <sup>4</sup> Siangpahrang thaonae ni hai kângingnae teh a pahren teh,  
kânging e lawkcengnae hah a caksak.  
Jakop koe lannae hoi kângingnae hah a kangdue sak.
- <sup>5</sup> BAWIPA Cathut teh tawm awh nateh,  
a khok koe bawk awh, ama teh a thoung.
- <sup>6</sup> Mosi hoi Aron teh a vaihmanaw thung e doeh.  
Samuel teh a min kakawnaw thung e doeh.  
Ahnimouh ni BAWIPA hah a kaw awh teh, ama ni a pato.
- <sup>7</sup> Tâmai thung hoi ahnimouh koe lawk a dei teh,  
ahnimouh koe a poe e lawkpanuesaknae hoi



a phunglam hah a tarawi.

- <sup>8</sup> Oe, BAWIPA kaimae Cathut, nang ni na pato awh.  
A sak awh e dawk moi na pathung nakunghai,  
nang teh ahnimouh na ka ngaithoumkung lah na o.
- <sup>9</sup> BAWIPA maimae Cathut teh tawmrasang awh nateh,  
amon kathoung dawk ama teh bawk awh.  
Bangkongtetpawiteh, BAWIPA maimae Cathut teh a thoung.

## 100

Kasakkung: panuekhoeh

- <sup>1</sup> Talai taminaw pueng BAWIPA teh pholen awh.
- <sup>2</sup> BAWIPA thaw hah lunghawi laihoi tawk awh.  
A hmalah la sak laihoi tho awh.
- <sup>3</sup> BAWIPA teh Cathut doeh tie hah panuek awh.  
Ahní ni maimouh na sak toe.  
Maimouh teh amae lah o awh.  
Maimouh teh amae tami lah o awh,  
ama koe ka pâ e tuhu lah o awh.
- <sup>4</sup> Lunghawilawkdinae lahoi longkha dawk kâen awh,  
pholen laihoi a takhang dawk kâen awh.  
Ama koe lunghawi awh nateh,  
a min hah yawhawi poe awh.
- <sup>5</sup> Bangkongtetpawiteh, BAWIPA teh ahawi,  
a pahrenlungmanae teh a yungyoe a kangning,  
yuemkamcunae teh a yungyoe a cak.

## 101

*BAWIPA koe yuemkamcu lawkkamnae*

Kasakkung: Devit

- <sup>1</sup> Lungmanae hoi kângingnae la ka sak han.  
BAWIPA nang koe pholennae la ka sak han.
- <sup>2</sup> Ka kuep e lamthung dawk lungang lahoi ka hring han.  
Oe, nâtuék ne kai koe na tho han vai.  
Ka imthungkhu dawk ka thoung e lungthin hoi ka o han.
- <sup>3</sup> Ka mithmu vah hawihoeahnae banghai ka tat mahoeah.  
Katâlawhaw ni tawksaknae hah ka hmuhma teh,  
kai dawk kâbet mahoeah.
- <sup>4</sup> Lungthin longkawinae ni na ceitakhai vaiteh,  
hawihoeahnae hah ka panuek mahoeah.
- <sup>5</sup> Arulahoí a imri ka pathoe e pueng ka raphoe vaiteh,  
a minhmai kâoup niteh,  
a lungpouk ka rasang e naw hah ka panguep mahoeah.
- <sup>6</sup> Yuemkamcu e khocanaw teh kai koe ao awh nahanelah, ka khetyawt han.  
Ka kuep e lamthung ka dawn e ni kaie thaw a tawk awh han.
- <sup>7</sup> Tami ka dumyen e teh, ka im dawk awm mahoeah.  
Laithoe kadeinaw teh, ka hmalah pou awm awh mahoeah.
- <sup>8</sup> Hawihoeahnae ka sak e naw hah  
BAWIPA e khopui dawk hoi raphoe nahanlah,  
tamikathoutnaw pueng teh palang a raphoe han toe.



## 102

*BAWIPA lungpatawnae*

Kasakkung: panuekhoeh

- <sup>1</sup> Oe BAWIPA ka ratoumnae na thai pouh awh.  
Ka kanae hai nang koe phat naseh.
- <sup>2</sup> Ka rucat navah kai koe na minhmai na hrawk pouh hanh.  
Kai koe lah na hnâpakeng nateh,  
na kaw toteh karanglah na pato haw.
- <sup>3</sup> Bangkongtetpawiteh,  
kaie hninnaw teh hmaikhu patetlah a kahma han.  
Ka hrunaw hah hmaito patetlah a kak.
- <sup>4</sup> Ka lungthin teh phokahring patetlah,  
hem lah ao teh a kamyai.  
Rawca ca hane hai ouk ka pahnim.
- <sup>5</sup> Ka cingounae dawkvah,  
ka hru hoi ka vuen khik kâbet.
- <sup>6</sup> Kahrawng e tavaca patetlah ka o teh,  
ka rawk tangcoung e kho dawk e bukbu patetlah ka o.
- <sup>7</sup> Ka i nah ka mitmasip thai hoeh,  
lemphu vah amadueng kaawm e  
mongmang va patetlah ka o.
- <sup>8</sup> Ka tarannaw ni kanîrui na pathoe awh.  
Kaie avanglah na ka pacekpahlek e naw ni  
kai hah bangnue nae lah thoe na bo awh.
- <sup>9</sup> Bangtelah tetpawiteh, hraba hah rawca lah ka khan teh,  
ka nei hane tui hai mitphi hoi a kâkalawt.
- <sup>10</sup> Na lungkhueknae kecu dawk,  
na tawm teh na tâkhawng.
- <sup>11</sup> Kaie hninnaw teh kanika patetlah ao teh,  
phokahring patetlah a kamyai.
- <sup>12</sup> Hatei, Oe BAWIPA, nang teh a yungyoe na kangning.  
Na min pahnimhoehnae teh se pueng dawk a kangning.
- <sup>13</sup> Na thaw vaiteh, Zion na lungma han,  
Zion kho rungngang nahane tueng,  
atueng khoe e teh a pha toe.
- <sup>14</sup> Na sannaw teh talungnaw dawk a konawm awh teh,  
hraba totouh a doun awh.
- <sup>15</sup> Miphunlouknaw ni BAWIPA min teh a taki awh han.  
Talaivan e siangpahrang pueng ni  
na bawilenna hah a taki awh han.
- <sup>16</sup> BAWIPA ni Zion kho kangdue sak teh  
a bawilenna lahoi a kamnue sak.
- <sup>17</sup> Kavoutnaw e ratoumnae na thai pouh vaiteh,  
a kâheinae teh noutna laipalah na awm hoeh.
- <sup>18</sup> Hetheh, kaawm hane se hanelah thut lah ao teh  
kaawm hane tamimaya ni  
BAWIPA teh a pholen awh han.
- <sup>19</sup> Thongkabawtnaw kâhram lawk  
thai hane hoi a due han toe telah  
pouk e naw hlout sak hane hoi,
- <sup>20</sup> Zion hoi BAWIPA min pâpho hane hoi



- Jerusalem hoi ama pholen hanelah,  
 21 BAWIPA thaw tawk hanlah tami pueng hoi  
 ram pueng hmuen touh koe kamkhueng awh toteh,  
 22 a rasangnae hmuen kathoung koehoi a khet navah,  
 BAWIPA ni talai heh kalvan hoi a khet.  
 23 Lamthung dawk ka thaonae a youn teh,  
 kanî hah a duem sak teh,  
 24 Oe ka Cathut, ka hringyung na lat pouh hanh telah ka ti.  
 Nange na kum teh se pueng hane doeh telah ka ti.  
 25 Nang ni ahmaloe hoi talai heh na kangdue sak toe.  
 Kalvannaw hah na kut sak doeh.  
 26 Hotnaw teh rawknae koe ka phat nakunghai,  
 nang teh a yungyoe na kangning.  
 Hotnaw pueng teh, khohna patetlah ka pawn han.  
 Khohna kâthung patetlah na thung vaiteh  
 kâhleng awh nakunghai,  
 27 nang teh kâhlengnae awm hoeh.  
 Na kum hai bawnae awm hoeh.  
 28 Na sannaw e ca catounnaw teh,  
 kangning awh vaiteh,  
 catounnaw hai na hmalah caksak lah ao han.

## 103

### *BAWIPA lungmanae pholennae*

Kathutkung: Devit

- 1 Oe ka hringnae BAWIPA teh pholen haw.  
 Ka thung kaawm e pueng  
 a min kathoung teh pholen awh.  
 2 Oe ka hringnae BAWIPA teh pholen nateh  
 ahawinae pueng hah pahnim hanh.  
 3 Na payonnae pueng ka ngaithoumkung,  
 na patawnae pueng kadamsakkung,  
 4 rawk kahmanae koehoi na hringnae  
 karatangkung hoi ngai kaawm e lungmanae hoi  
 lungpatawnae bawilakhung na kamuksakkung,  
 5 Na nawnae hah mataw patetlah bout katha nahanlah,  
 na cue toteh hnokahawi hoi na lung a kuep sak.  
 6 BAWIPA ni kângingnae hah a kangdue sak teh,  
 repcoungroenae pueng hanelah,  
 kângingnae lah a kangdue sak.  
 7 A lamthung hah Mosi koe a panue sak teh,  
 a sak e naw hah Isarelnaw koe a panue sak.  
 8 BAWIPA teh lungmanae hoi pahrennae lah ao.  
 A lungsaw teh, lungpatawnae hoi a kawi.  
 9 Pou na yue mahoe,  
 a lung pou khuek mahoe.  
 10 Yon awh e patetlah maimouh koe sak mahoe.  
 Payon e patetlah na pathung mahoe.  
 11 Bangkongtetpawiteh,  
 kalvan teh talai hlah a rasang e patetlah,  
 ama kataketnaw koe vah a lungmanae teh a len.



- 12 Kanitho hoi kaniloum a kâhla e patetlah,  
kâtapoenae teh maimouh koehoi  
ahla poungnae koe na ta pouh awh.
- 13 Na pa ni canaw a lungma e patetlah,  
BAWIPA ni ama kataketnaw hah a lungma.
- 14 Bangkongtetpawiteh,  
maimae tak heh a panue teh  
vaiphu lah o awh e hah pahnim hoeh.
- 15 Tami e ahninnaw teh pho kahring patetlah ao teh  
kahrawng e a pei patetlah doeh ao.
- 16 Bangtelah tetpawiteh, kahlî ni a palek teh a pei a kahma,  
a onae hmuen hai panuek hoeh toe.
- 17 Hatei, BAWIPA lungmanae teh  
a ma taketnaw lathueng vah,  
a yungyoe hoi a yungyoe totouh a kangning.
- 18 A lawkkam tarawi kangainaw hoi  
kâpoelawk kapâkuemnaw teh,  
a lannae hoi catounnaw totouh a kangning han.
- 19 BAWIPA ni kalvan vah  
a bawitungkhung a caksak teh,  
a uknaeram ni bangpuengpa kounng a uk.
- 20 Kalvantaminaw BAWIPA teh pholen awh.  
A lawk ka ngai ni teh katarawinaw hoi  
acawilah thaonae hoi pathoup e lah na o awh.
- 21 Nangmouh ransahu pueng,  
a thaw katawkkungnaw hoi,  
a ngainae kasaknaw BAWIPA teh pholen awh,
- 22 A sak e hno pueng kecu dawkw,  
a uknaeram pueng thungvah,  
BAWIPA teh pholen awh.  
Oe ka hringnae BAWIPA teh pholen haw.

## 104

### *Saknae hoi khetyawtnae dawkw BAWIPA pholennae*

kasakkung: panuekhoeh

- 1 Oe, ka hringnae BAWIPA teh pholen haw.  
Oe BAWIPA ka Cathut nang teh na lentoe tangngak.  
Taluenae hoi barinae hoi kamthoup e lah na o.
- 2 Khohna patetlah angnae na khohna teh,  
kalvannaw hah hni patetlah na yap.
- 3 Na onae im van adunaw hah tui dawkw na pâhung teh,  
tâmai patet hah leng lah na coung sak teh  
kahlî rathei hoi na tho.
- 4 Na patounenaw hah kahlî patetlah thoseh,  
thaw katawknaw hah hmaito patetlah  
thoseh na coung sak.
- 5 Talai adu hah nâtuék hai  
a kampuen hoeh nahanlah ka caksak e lah na o
- 6 Talai hah hni hoi khu e patetlah  
tui hoi na khu teh,  
tui hah monsom vah a kangdue.



- 7 Na yue toteh, a yawng awh.  
Khoparit lawk a thai awh toteh  
karangpoung lah a yawng awh.
- 8 Mon lah a luen awh teh,  
ravonaw dawk hoi a kum awh teh  
ao nahane hmuen koe koung a pha awh.
- 9 Tuinaw bout a tho teh,  
talai a muem hoeh nahanlah,  
a tapuet thai hoeh hane khori hah a khuen pouh.
- 10 Ravo dawk lawng hanelah tui hah a tha teh,  
mon hoi a lawng cathuk awh.
- 11 Saring pueng ni nei hanelah a poe teh,  
kahrawng e lanaw ni hai tui kahran a dap sak awh.
- 12 Ateng vah kalvan e tavanaw tabu a tuk awh teh,  
thingkungnaw dawk a cai awh.
- 13 A im van hoi monnaw tui a awi teh,  
na tawk e ni talai heh ka boum lah a kaw.
- 14 Talai ni rawca a tâco sak nahanlah  
saringnaw hanlah pho a paw sak teh  
taminaw hanlah thingthairompo a paw sak.
- 15 Misur ni tami lungthin a nawm sak,  
satui ni mei a kâpi sak, rawca ni tha ao sak.
- 16 BAWIPA e thingkung lebanon mon vah  
a ung e sidar thingnaw hai a boum awh.
- 17 Hawvah, tavanaw ni a tabu a tuk awh teh,  
hmaica thing teh kahrawng cawmpainaw e im lah ao.
- 18 Lungtha teh Athanaw o nahanelah ao teh,  
savehnaw teh talung koe a kâhro awh.
- 19 Ama ni thapa hah hnintha  
touk nahanlah a sak teh,  
kanî ni khup nahan tue a panue.
- 20 Hmonae na sak teh hothateh karum doeh.  
ratu thung e saring pueng a tâconae tue lah ao.
- 21 Sendektanca ni kei hane a tawng teh,  
Cathut koehoi e rawca a tawng.
- 22 Kanî a tâco toteh a onae  
a kâkhu dawk lengkaleng a tabo awh.
- 23 Tami teh thaw tawk hanelah a tâco teh,  
tangmin lah totouh a taw.
- 24 Oe BAWIPA, na sak e hno teh apap poung.  
Lungangnae hoi na sak e seng doeh.  
Talai teh na tawntanae hoi akawi.
- 25 Hete ka kaw ni teh kalen e talipui dawkvah,  
touklek thai hoeh e saring kathoung kalen a kâhlai awh.
- 26 Haw e hmuen koe long a cei teh,  
hawvah ka paitun hanelah na sak e  
tangapui Leviathan hai ao.
- 27 A tue a pha toteh, rawca na poe thai nahanlah  
abuemlahoi nang na ring awh.
- 28 Na poe e pueng a la awh teh,  
na kut na dâw teh hno kahawi hoi a kâkaw awh.
- 29 Na minhmai na hro pouh toteh, a lungpuen awh.



- A kâha na lat pouh pawiteh  
a due awh teh vaiphu lah a coung awh.
- 30 Na Muitha na tha toteh hotnaw teh sak e lah ao.  
Talai meilam hai bout na katha sak.
- 31 BAWIPA bawilennae teh yungyoe kangning seh.  
BAWIPA teh a sak e dawk konawm naseh.
- 32 Talai a khet nah a pâyaw,  
mon a tek nah hmaikhu a tâco.
- 33 Ka hringyung thung BAWIPA koe la ka sak vaiteh,  
ka hringyung thung Cathut pholen hoi la ka sak han.
- 34 Ka khopouknae hah ahni hanelah radip naseh.  
BAWIPA dawk ka konawm han.
- 35 Tamikayon teh talai hoi raphoe lah awm naseh.  
Tamikathout awm hanh lawiseh.  
Oe kahringnae BAWIPA teh pholen haw.  
Hallelujah.

## 105

### *A yungyoe BAWIPA yuemkamcunae*

Kathutkung: Devit

- 1 Oe, BAWIPA koe lunghawilawk dei awh.  
A min lahoi kaw awh nateh,  
a sak e hno hah tami pueng koe panueksak awh.
- 2 Ama koe la sak awh, ama koe la sak laihoi,  
a sak e hno kângairu hno pueng hah dei awh.
- 3 A min kathoung teh bari awh.  
BAWIPA katawngnaw e lungthin teh nawm naseh.
- 4 BAWIPA hoi a thaonae hah tawng awh nateh,  
a minhmai hah hoehoe tawng awh.
- 5 Kângairu hno a sak e hah hoehoe pâkuem awh nateh,  
kângairunae hoi a pahni dawk hoi  
ka tâcawt e lawkcengnae hah pâkuem awh.
- 6 Oe a san Abraham catoun,  
nangmouh Jakop catounnaw,  
ama ni rawi e lah na o awh.
- 7 Ama teh BAWIPA Cathut lah ao teh,  
a lawkcengnae ni talai pueng koug a katin.
- 8 A lawkkam teh pou a pâkuem teh  
se thong totouh nakunghai thoseh,
- 9 Abraham koe lawk a kam e hoi  
Isak koe thoe a bo e hai thoseh,  
kâ a poe e lawk teh a pâkuem.
- 10 Hotnaw teh Jakop Catounnaw hanelah,  
ka cak e phung lah a sak teh,  
Isarel hanelah a yungyoe e lawkkam doeh.
- 11 Kanaan ram heh râw lah  
na poe han telah lawk a kam.
- 12 Tami kayounca lah ao awh lahunnah,  
oe kayounca lah imyin lah ka o awh.
- 13 Kho touh hnukkhu kho touh,  
uknaeram hnukkhu alouke koe a kâva awh.
- 14 Ahnimouh rektap hane pasoung hoe.



Bokheiyah, ahnimouh kecu dawk  
siangpahrang hah a yue pouh.

- 15 Satui ka awi e naw hah tek awh hanh.  
Ka profetnaw hah runae poe hanh telah a ti.
- 16 Hothloilah, ram thung takang a tho sak teh,  
cang hoi apawhik naw kOUNg a raphoe pouh.
- 17 Ahnimae hmalah a patoun awh e,  
Joseph teh san patetlah a yo awh.
- 18 a khok hlong a buet pouh awh teh,  
sumbawtarui hoi a rektap awh.
- 19 A dei tangcoung e a kuep hoehroukrak,  
BAWIPA ni ahni teh a tanouk.
- 20 Hottelah siangpahrang ni a patoun teh a tâco sak teh,  
ukkung lah o hanlah a hlout sak.
- 21 A imthungkhu kahrawikungnaw a tawn e pueng hoi,
- 22 a tami bawinaw yue thainae kâ hoi  
kahrawikungnaw lungangnae cangkhai hanelah,  
kaukung lah a coung sak.
- 23 Isarel hai Izip ram lah a tho teh,  
Jakop hai Ham ram vah ao.
- 24 A taminaw moi a pung sak teh,  
ahnimouh ka tarannaw hlak  
a tha hoe kaawm lah a coung sak.
- 25 A taminaw hah a tarannaw ni a hmuhma awh teh,  
a sannaw hah huenghai hoi  
dumyen hanelah a lungthin a kâhleng sak.
- 26 A san Mosi hoi a rawi e  
Aron hoi a patoun.
- 27 Mitnout hah a taminaw koe a sak teh,  
Ham ram dawK kângairu hno hah a sak.
- 28 Hmonae hah a tho teh kOUNg a hmo.  
Hahoi a lawk teh oun thai awh hoeh.
- 29 Ahnimae tui hah thi lah a coung sak teh,  
tangawn hah a due sak.
- 30 Ahnimae ram teh ekka hoi king akawi teh,  
siangpahrang imthung totouh kOUNg akawi.
- 31 Lawk a dei boteh bitsei thouk a tâco teh  
ahri hai a ram pueng dawK a tâco.
- 32 Kho rak yueng lah roun a poe,  
a ram dawK hmaito hai a tâco sak.
- 33 Misurkung hoi thaibunglung kung  
kOUNg a raphoe teh a ram dawK e  
thingkungnaw a khoe pouh.
- 34 Lawk a dei teh samtongnaw a tho awh teh,  
touklek hoeh lah a tho awh.
- 35 Hotnaw ni a ram dawK e  
apawhik pueng a ca teh,  
apawhik pueng hah capingkacailah a ca awh.
- 36 A ram dawK e camin pueng hai a raphoe teh,  
aluepaw pueng hai kOUNg a raphoe pouh.
- 37 Hothloilah, sui hoi ngun hoi a tâco sak teh,  
a taminaw thung dawK kabawp han totouh,



ka vout e awm hoeh.

<sup>38</sup> A tâco awh navah, Izipnaw a lunghawi awh.

Bangkongtetpawiteh, ahnimouh hah a taki awh.

<sup>39</sup> Ka ngue hanelah tâmai a pâyam sak teh,

khohmo ka ang sak hanlah hmai hah a poe.

<sup>40</sup> Tamimaya ni a hei awh e tamuem hah a poe teh,

kalvanlae rawca hoi a von a paha awh.

<sup>41</sup> Lungsong a paawng teh, tui a tâco,

kahrawngum palang patetlah a lawng.

<sup>42</sup> Bangtelah tetpawiteh, a san

Abraham koe kathounge a lawkkam hah pahnim hoeh.

<sup>43</sup> A taminaw hah konawm laihoi a hrawi teh,

a rawi e naw hah thadamcalah a hrawi.

<sup>44</sup> A phunglam hah tarawi vaiteh,

kâlawk a tarawi thai awh nahanlah,

<sup>45</sup> Jentelnaw e ram hah a poe teh,

ayâ ni a tawk tangcoung e hah a pang sak.

Hallelujah.

## 106

### *Isarel yon pankângainae dawk lunghawinae*

Kasakkung: panuekhoeh

<sup>1</sup> BAWIPA teh pholen awh.

Oe BAWIPA koe lunghawilawk dei awh.

Bangkongtetpawiteh, ama teh ahawi.

A lungmanae teh a yungyoe a kangning.

<sup>2</sup> BAWIPA ni a sak e thaonae hah

apinimaw a dei thai han.

Apinimaw pholennae pueng

koung a pholen thai han.

<sup>3</sup> Nâtuek haiyah kalan lah ka tawksak e hoi

lannae kâuepkhai e teh, tami yawkahawi e lah ao.

<sup>4</sup> Oe BAWIPA na rawi e naw e hawinae hah

ka hmu thai nahanlah thoseh,

na miphun lunghawinae koe

ka lunghawi nahan nange râw lah

kaawmnaw hoi cungtalah lunghawi nahanelah thoseh,

<sup>5</sup> Na taminaw ni a coe awh e na ngaikhainae hah

na pahnim hanh lah a.

Rungngangnae hoi pâtam haw.

<sup>6</sup> Mintoenaw hoi reirei ka payon awh toe.

Yonnae hah ka sak awh teh, hnokathout ka sak awh toe.

<sup>7</sup> Mintoenaw ni Izip ram vah kângairu hno

na sak e hah thaipanuek awh hoeh.

na Lungmanae apapnae hai pâkuem awh hoeh.

Tuipui paling teng patenghai taran a thaw awh.

<sup>8</sup> Hatei, amae min thaonae bahu hoi duengdoeh na rungngang.

A hnosakthainae hoi a thaonae

panue sak thai nahane doeh.

<sup>9</sup> Tuipui paling hai a yue teh rem a hak.

Hottelah ka dungpoung e tui a raka awh teh,



kahrawngum vah a hrawi.

10 Ama kahmuhmanaw e kut dawkh hoi a rungngang teh,  
tarannaw kut dawkh hoi a ratang.

11 Tarannaw hah tui ni kOUNg a muem teh,  
buet touh hai ka hring e awm hoeH.

12 Hottelah a lawk hah a yuem awh teh,  
ama pholen hoi la a sak awh.

13 A sak awh e hah tang a pahnim awh teh,  
a noenae hah coe ngai awh hoeH.

14 Hatei, kahrawngum vah takthai  
ngainae a len dawkvah,  
kahrawngum vah Cathut hah a tanouk awh.

15 A hei awh e hah a poe.  
Hatei, muitha hringnae dawkh kamsoenae hah a poe sin.

16 A roe awhnae koe Mosi hah a ut awh teh,  
Oe BAWIPA tamikathoung Aron hai a ut awh.

17 Talai ni a pahni a ang teh, Dathan hah a payawp.  
Abiram e taminaw hah kOUNg a ramuk.

18 Ahnimouh koehoi hmai a tâco teh,  
tamikathoutnaw hmai kOUNg a kak.

19 Horeb vah maitoca meikaphawkh hah a sak awh teh,  
sakhlawh meikaphawkh hah a bawkh awh.

20 Hottelah a bawilennaeh teh,  
phovai ka cat e maitotan patetlah a cOUNg sak awh.

21 Izip vah hno kalennaw a sak e hoi,

22 Ham vah a sak e kângairu hnonaw hoi,  
tuipupaling koe e takikatho hno a sak e naw hoi  
ahnimouh ka rungngangkOUNg Cathut teh a pahnim awh.

23 Hat toteh, a rawi e Mosi ni,  
a lungkhueknaeh hah takhoe vaiteh,  
ahnimanaw raphoe hoeH nahanelah,  
raphoenae hmuen, a hmalah kangdout hoeH pawiteh,  
ahnimanaw raphoe han telah a kâcai.

24 Hathnukkhu, kahawi e ram teh a pacekpahlek awh teh,  
a lawk hah yuem ngai awh hoeH.

25 Amamaeh rimnaw hah a phuenang sin awh teh,  
BAWIPA e lawk hah tarawi ngai awh hoeH.

26 Hatdawkvah, ahnimouh teh kahrawngum vah  
kOUNg due sak hanelah thoseh,

27 A catounnaw hai miphunlouknaw koe  
tâkhawng hanelah hoi ram tangkuem kâkapek sak hane thoseh,  
ahnimae a vang lah thoe a bo.

28 Ahnimouh teh Peor e Baal hoi a kâkuet awh teh,  
tami kadout hmalah thueng e hno hah a ca awh.

29 Hottelah a sak awh e hno ni a lungkhuek sak teh,  
ahnimouh koe lacik kathout hah a tha pouh.

30 Hatnavah, Phinehas a kangdue teh,  
lawk a ceng navah lacik teh a roum.

31 Hothateh, ama lannaeh lah a yungyoe hoi se pueng dawkh,  
pouk pouh e lah ao.

32 Meribah tui koehai a lungkhuek sak awh teh,



ahnimouh kecu dawk Mosi koe  
totouh thoebonae teh a pha.

- 33 Mosi e a lungthin a  
tarawk awh dawkvah,  
pouk laipalah ahni teh lawk a dei.
- 34 BAWIPA ni a dei e patetlah sak hoeh.  
Miphunlouknaw raphoe laipalah ao awh.
- 35 Jentelnaw hoi a kâkalawt awh teh,  
ahnimae hringnuen hah a kamtu awh.
- 36 Ahnimae meikaphawk thaw hah a tawk awh.  
Hothateh ahnimouh hanelah karap doeh.
- 37 A capanaw hah thueng nahanelah a poe awh teh,  
a canunaw hah kahrai koe a poe awh.
- 38 Yon ka tawn hoeh e thi hah a rabawk awh teh,  
a capanaw hoi a canunaw e thi hoi roeroe vah,  
Kanaan ram meikaphawk cathut thuengnae lah  
a hno awh teh, hottelah thipalawng e lahoi  
ram a khin sak awh.
- 39 Hottelah a sak awh e hno hoi roeroe a kâkhinsak awh,  
a sak awh e hoi roeroe a yon awh.
- 40 Hatdawkvah, BAWIPA lungkhueknae teh  
a taminaw taran lahoi a kaman teh,  
a râw lah kaawm e hah a panuet.
- 41 Ahnimanaw teh Jentel kut dawk a poe teh,  
a hmuhma e naw ni a uk awh.
- 42 A taran ni rep a coungroe awh teh,  
a kut rahim vah ao awh.
- 43 Avai moikapap a rungngang toe.  
Hatei, amamouh khokhannae dawk hoi  
taran a thaw awh teh,  
amamae payonnae ni a rahnoum sak awh.
- 44 Hatei, runae a kâhmo awh toteh  
a hram awh e ka thai pouh teh,  
ahnimouh han pouk pouh laipalah awh thai hoeh.
- 45 Ahnimouh kecu dawk a lawkkam teh pou a panue teh,  
a lungmanae apap dawkvah, a pahren awh.
- 46 San lah kahrawinaw e lungthin dawkhai  
ahnimouh a pahren sak.
- 47 Na min kathoung dawkhawinae lawk dei hane hoi,  
na pholennae dawk tânae hmu hanelah,  
Oe BAWIPA maimae Cathut, na rungngang haw.  
Jentel miphun thung hoi cungtalah  
bout na pâkhueng haw.
- 48 Isarel BAWIPA Cathut teh,  
a yungyoe hoi a yungyoe totouh, pholen lah awh seh.  
Tami pueng ni Amen tet naseh.  
BAWIPA teh pholen awh.

## 107

*BAWIPA koe lunghawilawk deinae*

Kasakkung: panuekhoeh

<sup>1</sup> Oe BAWIPA koe lunghawilawk hah dei awh.



- Bangkongtətpawiteh, ama təh ahawī,  
a lungmanae təh a yungyoe a kangning.
- 2 BAWIPA nī a ratang tangcounḡ,  
taran kut dawḡ hoi a ratang e naw nī,  
hottelāh dei awh naseh.
- 3 Kho tangkuem hoi, kanītho,  
kanīloum, aka, atung lahoi kounḡ a pākhueng.
- 4 Thingyeium ramke lamthung dawḡ a kāva awh təh,  
o nahane kho hmawt awh hoeh.
- 5 Vonhlam tui kahran hoi a lung apout awh.
- 6 Runae koehoi BAWIPA hah a kaw awh təh,  
rucatnae thung hoi a rasa awh.
- 7 Khosaknae hmuen khopui vah a cei thai awh nahanelah,  
lam kalan dawḡ a hrāwī awh.
- 8 Oe taminaw niyah BAWIPA hawinae hoi  
taminaw hanelah kāngairu hno a sak e naw dawḡvah,  
lungḡawilawḡ dei awh haw boipawiteh khe.
- 9 Bangtelāh tətpawiteh, hringnae nī a rabui e hah kuep sak vaiteh,  
vonhlamrincinaw hah hawinae hoi a paha sak han.
- 10 Hmonae hoi duenae tāhlip dawḡ  
ka tahung e naw hah,  
runae sumrui hoi katek lah ao.
- 11 Bangkongtətpawiteh, Cathut lawḡ a oun, a taran awh təh,  
Lathueng Pounḡ e pouknae hai banglah ngāi awh hoeh.
- 12 Hatdawḡvah, ahnimae lungthin təh  
karanglah a tabut sak,  
a rawpḡkhai awh təh,  
kabawmkung apihai awm hoeh.
- 13 Hottelāh runae koehoi BAWIPA a kaw awh təh,  
ahni nī amamae rucatnae thung hoi a tâco takhai.
- 14 Hmonae hoi duenae tāhlip thung hoi a rasa təh,  
ahnimouh kateknae sumbawtarui hah a rading pouh.
- 15 Oe taminaw niyah BAWIPA hawinae hoi taminaw  
hanelah kāngairu hno a sak e naw dawḡvah,  
lungḡawilawḡ dei awh haw boipawiteh khe.
- 16 Ama nī rahum tho hah a raphoe təh,  
tarennae sumtaboung hah a raphoe.
- 17 Tamipathu hah kâtapoenae hoi  
a payonnae dawḡ runae khang sak lah ao.
- 18 A hringnae nī ca hane pueng a panuēt təh,  
duenae tho koe a pâtam awh.
- 19 Hottelāh runae koehoi BAWIPA a kaw awh təh,  
ahni nī amamae rucatnae thung hoi a tâco takhai.
- 20 A lawḡ patoun lahoi a dam sak təh,  
a kahmanae koehoi a rungngang.
- 21 Oe taminaw niyah BAWIPA hawinae hoi taminaw  
hanelah kāngairu hno a sak e naw dawḡvah,  
lungḡawilawḡ dei awh haw boipawiteh khe.
- 22 Lungḡawilawḡkdeinae thuengnae poe laihoi  
a tawḡ e naw hah lungḡawī lahoi pâpho naseh.
- 23 Talīpui dawḡ long hoi kahlawng ka cet e,



- ka kaw e talîpui dawk hnopai kayawtnaw ni,  
 24 kadung pounge e tui thung vah,  
 kângairu hoi BAWIPA hno sak e hah ouk a hmu awh.  
 25 Bangkongtetpawiteh, ama ni kê a poe teh kahlî a tho sak,  
 hote kahlî ni tuicapa a thaw sak.  
 26 Kalvan totouh a luen teh,  
 adungnae koe bout a bo awh teh,  
 takithonae dawk a lung a pout awh.  
 27 Yamu ka parui e tami patetlah rawrawcu awh teh,  
 bangtelah o nahan panuek awh hoeh.  
 28 Hottelah runae koehoi BAWIPA a kaw awh teh,  
 ahni ni amamae rucatnae thung hoi a tâco takhai.  
 29 Kahlî a roun sak teh,  
 tuicapa hai a roun.  
 30 Hottelah a roun dawkvah, a lunghawi teh,  
 pha han ngaipoungnae hmuen koe a phakhai.  
 31 Oe taminaw niyah BAWIPA hawinae hoi  
 taminaw hanelah kângairu hno  
 a sak e naw dawkvah, lunghawilawk  
 dei awh haw boipawiteh khe.  
 32 Tamimaya a kamkhuengnae koehai  
 ama teh tawm awh naseh.  
 Kacuenaw hmalah hai  
 pholen awh naseh.  
 33 Ama ni palangpui hah ayawn lah a coung sak teh,  
 tui hah talai kaphui e lah a coung sak.  
 34 Bangtelah tet pawiteh,  
 a thung kaawm e yonnae kecu dawk,  
 ram kahawi teh palawi talai lah ouk a coung sak.  
 35 Ayawn hah tuikamuemnae lah a coung sak teh,  
 ramkenaw hah tui onae hmuen lah a coung sak.  
 36 Khosaknae hmuen khopui lah a kangdue thai nahan,  
 vonkahlamnaw hah ao sak.  
 37 Moikapap a paw thai nahanelah,  
 misur takha a sak awh.  
 38 Yawhawi a poe teh moikapap a pung sak.  
 A paca e saringnaw kahma hane pasoung hoeh.  
 39 Repcoungroenae hoi runae,  
 pankângainae kecu dawk rahnoumnae hoi,  
 raphoe lah ao navah,  
 40 a tami bawinaw koe, pacekpahleknæ a pha sak teh,  
 lamthung ohoehnae kahrawngum vah, a kêva sak.  
 41 Hottelah hoi tami ka roedeng e hah  
 runae tangkom dawk hoi hmuen rasangnae koe  
 a tawm teh, saringhu patetlah imthung a sak pouh.  
 42 Tamikalannaw ni a hmu awh navah,  
 a lunghawi awh. Payonnae ka sak pueng teh  
 pahni tabuem pouh lah ao.  
 43 A lungkaang pueng ni hete hnonaw heh  
 a pâkuem awh vaiteh,  
 BAWIPA lungpatawnæ hah a thai panuek awh han.



## 108

*Cathut tânae*

Kathutkung: Devit

- <sup>1</sup> Oe Cathut, ka lungthin heh a cak,  
pholennae na poe haw la ka sak han.  
Ka bawilennae totouh na poe han.
- <sup>2</sup> Ratoung tamawi kâhlaw haw.  
Kai hai amom ka kâhlaw han.
- <sup>3</sup> Oe BAWIPA, tamimaya hmalah na pholen han.  
Miphunnaw rahak vah,  
nang koe pholennae la ka sak han.
- <sup>4</sup> Bangkongtetpawiteh, na lungmanae ni kalvannaw totouh thoseh,  
na lawkkatang ni tâmai totouh thoseh a pha.
- <sup>5</sup> Oe Cathut, kalvannaw lathueng tawm lah awm nateh,  
na bawilennae teh talai van pueng lathueng vah, tawm lah awm seh.
- <sup>6</sup> Na pahren e naw hlout sak lah ao awh nahanelah,  
aranglae kut hoi runngang nateh, na thai pouh haw.
- <sup>7</sup> Cathut ni, a thoungnae lahoi ka konawm vaiteh,  
Shekhem hah ka pek han.  
Sukoth ram hah koung ka bangnue han telah a ti.
- <sup>8</sup> Gilead teh kaie lah ao teh,  
Manasseh teh kai doeh.  
Ephraim hai kai hanlah bawilakhung lah ao teh,  
Judah teh ka tahroe lah ao.
- <sup>9</sup> Moab teh tui kamhluknae hlaam lah ao teh,  
Edom van vah khokkhawm ka tâkhawng han.  
Felistin van vah tânae ka pang han.
- <sup>10</sup> Ka cak e khopui dawk apinimaw na kaênkhai han.  
Edom vah apinimaw na hrawi han.
- <sup>11</sup> Oe Cathut, kai na ka pahnawt e  
nang ni na sak e nahoehmaw.  
Oe Cathut, kaimae ransanaw hoi cungtalah  
na ka cet hoehe e nang ni na sak nahoehmaw.
- <sup>12</sup> Runae thung hoi na kabawm haw.  
Bangkongtetpawiteh, taminaw e  
kabawpnae teh cungkeihoehe.
- <sup>13</sup> Cathut hoi cungtalah maimouh teh,  
taranhawi laihoi sak awh han.  
Bangkongtetpawiteh, ama teh,  
maimae tarannaw rep kacuengroekung doeh.

## 109

*Taran hanelah heinae*

Kathutkung: Devit

- <sup>1</sup> Oe ka pholen e ka Cathut, duem awm hanh.
- <sup>2</sup> Bangkongtetpawiteh, tamikathoutnaw hoi  
tami kadumyennaw ni, a pahni na ang sin awh teh,  
lai na thoe sin awh.
- <sup>3</sup> Hmuhmanae lawk hoi na kalup awh teh,  
a khuekhaw awm laipalah na tuk awh.
- <sup>4</sup> Ka lungpataw e naw teh na katarankung lah a coung awh.



Hatei, ratoum laihoi ka o.

<sup>5</sup> Ahnimouh ni hawinae hah hawihoeahnae hoi na patho awh teh,  
ka pahrennae hah hmuhmanaeh hoi na patho awh.

<sup>6</sup> Ahnimae lathueng vah tamikathoutnaw tat nateh,  
aranglah vah tarannaw awm naseh.

<sup>7</sup> Lawkceng navah sung naseh,  
a ratoumnae teh yonnae lah coung pouh naseh.

<sup>8</sup> A hringnae hnin duem naseh,  
a thaw teh ayâ alouk ni patawm naseh.

<sup>9</sup> A canaw teh nara lah awm awh naseh,  
a yu teh lahmai naseh.

<sup>10</sup> A canaw teh kâva awh naseh,  
ka rawk tangcoung e amamae hmuen koehoi  
rawca tawng awh naseh.

<sup>11</sup> Tangka kacawisaknaw ni a canaw teh  
laiba dawak lat pouh naseh,  
a tawak teh a tawn tangcoung e hai  
apimouh ti panue hoe e ni koung lat pouh naseh.

<sup>12</sup> A lathueng vah apinihai lungmanaeh kamnuek sak hanh naseh.  
A ca naranaw hai apinihai pahren hanh naseh.

<sup>13</sup> A ca catounnaw hai dout naseh.  
A catoun awm laipalah a min kahmat naseh.

<sup>14</sup> A na mintoenaw e yonnae teh,  
BAWIPA hmalah pou pâkuem naseh.  
A manu yonnae raphoe pouh hanh naseh.

<sup>15</sup> Hotnaw teh BAWIPA hmalah pou kamnuek naseh.  
Het talai van vah, ahnimouh pahnimhoeahnae  
awm hanh naseh.

<sup>16</sup> Bangkongtetpawiteh, lungmanaeh kamnuek sak hanelah, panuek awh  
hoeh.  
A lung ka tangpawak e patenghai a thei thai awh nahanelah,  
a reikathai hoi mathoenaw hah a pacekpahlek awh.

<sup>17</sup> Thoe a bo awh e hah amamouh lathueng bawt naseh.  
Banglahai a noutna awh hoe e yawhawi ni  
ahla poungnae koe cettakhai naseh.

<sup>18</sup> Thoebonaeh hah angki lah a kho e patetlah,  
a von dawak tui patetlah kâen naseh.  
A hru thung satui patetlah kâen naseh.

<sup>19</sup> A kâkhu e hah a khohna patetlah coung naseh,  
taisawm patetlah a keng dawak pou kâyeng naseh.

<sup>20</sup> Hothateh, ka tarannaw koe  
BAWIPA ni moipathungnae lah awm naseh.  
Na pathoe awh dawkvah,  
a pang awh e lah awm naseh.

<sup>21</sup> Hateiteh Oe Bawipa Jehovah,  
kai hateh na min kecu dawak hawinae hoi  
na awmkhai haw.  
Na lungmanaeh dawkvah, na rungngang haw.

<sup>22</sup> Tami ka roedeng hoi tami ka vout e lah doeh ka o.  
Ka thung vah ka lungthin teh hmâ a ca.

<sup>23</sup> Kanika patetlah ka kahma teh,



awsi patetlah ka kâhuet.

- 24 Ka khokpakhu teh rawcahai kecu dawc cak hoeh,  
ka takthai teh a kamsoe.
- 25 Ahnimouh ni na pathoe hanelah ka o teh,  
na hmu awh toteh lû na saling sin awh.
- 26 Oe BAWIPA ka Cathut, na kabawm haw.  
Na lungmanae patetlah na rungngang haw.
- 27 BAWIPA, hethateh na kut hoi sak e doeh  
tie a panue thai awh nahanlah.
- 28 Ahnimouh ni thoe na bo eiteh,  
nang ni yawhawî na poe haw.  
Ahnimouh a thaw awh navah kayak awh naseh.  
Hatei, na san teh konawm naseh.
- 29 Na katukkungnaw teh kayanae ni ramuk awh naseh.  
Min mathoenae hni ni koug ramuk naseh.
- 30 Ka pahni hoi BAWIPA teh puenghoi ka pholen han.  
Bokheiyah, maya hmalah ama teh ka pholen han.
- 31 Bangkongtetpawiteh, yon kapennaw kut dawc hoi rungngang hanelah,  
ka roedengnaw e aranglah a kangdue han.

## 110

*Messiah uknae kong pathangnae*

Kathutkung: Devit

- 1 BAWIPA ni ka Bawipa koevah,  
na taran hah na khoktoungae lah ka sak hoehroukrak,  
kaie kut arang lah tahung atipouh.
- 2 BAWIPA ni, na thaonae tahroe teh,  
Zion hoi ka patoun han.  
Na tarannaw lungui uk haw.
- 3 Na taran na tuk hnin vah,  
na taminaw teh amamouh lungthocalah hoi na thosin awh han.  
Na thoundounnaw teh amom e tadamtui patetlah,  
nang koe monkathoung dawkvah, a tâco awh han.
- 4 BAWIPA ni nang teh, Melkhizedek patetlah  
a yungyoe vaihma bawi telah thoe na bo tounge dawkvah,  
nâtuék hai bout kâhno mahoe toe.
- 5 BAWIPA teh nange aranglah ao teh,  
a lungkhueknae hnin dawc siangpahrangnaw koug na thei han.
- 6 Miphunnaw hah lawk koug ceng vaiteh,  
hmuen pueng koe tami ro hoi akawi han.  
Ram moikapap kahrawikungnaw hah koug a thei han.
- 7 Lam teng e sawkcanaw a nei awh vaiteh,  
lû hah a tawm awh han.

## 111

*A lannae hoi yuemkamcunae dawc Cathut pholennae*

Kathutkung: Panuekhoeh

- 1 BAWIPA teh pholen awh.  
Tami kalannaw kamkhuengnae koe, maya um vah,  
BAWIPA teh ka lungthin abuemplahoi ka pholen han.
- 2 BAWIPA ni a sak e thaw teh a len.



- Ka ngai e pueng ni teh a kamtu awh.
- <sup>3</sup> A tawk e teh bari a kamcu teh, a sungren.  
A lannae teh a yungyoe a kangning.
- <sup>4</sup> Kângairu hno a sak e teh a yungyoe panue hanelah a sak.  
BAWIPA teh pahrennae hoi lungmanae hoi ka kawi e doeh.
- <sup>5</sup> Ama ka taketnaw hah rawca ca hane a poe.  
A lawkkam teh nâtuek hai pahnim hoeh.
- <sup>6</sup> Miphunnaw e râw hah a miphunnaw a poe teh,  
a taminaw koe a tawk e thaonae hah a pâpho pouh.
- <sup>7</sup> A kut hoi sak e naw teh lawkkatang hoi lannae lah ao.  
Phunglawknaw teh yuem a kamcu.
- <sup>8</sup> Hotnaw teh a yungyoe hoi a yungyoe a kangning han.  
Hotnaw teh lawkkatang hoi lannae hoi sak e lah ao.
- <sup>9</sup> A taminaw koe ratangnae hah a patawn teh,  
a lawkkam teh a yungyoe a kangning nahanlah, kê a poe.  
A min teh a thoung, taki a tho.
- <sup>10</sup> BAWIPA taki e heh lungang kamtawngnae lah ao.  
Kâpoelawknaw katarawinaw ni thaipanueknae kahawi a tawn.  
Pholennae teh a yungyoe a kangning.

## 112

### *Kalan e ram yawhawinae*

Kathutkung: Panuekhoeh

- <sup>1</sup> BAWIPA teh pholen awh.  
BAWIPA ka taketnaw hoi kâpoelawknaw  
a lung kahawikhai katang e teh a yaw kahawi e doeh.
- <sup>2</sup> A catounnaw ni talai van a thao awh vaiteh,  
tami kalannaw e catounnaw teh a yawhawi awh han.
- <sup>3</sup> A im vah hnopai a tawnta awh vaiteh,  
a lannae teh a yungyoe a kangning han.
- <sup>4</sup> Tami kalan hanelah teh hmonae koehoi angnae a tâco teh,  
ama teh pahrennae lungmanae, lannae hoi ka kawi e lah ao.
- <sup>5</sup> Tami kahawi niteh, pahrennae lahoi a cawi sak teh,  
ama teh ka lan lah kho a sak han.
- <sup>6</sup> Khoeroe kâhuen mahoe.  
Tami kalan teh panue e lah pou ao han.
- <sup>7</sup> Kamthang kahawihoehe ni taket sak mahoe.  
BAWIPA a kâuep teh a lungthin a cak.
- <sup>8</sup> A lungthin caksak lah ao dawkvah,  
a tarannaw koe a ngai e a pha totouh, taket mahoe.
- <sup>9</sup> Lungthocalah hoi a rei teh,  
karoedengnaw hah a poe toe.  
A lannae teh a yungyoe a kangning.  
A ki teh barinae lahoi tawm lah ao han.
- <sup>10</sup> Tamikathoutnaw ni hmawt awh vaiteh,  
a lungkhuek awh han.  
A hâkam kata awh vaiteh, koung atum pouh han.  
Tamikathoutnaw e ngainae teh koung a kahma pouh han.



## 113

*Cathut dawk hringnae*

Kathutkung: Panuekhoeh

<sup>1</sup> BAWIPA teh pholen awh.

Oe BAWIPA e sannaw, pholen awh.

BAWIPA min teh pholen awh.

<sup>2</sup> BAWIPA min teh atuhoi a yungyoe ditouh  
pholen lah awm lawiseh.<sup>3</sup> Kanitho koehoi kaniloum totouh,

BAWIPA min teh pholen lah awm lawiseh.

<sup>4</sup> BAWIPA teh miphun pueng e lathueng vah ao teh,  
a bawilennaeh teh kalvan hlak a rasang.<sup>5</sup> A rasang hmuen koe ao eiteh,

BAWIPA Cathut patetlah apimouh kaawm .

<sup>6</sup> Kalvan e hno hoi talai hnaw ka khen e

BAWIPA patetlah apimaw kaawm.

<sup>7</sup> Mathoenaw hah vaiphu koehoi ka pathaw niteh,

kavoutthoupnaw hah vaipuen koehoi a tawm teh,

<sup>8</sup> bawinaw hai thoseh, a taminaw hoi

cungtalah ao thai awh nahanelah thoseh hmuen a poe.

<sup>9</sup> Cakaroe e napui o nahan im a poe teh,

camo ka tawn e napui patetlah a konawm.

Hallelujah.

## 114

*Isarel rungngang nahanelah kaheinae*

Kathutkung: Panuekhoeh

<sup>1</sup> Isarel hah Izip ram hoi a rasa teh,

Jakop imthung hah lawk phunlout koehoi a tacokhai awh toteh,

<sup>2</sup> Judah teh hmuen kathoung lah a coung.

Isarel teh uknae lah a coung.

<sup>3</sup> Talipui ni a hmu teh a yawng,

Jordan palang teh a ban.

<sup>4</sup> Monnaw teh tutan patetlah,

monruinaw teh tuca patetlah a coukdouk awh.

<sup>5</sup> Oe talipui bangdawkmaw na yawng,

Oe Jordan palang, bangdawkmaw na ban.

<sup>6</sup> Oe monnaw bangdawkmaw tutan patetlah na coukdouk.

Oe monruinaw bangdawkmaw tuca patetlah na coukdouk awh.

<sup>7</sup> Oe talai, BAWIPA hmalah payaw nateh,

Jakop Cathut hmalah payaw haw.

<sup>8</sup> Ama teh, lungsong hah tuikamuem lah,

lungtaw hah tuiphuek lah kacoungsakkung doeh.

## 115

*Meikaphawk banglah a ohoeahnae hoi Cathut yuem a kamcunae*

Kathutkung: Panuekhoeh

<sup>1</sup> Oe BAWIPA, na lungmanae hoi na lawkkatang kecu dawkvah,  
na bawilennaeh teh kaimouh koe laipalah,  
na min dawkvah awm lawiseh.



- <sup>2</sup> Bangkong mouh Jentelnaw niyah,  
ahnimae Cathut teh nâmouh ao ati awh va.
- <sup>3</sup> Maimae Cathut teh kalvan vah ao teh,  
a ngai e pueng hah ouk a sak.
- <sup>4</sup> Ahnimae meikaphawknaw teh sui hoi ngun lah ao awh teh,  
kut hoi sak e lah ao awh.
- <sup>5</sup> Pahni a tawn awh ei, lawk dei thai hoeh.  
Mit a tawn awh ei, hmawt thai hoeh.
- <sup>6</sup> Hnâ a tawn awh ei, thai awh hoeh.  
Hnawng a tawn awh ei, hmui thai awh hoeh.
- <sup>7</sup> Kut a tawn awh ei, banghai tek thai awh hoeh.  
Khok a tawn awh ei, cet thai awh hoeh.  
Hotnaw e lawkron dawk hoi lawk tâcawt hoeh.
- <sup>8</sup> Hotnaw kasakkung teh a sak awh e hoi doeh a kâvan awh.  
Hotnaw kâuep e hai sue touh lah a kâvan awh.
- <sup>9</sup> Oe Isarel, BAWIPA hah kâuep haw.  
Ahni teh nangmouh na kabawmkung hoi kângue e bahling doeh.
- <sup>10</sup> Oe Aron imthungnaw, BAWIPA hah kâuep awh.  
Ahni teh nangmouh kabawmkung hoi kânguenae bahling doeh.
- <sup>11</sup> Nangmouh BAWIPA ka taket e naw,  
BAWIPA hah kâuep awh haw.  
Ahni teh nangmouh kabawmkung hoi  
kânguenae bahling doeh.
- <sup>12</sup> BAWIPA ni pou na panue teh,  
yawhawi na poe han.  
Isarel imthung hai yawhawi a poe vaiteh,  
Aron imthung hai yawhawi a poe han.
- <sup>13</sup> BAWIPA ka taket e teh,  
tami kalen kathoung yawhawi a poe han.
- <sup>14</sup> Namamouh hoi na canaw khuehoi  
BAWIPA ni hoehoe na pung sak naseh.
- <sup>15</sup> Talai hoi kalvan kasakkung  
BAWIPA ni yawhawi na poe awh naseh.
- <sup>16</sup> Kalvan teh kalvannaw totouh BAWIPA e doeh.  
Hatei, talai teh talai taminaw hah a poe toe.
- <sup>17</sup> Tami kadout ni BAWIPA pholen hoeh.  
Duem kâhatnae koe kacettangcoungnaw nihai  
BAWIPA pholen boihoeh.
- <sup>18</sup> Hatei, maimouh niteh,  
BAWIPA hah atuhoi a yungyoe totouh pholen awh han.  
BAWIPA teh pholen awh.

## 116

*Duenae koehoi rungngangnae koe lunghawilawk deinae*

Kathutkung: Panuekhoeh

- <sup>1</sup> BAWIPA teh ka lungpataw.  
Bangkongtetpawiteh, ka lawk hoi ka kâhei e hah na thai pouh.
- <sup>2</sup> Kai koe lah a hnâ a pakeng dawkvah,  
ka hringyung thung ka kaw han.
- <sup>3</sup> Due patawnae ni na kalup,  
sheol patawnae ni na kuet,



kângairu lungmathoe hoi ka o.

- <sup>4</sup> Hat toteh, Oe BAWIPA,  
pahren lahoi ka hringnae hah na rungngang haw telah  
BAWIPA min teh ka palaw.
- <sup>5</sup> BAWIPA teh lungmakung hoi lannae lah ao.  
Bokheiyah, maimae Cathut teh lungmanae hoi akawi.
- <sup>6</sup> BAWIPA ni tami kamawnggramenaw hah a khetyawt.  
Kai teh ka kârahnoum navah, ama ni na rungngang.
- <sup>7</sup> Oe, ka hringnae na lungmawngnae koe ban leih.  
Bangkongtetpawiteh, BAWIPA ni nang lathueng vah  
hnokahawi a sak toe.
- <sup>8</sup> Bangkongtetpawiteh, ka hringnae heh duenae koehoi  
na rungngang teh, ka mit heh mitphi bonae koehoi,  
ka khok heh tâlawnae koehoi na rungngang toe.
- <sup>9</sup> BAWIPA hmalah kahringnaw  
onaeh muen koe ka kâhlai han.
- <sup>10</sup> Kai teh ka yuem dawkvah, lawk ka dei,  
puenghoi na rektap awh.
- <sup>11</sup> Tami pueng laithoe a dei awh telah  
koe ka dei payon.
- <sup>12</sup> Kai lathueng vah, BAWIPA ni hnokahawi a sak e naw dawkvah,  
bangmouh ahni hanlah hawinae ka sak van han vai.
- <sup>13</sup> Rungngangnae manang hah ka la vaiteh,  
BAWIPA min teh ka kaw han.
- <sup>14</sup> Ka lawkkam e teh BAWIPA hmalah ka kuep sak han.  
A taminaw pueng e hmalah ka kuep sak han.
- <sup>15</sup> A tami kathoungnaw due e teh, BAWIPA hmalah a phuopoung.
- <sup>16</sup> Oe BAWIPA, na san lah ka o.  
Na sannaw e capa lah ka o.  
Kai dawk e kateknae teh na rathap pouh toe.
- <sup>17</sup> Lunghawilawkdeinae nalaihoi,  
BAWIPA min teh ka kaw han.
- <sup>18</sup> Atuvah, ka lawkkam e hah BAWIPA hoi  
a taminaw e hmalah ka kuep sak han.
- <sup>19</sup> Oe Jerusalem, na kho lungui  
BAWIPA e im thongma dawk roeroe ka kuep sak han.  
Hallelujah.

## 117

### *Tami pueng ni pholen naseh*

Kathutkung: Panuekhoeh

- <sup>1</sup> Miphunnaw pueng BAWIPA teh pholen awh.  
Taminaw pueng ama teh pholen awh.
- <sup>2</sup> Bangkongtetpawiteh, ahnie pahrenlungmanae teh  
maimouh koe a cak teh a len.  
BAWIPA e yuemkamcunae hai a yungyoe a kangning.  
Hallelujah.

## 118

### *A lungmanae teh a yungyoe akangning*

Kathutkung: Panuekhoeh



- 1 Oe BAWIPA koe lunghawilawk dei awh.  
Bangkongtetpawiteh, ama teh ahawi,  
a lungmanae teh a yungyoe a kangning.
- 2 A lungmanae teh a yungyoe a kangning telah  
Isarelnaw ni atu dei awh naseh.
- 3 A lungmanae teh a yungyoe a kangning telah  
Aron imthung ni atu dei awh naseh.
- 4 A lungmanae teh a yungyoe a kangning telah  
BAWIPA ka taket e naw ni atu dei awh naseh.
- 5 Ka lungpout nah BAWIPA ka kaw teh,  
BAWIPA ni hai na pato teh, hmuen akawnae koe na o sak.
- 6 BAWIPA ni na kampangkhai dawkvah ka taket mahoeah,  
Tami ni kai lathueng bangmouh a sak thai han.
- 7 BAWIPA teh na kabawm e lah ao.  
Hatdawkvah, na ka hmuhma e naw koe ka lungngai akuiep han.
- 8 Tami kâuep hlak  
BAWIPA kâuep ahawihnawn.
- 9 Bawinaw kâuep hlak BAWIPA kâuep ahawihnawn.
- 10 Miphun pueng ni na kalup awh.  
Hatei, ahnimanaw teh BAWIPA min lahoi koung ka raphoe han.
- 11 Ahnimouh ni na kalup awh, na tuembue awh.  
Hatei, BAWIPA min lahoi koung ka raphoe han.
- 12 Khoi ni a kayo e patetlah na kalup nakunghai,  
buruk hmai kang e patetlah a roun awh.  
Bangkongtetpawiteh, BAWIPA min lahoi koung ka raphoe han.
- 13 Ka rawp nahanlah puenghoi na ka tanawt nakunghai,  
BAWIPA ni na kabawp.
- 14 BAWIPA teh ka tha hoi ka la doeh.  
Ahnî teh kaie rungngangnae doeh.
- 15 Tami kalannaw e rim dawkvah,  
konawmnae pawlawk hoi rungngangnae pawlawk teh ao.  
BAWIPA e aranglae kut ni taranhawinae lahoi a tawk.
- 16 BAWIPA e aranglae kut teh, tawm lah ao teh,  
BAWIPA e aranglae kut ni taranhawi lahoi ouk a tawk.
- 17 Dout laipalah, ka hring vaiteh,  
BAWIPA hnosak e hah ka pâpho han.
- 18 BAWIPA ni puenghoi na yue, hatei due hane teh  
pasoung hoeh rah.
- 19 Lannae takhang teh na paawng pouh haw.  
Hawvah ka kâen vaiteh, BAWIPA ka pholen han.
- 20 Hethateh, BAWIPA e longkha,  
tami kalannaw a kâen nahane doeh.
- 21 Nang teh, na pholen han.  
Bangkongtetpawiteh, nang ni na pato teh,  
kaie rungngangnae lah na o.
- 22 Im kasakkungnaw ni a pahnawt awh e talung hah  
alawkpui poung e a takinlung lah ao.
- 23 Hothateh, BAWIPA ni a sak e doeh.  
Maimae mithmu haiyah kângairu hanlah ao.
- 24 Hethateh, BAWIPA ni a sak e hnin a tho.  
Hote hnin dawkvah, lunghawi awh han. Konawm awh han.



- 25 Oe BAWIPA, atu na rungngang haw telah ka ratoum.  
Oe BAWIPA kuepcingnae hah na poe haw telah ka ratoum.
- 26 BAWIPA min lahoi ka tho e teh tami yawkahawi e doeh.  
BAWIPA imthung hoi yawhawi teh na poe awh.
- 27 Cathut teh BAWIPA lah ao teh agnae hah na poe awh toe.  
Thueng nahane hateh thuengnae khoungroe ki daw  
rui hoi pâkhit nateh pen awh.
- 28 Nang teh, kaie Cathut lah na o, na pholen han.  
Nang teh, ka Cathut lah na o. Na tawm han.
- 29 Oe, BAWIPA koe lunghawilawk dei awh.  
Bangkongtetpawiteh, ama teh ahawi.  
A lungmanae teh a yungyoe a kangning.

## 119

Kathutkung: Panuekhoeh, tami tangawn ni Ezra a ti awh

### § ALEPH

BAWIPA lawk dawk khosaknae

- 1 BAWIPA e a lamthung ka phen hoe hoi niteh,  
a lawk dawk ka dawn e tami teh a yawhawi.
- 2 Bawipa e lawkpanuesaknae ka hringkhai niteh,  
Bawipa hah a lungthin abuemplahoi ka tawng e teh a yawhawi.
- 3 Ahnimouh teh payonnae sak awh hoe hoi.  
Ahnies lamthung dawk a dawn awh.
- 4 Maimouh ni tarawi awh hanelah,  
Nang ni kâlawnaw hah na cangkhai awh toe.
- 5 Bawipa e phunglawknaw dawk ka dawn thai nahanlah,  
ka lamthungnaw teh lan naseh.
- 6 Kai ni Bawipa e kâpoelawnaw  
ka tarawi navah kayak mahoe hoi.
- 7 Nange kalan lah lawkcengnae ka kamtu navah,  
kalan e lungthin hoi nang teh, na pholen han.
- 8 Nange phunglawknaw hah ka tarawi han.  
Kai hah khoeroe na hnoun hanh loe.

### ▮ BETH

Lawk

- 9 Nawsai ni amae lamthung hah  
bangtelamaw a thoungsak han tet pawiteh,  
Bawipa e a lawk patetlah a tarawi han.
- 10 Kai ni nang teh, ka lungthin abuemplahoi na tawng.  
Bawipa nange kâpoelawnaw daw hoi kai na phensak hanh.
- 11 Bawipa koe ka yon hoe hoi nahanlah,  
ka lung thung a lawknaw hah ka hmouk toe.
- 12 Oe BAWIPA, nang teh yawhawi lah na o.  
Nange phunglawknaw hah na cangkhai haw.
- 13 Nang ni pahni hoi lawkcengnae pueng hah  
ka pahni hoi ka pâpho han.
- 14 Hnopai tawnta e daw hoi ka lunghawi e patetlah,  
nange panuesaknae lawk daw hoi ka konawm han.
- 15 Nange phunglawk hah luepluep pouk laihoi,  
na lamthungnaw hah ka bari han.
- 16 Nange phunglamnaw daw hoi ka sak han.



Na lawk hah ka pahnim mahoe.

### ♪ GIMEL

Panuesaknae

- 17 Na san ni kahring vaiteh,  
na lawk ka tarawi thai nahanlah na pahren haw.
- 18 Nange na kâlawknaw dawk hoi kângairu hno  
ka hmu thai nahan ka mit ang sak haw.
- 19 Kai teh het talai van vah imyin lah ka o.  
Kâpoelawknaw hah hrawk hanh loe.
- 20 Nange lawkcengnae naw hah  
pou ka doun e lahoi ka lung a tangpo.
- 21 Nange kâpoelawknaw dawk hoi ka phen awh niteh,  
ka kâoupnaw hoi thoebo lah kaawm e naw hah yue haw.
- 22 Kai teh, nange panuesaknae hah  
ka tarawi dawkvah, pathoenae hoi  
banglah noutnahoe hah dawk hoi na hlout sak haw.
- 23 Kacuenaw ni a tahung awh teh,  
kai hah na ka taran awh nakunghai,  
nange na san teh, na phunglamnaw hah luepluep ka pouk han.
- 24 Nange lawkpanuesaknae teh,  
ka khosaknae hoi kâpankhaikung lah ao.

### ♪ DALETH

Ukpadi

- 25 Ka muitha teh vaiphu dawk rep a kâbet.  
Na lawk dawk na hring sak haw.
- 26 Ka lamthung ka pâpho toteh nang ni na thai pouh.  
Na phunglamnaw hah na cangkhai haw.
- 27 Na phunglawk hah na panueksak haw,  
na sak e kângairu hno hah ka pouk han.
- 28 ka lungmathoe lahoi ka lungthin teh a kamyawt toe.  
Na lawk patetlah tha na awm sak haw.
- 29 Payonnae lamthung ka roun thai nahan na pahren nateh,  
kâlawknaw hah na poe haw.
- 30 Lam kalan teh ka rawi toe.  
na lawkcengnae naw teh kahma lah ka hruek toe.
- 31 Oe BAWIPA, na lawkpanuesaknae hah ka kuet.  
Na kayak sak hanh.
- 32 Ka lungthin na kaw sak toteh,  
na poe e kâpoelawknaw dawk tarawi laihoi ka yawng han.

### ♪ HE

Phunglawk panue nahane

- 33 Oe BAWIPA, na phunglam hah na cangkhai haw.  
Apout totouh ka tarawi han.
- 34 Thaipanueknae hah na poe haw,  
na kâlawknaw teh ka tarawi han,  
oe ka lungthin abuemplahoi ka tarawi han.
- 35 Na poe e kâpoelawknaw hah na dawn sak haw.  
Bangkongtetpawiteh, hothateh, ka lunghawinae doeh.
- 36 Ka lungthin hah hounlounnae koe laipalah,  
na lawkpanuesaknae koe lah pahei haw.



- 37 Ahrawnghrang koe lah ka khet hoeh nahanlah,  
ka mit heh alouklah kangvawi sak haw.  
Na lamthung dawkvah, na hring sak haw.
- 38 Na san koevah, na lawk hah caksak haw.  
Nang takinae hoi a hring nahanlah.
- 39 Tamthoe takinae koe hoi na kamlang sak haw.  
Bangkongtetpawiteh, na lawkcengnae teh ahawi.
- 40 Khenhaw! Na phunglawknaw teh ka rabui,  
na lannae hoi na rounng sak haw.

### ↑ VAU

Kâlawk

- 41 Oe BAWIPA na lawkkam e patetlah  
na lungmanae hoi  
na rungngangnae teh kai koe phat lawiseh.
- 42 Hottelah hoiyah, kai min mathoe ka dei e naw hah ka pathung thai han.  
Bangkongtetpawiteh, nange lawkkatang doeh ka kâuep.
- 43 Nange lawkcengnae hah ka ngaihawi dawkvah,  
lawkkatang lawk hah ka pahni daw hoi na takhoe pouh hanh loe.
- 44 Kai teh nange kâlawkknaw hah a yungyoe hoi  
a yungyoe totouh ka tarawi han.
- 45 Nange phunglawknaw hah ka tawng tounng dawkvah,  
hloutnae dawkvah ka cei han toe.
- 46 Kai teh nange panuesaknae naw hah  
siangpahrangnaw hmalah ka pâpho han.  
Kayakkhai mahoe.
- 47 Kai ni ka lungpataw e nange kâpoelawknaw dawkvah,  
kai teh ka lunghawikhai han.
- 48 Ka lungpataw e nange kâpoelawknaw hanlah,  
ka kut ka dâw vaiteh,  
nange phunglamnaw hah luepluep ka pouk han.

### ↑ ZAIN

Phunglawk

- 49 Na san koe e lawk hah pahnim hanh.  
Hote ni doeh ngaihawinae na tawn sak.
- 50 Hethateh, runae kâhmo navah,  
ka lungmawngnae doeh.  
Bangkongtetpawiteh, na lawk ni hringnae na poe.
- 51 Ka kâoupnaw niteh, lung na paroum nah awh.  
Hatei, nange kâlawk teh ka phen takhai mahoe.
- 52 Oe BAWIPA, yampa e na lawkcengnae teh ka pahnim hoe h  
Hothateh, ka lungmawngnae doeh.
- 53 Nange kâlawk kapahnawtnaw  
kecu dawkvah, ka lung a ro.
- 54 Kahlawng ka ceinae im dawkvah,  
na phunglawk teh kaie la lah doeh ao.
- 55 Oe BAWIPA, karum hai na min teh ka pahnim hoe h.  
Na kâlawk teh ka tarawi.
- 56 Na phunglawknaw teh ka tarawi dawkvah,  
kaie lah a coung awh.



### ▮ CHETH

Bawipa e kâlawk kâuepnae

<sup>57</sup> Oe BAWIPA, nang teh kai kaham doeh.

Nange na lawk hah ka tarawi han telah ka dei toe.

<sup>58</sup> Ka lungthin abuemlahoi na minhmai teh ka tawng.

Na lawk patetlah kai na pahren haw.

<sup>59</sup> Ka lamthungnaw hah ka pouk teh,

ka khoktakannaw teh na panuesaknae koelah ka kamlang sak .

<sup>60</sup> Kâpoelawknaw tarawi hanelah, hnawngcawn laipalah,  
karanglah ka kâroe.

<sup>61</sup> Tamikaponaw e tangron ni na katek ei nakunghai,  
nange kâlawk teh ka pahnim hoeh.

<sup>62</sup> Nang ni kalan lah na lawkcengnae dawkvah,  
karumsaning nang koe lunghawilawk dei hanelah ka thaw han.

<sup>63</sup> Nang na ka taket e pueng hoi nange  
phunglawk katarawinaw e hui lah doeh ka o.

<sup>64</sup> Oe BAWIPA, talai hah na lungmanae hoi akawi teh,  
na phunglam hah na cangkhai haw.

### ▮ TETH

Bawipa e kâlawk ahawinae

<sup>65</sup> Oe BAWIPA, na lawk patetlah  
na san kai koe na hawi toe.

<sup>66</sup> Kai teh, na lawkcengnae kahawi hoi,  
panuethainae hah na cangkhai haw.  
Nange kâpoelawknaw hah ka yuem.

<sup>67</sup> Kai teh runae kâhmo hoehnahlan vah lam ka payon.  
Atuteh nange na lawk heh ka tarawi toe.

<sup>68</sup> Nang teh na hawi, hawinae hai na sak.  
Na phunglam hah na cangkhai haw.

<sup>69</sup> Tami kâoupnaw niteh, kai hah laithoe hoi  
na ka taran nakunghai,  
kai teh nange phunglawknaw hah  
ka lungthin abuemlahoi ka tarawi.

<sup>70</sup> Ahnimaie lungthin teh sathaw patetlah a thâw.  
Kai teh, nange kâlawk doeh ka lunghawikhai.

<sup>71</sup> Nange phunglam ka kamtu thai nahanlah,  
runae ka kâhmo e naw heh kai hanelah ahawi.

<sup>72</sup> Suingun thong moikapap hlakvah,  
na pahni dawh hoi ka tâcawt e  
na lawk teh kai han lah ahawihnawn.

### • YOD

Bawipa e kâlawk teh a lan

<sup>73</sup> Bawipa nange kut ni kai hah na sak teh,  
meilam hah na poe toe.

Nange kâpoelawknaw kamtu thai nahanlah,  
panuenaie hoi na kawi sak haw.

<sup>74</sup> Na lawk ka ngaihawinae dawkvah,  
Bawipa ka taketnaw ni kai na hmu awh toteh,  
a lunghawi awh han.

<sup>75</sup> Oe BAWIPA, na lawkcengnae teh a lan.



Runae na kâhmo sak e hai yuemkamcu lahoi  
na kâhmo sak tie ka panue.

- 76 Na san kai koe na lawk patetlah na lungmanae teh,  
ka lungmawngnae lah tho lawiseh telah ka ratoum.
- 77 Na lungmanae teh ka hring nahanlah kai koe kamnuek naseh.  
Bangkongtetpawiteh, nange kâlawk teh, ka lunghawinae lah ao.
- 78 Tami kâoupnaw teh, yeiraipo hoi awm awh naseh.  
Bangkongtetpawiteh, a khuekhaw awm laipalah,  
kai dawk kamsoum hoeh lah hno a sak awh.  
Hatei, kai teh, na phunglawknaw hah luepluep ka pouk.
- 79 Bawipa nang ka taket e nange kampangkhainaw ka panuek e naw teh,  
kai koe kamlang awh naseh.
- 80 Kaya hoeh nahanelah, ka lungthin teh  
na phunglamnaw dawk tounnae  
awm laipalah awm lawi naseh.

### 7 KAPH

Hlout nahanlah ratoumnae

- 81 Ka muitha teh na rungngangnae pouk laihoi tha a tâwn toe.  
Hatei, na lawk doeh ka ngaihawi.
- 82 Nâtuek maw lung na mawng sak han ti hoi  
ngaihawi laihoi ka mit tha abaw toe.
- 83 Bangkongtetpawiteh, tungking ka cawt e  
phaivuen um patetlah doeh ka o.  
Hatei, na phunglam teh ka pahnim hoeh.
- 84 Na san ka hringnae hah nâsittouh han na maw.  
Na ka rektap e naw hah nâtuek maw lawk na ceng han.
- 85 Tami kâoupnaw nange kâlawk katapoenaw ni  
kai hanelah tangkomnaw hah a tai awh toe.
- 86 Na kâlawknaw pueng teh, yuem a kamcu.  
Ahnimouh ni kamsoum hoeh lah na rektap awh,  
na kabawm haw.
- 87 Ahnimouh ni kai teh, talai van meimei na pahma awh toe.  
Hatei, nange phunglawknaw teh ka pahmat hoeh.
- 88 Na pahrenlungmanae hoi bout na kâhlaw sak haw.  
Na lawkpanuesaknae teh ka tarawi han.

### ↳ LAMED

Bawipa e kâlawk teh yuemkamcu

- 89 Oe BAWIPA, na lawk teh kalvan kho vah  
a yungyoe a cak.
- 90 Yuemkamcunae teh a se tangkuem a kangning.  
Talai heh na caksak teh a kangning.
- 91 Hnocawngca pueng teh na san lah ao awh dawkvah,  
sahnin ditouh a kangning awh.
- 92 Na kâlawk heh ka lunghawinae lah awm hoeh pawiteh,  
yampa runae ka kâhmo navah, kadout han doeh toe.
- 93 Na phunglawk hah ka pahnim roeroe mahoe.
- 94 Nange lah ka o, na rungngang haw.  
Bangkongtetpawiteh, hotnaw lahoi doeh hringnae teh na poe.
- 95 Tamikathoutnaw ni thei hanelah na pawp awh.



Hatei, na lawkpanuesaknae hah luepluep ka pouk han.

<sup>96</sup> Kuepnae pueng ni poutnae hai ka hmu toe.

Hatei, kâpoelawk teh a kaw toungloung.

### ▣ MEM

Bawipa e kâlawk teh ka ngai

<sup>97</sup> Oe nange kâlawk teh ka lungpataw poun.

Hothatei kanîrui rui luepluep ka pouk e lah ao.

<sup>98</sup> Nange kâpoelawknaw ni ka tarannaw hlak ka lung a ang sak.

Bangkongtetpawiteh, kai koe pou ao awh.

<sup>99</sup> Nange panuesaknae naw teh,  
luepluep ka pouk dawkvah,  
na kacangkhaikungnaw hlak hoe ka thaipanuek.

<sup>100</sup> Nange phunglawknaw hah ka tarawi dawkvah,  
kacuenaw hlak hai ka thaipanuek.

<sup>101</sup> Na lawk ka tarawi thai nahanlah,  
hawihoe hnae lamthungnaw pueng heh ka roun.

<sup>102</sup> Na lawkceng e naw hah ka roun hoeh.  
Bangkongtetpawiteh, nama roeroe ni na cangkhai toe.

<sup>103</sup> Na lawk teh kai hanlah ka dangka dawk banghloimaw a radip.  
Kai hanlah ka pahni dawk khoitui hlak hai a radip.

<sup>104</sup> Na phunglawknaw lahoi, thaipanueknae ka tawn toe.  
Hatdawkvah, lampaiheinaw teh ka hmuhma toe.

### ┆ NUN

Bawipa e kâlawk teh angnae

<sup>105</sup> Na lawk teh ka khok hanlah hmaiim lah ao teh,  
ka lamthung hanlah angnae lah ao.

<sup>106</sup> Na lawkcengnae kalan teh  
ka tarawi han telah lawk ka kam toe.

<sup>107</sup> Oe BAWIPA, kai teh puenghoi rektapnae ka kâhmo.  
Na lawk patetlah na hring sak haw.

<sup>108</sup> Oe BAWIPA, lungthocalah hoi ka pahni hoi  
thuengnae hah na dâw pouh haw telah ka ratoum.  
Na lawkcengnae hah na cangkhai haw.

<sup>109</sup> Ka hringnae heh ka kut dawk pou ao.  
Hatei, na lawk teh ka pahnim hoeh.

<sup>110</sup> Tamikaponaw ni kai hanlah karap teh a patûng awh.  
Hatei, na phunglawk hah ka phen takhai mahoe.

<sup>111</sup> Na lawkpanuesaknae teh a yungyoe raw lah ka la toe.  
Bangkongtetpawiteh, lung kahawisakkung doeh.

<sup>112</sup> Na phunglamnaw tarawi hanelah,  
ka lungthin hah pou ka hroecoe toe.

### ▣ SAMEK

Bawipa e kâlawk teh kâhatnae

<sup>113</sup> Ayawmyin e taminaw teh ka hmuhma,  
hatei nange kâlawk teh ka lungpataw.

<sup>114</sup> Nang teh, ka kânguena hoi bahling lah na o teh,  
na lawk teh ka ngaihawinae lah ao.

<sup>115</sup> Nangmouh hawihoe hnae kasaknaw kai koehoi kâkhoe awh.  
Bangkongtetpawiteh, ka Cathut e kâpoelawknaw dueng doeh  
ka pâkuem han.



- 116 Ka hring nahanlah na lawk patetlah na kangdout sak haw.  
Ka hawinae hah yeirai lah coungsak hanh.
- 117 Na kuen haw, ka hlout han.  
Na phunglam hah pou ka tarawi han.
- 118 Na phunglam dawh hoi ka phen e pueng heh kOUNg na pahnawt.  
Bangkongtetpawiteh, ahninae dumpyennae teh laithoe doeh.
- 119 Talai tamikaponaw pueng teh,  
ei patetlah na tâkhawng.  
Hatdawkvah, nange lawkpanuesaknae teh ka lungpataw han.
- 120 Nang taki lawi ka takthai a pâyaw teh,  
na lawkcengnae hah ka bari.

### 𐄇 AIN

Bawipa e kâlawk teh tarawi hane

- 121 Kai teh lawkcengnae hoi lannae hah katawksak toe.  
Rep kacuengroenaw koe na cettakhai hanh.
- 122 Na san kai hanlah kacakpounge kabawmkung lah awm nateh,  
ka kâoupnaw ni repcOUNgroe e lah na awm sak hanh.
- 123 Na rungngangnae hoi lannae lawk  
ka radoungnae koe ka mit teh tha abaw toe.
- 124 Na san hanelah na lungmanae kamnuek sak nateh,  
na phunglam hah na cangkhai haw.
- 125 Kai teh nange san doeh.  
Na lawkpanuesaknae hah ka panue thai nahanlah  
thaipanueknae na poe haw.
- 126 Oe BAWIPA, na tawk nahane tueng a pha toe.  
Bangkongtetpawiteh, na kâlawk teh banghai  
bang hoeh lah a coungsak awh.
- 127 Hatdawkvah, nange kâpoelawknaw teh  
sui hlak hai ka lungpataw teh,  
sui tuici hlak hai ka lung hoe ka pataw.
- 128 Hatdawkvah, bangpueng hlak hai  
na phunglawknaw hah a thuem telah ka pouk.  
Lampaihei teh ka hmuhma.

### 𐄇 PE

BAWIPA e kâlawk teh tarawi ka ngai

- 129 Na lawkpanuesaknae teh kângai lah a ru.  
Hatdawkvah, ka hringnae ni a pâkuem.
- 130 Na lawk caisaknae ni angnae a poe teh,  
kamawnggramnaw hah thaipanueknae a poe.
- 131 Ka kâko ka ang teh puenghoi ka kâha.  
Bangkongtetpawiteh, nange kâpoelawknaw hah ka rabui pOUNg.
- 132 Na min kalungpatawnaw na pahrennae patetlah,  
na khen nateh, na pahren haw.,
- 133 Ka khoktakannaw hah na lawk hoi caksak haw,  
ka lathueng vah payonnae ni kâ tawn sak hanh.
- 134 Na phunglawknaw ka tarawi thai nahanlah,  
ayâ ni repcOUNgroenae hmuem koehoi na rasat haw.
- 135 Na san koevah, na minhmai ang sak nateh,  
na phunglam hah na cangkhai haw.
- 136 Ayânaw ni nange kâlawk a tarawi awh hoeh dawkvah,



ka mitphi teh palang tui patetlah a lawng.

### ‡ TZADDI

BAWIPA E kâlawk teh Lannae

137 Oe BAWIPA, nang teh na lan doeh,  
na lawkcengnae hai a lan doeh.

138 Na poe e panuesaknae teh a lan teh,  
yuemkamcu e lah ao.

139 Ka tarannaw ni na lawk a pahnim awh dawkvah,  
ka lungthaonae ni kai teh na rek.

140 Na lawk teh a thoung tangngak.  
Hatdawkvah, na san kai ni ka ngai.

141 Kai teh tami titca, hnephnap e lah kaawm ei nakunghai,  
nage phunglamnaw teh ka pahnim hoeh.

142 Na lannae teh a yungyoe lannae lah ao teh,  
na kâlawk teh a thuem doeh.

143 Runae hoi mathoenae ni na ka tho sin nakunghai,  
nage kâpoelawknaw teh ka lunghawinae lah ao.

144 Na panuesaknae lannae teh  
a yungyoe a kangning, thaipanueknae  
na poe haw ka hring han.

### ‡ KOPH

Hlout nahan ratoumnae

145 Ka lungthin abuemlahoi na kaw,  
Oe BAWIPA na thai pouh haw,  
na phunglam teh ka tarawi han.

146 Nang koe ka hramki, na rungngang haw.  
Na lawkpanuesaknae teh ka tarawi han.

147 Khodai hoehnahlan ka thaw teh,  
kabawpnae hei laihoi ka hram.  
Na lawk teh ka ngaihawi.

148 Na lawk lueplueppouk thai nahan,  
karum tuettuet ip laipalah ka hra.

149 Na lungpatawnae patetlah ka lawk hah na thai pouh haw.  
Oe BAWIPA na lawkcengnae patetlah na hring sak haw.

150 Hawihoehnae kasaknaw teh hoehoe a hnai awh toe.  
Na kâlawk hoi ahlanae koe ao awh.

151 Oe BAWIPA, nang teh na hnai teh,  
nage kâpoelawknaw teh lawkkatang doeh.

152 Na lawkpanuesaknae a yungyoe na ta e hah  
ahmaloe hoi ka panue toe.

### ‡ RESH

Rungngang nahan ratoumnae

153 Ka khang e runae hah khien nateh,  
na rungngang haw.

Bangkongtetpawiteh, nage kâpoelawk teh ka pahnim hoeh.

154 Kai hanelah pouk nateh, na ratang haw.  
Na lawk patetlah na pâhlaw haw.

155 Rungngangnae teh tami kahawihoeahnaw koehoi ahla toungloun.  
Bangkongtetpawiteh, na phunglam hah tawng awh hoeh.

156 Oe BAWIPA ka kamcu e na lungmanae teh a len tangngak.



Na lawkcengnae patetlah na pâhlaw haw.

157 Na ka pacekpahlek e hoi ka taran apap.

Hatei, na panuesaknae teh ka phen hoeh.

158 Lawkkam kacakhoehnaw ka hmu nah,

ka lung caca a pataw.

Bangkongtetpawiteh, na lawk tarawi ngai awh hoeh.

159 Nange phunglawknaw ka lungpatawnae heh na pouk pouh haw.

Oe BAWIPA, na pahrenlungmanae patetlah na pâhlaw haw.

160 Na lawk pueng teh lawkkatang doeh,

kalan lah lawkcengnae teh, a yungyoe a kangning.

### ✠ SHIN

Bawipa kâlawk tarawi han ka ngai

161 Bawinaw ni a khuekhaw awm laipalah na rektap awh.

Hatei, ka lungthin teh kângaikaru na lawk dawkvah a kangdue.

162 Hnopai moi ka tawnta e patetlah

na lawk ni ka konawm sak.

163 Laithoe lawk teh ka hmuhma, ka panuet.

Hatei, nange kâlawk teh ka ngai.

164 Na lawkcengnae a lan dawkvah,

hnin touh dawk vaisari touh ka pholen.

165 Kâlawk ka lungpataw naw koe lungmawngnae kalen ao.

Lungpout nahane awm hoeh.

166 BAWIPA, na rungngangnae heh ka ngaihaw.

Na kâpoelawknaw hah ka tarawi.

167 Na panuesaknae heh ka hringnae ni a tarawi teh,

ka lungpataw katang doeh.

168 Na phunglawk hoi na lawkpanuesaknae teh ka tarawi.

Bangkongtetpawiteh, ka lamthung pueng teh na hmalah ao.

✠ TAU: Kabawp heinae ratoum

169 Oe BAWIPA, ka hramnae lawk teh nang koe phat naseh.

Na lawk patetlah thaipanueknae na poe haw.

170 Ka kâheinae teh nang koe phat naseh,

na lawk patetlah na rungngang haw.

171 Nange phunglawk hah na cangkhai dawkvah,

ka pahni ni a pholen han.

172 Ka lai ni na lawk a dei han.

Bangkongtetpawiteh, nange kâpoelawknaw pueng teh lannae lah ao.

173 Na kut teh na kabawmkung lah awm seh.

Bangkongtetpawiteh, na phunglawk hah ka rawi toe.

174 Oe BAWIPA, na rungngangnae teh ka rabui toungloung.

Na kâpoelawk teh ka lunghawinae doeh.

175 Ka hringnae teh hring naseh.

Na pholen han.

Na lawkcengnae ni na ka bawm naseh.

176 Tu kahmat e patetlah ka kahma.

Na san heh na tawng haw.

Bangkongtetpawiteh, nange kâpoelawknaw teh ka pahnim hoeh.

## 120

Kathutkung: Panuekhoeh, tami tangawn ni Hezekiah a ti awh



- <sup>1</sup> Kai teh runae kâhmo navah,  
BAWIPA ka kaw teh Bawipa ni na pato.
- <sup>2</sup> Oe BAWIPA, ka muitha hah laithoe e pahni dawk hoi thoseh,  
dumyennae lai dawk hoi thoseh, na rungngang haw.
- <sup>3</sup> Oe dumyennae lai, Bawipa ni nang hah  
bangtelah vaimoe na ti han vai,  
nang hah bang hoi vaimoe runae na poe han vai tet pawiteh,
- <sup>4</sup> athakaawmnaw e kahran e pala hoi  
kongkang hmaisaaan hoi doeh.
- <sup>5</sup> Kai teh, Meshek ram vah, kahlawng ka cei teh  
Kedarnaw e rim dawk ka o dawkvah,  
yawthoe lah a o
- <sup>6</sup> Ka muitha teh rounnae ka hmuhma e naw hoi  
rei ao e hroung asaw toe.
- <sup>7</sup> Kai teh rounnae ka ngai.  
Hatei, ka dei navah,  
ahnimouh teh tarantuk hane doeh a ngai awh.

## 121

### *Kabawpnae teh BAWIPA koehoi a tho*

Kathutkung: Panuekhoaeh, tami tangawn ni Hezekiah a ti awh

- <sup>1</sup> Kabawpnae teh nâhoi maw a tho han ka titeh,  
monnaw koelah ka khet.
- <sup>2</sup> Kalvan hoi talai kasakkung  
BAWIPA koehoi doeh a tho.
- <sup>3</sup> Bawipa ni na khok tâlaw sak hoeh.  
Nang khenyawnkung teh ngâm boihoeh.
- <sup>4</sup> Atangcalah Isarelnaw khenyawnkung  
Ahnî teh ngâm boihoeh, ip hai ip boihoeh.
- <sup>5</sup> BAWIPA ni nang teh, na khetyawt.  
BAWIPA teh, aranglae tâhlip, na kângue e doeh.
- <sup>6</sup> Khodai vah kani, karum vah thapa ni  
runae na poe mahoe.
- <sup>7</sup> BAWIPA ni runae pueng thung hoi na khetyawt han,  
na hringnae hai a khetyawt han.
- <sup>8</sup> BAWIPA ni, na ceinae,  
na thonae pueng hah  
atuhoi pout laipalah, a khetyawt han.

## 122

### *Jerusalem hanelah ratoum awh sei*

Kathutkung: Devit

- <sup>1</sup> BAWIPA e im dawc cet awh sei telah,  
kai koe ati awh navah, ka lunghawi.
- <sup>2</sup> Oe Jerusalem, kaimae khok teh,  
nage takhang thungvah a kangdue han.
- <sup>3</sup> Jerusalem teh kacakpounglah sak e lah ao.
- <sup>4</sup> BAWIPA e miphunnaw teh hote kho dawc a cei awh katang.  
Isarelnaw e phung patetlah BAWIPA e a miphunnaw teh  
BAWIPA min pholen hanelah,  
BAWIPA min pholen nahanelah a ceitakhang awh.



- <sup>5</sup> Bangkongtetpawiteh, hote hmuen koevah, bawitungkhungnaw,  
Devit imthung bawitungkhungnaw lawkceng nahanelah a hruek awh.
- <sup>6</sup> Jerusalem a roum nahanlah ratoum awh.  
Nang lungpataw naw teh a hmacawn awh naseh.
- <sup>7</sup> Nange rapannaw roumnae awmseh.  
Na impui hawinae coe awh naseh.
- <sup>8</sup> Ka hmaunawngaha han hoi ka huikonaw hanelah,  
nang dawk roumnae awm seh telah ka dei han.
- <sup>9</sup> Maimae BAWIPA Cathut im hane dawkvah,  
nange hawinae hah ka tawng han.

## 123

### *BAWIPA ngaihawinae*

Kathutkung: Panuekhoeh, tami tangawn ni Hezekiah a ti awh

- <sup>1</sup> Kalvan kho a tungkhung kaawm e  
nang koe doeh ka ngaihawi .
- <sup>2</sup> Sanpanaw ni a bawipa kut a ngaihawi e patetlah thoseh,  
Sannunaw ni a bawipa kut a ngaihawi e patetlah thoseh,  
kaimouh ni lungmanae ka coe awh hoehroukrak  
BAWIPA Cathut doeh na ngaihawi awh.
- <sup>3</sup> Oe BAWIPA, kaimouh na lungma haw.  
Kaimouh na lungma haw. Bangkongtetpawiteh,  
banglah noutnahoeahnae teh koug ka boum awh toe.
- <sup>4</sup> Kaimae hringnae teh, ka kâoupnaw ni yeiraipo saknae hai thoseh,  
lunglenpansa lah kaawm naw ni banglah noutnahoeahnae hai thoseh,  
koug ka boum awh toe.

## 124

### *Maimouh koe kaawm e BAWIPA*

Kathutkung: Devit

- <sup>1</sup> BAWIPA ni na awmkhai hoeh pawiteh,  
telah Isarelnaw ni atu a dei awh hane teh,
- <sup>2</sup> BAWIPA teh maimouh koe lah awm hoeh pawiteh,  
taminaw ni na taran awh navah,
- <sup>3</sup> a lungkhuek awh vaiteh, maimouh hah  
hringo na payawp awh toe.
- <sup>4</sup> Hatnavah, tui ni maimanaw teh  
muen na ramuk teh tui ka lawng e ni,  
maimae hringnae van muen a lawng sin toe.
- <sup>5</sup> Puenghoi kalawng e tui ni maimae hringnae teh  
muen a lawng sin toe, tie hah doeh.
- <sup>6</sup> Ahnimouh ni hâ hoi na ai awh nahanelah,  
maimanaw hah ahnimouh koe na poe awh hoeh.  
BAWIPA teh pholen lah awm seh.
- <sup>7</sup> Maimae hringnae teh, tangkam dawh hoi  
kahlout e tava patetlah a hlout toe.  
Tangkam a lawt teh, maimouh hlout awh toe.
- <sup>8</sup> Maimouh kabawpnae teh, kalvan hoi talai ka sak e  
BAWIPA min lahoi coe awh.



## 125

*Miphunnaw ni kâuepnae*

Kathutkung: Panuekhoeh, tami tangawn ni Hezekiah a ti awh

- <sup>1</sup> BAWIPA ka kâuep e naw teh,  
kâhuen hoehe niteh, a yungyoe kangning e  
Zion mon patetlah ao han.
- <sup>2</sup> Monnaw ni Jerusalem a kalup e patetlah,  
BAWIPA ni a miphunnaw hah atuhoi pout laipalah a kalup.
- <sup>3</sup> Tami kalannaw ni amamae kut hoi,  
kahawihoehe hno a sak awh hoehe nahanelah,  
tamikaponaw e sonron teh,  
tami kalannaw e râw talai dawk awm hanh naseh.
- <sup>4</sup> Oe BAWIPA, tami kahawinaw hoi  
tami kalannaw koe hawinae sak haw.
- <sup>5</sup> Amamae dumpyennae lam dawk ka cet e naw hateh,  
yonnae ka sak e naw hoi cungtalah,  
BAWIPA ni a pâlei han. Isarelnaw koe roumnae awm lawiseh.

## 126

*Zion hawinae bout a coe sak*

kathutkung: panuekhoeh

- <sup>1</sup> A man awh teh a hrawi awh e Zioncanaw hah  
BAWIPA ni bout a ban sak toteh,  
kai teh mang ka mang e patetlah ka o.
- <sup>2</sup> Hat toteh, kaimae pahni teh panuinae hoi thoseh,  
kaimae lai teh, la saknae hoi thoseh a kawi han.  
Ayânaw niteh, BAWIPA ni ahnimouh hanelah  
hno kalen a sak pouh toe, telah miphunnaw rahak vah a dei awh.
- <sup>3</sup> BAWIPA ni kaimouh hanlah hno kalen a sak toe.  
Kaimouh teh ka lunghawi awh.
- <sup>4</sup> Oe BAWIPA, a man awh teh, a hrawi awh e kaimanaw hah,  
Negeb e palangtui patetlah bout tho sak haw.
- <sup>5</sup> Mitphi tui hoi cati katunaw ni  
lunghawi la sak laihoi a a awh han.
- <sup>6</sup> Cati ka phawt niteh, tha thout laipalah,  
khuika laihoi ka tâcawt e tami teh,  
cabongnaw hrawm vaiteh,  
lunghawi la sak laihoi bout a ban katang han.

## 127

*BAWIPA ni im sak hoehe pawiteh*

kathutkung: Solomon

- <sup>1</sup> BAWIPA ni im sak hoehe pawiteh,  
ka tawk e pueng ni ayawmyin doeh a tawk awh.  
BAWIPA ni kho ring hoehe pawiteh,  
ka ring e pueng ni ayawmyin doeh a ring awh.
- <sup>2</sup> Amom ka thaw niteh, karumsaning toreï ka ip niteh,  
ngët ka tawn lah tawk laihoi ka cat nakunghai,  
ayawmyin doeh.  
Bangkongtetpawiteh, Bawipa ni a pahren e naw koe  
duedue inae a poe.



- <sup>3</sup> Khenhaw! Canu capanaw teh, BAWIPA ni na poe e râw doeh.  
Khe e camo teh, tawkpheu doeh.
- <sup>4</sup> Na naw nah na khe e canu capanaw teh,  
athakaawme tami kut dawk e pala hoi a kâvan.
- <sup>5</sup> Ama e palabom hah hote palasamtang hoi  
ka kawi sak e tami teh a yawhawî.  
Ahnimouh teh, kayanae awm mahoeu.  
Tarannaw hah longkha koe a ngang awh han.

## 128

### *BAWIPA ka taket e imthung*

- Kathutkung: Panuekhoeh, tami tangawn ni Hezekiah a ti awh
- <sup>1</sup> BAWIPA ka taket niteh, a lamthung ka dawn e tami pueng teh,  
tami yawkahawi e doeh.
- <sup>2</sup> Hottelah na sak pawiteh, nang teh na kut hoi  
na tawk e hah atangcalah na ca han.  
Yawhawî awm vaiteh, lunghawinae na coe han.
- <sup>3</sup> Na yu teh na im thung kaawm niteh,  
a paw moi kapaw e misurkung hoi a kâvan.  
Na canu capanaw teh, na caboi petkâkalup lah,  
ung e olivekungnaw patetlah ao awh han.
- <sup>4</sup> Khenhaw! Bawipa ka taket e teh,  
hot patet e yawhawinae a coe han.
- <sup>5</sup> BAWIPA ni Zion hoi yawhawî na poe seh.  
Na hringyung thung Jerusalem e hawinae na hmawt naseh.
- <sup>6</sup> Na canaw ni a khe e canaw hai na hmawt naseh.  
Isarelnaw koe roumnae awm seh.

## 129

### *Taran tâ nahanelah ratoumnae*

- Kathutkung: Panuekhoeh, tami tangawn ni Hezekiah a ti awh
- <sup>1</sup> Ka nawca hoiyah ahnimouh ni na rektap awh,  
telah Isarelnaw ni tet awh naseh.
- <sup>2</sup> Ka nawca hoiyah ahnimouh ni kai teh, na rektap awh.  
Hatei, na tâ awh hoeu.
- <sup>3</sup> Ka hnukthun vah talai thawn e patetlah a thawn awh teh,  
laikong kasawlah a sak awh.
- <sup>4</sup> Hatei, BAWIPA teh a lan.  
Ahnî ni tamikaponaw e tangronnaw teh,  
thouk thouk a bouk pouh.
- <sup>5</sup> Zion kahmuhmanaw pueng teh,  
kayak awh naseh, hnuklah ban awh naseh.
- <sup>6</sup> Ahnimouh teh, a kung a len hoehnahlan  
remke e lemphu e phokung patetlah awm awh naseh.
- <sup>7</sup> Hote pho teh, kaanaw hanelah,  
kut kasum khuem hai phat hoeu.  
Ka tangoungnaw hanelah, tapam khuem hai phat hoeu.
- <sup>8</sup> Ka cet kaawm pueng nihai,  
BAWIPA e yawhawî teh nangmouh koe awm lawiseh.  
Kaimouh ni BAWIPA min lahoi nangmouh  
yawhawî na poe awh telah a dei awh mahoeu.



## 130

### *BAWIPA ni ratangnae*

Kathutkung: Panuekhoeh, tami tangawn ni Hezekiah a ti awh

<sup>1</sup> Oe BAWIPA, kai ni a dungnae koehoi na kaw.

<sup>2</sup> Oe Cathut, kaie lawk hah na thai pouh haw.

Kai ni ka kâheinae lawk hah hnâpakeng haw.

<sup>3</sup> Oe Bawipa Jehovah, nang ni payonnae hah

na pâkuem pawiteh, apimouh ka khang thai han va.

<sup>4</sup> Hatei, nang ni na ngaithoum dawkvah,

taminaw ni nang teh, na taki awh teh na bari awh.

<sup>5</sup> Kai teh, BAWIPA doeh ka ngaihawi.

Ka hringnae ni a ngaihawi.

Kai teh Bawipa e a lawk hah ka kâuep.

<sup>6</sup> Ramvengnaw ni amom a ngaihawi awh e hlak,

atangcalah ramvengnaw ni amom a ngaihawi awh e hlak,

ka hringnae ni Bawipa teh a ngaihawi.

<sup>7</sup> Oe Isarel miphun, BAWIPA hah ngaihawi awh haw.

Bangkongtetpawiteh, BAWIPA dawkw pahrenlungmanae ao.

Ka kuep e ratangnae hai Bawipa koe ao.

<sup>8</sup> Bawipa ni Isarel miphunnaw teh

payonnae kaawm e pueng dawkw hoi a ratang han.

## 131

### *Cathut kâuep laihoi ratoumnae*

Kathutkung: Devit

<sup>1</sup> Oe BAWIPA, kai teh ka pouknae rasang hoeh,

ka mit hai kâ rasang hoeh,

kai hanelah kalenpounge hno hoi,

ka ru poung e hno dawkw ka nuen hoeh.

<sup>2</sup> Atangcalah, kai teh sanu pâphei e camo patetlah,

ka lungroum teh,

ka lungthin teh sanu pâphei e camo patetlah ao.

<sup>3</sup> Isarelnaw ni atuhoi

BAWIPA hah ngaihawi awh naseh.

## 132

### *Devit hoi Zion rawinae*

Kathutkung: Panuekhoeh

<sup>1</sup> Oe BAWIPA, Devit hai thoseh,

a khang e rektapnae hai thoseh,

<sup>2</sup> BAWIPA koe bangtelane thoe a kâbo tie hai thoseh,

Jakop miphun e athakaawme Bawipa koe

bangtelamaw lawk a kam tie hai thoseh, pouk haw.

<sup>3</sup> Ahni ni BAWIPA onae,

Jakop miphun e Athakasaipounge a onae hmuen

ka hmu hoehroukrak,

<sup>4</sup> kama im ka ban mahoe,

ka ikhun dawkw ka luen mahoe,

<sup>5</sup> ka ip mahoe, ka mit ka pakhap mahoe

telah lawk a kam.



- 6 Khenhaw! Ephrath vah, ka thai a teh,  
ratu thung vah ka hmu awh.
- 7 Ama onae koe cet awh sei .  
Ama khok tOUNGNAE hmalah tabawk awh sei .
- 8 Oe BAWIPA nama e thaonae thingkong hoi cungtalah,  
nama e roumnae koe luen haw.
- 9 Nange vaihmanaw teh lannae hah khohnat awh naseh.  
Nange tami kathoungnaw ni hai lunghawicalah la sak awh naseh.
- 10 Na san Devit minhmai khet lahoi satui na awi e hah  
pahnawt hanh loe.
- 11 BAWIPA ni Devit koe thoe a bo teh  
bout raphoe hoeh hane lawk teh:  
na catoun hah na bawitungkhung dawk ka tahung sak han.
- 12 Na capanaw ni kaie lawkkam hoi  
kaie lawkpanuesaknae hah tarawi awh pawiteh,  
ahnimae capanaw hai nange bawitungkhung dawk  
pou a tahung awh han tie hah doeh.
- 13 Bangkongtetpawiteh, BAWIPA ni Zion hah a rawi teh,  
hawvah o nahane hmuen lah ta hane a ngai dawkvah,
- 14 hote hmuen teh a yungyoe kaie roumnae hmuen lah ao.  
Hote hmuen hah ka ngai dawkvah, hawvah ka o han.
- 15 Hote hmuen koe rawca yawhawi ka poe han.  
Hote hmuen koe mathoenaw hai rawca ka boum sak han.
- 16 Hote hmuen koe e vaihmanaw heh  
rungngangnae hoi ka ramuk vaiteh,  
tami kathoungnaw ni lunghawi laihoi la a sak awh han.
- 17 Hawvah, Devit e ki hah ka cawn sak han.  
Satui ka awi e tami hanelah,  
hmaiim sut ka hruek pouh.
- 18 Kai ni ahnie tarannaw hah  
kayayeirai hoi ka ramuk pouh han.  
Agni koe teh, amae lentoenae lukhung  
kamhlawng sak han telah a ti.

## 133

### *Hmaunawnggha lungkâpatawnae*

Kathutkung: Devit

- 1 Khenhaw! Hmaunawngghanaw ni  
lungkânging lahoi cungtalah kho a sak awh e teh  
ahawipoung teh, ngai ao poung.
- 2 Aphu kaawm e satui lû dawk awi teh,  
pâkhamuen totouh ka lawi e,  
Aron e pâkhamuen totouh ka lawi niteh,  
a lahuen koehoi a khohna dawk ka lawi e hoi a kâvan.
- 3 Zion mon dawk ka bawt niteh,  
Hermon mon e tadamtui patetlah ao.  
Bangkongtetpawiteh, hote hmuen koe  
a yungyoe hringnae yawhawi teh na poe han telah  
BAWIPA ni lawk na kam pouh.



## 134

*BAWIPA yawhawi poe awh sei*

Kathutkung: Panuekhoeh, tami tangawn ni Hezekiah a ti awh

- <sup>1</sup> BAWIPA e sannaw pueng tho awh,  
Karum vah, BAWIPA e im dawk thaw katawknaw pueng,  
BAWIPA teh pholen awh.
- <sup>2</sup> Thounghae hmuen koe lah na kut dâw awh nateh,  
BAWIPA teh pholen awh.
- <sup>3</sup> Kalvan hoi talai ka sak e BAWIPA ni  
Zion hoi nang hah yawhawinae na poe lawiseh.

## 135

*BAWIPA lennae*

Kathutkung: Panuekhoeh

- <sup>1</sup> BAWIPA teh pholen awh. BAWIPA min teh pholen awh.  
BAWIPA e a sannaw ama teh pholen awh.
- <sup>2</sup> BAWIPA e min dawk thoseh,  
maimae Cathut im thongma dawk thoseh,  
thaw ka tawk e a sannaw pueng ama teh pholen awh.
- <sup>3</sup> BAWIPA teh ahawi, BAWIPA teh pholen awh.  
Bawipa e min hah la sak awh. Hottelah sak e teh a kamcu.
- <sup>4</sup> Atangcalah BAWIPA ni Jakop hah ama hanelah thoseh,  
Isarel hah amae hno lah o sak hanelah thoseh a rawi toe.
- <sup>5</sup> Hatdawkvah, Jehovah teh a len e hoi maimae Bawipa teh,  
cathut pueng e lathueng lah ao tie hah ka panue.
- <sup>6</sup> BAWIPA teh kalvan hoi talai hai thoseh,  
tuipui hoi adungnae koehai thoseh,  
a ngai e patetlah a sak.
- <sup>7</sup> BAWIPA ni tâmainaw hah  
talai apoutnae koehoi a luen sak teh,  
kho hoi sumpa a palik sak teh,  
kahlî hah a hnoim thung hoi a tâco sak.
- <sup>8</sup> Ama ni Izip ram vah tami hoi saring totouh  
caminnaw hah a thei pouh.
- <sup>9</sup> Oe Izip ram ahni ni mitnoutnaw hoi  
kângairu mitnoutnaw hah nangmouh koe,  
Faro siangpahrang hoi a thaw katawknaw  
pueng koe a thosak toe.
- <sup>10</sup> Bawipa ni miphun moikapap a moum teh,  
athakaawme siangpahrangnaw hah a thei.
- <sup>11</sup> Hotnaw teh Amor siangpahrang Sihon,  
Bashan siangpahrang Og, hoi kanaan uknaeramnaw doeh
- <sup>12</sup> Hathnukkhu, ahnimae talai hah a tami Isarelnaw râw lah a poe.
- <sup>13</sup> Oe BAWIPA, nange min teh a yungyoe a kangning.  
Oe BAWIPA, na kamthang teh catounnaw totouh a cak.
- <sup>14</sup> Bangkongtetpawiteh, BAWIPA Cathut ni  
a miphun hah lawk a ceng teh, a sannaw hah a pahrenlungma,
- <sup>15</sup> Jentelnaw e meikaphawknaw teh,  
sui, ngun lah ao teh, kut hoi sak e lah ao.
- <sup>16</sup> Hotnaw teh pahni a tawn awh ei lawk dei thai awh hoeh.  
Mit a tawn awh ei, hmawt thai awh hoeh.



- 17 Hnâ a tawn awh ei, thai awh hoeh.  
Ahnimae kâko dawk kâha hai awm hoeh.
- 18 Hotnaw ka sak e hoi kayuemnaw pueng hai  
hotnaw patetlah ao awh han.
- 19 Oe Isarelnaw, BAWIPA hah yawhawi poe awh.  
Aron catounnaw BAWIPA hah yawhawi poe awh.
- 20 Oe Levih catounnaw BAWIPA hah pholen awh.  
BAWIPA ka taket e naw, BAWIPA hah pholen awh.
- 21 Jerusalem vah kaawm e BAWIPA Cathut teh,  
Zion hoi pholen awh.  
Hallelujah.

## 136

### *Lunghawilawkdeinae la*

Kathutkung: Panuekhoeh

- 1 BAWIPA koe lunghawi lawk dei awh.  
Bangkongtetpawiteh, ahni teh ahawi.  
A lungmanae teh a yungyoe a kangning.
- 2 Cathut pueng e Cathut koe lunghawi lawk dei awh.  
Bangkongtetpawiteh, a lungmanae teh a yungyoe a kangning.
- 3 Bawi pueng e Bawi koe lunghawi lawk dei awh.  
Bangkongtetpawiteh, a lungmanae teh a yungyoe a kangning.
- 4 Kângairu hno kalen heh amadueng ka sak e koe,  
bangkongtetpawiteh, a lungmanae teh a yungyoe a kangning.
- 5 A lungangnae hoi kalvan ka sak koe,  
bangkongtetpawiteh, a lungmanae teh  
a yungyoe a kangning.
- 6 Talai hah tui van ka phai e Bawipa koe,  
bangkongtetpawiteh, a lungmanae teh  
a yungyoe a kangning.
- 7 Kalenpoung angnae ka sak e koe,  
bangkongtetpawiteh, a lungmanae teh  
a yungyoe a kangning.
- 8 Khodai ka uk hanlah kanî ka sak e koe,  
bangkongtetpawiteh, a lungmanae teh a yungyoe a kangning.
- 9 Karum ka uk hanlah thapa hoi âsinaw ka sak e koe,  
bangkongtetpawiteh, a lungmanae teh a yungyoe a kangning.
- 10 Izipnaw e caminnaw ka thet e koe,  
bangkongtetpawiteh, a lungmanae teh a yungyoe a kangning.
- 11 Isarelnaw hah Izipnaw thung hoi ka tâcawtkhaikung koe,  
bangkongtetpawiteh, a lungmanae teh a yungyoe a kangning.
- 12 Athakaawme kut, a dâw e kut hoi ka tâcawtkhai koe,  
bangkongtetpawiteh, a lungmanae teh a yungyoe a kangning.
- 13 Tuipui paling hah kahni telah rak ka bawng e koe,  
bangkongtetpawiteh, a lungmanae teh a yungyoe a kangning.
- 14 Isarelnaw hah hote tuipui lungui hoi ka cet sakkung koe,  
bangkongtetpawiteh, a lungmanae teh a yungyoe a kangning.
- 15 Faro siangpahrang hoi a ransanaw teh,  
tui dawk kougng ka tâkhawng koe,  
bangkongtetpawiteh, a lungmanae teh a yungyoe a kangning.
- 16 A miphunnaw hah thingyei yawn dawk ka cetkhaikung koe,



- bangkongtetpawiteh, a lungmanae teh a yungyoe a kangning.
- <sup>17</sup> Siangpahrang kalennaw kathetkung koe,  
bangkongtetpawiteh, a lungmanae teh a yungyoe a kangning.
- <sup>18</sup> A min kamthang e siangpahrangnaw kathetkung koe,  
bangkongtetpawiteh, a lungmanae teh a yungyoe a kangning.
- <sup>19</sup> Amor siangpahrang Sihon ka thet koe,  
bangkongtetpawiteh, a lungmanae teh a yungyoe a kangning.
- <sup>20</sup> Bashan siangpahrang Og ka thet koe,  
bangkongtetpawiteh, a lungmanae teh a yungyoe a kangning.
- <sup>21</sup> Ahnimae ram hah râw lah kapoekung koe,  
bangkongtetpawiteh, a lungmanae teh a yungyoe a kangning.
- <sup>22</sup> San hah Isarelnaw râw lah kapoekung koe,  
bangkongtetpawiteh, a lungmanae teh a yungyoe a kangning.
- <sup>23</sup> Maimouh bo awh lahun nah, pou na kapoukung koe,  
bangkongtetpawiteh, a lungmanae teh a yungyoe a kangning.
- <sup>24</sup> Maimanaw heh taran um hoi na karasatkung koe,  
bangkongtetpawiteh, a lungmanae teh a yungyoe a kangning.
- <sup>25</sup> Moithang pueng rawca ka poe koe,  
bangkongtetpawiteh, a lungmanae teh a yungyoe a kangning.
- <sup>26</sup> Kalvan Cathut koe lunghawi lawk dei awh.  
Bangkongtetpawiteh, a lungmanae teh a yungyoe a kangning.

## 137

### *Zion la*

Kathutkung: Panuekhoeh

- <sup>1</sup> Kaimouh teh Babilon palang teng ka tahung awh teh,  
Zion ka pouk awh dawkvah, ka ka awh.
- <sup>2</sup> Kaimae ratoungnaw hah  
sumpakung dawh ka bang awh.
- <sup>3</sup> Bangkongtetpawiteh, hote hmuen koe maimouh na ka man niteh,  
na kahrawinaw ni kai koe la a hei awh.  
Kaimouh karektapnaw ni hai amamouh nawm nahanelah  
Zion la kaimouh hanlah sak haw ati awh.
- <sup>4</sup> Kaimouh ni Jentelnaw e ram dawh bangtelamaw  
BAWIPA pholennae la ka sak thai awh han vaw.
- <sup>5</sup> Oe Jerusalem, nang hah kai ni na pahnim pawiteh,  
kama e aranglae kut ni a tawksak thai e hah pahnim naseh.
- <sup>6</sup> Nang hah na pouk hoeh boilah,  
Jerusalem hah ka lunghawinae  
lathueng ka hrueng hoeh pawiteh,  
ka lai teh ka dangka dawh kâbet naseh.
- <sup>7</sup> Oe BAWIPA, Jerusalem a rawp nah hnin vah,  
raphoe awh, khomdu totouh raphoe awh telah  
kahram awh e Edomnaw hah pouk haw.
- <sup>8</sup> Oe Babilon canu, raphoe lah na o han toe.  
Kaimouh koe na sak e patetlah,  
nang koe ka patho e teh a lunghawi naseh.
- <sup>9</sup> Nange camonaw hah kaman niteh,  
talung dawh rekrek ka suk e teh a lunghawi naseh.



## 138

*BAWIPA koe lunghawilawk deinae*

Kathutkung: Devit

- <sup>1</sup> Oe BAWIPA, kai teh nange pahrennae hah  
ka lungthin abuemlahoi ka pholen han,  
cathutnaw hmalah nang koe pholennae la ka sak han.
- <sup>2</sup> Kai teh nange kathounge Bawkim koelah  
kangvawi laihoi ka bawk vaiteh,  
nange pahrenlungmanae hoi nange lawkkatang hanelah,  
na Min teh ka pholen.
- <sup>3</sup> Bangkongtetpawiteh, nang teh nama ni na dei e naw hah na min onae  
lathueng vah na tawm toe.  
Kai ni na kawnae hnin navah, nang ni na pato teh,  
ka hringnae teh tha hoi na kawisak.
- <sup>4</sup> Oe BAWIPA talai van e siangpahrang pueng ni,  
nange lawk a thai awh toteh, na pholen awh han.
- <sup>5</sup> BAWIPA e lamthungnaw dawk la a sak awh han.  
Bangkongtetpawiteh, BAWIPA e bawilennae teh a len poung.
- <sup>6</sup> Atangcalah BAWIPA teh arasang ei nakunghai,  
ka rahnoum e naw hah a khetyawt.  
Hatei, kâoupnaw teh ahlanae koehoi a panue toe.
- <sup>7</sup> Kai teh runae um ka cet ei nakunghai,  
Bawipa ni na hring sak han.  
Bawipa ni a kut dâw vaiteh,  
ka tarannaw e lungkhueknae hah ngang vaiteh,  
Bawipa e aranglae kut hoi kai hah na rungngang han.
- <sup>8</sup> BAWIPA ni kai hanlah a noenae a kuep sak han.  
Oe BAWIPA nange pahrenlungmanae teh a kangning.  
Na kut hoi na sak e naw heh hnoun hanh lah a.

## 139

*A yungyoe lentoenae hoi kawi e Cathut*

Kathutkung: Devit

- <sup>1</sup> Oe BAWIPA, nang ni na pâphue teh na panue toe.
- <sup>2</sup> Kai ka tahungnae, ka thawnae pueng hah na panue.  
Kaie ka pouknae pueng hai ahlanae koehoi na panue.
- <sup>3</sup> Ka ceinae lamthung hai thoseh,  
ka inae hai thoseh, na pâphue teh,  
ka coungnae puenghai na panue.
- <sup>4</sup> Kai ni lawk kam touh boehai  
ka dei hoeh nakunghai Oe BAWIPA,  
nang ni kOUNg na panue.
- <sup>5</sup> Nang ni kai pet na kalup teh,  
kaie van vah na kut hah na tOUNg toe.
- <sup>6</sup> Hot patet e panuenae teh kângairu, arasang,  
kai ni ka phat thai hoeh.
- <sup>7</sup> Nange Muitha hoi hlout nahanelah nâmourh ka cei thai han va.  
Na hmalah hoi ka hlout nahanelah nâmourh ka cei thai han va.
- <sup>8</sup> Kalvan ka luen pawiteh hawvah nang teh na o.  
Phuen koe yanna ka phai nakunghai hawvah nang teh na o.
- <sup>9</sup> Amom ratheinaw ka lat niteh,



- tuipui avanglae rai koe kaawm nakunghai,  
 10 hote hmuen koehai Bawipa e kut ni na thak teh,  
 aranglae kut ni na kuet han.
- 11 Hmonae ni ka ramuk nakunghai,  
 karum hai kaie tengpam vah angnae lah ao han.
- 12 Bawipa hmalah hmonae ni banghai ramuk thai mahoe.  
 Karum teh khodai patetlah a ang.  
 Hmonae hoi angnae teh reikâvan.
- 13 Bawipa ni kaie kuen hah a sak teh,  
 anu von thungvah kai hah na ramuk toe.
- 14 Kai ni na pholen han. Bangkongtetpawiteh,  
 takikatho lah, kângailah a ru. Ka hringnae ni kacaicalah a panue.
- 15 Kai hah arulaoi na sak teh,  
 talai thung vah na pahlawm navah,  
 ka tak teh na hmalah hro lah awm hoe.
- 16 Nange mit niteh, kamnuek hoe hae rae ka tak hai na hmu toe.  
 Kai hanelah na hmoun e hninthanaw  
 hnin touh boehai ao hoehnahlan hoiyah  
 nama e cauk dawk ngit na thut e lah ao toe.
- 17 Oe Cathut, kai dawkvah nange pouknae teh aphu o poun.  
 Banghloi apap tanggak.
- 18 Hote pouknae teh parei han pawiteh,  
 sadi hlak hai apap han doeh.  
 Ka kâhlaw toteh nang hoi pou ka o.
- 19 Oe Cathut, tamikaponaw hah na thet pawiteh ahawi han doeh.  
 Tami thei hanlah thi ka phuen e naw, kai koehoi tâcawt awh.
- 20 Ahnimouh teh, ponae lahoi Bawipa tarannae lawk a dei awh.  
 Nange tarannaw ni na min hah yawmyin lah a hno awh.
- 21 Oe BAWIPA, nang ni na hmuhma e naw  
 hai kai ni hai ka hmuhma nahoehmaw.  
 Nang ka tarannaw hai kai ni ka panuet nahoehmaw.
- 22 Kai ni ahnimouh hah puenghoi ka hmuhma.  
 Ka taran lah doeh ka pouk.
- 23 Oe Cathut, kai hah na pâphue teh,  
 kaie ka lungthin hah hmawt haw.  
 Kai hah na noumcai nateh ka pouknae pueng panuek haw.
- 24 Kai ni lamthung kathout dawk ka dawn ou,  
 ka dawn hoe ou tie na khen nateh,  
 a yungyoe e lamthung dawk na hrawi haw.

## 140

### *Rungngang hanelah ratoumnae*

Kathutkung: Devit, Devit ni tumkhawngkung hanelah a sak e la

- 1 Oe BAWIPA, tamikathoutnaw e kut daw k hoi  
 kai hah na hlout sak haw.  
 Ka mathoutmakainaw e kut daw k hoi na rungngang haw.
- 2 Ahnimouh teh a lungthung vah hawihoe hnae hah a pouk awh teh,  
 kâtuknae ao nahanelah, hnintangkuem cungtalah a pouk awh.
- 3 Ahnimouh teh amamae lai hah tahrin e lai patetlah,  
 a hran sak awh.  
 Ahnimae pahni thung vah hrnthoe sue ao. Selah.



- <sup>4</sup> Oe BAWIPA, tamikathoutnaw e kut dawk hoi  
kai hah na ring haw.  
Ka mathoutmakainaw e kut dawk hoi na rungngang haw.  
Ahnimouh ni ka tâlaw nahanelah kho a khang awh.
- <sup>5</sup> Ka kâoupnaw ni kai hanelah arulahoi tangkam a patûng awh.  
Lamthung dawk tamlawk a yangda awh teh,  
kai hanelah karap a patûng awh. Selah.
- <sup>6</sup> Nang teh kaie Cathut lah na o tie hah Jehovah koe ka dei.  
Oe BAWIPA, kai ni ka kâhei e hah na thai pouh haw.
- <sup>7</sup> Oe Bawipa Jehovah, nang teh kaie rungngangnae tha lah na o.  
Tarankâtuk hnin vah, nang ni kaie ka lû teh na ramuk pouh.
- <sup>8</sup> Oe BAWIPA, tamikathoutnaw e ngainae teh kuep pouh hoeh.  
Hawihoeahnae sak hanelah noenae teh kuep sak pouh hoeh.  
Hoehpawiteh, kârasang awh langvaih.
- <sup>9</sup> Hot patet e taminaw teh, kaie ka tengpam vah,  
amamae lû loungouk awh laipalah,  
amamouh ni a dei awh e hawihoeahnae ni  
amamanaw teh ramuk naseh.
- <sup>10</sup> Hmaisaannaw teh amamae van bawt naseh.  
Ahnimouh teh hmai dawk thoseh, tangkawm thung thoseh,  
tâkhawng e lah awm awh naseh, bout thaw awh hanh lawiseh.
- <sup>11</sup> Thoenae ka dei e naw teh, talai van cak awh hanh naseh,  
ka mathoutmakai e taminaw koe runae ni pâlei awh naseh.
- <sup>12</sup> BAWIPA ni runae kâhmonaw hah a khetyawt teh,  
kavouthoupnaw koelah kalan lah lawk a ceng han tie ka panue.
- <sup>13</sup> Atangcalah, tami kalannaw ni na min a pholen awh han.  
A lungthin kalannaw ni hai na hmalah ao awh han.

## 141

### *Kahawihoeh hno sakpayon hoeh nahanelah ratoumnae*

Kathutkung: Devit

- <sup>1</sup> Oe BAWIPA, nang teh, kai ni na kaw.  
Karanglah kai koe tho haw.  
Kai ni nang na kaw nah kaie ka lawk hah na thai pouh haw.
- <sup>2</sup> Kaie ratoumnae teh na hmalah hmutui hmaisawi e patetlah thoseh,  
ka kut ka dâw e teh kanî a khup nah thueng e patetlah thoseh,  
pouk e lah awm lawiseh.
- <sup>3</sup> Oe BAWIPA, ka pahni karingkung na tat pouh haw.  
Ka pahni takhang hai ring haw.
- <sup>4</sup> Payonnae ka sak e taminaw hoi hawihoeahnae sak nahanelah,  
ka lungthin heh hawihoeahnae koe lah na kangvawi sak hanh.  
Ahnimae canei kawi hai na catnet sak hanh.
- <sup>5</sup> Tami kalan ni kai na hem naseh.  
Hot hateh pahrenlungmanae lah ao.  
Kai hah na yue naseh.  
Hot hateh, lû dawk satui awi e lah ao.  
Ka lû ni hot hateh mat hanh naseh.  
Bangkongtetpawiteh, kaie ratoumnae niteh,  
hawihoeahnae ka sak e naw hah pou a taran han.
- <sup>6</sup> Ahnimouh ka ukkungnaw teh pango dawk tanawt lah ao awh han.  
Hat toteh, kaie lawknaw teh ngai ao tie hah na panue awh han.



- <sup>7</sup> Talai tai e laitueng pâpâwn e patetlah,  
kaie ka hrunaw teh phuen longkha koe a kâyat.
- <sup>8</sup> Hatei, Oe Bawipa Jehovah, kai teh, nang doeh na khet toe.  
Nang doeh na kângue toe.  
Ka hringnae hah kângue han kaawm hoeh lah awm sak hanh.
- <sup>9</sup> Ahnimouh ni kai hanelah sut patûng e tangkam dawk hoi thoseh,  
payonnae kasaknaw e karap dawk hoi thoseh,  
kai hah na khoun haw.
- <sup>10</sup> Kai ni hote tangkamnaw ka tapoung toteh,  
tamikathoutnaw teh amamouh ni  
a patûng awh e tangkam dawk reirei bawt awh naseh.

## 142

### *Runae um hoi hramki laihoi kâheinae.*

Kathutkung: Devit, Lungngoum thung aonae koehoi a sak e

- <sup>1</sup> Kai teh, BAWIPA koevah ka hram.  
BAWIPA koe hram laihoi ka kâhei.
- <sup>2</sup> Na hma lah ka phuenangnae ka pâpho teh,  
ka reithainae hai a hmalah ka dei pouh.
- <sup>3</sup> Ka muitha ni ka thungvah a puen toteh,  
Bawipa nang dueng ni doeh kaie lamthung teh na panue.  
Taminaw ni ka dawn e lamthung dawkvah,  
tangkam hah arulahoi a patûng awh.
- <sup>4</sup> Aranglah na khet teh na panue.  
Kai na kapanuekkhaikung apihai awm hoeh.  
Ka yawng nahane lam hai awm hoeh.  
Ka hringnae kapasaikung hai awm hoeh.
- <sup>5</sup> Oe BAWIPA kai teh nang koe vah ka hramki toe.  
Nang teh kai ni kângue e lah na o teh,  
kahringnaw onae ram dawk kaie kaham lah ao telah kai ni ka dei.
- <sup>6</sup> Kai ni ka hram e lawk hah na thai pouh haw.  
Bangkongtetpawiteh, kai teh puenghoi runae ka kâhmo toe.  
Kai na karektapnaw kut dawk hoi na hlout sak haw.  
Bangkongtetpawiteh, ahnimouh teh kai hlak a tha ao awh.
- <sup>7</sup> Bawipa nange min ka pholen thai nahanelah  
kai hah thongim thung hoi na rasat haw.  
Hottelah hawinae na sak toteh,  
tami kalannaw ni kai hah na kalup awh han.

## 143

### *Hramki laihoi kabawp heinae*

Kathutkung: Devit

- <sup>1</sup> Oe BAWIPA, kaie ratoum lawk heh na thai pouh haw.  
Kai ni ka kâhei e hah na thai pouh haw.
- <sup>2</sup> Nange yuemkamcunae lahoi thoseh,  
nange lannae lahoi thoseh, kai hah na pato haw.  
Nange na san hoi lawkcengnae koe na kâenkhai hanh.  
Bangkongtetpawiteh, kahring e tami buet touh boehai  
na hmalah a lan tie awm hoeh.
- <sup>3</sup> Atangcalah taran ni ka hringnae heh a rektap teh,  
ka hringnae hai talai dawk rekrek a suk teh,



- ngailawi kasawlah kadout tangcoung e patetlah  
hmonae um hai kai hah na o sak.
- 4 Kai teh, ka lung apout teh  
ka thung vah ka lung a rek.
- 5 Kaloum tangcoung e a hninnaw hah ka pouk teh,  
Bawipa ni a sak e hnonaw hoi kut hoi a sak e  
hnonaw hah luepluep ka pouk.
- 6 Bawipa nang koe ka kut ka daw.  
Talai ka ke e patetlah ka hringnae ni nang teh na doun. Selah.
- 7 Oe BAWIPA karanglah na pato haw.  
Ka muitha teh a tha abaw toe.  
Kai teh duenae tangkawm dawk ka kum hane tami patetlah  
alouklah na kangvawi takhai hanh loe.
- 8 Amom vah nange pahrenlungmanae hah na thai sak haw.  
Bangkongtetpawiteh, kai ni nang teh na kâuep toe.  
Ka dawn hane lamthung hah na panuek sak.  
Bangkongtetpawiteh, ka hringnae ni nang doeh na kângue toe.
- 9 Oe BAWIPA, ka tarannaw e kut dawk hoi  
kai hah na hlout sak haw.  
Kai teh nang doeh na kângue.
- 10 Nange ngainae ka tawk thai nahan,  
na cangkhai haw.  
Bangkongtetpawiteh, nang teh kaie Cathut lah na o.  
Nange Muitha teh ahawi, kai hah lamkalan dawk na thak lawiseh.
- 11 Oe BAWIPA na min kecu dawk kai hah na hring sak haw.  
Na lannae kecu dawk ka hringnae hah  
runae thung hoi rasat haw.
- 12 Kai teh nange san lah ka o dawkvah,  
namae pahrenlungmanae lahoi ka tarannaw hah,  
na takhoe pouh haw.

## 144

### *Siangpahrang Ratoumnae*

Kathutkung: Devit

- 1 Kaie lungsong lah kaawm e BAWIPA teh  
yawhaw lah awm lawiseh.  
Bawipa ni kaie kut hah tarankâtuk nahanelah a cangkhai teh,  
ka kutdawnnaw hah kâtuk nahanelah a cangkhai.
- 2 Bawipa teh kai lung na kapatawkung,  
kaie rapan, kai karasang e imrasang,  
kai na ka rungngangkung, kaie bahling lah ao.  
Kai teh ahni a ka kângue.  
Bawipa ni ka miphunnaw hah ka kut dawk a pha sak.
- 3 Oe BAWIPA, tami hah banglamouh ao teh, khuet na pouk va.  
Tami capa teh banglamouh ao teh,  
alawkpui lah khuet na ta va.
- 4 Tami teh kâha patetlah doeh ao.  
Ahníe a hninnaw haiyah tang kaloum e tâhlip patetlah doeh ao.
- 5 Oe BAWIPA, na kalvan rahnoum sak nateh, kum haw.  
Monnaw dawk hoi hmaikhu a tâco nahanelah kâbet haw.
- 6 Sumpapalik sak nateh, tarannaw hah kâapek sak haw,



- na pala hoi ka nateh, ahnimanaw hah raphoe haw.
- <sup>7</sup> Arasangnae koehoi na kut dâw haw.  
Moikapap e tui thung hoi thoseh,  
Jentelnaw e kut dawċ hoi thoseh,  
kai hah na rungngang nateh, na hlout sak haw.
- <sup>8</sup> Ahnimanaw e pahni teh laithoe hrawnghrang doeh a dei awh.  
Ahnimae aranglae kut hai dymyennae kut lah doeh ao.
- <sup>9</sup> Oe Cathut, kai teh, nang koe la katha ka sak han.  
A rui hra touh thueng e ratoung hoi na pholen han.
- <sup>10</sup> Bawipa, nang ni siangpahrangnaw hah rungngangnae na poe.  
Nange san Devit hai tahloi dawċ hoi na hlout sak.
- <sup>11</sup> Jentelnaw e kut dawċ hoi na rungngang nateh,  
na hlout sak haw.  
Ahnimae pahni teh laithoe hrawnghrang a dei awh.  
Ahnimae aranglae kut hai dymyennae kut lah a o
- <sup>12</sup> Kaimae capanaw teh a naw awh lahun navah  
a dawn ka sai lahun e patetlah awm awh naseh.  
Kaimae canunaw teh hak pathoup tangcoung e  
takinkhom patetlah awm naseh.
- <sup>13</sup> Kaimae capainaw teh,  
law dawċ e a pawnaw hoi kawi lawiseh.  
Kaimae tunaw hai talai dawċ thong touh,  
thong hra touh pungdaw lawiseh.
- <sup>14</sup> Kaimae maitonaw teh  
thaw tawċ hanlah a tha awm naseh.  
Thama lah kâennae awm hanh naseh,  
lawpnae awm hanh naseh.  
kaimae lamthung dawċ khuikanae hai awm hanh naseh.
- <sup>15</sup> Hot patetlah e yawhawinae hah  
ka coe e miphun teh yawhawi ao.  
BAWIPA hah amae Cathut lah  
ka bawċ e miphun teh yawhawi ao.

## 145

### *Cathut lentoenae hah pholennae*

Kathutkung: Devit

- <sup>1</sup> Kaie Cathut, kaie siangpahrang,  
Bawipa nang teh na tawm han.  
Bawipa nange min teh a yungyoe ka pholen han.
- <sup>2</sup> Kai ni Bawipa nang hah hnintangkuem na pholen vaiteh,  
nange min hah a yungyoe ka pholen han.
- <sup>3</sup> BAWIPA teh a lenpoung dawċvah,  
puenghoi pholen han kawi lah ao.  
Ahniennae teh boeba hai pâphue thai lah awm hoeh.
- <sup>4</sup> Catoun buet touh hnukku buet touh ni  
Bawipa ni a sak e naw hah a pholen awh han.  
Bawipa e thaonae hnosakenaw hai a pathang awh han.
- <sup>5</sup> Nange taluenae hah bari kaawm bawilen poung lah thoseh,  
kângairu hno hai thoseh, ka dei han.
- <sup>6</sup> Ahnimouh niteh, Bawipa kângairu  
lentoenae hah a dei awh han.  
Kai ni hai Bawipa e lennae hah ka dei han.



- 7 Ahnimouh niteh, Bawipa e hawinae hah pahnim hoeh nahanlah,  
dei awh vaiteh, Bawipa e lannae hah  
lunghaw i laihoi a pholen awh han.
- 8 BAWIPA teh hawinae, pahrennae hoi akawi teh,  
a lungsaw teh, lungmanae hoi akawi.
- 9 BAWIPA teh bangpueng daw k hai ahawi.  
Ama ni a sak e hnopueng hai a pahren.
- 10 Oe BAWIPA, na sak e hnopueng ni  
nama e hawinae teh a pholen awh han.  
A tami kathoung pueng ni hai a pholen awh han.
- 11 Ahnimouh ni nange uknaeram bawilenna kong a dei awh han.  
Nange thaonae hai a dei awh han.
- 12 Hettelah hoi nange thaonae hnosakenaw hoi,  
uknaeram bawilen taluena teh  
tami capa pueng koe a panue sak awh han.
- 13 Na uknaeram teh a yungyoe e uknae lah ao teh,  
na kâtawnnae teh se pueng daw k kangning.
- 14 BAWIPA ni ka rawm e taminaw hah a pathaw teh,  
ka tabut e taminaw hah a lounoug sak.
- 15 Tami pueng ni ngaihawi laihoi na khet awh teh,  
atueng a pha toteh, rawca a poe.
- 16 A kut a kadai teh, kahring e moithang pueng hah  
a lungkuep sak.
- 17 Bawipa teh amae lamthung pueng daw k a lan teh,  
a sak e hnopueng daw k yuem a kamcu.
- 18 BAWIPA teh ama ka kaw e pueng,  
lawkkatang laihoi ka kaw pueng koe a hnai sin.
- 19 Bawipa ni ama ka taketnaw e lungngai aku ep sak pouh.  
Ahnimae hramki lawk hai a thai pouh teh,  
ahnimanaw hah a rungngang.
- 20 BAWIPA ni ama ka lungpataw e pueng a khetyawt.  
Hatei, tamikathout pueng teh a raphoe han.
- 21 Ka pahni ni BAWIPA pholenna a dei han.  
Tami pueng ni a mûn kathoung hah  
a yungyoe hoi a yungyoe pholen awh naseh.

## 146

### *Pahrennae hoi kawi Cathut*

Kathutkung: Panuekhoeh

- 1 BAWIPA teh pholen awh.  
Oe ka hringnae BAWIPA hah pholen haw.
- 2 Kai teh, kahring lahun nah BAWIPA ka pholen han.  
Ka hringyung thung ka Cathut teh la sak hoi ka pholen han.
- 3 Bawinaw hoi na ka rungngang thai hoeh e  
taminaw hah kâuep awh hanh.
- 4 Ahnimae muitha a tâco toteh, talai lah doeh a ban awh.  
Hatnah hnin vah, ahnimae pouknae pueng teh be a rawk pouh.
- 5 Jakop e Cathut hah na kabawmkung lah kaawm sak e,  
amae Cathut ka ngaihawi e teh, a yaw ahawi.
- 6 Hote Cathut ni kalvan, talai, tuipui,  
hoi hetnaw daw k kaawm e naw pueng hah a sak.



- <sup>7</sup> Rektap lah kaawmnaw hanelah, lawk a ceng pouh teh,  
a von kahlamnaw rawca a poe.  
BAWIPA ni thongkabawtnaw a hlout sak.
- <sup>8</sup> BAWIPA ni mitdawnnaw mit a hmu sak.  
BAWIPA ni katabutnaw hah a lounyouk sak teh,  
tamikalannaw hah a lungpataw.
- <sup>9</sup> BAWIPA ni Jentelnaw hah a khetyawt teh,  
naranaw hoi lahmainunaw hah a kabawp.  
Tamikathoutnaw e lamthung teh, a rawk sak.
- <sup>10</sup> BAWIPA ni a yungyoe a uk han.  
Oe Zion na Cathut ni catounnaw totouh a uk han.  
Hallelujah.

## 147

### *Ka lentoe Cathut pholennae*

Kathutkung: Panuekhoeh

- <sup>1</sup> BAWIPA teh pholen awh.  
Maimae Cathut hah la sak laihoi pholen e teh ahawi.  
Pholen e teh atangcalah, a kamcu teh ngai ao poun.
- <sup>2</sup> BAWIPA ni Jerusalem kho a sak teh  
pâlei lah kaawm e Isarelnaw hah a kamkhueng sak.
- <sup>3</sup> A lungthin kareknaw hah a dam sak teh,  
ahnimae hmânaw hah a kawm pouh.
- <sup>4</sup> Âsinaw hah a parei teh,  
ahnimae minnaw hai koun a phung.
- <sup>5</sup> Maimae Bawipa teh a len teh,  
thaonae dawk bahu ao,  
thaipanueknae dawk khorî tawn hoeh.
- <sup>6</sup> BAWIPA ni kârahnoum e naw hah a tawm,  
tamikathoutnaw hah talai dawk rek a payan.
- <sup>7</sup> Lunghawilawkdeinae laihoi BAWIPA koe la sak awh.  
Ratoung kueng laihoi maimae Cathut hah pholen awh.
- <sup>8</sup> Kalvan hah tâmai hoi a huem teh,  
talai hanelah kho a rak sak teh,  
monruinaw dawk phonaw a pâw sak.
- <sup>9</sup> Moithangnaw hoi kacaikaringe  
vongacanaw hah rawca a poe.
- <sup>10</sup> Bawipa ni marang tha lunghawikhai hoeh.  
Tami e khoknaw lunghawikhai hoeh.
- <sup>11</sup> Bawipa ni ama ka taket e taminaw hoi  
amae pahrennae ka ngaihawi e taminaw doeh a lunghawikhai
- <sup>12</sup> Oe Jerusalem, BAWIPA hah pholen haw.  
Oe Zion, na Cathut hah pholen haw.
- <sup>13</sup> Bangkongtetsawiteh, Bawipa ni nange  
kholongkha khannae hah a caksak teh,  
nang thung kaawm e camonaw hah yawhawi a poe.
- <sup>14</sup> Bawipa ni nange thungup vah roumnae ao sak teh,  
katuipounge rawca hoi na von a paha sak han.
- <sup>15</sup> Ama e kâpoelawk hah, talai van a patoun.  
A lawk teh, karang poun lah a yawng.
- <sup>16</sup> Tadamtui hah tumuen patetlah a poe.



Tadamtui kamkak e hah hraba patetlah a dan.

- 17 Ama e rounnaw hah vaiyei kanuinaw patetlah a pabo.  
Bawipa ni a pânding sak e hah apinimaw a khang thai han.
- 18 A lawk hah a patoun teh, hotnaw hah a kamyawt sak.  
Ama e kahli a tho sak toteh, tuinaw teh a lawng awh.
- 19 A lawk hah Jakop miphun koe thoseh,  
phung hoi lawkcengnae teh Isarel miphun koe thoseh, a pâpho.
- 20 A louk e apipatet e miphun koehai hettelah sak boihoeh.  
Hote Jentelnaw teh,  
Lawkcengnae hah panuek awh hoeh. BAWIPA teh pholen awh.

## 148

*Sak e pueng ni BAWIPA teh pholen awh*

Kathutkung: Panuekhoeh

- 1 BAWIPA teh pholen awh.  
BAWIPA hah kalvan hoi pholen awh.  
A rasang poungeae koe pholen awh.
- 2 A kalvantaminaw pueng ama teh pholen awh.  
Rasahu pueng ama teh pholen awh.
- 3 Kaní hoi thapa naw ama teh pholen awh.  
Ka ang e âsinaw pueng ama teh pholen awh.
- 4 Karasangpoung e kalvannaw hoi,  
kalvannaw lathueng kaawm e tuinaw ama teh pholen awh.
- 5 Hotnaw pueng teh BAWIPA e kê lahoh sak e lah ao awh dawkvah,  
a min teh pholen awh.
- 6 Ama ni hotnaw pueng teh pou acak sak teh  
kahmat thai hoeh e phung hah a poe.
- 7 Adungpoungeae koe  
kaawm e naw hoi khoruinaw
- 8 hmai hoi roun, tadamtui hoi a kahû,  
a lawk patetlah kêroe e kahli,
- 9 monnaw hoi monrui pueng,  
thingthai rompo hoi sidarkung pueng,
- 10 moithang ka matheng hoi saring ka mawng pueng,  
vonpui hoi kêva e hoi kamleng e tava pueng,
- 11 talai van e siangpahrangnaw hoi tami pueng,  
kacuenaw hoi ukkung khobawi pueng,
- 12 thoundounnaw hoi tanglanaw pueng,  
matawnnaw hoi camonaw pueng,  
BAWIPA teh talai van hoi pholen awh.
- 13 A min dueng doeh ka taluepoung,  
a bawilennae teh talai hoi kalvan lathueng ao dawkvah,  
BAWIPA min teh pholen awh.
- 14 A taminaw e ki teh a tawm pouh dawkvah,  
ateng kaawm e taminaw,  
a tami Isarelnaw e pholen lah kaawm e  
tamikathoungnaw ni pholen e lah na o.  
Hallelujah.



## 149

*Tami kathoungnaw ni BAWIPA pholennae*

Kathutkung: Panuekhoeh

- <sup>1</sup> BAWIPA teh pholen awh.  
BAWIPA koe la katha hah sak awh haw.  
Tami kathoungnaw kamkhuengnae koe  
a pahrennae hah pholen awh.
- <sup>2</sup> Isarelnaw ni amamouh kasakkung koe lunghawi naseh.  
Zion canunaw ni amamae siangpahrang koe konawm naseh.
- <sup>3</sup> Ahnimouh ni lamtu laihoi  
Bawipa min teh pholen awh naseh.  
Tâbaw khawng laihoi, ratoung kueng laihoi,  
pholen hoi la sak awh naseh.
- <sup>4</sup> Bangkongtetpawiteh, BAWIPA ni  
amae taminaw dawk a lungyouk.  
A ma ni kârahnoum e naw hah  
rungngangnae hoi a kamcu sak.
- <sup>5</sup> Tami kathoungnaw ni a bawilennae dawkvah,  
lunghawi awh naseh.  
Amamae ikhun dawk lunghawi laihoi la sak awh naseh.
- <sup>6</sup> Ahnimae pahni dawk karasangpoung lah  
Cathut pholennae awh naseh.  
Ahnimae kut dawk hai,  
avoivang kahran e tahloi patuem awh naseh.
- <sup>7</sup> Ahnimouh ni khoramnaw moipathung hane hoi  
taminaw reknae thoseh,
- <sup>8</sup> ahnimae siangpahrangnaw hai sumrui hoi pâkhi vaiteh,  
ahnimouh thung dawk e bari kaawm e taminaw hah  
khok dawk hlong buet hoi pâkhi hane thoseh,
- <sup>9</sup> thut e lawkcengnae hah,  
ahnimouh koe pha sak nahane doeh.  
Hethateh, tami kathoungnaw pueng koe  
kaawm hane barinae doeh.  
Hallelujah.

## 150

*BAWIPA teh pholen awh*

Kathutkung: Panuekhoeh

- <sup>1</sup> BAWIPA teh pholen awh.  
Thoungnae hmuen koe Cathut teh pholen awh.  
A Bawilen kamnuaenae koe kalvan vah pholen awh.
- <sup>2</sup> Athaonae hnosakenaw dawkvah pholen awh.  
A lentoenae dawkvah pholen awh.
- <sup>3</sup> Mongka ueng laihoi ama teh pholen awh.  
Ratoung tamawi kueng laihoi ama teh pholen awh.
- <sup>4</sup> Tâbaw khawng laihoi, lam laihoi,  
ama teh pholen awh.  
Rui thueng e naw kueng laihoi,  
vovit tum laihoi ama teh pholen awh.
- <sup>5</sup> Cecak khawng laihoi ama teh pholen awh.  
Kacaipounge cecak khawng laihoi ama teh pholen awh.



6 Kahring e moithang pueng ni  
BAWIPA teh pholen awh naseh.  
Hallelujah.



## CINGTHUILAWKNAW

### *Lungang kamtawngnae*

- <sup>1</sup> Isarel siangpahrang, Devit capa Solomon e cingthuilawknaw:
- <sup>2</sup> Lungangnae hoi cangkhaïnae panue hane hoi  
thaipanuenae lawk hah thaipanuek hane hoi,
- <sup>3</sup> lungangnae, lannae, lawkcengnae hoi lannae koelah  
cangkhaïnae pang hane hoi,
- <sup>4</sup> kamawngrame kâhruetcuat poe hane hoi,  
thoundounnaw ni panuenae hoi poukthainae a tawn awh nahanlah,
- <sup>5</sup> tami lungkaang ni a thai navah lungang a kâthap vaiteh,  
thaipanueknae ka tawn e ni lamthung patue thainae a hmu han.
- <sup>6</sup> Cingthuilawk hoi bangnuenae,  
lungangnae hoi kâpâvêinae naw thaipanuek nahanlah,
- <sup>7</sup> BAWIPA takinae teh panuenae kamtawngnae doeh.  
Hatei, tamipathunaw ni teh lungangnae hoi cingthuinae hah a dudam  
awh.

### *Kahawihoeh e khokhannaeh hah roun haw*

- <sup>8</sup> Ka capa, na pa e pâtnae hah thai nateh,  
na manu e kâlawk hai pahnawt hanh.
- <sup>9</sup> Hothateh na lû dawc kamthouptnae sammuem lah awm vaiteh,  
na lahuen dawc awi e dingyin lah ao han.
- <sup>10</sup> Ka capa, tamikayonnaw ni na pasawt pawiteh,  
ngai pouh hanh.
- <sup>11</sup> Kai koe tho van haw, tami thei hanelah pawm sei.  
A khuekhaw awm laipalah yonnae ka tawn hoeh naw hah  
arulahoi pawm awh sei.
- <sup>12</sup> Sheol patetlah a hring lahoi payawp awh vaiteh,  
kadungpoung e tangkom dawc kâ bawt e patetlah,
- <sup>13</sup> Aphu kaawm e hno pueng la awh vaiteh,  
lawphno hoi mamae im dawc kawi sak awh sei.
- <sup>14</sup> Kaimouh koe kambawng van leih,  
maimae tangkabom suekâvan sak awh sei ati awh nakunghai,
- <sup>15</sup> ka capa, ahnimouh koe kambawng hanh.  
Ahnimae lamthung hah roun hanelah kâyawmh.
- <sup>16</sup> Ahnimae khok teh yonnae koe lah a yawng teh,  
tami thei hanelah a hue a rang awh.
- <sup>17</sup> Bangpatet e tava nakunghai  
a hmuna koe tamlawk yangda pawiteh, ayawm doeh.
- <sup>18</sup> Hatei, ahnimouh teh amamouh hoi  
amamouh kâthei hanlah a kâpawp awh teh,  
amamae hringnae arulahoi ka pawm e lah doeh ao awh.
- <sup>19</sup> Hot patetlah, kamsoumhoehe pungdawnae koe lah  
kahounlounnaw e hringnae teh, katawnkung hringnae hah a thei awh.

### *Lungang hanelah kawnae*

- <sup>20</sup> Lungangnae ni a lawi lahoi kacaipounglah a kaw teh,  
lam tangkuem dawc lawk ceiceikapanglah a oung.
- <sup>21</sup> Tami kamkhuengnae koe a oung teh,



- khopui kâennae longkha koe lawk a dei.
- 22 Nangmouh kamawnggramenaw,  
nâtotouh maw cungkeihoehe kamawngrame hah  
na lungpataw awh han rah.  
Kadudamnaw ni, dudamnae dawk a nawm awh teh,  
tamipathunaw ni panuethainae hah a hmuhma awh.
- 23 Kaie yuenae koe kamlang awh,  
nangmae thung ka muitha ka awi vaiteh,  
ka lawk hah na panue sak han.
- 24 Na kaw awh ei, na ngai awh hoehe.  
Ka kut ka dâw ei, apinihai banglah na pouk awh hoehe.
- 25 Kâhruetcuat na poe awh e puenghai na hnoun awh teh,  
na yuenae puenghai buet touh boehai bout na tarawi awh hoehe.
- 26 Hatdawkvah, yawthoenae na kâhmo awh toteh,  
na panuikhai vaiteh, lungpuennae na kâhmo awh to hai na panuikhai  
awh han.
- 27 Takinae kahli kathout ni na kanawi awh teh,  
bongparui ni na parit awh toteh,  
kângairu temdengnae a tho toteh, na panuikhai han.
- 28 Hatnavah, na kaw awh han, hatei, na pato awh mahoehe.  
Atangcalah na tawng awh han, hatei, na hmawt awh mahoehe.
- 29 Panuethainae hah a hmuhma awh teh,  
BAWIPA taki hane hah na kârawi awh hoehe.
- 30 Pouknae ka poe e hah ngai awh hoehe,  
ka yuenae puenghai banglah noutna awh hoehe.
- 31 Hatdawkvah, a hringnuen pawhik hah amamouh ni a ca awh han.  
A khopouk awh e ni letlang a paha sak han.
- 32 Bangkongtetpawiteh, kamawngrame ni a phen saknae ni a thei awh  
vaiteh,  
lawlulawlei ka panuek laipalah, a onae ni a raphoe awh han.
- 33 Hatei, ka lawk ka tarawi e teh,  
karoumcalah kho a sak han.  
Thoenae taket laipalah karoumcalah ao awh han.

## 2

### *Lungang a sungrennae*

- 1 Ka capa, ka lawk hah ngâi nateh,  
kaie kâpoelawknaw e hah na lungthung vah na pâkuem pawiteh,
- 2 Lungangnae koe lah na hnâpakeng nateh,  
na thai panuek nahanelah na lungthin na poe pawiteh,
- 3 Kapek thai nahanelah na kaw teh,  
thaipanueknae tawn hanelah na hram pawiteh,
- 4 ngun patetlah na tawng teh,  
hro e hno patetlah na tawng pawiteh,
- 5 BAWIPA takinae na panue vaiteh,  
Cathut panuenae hah na hmu han.
- 6 Bangkongtetpawiteh, BAWIPA ni lungangnae a poe teh,  
a pahni hoi panuenae hoi thaipanueknae hah ouk a tâco sak.
- 7 Tamikalannaw hanelah lungangnae  
katang hah a pâkhueng pouh teh,  
kalan lah kacetnaw hanelah bahling lah ao.



- 8 Kângingnae lam hah a ring teh,  
a tamikathoungnaw e lamthung hah a ngue pouh.
- 9 Hottelahoi, kângingnae hoi lannae na thaipanuek vaiteh,  
ngaima tawnhoehtae hoi kahawi e lamthung hai na panue han.
- 10 Na lungthin dawk lungangnae a kâen toteh,  
panuenaeh teh, na hringnae kanawm sakkung lah ao han.
- 11 Poukpanueknae ni na ngue vaiteh,  
thaipanueknae ni na ring han.
- 12 Tamikathoutnaw e lamthung dawk hoi na rungngang han.  
Lawk longkawi lah ka dei e,
- 13 Lannae lamthung ka pahawt niteh,  
hmonae lamthung dawn hanelah ka cet e,
- 14 thoenae saknae dawk lungkahawi e,  
tamikathout lanhoehtae dawk a lungkahawi e,
- 15 Lam longkawi ka dawn niteh,  
a lamthung dawk yuemkamcu hoeht e,
- 16 Kahlong lae napui hoi  
pasawtpanep lawk ka hno e,
- 17 A naw nah hui ka cettakhai niteh,  
a Cathut lawkkam kapahnimnaw koehoi  
nang hah na rungngang han.
- 18 Bangkongtetpawiteh, ahnie im ni duenaeh koe lah a hrawi teh,  
ahnies lam ni tamikadoutnaw koelah a pâtam.
- 19 Ahni koe kacetnaw teh ban boihoeht toe.  
Hringnae lam hah dawn boi awht hoeht toe.
- 20 Nang teh tamikahawinaw e lamthung na dawn vaiteh,  
lannae lamthung pou na dawn thah nahane doeh.
- 21 Bangkongtetpawiteh, tamikalan teh ram dawk kho a sak vaiteh,  
tami kakuep teh hawwah pou ao han.
- 22 Hatei, tamikathout teh talai van hoi takhoe lah awm vaiteh,  
yuemkamcu hoeht naw hah phawk lah ao awht han.

### 3

#### *Nawsainaw hanelah lamthung hmusaknae*

- 1 Ka capa, kaie kâlawk hah pahnim hanh.  
Kaie kâpoelawknaw hah na lung dawk pâkuemh.
- 2 Bangkongtetpawiteh, hote ni na hringsawnae hoi  
roumnae na thap sin han.
- 3 Lungmanaeh hoi lawkkatang ni na cettakhai hanh naseh.  
Na lahuen dawk awi nateh, na lungthin dawkvah thut haw.
- 4 Hottelah Cathut hoi tami hmalah,  
minhmai kahawi na hmu vaiteh, tawmrasang lah na o han.
- 5 Na lungthin buem hoi BAWIPA kâuep nateh,  
nama e thaipanueknae hah kângue hanh.
- 6 Na lamthung pueng dawk ama na panuek haw,  
na lamthung pueng dawk na hrawi han.
- 7 Namahoima lungkaang lah kâsak hanh.  
BAWIPA hah taket nateh yon cettakhai.
- 8 Na takthai hanelah damnae lah ao vaiteh,  
na hru hanelah thasainae lah ao han.



- 9 Na tawnta e naw hoi aluepawnew hoi  
BAWIPA hah bari haw.
- 10 Hahoi na capai dawh a kawī vaiteh,  
misur katinnae tangkom dawh misur katha hoi a kawī han.
- 11 Ka capa, BAWIPA yuenae hah dudam hanh.  
Na pheap e hai hmuhma hanh.
- 12 Bangkongtetpawiteh, na pa ni a lungpataw e capa teh  
ouk a yue e patellah,  
BAWIPA ni a lungpataw e naw hah ouk a yue.
- 13 Lungmanae kahmawtnaw teh a lung kahawī e tami lah ao awh teh,  
Thaipanueknae ka tawn e tami hai a lung kahawī e tami lah ao.
- 14 Bangkongtetpawiteh, ngun pungdaw sak e hlak,  
lungmanae pungdaw sak e hah ahawihnawn.
- 15 Talungpaling hlak hai aphu ao teh,  
na ngai e pueng ni hai phat hoeh rah.
- 16 Aranglae kut dawh hringsawnae ao teh,  
avoulah e kut dawh hnopai hoi barinae ao.
- 17 A lamthung teh lamthung kanawm lah ao teh,  
a lamthung pueng teh roumnae lah ao awh.
- 18 Kakuennaw hanelah hringnae thingkung lah ao teh,  
ka hringkhaie pueng teh tami lung kahawī e lah ao awh.
- 19 BAWIPA ni lungangnae lahoi talai hah a kangdue sak teh,  
thaipanueknae lahoi kalvan a cak sak.
- 20 A panuenae lahoi tali a kapek teh,  
tâmai ni tadamtui a bo sak.
- 21 Ka capa, lungangnae katang hoi  
panuethainae hah kuen nateh,  
na mit hoi kâhlāt sak hanh.
- 22 Hottelah pawiteh, na muitha hanelah hringnae lah awm vaiteh,  
na lahuen hanelah pahrennae lah ao han.
- 23 Hottelah na lamthung dawh karoumcalah na cet vaiteh,  
na khok na kamthui mahoe.
- 24 Na i navah na taket mahoe,  
ihmu katuilah na i han.
- 25 Taki ka tho e kaluekalapnae hai taket hanh.  
Hoehpawiteh, tamikathoutnaw ni  
a kâhmo awh e runae hai taket hanh.
- 26 Bangkongtetpawiteh, BAWIPA teh na kânguenae lah awm vaiteh,  
na khok teh karap dawh hoi a hlout sak han.
- 27 Sak nahane kâ na kut dawh ao nahlangva,  
hmu hanelah kakamcunaw hah  
hnokahawī pasoung laipalah awm hanh.
- 28 Poe hane na sin nahlangva, cet ei, bout tho lah a,  
tangtho torei na poe han, telah na imri koe tet pouh hanh.
- 29 Na imri taranlahoi thoenae sak hanelah kâcai hanh.  
Bangkongtetpawiteh, nang na ka ring e doeh.
- 30 Nang dawh patawnae na poe hoeh pawiteh,  
a khuekhaw awm laipalah tami taran hanh.
- 31 Tami rep kacoungroenaw e hnopai noe awh hanh.  
Ahnimae lamthung hai rawi awh hanh.
- 32 Bangkongtetpawiteh, a lungthin ka longkawī e teh  
BAWIPA hanelah panuet a tho teh, a lungthin kalan e teh,



ama hoi arulahoi kâponae ao.

- <sup>33</sup> Tamikathoutnaw e im daw, BAWIPA thoebonae ao, hatei, tamikalannaw e im teh, yawhawi a poe.  
<sup>34</sup> Dudam lahoi kaawmnaw hah a dudam teh, ka kârahnoumnaw hah pahrennae a poe.  
<sup>35</sup> Tami lungkaang ni bawilennae râw a coe han. Hatei, tamipathunaw ni a coe awh e râw teh, kayanae doeh.

## 4

### *Lungangnae daw kânguenae*

- <sup>1</sup> Ka canaw, na pa ni na cangkhaenae hah thai awh nateh, thaipanueknae hah panue hanelah na hnâpakeng awh.  
<sup>2</sup> Bangkongtetpawiteh, cangkhaenae kahawi hah na poe dawkvah, kaie kâlawk hah cettakhai hanh.  
<sup>3</sup> Apa e capa lah ka o navah, anu e capa a pahren e tawntoe e capa lah ka o.  
<sup>4</sup> Pâtu hai na pâtu teh, na lungthin hoi ka lawknaw hah pâkuem haw. Kaie kâpoelawknaw hah tarawi nateh hring haw.  
<sup>5</sup> Lungangnae hah tawn nateh, thaipanueknae hah tawn haw. Ka pahni daw hoi ka tâcawt e lawknaw hah pahnim laipalah, kamlang takhai hanh.  
<sup>6</sup> Cettakhai hanh, na ring nakaima. Lungpataw haw na ngue han kaima.  
<sup>7</sup> Lungangnae teh a lawkpui poug doeh.  
<sup>8</sup> Talue sak haw, na tawmrasang han. Tapam haw, barinae koe na ceikhai han.  
<sup>9</sup> Na lû daw lungmanae na kâ muk sak han, bawilennae bawilakhung hah na kâ muk sak han.  
<sup>10</sup> Ka capa, ka dei e hah thai nateh, dâw haw. Na hringyung a saw sak han.  
<sup>11</sup> Lungangnae lamthung na cangkhai teh, lamkalan daw na hrawi.  
<sup>12</sup> Na cei navah, na khok hanelah kamthuinae awm mahoe, na yawng navah na tâlaw mahoe.  
<sup>13</sup> Na cangkhaenae hah kacaklah kuen nateh, tha laipalah pou kuen haw. Bangkongtetpawiteh, na hringnae doeh.  
<sup>14</sup> Tamikathoutnaw e lamthung daw kâen awh hanh. Tami kahawihoe hnaw e lamthung dawn hanh.  
<sup>15</sup> Roun nateh, khoeroe dawn hanh, kamlang takhai nateh, cettakhaih.  
<sup>16</sup> Bangkongtetpawiteh, hno kathout sak hoe pawiteh, ip thai awh hoe niteh, tami buetbuet touh tâlaw sak hoe pawiteh, ihm u tho awh hoe.  
<sup>17</sup> Bangkongtetpawiteh, thoenae vaiyei hah a ca awh teh, rektapnae yamu hah a nei awh.  
<sup>18</sup> Hatei, tamikalannaw e lamthung teh, kanî raeng, kanî tuengtalung a thunnae kanî ang patetlah ao.



- 19 Tamikathoutnaw e lamthung teh khohmo patetlah ao teh,  
tâlawnae akungcing hai panuek awh hoeh.
- 20 Ka capa, ka lawk kahawicalah thai haw,  
ka dei e hah atangcalah pouk.
- 21 Na mit hoi kâhlat sak hanh,  
na lungthin dawk pâkuemh.
- 22 Bangkongtetpawiteh, kahmawtnaw hanelah hringnae lah ao teh,  
a takthai abuemlah hanelah damnae lah ao.
- 23 Hno pueng hlak hoi na lungthin hah kahawicalah ring haw.  
Bangkongtetpawiteh, hringnae akungtuen lah ao.
- 24 Dumyennaeh pahni hah pahnawt nateh,  
payonnae pahni hah ahlanae koe takhoe haw.
- 25 Na mit hoi hmalah kalan lah khen nateh,  
na hmalah kalan lah radoung haw.
- 26 Na lamthung hah hmaloe rip nateh,  
na lamthung pueng hah cak sak.
- 27 Aranglah nakunghai, avoilah nakunghai phen hanh.  
Thoenae lamthung hah roun haw.

## 5

*Dumnae hah roun haw*

- 1 Ka capa, poukpanueknae na tawn nahane hoi,  
na pahni ni panuenae a pâkuem thai nahanelah,
- 2 kaie lungangnae hah thai nateh,  
kaie thaipanueknae dawk na hnâpakeng haw.
- 3 Bangkongtetpawiteh, napui kathoutnaw e pahni teh,  
khoitui patetlah a radip, a lawk teh sathaw hlak hai a pâhnan.
- 4 Hatei, apoutnae koe lateh, hmue patetlah a kha teh,  
avoivang kahrn e sarai patetlah a hran.
- 5 A khok ni duenae lamthung a pâmam teh,  
a khok takan ni sheol hmai a pâmam.
- 6 Hoehpawiteh, a hringnae lamthung na pouk hoeh vaiteh,  
a lamthung a cak hoeh e hah na panuek mahoe.
- 7 Hatdawkvah, ka canaw, atuvah, ka lawk thai awh haw.  
Ka dei e lawknaw hah pahnawt awh hanh.
- 8 Hatei, ahlanae koe kampuen awh nateh,  
ahnie im takhang hoi hai hnai awh hanh.
- 9 Hoehpawiteh, barinae na hmu e hah  
ayâ alouk koe kampuen payon vaih.  
Tami nuen kamathoutnaw rahak vah,  
na hringnae be na hno payon vaih.
- 10 Hoehpawiteh, ramlouknaw ni  
na tawntanae dawk nawm awh vaiteh,  
na thaw tawk e a pawnaw hah  
ramlouknaw im vah phat payon vaih.
- 11 Apoutnae koe lah, na takthai a kamsoe toteh,  
na khui payon vaih.
- 12 Bangtelamaw, cangkchainae hah koe ka hmuhma teh,  
yuenae hah ka lungthin hoi koe ka dudam toe.
- 13 Na kacangkhaikung e lawk hah koe ka tarawi ngaihoe niteh,  
na cangkchainae hah koe ka thai ngaihoe heh ma.



- 14 Tamimaya hoi kamkhuengnaw koe  
rawknae kâhmo hoeh e dueng doeh hei na ti han na kaima.
- 15 Nange tuikhu, na tuikhu hoi  
ka tâcawt e tui roeroe hah na nei han.
- 16 Na tuiphuek hah ram tangkuem lawng vaiteh  
tamimaya ceinae lamnaw dawk a lawng han na maw.
- 17 Nama hanelah dueng awm seh,  
ayâ alouke hoi kâkabawpkhai hane nahoe.
- 18 Na tuikhu teh yawhawi seh,  
na naw nah e na yu koe na lungkuep lawih.
- 19 Ngai kaawm e sayuk hoi a meikahawi e sayukhre patetlah,  
a sannunaw ni na lungkuep sak naseh.  
A lungpatawnae ni na lungkuep sak naseh.
- 20 Bangtelamaw, ka capa nang ni napui kahawihoehe hah  
na ngai vaiteh, khuet na tapam han vaw.
- 21 Bangkongtetpawiteh, tami hringnae lamthungnaw teh,  
BÂWIPA ni kOUNG a hmu teh,  
a lamthung pueng kOUNG a pouk pouh.
- 22 Ama pouknae ni tamikayon teh a man vaiteh,  
a yonnae tangron hoi pâkhi lah ao han.
- 23 Cangkhainae a vout dawkvah, a due vaiteh,  
puenghoi a pathu dawkvah, a kahma han.

## 6

### *Lawkkam e taki a tho*

- 1 Ka capa, na hui hanelah lawk na kam teh,  
ayâ alouk hoi na kut na tambei pawiteh,
- 2 na dei e lawk dawk letlang na kâman toe.  
Na dei e lawk hoi la lah na o toe.
- 3 Hatnavah, ka capa, hettelah namahoima na kârungngang han.  
Bangtelamaw na hui kut dawk na pha tOUNG dawkvah,  
kârahnoumnae lahoi cet nateh, kâhet lah a.
- 4 Ip hanh, ngam takhai hanh.
- 5 Moi ka me e koehoi sakhi ni a yawng takhai e patetlah,  
yawng takhai haw, tangkam dawk hoi  
kahlout e tava patetlah kamleng takhai haw.
- 6 Nange tami ka pangak, lungkhi koe cet nateh,  
a oangnae lahoi lungangnae kamtu haw.
- 7 Ahnimouh teh, kahrawikung, karipkung,  
kaukkung, tawn awh hoeh eiteh,
- 8 kawmpoi vah rawca a pâtung awh teh,  
canga tue nah rawca a pâtung awh.
- 9 Oe, tami ka pangak, nâtotouh maw na i han.  
Nâtuek maw na kâhlaw han.
- 10 Ka ip ei haw pawiteh, dongdeng ka yan ei haw pawiteh,  
kut kâtapam hoi dongdeng kâhat ei haw pawiteh, na ti lahun nah,
- 11 mathoenae ni karum kâva e patetlah vaitalahoi na tho sin vaiteh,  
vouthouptnae ni kutdaw patetlah na tho sin han.
- 12 Tami cungkeihoeh e, tami kahawihoehe teh,  
tamthoe hoi a kâhlai.
- 13 A mit a kaluek teh, a khok hoi mitnout a poe teh,



a kutdawn hoi a takhi teh a pâtu.

- 14 A lungpouk a longkawi teh, pout laipalah,  
hawihoeahnae dueng a pouk teh, kâyuenae cati doeh ouk a tu.
- 15 Hatdawkvah, kahmakatanae ni vaitalahoi a tho sin han.  
Vaitalahoi damthaihoeahnae kahmakatanae a kâhmo han.
- 16 Hete hno taruk touh heh, BAWIPA ni a hmuhma.  
Bokheiyah, a panuet e hno sari touh a pha.
- 17 Kâoupnae mit, laithoe ka deinae lai,  
yon ka tawn hoehe e tami theinae kut,
- 18 Hawihoeahnae meng ka pouk e lungthin,  
kahawihoehe sak nahanelah a hue ka rang e khok,
- 19 Laithoe ouk ka dei e kapanuekkhaikung kaphawk hoi,  
hmaunawnggha rahak kâpohoeahnae cati ka patuekungnaw doeh .

*Uicuknae kâhruetcuete poenae*

- 20 Ka capa, na pa e kâpoelawk hah tarawi nateh,  
na manu e kâlawk hah cettakhai hanh.
- 21 Na lungthung pâkuem nateh,  
na lahuen dawk awi haw.
- 22 Alouklah na cei toteh, hote kâlawk ni na hrawi han,  
na i navah na ring vaiteh, na kâhlaw toteh, na pato han.
- 23 Bangtelah tetpawiteh, kâpoe e teh,  
hmaiim lah ao teh, kâlawk teh angnae lah ao.  
Cingthuillasak e teh hringnae lamthung doeh.
- 24 Napui kathout hoi pasawtpanepnae koehoi  
na hlout sak han.
- 25 Na lungthin hoi a meihawinae nôe hanh lah a,  
a mit padainae ni na man hanh naseh.
- 26 Bangkongtetpawiteh, kâyawt e napui kecu dawk,  
tongpatang heh vaiyei tangen lah a coung teh,  
ayâ yu ka yonkhai e ni, ka sungren e a hringnae hah a raphoe.
- 27 Tami ni a kho e angki kang laipalah  
hmaisaan a yawm thai han na maw.
- 28 Tami ni a khok kang laipalah,  
hmaisaan van a cei thai han na maw.
- 29 Hot patetvanlah, a imri yu ka ipkhai e tami hai hot patetlah doeh ao.  
Ayâ yu ka ipkhai e tami teh, yonnae hoi hlout hoehe.
- 30 A vonhlan dawk tami ni parawt pawiteh,  
hote tamru teh tami ni pacekpahlek hoehe.
- 31 Hmu lah awm pawiteh, let sari touh hoi a patho roeroe hanelah ao.  
A im dawk kaawm e hno pueng a rawng hanelah ao.
- 32 Ayâ yu hoi ka uicuk e tami pueng teh,  
panuena ka tawn hoehe e tami doeh.  
Ama hringnae ka raphoekung lah ao.
- 33 Hmâtan cat vaiteh, min mathoe a kâhmo han.  
A kayanae teh roum thai mahoehe.
- 34 Bangkongtetpawiteh, dipmanae ni  
vanaw puenghoi a lung ouk a khuek sak.  
Moipathungnae hnin navah hlout thai mahoehe
- 35 Rawng e hno nâyittouh hai banglah noutna mahoehe.  
Hno moikapap ka poe nakunghai a lung roum sak thai mahoehe.



## 7

- 1 Ka capa, ka lawk hah hringkhai nateh,  
kaie kâpoelawknaw hah na thung vah pâkuem haw.
- 2 Kaie kâpoelawk hah, pâkuem nateh, hringkhai haw.  
Hahoi, Kaie kâpoelawknaw hah na mitmu patetlah ring haw.
- 3 Na kutdawnnaw dawk pâkhit nateh,  
na lungthin dawkvah thut haw.
- 4 Lungangnae koevah, ka tawncanu lah na o tet nateh,  
thaipanueknae hah na tawncanu patetlah pouk haw.
- 5 Het niyah napui kahawihoehnaw koehoi na hlout sak vaiteh,  
lawk radip lawk pâhnan naw koehoi na ring han.

*Ka kâyawtnaw huengonae*

- 6 Kama im e hlangaw dawk hoi ka khet boteh,
- 7 Kamawngrame thung dawk,  
nawsai buet touh hah tanglanaw rahak vah ka hmu.
- 8 Hote napui aonae lamtakin koe a pha awh toteh,  
ahni im lah ceinae lamtalawi hah a dawn.
- 9 Tangmin karumsaning a pha toteh,
- 10 hawvah, hak kamthoup niteh,  
ka kâyawt e napui ni a kâhmo.
- 11 Hote napui teh a im vah duem kaawm thai hoeh e,  
a lungkatang e lah ao.
- 12 Lamthung hoi lam takin koe ao teh  
tamipuong hah ouk a pawp.
- 13 A takawi teh, tang a paco  
Lungpuenna awm laipalah, hettelah a dei.
- 14 Roum thueng hane ka tawn.  
Sahnin ka lawkkam ka kuep sak han.
- 15 Hatdawkvah nang dawn hanelah ka tho.  
Na tawng teh na kâhmo toe.
- 16 Ka ikhun dawk a meikahawi poung e hni  
Izip lukkarei a em kaawm e sut ka phai toe.
- 17 Ka ikhun teh, murah hoi aloe,  
nakzik hmuithui hoi ka pathoup toe.
- 18 Tho haw, khodai totouh, lungpatawnae lahoi  
phaibongcito roi sei.
- 19 Bangkongtetpawiteh, ka vâ teh im vah awm hoeh.  
Tangkabom a sin teh, kho hlanae koe kahlawng yo a cei toe.
- 20 Thapa a kamhluem to doeh  
tho ti toe telah atipouh.
- 21 Lawkdeithoumnae ni a tâ teh,  
lawk pâhnan hoi a tacuek thai
- 22 Maitotan ni moi theinae koe a pâtam e patetlah thoseh,  
sayuk ni a lungthin pala ni a cusin hoehnahlan  
karap coungrae e patetlah thoseh,
- 23 Tava ni a due nahanelah patung e tangkam a panue hoeh teh,  
karanglah a kâen e patetlah thoseh,  
thoundoun teh hote napui hnuk tang a kâbang.
- 24 Hatdawkvah, ka capanaw, ka lawk heh tarawi awh nateh,  
ka dei e lawk hah kahawicalah pouk awh.



- 25 Na lungthin hah hote napui koelah, kamlang sak hanh,  
a dawn e lam dawk dawn hanh.  
26 Bangkongtetpawiteh, tami moikapap hmâ a paca teh,  
athakaawme tami moikapap a kamlei sak toe.  
27 Ahnie im teh phuen koe ceinae lamkalen lah ao teh,  
duenae tangkom thung na ka hrawi e lah ao.

## 8

*Lungangnae hoe ahawi*

- 1 Lungangnae ni a kaw teh,  
thaipanueknae ni a lawk a cai sak nahoehmaw.  
2 Monsom vah tahungnae a sak teh,  
lam teng hoi lamtalawi koe ouk a kangdue.  
3 Khopui kâennae longkha koehoi,  
kâennae thonaw koevah, kacaipounglah a oung.  
4 Oe, taminaw, nangmouh hah na kaw awh.  
Ka lawk hah taminaw hane doeh.  
5 Oe kamawngrame, lungangnae hah thaipanuek awh.  
Nangmouh tamipathunaw thaipanueknae lungthin tawn awh haw.  
6 Thai awh haw, kahawi poung e hah ka dei vaiteh,  
ka pahni dawk hoi ka tâcawt e teh, kalan e han doeh.  
7 Bangkongtetpawiteh, ka pahni ni lawkkatang a dei han,  
thoenae teh ka pahni hanelah panuet a tho.  
8 Ka pahni hoi ka dei e lawk pueng teh, lannae doeh.  
Kâcawngmet e hoi ka longkawi e awm hoeh.  
9 Kathaipanueknaw hanelah a kamceng teh,  
panuenae katawnnaw hanelah a lan.  
10 Tangka hlak kaie cangkhaenae hah dâw awh.  
Sui kahawi hlak panuenae heh kârawi awh.  
11 Bangkongtetpawiteh, lungangnae teh  
Rubies talung hlak ahawihnawn.  
Ngai kawi e hno pueng hoi hote hno hah bangnue thai mahoe.  
12 Kai, lungangnae teh lungang laihoi ka o.  
Panuinae hoi poukthainae hai ka tawn.  
13 BAWIPA taki e teh yon hmuhma e doeh.  
Kâoupnae hoi kaisuenae, yonnae lamthung hoi  
lawk kalan deihoehnae pahninaw heh ka hmuhma.  
14 Kâpankhainae hoi lungangnae  
katang hateh, kaie naw doeh.  
Thaipanueknae lah ka o teh thaonae ka tawn.  
15 Kai pawlawk hoi siangpahrangnaw ni a uk awh teh,  
ukkungnaw ni kalan lah laidei ouk a tâtueng awh.  
16 Kai pawlawk hoi ukkungnaw hoi  
tami kalennaw hoi bari kaawmnaw hoi  
talai van e lawkcengkung pueng ni uknae kâ a tawn awh.  
17 Kai lungpataw e teh, kai ni ka lungpataw van,  
atangalah na katawngnaw ni na hmu awh han.  
18 Tawntanae hoi barinae teh kai koe kaawm e naw doeh.  
Kangning e tawntanae hoi lannae doeh.  
19 Kaie a paw teh sui hlak hai ahawihnawn.  
Bokheiyah, sui kathoung hlak hai ahawihnawn.



- Hahoi ka hmu e hnopai teh, kahawi e ngun hlak hai ahawihnawn.
- 20 Lannae hoi kângingnae lamthung lungui vah ka cei.
- 21 Hottelah, kai lungpataw naw koe hnopai tabu dawk,  
hno akawi nahanlah hnopai ka coe sak han.
- 22 BAWIPA ni a kamtawng lahun nahoi,  
ayan e thaw a tawk hoehnahlan vah, yo na tawn toe.
- 23 Talai ao hoehnahlan hoi a kamtawng hoehnahlan vah,  
a yungyoe caksak lah ka o toe.
- 24 Kadungpoung e tali ao hoehnahlan hoi,  
tuinaw pueng a tâco hoehnahlan vah, yo ka tâco toe.
- 25 Talai hoi vaiphu ao hoehnahlan,  
talai hoi ramnaw a sak hoehnahlan,
- 26 Montamnaw ao hoehnahlan vah,  
yo ka tâco toe.
- 27 Kalvannaw a rakueng lahun navah, yo ka o toe.  
Kadungpoung e tali dawk e kâheinae a sak navah,
- 28 Kalvan e tâmai a yam sak navah, kadungpoung e tali,  
ka lawng e palang, tha a poe navah,
- 29 Tui ni a kâpoelawk a ek hoeh nahanlah,  
talîpui hanelah a langri a khuen pouh navah, talai du a ung navah,
- 30 Kai teh kawk e capa patetlah ama koe ka o teh,  
pout laipalah ama lung kahawi sakkung lah ka o.  
A hmalah ka konawm.
- 31 O nahanelah a sak e talai ni, ka konawm sak,  
taminaw ni ka ko hoe a nawm sak.
- 32 Hatdawkvah, ka canaw, atu ka lawk thai awh haw.  
Bangkongtetpawiteh, ka lamthung kadawnnaw teh  
tami yaw kahawi e lah ao awh.
- 33 Cangkhainae heh thai awh nateh,  
lungang awh haw, banglah noutna laipalah awm hanh awh.
- 34 Hnin tangkuem kaie longkha koehoi na ring teh,  
takhang koehoi na ngaihawi.  
Ka lawk ka ngâi e teh, tami yaw kahawi e doeh.
- 35 Bangkongtetpawiteh, kai na kahmawt e pueng teh  
hringnae ka hmawt e lah ao.  
BAWIPA ni ngaikhainae hai ouk a hmu awh.
- 36 Hatei, kai dawk yonnae kasaknaw ni amae hringnae a raphoe teh,  
na ka maithoe e pueng teh duenae ka lungpataw naw doeh.

## 9

### *Lungangnae lamthung*

- 1 Lungangnae ni a im a sak teh  
khom sari touh a ung.
- 2 Moi a thei teh misurtui a phunphun hoi  
a kalawt teh ca hanelah caboi van a pâtoum.
- 3 A san tanglanaw a patoun teh,  
khopui hmuenrasang koehoi a oung awh.
- 4 Kamawngrame pueng hi lavah kamlang awh naseh.  
Oe, thaipanueknae kavoutnaw hai tho awh.
- 5 Kaie vaiyei hah cat awh.  
Aphunphun kalawt e misurtui hah net awh a ti.



- 6 Kamawngrame hah cettakhai awh nateh, hring awh.  
Hahoi thaipanueknae lamthung hah dawn awh.
- 7 Ayâ ka dudam e tami hah ka yue e teh, yeirai a po han.  
Tamikathout ka yue e teh pacekpahlekae a kâhmo han.
- 8 Ayâ ka dudam e tami hah na yue pawiteh, na hmuhma han.  
Tamilungkaang e na yue pawiteh, ahni ni na lungpataw han.
- 9 Tamilungkaang hah yue haw, a lung hoe a ang han.  
Tamikalan hah pâtu haw thouthainae a kâthap han.
- 10 BAWIPA takinae teh lungang kamtawngnae a kung doeh.  
Kathounge Cathut panue e teh thaipanueknae doeh.
- 11 Bangkoktetpawiteh, na hnin hah kai ni ka pap sak vaiteh,  
na hringyung kum na thap pouh han.
- 12 Na lungang pawiteh, na lungangnae phu na hmu han.  
Na dudam pawiteh, nama ni na khang han.

### *Pathunae lamthung*

- 13 Napui pathu teh a hramki teh,  
kamawngrame lah ao dawkvah, banghai panuek hoeh.
- 14 A im takhang koe a tahung teh,  
khopui hmuen rasang tahungnae koe a tahung.
- 15 Lam daw amamae lamthung daw  
kacetnaw hah a kaw teh,
- 16 kamawngrame pueng hivah tho awh,  
lungangnae ka tawn hoeh naw,
- 17 paru e tui teh a radip, arulahoi ca e vaiyei teh  
hoe a tui telah ouk a ti.
- 18 Hatei, hawvah tamikadoutnaw ao teh,  
amae imyinnaw teh adungnae koe sheol dawk ao awh tie hah  
hote tongpa ni panuek hoeh.

## 10

### *Solomon cingthuinae*

- 1 Solomon e cingthuilawk: Capa a lungkaang e ni teh,  
a na pa a lunghawi sak. Hatei, capa ka pathu e teh,  
a manu lung ka mathout sakkung doeh.
- 2 Thoenae lahoi pâkhueng e hnopai teh, hawinae awmhoeh.  
Hatei, lannae ni teh duenae koehoi a rungngang.
- 3 BAWIPA ni tamikalannaw a pasai teh,  
tamikathoutnaw ngainae hah a tâkhawng pouh.
- 4 Pangaknae ni mathoenae a tâco sak teh,  
hratbatnae ni tawntanae a tâcokhai.
- 5 Kawmpoi tueng navah rawca ka pâkhueng e teh,  
a lungkaang e capa doeh.  
Canga lahun nah ka ip e capa teh  
yeirai ka po sakkung doeh.
- 6 Tamikalan lû daw yawhawinae ao teh,  
tamikathoutnaw e pahni teh rektapnae hoi akawi.
- 7 Tamikalannaw pahnimhoehnae heh yawhawinae lah ao han.  
Hatei, tamikathoutnaw e min teh a pawk han.
- 8 Tami lungkaang ni teh kâpoelawknaw a lungthin hoi a dâw,  
hatei, a lawk kapap e tamipathu teh a rawp han.



- 9 Lannae lahoi ka cet e tami teh karoumcalah a cei,  
hatei lam longkawi ka dawn e teh panue lah ao han.
- 10 Mit cumasipnae ni lungmathoenae a tâco sak,  
lawk kapap e tamipathu teh a rawk han.
- 11 Tamikalan e pahni teh hringnae tuiphuek doeh.  
Hatei, tami kahawihoehnaw e pahni teh moikainae ni a ramuk.
- 12 Hmuhmanae ni kâpohoehnaw e tâco sak.  
Hatei, lungpatawnae niteh, yonnae pueng a ramuk pouh.
- 13 Thaipanueknae ka tawn e pahni daw  
lungangnae hah hmu e lâh a o,  
hatei, hemnae bongpai teh  
thaipanueknae ka tawn hoe e a hnukthun vah a bo.
- 14 Tami a lungkaangnaw niteh, thouthainae heh a pâkhueng awh,  
hatei, tamipathu e pahni niteh, rawknae hah a hnai.
- 15 Tami katawntanaw hanelah teh,  
a tawntanae hah ka cak e khopui lah ao teh,  
tamimathoenaw rawknae teh, a mathoenae doeh .
- 16 Tamikalan thaw tawknae ni hringnae a tâcokhai teh,  
tamikathoutnaw e tawkpheu teh, thoe khangnae hah doeh.
- 17 Cangkhainae ka tarawi e teh, hringnae lamthung daw ao.  
Hatei, yuenae ka ek e teh, lamthung ka phen e doeh.
- 18 Hmuhmanae hah laithoe deinae pahni hoi ka ramuk e tami,  
ayâ min mathoe nahanelah ka dei e tami teh tamipathu doeh.
- 19 Lawk pap pawiteh, payon e hai a pap.  
Hatei, a pahni ka cakuep e tami teh tami a lungkaang e doeh.
- 20 Tamikalan e lai teh, kahawi e ngun patetlah ao teh,  
tamikathout e lungthin teh aphu awm hoe.
- 21 Tamikalan e pahni ni tami moikapap a kaw.  
Hatei, tamipathu teh lungangnae a vout dawkvah a due.
- 22 BAWIPA yawhawinae ni tami a tawnta sak teh,  
lungmathoenae thokhai boihoe.
- 23 Tamipathu hanelah teh, yonnae sak e heh a nawmnae lah a coung.  
Hatei, thaipanueknae ka tawn e niteh, lungangnae a tawn.
- 24 Tamikathout teh a taki e patetlah a lathueng a pha vaiteh,  
tamikalan teh a ngai e hah poe lah ao han.
- 25 Bongparui a kâkaven toteh, tamikathoutnaw teh a kahma han.  
Hatei, tamikalan ni teh a yungyoe adu hungnae a tawn.
- 26 Tami pangak patoun e teh, misurtui kathut e ni hah a kip sak e hoi,  
hmaikhu ni mit a ut e patetlah doeh ao.
- 27 BAWIPA takinae ni hringyung a saw sak, hatei,  
tamikathout e hringyung teh duem sak lah ao han.
- 28 Tamikalan ni ngaihawi e teh lunghawinae lah ao,  
hatei, tamikathout e ngaihawinae teh a kahma han.
- 29 Tamikalan hanelah BAWIPA e lamthung teh thaonae doeh.  
Hatei, thoenae ka sak e teh, rawkkahmanae koe a pha han.
- 30 Tamikalan teh hmuen daw hoi nâtuék hai puen lah awm mahoe.
- 31 Tamikalan e pahni ni lungangnae a tâcokhai,  
hatei ka longkawi e lai teh, tâtueng pouh lah ao han.
- 32 Tamikalan e pahni ni ngai kawi e hno hah a panue,  
hatei tamikathout e pahni niteh,



kâtarannae lawk doeh ouk a dei.

## 11

- <sup>1</sup> Kânging hoeh e yawcu teh BAWIPA hanelah panuet a tho teh,  
kânging e bangnuenae teh a ngai e lah ao.
- <sup>2</sup> Kâoup navah yeiraiponae ao teh,  
kârahnoum navah lungangnae ao.
- <sup>3</sup> Tamikalan teh yuemkamcunae ni a hrawi han,  
hatei, yuemkamcu hoeh e khopouknae niteh  
amamouh a raphoe han.
- <sup>4</sup> Lungkhueknae tueng navah hnopai teh cungkeihoeh,  
hatei lannae ni teh duenae koehoi a rungngang han.
- <sup>5</sup> Lannae ni teh toun kaawm hoeh e naw hah lam kalan a pâtue han,  
hatei, tamikathoutnaw teh  
thoenae dawk letlang a rawp awh han.
- <sup>6</sup> Tamikalannaw teh lannae ni a rungngang awh han,  
hatei, yuemkamcu hoeh e naw teh  
amamae ngainae dawk a kâman awh han.
- <sup>7</sup> Tamikathoutnaw a due awh toteh  
a ngaihawi awh e puenghai a kahma vaiteh,  
tamikalanhoehnaw e ngaihawinae puenghai a kahma han.
- <sup>8</sup> Tamikalan teh runae thung hoi a hlout vaiteh,  
hote runae teh tamikathoutnaw ni a pang awh han.
- <sup>9</sup> Cathut ka taket hoeh e niteh, a pahni hoi a imri ouk a raphoe,  
hatei, tamikalan teh thouthainae lahoi rungngang lah ao han.
- <sup>10</sup> Tamikalan ni hawinae a coe navah khobuem a konawm awh,  
hatei, tamikathout a due toteh a lunghawi awh.
- <sup>11</sup> Tamikalan ni yawhawi a coe navah khopui hai tawmrasang lah a o,  
hatei, tamikathoutnaw e pahni ni teh ouk a raphoe.
- <sup>12</sup> Lungangnae ka vout e tami ni teh a imri hah ouk a dudam,  
hatei, thaipanueknae ka tawn e teh duem ao.
- <sup>13</sup> Yuengyoe ka pai ni teh lawk kapap e tami ni hrolawk hah  
ouk a pâpho, hatei, yuemkamcu e ni teh ouk a hro.
- <sup>14</sup> Pouknae kahawi poenae a ohoeahnae koe  
khocanaw ouk a kahma teh,  
pouknae kahawi poenae apapnae koe teh  
khocanaw rounnae a coe awh.
- <sup>15</sup> Panue hoeh e tami panuesaknae teh a khang han, hatei,  
lawkpanuesaknae dawk kut tambeinae  
ka ngai hoeh e teh a hlout han.
- <sup>16</sup> Pahrennae ka tawn e napui ni barinae a coe,  
hatei, a thakasai e tongpa ni teh tawntanae a coe.
- <sup>17</sup> Pahrennae ka tawn e tami ni a hringnae han lah hnokahawi a sak,  
hatei, tamikathout teh  
a takthai hanelah runae kapoekung doeh.
- <sup>18</sup> Tamikathout ni dumnae phu ouk a hmu awh,  
hatei, lannae cati katukkungnaw ni tawkphu katang teh  
a coe awh han.
- <sup>19</sup> Lannae ni hringnae lamthung dawk tami a hrawi e patetlah,  
thoenae ka sak e ni ouk a duekhai.
- <sup>20</sup> Lungthin ka longkawi e teh BAWIPA hanelah panuet a tho,  
hatei, tamikalan kakuepcingnaw e hringnae teh



- amamouh letlang lunghawinae doeh.
- 21 Lungkânging lah ao awh nakunghai,  
tamikathout teh rek laipalah awm mahoe.
- 22 Hatei, tamikalannaw e canaw teh hloutsak lah ao han.  
A meihawi eiteh pouknae ka tawn hoe e napui teh,  
vok hnawng daw suikuthrawt bang pouh e patetlah doeh ao.
- 23 Tamikalan ni ngainae teh hawinae dueng doeh,  
hatei, tamikathout ni a ring e teh lungkhueknae dueng doeh.
- 24 Thouk ka poe e teh, thouk a tawnta,  
hatei moikapap a pâkhueng eiteh, ka mathoe e tami hai ao.
- 25 Hring ka pasoung e teh tawnta sak lah ao han.  
Ayâ tui ka awi e teh ama hai tui awi lah ao han.
- 26 Cakang ka haw e tami teh ayâ ni thoe a bo han.  
hatei, kayawtkung koe teh yawhawinae ao han.
- 27 Hawinae ka tawng katang e ni barinae a coe han.  
hatei, thoenae ka tawng koe teh runae a pha han.
- 28 Hnopaï kâuep e teh a rawp han,  
hatei tamikalan teh phokung patetlah dikhring han.
- 29 Ma e imthung runae ka poe e ni a coe e râw teh kahli lah ao vaiteh,  
tamipathu teh a lungkaangnaw koe san lah ao han.
- 30 Tamikalannaw e a paw teh hringnae thing paw lah ao teh,  
muitha ka man e teh tami a lungkaang e doeh.
- 31 Tamikalan patenghai talai van reknae khang pawiteh,  
cathutlaipa e hoi tamikayon teh  
banghloimaw hoe a khang han vai.

## 12

- 1 Cangkhaïnae ka ngai e teh panuena hah a ngai toe,  
hatei yuena ka hmuhma e teh tamipathu doeh.
- 2 Tami kahawi ni teh BAWIPA ni ngaikhai e hah ouk a hmu,  
hatei hawihoe hnae sak hanelah kakâcainaw teh  
yonpen lah ao awh han.
- 3 Hawihoe hnae ni tami caksak boi hoe,  
hatei tamikalan e adu teh tahruet thai lah awm hoe.
- 4 Napui kahawi teh a vâ hanelah bawilukhung lah ao,  
hatei yeirai ka po sak e napui teh  
a vâ e hru ka hmawnsakkung doeh.
- 5 Tamikalan pouknae teh a lan,  
hatei tamikathoutnaw e pouknae teh dumpyenna doeh.
- 6 Tamikathoutnaw e lawk teh,  
thei hanelah pawm awh sei, tie hah doeh.  
Hatei tamikalan e pahni ni teh a rungngang han.
- 7 Tamikathout teh tâkhawng lah ao teh awm hoe toe,  
hatei tamikalan e imthung teh a cak han.
- 8 Tami a lung a ang awh e patetlah rip oup lah ao,  
hatei a lungthin ka longkawi e teh dudam lah ao han.
- 9 Amahoima a kâoup teh ca hane kaawm hoe e tami hlah teh,  
apinihai oup laipalah mae thaw duem ka tawk e bet ahawihnawn.
- 10 Tamikalan ni teh amae saringnaw hah a pasai,  
hatei tamikathout teh a pahrennae daw patenghai a moikai.
- 11 Amae laikawk ka thawn e ni kaboumlah a ca han,



- hatei ayawmyin lah kho ka sak e tami teh  
thaipanueknae ka tawn hoe e tami doeh.
- 12 Tamikathout ni tamikathoutnaw e tangkhek hah a doun awh,  
hatei tamikalannaw e kung ni teh apaw a paw sak.
- 13 Tamikathout teh amae ekae dawk ouk a kâman,  
hatei tamikalan teh runae thung hoi ouk a hlout.
- 14 Tami ni amae pahnipaw hah kaboumlah a ca han,  
amae a kut hoi a tawk e a paw hai poe lah ao han.
- 15 Tamipathu ni amae lamthung hah kalan poung e lah a pouk,  
hatei pouknae poe e ka ngâi e tami teh a lungkaang e doeh.
- 16 Tamipathu e lungkhueknae teh tang a kamnue,  
hatei kahawicalah kho ka pouk e ni teh kayanae hah ouk a ramuk.
- 17 Lawkkatang ka dei e ni lannae a kamnue sak,  
hatei kapanuekkhaikung kaphawk niteh  
kadumyennaw hah a kamnue sak.
- 18 Tahloi hoi thut e patetlah lawk ka dei e ao awh,  
hatei tami lungkaangnaw e lawk ni teh a dam sak.
- 19 Lawkkatang pahni teh a yungyoe caksak lah ao han,  
hatei laithoe deinae lai teh dongdengca hanelah doeh.
- 20 Hawihoehnae pouknae lungthin dawk dumyenna a,  
hatei rounnae kadeikungnaw ni konawmnae a tawn awh.
- 21 Tamikalan koe thoenae phat mahoe,  
hatei tamikathout teh thoenae hoi a kawi han.
- 22 Laithoe pahni teh BAWIPA ni a hmuhma e doeh,  
hatei kalan lah ka tawk e teh lunghawikhai e lah ao.
- 23 Kho ka pouk thai e tami ni teh a panue e patenghai a hro rah,  
hatei tamipathu e lungthin ni teh pathunae dueng doeh a pâpho.
- 24 Tami ka hratbat e kut ni a uk han,  
hatei ka pangak e teh lawkceng vaiteh  
thama lahoi tawk sak lah ao han.
- 25 Khopouk papnae ni lungmathoenae a tâco sak,  
hatei lawkkahawi ni tami konawm sak.
- 26 Tamikalan ni teh a imri hah lamthung a patue,  
tamikathout ni teh lam a phen sak.
- 27 Tami ka pangak niteh, kahrawng a cei ei,  
moi thokhai e boehai cat mahoe.
- 28 Lannae lamthung dawk hringnae ao teh,  
hote lamthung dawk teh duenae awm hoe.

### 13

- 1 Capa lungkaang ni teh na pa e cangkhae hah alawkpui lah a ta,  
hatei kadudamnaw ni teh cangkhae hah ngai awh hoe.
- 2 Tami ni amae pahnipaw hah kahawicalah a ca han,  
hatei yuemkamcu hoe e tami teh rektapnae hoi a kâkaw han.
- 3 A pahni ka ring e ni teh a hringnae hah a ring toe,  
hatei ka kaw lah a kâko ka ang e teh rawknae koe a pha han.
- 4 Tami pangaknaw ni teh a ngai poung awh ei banghai tawn awh hoe,  
hatei tami kahratbat e teh tawnta sak lah ao han.
- 5 Tamikalan ni teh laithoe dei e a hmuhma,  
hatei tamikathout teh panuet ka tho e hoi  
kayanae kaphawtkung doeh.
- 6 Toun han kaawm hoe e lamthung ni lannae a ring,



- hatei thoena ni tamikayon a tâkhawng.
- 7 Tami ka tawnta lah a kâpouk ei banghai ka tawn hoeh e tami ao,  
hatei kamathoe poungh lah a kâpouk ei ka tawnta poungh e ao.
- 8 Tami ka tawnta e ni kâratang nahane hnopai a tawn,  
hatei mathoe ni yuena kâhmo boihoe.
- 9 Tamikalannaw e angnae teh kahawi poungh e angnae doeh,  
hatei tamikathoutnaw e hmaiim teh a due han.
- 10 Kâoupnae dawh doeh kâyuenae a tâco,  
hatei pouknae kahawi poe e tarawinae teh lungangnae doeh.
- 11 Kamsoumhoehe lah hnopai la e teh tang a kahma han,  
hatei panki laihoi hmu e hnopai teh a pung han.
- 12 Ring e hno tang hmu hoeh e ni lung a pataw sak,  
hatei ngaikuepnae teh hringnae thingkung doeh.
- 13 Lawk banglahai ka noutna hoeh e teh rawk sak lah ao han,  
hatei kâpoelawh e ka bari e teh tawkpou poe lah ao han.
- 14 Tami lungkaangnaw e kâpoelawh e teh  
hringnae tuiphuek lah ao teh,  
duena karap rounnae lamthung lahai ao.
- 15 Thaipanueknae ni minhmai kahawi a poe,  
hatei yuemkamcu hoeh naw e lamthung teh a ru poungh.
- 16 Kho kapoukthai e pueng ni panuena hoi a kâroe awh,  
hatei tamipathu ni teh a pathuna e kamnu sak.
- 17 Patoune kathout teh runa dawh a rawp,  
hatei yuemkamcu e laice ni teh damnae a thokhai.
- 18 Tounnae banglahai ka ngaihoeh e tami koe  
voutnae hoi yeiraipona e pha han,  
hatei tounnae alawkpui lah ka tat e teh bari lah ao han.
- 19 Ngaikuepnae teh a radip, hatei payonnae rounnae  
hateh tamikathoutnaw ni a hmuhma awh.
- 20 Tamilungkaangnaw hoi kamyawng e teh a lung a ang han,  
hatei, tamikathoutnaw hoi kamyawng e teh a rawk han.
- 21 Tamikayon teh thoena ni a pâlei,  
hatei tamikalan teh hawinae a pang han.
- 22 Tamikahawi ni teh a ca catounnaw hanelah râw a parâw pouh,  
hatei tamikayonnaw e hnopai teh  
tamikalannaw hanelah pâkhueng lah ouk ao.
- 23 Tamimathoe ni laikawh thawnnae lahoi rawka moi ao,  
hatei thoena dawh doeh rawknae koe ouk pha awh.
- 24 Bongpai ka hno ngai hoeh e teh a capa ka hmuhma e lah ao,  
hatei a capa lung ka pataw e ni teh a nawca hoi ouk a yue toe.
- 25 Tamikalan teh a von a paha,  
hatei tamikathout teh a vonhlan han.

## 14

- 1 A lungkaang e napui ni teh a im hah a sak,  
hatei ka pathu e ni teh amae kut hoi ouk a raphoe.
- 2 Kalanlah ka hring e ni BAWIPA a bari,  
hatei a hringnae ka longkawi e ni teh a dumdam.
- 3 Tamipathu e pahni dawh kaisuena bongpai ao,  
hatei tamilungkaang e pahni ni teh kânguena e poe.
- 4 Maitotan ohoe hnae koe maito im a thoung,



- hatei moikapap pungnae teh maitotha dawk doeh ao.
- 5 Yuemkamcu e ka panuekkhaikung teh laithoe dei hoeh,  
hatei kapanuekkhaikung kaphawk ni doeh laithoe ouk a dei.
- 6 Ka dudam e tami ni teh lungangnae  
ka tawng nakunghai hmawt mahoe,  
hatei kathaipanueknaw hanelah teh panuenae heh ayawica.
- 7 A pahni panuenae na hmu hoeh toteh,  
tamipathu teh cettakhai yawkaw.
- 8 Ma e coungnae panue e heh poukthainae ka tawn e lungangnae doeh,  
hatei tamipathunaw e pathunae teh dumnae doeh .
- 9 Tamipathu ni teh yonnae a panuikhai,  
hatei tamikalannaw koe ngaikhainae ao.
- 10 Lungthin patawnae heh lungthin ni doeh a panue,  
ayânaw ni teh lunghawinae hai hmawngkhai katang hoeh.
- 11 Tamikathout imthung teh ka rawk han doeh,  
hatei tamikalan e rim teh a kamhlawng han.
- 12 Tami pouknae lahoi teh lam kalan lah a kamcu eiteh,  
apoutnae koe lah duenae koe ka phat e lam hai ao.
- 13 Panui lahun nahai lung a mathoe teh,  
panuinae a poutnae heh lungmathoenae lah a coung thai.
- 14 Lungthin hoi hnuklah ka ban e teh, ama ngainae hoi a kawi han,  
hatei tamikahawi teh hot patet e lathueng vah  
ao dawkvah a lunghawi han.
- 15 Kamawngrame ni dei e pueng a yuem awh,  
hatei kâhruetcuwet e tami ni teh  
a cei nahane lamthung kahawicalah a pouk.
- 16 Tamilungkaang ni teh a taki dawkvah yonnae hah a roun,  
hatei tamipathu ni teh amahoima a kâyuem teh a taran a hawi sak.
- 17 Tami lungkaduem teh pathu laihoi a kâroe,  
hatei tamikathout e noenae teh hmuhmanae doeh.
- 18 Kamawngrame e coe e teh pathunae doeh,  
hatei kho ka pouk e teh panuenae kâmuksak lah ao.
- 19 Tamikahawi teh tamikahawi hmalah a tabut vaiteh,  
tamikathout teh tamikalan e takhang koe a tabut han.
- 20 Tamikathout teh a imri ni hai a hmuhma,  
hatei tami ka tawnta ni hui moi a tawn.
- 21 A imri ka dudam e teh tamikayon doeh,  
hatei tamimathoe ka pahren e teh a lungkahawi e lah ao.
- 22 Hnokathout ka pouk e teh lam a phen toung nahoehmaw,  
hatei lungmanae hoi lawkkatang teh  
hawinae kapouknaw hane doeh.
- 23 Tawknae pueng dawk meknae ao teh,  
pahni hoi dei rumram e teh voutnae doeh.
- 24 Tamilungkaangnaw e bawilukhung teh tawntanae doeh,  
hatei tamipathu pathunae hateh a pathunae doeh .
- 25 Kapanuekkhaikung katang ni teh hringnae a rungngang,  
hatei kapanuekkhaikung kaphawk ni teh laithoe ouk a dei.
- 26 BAWIPA takinae dawkvah a taranhawi laihoi a tha ao teh,  
a canaw ni kânguenae a pang awh han.
- 27 BAWIPA takinae teh hringnae tuiphuek lah ao teh,  
duenae karap dawk hoi kamlang sakkung lah ao.



- 28 Tamimaya koe siangpahrang barinae ao teh,  
tami younca koe e ukkung teh rawkphainae doeh.
- 29 A lung kasawe ni thaipanueknae a tawn,  
hatei tami lungkaduem e teh pathu tawmrasangnae doeh.
- 30 Lungthin damnae teh tak hanelah hringnae lah ao teh  
utsinnae teh hru ka rawk sakkung doeh.
- 31 Tamimathoe repcoungrae e teh  
ama kasakkung dudam e lah ao,  
hatei kasakkung ka bari e ni tami kavoutthoupnaw pahrennae a tawn.
- 32 Tamikathout teh a thoena e ni letlang a pâlei teh,  
tamikalan teh a duena e koe kânguena e tawn.
- 33 Thaipanueknae katawnnaw lungthin dawk lungangnae ao,  
hatei tamipathu e lungthung kaawm e teh kamnue sak lah ao toe.
- 34 Lanna e ni miphun a tawmrasang,  
hatei yonnae teh tami pueng hanelah min mathoena e doeh.
- 35 Tamilungkaang okhai e teh siangpahrang ni a ngai pouh,  
hatei yeirai ka po sakkung koe a lung ouk a khuek

## 15

- 1 Lawkkanem ni lungkhueknae a roum sak,  
hatei lawkkahram ni lungkhueknae a pâhlaw.
- 2 Tamilungkaang e lai ni teh, panuena e hah kalan lah ouk a hno,  
hatei tamipathu ni teh pathuna e hah  
a pahni dawk hoi ouk a tâco sak.
- 3 BAWIPA e mit teh hmuen tangkuem a kâhlai teh  
hnokahawi hoi hnokathout hah ouk a khet.
- 4 A tak ka dam e lai teh hringnae thingkung doeh,  
hatei lawkkahram ni teh lung a mathoe sak.
- 5 Tamipathu ni a na pa e cangkhaena e hah banglah ngai hoeh,  
hatei yuena e ka tarawi e tami teh kho ka pouk thai e doeh.
- 6 Tamikalan im vah hnopai moikapap ao teh,  
tamikathout ni a hmu e teh rucatna e hah doeh.
- 7 Tamilungkaang e pahni ni teh panuena e pung sak,  
hatei tamipathu e lungthin ni teh hottelah sak boihoeh.
- 8 Tamikathout ni thueng e teh BAWIPA hanelah panuet a tho,  
hatei tamikalan ni ratoum e teh a lunghawina e doeh.
- 9 Tamikathout hringnuen teh BAWIPA hanelah panuet a tho,  
hatei lanna e katarawinaw hah teh a lung a pataw.
- 10 Lam kalan kaphennaw teh puenghoi yue lah ao teh,  
yuena e kahmuhmanaw teh a due han.
- 11 Sheol hoi rawkphaina e teh BAWIPA hmalah a kamnue,  
tami canaw e lungthin teh hoe a kamnue han.
- 12 Ka dudam e tami teh yuena e ngai hoeh,  
tamilungkaang koehai cet ngai hoeh.
- 13 Lungthin nawmnae ni minhmai a pan sak teh,  
lungreithaina e teh lungreknae doeh.
- 14 Thaipanueknae lungthin ka tawn e ni panuena e ouk a tawng,  
hatei tamipathu ni teh pathuna e lawk hoi ouk a kâkaw.
- 15 Runa e kâhmo e tami hanelah teh hnin pueng kathout seng doeh,  
hatei lungthin kanawm e ni teh paw pou tonae lah ao.
- 16 BAWIPA taki laihoi younca tawn e teh



- baruengbaraw o laihoi moikapap tawn e hlak a hawihnawn.
- 17 Lungpatawnae lahoi ankahring hoi vai touh ca e teh,  
kâhmuhmanae koe maito buem pui ca e hlak ahawihnawn.
- 18 Tami lungkathout ni kâyuenae a tâcokhai,  
hatei ka panguep thai e ni teh a roun sak.
- 19 Kapangkawnaw e lamthung teh pâkhing hoi khak a cak,  
hatei tamikalannaw e lamthung teh a ngaca.
- 20 Capa a lungkaang ni teh a na pa a konawm sak,  
ka pathu e ni teh a manu a dumdam.
- 21 Lungangnae ka tawn hoeh e naw niteh  
pathunae heh a lunghawinae lah a o,  
hatei thaipanueknae katawnnaw teh kalandalah ouk a cei awh.
- 22 Kâpankhainae awm hoeh pawiteh  
noenae hai kangcoung thai hoeh,  
hatei kâpankhaikung pap pawiteh noenae a kangcoung.
- 23 Pahni hoi dei e lawk ni lunghawinae a tâco sak,  
a tue a pha torei dei e lawk teh ahawi poun.
- 24 Tamilungkaangnaw e hringnae lamthung teh kahlun lah a luen,  
hothateh rahim lae sheol lam dawk hoi a kamlang thainae doeh.
- 25 BAWIPA ni tami kâoupnaw e im hah a raphoe pouh han,  
hatei lahmainu imhmuen teh a caksak han.
- 26 Tamikathoutnaw e pouknae teh BAWIPA hanelah panuet a tho,  
hatei a lung kathoungnaw lawk teh thai a nawm.
- 27 Ka hounloun e ni ama imthung totouh runae a poe,  
hatei tadawngnho ka hmuhma e teh a hring han.
- 28 Tamikalan lungthin ni teh pato nahane hmaloe a kamtu,  
hatei tamikathout e pahni ni teh hnokathout ouk a tâco sak.
- 29 BAWIPA teh tamikathout koehoi ahla,  
hatei tamikalan e ratoumnaw teh ouk a thai.
- 30 Lunghawinae minhmai ni lungthin a nawm sak teh,  
kamthang kahawi teh hru hanelah hawinae lah ao.
- 31 Hring tounnae ka tarawi e tami teh  
tamilungkaangnaw koe pouh ao han.
- 32 Cangkhainae banglah ka pouk hoeh e tami teh  
amae hringnae banglah ka pouk hoeh e tami doeh,  
hatei yuenae alawkpui lah ka pouk e ni thaipanueknae a hmu.
- 33 BAWIPA takinae teh lungangnae cangkhainae lah o teh,  
barinae ao hoehnahlan kârahnoumnaw hmaloe ao.

## 16

- 1 Lungthin hoi pouknae teh tami e doeh,  
hatei laihoi bout deinae teh BAWIPA koehoi e doeh.
- 2 Tami hmuna pueng heh ama ni hmuna lahoi teh a thoung,  
hatei BAWIPA ni muitha hah yawcu dawka khang.
- 3 Na thaw teh BAWIPA dawka poe haw  
na pouknae caksak lah ao han.
- 4 BAWIPA ni bangpueng hai ama hanelah a sak.  
Tamikathoutnaw haiyah thoenae kâhmo hnin hanelah  
sak e lah ao.
- 5 A lungthin hoi kâoup e tami teh BAWIPA han lah panuet a tho,  
a lung kânging awh nakunghai, rek lah ao mingming han.



- 6 Lungmanae hoi yonthanae lawkkatang teh  
BAWIPA takinae lahoi tami ni yonnae ouk a ceitakhai.
- 7 Tami e hringnuen ni BAWIPA a lungyouk toreì teh,  
a taran hoi patenghai a kâpo sak.
- 8 Kamsoumhoeh lahoi moikapap tawn e hlak teh,  
lannae lahoi yitca tawn e ahawihnnawn.
- 9 Tami e lungthin ni amae lamthung ouk a pouk,  
hatei BAWIPA ni teh a khoktakan hah ouk a hrawi.
- 10 Siangpahrang pahni dawc Cathut lawk pâpho hane ao,  
lawkcengnae koe a pahni a payon sak hanelah awm hoeh.
- 11 Kânging e yawcu hoi khinglung teh BAWIPA e doeh,  
congko dawc e khinglung puenghai a kut thawtawknae doeh.
- 12 Thoenae lahoi sak e heh siangpahrang hanelah teh panueta tho,  
bangkongtetpawiteh, bawitungkhung teh  
lannae lahoi caksak lah ao.
- 13 Lannae pahni teh siangpahrang hanelah konawmnae lah ao teh,  
lawkkatang kadeinaw hah a lungpataw.
- 14 Siangpahrang lungkhueknae teh duenae patounenaw patetlah ao,  
hatei tamilungkaang ni teh a roum sak han.
- 15 Siangpahrang mithmaiang dawc hringnae ao,  
a ngaikhainae teh a hnukteng e kho tâmai patetlah ao.
- 16 Sui hlak hai lungangnae tawn e heh banghloimaw ahawi,  
hahoi ngun hlak hai thaipanueknae heh kârawi hanelah ao.
- 17 Tamikalannaw e lamthung teh yonnae ceitakhai e hah doeh,  
a lamthung ka ring e ni a hringnae a ring.
- 18 Rawk hoehnahlan kâoupnae ao teh,  
rawp hoehnahlan lunglennae muitha ao.
- 19 Kâoupnae lahoi lawphno kârei hlak teh,  
kârahnoumnae hoi ka rahnoumcalah o e ahawihnnawn.
- 20 Kâhruetcuetcalah hoi lawk ka tarawi e ni hnokahawi a hmu vaiteh,  
BAWIPA ka kâuep e teh tami yawkahawi e doeh.
- 21 Lungthin hoi a lungkaang e teh  
kho ka pouk e doeh tie lah ao vaiteh,  
lawkradip ni thoumthainae a pung sak.
- 22 Thaipanueknae heh ka tawn hanelah teh  
hringnae tuiphuek lah ao teh,  
tamipathunaw e cangkhaingnae teh pathunae doeh.
- 23 Tamilungkaang ni teh a pahni hah a cangkhai teh,  
a pahni hoi thoumthainae hah ouk a kâthap.
- 24 Lawkkahawi teh khoipha patetlah ao,  
hring nahanelah a radip teh hru hanelah damnae lah ao.
- 25 Tami pouknae lateh lamkalan lah a kamcu ei,  
apoutnae koe teh duenae lamthung doeh.
- 26 Thaw ka tawc e teh ama hanelah doeh a tawc,  
bangkongtetpawiteh a vonhlanmae pahni ni a patoun e doeh.
- 27 Cathut ka taket hoeh e ni thoenae tangkom a tai teh,  
a pahni teh hmaisaan patetlah ao.
- 28 Lungthin longkawi ni kâyuenae cati a kahei teh,  
tamcuelawc ka dei e ni hai huiko a kapek.
- 29 Kaisue e ni a imri a pasawtpanep teh,  
hawihoehnae lamthung dawc ouk a hrawi.



- 30 A mitmasip teh kahawihoehe dueng doeh a pouk,  
a pahni a kâroe sak teh thoenae dueng doeh a tâco sak.  
31 Lannae lamthung dawk hmu e lah awm pawiteh,  
sampo teh bawilennae bawilakhung doeh.  
32 Athakaawme tami hlak a lungkasaw e tami ahawihnawn,  
a hringnae kâcakuap thai e kaukung teh  
khopui ka lawm e hlak ahawihnawn.  
33 Congko dawc cungpam teh rayu lah ao,  
hatei laideitâtuengnae pueng teh BAWIPA e doeh.

## 17

- 1 Kâyue kâoun laihoi im dawc yikkawi e pawitona e bu hlakvah  
karoumcalah lahoi bukaro kam touh ca e ahawihnawn.  
2 A lungkaang e san ni yeirai ka phawt e capa hah a uk teh,  
hmaunawngghanaw hoi cungtalâh râw a coe han.  
3 Ngun sôlêi nahanelah manang, sui sôlêi nahanelah takhuenhmai,  
hatei BAWIPA ni lungthin a tanouk.  
4 Thoenae kasaknaw ni teh laithoe dueng a thai ngai awh teh,  
laithoe kadeinaw ni hai laithoe lawk a thai ngai awh.  
5 Tamimathoe ka dudam e ni kasakkung a dudam teh,  
ayânaw runae a kâhmo navah  
a lungkahawi e tami hai hlout mahoe.  
6 Mincanaw teh matawngnaw e bawilukhung doeh,  
camonaw bawilennae teh a napanaw doeh.  
7 Lawkkanem hoi tamipathu kamcu hoe, h,  
laithoe deinae pahni teh bawi hoi hoe kamcu hoe.  
8 Tadaawngno teh ka dâw e tami koe talung phukaawm hoi a kâvan,  
a kangvawi tangkuem koe hawinae a hmu.  
9 Lawkeknae ka ramuk pouh e ni lungpatawnae a tawng,  
hatei boutbout ka dei pouh e tami ni teh huiko a kapek.  
10 Tamipathu avai cum touh hem e hlak  
tamilungkaang vai touh yue e aphuoahnawn.  
11 Tamikahawihoe e ni kâtaran nahane dueng doeh a tawng,  
hatdawkvah patoune kathout hoi a kâhmo han.  
12 Tamipathu a pathu lahun nah kâhmo e hlak teh,  
a ca kahmat e tavom hoi kâhmo pawiteh bet ahawihnawn.  
13 Hawinae hah thoenae hoi ka pathung e tami teh  
hnokathout ni a imthung tâcawt takhai mahoe.  
14 Kâyuenae teh tuiim dawc hoi tui ka yu e patetlah ao,  
hatdawkvah kâyue hoehnahlan kâounnae hah roun lawih.  
15 Tamikayon a yon ka ngaithoum e tami hoi,  
tamikalan yon kapen e tami hah BAWIPA ni a panuet  
16 Tamipathu ni lungangnae a ngai hoe dawkvah,  
lungangnae ran nahane hnopai hah  
bangkongmaw ahni kut dawc poe han vaw.  
17 Hui ni teh nâtuék hai lung na pataw teh,  
hmaunawnggha teh runae kâhmo tueng nahanelah doeh a khe.  
18 Thaipanueknae ka tawn hoe e niteh  
kuttabei kâtambei hoi a hui hmalah lawk a kam.  
19 Lawkeknae ka ngai e ni teh kâyuenae hai a ngai,  
a longkha ka rasangsak e ni rawknae hah a tawng.



- 20 Dumyennae lungthin ka tawn e ni hnokahawi hmawt mahoe, laithoe ka dei e tami teh runae hoi a kâhmo han.
- 21 Tamipathu ka khe e tami teh amahoima a lungmathoe sak, ka pathu e capa ka tawn e tami teh konawmnae tawn hoeh.
- 22 Lungthin konawm e heh kahawipoung e tâsi hoi a kâvan teh, lungthin reknae ni hru a ke sak.
- 23 Tamikathout ni lannae lamthung phen hanelah a hnukkhu lahoi hno ouk a lawp.
- 24 Lungangnae teh thaipanueknae katawnkung hmalah ao teh, tamipathu e mit ni teh talai pout totouh ouk a khet.
- 25 Capa pathu e teh na pa lung kamathoutsakkung lah ao teh, kakhekung manu hanelah hai ka khat poung e lah ao.
- 26 Tamikalan rek hanelah awm hoeh, ka talue e hai a hawi nahlangva hem hanelah awm hoeh.
- 27 Panuena e ka tawn e ni lawk a kâsum teh, thaipanueknae ka tawn e teh roumnae muitha ka tawn e doeh.
- 28 Tamipathu hai duem awm pawiteh, tamilungkaang patetlah pouk e lah ao, a pahnicakuep pawiteh thaipanueknae ka tawn patetlah pouk e lah ao.

## 18

- 1 Amadueng kaawm e ni ama ngainae dueng a tawng teh, lungangnae pueng hai a taran.
- 2 Tamipathu ni thaipanueknae dawk konawmnae tawn laipalah a mae lungthin dueng a kamnue sak.
- 3 Tamikathout a tho toteh dudamnae ao, yeiraipona e hoi yuena e hai hmawi ao van.
- 4 Tami e pahni dawk hoi ka tâcawt e lawk teh kadung e tui patetlah ao teh, lungangnae tuikhu teh ka lawng e palang patetlah ao.
- 5 Tamikathout e minhmai khet lahoi tamikalan sung sak nahanlah lawkceng e heh hawihoe.
- 6 Tamipathu e pahni dawk hoi kâyuenae lawk a tâco teh a lawk ni hemnae hah a tâcosak.
- 7 Tamipathu e pahni teh ama rawknae lah ao teh, a pahni teh ama hanelah karap lah ao.
- 8 Tamcueklawk teh katuipounge rawca patetlah ao teh, von thung a thung totouh a kâen.
- 9 A thaw dawk ka pangak e teh karaphoekung e hmaunawngaha lah ao.
- 10 BAWIPA e min teh kacake imrasang lah ao, tamikalan ni a kâen teh roumnae a hmu.
- 11 Tami katawntanaw e tawntanae teh, amamouh pouknae dawkvah, kacake khopui, karasang e rapan lah a o.
- 12 Rawknae kâhmo hoehnahlan tami lungpouk a rasang teh, barinae ao hoehnahlan kârahnoumnae ouk ao.
- 13 Thai hoehnahlan lawk pathung e teh pathuna e hoi yeiraipona e doeh.
- 14 Tami e muitha ni a patawnae hah a khang thai, hatei muitha rek e teh apinimaw a khang thai han.



- 15 Kho ka pouk e lungthin ni panuenae hah a pang teh,  
tamilungkaang e hnâ ni panuenae hah a tawng.
- 16 Poehno poe e ni lam a kâko sak teh,  
kacuenaw hmalah na phakhai.
- 17 Amahoima hmaloe ka kâdei e teh  
tamikalan lah pouk e lah ao eiteh,  
a imri ni akung ouk a kheh.
- 18 Cungpam rayunae ni kâounnae a roum sak teh  
athakaawmnaw hah a roum sak.
- 19 Hmaunawnggha lungkuep sak hoeh e teh  
khopui tâ e hlak aruhnawn,  
lawk kâounnae teh sum hoi kâtaren e patetlah ao.
- 20 A pahni dawh hoi ka tâcawt e a paw hoi a von a paha vaiteh,  
a pahni paw hoi a lung a kuep han.
- 21 Hringnae hoi duenae teh lai bahu dawh ao teh,  
lai ka lungpataw e ni laipaw a ca han.
- 22 Yu kahmawt e ni hnokahawi a hmu teh,  
BAWIPA koehoi ngaikhainae ka pang e tami doeh.
- 23 Tamimathoe ni teh a kâhei, hatei ka tawnta e niteh  
lawk kahram lah ouk a dei.
- 24 Hui kapap ka tawn e teh hui kahawi lah  
ao van hanelah ao,  
hatei hmaunawnggha hlak kahnai e huiko hai ao.

## 19

- 1 A lawk ka longkawi e tamipathu hlak,  
mathoe laihoi yuemkamcu hringnae ahawihnawn.
- 2 Panuenae tawn laipalah hringnae hai hawi hoeh,  
a khok a hue ka rang e hai a payon thai.
- 3 A pathunae ni lamthung a payon sak teh,  
a lungthung hoi BAWIPA ouk a taran.
- 4 Hnopai ni huiko moi a sak,  
hatei tamimathoe teh a hui ni a ceitakhai.
- 5 Ka panuekkhaikung kaphawk teh rek laipalah tâcawt mahoe,  
laithoe ka dei e hai hlout mahoe.
- 6 Tami kapap ni bawi e lungyouk hanelah a kâcai awh,  
poehno ka poe e tami hai tami pueng ni a kamyawngkhai.
- 7 Tamimathoe teh a hmaunawnggha pueng ni hai a hmuhma,  
a huinaw natawng teh ahlanae koe doeh hoe ao awh,  
lawkkanem lahoi a pâlei ei nakunghai hoe a yawng takhai awh.
- 8 Lungangnae ka hmawt e ni hringnae a lungpataw teh,  
thaipanueknae ka pâkuem e ni hnokahawi a hmu han.
- 9 Ka panuekkhaikung kaphawk teh rek laipalah tâcawt mahoe,  
laithoe ka dei e hai a rawk han.
- 10 Hringnawnmae heh tamipathunaw hanelah kamcu hoe,  
san ni khobawi a uk e heh hoe kamcu hoe.
- 11 Poukpanueknae ka tawn e ni a lungsaw sak teh,  
kâtapoenae ka pahnim pouh e teh ama ka bawilen sakkung doeh.
- 12 Siangpahrang lungkhuek e teh sendek ka huk e patetlah ao,  
hatei a ngaikhainae teh hram dawh  
ka bawt e tadamtui patetlah ao.
- 13 Capa ka pathu e teh a na pa hanelah



- thoenae kaphawtkung lah ao teh,  
lai ka roe e yu teh tui ka yu e patetlah ao.
- 14 Im hoi tawntanae teh napanaw koehoi coe e râw doeh,  
hatei yu kahawi teh BAWIPA koehoi e doeh.
- 15 Thathoenae ni ihmu a tho sak,  
ka pangak e teh a vonhnam han.
- 16 Kâpoelawk ka tarawi e teh a hringnae a ring,  
hatei ka pahnawt e teh a due han.
- 17 Tamimathoe ka pahren e teh BAWIPA koe a cawi sak toe,  
a poe tangcounge e hno hah bout poe lah ao han.
- 18 Ngaihawinae ao navah na capa hah yue haw,  
a kahma nahanelah pouk hanh.
- 19 A lung puenghoi ka khuek sak e ni reknae a kâhmo han,  
bangkongtetpawiteh, na rungngang nakunghai  
boutbout rungngang a ngai han doeh.
- 20 Kâpankhainae hah thai haw, cangkchainae hah dâw haw,  
bangkongtetpawiteh, hmalah na lung a ang han.
- 21 Tami e lungthin ni hno moikapap a kâcai,  
hatei BAWIPA e khokhangnae dueng doeh kangning han.
- 22 Tami ni a ngai poung e teh pahrennae hah doeh,  
laithoe dei e hlak mathoe e ahawihnawn.
- 23 BAWIPA takinae ni hringnae koe lah a ceikhai,  
hote hringnae ka tawn e teh a lung a kuep vaiteh,  
hnokathout ni thosin mahoe.
- 24 Tami ka pangak ni a kut a kâyp teh  
rawca a kâtu hane boehai ngai hoe.
- 25 Ka dudam e tami hah hem haw,  
kamawngrame tami teh a kâhlaw yawkaw han doeh,  
a lungkaang e tami hah yue haw patopatang han
- 26 Na pa roedeng ka poe ni teh manu ka hrek e teh,  
yeiraipone hoi min mathoenae ka phawt e capa doeh.
- 27 Ka capa cangkchainae thai e heh na kâhat payon pawiteh,  
lungangnae lamthung na phen han doeh.
- 28 Cungkeihoehe kapanuekkhaikung ni  
lawkcengnae kalan a dudam teh,  
tamikathout e pahni ni payonpakainae a payawp.
- 29 Lawkcengnae heh kadudamnaw hanelah hruek e lah ao teh,  
hemnae bongpai teh tamipathunaw e hnukthun hane doeh.

## 20

- 1 Misurtui teh ayâ ni panuikhainae doeh,  
yamu teh kâyuenae doeh,  
hot patet e hno ni tami lungang sak boihoe.
- 2 Siangpahrang lungkhuek e teh sendek ka huk e patetlah ao,  
a lung ka khuek sak e tami teh a hringnae hanlah runae doeh.
- 3 Kâyuenae karoumsakkung teh bari a kamcu,  
tamipathu ni kâhemnae pou a kamtawng.
- 4 Tami ka pangak ni a pâding dawkw laikaww kanaww ngaihoe,  
canga toteh a ca hane banghai tawn mahoe.
- 5 Tami lungthin hoi pouknae teh ka dungpoung e tui hoi a kâvan,  
hatei thaipanueknae ka tawn e ni teh haw hoi a tâco sak han.



- 6 Tami kapap ni amamouh hawinae dueng doeh ouk a dei awh,  
hatei apinimaw yuemkamcu e a hmu thai han.
- 7 Tamikalan teh yuemkamcu lah ouk a hring,  
a canaw ni hai ahnie yawhawi ouk a hmawng awh.
- 8 Lawkcengnae tungkhung dawk ka tahung e siangpahrang ni,  
a mithmu e hnokathout pueng koug a takhoe.
- 9 Ka lungthin ka thoung sak toe,  
yon hoi ka hlout toe telah apinimaw a dei thai.
- 10 Yawcu kânginghoehe hoi khinglung ka kuep hoeh e teh  
BAWIPA hmalah panuet a tho.
- 11 Camo hai a tawk e lahoi panue thai,  
a tawk e hno a thoung hoi a lan e lahoi bangnue thai.
- 12 Thaithainae hnâ hoi hmuthainae mit heh  
BAWIPA ni a sak e doeh.
- 13 I e hah lungpataw hanh na mathoe han,  
na mit pakkaw lah khenhaw! cakhuem rawca na tawn han.
- 14 Hno karankung ni hawihoeheh ati,  
hatei a cei hnukkhu a ran e hah a kâoupkhai.
- 15 Sui hoi talung phukaawm moikapap ao,  
hatei panuenae pahni teh talung phukaawm e lah ao.
- 16 Tamitavan hanelah amahkhankung teh angki amahkhan  
nahanelah la pouh lah ao vaiteh napui koe poe naseh.
- 17 Dumnae vaiyei teh a tui eiteh,  
a ca hnukkhu a kâko dawk sadi hoi a kawi han.
- 18 Noenae heh kâpankhai hnukkhu caksak lah ouk ao,  
kahawicalah kâpan hnukkhu na taran hah tuk.
- 19 Yapliyaplap kaawm e tami ni arulawk hah ouk a pâpho,  
hatdawkvah a lawk ka pâhnan e tami hoi kamyawng hanh.
- 20 Apipatethai, a manu hoehpawiteh a na pa thoe ka bo e teh,  
khohmo um a hmaiim a due pouh han.
- 21 Râw hah hmaloe pang thai eiteh,  
apoutnae koe yawhawinae lah awm hoeh.
- 22 Moi ka pathung han telah tet hanh,  
BAWIPA hah ring haw, ama ni na rungngang han.
- 23 Khinglung kâvan hoeh e heh BAWIPA mithmu vah panuet a tho teh,  
kânging hoeh e yawcu hai hawihoeheh.
- 24 Tami ceinae lamthungnaw heh BAWIPA ni a sak e doeh,  
hatdawkvah tami ni ama ceinae lamnaw hah  
bangtelamaw a panue thai han.
- 25 Hetheh poehno kathoung doeh telah  
lungrang laihoi dei e teh tami hanelah karap doeh,  
lawkkam hnukkhu pankângainae ouk ao.
- 26 A lungkaang e siangpahrang ni tamikathoutnaw hah  
a kâyatsak teh lengkhok hoi a coungroe.
- 27 Tami e muitha teh BAWIPA e hmaiim doeh,  
a lungthin thung e pueng pheng a tue.
- 28 Lungmanae hoi lawkkatang ni siangpahrang teh a kountouk,  
a bawitungkhang teh lungpatawnae lahoi kangdue sak lah ao.
- 29 Thoundounnaw e bawilennae teh a thaonae doeh,  
matawngnaw e kamcunae teh a sampo doeh.
- 30 Puenghoi hemnae ni hno kathout a thoung sak,



hemnae ni thung lah von daw k e pueng hai a thoung sak.

## 21

- 1 Siangpahrang lungthin teh tui ka lawng e patetlah ao teh,  
BAWIPA kut daw k ao dawkvah, a nginae koe lah a lawng sak.
- 2 Ma e hmunae daw k teh mae hringnuen heh a lan telah pouk awh,  
hatei BAWIPA ni lungthin heh yawcu daw k a khing.
- 3 Lannae hoi kânging lah sak e heh  
thuengnae hla k BAWIPA ni a ngaihnawn.
- 4 Kâoupnae minhmai hoi lunglennae lungthin hoi  
tamikathoutnaw e hmaiim teh yon doeh.
- 5 Tami ka hratbat e pouknae ni tawntannae a tâcokhai,  
hatei kâhruetcu et hoe h e pouknae ni voutnae a tâcokhai.
- 6 Laithoe dei lai hoi hmu e hnopai teh  
duenae ka tawng ni teh kahmat e patetlah ao.
- 7 Tamikathoutnaw e lawpnae ni amamouh a raphoe han,  
bangkongtetpawiteh kânginglah lawkcengnae hah a pahnawt awh.
- 8 Tamikayon e lamthung teh a longkawi,  
hatei tamikalan hanelah teh a taw k e hah kalan e doeh.
- 9 Ka hrawang e yu hoi im kalen daw k o hla k teh,  
lemphu imtak in koe awm pawiteh bet ahawihnawn.
- 10 Tamikathout hringnae ni hnokathout a ngai,  
a imrinaw ni ahnie pahrennae hmawt awh hoe h.
- 11 Kadudame taminaw re knae daw kvah  
kamawngrame ni lungang a kâla awh,  
hatei tamilungkaangnaw cangkhai navah panuenae a hmu awh.
- 12 Tamikalan ni tamikathout imthung hah kahawicalah a pouk,  
hatei Cathut ni tamikathoutnaw teh  
amamae thoenae la hoi a tâkhawng.
- 13 Tamimathoe hramnae law k thai ngai laipalah  
a hnâ ka tabuem e teh,  
ama hai a hram toteh apinihai thai pouh mahoe h.
- 14 Arulaho i poe e poehno ni lungphuenna e,  
a lungtabue daw k poe e tadawng hno ni  
puengho i lungkhue knae a roum sak.
- 15 Kalan lah lawkcengnae e teh tamikalan hanelah konawmnae doeh,  
hatei yonnae kasaknaw teh rawknae koe a pha awh han.
- 16 Thaipanue knae lam kaphennaw teh  
tamikadoutnaw kamkhuengnae koe a kâhat van han.
- 17 Nawmnae dueng ka ngai e teh a mathoe han,  
misurtui hoi satui ka ngai poung e teh tawnta mahoe h.
- 18 Tamikathout teh tamikalan hanelah,  
Yuemkamcuhoeh e teh tamikalan ratangnae lah ao.
- 19 A lungkaduem ni teh ka hrawang e yu hoi o hla k teh,  
ramkenae koe awm pawiteh bet ahawihnawn.
- 20 Tamilungkaang onae koe hno ngai kaawm hoi satui ao teh,  
tamipathu ni teh a kaseikasak.
- 21 Lannae hoi lungmanae katawngnaw ni hringnae hoi  
lannae hoi barinae ouk a hmu awh.
- 22 Tamilungkaang ni kacakpounge khopui daw k a kâen teh,  
khocanaw ni a kângue e rapanim hah a tip sak.



- 23 A laihoi a pahni ka ring e teh runae thung hoi  
a hringnae ouk a hlout.
- 24 Tami moikai hoi kâoup e teh a min patenghai  
dudamkung telah a phung awh teh,  
kâoup lungkhuek laihoi ouk a kâroe.
- 25 Tami ka pangak e teh thaw a tawk ngaihoeh dawkvah,  
a doun e ni ama a thei.
- 26 Hnintangkuem nôe laihoi ao, hatei tamikalan niteh  
pasai laipalah a poe.
- 27 Tamikathout e thuengnae teh panuet a tho,  
hnokathout ngainae lungthin hoi thuengnae teh panuet hoe a tho.
- 28 Kapanuekkhaikung kaphawk teh takhoe lah ao han,  
hatei kapanuekkhaikung katang ni a panue e patetlah  
a dei e teh dâw lah ao han.
- 29 Tamikathout ni a minhmai tamundun lah a ta,  
hatei tamikalan ni a lamthung a cak sak.
- 30 BAWIPA taranlahoi lungangnae, thaipanueknae,  
hoi kâpankhainae awm hoeh.
- 31 Marangtan teh tarantuk hnin hanelah rakueng lah ao,  
tânae teh BAWIPA e doeh.

## 22

- 1 Hnopai moikapap hlak hai minhawinae heh rawi hanelah ao,  
tangka hoi sui hlak hai ayâ ni pahrennae heh  
ngaihnawn hanelah ao.
- 2 Tami ka tawnta hoi tamimathoe rei a tawn roi e teh,  
BAWIPA teh bangpueng kasakkung doeh.
- 3 Kâhruetcuat e ni teh hnokathout a hmu navah a kâhro,  
hatei kamawngrame ni teh a ceisin teh rek e lah ouk ao.
- 4 Kârahnounnae hoi BAWIPA takinae ni tawntanae hoi  
barinae hoi hringnae a tâcokhai.
- 5 Lam longkawi dawk teh pâkhing hoi karap ao teh,  
a hringnae lamthung ka ring e teh  
hotnaw hoi ahlanae koe doeh ao.
- 6 Camo ni a dawn hane lamthung pâtu haw,  
a matawng to hai phen mahoe toe.
- 7 Tami ka tawnta ni tamimathoe a uk,  
ka câwi e tami teh kacâwisakkung koe san lah ao.
- 8 Payonpakaina cati ka tu e ni lungmathoenae a a vaiteh,  
a lungkhueknae sonron a khoe han.
- 9 Pahrennae mit ka tawn e teh yawhawi a coe han,  
bangkongtetpawiteh tamimathoenaw ouk a kawkw toe.
- 10 Dudamnaw pâlei haw kâounnae tang a roum han,  
kâyuenae hoi kâpakungnae hai a roum han.
- 11 A lungthin ka thoung e teh,  
kamcu e lawk a dei dawkvah  
siangpahrang e hui kahawicalah ao han.
- 12 BAWIPA mit ni panuenae a kountouk,  
hatei yuemnae ka tawn hoeh e lawk teh ouk a takhoe.
- 13 Ka pangak e tami ni alawilah sendek ao,  
lam vah na kei han doeh, ouk a ti.
- 14 Napui kahawihoehe pahni teh kadunge tangkom doeh,



BAWIPA ni a panuet e teh hawvah a bo han.

- 15 Pathunae heh camo lungthin dawk a kâbet teh,  
yuenae bongpai ni ahlanae koe ouk a pâlei.  
16 Ma mek nahanelah tamimathoenaw ka rektap e hoi,  
katawntanaw ka poe e tami teh hoehoe a mathoe han.

### *Lungangnae lawknaw*

- 17 Tamilungkaangnaw e lawk heh kahawicalah thai nateh,  
na lungthin hoi kaie lungangnae hah dâw haw.  
18 Bangkongtetpawiteh, na thung hoi na pâkuem pawiteh  
hothateh lunghawinae doeh, na pahni dawk pou awm seh.  
19 Hottelahoi BAWIPA teh na kâuep thai han,  
sahnin vah nang koe na panuesak toe.  
20 Kâpankhainae hoi panuenae kahawi poung e hah  
na thut pouh toe nahoehmaw.  
21 Nang ni lawkkatang katang na panue vaiteh,  
nang koe patoun e naw hah lawkkatang lawk  
bout na dei pouh thai han.  
22 Mathoenaw e mathoenae hah thakâla hoi  
ahnie hno lawm hanh, ka cunathoehnaw hai  
kho longkha koe coungroe hanh.  
23 Bangkongtetpawiteh, BAWIPA ni ahnimae kong a pouk han doeh,  
ahnimae hno kalawmnaw e hringnae a lawp pouh van han.  
24 A lungkaduem e tami hah kamyawngkhai hanh,  
a lungkhuek thai poung e tami hai kamyawngkhai hanh.  
25 Ahnimae nuen na kamtu vaiteh,  
na hringnae a kâman han.  
26 Kut tambei e taminaw hoi laiba patho pouh hanelah  
lawk kâkam e taminaw koe bawk van hanh.  
27 Patho nahane na tawn hoeh pawiteh,  
na ikhun tawm awh vaiteh oun na la pouh awh han nahoehmaw.  
28 Na mintoenaw ni ung e  
khori hah takhoe hanh.  
29 Thaw kahawicalah ka tawk ni teh ka cuem e na hmu boi ou,  
siangpahrangnaw hmalah hai a kangdue han doeh,  
tami rumram e hmalah kangdout mahoe.

## 23

### *Namahoima kâcakuep*

- 1 Khobawinaw hoi rawca rei na ca toteh,  
na hmalah apimaw ka tahung tie kahawicalah pouk.  
2 Na kâso e lah na awm pawiteh,  
tahloi hoi na lawkron hah nue haw.  
3 Atuinae dueng pouk hanh,  
bangkongtetpawiteh dumyenna rawca doeh.  
4 Tawnta hanelah kâcai hanh,  
na panuenae kâuep hanh.  
5 Ka coung thai hoeh e hah na ngaihawi kawi namaw.  
Tawntanae ni amahmawk rathei a sak teh  
mataw patetlah kahlun lah koung a kamlang.  
6 Utsinnaw e rawca cat pouh hanh,  
ahnie rawcanaw hai nôe pouh hanh.



- 7 Bangkoktetpawiteh, a lung hoi a pouk e patetlah doeh ao,  
cat nateh net ati nakunghai a lungthin teh nang koe awm mahoe.
- 8 Na ca e hai na palo vaiteh,  
na oupnae hai a hrawnghrang lah ao han.
- 9 Tamipathu thainae koe lawk dei hanh,  
bangkongtetpawiteh na lungangnae lawk hah  
banglahai noutna mahoe.
- 10 Ayan e khorì hai takhoe hanh,  
naranaw e ram hai lawm hanh.
- 11 Bangkoktetpawiteh, ahnimouh ratangkung teh a tha ao,  
ahnimouh koelah kampang lahoi na taran payon vaih.
- 12 Cangkhainae koelah na lungthin poe nateh,  
panuenae lawk thainae koe na hnâpakeng haw.
- 13 Camo hah yue laipalah awm hanh,  
hem yawkaw dôt mahoe.
- 14 Bongpai hoi hem nateh a hringnae hah  
sheol dawh hoi runngang haw.
- 15 Ka capa na lungang pawiteh, ka lung ahawi katang han.
- 16 Bokheiyah, na pahni ni lawk kalan dei pawiteh,  
ka lung ahawi katang han.
- 17 Na lungthin ni tamikayon nôe hanh naseh,  
hatei kanîruirui BAWIPA takinae tawn haw.
- 18 Bangkoktetpawiteh, apoutnae teh ka phat han,  
na ngaihawì e teh ahrawnghrang lah awm mahoe.
- 19 Ka capa thai nateh lungang haw,  
na lungthin teh lamkalan dawh tat haw.
- 20 Misurtui kâsonaw hah kamyawngkhai hanh,  
moi kâsonaw hai kamyawngkhai hanh.
- 21 Bangkoktetpawiteh, yamuhri hoi moi kâso e teh  
a mathoe han, iparuinae ni tami napon a kâkhusak.
- 22 Kakhekung na pa e lawk hah ngâi nateh,  
na matawng toteh na manu dudam hanh.
- 23 Lawkkatang hah ran nateh yawt hanh, lungangnae hai,  
cangkhainae hai, thaipanueknae hai a sak.
- 24 Tamikalan ni a na pa puenghoi a lunghawisak,  
capa lungkaang ka khe e hai a lunghawi katang han.
- 25 Na manu hoi na pa teh lunghawi hoi awm awh naseh,  
kakhekung hai lunghawi naseh.
- 26 Ka capa na lungthin na poe haw,  
na mit ni ka onae nuen khen naseh.
- 27 Kâyawt e teh kadung poung e tangkom doeh,  
kahlong lae napui hai kabueng e tuikhu doeh.
- 28 A man thai e naw hah ouk a pawp,  
tongpa naw koe yuemkamcuhoehnae ouk a pungsak
- 29 Apimaw a lung ka mathout, apimaw kângaikâthung,  
apimaw ayâ hoi kâyue, apimaw ka phuenang,  
apimaw a khuekhaw awm laipalah hmâ ka cat,  
apimaw a mit ka paling tetpawiteh,
- 30 Yamu koe pou kaawm niteh,  
yamu aphunphun ouk kalawt e taminaw doeh.
- 31 Ka paling e yamu hah khen hanh,



- manang dawk kamlaw niteh,  
kamcu e yamu hah khen lah boehai khen hanh.
- <sup>32</sup> Apoutnae koe tahrún patetlah na khuek vaiteh,  
hrunthok patetlah na khue han.
- <sup>33</sup> Na mit ni napuinaw kathoute hmawt vaiteh,  
na lunghin ni lawk longkawi a dei han.
- <sup>34</sup> Bokheiyah, talí dawk ka ip e patetlah na awm vaiteh,  
long dawk yap e hni van ka ip e patetlah doeh na awm ti.
- <sup>35</sup> Na hem awh teh pataw hoe, na tam awh ei ka panuek hoe,  
nátuek vaimoe ka káhlaw vaiteh  
bout ka parui han vai na ti han doeh.

## 24

- <sup>1</sup> Tamikayonnaw hah nôe awh hanh,  
ahnimouh koehai kambawng hanh.
- <sup>2</sup> Bangkongtetpawiteh, rawk nahane dueng a pouk awh teh,  
runae kâhmo nahan dueng doeh a dei awh.
- <sup>3</sup> Lungangnae hoi im sak lah ao teh,  
thaipanueknae lahoi caksak lah ao.
- <sup>4</sup> Thouthainae lahoi rakhannaw teh aphukaawm niteh  
ngai kaawm e hnonaw hoi a kawisak.
- <sup>5</sup> Tamilungkaang e teh a tha ao,  
panuenae ka tawn e ni a tha ao sak.
- <sup>6</sup> Bangkongtetpawiteh, lungkaangnaw hoi kâpankhai e lahoi  
na taran na tâ vaiteh kâpankhaikung a papnae koe hloutnae ao.
- <sup>7</sup> Lungangnae heh tamipathu hanelah teh a rasang poung dawkvah,  
kho longkha koe dei hane panuek hoe.
- <sup>8</sup> Thoenae sak hanelah kâcai e tami teh,  
thoenae khokhankung telah kaw lah ao han.
- <sup>9</sup> Tamipathunaw e pouknae teh yonnae doeh,  
ayâ ka dudam e teh ayâ hanelah panuet a tho.
- <sup>10</sup> Runae na kâhmo navah na lungpout pawiteh,  
na tha a youn han.
- <sup>11</sup> Due hanelah a hrawi awh e hah rungngang awh nateh,  
thei hanelah a hrawi awh e hah ratang awh haw.
- <sup>12</sup> Thai haw, hetteh ka panuek hoe, na tet pawiteh,  
na lunghin yawcu daw kakhingkung ni pouk mahoe namaw.  
Na hringnae kountoukkung ni panuek mahoe namaw.  
Tamipueng a taw k awh e patetlah patho mahoe namaw.
- <sup>13</sup> Ka capa khoitui hah cat haw, bangkongtetpawiteh ahawi,  
ka radip e khoipha hah cat haw.
- <sup>14</sup> Hot patetlah, panuenae hoi lungangnae hai  
na hringnae hanlah tho van seh.  
Hot hah na hmawt pawiteh ngaihawi hane ao teh  
na ngaihawinae teh yawmyin lah awm mahoe.
- <sup>15</sup> Oe tamikathout, tamikalan onae im hah pawm hanh,  
a kâhatnae hmuen hai raphoe hanh.
- <sup>16</sup> Bangkongtetpawiteh, tamikalan teh vaisari touh  
ka rawm nakunghai bout a thaw hah,  
hatei tamikathout teh rawknae koe a rawp han.
- <sup>17</sup> Na taran a rawp navah na konawm hanh,



a kamthui navah na lunghawi hanh naseh.

- 18 Hatnavah, BAWIPA ni hmawt vaiteh,  
a lunghawi hoeh langvaih,  
hahoi ahni koe a lungkhueknae hai a roum sak thai.
- 19 Thoenae kasaknaw kecu dawh na lungpuen hanh,  
tamikathoutnaw hai ut hanh.
- 20 Bangkongtetpawiteh, tamikathoutnaw hanelah  
ngaihawinae awm hoeh,  
tamikathoutnaw e hmaiim teh padue pouh lah ao han.
- 21 Ka capa, BAWIPA hoi siangpahrang teh taket haw,  
kaletkalang kaawm e hah kamyawngkhai hanh.
- 22 Bangkongtetpawiteh, vaitahoi rawknae a pha han,  
ahnimouh roi e rawknae teh apinimaw a panue thai.

### *Lungangnae lawk alouklouknaw*

- 23 Het hai tamilungkaangnaw e doeh,  
lawkceng nah tami kapek e teh hawi hoeh.
- 24 Tamikathout koe, nang teh na lan, ka tet e teh,  
tamipueng ni thoebo vaiteh miphun pueng ni a panuet han.
- 25 Hatei, tamikathout ka yue e teh kabawpnae a tawn han,  
a lathueng yawhawinae kahawi a pha han.
- 26 Kalan lah ka pato e pahni teh  
tami pueng ni a paco han.
- 27 Alawilah na thaw hah kâcai haw,  
law thaw tawh hanelah kâcai haw, hathnukkhu na im hah sak.
- 28 A khuekhaw awm laipalah na imri taranlahoi  
kapanuekkhaikung lah awm hanh,  
bangkongtetpawiteh na pahni hoi na dum han namaw.
- 29 Ahni ni kai dawh a sak e patetlah ahni dawh ka sak han,  
amae moi rueng ka pathung han telah tet hanh.
- 30 Ka pangak law ka cei teh,  
thaipanueknae ka tawn hoeh naw e misur takha koe ka cei.
- 31 Pâkhing ni king a kayo, pho king a cak,  
rapan koug a tip toe.
- 32 Ka khet teh kahawicalah ka pouk,  
cangkhaingnae ao telah ka panue.
- 33 Dongdeng ka yan ei nei, dongdeng ka ip ei nei,  
kut tapam laihoi kâhat einei na ti lahun nah,
- 34 mathoenae ni imyin patetlah tho vaiteh,  
na voutnae teh ransa patetlah a tho han.

## 25

### *Solomon ni dei e lungangnae lawk alouknaw*

- 1 Hethaiyah, Solomon e cingthuilawh,  
Judah siangpahrang Hezekiah e taminaw ni  
patuen a thut awh e doeh.
- 2 Hro e hno teh Cathut bawilennae doeh,  
hatei hno pakhingpalang e teh siangpahrang bawilennae doeh.
- 3 Kalvan a rasang teh talai a dung e patetlah  
siangpahrang lungthin hai koug panuek thai hoeh.
- 4 Ngun ei hah takhoe haw,  
kahlunkung ni manang kahawi a sak thai han.



- 5 Siangpahrang hmalah hoi tamikathout hah takhoe pawiteh,  
a bawitungkhung teh lannae lahoi a cak han.
- 6 Siangpahrang hmalah mahoima kârasang sak hanh,  
siangpahrang hmuen koe hai kangdout hanh.
- 7 Na mit ni a hmu e bawitungkhung hmalah  
pahoung hanelah puen e lah na o hlak teh,  
hi tho, telah kaw e ahawihnawn.
- 8 Lawkcengnae hmuen koe karanglah cet hanh,  
bangkongtetpawiteh, na imrinaw ni  
yeirai na po sak vaiteh bangtelamaw na ti han.
- 9 Na imri hoi na lawk teh kâpankhai awh nateh,  
arulawk hah ayânaw koe dei awh hanh.
- 10 Hoehpawiteh ka thai e ni hoe pâpho vaiteh,  
yeirai na ponae hah hoe kamnuek langvaih.
- 11 Kamculah dei e lawk teh ngun manang dawk e  
suipaw hoi a kâvan.
- 12 Kahawicalah yuenae ka tarawi e tami teh,  
suihnacacp hoi sôlêi e sui hoi kamthoup e patetlah ao.
- 13 Kapatoungkung hanelah yuemkamcu lah  
kaawm e patoune teh canganae tadamtui patetlah ao,  
bangkongtetpawiteh a bawi lung a roun sak.
- 14 Ka poe han tihoi a kâoup hnukkhu  
poe laipalah kaawm e tami teh,  
khotui laipalah e tâmai hoi kahli hoi a kâvan.
- 15 Lungsaawnae ni lawkcengkung a tâ thai,  
lawkkanem ni hru a khoe thai.
- 16 Khoitui na hmu boimaw, na boum totouh duengma cat.  
Na kâso pawiteh na palo han.
- 17 Na imri koe ekvoi cet hanh, na hmawt vaiteh  
na hmuhma payon vaih.
- 18 A imri taranlahoi panuekkhaikung kaphawk lah kaawm e tami teh,  
bongpai, tahloi, kahran e pala hoi a kâvan.
- 19 Runae kâhmo lahun nah yuemkamcu hoeh e kâuep e teh,  
hâ kâkhoenae, hru kamhoutnae patetlah doeh ao.
- 20 A lungkamathout koe la ka sak e teh  
pâding nah angki ka rading e hoi hmâ dawk  
longtui awi e hawi a kâvan.
- 21 Na taran a vonhlan pawiteh,  
a ca hane rawca poe nateh tui kahran pawiteh  
nei hane tui poeh.
- 22 Bangkongtetpawiteh, hottelah na sak pawiteh  
a lû dawk hmaisaan na pâpawp pouh e lah ao teh,  
BAWIPA ni tawkpheu na poe han.
- 23 Atunglah e kahli ni kho a thokhai teh,  
tamcuk lawk deinae lai ni lungkhueknae minhmai a thokhai.
- 24 Ka hrawk'ang e yu hoi im kalen dawk o hlak teh,  
lemphu imtakin koe o e ahawihnawn.
- 25 Ahlanae koe e kamthang kahawi thai e heh,  
tuikahran e tami koe tuipading hoi a kâvan.
- 26 Tamikathout hmalah tamikalan lawk dei payon e teh tui pânut e,  
kapawk e tuikhu hoi a kâvan.



- 27 Khoitui ek kapap ca e hawi hoeh,  
hot patetlah mahoima bawilennae tawng e teh bawilennae nahoe.  
28 Ma e muitha ka uk thai hoeh e teh  
rapan tawn laipalah karawk e khopui hoi a kâvan

## 26

- 1 Kawmpoi e tadamtui hoi canganæ kho patetlah,  
tamipathu hoi barinae kamcu hoeh.  
2 Kamleng rumram e pusu hoi pingpit patetlah,  
a khuekhaw awm laipalah thoebo e teh api koehai bawt mahoe.  
3 Marang hanelah ruibongpai,  
la hanelah kammoumruï,  
tamipathu e keng hanelah bongpai teh a kamcu doeh.  
4 Tamipathu teh a pathunæ patetlah pato hanh,  
hoehpawiteh ama patetlah na awm payon vaih.  
5 Tamipathu teh a pathunæ patetlah pato,  
hoehpawiteh a lungkaang lah kâpouk payon vaih.  
6 Tamipathu koe lawk ka thui e tami teh  
amae khok ka tâtueng ni teh rawknae tui ka net e lah ao.  
7 Khokkhem e khoktakan a kânging hoeh e patetlah,  
tamipathu e pahni dawc cingthuilawk teh ao.  
8 Tamipathu bari e teh tâyaicung dawc  
hluemhluem kawm e patetlah doeh ao.  
9 Tamipathunaw ni dei e cingthuilawk teh  
yamuhri kut dawc ka um e pâkhing hoi a kâvan.  
10 Bangpuengpa kasakkung lentoe Cathut ni  
tamipathu hoi kâtapoe kung aphu a poe.  
11 Ui ni a palo bout a ca e patetlah tamipathu ni  
a pathunæ hah a kamnue sak.  
12 Ama pouknae dawc tamilungkaang lah ka kâpouk e na hmu ou.  
Hote tami koehoi hlak teh tamipathu koehoi  
ngaihawinae bet aohnawn.  
13 Tami pangak ni, lam dawc sendek ao,  
thongma vah sendek ao telah a ti.  
14 Tho teh takhang dawc a kâhei e patetlah  
tami pangak teh ikhun dawc a kâhei.  
15 Tami pangak ni rawca a kâyp teh  
a kâtu hane boehai ngai hoeh.  
16 Ka pangak e ni, kahawicalah khopouk thai e tami sari touh hlak  
ka lunganghnawn telah a kâpouk.  
17 Yuengyoe cei lahoi ayânaw e kong dawc ka bawc e tami teh  
ui hnâ ka kuen e hoi a kâvan.  
18 Na pacai e doeh na a tihoi,  
a imri ka dum e tami teh,  
19 hmaito, pala, duenæ hoi  
ka ka e tamipathu hoi a kâvan.  
20 Thing awm hoehpawiteh hmai a roum e patetlah,  
tamcuelawc deinae awm hoehpawiteh kâyuenæ hai a roum.  
21 Hmaisaaan ni hmaisaei a kamtawi sak,  
thing ni hmai a kak sak e patetlah,  
kâoun ka ngai e ni kâyuenæ a kamtawi sak.



- 22 Tamcuelkawh teh katuipounge rawca patetlah ao teh,  
von thung a kâen.
- 23 Apâhni pâhnan hoi lungthinkathout e tami teh,  
talai hlaam ngun hoi pâbing e hoi a kâvan.
- 24 Tami hmuhmanae ka tawn e tami ni a pahni hoi a hro teh,  
a lung thung dmyennae hah a hro.
- 25 Pahren lahoi, ati ei nakunghai yuem hanh,  
bangkongtetpawiteh a lungthung vah panuettho e sari touh ao.
- 26 A hmuhmanae hah dumnae lahoi ka hrawk nakunghai,  
thoenae teh taminaya ni panuenae koe  
kamnue sak lah ao han.
- 27 Tangkom kataikung teh a tai e tangkom dawh a bo han,  
talung kapaletkung koe talung bout a kamlei han.
- 28 Laithoe ka dei e ni a rektap e naw hah ouk a hmuhma,  
oupnae kaphawk ni rawknae a tâcokhai.

## 27

- 1 Tangtho e hnin hanlah kâoup hanh,  
bangkongtetpawiteh bangmaw a tâcokhai han tie na panuek hoe.
- 2 Namahoima laipalah ayâ ni na pholen naseh,  
nama e pahni ni laipalah alouke ni na pholen naseh.
- 3 Talung hai a ri teh sadi hai a ri,  
hatei tamipathu lungkhueknae teh hotnaw hlak a ri hnawn.
- 4 Lungkhueknae teh a mathoe,  
lungphuennae teh a matheng,  
hatei utnae teh apinimaw a khang thai han.
- 5 Hro e lungpatawnae hlak teh  
hmantang yue e ahawihnawn.
- 6 Hmâ na ka paca e hui teh yuem a kamcu,  
hatei taran ni na paco e teh dmyennae doeh.
- 7 A von ka paha tangcoun e ni teh khoipha patenghai  
ngai mahoe toe,  
hatei a von ka hlam e tami hanelah teh kakhat e patenghai a radip.
- 8 Ma e imlaw ka palum ngai hoe e teh,  
tava a tabu dawh kaawm ngai hoe e hoi a kâvan.
- 9 Satu hoi hmuitui ni lungthin a konawm sak teh,  
hui kahawi ni pouknae na poe e ni hringnae konawm sak.
- 10 Na pa e hui hoi nama e hui kapek hanh,  
runae na kâhmo navah na hmaunawngna im kuekluek cet hanh,  
ahlanae koe e na hmaunawngna hlak teh  
a hnainae koe e na hui a hawihnawn.
- 11 Na ka pacekpahlek e ka pathung thai nahanlah ka capa,  
lungang haw, ka lungthin konawm sak haw.
- 12 Tamilungkaang ni thoenae hah sut a hmu teh a kâhro,  
kamawngrame ni teh a kâphumsin teh rek e lah ouk ao.
- 13 Tamitavan hanelah amahkhankung teh  
a angki amahkhan nahanelah la pouh lah ao vaiteh  
napui koe poe naseh.
- 14 Amom a thaw teh kacaipounglah a hui yawhawi ka poe e teh,  
thoebonae lah pouk pouh lah ao han.
- 15 Lai pou ka roe e yu teh,



Puenghoi khonan hnin e khoramei hoi a kâvan.

- 16 Hote napui ka pâkuem e teh, kahlî ka pâkuem niteh,  
aranglae kut dawk satui kasum e hoi a kâvan.
- 17 Sum teh sum hoi doeh letlang hran sak thai,  
hot patetlah tami ni a hui e a minhmai ouk a pan sak.
- 18 Thaibunglung kung ka tawn e pueng ni thaibunglung paw a ca han,  
hot patetlah a bawi e thaw ka tawk e teh bari lah ao han.
- 19 Tui dawc coungrae a kamnue,  
hot patetlah tami lungthin ni tami a kamnue sak.
- 20 Sheol hoi rawkkahmanae teh khout boihoe,
- hot patetlah tami e mit ni a khout tie tawn boihoe.
- 21 Sôlêinae manang teh ngun hanelah,  
takhuenhmai teh sui hanelah ao.  
Tami teh oup e lahoi a bawilennae panue lah ao.
- 22 Tamipathu teh sumdawc cakang hoi  
mek ka phawm nakunghai a pathunae ni cettakhai pawm mahoe.
- 23 Na tuhu kong panue nahanlah panki loe,  
na saringhu hah kahawicalah a kountouk.
- 24 Bangkongtetpawiteh, tawntanae heh a yungyoe kangning hoe,
- hoehpawiteh bawilukhung heh se pueng dawc kangning hoe.
- 25 Phonaw hai a pâw, catinaw hai a pâw,  
law e a pawnaw hai khue lah ao.
- 26 Tunaw ni na khohna hane  
hmaenaw ni lawhmuen ran nahane ouk a thokhai.
- 27 Nang ni na ca hane, imthungnaw ca hane,  
sannunaw ca hanelah hmae sanutui teh a khout han doeh.

## 28

- 1 Tamikathout teh apinihai pâlei hoe eiteh a yawng,  
hatei tamikalan teh sendek patetlah a taran ahawi.
- 2 Khocanaw lawkeknæ kecu dawc  
khobawinaw tuhoitu a kâthung awh,  
hatei thaipanueknæ hoi panuenæ katawnnaw kecu dawc  
ram a kangning han.
- 3 Tamimathoe ni tamimathoe repcoungræ e teh  
ca hane pek laipalah ka cetkhai e longhotui hoi a kâvan.
- 4 Kâlawk ka cettakhai e ni tamikathout a pholen,  
hatei kâlawk ka tarawi ni ouk a tuk awh.
- 5 Tamikathoutnaw ni lannæ thaipanuek awh hoe,
- hatei BAWIPA katawnnaw ni bangpueng hai a thaipanuek.
- 6 Tawnta laihoi a khuekhaw awm laipalah hring hlak teh  
tamimathoe yuemkamculah kaawm e ahawihnawn.
- 7 Kâlawk ka tarawi e teh a lungkaang e capa doeh,  
ka kâso e hoi kamyawng e ni a na pa yeirai a po sak.
- 8 Apung ka cat ni teh kalan hoe e lahoi hnopai ka tawnta e ni  
tamimathoe kabawmkung hanelah a pätung pouh.
- 9 Kâlawk ka tarawi ngai hoe e teh a ratoumnæ hai panuet a tho.
- 10 Thoenæ lam dawc tamikalan lam ka phen sak e teh  
ama ni a tai e tangkom dawc a bo han,  
hatei toun kaawm hoe e ni hnokahawi a coe han.
- 11 Ka tawnta e ni amahoima a lungkaang lah a kâpouk,



- hatei thaipanueknae ka tawn e tamimathoe ni peng a pâpho han.
- 12 Tamikalan a lunghawi navah kalen e bawilennae ao,  
hatei tamikathout a kangdue toteh taminaw a kâhro awh.
- 13 Amae yonae ka hrawk e teh hawinae hmawt mahoe, h,  
hatei ka pâpho e ni pahrennae a hmu han.
- 14 Takinae pou ka tawn e teh a yawkahawi e doeh,  
hatei a lung pou ka patak e teh rawkkahmanae hoi a kâhmo han.
- 15 Mathoenaw kaukkung bawi kathout teh  
sendek ka huk e hoi tavom ka hram e patetlah ao.
- 16 Thaipanueknae ka vout e ukkung niteh  
rep a coungroe hatei hounlounnae ka hmuhma e ukkung teh  
a hringsaw han.
- 17 Tamikathet e teh phuen tangkom koe yawng na lawiseh,  
apinihai ngang nahan seh.
- 18 Lam kalan dawk ka dawn e tami teh a hlout han,  
hatei lam longkawi dawk ka dawn e teh vaitalahoi a rawp han.
- 19 Laikaw ka thawn e teh rawca moi a tawn han,  
hatei ayawmyinlah kaawm e tami teh a mathoe han.
- 20 Yuemkamcu e ni yawhawinae kapap a hmu han,  
hatei dongdengca dawk tawnta hanelah  
kâcai e teh rek laipalah awm mahoe.
- 21 Minhmai khet tawnta teh hawi hoe, h,  
vaiyei tangen kecu dawk tami kâlawk ouk a tapoe awh.
- 22 Dongdengca dawk tawnta hanelah  
kâcai e tami teh thoenae mit a tawn,  
bout mathoe han doeh tie pouk hoe.
- 23 Tami ka oup e hlak teh tami ka yue e ni  
a hnukkhu pholennae a coe han.
- 24 A manu hoi a na pa hno ka lawm niteh,  
kâtapoenae nahoe ka tet e tami teh,  
karaphoeung e hui doeh.
- 25 Tami kâoup e lungthin ni kâyuenae a tâcokhai,  
hatei BAWIPA kâuep e teh a lamcawn han.
- 26 Amae pouknae ka kâuep e teh tamipathu doeh,  
hatei lungang lahoi kaawm e teh hlout lah ao han.
- 27 Tamimathoenaw hno ka poe e teh vout mahoe, h,  
hatei ka roun e tami teh puenghoi thoebonae a hmu han.
- 28 Tamikathoutnaw a kangdue toteh  
taminaw amahmawk a kâhro awh,  
hatei a rawk awh toteh tamikalannaw a pung awh.

## 29

- 1 Voutsout yue eiteh a lahuen ka patak sak e tami teh,  
hawinae awm laipalah hmaw a rawk han.
- 2 Tamikalan ni kâtaawnta e tawn toteh tamimaya a konawm awh,  
hatei tamikathout ni a uk navah tamimaya a cingou awh.
- 3 Lungangnae ka ngai e ni a na pa a konawm sak,  
hatei kâyawt e hoi kamyawng e tami ni a hnopai koun a pâbaw.
- 4 Siangpahrang ni lawkcengnae lahoi ram a caksak,  
hatei tadawng hno ni ram a rawk sak.



- 5 A imri laithoe lahoi ka oup e teh a khok kâman nahanlah  
tamlawk a yangda pouh.
- 6 Kâtapoenae ni tamikathout a man,  
hatei tamikalan teh la sak lahoi a lunghawi.
- 7 Tamikalan ni tamimathoe hanlah a pouk,  
hatei tamikathout ni teh banglahai noutna hoeh.
- 8 Kadudamnaw ni khopui hmai a sawi,  
hatei tamilungkaang ni teh lungkhueknae a takhoe thai.
- 9 Tamilungkaang ni tamipathu hoi kâyue pawiteh,  
tamipathu a panui hai thoseh,  
a lungphuen hai thoseh banglahai tho hoeh.
- 10 Tami kathetnaw ni tamikalan a hmuhma awh,  
tamikalan teh hawinae hah a tawng.
- 11 Tamipathu ni a pouk e pueng hah a dei,  
hatei tamilungkaang ni teh a panguep.
- 12 Ukkung ni laithoe dei e banghai nahoe tet pawiteh,  
a sannaw pueng teh tamikathout lah koug a coung awh.
- 13 Tamimathoe hoi repcoun groenaw ni cungtalaha a hmawng e teh,  
BAWIPA ni a mit reirei a ang sak.
- 14 Atangcalah tamimathoe hanelah  
lawkcengkung siangpahrang teh,  
a bawitkhung a yungyoe caksak lah ao han.
- 15 Bongpai hoi yuenae ni tami a lungangsak teh,  
ka pangak e camo ni a manu yeirai a po sak.
- 16 Tamikathout apapnae koe kâtapoenae apap,  
hatei tamikalan ni a rawk awh e hah a hmu.
- 17 Na capa hah yue yaw lannae na poe han,  
hothloilah hring nawmnae na poe han.
- 18 Vision ohoehnae koe tami pueng a thathoe awh,  
hatei kâlawk ka tarawi e teh tami yawkahawi e doeh.
- 19 San teh lawk hoi dueng yue thai lah awm hoeh,  
bangkongtetpawiteh a thai eiteh tarawi laipalah ao thai.
- 20 Pouk laipalah lawk ka deirumram e ouk na hmu ou,  
hot patet e tami koe hlak teh  
tamipathu koe ngaihawine bet aohnawn.
- 21 Camo nah ekvoi pahren e san teh a cue torei teh  
calan e lah ao han.
- 22 A lung ka khuek e ni kâyuenae a tâcokhai teh,  
ka matheng e ni kâtapoenae pou a tâcokhai.
- 23 Ma e kâoupnae ni na rahnoumsak han,  
hatei muitha lahoi kârahnoum e ni barinae a coe.
- 24 Tamru hoi kamyawng e teh  
amae hringnae ka hmuhma e tami doeh,  
lawkkatang dei hanelah thoe a kâbo ei dei kalawn hoeh.
- 25 Tami barinae ni karap patetlah na man,  
hatei BAWIPA kâuep e teh rungngang lah ao han.
- 26 Tami kapap ni ukkungnaw e lungyouknae hah a tawng awh,  
hatei taminaw hanelah lawkcengnae teh  
BAWIPA koehoi doeh a tho.
- 27 Tamikalanhoehe teh tamikalan hanelah panuet a tho e patetlah,  
tamikalan teh tamikalanhoehnaw hanelah panuet a tho van.



## 30

*Agur lungangnae*

- 1 Jakeh capa Agur ni a dei e lawk.  
Ama ni Ithiel, Ithiel hoi Ucal koe hettelah a dei.
- 2 Tamipueng hlak tamipathu poung lah ka o teh,  
thaipanueknae hai ka tawn hoeh.
- 3 Lungangnae hai kamtu van hoeh niteh,  
tamikathoungnaw e panuenae hai ka tawn hoeh.
- 4 Kalvan ka luen ni teh ka kum e teh apimaw,  
Talai poutnae pueng kacaksakkung teh apimaw,  
A min apimaw, a capa min hai apimaw, na panue maw.
- 5 Cathut lawk pueng teh a thoung,  
ka kânguenaw pueng hanelah kânguenae lah ao.
- 6 A lawk hah thap hanh, hoehpawiteh na yue vaiteh,  
na laithoe e hah a hmu han.
- 7 Hno kahni touh ka hei han,  
ka due hoehnahlan na poe haw.
- 8 Ahrawnghrang hoi laithoenae heh kai hoi  
ahlanæ koe na tat pouh haw, mathoenæ nakunghai,  
tawntanae nakunghai na poe hanh,  
ka panki e rawca hoi na kawh haw.
- 9 Hoehpawiteh ka tawnta vaiteh na pahnwawt payon vaih,  
BAWIPA teh apimaw, ka tet payon vaih.  
Hoehpawiteh, ka mathoe vaiteh hno ka parawt vaiteh  
Cathut min ka mathout sakpayon vaih.
- 10 San teh a bawi koe pathoe hanh,  
hoehpawiteh thoe na bo vaiteh,  
nang dawh yonnae ao han.
- 11 A na pa thoe a bo teh  
a manu yawhawi a poe ngaihoehnae se ao.
- 12 Ama mithmu vah kathoung poung lah kâpouknae ao,  
hatei a khinnae koehoi pâsu hoeh rah.
- 13 Khopouk ka rasang ni teh mounghnae a o,  
a khopouk teh a rasang katang.
- 14 A hâ teh sendek patetlah,  
a hâkamnaw teh sarai patetlah a onæ se a o,  
het talai van e tami mathoenaw hoi  
kavoutthoupnaw hah koungh ca hanelah kakâcainaw doeh.
- 15 Tavat ni canu kahni touh a tawn teh,  
na poe na poe a ti.  
Ka boum thai hoeh e kathum touh ao.  
A khout toe ka tet boihoeh e hno pali touh a o
- 16 Tangkom, kating e thun,  
tui ka boum hoeh e talai,  
a khout toe ka tet boihoeh e hmai naw hah doeh.
- 17 A na pa ka dudam niteh  
a manu banglah ka noutna hoeh naw e mit teh,  
vonga ni a cawngkhawi pouh vaiteh,  
matawcanaw ni a ca awi han.
- 18 Kai hanlah kângairu hno kathum touh a o,  
ka thaipanuek hoeh e hno pali touh teh,
- 19 Kahlî dawh mataw kamlengnae lamthung,



- Lungphen van tahrûn ceinae, tuipei van long ceinae,  
 hoi thoundoun ni tangla painae lam naw hah doeh.
- 20 Napui kahawihoe hah hottelah doeh ao van,  
 a ca hnukkhu a pahni a hui teh yonnae ka sak hoe h, telah ouk a ti.
- 21 Hno kathum touh kecu talai heh taki hoi ouk a pâyaw,  
 bokheiyah, hno pali touh khang thai hoe h e ao.
- 22 Siangpahrang lah kâsak e san,  
 king ka boum e tamipathu,
- 23 Vâ ka sak e napui kathout,  
 a bawipa e yu ka khawng e sannu hetnaw hah doeh.
- 24 Talaivan a thounga eite h  
 a lungkaang e hno pali touh ao.
- 25 Atha awm hoe h eite h kompawi vah  
 ama hane rawca ka pâtung e lungkhi,
- 26 a tha ayoun eite h  
 lungha rahak kaawm e saveh.
- 27 siangpahrang tawn hoe h eite h  
 ahuhu lahoi ka cet e samtong,
- 28 a khok hoi a kâbang eite h  
 siangpahrang im kaawm e bombanaw hah doeh.
- 29 Hno kathum touh kahawicalah ka cet thai e a o,  
 bokheiyah pali touh hah teh,
- 30 Saring pueng daw k athakaawme sendek,  
 bang ni hai ngang thai hoe h.
- 31 Ransa marang, hmaetan,  
 apinihai ngang thai hoe h e siangpahrang hetnaw hah doeh.
- 32 Mahoima kâtalue totouh na pathu pawite h,  
 hoe hpawite h hnokathout sak hanelah na kâcai pawite h,  
 na kut hoi na pahni tabuemh.
- 33 Bangkongtetpawite h, maitosanutui kalaw e ni  
 sanutuikamkak a tâcosak e patetlah,  
 hnawng kapennae ni hnawngthi a lawng sak.  
 Hot patetlah lungkhueknae ni kâyuenae a tâcokhai.

## 31

### *Lemuel e lawknaw*

- 1 Siangpahrang Lemuel lawk,  
 a manu ni a cangkhai e naw teh:
- 2 Bangtelane ka capa, bangtelane ka khe e capa,  
 bangtelane ka lawkkam capa.
- 3 Siangpahrangnaw patenghai karaphoekung napui koe  
 na thaonae poe hanh.
- 4 Aw Lemuel, misurtui nei e hoi yamu nei e teh  
 siangpahrangnaw hane nahoe h.
- 5 Hoe hpawite h, net awh vaite h  
 kâlawk pahnim awh vaite h mathoenaw hanelah  
 kalanhoe he lah lawkceng awh langvaih.
- 6 Meimei kadout e hah yamu pânei awh nate h,  
 lungrei ka thai e hah misurtui pânei awh.
- 7 Net awh nase h, a reithainae hah pahnim awh nase h,



a lungmathoenae pahnim totouh net awh naseh.

- 8 Lawkanaw hanlah dei pouh nateh,  
due hanelah lawk tâtueng pouh e naw hane hai dei pouh.  
9 Kalan lah lawkceng nateh tamimathoe hoi  
tamikavout hanlah kâhet pouh.

*Yu kahawi*

- 10 Yu kahawi apinimaw a hmu thai han.  
Bangkongtetpawiteh talung phukaawm hlak hai aphuoawn.  
11 A vâ ni a lungthin hoi a kâuep teh hawinae awm laipalah  
awm mahoe.  
12 A hring nathung thoenae laipalah  
hawinae dueng doeh a sak pouh.  
13 Tumuen hoi pahla hah a tawng teh  
a kut hoi amahmawk ouk a taw.  
14 Hno ka yawt e long patetlah ao teh,  
ahlanae koehoi rawca ouk a thokhai.  
15 Amom a thaw teh a imthungnaw hah rawca a paca teh,  
a sannunaw hah thaw rip a boun.  
16 Lawhmuen hah a khet teh a ran,  
a tawkpheu hoi misur takha a sak.  
17 A keng dawkhâ a kâyeng teh,  
a kuttha hai a patung.  
18 Hno a yo e a mek tie a panue dawkvah  
tangmin patenghai hmaiim dout hoe.  
19 A kut hoi rahakut a kuet teh,  
avanglae kut hoi yâcung a kuet.  
20 Tamimathoe hanelah a kut a kâyap,  
bokheiyah kavoutnaw totouh a kut ni koun a pha.  
21 Tadamtui ka bawt nakunghai  
a imthungnaw hanelah taki hane awm hoe,  
bangkongtetpawiteh a imthungnaw ni  
dikpalingca e khohna kabet e a khohna awh.  
22 Ama hanlah hni a kawng teh,  
loukloukkaang e hoi pu doeh a khohna.  
23 A vâ hai kho longkha koe khobawinaw hoi  
a tahung toteh mithmaiben e lah ao.  
24 Loukloukkaang e hni a kawng teh a yo,  
hno kayawtnaw koe taisawm hah a yo.  
25 A kawng e khohna teh a khaw,  
ahawi dawkvah ahni teh hmalah a konawm han.  
26 Lungangnae hoi lawk a dei,  
a lawk teh pahrennae kâlawk lah ao.  
27 A imthung khosaknae kahawicalah koun a khetyawt,  
rawca hai pamda laihoi cat boihoeh.  
28 A canaw a thaw awh teh a manu koe a lunghawi awh.  
A vâ ni hai a oup van,  
29 napui kapap ni kahawicalah a tawkhaw toe,  
hatei nang ni ahnimanaw na tapuet toe, atipouh.  
30 Raimonae teh dumnae doeh,  
meihawinae hai a yawmyin doeh.  
Hatei BAWIPA ka taket e napui teh oup lah ao han.



<sup>31</sup> A kut hoi a tawk e a paw hah poe awh nateh,  
longkha koe ama roeroe hah a tawk e ni oup naseh.



## PHUNGDEIKUNG (Ecclesiastes)

### *Bangpueng ahrawnghrang*

- <sup>1</sup> Devit capa, phungdeikung Jerusalem siangpahrang ni a dei e lawk teh,
- <sup>2</sup> Ahrawnghrang doeh, ahrawnghrang doeh.  
Bangpueng hai ahrawnghrang doeh.
- <sup>3</sup> Kanî rahim vah tami ni a tawksak e pueng  
bang hawinae maw kaawm.
- <sup>4</sup> Se buet touh aloum teh se alouke bout a tâco.  
Hatei, talai teh a kangning.
- <sup>5</sup> Kanî a tâco teh bout a khup.  
Hatei, a tâconae koehoi bout bout a tâco.
- <sup>6</sup> Kahli haiyah a kâheinae koe lah  
bout bout a kâhei.
- <sup>7</sup> Tuipuinaw a lawng teh talîpui dawk koun a kâcu eiteh kawi hoeh.  
Talîpui teh a lawngnae koelah bout bout a ban.
- <sup>8</sup> Bangpueng hai tami ni dei thai hoeh totouh patangnae a kâhmo .  
Mîl ni a khet eiteh hmawt thai hoeh.  
Hnâ ni a thai eiteh boum thai hoeh.
- <sup>9</sup> Hno kaawm tangcoun e hai bout kaawm hane hoi a kâvan.  
Atu sak e hai bout sak hane hoi a kâvan.  
Kanî rahim vah hno katha awm hoeh.
- <sup>10</sup> Khenhaw! hno katha buet tabang ao maw awm hoeh,  
ayan vah yo kaawm tangcoun e doeh.
- <sup>11</sup> Ayan kaawm boi e hnonaw ouk pahnim thai awh.  
Ka tho hane naw hai ka tho hane naw ni bout a pahnim awh han.

### *Lungangnae ahrawnghrang*

- <sup>12</sup> Kai, phungdeikung, Jerusalem khopui dawk Isarel siangpahrang  
lah ka o nah, <sup>13</sup> Kanî rahim vah sakyoe e pueng thouthainae lahoi  
pakhingpalang lungthin ka tawng. Cathut ni taminaw koe khoram sak  
nahanelah a patangpalai sak. <sup>14</sup> Kanî rahim e hnosa e pueng ka hmu toe.  
Bangpueng ahrawnghrang doeh. Kahli ka man e hoi doeh a kâvan.
- <sup>15</sup> Ka longkawi e teh palan thai hoeh.  
Kamko e hno teh touk mahoe.
- <sup>16</sup> Kama hoi kama ka kâdei e teh, kai teh Jerusalem kauknaw pueng  
hlakvah ka talue, ka lung a ang, ka lungthin ni lungangnae hah alawkpui  
lah a kamtu. <sup>17</sup> Lungangnae hoi pathunae, polinae pakhingpalang ka  
tawn. Hot naw haiyah, kahli man e patetlah doeh ao. <sup>18</sup> Lungangnae apap  
nah, lungreithainae a pap. Thouthainae apapnae koe lungmathoenae  
hoe a pap.

## 2

### *Nawmnae ahrawnghrang*

- <sup>1</sup> Ka lungthin thung hoi atuteh nawmnae hoi na tanouk han, hno  
alouke pouk laipalah nawmnae dueng ka sak han ka ti. Hatei, hot hai  
ahrawnghrang doeh. <sup>2</sup> Thouthainae heh pathunae doeh. Nawmnae  
haiyah bang ahawinae awm hoeh. <sup>3</sup> Tami ni talai van kum kaduem ca



a hring nathung vah hnokahawi a sak hane panue hanelah lungangnae lamthung dawn hoi thahmei nahanelah, yamu ngainae koelah a pâlei teh pathunae dawk khosak hanlah lungthin hoi ka tawng. <sup>4</sup> Hno kalennaw hah ka sak. Kama hanlah im ka sak teh misur takha hai ka sak. <sup>5</sup> Takha aphunphun ka sak teh a pawhik aphunphun ka ung. <sup>6</sup> Thingthai karoung lahun naw awi nahanelah tui innaw hah ka sak. <sup>7</sup> San ka tawn dueng tho laipalah sannu hoi sanpanaw hai bout ka ran sin. Ka tawn e saringnaw teh ka o hoehnahlan Jerusalem kaawm e naw hlak a pap. <sup>8</sup> Suingun hai thoseh, siangpahrang hoi kâkuen e hno hai thoseh, khocanaw koe cawng e hno hai thoseh ka pâkhueng toe. Ratoung tamawi ka tum e napui tongpa hai thoseh, taminaw ni nawmnae yupui yudonaw hai thoseh ka la toe. <sup>9</sup> Hottelah Jerusalem kho ouk kaawm tangcoungnaw hlak ka tawnta teh ka talue toe. Ka lungangnae hai a cak. <sup>10</sup> Ka mit ni a noe e kangek hoeh. Ka lung ka nawm sak hane buet touh hai ka hnoun hoeh. Ka thawtawknae dawk lunghawinae ka hmu, hot teh ka tawkphu ka hmu e doeh. <sup>11</sup> Hete hnonaw pueng heh ka pouk teh ka tawk e hoi ka sak e hnonaw pueng ka pouk navah, khenhaw! ahrawnghrang doeh. Kahlî man e patetlah la doeh ao ti ka panuecai. Kanî rahim talaivan, taminaw hanlah hnokahawi banghai awm hoeh.

### *Lungangnae hoi khosak e ahrawnghrang*

<sup>12</sup> Hahoi, lungangnae, pathunae hoi lunganghoehnae, naw ka pâkhing ka palang. Siangpahrang ni a sak tangcoung e hloilah a hnuklah ka tho e tami ni hai bang bout sak thai hoeh. <sup>13</sup> Ka pakhingpalang hnukkhu, lungangnae teh pathunae hlak, angnae teh hmonae hlak ahawi ti ka panue. <sup>14</sup> Tami a lungkaang e teh a lû dawk mit a tawn. Hatei, tamipathu teh hmonae dawk kho a sak. Hateiteh, tami pueng ni hno buet touh rip a kâhmo e hah ka hmu. <sup>15</sup> Tamipathu ni a kâhmo e hno ka kâhmo van boipawiteh, ahni hlak lungkaang ka tie haiyah ahrawnghrang pui doeh. <sup>16</sup> A tu kaawm e hnonaw pueng heh hmalah pahnim lah ao han. Tamipathu ni a pahnim thai e patetlah tami lungkaang ni hai a pahnim thai. Tamipathu a due e patetlah tami lungkaang hai a due van. <sup>17</sup> Hatdawkvah, hringnae kahmawt toe. Kanî rahim e hnonaw pueng ni runae duengdoeh a thokhai. Hnonaw pueng teh ahrawnghrang doeh. Hnonaw pueng heh ahrawnghrang lah ao. Kahlî ka man e patetlah doeh ao.

### *Tawksak e hno ahrawnghrang*

<sup>18</sup> Kanî rahim ka sak e hoi ka tawk e hnonaw pueng ka panuet. Ka hnuklah ka tho hane naw hanlah ka ceitakhai han ti ka panue. <sup>19</sup> Ahni teh tami lungkaang e maw, ka pathu e maw tie apinimaw a panue thai han. Ahni ni ka kâyawm laihoi ka tawk e pueng, kanî rahim ka lungangnae kamnue sak e pueng koe kâ a tawn han. Hatei hotnaw haiyah ahrawnghrang doeh. <sup>20</sup> Hatdawkvah, Kanî rahim vah panki laihoi ka tawknae dawk ngaihawinae awm hoeh. Lungpoutnae lah ka pouk. <sup>21</sup> Bangkongtetpawiteh, banghai ka tawk hoeh hanelah lungangnae, panuethainae, thouthainae hoi thaw ka tawk e ni a ceitakhai hanlah ao. Hot hai thoseh, banghai ahawinae awm hoeh. Hoe kathoute hno lah ao. <sup>22</sup> Kanî rahim kaawm e tami ni panki laihoi a tawk e thaw, a lungthin hoi a lungpennae naw pueng hai bangmaw apu kaawm. <sup>23</sup> Ahnie a hninthah teh lungmathoene hoi akawi. A tawk e dawkh hai reithainae lah ao. Tangmin haiyah ip thai hoeh. Hot haiyah ahrawnghrang doeh.



<sup>24</sup> Tami hane teh canei hoi a thawtawknæ dawk hoi nawmnae a hmu e heh hnokahawi lah ao. Hot haiyah, Cathut koehoi a hmu awh e ti ka panue. <sup>25</sup> Cathut laipalah apimaw ka cat thai ni teh ka nawm thai. <sup>26</sup> Cathut lung ka youk e taminaw koevah lungangnae, panuethainæ hoi lunghawinae a poe. Hatei, yon ka sak naw teh patang laihoi a tawknæ dawk yawhawinae a poe. Hatdawkvah, hot hai ahrawnghrang lah doeh ao.

### 3

#### *Bangpueng ni atueng a tawn*

- <sup>1</sup> Hno cawngca pueng ni amamae atueng a tawn. Kanî rahim vah pouk e pueng lengkaleng tawksaknae atueng ao.
- <sup>2</sup> Khenæ atueng hoi duenæ atueng hai ao.  
Patuenæ atueng ao patetlah phawknæ atueng hai ao.
- <sup>3</sup> Theinae atueng ao patetlah dam saknae atueng hai ao.  
Raphoenæ atueng ao patetlah bout saknae atueng hai ao.
- <sup>4</sup> Kanae atueng hoi, panuinae atueng hai ao.  
Cingounæ atueng hoi, lamtunæ atueng hai ao.
- <sup>5</sup> Talungnaw kaheikalainæ atueng ao.  
Pâkhuengnae atueng hai ao.  
Takawinae atueng ao, kâtakawi laipalah kâkapeknæ atueng hai ao.
- <sup>6</sup> Pâkuemnae atueng ao, hnopai a kahmanæ hai ao.  
Pâtungnae atueng hoi, tâkhawngnae atueng hai ao.
- <sup>7</sup> Hnicu raveinae atueng hoi, khuinae atueng hai ao.  
Sairasuep onæ atueng hoi, lawk deinae atueng hai ao.
- <sup>8</sup> Kâpahrennae atueng hoi, kâmaithoenæ atueng hai ao.  
Tarankâtuknae atueng hoi, taran roumnae atueng hai ao.

#### *Cathut ni poe e thaw*

- <sup>9</sup> Ka tawk e tami ni panki teh a thapathonæ hah bangmaw hawinae kaawm. <sup>10</sup> Taminaw kho a sak nahan Cathut ni a poe e tawntanae hai, kai ni ka hmu toe. <sup>11</sup> A cawngca pueng amamae atueng a pha nah, kahawicalah a sakyoe toe. Tami e lungthin hai a yungyoe e atueng dawk, a kamtawngnae koehoi apout totouh tami ni teh pâphue nakunghai baw thai hoeh. <sup>12</sup> Lunghawinae hno dawk ka hring nah, hnokahawi sak hoeh e laipalah alouke thawnaw dawk, ahawinae awm hoeh tie ka panue. <sup>13</sup> Tami pueng canei hane hai thoseh, mahoima panki tha patho e naw dawk, nawm nahane hai thoseh, Cathut e lungmanaehoi doeh kâtawnnae ao.
- <sup>14</sup> Cathut e hno a sak e naw teh a yungyoe doeh tie ka panue. Bout sak thai lah awm hoeh, bout rayu thai e lahai awm hoeh. Taminaw teh a hmalah, a taki awh nahanlah Cathut ni telah a sak e doeh. <sup>15</sup> Kaawm tangcoung e hno teh atu kaawm e hno hoi a kâvan. Bout kaawm hane hno hai, kaawm tangcoung e hno hoi a kâvan. Ka loun tangcoung e naw hai Cathut ni bout a hei.

#### *Vaiphu koehoi vaiphu koe*

- <sup>16</sup> Hothloilah, Kanî rahim lawkcengnae hmuen dawk kahawihoehe hno ao tie thoseh, lannæ dawk yonnae ao tie hai thoseh, ka hmu toe. <sup>17</sup> Cathut ni tami kalannaw e tawksak e hoi, tamikalan hoeh naw e tawksak e hah lawk a ceng han telah ka pouk. Bangkongtetpawiteh, pouk e pueng, tawk e pueng lawkceng nahane atueng ao. <sup>18</sup> Taminaw e a hmuenhmawn ka



pouk nah, taminaw Cathut ni a tanouk hane hoi, ahnimouh teh saringnaw patetlah doeh tie a kâpanue thai awh nahane hah doeh. <sup>19</sup> Tami ni a kâhmo e saring ni hai kâvan e hno a kâhmo teh, bout a due e patetlah a due van. A cawngca pueng hringnae phun touh doeh rei ao awh. Hatdawkvah tami teh saring hlak a taluena awh hoeh. A cawngca pueng ahrawnghrang seng doeh. <sup>20</sup> A cawngca pueng buet touh e hmuen koe doeh ouk a pha awh. A cawngca pueng vaiphu dawh hoi a kangcoung e patetlah vaiphu lah bout a ban han. <sup>21</sup> Hatnavah, lathueng lah ka luen e tami e muitha hai thoseh, rahim lae hmuen talai lah ka khum e saring e muitha hai thoseh, apinimaw a kapek thai teh a panue thai han. <sup>22</sup> Tami ni a sak e hno dawh nawmnae hno hlak, hoe kahawi e hno awh hoeh tie ka hmu. Hote hno teh ahni hane doeh, ahni ni a hnukkhu lah bang hno ne ka tho han tie hah a panue nahan, apinimaw a bankhai han.

## 4

### *Kanî rahim e kahawihoe hno*

<sup>1</sup> Hahoi, kanî rahim vah sak e pacekpahleknae naw pueng bout ka pouk. Pacekpahleknae ka khang e taminaw ni a khuika ei nakunghai, hloutnae ka poe thai e tami awh hoeh. Ka pacekpahlek e taminaw teh bahu a tawn dawh hloutnae ka poe thai e tami awh hoeh. <sup>2</sup> Hateiteh, kadout tangcoung e tami teh kahring rae tami hlak hoe yawhawinae ao telah a ti. <sup>3</sup> Hatdawkvah, vai touh hai kaawm hoeh e tami, kanî rahim sak e yonnae kahmawt hoeh rae tami teh hote kahni touh hlak hoe yawhawinae ao.

<sup>4</sup> Hahoi, panki thapathonae hoi kahawicalah pâbaw e hnonaw pueng dawh hai thoseh, hot patetlah e hno dawkvah alouke tami ni hmuhmanae thoseh, kai ni ka pouk. Hote hno teh ahrawnghrang e hno kahli man e hoi doeh a kâvan.

<sup>5</sup> Tami pathu ni teh a kut a kâtapam teh, amae a tak hah letlang a ca.

<sup>6</sup> Roumnae hoi hmu e kutvang touh e hno teh, tawnta laihoi kahli man laihoi hmu e kutkarum touh e hno hlak bet ahawihnawn.

<sup>7</sup> Hahoi, kanî rahim ahrawnghrang e hno bout ka pouk navah, <sup>8</sup> tami teh a huiko, a canaw, a hmaunawngghanaw tawn hoeh, ama dueng kaawm ei nakunghai, panki thapathonae baw thai hoeh. A hno hmuna dawkvah lungkuep thai hoeh. Kai ni mahoima ka yue teh api hane maw ka panki aw telah ka pacei boihoeh. Hete haiyah ahrawnghrang tawntam nah hrum doeh. <sup>9</sup> Tami teh madueng hlak tami kahni touh bet ahawi. Tawh pawiteh kahawie tawkpau a hmu. <sup>10</sup> Buet touh rawm pawiteh buet touh ni a pathaw han. Buet touh dueng e tami rawm pawiteh ahawinae awh hoeh. Kapathawkung awh mahoe. <sup>11</sup> Tami teh kahni touh rei ip pawiteh a phubet han. Madueng teh bangtelamaw phubet thai han. <sup>12</sup> Tami buet touh ni buet touh tâ pawiteh ahni hah tami kahni touh ni a ngang thai. Rui katham touh hoi pakhit e tangron teh kayawicalah thawk thai hoeh.

<sup>13</sup> Tounnae ka ngai hoeh e, a kum kacue ka pathu e siangpahrang hlak, a lungkaang e mathoe camo teh apuohnawn.

<sup>14</sup> Thongim hoi siangpahrang koe ka phat e hai, a uknaeram dawh mathoe lah doeh a khe. <sup>15</sup> Kanî rahim kaawm e taminaw pueng e kong ka pouk navah, ahnimouh thung dawh siangpahrang hmuen ka coe hane, camo ao awh e hah ka panue. <sup>16</sup> Hote siangpahrang ni a uk e taminaw pueng parei thai kawi lah awh hoeh. A hnukkhu lah ka tho e taminaw ni hai hote siangpahrang hah a lungkuep thai awh mahoe. Atangcalah, hote hno hai ahrawnghrang e hno, kahli man e hoi doeh a kâvan.



## 5

*Cathut hah taket*

<sup>1</sup> Cathut e im koe na cei navah na khok kâhruetcuets. Tami pathu ni a sak e thuengnae a sak e hlak teh, lawk thai hanelah hoe kâyawm. Tamipathunaw teh mae yonnae naw pouk awh hoe. <sup>2</sup> Na pahni hah kâhruetcuets. Cathut hmalah lawk na dei han navah na lungthin rang sak hanh. Cathut teh kalvan vah ao. Nang teh talai dawk na o. Hatdawkvah lawk moikapap dei hanh. <sup>3</sup> Tawksaknae apap e lahoi mang ouk mang e patetlah lawk papnae lahoi pathunae lawk thai lah o.

<sup>4</sup> Cathut koe lawkkamnae na sak pawiteh lawkkam sak laipalah awm hanh. Cathut ni tamipathunaw koe lungkuep hoe. Lawk na kam e patetlah sak. Lawk na kam e patetlah sak loe. <sup>5</sup> Lawkkam tarawi hoe e hlak teh khoeroe kam laipalah awm pawiteh bet ahawihnawn. <sup>6</sup> Na pahni ni na tak dawk yon phat sak hanh naseh. Ka payon toe telah a laiceinaw e hmalah dei hanelah awm sak hanh. Bangkongmaw na lawkdei e dawk Cathut a lungphuon vaiteh na sakyoe e a raphoe han vaw. <sup>7</sup> Mang apapnae dawk thoseh, lawk apapnae dawk hai thoseh, kacungkeihoehe hno doeh. Nang teh Cathut hah taket haw.

*Tawntanae hoi Barinae ahrawnghrang doeh*

<sup>8</sup> Kho dawkvah ka roedeng naw ka pacekpahlek e, lam ka phen sak e, kamsoumhoehe laidei ka tâtueng naw na hmu navah, ahnimouh kecu dawk na kângairu sak hanh. Bawi buet touh ni buet touh a panue e patetlah kacuehloe e bawi ni patuen a panue doeh. <sup>9</sup> Talai dawk e tawnta e naw hateh a cawngca hanelah doeh. Siangpahrang nakunghai laikawk hoi kâkaw e doeh.

<sup>10</sup> Tangka ka raduek e teh tangka ni a ngainae kuep sak mahoe. Hnopai ka tawn poung e hai hoehe a tawn ei, a lungkuep thai hoe. Hot naw pueng teh ahrawnghrang doeh. <sup>11</sup> Hnopai hoe apap navah ka catnet e hai hoe a pap. Hno katawnkung ni a mit hoi a khet e doeh yawhawinae lah kaawm. <sup>12</sup> Thaw ka taw e tami teh moi a ca nakunghai thoseh, yitca a ca nakunghai thoseh a ihmu atui. Ka tawnta e tami teh a tawn e hno ni ip sak thai hoe.

<sup>13</sup> Ka tawnta kung teh a tawn e a hnopai ni runae a poe. Hote hno teh kanî rahim vah kathout poung e hno lah ao. <sup>14</sup> Hote hnopai teh kahawihoehe hno ni a kamko sak. Hnopai katawnkung a capa haiyah kuthrawng lah doeh ao. <sup>15</sup> Hoehpawiteh, hno katawnkung teh a manu von thung hoi caici lah a khe e patetlah bout a ban han. Kâyawm laihoi a hmu e hnopai buet touh boehai bout sin thai mahoe. <sup>16</sup> Ahni teh a tâco e patetlah banghai lanae awm laipalah bout ban e hateh, hno kathout doeh. Kahlî man hanelah kâyawm e tami teh bangmaw hawinae kaawm. <sup>17</sup> Ahnie hnin a tha teh kahmawt thung doeh a loum sak. Tarawknae, Lungmathoe, lungkhueknae doeh a pang awh.

<sup>18</sup> Kai ni ka hmu e naw hateh, canei e, kanî rahim vah Cathut ni na poe e hringnae hoi hring yunglam kâyawm teh hawinae coe dawkvah lunghawikhai hanelah ao. Ahawi ngounh. Hot hateh tami hane doeh. <sup>19</sup> Cathut ni na poe e hno ka tawnta pueng, ma hanelah coe teh pang hanelah thoseh, kâyawmnae dawk nawmnae thoseh, Cathut pahrennae dawk hoi doeh coe awh. <sup>20</sup> Kaloum tangcoung e ahninnaw hah ngailawi pouk hanh. Lungthin nawmnae teh Cathut ni doeh na poe awh.



## 6

<sup>1</sup> Taminaw ni kapap lah a kâhmo teh, kanî rahim ka hmu e hno kathoutnaw teh; <sup>2</sup> A ngai e hno pueng, hnopai hoi bawinae, barinae naw hah Cathut ni a poe eiteh, canae kâ a poe hoeh dawkvah, amamouh ni cat laipalah, kâkuen hoeh e alouke ram e taminaw ni a ca e heh, ahrawnghrang doeh, kahawihoehe hno doeh. <sup>3</sup> Tami ni kum moikasawlah a hring teh, a canaw, 100 touh ka tawn nakunghai, ngainae kuep laipalah, pakawp laipalah oun dout pawiteh, hote tami hlak camo ka hrun e ahawihnawn. <sup>4</sup> Bangkongtetpawiteh, ka hrun e camo teh ayawmyin lah a kamnue teh, hmonae thung a cei. Ahnie min teh hmonae ni a ramuk han. <sup>5</sup> Kanî hai hmawt mahoe. Banghai panuek mahoe. Hateiteh, hmaloe dei e tami hlak ahawihnawn. <sup>6</sup> Hmaloe dei e tami teh a kum thawngnhni touh ka hring nakunghai aphu awmhoeh. A hmuen buet touh koe nahoehmaw koug a khup awh heh vaw.

<sup>7</sup> Tami ni panki thapatho e naw pueng teh, vonpui hanelah panki thapatho awh eiteh, cangainae lung roun thai hoeh. <sup>8</sup> Lungkaang e tami teh ka pathu e tami hlak bangmaw hawinae kaawm. Kahring e taminaw hmalah, ka tawk e mathoe ni a coe e hawinae teh bangne. <sup>9</sup> Mit hoi hmu e teh pouk e hlak ahawi. Hote hno teh ahrawnghrang e hno, kahlî man e hoi doeh a kâvan.

<sup>10</sup> Kaawm tangcoung e hnouaw, pâkuem lah ao toe. Tami teh bang patet e tami maw tie hai panue tangcoung e lah ao toung dawkvah, ama hlak tha ka sai e tami tâ thai mahoe. <sup>11</sup> Cungkeihoehtae hoe a pung dawkvah, tami teh bangmaw hawinae kaawm. <sup>12</sup> Tâhlip patetlah kaloum ni teh ahrawnghrang hring nathung, tami dawk hnokahawi sak e heh apinimaw a panue thai han. Kanî rahim tami hnukkhu kaawm hane naw hai apinimaw a dei thai han.

## 7

*Lungangnae hoi pathunae*

<sup>1</sup> Minhawinae teh hmuitui satui hlak ahawi. Duenae hnin hai khenae hnin hlak bet ahawi.

<sup>2</sup> Ro im cei e heh pawî koe cei e hlak ahawi.

Bangkongtetpawiteh, tami pueng ni ro im vah lam a pâpout awh.

Kahring lahun e naw ni hai a lungthin thungvah a pâkuem awh han.

<sup>3</sup> Panui e hlakvah lungmathoe e bet ahawi.

Bangkongtetpawiteh, lungmathoenae ni lungthin bet ahawi sak.

<sup>4</sup> Lungkaangnaw e lungthin teh ro im vah ao.

Tamipathunaw e lungthin teh pawî im vah ao.

<sup>5</sup> Tamipathunaw e la sak lawk thai hlakvah,

lungkaangnaw e tounnae lawk tarawi e bet ahawi.

<sup>6</sup> Bangkongtetpawiteh, tamipathunaw e panuinae teh

hlaam rahim vah pâkhing ka kang e lawk hoi a kâvan.

Hot naw hai ahrawnghrang doeh.

<sup>7</sup> Atangcalah, rektapnae ni a lungkaangnaw a pathu sak.

Tadawngnae ni lungthin a rawk sak.

<sup>8</sup> Apoutnae teh kamtawngnae hlak ahawi,

a lungkasaw e tami teh a lungkalen e tami hlakvah ahawi.

<sup>9</sup> Lungkhuek han totouh na lungduem sak hanh.

Lungkhueknae teh kapathunaw e lungthung vah hmuen ouk a la.



- <sup>10</sup> Bangkongmaw yampa e atueng teh  
atu e atueng hlak ahawi telah na pacei awh hanh.  
Hottelah na pacei pawiteh lungangnae lahoi pacei e na hoe.
- <sup>11</sup> Lungangnae teh râw patetlah ahawi.  
Kanî ka hmawt e naw koe hnokahawi a sak.
- <sup>12</sup> Bangkongtetpawiteh, lungangnae ni na rawngkhan,  
tangka ni hai na rawngkhan thai.  
Thoumthainae teh banghloimaw aphu ao.  
Thoumthainae ka coe e tami teh hringnae hai a coe.
- <sup>13</sup> Cathut ni hno a sak e hah pouk haw,  
a longkawi sak e teh apinimaw a palan thai han.
- <sup>14</sup> Yawhawinae na coe nah lunghawi awh.  
Rucatnae na kâhmo nah kâpouk awh.  
Tami ni ka tho hane kawi a panue nahanlah  
Cathut ni hawinae hoi roedengnae kâletta lah a poe.
- <sup>15</sup> Ayawmlah ka onae atueng nah hno pueng ka hmu thai toe. Tami kalan  
ni a lannae daw k a sung e tie hoi, tami kahawihoe ni ahawihoe hnae,  
daw k a hringsaw e hai thoseh ka hmu. <sup>16</sup> Hloi lan hanh, hloi lungang  
hanh. Bangkongmaw nama e hawinae hah raphoe hanelah na ngai. <sup>17</sup> Hloi  
mathout hanh, hloi pathu hanh. Bangkongmaw atueng a pha hoe hnahlan  
due hane na ngai. <sup>18</sup> Hete lawk heh pâkuem hanelah ahawi. Thada hanh,  
Cathut ka taket e tami teh hno pueng daw k hoi a hlout han.
- <sup>19</sup> Khopui thung kaawm e ukkung hra touh hlak, tami lungkaang buet  
touh e lungangnae a tha aohnawn.
- <sup>20</sup> Yon nuen laipalah hnokahawi ka sak e tami a nuen kahawi e talai van  
buet touh hai awm hoe.
- <sup>21</sup> Ayâ ni a dei e pueng hah pâkuem hanh. Hottelah na tetpawiteh, na  
san e thoebo lawk na thai han.
- <sup>22</sup> Nama roeroe ni atuhoitu, ayânaw thoe na bo e hah na lung hoi na  
panue.
- <sup>23</sup> Hetnaw pueng heh, kai ni lungangnae hoi ka noumcai toe. Ka lungang  
han toe ka ti navah, lungangnae hoi hoe ka kâhla. <sup>24</sup> Kahlat ni teh  
kadung poung e hno hah apinimaw a tawng vaiteh a hmu thai han.
- <sup>25</sup> Lungangnae hoi akongnaw hah ka tawng teh panue hanelah thoseh,  
povangtanae hoi pathunae panue nahanelah thoseh, ka lung ni a kâyawm  
toe. <sup>26</sup> Tangkhek hoi tamlawk lah kaawm e napui e lungthin teh duenae  
hlak bet akhahnawn tie ka panue. Cathut a lung ka youk lah kaawm e ni  
duengdoeh hote napui kut daw k hoi a hlout han. Yon ouk ka sak e teh a  
kâman han. <sup>27</sup> Phungdeikung ti e teh kai ni ka tawng teh ka hmu hoe  
rae hah hmu hanelah buet touh hnukkhu buet touh a pâphue. <sup>28</sup> Tongpa  
thong touh thung daw k buet touh ka hmu toe. Napui thong touh thung  
buet touh boehai ka hmawt hoe. <sup>29</sup> Kai ni ka hmu e buet touh teh, Cathut  
ni tami hah tamikalan lah a sak ei teh, taminaw ni moikapap e pouknae  
hah a tawng awh.

## 8

### *Siangpahrang e kâlawk hah tarawi haw*

- <sup>1</sup> Apimaw a lungkaang e patetlah kaawm  
Apimaw deicainae ka panuek.  
Lungangnae ni minhmai a pan sak teh  
taranhawinae mei a kamnue sak.



<sup>2</sup> Cathut hmalah lawk na kam e patetlah siangpahrang e lawk ngâi haw telah pouknae na poe. <sup>3</sup> Siangpahrang hmalah hoi karanglah tâcawt hanh. Kahawi hoeh e hno saknae koe lah kampang hanh. Bangkongtetpawiteh, a ngai e patetlah lawk a ceng. <sup>4</sup> Siangpahrang e kâlawk dawk bahu ao. Ahni koe apini maw, nang bangmaw na sak tie hah a pacei ngam han. <sup>5</sup> Ahnie kâ ka tarawi e teh runae dawk hoi a hlout han. Tami a lungkaang e a lungthin ni atueng hoi sak han kawi a panue. <sup>6</sup> Tami ni a pouk e pueng hah atueng hoi saknae kâ ao. Hatei, tami teh runae puenghoi a khang. <sup>7</sup> Hmalah ka tho hane panuek hoeh. Bangtelamaw ao han tie apinihai dei thai hoeh. <sup>8</sup> Apihai muitha ka kuen thai e tami buet touh hai awm hoeh. A due hnin dawk apinihai kâ tawn hoeh. Hote kâtuknae dawk hoi apihai hlout thai hoeh. Yonnae a sak ei nakunghai, yonnae ni hot dawk hoi hlout sak thai hoeh. <sup>9</sup> Hetnaw pueng heh ka hmu toe. Kanî rahim vah sakyoe e pueng heh ka pouk toe. Amahoima runae kâhmo hanelah ayâ alouknaw uknae tueng hai ao.

### *Cathut ka taket e ni hnokahawi a sak*

<sup>10</sup> Hothloilah, thoungnae hmuen koe ka cet e tami kahawihoeahnaw pakawp lah ao awh e hai thoseh, hawihoeahnae a saknae kho dawk apinihai ahni hah a pouk awh hoeh e hai thoseh, ka hmu toe. Hathai ahrawnghrang doeh. <sup>11</sup> Kahawi hoeh ka sak naw hah karanglah lawkceng teh dan ouk a poe hoeh dawkvah, taminaw ni kahawihoehe hno sak hanelah a lungtang awh. <sup>12</sup> Tami kahawihoehe ni avai cum touh hawihoeahnae a sak nahlangva a hring a saw eiteh, Cathut kataketnaw ni a hmalah a taki awk dawkvah, hawinae a coe awh han tie kamcengcalah ka hmu. <sup>13</sup> Tami kahawihoehe niteh, Cathut a taki hoeh dawkvah hawinae coe mahoehe. Tâhlip hoi kâvan e a hringnae hai aduem han.

### *Cathut ni a sak e hnopueng tami ni panuek thai hoeh*

<sup>14</sup> Talai van kaawm e ahrawnghrang hno buet touh teh, tami kahawihoeahnaw ni a pang awh hane kathout hno hah tami kalannaw ni a pang awh teh, tami kalannaw ni a pang awh hane kahawi hno hah tami kahawihoeahnaw ni letlang a pang awh. Hathai ahrawnghrang doeh telah ka pouk. <sup>15</sup> Hatnavah nawmnae hah ka oup. Bangkongtetpawiteh, kanî rahim vah caneinae, nawmnae hlakvah kahawi e hno awm hoeh. Kanî rahim vah Cathut ni na hring sak nathing vah, panki laihoi hmu e hno thung dawkvah, hot doeh pou coe awh.

<sup>16</sup> Lungangnae panue hane hoi talai van thaw tawk e pueng hmu hanelah karum khodai ip laipalah ka lungthin ka hroecoe navah, <sup>17</sup> Cathut ni kanî rahim a sak e hno pueng tami ni panuek thai hoeh tie ka hmu. Hothloilah banghloi e a lungkaang ni koug ka panue han ka tet nakunghai coung thai hoeh.

## 9

### *Tami pueng koe duenae a pha*

<sup>1</sup> A lathueng lah dei tangcoung e naw hah kai ni ka pouk navah, tamikalan hoi tami lungkaangnaw teh, a tawksak e hno khuehoi Cathut kut dawk ao. Tami pueng ni amamae hmalah lengkaleng kaawm e lungpatawnae hoi hmuahanae hah panuek awh hoeh. <sup>2</sup> Tami pueng e lathueng vah reikâvan e hno a tâco. Tami kalan hoi kalan hoeh e, tami kahawi hoi kahawihoehe e, tami kathoung hoi kathounghoehe, thuengnae ka sak hoi ka sak hoeh e, yonnae ka tawn hoeh e hoi ka tawn e, thoekâbo



e tami hoi kâbo hoeh e taminaw lathueng hai reikâvan e hno a tâco.  
<sup>3</sup> Hethateh, kanî rahim vah sak e reikâvan e hawihoehnae tami pueng ni a kâhmo e hno doeh. Atang katang lah taminaw e lungthin teh yonnae hoi akawi. A hring awh nathung vah, pathunae lung a tawn awh teh bout a due awh. <sup>4</sup> Ka hring e taminaw hoi kâkuennaw teh ngaihawinae ao. Kahring e ui teh kadout e sendek hlak bet ahawi. <sup>5</sup> Kahring e tami ni a due hane a panue. Ka dout e ni teh banghai panuek hoeh. Tawkpheu awh hoeh toe. Ama hai pahnim awh toe. <sup>6</sup> Ahnie lungpatawnae, maithoenae, utnae hai a kahma toe. Kanî rahim vah sak e hno dawkw ayânaw hoi rei coe mahoe toe.

### *Na lungpataw e hoi nawm haw*

<sup>7</sup> Cet nateh lunghawi lahoi rawca cat leih. Lunghawi lahoi misurtui net leih. Nang ni na sak e naw pueng Cathut ni lung na kuepkhai. <sup>8</sup> Na khohna hai pou pangaw naseh. Na lû dawkw e satui hai phui sak hanh. <sup>9</sup> Kanî rahim na poe e ahrawnghrang hring nathung, na lungpataw e yu hoi kanawmcalah hringnae atueng loun sak haw. Hetteh, hring na thung kanî rahim vah panki thapatho e dawkw coe e doeh.

<sup>10</sup> Tawkw hane kaawm e pueng hah thahmei laihoi tawkw awh. Bangkoktetpawiteh, atu na cei teh na pha hane hmu e, tami kadout kho teh thaw tawkwnae, kho poukwnae, thouthainaie, lungangnae hai awm mahoe toe.

### *Lungang e teh pathu e hlak bet ahawihawn*

<sup>11</sup> Kanî rahim kaawm e naw pueng bout ka khet navah, a hue karang poung e tami hai ouk tâ hoeh. Atha kaawm poung ni taran a tuk ei, ouk tâ hoeh. A lungkaang ni ka boum lah ouk cat hoeh. A ratho kahawi ni hnopai ouk hmawt hoeh. Lawkw ka ngai e teh tami hmalah minhmai kahawi ouk hmawt hoeh. Tami pueng koe atueng akuepnae, coungkacoenae patetlah doeh ouk ao tie hah ka hmu. <sup>12</sup> Tami ni amae atueng hah ouk panuek hoeh. Tamlawkw dawkw kâman e tanga patetlah tangkam dawkw kâman e tava patetlah taminaw ni runae thungvah poukw laipalah a kâman awh toe.

<sup>13</sup> Kanî rahim oup han kawî lah ka hmu e lungangnae teh, <sup>14</sup> khoca kayoun e kho buet touh ao. Siangpahrang kalen e a tho teh, hote kho lawilah ao awh teh, ransanaw moikapap hoi a kalup awh. <sup>15</sup> Hote kho dawkw kaawm e mathoe ca a lungkaang e buet touh ni, amae lungangnae lahoi hote kho teh a hlout sak. Hatei, hote mathoe ca hah apinihai noutna awh hoeh. <sup>16</sup> Hatnavah, ka dei ngai e teh, lungangnae teh thasainaie hlak ahawi. Hatei, mathoe ca e lungangnae teh banglahai ouk noutna awh hoeh. A lawkw hai ngai a pouh hoeh.

<sup>17</sup> Ka ukkung ni kapathunaw e hramkikhai e lawkw ngai e hlakvah, soumtinae koe tami lungkaang ni dei e lawkw doeh a ngai pouh. <sup>18</sup> Lungangnae teh senehmaica hlak bet ahawi. Yonnae ka sak e haiyah hno kahawinaw hah ouk a raphoe.

## 10

<sup>1</sup> Kâhluk e hmuítui hah bitsei ro ni  
 a hmuikawkw sak e patetlah,  
 pathunae titca e ni a lungkaang e hoi  
 bari kaawm e tami hah hot boiboe lah ao sak.

<sup>2</sup> Tami lungkaang e a lungthin teh amae aranglae kut dawkw ao.  
 Tamipathu e a lungthin teh avoilae kut dawkw ao.



- 3 Tamipathu teh lam a cei lahun nah pouknae a tawn hoeh dawkvah,  
 kai teh tamipathu doeh telah tami pueng koe ouk a dei.  
 4 Bawi buet touh ni nang koe a lungphuen pawiteh,  
 nama e hmuen cettakhai hanh.  
 Panguenpnae ni yon kalen e hai ouk a roun sak.  
 5 Bawi ni a payon e kecu dawk kanî rahim vah  
 hnokahawi hoeh ka hmu e teh,  
 6 kapathunaw ni a rasangnae koe,  
 ka tangrengnaw ni a rahnoumnae koe a tahung awh e,  
 7 sannaw ni marang a kâcui awh teh,  
 bawinaw ni sannaw patetlah khok hoi a cei awh e hah ka hmu.  
 8 Tangkom ka tai e tami teh hote tangkom dawk a bo han.  
 Takha ka raphoe e tami teh tahrûn ni a khue han.  
 9 Talungnaw ka takhoe e tami teh ama a ratet han,  
 thing ka tâtueng tami haiyah hmâtanca hoi ao han.  
 10 Cakâ a hâ a kim nah na kata hoeh pawiteh, tha hoe patung han.  
 Thounthainae ni tânae hoi yawhawinae a coe sak.  
 11 Ân hoehnahlan tahrûn ni tami khuek pawiteh,  
 Taânkasinnaw teh banghai hawinae awm hoeh.  
 12 Tami lungkaang e lawk teh a radip.  
 Hatei, tamipathu e pahni teh amahoima a kâpayawp thai.  
 13 Lawkdei a kamtawng nah pathunae lah a o,  
 apoutnae koe lah teh ka mathout poung e pathunae lah ao.  
 14 Tamipathu teh lawk apap.  
 Hateiteh, kaawm hane hno tami ni dei thai awh hoeh.  
 Ahnie a hnuklah bangtelamaw a tho han tie apimaw ka dei thai.  
 15 Tamipathunaw teh khothung a cei awh han e  
 lamthung pateng a panue awh hoeh dawkvah,  
 ahninae kâyawmnae teh ayâ patang sak.  
 16 Camo rae siangpahrang ni a uknaeram teh,  
 Ukkungnaw ni amom patenghai  
 a ngai patetlah a canei dawkvah yawthoenae lah ao.  
 17 Na ram dawk e siangpahrang teh  
 ka talue e a miphun lah ao dawkvah,  
 ukkungnaw ni yamuhrinae laipalah  
 thao nahanelah atueng khoe e daw  
 catnet pawiteh yawhawinae lah o.  
 18 Ekvoi pangak dawkvah lemphu a hmawn thai  
 kut hoi pathoup hoehpawiteh kho a yu thai.  
 19 Nawm nahanelah pawî ouk to awh.  
 Misur ni hai na nawm sak thai.  
 Tangka ni bangpueng a sak thai.  
 20 Na lungthin hoi siangpahrang hah thoebo hanh.  
 Na inae hmuen koehai kacue e hah thoebo hanh.  
 Kalvan kamleng e tava ni hote lawk hah a kamlengkhai han.  
 A kamleng lahun nah hote tava ni hote kong hah a pathang han.

## 11

- 1 Na rawka hah tui dawk tâkhawng haw,  
 atueng moi a ro hnukkhu bout na hmu han.  
 2 Tami sari touh dueng na hoeh, tami taroe touh hah rei lah.



Talai dawk bangmaw kaawm han tie na panuek hoeh.

<sup>3</sup> Tâmainaw teh khotui hoi a kawî torei teh talai dawk kho a rak.  
Thingkung ni akalah, atunglah a rawp nakunghai thoseh,  
A rawpnae hmuen dawk roup ao.

<sup>4</sup> Kahlî dueng ka khen e tami ni cati kahei hoeh,  
Tâmainaw banglahai ka noutna hoeh e ni hai canga mahoe.

<sup>5</sup> Kahlî a cei nahane lam hai thoseh, camo ka neng e napui e von dawk a  
hrunaw ni bangtelamaw a rounge tie hai thoseh, panue thai hoeh e patetlah  
a cawngca pueng kasakkung Cathut ni a tawksak e panuek thai hoeh.

<sup>6</sup> Amom lae atueng dawk cati kahei nateh, tangmin lahai kahei laipalah  
awm hanh. Bangkongtetpawiteh, bangpatet hah maw aphu o han tie hai  
thoseh, hot roi teh kâvan e lah aphu ao han tie hai thoseh, panuek thai  
hoeh.

<sup>7</sup> Atangcalah, angnae teh a radip, kanî raeng a hmu nah lunghawi han  
kawi lah ao.

<sup>8</sup> Hatnavah tami ni a hringyung asaw teh a lunghawi nakunghai,  
hmonae tueng hah pouk naseh, hote atueng teh moi a ro han. Kaawm  
tangcoung e hnonaw teh a hrawnghrang la doeh be ao.

<sup>9</sup> Thoundoun nang, na naw lahun nah nawmnae sak awh haw, na  
nawnae tueng nah lunghawinae tawn haw. Ma ngainae lamthung hoi,  
na panuena koe lah dawn haw, hat navah, hote hnonaw pueng Cathut ni  
lawkceng vaiteh, nang yon na pen han tie panuek awh.

<sup>10</sup> Hatdawkvah, lungreithainae hoi na roedengnae hah takhoe haw,  
camonae hoi thoundounnae hai a hrawnghrang doeh.

## 12

<sup>1</sup> Na nawnae a hninnaw dawk na kasakkung pouk loe. Rucatnae a  
hninnaw a pha teh kai dawk a nawmnae awmhoeh toe telah na deinae  
kumnaw a pha hoehnahlan, <sup>2</sup> Kanî hoi angnae, thapa hoi âsinaw a mawm  
hoehnahlan, khorak hnukkhu tâmainaw bout a tho hoehnahlan, Bawipa  
pouk loe. <sup>3</sup> Hote atueng dawk imkaringnaw a tâsue vaiteh, athakaawme  
taminaw a thayoun awh han. Cakang kaphawmnaw ayoun dawkvah, a  
kâhat awh han. Hlalangaw dawk hoi ka khen e taminaw, a mitmawm  
awh han. <sup>4</sup> Cakang phawm lawk rek a cai hoeh torei teh, lam teng e  
longkhanaw teh khan lah ao han. Tava lawk a thai torei teh amom a thaw  
awh han, la ka sak e tanglanaw abuemlah tha a tawn awh han. <sup>5</sup> Taminaw  
ni hmuenrasang hoi lam dawk takikathonaw a taki awh han. Almond kung  
ni a pei han. Samtong teh amahoima a ri han. Bangkongtetpawiteh, tami  
teh yungyoe e im koe lah cei lahun lah o dawkvah, ka khui e taminaw  
ni lam dawk a kâhei awh han. <sup>6</sup> Ngun dingyin a thouknae, suimanang  
a reknae tuiphuek koe tuium kâbawngnae, tui sawnnae rui thawknae,  
atueng ka phat han. <sup>7</sup> Hatnae atueng dawk vaiphu teh a thonae talai  
koelah bout a ban vaiteh, muitha teh na kapoekung Cathut koe bout a  
ban han. <sup>8</sup> Ahrawnghrang doeh, hnopueng teh ahrawnghrang doeh telah  
phungdeikung ni a ti.

<sup>9</sup> Phungdeikung teh a lungang dawkvah, tamihunaw, lungang  
thoumthainae ouk a cangkhai. A pouklak e phungdeilawknaw a noumcai  
teh a thut. <sup>10</sup> Phungdeikung ni thai kahawi e lawklung a tawng teh a thut  
e lawklung teh kathuem e lawk, lawkkatang doeh. <sup>11</sup> Tami lungkaang e  
lawk teh sâw hoi thoseh, tukhoumkung kalen buet touh koe a hnawng teh  
tami hu hemnae sumtaboung hoi thoseh a kâvan. <sup>12</sup> Hothloilah, ka capa



hot patet e lawk lahoi na dei pouh e hah tarawi loe. Ca lahoi ka thun nakunghai baw thai mahoe. Ca panki lai hawi khetnae ni na tawn sak.

<sup>13</sup> Ahnoungepoung e lawk teh, Cathut taket nateh kâpoelawknaw hah tarawi haw. Hethateh, tami pueng e thaw lah ao. <sup>14</sup> Cathut ni kahawi hno thoseh, kahawihoehe hno thoseh, hro e hnonaw pueng hoi hnocawngca lawk a ceng han.



## SOLOMON LA

### *Sulam tami*

- <sup>1</sup> Solomon ni a thut e lanaw thung dawk e la lah ao.
- <sup>2</sup> Pahní hoi paconae hoi kai hah na paco haw.  
Bangkongtetpawiteh, nange lungpatawnae teh  
misurtui hlak ahawihnawn.
- <sup>3</sup> Na kâhluk e hmuitui ni na kaying toe.  
Nange na min teh awi e hmuitui lah ao.  
Hatdawkvah tanglakacuemnaw ni nang teh na lungpataw awh.
- <sup>4</sup> Kai hah na hrawi nateh, karanglah yawng lei sei.  
Nang siangpahrang ni kai teh amae inae khan thung na kaw toe.  
Nang dawk ka lunghawi vaiteh ka konawm han.  
Na lungpatawnae hah misurtui hlak ka pouk han.  
Nang teh na lungpataw katang awh.
- <sup>5</sup> Oe Jerusalem canu, kai teh Kedar rim patetlah ka tamang eiteh,  
Solomon siangpahrang e im dawk  
yap e hni patetlah a mei kahawi.
- <sup>6</sup> Ka tamang poung e kaie ka takthai kecu dawk,  
kahawi hoeh lah na hmawt awh han.  
Ka manu e capanaw ni kai koe a lungkhuek awh teh,  
misur takhanaw hah, ka ring hanelah ka rakueng awh toe.  
Kaie misur takha teh ka ring hoeh.

### *A pahren e napui koe*

- <sup>7</sup> Kaie ka lungthin thung dawk  
Ka pahren e tami,  
na tuhu hah nâ e hmuen koe vaimoe,  
a khoum awh vaiyoe,  
kanithun vah na e hmuen koe vaimoe a kâhat sak vaiyoe.  
Kai hah na dei pouh haw.  
Kai teh bangkongmaw na hui tuhu naw rahak vah  
hro e patetlah khuet ka o han va.

### *A pahren e*

- <sup>8</sup> Napuinaw thung dawk  
a mei kahawipoung e lah na  
Oe na ka panuek hoehpawiteh,  
tunaw e hnukkâbang haw.  
Tukhoumnaw e rim teng vah,  
nange hmaeca hah rawca poe haw.
- <sup>9</sup> Ka pahren e tawncanu,  
nang teh Faro siangpahrang e  
ranglengnaw thung dawk e  
marang hoi na bangnue.
- <sup>10</sup> Nange na tambounnaw teh  
talung phu kaawm poung e lah ao teh,  
na lahuen teh suidingyin hoi na meihawi poung.

### *Jerusalem canunaw*

- <sup>11</sup> Nang hanelah ngun hoi sak e  
suihnacacp hai kaimouh ni na sak pouh han.



*Sulam tami*

- 12 Nang siangpahrang teh ahnie caboi daw  
na tahung nah kai koehoi,  
ka tho e hmuitui hmui ni kaying e lah ao.
- 13 Kai ni ka pahren e nang e,  
murah hmuitui tabu ca teh,  
kaie lungtabue dawkvah rum touh thung ao.
- 14 Kai ni ka pahren e nang teh,  
kai hanelah Engedi misur takha daw  
Henna pei patetlah ao.
- 15 Ka pahren e ka tawncanu,  
nang teh na mei ahawipoung.  
Na hawi poung.  
Nange na mit teh bakhu mit na tawn.
- 16 Kai ni ka pahren e nang teh  
na mei ahawipoung.  
Ngai a tho poung.  
Ka lung a nawm sak.  
Maimae ikhun teh hringsuepcalah ao.
- 17 Maimae im khomnaw teh,  
Sidar thing, a lempu teh hmaicathing e doeh.

**2**

- 1 Kai teh Sharon e rosi pei hoi kâvan teh  
ayawn daw e lili pei lah ka o.
- 2 Ka pahren e nang teh, ka lungpataw e tangla,  
pâkhingum e, lili pei patetlah na o.
- 3 Kahrawngum ka paw e  
Epal thingkung patetlah ka pahren nang teh,  
thoundounnaw e rahak na o.  
Kai teh ahnie tâhlip daw kanawmca lah ka o teh,  
a paw teh kai hanelah a radip poung oe.
- 4 Ahni ni kai teh buvennae im koe na hrawi teh,  
kaie lathueng a yap e hni teh  
a lungpatawnae doeh.
- 5 Kai teh ngaipatawnae hoi ka o dawkvah  
misur hoi Epal paw hoi  
lung bout na pahawi haw.
- 6 Ahnie avoilaie a kut ka lû rahim a ta teh,  
aranglaie kut hoi na takawi na seh.
- 7 Oe Jerusalem canu ka pahren e teh,  
a mahmawk a kâhlaw hoeh roukrak  
na pâhlaw awh hoeh nahanelah,  
kahrawng e sayuk sakhinaw thoebo laihoi  
nangmouh teh lawk na thui awh.
- 8 Khenhaw! ka pahren e lawk doeh.  
Montang monruinaw yawngtapue laihoi a tho.
- 9 Ka pahren e teh, sayuk sakhi ca patetlah ao.  
Rapan lawilah a kangdue.  
Hlalangaw koe a khet teh,  
hlalangaw koe a kâpâtue.
- 10 Ka pahren ni na kaw teh,



- a dei e lawk teh, ka pahren poun e tangla,  
a meikahawi e, thaw nateh tho haw.
- 11 Khenhaw! kasik hai aloum teh  
cotui hai abaw toe.
- 12 Talai van vah, a peinaw a kamhlawng toe.  
Tavanaw hai a cainae tue a pha toe.  
Maimae ram vah, bakhu lawk hai thai toe.
- 13 Thaibunglung kung a pawnaw hai a hmin toe.  
Misurkung hai a pei teh, a hmuittui toe.  
Ka pahren e ka imlawinu, a meikahawi poun e,  
thaw nateh tho leih.
- 14 Lungsong rahak e bakhu,  
na mei heh na hmawt sak haw.  
Na lawk hai na thaisak haw.  
Na lawk a rading teh na mei teh ngai ao poun.
- 15 Maimae misurnaw teh  
a pei lahun toung dawkvah,  
misurkungnaw ka raphoe hane  
Asuinaw hoi Asuicanaw hah man awh.
- 16 Kaie ka pahren e teh kai hanelah ao e patetlah  
kai hai ahni hanelah ka o.  
Ahni teh tucahunaw hah  
kahrawngum a khoum teh a kawkhik.
- 17 Khohmo a kahma teh,  
khodai totouh ka pahren teh  
Bethel mon daw e  
sayuk sakhi patetlah doeh ao.

### 3

- 1 Ka lungthung hoi ka pahren e hateh,  
karum vah ka inae koehoi ka tawng.  
Hateiteh ka hmawt hoe.
- 2 Atu ka thaw teh khothung ka lawngven teh  
lam tangkuem hoi tami a kamkhuengnaw  
hmuennaw koe ka lungthinthung hoi  
ka pahren nang teh na tawng.  
Hateiteh na hmawt hoe.
- 3 Khoipui ka ring e ramvengnaw ni hai  
na hmu awh.  
Ahnimouh koe ka pahren hah  
na hmu awh maw telah ka pacei.
- 4 Ahnimouh koun tapoun hoi a ro hoehnahlan,  
ka pahren e teh ka hmu.  
Ahni hah ka kuet teh, ka khenae,  
anu imthungkhu totouh ka hrawi.
- 5 Oe Jerusalem canunaw ka pahren teh  
amahmaw a kâhlaw hoe roukrak  
na pâhlaw awh hoe nahanelah,  
kahrawng e sayuk sakhinaw thoebo laihoi,  
nangmouh teh lawk na thui awh.
- 6 Murah hoi frankinsen koehoi  
hno kayaktnaw ni  
a yo e hmuittuinaw pueng hah,  
hmaisawi toteh ka khu e hmaikhukhom patetlah



kahrawngum hoi ka tâcawt e teh api nama.

- 7 Khenhaw! Solomon kâkayawtnae doeh.  
Isarel athakaawme taminaw,  
athakaawme 60 touh hoi a tho.
- 8 Hotnaw abuemlah teh tarantuk hanelah  
tahloi ka patuem e tarankahawinaw doeh.  
Karum lae atueng nah  
puen hanelah ao dawkvah,  
tami pueng ni tahloi coungkacoelah a neng awh.
- 9 Solomon siangpahrang ni  
Lebanon thing hoi ama hanelah,  
kâkayawtnae hah a sak.
- 10 Alungui e khomnaw hah, ngun hoi,  
a rahim e naw hah sui hoi,  
tahung nahane carawng hah  
Opaou e hni hoi a sak.  
Athung lae naw teh,  
Jerusalem canunaw ni lungpatawnae hoi  
a pathoup awh.
- 11 Zion canunaw kâpaluen e hnin hoi,  
lungthin a nawmnae hnin nah,  
a manu ni oupnae bawilakhung hah  
kâmuk sak e Solomon siangpahrang hah  
cet nateh khen awh.

## 4

### *Thoundoun*

- 1 Ka pahren e, nang teh na meihawipoung.  
Na meihawi tanggak na mit teh  
minhmai ramuk thung kaawm e  
Bakhu e mit hoi a kâvan.  
Nange na sam teh, Gilead mon hoi  
ka kum e hmaehu patetlah ao.
- 2 Nange na hânaw teh a muen ngaw teh  
thoung sak hnukkhu,  
ka takhang e tuhu patetlah ao.  
Buet touh hai kahmat hoeh.  
Suetalah a kamphek awh.
- 3 Nange na pahni teh langsanrui hoi a kâvan.  
Nange na lawk teh a pâdingsue.  
Nange na minhmai ramuk thung kaawm e,  
nange na hnâ lakheng teh  
tale paw tangawntangai hoi a kâvan.
- 4 Na lahuen hai Devit ni a sak e imrasang hoi a kâvan.  
Athakaawme taminaw e bahlingnaw pueng,  
hawvah bahling 1,000 touh a bang awh.
- 5 Na sanu roi teh ayawn dawk  
ka pouh e sayuk sakhi samphei hoi a kâvan.
- 6 Kanî a khup hoi kanîka suirasai totouh,  
Murah mon hoi frankinsen mon  
totouh ka cei han.
- 7 Ka pahren e nang dawk toun hane



banghai awmhoeh.

Na meihawi toungloun.

<sup>8</sup> Ka imlawinu, kai hoi lebanon mon hoi tho haw.

Kai hoi Lebanon mon hoi kum haw.

Amana monsom, Senir mon hoi,

Hermon monsom, sendek e kâkhu,

takainaw a onae mon dawkvah khenhaw!

<sup>9</sup> Kaie ka tangla, ka tawncanu,

nang ni ka lungmuenti sak toe.

Na mit hoi vai touh na khet e hoi

lahuen vai touh na pahei e ni,

kaie ka lungthin teh muen na ti sak toe.

<sup>10</sup> Kaie ka tangla, ka tawncanu,

nange lungpatawnae teh a radip poung.

Nange lung na patawnae teh

misurtui hlak hoe ahawi.

Hmuituinaw hlak hai na tui.

<sup>11</sup> Kaie tangla, nange na pahni teh

khoipha patetlah a lăwi.

Na lai rahim sanutui hoi khoitui ao.

<sup>12</sup> Kaie tangla, ka tawncanu,

ka khan e takha ka tungdum e tuiim,

tacikkin e tuiphuek lah ao.

<sup>13</sup> Nange thingthainaw teh,

ka radip e a paw hoi talepawnew onae takha,

hennakung hoi a hmuituinaw,

<sup>14</sup> Hmuitui, spiknard hoi saffron, kalamus,

nakzik thing hoi, frankinsen, murah,

aloe hmuitui, phunkuep ao.

<sup>15</sup> Takha thung e naw, tui bu nahanelah tuiim,

tuiphueknaw, lebanon mon hoi

ka lawng e tuinaw hai ao.

<sup>16</sup> Tung lae kahlî thaw haw, akalae kahlî tho haw.

Kaie takha dawkvah tho awh haw.

A hmuituinae naw teh kâkahei naseh.

Ka pahren e ni takha thung kâen vaiteh

ka radip e paw hah cat naseh.

## 5

<sup>1</sup> Kaie ka tangla ka tawncanu,

ka takha thung kai ka tho toe.

Kai ni Murah hoi a hmuitui e phun hah

ka pâkhueng toe.

Khoitui hoi khoiphanaw hah ka ca toe.

Ka huinaw cat awh, net awh,

Oe ka pahren, ka boum lah cat net.

<sup>2</sup> Kai teh ka i lahun nahai ka lungthin teh

a kâhlaw doeh.

Ka pahren e lawk teh ka thai doeh.

Kaie bakhu, ka pahren e, ka tawncanu,

tamikalan, kai hane na paawng pouh haw.

Ka lû teh tadamtui hoi, ka samnaw hai

karum kabawt e tadamtui hoi



- a duk toe telah ati teh tho a takhawng.
- <sup>3</sup> Kaie ka khohna e teh ka rading toe.  
Bangtelamaw bout ka kho han.  
Ka khoknaw hai ka pâsu toe.  
Bangkong bout kakhin sak han.
- <sup>4</sup> Ka pahren ni kut hoi takhang hah  
ka tanawt teh a paawng toreih teh,  
kaie ka lungthin teh ahni dawk noenae ao toe.
- <sup>5</sup> Ka pahren hanelah takhang  
paawng pouh hane ka thaw navah,  
kaie ka kut dawk hoi Murah satui dek a ca.  
Murah satui teh kaie kutcarei rahak hoi  
tho khannae dawk hoi a lawng.
- <sup>6</sup> Ka pahren hanelah tho ka paawng pouh navah,  
Hatei ka pahren teh yo la a tâco toe.  
Ahnies lawk thai han ka ngai dawk ahni teh  
ka tawng ei, ka hmawt hoe, ka kaw ei voi hoe.
- <sup>7</sup> Khopui ka ring e ramvengnaw ni na hmu navah  
puenghoi na hem awh.  
Khorapan karingkungnaw ni  
ka minhmai ramuk na lawp awh.
- <sup>8</sup> Oe Jerusalem canunaw ka pahren hah,  
na kâmo pawiteh, kai ni ka pahren lawi,  
ngaipataw e lah ka o e hah,  
ahni koe dei pouh loe telah  
nangmanaw lawk na thui awh.
- <sup>9</sup> Napuinaw thung dawk a meikahawi poun e,  
nang ni na pahren e teh,  
alouknaw e phrennae hoi bangtelamaw kâvanhoehnae .  
Kaimanaw hah hottelah lawk na thui nahanelah,  
na pahren e teh alouknaw e pahrennae hoi  
bangtelamaw a kâvanhoehnae,
- <sup>10</sup> Ka pahren teh, a pangaw palingnae hoi  
a kaw e teh tami thong hra touh thung dawk  
ka talue poun lah ao.
- <sup>11</sup> Ahnie a lû dawkvah, sui patetlah  
suihuici patetlah ao.  
Ahnies sam teh atha teh,  
vonga patetlah a tamang.
- <sup>12</sup> Ahnie mit teh palang teng vah  
sanutui hoi pâsu e bakhunaw hoi a kâvan.
- <sup>13</sup> Ahnie tamboung teh hmutui e a pei hmutui,  
hmutui ungnae kahrawngum patetlah ao.  
Ahnies pahni teh, murah tui kalawng e  
lili pei patetlah ao.
- <sup>14</sup> Ahnie kutnaw teh talung hoi pathoup e  
suikuthrawt patetlah  
ahnie tak teh Sapphire lung hoi pathoup e  
loukloukkaang e kasaino patetlah ao.
- <sup>15</sup> Ahnie khok teh, suikhom dawk sak e  
talung phukaawm e khom hoi a kâvan.  
Ahnies a meilam teh,



Lebanon mon patetlah ao teh,  
Sidar thing patetlah a talue poun.

- <sup>16</sup> A hni e pahni teh a radip poun teh,  
a takthai abuemlah ngai a tho poun  
Jerusalem canu ahni teh ka pahren e ka hui lah ao.

## 6

- <sup>1</sup> Napuinaw thung daw k a mei kahawipoun e  
ka tawncanu, nange na pahren e teh  
nâ e hmuen koe maw a cei vai.  
Kaimouh ni nang hoi reirei tawng hanelah,  
nange pahren e teh,  
namaw na kâceihlinghlang roi tie hah dei haw.
- <sup>2</sup> Ka pahren teh, a pawnaw cat vaiteh,  
lili peinaw ka la han a titeh,  
takha thung hmuitui onae koe lah a cei toe.
- <sup>3</sup> Ka pahren hanelah kai teh ka o.  
Ka pahren hai kai hanelah ao.  
Ayawn daw k a pouh e lah ao.
- <sup>4</sup> Ka pahren e ka tawncanu,  
nang teh Tirzah kho patetlah na mei ahawi.  
Jerusalem kho patetlah ngai ao.  
Taran kâtuknae koe e patetlah  
taki kawi lah na o.
- <sup>5</sup> Nange na mit teh,  
kai koehoi alouklah kangvawi leih.  
Ahnimouh ni kai teh na tâ toe.  
Nange na san teh,  
Gilead mon hoi ka kum e hmaehu patetlah ao.
- <sup>6</sup> Nange na hânaw teh tui pâhluknae koehoi  
ka luen e tuhu patetlah ao.  
Buet touh hai kahmat hoeh.  
Kamphei e dueng doeh a khe awh.
- <sup>7</sup> Na minhmai ramuknae thung kaawm e  
na tangbounnaw teh  
talepaw tangawntangai hoi a kâvan.
- <sup>8</sup> Siangpahrang napui 60,  
a yu ado lah 80,  
touklek thai hoeh e tanglakacuemnaw ao.
- <sup>9</sup> Kaie bakhu, kaie ka kuep e,  
buet touh dueng doeh kaawm.  
Agni ka khe e manu ni a pahren poun e lah ao.  
Tanglanaw ni agni hah a hmu teh,  
yawhawi a poe awh.  
Siangpahrangnu hoi a yudonaw ni hai  
agni teh a pholen awh.
- <sup>10</sup> Thapa patetlah ahawi teh,  
kani patetlah a sei teh,  
tarankâtuknae koe e patetlah  
taki hanlah na o.  
Amom patetlah ngaihawi laihoi  
ka khen e teh apimaw .



- 11 Kai teh misurkung rounng hai a rounng hoeh hai,  
Tale a pei hoi a pei hoeh e hai panue hanelah,  
ka khetyawt hanelah takha koe ka cei.
- 12 Kai ka panue hoehnahlan vah,  
ka muitha teh,  
Aminadab leng dawk kâcuie patetlah ao.
- 13 Oe Sulammit, bout tho haw.  
Kaimouh ni nang teh na hmu thai nahanelah  
bout tho haw. Bout tho haw.  
Sulammit dawk bang hno maw  
a hmu awh han vai.  
Ransahu bokhni touh e patetlah a hmu awh han.

## 7

- 1 Oe bawi canu, khokkhawm na khawm laihoi  
na khoknaw teh a kamcu pounng.  
Na phainaw teh kathoumnaw ni a sak e  
aphu kaawm e talung patetlah ao awh.
- 2 Nange na keng teh tui hoi ka kawi e  
manang lah ao.  
Na vonpui hai, lili pei hoi ka kawi e  
cakang pung e lah ao.
- 3 Sanu roi teh  
sayukca kamphei e hoi a kâvan.
- 4 Nange na lahuen teh,  
kasaino imrasang patetlah na mit teh,  
Heshbon kho, Bethrabbim  
longkha teng kaawm e, tuiim patetlah  
na hnawng teh Damaskas kho koe ka kangvawi e,  
lebanon im hoi a kâvan.
- 5 Nange na lû dawk kaawm e bawilakhung teh,  
Karmel mon hoi a kâvan.  
Nange na lû dawk kaawm e na sam hai,  
opaou e hni hoi a kâvan.  
Siangpahrang ni sam a vei e hoi a kâvan.
- 6 Ka pahren e ka tawncanu, nang teh,  
kai ka nawm nahanelah ahawi pounng.  
Ngai kaawm pounng e nuen hoi na kawi.
- 7 Nange na rasangravuinae teh,  
samtuekung patetlah na o teh  
nange sanunaw hai samtuepaw hoi a kâvan.
- 8 Samtuekung dawk ka luen vaiteh,  
a kangnaw hah ka tek han ka ti navah  
nange sanunaw teh misurbom patetlah thoseh,  
na kâha hmuï teh, Epal hmuï patetlah thoseh,
- 9 Nange na pahni hai katuipounge  
misurtui patetlah thoseh ao.  
Hote misurtui teh ka pahren hanelah  
kalanalah a lawng.  
Kaipnaw e pahni dawk pouk laipalah a lawng.
- 10 Kaie ka pahren e tami teh,  
kaie lah ao patetlah ahnie a ngainae teh



kaie lah ao.

- 11 Tho leih, ka pahren e,  
kahrawng e hmuen koe cei vaiteh,  
khonaw daw k tangmin lae atueng  
loum sak awh sei.
- 12 Amom lah misur takha koe cet awh sei.  
Misurkung a hring, hring hoeh maw,  
a paw rano moi rano hoeh maw,  
khenhaw! sei.  
Hote hmuen daw k ka lungpataw e  
nang hah na poe han.
- 13 Hloisikungnaw ni hmutui e  
kaimae longkha teng radip e a paw katha hoi,  
karuem e abuemlah ka pahren nang hanelah  
ka pátung toe.

## 8

- 1 Nang koe kaie manu e sanutui karadip e,  
ka net e, ka thangroi patetlah o sak han ka ngai.  
Kai ni nang teh, alawilah kâhmo vaiteh,  
na paco nakunghai ayânaw ni kai teh  
na pathoe mahoe.
- 2 Anu e irakhan na kut daw k hoi  
na hrawi vaiteh na ceikhai han.  
Ahni ni hai kai hai na cangkhai han.  
Kai ni tâsi hoi kalawt e misurtui hoi  
taletui hah na nei sak han.
- 3 Ahnie avoilah,  
e kut kaie ka lû rahim a hruek vaiteh,  
aranglae kut hoi na takawi seh.
- 4 Oe Jerusalem canunaw, ka pahren e teh  
amahmaw k a kâhlaw hoehrourak  
na pâhlaw awh hoeh nahanelah,  
kahrawng e sayuk sakhinaw noe lahoi  
lawk na thui awh.
- 5 A pahren daw k kamngawi laihoi  
kahrawngum hoi ka tho e hateh  
api han namaw.  
Epal thingkung rahim nang teh na pâhlaw toe.  
Hote hmuen koe nange na manu ni  
nang teh na hâ toe.  
Hote hmuen koe nang na khe teh,  
hâ e lah na hruek toe.
- 6 Kai teh nange na lung dawkvah  
tacik na kin leih lah.  
Na kut daw k hai tacik na kin leih.  
Bangkongtetpawiteh, lungpatawnae teh,  
due e patetlah a thao.  
Dipmanae lungthin teh phuen kho patetlah a ru.  
Ahnie a hue teh, hmaisaa hoi  
hmaito patetlah ao.
- 7 Hatnavah, tuinaw ni  
lungpatawnae roum sak thai hoeh.



Tuikalen ni hai pâyawt thai hoeh.  
Tami ni ama im kaawm hnopai pueng  
lungpatawnae lahoi poe han a ngai nakunghai  
puenghoi dudamnae doeh kâhmo ti.

- 8 Kaimouh koevah kanaw rae ka tawncanu  
buet touh ao rah.

Ahni teh sanu co hoeh rah.  
Hote ka tawncanu a pacei awh navah,  
ahni hanelah bangtelamaw ka ti awh han.

- 9 Ahni teh rapan lah awm pawiteh,  
ahni van ngunrapan ka sak han.  
Takhang lah awm pawiteh  
Sidar thing hoi ka kalup han.

- 10 Kai teh kho rapan lah ka o.  
Kaie sanu hai imrasang patetlah o.  
Hatdawkvah, kai teh  
nang na hmalah hawinae ka sak.

- 11 Baalhamon ram dawk takha buet touh ao.  
Hote misur takha teh,  
karingkungnaw koe ka hlai sak teh  
a paw a ca phu lah  
shekel thawng touh rip a sin awh.

- 12 Ka tawn e misur takha teh kahma lah ao.  
Oe Solomon, ngun shekel thong touh  
nama hanelah ao teh,  
karingkungnaw ni cumhni touh rip a la awh.

- 13 Takha thung kaawm e,  
nange tami na huikonaw ni nange  
na lawk teh a ngai awh.  
Kai hai na thaisak van awh haw.

- 14 Ka pahren nang kai koe karanglah tho leih.  
Hmuitui monnaw dawk kaawm e  
sayuk sakhicanaw patetlah na awm sak haw.



## ISAIAH

<sup>1</sup> Judah siangpahrang Uziah, Jotham, Ahaz, Hezekiah tinaw a bawi awh navah, Amos capa Isaiah ni Judahnaw hoi Jerusalem kho hoi kâkuen lah a hmu e vision,

### *Cathut ni a taminaw a yue*

<sup>2</sup> Cathut ni lawk a dei dawkvah, Oe kalvannaw, thai awh haw. Oe talai, hnâpakeng haw. Ka kaw k e catounnaw ni Kai na taran awh toe. <sup>3</sup> Maito ni kakhoumkung a panue. La ni hai kakawkkung e dokko a panue. Isarelnaw ni Kai na panuek awh hoe h toe. Ka taminaw ni pouk panuek awh hoe h toe a ti.

<sup>4</sup> Miphun kathout, sak payonnae ka phawt e tamihu, kahawihoehe hno ka sak e catoun, rawknae canaw lah bo na o awh toung aw. BAWIPA hah na ceitakhai awh toe. Isarelnaw e kathounge Cathut hah na bari awh laipalah, hnamthun sin awh teh, na kamlang takhai awh toe. <sup>5</sup> Ahnimanaw hah bangtelamaw bout ka hem han vai. Bangtelamaw bout ka yue han vai. A lû teh hmâtan hoi king akawi, na lung hai tha khoeroe awh hoe h toe. <sup>6</sup> Khoktabei koehoi lû koe totouh, damnae awmhoeh. Hmâtan hoi, a phing teh, a hnai ka lawi e seng lah ao. Hote hmânaw hah pâsu hoe h, kawm hoe h, satui hai hluk pouh hoe h rah.

<sup>7</sup> Nangmae ram teh tami kingkadi lah ao. Khonaw hai hmai a kak toe. Na talainaw hai ramlouknaw ni na hmaitung vah a ca awh vaiteh, taran ni a raphoe tangcung e patetlah tami kingdi han.

<sup>8</sup> Zion canu hai misur takha ringnae patetlah payin takha daw k e rim patetlah taran ni a kalup e kho patetlah ceitakhai lah ao. <sup>9</sup> Rasahu BAWIPA ni mamouh hanelah younca hai cawi sak hoehpawiteh, maimouh teh Sodom kho patetlah o awh teh, Gomorrah kho hoi kâvan awh.

<sup>10</sup> Sodom kho ka uk e bawinaw, Cathut e lawk hah thai awh haw. Gomorrah khocanaw kaimae Cathut lawk hah hnâpakeng awh haw.

<sup>11</sup> Cathut ni a dei e teh, nangmouh ni na thueng awh e satheinaw teh kai hoi bangtelamaw a kâkuet vaw. Thuengnae tu, ka phuekuek lah na paca e saring thaw n aw hoi ka boum toe. Maito, tuca hoi hmaenaw e thi hah ka ngai hoe h. <sup>12</sup> Ka hmalah minhmai patue han na tho awh navah, Kaie thongma coungroe hanlah apinimaw na patoun awh. <sup>13</sup> Ayawmyin e pasoum hno hah bout thokhai awh hanh lawih. Hmai na sawi awh e hmuitui hah ka panuet. Thapa rei hnin, kamhluem hnin, kamkhueng hnin naw hai ka panuet. Hawihoe h nae hoi kâkalawt e kathoung kamkhuengnae hah ka panguep thai hoe h. <sup>14</sup> Ka muitha ni nangmae thapa rei hnin hoi nangmae pawinaw hah ka hmuhma. Kai katarawk e lah ao teh ka panguep lawi ngawt ka tawn toe.

<sup>15</sup> Nangmouh ni, na kut na kadai awh toteh, alouklah na kangvawi takhai awh han. Avai moikapap na ratoum awh nakunghai, ka thai mahoe h. Na kutnaw teh thi hoi akawi. <sup>16</sup> Kâpasu awh, kamthoung awh. Na payonnae hah ka hmaitung hoi takhoe awh. Kahawihoehe nuencang hah kâhat awh leih. <sup>17</sup> Kahawi hno sak hanelah kamtu awh. Lannae hah tawng awh. Ka lawngkoi e hah palan awh. Naranaw hanelah kalan lah sak awh. Lahmainunaw hanelah kalan lah sak awh. Lahmainunaw hah pahren awh.



<sup>18</sup> BAWIPA ni a dei e teh, tho awh. Cungtalaw pouk awh haw sei. Nangmae yonnae teh ka paling nakunghai tadamtui patetlah a pangaw han. Athi patetlah ka paling nakunghai tumuen patetlah ao han. <sup>19</sup> Nangmouh ni ngainae lahoi lawk na ngai awh pawiteh, ram thung e hnokahawi e a pawnaw hah na ca awh han. <sup>20</sup> Hatei na taran awh pawiteh, tahloi hoi na due awh han telah BAWIPA e pahni ni a dei toe a ti.

<sup>21</sup> Yuemkamcu e kho teh bangtelamaw ka kâyawt e kho lah a kangcoung vaw. Ahmaloe teh, kângingnae hoi ka kawi e, a thung lannae ni hmuen a la e lah ao ei, atuteh tamikathetnaw ni hmuen lanae lah ao toe. <sup>22</sup> Na tangka hai a ei lah ao toe. Na misurtui hai tui hoi a kâkalawt toe. <sup>23</sup> Na khobawinaw teh, taran lah a thaw toe. Tamrunaw e hui lah ao awh toe. Hote bawinaw pueng ni tadawngno a ngai awh teh, tawknae phu dueng a pâlei awh. Naranaw hah khenyawn awh hoeh. Lahmainunaw teh banglahai ngai awh hoeh.

<sup>24</sup> Hatdawkvah, Isarelnaw e Athakaawme, ransahu Bawipa Jehovah ni a dei e teh, Aya! Kai na ka taran e naw hah bat ka takhoe vaiteh, ka tarannaw koe moi ka pathung han. <sup>25</sup> Nang hah na kueta vaiteh, a ei hoi khoeroe na thoungsak vaiteh, thounghoehnae pueng ka takhoe han. <sup>26</sup> Lawkcengkungnaw hoi pouknae kapoekung naw hah, ahmaloe ka ta e patetlah bout ka ta han. Hathnukkhu lannae khopui, yuemkamcu e khopui ati awh han.

<sup>27</sup> Zion teh kângingnae hoi thoseh, lannae hoi thoseh ratang lah ao han. <sup>28</sup> Kâtapoe e hoi ka yon e tami teh reirei raphoe lah ao han. Cathut ka cettakhai e teh hraba mueng ka yawng lah hmaisawi han.

<sup>29</sup> Na doun e kathenkungnaw hah na kayakkhai awh toung vaiteh, na kârapi e takha ni kângai lah a ru sak awh han. Minhmai mathoe na poe awh han. <sup>30</sup> Bangkongtetpawiteh, a hna kamyai e kathen kung hoi tui kahak e takha patetlah lah na o awh han. <sup>31</sup> Athakaawme taminaw teh ngun ei patetlah awh vaiteh, a tawksak e teh hmaitali patetlah ao han. Hottaroi teh reirei kang vaiteh, hote hmai hah apinihai padout mahoe.

## 2

### *BAWIPA e mon*

<sup>1</sup> Amoz capa Isaiah ni, Judah ram hoi Jerusalem hoi kâkuen lah a hmu e vision teh, <sup>2</sup> a hnukteng e hnin teh, BAWIPA im saknae mon teh, monsomnaw e lathueng vah, tawm lah ao vaiteh, caksak lah ao han. Miphun pueng ni hote mon koe a kamkhueng awh han. <sup>3</sup> Taminaw ni hai, tho awh. BAWIPA e mon, Cathut im koe cet awh sei. A lamthung hah na pâtu awh vaiteh, a lamthung dawn awh han, telah kahlawng cei laihoi ati awh han. Bangkongtetpawiteh, kâlawk teh Zion mon hoi tâcawt vaiteh, Cathut lawk teh Jerusalem hoi a tâco han. <sup>4</sup> Cathut ni miphunnaw hah lawkceng vaiteh, tami moikapap hah a yue han. Ahnimae tahloinaw hah thunha lah thoseh, tahroenaw hah tangkoun lah thoseh, a dei awh han. Ram buet touh hoi buet touh tarankâtuk mahoe toe. Taran tuknae hai kâpâtu awh mahoe toe.

<sup>5</sup> Oe Jakop imthungnaw tho awh. BAWIPA angnae dawkhosak awh haw sei.

### *BAWIPA e hnin*

<sup>6</sup> Bangtelah tetpawiteh, Jakop imthung, na taminaw hah na ceitakhai toe. Bangkongtetpawiteh, ahnimouh teh, Kanitholae naw patetlah kho a sak



awh teh, Filistinnaw patetlah khueyue lah ao awa teh, ramlouknaw hoi a kâhuiko awa. <sup>7</sup> Ahnimae ram teh sui ngun hoi akawi teh, a tawnta awa e teh touklek thai hoeh. Ahnimae ram hai marang hoi akawi teh, rangleng touklek thai hoeh. <sup>8</sup> Ahnimae ram teh, meikaphawknaw hoi akawi teh, amamae kut hoi sak e hnawaw patenghai a lûsaling awa toe.

<sup>9</sup> Tami pueng ni a tabo awa teh, kouna a kârahnom sak awa. Hatdawkvah, ahnimae yonnae teh, BAWIPA ni ngaithoum hoeh.

<sup>10</sup> BAWIPA ni talai kahuet hanelah a tho toteh, takinae hoi a bawilen taluenae dawkvah, talung thung kâen awa, vaiphu thung kâhrawk awa.

<sup>11</sup> Hatnae tueng dawkvah, kâoupnaw rahnom sak vaiteh, kâtalue e naw pabo vaiteh, BAWIPA duengdoeh tawm lah kaawm han. <sup>12</sup> Rasahu BAWIPA e hnin teh, kârasang e hoi kâoup e tami pueng e lathueng thoseh, <sup>13</sup> Lebanon mon e sidarkung ka rahnom ka rasang e pueng koe thoseh, Bashan ram e kathenkunaw pueng e lathueng thoseh, <sup>14</sup> mon karasangpoung e lathueng thoseh, mon kathoung pueng e lathueng thoseh, <sup>15</sup> Ka rasang e imrasang lathueng thoseh, rapan pueng e lathueng thoseh, <sup>16</sup> Tarshish long pueng lathueng thoseh, ngai kaawm e vision pueng e lathueng thoseh a pha han. <sup>17</sup> Tami kâoupnae rahnom sak vaiteh, a kârasangnae hah pabo lah ao han. Hat hnin dawkvah, BAWIPA dueng tawm lah ao han. <sup>18</sup> Kutsak pueng teh, khoeroe kahma han toe.

<sup>19</sup> BAWIPA ni talai a kahuet hanelah a tho toteh, takinae hoi a bawilen taluenae dawkvah, taminaw teh lungngoum thung, talai kâkhu thung a kâen awa han. <sup>20</sup> Hatnae atueng dawkvah, taminaw ni ouk a baw awa e sui hoi, ngun hoi ma hanelah raphoe sak e meikaphawk hah, thangbui hoi bongpinaw koe a tâkhawng awa han. <sup>21</sup> BAWIPA ni talai kahuet hanelah a tho toteh, takinae, a bawilen taluenae dawkvah talung khu, rawnaw thung a yawng awa han.

<sup>22</sup> Hnawng hoi kâha e tami hah kâuep awa hanh. Ahnimouh teh, banghai cungkeinae awa hoeh.

### 3

#### *Judah hoi Jerusalem lawkcengnae*

<sup>1</sup> Bangkongtetpawiteh, Rasahu Bawipa Jehovah ni rawca hoi tui kabawpnae puenghoi, kabawpnae kaawm e pueng hah Jerusalem kho hoi Judah ram thung hoi a takhoe toe. <sup>2</sup> Athakaawme tami, taran ka tuk e tami, lawkcengkung, profet, khueyue, matawng, <sup>3</sup> tami 50 ka uk e, barilawa kaawm e tami, kâpokhai, kut taran kahawi, pahni taran kahawi e pueng a takhoe han. <sup>4</sup> Hote ram dawc camonaw ni, bawi thaw tawc awa vaiteh, sanu ka net e camonaw ni a uk awa han. <sup>5</sup> Khocanaw teh buet touh hoi buet touh, imri hoi imri a kârektap awa han. Camo ni matawng, banglahai kaawm hoeh e ni, bari kaawm e hah a dudam awa han.

<sup>6</sup> Tami ni a hmaunawng hah a na pa im e man vaiteh, nang teh khohna na tawn nah, hi tho. Kaimouh na uk leih. Hete ka rawc e pueng hai na pathoup pouh leih ati awa toteh, <sup>7</sup> Ahni ni, kai ni ka pathoup thai mahoe. Bangkongtetpawiteh, kai im vah, rawca hoi khohna awa hoeh. Khocanaw koe bawi na tawc sak awa hanh loe telah kamcengcairalah ati han.

<sup>8</sup> Jerusalem kho a tip toe. Judah ram a rawc toe. Bangkongtetpawiteh, ahnimae lawk tho hoi tawksaknae teh, BAWIPA ngainae patetlah awa hoeh. A bawilenna mit hah a taran awa toe. <sup>9</sup> Ahnimae minhmai teh, amamouh kapanuekkhaikung lah ao. Amamouh yonnae hrawk



thai awh hoeh. Sodom khonaw patetlah hmantang vah, yonnae a sak awh. Ahnimae muitha dawkwawthoenae ao. Bangkongtetpawiteh, hawihoeahnae heh a mamhmawkwaw a kâpatho awh toe.

<sup>10</sup> Tami kalan teh yawhawinae ao telah ahnimouh koe dei pouh haw. Bangkongtetpawiteh, a tawkwaw awh e paw hah a ca awh han. <sup>11</sup> Tami kahawihoeah teh yawthoenae ao. Hawihoeahnae hoi a kâhmo han. Bangkongtetpawiteh, a tawksak e yonnae hah ahni lathueng patho lah ao han.

<sup>12</sup> Ka taminaw ni camonaw a rektap awh. Napuinaw hai a uk awh. Ka taminaw, nangmouh lam na ka patue e naw ni lam na phen sak awh toe. Na dawn awh e lamthung hai a raphoe awh toe.

### *BAWIPA ni a taminaw lawkwaw a ceng*

<sup>13</sup> BAWIPA ni lawkcengnae hmuen koe amae hmuen a la teh, taminaw lawkceng hanlah a kangdue. <sup>14</sup> BAWIPA ni a taminaw thung dawkwaw e, a kum kacuenaw hai thoseh, bawinaw hai thoseh, lawkceng hanelah lawkcengnae hmuen koe a kâen. Nangmouh ni, kaie takha na padoun awh toe. Karoedengnaw, e hnopai na lawp awh teh, namamouh im vah na pâkhueng awh toe. <sup>15</sup> Ka taminaw hah bangkongmaw na rektap awh vaw. Mathoenaw e minhmai hah bangkongmaw na phom awh vaw telah, ransahu Bawipa Jehovah ni a ti.

### *Jerusalem e napuinaw kâhruetcuwet poenae*

<sup>16</sup> BAWIPA ni bout a dei e teh, Zion canunaw teh a kâoupnae a rasang awh. A lahuen a kamnue sak awh teh, a mit a kâheh sak awh teh, a khoksaluem koe dinghling lawkwaw a tho teh, tektanek lah ceitakhai laihoi lam a cei awh dawkwah, <sup>17</sup> BAWIPA ni Zion canunaw hah a lû moiha sak vaiteh, a khohna rading pouh vaiteh, caici lah yeirai kaposak han.

<sup>18</sup> Hote hnin navah, a kamthoupnae khok dinghling, tamlawkwaw lupawkwaw, dingyin, <sup>19</sup> hnâpacap kanghoi e, laikaw, minhmai ramuk, <sup>20</sup> luhuem, sui khokdingyin, taisawm, hmuitui bawm, <sup>21</sup> kuthrawt, hnawngpacap, <sup>22</sup> sui tamlawkwaw angki, hnica, kala, yawngya, <sup>23</sup> hlalang, athung angki, sammuem, hoi kamthoupnae hni naw hah ka takhoe han.

<sup>24</sup> Hmuitui e yueng lah kapawkwaw hmui, taisawm e yueng lah tangron, samvei e yueng lah lû luengpalueng, loukloukkaang e khohna yueng lah buri, meihawinae yueng lah sum pâan hoi nep e a hmâkathan lah ao han.

<sup>25</sup> Na taminaw teh, tahloi hoi a rawp awh vaiteh, nange athakaawm taminaw teh taran tuknae koe a due awh han. <sup>26</sup> A longkhanaw ni cingou laihoi khuikaw awh vaiteh, kingkadi lah talai dawkwaw a tahung han.

## 4

<sup>1</sup> Hatnae atueng dawkwah, napui sari touh ni tongpa buet touh kuen awh vaiteh, kamamae rawca doeh ka cat awh tih, kamamae khohna doeh ka khochnat awh tih. Min mathoenae ao hoeh nahanelah, na min duengma hah na phawt sak awh la ati awh han. <sup>2</sup> Hatnae atueng dawkwah, BAWIPA e akang teh, a meihawi vaiteh, a lentoe han. Kahlout e Isarelnaw hanelah, talai a pawhik teh a thawn han. <sup>3</sup> Cathut ni lawkcengnae muitha, hmai ka kang e muitha, hoi Zion canunaw e khinnae hah pâsu pouh vaiteh, <sup>4</sup> Jerusalem kho e thi hah a takhoe toteh, Zion e naranaw hoi Jerusalem kaawm rae hringnae cauk dawkwaw min thut lah kaawm e naw teh, ka thoung e lah ao awh han. <sup>5</sup> BAWIPA ni Zion vah khosaknae hmuen puenghoi kamkhueng e rangpuinaw lathueng vah, khodai lah, tâmai hoi hmaikhu,



karum lah hmaito angnae hah sak vaiteh, ka talue e hmuenpueng koug a ramuk han. <sup>6</sup> Khodai lah khumbei ka ngang e rim, tûilî a tho toteh, lungmawngnae hoi kânguenae lah ao han.

## 5

### *Misur takha la*

<sup>1</sup> Ka pahren e misur takha hah, pahrennae la hoi a hmalah ka sak haw nei. Talai hawinae koe mon vah, ka pahren e misur takha buet touh ao.

<sup>2</sup> Talai a tai teh, talungnaw a takhoe hnukkhu, kahawipoug e misurkung hah a ung. Takha thung ring nahanelah imrasang hai a sak teh, misur paw a paw han titeh a ngaihawî. Hatei, misur kaphawk bo oun ka paw aw. <sup>3</sup> Atuvah, Oe Judah khocanaw, Jerusalem khocanaw, kai hoi kaie misur takha rahak vah, laidei awh haw. <sup>4</sup> Kai takha koe hawinae ka sak thai nahlangva, ka sak hoe hae ao ma aw. Misurpaw a paw han doeh titeh, ka ngaihawî nah, bangkongmaw misur kaphawk lah a paw vaw.

<sup>5</sup> Atu thai haw. Kaie misur takha daw k ka sak hane kawî na patue avai. Tumdumnae rui payang e hah, ka raphoe vaiteh, ayâ alouke ni a ca awh han. Tumdumnae amhrû tapang hah ka raphoe vaiteh, ayâ alouke ni a coungroe awh han. <sup>6</sup> Takha hah khoeroe ka raphoe han. Apinihai pathoup mahoe h. Apinihai vulai mahoe h. Pâk hing aphunphun a paw han. Hote takha daw k kho a rak hoe h nahanelah, kâ bout a poe han.

<sup>7</sup> Rasahu BAWIPA e misur takha teh, Isarelnaw lah ao teh, Judahnaw teh Bawipa ni a ngai e misurkung lah ao. Bawipa ni lannae hah a ngaihawî ei, khenhaw! kâtheinae hoi doeh akawî. Lannae yueng lah hramkinae doeh kaawm.

<sup>8</sup> A hmuen houg sak laipalah, im touh hnukkhu im touh a pakaw awh teh, laikaw k buet touh hnukkhu buet touh ka pakaw e teh a yawthoe. Hote laikaw k lungui vah, nangmouh duengdoeh na kaawm awh han. <sup>9</sup> Rasahu BAWIPA ni kai koe a dei e teh, atangcalah, moikapap e imnaw heh, tamî kingkadi e lah awm vaiteh, im kalennaw daw kvah, kaawm hane awm laipalah ao han. <sup>10</sup> Bangkongtetpawiteh, Misurtakha ekah hra touh daw k misurtui am touh dueng a tâco vaiteh, cati hmuen hra touh tunae daw k hoi hai hmuen touh dueng a tâco han.

<sup>11</sup> Na kahma awh toe! Yamu nei hanelah, amom na thaw awh teh, tangmin totouh misurtui na parui awh. <sup>12</sup> Nangmae canei pawî koe ratoung, tamawî, cecak, vovif, hoi misurtui hoi akawî. BAWIPA e kut hoi sak e hno hai na hmawt awh hoe h. <sup>13</sup> Hatdaw kvah, ka taminaw panuena e ayoun daw kvah pâlei lah ao awh. Ahnimae bari kaawm e naw teh, a vonhlam awh. Ahnimae taminaw teh tui kahran hoi ao awh. <sup>14</sup> Hatdaw kvah, Phuen kho (Sheol) ni a ngainae a len sak teh, apâhni teh bangnue thai hoe h hane totouh a ang teh, Zion bawilenna e hoi a taminaw teh, hrawang laihoi, ka lamtu e naw hoi reirei a kum awh han.

<sup>15</sup> Tami teh pabo lah ao daw kvah, tamî pueng teh a rahnoum awh han. Ka kâoupnaw e minhmai hai a rahnoum han. <sup>16</sup> Ransahu BAWIPA teh, lawkcengnae lahoi tawm lah ao teh, Kathoung e Cathut teh, ama thoungnae hah lannae lahoi a kamnue sak han. <sup>17</sup> Hatnavah, tucanaw teh, amamae pânae patetlah a pâ awh vaiteh a ca awh han. Dongdeng ka lamroenaw ni, tangrengnaw e caneinae hmuen koe, a canei awh han.

<sup>18</sup> Payonnae hah laithoe hradang hoi ka sawn e tamî, yon hah rangleng rui hoi sawn e patetlah ka sawn e taminaw teh a yawthoe awh.

<sup>19</sup> Ahnimouh ni, kaimouh ni ka hmu awh nahanelah Bawipa ni karang



sak naseh. A thaw hah karang tawk naseh. Kaimouh ni ka hmu awh nahanelah, Isarelnaw e kathounge Bawipa ni rek hnai naseh. Tho naseh telah ouk a dei awh.

<sup>20</sup> Kathout hah kahawi, kahawi e hah kathout telah ka tet e tami, angnae hah hmonae, hmonae hah angnae, karadip hah kakhath, kakhath hah karadip ka tet e tami teh a yawthoe.

<sup>21</sup> Amamae mithmu dawk teh, amamouh hah tami lungkaangnaw, panuena katawnnaw telah ka tet e tami teh a yawthoe.

<sup>22</sup> Misurtui neinae koe athakaawme taminaw hoi yamu sak kalawtnae koe athakaawme taminaw teh a yawthoe awh. <sup>23</sup> Ahnimouh teh, tadawngnae kecu dawk tami kathout hah tami kahawi telah ati teh, tami kalannaw e lannae law teh a takhoe awh. <sup>24</sup> Hatdawkvah, hmaipalai ni cakong hoi phoke a kak e patetlah ahnimae a tangpha teh, kahmawn e patetlah ao dawkvah, ahnimae a pei hai vaiphu patetlah mungpoung han. Bangkongtetpawiteh, ahnimouh teh ransahu BAWIPA e kâlawk hah a takhoe awh teh, Isarelnaw e kathoungpoung Bawipa ni a dei e naw hah banglahai noutna awh hoe. <sup>25</sup> Hatdawkvah, BAWIPA teh a taminaw koe a lungkhuek teh, ahnimouh van a kut a dâw teh, runae a poe dawkvah, monnaw a kâhuat teh, ahnimae ronaw teh lamthungnaw daw songnawng patetlah ao awh han.

<sup>26</sup> Bawipa ni ahlanae hmuen koehoi a taminaw hanelah, mitnout a ung pouh teh, talai poutnae koe kaawm e naw hah pâhui laihoi a kaw. Hatnavah, khenhaw! Ahnimouh teh karang poung lah yawng laihoi a tho awh. <sup>27</sup> Ahnimouh daw ka tawn e awm hoe. Thongmui kamthui laihoi ka tâlaw e hai awm hoe. Ka ngam e hai awm hoe. Ka ip e hai awm hoe. Taisawm kâratham hoe. Khokkhawmrui hai pet hoe. <sup>28</sup> Ahnimae pala teh hruepatuecalah ao teh, licung teh sut patung e lah ao. Ahnimae marangnaw e khoktabeinaw teh, lungtaw hoi a kâvan telah pouk e lah ao teh, ahnimae taran tuknae ranglengnaw hai bongparui patetlah doeh ao awh. <sup>29</sup> Ahnimae hramki lawk teh, sendek huk lawk hoi a kâvan teh, ahnimouh teh sendek patetlah a huk awh han. A rakoung e teh apinihai lawm thai mahoe.

<sup>30</sup> Hot hnin vah, ahnimouh teh tuipui e cairing lawk patetlah a cairing awh han. Buetchuet touh ni hote ram hah khen pawiteh, khenhaw! hmonae hoi runae duengdoeh kaawm. Angnae teh hote ram daw kâmai kecu king a hmo han.

## 6

### *Isaiah ni BAWIPA e vision a hmu e*

<sup>1</sup> Uziah siangpahrang a duena kum dawkvah, tawm lah kaawm e BAWIPA teh bawitungkhung van a tahung e hah ka hmu. A khohna ni bawkim daw muen akawi. <sup>2</sup> Tungkhung e avoivang lah, Seraphimnaw teh a kangdue awh. Hote Seraphimnaw teh, rathei taruk touh rip a tawn awh. Rathei kahni touh hoi a minhmai, kahni touh hoi a khoknaw hah a ramuk awh teh, kahni touh hoi a kamleng awh. <sup>3</sup> Buetchuet touh ni buetchuet koe, Rasahu BAWIPA teh a thoung, a thoung, a thoung, talai van pueng teh a bawilenna hoi akawi telah a hramkhai awh. <sup>4</sup> Hottelah hram e lawk ni longkha e khomdunaw a kâhuat sak teh, hmaikhu hoi im teh akawi. <sup>5</sup> Hat toteh, kai ni, Oe hettelah doeh ka o toe. Kai ka cungkeihoeh toe. Bangkongtetpawiteh, kakhin e pahni doeh ka tawn. Ka khin e pahni ka



tawn e miphun koe doeh ka o. Rasahu BAWIPA, siangpahrang hah ka mit ni a hmu toe ka ti.

<sup>6</sup> Hattoteh Seraphim buet touh ni, thuengnae khoungröe dawk e paitei hoi a sin e hmaisaan hah a kut hoi a kuet teh kai ka onae koe kamlang laihoi a tho teh, <sup>7</sup> ka pahni hah a nep teh, hete hmaisaan ni na pahni a kânep toe. Na payonnae teh takhoe lah ao toe. Na yon hai thoungsak lah ao toe ati.

### *BAWIPA ni Isaiah a patoun*

<sup>8</sup> Hahoi, BAWIPA ni dei e lawk bout ka thai. Kai ni apimaw ka patoun han. Kai hanelah apimaw ka cet han, ati navah, kai ni kai ka o, kai na patoun loe ka ti pouh. <sup>9</sup> BAWIPA ni, hote miphunnaw onae koe cet nateh, na thai awh eiteh, na thai panuek awh hoe. Na hmu awh eiteh, na nout awh hoe tet pouh. <sup>10</sup> A mit hmawt awh hoe, a hna thai awh hoe, a nuen kâthung awh hoe, a patawnae karoumsak hoe nahan totouh, a lungthin mom sak, a hnâpang sak, a mitdawn sak pouh ati.

<sup>11</sup> Hatnavah, kai ni, Oe BAWIPA nâtotouh maw telah ka pacei navah, kho thung khoca o hoe nahanelah, im thung imkung o hoe nahanelah, koungraphoe vaiteh, ram thung tami kingkadi lah ao totouh thoseh, <sup>12</sup> BAWIPA ni taminaw hah ahlanae koe a thak vaiteh, ram teh kingkadi lah ao totouh thoseh a saw han ati. <sup>13</sup> Hote ram dawk hra touh dawk buet touh ka cawi rah nakunghai, hote ka cawi e hah boutbout raphoe lah ao han. Hatei, hmaica thing hoi bengkenng thingnaw tâtueng teh, a thongmui a cawi e patetlah kathoung catoun teh hote ram dawk thongmui lah ao han.

## 7

### *Isaiah teh siangpahrang Ahaz koe patounnae*

<sup>1</sup> Judah siangpahrang Uziah capa Jotham, a capa Ahaz siangpahrang se navah, Siria siangpahrang Rezin hoi Isarel siangpahrang Remaliah capa Pekah tinaw teh Jerusalem tuk hanlah a kamthaw awh. Hateiteh, kangcoung hoe. <sup>2</sup> Siria ram ni Ephraim ram hah a kâuep tie hah Devit imthung ni a thai navah, kahrawngum vah thingkungnaw teh kahli ni a kâhuat sak e patetlah siangpahrang e lung hoi khocanaw e lung hai thouk a kâhuat.

<sup>3</sup> Hat toteh, BAWIPA ni Isaiah koe lawk a dei pouh e teh, nang hoi na capa Shear-Jashub hoi rei cet roi nateh, kapâsukung e laikaw teng ceinae lam, atunglae tuikhu teng vah, Ahaz siangpahrang hah dawn nateh, na kâhmo toteh na dei pouh hane teh, <sup>4</sup> Kâhruetcuat nateh, lawkkamuem lah awm. Taket hanh. Hmai sungung ka khu e hete thingtu kahni touh tie Siria siangpahrang Rezin hoi Remaliah capa tinaw teh a lung puenghoi ka khuek nakunghai, na lungpuen hanh. <sup>5</sup> Siria ram, Ephraim ram, Remaliah capanaw ni, maimouh ni Judah ram lah cei awh vaiteh, peng kayei awh sei, <sup>6</sup> ram lungui vah Tabeel capa hah siangpahrang lah tat awh sei, telah nange a vang lah kahawihoehe pouknae hoi a kâcai awh <sup>7</sup> Hatei, Bawipa Jehovah ni, hottelah kangcoung mahoe, hottelah tho mahoe ati. <sup>8</sup> Siria ram e lû teh Damaskas kho, Damaskas kho e lû teh Rezin, kum 65 touh thung Ephraim teh ram lah ao hoe nahanelah, a raphoe han. <sup>9</sup> Ephraim e lû teh Samaria, Samaria e lû teh Remaliah capa doeh. Na yuem awh hoehpawiteh, na kangdout katang awh mahoe atipouh.

### *Immanuel mitnout*



<sup>10</sup> Hahoi, BAWIPA na Cathut koe mitnoutnae hah het haw. <sup>11</sup> Adungnae koehai thoseh, a rasangnae hmuen koehai thoseh, kâhet haw telah BAWIPA Cathut ni Ahaz koe atipouh.

<sup>12</sup> Hatei, Ahaz ni ka kâhet mahoehe. BAWIPA hai ka tanouk mahoehe atipouh. <sup>13</sup> Hat toteh, Isaiah ni Oe Devit imthungnaw, thai awh haw. Nangmouh ni tami na hnueai sak dueng laipalah, kai ni ka bawk e Cathut hai na hnueai sak awh han namaw. <sup>14</sup> Hatdawkvah, BAWIPA ma ni nangmanaw hah mitnout na poe awh han. Khenhaw! Tanglakacuem buet touh ni capa vawn vaiteh, ca tongpa a khe han. Hote capa hah Immanuel telah a min phung han. <sup>15</sup> Ahni ni, kahawihoehe hah a takhoe teh, kahawi e hah a rawi thai totouh, sanutui pakak e hoi khoitui hah a ca han. <sup>16</sup> Hote camo ni, kahawihoehe a takhoe teh kahawi e a rawi thai hoehnahlan nang ni na taki e siangpahrang kahni touh ni, a uknaeram teh pahnawt e ram lah ao han.

<sup>17</sup> Ephraim ni Judah koehoi a tâco takhai hnin hoiyah, kaawm boihoeh e hnin hah nange lathueng hai thoseh, na imthungnaw lathueng hai thoseh, BAWIPA ni a Assiria siangpahrang a tho khai han.

<sup>18</sup> Hote hnin navah, Izip sawkcanaw dawk e bitseinaw hai thoseh, Assiria ram e khoinaw hai thoseh, BAWIPA ni a hroecoe han. <sup>19</sup> Hotnaw tho awh vaiteh, tami kingdinae koe ravonaw, lunggha lungngoumnaw, buruknaw, saring ni canei e ramnaw pueng dawking akawi awh han.

<sup>20</sup> Hat hnin vah, palangpui namran lah kaawm e hlai e Assiria siangpahrang pataca hoi, na sam hoi na khokmuen hah BAWIPA ni na ngaw pouh han. Na pâkhamuen hai na ngaw pouh han. <sup>21</sup> Hat hnin vah, tami buet touh ni maito buet touh, tu kahni touh paca pawiteh, <sup>22</sup> sanutui buem pouh vaiteh, sanutui pakak e a ca han. Ram dawking cawi rae pueng ni sanutui pakak e hoi khoitui a ca awh han. <sup>23</sup> Hatnavah, misurkung 1,000 touh ka tawn niteh, tangka 1,000 touh ka phu e misur takha pueng haiyah, pâkhing hoi akawi han. <sup>24</sup> Licung hoi pala patuem awh vaiteh, hete hmuen koe a cei awh han. Talaivan pueng pâkhing hoi akawi han. <sup>25</sup> Tokso hoi tai teh vu e law pueng hai, pâkhing kecu apinihah a cei ngai hoehe dawkvah, maito pânae, tunaw ni coungroenae lah ao han.

## 8

### *Isaiah ni ca tongpa a khe*

<sup>1</sup> Hahoi, BAWIPA ni, ca thut nahane a phen kalen e buet touh lat nateh, Maher-shalal-hash-baz telah ca cung hoi thut loe ati. Hot hateh, hno lawpnae hoi karangpoung lah raphoe haw tinae doeh. <sup>2</sup> Hat toteh, kapanuekkhaikung lah ao nahanlah, yuemkamcu e kahni touh, vaihma Uriah hoi Jeberkhiah capa Zekhariah tinaw hah ka kaw toe.

<sup>3</sup> Hathnukkhu, profetnu koe ka cei teh camo a von teh, ca tongpa a khe. BAWIPA ni a min teh, Maher-sahalal-hash-baz phung loe ati. <sup>4</sup> Bangkongtetpawiteh, hote camo ni anu apa telah a kaw thai hoehnahlan, Damaskas e bawinae hnopai hoi Samaria koe lawp e hnopainaw teh, Assiria siangpahrang ni koug na lawp awh han ati.

### *Assiria siangpahrang a tho han*

<sup>5</sup> Hahoi, BAWIPA ni, hete taminaw ni yutyut kalawng e Shiloh palang hah a pahnawt awh teh, <sup>6</sup> Rezin hoi Remaliah capanaw koe a lungghaw awh dawkvah, <sup>7</sup> ransahu hoi cungtalah Assiria siangpahrang a thakaawm-pounge palang tui hoi ahnimanaw teh koug ka ramuk sak han. Hote tui



ni palang tuiko hoi rangoum pueng dawk muen kawi vaiteh, <sup>8</sup> Judah ram muen the vaiteh, lahuen totouh a ramuk han. A ratheinaw hah kadai vaiteh a ram hah kOUNg a ramuk han. Oe Immanuel, telah ati.

<sup>9</sup> Oe taminaw, kamkhueng awh nateh taket awh haw. Ram hlanae koe e taminaw, na hnâpakeng awh haw. Taran kâtuk hanelah, kârakueng awh nateh, taket awh haw.

<sup>10</sup> Kâpan awh haw, na pouknae teh banglahai tho mahoe. Lawk tâtueng awh haw, cak mahoe. Bangkongtetpawiteh, Cathut teh kaimouh hoi ao.

### *Cathut taket haw*

<sup>11</sup> Hete miphunnaw ni a dawn awh e lamthung ka dawn hoe hahanlah BAWIPA ni lawk na dei pouh e teh, <sup>12</sup> hete taminaw e kamkhuengnae koe kamkhueng van hanh. Ahnimouh ni a taki awh e hah taket van hanh, puen awh hanh.

<sup>13</sup> Rasahu BAWIPA hah bari awh. Ahni dueng maha taket awh nateh, puen awh.

<sup>14</sup> Hottelah na sak pawiteh, ahni teh, nang ni na kângue e lah awm vaiteh, Isarel ram thung kaawm naw hoi Jerusalem kho thung kaawm naw hanelah, rawpnae talung, kamthuinae talung tangkhek hoi karap lah ao han.

<sup>15</sup> Hahoi hawvah tami kapap ni a kamthui awh han. Rawm awh vaiteh a rek awh han. Kâman awh vaiteh man lah ao awh han.

<sup>16</sup> Hete lawkpanuesaknae hah ka hnukkâbangnaw koe tangoung nateh kâlawk hah tacikkin haw. <sup>17</sup> Jakop imthung koe minhmai ka hrawk e BAWIPA hah kai niteh, ka ngaihaw i han.

<sup>18</sup> Kai hoi BAWIPA ni na poe e camonaw heh, Zion mon kaawm e ransahu BAWIPA koehoi e Isarelnaw hanelah, mitnoutnae hoi noutnae lah ao.

<sup>19</sup> Lawk duemduem hoi sipsap sipsap ka dei e kutkhetkathoumnaw hoi khueyuenaw koe cet awh tet awh pawiteh, taminaw ni amamae Cathut koe pacei kawi nahoe. Kahringnaw ni kadoutnaw koe pacei kawi na naw.

<sup>20</sup> Cangkhainae hoi lawkpanuesaknae hah thai awh haw. Ahnimouh ni a dei awh e teh, lawk dawk nahoe pawiteh, ahnimouh koe khodai hoe rah.

<sup>21</sup> Ram thungvah, lungpout hoi vonhlan hoi a kâva awh han. A vonhlan awh toteh, mahoima runae a kâpoe awh vaiteh, amamae siangpahrang hoi amamae Cathut hah thoebo awh. <sup>22</sup> Hahoi, kahlun lah a moung awh han. Talai lah a khet awh nakunghai, runae hoi hmonae duenghoi akawi. Angnae ohoe hnae koe, khohmo thung doeh kân awh tih toe.

## 9

### *Maimouh han lah camo a khe toe*

<sup>1</sup> Hatei, runae khang hnukkhu hmonae daw k hoi ram teh a hlout awh han. Zebulun ram hoi Naphtali ram teh, ahmaloe vah kayanae kâhmo nakunghai a to hmalah teh, tuipui rai ceinae lamthung, Jordan palangpui namran lae, Jentelnaw onae Galilee ram totouh barinae a coe awh han.

<sup>2</sup> Hmonae thung ka cet kaawm e taminaw ni, kalenpounge angnae hah hmawt awh vaiteh, duenae ram thung kaawm naw koe angnae ni a tue han. <sup>3</sup> Bawipa nang ni miphun hah na pung sak teh, ahnimae lunghawinae hah na pung sak pouh. Canga hnin patetlah lawp e hno kareinaw ni lunghawi e patetlah na hmalah ahnimouh ni a lunghawi awh.

<sup>4</sup> Bangkongtetpawiteh, Midiannaw koe na sak e patetlah ahnimouh ni aphu



awh e hnori, hemnae bongpai, ka rektapnaw e tahroenaw hah BAWIPA nang ni na khoe pouh toe. <sup>5</sup> Ransanaw e khokkhawm hoi thi kânep e khohna puenghai hmai kounng sawi lah ao han. <sup>6</sup> Bangkongtetpawiteh, maimouh hanelah camo a khe toe. Maimouh hanelah capa buet touh na poe awh toe. Ahnie lounng daw uknae kâ ao han. Amin teh, Kângairu, Kâpokhaikung, Athakaawme Cathut, Yungyoe e Napa, Roumnae Bawi ti han. <sup>7</sup> A uknaeram rounng vaiteh, lungmawngnae pout mahoe. Siangpahrang Devit e bawitungkhung daw tahung vaiteh, a ram hah a uk han. Atu hoi a yungyoe totouh, kalan lah a uk han. Rasahu BAWIPA ni a sak roeroe hanelah a ngainae ao.

### *BAWIPA ni Isarel runae a poe han*

<sup>8</sup> Bawipa ni Jakop miphun koe a lawk a poe teh, Isarelnaw koe a pha han. <sup>9</sup> Amhru katim nakunghai, pathei tangcounng e talung hoi bout ka sak awh han. <sup>10</sup> Thailahei kungnaw teh ka rawm nakunghai, a yueng lah sidarkung ka ung awh han telah ka kâoup awh ni teh a lung kalen awh e Samaria khocanaw hoi Ephraim khocanaw pueng ni a panue awh han.

<sup>11</sup> BAWIPA ni ahnimouh hanelah, Rezin tarannaw hah a thaw sak teh, Ephraim e tarannaw hah a thaw sak dawkvah, <sup>12</sup> kanîtholah Sirianaw, kanîloumlah Filistinnaw ni a pahni ang awh vaiteh Isarelnaw hah a kei awh han. Hatei, a lungkhueknae teh roum hoe, a kut teh pou a dâw.

<sup>13</sup> Hete miphunnaw teh runae kapoekung koelah kamlang a hoe. Rasahu BAWIPA hah tawng panuek awh hoe. <sup>14</sup> Hatdawkvah, BAWIPA ni Isarel miphunnaw koehoi lû hoi mai hai thoseh, samtue kang hoi pho hai thoseh hnin touh hoi a tâtueng han. <sup>15</sup> Lû teh matawng hoi bari kaawmnaw doeh. Mai hateh, laithoe ka dei e profet hah doeh. <sup>16</sup> Hete miphunnaw lam kapatuekungnaw ni lam a payon awh nahanelah lamthung a pâtu awh toe. Ka dawn e naw hai rawknae koe a pha awh han. <sup>17</sup> Hatdawkvah, ahnimae thoundounnaw hah BAWIPA ni a lungyouk hoe. Naranaw hoi lahmainunaw hai pahren hoe. Ahnimouh pueng teh, cathutlaipa e naw hoi tamikathoutnaw lah ao awh dawkvah, kamsoumhoeh lawk hah a dei awh. Hatdawkvah, a lungkhueknae roum hoe, a kut teh pou dâw e lah ao rah.

<sup>18</sup> Kamsoumhoeh teh hmai patetlah ouk a kak. Pâkhing aphunphun hah ouk a kamtawi sak. Ratu hai hmaisawi teh, akungnaw teh hmaikhu hoi parang a kâyat han. <sup>19</sup> Rasahu BAWIPA e a lungkhueknae dawkvah, talai hmai a kak teh, talai taminaw teh hmai patawi nahane thing lah ao awh han. Hmau nawnga reira buet touh hoi buet touh kâpasai mahoe. <sup>20</sup> Aranglah hoi ka bouk ei nakunghai, vonhnam mingming han rah. Avoilah hoi ka cat ei nakunghai, von paha mahoe. Imri reira e moi hah tami pueng ni a ca awh han. <sup>21</sup> Manasseh miphun ni Ephraim miphun, Ephraim miphun ni Manasseh miphun hah a kâkei awh han. Hote miphun roi ni Judah miphun hah cungalah a taran roi han. Hatei, a lungkhueknae teh roum hoe, a kut teh pou a dâw rah.

## 10

<sup>1</sup> Vonhnamrinci hoi kaawm naw rektap nahanelah thoseh, <sup>2</sup> ka taminaw thung daw e ka mathoenaw ni a coe awh hane kawi hah lawp hanelah thoseh, lahmainunaw rektap hane, naranaw e hnopai lawp hanelah kalanhoehe lah lawk katâtuengkung, caretacailah ca kathutkungnaw, nangmouh teh na yawthoe awh. <sup>3</sup> Runae na kâhmo hane hnin, rawknae



ahlanae koehoi a tho navah, na kabawm hanelah, api koe maw na yawng awh han. Na hnopai tawnta e naw teh namamouh ni na pâtung awh han. <sup>4</sup> Taran tuknae koe na due awh han, hoehpawiteh, san lah na hrawi awh han. Hatei, a lungkhueknae teh roun hoehe, a kut teh pou a dâw rah.

*Cathut ni Assiria siangpahrang Lawk a ceng*

<sup>5</sup> Aya! Assiria teh ka lungkhueknae bongpai lah ao. Ahni ni a patuep e sonron teh, runae ka poe nahanelah ao. <sup>6</sup> Cathut banglah ka ngâi hoehe naw onae koe ahni hah ka patoun. Ka lungkhueknae ka khang hane taminaw hah a lawp vaiteh, a raphoe vaiteh, lam daw k e tangdong patetlah a coungroe nahanlah lawk ka thui han. <sup>7</sup> Hatei, ahni teh, amae a lung thung vah, alouke pouknae hoi alouke ngainae a tawn. Ahni ni raphoenae hoi miphun moikapap hah thei hanelah a ngainae ao. <sup>8</sup> Ahni ni hettelah a dei: Kaie ransabawinaw teh siangpahrangnaw nahoehmaw. <sup>9</sup> Kalno kho teh Kakhemish kho patetlah Hamath kho teh Arpad kho patetlah nahoehmaw, Samaria kho teh Damaskas kho patetlah nahoehmaw ao vaw.

<sup>10</sup> Samaria meikaphawk hoi Jerusalem meikaphawk ka talue e meikaphawk ka baw k e uknaeramnaw hah ka lawp e patetlah thoseh, <sup>11</sup> Samaria kho hoi a meikaphawknaw koe ka sak e patetlah thoseh, Jerusalem hoi ahnie meikaphawknaw koe ka sak han nahoehmaw.

<sup>12</sup> Hatei, BAWIPA ni Zion mon hoi Jerusalem vah thaw a cum hnukkhu, Assiria siangpahrang e a lungthin hoi a kâoupnae hoi, a mit hoi a kâlennae dawkvah, runae ka poe han.

<sup>13</sup> Hote siangpahrang ni, kai teh kama e kut thao thasainae hoi, ka lungangnae hoi ka panue thai. Taminaw e khorinaw hah ka tahruep pouh toe. Ahnimae hnopai pueng ka lawp toe. Siangpahrangnaw hah maitotan patetlah beng ka sawn toe. <sup>14</sup> Ka kut ni tava tabu a kasum e patetlah ahnimae hnopainaw teh ka kasum pouh toe. A ceitakhai e tava tadui ka lae patetlah talai hno kaawm e pueng hah ka la toe. Apihai a rathei kâhuen sak hoehe. A pahni ang hoehe. Cairing hoehe ati.

<sup>15</sup> Bongpai ni tami tawm hoehe, tami ni doeh a sonron a tawm e patetlah Cakâ ni ka hno kung lathueng a kâoup thai maw. Hlaw ni ka hno kung koe a kâoup kaw i na maw.

<sup>16</sup> Hatdawkvah, ransahu Bawipa Jehovah ni, kingking kaboumlah ka cat ka net e siangpahrang koe, pheng kamsoenae hah a patoun pouh han. A bawilennae rahim vah, hmai ka kang e patetlah a kak han.

<sup>17</sup> Isarelnaw e angnae teh hmai lah ao han. Kathounge Cathut teh hmaipalai lah ao han. Hnin touh hoiyah, ahnimae pâkhing buruk hoi rapan pueng teh mueng ka yawng lah a kak han. <sup>18</sup> BAWIPA ni, ratu bawilennae hoi, caticamu a pawnae laikaw k bawilennae hai a raphoe pouh han. A tak hoi muitha hai a tha baw vaiteh, ka ngouk e patetlah ao han. <sup>19</sup> Camo ni a touk thai nahanelah, ratu youn touh a cawi han.

*Kacawie Isarel a ban awh han*

<sup>20</sup> Hat hnin toteh, runae ka hlout ni teh kacawie Isarelnaw hoi Jakop imthungnaw teh, amamouh karektapkungnaw koe bout kâuep awh toung laipalah, Isarelnaw e Kathounge BAWIPA koe atangcalah a kâuep awh han.

<sup>21</sup> Kacawiraenaw bout a ban awh han. Jakop miphun daw k kacawiraenaw teh, athakaawme Cathut koe bout a ban awh han. <sup>22</sup> Oe Isarelnaw, nange taminaw teh, tuiptui rai e sadi yit touh ka phat ei nakunghai, kacawie naw duengdoeh bout ka ban awh han. Rawknae teh sut hmoun e lah ao dawkvah, lannae lahoi ahnimouh teh a ramuk han. <sup>23</sup> Rasahu Bawipa



Jehovah ni, talai van lungui vah a hmoun tangcounge e runae teh a sak han.

### *BAWIPA ni Assiria runae a poe han*

<sup>24</sup> Hatdawkvah, ka Bawipa ransabawi Jehovah ni a dei e teh, Oe ka taminaw, Zion vah kaawm e naw, Assiria siangpahrang hah taket awh hanh. Izip siangpahrang ni a sak e patetlah ahnie bongpai hoi sonron hoi na hem awh han. <sup>25</sup> Hatei, ahnimouh rawknae koe a pha e lahoi, dongdeng ca dawk ka lungkhueknae teh a roum han. <sup>26</sup> Rasahu BAWIPA ni Oreb lungsong teng Midiannaw a hem e patetlah thoseh, tuipui van sonron dâw e patetlah thoseh, Izipnaw koe a sak e patetlah thoseh, ahnimanaw hah a hem han. <sup>27</sup> Hatnae hnin dawkvah, ahnie hnokari teh na loung dawk hoi thoseh, na lahuen dawk hoi thoseh takhoe lah ao han. Thâwnae kecu dawk na lahuen dawk e yawcu teh a rek han.

### *Taran teh a kâen*

<sup>28</sup> Aiath kho dawk a pha toe. Migron a tapoung toe. Mikmash kho vah hnopainaw teh a ta awh toe. <sup>29</sup> Sanengnaw a tapuet awh toe. Geba kho vah a tungpup awh toe. Ramah kho teh a taki toe. Sawl onae Gibeah kho teh a yawng toe. <sup>30</sup> Oe Gallim canu, hramki haw. Oe Laish kho na hnâpakeng haw. Anathoth kho a temdeng toe. <sup>31</sup> Madmenah kho teh a kampuen toe. Gebim khocanaw teh hloutnae koe a yawng awh toe.

<sup>32</sup> Nob kho vah sahnin ao awh teh, Zion canu e mon lah kaawm e Jerusalem mon hah, a kut hoi a kahuet han. <sup>33</sup> Rasahu Bawipa Jehovah ni thingkangnaw rabat e patetlah takikathopounge bahu hoi, a kangnaw hah bouk vaiteh, ka rasang e a kangnaw hah reprep a satut han. <sup>34</sup> Ratu kathapounge hah cakâ hoi tâtueng vaiteh, Lebanon teh, athakaawme kut dawk hoi a rawp awh han. Kaie lung hai a roum han.

## 11

### *Jesi cakang ni uknae*

<sup>1</sup> Jesi kung dawk hoi a dawn a cawn han. A tangpha dawk e a cakang ni a paw a paw han. <sup>2</sup> BAWIPA e Muitha, lungangnae Muitha, thaipanueknae Muitha, kâponae Muitha, thaonae Muitha, panuenae Muitha, hoi BAWIPA takinae Muitha teh ahni dawk ao han. <sup>3</sup> Ahni teh BAWIPA a taki dawkvah, a mit hoi a hmu e patetlah lawkceng hoe, a hnâ hoi a thai e patetlah lawk tâtueng hoe. <sup>4</sup> Mathoenaw hah lannae hoi lawk a ceng teh, talai taminaw koelah, panguepnae lahoi lawk a tâtueng pouh. Talai hah a lawk bongpai hoi a hem teh, tamikathoutnaw hah a kâha hoi a thei. <sup>5</sup> Lannae hoi yuemkuncunae teh a keng dawk kâyeng e taisawm lah ao. <sup>6</sup> Asui teh tuca hoi rei ao han. Kaisi teh hmaeca hoi rei a yan han. Maitoca, sendek, hoi ka thâw e saringnaw hoi reirei a ceio awh han. Camocanaw ni hotnaw hah a hrawi awh han. <sup>7</sup> Maitomanu hoi tavom teh reirei hrampa awh vaiteh, a canaw teh reirei a yan awh han. Sendek hai maito patetlah hram a ca han. <sup>8</sup> Sanu ka net e camo ni hai hrunthoe khu koe a pai han. Sanu kamphei e camo nihai, hrunthok khu dawk a tapu han. <sup>9</sup> Kaie kathounge mon dawk, kârektapnae, kâraphoenae awm mahoe. Bangkongtetpawiteh, tuipui ni amae hmuen hah a ramuk e patetlah talai van teh, BAWIPA panuenae hoi akawi han.

### *Santoungnae koehoi bout a ban awh*



<sup>10</sup> Hate hnin dawkvah, Jesi e tangpha teh cawn vaiteh, taminaw hanelah mitnoutnae lah ao han. Hote mitnoutnae koe Jentelnaw teh a kâhnai awh han. A onae hmuen hai a lentoe han. <sup>11</sup> Hate hnin dawkvah, a kut dâw vaiteh, Assiria ram, Izip ram, Pathros ram, Kush ram, Elam ram, Shinar ram, Hamath ram, tuiptui namran lah kaawm e ramnaw koehoi, a taminaw kacawiraenaw hah bout a thokhai. <sup>12</sup> Jentelnaw hanelah mitnoutnae a ung pouh dawkvah, a pâlei e Isarelnaw hoi kho tangkuem kampek e Judahnaw hah, talai takin pali touh koehoi kaw vaiteh, a pâkhueng han. <sup>13</sup> Ephraim teh utnae lung a room han. Ouk ka taran e Judahnaw hai taran ngainae lung a room awh han. Ephraim ni Judahnaw hah ut awh mahoe h toe. Judahnaw ni Ephraim hah taran awh mahoe h toe. <sup>14</sup> Ahnimouh ni kanîloum lah, Filistinnaw hah a tuk awh han. Kanîtholae ramnaw e hnopainaw hah reirei a lawp awh han. Edomnaw hoi Moabnaw hai a thei awh han. Ammonnaw ni ahnimae lawk hah a ngai pouh awh han. <sup>15</sup> BAWIPA ni Izip tuiptui e lai hah khoeroe a raphoe pouh han. Kabetpoung e kahli hoi a kut hah palangnaw van kahek vaiteh, palang sari touh a lawng nahlanlah hem vaiteh, taminaw ni khokkhawm khawm vaiteh a raka awh han. <sup>16</sup> Isarelnaw Izip ram hoi a tâco awh navah kaawm e patetlah Assiria ram hoi kacawie a taminaw ceinae lamthung lah a coung han.

## 12

### *BAWIPA teh ka tha hoi ka la doeh*

<sup>1</sup> Hate hnin dawkvah nang ni na dei hane teh, Oe BAWIPA, nang koe ka lung ahawi. Kai koe na lungkhuek ei nakunghai, na lung bout a room teh, kai hah lung na pahawi toe. <sup>2</sup> Khenhaw! Cathut teh na kaie rungngangnae doeh. Takinae tawn laipalah, ka taran ahawi han. Jehovah teh ka tha hoi ka la doeh. Kaie rungngangnae lah ao. <sup>3</sup> Nangmouh teh lunghawinae lungthin hoi rungngangnae tuiptuek tui hah na do awh han. <sup>4</sup> Hate hnin dawkvah, BAWIPA teh pholen awh. A min hah kaw awh. A thaw tawknæ hah taminaw koe panuek sak awh. A min lentoenae hah pathang awh. <sup>5</sup> BAWIPA koe pholen la sak awh. Lentoenae lahoi thaw a tawk toe. Hete heh, talai tami pueng ni panuek awh naseh. <sup>6</sup> Oe Zion vah kaawm e naw pueng, hram awh nateh, lunghawi la sak awh. Bangkongtetpawiteh, Isarelnaw e kathoungpounge Cathut teh, nangmae lungui vah a lentoe poung.

## 13

### *Babilon lawkcengnae*

<sup>1</sup> Amoz capa Isaiah ni Babilon hoi kâkuen lah lawk a dei e teh, <sup>2</sup> Ka nga e mon daw k luen awh nateh, mitnout hah ung awh haw. Kacaipounglah hramki awh. Na kut hah kahek awh. Ahnimouh teh, nangmouh onae longkha thung kâen awh naseh. <sup>3</sup> Kai ni ka thoungsak e naw koe lawk ka thui toe. Kai ni ka poe e lentoenae dawkvah, a lung kahawi e, athakaawme taminaw hah ka lungkhuek e a room nahanelah, ka kaw toe. <sup>4</sup> Monsom e pawlawk teh tamihupui e pawlawk doeh. Miphunnaw uknaeram kamkhuengnae koe ruengruengti e pawlawk, hoi ransahu BAWIPA teh taran tuk hanlah a kâcai. <sup>5</sup> BAWIPA hoi cungtalah, a lungkhueknae senehmaica teh ram buemlah raphoe hanlah, a hlanae ram talai poutnae koehoi a tho awh.



<sup>6</sup> BAWIPA e hnin teh a hnai tounge dawkvah, khuikap awh haw. Athakasaipounge ni a rawk sak nahane hnin teh a tho han. <sup>7</sup> Kut kaawm pueng loungkanghawi han. Tami pueng a lung a pout awh han. <sup>8</sup> Lungpuen hoi awh awh vaiteh, patawnae aphunphun ni a cusin han. Camokhe patawnae ka khang e napui patetlah patawnae khang awh vaiteh, buet touh hoi buet touh a kâkhet awh toteh, ahnimae minhmai teh hmaipalai patetlah ao han. <sup>9</sup> Khenhaw! BAWIPA e hnin teh a tho lahun. A lungkhueknae, a lungkâanna hoi hote ram hah kingdi vaiteh, khocaramca tamikayonnaw hah peng raphoe hanelah a tho lahun. <sup>10</sup> Kalvan âsinaw hoi âsihunaw teh ang awh mahoe. Kanî hai a tâco navah a hmo vaiteh, thapa hai ang mahoe.

<sup>11</sup> Talaivan ni a yonnae hai thoseh, tamikathoutnaw e a payonnae hai thoseh, runae ka poe han. A lung kalennaw e kâoupnae hah ka pout sak vaiteh, kakaisuenaw e dudamnae hah ka pabo han. <sup>12</sup> Kai ni taminaw teh sôlêi e sui hlak hai thoseh, Ophir sui hlak hai thoseh ka takang sak han. <sup>13</sup> Hatdawkvah, ransahu BAWIPA e a lungkhueknae hah, a lungphuennae hnin dawkvah, kalvan kahuet vaiteh, talai hai ama onae hmuen koehoi a kâtahruet han.

<sup>14</sup> Tami pueng teh kahrawng pâlei e sayuk sakhi patetlah a yawng awh vaiteh, kapâkhuengkung kaawm hoe e tunaw patetlah awh awh vaiteh, amamae miphun koelah kamlang awh vaiteh, amamae ram daw a yawng awh han. <sup>15</sup> A kâhmo awh e pueng thut lah awh vaiteh, a man awh e pueng teh tahloi hoi thei lah ao han. <sup>16</sup> Ahnimae a canaw hai amamae hmaitung vah, doukkâlat lah talai daw raphet awh vaiteh, ahnimae innaw teh peng a raphoe pouh han. A yunaw hah a pacekpahlek pouh awh han.

<sup>17</sup> Khenhaw! Medesnaw hah ka hroecoe pouh han. Ahnimouh teh, sui hah banglahai ngâi awh mahoe, ngun hai ngai awh mahoe. <sup>18</sup> Ahnimouh ni thoundounnaw hah licung hoi a thei han. Ahnimouh ni a thun thung e camonaw hai pahrennae tawn awh mahoe. Ahnimae mit ni camocanaw hah pasai awh mahoe. <sup>19</sup> Uknaeram pueng hlak ka bawilen e Babilon, Khaledan taminaw ni kâoupnae lah kaawm e Babilon kho teh, Cathut ni a raphoe e Sodom hoi Gomorrah kho patetlah ao han. <sup>20</sup> Hote kho daw nâtuék hai tami khosak mahoe toe. Bangpatet e Arabnaw hai hote hmuen koe rim sak mahoe toe. Bangpatet e tukhoum ni hai hote hmuen koe a tunaw hah tabaw sak mahoe. <sup>21</sup> Hatei, thingyeiyawn sarangnaw teh hote hmuen koe a tabo awh han. Ahnimae innaw teh kaakirange moithang hoi akawi han. Kalaukvanaw ni ao nah vaiteh, Athanaw a coukdouk awh han. <sup>22</sup> Asuinaw ni kho longkha rapannaw koe thoseh, kahrawnguinaw ni innaw daw thoseh, a cairing awh han. Hote kho daw atueng nâsittouh ao hoehnahlan a tho han. Hote tueng hai saw mahoe.

## 14

### *San lah onae koehoi Jakop bout bannae*

<sup>1</sup> Bangkongtetpawiteh, BAWIPA ni Jakop imthung hah a pahren dawkvah, Isarelnaw hah bout a rawi teh, amamae ram daw ahnimanaw hah a hmuen a poe han. Ramlouknaw ni ahnimouh koe ao awh van han. <sup>2</sup> Miphunnaw ni ahnimouh teh, amamae ram daw a thokhai awh han. Isarelnaw ni miphunnaw e napui tongpanaw hah san lah a tawn awh han.



Ahnimouh ni ahnimouh kamangkungnaw hah a man awh han. Ahnimouh ka rektap e naw hai a uk awh han.

### *Babilon siangpahrang rawpnae*

<sup>3</sup> BAWIPA ni nange patawnae, temdengnae, ka ru e thaw na taw saknae koehoi nang hlout sak nahan lah BAWIPA e hnin teh a tho han. <sup>4</sup> Hattoteh, nangmouh ni Babilon siangpahrang hanelah hettelah bangnuenae na dei awh han, talai ka rektap e teh hete tami nahoehmaw, a uknaeram teh a rawp bo tOUNG VAW. <sup>5</sup> BAWIPA teh tamikathoutnaw e sonron, ukkungnaw e tahroe hah a khoe pouh. <sup>6</sup> Hote ni pout laipalah hemnae hoiyah taminaw hah lungkhueknae hoi a hem. Pahrennae awm laipalah, rektap teh lungkhueknae miphunnaw hah a uk <sup>7</sup> Talaivan pueng teh duem a kâhat teh, la sak lawk ni a katin. <sup>8</sup> Hmaica thingnaw ni nang koe a lunghawi awh. Lebanon mon kaawm e sidar thingnaw ni, nang na rawp hnukkhu, kaimouh na ka tâtueng hane luen takhang hoeh toe ati awh.

<sup>9</sup> Nang na tho toteh dawn hanelah, tami kadout kho teh a kâcai. Talai ukkungnaw pueng a hroecoe teh, ram tangkuem e siangpahrangnaw pueng hai amamae bawitungkhang dawk hoi a thaw sak. <sup>10</sup> Ahnimouh pueng ni na pathungnae lah a dei awh e teh, nang hai kaimouh patetlah na tha a youn teh, kaimouh hoi rei na kâvan bo vaw <sup>11</sup> Nange raïm onae, nange ratoung lawk teh tami kadout kho a cei awh toe. Pârinaw teh na yan nahanelah ao teh, ahrinaw teh na kâkhu e lah ao.

<sup>12</sup> Oe Khosei capa (Lucifer), amom tempalo, kalvan hoi na bo toe. Ram pueng na kata e, nang teh talai dawk rek na taben toe khe. <sup>13</sup> Nama ni teh na lunghung hoi hettelah na dei. Kalvan vah ka luen han. Cathut e âsinaw lathueng vah, ka tahungnae bawitungkhang ka rasang sak han. Atunglah kaawm e kamkhuengnae mon dawk ka tahung han. <sup>14</sup> Tâmainaw e lathueng ka luen han. Lathueng Poung e Cathut patetlah ka kâsak han. <sup>15</sup> Hatei, nang teh tami kadout kho, kadung poung e tangkom thung na bo toe.

<sup>16</sup> Nang na kahmawt e naw ni nang hah na khet awh teh, talai kâhuen sak e tami, ram pueng kâhuen sak e tami, <sup>17</sup> talaivan heh kahrawngum patetlah ka coung sak niteh, khopuinaw hah ka raphoe e, a man e naw hah ama im bout ban sak hanelah kâ ka poe hoeh e teh hete tami han namaw, na ti pouh awh han. <sup>18</sup> Ram tangkuem e siangpahrangnaw pueng teh, amamae tangkom dawk bawilenna e hoi a yan awh. <sup>19</sup> Hatei, nang teh panuettio e thingkang patetlah na tangkom dawk hoi takhoe lah na o toe. Thei lah kaawm e, tahloi hoi thut lah kaawm e, talung tangkom thung ka cet e naw hoi ramuk lah na o teh, khok hoi coungroe e ro patetlah doeh na o toe.

<sup>20</sup> Nang teh ahnimouh hoi rei pakawp mahoe. Bangkongtetpawiteh, nang teh, nama e ram hah na raphoe teh, na taminaw hah na thei toe. Hawihoehnae ka sak e a catounnaw teh nâtuék hai a min bout dei mahoe toe. <sup>21</sup> Ahnimae a canaw teh, amamae napanaw e yon kecu dawkvah, thei nahane hmuen hah rakueng awh. Ahnimouh thung hoi apihai talai ukkung awm mahoe toe. Talaivan kho hai kangdout sak awh mahoe toe.

### *Cathut ni Babilon a raphoe han*

<sup>22</sup> Rasahu BAWIPA ni, ahnimouh hoi kâtaran lah ka o han. Babilon kho dawk hoi ahnie min hoi kacawie naw thoseh, a ca catounnaw hai thoseh ka raphoe han telah ati. <sup>23</sup> Babilon kho teh sambuem lah ka o sak vaiteh,



bukbu onae lah ka ta han. Raphoenae sampho hoi ka pâthoun han telah ransahu BAWIPA ni a pathang.

*Cathut ni Assirianaw a raphoe han*

<sup>24</sup> Rasahu BAWIPA ni, ka pouk e patetlah ao han. Ka noe e patetlah ka sak han. <sup>25</sup> Assirianaw hah ka ram dawkwah rek ka hem vaiteh, kama e monnaw dawkvah, rep ka coungröe han. Ahnie yawcu hah ka takhoe pouh vaiteh, a hno hah a loung dawkwah hoi ka takhoe pouh han telah thoe a kâbo teh a dei. <sup>26</sup> Hethateh, talai van puenghoi kâkuen e ka noenae doeh. Hathateh, ram pueng koe ka dâw e kut doeh <sup>27</sup> Bangkongtetpawiteh, ransahu BAWIPA ni a noe toe. Apinimouh a oun thai han. BAWIPA e kut teh a dâw toe. Apinimouh a hno sak thai han.

*Cathut ni Filistinnaw a raphoe han*

<sup>28</sup> Ahaz siangpahrang a duenae kum dawkwah hete lawk teh a tho. <sup>29</sup> Filistin khocanaw, nangmouh na hemnae bongpai a lawt dawkwah na lunghawi awh hanh. Bangkongtetpawiteh, tahrün phün dawkwah hoi hruthoe a khe awh han. Hote a canaw hai kamlang thai e hmaitahrün lah ao awh han. <sup>30</sup> Mathoenaw e caminnaw hai kawkhik lah ao han. Mathoemaranaw hai kahawicalah a i awh han. Hatei, nange tangpha teh takang hoi ka thei han. Kacawie naw hai thei lah ao han. <sup>31</sup> Oe kho longkha, cingou haw. Oe khopui, khuikap haw. Filistinnaw pueng teh taki hoi a pâyaw awh. Bangkongtetpawiteh, atunglah hoi hmaikhu a tâco. Hote ransahu dawkvah, kampek e awm hoe. <sup>32</sup> Ahnimouh ni, ram tangkuem e patounenaw koe bangtelamaw a dei pouh han vai. BAWIPA ni Zion kho hah a kangdue sak teh, mathoenaw ni hote kho dawkwah a kângue awh han.

## 15

*Moab koe rawknae a pha han*

<sup>1</sup> Hethateh, Moab hoi kâkuen e lawk doeh. Moab ram Ar kho teh tangmin buet touh hoi rawknae koe a pha. Moab ram teh khoeroe a rawk toe. Moab ram Kir kho teh tangmin buet touh hoi rawknae koe a pha. Moab ram teh khoeroe a rawk toe. <sup>2</sup> Khocanaw teh Dibon kho, a rasangnae koe e bawkim koe a cei awh teh a khuika awh. Moab khocanaw teh, Nebo kho, Medeba kho hah a khuikakhai awh. Ahnimae lû dawkwah sam awm hoe, ahnimae pâkhamuen pueng teh koug a ngaw awh. <sup>3</sup> Lamthung dawkwah buri a khohna awh teh, lemphu hai thoseh, lam dawkwah hai thoseh, kaawm e pueng ni a khuika awh teh, mitphi dawkwah a kâkaawkwah awh. <sup>4</sup> Heshbon kho hoi Elealeh kho vah a khuika awh teh, Jahaz kho totouh a kâthai. Moab ransanaw hai pâyaw laihoi a khuika awh. <sup>5</sup> Kaie ka lungthin hai Moab hanelah a kâ van. Ka yawng e taminaw teh kum thum touh e, maitola patetlah Zoar kho totouh a kâhêi awh. Luhith mon dawkwah mitphi bo laihoi a luen awh. Horonaim kho koelah ceinae lamthung dawkwah hai, rawk kahmanae khuika lawkwah hoi a hram awh. <sup>6</sup> Bangkongtetpawiteh, Nimrim tuinaw kingdi teh, phonaw teh a ke awh toe. Caticamu hai a due toe. Kahring e kung touh boehai awmhoe. <sup>7</sup> Hatdawkwah, ahnimouh teh, tawnta hnopainaw hah sumpa yawng koe a thokhai awh han. <sup>8</sup> A khuika lawkwah ni Moab ram peng a katin. A cingou lawkwah teh Eglaim kho totouh, Beerelim kho totouh a pha. <sup>9</sup> Bangkongtetpawiteh, Dibon tui teh thi hoi akawi. Dibon kho dawkwah alouke lacik bout ka pha sak han rah. Ka hlout e Moab khocanaw hoi, kacawie khocanaw hanelah sendek hah ka patoun han.



## 16

*Moab hanelah ngaihawinae awm hoeh*

<sup>1</sup> Zion canu mon dawк kaawm e ram ukkung bawi hanelah, Sela kho hoi kahrawngum lam lahoi tuca hah patawn haw. <sup>2</sup> Arnon palang rakanae koe e lamthungnaw dawк, Moab canunaw teh tabu raphoe lah ao teh kamleng e tavanaw patetlah ao awh. <sup>3</sup> Pouknae na poe awh haw. Lannae lahoi laideitatueng awh haw. Kaní tuengtalueng thun nah e na tâhlip hah, karum patetlah awm sak awh haw. Pâlei e naw hah hrawк awh. Ka yawng e naw hah pahnawт awh hanh. <sup>4</sup> Moab ram hoi a pâlei teh a takhoe e naw hah nangmouh koe rei awm naseh. Ahnimouh karaphoenaw e kut dawк hoi rawngkhan hanelah kângue e lah awm awh. Ka hnephnapnaw ao awh hoeh toreі, raphoenae teh a roum toreі, reprep ka coungroe e taminaw teh talai van hoi a kahma awh toreі teh, <sup>5</sup> bawitungkhung teh lungpatawnae lahoi a cak han. Hote tahungnae dawкvah, Devit e lukkareim thung hoi buet touh ni lawkceng vaiteh, lannae hah tawng vaiteh, lannae hah karanglah sak vaiteh, yuemkamcunae lahoi a tahung han. <sup>6</sup> Moab e kâoupnae, banghloimaw a kâoup, ahnie lunglennae, a kâoupnae, a kaisuenae pueng teh maimouh ni thai awh toe. A kâoupnae pueng teh ahrawnghrang doeh.

<sup>7</sup> Hatdawкvah, Moab khocanaw teh, Moab kho hanelah a cingou awh han. Khoca pueng a cingou awh han. Nangmouh teh Kirhareseth kho e misur vaiyeinaw hanelah na cingou awh han. Ahnimouh teh atangcalah puenghoi runae a kâhmo awh han. <sup>8</sup> Bangkongtetpawiteh, Heshbon laikawкnaw, Sibmah misurkungnaw teh ketkamyai teh a ke awh toe. Miphunnaw ukkung bawinaw ni misurbomnaw teh a khoe awh toe. Hote akungnaw teh, Jazer kho totouh a pha teh, kahrawngum totouh a yam awh. Hote a kangnaw teh, tuiпui ka tapuet lah a yam awh. <sup>9</sup> Hatdawкvah, Jazer kho hoi cungalal Sibmah misurnaw hanelah ka khuika. Oe Heshbon kho hoi Elealeh kho, nang hah ka mitphi hoi cupcup na duk sak han. Bangkongtetpawiteh, nange kompawi a pawhik hoi caâpawi a pawhiknaw teh a kâhat toe. <sup>10</sup> Lunghawinae hoi nawmnae teh talai kahawi dawк hoi takhoe lah ao toe. Misur takha dawк lunghawinae la saknae awm hoeh. Lunghawinae hoi hramnae awm hoeh. Misur paw katinnaw ni katinnae dawкvah misur paw hah katin awh hoeh. Hramki lawк ka kâhat sak toe. <sup>11</sup> Hatdawкvah, kaie ka lung teh, Moab ram hanelah, ka lungthin teh Kirhareseth kho hanelah ratoung lawк patetlah a cingou toe. <sup>12</sup> Moabnaw ni a rasangnae hmuen koe, tawntam laihoi ratoum hanelah, amamae kathounge hmuen koe a tho awh navah, banghai hawinae hmawт awh mahoe. <sup>13</sup> Hethateh, atuvah Moab ram hoi kâkuen e BAWIPA ni a dei e lawк doeh. <sup>14</sup> Atu BAWIPA ni a dei e teh, kum thum touh thung, thaw ka tawк hanlah hlai e ni thaw a tawкnae kum patetlah Moab e bawilennae teh tami moikapap ni a khet rahnoum awh han. Kacawie naw teh ekvoi ayounca awh dawкvah, a tha a baw awh ati toe.

## 17

*Cathut ni Damaskas hoi Isarel runae a poe han*

<sup>1</sup> Damaskas kho hoi kâkuen e lawк teh, Khenhaw! Damaskas kho teh kho lah awm mahoe. Ka rawк e songnawng lah doeh ao han toe. <sup>2</sup> Aroer khonaw teh kahrawngum, saringnaw ni pânae lah, yannaе lah awm vaiteh, ka hrui hane apihai awm mahoe. <sup>3</sup> Rapan teh Ephraim kho



hoi a kahma han. Uknaeram teh Damaskas kho hoi a kahma han. Kacawie Sirianaw teh Isarelnaw e bawilennae patetlah ao awh han, telah ransahu BAWIPA ni ati.

<sup>4</sup> Hote hnin dawkvah, Jakop bawilennae teh a roum han, a thâwnae teh a kamsoe han. <sup>5</sup> Cang ka a kung ni cavuinaw a pâkhueng navah, a kut hoi cavuinaw a a awh e patetlah Rephaim yawn dawc cavui pâhma e racawng e patetlah ao han. <sup>6</sup> Hatei, olive paw hah karuek toteh, a som dawc kahni kathum touh ka paw e a kang, paw rah pawiteh, pali panga touh ouk ao e patetlah pâhma e cang a cawi nahanlah ao han telah Isarelnaw e Bawipa Jehovah ni ati.

<sup>7</sup> Hat hnin vah, tami ni kasakkung koe a khet vaiteh, a mit ni Isarelnaw e kathounge Cathut hah a bari han. <sup>8</sup> Amamouh ni a kut hoi a sak awh e khoungroenaw koe kangvawi awh mahoe. Amamae kutdawnnaw hoi a sak awh e hmuitui sawinae Asherim khoungroenaw koe lah kangvawi awh mahoe. <sup>9</sup> Hat hnin dawkvah, amamae kakakpounge khonaw teh, Isarelnaw kecu dawc a ceitakhai e kahrawngum hoi monsom patetlah ao vaiteh, kingkadi e lah ao han.

<sup>10</sup> Bangkongtetpawiteh, nang teh nama e rungngangnae Cathut hah na pahrim teh, nama e kânguenae talung hah pouk dounnae na tawn hoe. Hatdawkvah, nang ni na ngai e thingthairompo na ung eiteh, ramlouknaw e misur kang hah na ung han. <sup>11</sup> Na ungnae hnin dawkvah, na rount sak teh, cati na patuena amom vah, a pei na pei sak han. Hatei, patawnae hoi kahmat thai hoe e runae a tho hnin navah, caticamu anae tueng a kahma han.

<sup>12</sup> Aya! miphunnaw e hramki lawk bo aw. Ahnimouh teh, athakaawme tui a cairing e patetlah a cairing awh han. <sup>13</sup> Miphunnaw teh tui moikapap e a cairing e patetlah ka cairing awh nakunghai, Bawipa nang ni ahnimanaw hah na yue toteh, ahlanae koe a yawng awh han. Mon vah kahlî palek e cahik patetlah bongparui ni a sin e songnawng patetlah pâlei lah ao awh han. <sup>14</sup> Kanî a khup navah kenhaw! taki a tho poung khe. Khodai totouh ahnimouh awh mahoe toe. Hethateh, maimouh na ka tuk ni teh na ka lawm e naw ni a coe awh hane ham, maimouh na ka lawm e naw koe kabawt hane cungpam doeh.

## 18

### *Cathut ni Kush runae a poe*

<sup>1</sup> Kush palangnaw namran lah, cahucahu kacai e ratheinaw onae ram teh a yawthoe. <sup>2</sup> Hothateh, tuipui lam hoi thoseh, tui van vah, lungpum longnaw hoi thoseh, patounenaw patoun e ram lah ao. Karang poung e kaoungkung naw, ka rasang ni teh a tak kâpi e miphun, kahnai kahlat kaawm e taminaw ni taki e miphun, palangnaw kamphinae koe e talai dawc kaawm e, a tha kaawm ni teh reprep ka coungroe e miphun koe cet awh haw.

<sup>3</sup> Talaivan kaawm e taminaw hoi talai dawc kaawm e taminaw, monnaw dawkvah mitnout a ung awh toteh, nangmouh ni na hmu awh han. Mongka ueng toteh nangmouh ni na thai awh han. <sup>4</sup> Bangkongtetpawiteh BAWIPA ni, kai koe a dei e teh, duem ka o teh, kanî raeng dawc hoi ka ang poung e khumbei patetlah thoseh, canga tue kâanna tueng koehoi tadamtui kabawt sak e tâmai patetlah thoseh, ka onae hmuen koehoi ka khet han telah ati. <sup>5</sup> Bangkongtetpawiteh, a tue a pha hoehnahlan a pei ka pei niteh, a pei teh kahmin e a paw lah ao toteh, a dawnnaw hah



ramalongkawi hoi bouk vaiteh, a kangnaw hai kOUNg bouk teh tâkhawng lah ao. <sup>6</sup> Hotnaw pueng teh, mon vah moi kacate tavanaw hoi talai dawk e saringnaw hanelah ka cawi sak han. Moi ka cat e tavanaw ni ahnimae van vah, kompawi tue a loun sak awh vaiteh, talai dawk e saring pueng ni ahnimae van vah kasik tue a loun sak awh han.

<sup>7</sup> Hate tueng dawkvah, ka rasang ni teh a tak kâpi e miphun, kahnai kahlat kaawm e taminaw ni taki e miphun, palangnaw kamphinae koe e talai dawk kaawm ni teh a tha kaawm reprep ka coun groe e miphun teh, kalvan ransanaw e BAWIPA min onae Zion mon dawk, ayawmpoehnonaw hah a sin awh han.

## 19

### *Cathut ni Izip runae a poe han*

<sup>1</sup> Izip ram hoi kâkuen e lawk hateh, Khenhaw! BAWIPA ni karang poung e tâmai a kâcui teh Izip ram lah a tho. Izip ram e meikaphawknaw teh a hmalah a pâyaw awh teh, Izipnaw e a lung teh, amamae thungvah, a kamyawt pouh awh han. <sup>2</sup> Kai ni Izipnaw teh, buet touh hoi buet touh a kâtaran awh nahanelah ka hroecoe vaiteh, ahnimouh ni amamae hmaunawng ha reira, imri reira, kho reira, uknaeram reira a kâtuk awh han. <sup>3</sup> Izipnaw e lungthin teh, amamae thungvah, hrawnghrang lah ao han. A noenae hai ka kâsanu sak han. Hatnavah, ahnimouh ni meikaphawknaw, taân kasinnaw, khueyuenaw, tonghmanaw koe a pacei awh han. <sup>4</sup> Izip khocanaw teh, ka matheng e bawi kut dawk ka thak han. Kâtawnnae kalen e siangpahrang ni ahnimouh hah a uk awh han telah, ransahu Bawipa Jehovah ni a ti.

<sup>5</sup> Tuipui tuinaw rem aphui vaiteh, palang tuinaw rem hak vaiteh a ke awh han. <sup>6</sup> Palangnaw teh a hmui kong vaiteh, Izip ram e palangnaw teh rem a hak han. Lungpum hoi pho naw teh kamyai vaiteh a ke awh han. <sup>7</sup> Nai palang rai kaawm e akungnaw hoi Nai palang teng patue e naw pueng teh, remke vaiteh, kOUNg kahmat vaiteh, awm awh mahoe h toe. <sup>8</sup> Tanga kamannaw teh cingou awh vaiteh, Nai palang dawk hradang kasawnnaw pueng a khui a ka awh han. Tui dawk tamlaw kahengnaw hai a tha a tawn awh han. <sup>9</sup> Raha kasawnnaw hoi lukkarei kakawngnaw teh yeirai a po awh han. <sup>10</sup> A kâoupkhai e naw teh a rawk han, thaw katawnk pawng teh a lung a rek awh han. <sup>11</sup> Zoan kho e kahrawikungnaw teh a pathu awh han. Faro siangpahrang e a lungkaang poung e kâpokhaibawinaw ni pathunae pouknae hah a poe awh. Nang ni Faro siangpahrang hah, kai teh a lungkaangnaw e miphun, ayan e siangpahrangnaw e miphun lah ka o, telah bangtelamaw na dei thai han vaw. <sup>12</sup> Atuvah, nange a lungkaangnaw teh nâmour awh va. Ahnimouh ni atuvah, ransahu Bawipa Jehovah ni Izipnaw hanelah a kâcai e hah atu dei awh naseh, panuek awh naseh. <sup>13</sup> Zoan kho e kahrawikungnaw teh, ka pathu e lah ao awh toe. Memphis kho e kahrawikungnaw teh dumyennae hoi awh awh toe. Izip catoun e kacuenaw ni Izip ram hah a payon sak toe.

<sup>14</sup> BAWIPA ni Izip ram thung kâkapeknae muitha a patoun pouh dawkvah, yamu ka parui e tami ni amae a palo dawk rawraw a cu e patetlah, ahnimouh teh, Izip ram hah ahnie tawksaknae dawk, rawrawcu awh han. <sup>15</sup> A lû nakunghai thoseh, a mai nakunghai thoseh, samtue kang nakunghai, lungpumpung nakunghai, Izip ram hanelah thaw ka tawk pouh thai hane api awm hoe h.



<sup>16</sup> Hote hnin navah, Izip khocanaw teh napui patetlah ao awh han. Ahnimouh ni ahnimouh koe kut kahek e ransahu BAWIPA hmalah taket awh vaiteh a pâyaw awh han. <sup>17</sup> Izip ram hane kâtaran lah ka noe pouh e ransahu BAWIPA Cathu e a pouknae dawkvah, Judah ram teh Izip ram hanelah, takikathopounge lah a coung pouh han. Hote ram ka pouk e naw pueng ni a taki awh han.

### *Izip ni BAWIPA a bawh han*

<sup>18</sup> Hote hnin dawh, Izip ram vah, Kanaan lawk ka dei niteh, kalvan ransanaw e BAWIPA hah thoe ka bo e kho panga touh ao han. <sup>19</sup> Hat hnin vah Izip ram lungui vah, Jehovah hanelah thuengnae khoungroe buet touh ao teh, hote ram ramri koevah, Jehovah hanelah lungdon ao han. <sup>20</sup> Hote lungdon teh Izip ram vah, ransahu BAWIPA hanelah, mitnoutnae hoi kapanuekkaikung lah ao han. Ahni ni rungngangkung hoi karingkung a patoun vaiteh, ahni ni a rungngang awh han. <sup>21</sup> Hahoi, BAWIPA ni amahoima Izipnaw ni panue nahanelah a sak dawkvah, hat hnin vah, Izipnaw ni BAWIPA hah a panue awh teh, sathei hoi pasoung hnonaw hoi BAWIPA hmalah lawk a kâkam awh teh, a kuep sak awh han. <sup>22</sup> BAWIPA ni Izip ram hah runae a poe han. Runae a poe eiteh, a hmâ teh a kahma han. Hat toteh, ahnimouh teh BAWIPA koe bout a tho awh han. BAWIPA ni ahnimae ratoum lawk hah a thai pouh teh, ahnimae hmânaw teh ahawi sak pouh awh han.

<sup>23</sup> Hat hnin vah Izip ram hoi Assiria ram totouh lamthungpui ao han. Assirianaw teh Izip ram lah thoseh, Izipnaw teh Assiria ram lah thoseh, cet awm awh vaiteh, Izipnaw teh Assirianaw hoi reirei a bawh awh han. <sup>24</sup> Hate hnin dawkvah, Isarel ram teh Izip ram hoi Assiria ram hoi cungtalah, apâthum e ram lah a bawh teh, talai van lungui vah yawhawi lah ao han. <sup>25</sup> Rasahu BAWIPA ni, ka miphun Izip, ka kut hoi ka sak e Assiria, ka râw lah kaawm e Isarelnaw koe, yawhawinae awm seh telah dei vaiteh, ahnimanaw hah yawhawi a poe han.

## 20

### *Izip hoi Kush hanelah mitnoutnae*

<sup>1</sup> Siria siangpahrang Sargon ni ransabawi Ashdod hah a patoun dawkvah, ahni ni Ashdod kho hah a tuk teh a lawp. <sup>2</sup> Hote tueng nah, BAWIPA ni Amoz capa Isaiah koe, cet haw. na kâyeng e buri hah rading nateh, na khok dawh e khokkhawm haiyah rading haw atipouh navah, ahni ni khohna hnât laipalah, khokkhawm khawm laipalah a cei ao. <sup>3</sup> Hahoi, BAWIPA ni ka san Isaiah ni, Izip hoi Kush ramnaw hanelah, mitnout hoi kângairu hno lah, khohna hnât laipalah, khokkhawm khawm laipalah kum thum touh thung a ceio e patetlah, <sup>4</sup> Siria siangpahrang ni Izipnaw hoi Kushnaw kacue kanaw pueng teh, khohna hnât laipalah, khokkhawm khawm laipalah, laheibaw boehai ramuk laipalah, a hravi awh han. Hethateh, Izip ram e yeiraiponae doeh. <sup>5</sup> Hatnavah, Ashdod khocanaw ni a taki awh han. Ahnimouh ni a kâuep awh e Kush ram hai thoseh, a kâoupkhai awh e Izip ram hai thoseh yeiraipo hoi ao awh han. <sup>6</sup> Hot hnin vah, hote palang rai kaawm e naw ni hai, khenhaw! Assiria siangpahrang e kut dawh hoi hlout nahanelah, maimouh ni ngaihawi teh kângue e naw koe, hettelah bo ao aw. Hat pawiteh, maimouh teh bangtelah hoi maw hlout thai awh han toung vaw, ati awh han a ti.



## 21

*Babylon rawknae*

<sup>1</sup> Tuipui teng kaawm e thingyeiyawn hoi kâkuen e lawk teh, akalah hoi bongparui ni a ceikhai e patetlah hothateh takitho e ramke koehoi a tho. <sup>2</sup> Taki ka tho e vision hah ka hmu toe. Yuemkamcu hoeh e tami teh yuemkamcu hoeh. Ka raphoe e tami teh a raphoe. Elam khocanaw luen takhang awh. Midian khocanaw kalup awh. Hote kho kecu ka tâcawt e cingounae kaawm e pueng hah karoumsak toe.

<sup>3</sup> Hatdawkvah, ka keng teh patawnae hoi a kawî. Ca khenae hoi kâvan e puenghoi patawnae ni kai teh na katek. Kai teh ka thai thai hoeh nahanelah ka lung a kâsanu. Ka hmu thai hoeh nahanelah ka lung a puen. <sup>4</sup> Ka lungthin a kâhei teh, ka taki dawkvah, tâlueng laihoi ka o. Dikdik ka doun e tangminlah lenghrim patenghai kaluekalap kawî lah ao toe.

<sup>5</sup> Ahnimouh ni caboi a rakueng awh. Imrasang dawc ramveng ka ta toe. A ca awh. A nei awh. Oe kahrawikungnaw thaw awh. Bahlingnaw hah satui hluk awh.

<sup>6</sup> Bangkongtetpawiteh, Cathut ni kai hanelah, cet haw. Ramveng ratawng sak haw. A hmu e patetlah dei sak haw. <sup>7</sup> Ahni ni, rangleng ransahu, marangransanaw, la ransahu, kalauk ransahu hah a hmu toteh, kamcengcalah a hnâpakeng vaiteh, taranhawî nalaihoi thai naseh, telah a ti. <sup>8</sup> Ramvengim dawc e sendek ni, Oe BAWIPA, kai teh khodai lah kanîruirui ka kangdue, karum lahai karum tuettuet ka kangdue. <sup>9</sup> Khenhaw! Atu rangleng ransahu hoi marangransanaw teh a tho awh lahun, titeh hram laihoi a dei. Hathnukkhu, a rawp toe. Babilon kho a rawp toe. Ahnie meikaphawc cathut kaawm e pueng teh, talai dawc reppasei lah koug a rawp awh toe telah rek a dei.

<sup>10</sup> Ka coungröe teh, katinkaawinae hmuen koehoi ka tho e miphun, ransahu BAWIPA tie Isarelnaw e Cathut ni a dei e hah, ka thai e patetlah nangmouh hah kâhructuetnae na poe awh.

*Dumah ram hoi kâkuen e lawk*

<sup>11</sup> Oe ramveng, karum lah bangtelane Oe ramveng, karum lah bangtelane, telah Seir mon hoi kai hah na kaw.

<sup>12</sup> Ramveng nihai, amom a pha doeh. Karum hai a pha doeh. Pacei han ngai pawiteh pacei awh. A hnukkhu bout tho awh, telah a ti.

*Arabia hoi kâkuen e lawk*

<sup>13</sup> Kahlawng ka cet e Dedannaw, nangmouh teh Arabia ratu dawc karum na roe awh han. <sup>14</sup> Tema ram dawc kaawm e taminaw, tui kahrannaw hanelah tui sin pouh awh. Nangmouh ni ka yawng e naw hah vaiyei hoi na dawn awh toe. <sup>15</sup> Bangkongtetpawiteh, nangmouh teh tahlöinaw e hmalah hoi thoseh, phawk e tahlöi hmalah hoi thoseh, nue tangcoung e licung pala hmalah hoi thoseh, kâtuk nah um hoi thoseh na yawng awh toe.

<sup>16</sup> BAWIPA ni kai koe hettelah a dei. Thaw tawc hanelah hlai e naw ni a parei awh e kum lahoi, kum touh thung vah, Kedar kho e bawilennae pueng teh a pout han. <sup>17</sup> Kacawie athakaawme Kedar capanaw, lipala ka patuem e ransanaw teh a youn awh han. Bangkongtetpawiteh, Isarelnaw e Cathut Jehovah ni hottelah yo a dei toe.



## 22

*Jerusalem hoi kâkuen e lawk*

<sup>1</sup> marangransanawHethateh, ayawn hoi kâkuen e vision doeh. Nangmouh pueng teh lempu na luen awh nahanelah, nangmouh koe bang hno mouh ka tho vaw. <sup>2</sup> Nang teh ka hrawang e kho, ka hramki e kho, ka kamlue e kho. Na tami ronaw teh, tahloi hoi kadout awh e nahoe. Taran kâtuknae koe kadout awh e hai nahoe. <sup>3</sup> Na kahrawikungnaw pueng teh cungtalah koug a yawng awh. Ahnimouh teh licung sin laipalah, katek lah ao awh. Ahlanæ koe a yawng awh eiteh, man e naw teh, cungtalah katek lah ao awh. <sup>4</sup> Hatdawkvah, kai hah na khen hanh. Puenghoi ka kap haw nei. Ka miphunnaw e tanglanaw hoi kâkuen lah, kai hah lungpahawi hanelah kâcai awh hanh lah a, telah ka ti. <sup>5</sup> Bangkongtetpawiteh, ransahu BAWIPA ni, vision hmunaeyawn dawkvah, paringparang lah onæ, rektapnae, kâsanunæ, kho rapan raphoenæ, monnaw hramkinae hoi kâkuen e hnin teh a hmoun toe.

<sup>6</sup> Elam ram teh, rangleng ransa, marangransanaw hoi cungtalah caritpala a sin toe. Kir ram ni bahling hah a rasa toe. <sup>7</sup> Na ngai poung e ayawnnaw teh taran tuknae ranglengnaw hoi a kaw. Marangransanaw teh longkha koe hmuen a la awh. <sup>8</sup> Judah ram ni a kânguenæ teh takhoe pouh lah ao toe. Hatnae tueng dawknang teh, ratu im dawke senehmaica hah na khen vaiteh, <sup>9</sup> Devit kho dawkkarawki ni teh katim e moikapap na hmu han. Nangmouh teh, akalæ tuiim dawke tui hai na pâtung awh han.

<sup>10</sup> Hathnukkhu, Jerusalem kaawm e innaw hah na parei vaiteh, rapannaw hah kacaklah sak thai nahanelah, innaw hah raphoe awh. <sup>11</sup> Tuiim karuem dawkhui tuinaw hanelah, tuiim hai rapan bokhni touh e rahak vah, a sak awh. Hatei, het naw ka sak e, nangmouh ni na khen awh hoe, na panuek awh hoe. Ayan hoi hote ka sak e haiyah, banglahai na ngai awh hoe.

<sup>12</sup> Hatnae tueng dawkvah, khuika hanelah, sam ngaw hanelah, buri khohna hanelah, ransahu Bawipa Jehovah ni na coun teh na hroecoe awh. <sup>13</sup> Hatei, Khenhaw! Lunghawinae, maitonaw theinae, tunaw theinae, maitomoi canæ, misur yamu neinae a sak awh teh, maimouh teh tangtho due awh han toung dawkvah, cat net awh sei, telah ati awh bo aw.

<sup>14</sup> Rasahu BAWIPA ni a dei e teh, kaie ka hnâ dawke pâpho e teh, atangcalah, nangmouh teh na due awh ditouh yontha lah na awm mahoe, telah ransahu Bawipa Jehovah ni a ti.

*Shebna kâhruetcuet poenæ*

<sup>15</sup> Ka Bawipa ransabawi Jehovah ni a dei e teh, tho nateh, hnokuemkung Shebna, ahni teh im ka ukkung lah kaawm e koe cet nateh, <sup>16</sup> a rasangnae koe nama hanelah phuen tangkom tai nateh, ma o nahane hmuen hah talung dawka thuk e, nang teh hete hmuen hoi bangtelamaw na kâkuet teh, phuen tangkom hah nama hanelah na thuk nahanelah, hete hmuen koe nang teh api hoi maw na kâkuet. <sup>17</sup> Oe, athakaawme tami, BAWIPA ni nang teh, puenghoi na pâlei han. Nang hah kacaklah na man han. <sup>18</sup> Nang hah pou na palet vaiteh, akawnae ram dawka tâkhawng han. Nang teh hote ram dawka due han. Hote ram dawka, nange lentoe ranglengnaw teh, na bawipa e imthungnaw hanelah, yeiraponæ lah ao han. <sup>19</sup> Na thaw dawkhui hoi na takhoe han. Na hmuen koehoi beng na sawn han.

<sup>20</sup> Hatnae hnin dawkvah, Hilkiah capa, ka san Eliakim hah ka kaw vaiteh, <sup>21</sup> nange khohna hah, ahni ka khohna sak han. Na taisawm hai



ka kâyeng sak vaiteh, nange kâtawnnae hah ahni kut dawk ka poe han. Ahni teh Jerusalem vah kaawm e naw hoi Judah miphunnaw e na pa lah ao han. <sup>22</sup> Devit im e tho cabi hah, ahnie a loung dawk ka patue pouh han. Ahni ni a paawng vaiteh, apinihai khan thai mahoe. Ahni ni a khan e teh apinihai paawng thai mahoe. <sup>23</sup> Kacake hmuen koe pâkhinae rui patetlah ka caksak han. Ahni teh a na pa e im dawk, bawilennae bawitungkhung lah ao han.

<sup>24</sup> Kawlung koehoi kamtawng teh, ailo manang pueng, hnopai e pueng, na pa imthung hoi catounnaw e bawilennae teh, ahnie van vah bang lah ao han. <sup>25</sup> BAWIPA ni a dei e teh, hatnae tueng dawkvah, kacak hmuen koe kaawm e pâkhinae rui teh, a hmuen koehoi puen vaiteh, thouk bouk vaiteh, a rawp han. Ahni van kaawm e hnokari hai takhoe lah ao han, telah Rasahu BAWIPA ni a ti.

## 23

### *Taire hoi Sidon hoi kâkuen e lawk*

<sup>1</sup> Hete lawk teh Taire hoi kâkuen e lawk doeh. Tarshish longnaw, cingou awh haw. Bangkongtetpawiteh, Taire kho teh im awm hoe. Turai kâhatnae ao hoe totouh, raphoe lah ao toe. Kittim ram hoi patuen thai lah ao. <sup>2</sup> Tuilum dawk kaawm e naw sairasuep lah awm awh. Tuipui dawk ka cet kaawm e Sidon hno ka yawt naw, nangmouh teh na tawnta sak awh toe. <sup>3</sup> Ka kaw poung e tui van vah, hot kho e aphawng teh, Shihor cati lah kaawm e Nai palang e a paw doeh. <sup>4</sup> Oe Sidon kho, kayak haw. Bangkongtetpawiteh, tuipui rapan niyah, kai teh camo hai ka vawn hoe, ca hai ka khe hoe, thoundounnaw hai ka khenyawn hoe, tanglanaw hai ka paroung hoe telah a ti.

<sup>5</sup> Izip ram vah kamthang a pha toteh, Taire kho kamthang kecu daw, ahnimouh teh puenghoi a lungpuen awh han. <sup>6</sup> Tarshish kho lah raka awh. Tuilum dawk kaawm e taminaw, cingou awh haw.

<sup>7</sup> Akungtuem kamtawngnae teh, ayan hoi e lah ao teh, ahlanae koe na khok ni na ceikhai teh, nangmae na lamtunae kho teh, hettelah namaw ao vaw. <sup>8</sup> Bawilukhungnaw ouk ka poe e kho lah ao nahlangva, ahnie hno kayawtnaw teh, kahrawikungnaw lah a coung awh teh, hno kayawtnaw teh talai van oup e lah kaawm e Taire kho hoi kâtaran lah apimouh hete pouknae hah ka tâcawtkhai va. <sup>9</sup> Ransahu BAWIPA niyah, bawilennae kâoupnae kaawm e pueng hah, banglah ngaihoe nahane hoi, talai van e ouphlawpnae pueng yeiraipo sak hanelah, hotehah a noe toe.

<sup>10</sup> Oe Tarshish kho tanglakacuemnaw, ka khoumkung ao hoe toung dawkvah, Nai palang patetlah bout lawng lawih. <sup>11</sup> Bawipa ni tuipui van vah a kut a dâw teh, uknaeramnaw hah a kâhuat sak. Kanaan hoi kâkuen lah, kacakpoung rapanimnaw hah raphoe hanelah BAWIPA ni kâ a poe. <sup>12</sup> Rektap lah kaawm e tanglakacuem, Sidon canu, nang teh na lung bout hawinae awm mahoe teh. Thaw haw. Kittim ram lah raka haw. Haw e hmuen koehai nang hanelah, kâhatnae hmuen awm mahoe, telah a ti.

<sup>13</sup> Khaldeannaw e ram hah, kenhaw! Ahnimouh teh ayan vah awm awh hoe. Assiria ni hote ram hah, ramke um e moithangnaw hanelah a tawn awh. Ahnimouh ni, rapan ramvengim a sak awh teh, hote kho rapan hah a raphoe awh teh, hote kho hah ka rawk e imrawng lah ao sak awh.

<sup>14</sup> Tarshish longnaw cingou awh haw. Bangkongtetpawiteh, nangmae ramvengimnaw teh raphoe lah ao toe.



<sup>15</sup> Hatnae hnin dawkvah, Taire kho teh, siangpahrang buet touh e se patetlah kum 70 touh thung pahnim lah ao han. Kum 70 touh a baw navah, ka kâyawt e napui ni la sak e dawk e patetlah Taire kho vah ao han. <sup>16</sup> Oe pahnim lah kaawm e ka kâyawt e napui, ratoung hah lat nateh, kho hah lawngven haw. Nang hah hlawt na pouk awh nahanelah, ngai kaawm lah kueng nateh, la moi sak haw.

<sup>17</sup> Kum 70 abaw toteh, BAWIPA teh Taire kho khet hanelah a tho han. Hote kho teh, amae aphu koe bout ban vaiteh, talaivan uknaeram puenghoi yah bout a kâyo han. <sup>18</sup> Hatei, ahnie hnopai yonae aphunaw teh, BAWIPA han thoungnae lah ao han. Hot hah pâkuem mahoe. Ahnie hnopai yo e teh, BAWIPA hmalah kaawmnaw hanelah teh, ka khout e rawca hoi khohna kahawi naw hah a kabawp han.

## 24

### *Talaivan pueng lawkcengnae*

<sup>1</sup> Khenhaw! BAWIPA ni talai hah peng raphoe vaiteh, tami kingkadi lah awm sak vaiteh, talai detpakhup vaiteh, hawvah kaawm e naw hai koung a kâkayei sak han. <sup>2</sup> Hattoteh taminaw koe kaawm e patetlah vaihma koe ao van han. San koe kaawm e patetlah a bawi koehai ao van han. Ka ran e koe kaawm e patetlah kâyawt e koehai ao han. Lai ka ba e koe kaawm e patetlah lai a ba pouh e koehai ao han. Apung ka poe e koe kaawm e patetlah apung kacate koehai ao han. <sup>3</sup> BAWIPA ni a dei dawkvah, talai teh hrawnghrang lah ao teh, lawp e lah ao han.

<sup>4</sup> Talai teh a cingou laihoi a kamyai. Talaivan hai a tha ayoun teh a kamyai. Talai tami kalentoenaw hai a tha ayoun awh. <sup>5</sup> Talai teh, ama dawk kaawm e taminaw e kâtapoenae, kâlawk ngaihoeahnae, a yungyoe lawkkam tapoenae dawkvah, a khin toe. <sup>6</sup> Hatdawkvah, hete thoebonae ni talai a payawp toe. Talai dawk kaawmnaw koe yon teh a pha toe. Hatdawkvah, talai dawk kaawm e naw teh, a kak awh teh, hoehoe a youn awh. <sup>7</sup> Misurtui a katha e teh a cingou. Misurkung hai a kamyai toe. Konawmnae hoi kaawm e pueng ni a cingou awh. <sup>8</sup> Tâbaw hoi panuiparing lawk hai kingdi toe. <sup>9</sup> La sak laihoi misurtui neinae awm hoehe toe. Yamu teh kanetnaw hanelah a kha pouh toe. <sup>10</sup> Paringparang lah kaawm e khopui teh a rawk toe. Apihai a kâen hoehe nahanelah im pueng teh khan lah ao. <sup>11</sup> Misurtui a takang toung dawkvah, lamnaw dawk a cingou awh. Lunghawinae kaawm e pueng teh kingdi toe. Talai lunghawinae teh pâlei lah ao toe. <sup>12</sup> Kho thung teh, kingdinae doeh kaawm toe. Kho longkha teh, peng raphoe lah ao. <sup>13</sup> Bangkongtetpawiteh, talai lungui, ramnaw thung dawkvah, olivekung kahuet toteh kaawm e patetlah thoseh, misurpaw khi toteh a paw racawng e patetlah thoseh ao han.

<sup>14</sup> A lawk hoe a cai sak awh teh, lunghawi laihoi la a sak awh. Kanîloumlah kaawm e naw ni BAWIPA taluenae teh a dei awh han. <sup>15</sup> Hatdawkvah, kanîtholah kaawmnaw ni BAWIPA lentoenae a poe awh han. Talai poutnae koe, tupui rai kaawm e naw ni, Isarelnaw e Jehovah Cathut teh lentoenae a poe awh han. <sup>16</sup> Kalan e Bawipa teh lentoe lawiseh, telah talai poutnae koehoi la sak lawk ka thai. Hatei, kai niteh, kai kaawm hoehe toe. Kai kaawm hoehe toe. Ka kahma toe. Bangkongtetpawiteh, yuemkamcu hoehe e naw ni yuemkamcu hoehe lah kho a sak awh. <sup>17</sup> Oe talai taminaw, taki ka tho e hoi tangkom hoi karap naw ni sut na pawp awh. <sup>18</sup> Taki ka tho e pawlawk dawk kayawngnaw teh tangkom thung a



bo awh han. Tangkom thung hoi bout katâcawtnaw teh tangkam dawk a kâman awh han. Kalvan longkhanaw paawng teh, talai dunaw hai a kâhuê han. <sup>19</sup> Talaipui teh khoeroe a kâbawng toe. Talaipui teh khoeroe a tip teh a rawk toe. Talaipui teh khoeroe a kâhuê toe. <sup>20</sup> Talaipui teh yamuhri patetlah dandan a rawp teh, lounkanghawi patetlah a kâhuê toe. A payonnae yon teh amae lathueng a ri poung dawkvah, a rawp han. Bout thaw thai mahoe toe.

<sup>21</sup> Hote hnin dawkvah, BAWIPA ni kalvan vah, ransabawinaw thoseh, talai van vah talai siangpahrangnaw thoseh, lawk a ceng han. <sup>22</sup> Ahnimanaw hah tangkom dawk hoi thongim ka bawt naw patetlah cungalak kamkhueng sak vaiteh, thongim thung a paung han. Hnin moikapap a loun torei, ahnimanaw teh lawkceng lah ao awh han. <sup>23</sup> Hathnukkhu thapa teh a minhmai mathout vaiteh, kanî hai yeirai a po han. Bangkongtetpawiteh, kalvan ransabawi ni Zion mon Jerusalem vah siangpahrang lah awh vaiteh, amae kacuenaw hmalah, a lentoe han.

## 25

### *Pholennae la*

<sup>1</sup> Oe Jehovah, nang teh kaie Cathut lah na o. Na bari vaiteh, na min ka pholen han. Bangkongtetpawiteh, nang ni kângairu hnouh hah na sak toe. Ayan e na pouknae teh, yuemkamcunae lahoi a cak awh. <sup>2</sup> Kho hah songnawng lah na coung sak teh, kacakpoung kho hah na tip sak. Ramlouknaw e imnaw teh kho lah awh hoe toe. Hotnaw hah nâtuê hai bout sak awh mahoe toe. <sup>3</sup> Hatdawkvah, athakaawme miphun teh, Bawipa nang na pholen awh han. Taki ka tho e miphunnaw e kho ni nang teh na taki awh han. <sup>4</sup> Bawipa nang teh mathoenaw e rapan, runae koe ka phat e vonhlamrincinaw hanelah kângue e, cakho a tho nah kâhatnae, khumbei um vah tâhlip lah na o. Bangkongtetpawiteh, taki ka tho naw e lungkhueknae teh, tapang kahmâng e cakho patetlah thoseh, <sup>5</sup> ramkenae koehoi e khumbei patetlah thoseh ao. Bawipa nang ni, ramlouknaw e pawrin teh na roum sak pouh. Tâmai tâhlip dawkhumbei a bet e patetlah taki ka thonaw e la sak lawk teh a kahma han. <sup>6</sup> Rasahu BAWIPA niyah, kahawipoung e ai kawi, cakawi naw hoi misur yamunaw hoi tami pueng hanelah, hete mon dawkhane pawipui a to pouh awh han. <sup>7</sup> Tami pueng ka ramuk e minhmai ramuknae hoi ram pueng ka ramuk e minhmai ramuknae hah, hete mon dawkhane Bawipa ni a takhoe han. <sup>8</sup> Duenae hah a yungyoe a payawp han toe. Bawipa Jehovah ni, tami pueng e minhmai dawkhane hoi mitphi hui pouh vaiteh, a taminaw ni a khang awh e pathoenae hah, talai van dawkhane hoi takhoe pouh han toe. Bangkongtetpawiteh, BAWIPA ni hottelah a dei. <sup>9</sup> Hat hnin vah, khenhaw! Hete Bawipa teh, maimouh rungngang hanelah, maimouh ni ngaihawi e maimae BAWIPA doeh. Bawipa e rungngangnae dawkvah, maimouh teh lunghaw awh sei, telah la a sak awh han.

### *Cathut ni Moab runae a poe han*

<sup>10</sup> Bangkongtetpawiteh, BAWIPA e a kut teh, hete mon dawkhane han. Cakong teh vaipuen tangdong dawkhane vitvit coungroe patetlah Moab ram teh Bawipa e khok rahim vah, vitvit coungroe lah ao han. <sup>11</sup> Tui ka kale e ni tui kale hanelah a kut a dâw e patetlah, Bawipa ni hote ram lungui vah a kut dâw vaiteh, hot ram e kâoupnae teh a thaonae kut hoi rahim lah a



pabo han. <sup>12</sup> Bawipa ni nange rapan koehoi kacakpounge ramvengim hah raphoe vaiteh, talai totouh a pabo dawkvah, vaiphu dawk a rawp han.

## 26

### *Cathut ni a taminaw tânae a poe*

<sup>1</sup> Hat hnin vah, Judah ram dawk hete la heh a sak awh han. Kaimouh koe kacakpounge kho ao. Rungngangnae rapannaw hoi kânguena na poe han. <sup>2</sup> Yuemkamcu e tamikalan miphun a kâen nahanelah, kho longkhanaw hah paawng awh haw. <sup>3</sup> BAWIPA ni ama kâuep ni teh a lung kathounge naw hah ka kuep e lungmawngnae thungvah, a khetyawt han. <sup>4</sup> BAWIPA hah poe kâuep awh. Bangkongtetpawiteh, Jehovah Cathut teh kangning e lungsong doeh. <sup>5</sup> Ahni teh, a rasangnae hmuén, ka talue e kho dawk kaawm e naw hah a pabo han. Hote kho hah a rahnoum sak han. Hote kho hah rahnoum sak vaiteh, vaiphu dawk a ta han. <sup>6</sup> Khok ni khopui a coungroe han. Mathoenaw e khok, a thakatawnnaw e khok ni a coungroe han.

### *Cathut lannae pholennae*

<sup>7</sup> Tami kalannaw e lamthung teh a lan. Oe kalan e BAWIPA, nama ni, tami kalannaw e lamthung hah na lan sak.

<sup>8</sup> Oe BAWIPA kaimouh teh, nange lawkcengnae lamthung dawk nang hah na ring awh. Na min hoi pahnimhoehnae teh, ka muitha ni a doun e lah ao.

<sup>9</sup> Tangmin vah ka muitha ni Bawipa nang na doun. Ka muitha ni ka thungvah, Bawipa nang na tawng. Bangkongtetpawiteh, talai daw lawkcengnae ao toteh, talaivan kaawm e naw ni lannae hah a kamtu awh han.

<sup>10</sup> Tamikathoutnaw teh, hawinae a hmu awh nakunghai, lannae kamtu thai awh hoeh. Ahni teh, lannae ram daw patenghai kathout hno hah a sak awh teh, BAWIPA e taluena hah banglahai ngai awh hoeh.

<sup>11</sup> Oe BAWIPA, na kut hah na dâw eiteh, ahnimouh ni hmawt awh hoeh. Na miphunnaw hanelah, na lung patawnae hah ahnimouh patue nateh yeirai phawt sak haw. Na tarannaw hoi kâkuen e hmai ni ahnimouh teh, kang naseh.

<sup>12</sup> Oe BAWIPA, nang ni kaimanaw hah lungmawngnae na poe han. Bangkongtetpawiteh, kaimouh hanelah nang ni na sak e seng doeh.

<sup>13</sup> Kaimae BAWIPA Cathut, nang hloilah alouke bawipanaw ni kaimouh teh na uk awh toe. Hatei, nange na min duengdoeh kaimouh ni ka pâkuem awh.

<sup>14</sup> Ahnimouh teh a due awh toe. Bout hring awh mahoe toe. Ka dout e lah ao awh dawkvah, thaw awh mahoe toe. Hatdawkvah, Bawipa, tho nateh, ahnimanaw hah raphoe nateh, bout pâkuem kawi pueng hah raphoe pouh haw.

<sup>15</sup> Bawipa nang ni, nama e miphun na pung sak toe. Oe BAWIPA nang ni nama e miphun na pung sak teh, lentoena na kamnue toe. Ramrinaw hai na pakaw toe.

<sup>16</sup> Oe BAWIPA, runae kâhmo toteh, nang koe ahnimouh teh a tho awh. Nang ni ahnimouh na yue toteh, a ratoum awh.

<sup>17</sup> Oe BAWIPA, camovawn e napui ni, camo khe hnin a hnai toteh, a pataw dawkvah a hram e patetlah kaimouh hai nange hmalah hot patetlah ka o awh.



<sup>18</sup> Kaimouh teh camo ka vawn awh niteh, patawnae puenghoi ka khang awh ei nakunghai, kahlî doeh ka khe awh. Kaimouh teh talai van vah, hloutnae hah ka tâcawt sak thai awh hoeh. Talaivan kaawm naw hai rawm awh hoeh.

<sup>19</sup> Bawipa nange tami kadout naw teh a hring awh han. Ahnimae tak teh a thaw awh han. Vaiphu dawk kaawm e naw, kâhlaw hoi thaw awh vaiteh, lunghawi la a sak awh han. Bangkongtetpawiteh, Bawipa nange tadamtui teh, angnae tadamtui patetlah ao teh, talai ni hai kadout e naw hah a khe han.

<sup>20</sup> Ka taminaw tho awh. Namamae rakhan thung kâen awh nateh, na hnuklah tho hah taren awh haw. A lungkhueknae a roum totouh, dongdeng kâhrawk awh.

<sup>21</sup> Bangkongtetpawiteh, BAWIPA ni talai van kaawm e naw hah, a yonae patetlah runae poe hanelah, ama onae koehoi a tâco. Hat toteh, talai ni amae van rabawk e thi hah a pâpho han. Talai dawk thei lah kaawm e naw hah bout ramuk thai mahoe toe.

## 27

### *Isarel ratangnae*

<sup>1</sup> Hote hnin dawkvah, BAWIPA ni kate niteh, kalen niteh, athakaawme tahloi hoi vi kathawn e tahrûn Leviathan, kâpoum e tahrûn Leviathan, tuipui dawk kaawm e khorui hah a thei han. <sup>2</sup> Hote hnin dawkvah, ngai kaawm e misur takha hah la lah sak awh haw. <sup>3</sup> BAWIPA teh hote takha kakhenkung lah ao. Kai ni hote takha hah atuhoitu tui ka awi. Apinihai runae a poe hoeh nahanelah karum khodai pout laipalah ka khetyawt. <sup>4</sup> Kai dawk lungkhueknae awh hoeh. Pâkhing hoi pâkhingkungnaw kaawm nakunghai, hotnaw koe ka kamthaw vaiteh, vaitalahoi hmai ka sawi han. <sup>5</sup> Hoehpawiteh, kaie khetyawtnae dawk tha kâlat nateh, kai hoi roumnae lat awh. Kai hoi roumnae lat awh naseh.

<sup>6</sup> Ka tho hane atueng dawk, Jakop miphun ni a tangpha a payang teh, Isarel miphun hai a pei pei vaiteh, ahnimouh ni talaivan pueng a paw hoi akawi sak awh han. <sup>7</sup> Ahnimouh ka rektap e naw hah a rektap e patetlah ahnimouh hai a rektap a maw. Ahnimouh ka thet e naw teh thei lah ao e patetlah ahnimouh hai thei e lah ao awh maw. <sup>8</sup> Bawipa ni a taminaw hah ramlouk lah bout bout ceisaknae lahoi runae a poe. Kanîtholae kahlî a tho toteh, amae a kâko hoi puenghoi ka tâcawt e kahlî hoi ahnimouh hah peng a takhoe. <sup>9</sup> Hatdawkvah, Jakop miphun teh, ahnimouh hno lahoi, amae yon hah a tha teh, thuengnae khuongroe talung kaawm e pueng hah talungpangaw patetlah rekrek a hem teh, Asherah khom hoi meikaphawknaw hah parawp toteh, hot hateh, amamouh yon takhoenae hoi ka kawi e a paw lah ao han.

<sup>10</sup> Bangkongtetpawiteh, kacaklah sak e kho teh, kingkadi e hmuen, kahrawng patetlah hnoun e hmuen lah ao han. Maitoca ni hote hmuen koe a pâ vaiteh, hote hmuen koe a i vaiteh, a dawn a kangnaw hah pekhli e patetlah ao sak han. <sup>11</sup> A kangnaw a ke toteh a khoe awh han. Napuinaw ni tho awh vaiteh, hmai a sawi awh han. Bangkongtetpawiteh, hete miphunnaw teh hmuthainae kaawm hoeh e naw lah ao awh. Hatdawkvah, ahnimouh kasakkung ni ahnimanaw teh pahren awh mahoe. Ahnimouh kacangkhaie ni ahnimouh koe hawinae sak pouh mahoe. <sup>12</sup> Oe Isarelnaw, hote hnin dawkvah, Euphrates palangpui koehoi Izip palang totouh, BAWIPA ni cakang hah hem vaiteh, nangmanaw ni buet touh hnukkhu



buetsa touh na rakhun awh han. <sup>13</sup> Hote hnin dawkvah, kalenpounge mongka hah a ueng awh han. Siria ram dawkhahmat e taminaw hoi, Izip lah pâlei e taminaw teh, bout tho vaiteh, Jerusalem kho, kathounge mon dawkvah, BAWIPA hah a bawkh awh han.

## 28

### *Ephraim hoi Jerusalem lawkcengnae*

<sup>1</sup> Ephraim yamuhrihaw e kâoupnae bawilakhung hai thoseh, misur meng kaparuinaw e talai kahawi monsom hoi kamyai thai e amamae lentoenae a pei hai thoseh, yawthoe lah ao. <sup>2</sup> Khenhaw! Bawipa koe athakaawme teh, roun, cakho patetlah thoseh, athakaawme tûili patetlah thoseh, amae kut hoi talai totouh a tâkhawng han. <sup>3</sup> Ephraim yamuhrihaw e kâoupnae bawilakhung teh kho rahim reprep counroe lah ao han. <sup>4</sup> Talai kahawi e monsom hoi kamyai thai e amamae lentoenae a pei teh kompaw hoehnahlan hmaloe kahmin e a paw patetlah ao han. Hote a paw ka hmawt e tami teh, amae kut dawkh a pha tahma he tang a ca han. <sup>5</sup> Hote hnin dawkvah, ransahu BAWIPA ni, kacawie a taminaw koe bawilennae lukhung, ka talue e bawilakhung lah ao han. <sup>6</sup> Lawkcengnae koe katahungnaw hanelah, lannae muitha lah ao vaiteh, tarannaw e longkha koehoi kabannaw hanelah, thaonae lah ao han.

### *Vaihma hoi profetnaw yamu a parui awh*

<sup>7</sup> Ahnimouh teh misur yamu kecu dawkh rawrawcawt awh vaiteh, yamu kecu dawkh a kamrit awh han. Vaihma hoi profetnaw teh rawrawcawt awh vaiteh, misur hoi hmoungti awh toe. Yamu kecu a kamrit awh toe. Vision hmuna koe a kamrit awh teh, lawkcengnae koe paletpalut lah ao awh. <sup>8</sup> Ahnimae canei paw pueng teh, hmuen houng laipalah palo hoi a kawi. <sup>9</sup> Ahnimouh ni, apimouh panuena ka cangkhai awh han va. Kamthang hah apimouh ka deicai pouh han va. Nene nueng pâphei e naw nama. Nene ka net lahun e naw nama. <sup>10</sup> Bangkongtetpawiteh, kâlawk van kâlawk, kâlawk van kâlawk, langri van langri, langri van langri, hitueng youn touh haw tueng youn touh lah bo ao vaw.

<sup>11</sup> Hatdawkvah, tamitavannaw e pahni hoi ramlouknaw e lawkh hoi hete miphunnaw koe ahni ni lawkh a dei han. <sup>12</sup> Lawkh a dei hane teh, het hateh, kâhatnae doeh. Ka tâwn e naw kâhat naseh, duem kâhat naseh, telah ahnimouh koe a dei pouh ei, ahnimouh ni thai ngai awh hoeh. <sup>13</sup> Hatdawkvah, ahnimouh teh a cei awh teh, hnuklah a rawp awh teh, a rawkphai awh teh, tangkam dawkh a kâman awh teh, man lah ao awh nahan, BAWIPA e kâlawk teh ahnimae van vah, kâlawk van kâlawk, kâlawk van kâlawk, langri van langri, langri van langri, hitueng youn touh haw tueng youn touh lah ao han.

### *Zion hanelah takinlung*

<sup>14</sup> Hatdawkvah, Jerusalem kho vah, hete miphunnaw ka uk niteh, ka dudam e naw, BAWIPA e a lawkh teh thai awh haw. <sup>15</sup> Bangkongtetpawiteh, nangmouh ni, kaimouh teh duena hoi lawkkam ka sak awh toe. Phuen hoi lawkkâcat awh toe. Lacik kathout a tho toteh, kaimouh koe tho mahoe. Bangkongtetpawiteh, Laithoe hah kâuepnae lah ao teh, dymyennae dawkh kâhro awh toe, telah na dei awh. <sup>16</sup> Hatdawkvah, Bawipa Jehovah ni, khenhaw! talung, tanouknaw talung, ka talue e a takinlung hah im du lah Zion mon dawkvah ka hruek toe. Ka yuem e



tami teh kalue tâsuenae awm mahoe. <sup>17</sup> Kai ni lannae hah bangnueae rui lah ka coung sak vaiteh, lannae hah bangnueae paw lah ka o sak han. Roun ni laithoe kâuepnae hah raphoe vaiteh, a kâhronae hmuen hai tui ni muen a khu han.

<sup>18</sup> Duenae hoi lawkkam na sak e teh a rawk han. Phuen hoi lawkkam na sak e hai kangcoung mahoe. Runae a pha toteh, nangmouh hah reprep na coungroe awh han. <sup>19</sup> Hote a cei toteh, nangmouh hai na ceikhai awh han. Hot teh amom buet touh hnukkhu amom buet touh a cei han. Kamthang na thai e ni karum khodai kaluekalapnae duengdoeh a tâcokhai han. <sup>20</sup> Bangkongtetpawiteh, ikhun teh ma cawng hoe hane totouh a duem, hni hai kâkhu thai hoe hanlah a thoung. <sup>21</sup> BAWIPA ni a thaw ka talue e thaw hah tawk hane hoi ouk a tawk e lah kaawm hoe e thaw hah tawk hanelah, Perazim mon daw k e patetlah a thaw sak han. Gibeon yawn daw k e patetlah a kâhlaw sak han.

<sup>22</sup> Atuvah nangmouh teh, dudamnae sak awh hanh. Hoehpawiteh, puenghoi yuenae na khang awh han. Bangkongtetpawiteh, ram pueng daw k rawknae hoi lawkcengnae hah ransahu Bawipa Jehovah koehoi thai awh toe.

### *Cathut lungangnae*

<sup>23</sup> Kaie ka lawk hah na hnâpakeng awh nateh thai awh haw. Ka lawk hah takuetluet thai awh haw. <sup>24</sup> Cati patue nahanelah laikaw k ka taw k e ni kanîruiroi talai a thawn maw. Talai hah patuenpatuen a pâpaw n teh a thawn maw. <sup>25</sup> A palat toteh, catun hoi catun hah patue laipalah ouk ao maw. Catun hah aruiroi lah a patue teh, catun hah a kawkkaw k lah patue laipalah ouk ao maw. <sup>26</sup> Bangkongtetpawiteh, ahni hah a cangkhai toe. A Cathut ni ahni hai a cangkhai toe. <sup>27</sup> Catun hah palatnae thingphek hoi kanaw k hoe. Catun hai lengkhok hoi palet sin hoe. Catun hoi catun hah bongpai hoi doe ouk hem. <sup>28</sup> Vaiyei lah sak hane catun hah ouk tip sak awh. Hatei, pou kanek hoe. Rangelang hah marang hoi a sawn sak eiteh, tip sak e nahoe. <sup>29</sup> Hethateh, ransahu BAWIPA koehoi doe a tho. BAWIPA teh pouknae poenae koe kângairu hanelah ao teh, a pouknae hai a len.

## 29

### *Jerusalem ni kâhmo e hno*

<sup>1</sup> Ariel kho, Ariel kho, Devit ni a tungpupnae kho a rawk toe. Kum touh hnukkhu kum touh pakawi awh. Pawinaw hah patuen patuen to awh. <sup>2</sup> Hatei, kai ni Ariel kho hah runae ka kâhmo sak han. Hote kho daw k khuikanae hoi cingounae ao han. Hote kho teh ka hmalah Ariel kho patetlah ao han. <sup>3</sup> Kai teh nangmouh petkâkalup lah ransanaw ka tungpup sak han. Ramvengimnaw hoi pet na kalup vaiteh, lampawpkhunaw hai ka tai han. <sup>4</sup> Nang teh rahnoum sak lah na o vaiteh, talai thung na deipan han. Rep na tabonae vaiphu thung hoi na lawk a tâco han. Na lawk teh kahrai lawk patetlah talai thung hoi a tâco han. Na lawk teh talai thung hoi paiyaicalah thai lah ao han. <sup>5</sup> Hatei, na tarannaw teh vaiphu patetlah ao awh vaiteh, kamathengnaw hai palek e cahik patetlah ao awh han. <sup>6</sup> Vaitalahoi pouk laipalah, ransahu BAWIPA ni khoparit lawk, tâli, puenghoi kacai e lawk, ka kang e hmaipalai naw sin vaiteh, nang koe pai hanelah a tho han. <sup>7</sup> Ariel kho ka tuk e ram pueng daw k e ransanaw, hote kho hoi hote kho hah ka tuk ni teh hote kho ka rektap e tami pueng teh,



mang patetlah tangmin e vision patetlah ao han. <sup>8</sup> A von ka hlam e ni bu ka ca toe telah a mang a sak eiteh, a kâhlaw toteh, a von toungloung a hlam e patetlah thoseh, tui kahran e ni hai, tui ka nei toe telah a mang a sak eiteh, a kâhlaw toteh tui toungloung a kahran e patetlah thoseh Zion mon ka tuk e ram pueng dawh e ransanaw teh ao awh han.

*Kâhruetcuetnae lawk apinihai banglahai ngâi awh hoeh*

<sup>9</sup> Hmoung tet awh nateh, hmoung ngam awh. Mit dawn awh nateh, hmawt laipalah awh awh. Misur net laipalah parui awh. Yamu net laipalah rawrawcu laihoi cet awh. <sup>10</sup> Bangkongtetpawiteh, BAWIPA ni inae hoi kâkuen e muitha hah nangmae lathueng a awi vaiteh, nangmae profet mitnaw hah tabuem vaiteh, na hmunae lûnaw hah a ramuk han.

<sup>11</sup> Nangmouh hanelah vision pueng teh, tacikkin e ca thung e lawklung-naw patetlah ao. Hot hah cakathoumnaw koe poe vaiteh, hete ca hah atu touk haw, telah na tetpawiteh, ahni ni, hete ca teh tacikkin lah ao dawkvah, kai ka touk thai hoeh, telah bout ati han. <sup>12</sup> Hahoi hote ca hah, ca kathoum hoeh e koe bout poe nateh, hete ca hah atu touk haw, telah na tetpawiteh, ahni ni, kai teh ca ka thoum hoeh bout ati han.

<sup>13</sup> Bawipa ni, hete miphunnaw ni pahni hoi kai koe rek na hnai awh teh, amamae pahni hoi kai hah na pholen awh. Ahnimae lungthin teh kai hoi a kâhla poung. Ahnimouh ni tami ni sak e kâlawk hoi kai hah na taki awh. <sup>14</sup> Hatdawkvah, khenhaw! Hete miphun koe kângairu hno buet touh hnukkhu buet touh hah puenghoi kângairu sak nahanelah, bout ka patue han rah. Ahnimouh thung e a lungkaangnaw e lungangnae teh a rawk han. Kathoumnaw e thoumnae hai a kahma han telah ati.

*Kadumyenkungnaw*

<sup>15</sup> BAWIPA ni panue hoeh nahanelah pouknae teh kadung poung lah a hro awh teh, amamae sakyoenae teh hmonae koe a sak awh teh, kaimouh hah apinimouh na hmu va, kaimouh hah apinimouh na panue va, telah ouk ka tet e taminaw teh a yawthoe awh. <sup>16</sup> Nangmouh ni palet lah na o sak awh toe. Hlaam ka bo e hah amhru patetlah pouk kawi na maw. Sak lah kaawm e ni kasakkung hanelah, ahni ni kai na sak e nahoe, telah ati kawi na maw. Sakyoe lah kaawm e hno ni, ka sakyoe hanelah, ahni teh banghai panuek hoeh, tai kawi na maw.

<sup>17</sup> Lebanon mon teh talai ahawi lawhmuen lah ao teh, talai kahawi e lawhmuen teh ratu lah ao nahan sica doeh a ngai toe. <sup>18</sup> Hatnae hnin dawkvah, hnâ ka thai hoeh e naw ni Cakathoung e lawk a thai awh han. Mitdawnnaw ni vuivainae hoi hmonae dawh hoi hlout awh vaiteh, mit a hmu awh han. <sup>19</sup> Lung kârahnnoum e naw teh, BAWIPA dawh lunghawinae hah a katha lah bout a hmu awh han. Ayâ rahak kamathoe e taminaw teh, Isarelnaw e kathoung Bawipa dawh a lunghawi awh han.

<sup>20</sup> Bangkongtetpawiteh, ka mathengpaan e tami teh kahmat vaiteh, ka dudam e tami teh a kahma han. <sup>21</sup> Yonnae sak hanelah a pawp teh, lawk lahoi tami buetbuet touh a yon sak teh, kho longkha koe ahni hanelah karap ka patung pouh e tami hoi yawmyin lah tami kalannaw e ham hah ka lawm e tami pueng teh, raphoe lah ao awh han. <sup>22</sup> Hatdawkvah, Abraham ka rungngang e BAWIPA ni, Jakop miphun hoi kâkuen lah, Jakop miphun teh a hnukkhu kayanae hoi minhmai mathoenae hai awh mahoe hoeh toe. <sup>23</sup> Ahnimouh ni kai ni ka sak e hno a hmu awh navah, kaie ka min hah amamae lungui vah a thounsak awh han. Jakop miphun e kathoung BAWIPA teh a thoung tet awh vaiteh, Isarel Cathut teh a taki awh han.

<sup>24</sup> Lam ka phen e naw ni thaipanueknae hoi kâkuen e muitha hah coe



awh vaiteh, lungminhoehnae hoi ka cingou e naw ni hai cangkhae nae lawk hah a dâw awh han telah ati.

## 30

### *Izip hoi lawkkam sak awh hanh.*

<sup>1</sup> BAWIPA ni a dei e teh, a lung ka patak e camonaw teh a yawthoe awh. Ahnimouh teh, kaie pouknae lah kaawm hoe e pouknae hah a tawksak awh. Kaie muitha laipalah, a kâhuiko awh teh, payonnae van payonnae a pakawi sin awh. <sup>2</sup> Ahnimouh teh, Faro siangpahrang e nguenae rahim vah, lungmawngnae a tawng awh teh, Izip ram kângue hanelah a tawng awh teh, kaie kâ het laipalah, Izip ram lah a cei awh. <sup>3</sup> Hatdawkvah, Faro siangpahrang e nguenae teh, nangmouh hane yeirai lah ao han. Izip ram kânguenae teh, minhmai mathoenae lah ao han. <sup>4</sup> Ahnimae bawinaw teh, Zoan kho vah ao awh teh, ahnimae laiceinaw teh, Hanes kho ka phat awh nakunghai, <sup>5</sup> cungkeinae awh hoe. Cawmpang han awh hoe. Hawinae awh hoe. Yeirai ponae hoi minhmai mathoenae dueng lah kaawm e taminaw kecu dawkvah, ahnimanaw pueng teh yeirai a po awh han.

<sup>6</sup> Akalae ram daw e saringnaw hanelah Bawipa ni a dei e teh; sendek la, sendektan, hrunthoe, hoi kamlang e hmai tahrinnaw apapnae runae hoi rucatnae ram hah ka raka niteh, hawinae kaawm hoe e miphun koe, la van vah amamae hnopainaw thoseh, kalauk van vah hnopainaw thoseh, a phu awh. <sup>7</sup> Izip ni kabawpnae teh cungkeihoeh, ayawmyin doeh.

### *Lawk ka ngaihoeh e miphun*

<sup>8</sup> Ka tho hane tueng daw, kapanuekkhaikung lah a yungyoe ao nahanlah, atu cet nateh, ahnimae hmalah a phen daw thun pouh nateh, cauk daw hai thun pouh. <sup>9</sup> Bangkongtetpawiteh, nangmouh teh ka taran e miphun, ka dумыen e canunaw, BAWIPA lawk ngai hanelah ka ngai hoe e capanaw lah ao awh. <sup>10</sup> Ahnimouh ni, vision ka hmawt naw koe vision hmawt awh hanh awh, profetnaw koe, katang e naw hah kaimouh koe dei awh hanh. Kaimouh koe hnâthai ka nawm e, lungthin kâdumnae naw ma hah na dei pouh awh. <sup>11</sup> Lamthung katang daw hoi kâkhoe awh. Lamthung daw hoi phen awh. Isarelnaw e kathounge BAWIPA teh, kaimae hmalah kahmat sak awh, telah a dei awh.

<sup>12</sup> Hatdawkvah, Isarel miphunnaw e kathounge BAWIPA ni a dei e teh, nangmouh ni hete lawk hah na hnoun awh teh, rektap hnephnapnae hoi kahuengkalang onae hah na kâuep awh teh, hotnaw hah na kâuep awh. <sup>13</sup> Hatdawkvah, hete payonnae teh, rak ka kâbawng niteh, cungkacoe kaawm e karasangpoung e kho rapan hoi a kâvan. Hote lawknae teh, pouk laipalah vaitalahoi a tho teh, <sup>14</sup> hlaamkabokung ni amae hlaam hah pasaina tawn laipalah, takhuen koe e hmaisaan la nahane hoi, tui duek nahane boehai awh laipalah a hem e patetlah ao han.

<sup>15</sup> Isarelnaw e kathounge ka Bawipa Jehovah ni hettelah a dei. Nangmouh teh pankângai laihoi duem na awh awh pawiteh, rungngang lah na o awh han. Nangmae thaonae teh duem na onae thung thoseh, yuemnae thung thoseh ao. Hateiteh, nangmouh ni na ngai awh hoe. <sup>16</sup> Nangmouh niteh, kaimouh teh hottelah kaawm awh hoe. Marang kâcui vaiteh, ka yawng awh han, telah na ti awh dawkvah, nangmouh teh na yawng awh han. Kaimouh teh, karang poung lah ka kâcui awh han na ti awh dawkvah, nangmouh na ka pâlei e teh a rang awh han. <sup>17</sup> Nangmouh ni monsom hoi mitnout khom patetlah thoseh, monsom e mitnout patetlah thoseh, na



o awh nahan, buet touh ni na pakhi pawiteh, 1,000 touh na yawng awh vaiteh, panga touh ni na pakhi awh pawiteh, thong hra touh na yawng awh han. <sup>18</sup> Hatei, BAWIPA ni nangmouh koe hawinae sak hanelah na ngaihaw i han. Lungmanae tawn hanelah, tawm lah ao han. Bangkongtetpawiteh, BAWIPA teh, lannae Cathut lah ao. Cathut Jehovah ka ngaihaw i e pueng teh, yawhawinae ao.

### *Cathut ni a taminaw yawhaw i a poe han*

<sup>19</sup> Oe Jerusalem vah kho ka sak e Zion khocanaw, nangmouh teh na khuikap awh mahoei toe. Nangmae hramki lawk Bawipa ni a thai toteh, nangmouh na pahren awh han. <sup>20</sup> BAWIPA ni nangmouh hah runae vaiyei hoi rektapnae tui na poe awh eiteh, nange kacangkhaikungnaw teh a hnukkhu bout kâhrawk awh mahoei toe. Amamae mit hoi amamae kacangkhaikungnaw hah a hmu awh han. <sup>21</sup> Nang teh avoilah na kamlang nah, hoehpawiteh, aranglah na kamlang nah, hetteh lamthung doeh, hete lamthung dawk dawn haw, telah na hnuk lahoi dei e lawk hah na thai han. <sup>22</sup> Hatdawkvah, tangka pukhluk e nange meikaphaw hoi, sui pukhluk e nange meikaphawknaw hah koug raphoe vaiteh, hotnaw pueng teh kakhin e napon patetlah takhoe vaiteh, cet leih, telah ti pouh awh han. <sup>23</sup> Bawipa ni, talai daw k nang ni na kahei e cati hanelah kho teh a rak sak han. Talai a pawhik daw hoi e vaiyei teh a pungdaw sak han. Hote hnin dawkvah, nange saringnaw teh, ka kaw e hmuen koe a hrampa awh han. <sup>24</sup> Talai daw k thaw ka taw k e maito hoi lanaw nihai, cuekkae hoi para hoi karue teh pãsei tangcoung e rawca dueng a ca awh han. <sup>25</sup> Imrasangnaw a tip awh teh, kalenpounge kâtheinae hnin navah, karasang e monnaw hoi, karasang e monrui kaawm e pueng daw k tui ka lawng e palangnaw ao han. <sup>26</sup> BAWIPA ni a taminaw e rawknae hah a pathoup pouh vaiteh, ama ni runae a poenae hmâ hah a kahma sak toteh, thapa e angnae teh kanî e angnae patetlah ao vaiteh, kanî e angnae hai hnin sari touh e angnae patetlah let sari touh a ang han.

### *Cathut ni Assiria runae a poe han*

<sup>27</sup> Khenhaw! BAWIPA e a min teh, ka kang e a lungkhueknae hoi kingkhamaw e hmaikhu naw hoi ahlanae koehoi a tho. Bawipa e a pahni teh, lungkhueknae hoi a kaw i teh, a lai teh kamtaw i e hmai patetlah ao. <sup>28</sup> Bawipa e a kâha haiyah, rawknae hoi ram pueng karue teh pãsei hane hoi lam ka phen sak e pahni moumrui hah taminaw e pahni daw k moun hanelah, lahuen totouh ka phat e sawkca palang patetlah ao han. <sup>29</sup> Pawitona e tangmin e patetlah sak hane la thoseh, Isarelnaw e talung lah kaawm e Cathut e mon koe vovit tum laihoi cei e patetlah lunghawinae lung hai thoseh nangmouh koe ao han.

<sup>30</sup> BAWIPA ni amae lentoe lawk hah na thai sak han. Puenghoi a lungkhueknae hoi hmaito hmaipalai thungvah, kho kanan e kho, kahli hoi roun hoi amae kut thasaina e hah na hmu sak han. <sup>31</sup> Bongpai hoi runae a poe toteh, Assirianaw teh BAWIPA e lawk daw k puenghoi a puen awh han. <sup>32</sup> BAWIPA ni ahnima e van vah a toung e sonron ni vaivai touh a hem e tangkuem teh, ratoung hoi tâbaw lawk hoi cungtaloh ao han. Taran tuknae koe kahek e senehmaica hoi ahnimanaw hah a tuk han. <sup>33</sup> Bangkongtetpawiteh, kahrawng lae naw teh, yampa hoi sut a rakueng toe. Atngcalah, hot hah siangpahrang hanelah a rakueng toe. Thing hoi hmai hoi pãeng nahanelah hmuen adungsak teh a pakaw toe. BAWIPA e a kâha teh, gan hmai palang patetlah a kamkai sak han.



## 31

*Cathut ni Jerusalem a ngue han*

<sup>1</sup> Kabawpnae coe nahanelah Izip ram lah cei teh, marangnaw kâuepkhai teh, taran tuknae rangleng moi ao dawk thoseh, athakaawme marangransanaw moikapap ao dawk thoseh, hotnaw hah kâuepkhai teh, Isarelnaw e kathounge Bawipa hah khen hoe. Bawipa Jehovah hah tawng laipalah kaawm e tami teh yawthoe lah ao awh. <sup>2</sup> Hatei, Bawipa nang teh, lungangnae ao dawkvah, ahnimouh koevah, runae a pha sak. Ama e lawk hah takhoe laipalah, tamikathoutnaw e avanglah hai thoseh, yonnae kasaknaw kabawm e naw koe lahai thoseh a thaw han. <sup>3</sup> Izipnaw teh Cathut nahoe, tami roeroe doeh. Ahnimae marang hai muitha nahoe, tak roeroe doeh. BAWIPA ni a kut hah a dâw toteh, ka bawm e tami teh kamthui vaiteh, kabawp e tami teh a rawp han. Ahnimouh pueng teh cungtalai rawknae koe a pha awh han. <sup>4</sup> Bangkongtetpawiteh, sendek hoehpawiteh, sendektanca ni amamouh ni a kei e moi dawk a huk navah, tukhounnaw ni hramki laihoi pâlei ei nakunghai a taki hoe e patetlah hrawang lawk dawk a kalue hoe e patetlah ransahu BAWIPA nihai, Zion mon dawk hote monrui dawkvah taran tuk hanelah, hot patetlah a kum han. <sup>5</sup> Tava ni a awt e patetlah Rasahu BAWIPA ni Jerusalem hah a ngue han. Ngue vaiteh a runngang han. Pasai vaiteh a runngang han.

<sup>6</sup> Oe Isarelnaw, nangmouh ni thouk na taran awh e Bawipa koe bout ban awh haw. <sup>7</sup> Bangkongtetpawiteh, hote hnin dawkvah, nangmouh hanelah, namamae kut hoi na thuk awh e namamae sui kutsak, hoi namamae ngun meikaphawk naw hah tami pueng ni a ceitakhai awh han. <sup>8</sup> Assiria tami ni hai, tongpa e tahloi nahoe e tahloi hoi a due han. Tami rumram e tahloi hoe e tahloi hoi thei lah ao han. Ahni teh tahloi dawk hoi hlout vaiteh, ahnie thoundounnaw teh, san lah ao awh han. <sup>9</sup> Ahni hai a taki dawkvah amae a rapanim hloilah ahlanae koe a yawng han. Khobawinaw ni mitnout hah a hmu awh toteh, a lung a pout awh han telah, Zion mon dawk hmai ka tawn niteh, Jerusalem vah takhuen ka tawn e BAWIPA ni ati.

## 32

*Kâhatnae siangpahrang*

<sup>1</sup> Khenhaw! Siangpahrang buet touh ni lannae hoi a uk han. A kut rahim e bawinaw ni hai lannae hoi a uk awh han. <sup>2</sup> Tami buet touh teh, kahli a tho nah kânguanae patetlah thoseh, thingyei yawn daw e palang patetlah thoseh, ngawt tawwnae koe lungsong e a tâhlip patetlah thoseh ao han. <sup>3</sup> Kahmawtnaw e mit kacaipanlah a hmu awh han. Ka thai e tami pueng ni hai a hnâ a pakeng awh han. <sup>4</sup> Lungtawtnae lung hoi ouk ka kâroe e ni hai a thaipanuek han. A lawk ka patak e ni hai kamcengcalah a dei thai hanelah coungkacoe ao. <sup>5</sup> Tamipathu hah ka talue e telah thoseh, a lai kathout kamhnawng e hah bari kaawm e tami telah thoseh, bout kaw mahoe toe. <sup>6</sup> Bangkongtetpawiteh, Cathut laipalah tawksak nahanelah, BAWIPA e kong hah laithoe lah dei nahanelah, vonhlamrincinaw e lungngai pakuep pouh laipalah paktha nahane hoi, tui kahran e hah tui pânei hoe nahanelah, tamipathu ni pathunae hah a dei teh, ahnie lungthin ni yonnae sak hanelah a pouk <sup>7</sup> A lai kathout kamhnawng naw hanelah senehmaica teh yonnae hah doeh. Mathoenaw e kâheinae teh thuem pawiteh, mathoenaw hah laithoe lahoi raphoe



nahanelah, ahni ni kathoute pouknae hah ouk a pouk. <sup>8</sup> Hatei, ka talue e taminaw niteh, ka talue e pouknae hah a pouk teh, ka talue e naw hah a kangduekhai. <sup>9</sup> Awpawp kaawm e napuinaw, thaw awh haw. Kaie lawk hah thai awh haw. Mahoima lungkayouk e napuinaw, ka lawk hah thai awh haw. <sup>10</sup> Mahoima lungkayouk e napuinaw, nangmouh teh hnin touh, kum touh thung na pâyaw awh han. Bangkongtetpawiteh, misurpaw khinae a pâpout awh han. A paw khinae tue phat mahoe. <sup>11</sup> Awpawp kaawm e napuinaw, taki hoi pâyaw awh haw. Mahoima lungkayouknaw, khohna rading teh, tawngtai lah o hnukkhu, buri hah kâyeng awh haw. <sup>12</sup> Talai kahawi laikawknaw hoi a paw kara e misurkung hanelah, lungtabue ratum awh. <sup>13</sup> Pâkhing tangdunnaw ni a yawngyen e ka taminaw e talai hane hoi kamthang e kho thung hoi lunghawinae hoi kakawi e im pueng hanelah a tho. <sup>14</sup> Siangpahrang im teh ceitakhai lah ao teh, tami alumnae kho teh hnoun lah ao toe. Imrasang hoi onae imnaw teh, sarang khu lah a yungyoe ao teh, la kacuetnaw hoi tunaw ni hrampanae hmuen lah ao han. <sup>15</sup> Kalvan hoi Muitha hah maimouh van a awi teh, ramke teh talai kahawi patue nahane kahawicalah a coung teh, talai kahawi lawhmuen teh ratu telah ti hnin totouh ao han. <sup>16</sup> Hattoteh lannae teh kahrawngum vah ao vaiteh, lannae teh talai kahawi lawhmuen dawk a yungyoe ao han. <sup>17</sup> Lannae ahawinae teh, lungmawngnae lah ao teh, lannae ni a thokhai e teh, a yungyoe rounnae hoi lungmawngnae lah doeh ao. <sup>18</sup> Ka taminaw hai rounnae hmuen, lungmawngnae hmuen hoi duem kâhatnae naw dawk ao awh han. <sup>19</sup> Hatei, ratu teh talai dawk rep a tabo teh, kho hai talai hoi sue touh lah a rawk toteh, rounnaw a bo han. <sup>20</sup> Tui onae hmuen pueng koe cati kahei vaiteh, maito e khok hoi la khok naw ka tha e nang teh na yawhawi awh.

## 33

### *Kabawp nahan ratounnae*

<sup>1</sup> Raphoenae kâhmo laipalah ouk ka raphoe e hoi dumnae kâhmo laipalah ouk ka dum e naw teh, a yawthoe awh. Nang ni na raphoe hnukkhu, nama hai raphoenae na kâhmo han. <sup>2</sup> Oe BAWIPA kaimouh hah na pahren haw. Kaimouh ni nang teh na ring awh. Amom karawitawi kaimae kut, runae kâhmo toteh kaimae rungngangkung lah awh haw. <sup>3</sup> Ransanaw e lawk kecu dawk taminaw teh a yawng awh. Bawipa nang na thaw toteh, miphunnaw teh koung a kâkaye awh. <sup>4</sup> Nangmae hnopainaw teh samtongnaw kamkhueng e patetlah lawp lah na o awh han. samtongnaw a kâtawm teh a cawkdawk awh e patetlah hotnaw e van vah a kâtawm awh vaiteh a yawng awh han.

<sup>5</sup> BAWIPA teh tawm lah ao. Bangkongtetpawiteh, a rasangnae hmuen koe ao teh, Zion kho hah kângingnae hoi lannae hoi a kawi sak. <sup>6</sup> Bawipa teh nange tueng dawk na caknae, rungngangnae hnopai, lungangnae hoi panuenaeh lah ao han.

<sup>7</sup> Khenhaw! Ahnimae ransanaw teh, lamthung dawkvah a hram awh. Lungmawngnae laiceinaw teh a khuika awh. <sup>8</sup> Lamthungnaw teh kingdi. Lamthung dawk kahlawng ka cet e awm hoe. Lawkkam hah a raphoe awh toe. Khonaw hai a hnoun awh toe. Tami hah banglahai ngâi awh hoe. <sup>9</sup> Ram teh a cingou teh, ayawmyin lah ao han. Lebanon kahrawng teh yeiraiponaeh hoi remke lah ao. Sharon hmuen teh kahrawngum



patetlah ao. Bashan hoi Karmel mon dawk e thingkungnaw teh peng a sarut han.

*Bawipa ni a tarannaw kâhructuetnae a poe*

<sup>10</sup> BAWIPA ni a dei e teh, atu kai ka thaw han. Atu kamahoima ka kâtaawm han. Atu kai teh tawm e lah ka o han. <sup>11</sup> Nangmouh teh, cahik na vawn awh vaiteh, cakong hah na khe awh han. Nangmae kâha teh, hmai lah ao teh, namamouh na kak awh han. <sup>12</sup> Taminaw ni thungtalung hah hmai a raawng e patetlah thoseh, pâkhingkungnaw a bouk teh hmai a phum e patetlah thoseh ao han. <sup>13</sup> Ahlanae koe e taminaw, kai ni ka sak e naw hah panuek awh haw. A hnainae koe e taminaw, kaie thaonae hah panuek awh haw.

<sup>14</sup> Zion kho e tamikayonnaw teh a taki awh. Cathut laipalah e taminaw teh, a tâlueng awh. Maimouh dawkvah, apimouh ka kang e hmai hoi kaawm thai han. Maimouh dawkvah, apimouh a yungyoe e hmai hoi kaawm thai han. <sup>15</sup> Kalan lah ka cet niteh, kalan lah ka dei e, rektapnae lahoi hmu e hnopai hah a panuet teh, tadawngghno hah dâw hane hlahk teh a kut kahek e, thi palawng hane pouknae hah tarawi hoeh nahanlah amae hnâ hah ka tabuem e, kathout hnnonaw khet hoeh nahanelah, a mit ka tabuem e, <sup>16</sup> hote tami teh a rasangnae koe a tahung han. Ahnie a kâuepnae teh, talungmon ramvengim lah ao han.

*Hmalah hane ngaihawinae*

<sup>17</sup> Na mit ni siangpahrang e meihawinae hah hmawt vaiteh, ahlanae koe e ram hai a hmu han. <sup>18</sup> Na lungthin ni taki ka tho e hah letlang a pouk toteh, ka parei e tami teh nâmouh ao va. Ka khing e tami teh nâmouh ao va. Imrasangnaw ka parei e tami teh nâmouh ao va. <sup>19</sup> Ka pathu e miphun, thai thai hoeh e lawk hah vaptivaptap lah ka pan niteh, panue thai hoeh e lawk ka pan e miphun hah na hmawt mahoe h toe. <sup>20</sup> Pawitonae kho Zion kho hah khenhaw! Khom buet touh boehai puen hoeh e, rui buet touh boehai ka pet hoeh e, kampuen thai hoeh e rim ti e, lungmawngnae im Jerusalem kho hah, nangmouh ni namamae mit hoi na hmu awh han. <sup>21</sup> Hote hmuen koe ka lentoe e BAWIPA teh, kakaw e palangnaw e hmuen lah ao han. hote hmuen koe tuisamlanae kaawm e long cet thai mahoe h. Atha kaawm e long hai cet thai mahoe h. <sup>22</sup> Bangkongtetpawiteh, BAWIPA teh maimae lawkcengkung lah ao. BAWIPA teh maimae kâlawnaw kapoekung lah ao. BAWIPA teh maimae siangpahrang lah ao teh, maimouh hah na rungngang han. <sup>23</sup> Nange long hninaw arui athawk teh, hote hnikhornaw hah kacaklah kawm thai hoeh, hni hai kadai thai hoeh. Hatnavah, hmu e hnnonaw hah kârei awh han. Khokkhemnaw ni patenghai lawp e hnnonaw hah bout a lawp awh han. <sup>24</sup> Haw kaawm e buet touh ni boehai, kai ka pataw, telah dei awh mahoe h. Hote hmuen koe kho ka sak e pueng teh, yon ngaithoum lah ao awh han.

## 34

*Cathut ni a tarannaw runae a poe*

<sup>1</sup> Oe! ramnaw, na thaithai awh nahanlah hnai awh haw. Oe! Miphunnaw, thai awh haw! Talai hoi talai daw k kaawm e hno puenghai thoseh, talai van hoi talai van thung kaawm e hno puenghai thoseh thai awh naseh. <sup>2</sup> BAWIPA teh miphun pueng koe a lungkhuek dawkvah, a lungphuenna e hue teh ahnima e ransabawinaw koe a pha. Ahnimanaw



hah raphoe vaiteh, theinae koe a poe han. <sup>3</sup> Ahnimouh thung hoi thei lah kaawm e ronaw hah alawilah tâkhawng dawkvah, hote ronaw daw k hoi a hmuikaw k teh, ahnimae thi hoi monnaw teh a kamyawt. <sup>4</sup> Kalvan e hnonaw puenghai a hmawn teh, kalvan teh cahna kalawng e patetlah kalawng lah ao. Hote kalvanlae hnonaw teh misur hna ka king e patetlah thoseh, thaibunglung daw k hoi a paw ka sarut e patetlah thoseh a sarut awh han.

<sup>5</sup> Bangkongtetpawiteh, kaie tahloi teh, kalvan vah pâsu vaiteh, Edom ram daw k thoseh, kai ni thoebo e taminaw lathueng lawkcengnae hoi a kum han. <sup>6</sup> BAWIPA e tahloi teh thi a boum toe. Athaw, tuca hoi hmaeca e thi, tutan e kuen thâwnae hoi thâw sak toe. Bangkongtetpawiteh, Bozrah kho daw k thuengnae paw i ao teh, Edom ram daw k puenghoi kâtheinae ao. <sup>7</sup> Sakraknaw teh ahnimouh hoi cungtalah a rawp awh han. Maitotancanaw teh maitotanpui hoi reirei a rawp awh han. Ahnimae talai teh thi a boum teh, ahnimae vaiphu hai athaw hoi akawi han. <sup>8</sup> Bangkongtetpawiteh, BAWIPA daw k runae poenae hnin, Zion kho hane kecu daw k moipathungnae kum lah ao.

<sup>9</sup> Hote ram thung e palang tuinaw teh kattaya patetlah thoseh, haw e vaiphu teh gan patetlah thoseh, a kâthung vaiteh, hote ram pueng teh hmai ka kang e kattaya lah ao han. <sup>10</sup> Karum khodai hmai roum mahoe h. Hote ram hmaikhu teh, pou a khu han. Hote ram teh miphun catoun totouh tami kingdi vaiteh, nâtuek hai hote ram hah tami ni raka boi mahoe h toe. <sup>11</sup> Mataw hoi kawrangnaw ni hote ram teh ao nah awh han. Bukbunaw hoi vonganaw hai hote ram daw k ao awh han. Hote ram daw k kâsanunae rui hoi hrawng hrang e bangnuenae a payang sin han. <sup>12</sup> Hote uknaeram daw k e bawinaw hoi kâkuen lah, hote ram hah ram doeh telah ka kaw e tami hote ram daw k awm mahoe h. Hote ram daw k e bawi kacue kanaw pueng teh ahrawng hrang lah ao awh han. <sup>13</sup> Ahnimae siangpahrang imnaw daw k pâk hingkungnaw hoi, ahnimae ramvengimnaw daw k pâk hing hoi benyetnaw a pâw han. Kahrawnguinaw hrampanae hmu en, tavakalauknaw onae hmu en lah ao han. <sup>14</sup> Ramke um e sarangnaw teh kahrawnguinaw hoi reirei ao han. Athanaw ni hai buet touh hoi buet touh law k a kâpan awh han. Hote hmu en koe karum lae tavanaw ni hai amamouh kâhatnae hmu en a pâphawng awh han. <sup>15</sup> Tahr un ni hai hote hmu en koe tabu tuk vaiteh, tadui tadui vaiteh, a ca a khe toteh, amae a tâh lip daw k a tabo sak han. Matawnaw nihai, hote hmu en koe kamkhueng awh vaiteh, buet touh hoi buet touh âvâ a kâyawng awh han. <sup>16</sup> BAWIPA e a Cakathoung hah khi n awh nateh, touk awh. Hotnaw thung daw k hoi buet touh boehai ceitakhai e awm mahoe h. Buet touh boehai hui tawn laipalah awm mahoe h. Bangkongtetpawiteh Bawipa e law k daw k hottelah ati. Bawipa e Muitha ni hai ahnimanaw hah a pâkhueng sak. <sup>17</sup> Bawipa ni ahnimouh hanelah cungpam a rayu teh, a kut hoi rui a payang teh, ahnimanaw hah a rei. Ahnimouh ni hote ram hah a yungyoe râw lah pang awh teh, miphun catoun totouh hote ram daw k ao awh han.

## 35

### *Man e naw bout a ban han*

<sup>1</sup> Ramke hoi ka ke e talai teh a lunghawi awh han. Ayawn hai a lunghawi vaiteh, a kamhlawng han. <sup>2</sup> Puenghoi kamhlawng vaiteh, lunghawinae hoi la saknae hoi a lunghawi awh han. Ahni ni Lebanon mon e bawilenna e hai



thoseh, Karmel mon hoi Sharon hmuén meihawinae hai thoseh, poe lah ao han. Ahni teh BAWIPA e lentoenae, maimae Cathut e bawilennae hah a hmu awh han. <sup>3</sup> Tha ka baw e kutnaw hah tha awm sak awh. Pouk ka ca e khokpakhu hah caksak awh. <sup>4</sup> Lung ka tâsue e naw na lung tha awm sak awh. Taket awh hanh awh telah tet awh. Khenhaw! Nangmae Cathut teh moipathungnae, Cathut e runae poenae hoi a tho han, nangmouh na rungngang han. <sup>5</sup> Hat toteh, mitdawnnaw ni mit bout hmawt awh vaiteh, hnâpangnaw ni hnâ bout a thai awh han. <sup>6</sup> Khokkhemnaw ni sayuk patetlah a doukcouk awh han. Lawkanaw ni hai la a sak awh han. Bangkongtetpawiteh, ramke um vah tui puk tâcawt vaiteh, thingyeiyawn dawk tui a lawng han. <sup>7</sup> Kâan poung e thingyei teh, tuikamuem lah ao awh han. Ka ke e talai teh tuiphuek lah ao han. Kahrawnguinae a inae lungpum yueng lah marangpho a paw han. <sup>8</sup> Hote hmuén koe lamthungpui awm vaiteh, thoungnae lamthung telah a phung awh han. Kathounghoehe naw teh, hote lamthung dawk dawn awh mahoehe. Hote lamthung teh, hote lamthung dawk ka dawn naw e lah ao teh, a pathu awh nakunghai lam phen a mahoehe toe. <sup>9</sup> Hote hmuén dawk bangpatet e sendek hai awm mahoehe. Ka matheng e sarang buet touh boehai hote lamthung dawk luen awh mahoehe. Ratang e naw ni duengdoeh hote lamthung teh a dawn awh han. <sup>10</sup> BAWIPA ni a ratang e naw teh bout tho awh vaiteh, la sak laihoi Zion kho dawk a kâen awh han. A yungyoe lunghawinae teh ahnimae lû dawk ao han. Ahnimouh teh lunghawinae hoi lungnawmnae tawn awh vaiteh, lungmathoenae hoi cingounae teh a yawng awh han toe.

## 36

### *Sennacherib ni Judah a tuk teh a lawp*

<sup>1</sup> Hezekiah siangpahrang a bawinae kum 14 nah Assiria siangpahrang Sennacherib ni Judah ram kacakpounge kho kaawm e pueng hah a tuk teh a lawp. <sup>2</sup> Hathnukkhu Assiria siangpahrang, Rabshakeh hah ransanaw moikapap hoi Lakhish kho hoi Hezekiah onae Jerusalem vah a patoun. Hote ransabawi a tho teh, kapâsukung e laikawt teng kaawm e lamthung lamtung e tuiim teng vah a kangdue. <sup>3</sup> Hat toteh, Hilkiah capa Eliakim, cakathutkung Shebna hoi Asaph capa Joab cayin kuenkung tinaw teh ahni koe a cei awh. <sup>4</sup> Rabshakeh ni ahnimouh koe a dei e teh, Hezekiah siangpahrang koe bout dei pouh awh. Ka lentoe e siangpahrang, Assiria siangpahrang ni nang teh bangpatet e kânguenae nama hettelah totouh na kâuep va. <sup>5</sup> Taran tuk thainae lamthung hoi tithainae kai koe ao na ti teh, ahrawnghrang lawk hah na dei. Kai taran hanelah apimouh na kâuep va. <sup>6</sup> Khenhaw! Nang teh lawtâkhoe e lungpum sonron tie Izip ram nahoehmaw na kâuep hah vaw. Hot ni teh ka kâuepnaw e kut hah a ruk pouh han. Hethateh, ama ka kâuep e naw pueng koe Izip siangpahrang Faro ni a kamnue sak e doeh.

<sup>7</sup> Nang ni, kaimae BAWIPA Cathut doeh ka kâuep awh na tetpawiteh, Hezekiah teh, hete thuengnae khuongroe hmalah duengdoeh a baw han, telah Judah khocanaw hoi Jerusalem khocanaw hah dei pouh nateh, hote Cathut e karasang hmuén puenghoi thuengnae khuongroe pueng hah a takhoe toe nahoehmaw. <sup>8</sup> Atu kaie bawipa Assiria siangpahrang hoi lawkkam sak leih. Nang ni marang ransâ kakhoutlah na ta thai e nah boi pawiteh, marang 2,000 touh na poe han. <sup>9</sup> Nang ni taran tuknae marangnaw hane hoi marangransanaw hanelah, Izip ram hah na kâuep nakunghai, kaie bawipa e a thaw katawnaw thung dawk



kathoungpounge patenghai bangtelamaw a tuk thai han vaw. <sup>10</sup> Hothloilah kai teh, BAWIPA e kâ laipalah hete ram raphoe hanelah ka tho hoeh. Hete ram heh BAWIPA ni raphoe loe telah kâi koe a dei toe telah ati telah atipouh.

<sup>11</sup> Hat toteh, Eliakim, Shebna, hoi Joab tinaw ni kaimouh ni ka thai thai awh nahanlah Aramaih lawk lahoi na dei pouh haw. Rapan daw kkaawmnaw ni a thai thai awh nahan, Judah lawk lahoi dei hanh loe telah Rabshakeh koe ati pouh awh. <sup>12</sup> Hatei, Rabshakeh ni, ka bawipa ni nangmouh hoi nangmae bawipa koe doeh hete lawk dei hanelah na patoun. Amamae ei ka cat niteh, amamae payungtui ka net e rapan daw kkaawm e naw koe dei hanelah nahoe atipouh.

<sup>13</sup> Hathnukkhu, Rabshakeh ni a kangdue teh Judah lawk lahoi kacai-pounglah hram laihoi a dei e teh, ka lentoe e Assyria siangpahrang ni a dei e lawk teh thai awh haw. <sup>14</sup> Siangpahrang ni hettelah a dei. Hezekiah ni nangmouh na dum hanh naseh. Bangkongtetpawiteh, ahnin ni nangmouh na rungngang thai mahoe.

<sup>15</sup> BAWIPA ni doeh na rungngang tih. Hete kho teh Assyria kut daw phat mahoe telah ati teh, nangmanaw hah BAWIPA na kâuep awh nahanlah kâ poe awh hanh. <sup>16</sup> Hezekiah e lawk hah ngâi awh hanh. Assyria siangpahrang ni a dei e teh, kai hoi cungtalal roumnae awm sak awh. Kai koe tho awh. <sup>17</sup> Ka tho vaiteh, nangmanaw hah, namamae ram hoi kâvan e, cai, tui, misurtui apapnae koe, vaiyei hoi misur takha apapnae koe na thak hoehroukrak, namamae misur paw lengkaleng cat awh nateh, namamae tuikhu tui hah lengkaleng net awh. <sup>18</sup> Hezekiah ni, BAWIPA ni maimouh na rungngang han doeh telah a dei e lahoi na dum awh nahanh seh. Ram pueng teh Assyria siangpahrang kut daw hoi amamae ram hah a rungngang awh maw. <sup>19</sup> Hamath ram hoi Arpad kho cathutnaw teh nâne. Ahnimouh ni Samaria ram hah ka kut daw hoi a rungngang awh maw. <sup>20</sup> Hete ram pueng e cathutnaw hlakvah, bangpatet e cathut maw amae ram hah ka kut daw hoi ka rungngang thai han. Jerusalem kho hah Jehovah ni ka kut daw hoi bangtelamaw a rungngang thai han telah a ti. <sup>21</sup> Hatei, ahni hah pato awh hanh awh telah siangpahrang ni ati dawkvah, apinihai pato laipalah lawkkamuem lah ao awh. <sup>22</sup> Hat toteh, Hilkiah capa siangpahrang im ka ring e Eliakim, cakathutkung Shebna, Asaph capa cungpam kakhoekung Joab tinaw teh, Hezekiah koe a cei awh teh, amamae khohna a phi awh teh, Rabshakeh ni dei e lawk hah ahni koe a dei pouh awh.

## 37

### *Hezekiah ni Isaiah koe kabawpnae a hei*

<sup>1</sup> Hezekiah siangpahrang ni hote lawk hah a thai toteh, amae angki a phi teh, buri a kâkhu teh, BAWIPA e im thung a kâen. <sup>2</sup> Hat toteh, buri ka kâkhu e im karingkung Eliakim, cakathutkung Shebna, hoi kacue e vaihmanaw hah Amoz capa profet Isaiah koe a patoun. <sup>3</sup> Ahnimouh ni, Hezekiah siangpahrang ni hettelah a dei, sahnin teh runae, yuenae, hoi yeiraiponae hnin doeh. Camo khe tue a pha navah, khe thai nahane tha awm hoeh. <sup>4</sup> Na BAWIPA kahring Cathut dudam hanelah, ahnima bawi lah kaawm e Assyria siangpahrang ni a patoun e Rabshakeh e lawk hah Jehovah na Cathut ni thai naseh. Na Cathut Jehovah ni a thai e lawk patetlah yue na lawiseh. Nang ni hai kacawiraenaw hanelah patuen ratoum loe ati pouh.



<sup>5</sup> Hezekiah e a sannaw teh Isaiah koe a pha awh toteh, <sup>6</sup> Isaiah ni, nangmae na bawipa koe hettelah dei pouh awh. BAWIPA ni Assyria siangpahrang e sannaw ni kai hah na dudam awh teh, na thai e lawknaw dawkvah taket hanh. <sup>7</sup> Kai ni ahni thung muitha buet touh ka thum pouh vaiteh, ahni ni kamthang buet touh a thai toteh, amamae ram koelah bout a ban han. Hathnukkhu, a ram thung e tahloi hoi ka due sak han ati telah a dei.

<sup>8</sup> Hathnukkhu Assyria siangpahrang teh Lakhish kho hoi a tâco toe tie Rabshakeh ni a thai teh a ban navah, siangpahrang ni Libnah kho a tuk e hah a hmu. <sup>9</sup> Atuvah Kush siangpahrang Tirhakah hoi kâkuen lah, ahni teh nang tuk hanelah a tho toe telah kamthang a thai. Hottelah kamthang a thai toteh, Hezekiah siangpahrang koe patounenaw a patoun teh, <sup>10</sup> nangmouh ni Judah siangpahrang Hezekiah koe hettelah na dei awh han. Jerusalem kho teh Assyria kut dawkh phat mahoe telah na kâuep e Cathut ni na dum hanh naseh. <sup>11</sup> Khenhaw! Assyria siangpahrangnaw ni khoram tangkuem a raphoe awh teh, hotnaw koe a sak e naw hah na thai toe. Ahni teh ka hlout na ou. <sup>12</sup> Ka mintoenaw ni a raphoe e miphun, Gozan, Haran, Rezep, Telassar kho kaawm e Eden miphunnaw hah ahnima cathutnaw ni a rungngang awh maw. <sup>13</sup> Hamath siangpahrang, Arpad siangpahrang, Sepharvaim kho e siangpahrang, Hena siangpahrang, Ivvah siangpahrang tinaw teh nâne ao awh telah lawk a thui.

### *Hlout nahanelah Hezekiah ratoumnae*

<sup>14</sup> Hezekiah siangpahrang ni patounenaw kut dawkh hoi ca hah a la teh a touk. Hahoi, BAWIPA e im dawkh a cei teh, BAWIPA hmalah ca hah a kadai. <sup>15</sup> Hatnavah, Hezekiah siangpahrang teh BAWIPA koe a ratoum. <sup>16</sup> Cherubim e lathueng vah ka tahung e Isarelnaw e Cathut, ransahu BAWIPA Cathut, nang teh talai uknaeram pueng lathueng vah buet touh dueng e Cathut lah na o. Nang ni kalvan hoi talai na sak. <sup>17</sup> Oe BAWIPA, na hnâpakeng nateh na thai pouh haw. Oe BAWIPA, na mit padai nateh khenhaw! Sennacherib siangpahrang ni kahring Cathut dudam hanelah a patoun teh a dei sak e lawknaw hah thai haw. <sup>18</sup> Oe BAWIPA, Assyria siangpahrangnaw ni miphunnaw hoi amamae ram naw hah kingkadi lah a ta teh, <sup>19</sup> ahnima cathutnaw hai hmai dawkh a phum pouh. Bangkongtetpawiteh, hotnaw teh cathut nahoe. Tami e kut hoi sak e thing hoi talung naw doeh. <sup>20</sup> Oe kaimae Cathut Jehovah, nang dueng doeh Cathut lah na kaawm tie hah, talai uknaeram pueng ni a panue awh nahanelah, hote siangpahrang kut dawkh hoi, kaimanaw hah a tu na rungngang haw telah a ratoum.

### *Sennacherib e rawpnae*

<sup>21</sup> Hattoteh Amos capa Isaiah ni Hezekiah koe a patoun teh, Isarelnaw e Cathut Jehovah ni hettelah a dei. Nang ni Assyria siangpahrang Sennacherib hoi kâkuen lah kai koe na ratoum toe. <sup>22</sup> Hote siangpahrang hoi kâkuen lah Cathut ni hete lawk hah a dei. Tanglakacuem Zion canu ni nang hah na noutna hoe hah na dudam toe. Jerusalem tangla ni na hnuk lahoi a lû a kahek toe. <sup>23</sup> Nang ni apimouh na dudam teh na pacekpahlek vaw. Nang ni apimouh na hram sin teh, na minhmai na moung sin. Isarelnaw e Kathounge koe hottelah na sak awh toe. <sup>24</sup> Na sannaw e kut hoi Cathut hah na dudam awh teh, kai teh ka tawn e ranglengnaw hoi monsom vah thoseh, Lebanon mon a poutnae koe thoseh, ka luen toe. Hawvah ka rasang poung e sidarkungnaw hoi kahawihloe e hmaicakungnaw hah ka



tâtueng toe. A rasangpounghae koe thoseh, a paw a thawnae ratu koe thoseh ka kâen toe. <sup>25</sup> Tuikhu ka tai teh tui ka nei toe. Ka khoktabei hoiyah Izip ram e palang kaawm e pueng kahak sak toe telah na dei. <sup>26</sup> Ayan hoi hetnaw heh kai ni sut ka pouk tangcoung toe tie na thai boihoe haw. Nang ni kacakpoung kho rapannaw hah na raphoe teh, songnawng kâpawppawm e lah na o sak nahanelah, atu ka sin e naw hah ayan hoi sut ka hmoun toe. <sup>27</sup> Atha ka baw e hote khocanaw teh, a lungpout laihoi yeirai a phu awh teh, kahrawng e phonaw patetlah thoseh, a len hoehnahlan tang kamyai e lempu e phokung patetlah thoseh, ao awh. <sup>28</sup> Na tahungnae, na ceinae, na thonae, na kâenna, na tâconae, koe na lungkhueknae naw hah ka panue. <sup>29</sup> Nang teh kai koe na lungkhuek dawkh thoseh, namahoima na kâuepnae hah ka hnâ koe a tho dawkh thoseh, kai sumhradang teh na hnawng dawkvah thoseh, kaie pahni mounnae teh na pahni dawkvah thoseh, ka mawp vaiteh, na thonae lam dawkh hoi na ban sak han.

<sup>30</sup> Nang hanelah mitnout teh hettelah ao. Takum dawkvah amahmawkh ka paw e naw thoseh, a kum pahni vah hot dawkh hoi ka pâw e naw hai thoseh na ka han. A kum pâthum vah, kahei nateh a awh. Misurnaw hah patue awh nateh, a paw hah cat awh. <sup>31</sup> Kacawie Judahnaw teh, a tangpha bout payang awh vaiteh, asawi lah a pâw a paw awh han. <sup>32</sup> Bangkongtetpawiteh, kacawie naw teh Jerusalem kho hoi thoseh, kahlout e naw teh Zion mon dawkh hoi thoseh, a tâco awh han. Cathut e a lungthonae teh hetenaw hah a sak han.

<sup>33</sup> Hatdawkvah, Cathut ni Assyria siangpahrang hoi kâkuen lah hettelah a dei. Ahni teh hete kho dawkh kâen mahoe. Hete hmuen koe pala hai ka mahoe. Bahling hoi hete kho hai hnai mahoe. Hete kho avanglah na tungpup awh mahoe. <sup>34</sup> Hete kho koe a thonae lam dawkh hoi a ban han. Hete kho thung kâen mahoe. Cathut ni a dei e teh, <sup>35</sup> Kai ni hete ka minhmai hoi ka san Devit e minhmai hah ka khet teh, hete kho rungang hanelah, hete kho hah ka ring han, telah a ti.

<sup>36</sup> Hat toteh, BAWIPA e kalvantami a tâco teh Assyria ransahu thung e tami 185,000 touh a thei. Amom toteh a thaw awh navah, ahnimanaw teh ro lah ao awh. <sup>37</sup> Assyria siangpahrang Sennacherib hai a tâco a ban teh, Nineveh kho dawkvah ao. <sup>38</sup> Hathnukkhu, ahni teh, amae cathut Nisroch Bawkim dawkh a bawkh lahun nah, ahnie capa Adrammelek hoi Sharezer tinaw ni tahloi hoi a thei awh. Hahoi teh, ahnimanaw teh Ararat mon lah a yawng awh. Hat toteh, capa Esarhaddon teh a na pa e hmuen dawkh a tahung.

## 38

### *Hezekiah patawnae hoi damnae*

<sup>1</sup> Hatnae hninnaw dawkvah, Hezekiah teh meimei kadout lah a pataw. Hatnavah, Amoz capa Isaiah ahni koe a tho teh, hettelah ati pouh: BAWIPA ni hettelah a dei. Nang teh na hring mahoe toe. Na due han tOUNg dawkvah, na imthungnaw hah lawk thui lawih, atipouh. <sup>2</sup> Hattoteh Hezekiah teh tapang koelah a kangvawi teh, BAWIPA koe, <sup>3</sup> Oe! BAWIPA, kai teh Bawipa na hmalah yuemkamcunae hoi ka lungthin abuemlah kho ka sak e hoi na hmalah hnokahawi ka sak e hah na pouk pouh haw, telah a ratoum. Hathnukkhu, Hezekiah siangpahrang teh puenghoi a khuika.

<sup>4</sup> Hahoi, BAWIPA e lawk teh Isaiah koe bout a tho teh, <sup>5</sup> nang teh Hezekiah siangpahrang koe cet nateh, na pa Devit e Cathut Jehovah ni hettelah a dei. Nange ratoum lawk teh ka thai toe. Nange mitphi hai ka



hmu toe. Nange hringnae dawk kum 15 touh ka thapsin han. <sup>6</sup> Nang hoi hete kho hah Assyria kut dawk hoi ka hlout sak han.

<sup>7</sup> Hethateh, BAWIPA ni ka sak roeroe han titeh lawk a kam e, nang hanelah BAWIPA e mitnoutnae doeh. <sup>8</sup> Khenhaw! Ahaz e kanísuimilam dawk a tâhlip lakhout hra touh hnuklah bout ka ban sak han ati. Ati e patetlah kaloum tangcoung e a tâhlip lakhout hra touh hnuklah bout a ban.

<sup>9</sup> Judah siangpahrang Hezekiah ni a patawnae koehoi bout a dam hnukkhu a thut e ca hateh, <sup>10</sup> muengmueng ka o navah, ka due han doeh toe. Kaawm rae hringnae ka coe hoeh toe telah ka ti. <sup>11</sup> BAWIPA teh ka hmawt mahoeu toe, kahringnaw onae koe BAWIPA teh ka hmawt mahoeu toe ka ti. <sup>12</sup> Tukhoumkung e rim patetlah kai ka onae im hah beng a sawn awh teh, yout a la awh toe. Hni ka kawng e ni a kalawng e patetlah kahringnae hah kalawng lah ao teh, hnikaungnae dawk hoi kai teh na takhoe han toe. Hnin touh hoi kai hah na poutsak awh han toe. <sup>13</sup> Kaie ka hrnaw hah sendek patetlah a khoe, kai teh amom ditouh duem ka o. Hnin touh hoi rum touh thung dawk kai teh poutnae koe na phakhai. <sup>14</sup> Pingpit patetlah kahram teh bakhu patetlah ka cingou. Kahlun lah ka khet boteh, ka mit a tha a tawn. Oe Bawipa, runae thouk ka kâhmo dawkvah, kai hanelah hloutnae amahkhan lah awm haw ka ti. <sup>15</sup> Bangtelamouh ka dei han toung. Bawipa ma ni na dei pouh e patetlah ama ni a sak toe. Ka muitha ni a khangnae dawkvah, kai teh paiyaica hoi doeh kahring nathung lam ka cei han toe. <sup>16</sup> Oe Bawipa, hot patet e hnonaw hoi doeh taminaw teh a hring awh. Hotnaw dawk doeh ka muitha teh a hring. Bawipa, nang ni kai hah na dam sak nateh, na hring sak haw. <sup>17</sup> Puenghoi ka khangnae teh, kai hanelah hawi nahane doeh. Bawipa nang ni na lungpataw dawkvah, rawknae koehoi na rasa toe. Bawipa, nang ni kaie yonnae pueng hah hnuk lah na tâkhawng pouh toe. <sup>18</sup> Bangkongtetpawiteh, phuen niteh, nang koe lunghawilawk dei thai hoeu. Tami kadout ni nang na pholen thai hoeu. Tangkom dawk ka bawt e ni nange yuemkamcunae hah ngaihawi thai hoeu. <sup>19</sup> Kahring e, kahring e ni dueng doeh, sahnin kai ni lunghawilawk ka dei e patetlah lunghawilawk a dei. Na pa ni canaw koe nange yuemkamcunae hah a cangkhai. <sup>20</sup> BAWIPA ni na rungrang han lah coungkacoe ao. Hatdawkvah, kahring nathung hnintangkuem vah, BAWIPA e im dawkvah, rui thueng e naw hah ka kueng han.

<sup>21</sup> Hathnukkhu, Isaiah ni, thaibunglung paw abuem hah sin awh nateh, a hmâ dawk ramuk pouh awh. Siangpahrang teh bet a dam han atipouh.

<sup>22</sup> Hezekiah siangpahrang nihai, BAWIPA e im dawk kai ka luen nahanelah bangpatet e mitnout maw kaawm telah a pacei.

## 39

### *Babilon ram hoi ka tho e laicei*

<sup>1</sup> Hatnae tueng navah, Babilon siangpahrang, Baladan capa Merodakbaladan ni Hezekiah siangpahrang teh damhoehnae koehoi bout a dam toe tie a thai navah, ca hoi poehno a sin sak teh laicei a patoun. <sup>2</sup> Hezekiah teh a lunghawi poung dawkvah, amae sui kuemnae hoi sui, ngun, hmuithui, aphu kaawm e satui, senehmaica hmouknae, hoi hnopai hmouknae dawk kaawm e hno pueng hote laiceinaw hah a patue. Ama e imthung e kaawm e hoi a ram thung e kaawm e naw hah a patue hoeu e awm hoeu. <sup>3</sup> Hat toteh, profet Isaiah ni, Hezekiah siangpahrang koe a cei teh, hete taminaw ni bangmaw a kâhei awh. Ahnimanaw heh nâhoi maw nang koe a tho awh



telah a pacei navah, Hezekiah siangpahrang ni, ahnimouh teh, ahlanae koe e ram Babilon hoi a tho awh, telah ati.

<sup>4</sup> Hathnukkuh, nange im thung e hno bangmaw ahnimouh ni a hmu awh toung, telah bout a pacei navah, im thung e hno pueng koug a hmu awh toe. Hno hmouknae thung hoi ka patue hoeh e hno banghai awm hoeh, bout atipouh.

<sup>5</sup> Hat toteh, Isaiah ni, ransahu BAWIPA e lawk hah thai haw. <sup>6</sup> Nange im thung kaawm e puenghoi, sahnin ditouh mintoenaw ni a hmouk awh e pueng hah, Babilon kho lah a phu awh nahane hnin teh ka phat han. Bang hno ca boehai cawi mahoe. BAWIPA ni ati. <sup>7</sup> Nang ni na khe e na canaw hoi na catounnaw hai koug hrawi awh vaiteh, ahnimouh teh, Babilon siangpahrang hanlah tuenlanaw lah ao awh han, telah Hezekiah koe a dei pouh. <sup>8</sup> Hezekiah ni, atangcalah kai dawk lungmawngnae hoi roumnae ao han doeh telah Isaiah koe atipouh navah, Isaiah ni, na dei e BAWIPA e lawk teh ahawi doeh telah atipouh.

## 40

### *Ngaihawinae lawk*

<sup>1</sup> Lungpahawi awh, ka taminaw hah lungpahawi awh haw, telah nangmae Cathut ni a ti. <sup>2</sup> Tarantuk thaw na tawknae tueng akuap toe. Nange yon hai ngaithoum toe telah Jerusalem kho koe lawkkanem lahoi dei awh nateh, oung pouh awh haw. <sup>3</sup> Ramke dawk Oung pouh e teh, BAWIPA e lamthung teh rasoun awh. Thingyeiyawn dawk maimae Cathut e lamkalen teh sak awh. <sup>4</sup> Ravo kaawm e pueng paten awh nateh, monnaw hah tanghling sak awh. Ukuk kacoum e lamthungnaw hah kanging sak nateh, duradiduradup e naw hah kâpi sak awh. <sup>5</sup> BAWIPA e bawilenna kamnuek vaiteh, tami pueng ni a hmu awh han. Bangkongtetpawiteh, BAWIPA ni a dei toe.

### *Cathut e lawk teh a kangning*

<sup>6</sup> Hote lawk ni hramkhai haw ati navah, kai ni bangmouh ka hramkhai han ka ti pouh navah, tami pueng teh phokung lah doeh ao. Ahnimae hawinae pueng hai kahrawng e a pei patetlah doeh ao. <sup>7</sup> BAWIPA e a kâha ni a kanawi toteh, phokungnaw teh a kamyai awh teh, a peinau hai a sarut awh. Atangcalah, taminaw teh phokung lah doeh ao awh. <sup>8</sup> Phokung teh a kamyai teh, a pei hai a sarut. Maimae Cathut lawk teh a yungyoe a kangning a ti. <sup>9</sup> Zion mon dawk kamthang kahawi kasinkung, ka rasang e mon dawk luen haw. Jerusalem vah kamthang kahawi kasinkung, puenghoi hramkhai haw. Taket hanh. Na Cathut hah khenhaw! telah Judah khonaw koe dei pouh haw. <sup>10</sup> Khenhaw! Bawipa Jehovah teh thaonae kut hoi tho vaiteh, amae kutbuembue ni ama hanelah a uk han. Ama e tawkpouh teh ama ni a thokhai han. Ama e kutphu hai a hmalah ao. <sup>11</sup> A tuhunaw hah tukhoumkung patetlah kawak vaiteh, tucanaw hah a kut hoi tawm vaiteh, a tawm han. A ca kanaw kaawm e tunaw hai paipayi hoi a hrawi han.

### *Isarel Cathut teh bang hoi hai bangta thai lah awm hoeh*

<sup>12</sup> Tuinaw hah amae kuttabei hoi ka bangnue e, kalvan hah a kut hoi ka pakhap thai e, talai van e vaiphunaw hah yawcu khingnae dawk ka hrueng thai e, monnaw hah yawcu hoi ka khing niteh, monruinaw hah khinglung hoi ka khing thai e teh api nama. <sup>13</sup> BAWIPA e Muitha hah apinimaw a bangnue thai han. Apimaw ama hoi kâpan niteh, ama hah



ka panuek sak. <sup>14</sup> Bawipa ni api hoi maw a kâpan teh, ahni ni Bawipa hah a thai panue sak thai vaw. Apinimaw Bawipa hah a cangkhai teh, lamthung hah a patue teh, a thai panuek nahanelah ka dei pouh vaw. <sup>15</sup> Miphunnaw teh sikrei dawh hoi padekca e patetlah ao teh, yawcu dawh e vaiphuca patetlah doeh ao. Khenhaw! Tuilumnaw teh, mungpoung e patetlah doeh ao. <sup>16</sup> Lebanon mon teh hmai patawi nahanelah khout hoeh. Hote mon dawh kaawm e moithangnaw hai hmaisawi thueng nahanelah khout hoeh. <sup>17</sup> Khoram pueng hai Bawipa e hmalah teh, banghai bang hoeh e patetlah ao teh, banghai bang hoeh e hlak hai a thoungca e patetlah ao awh teh, ahrawnghrang patet lahai ao awh. <sup>18</sup> Hatdawkvah, Cathut hah api hoi maw bangnue han. Bawipa hah bang hoi maw bangnue han. <sup>19</sup> Meikaphawknaw teh, kasakkung ni sui puk a hluk teh, ngundingyin hai ouk a sak pou awh. <sup>20</sup> Pasoumhno poe thai hoeh hane totouh, ka roedeng e tami niteh, kahmawn thai hoeh e thing hah a kârawi teh, kâroe thai hoeh e meikaphawh sak hanelah, kasakthaie naw hah ouk a tawng awh. <sup>21</sup> Na panuek awh hoeh maw. Apuengcue hoi nangmouh koe dei awh hoeh maw. Talai pek a pâw hoiyah na thaipanuek awh hoeh maw. <sup>22</sup> Talai kamhluem e van vah ka tahung niteh, talai van kaawm e taminaw teh awsi patetlah ao awh. <sup>23</sup> Ukkung bawinaw hah banghai bang hoeh lah a coung sak teh, talai lawkcengkungnaw hah ahrawnghrang lah a coung sak. <sup>24</sup> Atangcalah ahnimouh hah patue hoeh. Atangcalah ahnimae cati hai kahei hoeh. Atangcalah ahnimae khawngyang teh talai dawh kâung hoeh. Ahnimouh hah phohmu toteh ahnimouh teh, bongparui ni cahik patetlah a palek awh han. <sup>25</sup> Hottelah pawiteh, Kai teh api hoi maw a kâvan na ti awh han vaw telah kathoung Bawipa ni a ti. <sup>26</sup> Nangmae na mit naw hoi kahlun lah khenhaw. Hete hnonaw hah apinimaw a sak. Hote Bawipa ni teh hotnaw pueng hah koug a parei thai. A min lahoi koug a kaw thai. A thasai teh, bahu hoi a kawi dawkvah, buet touh boehai kahmat mahoe. <sup>27</sup> Ka ceinae lamthung teh BAWIPA ni a hro. Ka coe hane kawi hai Cathut ni banglahai ngâi hoeh telah Oe Jakop miphun ni bangkongmaw na dei awh. Oe Isarel miphun bangkongmaw na dei awh. <sup>28</sup> Na panuek hoeh maw. Na thai boihoeh maw. Jehovah teh a yungyoe kangning e Cathut, talai pout ditouh kasakkung Cathut lah ao. A tâwn tie awm hoeh. A patang tie awm hoeh. Bawipa e panuenae hoi thaipanueknae teh apinihai tawng thai hoeh. <sup>29</sup> Bawipa ni ka tâwn e naw hah tha a poe teh, tithainae ka tawn hoeh e naw hah tithainae a poe. <sup>30</sup> Nawsainaw teh a tâwn awh vaiteh, a tha a baw awh han. Camonaw hai kamthui awh vaiteh, a tâlaw awh han. <sup>31</sup> BAWIPA ka ngaihaw e naw teh, thaonae a katha hoi a kawi awh han. Matawnaw patetlah amamae rathei hoi kahlun lah a kamleng awh han. A yawng awh toteh patang awh mahoe. A ceio awh to hai tâwn awh mahoe.

## 41

### *Taket hanh, Kai teh nang koe ka o*

<sup>1</sup> Oe tuilumnaw, a hmalah sairasuep lah awm awh. Taminaw ni tha hoi bout kawi awh naseh. Rek hnai awh naseh, lawk dei awh naseh. Lawkcengnae koe kahnaicalah tho awh naseh. <sup>2</sup> Kanitholah hoi tami buet touh hah apinimaw a kangdue sak, apimaw lannae koe a khok rahim vah a kaw. Apinimaw a hmalah miphun hah a poe teh, siangpahrangnaw e lathueng vah lawk a ceng sak. Apinimaw vaiphu patetlah a tahloi koe a poe teh, cahik kahlî ni a palek e patetlah apinimaw licung koe a poe.



<sup>3</sup> Apinimaw ahnimanaw hah a pâlei teh, a khok hoi a coungroe boihoe e lam daw k hoi a yawngtahrei. <sup>4</sup> Apinimaw hete hnonaw hah a sak teh, miphunnaw hah a kamtawngnae koehoi a kaw vaw. Kai Jehovah, ahmaloe poung e hoi a hnukteng poung e koe kaawm e kasakkung teh kai doeh. <sup>5</sup> Tuilumnaw ni a hmu awh teh a taki awh. Talai poutnae naw teh a pâyaw awh. Rek a hnai awh teh, a kamkhueng awh. <sup>6</sup> A imri buet touh hoi buet touh a kâkabawp awh teh, tha kâlat nateh na taranhawi sak awh telah tha a kâpoe awh. <sup>7</sup> Kutsakkathoum e ni suihlunkathoum e hah tha a poe. Cakkin hoi ka pacai e nihai, sum ka dêi ni teh kahei ka pacawng e tami hanlah ahawi atipouh. Ahnimouh ni hote meikaphaw k hah a kâroe hoeh nahanlah sum hoi kacaklah a het awh. <sup>8</sup> Hatei, nang Isarel, ka san, kai ni na rawi e Jakop, ka hui Abraham e catoun, <sup>9</sup> Kai ni nang teh talai poutnae koehoi ka kut hoi na sawn teh, ahlapoungnae hmuen koehoi na kaw teh, nang teh kaie thaw ka taw k e lah na o. Kai ni nang teh na rawi toe. Kai ni nang teh na pahnawt hoeh. <sup>10</sup> Taket hanh. Kai teh nang hoi rei ka o. Na lungpuen hanh. Kai teh na Cathut lah ka o, tha na o sak han. Na kabawp han. Lawkkamcaknae aranglae ka kut hoi na tawm han. <sup>11</sup> Nang koe a lung ka khuek e naw teh, yeirapo awh vaiteh, minhmai a kaya awh han. <sup>12</sup> Nang na katuknaw hah na tawng hai na hmawt mahoe toe. Nang hoi taran ka tuk e naw teh ayawmyin patetlah ahrawnghrang patetlah ao awh han. <sup>13</sup> Bangkoktetpawiteh, nange Jehovah na Cathut ni nang hanelah, na lungpuen hanh, na kabawp han ati teh, nange aranglae kut hah a kuet. <sup>14</sup> Oe Tangraet Jakop, miphun kathoengcae Isarel, taket hanh. Kai ni na kabawp han. Nang karatangkung teh, Isarelnaw e kathounge Bawipa lah ao telah BAWIPA ni a ti. <sup>15</sup> Khenhaw! Cangkatinnae seh katha, kahran e, hâ ka tawn e lah na coungsak awh han. Monnaw hah katin vaiteh kâbawng sak han. Monruinaw hah cahik patetlah ao sak han. <sup>16</sup> Na hut awh vaiteh kahlî ni ahnimanaw hah a palek awh han. Cakho ni hai a palek awh han. Nang teh BAWIPA daw k na lunghawi han. Isarelnaw e kathounge Bawipa hah na lentoesak awh han. <sup>17</sup> Ka mathoe e hoi kavoutthoupnaw ni tui a tawng awh teh a hmu awh hoeh dawkvah, tui a kahran awh toteh, Kai BAWIPA ni ahnimouh hah ka pato han. Isarelnaw e Cathut Jehovah lah kaawm e Kai ni ahnimanaw hah ka pahnawt mahoe. <sup>18</sup> Arasangnae cailum hmuen koe palangnaw thoseh, ayawnnaw lungui vah tuiphueknaw thoseh, ka tâco sak han. Kahrawng thingyei hah tuikamuem lah ka coung sak vaiteh, ka ke e talai hah palang lah ka coung sak han. <sup>19</sup> Thingyei um vah sidar thing, anri thing, tuihan thing hoi olive thingnaw hah ka ung han. Kahrawngum dawkvah, hmaica thing, saipres thing, kongkang thingnaw hah ka pâw sak han. <sup>20</sup> Hettelah hoi BAWIPA e kut ni hete hnonaw hah a sak teh, Isarelnaw e kathounge Bawipa ni hotnaw a sak tie hah, hmawt awh vaiteh, panuek awh vaiteh, pouk awh vaiteh, a thaipanuek awh han doeh. <sup>21</sup> Nangmae hno ka tâcawt e hah pâpho awh haw telah BAWIPA ni ati. Kacake kapanuekkhaikung hah na patue awh haw telah Jakop miphun e siangpahrang ni a ti. <sup>22</sup> Ka tâcawt hane naw hah pâpho awh nateh, dei awh naseh. Ka pouk awh vaiteh, ka panue thai awh nahanelah, yampa e naw hah dei awh naseh. Hoehpawiteh, ka tâcawt hane naw hah kaimouh koe dei awh naseh. <sup>23</sup> Nangmouh teh cathutnaw lah na o awh e ka panue awh nahanelah, ka tâcawt hane naw hah dei awh haw. Kaimouh teh buet touh hoi buet touh kâkhet teh, ka taki awh nahan kahawi e hoehpawiteh, kahawihoehe hnonaw hah dei awh naseh. <sup>24</sup> Khenhaw! Nangmouh teh ayawmyin doeh toe. Nangmae



na tawksak awh e hai ahrawnghrang hlak a rahnoum. Nangmouh na ka rawi e teh panuet a tho. <sup>25</sup> Buet touh hah atung lahoi ka tâcosak vaiteh, ahni teh a tho han. Kanîtholah hoi buet touh a tho vaiteh, ahni ni ka min hah a kaw han. Hlaamkabokung ni amhru hah a katin e patetlah ahni ni bawinaw hah amhru patetlah a katin han. <sup>26</sup> Kaimouh ni ka panue awh nahan, bokheiyah sut ka ti awh nahan, ahmaloe hoi apinimaw a dei boi. Ka dei e awm hoe. Ka pâpho e awm hoe. Hothloilah nangmae lawk hah ka thai boi e buet touh hai awm hoe. <sup>27</sup> Kai teh Zion kho hah khenhaw! haw o ho hmaloe ka tet e lah ka o. Kamthang kahawi ka dei hane tami hai Jerusalem lah ka patoun. <sup>28</sup> Hatei, ka khet navah buet touh boehai awm hoe. Bout dei hanelah ahnimanaw hah ka pacei torei teh, ahnimouh thungvah, kâpankhaikung buet touh boehai awm hoe. <sup>29</sup> Khenhaw! Ahnimouh pueng teh dumpyennae buet touh duengdoeh kaawm. Ahnimouh ni a tawksaknae hai ayawmyin doeh. Ahnimouh ni a hlun awh e meikaphawk hai kahlî hrawnghrang lah doeh ao.

## 42

### *BAWIPA ni a san a rawi*

<sup>1</sup> Khenhaw! kai ni ka tawm e ka san, ka lungkuepkhai teh, ka rawi e san doeh. Ka Muitha hah ahni van ka patue han. Ahni ni lannae hah miphunnaw koe a thokhai han. <sup>2</sup> Ahni teh, hramki mahoe. Oung mahoe. Ahnie lawk hai lamthung dawk apinihai thai mahoe. <sup>3</sup> Coungroe e lungpum hah khoe hoe, hmai ka taw e hmaim hai padout hoe. Lannae hah yuemkancunae hoi a thokhai han. <sup>4</sup> Talaivan vah lannae phung a kangdue sak hoehroukrak, a thayoun mahoe, a lungpout mahoe. Ahlanae koe kaawmnaw ni hai ahnie kâlawk hah a ngaihaw awh han.

<sup>5</sup> Kalvan ka sak niteh, talai hoi talai thung kaawm e pueng ka sak e, talai van kaawm e naw hah kâha hai thoseh, talai van lam kacetnaw hah muitha hai thoseh, ka poe e, Cathut Jehovah ni a dei e teh, <sup>6</sup> kai teh Jehovah doeh. Kai ni nang hah lannae lahoi na kaw vaiteh, na kut daw k hoi na hrawi han. <sup>7</sup> Nang ni mit ka dawnnaw e mit na hmu sak thai nahane hoi, paung lah kaawm e naw hah thongim thung hoi thoseh, hmonae koe ka tahung e naw hah hmonae thongim thung hoi thoseh, rasa tâcokhai hanelah, taminaw hoi lawkkam e lah thoseh, miphunnaw hanelah angnae lah thoseh, nang hah kai ni na ta toe. <sup>8</sup> Kai teh Jehovah doeh. Hothateh, kaie ka min doeh. Kai bawilennae hah apihai thoseh, kai ni ka coe e pholennae hah meikaphawknaw hai thoseh, ka poe hoe. <sup>9</sup> Yampa e hnonaw teh a loum toe. A katha e hnonaw hah atu ka pâpho. Hotnaw a tâco hoehnahlan vah, nangmouh sut na thai sak.

### *BAWIPA pholennae la*

<sup>10</sup> Tui daw k ka cet kaawm e naw hoi ahlanae koe ramlouk lah kaawm e naw, BAWIPA koe la katha sak awh. Ahni hah talai apoutnae koehoi pholen awh. <sup>11</sup> Kahrawngum hoi hot thung e kho kaawm e pueng, hoi Kedar kho kaawm e taminaw pueng ni pholen awh naseh. Sela kaawm e naw pueng ni monsom vah hram laihoi lunghawi laihoi la sak awh naseh. <sup>12</sup> BAWIPA e bawilennae kamnue sak laihoi, tuilum apoutnae koe a lungmanae teh pholen awh. <sup>13</sup> BAWIPA teh athakaawme tami patetlah a tâco teh, ransa patetlah a taran ahawi. Tânae hoi a hram teh, a tarannaw hah a tâ.

### *BAWIPA kabawp lawkkamnae*



<sup>14</sup> Kai teh atueng kasawlah duem ka o. Kai teh duem ka o teh, ka taminaw hah ka pato hoeh. Atuteh, camo ka khe e napui patetlah kahram han. Hongho hongho kâha vaiteh, ngawt ka tawn han. <sup>15</sup> Monnaw hoi monruinaw ka raphoe han. Thingkung ramkungnaw puenghai ka ke sak han. Tuipuinaw hai tuilumnaw lah kacounsak vaiteh, talinaw pueng hai kahaksak han. <sup>16</sup> Mit kadawnnaw hah a panue awh hoeh e lam dawk hoi ka thak vaiteh, a panue awh hoeh e lamthung dawk lam ka patue han. Ahnimae hmalah hmonae hah angnae lah kacounsak han. Lamthung tangkomnaw hah, ka kânging sak han. Hetnaw hah ka sak vaiteh, ahnimaw hah ka hnoun mahoe. <sup>17</sup> Meikaphawk ka bawk awh niteh, meikaphawk hanelah, nang teh kaimae cathutnaw doeh katetenaw teh puenghoi kayak awh vaiteh, hnuklah a kamlang awh han.

### *Isarel naw ni panuek thai awh hoeh.*

<sup>18</sup> Hnâpangnaw thai awh haw. Mitdawnnaw, na hmu thai nahanelah khenhaw. <sup>19</sup> Kaie ka san hloilah apimouh a mit ka dawn va. Ka patoun e laiceinaw patetlah apimouh a hnâ ka pang va. Kaie ka hui patetlah apimouh a mit ka dawn va. BAWIPA e san patetlah apimouh a mit ka dawn va. <sup>20</sup> Ahni ni moikapap a hmu eiteh, kâhruecuet thai hoeh. A hnâkâko eiteh thai thai hoeh. <sup>21</sup> BAWIPA teh amae kâlawk rasangsak hane hoi a lentoesak hanelah, amae lannae dawk a lungyouk. <sup>22</sup> Hete miphun teh, tuk e hoi lawp e miphun lah doeh ao. Ahnimouh teh, tangkom dawk tangkam a kâman awh teh, thongim dawk hro e lah ao awh. Kahloutsakkung kaawm hoeh e lawp e lah ao awh. Tuk teh lawp lah ao awh navah, na poe leih telah ka tet hane awm hoeh. <sup>23</sup> Nangmouh thung dawk apinang mouh hete lawk hah na ka thai awh han va. Atu hoi hmalah te, apinang mouh na ka thai awh han. <sup>24</sup> Jakop teh tuk e hoi lawp e lah thoseh, Isarel hah kalawmkungnaw koe thoseh, apimouh ka hnawng va. Maimouh ni taran awh teh, ahni koe yonnae sak awh e BAWIPA ni nahoehmaw. Ahnimouh teh Bawipa e lamthung dawn awh hoeh. Bawipa e kâlawk hai tarawi awh hoeh. <sup>25</sup> Hatdawkvah, puenghoi a lungkhueknae teh, ahnimouh lathueng a rabawk teh, takikatho e tarankâtuknae hah ahnimouh koe a pha sak. Ahnimouh tenggam vah hmai a sawi. Hateiteh, panuek awh hoeh. Amamouh hoi amamouh a kak awh. Hatei, pâkuem awh hoeh.

## 43

### *Isarel ratangnae*

<sup>1</sup> Hatei, atuteh Oe Jakop nangmouh kasakkung hoi, Oe Isarel nangmouh kapâkhuengkung Jehovah ni telah ati, taket awh hanh, bangkongtet-pawiteh na ratang awh toe, na min lahoi na kaw awh teh kaie lah doeh na o awh toe. <sup>2</sup> Tui na raka awh nahaiyah nangmouh koe ka o vaiteh, tuipei na raka nahai na pâyawt awh mahoe. Hmai dawk na cei awh nakunghai na kang awh mahoe. Hmaipalai ni hai na kang awh mahoe. <sup>3</sup> Bangkongtetpawiteh, kai teh nangmae Jehovah na Cathut, Isarel Tami Kathoung, nangmouh ka rungngangkung doeh. Nangmouh ratang hanelah, Izipnaw koe na poe teh, Ethiopia hoi Sheba nangmae yueng lah ka poe. <sup>4</sup> Ka mithmu vah ka talue pounge lah na o awh teh, bari kawi e lah na o awh. Hatdawkvah, nangmouh na ban thai awh nahanelah tami na poe vaiteh, na hringnae kâthung nahanelah tamihu na poe han. <sup>5</sup> Taket awh hanh, nangmouh koe ka o, na catounnaw hah kanîtho koehoi ka thokhai vaiteh, kanîloumlah hoi ka pâkhueng han. <sup>6</sup> Atunglah pou thak



awh ka ti vaiteh, akalah katek awa hanh lawih telah ka ti pouh han. Ka capa hah ahlapoungnae koehoi thokhai awa, ka canu hah talai poutnae koehoi thokhai awa. <sup>7</sup> Ka min lahoi ka kaw e tami pueng hoi, ka lentoe nahanelah ka sak e tamipueng teh thokhai awa haw telah ka ti han. <sup>8</sup> Mit tawn eiteh mitdawnaw hoi hnâ tawn eiteh hnâpangaw kai koe thokhai awa. <sup>9</sup> Miphun pueng hoi tamimaya hmuen touh koe kamkueng awa naseh. Ahnimouh thung dawka apinimaw a pâpho thai teh, ayan e hno hah a hmu sak thai han. Lan sak lah o thai nahanelah, kapanuekkhaikung hah thokhai awa naseh. Telah hoea nakunghai hnâ hoi thai awa nateh, hethateh lawkkatang doeh tet awa naseh. <sup>10</sup> Na panue awa teh na yuem thai awa nahanelah, kai teh ahni doeh tie na panue thai awa nahanelah, nangmouh teh kapanuekkhaikung hoi ka rawi e ka sannaw doeh telah BAWIPA ni ati. Ka hmalah sak e thung dawka bangpatet e cathut hai awa hoea, ka hnuk lahai awa mahoea. <sup>11</sup> Kai teh Jehovah doeh. Kai laipateh rungngangkung alouke awa hoea. <sup>12</sup> Kama ni ka dei teh ka rungngang, na panue sak dawka nangmouh rahak cathut alouke roeroe awa hoea. Hatdawkvah, nangmouh teh kapanuekkhaikung lah na o awa telah BAWIPA ni ati. Kai teh Cathut doeh. <sup>13</sup> Ahnintha ao hoeahlan kai teh ahni doeh. Ka kut dawka hoi ka rungngang thaikung apihai awa hoea. Ka sak hnukkhu apinimaw a rakhout thai han. <sup>14</sup> Isarelhaw e Kathoung Poung, nangmouh karatangkung BAWIPA ni telah a dei, nangmouh kecu dawka Babilon kho dawka ransa ka patoun, hottelah abuemlah hoi Khaldean taminaw, a lunghawinae long dawka kayawngaw a ceikhai e patetlah na ceikhai awa. <sup>15</sup> Kai teh, Jehovah, nangmae Tami Kathoung, Isarel kasakkung, nangmae siangpahrang doeh. <sup>16</sup> Tuipui dawka lamthung ka sak niteh, athakaawme tuinaw dawka lamthung ka sak e, <sup>17</sup> athakaawme tami, rangleng hoi marangaw ka cetkhai niteh, bout thaw thai hoea nahanelah karawmsakkung, hmaiim padue e patetlah karoumsakkung BAWIPA ni hettelah a dei, <sup>18</sup> hnuk lae naw bout pouk hanh lawih, ayan e naw na lungthin dawka tat awa hanh leih. <sup>19</sup> Thai awa haw, hno katha ka sak han. Atu roeroe kamnue han. Nangmouh ni na panue katang han. Ramke lam ka sak vaiteh, thingeyiawn dawka tui ka lawng sak han. <sup>20</sup> Kahrawng e sarang, kahrawnguinae, hoi kalaukva ni kai na bari han. Bangkongtetpawiteh, ka rawi e taminaw ni a nei awa hane ramke vah tui ka poe teh thingeyiawn dawka tui ka lawng sak. <sup>21</sup> Kama hanelah ka pâkhueng e taminaw ni ka pholennae a kamnue sak awa han.

### *Yuemkamcu hoea e Isarelhaw*

<sup>22</sup> Hateiteh Oe Jakop, nangmouh ni na kaw awa hoea. Oe Isarel, nangmouh ni kai na hmawtcei awa. <sup>23</sup> Hmaisawi thuengnae tu hah kai koe na thokhai awa hoea. Thuengnae lahoi kai na pholen awa hoea. Hnopoena lahoi hnori na phawt sak boihoea. Hmuitui hoi nangmanaw tha na tawn sak boihoea. <sup>24</sup> Hmuitui kacinge hah tangka hoi na ran pouh boihoea, thuengnae sathei thaw hoi kai ka lung na kuep sak boihoea. Yonnae phu phu hanelah thaw letlang na tawka sak, lam vah thoesaknae lahoi kai letlang na tawn sak awa. <sup>25</sup> Kai kama roeroe ni doeh kama hanelah nangmae kâ na tapoena naw na takhoe pouh. Nangmae yonnae ka pouk mahoea toe. <sup>26</sup> Na kapanuekkhaikung, pouk awa haw sei. Na lan awa nahanelah, na lawka dei awa haw. <sup>27</sup> Hmaloe e na pa ni, yon a sak teh, laiceinaw ni kâtapoe laihoi kai na taran awa. <sup>28</sup> Hatdawkvah, hmuen kathoung koe e kacuenaw, kakhin sak han, Jakop hah thoebo hanelah ka poe vaiteh, Isarelhaw pacekpahlekae khang hanelah ka pahnawt toe.



## 44

*Isarel naw koe Cathut yawhawinae*

<sup>1</sup> Atuteh, ka san Jakop, ka rawi e Isarel thai haw. <sup>2</sup> Nangmouh na kasakkung, von thung hoi na kasakkung, nangmouh kabawmkung lah kaawm e Jehovah ni hettelah a dei, Oe Jakop, ka san, kai ni na rawi e Jeshurun, taket hanh. <sup>3</sup> Bangkongtetpawiteh, tui kahrannaw koe tui ka awi han. Talai kaphui daw k palangpui ka lawng sak han. Na catounnaw koe muiha ka awi vaiteh, na canaw koe yawhawinae ka poe han. <sup>4</sup> Hot patetlah, ahnimouh teh tui teng ka pâw e sumpathing patetlah a dawn han. <sup>5</sup> Tami buet touh ni BAWIPA e tami doeh telah alouke ni Jakop min a kâphung han. Alouke ni Jakop e tami telah a kut daw k thun awh vaiteh, Isarel min teh amamae miphun min lah a hno awh han. <sup>6</sup> Isarel naw e siangpahrang Jehovah ni karatangkung ransahu BAWIPA ni hettelah a dei, kai teh ahmaloe e lah ka o teh a hnukteng e lah ka o. Kai laipalah teh Cathut alouke roeroe awm hoeh. <sup>7</sup> Ayan e taminaw kai ni ka kangdue sak hnin hoi kai ni ka sak e patetlah apimaw ouk ka pâpho. Hot patetlah, pâpho sak haw. Kai hanlah kaawm lahun e hno kaawm han rae hno heh kai koe kamphawng sak naseh. <sup>8</sup> Taket awh hanh, puen hai puen awh hanh. Hmaloe vah nangmouh koe ka dei teh na panue sak awh toe. Kai hloilah Cathut ao maw. Oe, lungsong alouke roeroe awm hoeh. Buet touh boehai ao tie ka panuek hoeh.

*Meikaphawk baw k e teh pathunae doeh*

<sup>9</sup> Meikaphawk kasaknaw teh, abuemlah hoi hno han kamcu hoeh e naw doeh. A sungren sak awh eiteh, banglahai tho hoeh. Kaimouh teh ka hmawt thai awh hoeh, ka panuek thai awh hoeh tie kayanae hah amamouh ni a pâpho awh. <sup>10</sup> Apinimaw cathut a sak. Apinimaw banglah ka tho hoeh e meikaphawk hah a sak. <sup>11</sup> Khenhaw! a huiko pueng ni a kaya awh han. Thaw katawkkungnaw hai tami kahring doeh. Abuemlah hoi kamkhueng nateh kangdout awh naseh. Taket awh vaiteh yeirai a po awh han. <sup>12</sup> Sum ka dêi ni cakâ ouk a dêi. Hmaisaan daw k a phum teh a kut tha kâsanguekhah teh, cakkin hoi a dêi. A vonhlam toteh a tha ouk a tawn. Tui a nei hoeh toteh tui a kahrân. <sup>13</sup> Lettama ni rui a payang teh cacung hoi a ruen. Lettama hnopai hoi a sak hnukkhu imvan ao thai nahanlah kompa hoi a thut teh, tami mei hoi a kâvan nahanelah tami hoi mei kâvan lah a sak. <sup>14</sup> Sidar thing a tâtueng awh teh, hmaica thing hoi saipres thing a la awh teh, ratu daw k e thing buet touh teh a ham lah o nahanlah a cak sak. Sidar thing a ung awh teh khotui ni a rounng sak. <sup>15</sup> Hathnukkhu hoi teh, tami hane thing lah doeh a tho toe. Thing lah a bet awh teh, hmai a kamben awh. Hmai a bet awh teh vaiyei lai a pâeng awh, cathut lah a sak awh teh a baw k awh. Hote thing hah meikaphawk lah a sak awh teh, hot hah tabo laihoi a baw k awh. <sup>16</sup> Hote thing hah a tangawn hmai a bet awh, a tangawn moi thawng nahanlah a hno awh, moi a pâeng awh teh kaboumlah a ca awh. Hmai a kamben awh teh huthutbet toe ati awh teh, hmai hai ka hmu toe ati awh. <sup>17</sup> Ka cawi e hai a la awh teh, cathutkaphawk lah a sak awh. Hote meikaphawk hmalah a tabo awh teh a baw k awh. Ahni koe a ratoun awh, na rungngang haw, bangdawkmaw kaie cathut nahoehmaw, atipouh awh. <sup>18</sup> Panuek awh hoeh ni teh thaipanuek awh hoeh. Bangkongtetpawiteh, a hmu thai hoeh nahan a mit a tabuem pouh teh, a thai thai hoeh nahan a lungthin khik a khan pouh. <sup>19</sup> Hahoi apinihai pouk thai awh hoeh, panuek thai awh hoeh. Atangawn teh hmai a bet



awh teh, hmaisaan dawk vaiyei hai a pâeng aw, moi hai a pâeng aw  
 teh a ca aw. Ka cawi rae naw teh panuetho e lah maw ao han toung.  
 Thingtalong hah tabo laihoi baw, han na maw tie ka panuek e hoi ka  
 thaipanuek e khoeroe awm hoeh bo toung aw. <sup>20</sup> Hraha hoi kâkaw  
 teh dumyennae lungthin hoi lam a payon aw toe. Hatdawkvah a hringnae  
 hah rungngang thai hoeh. Aranglae kut daw, hai laithoe ao tie panuek  
 thai aw hoeh.

### *Isarel teh pahnim hoeh*

<sup>21</sup> Oe Jakop, hote hnonaw teh pahnim hanh. Isarel hai pahnim hanh.  
 Nangmouh teh kaie ka san doeh. Kai ni na sak e ka san doeh. Oe  
 Isarel, nang teh ka pahnim e lah na awm mahoe. <sup>22</sup> Kâtapoenae hateh,  
 kathapoung e tâmai kâhin e patetlah ka kâhin sak han. Kai koe bout ban  
 aw lei, kai ni yo na ratang aw toe. <sup>23</sup> Oe kalvannaw lungawi hoi  
 la sak aw. BAWIPA ni a sak toe. Nangmouh talai taminaw hram aw  
 haw. Monnaw, ratunaw hoi thingkungnaw hram nateh la sak aw haw.  
 Bangkongtetpawiteh, BAWIPA ni Jakop teh a ratang toe. Isarelnaw lah a  
 lentreneae a kamnue toe.

### *Judah bout thawng han*

<sup>24</sup> Nang karatangkung BAWIPA, vonthung na ka sak e ni hettelah a dei,  
 Kai neh Jehovah hnonaw pueng kasakkung, kalvannaw haiyah madueng  
 lahoi ka sak niteh, kama dueng lahoi talai kapakawkung doeh. <sup>25</sup> Kai  
 ni a lai kathoutnaw e mitnoutnaw hai ka raphoe pouh. Khueyuenaw  
 hai ka pathu sak, a lungkaangnaw kamlang sak teh, a panuenae pathu  
 lah kacoungsakkung. <sup>26</sup> Kai ni ka sannaw e lawk hah ka caksak teh, ka  
 patouenaw ni a dei e patetlah ouk ka sak. Jerusalem kho hanelah nang  
 teh tami onae lah na o han telah thoseh, Judah kho hah sak lah na o han,  
 ka rawk e naw hah pathoup lah ao han telah thoseh ka dei. <sup>27</sup> Talipui hai  
 tui hak seh, nange palangnaw pueng ka hak sak han telah thoseh, <sup>28</sup> Sairas  
 siangpahrang hanelah nang teh kaie tukhoumkung doeh, kai ni ka ngai e  
 pueng na kuep sak vaiteh, Jerusalem kho pathoup seh, Bawkim adu ung  
 seh telah thoseh ka dei.

## 45

### *Sairas Cathut e hnopai*

<sup>1</sup> BAWIPA ni satui a awi e Sairas mipun hah a hmalah tabut sak  
 hane hoi, siangpahrangnaw e taisawm rading sak hane hoi, a hmalah tho  
 paawng sak hane hoi, kalupnae longkha khan hoeh nahanelah, aranglae  
 kut hoi ka man e koevah hettelah a dei. <sup>2</sup> Kai ni na hmalah ka cei vaiteh,  
 kânging hoeh e hah ka kânging sak han. Rahum longkha hah be ka raphoe  
 vaiteh, tarennae thing hai be ka bouk han. <sup>3</sup> BAWIPA min ka kaw e Isarel  
 Cathut lah ka o e hah na panue thai nahan, khohmo thung e râw hah  
 na poe vaiteh, hro e hnopai hah na poe han. <sup>4</sup> Bangkongtetpawiteh, ka  
 san Jakop hoi ka rawi e Isarelnaw kecu daw, ka min lahoi na kaw e a  
 tho. Kai na panuek aw hoeh eiteh min na phung aw. <sup>5</sup> Kai teh Jehovah  
 doeh, alouke khoeroe awm hoeh. Kai hoeh laipateh Cathut alouke roeroe  
 awm hoeh. <sup>6</sup> Kai hloilah alouke khoeroe awm hoeh tie hah kanîtho koehoi  
 kanîloum totouh a panue thai aw nahan, na panue aw hoeh nakunghai,  
 na keng na yeng pouh han. Kai teh Jehovah doeh alouke khoeroe awm  
 hoeh. <sup>7</sup> Angnae ka sak teh hmonae ka o sak, roumnae ka o sak, yawthoenae  
 hai ka o sak, hete hnopueng ka sak e BAWIPA kai doeh. <sup>8</sup> Kalvannaw



lathueng lahoi khorak sak haw, Tâmainaw lannae kho awi haw. Talai kamawng nateh rungngangnae hoi lannae paw awh naseh. Kai Jehovah ni hottelah ka o sak. <sup>9</sup> Ama kasakkung ka taran e teh a yawkathout e lah ao. Talai hlaam thung daw k e hlaam rumram e ni, kasakkung koe bangpatet e lah maw na sak atipouh han maw. Hoehpawiteh, na kut ni a sak thai e banghai na thoun e awm hoeh ati han na maw. <sup>10</sup> A na pa koe bangpatet e maw na khe, a manu koe bangpatet e maw na vawn, ka tet e tami teh a yawthoe. <sup>11</sup> Isarelnaw e Jehovah, Kathoung e ni a dei e teh, ka tho hane hno hah kai koe het haw. Ka capanaw e kong hoi ka thaw taw k e kong daw kâ na poe awh haw. <sup>12</sup> Talai ka sak teh avan kaawm e tami ka sak. Ka kut hoi kalvan ka phai teh ransahu hah kâ ka poe. <sup>13</sup> Ama teh lannae hoi ka kangdue sak teh, a lamthungnaw hah kalan sak han. Ka khopui hah a kangdue sak han. Thongim paung e ka taminaw hah apu laipalah, tawkpau hai patho laipalah, cetsak naseh telah ransahu BAWIPA ni a ti.

### *BAWIPA amadueng rungngangkung*

<sup>14</sup> BAWIPA ni hottelah a dei, Izipnaw patetlah thawtawkkung hoi Ethiopia hno kayawtnaw hoi Sabeana w ka rasang poung e naw hah nangmouh koe a tho awh vaiteh, na hnukkâbang e lah ao awh han. Sumrui pâkhi laihoi a tho awh han. Hottelah tabo nalaihoi barinae na poe awh han. Cathut teh nangmouh koe ao katang doeh. Alouklah khoeroe awm hoeh. Cathut alouke khoeroe awm hoeh telah nangmouh koe kâheinae a sak awh han. <sup>15</sup> Oe Isarel Cathut, rungngangkung ama lungpouk lahoi kâhrawk e Cathut roeroe doeh. <sup>16</sup> Yeirai po hoi ao awh han, abuemlah kayanae hoi ao awh han. Meikaphawk kasaknaw hah pouknae awm laipalah rei a cei awh han. <sup>17</sup> Isarelnaw hah yungyoe hloutnae hoi BAWIPA ni a rungngang han. A yungyoe hoi a yungyoe totouh poutnae awm laipalah kayayeirai awm mahoe h toe. <sup>18</sup> Kalvan kasakkung BAWIPA ni ama teh Cathut, talai hai kasakkung lah ao. Ama ni talai hah a cak sak. Banglahai ka tho hoeh lah sak hoeh, tami o nahanelah a sak e doeh. Hottelah a dei, kai teh BAWIPA lah ka o, alouke khoeroe awm hoeh. <sup>19</sup> Arulah hoi hmonae daw k lawk ka dei boi hoeh. Ka rawi e Jakop miphun koe na tawng awh ka tet pouh boi hoeh. Kai BAWIPA ni lannae lawk ka dei teh, kalan e lawk hah ouk ka dei. <sup>20</sup> Kamkhueng awh nateh tho awh haw. Miphun ka kuep reknaw daw k hoi ka hlout e naw, cungtalah na hnai awh haw. Thing meikaphawk kasaknaw, tami ka rungngang thai hoeh e, cathut koe ouk karatoumnaw ni panuena roeroe tawn awh hoeh. <sup>21</sup> Dei pouh awh. Tâcawt sak haw. Pouknae kâpoe awh naseh. Ayan hoi apinimaw a panue sak, apinimaw a dei pouh boi. Kai BAWIPA ni ka sak e nahoe h maw. Kai laipalah Cathut alouke roeroe awm hoeh. Kalan e hoi rungngangkung Cathut lah ka o. Kai hoeh laipateh alouke roeroe awm hoeh. <sup>22</sup> Talai pout totouh kaawm e pueng hah khenhaw! rungngang e lah awm hoeh. Bangkongtetpawiteh, kai teh Cathut lah ka o, alouke khoeroe awm hoeh. <sup>23</sup> Khokpakhu hoi tami pueng ni ka hmalah a cuengkhuem awh han. Talai tami pueng ni ka hmalah thoe a kâbo awh hoi lawk a kam awh han. Lawk teh lannae hoi ka pahni daw k hoi a tâco vaiteh ban mahoe h toe. <sup>24</sup> BAWIPA daw k dueng lannae hoi thaonae ao telah a dei awh han. Ama koe a tho awh vaiteh, ama koe a lung kakuep hoeh e pueng teh yeirai a po awh han. <sup>25</sup> Isarel ca catounnaw pueng BAWIPA daw k lannae lah o awh vaiteh, BAWIPA teh a bawilenna e lah ao han telah a ti.



## 46

*Kadout e meikaphawk hoi ka hring Cathut*

<sup>1</sup> Bel ni a lô a saling teh, Nebo a kârahnoum sak. Ahnimae meikaphawk-naw teh, a khok pali touh e saring e van doeh a hung awh. Na phu rumram hanelah doeh sak e lah ao teh, saringnaw ni nget ka tâwn lah a phu awh.

<sup>2</sup> A kârahnoum awh teh, rei a rawp awh. Amamae hnokari kârungngang thai awh hoeh. Amamanaw san lah letlang a ceikhai awh.

<sup>3</sup> Oe Jakop imthungnaw ka lawk thai awh haw. Ka cawi rae imthungnaw, pek na khe hoi vonthung na o na hoi doeh kai ni na tawm toe.

<sup>4</sup> Na matawng totouh hai na sam a po ditouh, kai teh hot patetlah e tami lah ka o teh, nangmanaw na tawm awh han, na sak awh e patetlah na ring awh vaiteh, na rungngang awh han.

<sup>5</sup> Nangmouh ni api hoi maw na mei na kâla sak awh han. Api hoi maw na kâvan sak awh teh, api hoi maw na bangnue awh han.

<sup>6</sup> Yawngya thung hoi sui moikapap rasa e patetlah ngun hai yawcu dawk a khing, sum kahlun e koe meikaphawk lah na sak sak awh teh, na tabo sin awh teh na bawk awh.

<sup>7</sup> A loung dawk a hrawm awh teh, a ceikhai awh teh, amae hmuen dawk ouk a pâhung awh. Pou a kangdue teh, a onae hmuen koehoi kampuen mahoei toe. A kaw awh nakunghai lawk dei pouh thai mahoei. A rucatnae koehoi hai rungngang thai mahoei.

<sup>8</sup> Oe lawk kaeknaw, hethet pahnim awh hanh. Tongpa katang lah awm awh nateh, bout pouk awh.

<sup>9</sup> Ayan e hno hah pahnim hanh awh. Bangkongtetpawiteh, Kai teh na Cathut lah ka o teh, kai hloilah Cathut alouke awm hoeh. Kai hoi kâvan e awm hoeh.

<sup>10</sup> Kamtawngnae koehoi apout totouh thoseh, ayan hoi kaawm rah boihoei e hnouaw thoseh, ka dei teh ka pouknae a kuep han, ka ngai e pueng be ka sak han telah a ti.

<sup>11</sup> Kanitholah hoi e ka matheng e tava, ahlanae hmuen koehoi ka pouk e hah ka kaw, yo ka dei e patetlah ka sak han.

<sup>12</sup> Lannae hoi ahla poungnae koe kaawmnaw ka lawk thai awh haw.

<sup>13</sup> Kahnaicalah lannae ka thokhai han. Ahla poungnae koe kaawm mahoei. Rungngangnae, lungmanae nihai, na ring mahoei. Zion vah rungngangnae ka ta vaiteh, ka bawilennae Isarel hanelah ka hruek han.

## 47

*Babilon yeiraponae*

<sup>1</sup> Oe Babilon canu tanglakacuem, kum nateh vaiphu dawk tahung haw. Oe Khaldean canu, bawitungkhung dawk laipalah, talai dawk tahung haw. Bangkongtetpawiteh, kanem e hoi kanaw e telah bout dei awh mahoei toe.

<sup>2</sup> Sum hah lat nateh, cakang hah phawm haw. Minhmai ramuk hah hawng haw. Angkidung hah rading haw. Na hna hah na phai totouh kalim nateh, palang raka haw.

<sup>3</sup> Nang teh, caici lah na o han, Yeirai na po han. Moi ka pathung vaiteh, aphihi ka pasai mahoei.

<sup>4</sup> Maimouh na karatangkung min teh, ransahu BAWIPA, Isarelnaw e kathounge Cathut tie doeh.

<sup>5</sup> Oe Khaldean canu, duem tahung nateh, hmone koe kâenh. Bangkongtetpawiteh, nang teh Napui e uknaeram teh lah na kaw mahoei toe.



<sup>6</sup> Ka taminaw koe ka lungkhuek dawkvah, ka râw hah ka khin sak teh na kut dawk na poe. Nang ni na lungma hoeh. Katawngnaw koe hnokari na phu sak.

<sup>7</sup> Kai teh siangpahrang lah pou ka o han telah na pouk dawkvah, hete hnônaw hah na pouk hoeh. Nang dawk a hnukteng ka phat hane hai bout na panuek hoeh.

<sup>8</sup> Hatdawkvah, hringnawmnae dueng ka tawng niteh, pamda laihoi kaawm e, ma imthung dawk kai doeh toe, kai hoi kâvan e apihai awm hoeh. Lahmainu lah kaawm mahoe. Camo duenae ka khang mahoe ka tet e, atu thaw haw.

<sup>9</sup> Hete hno kahni touh: camo duenae hoi lahmainu lah onae ni hnin hni touh, tawkkadek dawk na tho sin han. Na onae hoi na kâringnae teh kapap nakunghai hotnaw teh nang koe puenghoi a tho han.

<sup>10</sup> Bangtelamaw tetpawiteh, na hawihoeahnae hah na kâuep teh, apinihai na hmawt hoeh na la ti. Na lungangnae hoi na panuenae ni na dûm teh, kai doeh toe, kai hloilah alouke awm hoeh toe telah na lungthung hoi na ti.

<sup>11</sup> Hatdawkvah, nang koe thoenae teh a tho han. Nâhoi maw, a tho tie hah na panuek mahoe. Yawthoenae ni na tho sin vaiteh, hot teh na kahmat sak thai mahoe. Na panue thai hoeh e rawknae hah nang koe vaitalahoi a tho han.

<sup>12</sup> Na nawca hoi na taw koe e na kâringnae hoi taânsinnae naw hah kangdoutkhai ka lawnh. Hawinae hmu hai na hmu yawkaw han, tâ hai na tâ yawkaw han doeh.

<sup>13</sup> Nang teh, kâpankhaikung apap kecu dawk ngawt na tâwn toe khe. Atuvah asikhetkathoumnaw hoi âsi karadounghaw, thapa khet lahoi ka dei thai e naw teh nang dawk ka tho hane hno dawk hoi kangdout awh naseh. Nang hah atu na rungngang naseh.

<sup>14</sup> Khenhaw! ahnimanaw teh, caphon patetlah ao awh, hmaisawi lah ao awh han. Hmai ka kang e dawk hoi na rungngang thai awh mahoe. Ka bet sak e hmaisaa awm hoeh, kamben hane hmai awm mahoe.

<sup>15</sup> Hot patetlah na taw koe e hno teh nang hanlah ao han. Na naw nah hoi na pâtung e hnônaw hah amamae lam daw koungha kâva vaiteh, apinihai na rungngang thai mahoe.

## 48

### *Isarel ni Cathut bawilennae a kamnue sak*

<sup>1</sup> Oe Jakop imthung, Isarel telah min kaw e lah kaawm e, Judah tuikhu thung hoi ka lawng e Jehovah e min lahoi thoebo e, yuemkamcu hoeh e, a lawk hoi kamcu hoeh lah, Isarel Cathut min ka pholen e, ka lawk thai haw.

<sup>2</sup> Kathounge khopui taminaw telah amamouh a min a kâphung awh teh, ransahu BAWIPA lah kaawm e, Isarel Cathut kakânguenaw, ka lawk thai awh haw.

<sup>3</sup> Ka awm tangcoung e hnônaw hah, nangmouh koe ka dei toe. Ka pahni daw koe hoi ka tâco sak teh, na thaisak awh toe. Tang ka sak dawkvah a kuep awh.

<sup>4</sup> Bangkongtetpawiteh, a lung ka patak e tami lah na o awh teh, na lahuen teh sumtaboung doeh. Na tampa teh rahum tampa doeh tie yo ka panue toe.

<sup>5</sup> Ayan hoi doeh nangmouh koe ka dei toe. Hno a pha hoehnahlan na panue sak toe. Hatdawkvah, nang ni kaie meikaphawk teh na sak toe. Kai



ni ka sakhlawn e meikaphawk, ka hlun e meikaphawk ni, hete hno a sak e doeh na ti payon awh han.

<sup>6</sup> Na panue awh toe. Hetnaw pueng heh khenhaw! namamouh ni na dei awh mahoe h maw. Atu hoi teh hno katha na panue awh boihoe e, ka panuek e lah na o awh han.

<sup>7</sup> Hotnaw teh atu doeh sak e lah ao. Sut la sak e nahoe h. Nangmouh ni sahnin totouh na thai awh hoe h. Hatdawkvah, nangmouh ni yo la ka thai awh toe na te payon awh vaih.

<sup>8</sup> Na panuek roeroe awh hoe h. Na thai boi awh hoe h. Ayan hoi na hnâkâko awh hoe h. Bangkongtetpawiteh, nang teh yuem na kamcu hoe h. Vonthung hoi patenghai nang teh, kâlawk na ka tapoe e telah kaw e lah na o tie ka panue toe.

<sup>9</sup> Koung na raphoe awh hoe h nahanelah, ka min kecu dawk ka lungkhueknae teh, ka panguep han. Oup e lah ka o nahanelah, nangmouh dawk ka panguep han.

<sup>10</sup> Khenhaw! na thoung sak awh toe. Hatei, ngun sôlêi e patetlah nahoe h. Rucatnae tahmanghmai hoi na tanouk awh han.

<sup>11</sup> Kama hanelah kai ni na sak han rah. Ka min teh bangkong a mathoe han. Bawilenna e teh tami alouke koe ka poe mahoe h.

### *Cathut ni Isarel kawnae*

<sup>12</sup> Oe Jakop hoi ka kaw e Isarel, Ka lawk thai awh haw. Kai teh Cathut doeh. Ahmaloe e hoi a hnukteng poung lahai ka o.

<sup>13</sup> Ka kut ni talai du hah a ung. Aranglae kut hoi kalvannaw ka sak toe. Ka kaw teh hmuen touh koe a kamkhueng awh.

<sup>14</sup> Koung kamkhueng awh nateh, thai awh haw. Nangmouh thung dawk hoi apinimaw hete hnouaw hah a dei boi. BAWIPA a lung ka pataw e Babilon khopui dawk a ngainae a kuep sak han. A kut hah Khaldean taminaw ko e pha sak han.

<sup>15</sup> Kai kama roeroe ni lawk ka dei. Ahni teh, ka kaw. Ka ceikhai vaiteh, a lamthung a cawn han.

<sup>16</sup> Na hnai awh nateh, hete lawk hah thai awh haw. Apuengcue hoi arulaho lawk ka dei boihoe h. Apuengcue hoi hawvah ka o toe. Atuvah, Bawipa Jehovah Cathut e Muitha ni kai hah na patoun toe.

<sup>17</sup> Nangmanaw na ka ratang e, Isarelnaw e Kathoung Poung e BAWIPA ni a dei e lawk teh, kai heh nangmae Jehovah na Cathut, na hawi awh nahanlah nangmouh na kacangkhaikung, na dawn awh hanelah lamthung dawk nangmouh ka cetkhai hanelah doeh ka o.

<sup>18</sup> Oe kâpoelawknaw na poe e tarawi awh haw khe. Hottelah na sak awh pawiteh, roumnae teh palang tui patetlah thoseh, na lanna e teh tui pui tuicapa ka thaw e patetlah thoseh, ao han.

<sup>19</sup> Na catounnaw hai sadi patetlah pap vaiteh, na catounnaw hai sadi patetlah a pap awh han. A min teh ka hmaitung hoi raphoe e lah awm mahoe h.

<sup>20</sup> Babilon khopui thung hoi tâcawt awh. Khaldeannaw hai yawng takhai awh. Hetheh, la sak pawlawk hoi thai sak nateh, dei awh. Talai pout totouh kamthang sak awh. BAWIPA ni a san Jakop hah a ratang toe telah dei awh atipouh.

<sup>21</sup> Thingyeiyawn lahoi a hrawi awh navah, tui kahran boi awh hoe h. Lungsong thung hoi ahnimouh han tui a lawng sak. Lungsong a kâbawng sak teh, tui hah a tâco sak.

<sup>22</sup> Tami kahawihoe hnaw hanelah, roumnae awm hoe h telah BAWIPA ni a dei.



## 49

*BAWIPA e san*

<sup>1</sup> Oe tuilum taminaw, ka lawk hah thai awh haw. Ahla koe e miphunnaw na hnâpakeng awh haw. Vonthung ka o nah roeroe vah BAWIPA ni na kaw toe. Anu e vonthung vah ka min a pakhum toe.

<sup>2</sup> Ka pahni hah tahloi kahrn e patetlah a sak teh, a kut tâhlip dawk na hro. Pala pikhluk e patetlah na coung sak teh, a palabom dawkvah na pâseng.

<sup>3</sup> Oe Isarel nang teh kaie san doeh. Nang dawk hoi ka bawilennae a kamnue han telah ka ti toe.

<sup>4</sup> Kai ni hai hawinae awm laipalah ka tawk toe. Ayawmyin lah ka tha hai a baw toe. Hatei, ka lannae tawkpheu teh BAWIPA koe ao teh, ka tawkpheu teh Cathut koe ao tie hah ka cai telah ati.

<sup>5</sup> Atuvah, BAWIPA ama koe Jakop bankhai hane hoi, ama koe Isarel ka pâkhueng hane a san lah o nahanelah, von thung hoi na kangdoutkhai e ni a dei. Bangkongtetpawiteh, BAWIPA hmaitung vah ka sungren e lah ka o. Ka Cathut teh ka thasainae lah ao han.

<sup>6</sup> Bokheiyah, ama ni, Jakop miphun kangdue sak hane hoi Isarelnaw thung dawk kahloutnaw hah bout kangdue sak hanelah, ka san lah na o e heh hno ka pâhawca doeh. Talai pout totouh ka runngangnae lah na o nahan, Jentelnaw kaangsakkung lah onae hai na poe han.

<sup>7</sup> Isarelnaw hah a ratang teh, a tami kathoungnaw ayâ ni a pacekpahlek e, miphun ni a panuet e, lawkcengkung san, Jehovah ni hettelah a dei. Yuemkamcu, BAWIPA, Isarel tamikathoung, na karawikung kecu dawkvah, siangpahrangnaw ni hmawt awh vaiteh, a thaw awh han, bawinaw ni hai a bawk awh han telah ati.

*Isarel bout pâkhuengnae*

<sup>8</sup> BAWIPA ni hettelah a dei. Ngai kaawm e tueng dawk na lawk hah ka tarawi toe. Runngangnae hnin dawk nang hah na kabawp toe. Na ring vaiteh, miphunnaw hanelah lawkkamnae hah na poe han. Ram bout kangdue sak hane hoi kingkadi e râw lah bout coe hanelah,

<sup>9</sup> Thongkabawtnaw koe tâcawt awh. Hmonae koe kaawmnaw koevah, kamphawng awh telah na dei thai nahanelah, na ta awh han. Lamthungnaw dawc cet awh vaiteh, arasangnae cailum hmuen dawc pawngpanae lah ao awh han.

<sup>10</sup> Vonhlan awh mahoe, tui kahrn awh mahoe. Khumbei ni runae poe awh mahoe. Kanî raeng ni daw awh mahoe. Bangkongtetpawiteh, ahnimouh ka pahren e ni cetkhai awh vaiteh, tui onae koe a ceikhai han.

<sup>11</sup> Kaie mon pueng teh lamthung lah ka coung sak han. Kaie lam kalennaw hai ka tawm han.

<sup>12</sup> Khenhaw! Ahnimanaw teh ahlanae koehoi tho hanelah a kâcai awh. Khenhaw! ahnimanaw teh atunglah hoi kanîloumlah hoi tho hanelah a kâcai awh. Ahnimouh teh Sinim ram hoi tho hanlah kâcai awh e naw doeh.

<sup>13</sup> Oe kalvannaw lunghawi hoi la sak awh haw. Oe talai lunghawi haw. Oe monnaw la sak awh haw. Bangkongtetpawiteh, BAWIPA ni a taminaw a lung a pahawi. Runae kâhmonaw hai a pahren han.

*Cathut ni Zion pahnim hoeh*

<sup>14</sup> Hateiteh, Zion ni, Jehovah ni na ceitakhai teh, Bawipa ni na pahnim toe ati.



<sup>15</sup> Napui ni a ca a khe e hah, a pahren hoeh totouh, sanu a pânei lahun e camo a pahnim thai han na maw. Pahnim thai nakunghai kai ni na pahnim hoeh.

<sup>16</sup> Kai ni ka kuttabei dawk ca ka thut teh, na kâkalupnae rapan teh ka hmalah pou ao.

<sup>17</sup> Na canu capanaw ni karanglah a kâroe awh han. Nang karaphoenaw hoi, nang ka hmawt sak e naw ni na tâco takhai han.

<sup>18</sup> Na tengpam vah khenhaw! Ahnimanaw teh a kamkhueng awh teh nang koe a tho awh. BAWIPA ni a dei e teh, Kai teh ka hring dawkvah, nang teh langa a kamthoup e patetlah phunkuep hoi na kamthoup dawkvah, rumram nahoe hoi.

<sup>19</sup> Raphoe teh kingdi e hmuen hoi ka rawk tangcoung e na ram teh, atuvah kho ka sak e apap dawkvah, abueng toe. Nangmouh na kapayawpnaw teh ahlanae koe ao awh han.

<sup>20</sup> Na canaw a due hnukkhu, bout na tawm e capanaw ni hmuen khout awh mahoe hoi. A hmuen na poe ei telah a hei awh han.

<sup>21</sup> Hatnavah, nang ni na lungthung hoi, hetnaw heh apinimouh na khe pouh aw, ka canaw be kadout niteh, madueng kaawm e, yuengyoe kâva e lah bout ka o. Hetnaw hah apinimouh a thokhai awh. Kai teh ka madueng kaawm e lah ka o dawkvah, hetnaw heh nâmouh ao awh aw na ti han.

<sup>22</sup> Bawipa Jehovah ni a dei e teh, khenhaw! Kai ni khoram tangkuem kaawm e miphunnaw koe ka kut ka dâw teh, mitnoutnae hah ka vo pouh han. Ahnimouh ni nange na canu capanaw hah a kut hoi tawm awh vaiteh, a loun daw hrawm awh vaiteh, a thokhai awh han.

<sup>23</sup> Siangpahrangnaw ni nange camo tawm awh vaiteh, siangpahrangnaw teh nange camo ka khom e lah ao awh han. Na hmalah tabaw awh vaiteh, na khok daw k e vaiphu hah a palem awh han. Kai teh Jehovah lah ka o e hai thoseh, kai na kangaihawinaw teh kayanae a ohoehnae hai thoseh na panue han.

<sup>24</sup> Athakaawme kut daw hoi hnopai lawp han na maw. Taki ka tho e san hah rungngang han na maw.

<sup>25</sup> BAWIPA ni a dei e teh, atangcalah, athakaawme ni man tangcoung e tami hah bout la han. Takitho e ni lawp tangcoung e lawphno hah bout la han. Bangkongtetpawiteh, nang ka taran e hah kai ni ka taran vaiteh, na capanaw hah ka rungngang han.

<sup>26</sup> Nang na karektapnaw hah amamae tak ka ca sak han. Amamae thi hah misurtui nei e patetlah kounng ka boum lah a nei awh han. Hatdawkvah, kai Jehovah teh nang ka rungngangkung, nang karatangkung, Jakop miphun daw athakaawme Cathut, ao tie hah tami pueng ni a panue awh han telah a dei.

## 50

### *Isarelnaw yonnae dawk hoi hloutnae*

<sup>1</sup> BAWIPA ni hettelah a dei. Nangmae manu manae ca, kâmanae hah nâne ao. Nahoe pawiteh, ka laiba dawkvah api koe maw nangmanaw hah na yo awh. Bangkongtetpawiteh, namamae na payonnae dawkvah san lah na o awh. Namamouh kaya poenae dawkvah, nangmae manu ka manae doeh.

<sup>2</sup> Kai ka tho navah bangkongmaw taminaw ao awh hoeh. Bangkongmaw na kaw awh lahun nah na pato awh hoeh. Kai ni na ratang thai awh hoeh nahanelah, ka kut a duem namaw. Rungngang thai hoeh nahanlah bahu ka tawn hoeh na maw. Khenhaw! kai ni ka yue teh, tuipei hai remphui.



Palang pui hai kahrawng patetlah ka o sak. Tui ao hoeh daw k tanganaw a pawk awh. Tui kahran hoi a due awh.

<sup>3</sup> Kalvan teh hmonae hoi ka tangoung teh, burihni ka kâkhu sak.

<sup>4</sup> Ka tâwn e koe lawk hoi a tawnnae ka dam sak thai nahanelah, Bawipa Jehovah ni thoumthainae lai na poe. Amom tangkuem kai hah na pâhlaw, ca ka kamtu e patetlah thaisak hanelah ka hnâ heh a pâhlaw.

<sup>5</sup> Bawipa Jehovah ni ka hnâ hah a paawng teh, kai hai kangek mahoe h. Ka taran mahoe h. Hnuklah kâhnawn mahoe h.

<sup>6</sup> Ka keng kahemnaw koe thoseh, hmaibeisam kapawnnaw koe thoseh, hmaibei ka patueng. Yeiraiponae hoi tamthawinae daw k hoi ka minhmai ka hrakw hoe h.

<sup>7</sup> Bangkongtetpawiteh, Bawipa Jehovah ni na kabawp han. Hatdawkvah, yeirai ka po mahoe h. Hatdawkvah, lungtaw patetlah ka minhmai ka hruek teh, kayak mahoe h tie ka panue.

<sup>8</sup> Kai tangnae na kapoekung teh a hnai toe. Apimaw na tuk han. Na ka tuk hane teh apimaw. Kamtueng awh sei. Na ka tuk hane teh apimaw, rek na hnai naseh.

<sup>9</sup> Bawipa Jehovah ni na kabawp roeroe han. Apinimaw kai hah na sung sak han. Hot patetlah e taminaw teh napon patetlah ao awh vaiteh, khakbara ni koug a ca awh han.

<sup>10</sup> Nangmouh daw k apimaw BAWIPA ka taket, ahni teh a san e lawk ngai naseh. Apimaw angnae tawn laipalah hmonae daw k ouk ka cet. Jehovah min hah kâuep nateh, amae Cathut daw k kamngawi naseh.

<sup>11</sup> Hmai hah patawi teh, amamouh hmaitali hoi muen kâkatum e taminaw, namamae hmaiang daw k thoseh, namamouh ni patawi e hmaw daw k thoseh, cet awh. Hetheh ka kut daw k hoi ka sin e hmai teh namamouh koe lah tangpek vaiteh, lungmathoe laihoi na yan awh han.

## 51

### *BAWIPA ni Zion lung a pahawi*

<sup>1</sup> Lannae ka pâlei niteh, BAWIPA ka tawng e taminaw ka lawk thai awh haw, nangmouh na kâdeinae lungsong hoi na tai awh e tangkom kâko khenhaw.

<sup>2</sup> Nangmae na pa Abraham hoi nangmouh na kakhekung Sarah hah khenhaw. Bangtelamaw tetpawiteh, ahni dueng doeh ka kaw, yawkahawi sak teh, tami moikapap lah ka coung sak.

<sup>3</sup> Hahoi BAWIPA ni Zion kho lung a pahawi han. Ahnie tami kingdinae hmuen pueng, lung a pahawi vaiteh, kahrawngum hah Eden hmuen patetlah ka sak vaiteh, ramkenae hah BAWIPA takha patetlah ka sak han. Lunghawilawkdinae hoi nawmnae, lunghawilawk deinae hoi la saknae lawknaw athung vah hmu lah ao han.

<sup>4</sup> Ka taminaw ka dei e thai awh haw. Ka miphunnaw na hnâpakeng awh haw. Kai koehoi kâlawk a tâco vaiteh, lawk ka tâtueng e teh taminaw hanelah, angnae lah ao han.

<sup>5</sup> Ka lannae teh a hnai toe. Kaie rungngangnae teh a tâco toe. Ka kut ni tamipueng lawk a ceng awh han. Tuilum ramnaw ni a panue awh vaiteh, ka kut a kâuep awh han.

<sup>6</sup> Kalvan lah radoung awh haw, a rahim lae talai hai khenhaw. Kalvan teh hmaikhu patetlah a kahma teh, talai teh khohna patetlah a pawn han. Talai taminaw teh, tangkarang patetlah a due awh han. Hatei, rungngangnae teh a yungyoe a kangning vaiteh, lannae hai pahawt thai lah awm mahoe h.



<sup>7</sup> Lannae phung ka panuek niteh, kaie kâlawk a lungthin dawk katatnaw, ka lawk thai awh haw. Taminaw e pathoenae takek awh hanh. Hnephnapnae hai takek awh hanh.

<sup>8</sup> Bangkongtetpawiteh, ahnimanaw teh, khohna patetlah hmonae ni kOUNg a ca awh han. Tumuen patetlah ahnimanaw teh pâri ni a ca awh han. Hatei, ka lannae teh a yungyoe a cak vaiteh, ka rungngangnae teh a se buet touh hnukkhu buet touh a kangning han.

<sup>9</sup> Kâhlaw leih, kâhlaw leih, thaonae kâmahrawk leih. Ayan e tueng dawk palang na kâhlaw e patetlah kâhlaw leih. Rahab ka rek niteh, khorui hah patawnae kapoekung teh, BAWIPA nang nahoehmaw.

<sup>10</sup> Nang teh, kadung ni teh ka kaw e tuipui kahaksakkung, na rungngang e taminaw a cei nahanelah, tuipui a dungpoungnae koe lamthung na ka sak pouh kung teh nang nahoehmaw.

<sup>11</sup> Hot patetlah a ratang e taminaw ni, BAWIPA koelah a ban awh vaiteh, amamae lû dawk a yungyoe lunghawinae la sak nalaihoi Zion lah a ban awh nahan, lunghawinae hoi a nawmnae a hmu awh vaiteh, lungmathoenae hoi khuikanae teh, kOUNg a kahma han toe.

<sup>12</sup> Na lung ka mawng sak kung teh kai kama roeroe doeh. Tami capa pho patetlah kasakkung hoi kadout hane tami ka takek e tami teh apimaw.

<sup>13</sup> Talaidu adu ka ung niteh, kalvannaw kasakkung hoi nang na kasakkung BAWIPA na pahnim teh, pacekpahlek e tami ni kai na raphoe tawmlei toe telah na pouk teh ahnie lungkhueknae pou na taki. Ka pacekpahlek e tami a lungkhueknae teh atu nâmwaw ao.

<sup>14</sup> Tangkom thung dout mahoe. Rawca hai pout mahoe, Karang lah hloutnae koe a pha han.

<sup>15</sup> Kai teh, tuipui ka yue ni teh tuicapa kahramsakkung nangmae Jehovah na Cathut doeh. A min teh ransahu BAWIPA doeh.

<sup>16</sup> Kalvan ka kangdout sak niteh, talai adu ka ung e ni Zion koevah, ka tami lah na o telah ka ti thai nahanelah, ka lawk na pahni dawk ka hruek toe. Ka kut e tâhlip hoi nang teh na ramuk toe telah ati.

### *Cathut e lungkhueknae ka patawpoung e*

<sup>17</sup> Oe, Jerusalem, BAWIPA e kut dawk e lungkhueknae manang kanetkung napui, kâhlaw leih, thaw nateh kâhlaw leih. nang ni tâluengsaknae manang hai kOUNg na nei toe. A radue hai kOUNg na nei toe.

<sup>18</sup> Na khe e na capanaw thung dawk, nama lam kapâtuekung buet touh hai awm hoe. Na kaw e capanaw thung dawk nama kut hoi na ka hrawi hane tami buet touh hai awm hoe.

<sup>19</sup> Takang a tho vaiteh tami kingdinae hoi, tahloi hoi theinae, hete runae kahni touh nange lathueng a pha toe. Apinimaw na ka khai vaiteh, lung na pahawi han.

<sup>20</sup> Na capanaw ni kângai a ru awh han. Tangkhek dawk kâman e Atha patetlah lam tangkuem dawk ayan awh vaiteh, BAWIPA e lungkhueknae hoi Cathut e yuenae teh a boum awh han.

<sup>21</sup> Hatdawkvah, pacekpahlek e ka khang e tami, misurtui hloilah alouke paruinae hoi ka parui e tami thai awh haw.

<sup>22</sup> Na BAWIPA, a taminaw lawk ouk ka kâpankhai e, na Bawipa Jehovah ni a dei e teh, khenhaw! pâyawnae manang, ka lungkhueknae manang daw e a taisawm hah na kut daw e ka la vaiteh, nang teh bout na net mahoe toe.

<sup>23</sup> Hatei, nang koe vah na tak van coun groe thai nahanelah, tabaw haw telah a titeh, na lathueng kacetnaw hanelah, lamthung patetlah na tak a



phai teh, patawnae na kapoekungnaw e kut dawk, hote yamu manang ka hruek han.

## 52

### *Cathut ni Jerusalem a ratang*

<sup>1</sup> Oe, Zion kâhlaw, kâhlaw. Na thaonae hoi kamthoup. Oe Jerusalem kho, kathounge khopui, khohna kahawi hoi kamthoup. Bangkongtetpawiteh, atu hoi teh, vuensom ka a hoehnaw hoi kamhnawngnaw teh na thung vah kâen mahoe hoi toe. <sup>2</sup> Oe Jerusalem, vaiphu na kâbetnae tâkhawng haw. Thaw nateh, tahung haw. Oe Zion canu san lah na onae na lahuen daw k pâkhi e ratham haw. <sup>3</sup> BAWIPA ni hettelah a dei. Banghai bang hoe hah na yo awh. Hot patetlah tangka laipalah hoi na ratang han toe telah atipouh. <sup>4</sup> Bangkongtetpawiteh, Bawipa Jehovah ni hettelah a dei. Ka taminaw Izip ram o hanelah hmaloe a cathuk awh teh, Assirianaw ni a khuekhaw awm laipalah hoi rep a coungroe awh. <sup>5</sup> Ka taminaw hah banglahai awm laipalah a ceikhai awh. Hatdawkvah, bangmaw hi ka sak han telah BAWIPA ni ati. Ahnimouh tak daw k ka ukkungnaw ni lungmathoe hoi a khuika sak awh telah BAWIPA ni ati. A hnintangkuem pout laipalah ka min a pacekpahlek awh a ti. <sup>6</sup> Hatdawkvah, ka taminaw ni ka min hah a panue awh han, lawk kadeikung hah kai doeh telah hat hnin vah a panue awh han. Khenhaw! kai doeh telah a ti. <sup>7</sup> Monsom vah kamthang kahawi ka phatkhai e, roumnae lawk hah ka hramkhai e, hawinae kamthang ka phat sak e, rungngangnae lawk hah ka oung e, Zion koevah, na Cathut ni a uk katetkung e a khok teh a meihawi poung. <sup>8</sup> Na ramveng ni a lawk hah a tâco sak han. A lawk tâco hoi cungtalalah la a sak awh han. <sup>9</sup> Ka rawk e Jerusalem hmuennaw vaitalahoi na lunghawi awh. Cungtalalah la sak awh. Bangkongtetpawiteh, BAWIPA ni a taminaw hah a lungmawng sak teh, Jerusalem hah a ratang toe. <sup>10</sup> BAWIPA ni a miphun abuemlae a mithmu vah, kathounge a kut a pâdue teh, kalvan e kaawmnaw pueng ni Cathut e rungngangnae a hmu han. <sup>11</sup> Tâcawt awh. Tâcawt awh. Haw hoi tâcawt awh. Ka khin e tek hanh awh. Haw hoi tâcawt awh. BAWIPA e hnopai ka phawt naw, kathoungcalah awm awh. <sup>12</sup> Nangmouh teh, ka rang lah na tâcawt awh hoe hoi, yawng hai na yawng awh hoe hoi. BAWIPA hah na hmalah cet vaiteh, Isarel Cathut teh na hmalah hoi kountoukkung lah ao han.

### *Yonnae kaphawtkung san*

<sup>13</sup> Khenhaw! ka san ni lungangcalah a sak han. Ahni teh karasangpoung lah ka talue lah ka tawmrasang e lah ao han. <sup>14</sup> Tami moikapap ni a kângairukhai e patetlah a mei teh tami mei hlak hai a mathoe teh, a takthai hai tami e takthai hlak a mathoe. <sup>15</sup> Hot patetlah, ahni ni miphunnaw pueng hah a thoung sak han. Siangpahrangnaw ni amamae pahni a tabuem awh han. Bangkongtetpawiteh, dei boihoe hoi e a hmu awh han, thai boihoe hoi e hai a thai awh han.

## 53

<sup>1</sup> Maimouh ni pathang awh e lawk heh apinimaw a yuem. BAWIPA kut teh api koe maw a kamnu. <sup>2</sup> Bangkongtetpawiteh, a hmalah talai hoi cati kapaw e patetlah ama teh, a paw. Ama ka hmu awh teh, ka ngai awh nahanelah, a meihawinae banghai tawn hoe hoi. Ngai kawi e minhmai awm hoe hoi. <sup>3</sup> Ama teh taminaw e dudam hoi pahnawt e lah ao. Reithainae ka tawn e hoi patawnae ka panuek e lah ao. Tami ni a minhmai a thung takhai



e patetlah taminaw ni a dudam e lah ao teh, kaimouh ni hai banglah ka noutna van hoe. <sup>4</sup> Ama ni ka patawnae hah a phu. Ka lungmathoenae hai a phu. Hatei, kaimouh ni, lungmathoenae ni na pha sin e hoi, Cathut ni na hemnae patawnae na poe e lah ka pouk awh. <sup>5</sup> Hatei, kaimouh ni kâlawk ka ek awh kecu dawkvah pakekpaheknae hoi, ka yonae kecu dawkvah hemnae a khang. Ka lungmawng awh nahanelah yuenae teh amae tak dawka a pha sak teh, a hemnae hmâ dawka hoi ka dam awh. <sup>6</sup> Tu patetlah kahma awh teh, lamthung lengkaleng ka phen awh. Hatdawkvah, BAWIPA ni ka yonnae naw hah amae a tak dawka a patue. <sup>7</sup> Ama teh repcoungröe e lah ao ei, lawkkamuem lah ao. Thei hanelah a ceikhai awh e tuca patetlah a muen ngaw pouh nah duem kaawm e tuca patetlah ao teh, a pahni hai a cakuep. <sup>8</sup> Ama teh thongim thung hoi lawkcengnae lahoi a ceikhai awh. Apini maw a catoun hah a hram khai han. Kahringnaw e ram thung hoi ahni teh takhoe lah ao teh, ka taminaw ni kâ tapoenae kecu dawka ahni teh hem lah ao. <sup>9</sup> Payonnae sak boihoe. Pahni dawka hoi dumyennae laithoe dei boihoe. Hatei, a tangkom teh tamikahawihoe hnaw koe rei pakawp hanelah a pouk awh. Hatei, a due hnukkhu hoi bawitangrengnaw koe ao. <sup>10</sup> Hateiteh, ama a hemnae teh BAWIPA ngainae doeh. Patawnae hah a poe katang teh, a hringnae teh yon thuengnae dawka hno toteh, ca catounnaw a hmu vaiteh, a hringnae hnin hah a saw sak han. BAWIPA ngainae teh a kut dawka a kuep sak han. <sup>11</sup> A hringnae tawkpheu a hmu vaiteh, a lung a kuep han toe. Ka lan e ka san hah panuenae lahoi, ahni ni tamikapap hah lannae dawka a caksak han. Ahnimae yonnaw hah a phu pouh han. <sup>12</sup> Hatdawkvah, ama teh tami kalennaw ham ka rei han. Ahni ni a la e hnopainaw hah, athakaawme taminaw a rei han. Bangkongtetpawiteh, a hringnae teh, a due totouh a rabawka teh, kâlawk ka ek naw koe hmai touksin lah ao. Tami moikapap e yonnae hah a phu teh kâlawk kaeknaw hanlah a kâhei pouh.

## 54

### *Ka pout thai hoe e roumnae lawkkam*

<sup>1</sup> Oe, carôe e napui, lunghaw hoi la sak haw. Ca khe patawnae ka khang boihoe rae napui, la sak hoi hram haw. Bangkongtetpawiteh, a vâ ka sak e napui ni ca sak e hlak pahnawt e ni ca hoe kapap a sak toe telah BAWIPA ni ati. <sup>2</sup> Na im hmuen hah pakaw haw. Na onae lemphu hah rayang haw. Pasai hanh. Ruinaw hah saw sak haw. Khomnaw hah kacaklah ung haw. <sup>3</sup> Bangkongtetpawiteh, nang teh avoilah aranglah na pungdaw han. Na catoun ni miphunnaw hah raw lah coe vaiteh, ahnimae kingkadi kho dawka kho a sak awh han. <sup>4</sup> Taket hanh, na kayak mahoe. Na lungpout hanh, na min mathout mahoe. Bangkongtetpawiteh, na nawca nah na khang e kayanae hah na pahnim han. Lahmainu lah na o dawka pathoenae hah bout na pouk mahoe toe. <sup>5</sup> Bangkongtetpawiteh, nang na ka sak e teh, nange vâ lah ao. A min teh, ransahu BAWIPA doeh. Nang karatangkung teh Isarel miphun dawka kathoung Cathut lah ao. Talai pueng a uk teh Cathut telah a kaw awh. <sup>6</sup> Pahnawt teh a lung ka mathout e napui, a naw navah yu lah kaawm niteh, a hnukkhu mae napui hah bout kaw e patetlah nang hah bout na kaw han telah na Cathut ni ati. <sup>7</sup> Nang hah dongdengca na pahnawt dawkvah, moikapap e pahrennae hoi bout na pâkhueg han. <sup>8</sup> Puenghoi ka lungkhuek teh, dongdengca ka minhmai ka hro ei nakunghai, a yungyoe lungpatawnae lahoi bout na pahren han telah nang ka ratang e Jehovah ni ati. <sup>9</sup> Noah se nah e tuikamuem a tho navah,



hote tui ni talai teh bout kamuem sin mahoe h toe telah lawk ka kam e patetlah nang koe ka lungkhuek mahoe h toe, na yue mahoe h toe telah thoe ka bo toe. <sup>10</sup> Monnaw kahmat niteh, monruinaw kampuen nakunghai, kaie lungpatawnae teh nang koe hoi kampuen mahoe h. Kaie roumnae lawkkam hai kampuen mahoe h nang ka pahren e BAWIPA ni ati. <sup>11</sup> Oe, nang rektap e hoi tûili ni meng a raphoe teh, lungmawngnae ka tawn hoe h e, khenhaw! na talungnaw teh talung phu kaawm phunkuep hoi ka pathoup vaiteh, na talungdu teh, Sapphire talung hoi ka ung han. <sup>12</sup> Longkhanaw hah rubies talung hoi thoseh, thonaw hah khristal talung hoi thoseh, tapang pueng teh aphu kaawm e talungnaw hoi thoseh, ka sak han. <sup>13</sup> Na catoun pueng teh BAWIPA ni cangkhai e lah awm vaiteh, na canaw e roumnae teh a len han. <sup>14</sup> Lannae daw k caksak lah na o han. Repcoun groenae hoi na kâhlat toung vaiteh, na taket mahoe h toe. Lungpuenna e hai hlat toung vaiteh nang koe phat mahoe h toe. <sup>15</sup> Kaie kâ laipalah, apinihai na taran mahoe h toe. Nang tuk hanelah kamkhueng e pueng teh, koung a rawp aw h han. <sup>16</sup> Hmaisaan ka hmu niteh, ama hanelah senehmaica ka dêi e hah ka sak teh, sumkadêinaw hai ka sak. <sup>17</sup> Nang taran hanelah a sak aw h e senehmaica buet touh boehai coung mahoe h. Lawkcengnae koe nang ka taran e pueng a sung aw h han. BAWIPA e sannaw teh hot patet e râw hah a coe aw h vaiteh, kai kecu daw k lannae koe a pha aw h han telah BAWIPA ni ati.

## 55

### *Hring thadam nahanelah counnae*

<sup>1</sup> Oe, tui kahran pueng, tui aonae koe tho aw h. Tangka ka tawn hoe h naw tho aw h. Ran aw h nateh net aw h. Tangka hoi aphu poe laipalah tho aw h nateh misurtui hoi sanutui ran aw h haw. <sup>2</sup> Rawca lah kaawm hoe h e daw k nangmouh ni na tangka thoseh, von ka paha thai hoe h e daw k na hnopai thoseh bangkongmaw na pâbaw aw h. Ka lawk thai aw h haw. Kahawie rawca hah cat aw h. Na hringnae a nawm han. <sup>3</sup> Na hnâpakeng aw h nateh, thai aw h haw. Hottelah na tet aw h pawiteh, nangmae muitha teh a hring han. Kai ni hai, nangmouh hoi a yungyoe lawkkamnae ka sak vaiteh, Devit daw k lungmanae ka caksak han. <sup>4</sup> Khenhaw! ahni teh, tami pueng hanelah, kapanuekkhaikung lah ka o sak hane thoseh, taminaw hanelah kahrawikung kacue lah thoseh, miphunnaw koe ka poe toe. <sup>5</sup> BAWIPA Cathut hoi Isarel Tami Kathoung kecu daw k, na panue boihoe h e miphun hah na kaw han. Nang na ka panuek boihoe h e miphun hah, nang koe a yawng han. Bangkongtetpawiteh, a bawilenna e caksak toe telah ati. <sup>6</sup> Hmu thai lahun nah BAWIPA hah tawng aw h, a hnai lahun nah ama hah kaw aw h. <sup>7</sup> Tamikathout ni a lamthung cettakhai naseh. Tamikalan hoe h e ni a pouknae thoseh, a pahnawt vaiteh, BAWIPA koe ban naseh. Hottelah tetpawiteh, a pahren han. Maimae Cathut koe kâthung naseh, hottelah tetpawiteh, a ngaihoum han. <sup>8</sup> Bangkongtetpawiteh, ka pouknae heh, nangmae pouknae hoi kâvan hoe h. Ka lamthung hai na lamthung hoi kâvan hoe h telah BAWIPA ni ati. <sup>9</sup> Kalvan heh talai hlak a rasang e patetlah ka lamthung hai na lamthung hlak a rasang teh, ka pouknae hai na pouknae hlak a rasang. <sup>10</sup> Bangkongtetpawiteh, ratui hoi tadamtui teh, kalvan hoi a rak teh bout ban toung laipalah, cati kahei koe cati hah a poe teh, rawca ka cat hane koe rawca hah a poe thai nahan, talai a duk sak teh, a kung a pâw sak teh, a paw a paw sak e patetlah, <sup>11</sup> Ka kâko hoi ka tâcawt e ka lawk teh ao han. Ayawmlah kama koe bout



ban mahoe. Ka ngainae a kuep sak vaiteh, ka patoun ngainae daw k kuepcingnae a hmu han. <sup>12</sup> Bangkongtetpawiteh, lunghawi laihoi na tâco awh vaiteh, karoumcalah na ceikhai awh han. Montang monruinaw ni nangmae hmalah la a sak awh han. Kahrawng e thingnaw pueng ni a kuttawng awh han. <sup>13</sup> Pâkhing yueng lah hmaica, pho yueng lah tuihannaw a pâw han. Hote hno teh BAWIPA hanelah minhawinae hoi, kahmat thai hoe e a yungyoe mitnout lah ao han.

## 56

### *Jentelnaw han rungangnae*

<sup>1</sup> BAWIPA ni telah a dei. Kângingnae hah kuen nateh, lannae hah sak haw. Bangkongtetpawiteh, kaie rungangnae meimei a tho toe, ka lannae hah pâpho lah ao han. <sup>2</sup> Hete hno kasaknaw hoi hot patetlah kacaklah ka kuen e tami capa, sabbath ek laipalah hawihoe hnae sak laipalah, a kut ka ring e teh, a yaw ka hawi e tami lah ao. <sup>3</sup> Hahoi, ramlouk tami, amadueng lahoi BAWIPA hoi kâkuen e capa ni, BAWIPA ni a taminaw thung hoi abuemlahoi na kapek tet nahanh seh. Tuenla ni khenhaw! thingke lah doeh rip ka o awh tet nahanh seh. <sup>4</sup> Bangkongtetpawiteh, kaie sabbath hnin ya hoi ka lunghawikhai e hno hah ka rawi niteh, ka lawkkam pou ka kuen e tuenla kong dawkvah, BAWIPA ni hettelah a dei, <sup>5</sup> Ahnimouh koe ka im vah thoseh, ka rapan thung thoseh, canu capa katawnnaw hlak haiyah, pahnim hoe hnan minhawinae ka poe han. Ahnimouh koe yungyoe kâraphoe thai hoe e min hah ka poe han. <sup>6</sup> Ahnie san lah o hane, BAWIPA min lungpataw hane, BAWIPA kâuep hane, ramlouk e tami capanaw a mahmaw lahoi BAWIPA hoi kâkuennaw hai sabbath ek laipalah, ya hanelah ka lawkkam ka kuen e pueng, <sup>7</sup> ahnimouh roeroe hah ka mon kathoung koe ka ceikhai han. Kaie ratoumnae im daw ka lunghawikhai han, hmaisawi thueng hanlah poe e naw hoi thuengnae naw hah, kaie khoungroe daw hoi ka dâw pouh han. Bangkongtetpawiteh, kaie ka im teh, miphunnaw pueng hanelah ratoumnae im ati awh han. <sup>8</sup> Bawipa Jehovah ni a pâlei e Isarel bout ka pâkhueng e ni, ama koe pâkhueng tangcoung e naw touksin laipalah, tami alouknaw hai ahnimouh koe ka pâkhueng han telah ati.

### *Khopouk ka vang hoe e Isarel kahrawikungnaw*

<sup>9</sup> Thingyei um e moithangnaw pueng hoayah, ratu um kaawm e moithangnaw pueng, ca hanelah tho awh. <sup>10</sup> Ahnimae ramvengnaw teh a mit ka dawn e a tho. Thainae ka tawn hoe e naw seng lah ao awh teh, abuemlahoi a lawk kacaihoehe ui, ka rauk thai hoe e ui lah ao awh. Karum mang sak hoi, pou ka ip niteh, i dueng ka panki e lah ao awh. <sup>11</sup> Ka carawng ni teh ka khout boihoe e uinaw lah ao awh. Ahnimouh teh, thaipanueknae ka tawn hoe e tukkhounnaw doeh. Makhomaram vah, mahoima mek nahanelah abuemlahoi lam a phen awh toe. <sup>12</sup> Tho awh haw, misur ka thokhai vai, yamu hah king net awh sei. Tangtho hai sahnin e patetlah han na a, apap hai hoe apap han doeh telah ati.

## 57

### *Cungkeihoehe meikaphawk bawknae*

<sup>1</sup> Tamikalan a due teh, hawinae ka sak e tami hah takhoe lah ao navah, tamikalan hah hawihoe hnae thung hoi takhoe toe tie hah apinihai thaipanuek awh hoe, apinihai pouk awh hoe. <sup>2</sup> Hot patet e tami teh



roumnae thung a kâen toe. Ahnimouh teh kalan lah a hring awh teh, amamae ikhun dawk a kâhat awh. <sup>3</sup> Ân ka sin e napui e capanaw, uicuknaw hoi ka kâyawt e catounnaw hi tho awh haw. <sup>4</sup> Nangmouh ni apimaw na pacai awh. Api hanelah maw na lai na pâthosin awh vaw. Nangmouh teh laithoe catoun, kâ ka ek e catoun, <sup>5</sup> kathenkungnaw e rahim vah, meikaphawk koe ka cuk e, ravo thung, lungha rahak camo kathetnaw nahoehmaw. <sup>6</sup> Ravo yawn talung kâpinaw rahak nangmae ham teh ao. Hot patetlah e hno teh nangmae râw doeh. Hetnaw e hmalah nei thuengnae hoi tavai thuengnae naw hah na rabawk awh. Hotnaw hah ka ngai han na maw. <sup>7</sup> Mon rasangnae koe na ikhun hah na hruek teh, hote hmuen koe thueng nahanelah ouk na luen. <sup>8</sup> Nang pahnim hoeh nahanlah tho hnuklah na hruek teh, kai koe laipalah alouknaw koe khohna na rading teh na luen toe. Na ikhun na pakaw teh, ahnimouh koe lawkkamnae na sak toe. Tawngtai lah na hmu e ahnimaie ikhun hah na lungpataw toe. <sup>9</sup> Satui na sin teh siangpahrang koe na cei toe. Hmuitui na pung sak toe. Laiceinaw hah ahlanae koe na patoun teh, Sheol totouh na patoun toe.

<sup>10</sup> Na ceinae lam ahlapoung dawkvah ngawt na tâwn eiteh, na lungpout hoeh. Na kâyawm teh na hlout dawkvah, na thathout hoeh.

<sup>11</sup> Nang ni apini na bari teh, na taki dawk maw laithoe dei laihoi kai na pahnim. Hoehpawiteh, na lungthin hoi na pouk hoeh. Kasawlah duem ka o dawk maw na taki hoeh.

<sup>12</sup> Na lannae hoi na tawksak e hah ka pâpho han. Hatei, cungkeinae awm mahoe.

<sup>13</sup> Na hram toteh, na pâkhueng e meikaphawknaw ni na runngang naseh. Hatei, hotnaw teh kahli ni ahlanae koe a sin han. Kâha ni a palek awh han. Hatei, kai na kâuep e niteh, ram hah pang awh vaiteh, mon kathoungnaw hah râw lah a pang awh han.

### *Hnuklah kabannaw damsaknae*

<sup>14</sup> Hahoi, talai paten awh, talai paten awh. Lam pathoup awh. Ka taminaw e lam dawk e thongmuinaw hah takhoe awh telah ka dei.

<sup>15</sup> Bangkongtetpawiteh, a rasang poungnae koe tawm lah kaawm e, a yungyoe kangning e, a min ThOUNGNAE telah ka tawn e ni hettelah a dei, Kai teh a rasangnae koe kathounge hmuen koe ka o. Ka kârahnoumnaw e lungthin pâhlaw hoi pankângai e lungthin pâhlaw hanelah, a lung hoi pankângai katang e hoi kârahnoum katangnaw koevah ka o.

<sup>16</sup> Bangkongtetpawiteh, a yungyoe ka tuk mahoe, ka lung hai pou khuek mahoe. Bangkongtetpawiteh, ka sak e kâha hoi muitha teh ka hma lah a tâwn han doeh.

<sup>17</sup> Bangkongtetpawiteh, utsinnae hoi payonnae dawkvah, ka lungkhuek teh ka tuk, ka minhmai ka hro teh ka lungkhuek. Hatei, ahnimouh teh amamae lungpata laihoi ao awh.

<sup>18</sup> A hringnae teh ka hmu toe. Ahni teh, ka dam sak han. Ka ceikhai vaiteh, ahni hoi ahni kakhuinaw koevah, lungmawngnae teh bout ka poe han.

<sup>19</sup> Pahni paw hah ka sak. Ahlanae koe kaawmnaw hoi a hnainae koe kaawmnaw koevah, roumnae, roumnae teh awm lawiseh, telah BAWIPA ni ati. Hahoi ahni teh ka dam sak han ati.

<sup>20</sup> Hatei, tamikathoutnaw teh, kâhuen e tali patetlah ao. Duem ao thai hoeh toteh, songnawng hoi tangdong a tâco sak.

<sup>21</sup> Tamikathoutnaw hanelah roumnae awm hoeh telah ka Cathut ni ati.



## 58

*Cathut lung kahawi sak e rawcahainae*

<sup>1</sup> Kacaipounglah hram nateh, panguep hanh. Mongka patetlah na lawk cai sak. Ka taminaw ni kâlawk a eknae hoi Jakop imthung yonnae hah pâpho haw. <sup>2</sup> Hateiteh, hnintangkuem kai hah na tawng awh teh, ka lamthung panue e hah a ngai awh. Miphun buet touh ni lannae a sak teh, Cathut e lamthung a ceitakhai boihoe e patetlah kângingnae phunglam hah na pâlei awh teh, Cathut hnai hane hai a ngai awh. <sup>3</sup> Bangkongmaw, rawca ka hai awh e na hmu hoe. Bang kecu dawk maw, oupnae na poe e hah na panuek laipalah ati awh. Khenhaw! rawca na hai hnin vah, namamouh nawmnae na sak awh teh, na thaw katawknaw pueng na dudam awh. <sup>4</sup> Nangmouh ni kâyuekâounnae hoi, thoena kut na kahluem awh teh, kâthaw hanelah, rawca hah ouk na hai awh. Sahnin e rawca na hai awh e patetlah na lawknaw hah lathueng lah thai hanelah rawca na hai awh mahoe. <sup>5</sup> Rawcahai hnin vah, na ka rek awh e hah maw kai ni ka ngai e lah ao han. A kang patetlah lûsaling hane hoi, buri phai vaiteh vaiphu kâphueng hane na vaimoe. Hetheh, rawcahainae hoi BAWIPA ni a coe e hnin na ti awh han na vaimoe. <sup>6</sup> Tamikathout kateknae tangron rathap pouh e, yawcu patue e, hoi yawcu kâkhoe sak e heh ka ngai e rawcahainae nahoehmaw. <sup>7</sup> A von ka hlamnaw koe rawca poe hane karoedengnaw im vah, thokhai e nahoehmaw. Caici lah kaawmnaw na hmu navah, khohna na poe hane, nama e tak na hmu toteh na roun hoe nahoehmaw. <sup>8</sup> Na angnae hah amom e kho ka sei e patetlah a sei vaiteh, damnae teh karanglah a pha han. Na lannae ni na hrawi vaiteh, BAWIPA bawilenna a kamnue sak han. <sup>9</sup> Hottelah na kaw vaiteh, BAWIPA ni a pato han. Na kaw toteh ahni ni, hi ka o ati han. Nangmouh thung dawk e yawcu hoi, khutdon hoi takhi e, dudamnae lawk dei e hah na kâvan sak awh teh,

<sup>10</sup> a von ka hlamnaw hanelah hring na pasoung teh, rektap e naw hah a von na paha sak pawiteh, hmonae um vah na angnae a tâco vaiteh, hmonae hah kanîthun patetlah ao han.

<sup>11</sup> Pout laipalah BAWIPA ni na hrawi awh han. Takang a tho navah, ka boum lah na paca han. Na hrnaw hai a tha ka o sak han. Tui ka bu e takha patetlah kahak boihoe e tuiphuek patetlah na o han.

<sup>12</sup> Nangmouh thung e taminaw ni palang ka rawk e hmuen hah na pathoup awh han. Se moikapap e adu lah ung e pathoup awh ati han. Hottelah nangmouh teh, ka rawk e ka pathoupkung tamimaya lam, khosak nahanelah, patuen ka pathoupkung lah na o awh ati awh han.

<sup>13</sup> Sabbath a ek hoe nahan hoi, hnin kathoung hnin nah na ngai e na sak hoe nahanelah, sabbath hah nawmnae doeh na titeh, BAWIPA e hnin kathoung teh, bari han kamcu na titeh, ma ngai e tarawi mahoe, mae nawmnae hai sak mahoe, lawk dei laipalah na pho na len awh pawiteh,

<sup>14</sup> BAWIPA dawkvah, na lunghawi vaiteh, talai a rasangnae hmuen dawk na kâcui han. Na pa Jakop ni a pang e râw hoi na kaw han. BAWIPA e pahni ni a dei toe ati.

## 59

*Isarel Yon pâphona*

<sup>1</sup> Khenhaw! BAWIPA e kut teh rungngang thai hoe han totouh duem hoe. Thai thai hoe nahan totouh a hnâpang hoe. <sup>2</sup> Hatei, namamae



payonnae ni na Cathut koehoi na kapek awh teh, a thai hoeh nahanelah na hawi awh hoeh nae ni a minhmai hah nangmouh koehoi a hro toe. <sup>3</sup> Nangmae kut teh thi hoi thoseh, na kutdawnnaw teh yonnae hoi thoseh, na khin sak awh. Nangmouh ni pahni hoi laithoe na dei awh. Na laihoi thoena lawk na dei awh. <sup>4</sup> Kângingnae hah apinihai tawng awh hoeh. Lawkkatang hah tarawi awh hoeh. Ayawmyin e lawk hah a kâuep awh teh, laithoe lawk doeh ouk a dei awh. Thoenae hah a vawn awh teh, payonnae hah a khe awh. <sup>5</sup> Tahrûn tadui hah a awt awh teh, Bombarui hah a kawng awh. A taduinaw kacate teh a due. A tadui a kâkhei teh tahrûn lah a tâco. <sup>6</sup> A kawng awh e bombarui teh, khohna lah kangcoung pouh hoeh. A kawng awh e hni hah kâkhu awh mahoe. A sak awh e hno hah kahawihoehe hoi a sak awh dawkvah, a kut dawk thamanae ao. <sup>7</sup> A khoknaw teh thoena saknae koe a yawng awh teh, yonnae ka tawn hoeh e tami thipalawngnae koe a hue a rang awh. A pouknae hai kahawihoehe pouknae doeh. A ceinae lamthung hai rucatnae hoi rawknae lamthung lah doeh ao. <sup>8</sup> Rounnae lamthung panuek awh hoeh. Ahnima lamthung daw kângingnae awm hoeh. A cei awh nahan lamlongkawinaw a sak awh teh, kadawnnaw pueng ni rounnae hmawt awh mahoe.

### *Isarel yon a pâphona*

<sup>9</sup> Hatdawkvah, kângingnae teh maimouh koehoi kahlatpoung lah ao teh, lanna ni hai na phat boi awh hoeh toe. Angnae hah ka ring awh, hatei, haw vah hmonae teh ao. Ka ring awh e teh angnae eiteh, kahmawt poung e koe doeh cei awh.

<sup>10</sup> Mit ka dawn e patetlah tapang thupthup payam awh teh, mit ka tawn hoeh e patetlah pou payam awh. Tangmin e patetlah kanîthun hai kamthui awh teh, ka rawp awh. Thaona koe teh tami kadout patetlah doeh ka o awh toe.

<sup>11</sup> Tavom patetlah ka hram awh teh, bakhu patetlah ka cingou awh. Kângingnae ka tawng awh ei, pâphawng awh hoeh toe. Rungngangnae ngaihaw awh ei, maimouh koehoi ahla poung toe.

<sup>12</sup> Bangkongtetpawiteh, kâlawk eknae teh a hmaitung vah hoehe apap. Ka yonae ni kamamouh koelah kapanuekkhaikung lah ao. Ka payon awh e pueng kamamouh koe ao teh, sakpayon e pueng hai kamamouh ni ka panue awh.

<sup>13</sup> Kâtapoenae, laithoe lahoi BAWIPA tarannae, Cathut hnamthun takhai e, repcoungroenae, taranthawnae lawk deinae, ka vawn awh teh, lungthin thung hoi laithoe lawk dei awh.

<sup>14</sup> Kalan lah lawkcengnae ni hnam na thun takhai teh, kângingnae ni kahlatpoung e hmuen koe a kangdue. Lawkkatang teh lam dawka rawp teh, lannae kâen thai hoeh.

<sup>15</sup> Lawkkatang teh a rawk toe. Thoenae ka roun e tami hah hnopainaw a lawp awh toe. BAWIPA ni hot hah a hmu teh, kângingnae ao hoeh toung dawkvah, a maithoe.

### *Yon dawka hoi Isarel ratangnae*

<sup>16</sup> Tami awm hoeh tie a hmu navah, ka kâhet pouh e awm hoeh tie hah kângai lah a ru. Hatdawkvah, a kut hoi roeroe rungngangnae letlang a sak teh, amae lanna lahoi letlang a kangdue sak.

<sup>17</sup> Lanna hah bahling lah a patuep teh rungngangnae hah sumluhuem lah a kâmuk. Moipathungnae hoi a kamthoup teh, lungthahmeinae angkidung hah a kho.



<sup>18</sup> A tawk a sak awh e patetlah apfu a hmu awh han. Ama ka taran e naw koe a lungkhueknae hah tarannaw ni khang han a kamcu e patetlah moi a pathung awh han.

<sup>19</sup> BAWIPA e min teh kaniloumlah hoi a taki awh vaiteh, a bawilennae hah kanitho lahoi a taki awh han. Tarannaw teh tuikalen patetlah a tho navah, BAWIPA e Muitha ni ama hoi kâtaran lah a ngang han.

<sup>20</sup> Zion vah ka ratangkung, Jakop kâtapoenae kamlang takhai naw koe a tho han telah BAWIPA ni ati.

<sup>21</sup> Het hah doeh, ahnimouh hoi kaie lawkkam e teh telah BAWIPA ni ati. Na lathueng kaawm e ka Muitha hoi na pahni daw k hruet e ka lawk ni, na pahni thoseh, na catounnaw e pahni thoseh, na catounnaw e pahni thoseh, atu hoi a yungyoe hoi a yungyoe totouh tâcawt takhai mahoe toe telah BAWIPA ni a dei.

## 60

### *Kum 1000 uknaeram daw k Isarel bawilennae*

<sup>1</sup> Thaw nateh, ang haw. Bangkongtetpawiteh, na angnae a pha, BAWIPA bawilennae teh na tak daw k a pha toe. <sup>2</sup> Hmonae ni talai hah a ramuk vaiteh, kathapoung e hmonae ni taminaw a ramuk han. Hatei, BAWIPA teh nang daw k tâcawt vaiteh, a bawilennae teh nang daw k hmu lah kaawm han. <sup>3</sup> Jentelnaw nange angnae koe a tho han. Siangpahrangnaw hai nange angnae koe a tho han. <sup>4</sup> Kalvan lah moun g nateh, na tengpam pueng kenh. Abuemlahoi a kamkhueng awh teh, ahnimouh koe a tho awh. Na capanaw hah lamhla pui hoi a tho awh vaiteh, na canunaw hah a camo patetlah a tawn awh han. <sup>5</sup> Hote hah na hmawt awh vaiteh, na ang awh han. Na lungthin hah lunghawinae hoi a kawi han. Bangkongtetpawiteh, tuilam hoi hno kayawtnaw nangmouh koe moi tho awh vaiteh, Jentelnaw hnopai pueng nangmouh koe a tho han. <sup>6</sup> Na ram teh kalaauk hoi kawi vaiteh, Midian hoi Ephah ram e kalauktan kanaw pueng hah, Seba ram hoi tho vaiteh, sui hoi frankinsen phawt vaiteh, BAWIPA pholennae hah a pâpho awh han. <sup>7</sup> Kebar saringnaw pueng ni nangmouh koe a kamkhueng vaiteh, Nebaioth tutannaw ni nangmae thaw a taw k awh han. Ka khoungroe dawkvah coe hane hoi luen awh vaiteh, ka bawilennae im hah ka pholen han. <sup>8</sup> Tâmai patetlah kamlang e naw hoi a cu nahan ka pâtam e bakhu patetlah ka kamlang e naw hateh api han namaw. <sup>9</sup> Tuilum ramnaw ni na ngaihawi awh roeroe han. BAWIPA na Cathut min hoi Isarel Tami Kathoung koevah, sui, ngun, hoi lamhlapui hoi a capanaw thokhai hanelah Tarshish longnaw hmaloe a tho han. Bangkongtetpawiteh, ama ni a pholen toe.

<sup>10</sup> Ram louk taminaw ni a kalupnae rapan hah a kangning vaiteh, a siangpahrangnaw ni hai na thaw a taw k awh han. Bangkongtetpawiteh, ka lungphueng teh, ka hem awh ei, ka ngaikhai lawi na pahren toe.

<sup>11</sup> Hatdawkvah, tami ni Jentelnaw e hnopai nang koe a tho khai thai nahanlah siangpahrangnaw hai be a tho thai nahanalah, na longkhanaw pueng hah karum khodai khan mahoe toe.

<sup>12</sup> Na thaw ka taw k ngai hoe e miphunnaw hoi uknaeram teh a kahma awh han. Hote miphunnaw teh ngit raphoe lah kaawm awh han.

<sup>13</sup> Ka hmuen kathoung hah hawi sak hanelah, Lebanon bawilennae hah nang koe a tho awh han. Hmaica hoi sumpa thing hoi Saipres thing hah cungtalah tho awh vaiteh, ka khok toungnae hmuen hah ka bawilen sak han.



<sup>14</sup> Nang ka rektap e capanaw hai a tabut vaiteh, nang koe a tho a han. Nang ka pacekpahlek e taminaw hai na khok rahim vah a tabo awh han. BAWIPA e khopui Isarel Tami Kathoung Zion telah ati awh han.

<sup>15</sup> Nang teh apinihai yah ceisak rumram hane, ceitakhai hane totouh hmuhma e yueng lah yungyoe kahawipoung e ase moikasaw hane lunghawinae ka tho sak han.

<sup>16</sup> Jentelnaw e sanu na nei awh vaiteh, siangpahrangnaw e sanu hai na nei awh han. Kai BAWIPA ni nang teh ka rungngangkung hoi na karatangkung Jakop e tami athakaawme lah ao tie hah na panue awh han.

<sup>17</sup> Rahum yueng lah sui ka thokhai han. Sum yueng lah ngun ka thokhai han. Thing yueng lah rahum ka thokhai han. Talung yueng lah sum, hnâroumnae hah na kahrawikung lah ka ta han. Lannae hah na lawkcengkung lah ka o sak han.

<sup>18</sup> Na ram dawkvah, thama lah kamthang na thai mahoe h toe. Kâtheikârawngnae na ram dawkvah thai mahoe h toe. Hatei, na tapangnaw hah rungngangnae na ti vaiteh, na thonaw hah pholennae na ti han

<sup>19</sup> Kanî hah khodai lah angnae lah awm toung laipalah, thapa ni hai angnae ang mahoe h toe. Hatei, BAWIPA hah nang hane yungyoe angnae lah awm toung vaiteh, na Cathut teh na bawilennae lah ao han. <sup>20</sup> Na kanî teh khum boi mahoe h toe. Na thapa hai kum boi mahoe h toe. Bangkontetpawiteh, BAWIPA teh a yungyoe na angnae lah awm vaiteh, lungmathoenae hah a pout han. <sup>21</sup> Na taminaw koug lan awh vaiteh, ram hah yungyoe pou a pang awh han. Ka bawilennae ao thai nahan, ka kut hoi ka tawkvah e haiyah ka ung e cakang lah ao han. <sup>22</sup> Ka tami kathoenae hah 1,000 touh lah a coung vaiteh, a tha kayoun poung e hah miphun a tha kaawm poung lah a coung han. Ka BAWIPA ni atueng a kuep toteh tang ka pha sak han.

## 61

### *Rungngangnae kamthang*

<sup>1</sup> Mathoenaw koe kamthang dei hanelah BAWIPA ni satui na awi dawkvah, Bawipa Jehovah e Muitha teh kai dawkvah ao. Ahni ni a lungkareknaw dam sak hane hoi sannaw koe hloutnae pathang pouh hane hoi, pâkhi teh thongkabawtnaw koe thongim paawng pouh hanelah na patoun. <sup>2</sup> BAWIPA lungyok kum hoi, Cathut moipathung hnin dei hane hoi, a lungkamathout e pueng lungpahawi hanelah na patoun. <sup>3</sup> Ama teh pholen lah ao vaiteh, ahnimouh teh BAWIPA ni ung e, lannae thingkung telah kaw thai nahanelah, hraba yueng lah luhuem, lungmathoenae yueng lah lunghawinae satui, muitha thayounnae yueng lah pholennae khohna ahnimouh poe hane hoi, Zion vah lungkamathoutnaw lungpahawi hanelah na patoun telah ati. <sup>4</sup> Ayan vah ka rawkvah e hah bout a sak awh han. Ayan vah a raphoe awh e hah bout a thawng awh han. Se moikapap ka rawkvah tangcoung e hah bout a pathoup awh han. <sup>5</sup> Imyinnaw ni kangdout awh vaiteh, nangmae saring a khoum awh han. Ramlouknaw ni nangmouh hanelah law a sak awh vaiteh, misur takha a sak awh han. <sup>6</sup> Hatei, nangmouh teh BAWIPA e vaihma, telah na kaw awh vaiteh, Cathut e san telah ati awh han. Jentelnaw tawnta e hah na cat awh vaiteh, ahnimae bawilennae dawkvah na kâoup awh han. <sup>7</sup> Na kayanae yueng lah let hni touh bari lah na awm awh vaiteh, barihoehnae yueng lah amamae ham dawkvah a konawm awh han. Hatdawkvah, amamae ram dawkvah let hni touh hoi coe awh vaiteh, a yungyoe konawmnae teh ahnimae lah ao han.



<sup>8</sup> Bangkongtetpawiteh, kai Jehovah ni kângingnae hah ka lungpataw teh, lawp e hoi payonnae hateh, ka hmuma. Yuemkamculah ahnimanaw hah a tawk e ka poe vaiteh, ahnimouh hoi a yungyoe lawkkam ka sak han.

<sup>9</sup> Amamae catounnaw teh, Jentelnaw koe kamthang awh vaiteh, a canaw teh tampueng koe panue e lah ao awh han. Ahnimouh ka hmaut e pueng ni BAWIPA ni yawhawi a poe e miphun doeh tie hah a panue awh han.

<sup>10</sup> BAWIPA dawk ka o a nawm katang han. Ka hringnae teh ka Cathut dawk a lunghawi katang han. Bangkongtetpawiteh, yu kalatkung ni luhuem a huem e patetlah thoseh, vâ ka sak hane langa ni a kamthoup e patetlah thoseh, rungngangnae khohna hoi kai hah na pathoup teh, lannae angkidung hoi kai hah na khu toe.

<sup>11</sup> Bangkongtetpawiteh, talai ni pho a dâwn sak e patetlah Bawipa Jehovah ni tami pueng e hmalah, lannae hoi pholennae hah a dâwn sak van han.

## 62

### *Zion rungngangnae*

<sup>1</sup> Zion khopui tie Jerusalem khopui e lannae hah angnae patetlah rungngangnae hah ka ang e hmaiim patetlah a kamnue hoehroukrak kai teh duem kaawm mahoe. <sup>2</sup> Jentelnaw ni a lannae a hmu vaiteh, siangpahrangnaw ni na bawilennae a hmu awh han. BAWIPA pahni dawk hoi ka tâcawt e min katha lahoi nang na kaw awh han. <sup>3</sup> BAWIPA kut dawk e bawilennae bawilukhung hoi na Cathut kut dawk e bawinaw e bawilukhung lah na o han. <sup>4</sup> Nang teh pahnawt e tami tet mahoe toe. Na ram hai tami kingdinae telah tet mahoe toe. Hatei, ngai kaawm e telah ati awh vaiteh, BAWIPA teh nangmouh dawk a lunghawi vaiteh, na ram hai vâ a tawn han toe. <sup>5</sup> Thoundoun ni tanglakacuem a paluen e patetlah na capanaw ni a yu lah a paluen han. Yu ka paluen e thoundoun ni a ham e tanglakacuem dawk a lunghawi e patetlah na Cathut hai nang dawk a lunghawi han. <sup>6</sup> Oe, Jerusalem, rapan kalupnae hah ramvengnaw ka ring sak teh, karum khodai nâtuek hai duem awh awh mahoe. <sup>7</sup> Jerusalem kho a caksak teh, pholennae lah ao hoehnahan totouh BAWIPA hah duem kâhat sak awh hanh. <sup>8</sup> BAWIPA ni a rang lae kut a tha kaawm pounge a kutbuembue noe lahoi, lawk a kam teh, na tarannaw koe nangmae na tawk tangcoung e misurtui net awh mahoe toe. <sup>9</sup> Hatei, katawkkungnaw ni a ca awh vaiteh, BAWIPA hah a pholen awh han. Cungtalah ka thokhai e naw ni, ka hmuen kathoung thongma dawk misurtui a nei awh han.

<sup>10</sup> Longkha dawk hoi tâcawt awh, tâcawt awh. Taminaw cei nahan lam rakueng awh. Talai paten awh. Talungnaw takhoe awh. Taminaw hanelah mitnoutnae vo awh.

<sup>11</sup> BAWIPA ni talai apout totouh hanelah a pâpho toe. Zion canu koe hettelah dei pouh awh. Rungngangnae teh a pha roeroe han. Kenhaw! tawkpouh teh ama koe ao teh, a sak e hai a hmalah ao.

<sup>12</sup> Ahnimanaw teh BAWIPA ni ratang e tami, kathounge taminaw, ati awh han. Nang teh pâphawng e, ceitakhai hoeh e khopui ati awh han telah a ti.

## 63

### *BAWIPA e hnin dawk moipathungnae*

<sup>1</sup> Edom ram, Bozrah kho hoi a tho teh, hni ka paling e kâkhu laihoi ka tho e hah apimaw. Ka sungren e hni, a thaonae bawilennae lahoi



ka tho e teh apine. Kai teh lannae lahoi lawk ka dei niteh, rungngang hanelah athakaawme doeh. <sup>2</sup> Bangkongmaw na kâkhu e hni hah a paling teh na hni teh misur katinnae koe tami ni a kho e hoi a kâvan. <sup>3</sup> Misur paw hah kai kama dueng doeh katin toe. Tami moikapap e thung hoi kai koe buet touh hai awm awh hoeh. Bangkongtetpawiteh, lungkhuek laihoi katin toe. Lungkhuek lahoi ka coungroe teh, ahnimae a thi ni kaie hni dawk a tâcawn sin teh kaie hninaw hah kakhin sak toe. <sup>4</sup> Moipathungnae hnin teh ka lung dawk ao. Ahnimanaw ka ratangnae kum ni a pha toe. <sup>5</sup> Ka khet navah kabawmkung apihai awm hoeh. Hmoung ka ti nahai kapathawkung apihai awm hoeh. Hatdawkvah, kamae kut ni kama hanelah rungngangnae a sak toe. Ka lungkhueknae ni kai heh na man toe. <sup>6</sup> Taminaw ka lungkhueknae lahoi ka coungroe toe. Ka lungkhueknae lahoi puenghoi ka kanawi toe. Ahnimae thi teh talai dawk ka rabawk toe. <sup>7</sup> Pahren lungmanae patetlah BAWIPA ni lung na patawnae pueng thoseh, Isarelnaw koe a sak pouh e a lungmanae hai thoseh, BAWIPA e a lungmanae hoi, BAWIPA pahrennae teh ka pholen han. <sup>8</sup> Hatdawkvah, BAWIPA ni a dei e teh, ahnimouh teh ka tami katang doeh. Laithoe ka dei hoeh e camo lah ao. Hatdawkvah, ahnimae rungngangkung lah ka o. <sup>9</sup> Kângairunae dawkvah, a hmalah kaawm e kalvantami ni, ahnimanaw a rungngang teh a lungpatawnae lahoi a ratang. Ayan e tueng pueng dawk hai ahnimouh hah a po teh a hrawi awh.

<sup>10</sup> Hatei taran a thaw awh teh, Kathoung Muitha hah a lungmathoe sak awh. Hatdawkvah ahnimanaw hah a taran teh a tuk.

<sup>11</sup> Hat toteh, ayan e Mosi hoi a taminaw hah pahnim awh hoeh, hateh hettelah ati awh, ' tali thung hoi a tuhu kakhoumkungnaw hoi rei ka tâcawkhaikung Cathut te nâne ao. Kathoung Muitha ahnimanaw koe kapoekung nâne ao.

<sup>12</sup> Ka bawilen poung e, Mosi e aranglae kut hoi kahrawikung te nâne ao. Ama hanelah a yungyoe min a kâsai nahanelah ahnimae hmalah tui kâbawng sakkung te nâne ao.

<sup>13</sup> Ayawn dawk marang yawng sak e patetlah kangangkung awm laipalah, ka dungpoung e tui dawk hoi ahnimanaw kahrawikung te nâne ao.

<sup>14</sup> Ayawn dawk saringnaw ka cet e patetlah BAWIPA e Muitha ni a kangdue sak teh, hottelah a min sungren sak nahanelah namae na taminaw hah na hrawi toe ati awh.

### *Pankângai ratoumnae*

<sup>15</sup> Kalvan hoi khen cathuk haw. Nange thoungnae hoi na bawilennae hoi na onae hmuen koehoi khenhaw! Na thaonae hnosakenaw hoi na lungthahmeinae nâne ao. Na lungthin hoi na dounnae hoi na pahrennae teh yout koe a roum toung boma.

<sup>16</sup> Abraham ni kaimanaw na panuek awh hoeh. Isarelnaw hah na coe hoeh nakunghai, atangcalah, kaimae na pa lah nang teh na o. Ayan hoi kamtawng teh, kaimanaw na ka ratang e Jehovah nama doeh.

<sup>17</sup> Oe, BAWIPA, bangkongmaw na lamthung dawk hoi kaimanaw hah lam na phen sak vaiteh nang takihoeahnae lungthin hoi na pata sak han waw. Na san, râw kacoekungnaw kecu dawk bout ban haw.

<sup>18</sup> Na tamikathungnaw ni tueng kaduemca dueng a coe awh teh, na katarankungnaw ni na hmuen kathoung hah koug ka rawk lah rep a coungroe awh.



<sup>19</sup> Na uk boihoe e hoi na min ka phawt boihoe e ayan e tami patetlah doeh ka o awh toe.

## 64

<sup>1</sup> Oe, Nang ni kalvan paawng nateh kum haw. Na hmalah monnaw kâhuen naseh. <sup>2</sup> Hmai ni songnawng a kak e patetlah thoseh, tui a tangdo sak e patetlah thoseh, awm naseh. Hottelah pawiteh, na tarannaw ni na min panuek awh vaiteh, na hmalah vah miphun pueng ni a pâyaw awh han. <sup>3</sup> Kaimouh ni ka ngaihawi awh hoe e hlak, kângairu hno a sak toteh, na tho teh, monnaw teh na hmalah a kâhuat awh. <sup>4</sup> Ama kangaihawinaw hmalah hawinae ka sak e Cathut, nang hloilah alouke Cathut hah talai pek kamtawng hoi apinihai panuek boihoe, hnâ hoi hai thai boi hoe, mit hoi hmawt boihoe. <sup>5</sup> Onawmnae lahoi kalan lah ka tawk e, na lamthung dawk nang ka pahnim hoe e, hah nang ni na kâhmo, bokheiyah, na lungkhuek. Bangkongtetpawiteh, ka payon awh toe. Hete lamthung heh pou ka dawn awh toe. Rungngang lah kaawm awh han rah nama aw. <sup>6</sup> Bangkongtetpawiteh, kathounghoehe patetlah koug o awh toe. Lannae pueng teh, kakhin e hna hoi a kâvan. Maimouh pueng teh thinghna patetlah kamyai awh teh, mamae yonnae ni kahli patetlah na palek awh. <sup>7</sup> Na min ka kaw e, nang dawk kâuep hanelah mahoima kâhroecoe e tami buet touh boehai awm hoe. Bangkongtetpawiteh, a minhmai a hmo teh, maimouh hah mamae yon dawk na raphoe awh toe. <sup>8</sup> Hatei, Jehovah, nang teh kaimae na pa lah na o. Kaimouh teh amhrulai lah ka o awh. Nang teh kaimae hlaamkabokung lah na o. Kaimouh pueng teh, na kut hoi na sak e hno lah ao. <sup>9</sup> Oe BAWIPA, puenghoi na lungkhuek sak hanh. Kangeknae yon hah pou pâkuem hanh. Kenhaw! Kaimouh pueng teh BAWIPA e tami doeh.

<sup>10</sup> Kho kathoung teh kahrawng lah ao toe. Zion mon hai kahrawng lah ao toe. Jerusalem kho hai a rawk toe.

<sup>11</sup> Mintoenaw ni nang na pholennae hmuem, kaimae kathoung ni teh a mei kahawi e im teh, hmai a kak toe. Kaimouh ni ka ngai poung awh e hmuennaw teh koug a rawk toe.

<sup>12</sup> Oe BAWIPA, hetnaw heh na panguap han na ou. Duem na o takhai vaiteh, maimanaw hah puenghoi na ru sak han maw.

## 65

### *Lawkcengnae hoi rungngangnae*

<sup>1</sup> Kai na ka pacei hoe naw e lawk ka thai pouh teh, Kai na ka tawng hoe e ni na hmu awh toe. Kai hah na khi awh haw, na khihaw! telah ka min ka kaw hoe e miphunnaw koe ka dei pouh toe. <sup>2</sup> Amamouh ngai patetlah kahawihoehe lam ka dawn niteh, kangek e miphunnaw koelah, kanîruihui ka kut kadai pouh han. <sup>3</sup> Takha dawk thuengnae a sak awh teh, amhru van hmuithui hmai a sawi awh teh, ka lungkhuek nahanlah ka hmalah pou a sak awh. <sup>4</sup> Phuen dawk ka tahung niteh, arulae hmuem koe ka roe e, vokmoi ka cat ni teh panuetho e moi hang ka pahrap e ni, <sup>5</sup> Nama dueng awm haw. Kai koe hnai hanh, nang hlak bet ka thounghnawn ouk ati. Hot patet e taminaw teh, ka hnawng dawk e hmaikhu hoi pou ka kang e hmai patetlah doeh ao awh. <sup>6</sup> Ka hmalah thut lah ao dawkvah, duem kaawm mahoe, moi ka pathung han. Bokheiyah, na lungtabue dawk na payonnae hoi na mintoenaw e payonnae teh moi ka pathung van han telah BAWIPA ni ati <sup>7</sup> Ahnimouh ni teh, mon kalennaw dawk



hmuitui hmai a sawi awh teh, monruinaw dawk ka min a dudam awh. Hatdawkvah, hmaloe a sak awh e hah poe hanelah lungtabue dawk ka bangnue han. <sup>8</sup> BAWIPA ni bout a dei e teh, misurbom dawk misurtui katha hmu toteh, raphoe hanh, yawhawinae ao ouk ati awh e patetlah ka sannaw hane dawkvah, hottelah ka raphoe mahoe. <sup>9</sup> Jakop catoun thung hoi cati buet touh hai thoseh, Judah catoun thung hoi ka monnaw râw lah ka coe hane thoseh, ka tâco sak han. Kai ni ka rawi e naw ni ram hah râw lah a coe vaiteh, ka sannaw ni kho a sak nah awh han.

<sup>10</sup> Kai na ka tawng e taminaw hanelah, Sharon teh tutakha lah ao han. Akhor yawh hai maitohu roenae hmuen lah ao han.

<sup>11</sup> Nang teh BAWIPA ka pahnawt e, kaie kathounge mon ka pahnim e, Gad cathut hanelah caboi ka phai pouh e, Meni cathut hanelah kalawt tangcounge e misur ka awi e tami lah na o awh.

<sup>12</sup> Nangmouh teh, na parei vaiteh, tahloi koe na poe awh han. Abuem-lahoi na due awh nahanlah na tabut awh han. Bangkongtetpawiteh, nangmouh kai ni na kaw awh navah na pato awh hoe. Ka dei navah, na thai awh hoe. Ka hmaitung vah kathout hno na sak awh toe. Ka ngaihoe e hno hah na rawi awh.

<sup>13</sup> Hatdawkvah, Bawipa Jehovah ni a dei e teh, ka sannaw ni a ca awh han. Nangmouh teh na vonhlam awh han. Ka sannaw ni a nei awh han. Nangmouh teh tui na kahran awh han. Ka sannaw ni a konawm awh han. Nangmouh teh na kaya awh han.

<sup>14</sup> Ka sannaw ni lunghawi laihoi la a sak awh han. Nangmouh teh lungmathoe laihoi na ka awh han. Muitha lungmathoe laihoi na cingou awh han.

<sup>15</sup> Nangmouh teh ka rawi e taminaw koe na min thoebo hanelah na ceitakhai awh han. Bawipa Jehovah ni nang hah na thet vaiteh, a sannaw hah min louk hoi a kaw han.

<sup>16</sup> Talaivan vah mahoima yawhawi ka poe e teh, yuemkamcu e Cathut kâuep laihoi yawhawi a poe han. Talaivan thoe ka bo e teh, Cathut noe laihoi thoe a bo han. Bangkongtetpawiteh, ahmaloe e naw hah pahnim toe. Ka hmaitung vah a kahma toe.

### *Ka sungren e sak kathanae*

<sup>17</sup> Khenhaw! Kalvan katha hoi talai katha hah ka sak. Ahmaloe e kalvan hoi talai hah pouk mahoe, pâkuem mahoe toe.

<sup>18</sup> Ka sak e hno dawkvah, a yungyoe lunghawi awh nateh, konawm awh. Jerusalem dawk ka konawmnae lah khocanaw dawk ka lunghawinae lah ka sak han.

<sup>19</sup> Kai hai Jerusalem kho kecu dawk ka konawm han. Ka taminaw kecu dawk ka lunghawi han. Hote kho dawk khuika lawk hoi hramki lawk bout thai mahoe toe. <sup>20</sup> Hote kho dawk a kum kanaw e awm mahoe. A kum kakuep hoe e matawng hai awm mahoe. A kum 100 touh a pha nah kadout e hah camo telah pouk han. Ka yon e tami teh a kum 100 touh a pha nah dout pawiteh, thoebo e tami telah pouk han. <sup>21</sup> Ahnimouh teh ma ni sak e im dawk ao awh han. Ma ni patue e misur paw a ca awh han.

<sup>22</sup> Ahnimouh teh ma ni sak e im hah alouke ni awm nah awh mahoe. Ahnimouh teh misur a patue e hah alouke ni cat mahoe. Ka taminaw e hringnae teh thingkung se patetlah a saw vaiteh, ahnimouh teh ma ni sak e hno hah moikasawlah a hno awh han. <sup>23</sup> Ka rawi e naw teh, ayawmyin lah tawk awh mahoe. A kum kaduem e capa khe awh mahoe. Ma koehoi kamtawng teh, catounnaw teh, BAWIPA ni poe e yawhawinae ka pang e tami lah ao awh han. <sup>24</sup> Ahnimouh ni na kaw hoehnahlan ka pato han. A



dei awh lahun nah ka thai pouh han. <sup>25</sup> Asui hoi tuca teh cungtalai rei a pai han toe. Sendek ni maifo patetlah hram a ca han. Tahrun teh vaiphu a ca han toe. Kaie mon kathoung pueng daw k buet touh hoi buet touh pacekpahleknae, kâraphoenae awm mahoe h toe telah BAWIPA ni a ti.

## 66

### *A katang e bawknae hoi a kaphawk e bawknae*

<sup>1</sup> BAWIPA ni hettelah a dei, kalvan teh ka tahungnae bawitungkhung lah ao teh, talai teh ka khoktoungha lah ao. Namaw im na sak pouh awh han. Namaw ka kâhatnae hmu en ao han. <sup>2</sup> Bangkongtetpawiteh, hete hnocawngca pueng teh, ka kut hoi ka sak teh, kaawmnaw doeh telah BAWIPA ni ati. Hateiteh, ka roedeng naw hoi muitha hoi pankângai e tami, ka lawk daw k a pâyaw e tami hah ka khet han. <sup>3</sup> Maitotan ka thet e tami teh, tami ka thet e patetlah ao han. Tuca hoi thuengnae ka sak e tami teh, ui lahu en ka khoe e patetlah ao han. Tavai ka poe e tami teh, vok thi ka poe e patetlah ao han. Hmuitui ka thueng e tami teh, meikaphawk yawhawi ka poe e patetlah ao han. Mahoima lamthung ka kârawi e tami teh, panuetho e hno daw k a lungkahawi e patetlah ao han. <sup>4</sup> Hottelah amahoima ka kâdum e hah ka rawi han. A taki e hno hah ahnima e lathueng ka pha sak han. Bangkongtetpawiteh, ka kaw nah apinihai na pato hoe h. Lawk ka dei teh thai awh hoe h. Hateiteh, ka mithmu vah, yonnae a sak awh teh, ka lunghawihoe hnae hno hah a kârawi awh.

### *BAWIPA ni Zion lanna e lah a coe sak*

<sup>5</sup> A lawk daw k a pâyaw e naw, BAWIPA lawk thai awh haw. Nang ka hmuhma e na hmaunawng ha, ka min kecu daw k nangmouh kahreknaw ni, na lunghawinae ka hmu thai awh nahanelah, BAWIPA teh pholenna e awm seh telah ati awh, hateiteh a kaya awh han. <sup>6</sup> Khopui daw k hoi ruengruengtinae, Bawkim daw k hoi hramnae pawlawk, BAWIPA hramnae pawlawk, a tarannaw kakueplah moi a pathungnae pawlawk teh thai awh haw. <sup>7</sup> A pataw hoe hnahlan a khe teh, von a pataw hoe hnahlan camo a khe. <sup>8</sup> Hot patet e teh apinimaw a thai boi. Hot patet e teh apinimaw a hmu boi. Hnin touh daw k hoi ram hah khe thai han na maw. Vaitalahoi miphun a tâco thai han na maw. Bangkongtetpawiteh, Zion ni a pataw tahma nah camo tang a khe. <sup>9</sup> Khenae tueng daw k tâcawt sak laipalah, ka o han na maw, telah BAWIPA ni ati. Ca khesakkung ni ca tawn sak hanelah pasoung laipalah ka o han maw, telah Cathut ni a ti.

<sup>10</sup> Jerusalem ka lungpataw pueng, Jerusalem teh konawm khai awh. Ama kakhuinaw a ma lunghawikhai nateh konawm awh.

<sup>11</sup> Hottelah na teh awh pawiteh, ahnie sanu na net awh vaiteh na boum awh han. Ahnie tawnta e thung hoi rasat vaiteh, na nawm awh han.

<sup>12</sup> BAWIPA ni a dei e teh, roumnae palang patetlah thoseh, Jentelnaw e tawnta e teh ka lawng e tuiphuek tui patetlah thoseh, Jerusalem vah ka pha sak han. Nangmouh teh sanutui na net awh vaiteh, keng daw k tawmnae, khokpakhu daw k tawmnae hah na coe awh han.

### *Cathut uknae hoi lungkhueknae*

<sup>13</sup> A manu ni a ca lung a mawng sak e patetlah nangmouh lung ka mawng sak han. Jerusalem khopui daw k lung na mawng sak awh han.

<sup>14</sup> Hote na hmu awh toteh, na lung ahawi awh han. Na hrunaw hah ka hringsuep e thingkung patetlah a thao awh han. BAWIPA e a kut



hnotithainae teh sannaw koe thoseh, a lungkhueknae teh a tarannaw koe a kamnue han.

<sup>15</sup> Khenhaw! a lungphuennae ka patawpoung lah a kamnue nahane hoi, na yuenae hmaisaan patetlah a kamnue nahanelah, BAWIPA teh hmai rangleng hoi bongparui patetlah a tho han.

<sup>16</sup> Bangkongtetpawiteh, hmai hoi tahloi hoi, BAWIPA ni takthai hoi kahringnaw pueng lawk a ceng han. BAWIPA ni a thei e teh a pap poung han.

<sup>17</sup> Mahoima kâthoung sak hane hoi, mahoima kâkapek hanelah, takha koe kacetnaw, meikaphawknaw rahak vah, pou ka cet e, vokmoi hoi panuetho e moiham moi ka cat e naw pueng cungtalah he a kahma awh han telah BAWIPA ni a ti.

<sup>18</sup> Bangkongtetpawiteh, a sak awh e hoi a pouk awh e ka panue, miphun tangkuem hoi lawk phunkuep tangkuem hah, ka pâkhuengnae tueng a pha han. Tho awh vaiteh ka bawilennae hah a hmü awh han.

<sup>19</sup> Ahnimouh koe kamnuenae hah ka o sak han. Hahoi teh, ahnimouh rahak vah, rektapnae koehoi ka hlout e ka miphun tangkuem koe, Tarshish, Pul, licung longkawi e Lud, Tubal hoi Javan, ka mün kamthangnae ka panuek boihoeh e naw koe, tuipui namran ahlanae koe ka thak han. Hottelah, Jentelnaw koe ka bawilennae a pâpho awh han. <sup>20</sup> Hahoi Isarelnaw ni, kathoung hlaam hah thueng e hno lah BAWIPA e im daw k ouk a thokhai e patetlah miphunnaw pueng thung daw k hai na hmaunawngghanaw hah marang daw k hoi thoseh, leng daw k hoi thoseh, kâkayawt e van hoi thoseh, la daw k hoi thoseh, kalauk daw k hoi thoseh, Jerusalem mon kathoung daw k BAWIPA koe ouk a thueng awh e patetlah a thokhai awh han telah BAWIPA ni a ti. <sup>21</sup> Hotnaw thung daw k hoi tami tangawn vaihma hoi Levihnaw hanelah ka la han telah BAWIPA ni a ti. <sup>22</sup> Bangkongtetpawiteh, kalvan katha hoi talai katha ka sak hane teh, ka hmalah ka kangning hane patetlah, na catounnaw hoi na min a kangning han telah BAWIPA ni a ti. <sup>23</sup> Hahoi teh, hettelah han. Thapa a reinae koehoi bout a rei katha totouh, sabbath hnin hoi alouke sabbath hnin totouh moithangnaw pueng Kai baw k hanelah ka hmalah a tho awh han telah BAWIPA ni a ti. <sup>24</sup> Tâcawt awh vaiteh, kai taranlahoi kâ kaeknaw e ro hah a khet awh han. Bangkongtetpawiteh, pâri hai dout thai hoeh ni teh hmai hai roun thai mahoe. Tami pueng hanelah teh panuet a tho han.



## JEREMIAH

<sup>1</sup> Benjamin ram Anathoth e vaihma Hilkiyah capa Jeremiah e lawk, <sup>2</sup> Judah siangpahrang Ammon capa Josiah a bawinae kum hrahlaikathum nah ahni koe BAWIPA e lawk teh a pha. <sup>3</sup> Judah siangpahrang Josiah capa Jehoiakim a bawi navah, Judah siangpahrang Josiah capa Zedekiah a bawinae kum hrahlaibun abaw totouh hoi Jerusalem san la a ceikhainae thapa yung panganae totouh hai lawk te a pha.

### *Jeremiah kawnae*

<sup>4</sup> Hottelah BAWIPA e lawk teh kai koe a pha teh, <sup>5</sup> Von thung na sak hoehnahlan patenghai na panue toe. Camoim dawk hoi na tâco hoehnahlan patenghai na thoung sak teh, miphun naw koe profet lah o hane na cak sak toe, telah a ti. <sup>6</sup> Kai ni aya! Bawipa Jehovah khenhaw! lawk ka dei thai mahoe, bangkongtetpawiteh, ka nawca rah telah ka ti. <sup>7</sup> Hateiteh BAWIPA ni kai koe vah, kanawca rah tet hanh, bangkongtetpawiteh, na patoun e pueng koe na cei vaiteh, kâ na poe e pueng hah na dei han. <sup>8</sup> Ahnimanaw e minhmai hah, taket hanh, bangkongtetpawiteh, nang na rungngang hanelah, nang koe kai ka o telah BAWIPA ni a ti. <sup>9</sup> Hottelah, BAWIPA ni a kut a pho teh, ka pahni hah a tek. BAWIPA ni kai koe khenhaw! na kâko dawk ka lawk teh, ka hruek toe. <sup>10</sup> Khenhaw! miphunnav hoi siangpahrang uknaeram thung vah, phawk vaiteh, rawp sak han, raphoe vaiteh tâkhawng han, kangdue sak vaiteh ung hanelah, sahnin totouh hoi kai ni na rawi toe telah a ti.

<sup>11</sup> Hahoi BAWIPA e lawk teh kai koe a pha teh, Jeremiah bangmaw na hmu telah ati. Kai ni, Almond thing kang ka hmu, telah ka ti.

<sup>12</sup> BAWIPA ni kai koe vah na hmu e teh ahawi, bangkongtetpawiteh, ka lawk teh, sak hanelah coungkacoe ka o telah a ti. <sup>13</sup> BAWIPA lawk teh apâhni e kai koe a phateh, bangmaw na hmu telah ati. Kai ni ka tangdaw e hlaam, atung lah kangvavi e hah ka hmu, telah ka ti.

<sup>14</sup> BAWIPA ni kai koe vah, ram thung e kaawmnaw pueng hanelah, atunglah hoi rawknae a pha han. <sup>15</sup> Khenhaw! atunglae uknaeram imthungnav pueng hah, ka kaw han telah BAWIPA ni a dei. A tho awh vaiteh, Jerusalem kâennae longkha atengpam kalupnae tapangnav pueng hoi Judah khopuinaw pueng daw e bawitungkhung hah a hruek han.

<sup>16</sup> Kai na pahnavt awh teh, cathut alouke koe hmuittui hmai a sawi awh te, amamae kut hoi a sak awh e hah, a baw awh dawkvah, amamae yonnae a lathueng vah, kaie lawkcengnae ka pâpho han.

<sup>17</sup> Hatdawkvah, coungkacoe awm nateh thaw, kâ na poe e naw pueng hah, ahnimouh koe dei. Ahnimae hmalah takinae tawn hanh telah nahoe pawiteh, ahnimae hmalah takinae hoi na o sak han. <sup>18</sup> Khenhaw! sahnin e a hnin daw, hete ram pueng hoi, Judah Siangpahrang hoi, kahrawikungnav hoi, vaihmanaw hoi, hote ramnav thung e rapan ka tawn e khopuinaw hoi, sumkhom hoi, rahumtapang lah na sak toe. <sup>19</sup> Nang teh na tuk awh han, hatei na tâ awh mahoe, bangkongtetpawiteh, nang rungngang hanelah nang koe ka o, telah BAWIPA ni a ti.



<sup>1</sup> Hahoi BAWIPA e lawk teh kai koe a pha. <sup>2</sup> Cet nateh, Jerusalem ka thai lah hram haw. BAWIPA ni hettelah a dei, phaw hoeh e kahrawng hoi kingkadi e kahrawng dawk kaie hnuk na kâbang awh navah, na nawca nah, na ngainae hoi na lawkkam na lungpatawnae hah ka pahnim hoeh. <sup>3</sup> Isarel te BAWIPA koe thoungae lah ao, hmaloe e aluepaw lah ao. Ahni kacatnaw pueng teh, raphoe lah ao han. Ahnimae lathueng vah, rawknae a pha han, telah BAWIPA ni a dei. <sup>4</sup> Oe, Jakop imthung hoi Isarel imthungnaw pueng BAWIPA e lawk hah thai awh haw. <sup>5</sup> BAWIPA ni hettelah a dei. Na mintoenaw ni kai dawkvah bangpatet e lanhoehtae maw a hmu awh teh, kai koehoi kahlatpoung lah a cei te, meikaphawk pâlei teh, kabawknaw lah a coung awh. <sup>6</sup> BAWIPA ni Izip ram hoi na tâcokhai teh, kingkadi e kahrawng, tangkom apapnae hmuen, duenae tâhlip hoi, thingyeiyawn pinihai a cei hoeh nae, ao boihoehtae hmuen daw, kacetkhainaw hah, na maw ao telah hai bout tet awh hoeh. <sup>7</sup> Canei hane kahawi apapnae ram daw na kâenkhah awh. Hateiteh, na kâen awh toteh, ka ram daw na kamhnawng awh teh, ka râw hah panuetttho e lah na coungsak awh. <sup>8</sup> Na maw BAWIPA teh ao telah, vaihmanaw ni tet awh hoeh. Cakathutkungnaw ni hai kai na panuek awh hoeh. Ka ukkungnaw ni hai, kai na taran awh teh, profetnaw ni Baal e lawk hah a pâpho awh teh, cungkeihoehtae hno hah a pâlei awh. <sup>9</sup> Hatdawkvah, namamouh hoi na catounnaw totouh, kai ni na taran awh han, telah BAWIPA ni a ti. <sup>10</sup> Bangkongtetpawiteh, Kittim tuilum hloilah cet awh nateh, khen awh. Kedar ram daw, tami patoun awh nateh, kahawicalah pouk awh, het patet e hno het ao boimaw. <sup>11</sup> Miphun alouke ni amamae cathut hah cathut katang nahoehtae ei, a thung boimaw. Hatei ka taminaw ni bawilennaenaw hah banghai cungkeihoehtae lah a thung awh toe. <sup>12</sup> Oe, Kalvannaw, kângairu awh, muenruengthaw lah, pâyaw hoi awm awh, telah BAWIPA ni a dei. <sup>13</sup> Bangkongtetpawiteh, ka taminaw ni kathoute kahni touh a sak awh. Tui kahring a phueknae, kai hah na ceitakhah awh teh, songkong kâbangng e tui kamuem thai hoehtae hah a sak awh.

<sup>14</sup> Isarel teh san na maw. Ahni teh, im hoi ka tâcawt e san na maw. Bangkongmaw lawphno lah a coung. <sup>15</sup> Sendektan kanawnaw ni a huksin awh. Nangmouh koe a hram teh, a ram hah koug a raphoe awh. A khopui hai karingkung awm laipalah hmai be a kak. <sup>16</sup> Noph tami hoi Tahpanhes tami nihai, na bawilukhung hah rak a hem awh. <sup>17</sup> Nangmanaw lam ka hrâwi e BAWIPA Cathut hah na pahnawt awh dawkvah, hete heh nangmouh lathueng a pha sak nahoehtae. <sup>18</sup> Sihor tui nei hanelah, bangkongmaw Izip lamthung na dawn. Euphrates palang tui nei hanelah, bangkongmaw, Assiria lamthung na dawn. <sup>19</sup> Na hawihoehtae ni na hringnae a toun vaiteh, hnukkhu lah na bannaenai na yue han. Hatdawkvah, BAWIPA Cathut na pahnawtnae hoi, kai na takinae na thung vah, kaawm hoehtae e hah, yonnaenai hoi, kakhat e doeh tie hah, kancengcalah panuek, telah ransahu Bawipa Jehovah ni a dei. <sup>20</sup> Bangkongtetpawiteh, ayan e na kahnam hah ka khoe teh, a rui hai ka bouk toe, mon rasang tangkuem hoi, thing rahim tangkuem vah, na tabut teh, tak na kâyo, nange kâ ka ek mahoehtae telah na ti. <sup>21</sup> Kahawipoung ati hoi ka talue e misur lah na ung. Bangkongmaw, ka hmatung hoi na kamlang teh, misur kaphawk lah na coung. <sup>22</sup> Bangkongtetpawiteh, longtui hoi na kâpasu teh, sapet moikapap na ka hno nakunghai, na yonnaenai teh, ka hmalah a kamnue, telah Bawipa Jehovah ni a ti. <sup>23</sup> Ka kâkhinsak hoehtae, Baal hai ka kâbang hoehtae, telah bangkong na tithai, tanghling daw na



khosaknae khenhaw. Na sak e hah pahnim hanh. Nang teh yuengyoe kâva e kalauk patetlah na o. <sup>24</sup> Kahrawngum kaawm niteh, cuknae lahoi kahlî ka pahap e kahrawng e la atueng a pha toteh apini maw, a ngang pouh thai han. Katawnkungnaw hah reithai hoi awm hanh naseh, atueng akuep nah bout a hmu awh han doeh. <sup>25</sup> Na khok dawkhokkhawm khawm laipalah awm hanh, na adangka hai ke hanh naseh. Hatei nang ni na ngaihawi hane awm hoehe toe. Bangkongtetpawiteh, imyin hah lung ka pataw teh, a hnuk vah kâbang han, telah na ti. <sup>26</sup> Tamru a man teh, kaya e patetlah, Isarel imthung te a kaya awh toe. Ahnimouh hoi, ahnimae siangpahrangnaw, bawinaw, vaihmanaw hoi, profetnaw hoi, a kaya awh. <sup>27</sup> Thingkung koevah, apa lah na o, a titeh, lungsongpui koe, kahrawikung lah na o, telah ti awh, bangkongtetpawiteh, Ahnimae a hmalah laipalah, hnuklah na kamlang takhai awh. Hateiteh, rucatnae a kâhmo toteh, thaw haw, kaimouh na rungngang haw ati awh han. <sup>28</sup> Hateiteh, na sake na cathut hah, na maw ao. Na rucatnae dawkhoe hoi nangmanaw na rungngang thai pawiteh, ahnimanaw hah thaw sak haw khe, bangkongtetpawiteh, oe, Judah, na cathut te na khopuinaw yit touh a pha awh.

<sup>29</sup> Bang kecu dawkhoe maw, kaie lathueng vah na phuen na ang awh. Nangmouh pueng ni kai na taran lahoi, lawk na ek awh, telah BAWIPA ni a ti. <sup>30</sup> Ayawmyin lah na canaw ka rek teh, kâponae lah hno ngai awh hoehe. Kamamae profetnaw koug a ca. <sup>31</sup> Oe, atu se thung e taminaw, BAWIPA e lawk hah khenhaw! Isarel hanelah, kahrawngum hoi kahmawt e ram lah ka o maw. Bang kecu dawkhoe maw, ka taminaw ni, bawi lah ka o awh, nang koe ka tho mahoehe toe, telah ati awh. <sup>32</sup> Tanglakacuem ni a kamthoupnae, yuvâ kâpaluen e ni kâpathoupnae a pahnim thai han na maw. Hatei ka taminaw ni hnin moikasaw lah na pahnim awh. <sup>33</sup> Bangkongmaw lungpatawkung tawng hanelah na kamthoup. Hatdawkvah napui kahawihoehe ni na hringnuen na cangkhai toe. <sup>34</sup> Yonnae ka tawn hoehe e karoedengnaw na theinae thi hah na hni pawî dawkhoe hmu. Arulah ka tuet teh ka hmu e nahoehe. Hatei hete hnouaw pueng teh hmantang vah hmu e doeh. <sup>35</sup> Hatei nang ni yonnae ka sak hoehe dawkvah, a lungkhueknae teh kai koe hoi a roum han doeh, khenhaw! yonnae ka sak hoehe na ti dawkvah, nang na taran lahoi yah, ka lawk hah bout ka pouk han rah, telah a ti. <sup>36</sup> Bangkongmaw, na hringnae kâthung hanelah, yuengyoe na kâva. Assiria na kayakhai e patetlah, Izip hai na kayakhai han. <sup>37</sup> Na lû dawkhoe na kut na toung hoi ahni koehoi na cei han, bangkongtetpawiteh, BAWIPA ni na kâuepkhai e hah a pahnawt teh, ahnimouh koehoi hawinae na hmawt mahoehe.

### 3

#### *Isarel te kaya panuek hoehe*

<sup>1</sup> Tami buet touh ni a yu hah a ma teh, napui ni ahni hah a ceitakhai teh, ayâ alouke yu lah awm pawiteh, tongpa ni hote napui teh bout a la han na maw. Hote ram teh ka patawpoung lah khin sak hoehe na maw, telah ati awh. Hateiteh nang teh, na ngai e naw pueng koe tak na kâyo. Hatei kai koe bout na ban telah, BAWIPA ni ati. <sup>2</sup> Hmuenrasang cailum hmuen koe loungek nateh khenhaw! tongpa ni na ikhai hoehe nae hmuen ao maw. Ram tangkuem dawkhoe Arabia taminaw patetlah, ahnimouh na ring laihoi, lam teng vah na tahung teh, na tak kâyonae hoi, na hawihoehe na lahoi, ram thung koug na khinsak toe. <sup>3</sup> Hatdawkvah, khorak sak laipalah, hnukteng e kho hai rak hoehe toe, tak na kâyonae tampa hah na sin teh,



kaya na panuek hoe. <sup>4</sup> Apa, ka nawca navah na kahrawikung lah na o, telah kai na kaw nahoehmaw. <sup>5</sup> Nang teh lung pou na khuek han maw. Apout totouh maw na lung pou khuek han, khenhaw! hot patetlah, lawk na dei teh, na tithai totouh, yonnae hah na sak.

<sup>6</sup> Hothloilah, Josiah siangpahrang se nah hai, BAWIPA ni kai koe hettelah a dei, hnuklah ban han ka ngai e Isarel ni a sak e hah, na hmu maw. Mon rasang pueng daw k a luen teh, thing rahim tangkuem vah tak a kâyo. <sup>7</sup> Hete hnonaw a sak hnukkhu hoi, kai koe bout a ban han doeh, telah ka ti. Hatei bout ban ngai hoe, yuemkamcu hoe e a nawnggha Judah ni a hmu. <sup>8</sup> Hatdawkvah, hnuklah a bannae ni Isarel ka uicuk sak naw hah ka hmu. Kama teh kâmanae ca hah ka poe. Hat nakunghai yuemkamcu hoe e a nawnggha Judah ni bout taket hoe. Hatei ahni hai a cei teh, tak a kâyo van. <sup>9</sup> Takkâyona e hoi ram hah a khin sak teh, thing hoi talung koe a uicuk. <sup>10</sup> Hete hnonaw hloilah kamcu hoe e a nawnggha napui Judah teh lungthin katang hoi ban laipalah, ka kâsak e lah a ban, telah BAWIPA ni a dei. <sup>11</sup> BAWIPA ni kai koe hettelah a dei. Hnuklah ka ban e Isarel ni yuemkamcu hoe e Judah hlak hai kalanhnawn la a kammue. <sup>12</sup> Cet nateh, hete lawk he tung lah pâpho, hnuklah kamlang e Isarel ban leih telah BAWIPA ni ati. Lungkhueknae minhmai hoi na khen mahoe. Bangkongtetpawiteh, lungmanae hoi ka kawi e lah ka o, telah BAWIPA ni ati, lungkhueknae hoi poe kaawm mahoe. <sup>13</sup> BAWIPA na Cathut na taranna e hoi thingkung rahim e ram alouknaw koe, tak na kâyona e hoi, ka dei e lawk na yuem hoe kecu dawkvah, na payonnae hah pâpho, telah BAWIPA ni ati. <sup>14</sup> Oe, hnuklah kamlang e catounnaw ban awh, telah BAWIPA ni ati. Bangkongtetpawiteh, nangmanaw kountoukkung lah ka o. Khopui daw k hoi tami buet touh, imthung daw k hoi tami kahni touh na la awh vaiteh, Zion vah na hrawi awh han.

<sup>15</sup> Panuena e hoi, thouthai lungangnae hoi, nangmouh kountoukkung, kaie lungthin ka tawn e, tukhoumkung hah na poe awh han. <sup>16</sup> Hahoi hettelah ao han. Hatnae tueng daw k ram thung vah, moikapap na kamphung tore i teh, ahnimouh ni 'BAWIPA lawkkam thingkong telah tet awh mahoe toe, a pouknae naw daw k hai pâkuem awh mahoe toe. Cet hai na cet sin awh mahoe, sak hai na sak awh mahoe toe, telah BAWIPA ni ati. <sup>17</sup> Hatnae tueng daw k Jerusalem teh, BAWIPA bawitungkhung telah ti han. Hawvah miphunnaw pueng hah BAWIPA e min lahoi Jerusalem vah a kamkhueng awh han. Kahawihoe e pouknae kâpoena e hah tarawi awh mahoe toe. <sup>18</sup> Hatnae hnin daw k Judah imthung hah Isarel imthung hoi rei awm awh vaiteh, na mintoenaw koe râw hanelah ka poe e, ram daw k tung lae ram hoi cungtalâh tâco awh han.

<sup>19</sup> Hateiteh, kai ni bangtelamaw miphunnaw râw kahawie kanawm-poung e ram hah ka poe teh, catounnaw koe vah, na hruek thai awh, telah ka ti. Apa telah na kaw vaiteh, na kangheng takhai mahoe toe, telah ka ti. <sup>20</sup> Yu buet touh ni yuemkamcu hoe lahoi a vâ a ceitakai e patetlah, oe Isarel imthungkhunaw yuemkamcu hoe lahoi na dum katang awh, telah BAWIPA ni ati. <sup>21</sup> Isarel catounnaw kâheinae hoi na khuinae lawk hah, karasange cailum hmu en daw k hoi ka thai toe. Bangkongtetpawiteh, amamae lamthung hah kamlang takhai teh, BAWIPA Cathut hah a pahnim awh. <sup>22</sup> Oe, hnuklah kamlang e canaw bout ban awh haw, hnuklah na kamlangnae hah na dam sak han. Hatei nang koe ka tho. Bangkongtetpawiteh, nang nama teh kaimae BAWIPA Cathut la na o. <sup>23</sup> Mon daw k hoi rungngangnae hmu hane ngaihawinae



teh, bang cungkeinae awm hoe. Monnaw puenghai cungkeinae awm katang hoe. Isarel rungngangnae teh, BAWIPA Cathut koe dueng doeh ao. <sup>24</sup> Bangkongtetpawiteh, ka nawca hoi ka mintoenaw ni a tawk e a tuhunaw hoi, saringnaw, a canu a capanaw totouh, kayanae ni be a ca awh. <sup>25</sup> Kayanae dawk ka i awh teh, yeiraipone ni, na ramuk awh. Bangkongtetpawiteh, BAWIPA Cathut taranlahoi ka yon awh teh, kamamouh hoi mintoenaw ni ka nawca hoi sahnin totouh, BAWIPA Cathut e lawk hah ka tarawi awh hoe.

## 4

<sup>1</sup> Oe, Isarel na ban pawiteh, kai koe vah ban, telah BAWIPA ni ati. Panuet na thonae hah ka hmaitung hoi na tâkhawng pawiteh, puen e lah na awm mahoe. <sup>2</sup> BAWIPA teh a hring, telah lawkkatang hoi lawkcengnae hoi, lannae dawk lawk na kam vaiteh, BAWIPA lahoi miphunnaw pueng ni amamouh dawk yaw ka hawi e lah ao awh han. Ahnimouh dawk pholennae lah ao awh han telah ati. <sup>3</sup> Bangkongtetpawiteh, Judah taminaw hoi Jerusalem taminaw koe BAWIPA ni hettelah a dei. Na laikawknaw hah kanaw awh nateh, pâkhing um vah cati tu hanh awh. <sup>4</sup> Nangmouh Judah taminaw hoi Jerusalem vah kho kasaknaw hanelah namamae lungthin vuensom hah a awh telah nahoe pawiteh, yonnae na sak e kecu dawkvah, ka lungkhueknae teh hmai patetlah tawk vaiteh, apinihai padout thai laipalah na kang payon awh vaih.

### *Ka phat tawmlei e rawknae*

<sup>5</sup> Judah ram dawk pathang nateh, Jerusalem vah pâpho awh. Ram thung vah, mongka ueng nateh hram awh. Cungtalah kamkhueng nateh, rapan ka tawn e kho dawkvah, kêen awh sei telah tet awh. <sup>6</sup> Zion mon koelah lukkarei pathout awh. Rounnae tawng awh nateh uet hanh awh. Bangkongtetpawiteh, atunglah hoi kalenpounge rawknae hoi kathoute ka pha sak han. <sup>7</sup> Ratu thung hoi sendek tâcawt vaiteh, miphunnaw ka raphoeung a tho lahun. Na ram hah raphoe hanelah a onae hmuen koehoi a tâco toe. Na khopui hah tami ao hoe na hanlah a raphoe awh han. <sup>8</sup> Hat kecu dawkvah, burihni kâkhu awh nateh kap awh haw. Hramki awh. Bangkongtetpawiteh, ka patawpoung e BAWIPA lungkhueknae hah maimouh koehoi kamlang hoe rah.

<sup>9</sup> Hote hnin dawk teh hettelah ao han telah BAWIPA ni ati. Siangpahrang hoi kahrawikungnaw e lungthin hah puen tâsue laihoi ao awh han. Vaihmanaw hah kângairu lah awm awh vaiteh, profetnaw ni a lungpout awh han.

<sup>10</sup> Hahoi kai ni Oe! Bawipa Jehovah, hete taminaw hoi Jerusalem hah pueng hoi na dum toe, tahloi ni a hringnae a thut navah, rounnae na hmu han na ti telah ka ti.

<sup>11</sup> Hatnae tueng dawk teh, hete taminaw hoi Jerusalem koe, kahrawng arasangnae cailum hmuen koehoi kabetsoung e kahli ni ka taminaw hoi ka canunaw koe lah ahnimouh palek sak hane hoi thoung sak hanelah laipalah kahli a tho han. <sup>12</sup> Hotnaw hanelah ka patawpoung e kahli kai koehoi a tho han. Ahnimouh taranlahoi lawkcengnae hai ka dei han, telah tie lah ao han.

<sup>13</sup> Khenhaw! tâmai patetlah bongparui patetlah kaawm e rangleng hoi a tho han. A marang teh mataw hlak hai aranghnawn. Maimouh teh yawkathout e lah o awh, rawknae koe lah pha awh toe. <sup>14</sup> Oe, Jerusalem rungngang lah na o thai nahan, ka thout e lungthin hah thoung sak totouh maw pouk payonnae na thung vah ao han. <sup>15</sup> Bangkongtetpawiteh,



Dan ram hoi lawk a tâco teh, Ephraim mon hoi kathoute hah a pâpho. <sup>16</sup> Miphun tangkuem koe dei awh. Oe Jerusalem taranlahoi pâpho awh. Khenhaw! ram hlanae koehoi katuettaw a tho teh, Judah khopuinaw taran lah hoi a hram awh. <sup>17</sup> Kai na taran awh dawkvah, law karingkungnaw patetlah a tengpam hoi a kalup awh telah BAWIPA ni ati. <sup>18</sup> Na hringnae na nuencang hoi na tawksak e ni hete hno heh, na lathueng vah a pha sak. Hetteh kakhat e, na hawi awh hoe h nae lah ao dawkvah, na lungthin hah a thut.

<sup>19</sup> Oe, ka hringnae, ka hringnae, ka lungthin roeroe heh a patawpoung. Ka thung vah ka lungthin hanghangkâan. Duem kaawm thai hoe h. Tarantuknae pawlawk hoi kâhructuetnae mongka ueng e pawlawk hah na thai dawkvah Oe, ka hringnae duem kaawm thai hoe h. <sup>20</sup> Rawknae dawkvah rawknae a hram. Bangkongtetpawiteh, ramnaw pueng hah a rawk toe. Kaie lukkareim hah vai touh hoi a rawk teh, lukkarei hai tawkkadek daw k a rawk. <sup>21</sup> Atueng nâsittouh maw tarantuknae lukkarei hah ka hmu vaiteh, mongka lawk ka thai han vai. <sup>22</sup> Bangkongtetpawiteh, ka taminaw teh a pathu poung dawkvah, kai na panuek awh hoe h. Camo ka pathu e panuena e ka tawn hoe h e patetlah ao awh. Kathout e sak hanelah a lungang awh eiteh, hawinae sak hane panuek awh hoe h. <sup>23</sup> Talai ka khet navah a hrawnghrang pui lah ao. Kalvan hai ka khet navah, a angnae awm hoe h. <sup>24</sup> Mon hai ka khet navah, koug a pâyaw. Monruinaw pueng hai koug kâkapek <sup>25</sup> Ka khet navah, taminaw hai awm hoe h. Kalvan e tavanaw pueng hai koug kamlang. <sup>26</sup> Ka khet navah kahawi e law hah kahrawng lah ao toe. BAWIPA e hmalah, pueng hoi a lungkhueknae hmalah khopuinaw pueng hai a rawp awh. <sup>27</sup> Bangkongtetpawiteh, BAWIPA ni hettelah a dei. Ramnaw pueng kingdi han. Hateiteh, abuemlahoi teh ka pout sak mahoe h. <sup>28</sup> Hote hno kecu daw k talai ni a cingou han. Lathueng lae kalvan hai a hmo han. Bangkongtetpawiteh, ka dei toung dawkvah, ka kâcai toe. Pankângai vaiteh, bout kamlang mahoe h toe. <sup>29</sup> Marangransanaw hoi licung ka e pawlawk hoi khopui koug a yawng han. Ka hmawt e ratu thung vah kâen awh vaiteh, talung daw k a luen awh han. Khonaw pueng cettakhai vaiteh kho ka sak e buet touh boehai awm awh mahoe h. <sup>30</sup> Na rawk torei teh, bangtelamaw na ti han. Ka paling e khohna nakunghai, sui puengcang hoi na kamthoup nakunghai, mitlakuem na kâhluk nakunghai, aphu kaawm hoe h e na kamthoup rumram e doeh. Na thoundounnaw ni na dudam awh mingming han. Na hringnae thei hanlah a tawng awh han. <sup>31</sup> Bangkongtetpawiteh, napui ni camo khe pataw khangnae kâhram pawlawk ka thai. Camin ka khe e ni pataw a khangnae doeh. Zion canu kâha a uek teh a kut a dâw teh ka yawthoe poung toe, bangtelah, tamikathoutnaw kecu daw k ka hringnae ka rei thai poung toe telah ati.

## 5

### *Cathu lawkcengnae teh a lan*

<sup>1</sup> Jerusalem khouthung vah yawng nateh, thongma hoi khen nateh panuek awh. Thongma tanghling hah khen awh nateh, tami buet touh banghai lawkkatang ka tawng e lawkcengkung na hmawt awh pawiteh Jerusalem teh ka ngaithoum han. <sup>2</sup> BAWIPA a hring telah a dei awh nakunghai, laithoe hoi thoe a kâbo awh. <sup>3</sup> Oe, BAWIPA lawkkatang teh, hmu han na ngai e nahoe hmaw. Na hem awh nakunghai ka lung mathout hoe h. Na raphoe nakunghai, na tounnae hah tawm ngai awh hoe h. Lungsongpui



hlak hai a pata teh, a tampanaw hah a te sak teh bout ban ngai kalawn aw hoeh. <sup>4</sup> Hatdawkvah, kai ni, hetnaw heh tami karoedengnaw doeh, ahnimouh teh a pathu awh, bangkongtetpawiteh, BAWIPA e lam hoi amamae Cathut lawkcengnae hah panuek awh hoeh. <sup>5</sup> Tami kalentoenaw koe ka cei vaiteh, ahnimouh koe lawk ka dei han. bangkongtetpawiteh, ahnimouh ni, BAWIPA e lam hoi amamae Cathut lawkcengnae han a panue awh, telah ka ti. Hateiteh, hetnaw ni, lungthin suetalah kahnam hah a khoe awh teh, kateknae rui a rathap awh. <sup>6</sup> Hatdawkvah, ratu thung e sendek ni ahnimouh teh a kei awh han. Asui ni a raphoe awh han. Takai ni khopui pawm vaiteh, ka tâcawt e pueng vekrasen lah a phi han. Bangkongtetpawiteh, lawkeknae hah apap teh, hnuklah kamlangnae apap poun. <sup>7</sup> Hete hno daw, bangtelamaw na ngaithoum thai han. Na canaw ni na ceitakhai awh teh, Cathut lah kaawmhoehnaw koe lah thoe a kâbo awh. Kaboumcalah ka kawkhik torei teh, a uicuk awh teh, tak kâyawt e im vah, a kamkhueng awh te, a yon awh. <sup>8</sup> King kaboumlah rawka ka cat e marang patetlah ao awh, tami pueng ni amamae imri e a yunaw hah a nôe awh teh a cairing sin awh. <sup>9</sup> Hete hnonaw kecu dawkvah, ka rek mahoe h namaw telah BAWIPA ni ati, hot patet e miphun lathueng vah, ka pathung mahoe h namaw. <sup>10</sup> A rapan dawkvah, kâen nateh, koun raphoe awh. Hateiteh, abuemlah teh raphoe hanh awh, a cakang hah lat awh. Bangkongtetpawiteh, BAWIPA e nahoe. <sup>11</sup> Bangkongtetpawiteh, Isarel imthung naw hoi Judah imthung ni ka lathueng vah, huenghai hawi a sak awh, telah BAWIPA ni a dei. <sup>12</sup> BAWIPA teh laikathout e lah a pouk awh teh, ahni ni banghai tet katang mahoe h, rucatnae hai maimouh lathueng phat sak katang mahoe h, tahloi hoi takang hai kâhmo katang mahoe h. <sup>13</sup> Profetnaw teh kahli doeh, ahnimouh daw lawkatang awm hoeh, hatdawkvah ahnimae a lawk teh amamouh hanelah awm yawkaw seh, ati awh.

<sup>14</sup> Hatdawkvah kalvan ransabawi ni hettelah a dei, ahnimanaw ni hete lawk a dei tangcoung dawkvah, kai ni ka lawknaw heh na pahni daw hmai lah ka o sak vaiteh he e taminaw heh thing lah kacoungsak vaiteh hmai ni koun a kak awh han. <sup>15</sup> Oe Isarel imthungkhunaw, nangmanaw ka tuk hanelah kho hlanae koehoi miphun thasai ka kaw han, ayan hoi kaawm boi e tha kaawm poun, nangmouh ni a lawk na thai panuek awh hoeh e taminaw ka kaw han, telah BAWIPA ni a ti. <sup>16</sup> Ahnimae palanaw teh sut kamawng e phuen lah ao teh abuemlahoi thakasai pong e lah ao awh. <sup>17</sup> Ahnimouh ni na tangcoung e cang hai na ca han e rawca pueng haiyah koun a ca vaiteh, na capanaw hoi na canunaw ni a ca awh hane hai koun a ca awh han. Na maitonaw hoi na tunaw hai a ca han, na misurkung hoi thaibunglungnaw hai a ca han, rapan ka tawn e khonaw hai telah hoi koun a raphoe awh han.

<sup>18</sup> Hahoi teh hatnae hnin nah kai ni koun na pathup awh mahoe h, telah BAWIPA ni a ti. <sup>19</sup> Taminaw ni, bangkongmaw maimouh BAWIPA Cathut ni hettelah maimouh van hno a sak vai. Telah na pacei awh vah, nangmouh ni ahnimouh koe, "nangmouh ni kai na hnoun awh teh ramlouk cathut thaw hah na ram thung na sak van awh e patetlah, atu na ramdaw k e laipalah ram alouke thaw teh na taw k a han toe teh poeh, telah BAWIPA ni a pâpho.

<sup>20</sup> Hete lawk heh Jakop imthungkhu koe dei poeh, Judah ram thung vah pâpho awh. <sup>21</sup> Oe nangmouh tamipathu hoi panuena e laipalah, mit na tawn awh eiteh, kahmawthoe hnaw, hnâ na tawn awh eiteh kathaihoe hnaw hetheth thai awh haw. <sup>22</sup> Na taket awh hoeh maw. Telah



BAWIPA ni a dei. Ka hmalah na pâyaw awh mahoe h maw. Kai ni tui pui teng vah langri hanlah sadi ka sak, tapoung thai hoe h nahan yungyoe sak hanelah ao. Tuipui tuicapa ka tho nakunghai, tapoung thai mahoe h.  
<sup>23</sup> Hatei ka taminaw ni a lungpata awh teh taranthawnae lungthin a tawn awh; tarantuk hanlah a yawng awh. <sup>24</sup> Amamouh roeroe ni a lungthin hoi hai, “a tue nah hmaloe kho hoi hnuk ten kho ka rak sakkung, canga tue nah ka kesakkung, BAWIPA maimae Cathut heh takhet awh haw sei”, tet awh hoe h. <sup>25</sup> Namamae na sak payonnae ni hetnaw pueng heh a kahma sak teh, na yonnae naw pueng kOUNg a ngang. <sup>26</sup> Ka taminaw rahak vah tamikathoutnaw ao teh tangkam kapatûngnaw ni tava a pawp awh e patetlah a pawp awh teh tangkam heh a patung pouh awh. <sup>27</sup> Tapawm daw k tava a kawi e patetlah, a im daw k dumnae hai akawi, a bawi awh teh hnopai moikapap tawn awh. <sup>28</sup> Athaw awh teh minhmai a kâpi awh. Tamikathoutnaw ni sak e ka tapuetlah thoena e a sak awh, hno kathout saknae ni, na pa katawnhoe hnaw koe laidei awh hoe h, roedengnaw ni hmu han kawi koelah kangdoutkhai awh hoe h. <sup>29</sup> Hete hnonaw dawkvah sak laipalah ka o han namaw telah BAWIPA ni a dei. Het patetlae miphunnaw lathueng moipathung laipalah ka o han namaw. <sup>30</sup> Kângairu hnonaw, hoi takikathopoung hno teh ram thungvah a sak awh. <sup>31</sup> Profetnaw ni laithoe a dei awh teh, vaihmanaw ni amamae kâ lahoi a uk awh. Het patetlae naw hah ka taminaw ni a lungpataw awh. Hatei a poutnae koe lah teh bangmaw na sak awh han.

## 6

### *Atunglah hoi ka tho e rawknae*

<sup>1</sup> Benjamin canaw na hlout nahanelah Jerusalem khothung hoi yawng awh leih. Tekoa vah mongka ueng awh, Bethhakkerem vah thaisaknae hmai hah paang awh. Bangkongtetpawiteh, rucatnae kalen poung rawknae teh atunglah hoi a tho toe.

<sup>2</sup> Zion canu meikahawi kanaw e hah, ka raphoe han toe. <sup>3</sup> Tukhoumnaw ni a tuhunaw hoi ahni koe pha awh han, petkâkalup lah lukkareirimmaw a sak awh vaiteh, amamae tuhunaw rip a khoun awh han.

<sup>4</sup> Ahnimanaw tuk hanlah kârakueng awh leih, thaw awh leih, kanîthun vah tuk awh sei, maimouh han a ru poung bangkongtetpawiteh, kanîthun a hloi teh tangmin kho a hmo toe. <sup>5</sup> Thaw awh leih, karum vah tuk awh sei, a im kahawi kahawi naw hah raphoe awh sei.

<sup>6</sup> Rasahu BAWIPA ni hettelah a dei, thingnaw tâtueng awh nateh, Jerusalem bout tuk nahanelah, luennae hah sak awh. Hote khopui heh rek hanelah ao. Hatei khopui thung vah kâyue kâounnae seng doeh akawi toe.

<sup>7</sup> Tuikhu ni tui a tâco sak e patetlah ahnimouh ni kathoute a tâcokhai van. Athung vah kâounnae hoi rawknae niyah akawi, ka hmalah lungmathoena e hoi patawnae pout laipalah ao.

<sup>8</sup> Oe Jerusalem kâhruetcu et, telah nahoe h pawiteh, ka hringnae ni hnamthun takhai vaiteh, athung vah kingdi ram lah ka coung sak han.

<sup>9</sup> Rasahu BAWIPA ni hettelah a dei, misur paw kacawirae khi e patetlah ahnimouh ni Isarelnaw kacawirae hah abuemlah he a khi awh han. Misur paw kakhikung ni a khi e patetlah na kut hah tangthung daw k bout tapu ei.



<sup>10</sup> Api koe maw lawk ka dei pouh vaiteh, kâhruetcuetnae ka poe han. A hnânaw a tabuem awh dawkvah, thai thai awh hoe. BAWIPA e lawk hah ahnimouh hane dudam e lah ao teh, thaingainae roeroe tawn awh hoe.

<sup>11</sup> Hatdawkvah, BAWIPA e lungkhueknae hoi ka kawi teh ka khang thai hoe. Lam daw kaawm e camonaw hoi a kamkhueng e nawsainaw koe ka kamnue sak, yuvâ roi ni hot teh a khang han, matawng kum kacuenaw ni hai a khang awh han.

<sup>12</sup> A imlawnew hoi a yunaw hai ayânaw koe kOUNg ka poe han, ram thung vah kaawmnaw lathueng kai ni kut ka tha han toe, telah BAWIPA ni a dei.

<sup>13</sup> Kathoengca koehoi kalenpoung koe totouh, tami pueng ni a hounloun awh, profetnew hoi vaihmanaw hai la awh hoe, laithoe dei hoi a kâroe awh.

<sup>14</sup> Ka taminaw e a hmâ lah ahawi han doeh, ahawi han doeh ati awh teh, phouhoucalah a khet awh, hawi katang hoe.

<sup>15</sup> Panuet ka tho e hno a sak awh navah a kaya awh maw. Kayak awh hoe. Kayak roeroe awh hoe. Minhmai kangna hai paling awh hoe. Hatdawkvah, karawmnaw koe rawp awh van han, kai ni ahnimanaw ka rek toteh, ahnimanaw teh rahim lah a bo awh han telah BAWIPA ni ati.

<sup>16</sup> BAWIPA ni hettelah a dei, lam daw k kangdout nateh, khenhaw! ayan e lamruem hah pacei nateh, lam kahawi namaw ao telah pacei awh nateh, hote lam daw dawn awh, telah pawiteh na muitha hanlah kâhatnae na hmu awh han. Hatei, nangmouh ni hote lam daw ka cet awh mahoe na ti awh.

<sup>17</sup> Kai ni nangmouh hanelah karingkung tami ka hmoun, mongka lawk thai awh! na ti pouh awh. Hatei, nangmouh ni, ka thai awh mahoe na ti awh.

<sup>18</sup> Hatdawkvah, miphunnaw thai awh haw, taminaw voi, ahnimanaw e lathueng ka phat hane hah pâkuem van awh.

<sup>19</sup> Oe talai, thai haw! hete taminaw lathueng vah, rona e ka pha sak han toe, amamouh ni a pouknae a paw letlang ni bangkongmaw kaie lawk hoi kâlawk a pahnawt awh.

<sup>20</sup> Sheba e hmuitui hoi kho hlan e koehoi e kacingtui ka radip e kai ni bangmaw ka ti nahan. Nangmae hmaisawi thuengnae ka dâw mahoe, sathêi thuengnae ni ka lung hawi sak mahoe.

<sup>21</sup> Hatdawkvah, BAWIPA ni hettelah a dei, hete taminaw hmalah tâlaw nahan ka ta pouh han. A napanaw hoi a canaw ni a tâlaw awh han, imri hoi huikonaw rei a rawk awh han, ati.

<sup>22</sup> BAWIPA ni hettelah a dei, khenhaw! atunglae ram koehoi ransanaw a tho toe, talai poutnae koehoi miphun kalenpoung kamthaw toe.

<sup>23</sup> Pala hoi tahroe patuep awh teh, tamikathout, pahrennae roeroe ka tawn hoe naw lah ao. A pawlawk teh tuipui pawlawk patetlah ao teh, marang daw k a kâcui awh teh, tamipueng senehmaica a kâmahrawk awh teh, Oe! Zion canu, nang tuk hanlah a tho awh toe, ati.

<sup>24</sup> Ahnimae kamthang ka thai awh navah, ka kut tha pouk a bo. Runae teh manu ni ca khe patawnae a khang e patetlah khik na moum toe.

<sup>25</sup> Kahrawng tâcawt awh hanh, lam daw hai cet awh hanh awh, tarannaw koe tahloi ao, avoivang taki a tho.

<sup>26</sup> Oe! Ka tami canunaw voi, buri kâkhu awh nateh, vaiphu daw k kamawp awh nateh, capa buet touh dueng kadout e ka khai e patetlah kap awh. Bangkongtewpawiteh, vaitalahoi karaphoekung teh maimae lathueng a pha han toe.



<sup>27</sup> Ka taminaw katanoukkung hoi pakhingpalang hanelah na sak, telah pawiteh doeh ahnimae nuencang hah na pathoup thai awh tih.

<sup>28</sup> Ahnimouh teh a lungpata awh ni teh tarankathaw e, tamthoe kadeinaw doeh, rahum hoi sum patetlah ao awh teh, abuemplahoi kahawihoehe dueng katâcawtkhaikung lah ao awh.

<sup>29</sup> Konlawk hai hmai dawk a kahma toe, hmaipho hai a tum toe. Tamikathoutnaw teh kangcing awh roeroe hoeh rah.

<sup>30</sup> Hotnaw teh BAWIPA ni a pahnawt toung dawkvah, ayânaw ni nguneinaw telah ati pouh awh han, telah ati.

## 7

### *Kamhnawng e bawknæ*

<sup>1</sup> BAWIPA koehoi Jeremiah koevah lawk hah a pha teh, <sup>2</sup> BAWIPA e im takhang koe kangdout nateh, hawvah hete lawk hah dei pouh, BAWIPA bawk hanelah hete takhang dawk kâen e nangmouh Judah tami pueng, BAWIPA e a lawk hah thai awh haw! <sup>3</sup> Ransahu BAWIPA Isarel Cathut ni hettelah a dei, na nuencang hoi na hnosaknaw hah pathoup awh telah pawiteh, hete hmuen koe kho na sak awh han. <sup>4</sup> Hetheh, BAWIPA e bawkim, BAWIPA e bawkim, BAWIPA e bawkim, telah laithoe lawk heh yuem awh hanh.

<sup>5</sup> Na nuencang hoi na sak e kahawicalah kâpathoup awh nateh, ayâ hoi na imri rahak kalan lah lawkceng pouh awh pawiteh, <sup>6</sup> miphun alouknaw, naranaw, lahmoinaw na hnephnap awh hoehpawiteh, tamikalannaw e thi hete hmuen koe na palawng awh hoehpawiteh, na mamanaw rawk nahan Cathut alouke hnuk na kâbang awh hoeh pawiteh, <sup>7</sup> na mintoenaw koe yungyoe hanlah ka poe e hete ram dawk na o sak awh han.

<sup>8</sup> Hatei khenhaw! banglahai ka tho hoeh e dумыennaе lawknaw hah na kâuep awh. <sup>9</sup> Na paru awh, ayâ na thei awh, na uicuk awh teh laithoe na dei awh, Baal koevah hmuítui na thueng awh teh, nangmouh ni na panue hoeh e cathut alouke hnuk na kâbang awh. <sup>10</sup> Hathnukkhu na tho awh teh, ka min hoi kaw lah kaawm e hete im thung ka hmaitung na kangdue awh teh, hete panuetkathonaw sak laihoi rungngang e lah ka o na ti awh han na maw. <sup>11</sup> Ka min lahoi kaw e hete im heh, nangmae mithmu vah dingcanaw e khu lah maw a coung toung vaw. Hatei, kama roeroe ni ka hmu telah BAWIPA ni ati.

### *Shiloh nang thai haw*

<sup>12</sup> Kai ni ka min o nahanlah ahmaloe ka sak e Shiloh hmuen koe atu cet nateh, ka tami Isarelnaw e thoenaе dawkvah hno ka sak e hah khenhaw!

<sup>13</sup> Het patet lae hnônaw pueng na sak navah, amom ka thaw teh nang koe lawk boutbout ka dei ei, thai han na ngai awh hoeh, kai ni na kaw awh navah, na pathung awh hoeh. <sup>14</sup> Hatdawkvah, Shiloh vah ka sak e patetlah ka min lahoi kaw e hete im nangmanaw hoi napanaw koe kai ni ka poe e hmuen na kâuep awh e lathueng vah ka sak van han.

<sup>15</sup> Na hmaunawngghanaw pueng Ephraim miphun abuemplah ka tâkhawng e patetlah ka hmalah hoi nangmouh kOUNg na tâkhawng awh han telah BAWIPA ni ati.

### *Judah hanelah ratoum hanh leih*

<sup>16</sup> Hatdawkvah, hete taminaw hanelah ratoum pouh hanh leih, ahni-mouh hanelah pahrennae hai het pouh hanh leih, kai ni ka thai pouh mahoehe toe. <sup>17</sup> Judah khonaw hoi Jerusalem lamthungnaw dawK hno



a sak awh e naw na hmawt awh hoeh maw. <sup>18</sup> Camonaw ni thing a cawng awh teh, a napanaw ni hmai a patawi awh, napuinaw ni tavai a kanawk awh teh, kalvan siangpahrangnu hanelah vaiyei a karê pouh awh, kai ka lungkhuek nahanelah, cathut alouknaw nei hanelah a hlun pouh awh. <sup>19</sup> Hatei, kai doeh ahnimouh ni lung na khuek sak awh, telah BAWIPA ni ati. Amamouh kaya nahanelah, amamouh hoi amamouh kâpoe awh e nahoehmaw. <sup>20</sup> Hatdawkvah, Bawipa Jehovah ni hettelah a dei, ka lungkhueknae hoi ka lungphuennae heh hete hmuen koe kaawm e taminaw lathueng hoi saringnaw lathueng vah, kahrawng e thingkungnaw hoi talai dawk e apawhik van vah, ka rabawk han, hotnaw teh a kak awh vaiteh, roum mahoe.

### *Thuengnae dawk lawkngainae*

<sup>21</sup> Ransahu BAWIPA Isarel Cathut ni hettelah a dei, cet awh nateh, hmaisawi thuengnae sathei na thueng awh e hoi alouke e sathei thapsin nateh, a moi hah cat awh. <sup>22</sup> Napanaw Izip ram hoi ka thokhai teh ahnimouh koe lawk ka dei navah, hmaisawi hane sathei hoi thuengnae dueng kâ ka poe hoeh. <sup>23</sup> Ahnimouh koe hete lawk doeh ka poe, Kai e lawk heh thai awh, kai teh nangmae Cathut lah ka o vaiteh, nangmouh teh, kaie ka tami lah na o awh han. Na dei pouh e patetlah mah cet awh, telah pawiteh nangmouh hanlah ahawi han. <sup>24</sup> Hatei, ahnimouh ni a ngai awh hoeh teh, banglahai ngai awh hoeh, hottelah amamae lungpatanae lungthin kamathout koe lah dai a kamlang awh. Hmalah cet awh laipalah, hnuklah a ban awh. <sup>25</sup> Napanaw ni Izip ram a ceitakhai hoi sahnin totouh, hnin touh hoi hnin touh, hnintangkuem nangmouh koe profetnaw ka patoun. <sup>26</sup> Hatei, ahnimouh ni ka lawk hah thai awh hoeh teh, banglahai ngai awh hoeh, a lung pueng hoi a pata awh teh, mintoenaw hlak a yon awh.

### *Judah hnamthun takhai toe*

<sup>27</sup> Hetnaw pueng heh ka dei pouh han, hatei ahnimouh ni na lawk thai ngai awh mahoe, ahnimanaw na kaw navah na pathung awh mahoe. <sup>28</sup> Hatdawkvah, ahnimouh koevah, hetteh Bawipa Jehovah lawk ka ngai hoeh e miphun, tounnae ka ngai hoeh e miphunnaw doeh na ti han. Lawkkatang a pahma awh teh, apâhni dawk hoi a tâkhawng awh toe. <sup>29</sup> Na sam hah ngaw nateh, tâkhawng, a rasangnae cailum hmuen koe cingou haw. Bangkongtetpawiteh, BAWIPA ni a taminaw hah a hnoun toe. A lungkhueknae ni a pha sin e miphun hah a hnamthun takhai toe.

### *Kamhnawng e bawknae lathueng lawkcengnae*

<sup>30</sup> Judahnaw ni ka mithmu vah hnokathout a sak awh toe, telah BAWIPA ni a pathang. Ka min onae im hah khinsak nahanlah panuetho e hno hah a hruek awh toe. <sup>31</sup> A capanaw hoi a canunaw hmaisawi hanelah Benhinom yawn vah Topheth hmuensasang a sak awh. Hot hah teh, kâ ka poe e nahoe, ka pouknae dawk hai kâen boihoeh. <sup>32</sup> Hatdawkvah, kâhruetcueth awh, a hnin teh a pha toe, telah BAWIPA ni ati. Taminaw niyah hote yawn teh, Topheth telah kaw mahoe toe, Benhinom yawn telah hai kaw mahoe toe, tami theinae yawn telah a kaw awh han toe. Bangkongtetpawiteh, hmuen a houng hoeh totouh Topheth vah a pakawng awh han. <sup>33</sup> Hete taminaw e ro teh, lathueng tavanaw hoi kahrawng moithangnaw e rawca lah ao han, hotnaw hah apinihai pâlei mahoe toe. <sup>34</sup> Lunghawi nawmnae lawk Judah ram hoi Jerusalem lathueng vah yu



kâpaluennae lawknaw hah kai ni ka pout sak han toe, ram hah teh kingdi lah ao han toe.

## 8

### *Bawipa e a tue hoi hnin*

<sup>1</sup> Hatnae tueng nah BAWIPA ni telah a dei, Judah siangpahrang hrunaw, vaihma hrunaw, profet hrunaw, Jerusalem tanminaw e hrunaw hah amamae phuen koehoi a thaw awh han. <sup>2</sup> Ahnimanaw ni lungpataw teh thaw tawk pouh awh, a hnukkâbang pouh awh, a pacei awh teh a bawk awh e kanî hoi thapa hoi kalvan e âsinaw pueng hmalah a dan awh han. <sup>3</sup> Kai ni ka pâlei e hmuen pueng koevah, hete tamikathout miphunnaw ni hringnae hlak duenae arawihnawn awh telah ransahu BAWIPA ni ati.

### *yonnae hoi tounnae*

<sup>4</sup> BAWIPA ni hettelah a dei tie hah ahnimouh koe dei pouh, taminaw tâlaw awh navah bout thaw awh hoe hah maw, lam a payon awh navah bout ban awh mahoe hah maw.

<sup>5</sup> Telah pawiteh, bangkongmaw hete taminaw ni hnuklah a kamlang awh, Bangkongmaw Jerusalem kho taminaw ni hnuklah meng a kamlang awh. Dumnae daw k a lungpen awh teh ban han ngai awh hoe hah.

<sup>6</sup> A lawk khe i ka thai nah, ahnimouh ni lawkkatang hah dei awh hoe hah. A thoena koehoi buet touh ni hai pankângai e awm hoe hah. Kai bangmaw ka sak, ati awh. Tarantuk koe marang ka yawng e patetlah tami pueng ni lam a phen awh teh, amamae lamthung daw k koug a yawng awh toe.

<sup>7</sup> Lathueng kamlang tavanaw ni patenghai a tue hah a panue awh teh, batuiling, bakhunaw, pingpitnaw, hoi tuicawmpainaw ni hai tho nahane a tue hah a panue awh. Hatei, ka taminaw ni teh BAWIPA e a kawnae hah panuek awh hoe hah.

<sup>8</sup> Bangtelamaw, kaimouh teh ka lungang awh, BAWIPA e kâlawk kaimouh koe ao na ti thai awh vaw. cakathutkungnaw e cacung ni laithoe a tawm sak awh toe hei.

<sup>9</sup> A lungkaangnaw yeirai a phu awh han. Puen awh vaiteh, man lah ao han. BAWIPA e lawk a pahnawt awh toe, bangpatet lungangnae maw a tawn awh.

<sup>10</sup> Hatdawkvah, a yunaw hah tami alouknaw koe ka poe han. A lawnaw hai ayânaw koe ka poe han. Kathoengca koehoi kalenpoung totouh kahounlounnaw lah ao awh. Profetnaw hoi vaihmanaw hai laithoe koug a dei awh.

<sup>11</sup> Ka taminaw, ka canunaw e hmâ hah phouhoucalah a khet awh. Lungmawngnae kaawm hoe hah e hah, lungmawngnae lungmawngnae atipouh awh.

<sup>12</sup> Panuet ka tho e nuencangnaw daw k a kaya awh maw, kayak awh hoe hah. Kayanae roeroe tawn awh hoe hah. A minhmai patenghai paling awh hoe hah. Hatdawkvah, ka rawm e taminaw koe a rawp awh van vaiteh, rek lah ao awh nah a rahim lah a bo awh van han telah BAWIPA ni ati.

<sup>13</sup> A paw a khi awh e naw pueng ka la pouh han. BAWIPA ni ati. Misurkung daw kvah, misur paw awm mahoe hah. Thabunglung kung daw k a paw awm mahoe hah, a hnanaw koug kamyai han. Kai ni ahnimanaw koe ka poe e hah bout ka la pouh han.

<sup>14</sup> Bangkongmaw sut na tahung awh. Cungtalalah kâracut awh vaiteh, rapan ka tawn e khopui daw k kâen awh sei. Haw vah cungtalalah dout awh sei. Bangdaw k tetpawiteh, maimouh ni BAWIPA koe yon awh toun



dawkvah, BAWIPA maimae Cathut ni duenae sue na pânei awh teh, kahmakatanae koe na ta awh toe.

<sup>15</sup> Lungmawngnae ngaihawi awh ei, ahawinae tho hoeh toe, tak damnae ngaihawi awh ei, runae seng doeh kaawm toe.

<sup>16</sup> Tarannaw e marangnaw kâha lawk teh, Dan hoi a thai awh toe. Marangtannaw e a cai lawk ni ram thung pueng pâyaw sak awh toe. Ram hoi a thung e kaawm hnopueng hoi khopui hoi khopui thung kaawm taminaw pueng pâyaw hanlah a tho awh toe.

<sup>17</sup> Khenhaw! nangmouh koe, hrnthok, hrnthoe ka tha vaiteh, bangtelah hai ti thai lah kaawm hoeh e ni nangmouh teh kouna na khue awh han, telah BAWIPA ni ati.

### *Tamimaya kecu profet a lungmathoe*

<sup>18</sup> Oe ka lungmathoenae heh api nang ne karoum sak han. Ka thung vah ka lung sut a pout.

<sup>19</sup> Ram hlanae koe kaawm ka canu ka taminaw e a khuika lawk hah thai haw. Zion vah BAWIPA awm hoeh maw. Siangpahrang hai haw vah awm hoeh toung maw. Bangkong hetnaw ni sakhlawn e meikaphawknaw hoi miphunnaw e meikaphawknaw ni bangkongmaw ka lungkhuek sak awh.

<sup>20</sup> Canga tue a loum toe, kompaw tue a khup toe, maimouh teh rungngang lah awm awh hoeh rah.

<sup>21</sup> Ka taminaw hoi ka canaw, patawnae hah ka hmawngkhai. Ka lungmathoe teh kângairunae ni khik na katek.

<sup>22</sup> Gilead vah hluk hane thingtapi awm hoeh maw. Haw vah tâsibawi awm hoeh maw. Bangkong ka taminaw ka canaw e a hmâ ahawi thai hoeh.

## 9

<sup>1</sup> Oe ka lû heh tuikhu lah awm haw pawiteh, ka mit roi heh mitphi tuiphuek lah awm haw pawiteh, ka tami ka canunaw thei lah ao dawkvah, khohmo khodai ka ka yawkaw han toe.

<sup>2</sup> Oe ahnimouh koehoi cei vaiteh, ka taminaw ka ceitakhai thai nahanlah, imyinnaw hanlah roenae hmuen hah kingdinae koe tawn hanlah ka ngai. Bangkongtetpawiteh, abuemplahoi ka uicuk e, dumyen hoi kamkhueng e lah ao awh.

<sup>3</sup> Laithoe dei awh nahanlah, a lainaw hah pala patetlah sut a pho awh. Lawk katang hoi ram thung vah roung awh hoeh. A yonnae buet touh koe hoi buet touh patuen a cei awh, kai heh banglah hai na ngai awh hoeh, telah BAWIPA ni a ti.

<sup>4</sup> Na huinaw hah kâhruetcueth awh, na hmaunawngghanaw hai kâuep awh hanh. Bangkongtetpawiteh, hmaunawnggha abuemplah kadumyennaw lah ao awh teh, a hui pueng hai tamthoe ka dei seng doeh.

<sup>5</sup> Hui hoi hui a kâdoun awh, apinihai lawkkatang dei awh hoeh. A lai heh laithoe deinae lai lah a pâtu awh teh, yonnae hoi amahoima tha a tawn sak awh.

<sup>6</sup> Laithoe dawk na kangdue awh teh, a laithoenae ni kai panue hanlah ngai awh hoeh, telah BAWIPA ni a ti.

<sup>7</sup> Hatdawkvah, ransahu BAWIPA ni hettelah a dei, khenhaw! ahnimouh teh atui lah kamyawt sak vaiteh, ka tanouk han, ka tami lah kaawm e ka canu heh bangtelamaw ka ti han.

<sup>8</sup> Ahnimae a lai teh duenae pala lah ao teh, laithoe lawk a dei awh. A pahni hoi imrinaw koe kâponae lawk a dei awh ei, a lung thung hoi teh, sut a pawp awh.



<sup>9</sup> Hatdawkvah, rek hoe laipalah ka o han na maw, telah BAWIPA ni ati. Hettelah kaawm e lathueng vah kama hoi kama moipathung laipalah ka o han maw.

<sup>10</sup> Monnaw hanlah lungpataw hoi ka ka vaiteh, kahrawng e phovainaw ka khui han. Hotnaw teh sut a ke awh teh, apinihai pâtam hoe toe. Saringnaw lawk hai thai hoe toe. Lathueng tavanaw hai kOUNG a pOUNG awh teh, kahrawng moithangnaw hai awm hoeh toe.

<sup>11</sup> Jerusalem teh songnawngbom lah ka hruek vaiteh, kahrawnguinaW onae hmuen lah ka ta han, Judah khonaw hai kingdi sak vaiteh, api buet touh hai awm mahoeH.

<sup>12</sup> Hete hno panue thai nahan a lungkaang e apimaw. BAWIPA ni apimaw a cangkhai teh hete hno heh kacaicalah ka dei thai. Apinihai a pâtam hoeH e thingyei patetlah a ram hah he a kak.

<sup>13</sup> BAWIPA ni a dei e teh, ahnimouh hmalah ka ta pouh e, kaie kâlawk hah a pahnawt awh teh, ka lawk ngai awh hoeH, cangkhaiae lawk hai tarawi awh hoeH.

<sup>14</sup> Amamae lung a patanae lamthung hah a tarawi awh, a napanaw ni a cangkhai awh e patetlah Baal hnuk a kâbang awh.

<sup>15</sup> Hatdawkvah, ransahu BAWIPA Isarel Cathut ni hettelah a dei, khenhaw! hete taminaw heh rawca kakhat ka ca sak vaiteh, kakhat e tui hah ka nei sak han.

<sup>16</sup> Ahnimouh hoi a napanaw ni a panue boihoeH e miphunnaw koe kâkayeisak vaiteh, ahnimanaw be raphoe hoehroukrak tahloi ka pâlei sak han.

<sup>17</sup> Ransahu BAWIPA ni hettelah a dei, atu kahawicalah pouk awh haw, ka kap thai e napuinaw hah tho hanlah kaw awh leih, ahnimouh imthung dawK hai kalung kathoumpOUNgnaw hah lawk thui awh.

<sup>18</sup> Ahnimanaw hah karang tho sak nateh, mamae mitphi a lawng teh, mamae mitsum dawK hoi tui a phuek hoehroukrak, maimouh na kapkhai lawiseh.

<sup>19</sup> Kanae lawk heh Zion hoi thai thai lah ao. Banghloimaw rawk awh tanggak toe. Yeiraipo awh katang toe. Na imlawnaW a ro katang tOUNg dawkvah, ram teh ka ceitakhai awh toe.

<sup>20</sup> Atuvah, Oe napuinaw, BAWIPA e lawk heh thaihaw, a pahni dawK e lawk koe lah hnâpakeng haw, na canunaw bangtelamaw a ka awh han tie hah cangkhai awh. Kalungla buet touh hoi buet touh kâcangkhai awh.

<sup>21</sup> Duenae teh hlalangaw koehoi a kâen teh, im thung vah a kâen, lamthung dawK e camonaw a takhoe teh lamlawng e nawsainaw a pâlei toe.

<sup>22</sup> BAWIPA ni hettelah a dei, tami kadoutnaw e ro teh laikawK dawK e vaipuen patetlah thoseh, cang ka a naw ni cabong a pâhma awh e patetlah thoseh, apinihai ahnimouh teh bout kuem awh mahoeH toe, telah dei pouh.

### *BAWIPA dawK kâoup seh*

<sup>23</sup> BAWIPA ni hettelah a dei, tami lungkaang ni lungangnae dawK kâoup hanh naseh, thakasai ni thasainae dawK kâoup hanh naseh, bawi ni hai a bawinae dawK kâoup hanh naseh. <sup>24</sup> Hatei, apipatet hai kâoup ngai pawiteh, het dawK kâoup naseh, kai na ka nout hoi na ka panuek e hah teh BAWIPA lungpatawnae, ka thuem hoi lannae talai van kasakkung doeh, hete hninaW heh ka lunghawinae doeh, telah BAWIPA ni a ti.

<sup>25</sup> Takthai dawK dueng vah vuensom ka a e taminaw pueng rek nahane atueng teh a pha toe, telah BAWIPA ni a ti. <sup>26</sup> Izip, Judah, Edom, Ammon, Moab, hoi thingyei ram ahlanae koe kaawm e tami pueng hai, hote miphunnaw pueng teh vuensom ka a hoeH e taminaw lah ao awh. Isarel



imthung buemlah hoi lungthin lahoi vuensom ka a hoehe e seng doeh, telah BAWIPA ni a dei.

## 10

### *Meikaphawknaw*

<sup>1</sup> Oe Isarel imthungkhunaw, BAWIPA ni nang koe a dei e thai haw.

<sup>2</sup> BAWIPA ni hettelah a dei, Jentelnaw e nuencang out hanh awh, kalvan hoi mitnoutnae kaawm nakunghai taket awh hanh. Jentelnaw teh hot patet lae hah a taki awh.

<sup>3</sup> Taminaw e a phunglam teh ayawmyin doeh, tami buet touh ni ratu thing a tâtueng teh, kutsakkathoum ni a sak teh,

<sup>4</sup> sui ngun hoi a pathoup awh teh, a kâhuet hoehe nahanelah, sum hoi cakkin hoi king a tâhet awh.

<sup>5</sup> Samtuekung patetlah a kangdue teh, lawk dei thai hoehe, cet hai cet thai hoehe, hrawm lah hrawm a ngai. Hotnaw hah taket awh hanh, rucatnae banghai na poe thai hoehe, hawinae hai banghai sak thai hoehe.

<sup>6</sup> Oe BAWIPA, nang patetlah e apihai awm hoehe. Nang teh na len tangak, na min hai thaonae hoi a lentoe tangak.

<sup>7</sup> Nang teh, bari laipalah apimaw kaawm han. Oe miphun pueng e siangpahrang, hethet nang na kancunae roeroe doeh. Miphunnaw thung hoi thoseh, lungkaang pueng thung hoi thoseh, ahnimae ram thung pueng dawh hoi thoseh, nang patetlah api buet touh hai awm hoehe.

<sup>8</sup> Ahnimouh teh abuemlahoi panuenae awm hoehe a pathu awh. Hottelah ayawmyin lah kaawm e thingmeikaphawk koehoi a cang awh.

<sup>9</sup> Ngun dêi e hah Tarshish hoi a sin awh teh, sui hah Uphaz hoi a sin awh. Kutsakkathoumnaw ni sak e, suihlunkathoumnaw ni dêi e, khohnanaw dawkvah, âthi hoi paling e kutsakkathoumnaw ni a sak e seng doeh.

<sup>10</sup> Hote BAWIPA teh Cathut katang doeh, ahni teh kahring Cathut yungyoe siangpahrang lah ao. A lungkhuek nah talai a kâhuet teh, miphun pueng ni a lungkhueknae khang thai awh hoehe.

<sup>11</sup> Hethet dei pouh awh, kalvan hoi talai ka sak hoehe e, cathutnaw heh, talai van hoi kalvan rahim hoi bat a kahma awh han, telah ati.

<sup>12</sup> Hatei, Cathut ni thaonae hoi talai heh a sak, a thoum lungangnae hoi talaivan heh a caksak teh a panuenae hoi kalvan hah a sak.

<sup>13</sup> Khoparit lawk a tho nah, kalvan e tuinaw hah pawlawk a cai, talai poutnae koehoi tâmai a tâco sak. Sumpapalik teh kho a rak sak teh hnoim thung dawh hoi kahli a tho sak.

<sup>14</sup> Tami pueng ni bang a panue awh hoehe dawh panuenae tawn awh hoehe, suihlunkathoumnaw ni hai a dei awh e hah a kayakhai. Ahnimouh ni a thuk awh e meikaphawk hah teh, ayawmyin pui doeh, kâha hai tawn awh hoehe.

<sup>15</sup> Aphu awm hoehe, dумыennaе thaw lah doeh ao, rek lah ao awh toteh, he a kahma awh han.

<sup>16</sup> Jakop ni a pang hanelah hetnaw patetlah awm awh mahoehe, bangkongtetpawiteh, ahni teh bangpueng kasakkung lah ao, Isarel heh raw lah ao teh, a min teh ransahu BAWIPA doeh.

### *Judah santoung nahane*

<sup>17</sup> Nangmouh rapan thung kaawmnaw uknaeram dawh kaawm e na hnouaw hah pâkhueng leih.



<sup>18</sup> Bangkongtetpawiteh, BAWIPA ni hettelah a dei, atuvah, hete ram thung vah kaawm taminaw hah kai ni ka tâkhawng han, ahnimouh van vah kângairunae ka pha sak han.

### *Jeremiah ratoumnae*

<sup>19</sup> Ka patawnae dawkwawthoe lah ka o. Hmâ ka ca e heh a patawpoung oe! Hatei, hethenh reknae doeh ka khang hanlah ao, ka ti rah.

<sup>20</sup> Kaie rim teh a rawk teh, kaie ruinaw pueng koug a thouk toe. Ka capanaw hai kai koe hoi koug a cei awh teh, buet touh hai awh awh hoeh toe, kaie rim ka sak hane awh hoeh toe, ka o nahan ka sak hane hai awh hoeh.

<sup>21</sup> Tukhoumnaw hai bang panuek awh hoeh, BAWIPA koe pacei e hah panuek awh hoeh, hatdawkvah, a hmacawn awh hoeh, a tuhunaw koug a kâkayei awh han.

<sup>22</sup> Khenhaw! atunglae ram koehoi runae kalenpui Judah khopuinaw kingdi sak vaiteh, kahrawnguinae onae lah o sak nahane pawlawk a kamthang.

<sup>23</sup> Aw, BAWIPA tami hringnae heh amae nahoe, tie ka panue, tami ni a khok takannae lam hai amae nahoe. <sup>24</sup> BAWIPA, kai heh na lungkhuek laihoi laipalah, lannae hoi na pathoup haw telah nahoe pawiteh, na kahmat sak langvai. <sup>25</sup> Nang kapanuekhoehnaw hoi na min ka kaw hoeh e Jentel miphunnaw van vah, na lungkhueknae hah awi haw. Bangkongtetpawiteh, ahnimouh ni Jakop hah he a ca awh. A khosaknae ram haiyah kingdi han.

## 11

### *Lawkkam raphoenae*

<sup>1</sup> Jeremiah koevah, BAWIPA koehoi, ka tho e lawk teh hettelah a o, <sup>2</sup> Hete lawkkam lawk hah thai nateh, Judah taminaw hoi Jerusalem kaawmnaw koevah dei pouh. <sup>3</sup> BAWIPA, Isarelnaw e Cathut ni lawk a dei e teh dei pouh, Hete lawkkam dawkwawthoe a lawk ka ngai hoeh e tami teh, thoebonae khang naseh. <sup>4</sup> Izip ram tahmang koehoi kai ni na mintoenaw ka hrawi nah ka poe e lawk teh, kai ni ka lawk ngai awh nateh, kaie lawkkam lawk na tarawi awh pawiteh, ka tami lah na o awh vaiteh, kai teh nangmae Cathut lah ka o han. <sup>5</sup> Hottelah pawiteh, na mintoenaw koe lawk ka kam e ka kuep sak vaiteh, maito sanu hoi khoitui lawngnae ram nangmouh ni sahnin e coung awh e patetlah na poe awh han ati. Kai ni Amen, BAWIPA ka ti.

<sup>6</sup> BAWIPA ni kai koevah, hete lawknaw pueng hah Judah ram hoi Jerusalem e lamthung pueng koe hramkhai haw. Hete lawkkam lawk heh ngai awh nateh, tarawi awh.

<sup>7</sup> Izip ram hoi na mintoenaw ka tâcokhai hnin hoi sahnin totouh, amom ka thaw teh, kâhruetcuetae lawk tuhoitu ka dei pouh, ka lawk ngai awh, ka ti pouh.

<sup>8</sup> Hatei ngai awh hoeh, banglahai noutna awh hoeh, amamae lungthin kathout lungpatanae koe lah a pâlei awh. Hatdawkvah, ka poe e lawk a tarawi ngai awh hoeh dawkvah, lawkkam dawkwawthoe kaawm e thoebonae pueng ka khang sak.

<sup>9</sup> Hathnukkuh, BAWIPA ni kai koevah a dei, Judah taminaw hoi vah kaawm taminaw koe thoe sak hanlah a kâcoun awh.

<sup>10</sup> Ka lawk heh ngai awh hoeh. A mintoenaw e yonnae koe lah koug kamlang awh toe. Alouke cathutnaw e thaw taww hanelah a kâbang



awh. Isarel imthungkhunaw hoi Judah imthungkhunaw ni mintoenaw e lawkkam teh a raphoe awh. <sup>11</sup> Hatdawkvah, BAWIPA ni hettelah a dei, ahnimouh dawk runae ka pha sak vaiteh, hlout awh mahoe. Kai koe hram awh van han eiteh, hotnaw e a lawk teh ka thai pouh mahoe. <sup>12</sup> Judah khonaw hoi Jerusalem e taminaw ni a cei awh vaiteh, hmuitui ouk a sawi pouh e cathutnaw koevah a hram awh han, hatei runae kâhmo awh navah, ahnimouh ni rungngang thai mahoe. <sup>13</sup> Oe, Judah, na khonaw yit touh cathutnaw na tawn. Baal cathut koevah kaya ka tho e hmuitui hmaisawi thuengnae khoungroe hah Jerusalem e lamthung yit touh na sak awh. <sup>14</sup> Hete taminaw han ratoum pouh hanh awh. Pahrennae hai het pouh hanh awh, patang rucatnae kâhmo nah kai na kaw nakunghai, kai ni ka thai mahoe. <sup>15</sup> Panuet ka tho e hno moikapap sak nah laihoi, ka pahren e ni kaie im dawk tawk han bangmaw a tawn. Nangmouh koehoi kathounge moi teh a tapoung toe. Yonnae na sak navah, na lung ahawi awh. <sup>16</sup> BAWIPA ni nangmouh teh olivekung ka naw e a paw ka hawi poung e ati. Hatei, cairing laihoi a van hmai a patawi teh, a kang koug a khoe.

<sup>17</sup> Isarel imthungnaw hoi Judah imthungnaw ni Baal koevah, hmuitui a awi roi teh, kathout hno sak hoi ka lungkhuek sak roi dawkvah, nang na kaungkung ransahu BAWIPA ni na lathueng vah ronaie pha sak hanlah lawk a tâtueng na poe.

### *Jeremiah thei han nounгнаe*

<sup>18</sup> BAWIPA ni na panuesak teh, ka panue toe. Bangkongtetpawiteh, a sak awh e naw hah be na hmu sak toe. <sup>19</sup> Hatei, kai teh, a nuen ka nem e tuca thei hanlah a hrawi awh e patetlah doeh ka o, ahnimouh ni kai thei hanlah kho a kham awh. Akung hoi a pawnaw hai be raphoe vaiteh, kahringnaw ram koehoi ahni teh tâkhawng awh sei, apinihai a min teh pâkuem hanh naseh, telah a dei awh e hah ka panuek hoe. <sup>20</sup> Hatei, ransahu BAWIPA, kalan lah lawkcengkung, lungthin hoi pouknae kanoutkung, ahnimouh van moi na pathungnae heh na hmawt sak haw, ka counгнаe abuemlah na kut dawkvah na poe.

<sup>21</sup> Hatdawkvah, nange hringnae thei hoe hahanlah BAWIPA min lahoi lawk dei han leih, telah nahoe pawiteh, kaimae kut dawkvah na due han, telah Anathoth kho e taminaw koevah ransahu BAWIPA ni he a dei. <sup>22</sup> Hatdawkvah ransahu BAWIPA ni hettelah a dei, kai ni ahnimanaw hah ka rek han. A nawsainaw heh tahloi hoi a due awh vaiteh, a capanaw hoi a canunaw hah takang dawk a due awh han. <sup>23</sup> Buet touh hai hlout awh mahoe, ahnimouh reknae kum navah, Anathoth kho e taminaw lathueng vah, yawthoenae ka pha sak han, a ti.

## 12

### *Jeremiah phuenangnae*

<sup>1</sup> Oe BAWIPA na hmalah lai ka roe nahaiyah, nang na kuep yungyoe. Hatei, na lawkcengnae kong heh na hmalah dei ka ngai rah. Bangkong-maw tamikathoutnaw a lamcawn awh teh, kadumyennaw ni lunghawi hoi khosak awh.

<sup>2</sup> Ahnimanaw hah nang ni na ung teh, tangpha a pabo, a rounг awh teh, a paw awh. Ahnimae pahni hoi na hnai teh, ahnimae lungthin hoi teh na hla.



<sup>3</sup> Hatei, BAWIPA nang ni na panue, nang ni na hmu teh nama na pouknae hah na tanouk. Thei hanlah kaawm e tunaw patetlah ahnimouh hah sawn nateh hrawi haw. Thei nahane hnin hanlah ahnimouh hmoun haw.

<sup>4</sup> Ram ni na to touh maw, a cingou vaiteh, kahrawng e hrâmnaw ni nâtotouh maw a ke awh han. A thung e kaawmnaw hah a hawihoe haw dawkvah, kahrawng moithangnaw hoi tavanaw hai kahmakata awh toe. Hathnukkuh vah, taminaw ni maimouh koe kaawm hno heh hmawt katang mahoe, telah bout ati awh.

### *BAWIPA ni pathungnae*

<sup>5</sup> Taminaw hoi yawng kâta nahai, ahnimouh ni na ta awh pawiteh, marangnaw hoi bangtelamaw na tâ thai han. Na kâuep e roumnae ram ni na tawn sak pawiteh, Jordan ratu tanghling dawk bangtelamaw na ti han vai.

<sup>6</sup> Na hmaunawngnaw, na imthungkhu ni patenghai, nang hah na dum awh toe, na ngaihoe hoi na hrâmsin awh toe. Ahnimouh ni lawk kahawi a dei awh nakunghai, ahnimouh yuem awh hanh.

<sup>7</sup> Ka im ka pahnawt vaiteh, ka râwnaw hai ka hnoun han toe. Ka pahren e tami teh, a tarannaw kut dawk ka poe toe.

<sup>8</sup> Kaie râw teh, ratu e sendek patetlah doeh ao toe. Kai hah na huk sin, hatdawkvah kai ni ka hmuhma.

<sup>9</sup> Kaie râw teh kai hanlah taracak e langtanaw lah ao. Langta ni petkâkalup lah a hmang maw. Moithang pueng pâkhueng awh nateh ca hanelah thokhai awh.

<sup>10</sup> Tukhoumkung kapap ni, ka misur takha hah a raphoe awh teh, ka coe hane hah rep a coungroe awh. Phunep poung lah ka coe hane hah tami kingdi lah ao han.

<sup>11</sup> Kingdi e ram lah ao sak, koug a raphoe teh kai koe a ka. A ram buemlah koug a raphoe teh, apinihai noutna awh hoe.

<sup>12</sup> Kingdi e monsom ka nga e pueng koe karaphoeungkung a luen awh han, ram apoutnae koehoi avanglae apout tofouh, BAWIPA e tahloi ni koug a ca han, roumnae roeroe awm mahoe.

<sup>13</sup> Cang hah a tu awh han eiteh, pâkhing lah doeh a a awh han. A tha pueng hoi a tawn awh eiteh, banghai hmawt awh mahoe. BAWIPA e a lungphuennae a patawpoung toug dawkvah, yeiraiponae doeh a a awh han.

<sup>14</sup> BAWIPA ni hettelah a dei, kaie tami Isarelnaw koe vah, ka poe e râw karaphoeungkung ka imrinaw e yonnae naw dawkvah, a ram thung hoi ka phawk vaiteh, ahnimouh thung dawk hoi hai Judah imthungkhu hah ka phawk han. <sup>15</sup> Hatei, ka phawk hnukkuh, hetnaw van vah pahrennae bout ka tawn vaiteh, amamouh ni râw a pang hane talai amamouh ram lah bout ka thokhai han. <sup>16</sup> Hahoi, hettelah ao han. Baal koe ka taminaw thoebo a pâtu e patetlah ka min lahoi BAWIPA a hring teh, a hring nah thung pueng teh, telah thoebo a kamtu awh teh, ka taminaw hoi hringnuen hah kahawie lah kamtu awh pawiteh, ka taminaw thung dawk ka caksak han.

<sup>17</sup> Hatei, api miphun ni hai thai ngai awh hoehpawiteh, hote miphun teh koug ka phawk vaiteh, ka raphoe han, telah BAWIPA ni a ti.

## 13

### *Hnitaïsom*

<sup>1</sup> BAWIPA ni kai koe hethah a dei, cet nateh hnitaïsom ran nateh kâyeng haw, hatei tui duk sak hanh, ati. <sup>2</sup> Hatdawkvah, BAWIPA ni a dei e patetlah



hnitaisom hah ka ran teh ka kâyeng. <sup>3</sup> Hathnukkhu, BAWIPA e lawk teh apâhni kai koe bout a pha teh, <sup>4</sup> hnitaisom na ran e hah lat nateh, kâyeng laihoi Euphrates tui koe cet nateh, talung kâbawng e rahak vah hrawk haw, telah ati. <sup>5</sup> Hatdawkvah, ka cei teh BAWIPA ni a dei e patetlah Euphrates tui teng vah ka hro. <sup>6</sup> Hnin moi a saw hnukkhu teh, BAWIPA ni kai koe vah, thaw nateh Euphrates tui koe cet nateh, hnitaisom na hro sak e hah bout lat leih na ti pouh. <sup>7</sup> Hatdawkvah, Euphrates tui koe ka cei teh, ka hronae hmuen koe ka tai teh, bout ka la. Hatei, koug a hmawn toug dawkvah, hnopai hanlah awm hoeh toe.

<sup>8</sup> Hathnukkhu BAWIPA e lawk teh kai koe a pha. <sup>9</sup> BAWIPA ni hettelah a dei, het patetlah Judahnaw kâoupnae hoi Jerusalem kâoupnae hah ka raphoe han.

<sup>10</sup> Hete tamikayonnaw, ka lawk ka ngai hoeh e taminaw, amamae a lungpatanae patetlah ka cet ni teh, alouke cathutnaw ka bawk niteh, a thaw tawp pouh hanelah ka cet naw teh, hete hnitaisom patetlah lah ao awh. Hnopai hanlah awm awh mahoe. <sup>11</sup> Hnitaisom teh tami ni a keng dawk a kâyeng e patetlah Isarel imthungkhu hoi Judah imthungkhu naw pueng teh, ka taminaw, ka min kamthang sak hane hoi ka bawilen sak hanelah kai koe pou kârayen hanelah ka sak e lah ao eiteh, banglah noutna awh hoeh telah BAWIPA ni ati.

### *Misur um*

<sup>12</sup> Ahnimouh koe hete lawk heh na dei pouh han. BAWIPA Isarel Cathut ni vah hettelah a dei, Misur um pueng hah misur tui hoi kawi sak hanlah ao. Ahnimouh ni nang koevah, misur um teh misur tui hoi kawi sak hanlah ao tie hah ka panuek boi awh hoeh maw, telah ati awh han.

<sup>13</sup> Ahnimouh koevah, BAWIPA ni hettelah a dei. Hete ram thung kaawm tami pueng Devit e bawitungkung dawkvah, ka tahung siangpahrang pueng, vaihmanaw, profetnaw hoi Jerusalem vah kaawm taminaw pueng hah yamuhrinae hoi ka kawi sak han. <sup>14</sup> Kai ni amahoima buet touh hoi buet touh, a napanaw hoi a canaw hai ka kâhem sak han telah BAWIPA ni ati. Hottelae naw teh raphoe hoeh nahanlah pahren mahoe, pâhlung mahoe, lungma mahoe, hatei, he ka raphoe han ati telah ati.

### *Santoungnae*

<sup>15</sup> Hnâpakeng nateh thai haw. Kâoup hanh awh. Bangkongtetpawiteh, BAWIPA ni lawk a dei toe. <sup>16</sup> Hmonae a pha sak hoehnahlan, ka hmot e mon dawkvah na khok na kamthui hoehnahlan vah, BAWIPA na Cathut teh pholen haw. Angnae na tawng lahun nah duenae fâhlip a tâco sak teh, ka hmot e talung kâko lah a coung sak. <sup>17</sup> Hete na ngai hoehpawiteh, nangmae na kâoupnae dawkvah, arulahoï ka ka han. BAWIPA e tuhunaw teh, san lah a hrawi awh han dawkvah, lungpataw lahoï ka ka vaiteh ka mitphi a bo han. <sup>18</sup> Siangpahrang hoi siangpahrangnu koevah, na lû roi dawk e na bawilen bawilakung hah a bo han toe. Hatdawkvah, na bawitungkung dawk hoi kum roi leih, telah dei pouh. <sup>19</sup> Negev khopuinaw taren awh vaiteh, ka paawng hane apihai awm mahoe. Judahnaw pueng san lah, abuemlahoi koug a hrawi awh han. <sup>20</sup> Na mit padai awh nateh, atunglah hoi kathonaw kenhaw, nangmouh koe na khom sak e tuhu hoi ngai kaawm e tunaw hah namaw ao. <sup>21</sup> Bawi hoi lû lah kaawm hane na cangkhai e ni, na rek toteh, bangne na dei han. Napui ca khe pataw e patetlah na man toteh, a pataw na ti han na vaiyaw.



<sup>22</sup> Bangkongmaw het patet e hno heh kai koe a pha vai, telah na mahoima hah kâpacei pawiteh, na yonnae naw apap poun dawkw doeh toe, na hna a phawi awh teh tawngtai lah na o e a kamnue toe. <sup>23</sup> Ethiopianaw ni a vuen a kâthung thai maw. Kaisi ni a em a kâthung thai maw. Kâthung thai pawiteh, nangmouh kathout hno kasaknaw ni hai kahawi hno na sak thai awh han doeh. <sup>24</sup> Thingyei yawn dawkw e kahlî ni cahik a palek e patetlah kai ni nangmouh teh be na kahei awh han. <sup>25</sup> Kai na hnoun awh teh, laithoe na kâuep awh dawkvah, hetheh na ham hanlah na pouk pouh e doeh toe, telah BAWIPA ni a dei. <sup>26</sup> Na kayanae kamnue nahanelah, na hna teh na minhmai totouh kalip takhang han. <sup>27</sup> Kahrawng hoi monnaw dawkvah, na uicuknae hoi na hounlounnae hram pawlawkw hoi, na kâyonae, panuetho e na sak e hah ka hmu, Oe Jerusalem, na yaw a thoe. Atu totouh na thoung hoe hah rah maw.

## 14

### *Khokang, tahloi, lacik*

<sup>1</sup> Khokangnae kong dawkw BAWIPA koe e lawkw Jeremiah koe ka phat e lawkw ka phat e teh, <sup>2</sup> Judah ni a khui teh, longkhanaw koe vah khuinae ao. Ram hanlah a ka teh, Jerusalem koehoi kanae pawlawkw a luen takhang. <sup>3</sup> Bawinaw ni tui kayawtnaw tui do hanelah a patoun awh. Ahnimouh ni tuikhu koe a cei awh ei, tui awm hoe hah. Ahrawng lah bout a ban awh. Lungpuen taki laihoi a lû a ramuk awh. <sup>4</sup> Ram thung kho a rak hoe hah dawkvah, talai teh rak khang toe. Law kaphawnaw ni lungpuen awh teh, a lû a ramuk awh. <sup>5</sup> Kahrawng e sayuk ni patenghai ca a khe ei, hram ao hoe hah dawkvah a ca hah a hnâw. <sup>6</sup> Kahrawng e la teh a rasangnae cailum hmuen vah a kangdue awh teh, kahrawnguinau patetlah kahlî a pahap awh. Hram ca hane ao hoe hah dawkvah, a mit a mom awh. <sup>7</sup> Kamamae yonnae ni yon na pen nakunghai, Oe BAWIPA, na min kecu dawkw hno buetbuet touh sak yawkaw ei, yuemkamcuhoeh eiteh, moi a pap toe. Nang taranlahoi ka yon awh toe. <sup>8</sup> Oe! Isarel naw, na ngaihawinae kângairu lahun nah, rungngangkung BAWIPA, bangkong ka ram thung vah imyin patetlah tangmin buet touh dueng ka ip e imyin patetlah na o. <sup>9</sup> Bangkong kângairu e patetlah kârungngang thai hoe hah e athakaawme tami patetlah na o. Oe! BAWIPA, nang teh kaimouh koe na o teh, nange min teh ka phu awh. Hatdawkvah, kaimouh sut na hnoun hanh. <sup>10</sup> Hete taminaw kecu dawkw BAWIPA ni hettelah a dei, ahnimanaw ni pounggram hane a ngai awh. A khoktakan hah kâcakuiep thai hoe hah. Hatdawkvah, BAWIPA ni hetnaw heh dâw awh hoe hah. Atu teh ahnimouh thoenae teh, pou pâkuem pouh vaiteh, a yonnae kecu dawkw a rek awh han.

### *Laithoe profetnaw*

<sup>11</sup> Hahoi BAWIPA ni kai koe vah, hete taminaw ahawi nahanelah ratoum pouh hanh. <sup>12</sup> Rawcahai awh nakunghai, ahnimae hremnae lawkw teh ka thai pouh mahoe hah. Hmaisawi thuengnae hoi pasoumhno, aluepaw na sin nakunghai kai ni ka dâw mahoe hah. Ahnimouh teh tahloi, takang, hoi Lacik hoi let ka raphoe han ati. Hahoi kai ni, Aya! BAWIPA Cathut khenhaw! ahnimouh koe profetnaw ni,

<sup>13</sup> tahloi na ka hmo awh mahoe hah, takang hai phat ma hoe hah. Hete hmuen koe vah ka pout thai hoe hah e hnâroumnae na poe awh han telah pou a dei pouh awh, kai ni telah ka ti pouh. <sup>14</sup> Hatnavah BAWIPA ni kai koe vah, profetnaw ni ka min hoi laithoe doeh ka pâpho awh. Ahnimouh teh



kai ni ka patoun e nahoe, kâ ka poe awh hoe. Lawk hai ka dei pouh hoe. ahnimouh ni a pâpho e naw teh mitpaleinae, kahrai thawtawknae, cungkeihoehe pouknae, amamae pouknae patetlah dumpyennae roeroe doeh a dei awh. <sup>15</sup> Hatdawkvah BAWIPA ni hettelah a dei. Kai ni hotnaw teh ka patoun hoe. Hatei ahnimouh ni tahloi hoi takangnae teh, hete khoram daw k phat mahoe telah a dei awh. Hote profetnaw heh tahloi hoi takangnae hoi a due van awh han. <sup>16</sup> Ahnimouh ni lawk a pâpho pouh e, ka thai e miphun pueng hai tahloi hoi takang dawkvah, Jerusalem lamthungnaw dawkvah, sut ka tâkhawng han. Amamouh hoi a yunaw hai a capa canunaw ka pakawp pouh han api buet touh hai awm mahoe. Bangkoktetpawiteh, thoenae hah amamouh tak daw k ka awi han. <sup>17</sup> Hatdawkvah, hete lawk hah ahnimouh koe na dei han. Ka canu tanglakacuem ka taminaw ni, hemnae ka patawpoung teh a khang han, rahim lah coun groe lah ao toun dawkvah, ka mitphi teh karum khodai pout laipalah lawng lawiseh. <sup>18</sup> Kho alawilah ka cei nahai tahloi hoi thei e taminaw ka hmu, khopui thung kâen nahai, takang daw k hoi profet hoi vaihmanaw ni a panue awh boihoe e khoram lah cei awh toe, atipouh

### *Jeremiah lungpahawinae*

<sup>19</sup> Judah heh koun na pahnawt awh katang toun. Zion hah na panuet awh ka tang toun. Hawi thai hoe nahan bangkong kaimouh heh patang na khang sak. Hnâroumnae ka ngaihawi awh ei, hnokahawi tho hoe toe. Hawinae ka ngaihawi awh ei, takinae letlang a pha. <sup>20</sup> Oe BAWIPA ka hawioehnae naw hoi mintoenaw e a yonnae naw hah ka panue awh. Nang koe vah ka yon awh tangak toe. <sup>21</sup> Na min lahoi kaimouh heh na panuet awh hanh ei, na lentoe tungkhung teh, a min mathout sak hanh, kaimouh hoi lawkkam sak e hah pahnim hoi raphoe rumram hanh. <sup>22</sup> Banglah ka tho hoe e miphun alouke cathutnaw daw k, kho ka rak sak thai e ao na maw. Kalvan ni a mahmaw k kho a rak sak thai maw. Oe BAWIPA kaimae Cathut, nang ni doeh kho na rak sak. Hatdawkvah, kaimae ngaihawinae hah nang daw k doeh ao. Nang ni doeh het patetlae hnouaw pueng hah na sak.

## 15

### *BAWIPA a lunghno mahoe*

<sup>1</sup> Hathnukkuh BAWIPA ni kai koe vah, Mosi hoi Samuel teh ka hmalah ka ratoum roi nakunghai, hete taminaw koe lah ka lungthin kamlang pom mahoe. Ka hmuhoehnae koe pâlei nateh koun kahmat naseh. <sup>2</sup> Ahnimanaw ni vah, nâ lah maw ka cei awh han, tetpawiteh, BAWIPA ni hettelah a dei, due hanlah kaawmnaw teh a due awh han, tahloi hanlah kaawmnaw hah teh tahloi hoi a due awh han, kamlum hanlah kaawmnaw teh a kamlum awh han, santoun hanlah kaawmnaw teh san a toun awh han.

<sup>3</sup> Hote taminaw ka raphoe nahanlah hno pali touh ka patoun han telah BAWIPA ni ati. Ka thet hanelah tahloi, tami ka kei hanelah uinaw, ka cat hanelah kalvan e tavanaw hoi talai daw k e moimathengnaw hah doeh.

<sup>4</sup> Judah siangpahrang Hezekiah capa Manasseh ni Jerusalem vah hno a sak e dawkvah, ahnimouh teh talai uknaeramnaw pueng ni a taraw k awh nahanelah a sak han.

<sup>5</sup> Oe Jerusalem apinimaw nang hah na pahren han. Apinimaw nang lungmathoekhai han. Nang e kong pacei hanelah apinimaw cawp a kangdue han.



<sup>6</sup> Nangmouh ni kai hah na pahnawt awh, telah BAWIPA ni a dei, hnuklah na ban awh. Hatdawkvah, na lathueng vah ka kut ka tha vaiteh, nang hah na raphoe han, ka lunghnonae ka hmawt toe. <sup>7</sup> A lamthung dawkw hoi a ban ngai awh hoeh dawkvah, ram kalupnae longkha koe ka pâsei vaiteh, a canaw hah ka thei pouh han.

<sup>8</sup> Ahnimae lahmawh hah tuipui teng e sadi patetlah kapap sak han. A manunaw kathetkung thoundounnaw hah kanithun vah ka patoun han, dongdengca dawkw ahnimouh van vah takitho lungpuennae hah ka pha sak han. <sup>9</sup> Ca tongpa sari touh ka khe e a manu a thabaw teh a hringnae a thouk. Ahnie khosei teh khodai nah a loum, ahni teh yeirai hoi lungpout lah ao. A tarannaw hmalah kahloutnaw teh kai ni tahloi hoi ka thei han, telah BAWIPA ni ati.

### *Jeremiah lungpoutnae*

<sup>10</sup> Oe anu, ka yaw a thoe! talai van pueng kâyue e hoi kâtapoe hanelah vai kai heh na khe khe! Api koehai a ca hane lahoi laiba ka tawn hoehe, ayâ ni hai kai koe laiba tawn hoehe ei, tami pueng ni lawkthoeumkha na bap awh.

<sup>11</sup> BAWIPA ni vah, atangcalah nang hah na hlout sak han. Runae tueng nah, rektapnae tueng nah, na tarannaw hah nang koevah, pahrennae ka kâhei sak han.

<sup>12</sup> Sum ni atunglae sum hoi stil a khoe thai han na maw.

<sup>13</sup> Na ram thung pueng vah yonnae na sak e dawkvah, na bawinae hoi na tawnta e pueng aphu laipalah na lawp e patetlah ahnimae kut dawkw ka poe han.

<sup>14</sup> Na panue hoehe e ram koe na tarannaw koevah san lah na ta han. Ka lungkhuek dawkw nangmouh lathueng patawi hane hmai teh a kamtawi toe.

<sup>15</sup> Oe! BAWIPA nang ni na panue. Kai hah pou na pouk teh, na pai sin hanelah na tho toteh, na karektapnaw kalan lah lawkceng haw. Ahnimanaw he na panguep teh kai na thet hanh loe. Kai ni nang hanlah dudamnae ka khang e heh na pahnim pouh hanh.

<sup>16</sup> Na lawknaw hah a kamnue teh, ka ca! na lawk teh kai hanlah lunghawinae hoi lungthin phunepnae lah ao. Bangkongtetpawiteh, Oe ransahu BAWIPA na min lahoi na kaw e lah ka o.

<sup>17</sup> Pawito kamkhuengnaw koevah, ka tahung hoehe, ahnimouh hoi lunghawinae ka hmawng boihoehe, na kut ka van ao dawkvah kamadueng ka tahung, bangkongtetpawiteh, lunghawihoehnae hoi na kawi sak.

<sup>18</sup> Bangkongmaw ka patawnae heh ahawi thai hoehe, ka hmâ heh hawi han ka ngaihoehe e patetlah hawi thai hoehe bo vaw, Kai hanlah kâuep han kamcuhoehe e tui tang ka hak e patetlah maw ao vaiyoe.

### *BAWIPA ni Jeremiah bout a cai sak*

<sup>19</sup> Hatdawkvah, BAWIPA ni hettelah a dei, bout na ban pawiteh, na bankhai vaiteh, ka hmalah bout na kangdue han. Cungkeihoehe thung hoi sungren e hno dueng na dei pawiteh, kaie lawk karingkung lah ao han. Ahnimouh ni nang koe lah kamlang boilah, nang teh ahnimouh koe lah na kamlang mahoehe.

<sup>20</sup> Hete taminaw thung vah rahum tapang na sak han, ahni ni nang hah na tuk awh han eiteh, nang rungngang hanelah, na teng ka o dawkvah, ahnimouh ni nang na tâ awh mahoehe, telah BAWIPA ni ati.

<sup>21</sup> Tamikathoutnaw kut dawkw hoi na rungngang vaiteh, takitho e taminaw e kut dawkw hoi nang teh na ratang han.



## 16

*Jeremiah hringnuen hoi cangkchainae*

<sup>1</sup> Hathnukkhu, BAWIPA e lawk kai koe a pha teh, <sup>2</sup> yu na lat mahoe, hete hmuen koe vah, canaw na tawn mahoe. <sup>3</sup> Hete hmuen koe khe e canaw hoi a manu na pa kong daw BAWIPA ni hettelah a dei, <sup>4</sup> ahnimanaw teh Lacik hoi a due awh han, Hotnaw hah apinihai kapkhai mahoe, pakawm mahoe, vaipuen talai daw eitaboung patetlah a yan awh han. Tahloi hoi takangnae hoi a due awh han. Ahnima ronaw teh kalvan e tava hoi moithangnaw hane rawca lah ao han.

<sup>5</sup> Bangkongtetpawiteh, BAWIPA ni hettelah a dei, ro im cet hanh, lungpahawi hanelah hai cet hanh, ama hai khui hanh. Bangkongtetpawiteh, hete taminaw koe hoi lungmawngnae, pahrennae lungmanae he ka la pouh toe telah BAWIPA ni a dei. <sup>6</sup> Hete ram daw tami kalen kathoung hai a due awh han. Apinihai pakawm mahoe, apinihai khui mahoe. Apinihai a mahoima kâbouk mahoe, a sam hai ngaw mahoe. <sup>7</sup> Ro karingkungnaw hoi kapakawpnaw lungpahawi hanelah rawca apinihai thak pouh mahoe. Ka dout e a na pa hoi a manu han patenghai thak pouh mahoe. Ahnimouh lungpahawi hanelah apinihai tui boehai poe mahoe. <sup>8</sup> Hatdawkvah, caneinae im daw kâen hanh, ahnimouh hoi cungtalai tahung hanh, cat hanh. <sup>9</sup> Bangkongtetpawiteh, ransahu BAWIPA Isarel Cathut ni hettelah a dei, nangmouh mithmu hoi na hring na thung vah lunghawilawknaw hah ka roum sak vaiteh, yuvâ kâpaluennae lawk hai hete hmuen koe ka roum sak han.

<sup>10</sup> Hete lawknaw pueng hah hete taminaw koe vah na dei pouh navah hotnaw ni, bangmaw BAWIPA ni hettelah totouh kahawihoe poung e hno hah a dei vai. Bang hno maw sakpayon awh, BAWIPA kaimae Cathut koe vah bang yonnae maw ka sak awh, tet awh pawiteh, <sup>11</sup> hettelah na dei pouh han, na mintoenaw ni kai na hnoun awh teh, alouke cathutnaw hnuk a kâbang awh teh, ahnima thaw a taw pouh awh. Kai na hnoun awh teh, kaie kâlawk hai tarawi awh hoe. <sup>12</sup> Nangmouh hai na mintoenaw hlak hoe na thoe hnawn awh. Khenhaw! kaie lawk ngai laipalah tami pueng ni amamae lungpouk patetlah koug a cei awh. <sup>13</sup> Hatdawkvah, kai ni hete ram thung hoi nangmouh hoi na mintoenaw ni na panue boihoe e ram koe lah na pâlei awh han, hote hmuen koe vah karum khodai alouke cathutnaw e thaw na taw awh han. Kai ni nangmouh hah na pasai awh mahoe.

*Cathut ni Isarel bout a kâhat sak han*

<sup>14</sup> Hatei, Isarel taminaw Izip ram hoi na kahrawikung, BAWIPA teh a hring dawkvah telah taminaw ni a dei awh hoe nahanelah, a hnin teh a pha lahun, telah BAWIPA ni a ti. <sup>15</sup> Hatei taminaw ni, atunglae ram hoi ahnimouh a hreknaw ramnaw pueng thung hoi Isarelnaw kahrawikung BAWIPA teh a hring tangngak dawkvah ati awh han. Ahnimouh teh kai ni a na mintoenaw koe vah, ka poe e ram thung bout ka o sak awh han, telah BAWIPA ni a dei.

<sup>16</sup> Hatei, atu teh tangakamankungnaw moikapap ka kaw vaiteh, ahnimouh ni a man awh han. Hahoi kai ni moi ka kathoumnaw moikapap ka kaw vaiteh, monrui hoi montam hoi talungkâko totouh a ka awh han. <sup>17</sup> Ahnima lamthung pueng hah ka mit ni pheng a hmu, kai koe hoi kâhrawk thai awh mahoe, ahnima yonnae hai ka mithmu hoi hro thai lah awm mahoe. <sup>18</sup> Amamae thoenae hoi yonnae dawkvah, let hni hoi ka pathung han, ahnimouh ni ka ram hah panuetho e ro hoi a kamhnawng



sak awh teh, panuetthonaen ni ka coe e ram daw k a kawi sak telah BAWIPA ni a ti.

<sup>19</sup> Oe BAWIPA ka thaonae hoi ka rapan, kângairu nah kângue e hoi talai apoutnae koehoi Jentelnaw nang koe a tho awh han. Mintoenaw ni laithoe, cungkeihoehe hno, ayawmyin hno hoeh laipalah banghai a pang awh hane râw awm hoeh. <sup>20</sup> Tami ni ama hanlah cathut lah kaawm hoeh e cathut hah a sak han na maw. <sup>21</sup> Hatdawkvah, kai ni hotnaw hah ka panue sak han. Ka kut hoi hnotithinae ka panue sak vaiteh, ka min hah Jehovah doeh tie a panue awh han.

## 17

### *Judah yonnae hoi reknae*

<sup>1</sup> Monsou ka hring e thingkung koevah, ahnimaen khoungroe hoi thingmeikaphawk hah a catounnaw ni a pouk awh lahun nah, <sup>2</sup> Judah yonnae teh sumcacung hoi thut lah ao teh, talung phukaawm pâsu hoi ahnimaen lungthin phen daw k tarik lah ao teh, khoungroe ki daw k hai tarik lah ao. <sup>3</sup> Ram thung e kaie mon, ram thung pueng na yonnae dawkvah, na bawinae hoi na tawnta na pâtung e râw pueng taran kut daw k ka poe han. <sup>4</sup> Na sak payonnae dawkvah, kai ni na poe e râw koehoi ka takhoe han toe. Na panue boihoe e ram taran kut daw k san na toung sak han. Ka lungkhueknae hmai teh a kaman sak toe.

### *Thoebonae hoi yawhawi*

<sup>5</sup> Tami kâuep teh a lungthung vah BAWIPA koehoi kangheng e tami teh thoebo e lah ao. <sup>6</sup> Ahni teh thingyeiyawn daw k thingke patetlah ao vaiteh, kahawi hno ka tho nakunghai hmawt mahoe, ka ke e tanghling talai apinihai a ohoehnae palawi talai hmuen koe ahni teh ao han. <sup>7</sup> Hatei, BAWIPA kâuep niteh, ama dawkvah, ngaiuepnae katawnnaw teh a yawhawi. <sup>8</sup> Ahni teh tuirai vah ung e thing, tui ao nah koevah a tangpha ka payang e hoi a kâvan. Khokang nakunghai takinae awm hoeh, a hna hai hringsuepcalah pou ao. Khokang kum hai lungpuennaen tawn hoeh, a paw hai sarut boihoe.

<sup>9</sup> Lungthin teh bangpueng hlak hai huenghai kaawm poung e abuempla-hoi kahawihoehe doeh. Apinimaw a panue thai han. <sup>10</sup> A nuencang hoi tawksaknae patetlah poe hanlah kai BAWIPA teh pouknae a tanouk teh lungthin ka pakhingpalang kung lah ka o. <sup>11</sup> Ka lan hoeh lah hnopai ka tawnta e tami teh, bakoum ni amae a tadui hoeh e a awt e patetlah ao. A rour lahun navah a roedeng vaiteh, apoutnae koe teh tami pathu lah ao han.

<sup>12</sup> Apuengcue hoi rasangpoung lah kaawm bawitungkhung teh mamae hmuen kathoung lah ao. <sup>13</sup> Oe! BAWIPA, Isarelnaw ni kângaiuep e, nang kapahnawtnaw pueng yeirai a po awh han. Kai kamlang takhai e pueng teh, vaiphu daw k a thut e patetlah ao awh han. Bangkongtetpawiteh, BAWIPA hringnae tuiphuek a ceitakhai awh .

<sup>14</sup> Oe! BAWIPA na hawi sak haw, pawiteh ka hawi han, na runngang haw ka hlout han, kai ni nang doeh na pholen. <sup>15</sup> Ahnimouh ni kai koevah, BAWIPA e lawk teh namaw ao, atuvah kuep sak haw, na ti pouh awh.

<sup>16</sup> Na hnukkâbang e tukhoumkung lah ka onae koehoi ka roun mahoe. Hawihoe hnae hnin a pha hane hai ka ngai hoeh. Ka tâcawt e lawk hah na panue teh na hmalah ao. <sup>17</sup> Kai hanelah taki kawi lah awm hanh, ronaen a pha navah nang teh kai ni kângue e hmuen doeh. <sup>18</sup> Kai na ka rektapnaw



hah yeiraipo awh naseh, hatei kai teh yeirai na po sak hanh, ahnimanaw teh yawng awh naseh, hatei kai teh, na yawng sak hanh. Ahnimanaw van vah ronea phat sak nateh, let hni touh hoi ahnimouh lathueng phat sak haw.

### *Sabbath hnin thounsaknae*

<sup>19</sup> BAWIPA ni kai koevah hettelah a dei, cet nateh taminaw e kho rapan longkha, Judah siangpahrangnaw a tâco kâen koevah, Jerusalem rapan longkha pueng koe kangdout haw. <sup>20</sup> Ahnimanaw koevah, kâen tâcawt e taminaw pueng hoi Judah siangpahrangnaw pueng voi, BAWIPA lawk teh thai awh haw.

<sup>21</sup> BAWIPA ni hettelah a dei, sabbath hnin hnori na phu hoeh nahan, Jerusalem na kâenkhai hoeh nahan kâhruetcuat awh. <sup>22</sup> Na imthungkhu hoi hnori sin awh hanh. Sabbath hnin vah thaw taww awh hanh, na mintoenaw koevah kâ ka poe tangcoung patetlah sabbath hnin vah kathoungcalah ya awh. <sup>23</sup> Hatei, ahnimouh ni a thai ngai awh hoeh teh, a hnâ hai pakeng awh hoeh, a lungpata sak awh teh, ka patounnae lawk hah thai awh hoeh, dâw ngai awh hoeh.

<sup>24</sup> BAWIPA ni hettelah a dei, hatei nangmouh ni ka lawk na ngai awh hoeh. Sabbath hnin vah hete rapan longkha koehoi hnokari hah na sin awh hoehpawiteh, thaw na taww awh laipalah sabbath hnin hah kathoungcalah na ya awh pawiteh, <sup>25</sup> Devit e bawitungkhung dawkvah, ka tahung e leng hoi marang kâcui e, siangpahrangnaw ni hete rapan longkhanaw daww hoi a bawinaw hoi a kâen awh han. Ahnimouh hoi bawinaw ni Judah taminaw hoi Jerusalem vah kho kasaknaw hoi, hete khopui thung vah a yungyoe na o awh han. <sup>26</sup> Judah khonaw hoi Jerusalem tengpam khonaw hoi Benjamin ram hoi akalae ram hoi mon lae ram hoi, Negeb ram koehoi taminaw a tho awh vaiteh, lunghawi thuengnae hah BAWIPA im a poe awh han. <sup>27</sup> Sabbath hnin kathoungcalah a ya awh teh, sabbath hnin vah Jerusalem rapan longkhanaw koehoi hnori phu laihoi kâen hoeh nahanelah a dei e hah na ngai awh hoehpawiteh, Jerusalem rapan longkhanaw koevah, kadout thai hoeh e hmai ka tâco sak vaiteh, Jerusalem siangpahrang im a kak vaiteh roun mahoe toe.

## 18

### *Hlaam kasakkung hoi amhru*

<sup>1</sup> BAWIPA koehoi Jeremiah koe ka phat e lawk teh hettelah a o, <sup>2</sup> Hlaam kasakkung im cet nateh, hawvah kai ni lawk na poe han, atipouh. <sup>3</sup> Hatdawkvah, hlaam kasakkung im lah ka cei teh, hatnavah hlaam kasakkung, hlaam saknae a tabu koe thaw a taww e hah ka hmu. <sup>4</sup> Amhru hoi sak e talai teh hlaam kasakkung e kut daww hoi a raww dawkvah, kasakkung ni ama ni ahawi ati e patetlah a katha alouke e bout a sak.

<sup>5</sup> Hatdawkvah, BAWIPA e lawk teh kai koe a pha. <sup>6</sup> Oe Isarel imthungkhu, hete hlaam kasakkung ni hlaam a sak e patetlah kai ni nangmouh heh na sak thai mahoe maw, telah BAWIPA ni ati. Hlaam kasakkung e kut daww talaihlaam ao e patetlah oe Isarel imthungkhu nangmouh hai kaie kut daww vah na o awh. <sup>7</sup> Nâtuék hai uknae thoseh, miphun kong daww thoseh, phaww hoi ka raphoe vaiteh, ka yei han telah ka dei nakunghai, <sup>8</sup> hote miphun ni ahni taranlahoi ka dei e kecu daww, hawihoehnae kamlang takhai pawiteh, a lathueng vah hawihoehnae sak hanelah, ka kâcai e hah ka kâhno han. <sup>9</sup> Hahoi nâtuék e atueng hai



miphun kong dawk thoseh, uknae kong dawk thoseh, ka sak vaiteh, ka kangdue sak han telah ka dei nakunghai, <sup>10</sup> ka dei e ngai laipalah ka mithmu vah kathoute sak pawiteh, ahni hanlah hawinae ka sak han ka tie hah, let ka kâhno han. <sup>11</sup> Hatdawkvah, Judah taminaw hoi Jerusalem khokasaknaw koe BAWIPA ni hettelah a dei. KEnhaw! nangmae kong dawk hnokahawi e ka pouk teh, kâtarannae ka pouk lahun, tami pueng ni kahawihoehe nuencang hah kamlang takhai pawiteh, na hringnae khosaknae nuen hah kâthung awh telah tet pouh.

### *Hnâpang Isarel*

<sup>12</sup> Hateiteh, ahnimouh ni hot teh ngaihawinae kaawm hoeh e doeh ati, ma ni ahawi tie patetlah o awh vaiteh, tami pueng a lungpouk payonnae ni kâ a poe e patetlah sak awh han telah ati awh. <sup>13</sup> Hatdawkvah, BAWIPA ni hettelah a dei. Jentelnaw pacei awh haw, het patet lae apinimaw a thai boi, Isarel tanglakacuem ni takikatho e hno hah a sak toe. <sup>14</sup> Lebanon mon talung van e ka bawt e tadamtui hah tami buet touh ni a ceitakhai boimaw. A tengpam hoi ka lawng e tuipading hah a hak boimaw. <sup>15</sup> Ka taminaw ni na pahnim awh dawkvah, patopatang kaawm hoeh e meikaphawk koevah hmuitui a sawi awh. Hote ni vah ayan e lamkaruem a phen sak awh. Picai hoe e lamthung lam a dawn awh. <sup>16</sup> Amamae ram teh yungyoe panuikhai hanelah a ceitakhai awh teh, ka cet kaawm pueng ni kângairu teh a lûsaling sin awh. <sup>17</sup> Kanîtholae kahlî kathout patetlah tarannaw hmalah, peng kâkayeï sak han. A yawthoenae hnin nah ka hmalah tho laipalah ka hnukkhu lah a kamlang takhai han telah ati.

### *Jeremiah a pacepahlek awh*

<sup>18</sup> Ahnimouh ni tho awh, Jeremiah hah youk awh sei. Bangkongtetpawiteh, vaihmanaw koe e kâlawk kahmat mahoehe, profetnaw koe e lawk hai pout mahoehe, tho awh, pathoe awh sei, a lawk hai bang lah noutna pouh hanh sei, telah ati awh.

<sup>19</sup> Oe BAWIPA ka kong heh pouk haw, kai ka tarannaw e lawk hah na thai pouh haw. <sup>20</sup> Hnokahawihoehe hah, hnokahawi hoi pathung boimaw. Bangkongtetpawiteh, ka hring nahanelah tangkawm a tai awh. Ahnimouh koehoi ka lungkhueknae roun nahane hoi ahnimouh hanelah hawinae dei hanelah, na hmalah ouk ka kangdue e hah na pahnim pouh hanh.

<sup>21</sup> A canaw hah takang kâhmo sak nateh, tahloi thakaawme kâhmo sak haw. A yunaw hah a due awh vaiteh lahmai la coung awh naseh, a napanaw hah lacik hoi dout awh naseh, karoung lahun e naw hai taran hmuen koe tahloi hoi thei e lah awm awh naseh.

<sup>22</sup> Tarankatuknaw hah ahnimouh koe pouk laipalah na pha sak toreï teh, a imthung dawk hoi khuika lawk kampaw naseh. Bangkongtetpawiteh, man hanelah na kâcai awh dawkvah, tangkom a tai awh teh, ka khok kâman nahanelah karap a patung awh.

<sup>23</sup> Oe BAWIPA kai thei hanelah a kâcai awh e hah na panue toe. Ahnimae yonnae hah yontha pouh hanh. Na hmaitung vah a payonnae naw hah kahmat sak hanh. Na hmalah kamlet sak nateh na lungkhueknae hnin na vah hottelah sak haw.

## 19

### *Tuium*

<sup>1</sup> BAWIPA ni hettelah a dei, cet nateh hlaam ka sak e ni amhru hoi a sak e tuium hah ran haw. Hahoi kacuenaw hoi vaihmanaw thung e kacuenaw



hah hrawi nateh, <sup>2</sup> Kanitholae longkha kung koe Benhinom tanghling koe cet haw, hawvah nang koe ka dei hane lawk hah na pâpho han. <sup>3</sup> Hettelah na dei han, Judah siangpahrangnaw hoi Jerusalem vah, kho kasaknaw BAWIPA e lawk hah thai awh. Isarel Cathut ransahu BAWIPA ni hettelah a dei, khenhaw! kathainaw pueng e hnâ dawkh khik ka cawt e kathoute hah ka pha sak han. <sup>4</sup> Bangkongtetpawiteh, ahnimouh ni na pahnawt awh teh, hete hmuén heh a khin sak. Amamouh hoi a napanaw hoi Judah siangpahrangnaw ni hai a thai boihoe e cathut alouknaw koe hmuítui a sawi awh teh, hete hmuén heh yonnae ka tawn hoe e thipaling a kawi sak.

<sup>5</sup> Hahoi a canaw hah Baal koe hmaisawi thuengnae poe hanelah, Baal hmuénrasang hah a kangdue sak awh. Hot teh kâ ka poe e nahoe e, ka dei boihoe e, ka lungthin dawkh hai kâen boihoe e. <sup>6</sup> Hatdawkhvâh, thaihaw! atueng hah a pha han BAWIPA ni ati. Hatnae hnin nah hete hmuén heh Topheth telah kaw mahoe e. Benhinom tanghling tie hai tet hoe e toung vaiteh, kâtheikârawngnae tanghling telah ti han toe. <sup>7</sup> Hete hmuén dawkh Judah hoi Jerusalem khokhangnae hah a hrawnghrang lah ka coung sak han. Ahnimouh teh tahloi hoi a hringnae taran kut dawkh ka poe vaiteh, a ronaw hah kahlun e tava hoi talî moithangnaw e rawka lah ka poe han. <sup>8</sup> Hahoi hete khopui teh tami kingdi e, panuikhai hanelah ka coung sak vaiteh, a kâhmo e thoebonae kecu dawkh, ka cet pueng ni kângairu awh vaiteh a panuikhai awh han. <sup>9</sup> A canu hoi a capanaw e moi hah ka ca sak han. A hringnae ka lawm hane tarannaw ni a kalup awh teh, kângai ka ru lah ao sak torei teh, tami pueng ni a imrinaw e moi hah a ca awh han. <sup>10</sup> Hahoi na hrawi e naw hmaítung vah tuum hah rak hem.

<sup>11</sup> Ahnimouh koe hettelah na dei han. Ransahu BAWIPA ni hettelah a dei, hlaam kasakkung e hlaam hah tami ni rak a hem teh, pathoup thai lah ao hoe e patetlah hete taminaw hoi hete kho hah rak ka hem vaiteh, Topheth vah pakawp nahane hmuén ao hoe e totouh a pakawp awh han. <sup>12</sup> Hot patetlah hete hmuén heh ka ti roeroe han telah BAWIPA ni a dei. Hete kho heh Topheth patetlah ka coung sak vaiteh, athung e kho kasaknaw lathueng hai ka sak han. <sup>13</sup> Jerusalem imnaw hoi Judah siangpahrangnaw im hoi im tangkuem e a lathueng vah kalvan lah kangvaw hoi hmuítui sawinae imnaw pueng hoi, cathut alouknaw koe nei hane a awinae imnaw pueng hah, Topheth hmuén patetlah khin sak e lah ao han. <sup>14</sup> Jeremiah teh BAWIPA ni lawk dei hanelah a thanae hmuén Topheth hoi a tho teh, BAWIPA im thongma dawkh a kangdue teh, tamimaya koevah hettelah a dei. <sup>15</sup> Isarel Cathut ransahu BAWIPA ni hettelah a dei, khenhaw! ka lawk a ngai awh hoe e nahanelah, a lungthin a pata sak awh kecu dawkh thoenae kadeinaw pueng hah hete khopui hoi khonaw pueng dawkh ka pha sak han telah ati.

## 20

### *Pashhur ni Jeremiah a hem*

<sup>1</sup> Jeremiah ni hottelah lawk a dei e hah BAWIPA im e kahrawikung kacuepoung lah kaawm e Immer capa vaihma Pashhur ni a thai. <sup>2</sup> Hottelah Pashhur ni profet Jeremiah hah a hem teh, BAWIPA im e Benjamin longkha atunglah kaawm e dawkhvâh, hlong a buet teh a paung. <sup>3</sup> A tangtho vah Pashhur ni Jeremiah hah a rathap teh Jeremiah ni, BAWIPA ni na min teh Pashhur tet hoe e toe, Magormissabib telah ati toe atipouh.



<sup>4</sup> Bangkongtetpawiteh, BAWIPA ni hettelah a dei, Khenhaw! nang hoi na huinaw pueng hanelah taki ka tho e lah na coung sak han. A tarannaw hah tahloi hoi a rawp awh vaiteh, na mit hoi na hmu han. Judah tami pueng hah Babilon kut dawkh be ka poe han, ahnimouh ni Babilon vah san lah a hrawi awh vaiteh, tahloi hoi a thei awh han. <sup>5</sup> Hothloilah, khopui tawntanae, tawh e lahoi a hmu awh e pueng, apu kaawm e hno pueng, Judah siangpahrang râwnaw pueng hah a tarannaw kut dawkh be ka poe han, ahnimouh ni a lawp awh vaiteh, a man awh han, Babilon vah a hrawi awh han. <sup>6</sup> Nang Pashhur na imthung kaawmnaw pueng hoi san lah be na toung awh han. Babilon vah na cei vaiteh, haw vah na due han. Haw vah nama hoi na huinaw hai laithoe kapâphonaw pueng hoi pakawp lah be na o awh han telah ati.

### *Jeremiah thawtawknae dawkh min mathoenae*

<sup>7</sup> BAWIPA nama ni na pasawt teh, ka tarawi toe. Nang teh kai hlak na tha a sai teh na tâ. Kanî a lounm totouh panuilai lah na dei teh panuikhai e lah ka o. <sup>8</sup> Bangkongtetpawiteh, lawk ka dei navah, ka hram teh kâyuekâounnae, pacekpahleknae telah ouk ka hram. BAWIPA e lawk teh kai hanelah hnintangkuem pathoenae hoi panuikhai e lah ao.

<sup>9</sup> Ama teh ka toum mahoehtoe, a min lahoi lawk hai ka dei mahoehtoe, ka ti nakunghai, ka hru thung vah hmaisaaan patetlah ka lungthin thung vah ouk ao. Kaawm khai thai hoehtoe niteh, ka khang thai roeroe hoehtoe.

<sup>10</sup> Bangkongtetpawiteh, na panuikhai e naw hah ka thai. Avoivang hoi takinae ao. Raipot awh sei, raipot awh han, telah ati awh. Ka tâlaw nahanelah meng ka pawm e ka huikonaw ni, na pasawt thai yawkaw han, hettelah hoi tavai teh a lathueng vah pathung thai han telah ati awh.

<sup>11</sup> Hatei, BAWIPA teh athakaawme tami, takikathopoung patetlah kai koe ao. Kai na ka rektapnaw hah a bo awh vaiteh, na tâ awh mahoehtoe. Kayayeirai hoi ao awh han, a lamcawn mahoehtoe dawkhvâh, a yungyoe a min mathoenae teh pahnim e lah awm mahoehtoe.

<sup>12</sup> Oe! ransahu BAWIPA, tamikalannaw ka tanouk e, lungthin hoi pouknae ka tapuet lah kahmawtkung, ahnimae lathueng vah na pathung e hah na hmu sak. Bangkongtetpawiteh, ka kong teh nama koe ka hruektoe.

<sup>13</sup> BAWIPA koevah la sak awh nateh, BAWIPA teh pholen awh. Bangkongtetpawiteh, yonae kasaknaw a kut dawkh hoi kabawp a ngai e naw hringnae hah a rungngang pouh.

### *Jeremiah e kalung*

<sup>14</sup> Ka khenae hnin teh thoebo lah awm seh, anu ni na khenae hni teh yawhawinae lah awm hanh seh.

<sup>15</sup> Apa koevah, capa na tawn telah lawk a phu teh, a lung kahawi sak e hah thoebo lah awm seh.

<sup>16</sup> Ama teh BAWIPA ni pahren laipalah be raphoe e kho patetlah awm seh. Amom lah a pawlawknaw thai e lah awm seh. Kanîthun lah hramnae lawk thai naseh.

<sup>17</sup> Camoim thung vah na thei hoehtoe dawkhvâh, na thet pawiteh anu von teh kaie phuen lah awm vaiteh, camoim ni pou na von han ei,

<sup>18</sup> Bang kecu dawkh maw patang hoi lungmathoe hoi o hanelah kayayeirai dueng hoi ka hring thung a hninnaw hno hanelah camoim dawkh hoi ka tâco telah ati.



## 21

*Zedekiah ni heinae*

<sup>1</sup> Babilon siangpahrang Nebukhadnezar ni na tuk toe. BAWIPA ni a lentoenae hno ouk a sak e patetlah kabawp ngainae hah ban sak thai mahoe hnamaw, tie hah BAWIPA koe na het pouh seh, telah dei pouh hanelah, <sup>2</sup> siangpahrang Zedekiah ni Melhiah capa Pashhur hoi Maaseiah capa vaihma Zephaniah hah Jeremiah koevah a patoun. Hatnavah, Jeremiah koevah, BAWIPA e lawk ka phat e teh hettelah ao.

<sup>3</sup> Jeremiah ni, Zedekiah koevah, hettelah dei pouh awh.

<sup>4</sup> Isarel Cathut BAWIPA ni hettelah a dei, khenhaw! Babilon siangpahrang hoi Khaldean tami rapan alawilah hoi na kavennaw, tarantuknae puengcang hoi ka ban sak han. Hahoi khopui thung vah, ahnimouh teh ka pâkhueng han. <sup>5</sup> Kama roeroe ni ka lungkhueknae hoi ka lung a onae hoi ka lungphuennae kut hoi ka thaonae hoi ka tuk han. <sup>6</sup> Hie kho dawkhoo ka sak e taminaw hoi saringnaw hah be ka thei vaiteh, takikathopounge lacik hoi a due awh han. <sup>7</sup> Hahoi teh BAWIPA ni siangpahrang Zedekiah hoi a san, kho louk kaawm e lacik hoi tahloi hoi tangkhang hoi kahloutnaw hah Babilon siangpahrang Nebukhadnezar kut dawkhoo, a tarannaw e kut dawkhoo, thei hanelah katawngnaw kut dawkhoo, ka poe vaiteh, kahranpoung e tahloi hoi a tuk awh han. Pahrennae tawn laipalah pâhlung mahoe. Lungmanae hai tawn awh mahoe telah ati.

<sup>8</sup> Hahoi tamimaya koevah na dei han, BAWIPA ni hettelah a dei. Khenhaw! duenae lamthung hoi hringnae lamthung hah na hmalah ka hruek. <sup>9</sup> Hete khopui thung kaawm e pueng tahloi hoi thoseh, takang hoi thoseh, lacik hoi thoseh, a due awh han. Hateiteh, a tâco teh nangmouh ka ven e Khaldean taminaw koevah ka kâpoenaw dueng a hring awh han. A hringnae teh ahnimouh koe poe e phu lah ao han. <sup>10</sup> Hete khopui hawi nahanelah tho laipalah, a ro nahanelah ka noe e doeh toe. Babilon siangpahrang kut dawkhoo poe lah ao vaiteh, ahni ni hmai hoi a sawi han, telah BAWIPA ni a dei.

*Devit imthung koe lawkthuinae*

<sup>11</sup> Judah siangpahrang imthungnaw kong dawkhoo BAWIPA e lawk hah thai awh haw.

<sup>12</sup> Oe! Devit imthungnaw, BAWIPA ni hettelah a dei. Hnintangkuem lawkkatang hoi lawkkâceng awh nateh, pacekpahlek e naw kut thung hoi hnepnap kâhmo e naw hah ngang awh, telah nahoe pawiteh, ka lungkhueknae hah hmai patetlah tâcawt vaiteh, na yon kecu dawkhoo apinihai padout thai laipalah a kak payon han doeh.

<sup>13</sup> Khenhaw! tanghling dawkhoo kasaknaw, nangmouh tanghling dawkhoo ka sak e apimaw kaimouh ka o nah koevah, ka kâen han katetnaw, na taran awh han telah BAWIPA ni a dei.

<sup>14</sup> Hateiteh, na sakyoe e hoi kamcu lah ka rek awh han. Atu raw vah, ratu dawkhoo hmai ka tâco sak vaiteh, a tengpam pueng koug a kak han telah BAWIPA ni a dei.

## 22

<sup>1</sup> BAWIPA ni hettelah a dei, Judah siangpahrang im vah cet nateh hete lawk hah dei pouh. <sup>2</sup> Oe! Judah siangpahrang Devit e bawitungkhung dawkhoo ka tahung e nang hoi na sannaw hoi, na taminaw hi kâennaw hoi BAWIPA lawk hah thai awh haw.



<sup>3</sup> BAWIPA ni hettelah a dei, kalancah lawkceng awh nateh, thoebonae kut dawh hoi a man awh e naw hah rungngang awh. Imyin hoi na pa ka tawn hoehe e naw, lahmainaw koe lanhoehnae hoi pacekpahleknæ sak awh hanh. <sup>4</sup> Bangkongtetpawiteh, hete lawk heh na tarawi awh katang boipawiteh, Devit e bawitungkhang dawh e siangpahrangnaw hoi leng hoi marang kâcui hoi ama hoi a sannaw hoi a taminaw hoi longkha dawh a kâen thai awh han ei. <sup>5</sup> Hatei, hete lawk hah banglahai na ngai awh hoehpawiteh, hete im heh koug a houg han, telah amahoima thoe a kâbo telah BAWIPA ni a ti.

<sup>6</sup> BAWIPA ni Judah imthungkhu koevah, hettelah a dei, nang teh kai hanlah Gilead patetlah hoi, Lebanon mon patetlah doeh na o. Hatei kingdi e kahrawng hoi apinihai a ring hoehe e kho patetlah na coung sak han.

<sup>7</sup> Nang na kâraphoe hanelah senehmaica sin hoi kâcai han, na rawi e sidar thing hah tâtueng awh vaiteh, hmai hoi a sawi awh han.

<sup>8</sup> Miphun moikapap ni hete kho hah rakan awh vaiteh, tamipueng ni amae a imri koevah, Cathut ni hete ka lentoe e khopui hah bangkongmaw hettelah khuet a tho sak vai telah ati awh han. <sup>9</sup> Amamae Cathut BAWIPA lawkkamnae hah a ceitakhai awh teh, alouke cathut a bawh awh teh, a thaw a tawh pouh awh dawkvah telah a pathung han.

### *Shallum han kamthang*

<sup>10</sup> Kadoutnaw hah khui awh hanh, rabui hai rabui awh hanh. Kahmatnaw hane paleipalang teh puenghoi khuikapkhai awh. Bangkongtetpawiteh, bout a ban thai hoehe han toung dawkvah, a tâconae ram a hmu hoehe han toung dawkvah. <sup>11</sup> Bangkongtetpawiteh, Judah siangpahrang Shallum Josiah capa, a na pa Josiah yueng lah kaukkung hete hmuen koehoi ka cet e kong dawkvah, BAWIPA ni hettelah a dei, hivah bout ban mahoehe toe. <sup>12</sup> San lah a ceikhainae hmuen koe hawvah a due roeroe han, hete ram heh hmawt mahoehe toe.

### *Jehoiakim han kamthang*

<sup>13</sup> Lanhoehnae lahoi im a sak teh, kalanhoehe lahoi imvannaw a sak teh, a yawn lahoi amahoima, hoi a imri a thayung a hno teh kutphu poe laipalah kaawm e teh lungmathoe hanlah a o.

<sup>14</sup> Im kalenpoung lah imvan tawn e ka sak han. Hlangaw hah ka paawng vaiteh, disar thing hoi be ka sak vaiteh, a rong ka paling e ka hluk vai na ka tet nang, lungmathoe hanlah ao.

<sup>15</sup> Sidar thing hoi houk na sak kecu dawh siangpahrang lah na pouk maw. Na pa niyah, a ca a nei teh, kalanhoehe lah lawk a ceng nahoehmaw. Hot teh ama hanlah ahawi ngoun.

<sup>16</sup> Tami roedeng hoi kavouthoupnaw koug ka pouk pouh, hottelah ahawi. Hetheh na panue hane kawî nahoehmaw, telah BAWIPA ni a dei.

<sup>17</sup> Hatei kâsokâroumnae hoi kayonhoehe theinae hoi, repcoungrøe hane hoi, kâutnae dueng hah na mit hoi na lung ni a pouk.

<sup>18</sup> Hatdawkvah, Judah siangpahrang Jehoiakim Josiah capa kong dawh, BAWIPA ni hettelah a dei. Aya! ka hmaunawnggha hoehpawiteh, Aya! ka tawncanu telah khui awh mahoehe. Aya! Ka pâtukung hoehpawiteh, aya! a sungrennae hah telah khui awh mahoehe.

<sup>19</sup> Jerusalem longkha alawilah vah, la pakawp e patetlah a pakawp awh han. <sup>20</sup> Lebanon mon dawh luen awh nateh hram awh. Bashan vah hram awh haw, Abarim hmuen koe hram awh. Bangkongtetpawiteh, na huinaw pueng be a due awh toe. <sup>21</sup> Na kuepcing awh lahunnah, nang koe lawk ka dei hane, nang ni ka thai mahoehe telah na ti. Ka lawk na thai ngai hoehe



e heh, na nawca hoi e na nuencang doeh. <sup>22</sup> Kahlî ni nange tukhoumnaw be a ca han. Na huikonaw hah san a tOUNg awh han. Hottelahoî na hawihoeahnae dawK kayayeirai phu lahoi na o roeroe hah. <sup>23</sup> Oe! Lebanon mon dawK kho ka sak ni feh, sidar thing koe tabu katukkung patawnae na lathueng a pha toteh, pahren ka tho kawi lah na o hanelah ca ka khe e ni pataw a khang e patetlah doeh ao han.

### *Koniah han kamthang*

<sup>24</sup> Kai ka hring e patetlah BAWIPA ni a dei. Judah siangpahrang Jehoiakim capa, Koniah teh ka kut aranglae min thutnae kuthrawt lah kaawm nakunghai, hote hmuen koehoi na phawk han. <sup>25</sup> Thei hanelah na katawngkung, mei hmu hanelah na taki e naw kut dawK, Babilon siangpahrang Nebukhadnezar kut hoi Khaldeannaw e a kut dawK na poe awh han. <sup>26</sup> Na khenae kho dawK laipalah, ram alouke dawK nang hoi na kakhenkung na manu heh, na tâkhawng vaiteh hawvah na due han. <sup>27</sup> Hateiteh ban han na ngaipoungnae ram dawK na ban mahoe toe.

<sup>28</sup> Hete Koniah heh ka rek e hlaam dudam hane kawi lah awmhoeh na maw. Athung vah ngai hane kawi kaawm hoeh e hlaam nahoehmaw. Bangkongmaw ama hoi a catounnaw alawilah, a tâco sak teh, panue boihoeh e ram dawK tâkhawng e lah ao awh vaw.

<sup>29</sup> Oe! talai talai talai, BAWIPA e lawk hah thai haw, <sup>30</sup> BAWIPA ni hettelah a dei. Hete tami heh ca tawn laipalah a hringyung thung vah a lamthung ka cawn hoeh hate tami doeh. Bangkongtetpawiteh, a catounnaw hai apihai a lamcawn niteh, Devit e bawitungkung dawK tahung hane hoi, Judah kaukkung lah awm awh mahoe telah a ti.

## 23

### *BAWIPA hoi tuhu*

<sup>1</sup> Kaie saringnaw a pânae hmuen koe e kâkayeisakkung tukhoumnaw teh lungmathoe hanelah ao awh, telah BAWIPA ni a dei. <sup>2</sup> Hatdawkvah, BAWIPA Isarel Cathut ni ka taminaw ka khoum e tukhoumnaw kong dawkvah, hettelah a dei, ka saringhu hah na kâkayeî sak awh, na pâlei awh teh, na khenyawn awh hoeh. Khenhaw! na sak awh e yonnae kecu dawK na tho sin han telah BAWIPA ni a dei. <sup>3</sup> Ka saringhu, kacawirae ka saringhu hah ka pâlei ram dawK hoi ka pâkhueng vaiteh, ngai ka tho poung e a paw ka paw e lah awm awh vaiteh, a pungdaw awh han. <sup>4</sup> Ahnimouh ka kawK hane tukhoumnaw hah ka pouk pouh han, taki puennae awm hoeh tOUNg vaiteh, kângairu awh mahoe toe. Kahmat e hai awm mahoe toe, telah BAWIPA ni a dei.

### *Devit cakang*

<sup>5</sup> Khenhaw! Devit hanelah kalan e cakang ka kangdue sak hane atueng hah a pha tawmlei toe, telah BAWIPA ni a dei. Siangpahrang buet touh ni a uk vaiteh, a hmacawn han, talai van lawkcengnae hoi lannae a kuep sak han. <sup>6</sup> Ahnimae tueng nah Judah teh, rungngang lah ao vaiteh, Isarel teh karoumcalah ao han. Hahoi, a min teh BAWIPA teh kaimae lannae tie lah ao han.

<sup>7</sup> Hatdawkvah, khenhaw! atueng a pha tawmlei, BAWIPA ni ati. Isarelnaw Izip ram hoi ka tâcawtkhaikung BAWIPA teh a hring e patetlah tet awh mahoe toe. <sup>8</sup> Tung lae ram hoi a pâleinae ramnaw thung hoi Isarel imthung a tâcokhai teh, bout kabankhaikung BAWIPA a hring e patetlah tet awh vaiteh amamae ram dawK khosak awh han.



*Profetkaphawknaw pâpho e a hrawnghrang*

<sup>9</sup> Profetnaw kecu dawk ka lungthin thung vah a rek. Ka hrunaw hai kounge kâhuet, yamu ka parui e tami patetlah doeh ka o, BAWIPA hoi kathounge a lawk kecu dawk yamu ni rektap e patetlah ka o.

<sup>10</sup> Bangkongtetpawiteh, ram teh uicuknae hoi a kawi teh, thoebo e kecu dawk ram ni a khui awh. Kahrawng hmuen kahawi pueng kounge a ka toe. A hringnae lamthung hah a payon teh, a thaonae hai lan hoeh.

<sup>11</sup> Bangkongtetpawiteh, profetnaw hoi vaihmanaw ni CATHUT hah bang lah noutna awh hoeh. Hawihoehnae naw hah ka imthung vah ka hmu telah BAWIPA ni a dei.

<sup>12</sup> Hatdawkvah, a lamthung pueng teh khohmo vah ka pâhnan e lamthung patetlah ao han. Hote lamthung dawk pâlei e lah awm vaiteh, ka pâhnan e dawk kounge a rawp awh han. Bangkongtetpawiteh, ahnimouh lathueng vah kathoute reknae hah ka pha sak han, telah BAWIPA ni a dei.

<sup>13</sup> Samaria profetnaw dawkvah, panuetho e hah ka hmu, Baal kampang lahoi lawk hah a dei awh teh, Isarel naw hah lampaihei lah a ceikhai awh.

<sup>14</sup> Jerusalem e profetnaw dawk hai takitho poung e hno hah ka hmu, a uicuknae dawk a luen awh teh, laithoe hoi kho a sak awh. Apihai a thoenae dawk hoi a ban awh hoeh nahanelah, yonnae kasaknaw e kut hah a thao sak awh. Kai hanelah teh Sodom khonaw patetlah doeh ao. A kho thung e taminaw pueng hai Gomorrah kho e taminaw hoi a kâvan awh.

<sup>15</sup> Hatdawkvah, profetnaw kong dawk ransahu BAWIPA ni hettelah a dei, khenhaw! amamae cai kakhat hoi ka kaw kaweitah, kakhat e tui hah ka nei sak han. Bangkongtetpawiteh, Jerusalem e profetnaw kecu dawk ram thung pueng dawk Cathut taki teh bari hoeh nae hah a tâco.

<sup>16</sup> Ransahu BAWIPA ni hettelah a dei, profet ni nangmouh koe a dei awh e lawk hah ngai pouh hanh awh. Bang hoeh e hah na cangkhai awh. BAWIPA e pahni daw k hoi ka tâcawt e nahoe h niteh, amamae lungpouk e hah ouk a dei awh. <sup>17</sup> Kai na kadudamnaw koe vah, roumnae ka hmu awh han, BAWIPA ni ati, telah pout laipalah rek a dei awh. Amamae lungthin thung a ngaihawi e patetlah kacetnaw koe vah, thoenae nangmae lathueng vah phat mahoe h telah ati awh.

<sup>18</sup> Bangkongtetpawiteh, BAWIPA khokhangnae hah apimaw ka hrawk boi, a lawk daw k hoi kapanuekkung apimaw kaawm. Hoe h pawiteh, a lawk teh lawkpui lah pouk teh apinimaw a thai boi vaw.

<sup>19</sup> Kenhaw! ka patawpoung katang e, bongparui BAWIPA lungkhueknae bongparui hah a tâco toe, tamikathoutnaw e lû daw k ka patawpoung e lah a bo han.

<sup>20</sup> BAWIPA lungkhueknae teh ban mahoe h, a lungthung a noe tangcoung e teh, a kuep sak vaiteh, a cum hoe hroukrak ban mahoe h toe. A hnuktengpoung e hnin ka kuepcalah na panue awh han doeh. <sup>21</sup> Profet patoun ngai laipalah a yawng awh, ahnimouh koe ka dei pouh hoe h hai lawk a dei awh.

<sup>22</sup> Kaie khokhannae daw k awm van pawiteh, ka lawk heh ka taminaw koe pâpho van vaiteh, a yonnae daw k hoi pankângai awh han ei. <sup>23</sup> Kahlat lah kaawm e Cathut nahoe h niteh, a hnaicanae koe kaawm e Cathut lah maw ka o, telah BAWIPA ni a dei. <sup>24</sup> Ka hmu thai hoe h nahanlah ka kâhrawk thai e ao awh maw, telah BAWIPA ni a dei. Talai hoi kalvan daw k ka kawi nahoe hmaw, telah BAWIPA ni a dei. <sup>25</sup> Mang ka mang, mang ka mang ti teh ka min lahoi laithoe ka dei e profetnaw ni dei e lawk hah ka thai. <sup>26</sup> Laithoe ouk ka dei e profet a ma hoi a lungthin a kâdum



teh lawk ouk ka dei e lungthin dawk nâtotouh maw ao han. <sup>27</sup> Ahni ni a imri koe a mang lah a dei pouh teh, a napanaw ni Baal kecu dawk ka min a pahnim e patetlah ka taminaw hah ka min pahnim sak hanelah a kâcai awh. <sup>28</sup> Mang ka tawn e profet ni a mang hah dei naseh, kaie lawk ka tawn e profet ni kaie lawk hah yuemkamcu lah dei naseh, cahik hoi cahuem ni bangne kâvannae a tawn, telah BAWIPA ni a dei. <sup>29</sup> Ka lawk teh hmai patetlah talung rekkâbawng lah ka dêi thai e cakkin patetlah awm hoeh namaw, telah BAWIPA ni a dei. <sup>30</sup> Hatdawkvah, thai awh haw! kaie lawk ouk ka parawt e profet hah ka taran doeh, telah BAWIPA ni a dei. <sup>31</sup> Khenhaw! a lai ka pâhnan e profet BAWIPA ni a dei, ka tet e hah ka taran doeh, telah BAWIPA ni a dei. <sup>32</sup> Khenhaw! a mang hah laithoe a dei teh, kâhat laipalah a dei awh e laithoe lahoi, lam teng lah ka taminaw kacetsakkung, profet hah ka taran doeh telah BAWIPA ni a dei. Hateiteh, ahnimouh ka patoun teh kâ ka poe hoeh. Hatdawkvah, taminaw hawinae poe kalawn hoeh, telah BAWIPA ni a dei.

### *BAWIPA e arulawk*

<sup>33</sup> Tamimaya thungup hoi thoseh, profetnaw thung hoi thoseh, vaih-manaw thung hoi thoseh, BAWIPA ni a pâpho e bangne telah na pacei awh pawiteh, hettelah na dei pouh han, bang lawk pâpho e maw, nangmanaw totouh na ceitakhai awh han, telah BAWIPA ni a dei. <sup>34</sup> Profet thoseh, vaihma thoseh, tami buetbuet touh thoseh, BAWIPA e pâpho lawk ao ka tet e tami awm pawiteh, hote tami hoi a imthung hah kai ni ka rek han. <sup>35</sup> Hottelah tami bangpatet nihai, a imri thoseh, a hmaunawngaha koe thoseh, BAWIPA ni bangtelamaw a pathung, BAWIPA ni bangne a dei telah a pacei awh han. <sup>36</sup> BAWIPA ni a pâpho e doeh katetkung hah teh, na dei awh mahoehe toe. Bangkongtetpawiteh, tami bangpatet hai amae lawk hah ama hanelah a pâpho e lah kaawm han. <sup>37</sup> Profet koevah, BAWIPA ni bangtelamaw na pathung, BAWIPA ni bangmaw a dei, na ti pouh han. <sup>38</sup> Nangmouh ni BAWIPA e pâpho lawk doeh na ti awh dawkvah, BAWIPA ni a dei e teh, BAWIPA e pâpho lawk ao na ti awh hoeh nahanlah, kai ni kâ na poe awh eiteh, nangmouh ni BAWIPA e pâpho lawk ao na ti awh e lawk na hno awh dawkvah, <sup>39</sup> thaihaw! betbet na sawn awh han. Kai koe na onae koehoi na tâkhawng awh han, nangmouh hoi na khopui, nangmouh koe thoseh, na mintoenaw koe thoseh, na poe awh e hoi, <sup>40</sup> a yungyoe pathoenae hoi kayayeirai pahnim thai e lah kaawm hoeh e hah nangmouh koe ka pha sak han.

## 24

### *Thai paw bom kahni touh bangnueae*

<sup>1</sup> Babilon siangpahrang Nebukhadnezar ni, Judah siangpahrang Jekoniah, Jehoiakim capa, Judah kahrawikung, kutsakthoumnaw hoi sumdei-thoumnaw hoi Jerusalem hoi Babilon lah a ceikhai awh hnukkhu, BAWIPA ni a pâttue teh, khenhaw! thaibunglung paw bom kahni touh heh BAWIPA e bawkim e hmalah a pâhung awh. <sup>2</sup> A bom buet touh dawk thaibunglung paw kahawipoung e, thaibunglung paw ka hmin pasuek e patet e hah ao. A bom alouk lae dawk teh, thaibunglung paw kahawihoehe ca hanelah kamcu hoek totouh kahawihoehe hah ao. <sup>3</sup> BAWIPA ni kai koevah, bangne na hmu, Jeremiah telah ati. Kai ni thaibunglung paw kahawipoung e hoi kahawihoehe cakawi hoeh e telah ka ti.



<sup>4</sup> BAWIPA e lawk hah kai koe a pha teh, <sup>5</sup> BAWIPA Isarel Cathut ni hettelah a dei, san ka toung e Judahnaw, Khaldean ram dawk ahawi awh nahanelah ka patoun e naw hah hete kahawi e thaibunglung paw patetlah ka khet han. <sup>6</sup> Bangkongtetpawiteh, ahawi awh nahan ahnimae lathueng ka mit ka hruek vaiteh, hete ram dawk na bankhai awh han, ahnimouh ka pathung vaiteh, ka raphoe mahoe toe, ka ung vaiteh, ka phawng mahoe toe. <sup>7</sup> BAWIPA lah ka o thainae panuethainae lungthin hah ka poe han. Ka tami lah ao awh vaiteh, ahnimae Cathut lah ka o han. Bangkongtetpawiteh, a lungthin abuemlahoi kai koe bout a ban awh han.

<sup>8</sup> BAWIPA ni hettelah a dei, thaibunglung paw kahawihoe e, ca han kamcu hoe totouh kahawihoehe patetlah Judah siangpahrang Zedekiah hoi kahrawikungnaw hoi Jerusalem e kacawirae hete ram dawk kaawmnaw hoi Izip dawk kho ka sak e hah ka hnamthun takhai roeroe han. <sup>9</sup> Ka rucut poung lahoi talai uknaeram tangkuem dawk dudam hane ka hreknaw ram pueng koe pahnawt, pacekpahlek, yue han hoi theobo e lah ao nahanlah ka poe han. <sup>10</sup> Amamouh hoi a mintoenaw koevah, ka poe e ram thung hoi a thup awh totouh, ahnimouh koe tahloi, takang, hoi lacik ka patoun han telah BAWIPA ni ati.

## 25

### *Kum 70 thung santoungnae*

<sup>1</sup> Judah siangpahrang Jehoiakim, Josiah capa a bawinae kum pali nah, Judah taminaw pueng kong dawk Jeremiah koe ka tho e lawk teh: hatnae tueng Babilon siangpahrang Nebukhadnezar a bawinae a kum pasueknae doeh. <sup>2</sup> Hote lawk teh profet Jeremiah ni Judahnaw pueng hoi Jerusalem kaawmnaw pueng koevah, a dei e doeh. <sup>3</sup> kum 23 touh thung Judah siangpahrang Josiah Ammon capa a bawinae kum 13 hoi sahnin totouh BAWIPA e lawk teh a tho. Amom ka thaw teh nangmouh koe ouk ka dei ei, na thai ngai awh hoe. <sup>4</sup> BAWIPA ni nangmouh koe a thaw katawkkung profet pueng a patoun toe, amom a thaw awh teh, a patoun. Hatei, na thai ngai awh hoe. Thai hanelah na hnâpakeng ngai awh hoe.

<sup>5</sup> Hote profetnaw ni tami pueng mae yonnae lam hoi a tawksak awh e hawihoe hah pankângai vaiteh, BAWIPA ni nangmouh koehoi napanaw koevah a yungyoe hanelah na poe awh e ram dawkvah khosak awh. <sup>6</sup> Ahnimae cathut baw hane hoi thaw tawk pouh hanelah kâbang hanh awh. Hahoi na kut hoi na sak e hoi ka lungkhuek sak hanh awh. Hat pawiteh, patawnae na poe awh mahoe, telah ouk ati awh. <sup>7</sup> Hateiteh, nangmouh pawaw nahanelah, na kut thawtawknae ni ka lungkhuek sak teh, na tarawi ngai awh hoe, telah BAWIPA ni ati.

<sup>8</sup> Hatdawkvah, ransahu BAWIPA ni hettelah a dei, ka lawk na tarawi ngai awh hoe dawkvah, <sup>9</sup> kenhaw! atunglae imthung pueng hah ka patoun vaiteh, koug ka la han, telah BAWIPA ni ati. Ka san Babilon siangpahrang Nebukhadnezar hai, ram dawk ka tho sak vaiteh, ahni ni hete ram hoi hete ram thung kaawmnaw hoi hitapat kaawm e miphun pueng tuk hanelah ka thokhai han. Koug ka raphoe vaiteh, kângairu hane hoi, pathoe vaiteh raphoe yungyoe e lah ka coung sak han. <sup>10</sup> Ahnimouh thung vah nawmnae hoi lunghawilawknaw kamthang, yuvâ kâpaluennae pawlawk hoi, paang e hmaiang hah ka la pouh han. <sup>11</sup> Hete ram pueng hah koug a rawk han, hahoi hete miphun ni Babilon siangpahrang e thaw hah kum 70 touh a tawk awh han. <sup>12</sup> Hahoi kum 70 touh a baw toteh, Babilon siangpahrang hoi hote miphun hoi Khaldeannaw e ram teh, a yon awh



kecu dawkvah, ka rek vaiteh, a yungyoe ka raphoe han, telah BAWIPA ni ati. <sup>13</sup> Hahoi ram lathueng vah, ka dei e lawk pueng, Jeremiah ni miphun pueng lathueng vah a dei e, hete cauk thung thut e pueng hah ka kuep sak han. <sup>14</sup> Bangkongtetpawiteh, miphun kuep hoi ka lentoe e siangpahrangnaw ni, amamouh thung hoi a ngai awh e hah a rawi awh vaiteh, a sak awh e hoi a tawk awh e patetlah moi ka pathung han.

*Miphunnaw koe lawkcengnae*

<sup>15</sup> Isarel Cathut BAWIPA ni kai koe hettelah a dei, Ka kut dawk kaawm e lungkhueknae manang hah lat nateh, ka patoun hane miphun hah pânei haw. <sup>16</sup> A nei awh vaiteh, rawrawcu awh han. Ahnimouh koe ka patoun hane tahloi kecu dawkvah, lungmuenti awh han, telah ati. <sup>17</sup> BAWIPA kut dawc e manang hah ka la teh, BAWIPA ni a patoun e miphunnaw ka pânei. <sup>18</sup> Hotnaw teh hetnaw hah doeh. Jerusalem hoi Judah khopui, haw e siangpahrangnaw hoi kahrawikungnaw, raphoenae hoi kângairu hane hoi lawkthoe hoi thoebonae lah ao nahanelah, atu e a nuencangnaw hah, <sup>19</sup> Izip siangpahrang Faro hoi a ransa kahrawikungnaw hoi a taminaw pueng, <sup>20</sup> ahni hoi kambawng e Jentelnaw pueng, Uz ram dawc e siangpahrangnaw, Filistin ram e siangpahrangnaw pueng, Askelon, Gaza. Ekron, hoi Asdod kaawm e siangpahrang, <sup>21</sup> Edom hoi Moab, Ammon catounnaw, <sup>22</sup> Taire siangpahrang pueng hoi Zidon siangpahrangnaw pueng, tuipei teng siangpahrangnaw pueng hoi, <sup>23</sup> Dedan, Tema, Buz hoi ahlanæ koe kaawmnaw pueng, <sup>24</sup> Arabia siangpahrangnaw pueng, ramke khosak e miphun kambawng e siangpahrang pueng, <sup>25</sup> Zimri siangpahrangnaw pueng, Elam siangpahrangnaw pueng, Media siangpahrangnaw pueng, <sup>26</sup> atunglae siangpahrangnaw pueng, ahla a hnai a kâtarui awh e patetlah talai uknaeram pueng hah a nei awh hnukkhu, Sheshak siangpahrang ni a nei han. <sup>27</sup> Ahnimouh koe, ransahu BAWIPA, Isarel Cathut ni hettelah a dei. Net awh nateh, parui awh. Palawt awh nateh rawm awh. Thaw awh hanh lawih. Bangkongtetpawiteh nangmouh koe ka patoun hane tahloi kecu dawkvah, na ti pouh han. <sup>28</sup> Hahoi na kut dawc e manang nei hane heh lat ngai awh hoehpawiteh, ahnimouh koe hettelah na dei pouh han. Ransahu BAWIPA ni hettelah a dei, na nei roeroe han <sup>29</sup> Bangkongtetpawiteh, ka min lahoi kaw e khopui dawc, thoena sak hanlah ka kamtawng teh, nangmouh rek laipalah ka o han na maw, rek laipalah na awm awh mahoe. Bangkongtetpawiteh, talai van khosaknaw pueng koe vah, tahloi ka palik han, telah ransahu BAWIPA ni a dei.

<sup>30</sup> Hatdawkvah, ahnimouh taran lahoi, hete lawk pueng pâpho nateh, ahnimouh koe vah, BAWIPA teh hmuenrasang koehoi a hram han. Khosaknae hmuen kathoung koehoi a lawk a tâco han. A rapan taranlahoi puenghoi a hram han. Misur katinkung patetlah talai van kaawm pueng taranlahoi a hram han.

<sup>31</sup> Talai pout totouh, pawlawk a kamthang han. Bangkongtetpawiteh, BAWIPA ni miphun a taran teh, moithang pueng lathueng lawkceng han. Tamikathout teh tahloi koe a poe han, telah BAWIPA ni a dei.

<sup>32</sup> Ransahu BAWIPA ni hettelah a dei, khenhaw! thoena ni miphun pueng a katin han. Katangpounge kahlî talai poutnae koehoi a tho han.

<sup>33</sup> Hat hnin vah BAWIPA ni a thei e naw hah talai poutnae koehoi talai poutnae koe totouh a kâyat vaiteh, talai dawc eitaboung patetlah ao awh han.

<sup>34</sup> Tukhoumnaw hramki awh nateh, kap awh. Nangmae tuhu thung e kahrawikungnaw hai paleipaluet awh. Bangkongtetpawiteh, thei nahane



hnin hoi na kâkapek nahane hnin teh a pha katang toe. Ka sungren e hlaam patetlah a rawp awh han.

<sup>35</sup> Tukhoumnaw hanlah yawng nahane hmuen awm mahoe. Tuhunaw thung dawk kahrawikungnaw nihai, roun nahane lamthung tawn awh mahoe.

<sup>36</sup> Tukhoumnaw khuinae pawlawk hoi tuhunaw thung dawk hoi kahrawikungnaw hramnae pawlawk hah thai e lah ao han. Bangkongtet-pawiteh, BAWIPA ni a pawngpanae ramhringnaw heh a raphoe pouh teh,

<sup>37</sup> kalenpounge BAWIPA lungkhueknae kecu dawkvah, duem ao nahane hmuen hai he a raphoe.

<sup>38</sup> Sendek patetlah a kâhronae hmuen a tâco takhai toe. Bangtelamaw, ka mathengpoung e ni repcongrounae hoi ka mathengpoung e a lungkhueknae kecu dawkvah amamae ram kingdi toe telah ati.

## 26

### *Duenae dawk hoi Jeremiah rungngang lah a o*

<sup>1</sup> Judah siangpahrang Josiah capa Jehoiakim a bawinae kamtawng nah hete lawk BAWIPA koe hoi a tho. <sup>2</sup> BAWIPA ni hettelah a dei, BAWIPA e im thongma dawk kangdout haw, Judah khopuinaw pueng ni Cathut baw hanlah BAWIPA e im dawk kathonaw pueng koe dei hanlah na poe e lawknaw hah buet touh hai pâhma laipalah dei pouh. <sup>3</sup> Yonnae a sak awh dawkvah ahnima lathueng thoenae sak hanlah ka kâcai e let ka kâhno thai nahanlah tamipueng ni a yonae hah kamlang takhai teh, thai hanlah a ngai thai yawkaw han doeh. <sup>4</sup> Nang ni ahnimouh koevah, BAWIPA ni hettelah a dei, kaie lawk na thai ngai awh hoe teh, nangmae hmalah ka ta e kâlawnaw tarawi ngai hoe dawkvah, <sup>5</sup> amom ka thaw teh ka patoun e ka thaw ka taw e profetnaw e lawk hah banglahai noutna awh hoe pawiteh, <sup>6</sup> hete im heh Shiloh patetlah ka o sak vaiteh talai van e miphunnaw pueng ni thoebo e khopui lah ka coung sak han, telah na ti han, telah ati.

### *Jeremiah a man awh*

<sup>7</sup> Vaihmanaw hoi profetnaw hoi tamimaya ni BAWIPA im dawk Jeremiah ni a dei e lawk hah a thai awh. <sup>8</sup> Hahoi hettelah o, tamimaya koe dei hanelah BAWIPA ni a poe e lawknaw pueng he a dei hnukhu vaihma, profet hoi tamimaya ni, a man awh teh na due roeroe han! <sup>9</sup> Bangkongmaw BAWIPA e min lahoi, hete im heh Shiloh patetlah ao vaiteh hete khopui dawk tami awm laipalah kingdi han telah na dei, telah ati awh. Hattoteh BAWIPA e im dawk taminaw pueng ni Jeremiah teh a cusin awh. <sup>10</sup> Judah kahrawikungnaw ni hete kong a thai awh toteh siangpahrang im dawk e BAWIPA e im longkha katha koe a tahung awh. <sup>11</sup> Vaihma hoi profetnaw ni kahrawikungnaw hoi tamiu koe, hete tami he due hanlah a kamcu. Bangkongtetpawiteh, hnâ hoi na thai e patetlah hete khopui taranlahoi a pâpho toe, telah ati awh.

<sup>12</sup> Kahrawikungnaw pueng hoi taminaw pueng koe Jeremiah ni, lawknaw pueng na thai awh e patetlah, hete im hoi khopui raphoe hane kong dei hanelah BAWIPA ni a patoun. <sup>13</sup> Hatdawkvah, atu na hringnuen hoi na khosaknae hah pathoup awh nateh BAWIPA Cathut e lawk hah yuem awh, telah pawiteh, BAWIPA ni nangmae lathueng hawihoe hane pha sak hanlah a pâpho tangcoung e hah bout a kâhno han. <sup>14</sup> Kai hah teh, atu nangmae kut dawk ka o, a lan, ahawi na ti awh e patetlah, kaie lathueng



vah sak awh. <sup>15</sup> Kai na thet payon awh pawiteh namamouh hoi hete khopui hoi athung kaawmnaw pueng koe yonnae kaawm hoeh e thipaling na pha sak awh tie hah panuek awh. Atangcalah hete lawknaw heh na hnâthai awhnae koe dei hanelah BAWIPA ni na patoun e doeh, telah ati.

### *Jeremiah a hlout*

<sup>16</sup> Hat toteh, kahrawikungnaw hoi tamimaya ni, vaihma hoi profetnaw koevah, hete tami heh due hanelah kamcu hoeh, bangkongtetpawiteh, BAWIPA maimae Cathut min lahoi maimouh koe lawk a dei toe, telah ati awh. <sup>17</sup> Hote ram daw koe kacuenaw a kangdue awh teh, tamimaya koevah, <sup>18</sup> Mikah Morashtite tami ni Judah siangpahrang Hezekiah a bawi navah lawk a pâpho, hahoi Judah taminaw pueng koe, ransahu BAWIPA ni hettelah a dei. Zion teh laikaw k patetlah thawn e lah ao han, Jerusalem teh songnawng lah o vaiteh, bawkim mon teh ratu hmuernasang patetlah ao han, telah ati. <sup>19</sup> Judah siangpahrang Hezekiah hoi Judah taminaw pueng ni ahni hah a thei awh maw. BAWIPA taki lahoi BAWIPA ni ngai khainae doeh a pacei awh teh, BAWIPA ni ahninae lathueng hawihoe hnae pha sak hane hah bout a kâhno nahoe hmau. Hatei, maimouh teh kalenpounge hawihoe hnae hah mamouh taranlahoi sak awh.

### *Profet Uriah*

<sup>20</sup> Hahoi alouke tami BAWIPA e min lahoi lawk ka dei e Kiriath tami Shemaiah capa Uriah hah bout ao. Jeremiah ni a dei e naw patetlah hete ram hoi khopui raphoe hane kong hah a dei.

<sup>21</sup> Siangpahrang Jehoiakim hoi athakaawme taminaw hoi kahrawikungnaw pueng ni a thai awh toteh, siangpahrang ni thei hanelah a kâcai. Hatei, Uriah ni a thai toteh a taki teh Izip ram lah a yawng. <sup>22</sup> Hahoi siangpahrang Jehoiakim ni Izip ram lah Akbor capa Elnathan hoi alouke taminaw hoi a patoun. <sup>23</sup> Izip ram daw koe Uriah a tâcokhai awh teh siangpahrang Jehoiakim koevah a thokhai awh, ama ni tahloi hoi a thei teh a ro hah lam teng mathoenaw e phuen daw koe a tâkhawng, telah ati awh.

<sup>24</sup> Hatei, Shaphan capa Ahikam ni Jeremiah a kampangkhai dawkvah, thei hanelah tamimaya e kut daw koe poe hoeh.

## 27

### *San hoi kahnam bangnuenae*

<sup>1</sup> Judah siangpahrang Josiah capa Zedekiah abawinae kamtawng pasuek nah, BAWIPA koehoi hete lawk teh a pha. <sup>2</sup> BAWIPA ni kai koe hettelah a dei. Kahnam hoi a rui hah na lahuen daw k bang. <sup>3</sup> Edom siangpahrang, Moab siangpahrang, Taire siangpahrang, Zidon siangpahrang naw koevah, Judah siangpahrang Zedekiah koe patounenaw Jerusalem vah ka tho e kut daw k patawn. <sup>4</sup> A bawipanaw koe dei hanelah kâ a poe, hettelah Isarel Cathut, ransahu BAWIPA ni a dei. Hettelah na bawipanaw koe na dei pouh han.

<sup>5</sup> Kalenpounge ka hnotithainae hoi kut ka dâw teh, talai hoi tami hoi talai van e saringnaw phunkuep hah ka sak, poe hanlah ka pouk e naw koe kâ poe. <sup>6</sup> Atu hai thoseh, ka thaw ka taw koe Babilon siangpahrang Nebukhadnezar e kut daw kete ramnaw pueng teh kâ poe toe. Kahrawngum e saringnaw hai ahnie thaw taw k hanelah kâ poe toe. <sup>7</sup> Ahnie uknae rawknae koe pha hoe hna hlan teh, miphunnaw pueng ni ama hoi a capanaw hoi a mincanaw e thaw a taw k pouh awh han.



Hathnukkhū miphun kapap, kalenpounge siangpahrangnaw ni ahni teh san lah a coung sak awh han.

<sup>8</sup> Hahoi, Babilon siangpahrang Nebukhadnezar e kahnam ka phawt ngai hoeh e, a thaw ka tawk ngai hoeh e miphun hoi uknaeram teh tahloi hoi thoseh, takangnae hoi thoseh, lacik hoi thoseh ahnie kut dawk hoi raphoe hoe roukrak, ahnimanaw teh ka rek han. <sup>9</sup> Hatdawkvah, namamae profet, khueyue, mangkamangnaw, kutkhetkathoum, taânkasinaw, Babilon siangpahrang e thaw na tawk awh mahoehtelah ka dei e naw hah tang pouh hanh awh. <sup>10</sup> Na ram dawk hoi ahlapounge nae koe na ceikhai thai nahanelah nangmouh koe laithoe kapâphonaw doeh, ka pâlei vaiteh he a kahma awh han. <sup>11</sup> Hatei, Babilon siangpahrang e kahnam ka phawt ni teh a thaw tawk hane ka ngai e tami teh amamae ram dawk bout ka o sak han, laikaw kanaw awh vaiteh haw vah kho pou a sak awh han, telah BAWIPA ni a dei.

<sup>12</sup> Judah Siangpahrang Zedekiah koehoi hete lawknaw pueng ka dei pouh. Babilon siangpahrang e kahnam phawt awh nateh ama hoi a taminaw e thaw tawk nateh hring awh. <sup>13</sup> Babilon siangpahrang e thaw ka tawk ngai hoeh e miphunnaw kong dawk BAWIPA ni a dei tangcoung e hah bangkongmaw tahloi hoi lacik dawk nama hoi na taminaw hah a due awh han vaw. <sup>14</sup> Hatdawkvah nangmouh koe, Babilon siangpahrang e thaw tawk pouh hanh awh telah, ka dei e profetnaw e lawk hah yuem hanh awh. Bangkongtetpawiteh, nangmouh koe laithoe doeh a pâpho awh. <sup>15</sup> Bangkongtetpawiteh, ahnimouh kai ni ka patoun hoeh, hatei, nangmouh hoi nangmouh koe lawk ka pâpho e profet hah ka pâlei vaiteh na kahma awh nahan kaie min noe lahoi laithoe a pâpho awh, telah BAWIPA ni a dei.

<sup>16</sup> Vaihmanaw hoi tamihunaw pueng koehai, BAWIPA ni hettelah a dei, nangmouh koe vah, khenhaw Babilon hoi BAWIPA im dawk e hnopainaw teh bout a thokhai awh han, telah a dei e profetnaw e lawk hah yuem awh hanh. Bangkongtetpawiteh, nangmouh koe laithoe kadeinaw doeh. <sup>17</sup> Ahnimae lawknaw hah tarawi pouh hanh awh, Babilon Siangpahrang e thaw tawk awh nateh, hring awh, bangkongmaw he e khopui teh a rawk han vaw. <sup>18</sup> Hatei profet lah ao awh teh BAWIPA im hoi Judah siangpahrang im hoi Jerusalem e hnopai cei takhai e hah Babilon vah phakhai hoeh nahanlah ransahu BAWIPA koe pacei awh naseh. <sup>19</sup> Bangkongtetpawiteh, ransahu BAWIPA ni khom karasang e hoi rahum tuium hoi pâhungnae hete khi dawk kaawm rae hnopainaw hoi, <sup>20</sup> Babilon siangpahrang Nebukhadnezar ni Judah siangpahrang Jehoiakim hoi Judah hoi Jerusalem e kacuenaw pueng Jerusalem hoi Babilon lah san lah a ceikhai teh kaawm rae kong teh hettelah a dei. <sup>21</sup> Ransahu BAWIPA, Isarel Cathut ni, BAWIPA e im hoi Judah siangpahrang e im hoi Jerusalem e hnopai kaawm rae kong dawk hettelah a dei. <sup>22</sup> Babilon lah ceikhai lah kaawm hane, ahnimouh ka hloe hoehnahlan teh, haw vah o awh han. Hahoi bout ka la vaiteh hete hmuen koe bout ka ta han, telah BAWIPA ni a dei.

## 28

### *Hananiah e laithoe lawk*

<sup>1</sup> Judah Siangpahrang Zedekiah abawinae kum pali, thapa yung panga nah, profet Hananiah, Azzur capa, Gibeon tami ni, vaihmanaw hoi taminaw koe vah BAWIPA e im dawk na pato teh kai koe, <sup>2</sup> ransahu



BAWIPA, Isarel Cathut ni hettelah a dei, Babilon Siangpahrang e kahnam teh ka kâkhoe sak toe. <sup>3</sup> A kum kum hni touh thung BAWIPA e im dawk e hnopai Babilon siangpahrang Nebukhadnezar ni hete hmuen koehoi a la teh Babilon lah a ceikhai e hah, hete hmuen koe bout ka bankhai han. <sup>4</sup> Hete hmuen koevah Judah siangpahrang Jehoiakim capa Jekoniah hoi Babilon lah ka cet e Judah tami santoung e naw pueng hah bout ka bankhai han, bangkongtetpawiteh, Babilon siangpahrang e kahnam hah ka khoe han, telah BAWIPA ni a dei telah ati.

<sup>5</sup> Profet Jeremiah ni vaihmanaw hoi BAWIPA e im dawk kangdout e taminaw hmalah profet Hananiah koevah, <sup>6</sup> profet Jeremiah roeroe ni, Amen! hettelah BAWIPA ni sak katang naseh. BAWIPA im dawk e hnopainaw hoi san lah ceikhai e taminaw pueng hah Babilon hoi hete hmuen koe bout bankhai hanlah na pâpho e dawk BAWIPA ni sak katang seh. <sup>7</sup> Hatei, rangpuinaw hoi na hnâthainae koe ka dei e lawk hah thaihaw. <sup>8</sup> Kai hoi nang hoehnahlan, yampa e profetnaw ni ram moikapap e lathueng hoi kalenpounge uknae dawk tarântuknae, hawihoehtae hoi lacik kongnaw ouk a dei awh. <sup>9</sup> Roumnae lawk ka pâpho e profet kong daw, profet lawk a pha toteh hote profet teh, BAWIPA ni a patoun e doeh tie hah panue lah o han doeh, telah atipouh.

<sup>10</sup> Hahoi profet Hananiah ni profet Jeremiah e lahuen daw k e kahnam hah a la teh a khoe. <sup>11</sup> Rangpuinaw hmalah Hananiah ni, hettelah BAWIPA ni a dei, hettelah Babilon siangpahrang Nebukhadnezar e kahnam teh kum hni touh thung roeroe vah miphunnaw e lahuen daw k kâkhoe sak han telah ati. Hahoi profet Jeremiah ni a ceitakhai.

<sup>12</sup> Profet Hananiah ni profet Jeremiah lahuen daw k e kahnam a khoe pouh hnukkhu Jeremiah koe BAWIPA e lawk a pha. <sup>13</sup> Cet nateh Hananiah koevah hettelah dei pouh. Hettelah BAWIPA ni a dei, thing kahnam na khoe e yueng lah sumkahnam na sak han atipouh. <sup>14</sup> Bangkongtetpawiteh, hettelah Isarel Cathut, ransahu BAWIPA ni a dei, Babilon siangpahrang Nebukhadnezar e thaw taw k thai awh nahan, hete hah miphunnaw pueng heh sumkahnam, phu sak lah ao. Ahni e thaw a taw k awh han, kahrawng moithangnaw hai ahni ka poe toe, telah ati. <sup>15</sup> Profet Jeremiah ni profet Hananiah koevah, thaihaw, Hananiah, BAWIPA ni na patoun e nahoeht, hatei hete taminaw hah laithoe na yuem sak. <sup>16</sup> Hatdawkvah, hettelah BAWIPA ni a dei, khenhaw, talai daw k hoi na takhoe han. BAWIPA taranlahoi taranthawnae na cangkhai dawkvah takum daw k na due han atipouh.

<sup>17</sup> Hahoi, hatnae kum daw k, thapa yung sari nah profet Hananiah teh a due.

## 29

### *Jeremiah ni ca patawn e*

<sup>1</sup> Profet Jeremiah ni Jerusalem vah san lah kaawm rae kacuenaw, vaihma hoi profet, Nebukhadnezar ni Jerusalem hoi Babilon lah a ceikhai e naw thung daw k hoi kaawm rae naw koe ca a patawn e teh, <sup>2</sup> siangpahrang Jekoniah hoi siangpahrangnu, tuenlanaw, Judah tami, Jerusalem kaukkung, kutsakkathoumnaw hoi sumdeinaw ni Jerusalem a tâco takhai awh hnukkhu. <sup>3</sup> Saphan capa Eleasah hoi Hilkiah capa Gemariah tinaw e kut daw k a patawn. Hotnaw teh Judah siangpahrang Hezekiah ni Babilon ram lah Babilon siangpahrang Nebukhadnezar koe a patoun e naw doeh. <sup>4</sup> Ransahu BAWIPA, Isarel Cathut ni san lah ceikhai e



naw pueng, Jerusalem hoi Babilon lah san lah a ceisak e naw pueng koe hettelah a dei. <sup>5</sup> Im sak awh nateh haw vah khosak awh. Takha sak awh nateh a paw naw cat awh. <sup>6</sup> Yu lat awh nateh canunaw capanaw tawn awh. Hottelah canu capa tawn thai nahanlah na capanaw hanlah yu paluen pouh awh, haw vah takangnae awm laipalah pungdaw awh. <sup>7</sup> San lah na osaknae khopui hanelah roumnae tawng awh nateh BAWIPA koe het awh. Bangkongtetpawiteh roumnae koe roumnae na hmu awh han. <sup>8</sup> Ransahu BAWIPA, Isarel Cathut ni hettelah a dei, nangmouh thung e profetnaw hoi camkathoumnaw ni na dumyen hanh naseh. mangkamangnaw yuem pouh hanh awh. <sup>9</sup> Bangkongtetpawiteh, kaie min hno lahoi laithoe a dei awh, kai ni ka patounnaw nahoe, telah BAWIPA ni a dei.

<sup>10</sup> Bangkongtetpawiteh, BAWIPA ni hettelah a dei, Babilon teh kum 70 touh akuiep toteh ka hloe vaiteh, nangmouh koe vah kahawi e ka lawk kakuep sak vaiteh hete hmuen koe boutbout na bankhai awh han.

<sup>11</sup> Bangkongtetpawiteh, nangmae kong daw koe lungpouk teh ka panue. Nangmouh ngaihawinae apout toteh ngaihawinae poe hane hawihoe hane laipalah hawinae koe lah doeh ka pouk, teh lah BAWIPA ni a dei.

<sup>12</sup> Hattoteh nangmouh ni kai na tawng awh han, na tho awh vaiteh kai koe na ratoum awh vaiteh kai ni na thai pouh han. <sup>13</sup> Nangmouh ni kai na tawng awh vaiteh na lungthin buemlah hoi na tawng awh toteh na hmu awh han. <sup>14</sup> Na hmu awh e lah ka o han, telah BAWIPA ni dei. San lah na o awh hmuen koehoi na bankhai awh han, miphun tangkuem daw koe na kâkaheisaknae hmuen koehoi na pâkhueng awh han, telah BAWIPA ni a dei. San lah na mansaknae hmuen koe roeroe vah na hrawi han.

<sup>15</sup> Bangkongtetpawiteh, BAWIPA ni Babilon ram daw koe hai profet na ta pouh telah na ti awh. <sup>16</sup> Hatdawkvah, BAWIPA ni Devit bawitungkhung daw koe tahung e siangpahrang e kong hoi hete khopui daw koe kho ka sak e taminaw kong hoi san lah hrawi hoe e na hmaunawng hanaw e kong daw koe hettelah a dei. <sup>17</sup> Ransabawi, BAWIPA ni hettelah a dei. Khenhaw! ahnima e lathueng vah tahloi, takang hoi lacik ka pha sak vaiteh, thai-bunglung paw ca han kahawihoehe patetlah ka coungsak han. <sup>18</sup> Hahoi tahloi, takang lacik hoi ka pâlei awh han. Ahnimouh ru sak hanelah tailai uknaeram pueng koe ka poe han, ahnimouh koe ka patawnnae miphunnaw e rahak vah thoebo e tami, kângairu e, pacekpahlek e, hoi dudam e taminaw lah ka o sak han. <sup>19</sup> Bangkongtetpawiteh, ahnimouh koe ka patoun e ka san profetnaw hno lahoi ka lawk banglahai ngai awh hoe, telah BAWIPA ni ati. Amom ka thaw teh ka pâtam ei na thai ngai kalawn awh hoe, telah BAWIPA ni ati. <sup>20</sup> Hatdawkvah, nangmouh Jerusalem hoi Babilon lah ka patoun teh san lah kaawmnaw pueng, BAWIPA e lawk thai awh haw. <sup>21</sup> Ransahu BAWIPA, Isarel Cathut ni Kolaiah capa Ahab hoi Maaseiah capa Zedekiah e min lahoi nangmouh koe laithoe ka dei e kong daw koe hettelah a dei. Khenhaw! Babilon siangpahrang Nebukhadnezar e kut daw koe poe vaiteh nangmae mithmu roeroe vah a man awh han. <sup>22</sup> Ahnima e kong daw koe, Babilon ram e Judah tami san lah kaawmnaw pueng ni, Babilon siangpahrang ni hmai daw koe pâeng e Zedekiah hoi Ahab patetlah BAWIPA ni nangmae lathueng vah sak naseh, tie thoebonae lawk daw koe, a pâkuem awh han. <sup>23</sup> Bangkongtetpawiteh, Isarel ram daw koe hnokathout a sak awh teh, a imri e yu koe a uicuk awh teh kaie min hno laihoi kâ ka poe hoe e laithoe lawknaw a dei awh. Kai kama doeh kapanuekkung hoi kapanuekkhaikung lah ka o, telah BAWIPA ni ati. <sup>24</sup> Nehelam tami Shemaiah kong daw koe hai nang ni hettelah na dei han.



<sup>25</sup> Isarel Cathut, ransahu BAWIPA ni hettelah a dei, Jerusalem e taminaw pueng koe hai thoseh, nang namae min roeroe lahoi ca na patawn, tet pouh.

<sup>26</sup> Tamipathunaw hoi profet lah kakâsaknaw pueng thongim thung na paung teh hlawnghuet sak hanelah BAWIPA ni vaihma Jehoiada e yueng lah vaihma lah na o sak teh, BAWIPA e im khenyawnkung lah na o. <sup>27</sup> Hatdawkvah, bangkongmaw Anathoth tami Jeremiah nang koevah profet ka kâtet e na yue hoe. <sup>28</sup> Bangkongtetpawiteh, Babilon vah kai koevah ca na patawn teh santoungnae teh asaw han rah, im sak awh, haw vah khosak awh, takhanaw sak awh nateh, a pawnaw cat awh telah ati. <sup>29</sup> Hahoi vaihma Zephaniah ni hote ca teh profet Jeremiah thainae koe a touk.

### *Shemaiah hanlah kamthang*

<sup>30</sup> Hahoi, Jeremiah koe BAWIPA e lawk a pha. <sup>31</sup> Sankatoungnaw pueng koe Nehelam tami Shemaiah kong daw BAWIPA ni hettelah a dei, kai ni ka patoun hoe e Shemaiah ni nang koe lawk a dei telah laithoe lawknaw na yuem sak awh. <sup>32</sup> Hatdawkvah, BAWIPA ni hettelah a dei. Khenhaw! Nehelam tami Shemaiah hoi a imthungnaw ka rek han. Hete hmuene koe khokasaknaw rahak vah tami buet touh hai tawn mahoe. Ka taminaw hanlah ka sak hane hnokahawi hah hmawt van mahoe. Bangkongtetpawiteh BAWIPA taranlahoi taranthawnae a cangkhai.

## 30

### *Santoungnae koehoi a ban han*

<sup>1</sup> Jeremiah koe BAWIPA e lawk ka tho e teh: <sup>2</sup> Isarel BAWIPA Cathut ni hettelah a dei, nang koe ka dei e lawknaw pueng hah cauk daw thut. <sup>3</sup> Bangkongtetpawiteh, khenhaw! ka tami Isarelnaw hoi Judahnaw hah santoungnae koehoi bout ka bankhainae hnin a pha han telah BAWIPA ni a dei. A na mintoenaw koe ka poe e ram daw ka bankhai vaiteh haw vah kho a sak awh han telah BAWIPA ni a dei.

<sup>4</sup> Hahoi, Judah hoi Isarel kong daw BAWIPA ni dei e lawk teh hethah doeh. <sup>5</sup> Bangkongtetpawiteh, BAWIPA ni hettelah a dei, roumnae laipalah takinae hoi pâyawnae pawlawk ka thai. <sup>6</sup> Pacey awh nateh khenhaw! tongpa ni camokhenae a khang boimaw. Bangkongmaw napui ni camokhenae a khang e patetlah tongpa ni a keng tâdue teh minhmai a kamthim. <sup>7</sup> Bangkongtetpawiteh, hote hnin teh a len tangngak, hot patetlah awm boihoe. Jakop runae hnin roeroe doeh. Hatei ahnimanaw teh hote hmuene koehoi rungngang lah ao han.

<sup>8</sup> Hote hnin daw teh hettelah ao han, a kahnam hah kâkhoe vaiteh arui ka bouk pouh han. Ram alouknaw ni san lah bout awm sak mahoe toe. <sup>9</sup> Hatei, BAWIPA Cathut hoi siangpahrang hanlah ka kangdue sak hane Devit e thaw taw awh han toe. <sup>10</sup> Hatdawkvah oe, ka san Jakop, taket roeroe hanh, oe Isarel na lungpuen hanh, telah BAWIPA ni a dei. Bangkongtetpawiteh khenhaw! lamhlapoungnae koe santoungnae hmuene koehoi na catounnaw heh ka rungngang han. Jakop a ban vaiteh karoumcalah a kâhat han, apinihai lungpuennae poe mahoe toe. <sup>11</sup> Bangkongtetpawiteh, nang rungngang hanlah nang koe ka o, na kâkaheinae ram, miphunnaw hah ka pout sak nakunghai nang teh abuemiahoi he na poutsak mahoe. Hatei lannae hoi na cangkhai vaiteh rek laipalah teh na awm mahoe telah BAWIPA ni a dei.



<sup>12</sup> Bangkongtetpawiteh, BAWIPA ni hettelah a dei, na patawnae teh ka dam thai hoeh e doeh, na hmâ teh a nung poug. <sup>13</sup> Ahni kabawmkung awm hoeh, dam nahane tâsi hai bout awm hoeh. <sup>14</sup> A kâuep e naw ni a pahnim awh teh banglahai noutna awh hoeh toe. Na taran patetlah hmâ na casak teh patuep laipalah na rek toe. Bangkongtetpawiteh na yonnae naw apap teh na yonnae yikkawi. <sup>15</sup> Bangkonggmaw, na hmâ dawk na khuika. Na lungmathoenae teh damsak thai lah awm hoeh. Bangkongtetpawiteh, na sak payonnae apap teh na yonnae akawi dawkvah hete hnonaw na lathueng vah ka sak. <sup>16</sup> Hatdawkvah, nang na kacatnaw pueng ca lah o awh van vaiteh, nang na ka tarannaw pueng koe san a toung awh han. Nang ka raphoe e teh raphoe lah ao vaiteh, nang kaman e taminaw pueng man lah ao han. <sup>17</sup> Pahnawt e telah ati awh teh, apinihai banglahai ngai hoeh e Zion telah ati awh dawkvah, na hru ka damsak vaiteh na hmânaw pueng ka damsak han, telah BAWIPA ni a dei.

<sup>18</sup> BAWIPA ni hettelah a dei, khenhaw! Jakop lukkarei, santoungnae koe kaawm e hah ka bankhai han. Khosaknae hmuén hah ka pahren han. Siangpahrang im hai yampa e patetlah bout kangduesak han. <sup>19</sup> Lunghawilawkdinae hoi nawmnae pawlawk teh hote hmuén koehoi a tâco han, a taminaw ka pungdaw sak vaiteh, youn mahoe. Ahnimouh ka lentoesak vaiteh titcalah awm mahoe. <sup>20</sup> A canaw hai ayan e patetlah o awh vaiteh ka hmalah kamkhueng vaiteh a cak awh han. Ahnimouh ka rek e taminaw teh ka rek han. <sup>21</sup> Bari kaawm e tami hah amamouh thung hoi a tâco vaiteh khobawi hai amamouh thung daw k hoi a tâco han. Ahni ni na hnai hanlah ka dei pouh vaiteh, ahni ni na hnai han. Bangkongtetpawiteh kai hnai hanlah a lungthin daw k lawk ka kam pouh e hah apimaw, telah BAWIPA ni a dei.

<sup>22</sup> Ka tami lah na o awh vaiteh, kai teh nangmae Cathut lah ka o han, telah a ti. <sup>23</sup> Khenhaw! BAWIPA e kahlîkathout, kalenpounge a lungkhueknae kahlîkathout a tho vaiteh, tamikathoutnaw e lû a palek pouh han. <sup>24</sup> Lungthin hoi a kâcai e hah akuepsak teh a cum totouh, ka hring e BAWIPA lungkhueknae teh bout ban mahoe toe. A hnukteng hnin dawkvah hetnaw teh na thaipanuek awh han telah ati.

## 31

### *Kacawirae Isarel rungang lah a o*

<sup>1</sup> Hatnavah, kai teh Isarel imthungnaw pueng hanlah Cathut lah ka o vaiteh, ahnimouh hai ka tami lah o awh han, telah BAWIPA ni a dei.

<sup>2</sup> BAWIPA ni hettelah a dei, Isarel hah kâhatnae poe hanlah ka cei navah, tahloi daw k hoi kahloutnaw ni kahrawng vah pahrennae a hmu awh. <sup>3</sup> Ahlanae koehoi kai koe kamnuek e BAWIPA ni hettelah a dei, ka pouthaihoe e lungpatawnae hoi lung na pataw, hatdawkvah lungmanae daw k na kâenkhai. <sup>4</sup> Na kangdue sak vaiteh kangdue e lah na o han, oe tanglakacuem Isarel, kacakcalah kangdue lah na o han. Tâbaw hoi na kamthoup vaiteh a lungkahawinaw lamnae koe na baw van han. <sup>5</sup> Misur takha hah Samaria mon daw k na sak vaiteh hot van kho kasaknaw ni amamouh ngai patetlah a ca awh han. <sup>6</sup> Ephraim mon daw k khokasaknaw ni, thaw awh haw, maimae BAWIPA Cathut onae koe Zion mon koe cet awh sei telah hramnae tueng a pha han, telah a ti.

<sup>7</sup> Bangkongtetpawiteh, BAWIPA ni hettelah a dei, Jakop hanlah lunghawi laihoi la sak awh haw, kalenpounge miphun hanlah hram awh, pathang laihoi pholen awh, oe BAWIPA, kacawirae na tami Isarelnaw rungang



haw, telah dei awh. <sup>8</sup> Khenhaw! atunglae ram dawk hoi ka thokhai vaiteh, talai poutnae koehoi ka pâkhueng awh vaiteh mitdawn, khokkhem, camo ka vawn e napui hoi ka pataw e taminaw moikapap kamkhueng awh han. <sup>9</sup> Mitphi hoi tho awh vaiteh ngaithoumnae hoi ka hrawi awh han, ka lawng e tui koe, kamthuinae kaawm hoehe e lam kalan dawka hrawi han. Bangkongtetpawiteh, kai teh Isarel e a na pa lah ka o teh, Ephraim teh ka camin lah ao. <sup>10</sup> Oe miphunnaw, BAWIPA e lawk thai awh haw, a hlanae ram dawk pâpho awh, Isarel kâkapek sakkung ni bout a pâkhueng han, tukhoumkung ni tuhu a khetyawt e patetlah a khetyawt han. <sup>11</sup> Bangkongtetpawiteh, Jakop teh BAWIPA ni a ratang teh, ahni hlak thakaawme kut dawka hoi a runngang. <sup>12</sup> Zion monsom vah la sak laihoi tho awh vaiteh BAWIPA hawinae dawka lunghawi awh han, cakang, misur hoi satui, tu hoi saringnaw dawka lunghawi awh han, ahnimaehringnae teh tui awi e takha patetlah ao vaiteh a yungyoe lungmathoenae awm mahoehe toe. <sup>13</sup> Tanglakacuem teh lam laihoi a lunghawi vaiteh, thoundoun, hoi minpui, mintawngpanaw hoi a lunghawi awh han. Ahnimaehcingounae teh lunghawinae lah counsaka laihoi lung ka mawng sak vaiteh a lungmathoenae dawka hoi lung kahawi sak han. <sup>14</sup> Vaihmanaw teh kathâw e moi hoi kaboumcalah ka paca vaiteh, ka hawinae dawka taminaw a lungkuep awh han telah BAWIPA ni a dei.

### *Ephraim e lathueng lungmanae*

<sup>15</sup> BAWIPA ni hettelah a dei, Ramah kho dawka kamthang ka thai, tamikadout rabui laihoi kanae kamthang doeh. Rachel ni a canaw a khui teh a canaw o hoehe toung dawkvah lungpahawi thai kawi lah awh hoehe toe. <sup>16</sup> BAWIPA ni hettelah a dei, ka hoehe nahanlah na lawka kâpanguiep leih, na mitphi hai hui leih, bangkongtetpawiteh, na tawksak e dawka tawkpheu a hmu vaiteh, tarannaw e ram dawka hoi bout ban awh han telah BAWIPA ni a dei. <sup>17</sup> Nang e tueng poutnae dawka ngaihawinae ao. Na canaw teh bout a ban awh han telah, BAWIPA ni a dei. <sup>18</sup> Ephraim na khuikanae lawka ka thai doeh, nang nama ni na yue teh kacuete Maitotan patetlah bout na katha sak haw, bout ka ban han. Bangkongtetpawiteh, nang teh ka BAWIPA Cathut lah na o. <sup>19</sup> Bout ka ban hnukkhu pankângai katang, na yue hnukkhu ka phai ka tabawng teh ka kaya, ka naw nah min mathoenae dawka kaya laihoi duem ka o. <sup>20</sup> Ephraim teh ka lungpataw e capa, ka kâuep e camo nahoehmaw. Bangkongtetpawiteh, ahni taranlahoi lawka ka dei eiteh ahni khoeroe ka pahnim thai hoehe. Hatdawkvah ka lungthin ni a rabui teh ka lungma roeroe han telah, BAWIPA ni a dei.

<sup>21</sup> Mitnoutnae a vo nateh, ram mitnoutnae hah sak haw. Na cei tangcoungae lamthungpui dawka na lungthin hrueng haw. Bout ban, oe tanglakacuem Isarel na khopui koe bout ban leih. <sup>22</sup> Oe, nang hnuklah ka ban e canu, bangkongmaw na kâva han rah. Bangkongtetpawiteh BAWIPA ni talai dawka hno katha a sak toe. Napui ni tongpa a kalup han telah, a ti.

### *Hmalah Judah a bawi nahane*

<sup>23</sup> Isarel Cathut, ransahu BAWIPA ni hettelah a dei, santoungnae thung hoi ka bankhai toreih teh, Judah ram hoi khopui dawka hete lawka bout a hno awh han, oe lannae khosaknae hmuem, oe mon kathoung BAWIPA ni yawhawinae poe seh, telah a ti. <sup>24</sup> Hote Judah taminaw hoi a khopui thung e taminaw pueng hah, hmuem touh koe takhakatawkkungnaw hoi saring ka pacanaw hoi kho rei ka sak awh han. <sup>25</sup> Bangkongtetpawiteh, ka vouthoupnaw ka kawka vaiteh, lung ka mathoutnaw hai ka kawka han



telah a ti. <sup>26</sup> Hahoi, ka kâhlaw teh, kahawipoung e mang lah doeh a la o. <sup>27</sup> Khenhaw! a tueng kuep tawmlei, Isarel imthung hoi Judah imthung dawk tami e cati hoi saring e cati ka tu han telah, BAWIPA ni a dei. <sup>28</sup> Kai ni ahnimouh ka phawk, ka pakhup pathan, ouk ka rektap e patetlah, ahnimouh bout ka kangdue sak han telah a ti. <sup>29</sup> Hatnae tueng dawk a napanaw ni ka thut e misur a nei awh vaiteh a capanaw a hâ kayâ, tet awh mahoehtoe. <sup>30</sup> Hatei taminaw pueng mae sak payonnae dawk a due awh vaiteh, kathut e misurtui ka net e hânaw dueng doeh a kayâ han toe.

### *Lawkkam katha*

<sup>31</sup> Khenhaw! atueng kuep tawmlei telah, BAWIPA ni a dei, Isarel imthung hoi Judah imthung koe lawkkam katha ka sak toteh, <sup>32</sup> Izip ram dawh hoi tâcokhai hanlah ahnimae kut ka kuet hnin vah a na mintoenaw koe, ahnimae vâ lah ka o eiteh a rapha awh e ka lawkkam patetlah laipalah, telah BAWIPA ni a dei. <sup>33</sup> Hatei hetheh, Isarel imthungnaw koe lawkkamnae ka sak han e doeh, telah BAWIPA ni a dei. Ahnimouh koe ka kâlawk ka hruek vaiteh a lungthin dawh ka thut han, kai ahnimae Cathut lah ka o vaiteh, ahnimouh teh ka tami lah o awh han. <sup>34</sup> Apipatet nihai, BAWIPA teh panuek telah ma hoi imri hoi hmaunawnggha cangkhai mahoehtoe. Bangkongtetpawiteh, kahoengca koehoi kalenpoung totouh abuemlahoi kai na panue awh han toe, telah BAWIPA ni a dei. Kâtapoenae naw ka ngaithoum vaiteh yonnae naw hai ka pâkuem pouh mahoehtoe. <sup>35</sup> Hettelah BAWIPA teh khodai ang sak hanlah kanî kapoekung, karum angnae ka poe hanlah thapa hoi âsi hanlah phunglam kapoukpouhking, taucapa pawlawk kathosakkung ni a dei. A min teh ransahu BAWIPA doeh. <sup>36</sup> Hete phunglamnaw heh, ka mithmu hoi kahmat pawiteh Isarel catounnaw hai ka mithmu vah miphun buet touh a coungnae dawh hoi a kahma awh han, telah BAWIPA ni a dei. <sup>37</sup> BAWIPA ni hettelah a dei, lathueng e kalvan bangnue thai teh, talaidu pâlei thai pawiteh, Isarel catounnaw pueng a tawksak payonnae naw dawh ka raphoe van han telah BAWIPA ni a dei.

<sup>38</sup> Khenhaw! atu a pha tawmlei, Hananel imrasang hoi kamtawng teh khopui takin longkha totouh, khopui hah BAWIPA hanlah sak lah ao han, telah BAWIPA ni a dei. <sup>39</sup> A bangnue nae teh Gereb mon dawh kаланalah a cei vaiteh Goah lah a kalup han. <sup>40</sup> Tami ro hoi hraba rabawknae tanghlingnaw hoi kahrawngnaw pueng, Kidron palang tanghling totouh. Kanîtholah hoi marang longkha takin totouh BAWIPA hanlah kathounge lah ao han. Hothateh nâtuék hai kapek e hoi raphoe e lah awm mahoehtoe.

## 32

### *Jeremiah ni ram a ran*

<sup>1</sup> Judah Siangpahrang Zedekiah abawinae kum 10 nah, Nebukhadnezar abawinae kum 18 nah, Jeremiah koe BAWIPA e lawk a tho. <sup>2</sup> Hatnae tueng dawh Babilon siangpahrang ransahunaw ni Jerusalem a kalup awh teh, profet Jeremiah teh Judah siangpahrang kalupnae rapan thung vah thongim a bo. <sup>3</sup> Bangkongtetpawiteh, Judah siangpahrang Zedekiah ni, bangkongmaw BAWIPA ni hettelah a dei, khenhaw! hete khopui he Babilon siangpahrang kut dawh ka poe vaiteh a la han. <sup>4</sup> Judah siangpahrang Zedekiah hai Khaldeannaw e kut dawh hoi hlout mahoehtoe, Babilon siangpahrang e kut dawh bout a pha vaiteh, minhmai kâhmo



laihoi kâpato roi vaiteh a mit ni a mei a hmu han. <sup>5</sup> Zedekiah teh Babilon ram lah a ceikhai han, ahni ka hloe hoehroukrak haw vah ao han, Khaldeannaw na tuk ei teh, na tâ mahoe, telah BAWIPA ni a dei, telah bangkongmaw a dei. titeh thongim vah a paung.

<sup>6</sup> Jeremiah ni, BAWIPA e lawk kai koe a pha teh, <sup>7</sup> Khenhaw! na pa kanaw Shallum capa Hanamel hah Anathoth kho e ka ram hah nama hanlah ranh. Bangkongtetpawiteh ram coe thai e lah na o dawkvah na ran thai, telah nang koe a tho han, telah a ti.

<sup>8</sup> Hot patetlah apa kanaw e capa Hanamel teh BAWIPA e lawk patetlah kalup e rapan thung kai koe vah a tho teh, Benjamin ram Anathoth kho e ka ram heh ran leih, bangkongtetpawiteh ram coe thai e lah na o dawkvah na ratang hanlah ao. Hatdawkvah nang hanlah ka ran toe telah ati. Hahoi hethel BAWIPA e lawk doeh tie hah ka panue. <sup>9</sup> Hahoi, apa kanaw e capa Hanamel, Anathoth kho e ram teh ka ran. Tangka ka parei pouh teh ngun tangka sekel 17 touh doeh. <sup>10</sup> Min ka thuk teh mitnoutnae ka sak, lawk kapanuekkhaikung ka kaw teh, tangka teh khingnae daw k ka khing. <sup>11</sup> Ran nahane rannae hoi phunglam patetlah lawkkâkam e hoi lawkkâkam hoe h e naw hai ka la.

<sup>12</sup> Apa kanaw e capa Hanamel mithmu hai thoseh, kapanuekkhaikung, rannae daw k min kaawmnaw mithmu hai thoseh kalup e rapan thung kaawm e Judahnaw e hmalah Maaseiah capa Neriah capa Baruk hah kâ ka poe. <sup>13</sup> Hottelah ahnimae hmalah Baruk hah kâ ka poe teh, <sup>14</sup> Isarel Cathut ransahu BAWIPA ni hettelah a dei, hete ca tacikkin e ca hoi paawng e ca hah lat haw, kasawlah o thai nahan talai hlaam thung hrueng. <sup>15</sup> Bangkongtetpawiteh Isarel Cathut, ransahu BAWIPA ni hettelah a dei, hete ram daw k im, law, misur takhanaw ayânaw ni bout a ran awh han, telah a ti.

### *Panuethai nahan Jeremiah ratoumnae*

<sup>16</sup> Neriah capa Baruk koe rannae ca ka poe hnukkhu BAWIPA koe ka ratoum. <sup>17</sup> Oe BAWIPA Cathut khenhaw! hnotithainae kalenpounge hoi na kut na dâw teh talai hoi kalvan na sak, nang hanlah ka ru e hno khoeroe awm hoe h. <sup>18</sup> Tami moikapap e lathueng pahrennae kamnue sak e hoi napanaw payonnae hnuk vah a capanaw koe kalenpounge, athakaawme Cathut, a min ransahu Jehovah doeh. <sup>19</sup> Khokhang kathoum, a thaw daw k athakaawme, tami canaw nuencang kacaicalah kahmawtkung hoi taminaw pueng e nuencang hoi a sak awh e patetlah kapathungkung, <sup>20</sup> Izip ram daw k mitnoutnae hoi kângairu hno kasakkung, sahnin totouh Isarelnaw koe thoseh, alouke taminaw koehai thoseh ouk ka sak e, sahnin e patetlah ma hoi min kamnueksakkung, <sup>21</sup> na tami Isarelnaw Izip ram daw k mitnoutnae hoi kângairunae, a thakasai e kut hoi a kut a pho teh takikatho e hno kalenpoung kathokhaikung, <sup>22</sup> khoitui hoi sanutui lawngnae ram mintoenaw koe thoebo hoi lawkkam e patetlah kapoekung doeh. <sup>23</sup> A kâen awh teh kho a sak awh. Hatei lawk ngai awh laipalah kâpoelawknaw tarawi awh hoe h, taw k hanlah kâ poe e naw taw k awh hoe h, hatdawkvah hete kahawihoe h hnonaw pueng ahnimae lathueng na pha sak e doeh. <sup>24</sup> Khenhaw! khopui la hanelah talai kacoumnaw a o, tahloi hoi takang hoi lacik daw k khopui hai ka tuk e Khaldeannaw e kut daw k poe lah a o, na dei tangcoung e hah a kuep, khenhaw! nama ni hmu.

<sup>25</sup> Oe BAWIPA Cathut, nama ni kai koe, ram teh tangka hoi ran leih, panuekkhaikungnaw kaw, khopui teh Khaldeannaw e kut daw k poe lah ao na ti, telah a ti. <sup>26</sup> Hahoi BAWIPA e lawk Jeremiah koe a pha teh,



<sup>27</sup> Khenhaw! kai BAWIPA heh thitak katawnnaw pueng e Cathut lah ka o teh kai hanlah hno ka ru ao maw, telah a ti.

<sup>28</sup> Hatdawkvah, BAWIPA ni hettelah a dei, khenhaw! hete khopui heh Khaldeannaw e kut hoi Babilon siangpahrang Nebukhadnezar e kut daw k poe vaiteh a tâ han. <sup>29</sup> Hahoi hete khopui ka tuk e Khaldeannaw tho awh vaiteh khopui hmaisawi awh han. Ka lungkhuek sak hanlah Baal koe hmuitui thuengnae, alouke cathutnaw koe nei thuengnae rabawk nahanelah a sak awh imvan kaawm e im pueng hoi he a kak han. <sup>30</sup> Bangkongtetpawiteh, Isarel catounnaw hoi Judah catounnaw ni a nawca hoi ka mithmu vah hawihoeahnae dueng a sak awh. Isarel catounnaw e a tawksak e naw ni ka lungkhuek sak, telah BAWIPA ni a dei. <sup>31</sup> Bangkongtetpawiteh, ka hmaitung hoi ka raphoe hanelah hete khopui sak kamtawng hoi atu totouh ka lungkhueksakkung hoi ka lungphuensakkung lah pou ao awh. <sup>32</sup> Isarel catounnaw hoi Judah catounnaw ni ka lungkhuek nahanlah hawihoeahnae a sak awh dawkvah, amamouh hoi siangpahrang kahrawikung, vaihma, profet, Jerusalem vah kho ka sak e Judah taminaw pueng hoi, <sup>33</sup> ahnimanaw ni kai koe kamlang laipalah hnam na thun takhai toe. Atangcalah ka cangkhai eiteh dâw hanlah banglahai ngai awh hoe. <sup>34</sup> Ka min onae im hah a khin sak awh teh panuetho e hno a ta awh. <sup>35</sup> A canu, capanaw hah Molek koe hmaisawi hanlah Benhinom tanghling daw k kaawm e Baal bawknae hmuenrasang hah a sak awh. Judah taminaw yonnae sak sak hanlah hete panuetho e hno a sak awh e heh kai ni kâ ka poe e nahoe, ka pouknae daw k hai kâen boihoe.

<sup>36</sup> Hatdawkvah atu Isarel BAWIPA Cathut ni hete khopui heh tahloi, takang hoi lacik hoi Babilon kut daw k poe lah ao toe, ouk na ti awh e daw k hettelah a dei. <sup>37</sup> Khenhaw! ka lungkhueknae, ka lungroumhoehnae, ka patawpoung e ka lungkâanna e daw k hoi ahnimouh ka pâleinae ramnaw thung hoi bout ka pâkhueng vaiteh, hete hmuen koe ka thokhai vaiteh karoumcalah ka o sak han. <sup>38</sup> Ka tami lah ao vaiteh a Cathut lah ka o pouh han. <sup>39</sup> Amamouh hoi hnuk lae canaw hawi nahanlah yungyoe kai na bari awh nahan lungthin buet touh hoi hringnuen buet touh lah ka sak pouh han.

<sup>40</sup> Hahoi ahnimouh koe yungyoe lawkkamnae ka sak vaiteh ahnimouh ceitakhai awh hoe nahanlah pou ka sak pouh han. Kai na yawng takhai awh hoe nahanlah lungthin daw k kai takinae ka hruek pouh han. <sup>41</sup> A hawinae ka sak e heh kalunghawinae la o han, ka lungthin abuemlahoi hete ram daw k kacaklah ka ung han.

<sup>42</sup> BAWIPA ni hettelah a dei, hete taminaw lathueng hawihoeahnae ka patawpoung lah ka tho sak e patetlah ahnimouh koe lawk ka kam e hawinae pueng ka kuep sak han. <sup>43</sup> Kingdi ram Khaldeannaw koe poe tangcoung e tami hoi saring awm hoe toe, telah ouk na ti awh e ram daw k ram hah bout a ran awh han. <sup>44</sup> Benjamin ram daw k thoseh, Jerusalem khopui tengpam thoseh, Judah ram khopui daw k thoseh, tami ni tangka hoi law a ran awh han, a kin awh vaiteh kapanuekkhaikung a kaw awh han, mitnoutnae a sak awh han, bangkongtetpawiteh santoungnae thung hoi bout ka bansak han, telah BAWIPA ni a dei.



<sup>1</sup> Jeremiah teh ramvengim thung thongim thung ao navah, ahni koe BAWIPA e lawk apähni bout a pha. <sup>2</sup> Hno kasakkung BAWIPA, kacakcalah ka sak e BAWIPA, a min teh BAWIPA doeh. <sup>3</sup> Na kaw haw, na pato han, hnokalen hoi hrolawk na panue boihoeh e na hmu sak han. <sup>4</sup> Isarel BAWIPA Cathut ni hete khopui dawk e innaw hoi Judah siangpahrang innaw tahloi hoi talai kacoum thung ringnae sak hanelah a kayei awh teh, a raphoe awh e kong dawk hettelah a dei. <sup>5</sup> Khaldean taminaw taran tuk hanlah a tho awh. Hatei ka lungkhueknae hoi ka lungkâannae ni ka thei e tamironaw hoi a onae hmuen dawk a kawi han. <sup>6</sup> Khenhaw! damnae hoi hawinae ka pha sak han, ka damsak vaiteh kacakpounge roumnae hoi lawkkatang hah ka kamnue sak han. <sup>7</sup> Judah nuencang hoi Isarel nuencang hah ka thung pouh han, ahmaloe pasuek e patetlah bout kangdue sak han. <sup>8</sup> Kai taranlahoi a sak awh e sak payonnae naw thung hoi kathoung sak han, a sak awh e payonnae hoi kâtapoenae naw pueng ka ngaithoum han. <sup>9</sup> Hahoi, hete khopui heh talai van e miphunnaw pueng ahnimouh hanlah hawinae ka sak e kahmawtnaw e hmalah, kai hanlah nawmnae hoi pholennae hoi bawilennae lah ao awh vaiteh hawinae hoi roumnae ahnimouh lathueng ka phasak e naw pueng taki laihoi a pâyaw awh han.

<sup>10</sup> BAWIPA ni hettelah a dei, hete hmuen, Judah khopui patenghai tami hoi saring awm laipalah kingdi e hoi Jerusalem lamthungnaw dawk hai tami hoi saring kho kasaknaw awm laipalah he a rawk toe, telah ati awh dawkvah.

<sup>11</sup> Konawmnae lawk, oe, yu kâpaluen e pawlawk hoi ransahu BAWIPA koe lunghawilawk dei awh. Bangkongtetpawiteh, BAWIPA teh ahawi, lungmanae teh yungyoe a kangning ka tet e lawk hoi BAWIPA im dawk lunghawilawkdeinae thuengnae kathokhainaw e lawk hah bout ka thai han toe, telah BAWIPA ni a dei.

<sup>12</sup> Ransahu BAWIPA ni hettelah a dei, hete hmuen tami hoi saring ao hoeh toutoh kingdi e hoi a khopui pueng dawkvah, tuhu ka ring e tukhoumnaw khosaknae bout ao han. <sup>13</sup> Mon dawk e khopuinaw hoi tanghling dawk e khopuinaw dawk, a ka lae khopui hoi Benjamin ram, Jerusalem tengpamnaw hoi Judah khopuinaw, ahnimouh ka parei e kut rahim vah tunaw a khoum awh han, telah BAWIPA ni a dei. <sup>14</sup> Khenhaw! atueng kuep tawmlei toe, telah BAWIPA ni a dei. Isarel imthung hoi Judah imthung dawk kahawi e lawk ka dei e hah ka kuepsak han. <sup>15</sup> Hatnae hnin hoi tueng dawk lannae ka dawn e a hna kanawca e hah Judah taminaw koe hoi ka tâcosak han, hote ram dawk kalancalah lawkceng han. <sup>16</sup> Hote hnin dawk Judah teh rungngang lah ao vaiteh Jerusalem teh karoumcalah ao han. Hote BAWIPA teh lannae BAWIPA (Jehovah Tsikkenu) tie a min lah ao. <sup>17</sup> Bangkongtetpawiteh, BAWIPA ni hottelah a dei, Devit ni Isarel imthung bawitungkhang dawk ka tahung hane vout mahoe. <sup>18</sup> Vaihma Levih miphun ni hai ka hmalah sathei thuengnae poe hane hoi canei poe hane, thuengnae pou sak hanlah tami vout mahoe, telah ati.

### *Kangning e Cathut e lawkkamnae*

<sup>19</sup> BAWIPA e lawk Jeremiah koe a pha. <sup>20</sup> BAWIPA ni hettelah a dei, kaie kanîthun lawkkam hoi tangmin lawkkam na raphoe thai awh teh kanîthun hoi tangmin ao hoeh nahan la na sak thai awh pawiteh, <sup>21</sup> Ka thaw ka tawk e Devit koe, ka lawkkam hai a bawitungkhang dawk ka tahung han e capa a tawn hoeh nahanlah raphoe lah ao van han. Levih tami vaihma hoi ka thaw katawnaw koe hai, <sup>22</sup> kalvan kaawm e touklek



thai hoeh e hoi tali thung e sadi touklek thai hoeh e patetlah, ka thaw ka tawk e Devit catoun hoi Levih miphun thaw kakawknaw hah ka pung sak han telah ati.

<sup>23</sup> Hothloilah, BAWIPA e lawk Jeremiah koe a pha teh, <sup>24</sup> imthung kahni touh BAWIPA ni a rawi e hah a raphoe, telah hete taminaw ni a dei awh e hah na pouk boimaw, ahnimouh mithmu vah miphun ti han kamcu hoeh totouh a hnephnap awh. <sup>25</sup> BAWIPA ni hettelah a dei, kanithun hoi tangmin lawkkam teh awm hoehpawiteh, talai hoi kalvan counгнаe naw ka pouk hoeh pawiteh, <sup>26</sup> Jakop capanaw hoi ka thaw ka tawk e Devit catounnaw hah ka raphoe han. Abraham, Isak hoi Jakop catounnaw lathueng vah lawkceng hanlah a catounnaw hah ka rawi vaiteh ka lah han. Bangkongtetpawiteh, ahnimouh nuencang kâthungsak teh a lathueng vah pahrennae ka tawn han, telah ati.

## 34

### *Cathut ni Zedekiah kâhruetcueknae a poe*

<sup>1</sup> Babilon Siangpahrang Nebukhadnezar hoi ransanaw pueng, a uknaeramnaw hoi taminaw pueng ni Jerusalem hoi khopuinaw pueng a tuk navah BAWIPA koehoi Jeremiah koe ka tho e lawk, <sup>2</sup> Isarel BAWIPA Cathut ni hettelah a dei, Judah siangpahrang Zedekiah koe cet nateh dei pouh, BAWIPA Cathut ni hettelah a dei, khenhaw! hete khopui heh Babilon siangpahrang kut dawka poe vaiteh, hmai hoi a sawi han. <sup>3</sup> Ahnie kut dawka hoi na hlout mahoe. Hatei man lah na o roeroe vaiteh a kut dawka na pha han. Na mit ni Babilon siangpahrang e mit a hmu han, minhmai kâhmo laihoi na pato vaiteh Babilon lah na cei han telah ati. <sup>4</sup> Hateiteh, oe Judah siangpahrang Zedekiah, BAWIPA e lawk thaihaw, nange kong dawka BAWIPA ni hettelah a dei, tahloi hoi na dout mahoe. <sup>5</sup> Karoumcalah na due han. Nang hoehnahlan e siangpahrang, kakhekungnaw hmuitu a sawi pouh awh e patetlah, nang han na sawi pouh awh han. Aiyoe bawipa, telah na khuika han. Bangkongtetpawiteh, lawka pabo toe, telah BAWIPA ni a dei telah ati.

<sup>6</sup> Babilon siangpahrang ransahunaw ni Jerusalem hoi kacawirae Judah khopuinaw pueng, Lakhish hoi Azek a tuk awh navah, <sup>7</sup> Profet Jeremiah ni hete lawknaw pueng Jerusalem e Judah siangpahrang Zedekiah koe a dei pouh. Bangkongtetpawiteh, Judah khopui thung dawka tawn hane rapan ka tawn e teh hetnaw dueng doeh toe.

### *San dumnae*

<sup>8</sup> Siangpahrang Zedekiah ni Jerusalem e tamihupui koe vah, taminaw pueng ni Hebru sannu hoi Hebru sanpa lah awm pawiteh hloutsak hanlah ao. <sup>9</sup> A hmaunawngaha e thaw ka tawka Hebru tami apihai awm hanh naseh, telah hloutnae lawka dei teh, lawkkamnae a sak hnukkhu BAWIPA koehoi Jeremiah koe lawka tho e teh, <sup>10</sup> taminaw pueng ni thaw ka tawka pouh e napui, thaw ka tawka pouh e tongpa hai thosoh hloutsak hanlah ao. Ahnimae thaw tawka hanlah apihai awm hanh naseh tie lawkkam ka dâw e kahrawikungnaw hoi taminaw pueng ni lawkkam a dâw awh teh a hloutsak katang awh. <sup>11</sup> Hatei hatnae tueng dawka bout kamlang awh teh a hloutsak awh e thaw ka tawka e napui, tongpanaw hah bout a man awh teh amamae kut rahim vah thaw bout a tawka sak awh. <sup>12</sup> Hat toteh, BAWIPA koehoi BAWIPA e lawka Jeremiah koe vah a pha. <sup>13</sup> Isarel BAWIPA Cathut ni hettelah a dei, Izip ram santounгнаe thung hoi na tâcokhai hnin dawka, na kakhekungnaw koe vah, <sup>14</sup> taminaw pueng ni a hmaunawngaha Hebru



tami ahni koe yo e kum 6 touh a thaw tawk pouh pawiteh kum 7 kuep nah teh a hloutsak han, telah lawkkamnae a sak toe. Hatei na kakhekungnaw ni tarawi ngai awh hoehe, a hnâ a tabuem awh. <sup>15</sup> Atuvah nangmanaw ni na kamlang awh teh taminaw pueng ni a imri koe hloutnae lawk a pâpho teh ka mithmu vah kalan e na sak awh teh ka min onae im dawka hmalah lawkkamnae sak awh. <sup>16</sup> Hatei, bout na kamlang awh teh ka min na kamhnawng sak awh teh lungthocalah hoi na tha awh e na sannu sanpanaw bout na man awh teh, namamae kut rahim vah thaw ka tawka e sannu sanpa lah bout na ta awh.

<sup>17</sup> Hatdawkvah, BAWIPA ni hettelah a dei, taminaw pueng ni mae hmaunawngaha hoi imri koe hloutnae lawk dei hanlah ka lawk na ngai awh hoehe. Khenhaw! kai kama ni nangmouh koe hloutnae lawk ka pâpho telah BAWIPA ni a dei. Tahloi, takang, lacik hoi doeh: runae kâhmo sak hanlah talai uknaeram pueng dawka na ta han. <sup>18</sup> Ka lawkkam kaek e hoi ka hmalah reksei e maitoca rahak vah a cei teh lawkkamnae ka ek e, <sup>19</sup> Judah kahrawikung, Jerusalem kahrawikung hoi tuenla hoi, vaihma hoi taminaw pueng ni reksei e maitoca rahak ka cet e taminaw pueng hah, <sup>20</sup> A tarannaw hoi thei hanlah katawngnaw koe ka poe vaiteh ahnimae ro teh kalvan e tavanaw hoi talai e sarangnaw e rawca lah ao han. <sup>21</sup> Judah Siangpahrang Zedekiah hoi a sannaw a tho awh, ahnimouh thei han ka tawng e Babilon siangpahrang ransahu nangmouh koehoi kabannaw kut dawka ka poe han. <sup>22</sup> Khenhaw! hete khopui dawka bout ban hanelah kâ ka poe han telah BAWIPA ni a dei. Hattoteh na tuk awh han, a la awh vaiteh hmai a sawi awh han. Hahoi Judah khopui kingdi sak han telah BAWIPA ni a dei.

## 35

### *Lawk ka ngai e Rekhab taminaw*

<sup>1</sup> Judah siangpahrang Josiah capa Jehoiakim a bawi nah BAWIPA koehoi Jeremiah koe ka tho e lawk ni, <sup>2</sup> Rekhab imthung koe cet nateh pato, BAWIPA im dawka e imrakhan buet touh dawka kâenkhai nateh misur nei hane poe telah ati. <sup>3</sup> Hadazziniah capa Jeremiah capa Jaazaniah hoi a hmaunawngahanaw hoi a capanaw pueng hoi Rekhab imthungnaw pueng ka ceikhai. <sup>4</sup> Cathut e tami Igdaliah capa Hanan capanaw e imrakhan, BAWIPA e im dawka kâenkhai, hote imrakhan teh kahrawikungnaw e imrakhan teng longkha ka ring e Shallum capa Naser imrakhan thung kaawm e doeh. <sup>5</sup> Hahoi Rekhab catoun naw thung hoi tongpanaw hmalah hlaam hoi manang dawka kakawilah misurtui ka phung teh ahnimouh koe, misurtui heh net awh, telah ka ti pouh.

<sup>6</sup> Hatei ahnimouh misurtui teh ka net awh mahoehe, na kaukkung Rekhab capa Jonadab ni, nama hoi na catounnaw ni hai nâtuê hai misurtui na net awh mahoehe. <sup>7</sup> Im sak hanh awh, cati hai tu hanh awh, misur takha hai sak hanh awh, hote hnonaw tawn hanh na onae ram dawka kasawlah na hring thai awh na han, na hring awh na thung lukkarei dawka kho na sak awh han, telah kâ na poe. <sup>8</sup> Hottelah, na kaukkung Rekhab capa Jonadab ni a pahni dawka hoi lawk a dei e ka hring awh na thung, kamamouh hoi ka yunaw hoi ka capa hoi ka canunaw ni misurtui nei hoehe hane hoi, <sup>9</sup> kho ka sak awh nahane im sak hoehe hane hoi misur takha thoseh, cati thoseh tawn hoehe hanelah ka tarawi awh e doeh. <sup>10</sup> Lukkarei dawka kho ka sak awh teh, na kaukkung Jonadab e kâpoe lawknaw pueng ka tarawi teh ka hringkhai awh. <sup>11</sup> Hahoi, Babilon Siangpahrang Nebukhadnezar



ni ram a tuk navah kaimouh ni tho awh, Khaldean ransahu hoi Siria ransahu taki awh dawkvah Jerusalem lah cet awh sei telah ka ti awh teh, atu Jerusalem vah ka o awh telah ati awh. <sup>12</sup> Hahoi BAWIPA e lawk Jeremiah koe a pha. <sup>13</sup> Isarel Cathut ransahu BAWIPA ni telah a dei Judah ram e taminaw hoi Jerusalem kho ka sak taminaw koe dei pouh, ka lawk ngai hanelah cangkhae hah na dâw awh mahoe h maw telah BAWIPA ni a dei. <sup>14</sup> Rekhab capa Jonadab ni a capanaw koe kâ a la poe e, misurtui nei hoe hanelah a tarawi awh teh, sahnin totouh net awh hoe h, kakhekung e kâpoelawk a tarawi awh katang, kai ni teh amom ka thaw teh nangmouh koe lawk ka dei ei, na thai ngai awh hoe h. <sup>15</sup> Ka thaw ka taw k e profetnaw amom a thaw awh teh, nangmouh koe ka patoun, tamipueng na hringnuen yonnae daw k hoi bout ban awh leih, ouk na sak awh e hnonaw hah pathoup awh leih, Cathut alouke thaw taw k hanlah tarawi awh hanh leih, hat pawiteh namamouh hoi na kakhekungnaw koe ka poe e ram daw k kho na sak awh telah ka ti. Hatei hnâ na tabuem awh teh na thai ngai awh hoe h. <sup>16</sup> Rekhab capa Jonadab catounnaw ni teh kakhekung e kâpoelawk a tarawi awh, hete taminaw ni teh ka lawk thai ngai awh hoe h. <sup>17</sup> Hatdawkvah, Isarel BAWIPA Cathut, ransahu Cathut ni hettelah a dei, kenhaw Judah hoi Jerusalem kho ka sak e taminaw pueng koe hawihoe hnae ahnima e lathueng phasak hanelah ka dei e hah kakuep sak han. Bangkongtetpawiteh, ahnimouh koe lawk ka dei e thai ngai awh hoe h. Ahnimouh ka kaw awh eiteh na pato ngai awh hoe h teh lah ati.

<sup>18</sup> Hahoi Jeremiah ni Rekhab catounnaw koe vah, ransahu BAWIPA, Isarel Cathut ni hettelah a dei, na kakhekung Jonadab e kâpoelawk na tarawi awh teh, a dei e naw pueng na tarawi awh teh kâpoe e patetlah na sak awh dawkvah. <sup>19</sup> Rekhab capa Jonadab ni a yungyoe hoi ka hmalah kangdout hane tami vout mahoe h, telah ransahu BAWIPA, Isarel Cathut ni a dei.

## 36

### *Bawkim daw k cakalawng a touk awh*

<sup>1</sup> Hahoi, Judah Siangpahrang Josiah capa Jehoiakim abawinae kum pali navah hete lawk BAWIPA koe hoi Jeremiah koe a pha. <sup>2</sup> Cakalawng hah lat nateh, hot dawkvah nang koe ka dei e lawknaw pueng hoi Isarel taranlahoi thoseh, Judah taranlahoi thoseh, miphun pueng taranlahoi thoseh nang koe pasuek ka dei e hoi Josiah se koehoi sahnin totouh e lawknaw hah thun haw. <sup>3</sup> Judah imthungnaw ni a lathueng hawihoe hnae ka sak hanlah kakâcainaw pueng a thai awh toteh, a sak payonnae hoi yonnae naw ka ngaihoum thai nahanelah, tami pueng ni amamae hringnuen hoi yonnae hah a kâthung thai yawkaw han doeh, telah ati.

<sup>4</sup> Jeremiah ni Neriah capa Baruk hah a kaw teh Baruk ni, BAWIPA e lawknaw pueng ahni koe vah a dei pouh. Jeremiah e pahni daw k hoi ka tâcawt e lawknaw hah cakalawng daw k a thut. <sup>5</sup> Jeremiah ni Baruk koe vah, kai teh paung e lah ka o dawkvah, BAWIPA e im daw k cet thai hoe h. <sup>6</sup> Hatdawkvah, nang cet nateh, BAWIPA e lawk ka pahni daw k hoi ka tâcawt ni teh cakalawng daw k na thut e BAWIPA e lawk hah rawcahai hnin BAWIPA e im daw k e tami pueng ni thainae koe touk pouh. Khopui, khote koehoi ka tho e Judah taminaw pueng ni thainae koehai touk pouh. <sup>7</sup> Tami pueng ni hringnuen yonnae naw hah kamlang takhai teh BAWIPA hmalah yon pankângai lahoi a tho thai awh yawkaw han. Bangkongtetpawiteh, hete taminaw lathueng vah lungkhueknae hoi lungkâanna e BAWIPA im daw k dei lah kaawm e hah a pataw tangngak, telah kâ a poe.



<sup>8</sup> Hot patetlah, Neriah capa Baruk ni, profet Jeremiah ni ahni koe kâ a poe e patetlah BAWIPA im dawkw BAWIPA e lawkw, cauk thung e a touk.  
<sup>9</sup> Hahoi, Judah siangpahrang Josiah capa Jehoiakim abawinae kum panga, thapa yung tako nah, Jerusalem e taminaw pueng hoi Judah khopui thung e Jerusalem hoi kathonaw pueng ni rawcahai hanelah a pathang awh.  
<sup>10</sup> Baruk ni BAWIPA im takhang kêennae dawkw a lathueng lah kaawm e ca kathutkung Shaphan capa Gemariah e imrakhan, BAWIPA im dawkw kaawm e hah taminaw pueng ni thainae koe a touk.

### *Cakalawng siangpahrang im vah touk lah a o*

<sup>11</sup> Shaphan capa Gemariah capa Mikaiah ni cauk thung kaawm e BAWIPA e lawknaw pueng a thai toteh, <sup>12</sup> Siangpahrang im dawkw a kum teh cakathutkung e imrakhan dawkw a kêen. Hahoi khenhaw, hote kahrawikungnaw pueng cakathutkung Elishama, Shemaiah capa Delai, Abor capa Elnathan, Shaphan capa Gemariah, Hananiah capa Zedekiah hoi kahrawikungnaw pueng a tahung awh. <sup>13</sup> Mikaiah ni tamihunaw pueng ka thai lah Baruk ni cauk touk e kong a thai e naw pueng hah ahnimouh koe a pâpho pouh. <sup>14</sup> Hatdawkvah, kahrawikungnaw pueng ni Kushi capa, Shelemiah capa, Nathaniah capa Jehudi teh Baruk koe a patoun awh teh, ahni koevah, tamihunaw pueng ni ka thai lah na touk e cauk hah hrawm nateh tho, telah atipouh awh. Hattoteh Neriah capa Baruk teh cakalawng hrawm lahoi ahnimouh koe a tho.

<sup>15</sup> Hahoi, ahni koevah tahung nateh kaimouh hnâthainae koe touk haw atipouh awh. Hottelah Baruk ni ahnimouh ka thai lah a touk pouh.  
<sup>16</sup> Hahoi, hote lawkw a thai awh toteh, lungpuen laihoi buet touh hoi buet touh kâkhet awh teh Baruk koevah, hete hnonaw pueng heh siangpahrang ka dei pouh roeroe han, telah ati awh. <sup>17</sup> Hahoi Baruk koe, hete lawknaw pueng a pahni dawkw hoi e bangtelamaw na thut, na dei pouh haw, telah a pacei awh. <sup>18</sup> Baruk ni hete lawknaw pueng a pahni dawkw hoi a dei teh cahang hoi cauk dawkw ka thut e doeh, telah atipouh. <sup>19</sup> Ahnimouh ni Baruk koevah, cet nateh Jeremiah hoi kâhrawk roi, apini na o roinae panuek hanh naseh, telah atipouh awh.

### *Siangpahrang ni Jeremiah e cakalawng a raphoe*

<sup>20</sup> Hote rapan thung siangpahrang teh cakathutkung Elishama e imrakhan dawkw a hruek, a thung e lawknaw pueng pahni hoi siangpahrang koe a dei awh. <sup>21</sup> Hahoi siangpahrang ni cakalawng la hanelah Jehudi a patoun teh cakathutkung Elishama imrakhan thung e a la. Hahoi Jehudi ni siangpahrang hoi siangpahrang teng kangdout e kahrawikungnaw hnâthainae koe a touk. <sup>22</sup> Thapa yung takonae kasik tue nah siangpahrang teh, hmaisaaan a kamben. <sup>23</sup> Hahoi, Jehudi ni rui hni, rui thum touh a touk toteh siangpahrang ni saraica hoi vekvek a sei teh hmai dawkw a phum teh he a kak. <sup>24</sup> Siangpahrang hoi thaw katawkkungnaw, hete lawkw kathainaw pueng apinihai taket awh hoe, a khohnanaw hai phi awh hoe. <sup>25</sup> Hothloilah, Elnathan hoi Delaihai hoi Gemariah tinaw ni cakalawng hmai phum hoe nahanelah siangpahrang koe a kâhei, hatei banglah noutna hoe. <sup>26</sup> Siangpahrang ni siangpahrang capa Jerahmeel hoi Azriel capa Seraiah hoi Abdel capa Shelemiah hah cakathutkung Baruk hoi profet Jeremiah man hanelah kâ a poe. Hateiteh, BAWIPA ni ahnimouh roi teh a hro.

### *Jeremiah ni cakalawng bout a thut*



<sup>27</sup> Hote cakalawng hoi Jeremiah e pahni thung e Baruk ni a thut e lawknaw pueng siangpahrang ni hmai he a sawi hnukkhu BAWIPA e lawk Jeremiah koe a pha. <sup>28</sup> Cakalawng alouke lat haw. Cakalawng apasuek daw e lawknaw pueng Judah siangpahrang Jehoiakim ni hmai a sawi e naw hah bout thun haw. <sup>29</sup> Hahoi, Judah siangpahrang Jehoiakim e kong daw hettelah na dei han. BAWIPA ni hettelah a dei. Babilon siangpahrang a tho roeroe vaiteh, hete ram raphoe vaiteh, hete taminaw hoi saringnaw pueng he a pâmit han, telah thut e hah, bangkongmaw hot patetlae lawk na thut telah cakalawng thut e hah hmai a sawi. <sup>30</sup> Hatdawkvah, Judah siangpahrang Jehoiakim e kong daw BAWIPA ni hettelah a dei. Devit e bawitungkhung daw ka tahung hane tami tawn mahoe. A ro hai kanîthun kân poung e hoi tangmin tadamtui um vah tâkhawng lah ao han. <sup>31</sup> Hahoi a yonnae dawkvah ama hoi a catounnaw hoi a thaw katawnaw ka rek han. Hahoi amamouh hoi Jerusalem vah kho kasaknaw hoi Judahnaw e lathueng ahnimouh koe ka pâpho pouh e hoi a thai ngai awh hoe e hawihoeahnae pueng ka pha sak han, telah ati.

<sup>32</sup> Hottelah Jeremiah ni cakalawng alouke a la teh cakathutkung Neriah capa Baruk koe a poe. Ahni ni hawvah Jeremiah e pahni daw hoi ka tâcawt e cakalawng daw thut e naw pueng Jehoiakim ni hmaisawi e lawk hah bout a thut e hloilah hot hoi kâvan e lawknaw moikapap a thut sin.

## 37

### *Zedekiah ni ngaihawinae cungkeihoeh*

<sup>1</sup> Josiah capa Zedekiah teh Babilon siangpahrang Nebukhadnezar ni Judah ram siangpahrang lah ao sak e Jehoiakim capa Koniah yueng lah a bawi. <sup>2</sup> Hatei, ama hoi a thaw katawkkungnaw hoi a ram thung kaawm e taminaw ni, profet Jeremiah ni a dei e BAWIPA lawk thai ngai awh hoe. <sup>3</sup> Siangpahrang Zedekiah ni, Shelemiah capa Jehukal hoi Maaseiah capa vaihma Zephaniah hah profet Jeremiah koe Cathut BAWIPA na ratoum pouh haw telah dei pouh hanelah a patoun.

<sup>4</sup> Jeremiah teh taminaw hoi ama ngai patetlah a paitun rah. Bangkongtetpawiteh, hatnavah thongim thung bawt hoe rah. <sup>5</sup> Faro ransahu Izip ram hoi a tâco awh toe. Jerusalem kalup e Khaldean taminaw ni ahnimae kamthang a thai awh toteh, Jerusalem a ceitakhai awh. <sup>6</sup> Hat toteh, BAWIPA e lawk profet Jeremiah koe a pha. <sup>7</sup> Isarel Cathut BAWIPA ni hettelah a dei, Judah siangpahrang ni kai koe pouknae hei hanelah a patoun e naw koevah, khenhaw! Faro ransahu nangmouh kabawp hanlah kathonaw hah amamae ram Izip lah bout a ban awh han. <sup>8</sup> Khaldean taminaw teh ban awh vaiteh, hete khopui heh tuk laihoi a la awh vaiteh hmai a sawi awh han. <sup>9</sup> BAWIPA ni hettelah a dei, Khaldean taminaw ni na ceitakhai awh han telah namahoima kâdum hanh awh. Bangkongtetpawiteh, na ceitakhai awh mahoe. <sup>10</sup> Nangmouh ka tuk e Khaldean ransahu na tâ awh nakunghai, ahnimouh thung e hmâ ka cat ni teh kaawm rae naw hah amae rim hoi thaw awh vaiteh hete khopui heh, hmaisawi awh roeroe han, telah na dei han telah atipouh.

### *Jeremiah thongim a pabo awh*

<sup>11</sup> Hahoi, Faro ransahu taki lahoi Khaldean ransanaw ni Jerusalem a ceitakhai awh navah, <sup>12</sup> Jeremiah ni hote taminaw rahak hoi, a ham la hanelah Benjamin ram daw kâen hanelah Jerusalem a tâco takhai. <sup>13</sup> Benjamin longkha koe a pha navah, ramvengnaw kahrawikung



Hananiah capa Shelemiah capa, a min Irijah teh hawvah a la o. Ahni ni Khaldean taminaw hoi na kâkuet telah profet Jeremiah hah a man awh.

<sup>14</sup> Jeremiah ni laithoe doeh. Khaldean taminaw koe ka kâkuen hoe hah telah ati. Hatei, thai ngai hoe hah. Hat toteh, Irijah ni Jeremiah hah a man teh kahrawikungnaw koe a ceikhai. <sup>15</sup> Kahrawikungnaw teh Jeremiah koe puenghoi a lungkhuek awh. A hem awh hnukkhu, ca kathutkung Jonathan im e thongim daw koe a pabo awh. Bangkongtetpawiteh, hot teh thongim lah a hmoun e doeh. <sup>16</sup> Jeremiah teh talai thung thongim daw koe a kâen teh hawvah, a hnin kasawlah ao.

<sup>17</sup> Siangpahrang Zedekiah ni tami a patoun teh a tâco sak. Siangpahrang im vah arulahoi a pacei teh ahni koe vah, BAWIPA koe hoi e lawk ao bangmaw telah a ti.

<sup>18</sup> Jeremiah ni siangpahrang Zedekiah koe vah, nama thoseh, na thawtawknaw koe thoseh, hete taminaw koe thoseh, bangpatet lae yonnae maw ka sak teh thongim na paung. <sup>19</sup> Nang koe Babilon siangpahrang ni tuk hanelah tho mahoe telah ka dei e na profetnaw hah namaw ao awh. <sup>20</sup> Oe siangpahrang ka BAWIPA pahren lahoi na thai pouh haw. Ka kâhei e heh dâw haw. Ka kâhei, ca kathutkung Jonathan im lah bout na ban sak hanh, hawvah kadout payon vaih, telah a ti.

<sup>21</sup> Siangpahrang Zedekiah ni, kâ a poe teh Jeremiah hah ramveng rapan thung vah a paung. Vaiyei kasakkungnaw ni sak e thung hoi hnintangkuem vaiyei phen buet touh khopui thung vaiyei ao roukrak a poe awh. Hottelah Jeremiah teh ramvengnaw e rapan thung vah ao.

## 38

### *Tangkom thung Jeremiah*

<sup>1</sup> Hahoi, Mattan capa Shephatiah, Pashhur capa Gedaliah, Shelemiah capa Jukal hoi Malkhijah capa Pashur tinaw ni, tami moikapap koe Jeremiah ni, <sup>2</sup> BAWIPA ni hettelah a dei, hete khopui daw koe kaawm rae hah tahloi, takang hoi lacik hoi a due awh han. Hatei, Khaldean taminaw koe ka kâhmoun e tami teh a hring han. A hringnae teh ahnimouh koe poe e phu lah ao vaih a hring han. <sup>3</sup> BAWIPA ni hettelah a dei, hete khopui heh Babilon siangpahrang ransanaw koe poe e lah ao vaiteh, a la awh han telah a dei awh e hah a thai awh. <sup>4</sup> Hatdawkvah, kahrawikungnaw ni siangpahrang koe vah pahren lahoi hete tami heh thei e lah awm naseh. Bangkongtetpawiteh, ahni ni ahnimouh koe hettelah lawk a dei teh, hete khopui thung e taran ka tuk hane naw hoi taminaw tha a youn sak. Hete tami ni taminaw hawi nahane tawng laipalah thoenae doeh a tawng telah ati awh. <sup>5</sup> Siangpahrang Zedekiah ni khenhaw! ahni teh nangmae kut daw koe poe lah ao toe nahoe hmanaw. Bangkongtetpawiteh, siangpahrang ni na ngai awh hoe hah e ouk sak thai boihoe telah a ti.

<sup>6</sup> Jeremiah a ceikhai awh teh, ramveng rapan thung kaawm e siangpahrang capa Malkhijah talai rahim tangkom daw koe a tâkhawng awh. Jeremiah teh tangkom thung tangdong daw koe a pabo awh teh, tangdong daw koe ao. <sup>7</sup> Ethiopia tami siangpahrang im ouk kaawm boi e, Ebedmelek ni Jeremiah talai thung tangkom daw koe a ta tie hah a la thai. Hatnavah siangpahrang teh Benjamin longkha koe a la tahung. <sup>8</sup> Ebedmelek teh siangpahrang im hoi a tâco teh, siangpahrang koe vah, <sup>9</sup> ka bawipa siangpahrang, hete taminaw ni profet Jeremiah talai thung tangkom daw koe pabo e hah kalenpounge yonnae a sak awh e doeh. Vonhlam hoi a onae



hmuen koe a due yawkaw han doeh, bangkongtetpawiteh, khopui thung vaiyei awm hoeh toe telah a ti.

<sup>10</sup> Hahoi siangpahrang ni Ethiopia tami Ebedmelek hah kê a poe teh hi hoi tami 30 touh hoi cet awh nateh, talai thung tangkom dawk a due hoehnahan profet Jeremiah teh lat awh telah kê a poe.

<sup>11</sup> Hottelah Ebedmelek ni tami a ceikhai teh, siangpahrang hnopai tanae im rahim a kêan teh angki karuem tâkhwang e hoi hnikaon hah a la teh, tangkom thung Jeremiah koe rui hoi a pabo pouh. <sup>12</sup> Ethiopia tami Ebedmelek ni Jeremiah koe hete angki ka pon hoi hnikaon naw heh na yakba rahim rui hoi pakhit atipouh e patetlah Jeremiah ni a sak. <sup>13</sup> Jeremiah teh talai thung tangkom dawk hoi rui hoi a rasa awh. Hottelah, Jeremiah teh ramvengnaw e rapan thung ka saw lah ao.

### *Zedekiah takinae*

<sup>14</sup> Hahoi siangpahrang Zedekiah ni Jeremiah hah a kaw teh, BAWIPA e im kêennae apâthum e dawk ahni teh a kêenkhai. Siangpahrang ni lawk na pacei han banghai pâphat hanh loe telah a ti.

<sup>15</sup> Jeremiah ni ka dei pawiteh, na thei payon han boma. Pouknae na poe nakunghai bout na ngai mahoei telah atipouh.

<sup>16</sup> Siangpahrang Zedekiah ni, BAWIPA ka hringnae kasakkung a hring e patetlah na thet mahoei, nang na ka thet hane naw hai na poe mahoei, telah arulahi thoe a kâbo.

<sup>17</sup> Hat toteh, Jeremiah ni BAWIPA Isarel Cathut ransahu BAWIPA ni hettelah a dei, Babilon siangpahrang kahrawikungnaw koe na kâhmoun awh pawiteh, na hringnae a hlout han, hete khopui hai hmai kang mahoei, nama hoi na imthungnaw hai na hring awh han. <sup>18</sup> Hatei, Babilon siangpahrang kahrawikungnaw koe na kâhmoun awh hoehpawiteh, hete khopui heh Khaldean taminaw kut dawk poe lah ao han, hmaisawi awh vaiteh, ahnimae kut dawk hoi na hlout awh roeroe mahoei telah atipouh.

<sup>19</sup> Siangpahrang Zedekiah ni Jeremiah koevah, Khaldean taminaw ka kâhmoun e Judah tami hah na man sak vaiteh, panuilai lah kaawm payon vaih tie ka lungpuen, atipouh.

<sup>20</sup> Hatei, Jeremiah ni na man sak mahoei, nang koe ka dei e BAWIPA e lawk ma yuem. telah pawiteh nang hanlah ahawi han, hring hai bout na hring han. <sup>21</sup> Hatei, na kâhmoun hoehpawiteh, hethateh BAWIPA e lawk ni na hmasuk e doeh. <sup>22</sup> Khenhaw! Judah siangpahrang im dawk kaawm e napuinaw pueng Babilon siangpahrangnaw koevah, ceikhai lah ao vaiteh, hote napuinaw niyah, na hui kahawinaw ni na dum awh teh na tâ awh toe, na khok hah tangdong dawk a mang tahma vah kounge na cei takhai awh han, telah ati awh han. <sup>23</sup> Na yu na canaw hah Khaldean taminaw koe a ceikhai awh vaiteh, a kut dawk hoi na tâcawtkhai mahoei toe. Babilon siangpahrang kut dawk man e lah na o vaiteh, nang kecu dawk hete khopui hmaisawi awh han telah atipouh. <sup>24</sup> Zedekiah ni Jeremiah koevah, hete lawk apinihai thai hanh naseh, telah pawiteh na dout mahoei telah atipouh. <sup>25</sup> Hatei, kahrawikungnaw ni a kâpato roi e hah a thai awh. Nang koe a tho awh teh, siangpahrang na dei e hoi siangpahrang ni nang koe a dei e hai na dei pouh haw, kaimouh koe banghai pâphat hanh, na thet awh mahoei, telah tet awh pawiteh, <sup>26</sup> Ahnimouh koevah Jonathan im lah na ban sak nateh, hawvah ka due hoeh nahane lah doeh siangpahrang koe ka kêhei, telah na ti pouh han telah atipouh.



<sup>27</sup> Hahoi, Jeremiah koe a tho awh toteh kahrawikungnaw ni a pacei awh. Siangpahrang ni kâ a poe e patetlah a dei pouh. Hat toteh, bout pacei awh hoeh toe. Bangkongtetpawiteh, pouknae hah panuek awh hoeh. <sup>28</sup> Hottelah Jerusalem a tuk awh teh a lanae hnin totouh, Jeremiah teh thongim rapan thung ao rah. Hahoi Jerusalem teh a la awh.

## 39

### *Jerusalem rawpnae*

<sup>1</sup> Judah siangpahrang Zedekiah a bawinae kum 9, thapa yung hra nah Babilon siangpahrang Nebukhadnezar hoi a ransanaw ni Jerusalem a tuk awh teh a kalup awh. <sup>2</sup> Zedekiah a bawinae kum 11, thapa yung pali hnin tako nah khopui rapan peng a raphoe awh. <sup>3</sup> Hahoi, Jerusalem a la awh toteh, Babilon siangpahrang kahrawikungnaw a kâen awh teh longkha lungui vah Negalsharezer, Sangarnebo, Sarsekhim, Rabsaris, Negalsharezer, Rabmag tinaw hoi Babilon kahrawikung alouke pueng hoi a tahung awh. <sup>4</sup> Hahoi, Judah siangpahrang Zedekiah hoi taran ka tuk e pueng ni ahnimouh a hmu awh toteh, a yawng takhai awh. Khopui thung hoi tangmin vah siangpahrang e takha koelah kalupnae tapang kahni touh e longkha koehoi a yawng awh, ama teh ayawn koe lah a cei. <sup>5</sup> Hatei, Khaldean ransanaw ni ama hah a pâlei awh teh, Jeriko tanghling dawk rek a pha awh, a man awh hnukkhu Babilon siangpahrang Nebukhadnezar koe Hamath ram e Riblah kho dawk a ceikhai awh teh, ahni ni lawk a ceng. <sup>6</sup> Babilon siangpahrang ni Riblah kho dawk a mithmu roeroe vah Zedekiah capanaw hah a thei pouh, Babilon siangpahrang ni Judah tami kacuenaw hai a thei awh. <sup>7</sup> Hothloilah, Zedekiah e mitmu a cawngkhawi pouh, sumbawtarui hoi a katek awh teh, Babilon lah a ceikhai awh. <sup>8</sup> Khaldean taminaw ni siangpahrang im hoi alouke imnaw pueng hmai a sawi awh teh Jerusalem hai a raphoe awh. <sup>9</sup> Ramvengnaw kahrawikung Nebuzaradan ni khopui thung kaawm e taminaw hoi ahnimouh koe kamkhueng e taminaw hoi kacawirae taminaw pueng Babilon vah san lah a ceikhai awh. <sup>10</sup> Hahoi, ramvengnaw kahrawikung Nebuzaradan ni Judah ram e tami ka roedeng banghai ka tawn hoeh naw a ceikhai teh misur takha hoi lawnaw hah a poe.

### *Jeremiah a hlout*

<sup>11</sup> Hahoi, Babilon siangpahrang Nebukhadnezar ni, Jeremiah kong dawk ramvengnaw kahrawikung Nebuzaradan koevah, <sup>12</sup> ahni hah cetkhai nateh kahawicalah khenyawn, khoeroe rektap hanh, nang koe ka dei e patetlah sak, telah kâ a poe.

<sup>13</sup> Hahoi, ramvengnaw kahrawikung Nebuzaradan ni Nebushasban hoi Rabsaris, Nergalsharezer, Rabmag tinaw hoi Babilon siangpahrang ransabawinaw lawk a thui teh, <sup>14</sup> ahnimouh ni Jeremiah teh ramvengnaw e rapan thung hoi a kaw awh teh, Saphan capa Ahikam capa Gedaliah koevah, a im dawk luen hanelah lawk a thui teh tamimaya koe kho a sak. <sup>15</sup> Hahoi, ramvengnaw e rapan thung pâkhi lah ao navah, BAWIPA e lawk teh Jeremiah koe a pha. <sup>16</sup> Ethiopia tami Ebedmelek koevah, ransahu BAWIPA Isarel Cathut ni hettelah a dei, khenhaw! ahawi nahane laipalah hete khopui rawk phai nahanelah ka lawk ka pha sak vaiteh hot hnin roeroe vah na hmalah ka kuep sak han. <sup>17</sup> Hot hnin vah nang teh rungngang e lah na o han, telah BAWIPA ni a dei. Na taki e taminaw koe poe e lah na awm mahoe. <sup>18</sup> Bangkongtetpawiteh, na rungngang roeroe



vaiteh, tahloi hoi na dout mahoe. Hatei. nang hringnae teh na hlout sak han. Bangkongtetpawiteh, kai na kâuep dawkvah, telah BAWIPA ni a dei, telah dei pouh telah ati.

## 40

### *Jeremiah teh Gadaliah im daw k a o*

<sup>1</sup> Judah hoi Jerusalem hoi san lah ceikhai e naw pueng Babilon lah a ceikhai e naw koevah, Jeremiah hah rui hoi a pâkhi laihoi a ceikhai awh lahun nah, ramvengnaw kahrawikung Nebuzaradan ni Ramah hoi a tâco sak hnukkhu, BAWIPA koehoi Jeremiah koe ka phat e lawk teh, <sup>2</sup> ramvengnaw kahrawikung ni Jeremiah hah a ceikhai teh ahni koevah, BAWIPA na Cathut ni hete hmuén koe ka tho hane kahawihoehe hah a pâpho toe. <sup>3</sup> Hahoi, BAWIPA ni a dei e patetlah a kuep sak. Bangkongtetpawiteh, BAWIPA taranlahoi yonnae na sak awh teh, a lawk hah na tarawi awh hoe, hatdawkvah hete hnonaw nangmae lathueng vah a pha. <sup>4</sup> Atu khenhaw! na kut daw k e sumrui daw k hoi sahnin na hlout sak. Babilon lah kai koe na tho hane na ngai pawiteh tho, na khetyawt han. Hatei Babilon lah kai koe tho hanlah na ngai hoehpawiteh, hivah awm yawkaw. Khenhaw! ramnaw pueng na hmalah ao, na lungkuep e hoi ahawi na tie hmuén koe cet yawkaw telah ati. <sup>5</sup> Jeremiah teh a ban hoehnahlan vah, Nebuzaradan ni, Judah khopuinaw lathueng vah ukkung hane hah Babilon siangpahrang ni a hruek e Shaphan capa, Ahikam capa Gedaliah koe vah ban nateh, tamimaya koevah awmh, hoehpawiteh na ngainae koe pueng vah cet yawkaw telah ati.

<sup>6</sup> Hat toteh, ramvengnaw kahrawikung ni canei hane hoi poehnonaw a poe teh a ceisak. Jeremiah teh Ahikam capa Gedaliah koe Mizpah kho daw k a cei teh hote ram daw k kaawm e taminaw koe ao. <sup>7</sup> Hahoi ransahu kaukungnaw kahrawngum kaawm e amamouh hoi a uk e taminaw ni Babilon siangpahrang ni Ahikam capa Gedaliah hah teh ram daw k e tami karoedengnaw Babilon vah ceikhai e naw hah a kut daw k a tie a thai awh toteh, <sup>8</sup> Mizpah kho Gedaliah koe a tho awh, Nethaniah capa Ishmael, Kareah capa Johanan hoi Jonathan hoi Tanhumeth capa Seraiah hoi Netophath tami Ephai capa naw hoi Maakath tami e capa Jezaniah tinaw hoi a sannaw hoi, <sup>9</sup> hahoi, Saphan capa Ahikam capa, Gedaliah ni amamouh hoi a kut rahim e taminaw koe, Khaldean taminaw thaw taw k e hah taket hanh awh, ram thung vah karoumcalah awm awh, Babilon siangpahrang e thaw taw k awh, nangmouh hanlah ahawi han.

<sup>10</sup> Kai na pâlei teh, Mizpah kho daw k ka o han. Khaldean tami ka hmalah ka tho hane naw koevah, nangmouh yueng lah ka kangdue han, nangmouh teh misur tui hoi kompawi paw, satuinaw hah lat awh nateh, a um daw k pâtung awh nateh na la awh e kho daw k khosak awh, telah lawkkamnae a sak.

<sup>11</sup> Hottelah, Judah taminaw Moab ram daw k kho ka sak e, Ammon taminaw koe kho ka sak e hoi Edom ram daw k kho ka sak e hoi ramlouk lah kaawmnaw ni Babilon siangpahrang ni Judah tami tangwan a ceitakhai teh, ahnimouh lathueng vah Shaphan capa, Ahikam capa Gedaliah hah a tâ tie a thai awh toteh, <sup>12</sup> Judah taminaw pâleinae hmuén koehoi a ban awh teh, Judah ram e Mizpah kho Gedaliah koevah, a tho awh teh misur hoi kompawi pawnaw moi a thokhai awh.

<sup>13</sup> Hothloilah, Koreah capa Johanan hoi ransahu kahrawikung e ram rahim kaawmnaw pueng Mizpah kho e Gedaliah koe a tho awh teh,

<sup>14</sup> Ammon taminaw siangpahrang Baalis ni na thei hanlah Nethaniah capa,



Ishmael a patoun tie na panue maw telah ati awh. Hatei, Ahikam capa Gedaliah ni yuem hoeh. <sup>15</sup> Hahoi, Koreah capa Johanan ni Mizpah kho e Gedaliah koevah, kai na cetsak haw, Nethaniah capa Ishmael teh ka thet vai, apinihai panuek mahoe. Bangkongmaw na thei awh vaiteh, nang koe kaawm e Judah taminaw kâkapek vaiteh due awh han telah arulaho a dei. <sup>16</sup> Hatei, Ahikam capa Gedaliah ni Koreah capa Johanan koevah, hete hno heh na sak hane nahoe. Bangkongtetpawiteh, Ishmael e kong daw na dei e atang nahoe, telah ati.

## 41

### *Gedaliah taranlahoi taranthawnae*

<sup>1</sup> Hahoi, thapa yung sari nah Elishama capa, Nethaniah capa Ishmael, siangpahrang thaw taw e thung tami buet touh ni tami hra touh a hrawi teh Mizpah kho e Ahikam capa Gedaliah koe a tho awh teh, Mizpah khovah rei a canei awh. <sup>2</sup> Nathaniah capa Ishmael teh a hrawi e tami hra touh hoi a thaw awh teh, Saphan capa Ahikam capa, Babilon siangpahrang ni ram kaukung lah a hruek e Gedaliah hah tahloi hoi a thei awh. <sup>3</sup> Ahni koe kaawm e Judahnaw hoi Mizpah hoi Gedaliah koe kaawmnaw hoi Khaldean tarankatuknaw pueng hai Ishmael ni he a thei.

<sup>4</sup> Gedaliah a thei hnukkhu, hnin apâhni nah hettelah ao, apinihai panue hoehnahan, <sup>5</sup> Shekhem hoi Shiloh hoi Samaria kho daw hoi tami 80 touh hah amamae pâkhamuen a ngaw awh teh, khohnanaw a phi awh teh, amahoima a kâboug awh. Vaiyei thuengnae hoi hmuittuinaw a sin awh teh, BAWIPA im daw thuengnae sak hanelah a tho awh. <sup>6</sup> Nethaniah capa Ishmael teh Mizpah kho daw, ahnimouh dawn hanelah a tâco. Lam hoi a ka, hahoi ahnimouh a hmu toteh, ahnimouh koevah, Ahikam capa Gedaliah koe tho awh telah ati.

<sup>7</sup> Hahoi, khopui a pha awh toteh, Nethaniah capa Ishmael hoi a hrawi e taminaw ni ahnimouh a thei teh tangkom thung he a tâkhawng.

<sup>8</sup> Ahnimouh thung hoi tami 10 touh ni na thet han awh. Bangkongtetpawiteh, ram thung cakang hoi satui hoi khoitui naw ka hro awh telah ati awh. Hottelah ahnimouh teh a hmaunawngghanaw thung hoi thet awh hoeh. <sup>9</sup> Ishmael ni Gedaliah hoi a thei e taminaw a ro tâkhawngnae tangkom hah siangpahrang Asa ni Isarel siangpahrang Baasha a taki daw a sak e doeh. Nethaniah capa Ishmael ni hote tangkom teh tami ro hoi a kawi sak.

<sup>10</sup> Hahoi, Isarel ni Mizpah kho e kacawirae siangpahrang canu hoi Ahikam capa Gedaliah koe e ramvengnaw kahrawikung Nebuzaradan ni a kut daw a ta e hoi Mizpah kho kaawmnaw pueng san lah a ceikhai. Nethaniah capa Ishmael ni ahnimouh teh san lah a ceikhai teh Ammonnaw e ram pâtam laihoi a tâco.

<sup>11</sup> Hatei, Koreah capa Johanan hoi ahni koe kaawm e ransahu kahrawikungnaw ni Nethaniah capa Ishmael ni a sak e hno hawihoe tie a panue awh teh, <sup>12</sup> taminaw pueng a ceikhai teh, Nethanel capa Ishmael tuk hanelah a cei awh, tui moikapap onae hmuen Gibeon vah a hmu awh. <sup>13</sup> Hahoi, Ishmael koe kaawm e taminaw pueng ni Koreah capa Johanan hoi ahni koe e ransahu a hmu awh toteh puenghoi a lunghawi awh. <sup>14</sup> Hat toteh, Ishmael ni Mizpah kho hoi san lah a hrawi e taminaw pueng a ban sak teh, Koreah capa Johanan koe a cei awh. <sup>15</sup> Hatei, Nethaniah capa Ishmael teh tami 8 touh hoi Johanan koehoi a yawng teh, Ammon taminaw koe a cei awh. <sup>16</sup> Hat toteh, Koreah capa Johanan hoi ama koe



e ransahu pueng ni Nethaniah capa Ishmael ni Ahikam capa Gedaliah a thei hnukkhu, Mizpah hoi Nethaniah capa Ishmael koehoi Johanan ni a rungngang e taminaw pueng, tarantuk e naw hoi napui camonaw hoi tuenlanaw hoi Gibeon hoi kabannaw hai kOUNg a ceikhai. <sup>17</sup> Hahoi, a tâco awh teh Khaldean taminaw kecu dawK Izip ram lah yawng hanlah a kâcai awh teh, Bethlehem kho teng e Geruth Khimham vah kho a sak awh. <sup>18</sup> Bangkongtetpawiteh, Babilon siangpahrang ni hote ram uk hanlah a ta e Ahikam capa Gedaliah hah Nethaniah capa Ishmael ni a thei dawkvah Khaldean taminaw a taki awh.

## 42

### *Izip ram yawng hane a haw awh*

<sup>1</sup> Kahrawikungnaw hoi Koreah capa Johanan hoi Hoshaiah capa Jezaniah hoi taminaw pueng, kathoengca koehoi kalenpoung totouh a kamkhueng awh. <sup>2</sup> Profet Jeremiah koevah, na hmalah pahrennae ka kâhei e naw he na dâw pouh haw. Kacawirae taminaw hanelah na Cathut koe pahrennae lahoi na ratoum pouh haw, kacawirae taminaw hanelah na Cathut koe pahren lahoi na ratoum pouh haw. Bangkongtetpawiteh, na hmu awh e patetlah tami moikapap thung hoi tami youn touh doeh ka o awh toe. <sup>3</sup> BAWIPA na Cathut ni ka cei awh nahane hoi ka tawksak awh hane na hmusak nahanelah, telah ati awh. <sup>4</sup> Profet Jeremiah ni nangmae lawk ka thai, khenhaw! mamae lawk patetlah BAWIPA na Cathut koe ka hei han. Hahoi BAWIPA ni bout na dei pouh e naw pueng, nangmouh koe he ka dei han, nangmouh koe banghai ka pâphat mahoeH telah ati.

<sup>5</sup> Ahnimouh ni Jeremiah koevah, BAWIPA na Cathut ni nang hno lahoi kaimouh koe a tha e lawk patetlah ka sak awh hoehpawiteh, kaimouh rahak vah BAWIPA teh kapanuekkaikung hoi yuemkamcu e lah awm lawiseh. <sup>6</sup> BAWIPA Cathut e pahni dawK hoi ka tâcawt e ka tarawi awh toteh, kaimouh hanlah hawinae lah ao thai nahan thoseh, ahawi thoseh, na ka patoun e Cathut BAWIPA ni a dei e teh, ka tarawi awh roeroe han, telah ati awh.

<sup>7</sup> Hahoi, hnin hra hnukkhu, BAWIPA e lawk Jeremiah koe a pha. <sup>8</sup> Hahoi Koreah capa Johanan hoi ahni koe e ransahu kahrawikungnaw pueng hoi ransanaw pueng kathoengca koehoi kalenpoung totouh a kaw teh, <sup>9</sup> ahnimouh koe, a hmalah pahrennae na kâheinae phasak hanelah na patounnae BAWIPA Isarel cathut ni hettelah a dei. <sup>10</sup> Hete ram dawK pou na awm awh pawiteh, bout na kamlang sin vaiteh, na raphoe mahoeH, bout na ung awh vaiteh, na phawng mahoeH. Bangkongtetpawiteh, nangmouh lathueng hawihoeHnae ka pha sak e pankângai toe. <sup>11</sup> Babilon siangpahrang ouk na taki awh e hah taket awh hanh awh, telah BAWIPA ni a dei. Bangkongtetpawiteh, a kut thung hoi rungngang hane hoi rasa hanelah nangmouh koe ka o. <sup>12</sup> Lungangnae tawn thai awh nahanlah nangmae lathueng lungmanae ka kamnue sak vaiteh, namamae ram dawK roeroe na bankhai awh han. <sup>13</sup> Hatei, hete ram dawK kaawm awh mahoeH telah BAWIPA na Cathut e lawk na ngai awh hoeH teh, <sup>14</sup> Izip ram lah ka cei awh vaiteh, hawvah tarantuknae roeroe ka kâhmo awh mahoeH, mongka lawk hai ka thai awh mahoeH, vonhlam, tui kahranneae hai awm mahoeH, hote hmuen koe kho ka sak han na tet awh pawiteh, <sup>15</sup> Oe kacawirae Judah taminaw, BAWIPA e lawk thai awh haw, ransahu BAWIPA Isarel Cathut ni hettelah a dei. Izip ram dawK kâen hane hoi khosak hanlah thama lah na ban awh pawiteh, <sup>16</sup> na taki awh e tahloi ni Izip ram vah a pha vaiteh, hawvah na due awh han. <sup>17</sup> Izip ram dawK khosak hanelah thama lah ka



cet e taminaw pueng hottelah ao awh han. Tahloi, takang, lacik hoi a due awh han, hawihoeahnae ahnimouh lathueng ka pha sak hane thung hoi apihai hlout mahoeah.

<sup>18</sup> Ransahu BAWIPA Isarel Cathut ni hettelah a dei, Jerusalem kho ka sak e taminaw koe ka lungkhueknae ka rabawk e patetlah Izip ram na kâen awh toteh, nangmouh lathueng lungkhueknae ka rabawk han. Pathoe e, kângai ka ru e, thoebo e, hnephnap e lah na o awh vaiteh hete hmuen bout na hmawt awh mahoeah toe. <sup>19</sup> Oe kacawirae Judah taminaw, BAWIPA ni nangmouh kong dawak a dei toe. Izip ram dawak kâen hanh awh, Sahnin vah na thaisak awh tie hah pahnim roeroe hanh awh. <sup>20</sup> BAWIPA na Cathut koevah kai na patoun awh navah, Namamae hringnae sung hanelah namahoima na kâdum awh e doeh. Mamae BAWIPA ka Cathut kaimouh yueng ratoum haw, maimae BAWIPA Cathut ni a dei e naw pueng kaimouh koe na dei pouh haw ka sak awh han telah na ti awh. <sup>21</sup> Sahnin vah nangmouh koe ka pâpho, hatei nangmouh koe na ka patoun e BAWIPA na Cathut lawk hah bout na tarawi ngai awh hoeah. <sup>22</sup> Hatdawkvah, atu panuek awh, khosak hanlah na ngai awh e hmuen koe roeroe vah, tahloi, takang, lacik hoi na due awh roeroe han telah ati.

## 43

### *Jeremiah teh Izip ram lah a ceikhai awh*

<sup>1</sup> Jeremiah ni tamimaya koevah, BAWIPA Cathut e lawk, BAWIPA Cathut ni dei hanelah a patoun e kong naw hoi lawknaw pueng he a dei hnukkhu, <sup>2</sup> Hoshaiha capa Azariah hoi Koreah capa Jahanan hoi ka kâoup e taminaw pueng ni Jeremiah a pathung awh teh, ahni koevah, kalanhoehe lah lawk na dei, BAWIPA ka Cathut ni Izip ram dawak kho na sak awh hanlah na cet awh mahoeah, telah dei hanlah na patoun roeroe hoeah. <sup>3</sup> Khaldean taminaw e kut dawak man e lah ka o awh teh, na thei awh nahane hoi Babilon san lah na hrawi awh nahan Neriaha capa Baruk ni kaimouh tuk hanlah na patoun e doeh telah a dei awh. <sup>4</sup> Hahoi teh, Koreah capa Jahanan hoi ransanaw kahrawikung hoi tamimaya ni Judah ram dawak khosak hanlah BAWIPA e lawk hah thai han ngai awh hoeah. <sup>5</sup> Hahoi, Koreah capa Jahanan hoi ransahu kahrawikung ni kacawirae Judah taminaw pueng, Judah ram dawak khosak hanlah kampuen ni teh a onae miphunnaw koe ka ban awh e naw, <sup>6</sup> napui, tongpa, camonaw hoi siangpahrang canunaw hoi tami pueng ramvengnaw kahrawikung Nebuzaradan ni Shaphan capa, Ahikam capa Gedaliah hoi ahni koe e a hruek e taminaw ni, profet Jeremiah hoi Neriaha capa Baruk hai a ceikhai awh. <sup>7</sup> Hattoteh Izip ram dawak a cei awh. Bangkongtetpawiteh, BAWIPA e lawk that han a ngai awh hoeah dawak, Tahpanhes totouh a cei awh.

<sup>8</sup> Tahpanhes vah BAWIPA e lawk Jeremiah koe a pha. <sup>9</sup> Talungpui lat nateh, Tahpanhes e Faro im kâennae a kung koe amhru lai rahim vah Judah taminaw e hmalah roeroe vah hrawk pouh. <sup>10</sup> Hahoi ahnimouh koe ransahu BAWIPA Isarel Cathut ni hettelah a dei, khenhaw! ka thaw tawak e Babilon siangpahrang Nebukhadnezar hah tha kaawm lahoi ka thokhai vaiteh, ahni ni hete talung ka pakawp e naw dawak, a bawitungkhung a ta vaiteh, ahnimaeh lathueng siangpahrang hni hoi a khu han. <sup>11</sup> A tho vaiteh Izip ram a tuk vaiteh, ahmaloe kadoutnaw e duenae koe san lah kaawm hane naw, san dawak tahloi hoi kadout hane naw tahloi dawak a hruek han. <sup>12</sup> Izip taminaw e cathut im dawak hmai tâco sak lahoi he a kak vaiteh, san lah a ceikhai han. Tukhoumkung khohna a kho e patetlah Izip ram



teh a khohna han. Hote hmuen koehoi karoumcalah a tâco vaiteh, <sup>13</sup> Izip ram e Bethshemesh dawk ka rasang e meikaphawknaw raphoe vaiteh, Izip cathut innaw hmai hoi a sawi han ati, tet pouh telah ati.

## 44

### *Isarelnaw reknae*

<sup>1</sup> Izip ram dawk kaawm e Judah taminaw pueng, Migdil, Tahpanhes, Noph kho hoi Pathros ram khosaknaw kong dawk Jeremiah koe ka tho e lawk. <sup>2</sup> Ransahu BAWIPA Isarel Cathut ni hettelah a dei, Jerusalem hoi Judah khopuinaw pueng e lathueng rawkkahmae nae ka tho sak e naw pueng hah na hmu awh toe. Hatdawkvah, kenhaw! sahnin vah a kâraphoe teh apihai khosak awh hoeh toe. <sup>3</sup> Bangkongtetpawiteh, ahnimouh ni thoseh, nangmouh ni thoseh, na mintoenaw ni thoseh a panue awh boihoeh e cathut alouke baw hane hoi ahnimouh koe hmuítui thueng hanlah a cei awh teh, kaie lungkhuek sak nahanlah thoenae lam a dawn awh. <sup>4</sup> Hottelah nakunghai ka san profetnaw amom a thaw awh teh, ka patoun teh ahnimouh koevah, oe! hete panuettuo e hno, ka hmuhma e heh sak awh hanh leih telah ka ti. <sup>5</sup> Hatei cathut alouknaw koe hmuítui thueng hoeh hane hoi hawihoeahnae kamlang takhai hanelah thai ngai awh hoeh. <sup>6</sup> Hatdawkvah, ka lungkhueknae hoi ka lungkâannaeh teh Judah khopuinaw hoi Jerusalem lamnaw dawk ka rabawk teh, a kamtawi. Sahnin vah a counghae patetlah a kâraphoe teh kingdi toe. <sup>7</sup> Hatdawkvah, Isarel Cathut ransahu Cathut BAWIPA ni hettelah a dei, bangkongmaw namamouh thung hoi napui tongpa, camo sanu ka net e hoi Judah taminaw thung hoi apihai pâhlung laipalah be pâmit hanelah hete kahawihoehe hno heh, namamouh taranlahoi letlang na sak awh teh, <sup>8</sup> khosak hanlah na ceinae Izip ram dawk e cathutnaw koe hmuítui na thueng awh teh, talai van e miphunnaw rahak vah, mahoima kâraphoe hane hoi, thoebo e tami hoi, pathoe e tami lah o hanelah na meikaphawknaw roeroe ni ka lungkhuek sak. <sup>9</sup> Na kakhekungnaw hawihoeahnae hoi Judah siangpahrangnaw hawihoeahnae, tamimaya hawihoeahnae, namamouh hawihoeahnae hoi, na yunaw hawihoeahnae Judah ram hoi Jerusalem lamthung dawk a sak awh e naw hah na pahnim awh tounge maw. <sup>10</sup> Sahnin totouh pankângai kalawn awh hoeh. Na kakhekung hoi nangmae hmalah ka kamnue sak e ka kâlawk hoi ka phunglam hah na tarawi awh hoeh teh na taket awh hoeh.

<sup>11</sup> Hatdawkvah, ransahu BAWIPA Isarel Cathut ni hettelah a dei, Khen awh haw nangmouh rawk nahane hoi Judah taminaw pueng raphoe hanelah na taran awh han. <sup>12</sup> Hahoi kacawirae Judah Izip ram vah khosak hanlah kabawmnaw hah ka man vaiteh, be ka pâmit han. Izip ram lah ban awh vaiteh, tahloi, takang hoi be raphoe e lah ao han. Kathoengca koehoi kalenpoung totouh tahloi, takang hoi a due awh han. Thoebo e hoi tami ni kângairu e hoi lawkthoeumkha bap e, hnepnap e lah ao awh han. <sup>13</sup> Jerusalem ka rek e patetlah Izip ram dawk kho ka sak e naw hah, tahloi, takang, lacik hoi ka rek han. <sup>14</sup> Hahoi Izip ram khosak hanlah kacetnaw thung hoi kacawirae Judah taminaw hah Judah ram ao awh nahane ban han a ngai poung awh e ram dawk a ban hanelah buet touh boehai ka dam lahoi tâcawt mahoe. Arulaho ka yawng e hoeh laipalah teh apihai ban mahoe.



<sup>15</sup> Hattoteh taminaw pueng a yunaw ni cathut alouke koevah hmutui a sawi awh telah ka panuek e naw hoi ka kangdout e napui moikapap naw, Izip ram dawkhô ka sak e tamimaya ni Pathros vah Jeremiah hah hettelah a pathung awh. <sup>16</sup> BAWIPA min lahoi kaimouh koe na dei awh e hah ka ngai awh mahoe. <sup>17</sup> Hatei kamamouh hoi kakhekungnaw, ka siangpahrangnaw hoi kahrawikungnaw ni Judah khopuinaw hoi Jerusalem lam dawkhô ka sak awh e patetlah kalvan siangpahrangnu koe hmutui sawinae hoi ahni koe nei thuengnae awi nateh, kamamae pahni dawkhô hoi ka tâcawt e lawk patetlah ka sak awh roeroe han. Bangkongtetpawiteh, hatnae tueng dawkhô hmaisawi teh, cane kawi apap teh rucatnae kâhmo awh boihoeh. <sup>18</sup> Kalvan siangpahrangnu koe hmaisawi thuengnae hoi nei han rabawknae ka kâhat awh hnukkhu teh, bangpuengpa dawkhô ka vout awh teh, tahloi hoi takang hoi raphoe e lah ka o awh. <sup>19</sup> Hahoi napuinaw ni kalvan siangpahrangnu koe hmutui hmaisawinae hoi nei han rabawknae a sak awhnae koe vanaw hoi lungkuep hoe lahoi maw ama bawknae dawkhô vaiyei a sak awh teh ahni koe nei han rabawknae sak awh telah ati awh.

<sup>20</sup> Hattoteh Jeremiah ni, taminaw pueng napui tongpa hoi ama kapathungnaw koe, <sup>21</sup> Judah khopuinaw hoi Jerusalem lamthungnaw dawkhô namamouh hoi na kakhekung, na siangpahrangnaw, na kahrawikungnaw hoi ram thung e tamimaya ni hai hmutui a sawi awh e hah, BAWIPA ni a pâkuem teh a lung dawkhô tat hoe maw. <sup>22</sup> Yonnae na sak awh e hoi panuetho e hno na sak awh e dawkhô, BAWIPA ni khang thai hoe toe. Hatdawkvah, nangmae ram teh kingdinae, kângairunae, theobonae, hoi karingkung kaawm hoe e sahnin e patetlah doeh ao. <sup>23</sup> Hmutui na sawi awh teh BAWIPA e lathueng yonnae na sak awh teh, BAWIPA lawk na thai ngai awh hoe. A kâlawkhô thoseh, a phunglam thoseh, na panue sak e lawkhô thoseh, na tarawi awh hoe dawkvah, hete hno kahawihoe e, atu e patetlah nangmouh lathueng ka phat e doeh telah a ti.

<sup>24</sup> Hothloilah, Jeremiah ni tamimaya hoi napuinaw koe, Izip ram e Judah taminaw pueng, BAWIPA e lawk heh thaihaw. <sup>25</sup> Ransahu BAWIPA Isarel Cathut ni hettelah a dei. Namamouh hoi na yunaw ni kalvan siangpahrangnu koevah, hmutui sawi e hoi, nei rabawkhanelah, ka dei tangcoung e patetlah ka sak awh roeroe han telah na pahni ni a dei teh na kut ni hai a kuep sak. Na lawk kam hah caksak awh haw. Na kâcai e naw kuep sak roeroe awh. <sup>26</sup> Hatdawkvah, nangmouh Judah taminaw, Izip ram hô ka sak e taminaw pueng. BAWIPA e lawk thai awh. Thaihaw! Bawipa Jehovah a hring e patetlah Izip ram dawkhô ka sak e Judah tami apipatet nihai, ka min dei hanh lawi naseh telah kalenpounge ka mitnout lahoi thoe ka bo telah BAWIPA ni a dei.

<sup>27</sup> Khenhaw! ahawi nahane laipalah, a rawkhô nahanelah, ahnimouh pou ka pawp. Judah tami Izip ram dawkhô kaawmnaw pueng teh, tahloi, takang hoi he raphoe hoehrourak, be kahma sak e lah ao han. <sup>28</sup> Tahloi dawkhô ka hlout e tami tangawn hah Izip ram hoi ban awh vaiteh, Judah ram dawkhô kâen awh han. Cacawirae Judah taminaw pueng, Izip ram dawkhô khosak hanelah kacetnaw ni, apie lawkhô maw ka cak han, ka lawkhô maw, ahnimae lawkhô tie a panue awh han. <sup>29</sup> Hahoi hetheh nangmouh hanlah minoutnae lah ao han. Ka lawkhô heh nangmouh hanlah hawihoeahnae lah a kangdue roeroe telah na panue thai awh nahan, hete hmuen koe ka sak han telah BAWIPA ni a dei. <sup>30</sup> BAWIPA ni hettelah a dei, khenhaw! Judah siangpahrang Zedekiah teh a hringnae ka thet hane a taran Babilon siangpahrang Nebukhadnezar kut dawkhô ka poe e patetlah



Faro Hophra Izip siangpahrang teh ka thet hane a taran koevah ka poe han telah a ti.

## 45

### *Baruk koe kamcengsaknae*

<sup>1</sup> Judah siangpahrang Jehoiakim, Josiah capa a bawinae kum pali nah, Jeremiah ni dei e lawk cauk dawk thut lahun nah, Neriah capa Baruk koe profet Jeremiah ni dei e lawk teh, <sup>2</sup> Oe! Baruk, BAWIPA Isarel Cathut ni nang koe hettelah a dei, <sup>3</sup> nang ni tami yawthoe e lah ka o, bangkongtetpawiteh, BAWIPA ni ka rucatnae dawk lungmathoenae a thapsin, ka kâhramnae dawk ka hrip toe, thadamnae banghai awm hoeh telah na ti.

<sup>4</sup> Ahni koe hettelah na dei han, BAWIPA ni hettelah a dei, khenhaw! ram tangkuem dawk ka sak tangcung e hah bout ka raphoe vaiteh ka ung tangcung e bout ka phawk han. <sup>5</sup> Ma hanelah hno kalen na tawng maw, tawng hanh, bangkongtetpawiteh, moithang pueng e lathueng vah thoenae ka pha sak han telah BAWIPA ni a dei. Hatei na hringnae teh na ceinae pueng dawk nang koe ka poe e phu lah ao han telah ati.

## 46

### *Izip lathueng lawkcengnae*

<sup>1</sup> Miphunnaw taranlahoi profet Jeremiah koe BAWIPA e lawk ka tho e teh,

<sup>2</sup> Izip taranlahoi Euphrates palang teng Karkhemish koe kaawm e Judah siangpahrang Jehoiakim, Josiah capa a bawinae kum 4 nah Nebukhadnezar ni a thei e Izip siangpahrang Faro Neko ransahu kong dawk doeh.

<sup>3</sup> Saiphei kathoung hoi kalennaw kârokueng awh nateh tarantuknae koe pâtam awh.

<sup>4</sup> Marangnaw rakueng awh nateh, marangransanaw kâcui awh, rahum lukhung kâruk awh nateh kacaklah kangdout awh, na tahroenaw kata awh nateh sumangi hah kho awh.

<sup>5</sup> Bangkongmaw hnuklah a ban awh teh a yawng awh. Ahnimae athakaawme taminaw teh rek a dei awh toe, a yawng awh teh hnuklah kangvawi awh hoeh, avoivang lahoi takithonae teh a tho telah BAWIPA ni a dei.

<sup>6</sup> Ahue karangnaw yawng thai awh hoeh, athakaawme tami hlout kalawn hoeh, Euphrates palang atunglah a hmang awh teh he a rawp awh.

<sup>7</sup> Apimaw tuikalen patetlah ka tho niteh, tuicapa patetlah ka thaw e heh apimaw .

<sup>8</sup> Izip teh tuikalen patetlah a luen teh tuicapa ka thaw e patetlah ka len vaiteh talai pueng koug ka ramuk han, khopui hoi karingkungnaw koug ka raphoe han telah ati.

<sup>9</sup> Oe marangnaw kamthoup awh haw, Oe ranglengnaw puenghoi kâroe awh haw, tami athakaawme taminaw hmalah hoe nawt awh, Ethiopia tami hoi Put tami saiphei kasinnaw licung ka ka thoum e Ludimnaw.

<sup>10</sup> Bangkongtetpawiteh, hatnae hnin teh ransahu BAWIPA ni moipathungnae hnin, a tarannaw e lathueng moipathungnae hnin doeh. Tahloi ni he a ca vaiteh, a due awh han. Ahnimae thipaling teh ka boum lah a nei awh han. Bangkongtetpawiteh, BAWIPA ni atunglae ram Euphrates palang teng vah thuengnae hah a sak.



<sup>11</sup> Oe Izip canu tanglakacuem, Gilead lah luen nateh, kâhluk e tâsi hah lat haw. Tâsi moikapap na la teh na hno ei, nang hanlah hawinae banghai awm hoeh.

<sup>12</sup> Miphunnaw ni yeiraiponae a thai awh teh na khuikanae ni ram daw k a kawisak. Bangkongtetpawiteh, athakaawme tami hoi athakaawme tami a kâtuk roi teh hmuen touh koe a rawp roi.

### *Babilon ni Izip a tuk han*

<sup>13</sup> Babilon siangpahrang Nebukhadnezar a tho teh, Izip ram a tuk hane kong BAWIPA ni profet Jeremiah koe a dei e teh, <sup>14</sup> Izip ram daw k dei awh, Migdol vah pathang awh, Noph hoi Tahpanhes daw k pâpho awh nateh, kacaklah kangdue laihoi kâhruetcueth awh. Bangtelah tetpawiteh, nang petkâkalup lah kaawmnaw tahloi ni a ca toe telah dei pouh awh.

<sup>15</sup> Bangkongmaw a thakasai e tami hah tâkhawng lah ao. BAWIPA ni a tanawt dawkvah kangdout thai awh hoeh.

<sup>16</sup> Tami moikapap a rawp sak. A kâcakueng awh teh hmeng a rawp awh. Repcoun groenae tahloi hah yawngtakhai laihoi, tho awh ban awh lei sei, tâconae ram, mae taminaw koe vah, telah ati awh.

<sup>17</sup> Izip ram e Faro teh a kamthang dueng doeh a len. Hatei, atueng a baw toe, telah a hram awh.

<sup>18</sup> Kai ka hring e patetlah siangpahrang ransahu BAWIPA ni a dei. Monnaw thung hoi Tabor mon hoi tuipui teng e Karmel mon patetlah a tho roeroe han.

<sup>19</sup> Oe nang canu! Izip ram daw k kho ka sak e, santoung hanlah kârakueng. Bangkongtetpawiteh, Noph hah ka raphoe vaiteh, kho ka sak e ao hoeh ditouh kingdi han.

<sup>20</sup> Izip teh a mei kahawipoung e maitola doeh. Hatei, atunglae ram daw k hoi karaphoekung a tho toe.

<sup>21</sup> A coun e ransanaw hah kaboumlah paca e maito patetlah doeh ao. Bangkongtetpawiteh, ahnimouh ni hnuklah kamlang takhai teh kâhat laipalah a yawng awh. Bangkongtetpawiteh, ahnimae lathueng vah rawkphainae a tho teh reknæ tueng lah ao.

<sup>22</sup> Thing katâtuengnaw patetlah cakâ sin hoi tamihupui hoi a tho awh toteh, ahnie lawk teh tahrûn phi e lawk patetlah ao han.

<sup>23</sup> Katin thai hoeh e ratu hah koug a tâtueng awh han. Bangkongtetpawiteh, samtong hlak a pap awh teh, touk thai lah awm hoeh.

<sup>24</sup> Izip canu teh yeiraipo laihoi atunglae ramnaw e kut daw k poe lah ao han.

<sup>25</sup> Ransahu BAWIPA Isarel Cathut ni hettelah a dei. Khenhaw! No e Ammon hoi Faro, hahoi Izip hoi a cathutnaw hoi a siangpahrangnaw, Faro ama roeroe hoi ama ka kâuep e naw hah ka rek han. <sup>26</sup> Ahnimouh ka thet hane Babilon siangpahrang Nebukhadnezar hoi a thaw katawknaw e kut daw k a poe han. Hatnae tueng daw k yampa e hnin patetlah panue e lah ao han, telah BAWIPA ni a dei.

### *Isarel kâkathoenae*

<sup>27</sup> Hatei, Oe Jakop, kaie thaw katawkkung, taket hanh. Oe Isarel na lungpuen hanh naseh. Bangkongtetpawiteh, khenhaw! lamhlanæ koehoi na rungngang han. Na catounnaw hai santoungnae ram thung hoi ka rungngang han. Jakop teh a ban vaiteh, karoumcalah ao han, apinihai takinae poe mahoe.

<sup>28</sup> Oe Jakop, ka san, taket hanh. Bangkongtetpawiteh, kai kama ni na okhai telah BAWIPA ni a dei. Bangkongtetpawiteh, na pâleinae ramnaw



pueng heh ka baw sak han. Hatei nang teh a pout totouh na pout sak mahoe. Kalanlah na toun han. Bangkongtetpawiteh, rek laipalah na hlout sak mahoe.

## 47

### *Filistin lawkcengnae*

<sup>1</sup> Faro ni Gaza a tuk hoehnahlan e Filistinnaw e kong daw, Profet Jeremiah koe BAWIPA e lawk teh a pha.

<sup>2</sup> Atunglah hoi tui kalen teh a lawng han. Ka poum lah a lawng vaiteh, ram hoi a thung kaawm e naw pueng heh a muem han. Khopui hoi athung kaawm e taminaw pueng a khuika awh vaiteh, ram thung kaawm e taminaw pueng a kâhram awh han.

<sup>3</sup> A thakasai marang ka yawng thai e hoi tarantuknae rangleng ka sawm e hoi leng a tuen sak e pawlawk daw napanaw ni a canaw khet mang laipalah a yawng awh han.

<sup>4</sup> Filistin taminaw raphoenae hnin, Taire hoi Sidon koehoi kabawmkung kaawm rae raphoenae hnin teh a pha vaiteh, bangkongtetpawiteh, BAWIPA ni kacawie Kaphtor ram koehoi ka tho e Filistinnaw hah a raphoe han.

<sup>5</sup> Gaza taminaw e lû a ngaw pouh han. Askelon teh a pâmit han. A ram tanghling daw kacawirae hah, bangkongmaw namahoima na kâbouk han.

<sup>6</sup> Oe! BAWIPA e tahloi na totouh maw duem na o han. Na tabu daw kâen nateh duem awmh.

<sup>7</sup> BAWIPA ni Askelon hoi tuipui teng e ram taranlahoi kâ na poe e na thai nahlangva bangkongmaw duem ao thai han. Hawvah kâroe hanelah hruek e doeh telah ati.

## 48

### *Moab lathueng lawkcengnae*

<sup>1</sup> Moab taranlahoi, ransahu BAWIPA Isarel Cathut ni hettelah a dei, Nebo teh yawthoe lah ao. Rawknae koe a pha. Kiriathaim teh yeiraipo lah ao. Pâmit e lah ao. Misgab rapanim teh yeiraipo e hoi raphoe e lah ao.

<sup>2</sup> Moab min kamthangnae a kahma han. Heshbon a rawk nahan kâcai laihoi tho awh, miphun a counгнаe daw hoi tâkhawng awh sei, telah ati awh. Oe Madmen, nang hai tâtueng e lah na o vaiteh tahloi hoi pâlei e lah na o han.

<sup>3</sup> Horonaim hoi hramnae kamthang rektapnae hoi rawkphainae kamthang hah!

<sup>4</sup> Moab teh a kahma toe, a canunaw khuika lawk thai lah ao toe.

<sup>5</sup> Luhith mon daw ka laihoi a luen awh teh, Horonaim cathuknae koe rawkphainae kamthang hoi kângairunae hah thai lah ao.

<sup>6</sup> Yawng awh na hringnae rungngang hanlah kahrawng e la patetlah yawng awh.

<sup>7</sup> Thaw na tawknae kutnaw hoi na hnopainaw na kâuepkhai dawkvah nang hai man e lah na o han, Khemosh teh a vaihma hoi kahrawikungnaw hoi san lah man e lah ao han.

<sup>8</sup> Kho tangkuem daw karaphoekung a tho vaiteh kho buet touh boehai hlout mahoe. Tanghling daw e ramnaw hai he a pâmit han. BAWIPA ni a dei tangcung e patetlah a yawn hai raphoe lah ao han.



<sup>9</sup> A kamleng thai nahanlah Moab teh rathei poe awh, bangkongtetpawiteh, a khonaw teh kho ka sak e tami awm laipalah kingdi awh han.

<sup>10</sup> Pamda laihoi BAWIPA thaw ka tawk e teh thoebo lah awm seh, thipaling lawng hanlah a tahloi ka hno hoehe e tami teh thoebo lah awm seh.

<sup>11</sup> Moab teh a nawca hoi a nawm, a laheipadin koe pou ao. Hlaam alouke dawk pahoung boihoeheh teh, santoung boihoeheh. A kamtuinae lahoi pou a tui teh, a mei hai kâhung boihoeheh.

<sup>12</sup> Hatdawkvah, thaihaw! atueng a pha tawmlei toe, ahnimouh rawbawk hanlah tami katha vaiteh, ahnimouh ni na rabawk awh han, telah BAWIPA ni a dei. Ahnie hlaam teh a poum sak vaiteh, rakkâbawng han. <sup>13</sup> Isarel imthung ni a kâuep poung awh e Bethel a kayakhai awh e patetlah Moab ni Khemosh a kayakhai han toe.

<sup>14</sup> Taran tuk hanlah athakaawme taminaw, tarankahawi e taminaw telah bangtelamaw na ti thai.

<sup>15</sup> Moab teh a rawk toe, a khopui teh hmaikhu lah a coung toe. A nawsainaw pueng he a rawp awh han, telah siangpahrang a min ransahu BAWIPA ni ati.

<sup>16</sup> Moab rawkphainae teh a hnai toe, a rucatnae teh karanglah a tho han.

<sup>17</sup> Nangmouh a tengpam e naw ni ahni ka khai laihoi, a min kapanuek-naw ni hai, kalenpoung hoi thakasai poung e sonron teh a kâkhoe toe telah dei awh.

<sup>18</sup> Oe nang canu, Dibon dawk kho ka sak e na tawntanae hah kum takhai nateh, tui kahran laihoi tahung. Bangkongtetpawiteh, Moab ka raphoe e ni na tuk awh vaiteh, na rapanimnaw a raphoe awh.

<sup>19</sup> Oe Aroer dawk kho ka sak e canu, lam teng kangdout nateh khenhaw! ka yawng e tongpa hoi ka kâhrawk e napui hah pacei nateh, bangtelamaw telah tet haw.

<sup>20</sup> Bangkongtetpawiteh, Moab teh yeiraipo e lah ao teh, he a rawp han. Kâhram laihoi khuikap awh haw. Moab teh rawkphai e lah ao telah Arnon lah pâpho awh.

<sup>21</sup> Ayawn ram dawk lawkcengnae a pha toe. Holon hoi Jahzah hoi Mephaath, <sup>22</sup> Dibon hoi Nebo hoi Bethdiblathaim, <sup>23</sup> Kiriathaim hoi Bethgarmul hoi Bethmeon, <sup>24</sup> Kirioth hoi Bozrah hoi Moab ram e khonaw pueng ahlanae koe e hoi a hnainae koe e naw pueng hai, <sup>25</sup> Moab e ki teh tâtueng e lah ao teh, a loung hai khoe pouh e lah ao, telah BAWIPA ni a dei.

<sup>26</sup> BAWIPA e lathueng a kârasang dawkvah ama hah parui sak awh, Moab teh amae palo dawk a kâkaawk vaiteh panuikhai e lah ao han.

<sup>27</sup> Isarel nang hai panuikhai e lah ao nahoehmaw. Tamru hoi a kambawng boimaw. Bangkongtetpawiteh, ahnie kong na dei karoitawi na lû na saling.

<sup>28</sup> Moab dawk kho ka sak e naw khopui hah yawng takhai awh nateh, lungha rahak vah awm awh. Bakhu ni talung kâko dawk tabu a tuk e patetlah awm awh.

<sup>29</sup> Moab a kâoupnae ka thai, a kâoup tangak doeh. A kârasangnae a kâpholennae hoi a lungpatanae hoi a lungkârasangnae naw hah.

<sup>30</sup> A lungkhueknae teh banglahai awh hoehe tie hah ka panueh teh a kâoupnae ni banghai thokhai hoehe, telah BAWIPA ni a dei.

<sup>31</sup> Moab e lathueng kâhram han, Moab hanlah ka ka han. Kirhareth taminaw hai a ka awh han.



<sup>32</sup> Jazer khuikanae hlak ka patawn lah ka ka awh han. Oe Sibam misurkung, na dawn hah tui totouh a yam teh Jazer tali totouh a pha. Na paw hoi misurpaw ka raphoekung ni he a raphoe han.

<sup>33</sup> Lunghawinae hoi nawmnae a kahma toe. A paw e hmuen hoi Moab ram thung hoi misur katinnae daw k misur a baw toe. Apihai nawmnae hoi na katin awh mahoe h toe. Hramnae pawlawk hai lunghawinae pawlawk mahoe h toe.

<sup>34</sup> Heshbon hoi Elealeh daw k a hram awh, Jahaz totouh ka lawk a kampaw. Zoar hoi Horonaim totouh, Eglathshelishiyah totouh, Nimrim tui hai kingdi han. <sup>35</sup> Hothloilah, Moab hmuenrasang daw k thuengnae hoi a cathut hanlah hmutui ka sawi e hah ka pout sak han, telah a BAWIPA ni a dei. <sup>36</sup> Hat toteh, tamawi patetlah ka lungthin Moab hanlah ao teh, Kirhareth taminaw hanlah takhawng e pawlawk patetlah ka lungthin hah a cai. Hatdawkvah, karoumcalah ouk a hmu awh e hnonaw teh awh hoe h toe.

<sup>37</sup> Lûnaw pueng luengpalueng lah ao teh, pâkha muennaw pueng ngaw e lah ao. Kutnaw pueng a e lah ao teh, keng daw k buri kapawn ao. <sup>38</sup> Moab imthungnaw daw k lamthungnaw hoi kho takinnaw daw k khuikanae ao. Bangkongtetpawiteh, Moab teh aphu kaawm hoe h e hlaam patetlah a kâbawng toe, telah BAWIPA ni a dei. <sup>39</sup> Nâtotouh maw a rawk toung, nâtotouh maw a hram awh toung. Moab teh yeirapo laihoi a kamlang botoung. Hatdawkvah, Moab teh a tengpam e taminaw hanlah panuikhai e hoi takikatho e lah a coung.

<sup>40</sup> Bangkongtetpawiteh, BAWIPA ni hettelah a dei, khenhaw! Mataw patetlah kamlang vaiteh, Moab lathueng a rathei a kadai han.

<sup>41</sup> Kirioteh teh la e lah ao vaiteh, a rapanimnaw vaitalahoi he a raphoe. Hatnae hnin daw k Moab tami athakaawmnaw teh camo ka khe tawmlei e napui ka pataw e lungthin patetlah ao han.

<sup>42</sup> Moab a kahma vaiteh, miphun kuep mahoe h toe. Bangkongtetpawiteh, BAWIPA lathueng a kâoup.

<sup>43</sup> Takitho e tangkom hoi karapnaw, Oe Moab daw k kaawm e naw nangmae lathueng a pha, telah BAWIPA ni a dei.

<sup>44</sup> Takinae ka yawng takhai e tami teh tangkom daw k a bo han, tangkom daw k hoi ka tâcawt e tami teh karap daw k a kâman han. Bangkongtetpawiteh, reknæ kum hah Moab e lathueng. Moab e lathueng roeroe vah ka pha sak han, telah BAWIPA ni a dei.

<sup>45</sup> Heshbon tâhlip daw k ka yawng e naw thabaw laihoi a kangdue awh han. Hahoi Heshbon koehoi hmai a tho vaiteh, Sibon taminaw e lathueng a kaman han Kâoupnaw e Moab kho a deng totouh he a kak han.

<sup>46</sup> Yawthoe e lah na o Oe Moab, Khemosh taminaw a thayoun awh, na capanaw san lah ceikhai teh na canunaw santoung awh han.

<sup>47</sup> Hatei, a to hmalah, Moab santoungnae teh ka thung han telah, BAWIPA ni a dei. Moab lawkcengnae teh het totouh doeh.

## 49

### *Ammon lathueng lawkcengnae*

<sup>1</sup> Ammonnaw taranlahoi BAWIPA ni hettelah a dei, Isarel ni capa tawn hoe h na maw. Râw ka pang hane awh hoe h na maw. Bangkongmaw Gad hah Milkom ni a ring teh a taminaw a khopui daw k kho a sak awh.

<sup>2</sup> Hatdawkvah khenhaw! atueng pha tawmlei toe, telah BAWIPA ni a dei. Rabbah e Ammon taminaw koe tarantuk kâhruetcuetnae kamthang ka



thaisak han. Kingdi la awm vaiteh, a khonaw hmai ni a kak han. Hattoteh Isarel ni a tawn e hno hah a pang han, telah BAWIPA ni a dei.

<sup>3</sup> Oe Heshbon hramki haw, khuikap haw, Rabbah canunaw khuikap aw. Bangkongtetpawiteh, Milkom teh a vaihma hoi a bawinaw hoi san lah ceikhai e lah ao han.

<sup>4</sup> Bangkongmaw na tanghling na kâoupkhai, Oe yuemkamcuhoeh e napui, na tawn e hnokahawi na kâuep teh, apinimaw na tuk han telah ouk na ti.

<sup>5</sup> Khenhaw! na tenggam e taminaw thung hoi na lathueng takinae ka pha sak han, telah Bawipa ransahu Jehovah ni a dei. Taminaw pueng he pâlei e lah awm vaiteh, kayawngnaw hah apinihai bout pâkhueng mahoe.

<sup>6</sup> Hatei, hote hnouaw hnukkhu Ammon catounnaw hah santoungnae dawkw hoi ka bankhai han, telah BAWIPA ni a dei.

### *Edom lathueng lawkcengnae*

<sup>7</sup> Edom taranlahoi ransahu BAWIPA ni hettelah a dei. Teman dawkw lungangnae abaw toung maw. Khokhang kathoum e khokhangnae abaw toung maw. Lungangnae a kahma toung maw.

<sup>8</sup> Oe Dedan vah kho ka sak e taminaw yawng aw. Bout ban aw nateh, kadungpoung e koe khosak aw. Bangkongtetpawiteh, ama ka rek navah, Esaw rawkphainae a lathueng ka pha sak han.

<sup>9</sup> Misurpaw ka khi e tami nang koe tho pawiteh, pâhma e ao han nahoehmaw. Tangmin vah tami ka parawt tho pawiteh, a ngai e yit touh a hmu hoehroukrak a tawng han nahoehmaw.

<sup>10</sup> Hatei, Esaw teh tak caici lah ka o sak toe. A paten e hah ka hawng pouh toe, hrawk thai mahoe toe. A catounnaw hoi a hmaunawng, imrinaw hoi raphoe lah ao vaiteh a ma hai a rawk han.

<sup>11</sup> Na pa ka tawn hoe e camo hah, pouk aw hanh, kai ni ka kountouk han. Na lahmainaw ni kai na kâuep aw naseh.

<sup>12</sup> Bangkongtetpawiteh, BAWIPA ni hettelah a dei. Khenhaw! manang ka net hoe e tami patenghai parui pawiteh, nang rek laipalah na hlout han namaw, rek laipalah na hlout mahoe, na nei roeroe han.

<sup>13</sup> Bangkongtetpawiteh, BAWIPA ni mahoima e min noe lahoi thoe a kâbo toe. Bozrah teh tami ni kângairu e, pathoe e, kingdi e, lawkthoeumkha bap e lah awm vaiteh, khonaw pueng hai yungyoe hoi raphoe e lah ao han.

<sup>14</sup> BAWIPA koehoi pâpho lawk ka thai toe. Miphunnaw koe laicei ka patoun. Kâcoun aw nateh, ama taranlahoi tarantuk hanlah kârakueng aw.

<sup>15</sup> Bangkongtetpawiteh, miphunnaw thung hoi taminaw ni hnepnap hanlah ka sak toe.

<sup>16</sup> Takitho e na meilam hah teh na lungthin kâoupnae hoi na kâdum e doeh. Oe nang lungha rahak monsom kho na ka sak e tami, mataw patetlah ka rasangpoung koe tabu na tawn ei nakunghai, hate hmuen koehoi na pabo roeroe han, telah BAWIPA ni a dei.

<sup>17</sup> Edom teh kângairu e lah awm vaiteh, voivang ka cet e taminaw ni kângairu telah ati aw vaiteh, ka raphoekungnaw hanlah a kam khuem aw mahoe. <sup>18</sup> Sodom hoi Gomorrah hoi a tenggam e khopuinaw raphoe e patetlah apihai khosak mahoe toe. Tami ca apihai hawvah aw mahoe toe telah BAWIPA ni a dei. <sup>19</sup> Khenhaw! Jordan tangling ratu thung hoi sendek saring thanae hmuen koe ka luen e patetlah a tho han. Hatei ahni koehoi ahnimouh teh tang ka yawng sak han. A lathueng vah



kâtawn hanlah ka rawi e hah ka pouk thai nahanelah, kai patetlae apimaw kaawm. Apipatet ni maw kaie tueng a khoe thai han. Tukhoumkung apipatet maw ka hmalah kangdout thai han. <sup>20</sup> Hatdawkvah, Edom e lathueng BAWIPA ni pouknae hoi Teman taminaw lathueng a pouknae sak han a kâcai e naw hah thai awh haw. Saringnaw thung hoi kanawka e hah la e lah awm vaiteh, raphoe han, a pawngpanae hai kingdi han. <sup>21</sup> A rawpnae pawlawk ni talai a kâhuat teh a khuikanae pawlawk teh tuipui paling koehoi hai thai e lah ao. <sup>22</sup> Khenhaw mataw patetlah luen laihoi a kamleng vaiteh, Bozrah e lathueng rathei a kadai han. Hatnae hnin navah Edom tami tarankahawinaw e lungthin teh camo kaawm tawmlei e ni ka pataw e lungthin patetlah ao han.

### *Damaskas lathueng lawkcengnae*

<sup>23</sup> Damaskas tarannae lawk, Hamath hoi Arpad teh kahawihoehe kamthang a thai roi dawkvah, kaya teh lungpout laihoi ao roi, talîpui totouh lungpuennae ao dawkvah, rounnae koe phat thai hoeh.

<sup>24</sup> Damaskas teh thayung tawn hoeh toe, yawng han a kâcai ei takinae ni a man, napui patawnae ni a man e patetlah lungmathoenae hoi patawnae ni a man.

<sup>25</sup> Khopui min kamthangnae hoi nawmnae teh bangkong kingdi bo aw.

<sup>26</sup> Hatdawkvah, hote hnin dawkwawsai naw ni lam dawkw a rawp awh vaiteh, taran ka tuk e tongpanaw pueng a kâhmo awh han, telah ransahu BAWIPA ni a dei. <sup>27</sup> Hahoi Damaskas kalup e rapan dawkw hoi hmai ka tâco sak vaiteh, Benhadad im he a kak han.

### *Kedar hoi Hazar lathueng lawkcengnae*

<sup>28</sup> Babilon siangpahrang Nebukhadnezar ka tuk e Kedar hoi Hazar uknaeram taranlahoi BAWIPA ni hettelah a dei. Thaw, Kedar lah luen, Kanîtholae tami capanaw hah tuk awh.

<sup>29</sup> Rim hoi saringnaw a ceikhai awh han. Lukkareirimmaw amamouh hanlah he a lah awh han, a hnopainaw hoi kalauknaw a ceikhai awh han. Hote hnonaw dawkw kap awh vaiteh, tengpam vah takinae ao.

<sup>30</sup> Yawng awh nateh, ahla poungnae koe cet awh. Oe Hazar dawkw kho ka sak e taminaw, adungnae koe kho sak awh telah BAWIPA ni a dei. Bangkongtetpawiteh, nangmouh taranlahoi Babilon siangpahrang Nebukhadnezar ni kho a khang teh, nangmouh taranlahoi noenae a tawn.

<sup>31</sup> Thaw haw, ka tawnta e mipun lungmawngcalah khosak e tami, longkha thoseh, tarennae thoseh, tawn laipalah madueng kho ka sak e koe cet haw, telah BAWIPA ni a dei.

<sup>32</sup> Kalauk hah tarannaw ni paru e lah awm vaiteh, maitohu lawp e lah ao han, ahlapoung hmuen koe ka kâkaheisak vaiteh, a rawkphainae naw hah hmuen tangkuem ka pha sak han telah BAWIPA ni a dei.

<sup>33</sup> Hazar teh kahrawnguinau khosaknae hmuen lah awm vaiteh yungyoe ka ke e lah ao han. Apihai khosak mahoehe toe, tami capa khosak mahoehe toe.

### *Elam lathueng lawkcengnae*

<sup>34</sup> Judah siangpahrang Zedekiah ni uknae kamtawng nah Elam taranlahoi BAWIPA e lawk profet Jeremiah koe ka tho e, <sup>35</sup> ransahu BAWIPA ni hettelah a dei. Khenhaw! Elam e licung a thaonae hah ka khoe han. <sup>36</sup> Talai poutnae koehoi kahlî pali touh ka tho sak vaiteh, Edom taranlahoi talai poutnae totouh he ka kâkaheisak han. Elam tami pueng heh pâleioehnae mipun khoeroe awm mahoehe. <sup>37</sup> Bangkongtetpawiteh,



ka thet hane naw hoi a tarannaw e hmalah Elamnaw hah ka pâyaw sak han. Kaman e ka lungkhueknae ni ahnimouh lathueng rawkphainae ka pha sak han, telah BAWIPA ni a dei. Ahnimouh tahloi hoi ka pâlei vaiteh, he ka pâmit hoehroukrak teh. <sup>38</sup> A siangpahrangnaw hoi kahrawikungnaw ka raphoe vaiteh, Elam vah ka bawitungkhung ka hung han, telah BAWIPA ni a ti.

<sup>39</sup> Hahoi a to hmalah toreih teh, hettelah ao han, Elam taminaw hah santoungnae koehoi bout ka bankhai han, telah BAWIPA ni a dei.

## 50

### *Babilon lathueng lawkcengnae*

<sup>1</sup> Babilon hoi Khaldean taminaw e ram taranlahoi profet Jeremiah e pahni hno lahoi BAWIPA ni a dei e lawk teh, <sup>2</sup> Miphunnaw koe dei pouh nateh pâpho haw. Lukkarei vo awh na teh, pathang awh. Hrawk awh hanh. Babilon la e lah ao vaiteh, Bel teh yeirai po lah ao han. Merodak e cathut teh a kâkhoe toe. Babilon e meikaphawknaw teh yeirai po awh teh, reppasei lah a kâbawng toe. <sup>3</sup> Bangkongtetpawiteh, ahni taranlahoi miphun buet touh atunglah hoi a tho teh, apihai kho sak hoeh nahanlah a ram hah kingdi, tami hoi moithangnaw hai yawng awh vaiteh awm awh mahoe toe.

<sup>4</sup> Hatnae hnin hoi tueng nah teh, Isarel catounnaw hah tho awh vaiteh, amamouh hoi Judah catounnaw hoi khuika laihoi tho awh vaiteh, BAWIPA Cathut a tawng awh han, telah BAWIPA ni a dei. <sup>5</sup> Zion lah ceinae lamthung hah a pacei awh han, tho awh, yungyoe lawkkam pahnim hoe nahanlah BAWIPA hnai awh telah ati awh han. <sup>6</sup> Ka taminaw teh tu kahmat e lah o awh. Tukhoumnaw ni mon daw k lam a payonsak toe. Ahnimanaw teh mon buet touh hoi buet touh daw k lam a kahma awh teh roumnae hmuen a pahnim awh toe. <sup>7</sup> Kahmawtnaw pueng ni a kei awh teh, a tarannaw ni maimouh payon hoeh, BAWIPA e lannae kânguenae, a mintoenaw ni ngaihawinae BAWIPA lathueng roeroe vah yonnae a sak awh daw k doeh ati awh.

<sup>8</sup> Babilon hoi kampuen awh, Khaldean ram daw k hoi tâcawt awh, hmaehu e rahak vah hmaetan patetlah awm awh. <sup>9</sup> Bangkongtetpawiteh, thaihaw! Babilon tuk hanlah atunglae ram daw k hoi kalenpounge miphun hah thakasai sak vaiteh, ama tuk hanlah a kâcai vaiteh, hawvah man e lah ao han, a tahroe teh athakaawm ni teh tarantuk kathoume tami, ka thaw boihoe e patetlah o han.

<sup>10</sup> Khaldean teh raphoe e lah awm vaiteh, haw vah ka raphoe kungnaw kaboumlah ao awh han, telah BAWIPA ni a dei. <sup>11</sup> Kaie râw na raphoe awh daw kvah, kanawmcalah na lunghawi awh nateh, hramkahring daw k maitolaca ka pâ e hoi marangtan ka cai e patetlah na o awh nakunghai, <sup>12</sup> na manu yeirai po vaiteh, na kakhekung yeirai po han. Khenhaw! miphunnaw thung daw k hoi ka rahnoumpoung e, ka ke ram, ramke, thingyeiyawn lah na o han.

<sup>13</sup> BAWIPA lungkhueknae kecu daw k apihai awm laipalah, kingdi lah o han. Babilon lah ka cet e taminaw pueng ni puen khai awh vaiteh, a rawkphainae daw k pathoenae lawk a dei awh han. <sup>14</sup> Babilon kalup awh nateh ven awh, palâ hoi ka awh, thaw awh hanh, bangkongtetpawiteh, BAWIPA taranlahoi a yo toe. <sup>15</sup> A tengpam vah hramki sak awh, amahoima a kâhmoun toe. A rapan rawm vaiteh, tapangnaw a tip han. Bangkongtetpawiteh, BAWIPA ni moipathung e doeh. A lathueng vah



moipathung awh, a sak e patetlah a lathueng sak van awh. <sup>16</sup> Babilon vah cati kapatuekung hoi cangkaanaw hoi cangkatinaw hah tâkhawng awh, repcoun groenaw e tahloi taki daw k mae taminaw koe pâtam awh vaiteh, mae ram lah a yawng awh han.

*BAWIPA e a taminaw bout a ban awh han*

<sup>17</sup> Isarel teh tu kâhei e doeh. Sendek ni a pakhi, hatei siangpahrang ni ahni a ca teh a poutnae koe Babilon siangpahrang Nebukhadnezar ni a hru totouh be a khoe. <sup>18</sup> Hatdawkvah, ransahu BAWIPA Isarel Cathut ni hettelah a dei. Khenhaw! Assiria siangpahrang ka rek patetlah Babilon siangpahrang hoi a ram hah ka rek han. <sup>19</sup> Isarel teh yampa a onae koe ka hravi han. Karmel hoi Bashan vah a pawngpa han. Ephraim mon hoi Gilead vah ahni teh kaboumcalah ao han. <sup>20</sup> Hatnae hnin hoi tueng daw k Isarel yonnae ka tawng eiteh, hmawt mahoe h. Judah yonnae hai hmawt mahoe h. Bangkongtetpawiteh, kacawi ni teh ka pâhlung e naw hah ka ngaitoum awh, telah BAWIPA ni a dei.

*Babilon a et toe*

<sup>21</sup> Marathaim ram heh tuk awh, A ram hoi Pekod vah khokasaknaw hah thet awh, he baw ditouh tâkhawng awh nateh kâ na poe e patetlah sak awh, telah BAWIPA ni a dei. <sup>22</sup> Hote ram daw k taran pawlawk hoi ka patawpoung e rawkkahmanae ao. <sup>23</sup> Talaivan pueng e cakkin a lawt teh a kâbawng toe. Miphunnaw thung hoi Babilon teh banghloimaw a rawk. <sup>24</sup> Oe Babilon nang hanlah karap ka patung, panuek laipalah na kâman toe. BAWIPA na taran daw kvah, hnephnap e hoi man e lah na o han. <sup>25</sup> BAWIPA ni senehmaica bom a paawng teh lungkhueknae puengcang a la toe. Ransahu Jehovah Bawipa ni Khaldean taminaw e ram daw k sak hane a tawn. <sup>26</sup> Ramri poutnae koehoi tuk awh nateh, hnoim hah paawng awh. Kamkhueng awh nateh, he raphoe awh, banghai pâhlung hanh awh. <sup>27</sup> A maitotan kanawnaw hah he thet awh, he thei e lah awm naseh. A yawkathout e lah ao awh. Bangkongtetpawiteh, a hnin a pha toe, ahni rek hnin roeroe a pha toe.

*Babilon a bo toe*

<sup>28</sup> BAWIPA Cathut ni moipathungnae, a bawkim moipathungnae hah Zion vah pathung hanlah Babilon hoi a yawng teh ka tâcawt e taminaw e pawlawk hah <sup>29</sup> Babilon tuk hanlah palakathoumnaw pueng hah kaw awh. A tengpam vah tungpupnae rim sak awh nateh, apihai tâcawt hanh naseh. A sak awh e patetlah moipathung awh. A sak awh e naw pueng hah a lathueng sak pouh van awh. Bangkongtetpawiteh, BAWIPA Isarel Tami Kathoung hah hnephnap laihoi a kâoup. <sup>30</sup> Hatdawkvah, a thoundounnaw kho thung vah a due awh vaiteh, ransanaw hot hnin vah a due awh han, telah BAWIPA ni a dei. <sup>31</sup> Khenhaw! nang ka kâoup e tami, kai ni na taran telah ransahu Jehovah Bawipa ni ati. Bangkongtetpawiteh, nang reknae hnin teh a pha toe. <sup>32</sup> Ka kâoup e tami a rawpnae koehoi apinihai bout pathaw mahoe h. Khopuinaw daw k hmai ka tâco sak vaiteh, a tengpam kaawmnaw pueng he ka kak sak han.

*Babilon kho a pawng toe*

<sup>33</sup> Ransahu BAWIPA ni hettelah a dei, Isarel catoun hoi Judah catoun teh repcoun groe e lah ao awh, san lah kahrawikungnaw ni a paung awh teh, tâcawt ngai awh hoe h. <sup>34</sup> Ahnimouh karatangkung teh a thakasai e a min teh ransahu Jehovah doeh. Ahnimouh koe lah ama teh kampang vaiteh



Babilon vah khokasaknaw hah runae a poe vaiteh, ram dawk roumnae hah ka pha sak han.

<sup>35</sup> Khaldean taminaw e lathueng tahloi a pha. Babilon e kho ka sak e kahrawikungnaw hoi, tami lungkaangnaw e lathueng hai a pha telah BAWIPA ni a dei. <sup>36</sup> Tahloi ni kutkhetkathoumnaw a taran teh tamipathu lah ao awh han. Tahloi ni athakaawme taminaw hah taran vaiteh a pâyaw awh han. <sup>37</sup> Tahloi ni marang hoi ranglengnaw hoi athung e tami kâkalawtnaw pueng hai a taran. Napui patetlah ao awh han. Tahloi ni a râwnaw taran vaiteh lawp e lah ao han. <sup>38</sup> Tui a hak teh remphui pouh. Bangkongtetpawiteh, meikaphawk ram lah ao. Meikaphawk hah a pathukhai awh.

<sup>39</sup> Hatdawkvah kahrawng e sarang hoi Asuinaw hawvva kho a sak awh han. Kalauk, tavanaw hai hawvva kho a sak awh han. Ring e lah awm mahoe toe, nâtuek hai ring e lah awm mahoe toe. <sup>40</sup> Cathut ni Sodom hoi Gomorrah hoi a tengpam e khonaw a raphoe e patetlah hawvva apihai khosak mahoe toe. Tami capa apinihai pâtam mahoe toe, telah BAWIPA ni a dei.

### *Babilon a saling toe*

<sup>41</sup> Khenhaw! atunglae ram dawk hoi taminaw a tho awh. Talai poutnae koehoi miphun kalen hoi siangpahrang moikapap a tâco. <sup>42</sup> Licung hoi tahroe a hrawm awh teh a nuencang kamathoutpounnaw doeh. Lungmanae tawn awh hoe. Ahnimae pawlawk teh tâli, tuicapa pawlawk patetlah ao teh, marang dawk a kâcuî awh teh, tami pueng tarantuk e patetlah a kamthoup awh teh, Oe! Babilon canu a tuk awh han. <sup>43</sup> A pawlawk thai toteh Babilon siangpahrang e kut tha a youn toe. Camokhe tawmlei pataw e patetlah hote patawnae ni a man awh.

<sup>44</sup> Khenhaw! Jordan kâoupnae thung hoi sendek, saring onae hmuene koe a luen takhang e patetlah a tho han. Hatei ahni koehoi ahnimouh ka yawng sak han. A lathueng vah kâ tawn hane ka rawi e ka ta han. Kai patetlah e apimaw kaawm, apipatet ni maw kaie tueng a khoe thai han. Tukhoumkung apimaw ka hmalah kangdout thai han. <sup>45</sup> Hatdawkvah, Babilon kong dawk BAWIPA pouknae, Khaldean taminaw e lathueng pouknae a tawn. Sarangnaw hah lawp lah ao vaiteh, pawngpanae hmuennaw kingdi lah ao han. <sup>46</sup> Babilon hah tuk teh lawp lah onae kamthang dawk hoi talai a kâhuê teh a khuinae kamthang miphunnaw pueng ni a thai awh han.

## 51

### *Babilon lathueng lawkcengnae*

<sup>1</sup> BAWIPA ni hettelah a dei, khenhaw! Babilon hoi Khaldean taminaw e lathueng ka raphoeukung kahlikathout a patoun han. <sup>2</sup> Babilon lathueng vah para patetlah hut hanelah ka patoun vaiteh, amahoima hah kathoungcalah a hut han. Bangkongtetpawiteh, rawk kahmanae hnin daw, ahnimouh ni kalup awh vaiteh a tuk awh han. <sup>3</sup> Licung ka patuem e tami, a licung hah kâkhoe laipalah sum angki kho laihoi kangdout naseh, a thoundounnaw hah buet touh hai pâhlung laipalah a ransanaw pueng hai he pâmit naseh. <sup>4</sup> Khaldean ram dawk thei vaiteh a rawp awh han, kho thung lamnaw daw kamlet awh vaiteh, pawk a thut awh han.

<sup>5</sup> Bangkongtetpawiteh, Isarel Tami Kathoung taran laihoi ram teh yonnae



hoi ka kawi nakunghai, Isarel hoi Judah teh Cathut ransahu BAWIPA ni cettakhai mahoe.

<sup>6</sup> Babilon kho thung hoi yawng awh nateh, tami pueng ni mae hringnae kârunghang naseh. Sak payonnae naw daw k kahmanae koe lah hno awh hanh. Bangkongtetpawiteh, BAWIPA ni moipathungnae tueng a pha toe. Ama ni moipathung roeroe han toe. <sup>7</sup> Babilon teh BAWIPA kut daw e suimanang doeh, talai van pueng ka parui sak e lah ao. Miphunnaw ni misurtui a nei awh dawkvah, miphunnaw e lungthin he a pathu. <sup>8</sup> Babilon teh vaitalahoi a rawp teh a kahma, ahni hanlah khuikap awh. Dam thai nahanelah awm pawiteh, thingtapi tâsi hah lat pouh awh. <sup>9</sup> Babilon teh hawi sak hanlah ka kâcai, hatei hawi thai hoe. <sup>10</sup> BAWIPA ni maimae lannae a kamnue sak, tho awh, BAWIPA Cathut ni a sak e hah Zion vah pathang awh sei.

<sup>11</sup> Palanaw hah kata awh nateh, saipheinaw hah patuem awh. BAWIPA ni Midian siangpahrang e muitha hah a thao sak toe. Bangkongtetpawiteh, a kâcai e teh Babilon raphoe hane doeh, bangtelah tetpawiteh, hethateh BAWIPA ni moipathungnae, bawkim moipathungnae doeh. <sup>12</sup> Babilon kalupnae a kung koevah tarantuknae lukkarei vo awh. Ringnae sak nateh, ramvengnaw hrueng awh. Pawpnae hah kâra kueng awh. Bangkongtetpawiteh, Babilon vah kaawmnaw taranlahoi BAWIPA ni a dei e hah ama ni a bangnue teh a cum toe.

<sup>13</sup> Oe! nang, tui papnae koe kho ka sak ni teh hnopai moipap ka tawn e tami, na poutnae a pha toe, na hringnae rui a pet han toe. <sup>14</sup> Ransahu BAWIPA ni mahoima noe lahoi thoe a kâbo toe. Samtong patetlah taminaw hoi na kawi sak han, hotnaw ni na hram sin awh han.

<sup>15</sup> A hnotithainae ni talai a sak teh a lungangnae ni talaivan a kangdue sak teh, a thaipanueknae ni kalvan hah a sak. <sup>16</sup> A lawk a tâco toteh kalvan hoi tui a cairing teh talai poutnae koehoi tâmai a luen sak. Khorak teh sumpapalik sak Hnoim daw k hoi kahli a tho sak. <sup>17</sup> Tami pueng mae lungangnae lahoi teh saring hoi doeh a kâvan. Sui dêikathoum e tam ni sak e meikaphawk ni yeirai a po sak. Bangkongtetpawiteh, meikaphawk a thuk e teh laithoe doeh. Hothah kâha tawn hoe. <sup>18</sup> Re knae ao toteh, bang hoe e kâdumnae lah ao teh a kahma han.

<sup>19</sup> Jakop e a ham teh hottelah nahoeh. Bangkongtetpawiteh, bangpuengpa ka sak e lah ao teh, Isarel teh râw lah a coe e miphun doeh. A min teh ransahu Jehovah doeh. <sup>20</sup> Nang teh ka tarantuknae cakâ hoi senehmaica lah na o teh, nang hno lahoi miphunnaw hah ka dêi, nang hno lahoi uknaeramnaw hah ka raphoe han. <sup>21</sup> Nang hno lahoi rangleng daw k kâcuinaw ka khoe teh, nang hno lahoi leng daw k kâcuinaw hah ka khoe. <sup>22</sup> Nang hno lahoi napui tongpanaw ka khoe teh, nang hno lahoi matawng hoi nawsainaw ka khoe. Nang hno lahoi thoundounnaw, tanglanaw hah ka khoe. <sup>23</sup> Nang hno lahoi tukhoumking hoi tunaw ka khoe teh, nang hno lahoi law kasaknaw e thenaw ka khoe, nang hno lahoi ram ukkungnaw hoi kabawmkingnaw hah ka khoe.

<sup>24</sup> Nange mithmu roeroe vah Zion daw k hawihoe hnae a sak awh e naw pueng hah Babilon hoi Khaldean taminaw lathueng vah moi ka pathung han, telah BAWIPA ni a dei. <sup>25</sup> Khenhaw! talai van pueng ka raphoe e, Oe! raphoe kung kalenpounge mon, kai ni na taran telah BAWIPA ni a dei. Na lathueng vah kut ka dâw vaiteh, ka rasang e lungha koehoi pâlei han. He ka kang e mon patetlah na o sak han. <sup>26</sup> Nang koehoi adu talung hoi takinlung ka lat mahoe. Hatei yungyoe hoi kingdi lah na o han telah



BAWIPA ni a dei. <sup>27</sup> Hote ram dawk tarantuknae lukkarei vo awh nateh, miphunnaw rahak mongka ueng awh. Ama tuk hanelah miphunnaw kârokueng awh. Ahni tuk hanelah uknaeram pueng kaw awh. Ararat, Minni, Askenaz ramnaw, ama tuk hanelah hram awh, ama tuk hanlah ransanaw tat awh, samtongnaw patetlah marangnaw hah pâkhueng awh. <sup>28</sup> Ama ka tuk hane miphunnaw kârokueng awh. Midian siangpahrang hoi ka ukkungnaw kahrawikungnaw hoi kâ a tawnae ramnaw pueng hoi, <sup>29</sup> Hote ram teh patawnae khang laihoi a pâyaw teh Babilon ram hah kho ka sak e tami awm laipalah pahma hanlah Babilon lathueng BAWIPA ni a kâcai e a cak sak han.

<sup>30</sup> Babilon athakaawme taminaw tarantuk laipalah ao awh teh, rapanimnaw dawk a kâhro awh. Taranhawinae a kahma pouh teh, napui patetlah doeh ao awh toe. A khosaknae hmuennaw he a kak teh tho tarennae pueng a kâkhoe. <sup>31</sup> Babilon siangpahrang koe, khopui teh avangvanglah hoi he a man awh toe tie dei hanelah patoune ka yawng e ni tami alouke a kâhmo teh patoun e ni alouke bout a kâhmo. <sup>32</sup> palang rakhannae a rakhan awh teh, lungpungkungnaw hah a sawi awh teh, tarankatuknaw hai he a yawng awh. <sup>33</sup> Isarel Cathut ransahu BAWIPA ni hettelah a dei, Babilon canu teh cangkatinnae hmuennaw patetlah ao. Nâsittouh ao hoehnahlan cangkatinnae tue a pha han. <sup>34</sup> Babilon siangpahrang Nebukhadnezar ni na ca awh, na ai awh teh, kathounge hlaam lah na coung sak. Khorui patetlah na payawp teh, katui e kaie moi hoi a vawn paha sak teh bout na pâlei awh.

<sup>35</sup> Kai hoi ka thitak kong dawk hawihoehnae thaw he Babilon lathueng awm naseh, telah Zion e kho kasaknaw ni ati awh han. Ka thipaling teh Khaldean taminaw e lathueng awm seh telah, Jerusalem ni ati han.

<sup>36</sup> Hatdawkvah, BAWIPA ni hettelah a dei. Nang koe lah kampang vaiteh moi na pathung pouh han. A tali ka hak sak vaiteh, a tuiim hai ka phui sak han. <sup>37</sup> Babilon teh songnawng kahrawingnaw khosaknae, kângairu e, hoi pathoene, kingdinae hmuennaw lah ao han.

<sup>38</sup> Sendek thakasai patetlah huk awh vaiteh, sendecanaw patetlah a cairing awh han. <sup>39</sup> A parui lahun awh navah, rawca ka paca vaiteh, banghai panuek laipalah ka parui sak han, kâhlaw toung laipalah pou a i awh nahan telah BAWIPA ni a dei. <sup>40</sup> Tuca thei hane patetlah ka pâkhi han. Tutan hoi hmaetan patetlah .

<sup>41</sup> Sheshak teh la e lah ao han, talai van pueng ni oup e hah man e lah ao han. Babilon teh miphunnaw rahak kingdi lah ao han. <sup>42</sup> Babilon teh tuihui ni a ramuk han. Tuicapa patawpong lah ka thaw e ni a ramuk han.

<sup>43</sup> A khopuinaw hah raphoe vaiteh, ramke, ram kingdi, tami ohoehnae, tami ca pinihai pâtam boihoeh e ram lah ao han. <sup>44</sup> Babilon e Bel hah ka rek han. A padoun tangcoung e hai a kâko thung hoi ka rasa vaiteh, miphunnaw ahni koe bout kamkhueng mahoe toe. Babilon e rapan teh a tip han.

<sup>45</sup> Ka taminaw Babilon thung hoi tâcawt awh, takithopoung e BAWIPA lungkhueknae thung hoi mahoima e hringnae kârungngang awh. <sup>46</sup> Na lungthin tawn hanh naseh, ram dawk e kamthang hai taket hanh awh. Kum touh hoi kum touh kamthang a tho han, siangpahrang hoi siangpahrang kâtuk vaiteh, rektapnae ao han. <sup>47</sup> Hatdawkvah, kenhaw! Babilon ni thuk e meikaphawknaw lathueng vah lawkkaceng teh a ram pueng kaya laihoi a onae tueng a pha vaiteh, a lathueng vah thei e naw a rawp awh han. <sup>48</sup> Hat toteh, talai hoi kalvan athung kaawmnaw pueng



atunglae ram dawk hoi raphoekungnaw ahnimouh koe a pha han, telah BAWIPA ni a dei.

<sup>49</sup> Thei e Isarelnaw Babilon ni a rawp sak e patetlah Babilon vah ram dawk e tami thei e naw a rawp awh van han. <sup>50</sup> Nangmouh tahloi dawk hoi kahloutnaw, cet awh nateh, duem kangdout rumram awh hanh. Lamhlanae koehoi BAWIPA hah pou panuek awh nateh, a lungthin dawk Jerusalem doun naseh.

<sup>51</sup> Tamthoe lawk ka thai dawkvah, ka kaya teh ka minhmai a mathoe. Bangkongtetpawiteh, BAWIPA im hmuen kathoung dawk ram alouke tami a kâen toe. <sup>52</sup> Hatdawkvah thai awhaw! ahnimae meikaphawknaw lathueng lawkcengnae hnin hoi a ram pueng lathueng a hmâ patawnae dawk kâhramnae hnin a pha han, telah BAWIPA ni a dei.

<sup>53</sup> Babilon teh kalvan kâbet totouh a rasang teh, rapan kacakpoung nakunghai, a lathueng vah kai koehoi raphoekung ka pha sak roeroe han, telah BAWIPA ni a dei. <sup>54</sup> Babilon hoi khuikanae kamthang a pha teh, Khaldean ram dawk hoi ka patawpoung e rawk kahmanae kamthang a pha. <sup>55</sup> BAWIPA ni Babilon hah a raphoe teh, kacaipoung e kamthang hah a roum sak. Ahnimouh kâroena pawlawk, tui moikapap e pawlawk patetlah ao teh, thouk a hramki awh. <sup>56</sup> Bangkongtetpawiteh, a lathueng hoi Babilon e lathueng raphoekung a pha teh a tami thakasainaw hah a man. Tami pueng e linaw he a khoe pouh. Bangkongtetpawiteh, BAWIPA teh moipathung e Cathut lah ao teh moi a pathung roeroe han.

<sup>57</sup> Kahrawikungnaw, tami lungkaangnaw, ukkungnaw, kabawmkungnaw, hoi tami thakasainaw ka parui sak han. Mat ip awh vaiteh, kâhlaw awh mahoehtoe, telah ka Bâwi Poug, a min rânsahu siangpahrang Jehovah ni a dei.

<sup>58</sup> Ransahu BAWIPA ni hettelah a dei, Babilon rapan katha poung e tim vaiteh, longkha rasangpoung e he a kak han. A taminaw ni houng laipalah a tawk awh ei, miphunnaw ni hmaisawi hanelah doeh ao.

### *Seraiah koe Jeremiah kâpoelawk*

<sup>59</sup> Judah siangpahrang a bawi kum 4 nah Babilon lah a cei nah ahni koe ka cet van e Seraiah, Neraiah capa Maaseiah capa koevah, profet Jeremiah e kâpoe lawk, Bangkongtetpawiteh, Seraiah teh siangpahrang imthung dawk kahrawikung kacue pouh lah ao. <sup>60</sup> Jeremiah ni Babilon lathueng ka tho hane rawkphainae pueng, Babilon kong dawk a thut e canaw pueng hete cauk dawk a thut. <sup>61</sup> Jeremiah ni Seraiah koevah, Babilon na pha navah, hete lawknaw pueng he touk loe. <sup>62</sup> Hat toteh, nang ni, Oe BAWIPA hete hmuen taranlahoi apihai, tami hoi saring hai, khosak laipalah ao teh, yungyoe hoi raphoe hanelah lawk na dei toe, telah na ti han. <sup>63</sup> Hahoi, hete cauk heh na touk toteh, talung hoi pâkhit nateh Euphrates palang dawk na tâkhawng han. <sup>64</sup> Babilon teh hettelah a bo han. A lathueng vah rawkphainae ka pha sak hane dawkvah, bout thaw mahoehtoe. A hmawtcei awh han telah na dei han, telah atipouh.

Hethateh Jeremiah e lawk doeh.

## 52

### *Jerusalem a rawp toe*

<sup>1</sup> Zedekiah teh siangpahrang a tawknae kum 21 touh a pha. Jerusalem vah kum 11 touh a uk, a manu min teh Hamutal, Libnah kho e Jeremiah e canu doeh. <sup>2</sup> Jehoiakim ni ouk a sak e patetlah BAWIPA e mithmu



vah hawihoeahnae a sak. <sup>3</sup> Bangkongtetpawiteh, BAWIPA a lungkhuek teh a hmalah hoi he takhoe e totouh Jerusalem hoi Judah ram dawk hete hnnonaw a pha. Hattoteh Zedekiah teh Babilon siangpahrang taranlahoi taran a thaw.

<sup>4</sup> A uknae kum 9, thapa yung hra, hnin 10 nah Babilon siangpahrang Nebukhadnezar hoi a ransanaw pueng Jerusalem tuk hanlah a tho awh. A roe sin awh teh tengpam petkâkalup lah a tungpup awh. <sup>5</sup> Hottelah siangpahrang Zedekiah abawinae kum 11 totouh khopui hah king a ven awh.

<sup>6</sup> Thapa yung pali, hnin 9 nah khopui dawk takang ka patawpoung lah a tho sak teh, ram thung rangpuinaw ca hane banghai awm hoeh toe. <sup>7</sup> Hat toteh, khopui kalupnae tapang a thuk awh teh, ransanaw pueng a yawng awh. Siangpahrang takha koe e tapang kahni rahak e longkha koehoi a tâco awh teh, tangmin vah khopui thung hoi a yawng awh. Khaldean taminaw khopui tengpam ao awh eiteh, a yawng lam lah a cei awh. <sup>8</sup> Hatei, Khaldean ransanaw ni siangpahrang hah a pâlei awh teh, Jeriko yawn dawk rek a pha awh. A ransanaw pueng ahni koehoi a kâkapek awh. <sup>9</sup> Zedekiah a man awh teh Babilon siangpahrang koe Hamath ram e Riblah kho dawk a ceikhai awh teh, ahni ni ama kong dawk lawk a ceng.

<sup>10</sup> Babilon siangpahrang ni Zedekiah capa hah a mithmu roeroe vah a thei. Ribah vah Judah kahrawikungnaw pueng a thei. <sup>11</sup> Zedekiah e mitmu hai a cawngkhawi pouh. Babilon siangpahrang ni sumbawtarui hoi a pâkhi teh, Babilon lah a ceikhai, a due totouh thongim vah a paung.

### *Jerusalem raphoenae*

<sup>12</sup> Hahoi Babilon siangpahrang Nebukhadnezar abawinae kum 19, thapa yung panga, hnin hra nah siangpahrang karingkungnaw kahrawikung, Babilon siangpahrang hmalah ouk kangdout e Nebuzaradan teh Jerusalem vah a kâen. <sup>13</sup> BAWIPA e im hoi siangpahrang im hah hmai a sawi. Jerusalem e im kalenpoungnaw pueng hmai koug a sawi.

<sup>14</sup> Khaldean ransa, siangpahrang karingkungnaw thung kaawmnaw pueng ni Jerusalem kalupnae teh a tengpam hoi he a raphoe awh. <sup>15</sup> Hat toteh, karingkungnaw kahrawikung Nebuzaradan ni tami ka roedeng tangawn hoi, khopui thung kaawm rae tami pueng hoi Babilon siangpahrang koe ka kâhmoun tangcounghaw hoi kacawirae kutsakkathoumnaw pueng hah san lah a ceikhai. <sup>16</sup> Hatei, karingkungnaw kahrawikung Nebuzaradan ni ram dawk e ka roedeng tangawn hah takhakatawkkungnaw lah a hruek.

<sup>17</sup> Hahoi BAWIPA im dawk e rahum khom, hoi BAWIPA im dawk e rahum tuim hoi kawlungnaw hah Khaldean taminaw ni koug a kâbawng sak teh rahumnaw pueng Babilon lah a ceikhai awh. <sup>18</sup> Hlaam hoi hraba kawnae, paitei, ampaikae, sumpacen, ouk a hro awh e rahum hnopai pueng he a la awh. <sup>19</sup> Manang hoi hrabakawnae, tongben, hlaam, hmaimkhoknaw, sumpacen, sui hoi sak e hoi, ngun hoi sak e pueng teh, karingkungnaw kahrawikung ni he a la.

<sup>20</sup> Rahum hoi sak e khom kahni touh, maitotan hlaikahni touh, rahum tuim pâhungnae, Solomon siangpahrang ni BAWIPA im hanelah a sak e naw hah, hete rahum pacen tawngben pueng teh boeba hai khing leklak hoeh. <sup>21</sup> Hahoi khom buet touh dong 18 touh a rasang teh, petkâdue lah dong 12 touh a pha. A tha e dek pali touh a pha teh, a lungui vuk kâco. <sup>22</sup> A som dawk rahum kaco e ao. A lû kacoum e teh dong panga touh a pha. A lû ka coum e petkâkalup lah rahum hoi pathoup e lah ao teh, talepawmei hai ao. Khom apâhni e dawk kaawm e talepaw hoi a kâvan. <sup>23</sup> Khom vang



lah talepaw 96 touh ao. Petkâkalup lah pathoupnae talepaw teh 100 touh a pha.

*Judahnaw pueng Babilon vah ceikhai lah a o*

<sup>24</sup> Hahoi, karingkungnaw kahrawikung ni vaihma bawi Seraiah hoi vaihma apâhni e Zephaniah hoi hmaiim khenyawnkung kathum touh hai a man. <sup>25</sup> Tarankatuknaw e thung kahrawikung lah ta e naw tami sari touh siangpahrang ouk kahmawt e khopui vah kaawm e hoi ransa ka hrawi e cakathutkung, ram dawk e tami minnaw ouk ka pâkuem e hoi ram dawk e taminaw thung hoi 60 touh khopui dawk kaawmnaw hah khopui thung hoi a tâcokhai. <sup>26</sup> Karingkungnaw kahrawikung Nebuzaradan ni ahnimouh a ceikhai teh, Riblah e Babilon siangpahrang koevah, a ceikhai. <sup>27</sup> Babilon siangpahrang ni Hamath ram e Riblah vah ahnimouh a tuk awh teh a thei, hat toteh, Judah teh a ram dawk hoi san lah ceikhai lah ao.

<sup>28</sup> Hetnaw teh Nebukhadnezar ni taminaya san lah a hrawi e naw doeh. Kum 7 nae dawk Judahnaw 3023, <sup>29</sup> Nebukhadnezar abawinae kum 18 nae dawk Jerusalem hoi tami 832 touh san lah a hrawi. <sup>30</sup> Nebukhadnezar abawinae kum 23 nae dawk karingkungnaw kahrawikung Nebuzaradan ni 745 touh san lah a hrawi. Abuemlahoi tami 4600 touh a pha.

*Jehoiakhin a tha awh*

<sup>31</sup> Hahoi Judah siangpahrang Jehoiakhin abawinae kum 37, thapa yung 12, hnin 25 nah, Babilon siangpahrang Evilmerodak ni abawinae kum kum touh nah, Judah siangpahrang Jehoiakhin teh a rasa awh teh, thongim hoi a tâco sak awh. <sup>32</sup> Kahawicalah a kâpankhai awh teh, Babilon hoi ahni koe kaawm e siangpahrangnaw e tungkhung hlak ka rasanghnawn lah tungkhung a ta pouh awh. <sup>33</sup> Hottelah, Jehoiakhin thongim dawkhohna a kâthung teh, a hringyung thung siangpahrang hmalah bu ouk a ca. <sup>34</sup> Hnintangkuem a ham hah Babilon siangpahrang ni kawkhik nahanlah a hringyung pueng, a due hnin totouh hnintangkuem a ham hah a poe.



## KHUINAE (The Lamentations of Jeremiah)

<sup>1</sup> Tami moikapap kamkhuengnae khopui teh, tami kingkadi lah ao toe. Yampa teh ram pueng thung dawkvah kalenpounge khopui teh lahmainsu patetlah ao toe. Ram pueng e a lathueng vah, bawi lah ouk kaawm e khopui teh san lah a pha toe.

<sup>2</sup> Tangmin vah, a lung ka rek lah a ka teh, a tamboung dawk a mitphi a lawng. A pahren e naw thung hoi ahni lung ka pahawi hane tami buet touh hai awm hoeh. A huinaw pueng ni a dum awh teh a taran lah kOUNg ao pouh.

<sup>3</sup> Judah miphun teh rektapnae thaw taw sak hane san lah a man awh teh, a hrawi awh. Jentelnaw thung dawkvah, lungreithai hoi kho a sak awh. Ahnie hnukkâbang e naw pueng teh, reithai rucatnae dawk a pha awh.

<sup>4</sup> Ka talue pOUNg e paw koe apihai a tho hoeh dawkvah, Zion lamthungnaw teh a khuika awh. Ahnie khopui longkhanaw pueng teh kingdi lah ao awh. Ahnie vaihmanaw teh a cingou awh. Ahnie tangla kathoungnaw hai lungrek nalaihoi amahoima a temdeng awh.

<sup>5</sup> A tarannaw teh akuepcing awh toe. Ahnie lawkeknæ apap lawi vah, BAWIPA ni ahni teh, patawnae a khang sak. A canaw teh tarannaw hmaitung vah san lah a hrawi toe.

<sup>6</sup> Zion canu e a meihawinae pueng teh be a kahma toe. A bawinaw teh, a pâ nahan kaawm hoeh e sayukhre patetlah ao awh toe. Ka pâlei e naw hmalah tha awm laipalah a yawng awh toe.

<sup>7</sup> Jerusalem khopui teh, kângai kâthungnae hoi rucatnae naw a kâhmo navah, yampa e a sungrennae hah a pouk. A taminaw teh taran kut dawk a pha navah, kabawmkung awm hoeh. A tarannaw ni asung e hah a hmu navah, a pacekpahlekkhai awh.

<sup>8</sup> Jerusalem khopui teh puenghoi a yon tOUNg dawkvah, hote hno teh panuetho e lah ao toe. Ahni ka oup e naw pueng ni ahni teh caici lah ao e a hmu dawkvah, banglah noutna awh hoeh. Ahni hai a cingou laihoi hnuklah a ban.

<sup>9</sup> Ahnie a khinnae teh amae hnabOUNg dawk a kamnue eiteh, apout nahane pouk hoeh. A lung ka pahawi e tami awm hoeh. Kângairunæ koe a pha toe. Oe BAWIPA taran ni tânae a hmu tOUNg dawkvah, kaie reithai rucatnae hah na khen pouh haw.

<sup>10</sup> Taran ni a kut hoi hnopainaw pueng na lawp toe. Ahnimanaw hah nama e tamimaya kamkhuengnae thung kâen hanh telah na ngang e Jentelnaw ni ahnie hmuen kathoungpOUNg dawk a kâen awh e ka hmu.

<sup>11</sup> Ahnie taminaw pueng teh cingou laihoi rawca a tawng nalaihoi, ao awh. A hring nahanelah, amamae hnopainaw hah rawca hoi athung awh. Oe BAWIPA kai teh dudamnae kâhmo tOUNg dawkvah, khen nateh pouk haw.

<sup>12</sup> Lam dawk ka cet cathuk takhang e pueng Cathut e puenghoi lungkhueknæ hnin nah kai dawk pacekpahleknæ ka sak e, kaie rucatawnæ patetlah kâhmo e tami o hoi o hoeh e khen nateh pouk awh haw. Nangmouh hoi kâkuen hoeh maw.



<sup>13</sup> Nama ni a lathueng lahoi na tha e hmai teh kaie ka hru thung na bo sak. Ka khok hanelah tamlawk na yangda teh, hnuklah na kamlang sak. Kanîruiroi kingkadi lah na ta teh thayung laipalah na o sak.

<sup>14</sup> Kai ni kâ ka eknae hah hnori ka phu e patetlah ahnie kut hoi ka lahuen daw k a thueng teh, na yawngyen. BAWIPA ni ka thaonae hah a bo sak teh ka kangdue thai hoe h nahan ka sak e taminaw e kut thung na pha sak.

<sup>15</sup> BAWIPA ni kaie tami athakaawmnaw hah ka thung hoi na takhoe pouh. Kai na ka taran niteh, kaie thoundounnaw raphoe hane tamihupui na kaw pouh. Bawipa ni Judah tanglakacuem hah misur katinnae tangkom daw k a katin.

<sup>16</sup> Hote kecu dawkvah, kai teh ka ka. Ka mit daw k hoi mitphi teh tui patetlah a lawng. Ka hringnae teh a lunghawi sak teh, lungkaroumsak hane tami teh kai hoi ka kâhla toe. Ka taran ni na tâ toung dawkvah, kaie ka canaw teh a kahma awh toe.

<sup>17</sup> Zion khopui teh a kut a dâw eiteh, a lungkaroumsak hane tami awmhoeh. BAWIPA ni Jakop teh a tengpam vah a tarannaw a hruek pouh toe. Jerusalem khopui teh ahnimouh rahak vah, kathounghoehe hno patetlah ao toe.

<sup>18</sup> BAWIPA teh a lan, kâpoelawk kai ni ka ek toe. Oe miphun a buemlah, thai awh nateh kaie rucatnae hah kenhaw. Thoundounnaw hoi tanglakacuemnaw san lah be a hrawi awh toe.

<sup>19</sup> Ka pahren e nangmanaw kai ni na kaw awh. Hateiteh, ahnimouh ni kai daw k yuemkamcu awh hoe h. Kaie vaihmanaw hoi kacuenaw teh, hring nahane rawcanaw a tawng awh navah, kho thung vah be a due awh toe.

<sup>20</sup> Oe BAWIPA kai hah na kenhaw! Kai daw k reithai rucatnae a pha toe. Ka hringnae ni runae a kâhmo toe. Ka lungthin hai phang a kahma toe. Bangkongtetpawiteh, kai ni puenghoi ka payon toe. Alawilah tahloi e taran ao teh imthung hai duenae patetlah ao.

<sup>21</sup> Kaie ka cingounae lawk hai a thai eiteh, kai lungpahawikung awm hoe h. Kaie reithai rucatnae hah ka tarannaw abuemlah ni koug a thai toe. Ahnimouh ni nama ni na sak e hno daw k lung koug ahawi awh. Nama ni na pathang e hnin daw k a pha torei ahnimouh hai kai patetlah awm awh naseh.

<sup>22</sup> Ahnimae thoesaknae pueng heh nama e hmalah phat van naseh. Kai ni kâ ka eknae pueng kai koe a pha e patetlah ahnimouh daw k hai phat van seh. Kaie ka cingounae teh apap dawkvah, kaie ka lungthin teh a tâwn toe.

## 2

### *Jerusalem lathueng Cathut lungkhueknae*

<sup>1</sup> Bawipa ni Zion canu dawkvah, a lungkhueknae tâmai hoi muen a ramuk toe. Isarel miphun e a minhawinae teh kalvan hoi talai daw k a tâkhawng toe. Ama e a lungkhueknae hnin nah, amae khok toungnae hai a pahnim toe.

<sup>2</sup> Bawipa ni pahren laipalah Jakop onae hmuen pueng a raphoe pouh. Ama e a lungkhueknae hoi Judah canu e rapanimnaw hah talai totouh a sin teh, a uknaeram hoi a bawinaw hai he a raphoe pouh.

<sup>3</sup> A lungkhueknae hmai a kak teh, Isarel miphunnaw e ki pueng hah a tâtueng pouh. A taran hmalah aranglae a kut a la pouh. A tengpam e hmaipalai ka thaw e patetlah Jakop canaw teh a kamtawi toe.



<sup>4</sup> Taran patetlah a kangdue teh aranglae kut hoi licung hah a sawn. Zion canu lukkareiim dawkw, a meikahawi e naw pueng hah be a thei teh, hmai patetlah lungkhueknae a rabawksin.

<sup>5</sup> Bawipa ni a taran teh, Isarel miphun hai thoseh, imkahawinaw hai thoseh a payawp toe. Rapanimnaw hai he a raphoe toe. Judah canunaw e khuikanae hoi cingounae hoe a pung sak.

<sup>6</sup> Lukkareiim hah takha patetlah koug a raphoe pouh. A sungren sak e paw hah a raphoe pouh. Zion khopui dawkw paw hah a sak e hoi Sabbath hnin hah Bawipa ni a pahnim sak. A lungkhuek lawi siangpahrang hoi vaihma hah a hnoun pouh.

<sup>7</sup> Bawipa ni amae thuengnae khoungroe hah a pahnawt toe. Ama e hmuen kathoung hah a panuet toe. Siangpahrang im kalupnae hah taran kut dawkw a poe toe. Ahnimanaw teh pawitona e hnin patetlah Bawipa e im dawkw a hramki awh.

<sup>8</sup> BAWIPA ni Zion canu e rapan hah raphoe hane a noe e patetlah raphoe hanelah a kut hno hoe. Bangnue nae rui a payang teh, athung lae rapan hoi alawilae rapan hah khuikanae lah reirei a coung sak.

<sup>9</sup> A tungdumnae longkhanaw teh talai thung lah a bo toe. Longkha tarenae sumtabounnaw teh, koug kâkhoe toe. Siangpahrang hoi bawinaw teh Jentelnaw rahak ao awh teh, kâlawk awh hoe. Profetnaw hai Bawipa koehoi vision hmawt awh hoe toe.

<sup>10</sup> Zion canu e kacuenaw teh, vaiphu a lû dawkw a kâphu en awh te, buri a kâkhu teh, tanglakacuem teh amamae a lû hah talai dawkw a saling awh.

<sup>11</sup> Camoca hoi sanu ka net naw ni khopui thung lamnaw dawkw sut a kamlei awh teh, ka miphun tanglanaw a rawk dawkwah, ka mitphi a bo teh, ka lungthin teh runae a kâhmo.

<sup>12</sup> Ahnimanaw teh, a hmâ ka cat e patetlah khopui thung lamnaw dawkw sut a kamlei awh teh, a manunaw e lungtabue dawkw amamae a hringnae hah a awi awh teh, a manunaw koe satun hoi misurtuinaw hah nâmao ao telah a pacei awh.

<sup>13</sup> Oe Jerusalem canu nang teh, kai ni bangtelamaw na bangnue han. Bangmaw na panue sak han. Bangtelamaw na o ka ti han. Oe Zion canu tanglakacuem, nang na lungroum thai nahanlah kai ni bangtelamaw lung na pahawi han. Nang e na rawknae teh tuipui patetlah a kaw dawkwah, apinimaw nang teh na dam sak thai han.

<sup>14</sup> Nange profetnaw teh, dumpyenna e hoi payonna e vision hah nang hanelah a hmu awh teh, na onae dawkw bout o sak hanelah, nange yonna e pâpho laipalah, huenghai onae pathuna e hnounaw hoi nangmouh na dum awh teh, a pathang awh toe.

<sup>15</sup> Lam dawkw ka cet kaawmnaw pueng ni, kut na tabawng sin awh teh, na kayasak awh. A lû a kahek awh teh, talai van pueng dawkw e kanawm poung e teh, hete khopui maw telah Jerusalem canu hah ati awh.

<sup>16</sup> Na tarannaw pueng ni nang koe lah pahni a ang awh teh, a hâ cakkarue teh, maimanaw hah na payawp toe. Hete hnin teh maimouh ni ring e hnin doeh, maimouh ni hmu awh toe ati awh.

<sup>17</sup> BAWIPA ni a noe tangcoung e hno hah a sak toe. Ayan hoi ka ti han ati e a lawk hah a kuep sak toe. Pahrennae awh laipalah, a raphoe toe. Taran teh nang dawkwah, a lunghaw hoi sak teh taran e a ki teh a ouphlawp toe.

<sup>18</sup> Ahnimouh teh a lungthin thung hoi Bawipa koe a hramki awh. Oe Zion canu e rapan, nange mitphi teh, palang tui ka lawng e patetlah karum



khodai pout laipalah lawng naseh. Nama hai kâhat hanh. Na mit hai kâhat sak hanh.

<sup>19</sup> Karumsaning hai thaw nateh, hram haw. Bawipa e a hmalah, na lunghin teh, tui patetlah rabawk haw. Lam tangkuem vah a vawn ka hlam niteh, sut ka yan e camonaw a lungngai kuep thai nahanelah, na kut hah ahnimouh koe lah dâw haw.

<sup>20</sup> Oe BAWIPA, apimaw hettelah ka tet e hah, khien nateh pouk haw. Napuinaw ni ama ni a cun e camonaw hah a ca han namaw. Vaihmanaw hoi profetnaw teh BAWIPA e a thoungnae hmuen dawkvah, thei awh han na maw.

<sup>21</sup> Camo hoi matawngnaw teh talai dawk a kamlei awh toe. Kaie tami, thoundoun tanglakacuemnaw hai tahloi hoi kOUNg a kamlei toe. Na lungkhueknae hnin dawk ahnimouh teh pahren laipalah na thei teh kOUNg na raphoe toe.

<sup>22</sup> Pawi hnin dawk coun e patetlah tengpam pueng vah kai ni ka taki e hno hah na coun toe. BAWIPA lungkhueknae hnin dawk ka hlout ni teh kahring e tami ni buet touh hai awm hoe. Ka kawkhik e camonaw patenghai ka tarannaw ni kOUNg a raphoe toe.

### 3

#### *Yuemkamcunae teh a len*

<sup>1</sup> Kai teh nama e lungkhueknae dawk reithai rucatnae ka kâhmo e tami lah ka o. <sup>2</sup> Kai hah na pâlei teh angnae dawk laipalah hmonae dawk na cei sak. <sup>3</sup> Atangcalah, kai hah hnin touh thung a kut hoiyah na pakhuppathan.

<sup>4</sup> Ka tak hoi ka vuennaw a hmawn sak teh, ka hrunaw hah a khoe. <sup>5</sup> Kai koe lah na rakhan teh reithai rucatnae hoi na kalup. <sup>6</sup> Ka dout tangcOUNgnaw patetlah a hmonae thung na o sak.

<sup>7</sup> Na paung teh karipOUNg e rui hoi kahlout thai hoe hahanlah na katek.

<sup>8</sup> Hramki hoi ka ka teh, pahrennae ka kâhei nakunghai, ka ratoumnae hah na coe pouh hoe. <sup>9</sup> Ka lamthung hai talung a e hoi na khan pouh. Ka lamthung a longkawi sak.

<sup>10</sup> Kai na ka pawm e tavom patetlah kâhronae dawk kaawm e sendek patetlah na o sak. <sup>11</sup> Ka lamthung na phen sak teh, kai hah thawkthawk na rabOUNg. Kângue han awm laipalah na o sak. <sup>12</sup> Ahnie licung a sawn teh, pala hoi ka hanelah a nue e patetlah na ta.

<sup>13</sup> Ahnie palacung teh ka kuen thung a kâen sak. <sup>14</sup> Kai teh ka taminaw e hmalah hnin touh thung dudamnae hoi la lah na sak awh hanelah ka o toe. <sup>15</sup> Na min ni kakhat e kUNG hoi na kawi sak teh, lungkhueknae hoi na phum.

<sup>16</sup> Ka hâ teh talung kate e hoi a khoe. Hraba hoi muen a ramuk.

<sup>17</sup> Ka lunghin muitha teh roumnae thung hoi na takhoe tOUNg dawkvah, bawinae tie teh ka pahnim toe. <sup>18</sup> Ka ngaihawinae hoi ka lentoenae teh, BAWIPA ama koehoi a kahma toe telah ka ti.

<sup>19</sup> Kaie reithai rucat ka khangnae, lungkhueknae hoi kakhat e naw na pahnim pouh hanh. <sup>20</sup> Ka hringnae ni hote hnonaw hah pahnim hoe niteh, ka thungvah pou ao. Kaie lunghin muitha hah tha ayoun sak.

<sup>21</sup> Hettelah ka lunghin bout na pouk sak nah ka ngaihawinae bout ka tawn.

<sup>22</sup> Bangkongtetpawiteh, BAWIPA mae pahren lungmanae hoi ngaithoumnae teh nâtuék hai a poutnae ao hoe dawkvah, maimouh teh rawk laipalah o awh. <sup>23</sup> Amom tangkuem a tha lah pahren lungmanae na pang



sak. Nama e yuemkamcunae teh a lenpoung. <sup>24</sup> BAWIPA teh kai hanelah doeh ao. Hatdawkvah, ka lungthin muitha ni ama teh a ngaihawi.

<sup>25</sup> BAWIPA teh ama ka tawng e hoi ama kâuepnaw hanelah, ahawinae a sak pouh. <sup>26</sup> BAWIPA e rungngangnae duem ka ring e teh, kahawi e hno doeh. <sup>27</sup> Nawsai nah kahnam phu hanelah ao.

<sup>28</sup> Cathut ni a van kahnam a toung dawkvah, amadueng a tahung vaiteh, duem awm naseh. <sup>29</sup> Hote hmuen koe ngaihawinae ao thai dawkvah, amae a pahni teh vaiphu dawk hrueng naseh. <sup>30</sup> Ka tambei e tami hah hmaibei vang rek patueng pouh, a minhmai mathout naseh.

<sup>31</sup> Bangkongtetpawiteh, Bawipa ni a yungyoe na pahnawt mahoe. <sup>32</sup> Ama ni lung na mathoe sak nakunghai, a lentoe lungmanae hoi bout na pahren han doeh. <sup>33</sup> Bangkongtetpawiteh, taminaw lungmathoe sak e hoi rucatnae pha sak hanelah ngai hoe. <sup>34</sup> Talai dawkvah, thongkabawtnaw khok rahim coun groe e hai thoseh,

<sup>35</sup> A lathueng Poung Cathut hmalah tami e lannae pahnawtnae hai thoseh, <sup>36</sup> Kayanae lahoi ayâ sungsaknae hai thoseh, Bawipa ni a ngai e nahoeh.

<sup>37</sup> Bawipa ni kâpoenae awm laipalah, tami ni dei e hah coung thai han namaw. <sup>38</sup> A lathueng Poung e Cathut e pahni dawk hoi yawhawinae yawthoenae teh ka tho e doeh. <sup>39</sup> Ama e yon dawk reknæ a khang e hah tami ni bangkongmaw a phuenang awh vaw.

<sup>40</sup> Maimae lamthungnaw hah maimouh ni tanouknae hoi tawng awh sei. BAWIPA koe lah bout kamlang awh sei. <sup>41</sup> Kalvan kaawm e Cathut koe maimae lungthin hoi kutnaw dâw awh sei. <sup>42</sup> Kaimanaw ni ka payon teh na taran awh toe. Nama ni kayonnae na ngaithoum hoe.

<sup>43</sup> Nama e lungkhueknae dawk minhmai na kamlang takhai teh, kaimouh koe lungmanae awm laipalah na thei toe. <sup>44</sup> Kaimae ratoumnae teh nama koe a cei thai hoe nahanelah, tâmai hoi na ramuk pouh toe. <sup>45</sup> Nama ni kaimanaw teh miphunnaw e rahak vah, kakhin e hoi panuetho e eitaboung lah na o sak.

<sup>46</sup> Tarannaw ni kaimouh koe lah a pahni a ang awh. <sup>47</sup> Kaimouh koe takinae hoi karap teh a pha toe. <sup>48</sup> Kaie tami tanglanaw a rawk dawkvah, ka mit teh palang tui patetlah a lawng.

<sup>49</sup> Ka mitphi teh palang tui ka lawng e patetlah poutnae awm laipalah a lawng. <sup>50</sup> BAWIPA ni kalvan hoi a khetcathuk teh a hmu. <sup>51</sup> Ka khopui thung e canu tanglanaw abuemlae kecu dawk, ka mit ni ka lungthin dawk a pawak sak.

<sup>52</sup> Bang hoe e dawk ka tarannaw ni, tava patetlah na pâyuep awh. <sup>53</sup> Ahnimouh ni ka hringo tangkom dawk na pabo teh, talungnaw hoi na ratet sin awh. <sup>54</sup> Ka lû dawk hoi tui ni muen na licung teh, ka due han toe telah ka pouk.

<sup>55</sup> Oe BAWIPA, kai ni tangkom thung hoi nama e na min teh ka kaw. <sup>56</sup> Kaie ka kâheinae lawk na thai teh ka ka navah, na hnâpakeng laipalah awm hanh. <sup>57</sup> Kai ni nama na kawnae hnin nah ka teng na tho teh, taket hanh na ti pouh.

<sup>58</sup> Oe BAWIPA nama ni ka lungthin na rungngang pouh teh, ka hringnae na ratang. <sup>59</sup> Oe BAWIPA nama ni kapayonnaw na hmu toe. Kai hanlah lawk na ceng pouh haw. <sup>60</sup> Nama ni kai ka tak dawk thoe ka sak e taminaw e kahawihoehe pouknae hah na hmu pouh.



<sup>61</sup> Oe BAWIPA kai ka tak dawk thoe ka sak e pathoenae hoi khokhannae pueng teh, nama ni na thai. <sup>62</sup> Ka tarannaw ni a dei e hoi a pouk e naw pueng teh, hnin touh thung a sak awh. <sup>63</sup> Ahnimae tahungnae kangduenae hah khenhaw! Kai teh ahnimouh e pathoe hanelah ka o.

<sup>64</sup> Oe BAWIPA amamae kut hoi a sak e pueng dawk aphu teh bout poe haw. <sup>65</sup> Ahnimae lungthin patak sak nateh, nama e thoebonae ahnimae lathueng phat naseh. <sup>66</sup> BAWIPA e kalvan rahim hoi na lungkhueknae hoi ahnimanaw teh be raphoe haw.

## 4

### *Zion rawksaknae*

<sup>1</sup> Sui teh kamlaw hoeh toe. Kahawi e sui teh a kâthung toe. Kathounge talung teh lamtakinnaw koe kâkahei lah ao.

<sup>2</sup> Aphu kaawm e suikatang patetlah kaawm e Zion canaw hah, hlaamk-  
abonaw ni kut hoi a bo e talai hlaam patetlah a pouk awh.

<sup>3</sup> Kahrawnguinaw ni patenghai a canaw hah sanu a pânei teh, a khetyawt. Hatei ka taminaw canunaw teh, kahrawng kaawm e kalauk tava patetlah kamatheng e lah ao awh.

<sup>4</sup> Sanu ka net e camo ni sanu a kahran dawkvah, a lai hah adangka daw  
rapkâbet lah ao. Camonaw ni vaiyei a hei awh nakunghai, ka poe hane  
tami awm hoeh.

<sup>5</sup> Kahawi poung e rawca kacatnaw teh, lamnaw dawk ao awh. Hnipaling  
kâkhu lahoi ka rounge e naw ni, eitaboung lah a tawm awh.

<sup>6</sup> Kaie ka miphun tangla ni a khang e teh, kut hoi thapatho laipalah,  
vaitahoi raphoe e Sodom khopui e yonnae hlak hoe a len.

<sup>7</sup> Ahnie bawinaw teh, tadamtui hlak a thoung teh, sanutui hlak hai a  
pangaw. Ahnimae a tak teh, sapphire talung hlak a paling. Ahnimae a  
meihawinae teh, sapphire talung hoi a kâvan.

<sup>8</sup> Atuteh ahnimae a meihawinae teh, hmaisaei hlak a tamang teh, lam  
dawk nout thai hoeh toe. A vuennaw hai a hru dawk rapkâbet teh thing  
patetlah a ke toe.

<sup>9</sup> Law dawk a pawhiknaw hai a pawk teh, a hrawnghrang lah ao teh,  
vonhnam hoi due e hlak tahloi hoi thei e hah ahawihnnaw.

<sup>10</sup> Pahrennae ka tawn e napuinaw e kutnaw nihai, amamae camonaw  
hah a thuing awh. Ka miphun canu tanglanaw ni a rawknae tueng nah,  
ahnimouh hanelah camonaw teh rawca lah a kangcoung.

<sup>11</sup> BAWIPA ni mae a lungkhueknae a kuep sak toe. Puenghoi a  
lungkhueknae a rabawksin toe. Zion khopui hah hmai a sawi teh, hote  
kho teh adu totouh a kak sak.

<sup>12</sup> Tarannaw ni Jerusalem khopui thung a kâen thai nah doeh tie hah,  
talai van kaawm e siangpahrangnaw hoi talai van kho ka sak e pueng ni  
hai yuem awh hoeh toe.

<sup>13</sup> Khopui thung e tami kalannaw e thi a lawngnae teh profetnaw e  
yonnae hoi vaihmanaw kânginghoehnae kecu dawk doeh.

<sup>14</sup> Ahnimouh teh lamnaw dawk mit ka ang hoeh e patetlah a cei awh  
teh, thi hoi kâkaawk dawkvah, lamnaw dawkvah ahnimae khohnanaw  
teh apinihai kâbet ngai hoeh.

<sup>15</sup> Tami pueng ni ahnimouh teh cet awh, cet awh, kâbet awh hanh.  
Kathounghoehe nangmanaw ahlanae koe cet awh telah a hram awh. Ram  
thung bout awm awh hanh leih ati awh dawkvah, ahnimouh teh hmuen  
tangkuem a cei awh.



<sup>16</sup> BAWIPA ni ahnimanaw teh kâkapeksak. Ahnimouh teh bout khen hoehe toe. Vaihmanaw e hmalah barilawa poe hoehe toe. Kacuenaw hai ngaikhainae awm laipalah ao awh.

<sup>17</sup> Maimouh teh bout na kabawm hane apimaw telah ngaihawi hoi ka mit hai amom toe. Maimouh ni ka rungngang thai hoehe e ram hah ayawmyin ring awh.

<sup>18</sup> Ahnimouh ni maimouh ceinae lam dawkh, khokhnuk a dawn teh na pâlei awh. Maimae a poutnae teh a hnai toe. Maimae a hninnaw teh abaw han toe. Mamouh teh sungnae tueng lah pha awh toe.

<sup>19</sup> Mamouh hnuk lahoi na kapâleinaw teh, kalvan e mataw hlak hai hoe karang e lah ao awh. Ahnimouh ni maimanaw hah mon lah na pâlei awh teh, kahrawngum vah na pawp awh.

<sup>20</sup> Maimae kâha lah kaawm e, BAWIPA ni satui a awi e tami ni, ahnimae rawknae tangkom dawkh man e lah o awh toe. Maimouh teh ramnaw dawkh e a lungui ahnie thungup rahim vah khosak han toe ati awh.

<sup>21</sup> Uz ram dawkh kaawm e Edom canu lunghawi hoi konawm haw. Manang teh nang koe a pha han doeh. Na parui vaiteh, caici lah na o han toe.

<sup>22</sup> Oe Zion canu nange yonnae teh, a pout toe. Nang teh bout na pâlei mahoehe. Oe Edom canu na sak e na yonnae dawkh reknae na khang vaiteh, na yonnae a pâphue han.

## 5

<sup>1</sup> Oe BAWIPA kaimanaw dawkh ka phat e hno hah, pahnim hanh. Kaimae yeiraiponae hai khen nateh na panuek pouh.

<sup>2</sup> Kaimae râw talai teh, ram louk e kut dawkh, imnaw hai Jentelnaw e kut a pha toe.

<sup>3</sup> Kaimanaw teh nara patetlah ka o toe. Na pa o hoehe dawkh kaimae manunaw teh lahmai patetlah ao awh.

<sup>4</sup> Kaimouh teh tui hai aphu hoi ka ran awh. Ka hno awh hane thing hai aphu hoi ka ran awh.

<sup>5</sup> Kaimae hnukkhu rek na patawt dawkhvah, ka patang awh. Kaimanaw teh kâhatnae na poe hoehe.

<sup>6</sup> Kaimanaw teh rawcarawnei a khout thai nahanlah, Izip ram, Assiria ram naw e a hmalah kutdaw teh ka hei awh.

<sup>7</sup> Kaimae mintoenaw ni a ton awh teh, a kahma awh nakunghai, kaimanaw ni ahnimae a yonnae teh ka phu awh.

<sup>8</sup> Sannaw ni kaimouh teh na uk awh. Ahnimae kut dawkh hoi apinihai na rungngang thai hoehe.

<sup>9</sup> Kahrawngum vah, tahloi kecu dawkh kaimouh teh hring nahanelah, canei hane ka panki teh ka tawng awh.

<sup>10</sup> Takang dawkh kaimae vuennaw teh takhuen patetlah a tamang toe.

<sup>11</sup> Ahnimouh teh Zion khopui dawkh kaawm e napuinaw hoi Judah khopui dawkh kaawm napui tanglanaw hah a pacekpahlek awh.

<sup>12</sup> Ahnimae kâ dawkh hoi bawinaw hah lawk a ceng awh. Kacuenaw hai barilawa awh hoehe.

<sup>13</sup> Thoundounnaw ni talungsumnaw hah a phu awh. Camonaw ni thing a hrawm thai hoehe e ngangngang a hrawm awh.

<sup>14</sup> Kacuenaw ni kho longkha koehoi thoseh, thoundounnaw ni ahnimae tumkhawng koehoi thoseh a ceitakhai awh.

<sup>15</sup> Kaimae lungthin dawkhvah, lunghawi nawmnae a kâhat teh, lamtunae dawkh hoi khuikanae koelah a coung toe.



<sup>16</sup> Kaimae lû dawkh hoi bawilakhung teh a bo toe. Kaimouh ni ka sak e yon dawkvah, kamamouh koe yawthoenae ao.

<sup>17</sup> Hote hno dawkvah, kaimae lungthin teh tha ayounnae koe lah, a pha toe. Hote yon dawkh kaimae mitnaw hai amom toe.

<sup>18</sup> Kingkadi e Zion mon dawkvah, Asuinaw ni a paitun awh.

<sup>19</sup> Oe BAWIPA nama teh, a yungyoe na kangning. Nama e bawitungkhung teh catounnaw e lah a yungyoe a kangning.

<sup>20</sup> Bangkongmaw kaimanaw hah pou na pahnim vaw. Bangkongmaw atueng moikasawlah na pahnawt vaw.

<sup>21</sup> Oe BAWIPA kaimouh teh nama koe bout na bankhai haw. Telah pawiteh, kaimouh teh bout ka tho awh han. Yampa e patetlah kaimae a hninnaw teh a katha lah na pathoup haw.

<sup>22</sup> Hoehpawiteh, nama ni kaimanaw hah na pahnawt han na maw. Kaimanaw hah puenghoi na lungkhueksin han na maw.



## EZEKIEL

### *Ezekiel ni hmu e vision*

<sup>1</sup> Aruithumnae kum, thapa yung pali, hnin panganae dawkvah, Kebar tui teng san lah kaawm e Judahnaw koe ka o navah, hettelah doeh. Kalvan a kamawng teh, Cathut e vision ka hmu. <sup>2</sup> Siangpahrang Jehoiakim e san lah ao nah kum, thapa yung pali, hnin panga hnin daw, <sup>3</sup> Khaldean ram Kebar tui teng vah, Buzi capa vaihma Ezekiel koevah, BAWIPA e lawk karang poung lah a pha teh, hawvah BAWIPA e kut teh a lathueng vah ao.

<sup>4</sup> Ka khet teh atunglah hoi katang poung e kahli kathout a tho e ka hmu. Ka raim poung e tâmai daw k hoi sumpapalik teh, atengpam pueng pheng a ang. Sumpapalik e palek ka ang e teh rahum patetlah ao. <sup>5</sup> Tâmai lungui vah moithang pali touh a kamnue awh. Hote moithangnaw e meilam teh, tami e meilam ka sin e hah a tâco. <sup>6</sup> Minhmai pali touh hoi rathei pali touh rip a tawn awh. <sup>7</sup> A khok teh kalanthoung niteh, Maito khokpatin patet e a tawn awh. Rahum loukloukkaang e patetlah a ang awh. <sup>8</sup> Minhmai pali, rathei pali touh hloilah tami kut patetlah pali touh rip a tawn awh teh, rathei rahim lengkaleng ao. <sup>9</sup> Moithang pali touh e naw ni, a rathei kadai awh nah a rathei dong hmo koung a kâbet. Rathei a kangdue teh, a kêroe awh nahai a tak kêroe laipalah a kâtahruet awh. <sup>10</sup> Moithang pali touh ni minhmai pali touh rip a tawn awh. A hmalah tami e mei, aranglah sendek mei, avoilah maitotan mei, a hnuklah mataw mei a tawn awh. <sup>11</sup> Moithang pali touh ni a rathei kahni touh rip a kâhmo thai nahanlah a kadai awh teh, alouke hah a tak a ramuk nah aw. <sup>12</sup> Hmalah kalancalah a cei awh teh, muitha ni ceisak han a ngainae pueng koe a cei awh, a cei awh navah kamlang awh hoeh.

<sup>13</sup> Moithangnaw e kâvannae teh, ka taw k e hmaito, moithangnaw rahak vah hnuklah hmalah ka cet e hmaito patetlah ao. Hmaito thung hoi sumpapalik. <sup>14</sup> Moithangnaw ni hai sumpapalik e patetlah hnuklah hmalah a kamlang awh teh a yawng awh.

<sup>15</sup> Moithang pali touh ka khet lahun nah lengkhok hah Moithang pali touh teng vah talai daw k kaawm e hah ka hmu. <sup>16</sup> Lengkhoknaw a kamnuenae hoi a counгнаe teh Beril talung phukaawm hoi a kâvan. Pali touh hoi a counгнаe rei a kâvan awh teh, a meilam teh lengkhok buet touh thung buet touh mawp e patetlah ao. <sup>17</sup> A kâtahruet navah a hmalah lengkaleng a cei awh teh, a cei awh navah kêhei laipalah a cei thai awh. <sup>18</sup> Lengkhoknaw hai arasang teh taki a tho poung. Hote pali touh teh mit hoi king a kawi awh. <sup>19</sup> Moithangnaw teh a cei awh navah, lengkhok ni a hnuk a kâbang awh teh, Moithangnaw hah talai daw k hoi tawm takhang lah ao navah, lengkhok hai a kâtawm. <sup>20</sup> Muitha ni ceisak hane a ngainae tangkuem koe a cei awh. Bangkongtetpawiteh, muitha hah haw vah a cei. Lengkhok teh amamouh hoi tawm lah ao awh. Bangkongtetpawiteh, Moithangnaw e muitha teh lengkhok daw k ao. <sup>21</sup> Ahnimanaw a cei awh navah, lengkhoknaw hai a cei awh. Ahnimouh a kangdue navah, lengkhoknaw hai a kangdue. Ahnimouh talai hoi tawm lah ao navah, lengkhok hai ahnimouh koe tawm e lah ao. Bangkongtetpawiteh, Moithangnaw e muitha teh lengkhok daw k ao.



<sup>22</sup> Moithangnaw e lû dawk khristal talung pangaw loukloukkaang e patetlah sak e kalvan ni a kalup. <sup>23</sup> Hote kalup e rahim vah, Moithangnaw a kangdue. Alawilah amamae tak a ramuk nahanelah rathei kahni touh a kadai. Alouke rathei kahni touh hoi a tak hah a ramuk awh. <sup>24</sup> A kamlang awh nah a rathei takhawng pawlawk ka thai teh, tuipui tuicapa pawlawk hoi ransahu pawlawk patetlah tamimaya a hram e pawlawk hoi Athakasaipounge Cathut lawk patetlah ka thai teh, a kâhat nah a ratheinaw hah a cakuep awh.

<sup>25</sup> A kâhat awh teh a ratheinaw a cakuep awh navah, ahnimae lû lathueng vah kalvan hoi lawk pou a tho. <sup>26</sup> A lûnaw dawk kaawm e lathueng kalvan rasang dawk bawitungkhang patetlah sapphire talung aphu kaawm e patetlah ka kamnuek e ao. Haw e bawitungkhang patetlah kaawm e dawkvah, tami hoi kâvan e ao. <sup>27</sup> A keng lathueng lah dingyinnaw patetlah loukloukkaang e ka hmu. keng koehoi a rahim lae teh, hmaisaan patetlah ka hmu, petkâkalup lah kOUNg a ang. <sup>28</sup> Kho a rak hnin e tâmai dawk e salumpa kamnuek e patetlah a tengpam angnae a kamnuaenae ao. Ka hmu navah, pakhup lah ka rawp teh lawk kadeikung e lawk hah ka thai.

## 2

### *Tarankathaw e Isarel koe Ezekiel patounnae*

<sup>1</sup> Hahoi, kai koe vah, tami capa na khok hoi kangdout nateh, nang koe lawk ka dei han telah ati. <sup>2</sup> Kai koe lawk a dei lahun nah, Muitha ka thung vah a kâen. Ka khok hoi na kangdue sak teh kai koe lawk a dei e ka thai. <sup>3</sup> Kai koe vah tami capa nang teh taran na ka thaw e Isarel miphun, taran ka thaw e miphun, kâi na ka hmuhma e miphun koe na patoun han. Amamouh hoi a na mintoenaw ni sahnin ditouh hawihoeahnae lahoi kai na taran. <sup>4</sup> Bangkongtetpawiteh, ahnimanaw teh a lung ka patak e hoi dei ka ru poung e lah ao awh. Ahnimouh koe na patoun teh, Bawipa Jehovah ni hettelah a dei telah na ti han.

<sup>5</sup> Ahnimouh ni a tarawi hai thoseh, a tarawi hoeh hai thoseh, bangkongtetpawiteh, taran ka thaw e imthung lah ao awh. Hateiteh, ahnimouh koe profet ao tie a panue awh han. <sup>6</sup> Nang tami capa, ahnimouh taket hanh. A lawknaw ni hai takinae na poe hanh naseh. Nang koe vah pakhing a phun phun hoi kâhmo nakunghai, aikamnaw koe kho na ka sak nakunghai, taran ka thaw e lah na kaawm awh nakunghai, ahnimae lawk taket awh hanh. A meilamnaw ni na taket sak awh hanh naseh. <sup>7</sup> A tarawi hai a tarawi hoeh nakunghai thoseh, ahnimouh koe kaie ka lawk na dei han. Bangkongtetpawiteh, taran ka thaw awh e doeh.

<sup>8</sup> Hatei, nang tami capa nang koe ka dei lawk ngai haw. Taran ka thaw e imthung patetlah taran thaw van awh hanh. Na pahni ang nateh kai ni na poe e hah cat loe telah atipouh. <sup>9</sup> Ka khet toreih teh, a kut hoi na kâyp teh, khenhaw! a kut dawc cakalawng teh ao. <sup>10</sup> Ka hmalah a rathap teh, athung, avanlah hoi thut e doeh. Khuinae, khopoukrunae, yawthoenae naw hah a kâthut.

## 3

<sup>1</sup> Hothloilah, tami capa, na hmu e hah cat haw. Cakalawng hah cat nateh, Isarel imthung koe lawk dei loe, telah ati. <sup>2</sup> Hottelah ka pahni ka ang teh, cakalawng hah ka ca. <sup>3</sup> Ahni ni, tami capa na von dawc paen nateh, hete



cakalawng na poe e heh na von daw kawi naseh, telah ati. Hottelah ka ca teh, ka kâko daw khowitui patetlah a radip.

<sup>4</sup> Ahni ni kai koevah, tami capa Isarel imthung koe cet nateh, ahnimouh koe kaie ka lawk hah dei haw. <sup>5</sup> Bangkongtetpawiteh, lawk phunlouk hoi thai ka ru e lawk koevah, patoun e nahoeh, Isarel miphunnaw koe na patoun e doeh. <sup>6</sup> Ka bawilen e miphun, a lawk ka hram niteh, a lawk hoi lawk thai panuek hoehe e koe na patoun hoehe, ahnimouh koe na patoun pawiteh, na lawk a ngai awh han. <sup>7</sup> Hatei Isarel imthung ni teh, nange na lawk ngai awh mahoehe. Kaie ka lawk hai ngai awh mahoehe. Bangkongtetpawiteh, Isarel imthung pueng teh, tami lung ka patak e hoi dei han ka ru poung e lah ao. <sup>8</sup> Khenhaw! ahnimae minhmai katarankung lah nangmae minhmai, ahnimae tanpa katarankung lah nangmae tanpa hah ka te sak toe. <sup>9</sup> Kate katang e talung hmaikhom patet lae kate e tampa hah na tawn sak teh, Taket hanh loe, taran ka thaw e imthung lah kaawm nakunghai a mithmainaw ni takinae na poe hanh naseh.

<sup>10</sup> Hothloilah kai koevah, tami capa nang koe ka dei hane pueng na hnâpakeng nateh, na lungthin daw paen haw. <sup>11</sup> cet nateh, na hmaunawnggha san lah kaawm e koevah cet haw. A tarawi hai a tarawi hoehe hai hettelah Bawipa Jehovah ni a dei telah pâpho nateh dei telah ati.

<sup>12</sup> Muitha ni kai hah na tawm teh, ka hnuklah kacaipoung khoparit lawk hah ka thai. Ama hmuen koehoi BAWIPA bawilennae teh pholen lah awm seh telah ati. <sup>13</sup> Moithangnaw a rathei buet touh kâhmo e pawlawk hoi a tengpam e leng pawlawk hoi kacaipoung khoparit law hah ka thai. <sup>14</sup> Hottelah Muitha ni na tawm teh, yout na la, kâan e, kakhat e, lungpuennae hoi na pâlei. Hatei Thakasai e BAWIPA kut hah ka lathueng vah ao. <sup>15</sup> Hottelah Telabib e san lah kaawm e Kebar palang daw kho ka sak e naw koevah ka pha. A tahungnae koe ka tahung. Kângairu lahoi hawvah, hnin sari touh ka tahung.

<sup>16</sup> Hnin sari touh abaw hnukkuh vah hettelah doeh. BAWIPA e a lawk kai koe a pha. <sup>17</sup> Tami capa Isarel imthung kakhenkung lah na pouk e doeh. Hottelah ka lawk na thai vaiteh, kaie yueng lah kâhruetcuetnae na poe han. <sup>18</sup> Tamikathout, na due roeroe han ka ti pouh teh, hote tamikathout e a hringnae rungngang hanelah, a yonnae lamthung a kamlang takhai hanelah kâhruetcuetnae na poe hoehe lah, na dei pouh hoehe pawiteh, hote tamikathout teh a payonnae daw dout pawiteh, a thi phu teh nang koe na suk roeroe han. <sup>19</sup> Hatei, tamikathout hah kâhruetcuetnae na poe teh, a thoenae cettakhai laipalah kahawihoehe lamthung daw hoi kamlang hoehpawiteh, a payonnae daw a due han, nang teh na hringnae na hlout han. <sup>20</sup> Tamikalan ni a lannae a kamlang takhai teh, yonnae sak pawiteh, a hmalah tâlaw nahan ka tat pouh pawiteh, a due han. Kâhruetcuetnae na poe hoehe dawkvah yon daw a due han. Lannae a sak tangcoung e hah panue pouh e lah awm mahoehe toe, a thi phu nang koe ka hei han. <sup>21</sup> Hateiteh, tamikalan a yon hoehe nahan kâhruetcuetnae na poe teh, payon hoehpawiteh, kâhruetcuetnae na poe e hah a lawkpui lah a pouk dawkvah, a hring han. Nang hai na hlout toe telah ati.

<sup>22</sup> Hawvah BAWIPA e kut ka lathueng ao teh, kai koevah thaw nateh ayawn daw cet loe. Hawvah kai ni na pato han telah ati. Hattoteh ka thaw teh ayawn koe ka cei. <sup>23</sup> Khenhaw! hawvah, BAWIPA bawilennae Kebar palang ka hmu e bawilennae patetlah a kangdue teh, kai teh pakhup lah rep ka tabo. <sup>24</sup> Hottelah hoi Muitha teh, kai daw a kâen. Ka khok hoi na kangdue sak teh, na pato, cet nateh na im kangungh. <sup>25</sup> Nang tami



capa tangron hoi na pakhi awh vaiteh na katek awh han. <sup>26</sup> Na lai hah na adangka daw kâbet sak vaiteh, lawk na tho mahoe h toe. Ahnimouh na yue mahoe h toe. Bangkongtetpawiteh, tarankathaw e imthung doeh. <sup>27</sup> Hateiteh, nang koe lawk ka dei navah, na pahni na ang sak vaiteh, ahnimouh koe, Bawipa Jehovah ni hettelah a dei. Ka tarawi e ni tarawi naseh, ka tarawi ngaihoeh e ni tarawi hanh naseh. Bangkongtetpawiteh, tarankathaw e imthung doeh telah na dei han

## 4

### *Jerusalem meilam*

<sup>1</sup> Nang, tami capa amhru lat nateh na hmalah hrueng nateh, Jerusalem khopui meilam thun haw. <sup>2</sup> Petkâkalup lah rapan hoi kalup nateh, mon ka coum e hah pet tai nateh, ransa roenae hah tai sin nateh, rapan patennae thingtaboungnaw hah petkâkalup lah tat. <sup>3</sup> Sumphen lat nateh, nama hoi khopui rahak vah sumrapan lah thung haw. Haw lah kangvawi nateh, hottelah na tungdum vaiteh, haw e khopui teh kalup e lah ao han. Hetheh Isarelnaw hane mitnoutnae lah ao han.

<sup>4</sup> Nang teh avoilah kâpaihrueng lahoi ip haw, na van vah Isarel imthung payonnae hah thueng nateh, a yonnae hah na phu han. Touk e hnin yit touh a van vah ip. <sup>5</sup> Bangkongtetpawiteh, a payonae kum hah nange lathueng ka patue. Hnin touk e patetlah hnin 390 touh thung Isarel imthung yonnae na phu han. <sup>6</sup> Na kuep sak hnukkhu aranglah paihrueng lahoi yan nateh, Judah payonnae hah hnin 40 touh bout na khang han. Kum touh hane hnin touh na van vah ka patue toe. <sup>7</sup> Hatdawkvah, na kalup e Jerusalem koelah na kangvawi han. Na kut na dâw vaiteh, ahni koelah profet lawk na pâpho han. <sup>8</sup> Khenhaw! tangron hoi na pakhi vaiteh, na kalup hnin a kuep hoehroukrak teh, nâ lahai na kamlang thai mahoe h.

<sup>9</sup> Cakang, catun, pe phunkuep, kalape, vaicakuem, rakhun e cakang hah lat, hlaam buet touh daw k hrueng nateh vaiyei lah sak. Paihrueng lah na i na thung hnin 390 touh thung hot hah na ca han. <sup>10</sup> Na ca hane bu teh koug nue e doeh. Hnin touh daw shekel 20 touh han. Atueng kahmancalah na ca han. <sup>11</sup> Tui hai koug nue tangcoung hoi na nei han. Hin buet touh hah taruk touh lah na kapek vaiteh, buet touh e hah na nei han. <sup>12</sup> A mithmu roeroe vah ka ke e tami ei hoi na pâeng vaiteh, catun vaiyei ca lah na ca han telah ati. <sup>13</sup> BAWIPA ni het patet lae bu kakhin e heh Isarel catounnaw ni ka pâleinae ram daw k a ca awh han telah ati.

<sup>14</sup> Hatnavah kai ni aya! Bawipa Jehovah awh ei, ka hringnae heh kakhin sak boi mahoe h. Ka nawca hoi atu totouh amahmaw k kadout e thoseh, sarang ni a kei e thoseh, ka cat boihoeh. Panuet ka tho e moi ka kâko daw k ka kâen sak hoeh telah ka ti. <sup>15</sup> Hat navah, ahni ni khenhaw! tami ei yueng lah maito ei na poe awh. Na ca hane teh maito ei ka ke e hoi na sak han telah ati. <sup>16</sup> Hothloilah ahni ni, tami capa khenhaw! Jerusalem vah hringnae akungtuen lah kaawm e bu ka raphoe vaiteh, a rawca koug nue pouh lahoi, ngaihri lahoi a ca han, tui hai koug nue pouh vaiteh, ngaihri lahoi a nei a han. <sup>17</sup> Tui hoi bu vout laihoi buet touh hoi buet touh a kâpanuet awh teh, a yon awh kecu dawkvah, koug a kahma awh han telah ati.

## 5

### *Jerusalem raphoenae*



<sup>1</sup> Nang tami capa, pataca hruepatue e hah tahloi yueng lah lat haw, na lû hoi pâkhamuen hah ngaw haw. Yawcu dawk khing nateh, alouklouk lah kapek haw. <sup>2</sup> Khopui kalupnae tueng a kuep navah, sam hoi pâkhamuen, pung thum touh dawk pung touh hah khopui thung hmaisawi nateh, pung touh e hah tahloi hoi tâtueng haw, pung touh e hah kahlî thonae koe paleng sak. Kai ni tahloi hoi ka pâlei han. <sup>3</sup> Youn touh na la vaiteh, na angki pawî dawk na taoung han. <sup>4</sup> Hote youn touh bout na lat nateh hmai sawi haw. Haw hoi teh Isarel imthung hoi hmai a tâco han. <sup>5</sup> Bawipa Jehovah ni hettelah a dei. Hetheh Jerusalem kho doeh, miphunnaw umsali ka hrek teh a tengpam vah ramnaw hah ao.

<sup>6</sup> Miphunnaw hlak hawihoe hah a sak teh, ka lawkcengnae a taran teh, a tengpam e ramnaw hlak ka phunglam hah hoe a taran. Bangkongtetpawiteh, ka lawkcengnae hah a oun awh teh, ka phunglam tarawi awh hoe. <sup>7</sup> Hatdawkvah, Bawipa Jehovah ni hettelah a dei, Na tengpam e miphunnaw hlak lawkeknæ hah hoe na pung sak teh ka phunglam tarawi awh laipalah ka lawkcengnae hah na pâkuem awh hoe.

<sup>8</sup> Bawipa Jehovah ni hettelah a dei, khenhaw! kai kama roeroe ni na taran awh vaiteh, miphunnaw e mithmu roeroe vah ka lawkcengnae ka kuep sak han. <sup>9</sup> Panuet na thonae kecu dawk, ka sak boihoe e hoi sak lah hai bout ka sak hoe hane hah nangmouh koe ka sak han. <sup>10</sup> Hatdawkvah, nangmouh koe lawkcengnae ka kuep sak vaiteh, a na pa ni a canaw a ca awh han, a ca ni hai a napanaw a ca awh han. Nang koe ka cawi rae naw hah kOUNg ka kâkahei sak han. <sup>11</sup> Bangkongtetpawiteh, Bawipa Jehovah ni a dei e hateh, kai ka hring e patetlah na kamhnawngnae hoi panuethonae lahoi ka hmuen kathoung hah na kamhnawng sak dawkvah, kai ni nang pasainæ ka tawn mahoe. KOUNg na pahma han, na pahren mahoe.

<sup>12</sup> Nangmouh thung pung thum touh dawk pung touh teh lacik patawnæ hoi thoseh, takang hoi thoseh a due awh han. Pung touh hah tahloi hoi na teng vah a due awh han. Pung touh hah ka kâheisak vaiteh tahloi hoi ka pâlei han. <sup>13</sup> Hettelah ka lungkhueknæ kamnue sak e lah ao han. A lathueng vah, ka lungkhueknæ kamnue sak e lah ao navah, BAWIPA ni ngaikhainæ hoi ka dei toe tie a panue awh han. <sup>14</sup> Hothloilah, ahni teng ka cet pueng e a hmalah nang heh tami kingdinae, na teng petkâkalup lah kaawm e miphunnaw ni dudam e lah na o han.

<sup>15</sup> Lungkhueknæ a len poung e lahoi nang dawk ka pataw poung e kâhruetcuetnae na poe toteh, na tengpam kaawm e miphun pueng dawk dudam yonpen kawi lah pouk hanelah, kângairu hno lah na o han. <sup>16</sup> Kai BAWIPA ni yo ka dei toe. A lathueng vah takang, kahawihoehe kahma katanae pala mauthout e, kai ni ka pabo toteh, nangmouh thung takangthonæ ka pung sak vaiteh, na hringnae lah kaawm e na rawcanaw ka raphoe han. <sup>17</sup> Nangmouh koe takang hoi sarang ka tha vaiteh, na hringnae a pahma han. Lacik hoi kâtheinae ni na katum awh vaiteh, nangmouh koe tahloi ka thokhai han. Kai BAWIPA ni ka dei toe telah ati.

## 6

### *Isarel meikaphawknaw dawk lawkcengnae*

<sup>1</sup> BAWIPA e lawk kai koe a pha teh, <sup>2</sup> tami capa Isarel mon hah radoung haw. Ahnimouh koe taranlahoi pâpho haw. <sup>3</sup> Isarel monnaw Bawipa Jehovah e lawk ngai awh. Bawipa Jehovah ni ram hoi monrui koe thoseh, tanghling hoi ravo koe thoseh hettelah dei haw, kai kama roeroe



nangmouh koe tahloi ka pha sak vaiteh, hmuenrasang be ka raphoe han. <sup>4</sup> Nangmae khoungroenaw teh kingkadi lah ka o sak han. Nangmae meikaphawk cathutnaw be ka rek sak han. Kutsak meikaphawknaw e hmaitung, nangmae ransanaw be ka raphoe han. <sup>5</sup> Isarelnaw e a ronaw meikaphawk teng koe ka hruek han, na hrunaw hah khoungroe petkâkalup lah ka yat han. <sup>6</sup> Na khosaknae khopui pueng a ro vaiteh, hmuenrasang pueng kingkadi lah ao han. Khoungroenaw be raphoe vaiteh, meikaphawk pueng be tâtueng vaiteh, nangmouh ni na sak e hnnonaw be a rawkphai awh han. <sup>7</sup> Thei e naw nangmouh umsali a rawp awh han. Hottelah hoi BAWIPA lah ka o tie na panue awh han <sup>8</sup> Hateiteh, ram tangkuem koug na kâkahei toteh, miphunnaw thung dawkhahloi hoi na kahlout e hai na o awh han. A tangawn teh na pâhlung awh han rah.

<sup>9</sup> Nangmouh thung dawkhahloi hoi ka hlout e naw ni san lah a ceinae hmuen miphunnaw koevah, kai na pahnim awh mahoe. Bangkongtetpawiteh, alouke meikaphawk ngainae lungthin, kai koehoi kâkapeknae hoi, meikaphawk koe a kâyo awh, a mitnaw cawngkhawi toe tie a kâpanue awh vaiteh, panuethopoung a sakpayonnae kecu dawkhahloi amahoima a kâpanuet awh han. <sup>10</sup> BAWIPA lah ka o teh, a lathueng vah hete rawkphainae heh, ka pha sak han telah ka dei e hah rumram nahoe hoi hah a panue awh han telah ati.

<sup>11</sup> Bawipa Jehovah ni hettelah a dei. Na kut tambei nateh, na khok hoi kamlang haw. Aya! panuetho e Isarel imthung yonnae kecu dawkhahloi na ou, bangkong tahloi, takangnae hoi lacik patawnae hoi due awh han.

<sup>12</sup> Lamhla pui lah kaawm e hah lacik patawnae hoi a due awh vaiteh, kahnaicalah kaawm e hah tahloi hoi a due awh han. Kacawiraenaw hah takang hoi a due awh mingming han. Het patetlae ka patawpoung e ka lungkhueknae hah a lathueng vah ka kuep sak han. <sup>13</sup> Meikaphawknaw koe hmuitui hah a thuengnae hmuen, khoungroenaw tenggam rasangnae hmuen, monsom kaawm pueng e a lathueng, kahring e thingkung, tâhlip kahawi e thingkung rahim tangkuem vah, meikaphawknaw a rawp awh teh, a due awh toteh, kai teh BAWIPA lah ka o tie a panue awh han.

<sup>14</sup> Ahnimae a lathueng vah ka kut ka dâw vaiteh, Diblah kho hoi kâkuen e khosaknae hmuen pueng kahrawngum hah tami kingdinae, kângairunae hoe ka o sak toreih teh, kai teh BAWIPA lah ka o tie a panue awh han telah ati.

## 7

### *Isarel lathueng lawkcengnae*

<sup>1</sup> BAWIPA e lawk kai koe bout a pha teh, <sup>2</sup> Nang tami capa Bawipa Jehovah ni Isarel ram koe hettelah a dei. Poutnae, poutnae teh ram takin pali touh koe a pha toe. <sup>3</sup> Atuteh nang hanelah poutnae doeh. Na lathueng ka lungkhueknae ka pha sak han, na hringnuen hoi kamcu lah lawk na ceng awh vaiteh, na kamhnawng awh e patetlah na lathueng ka pha sak han. <sup>4</sup> Ka mit ni pasainae awm laipalah, nangmae na sak awh e phu na patho awh han. Na sak awh e panuetho e hnnonaw nang koe a pha han. Kai teh BAWIPA lah ka o e na panue awh han telah ati. <sup>5</sup> Bawipa Jehovah ni hettelah a dei. Khenhaw! rawknae buet touh hnukku buet touh a pha han. <sup>6</sup> poutnae a pha, poutnae a pha nang hah na ring teh a pha toe. Khenhaw! a pha toe. <sup>7</sup> Oe ram karingkung, na rawk nahane nange lathueng a pha toe. Atueng a kuep toe, runae hnin lunghawinae mon



dawkvah, hramnae hnin nahoe, ruengruengtinae hno kamnuesaknae hnin a hnai toe. <sup>8</sup> Ka lungkhueknae na lathueng atu ka awi han toe. Na lathueng vah ka lungkhueknae kamnue sak han. Na hringnue hoi kamcu lah lawk na ceng han. Panuet na thonae hoi kamcu lah na pathung han. <sup>9</sup> Pasainae awm laipalah na pahren mahoe, na hringnue hoi kamcu lah na pathung han. Panuet a thonae nangmouh koe ao han. Hottelah kai BAWIPA heh reknae kapoekung tie na panue awh han.

<sup>10</sup> Khenhaw! a hnin teh a pha toe. Na ro nahane hnin a tâco toe. Sonron teh a pei toe, kâoupnae teh a rounge toe. <sup>11</sup> Pacekpahleknae teh kahawihoehe sonron lah a kangcoung. Apihai awm hoe hoi toung vaiteh, a kamthang hoi khuinae hai apini sak mahoe toe. <sup>12</sup> Atueng a kuep toe. A hnin a hnai toe. Karangkung ni lunghaw hanh naseh, hno kayawtkung hai a lungmathout hanh naseh. Bangkongtetpawiteh, a lungkhueknae teh ahnimouh pueng koe a pha. <sup>13</sup> Hno kayawtkung a hring nakunghai, a yo e hah hmawt mahoe toe. Vision teh taminaw koe kuep laipalah awm mahoe. Apihai a payonnae dawk hring thai awh mahoe toe. <sup>14</sup> Mongka a ueng awh teh, bangpueng coungkacoe lah ao toe. Hatei, tarantuknae koe apihai cet hoe, bangkongtetpawiteh, ka lungkhueknae teh ahnimouh pueng e lathueng ao.

<sup>15</sup> Alawilah tahloi, athunglah lacik hoi takangnae, ram dawk kaawm e hah tahloi hoi a due vaiteh khopui dawk kaawm e hah takang hoi lacik ka mathout ni be a ca han. <sup>16</sup> Ka yawng e hah a yawng thai han eiteh, mon dawkvah tâco takhai e law e bakhu patetlah ao vaiteh, abuemlahoi amamouh payonnae dawkvah, aphu a paha awh han. <sup>17</sup> Abuemlahoi a kut tha a youn awh vaiteh, a khokpakhunaw a tui patetlah ao han. <sup>18</sup> Buri kâkhu awh vaiteh, takikathopounge runae ni a kayo awh han. Minhmai pueng kayanae a kamnue vaiteh, a lû pueng luengpalueng lah ao han. <sup>19</sup> Ahnimae ngun hoi sui ni BAWIPA lungkhueknae hnin dawk rungngang thai mahoe. A hringnae khuektet sak mahoe. A von paha sak mahoe. Bangkongtetpawiteh, a payonnae dawk ahnimae sui ngun teh amamouh rawpnae lah ao.

<sup>20</sup> A meihawinae a kamthoupnae, taluena hoi kamthoupnae hah a kâoupkhai awh teh, panuetho hringnae meikaphaw hoi, a kamhnawngnae hno lah letlang a kangcoung sak awh. Hatdawkvah, ahnimouh han panuetho e hno lah ka kangcoung sak toe. <sup>21</sup> Lawphnonaw miphun alouke kut dawk ka poe han. Talai e tami kahawihoehnaw kut dawk a hnopai hanlah ka poe han, ahnimouh ni a khin sak awh han. <sup>22</sup> Ahnimouh ka ceitakhai vaiteh, kaie thoungnae hmuen hah a khinsak han. Bangkongtetpawiteh, dingcanaw a kâen vaiteh, a khin sak han. <sup>23</sup> Sumrui hah sak awh, ram teh thipaling palawngnae uknae hoi akawi teh, khopui hah ka pacekpahleknae hoi a kawi. <sup>24</sup> Hatdawkvah, ka pahngawpahrak e miphun alouke hah ka kâenkhai vaiteh a innaw a lawp pouh han. A thasainae a kâoupkhai awh e hah a pout sak vaiteh, a thoungnae hmuen kakhin sak han. <sup>25</sup> Rawkphainae a pha, rounnae a tawng awh ei hmawt awh hoe. <sup>26</sup> Rawknae buet touh hnukkhu buet touh, kamthang buet touh hnukkhu buet touh ao han. Profet koe vision a tawng awh nakunghai hmawt awh mahoe. Vaihmanaw ni lawk pâphona, kacuenaw ni pouknae poe thainae kâ hmawt awh laipalah ao awh han. <sup>27</sup> Siangpahrang a lungmathoenae vaiteh, kahrawikungnaw lungpoutnae hni hoi a kamthoup awh han. Khocanaw e a kut a pâyaw han. Ahnimouh



koe a hringnuen hoi kamcu lah ka sak han. A sak awh e hoi kamcu lah lawk ka ceng han. Kai teh BAWIPA lah ka o tie a panue awh han telah ati.

## 8

### *Bawkim dawk panuetho e naw*

<sup>1</sup> Ataruknae kum, ataruknae thapa, hnin panga hnin vah, kai teh kama im ka tahung navah, Judah miphun kacuenaw kaie hmalah a tahung awh navah, Bawi Jehovah e kut hah kaie lathueng vah a pha. <sup>2</sup> Ka khet navah hmai patetlah ka kamnuek e tami hah ao. A keng koehoi a rahim lah hmai patetlah a kamnue. A keng koehoi a lathueng lah a kamnue teh a ang poung. <sup>3</sup> Kut patet e a dâw teh, ka tampa sam dawk hoi na man. Muitha ni talai hoi kalvan rahak vah na tawm teh, Cathut a kamnue nae im Jerusalem vah a ceikhai. Jerusalem a tung lae tumdumnae thung hoi longkha lah tarennae a kung koe, na phakhai. Hawvah lungkhueknae meikaphawk tahungnae hmuen ao teh, hote ni a lungkhuek sak. <sup>4</sup> Khenhaw! ayawn dawk ka hmu e patetlah haw tueng vah Isarel Cathut bawilennae ao.

<sup>5</sup> Ahni ni tami capa atunglah kamlang nateh na mit hoi radoung haw telah ati. Hottelah atunglah kangvaw laihoi ka mit hoi ka radoung navah, khenhaw! khoungröe takhang kâennae koe lungkhueknae meikaphawk teh ao. <sup>6</sup> Ahni ni kai koevah, tami capa hmuen kathoung koehoi kahlatpoung lah na kacetkhaikung ahnimouh ni panuet hoe ka tho e hah Isarel imthung ni hitueng vah a sak awh. Hmuen kathoung koehoi kahlatpoung lah ka cei nahanelah, a sak awh e hah na hmu maw. Atu kamlang haw panuet hoe ka tho e na hmu han.

<sup>7</sup> Thongma e takhang koe totouh kai hah na ceikhai teh, ka khet navah tapang dawk a kâko teh ao. <sup>8</sup> Tami capa, tapang hah tai haw ati e patetlah kai ni ka tai teh takhang ka aw e ka hmu. <sup>9</sup> Kâen haw hie hmuen koe na sak awh e panuetho e kahawi hoeh e a sak awh e khenhaw! telah ati. <sup>10</sup> Ka kâen teh ka khet navah, tapang tangkuem dawk vonpui hoi kâva e khe hoi, panuetho e moithang phunkuep hoi Isarel imthungnaw ni a bawk awh e meikaphawknaw e mei kaawm pueng hah a vo awh.

<sup>11</sup> Hote a hmalah Isarel kacuenaw thung hoi tami 70 touh a kangdue awh. A lungui vah Shaphan capa Jaazaniah hah a kangdue. Tami pueng ni tongben rip a patuep awh teh, hmu itui hmai a sawi awh teh, hmaikhu teh a tung lah a luen. <sup>12</sup> Tami capa, Isarel imthung kacuenaw ni ka hmawt e rakkan thung kaawm e a sak awh e hno hah na hmu toung. Ahnimouh ni BAWIPA ni na hmawt hoeh, BAWIPA ni ram teh a ceitakhai toe telah ati awh.

<sup>13</sup> Ahni ni kai koevah, bout kamlang haw, a sak awh e panuethopoung hah na hmu hah telah ati.

<sup>14</sup> BAWIPA im atunglah hoi kâennae longkha tho koe na ceikhai. Khenhaw! haw vah napuinaw Tammuz pouk laihoi a ka awh teh a tahung awh. <sup>15</sup> Ahni ni kai koevah, Oe tami capa, hethah na hmu maw. Hethlak patenghai panuetho e hai a na hmu han rah telah ati.

<sup>16</sup> BAWIPA im thongma a thung totouh na ceikhai teh, bawkim takhang bawkim alawilah hoi khoungröe rahak vah, tami 25 touh bawkim hnamthun takhai hoi kanitholae a kamlang awh teh, Kanitholae kanî hah a bawk awh. <sup>17</sup> Ahni ni kai koe hethah na hmu ou. Oe tami capa, panuetho e a sak awh teh, hi tueng a sak awh e hah Judah imthung hanelah hno titca namaw. Ram teh kâyue kâounnae hoi a kawi sak awh teh, ka lungkhuek sak awh, thinghna hoi a hnawng a ramuk awh. <sup>18</sup> Hatdawkvah, kai ni hai



lungkhueknae lahoi ka sak van han. Ka mit ni roun mahoe, ka pahren mahoe. Ka hnâkâko daww kacaipounglah ka hram nakunghai ka thai pouh mahoe telah ati.

## 9

### *Tamikhouth teh thei lah a o*

<sup>1</sup> Hottelah, khopui kakhenkung hah tami pueng raphoenae senehmaica sin lahoi rek hnai naseh telah kacaipounglah dei e ka thai.

<sup>2</sup> Khenhaw! atunglae longkha a lathueng lahoi ceinae koehoi tami taruk touh a tho awh. Tami pueng ni senehmaica a sin awh. A lungui e tami buet touh hni loukloukkaang kâkhu e ni, cahangum a sin. Hottelah a kâen awh teh rahum khougroe koe a kangdue awh. <sup>3</sup> Isarel Cathut bawilennae hah a onae cherubim takhang koe lah a luen teh, hni loukloukkaang kâkhu ni teh cahangum ka sin e hah a kaw. <sup>4</sup> BAWIPA ni ahni koevah, Jerusalem khopui lungui cet haw. Khopui hah kounk katin. A thung e panuetho e hno a sak e kecu daww ka khui ka kap e naw tampa daww noutnae na sak pouh han telah ati.

<sup>5</sup> Tami alouknaw koehai khopui thung ahni hnukkâbang nateh, pasainae hoi pahrennae tawn laipalah thet awh. <sup>6</sup> Kacue e thoundoun tangla hoi camonaw hoi napui tongpa kounk thet awh. Mitnout katawnnaw hah teh hnai hanh awh. Bawkim hmalah hoi kamtawng awh telah ati. ahnimouh ni hai bawkim hmalah kaawm e kacuenaw hah hmaloe thet awh. <sup>7</sup> Ahni ni ahnimouh koe bawkim teh a kamhnawng sak awh teh, a thei awh e ronaw hoi a thongmanaw hah kingkawi sak nateh, cet awh telah ati e patetlah a tâco awh teh, khopui vah a thei awh.

<sup>8</sup> Hettelah khopui daww a thei awh lahun navah, kai teh na ceitakhai awh teh, pakhup lah rawp ka tabo. Oe Bawipa Jehovah, Jerusalem lathueng vah, lungkhueknae na awi e hah, kacawirae Isarel taminaw hai na raphoe han namaw telah ka hram.

<sup>9</sup> Ahni ni kai koevah Isarel hoi Judah e payonnae teh apap poung daww doeh. Ram teh thipaling hoi a kawui teh khopui teh, kalanhoehe lawkcengnae hoi akawi. BAWIPA ni ram teh a ceitakhai toe. BAWIPA ni banghai hmawt hoe bo telah ati awh. <sup>10</sup> Hatdawkvah, kai ni pasainae ka tawn mahoe. A yonnae phu hah ahnimae lû lathueng ka pha sak han telah ati. <sup>11</sup> Hni loukloukkaang e kâkhu niteh, cahangum ka sin e ni hai, kâ na poe e patetlah be ka sak toe telah ati.

## 10

### *Bawilennae ni bawkim a tâco takhai*

<sup>1</sup> Hottelah, bout ka khet teh, cherubim e lû lathueng kalvan dawkvah Sapphire talung a phukaawm poung patetlah bawitungkhung hoi kâvan e arong a kamnue. <sup>2</sup> Ahni ni loukloukkaang e hni kâkhu e koe, cherubim e rahak kaawm e hraba hah kut kahni touh hoi pham nateh, khopui thung kahei haw atipouh e patetlah ahni teh ka hmaitung vah a cei.

<sup>3</sup> Tami a kâen navah, cherubim teh, bawkim aranglah a kangdue awh. Im teh tâmai hoi a kawui teh, thongma teh tâmai hoi a kawui. <sup>4</sup> BAWIPA bawilennae teh cherubim koehoi a luen teh, bawkim takhang van vah a kangdue. Im teh tâmai hoi akawi teh thongma teh BAWIPA bawilennae raeng hoi a kawui. <sup>5</sup> Cherubim rathei takhawng pawlawk teh, thongma



alawilah Cathut Athakasaipounge ni tami a pato lahunnae lawk patetlah thai e lah ao.

<sup>6</sup> Loukloukkaang e ka kho e koevah, lengkhok rahak hoi hmai hah lat haw telah a dei toteh, a kâen teh lengkhok teng a kangdue. <sup>7</sup> Cherubim buet touh ni cherubim thung hoi a kut a dâw teh, cherubim rahak daw kaawm e hmai a la hnukkhu, loukloukkaang e kâkhu e a kut daw a poe e teh, ahni ni hai a dâw teh a tâco. <sup>8</sup> Cherubim rathei rahim vah tami kut patet e a kamnue.

<sup>9</sup> Ka khet navah, cherubim e teng vah lengkhok buet touh lengkaleng ao. Lengkhoknaw teh, Beril talung phukaawm komthawm e patetlah ao.

<sup>10</sup> Lengkhok pali touh teh sue a kâvan awh. Lengkhok buet touh e thung vah, alouke lengkhok kaawm e patetlah ao. <sup>11</sup> A cei awh navah pali touh lahoi rei a kangvawi e patetlah hmalah a cei awh teh, a cei awh nahai kamlang boi awh hoe. Hatei pasuek kangvawi e koelah a cei awh. A cei awh navah kamlang boi awh hoe. <sup>12</sup> A tak abuemlah a hnukkhu lae a kut naw, a rathei hoi lengkhok hai mit hoi akawi awh. <sup>13</sup> Lengkhoknaw teh, a hnâthainae koe roeroe lengkhok telah tie lah ao. <sup>14</sup> Cherubim teh minhmai pali touh rip a tawn awh teh, apasueke minhmai teh cherubim minhmai, apâhni e minhmai teh tami minhmai, apâthum e minhmai teh sendek e minhmai, apali e minhmai teh mataw minhmai doeh.

<sup>15</sup> Cherubim teh a luen awh. Hethateh, Kebar palang teng e moithang ka hmu e hah doeh. <sup>16</sup> Cherubim ni a cei awh toteh, lengkhok ni tang a kâbang sin. Cherubim ni talai hoi luen hanelah a rathei a pho awh navah, lengkhok ni hai cettakhai boihoe. <sup>17</sup> Kangdout awh pawiteh a kangdue awh van, luen awh pawiteh a luen awh van. Bangkongtetpawiteh, moithang muitha teh ahnimouh daw ao.

<sup>18</sup> BAWIPA bawilennae teh, bawkim takhang koehoi a tâco teh cherubim lathueng vah a kangdue. <sup>19</sup> Cherubim ni ka hmaitung vah a rathei a kadai awh teh, talai daw hoi a luen awh. Alawilah a tâco awh navah, lengkhoknaw ni a kâbang sin. BAWIPA e im hmalah longkha tho koe a kangdue awh teh, Isarel imthung e Cathut bawilennae teh ahnimouh lathueng vah ao.

<sup>20</sup> Hethah Kebar palang Isarel Cathut rahim e moithang ka hmu e doeh, Cherubim tie ka panue. <sup>21</sup> Ahnimouh ni minhmai 4, rathei 4 lengkaleng a tawn awh teh, a rathei rahim vah tami kut hoi kâvan e ao. <sup>22</sup> A meilam a kamnuaenae teh Kebar palang e ka hmu e mei hoi a kâvan. a takthai hai rei a kâvan. Hote pali touh e naw teh a hmalah phouk a cei awh.

## 11

### *Khokhankung tamikathoutnaw lawkcengnae*

<sup>1</sup> Hottelah Muitha ni na tawm teh, kanîtholah kangvawi e BAWIPA im longkha koe na pha sak. Kâennae takhang daw tami 25 touh ao. Ahnimanaw thung daw maya kahrawikungnaw Azzur capa Jaazaniah hoi Benaiah capa Pelatiah ka hmu. <sup>2</sup> Kai koe a dei e lawk teh tami capa, hetnaw heh hete khopui daw payonnae ka thokhai e hoi ka payon e khokhannae katâcawtsakkung hoi ka yon e khokhannae ka tâcawtsakkungnaw doeh.

<sup>3</sup> Im saknae tueng nahoe rah. Hete khopui heh ka tangdaw e moi hlaam lah ao. Kaimanaw heh a moi lah ka o awh telah katetkungnaw doeh.

<sup>4</sup> Hatdawkvah, Oe tami capa, ahnimouh koe lah profet lawk dei loe telah ati.



<sup>5</sup> Hatnavah, BAWIPA e Muitha kaie lathueng a pha teh, kai koevah, BAWIPA ni hettelah a dei telah dei pouh. Hettelah ouk na dei awh, Oe Isarel imthungnaw, na muitha e lakhout hai ka panue. <sup>6</sup> Nangmouh ni hete khopui dawkh thei e lahoi na pung sak awh teh, khothung lamnaw hah thei e naw hoi na kaw sak awh toe.

<sup>7</sup> Hatdawkvah, Bawipa Jehovah ni hettelah a dei, na thei e a lungui na hruek e hah a moi doeh. Hete khopui teh moi hlaam ka tangdawkh e doeh, hateiteh khopui thung hoi rasa lah na o han. <sup>8</sup> Na takipoung e tahloi hah na lathueng ka pha sak han. Bawipa Jehovah ni ati. <sup>9</sup> Kai ni nangmouh teh khopui thung hoi na rasa vaiteh, Jentelnaw e kut dawkh na poe han, lawk na ceng awh han. <sup>10</sup> Nangmouh teh tahloi hoi na due awh vaiteh, Isarel khori koe lawk na ceng awh han, Kai teh BAWIPA doeh tie na panue awh han. <sup>11</sup> Hete khopui teh ka tangdawkh e hlaam nahoe, nangmouh hai a thung e moi na hoe, Isarel khori dawkh lawk na ceng awh han. <sup>12</sup> BAWIPA doeh tie na panue awh han. Bangkongtewawiteh, ka phunglam na tarawi awh hoe. Ka lawk ka dei e hai na tarawi awh hoe. Na tengpam e Jentelnaw phunglam law teh na tarawi awh telah ati.

<sup>13</sup> Lawk ka pâpho lahun nah Benaiah capa Pelatiah hah a due. Hottelah hoi pakhup lah ka rawp teh, kacaipounglah ka hram. Aya! Bawipa Jehovah kacawira Isarelnaw hah na pâmit han na maw telah ka ti.

### *Cathut ni Isarel nham a thun takhai*

<sup>14</sup> Lahoi, BAWIPA e lawk hah kai koe a pha. <sup>15</sup> Tami capa na hmaunawngah, na imthung, na mipun hoi Isarel imthung abuemlahoi Jerusalem karingkungnaw hah BAWIPA koehoi kahlat lah cet awh. Hete ram heh kai koe na poe toe, katetnaw doeh.

<sup>16</sup> Hatdawkvah, Bawipa Jehovah ni hettelah a dei, ka hlatpoung lah Jentel mipun koehoi na puen teh ram tangkuem kahei nakunghai, a phanae ram dawkvah, ahnimouh han kathoung hmuen kathoung lah dongdeng ka o han.

<sup>17</sup> Hatdawkvah, Bawipa Jehovah ni hettelah a dei. Jentelnaw koe bout na pâkhueng han, na kâkaheinae hmuen koehoi na pâkhueng vaiteh, Isarel ram hah na poe awh han.

<sup>18</sup> Hawvah, a tho awh vaiteh, kamhnawng e hoi panuetho e pueng teh haw e hmuen koehoi koug a raphoe han. <sup>19</sup> Lungthin buet touh na poe awh vaiteh, nangmouh thung muitha ka hruek han, na takthai thung e talung patetlah kate e lungthin hah ka la vaiteh, tak patetlah kanem e lungthin hah na poe han. <sup>20</sup> Ka phunglam a tarawi teh lawkcengnae a coe awh teh, a sak thai awh nahan, hottelah ka tami lah ao awh vaiteh, kai hai a Cathut lah ka o han. <sup>21</sup> Hateiteh, panuethopoung ngainae koe lungthin hoi katarawinaw e yon hah ahnimae a lû dawkh ka pha sak han telah Bawipa Jehovah ni ati.

<sup>22</sup> Hatnavah, Cherubim ni a rathei a kadai awh teh, lengkhoknaw ni hai ahnimouh koe ao awh. Isarel Cathut a bawilennae teh ahnimae lathueng ao. <sup>23</sup> BAWIPA a bawilennae teh, khopui lungui hoi a luen teh, khopui kanitholah ka rasang e mon dawkh a kangdue. <sup>24</sup> Muitha ni vision lahoi na tawm teh, Cathut e Muitha ni Khaldean ram e sankatoungnaw koevah na phakhai. Kai ni ka hmu e vision hah kai koehoi luen. <sup>25</sup> BAWIPA ni na patue e naw pueng hah sankatoungnaw koe ka dei pouh.



<sup>1</sup> BAWIPA e lawk kai koe a pha teh, <sup>2</sup> Tami capa, nang teh tarankathaw e imthung koe doeh na o. Hmunae mit a tawn eiteh, hmawt thai hoeh, thainae hnâ a tawn eiteh, ka thaipanuek hoeh e naw tarankathaw e imthung lah na o awh.

<sup>3</sup> Hatdawkvah, nang tami capa santoungnae koe ka cet hane patetlah na hnopai kahawicalah taoung nateh, khodai lah ahnimae hmaitung roeroe vah kamthaw haw. Na hmu awh lahun nah na onae hmuen koehoi hmuen alouke koe na cei han. Tarankathaw e lah kaawm awh nakunghai a lung a ang awh yawkaw han doeh. <sup>4</sup> Na hnopainaw hah khodai lah ahnimae hmaitung roeroe vah, santoungnae koe ka cet hane ni hno lae patetlah na la han. Nang nama roeroe hai ahnimae hmaitung vah ram louk ka cet hane patetlah na cei han. <sup>5</sup> Ahnimae hmaitung vah kalupnae rapan hah na raphoe vaiteh, hawvah na hno hah na tâcokhai han. <sup>6</sup> Ahnimae hmaitung roeroe vah na loung hoi na hrawm vaiteh, khohmo na tâcokhai han. Talai na hmu hoeh na han na minhmai na ramuk han. Bangkongtetpawiteh, Isarel imthung hanelah a khetsin hanelah na ta toe telah a ti.

<sup>7</sup> Kâ na poe e patetlah ka sak teh ka hnopai hah santoung hane patetlah kanîthun vah ka tâcokhai, Ka kut hoi karum rapan ka raphoe teh, karum lah ahnimae hmaitung roeroe vah ka loung dawk ka hrawm.

<sup>8</sup> Hahoi amom vah Bawipa Jehovah e lawk kai koe a pha teh, <sup>9</sup> tami capa Isarel imthung, tarankathaw e imthung ni nang koevah, bang ne na sak telah ati nahoehmaw. <sup>10</sup> Ahnimouh koe Jehovah Cathut ni hettelah a dei, hete lawk heh Jerusalem kacuenaw hoi ahnimouh koe kaawm e Isarel imthung abuemlae kong doeh. <sup>11</sup> Nangmouh hanelah khetsin hanelah ahmaloe kamnu sak e doeh. Ka sak e boiboe lah ahnimae lathueng hai ka sak han. San lah toung sak hanelah man lah ao han telah tet pouh.

<sup>12</sup> Ahnimouh koe kaawm rae kahrawikungnaw ni khohmo thung a hnopai a loung hoi a hrawm awh vaiteh, a tâco awh han. A tâco awh nahane rapannaw a raphoe awh han. A mit hoi ram a hmu awh hoeh nahanelah, a minhmai a ramuk awh han. <sup>13</sup> Ahni teh kaie tamlawk hoi ka ramuk vaiteh, kaie masi dawk a kâman han. Khaldean ram e Babilon vah ka thokhai han. Haw tueng vah kadout nakunghai khopui hmawt mahoe.

<sup>14</sup> Ahni kabawm hanelah a teng kaawm e hoi kâkaheisak vaiteh, rayu tangcoun e tahloi hoi ka pâlei han. <sup>15</sup> Miphunnaw koe ka kâkaheisak teh ram tangkuem koe ka pâlei navah, BAWIPA lah ka o e hah a panue awh han. <sup>16</sup> Hateiteh, tahloi hoi takang patawnae naw thung hoi tami youn touh ka cawi sak han. Ahnimouh ni a tho awh hoeh nae ram koelae miphunnaw koelah, panuetho e pueng hah a kamnu sak awh nahan, kai teh BAWIPA lah ka o e hah a panue awh han telah a ti.

### *Lawkcengnae tahrut hoeh*

<sup>17</sup> Hothloilah BAWIPA e lawk kai koe a pha teh, <sup>18</sup> tami capa pâyaw laihoi rawca cat nateh, kâhruetcueth laihoi tui hah net haw. <sup>19</sup> Hote ram daw k e taminaw koe Bawipa Jehovah ni Jerusalem e kho ka sak e thoseh, Isarel ram e kho ka sak e koe thoseh, hettelah a dei. Ahnimouh ni kâhruetcueth laihoi rawca a ca awh han. Lungpuen laihoi tui a nei awh han, hottelaho khocanaw ni a sak awh e kathout hno thung kaawm e hnônaw thung hoi a hlout awh han. <sup>20</sup> Tami a onae khonaw a rawk teh ram pueng kingkadi lah ao han, kai teh BAWIPA lah ka o tie a panue awh han telah a ti.

<sup>21</sup> Hahoi BAWIPA e lawk kai koe a pha teh, <sup>22</sup> Tami capa, a hnintha a lounm toteh kamnuke e vision hai a rawk toe telah ouk na ti awh e hah Isarel ram daw k ouk hno e cingthuilawk hah bangtelane.



<sup>23</sup> Hatdawkvah, Bawipa Jehovah ni hettelah a dei. Hete cingthuilaaw kaduemca e heh ka pahawt teh Isarel ram daw k hno awh mahoe h toe. A hninth a hnai toe. Kamnuek e vision pueng akuep nahane tueng a hnai toe telah ahnimouh koe a dei pouh. <sup>24</sup> Isarel imthungnaw thung daw k aphu kaawm hoe h e kamnuek e hoi hawinae koe lah cungpam rayunae roeroe awm mahoe h toe. <sup>25</sup> Bangkongtetpawiteh, BAWIPA lah ka o. Ka dei e hah kuepsak lah ao han, akuepnae tueng hai tahrue t mahoe h. Tarankathaw e imthungnaw na hring nathung roeroe lawk ka dei vaiteh ka kuep sak mingming hah telah Bawipa Jehovah ni a dei telah a ti.

<sup>26</sup> BAWIPA e lawk kai koe bout a pha teh, <sup>27</sup> tami capa thai haw, Isarel imthung ni kamnue nae a hmu e teh hmalah hanelah doeh, a dei tangcoung e hai hmalah hane doeh telah atipouh. <sup>28</sup> Hatdawkvah, ahnimouh koe Bawipa Jehovah ni hettelah a dei. Ka lawk ceitakhai e awm mahoe h. Ka dei e lawk pueng heh kuep sak e lah ao han, telah Bawipa Jehovah ni a dei telah dei pouh telah a ti.

## 13

### *Laithoe profet*

<sup>1</sup> BAWIPA e lawk kai koe a pha teh, <sup>2</sup> tami capa, Isarel profet ma ngainae dueng ka dei e koe vah, BAWIPA e lawk thai haw tet pouh.

<sup>3</sup> Bawipa Jehovah ni hettelah a dei. A lai kathout e profet, ma ngainae dueng ka tarawi niteh, banghai ka hmawt thai hoe h e profetnaw teh a yawthoe awh. <sup>4</sup> Oe Isarel na profetnaw teh thingyeiyawn e asuinaw patetlah doeh ao awh. <sup>5</sup> BAWIPA e hnin daw k tarantuk nah a ngang awh thai nahanelah, ahnimouh teh rapan karawknaw hah pathoup ngai hoe h. <sup>6</sup> Ayawmyin doeh a hmu awh toe. BAWIPA ni patoun hoe h e hah. BAWIPA ni na patoun ati awh teh, dумыen lahoi profet lawk a dei awh toe. Hete lawk akuep han telah ayânaw hah a yuem sak awh toe. <sup>7</sup> Ahrawnghrang e kamnue nae na hmu awh teh, kalan hoe h e sutdeilaw k na dei awh nahoe hmaw. BAWIPA ni a dei e doeh, na ti awh rah, kai ni ka dei e roeroe nahoe h.

<sup>8</sup> Hatdawkvah, Bawipa Jehovah ni hettelah a dei. Bang hoe h e hah na dei awh teh, laithoe hah na hmu awh daw kvah, khenhaw! kai ni na taran awh toe telah BAWIPA ni ati. <sup>9</sup> Ka cungkeihoe he hno kahmawtkungnaw hoi laithoe kadeikungnaw hah, ka kut ni a taran han. Ka taminaw pouknae ka poe awh e daw k baw k van awh mahoe h. Isarel imthung min thutnae daw k thut e lah awh mahoe h. Isarel ram daw k hmu en poe mahoe h. Hottelaho i Bawipa Jehovah lah ka o tie hah na panue awh han.

<sup>10</sup> Atangcalah, rounnae awm laipalah pâdingsue doeh telah ka taminaw hah, a kahmak hai awh teh, ayânaw e tapang daw k thungpangaw doeh a hluk awh. <sup>11</sup> Thungpangaw kahluknaw koe vah, kho a rak vaiteh, koung bout a bo awh han. Nangmouh roun kalenpuinaw baw t awh nateh, katangpounge kahlî ni koung raphoe naseh telah tet awh. <sup>12</sup> Khenhaw! rapan hah a tip hnukkhu, thungpangaw na hluk awh e teh, nâmaw ao han telah tet awh mahoe h na maw.

<sup>13</sup> Hatdawkvah, Bawipa Jehovah ni hettelah a dei, ka lungkhue k lahoi katangpounge kahlî hoi koung ka raphoe han. Ka lungkhue k lahoi kho a rak vaiteh, ka lungkhue k lahoi roun puenghoi a bo awh han. <sup>14</sup> Hottelaho i thungpangaw na hluk awh e rapan hah ka raphoe vaiteh, talai totouh a rawp vaiteh, adu ung e talung totouh a kamnu e han. A rawp vaiteh, rapan a tipnae daw k be raphoe e lah na o awh han. Hat toteh, BAWIPA lah ka o tie



hah na panue awh han. <sup>15</sup> Hettelah rapan dawkvah thoseh, thungpangaw ka hluk e lathueng thoseh, ka lungkhueknae kamnue sak han. Rapan awm hoeh toe, kahluknaw hai awm hoeh toe telah ati awh han. <sup>16</sup> Haw teh, Isarel profet Jerusalem kong sut ka dei e roumnae awm laipalah roumnae vision kahmawtsakkungnaw doeh, telah Bawipa Jehovah ni a dei.

<sup>17</sup> Hothloilah Oe tami capa, amahmawk profet lawk ka dei e na taminaw hoi napuinaw taranlahoi kangvawi nateh, <sup>18</sup> Bawipa Jehovah e lawk na dei hane teh, hringnae man hanelah, tami pueng e loung koe hno hah a thueng teh, tami kacue kanaw e lû dawk ka tat e napuinaw teh, a yawthoe awh. Ka taminaw e a hringnae hah man vaiteh, mae hringnae hah duenae koehoi rungngang awh han na maw. <sup>19</sup> Catun vai touh kasum e hoi vaiyei phen hmau hanelah, kadout hoeh hane due sak teh kahring hoeh hane hring sak hanelah, laithoe na dei awh e hah, tami ni a yuem awh dawkvah, ka taminaw koevah, ka min na khin sak awh.

<sup>20</sup> Hatdawkvah, Bawipa Jehovah ni a dei e teh, nangmouh ni tami hringnae hmu hanelah na man awh teh, ka hno thai e raim kaawm e hnonaw hah nangmouh dawk hoi ka takhoe vaiteh, nangmouh ni na man awh e hringnae hah ka tha han. <sup>21</sup> Na lahuen hai ka phi vaiteh, kaie taminaw hah na kut dawk hoi na lawp han. Nangmae kut dawk bout phat mahoehtoe. Kai teh BAWIPA lah ka o e hah na panue awh han. <sup>22</sup> Kai ni lung ka mathoe sak hoeh e tamikahawinaw hah nangmouh ni laithoe lahoi lung na mathoe sak dawkvah thoseh, tamikathoutnaw ni thoenae lamthung roun sak hoeh nahanelah, hringhloutnae na poe awh teh, a lung na pata sak awh dawkvah thoseh, <sup>23</sup> nangmouh teh ayawmyin e hno na hmawt awh mahoehtoe. Profet lawk na dei awh mahoehtoe. Ka taminaw hah nangmae kut dawk hoi ka rasa han. Kai teh BAWIPA lah ka o e hah nangmouh ni na panue awh han, ati.

## 14

### *Meikaphawk bawknae*

<sup>1</sup> Isarel kacuenaw tangawn kai koe a tho awh teh, ka hmalah a tahung awh. <sup>2</sup> Hahoi BAWIPA e lawk kai koe a pha teh, <sup>3</sup> tami capa, hetnaw ni amae meikaphawknaw hah a lungthin dawka kâen sak awh teh, a hmalah a yonae dawk tâlawnâe hah a hruek awh teh, ahnimouh ni pouknae hei hanelah ka o pouh han namaw.

<sup>4</sup> Hatdawkvah, pato nateh, Bawipa Jehovah ni hettelah a dei. Isarel imthung koe tami pueng ni meikaphawk a lungthin thung a kâen sak teh, hotnaw e hmalah payonnae dawka rawpnae hah hruek pouh teh, profetnaw koe ka tho pueng, kai BAWIPA ni amae meikaphawk a pap e hoi kamcu lah ka pathung han. <sup>5</sup> Isarel imthung ni amae meikaphawk kecu dawk hoi na ceitakhai awh dawkvah, a lungthin katang dawkvah ka kuethai nahanelah telah ati.

<sup>6</sup> Hatdawkvah, Isarel imthung koevah, Bawipa Jehovah ni hettelah a dei. Ban awh nateh, namamae meikaphawk koehoi ban awh. Panuet na thonae pueng cettakhai awh. <sup>7</sup> Isarel imthung dawka tami bangpatet hai thoseh, Isarel ram e kho ka sak pueng thoseh kai koehoi a kamlang teh, a lungthin dawka meikaphawk a kâen sak lahoi a hmalah payonnae dawka rawpnae hah hruek e lahoi, ahnimouh kong dawka pouknae hei hanelah, profet koevah ka tho e pueng teh kai BAWIPA roeroe ni ka pathung awh han. <sup>8</sup> Hote tami teh, ka kangdue sin vaiteh, noutnae, cingthuinae lah ka



hruék han. Ahni hah ka taminaw koehoi ka takhoe han. BAWIPA lah ka o tie a panue awh han.

<sup>9</sup> Bang hno pueng dei hanelah, profet hah pasawt pawiteh, hote profet teh kai BAWIPA ni ka pasawt e lah ao teh, ama taranlahoi ka kut ka dâw vaiteh, ka tami Isarelnaw thung hoi ka pâmit han. <sup>10</sup> A payonnae hah a phu awh han. Profet reknae hoi pouknae kahetkung reknae hah a kâvan han. <sup>11</sup> Isarel imthung teh kai koehoi kahmat awh hoehtoung vaiteh, a payonnae pueng ni a kamhnawng sak hoehtahanelah, ka tami lah ao awh toung dawkvah, a Cathut lah ka o thai nahan, Bawipa Jehovah ni a dei tet pouh, telah ati.

### *lawkcengnae pali touh*

<sup>12</sup> BAWIPA e lawk kai koe a pha teh, <sup>13</sup> tami capa, ram daw k e taminaw ni kâlawk a tapoe awh teh, kaie lathueng yonnae a sak e lahoi, kai ni ka kut ka dâw teh, a hringnae a kungpui, a rawcanaw raphoe pouh e lahoi ahnimouh lathueng takang ka tho sak e lahoi tami hoi saringnaw ka pâmit toteh, <sup>14</sup> Hete tami kathum touh: Noah, Daniel, hoi Job patenghai awm awh haw pawiteh, a lannae ni amamae hringnae dueng doeh rungngang thai awh tih, telah Jehovah ni a dei.

<sup>15</sup> A ram hah sarang katin sak vaiteh, ram hah ka raphoe dawkvah, apihai ao thai hoehtah, tami kingdi pawiteh, <sup>16</sup> hete tami kathum touh kaawm nakunghai ka hring e Bawipa Jehovah ni telah a dei, amamae a canu capa naw rungngang thai kalawn mahoeht. Amamanaw dueng rungngang e lah ao awh vaiteh, a ram teh kingdi lah doeh bout ao han.

<sup>17</sup> Hoehpawiteh a ram dawktahloi ka hno vaiteh, tahloi kâroe haw ka tet boilah, tami hoi moithang pueng koug ka pâmit pawiteh, <sup>18</sup> Hete tami kathum touh kaawm nakunghai Bawipa Jehovah a hring e patetlah a canu capa naw rungngang thai kalawn mahoeht. Amamae hringnae dueng hah a rungngang thai awh han.

<sup>19</sup> Nahoeht pawiteh, a ram dawklacik ka pha sak vaiteh, tami hoi moithang be pâmit hanlah thingpalawngnae lahoi ka lungkhueknae hah a ram daw k a awi pawiteh, <sup>20</sup> Noah, Daniel, hoi Job ahnimouh kaawm awh nakunghai, Bawipa Jehovah ni kai ka hring e patetlah a canu a capa naw hai rungngang mahoeht. A lannae ni amamae hringnae dueng a rungngang awh han telah, BAWIPA ni a dei.

<sup>21</sup> Bangkongtetpawiteh, Bawipa Jehovah ni hettelah a dei. Jerusalem lathueng vah, ka patawpoung e ka lawkcengnae pali touh: tahloi, takang, sarang hoi lacik hah tami hoi saring be pâmit hanelah ka pha sak toteh, banghloine a pataw han. <sup>22</sup> Hatei khenhaw! hawvah, kaawm rae tâcokhai hanelah, pâhlung lah ao han. Canu capa naw hai, khenhaw! nangmouh koe a tho awh han. A hringnae hoi a tawksak awh e hah, na hmu awh han. Hahoi Jerusalem lathueng vah, hawihoehtnae kaphasaknae kong dawkvah, lung na mawng sak awh han. A lathueng hno ka pha sak e pueng daw k a lungmawng awh han. <sup>23</sup> A hringnae hoi a tawksaknae hah na hmu awh toteh, na lung a mawng sak awh han. A lathueng ka sak e pueng a khuekhaw awm laipalah ka sak hoehtie na panue awh han telah Bawipa Jehovah ni a dei, telah ati.

## 15

### *Hnoun e Misurkung*

<sup>1</sup> BAWIPA e lawk kai koe a pha teh,



<sup>2</sup> tami capa, ratu thung e misurkung hah thing alouke hlak bang alânae maw kaawm. <sup>3</sup> A thing hah hnopai sak nahanelah ouk hno boimaw. Ailo tongben bang nahanelah hai apinimaw ouk a hno boi. <sup>4</sup> Khenhaw! hmai patawi nahanelah doeh ouk hno awh. A som hoi a kung koe totouh hmai ni kouna a kak. A langbouna a kak teh, patopatangnae ao boimaw. <sup>5</sup> Hmai a kak hoehnahlan pato patang han awm hoehpawiteh, hmai a kak hnukkhu patopatangnae bangmaw hoe kaawm han.

<sup>6</sup> Hatdawkvah, Bawipa Jehovah ni hettelah a dei. Ratu thung e thingnaw thung dawkw misurkung hah hmai patawi nahanelah ka ta e patetlah Jerusalem khocanaw hai ka hruek han. <sup>7</sup> Ahnimouh koe lah ka kangdue sin vaiteh, hmaithung hoi ka tâcawt awh nakunghai, hmai dawkw a kak awh mingming han. Ahnimouh koelah ka kangdue sin toteh, BAWIPA la ka o tie a panue awh han. <sup>8</sup> Ahnimouh ni payonnae bout a sak awh dawkvah, a ramnaw ka pâmit roeroe han telah Bawipa Jehovah ni a dei telah a ti.

## 16

### *Cathut ni Jerusalem lung a pataw*

<sup>1</sup> BAWIPA e lawk teh kai koe bout a pha. <sup>2</sup> Tami capa, Jerusalem panuet a thonae hah panuek sak nateh ahni koevah, <sup>3</sup> Bawipa Jehovah ni Jerusalem koe hettelah a dei. Na khenae hoi na tâconae ram teh Kanaan taminaw e ram doeh. Na pa teh Amor tami lah ao teh na manu teh Hit tami doeh. <sup>4</sup> Na tâco nah apinihai na thunrui a awh hoe. Thouna sak hanelah tui dawkw hai na pâhluk awh hoe. Palawi hai na hluk awh hoe. Kabethueplah hni hoi hoi hai na kayo e hai nahoeh. <sup>5</sup> Pahren hanelah na lathueng hete hnoung ka sak hanelah, apie mit ni hai na pahren hoe, vaipuen vah tâkhawng e lah na o. Bangkongtetpawiteh, na khe na hnin hoi panuet e lah na o.

<sup>6</sup> Nang koe ka tho navah, thi hoi puk na kâkaawkw e ka hmu navah, hring loe ka ti, nang teh thi dawkw na o lahun nah kai ni ka dei. <sup>7</sup> Phokung patetlah na rouna sak teh, nang teh pou na len sak e, kamcu meikahawi e hoi na kawi. Na sanu a rouna teh na tak dawkw hai a muen a tho. Hateiteh khohna tawn laipalah caici lah na o.

<sup>8</sup> Nang koe ka tho nah na khet toteh, nange na tueng teh pahrennae tueng lah ao teh, kaie hni ka kadai teh caici lah na onae hah ka ramuk. Thoe hai na bo teh nang hoi lawkkamnae ka sak e lahoi, nang teh kaie ka yu lah na o telah Bawipa Jehovah ni a dei. <sup>9</sup> Tui hoi na pâsu teh na thipaling teh kathoungcalah ka pâsu teh satui na hluk. <sup>10</sup> Pathoupnae hni hoi na pathoup teh, a pho phukaawm hoi na khokkhawm na khawm sak, loukloukkaang e hni na kâkhu sak. <sup>11</sup> Pathoupnae hoi na pathoup teh na kut dawkw kuthrawt, na lahuen dawkvah sui dingyin, <sup>12</sup> na hnawng dawkw hnongpacap, na hnâ dawkw hnâpacap, na lû dawkw kahawipoung e suilukhung na kâmu sak. <sup>13</sup> Hottelah sui hoi ngun hoi pathoup e lah na o. Na khohna hai loukloukkaang e hni kahawipoung e carouk e hninaw doeh. Na ka hane bu teh tavai kanui hoi khoitui hoi satui doeh. Na kamcu, mei na hawi poung, siangpahrangnu lahoi na kuep doeh. <sup>14</sup> Na meihawinae na miphunnaw koe a kamthang, ka bawilen nahanelah pathoup e lahoi kuepcingnae na tawn telah Bawipa Jehovah ni a dei.

### *Jerusalem a kâyonae*

<sup>15</sup> Hateiteh, na meihawinae ekvoi na kâoup dawkvah, na min kamthangnae teh na kâyonae lah na hno. Ka cet kaawm e naw koe na kâyonae na



pâpho teh, tongpa pueng ni tha a kâla awh. <sup>16</sup> Na khohna na rading teh hmuenrasang hah nama hanelah na pathoup. Hawvah, na kâyo. Het patetlae heh bout awm boi mahoe h toe. <sup>17</sup> Kaie sui hoi ngun hnopai kahawi kahawi na poe e na la teh, tongpa meikaphawk sak nahanelah na hno teh na kâyo. <sup>18</sup> A meikahawi e na khohna hah na la teh, ahnimouh hah na kâkhu sak. Kaie satui hoi hmuittui hah a hmalah vah na pâhung. <sup>19</sup> Kai ni na poe e vaiyei hoi tavai kahawi e hoi satui hoi khoittui ouk na kawknae hah, hmuittui hanelah a hmalah na pâhung pouh teh, hettelah na toung vai yaw khe, telah Bawipa Jehovah ni a dei.

<sup>20</sup> Hothloilah, na canu capa na khe pouh e hah ahnimouh koe thuengnae koug hno hanelah na poe, na kâyonae heh rumram nahoe. <sup>21</sup> Ka canaw na thei teh, hmai hoi thueng hanelah ahnimouh koe na poe e naw hah, <sup>22</sup> panuet na thonae hoi na kâyonae naw pueng dawh na lung a mathoe lahun nae, caici lah na onae, thi puk na kâkaawh lahun nae hah na naw nah hoi na panuek hoe h mue toe.

<sup>23</sup> Na hawihoe hnae naw a hnukkhu hettelah doeh. Lungmathoe hanlah ao telah Bawipa Jehovah ni a ti. <sup>24</sup> Lamthung tangkuem meikaphawk bawknae hmuen na sak, nama na kâyo nahane im na sak. <sup>25</sup> Lamthung kâracutnae koe pueng vah, kâyonae im na sak, na meihawinae teh panuettho lah na coung sak. Ka cet kaawm pueng koe na kâpoe teh na kâyonae teh hoe a pap. <sup>26</sup> Izip tami na imri koe vah, na kâyo teh, ka lungkhuek nahanelah na kâyonae na nut sak.

<sup>27</sup> Hatdawkvah, kenhaw! na lathueng vah ka kut ka dâw teh, ouk na ca boi e bu ka youn sak teh, nang ka mathoe e Filistin tami napui na kâyonae na kayakkhai e poung koe, a ngai thaitue na sak hanelah na poe. <sup>28</sup> Assirianaw koe hai na kâyo teh, a khout toe tie hai na panuek hoe h. <sup>29</sup> Kanaan ram Khaldeannaw koe vah na kâyonae bout na nut sak teh, na khout kalawn hoe h.

<sup>30</sup> Na lungthin banghloimaw a kamko. Na kâroekâkhawinae dawh a lung ka patak e napui patetlah hno na kâyo telah Bawipa Jehovah ni a ti.

### *Jerusalem uicuknae*

<sup>31</sup> Lam a kâcunae koe pueng tami pawpnae rim hah na sak teh, lamsalun tangkuem koe e kâkaawknae hmuen na sak e naw dawkvah aphu na hei hoe dawkvah, kâyawt e lah na awm hoe h toe. <sup>32</sup> Thoundoun alouke hoi ka ip e napui, vanaw hlak tami alouke ka ngaihnawn e napuinaw, <sup>33</sup> tongpa ni kâyawt e napui koe aphu ouk a poe awh. Nang ni teh na ka ngai e koe doeh letlang na poe. Ram tangkuem hoi a tho awh teh, na ikhai nahanelah nama ni ouk na pasawt. <sup>34</sup> Na kâyonae dawh apinihai na pâtam hoe h e hah, kâyawt e alouke hoi na kâvanhoe hnae doeh. Apinihai aphu na poe awh hoe h niteh, nang ni law dai na poe e hah kâvanhoe hnae doeh.

<sup>35</sup> Hatdawkvah Oe kâyawt e napui, BAWIPA e lawk hah thai haw. <sup>36</sup> Bawipa Jehovah ni hettelah a dei, panuet na thonae teh, meikaphawk-naw hoi, na kâyonae hoi, caici lah na onae kamnue sak e lahoi, ahnimouh koe na poe e na canaw e thipaling kecu dawkvah, <sup>37</sup> Kenhaw! na ka ipkhai e hoi na ka pahren e tami pueng, na ka mathoe e pueng hah ka pâkhueng han, nang koe ka thokhai vaiteh, caici lah na onae a hmu awh thai nahan, ahnimouh koe caici lah na onae hah kamnue sak han. <sup>38</sup> Hahoi napui a vâ a kapek teh, mae canaw thipaling palawngnae kong dawh lawk ouk ceng e patetlah nange kong heh lawkceng awh han, lungkhueknae hoi



ka patawpoung e lungphuennae ka pha sak han. <sup>39</sup> Ahnimae kut dawh na poe vaiteh, na kâkaawwnae ka raphoe han. Na hmuenrasangnaw ka rawp sak han. Na khohnanaw hah a rading awh vaiteh, a phukaawm e painapaitunnaw a la awh han, hni laipalah tak caici lah na hruek awh han. <sup>40</sup> Tami moikapap a kaw vaiteh, ahnimouh ni talung hoi na dei awh han. Tahloi hoi na bouk awh han. <sup>41</sup> Nange im hah hmai hoi a sawi awh han. Napui moikapap a hmunae koe nange lathueng lawkcengnae a pha sak han. Na kâyonae teh ka pout sak vaiteh, nang teh ayânaw na hlai mahoe h toe. <sup>42</sup> Hottelah hoi ka lungkhueknae hah na lathueng vah ka kuepcalah ka kamnue sak han. Na dipmanae hai nangmouh koe hoi ka takhoe vaiteh, muengmueng ka o han, ka lungkhuek mahoe h toe. <sup>43</sup> Na nawnae hnin hah na pahnim teh, hete hnônaw dawh rucatnae na poe dawkvah, khenhaw! na kâroenae patetlah na lathueng ka pha sak han, telah Bawipa Jehovah ni a dei. Hahoi panuet na thonae pueng thap sin hanelah, hete na kâyonae na sak mahoe h toe.

<sup>44</sup> Khenhaw! cingthuilawh kaduemca ka hno e pueng ni hete cingthuilawh hah a hno awh han, a canu ni a manu pheh a la, tie hah. <sup>45</sup> Na manu mae vâcanaw patenghai kapanuetkung, canu lah na o, hmaunawngah coungnae koe lah mae vâ hoi canaw kapanuetkung hmaunawngah lah na o. Na manu Hit tami doeh, napanaw hah Amornaw doeh. <sup>46</sup> Na tawncanu teh Samaria, nange avoilah kho ouk ka sak e hah ama hoi a canunaw hoi doeh. Na hmau na nawngah hoi aranglah kho ouk ka sak e hah teh Sodom hoi a canunaw doeh. <sup>47</sup> A hring nuengcang hah na tarawi hoe h eiteh, panuet a tho awh e patetlah na sak hoe h ei, na hring nathung e na payonpakainae naw pouk toteh, hothateh, dei hane kamcu hoe h. <sup>48</sup> Kai ka hring e patetlah Bawipa Jehovah ni a dei, nang nama hoi na canaw ni a sak awh e heh, a hmaunawngah Sodom hoi a canu ni hai sak awh hoe h. <sup>49</sup> Na hmaunawngah Sodom a yonnae teh, hetnaw hah doeh, kâoupnae hoi king ka boum lah canae ama hoi a canunaw a nawmnae lah ao teh, tami ka roedeng hoi voutthoup e taminaw hah kabawm awh hoe h. <sup>50</sup> Kâoupnae poung e lah ao teh kaie kahma lah panuetho e hno kasakkungnaw doeh, hatdawkvah, ahawi ka tie patetlah kai ni ka raphoe toe. <sup>51</sup> Samaria nihai, nang ni na sak e yonnae a tangen boehai sak hoe h. Ahnimanaw hlak panuet ka thoe e hno hah na sak dawkvah, na hmaunawngahanaw e yon hah na kamnuek sak hoe h. <sup>52</sup> Na hmaunawngahanaw kalanhnawn lah na kamnue sak dawkvah, nang nama roeroe ni na yeiraiponae teh na phu hanelah ao. Ahnimanaw hlak panuethopoung hno hah hoe kapap lah na sak teh, na hawihoe hnae kecu dawh, ahnimouh teh nangmanaw hlak vah a lan hnawn. Na hmaunawngah kalanhnawn lah na kamnuesaknae dawkvah, kayak poung e hoi yeiraiponae hah na coe han.

<sup>53</sup> Hahoi, Sodom hoi a canu e hringnuen hoi ahnimouh hoi nangmae hringnuen hai ka thung han. <sup>54</sup> Ahnimouh han roumnae lah ouk na ona e dawkvah, na sak e hnopueng kecu dawh na kayayeirai lah na o thai nahan, <sup>55</sup> Na hmaunawngah Sodom hoi a canunaw hoi Samaria hoi a canunaw hah, a hringnuen hmaloe e patetlah bout a hring awh vaiteh, nang hoi na canunaw hai, ahmaloe e na hringnae dawkvah, bout na hring awh han. <sup>56</sup> Na hawihoe hnae hmu hoe hnahn e, na bawilenna hnin dawkvah, na hmaunawngah Sodom teh a min kuekluek dei mahoe h namaw. <sup>57</sup> Atuteh, Siria canu hoi atenggam e tami pueng Filistin canunaw nang teng e na ka panuikhainaw hoi puenghoi na kaphathoenaw, <sup>58</sup> na kâyonae hoi panuet na thonae hah pou na kampu telah BAWIPA ni a ti.



<sup>59</sup> Bawipa Jehovah ni hettelah a dei. Lawkkam e hah tapuet teh, lawkkam e banglahai na noutna hoe e patetlah na lathueng ka sak van han. <sup>60</sup> Hateiteh, na camo nah nang koe ka lawkkam e hah ka pahnim mahoe, nang koe vah a yungyoe kangning e lawkkamnae ka sak han.

<sup>61</sup> Hottelah hmaunawngghanaw hah na coe awh navah, na lung a ang vaiteh, na kayakhai han. Bangkongtetpawiteh, nang koe lawk ka kam kecu dawk nahoe niteh, ahnimouh teh a canu hanelah na poe han. <sup>62</sup> Nang koe ka lawkkam e ka cak sak vaiteh, BAWIPA lah ka o tie hah na panue awh han. <sup>63</sup> Nang ni ouk na sak boi e pueng yontha lah ao han. Ka lung a roun toteh, kai ni na pahnim mahoe. Kayanae takinae hoi minhmai mathoe kecu dawk lawk ka dei laipalah, ka o han telah Bawipa Jehovah ni a ti.

## 17

### *Mataw hoi Misurkung*

<sup>1</sup> BAWIPA e lawk kai koe a pha teh, <sup>2</sup> tami capa Isarel imthung dawkvah pãveinae sak pouh haw, bangnue nae buet touh dei pouh.

<sup>3</sup> Ahnimouh koe Bawipa Jehovah ni hettelah a dei. Mataw kalenpounge rathei kakawpoung e a tawn teh a rathei hmo kasawpoung e, a em kaawm ni teh a muen kathapoung e hah Lebanon mon dawk a kamleng teh Sidar thing e a donghmo hah a la. <sup>4</sup> A kang dawk e a dawn kanaw poung e a khoe teh, tami hno kayawtnaw e ram dawk a kamlengkhai teh, hno yonae khopui dawkvah a ung. <sup>5</sup> Haw e ram cati a tangawn hah a la teh, talai kahawi dawk a paw sak teh, tui moikapap a onae kongteng vah sumpakung patetlah a ung. <sup>6</sup> A roun takhang teh misurkung abu ka rung poung e lah ao. A kangnaw teh mataw aonae koe lah a buk teh, ahnie rahim vah a tangpha ao, akangnaw hoi ka kuep e misurkung lah ao. <sup>7</sup> Hatei, kalenpounge mataw alouke bout ao. Kakawpoung e hoi katha poung e a muen hah a tawn van. Khenhaw! hete misur heh ahni koe lah a kung a yam, ahni hah tui hoi a awi thai nahanelah, a ungae hmuen koehoi ahni koe lah a kang hah a yam. <sup>8</sup> A kang hah a tâco teh kahawipoung e misur lah ao thai nahan, tui moikapap e kongteng ung e lah ao. <sup>9</sup> Bawipa Jehovah ni hettelah a dei. A hmacawn han na ou, a kamyai thai nahan, a tangpha hah kaduek pouh vaiteh, a paw hah khi han na maw, na hna ka dawn e pueng ni hai a kamyai han, a tangpha totouh ka duek hane, kalenpounge bahu hoi moikapap e tami hu a pãnki han na maw. <sup>10</sup> Khenhaw! ka ung nakunghai, a hmacawn thai han na maw, Kanîtholae kahlî ni a hmang toteh, koun ka kamyai han nahoe hmau, a pawnae hmuen dawk ka kamyai han tet pouh telah ati.

<sup>11</sup> Hothloilah BAWIPA e lawk kai koe a pha teh, <sup>12</sup> taran ka thaw e imthung koe vah, dei pouh hete hno kaawm e heh panuek awh hoe hmau dei pouh, khenhaw! Babilon siangpahrang teh Jerusalem vah a tho teh, a siangpahrang hoi kacuenaw a man awh teh, Babilon vah a ceikhai awh. <sup>13</sup> A miphun thung e siangpahrang cati a man awh, lawkkamnae a sak khai awh teh, thama lahoi lawk a kam sak awh, ram dawk e athakaawmnaw koun a ceikhai awh. <sup>14</sup> A uknaeram hah a pabo teh a ma dueng lahoi a kangdue hoe hmau, hatei a lawkkamnae hah caksak lahoi a kangdue thai nahan. <sup>15</sup> Hatei marang hoi tami moikapap ahni koe a poe thai nahan, Izip ram lah laicei patoun hanelah hoi a lathueng vah taran a thaw. A hmacawn han na ou, hot patetlae hno kasakkung ni teh a rungngang thai han na ou.



<sup>16</sup> Kai ka hring e patetlah Bawipa Jehovah ni a dei. Ka bawi pounge e siangpahrang lah kasakkung khosaknae hmuen roeroe dawk thoe ka bo e hah bout a raphoe teh, a lawkkamnae hah a ek teh, ama koe roeroe vah Babilon vah a due han. <sup>17</sup> Taran tuknae koe tami moikapap thei nahanelah monrui hoi rapan a sak nah hoi, Faro e athakaawm ransanaw hoi ka lentoe pounge e tamihu ni hai banghai sak pouh thai mahoe. <sup>18</sup> Bangkongtetpawiteh, lawkkamnae ek lahoi, thoebonae a raphoe, lawk a kâkam hnukkhu vah, hete hnnonaw pueng bout a sak, hatdawkvah, hlout roeroe mahoe.

<sup>19</sup> Hatdawkvah, Bawipa Jehovah ni hettelah a dei. Kaie thoebonae a raphoe teh, ka lawkkamnae hah a ek. Kai kahring e patetlah ahni teh ka pathung roeroe han. <sup>20</sup> Tamlawk hoi ka ramuk vaiteh, kaie masi dawk a kâman han. Babilon vah ka ceikhai vaiteh, hawvah kâlawk eknae, kaie lathueng kâlawk a eknae roeroe dawk lawk ka ceng han. <sup>21</sup> Hahoi ahu thung hoi ka yawng e pueng hah tahloi hoi a due awh han, kacawie hah talai pout totouh a kâkahei awh han, hahoi kai BAWIPA ni ka dei toe tie na panue awh han.

### *Apoutnae koe Isarel tawmrasangnae*

<sup>22</sup> Bawipa Jehovah ni hettelah a dei. Ka rasang pounge e Sidar dawn hah kai ni ka la vaiteh, ka ung han. A lungui e a dawn teh ka khoe vaiteh, kamnuek pounge e mon ka rasang nah koevah ka ung han. <sup>23</sup> Isarel a rasangnae mon dawk ka ung han, a kang a cawn awh han. A paw a paw vaiteh, ka lentoe pounge e Sidarkung lah ao han, a rahim vah tava phunkuep ni kho a sak vaiteh, a tâhlip rahim vah ao awh han. <sup>24</sup> Kahrawng e thingnaw ni kai BAWIPA ni ka rasang e thingkung ka rahnoum sak teh, ka rahnoum e thingkung hah ka rasang sak. Thing hring hah ka ke sak teh, thingke hah hluthlut kanaw sak tie hah a panue awh han. Kai BAWIPA ni ka dei toe, sak hai ka sak toe telah ati.

## 18

### *Kalanhoehe cingthuilawk*

<sup>1</sup> BAWIPA e lawk teh kai koe bout a pha teh,

<sup>2</sup> Isarel ram kong dawkvah hete cingthuilawk a hno awh lahun e hah bangmaw a nginae, a napanaw ni misur paw kathut e a ca awh teh a canaw e a hâ a kip, tie hah.

<sup>3</sup> Kai ka hring e patetlah Isarel kong dawkvah, hete cingthuilawk hah hno e lah awm mahoe toe, telah Bawipa Jehovah ni a dei. <sup>4</sup> Khenhaw! hringnae pueng kaie seng lah doeh ao. Na pa hringnae kaie lah ao e patetlah a capa hringnae hai kaie lah ao. Yonnae ka sak pueng hah a due han.

<sup>5</sup> Hatei, tami lungthin lan pawiteh, kalan e hno, kamsoum e hno hah sak pawiteh, <sup>6</sup> Mon dawk hai catnet laipalah, Isarel imthung meikaphawk koe lahai kangvawi laipalah, a imri e a yu hai kamhnaewng sin laipalah, kampheng lahun e napui hai hnai laipalah, <sup>7</sup> apie lathueng hai yonnae sak laipalah, laibakung ni a hung e lat laipalah, ayâ e hno thama lah lawm laipalah, von ka hlam e tami rawca ka poe e caici lah kaawm e khohna ka poe, <sup>8</sup> apung ka cat hoe e, tangka ka cawi hoe e, yon sak hanelah kâcakupe e hoi, tami hoi tami rahak kalanalah lawk ka ceng e, <sup>9</sup> kaie phunglawknaw tarawi teh kalanalah sak e lahoi ka lawkcengnae naw tarawi pawiteh, tamikalan lah ao teh, a hring roeroe han telah Bawipa Jehovah ni a dei.



<sup>10</sup> Hatei, ka parawt e capa hah, a khe teh, thi kapalawngkung lah ao teh, hote hno pueng a sak teh, <sup>11</sup> A sak hane law sak laipalah, mon dawkvah a canei teh a imri napui hah a kamhnawng sin teh, <sup>12</sup> ka roedeng ka vouththoup pacekpahlek laihoi, a hnopai thama lah lawpnae, meikaphawk khet lahoi panueththo e saksaknae, <sup>13</sup> apung ka cat, tangka kacawi e, lah awm pawiteh, a hring han na maw. Hring roeroe mahoe. Bangkongtetpawiteh, hete panueththo e hno pueng hah a sak. A due roeroe han, a due hane kamcu yonnae a tawn.

<sup>14</sup> Khenhaw! a capa hah khe boilah, a na pa ni a sak e yonnae pueng hah a hmu toteh, a taki teh haw patetlah sak van hoe hahan, <sup>15</sup> mon dawkvah, catnet laipalah, Isarel imthungnaw e meikaphawk hah a hmalah ka khi hoe e, a imri napui hah kamhnawng sin hoe e, <sup>16</sup> apie lathueng hai yonnae ka sak hoe e, hung e hno ka lat hoe e, apihai ka pacekpahlek hoe e, von ka hlam e hah ca hane ka poe e, caici lah kaawm e khohna ka poe e, <sup>17</sup> ka roedeng e tami hloutnae ka poe, apung ka cat hoe ni teh, ka phunglam tarawi pawiteh, a na pa a yonnae kecu dawkwout mahoe, a hring roeroe han.

<sup>18</sup> A na pa teh amae hmaunawng ha boutbout pacekpahlek pawiteh, a hnopai thama lahoi lawpnae, amae miphunnaw dawkwahawihoe hno a sak e yonnae kecu dawkwout han. <sup>19</sup> Hateiteh, bangkongmaw a capa ni a na pa a yonnae hah a khang hoe han, ouk na ti awh. Capa ni kâlawk a tarawi teh lannae a sak teh ka phunglam pueng hoi pâkuem lah tarawi pawiteh, a hring roeroe han. <sup>20</sup> Yonnae ka sak e teh a due han, a na pa ni a na pa yonnae dawkwahawihoe. A na pa ni hai capa yonnae dawkwahawihoe. Tami kalan a lannae aphu teh, ama ni ama ni a coe vaiteh, tamikayon a yonnae phu teh a ma a khang han.

<sup>21</sup> Hateiteh, tamikayon ni a sak e yonnae pueng a ceitakhai teh, kaie phunglawknaw a pâkuem teh, kâlawk hah tarawi laihoi, lannae sak pawiteh, a hring roeroe han, dawkwout mahoe. <sup>22</sup> Kâtapoenae pâkuem pouh e lah awm mahoe, a sak tangcoung e a lannae lahoi a hring han. <sup>23</sup> Tamikayon a duenae dawkvah, lunghawinae katawnnaw, a lamthungnaw ka kamlang takhai teh, hring laipalah teh, telah Bawipa Jehovah ni a dei. <sup>24</sup> Hateiteh, tamikalan ni a lannae a kamlang takhai teh, yonnae sak pawiteh, tamikayon ni a sak e patetlah panueththo e hno a sak toteh, a hring han na ou. a sak e lannae hah panue pouh e lah awm hoe vaiteh, kâlawk tapoenae roeroe dawkvah, yonnae a sak dawkwout roeroe a due han. <sup>25</sup> Hateiteh, Bawipa a sak e pou kâvan hoe ouk na ti awh. Isarel imthungnaw thai awh haw, ka sak e hah pou kâvan nahoe hma. Na sak awh e law teh kâvan boihoe nahoe hma. <sup>26</sup> Tamikalan ni a lannae kamlang takhai lah, payonnae hah sak pawiteh, haw tueng vah a due han, payonnae a sak e dawkwout a due han. <sup>27</sup> Hothloilah tamikayon ni a sak tangcoung e yonnae hah, kamlang takhai lah kâlawk tarawinae lahoi lannae hah sak pawiteh, a hringnae a rungngang han. <sup>28</sup> A lung a ang teh ka lawk a eknae a sak tangcoung e pueng a kamlang takhai dawkvah, a hringnae roeroe hah dawkwout mahoe. <sup>29</sup> Hateiteh Isarel imthung ni, BAWIPA ni a sak e hah kâvan boihoe ati awh. Oe Isarel imthungnaw, ka tawksaknae be a kâvan nahoe hma. Nangmae na tawksak e law teh a kâvan boi yaw maw.

<sup>30</sup> Hatdawkvah Oe Isarel imthungnaw, tami pueng nangmouh na sak awh e patetlah hoi lawk na ceng awh han telah Bawipa Jehovah ni a dei. Kamlang awh nateh, kâ na tapoenae pueng kamlang takhai awh. Hottelah



pawiteh, na yonnae hah na rawpnae lah awm mahoe. <sup>31</sup> Kâ na tapoenae pueng, kâlawk na ek tangcoun e be tâkhawng awh nateh, lungthin katha hoi muitha katha hoi kamthoup awh. Oe Isarel imthungnaw, bangkongmaw na due awh han. <sup>32</sup> Bangkongtetpawiteh, tami a duenae dawkvah, lunghawinae ka tawn boihoei telah Bawipa Jehovah ni a dei. Hatdawkvah, kamlang awh nateh hring awh.

## 19

### *Isarel khobawinaw hanlah kalung*

- <sup>1</sup> Hothloilah, Isarel khobawinaw hanlah kalung na sak pouh hane teh,
- <sup>2</sup> Na manu teh api nama, Sendek napui doeh, a canaw kawkhik laihoi Sendekanaw koe a tabo.
- <sup>3</sup> A kawkhik e a ca buet touh teh sendektan lah ao teh, kahrawngum e moithangnaw kei hanelah na taminaw hai ouk a kei.
- <sup>4</sup> Miphunnaw ni a thai awh teh, kadungpoung e tangkom daw k a pabo awh, sum hoi a taren awh teh, Izip ram daw k a phakhai.
- <sup>5</sup> A manu ni lungpout laipalah ayawmyin lah a ring, bout a sak, sendektanca lah o nahanlah,
- <sup>6</sup> Sendektancanaw koe pou ka paitun e sendektanca lah ao dawkvah, moi kei nahanelah a kamtu teh na taminaw hah a kei.
- <sup>7</sup> Ahnimae moi kamenaw hah a panue teh, ahnimae khopuinaw be a raphoe pouh, a huknae pawlawk daw k ram hoi tami pueng teh kingdi awh.
- <sup>8</sup> Miphunnaw a kamkhueng awh teh, ram pueng ni a tuk awh. Tamlawk rui hoi a kalup awh. Kadungpoung e tangkom dawkvah, a pabo awh.
- <sup>9</sup> Sumrui hoi a pâkhi awh teh, Babilon siangpahrang koe a thokhai awh. Ahnie a pawlawk teh, Isarel mon daw k bout a cai hoei nahan, paungnae im daw k a hruek awh.
- <sup>10</sup> Nange na manu teh nang hoi na kâvan teh tui teng ung e misurkung patetlah ao. Tui apap dawkvah abu a rung teh a paw moikapap a paw.
- <sup>11</sup> Kaukungnaw hane sonron hanelah ka khaw e a kangnaw lah a coung. Abu a rung teh a kang a rasang teh a kamnue.
- <sup>12</sup> Hatei, lungkhueknae bahu hoi a khoe teh, talai daw k ka rawm e lah ao toe. Kanitholae kahlî ni a palek teh a paw kung a ke sak. Hmaipalai hoi kak sak e lah ao toe.
- <sup>13</sup> Atu teh, tui a ohoeinae ka ke e kahrawngum vah ung e lah ao toe.
- <sup>14</sup> A kang daw k hoi hmaipalai a tâco teh, kOUNg a kuet, a pawnaw pueng be a ca toe. A kang awm hoei toe. Kaukungnaw e sonron hanelah, hethel kalungla doeh, khuinae koe hno hane doeh.

## 20

### *Isarel thuengnae*

- <sup>1</sup> A kum sarinae thapa yung panga, hnin hra navah, Isarel kacuenaw ni BAWIPA pacei awh hanelah a tho awh teh, ka hmalah a tahung awh.
- <sup>2</sup> Hahoi BAWIPA e lawk kai koe a pha teh, <sup>3</sup> tami capa, Isarel kacuenaw hah dei pouh. Ahnimouh koe Bawipa Jehovah ni hettelah a dei, Nangmanaw ni kai lawk na pacei hanelah na ka tho awh e na ou. Ka hring e patetlah nangmouh ni na pacei awh hanelah kaawm hoei, telah Bawipa Jehovah ni a dei tet pouh.
- <sup>4</sup> Lawk na ceng mahoei na maw, tami capa lawkceng haw, a napanaw panuethonae hah panuek sak awh. <sup>5</sup> Hahoi ahni koevah, Bawipa Jehovah



ni hettelah a dei. Isarelnaw ka rawinae hnin koehoi, Jakop imthung ka rawi e naw koevah, kut ka dâw totouh Izip ram dawkw ahnimouh koe ka kâpanue sak. Ahnimouh koe ka kut hah ka dâw teh, kai heh BAWIPA na Cathut doeh telah ka ti pouh. <sup>6</sup> Hot hnin dawkw Izip ram hoi na tâcokhai teh ahnimouh han ram ka hruek pouh e khotui hoi sanutui a lawngnae ram, ram pueng thung dawkw ram kahawipoung e ram koe kâenkhai hanelah ka kut ka dâw na hnin dawkvah, <sup>7</sup> ahnimouh koe tami pueng ni na mit hoi na hmu awh e hno panuetho e hah pahnawt awh nateh, Izip ram e meikaphawkw hoi kâkhinsak hanh awh. Kai heh BAWIPA na Cathut lah ka o telah ka dei.

<sup>8</sup> Hateiteh kai hah na taran awh. Ka lawkw ngai awh hoehe. Tami pueng e a mithmu vah hno panuetho e hai pahnawt awh laipalah hottelah hoi a lathueng vah ka lungkhueknae hah kamnue sak hanelah Izip ram thung roeroe vah, ka rabawkw payon han na ou telah ka ti. <sup>9</sup> Hateiteh, a onae Jentelnaw e a mithmu vah, ka min a pathoe thai awh hoehe nahan, ka kâroe teh, Izip ram hoi ahnimouh tâcokhai hanelah ahnimae mithmu vah ka panue sak. <sup>10</sup> Hatdawkvah, Izip ram tâco takhai hanelah, ka dei teh kahrawngum vah ka kâenkhai. <sup>11</sup> Ka phung lam hah ka poe teh, ka lawkcengnae ka hmu sak, hot hah tami ni tarawi pawiteh hottelah hoi a hring awh han. <sup>12</sup> Hothloilah kai BAWIPA heh ahnimouh kathoungsakkung toeh tie a panue thai awh nahan, ka sabbath hai maimae rahak vah mitnout lah ka poe.

<sup>13</sup> Hateiteh, Isarel imthungnaw teh kahrawng vah kai na taranlahoi taran a thaw awh. Ka phunglawknaw hah tarawi awh hoehe. Ka lawkcengnae tarawi vaiteh hringnae lah kaawm hane hah a pahnawt awh. Kaie sabbath hai puenghoi a tapoe awh. Hottelah hoi kahrawngum vah ahnimouh he pahma hanelah ka lungkhueknae ka rabawkw sin mahoehe na ou, telah a ka ti. <sup>14</sup> Ka tâcokhai lahun nah, mit hoi kahmawtnaw e hmalah ka raphoe hoehe nahan, ka mit kâkaram lahoi ka kâroe. <sup>15</sup> Hottelah hoehpawiteh, kahrawngum vah ka poe e khotui hoi sanutui a lawngnae, ram pueng hlak kahawipoung e ram dawkw kâenkhai mahoehe telah ka kut ka dâw totouh ka ti. <sup>16</sup> Ka lawkcengnae a pahnawt awh teh, ka phunglawknaw hah tarawi awh hoehe. Kaie sabbath hah a tapoe awh. Bangkongtetpawiteh, a lungthin teh meikaphawkw koelah pou a kamlang awh. <sup>17</sup> Hateiteh, he pahma hoehe nahanelah, ka mit a pasai teh kahrawngum hai he ka raphoe hoehe.

<sup>18</sup> Hatei, kahrawngum vah a catounnaw koe, na mintoenaw e phunglawknaw hah, tarawi awh hanh, a lawkcengnae hai pâkuem awh hanh, hoehpawiteh a meikaphawknaw hoi hai kamhnawng awh hanh. <sup>19</sup> Kai teh BAWIPA na Cathut lah ka o, ka phunglawknaw tarawi awh nateh, ka lawkcengnae hah pâkuem awh nateh dawn awh. <sup>20</sup> BAWIPA na Cathut lah ka o tie na panue thai awh nahanelah, kaie sabbath hah tarawi awh nateh, maimae rahak vah mitnoutnae lah ao han telah ka ti.

<sup>21</sup> Hatei, a catounnaw taran a thaw awh teh, ka phunglawk tarawi laipalah, lawkw ka dei e tami ni kâhruetcueth lahoi a sak teh, a hring nahanelah kaawm e hah tarawi hanelah pâkuem awh hoehe. Kaie sabbath hai a tapoe awh. Kahrawngum vah kaie lungkhueknae kamnue sak hane lahoi ahnimae lathueng vah ka lungkhueknae hah ka rabawkw sin payon han na ou, telah ka ti. <sup>22</sup> Hatei, ka kut ka hno teh, ka tâcokhai lahun nah kahmawtkung miphunnaw mithmu vah, pâmit lah o hoehe nahan, ka min kecu dawkw ka kâroe. <sup>23</sup> Hothloilah miphunnaw koevah,



ahnimouh kâkayei sak vaiteh, ram tangkuem dawk kâkayei sak han telah kahrawngum vah kut ka dâw totouh ka dei toe. <sup>24</sup> Bangkongtetpawiteh, ka lawkcengnae tarawi awh laipalah, ka phunglawknaw noutna awh hoeh. Kaie sabbath hah a tapoe awh teh, a na mintoenaw e meikaphawk koelah a kangvawi awh. <sup>25</sup> Hatdawkvah, a hring thai awh hoeh nahan lawkcengnae hoi phunglam kahawihoehe hah kai ni hai ka poe van. <sup>26</sup> A camin pueng hmai dawk thueng hanelah, phung lah a tawn awh e thuengnae kecu dawk ahnimouh phurinbenpaha lah ka o sak teh, BAWIPA lah ka o tie a panue thai awh nahan, ahnimouh kakhin sak telah ati. <sup>27</sup> Hatdawkvah, tami capa, Isarel imthung koe lawk dei nateh, ahnimouh koe Bawipa Jehovah ni hettelah a dei, kai koe yuemkamcuhoeh lah a onae dawk hai na mintoenaw ni na dudam awh rah. <sup>28</sup> Ahnimouh poe hane ka kut ka dâw teh, thoe ka bo e ram hoi ka thokhai toteh, mon hoi thingbu ka rung poung a hmu awh nah tangkuem vah, thuengnae a poe awh teh, lungkhuek sak hanelah kaawm e hmaisawi thuengnae naw hah a poe awh. Himuitui hai hote hmuen koe a thueng awh teh, nei thuengnae hai a awi awh. <sup>29</sup> Kai ni ahnimouh koe ouk na ceinae hmuenrasang hah bang nama telah ka ti, hottelah hoi sahnin totouh bamah telah ati.

<sup>30</sup> Hatdawkvah Isarel imthung koevah dei haw, Bawipa Jehovah ni telah a dei, na mintoenaw patetlah mahoima kâkhinsak teh panuetho e lam koelah na kâyawt awh nahoehmaw. <sup>31</sup> Bangkongtetpawiteh, na hmu awh na thueng awh toteh, na canaw hmai dawk na phum awh teh, sahnin totouh na meikaphawknaw dawk na kâkhinsak awh hoeh na maw, hottelah nangmanaw ni pouknae na hei awh hanelah ao na maw. Oe Isarel imthungnaw kai ka hring e patetlah na pacei awh hanelah kai kaawm hoeh telah Bawipa Jehovah ni a dei.

<sup>32</sup> Maimouh tenggam e Jentelnaw hoi Jentelnaw patetlah thing hoi talung bawk hanelah doeh telah na lungthin hoi na ti awh han eiteh, khoeroe coung thai mahoe.

### *Isarel boutthawnae*

<sup>33</sup> Kai ka hring e patetlah thaonae kut hoi, kut dâw nah laihoi, lungkhueknae kamnue sak e lahoi, na uk awh han, telah Bawipa Jehovah ni ati. <sup>34</sup> Miphunnaw thung hoi na tâcokhai han, na kâkayeinae ram thung hoi thaonae kut hoi kutdawnae hoi, lungkhueknae, ka rabawk vaiteh bout na pâkhueng han. <sup>35</sup> Kahrawngkadi kaawm e koevah, na kâenkhai awh vaiteh, haw vah ka mithmu lah lawk na ceng awh han. <sup>36</sup> Izip ram kingdinae koe na mintoenaw lawk ka ceng e patetlah nangmouh koehai ka sak han telah Bawipa Jehovah ni ati. <sup>37</sup> Sonron rahim vah na ceisak awh teh, lawkkamnae kateknae a rahim na ceikhai awh han. <sup>38</sup> Nangmouh thung hoi tarankathawnaw hoi kai taranlahoi kâeknae hah a onae ram koe hoi ka tâcokhai vaiteh, ka thoung sak han. Hateiteh, Isarel ram daw kâen awh mahoe. Hottelah BAWIPA lah ka o tie a panue awh han.

<sup>39</sup> Nangmouh hai Oe Isarel imthungnaw, Bawipa Jehovah ni hettelah a dei. Ka lawk na ngai awh hoeh nahane pawiteh, atuhoi hai namamae meikaphawk lengkaleng bawk awh yawkaw, hatei kathoung ka min heh na poehno awh e lahoi, meikaphawknaw hno e lahoi na khin sak awh mahoe. <sup>40</sup> Bangkongtetpawiteh, kaie mon kathoung, Isarel a rasangnae mon dawkvah, hawvah Isarel imthungnaw hoi ram thung e pueng, hote ram daw kâie thaw a tawk awh han toe. Hatdawkvah, ahnimae lathueng ka lung ahawi han. Hawvah, na poehno e hoi na thuengnae hoi na ya awh e hno pueng hah ka dâw han. <sup>41</sup> Miphunnaw thung hoi, na tâco sak



awh toteh, ram tangkuem hoi na kâkayeinae thung hoi, bout na pâkhueng aw hoi toteh, hmutui patetlah na dâw aw hoi han. Miphunnaw e a mithmu vah nangmouh koe ka thounghae a kamnue han toe, telah Bawipa Jehovah ni a dei. <sup>42</sup> Isarel ram na mintoenaw koe ka kut ka dâw teh, thoe ka bo e lahoi ka kam e thung vah na kâenkhai aw hoi navah, BAWIPA lah ka o e hah na panue aw hoi han. <sup>43</sup> Hawvah, na hringnue hoi na tawk sak aw hoi e na kâkhinsaknae pueng hah, na panue aw hoi vaiteh, hawihoeahnae na sak aw hoi e pueng daw k, namamae na mithmu roeroe vah na kâpanuet aw hoi han. <sup>44</sup> Oe Isarel imthungnaw nangmae na yonae naw, nangmouh na thoenae na tawksaknae, kai ni nangmouh lawk na ceng mahoe h. Ka min kecu daw k nangmae lathueng ka sak toteh, BAWIPA lah ka o tie nangmouh ni na panue aw hoi han, telah Bawipa Jehovah ni ati.

### *Kahrawng hmai*

<sup>45</sup> Hothloilah, BAWIPA e lawk kai koe a pha teh, <sup>46</sup> tami capa, akalah kangvaw hoi, akalae taranlahoi dei hoi, akalae ratu taranlahoi dei hoi. <sup>47</sup> Akalae ram daw k kaawm e ratu koe patuen na dei pou h hane teh, BAWIPA e lawk thai hoi, Bawipa Jehovah ni hettelah a dei, khenhaw! nang daw k hmai ka patawi vaiteh, na thung e thing kahring pueng hoi thingke pueng hai be a kak han, ka kang e hmai roum mahoe h, a ka lahoi atunglah totou h, kai na ka taran pueng hah be a kak aw hoi han. <sup>48</sup> Moithangnaw ni kai BAWIPA heh hmai katâcawtsakkung doeh tie hah a hmu aw hoi vaiteh, hmai roum mahoe h ati, telah tet pou h telah ati. <sup>49</sup> Hottelah kai ni Aiyoe! Bawipa Jehovah, bangnue rumramnae doeh a dei na tet payon vai hoi telah ka ti.

## 21

### *Tahloi*

<sup>1</sup> BAWIPA e lawk kai koe bout a pha teh, <sup>2</sup> tami capa Jerusalem koe lah na minhmai hrueng hoi, kathoung hmu en koe lah taranlahoi lawk hah dei hoi. Isarel ram taranlahoi lawk hah pâpho hoi. <sup>3</sup> Isarel ram koe vah, BAWIPA ni hettelah a dei. Khenhaw! nang teh na taran, a tabu daw k e tahloi ka rayu vaiteh, nangmouh thung e tamikalan hoi tamikathout hoi ka pâmit han. <sup>4</sup> Bangkongtetpawiteh, nangmouh thung e tamikalan hoi tamikathout ka pâmit han. Hatdawkvah, atunglah hoi akalae moithang pueng taranlahoi kaie tahloi a tabu daw k hoi ka rayu vaiteh, <sup>5</sup> Kai BAWIPA ni tahloi a tabu daw k hoi ka rayu tie moithang pueng ni a panue thai nahan, bout ka raseng mahoe h toe, telah ati.

<sup>6</sup> Hatdawkvah, nang tami capa hramki na teh lung ka rek lah ahnima e hmaitung vah pou hram hoi. <sup>7</sup> Bangkongmaw na cingou telah ati aw hoi navah, nang ni kai teh kamthang lawk kecu daw k, ka cingou, a tho han a hna i toe, tamipueng ni pueng hoi a taki aw hoi teh a kut pueng a tha a youn aw hoi han. A lung a pout aw hoi vaiteh, a khokpakhunaw hai a tui lah kamyaw t han. Hote hno teh a tho lahun tie a kong hah Bawipa Jehovah ni lawk a poe e a kuep sak han tie hah bout dei hoi telah ati. <sup>8</sup> Hahoi BAWIPA e lawk kai koe bout a pha teh, <sup>9</sup> tami capa lawk dei nateh, hettelah BAWIPA ni a dei tahloi, tahloi, kahranpoung e lah o teh loukloukkaang sak toe. <sup>10</sup> Takithopoung e kâtheinae o sak hanelah, hransak e lah ao teh, sumpalalik e patetlah a ang hanelah, ka ta e doeh. Nawmnae sak aw hoi han rah na ou. Thingnaw pueng ni banglahai na noutna hoe h e patetlah ka capa e sonron ni na dudam. <sup>11</sup> Hno thai nahanelah hran sak hanelah a poe toe. Hete tahloi heh kathetkung hane kut daw k poe hanelah



hransaknae hoi loukloukkaang sak toe. <sup>12</sup> Tami capa kap nateh hram haw, bangkongtetpawiteh, taminaw hah taran e lah ao vaiteh, Isarel bawinaw pueng taran e lah ao han. Taki ka tho e tahloi hoi ka taminaw hah taran e lah ao. Hatdawkvah, na phai hah ratum. <sup>13</sup> Bangkongtetpawiteh, hethateh tanouknae doeh. Tahloi ni sonron patenghai dudam pawiteh, bangtelah han ne. Sonron hah awm mahoe hoi toe telah BAWIPA ni a dei.

<sup>14</sup> Hatdawkvah, nang tami capa lawk pâpho haw, na kut hah tambei haw, due thainae tahloi hah vai thum touh palik. Theinae tahloi ni amamae rakhan tangkuem ouk ka kâen e, tami a tha ka sai e hah a kalup aw. h.

<sup>15</sup> Lungthin karawknaw, a rawknae hoe apap nahanelah, kahran e tahloi takhang tangkuem koevah, ka hruek toe. Aiyoe! sumpapalik e patetlah a ang, duenae tahloi. <sup>16</sup> Aranglah kamlang nateh bouk nateh kâroesak. Avoilah kamlang nateh kâroesak haw, hahoi hmalah hoiyah bouk haw.

<sup>17</sup> Kai ni hai ka kut ka tambei vaiteh, ka kuep sak mingming han. Ka lungkhueknae kai BAWIPA ni hethah ka dei toe ati tet pouh telah ati.

<sup>18</sup> BAWIPA e lawk kai koe bout a pha teh, <sup>19</sup> tami capa Babilon siangpahrang tahloi a cei nahanelah, lânthung kahni touh sak. Hote lamthung kahni touh e teh, ram buet touh koehoi a tâco han. Lam a kâphinae daw hmuem buet touh rawi nateh, khopui koelah ceinae longkha lah sak haw. <sup>20</sup> Lamthung hah Ammonnaw kho Rabah hoi tahloi a tâco thai nahan sak nateh, Judah ram a lungui e Jerusalem kalupnae hai sak haw. <sup>21</sup> Bangkongtetpawiteh, cungpam rayu hanelah Babilon siangpahrang teh lamthung kahni touh a kâcuna koe a kangdue, palanaw mak a kalawt teh, Terah meikaphawk lawk a pacei, a thin hah a khet.

<sup>22</sup> Cungpam a rayunae koe a rang lae kut daw Jerusalem hah a kamnue. Rapan raphoenae hoi tarantuknae hramkinae a pawlawk takhang koe tumdum e rapan raphoe nahane monrui paten hane hoi tungdumnae sak hane hoi,

<sup>23</sup> ahnimouh hoi lawkkamnae kasakkungnaw e hmaitung vah, kalan-hoehe cungpam rayunae patetlah ao. Hateiteh la e lah ao thai nahan, a payonnae a pahnim hoe hah nahan a thokhai han.

<sup>24</sup> Hatdawkvah, Bawipa Jehovah ni hettelah a dei, na payonnae hah pahnim hoe hah nahanelah na sak kecu daw, kâlawk na eknae a kamnue. Hottelah na sak aw h e hnaw pueng daw na yonnae pou a kamnue teh, pahnim hoe e lah na o daw vah, kut daw man e lah na o aw han.

<sup>25</sup> Hahoi nang Isarel kahrawikung, ka kamhnawng e, na yonnae rektapnae hnin roeroe a pha toe. <sup>26</sup> Bawipa Jehovah ni hettelah a dei, kahrawikung e lupaw teh tâkhawng pouh nateh, bawilukhung hai tâkhawng pouh. Hethateh, ama boiboe lah mahoe hoi, kârahnoum hah tawmrasang aw h nateh, tawmrasang e hah kârahnoum sak aw. <sup>27</sup> Bungling lah ka bang han, bungling lah ka bang han, bungling lah ka bang han. Katawnkung a tho hoehroukrak hot teh awm mahoe hoi, hothateh ama koe vah ka poe han telah ati.

### *Ammonnaw katarankung tahloi*

<sup>28</sup> Hahoi nang tami capa, lawk dei haw. Hettelah dei, Bawipa Jehovah ni Ammon miphun kong hoi a pathoenae kong daw, hettelah a dei. Tahloi tahloi rayu e lah ao toe. Tami theinae hoi kahmasaknae daw vah sumpapalik e patetlah a ang sak toe. <sup>29</sup> Kamnuenae kaphawk na hmu sak teh tahloi teh tamikayon due hanelah, a hmâ ka cat e, a yonnae hnin a poutnae a pha hane, a lahuennaw daw ka cuek han ati navah laithoe doeh a dei aw.



<sup>30</sup> Na tahloi hah a tabu dawk pâseng, nang na tâconae hmuen, na khenae roeroe koevah, nange na kong lawk ka ceng han.

<sup>31</sup> Ka ngaihoehnae hah na lathueng vah ka awi vaiteh, ka lungkhueknae hmai lah na lathueng vah ka patawi han, tami a nuen ka mathout raphoe kathoumpoung e kut dawk na raphoe han. <sup>32</sup> Hmai lah patawi hanelah na o vaiteh, ram lungui vaihma thi hah a lawng han. Pou panue e lah na awm mahoe toe, bangkongtetpawiteh, kai BAWIPA ni ka dei toe tet pouh telah ati.

## 22

### *Jerusalem yonnae*

<sup>1</sup> Hothloilah, BAWIPA e lawk hah kai koe a pha teh, <sup>2</sup> nang tami capa, thi ka Palawng e khopui hah lawk na ceng hah na maw, Bokheiyah panuet a thonae naw hah panuek sak. <sup>3</sup> Ahnimouh koe Bawipa Jehovah ni hettelah a dei. Amae tueng roeroe navah thipalawngnae khopui atueng a pha nahanelah, amahoima kâkhinsak hanelah meikaphawk hah a sak. <sup>4</sup> Tami hringnae na thei e lahoi yonpen e lah na o teh meikaphawk na sak e dawkvah na kâkhinsak. Namae na hnin na hnai sak teh, na kum apoutnae meimei a pha toe. Hatdawkvah, miphunnaw na pathoenae hoi ram pueng ni dudam e lah na o sak han. <sup>5</sup> Na tengpam e taminaw hoi lamhla e taminaw ni pathoenae hoi pacekpahleknae hoi ka kawî e patetlah na panuikhai han.

<sup>6</sup> Khenhaw! Isarel ukkungnaw ni nangmouh thi Palawng hanelah a thaonae rip a hno awh. <sup>7</sup> Nangmouh thung manu na pa hah a dudam awh teh, nangmae rahak alouke miphun khok hoi a coungroe awh teh, nangmouh dawk e nara hoi lahmai hah banglahai noutna awh hoeh. <sup>8</sup> Nang ni kaie thoungnae naw banglahai noutna hoeh e lah na sak toe. Kaie sabbath hninnaw na tapoe toe. <sup>9</sup> Namamouh thung e tami thipalawng han na ngai teh, thuengnae moi, tami tangawn ni a ca awh, hno kathout ka sak e ao awh. <sup>10</sup> Nangmouh thung dawk a na pa e yu hah caicinae na ramuk awh hoeh. Kampheng lahun e napui hai a yonkhai awh toe. <sup>11</sup> Nangmouh thung dawk tami tangawn ni amae imri yu koe panuetho e hno a sak awh toe, a langa a kamhnawngkhai awh toe, tangawn ni a tawncanu, a na pa e canu hah a pacekpahlek awh. <sup>12</sup> Nangmouh thung dawk tami theinae han lah tadawng hno hai na la awh, apung na ca teh, tangka na cawi awh, imri e hnopai na lawp awh.

<sup>13</sup> Hatdawkvah, nama ni na pâkhueng e hnopai namamouh thung dawk thi na Palawng e kecu dawk kai ni kut ka tambei sin han. <sup>14</sup> Kai ni nang lawk na ceng toteh, na lungthin na cak sak thai han na ou. Na kut hai a tha ao thai han na ou. Kai BAWIPA ni ka dei tangcoung e patetlah ka sak han. <sup>15</sup> Nang hai ram miphun tangkuem koevah, na kâkayeï sak han. Hateiteh, na khinnae hah be kahma sak han. <sup>16</sup> Miphunnaw e hmaitung vah mahoima na kâkhinsak. BAWIPA lah ka o tie na panue han ati tet pouh telah ati.

### *Tahmanghmai*

<sup>17</sup> BAWIPA e lawk kai koe a pha teh, <sup>18</sup> tami capa Isarel imthung hah kai hanelah sumei lah doeh ao. Ahnimanaw teh sôlêi e, tahmanghmai dawp phum e, rahum paling, rahum pangaw, sum hoi ngunei patetlah doeh ao awh. <sup>19</sup> Hatdawkvah Bawipa Jehovah ni hettelah a dei. Ei rumram lah na o awh dawkvah, khenhaw! Jerusalem kho lungui na



pâkhueng awh. <sup>20</sup> Ngun, rahum paling, rahum pangaw, sum, konlawk naw hmai patawi sin teh a tui lah kamyawt hanelah, thawngnae dawk khuk papawp e patetlah kai teh ka lung puenghoi a khuek teh, nangmouh teh kho lungui vah na pâkhueng awh vaiteh, atui lah na kamyawt sak han. <sup>21</sup> Atangalah na pâkhueng awh vaiteh, kaie ka lungkhueknae hmai, ka patawi vaiteh, nangmouh teh kho thung atui lah na kamyawt awh han. <sup>22</sup> Ngun thawngnae dawkvah atui lah kamyawt e patetlah nangmanaw teh kho thung vah atui lah na kamyawt awh vaiteh, kai BAWIPA ni nangmae lathueng vah, kaie ka lungkhueknae ka awi toe tie hah na panue awh han telah ati.

### *Isarel kahrawikungnaw hawihoehnae*

<sup>23</sup> BAWIPA e lawk kai koe a pha teh, <sup>24</sup> tami capa ahni koe dei pouh nang teh, lungkhueknae ahni dawk kho ka rak hoeh e, khotui hah ka dawp hoeh e ram lah ao. <sup>25</sup> Hote ram dawkvah, profetnaw teh a kâyauk awh toe. Ka huk ni teh moi ka kei e sendek patetlah taminaw a ca awh. Hno kuemnae hoi aphu kaawm e hnopainaw a lawp awh toe. Khothung vah lahmmainaw moikapap lah ao sak awh. <sup>26</sup> Ahnimae vaihmanaw ni hai kaie kâlawk a ek awh teh, kaie a thoungnae hmuen hai a khinsak awh. Kathounge hoi kathounghoehe hoi kapek awh hoeh. Kathounge hoi kathounghoehe mak kâkalawtsak awh, kaie sabbath hnin hai a kâpahnim sak awh.

<sup>27</sup> Kahrawikungnaw ni hai moi ka kei e Asuinaw patetlah ram thung ao awh teh, kamsoumhoehe apung a tawng awh teh, tami hringnae a thei awh. <sup>28</sup> Ahnimae profetnaw ni thungpangaw a hluk awh teh, kaphawk e kamnuenae hah a hmu awh. Laithoe lahoi cungpam a rayu pouh awh. BAWIPA ni banghai a dei hoeh nakunghai, Bawipa Jehovah ni hettelah a dei, telah ouk ati awh. <sup>29</sup> Khocanaw hai rektapnae tahloi hoi a tuk awh, ka roedengnaw hah pacekpahleknae Jentelnaw hai kahawihoehe lahoi a pacekpahlek awh. <sup>30</sup> Ram hah ka raphoe hoeh nahan, rapan ka sak hane hoi ram e a yueng lah kai han e ka kangdout hanelah ahnimouh koe ka tawng, hatei ka hmawt hoeh. <sup>31</sup> Hatdawkvah, ka lungkhueknae teh ahnimae lathueng ka rabawk teh, ka lungkhueknae hmai hoi ka sawi. A hringnae hoi kamcu lah ahnimae lathueng ka pha sak e doeh telah Bawipa Jehovah ni a dei, tet pouh telah ati.

## 23

### *Kâyawt e hmaunawnggha roi*

<sup>1</sup> BAWIPA e lawk kai koe bout a pha teh, <sup>2</sup> tami capa napui e ca roi kahni touh <sup>3</sup> Izip ram vah a kâyo roi teh, a nawca hoi a kâyo roi toe, hatdawkvah a sanu hah a pânam pouh awh teh, a tanglanae banglahai noutna awh hoeh. <sup>4</sup> Kacuehnawn e min teh Oholah, a nawnggha teh Oholibah doeh. Kaie lah ao awh teh napui tongpa hah a khe awh. A min lah Oholah teh Samaria tami doeh, Oholibah teh Jerusalem doeh.

### *Kacue e napui Samaria*

<sup>5</sup> Oholah teh kaie lah ao hnukkhu a kâyo teh, a lungpataw e a imri Assiria teh a noe. <sup>6</sup> Hnipaling hoi kamthoup e ukkung hoi lawkcengkungnaw, a pahren e thoundounnaw, Marangransanaw marangnaw dawk kâcuinaw hah, <sup>7</sup> hete Assiria thoundoun kahawi pueng koevah, a kâyo teh a mit hoi a nôe e meikaphawk koevah a kâkhinsak. <sup>8</sup> A nawca hoi a sanu a pânam pouh teh a ikhai awh dawkvah, Izip lahoi a kâyo e hah kâhat hoeh. Ahnimouh ni hai a cuk awh nahanelah, a lathueng vah lungkhuek ati



nahanelah a hno awh. <sup>9</sup> A pahren teh mit ni a nôe e, Assiria kut roeroe dawkvah ka man sak. <sup>10</sup> Hetnaw ni caici lah ao nahan angki a rading pouh, a canu hoi a capanaw a la pouh. Ama haiyah tahloi hoi a thei awh teh, napuinaw thung dawк kamthang poung e lah ao. A lathueng vah lawkceng e patetlah a kuep sak.

### *A nawngha napui Jerusalem*

<sup>11</sup> A nawngha Oholibah ni hetheh a hmu. Hateiteh, a hmau hlak hai noe-nae hoe a len, a kâyonae hai a hmau hlak vah hoe a nut. <sup>12</sup> Assirianaw e imri ram kaukkungnaw hoi, lawkcengkung ngai han kaawm e thoundoun, Marangransanaw marang van kâcuinaw, kahawipoung lah kamthoup e hah a mit hoi a noe. <sup>13</sup> A khin e hah ka hmu, kahni touh hoi lamthung rei kâvan e a dawn awh. <sup>14</sup> Hateiteh, a kâyonae hoe a nut sak teh, tongpa meikaphawк rapan dawк kamnuek e Khaldeannaw e meilam, paling e lahoi kamthoup e, <sup>15</sup> a keng dawк taisawm kâyeng e, a lû dawк a pei lupawк kâmuk e, siangpahrang e mei koung ka lat e, Khaldean ram a tâconae ram, Babilonnaw patetlah a hmu. <sup>16</sup> Ahnimouh a hmu awh tahma tang a ngai awh teh, ahnimouh koe Khaldean totouh patounenaw a patoun. <sup>17</sup> Babilonnaw hah ahni koevah napui tongpa yonnae ikhun dawк a tho awh teh, a cuknae lahoi a khin sak awh teh, amahoima panuetho e lah be a kangcoung sak awh teh a khin awh. <sup>18</sup> Hottelah hoi a kâyonae a kamnue sak teh, caici lah onae hah a kamnue sak, a hmau ka panuet e patetlah a nawngha hai ka panuet van. <sup>19</sup> Hatei, a naw lahunnae Izip ram dawк a kâyo awh e hah pahnim pouh hoeh, hoehoe a kâyo awh. <sup>20</sup> Hahoi kaipkhainaw e a tak teh la e tak patetlah a yangtui teh marang e yangtui doeh toe. <sup>21</sup> Hettelah na nawca nah na cuknae, Izipnaw ni na sanu a pânam pouh e hah bout na pouk rah.

### *Jerusalem lathueng lawkcengnae*

<sup>22</sup> Hatdawkvah Oe Oholibah, hettelah Bawipa Jehovah ni a dei. Khenhaw! kayonkhaikung, na lungthin hoi na maithoe e hah ka coun vaiteh, a hmuen tangkuem koehoi ka tho sak vaiteh, na tuk sak han. <sup>23</sup> Babilon, Khaldean, Pekod, Shoa, hoi Koa hoi ahnimouh koe kaawm e Assirianaw hoi, abuemlahoi ngai ka tho poung e thoundoun, ukkung hoi lawkcengkung, bawi hoi tami a min kamthang abuemlahoi marang dawк kâcui laihoi a tho awh han. <sup>24</sup> Tarantuknae puengcang, tarantuknae leng, leng hoi tamihupui hoi, a tuk awh han. Saiphei kalen kathoung sumluhuemnaw hoi, ahnimouh koe lawkcengnae hah ka poe han. Lawк a ceng awh e boiboe lah nange lathueng a kuep sak han. <sup>25</sup> Nang e lathueng utnae hah kamnue sak e lahoi, ka hring e hah tahloi hoi a due awh han. Na canu na capa naw hoi na lawp awh han, a hring nah thung hmai ni a kak awh han. <sup>26</sup> Na khohna hah na rading pouh awh vaiteh, na kamthoupnae kahawi poung e hah koug na la pouh awh han. <sup>27</sup> Na cuknae hoi Izip ram hoi na kâyonae hah na kâhat sak han. Hottelah ahnimouh koe lah na mit na hrueng mahoe toe. Izip ram teh na pâkuem mahoe toe.

<sup>28</sup> Bangkongtetpawiteh, Bawipa Jehovah ni, hettelah a dei khenhaw! na hmuhma poung e, na lungthin dawк hoi na hmuhma e naw kut dawк na man sak han. <sup>29</sup> Na hmuhma katang awh han. Na tawк awh e a pawhiknaw hah, na la pouh awh han. Caici lah na hruek awh han, na kâyonae caici lah, na cuknae hoi na kâyonae hah kamnue sak e lah ao han. <sup>30</sup> Hete hnonaw heh nange lathueng a pha han. Alouke miphun koehoi na kâyo teh a meikaphawкnaw dawк na kâkhinsak dawkvah, <sup>31</sup> na hmau e



lamthung na dawn. Hatdawkvah, a neinae manang hah na kut dawkh na poe han telah a ti.

<sup>32</sup> Bawipa Jehovah ni hettelah a dei. Na hmau e a neinae manang kalenpounge thung hoi na nei vaiteh, pacekphahleknae hoi panuikhai e lah na o han. Bangkongtetpawiteh, hote manang dawkh moikapap a kâen dawkvah.

<sup>33</sup> Yamuhrinae hoi lungmathoenae hoi na kawi vaiteh, kângairunae hoi rawknae, na hmau Samaria e manang hoi he na nei han.

<sup>34</sup> Na nei vaiteh be na yawn han. Manang na kâbang sak vaiteh, a sanu hah hawng pouh han, bangkongtetpawiteh kai ni ka dei toe telah Bawipa Jehovah ni a dei.

<sup>35</sup> Hatdawkvah Bawipa Jehovah ni hettelah a dei. Kâ na poe na hnin teh na kamlang takhai dawkvah, na cuknae hoi na kâyonae phu hah na phu hanelah ao.

### *Ahnmouh roi e lathueng lawkcengnae*

<sup>36</sup> Hothloilah BAWIPA ni kai koe lawk bout na dei pouh, tami capa Oholah hi Oholibah teh lawk na ceng han na maw. Panuet a thonae hah ahnmouh koe na pâpho han. <sup>37</sup> Bangkongtetpawiteh, a uicuk awh, a thi hah a kut dawkh a kâhluk teh, amamae meikaphawkh koe a kâyo awh. Kai hanelah a khe e a capanaw hah, ahnmouh koe hmaisawî thueng hanelah a poe awh. <sup>38</sup> Hothloilah kai koe hetheh a sak awh, ahnmouh ni ka min kathoung hah a khin sak awh teh, kaie sabbath hai a tapoe awh. <sup>39</sup> Amamae meikaphawkh hanelah a canaw a thei awh hnukkhu, a amanaw letlang hah, kaie hmuen kathoung kamhnawng sak hanelah a kâen awh. Khenhaw, hettelah ka imthung roeroe vah ouk a sak awh.

<sup>40</sup> Hat dueng nahoe hah, kho hlanae koe kaawm e hah a tho nahan lawk na thui awh teh, patoune hah na patoun awh. Khenhaw a tho awh teh, ahnmouh kecu dawkh na kamhluk teh, na mit dawkh puk nahluk teh, aphunphun lah kamthouppnae hoi na kamthoup. <sup>41</sup> Kahawi e tahungnae dawkh na tahung teh, a hmalah caboi na hung teh hmutui hoi satui hah hote hmuen koe na pâhung. <sup>42</sup> A nawmnae lahoi taminaw a hramnae hai ka thai. Alouke taminaw hoi kahrawng hoi rei a tho awh teh, a kut dawkh laikaw, a lû dawkh kahawipoung e bawilakhungnaw a kâmu, yamu ka parui e hai a thokhai awh. <sup>43</sup> Kai ni ka uicuk tangcoung e napui hah a yonkhai ngai awh han na maw telah ka ti. <sup>44</sup> Kâyawtnaw koe a cei awh toteh, ahnmouh koe mingming doeh a kâen awh. Hottelah ka cuk e napui Oholah hoi Oholibah koe a kâen awh. <sup>45</sup> Hateiteh, tamikalan ni ka uicuk e hoi kaawm e napui hoi ka tami ka thet e napui lawkceng e patetlah lawk a ceng awh han. Bangkongtetpawiteh, ka uicuk e hoi kaawm e a kâbet .

<sup>46</sup> Bangkongtetpawiteh, Bawipa Jehovah ni hettelah a dei. Nangmouh taran e lahoi tamihu hah ka coun han. Na lawp awh vaiteh, ka patawpoung lah na katin sak han. <sup>47</sup> Hahoi kamkhueng e tamihu ni talung hoi na dei awh han. Tahloi hoi na bouk awh vaiteh, a canunaw hoi a capanaw a thei awh han. A imnaw hai hmai be a sawi pouh. <sup>48</sup> Napuinaw pueng ni, cuknae hah sak hane nahoe hah tie a panue thai awh nah, het patetlah cuknae hah ram thung hoi ka pahma han. <sup>49</sup> Namamae lathueng na cuknae hah a moi na pathung awh vaiteh, meikaphawkh yonnae hah na khan awh han. Hahoi kai heh Bawipa Jehovah lah ka o tie na panue awh han telah a ti.



## 24

*Hlaam bangnuenae*

<sup>1</sup> A kum tako thapa yung hra hnin hra hnin BAWIPA e lawk kai koe bout a pha teh, <sup>2</sup> tami capa hete hnin sahnin e hnin hah thun haw, hete hnin roeroe dawkvah, Babilon siangpahrang ni Jerusalem tuk hanelah a kamtawng. <sup>3</sup> Taran kathâw e imthung koevah, bangnuenae lawk dei haw. Ahnimouh koe Bawipa Jehovah ni hettelah a dei. Hlaam hah khueng haw, hmai patawi sin nateh, a thung vah tui hai hlun haw.

<sup>4</sup> A thung vah moituen hrueng nateh, kahawi e moi a tak pueng hah a phai a loung a hru hah kahawicalah kingracet haw.

<sup>5</sup> Saringnaw thung dawk e kahawipoung e hah lat nateh, a rahim vah thing kapappoung rahawng, moi hah hlakhlak tangdawk naseh, a hrunaw hah dik hmin naseh.

<sup>6</sup> Hatdawkvah Bawipa Jehovah ni hettelah a dei. Tami ka thet e khopui, ka tangdawk e moi hlaam ka ekko ni teh kaawm rae hlaam teh a yawthoe. Moituen buet touh hnukkhu buet touh rasat haw.

<sup>7</sup> Bangkoktetpawiteh, a palawng e thi hah amae thung ao teh, lungsong van a hruek. Vaiphu hoi ramuk hanelah talai dawkvah a rabawk hoehe.

<sup>8</sup> Moipathung hanelah lungkhueknae a tâco thai nahane lahoi ramuk e lah ao hoehe nahan, thipaling e hah lungsong dawk ka awi toe.

<sup>9</sup> Hatdawkvah, Bawipa Jehovah ni hettelah a dei. Thi ka palawng e khopui teh a yaw a thoe, kai ni hai moikapap lah thing ka rahawng sin han.

<sup>10</sup> Hmai sut patawi sin awh nateh, thing moikapap lah rahawng sin awh. Moi hah dik kahmincalah thawng awh, a moi hah katupoung lah a hru pueng hai he kang naseh.

<sup>11</sup> Hmai patawi e van hlaam hah ahrawng lah khueng haw.

<sup>12</sup> Hmawtcei totouh ka thawng nakunghai, moikapap lah sumei tâcawt mahoehe. Hmai ni hai kang thai hoehe. <sup>13</sup> Na kamhnawngnae teh na cuknae lah ao teh, na pâsu ei, na thoung kalawn hoehe dawkvah, na lathueng vah ka lungkhueknae pueng a pha hoehroukrak teh, nâtuék haiyah na kamhnawngnae koehoi thoung sak e lah na awm mahoehe toe. <sup>14</sup> Kai BAWIPA ni yo ka dei toe. Ka phat roeroe han. Bangkoktetpawiteh, kai kama ni ka sak han, hnuklah kâhnawn mahoehe. Ka pasai mahoehe, pankângai mahoehe, na hringnuen hoi na tawksak e hoi kamcu lah Bawipa Jehovah ni a dei telah tet pouh telah ati.

*Profet yu a due*

<sup>15</sup> BAWIPA e lawk kai koe a pha teh, <sup>16</sup> tami capa khenhaw! vaitalahoi na mitkhet khuektinae hah na takhoe pouh han. Na kângaikâthung mahoehe. na kap hai na kap mahoehe. Na mitphi hai bawt mahoehe. <sup>17</sup> Arulaho cingou haw. Tamikadout hanelah khui hanh. Luheu huem nateh, khokkhawm hah khawm haw. Na pahni huem hanh, ka roedengnaw e bu hai cat hanh telah ati. <sup>18</sup> Hottelah amom lah tamimaya koe lawk ka dei teh, tangmin lah ka yu teh a due, amom lah kê na poe e patetlah ka sak. <sup>19</sup> Tami ni hettelah a sak e heh kaimouh hanelah, bang a ngainae ne, na dei pouh mahoehe maw telah ati.

<sup>20</sup> Hottelah kai ni ka pathung, BAWIPA e lawk kai koe a pha teh, <sup>21</sup> Isarel imthung koevah dei pouh, Bawipa Jehovah ni hettelah a dei. Thai haw, kaie hmuen kathoung, nangmae na thaonae na kâoupnae nangmouh ni na khet han na ngai awh e, na kâoup e kai ni kakhin sak vaiteh, na canaw



hoi hnukkhu lah na cei takhai awh e hah tahloi hoi a due awh han. <sup>22</sup> Kai ni ka sak e patetlah na sak awh van han. Na pahni na huem awh mahoe. Ka roedengnaw e rawca na cat mahoe. <sup>23</sup> Luhuem na lû daw k na huem awh vaiteh, khokkhawm hai na khawm awh han. Khuikanae awm mahoe. Namamae na yonnae daw k na kahmakata awh vaiteh, buet touh hoi buet touh na kâkhuikhai awh han. <sup>24</sup> Het patetlah Ezekiel hah nama hanelah khetsin hanelah awm vaiteh, a sak e patetlah na sak awh van han, heteheh a pha toteh, Bawipa Jehovah lah ka o tie na panue awh han telah ati telah ka ti.

<sup>25</sup> Hahoi nang tami capa, ahnimae rapanim, konawmnae, bawilennae, mitnoenae, lungradueknae thoseh, na canaw hah kai ni ka pâmit torei teh, <sup>26</sup> hote hnin roeroe navah, ka yawng e hah nang koe tho vaiteh, hothah na thai sak han. <sup>27</sup> Hot hnin torei teh, ka yawng e hoi a kâhmo vaiteh, na pahni na ang han, lawk na dei vaiteh, duem na awm mahoe toe, hottelah ahnimouh hane mitnoutnae lah ao vaiteh, BAWIPA lah ka o tie a panue awh han telah ati.

## 25

### *Ammonnaw lathueng pâphoneae*

<sup>1</sup> BAWIPA e lawk kai koe a pha teh, <sup>2</sup> tami capa Ammonnaw kangdout sin haw, ahnimouh taranlahoi pâpho. <sup>3</sup> Ammonnaw koevah, Bawipa Jehovah e lawk hah thai awh, Bawipa Jehovah ni hettelah a dei, hmuen kathoung hah na khin sak lahun navah, Isarel ram taran lahoi, raphoe lah ao lahun nah, Judah imthung hah san lah a hrawi navah, haha! telah na ti dawkvah, <sup>4</sup> nang teh Kanîtholae taminaw koe a coe awh hanelah na poe han, nang dawkvah roenae rim a sak awh vaiteh, haw e hmuen koe ao awh han, nange a pawhik a ca vaiteh, nange maito sanutui a nei awh han. <sup>5</sup> Rabbah kho teh kalauk im lah ka sak vaiteh, Ammon hah saringhunaw a tabonae lah ka coung sak han, hottelahoi BAWIPA lah ka o tie a panue awh han.

<sup>6</sup> Bangkongtetpawiteh, Bawipa Jehovah ni hettelah a dei, Isarel ram thung vah na kut na tambei teh, na khok na pano, a rawknae kong dawkvah, lungthin abuemlah na lunghawi dawkvah, <sup>7</sup> kenhaw! na lathueng vah ka kut ka dâw teh, miphunnaw koe lawphno patetlah na man sak han. Ram pueng koehoi nang teh na thei vaiteh, hote ram daw k hoi kOUNG na pâmit han. Na raphoe vaiteh, BAWIPA lah ka o tie hah na panue han telah ati.

### *Moab lathueng pâphoneae*

<sup>8</sup> Bawipa Jehovah ni hettelah a dei, Moab hoi Seir ni kenhaw! Judah imthung teh miphun alouke patetlah doeh ao van telah ati awh dawkvah, <sup>9</sup> kenhaw! Moab khopui e ram, a khopui e khorî hah kamceng sak vaiteh, ka lentoe e ram Bethjeshimoth, Baalmeon Kiriathaim naw hah, <sup>10</sup> Ammonnaw hah miphunnaw thung daw k hoi pou panuekhai e lah o hoeh nahan, Kanîtholae taminaw a coe hane ham hah, Ammonnaw hoi cungtalah ka poe han. <sup>11</sup> Moab ram daw k lawkcengnae hah ka kuep sak vaiteh, BAWIPA lah ka o tie a panue awh han telah ati.

### *Edom lathueng pâphoneae*

<sup>12</sup> Bawipa Jehovah ni hettelah a dei. Edom ni Judah imthungnaw taranlahoi moi a pathung teh, a mahmaw k lahoi ahnimae lathueng vah, kalenpoung lah yonnae a sak. <sup>13</sup> Hatdawkvah, Bawipa Jehovah ni hettelah a dei. Edom lathueng vah, ka kut ka dâw vaiteh, amae thung hoi tami



hoi saring he ka raphoe han. Teman kho teh kingdi sak han. Dedan totouh tahloi hoi a rawp awh han. <sup>14</sup> Ka tami Isarelnaw e kut hoi a moi ka pathungnae hah, ka pha sak han, Edom e lathueng vah ka lungkhueknae hoi ka lungreithainae patetlah a sak awh han. A moipathungnae pawlawk dawkh hoi a panue awh han telah Bawipa Jehovah ni a dei.

### *Filistin lathueng pâphonae*

<sup>15</sup> Bawipa Jehovah ni hettelah a dei, Filistinnaw ni ayan hoi na maithoe awh kecu dawkvah, tami thei ngainae lungthin hah tawn laipalah, moipathung awh dawkvah, <sup>16</sup> Bawipa Jehovah ni hettelah a dei, khenhaw! Filistinnaw taranlahoi ka kut ka dâw vaiteh, Kherethnaw hah tâkhawng teh, tuipuipaling teng e kacawie hah be ka raphoe han. <sup>17</sup> Ka patawpoung e tounnae hoi ka patawpoung lah moi ka pathung han, hot patetlah ahnimae lathueng vah, moi ka pathung toreih teh, BAWIPA lah ka o tie hah a panue awh han, telah ati.

## 26

### *Taire lathueng pâphonae*

<sup>1</sup> A kum hlaibun, thapa yung pasuek, hnin pasuek dawkvah, hettelah doeh, BAWIPA e lawk kai koe a pha. Tami capa Taire ni Jerusalem taranlahoi haha! miphunnaw e takhang lah kaawm e a rawk toe khe, kai koe lah a kamlang teh, koug raphoe lah ao vaiteh, kai kama law teh, a cak han telah ati. <sup>2</sup> Tami capa Taire ni Jerusalem taranlahoi haha! miphunnaw e takhang lah kaawm e a rawk toe khe, kai koe lah a kamlang teh, koug raphoe lah ao vaiteh, kai kama law teh, a cak han telah ati. <sup>3</sup> Hatdawkvah, Bawipa Jehovah ni telah a dei, khenhaw! Oe Taire, kai ni na taran, tali ni tuicapa a thaw sak e patetlah nang nama taranlahoi miphun moikapap nang koe ka tho sak han. <sup>4</sup> Taire rapan hah a raphoe awh vaiteh, imrasangnaw hah a raphoe awh han. Ama koehoi vaipuh hah kathoungcalah ka hui pou vaiteh, ka ke e lungsong lah ka coung sak han. <sup>5</sup> Tali lungui e tamlawk yangda rumram nahanelah ao han, bangkongtetpawiteh, kai ni ka dei toe, telah Bawipa Jehovah ni a dei, hottelah miphunnaw hanelah lawphno lah ao awh han. <sup>6</sup> Kahrawngum kaawm e a canu hah tahloi hoi thei e lah ao han, hat toteh, BAWIPA lah ka o tie a panue awh han.

<sup>7</sup> Bangkongtetpawiteh, Bawipa Jehovah ni hettelah a dei, khenhaw! Taire taranlahoi Babilon siangpahrang Nebukhadnezar, siangpahrangnaw e siangpahrang teh atunglae ram lahoi marang hoi marangransanaw hoi tami moikapap hoi ka thokhai han. <sup>8</sup> Na canu hah kahrawngum vah tahloi hoi a thei awh han. Nang na rungngang nahanelah rapan hah a sak awh vaiteh, nang na tuk nahanelah ravo a sak awh vaiteh, ahnimouh taranlahoi bahlingnaw a sin awh han. <sup>9</sup> Nang e rapannaw avanglah takhang a raphoe nahanelah a sak awh vaiteh, cakâ hoi imrasang hah a raphoe awh han. <sup>10</sup> Kapappoung e marang kecu dawkh, vaipuh hoi muen ramuk e lah ao han, raphoe e khopui dawkvah, tami ouk a kâen e patetlah na takhang dawkh a kâen awh han, na takhang dawkh a kâen awh navah, marangransanaw e pawlawk hoi tarantuknae leng pawlawk dawkh rapan rasang hah a kâhuet han. <sup>11</sup> Na lamthungnaw hah marang khoksamen hoi be a katin awh vaiteh, na taminaw hah tahloi hoi a thei awh han. Ka rasang e na rapan hah talai dawkh be a rawp awh han. <sup>12</sup> Na tawntanae hah lawphno lah koug a la awh han, na hnopai pueng be a rawk han, na rapan hah a tip vaiteh, kahawipoung e na im hah a raphoe awh han, na



thing, na talung hoi na talai kahawinaw hah tui dawk be a tâkhawng awh han. <sup>13</sup> La na sak pawlawk hah ka roum sak vaiteh, na ratoung pawlawk thai e lah awm mahoeah toe. <sup>14</sup> Ka ke e lungsong lah ka coung sak han, tamlawk yangda hanelah ka coung sak vaiteh, na kangdout sak mahoeah toe. Bangkongtetpawiteh, kai BAWIPA ni ka dei toe telah Bawipa Jehovah ni a dei.

<sup>15</sup> Bawipa Jehovah ni Taire koevah, hettelah a dei, nangmouh koevah kâtheinae ao. A hmâ ka cat e a hram toteh, na rawpnae a pawlawk dawk ramlouknaw hah a kâhuen mahoeah namaw. <sup>16</sup> Tali dawk e kahrawikungnaw pueng ni a tungkhung dawk hoi a kum awh han, ka sungren poung e a hnicunaw hah a hruek awh vaiteh, a kamthoupnae be a rading awh han. Pâyawnae hah kamthoup awh vaiteh, talai dawk tathung laihoi pou a pâyaw awh han, kângairupoung awh han.

<sup>17</sup> Nang khuinae la a phueng awh vaiteh, nang koevah, talai van e a tha ka sai e khopui a min kamthang, tuikathoumnaw khosaknae hah ama hoi a thung kho ka sak pueng, ka cet kaawm e naw ni a bari e khocanaw hoi kakuep e kho, nang teh na rawknae a pataw poung. <sup>18</sup> Na rawpnae ni tuilum pueng koung a kâhuat sak, na kahma hnin vah, talipui teng e ramnaw be yawng awh han, ati awh han telah ati.

<sup>19</sup> Bangkongtetpawiteh, Bawipa Jehovah ni hettelah a dei, tami a ohoeahnae khopui ka rawk e kingdi e khopui lah na coung sak toteh, kadungpoung e tui dawk na bo sak vaiteh, tui moikapap ni na ramuk han. <sup>20</sup> Ayan e tami kadungpoung e tangkom dawk ka cet tangcoung e koevah, na ceisak awh han, talai thung vah, ayan hoi kingdi e kadungpoung e tangkom thung ka cet tangcoung e koevah, kho na sak han, apihai nangmouh thung vah kho a sak hoeah nahan hoi, taminaw koehoi bawilenna hah na hmu hoeah nahanelah, <sup>21</sup> He na pâmit han, na awm mahoeah toe, tami ni na ka tawng nakunghai, na hmawt awh mahoeah toe telah Bawipa Jehovah ni ati.

## 27

### *Taire khuinae kalung*

<sup>1</sup> BAWIPA e lawk kai koe bout a pha teh, <sup>2</sup> tami capa, Taire khuinae kalung hah phueng haw. <sup>3</sup> Taire koevah, oe nang tali teng e kho na sak nang, tali tengpam ram moi kapap dawh hno ouk ka yawt e, Bawipa Jehovah ni nang koevah hettelah lawk a dei,

Oe nang Taire, meihawinae kuep hoi ka meihawi doeh na ti na ou.

<sup>4</sup> Na khorì ni tali lungui vah a takhi katang doeh.

Nang na kasakkung ni hoe na hawi sak poung doeh.

<sup>5</sup> Nang e thingpheknaw pueng teh Seir hmaica thing hoi sak teh, nange long rahim vah Lebanon thing kahawipoung e hah a la awh.

<sup>6</sup> Bashan lae kathennaw hoi long mawngnae a sak awh teh, Kittim tuilum hoi a la awh teh, kasaino hoi ratu thing hoi a sak awh.

<sup>7</sup> Izip ram dawh pathoup e loukloukkaang e hni a yap awh teh, Elisha tuilum koehoi a la awh e a van khu e hni, kamthim, paling hoi a sak .

<sup>8</sup> Nange long kamawngkung Zidon Aravadnaw doeh, Oe Taire nang long kamawngkung hah tami a lungkaangnaw doeh.



- <sup>9</sup> Gebal kacue hoi kusatkathoum hah nange long kasakkungnaw doeh.  
 Tuipui longnaw hoi, taminaw ni ahnimouh koe e pouknae ouk a hei awh.
- <sup>10</sup> Nange Taran katukkung na ransahu Persia, Lydia, hoi Libianaw doeh.  
 Bahling hoi sumluhuem hah a sin awh teh,  
 nang na kapathoupkung lah a coung.
- <sup>11</sup> Nange rapannaw dawkvah, na ransahu  
 Arvadnaw hoi a kâcui awh, nange  
 imrasang karingkung Gammadnaw ni bahlingnaw hah  
 rapan petkâkalup lah a bang awh teh,  
 nang na kapathoupkung lah ao awh.
- <sup>12</sup> Hnopai moikapap na tawn dawkvah, Taire hah na hno yorankung doeh. na hnopai a ran e lahoi a kutnaw dawkw a poe awh. Ngun, sum, samphei, konlawknaw hai, <sup>13</sup> nange hno karankung Javan, Tubal, Mesheknaw teh nange hno yorankung doeh. Rahum hlaam hoi hnopai na tawn nahanelah, na ran pouh awh. <sup>14</sup> Bethtogarmah koehoi marang tarantuknae hoi la hoi na hnopai hah a yoran awh. <sup>15</sup> Nange na hno karankung teh Dedannaw doeh. Talî rai e hmuen tangkuem koe na hno yonae hmuen lah ao. Kasaino hoi Eboni nang koe a yonae hmuen lah ao. <sup>16</sup> Hnopai moikapap na tawn awh dawkvah, Edom teh nang koe kâkuen e lah ao. Emerald talung aphu kaawm e hni paling pathoup e hni, loukloukkaang e, dingyin, âthi talung a yoran awh. <sup>17</sup> Judah hoi Isarel hai nangmouh hoi na yoran awh teh, minnith cai hoi pannang, khotui hoi satui hoi thingtapi hoi a yoran awh. <sup>18</sup> Hnopai moikapap a tawn kecu dawkvah, Damaskas hah nang koe yorankung lah ao. Helbon misurtui hoi tumuen hoi a kâthung awh. <sup>19</sup> Uzal misurtui hah a sin awh teh, na hnopainaw hah a ran awh. Loukloukkaang e sum, nakzik hoi kacing hai a yoran awh e lah ao. <sup>20</sup> Dedan kho teh, marang ka kâcui e ransanaw ni a hno hane kahawipoung e hnopai nang koe a yo awh. <sup>21</sup> Arabia hoi Kebar siangpahrang hah nama koe a yoran lahoi a yo awh. Tuca hoi tutan, hmaetannaw hoi a yoran awh. <sup>22</sup> Sheba hoi Raamah hno kayawtnaw doeh. Hmuítui, kahawipoung e naw hoi talung aphu kaawm e phunkuep hoi sui hoi a yoran awh. <sup>23</sup> Haran, Kanneth, Eden, Sheba hno kayawtkungnaw doeh. Assiria hoi Kilmad hno kayawtkung hah nang koe yorannae kasaknaw doeh. <sup>24</sup> Hotnaw niteh, kahawi e hnicu, hninaw hoi pathoup e hni, a em kaawm e hniphai hoi, ka khawpoung tangron vei e, ka khawpoung lah na hno kuemnae dawkvah a hruek awh. <sup>25</sup> Tarshish long hah na hnopai kaphawtkung doeh.

Moikapap na pâkhueng teh,  
 talî dawkvah bawilennae hah na hmu.

- <sup>26</sup> Nange long kamawngkung ni,  
 talî tuicapa dawkw a kâenkhai teh,  
 Kanîtholae kahlî ni talî lungui vah kahmat lah a palek.
- <sup>27</sup> Nang teh na rak hnin vah,  
 na hnopainaw hoi hno na yonae naw hoi,  
 na long dawkw e taminaw long kamawngkung hoi,  
 taminaw hoi kasakkung hno kayawtnaw hoi a ransanaw,  
 nang koe kaawm e hoi a thung kaawm e pueng hoi,  
 talî lungui be na bo awh han.
- <sup>28</sup> Nange long kamawngnaw a hramnae pawlawk dawkvah,



- nang koe kaawm e hah a pâyaw awh.
- <sup>29</sup> Long mawngnae ka kuen e pueng hoi, long dawk e taminaw hoi,  
talî dawk lam ka patue e pueng hah,  
a kum awh teh, tuiteng vah a kangdue awh.
- <sup>30</sup> Nange kong dawk ka thai lah,  
lawk kacaipounglah lungmathoe laihoi a ka awh han.  
A lû dawk vaiphu kâphuen awh laihoi,  
vaiphu dawk a kâkaawk awh han.
- <sup>31</sup> A samnaw hai a ngaw awh vaiteh,  
burihni a kâkhu awh vaiteh,  
lung ka mathout poung lahoi nang hanelah  
puenghoi a khuika awh han.
- <sup>32</sup> Talai a lungui karawk e,  
khopui Taire kho api kho hoi maw a kâvan.
- <sup>33</sup> Nang e hnopai pueng teh, talî lam lahoi a ceikhai navah,  
taminaw a lungtang sak awh,  
moikapap e hno na hnopai lahoi siangpahrangnaw na bawi sak.
- <sup>34</sup> Atu teh, nang teh talî dawk thoseh,  
na yo han e hnopainaw hai thoseh,  
tuicapa e lungui a kâkhoe teh  
nang koe kaawmnaw pueng be a rak awh.
- <sup>35</sup> Tuilum e tami pueng teh, hote hno dawk a kângai a ru awh.  
Siangpahrangnaw teh, a minhmai a paling awh teh,  
a pawngmuen rueng a thaw awh.
- <sup>36</sup> Alouklouke hno kayawtnaw ni  
nang na pacekpahlekae lawk a dei awh.  
Nang teh taki na tho poung toe,  
bout na kamphawng mahoe toe,  
telah na khui na ka khai awh han, telah a ti.

## 28

### *Taire siangpahrang lathueng pâphona*

- <sup>1</sup> BAWIPA e lawk kai koe bout a pha. <sup>2</sup> Tami capa Taire bawi koevah dei  
pouh haw, Bawipa Jehovah ni hettelah a dei,  
na lungthin na kâpouk teh, Cathut lah ka o.  
Talî lungui vah cathut a tahungnae dawk ka tahung telah na ti,  
hateiteh, tami rumram lah doeh na o,  
cathut lungthin lah na kâpouk eiteh, cathut nahoe.
- <sup>3</sup> Thaihaw Daniel hlak na lunganghnawn,  
nang koe lawk hro thai kawi lah awm hoe.
- <sup>4</sup> Na lungangnae hoi kho na poukthainae ni na bawi sak teh,  
na râw bawm dawkvah sui hoi ngun na pâkuem.
- <sup>5</sup> Ka lentoe poung e na lungangnae hoi na yorannae lahoi,  
na mek poung teh na tawnta dawkvah na lungthin na kâoup.
- <sup>6</sup> Hatdawkvah, Bawipa Jehovah ni hettelah a dei,  
cathut lungthin ka sin e lah na kâpouk dawkvah,
- <sup>7</sup> Khenhaw! takikatho poung e alouke miphunnaw hah  
nang koe ka patoun han,  
ahnimouh ni nange lungangnae ka lentoe e hah  
tahloi hoi a bouk vaiteh, na bawilenna a raphoe han.
- <sup>8</sup> Ka dungpoung e tangkom thung na pabo awh vaiteh,



talî lungui e ro patetlah na due han.

- <sup>9</sup> Na hringnae ka thet e hmaitung vah,  
cathut lah ka o na ti han rah na ou,  
a hmâ na ka paca e kut dawk teh cathut lah na awm hoeh,  
tami rumram lah doeh na o.
- <sup>10</sup> Imyinnaw e kut dawk vuensom ka a hoeh e,  
due e patetlah na due han, bangkongtetpawiteh,  
lawk yo ka dei toe telah Bawipa Jehovah ni a dei.

### *Taire siangpahrang hane kalung*

<sup>11</sup> Hothloilah, BAWIPA e lawk kai koe a pha teh, <sup>12</sup> tami capa Taire siangpahrang khuinae kalungla hah phueng nateh, ahni koevah hettelah Bawipa Jehovah ni a ti,  
ahawinae ka kuep, lungangnae hoi ka kawi e,  
kamcupoung e meilam hoi ka kuep,

- <sup>13</sup> Eden hmuen takha dawk na o toe,  
na i dawk talung aphu kaawm e aphunphun hoi  
na kamthoup. Sardis, topaz, diamôn, beril, onyx, jasper,  
saphir, sarakdin, karbukul, phunphun hoi,  
sui hoi sak e cecak, vovit, naw haiyah  
na khe tahma vah nang hane sut rakueng e lah ao toe.
- <sup>14</sup> Nang teh na karingkung cherubim hoi satui awi e lah na o.  
Cathut e mon kathoung dawkvah na o sak.  
hmaito hoi kâvan e talung phukaawm koe na kâhlai.
- <sup>15</sup> Na khe hnin hoi na yonnae a kamnue hnin totouh,  
na sak e pueng dawk na kuep e lah na o,
- <sup>16</sup> Hatei na hno yorannae a pungdaw teh,  
hnokathout hoi a kawi,  
na yorannae dawk na rawp toe,  
hatdawkvah, tamikathout patetlah nang hah Cathut e mon  
dawk hoi kai ni na hrek toe, karingkung cherubim  
hmai ka tawk e talungnaw thung hoi kai ni na raphoe toe.
- <sup>17</sup> Nang teh na takthai meihawinae kecu dawk,  
kâoupnae lungthin na tawn teh, na bawilennae ni,  
nage lungangnae teh a raphoe toe.  
Kai ni nang teh talai totouh na pabo han.  
Siangpahrangnaw ni nang teh na khet awh teh,  
a lunghawisak nahanelah  
ahnimae hmaitung kai ni na hruek han.
- <sup>18</sup> Nange yonnae teh apappoung dawkvah,  
hno na yorannae a lãnhoeahnae ni,  
na hmuen kathoung hah a kamhnaung sak.  
Hatdawkvah, na thung hoi hmai a tâco sak.  
Koung a kak awh teh, na kahmawtnaw ni  
a mithmu vah vaiphu lah na coung sak.
- <sup>19</sup> Tami hu thung hoi nang ka panuek e pueng ni  
parap na khet awh teh, kângairu lahoi na kangdue sin awh.  
Bout kamnuek mahoe hoi toe telah ati awh.

### *Sidon lathueng pâphona*

<sup>20</sup> BAWIPA e lawk hah kai koe a pha teh, <sup>21</sup> Tami capa Sidon hah kangdout sin nateh, amae kong hah dei pouh. <sup>22</sup> Hettelah Bawipa Jehovah ni a dei,  
Oe! Sidon, nang teh na taran,  
nang dawkvah ka bawilennae ka kamnue sak vaiteh,



BAWIPA lah ka onae hah a panue awh han,  
ahni dawkw lawk ka ceng toteh,  
kathounge hah ka hmu sak han.

<sup>23</sup> Lamthungnaw dawkw thipaling hoi lacik ka pha sak han,  
hmuen tangkuem tahloi ni hmâ a paca e naw hah,  
a rawp awh han, hat toteh BAWIPA lah ka o tie a panue awh han.

### *Isarel teh a yaw kahawi e lah ao han*

<sup>24</sup> Hottelah, Isarelnaw hanelah, tami ka ruk e pâkhingkung awm mahoe h toe. Ahnimae tengpam e kadudamnaw thung hoi runae ka poe hane pâkhing awm mahoe h toe. Hahoi kai teh Bawipa Jehovah doeh tie a panue awh han. <sup>25</sup> Bawipa Jehovah ni hettelah a dei. Isarel imthung hah a kâkayeinae ram thung hoi, ka pâkhueng teh ahnimae hmalah miphunnaw e mithmu vah, ka thounge hah na hmu sak toteh, Jakop koe ka poe e amamae ram roeroe dawkw kho a sak awh han toe. <sup>26</sup> Hottelah karoumcalah ao awh han, im a sak awh han. Misur takha a sak awh vaiteh, karoumcalah ao awh han, a tengpam e ahnimouh kadudamnaw e a lathueng lawk ka ceng torei teh, kai teh Bawipa Jehovah lah ka o tie a panue awh han telah ati.

## 29

### *Izip lathueng pâphonae*

<sup>1</sup> Kum hra, thapa yung hra, hnin hlaikahni navah, BAWIPA e lawk teh kai koe a pha teh, <sup>2</sup> tami capa Izip siangpahrang Faro taranlahoi kangdout sin nateh ahni hoi Izip ram pueng taranlahoi lawk pâpho haw.

<sup>3</sup> Pato nateh Bawipa Jehovah ni a dei e hah dei pouh haw, Izip siangpahrang Faro, tuipui lungui dawkw ka tabawkw e, takikathopoung e khorui, tuipui heh kaie doeh, kama hanelah ka sak e doeh katetkung nang hah na taran. <sup>4</sup> Hateiteh na pâkha dawkw hradang hoi na wavi vaiteh, tuipui dawkw e tanganaw hah nange na lakep dawkw ka kâbet sak han, nange tuipui lungui hoi kai ni ka rasa han, tuipui dawkw kaawm e tanganaw, nange na lakep dawkw ka kâbet sak han. <sup>5</sup> Nang hoi na tuipui dawkw e tanga pueng hah, kahrawngum na ceitakhai vaiteh, kahrawngum vah na bo han, na racawng vaiteh bout na pâkhueng mahoe h toe, kahrawng e sarang hoi kalvan e tavanaw e rawca lah na poe han. <sup>6</sup> Isarel imthung hanelah lungpum sonron patetlah ao dawkvah, Izip vah kho ka sak e pueng ni, kai heh BAWIPA lah ka o tie a panue awh han. <sup>7</sup> Kut hoi na man awh navah khoe pouh teh, ahnimae loungnaw pueng na rakhing pouh, nang dawkw a kamngawi awh navah, nang na kâkhoe vaiteh ahnimae a keng na pataw sak.

<sup>8</sup> Hatdawkvah, Bawipa Jehovah ni hettelah a dei. Khenhaw! na lathueng vah tahloi ka pha sak vaiteh, tami hoi saringnaw be ka thei han. <sup>9</sup> Izip ram teh tami kingdi lah ao han, hahoi kai teh BAWIPA lah ka o e hah a panue awh han. Bangkongtetpawiteh, tuipui hai kaie lah ao teh, ka sak e doeh, telah ati. <sup>10</sup> Hatdawkvah, kai ni na taran teh, nange tuipui Migdol hoi Syene, Ethiopia khoru totouh, Izip ram teh tahloi hoi be ka thei vaiteh kingdi lah ka o sak han. <sup>11</sup> A kum 40 totouh tami cet mahoe h. Saring hai cet mahoe h, apihai karingkung awm mahoe h. <sup>12</sup> Ka rawkw e ramnaw dawkw Izip ram teh kai ni ka raphoe han, tami kingdinae khonaw dawkw a kum 40 touh Izip ramnaw dawkw a rawkw awh han. Izipnaw hah a ram tangkuem koe kai ni kâkaye sak han. <sup>13</sup> Hateiteh, Bawipa Jehovah ni hettelah a



dei, kum 40 a pha hnukkhu Izip heh a kâkayeinae koehoi tamihu koehoi ka kaw vaiteh, ka pâkhueng han. <sup>14</sup> Izipnaw hah santoungnae koehoi ka bankhai vaiteh, a onae ram daw kârahnoum e uknaeram lah ao awh han. <sup>15</sup> Jentelnaw hah bout uk awh mahoe, uknaeramnaw pueng daw kâthoungcalah ao han, alouke miphun hah bout uk sak hoe hahanlah ka rahnoum sak han. <sup>16</sup> Ahnimouh koelah kangvawi e pueng ni a payonnae a kâpanue awh dawkvah, Isarelnaw kâuepkhai poung e lah awm mahoe, hahoi Bawipa Jehovah lah ka o tie a panue awh han.

### *Babilon ni Izip a lawp han*

<sup>17</sup> Kum 27, thapa yung pasuek, hnin pasuek nah BAWIPA e lawk kai koe bout a pha teh, <sup>18</sup> tami capa Babilon siangpahrang Nebukhadnezar ni Taire taranlahoi thaw kalenpoung taw kâhanelah, a ransahu hah a patoun. Tami pueng tampasam a nganae hoi aloungnaw be a kâpin toe, hatei, ama hoi a ransahu ni hai thaw a taw kâhanelah e daw kâhanelah koe hoi a meknae banghai hmawt awh hoe. <sup>19</sup> Hatdawkvah, Bawipa Jehovah ni hettelah a dei, khenhaw! Izip ram teh, Babilon siangpahrang Nebukhadnezar koelah ka poe han, a hnopai moikapap lah a lawp vaiteh, lawphno lah be ao vaiteh, hot teh ransahu e taw kâhanelah lah ao han. <sup>20</sup> Kaie thaw a taw kâhanelah, Izip ram heh a taw kâhanelah lah ka poe telah Bawipa Jehovah ni ati. <sup>21</sup> Hote hnin navah, Isarel imthung hanelah, ki ka cawn sak han. Ahnimouh koe na pahni ka ang sak han, hettelah hoi BAWIPA lah ka o tie hah a panue awh han telah ati.

## 30

### *Izip rawknae*

<sup>1</sup> BAWIPA e lawk kai koe bout a pha teh, <sup>2</sup> tami capa lawk dei haw, Bawipa Jehovah ni hettelah a dei, Aiyoe! hote hnin hanelah hram haw. <sup>3</sup> Hote hnin a hnai toe. BAWIPA e hnin a hnai toe. Khopâuinae hnin, miphunnaw rawpnae hnin, <sup>4</sup> Izip lathueng vah tahloi a pha vaiteh, Ethiopia lathueng vah, lungtangponae hnin a pha han. Izip vah thei e naw a rawp toteh, a taminaw koug la pouh vaiteh, adu ungnae be raphoe pouh han. <sup>5</sup> Ethiopia, Put hoi Lud ka kambawng e tamihu pueng, Khubnaw, kâhuiko e khocanaw pueng teh Izipnaw hoi tahloi hoi reirei a due awh han. <sup>6</sup> BAWIPA ni hettelah a dei, Izip ram ka dounrouk nakunghai a rawp vaiteh, a due han. Izip ram thasainae a bawilennae a pout han. Migdol hoi Syene totouh, tahloi hoi be a due awh han, telah Bawipa Jehovah ni a dei. <sup>7</sup> Ka rawk e ramnaw daw buet touh e lah ao han. Kingdi e khopuinaw daw Izip khonaw hai a baw kâhanelah. <sup>8</sup> Izip ram daw hmai ka tâco sak vaiteh, kabawmkungnaw be ka raphoe torêi teh, BAWIPA lah ka o tie a panue awh han. <sup>9</sup> Hot hnin navah, ka kâruetcuethoe e Ethiopianaw, kâran sak hanelah, kai koehoi patounenaw teh amamae long hoi a cei awh han. Izip ram e hnin patetlah lungthin reithainae hah ahnima e lathueng a pha han, khenhaw! atu a pha lahun. <sup>10</sup> Bawipa Jehovah ni hettelah a dei. Babilon siangpahrang Nebukhadnezar e kut hoi Izip taminaw pueng be ka thei han. <sup>11</sup> Ram raphoe hanelah, ama hoi a san miphunnaw koe takikathopoung e hah pha sak e lah ao han, Izip lathueng vah tahloi palik awh vaiteh ram teh tami ro hoi a kawi sak awh han. <sup>12</sup> Hahoi tuipui hah ka hak sak vaiteh, ram teh tamikayonnaw koe ka yo han. A ram hoi a thung e kaawm pueng hah miphunnaw e kut hoi be ka raphoe han, kai BAWIPA ni ka dei toe telah ati. <sup>13</sup> Bawipa Jehovah ni hettelah a dei, meikaphaw hai



ka raphoe han, Noph hoi meikaphawk hah ka pâmit han, Izip ram dawk Bawi roeroe awm mahoe hoi, Izip ram dawk taki lungpuennae hah ka o sak han. <sup>14</sup> Pathros hah kai ni ka raphoe han, Zoan vah hmai ka tâco sak vaiteh, No kho dawk lawkcengnae ka kuep sak han. <sup>15</sup> Izip kalupnae Sin kho lathueng vah, ka lungkhueknae ka kamnue sak vaiteh, No khocanaw hah be ka thei han. <sup>16</sup> Izip ram dawk hmai ka tâco sak han, Sin kho teh, kângai mathoe awh han. No kho hai be a tip han. Noph kho teh, hnintangkuem a kângairu han. <sup>17</sup> Aven kho hoi Pibeseth thoundounnaw hah tahloi hoi a due awh han. Hete khopuinaw hah san lah a ceikhai awh han. <sup>18</sup> Izip tahroe hah ka khoe vaiteh, a kâoupkhai e a thasainae hah ka pout sak navah, Taphanhesh vah khodai nah kho a hmo han. Khopâui vaiteh kho thung e canunaw teh san lah a man awh han. <sup>19</sup> Hettelah Izip ram vah lawkcengnae hah ka kuep sak han, hottelah kai teh BAWIPA lah ka o tie a panue awh han telah ati.

### *Faro taranlahoi pâphoneae*

<sup>20</sup> Kum hlaibun, thapa yung pasuek, hnin sari hnin BAWIPA e lawk kai koe a pha teh, <sup>21</sup> Tami capa Izip siangpahrang Faro e a kut hah ka khoe pouh toe. Khenhaw! tahloi patuep thai totouh, bout a thasai nahanelah, tâsi hluk teh bout kawm mahoe hoi. <sup>22</sup> Hatdawkvah, Bawipa Jehovah ni hettelah a dei. Khenhaw! Izip ram Faro hah ka taran. Kâkhoe tangcung e a kut hah a hawinae koelae hai bout ka khoe han, hahoi a kut dawk e tahloi hah a kut dawk hoi ka bo sak han. <sup>23</sup> Izipnaw hah miphunnaw rahak hoi kâkayei sak vaiteh, ram tangkuem koe ka yawng sak han. <sup>24</sup> Babilon kut hah a thasai sak vaiteh, a kut dawk tahloi ka sin sak han. Faro e kut teh ka khoe pouh han. Siangpahrang hmalah, ahni teh due hane patetlah a hmâ ka cat e patetlah a hram han. <sup>25</sup> Babilon siangpahrang e a kut a thasai sak vaiteh, Faro e kut teh be a kamyai han. Babilon siangpahrang e kut dawk tahloi ka poe vaiteh, Izip ram taranlahoi a palik navah, kai teh BAWIPA lah ka o tie hah a panue awh han. <sup>26</sup> Izipnaw hah miphunnaw thung hoi kâkayei sak vaiteh, ram tangkuem koe koug ka pâlei han, hahoi BAWIPA lah ka o tie hah a panue awh han, telah ati.

## 31

### *Izip tâtuengnae*

<sup>1</sup> Kum hlaibun, thapa yung thum, hnin pasuek nah BAWIPA e lawk kai koe a pha teh, <sup>2</sup> tami capa, Izip siangpahrang Faro hoi tamihunaw koe dei pouh. Na bawilennae a len teh, api hoi maw nah kâvan, <sup>3</sup> Assiria na meihawi teh, a bu ka rung e a kang, ka rasang e hmuen, ratu a tâhlip kahawie, akangnaw hoi ka kuep e a som kaawm e Lebanon doeh. <sup>4</sup> Tui kathounge ni ahni teh a roug sak teh, talai thung e tui ni a rasang sak teh a ungnae hmuen petkâkalup lah ka lawng e palang ni a lawng sin teh, ram dawk e thing pueng a kawc nahanelah a lawng sak. <sup>5</sup> Hot patetlah kahrawngum e thingnaw hah ka tapuet lah a roug teh, hoe hoi a rasang, akangnaw a roug teh a saw awh, tui moikapap hoi a kawc e doeh. <sup>6</sup> Kalvan e tava pueng ni a kangnaw dawc a tabu a tuk awh. Kahrawngum e saringnaw ni a kangnaw e a rahim vah a ca khe awh. Hote thingkung a tâhlip dawkvah, kalenpounge miphunnaw pueng khosak awh. <sup>7</sup> Hottelah, tui apapnae hmuen koe a tangpha a pabo dawkvah, a len teh, a kangnaw a saw teh, a meihawinae hoi a kuep. <sup>8</sup> Cathut e takha dawc Sidar thingnaw ni hote thingkung teh ngue thai awh hoe hoi. Hmaica thing hoi Aramonkung



naw hai hot patetlae a kang hoi kuep awh hoe. Cathut e takha daw k e thingkung buet touh ni hote thingkung ka phat e awm hoe. <sup>9</sup> Eden hmuen Cathut e takha daw k kaawm e thingkungnaw teh hote thingkung hah a ut awh totouh, a kang apap e lahoi ahnie meihawinae kai ni ka poe.

<sup>10</sup> Bawipa Jehovah ni hettelah a dei, hote Sidar thing teh, a rasangpoung teh a kangnaw hai tâmai totouh a pha dawkvah, a lungthin a kârasang.

<sup>11</sup> Miphunnaw daw k bahu a len teh, ka patawpoung lah lawkcengkung e a kut daw k kai ni ka poe toe. Ahni ni a sak e hno kecu daw k ka hrek han.

<sup>12</sup> Miphunnaw thung daw k hoi taki ka tho poung e naw ni a tâtueng awh vaiteh, a tâkhawng awh han. Mon daw k thoseh, tanghling daw k thoseh, a kangnaw be a bo han. Hote ram daw k tui lawngnae ravo daw k a kangnaw be ka khoe han. Talai tami pueng a tâhlip daw k hoi a tâco awh vaiteh, a ceitakhai awh han.

<sup>13</sup> Kalvan e tavanaw hoi kahrawngum e saringnaw teh ka kâkhoe e a kangnaw van ao awh han. <sup>14</sup> Bangkongtetpawiteh, tui teng vah kaawm e thingkungnaw thung daw k a rasangnae a kâoupkhai hoe nahane doeh. Talai rahim a rahnoumnae tangkom thung hoi, ka kum e tami capanaw koe cei hanelah, duenae be a kâman sak e lah ao toe.

<sup>15</sup> BAWIPA Jehovah ni hettelah a dei, ahni teh duenae kho koe a ceinae hnin daw k kadungpoung e hmuen koe, ahni hanelah rohni hoi ka khu han, tuipei kaman teh, ka lenpoung e tuipei ka ban sak, ahni teh Lebanon hanelah rohni ka kho sak teh, kahrawngum e thing pueng ahni kecu daw k a lung a pout awh. <sup>16</sup> A rawpnae a pawlawk daw k, miphun hoi ka pâyaw sak teh, tangkom thung ka kum tangcoung e naw koe sheol ka pabo hnin vah, Eden thing pueng Lebanon thing kahawinaw hoi tui ka net e pueng hah talai rahim vah karoumcalah ao awh. <sup>17</sup> Tahloi hoi thei e koe, ahnimouh hai sheol koe lah a kum awh van teh, miphunnaw koe a tâhlip rahim kho ouk kasaknaw a thasainae kutnaw hoi, <sup>18</sup> Eden thingnaw thung daw k, bawilenna hoi lentoenae daw k apimaw nang patetlah kaawm. Hateiteh, Eden thingnaw hoi adungpoungnae koe tâkhawng e lah na o han, hethesh Faro hoi a tamihupuinaw doeh, telah BAWIPA ni a dei.

## 32

### *Izip hoi Faro khuinae kalung*

<sup>1</sup> Kum hlaikahni, thapa yung hlaikahni, hnin pasueknae daw k BAWIPA e law k hai koe a pha teh, <sup>2</sup> tami capa Izip siangpahrang Faro khuinae kalungla hah phueng haw, ahni koe, miphunnaw daw k hoi sendektanca patetlah kaawm e, talî daw k kaawm e, tangapui, khorui patetlah hai na o teh, tuipeuinaw na raka teh na khok hoi tui na kâhu et sak. Tuipei na pânut sak. <sup>3</sup> Bawipa Jehovah ni hettelah a dei. Tamlawk hoi na man han, tami moikapap hoi ka tamlawk hoi na man roeroe han. <sup>4</sup> Mon daw kvah na cei takhai vaiteh, kahrawngum vah na tâkhawng han, na van vah kalvan e tava pueng kamcout sak han. Talai daw k e sahringnaw king ka boum lah ka paca han. <sup>5</sup> Nange na moinaw hah monnaw daw k ka dan han. Ayawnnaw hah nange ro hoi ka kaw i sak han. <sup>6</sup> Ka lawng e na thipaling hoi, ram hah monsom totouh ka pâsu han, palangnaw nange na thi hoi kingkawi han. <sup>7</sup> Na angnae hah ka padue toteh, kalvan ka ramuk vaiteh, âsi ka mom sak han. Kanî teh tâmai hoi be ka ngue vaiteh, thapa ni a angnae hah poe mahoe toe. <sup>8</sup> Nange lathueng kalvan angnae pueng kâhmo sak han, na ram daw k hmonae hoi muen ka ramuk han, telah Bawipa Jehovah ni a dei, telah tet pouh. <sup>9</sup> Na panue hoe h e miphunnaw



dawk e na rawknae ka pha sak toteh, tami moikapap e lungthin hah pouknae panuek laipalah ka o sak han. <sup>10</sup> Tami moikapap hah nange kong dawk kângairu lahoi, ka o sak han, a hmalah tahloi ka dâw toteh, nang kecu dawk ahnimae siangpahrang hai, a lungpuen vaiteh, na rawp hnin toteh tei, tami pueng ni hringnae sung hanelah a ngaihi kecu dawk a pâyaw awh han telah Bawipa Jehovah ni ati. <sup>11</sup> Bangkongtetpawiteh, Bawipa Jehovah ni hettelah a dei, Babilon siangpahrang tahloi hah na lathueng vah a pha han. <sup>12</sup> Athakaawme tahloi hoi na taminaw ka rawp sak han. Miphunnaw thung dawk takikathopounge lah ao awh. A raphoe awh vaiteh, Izipnaw bawilennae hoi a tamihu pueng hah be a kahma awh han. <sup>13</sup> Moikapap e tui teng e saring hah ka raphoe han. Tami e a khok hoi saring e a khok ni tui bout pânut sak mahoe toe. <sup>14</sup> Ahnimae tui hah ka pâcim sak vaiteh, palang tui hah satui patetlah ka lawng sak han, telah Bawipa Jehovah ni a dei. <sup>15</sup> Izip ram dawk hno kaawm e pueng be baw sak nahanelah kingdi sak han, be ka raphoe vaiteh, khoca pueng ka rek toteh, kai teh BAWIPA lah ka o tie a panue awh roeroe hah. <sup>16</sup> Hethateh, Izip ram hanelah sak han e kawi khuinae kalungla doeh. Miphun tangkuem e a canunaw ni a khuinae kalung lah ao vaiteh, Izip ram hoi khocanaw pueng han a khui awh han telah Bawipa Jehovah ni a dei.

### *Izip tangkom dawk tâkhawng*

<sup>17</sup> Kum hlaikahni, thapa yung pasuek, hnin hlaipanga hnin BAWIPA e lawk teh kai koe a pha teh, <sup>18</sup> tami capa Izip tamihu hah puenghoi khui haw, ama hoi a min kamthang e, miphun canu tangkom dawk kakumnaw koevah, adungpoungnae dawb bawt awh naseh. <sup>19</sup> Nang teh ayâ alouke hlak na meihawi maw, vuensom ka a hoe e taminaw hoi rei ip lawih. <sup>20</sup> Talai hoi thei tangcoung e naw koevah, a rawp awh han, tahloi koe poe e lah ao toe, ama hoi a tami pueng hah he sawn lawih. <sup>21</sup> Athakaawme ni sheol thung hoi ahni hoi ahni kabawmkungnaw hah a pato awh han, tahloi hoi thei e vuensoma hoe e naw a kum awh teh pou a yan awh. <sup>22</sup> Hote hmuen dawb Assiria hoi a taminaw ao awh, a phuennaw ni a ma hah a kalup awh, abuemplahoi tahloi hoi a thei teh, kadoutnaw doeh. <sup>23</sup> Tangkom teh kadungpoung e a khu dawkvah ao teh, petkâkalup lah a taminaw hah ao. Abuemplahoi tahloi hoi thei e karawmnaw ka hring ram dawb takinae kaawmsakkungnaw doeh. <sup>24</sup> Hote hmuen dawb Elam hoi tangkom petkâkalup lah, a taminaw ao awh teh, abuemplahoi tahloi hoi thei e teh karawmnaw, vuensoma laipalah talai rahim ka kum e, kahring e ram dawb takinae kaawmsakkung, yeiraiponae tangkom thung kakumkhaikungnaw doeh. <sup>25</sup> Thei e naw thung dawb ama hoi a taminaw inae a sak pouh teh, phuen hah ama petkâkalup lah ao. Abuemplahoi vuensom ka a hoe e, tahloi hoi thei e naw doeh. Lungpuennae teh, ka hring e ram dawkvah, lungpuennae hah doeh. Hatei, tangkom thung kakumnaw hoi yerai a po awh teh thei e naw koe ao sak. <sup>26</sup> Hawvah, Meshek hoi Tubal naw hai ao awh. Phuennaw teh petkâkalup lah ao teh, abuemplahoi vuensoma hoe, tahloi hoi thei e naw doeh. Bangkongtetpawiteh, a hringnae ni ka hring e ram dawb lungpuen hah ouk a tho sak awh. <sup>27</sup> Vuensom a hoe e tami athakaawme ka rawm e, tarantuknae puengcang hoi sheol dawb ka kum e, tahloi hah a lû rahim a hruek teh, a hrinaw dawb amamae yon ao, bangkongtetpawiteh, ahnimouh teh ka hring e ram dawb e tami thasai, lungpuennae kaawmsakkungnaw doeh. <sup>28</sup> Vuensom ka a hoe e koevah, na rek vaiteh, tahloi hoi kadoutnaw koe na i han. <sup>29</sup> Hawvah, Edom



siangpahrangnaw hoi a bawi pueng, a thasai awh eiteh, tahloi hoi a thei e naw koevah a yan sak awh. Vuensom ka a hoehe e tangkom thung vah, kakumnaw koe a yan awh. <sup>30</sup> Hawvah, a tung lae bawi pueng, Sidonnaw a thei awh e thung dawkw ka kum e ao awh. A thasainae ni tami koe lungpuennae a tho sak eiteh, a kaya awh. Vuensom a laipalah, tahloi hoi a thei e naw koevah, a yan awh teh, tangkom thung kakumnaw hoi yeirai a po awh. <sup>31</sup> Faro ni a hmu vaiteh, a tamihu pueng a lungmawngsaknae dawkw a hno awh han. Faro hoi a ransahu pueng tahloi hoi a thei e hai telah Bawipa Jehovah ni a dei. <sup>32</sup> Bangkongtetpawiteh, ka hring e ram dawkw lungpuennae hah ka o sak teh, vuensom ka a hoehe e tahloi hoi a thei e naw koevah, Faro hoi a tamihunaw a yan awh han.

## 33

### *Ramveng lawk thuinae*

<sup>1</sup> BAWIPA e lawk kai koe a pha teh, <sup>2</sup> tami capa, na miphun na catoun koe lawk dei haw. Ram dawkw tahloi ka pha sak teh, ram dawkw e taminaw ni amamouh thung dawkw e tami buet touh a la awh teh, ramveng lah a hruerk awh toteh, <sup>3</sup> ram dawkw tahloi a pha e a hmu toteh, mongka hah ueng laihoi taminaw hah kâhruetcuetae poe pawiteh, <sup>4</sup> mongka ueng e pawlawk ka thai e pueng ni kâhruetcuetae lai hoi awm laipalah, tahloi hoi a due nakunghai, a thipaling phu teh a ma ni a khang han. <sup>5</sup> Mongka lawk a thai nahlangva, kâhruetcuetae poenae banglahai a noutna hoehe dawkvah, a thipaling phu teh a khang han. Hateiteh, a lawkpui lah hrueng pawiteh, a hringnae a rungngang han. <sup>6</sup> Hateiteh, ramveng ni tahloi a pha e hah a hmu teh, mongka ueng hoehe lah, taminaw hah kâhruetcuetae poe laipalah, ka phat e tahloi ni ahnimouh thung e tami buetbuet touh dout sak pawiteh, payonnae dawkw a due han. A thipaling phu teh ramveng koe ka suk han telah dei pouh. <sup>7</sup> Hot patetlah nang tami capa, Isarel imthung hanelah, ramveng lah na rawi, hatdawkvah, ka pahni dawkw hoi ka tâcawt e lawk hah na thai teh, kai hanelah kâhruetcuetae na poe awh han. <sup>8</sup> Tamikathout koe, Oe! tamikathout na due roeroe han, telah ka ti toteh, tamikathout teh a hringnuen kamlang khai hanelah, kâhruetcuetae na poe hoehe, haw e tamikathout teh a yon dawkw dout pawiteh, a thipaling phu teh nang koe na suk han. <sup>9</sup> Nahoehe pawiteh, tamikathout teh a hringnuen ceitakhai hanelah kâhruetcuetae na poe ei, a hringnuen cettakhai hoehe boilah, a payonnae dawkw a due han, nang teh na hringnae na rungngang lah ao han. <sup>10</sup> Hatdawkvah, tami capa Isarel imthung koevah, hettelah dei haw, ka sak e yonnae hoi lawkeknæ ni na ratet, hote hno kecu dawkw ka rawknæ lah awm pawiteh, bangtelamaw ka hring thai awh han, telah na ti awh. <sup>11</sup> Bawipa Jehovah ni a dei e teh, kai ka hring e patetlah tamikathout teh, a duenae dawkw ka lunghawinae ka tawn hoehe, tamikathout ni a hringnuen a ceitakhai e doeh kai ka lunghawinae lah ao.

### *Cathut lawkcengnae*

<sup>12</sup> Kahawi hoehe e na hringnuen koehoi ban awh. Ban awh, Oe! Isarel imthungnaw bang dawkw ne na due awh han, telah ati. Hatdawkvah, nang tami capa na taminaw koe dei haw. Tamikalan teh rawm pawiteh a lannæ ni a rungngang thai mahoehe. Tamikathout ni thoenæ hah roun pawiteh, ahmaloe e a thoenæ kecu dawkw rawknæ koe phat mahoehe. Tamikalan teh a yonnae hnin dawkw hring thai kalawn mahoehe. <sup>13</sup> Tamikalan koevah na hring roeroe han telah ka ti navah, a lannæ kâuep hoi yonnae sak



pawiteh, lannae a sak e hah buet touh hai panue pouh e lah awm mahoe, yonnae a saknae dawkvah a due han. <sup>14</sup> Tamikayon koevah na due roeroe han, bout ka ti pouh teh, a yonnae kamlang takhai pawiteh, thoungnae hoi lannae a sak toteh, <sup>15</sup> Tamikayon na hung e hno hah a pâban teh, a paru e hah bout a poe, hringnae a phunglam hah a tarawi payonnae banghai sak hoehpawiteh, a hring roeroe han, dout mahoe. <sup>16</sup> Yonnae a sak tangcoung e hah nâtuék hai pâkuem pouh mahoe toe. Thoungnae hoi lannae a sak tounge dawkvah, a hring roeroe han. <sup>17</sup> Hateiteh, na taminaw ni BAWIPA hno sak e lan hoeh ati awh toteh, a sak awh e hah a lan hoeh dawkw doeh. <sup>18</sup> Tamikalan ni a lannae kamlang takhai teh yonnae sak pawiteh, hote kecu dawkw a due han. <sup>19</sup> Tamikayon ni a yonnae a kamlang takhai teh, thoungnae hoi lannae sak pawiteh, hote lahoi a hring han. <sup>20</sup> Hateiteh, BAWIPA hnosaknae heh, lan hoeh telah na ti awh, Oe! Isarel imthungnaw, tami pueng amamae a hringnae patetlah lawkceng han telah a ti.

### *Jerusalem rawpnae*

<sup>21</sup> Kaimouh santoungnae kum hlaikahni, thapa yung hra, hnin panga hnin vah, Jerusalem hoi ka yawng e tami buet touh kai koe a tho teh, khopui teh tâ e lah ao toe telah a ti. <sup>22</sup> Hote ka yawng e a pha hoehnahlan tangminlah, BAWIPA ni kaie lathueng a kut a tounge, amom lah kai koe a tho navah, ka pahni yo na ang sak toe. Hottelah ka pahni ka ang teh, lawk ka dei thai laipalah ka o.

### *Judah rawknae*

<sup>23</sup> BAWIPA e lawk kai koe a pha teh, <sup>24</sup> tami capa ka rawk e Isarel ram dawkw kaawm rae ahnimouh ni Abraham teh buet touh dueng eiteh, ram teh a ring. Maimouh teh moipap awh teh ram râw lah na poe awh toe nahoehmaw, telah ati awh. <sup>25</sup> Hatdawkvah, ahnimouh koe Bawipa Jehovah ni hettelah a dei. Moi hah a thi hoi na ca awh teh, meikaphawknaw koe na mit na um sak awh, tami na thei awh, nangmouh ni ram hah na coe awh han na maw. <sup>26</sup> Na tahloi na kâuep awh teh, panuetho e hno hah na sak awh. Na imri e yunaw na yonkhai awh, nangmouh ni ram hah na coe han na maw. <sup>27</sup> Hettelah ahnimouh koe na dei pouh han, Bawipa Jehovah ni hettelah a dei, Kai ka hring e patetlah ka rawk e ram dawkw kaawm e hah tahloi hoi a due roeroe han, kahrawngum kaawm e hah, sarang ni a ca hanelah ka poe han. Kacake rapanim hoi talung kâko dawkw kaawm e hah lacik patawnae hoi a due awh han. <sup>28</sup> Ram pueng kingdi vaiteh, takikathopounge lah ka o sak han, a hnotithainae a kâoupnae hah a baw han toe. Isarel mon teh kingdi vaiteh, apinihai cet awm awh mahoe toe. <sup>29</sup> Panuet ka tho e hno a sak awh kecu dawkvah, a ram teh ka raphoe vaiteh, takikathopounge lah ka o sak hnukkhu, kai teh BAWIPA lah ka o tie a panue awh han.

### *Thainae hoi tawkhoenae*

<sup>30</sup> Hathnukkhu nang, tami capa, tapang teng e takhangnaw koe, na taminaw hoi pou na dei awh vaiteh, tami pueng ni a hmaunawngaha koevah, tho awh haw, BAWIPA koe e lawk thai awh haw sei, telah ati awh han. <sup>31</sup> Kaie tami patetlah nang koe a tho vaiteh, kaie ka tami patetlah na hmalah a tanguh awh vaiteh, nange na lawk a thai nakunghai yah, tarawi awh mahoe. Ngai ka tho poung e mitnoutnae hah a pahni hoi a kamnué sak nakunghai, a lungthin ni talai hno dueng hah a pouk awh han. <sup>32</sup> Khenhaw! nang teh ahnimae lah pahrennae la, kahawipoung lah sak e hoi kahawicalah kueng e lah na o han, na lawk a thai awh han, hatei



tarawi awh mahoe. <sup>33</sup> Hattoteh a pha han toe, khenhaw! a pha torei teh, ahnimouh koe profet ao tie hah ahnimouh ni a panue awh han telah, tet pouh telah a ti.

## 34

### *A tha kathoute tukhounnaw*

<sup>1</sup> BAWIPA e lawk kai koe a pha teh, <sup>2</sup> tami capa Isarel tukhounnaw taranlahoi pâpho haw. Pâpho nateh, ahnimouh tukhounnaw koe hettelah Bawipa Jehovah ni a dei, Isarel tukhounnaw, mahoima dueng kâkawknaw teh lûngmathoe hanlah a o, tukhounnaw ni tu hah a kawk awh mahoe na maw. <sup>3</sup> Nangmouh ni a thaw hah na ca awh teh, a muen hah na kâkhu awh. Kathâw kathâw e na thei awh, hatei, tunaw teh na kawk awh hoe. <sup>4</sup> A thayoun e tha na poe awh hoe, kapatawnaw na dam sak awh hoe, a khok kâkhouenaw na kawm pouh awh hoe. Pâlei e naw bout na bankhai awh hoe. Kahmat e hai na tawng awh hoe. Thama thama lahoi lawkkahram lah na hram sin awh. <sup>5</sup> Kakhounkung ao hoe dawkvah, tunaw teh a kâkaye awh. A kâkaye toteh, sarangnaw e rawca lah ao awh. <sup>6</sup> Kaie tunaw teh mon tangkuem koe a kâva awh, kaie tu hah talai pueng koe a kâkaye ti khopouk pouh kung hoi katawngkung awm hoe, telah dei haw telah a ti.

<sup>7</sup> Hatdawkvah, tukhounnaw BAWIPA e lawk thai awh haw. <sup>8</sup> Kai ka hring e patetlah Bawipa Jehovah ni a dei. Tukhounnaw awm hoe. Tukhounnaw ni kaie tunaw hah a tawng awh hoe dawkvah, kaie tunaw kahrawng e sarangnaw e rawca lah ao awh teh, kaie tunaw hah sarang ni kei hanelah ao awh. Tukhounnaw ni amahoima a kâkaw awh teh, kaie tu hah kawkhik awh hoe. <sup>9</sup> Hatdawkvah, nangmouh tukhounnaw BAWIPA e lawk thai awh haw.

<sup>10</sup> Hettelah Bawipa Jehovah ni a dei. Khenhaw! tukhounnaw ka taran, a kut thung e tunaw hah ka lawp vaiteh kaie tukhounnae koehoi kâhat sak han. Tukhounnaw teh amahoima kâkaw awh mahoe toe, bangkongtetpawiteh, tuhunaw hah a rawca lah ao hoe nahanelah a pahni dawk hoi ka tunaw hah ka la pouh han toe, telah a ti.

### *Cathut e tukhounkung katang*

<sup>11</sup> Bangkongtetpawiteh, Bawipa Jehovah ni hettelah a dei. Khenhaw! kai kama roeroe ni ka tunaw hah ka tawng vaiteh ka hmu han. <sup>12</sup> Tukhounkung ni tu hah kâkaye e tunaw a tawng e patetlah ka tunaw hah ka tawng han, tâmai hoi hmonae hmuen koe pueng hai ka tawng han. <sup>13</sup> Ram tangkuem koehoi ka la vaiteh ka pâkhueng han, amamae ram roeroe dawk ka ceikhai han. Isarel ram thung hoi tanghling, khosaknae hmuen pueng koe vah ka kaw han. <sup>14</sup> Ramhringnae koe ka pâ sak vaiteh, a im hah Isarel mon rasangnae koe ao han, kahawi e takha dawkvah a tabo awh vaiteh, Isarel mon dawk hrâmnaw a onae koe a pâ awh han. <sup>15</sup> Kai kama roeroe ni ka tunaw hah ka kawkhik han, karoumcalah ka tabo sak han, telah Bawipa Jehovah ni a ti. <sup>16</sup> Kahmat e ka tawng vaiteh, pâlei e bout ka bankhai han. A khok kâkhoe hah ka kawm pouh vaiteh, a patawnae hah kahawi sak han. Hateiteh, kathâw e hoi a thasai e hah ka thei vaiteh, lawkcengnae koe ka pha sak han, telah BAWIPA ni a ti.

<sup>17</sup> Bawipa Jehovah ni a dei e teh, Oe! ka tunaw, saring alouklouknaw thoseh, tutannaw hoi hmaetannaw thoseh, kai ni ka kapek han.

<sup>18</sup> Nangmouh teh kahawie hram kanaw e hmuen koe na ca awh e dueng



laipalah, kacawie tui hah na khok hoi na pânut sak hane teh, kathoengcae hno doeh, telah na pouk awh na maw. <sup>19</sup> Nangmouh ni na coungroe e phokungnaw thoseh, na khok hoi na pânut sak e tui hai thoseh, kaie tunaw ni a canei awh han na maw.

<sup>20</sup> Hatdawkvah, Bawipa Jehovah ni ahnimouh koe hettelah a dei, kathâw e saringnaw hoi kamsoe e saringnaw hah kai ni lawkceng han.

<sup>21</sup> Nangmouh ni a thakayoune tunaw hah hmuen tangkuem koe kâkayei sak hanelah na lounghoi na en awh teh, na ki hoi na deng awh.

<sup>22</sup> Hatdawkvah, ka tunaw ka rungngang vaiteh, ahnimouh teh sarang ni a kei rumram e lah awm mahoehtoe. Tunaw e a rahak vah lawk ka ceng han. <sup>23</sup> Tukhoumkung buet touh ka rawi pouh vaiteh, ahni ni a kawh han. Kaie ka san Devit ni ahnimouh a kawh vaiteh, ama teh kakhoumkung lah ao vaiteh a kawkhik han. <sup>24</sup> Kai BAWIPA teh ahnimae Cathut lah ka o vaiteh, ka thaw katawkkung Devit teh ahnimae lathueng kahrawikung lah ao han, kai BAWIPA roeroe ni yo ka dei toe.

<sup>25</sup> Hahoi, ahnimouh hoi rounnae lawkkamnae hah ka sak vaiteh, sarang kathout hah ram thung hoi ka baw sak han, kahrawngum vah karoumcalah kho a sak vaiteh, ratu thungvah karoumcalah a i awh han. <sup>26</sup> Ahnimouh thoseh kaie mon petkâkalup lah kaawm e hai thoseh, yawhawinae khotui a rak han. <sup>27</sup> Ram thung e thingnaw ni a pawra han, talai ni hai apaw a tâco sak han, khocanaw ni karoumcalah ao awh han, ahnimouh ni a phu awh e kahnam rui ka a pouh vaiteh, thama thama lah ka rek e ahnimae kut dawh hoi ka tâco sak toteh, kai teh BAWIPA lah ka o tie a panue awh han. <sup>28</sup> Jentelnaw ni bout lawm awh mahoehtoe, ram dawh e sarang ni hai kei awh mahoehtoe. Apihai takinae pou mahoehtoe, ahnimouh teh karoumcalah ao awh han toe. <sup>29</sup> A min kamthang e takha hai ahnimouh hanelah kai ni ka sak pouh han, a ram dawh takangnae, kahai lah onae bout awm mahoehtoe. Jentelnaw e dudamnae khang awh mahoehtoe. <sup>30</sup> Ahnimae Bawipa Jehovah teh ahnimouh hoi rei o e thoseh, Isarel imthungnaw hai ka tami lah ao e hai thoseh, a panue awh han telah Bawipa Jehovah ni a dei. <sup>31</sup> Nangmouh ka tuhu hoi saring pânae hmuen dawh e ka tuhu hah ka tami na o awh. Kai hai nangmae Cathut ka ka o, telah Bawipa Jehovah ni a dei telah a ti.

## 35

### *Seir mon lawkcengnae*

<sup>1</sup> BAWIPA e lawk kai koe bout a pha teh, <sup>2</sup> tami capa Seir mon taranlahoi kangdout sin nateh, ahni koe pâpho haw. <sup>3</sup> Ahni koe Bawipa Jehovah ni hettelah a dei, Khenhaw! Seir mon nang teh na taran, na lathueng vah ka kut ka dâw han, na raphoe vaiteh takikathopoung e lah na o sak han. <sup>4</sup> Nange khopui ka raphoe vaiteh, nang teh tami kingdi lah na o vaiteh, kai teh BAWIPA lah ka o e hah na panue han.

<sup>5</sup> Nang tarannae pou ao vaiteh, Isarel imthung dawh runae a thonae tueng yon kecu dawh khangnae tueng a poutnae dawh, ahnimae hringnae hah tahloi hoi na thei awh dawkvah, <sup>6</sup> Bawipa Jehovah ni hettelah a dei teh, kai ka hring e patetlah a hringnae thei e hah nang dawh kai ni ka sak vaiteh, thipaling ni na pâlei han, a thipaling hah nang ni na hmuhma hoeht dawkvah, a thipaling ni na pâlei awh han. <sup>7</sup> Hottelah Seir mon hah kingkadi sak vaiteh, kai ni ka raphoe vaiteh, ka cet e ka tâcawt e naw hah ka raphoe han. <sup>8</sup> Nange monnaw hai nange ronaw hoi ka kawi sak



han. monnaw, tangkomnaw, tuiپuiteng tahloi hoi thei e naw hoi king ka kawi han. <sup>9</sup> Be na thei awh vaiteh, nange khopuinaw dawk apihai awm mahoe, kai teh BAWIPA lah ka o tie na panue awh han. <sup>10</sup> Haw vah, BAWIPA ao eiteh, hete miphun kahni touh hoi ram kahni touh teh, kaie lah ao teh, kai ni ka tawn han na ti dawkvah, <sup>11</sup> kai ka hring e patetlah BAWIPA ni a dei. Na lungkhueknae hoi na maithoe kecu daw, utsinnae na kamnue sak e patetlah nang daw, ka sak van han, nange kong ka dei torei teh, ahnimouh koe ka kamnue sak han. <sup>12</sup> Nang ni Isarel monnaw a rawk teh, kaimanaw ca hane kawi lah na o awh, telah dudamnae lawk dei e lawk pueng hah BAWIPA ni be ka panue a tie na panue han. <sup>13</sup> Kai taranlahoi na pahni hoi na kâoup teh kâtaran lahoi na dei e lawk ka thai toe telah ati. <sup>14</sup> Hettelah Bawipa Jehovah ni a dei, na raphoe navah, talai pueng heh a lunghawi han. <sup>15</sup> Isarel imthung ni coe e raw a rawk e hah na lunghawikhai dawkvah, hot patetlah nang e lathueng ka sak han. Oe! Seir mon hoi Edom pueng he a rawk vaiteh, BAWIPA lah ka o tie a panue awh han.

## 36

### *Isarel imthung yawhawinae*

<sup>1</sup> Tami capa Isarel mon koevah, lawk hah pâpho haw, nangmouh Isarel monnaw BAWIPA e lawk hah thai awh haw.

<sup>2</sup> Bawipa Jehovah ni hettelah a dei, taran ni haha! BAWIPA e monnaw teh maimae kut daw, a pha awh toe, telah nangmouh koe lah a dei awh dawkvah, <sup>3</sup> lawk hah pâpho haw, Bawipa Jehovah ni hettelah a dei, nangmanaw na raphoe awh teh, hmueng pueng koe hoi na payon awh dawkvah, tami ni na dei hane, dudam hanlah na o awh dawkvah, <sup>4</sup> hatdawkvah, nangmouh Oe! Isarel monnaw Bawipa Jehovah e lawk hah thai haw, Bawipa Jehovah ni monnaw, monruinaw, tui lawngnae, tanghlingnaw, kahrawngum hoi, ceitakhai e khopui, petkâkalup lah kaawm e miphun pueng lawp e hoi, hnephnap e naw koevah, hettelah a dei. <sup>5</sup> Hatdawkvah, Bawipa Jehovah ni hettelah a dei, kacawirae miphunnaw hoi Edomnaw pueng lunghawinae lungthin, noutnahoeahnae lawp hanelah kâsak e naw koevah, lungkhuek laihoi lawk ka dei. <sup>6</sup> Hatdawkvah, Isarel ram e kong dawkvah, lawk pâpho haw, monpui monrui, tui lawngnae ravo hoi tanghling koevah, Bawipa Jehovah ni hettelah a dei, khenhaw! miphunnaw ni na panuikhai e na khang dawkvah, lungkhuek hoi ka dei toe. <sup>7</sup> Hatdawkvah, Bawipa Jehovah ni hettelah a dei. Petkâkalup lah kaawm e miphunnaw ni, amae yeirainae a phu roeroe han telah, ka kut ka dâw teh thoe ka bo.

<sup>8</sup> Hateiteh, Oe! Isarel monnaw, a kang na tho vaiteh ka tami Isarelnaw hanelah, apaw na paw awh han. Bangkongtetpawiteh, bout na tho awh nahan a hnai toe. <sup>9</sup> Bangkongtetpawiteh, nangmouh koelah doeh ka kampang katang, nangmouh koelah kamlang vaiteh, phaw e lah o vaiteh, cati tu e hah na o han.

<sup>10</sup> Nangmae lathueng vah tami kamphung sak vaiteh, Isarel imthung pueng abuemlahoi ahnimouh teh khopui daw, ao awh vaiteh, ka rawk e hmuennaw hah bout ka pathoup han. <sup>11</sup> Nangmae lathueng vah tami hoi saring kamphung sak han. A kamphung awh vaiteh, catoun lah pou ao awh han. Ahmaloe onae hmuennaw daw, kai ni hmueng ka poe han, apuengcue e kai ni ka sak e patetlah ka o sak han, kai teh BAWIPA lah ka o e hah a panue awh han. <sup>12</sup> Nangmae lathueng taminaw hah kaie



ka tami Isarel miphunnaw teh, a ceio awh nahanelah. kai ni ka sak han, ahnimouh ni, na coe e hah a la awh vaiteh, a coe awh e raw lah na o han, nangmouh kecu daw k camo na sung awh mahoe h toe.

<sup>13</sup> Bawipa Jehovah ni hettelah a dei, nang tami ka cat e hoi khocanaw e camo meng na ka thet e na ti pouh awh dawkvah, <sup>14</sup> tami na cat mahoe h toe, na miphunnaw hai na raphoe mahoe h toe, telah Bawipa Jehovah ni a dei. <sup>15</sup> Miphunnaw dudamnae na thai sak awh mahoe h toe. Taminaw e tamthoe na khang boi mahoe h toe. Na ram hai na rawm sak mahoe h toe telah Bawipa Jehovah ni a dei telah ati.

### *Isarel a kathanae*

<sup>16</sup> Bawipa Jehovah e lawk kai koe bout a pha teh, <sup>17</sup> tami capa Isarel imthungnaw teh, amae ram daw k ao awh teh, amamouh lungpouk a tawksak e lahoi, hote ram a khin sak awh. A hringnuen teh napui kampheng lahun e hringnae patetlah ao. <sup>18</sup> Hote ram daw k tami theinae yon, meikaphawk hoi kâkhinsaknae yon dawkvah, ka lungkhueknae a lathueng vah ka awi toe. <sup>19</sup> Miphunnaw koe ka kâkayeisak, ram tangkuem daw k a kâkaye h awh teh, a hringnuen hoi a tawksak awh e patetlah ahnimouh lathueng lawk ka ceng. <sup>20</sup> A cei awh nah tangkuem daw k a phanae ram koe vah, ka min ka thoung a khin sak awh. Ayâ ni ahnimouh koe hetnaw heh BAWIPA e taminaw doeh, hateiteh, a ram daw k hoi ka tâcawt e naw doeh telah ati awh. <sup>21</sup> Hateiteh, Isarel imthung ni, a ceinae miphunnaw koe vah, a khinsak awh e ka min ka thoung heh ka pasai poung.

<sup>22</sup> Hatdawkvah, Bawipa Jehovah ni Isarel imthung koe hettelah a dei. Oe! Isarel imthungnaw nangmouh kecu daw k nahoe h, na ceinae ram daw k ka min ka thoung na khin sak awh kecu daw k doeh hethe h ka sak.

<sup>23</sup> Miphunnaw koe vah nangmouh ni na kamhnawng sak e, kaie ka min hah ka tawmrasang han. Nangmae hmaitung vah nangmouh lahoi kai na tawmrasang e lah ka o toteh, kai teh Jehovah lah ka o tie nangmouh ni na panue awh han.

<sup>24</sup> Bangkongtetpawiteh nangmouh teh ram tangkuem hoi kai ni na kaw awh teh, na pâkhueng awh vaiteh, ahmaloe na onae ram daw k na ceikhai han. <sup>25</sup> Nangmae lathueng vah kathounge tui na kathek sin awh vaiteh, nangmouh teh a khinnae pueng koehoi meikaphawk thung hoi na kamthoung sak awh han. <sup>26</sup> Lungthin katha na poe awh han, na thung vah muitha katha ka hruek han, nangmae tak thung e talung lungthin hah ka la vaiteh, tak lungthin na poe awh han. <sup>27</sup> Kai e Muitha hai nangmae thung ka hruek han, nangmouh ni kâlawk na poe e na tarawi awh vaiteh, kai ni na dei pouh e naw hah na hringkhai awh han. <sup>28</sup> Mintoenaw koe ka poe e ram daw k nangmouh ni na o awh vaiteh, ka tami lah na o awh han, kai hai nangmae Cathut lah ka o han. <sup>29</sup> Na kamhnawng awh e thung hoi na tâco sak han. Cakang hah kâ ka poe vaiteh, ka pungdaw sak han. Nangmae lathueng vah takang ka tho sak mahoe h toe. <sup>30</sup> Thingthai rompo ka pungdaw sak vaiteh, na law daw k rawka ka tâco sak han. Hottelah takang a tho e kecu daw k, hnehnappa na khang awh mahoe h toe.

<sup>31</sup> Kahawi hoe h e na hringnuen hoi kahawihoe h na tawksak e hah na kâpanue awh vaiteh, panuethonae hoi na hawihoe hnae kecu daw k, na mithmu roeroe vah namahoima na kâpanuet awh han. <sup>32</sup> Nangmouh kecu daw k hethe h ka sak e nahoe h tie pahnim awh hanh awh telah Bawipa Jehovah ni a dei. Oe! Isarel imthungnaw kahawihoe h na hringnuen kecu daw k, kayak awh nateh, kângairu lah awm awh. <sup>33</sup> Bawipa Jehovah ni



hettelah a dei, na hawihoeahnae pueng dawk hoi kai ni na thoung sak hnin dawk teh, khopui dawk kho na sak sak awh vaiteh, ka rawk tangcoung e bout sak e lah ao han. <sup>34</sup> Kacetnaw kaawmnaw e hmaitung vah, pahnavt tangcoung e talai dawk laikawb bout na kanawb awh han. <sup>35</sup> Hat toteh, taminaw ni ahmaloe pahnavt e hete talai teh, Eden takha patetlah ao toe, be raphoe e khopuinaw hai, kacac niteh, khocanaw hai a kuep awh toe telah a dei awh han telah ati.

<sup>36</sup> Hat toteh, ka rawk e hmuennaw hah kai BAWIPA ni ka pathoup e thoseh, pahnavt e talai dawk laikawb kanawb e thoseh, namae tengpam kaawm e pueng Jentelnaw ni a panue awh han telah, kai BAWIPA ni ka dei e patetlah ka sak roeroe han. <sup>37</sup> Bawipa Jehovah ni hettelah a dei. Isarel imthung hanelah, hete hno ka sak nahanelah, ahnimouh ni kai koe na kâhei awh han. Tuhunaw patetlah a taminaw kamphung sak han.

<sup>38</sup> Kathoung thuengnae koe poe e, saringnaw hoi, Pawi hnin dawk hane Jerusalem tuhu patetlah ka rawk e khopui teh, tamihu moikapap e hoi akawi han. Hottelah kai heh BAWIPA lah ka o tie hah a panue awh han telah tet pouh ati.

## 37

### *Hrukenaw a hring*

<sup>1</sup> BAWIPA e kut teh kaie lathueng ao teh. BAWIPA e Muitha lahoi alawilah na tâcokhai teh, tanghling lungui hrunaw dueng hoi kingkawi e koe kai hah na hruek. <sup>2</sup> Ahnimouh koe na ceikhai, hote tanghling dawb moikapap e hrunaw hah ao teh, ahnimouh teh khik a ke awh. <sup>3</sup> BAWIPA ni kai koevah, tami capa hete hrunaw a hring thai han na maw, telah ati, Kai ni hettelah ka dei pouh, Oe! Bawipa Jehovah nang ni na panue, telah ka ti.

<sup>4</sup> BAWIPA ni hai hete hrunaw lathueng vah lawk dei haw, ahnimouh koe Oe! hrukenaw BAWIPA e lawk hah thai awh haw.

<sup>5</sup> Hete hrukenaw koevah Bawipa Jehovah ni hettelah a dei. Khenhaw! nangmouh dawb kâha ka pakhum vaiteh, na hring awh han. <sup>6</sup> Nang mamouh dawb tharui ka hruek han, takthai hoi ka pacawp awh vaiteh, vuen hoi ka ramuk awh han, nangmae thung vah kâha ka pakhum vaiteh, na hring awh han. Kai teh BAWIPA lah ka o tie na panue awh han telah a ti.

<sup>7</sup> Hottelah kâ ka poe e patetlah ka pâpho teh, thaihaw! ka pâpho lahun nah, dongdengca dawb hrunaw hah amamouh a onae hmuên tangkuem dawb a kâpatawp awh.

<sup>8</sup> Ka khet navah, khenhaw! ahnimouh dawb tharui ao teh, takthai ni a pacawp teh, vuen ni a ramuk, hateiteh, hring awh hoeh rah. <sup>9</sup> BAWIPA ni kai koevah, kahlî koe lawk dei haw, tami capa kahlî koe pâpho e roeroe haw, telah Bawipa Jehovah ni ati. Oe! kahlî talai takin pali touh koe hoi tho awh haw, kadoutkaronaw a hring thai awh nahanelah, ahnimouh lathueng pakhum haw telah a ti. <sup>10</sup> Hottelah kâ ka poe e patetlah ka dei teh kahlî teh ahnimouh thung a kâen teh a hring awh, amamae khok hoi lengkaleng a kangdue awh teh, ransahupui lah a coung awh.

<sup>11</sup> BAWIPA ni kai koevah, tami capa ahnimouh ni hrunaw heh Isarel imthungnaw doeh, ahnimouh ni kaimae hrunaw be a ke teh, ka ngaihawinae hai be ka kahma tangngak awh toe telah a dei katang awh.

<sup>12</sup> Hatdawkvah, lawk hah pâpho nateh, ahnimouh koe Bawipa Jehovah ni hettelah a dei, khenhaw! nangmae tangkomnaw ka paawng han, Oe!



ka taminaw na tangkomnaw dawk hoi na rasa awh vaiteh, Isarel ram dawk na kâenkhai awh han. <sup>13</sup> Nangmae tangkomnaw ka paawng teh na tangkomnaw dawk hoi na rasa awh toteh, kai teh BAWIPA lah ka o tie na panue awh han. <sup>14</sup> Hahoi nangmae na thung ka muitha ka pakhum han, hring awh vaiteh, namamae na ram dawk roeroe na hruek awh han, kai BAWIPA ni yo ka dei toung dawkvah, hot hah ka sak tie na panue awh han, telah BAWIPA ni a dei telah a ti.

### *Siangpahrang buet touh, uknae buet touh*

<sup>15</sup> BAWIPA e lawk kai koe bout a pha teh, <sup>16</sup> nang tami capa sonron buet touh lat haw, a van vah Judah hoi Isarel miphunnaw telah thun haw, sonron alouke hai lat nateh Joseph, Ephraim, Isarel imthungnaw telah thun haw. <sup>17</sup> Hote sonron kahni touh e hah buet touh lah pacawng nateh, hahoi na kut dawk buet touh lah ao han. <sup>18</sup> Na taminaw ni hete hno heh bangmaw a dei ngainae, kai koe dei kawi hoeh namaw telah a pacei navah, <sup>19</sup> Bawipa Jehovah ni hettelah a dei, khenhaw! Joseph e sonron Ephraim hoi Isarel miphun kut dawk kaawm e hah ka la han, Hothateh, Judah e sonron hoi ka pacawng vaiteh, buet touh lah ao han toe, ati, telah na ti pouh han.

<sup>20</sup> A van vah na thut e sonron hah ahnimae a mithmu vah na kut dawk ao han. <sup>21</sup> Hahoi ahnimouh koe Bawipa Jehovah hettelah a dei, khenhaw! miphunnaw a onae hmuen koehoi, ka hrawi vaiteh, hmuen tangkuem koehoi ka pâkhueng vaiteh, amamae ram dawk ka kâenkhai han. <sup>22</sup> Hahoi Isarel mon dawk miphun buet touh lah ka sak han, uknaeram kahni touh lah awm mahoe toe. <sup>23</sup> Ahnimae meikaphawknaw hoi panuetho e hno hoi, kâtapoenae dawkvah, kâkhinsak awh mahoe toe. A rawpnae ouk a yonae pueng thung hoi ka rungngang vaiteh, ka thoung sak han, hat terei teh, ka tami lah ao awh vaiteh, ahnimae Cathut lah ka o han. <sup>24</sup> Kaie thaw katawkkung Devit hah ahnimae lathueng siangpahrang lah ao han. Ahnimouh pueng e a lathueng dawk tukhoumkung buet touh ao han, kaie kâpoe e hah tarawi awh vaiteh, kaie phunglam hah a pâkuem awh vaiteh a hringkhai awh han.

<sup>25</sup> Kaie thaw katawkkung Jakop koevah, ka poe e ram na mintoenaw kho ouk a sak boi dawkvah, kho a sak awh han, amamouh hoi a canaw a catounnaw hai kho pou a sak awh han, hahoi ka thaw katawkkung Devit hah ahnimae a lathueng bawi lah ao han. <sup>26</sup> Hothloillah, ahnimouh koe rounnae lawkkamnae ka sak han, ahnimouh hanelah a yungyoe lawkkamnae lah ao vaiteh, ahnimouh koe ka poe han. Ahnimanaw teh a pungdaw awh vaiteh, ahnimouh koe a yungyoe totouh, kaie hmuen kathoung hah ka kangdue sak han. <sup>27</sup> Kaie lukkareiim hai ahnimouh koe ao vaiteh, ahnimae Cathut lah ka o vaiteh, ahnimouh hai kaie taminaw lah ao awh han. <sup>28</sup> Hottelah hmuen kathoung teh ahnimouh koe a yungyoe a cak toteh, Bawipa Jehovah ni Isarel miphun hah a thoung sak toe telah Jentel miphunnaw ni a panue awh han telah a ti.

## 38

### *Gog hoi kambawngnaw ni Isarel a tuk awh*

<sup>1</sup> BAWIPA e lawk kai koe a pha teh, <sup>2</sup> tami capa Magog ram e Rosh hoi Meshek hoi Tubal kahrawikung kacuepounge Gog taranlahoi kangdout sin haw, ahni taranlahoi pâpho haw. <sup>3</sup> Bawipa Jehovah ni hettelah a dei. Khenhaw! Rosh, Meshek, hoi Tubal bawi Gog, nang hateh na taran. <sup>4</sup> Na ban sak vaiteh, na pâkha dawh hradang hoi na sawn han, na ransanaw



hoi marangnaw, marangransanaw hoi puengcang hoi, kamthoupnaw, bahling, bahling kathoeng a sin awh teh, tahloi kasinnaw hah ka thokhai han. <sup>5</sup> Persia, Ethiopia, Libia hoi abuemlah bahling hoi sumluhuem kaawmnaw hah, <sup>6</sup> Gomer hoi a ransahu hahoi Togarmah, imthung hoi atunglae ram a poutnae, ransahu pueng hoi nang koe kaawm e tami moikapap hoi a kâbang awh han.

<sup>7</sup> Kâhruetcuets, coungkacoe kâra kueng lahoi awm, nang nama hoi nang koe kamkueng e tamihunaw hoi ahnimouh karingkung lah awmh. <sup>8</sup> Hnin moi a loun hnukkuh, nang teh uknae kâ na tawn han, tahloi dawkh hoi na hlout vaiteh, miphunnaw thung hoi rasa e khoca moikasawlah kingdi lah kaawm e, Isarel monnaw lathueng, bout a tâcokhai e khocanaw ao awhnae koe, hma lae tueng dawkh nang ni na tuk han. Hote khocanaw teh, miphunnaw thung dawkh hoi tâcokhai e lah ao teh ram pueng karoumcalah ao toteh, <sup>9</sup> hahoi na luen vaiteh, tûlî patetlah na tho han, nang koe kaawm e ransahu pueng hoi, nang koevah tami moikapap e hah tâmai ni ram muen kayo e patetlah na o awh han.

<sup>10</sup> Hahoi Bawipa Jehovah ni hettelah a dei, hote hnin dawkh teh, nang ni bangpueng na pouk vaiteh, kahawihoehe pouknae na tawn vaiteh, <sup>11</sup> rapan ka tawn hoehe e kho hoi ram hah ka lawp han, karoumcalah kaawm rumram e hah la ao awh vaiteh, rapan tawn laipalah kho ka sak e longkha hoi tarennae sum ka tawn hoehe e hah, ka tuk han telah na lung dawkh hoi na ti han. <sup>12</sup> Nangmae na hnopainaw na lawp awh han. Ahmaloe kingdi ni teh, atu tami a onae hmuennaw hah miphun pueng thung hoi na pâkhueng vaiteh, saring hoi hnopai moikapap a tawn awh teh, ram lungui dawkh kaawmnaw thoseh, ka tuk han telah na pouk han. <sup>13</sup> Sheba hoi Dedan, Tarshish hno kayawtnaw hoi Sendektancanaw ni, nang koevah hnopai la hanelah na tho toung maw, hnopainaw lawp hanelah na tamihunaw na pâkhueng toe khe. Ngun hoi sui saringhu hoi hnopai moikapap lawp pouh vaiteh, na ka lat pouh hane doeh khe, na ti pouh han telah ati.

<sup>14</sup> Hatdawkvah, tami capa lawk pâpho haw, Gog koevah, Bawipa Jehovah ni hettelah a dei, hote hnin, ka tami Isarelnaw karoumcalah ao awh nahane hnin hah na panuek hoehe na maw. <sup>15</sup> Atunglae ram a poutnae koe e hmuens koe hoi nang hoi nama koe tami moikapap, marang dawkh kâcui e ka lentoe e tamihu, athakaawme ransahu hoi a tho awh han. <sup>16</sup> Tâmai ni ram muen a ramuk e patetlah ka tami Isarelnaw taranlahoi na tho han, atueng a hnukteng toteh, kaie ram tuk hanelah na ceikhai awh han, Oe! Gog ahnimae hmaitung nang dawkh thoung sak e lah ao toteh, miphunnaw ni na panue awh han.

<sup>17</sup> Hahoi Bawipa Jehovah ni hettelah a dei, ayan hoi kaie thaw katawkkung Isarel profetnaw, hatnae kum moikasaw lah lawk ouk ka dei boi e naw ni, ahnimouh tuk hanelah ka ceikhai awh nahane kong ouk a dei awh e hateh nang raw na maw.

### *Gog lathueng lawkcengnae*

<sup>18</sup> Hote hnin dawkvah, Isarel ram tuk hanelah Gog a tho toteh, ka lungkhueknae ka minhmai ka kamnue sak han, telah Bawipa Jehovah ni a dei. <sup>19</sup> Ka lungkhuek lahun nah, hote hnin dawkh teh, Isarel ram dawkh Tâlî pueng hoi a no han. <sup>20</sup> Tâlî dawkh e tanga hoi kalvan tavanaw hoi moithang hoi talai van dawkh a vonpui hoi kâva e saringnaw hoi talai dawkh e tami pueng ka hmalah a pâyaw awh han. Mon hah rahnoum sak e lah ao vaiteh, lungha hah a tip han, kalupnae rapan pueng talai dawkh koug a



tip han, telah ka dei. <sup>21</sup> Kaie monnaw dawk Gog tuk hanelah tahloi hah ka kaw vaiteh, tami pueng e tahloi ni a hmaunawngna hah a thut han telah Bawipa Jehovah ni a dei. <sup>22</sup> Kâtheinae lacik patawnae lahoi runae ka poe han. Ama hoi a ransahu hoi ama koe e tami moikapap e lathueng vah, puenghoi ka nung e khotui hoi roun kalenpounge hmai hoi ganhmai kho lah ka rak sak han. <sup>23</sup> Hottelah kai teh, kama hoi kama kâsungren sak vaiteh, kama hoi kama kâthoung sak han, kai teh BAWIPA lah ka o tie a panue awh han.

## 39

### *Gog ransanaw thei e lah a o*

<sup>1</sup> Hatdawkvah, nang tami capa, Gog taranlahoi lawk pâpho haw, Bawipa Jehovah ni hettelah a dei, khenhaw! Oe! Gog, Rosh, Meshek hoi Tubal naw e bawi, nang teh na taran. <sup>2</sup> Hnukhma lah na palang vaiteh, atunglae apoutnae koehoi, na tâcokhai vaiteh, Isarel mon dawkvah na phakhai han. <sup>3</sup> Avoilae na kut dawk e licung hah ka khoe vaiteh, aranglae na kut dawk e palacung hah ka khoe han. <sup>4</sup> Nang nama hoi na ransanaw nang koe kaawm e tamihu hoi, Isarel mon dawk na rawp awh han. Moi ka cat e kalvan e tavanaw hoi sarangnaw kei sak hanelah na poe awh han. <sup>5</sup> Kahrawngum vah na rawp awh vaiteh na due awh han. Kai ni yo ka dei toe telah Bawipa Jehovah ni a dei telah a ti.

<sup>6</sup> Magog hoi tali rai lae karoumcalah kho kasaknaw koevah, hmai ka tâco sak han, hahoi kai teh BAWIPA lah ka o tie hah a panue awh han.

<sup>7</sup> Hottelah ka tami Isarelnaw dawk ka min kathoung hah ka panue sak vaiteh, ka min kathoung khin sak e ka pasoung mahoei toe, hottelahoi miphunnaw ni kai teh BAWIPA, Isarel miphunnaw e tami kathoung lah ka o tie a panue awh han. <sup>8</sup> Khenhaw! a pha toe, kuepsak e lah ao roeroe han telah Bawipa Jehovah ni a dei. Hete hnin doeh telah yo ka la dei tangcoung e hah.

<sup>9</sup> Isarel khopui dawk kho kasaknaw hah a tâco awh vaiteh, tarantuknae puengcang, bahling kathoeng kalen, licung hoi samtang, tahroe hoi bongpai naw hah kum sari touh thung hmai a sawi awh han. <sup>10</sup> Hatnae tueng dawk takha dawk thing phawt mahoei, ratu thung e tâtueng awh mahoei, tarantuknae puengcangnaw hoi hmai a patawi awh han, ka raphoekungnaw hah a raphoe awh han. Kalawmkungnaw e hnopai a lawp awh van han, telah Bawipa Jehovah ni a dei.

<sup>11</sup> Hote hnin tore i teh, Gog hanelah Isarel ram dawkvah, pakawp nahane hmuen ka poe han, tali, kanitholah Abarim tanghling hah Gog hoi a taminaw a pakawp awh han dawkvah, hote hnin teh, kahlawng kacetnaw e a hnawng a tabuem awh han, hatdawkvah, hote hmuen hah Hamon-gog tanghling telah ati awh han. <sup>12</sup> Isarelnaw ni amamae ram a thoung sak thai nahanelah, thapa yung sari touh thung a pakawp awh han. <sup>13</sup> Khocanaw pueng ni a ven awh vaiteh, talai dawk a pakawp e lahoi, kai na pholennae hnin dawk ka min kamthangnae lah ao awh han telah Bawipa Jehovah ni a dei.

<sup>14</sup> Hahoi amamae ram a thoung sak nahanelah, pakawp hoeh e naw hah a tawng awh teh, kapakawmkungnaw hah a rawi awh han, ahnimouh ni thapa yung sari aloum hnukkhu tawng hane a kamtawng awh han. <sup>15</sup> Ram katinnaw ni a katin awh navah, tami hru hmawt awh pawiteh, Hamon-gog tanghling dawk kapakawmkungnaw ni a pakawp awh hoehroukrak



teh mitnoutnae a ung awh han. <sup>16</sup> Khopui e min hai Hamonah telah a phung han, hottelahoi ram hah a thoung sak awh han telah a ti.

<sup>17</sup> Hahoi nang tami capa Bawipa Jehovah ni hettelah a dei, tava phunkuep hoi moithang phunkuep koevah, lawk dei, kamkhueng awh nateh tho awh. <sup>18</sup> Athakaawmnaw moynaw hah na ca awh vaiteh, talai e kahrawikungnaw e a thi hah na nei awh han, tutan hoi tuca, hmae, Bashan ram e maitotannaw e thipalingnaw hoi, <sup>19</sup> nangmouh hanelah bu lawngnae ka sak e athaw hah kingboun lah na ca vaiteh, a thi hah nget ka parui lah a nei awh han. <sup>20</sup> Hottelah marang hoi leng ka kâcuinaw, athakaawme taminaw, hoi tarantuk pueng hah kaie bu lawng na koe ka boum lah na ca awh han, telah Bawipa Jehovah ni a dei.

### *Isarel kamlangnae*

<sup>21</sup> Ka bawilennae hai Jentel miphunnaw koe kai ni ka hruek han. Lawk ka dei tangcung e hoi ahnimouh dawk ka kut ka toung e hah Jentel miphun pueng ni a hmu awh han. <sup>22</sup> Kai teh ahnimae BAWIPA heh Cathut lah ka o tie Isarel imthungnaw ni hote hnin koehoi a panue awh han. <sup>23</sup> Isarel imthungnaw ni amamae yon kecu dawk santoungnae hah Jentelnaw ni a panue awh han. Kai koe a yon awh dawk, ka minhmai ka thung vaiteh, a tarannaw e kut dawk ka poe vaiteh, ahnimouh pueng teh tahloi hoi koung a due awh. <sup>24</sup> A kamhnawngnae hoi kâtapoenae patetlah ahnimae a lathueng ka sak teh, ahnimouh koe ka minhmai ka thung.

<sup>25</sup> Hatdawkvah, Bawipa Jehovah ni hettelah a dei. Atuvah, Jakop sankatoungnaw hah ka bankhai vaiteh, Isarel imthungnaw pueng koevah pahrennae ka tawn han. Ka min kathoung hane dawkvah, ka lung a cak han. <sup>26</sup> Na lungpuensak hane apihai awm laipalah, amamae ram dawk ao awh nah, kai koe a yonnae, kaie lathueng lawkeknaw hoi, yeiraiponae hah a phu awh han. <sup>27</sup> Ahnimouh teh miphun pueng koehoi ka bankhai vaiteh, a tarannaw e kut dawk hoi ka pâkhueng toteh, miphunnaw hmaitung vah ahnimouh teh a thoung awh hah. <sup>28</sup> Miphunnaw koevah san lah kaawmsakkung kecu dawk thoseh, hateiteh buet touh boehai san lah cettakhai laipalah, amamae ram dawk roeroe vah, bout ka bankhai e dawkvah, kai teh Bawipa Jehovah lah ka o tie a panue awh han. <sup>29</sup> Ahnimouh koe ka minhmai ka thung mahoeh toe, bangkongtetpawiteh, Isarel imthungnaw e a lathueng vah ka muitha ka awi toe telah Bawipa Jehovah ni a dei telah a ti.

## 40

### *Bawkim katha*

<sup>1</sup> Santoungnae kum 25, kum kamtawngnae thapa hnin hra hnin vah, khopui raphoe lah ao hnukkhu kum hlaipali nah, hote hnin roeroe dawk BAWIPA e kut teh kai van ao teh, hawvah na ceikhai. <sup>2</sup> Cathut a kamnuenae vision lahoi Isarel ram dawk na ceikhai teh, mon ka rasang poun e van na hruek, hote mon e teng vah akalah khopui patetlae hah ao. <sup>3</sup> Hawvah na ceikhai, khenhaw! tami buet touh a o, rahum patetlah a meilam a o, pahla hoi bangnuenae cakui a sin teh, longkha koe a kangdue. <sup>4</sup> Ahni ni tami capa, takuetluet khenhaw! na hnâpakeng haw, kai ni na patue e naw hah na lungthung paen haw. Kai ni na patue hane kong dawk, hivah na thokhai e doeh. Na hmu e pueng hah Isarel imthung koe na pâpho han telah a ti.

### *Rapan hoi longkha*



<sup>5</sup> Khenhaw! bawkim petkâkalup lah rapan hah ao. Tami ni bangnue nae lahoi dong taruk touh kasawe cakui a sin teh rapan a tha e teh cakui yung touh, a rasang e hai cakui yung touh a pha. <sup>6</sup> Kanîtholah kangvawi e takhang koe a cei teh, khalai dawk hoi a luen, takhang kêennae rakhan hah a bangnue teh cakui yung touh a kaw. <sup>7</sup> Takhang e rakhannaw teh cakui yung touh hoi adangka cakui yung touh, rakhan buet touh hoi buet touh e rahak teh, dong panga touh doeh. Hahoi impui lae takhang alawilae takhang kêennae rakhan teh cakui yung touh doeh. <sup>8</sup> Imthungkhu e takhang rai imkalae takhang hai a bangnue teh cakui yung touh a pha. <sup>9</sup> A thung lae takhang, alawilae hai a bangnue teh dong taroe touh a pha, takhang khomnaw teh dong hni touh a tha, longkha alawilae hah athunglah ao awh.

<sup>10</sup> Hma lae longkha phekkadangka lae dawk rakhan kathoenge katham touh rip a o, yung adangka rei kâvan, rasang e hai rei a kâvan. <sup>11</sup> Takhang kêennae hai a bangnue teh adangka dong hra, rasang dong hlaikatham a pha. <sup>12</sup> Rakhan kathounge a hmalah avangvanglah thingphek ka tha e dong touh ao. Avangvanglah kaawm e rakhan kathounghaw teh a yung, a phen dong taruk touh rip a pha. <sup>13</sup> Kâennae tâconae longkha hah a bangnue teh, a lathueng e rakhan hoi avanglae rakhan totouh dong 25 touh a kaw, takhang hoi takhang be a kâkuet. <sup>14</sup> Hahoi longkha khom a bangnue teh dong 60 touh a rasang. Kâennae tâconae, thongma petkâkalup e hah longkha e a rahim lah kaw sak e lah ao. <sup>15</sup> Hahoi longkha alawilah, tengkatoe e hoi takhang athungpoung lae rahak teh dong 50 touh a pha. <sup>16</sup> Hahoi takhang imthungkhu lah petkâkalup lah paawng thai hoe e hlalangaw ao. A rahak e khom hoi im e alawilah haiyah, athunglah haiyah, petkâkalup lah hlalangaw ao teh, a khom dawkvah, samtuekung meikaphawknaw ao awh.

<sup>17</sup> Thongma lae alawilah, na ceikhai teh, thongma petkâkalup e dawk rakhan hoi talung phai e a o, talung phai e van vah, rakhan 30 touh ao. <sup>18</sup> Longkha teh talung hoi phai e doeh, longkha hoi kâvan lah phai e doeh, talung phai e teh a rahimnawn lah doeh. <sup>19</sup> Hathnukkhu, a rahim lae takhang apasuek koe hoi athunglah hoi thongma alawilah totouh, a bangnue teh a kaw e teh kanîtho lahoi atung lah dong 100 touh rahak ao.

### *Atunglae tâconae*

<sup>20</sup> Thongma alawilae ni hai, kâen tâconae atunglah a kangvawi teh, rasang hoi adangka a bangnue. <sup>21</sup> Karingkung e rakhan avangvanglah katham touh ao teh, longkha rahim lae hoi kâen tâconae takhang koe kaawm e naw patetlah doeh ao awh. A yung dong 50, adangka dong 25 touh doeh. <sup>22</sup> Rakhan kalenpoung hoi hlalangawnaw hoi samtuekung meinaw hah Kanîtholae longkha koe kaawmnaw patetlah doeh ao awh. Longkha totouh, luennae lakhout sari touh ao teh, rakhan vaikhap teh a thung lah ao. <sup>23</sup> Kanîtholae kaawm e patetlah atunglae longkha phekkadangka lae thung rapan longkha ao. Takhang buet touh hoi buet touh dong 100 touh a kâhla.

<sup>24</sup> Hathnukkhu akalah na ceikhai teh, akalae longkha ka hmu, khomnaw vaikhapnaw bangnue teh alouke lae hoi rei kâvan lah ao awh. <sup>25</sup> Ahmaloe e hlalangaw patetlah hlalangawnaw, vaikhapnaw ao awh teh, ayung dong 50, adangka dong 25 touh a pha. <sup>26</sup> Lakhout sari touh dawk hoi luen e lah a o, vaikhapnaw teh, khalai hoi sue touh lah ao awh. Avangvang lae khomnaw dawk samtuekung mei a thuk awh. <sup>27</sup> Akalah a kangvawi lahoi



athung kâen tâconae longkha ao. Akalae kâen tâconae longkha rahak a bangnue teh dong 100 touh a kâhla.

### *Athung patuen e longkha*

<sup>28</sup> Akalae kâen tâconae athung lae thongma dawk na kâenkhai teh, bangnue hoi akalae longkha hah a bangnue. <sup>29</sup> Rakhan kathoungnaw, khomnaw, vaikhapnaw teh ahmaloe e hoi rei a kâvan awh. Hlangawnaw ao teh petkâkalup lah vaikhap hai ao. A yung dong 50, adangka dong 25 touh a pha. <sup>30</sup> Petkâkalup e vaikhapnaw hai ayung dong 25, adangka dong 5 touh a pha. <sup>31</sup> Vaikhapnaw ni alawilah thongma koelah a kangvawi awh teh, khomnaw dawk samtuekung mei a thuk awh, Lakhout taroe touh dawk hoi luen e lah ao.

<sup>32</sup> Kanitholah athung lae thongma thung vah a ceikhai teh haw e longkha hah ahmaloe e hoi rei kâvan lah a bangnue. <sup>33</sup> Rakhan kathoungnaw, khomnaw, vaikhapnaw teh ahmaloe e hoi sue touh lah doeh ao awh. Longkha petkâkalup e dawk thoseh, vaikhap dawk thoseh, hlangaw ao teh, ayung dong 50, adangka dong 25 touh a pha. <sup>34</sup> Vaikhapnaw teh alawilah thongma koelah a kangvawi awh teh, avangvang lae khomnaw dawkvah, samtuekung mei hah a thuk awh. Lakhout taroe touh dawk hoi luen e lah ao.

<sup>35</sup> Atunglae longkha koe bout na ceikhai teh, ouk a bangnue e patetlah a bangnue. <sup>36</sup> Rakhan kathoungnaw, khomnaw, vaikhapnaw petkâkalup lah hlangawnaw hai ao. A yung dong 50, adangka dong 25 touh a pha. <sup>37</sup> Takhang khomnaw, vaikhapnaw teh alawilah thongma koelah a kangvawi awh, takhang rahim, hi lahoi avanglah samtuekung mei hah ao. Lakhout taroe touh dawk hoi luen e lah ao.

### *Thuengnae kârakuengnae*

<sup>38</sup> Hmaisawi e saring hah tui hoi pâsu nahane rakhannaw, kâennae naw teh, hote takhang e vaikhap dawkvah ao. <sup>39</sup> Hmaisawi thuengnae, yontha thuengnae, kâtapoe thuengnae sathei thei hanelah, kâennae takhangnaw teh hote vaikhap avangvanglah caboi kahni touh lengkaleng ao. <sup>40</sup> Atunglae longkha koe luennae alawilah caboi kahni touh ao. Vaikhap koe takhang avangvanglah haiyah caboi kahni touh lengkaleng ao. <sup>41</sup> Takhang avangvanglah caboi pali touh a o, avanglah hai caboi pali touh bout a o, thuengnae sathei ouk theinae teh caboi taroe touh a pha. <sup>42</sup> Hmaisawi thuengnae sathei hanelah, caboi pali touh e naw teh, talung hoi sak e, ayung dong touh hoi khap touh, adangka dong touh hoi khap touh, a rasang dong touh a pha, hote caboi van vah, hmaisawi thueng nahane sathei thei nahane puengcangnaw hah a van a hruek awh. <sup>43</sup> Caboi van petkâkalup lah a kaw e kuttabei hlawk touh a rai pou a yep awh teh, caboi van vah thueng hane sathei hah a hruek awh.

### *La ka sak e vaihmanaw e imrakhan*

<sup>44</sup> Hahoi athung e thongma dawkvah, na kâenkhai, khenhaw, athung e thongma dawk imrakhan kahni touh ao. Rakhan buet touh e teh, atunglae takhang teng ao teh akalae a kangvawi. Rakhan buet touh e teh akalae takhang teng ao teh atunglah a kangvawi. <sup>45</sup> Akalah kangvawi e imrakhan teh im dawkvah thaw ka taw e vaihmanaw ao nahanelah, <sup>46</sup> atunglah kangvawi e hete imrakhan teh, thuengnae koe lah thaw ka taw e vaihmanaw ao nahanelah hete thaw heh Zadok capa hoi Levih canaw thung daw hoi ni taw hanelah, BAWIPA koe ouk kahnaikungnaw hah doeh, telah a ti.



*Athung patuen e thongma hoiyah vaikhap dawk hoi luennae*

<sup>47</sup> Hahoi thongma hah a bangnue teh, ayung dong 100, adangka dong 100, petkâkalup lah khoungroe teh thongma a lungui vah ao. <sup>48</sup> Im van vah na ceikhai teh, takhang kahni touh e a bangnue teh akaw e dong panga touh, avangvang lae takhang adangka dong thum touh reirei a pha. <sup>49</sup> Im van e adangka dong 20, adangka dong 11 touh a pha, lakhout hra touh dawk hoi luen e lah ao. Im van luennae teng avangvanglah khom buet touh lengkaleng ao.

## 41

*Hmuen kathoung a kawnae*

<sup>1</sup> Hmuen kathoung dawk na ceikhai teh, takhang khom hah a bangnue, avanglah dong taruk touh reira katha e ao. Hothateh lukkareiim hoi a kaw e rei a kâvan. <sup>2</sup> Bawkim kâennae takhang a kaw e dong hra touh, atengteng lae tapang teh dong panga touh reirei a kaw. Bawkim athunglah a bangnue teh, ayung dong 40 touh adangka dong 20 touh a pha. <sup>3</sup> Hahoi a thung lae pueng a bangnue teh, kâennae tho khom a tha e dong hni touh, kâennae a rasang e teh dong taruk touh a pha teh takhang teh dong sari touh a kaw. <sup>4</sup> Athung patuen e rakhan a bangnue teh bawkim e adangka hoi sue a kâvan, A yung dong 20, adangka hai dong 20 touh, hetteh kai koevah hmuen kathoungpounge doeh telah a ti.

*Bawkim tapang*

<sup>5</sup> Hathnukkhu, im e tapang a bangnue teh, dong taruk touh a tha, a takin tangkuem koe imrakhan dong pali touh kaw e hah im petkâkalup lah ao. <sup>6</sup> Ateng lae rakhannaw teh, dot thum touh hoi sak e doeh. a dot buet touh dawk rakhan 30 touh ao. Petkâkalup lah ateng e rakhannaw hanelah, tapang a sak e naw hah bawkim tapang dawk kamhung laipalah tapang a rahim lae dawk a kamhung awh. <sup>7</sup> Ateng e rakhannaw teh, hoehoe a rasang teh, hoehoe a kaw van, bangkongtetsawiteh, tapangnaw teh hoe a kâhnai teh, rakhan a rahim poung e hoi a lathueng poung dawk, cei hanelah a lungui e hah ceitakhai a ngai.

<sup>8</sup> Hahoi im petkâkalup e dawk, talung ka coum e ka hmu, a teng e rakhan adu ungnae teh a bangnue nah dong taruk touh ka saw e cakui yung touh bang a kaw, a rasang e hoi kâvan lah a rasang. <sup>9</sup> Ateng lae rakhan, alawilae tapang teh, dong panga touh a tha. Bawkim teng alawilae rakhan tapang hloilah dong panga touh, hmuen ka houg e ao rah. <sup>10</sup> Im petkâkalup dawk e rakhan naw teh im e rakhan a rahak vah dong 20 touh a kâhla. <sup>11</sup> Ateng lae imrakhan e takhang hah a hougnae hmuen koe lahoi paawng e lah ao, buet touh takhang teh atunglah a kangvawi, buet touh takhang teh akalah a kangvawi. Petkâkalup lah hmuen ka houg e teh dong panga touh a pha.

*Kaniloumlae impui apoutnae*

<sup>12</sup> Kaniloumnae koe impui a hnuklah hmuen ka houg e a hloi lae im a kaw e teh ayung dong 70 touh a pha. Hahoi im e tapang teh petkâkalup lah dong panga touh a tha, ayung dong 90 touh a pha.

*im e a hmuen hmawn*

<sup>13</sup> Hahoi im teh a bangnue teh dong 100 touh a saw. impui e a hnuklah hmuen ka houg e hoi haw e im tapang a tha e mek touksin e lahoi dong 100 touh a kaw. <sup>14</sup> Im hmalah hmuen ka houg e mek touksin e



lahoi alouklah a kapek e thongma hoi dong 100 touh a kaw. <sup>15</sup> Hahoi impui hnuklah hmuen ka houg e a hloi lae im yung hah a bangnue teh, a tungdum e a hma lae rapan hoi dong 100 touh a pha, thongma vaikhap hoi bawkim athung patuen e naw hoi, <sup>16</sup> Athung e bawkim hoi alawilae vaikhapnaw takhang pâhungnae kabueng e hlalangawnaw, tho e khom pueng, avangvanglah coung thum touh lah kaawm e tapangnaw teh, talai koehoi hlalangaw totouh, thingphek hoi a ramuk awh, hlalangawnaw hai ramuk e lah ao. <sup>17</sup> Takhang pueng e a lathueng hmuen kathoung poung hoi, imthung e tapang pueng athung avanlah be bangnue e lah ao. <sup>18</sup> Hotnaw teh cherubim meikaphawh hoi samtuekung mei ka lat e hoi pathoup e doeh, cherubim hoi cherubim rahak vah samtuekung pou ao. Hahoi cherubim teh minhmai kahni touh lengkaleng a tawn awh. <sup>19</sup> Tami meilam ka sin e ni avanglah samtuekung koe lah a kangvawi teh, sendektanca e mei ka sin e ni avanglae samtuekung koe lah a kangvawi, bawkim petkâkalup lah hottelah sak e doeh. <sup>20</sup> Hottelah im petkâkalup vah talai koehoi takhang lathueng vah, bawkim tapang dawh, cherubim hoi samtuekung e mei a thuk awh.

<sup>21</sup> Bawkim takhang khomnaw teh, takin pali touh doeh. A thOUNGNAE hmuen hoi a minhmai rei a kâvan awh. <sup>22</sup> Thing khOUNGROE teh, a rasang dong thum touh, ayung dong hni touh, adangka dong hni touh a pha. KhOUNGROE a takin, padounnae, tapangnaw thing hoi a sak awh. Hete caboi teh, BAWIPA e hmalah hruek e caboi doeh telah ka ti.

<sup>23</sup> Bawkim hoi hmuen kathoung ni takhang buet touh lengkaleng a tawn. <sup>24</sup> Takhangnaw hai tho lep hni touh reirei a tawn teh, buet touh koelae hah thep thai e lah ao. Takhang buet touh dawkvah, phen kahni, alouke dawh phen kahni touh a pha. <sup>25</sup> Tapang dawh a thuk e patetlah bawkim e takhang dawh haiyah cherubim hoi samtuekung e mei a thuk awh. Vaikhap van vah, katha poung e thing dawh a pâhung awh. <sup>26</sup> Hahoi, vaikhap tapang, imrakhan tapangnaw teh pangkheknaw, ka bueng e hlalangawnaw, samtuekungnaw hoi yikkawi.

## 42

### *Vaihmanaw e im rakhan*

<sup>1</sup> Hathnukkhu hoi atunglae lam lahoi thongma koe lah, na tâcokhai teh, im e atunglah ka houg e hmuen e hmalah kaawm e rakhannaw hah na patue. <sup>2</sup> Hahoi atunglae im takhangnaw teh, ayung dong 100 touh asaw teh, adangka dong 50 touh akaw. <sup>3</sup> Athung patuen e thongma hmuen ka houg e dong 20 touh koe lah kangvawi e hoi, alawilae thongma talung phai e koe lah kangvawi lahoi imrakhan dot thum touh ao. <sup>4</sup> Im rakhannaw e a rahak dawh dong touh ka kaw e, dong 10 touh ka saw e takannae ao. Takhangnaw ni atunglah a kangvawi awh. <sup>5</sup> Lathueng patuen e rakhannaw teh abuenghnawn, bangkongtetpawiteh, a dot rahim e hoi a lungui e naw hlak rakhannaw ni hmuen ka paphnawn a la dawh doeh. <sup>6</sup> Bangkongtetpawiteh, dot thum touh lah sak e lah ao teh, thongma e khomnaw patetlah khom hah tawn awh hoe, hottelah a lungui e dot hlak a lathueng lae dot bet abuenghnawn. <sup>7</sup> Hote rakhan avangvanglah, alawilae thongma koe lah, rakhannaw e hmalah, a dum awh e tapang teh, ayung dong 50 touh a pha. <sup>8</sup> Alawilae thongma teng e rakhannaw teh, ayung dong 50 touh a pha. Bawkim e hmalah ayung teh dong 100 touh a pha. <sup>9</sup> Alawilae thongma hoi athunglah kanae patetlah kanîtho lahoi kâennae lamthung ao.



<sup>10</sup> Imka lah ka hounge e hmuen hah atunglae dum e thongma e tapang dawk hai rakhannaw ao. <sup>11</sup> Hote rakhannaw e hmalah kaawm e takannae koehoi rakhan ayung adangka, tâconae kâennae takhang kaawm e pueng teh, atunglae rakhan hoi mei rei a kâvan awh. <sup>12</sup> Akalae rakhan takhang hai, atunglae rakhan takhangnaw hoi a kâvan awh teh, thongma avangvangelah kanîtholah kangvawi e takannae tapang apasueke koe kâennae takhang ao.

<sup>13</sup> Ka bangnue e ni hai ka hounge e hmuen koe e hmalah, atunglae rakhan hoi akalae rakhannaw teh kathounge rakhan, Bawipa Jehovah koe rek kahnai e vaihmanaw ni kathoungpounge hnonaw hah a canae rakhannaw doeh. Hote a hmuen teh, a thoung dawkvah, kathoungpounge hno yon thuengnae, tavai thuengnae, yontha thuengnae hrueknae hmuen doeh. <sup>14</sup> Vaihmanaw ni a kâen toteh, thaw a tawknae angki a khohna awh teh, kathounge hmuen koehoi, alawilae thongma koe lah tâcawt mahoe, hote khohna a thoung dawkvah, a rading teh alouke khohna hah a kho hnukkhu, taminaw a onae koe a cei ao thai han telah kai ni ka dei, telah ati.

### *Bawkim alawilah kawnae*

<sup>15</sup> Athung e bawkim be a bangnue hnukkhu, kanîtholah kangvawi e, kâen tâconae lamthung koe na tâcokhai teh, petkâkalup lah a bangnue. <sup>16</sup> Bangnuenae cakui hoi Kanîtholae a bangnue teh, a bangnuenae hoi a bangnue teh dong 500 touh a pha. <sup>17</sup> Atunglae hah a bangnuenae cakui hoi a bangnue teh dong 500 touh a pha. <sup>18</sup> Akalae bout a bangnue teh bangnuenae cakui hoi a bangnue teh dong 500 touh a pha. <sup>19</sup> kanîloumlah hoi bout a bangnue teh, a bangnuenae cakui hoi a bangnue teh dong 500 touh a pha. <sup>20</sup> Avoivang lahoi a bangnue teh, ayung 500 touh a pha, adangka dong 500 touh a pha. Petkâkalup lah tapang ao teh, hmuen kathoung hoi hmuen kathounghoehe kapeknae lah ao.

## 43

### *Bawkim dawk BAWIPA pholennae*

<sup>1</sup> Hathnukkhu, kanîtholah kangvawi e takhang koe lah bout na ceikhai teh, <sup>2</sup> khenhaw! Isarel Cathut bawilennae teh kanîtho lahoi a tho. A pawlawk teh tui moikapap e pawlawk patetlah ao teh, talai heh a bawilennae hoi pheng a ang. <sup>3</sup> A kamnuenae ka hmu teh, a kamnuenae teh, khopui raphoe hanelah ka tho e hoi Kebar tui teng e ka hmu e patetlah kamnuenae lah ao teh pakhup lah a rawp <sup>4</sup> Kanîtholah kangvawi e takhang koe e bawkim thung vah, BAWIPA e bawilennae teh a kâen. <sup>5</sup> Muitha ni na tawm teh, athung patuen e thongma koe lah na kâenkhai. Khenhaw! BAWIPA bawilennae hoi bawkim dawk akawi.

<sup>6</sup> Hahoi tami buet touh kaie teng a kangdue lahun nah tami buet touh ni na pato e ka thai teh, <sup>7</sup> kai koevah, tami capa heteheh, ka bawitungkhung ka tahungnae hmuen, ka khok ka toungnae, Isarel catounnaw koevah, a yungyoe totouh khosak nahane hmuen doeh. Ka min kathoung teh Isarel catounnaw ni amamouh thoseh, a siangpahrangnaw thoseh, ka kâyawtnaw thoseh, siangpahrangnaw e ro pakawpnae hmuenrasang a sak awh teh, khin sak awh mahoe toe. <sup>8</sup> Takhang a kâennaw pâhung e teh, kaie takhang kâennae koe a sak awh teh, ahnimae takhang a pâhungnae hah kaie takhang pâhungnae teng a hruek awh teh, ahnimouh hoi kaïmanaw rahak vah, tapang buet touh ao sak teh, a sak awh e naw



ni ka min kathoung a khin sak awh. Hatdawkvah, ka lungkhueknae hoi ahnimouh ka raphoe han. <sup>9</sup> A kâyonae hoi ahnimae siangpahrang e ro hah, kai koehoi kahlatpoung lah a tâkhawng awh naseh, kai hi ahnimouh koe a yungyoe kho ka sak han.

<sup>10</sup> Nang tami capa, Isarel imthung koevah, bawkim hah patue, a payonnae naw hah a kayakhai awh nahanelah, im e oangnae hah bangnue sin awh naseh. <sup>11</sup> A sak awh e pueng kayakkhai awh pawiteh, bawkim e oang, tâconae hoi kâennaw a hnonae hoi a khetyawtnae naw hah pâtuê haw, ahnimae mithmu vah, thut haw, phunglawk poe e pueng a hnonae naw hah a pâkuem awh vaiteh, a tarawi thai awh nahan, <sup>12</sup> Hetheh bawkim hanelah kâlawk doeh atengpam pueng hoi monsom e naw. hmuen kathoung poung e naw doeh, khenhaw! hetheh bawkim e kâlawk hah doeh.

### *hmaisawi thuengnae khoungroe*

<sup>13</sup> Khoungroe a saw e padawng toteh, hetheh khoungroe a lennae (dong touh tie hah dong touh hoi kutsampha to touh e doeh), a kamhungnae teh dong touh a rasang, dong touh a kaw, arai petkâkalup lah khap touh ka kaw e hoi a yep teh cum sak lah ao. <sup>14</sup> Khoungroe a rasang e teh, a rahim lae a pâhungnae koehoi, avanlah totouh dong hni touh, a kaw e dong touh, kathoengca hrawtnae hoi kalen e hrawtnae totouh dong pali touh a pha teh, dong touh a kaw. <sup>15</sup> Khoungroe a rasang e hai dong pali touh a pha teh, ki pali touh a kangdue. <sup>16</sup> Khoungroe teh a takin pali touh a pha teh, ayung dong hrahlaikahni, adangka dong hrahlaikahni a pha. <sup>17</sup> A rahim lae a pâhungnae hai takin pali touh a pha, ayung dong hlaipali, adangka dong hlaipali touh a pha. Petkâkalup lah a kaw e khap touh, a hetnae khoungroe petkâkalup lah dong touh a tâco teh a luennae lam teh kanitholah a kangvawi hanelah a o, telah a ti.

<sup>18</sup> Hahoi kai koe vah tami capa Bawipa Jehovah ni hettelah a dei, be a sak toteh, khoungroe hnonae a lamthung teh, hmaisawi thueng nahan e hoi a thi kathek nahane doeh. <sup>19</sup> Levih miphun vaihma Zadok catounnaw dawk hoi thaw na ka tawk pouh hanelah, ouk na kahnaikung koevah, yon thueng nahanelah, maitotan na poe han telah Bawipa Jehovah ni a dei. <sup>20</sup> A thi hah na la vaiteh, khoungroe ki pali touh hoi a hrawtnae takin pali touh e hoi petkâtue lah na hluak vaiteh, na thoung sak vaiteh yonthanae na sak pouh han. <sup>21</sup> Yon thueng nahanelah, maito na la vaiteh, a thoungnae hmuen hloilah Bawkim im thung kâakuengnae hmuen koe hmai na sawi han.

<sup>22</sup> A hnin pahni dawk, kacueme hmaetan, yon thuengnae lah na poe awh han, khoungroe hah maito thi hoi na thoung sak e patetlah hmae thi hoi na sak han. <sup>23</sup> Hote khoungroe hah na thoung sak hnukkhu toun ka tawn hoe e maitotanca hoi kacueme hmaetan hah BAWIPA e hmalah na poe han. <sup>24</sup> Vaihmanaw ni palawi a phuen awh vaiteh, hote satheinaw hah BAWIPA hanelah, hmaisawi thuengnae lah a poe han. <sup>25</sup> Hnin sari touh thung hnintangkuem hmae buet touh hah yon thuengnae lah na hno awh han. Toun kaawm hoe e maitotanca hoi tutan buet touh hai na hno han. <sup>26</sup> Hnin sari touh thung khoungroe yonthanae na sak vaiteh na thoungsak han. Nama hoi nama hai vaihma e a hmuen dawk na kâpoe han. <sup>27</sup> A hnin sari a lounmhoehnae a hnin hnin taroe hnin dawk thoseh, hote hnin koehoi vaihmanaw ni thuengnae thoseh, khoungroe van a poe awh han. Hmaisawi thuengnae hoi roum thuengnae naw hah a poe awh



vaiteh, nangmanaw kai ni na coe awh han telah Bawipa Jehovah ni a dei telah a ti.

## 44

### *Kanîtholae takhang hoi bawi*

<sup>1</sup> Hathnukkhu hmuén kathoungé hmuén, kanîtholah kangvawí e takhang koelah na ceikhai téh, haw e takhang téh ka kâtareh e lah ao. <sup>2</sup> BAWIPA ni hete takhang téh tareh e lah ao vaiteh, paawng mahoe, apihai kâen awh mahoe. Bangkongtetpawiteh, BAWIPA Isarel Cathut a kâen toung dawkvah, tareh e lah ao han. <sup>3</sup> Bawi téh bawi lah ao dawkvah, BAWIPA Cathut e hmalah a canei hanelah hote tho koe a tahung han. Bawi téh vaikhap koehoi a kâen tâco han telah a ti.

### *Bawkim thung kâen sak e naw*

<sup>4</sup> Hahoi atunglah kangvawí e takhang bawkim e hmalah, na ceikhai. Ka khet nah kenhaw! BAWIPA e im téh BAWIPA a bawilennae hoi akawí téh, pakhpul lah ka tabo. <sup>5</sup> BAWIPA ni tamí capa BAWIPA e im daw kâlawk hoi phunglam pueng ka dei e hah thaihaw! imthung kâennae tho hoi takhang e hmuén koehoi tâconae thonaw pueng hah ka hawí lah pâkuemh. <sup>6</sup> Taran ka thaw e Isarel imthung koevah, hettelah na dei han, Bawipa Jehovah ni hettelah a dei, Oe! nangmouh Isarel imthungnaw, na khinnae bout na thap sin hanelah, miphun alouke, lungthin hoi takthai lahoi vuensom ka a hoe e. <sup>7</sup> Kaie vaiyei, satui, thinaw na poe awh navah, hmuén kathoung kaie im roeroe khin sak hanelah na kâen awh téh, ka lawkkamnae na ek awh e dawkvah, panuet na thonae pueng hah pâpout e lah awm lawí na seh. <sup>8</sup> Kathoungé kaie hno hah na ring awh hoe, hete miphun alouknaw héh, kaie hmuén kathoung dawkvah nangmae yueng lah karingkung lah na hruek awh.

<sup>9</sup> Bawipa Jehovah ni hettelah a dei, ram louk e apihai lungthin hoi takthai hoi vuensom ka a hoe e Isarelnaw daw e ram alouke tamí pueng téh, kaie hmuén kathoung daw kâen mahoe.

### *Vaihmanaw hane kâlawnaw*

<sup>10</sup> Levih miphun, Isarel meikaphawk pâlei hoi a kâva awh lahun nah, kai koehoi kahlatpoung lah ka cet tangcoung naw ni a payonnae hah a phu awh han. <sup>11</sup> Hateiteh, kai hmuén kathoung daw thaw katawkkung lah ao awh vaiteh, im longkhanaw hah a ring awh vaiteh, impui thung vah thaw a taw awh han, taminaw hanelah hmaisawi thuengnae hoi sathei a poe awh vaiteh, thaw a taw pouh awh hanelah a hmalah a kangdue awh han. <sup>12</sup> Amamae meikaphawk hmalah thaw a taw pouh awh téh, Isarel imthung hanelah payonnae thung vah rawpnae doeh. Hatdawkvah, ahnimouh taranlahoi ka kut ka dâw téh, a payonae a phu awh roeroe han telah Bawipa Jehovah ni a dei. <sup>13</sup> Hottelah kai koe vaihma thaw a taw hanelah, na hnai awh mahoe. Kathoungé kaie hno hoi kathounghoehe kaie hnonaw rek na hnai thai awh mahoe. Yeiraiponae hoi panuetho e hno a sak awh e hah a phu awh han. <sup>14</sup> Hat nakunghai, hote thaw taw sak hanelah kaawm e pueng taw hanelah, bawkim ka khenyawnkung lah thaw ka poe han.

<sup>15</sup> Hateiteh, vaihma Levih miphun Zadok capa, kai koehoi Isarelnaw lam a phen awh nah, kaie hmuén kathoung karingkungnaw hah téh, ka thaw a taw awh hanelah rek na hnai awh han, a thithaw poe hanelah, ka hmalah a kangdue awh han telah Bawipa Jehovah ni a dei. <sup>16</sup> Hmuén



kathoung dawk a kâen awh han, kai hane thaw tawk hanelah, kaie caboi a hnai awh han, kaie thaw katawkkung lah ao awh han. <sup>17</sup> Ahnimouh ni a thung patuen e thongma dawk e takhang koehoi a kâen awh navah, loukloukkaang e hoi sak e angkidung hah a khohna awh han. Athung e thongma thung thaw a tawk awh navah, tumuen angki khohnat awh mahoe. <sup>18</sup> A lû dawk lukkarei luhuem a huem awh vaiteh, a keng dawk lukkarei hnadung a hna awh han. Lahuntui ka tâcawt sak e banghai khohnat awh mahoe. <sup>19</sup> Taminaw a onae koe thongma koe lah a tâco toteh, thaw a tawk nah a khohna e hah a rading awh vaiteh, kathounge rakhannaw dawk a hruek awh vaiteh, alouke a khohna awh han, kathounge khohna hoi taminaw thong sak mahoe.

<sup>20</sup> Ahnimae sam luengpalueng lah ngaw mahoe, kasawpoung lah hlung awh mahoe, a ngaw awh han. <sup>21</sup> Vaihma ni athung patuen e rakhan dawk a kâen toteh, misurtui net mahoe. <sup>22</sup> Lahmainunaw hoi kâpaluen awh mahoe, a vâ ni amae napui hoi kâpaluen mahoe, Isarel miphun tanglakacuem hoi vaihma ni a due takhai e lahmai hoi a kâpaluen awh han. <sup>23</sup> Kaie ka taminaw hah kathounge hoi kathounghoe a kapek thai awh teh panue sak hanelah na cangkhai awh han. <sup>24</sup> Kamcannae ao nah lawkceng awh han, kai ni lawkceng e boiboe lah a ceng awh han, kaie paw hnin thapa tangkuem daw phunglawk hoi kâlawk a tarawi awh han, kaie sabbath hai a ya awh han. <sup>25</sup> Ma hoi ma kâkhinsak nahanelah, tami ro hah hnai awh mahoe, a manu, a napa, a canu, a capa, a hmaunawnga tongpa, a tawncanu a vâ ka sak hoe hae rae naw hane teh a kâkhinsak thai han. <sup>26</sup> Hahoi a kamthoung hnukkhu hnin sari touh ao han. <sup>27</sup> A thoungnae hmuen koe thaw a tawk hanelah, athung patuen lae thongma a thoungnae hmuen koelah a kâen hnin vah, yonthanae sathei a thueng han telah Bawipa Jehovah ni a dei. <sup>28</sup> Râw lah coe han e talai banghai tawn awh mahoe, bangkongtetpawiteh, a coe awh e teh kai doeh toe. Isarel dawk ham banghai na poe awh mahoe, a coe awh e teh kai doeh toe. <sup>29</sup> Thueng e vaiyei hoi, yon thuengnae sathei, kâtapoe thuengnae sathei hah a ca awh han, Isarelnaw koe lawkkam e thueng e hnoung pueng ahnimae râw lah ao han. <sup>30</sup> Aluepaw kahawipoungnaw hoi, thueng e naw thung daw kahawipoungnaw hah vaihmanaw ni a coe awh han, ahni ni nange im daw, yawhawinae a pha sak nahanelah, tavai ahmaloe kanaw e hah vaihma koevah na poe awh han. <sup>31</sup> Tava hai thoseh, moithang hai thoseh amahmawk kadout e, sarang ni a kei e ro hah vaihmanaw ni cat mahoe.

## 45

### *Kathoung ram*

<sup>1</sup> Hothloilah ram coe hanelah ram na kârei awh toteh, BAWIPA hanelah ram buet touh na pek awh han. Kathounge ram a coe hanelah, ayung dong 25,000, adangka 10,000 khori abuemlahoi kathounge ram lah ao han. <sup>2</sup> A hmuen kathoung hanelah, ayung hoi adangka dong 500, petkâkalup lah kathounge ram hai dong 50 touh dueng ao han. <sup>3</sup> Hete bangnue tangcoung e daw hoi, ayung dong 25,000 touh hoi, adangka dong 10,000 touh na bangnue vaiteh, hawvah, kathounge hmuen kathoung hah ao han. <sup>4</sup> Kathounge ram teh, hmuen kathoung daw thaw katawkkung, a thaw tawk hanelah, BAWIPA ouk ka hnai e vaihmanaw hanelah doeh. A imhmuen hanelah hoi hmuen kathoung lah ao nahanelah kathounge ram lah ao han. <sup>5</sup> A hmuen alouke ayung dong 25,000, adangka dong 10,000,



Levii miphun im dawkwaw katawknaw rakhan 20 touh sak thai nahan hoi kho a sak awh nahane doeh.

<sup>6</sup> Khopui hoi kâkuen e talai teh, kathounge hmuen phekkadangka lahayung dong 25,000, adangka 5,000 touh a pha teh, Isarel imthungnaw hanelah doeh ao han. <sup>7</sup> Hahoi bawi ham teh kathoung talai hoi khopui khori kaniloumlae pueng a tangawn, kanitholae pueng a tangawn teh bawinaw hane doeh. <sup>8</sup> Maimae bawinaw ni maimae tami rep bout a coun groe hoeh nahan, hote talai teh Isarel ram dawkvah bawi ni a tawn e lah ao han, kaawm rae talai hah Isarel catounnaw lengkaleng a rei han.

<sup>9</sup> Bawipa Jehovah ni hettelah a dei, Oe Isarel bawinaw, yit touh ma leih, kâhmuhmanae kâsaveknae hah takhoe awh leih, kalan lah hnosaknae kahawi e hnosak e hah hringkhay awh leih, ka taminaw rektapnae kâhat awh leih, telah Bawipa Jehovah ni a dei. <sup>10</sup> Yawcu kahman e, khinglung kakuep e, ephah kahman e, bath kahman e na tawm awh han. <sup>11</sup> ephah hoi bath heh rei a kânging hanelah ao. Homer hoi khing hanelah ao. Het patetlah ephah hra touh ni bath hra touh heh a kânging awh teh, hothateh Homer buet touh doeh. <sup>12</sup> Nangmae khinglung teh hot patetlah ao han, gerah 20 touh hoi shekel buet touh a kâvan vaiteh, shekel 60 touh e hah mina buet touh a pha han.

<sup>13</sup> Hahoi hethateh thuengnae hno na poe awh hanelah ao han. Cakang homer buet touh dawkwaw ephah pung taruk pung touh hoi catun homer buet touh dawkwaw ephah pung taruk pung touh na poe han. <sup>14</sup> Satui thuengnae teh Kor buet touh dawkwaw bath pung hra pung touh, Kor teh bath 10 touh doeh. Homer hoi a kâvan, bangkongtetpawiteh, homer buet touh teh bath 10 touh doeh. <sup>15</sup> Isarelnaw e saring a pânae koe ka pâ e tuhu thung hoi 200 touh dawkwaw a ca buet touh a poe han. Hetnaw heh tavai thuengnae, hmaisawi thuengnae, roum thuengnae, yonthanae lah ao han telah Bawipa Jehovah ni a dei. <sup>16</sup> Ram dawkwaw e tami pueng ni hete hno poe e heh Isarel bawi koevah a poe awh han. <sup>17</sup> Pawi hoi thapa reinae, sabbath hoi Isarel pawihninthanaw dawkvah hmaisawi thuengnae, tavai thuengnae, nei thuengnae, roum thuengnae hah Isarel imthung yontha hanlah a ma ni a sak han.

### *Pawi hnonae kong*

<sup>18</sup> Bawipa Jehovah ni hettelah a dei, thapa yung pasuek, hnin pasuek navah, maitoca kacueme na hno vaiteh, hmuen kathoung na thoung sak han. <sup>19</sup> Vaihma ni yon thuengnae a thi hah youn touh a la vaiteh, bawkim takhang khom dawkwaw khoungroe rahim lae hrawtne hoi takin pali touh e athung patuen e thongma e takhang khom dawkwaw thoseh, a hluk han. <sup>20</sup> Hote thapa hnin sari touh nah panue hoeh e yonnae ka sak hoi kamawngrame hanelah, hot patetlah boiboelah na sak pouh han. Hot patetlah bawkim hanelah yonthanae hah na sak han.

<sup>21</sup> Thapa yung pasuek, hnin 14 nah ceitakhay pawih na ya awh han, hahoi hnin sari touh thung vaiyei tawn phuen hoeh e hah na ca awh han. <sup>22</sup> Hot hnin dawkvah, bawi ni ama hoi a ram pueng hanelah, yon thuengnae poe hane maitotanca a thueng han. <sup>23</sup> Hote pawih hnin sari touh thung pueng dawkwaw maitotan kacueme sari touh hoi, tutan sari touh Bawipa hanlah, hmaisawi thueng nahane hoi yon thueng nahanelah, a hnintangkuem hmaetan buet touh hoi thuengnae a sak han. <sup>24</sup> Vaiyei thueng nahanelah maitotan buet touh dawkvah, ephah buet touh, tutan buet touh dawkwaw ephah buet touh hoi, ephah buet touh dawkwaw satui hin touh hmoun naseh. <sup>25</sup> Thapa yung sari, hnin 15 nae pawih dawkvah, hnin sari touh thung, hot



patetlah a sak han, yon thuengnae tavai hoi satui hah a hmoun han telah ati.

## 46

### *Bawknae nuencang*

<sup>1</sup> Hettelah Bawipa Jehovah ni a dei, athung lae thongma athung patuen e daw, kâen tâconae kanîtholah kangvawi e hah thawtawknae hnin taruk touh thung taren e lah ao han. Hateiteh, sabbath hnin hoi thaparei hnin daw paawng e lah ao han. <sup>2</sup> Khobawi teh vaikhap rai lahoi a kâen tâco vaiteh, longkha khom teng vah a kangdue han. Vaihmanaw teh hmaisawi thuengnae hoi rum thuengnae sathei a thueng vaiteh, longkha pâhungnae vaikhap koe tabo vaiteh alawilah a tâco han. Hottelah a tâco vaiteh, takhang teh tangmin totouh khan awh mahoe. <sup>3</sup> Taminaw ni sabbath hnin hoi thaparei hnin nah kâen tâconae takhang kung koe e BAWIPA mithmu vah thueng awh naseh.

<sup>4</sup> Sabbath hnin daw khobawi ni BAWIPA koe hmaisawi thuengnae a poe hane kawi teh, tuca kacueme taruk touh hoi, tutan kacueme buet touh han. <sup>5</sup> Tutan buet touh dawkvah, tavai ephah buet touh, tucanaw hoi a poe thai totouh ephah buet touh daw satui hin buet touh han. <sup>6</sup> Hahoi thaparei hnin maitotanca kacueme buet touh, tuca taruk touh, tutan buet touh, kacueme seng han. <sup>7</sup> Vaiyei thueng nahane a kârakueng vaiteh, maitoca daw ephah buet touh, tutan buet touh daw ephah buet touh, tucanaw a poe thai yit touh hoi ephah buet touh daw satui hin buet touh han. <sup>8</sup> Khobawi teh kâenna koe lah kâen tâconae vaikhap takhang hoi a kâen vaiteh haw lahoi bout a tâco han.

<sup>9</sup> Khocanaw teh paw hnin daw BAWIPA hmalah a tho awh nahai, thuengnae a sak awh nahanelah, atunglae longkha koehoi kâen e teh, akalae longkha daw hoi a tâco awh han. Akalae longkha daw hoi kâen e teh, atunglae longkha daw hoi a tâco awh han. A kâenna longkha daw hoi ban laipalah hmalah pou a cei awh han. <sup>10</sup> A kâen awh toteh, khobawi hai ahnimouh koe a kâen van vaiteh, tâcawt awh pawiteh, a tâco van han. <sup>11</sup> Pawi hninnaw hoi atueng khoe e pawinaw daw, tavai thuengnae teh maitotanca buet touh daw ephah buet touh, tutan buet touh daw ephah buet touh, tucanaw daw a poe thai e yit touh, ephah buet touh daw satui hin buet touh han.

<sup>12</sup> Khobawi ni lungtho lahoi a sak e hmaisawi thuengnae, rum thuengnae, lungtho lahoi BAWIPA koe thuengnae hno a poe navah, kanîtholah kangvawi e longkha hah a paawng han, sabbath hnin daw hmaisawi thuengnae, rum thuengnae a thueng e patetlah a poe han. A thueng hnukkhu a tâco vaiteh longkha hah a khan han.

<sup>13</sup> A hnintangkuem BAWIPA koelah hmaisawi thuengnae daw tutanca kum touh e, kacueme hah na thueng han. Amom tangkuem na sak han. <sup>14</sup> Amom tangkuem vaiyei na poe hanelah na kârakueng han. ephah pung taruk touh daw pung touh hoi tavai kanui e kanaw e daw satui hin buet touh, pung thum touh daw pung touh, hatei, tavai thuengnae dawkvah, kangning e BAWIPA koelah atueng kahmancalah sak hane hah doeh. <sup>15</sup> Het patetlah hmaisawi thuengnae pou poe hanelah, tutanca vaiyei thuengnae hoi satui hah amom tangkuem a rakueng han telah a ti.

### *Khobawi hoi uknae kâlawk*



<sup>16</sup> Bawipa Jehovah ni hettelah a dei, khobawi ni a capa tami bangpatet koehai rāw hanelah ram poe pawiteh, a capa ni a coe e rāw lah ao han. <sup>17</sup> Hateiteh, a coe e ram thung dawkh hoi, a thaw ka tawkh pouh e tami buet touh koevah, poe boipawiteh, santoungnae a tâconae kum totouh a tawn vaiteh, hathnukkhu hoi teh khobawi koevah, bout a poe han. Amae rāw lah kaawm e hateh, a capanaw hanelah ao han. <sup>18</sup> Hothloilah khobawi ni, alouke ni a coe e ram lawm pouh mahoe. A im hoi a law thung dawkh hoi, a hrek hanelah hai awm hoe. Ma e imlaw lengkaleng hah ka taminaw a kâkaye awh hoe hahan, amae lah kaawm e thung hoi a capanaw koe rāw a poe han.

### *Rawca thawngnae im*

<sup>19</sup> Hottelah longkha teng e vaihmanaw hanelah, kathounge imrakhan kâenna koe na kâenkhai. Hahoi khenhaw! imhle lah kanîloumlah hmuen kahoung e ao. <sup>20</sup> Ahni ni, hetheh vaihma ni taminaw thoung sak hanelah alawilae thongma lah a tâcokhai hoe hahan, kâtapoe thuengnae hoi yon thuengnae a thawngnae hmuen hoi vaiyei a pahainae hmuen doeh telah a ti. <sup>21</sup> Hahoi alawilae thongma dawkh na tâcokhai teh, thongma takin teng vah na ceisak. Hahoi khenhaw! thongma takin tangkuem koe thongma alouke ao. <sup>22</sup> Thongma takin pali touh dawkh thongma tapang ka tawn e, ayung dong 40, adangka dong 30 touh ao. Hote takin koe kaawmnaw teh a thoung a len be a kâvan awh. <sup>23</sup> Hote hmuen pali touh e athung lah, petkâkalup lah talung phai e ao teh, talung phai e a rahim petkâkalup e dawkvah, bu thawngnae lunghmunaw ao. <sup>24</sup> Hahoi, kai koevah, hetnaw heh thawngnae im, impui dawkh thaw katawknaw e taminaw ni thuengnae moi a thawngnae hmuen doeh telah a ti.

## 47

### *Damnae tui hoi thing*

<sup>1</sup> Hathnukkhu hoi bawkim kâenna takhang koe lah bout na bankhai, khenhaw! impui vaikhap rahim lae koehoi, kanîtholah kangvawi lahoi tui a lawng. Bangkongtetpawiteh, bawkim teh kanîtholah kangvawi e doeh. Hote tui teh khoungroe akalae bawkim, aranglae rahim hoi ka lawng e doeh. <sup>2</sup> Hahoi atunglah kangvawi e takhang koe lahoi na tâcokhai teh, alawilah kanîtholah kangvawi e takhang hloilah, na ceikhai, khenhaw aranglah tui hah a lawng. <sup>3</sup> Ama ni bangnue na sin laihoi, kanîtholah kangvawi laihoi a cei teh, dong 1000 touh a bangnue, hahoi tui hah na raka sak teh, khoksalue totouh doeh.

<sup>4</sup> Dong 1000 touh bout a bangnue teh, tui hah bout na raka sak, hote tui teh khokpakhu totouh a pha. Dong 1,000 touh bout a bangnue teh bout na raka sak navah hote tui teh keng totouh a pha. <sup>5</sup> Dong 1,000 touh bout a bangnue teh, ka raka thai hoe totouh e tui lah a coung. Tui teh hoe hoe a len teh raka lah raka thai hoe e, kale lah kale hane totouh a rasang. <sup>6</sup> Hahoi kai koevah, tami capa hetheh na hmu ou, telah ati, tuipui koelah bout na ban sak. <sup>7</sup> Ka ban navah khenhaw! tuipui avangvangelah, thingkung moikapap lah ao. <sup>8</sup> Ahni ni, kai koevah, hete kanîtholah ka lawng e tui heh, kahrawng a raka vaiteh talî dawkh a kâen han. Talî koe a pha toteh tui hah a thoung sak han.

<sup>9</sup> Tui a lawngnae hnintangkuem vah, saring pueng a hring awh han, tanga moikapap lah ao han, bangkongtetpawiteh, tuipui teh, a lawngnae tangkuem koe saring hah a hring thai nahanelah, hete tui heh ka lawng e



doeh. <sup>10</sup> Hahoi, tui teng vah tangakamankungnaw a kangdue awh vaiteh, Engedi hoi Eglaim totouh tamlawk hengnae hmuen lah ao han, tanganaw teh mamae talipui dawk e tanga patetlah apap katang han. <sup>11</sup> Tangkom tui hoi tuiphueknaw teh, thoung awh mahoe, palawi khu hanelah, ceitakhai han, pou a paan awh han.

<sup>12</sup> Tuipui teng vah avangvanglah thingkung phunkuep a paw vaiteh, hotnaw teh a hna kamyai boi mahoe, a paw hai pou a paw awh han, hmuen kathoung koehoi ka lawng e tui dawk hoi kaw k e lah ao dawkvah, thapa tangkuem a paw han, a paw teh ca hane kawi lah ao vaiteh, a hna teh damnae lah ao han.

### *Ramri*

<sup>13</sup> Bawipa Jehovah ni hettelah a dei, hetheh Isarel miphun 12 touh thung daw k hoi e, râw a kêrei awh hane talai lah ao han, Joseph ni hmuen kahni touh a coe han. <sup>14</sup> Lengkaleng kâvan lah na coe awh han. Na mintoenaw koe thoebo lahoi poe lah kaawm e hete ram heh na coe awh e ram lah ao han. <sup>15</sup> Heteheh ram buem lae khori lah ao han, atunglah tuipui hoi Hethlon a raka vaiteh, Hamath a kâenna tanghling Zebad vah a pha han.

<sup>16</sup> Hamath, Berothah, Damaskas hoi Hamath ramri daw k kaawm e Sibraim hoi Hauran ramri teng vah kaawm e Hazarhattikon totouh, <sup>17</sup> Hottelah hoi ramri teh tuipui hoi Damaskas ramri teng e Hazarenan totouh han, atunglah Hamath ramri daw k a kêri han, hetheh atunglae ramri doeh.

<sup>18</sup> Kanîtholah, Hauran hoi Damaskas rahak daw k, Gilead hoi Isarel ram rahak e Jordan tui a pâlei han, Kanîtholae ramri hoi Kanîtholae tali daw k Tamar a pha han, hetheh Kanîtholae ramri lah ao han.

<sup>19</sup> Akalah Tamar hoi Meribah Kadesh palang totouh, Izip tui a pâlei laihoi tuipui daw k a pha han, hetheh akalae ramri lah ao han. <sup>20</sup> Kanîloumlae ramri teh, talipui, akalae ramri hoi Hamath a kâenna tanghling totouh, hetheh kanîloumlae ramri lah ao han. <sup>21</sup> Hottelah hete ram heh Isarel miphun lahoi lengkaleng na kâkhuen awh han.

<sup>22</sup> Hahoi, na coe awh hane ram hoi nangmouh thung daw k miphun alouklah kho ka sak e, yucanaw katawnnaw a coe awh hane ram na kêrei sak han. Ahnimouh teh Isarel daw k hoi katâcawtnaw patetlah ao awh han. Isarel miphunnaw thung daw k nangmouh patetlah râw a tawn awh van han. <sup>23</sup> Hahoi, bangpatet e miphun dawkvah miphun alouke hah khosak boipawiteh, hawvah a coe hane kawi ram na khuen pouh han, telah Bawipa Jehovah ni a dei.

## 48

### *Ram kêreinae*

<sup>1</sup> Hetnaw heh miphun minnaw doeh. Atunglae ramri tuipui koehoi Hethlon raka lahoi Hamath lam teng, Damaskas ramri, Hamath kho teng, atung lae Hazarenan totouh, kanîtho lahoi, kanîloumlah coe hane buet touh e teh Dan ni a coe hane doeh.

<sup>2</sup> Dan ni coe e hoi kêri e kanîtho lahoi kanîloumlae hmuen buet touh e teh Asher e ham lah ao han.

<sup>3</sup> Asher ni coe e hoi kêri e kanîtho lahoi kanîloumlae hmuen buet touh e teh Naphtali e ham lah ao han.

<sup>4</sup> Naphtali ni coe e hoi kêri e koehoi kanîtho lahoi kanîloumlae hmuen buet touh teh Manasseh e ham lah ao han.



<sup>5</sup> Manasseh ni coe e hoi kâri e kanîtho lahoi kanîloumlae hmuen buet touh e teh Ephraim e ham lah ao han.

<sup>6</sup> Ephraim ni coe e hoi kâri e kanîtho lahoi kanîloumlae hmuen buet touh e teh Reuben e ham lah ao han.

<sup>7</sup> Reuben ni coe e hoi kâri e kanîtho lahoi kanîloumlae hmuen buet touh e teh Judah e ham lah ao han.

<sup>8</sup> Judah ni coe e hoi kâri e kanîtho lahoi kanîloumlah pou na kapek hane teh, ayung adangka a kâvan han. Adangka dong 25000 touh han, ayung teh kanîtho lahoi kanîloumlah hai alouke lae a coe e patetlah han, hote thungup dawh hmuen kathoung ao han.

<sup>9</sup> Hmuen kathoung hah BAWIPA koe na thueng awh hane teh, ayung dong 25000 touh vaiteh, adangka dong 10,000 touh han. <sup>10</sup> Hitueng vah vaihmanaw hanelah, ram kapek pouh e lah ao han, atunglah dong 25,000, kanîtholah dong 10,000, kanîloumlah dong 10,000, akalah dong 25,000 touh han, alungui vah BAWIPA e hmuen kathoung ao han. <sup>11</sup> Thoung sak e lah kaawm e vaihma Zadok e a canaw hah thaw poe lah kaawm e karingkungnaw lah ao han, hotnaw teh Isarelnaw lam a phen awh lahun nah lam ka phen e Levihnaw patetlah lam ka phen hoeh e naw doeh. <sup>12</sup> Levihnaw coe e kârinae koehoi kapek e ram pueng thung dawh hoi ahnimouh hanelah kapek pouh e hmuen kathoung poung lah ao han.

<sup>13</sup> Vaihmanaw e talai teng vah Levihnaw ni talai a tawn awh van han, ayung dong 25,000, adangka 10,000 touh han. <sup>14</sup> Talai na yawt mahoe, kâthungnae hai na sak mahoe, kahawi e hai tami alouke koe na poe mahoe, bangkongtetpawiteh BAWIPA hanelah ka thoung e doeh.

<sup>15</sup> Ayung 25,000 hloilah dong 25,000 touh e teh, abuemlahoi coe hane khosak awh nahane hoi khotenaw a sak awh nahane doeh, khopui teh alungui vah ao han. <sup>16</sup> Hahoi, a bangnuenae teh, atunglah dong 4,500, akalah dong 4500, kanîtholah dong 4500, kanîloumlah dong 4,500.

<sup>17</sup> Khopui ni a tengpam a tawn han, atunglah dong 250, akalah dong 250, kanîtholah dong 250, kanîloumlah dong 250.

<sup>18</sup> Hahoi atunglah kacawie kapek e ram teng e teh, kanîtholah dong 10,000, kanîloumlah dong 10,000 touh han. Kapek e ram la ao han, hote hmuen koe a pawhik ka tâcawt e naw teh, khopui dawh e thaw katawkkungnaw ni a ca awh hane doeh. <sup>19</sup> Khopui dawh thaw katawkkung Isarel miphunnaw thung hoi talai a kanawh awh han. <sup>20</sup> Kapek hane ram teh adangka dong 25,000, ayung dong 25,000, kapek e ram kathoung takin pali touh ka tawn e khopui ni a ham e hoi na thueng awh han.

<sup>21</sup> Kacawirae ram thoung sak tangcoung e hoi khopui avangvang lae coe hane teh, bawi ni a ham han. Kanîtholah dong 25,000, kanîloumlah dong 25,000, ahlawilae ram kapek e teh, bawi ni a coe hanelah ao han, kapek e ram thoung sak tangcoung e hoi bawkim e hmuen kathoung teh a lungui vah ao han. <sup>22</sup> Levih ni a ham e hoi khopui ni a ham e teh, Judah ni a ham e hoi Benjamin ni a ham e hoi a kâri han.

<sup>23</sup> Kacawie miphunnaw e kong dawh, kanîtho lahoi kanîloumlah buet touh e ham teh Benjamin ni a ham han.

<sup>24</sup> Benjamin ni coe e koehoi kâri e kanîtho lahoi kanîloumlae hmuen buet touh e teh Simeon e ham lah ao han.

<sup>25</sup> Simeon ni coe e koehoi kâri e kanîtho lahoi kanîloumlae hmuen buet touh e teh Issakhar e ham lah ao han.

<sup>26</sup> Issakhar ni coe e koehoi kâri e kanîtho lahoi kanîloumlae hmuen buet touh e teh Zebulun e ham lah ao han.



<sup>27</sup> Zebulun ni coe e koehoi kâri e kanitho lahoi kaniloumlae hmuen buet touh e teh Gad e ham lah ao han.

<sup>28</sup> Gad ni a ham e akalah kapek e koe, akalae khori teh, Tamar hoi Meribah Kadesh tuinaw totouh, Izip palang pâlei lahoi tuipui a pâtam han. <sup>29</sup> Hetheh, Isarel miphunnaw, râw coe hanelah cungpam a rayu awh teh, rei e lah kaawm e talai, hethateh, ahnimouh kapek teh ao awh nahane ram lengkaleng doeh, telah Bawipa Jehovah ni a dei.

### *Khopui katha*

<sup>30</sup> Khopui thung hoi tâco nahane takhangnaw hateh, atunglah dong 4500, touh a pha, <sup>31</sup> khopui e takhangnaw teh, Isarel miphunnaw e min poe lahoi atunglae longkha kathum touh ao, hotnaw teh, Reuben longkha, Judah longkha, Levi longkha naw hah doeh.

<sup>32</sup> Kanitholah dong 4,500, touh daw longkha kathum touh ao, hotnaw teh, Joseph longkha, Benjamin longkha, Dan longkha naw hah doeh.

<sup>33</sup> Akalah dong 4,500, touh daw longkha kathum touh ao, hotnaw teh, Simeon longkha, Issakhar longkha, Zebulun longkha naw hah doeh.

<sup>34</sup> Kaniloumlah dong 4,500, touh daw longkha kathum touh ao, hotnaw teh, Gad longkha, Asher longkha, Naphtali longkha naw hah doeh.

<sup>35</sup> Petkâkalup ka dong 18,000 touh a pha vaiteh, BAWIPA e hnin hoi kamtawng teh, khopui e min teh hawvah BAWIPA A O (Jehovah Shama) telah a min phung e lah ao han.



## DANIEL

### *Daniel hoi a huinaw e yuemnae*

<sup>1</sup> Judah siangpahrang Jehoiakim a bawinae a kum thum nah, Babilon siangpahrang Nebukhadnezar ni Jerusalem kho a thosin teh, king a kalup. <sup>2</sup> BAWIPA ni Judah siangpahrang Jehoiakim hoi bawkim dawk e hnopainaw a tangawn hah Nebukhadnezar kut dawk a poe. Nebukhadnezar ni a man e naw hah, Babilon kho kaawm e amamae bawkim thung a hrawi teh, hnopainaw hah hnopai im dawk a hruek awh. <sup>3</sup> Hat toteh, siangpahrang ni tuenlanaw dueng dawk kacuelah kaawm e Asphenaz hah a kaw teh, <sup>4</sup> Isarelnaw man e naw thung dawk hoi, a takthai kahawi e, a mei kahawi e, kamtu thai e, a lawkdei kahawi e, panuenae dawk a hue karang e naw hoi, siangpahrang im dawk thaw tawk han kamcu e nawsainaw hah na rawi han. Hahoi, Khaldean ca hoi lawk hah na cangkhai han atipouh. <sup>5</sup> Siangpahrang e rawca hah kum thum totouh hnintangkuem paca hnukkhu, siangpahrang im thaw a tawk awh han. <sup>6</sup> Hotnaw thung dawkvah, Judah tami Daniel, Hananiah, Mishael, hoi Azariah tinaw a kâpa awh. <sup>7</sup> Tuenla e naw kaukkung ni, ahnimanaw hah a min koug athung pouh. Daniel hah Belteshazzar, Hananiah hah Shadrak, Mishael hah Meshak, Azariah hah Abednego atipouh awh. <sup>8</sup> Daniel ni siangpahrang e rawca hoi misur canei e lahoi kakhin hoeh nahanelah, hot patet e rawca hah na paca hanh loe telah tuenlanaw kaukkung koe a kâhei. <sup>9</sup> Cathut pahren lahoi tuenlanaw kaukkung ni Daniel hah a pahren eiteh, ka bawipa ni nangmae rawca mitkhet hanelah, a hruek e hah kai hai ka taki van. <sup>10</sup> Ahni ni nouh nangmouh hanlah rawcarawnei naw hah a hmoun. Nangmae minhmai teh alouke nawsainaw e minhmai patetlah a meihawi hoeh e hah ka bawipa ni hmawt pawiteh, nangmouh kecu dawka kai teh ka lahuen a thawk toe, telah Daniel koe a dei pouh.

<sup>11</sup> Hattoteh Daniel ni, Daniel, Hananiah, Mishael, Azariah tinaw ka khenyawn hanelah tuenlanaw kaukkung ni a hruek e rawca mitkhenkung koevah, <sup>12</sup> kaimouh hanelah rawca hah anhla hoi tui maha hnin hra touh thung na poe na teh na tanouk haw. <sup>13</sup> Hathnukkhu kaimae minhmai hoi siangpahrang rawca ka catnet e nawsainaw e minhmai hah khen nateh na hmu e patetlah thaw tawk haw atipouh. <sup>14</sup> Rawca mitkhenkung nihai, a lungkuep teh hnin hra touh a tanouk. <sup>15</sup> Hnin hra touh akuiep toteh, ahnimae minhmai teh rawca ka catnet e nawsainaw e minhmai hlak a meihawi awh teh, phuekuek lah ao awh. <sup>16</sup> Hat toteh, rawca mitkhenkung ni ahnimouh hanelah, a hmoun e rawca hoi misurtui hah a takhoe teh anhla hoi duengdoeh a kaw toe.

<sup>17</sup> Cathut ni hote nawsainaw pali touh hah panuenae, ca thoumnae hoi kamtu e pueng thoum thainae hah a poe. Daniel teh vision hoi mangnaw pueng hai a panue thai. <sup>18</sup> Siangpahrang im a kâen nahane atueng khoe e akuiep toteh, tuenlanaw kaukkung ni nawsainaw hah a kaw teh siangpahrang im thung a kâenkhai. <sup>19</sup> Siangpahrang ni hote nawsainaw a pacei pakaw hnukkhu Daniel, Hananiah, Mishael, Azariah tinaw hoi kâvan e buet touh hai ao awh hoeh dawkvah, ahnimanaw teh, siangpahrang koe thaw tawk hane kâ a hmu awh. <sup>20</sup> Siangpahrang ni a pacei e panuenae puenghoi thoumthainae pueng dawkvah, a ram thung kaawm e mitpaleikathoum e, kut khet ka thoum e naw pueng hlak let hra



touh hoi a thoum awh e hah a hmu. <sup>21</sup> Daniel teh Sairas siangpahrang a bawinae apasuek kum totouh ao.

## 2

### *Nebukhadnezar e mang*

<sup>1</sup> Nebukhadnezar a bawinae a kum pahni navah, a mang lah a hmu e hno dawkvah roumkalue teh ip thai hoeh. <sup>2</sup> Hat toteh, siangpahrang ni a ram thung kaawm e mitpalei kathoumnaw, kutkhetkathoumnaw, kahrai ka pâlei thainaw hoi, Khaldeannaw hah pâkhueng awh ati e patetlah ahnimanaw a tho awh teh, <sup>3</sup> siangpahrang ni ka mang lah ka hmu e hah bang ngainae ne, ka panue thai hoeh dawkvah, ka lung nawm hoeh, dei awh haw atipouh. <sup>4</sup> Hatnavah Khaldeannaw ni Aramaih lawk lahoi, siangpahrang na hring saw seh. Kaimouh koe na mang hah rui haw. Kaimouh ni na mang teh ka leh awh vai nei atipouh awh. <sup>5</sup> Siangpahrang ni yo ka dei toung hat tayaw. Hote mang hoi a ngainae na dei thai awh hoehpawiteh, tawntarawn lah na tâtueng awh han. Na imlawnaw hai vaipuen songnawng lah ka coung sak han atipouh. <sup>6</sup> Mang hoi deingainae na deicai pawiteh, poehnonaw, tawkpunaw hoi barinae kalen a hmu han. Hatdawkvah, mang hoi deingainae hah kai koe dei awh telah Khaldean a lungkaangnaw koe atipouh. <sup>7</sup> Ahnimanaw ni, siangpahrang, na mang hah kaimouh koe dei haw, kaimouh ni ka leh awh vainei bout atipouh awh. <sup>8</sup> Hat toteh, siangpahrang ni yo ka dei toung hatayaw. A hnin thapa asaw nahanelah atueng tahruek sak hane doeh na ngai awh tie ka panue. <sup>9</sup> Mang hah na dei awh hoehpawiteh, pouknae buet touh duengdoeh kaawm. Atueng kasaw nakunghai, laithoe hrawngnhrang doeh dei hanelah na kâcai awh toe. Mang hah bout dei awh. Hottelah na dei thai awh pawiteh, leh hai na leh thai awh han tie ka panue bout atipouh. <sup>10</sup> Khaldeannaw ni, siangpahrang nang ni na dei e patetlah ka dei thai hane tami buet touh boehai awh hoeh. Bangpatet e siangpahrang ni hai a lentoe eiteh, mitpaleikathoumnaw, camkathoumnaw, Khaldean taminaw koe hettelah pacei boihoeh. <sup>11</sup> Siangpahrang nang ni na pacei e teh, ka ru poung e hno doeh. Tami lah kaawm hoeh e Cathut hloilah apinihai pâpho thai mahoe h bout atipouh awh. <sup>12</sup> Hote lawk hah a thai navah, puenghoi a lungkhuek teh, Babilon kho dawkvah kaawm e tami lungkaangnaw pueng koug thei lah awmseh telah kâ a poe. <sup>13</sup> Hat toteh, hote kâ hah a pathang awh teh, a lungkaangnaw thei a kamtawng awh teh, Daniel hoi a huinaw hah thei hanlah a tawng awh.

### *Nebukhadnezar mang pâphonae*

<sup>14</sup> Daniel ni bangkongmaw siangpahrang e kâ teh, hettelah totouh a rang vaw telah, <sup>15</sup> Babilon tami lungkaangnaw thei hanlah ka cet e naw kahrawikung, siangpahrang ka ring e Ariok koe kâhruecuet laihoi a pacei. <sup>16</sup> Ariok ni hote konglamnaw hah a dei navah, Daniel ni siangpahrang im a kâen teh, hote mang deicai nahanelah atueng na poe ei telah a kâhei. <sup>17</sup> Hahoi ama im a ban teh, hote akongnaw hah a huinaw Hananiah, Mishael, Azariah tinaw koe a dei pouh. <sup>18</sup> Hat toteh, maimouh teh alouke Babilon a lungkaangnaw hoi reirei due awh hoe h nahanelah, hete hrolawkvah dawkvah lungmanae coe awh nahan, kalvan Cathut koe ratoum awh sei ati awh. <sup>19</sup> Karum toteh Cathut ni vision lahoi, hote hrolawkvah hah Daniel koe a dei pouh. <sup>20</sup> Hat toteh, Daniel ni kalvan Cathut e lungmanae hah a pholen teh, Cathut min teh a yungyoe hoi a yungyoe



ditouh pholen lah awmseh. Lungangnae hoi hnotithainae hoi akawi. <sup>21</sup> A tue hoi khotue naw hah a kâthung sak. Siangpahrangnaw hai a pabo, a tawmtakhang, a lungkaang e naw koe lungangnae na poe. Kho ka pouk thai naw ni hai na lungmanae dawh hoi doeh a panue thai awh. <sup>22</sup> Ka ru e hnouaw hai kancengcalah, na patue awh. A hmonae koe kaawm e pueng na panue teh, nama koe angnae teh ao. <sup>23</sup> Mintoenaw e Cathut, hnotithainae hoi lungangnae na poe teh, kaimouh ni ka ratoum awh e patetlah siangpahrang e a mang pâpho thainae lungangnae teh ka pholen telah Daniel ni a ratoum.

### *Nebukhadnezar e mang deicainae*

<sup>24</sup> Hathnukkhu Babilon lungkaangnaw thei hanlah a patoun e Ariok koe a cei teh, Babilon tami lungkaangnaw hah thet hanh. Kai hah siangpahrang koe na thak haw. Kai ni mang hoi deingainae hah ka pâpho pouh vainei atipouh. <sup>25</sup> Hat toteh, Ariok ni Daniel hah karanglah siangpahrang koe a hrawi teh, siangpahrang, nange mang hoi deingainae ka pâpho thai e tami Judahnaw man e thung dawh e buet touh ka hmu toe atipouh. <sup>26</sup> Siangpahrang ni kai ni ka mang e mang hah dei vaiteh deingainae hah na pâpho thai han maw telah Belteshazzar tie Daniel hah a pacei navah, <sup>27</sup> Daniel ni siangpahrang, nang ni na pacei e hah a lungkaangnaw, camkathoumnaw, mitpaleikathoumnaw, hoi khueyuenaw ni pâpho thai mahoe. <sup>28</sup> Hro e naw ka pâpho niteh, ato hmalah ka tho hane naw siangpahrang nang koe ka dei pouh e Cathut buet touh duengdoeh kalvan vah kaawm. <sup>29</sup> Oe siangpahrang, na i navah ato hmalah ka tho hane naw hah na pouk. Hro e naw kapâphokung Cathut ni ato hmalah ka tho hane naw hah nang koe na patue. <sup>30</sup> Hete hro e hno hah, kai teh alouke moithangnaw hlak hoe ka lungang dawkvah kai koe a pâpho e nahoe. Nang ni na lungthung na pouk e naw hah na panue thai nahanlah doeh deingainae naw hah Cathut ni na pâpho pouh. <sup>31</sup> Siangpahrang, na i lahun nah na mang e vision teh, na khet navah meikaphawk hah na hmu. Athakaawme lah ao. Hote meikaphawk teh, taki ka tho e meilam hoi na hmalah a kâpâhung. <sup>32</sup> A lû teh sui, a lungtabue hoi a kut roi teh ngun lah ao. <sup>33</sup> A von hoi a phai roi teh, rahum lah ao. A khok buembue roi teh sum lah ao. Khoktabei hoi khoksampha teh sum atangawn amhru atangawn lah ao. <sup>34</sup> Nang ni na khet lahun nah, kut hoi sak hoe e amahmawk kaawm e talung buet touh ni, meikaphawk e khok sum tangawn amhru tangawn e koe a ten torei teh, <sup>35</sup> sum, amhru, rahum, ngun, sui naw teh, reppasei lah ao. Kawmpoi vah, cangkatinnae koe e vaiphu patetlah ao nahan awm laipalah, kahlî ni a palek teh a kahma. Meikaphawk ka ten e talung a rounteh, kalenpounge mon lah a coung. Talaivan pueng kounteh a ramuk telah mang na sak. <sup>36</sup> Atuvah, mang ni deingainae na dei pouh vai. <sup>37</sup> Siangpahrang, nang teh siangpahrangnaw e siangpahrang lah na o. Kalvan Cathut ni uknaeram, thasainae, hoi bawilennae na poe toe. <sup>38</sup> Tami khosaknae hmuen pueng koe, saringnaw hoi kahlun e tavanaw pueng na kut dawh poe lah ao teh, abuemlahoi uknae kâ na tawn. Nang teh, meikaphawk e suilû lah na o. <sup>39</sup> Nang hnukkhu lah, nang patetlah kalen hoe e alouke uknaeram a tâco han. Hathnukkhu talai van pueng ka uk hane apâthum e rahum ram a tâco han. <sup>40</sup> Apalinae uknaeram teh, sum patetlah kate e lah ao han. Sum teh alouke hno pueng a raphoe thai e patetlah apalinae ram ni raphoe vaiteh, a rektap han. <sup>41</sup> Kutsak e khoktabei hoi khoksamphanaw teh, sum tangawn amhru tangawn lah ao



e hah na hmu e patetlah, buet touh hoi buet touh kâtaran e uknaeram lah ao han. Hatei, amhru pâeng e hoi sum kalawt e na hmu e patetlah sum teh a tê han. <sup>42</sup> Khokcareinaw teh sum tangawn amhru tangawn lah ao e na hmu e patetlah, uknaeram atangawn teh a tê han, atangawn teh a rawk a yawi han. <sup>43</sup> Amhru pâeng e hoi sum kalawt e hah na hmu e patetlah khocanaw teh ram alouknaw hoi a kâkalawt awh han. Hatei, amhru hoi sum a kâkalawt thai hoehe e patetlah buet touh hoi buet touh kâpo thai mahoehe. <sup>44</sup> Kut hoi sak hoehe e talung buet touh ni mon hoi amahmawk a kamlei teh, sum, rahum, ngun, sui, amhrunaw hah reppasei lah a ten e na hmu e hateh, rawknae koe ka phat thai hoehe e, hote bawinae tueng nah kalvan Cathut ni uknaeram a kangdue sak han. Hote teh Jentelnaw e kut dawк phat tounge laipalah, ahmaloe dei tangcoung e ram pueng hah raphoe vaiteh, a yungyoe a cak han. <sup>45</sup> Hottelah, ato hmalah ka tho hane hnônaw hah ka lentoe poung e Cathut ni siangpahrang nang koe a dei e doeh. Nange mang teh, katang e doeh. Deicainae hai kahman e doeh telah Daniel ni a dei pouh.

### *Daniel poehno poenae*

<sup>46</sup> Hattoteh siangpahrang ni Daniel hmalah a tabo teh barinae a poe. Hmuitui hmaisawi hane hoi pasoumhno pasoung hanelah kâ a poe hnukkhu, <sup>47</sup> nang ni hete hrolawк hah na pâpho thai dawкvah, atangcalah nange Cathut teh, cathutnaw e Cathut, siangpahrangnaw e Bawi, hrolawк ka pâpho thai e Bawipa doeh telah a ti. <sup>48</sup> Hat toteh, Daniel hah thaw a luen sak teh, hnopai moikapap a poe hnukkhu, Babilon ram dawк bawi lah thoseh, Babilon lungkaangnaw kaukkung bawi lah a ta. <sup>49</sup> Hat toteh, Daniel ni a kâhei e patetlah siangpahrang ni, Shadrak, Meshak, hoi Abednego tinaw hah Babilon ram thung thaw katawкkung lah a ta. Hatei, Daniel teh siangpahrang im vah a tahung.

## 3

### *Sui meikaphawк*

<sup>1</sup> Vai touh teh, Nebukhadnezar siangpahrang ni a rasang dong 60, akaw e dong taruk touh e sui meikaphawк a sak teh, Babilon ram Dura yawn dawк a pâhung. <sup>2</sup> Siangpahrang ni a pâhung e meikaphawк hnawngnae pawi koe kâ katawnkungnaw, khobawinaw, pouknae kapoekungnaw, hnopai kakuenkungnaw, lawкcengkungnaw, hoi alouke khobawinaw pueng teh, kamkuheng sak hanelah kâ a poe. <sup>3</sup> Hatdawкvah kâ katawnkungnaw, khobawinaw, pouknae kapoekungnaw, hnopai kakuenkungnaw, lawкcengkungnaw hoi alouke khobawinaw pueng teh, a tho awh teh meikaphawк hmalah a kangdue awh. <sup>4</sup> Hatnavah miphun phunkuep hoi lawк phunkuep e taminaw, <sup>5</sup> Mongka, vovit, ratoung, cecak, tamawi, ratoung kalen hoi lawк ka tâcawt e pueng tumkhawng lawк na thai awh toteh, Nebukhadnezar ni a pâhung e sui meikaphawк hah tabo laihoi na bawк awh han. <sup>6</sup> Apipatethai tabo laihoi ka bawк ngai hoehe e teh, sut kamtawi e tahmanghmai dawк phum lah awmseh, telah kacaipounglah a oung awh. <sup>7</sup> Hatdawкvah, mongka vovit, cecak, ratoung, tamawi, ratoung kalen e hoi lawк ka tâcawt e pueng tumkhawng lawк tami pueng ni a thai awh toteh, miphun phunkuep hoi lawк phunkuep e taminaw pueng ni a tabo awh teh, Nebukhadnezar siangpahrang ni a pâhung e sui meikaphawк teh a bawк awh.



*Daniel e huinaw ni lawk eknæ*

<sup>8</sup> Hatnavah Nebukhadnezar siangpahrang koe Babilonnaw a tho awh teh, <sup>9</sup> Siangpahrang na hring dung vang seh, <sup>10</sup> mongka vovit, cecak, ratoung, tamawi, ratoung kalen e hoi lawk ka tâcawt e pueng tumkhawng lawk ka thai e pueng ni, sui meikaphawk hah tabo laihoi a bawk awh han. <sup>11</sup> Ka tabawk hoeh e, ka bawk hoeh e teh kamtawi lahun e tahmanghmai dawk phum lah ao han telah na pathang toe. <sup>12</sup> Siangpahrang nangmouh ni, Babilon ram thung kahrawikung thaw na poe e Shadrak, Meshak, hoi Abednego tinaw ni na pathang e lawk hah banglahai ngâi awh hoeh. Nange cathutnaw hai bawk awh hoeh. Na pâhung e sui meikaphawk hai bawk awh hoeh, telah Judahnaw yonpennæ a dei pouh awh. <sup>13</sup> Hat toteh, Nebukhadnezar siangpahrang teh puenghoi a lungkhuek dawkvah, Shadrak, Meshak, hoi Abednego tinaw kaw awh atipouh e patetlah siangpahrang hmalah a tâcokhai awh. <sup>14</sup> Nebukhadnezar siangpahrang ni, hei Shadrak, Meshak, hoi Abednego, kaie cathutnaw hah na bawk awh hoeh maw. Ka pâhung e sui meikaphawk hah na bawk awh hoeh maw. <sup>15</sup> Atuvah mongka vovit, cecak, ratoung, tamawi, ratoung kalen e hoi lawk ka tâcawt e pueng tumkhawng lawk na thai awh toteh, ka pâhung e sui meikaphawk hah bawk hanlah coungkacoe lah awm awh. Hoehpawiteh, kamtawi lahun e tahmang hmai dawk tang na phum awh han. Ka kut dawk hoi na kahlout sak hane cathut teh bangpatet e cathut mouh kaawm atipouh. <sup>16</sup> Shadrak, Meshak, hoi Abednego tinaw nihai, oe! siangpahrang Nebukhadnezar, hete kong dawk kaimouh ni bout dei hane banghai awmhoeh. <sup>17</sup> Kaimouh ni ka bawk awh e Cathut ni ka kamtawi lahun e tahmang hmai dawk hoi na hlout sak thai. Nange kut dawk hoi hai na hlout sak thai han. <sup>18</sup> Hottelah na kahlout sak hoeh nakunghai, nange cathutnaw teh ka bawk awh mahoe. Na pâhung e sui meikaphawk hai ka bawk awh mahoe, bout atipouh.

*Tahmanghmai dawk tâkhawngnæ*

<sup>19</sup> Hat toteh, Nebukhadnezar teh a lung hoe a khuek teh Shadrak, Meshak, hoi Abednego tinaw a khet navah a minhmai a mathoe dawkvah tahmang hmai hah ahmaloe e hlak let sari touh kamtawi sak hane hoi <sup>20</sup> a thakasai e ransanaw koe Shadrak, Meshak, hoi Abednego hah katek vaiteh kamtawi lahun e tahmang hmai dawk phum hanelah kâ a poe. <sup>21</sup> Hattoteh ahnimouh kathum touh hah, khohna khuehoi, hnicu khuehoi, luhuem khuehoi a katek awh teh kamtawi lahun e tahmang hmai dawk a phum awh navah, <sup>22</sup> siangpahrang e kâpoe e teh ekvoi a rang teh, patawi e tahmang hmai koe ekvoi a bet dawkvah, Shadrak, Meshak, hoi Abednego tinaw hmai kaphumkungnaw law teh a bet lawi a due awh. <sup>23</sup> Ahnimouh kathum touh teh puenghoi kamtawi e tahmang hmai dawk ao awh. <sup>24</sup> Hattoteh siangpahrang Nebukhadnezar teh kângairu laihoi hluet a thaw teh, tami kathum touh nahoehmaw katek laihoi hmai phum awh vaw telah kâpankhaikungnaw hah a pacei. Ahnimouh ni hai awiyaw atipouh awh. <sup>25</sup> Siangpahrang ni tami pali touh teh, katek laipalah hmai dawk a kâhlumkâhlai awh. Runæ dawk hoi a hlout awh e hah ka hmu bo vaw. Apali e teh Cathut capa boiboe bo aw atipouh hnukkhu,

*Tahmanghmai dawk hoi tâconæ*

<sup>26</sup> kamtawi lahun e tahmang hmai koe rek a cei teh, ka rasang poung e Cathut e sannaw, Shadrak, Meshak hoi Abednego tinaw tâcawt awh nateh, tho awh leih, atipouh navah ahnimouh teh hmai thung hoi a tâco



awh. <sup>27</sup> Kâ katawnkungnaw, pouknae kapoekungnaw, ransa bawinaw, hoi khobawinaw ni hmai ka kang thai hoeh e ahnimanaw hah a kalup aw hoi teh a khet aw hoi. Ahnimaie samrui buet touh boehai kamrâw hoeh. Khohna hai kamlang hoeh. Hmai kak hmuï hai tho hoeh. <sup>28</sup> Nebukhadnezar siangpahrang ni Shadrak, Meshak, hoi Abednego tinaw e Cathut teh pholen lah awmseh. Ahnimaie Cathut hloilah alouke cathut a bawk aw hoi hoeh nahanlah Cathut kâuep laihoi siangpahrang e kâ a ek aw hoi teh, a kâhmoun aw hoi e naw koe Cathut ni kalvantami a patoun teh a rungngang toe. <sup>29</sup> Hatdawkvah lawk phunkuep kapan e tami phunkuep thung daw k e buetbuet touh ni Shadrak, Meshak, hoi Abednego tinaw ni a baw k e Cathut dumdamnae lawk dei pawiteh, tawntarawn tâtueng lah awmseh, ahnimaie im haiyah vaipuen songnawng lah awmseh telah a pathang. Bangkongtetpawiteh, hettelah hluk e hloutnae hah hote Cathut hloilah bangpatet e cathut ni hai coung thai hoeh ati hnukkhu, <sup>30</sup> Babilon ram daw k Shadrak, Meshak, hoi Abednego tinaw hah a thaw a luen sak pouh.

## 4

### *Nebukhadnezar ni Cathut a pholen*

<sup>1</sup> Kai Nebukhadnezar ni lawk na patawn aw hoi. Talaivan kho tangkuem kaawm e mipun cawngca hoi lawk cawngca kapan e taminaw nangmouh koe lungmawngnae pungdaw seh. <sup>2</sup> Lathueng poung lah kaawm e Cathut ni kai daw k a sak e kângairu hno hoi mitnoutnae naw hah kamnue sak hanelah ka ngai. <sup>3</sup> Mitnout teh a len tangngak. Athaonae teh kângairu han lah ao tangngak. A uknaeram teh catounawtoun totouh kangning e lah ao.

### *Nebukhadnezar e mang pahni*

<sup>4</sup> Kai Nebukhadnezar teh kama e siangpahrang im daw k tawnta bawirengnae hoi ka o navah, <sup>5</sup> takikathopounge mang ka mang e hah ikhun daw k ka yannaie koehoi ka pouk navah, ka taki toungloug. <sup>6</sup> Hatdawkvah ka mang leh hanelah Babilon ram e a lungkaang e pueng ka hmalah koug thokhai aw hoi titeh ka pathang. <sup>7</sup> Hatnavah, mitpaleikathoumnaw, kutkhetkathoumnaw, Babilon kacangkhaikungnaw, hoi Khaldeannaw pueng a tho aw hoi teh, ka mang hah ka dei pouh. Hatei, ahnimanaw ni ka mang hah let thai aw hoi hoeh. <sup>8</sup> A hnukkhu vah, kaie cathut min ka phawt e Belteshazzar telah phung teh, Cathut e kathoug muitha hoi kakawi e Daniel ni kai koe a tho toreï teh, <sup>9</sup> mitpaleikathoumnaw kahrawikung Belteshazzar nang daw k kathoug Cathut Muitha ao tie thoseh, hrolaw k kaawm e pueng na pâpho thai e hai thoseh ka panue. Hatdawkvah, mang ka mang e hah na pâpho pouh haw.

<sup>10</sup> Ka ikhun daw k ka yan nah ka hmu e vision teh, talai lungui vah, karasangpoug e thingkung buet touh a kâung.

<sup>11</sup> Hote thingkung teh a roug teh a thao poung. Kalvan a deng teh, talai van pueng koehoi hmu e thai e lah ao.

<sup>12</sup> A hna hai a meihawi. Moithang pueng ni ca khuem hane paw hoi akawi. Talai e saringnaw teh hote thingkung tâhlip daw k a kâhat aw hoi, tavanaw ni a kangnaw daw k a kâhat aw hoi.

<sup>13</sup> Ka ikhun daw k ka yan lahun nah ka hmu e vision teh bout ka khet navah, thingkung ka ring e tami kathoug buet touh kalvan hoi a kum.



<sup>14</sup> Thingkung hah tâtueng haw. Akangnaw hah rabat haw. A hna, a pawnaw hah pahroe haw. Saringnaw ni thingkung rahim hoi tâcawt awh naseh. Tavanaw hai akangnaw dawk hoi tâcawt awh naseh.

<sup>15</sup> Hateiteh, a tangpha hoi a thongmui teh pâhlung haw. Sumrui, rahum rui hoi pâkhit nateh, hram kanaw um vah awm naseh. Kum sari touh thung khoraum ao vaiteh, saringnaw hoi cungtalâh hram cat naseh.

<sup>16</sup> Tami lungthin kahmat naseh. Saring lungthin tawn naseh.

<sup>17</sup> Bangkongtetpawiteh, a Lathueng Poug e Cathut ni talai uknaeram a uk tie thoseh, a poe ngai e tami koe a poe tie hai thoseh, ka rahnoum poung e tami hah a tawm teh ram hah a poe tie hai thoseh, moithangnaw ni a panue thai nahanlah thingkung karingkungnaw ni hettelah a sak awh toe. Tami kathoung naw ni kâ a poe toe telah a ti.

<sup>18</sup> Hottelah Nebukhadnezar siangpahrang ni mang ka mang toe. Nang Belteshazzar ka hmu e mang hah atuvah na deicai pouh haw. Kaie uknaeram dawk e a lungkaangnaw ni decai thai awh hoehe eiteh, nang teh kathoung Cathut Muitha hoi na kawi dawkvah, na pâpho thai telah ka hmu e mang hah Daniel koe ka dei pouh.

### *Mang deingainae*

<sup>19</sup> Hat toteh, Belteshazzar telah phung e Daniel teh, suimilam buet touh hane muen a kângai teh a lungpuen. Siangpahrang ni, nang Belteshazzar, mang hoi deingainae dawk na lungpuen sak hanh atipouh. Belteshazzar ni Bawipa, nang na kahmawt ngai hoehe e naw koe mang deingainae teh phat lawiseh. <sup>20</sup> Na hmu lahun nah karoung niteh, a tha kaawm poung e, kalvan ka deng niteh, talai van puenghoi hmu thai e, <sup>21</sup> a hna hai a meikahawi niteh, moithang pueng ni cakhuem e a paw hoi kakawi e, talai e saringnaw ni a rahim vah ao awh teh, tavanaw ni a kang dawk kâhatnae thingkung hateh, <sup>22</sup> Bawipa nang nama roeroe doeh toe. Nang teh na roun, thaonae hoi na kawi. Lentoe tawntanae teh kalvan kadeng lah ao. Kâ na tawntanae teh talai pout totouh a pha. <sup>23</sup> Thingkung ka ring e tami kathoung buet touh kalvan hoi ka kum niteh, thingkung hah tâtueng nateh raphoe haw. Hatei a tangpha hoi a thongmui hah pâhlung nateh, sumrui, rahumrui hoi katek nateh, hram kanaw um vah awm naseh. Kum sari touh thung khoraum awm naseh. Talai e saringnaw hoi rei awm naseh tie teh, <sup>24</sup> A lathueng poung e Cathut ni siangpahrang nang koe a pha sak e mang deicainae teh, <sup>25</sup> Nang hah tami um hoi na pâlei teh, talai saringnaw hoi reirei na o han. A Lathueng Poug e Cathut ni telah uknaeram hah a uk dawkvah, poe a ngai e taminaw koe a poe e hah na panue hoehnahlan kum sari touh thung maito patetlah hram na ca vaiteh, khoraum na o han. <sup>26</sup> Thing tangpha, thinghawngmui a pâhlung e teh, Kalvan ni a uk tie na panue hnukkhu, uknaeram hateh, na kut dawk bout poe lah ao han. <sup>27</sup> Hatdawkvah siangpahrang kaie lawk hah thai haw. Na tawnta e kasaw lah kangning thai nahan, na yonnae hah lannae lah, na hawihoehtae hah roedengnaw pahrennae lah let palang leih telah atipouh.

### *Nebukhadnezar kârahnoumnae*

<sup>28</sup> Hote hnopueng Nebukhadnezar siangpahrang koe a phanae kong teh hettelah ao. <sup>29</sup> Thapa yung 12 apoutnae dawk siangpahrang teh, Babilon im vah a kâhlai. <sup>30</sup> Siangpahrang ni, hete khopui teh, ka ram a kamtuenae, ka bawilen taluena tawm nahanlah ka bahu hoi ka sak e Babilon khopui nahoehtaw telah a ti. <sup>31</sup> Hote lawk a dei lahunnah, kalvan hoi ka tho e lawk teh Oe, Nebukhadnezar siangpahrang, thai haw. Na uknaeram teh



na kut dawkh hoi takhoe lah ao toe. <sup>32</sup> Nang hah taminaw umsali hoi na pâlei vaiteh, talai saringnaw hoi reirei na o han. A Lathueng Poung ni talai uknaeram hah a uk teh, a poe ngai e tami a poe e hah na panuehoenae tueng, kum sari touh thung maito patetlah hram na ca han telah a ti. <sup>33</sup> Hote lawk patetlah Nebukhadnezar dawkh vaitalahoi a tho teh, tami umsali hoi a pâlei awh. Maito patetlah hram a ca teh, khoraum vah ao. A takmuennaw teh mataw rathei patetlah ao teh, a khokpatinnaw teh tava khokpatin patetlah ao pouh.

### *Nebukhadnezar ni Cathut pholennae*

<sup>34</sup> Atueng akuiep toteh, kai Nebukhadnezar teh kalvan lah ka moungh navah, bout ka kâpanue teh, a yungyoe kahring e Cathut hah ka pholen, barinae ka poe teh, ka lentoe sak. Kâ tawnnae teh a yungyoe e doeh. A uknaeram teh a yungyoe a kangning. <sup>35</sup> Talai tami pueng teh, banghai bang hoeh lah ao awh. Kalvan ransanaw koehai thoseh, talai taminaw koehai thoseh, a ngai e patetlah a sak. Apinihai a kut hah ngang thai awh hoeh. Bangmouh na sak ka tet pouh thai e apihai awm hoeh. <sup>36</sup> Hat toteh, ka lunghin amahmoe lah bout ao. Kaie uknaeram bawilennae nahanlah bari onae hoi, raimonae teh kai koe bout a ban. Kho kapoukkungnaw hoi bawinaw ni bout na hnai awh teh, ka uknae casak lah ao teh, puenghoi taluena hai ahmaloe e hlak hoe a len. <sup>37</sup> Atuteh, kai Nebukhadnezar ni kalvan siangpahrang hah ka pholen teh, ka tawm teh ka lentoe sak. Bangkongtetpawiteh, a sak e hno pueng teh a thuem, a lamthung teh a lan. Kâoup laihoi kho ka sak e pueng teh rahim lah a pabo tie hah kho tangkuem a pathang.

## 5

### *Belteshazzar pawitona*

<sup>1</sup> Belshazzar siangpahrang ni, a bawinaw 1,000 touh a kaw teh, ahnimouh hanelah pawikalenpoung a to pouh teh, ahnimouh hoi misurtui rei a nei awh. <sup>2</sup> Misur tui a patek navah Belshazzar ni, apa ni Jerusalem bawkim thung e a lawp e sui manang, ngun manangnaw dawkh hoi, siangpahrang hoi a bawinaw, a yu hoi adonaw ni misurtui nei nahanelah thokhai awh telah kâ a poe. <sup>3</sup> Hat toteh, Cathut e bawkim thung e a lawp awh e suimanangnaw hah a la awh teh, siangpahrang hoi a bawinaw, a yu hoi adonaw ni hote manangnaw hoi misurtui a nei na awh. <sup>4</sup> Misur tui a nei awh teh, sui cathut, ngun cathut, rahum cathut, sum cathut, thing cathut, talung cathutnaw hah a pholen awh. <sup>5</sup> Hatnae tueng nah, tami e a kutdawn a tâco teh, hmaiimkhok lathueng, siangpahrang im tapang dawkh a kâthut teh, hottelah ka thut e kutdawn hah siangpahrang ni a hmu. <sup>6</sup> Hattoteh siangpahrang mei det a kamlang teh, a khopouk a ru dawkvah, a kenghru meimei doukkâlath lah ao teh, a khokpakhu thouk a kâkhawng pouh. <sup>7</sup> Camkathoum e Khaldean taminaw hoi khueyuenaw hah kaw awh telah puenghoi a hram. Hote ca hah a touk vaiteh a ngainae ka dei thai e tami teh, hnipaling kâkhu sak han, sui dingyin a lahuen dawkh awi sak han, uknaeram thung vah apâthum e bawi, lawkcengkung lah ao han a ti. <sup>8</sup> Tami kathoumthainaw pueng teh a tho awh. Hatei hote ca hah touk thai awh hoeh. A deingainae hai pâpho thai awh hoeh. <sup>9</sup> Hatdawkvah, siangpahrang Belshazzar teh, khopouk aru lawi a mei det a kamlang teh, a bawinaw puenghai muen ati awh.



<sup>10</sup> Hat toteh, siangpahrangnu ni siangpahrang hoi a bawinaw e lawk a thai navah, pawî thung a kâen teh, siangpahrang na hring saw seh. Na khopouk ru sak hanh. Na mei hai det kamlang sak hanh. <sup>11</sup> Kathoung Cathut Muitha ni a okhai e tami buet touh na uknaeram thung vah ao. Na pa se navah, ahni teh cathutnaw e lungangnae patet e lungangnae hoi panuena e tawn e hah panue e lah ao. Na pa Nebukhadnezar siangpahrang roeroe ni ahni hah camkathoumnaw, mitpaleikathoumnaw, Khaldeannaw hoi khueyuenaw, kahrawikung lah a hruk toe. <sup>12</sup> Bangkongtetpawiteh, mang let thainae, ka ru e lawknav hoi hoe kahawi e muitha, hoi panuena e, hah siangpahrang ni Belshazzar telah min a poe e Daniel dawkw ao e hah panue e lah ao. Hote Daniel hah kaw pawiteh a let thai han doeh atipouh.

### *Tapang dawkw e ca deinginae*

<sup>13</sup> Hattoteh Daniel hah siangpahrang hmalah a thokhai awh. Siangpahrang ni, apa ni Judah ram hoi a man teh a hrawi e sannaw thung dawkw ka bawkw e Daniel nang maw. <sup>14</sup> Nang teh Cathut Muitha ni na okhai teh, hoe kahawi e panuena e nang dawkw ao tie kamthang ka thai toe. <sup>15</sup> Hote ca hah touk vaiteh a ngaina e hah dei haw titeh camkathoumnaw hah kakaw eiteh, ahnimouh ni dei thai awh hoeh. <sup>16</sup> Nang ni na let thai, ka ru e lawkw paceinae naw hai na dei thai telah ka thai tangcoung e patetlah nang ni hote ca na touk thai boilah, na let thai pawiteh, hnipaling na kâkhu vaiteh, na lahuen dawkw sui dingyin na awi vaiteh, uknaeram thung apâthum e ukkung lah na o han atipouh. <sup>17</sup> Daniel ni, na hno poe hane naw teh nang namae lah awmseh. Poe han na ngai e tawkpahunaw hah ayâ alouknaw maha poe yawkaw, hatei na hmalah hote ca hah ka touk vaiteh ka let vainei. <sup>18</sup> Oe, siangpahrang Lathueng Poug e Cathut ni na pa Nebukhadnezar siangpahrang koe uknaeram, taluena e, bawilenna e hoi barinae hah a poe. <sup>19</sup> Taluena e a poe dawkvah, tami pueng mipun puenghoi lawkw cawngca pueng ni a bari awh teh, a hmalah a pâyaw awh. Thei han a ngai e pueng a thei teh, pasai a ngai e pueng hah a pasai. Thaw luen sak a ngai e pueng a luen sak teh, pabo a ngai e pueng a pabo. <sup>20</sup> A khopouk a rasang, a lungpata teh, kâoup hoi kho a sak. A bawilenna e lah pouh lah ao teh, a bawitungkhung dawkw hoi pabo lah ao. <sup>21</sup> Taminaw koehoi pâlei lah ao teh, moithang lungthin a tawn sak. Lathueng poung Cathut ni taminaw e uknaeram lathueng kâ a tawn dawkvah, a ngai e tami hah uknaeram a poe e hah a panue hoehroukrak lanaw hoi reirei a pawngpa teh maito patetlah pho a ca teh, khotui cupcup kayu lah ao. <sup>22</sup> Hatei, a capa nang Belshazzar, nang ni hote hnonaw hah na panue eiteh na lungthin na ka rahnoum laipalah, <sup>23</sup> Kalvan Bawipa hah na taran teh, bawkim thung e manangnaw hah na la sak teh, nama hoi na bawinaw hoi na yu hoi a donaw ni hote manang hoi misurtui na nei awh. Hahoi sui, ngun, rahum, sum, thing, talung hoi sak e cathut, kahmawt thai hoeh e, ka thai thai hoeh e hah na pholen awh teh, na hringnae hoi na lamthung pueng ka kuenkung Cathut law teh pholen laipalah na o awh. <sup>24</sup> Hatdawkvah kutdawn a patoun teh hote ca hah a thut sak. <sup>25</sup> Hote ca teh; MENE, MENE, TEKEL, UPHARSIN <sup>26</sup> MENE tie teh, na uknaeram hah Cathut ni a parei teh, a pâbaw toe. <sup>27</sup> TEKEL tie teh, nang hah yawcu dawkw na khing boteh na kuep hoeh toe. <sup>28</sup> PERES tie teh, na ukneram neh kapek lah ao toe. Media hoi Persia koe poe lah ao toe telah Daniel ni a dei pouh. <sup>29</sup> Hat toteh, Belshazzar siangpahrang ni a dei e patetlah Daniel hah hnipaling a kâkhu sak teh, a lahuen dawkw sui dingyin a awi sak teh,



a uknaeram dawk apâthum e bawi lah ao telah khothung a kâhlaikhai awh teh a oung awh. <sup>30</sup> Hat hnin tangmin vah, Khaldean siangpahrang Belshazzar teh thei e lah ao. <sup>31</sup> A kum 62 touh ka phat e Media tami Darius siangpahrang ni uknaeram hah a lawp.

## 6

### *Sendeknaw khu dawk Daniel tâkhawngnae*

<sup>1</sup> Darius siangpahrang ni a uknaeram thung thaw ka tawk hane 120 touh hoi hote bawinaw patuen ka hrawi hanelah bawi katham touh hah a ngai e patetlah a rawi. <sup>2</sup> Hote bawi katham touh thung dawk Daniel teh bawi buet touh lah ao hloilah, <sup>3</sup> bawinaw pueng hlak hai hoe kahawi e panuenae a tawn dawkvah, a ram buemlah ahni kut dawk kOUNg poe sak han telah siangpahrang ni a pouk. <sup>4</sup> Hat toteh, kahrawikungnaw hoi bawinaw ni Daniel dawk uknaeram hoi kâkuen e yonpen hane a tawng awh. <sup>5</sup> Cathut thaw a tawk e hloilah alouke thawtawknae dawk maimouh ni a yonnae hmawt awh hoeh ati awh teh, <sup>6</sup> Darius siangpahrang koe a kamkhueng awh. Siangpahrang na hring saw seh. <sup>7</sup> Bawipa, nang koe hloilah alouke tami koe nakunghai, cathut koe nakunghai hnin 30 touh thung ka ratoum e tami teh, sendekkhuh thung tâkhawng lah awmseh telah kâraphoe thai hoeh e kâ pathang sak hanelah uknaeram ukkung bawinaw, kho ukkung bawinaw, rahak lai ka deikungnaw hoi ukkung pueng ni lungkânging awh toe. <sup>8</sup> Hatdawkvah, laideitâtueng e teh caksak haw. Medes Persia phung patetlah kâraphoe thai hoeh e tacikkin sin haw atipouh awh. <sup>9</sup> Hatdawkvah, Darius siangpahrang ni laideitâtueng e teh kutnout a thut sin.

<sup>10</sup> Hote laideitâtueng e hah tacik a kin sin teh a pathang toe tie Daniel ni a panue ei, ama im a cei teh, imvan Jerusalem kho lah kangvawinae hlalangaw a paawng laihoi, meng ouk a sak e patetlah khok cuengkhuem laihoi hnin touh dawk vai thum touh a ratoum teh Cathut koe lunghawi lawk a dei. <sup>11</sup> Hottelah Cathut koe a ratoum e hah bawinaw ni a kamkhueng awh teh, a hmu awh navah, <sup>12</sup> siangpahrang koe a cei awh teh, siangpahrang nang koe hloilah, alouke tami koe nakunghai, cathut koe nakunghai, hnin 30 touh thung ka ratoum e tami teh sendek e khu thung tâkhawng lah awmseh telah kutnout na thut nahoehmaw telah laideitâtueng e hah a pacei awh. Siangpahrang ni hai kâraphoe thai hoeh e Medes Persia phung patetlah bokheiyah atipouh. <sup>13</sup> Bawinaw ni hai siangpahrang, Judah ram hoi na man e Judah tami Daniel ni siangpahrang banglahai ngaihoeh. Kutnout na thut teh na pathang e laideitâtueng e hai banglahai ngai hoeh. Hnin touh dawk vai thum touh a ratoum atipouh awh. <sup>14</sup> Hote lawk hah siangpahrang ni a thai navah puenghoi a kângai teh, Daniel a hlout thai nahan kanî a khup ditouh a kâpouk. <sup>15</sup> Bawinaw teh siangpahrang koe bout a kamkhueng awh teh, siangpahrang vai touh pathang tangcoung e laideitâtueng e teh Media Persia phung lah kâroephoe thai hoeh tie hah panuek khe, bout atipouh awh. <sup>16</sup> Hattoteh siangpahrang ni kâ a poe e patetlah Daniel hah a thokhai awh teh, sendekkhuh thung a tâkhawng awh. Siangpahrang ni Daniel koe, pout laipalah na bawk e Cathut ni nang teh na hlout sak seh atipouh. <sup>17</sup> Lungphenpui hah a la awh teh, sendekkhuh a khuem awh. Daniel e akong dawk bout pathuengpathainae ao hoeh nahanelah siangpahrang e kuthrawt hoi bawinaw e khuthrawt hoi a kin awh.



*Sendekkhū dawk hoi Daniel hloutnae*

<sup>18</sup> Hahoi, siangpahrang teh im lah a ban teh karum tuettuet rawca a hai. A hmalah ratoung tamawi hai tum sak hoeh. Ip hai ip thai hoeh. <sup>19</sup> Atangtho amom a thaw teh sendekkhū koe karanglah a cei. <sup>20</sup> Sendek khu koe a pha toteh, khuika laihoi Daniel hah a kaw teh, kahring Cathut e a san Daniel, nang ni pout laipalah na bawk e Cathut ni sendek runae koehoi na hlout sak thai maw atipouh. <sup>21</sup> Daniel ni siangpahrang na hring dung vang seh. <sup>22</sup> Ka Cathut ni a kalvantami a patoun teh, sendeknaw e a pahninaw hah a tabuem pouh. Hatdawkvah, kai teh sendek runae dawk hoi ka hlout. Bangkongtetpawiteh, kai teh Cathut hmalah kacueme lah ka o teh, nang koehai payonnae ka sak hoeh. <sup>23</sup> Hat toteh, siangpahrang puenghoi a lunghawi teh, Daniel hah sendekkhū thung hoi rasa hanelah kâ a poe.

*Daniel ni Cathut barinae*

<sup>24</sup> Hathnukkhū Daniel yon ka pen e naw hah, siangpahrang e kâ lahoi a kaw awh teh, a yuca abuemlahoi sendekkhū dawk a tâkhawng awh. Talai a pha hoehnahlan sendeknaw ni a hruhawng pueng vekrasen lah a kei teh a ca awh. <sup>25</sup> Hottelah hoi, talai van kho tangkuem kaawm e lawk cawngca, miphun cawngca pueng koe siangpahrang e kâ lahoi ca a thut teh, a patawn. Ca a thut e teh, nangmouh koe lungmawngnae pung seh. <sup>26</sup> Kai ni ka uknaeram thung kaawm e nangmouh ni, Daniel ni a bawk e Cathut hah taket awh telah lawk tâtuengnae ka sak. Bangtelamaw tetpawiteh, hote Cathut teh, kahring e Cathut, a yungyoe kangning e Cathut lah ao. Aram teh rawk thai mahoe. A uknaeram hai a yungyoe a kangning han. <sup>27</sup> A rungngang teh a hlout sak. Kalvan hoi talai van hai mitnoutnae, kângairunae hnonaw a tâco sak. Daniel hah sendek hnotithainae dawk hoi ka hlout sak e Cathut lah ao. <sup>28</sup> Hottelah hoi Daniel teh, Darius a bawi nahai thoseh, Persia tami Sairas a bawi nahai thoseh, hawinae ka coe e lah ao.

## 7

*Daniel e vision*

<sup>1</sup> Babilon siangpahrang Belshazzar a bawinae apasuek kum vah, Daniel teh a i lahunnah, mang a sak teh vision a hmu e naw hah a thut e teh, <sup>2</sup> Kai Daniel ni karum vah ka hmu e vision teh, kalvan takin pali touh koe e kahlîlaw teh tuipui van vah buet touh hoi buet touh a kâhmang awh. <sup>3</sup> Reikâvan hoeh e sarang pali touh teh tuipui thung hoi a tâco awh. Apasueke sarang teh sendek hoi a kâvan. Mataw rathei hai a tawn. <sup>4</sup> Ka khet lahun nah ahnie ratheinaw teh koung a phawk pouh awh. Talai dawk hoi amahoima a kâtaawm teh, tami patetlah khok hoi a kangdue teh, tami lunghin a tawn, <sup>5</sup> Apâhni e sarang teh tavom hoi a kâvan. Avang lae khok hoi a kangdue teh, a kâko dawk nâhru katham touh a rakoung. Thaw nateh a moi moikapap cat haw atipouh awh. <sup>6</sup> Bout ka khet boteh, kaisi hoi kâvan e sarang buet touh a kamnue. A hnukthun vah rathei pali touh ao. Lû pali touh a tawn. Uknâe kâ hai a tawn. <sup>7</sup> Tangmin vah bout ka hmu e vision teh, a tha kaawm poung niteh, takikathopounge apalinae sarang teh a kamnue. Kalenpounge sumhâ a tawn. Vekrasen lah a kei a ca teh, a canawi e hah a khok hoi a coungroe. Ahni teh, ahmaloe e sarangnaw hoi kâvan hoeh. Ki hra touh a tawn. <sup>8</sup> Hote kinaw hah ka khet lahunnah, kinaw e alungui vah, alouke ki buet touh bout a cawn. Hote kica e hmalah



hmaloe e ki kathum touh teh a tangpha khuehoi phawk lah ao. Hote kica teh tami e mit patet e mit a tawn, puenghoi lawk dei thainae pahni hai a tawn.

### *Ayan e taminaw kamnuenae*

<sup>9</sup> Ka khet lahun navah, bawitungkhungnaw hah ka hmu. A kum kacue e buet touh a tahung. A khohna e teh tâmai patetlah a pangaw. A sam teh tumuen patetlah a pangaw. Tungkhung teh hmaito lah ao. Tungkhung khok teh ka kang lahun e hmai lah ao. <sup>10</sup> A minhmai dawk hoi hmaiang a tâco. Touklek thai hoe e naw ni a thaw a tawk awh teh, touklek thai hoe e naw ni a hmalah a kangdue awh. Lawkceng hanelah cauwnaw hah kadai lah ao.

<sup>11</sup> Hatnavah, kica ni puenghoi dei e lawk dawk ka khet navah, hote sarang hah a thei awh teh, a tak hah hmai hoi a sawi awh teh, a raphoe awh. <sup>12</sup> Alouke sarang teh uknaeram kê tawn awh hoe eiteh, atueng khoe e a pha hoehnahlan totouh a hring awh. <sup>13</sup> Hote tangmin e vision dawk teh, tami hoi kâvan e buet touh tâmai a kâcui teh a kum kacue e koe a tho. A kum kacue e hmalah ahni hah a thokhai awh. <sup>14</sup> Kho tangkuem kaawm e lawk cawngca kapan e tami pueng hah uk sak hanelah, ahni koe uknaeram kê, lawkcengnae hoi bawilennae hah poelah ao. A uknaeram teh akangning, a ram teh rawk thai mahoe.

### *Daniel vision caksaknae*

<sup>15</sup> Kai Daniel teh hote vision ni ka lungthin dawk runae na poe teh, ka muitha teh a cingou. <sup>16</sup> Ateng kangdout e buet touh koe ka cei teh, atu e ka hmu e naw hah bangtelamaw telah ka pacei. <sup>17</sup> Ahni ni hete sarang pali touh teh talai van ka tâcawt hane ram pali touh hah doeh. <sup>18</sup> Hatei, a lathueng poung e Cathut e tami kathoungnaw ni hote uknaeram coe awh vaiteh, a yungyoe a pang awh han telah atipouh.

<sup>19</sup> Hat toteh, alouke sarangnaw hlak taki hoe ka tho niteh, sumhâ hoi rahum khokpatin ka tawn niteh, vekrasen lah a kei a ca teh, canawi e hah a khok hoi ka coungroe e sarang teh bangmouh a deingai nah aw tie thoseh, <sup>20</sup> A lû dawk e ki hra touh teh bangmouh a dei ngai na aw tie hai thoseh, a hnukkhu ka cawn niteh, ahmaloe e ki kathum touh hah din ka phawng niteh, puenghoi lawk dei thainae pahni hoi mit ka tawn e, a huinaw hlak taranhawinae minhmai ka tawn e ki hateh bangmouh a deingai nah tie hah panue han ka ngai. <sup>21</sup> Ka khet lahun navah, a kum kacue e buet touh a tho teh, <sup>22</sup> a lathueng poung e Cathut e tami kathoungnaw koe uknaeram teh poe lah ao. Hahoi, uknaeram pang hanelah tami kathoungnaw hanelah khoe e atueng teh a pha. <sup>23</sup> Ahni ni, apalinae sarang teh talai van kaawm e ram puenghoi hai kâvan hoe e apalinae uknaeram doeh. Hete ni talai uknaeram pueng vekrasen lah kei vaiteh a coungroe han. <sup>24</sup> Hote uknaeram dawk hoi ka cawn e ki hra touh hateh, ka tho hane siangpahrang hra touh hah doeh. Ahnimouh hnukkhu alouke siangpahrang a tho han. Ahmaloe e siangpahrangnaw hoi kâvan hoe. Ahmaloe e siangpahrang kathum touh hah a pabo han. <sup>25</sup> A lathueng poung e Cathut hah taran vaiteh, puenghoi lawk a dei han. Atueng hoi kâlawk hah pathai hanlah a panki han. Atueng buet touh, atueng kahni touh, atueng tangawn totouh kê a tawn han. <sup>26</sup> Hathnukkhu lawkcengnae ao han. Hattoteh kê a tawwnae takhoe pouh lah awm vaiteh, khoeroe raphoe lah ao han. <sup>27</sup> Kalvan rahim kêtawwnae, uknaeram, hoi lentoenae naw teh, a Lathueng Poung e Cathut e a tami kathoungnaw koe uknaeram



poe lah ao han. <sup>28</sup> Het totouh heh, deicainae doeh toe. Kai Daniel teh ka lung a puen teh, ka minhmai pan hoeh. Hatei nakunghai, ka hmu e visionnaw hah ka lung thungvah ka pâkuem.

## 8

### *Tutan hoi hmaetan kamnueanae*

<sup>1</sup> Siangpahrang Belshazzar a bawinae a kum pâthum nah, kai koe vision a kamnue. Kai Daniel koe ahmaloe a kamnue hnukkhu bout a kamnue. <sup>2</sup> Elam ram Shushan siangpahrang im, Ulai palang teng ka o navah vision teh a kamnue. <sup>3</sup> Ka khet navah, ki kahni touh ka tawn e tutan buet touh palang rai a kangdue. Ki roi teh kâvan hoeh, buet touh teh bet a saw. Bet ka saw e ki teh a hnukkhu ka cawn e lah ao. <sup>4</sup> Hote tu ni kanîloun, atunglah, akalah a deng dawkvah, bangpatet e saring ni hai ngang thai hoeh. Ahnie kut daw k hoi apinihai a hlout sak thai hoeh dawkvah, a ngai e patetlah a sak teh, ka lentoe poung e lah ao. <sup>5</sup> Hote konglam hah ka pouk navah, mit roi e rahak vah ki buet touh ka cawn e hmaetan buet touh teh, kanîlounlah hoi a tâco teh talai coungroe laipalah talai van pueng a katin. <sup>6</sup> Ki kahni touh ka tawn ni teh palang namran lah kaawm e tutan aonae koe, puenghoi a yawng teh, <sup>7</sup> ateng a pha toteh, puenghoi a lungkhuek dawkvah, tutan hah a deng teh tutan e ki kahni touh e hah, letlet a khoe pouh. Tutan ni a ngang thai hoeh dawkvah, hmaetan ni tutan hah talai daw k a parawp teh, a coungroe. A kut daw k hoi tutan hah apinihai lawm thai hoeh. <sup>8</sup> Hottelah hoi, hote hmaetan teh, puenghoi a rounng teh a len. A tha ao lahunnah, a ki a lawt pouh. Hote ki hmuen daw k ki pali touh a cawn teh, kalvan kahli pali touh koe lah, a kangvawi awh.

<sup>9</sup> Hote ki pali touh thung daw k buet touh e ki daw k alouke ki kang bout a cawn. Akalah hai thoseh, kanîtholah ai thoseh, ka lentoe e ram koe lahai thoseh, a kangvawi teh, puenghoi lennae koe a pha. <sup>10</sup> Kalvan kaawm e koe totouh a rounng teh, hawvah kaawm e atangawnnaw hoi âsi tangawn naw teh, talai van a pabo teh, khok hoi a coungroe. <sup>11</sup> Hothloilah, kalvan e kaawm e koe totouh a kâoup teh, hnintangkuem sak lah kaawm e hmaisawi thuengnae hah a takhoe teh thoungnae hmuen hah a raphoe han. <sup>12</sup> Payonnae daw k hnintangkuem sak e hmaisawi thuengnae hoi ransanaw hoi hote ki koe poelah ao teh, lawkkatang hah talai totouh a pabo teh, tânae a hmu.

<sup>13</sup> Hatdawkvah, tami kathoung buet touh ni, dei e lawk hah ka thai. Alouke tami kathoung ni ahmaloe lawk a ka dei e tami kathoung koe, thoungnae hmuen hoi ransanaw hmaisawi thuengnae takhoe hanelah thoseh, coungroe hanelah hnintangkuem sak e raphoe e yonnae hoi thoseh, kâkuen e vision teh nâtotouh han na maw atipouh. <sup>14</sup> Ahmaloe e ka dei e ni, hnin 2300 totouh a ro han. Hathnukkhu, kathoung bawkim hah bout a pâsu awh han atipouh.

### *Gabriel ni vision deicainae*

<sup>15</sup> Kai Daniel ni vision ka hmu e hah panue hanelah, kâyawm lahun nah tami hoi kâvan e buet touh ka hmalah a kangdue. <sup>16</sup> Hatnavah, Ulai palang koehoi tami e lawk ni, Gabriel hete tami koe vision deingainae hah dei pouh haw, tie lawk ka thai. <sup>17</sup> Kai ka kangdue nah kai koe rek a hnai toteh, ka taki teh ka tabo. Ahni ni, hei! Tami capa, thai panuek haw. Hete vision teh atueng poutnae hoi kâkuen e doeh a ti.



<sup>18</sup> Hottelah, a dei lahunnah talai dawk mat ka i. Ahni ni a kut hoi na tek teh, na kangdue sak. <sup>19</sup> Ahni ni, lungkhueknae atueng, apoutnae koe lah kaawm hane naw hah bout ka dei han rah. Bangkongtetpawiteh, atueng khoe e dawk poutnae kaawm han. <sup>20</sup> Ki hra touh ka tawn e tutan teh Media siangpahrang doeh. <sup>21</sup> Hmaetan teh Grik uknaeram doeh. Mit rahak ka cawn e ki hateh, ahmaloe e siangpahrang doeh. <sup>22</sup> Hote ki a lawt teh, hmuen dawk ki pali touh a cawn tie teh, ahnie uknaeram dawk hoi ram pali touh a tâco han. Hatei, ahmaloe e ram patetlah bahu tawn awh hoeh. <sup>23</sup> Ahnimae uknaeram atueng abawnae koe lah, kê katapoenaw e hawihoehnae akupeh nah tueng toteh, taranhawinae minhmai, dумыennaе ka panuek e siangpahrang buet touh a tâco han. <sup>24</sup> Hote siangpahrang teh, athakaawme lah ao han. Hatei, amae bahu nahoe. Puenghoi raphoe tânae a hmu awh han. Atha kaawm e taminaw hoi tami kathoungnaw hah a raphoe han. <sup>25</sup> Tâ hanelah a dумыen han, amahoima, ka taluepoung lah a kâpouk han. Roumnae ao ati awh navah ahni ni taminaw hah raphoe vaiteh, ahni ni, bawinaw e Bawi hah a taran han. Hatei, ahni teh, raphoe lah ao han. Tami e bahu hoi mahoe. <sup>26</sup> Nang koe na poe e amom hoi tangmin e vision teh, ahman dawkvah tacikkin loe. Bangkongtetpawiteh, ato hmalah torei a kuep han. <sup>27</sup> Hattoteh kai Daniel teh, nget tawn laihoi ka pataw. Hathnukkhu ka thaw teh, siangpahrang thaw bout ka tawk. Ka hmu e vision e puenghoi kângai na ru sak. Hothateh, apinihai panuek thai hoeh.

## 9

### *A taminaw hanlah Daniel ratoumnae*

<sup>1</sup> Ahasuerus capa, Darius, Medes catoun hah, Babilon siangpahrang lah a bawinae a kum pahni navah, <sup>2</sup> profet Jeremiah koe BAWIPA ni poe e a lawk, Jerusalem kho a rawk teh, kum 70 touh a ro han tie hah kai Daniel ni cakathoung lahoi ka panue. <sup>3</sup> Hatdawkvah, rawca ka hai, buri ka kho, hraba kâphuen teh Cathut koe ratoum laihoi kahei, <sup>4</sup> Hottelah, Cathut koe kâpâpho laihoi ka ratoum e teh, ama ka lungpataw niteh, a poe e kâpoelawknaw ka tarawi e koe, a lawkkam kacak ni teh lungmakung, ka lentoe niteh, takikathopounge Cathut, <sup>5</sup> na patoun e hoi kê poe e dawk hoi ka cei payon awh teh, ka payon awh toe. Kamsoum hoe lah kho ka sak e teh, nang na taran awh toe. <sup>6</sup> Siangpahrangnaw, kahrawikungnaw, napanaw hoi ram thung kaawm naw koe, nange kê laihoi lawk ka dei e profetnaw e lawk hai ka ngai awh hoeh toe. <sup>7</sup> Oe Bawipa lannae teh nange doeh. Nang na taran kecu dawk na pâlei teh, ram hnai ram hlanae koe, khoram tangkuem kaawm e Judahnaw, Jerusalem kho kaawm e Isarelnaw puenghoi kaimouh teh sahnin e patetlah kaya awh toe. <sup>8</sup> Oe Bawipa, nang koe ka yon awh kecu dawk, kaimae siangpahrang, kahrawikungnaw, napanaw hoi kaimouh teh ka kaya awh toe. <sup>9</sup> Kaimouh ni nang na ka taran nakunghai, lungmanae hoi ngaithoumnae teh, kaimae Cathut nama e doeh. <sup>10</sup> Maimae Cathut ni profetnaw hno lahoi maimouh koe na poe e tarawi hane kâlawnaw hah banglahai ngai laipalah ka o awh toe. <sup>11</sup> Atangcalah Isarelnaw pueng ni na lawk ka ngai awh laipalah, lam ka payon awh teh, kâlawk ka tapoe awh toe. Hatdawkvah, Cathut e san Mosi e kâlawk dawk thut lah kaawm e thoebonae teh, kaimouh lathueng awi lah ao toe. <sup>12</sup> Kaimouh koe dei e lawk hoi lawkcengkungnaw koe dei e lawk, rawknae kalenpoung teh kaimouh lathueng a phasak toe.



Bangkongtetpawiteh, Jerusalem vah rawknae phasak e patetlah kalvan rahim alouke ram dawk phat sak boihoeh. <sup>13</sup> Mosi e kâlawk dawk thut tangcoung patetlah rawknae pueng teh kaimouh lathueng a pha toe. Hatei, payonpakainae kamlang takhai teh, a lawkkatang panue thai nahanelah, BAWIPA Cathut koe kâhet awh hoeh toe. <sup>14</sup> Hatdawkvah, Cathut ni rawknae hah a sin teh, maimae lathueng a pha sak e doeh. Bangkongtetpawiteh, a lawkngai awh hoeh nakunghai, Cathut teh, a lan, maimouh lathueng hno a sak e pueng teh a thuem doeh.

<sup>15</sup> Atuvah, Oe BAWIPA Cathut, Izip ram thung hoi thaonae kut hoi a taminaw katâcawtkhaikung hoi, atu totouh minhawi min kamthang nahanlah kasakkung, kaimouh teh, ka yon awh toe, hno kahawihoe hoi ka sak awh toe. <sup>16</sup> Oe Bawipa, na lannae pueng patetlah lungkhuek lungphuennae teh, kathounge mon, Jerusalem kho dawk hoi na takhoe pouh haw telah ka kâhei. Bangkongtetpawiteh, kaimae yonnae hoi mintoenaw e yonnae kecu dawk Jerusalem kho hoi na taminaw teh tengpam kaawm e naw koe pathoe han kawilah ka o awh toe. <sup>17</sup> Hatdawkvah, Oe Cathut, na san kai ni ka hei e hoi ka ratoum e hah na thai pouh haw. Bawipa ama hane kecu dawk, kingkadi e a thoungnae hmuen koe na minhmai angnae ni pheng ang sak haw. <sup>18</sup> Oe Cathut, hnâpakeng nateh thai haw. Na mit padai nateh, kaimae rawknae hoi na min lahoi phung e khopui hah kenhaw! Kaimouh teh, mae hawinae kâuep awh hoeh, ka lentoe e na lungmanae dawk hoi doeh nama koe ka ratoum awh. <sup>19</sup> Oe Cathut na thai pouh haw. Oe Cathut yonnae na ngaithoum haw. Oe Cathut thai nateh sak haw. Nama hane dawk rap awm hanh. Bangkongtetpawiteh, nama e kho, nama e taminaw teh na min lahoi phung e doeh, telah a ratoum.

### *Yat 70 sut deingainae*

<sup>20</sup> Hottelah, kama e yonnae hoi ka tami Isarelnaw e yonnae pâpho laihoi ngaithoum nahanelah kâhei ratoum laihoi, Cathut hmalah Cathut e mon kathoung hanelah ka kâhei lahunnah, <sup>21</sup> ratoum laihoi lawk ka dei lahunnah, yampa e vision daw kammuek e Gabriel karangpoung lah kamleng laihoi tangminlah thuengnae tueng nah kai koe a tho teh, <sup>22</sup> na ka panue sak hnukkhu, Daniel, nang ni panuenae apap nahanelah, nang koe ka tho toe. <sup>23</sup> Na ratoum tahma vah kâ poelah ao dawkvah, nang koe dei hanelah kai ka tho toe. Nang teh puenghoi pahren ka tho e lah na o. Hatdawkvah vision thai panuek nahane kâ ao. <sup>24</sup> Kâtapoenae pout sak hane hoi, yonnae pout sak hane, payonae daw kâmaihiawinae sak hane, payonnae thoungsak nahane hoi, a yungyoe lannae thokhai hane hoi, vision hoi sutdeilaw kin hane hoi, hmuen kathoung poung satui awi hanelah, na taminaw hoi kho kathoung hanelah yat 70 touh tâtueng e lah ao toe. <sup>25</sup> Hatdawkvah, Jerusalem kho bout sak hanelah kâ poe hnin hoi Khrih Bawipa totouh yat 7 touh hoi yat 62 touh a ro han tie hah panuek lawih. Rucatnae tueng daw lamnaw hoi tapang sak lah ao han. <sup>26</sup> Hote yat 62 aloum hnukkhu, Khrih teh kâ hmawt laipalah thei lah ao han. Hathnukkhu ka tho e Bawi hoi taminaw ni khopui hoi hmuen kathoung hah raphoe awh vaiteh, tuikalen thonae lahoi rawknae ao han. Apout totouh kâtuknae awm vaiteh, rawknae teh pouk tangcoung lah ao. <sup>27</sup> Yat touh hanelah taminaw hoi lawkkam sak awh vaiteh, hote a yat tangawn navah, thuengnae hoi poenae hah a pout sak han. Panuet ka tho poung e a som daw karaphoeuk phat vaiteh, poutnae koe ka phat hanelah pouk tangcoung e totouh lungkhueknae teh ahni daw awi hanlah ao han telah atipouh.



## 10

*Daniel ni vision bout a hmu*

<sup>1</sup> Persia siangpahrang, Sairas a bawinae a kum thum nah Belteshazzar telah phung e Daniel koe lawk pâpho buet touh a tho. Hote lawk teh ahman, taran tuknae kalenpoung hoi kâkuen e lah ao. Hote lawk thaipanueknae teh vision lahoi ahni koe a tho. <sup>2</sup> Hatnae tueng navah, kai Daniel teh yat thum touh rawca hai laihoi ka o. <sup>3</sup> Yat thum touh aloum hoehroukrak, bu ka cat hoeh, moi ka cat hoeh, misur hai ka patek hoeh, satui hai khoeroe kâhluk hoeh. <sup>4</sup> Apasueke thapa 24 hnin vah palangpui Hiddekel teng ka o lahunnah, <sup>5</sup> ka radoung boteh, loukloukkaang e khohna ka khohnat niteh, Uphaz suitaisom kâyeng e tami buet touh ka hmu. <sup>6</sup> Atak teh topaz talung hoi a kâvan. A minhmai hai sumpapalik e patetlah ao. A mit hai hmaiim patetlah ao. A kutkhoknaw teh, loukloukkaang e rahum e rong hoi a kâvan. A lawk teh tami moikapap lawk hoi a kâvan. <sup>7</sup> Hote vision hah kai Daniel ni duengdoeh ka hmu. Kai hoi reirei kaawm e naw niteh, hmawt awh hoeh. Ahnimouh niteh, puenghoi a taki awh teh, a pâyaw awh dawkvah, kâhro hanlah a yawng awh. <sup>8</sup> Kai teh, kamadueng sut ka o teh, hote ka lentoe e vision ka hmu navah, ka minhmai a mathoe teh, tha khoeroe ka tawn hoeh, pouk ka kâsawp. <sup>9</sup> Hatnavah, lawk hah ka thai. A lawk hah ka thai pouh teh, lawk a dei lahun navah, minhmai hoi talai rekkâbet lah ka tabo teh mat ka i.

*Persia hoi Grik sut deinae*

<sup>10</sup> Hatnavah kutvang ni na tek, khokpakhu hoi kuttabei hoi ka kâva. <sup>11</sup> Ahni ni, pahren hanlah kaawm poung e Daniel, ka lawk na thai panuek nahanlah kangdout haw. Nang koe kai heh patoun lah ao teh, atu ka tho toe atipouh navah, kai teh nouknouk pâyaw laihoi ka kangdue. <sup>12</sup> Hatnavah, ahni ni Oe Daniel, taket hanh. Thaipanuek nahane hoi, Cathut hmalah kârahnom hanelah na kâhmoun hnin hoiyah kamtawng teh, nange lawk hah ka thai toe. Hote na lawk dawk kai ka tho e doeh. <sup>13</sup> Persia uknaeram kaukkung ni hnin 21 touh thung kai hah na ngang. Hahoi, kahrawikung kacuenaw thung dawk buet touh lah kaawm e Maikel hah kai na kabawp hanelah a tho. Bangkongtelpawiteh, Persia siangpahrangnaw koe kai kama dueng sut ka o. <sup>14</sup> Atuteh, na miphunnaw koe hmalah ka tho hane kawinaw hah na panue nahanelah, kai ka tho toe. Hete vision teh ato hmalae tueng hoi kâkuen e doeh telah a ti.

<sup>15</sup> Hottelah a dei hnukkhu ka lû ka saling teh lawkdei thai laipalah ka o. <sup>16</sup> Hatnavah, tami capa hoi kâvan e buet touh ni ka pahni hah a tek teh, ka pahni ka ang teh, ka hmalah kangdout e koe, ka Bawipa vision kecu dawk puenghoi ka khang toung dawkvah, ka tak dawk tha ka tawn hoeh toe. <sup>17</sup> Na san ni a Bawipa hoi bangtelavai lawk a dei thai. Atu patenghai kai dawk tha khoeroe awm hoeh. Kâha meimei a phout toe ka ti pouh. <sup>18</sup> Hat toteh, tami hoi kâvan e ni bout na tek teh, tha na poe. <sup>19</sup> Pahren ka tho poung e tami, taket hanh. Roumnae nang koe awmseh. Na tha awm sak. Thaona hoi kawi haw na ti pouh. Hottelah a dei lahunnah ka tha ao teh, ka Bawipa dei haw, nang ni tha na o sak toe ka ti pouh. <sup>20</sup> Ahni ni, nang koe kai kathonae hah na panue ou. Persia ram kaukkung taran tuk hanelah bout ka ban han. Kai ka ban hnukkhu Grik ram kaukkung bout a tâco han. <sup>21</sup> Hatei, Cakathoung dawk mitnoung tâ e teh na dei pouh han rah. Hete kong dawk nang kahrawikung Maikel hloilah apihai kai koelah kangdoutkhai e awm hoeh.



## 11

<sup>1</sup> Medes siangpahrang, Darius a bawinae a kum pasuek navah, a uknaeram caksak hane hoi thao sak nahanelah ka kampangkhai. <sup>2</sup> Atuteh, katang e ka dei han toe. Persia ram ka uk hane siangpahrang kathum touh a tâco han rah. Apalinae siangpahrang teh ahnimanaw hlak hoe a tawnta han. Hottelah a tawnta thai teh, a tha ao dawkvah, Grik ram tuk hanelah tamipueng a hroecoe han. <sup>3</sup> Hatnavah, athakaawme siangpahrang buet touh a tâco han. Ahni ni kâtawnnae hoi uk vaiteh, a ngai e patetlah a sak han. <sup>4</sup> Ahni a tâco hnukkhu hoi a ram rawk vaiteh, pali touh lah a kêrei awh han. Hatei, ka ukkungnaw teh a catounnaw nahoe, kâtawnnae hoi a uknaeram thung e nahoe. Bangkongtetsapawiteh, a ram teh a kâbawng tounge dawkvah, ayânaw poe lah ao han.

*Atunglae hoi akalae siangpahrangnaw kâhruetcuets poenae*

<sup>5</sup> Hat toteh, akalae siangpahrang teh a thao han. Hatei, a bawinae thung daw buet touh teh ahni hlak a tha awm vaiteh, amae ram hah kalen e bahu hoi a uk han. <sup>6</sup> Atueng a saw toteh, huiko a kâsak awh han. A kâpo awh nahanlah akalae siangpahrang canu teh atunglae siangpahrang koe kâtawnnae a poe han. Hatei, hote napui e kâtawnnae teh cak mahoe. Hote siangpahrang hoi a catoun hai cak mahoe. Siangpahrang canu hai, ahni ka thak e naw hai, ahnie canaw hai, hatnae tueng nah ahni kabawm e naw hai, thei hanlah ao han. <sup>7</sup> Hote siangpahrang canu e miphun daw e buet touh ni ahnie hmuen daw a kangdue han. Ahni ni atunglae siangpahrang hah tuk vaiteh, kothung kâen vaiteh, khocanaw hah a tuk vaiteh a tâ han. <sup>8</sup> Ahnima cathutnaw, hlun e meikaphawknaw, apu kaawm e sui manang, ngunnaw hah Izip ram lah be apu awh han. Atunglae siangpahrang hlak akalae siangpahrang teh a kum bet a saw han. <sup>9</sup> Atunglae siangpahrang hai akalae siangpahrang uknaeram thung a kâen han. Hatei, ama ram lah bout a ban han.

<sup>10</sup> A capanaw ni bout thaw awh vaiteh, ransanaw moikapap kamkhueng sak vaiteh a tho awh han. Tâ awh vaiteh, ahnie kho thung totouh runae a poe awh han. <sup>11</sup> Akalae siangpahrang teh a lungkhuek dawkvah, atunglae siangpahrang hah a tuk han. Hatei, tami moikapap hah a taran kut daw a poe han. <sup>12</sup> Tami moikapap a ceikhai awh toteh, kâoup vaiteh, a thong moikapap ka thet nakunghai, kâ a tawnnae cak mahoe.

<sup>13</sup> Bangkongtetsapawiteh, atunglae siangpahrang bout thaw vaiteh, ahmaloe e hlak kapap e taminaw hah pâkhueng vaiteh, kum nâyittouh ne a ro tore ransanaw hoi senehmaica hoi a tho awh han. <sup>14</sup> Hatnae tueng dawkvah, akalae siangpahrang ka taran e apap han. Na miphunnaw thung daw e tapungnaw ni vision akuep nahanelah thaw awh vaiteh, rawknae koe a pha awh han. <sup>15</sup> Atunglae siangpahrang ni tho vaiteh kho rapannaw sak awh vaiteh, kacaklah kâkalup e khonaw hah a tuk awh han. Akalae senehmaica thaonae ni ngang thai mahoe, hmoun e ransanaw ni hai ngang thai nahanelah tha tawn awh mahoe. <sup>16</sup> Ka tuk e niteh, amahmaw a tuk dawkvah, ahnie hmalah apihai kangdout thai hoe. Ram kahawi hah raphoe vaiteh, ka lentoe e ram lah a kangdue sak han. <sup>17</sup> A uknaeram buemlah thaonae hoi a kâen hanlah a kâcai teh, akalae siangpahrang hoi kâhuiko hanelah a sak han. A canu poe e lahoi raphoe hanelah a kâcai eiteh, a pouknae patetlah awm hoe. Banghai cungeinae awm hoe. <sup>18</sup> Hahoi, tuilumnaw koe lah kamlang vaiteh, tuilumnaw hah a tuk han. Hatei, ransabawi buet touh ni min mathoenae a dei e hah, katukkungnaw



koe letlang a bo sak han. <sup>19</sup> Hote bawi hai ama kho bout a ban hnukkhu a kamthui teh, a rawp teh a kahma. <sup>20</sup> Hote bawi e hmuen dawk tami buet touh sungren poung e uknaeram dawk, tamuk ka cawng e a kangdue han. Hatei, taran tuknae lungkhueknae dawk hoi laipalah, a kahma han.

<sup>21</sup> Ahnie hmuen dawk yuemkamcu hoe e, bari kaawm hoe e, dudam kamcu e tami a tâco han. Ahni ni tânae lahoi laipalah pasawtpanepnae lahoi uknaeram hah a la han. <sup>22</sup> A hmalah kaawm e naw teh, tui kalen thaonae lahoi pâyo sak lah ao vaiteh, koug a rawk awh han. Lawkkam e bawi hai a rawk han. <sup>23</sup> Bangkongtetpawiteh, lawk ka kam e bawi teh, lawkkam a raphoe dawkvah, tami younca hoi a tho eiteh, a tha ao han. <sup>24</sup> Ram kahawi dawk tuk laipalah a kâen han. Lawp e hnopainaw hah ayânaw a rei han. Mintoenaw ni patenghai a sak awh boihoe e hah a sak han. Kacakpounge kho rapanimnaw hah lawp hanelah kasawlah a kâpouk han. <sup>25</sup> Puenghoi kapap e ransanaw hoi, akalae siangpahrang hah tuk vaiteh, amahoima thaonae hah a hroecoe han. Akalae siangpahrang ni hai moikapap ni teh athakaawme ransanaw hoi taran tuk hanlah a kâhroecoe awh ei, ngang thai awh mahoe. Bangkongtetpawiteh, kahawihoehe pouknae a tawn awh han. <sup>26</sup> Siangpahrang koe kacatnetnaw ni ama tuk hanlah, letlang a kâcai awh. Hatei, a ransanaw teh, be kahmat vaiteh, tarankâtuknae koe tami moi a due awh han. <sup>27</sup> Hote siangpahrang roi teh kahawihoehe pouknae a tawn roi teh, caboi buet touh koe laithoe a dei roi han. Hatei, a pouknae coung pouh mahoe. A pouknae teh khoe tangcoung e a tue dawk ka phat mingming han. <sup>28</sup> Hahoi atunglae siangpahrang teh hnopai moikapap hoi ama ram lah a ban navah, kathounge lawkkamnae hah tarannae lungthin a tawn e patetlah a sak vaiteh, ama ram lah bout a ban han.

### *Akalae siangpahrang dudamnae*

<sup>29</sup> Khoe e tueng dawk bout ban vaiteh, akalah bout a tho han. Hatei, ahmaloe e patetlah nahoe. A hnukkhu e patetlah hai nahoe. <sup>30</sup> Bangtelane tetpawiteh, Kittim longnaw ni ahni tuk hanlah a tho awh han. Hatdawkvah puenghoi a lungpataw teh, lungkhuek laihoi bawkim kathoung tuk hanelah bout tho vaiteh, rawknae hah a sak han. Hottelah lawkkam kathoung katapoenaw hoi a kâhuiko awh han. <sup>31</sup> Ransanaw ni tuk pouh vaiteh, kathounge hmuen hah a khin sak awh han. A hnintangkuem sak e thuengnae hah takhoe awh vaiteh, panueththopounge rawknae kathokhaikung hah a pâhung awh han. <sup>32</sup> Lawkkam ka taran e naw teh lawk dei thounnae lahoi a rawk awh han. Hatei, Cathut ka panuek e taminaw teh thasinae hoi hno a sak hai awh han. <sup>33</sup> Taminaw thung dawk a lungkaangnaw ni tami kapapnaw teh a cangkhai awh han. Hatei, hnin kasawlah tahloi hoi theinae, hmaisawinae, san lah mannae, lawpnae hoi a rawp awh han. <sup>34</sup> A rawp awh toteh, kabawpnae youn touh bout a coe awh han. Taminaw teh lawk dei thounnae koe a kâbang awh han. <sup>35</sup> A lungkaang e tami tangawn hai a rawp awh han, a thoung awh teh, toun hoe hah nahanlah poutnae tueng totouh a sak han. Hot hateh, atueng khoe e totouh hane doeh. <sup>36</sup> Siangpahrang buet touh teh, amamouh ni a ngai e patetlah a sak han, cathutnaw pueng hlak kâawmrasang vaiteh, cathutnaw e Cathut hah a taran han. Dudamnae lawk a dei han. Lungkhueknae akuep hoehroukrak a tâ han. Pouk tangcoung e patetlah sak roeroe han. <sup>37</sup> Ahni teh mintoenaw e Cathut hai, napui nginae hai, alouke cathutnaw hai banglahai noutna hoe. Tami pueng hlak amahoima a kâawmrasang han. <sup>38</sup> Hote cathutnaw e hmuen dawk, rapan cathut,



mintoenaw ni panue hoeh e cathut hah tawm vaiteh, sui, ngun, talung, ngai kaawm e hnonaw hah a thueng han. <sup>39</sup> Kacake rapannaw hai, Jentelnaw e cathut hai sak vaiteh, a bawilennae apung sak han. Taminaw uknaeram kâ poelah awm vaiteh, tawnta nahanlah talai hah a kêrei awh han.

### *Akalae siangpahrang tânae*

<sup>40</sup> Atueng poutnae tueng nah, akalae siangpahrang ni ahni hah a tuk han. Atunglae siangpahrang nihai, ranglengnaw, marangnaw, marangransanaw, longnaw hoi bongparui patetlah tho awh vaiteh, hote ram hah reprep a counroe han. <sup>41</sup> Khet kahawi e ram dawkh hai a kêen awh han. Ram moikapap a lawp awh han. Hatei, Edom ram, Moab hoi Amon kahrawikungnaw teh ahnie kut dawkh hai a hlout awh han. <sup>42</sup> Ram pueng dawkh a ram pakaw vaiteh, Izip ram hai hlout mahoe. <sup>43</sup> Hote ram dawkh kaawm e sui, ngun, aphu kaawm e hnonaw hah a la han. Libianaw hoi, Ethiopianaw hai ahni hnuk a kâbang awh han. <sup>44</sup> Hatei, kanitho lahoi, atunglah hoi kamthang a thai navah a lungpuen teh, tami moikapap thei hanelah puenghoi lungkhuek lahoi a tho han. <sup>45</sup> Tuipui rahak vah ka lentoe niteh, kathounge mon dawkh o nahan im a sak teh, kabawmkung awm laipalah, rawknae koe a pha han.

## 12

### *Poutnae lawk deicainae*

<sup>1</sup> Hatnae tueng dawkvah, na miphunnaw kangdoutkhaikung Maikel teh a tâco han. Miphun a kamtawngnae koehoi hote tueng totouh kaawm boihoeh e runae teh a tho han. Hatnavah, cauk dawkh min pakhum lah kaawm e na miphun pueng teh, rungngang lah ao han. <sup>2</sup> Hatnae tueng navah, vaipuh dawkh ka ip tangcounghaw teh a kâhlaw awh han. Atangawn teh a yungyoe hringnae koelah thoseh, atangawn teh a yungyoe yeirai kayanae koelah thoseh a kâhlaw awh han. <sup>3</sup> A lungkaangnaw teh lathunglae ka ang e patetlah a ang awh vaiteh, tami kapap lannae lamthung ka dawn sak e naw hai âsinaw patetlah pout laipalah a ang awh han. <sup>4</sup> Nang Daniel teh, atueng abaw totouh hete lawknaw hah khan nateh, cauk hah tacikkin haw. Tami kapap ni hote ca touknae lahoi lungangnae apung han ati. <sup>5</sup> Hathnukkhu, kai Daniel ni ka khet navah, alouke kahni touh, tui kongteng avangvanglah a kangdue roi e hah ka hmu. <sup>6</sup> Buet touh e nyiah hete kângai ka ru hnonaw akuap nahanlah nâsittouh maw ao han telah loukloukkaang e ka khohnat niteh, tui van kaawm e tami hah a pacei. <sup>7</sup> Loukloukkaang e ka khohnat niteh, tui van kaawm e tami ni, atueng buet touh, atueng kahni, atueng tangawn touh a ro han. Tami kathoungnaw e hnotithainae hah kho tangkuem kahei hnukkhu, hete hnonaw pueng hai apout han telah a kut roi hoi kalvan lah a dâw teh, a yungyoe kahring e Cathut koe thoe a kâbo e hah ka thai. <sup>8</sup> Hote lawkh hah ka thai teh, ka panue hoeh dawkvah, Bawipa hete hnonaw hah bangtelamaw akuap han telah ka pacei. <sup>9</sup> Ahni ni, Daniel nang teh cet leih, hete lawkh teh apout hnin totouh tacikkin lah ao toe. <sup>10</sup> Tami moikapap teh thounsak lah ao teh, pangawsak lah ao. Tamikathoutnaw teh hawihoeahnae sak awh vaiteh, buet touh ni boehai panuek awh mahoe. A lungkaangnaw niteh, a panue awh han. <sup>11</sup> A hnintangkuem sak e thuengnae takhoh teh, panueththopounge karaphoekung a tâco hoi hnin 1,290 touh a ro han. <sup>12</sup> A hnin 1,335 totouh ka ring niteh, ka phat e tami teh, a yawkahawi e lah ao.



<sup>13</sup> Nang teh, apout totouh na lamthung dawh cet haw. Na kâhat vaiteh, a hninnaw apout toteh, nama e râw coe hanelah bout na thaw han ati.



## HOSI

<sup>1</sup> Judah siangpahrang Uziah, Jotham, Ahaz hoi Hezekiah tinaw a bawi nah, Joash capa, Jeroboam ni Isarel siangpahrang a tawk nah Beerî capa Hosi koe ka tho e Cathut lawk teh,

### *Hosi yu lanæ*

<sup>2</sup> Nang ni cet nateh atak kâyawt e napui hoi a canaw hah na yu lah lat haw. Bangkongtetpawiteh, khocanaw ni Cathut a pahnawt awh teh boutbout a payon awh toe telah Hosi koe Cathut ni atipouh.

<sup>3</sup> Hosi ni Cathut ni a dei e patetlah a cei teh, Debalaim canu, Gomer hah a yu lah a la. A yu ni camo a vawn teh ca tongpa a khe.

<sup>4</sup> Hatnavah Cathut ni Hosi koe, hete camo e min teh Jezreel phung loe atipouh. Bangkongtetpawiteh a ro hoehnahlan Jezreel theinae phu teh Jehu imthung koe moi ka pathung vaiteh, Isarel ram a uknaeram tueng ka baw sak pouh awh han.

<sup>5</sup> Hahoi, Jezreel yawn dawk Isarel ransanaw e thaonæ teh ka raphoe han telah a ti. <sup>6</sup> Gomer ni camo apâhni lah bout a vawn teh napui a khe. Bawipa ni min teh Loruhamah phung loe. Bangkongtetpawiteh, Isarelnaw teh ka pahren mahoehtoe, ka takhoe han toe. <sup>7</sup> Hatei, Kai ni Judahnaw teh ka pahren han. Ahnimæ BAWIPA Cathut Kai ni ka rungngang han. Ka rungngang nah taran tuknæ senehmaica, lilava, pala, tahlôi, marangnaw, hoi marangransanaw ka hno mahoehtoe a ti.

<sup>8</sup> Gomer ni a canu hah sanu a pâphei hnukkhu, camo bout a vawn teh, ca tongpa a khe. <sup>9</sup> Cathut ni Hosi koe, a min teh Loammî phung loe. Bangkongtetpawiteh, nangmouh teh, kaie tami nahoehtoe, kai hai nangmæ Cathut nahoehtoe atipouh.

### *Isarel bout pathawnæ*

<sup>10</sup> Isarelnaw teh palang sadi patetlah apung awh han. Bangnue thai hoehtoe hoi touk thai hoehtoe lah ao han. Atuvah, Cathut ni Isarelnaw teh ka tami nahoehtoe ati. Hatei, nangmouh teh kahrîng Cathut e canaw lah na o awh tie hnin ka phat han. <sup>11</sup> Judahnaw hoi Isarelnaw ni bout a kamkhueng awh han. Amamouh hanlah siangpahrang buet touh a rawi awh vaiteh, hete ram dawkt hoi a tâco awh han. Jezreel se teh a lentoe han telah a ti.

## 2

<sup>1</sup> Na hmaunawngghanaw hah ka tami telah thosehtoe, na tawncanunaw hah ka pahren e ka canu telah thosehtoe bout ka kaw han.

### *Yuemkamcu hoehtoe taminaw*

<sup>2</sup> Na manu teh dei pouh awh. Ahni teh kaie ka yu nahoehtoe. Kai haiyah ahnie a vâ nahoehtoe. <sup>3</sup> Kâyonaæ minhmai padai laipalah kathoute hno roun nasehtoe. Roun hoehtpawiteh, a khenæ patetlah caici lah thingyei um pak ka tha han. Tui ni a hak takhai e talaî patetlah tui ka pakoung vaiteh ka due sak han. <sup>4</sup> A canaw haiyah cataca lah ao dawkvah kai ni ka pahren mahoehtoe. <sup>5</sup> Ahnimæ manu teh, kâyawt e doehtoe. Ahni ka vawn e napui hai yeirai a po tohtoe. Ahni ni haiyah ka bu, ka tui, ka tumuen, ka tangka, ka satui, nei hane tui ouk na ka poe e kapahrennaw hnuk ka kâbang han a ti.



<sup>6</sup> Hatdawkvah pâkHING hoi ka kalup han. A tâco thai hoeh nahanlah talung hoi ka tapang sin han. <sup>7</sup> A pahren hah a pâlei ei phat mahoeH. A tawng ei hmawt laipalah ao navah, ka vâ karuem koe doeh bout ka cei han toe ati. Atu e hmuen koe hLak hmaloe e hmuen koe doeh hoe ahawi ati han.

<sup>8</sup> Cang, misur, satuinaw hoi Baal bawknae sui hoi ngun hai moi ka poe eiteH, Kai na pahnim awh. <sup>9</sup> Hatdawkvah canga tue nah cakang, misurtui kasu tue nah misurtui, ka poe mahoeH. Kaie tumuen hoi ngun, a caicinae ramuknae hah ka bankhai han.

<sup>10</sup> Atu roeroe a pahrennaw koe a khohna e ka rading pouh vaiteH, yeiraipo sak han. Apinihai ka kut dawk hoi hlout sak thai mahoeH.

<sup>11</sup> A nawmnae, pawitonaE, thaparei hnin, sabbath hnin, tamimaya kamkhueng e pueng ka pout sak han.

<sup>12</sup> Het hateH, ka pahren ni na poe e poehno ati e misurnaw, thai-bunglungnaw lungpalueng lah ka fa vaiteH, ratu lah ka sak han, hahoi sarangnaw ni a ca awh han.

<sup>13</sup> Baal cathutnaw koe hmutui hmai a sawi awh teh, hnongpacap hoi dINGyin a awi awh teh, a pahren hnuk a kâbang awh teh, Kai na pahnim awh dawkvah, Baal cathutnaw e tueng dawk e patetlah moipathung han telah Cathut ni a ti.

### *Cathut ni a taminaw a pahren*

<sup>14</sup> Hatei, ahni hah bout ka pasawt han. Kahrawng lahoi a ceikhai awh nakunghai, pasawtnae lawk hoi ka dei pouh awh han.

<sup>15</sup> Hote hmuen koe misur takha hai thoseH, Akhor tanghling koe ngaihawinae takhang hai thoseH ka sak pouh han. A camo nah Izip ram hoi a tâconae la a sak awh e patetlah namran lah a pha awh toteH, la a sak awh han.

<sup>16</sup> BAWIPA ni a dei e teh, hatnae tueng dawk nang ni kai hah Bawipa telah na kaw mahoeH, ka vâ telah na kaw han.

<sup>17</sup> Baal e min roeroe heh nangmae pahni dawk hoi takhoe vaiteH, a min hah dei lah rawraw bout dei mahoeH toe.

<sup>18</sup> Hatnae tueng dawk Kai ni ahnimouh hanlah, kahrawng e sarang, kalvan e tava, talai dawk e sarangnaw hoi na kâhuiko vaiteH, licung, tahloi, senehmaicanaw, talai dawk hoi ka takhoe han. Lungpuen tâsuenae awm laipalah a i awh han.

<sup>19</sup> Nang teh, ka yu lah pou na o han toe. Lannae, kamsoum e, ka kuep e lungmanae hoi nang teh kama hanelah na la han toe. <sup>20</sup> Ka lawkkam ka tarawi vaiteH na la han, nang ni Cathut na panue han. <sup>21</sup> Bawipa ni telah ati, hatnae tueng dawk ratoumnae Kai ni na thai pouh han. Kalvan lawk ka thai pouh vai teh, ahni ni talai lawk a thai pouh awh han.

<sup>22</sup> Talai ni hai cakang, misurtui, satui, naw e lawk a thai vaiteH, ahnimouh ni hai Jezreel e lawk a thai awh han. <sup>23</sup> Hote napui hah cati patetlah talai dawk kama hane ka patue han. Ka pahren hoeh e napui hah ka pahren han. Ka tami hoeh e koe ka tami ka ti pouh han. Ahnimouh ni hai nang teh kaimae Cathut doeh na ti pouh awh. han.

## 3

### *Cathut koe Isarel naw bout a ban han*

<sup>1</sup> Hahoi, Cathut ni Isarel naw nangmouh ni alouke cathutnaw na bawk awh teh, misurphen hah na ngai awh ei, Kai ni lungpataw mingming e patetlah cet nateH a vâ van ka uicuk e napui hah bout pahren haw a ti.



<sup>2</sup> Hat toteh, hote napui hah tangka phek hra hlaipanga touh, cai homer buet touh hoi ka ratang hnukkhu, <sup>3</sup> kai koe pou awm haw, kâyawt hanh haw, api alouke tongpa hoi hai ipawm hanh haw, hat pawiteh doeh kai hai nang hoi pou kaawm ti ka ti pouh. <sup>4</sup> Bangkongtetpawiteh, Isarelnaw teh kumtha moikasawlah siangpahrang, khobawi, thuengnae, khom kathoung, meikaphawk bawknae, Terah meikaphawk tawn laipalah ao awh han. <sup>5</sup> Hathnukkhu Isarelnaw bout tho awh vaiteh, amamae Cathut hoi siangpahrang Devit hah tawng awh vaiteh, ato hmalah lungmanae coe nahanelah, taki laihoi Cathut koe a yawng awh han.

## 4

### *Isarelnaw yonnae*

<sup>1</sup> Oe! Isarelnaw Cathut e lawk hah thai awh haw. Bangkongtetpawiteh, khoca ramcanaw teh Cathut hoi a kâyue awh toe. Ahnimouh teh lawkkam cak awh hoeh, lungmanae tawn awh hoeh, Cathut taket awh hoeh. <sup>2</sup> Thoebonae, laithoenae, parunae, uicuknae hoi tami theinae teh kâhat laipalah a sak awh. Tami theinae yon hoi patuen patuen a kâthap awh. <sup>3</sup> Hatdawkvah, ahnimae ram teh a cingou han. Taminaw hoi kahrawng e moithangnaw, kahlun e tavanaw pueng teh a tha a kamyai han. Tuipui dawk e tanganaw hai a thup awh han. <sup>4</sup> Hatei, apinihai ngang nahanh seh. Apinihai yue nahan seh. Bangkongtetpawiteh, nange na miphunnaw hai vaihmanaw hoi kaounnaw patetlah doeh ao awh. <sup>5</sup> Hatdawkvah, khodai lah na kamlei awh han. Karum lah vaihmanaw hoi rei na kamlei awh han. Na manu hai ka thei han. <sup>6</sup> Ka taminaw teh panuenae ayoun dawkvah a rawk awh. Nang ni panuenae na hnoun dawkvah kaie vaihma lah na o hoeh nahan nang teh na hnoun toe. Na Cathut e lawk na pahnim dawkvah na canaw teh ka pahnim han. <sup>7</sup> A lentoe awh e patetlah ahnimouh ni kai hah na pahnawt awh toe. Hatdawkvah ahnimae bawilennae hah yeirai ka po sak han. <sup>8</sup> Ka taminaw e yonthanae sathei moi a ca awh nahlangva vah, hote yonnae hah ouk a doun awh. <sup>9</sup> Hatdawkvah, taminaw koe ka tâcawt e patetlah vaihmanaw koehai ka tâco sak han. Amamae tawksaknae patetlah ka rek vaiteh lengkaleng tawkpheu ka poe han.

<sup>10</sup> Rawca a ca awh ei, a von paha awh mahoe. A kâyo awh ei, ca khe awh mahoe.

### *Isarel ni meikaphawk bawknae*

<sup>11</sup> Bangkongtetpawiteh, tak kâyona, misurhruem, misurtui ni a lung a pathu sak teh, Cathut a pahnawt awh toe.

<sup>12</sup> Ka taminaw ni bongpai hoi a kâpan awh teh, sonron koe pouknae a hei awh. Radueknae dawk a lungtang awh lawi vah, amamae Cathut koelah awm laipalah, a kâyo awh toe.

<sup>13</sup> Monsom vah thuengnae a sak awh teh, monruinaw hoi kathenkung-naw e tâhlip dawk hmuitui hmaisawi e hoi thuengnae a sak awh. Hatdawkvah na canunaw teh kâyawt e lah a coung awh teh, na langanaw teh a uicuk awh.

<sup>14</sup> Na canunaw ni a kâyo awh teh, na langanaw ni ka uicuk nakunghai lawk na ceng mahoe. Bangkongtetpawiteh, na yunaw na ceitakhai awh teh ka kâyawtnaw hoi tak na hmawng awh toe. Kâyawt e napuinaw hoi thuengnae reirei na sak awh toe. Hatdawkvah, panuenae kayounnaw teh a rawk awh han.



<sup>15</sup> Oe! Isarelnaw nang teh na tak na kâyo ei nakunghai, Judahnaw na payon hoe. Gilgal kho hoi kâhnai awh hanh. Bethaven kholah cet awh hanh. Cathut teh a hring dawkvah, thoebo awh hanh.

<sup>16</sup> Oe! Isarelnaw maitola patetlah na lahuen caksak awh hanh. A hmuen kawnae koe tuca khoun e patetlah Isarelnaw na khoun awh han.

<sup>17</sup> Kutsak daw. A lung kapen e Ephraim teh amahmaw awh naseh.

<sup>18</sup> Yamu a nei awh e teh taranthawnae doeh, pout laipalah a kâyo awh, khobawinaw ni kayanae hah a lungpataw awh.

<sup>19</sup> Kahlî ni kamlengkhai vaiteh, amae thuengnae hnonaw kecu daw. A kaya awh han.

## 5

### *Isarel hoi Judah koe lawkcengnae*

<sup>1</sup> Oe thai awh haw, vaihmanaw. Isarel miphunnaw hoi siangpahrang im daw. Kaawm e naw, nangmanaw teh lawkceng lah na o awh han. Bangkongtetpawiteh, nangmanaw teh Mizpah mon daw tangkam lah, Tabor mon daw patung e tamlawk karap lah na o awh. <sup>2</sup> Satheinaw theinae lahoi yon na pap sak awh dawkvah, kai ni ahnimanaw abuemlah ka yue han. <sup>3</sup> Ephraim e akong teh ka panue, Isarel hai ka hmalah kâhrakw thai mahoe. Ephraim nang teh atu roeroe na kâyo. Isarel teh a khin.

<sup>4</sup> Ahnimanaw teh, kâyonae muitha ahnimouh koe ao dawkvah, Cathut panuek awh hoe. <sup>5</sup> Isarelnaw e a kâoupnae ni amamouh a pabo teh, Isarel hoi Ephraim teh amamae yon daw a rawp awh teh, ahnimouh hoi cungtalah Judahnaw hai a rawp han. <sup>6</sup> Tuhu, maitohu a hrawi awh teh, Cathut tawng hanelah a cei awh eiteh, hmawt awh mahoe. Cathut teh ahnimouh hoi a kâhla toe. <sup>7</sup> Ahnimanaw teh Cathut koe lawk a kam awh e a raphoe awh toe. Bangkongtetpawiteh, alouke miphunnaw a khe awh toe. Amamouh hoi cungtalah a hnopainaw hai a rawk han. <sup>8</sup> Gibeah kho dawkovit hai thoseh, Ramah kho daw mongka hai thoseh, kâhructuetnae ueng awh. Oe! Benjamin miphun hnuklah kangvawi haw. <sup>9</sup> Isarelnaw yuena tueng nah Ephraim teh kingdi han. Patuen kaawm hane naw hah ka pâpho.

<sup>10</sup> Judah siangpahrangnaw teh lawrilung ka puen e taminaw patetlah ao awh. Kai ni ahnimouh koe ka lungkhueknae fui patetlah ka awi han.

<sup>11</sup> Ephraim teh rektapnae a khang. Lawkcengnae a kâhmo dawkvah, a sung. Bangkongtetpawiteh, ahni ni ama lung lahoi kâpoe e patetlah a sak.

<sup>12</sup> Kai teh Ephraim koe ahri lah, Judah koe patawnae lah ka o han.

<sup>13</sup> Ephraim ni a hmânaw thoseh, Judah ni a patawnae thoseh, a hmu toteh Ephraim teh Assiria koe a cei han. Judah teh Jareb siangpahrang koe a cei han. Hatei, hote siangpahrangnaw ni dam sak thai mahoe.

<sup>14</sup> Bangkongtetpawiteh, Kai teh Ephraim koe sendek patetlah Judah koe sendek thoundoun lah ka o han. Kai ni ka kei e hoi ka rakoung e teh apinihai na lawm thai mahoe.

<sup>15</sup> Ahnimanaw ni a yonae a pâpho awh hoehroukrak, kai na tawng awh hoehroukrak kama ka onae koe ka cei vaiteh hawvah ka o han. Runae a kâhmo awh toteh kai na tawng awh han.

## 6

### *Pankângai hanlah kawnae*



<sup>1</sup> Tho awh, Cathut koe ban awh sei. Bawipa ni vekrasen lah na kei teh na phi ei, bout na dam sak han. Na hem eiteh, bout na sat han. <sup>2</sup> Hnin hni touh a loun hnukkhu na hring sak teh, hnin thum hnin vah, na thaw sak han. Hatdawkvah, ama koe maimouh teh hring awh han. Lungangnae hai tawn awh han. <sup>3</sup> Cathut panue nahanlah a tawng awh han. A tâconae tueng teh amom patetlah ao. Kho ka rak e patetlah kho ahnounge e kho ka rak e patetlah talai duk sak hanlah a tho han. <sup>4</sup> Oe Ephraim, nang dawkw bangmaw ka sak han. Oe Judah, nang dawkw bangmaw ka sak han. Nangmae yuemkamcunae teh, amom e tâmai hoi, palang kahmat e tadamtui patetlah ao. <sup>5</sup> Hatdawkvah, ahnimanaw hah profetnaw hno lahoi kai ni patpat ka bouk toe. Ka lawk tâcawt e lahoi ka thei toe. Lawkcengnae hai angnae patetlah ao toe. <sup>6</sup> Thuengnae hlak lungmanae, hmaisawi thuengnae hlak Cathut hoi kâpanuena hah ka ngai. <sup>7</sup> Ahnimouh teh, Adam patetlah lawkkam a tapoe awh toe. A o awhnae koe yuemkamcu hoe hah lah na o sin awh toe. <sup>8</sup> Gilead khopui teh kahawihoe hno ka saknaw e hmuen lah ao teh, tami thi kapalawngnaw e khokhnuk tungkâtue. <sup>9</sup> Dingcanaw ni kahlong kacetnaw a pawp awh e patetlah vaihmanaw ni Shekhem lah ceinae lam dawkw patenghai tami a thei awh toe.

<sup>10</sup> Atangcalah, kahawihoe hno a sak awh. Isarelnaw koe taki ka tho e hno ka hmu toe. Ephraimnaw a tak a kâyo teh, Isarel teh a khin.

<sup>11</sup> Hothloilah, Oe Judahnaw, man lah kaawm e ka taminaw bout ka thokhai toteh, nang hanlah canganae tueng khoe lah ao.

## 7

<sup>1</sup> Isarel dam sak hanlah ka kâcai navah, Ephraim e yonnae hoi Samaria hawihoe hah bout a kamnue. Ahnimouh teh lawkkam cak awh hoe hah. Athung lah tamru ouk a kâen teh, alawilah hai dingca ni ouk a tuk awh. <sup>2</sup> Ahnimae hawihoe hah pueng Kai ni ka pâkuem tie hah a lung dawkw pouk awh hoe hah. Atu patenghai hote hno ni a kalup awh toe. Ka hmaitung vah ao awh. <sup>3</sup> Kahawihoe e hno hoi siangpahrangnaw a lunghawi sak awh teh, laithoe lawk hoi bawinaw a lunghawi sak awh. <sup>4</sup> Ahnimouh pueng teh kamsoumhoeh napui tongpa yonnae ka sak e lah ao awh. Vaiyei ka thawng e ni hmai sut a patawi teh, tavai a kanawkw hnukkhu a po hoe hah racum laipalah karoum e hoi a kâvan awh. <sup>5</sup> Maimae siangpahrang hnin navah, bawinaw ni misur kounge a parui awh teh, ka dudam e naw hoi kut reirei a dâw awh. <sup>6</sup> Arulahoi a pawp awh lahunnah, amamae lungthin teh takhuen hmai patetlah a kâcai awh. <sup>7</sup> Takhuen hmai patetlah a kâan awh teh, ahnimae lawkcengkung bawinaw hah a kak awh. Amamae siangpahrang pueng teh, a rawp awh. Kai na ka kaw e buet touh hai awm awh hoe hah. <sup>8</sup> Ephraim teh Jentelnaw hoi a kâkalawt awh. Ka kamhmi hoe hah e vaiyei lah ao awh. <sup>9</sup> Amamouh ni panuek laipalah ramlouknaw ni a thaonae teh kounge a ca pouh toe. A sam kounge a po awh toe. Hatei, amamouh ni panuek awh hoe hah.

<sup>10</sup> Isarelnaw e kâoupnae teh amamae hmaitung vah a kamnue eiteh, BAWIPA Cathut koe ban awh hoe hah. Cathut hai tawng awh hoe hah.

### *Miphun kâuep e teh cungkeihoe hah*

<sup>11</sup> Ephraim teh pouknae ka tawn hoe hah e bakhu hoi a kâvan. Izip a kaw awh teh, Assiria vah a yawng awh.



<sup>12</sup> A cei nah tangkuem koe tamlawk hoi ka heng vaiteh, kahlun e tavanaw patetlah ka man han. A kamkhuengnae koevah, ka thai e patetlah ka yue han.

<sup>13</sup> Ahnimouh teh, kai koehoi a yawng awh toe. Ahnimouh koe rawknae teh a pha. Bangkongtetpawiteh, kai na taran awh teh, kê a tapoe awh. Ahnimanaw hah ka ratang ei, Kai na taran awh teh, laithoe a dei awh.

<sup>14</sup> Ikhun daw k a cingou awh toteh, Kai na kaw awh hoe. Cakang, Misur tui tawn laipalah, a kamkhueng awh teh, kai na taran awh.

<sup>15</sup> Kai ni ka yue ei, ka caksak ei, Kai na taran awh teh, kahawihoehe hah a pouk awh.

<sup>16</sup> Ka dumnae licung patetlah ao awh. Bawinaw teh, a pacekpahlek awh dawkvah, tahloi hoi a due awh han. Izipnaw ni a panuikhai awh han.

## 8

### *Isarel cei payonnae*

<sup>1</sup> Mongka ueng haw. Taran teh mataw patetlah Cathut imthungkhu kâtaran lahoi a tho. Bangkongtetpawiteh, ahnimouh ni ka lawkkam a tapoe awh teh, kêlawk a taran awh. <sup>2</sup> Hatei, ahnimouh ni, kaimae Cathut, kaimouh teh Isarel miphun lah ka o awh teh, Bawipa nang teh na panue awh telah koe a hram awh. <sup>3</sup> Isarelnaw ni hnokahawi a hnoun awh dawkvah, taran ni a rektap han.

<sup>4</sup> Kaie kê laipalah siangpahrang a rawi awh teh, ka panuek laipalah bawinaw hah a rawi awh. Rawk nahanelah amamae sui hoi amamouh hane meikaphawk a sak awh toe. <sup>5</sup> Oe Samaria, na maitoca hah tâkhawng leih. Kabawknaw koe ka lungphuen. Ahnimouh ni nâtotouh maw thoungnae panuek laipalah ao awh han vai. <sup>6</sup> Hate maitoca teh Isarelnaw ni sak e lah ao teh, sak e lah ao dawkvah Cathut nahoe. Samaria maitoca teh reppasei lah a rawk han. <sup>7</sup> Kahlî cati hah a kahei awh teh, bongparui cang a a awh han. Cakung awm mahoe. A vui daw hoi tavai tâcawt mahoe. A tâco nakunghai ramlouknaw ni a ca awh han. <sup>8</sup> Isarel teh payawp lah ao toe. Apinihai a ngaihoe e hno patetlah Jentelnaw koe ao han. <sup>9</sup> Assiria ram lah amahmawk a cei. Ephraim teh, amadueng kâva e la patetlah a pahrennaw hah aphu a poe toe.

<sup>10</sup> Jentelnaw hah aphu a poe eiteh, vaitalahoi, taminaw hah ka pâkhueng han. Nâsittouh ao hoehnahan, siangpahrang hoi bawinaw e hno hah hnori lah na phu awh han.

<sup>11</sup> Ephraim ni amae yon a kamnue nahanlah thuengnae khoungroe moi a sak dawkvah, khoungroenaw hah ahnie yon telah ati awh han.

<sup>12</sup> Kaie kêlawk a lentoenae hah ahni hanelah ka thut pouh toe. Hatei, banglahai ngâi hoe.

<sup>13</sup> Kai hanlah hmoun e pasoumhno hah thuengnae kasaknaw ni a thueng awh teh a ca awh. Hatei, Cathut ni coe pouh hoe. Ahnimae yon hah a pâkuem pouh teh, a kung a khei dawkvah, ahnimouh teh Izip ram lah bout a ban awh han.

<sup>14</sup> Isarelnaw ni kasakkung a pahnim awh teh, im kahawi kahawi a sak awh. Judah ni hai ka cak e kho hah apung sak awh. Hatei, hote khonaw hah hmai ka sawi vaiteh, im kahawi kahawi naw hmai a kak awh han.

## 9

### *Isarel moipathungnae*



<sup>1</sup> Oe Isarelnaw, Jentelnaw patetlah konawm hoi lamtu awh hanh. Bangkongtetpawiteh, na Cathut na pahnavt awh teh, alouke cathut hoi na kâyo awh toe. Cangkatinnae pueng daw kâyonae phu hah na ngai awh toe. <sup>2</sup> Cangkatinnae hoi misur paw katinnae ni na kaw k mahoe. Misurtui a katha e hai ngaihaw awh e patetlah tâcawt mahoe. <sup>3</sup> Ephraim teh Cathut e talai daw k hosak awh mahoe. Izip ram lah bout a ban awh vaiteh, Assiria ram vah kathounghoehe rawca a ca awh han. <sup>4</sup> Misurtui awi thuengnae hah Cathut koe na sak awh hoe. Thueng e naw hai a lungyouk mahoe. Hote Sathei moi teh, khuika laihoi ro kathaknaw e rawca patetlah ao. Ka cat e tamipueng a khin awh han. Ahnimanaw e rawca hah amamouh roeroe ni cat awh naseh. Cathut e im daw hrueng awh han naseh. <sup>5</sup> Bawipa e paw hnin hoi, Bawipa koe pasoungnae hnin dawkvah, bangtelamaw na sak awh han toun. <sup>6</sup> Rawknae daw hoi ka hlout awh nakunghai, Izip ram pâkhueng awh vaiteh, Memphis khocanaw ni a pakawp awh han. Ngun hoi a pathoup awh e imnaw hah pâkhing tangdun a phunphun ni rup a yam sin han. <sup>7</sup> Lawkceng nahane hnin a pha toe. Moipathungnae hnin a pha toe. Isarelnaw ni a panue awh han. Profet teh a pathu awh toe. Muitha tami hai a pathu toe. Na yonnae apap e patetlah puenghoi raphoenae na khang han. <sup>8</sup> Ephraim ramvengnaw teh Cathut koe ao awh. Hatei, profet teh, a tawksak e pueng hah karap lah ao. A Cathut e im daw patenghai kâhmuhmanae ka sak e lah ao. <sup>9</sup> Gibeah senae patetlah puenghoi a rawk awh toe. A yonae hah a pâkuem pouh teh, a yonae daw lawk a ceng han.

<sup>10</sup> Isarel teh kahrawngum e misur paw patetlah ka hmu teh, na mintoenaw hah thaibunglung a paw hmaloe kahmin e patetlah ka hmu. Ahnimouh teh Baalpeor koe amahmawk a cei awh teh, kayanae daw a tak a kâhmoun awh teh, a doun awh e patetlah panuetho e hno hah a sak awh.

<sup>11</sup> Ephraim bawilennaeh teh tava patetlah a kamleng han. Ca khenae, camo vawnnae, pacipnae awm mahoe.

<sup>12</sup> A canaw hah a kaw awh eiteh, buet touh boehai hlout laipalah ka lawp han. Ahnimanaw hah Kai ni ka hnoun toteh lungmathoe hanlah ao tanggak.

<sup>13</sup> Ephraim teh Taire kho patetlah karoum e boiboe lah ao eiteh, a canu capanaw hah tami kathetnaw koe a thak awh han.

<sup>14</sup> Oe Cathut, na poe awh haw. Bangtelamaw na poe awh han. Camo ka vawn hoe e sanutui ka tâcawt hoe e sanu na poe a haw.

<sup>15</sup> Gilgal khovah, a sak awh e yon ao teh, hote hmuen koe ahnimouh hah kai ni ka panuet. Ahnimae yonnae kecu daw ka im daw hoi ka pâlei han. Ahnimouh hah bout ka lungpataw mahoe. Ahnimae bawinaw pueng teh taran lah ka thaw e seng doeh.

<sup>16</sup> Ephraim teh ahri ni a ca dawkvah, a tangpha a ke teh, a paw paw thai hoe. Capa a khe awh ei, a pahren awh e capanaw hah ka thei pouh awh han.

<sup>17</sup> Kai Cathut e lawk hah a ngai awh hoe dawkvah, ka hnoun vaiteh, miphunlouknaw koe parang a kâva awh han.

## 10

### *Isarel santoungnae*

<sup>1</sup> Isarel teh a paw moi kapaw e misurkung lah ao. Amahmawk ouk a paw. A paw apap e patetlah Isarelnaw ni thuengnae khoungroe apap



sak awh. Aram ahawi e patetlah meikaphawknaw a catraning awh. <sup>2</sup> A lungsamphei teh yon phu khang sak lah ao awh. Ahnimae thuengnae khoungroenaw hoi meikaphawknaw hah Bawipa ni a raphoe pouh awh han. <sup>3</sup> Maimouh teh, Cathut taki awh hoeh dawkvah, siangpahrang tawn awh hoeh. Siangpahrang ao nakunghai maimouh hanlah e lah bangmouh a sak thai han vâ na ti awh. <sup>4</sup> Lawkkamnae a sak awh navah, lawkhrawng hoi thoe a kâbo awh teh, laithoe lawk duengdoeh a dei awh. Lawk a ceng awh navah, laikaw koe e asue kung patetlah a pâw awh. <sup>5</sup> Samaria khocanaw teh, Bethaven maitoca kecu dawk a puen awh. Hote maitoca bawilen nahanelah, a taminaw ni a khuika awh teh, vaihma bawinaw ni a pâyaw awh han. Bangkongtetpawiteh, hote lentoenae hah a tarannaw ni a lawp awh teh, <sup>6</sup> Maitoca hoi cungtalah Assiria ram lah cetkhai awh vaiteh, siangpahrang jareb a poe awh han. Ephraim teh, a minhmai mathout vaiteh, Isarel teh a pouknae lahoi yeirai a po han. <sup>7</sup> Samaria teh a rawk han. Samaria siangpahrang teh tui dawk kâlâw e tuihon lah ao han. <sup>8</sup> Isarelnaw ni meikaphawk ouk a bawk awh e Aven hmuen puenghai raphoe lah ao han. Thuengnae khoungroe dawk pâkhing hoi phonaw muen a paw han. Oe monnaw, kaimouh na ramuk haw. Oe monruinaw, kaimouh van bawt awh haw telah ati awh han. <sup>9</sup> Oe Isarel, Gibeah senah na yon e hlak hoe na yon toe. Hawvah a kangdue awh. Gibeah vah tarankâtuk navah, hawihoeahnae ka sak naw hah na sung awh hoeh.

<sup>10</sup> Kai ni ka mahmawk ahnimanaw hah ka yue han. Kâ a tapoe awh e kahni touh kecu dawk ka katek awh toteh, ahnimouh taran hanlah taminaw teh a kamkhueng awh han.

<sup>11</sup> Ephraim teh a mawng teh, cangkatin ngai e maitola lah ao eiteh, a lahuen dawk yawcu ka toung pouh vaiteh, Ephraim van tami kâcui sak han. Judah ni talai a thawn han, Jakop ni laitueg a pâpâwn han.

<sup>12</sup> Ma hanelah, lannae cati kahei awh nateh, lungmanae a paw hah a awh haw. Taw koe hah rae laikaw hah thawn awh. Cathut ni nangmouh lathueng vah lannae kho a rak sak hoehroukrak, Bawipa tawngnae tueng a pha toe.

<sup>13</sup> Nangmouh teh, yonnae cati hah na kahei awh teh, yonnae a paw hah na a awh. Laithoe paw hah na ca awh. Bangkongtetpawiteh, ma ni pouk e hoi mae athakaawme taminaw hah ouk kâuep awh.

<sup>14</sup> Hatdawkvah, na taminaw teh ruengrueng ati awh han. Shalman ni Betharbel kho a tuk navah a raphoe e patetlah nange rapan pueng teh, a rawk han. Manu teh a canaw hoi talai dawk rekresuk lah ao han.

<sup>15</sup> Bethel teh, na yonnae kecu dawk hottelah a sak awh han. Amom vah Isarel siangpahrang teh khoeroe raphoe lah ao han.

## 11

### *Cathut ni Isarelnaw a pahren*

<sup>1</sup> Isarel teh a nawca hoi ka lungpataw teh, ka capa hah Izip ram hoi ka kaw toe. <sup>2</sup> Ka kaw navah hoe a yawng awh teh, Baal koe thuengnae a sak teh, meikaphawknaw koe hmuittui hmai a sawi awh. <sup>3</sup> Ephraim hah a kut dawk hoi ka kuet teh lamcei ka pâtu. Hatei, kaie khetyawtnae hah panuek hoeh. <sup>4</sup> Tami hrawinae, lungpatawnae rui hoi ka sawn. A lahuen dawk e yawcu hah a kam koelah ka pahout pouh teh rawca hah ka paca. <sup>5</sup> Nang koe ka tho mahoehteh, a kangek dawkvah, Izip ram lah bout ban mahoehteh. Assiria siangpahrang ni a uk awh han. <sup>6</sup> Amamae pouknae hah raphoe lah ao han. Tahloi teh a onae koe khoung phat



vaiteh, siangpahrang hah a thei awh han. <sup>7</sup> Ka taminaw teh kai koehoi lam pou a phen awh. A lathueng poun e Cathut koe ka kaw eiteh, hote Cathut hah apinihai talue sak han ngai hoeh. <sup>8</sup> Oe Ephraim, bangtelah hoi maw nang hah na pahnim thai han. Oe Isarel, nang hah bangtelah hoi maw na hnoun thai han. Nang teh Adamah kho patetlah bangtelah hoi maw na o sak thai han. Zeboiim kho patetlah bangtelah hoi maw na ta thai han. Ka lunghin a kâthung teh, puenghoi lungpatawnae ka tawn. <sup>9</sup> Puenghoi ka lungkhuek e patetlah ka sak ngaihoeh. Ephraim hah boutbout ka raphoe ngaihoeh. Kai teh tami nahoeh Cathut doeh. Khothung kaawm e tami nahoeh eiteh, nangmouh koe kaawm e kathounge Cathut lah ka o.

<sup>10</sup> Nangmouh teh Cathut koe na kâbang awh han. Sendek patetlah na huk awh han. A huk toteh a canaw kaniloumlah hoi karangpounglah a tho awh han.

<sup>11</sup> Baritca patetlah Izip ram lahoi thoseh, bakhu patetlah Assiria ram lahoi thoseh, karanglah yawng awh vaiteh, amamouh onae hmuen koe hmuen ka poe han telah Cathut ni a ti.

### *Cathut ni Ephraim a taran*

<sup>12</sup> Ephraim ni laithoe hoi thoseh, Isarel ni dumpyennae hoi thoseh, kai hah na tarawk awh toe. Judah nihai, kathoung ni teh yuemkamcu e Cathut koehoi lam a phen teh a kâva toe.

## 12

<sup>1</sup> Ephraim teh kahlî a pahap. Kanîtholae kahlî hah a pâlei. A hnintanguem laithoe hoi rawknae hah a kampai sak. Assirianaw hoi a kâhuiko nahlangva vah, Izip ram lah satui a sin awh. <sup>2</sup> Cathut ni Judahnaw koehai lungkuephoeahnae a tawn. Jakop e tawksaknae hah lawkceng vaiteh, a sak e patetlah moi a pathung han. <sup>3</sup> Jakop teh a manu von thung vah, a hmau e khokpaimai a kuet. A tha a sai teh, Cathut hoi a kâthe. Kalvantami hoi a kâthe teh a tâ. <sup>4</sup> Khuika laihoi yo la a kâhei toe. Kalvan ransabawi Cathut hah bethel vah a hmu teh, hawvah lawk a dei pouh. <sup>5</sup> Jehovah teh ransabawi Cathut lah ao. Jehovah tie teh amae min doeh. <sup>6</sup> Hatdawkvah, na Cathut koe bout ban leih. Lungmanae, lannae pouk nateh, na Cathut hah pout laipalah ngaihaw haw. <sup>7</sup> Ahni teh hno kayawtkung e lah a o, dumnae yawcu hah a patuep. Ayânaw rektap ngainae lung a tawn. <sup>8</sup> Hatei, Ephraim ni kai teh, ka tawnta hnopainaw ka hmouk toe. Ka tawksak e pueng dawк payonpakainae hmu han kawi awm hoeh telah a ti. <sup>9</sup> Kai teh Izip ram thung hoi na ka tâcawtkhai e na Jehovah Cathut lah ka o. Pawi hnin nah na o e patetlah rim dawк bout na o sak han.

<sup>10</sup> Kai ni profetnaw hno lahoi vision moi na poe toe. Bangnuenae hai moi na dei pouh toe.

<sup>11</sup> Gilgal ram teh a payon. Khocaramcanaw teh cungkei awh hoeh. Gilgal khovah, maito hoi thuengnae a sak awh ei, thuengnae khoungroenaw teh, laikawк thawn nah talai kacoum e naw patetlah doeh ao.

<sup>12</sup> Jakop teh, Assiria ram lah a yawng. Isarel teh yu la thai nahanelah, san a toung teh tuhu a khoum.

<sup>13</sup> Cathut ni profet lahoi Isarel hah, Izip ram hoi a hlout sak teh, profet lahoi a khetyawt.

<sup>14</sup> Ephraim ni Cathut a lungkhuek sak. Hatdawkvah, tami theinae yon teh ahni koe a pha han. Min mathoenae hah ama lathueng a bo han



# 13

## *Isarel naw koe kapek laipalah lawk a ceng*

<sup>1</sup> Ephraim ni a dei toteh, ayânaw ni a taki awh. Ahni teh Isarel naw thung daw k ka talue e lah ao. Hatei, Baal baw knae koe a rawp toteh a due. <sup>2</sup> Atuvah hoe hoe a yon awh teh, mae thounmae lahoi hlun e ngun kutsak, hahoi amamouh thoun e patetlah meikaphaw knaw hah amamouh hanelah a sak awh. Hottelah a sak awh hnukkhu thuengnae ka sak e tami teh maitoca hah pahnuem seh a kâti awh. <sup>3</sup> Hatdawkvah ahnimouh teh, amom e tâmai patetlah tang kamyawt e tadamtui patetlah cangkatinnae koe e bongparui ni a palek e cahik patetlah takhuen koehoi ka tâcawt e hmaikhu patetlah ao awh. <sup>4</sup> Hatei, kai teh, Izip ram hoi nangmouh kahlout sak e nangmae Jehovah Cathut lah ka o. Kai hloilah alouke Cathut hah nang ni na panuek hoe. Kai hloilah rungngangkung Bawi awm hoe. <sup>5</sup> Thingyei yawn hoi kân poung e ramke ram daw k patenghai nang hah na pahnim hoe. Kaboumlah na paca toe. <sup>6</sup> Na boum awh toteh, na kâoup awh. Kai hah na pahnim awh. <sup>7</sup> Hatdawkvah, ahnimouh koe Kai teh, sendek patetlah ka o pouh han. Lam teng ka pawm e kaisi patetlah ahnimanaw hah ka pawp han. <sup>8</sup> A ca kahmat e tavom patetlah ahnimanaw hah ka taba vaiteh, a thabuem totouh ka phi pouh han. Sendek manua patetlah ka hmunae koe raw vah, ka kei han. Sarang lah ka o dawkvah, vekrasen lah ka phi han. <sup>9</sup> Oe Isarel, nang kabawmkung Kai hah na taran dawkvah, na rawk awh toe.

<sup>10</sup> Na siangpahrang teh nâne ao. Na onae khopueng daw k na rungngang haw seh. Nange lawkcengkungnaw teh nâne ao awh.

<sup>11</sup> Siangpahrang hoi bawinaw na poe loe titeh na hei awh dawkvah, ka lungkhuek teh, siangpahrang hah na poe awh toe. Hahoi, puenghoi ka lungkhuek dawkvah, siangpahrang hah bout ka takhoe toe.

<sup>12</sup> Ephraim ni a sak e yonnae hah ka tangoung teh, a yonnae hah ka pâtung pouh toe.

<sup>13</sup> Ahni teh, camo ka khe e napui patetlah runae a kâhmo nahane atueng a hnai toe. Ahni teh, ka pathu e capa lah ao. Khe tue a pha navah, khe thai laipalah vonthung ka saw lah ao.

<sup>14</sup> Ahnimouh hah, phuen thaonae daw k hoi ka ratang vaiteh, duenae daw k hoi ka hlout sak han. Oe, duenae nange pali patawnae lah na o teh, Oe, phuen nange raw knae lah ka o sak han. Pan ka ngai nahanlah banglahai na ngai hoe.

<sup>15</sup> Ma e hmaunawng ha koe teh, a paw na paw awh eiteh, Kanitholae kahli teh thingyei yawn koehoi tho vaiteh, sawkcanaw a hak han. Tuikhunaw remphui han. Hno pâkhuengnae im daw k e hnopai aphu kaawm naw teh, taran ni na lawp awh han.

<sup>16</sup> Samaria kho teh, a Cathut a taran dawkvah, a rawk han. Khocanaw teh, tahloi hoi a rawp awh vaiteh, a due awh han. Camonaw teh talai daw k rekresuk vaiteh, camo kavawnnaw e von hah a khe pouh awh han.

# 14

## *A hnukteng Isarel bout pathawnae*

<sup>1</sup> Oe, Isarel, nang teh nama e yonnae kecu daw k hoi na rawk toung dawkvah, Jehovah Cathut koe bout ban leih. <sup>2</sup> Lawk sin laihoi Cathut koe ban nateh, ahni koe kai daw k kaawm e yonnae pueng hah na takhoe pouh haw. Bout na dâw haw. Ka pahni daw k hoi thuengnae hah ka sak awh



han. <sup>3</sup> Assiria ni kaimouh na rungngang mahoe. Kaimouh teh marang ransa lah kaawm a mahoe toe. Meikaphawknaw koe, nangmouh teh kaimae Cathut doeh bout ka tet awh mahoe toe. Bangkongtetpawiteh, nara ni nang koe lungmanae ouk a coe, telah dei awh. <sup>4</sup> Ka lungkhueknae roum vaiteh, hnam na thun takhai e heh ka dam sak han, aphu laipalah ka lungpataw han. <sup>5</sup> Kai ni tadamtui patetlah Isarel lathueng ka o pouh han. Ahnimouh teh lili pei patetlah a kamhlawng awh vaiteh, Lebanon mon e thingnaw patetlah a khawngyang a pabo awh han. <sup>6</sup> A kangnaw teh naw awh vaiteh, olivekung patetlah khet ahawi han. Lebanon mon patetlah a hmuitui han. <sup>7</sup> Taminaw ni hote thing tâhlip dawkhô bout a sak awh han. Ahni teh cang patetlah a roungh han, misur patetlah a roungh han. Lebanon misurtui patetlah a min kamthang han. <sup>8</sup> Ephraim ni kai teh, meikaphawk hoi bangmouh kâkuetnae kaawm ati han. Ahnie lawk ka thai pouh vaiteh, ka khetyawt han. Kahringsuep e hmaicakung patetlah ka o teh, nang teh kaie lungmanae dawkhô a paw hoi na kawi han. <sup>9</sup> Apimouh a lungkaang. Ahni niteh, hetnaw hah a thai panuek han doeh. Apimouh kho ka pouk thai, ahni niteh, hetnaw hah a panue han. Cathut e lamthung teh a lan. Tami kalannaw ni a dawn awh han. Tami kahawihoehe naw teh, hote lamthung dawkhô kamthui vaiteh a tâlaw awh han.



## JOEL

### *Ram rawknae*

<sup>1</sup> Pathuel capa Joel koe ka tho e BAWIPA e a lawk teh, <sup>2</sup> matawngnaw thai awh haw, khocaramcanaw pueng thai awh haw. Het patet e hno heh nangmae se nah ouk ao bawi ou. Mintoenaw e se nah ouk ao bawi ou. <sup>3</sup> Na canaw koe dei pouh awh, ahnimanaw ni hai a canaw koe patuen dei naseh. Ahnimae a canaw ni hai a catounnaw koe patuen dei naseh. <sup>4</sup> Kasaimalawn ni a canawi e hah samtong kalennaw ni a ca awh. Samtong kalennaw ni a canawi e hah samtong kathoungnaw ni a ca awh. Samtong kathoungnaw ni a canawi e hah awsinaw ni a ca awh. <sup>5</sup> Yamuhrinaw kâhlaw awh nateh kap awh haw. Misurhrinaw misur abaw tOUNG dawkvah khuikap awh haw. <sup>6</sup> Bangkongtetpawiteh, touk thai hoe e tami thakaawme taminaw teh maimouh ram daw a tho awh toe. Ahnimae a nô hoi a hânaw teh sendek e a nô hoi a hâ patetlah ao.

<sup>7</sup> Kaie misurkung a raphoe teh thaibunglungnaw a rawk sak toe. Arakawknaw a tâkhawng awh teh akangnaw pangawrang lah ao. <sup>8</sup> A kum a naw navah vâ ka sak e napui ni buri a kâ muk teh a vâ a khui e patetlah khuikap awh haw. <sup>9</sup> BAWIPA e im daw k pasoumhno, vaiyei hoi misur abaw toe. BAWIPA e thaw ka taw k e vaihmanaw phuenang awh haw.

<sup>10</sup> Laikawknaw a rawk toe. Talainaw remke toe. Cakang hai a rawk toe. Misurtui a katha e hai abaw toe. Olive satui hai remphui toe.

<sup>11</sup> Law thaw katawknaw khuikap awh haw, na a e apawhik a rawk dawkvah catun hoi catun hanlah na lungmathout awh haw. Takhakatawkkungnaw kap awh haw.

<sup>12</sup> Misurkung a kamyai, thaibunglung hai a ke. Talekung, ungkung, Epalkung hoi alouke thingkung pueng teh a ke toe. Taminaw e lunghawinae puenghai a ke toe.

<sup>13</sup> Thuengnae khoungroe koe thaw ka taw k e nangmouh vaihmanaw buri kâramuk nateh kap awh haw. Cathut e thaw katawknaw tho awh nateh buri kâramuk hoi kho pei ka dai lah ip awh haw. Bangkongtetpawiteh, nangmouh ni Bawipa e im daw k pasoumhno, misur hoi vaiyei na poe awh hoe h toe.

<sup>14</sup> Rawcahai nahane hnin khoe nateh pathang awh. Kamkhuengnae atueng hai pathang awh. A kum kacuenaw hoi khocaramca naw hah nangmae Cathut BAWIPA e im daw k pâkhueng awh nateh BAWIPA koe hram awh.

<sup>15</sup> Hote hnin daw k yawthoenae ao. Hote BAWIPA e hnin teh a hnai toe. Athakasaipounge ni raphoe e runae patetlah ka tho han.

<sup>16</sup> Maimae mithmu roeroe vah cakawi abaw toe. Maimae Cathut e bawkim daw k lunghawinae awmhoeh toe.

<sup>17</sup> Catinaw teh patuenae koe a pawk awh. Cakang ao hoe h dawkvah capainaw a rawk toe. Hno pâtuengnae im hai a rawk toe.

<sup>18</sup> Saringnaw teh a kamsoe awh, maitohunaw teh hrâm ca hane ao hoe h dawkvah a patang awh. Tahunaw hai a due awh.

<sup>19</sup> Oe BAWIPA, kai ni nang na kaw. Bangkongtetpawiteh, kahrawng e hrâmnaw hoi thingkungnaw pueng teh hmai kOUNG a kak toe.



<sup>20</sup> Sarangnaw ni hai nang na kaw awh. Bangkongtetpawiteh, palangnaw a hak teh kahrawng e hrâmnaw hai hmai kOUNg a kak toe.

## 2

### *Samtong ransanaw*

<sup>1</sup> Zion mon dawK mongka ueng awh haw. Kaie mon kathOUNg dawkvah kâhruetcuetnae lawk dei pouh haw lah, Khocanaw pueng tâlueng awh naseh, Bangkongtetpawiteh, BAWIPA e hnin teh tho han a hmai toe. <sup>2</sup> Khohmonae hnin, khokingpâuinae hnin lah ao. Kanî raeng ni monnaw dawK pheng a tue e patetlah miphun kalen naw hoi a tha kaawm naw a tho awh han. Ayan e tueng dawK hottelah awm boihoeH, hma lae tueng dawK hai bout awm mahoeH toe. <sup>3</sup> Ahnimae hmalah hmai a kak teh a hnuklah hmai a to. Hmalah kaawm e ram teh Eden takha patetlah ao. Ahnimae a hnuk lah, ka nga e thingyei patetlah ao. Atangcalah ahnimae kut dawK hoi bangcahai hlout mahoeH. <sup>4</sup> Ahnimae meilam teh marang hoi a kâvan. Marang ransa patetlah a yawng awh han. <sup>5</sup> Rangleng kacai e pawlawk patetlah hai thoseh, songnawng ka kang e pawlawk patetlah hai thoseh, a cai vaiteh, monsomnaw dawK a doukcouk awh han. Tarantuk hanlah, ka kamkhueng e a thakaawmpounge patetlah ao awh han. <sup>6</sup> Ahnimae hmalah, miphunnaw teh puenghoi a tawn awh vaiteh, minhmai duk a tamang awh han. <sup>7</sup> Ahnimouh teh, khopui e rapan dawK a luen awh han. Lamthung phen awh laipalah, mamae lamthung dawK athakaawme taminaw patetlah lengkaleng a yawng awh han. <sup>8</sup> Buet touh hoi buet touh kâhmang laipalah, mamae lamthung a dawn awh han. Tahloi e hâ ni na a ei nakunghai hmâ na cat mahoeH. <sup>9</sup> Kho thung avoivanglah yawng awh vaiteh kho rapannaw tapuet awh vaiteh, lempu hui awh vaiteh tamru patetlah hlalangaw dawK hoi a kâen awh han.

<sup>10</sup> Ahnimae hmalah Tâli a no vaiteh kalvan a kâhuet han. Kanî hoi thapa a hmo vaiteh âsinaw hai ang mahoeH.

<sup>11</sup> BAWIPA teh a ransanaw hmalah lawk a pathang. A ransanaw teh moiapap. A lawk patetlah lawk ka ceng e teh a bahu a len tounglOUNg. BAWIPA e hnin teh a lenpOUNg teh takikathopOUNg hnin lah ao. Apinimouh a khang thai han.

<sup>12</sup> Hatdawkvah BAWIPA ni a dei e teh, atuvah rawcahainae, khuikanae hoi lungthin abuemlahoi kai koe bout ban awh.

<sup>13</sup> Na khohna e phi laipalah na lungthin hah phi awh nateh, BAWIPA koelah bout ban awh. Lungkâpatawnae hoi kawi nateh lungsawnae hnokahawi saknae, rek han tangcOUNg e bout pahrennae lungthin a tawn.

<sup>14</sup> Nangmouh teh namamae Cathut BAWIPA koe canei kawi pasoumhno hah na poe awh navah, a kamlang teh yawhawinae a ceitakhai hoi a ceitakhai hoeH hane apinimaw a panue.

<sup>15</sup> Zion mon dawkvah mongka ueng awh. Rawcahainae atueng khoe awh nateh, pathang awh.

<sup>16</sup> Taminaw pueng kaw awh nateh kamkhuengnaw thoungsak awh. A kum kacuenaw thoseh, a kum kanaw naw hoi sanukanetnaw hai thoseh kamkhueng sak awh. Yu kalatkung thoundoun ni amae irakhan dawK hoi thoseh, vâ ka sak e napui ni amae rakhan dawK hoi thoseh tâcawt naseh.

<sup>17</sup> BAWIPA e thaw ka tawi e vaihma teh im takhang hoi thuengnae rahak vah a ka teh, Oe! na taminaw hah lungma haw. Alouke miphunnaw ni a uk teh a pacekpahlek awh. Nâmw nangmae BAWIPA teh ao telah alouke miphunnaw ni bangkongmaw a dei awh vaw telah a ti.



<sup>18</sup> Hottelah sak pawiteh, BAWIPA ni a ram hah a kabawp vaiteh a taminaw a rungngang han.

<sup>19</sup> Atangcalah BAWIPA ni na pato teh kai ni cakang, misur tui, satui na poe awh vaiteh nangmouh teh na von a paha han. Alouke miphunnaw ni dudam kawi lah kai ni bout na tat mahoehtoe. <sup>20</sup> Atunglae ransanaw hah nangmouh koehoi kai ni ka takhoe han. Kingdinae ram koelah ka pâlei han. Kanîtholah e tuipui koelah ka kangvawi vaiteh kaniloumlae tuipui teh ka hnamthun takhai han. Ka pawk hmui a tho han. Cathut ni kalenpounge hno ka sak han telah ati han. <sup>21</sup> Oe, Judah ram na lungpuen hanh. Na konawm awh nateh na lunghawi awh, BAWIPA ni hno kalen a sak han. <sup>22</sup> Oe kahrawng e sarangnaw, puen awh hanh. Pho a paw vaiteh thingkungnaw ni a paw paw vaiteh, thaibunglung hoi misurkungnaw ni hai tha a patho awh han. <sup>23</sup> Oe Zion canaw na lunghawi awh nateh namamae BAWIPA kâuep laihoi na lungnawm awh. Bangkongtetpawiteh, phung kadeikung na patoun pouh vaiteh apasuek e ratui hoi a hnukteng e ratui, nangmouh koe ka rak sak han. <sup>24</sup> Cangkatinnae hah cakang hoi akawi vaiteh, misur katinnae tangkom hai misur hoi satui akawi vaiteh, a poum han. <sup>25</sup> A kum moi kasawlah kai ni ka patoun e ransahu awsinaw ni a ca e bout na patho han. <sup>26</sup> Nangmouh teh ka boum lah na ca awh han. Nangmouh hanelah kângairu hno ka sak e na Cathut BAWIPA e a min hateh na pholen awh han. Ka taminaw teh yeirai bout po mahoehtoe. <sup>27</sup> Kai teh Isarel miphunnaw koe kaawm e, nangmae Cathut BAWIPA lah ka o teh alouk awm hoehtie hah na panue awh han. Taminaw teh yeirai bout po awh mahoehtoe. <sup>28</sup> Hathnukkhu vah Ka miphun pueng koe ka muitha ka awi han. Na canaw ni profet lawk a dei awh han. Matawng kacuenaw ni mang a mang awh han. Camonaw ni hai visionnaw a hmu awh han. <sup>29</sup> Kaie thaw ka tawk e tongpa napuinaw lathueng ka Muitha ka awi vaiteh ahnimouh ni profet lawk lahoi a pâpho awh han. <sup>30</sup> Kalvan thoseh, talai van thoseh, kângairu kawi thi, hmaito, hmaikhu khomnaw hah ka kamnue sak han. <sup>31</sup> Taki ka tho e BAWIPA e a hnin a pha hoehnahlan, kanî teh a hmo han, thapa hai thi lah ao han. <sup>32</sup> Hatnavah BAWIPA e min ka kaw e pueng teh a hlout awh han. Bangkongtetpawiteh, Zion mon, Jerusalem kho dawkkacawinaw teh rungngang lah ao awh han.

### 3

<sup>1</sup> Hatnae tueng navah, yampa vah man lah kaawm e Judahnaw khocanaw hoi Jerusalem khocanaw bout ka thokhai toteh, <sup>2</sup> miphun pueng ka pâkhueng vaiteh, Jehoshaphat yon koe ka kaw han. Ahnimouh ni ka ram heh a kêrei awh teh, ram tangkuem dawkkâyeyi e kaie râw tami Isarelnaw koe lah, ka kampangkhai vaiteh lawk ka ceng han. <sup>3</sup> Ka taminaw hah cungpam lah a rayu awh toe. Tongpa camonaw hah a tak kâyawtnaw hoi thoseh napui camonaw hah a nei awh hane misurtui hoi thoseh, athung awh toe. <sup>4</sup> Oe, Taire kho, Sidon kho, Filistin ram hoi kâhnai e ramnaw, kai hah na taran awh han namaw. Kai na taran awh pawiteh, hote taran hah nangmouh koe bout ka pha sak han. <sup>5</sup> Nangmouh ni kaie sui ngun hah na la teh, ka ngai kawi e hnaw hah namamae bawkim dawkkaw hruet awh dawktoseh, <sup>6</sup> Judahnaw, Jerusalem khocanaw hah amamae kho thung hoi kho hlanae koe a kampuen awh nahanlah Jentelnaw koe na yo awh dawktoseh, <sup>7</sup> nangmouh ni na yonae hmuen koehoi ka kangdue vaiteh ahnimouh koe na sak awh e naw hah nangmae lû dawkkaw pha sak han. <sup>8</sup> Nangmae canu capanaw hai Judahnaw koe



ka yo vaiteh ahnimouh ni kho hlanæ koe, Sheba ram lah na yo awh han. Hottelah BAWIPA ni a dei toe. <sup>9</sup> Hete hno heh alouke miphunnaw koe pathang loe. Taran tuk hanelah kâra kueng awh nateh athakaawme taminaw hah pâhlaw awh leih. Ransanaw abuemlah pâkhueng nateh tho awh naseh.

<sup>10</sup> Thenaw hah tahloi lah, tangkounnaw hah tahroe lah, dei awh. Tha kayoun e tami ni a thakasai poung e lah kâdei naseh.

<sup>11</sup> Tengpam kaawm e miphunnaw pueng kamkhueng awh nateh tho awh haw. Kâpâkhueng awh haw. Kamkhuengnae hmuen koe nangmae athakaawme taminaw hah BAWIPA ni rahimlah a pabo han.

<sup>12</sup> Alouke miphunnaw, Jehoshaphat yawn koe tho awh naseh. Tengpam kaawm e miphunnaw pueng lawkceng hanelah hote hmuen koe kai ka tahung han.

<sup>13</sup> Cang a hmin toung dawkvah, a nahanelah tangkoun lat leih. Misur katinnae a kawi teh, Maroi dawk misurtui a poum toung dawkvah, tho nateh kum awh. Bangkongtetpawiteh, ahnimæ yonnae teh a len poung toe.

<sup>14</sup> Lawkcengnae ayawn daw k taminaw teh a kamkhueng awh. Lawkcengnae ayawn daw k BAWIPA e hnin teh a hnai toe.

<sup>15</sup> Kanî hoi thapa a hmo han. Âsinaw hai ang laipalah ao awh han.

<sup>16</sup> BAWIPA ni Zion mon daw k hoi a huk toteh Jerusalem khothung hoi lawk a pathang toteh kalvan hoi talai ni a pâyaw han. Hatei BAWIPA teh a taminaw e kâuepnae, Isarelnaw hanlah thaonæ lah ao han.

<sup>17</sup> Kathounge Zion mon daw k kaawm e ka tamikathoungnaw e BAWIPA lah ka o e a panue awh han. Jerusalem khopui hai a thoung han. Hote khopui teh Jentelnaw ni bout coungroe awh mahoe.

<sup>18</sup> Hote atueng navah ka radip poung e misurtui mon daw k hoi a yu han. Monrui daw k hoi sanutui a tâco han. Judah tuipui pueng tui a lawng han. BAWIPA e Imthungkhu daw k hoi tuihnu a phuek vaiteh Shittim yawn a duk sak han.

<sup>19</sup> Judah ram daw k, yon ka tawn hoe h e taminaw hah a thei awh teh, Judahnaw hah a rektap awh dawkvah, Izip ram teh tami kingkadi lah ao han. Edom ram haiyah kahrawng patetlah kingdi han. <sup>20</sup> Judah ram teh yungyoe e ram, Jerusalem khopui teh a yungyoe kangning e khopui lah ao han. <sup>21</sup> BAWIPA teh Zion mon daw k ao dawkvah, hote khocanaw a thei awh dawkvah ka khang sak hoe h rae Judahnaw e thiphu hah bout ka pathung han.



## AMOS

<sup>1</sup> Judah siangpahrang Uziah, Isarel siangpahrang Jehoash e capa Jeroboam tinaw e kut dawkw tali a no hoehnahlan kum hni navah, tukhoum e lah kaawm e, Tekoa tami Amos ni Isarel ram hanelah, a hmu sak e lawk teh, <sup>2</sup> BAWIPA ni Zion mon dawkw hoi a hram teh, Jerusalem kho hoi lawk a pathang dawkvah, tukhoumnae hmuennaw teh, a kamyai vaiteh, Karmel mansom teh a kamyai han.

### *Miphunnaw lathueng lawkcengnae*

<sup>3</sup> Miphunnaw lathueng lawkcengnae ni kâ a poe e teh, Damaskas kho teh, Gilead ram hah cangkatinnae sum e sehnaw hoi katin e yon phun kathum touh dueng hoeh niteh, yon pali touh dawkvah reknæ na khang laipalah kaawm mahoe. <sup>4</sup> Hazeel im dawkw hmai ka tha vaiteh, Benhadad e innaw hah ka kak sak han. <sup>5</sup> Damaskas kho e longkha a khanna takhoe pouh han. Aven tanghling pueng, Beth-eden kho dawkw e bawi katawknaw pueng, ka raphoe han. Sirianaw hah Kir kho lah a man awh han telah BAWIPA ni a dei. <sup>6</sup> Hahoi BAWIPA ni a dei e teh, Gaza kho teh, paung e tami abuemlah hah Edom bawi koe poe hanlah, a man e yon kathum touh dueng laipalah, yon pali touh dawkvah, reknæ na khang laipalah na awm mahoe. <sup>7</sup> Gaza kho rapan lathueng vah hmai ka tha vaiteh siangpahrang innaw pueng hah ka kak sak han. <sup>8</sup> Ashdod kho e tami pueng, Ashkelon kho dawkw bawi katawknaw pueng, ka raphoe han. Ekron kho hai ka tuk vaiteh, kaawm rae Filistin taminaw hai be a ro han telah Bawipa Jehovah ni a dei. <sup>9</sup> Hahoi BAWIPA ni a dei e teh, Taire kho teh hmaunawnggha reira lawkkamnae pâkuem hoe. Paung e tami abuemlah naw hah, Edom bawi koe a poe e yon kathum touh laipalah, yon pali touh dawkw reknæ na khang laipalah na awm mahoe. <sup>10</sup> Taire kho rapan dawkvah hmai ka tha vaiteh, innaw ka kak sak han. <sup>11</sup> Hahoi BAWIPA Cathut ni a dei e teh, Edom ram teh, pahrennae lungthin ka panguap teh hmaunawnggha hah tahloi hoi pâlei e yon, lungkhueknæ hoi pout laipalah, ao teh, pout laipalah kâtaranna yon kathum touh dueng laipalah yon pali touh dawkvah reknæ na khang laipalah na awm mahoe. <sup>12</sup> Teman kho dawkw hmai ka tha vaiteh, Bozrah kho e innaw pueng hah a kak han. <sup>13</sup> Hahoi BAWIPA ni a dei e teh, Ammon ram e taminaw ni amamae hmuen hah kaw sak hanelah, camo ka vawn e, Gilead ram e napui camo kanengnaw e vonnaw hah vak a khei awh e yon kathum touh dueng laipalah, yon pali touh dawkw kaie reknæ na khang laipalah na awm mahoe. <sup>14</sup> Rabbah khopui rapan hmaisawi vaiteh, innaw ka kak sak han. Tarantuk nah hnin vah, hramkinae, kho hoi tûilî a thonae hnin nah palek e lah ao han. <sup>15</sup> Ahnimæ siangpahrang koehoi kamtawng vaiteh, a bawinaw hai man lah ao han telah BAWIPA ni a dei.

## 2

<sup>1</sup> Hahoi BAWIPA ni a dei e teh, Moab ram ni Edom siangpahrang e a hrunaw hah hraba lah ao nahane hmai hoi pâeng e yon kathum touh dueng laipalah, yon pali touh dawkvah reknæ na khang laipalah na awm mahoe. <sup>2</sup> Moab ram dawkw hmai ka tha vaiteh, Kerioth kho e im kahawinaw hah ka kak sak han. Kacaipounge pawlawk, hramkinae, mongka uengnae hoiyah Moab ram teh a due awh han. <sup>3</sup> Moab ram a



lungui vah, khobawinaw hah, kai ni ka takhoe vaiteh, ahni hoi bawinaw abuemlah ka thei han telah BAWIPA ni a ti.

### *Judah Lawkcengnae*

<sup>4</sup> Judah lawkkamnae daww Bawipa ni a dei e teh, Judahnaw BAWIPA e phunglamnaw hah tarawi hoeh. Kâlawknaw hah a pahnavt awh teh, mintoenaw ni a baww awh e cathutkaphaww hoi payon e yon kathum touh dueng laipalah yon pali touh dawwvah reknæ na khang laipalah na awm mahoe. <sup>5</sup> Judah ram daww hmai ka tha vaiteh Jerusalem kho imnaw hah ka kak sak han.

### *Isarelnaw lawkcengnae*

<sup>6</sup> Hahoi BAWIPA ni a dei e teh, Isarel miphun ni tamikalan e hah tangka hoi hai, karoedengnaw hah, khokkhaww buet touh hoi hai, a yonæ yon, <sup>7</sup> Karoedengnaw, e lû hah, vaiphu hoi muen kayo hanelah, ngainæ a lenpoung teh, ka rahnoum e tami hah, kamsoumhoeh lawkcengnae yon, kaie ka min hah khin sak hanelah, a na pa hoi a ca ni buet touh dueng e napui hah, rei okhainæ yon, <sup>8</sup> khohna e cawngca pueng, sathei thuengnae ateng vah a phai awh teh a i awh e yon, a yonnae tangka hoi a ran e misurtui hah Cathut e im dawwvah, a nei e yon kathum touh dueng laipalah, yon pali touh dawwvah, reknæ na khang laipalah na awm mahoe. <sup>9</sup> Sidar thing hoi kâvan lah arasang teh kathenkungnaw patetlah ka khaw e Amor miphunnaw teh nangmae hmalah, kai ni ka takhoe vaiteh, a lathueng lah ahnie a paw hai thoseh, a rahim lah ahnie a tangpha hai thoseh, kai ni ka raphoe toe. <sup>10</sup> Nangmouh naw hah Izip ram hoi na rasa teh, Amor ram hah pang sak hanelah, kum 40 touh thung kahrawngum vah na hrawi awh. <sup>11</sup> Nangmae ca tangawn hah, Profet lah, thoundounnaw hah, Nazirite tami lah, kai ni ka hmoun toe. Oe Isarel miphunnaw, hete laww kamsoum hoeh maw, telah BAWIPA ni a pacei. <sup>12</sup> Nangmouh niteh, Nazirite taminaw ni nei hanlah, misurtui na poe toe. Profetnaw hai profet a taww teh, dei hanh awh telah na cakâ awh. <sup>13</sup> Khenhaw, leng teh kakawi lah rasoup e cabong ni a ratet e patetlah nangmouh na onæ hmuen hah kai ni ka ratet han. <sup>14</sup> Ka yawng thai poung e tami ni, yawng thainæ kâhmawt hoeh. Athakaawme tami ni amahoima kârunngang thainæ kâ awm mahoe. A taran kahawi ni ama hai kârunngang mahoe. <sup>15</sup> Licung ka patuem e tami ni kandout mahoe. Ka yawng thai poung e ransa ni amahoima runngang mahoe. Marang kâcuie ni hai amahoima runngang mahoe. <sup>16</sup> A lungkatang ni teh athakaawme ni hat nah hnin vah, caici lahoi a yawng awh han telah, BAWIPA ni a dei .

## 3

### *Profet lawkgainæ*

<sup>1</sup> Oe Isarel miphunnaw Izip ram hoi kai ni na tâcokhai e miphun abuemlah nanganaw hah, kai BAWIPA ni ka dei e laww hah thai awh haw. <sup>2</sup> Talai van daww kaawm e miphun abuemlah daww hoi ka panue e nangmouh miphun buet touh dueng hah kai ni na coe dawwvah, nangmae yon kaawm e pueng hah, kai ni lawkkaceng han. <sup>3</sup> Tami ka hni touh ni lungkangingnae awm laipalah cungtalalah kahlawng cei thai han maw. <sup>4</sup> Sendek ni kei hoehpawiteh, ratu thung vah a huk han namaw. Sendek ni banghai kei hoehpawiteh, a kâkhu daww hoi a cairang han namaw. <sup>5</sup> Talai daww tangkam patung hoehpawiteh, tava hah kâman han namaw. Patung e tangkam dawwvah, banghai na hmu hoeh roukrak na patung e hah na lo



han namaw. <sup>6</sup> Kho thung dawk mongka tum pawiteh kho thung taminaw ni taket laipalah awm mahoe h namaw. BAWIPA ni a sak e laipalah rucatnae buetbuet touh kho thung vah a pha han namaw. <sup>7</sup> Atangcalah, Bawipa Jehovah ni amae a san Profetnaw koe pâpho laipalah, bangpatet e hno hai sak hoe h. <sup>8</sup> Sendek a huk torei teh, apihai taket laipalah awm mahoe h. Bawipa Jehovah ni lawk dei hoe hpawiteh, apinimaw a pâpho thai han. <sup>9</sup> Ashdod kho imnaw hoi Izip ram imnaw koe kamthang a dei hane teh, Samaria mon dawkvah a kamkhueng teh, Samaria kho thung dawkvah, ruengruengtinae kho thung dawk pacekpahle knae ka khang e naw, khenhaw. <sup>10</sup> Khothung e taminaw teh, kahawi e phung hah panuek hoe h. Thama lah a lawp e hnonaw hah im kahawinaw daw k a pâtung awh telah BAWIPA Cathut ni ati. <sup>11</sup> Hatdawkvah, Bawipa Jehovah ni ati e teh, tarannaw ni Samaria ram hah a ven awh vaiteh, nange taran hawinae a pabo vaiteh, im kahawinaw hah a raphoe awh han. <sup>12</sup> BAWIPA ni a dei e teh, tu ka khoum ni sendek e pahni daw k e khok kahni, nahoe h pawiteh, a hna tangawn hah, a rasa pouh e patetlah Samaria kho e ikhun, daw k ka ip e, Damaskas kho hni phai van ka tahung e Isarel miphunnaw hah, rasa awh han rah. <sup>13</sup> Ransahu Bawipa Jehovah ni a dei e lawk teh, thai awh nateh Jakop e miphunnaw koe patuen na dei pouh hane teh, <sup>14</sup> Atangcalah, Isarel miphunnaw e a yonnaw hah lawkcengnae hnin daw k, Bethel thuengnae hah kai ni lawk ka ceng vaiteh, thuengnae a kinaw hah, ka raboung vaiteh talai daw k a bo han. <sup>15</sup> Kasik imnaw hoi kawmpoi imnaw hah, kai ni ka raphoe vaiteh, kasaino hoi sak e imnaw hai koug a rawk han. Im kahawinaw hai apout han telah BAWIPA ni atipouh.

## 4

<sup>1</sup> Karoedengnaw ka rektap e, kahaikahlam kaawmnaw ka pacekpahlek e, amae bawinaw hah canei hane na poe haw ati awh teh, Samaria mon daw k kaawm e Bashan maitonaw, hete lawk he thai awh haw. <sup>2</sup> Bawipa Jehovah ni amae thoungnae hoi thoe a bo e patetlah nangmanaw hah hradang hoi thoseh, nangmae ca catounnaw hoi tamlaw k hoi thoseh mannae tueng a pha han. <sup>3</sup> Namamouh ni na hmu awh e a kâko daw k hoi lengkaleng na tâco awh vaiteh, Hermon thungvah na kâ tâkhawng awh han telah BAWIPA ni ati. <sup>4</sup> Bethel kho daw k cet nateh, yon awh haw. Gilgal kho daw k cet nateh kâta poenae pung sak haw. Amom tangkuem thuengnae sathei hnin thum touh daw k vai touh, pung hra pung touh e hah sin awh. <sup>5</sup> Na lawp awh e hno thung daw k hoi lunghawilaw k deinae thueng awh. Lungthocalah hoi thuengnae hah pathang sak awh. Oe Isarelnaw, hottelah na sak navah, nangmouh ni na nawm awh han telah Bawipa Jehovah ni ati.

### *Isarelnaw BAWIPA koe ban ngai awh hoe h*

<sup>6</sup> Kai ni nangmae kho tangkuem daw k, nangmouh na onae hmu en tangkuem daw k, takang ka tho sak nahai thoseh, nangmouh ni kai koe bout tho han na ngai awh hoe h telah BAWIPA ni ati. <sup>7</sup> Canga tue a pha hoe hnahan, thapa yung thum lathueng lah, kho a rak hoe h nahanlah, kho teh kai ni ka ngang toe. Kho buet touh daw k rak sak han thoseh, kho buet touh daw k a rak hoe h nahane thoseh ka sak han. Law buet touh ni kho tui a hmu vaiteh, alouke law ni teh hmwaw mahoe h ka ke lah ao han. <sup>8</sup> Hottelah kho thung daw k hoi kho thung e naw ni tui nei hanelah kho buet touh daw k a cei nakunghai boum awh mahoe h. Hatei nangmouh ni kai koe ban hane na ngai awh hoe h telah BAWIPA ni ati. <sup>9</sup> Kahlî ni akungnaw



a due sak. A ke sak teh atui lah a lawng sak teh, duenae hoi kai ni ka rek toe. Nangmouh koe laikawk, misur takha, thaibunglungkungnaw, olivekungnaw, hah samtongnaw ni a ca awh toe. Hatei kai koe na ban awh hoeh telah BAWIPA ni ati. <sup>10</sup> Izip ram na kâhmo e lacik hah nangmouh na onae koe ka tha toe. Thoundounnaw hah tahloi hoi ka thei sak toe. Marangnaw hah ka man sak toe. Nangmouh na onae rim daw k kapaw e hmui hah na hnong daw k ka kâen sak toe. Hatei kai koe na ban awh hoeh telah BAWIPA ni ati. <sup>11</sup> Cathut ni Sodom kho hoi Gomorrah kho a tâkhawng e patetlah nangmouh tangawn kai ni na tâkhawng vaiteh, hmai daw k hoi rayu e thingtu patetlah na o awh toe. Hatei kai koe bout ban hane na ngai awh hoeh telah BAWIPA ni ati. <sup>12</sup> Hatdawkvah, oe Isarelnaw, a lathueng lah ka sak e patetlah nangmouh koe ka sak han rah. Hottelah ka sak han dawkvah, Oe Isarelnaw, namamae Cathut hoi kâhmo hanelah, kârakueng awh. <sup>13</sup> Kenhaw. Monnaw ka sak niteh, kahlî ka sak e, tami ni pouk e naw ka panuek sak e, amom angnae hah ka hmawt sak e, talai arasangnae hmuen hah ka coungroe e a min teh Jehovah Cathut doeh.

## 5

### *Isarel khuinae*

<sup>1</sup> Oe Isarelnaw, atu nangmouh koe kai ni ka dei e khuinae lawk hah thai awh haw. <sup>2</sup> Isarel imthungnaw na rawp awh toe. Bout na thaw mahoe h toe. Namamae talai daw k ceitakhai lah na o awh toe. Na ka pathaw hane tami aww hoeh. <sup>3</sup> Bawipa Jehovah ni a dei e teh, Isarel miphunnaw e thaw taw k hanelah, tami 1,000 touh ka poe thai hane kho teh, tami cum touh, cum touh ka poe thai hane kho ni hra touh doeh a poe thai han.

### *Pankângai hanlah kawnae*

<sup>4</sup> BAWIPA ni Isarel miphunnaw a dei pouh e teh kai hah na tawng awh haw. Na tawng awh pawiteh na hring awh han. <sup>5</sup> Bethel kho hah tawng awh hanh. Gilgal kho daw k kâen awh hanh. Beersheba hai takhang awh hanh. Bangkongtetpawiteh, Gilgal kho teh, Bout na man awh han rah. Bethel kho hai ahawinae aww mahoe h. <sup>6</sup> BAWIPA hah tawng awh. Na tawng pawiteh na hring awh han. Nahoe h pawiteh, Joseph miphun van e hmai patetlah a tâco vaiteh, Bethel e hmai teh kapadoutkung aww mahoe h. <sup>7</sup> Ka lan lah lawkcengnae hah, kakhat e thingkung lah ka coung sak vaiteh, lannae hah talai daw k ka tâkhawng e naw, <sup>8</sup> Baritca hoi kangduetaphai hah ka sak e, Duenae tâhlip hah amom angnae lah kaawm sak hane, Kanithun angnae hah hmo sak han e, tuipui kakaw niteh, talai daw k ka rabaw k e, Jehovah tie a min bari kaawm e, <sup>9</sup> A thakaawmpounge taminaw, imnaw, ka raphoe thai e hah tawng awh. <sup>10</sup> Kho longkha dawkvah lawk ka tâtueng thai e tami hah a hmuhma awh teh, lawkkatang ka dei e hah a panuet awh toe. <sup>11</sup> Nangmouh ni karoedengnaw na pacekpahlek awh teh, Catun phawng ouk na la awh dawkvah, na a awh e talung hoi im na sak ei teh, hote im daw k na aww mahoe h, Na ngai awh e misur takha hah, na ung awh ei misurtui na net awh mahoe h. <sup>12</sup> Nangmouh ni patuenpatuen lawk eknae, na yon thaonae kai ni ka panue. Tami kalan hah runae na poe awh. Tadawngnae hah na ca awh. Karoedengnaw, takhang koe kânging hoeh lah lawk na ceng awh. <sup>13</sup> Hatdawkvah, atueng teh ka mathout poung e atueng lah ao. Tami a lungkaang e ni teh duem ao han. <sup>14</sup> Na hring thai awh nahanlah yonnae hah roun awh nateh, hawinae hah tawng awh. Hottelah na sak



pawiteh, nangmouh ni na dei awh e patetlah Kalvan ransabawi, BAWIPA teh nangmouh hoi rei ao han. <sup>15</sup> Yonnae hmuhma awh nateh, hawinae hah lungpataw awh. Kho longkha koe kahman e hah awm sak awh. Rasahu BAWIPA Cathut ni, kacawie Joseph miphunnaw, A pahren hai a pahren yawkaw han doeh.

### *BAWIPA hnin*

<sup>16</sup> Ransahu Jehovah Cathut ni a dei e teh bangpueng dawkvah, khuikanae ao vaiteh, ka cet kaawmnaw ni aiyoe! aiyoe! telah ati awh han. Law ka sak e taminaw hah cingou hanelah thoseh, cingounae hah khuika hanelah thoseh a kaw awh han. <sup>17</sup> Misur takhanaw dawk hai a khui awh han. Bangkongtetpawiteh, kai teh nangmae alungui ka cei han telah BAWIPA ni ati. <sup>18</sup> BAWIPA e hnin ka rabui e taminaw teh, yawthoe e lah ao. Bang dawk maw nangmouh ni na rabui awh. BAWIPA e hnin teh nangmouh koe ang mahoe. Hmonae lah ao awh han. <sup>19</sup> Tami ni sendek onae koehoi a yawng vaiteh, tavom hoi kâhmo e patetlah im dawk kâen vaiteh, tapang dawk a kut a toung eiteh tahrui ni a khue. <sup>20</sup> Bawipa e hnin teh ang laipalah a hmo han. Angnae roeroe awm mahoe. Khoeroe a hmo han. <sup>21</sup> Nangmae pawinaw hah, kai ni ka hmuhma, ka panuet. Na sak awh e hninnaw dawk hai kai ka nawm hoe. <sup>22</sup> Hmaisawi thuengnae, tavai thuengnae hah na poe nakunghai kai ni ka coe hoe. Roum thuengnae hai kai ni ka noutna mahoe. <sup>23</sup> Nangmouh ni la na sak e lawk hai takhoe awh. Ratoung na tum e lawk hai ka thai mahoe. <sup>24</sup> Ka lan lah lawkcengnae hah tui patetlah, lannae hah palang tui athakaawme patetlah lawng sak awh. <sup>25</sup> Oe Isarel imthung nangmouh ni sathei hoi thuengnae hah kahrawngum vah kum 40 touh thung kai koe na sin boi awh namaw. <sup>26</sup> Nangmae siangpahrang Sakkut hoi nangmae meikaphawk hoi âsi cathut na sak awh e hah na sin awh toe. <sup>27</sup> Hatdawkvah nangmouh teh Damaskas hloilah man sak hanlah kai ni ka rakueng han telah ransahu BAWIPA Cathut telah a min kaawm e ni a dei .

## 6

### *Zion hoi Samaria kâhruetcuat poenae*

<sup>1</sup> Zion kho dawk karoumcalah kaawm e, Samaria min kâuepnaw hoi miphun thung dawk a lathueng poun telah kaw e, Isarel imthung dawk kâhnae lah kaawm e taminaw teh, a yaw ka thout e lah ao. <sup>2</sup> Kalneh kho lah cet nateh khenhaw. Hote kho dawk hoi Hamath kho lah, Filistinnaw a onae Gath kho koe lah cet awh. Hotnaw teh, hete uknaeramnaw hlak hoe ahawi maw. Ahnimouh a onae teh, nangmouh na onae hlak hoe akaw maw. <sup>3</sup> Ka mathout e hnin hah tahruet awh nateh, kahmanhoe e lawkcangnae tungkhung teng ka hnai sak e, <sup>4</sup> kasaino ikhun dawk ka ip e, tungkhungkasaw dawk ka yan e, tucahu dawk hoi tucanaw, maito e dokko dawk hoi maitocanaw a la teh ka cat e, <sup>5</sup> ratoung kueng e kâtâ nalaihoi la ka sak e, tumkhawng katha hoi, Devit ni a sak e patetlah ka sak e, <sup>6</sup> misurtui hah manang dawk hoi a nei awh teh, aphu patawpoun e hmutui a kâhluk awh teh, Joseph e roedeng khangnae dawk a lung ka mathout hoe e naw, <sup>7</sup> ahnimanaw teh, hmaloe man e a khang e naw hoi cungtalah a cei awh han. Yon na laihoi kaawmnaw, ahnimae pawinaw hai kahma han. <sup>8</sup> Bawipa Jehovah ni a dei e teh Cathut teh amahoima thoekâbo e patetlah Jakop e kârasangnae hah ka panuet teh, ahnie im hah ka hmuhma teh, khopui hoi kho thung kaawm e pueng hah kai ni ka pahnawt han. <sup>9</sup> Im



buetsa touh dawkvah tami hra touh kaawm nakunghai a due awh han. <sup>10</sup> Imthungkhu lah kaawm e, hmai hoi pâeng lah kaawm e teh, im dawkvah hoi a ro hah rasa vaiteh, ceikhai torei teh, im dawkvah kaawm e tami hah kaw vaiteh, nang koe buetsa touh bang kaawm e ao rah na ou, awh hoeh telah bout ati han. Ka hrawm e tami hai duem awh. BAWIPA e min teh dei hane kâ awh hoeh telah ati awh han. <sup>11</sup> Bangkongtetpawiteh, BAWIPA Cathut e kâ lah ao dawkvah, impui hah raphoe vaiteh im kathounge hai kâbawng sak han. <sup>12</sup> Marang teh lungphen van a yawng thai maw. Tami ni talung dawkvah maito hoi kanawkvah panuek han maw. Nangmouh ni kalan lah lawkcengnae hah duenaesue patetlah lannaesue paw hah kakhat poung e thingkung lah na coung sak awh toe. <sup>13</sup> Banglahai kaawm hoeh e dawkvah kâoup teh, na lung ahaw awh, maimouh teh mae thaonaesue hoi nahoehmaw kâ tawn awh toe telah ouk dei awh nahoehmaw. <sup>14</sup> Atangcalah, Oe Isarel imthungnaw, nangmouh koe lah miphun buetsa touh ka thaw sak vaiteh, hote miphun ni Hamath kho lam dawkvah hoi kamtawng vaiteh kahrawng dawkvah kaawm e palang totouh, nangmouh teh na pacekpahlek awh han telah ransahu BAWIPA Cathut ni ati.

## 7

### *Samtong kamnuaes*

<sup>1</sup> Hahoi Bawipa Jehovah ni na patue e teh siangpahrang hane, canga kamtawng hoi cang bout a pawnaesue tueng navah samtongnaw hah a tâco sak. <sup>2</sup> Hote samtongnaw ni ram pueng thung dawkvah kaawm e cangnaw hah a ca teh, abaw hnukkhu hoi kai ni oe Bawipa Jehovah, yonnaesue hah na ngaithoum haw. Jakop teh a thoung dawkvah, bangtelamaw kangdue thai han telah ka pacei navah, <sup>3</sup> BAWIPA ni pankângai awh pawiteh hettelah awh mahoev telah BAWIPA ni a dei. <sup>4</sup> Hahoi Bawipa Jehovah ni kai na patue e teh, hmai hoi rek hanelah Bawipa Jehovah ni hmai a kaw teh, tuipei ka dungpoung e hah hmai a kak sak teh ramnaw hai a kak. <sup>5</sup> Kai ni oe Bawipa Jehovah roum sak leih. Jakop teh a thoung dawkvah bangtelamaw a kangdue thai han ka ti pouh teh, <sup>6</sup> Bawipa Jehovah ni pankângai awh pawiteh, hettelah awh mahoev telah BAWIPA ni ati.

<sup>7</sup> Hahoi na patue e teh bangnuaes rui hah a pabo teh, sak e talung van vah BAWIPA ni a kangdue teh a kut dawkvah bangnuaes rui patuep na lai hoi, <sup>8</sup> Amos nang ni bang e hno maw na hmu telah a pacei teh, kai ni bangnuaes rui hah ka hmu ka ti pouh navah, BAWIPA ni khenhaw! kaie tami Isarel miphunnaw a lungui vah bangnuaes rui ka pabo han. Atu hoi nangmouh bout na ngaithoum mahoev. <sup>9</sup> Isak e a rasangnaesue hmuennaw teh, tami kingdi vaiteh, Isarel e hmuensue kathoungnaw teh be raphoe e lah ao han. Jeroboam imthungnaw hai tahloi hoi ka tuk han, telah ati.

<sup>10</sup> Hahoi Bethel vaihma Amaziah, teh Isarel siangpahrang Jeroboam koe ka patoun vaiteh, Amos teh Isarel imthung a lungui vah ama koe lah kahawihoev pouknae a poe toe. Ahnie lawknaw teh ram ni khang thai mahoev. <sup>11</sup> Jeroboam teh tahloi hoi a due han. Isarel miphunnaw teh, a onae ram dawkvah hoi a pâlei awh han telah Amos ni a dei telah atipouh. <sup>12</sup> Amos koe Ameziah ni oe nang Profet Judah ram dawkvah yawng leih. Hote ram dawkvah Profet tawkvah nateh kho sak leih. <sup>13</sup> Atuhoi Bethel koe lah Profet tawkvah hanh lawih. Siangpahrang e a thoungnaesue hmuensue doeh. Siangpahrang e im doeh atipouh teh,

<sup>14</sup> Amos ni kai teh Profet nahoev. Profet e ca lah hai ka tho hoeh. Saring ka khenyawnkung hoi thailahei kungnaw ka khenyawnkung lah



ka o. <sup>15</sup> BAWIPA ni tu ka khournae koehoi kai hah na rasa teh, nang cet haw. Kaie tami Isarel miphunnaw koe Profet thaw tawh haw telah ati. <sup>16</sup> Hatdawkvah, BAWIPA e kâpoe e ka ngâi pouh. Isarel miphunnaw koe lah Profet tawh hanh, Isak imthung koe lah kâtarannae lawk dei pouh hanh. <sup>17</sup> BAWIPA ni a dei e teh, nange na yu teh khotung ka kâyawt e lah ao han. Nange na canu capanaw teh tahloi hoi a due han. Ayânaw ni nange talai teh, rui payang vaiteh a kêrei awh han. Nang teh kakhin e ram dawh na due han. Isarel miphunnaw teh a onae ram dawh hoi a pâlei awh hah telah Amaziah koe a dei pouh.

## 8

### *Kawmpoi paw kamnuenae*

<sup>1</sup> Hahoi Bawipa Jehovah ni kai na patue e teh, kenhaw! kawmpoi paw tangtung buet touh ka hmu. <sup>2</sup> Amos nang ni, bang e hno maw na hmu telah na pacei teh, kawmpoi paw tangtung buet touh ka hmu ka ti pouh navah, BAWIPA ni a hnukteng e tueng teh, ka tami Isarelnaw koe a pha toe. Atuhoi teh, ahnimanaw hah nâduek hai ka pahlout mahoe toe. <sup>3</sup> Hatnae tueng nah, bawkimnaw hah a khui awh han. Hmuen tangkuem dawh tami ronaw awh vaiteh, arulahoi a tâkhawng awh han telah Bawipa Jehovah ni a ti. <sup>4</sup> Maimouh ni cakang yo hanelah, thaparei hnin loun lawiseh, satun yo hanelah, sabbath hnin loun lawiseh teh awh vaiteh, <sup>5</sup> Ephah hah thung sak hanelah, shekel hah len sak hanelah, sak awh vaiteh, kahmanhoe e yawcu hah hno awh vaiteh, karodengnaw hah tangka hoi, a vonkahlamnaw hah, khokkhawm hoi ran awh vaiteh, satun hah a yo awh han. <sup>6</sup> A vonkahlamnaw hah, hnephnap vaiteh, ka roedeng e ramnaw hah, raphoe hanelah kangainaw, hete lawk hah thai awh haw. <sup>7</sup> Bawipa Jehovah ni Jakop e a lentoenae thoebo teh, ahnimae tawksak e naw pueng nâduek hai kai ni ka pahnim hoe. <sup>8</sup> Hote kong dawh ram kâhuen vaiteh taminaw pueng ni, lungpuen mahoe maw. Nai palang patetlah ram pueng thaw awh vaiteh, lzip ram e palang ni a muem e patetlah pâyawt vaiteh muem awh mahoe maw. <sup>9</sup> BAWIPA Cathut ni a dei e teh, hatnae tueng dawh teh, kanîthun e tueng nah, kai ni kanî ka loun sak han. Talai hah ka hmo sak han. <sup>10</sup> Nangmae paw na to e hah, lungmathoenae lah ka o sak han. La na sak awh e naw hah, khuikanae lah ka o sak han. Tami pueng ni buri khohna hoi keng dawh kâyeng sak hanelah, sam hah a ngaw nahanelah, kai ni ka sak han. Ca tawntoe e a due dawh khuika e patetlah, a poutnae koe, kakhat poung e hnin patetlah kacounsak han telah a ti. <sup>11</sup> Bawipa Jehovah ni a dei e teh, takangnae hah ram pueng dawh kathosak han. Canei takang nahoe, tui takang hai nahoe. Cathut e lawk thainae takang doeh. <sup>12</sup> Taminaw ni BAWIPA lawk a tawng awh han. Tui pui buet touh koehoi tui pui buet touh totouh, atunglah, akalah, kanîtho, kanîloun a yawng awh nakunghai, hmawt awh mahoe. <sup>13</sup> Hatnae tueng dawh a meikahawi poung e tanglakacuemnaw hoi thoundounnaw ni tui kahran hoi a patang awh han. <sup>14</sup> Samaria cathut hoi thoe kâbo e tami, Dan cathut hoi thoe kâbo e tami, Beersheba cathut min lahoi ka tet e naw haiyah koun a rawp awh vaiteh, nâduek hai thaw thai awh mahoe toe.

## 9

### *Isarel raphoenae*



<sup>1</sup> Kai ni bout ka khet navah, BAWIPA teh thuengnae khoungröe teng a kangdue e hah ka hmu. Ahni ni a dei e teh, kaawm e tami pueng e lû daw k takhang khom hah kâhuen nateh rawp sak hanelah, tho hah hem haw. Ahnimanaw hah tahloi hoi thet awh. Ka yawng e hai hlout mahoe h. Ka hlout e tami hai hring mahoe h. <sup>2</sup> Sheol toutoh ka tai nakunghai ka sawn han. Kalvan ka luen nakunghai ka pabo han. <sup>3</sup> Karmel monsom daw k kâhrawk nakunghai, ka rasa han. Kai koehoi hlout hanelah, tuipui a dengnae koe kâhrawk nakunghai tahrün ka khue sak han. <sup>4</sup> Taran ni ka man nakunghai, alouke hmu en koe tahloi kâ ka poe vaiteh, ka thei sak han. Hawinae ka sak mahoe h. Yon a sak nahanelah ka khet han. <sup>5</sup> Ransahu Bawipa Jehovah ni talai kâbet vaiteh, talai teh atui lah awm vaiteh, talai taminaw pueng ni a khuika awh han. Nai palang patetlah ram pueng daw k thaw vaiteh, Izip palang daw k a muem e patetlah a muem awh han. <sup>6</sup> Imrakhannaw hah kalvan vah sak vaiteh, a rahim lae im hah talai daw kvah a sak teh, tuipui hah kaw vaiteh, talai daw k a rabaw k. A min teh Jehovah doeh. <sup>7</sup> Oe Isarel miphunnaw, nangmouh teh kai koe Ethiopianaw patetlah na awm awh hoe h maw. Isarel miphunnaw teh Izip ram hoi kai ni ka hrawi e patetlah Filistin taminaw hah Kaptor ram hoi, Siria taminaw hah Kir ram hoi kai ni ka tâcokhai toe nahoe hmaw, telah BAWIPA ni ati. <sup>8</sup> Bawipa Jehovah ni yon ka tawn e uknaeram hah a khet teh, hote ramnaw hah talai daw k hoi be ka raphoe han. Hateiteh Jakop imthung teh, ka raphoe mahoe h telah BAWIPA ni ati. <sup>9</sup> Hahoi kâ ka poe vaiteh cai karue e patetlah Isarel imthungnaw hah miphun pueng thung hoi cuekkarue hoi karue han. Cai huem touh boehai talai daw k baw t mahoe h. <sup>10</sup> Runae ni maimouh teh na phat mahoe h. Na ngang thai mahoe h telah ati awh teh, tamikayonnaw pueng teh tahloi hoi a due awh han.

### *Isarel bout pathaw han*

<sup>11</sup> Kaawm rae Edom miphun koehoi kaie ka min lahoi ka phung e alouke miphunnaw pueng hah, man sak hanelah ka rawm e Dêvit e rim hah, hatnae tueng daw k kai ni bout ka sak han. <sup>12</sup> Kâbawng e hnönaw hah ka bet han. Ka rawk e hnönaw hah ka pathoup vaiteh, hote rim teh ayan e ao e patetlah kangdue sak han telah hete hnönaw kasakkung BAWIPA e lawk teh ao. <sup>13</sup> BAWIPA ni a dei e teh, laikaw k kanaw k e tami teh, cang ka a e tami, misur paw kasû e tami teh cati ka patue e tami a pha teh, mon daw k hoi ka radip e misurtui a lawng sak teh, monruinaw pueng daw k hai atui lah a lawngnae tueng a pha han. <sup>14</sup> Ka tami Isarel san lah kaawm e naw hah kabankhai han. Hahoi ka rawk e khopuinaw hah bout ka pathoup vaiteh, hawv ah ao awh han. Misurnaw hah ung awh vaiteh, misurtui a nei awh han. Takhanaw sak awh vaiteh a pawnaw a ca awh han. <sup>15</sup> Ahnimouh teh amamae ram koe ka ung han. Ka poe e ram daw k hoi pinihai bout phawng mahoe h toe telah Cathut ni ati.



## OBADIAH

### *Edom e kâoupnae*

<sup>1</sup> Obadiah ni a hmu e kamnuenae: Bawipa Jehovah ni Edom ram hanelah a dei e lawk teh, BAWIPA e hram lawk teh maimouh ni thai awh toe. Nangmouh thaw awh nateh Edom ram tuk hanelah cet awh leih titeh Jentelnaw koe laicei a patoun toe. <sup>2</sup> Nang teh Jentelnaw e hmalah kahoengca lah na ta, Jentelnaw ni na hnephnap awh han. <sup>3</sup> Talungnaw rahak vah na o teh, kai hah apini nama talai na ka pabawt thai han vâ na ti dawkvah na kâoupnae ni na dum toe. <sup>4</sup> Nang teh langta patetlah na kâtawm teh âsinaw dawkvah tabu na ka tuk nakunghai, hote hmuen koehoi kai ni nang hah na pabo han telah BAWIPA ni a ti. <sup>5</sup> Tamrunaw hoi dingcanaw ni karum vah tho awh pawiteh, amamouh ngai e duengdoeh parawt awh tih. Misur paw ka khi e ni hai youn touh teh ouk a pâhma nahoehmaw. <sup>6</sup> Nang teh puenghoi na kamko toe. Esaw teh puenghoi akungkhei awh toe. A hro e hnonaw teh ngit a pâphue awh toe. <sup>7</sup> Nang hoi kamyawng e naw pueng teh ram alawilah pâlei lah ao awh toe. Na huinaw pueng ni na dum awh toe. Nang hoi rei kacatnetnaw ni, nang hanelah tangkam a patung awh toe. Na thounnae abaw toe. <sup>8</sup> BAWIPA ni a dei e teh hatnae hnin dawkvah Edom ram thung e lungkaangnaw thoseh, Esaw e mon dawkvah hoi a ratho kahawinaw thoseh ka takhoe han. <sup>9</sup> Oe Teman kho, na ransanaw ni a taki awh han. Esaw e mon dawkvah tami pueng a thei awh han.

### *Edom ni a hmaunawngaha a rek*

<sup>10</sup> Nang teh na nawngaha Jakop na theinae, thama lah na sak e yon kecu dawkvah, yeirai na phawt vaiteh nang teh khoeroe takhoe lah na o han.

<sup>11</sup> Nang teh avanglah na onae hnin, ramlouknaw ni nange thaw katawkkungnaw mannae hnin, alouke miphunnaw ni ahnie khopui longkha thung a kâen teh Jerusalem khopui hah cungpam rayunae hnin nah nang teh dâw e tami lah na o.

<sup>12</sup> Na nawngaha teh ramlouk e tami lah a onae tueng nah laplap na khet kawi na hoe. Judahnaw rawknae a kâhmo nah na kâoup sin mahoe. Runae a kâhmo navah, dudamnae lawk na dei kawi nahoe.

<sup>13</sup> Ka taminaw runae a kâhmo nah, a longkha thung kâen kawi na hoe, a roedeng nah laplap khet kawi na hoe, a hnopai hai lawp kawi na hoe.

<sup>14</sup> Kahlout e taminaw ngang hanlah lamkâcunae koe kangdue kawi na hoe. Runae a kâhmo nah a tarannaw kut dawkvah thak kawi na hoe.

<sup>15</sup> Bangkongtetpawiteh, BAWIPA e hnin teh miphun pueng hoi a hnai toe. Na sak e patetlah ayâ ni nang koe a sak van han. Na sak e hno na lû van a pha han.

<sup>16</sup> Judah miphunnaw ni, kaie mon khoung dawkvah a canei e patetlah tengpam kaawm e miphunnaw pueng ni a canei awh han. A canei awh vaiteh a padoun awh foteh kaawm boihoe e tami patetlah ao han.

<sup>17</sup> Zion mon dawkvah ka hlout e youn touh ao han. Thounnae hmuen lah ao han. Jakop miphun ni a coe han kamcu e talai bout a coe awh han.

<sup>18</sup> Jakop miphun teh hmai, Joseph miphun teh hmaito, Esaw miphun teh songnawng lah ao. Hmai hoi sawi toteh be a kak awh han. Esaw miphun hlout awh mahoe telah BAWIPA ni a dei toe.



<sup>19</sup> Akalah kaawm e naw ni Esaw e mon hai thoseh, tanghling daw k kaawm e naw ni Filistin ram hai thoseh, Ephraim yawn hoi samaria ram hai thoseh, Benjamin miphun ni Gilead ram hai thoseh a tuk han. <sup>20</sup> Kanaannaw koe kaawm e, man e Isarel miphunnaw ni Zarephath totouh a coe awh han. Jerusalem hoi san lah a man awh teh Sepharad ram kaawm e naw ni akalae ram totouh a coe awh han. <sup>21</sup> Esaw e mon lawkceng hanelah rungngangkungnaw teh, Zion mon daw k a luen awh han. A uknaeram haiyah BAWIPA e ram lah ao han.



## JONAH

<sup>1</sup> Amittai capa, Jonah koe ka tho e BAWIPA e lawk teh, <sup>2</sup> Thaw haw, Nineveh khopui lah cet nateh, pakhinae hoi hramkhai haw. Hote khopui taminaw ni yonnae a sak awh e teh ka hmalah a pha toe telah a ti. <sup>3</sup> Hatei Jonah ni BAWIPA koehoi Tarshish kho lah yawng hane a kâcai. A thaw teh Joppa kho lah a cei teh a pha. Tarshish kho lah ka cet e long hoi a kâhmo teh, kâcuinae phu a poe teh Cathut koehoi long kamawngnaw hoi Tarshish kho lah reirei cei hanelah long a kâcui.

<sup>4</sup> Cathut ni kahlî katang poun e tuipui koe a patoun dawkvah, tuipui dawk athakaawme tuicapa a thaw teh long meimei a kamko. <sup>5</sup> Hatnavah long kamawngnaw ni a taki awh teh a cathut lengkaleng a kaw awh. Long a pâhaw nahanlah hnopainaw tui dawk a tâkhawng awh. Jonah teh long e vonpui koe a kum teh hawvah mat a i. <sup>6</sup> Long kaukkung a tho teh, Oe mat na ka ip e tami, bangtelane thaw haw. Na Cathut koe ratoum haw, maimouh hlout nahanlah ahni ni doun a thai talang teh atipouh.

<sup>7</sup> Ahnimouh ni be tho awh haw, apie yon kecu dawk ne hete hno a tâco tie panue thai nahanlah cungpam rayu a sei ati awh teh a kâpan awh. Hathnukkhu cungpam a rayu awh boteh, Jonah tak dawk a bo. <sup>8</sup> Ahnimouh ni bang e yon dawk maw hete hno a tâco dei haw. Nâ hoi maw na tho. Bang thaw maw na tawk. Api ram, api miphun maw telah a pacei awh. <sup>9</sup> Jonah ni kai teh Hebru miphun, tui hoi talai kasakkung kalvan e Jehovah Cathut ka bawk e doeh telah atipouh. <sup>10</sup> Ahnimouh ni thouk a taki awh dawkvah, bangkongmaw hettelah na sak vaw telah a pacei awh. Jonah ni Cathut koehoi ka yawng tie a kâpâpho dawkvah a panue awh.

<sup>11</sup> Hatnavah tuicapa teh hoe a thaw dawkvah, ahnimouh ni tuicapa a roun nahanlah nang dawk bangmaw ka sak awh han telah a pacei awh navah, <sup>12</sup> Kai heh na tawm awh nateh tui dawk na tâkhawng awh lawih. Hottelah na tâkhawng awh pawiteh tuicapa a roun han. Hete tûilî ka tho e teh kai kecu dawk doeh a tho tie ka panue atipouh. <sup>13</sup> Hatei, long kamawngnaw ni namran lah pha thai nahanelah tha hoi tuisam a la awh eiteh, hoehoe tuicapa a thaw dawkvah bang ati thai awh hoeh toreî teh, <sup>14</sup> Oe, BAWIPA kaimouh ni ngaithoumnae kâhei awh. Oe Jehovah, hete tami e a hringnae kecu dawk kaimouh koe thoenae phat hanh naseh. Yon ka tawn hoeh e tami hringnae ka thei awh dawkvah yonnae teh kaimouh koe na pen hanh. Oe BAWIPA, nang teh namamouh ni na ngai e patetlah doeh na sak telah a hram awh teh, <sup>15</sup> Jonah hah dawk a tawm awh teh tui dawk a tâkhawng awh. Hattoteh tuicapa a roun. <sup>16</sup> Long kamawngnaw ni hai Cathut a taki awh teh thuengnae a sak awh hnukkhu lawk a kam awh.

<sup>17</sup> Cathut ni Jonah ka payawp hanelah tangapui a hmoun e patetlah Jonah teh tanga von thungvah hnin thum rum thum touh ao.

## 2

<sup>1</sup> Jonah ni tangapui vonthung ao navah Cathut koe a ratoum e teh,

<sup>2</sup> Kai teh runae ka kâhmo dawkvah, Cathut ka kaw teh na thai pouh. Duenae vonthung hoi kaw e lawk na thai pouh.

<sup>3</sup> Bawipa ni kai teh kadung poun e tuipui lungui na tâkhawng dawkvah, tui ni na kalup teh tuicapa pueng ni muen na ramuk.



<sup>4</sup> Hottelah, na hmalah hoi na pâlei eiteh, kathounge bawkim teh pou ka khet han telah ka dei.

<sup>5</sup> Tui ni due sak hanelah na kalup teh, tui lungui vah na paung teh, tuipho ni ka lû dawk a yawngyen.

<sup>6</sup> Mon khok koe ka pha teh, tho pou kâkhan e thung ka phat ei nakunghai, BAWIPA Cathut ni rawknae hmuen koehoi na rasa han.

<sup>7</sup> Lungpout laihoi ka o nah Cathut hah ka pouk teh, kaie ratoumnae teh bawkim kathoung dawk Bawipa koe a pha.

<sup>8</sup> Cungkeihoehe meikaphawk ka bawk naw niteh, a coe awh hane lungmanae hah a tâkhawng awh. <sup>9</sup> Kai teh a lungmanae hah lunghaw-ilawkdeinae hoi bawknae ka sak han. Lawk ka kam e patetlah ka sak han. Runggangnae teh BAWIPA e doeh.

<sup>10</sup> Hatnavah Cathut ni tangapui hah kâ a poe teh, tangapui ni Jonah hah a kawngteng lah a palo.

### 3

<sup>1</sup> Jonah koe Cathut e lawk bout ka tho e teh, <sup>2</sup> thaw nateh Nineveh kholah cet loe, lawk na thui e patetlah hramkhai loe telah atipouh. <sup>3</sup> Hatnavah, Jonah teh Cathut ni kâ a poe e patetlah a thaw teh Nineveh kho lah a cei. Nineveh kho teh khopui lah ao dawkvah hnin thum touh lamcei akaw.

<sup>4</sup> Jonah ni kothung a kâen teh, hnin touh lam a cei teh, hnin rui pali touh aloum hnukkhu Nineveh khopui teh a rawk han toe telah a pathang.

<sup>5</sup> Nineveh kothung e taminaw ni Cathut e lawk a yuem awh teh, tami kacue kanaw abuemlah rawcahai nahane atueng a pathang awh teh buri a kâkhu awh.

<sup>6</sup> Nineveh siangpahrang ni hote kamthang a thai navah a bawit tungkhung dawk hoi a thaw teh, a puengcang a kâradang hnukkhu, buri a kâkhu teh vaiphu dawk a tahung. <sup>7</sup> Tami hoi saringnaw abuemlah sairaseup lah awmseh. Rawca cat sak awh hanh. Tui hai net sak awh hanh. <sup>8</sup> Taminaw hoi saringnaw teh buri kâkhu awh naseh. Cathut koe lungthin katang hoi ratoum awh naseh. Tami tangkuem amamouh ni a dawn awh e rawknae lamthung hno kahawihoehe a sak awh e roun awh naseh. <sup>9</sup> Maimanaw teh rawknae dawk hoi hlout awh nahanelah, Cathut a lungkâthung teh puenghoi a lungkhueknae hah a roun thai hoi a roun thai hoeh e hah apinimaw a dei thai a titeh, siangpahrang hoi bawinaw e kâ lahoi Nineveh khopui thung a pathang sak.

<sup>10</sup> Khocanaw ni amamouh ni a dawn awh e kahawihoehe lamthung a roun awh teh, a tawksak awh e naw hah Cathut ni a hmu navah ahmaloe pakhinae runae hah ahnimouh koe phat sak hoeh.

### 4

<sup>1</sup> Jonah teh a lungphuen, a lungkhuek teh, Oe Cathut nang koe ka kâhei. Kai teh kamamouh ram dawk ka o navah hettelah ka dei toe nahoehmaw. Hat dawk nahoehmaw nang koehoi Tarshish kho lah ka yawng vaw. <sup>2</sup> Bawipa nang teh pahrennae hoi lungmakung Cathut lah na o teh, lungsawnae, moi ka pathung han na tie hai pathung laipalah ngaithoumnae lung na tawn tie heh ka panue. <sup>3</sup> Hatdawkvah Cathut kahringnae na lat pouh lawih. Kai teh kahring e hlak ka due doeh ka hawihnawn telah a kâhei. <sup>4</sup> Cathut ni, na lungkhuek kawi na maw telah a pacei.



<sup>5</sup> Jonah ni khopui dawk bangtelah mouh ao han tie hah panue han a ngai dawkvah khopui e alawilah a tâco teh kanîtholah rim a sak teh a tâhlip dawk a tahung.

<sup>6</sup> Cathut ni Jonah a lungroum nahanelah tuiumkung a ung pouh teh a lû lathueng a yam pouh. Hote akung dawkvah Jonah te a lung akuep poung.

<sup>7</sup> Atangtho khodai torei teh Cathut ni a patoun e ahri ni tuiumkung thawk a kei pouh teh kawt a kamyai.

<sup>8</sup> Amom kanî a tâco torei teh, Cathut ni kâan poung e kahli kanîtho lahoi a tho sak teh, Jonah e a lû hah a dâw pouh dawkvah, Jonah puenghoi a tawn teh due ngainae lung a tawn. Hatdawkvah, Jonah ni ka due e doeh ka hring e hlak kahawi telah a cairing. <sup>9</sup> Cathut ni hai nang ni tuiumkung kecu dawk na lungkhuek kawi namaw telah a pacei navah, Jonah ni ka due han totouh ka lungkhuek telah atipouh.

<sup>10</sup> Cathut ni hai nang ni patang khai e nahoe, a rounng nahanelah na khetyawt e nahoe. Rum touh dawk hoi kapâw ni teh rum touh dawk hoi tang kamyai e tuiumkung hah na pasai maw.

<sup>11</sup> Kai ni saringnaw ka dei hoe, avoi arang boehai ka panuek hoe hae tami 120,000 hlak kapap e Nineveh khopui e taminaw hah ka pasai mahoe na maw telah atipouh.



## MIKAH

<sup>1</sup> Judah siangpahrang Jotham, Ahaz hoi Hezekiah, a bawinae kum dawκ Morashtite tami Mikah koe ka tho e Cathut e Lawκ Samaria hoi Jerusalem kong hoi kâkuen e teh,

<sup>2</sup> Taminaw pueng thai awh haw, khocaramcanaw thai awh haw, Bawipa Jehovah kathounge bawkim hoi BAWIPA teh nangmouh na kapanuekkhaikung lah ao han. <sup>3</sup> BAWIPA teh a onae hmuen koehoi a tâco a kum vaiteh, karasangnaw hah a coungroe han.

<sup>4</sup> Hmai ni khoilai a daw teh atui lah a lawng e patetlah ravopui dawκ hoi kalawng e tui patetlah ka hmalah monnaw ni a kamyawt awh han, ayawnnaw hai a kâraue han.

<sup>5</sup> Hete hnonaw pueng heh Jakop lawκ eknae kecu dawκ hoi Isarel imthungnaw a yon awh dawκ doeh. Jakop lawκ eknae bangne, Samaria nahoehmaw. Judah hmuen karasangpoung e nâne ao. Jerusalem nahoehmaw.

<sup>6</sup> Hatdawkvah, Samaria khopui teh laikawκ dawκ e talai pâpawp e patetlah ka o sak han, Misur takha patetlah ka o sak han. Rapan talungnaw ayawn dawκ ka rabawκ han. Rapan adu hah kamnue sak han.

<sup>7</sup> Meikaphawκ bawκnae pueng reppasei lah ka hrueκ pouh han. A tawksaknae aphu pueng hmai ka sawi pouh han. Cathutkaphawκ pueng be ka raphoe pouh han. Takkâyonaē lahoi hnopai a tawn dawkvah, hote hnopainaw teh kâyawt e kut dawκ bout a pha han.

<sup>8</sup> Hote kong dawκ kai teh ka khui ka ka han. Caici lahoi ka cei ka o han. Kahrawnguinau patetlah ka hram teh, Kalauκ tava patetlah ka cai han.

<sup>9</sup> A hmâ teh dam thai hoeκ, Judah ram totouh a kâkai awh vaiteh, ka miphun a onae hmuen Jerusalem khopui longkha totouh a pha toe.

<sup>10</sup> Gath khopui dawκ thaisak awh hanh, khoeroe kap awh hanh. Bet Aphrah vah vaiphu dawκ kamlet awh.

<sup>11</sup> Oe Saphir taminaw caici lah cet awh, Zaanān taminaw khuika laihoi tâcawt awh hanh. Bethazel khopui dawκ na roe awh nahane kâ na poe awh mahoeκ.

<sup>12</sup> Maroth tami ni hai hnokahawi a doun teh a ring eiteκ Cathut koehoi e rucatnae lah Jerusalem longkha totouh a pha toe.

<sup>13</sup> Oe, Lakhish canu karang poung e marang dawκ rangleng hah thueng haw, nang ni Isarelnaw e yonnae hah na kamtu awh teh Zion canunaw hah na yon sak awh.

<sup>14</sup> Hatdawkvah, Gath ram Moreseth koe poehno na poe han. Akhazib khocanaw ni Isarel siangpahrangnaw hah a dумыen awh han.

<sup>15</sup> Oe, Mareshah kho kaawm e taminaw râw ka coe hane tami kai ni kakaw vaiteh, Isarel bawilennaē Adullam kho dawκ a pha han.

<sup>16</sup> Ngai kaawm e canu capanaw teh san lah na man awh toung dawκ, lû luengpalueng lah ngaw awh. Langta patetlah luengpalueng lah awm awh.

## 2

<sup>1</sup> Yonnae sak hanlah ikhun dawκ hoi kahawihoehe kho pouκ e patetlah khodai torei, ka sak e tami teh a yawthoe awh. <sup>2</sup> Ayânaw e imlaw lungradueκ awh teh, tahma lah ka lawm e tami hoi a im hai thoseκ, tongpa hoi a hnopai hai thoseκ, a lawp awh teh a paceκpahleκ awh.



<sup>3</sup> Hatdawkvah, BAWIPA ni a dei eiteh, na lahuen hlouthoehnae, lû na lounghoehnae rucatnae imthungkhu dawk ka pha sak han. Runae teh hot patet e tueng lah ao han.

<sup>4</sup> Hatnae tueng nah, bangnue nae lawk lah hno awh vaiteh, lungmath-oena lah a sak awh hane teh, maimouh teh rawk katang awh toe. Ka miphun ni a coe hane kawi ka kut dawk hoi bout a la toe. Maimae laikawknaw na lawp awh teh ayânaw hah a rei toe.

<sup>5</sup> Hatdawkvah, kamkhueng e Cathut e taminaw koe na coe awh hanelah ka bangnue hane tami awm mahoe.

<sup>6</sup> Profetnaw, profet lawk dei hanh awh. Ahnimanaw kayasak nahanlah profet lawk pâpho awh mahoe.

<sup>7</sup> BAWIPA e Muitha teh ngang lah ao maw. Hote hnônaw na sak a na maw, telah Isarelnaw a pacei navah kalan e hno ka sak e tami teh ka lawk lahoi apfu a hmu nahoehmaw.

<sup>8</sup> Ayan hoi doeh Ka taminaw ni na taran awh toe. Taran tuknae koehoi a ban awh teh runae taket awh laipalah, kacetnaw e avan angki hoi athung angki hah a lawp awh.

<sup>9</sup> Ka taminaw e a yunaw hah a phunepnae hmuen koehoi a hrek awh teh, ahnimouh koehoi Kaie bawilenna hah meng na lawp awh toe.

<sup>10</sup> Thaw nateh cet awh haw, hete ram heh nangmouh hanlah hnâroumnae hmuen nahoe. Hete hmuen teh a khin dawkvah rawknae kalenpoung hoi a rawk han.

<sup>11</sup> Ma ngai patetlah laithoe ka dei e tami ni, Misur tui hoi yamu kong ka dei han tetpawiteh, ahni teh hote lawk kadeikung la doeh ao han.

<sup>12</sup> Oe, Jakop Kai ni na miphun pueng thoseh, bout kamkhueng sak han. Takha dawk e tu patetlah thoseh, hram kanaw koe e tuhu patetlah ka pâkhueng han. Tami apap poung dawk a pawlawk a cai poung han.

<sup>13</sup> Karaphoekungnaw ni ahnimae hmalah a cei awh. Ahnimouh ni hai a raphoe awh teh longkha dawk hoi a cei awh. Ahnimae siangpahrang ni ahnimae hmalah a cei teh BAWIPA ni lam a pâtue.

### 3

<sup>1</sup> Kai ni hettelah ka dei, Jakop phun, Isarel miphun kacuenaw thai awh haw, nangmouh ni kalan lah lawkcengnae teh na panue hane kawi lah ao nahoehmaw. <sup>2</sup> Hnokahawi na maithoe awh teh, hno kahawihoehe na lungpataw awh teh, ayânaw e vuen hai thoseh, hru dawk kambawm e tak hai thoseh, na hlip awh. <sup>3</sup> Ka taminaw e a moi na ca awh teh, a vuen hah na ho awh. A hrunaw na khoe awh teh hlaam dawk thawng e moitueng, ukkang dawp pahlouk e moi patetlah a moi hoi a hru na raban awh nahlangva, <sup>4</sup> BAWIPA koe na hram na nakunghai, Kai ni ka thai mahoe. Yonnae na sak awh e patetlah hatnae tueng dawk ka minhmai ka hro han. <sup>5</sup> Ka taminaw na yon sak awh teh, kaboumcalah na ca awh navah, Roumnae ao telah na hram awh teh, na pacapanei e taminaw ni tuk hanelah na kâcai awh. <sup>6</sup> Profet lawk ka dei e naw, nangmouh ni vision na hmu thai awh hoe hanelah, tangmin e tueng a pha han. Hma lae tue pâpho thai hoe hanelah kho kahmawt han. Profetnaw koe Kani ka khum han. Khodai patenghai yah hmonae ni a ramuk han. <sup>7</sup> Hatnavah, profetnaw kaya sak awh han. Hma lae tue kapâphonaw ni a lungpout awh han. BAWIPA ni a pato hoe dawp, ahnimouh pueng amamae pahni a tabuem awh han telah BAWIPA ni a ti. <sup>8</sup> Kai teh Jakop kâtapoenae hoi Isarelnaw a yonnae kamnue sak thai nahan BAWIPA e Muitha lahoi bahu



panuena, thouthaina hoi ka kawi. <sup>9</sup> Kalan e lawkcengnae ka panuet teh, bangpueng dei e lawk ka raphoe teh,

<sup>10</sup> Tami thei lahoi Zion khopui hai thoseh, hno kahawihoe sak e lahoi Jerusalem khopui hai thoseh, ka sak e Jakop kho bawinaw, Isarel ukkungnaw thai awh haw.

<sup>11</sup> Lawkcengkungnaw ni aphu a hmu hane dueng doeh a ngai awh. Vaihmanaw teh aphu hmu hane la doeh a cangkhai awh. Profetnaw ni tangka hmu hane lahoi hmalah e tue a pâpho awh. Hateiteh, BAWIPA teh maimouh koe ao nahoehmaw, runae koe phat thai mahoehtelah ouk na dei awh toe.

<sup>12</sup> Hatdawkvah, Zion mon teh nangmouh han laikaw kanawk e patetlah ao han, Jerusalem khopui teh songnawng vaikong lah ao han, Bawknae im onae mon hai ratu patetlah ao han.

## 4

### *BAWIPA uknae Zion hnin*

<sup>1</sup> A hnukteng e tueng daw, BAWIPA im a onae mon teh, monsomnaw dawkvah ka tawm vaiteh ka caksak han. Tami pueng teh hote mon koe a kamkhueng awh han.

<sup>2</sup> Miphunnaw pueng ni hai tho awh haw, BAWIPA mon daw, Cathut e mon, Jakop Cathut e im daw luen a sei, lamthungnaw hah na patue, na cangkhai awh vaiteh, maimouh ni a khokhnuk hah dawn awh han toe telah a cei laihoi a dei awh han. A lawk teh Zion mon daw hoi thoseh, Cathut Lawk teh Jerusalem khopui koehoi thoseh, a tâco han.

<sup>3</sup> BAWIPA ni miphunnaw rahak vah lawkceng vaiteh, ahlanae koe kaawm ni teh athakaawme miphunnaw hah a yue han. Ahnimae tahloi pueng teh thunha lah thoseh, tahroenaw teh ramalongkawi lah thoseh, a dei pouh han. Ram hoi ram hai kâtuk awh mahoehtoe. Taran tuknae hai kamtu awh mahoehtoe.

<sup>4</sup> Tami pueng ni amae misurkung, amae thaibunglung rahim a tahung awh han. Taki kawi buet touh hai awm mahoehtoe telah ransahu BAWIPA ni a dei. <sup>5</sup> Miphun pueng ni amamae cathut teh ouk a bawk awh. Hatei, maimouh teh mamae BAWIPA Cathut e min hah pout laipalah kângue awh han.

### *Zion tânae*

<sup>6</sup> BAWIPA ni telah a dei, hatnae tueng nah, khokkhem e naw ka kaw han, pâlei lah kaawm e tami, rucatnae kâhmo sak e taminaw hah ka kamkhueng sak han. <sup>7</sup> Khokkhemnaw kacawi sak han, pâlei e taminaw hah thakasaipounge miphun lah ka coung sak han. BAWIPA ni Zion mon daw ahnimouh teh atu hoi kamtawng vaiteh pout laipalah a uk han. <sup>8</sup> Oe, imrasang, zion canu rapanim, nang ni na uk han, ahmaloe e kâ na tawn e bout na tawn han, a uknaeram teh Jerusalem canu kut daw bout a pha han. <sup>9</sup> Bangkongmaw atu puenghoi na ka. Nang tung siangpahrang buet touh hai awm hoehtahoehmaw. Pouknae kapoekung kahmakata na ou. Camo ka khe e napui patetlah reithai na khang toung bo aw.

<sup>10</sup> Oe, Zion canu, camo ka khe e napui patetlah reithaina na khang teh, ca khe hanlah tha kâueng haw. Khopui daw hoi nang teh na tâco vaiteh, kahrawng vah na o han. Babilon khopui totouh na cei han. Hote khopui daw na hlout han. Hote khopui daw BAWIPA ni taran kut daw hoi na ratang han.



<sup>11</sup> Atu miphunnaw ni, Zion khopui teh khin lawi naseh, ahni daw k maimae lungngainae kuep naseh telah nangmouh hoi kâtaran lah a kamkhueng awh vaiteh a dei awh han.

<sup>12</sup> Hatei, BAWIPA e pouknae hoi noenae panuek thai awh hoe h. Cabongnaw cangkatinnae daw k pâkhueng e patetlah hote taminaw a pâkhueng.

<sup>13</sup> Oe, Zion canu thaw la teh katin haw, na ki hah sum hoi thoseh, khoksamennaw hah rahum hoi thoseh, ka sak han. Nang ni miphunnaw pueng vitpatit lah na katin han. Ahnimae hnopai ka la pouh vaiteh talai pueng be ka uk e BAWIPA hah ka poe han.

## 5

<sup>1</sup> Ransahu canunaw, kamkhueng awh haw. Maimanaw teh king na kalup awh toe. Isarel lawkkungnaw e a hmaibei daw k bongpai hoi a hem awh toe.

### *Katho hane Messiah*

<sup>2</sup> Oe, Bethlehem Epharath khopui, Judah uknae thung nang teh kathoengcae kho lah na o eiteh, Isarel miphunnaw ka uk e BAWIPA teh, Kai hanlah nang koehoi a kamnue han. Talai pekkamtawngnae koehoi kamnue e BAWIPA doeh. <sup>3</sup> Hatdawkvah, camo ka khe hane ka khang e napui ni a khe hoehnahlan hai thoseh, Isarel miphun hoi kacawie hmaunawngghanaw teh a kâthung hoehroukrak thoseh, ahnimouh teh ka pahnawt han. <sup>4</sup> Ahni ni a kangdue vaiteh, BAWIPA tha o thasainae lahoi thoseh, BAWIPA Cathut e min taluenae lahoi thoseh, a tuhunaw hah a kaw k han. Ahnimouh hai a cak awh han. Bangkongtetpawiteh, Ahni ni talai apout ditouh a uk vaiteh, roumnae ao han. <sup>5</sup> Assiria tami ni kaimouh ram a tho teh, maimae innaw a coungroe navah, tukhoum sari touh hoi bawi taroe touh a tâco vaiteh, <sup>6</sup> Tahloi hoi Assiria ram hai thoseh, khopui longkha koevah Nimrod ram hai thoseh, koug raphoenae lahoi, maimouh ram lah a tho awh vaiteh, maimae ram thung vah ka coungroe e Assiria e kut daw k hoi maimanaw hah na hlout sak awh han. <sup>7</sup> Kacawie Jakop miphunnaw teh Jentel miphun moikapapnaw koe ao vaiteh, BAWIPA ni na poe e tadamtui patetlah thoseh, tami ring mahoe h. Taminaw e ngainae koe ka cet hoe h e kho ratui patetlah ao han. <sup>8</sup> Kacawie Jakop miphunnaw ni Jentelnaw koe ao awh vaiteh, ratu e sarang sendek patetlah thoseh, tuhunaw koe sendektanca patetlah ao han. Sendek a kâen toteh apinihai ngang thai laipalah a coungroe vaiteh a ca han. <sup>9</sup> Nangmae taran koelah kambawng e naw hah na tuk awh vaiteh, na tarannaw pueng teh asung han.

<sup>10</sup> BAWIPA a dei e teh, hote atueng daw kvah, nangmae umsali hai marangnaw hoi ranglengnaw koug ka raphoe han.

<sup>11</sup> Na ram daw k e rapanimnaw hoi khopuinaw hai ka raphoe han.

<sup>12</sup> Na ram daw k e camkathoumnaw ka raphoe vaiteh, khueyue hai awm mahoe h.

<sup>13</sup> Meikaphawknaw hah nangmae hmaitung koug ka raphoe han. Meikaphawknaw hah nangmouh ni bout na baw k awh mahoe h toe.

<sup>14</sup> Asherahkungnaw na hmaitung vah ka phaw k han. Na khopui haiyah be ka raphoe han.

<sup>15</sup> Ka law k ka ngai hoe h e Jentelnaw hah puenghoi lungkhueknae a yon phu ka pathung han.



## 6

<sup>1</sup> Cathut e lawk thai awh haw, thaw nateh monpuinaw hmalah toe awh haw, moncanaw ni na lawk thai a naseh. <sup>2</sup> Oe monnaw, ka cak pounge e talai dunaw, BAWIPA e lawk thai awh haw, BAWIPA ni a miphun hoi kâ toe hane ao. Isarel miphun hoi kâdei kâoun han. <sup>3</sup> Oe ka miphun, nang hah Kai ni bangtelamaw ouk na ti boi, bangtelamaw ouk na rektap boi, Kai koe dei haw. <sup>4</sup> Nang teh Izip ram hoi na tâcokhai toe. San na toung koehoi na ratang toe. Na hmalah Mosi, Aron hoi Miriam tinaw hai ka patoun toe. <sup>5</sup> Oe ka miphun, Shittim khopui hoi Gilgal khopui rahak vah, Moab siangpahrang Balak pouknae hoi thoseh, Beor capa Balaam ni bout a dei e lawk hai thoseh, pouk awh haw, hottelah na pouk pawiteh, BAWIPA e a lannae na thai panuek awh han. <sup>6</sup> Kai ni BAWIPA hmalah bangmaw ka sin vaiteh ka cei han, ka rasang pounge e BAWIPA hmalah ka tabo han maw. Hmaisawi thueng nahanlah kum touh e maitoca ka sin vaiteh a hmalah ka cei han maw. <sup>7</sup> Cathut ni tutan 1000, satui moikapap hah a lungkuep han na ou, ka payonnae kecu daw, ka camin hai thoseh, ka muitha yon kecu daw ka tak hai thoseh, ka thueng han na ou. <sup>8</sup> Oe, ka tami, lamthung kahawi na patue toe. Kalane hno saknae, lungpataw pahrennae, na BAWIPA e hmalah lung kârahnounnae lahoi, saknae hoeh laipalah, alouke thuengnae bangmaw Cathut ni a hei vai. <sup>9</sup> BAWIPA lawk ni khopui akaw, a lungkaang e tami ni A min a taki, yuenae hai thoseh, lawkcengkung teh apine tie hai thoseh, thai awh haw.

<sup>10</sup> Tami kahawihoe im daw, kamsoum hoeh lahoi tawn e hnopai hoi panuetho e tangthung ca ao rah ou.

<sup>11</sup> Kânging hoeh e yawcu hoi yawyennae yawngya ka tawn e khopui hah, kathounge khopui ka ti han na maw.

<sup>12</sup> Bawi tangrengnaw ni thama lahoi a lawp awh teh Kamathoenaw ni hai laithoe a dei awh. Ahnimae pahni daw kaawm e lai teh laithoe doeh.

<sup>13</sup> Hatdawkvah, namamouh e yon kecu daw nang na raphoe nahanelah, ka patawpoung lah ka rek han.

<sup>14</sup> Nang ni na ca ei na boum mahoe kahai lah na o han, na tawn ei na sin mahoe, na sin e hno hai kâtheinae koe ka poe han.

<sup>15</sup> Cati na kahei awh ei, cang na a awh hoeh, olive paw na katin awh ei, satui na kâhluk mahoe. Misur paw na katin nakunghai misurtui na net awh mahoe.

<sup>16</sup> Bangkongtetpawiteh, nang ni Omri siangpahrang ni a dei e naw hai thoseh, Ahab siangpahrang ni a sak e naw pueng hai thoseh na tarawi teh, ahnimae thapoene koe lah na cei toe. Hatdawkvah, na thei vaiteh, khocanaw teh panuilai lah ka sak vaiteh, nang teh ka taminaw e dudam e lah na o han.

## 7

<sup>1</sup> Kai teh ka yawthoe. Kompawi tue nah khi e thaibunglung paw hoi rakhun e misur paw kacawie patetlah ka o. Ca hane kawi misur paw awm hoeh. Thaibunglung paw aluepaw hah ka doun toe. <sup>2</sup> Cathutlae naw kahmakata awh toe. Tami kalan buet touh hai awm hoeh. Tami pueng teh tami thei hanlah a pawp awh toe. Buet touh hoi buet touh tangkam daw ka ka man awh. <sup>3</sup> Yonnae sak hanelah coungkacoe lah ao awh. Bawinaw ni poehno a hei awh. Lawkcengkungnaw ni tadawngnae a ca awh. Ayâ hlak kalen e tami ni teh hounlounnae a kamnue sak. Hottelah, a kâsanu nahanlah a sak awh. <sup>4</sup> Tami kahawipoung hai pâkhingkung patetlah doeh ao. Tami kalan poung hai pâkhing takha hlak a ru. Nang ramvengnaw



ni kâhruetcuete poenae hnin, nang rektapnae na poenae hnin lah a pha, hothateh, lungpuennae lah ao han. <sup>5</sup> Na imri yuem hanh. Lam ka patue e hah kâuep hanh. Na lungtabue dawk ka ip e na yu hah yuem hanh. Na kâko takhang hah cakuep lawih. <sup>6</sup> Bangkongtetpawiteh, ca ni a na pa e min a mathoe sak. Canu ni a manu thoseh, a langa ni a mani thoseh, a taran han. Ma e imthungkhunaw teh mae taran lah ao han. <sup>7</sup> Hatei, kai teh BAWIPA ka ngaihaw han. Ka rungngangnae Cathut hah ka kângue han. Cathut ni ka lawk a thai han. <sup>8</sup> Ka taran nang, kaie lathueng vah kâoupnae, lunghawinae tawn hanh. Ka rawm nakunghai bout kathâw han. A hmonae koe ka tahung nakunghai, Cathut teh kaie angnae lah ao han. <sup>9</sup> Kai teh BAWIPA koe ka yon dawkvah, na racing hoehnahlan totouh a lungkhueknae ka khang han. Kai hah angnae koe na rasa vaiteh, lannae hmuen na poe e hah ka hmu han.

<sup>10</sup> Na Cathut nâne ao telah na ka pacei e ka taran ni hote hno a hmu torei teh yeirai a po han. Ahni koe ka lung a roun han. Ahni teh lam daw e tangdong coungroe e patetlah ao han.

<sup>11</sup> Nange khopui rapan saknae tueng a pha han. Kâtawnnae apout han.

<sup>12</sup> Hatnae tueng daw, Assiria ram hoi Izip khopui hai thoseh, Izip ram hoi tuipui rahak hai thoseh, tuipui tenggam, monnaw tangkuem koehoi hai thoseh, nang koevah a tho awh han.

<sup>13</sup> Hottelah, ao hoehnahlan khoca ramca naw e yonnae kecu daw ram teh tami kingkadi lah ao han.

<sup>14</sup> BAWIPA e tami tie a huiko awm laipalah Karmel mon daw kaawm e râw tuhu hah tukhoumnae sonron hoi khoun la, ayan e patetlah Bashan ram hoi Gilead ram daw pawngpa sak haw.

<sup>15</sup> Izip ram hoi na tâconae hnin daw na hmu e patetlah kângairu hnouaw bout na patue han.

<sup>16</sup> Miphunnaw ni ka taminaw daw kaawm e bahu a hmu awh teh, lungpuen laihoi amamae pahni hah kut hoi a tabuem awh vaiteh a hnâtâdeng awh han.

<sup>17</sup> Tahrn patetlah vaiphu a palem teh, tangraet patetlah a khu daw hoi pâyaw laihoi a tâco awh han. Maimae BAWIPA Cathut hai thoseh, nang hai thoseh a taki awh han.

<sup>18</sup> Yon daw hoi hlout sak e, kacawie râw, taminaw e sakpayon e hah ka ngaithoum e, pahrennae hoi ka kawi ni teh lung pou ka khuek hoe e Cathut patetlah apimaw kaawm.

<sup>19</sup> BAWIPA ni maimanaw hah bout na pahren teh, maimae yonnae pueng hah rep a coungroe han. Maimae yonnae pueng kadung poung e tuipui daw koug a tâkhawng han. <sup>20</sup> Ayan hoi mintoenaw koe thoe na bo e patetlah, Jakop koe lawkkatanag, Abraham koe pahren lungmanae teh na poe han.



## NAHUM

<sup>1</sup> Elkosh tami Nahum ni, Nineveh kho hoi ka kâkuenlah a coe e Cathut lawk teh, <sup>2</sup> Cathut teh na yon telah tang kayuem ni teh ka rek e lah ao. Lungkhuek laihoi a rek. Bawipa ka taran e taminaw hah a rek teh, a tarannaw hah sut a tareng.

<sup>3</sup> Bawipa teh lung a pâcawn, a bahu hai ao. Hatei tamikayonnaw e yontha pouh hoeh. Bawipa teh bongparui hoi cakho kahlî dawk hai a cei, tâmainaw teh a khok rahim e vaiphu patetlah doeh ao awh.

<sup>4</sup> Tuipui hah a yue teh khik a hak sak. Sawkca pueng rem aphui sak, Bashan mon hoi karmel monnaw teh a kamyai awh, Lebanon pei hai a kamyai.

<sup>5</sup> Bawipa e hmalah monnaw a kâhuê, monruinaw tui lah a kamyawt teh, a hmalah talai dawk kawm e pueng koehoi talai tami pueng teh a kampuen awh.

<sup>6</sup> A lungkhueknae hmalah apimaw kangdout thai han. A lungkhueknae a hue apinine a ngang thai han. Hmai ka kang e patetlah a lungkhuek teh talungnaw a tip awh. <sup>7</sup> Bawipa teh ahawi, runae a tho nah rapanim lah ao. Ama ka kângue e naw hah a khetyawt.

<sup>8</sup> Tarannaw e kho hah tui hoi muen a khu teh, tarannaw teh hmonae ni a pâlei han. <sup>9</sup> BAWIPA hah taran hanelah, bangtelamaw na kâcai awh waw. Sapingkacailah a rawk sak han, bout tuk han kawi lah awm mahoehtoe.

<sup>10</sup> Ahnimanaw teh pâkhing patetlah a kâvoun teh, Yamuhrinaw a parui e patetlah ao awh teh, remke e songnawng patetlah hmai a kak awh han.

<sup>11</sup> Cathut koe pouknae kahawihoehe ka tawn e tami teh nangmouh dawkt hoi a tâco toe.

<sup>12</sup> Cathut ni a dei e teh, nangmouh teh na kuepcing awh, a misa na pap awh eiteh, rawknae dawkt na pha awh vaiteh koun na kahma awh han. Kai ni nang ouk na rektap eiteh bout na rektap mahoehtoe.

<sup>13</sup> Atu nang koe na phu sak e hno hai ka takhoe vaiteh na kateknae tangronnaw hai ka rathap han.

<sup>14</sup> Nang koe Cathut ni hno a sak hane teh, na miphunnaw hoi kâkuen hanh. Meikaphawk cathutnaw hah nange bawkim dawkt hoi koun ka raphoe han. Nang teh na hawihoeht dawktvah na tangkom hah na tai pouh han.

<sup>15</sup> Roumnae lunghawinae kamthang kahawi ka dei e a khoknaw teh monsom vah kenhaw. Oe Judahnaw, nange bawknae pawt hah sak awh haw. Lawkkamnae teh kuep sak awh haw. Tami kahawihoehtnaw teh koun raphoe lah ao toun dawktvah nangmouh bout na tapuet awh mahoehtoe.

## 2

<sup>1</sup> Ka raphoe hane tami teh na hmalah a pha toe. Nange rapanim hah ring leih. Na keng hah caksak nateh tha kâ lat leih. <sup>2</sup> Bangkongtetpawiteh, Cathut teh Isarelnaw e a lentoenae patetlah Jakop e a lentoenae hah ao sak toe. Ka raphoe e taminaw ni Jakop e catoun, a raphoe teh, ahnie a cakang hai koun a raphoe toe. <sup>3</sup> Athakaawme taminaw ni ka paling e saiphei a patuet awh teh ka paling e khohna a kho awh. Ranglengnaw hah tahloi hoi laklak a ang teh, tahroenaw teh thouk a kâroe awh. <sup>4</sup> Ranglengnaw



teh cahucahu kacailah lam dawk atunglah, akalah a yawng awh. Hmaito patetlah a paling teh sumpa patetlah a yawng awh. <sup>5</sup> Ransanaw a hroecoe teh ahnimouh ni ayânaw dei a tanawt awh. Khorapan koe karanglah a cei awh teh ramvengnae khu a sak awh. <sup>6</sup> Tui longkha a kamawng teh siangpahrang im a rawk toe. Nineveh tanglanaw e a khohna a rading pouh teh, <sup>7</sup> bakhu patetlah khui laihoi lungtabue a ratup awh. <sup>8</sup> Ayan hoiyah Nineveh khopui teh tuinawk patetlah doeh ao. Atuteh tui a lawng toe, kangdout awh, kangdout awh telah kahram nakunghai apinihai kamlang sin hoeh. <sup>9</sup> Ngun lawm awh. Sui hai lawm awh. Ngai kawi e hnopainaw suitabu thung e rasa teh baw thai hoeh.

<sup>10</sup> Khopui teh luengpalueng lah ao. Hnopa awh hoeh. Tami kingdi. Khoca pueng teh a lungpout awh, khokpakhu kâkhawng lahoi a keng a pataw awh teh, minhmai ka tamang lah ao awh.

<sup>11</sup> Sendek a onae hmuen, sendek a canae hmuen, sendek canaw ni apihai kâtaiket sak laipalah a onae hmuen teh na maw ao.

<sup>12</sup> Sendek ni a canaw hanelah a kei teh, a manunaw hanelah a lahuen a kara pouh teh, a kâkhu dawk a kei e moi hoi akawi sak.

<sup>13</sup> Ransahu BAWIPA ni a dei e teh, nange avanglah ka o han. Nange ranglengnaw hah hmai koug ka sawi han. Na sendeknaw hah tahloi hoi ka thei han. Na lawp e hnonaw talai dawk hoi ka takhoe han. Nange na patounenaw e lawk hah apinihai bout thai mahoe toe.

### 3

<sup>1</sup> Tami thi palawngnae kho dawk, thoebonae ka tâcawtkhai e laithoe hoi thamanae akawi. A man e naw hai tha awh hoeh. <sup>2</sup> Bongpai hoi hem e lawk, rangleng khok kamlei lawk, marang coukdouk lawk, rangleng a yawng e lawk hah ka thai. <sup>3</sup> Marangransa ni laklakkaang e tahloi, keitat tahroe hah a dâw teh, kadout e tami ro teh a kâmawk. Hote ronaw hah boeba touk thai hoeh. Ronaw hah a kamthui awh teh ro van a tâlaw awh. <sup>4</sup> Hetnaw pueng teh ka kâyawt e napui kecu doeh a tho. A meihawinae, ânnae, a kâyonaeh lahoi khocaramca pueng koug a dum toe. <sup>5</sup> Hatdawkvah, Cathut ni a dei e teh, nange avanglah kai ka o. Na angki hah na minhmai dawk ka ling vaiteh caici lah na onae hoi na kayanae hah uknaeram tangkuem ka patue han. <sup>6</sup> Ei hoi na dei vaiteh, na khin sak vaiteh, ayâ ni panuet e lah na ta han. <sup>7</sup> Na kahmawt e tami pueng ni, Nineveh kho a rawk toe, apinimouh a khui han vai ati awh teh, na yawng takhai awh han. Nang lungpahawi hanelah, nâmourh ka tawng vaiteh ka pâphawng han vai. <sup>8</sup> Nang teh tuipui rahak kaawm e Noamon kho hlak na talue maw. Hote khopui teh tui ni a kalup teh, tuipui teh ahnie rapan lah ao. <sup>9</sup> Ethiopia hoi Izip ram teh ahnie senehmaica lah ao teh a thaonae teh baw thai hoeh. Put hoi Lubim ni a kabawp.

<sup>10</sup> Hatei, hote kho teh tarannaw ni a tuk awh teh a man awh toe. Khocanaw teh lamtakinnaw koe a phep awh. Bari lah kaawm e khocanaw teh, cungpam lah a khoe awh teh, thakasai e khocanaw abuemlah sumrui hoi a pâkhi awh toe.

<sup>11</sup> Nang haiyah puen laihoi na kâhro han. Taran kut dawk hoi hlout hanelah kakakpounge hmuen na tawng han.

<sup>12</sup> Nange rapaninnaw teh a paw hmaloe kahmin e thaibunglungnaw hoi a kâvan han. Kahu et navah ka cat ngai e kâko thung hloum a bo pouh awh han.



<sup>13</sup> Na taminaw teh na hmalah napui patetlah ao vaiteh, kho longkhanaw teh tarannaw hanelah kakaw lah a kamawng vaiteh tho rawngkannae teh hmai a kak han.

<sup>14</sup> Taran ni na kaven yunglam, na hno hane tui sut do awh. Rapanimnaw hah caksak awh. Amhru talai hah katin awh. Amhru hmai raawng awh.

<sup>15</sup> Hote hmuen koe raw vah hmai na kak awh vaiteh, tahloi hoi pat na raboung awh han. Samtong patetlah pap awh yawkaw, awsi patetlah pap a yawkaw.

<sup>16</sup> Kalvan âsinaw hlah hno kayawtnaw kapap nakunghai, samtongnaw patetlah parang a kamleng awh han.

<sup>17</sup> Nangmae khobawinaw teh samtangnaw patetlah ransabawinaw teh tapangkhangdengnaw patetlah ao awh teh, a pâding toteh tahmout dawh a tabo awh. Kanî a tâco toteh nâmour phang a kamleng tie panuek hoe.

<sup>18</sup> Assiria siangpahrang nange tukhoumnaw teh muet a i awh teh, Saring kakhenkungnaw teh a yan awh. Ransanaw teh monsom vah kounk kâkapek awh teh apinihai pâkhueng awh hoe.

<sup>19</sup> Na khang e a hmâ a nung poung dawkvah dam thai mahoe. Nange kamthang ka thai e pueng ni kut na tabawng sin awh han. Bangkongtetpawiteh, nang ni na rektap hoe e tami apihai awm hoe.



## HABAKKUK

<sup>1</sup> Profet Habakkuk ni a coe e profet lawk teh, <sup>2</sup> Oe Cathut, na thai laipalah nâtotouh maw na kaw han vaw Na rungngang laipalah, kai ni hno kathout ka kâhmo laihoi nâtotouh maw na hmalah kahram han vaw <sup>3</sup> Bangkongmaw kamsoumhoehe naw hah na pâtue vaw. Bangkongmaw hno kathout naw na hmu sak vaw Bangkongmaw Lawpnae, thamanae na kâhmo sak vaw. Bangkongmaw tami reira khuet kâoun awh teh, khuet kâyue awh vaw. <sup>4</sup> Hatdawkvah kâlawk teh cungkeihoeh toe. Kamsoum lah lawkcengnae awh hoehe toe. Tami kahawihoehnaw ni tami kalannaw teh, kamsoum hoehe lah lawk a ceng awh.

<sup>5</sup> Lawkkam kacakhoehe taminaw khen nateh muenkângai awh haw. Bangkongtetpawiteh, nangmouh koe ayâ ni na patue haiyah na yuem thai awh hoehe e hah nangmae atueng dawka sak han. <sup>6</sup> Ahue karang poung e Khaldean taminaw hah ka hroecoe toe. Amamae ram lah kaawm hoehe e ramnaw hah la hanelah kho tangkuem a cei awh han. <sup>7</sup> Takithopoung e tami lah ao awh teh, ama ngai e patetlah lawk a ceng awh.

<sup>8</sup> Ahnie marang teh, kaisi hlak a rang. Karum lah kâva e Asuinaw hlak a huencawn awh. Marangransanaw ni ahlanae koehoi tho awh vaiteh, a coukdouk awh han. Mui kei hanlah karang poung e langta patetlah kamleng awh vaiteh a tho awh han. <sup>9</sup> Hote taminaw teh rektap hanelah a tho awh. Hmalah dueng ka khen e ransa lah ao awh teh, a man awh e taminaw teh sadi yit touh a pha sak awh han.

<sup>10</sup> Siangpahrangnaw a dudam awh, khobawinaw hai banglahai noutna awh hoehe. Khopui rapanimnaw pueng hai panuikhai awh vaiteh, vaiphu a pâpawp awh vaiteh a tuk awh han.

<sup>11</sup> Hathnukkuh ahnimanaw teh a pouknae a kâthung awh teh a sakpayon e phu teh a hmu awh han. Ahnima e thaonae teh amamae cathut doeh toe.

<sup>12</sup> Oe, BAWIPA ka Cathut, nang teh kaie kathounge Cathut lah na o teh, a yungyoe na kangning e nahoehmaw. Hottelah pawiteh, kaimanaw teh duenae koehoi kahlout awh han doeh. Oe BAWIPA, kaimanaw lawkceng nahanelah ahnimanaw hah na hmoun toe. Oe Ka lungsong, yue sak hanelah ahnimanaw hah hmuen na poe toe.

<sup>13</sup> Nang teh kahawihoehe hno hmu hanelah a mit teh a thoungpoung. Hno kathout a hmu navah, awh takhai thai hoehe. Hottelah pawiteh, lawkkam kacakhoehe naw hah bangkongmaw na khetyawt vaw. Tami kahawihoehe naw ni tami kalannaw a thei navah bangkongmaw duem na o takhai.

<sup>14</sup> Nang ni, taminaw hah tuipui dawka e tanganaw patetlah, ukkung ka tawn hoehe e ahrinaw patetlah bangkongmaw na coung sak.

<sup>15</sup> Taran ni hote taminaw pueng hah hradang hoi sawn vaiteh, tamlawk hoi heng vaiteh, tamlawk hoi a kalup teh a lung ouk ahawi awh.

<sup>16</sup> Ama e tamlawk hah a thueng teh, amae tamlawk hanlah hmuitui hah hmai ouk a sawi. Bangkongtetpawiteh, hote hno hoiyah hnopai ouk a hmu teh kaboumlah ouk a kâkawka nah.

<sup>17</sup> Hatdawkvah ahni ni tamlawk, tamlawk dawka e tanganaw hah a rabawka han na maw. Miphunnaw hah pasai laipalah pou a thei han na maw.



## 2

<sup>1</sup> Kai ni kama e ramvengim dawk ka kangdue teh kalupnae tapang koe ka o, kai heh bangtelamaw na dei pouh han tie thoseh, yon na pen pawiteh bangtelamaw ka pathung han tie thoseh, ka ring teh ka o navah, <sup>2</sup> BAWIPA ni ka touk e taminaw ni yawng laihoi a touk thai awh nahan, pâpho e lawk hah calung dawk thut haw. <sup>3</sup> Hote pâpho lawk teh atueng bawnae tue dei ngainae doeh. A laithout hoeh, tang ka tho hoeh nakunghai ngaihawi haw. A ro hoehnahlan a kuep mingming han. <sup>4</sup> Pouknae karasang e tami teh a lungthin lan hoeh, tamikalan teh a yuemnae lahoi a hring han. <sup>5</sup> Hothloilah misur, thouk ka net e tami teh lawkkam cak hoeh. Kâoup e tami teh amae hmuen koe awm thai laipalah, amae hounlounnae hah phuen patetlah akaw sak teh, duenae patetlah karoum thai hoeh e lungthin a tawn teh, khocaramca naw pueng hah a man teh, ama koe a kamkhueng sak. <sup>6</sup> Hote taminaw ni pacekpahleknae lahoi banglahai noutna awh mahoe. Ma e hnopai lah kaawm hoeh e ka lat e tami teh a yawthoe. Na totouh maw laiba hoi ao han vai, telah dei awh mahoe haw. <sup>7</sup> Nang na ka kei e taminaw thaw awh vaiteh, ka tarawk e taminaw teh kâhlaw awh mahoe haw. Nang teh ahnimouh ni lawp e tami lah na o awh han. <sup>8</sup> Nang ni tami moikapap na lawp dawkvah kacawie taminaw ni nang teh na lawp awh han. Tami theinae yon, khocanaw pueng pacekpahleknae yon kecu dawk nang na pathung han. <sup>9</sup> Arasangnae koe tabu ka tuk ni teh rucatnae dawk hoi a taminaw hlout nahanelah ka tawng e tami teh a yawthoe.

<sup>10</sup> Nang ni taminaw na thei e lahoi mae miphunnaw kaya sak hanelah kho na pouk dawkvah na hringnae na payon toe.

<sup>11</sup> Atangcalah tapang lah thung e talung buet touh ni a hram teh, pangkhek ni thingnaw thung hoi a pato.

<sup>12</sup> Tami thei e lahoi kho ka thawng e tami, hnokahawihoe e sak e laihoi khopui ka caksak e tami teh a yawthoe awh.

<sup>13</sup> Taminaw ni tha patung laihoi a tawk awh e pueng teh, ayawmyin lah na coung sak awh teh, a sak awh e pueng teh hmai hoi na sawi awh, hettelah katetkung teh ransahu BAWIPA ama doeh.

<sup>14</sup> Bangkongtetpawiteh, tuipui ni a onae hmuen koug e licung e patetlah talai taminaw ni BAWIPA bawilenna hah panuethainae hoi akawi awh han.

<sup>15</sup> Imri hah caici lah ao teh kaya sak nahanlah yamu ka pânei e tami teh a yawthoe.

<sup>16</sup> Hatdawkvah nang teh minhmai mathoenae hoi, kayanae hoi na boum han. Nama hai yamu na net vaiteh caici lah na o han. Cathut e aranglae kut dawk kaawm e manang teh nang koe phat vaiteh, panuetho e palonae ni na bawilenna teh a ramuk han.

<sup>17</sup> Lebanon mon pacekpahleknae yon, saringnaw hah taki ka tho e hnouh hoi raphoenae yon ni nang teh na ramuk han. Tami theinae yon hoi khocanaw pueng pacekpahleknae yon teh ao.

<sup>18</sup> Meikaphawk ni bang hawinae maw na poe teh kasakkung ni khuet a sak vaw. Meikaphawk hoi kacangghaikung kaphawk naw ni ahawinae bangmaw na poe teh, kasakkung ni a sak e a kâuepkhai teh a lawk ka a e meikaphawk hah khuet a sak vaw.

<sup>19</sup> Thingphek hah kâhlaw haw, talung hah thaw haw telah ka tet e tami teh a yawthoe. Hote hno ni na cangkhai han na maw Sui, ngun hoi pathoup eithe athung hringnae tawn hoeh. <sup>20</sup> Cathut teh bawkim kathoung dawk ao dawkvah, a hmalah taminaw pueng lungmawng lahoi awm awh haw.



## 3

<sup>1</sup> Profet Habakkuk e ratounnae, Shigionoth la. <sup>2</sup> Oe BAWIPA kai ni na lawk ka thai teh ka taki toe. Atu e kumnaw dawk na thaw tawk e a kamnue teh ka hmu toe. Na lungkhuek ei nakunghai, na lungmanae teh na pahnim hoeh. <sup>3</sup> Cathut teh Teiman kho hai thoseh, Tami Kathoung teh Paran koehoi thoseh, a tho. Bawilennae ni kalvan a ramuk teh, a bawilennae ni talai van akawi. <sup>4</sup> A meilam teh kanî patetlah ao. A kut dawk kaawm e a bahu teh a raeng lah a tâco. <sup>5</sup> A hmalah runae ni a cei teh, a hnuklah patawnae ni a kâbang. <sup>6</sup> A kangdue teh talaipui a bangnue. A khet nah miphunnaw a tâlueng awh. Ayan e monnaw ni a kâbawng awh teh, kacakpounge monruinaw a tip awh. Hatei, Bawipa teh a lamthung dawk poe a cei. <sup>7</sup> Kushan ram dawk e rimnaw ni roedengnae a kâhmo awh teh, Midian ram dawk e yaphninaw a kâhuet e hah ka hmu. <sup>8</sup> Oe BAWIPA, Nang ni rungngangnae rangleng na kâcui nahanelah, tuipuinaw koe na lungkhuek na maw. Tuipui hoi na kâtaran maw. <sup>9</sup> Nang ni catounnaw koe lawkkam na tâ e patetlah lilava coungkacoe na rasa sin toe, talai dawk tuinaw na phuek sak toe.

<sup>10</sup> Monnaw ni BAWIPA a hmu awh navah a kâhuet awh. Ka poum e tuinaw ni muen a ramuk. Tuipuinaw ni a hram awh teh a kut a dâw awh.

<sup>11</sup> Kanî hoi thapa ni amamae hmuen dawk ao awh. Ahnimae a angnae dawk pala ni a cei teh, a raeng dawk tahroe hai sumpa lah a palik.

<sup>12</sup> A lungkhuek laihoi ram pueng dawk a cei teh, a lungkhueknae ni miphunnaw hah koug a coungroe.

<sup>13</sup> Bawipa e a taminaw rungngangnae hanelah na tho teh, satui na awi e naw rungngang hanlah na tho. Tami kalan hoeh e im teh imthungkhu koehoi rep na kanawi pouh teh a carawng koe totouh na raphoe pouh.

<sup>14</sup> Ransabawinaw e a lû hah palanaw hoi pawkkayawng lah a ka pouh. Ahnimouh teh kaimouh palek sak hanelah tûilî kathout patetlah a tho awh. Mathoenaw kei hanelah a lunghawi awh.

<sup>15</sup> Bawipa nang ni marangnaw na kâcui teh athakaawme tuicapa lungui na cei.

<sup>16</sup> Na pâpho lawk ka thai navah ka lung a tâlueng, ka kam ka cakuep, ka hru a hmawn, ka takbuem a pâyaw. Bangkongtetpawiteh, runae hnin, kathetkung ni miphunnaw a tuknae tueng totouh ka o han rah.

<sup>17</sup> Thaibunglung kung ni pei hoeh, Misurkung paw hoeh, olivekung hai ngaihawi hane awm hoeh. law dawk hai apawhik paw hoeh, tu takha dawk tu kathup niteh, maito im dawk maito kaawm hoeh nakunghai.

<sup>18</sup> Cathut dawk ka lung ahawi teh na ka rungngangnae Cathut kâuep lahoi ka lung ahawi han.

<sup>19</sup> Bawipa Jehovah teh kaie ka thaonae doeh, ka khok teh sayuk khok patetlah a coung sak teh, ka rasang e hmuen na poe han.



## ZEPHANIAH

<sup>1</sup> Judah siangpahrang Amon e a capa Josiah ni a uk navah, Hezekiah, Amariah, Gedaliah tinaw e ca catoun lah kaawm e Kushi capa Zephaniah koe ka tho e Cathut e lawk teh,

<sup>2</sup> ram dawk kaawm e naw abuemlah he ka raphoe han telah Cathut ni a dei.

<sup>3</sup> Tami hoi saringnaw pueng ka raphoe han, kahlun e tava hoi tui dawk e tanga pueng hai thoseh, Tami kahawihoe hoi, hawihoe hoi pueng hai raphoe lah ao han. Talaivan kaawm e tami pueng hai raphoe lah ao han telah Cathut ni a ti.

<sup>4</sup> Judah tami, Jerusalem kho e taminaw hah kai ni ka tuk vaiteh kacawirae Baal hnukkâbang e hoi vaihmanaw pueng hai ka raphoe han.

<sup>5</sup> Kalvan e hnônaw hah lempu hoi ka bawk e naw, cathut hoi Molek cathut lawkkam laihoi ka bawk e naw hai thoseh,

<sup>6</sup> Cathut hnukkâbang laipalah hnuk kamlang e tami, Cathut tawng hoe hoi, ka pacei hoe hoi e taminaw pueng hai ka raphoe han.

<sup>7</sup> Bawipa Jehovah e hmalah sairasuep lah awm awh haw, BAWIPA e hnin teh a hnai toe. BAWIPA ni amae thuengnae hah rakueng vaiteh hote pawit tung kâen e pueng teh thounsak lah ao han.

<sup>8</sup> BAWIPA e thuengnae hnin navah siangpahrangnaw, hoi a miphunnaw hoi ka talue lah kamthounpaw pueng hah a rek han.

<sup>9</sup> Ayâ e im longkha ka tapuet ni teh ayâ ka hnephnap e, ayâ dymyen laihoi hmu e hnopai hoi a bawipa e im kakawi sak e tami pueng hai hote hnin navah lawk ka ceng han.

<sup>10</sup> BAWIPA ni a dei e teh, hote hnin navah tanga longkha koe vah hramnae lawk thoseh, apâhni e khopui daw k khuikanae lawk thoseh, monrui daw k pueng hoi raphoe nae lawk thoseh ka thai.

<sup>11</sup> Maktesh taminaw, khuikap awh haw. Hnopa i kayawtnaw pueng teh awm hoe hoi toe. Tangka kasinnaw pueng teh koung a due awh toe.

<sup>12</sup> Hatnae tueng nah, kai ni hmaiim ka sin vaiteh Jerusalem hah lawk ka ceng han. BAWIPA ni hawinae sak hoe hoi, yon hai na pen hoe hoi telah a pouk awh teh, amae thoe hoi hawi a sak awh e patetlah lawk ka ceng han.

<sup>13</sup> Ahnima e hno teh ayâ ni a lawp vaiteh, a ona e hmu en daw k tami kingdi han. Im a sak awh han, hatei awm awh nah mahoe hoi. Misur a ung awh han, hatei misur net awh mahoe hoi.

<sup>14</sup> BAWIPA e hnin pui teh a hnai toe. A hnai toe. Karang lah ka tho han BAWIPA e hnin kamthang teh hnâ daw kvah akha. hote hnin navah, athakaawme tami ni a hram han.

<sup>15</sup> Hote hnin teh lungkhueknae hnin, lungpuen tâsuenae kâhmonae hnin, rawkphainae hnin, angnae a kahma teh hmonae hnin, khopâui teh tâmai muen a tabonae hnin,

<sup>16</sup> Kacake khopui hoi karasang e imrasangnaw koe lah mongka kâhruetcuetnae ueng teh hramnae hnin lah ao han.

<sup>17</sup> Ahnimouh ni BAWIPA koe a yon awh daw kvah, kai ni ahnimouh ka rektap vaiteh tami a mit ka dawn e patetlah a cei awh han. Ahnima e a thi teh vaiphu patetlah rabaw awh vaiteh a moi hai ei patetlah a pouk awh han.

<sup>18</sup> BAWIPA e lungkhueknae hnin navah, ahnima e sui ngun ni hai rungngang thai awh mahoe hoi. A lungkhueknae hmai ni ram abuemlah a



kak han. Khocanaw puenghai karanglah lawkceng vaiteh kOUNG a pâmit han.

## 2

<sup>1</sup> Yeirai ka panuek hoeh e miphunnaw namahoima kâpouk awh haw.

<sup>2</sup> A dei e patetlah na ka pouk awh hoeh, nangmae atueng teh vaikong patetlah a palek hoehnahlan, BAWIPA lungkhueknae ni nangmae lathueng a pha hoehnahlan namahoima kâpouk awh haw.

<sup>3</sup> A lung kârahnoum niteh, lawk ka tarawi e khocanaw pueng Cathut teh tawng awh haw. Lannae hoi kârahnoumnae hai tawng awh haw. BAWIPA lungkhueknae hnin nah kâhro nahan na hmawt awh mahoe.

<sup>4</sup> Gaza kho tâco takhai vaiteh, Ashkelon teh kingdi han. Kanîthun vah Ashdodnaw pâlei vaiteh, Ekron kho hai raphoe lah ao han.

<sup>5</sup> Talî rai lah kaawm e Kereth miphunnaw, nangmouh teh Cathut lawk hah na taran awh. Filistin onae Kanaan ram, apihai o hoeh nahanlah ka raphoe han.

<sup>6</sup> Talîpui rai teh, tu kakhounnaw ni kâkawnae hmuen lah ao han.

<sup>7</sup> Talîpui rai e hmuen teh ka cawi e Judahnaw ni ao nah vaiteh kâkawnae lah ao han. Tangmin lah Ashkelon kho dawk a roe awh han. Ahnimae BAWIPA Cathut teh ahnimouh koe tho vaiteh, hawinae bout a hmu awh han.

<sup>8</sup> Moabnaw hoi Amonnaw ni ka miphun a dudam awh teh a kâoup sin e lawk ka thai toe.

<sup>9</sup> Hatdawkvah Isarel Cathut ransahu BAWIPA ni a dei e teh Moab ram hoi Amon ram teh Sodom hoi Komorah kho patetlah pâkhing ka pâw e hmuen, palawi thawng nahanelah tai e talai, a yungyoe ka rawk e ram lah ao teh, kacawie ka tami, ka miphunnaw hah a tuk awh vaiteh a man awh han.

<sup>10</sup> Ahnimanaw teh a lung kalen e tami lah ao awh teh kâoup laihoi dudam awh vaiteh, ransahu BAWIPA e taminaw koe hottelah a sak awh han.

<sup>11</sup> Yungyoe Cathut teh ahnimouh hanelah taki kawi lah ao teh talai Cathutnaw hah cungkeihoehe lah a coung sak han. Alouke miphunnaw ni amamae hmuen koehoi lengkaleng a bawk awh han.

<sup>12</sup> Oe Kush khocanaw nangmouh hai ka tahloi hoi na due awh han.

<sup>13</sup> Atunglae naw hai ka tuk vaiteh Assiria ram hai ka raphoe han. Nineveh khopui hah tami kingkadi e lah ka hruek vaiteh a yawn patetlah ka ke sak han.

<sup>14</sup> Khopui lungui vah tuhunaw hoi Jentelnaw pueng teh a i awh han. Bukbu hoi basairek ni takhang hoi hlalangaw koehoi a cai awh han. Thonaw koe tami kingdi vaiteh sidarkung teh a emkâlo han.

<sup>15</sup> Hote khopui ni kai ka o. Kai hloilah api awm hoeh, tâluengnae awm hoeh, a lung kahawi e khopui lah ka o. Atuteh raphoe e lah, sarang onae kho lah ao toe. Ka cet e pueng ni hai dudam lawk dei awh vaiteh a kut a palik sin awh han.

## 3

<sup>1</sup> Palet lah kho ka sak niteh, kamhnawng laihoi tami pacekpahleknae kho teh a yawthoe. <sup>2</sup> Cathut e lawk ngâi hoeh, toun e hai ngai hoeh, BAWIPA kângue hoeh, mae Cathut koe kâhnai hoeh. <sup>3</sup> Khobawinaw teh kho lungui vah ka huk e sendek patetlah ao awh. lawkcengkungnaw ni a mon totouh banghai pahma awh hoeh. Tangmin vah yungyoe ka



kâva e a sui lah ao awh. <sup>4</sup> Profetnaw teh a lai kathout e, lawkkam ka cak hoeh e lah ao awh. Vaihmanaw ni kathounge hmuen a khin sak awh teh a lawk hai noutna awh hoeh. <sup>5</sup> Hateiteh, BAWIPA ni kho lungui vah hawinae a sak. Kamsoum hoeh hno sak boihoeh. Amom tangkuem lannae a kamnue sak. Hateiteh, tami kahawihoehnaw teh kayanae tawn awh hoeh. <sup>6</sup> Miphunnaw puenghoi ramvengimnaw puenghai ka raphoe pouh toe. Lam dawkvah apihai a cei hoeh nahanlah tami kingkadi sak toe. Tami buet touh hai o hoeh nahanlah khopui hai ka raphoe toe. <sup>7</sup> Hatnavah, kai ni hottelah totouh ka toun hnukkhu nang ni ma onae pahnawt laipalah, kai heh na taki vaiteh ka lamthung a dawn han doeh ka ti eiteh, ahnimanaw ni kahawihoehe hno hoehe a sak awh. <sup>8</sup> Hateiteh BAWIPA ni a dei e teh, man vaiteh lawp hanelah kai ka thaw hoehnahlan totouh na ring awh ei. Ukaeram pueng kamkhueng sak vaiteh kaie lungkhueknae, ka lungphuennae hah koug ka awi han telah pouknae ka tawn. Ka lungkhueknae hmai ni talai pueng a kak han. <sup>9</sup> Miphunnaw pueng ni atangcalah, BAWIPA e thaw cungtalah a tawk awh nahan, a min kaw awh nahanelah ahnimanaw koe kathounge lawk bout ka poe han.

<sup>10</sup> Kush ram palang namranlah, hmuen pueng koe kampek e ka miphun canunaw, kai koe kâhet e taminaw ni kai hanelah pasoumhno a sin awh han.

<sup>11</sup> Hatnae tueng dawkvah nang ni kai koe na payon e naw dawk yeirai na po mahoe. Bangkongtetpawiteh kâoup e taminaw hoi tami ka dudam e naw teh nangmouh thung hoi koug ka pâlei han. Nang hai kaie mon kathoung dawk bout na kâoup awh mahoe toe.

<sup>12</sup> Ka roedeng ni teh kârahnoum e miphunnaw, nangmouh koe ka cawi sak han. Ahnimanaw teh Bawipa e min a kâuep awh han.

<sup>13</sup> Kacawie Isarelnaw teh, kamsoumhoehe sak a mahoe. Laithoe hai dei awh mahoe. Ahnimae pahni dawk hoi dumyennae lawk tâcawt mahoe. A canei a i onae koe apinihai takinae poe mahoe toe.

<sup>14</sup> Oe Zion canu la sak haw.

Isarel miphun hramki haw.

Jerusalem canu na lungthin abuemlahoi na lunghawi haw.

<sup>15</sup> BAWIPA ni nange tarannaw a takhoe teh na yonnae a dam sak toe. Isarelnaw e siangpahrang Jehovah teh nangmouh koe ao. Nang teh runae bout na kâhmo mahoe toe.

<sup>16</sup> Hat toteh, Jerusalem na lungpuen hanh, Zion mon na kut thayoun sak hanh ati awh han.

<sup>17</sup> Nange Jehovah Cathut teh nang koe ao teh, athakaawme ni Cathut ni nang teh na rungngang han. Nang koe a lungkuiep vaiteh a lunghawi han. A lungpatawnae dawk awm vaiteh, lunghawinae la hoi nang koe a lunghawi han.

<sup>18</sup> Lungmathoenae hoi khuikanae pawt teh nang koehoi na takhoe pouh vaiteh, reithai kâhmo e naw hah ka kamkhueng sak han.

<sup>19</sup> Hattoteh nang ka rektap e naw pueng hah kai ni lawk ka ceng han. Kapatawnaw hah ka dam sak han. Pâlei e taminaw ka kamkhueng sak han. Yeiraiponae ram pueng dawk oupnae hoi minhawinae ka poe han.

<sup>20</sup> Hatnae tueng nah, kai ni nangmanaw bout na bankhai awh vaiteh na kamkhueng sak awh han. Man lah kaawm e naw hah na hmalah bout ka pâkhueng toteh, talai taminaw pueng koe oupnae minhawinae na poe awh han telah Cathut ni a ti.



## HAGGAI

<sup>1</sup> Darius siangpahrang ni a uknae a kum pahni, ataruknae thapa apasuek hnin vah, profet Haggai hno lahoi Judah kaukkung Shealtiel capa Zerubbabel hoi vaihma kacue Jehozadak e capa Joshua koe ka tho e BAWIPA lawk teh, <sup>2</sup> Ransahu BAWIPA Cathut ni a dei e teh, hete taminaw ni BAWIPA e im sak hanelah atueng phat hoeh rah ati awh. <sup>3</sup> Profet Haggai koehoi BAWIPA e lawk ka tho e teh, <sup>4</sup> Oe! nangmae taminaw, namamouh na o nahane im teh lempu coung hni touh e na tawn awh nahlangva vah, Kaie im teh ka rawkphai lahoi maw ao han. <sup>5</sup> Ransahu BAWIPA ni a dei e lawk teh, na tawksak awh e hno, kahawicalah pouk awh haw.

<sup>6</sup> Nangmouh ni cati moi na kahei awh eiteh, a paw yitca dueng na pâkhueng awh. Na ca a eiteh na von paha awh hoeh. Na nei a eiteh na boum a hoeh. Khohna na kho a eiteh na bet a hoeh. Thaw tawknæ phu na hmu a eiteh ka yuk e yawngya dawk na pâtung awh. <sup>7</sup> Ransahu BAWIPA BAWIPA ni a dei e teh, na sak e thaw kahawicalah pouk awh haw.

<sup>8</sup> Mon luen nateh thing hrawm awh haw. Kaie im sak awh haw. Kai hai ka lung akuep vaiteh ka bawilennæ ka kamnue sak han telah BAWIPA ni a ti.

<sup>9</sup> Nangmouh ni moi ka tawn han telah na ngaihaw i a eiteh hno yitca dueng na hmu awh, im na thokhai awh navah Kai ni phe i ka hmu. Bangkongmaw telah ransahu BAWIPA ni na pacei awh. Kaie im teh karawk lah paroup ao. Bangkongtetpawiteh, namamouh im lengkaleng na yawng a dawk doeh.

<sup>10</sup> Hatdawkvah nangmouh koe kho a kha vaiteh, tadamtui bawt mahoe. Talai ni hai a paw paw sak mahoe. <sup>11</sup> Talai van hai thoseh, monsom hai thoseh, cakui cakang, misur, satui daw k hai thoseh, talai daw k hoi ka tâcawt e pueng koehai thoseh, tami, moithang, saringnaw pueng koehai thoseh, tawksak e pueng daw k hai thoseh takang ka tho sak han a ti.

<sup>12</sup> Hat toteh, Shealtiel e capa Zerubbabel hoi vaihma kacue Jehozadak e capa Joshua koehoi kamtawng teh kacawie naw pueng ni, amamae BAWIPA lawk hai thoseh, BAWIPA ni a patoun e profet Haggai e lawk hai thoseh, a ngai awh teh, BAWIPA a taki awh. <sup>13</sup> Hat toteh, BAWIPA ni patoune Haggai ni, kai teh nangmouh koe ka o telah BAWIPA ni a dei pouh e hah taminaw koe patuen a dei pouh. <sup>14</sup> BAWIPA niyah, Judah kaukkung Shealtiel capa Zerubbabel hoi vaihma kacue Jehozadak e capa Joshua koehoi kamtawng teh, kacawie naw pueng hah a hroecoe teh, ransabawi Jehovah hane im sak hanelah, <sup>15</sup> Darius siangpahrang a bawinae kum pahni, ataruknae thapa, hnin 24 hnin vah a tho awh teh, amamae Cathut, ransahu BAWIPA e im daw k thaw a taw k awh.

## 2

<sup>1</sup> Asari e thapa, hnin 21 touh navah profet Haggai koehoi ka tho e BAWIPA e lawk teh, <sup>2</sup> Judah bawi kalen lah kaawm e Shealtiel e a capa Zerubbabel hoi vaihma kacue Jehozadak e capa Joshua hoi a kacawie naw koe patuen na dei pouh hane teh, <sup>3</sup> Hete im heh ayan e a lentoenæ hoi akawi e hah ouk kahmawt e nangmouh thung daw k apine na kaawm awh. Atu bangne na hmu awh. Bangnue pawiteh nangmae hmalah banglahai kaawm hoeh e patetlah nahoe hmaw ao vaw. <sup>4</sup> Hateiteh Oe! Zerubbabel na tha kâlat haw, telah BAWIPA ni ati. Oe vaihma kacue Jehozadak capa Joshua na tha kâlat haw, Oe! khocaramca naw na tha kâlat awh telah BAWIPA ni a ti. <sup>5</sup> Izip ram hoi na tâco awh navah, lawk ka kam e patetlah



kai teh nangmouh koe ka o. Ka Muitha teh nangmouh koe ao. Puen awh hanh telah ransahu BAWIPA ni a ti. <sup>6</sup> Ransahu BAWIPA Cathut ni a dei e teh, a tue nâsittouh a ro hoehnahlan kalvan, talai, tuipui hoi monnaw hah kai ni bout kahuet han rah. <sup>7</sup> Miphun puenghai kahuet han rah. Miphun pueng ni a ngai kawi e hno phat vaiteh, hete im dawklentoenae hoi kakawi sak han telah BAWIPA ni a ti. <sup>8</sup> Sui hoi Ngun teh kaie doeh telah ransahu BAWIPA ni a ti. <sup>9</sup> Atu e sak e im teh hmaloe e im hlak hoe a lentoe han telah ransahu BAWIPA ni ati. Hete hmuen koehai lungmawngnae ka poe han telah ransahu BAWIPA ni a ti.

<sup>10</sup> Darius siangpahrang uknae a kum pahni thapa yung takonae, hnin 24 navah BAWIPA e lawk profet Haggai koehoi a dei eiteh, <sup>11</sup> Nang ni vaihmanaw koe na pacei hane teh, <sup>12</sup> Tami ni kathounge moi hah amae angki hoi a tangoung laihoi a sin vaiteh vaiyei, ankahe, misur, satui naw, cakawi buetbuet touh hoi hote a tangoung e hoi kânep pawiteh hote rawca teh kathoung han na maw telah a pacei navah vaihmanaw ni hote rawca teh thoung hoeh telah ati awh.

<sup>13</sup> Haggai ni kathounghoehe ro kâbet pawiteh a khin maw telah a pacei navah, vaihmanaw ni, a khin telah a dei awh.

<sup>14</sup> Haggai nihai, hete miphun, hete khocanaw ka hmalah hottelah doeh ao awh. A tawkl e puenghai hottelah doeh ao. Kai koe a thueng awh e hno hai a khin telah BAWIPA ni a ti.

<sup>15</sup> Bawipa ni Bawkim dawkl talung buet touh e van buet touh pacoung hoehnahlan, atuhoi kamtawng nateh ahmaloe e hno hah bout pouk awh haw. <sup>16</sup> Hatnae tueng navah cakang hmuen 20 touh na hmunaedawkvah, hmuen hra touh duengdoeh na hmu awh. Misur tui hlaam 50 touh a pha han na ti awh e hah misur paw kasunae koe na pha awh navah 20 touh dueng na hmu awh. <sup>17</sup> Na tawksak e pueng teh kahlî ni a tânan vaiteh atui lah dui ka lawng sak toe. Hat nakunghai, kai koe lah na kamlang awh hoeh telah BAWIPA ni a ti. <sup>18</sup> Bawipa e Bawkim khom ungnae atako e thapa, hnin 24, sahnin totouh hoi pouk awh haw. <sup>19</sup> Capai dawkl cakang ao maw, awm hoeh, misurkung, thaibunglung kung, talekung, olivekungnaw ni paw awh hoeh rah. Hatei, atuhoi teh kai ni nangmanaw yawhawi na poe awh han telah a ti.

### *Zerubbabel koe lawkkam*

<sup>20</sup> Hote thapa 24 hnin vah Haggai koe BAWIPA e lawk bout a tho teh, <sup>21</sup> Judah kho kaukung Zerubbabel koe bout na dei pouh hane lawk teh, Kalvan hoi talai kai ni ka kahuet han. <sup>22</sup> Uknaeram bawitungkhungnaw ka pakhuppathan vaiteh, uknae bahu pueng ka raphoe han. Rangleng hoi rangleng kâcuinaw puenghai ka pakhuppathan han. Marang dawkl kâcuie ransanaw hai amamouh hoi amamouh naw tahloi hoi a kâbouk awh vaiteh a due awh han. <sup>23</sup> Kalvan e ransahu BAWIPA ni a dei e teh Shealtiel capa, kaie san Zerubbabel, hatnavah nang teh kuthrawt patetlah na ta han telah Bawipa ni ati. Nang teh na rawi toe telah ransahu BAWIPA ni a ti.



## ZEKHARIAH

### *Cathut ni Zekhariah a patoun*

<sup>1</sup> Darius siangpahrang uknae, a kum pahni, thapa yung taroe nah, Iddo e capa Berekhiah capa profet Zekhariah koe BAWIPA ni a dei pouh e lawk teh, <sup>2</sup> BAWIPA teh nangmae na mintoenaw koe a lungkhuek pounng toe. <sup>3</sup> Hateiteh, ransahu BAWIPA ni ahnimouh hanlah kâ a poe e teh, Kai koevah bout ban awh leih, Kai hai nangmouh koe ka ban han telah a ti. <sup>4</sup> Ayan e profetnaw ni nangmae kahawihoehe lam, kahawihoehe nuencangnaw atuvah roun awh, telah ransahu BAWIPA ni a dei e pathang nakunghai, na thai awh hoehe, kaie lawk hai na ngai awh hoehe. Na mintoenaw patetlah aww awh hanh, sak awh hanh telah BAWIPA ni a ti. <sup>5</sup> Mintoe naw na maw ao awh. Profetnaw yungyoe a hring a maw. <sup>6</sup> Ka san profetnaw koe lawk ka thui e kaie kâlawnaw teh, nangmae mintoenaw ni hai a kei awh nahoehmaw. Ahnimouh ni mae tawksak e patetlah ransahu BAWIPA ni lawk na ceng han telah a pouk awh e patetlah, lawk na ceng toe telah a dei awh nahoehmaw telah a ti.

<sup>7</sup> Darius siangpahrang a bawinae kum pahni, Adar thapa yung hlaibun nah, Shebat thapa hnin 24 nah, Iddo capa, Berekhiah capa Zekhariah koe ka tho e BAWIPA e lawk teh,

<sup>8</sup> Karum vah ka hmu e vision teh marang paling kâcui e tami buet touh a kamnue teh ayawn kaawm e tuihan hmanng um vah a kangdue. Ahnie a hnukkhu lah ka paling e marang, opaou e marang hoi marang pangaw ao. <sup>9</sup> Kai niyah, Oe BAWIPA hotnaw hah apinaw maw telah ka pacei teh, kai hoi kâpan e kalvantami ni hotnaw teh apine tie na patue vai ati teh, <sup>10</sup> Tuihan hmanng um kangdout e tami ni ahnimanaw teh talai van daw kâheh hanlah BAWIPA ni a patoun e naw doeh telah a ti. <sup>11</sup> Ahnimanaw nihaiyah kaimanaw teh talai van pueng kounng katin awh toe. Talai pueng lungmawngcalah ao telah tuihan hmanng um ka kangdout e BAWIPA e kalvantami koe atipouh.

<sup>12</sup> Hathnukkhu, BAWIPA e kalvantami ni Oe, ransahu BAWIPA nang ni a kum 70 totouh na lungkhuek sin e Jerusalem kho hoi Judahnaw hah na tueng totouh maw pahren laipalah na o han telah a pacei navah, <sup>13</sup> Kai hoi ka pato roi e kalvantami hanelah BAWIPA ni lawk kahawi, lungpahawinae lawk bout a dei pouh. <sup>14</sup> Kai hoi ka pato roi e kalvantami nihaiyah ransahu BAWIPA e kâlawnaw patuen a dei vaiteh a hramkhai hane teh, kai teh Jerusalem hoi Zion mon hanelah puenghoi lungpatawnae ka tawn. <sup>15</sup> Lung awpawp kamawng lah kaawm e alouke miphunnaw koe ka lungphuen pounng. Bangkongtetpawiteh, Jerusalem hah ka lung youn touh ka khuek sin navah, ahnimouh ni a ven awh teh a rektap awh. <sup>16</sup> Hatdawkvah, BAWIPA ni a dei e teh, lungmanae lungthin hoi Jerusalem kho vah bout ka tho toe. Hete khopui daw kamae im ka sak han. Khopui hmuen hai ka bangnue han telah ransahu BAWIPA ni a ti. <sup>17</sup> Hahoi, ransahu BAWIPA ni kâ a poe e bout hramkhai hane teh, kaie khopui teh avoivang lah akaw vaiteh ahawi han. BAWIPA ni hai Zion khocanaw a lung bout a pahawi han. Jerusalem khocanaw teh bout ka rawi vaiteh ka khetyawt han a ti.

<sup>18</sup> Hathnukkhu, ka khet navah ki pali touh ka hmu. <sup>19</sup> Kai hoi ka pan roi e kalvantami hanelah, hote a kinaw teh bang ti ngainae maw telah ka pacei navah, hote a kinaw teh Judah ram, Isarel ram, Jerusalem khopuinaw



pheng kampek sak e ki doeh telah a dei. <sup>20</sup> BAWIPA ni hai lettama pali touh na patue. <sup>21</sup> Kai ni hetnaw heh bang sak hanelah maw a tho ti ka pacei navah, a kinaw hah apinihai a khet ngam hoeh nahanelah, Judahnaw kampek sak e a kinaw doeh. Hete lettamanaw ni Judah ram kampek sak hanelah ka tuk e a kinaw hah pâlei vaiteh, Jentelnaw e a kinaw hah ka dudam e naw doeh telah a ti.

## 2

<sup>1</sup> Bout kamoung nah, bangnuenae rui ka sin e tami buet touh ka hmu.

<sup>2</sup> Na lah maw na cei han telah ka pacei navah Jerusalem khopui abueg akaw e bangnue hanlah ka cei telah a ti.

<sup>3</sup> Kai hoi ka pato roi e kalvantami a cei teh, alouke kalvantami ni na dawn teh, nang ni na yawng vaiteh thoundoun koe na dei pouh hane teh,

<sup>4</sup> Jerusalem khocanaw, tami hoi saringnaw apap poung dawkvah khonaw dawh na o awh han. <sup>5</sup> BAWIPA ni a dei e teh, Kai teh khopui kalupnae hmai rapan lah ka o. Khopui lungui haiyah kai teh khopui e bawilennae lah ka o han.

<sup>6</sup> Oe nangmouh, Oe nangmouh, atunglah hoi yawng awh haw, telah BAWIPA ni ati. Kalvan rahim a takin pali touh koe na ka kahei sak awh toe telah BAWIPA ni a ti. <sup>7</sup> Babilon canu koe kaawm e Zion canunaw puenghoi yawng awh leih. <sup>8</sup> ransahu BAWIPA ni a dei e teh, nangmouh na ka raphoe e miphunnaw aonae koe a bawilennae a kamnue hnukkhu kai na patoun. Nangmouh na ka tek e teh ka mitmu ka tek e doeh. <sup>9</sup> Ahnimouh ka tuk vaiteh a sannaw ka thei pouh han. ransahu BAWIPA ni kai na patoun e heh nangmouh ni na panue awh han.

<sup>10</sup> Oe, Zion canu lungnaw hoi la sak haw, kai nangmouh koe ka tho vaiteh nangmouh lungui ka o han telah BAWIPA ni a ti. <sup>11</sup> Hatnae tueng dawh, taminaw ni BAWIPA koelah a bawh awh vaiteh, Ka tami lah ao awh han. Nang e na lungui ka o han. ransahu BAWIPA ni kai nangmouh koe na patoun tie hah na panue awh han. <sup>12</sup> BAWIPA ni kho kathoung dawh Judah ram hah ama hanlah raw lah a coe vaiteh Jerusalem hah bout a rawi han. <sup>13</sup> Oe, taminaw pueng BAWIPA hmalah sairasuepcalah awm awh, kathoung onae hmuen dawh a thaw toe.

## 3

### *Vaihma kacue Joshua*

<sup>1</sup> Vaihma kacue Joshua ni BAWIPA e kalvantami hmalah a kangdue e thoseh, Setan ni a taran teh ahnie aranglah a kangdue e thoseh, kai hah na patue. <sup>2</sup> BAWIPA e kalvantami ni haiyah Oe Setan, BAWIPA ni nang teh na yue lawi seh, Jerusalem khopui ka rawi tangcoung e BAWIPA ni nang hah teh na yue raw naseh. Hete tami teh hmai dawh hoi rayu e thingtu nahoehmaw telah Setan hanlah atipouh.

<sup>3</sup> Joshua ni kakhin e khohna hah a khohna hoi kalvantami hmalah a kangdue teh, <sup>4</sup> Kalvantami ni kakhin khohna hah rading haw telah a hmalah kangdout e alouke taminaw hanlah atipouh. Joshua hanelah nange na yonnae ka thoung sak toe. Kamcu e khohna hoi na pathoup han atipouh.

<sup>5</sup> Kai ni hai kathoung lupawh ahnie a lû dawh pawh sak awh, ka tie patetlah kathoung lupawh hah ahnie a lû dawh a pawh sak awh teh khohna hah a khohna sak awh. BAWIPA e kalvantami haiyah ahnimae ateng vah a kangdue.



<sup>6</sup> BAWIPA e kalvantami ni ransahu BAWIPA e kâpoenae bout a dei teh, Joshua koe kâlawk a poe e teh, <sup>7</sup> Nang ni ka lamthung na dawn teh ka kâlawnaw na tarawi pawiteh kaie ka im lawkceng thinae hoi ka lentoenae im hai na khetyawt han. Na hmalah kangdout e sami tangawn hah lamthung kapâtuekung lah na o nahanlah kai ni na hmoun han.

<sup>8</sup> Oe, vaihma kacue Joshua na hmalah kaawm e na huikonaw hoi cungtalah thai awh haw. Nangmouh teh mitnoutnae hoi kâkuen e lah na o awh. Kaie ka san lah kaawm e cakang ka tâco sak han. <sup>9</sup> Joshua hmalah ka hruek e talung hah khenhaw! Hote talung buet touh teh a mit sari touh padai vaiteh a khet han. Hote talung hai ka hem han. Hnin touh hoiyah hete ram e yon ka takhoe han telah ransahu BAWIPA ni ati. <sup>10</sup> Hatnae hnin nah, nangmouh ni na imri buet touh hoi buet touh misurkung rahim, thaibunglung rahim na kâkaw awh han telah ransahu BAWIPA ni ati.

## 4

### *Sui hmaikhok*

<sup>1</sup> Kai hoi ka pato roi e kalvantami ni bout a tho teh ka ip e pâhlaw e patetlah kai hah na pâhlaw. <sup>2</sup> Nang bangmaw na hmu telah na pacei navah kai ni ka khet nah sui hoi sak e hmaimkhok ka hmu. Sui hmaimkhok e asawi vah satui hlaam buet touh, hmaim sari touh, satui hlaam hoi hmaim sari touh patawp e khom sari touh ao. <sup>3</sup> Satui hlaam e aranglah olivekung buet touh, avoilah olivekung buet touh, hmai khawm ka ramuk e olivekung kahni touh ao.

<sup>4</sup> Kai hoi ka pato roi e kalvantami hanelah ka bawipa hete hnouaw heh bangnaw ne telah ka pacei nah, <sup>5</sup> Kai hoi ka pato roi e kalvantami ni, hete hnouaw heh bangnaw maw tie na panuek hoe h maw telah na pacei navah, kai ni ka panuek hoe h ka bawipa telah ka ti pouh.

<sup>6</sup> Kalvantami ni hai Zerubbabel koe ka tho e Cathut e lawk teh, hete hno teh ransahu lahoi nahoe h, hnosakthinae lahoi hai nahoe h, kaie Muitha lahoi doeh tho ti telah ransahu BAWIPA ni a ti. <sup>7</sup> Oe, monpui, nang teh bangtelamaw, Zerubbabel e a hmalah kânging e hmuen lah na o han. Taminaw ni na lungma a naseh. Lungmanae awm naseh telah a hram teh, hote bawi ni im takin a som vah talung a pacoung han. <sup>8</sup> BAWIPA e lawk kai koe bout ka tho e teh, <sup>9</sup> Zerubbabel ni hete impui e khomdu a ung toe. Ahni niyah a cum han. ransahu BAWIPA ni kai heh nangmouh onae koe na patoun e hah na panue awh han. <sup>10</sup> Hno kathoengca saknae hnin heh apinimaw noutna laipalah ao han. Zerubbabel e a kut daw k bangnue nae rui ao e hah, hote sari touh ni a hmu awh tore i teh, a lunghawi awh han. Hote sari touh teh talai van atunglah akalah ka yawng e BAWIPA e a mit naw doeh telah a ti.

<sup>11</sup> Kai ni hai hmaimkhok kahni touh e avoilah aranglah kaawm e olivekung kahni touh hah bangtelamaw telah thoes h, <sup>12</sup> Satui racinae sui tuilo kahni touh hoi amamae satui awinae olivekung kahni touh haiyah bangne telah ka pacei navah,

<sup>13</sup> Kalvantami ni hote akangnaw na panuek awh hoe h na maw telah na pacei nah kai ni ka panuek hoe h telah ka ti pouh. <sup>14</sup> Kalvantami ni hai hote akungnaw teh talai kaukung bawi e a hmalah kangdout e satui awi e sami kahni touh doeh a ti.

## 5

### *Kamleng e cakalawng*



<sup>1</sup> Bout kamoung navah, kamleng e cakalawng hah ka hmu. <sup>2</sup> Kalvantami ni nang bangmaw na hmu telah na pacei navah, kamleng e cakalawng ka hmu, asaw e dong 20, akaw e dong hra touh a pha ka ti pouh. <sup>3</sup> Kalvantami ni hai hote cakalawng teh ram pueng koug katin e thoebonae doeh ati. Ka parawt e naw pueng teh cakalawng e avanglah kaawm e patetlah koug raphoe lah ao han. Thoebo ka ngam e pueng teh hote cakalawng avanglah kaawm e patetlah koug raphoe lah ao han. <sup>4</sup> Ransahu BAWIPA ni a dei e teh, hote cakalawng hah kai ni ka rasa han. Tamru e imthung thoseh, ka min lahoh kahmanhoeh e thoebonae ka sak e imthung dawkh thoseh, thingpheknaw, talungnaw, hoi cungtaloh, hote imthungnaw dawkh a pha han a ti.

<sup>5</sup> Kai hoi ka pato roi e kalvantami ni bout a tâco teh, atu ka tâcawt e hno hah kenhaw! telah na ti pouh. <sup>6</sup> Hot hah bang na maw telah kai ni ka pacei navah, hote teh ka tâcawt e takho doeh telah ati. Hottelah, ram pueng dawkh, amamae a noenae doeh a ti. <sup>7</sup> Kawnlawkh manang hra touh a tawmtakhang teh, napui buet touh takho dawkh a tahung e hah ka hmu. <sup>8</sup> Kalvantami nihaiyah hote napui teh yonnae doeh a titeh ahni hah takho thungvah a ta hnukkhu takho van vah kawnlawkh hah a ta. <sup>9</sup> Bout ka khet nah, kahrawngum e âcawmpai e rathei patetlah kaawm e napui kahni touh teh, kahli dawkh a rathei hoi a tâco. Hote ephah hah talai hoi kalvan rahak a tawm awh. <sup>10</sup> Hote ephah hah bangtelamaw a tawm awh telah kai hoi kâdei roi e kalvantami hah ka pacei.

<sup>11</sup> mShinar ram vah im sak pouh hanelah a tawm toe. Hote ram dawkh a ma pâhung nahane tungkhung dawkh a pâhung awh teh a ta awh han, telah a ti.

## 6

### *Leng pali touh*

<sup>1</sup> Bout kamoung navah, rahum hoi sak e rangleng pali touh mon rahak hoi a tâco e ka hmu. <sup>2</sup> Hmaloe e rangleng dawkh ka paling e marang, apâhni e rangleng dawkh ka tamang e marang, <sup>3</sup> Apâthum e rangleng dawkh ka pangaw e marang, apalinae rangleng dawkh thakasai ni teh tarackak e marangnaw sut kaw e lah ao.. <sup>4</sup> Ka bawipa, hote ranglengnaw hah bangtelamaw telah kai hoi ka pato roi e kalvantami koe ka pacei navah,

<sup>5</sup> Kalvantami ni hote ranglengnaw teh talai van pueng ka uk e Bawi e hmalah kangduenae koehoi ka tâcawt e kalvan e kahli pali touh doeh a ti. <sup>6</sup> Marang katamangnaw teh atunglae ram lah a cei awh, ka pangaw pueng teh ka tamangnaw e hnuk a kâbang awh, ka tarackaknaw teh akalae ram lah a cei awh, a ti. <sup>7</sup> Athakasai e marangnaw a tâco awh teh, talai van atunglah, akalah a kâhei awh nahanlah a tha a la awh. Kalvantami ni hai cet awh nateh talai atunglah, akalah kâhei awh, telah atipouh e patetlah, ahnimouh teh talai van atunglah, akalah a kâhei awh. <sup>8</sup> Kalvantami ni kai na kaw teh kenhaw! atunglah ka cet e marangnaw ni kalungkhueknae teh atunglae ram dawkh a kamtue sak awh toe.

<sup>9</sup> BAWIPA e lawkh kai koe bout ka tho e teh, <sup>10</sup> hmaloe a man awh e teh atu Babilon kho hoi ka tho e Heldai phun, Tobiah phun hoi Jedaiah phun a tangawn a kaw teh, hnin touh dawkh hoi Zephaniah e capa Josiah im vah a ceikhai teh, <sup>11</sup> suingunnaw a la awh teh bawilukhungnaw lah a sak awh hnukkhu, Jehozadak capa Joshua, vaihma kacue e a lû dawkh a kâmuk sak haw. <sup>12</sup> Ransahu BAWIPA e kâlawk ahni koe patuen dei pouh hane teh,



a cakang telah a min a phung e hah khenhaw! amamae kho hmuen koe ka pâw e tami ni BAWIPA e bawkim a sak han. <sup>13</sup> BAWIPA e bawkim a sak toreî teh bawilennae hoi a bawitungkhang dawkw a tahung vaiteh a uk han. A tungkhung dawkw vaihma lahai awm vaiteh, ahnimouh roi teh kâhuikonae lawkkam a sak roi han. <sup>14</sup> Hote bawilukhungnaw teh Helem, Tobiah, Jedaiah hoi Zephaniah capa Hennaw hanlah BAWIPA e bawkim dawkvah pahnim hoeh nahanlah ao han. <sup>15</sup> Ahlanæ koehoi hai tho awh vaiteh BAWIPA e bawkim hah a sak awh han. Ransahu BAWIPA ni kai teh nangmouh koe na patoun e hah na panue awh han. Nangmouh ni na BAWIPA, Cathut e a kâlawk hah kahawicalah na ngai a bawi pawiteh, hettelah na o awh han a ti.

## 7

### *Rawcahai hlak lawkngai ahawihnawn*

<sup>1</sup> Darius siangpahrang uknae kum pali, thapa yung tako, Chislev hnin pali hnin nah Zekhariah koe BAWIPA e lawk ka tho e teh, <sup>2</sup> BAWIPA e hmalah ratoum hanlah kum moikasaw sak e patetlah thapa yung panga navah, khuika teh bu hai han nama telah, <sup>3</sup> Ransahu BAWIPA e im dawkw kaawm e vaihma hoiyah profetnaw hah pacei hanelah, Sherezzer, Regem Melek hoi ahnimæ taminaw BAWIPA e im dawkw a patoun awh.

<sup>4</sup> Ransahu BAWIPA e lawk teh Zekhariah koe a pha teh, <sup>5</sup> vaihmanaw hoi khocaramcanaw pueng hanelah na dei hane teh, a kum 70 touh thung, nangmanaw teh thapa ayung panga e hoi ayung sari e dawkvah bu na hai awh teh na khuika awh navah atangcalah kaie ka ngainæ patetlah Kai koe bu na hai awh maw. <sup>6</sup> Na canei awh nahaiyah ma ngainæ patetlah vai na canei a vaw. <sup>7</sup> Jerusalem khopui hoi atengpam e khonaw akalæ hoi tanghlingnaw dawkw e tami apap lahun navah, ayan e profetnaw koe Cathut ni a pathang e kâlawk akuap toung nahoehmaw telah a ti.

<sup>8</sup> Hat navah, Zekhariah koe ka phat e BAWIPA e lawk teh, <sup>9</sup> Kalan lah lawkceng awh. Pahren lungmanæ hoi buet touh hoi buet touh lungkâpataw awh. <sup>10</sup> Naranaw, lahmai napui, ayâ khoram kaawm e karoedengnaw rektap awh hanh. Buet touh hoi buet touh kahawihoehe pouknae tawn awh hanh telah ransahu BAWIPA ni a dei e teh, <sup>11</sup> Ahnimouh ni ka lawk ngai laipalah hlout nahanlah a kâyawm awh. A thai hoeh nahanlah a hnâ a tabuem awh. <sup>12</sup> Phunglawk thoseh, ransahu BAWIPA e Muitha niyah ayan e profetnaw koe a dei pouh e lawk thoseh, ahnimouh ni a thai awh hoeh nahanlah a lungthinnaw lungtaw patetlah a pata sak awh. Hatdawkvah, ransahu BAWIPA teh puenghoi a lungkhuek. <sup>13</sup> Kai ni ka kaw navah a thai awh hoeh e patetlah, ahnimouh ni na kaw to hai kai ni ka thai pouh mahoehtelah ransahu BAWIPA ni a ti. <sup>14</sup> Ahnimouh ni a panue awh hoeh e miphunnaw koevah bongparui hoi ka palek sak awh toe. Hatdawkvah, ahnimæ ram teh kingkadi lah ao teh, apihaiyah kâhlumkâhlai e awm hoeh. Ram kahawi teh koung raphoe lah ao telah a ti.

## 8

### *Hmalæ Jerusalem*

<sup>1</sup> Ransahu BAWIPA e lawk kai koe bout ka phat e teh, <sup>2</sup> Ransahu BAWIPA ni a dei e lawk teh, ka lung a tangpoung toe. Puenghoi ka lungkhuek teh ahni hanlah ka lung a tang toe. <sup>3</sup> Ransahu BAWIPA ni a dei e lawk teh, Zion mon dawkw bout ka tho toe. Jerusalem khopui dawkw bout ka



o han. Jerusalem teh ka khopui telah ka ti vaiteh ransahu BAWIPA e monpui hoi mon kathoung telah ati awh han. <sup>4</sup> Ransahu BAWIPA ni a dei e lawk teh, kamatong e napui hoi tongpa, a kum kacue ni teh sonron ka sonron e matawng pueng, Jerusalem lamnaw dawak ao awh han rah. <sup>5</sup> Khopui e lamthungnaw dawak ka paitun e napui camonaw hoi khik akawi han. <sup>6</sup> Bout a dei e lawk teh, hottelah hno kaawm e hah atu kacawiraenaw hmalah kângairu hanlah ao ei, kaie ka hmalah lateh kângairu lah kaawm han namaw telah ransahu BAWIPA ni a ti. <sup>7</sup> Ransahu BAWIPA ni a dei e lawk teh, ka taminaw teh kanîtho ram lahoi thoseh, Kanîloum ram lahoi thoseh, ka rungngang vaiteh, <sup>8</sup> Jerusalem khothung o sak hanlah ka bankhai han. Lawk katang hoi, lannae phunglawk hoi ahnimouh teh ka tami lah ao awh vaiteh, kai haiyah ahnimae BAWIPA lah ka o pouh han. <sup>9</sup> Ransahu BAWIPA ni a dei e lawk teh, bawkim sak hanelah, ransahu BAWIPA e im khomdu pabonae tueng nah kaawm e profetnaw ni a dei e lawk hah atu na ka thai e nangmae kut dawkvah na tha patho awh. <sup>10</sup> Hote tueng a pha hoehnahlan, tami ni a coe hane awm hoeh. Kâen katâcawtnaw teh taran ao dawkvah a lungmawng awh hoeh. Kai ni taminaw pueng buet touh hoi buet touh ka kâtaran sak. <sup>11</sup> Atu e taminaw koe yampa e patetlah ka sak mahoe hoi telah ransahu BAWIPA ni a ti. <sup>12</sup> Lawkduem lahoi cati a patue awh han. Misurkung ni a paw thoseh, talai ni apung nahanelah thoseh, kalvan ni tadamtui thoseh, na poe awh han. Kacawirae hete taminaw hanlah, hete hno a coe thai awh nahanlah ka sak pouh han. <sup>13</sup> Oe Judah hoi Isarel miphunnaw, nangmanaw teh miphun alouknaw koe thoebo lah ouk na o a e patetlah yawhaw ni hmu awh nahanlah, Kai ni na rungngang awh han. Puen laipalah na kut thasai sak awh. <sup>14</sup> Ransahu BAWIPA ni a dei e lawk teh, nangmae mintoenaw ni kai lung na khuek sak awh navah, yon sak han telah pan kângai laipalah ka kâcai e patetlah, <sup>15</sup> Sahnin e atueng dawak Jerusalem khopui hoi Judah miphun teh yawhaw ka poe han telah, bout ka kâcai. Puen awh hanh telah ransahu BAWIPA ni a ti. <sup>16</sup> Nangmouh ni na sak awh han e teh, buet touh hoi buet touh lawk kahman e hah kâdei awh. Khopui longkha koe kalan lah lawkceng awh nateh, kâtoenae naw hah sak nahanlah laideitâtueng awh. <sup>17</sup> Buet touh hoi buet touh kahawihoehe khopouknae tawn awh hanh. Kahawi hoehe e thoe kâbonae sak e hah lungpataw awh hanh. Hot patet e tawksaknae naw teh kai ni ka panuet telah a ti. <sup>18</sup> Ransahu BAWIPA e lawk kai koe bout ka tho e teh, <sup>19</sup> Ransahu BAWIPA ni thapa yung pali nah rawcahainae, yung panga nah rawcahainae, yung sari nah rawcahainae, ayung tako nah rawcahainae, Judah miphunnaw ni a lunghawi awh teh pawitona e tueng lah ao han. Lannae hoi rounmae hah lungpataw awh haw. <sup>20</sup> Ransahu BAWIPA ni a dei e lawk teh, khoca ramca naw hoi tami aphunphun naw moikapap a tho awh han. <sup>21</sup> Khopui dawak kaawm ni yah alouke khopui dawak kaawm e naw koe a cei teh, BAWIPA hmalah ratoum hanelah thoseh, ransahu BAWIPA tawng hanelah thoseh, atangcalah cet awh sei telah ati awh vaiteh, kai hai ka cei han telah na kaw awh han. <sup>22</sup> Ram kalennaw, miphunnaw niyah ransahu BAWIPA hah Jerusalem khopui dawak a tawng awh vaiteh BAWIPA hmalah ratoum hanelah a tho awh han. <sup>23</sup> Hat navah, lawk aphunphun kapan thai e miphun alouklouk naw koe vah tami hra touh ni Judah taminaw e a hni pawica a tek vaiteh, BAWIPA teh nangmouh hoi rei ao tie ka thai awh teh nangmouh hoi cungtalah ka cei han telah ati awh han telah ransahu BAWIPA ni a ti.



## 9

*Zion taran koe lawkcengnae*

<sup>1</sup> BAWIPA e lawk teh Hadrak ram hoi Damaskas khopui dawk a pha. BAWIPA ni miphunnaw thoseh, Isarel miphunnaw thoseh, a khetyawt.

<sup>2</sup> Hote ram hoi kahnai e Hamath ram dawk thoseh, Taire kho teh a lungang awh dawkvah hote kho hoi Sidon kho dawk a pha. <sup>3</sup> Taire kho ni ama hanelah imrasang a sak teh ngun hah vaiphu patetlah thoseh, lam dawk e tangdong patetlah thoseh, a pâkhueng eiteh, <sup>4</sup> BAWIPA ni ayâ kut dawk a hnawng teh a tha hah tali dawk a tâkhawng pouh awh dawkvah, khopui teh hmai hoi a kak han. <sup>5</sup> Hot patetnaw hah Askelon ni a hmu vaiteh a taki han. Gaza kho ni a hmu vaiteh a pâyaw han. <sup>6</sup> Asdod khopui dawk tami alouknaw kho a sak han. Filistinnaw e kâoupnae haiyah ka raen pouh han.

<sup>7</sup> A ca e thi hah apâhni dawk hoi thoseh, A kei e panuetkathonaw hai a hâ rahak hoi thoseh, ka rayu pouh han. Kacawie naw haiyah maimae BAWIPA hanelah acawi awh teh Judah ram dawk ukkung patetlah ao awh han. Ekron khocanaw hai Jubusitnaw patetlah ao awh han. <sup>8</sup> Bang patet e taran hai a kâen a tâco thai hoeh nahanlah im petkâkalup lah ramveng ka ta han. Karektapkungnaw ni ka taminaw hah bout rektap mahoe. Bangkongtetpawiteh, kama ni ka mit hoi khei ka hmu toe.

<sup>9</sup> Oe, Zion canu na lunghawi haw. Oe Jerusalem canu hram haw. Kalan lah lawk a ceng teh runngangnae lah kaawm e nangmae Siangpahrang teh la van, laca van a kâcui teh lungdo lungnemnae lahoi na onae koe ka tho e hah kenhaw! <sup>10</sup> Kai ni Ephraim ram dawk rangleng thoseh, Jerusalem khopui dawk marang thoseh, ka raphoe han. Tarantuknae licung hai ka raphoe han. Miphun alouknaw ni taran ka room sak han telah, hote bawi ni ati han. Kâtawnnae hai tui avanglah hoi namran totouh thoseh, tuiptui koehoi talai apout totouh a kangning han. <sup>11</sup> Nange kong dawktah, paung lah kaawm e nange taminaw hah, tui kaawm hoeh e tuido dawktah hoi, nang hoi sak e lawkkam thipaling kecu dawktah kai ni ka hlout sak han.

<sup>12</sup> Paung lah kaawm ni teh ngaihawinae ka tawn e naw, rapanim thung lah ban awh. Kai ni let hni yawhawinae na poe awh han telah sahnin roeroe ka dei. <sup>13</sup> Judah licung ka patung vaiteh, Ephraim e licung ka sawn vaiteh, Zion khocanaw hah Kriknaw koe lah hroecoe vaiteh, nang teh athakaawme tami e tahloi patetlah na o sak han. <sup>14</sup> BAWIPA teh ahnimae lathueng a kamnue teh pala teh sumpapalik e patetlah a thui han. Bawipa Jehovah ni mongka a ueng vaiteh akalae bongparui naw hoi a tho han. <sup>15</sup> Ransahu BAWIPA ni ahnimouh teh a okhai dawktah a tarannaw a tâ awh han. Deinae talungnaw a coungrae awh han. Misur kaparuinaw patetlah a hram awh han. Kawlung patetlah thoseh, thuengnae khoungroe takin patetlah thoseh, akawi awh han. <sup>16</sup> Hat hnin vah, ahnimae BAWIPA Cathut ni a taminaw teh tuhu patetlah a runngang han. Ahnimouh teh a talai dawktah kaawm e bawilukhung dawktah ka-ang e ngun patetlah ao awh han. <sup>17</sup> Lungmanae teh a len toung loun. Bari law-a lah a onae hai a len toung loun. Cakang ni thoundounnaw thoseh, Misur tui a katha e ni hai tanglanaw thoseh, a rounng sak han.

## 10

*BAWIPA ni a taminaw a bankhai*



<sup>1</sup> A hnukkhu e khorak tue navah, khorak nahanlah BAWIPA koe ratoum awh. Keitat sak e BAWIPA ni khorak sak vaiteh, tami pueng hanlah law dawc caticamu a pâw sak han. <sup>2</sup> Terah e meikaphawknaw ni teh ahrawnghrang doeh a dei awh. Profet ka tawc e taminaw ni vision kaphawc a hmu awh teh, laithoe e mang a dei awh. Ayawmyin lah lung a kâpahawi awh. Hatdawkvah, tuhunaw patetlah a kâva teh, tu khoumkung ao hoe h dawkvah tunaw a roedeng awh. <sup>3</sup> Tukhoumnaw ka lungkhuec sin teh, hmaetannaw lawc ka ceng vaiteh ransahu BAWIPA ni amae tuhu Judah miphun a khetyawc vaiteh bawirengnae ka coe e taran ka tuk e marang patetlah kangcung sak han. <sup>4</sup> Hote miphun dawc hoi takin lung, cingco, taran tuknae licung, bawinaw pueng ni a tâco awh han.

<sup>5</sup> Ahnimouh teh taran a tuk awh navah, lamthung dawc e tangdong ka coungroe e athakaawme taminaw patetlah ao han. BAWIPA e lungmanae a coe awh dawkvah, taran a tuk awh vaiteh, marangransanaw yeirai a po sak han. <sup>6</sup> Judah miphun haiyah ka caksak han. Joseph miphun haiyah kahlout sak han. Ahnimanaw ka pahren dawkvah hmuen ka poe han. Ahnimouh teh pâlei boihoeh e patetlah ao awh han. Kai teh ahnimae Jehovah Cathut lah ka o teh ahnimae lawc ka thai han. <sup>7</sup> Ephraim miphunnaw teh athakaawme tami patetlah a tha ao awh han. Misur tui khak ka boum e patetlah a lunghawi awh han. A catounnaw ni hmawc awh vaiteh a lunghawi awh han, BAWIPA kâuep hoi a lunghawi awh han.

<sup>8</sup> Ahnimouh ka hroecoe vaiteh, ka kamkhueng sak han. Ahnimouh ni kaie ratangnae hah a hmu awh vaiteh, hmaloe e patetlah bout a pungdaw awh han. <sup>9</sup> Ahnimouh teh Jentelnaw koe cati patue e patetlah ka patue han. Kho hla ram dawc hoi kai na doun awh vaiteh ca catounnaw hoi cungtalah a hring lahoi bout a ban awh han. <sup>10</sup> Ahnimouh teh Izip ram hoi bout ka hrawi awh han. Assiria hai kakaw vaiteh ka pâkhueng han. Gilead ram hoi Lebanon ram lah bout ka hrawi vaiteh ahnimouh ao nahan e talai ni cawng mahoe. <sup>11</sup> Tuipui lungui a cei teh, a rektap awh vaiteh, tuicapanaw a hem awh han. Kadung poung e tuipui kaawm e naw pueng rem a hak han. Assiria naw e lunglennae a pâpho pouh vaiteh Izip bawi e kâtawnnae hai a kahma han. <sup>12</sup> Ahnimouh teh BAWIPA pawlawc hoi ka caksak han. A min kâuep laihoi a kâhei vaiteh a cei awh han telah BAWIPA ni a ti.

## 11

### *Tukhoumkung pahnavtnae*

<sup>1</sup> Oe Lebanon mon, nange anrikungnaw hah hmai a kak nahanelah, na takhangnaw hah paawng haw. <sup>2</sup> Oe hmaicakung, anri kung a kamlei dawkvah khui haw. Thingkung apu kaawmnaw teh koung a rawp toe. Oe kathenkungnaw, ratu dawc e thingkung dungradungnaw hai koung a rawp dawkvah khui haw. <sup>3</sup> Tukhoumnaw ni yeirai apu awh dawkvah a khui awh. Jordan tuipui e bawilennae a ro dawkvah sendeknaw a huk e pawlawc thai lah ao. <sup>4</sup> Kaie Jehovah Cathut ni a dei e teh, thei hanlah hmoun e hete tuhu naw hah kawc lah. <sup>5</sup> Katawnkungnaw ni a thei awh teh ka yon tie kâpanuec awh hoe. Kayawtnaw ni hai ka hmu thai e doeh ati awh teh BAWIPA teh yawhawinae awm naseh telah ati awh. Tukhoumnaw ni hai pahrenlungmanae tawn awh hoe. <sup>6</sup> BAWIPA ni a dei e teh, Kai ni khocaramca naw bout ka pahren mahoe. Pasai laipalah taminaw hah a imri naw e a kut dawc thoseh, siangpahrang e a kut dawc thoseh, ka



hnawng vaiteh, ahnimouh ni ram pueng teh a rektap awh han. Ahnimae a kut dawk hoi kahlout sak mahoe h a ti.

<sup>7</sup> Hottelah, thei han hmoun tangcoung e tuhu lah kaawm e ka roedeng e tu naw hah ka kaw. <sup>8</sup> Tukhoumkung kathum touh hai thapa yung touh dawk koug ka raphoe. Ahnimouh kecu dawk ka lungkaw thai hoe h. Ahnimouh ni hai kai teh na panuet awh. <sup>9</sup> Nangmouh teh bout na kaw awh mahoe h. Kadout e teh dout yawkaw naseh. Thei lah kaawm e hai thet a yawkaw naseh. Kacawie naw hai buet touh hoi buet touh kâkei a na yawkaw seh, telah a ti. <sup>10</sup> Miphun puenghoi sak e lawkkamnae hah raphoe hanlah ka ngai dawkvah sonron meihawi ka la teh ka khoe. <sup>11</sup> Hote lawkkamnae teh hat hnin vah a ro dawkvah Kai na kâuep e ka roedeng e tunaw teh BAWIPA lawk a thai panuek awh. <sup>12</sup> Hahoi, Kai ni ka hmu hane kamcu e aphu poe hanelah nangmouh ni na ngai awh pawiteh, poe awh. Na ngai awh hoehpawiteh poe awh hanh telah ati teh, ahnimouh ni kai aphu na poe awh hanelah ngun tangka 30 touh a nue awh.

<sup>13</sup> BAWIPA ni hote tangka teh hlaamkabonaw e hmalah tâkhawng pouh haw. Kai hanlah aphu na khoe a e tangka teh ek apap ati awh e patetlah, hote ngun tangka 30 touh hah ka la teh, BAWIPA e im dawk hlaamkabonaw e hmalah ka tâkhawng pouh. <sup>14</sup> Hat navah, Judah miphun hoi Isarel miphun huiko kamyawngnae raphoe ngaina e kecu dawkvah sonron alouke hah ka la teh ka khoe. <sup>15</sup> Hatnukkuh, BAWIPA niyah ka pathu e tukhoumkung e hnopainaw hah lat haw. <sup>16</sup> Bangkongtetpawiteh, hote ram dawk tukhoumkung buet touh ka tâco sak han. Ahni ni thei lah kaawm e tu hah khenyawn mahoe h. Lam ka phen e hah tawng hoe h. Ka dam hoe h e a dam nahanlah khenyawn hoe h. Kangdout e kabawm hoe h. Kathâw e naw hah a ca han. A khoksamen hai a khoe pouh awh han. <sup>17</sup> Tuhu hah ka pahnawt e ayawmyin e tukhoumkung teh a yawthout naseh. Ahnie a kut hoi aranglae mit dawkvah tahloi hoi hmâ a ca han. A kut thasaina e teh khak a ke han. Aranglae mit hai a dawn han telah a ti.

## 12

### *Hmalah Judah rungngang nahane*

<sup>1</sup> Kalvan hoi talai du kasakkung, tami hoi athung e muitha kasakkung, BAWIPA ni Isarelnaw hanlah a dei e lawk teh, <sup>2</sup> Kai ni Jerusalem khopui petkalup lah kaawm e miphun pueng hanlah, yamuhrinae manang lah ka coung sak han. Jerusalem a kalup awh navah, Judah ram hai hottelah ao van han. <sup>3</sup> Hatnae tueng dawkvah, hote khopui teh miphun pueng hanlah, talung ka ri e lah ka coung sak han. Hote talung katawmnaw pueng teh hote talung ni reppasei lah a ten awh han. Talai taminaw pueng ni Jerusalem khopui tuk hanlah a kamkhueng awh han. <sup>4</sup> BAWIPA ni a dei e teh, hatnae tueng dawk kaawm e marang naw pueng kalue sak hanelah, marangransanaw pueng hah pathu sak han. Judah miphun ka khet vaiteh, alouke miphunnaw koe kaawm e marang naw a mit dawn sak hanelah ka rek han. <sup>5</sup> Jerusalem Cathut ransahu BAWIPA lahoi ahnimouh teh kaie kathaonae doeh telah Judah bawinaw ni a lungthung vah ati awh han.

<sup>6</sup> Hat navah, Judah bawinaw teh thinghong dawk e takhuen patetlah thoseh, Cabong dawk e hmai tali patetlah thoseh, ka o sak vaiteh, avoilah aranglah kaawm e miphunnaw pueng hmai a kak awh han. Jerusalem khopui hai amae hmuen dawk pou ao han. <sup>7</sup> BAWIPA ni Judah rimnaw hmaloe a rungngang han. Hatdawkvah, Devit e catoun bawilenna e hoi Jerusalem khocanaw e bawilenna e teh Judah e hloilah kâphokâlen awh



mahoeh. <sup>8</sup> Hat hnin dawkvah, BAWIPA ni Jerusalem khocanaw a okhai vaiteh, hatnae tueng nah, a tha kayoun naw hah Devit patetlah thoseh, Devit canaw teh Cathut patetlah thoseh, ahnimae hmalah BAWIPA e kalvantami patetlah ao awh han. <sup>9</sup> Hatnae hnin daw, Jerusalem khopui tuk hanlah kamthaw e miphunnaw hah raphoe hanlah tha ka patho han.

<sup>10</sup> Lungmanae hoi ratoum ngainae hah Devit imthung hoi Jerusalem khocanaw lathueng vah, kai ni ka awi vaiteh, amamouh ni a thut e kai na hmu awh han. A na pa ni tawntoe e capa a khuikakhai e patetlah ahni hanelah a khuika awh han. A na pa ni camin hanelah a lungmathoe e patetlah a lungmathoe awh han. <sup>11</sup> Megiddo yawn daw, Hadadrimmon kho vah a khuika e patetlah hat navah, Jerusalem kho daw, puenghoi khuikanae kaawm han. <sup>12</sup> Khoram pueng ni a miphun lengkaleng alouklouk lah, a khuika awh han. Devit e imthungnaw alouklah, ahnimae a yunaw alouklah, Nathan e imthungnaw alouklah, ahnimae a yunaw alouklah, <sup>13</sup> Levih e imthungnaw alouklah, a yunaw alouklah, Shimei e imthungnaw alouklah, a yunaw alouklah, <sup>14</sup> Kacawie miphunnaw pueng hah alouklah, a yunaw hah alouklah, alouklouk lah lengkaleng a khuika awh han.

## 13

### *Meikaphawk bawknæ raphoenæ*

<sup>1</sup> Hote atueng navah, Devit imthungnaw hoi Jerusalem khocanaw e yonnae hoi khinnae naw hah pâsu nahanelah, tuiphuek teh a phuek han. <sup>2</sup> Ransahu BAWIPA ni a dei e teh, ram daw, kaawm e meikaphawknaw e minnaw hah apinihai bout panue hoeh nahanelah, hatnae tueng daw, kai ni koug ka raphoe han. Profet katawknaw hai thoseh, kakhine muithanaw hai thoseh, ram daw hoi ka pâlei han. <sup>3</sup> Tami buetbuet touh ni profet thaw taw, rah boipawiteh, kacunkung, manu na pa naw ni nang teh Jehovah min lahoi laithoe na dei dawkvah, na due han telah ati. Profet thaw a taw, lahun nah a manu na pa naw ni ahni teh pawkkayawng lah a thut awh han. <sup>4</sup> Hatnae tueng nah, profet teh amamae a dei e vision daw, a kaya awh han. Ayâ dum hane ngai dawkvah khohna hai khohnat mahoeh. <sup>5</sup> Kai teh profet nahoe law thaw ka taw, e doeh. Ka nawca hoi ayâ koe san ka toung toe telah ati han. <sup>6</sup> Ayâ ni hai na kut daw, e a hmânaw hah bangtelane telah na pacei pawiteh, hote hmânaw teh ka hui im vah ka ca e hmânaw doeh telah bout a dei han.

<sup>7</sup> Ransahu BAWIPA ni a dei e teh, kaie tukhoumkung avanglah, kaie ka huikonaw e avanglah, kâhlaw haw. Tukhoumkung thet haw. Hottelah na tetpawiteh, tunaw teh pareng kâkapek awh han. Tu canaw lathueng vah kut bout ka pathung han. <sup>8</sup> BAWIPA ni a dei e teh, ram puengpa thung e tami, pung thum pung hni touh ka raphoe vaiteh, pung touh ka pâhlung sak han. <sup>9</sup> Hote phu touh teh hmai lungui ka ceisak han. Ngun sôlei e patetlah ka sôlei han. Sui tanouk e patetlah ka tanouk han. Ahnimouh ni ka min lahoi ratoum awh vaiteh ka thai pouh han. Ahnimouh teh ka miphun telah ka kaw han. Ahnimouh ni hai Jehovah teh kaimae Cathut doeh ati awh han.

## 14

### *BAWIPA e hnin*



<sup>1</sup> BAWIPA e hnin a pha torei teh, ayânaw ni na hno na lawp vaiteh, na hmalah a kêrei awh han, <sup>2</sup> Jerusalem khopui tuk sak hanelah miphunnaw ka kamkhueng sak han. Hote khopui a tuk awh vaiteh, imnaw a lawp awh han. Napuinaw a yonkhai awh han. Khoca tami tangawn teh san lah man awh vaiteh tangawn a cei takhai awh han. <sup>3</sup> BAWIPA ni taran tuknae tue navah tuk e patetlah hote miphun teh a tuk han. <sup>4</sup> Hote hnin nah, a khok hoi Jerusalem kanîtholah Olive Mon dawk kangdue han. Olive Mon teh kanîtho hoi kanîlounm totouh a lungui vah kâbawng vaiteh, ayawn kalen poung lah a coung han. Mon tangawn teh atunglah thoseh, tangawn teh akalah thoseh, a kâtahruet han. <sup>5</sup> Nangmouh teh kamae mon rahak hoi na yawng awh han. Hote tangawn teh Âzel kho totouh a pha han. Judah siangpahrang Uziah tueng nah tâli a no teh a yawng a e patetlah na yawng awh han. BAWIPA Cathut teh a tami kathoungnaw puenghoi a tho awh han. <sup>6</sup> Hote hnin nah, angnae awm mahoe. Hnokahawi naw a ro han.

<sup>7</sup> Khodai na hoe, karum na hoe, BAWIPA ni a panue e hnin hnin touh lah ao teh, tangmin a pha to doeh a ang han. <sup>8</sup> Hat hnin vah, hringnae tui teh Jerusalem khopui dawkh hoi a lawng vaiteh, kompawî thoseh, kasik nah thoseh, kanîtholae tuihui dawkh tangawn, kanîlounmlae tuihui dawkh tangawn a lawng han. <sup>9</sup> Jehovah teh talai ram pueng dawkh siangpahrang lah ao han. Hote hnin dawkvah, Jehovah buet touh dueng, A min buet touh dueng lah ao han. <sup>10</sup> Geba khopui hoi Jerusalem khopui akalah Rimon khopui totouh ram pueng hah ayawn lah koun a coung han. Khopui haiyah Benjamin longkha koehoi hmaloe e longkha hmuên, khopui takin longkha totouh, Hananel imrasang koehoi misur katinnae totouh fawm lah ao vaiteh, khoruem hmuên dawkh kho bout a sak awh han. <sup>11</sup> Hathnukkhu, Jerusalem khopui teh thoebonae khang mahoe. Khoca naw haiyah puen laipalah kho a sak awh han.

<sup>12</sup> Jerusalem ka tuk e miphun pueng koe, BAWIPA ni a pha sak hane lacik teh, a khok hoi a kangdue nahlangva a takthai naw atum awh han. A mit dawkh mitmu a ro han. A lai hai a kâko vah a ro han. <sup>13</sup> Hat hnin vah, BAWIPA e bahu ni tami pueng ruengrueng ati sak vaiteh, buet touh hoi buet touh a kâhem awh han. Buet touh hoi buet touh a kâthei awh han. <sup>14</sup> Judah miphunnaw hai Jerusalem vah a tuk awh han. Petkâkalup lah kaawm e Jentelnaw e hnopai, sui ngun naw hah a pâkhueng awh han. <sup>15</sup> Marang, la, kalauk, laca koehoi kamtawng teh, taran thung e kaawm e saring pueng koe a lathueng dei e lacik naw teh a pha han. <sup>16</sup> Jerusalem ka tuk naw ni a cei takhai e taminaw niyah kalvan ransabawi tie Siangpahrang Jehovah hah a bawkh awh teh, lukkarei pawî koe kum tangkuem a tho awh han. <sup>17</sup> Ransahu BAWIPA tie Siangpahrang hah bawkh hanelah khopui koe ka cet hoe e talai taminaw pueng e lathueng vah, khorak mahoe. <sup>18</sup> Izip khocanaw tho hoehpawiteh, khorak laipalah awh vaiteh, lukkareiim pawî koe ka tho hoe e miphunnaw dawkvah, BAWIPA ni a pha sak hane lacik teh ahnimouh hai a khang sak awh han. <sup>19</sup> Hetnaw teh, lukkarei pawî koe ka tho hoe e Izip miphunnaw, alouke miphun pueng ni yonphu a khang awh hane doeh.

<sup>20</sup> Hatnae hnin nah, marang awi sak e rahum kingling dawkh hai, BAWIPA KOE THOUNGNAE telah a thut awh han. BAWIPA e im dawkh e hlaam naw teh thuengnae khoungroe hmalah kaawm e kawlung patetlah ao han. <sup>21</sup> Hothloilah, Jerusalem khopui dawkh hoi kamtawng vaiteh, Judah ram e kaawm e hlaam naw teh ransahu BAWIPA koe thoungnae lah ao han. Thuengnae ka sak pueng ni tho awh vaiteh, hote hlaamnaw a la awh



vaiteh, a thawng awh nahan. Hatnae hnin hoi teh, ransahu BAWIPA im dawkvah Kanaan taminaw teh awm mahoeh toe.



## MALAKHI

<sup>1</sup> BAWIPA ni Isarelnaw koe Malakhi hno lahoi a dei e profet lawk teh; <sup>2</sup> Kai ni lung na pataw awh toe. Bangtelamaw lung na pataw awh telah na pacei awh pawiteh, Esaw teh Jakop e a hmau nahoehmaw. Hateiteh Jakop teh ka lungpataw. <sup>3</sup> Esaw teh ka maithoe. Ahni onae monnaw ayawn lah kacounsak toe. Râw lah a coe thai kawi talai hah kahrawnguinaw koe yo ka poe toe telah BAWIPA ni a ti.

<sup>4</sup> Edom miphunnaw ni kaimanaw teh karawk awh ei nakunghai, kingdinae hmuennaw hah bout ka pathoup awh han ati awh navah, ransahu BAWIPA ni a dei e lawk teh ahnimanaw ni bout a sak awh nakunghai ka raphoe han. Ahnimanaw teh kahawihoe hno apapnae ram, BAWIPA lungkhueknae miphun telah ati awh han. <sup>5</sup> Hote hno nangmouh ni na hmu awh navah Bawipa teh Isarel ram, alawilah a lentoe poung telah ati awh han.

<sup>6</sup> A capa ni a na pa ouk a bari e patetlah a san ni hai a bawipa ouk a taki. Kai teh nangmae na pa lah kaawm pawiteh, apinimaw kai na bari. Na Bawipa lah kaawm pawiteh apinimaw kai na taki telah ka lentoe poung e ransahu BAWIPA ni amae min ka dudam e vaihmanaw a pacei. Kaimanaw ni na min bangtelamaw ka dudam awh vaw telah na pacei awh navah, <sup>7</sup> Kakhin e rawca thuengnae khoungroe koe na thokhai awh bo vaw. Kaimouh ni nang teh bangtelamaw na dudam awh vaw telah na pacei awh navah, BAWIPA e caboi teh thoung hoe hah telah na ti awh dawkvah, kai na dudam awh toe.

<sup>8</sup> A mit ka dawn e saring hah na thueng pawiteh a yon nahoehmaw. Khokkhem hoi ka pataw e saringnaw hoi thuengnae na sak pawiteh a yon nahoehmaw. Khobawi koe poe haw, khobawi a lungyok han na ou telah ka lentoe poung e ransahu BAWIPA ni a ti. <sup>9</sup> Atuvah Cathut pahrennae coe awh nahanelah Cathut koe ratoum awh. Nangmouh na coe awh dawkvah hettelah ouk na sak awh. Nangmae minhmai ka khet han namaw telah ransahu BAWIPA ni a ti.

<sup>10</sup> Nangmanaw dawk apimaw kaie takhangnaw ka khan han. Nangmanaw ni kaie thuengnae khoungroe van ayawmyin lah hmai na patawi awh mahoe hah. Nangmanaw na panki hoe hah, nangmouh ni thuengnae na sak e hah kai ni ka dâw mahoe telah ransahu BAWIPA ni a ti. <sup>11</sup> Kanitho koehoi kaniloum totouh alouke miphunnaw koe ka min a lentoe han. Bangpatet e hmuen koehai ka min lahoi hmuithui sawi awh vaiteh, kathounge thuengnae hoi a bawk awh han. Kaie ka min teh alouke miphunnaw koe a lentoe han telah ransahu BAWIPA ni a ti.

<sup>12</sup> Nangmouh ni BAWIPA e caboi na khin sak awh. Na thueng awh teh banglahai na noutna awh hoe hah. <sup>13</sup> Nangmouh ni thaw na tawk awh e dawkvah, ka tawn toe telah na dei teh, pacekpaheknae lawk na dei awh, telah ransahu BAWIPA ni ati. Lawp e naw, khokkhem e ka pataw e naw hah na thokhai awh toe. Nangmouh koe e kai ni ka daw han namaw telah BAWIPA ni a ti.

<sup>14</sup> Tutan poe hanlah lawk ham hnukkhu, atan ao nahlangva na dum awh teh, BAWIPA koe kacuhoe hoi thuengnae ka sak e tami teh, yawthoenae awmseh. Kai teh ka lentoe poung e siangpahrang lah ka o. Kaie ka min teh miphunnaw ni taki e lah ao han, telah ransahu BAWIPA ni a ti.



## 2

<sup>1</sup> Oe vaihmanaw, ransahu BAWIPA ni nangmouh hanlah a dei e lawk teh, <sup>2</sup> Ka lawk na ngai awh hoeheh lah, ka min barilawanae na tawn awh hoehpawiteh, thoebonae nangmouh koe ka patoun han. Nangmae yawhawinae hah yawthoenae lah ka coung sak han. Hothloilah, ka min na barilawa awh hoeheh dawkvah atu roeroe yawthoe lah ka coung sak toe. <sup>3</sup> Nangmae catounnaw hah ka yue vaiteh, pawî na tonae saring e ei hah na minhmai dawke ka kano han. Alouke miphunnaw ni ei khuehoi na hrawi awh han. <sup>4</sup> Kaie lawkkam teh Levih miphun koe caksak hanelah, hete kâlawknaw hah nangmouh koe na poe e hah na panue awh han telah ransahu BAWIPA ni a ti. <sup>5</sup> Ahnimouh koe ka poe e kaie lawkkam teh hringnae hoi lungmawngnae lah ahnimouh koe ao. Kai hah barilawa na poe awh teh ka min a taki awh dawkvah lawkkam hah ka poe. <sup>6</sup> Ahnimouh ni lawkkatang a dei awh vaiteh apâhni dawke hoi payonnae tâcawt mahoeheh. Lungmawngnae, lannae hoi kai hoi rei cet vaiteh ahnimouh ni yonnae a kamlang takhai awh han. <sup>7</sup> Vaihmanaw e pahni dawke hoi lungang thounnae a tâco han. Ahnie pahni dawke hoi taminaw ni cangkhaïnae atang awh han. Bangkongtetpawiteh ahni teh ransahu BAWIPA e patoune lah ao. <sup>8</sup> Nangmouh teh lam na phen awh toe. Nangmae cangkhaïnae teh taminaw kamthui nahanelah ao toe. Levihnaw hoi kam e lawkkam na raphoe awh toe telah ransahu BAWIPA ni a ti. <sup>9</sup> Hatdawkvah nangmouh teh ka lamthung na dawn awh hoeheh, na cangkhai awh navah minhmai khet na tawn awh dawkvah tami pueng ni na dudam nahanlah ka sak han.

<sup>10</sup> Maimouh pueng teh Na pa buet touh dueng tawn awh nahoehmaw. Cathut buet touh dueng ni maimouh na sak awh nahoehmaw. Bangkongmaw mintoenaw hoi kâhuïkonae lawkkam teh na pahnawt a vaw. Bangkongmaw buet touh hoi buet touh lawkkam na cak awh hoeheh vaw. <sup>11</sup> Judahnaw teh lawkkam cak awh hoeheh. Isarelnaw hoi Jerusalem khocanaw teh panuet ka tho e hno a sak awh toe. Judahnaw teh BAWIPA ni a lungpataw e thoungnae hah banglahai a noutna awh hoeheh dawkvah alouke miphun cathut e canaw hoi a kâyuva awh toe. <sup>12</sup> Hottelah kacangkhaïkungnaw hoi a hnukkâbangnaw thoseh, ransahu BAWIPA koe pasoum hno ka sin e hai thoseh, Jakop e rim dawke hoi a takhoe han.

<sup>13</sup> Hahoi, na sak awh e hno teh, BAWIPA e khoungroe hah mitphi bonae, khuïkanae hoi na ramuk awh toe. Hatdawkvah, pasoum hno hah dâw hoeheh toe. Na kut dawke hoi na poe e hno teh ngainae lahoi dâw hoeheh toe. <sup>14</sup> Bangtelane telah na pacei awh pawiteh, na thoundoun nah na paluen e na yu koe, lawkkam na cak hoeheh. Na yu hoi nang rahak BAWIPA teh kapanuekkhaïkung lah ao. Hote yu teh nange yu, lawkkam e yu lah ao toe. <sup>15</sup> Ahni ni ahnimanaw hah, buet touh lah nahoehmaw a sak vaw. Tak hoi muitha teh Cathut e doeh. Bangkongmaw buet touh dueng a sak tetpawiteh, Cathut ni cathutlae catoun hah a tawng. Hatdawkvah, na muitha hah kahawicalah pouk nateh, na nawsai nah na paluen e na yu koe lawkkam raphoe hanh. <sup>16</sup> Yu pahnawtnae, yu koe yuemkamcu hoeheh lah o e pâphanae hah, kahmawt ngai hoeheh telah Isarel Cathut ransahu BAWIPA ni ati. Hatdawkvah na muitha hanelah kâhruetcuet nateh kaisue laihoi khosak hanh.

<sup>17</sup> Nangmouh teh BAWIPA hnâ a poum totouh na lawk apap awh. Bangtelamaw hnâ a poum totouh na sak awh tetpawiteh, ka payon e tami



pueng, Cathut hmalah ahawi doeh. Hot patet e taminaw hah BAWIPA ni a ngai doeh, lawkcengkung Cathut teh nâmouh ao va telah na ti awh.

### 3

<sup>1</sup> Khenhaw! Ka cei nahane lamthung ka rakueng hane ka patoune ka patoun han. Nangmouh ni na tawng awh e Bawipa, na ngaihaw awh e lawkkam e laicei teh amae bawkim dawak tang a tho han. Khenhaw! Hote Bawipa teh a tho lahun ransahu BAWIPA ni a ti. <sup>2</sup> A thonae hnin nah apinimaw a khang thai han. A kamnue toteh apimaw kangdout thai han. Bangkongtetpawiteh Bawipa teh ngun sôlêinae hmai hoi a kâvan teh hno pâsunae sapet hoi a kâvan. <sup>3</sup> Ngun hah a sôlêi teh ka thoungsak e ni sui ngun a sôlêi e patetlah Levih miphun a thoungsak dawkvah, ahnimouh teh BAWIPA hanelah kalan e pasoum hno hah a thueng awh han. <sup>4</sup> Judah catounnaw hoi Jerusalem khocanaw e pasoum hno hah ayan e kumtha, hnin dawak e patetlah BAWIPA ni a ngai e lah ao han. <sup>5</sup> Nangmouh na tanouk hanelah nangmouh koe ka tho han. Tami ka ân e, ka uicuk e, kamsoumhoehe lah thoe ka kâbo e, apu poe laipalah ka rektap e, lahmai naranaw ka rektap e, imyinnaw kamsoumhoehe lah lawk ka ceng e, Kai na ka taket hoehe e taminaw e avanglah, kapanuekkhaikung lah tang ka o han telah ransahu BAWIPA ni a ti. <sup>6</sup> Kai Jehovah teh, kâthungnae awm hoehe. Hatdawkvah Jakop catounnaw nangmouh teh na rawk awh mahoehe. <sup>7</sup> Mintoenaw koehoi kamtawng teh, nangmouh ni ka phung lawk na tarawi awh hoehe, na roun awh toe. Kai koe bout ban awh haw, kai hai nangmouh koe lah ka ban van han telah ransahu BAWIPA ni ati. Bangtelah hoi maw bout ka ban han na ti awh. <sup>8</sup> Tami ni Cathut e hno lawp kawi namaw. Hatei, nangmouh ni teh kaie hno na lawp awh toe. Bangtelamaw na lawp awh vaw na tet awh pawiteh, pung hra pung touh thoseh, pasoum hnonaw hai thoseh na lawp awh toe. <sup>9</sup> Nangmouh teh theobo e lah na o awh toe. Bangkongtetpawiteh, khocanaw pueng ni ka hno na lawp awh toe. <sup>10</sup> Hra touh dawak buet touh pueng teh hno pâkhuengnae im dawak hmouk awh. Kaie im dawak ca kawi ao nahanelah sak awh. Kalvan tho ka paawng hoi paawng hoehe e, yawhawinae na rabawak sin hoi rabawak sin hoehe e, hottelah hoi na tanouk awh haw telah ransahu BAWIPA ni a ti. <sup>11</sup> Na talai dawak e a pawhiknaw hah ahriainaw koe ka raphoe sak mahoehe. Nangmae misurkung teh a paw paw laipalah awm mahoehe telah ransahu BAWIPA ni a ti. <sup>12</sup> Miphun pueng ni nangmouh teh a yaw kahawi e tami telah na kaw awh han. Na ram hai ngai kaawm e ram lah ao han telah ransahu BAWIPA ni a ti.

<sup>13</sup> BAWIPA koe lawk kahram lahoi na dei awh nahlangva vah, nangmouh ni bangtelamaw ka dei payon awh vaw, khuet na ti awh vaw. <sup>14</sup> Cathut e thaw ka tawak nakunghai ahawinae awm hoehe. Cangkhai e naw ka tarawi awh teh, ransahu BAWIPA hmalah rawca ka hai awh nakunghai bangmaw ahawinae kaawm. <sup>15</sup> Ka kâoup e taminaw hah a yaw kahawi e taminaw telah kaimouh ni ka ti awh. Atangcalah, yonnae ka saknaw law teh a tawnta awh. Cathut a tanouk nakunghai a hlout awh telah na ti awh.

<sup>16</sup> Hatnavah BAWIPA kabarinaw teh buet touh hoi buet touh a kâpato awh. BAWIPA ni hai a hnâpakeng teh a thai pouh. BAWIPA ka taket ni teh a min alawkpui lah ka tat e taminaw teh, a hmalah cayin a pakhum pouh. <sup>17</sup> Ahnimanaw teh lawk ka ceng hnin vah ka coe e hno lah ao awh han. A na pa e thaw ka tawak e capa hah na pa ni pasai e patetlah ahnimanaw hah ka pasai han telah ransahu BAWIPA ni a ti. <sup>18</sup> Hahoi, nangmouh teh,



na lung a kâthung awh teh kalan e tami, kalan hoeh e tami, Cathut e thaw ka tawk e tami, ka tawk hoeh e taminaw hah na panue awh han.

## 4

### *BAWIPA e hnin kalen*

<sup>1</sup> Tahmanghmai a kak e patetlah hmai kak hnin teh ka tho han. Kâoupnaw hoi yonnae ka sak naw pueng teh songnawng lah ao awh han. Hote atueng nah, ahnimanaw teh akung dawngghmo awm laipalah koug a kak awh han telah ransahu BAWIPA ni ati. <sup>2</sup> Ka min ka taket e nangmanaw koevah lannae Kani teh pataw damnae rathei hoi a tho han. Nangmouh teh maito im dawk e maito ca patetlah lunghawi hoi na coukdouk awh han. <sup>3</sup> Tami kahawihoehnaw hai na khok hoi na coungroe awh han. Hote hnin a pha toteh, ahnimouh teh nangmae khoktabei rahim vaiphu lah ao awh han telah ransahu BAWIPA ni ati. <sup>4</sup> Isarelnaw pueng hanelah Horeb mon, lawk ka thui e ka san, Mosi e kâlawk hoi cangkchainae naw hah pahnim awh hanh. <sup>5</sup> Kenhaw! BAWIPA e hnin takikathopounge a pha hoehnahlan vah, profet Elijah hah nangmouh koe ka patoun han. <sup>6</sup> Kai ka tho vaiteh, nangmae khoram hah thoebonae hoi na tuk awh hoeh nahanelah, hote profet ni capanaw hoi napanaw, napanaw hoi capanaw hah a kâpo sak han ati.



## MATTHAI (The Gospel According to Matthew)

*Jisuh a tâconae*

*Luk 3:23-38*

<sup>1</sup> Abraham hoi Devit e catoun lah kaawm e, Jisuh Khrih a thonae lairui cauk teh, <sup>2</sup> Abraham capa Isak, Isak capa Jakop, Jakop capa Judah hoi a hmaunawngna naw. <sup>3</sup> Judah ni Tamar hoi a khe e capa Perez hoi Zerah, Perez capa Hezron, <sup>4</sup> Hezron capa Aram, Aram capa Amminadab, Amminadab capa Nahshon, Nahshon capa Salmon, <sup>5</sup> Salmon capa Boaz, Rahab hoi a khe e. Boaz capa Obed, Ruth hoi a khe e. Obed capa Jesi, Jesi capa Devit siangpahrang.

<sup>6</sup> Devit capa Solomon, Uriah e a yu hoi a khe roi e, <sup>7</sup> Solomon capa Rehoboam, Rehoboam capa Abijah, Abijah capa Asaph, <sup>8</sup> Asaph capa Jehoshaphat, Jehoshaphat capa Joram, Joram capa Uziah, <sup>9</sup> Uziah capa Jotham, Jotham capa Ahaz, Ahaz capa Hezekiah, <sup>10</sup> Hezekiah capa Manasseh, Manasseh capa Amon, Amon capa Josiah, <sup>11</sup> Josiah capa Jehoniah hoi a hmaunawngnanaw, Babilon lah a kampuen tawmlei vah a khe e ca catounnaw doeh.

<sup>12</sup> Babilon kho lah a kampuen awh hnukkhu, Jehoniah capa Shealtiel, Shealtiel capa Zerubbabel, <sup>13</sup> Zerubbabel capa Abiud, Abiud capa Eliakim, Eliakim capa Azor, <sup>14</sup> Azor capa Zadok, Zadok capa Akhim, Akhim capa Eliud, <sup>15</sup> Eliud capa Eleazar, Eleazar capa Matthan, Matthan capa Jakop, <sup>16</sup> Jakop capa, Meri e a vâ Joseph, Khrih tie Jisuh teh Meri koehoi a khe. <sup>17</sup> Abraham koehoi Devit totouh a se hlaipali, Devit koehoi Babilon kho lah a kampuen awh totouh a se hlaipali, Babilon kho lah a kampuen awh hoi Khrih totouh a se hlaipali touh a pha.

*Jisuh khenae*

*Luk 1:35*

<sup>18</sup> Jisuh Khrih a khenae teh, hettelah ao. A manu Meri teh Joseph yu lah pacei lah ao navah tak cungalah a hmawng roi hoehnahlan, <sup>19</sup> Kathoung Muitha e camo teh a vawn toe. A vâ Joseph teh tamikalan lah ao dawkvah, Meri kaya sak hane a ngai hoeh dawkvah, arulaho ma hanlah a kâcai.

<sup>20</sup> Hottelah a kâcai navah, a manglah Bawipa e kalvantami, ahni koe a kamnue pouh teh, Devit capa Joseph, na yu Meri paluen hane hah na lungpuen hanh, atu e a vawn e camo teh Kathoung Muitha lahoi doeh a vawn. <sup>21</sup> Ahni ni Ca tongpa a khe vaiteh, Jisuh telah na phung han. Bangkongtetpawiteh, a taminaw yon thung hoi a rungngang han dawkvah atipouh.

<sup>22</sup> Hete akong teh Bawipa ni profetnaw hno lahoi sutdeilawk akuep nahane doeh. <sup>23</sup> Sutdeilawk teh, Kenhaw! tanglakacuem ni vawn vaiteh ca tongpa a khe han. A min teh Emmanuel telah a phung han. Emmanuel tie teh Cathut maimouh koe ao tinae doeh.

<sup>24</sup> Joseph a kâlaw teh, Cathut e kalvantami ni lawk a poe e patetlah a yu teh a paluen. <sup>25</sup> Hatei, camin a khe hoehroukrak tak cungalah hmawngkhai hoeh. Hote capa hah Jisuh telah a phung.



## 2

*Jisuh a bawk awh*

<sup>1</sup> Herod teh siangpahrang lah ao navah, Judah ram Bethlehem kho dawkwah Jisuh teh a khe. Hatnavah âsikathoumnaw teh Jerusalem vah a pha awh.

<sup>2</sup> Ahnimouh ni, kanîtholah amae Âsi ka hmu awh dawkvah, ama bawk hanelah ka pátam awh. Judah siangpahrang ka khe e teh na maw ao telah a pacei awh.

<sup>3</sup> Hote lawk hah a thai awh navah, Herod siangpahrang hoi Jerusalem e tami pueng a tásue awh. <sup>4</sup> Vaihma bawi kalennaw hoi cakathutkungnaw pueng a pàkhueing teh, Khrih teh na maw a khe han telah a pacei.

<sup>5</sup> Hotnaw pueng niyah, Profet buet touh ni sut a thut e teh, <sup>6</sup> Oe, Judah ram Bethlehem kho, nang teh Judah ram khopuinaw hlak vah na thoungca hoeh. Bangkongtetpawiteh, ka tami Isarelnaw kaukkung Bawipa teh nathing hoi a táco han, ahni ni Isarelnaw teh a khoum han, hettelah Cakathoung dawkwah. Hatdawkvah Judah ram, Bethlehem kho dawkvah Khrih teh a khe han atipouh awh.

<sup>7</sup> Hahoi, Herod ni âsikathoumnaw hah a ru lah a kaw teh, Âsi a kamphawngnae atueng hah kahawicalah a pacei hoiyah cet a nateh camo ca hah kahawicalah tawng awh <sup>8</sup> Na hmawt awh pawiteh kai hai ka bawk van nahan, bout na thaisak awh, telah lawk a thui teh Bethlehem lah a patoun.

<sup>9</sup> Siangpahrang e a lawk hah a ngai awh teh a cei awh navah, kanîtholah a hmu e âsi teh ahnimae hmalah a cei dawkvah camo ca a onae lathueng a pha teh a kâhat. <sup>10</sup> Hote âsi bout a hmu awh toteh a konawm awh teh puenghoi a lunghawi awh. <sup>11</sup> Im thung a kâen awh navah a manu Meri hoi camo ca teh a hmu awh, a tabo awh teh camo a bawk awh. Amamae hno tabunaw a paawng awh teh sui, frankinsen hoi murah poehnonaw hoi a bawk awh. <sup>12</sup> Herod siangpahrang koe bout ban hoeh nahanlah a manglah Cathut ni kâhruetcuetnae a poe dawkvah, alouke lam lahoi amamouh kho lah a ban awh.

*Jisuh Izip ram lah a yawngkhai*

<sup>13</sup> Ahnimanaw a cei awh hnukkhu, Cathut e kalvantami teh Joseph e a mang lah a kamnue teh, thaw nateh camo hoi a manu hah Izip ram lah yawngkhai leih. Lawk bout ka dei hoehroukrak hote ram dawkwah awh. Herod siangpahrang ni camo hah thei hanlah a tawng han toe atipouh.

<sup>14</sup> Hahoi, Joseph a thaw teh, camo hoi a manu hah a hrawi teh, karum vah Izip ram lah a yawngkhai. <sup>15</sup> Herod siangpahrang a due ditouh hote ram dawkvah ao awh. Het hateh, Ka Capa hah Izip ram hoi ka kaw toe, telah Cathut ni Profetnaw hno lahoi a dei tangcoung e a kuep nahane doeh.

*Herod ni camonaw a thei*

<sup>16</sup> Âsikathoumnaw ni na dum awh toe tie Herod ni a panue navah, a lung puenghoi a phuen. Tami lungkaangnaw koe a pacei tangcoung e âsi a kamphawngnae koehoi, Bethlehem hoi a tengpam kho dawkwah e camo tongpa kum hni touh hoi a rahim pueng hah tami a patoun teh a thei sak.

<sup>17</sup> Profet Jeremiah ni a dei e, <sup>18</sup> Ramah kho thungvah khuika hoi hramki e lawk ka thai. A canaw ao hoeh toung dawkvah Rachel ni a khuika e cing thai hoeh, tie lawk hatnavah a kuep.

*Nazareth kho Jisuh khosaknae*



<sup>19</sup> Hatei, Herod a due hnukkhu, Izip ram vah Joseph e a mang lah Bawipa e kalvantami teh bout a kamnue pouh teh, <sup>20</sup> Thaw nateh a manu hoi camo hah Isarel ram lah cetkhai leih, camo thei hanlah katawngnaw teh a due awh toe, atipouh.

<sup>21</sup> Joseph a thaw teh a manu hoi camo hah Isarel ram lah a ceikhai. <sup>22</sup> Hatei, Herod yueng lah a capa Akhelaus ni Judah ram dawkwah baw lah ao tie a thai dawkvah, hote ram koe lah cet ngam hoe. A mang lah Cathut ni kâhruetcuetnae bout a poe e patetlah Galilee ram lah a cei. <sup>23</sup> Profetnaw ni sut a dei awh e lawk, Khrih hah Nazareth tami telah a kaw awh han, tie a kuep nahanelah Nazareth kho dawkwah a pha awh teh hawvah ao awh.

### 3

#### *Baptisma Jawhan ni lamthung a rasoun*

*Mrk 1:3-8; Luk 3:2-17*

<sup>1</sup> Hatnah e tueng nah, Baptisma kapoekung Jawhan teh, Judah ram kahrawngum vah, <sup>2</sup> Kalvan uknaeram teh a hnai toe. Hatdawkvah, pankângai awh leih telah a pathang. <sup>3</sup> Profet Isaiah ni sut a dei e teh, Kahrawng um vah kahram e lawk ni, Bawipa e lamthung teh pathoup awh. A lamthung teh lan sak awh ati navah, hote Jawhan doeh a dei ngai nah. <sup>4</sup> Jawhan teh Kalauk muen hoi kawng e a khohna teh, a keng dawkwah phauvuen taisawm a kâyeng teh, samtong hoi khoitui hah a canei.

<sup>5</sup> Jerusalem, Judah ram, Jordan tui teng e tami pueng ni Jawhan teh a pâmaw awh. <sup>6</sup> A yonnae pueng a pâpho awh teh, Jordan tui dawkwah Jawhan e baptisma teh a coe awh.

<sup>7</sup> Farasinaw hoi Sadusinaw, baptisma coe hanelah a tho awh e hah Jawhan ni a hmu navah, Oe, Tahrung hrnthoe catounnaw, ka tho hane lungkhueknae dawkwah hoi na hlout awh nahanelah apinimaw kâhruetcuetnae na poe a vaw. <sup>8</sup> Pankângainae hoi kamcu e tawksaknae hah sak awh. <sup>9</sup> Abraham teh kaimae na pa doeh telah pouk awh hanh. Na dei pouh awh, Cathut ni hete talungnaw hah, Abraham e a canaw lah a coung sak thai. <sup>10</sup> Thingkung koevah Cakâ sut ta lah ao toung dawkvah, a paw kahawi ka paw hoe e akung pueng teh, tâtueng vaiteh, hmai dawkwah phum lah ao han. <sup>11</sup> Kai ni teh pankângainae baptisma tui dawkwah na poe awh. Ka hnuklah ka tho e teh kai hlak hno a sak thai. Ahnie khokkhawmrui patenghai rasu pouh hanelah kai ka kamcu hoe. Ahni ni teh Kathoung Muitha hoi hmai hoi baptisma na poe awh han.

#### *Jisuh Baptisma coenae*

*Mrk 1:9-11; Luk 3:21,22; Jhn 1:31-34*

<sup>12</sup> A kut dawkwah para a sin teh kacailah pheng a hut. Cakang ka tak e teh capai dawkwah a cui. Hatei, cahiknaw teh karoum thai hoe e hmai hoi sawi lah ao han atipouh. <sup>13</sup> Hatnavah, Jisuh teh Galilee ram lahoi Jordan palang vah Jawhan koe baptisma coe hanelah a tho. <sup>14</sup> Jawhan ni, kai nough nang koe baptisma ka coe hane ei, nang ni kai koe lat na tho atipouh teh a cakâ. <sup>15</sup> Jisuh ni, Cathut ni tawkwah hanlah na ngaihai e pueng teh tawkwah hanelah ao dawkvah, atu baptisma na poe leih atipouh. Hahoi toreih teh, Jawhan ni a tarawi pouh.

<sup>16</sup> Jisuh baptisma a coe hnukkhu tui dawkwah hoi a thaw navah, kalvannaw a kamawng teh, Cathut e Muitha teh Âbakhu patetlah a kum e hah a hmu teh a tak dawkwah a cu pouh. <sup>17</sup> Kalvan hoi e lawk ni, ahni teh ka pahren poung e hoi ka lungkuep e Capa doeh, telah a dei.



## 4

*Jisuh Tacueknae**Mrk 1:12-13; Luk 4:1-13*

<sup>1</sup> Hahoi, Jisuh teh kahraimathout koe tacuek sak hanelah, Kathoung Muitha ni kahrawngum vah a hrawi. <sup>2</sup> A hnin 40 rum 40 touh rawca a hai toung dawkvah kamlum hanelah ao toe. <sup>3</sup> Katacuekkung ni rek a hnai teh, hettelah ati, nang teh Cathut Capa katang lah na awm pawiteh, hete talungnaw hah vaiyei lah a coung nahan kâ poe haw, ati pouh. <sup>4</sup> Hatei Jisuh ni, tami teh vaiyei hoi dueng hring mahoe, Cathut e lawk poe e puenghoi yah a hring han telah Cakathoung dawk thut lah ao atipouh.

<sup>5</sup> Hahoi Kahraimathout ni Jisuh hah khopui kathoung thungvah a hrawi teh, bawkim som dawk a ta. <sup>6</sup> Nang teh Cathut Capa katang lah na awm pawiteh, talai lah tâtawt haw. Bangkongtetpawiteh, kalvantaminaw hah nang han lah lawk ka thui toe. Talung daw, na khok na hman hoeh nahanelah, ahnimouh ni a kut hoi na tawmdawm awh han telah Cakathoung dawk thut lah ao atipouh. <sup>7</sup> Jisuh ni, na Cathut hah na tanouk mahoe telah thut lah bout ao, ati pouh.

<sup>8</sup> Hahoi teh Kahraimathout ni Jisuh hah mon ka rasang poung koe bout a ceikhai teh, talaivan uknaeram puenghoi talai bawilennae pueng hah a patue. <sup>9</sup> Na khokcuengkhuem laihoi kai na baw pawiteh, hete hnopai pueng hah na poe han atipouh. <sup>10</sup> Jisuh ni, Setan cet. Na Cathut dueng hah na bawk vaiteh, A thaw dueng hah na taw han ti Cakathoung dawk thut lah ao atipouh. <sup>11</sup> Hat toteh, Kahraimathout ni a kangheng takhai. Hahoi kalvantaminaw a tho awh teh, a khetyawt awh.

*Jisuh kamthang lawk dei kamtawngnae*

<sup>12</sup> Jawhan thongim a pabo awh, tie Jisuh ni a thai toteh Galilee ram lah a cei. <sup>13</sup> Nazareth kho a ceitakhai teh Zebulun hoi Naphtali ramri tuipei teng kaawm e Kapernaum kho a pha teh hawvah ao. <sup>14</sup> Hot hateh Profet Isaiah ni sut a dei tangcoung e lawk a kuep nahane doeh. <sup>15</sup> Sut a dei e lawk teh: Zebulun hoi Naphtali ram tuipei teng ceinae lamthung, Jordan palang ran Jentelnaw e Galilee ram, <sup>16</sup> hmonae thung kaawm e tami pueng ni, angnae kalenpoung teh a hmu awh. Duenae tâhlip thung kaawm e pueng koeh, angnae teh a pha. <sup>17</sup> Hatnae tueng hoi teh, Jisuh ni, pankângai a leih. Kalvan uknaeram teh a hnai toe telah kamthang lawk dei e a kamtawng toe.

*A hnukkâbangnaw apasuek kawnae**Mrk 1:16-20; Luk 5:2-11; Jhn 1:35-42*

<sup>18</sup> Jisuh ni Galilee tui teng a cei navah, a hmaunawngnae roi, Piter tie Simon hoi a nawngnae Andru, ahnimouh roi teh tangakamankungnaw lah ao roi teh, tali daw tanga a heng roi lahun e hah a hmu. <sup>19</sup> Ahnimouh roi koeh, ka hnukkâbang roi haw atipouh. Tami kamankung lah na sak roi han atipouh. <sup>20</sup> Ahnimouh roi ni tamlawk a ceitakhai roi teh, a hnuk tang a kâbang roi. <sup>21</sup> Hahoi, bout a cei teh, alouke hmaunawngnae roi, Zebedee e capa Jem hoi Jawhan teh, a na pa hoi long thung vah tamlawk a cip roi e hah a hmu teh a kaw. <sup>22</sup> Ahnimouh roi nihaiyah, vai touh lahoi, a na pa hoi long hah a ceitakhai roi teh, a hnuk a kâbang roi.

*Patawnae a dam sak*

<sup>23</sup> Jisuh teh Galilee ram pueng daw a cei teh, amamae kamkhuengnae sinakok dawkvah, a cangkhai, uknaeram kamthang kahawi a pâpho.



Patawnae puenghoi patawnae ahri pueng a roun sak. <sup>24</sup> A kamthang teh Siria ram pueng daw k a kamthang dawkvah, athung kahrai kâen e naw, kapathunaw, kamkhuennaw, puenghoi yah a cawngca e patawnae, damhoehnae kaawm e pueng hah, a thokhai awh teh, ahnimaie patawnae pueng hah, a roun sak pouh. <sup>25</sup> Galilee ram e, Dikapolis ram e, Jerusalem e, Judah ram e, Jordan palang teng e tamihupui ni a hnuk vah a kâbang awh.

## 5

### *Monsom Cangkhainae Yawhawinaenaw*

<sup>1</sup> Hote tamihupui hah a hmu navah Bawipa teh mon lah a luen. A tahung navah, a hnukkâbangnaw ni rek a hnai awh. <sup>2</sup> Hahoi, a kâko a ang teh a hnukkâbangnaw a cangkhai.

### *A yawkahawinaw*

<sup>3</sup> Muitha koe lah ka mathoe e taminaw teh, a yawhawi awh, bangkongtetpawiteh, kalvan uknaeram teh ahnimaie doeh. <sup>4</sup> Ka khuikap e taminaw teh, a yawhawi awh, bangkongtetpawiteh, lungpahawi e lah ao awh han. <sup>5</sup> A lung ka do, a lung ka nem e taminaw teh, a yawhawi awh, bangkongtetpawiteh, Cathut ni a kam pouh e ram a coe awh han. <sup>6</sup> Lannae hah a von lah ka hlam e taminaw teh, a yawhawi awh. Bangkongtetpawiteh, Cathut ni a lungngai akuiep sak han. <sup>7</sup> Tami kapahrennaw teh, a yawhawi awh, bangkongtetpawiteh, pahren lah ao van han. <sup>8</sup> A lung kathounge taminaw teh a yawhawi, bangkongtetpawiteh, Cathut a hmu awh han. <sup>9</sup> Rounnae ka sak e taminaw teh a yawhawi awh, bangkongtetpawiteh, Cathut e canaw telah kaw lah ao awh han. <sup>10</sup> Lannae kecu daw k rektap lah kaawm e taminaw teh a yawhawi awh, bangkongtetpawiteh, kalvan uknaeram teh ahnimaie lah ao.

<sup>11</sup> Kai kecu daw k tami pueng ni yon na pen awh teh na rektap awh navah, a yawkahawi e lah na o awh. <sup>12</sup> Na konawm awh. Puenghoi na lunghawi awh. Bangkongtetpawiteh, kalvan vah nangmaie tawkpheu kalenpoung ao. Hettelah doeh nangmouh hoehnahlan profetnaw hai a pacekpahlek awh.

### *Talai e palawi lah na o awh*

<sup>13</sup> Nangmouh teh talai e palawi lah na o awh. Palawi tie teh, a paannae kahmat pawiteh, a paannae hah bangtelah hoi maw bout hmu thai han toung. Tâkhawng hoi coungroe hane hloilah, banghai cungekinae awm hoi han.

### *Talai angnae lah na o awh*

<sup>14</sup> Nangmouh teh talaivan e angnae lah na o awh. Monsom kaawm e khopui teh bang ni hai ngue thai hoeh. <sup>15</sup> Hmai paang e hah apinihai tangthung hoi ramuk boihoeh. Im thung angnae a poe thai nahanelah, hmaiimkhok daw k doeh ouk pâhung awh. <sup>16</sup> Hot patetvanlah, nangmaie angnae teh tami mithmu vah ang naseh. Ahnimouh ni nange hnokahawi na sak e hmawt awh vaiteh kalvan kaawm e nangmaie na Pa teh a pholen awh han.

### *Kâlawk ka kuep sak e Jisuh*

<sup>17</sup> Kâlawk hoi Profet lawknaw raphoe hanelah kai teh ka tho telah pouk awh hanh. Raphoe hanelah ka tho hoeh, kuep sak hanelah doeh ka tho.

<sup>18</sup> Atangcalah na dei pouh awh. Kalvan hoi talai a rawk hoehroukrak,



kâlawk dawk e dekhrei e hoi calung buet touh boehai kuep laipalah awm mahoe. <sup>19</sup> Hatdawkvah, apipatet ni hai hete kâpoelawknaw daw kahoengcae buet touh boehai a tapoe teh, hot patetvanlah, ayânaw hai cangkhai pawiteh, kalvan uknaeram thungvah kahoengcae lah ao han. Hatei, apipatet ni hai kâpoelawknaw hah a tarawi teh, hot patetvanlah, ayânaw hai cangkhai pawiteh, kalvan uknaeram thungvah ahni teh kalen lah ao han. <sup>20</sup> Nangmouh koe na dei pouh awh. Nangmae lannae teh Farasinaw hoi cakathutkungnaw e lannae hah tapuet hoehpawiteh, kalvan uknaeram thung na kâen a mahoe.

<sup>21</sup> Tami thet hanh. Apihai tami ka thet e teh, lawkcengnae a khang hanlah a kamcu tie kâlawk karuem teh na thai awh toe. <sup>22</sup> Kaie kâlawk teh, apipatet hai a hmaunawngna koe a lung ka khuek e teh, sanhedrin lawkcengnae taki ka tho a khang han. Apipatethai a hmaunawngna koe sin e teh lawk tâtuengnae koevah a pha han. Apipatethai a hmaunawngna thoe ka bo e teh, Hell hmai dawkvah hmaikaknae a khang hanlah a kamcu. <sup>23</sup> Hatdawkvah, bawk nahanelah hnopai na sin navah, na hmaunawngna ni na toun tie na panuek pawiteh, thuengnae khoungroe hmalah, na hnopai hah tat nateh, <sup>24</sup> na hmaunawngna hoi hmaloe kâmai hawi ei, hahoi torei na hnopai hah thuengnae bout sak. <sup>25</sup> Na ka toe e hoi lam reirei na cei roi lahun nah, hnâbonae hah karanglah sak leih. Hoehpawiteh, na ka toe e ni lawkcengkung koe na thak vaiteh, lawkcengkung ni karingkungnaw koe na poe vaiteh, nang teh thongim thung paung lah na o han toe. <sup>26</sup> Atangcalah na dei pouh: na laiba na patho hoehroukrak thongim hoi na tâcawt thai mahoe.

### *Uicuk hanh*

<sup>27</sup> Na uicuk mahoe tie kâlawk karuem teh na thai awh toe. <sup>28</sup> Kaie kâlawk teh, uicuk ngainae lungthin hoi ayâ yu ka khien e tami teh, a lungthung vah hote napui coungkacoelah a yonkhai toe. <sup>29</sup> Hatdawkvah, aranglae na mit ni na yon sak pawiteh, hote na mit hah cawngkhawi lawih. Na takbuem lahoi hell daw koe na bo hlak teh, na tak daw koe puengcang buet touh a rawk e heh bet ahawihnawn. <sup>30</sup> Hot patetvanlah, aranglae na kut ni nakunghai na yon sak pawiteh, hote na kut hah tâtueng lawih. Na takbuem lah hell daw koe na bo hlak teh, na tak daw koe puengcang buet touh a rawk e heh bet ahawihnawn.

### *Yuvâ kâkapeknae*

<sup>31</sup> Apihai a yu mat ngai pawiteh, yu manae ca poe seh tie kâlawk karuem teh ao toe. <sup>32</sup> Kaie kâlawk teh: Apihaiyah uicuknae laipalah, a yu ka mat e teh, a yu hah a yon sak. Hot dueng laipalah, ma lah kaawm e napui hah ka lat e tami hai bout a yon sak.

### *Thoebonae*

<sup>33</sup> Laithoe hoi theobo hanh. Cathut koe thoe na kâbo e teh cak seh, tie kâlawk karuem teh na thai awh toe. <sup>34</sup> Kaie kâlawk teh, theobonae khoeroe sak awh hanh. Kalvan noe lahoi theobo awh hanh, hotteh Cathut e bawitungkhung doeh. <sup>35</sup> Talai noe lahoi theobo awh hanh. Talai teh Cathut khok toungnae doeh. Jerusalem noe lahoi theobo awh hanh. Jerusalem teh Siangpahrang e khopui doeh. <sup>36</sup> Na lû noe lahoi theobo hanh. Na samrui buet touh boehai na pangaw sak thai hoe. Na tamang sak thai hoe. <sup>37</sup> Na lawk hah ue pawiteh ue, nahoeh pawiteh nahoeh tie lah awm nah nei. Hethloi e lawk teh kahawihoehe doeh a tâcokhai.

### *Pathung hanh*



<sup>38</sup> Mit yueng lah mit, hâ yueng lah hâ tie kâlawk karuem teh na thai awh toe. <sup>39</sup> Kaie kâlawk teh: na ka rek e hah cakâ awh hanh. Na hmaibei tambei awh pawiteh, avanglae rek patueng pouh awh. <sup>40</sup> Na angki na lawm awh pawiteh, na kâkhu e hah rek poe sin awh. <sup>41</sup> Na ka ukkungnaw ni meng touh na cet sak awh pawiteh, meng hni touh cet pouh awh. <sup>42</sup> Ka hete hah poe awh. Cawi han ka ngai e tami hah pâban hanh.

### *Na taran lungpataw*

<sup>43</sup> Nama hoi kâkuen e tami hah nama patetlah lungpataw nateh, na taran hah hmuhma, tie kâlawk karuem teh na thai awh toe. <sup>44</sup> Kaie kâlawk teh kalvan kho kaawm e nangmae Na pa e capa lah na o thai nahanlah na tarannaw hah lungpataw awh. Thoe na ka bo e naw hah lungpataw awh. Nangmouh na ka maithoe e hah hawinae sak pouh awh. Nangmouh ka tarawk ni teh na ka rektap e naw hanelah Cathut koe ratoum pouh awh. <sup>45</sup> Bangkongtetpawiteh kalvan kho kaawm nangmae na Pa ni tamikahawi hoi tamikahawihoe e lathueng vah kanî a tâco sak. Tamikahawi hoi tamikahawihoe e lathueng vah kho a rak sak. <sup>46</sup> Nangmouh lungpataw naw koe dueng na lungpataw awh pawiteh bangmaw tawkphu kaawm. Tamuk kacawngnaw ni patenghai yah hettelah ngoun teh a sak awh nahoehmaw. <sup>47</sup> Kawibang koe dueng khetyawtnae na sak pawiteh bangmaw bet na tapuetae kaawm vaw. Kayuemhoehnaw ni patenghai yah hettelah ngoun teh a sak a nahoehmaw. <sup>48</sup> Hatdawkvah nangmae kalvanlae Na pa teh a kuep e patetlah nangmouh haiyah kuep van awh atipouh.

## 6

### *Karoedengnaw poe awh*

<sup>1</sup> Hnokahawi na sak e taminaw hmalah na tawk na sak awh hoe hah nahanlah kâhruetcuet awh. Telah hoehpawiteh Kalvan kho kaawm nangmae na Pa koehoi tawkphu na coe awh mahoe h.

<sup>2</sup> Hatdawkvah hno na poe awh navah ka kâsaknaw ni a sak awh e patetlah sak awh hanh. Ahnimanaw teh taminaw e barinae a ngai awh dawkvah tamikâluinae koe, lamsalunnaw koe, mongka ueng laihoi sinakok koe a sak awh e patetlah sak awh hanh. Atangcalah na dei pouh awh. Ahnimouh teh amamae tawkphu hah a hmu awh toe. <sup>3</sup> Hno na poe awh navah na poe tie a kamnue thai hoe h nahanelah aranglae na kut ni a sak e hah avoilah e na kut panuek sak hanh. <sup>4</sup> Arulahoi na sak e kahmawtkung na pa ni tawkphu hah kancengcalah na poe han.

### *Ratoumnae*

#### *Luk 11:2-4*

<sup>5</sup> Na ratoum awh navah ka kâsaknaw patetlah ratoum awh hanh. Ahnimouh teh tami pueng ni na hmu kong titeh sinakok koe a kangdue awh teh ratoum e hah a lungpataw awh. Atangcalah na dei pouh awh. Ahnimouh teh amamae tawkphu hah a hmu awh toe. <sup>6</sup> Na ratoum awh navah na imthungkhu kâen awh nateh takhang na khan awh hnukkhu mithmuhoehnae koe kaawm e na pa koe ratoum awh. Mithmu hoe e kahmawt e na pa ni tawkphu hah kancengcalah na poe awh han. <sup>7</sup> Na ratoum awh navah Jentelnaw patetlah cungkeihoehe lawk hoi boutbout pâbo awh hanh. Ahnimouh ni teh lawk moikapap dei e lahoi mae lungngai akuiep han telah a pouk awh. <sup>8</sup> Hotnaw patetlah sak awh hanh.



Bangkongtetpawiteh nangmouh ni na ngai awh e hno pueng teh na hei awh hoehnahan vah nangmae na Pa ni a panue toe.

<sup>9</sup> Hatdawkvah na ratoum awh hane teh: Kalvan kho kaawm maimae na Pa, na min barinae awm lawiseh. <sup>10</sup> Na uknaeram phat lawiseh. Na lungngainae kalvan vah akupe e patetlah talai van hai kuep lawiseh. <sup>11</sup> Von kaw k khuem rawca sahnin kaimouh na poe awh haw. <sup>12</sup> Ayâ ni ka tak daw k a yon e ka ngaithoum e patetlah kaimae yonnae hai na ngaithoum haw. <sup>13</sup> Yon tacueknae daw k ka baw k payon hoeh nahanlah a thoena koehoi na rungngang haw. Uknaeram, bahu, hoi bawilenna pueng teh a yungyoe nange doeh. Amen. telah ratoum awh.

<sup>14</sup> Nangmouh koe yonnae ka sak e naw hah na ngaithoum awh pawiteh nangmae kalvanlae na Pa ni nangmae yonnae hai na ngaithoum van han. <sup>15</sup> Hatei, nangmouh koe yon kasaknaw e yonnae hah na ngaithoum awh hoehpawiteh nangmae na Pa ni nangmae yon hai ngaithoum van mahoe.

### *Rawcahinae*

<sup>16</sup> Nangmouh teh rawca na hai awh navah ka kâsaknaw e patetlah na minhmai daw k kamnuek sak awh hanh. Ahnimouh teh rawca a hai awh, tie hah taminaw hmalah a minhmai daw k kamnue sak awh. Atangcalah na dei pouh awh. Ahnimouh teh amamae taw kphu hah a hmu awh toe. <sup>17</sup> Hatei, nangmouh teh rawca na hai awh navah taminaw e hmalah kamnuek sak awh hanh. <sup>18</sup> Mithmuhoehnae koe kaawm e na Pa hmalah dueng kamnuek sak awh. Na lû satui kâhluk nateh na sam hak so awh. Na minhmai hak pâhla awh. Mithmu hoeh e ka hmaw t e nangmae na Pa ni taw kphu hah kamcengcalah na poe awh han.

### *Kalvan vah râw pâkhueng awh*

#### *Luk 11:34-36*

<sup>19</sup> Sumei hoi khakbara ni a ca thainae koe, tamru ni a paru thainae koe talai van vah na hno pâkhueng awh hanh. <sup>20</sup> Sumei hoi khakbara ni a cathaihoehnae koe, tamru ni a paruhoe hnae koe kalvan kho vah na hno hah pâkhueng awh. <sup>21</sup> Bangkongtetpawiteh na hno aona koe vah na lungthin hai ao van.

### *Tak e angnae teh mit*

<sup>22</sup> Mit teh tak e hmaiim lah ao. Na mit hawi pawiteh na tak abuemlah a ang han. <sup>23</sup> Hatei, na mit hawihoeh pawiteh na tak abuemlah a hmo han. Na tak daw k kaawm e na angnae hah hmot pawiteh hote hmonae teh banghloimaw a hmo han.

### *Cathut hoi Tangka*

<sup>24</sup> Apihai bawi kahni touh e san lah awm thai hoeh. Bawi buet touh hah pahnawt vaiteh buet touh hah a lungpataw han. Hoehpawiteh buet touh hah banglahai na pouk hoeh vaiteh, buet touh hah na kâuep han. Cathut hoi tangka san lah vai touh lahoi mek na taw k thai mahoe.

### *Na lungpuen hanh*

#### *Luk 12:22-31*

<sup>25</sup> Hatdawkvah bangne ka canei han tihoi na hring na hanlah na lungpuen awh hanh. Bangne ka khohna han tihoi na tak hanlah na lungpuen awh hanh. Rawca hlak hringnae heh apu bet ao nahoe hma. Khohna hlak na tak apu bet ao nahoe hma. <sup>26</sup> Kahlun kamle ng e tavanaw hah khenhaw. Hote tavanaw ni cati hai patûe awh hoeh, cang hai a awh hoeh, capai daw k pâkhueng awh hoeh. Hatei, nangmae kalvanlae



na Pa ni hotnaw hah a kaw. Hote tavanaw hlak nangmouh teh apu moi na awm awh hoeh maw. <sup>27</sup> Apimaw a lungpuennae lahoi amae hringnae hah bet ka saw sak thai han.

<sup>28</sup> Bangkongmaw khohna hane daw. <sup>29</sup> Solomon siangpahrang e khohna e ni hote akung e khohna boehai phat hoeh. <sup>30</sup> Yuemnae kayounnaw, sahnin kahring ni teh tangtho hmai daw phum e phonaw patenghai hottelah Cathut ni pathoup pawiteh nangmouh natawng teh hot hlak na pathoup awh mahoe na maw. <sup>31</sup> Hatdawkvah bangne ka canei han, bangne ka khohna han ti hoi na lungpuen awh hanh. <sup>32</sup> Jentelnaw ni doeh het patet e hnonaw daw a lungpuen awh. Nangmouh ni na panki awh e hah nangmae kalvanlae na Pa ni koun a panue. <sup>33</sup> Hatei, Cathut uknaeram hoi a lannae hah hmaloe tawng awh. Hathnukku hote hnonaw teh na poe sin awh han. <sup>34</sup> Hatdawkvah tangtho hanelah lungpuen awh hanh. Tangtho e hnin ni nang han lah a lungpuen han doeh. Sahnin kaawm e hno kahawihoehe hah sahnin hanelah a khout.

## 7

### *Ayânaw lawkceng awh hanh.*

*Luk 6:41-42*

<sup>1</sup> Nangmouh teh lawkceng lah na o awh hoeh nahanlah, ayânaw hah lawkceng awh hanh. <sup>2</sup> Ayânaw lawk na ceng e patetlah nama hai lawkceng lah na o van han. <sup>3</sup> Na mit daw e thingtaboung teh na pouk laipalah, hmaunawngah mit daw e songnawng teh bangkongmaw khuet na hmu vaw. <sup>4</sup> Na mit daw e thingtaboung ao nahlangva vah na hmaunawngah koe na mit daw e songnawng ca hah na lat pouh vai khuet na ti a vaw. <sup>5</sup> Ka kâsak e naw : na mit daw e thingtaboung hah hmaloe takhoe awh ei. Hat boipawiteh nouh na hmaunawngah mit daw e songnawngca hah kacaicalah na hmawt vaiteh na lat thai ti. <sup>6</sup> Kathounge hno hah Uinaw poe awh hanh. Pale hah voknaw hmalah tâkhawng awh hanh. A khok hoi coungroe awh vaiteh, nama koe lah kamlang awh vaiteh na kei awh han.

### *Het, tawng, takhawng*

*Luk 6:41-42*

<sup>7</sup> Het awh. Poe lah na o awh han. Tawng awh, na hmu awh han. Takhawng awh, takhang teh nangmouh hanlah paawng lah ao han. <sup>8</sup> Apihai ka hete ni teh a hmu. Ka tawng e ni teh a pâphawng. Ka takhawng e teh paawng pouh lah ao. <sup>9</sup> Nangmouh thung dawkvah, na ca ni vaiyei a hei nah talung ka poe hane tami na o a maw. <sup>10</sup> Hoehpawiteh, tanga a hei nah tahrin ka poe hane tami na o a maw. <sup>11</sup> Nangmouh ni patenghai canaw hanelah, hno kahawi poe hanelah na panuek awh pawiteh, kalvan kho kaawm e nangmae na Pa ni natawng teh, ka hetnaw hah banghloimaw kahawi e poehnonaw hah a poe han! <sup>12</sup> Hatdawkvah, nama koe ayânaw ni hnokahawi sak sak han na ngai e patetlah, ayânaw koehai sak van. Hethateh, kâlawk pueng hoi profetnaw e lawk doeh.

### *Kabueng e longkha hoi ka kaw e longkha*

<sup>13</sup> Kabueng e longkha daw kâen awh. Rawknae koe ka phatkhai e longkha hoi lam teh a kaw dawkvah, ka dawn e tami apap. <sup>14</sup> Hringnae



koe ka phatkhai e longkha hoi lam teh a bueng dawkvah kâen e tami teh a youn ca.

### *Thingkung hoi a paw*

<sup>15</sup> Profetkaphawknaw hah kâhruetcueth awh. Nangmouh koe a tho awh navah, tupho a kâkhu awh teh tu patetlah a kâsak awh. Athung teh Asui ka matheng lah ao awh. <sup>16</sup> Hotnaw teh amamae a paw lahoi na nout a thai. Pâkhing tangdun dawkh hoi misurpaw paw boihoe. Pâkhingkung dawkh hoi thaibunglung paw paw boihoe. <sup>17</sup> Hot patetvanlah, thingkung kahawi ni a paw kahawi a paw teh, thingkung kahawihoehe ni a paw kahawihoehe a paw van. <sup>18</sup> Thingkung kahawi ni a paw kathout paw boihoe, hahoi, thingkung kathout ni a paw kahawi paw boihoe. <sup>19</sup> A paw kahawi ka paw hoehe e thingkungnaw pueng tâtueng vaiteh hmai dawkh phum lah ao han. <sup>20</sup> Hot patetvanlah profetkaphawknaw teh amamae paw lahoi nout thai e lah ao.

<sup>21</sup> Bawipa, Bawipa ka tet e pueng ni kalvan uknaeram thung a kâen awh han tinae nahoeh. Hatei, kalvan kho kaawm e a Pa lungngai ka sak e dueng ni doeh a kâen han. <sup>22</sup> Tami moikapap ni hot hnin toteh, Bawipa, Bawipa, na min lahoi Cathut lawk ka dei a nahoehmaw. Na min lahoi kahrailuinau hai ka pâlei a nahoehmaw. Na min lahoi kângairu hnônaw hai ka sak a nahoehmaw. , telah ati awh han. <sup>23</sup> Hat toteh, kai ni nangmanaw khoeroe na panuek awh hoehe. Cet awh. Hnokahawi ka sak hoehe e naw, telah kamcengcalah ka ti pouh awh han.

### *Im kasakkung*

*Luk 6:47-49*

<sup>24</sup> Hatdawkvah, apipatet hai ka dei e lawknaw hah a thai teh ka tarawi e tami teh, lungsong dawkh im ka sak e tami a lungkaang e hoi a kâvan. <sup>25</sup> Kho a nan, tui a len, kahlî a tho teh hote im hah a hman. Hat nakunghai rawm hoehe. Bangkongtetpawiteh, lungsong dawkh adu a ung dawkvah. <sup>26</sup> Hatei, apipatet hai ka dei e lawknaw hah a thai teh ka tarawi hoehe e teh, sadi dawkh im ka sak e tami ka pathu e hoi a kâvan. <sup>27</sup> Kho a nan, tui a len, kahlî a tho teh hote im a hman toteh kayawicalah a rawp teh peng kâraphoe teh a rawk.

<sup>28</sup> Jisuh ni hete lawknaw pueng kung a dei hnukkhu vah, tamimaya teh a cangkhai e dawkh a kângairu awh. <sup>29</sup> Bangkongtetpawiteh, cakathutkungnaw patetlah cangkhai laipalah, kâkatawnnaw patetlah a cangkhai.

## 8

### *Hrikbei e a dam sak*

*Mrk 1:40-44; Luk 5:12-14*

<sup>1</sup> Jisuh mon lahoi a kumcathuk navah tami moikapap ni a hnuk a kâbang awh. <sup>2</sup> Hatnavah ka hrikbei e tami buet touh ni a tabo teh, Bawipa na ngainae awm pawiteh na thoung sak thai, atipouh.

<sup>3</sup> Jisuh ni, ka ngainae ao, thoungnae koe phat lawih, atipouh teh, a kut a dâw teh a tek. Dawngdengca dawkh a hrikbei a kahma teh thoungnae koe a pha. <sup>4</sup> Jisuh ni, hete kong heh api koehai na dei pouh hoehe nahanlah kâhruetcueth. Vaihmanaw koe cet nateh, na tak hah patue. Ayânaw koe lawkpanuesaknae lah ao nahan, Mosi ni kâ poe e patetlah thuengnae hah sak, atipouh.



*Ransabawi e a yuemnae**Luk 7:1-10*

<sup>5</sup> Hathnukkhu, Kapernuam kho lah a cei navah, ransabawi buet touh a tho teh, <sup>6</sup> Bawipa, kaie ka san buet touh teh a kutkhok roup a kamkhuen, puenghoi patawnae a khang teh im vah sut a yan telah a kâhei. <sup>7</sup> Jisuh ni, ka tho vaiteh ka dam sak han, atipouh. <sup>8</sup> Hahoi ransabawi ni, Bawipa im dawk na tho hane heh kamcu hoeh. Lawk kam touh ma na dei pawiteh kaie ka san teh a dam han doeh. <sup>9</sup> Bangnue nae lah, kai teh kâtawnnae rahim vah san lah ka o eiteh, ransanaw hah ka uk. Buet touh cet ka tet pouh pawiteh a cei, buet touh hi tho ka tet pouh pawiteh, a tho. Ka san haiyah hete tawk ka tet pouh pawiteh, a tawk telah ransabawi ni atipouh.

<sup>10</sup> Hote lawk hah Jisuh ni a thai navah a kângai lah a ru teh, atangcalah ka dei e teh, hettelah totouh e yuemnae hah Isarel miphunnaw daw patenghai ka hmawt boihoe rah. <sup>11</sup> Bout ka dei e teh, tami kapap ni, kanitho, kaniloumlah hoi tho vaiteh kalvan uknaeram thungvah Abraham, Isak, Jakop tinaw hoiyah cungtalah a tahung awh han. <sup>12</sup> Uknaeram thung e naw teh hâ kata hoi khuikanae, alawilah, hmonae koe pâlei lah kaawm han telah a hnukkâbangnaw koe a dei pouh. <sup>13</sup> Hathnukkhu ransabawi hah, cet leih. Na yuemnae patetlah nang koe awmseh, atipouh. Hatnah tahma vah a san e patawnae pueng a kahma teh damnae a hmu.

*Tami moikapap patawnae a dam sak**Mrk 1:29-34; Luk 4:38-41*

<sup>14</sup> Hathnukkhu vah, Piter im Jisuh a tho teh, Piter e a masei napui a pataw teh sut a yan e hah a hmu. <sup>15</sup> Hote napui e a kut hah a tek pouh navah, a patawnae a kahma pouh dawkvah, a thaw teh, Bawipa hah kahawicalah a khetyawt. <sup>16</sup> Tangmin vah, kahraikathout ni a man e taminaw hah a thokhai awh teh, a lawk hoiyah hote kahraituulinaw hah a pâlei pouh. Ka pataw e pueng hah a dam sak. <sup>17</sup> Het hateh, profet Isaiah ni a dei e, ahni ni maimae patawnae pueng a phu toe, tie lawk a kuep nahane doeh.

*Jisuh hnukkâbang e**Luk 9:57-60*

<sup>18</sup> Tami moikapap ni Jisuh a kaven awh e a hmu awh navah, namran lah cei hanelah kâ a poe. <sup>19</sup> Hatnavah kâlawk ka cangkhai saya buet touh ni a teng vah a tho teh, Bawipa, na ceinae hmuen koe kâbang van han atipouh. <sup>20</sup> Jisuh ni Asuinaw ni khu a tawn. Kahlun kamleng e tavanaw ni kâhat nahane tabu a tawn awh. Tami Capa teh a lû toung nahane boehai awm hoeh atipouh. <sup>21</sup> A louk e a hnukkâbang buet touh nihai, Bawipa, ka cei vaiteh, apa e ro hah hmaloe ka pakawm ei nei, atipouh. <sup>22</sup> Jisuh ni, ka hnuk kâbang haw. Kadoutnaw ni amamae tami kadoutnaw hah pakawm a ngoun seh, atipouh.

*Tuicapa a roum sak**Mrk 4:36-41; Luk 8:22-25*

<sup>23</sup> Hatnavah, long thung a kâen teh a hnukkâbangnaw ni a kâbang awh. Talî daw k tuicapa thouk a thaw dawkvah long hah muen a khu. <sup>24</sup> Hatnavah Jisuh teh a i. <sup>25</sup> A hnukkâbangnaw ni, Jisuh hah a pâhlaw awh. Bawipa maimouh pueng teh due awh han toe hei, na rungngang awh leih atipouh awh. <sup>26</sup> Jisuh ni, yuemnae a thakayounnaw, bangkongmaw na taki awh, telah atipouh hnukkhu, a kangdue teh, kahlî hoi tuipui hah a



yue teh a roum sak. <sup>27</sup> Ahnimanaw ni, bangpatetlah e tami ma aw, kahli hoi tuicapa ni hai a lawk a ngai pouh bo aw titeh a kângai lah a ru awh.

*Kahraikathoutnaw pâleinae*

*Mrk 5:1-17; Luk 8:26-37*

<sup>28</sup> Namran lah kaawm e Gadarenes ram lah a pha navah, kahrai ni a man e tami kahni touh hawvah ao roi, apihai hote lam a dawn thai awh hoeh nahanlah a mathengpaan roi. Phuen hoi a tâco roi teh Jisuh a dawn roi.

<sup>29</sup> Cathut Capa Jisuh, kaimouh hoi bangtelamaw na kâkuet vaw. Atueng a pha hoehnahlan kaimouh hah rektap hanelah khuet na tho vaw telah hramki laihoi ati roi.

<sup>30</sup> Ahnimouh hoi ek ahlahoehnae koe voknaw moikapap a pâ awh.

<sup>31</sup> Kahraituilinaw niyah, Jisuh kaimouh na hrek pawiteh hote voknaw thungvah na kâen sak telah a kâhei awh. Jisuh ni, cet awh atipouh.

<sup>32</sup> Kahrainaw hai a tâco awh teh voknaw thung a kâen awh. Vok kaawm e pueng teh tui teng pango dawk hoi a tâto awh dawkvah tui dawk koug a due awh. <sup>33</sup> Vok kakhoumnaw kothung a yawng awh teh, kahraikathout ni a man e tami roi e kong hoi a hmu awh e naw pueng hah a dei awh dawkvah, <sup>34</sup> Kothung e taminaw pueng ni Jisuh kâhmo hanelah a tâco awh. Jisuh hah a kâhmo awh toteh kaimae ram thung hoi a tâco hanelah a kâhei awh.

## 9

*Kutkhok kamkhuen e a dam sak*

*Mrk 2:3-12; Luk 5:18-26*

<sup>1</sup> Hahoi, Jisuh ni long dawk a kâcui teh, a ma onae kho tui namran lah a pha navah, <sup>2</sup> a kutkhok kamkhuen e tami buet touh ikhun dawk sut ka yan e hah ama koe a thokhai awh. Jisuh ni hotnaw e yuemnae hah a hmu navah, ka kamkhuen e tami hanelah, ka capa, kângai hanh. Na yon ngaithoum lah ao toe. <sup>3</sup> Cakathutkungnaw tangawn ni teh Cathut ka tapuet lah lawk a dei telah a pouk awh.

<sup>4</sup> Jisuh ni hotnaw e lungpouk hah a hmu navah, nangmouh ni bangkongmaw utsinnae lung na tawn awh. <sup>5</sup> Bang lawk maw dei bet ka yawihnawn. Na yon ngaithoum lah ao toe tie maw bet ka yawihnawn, nahoehteh thaw nateh cet leih tie maw bet ka yawihnawn. <sup>6</sup> Tami Capa teh talaivan vah yon ngaithoum thainae kâtawnnae ka tawn tie nangmouh na paanue awh nahanelah, thaw leih. Na phailei hah sin nateh nama im vah cet leih, telah ka kamkhuen e tami hah atipouh. <sup>7</sup> Ahni ni a thaw teh a ma im vah a cei. <sup>8</sup> Tami kamkhuengnaw ni a hmu awh navah a kângairu awh teh, taminaw koevah hettelah sak thainae kapoekung kahring Cathut hah a pholen awh.

*Matthai a kawnae*

*Mrk 2:13-17; Luk 5:27-32*

<sup>9</sup> Hote hmuen koehoi Jisuh a cei navah, tamuk cawngnae im dawk ka tahung e Matthai hah a hmu navah, ka hnuk kâbang haw atipouh. Ahni hai a thaw teh, a hnuk a kâbang. <sup>10</sup> Hathnukkhu imthung bu ca hanlah a tahung navah, tamuk kacawngnaw hoi tamikathoutnaw a tho awh teh, a hnukkâbangnaw hoi rawca reirei a ven awh. <sup>11</sup> Farasinaw ni a hmu awh toteh, a hnukkâbangnaw koe, nangmae Bawipa teh bangkongmaw tamuk kacawngnaw, tamikathoutnaw hoi cungtalah reirei a caneï vaw, atipouh awh.



<sup>12</sup> Jisuh ni a thai navah, a tak kadamnaw ni tâsibawi panki awh hoeh. Kapatawnaw ni doeh a panki awh. <sup>13</sup> Thuengnae hlak hai pahrennae doeh ka ngai tie na thai panuek awh nahanlah cet a nateh kamtu awh. Tami kalannaw kaw hanlah ka tho hoeh, tamikayonnaw hanelah doeh ka tho, atipouh.

*Rawcahainae kong a pacei awh*

*Mrk 2:18-22; Luk 5:33-39*

<sup>14</sup> Hatnavah Jawhan e a hnukkâbangnaw ni ahni koe a hnai awh teh, kaimouh hoi Farasinaw ni rawca ka hai awh. Bangkongmaw na hnukkâbangnaw ni rawca a hai awh hoeh vaw, atipouh awh. <sup>15</sup> Jisuh ni, yupaluengkung teh amae a huikonaw hoi rei ao navah, ahnimouh teh a lungmathoe a maw. Yupaluengkung hah a huikonaw hoi kapek teh alouklah ceitakhainae tue ka phat han. Hattoteh ahnimouh ni rawca a hai awh han.

<sup>16</sup> Khohna a kapawn e hah a katha e hoi ouk bo awh hoeh. Hottelah bo pawiteh bonae ni bo e hah vak sawn vaiteh hoe kâphi han. <sup>17</sup> Hot patetvanlah, phaivuen um karuem dawk misurtui katha e hlun boihoeh. Hottelah hlun pawiteh, phaivuen um karuem tangpawk vaiteh, misurtui a yu han, phaivuen um hai karawk han. Ahruem e misurtui teh a katha e phaivuen um dawk doeh ouk hlun. Hottelah hlun to doeh kahni touh hoi a cuem han, atipouh.

*Ka dout e napui hoi thikui e napui*

*Mrk 5:22-43; Luk 8:41-56*

<sup>18</sup> Hete lawknaw a dei lahun nah, bawi buet touh a tho teh, a tabo laihoi Bawipa, ka canu teh atuhlangca a due toe. Hatei, na tho teh, a van vah na kut na tounge sin pawiteh bout a hring han atipouh. <sup>19</sup> Jisuh ni a thaw teh a hnukkâbangnaw hoi ahnie a hnuk a kâbang awh.

<sup>20</sup> Hatnavah, kum hlaikahni touh thung thikui patawnae ka tawn e napui buet touh ni, <sup>21</sup> a kâkhu e hni pawî ma hah dek ka tek pawiteh ka dam han telah a pouk dawkvah, rek a hnai teh hni pawî hah dek a tek.

<sup>22</sup> Jisuh ni a kamlang teh hote napui hah a hmu navah, ka canu, kângai hanh. Na yuemnae ni na patawnae a dam sak toe, atipouh. Hat nah hote napui teh a patawnae a dam pouh. <sup>23</sup> Bawi im a pha awh toteh, tapueng longpan kakhawngnaw hoi taminaw teh ruengrueng ati awh e a hmu navah, <sup>24</sup> na phoun awh haw, napui ca teh kadout e nahoe, ka ip e doeh, atipouh. Hahoi ahnimanaw ni a panuikhai awh. <sup>25</sup> Haw e taminaw hah koung a tâco sak teh, imthungkhu a kâen, napui ca e a kut dawk a tek pouh tahma vah, napui ca teh hluet a thaw. <sup>26</sup> Hote kamthang teh khoram pueng dawk a kamthang.

*A mit ka dawnnaw hoi lawkanaw a dam sak*

<sup>27</sup> Jisuh ni hote hmuen koehoi a tâco navah, a mit ka dawn e tami kahni touh ni a hnuk a kâbang roi teh, Devit capa, kaimouh roi heh na pahren haw, telah a hramki roi. <sup>28</sup> Imthung a kâen navah a mit ka dawn e roi ni rek a hnai roi. Bawipa ni hete heh kai ni ka coung sak thai tie hah na yuem roi maw telah a pacei. Ahnimouh roi ni, ka yuem Bawipa ati roi.

<sup>29</sup> Ahnimouh roi e a mit dawk a tek pouh teh, na yuemnae patetlah nangmouh roi koe awmseh, atipouh navah ahnimouh roi e mit teh a ang.

<sup>30</sup> Jisuh ni, apihai panuek sak roi hanh lah a, telah kâhruetcuetnae a poe.

<sup>31</sup> Hatei, ahnimouh roi ni a cei roi teh, hote kamthang hah ram thung pueng a pathang roi.



<sup>32</sup> Ahnimanaw a cei a hnukkhu, kahrai ni a man e tamipathu buet touh ama koe a hrawi awh. <sup>33</sup> A thung e kahrai a pâlei pouh toteh, hote ka pathu e ni lawk a dei. Ka kamkhueng e pueng teh a kângai lah a ru awh teh, Isarel miphun dawk het patetlah e hmawt boihoe rah ati awh. <sup>34</sup> Farasinaw ni kahrailuulinaw e bawi a kâuep laihoi doeh kahrailuulinaw a pâlei ati awh.

<sup>35</sup> Jisuh ni khopui khote pueng dawk a cei teh, sinakoknaw dawkvah uknaeram kamthang kahawi hah a cangkhai. Patawnae a cawngca hoi kapatawnaw a dam sak. <sup>36</sup> Ahnimanaw teh ngawt a tawn awh toung dawkvah, tukhoumkung kaawm hoe e, pahnawt e tunaw patetlah a hmu. <sup>37</sup> Hatnavah, Jisuh ni, canga hane moi ao. Ka tawk e naw teh a younca.

### *Thaw katawkkung ayounca*

<sup>38</sup> Hatdawkvah, law katawkkung koe ratoum awh, canga sak hanelah thawtawkkung a patoun thai nahanlah atipouh.

## 10

### *A hnukkâbang hlaikahni touh*

<sup>1</sup> A hnukkâbang hlaikahni touh hah a kaw teh, kakhine muithanaw pâlei thainae, patawnae aphunphun dam sak thainae kâ a poe. <sup>2</sup> Guncei hlaikahni touh e a minnaw teh, apasuek vah Piter telah kaw e Simon hoi a nawngha Andru, <sup>3</sup> Zebedee e capa Jem hoi a nawngha Jawhan, Filip hoi Bartholomew, Thomas hoi tamuk ka cawng e Matthai, <sup>4</sup> Alfe capa Jem hoi Thaddaeus telah min katha hoi kaw e Lebbeus, Kanaan tami Simon hoi Judah Iskariot, ahni teh Jisuh ka pahnawt e doeh.

### *A hnukkâbang hlaikahni touh patounnae*

<sup>5</sup> Jisuh ni hete hlaikahni touh hah a patoun teh, kâ a poe. Nangmouh teh Jentelnaw onae koe cet awh hanh. Samaria kho thung kâen awh hanh. <sup>6</sup> Isarel miphun kahmat e tunaw onae koe hmaloe cet awh. <sup>7</sup> Na cei awh nah kalvan uknaeram teh a hnai toe telah pâpho awh. <sup>8</sup> Kapatawnaw hah damnae poe awh. Kadoutnaw hah thaw sak awh. Ka hrikbei naw hah thounsak awh. Kahrailuulinaw hah pâlei awh. Nangmouh teh aphu laipalah na coe awh dawkvah, aphu dâw laipalah poe awh. <sup>9</sup> Sui, ngun, rahum tangkanaw hah tangkabom thung kâen awh hanh. <sup>10</sup> Kahlong na cei nah lam hanelah, yawngya, angi kahni touh, khokkhawm, sonronnaw hah lampu awh hanh. Bangkongtetpawiteh, ka tawk e teh paca hanlah a kamcu raw doeh.

<sup>11</sup> Bangpatet e khopui khotenaw dawk na kâen awh navah, api hoi maw a kamcu tie hah pacei a nateh, hote kho dawk hoi na tâco awh hoehroukrak ahnie im dawkvah awh awh. <sup>12</sup> Imthung na kâen awh nah, yawhawinae awh naseh telah pato awh. <sup>13</sup> Hote imthung ni kamcu pawiteh nangmouh ni na dei awh e yawhawi lungmawngnae teh ahnimouh koe phat lawiseh. Kamcu hoehpawiteh nangmouh koe bout ban lawiseh. <sup>14</sup> Apipatet haiyah, nangmouh na luen sak awh hoe, nangmae lawk hai ngâi awh hoehpawiteh, ahnie im thung hoi na tâco awh navah, hoehpawiteh, hote kho thung hoi na tâco nah, na khoktabei dawk e vaiphu hah takhawng sin awh. <sup>15</sup> Atangcalah na dei pouh awh. Lawkcengnae hnin dawkvah hote kho hateh, Sodom hoi Gomorrah kho hlak hoe a khang awh han.

### *Ka tho hane runae*



<sup>16</sup> Asui um vah tunaw tha e patetlah kai ni nangmouh na patoun awh. Hatdawkvah, tahrn patetlah lungang a nateh, Bakhu patetlah asue laipalah awm awh. <sup>17</sup> Taminaw hah kâhruetcueth awh. Lawkcengnae hmuen koevah na thak awh han. Sinakoknaw dawk na hem awh han. <sup>18</sup> Khobawinaw hoi siangpahrangnaw koevah Kai kecu dawk na thak awh han. Ahnimanaw hoi Jentelnaw koe lawkpanuesaknae lah ao nahan lah. <sup>19</sup> Hottelah na thak awh toteh bangtelamaw ka dei han tie hah kângai awh hanh. Dei hane lawk hah atueng a pha toteh na coe awh han. <sup>20</sup> Na mahmawk na dei awh e na hoeh. Nangmae na Pa e Muitha ni nangmouh lahoi yah a dei e doeh.

<sup>21</sup> Hattoteh hmaunawnggha reira due sak hanlah a kâthak awh han. A na pa ni capa hah a thak han, canunaw ni hai manu na pa hah taran vaiteh a due sak awh han. <sup>22</sup> Taminaw ni haiyah, Ka min kecu dawk na hmawt ngai a mahoe. Apipatet haiyah a pout ditouh ka cak e teh rungngang lah ao han. <sup>23</sup> Kho buet touh dawk na rektap awh pawiteh, kho buet touh dawk yawng awh. Atangcalah na dei pouh awh. Isarel kho pueng, koug na katin awh hoehnahlan tami Capa teh a tho han.

<sup>24</sup> A hnukkâbang e ni kacangkhaikung tapuet hoeh. A san ni a bawipa tapuet hoeh. <sup>25</sup> A hnukkâbang e teh kacangkhaikung patetlah san teh a bawipa patetlah awm pawiteh a khout. Imkung hah Beelzebub telah kaw awh pawiteh a imthungnaw natawng teh hoe a kaw awh han nahoehmaw.

### *Cathut takinae*

<sup>26</sup> Hatdawkvah, ahnimanaw hah taket awh hanh. Ramuk e pueng peng kamnuek han. Arulah kaawm e pueng hai ka kamphawng han. <sup>27</sup> Kai ni a hmonae koe na dei pouh e naw hah nangmouh ni a angnae koe dei awh. Na hnâ koe duem ka dei teh na thai awh e naw hah lempu hoi hramkhai awh, atipouh. <sup>28</sup> Tak ka thet thai niteh, muitha ka thet thai hoeh e hah taket awh hanh. Tak hoi muitha hah hell dawk mek ka thet thai e hah hoe taket awh. <sup>29</sup> Pusu kahni touh hah rahum tangka pheh touh hoi ran nahoehmaw. Nangmae na Pa koehoi laipalah hote pusu buet touh boehai talai bawt mahoe. <sup>30</sup> Na sam patenghai koug touk e lah ao. <sup>31</sup> Hatdawkvah taket awh hanh. Pusunaw hlak nangmouh teh aphu na o awh.

### *Tami hmalah Khrih kampangkhai*

<sup>32</sup> Apipatet haiyah, tami hmalah Kai na kampangkhai e teh kalvan kho kaawm e a Pa hmalah ahni hah ka kampangkhai van han. <sup>33</sup> Apipatet haiyah taminaw hmalah Kai hah na ka pahnawt e teh, kalvan kho kaawm e a Pa hmalah ahni teh ka pahnawt van han.

### *Rounnae laipalah kâkapeknae tahloi*

<sup>34</sup> Talai van vah rounnae tho sak hanelah a tho telah pouk awh hanh. Rounnae tho sak hanelah ka tho hoeh. Tahloi patoun hanelah doeh ka tho. <sup>35</sup> Na pa hoi capa, manu hoi canu, mani hoi langa, kâkapek sak hanelah doeh ka tho. <sup>36</sup> Imthungnaw haiyah taran lah ao awh han.

<sup>37</sup> Apipatet haiyah, Kai hlak a manu, a na pa lungpataw pawiteh, kai hoi ka kamcu hoeh. Apipatet haiyah, canu capa hah Kai hlak lungpataw pawiteh kai hoi ka kamcu hoeh. <sup>38</sup> Apipatet haiyah amae thingpalam hrawm hoi ka hnukkâbang hoehpawiteh kai hoi kamcu hoeh. <sup>39</sup> A hringnae ka vum e teh hringnae a sung han. Kai kecu dawk a hringnae ka sung e teh, hringnae a coe han.



### *Tawkpou na hmu han*

<sup>40</sup> Nangmouh na ka dâw e teh Kai hai na dâw toe. Kai na ka dâw e teh kai na kapatoukung hai a dâw toe. <sup>41</sup> Profet e minhmai khet lahoi ka dâw e teh, profet e tawkpou hah a coe han. Tami kalan e minhmai khet lahoi ka dâw e teh, tamikalan e tawkpou hah a coe han. <sup>42</sup> Apipatet haiyah, a hnukkâbangnaw e minhmai khet laihoi hete kathoencae tami buetbuet touh hah tui pading manang buet touh banghai ka pânei e tami teh, atangcalah na dei pouh awh, tawkpou coe laipalah awm roeroe mahoe, telah lawk a thui.

## 11

### *Jisuh hoi Baptisma Jawhan*

<sup>1</sup> Hottelah a hnukkâbang hlaikahni touh hah kê a poe hnukkhu, cangkhai hane hoi kamthang pâpho hanelah khopui khote tangkuem koe a cei. <sup>2</sup> Khrih ni a sak e pueng hah Baptisma kapoekung Jawhan ni thongim thung hoi a thai navah, amae a hnukkâbang kahni touh a patoun teh, a ka tho hane teh nang tOUNg na maw. <sup>3</sup> Hoehpawiteh alouke maw ka ngaihawi awh han rah, telah a pacei sak. <sup>4</sup> Jisuh ni, Jawhan koe cet roi nateh na thai awh e hoi na hmu awh e pueng hah dei pouh awh, atipouh. <sup>5</sup> Mit kadawnnaw ni kho a hmu awh toe. Kamkhuennaw ni lam a cei awh toe. Ka hrikbeinaw ni a thOUNg awh toe. Hnâpangnaw ni hnâ a thai awh toe. Kadoutnaw ni a thaw awh toe. Karoedengnaw ni hai lunghawinae kamthang a thai awh toe. <sup>6</sup> Kai kecu dawk a lung ka pout hoe e teh a yawhawi telah atipouh.

<sup>7</sup> Ahnimouh a cei a hnukkhu, Jisuh ni Jawhan deingainae lahoi rangpounaw a dei pouh e teh, nangmouh ni bang hmu hane lahoi maw kahrawng na tâco a vaw. Kahlî ni hon a nawi e phonaw khet hanelah maw na tâco awh. <sup>8</sup> Hoeh teh, khohna kahawi ka khohnat e khet hanelah maw na cei awh. Khohna kahawi ka khonaw teh siangpahrang im doeh ouk ao. <sup>9</sup> Profet khet hanelah maw na cei awh. Bokheiyah. Profet hlaK kalen e lah ka o ka ti. <sup>10</sup> CakathOUNg dawk thut e teh, khenhaw! na cei nahane lamthung ka rasoun hanelah kaie patoune hah na hmalah ka patoun ati navah ahni doeh a dei ngai nah.

<sup>11</sup> Atangcalah ka dei. Napui ni a khe e naw thUNG dawk Baptisma Jawhan hlaK kalen e buet touh boehai kamphawng hoe hah rah. Hatei, kalvan uknaeram dawkvah kathOUNgpOUNge hah ahni hlaK a len han. <sup>12</sup> Baptisma Jawhan koehoi kamtawng teh atu totouh kalvan uknaeram hah a kâtuk awh. Kâtuk e naw ni hai thama lah a kâen awh. <sup>13</sup> Jawhan a pha hoehnahlan totouh kâlawnaw hoi profet lawknaw ni na cangkhai awh. <sup>14</sup> Nangmouh ni ka lawk hah na thai panuek awh pawiteh ahni teh ka tho hane Elijah doeh toe. <sup>15</sup> Thai nahan hnâ ka tawn pueng ni thai naseh.

<sup>16</sup> Hete miphunnaw hah bang hoi maw ka bangnue han vai. Pawi koe ka tahung e camonaw hoi a kâvan awh. <sup>17</sup> Kahawicalah ratOUNg tamawi ka tum a haiyah na lam awh hoe. Khuika la sak nahaiyah na kap awh hoe.

<sup>18</sup> Jawhan teh catnet laipalah a tho navah, kahrai ni a man e doeh bout na ti awh. <sup>19</sup> Tami Capa teh canei laihoi a tho navah, ka carawng e, misurtui kâso e, tamuk kacawngnaw hoi tamikayonnaw e huiko lah kâsak e bout na ti pouh awh. Hateiteh, a lungangnae ni, a canaw a hlout sak telah a ti.



*Pankângai hoeh e khonaw yawthoenae**Luk 10:13-15*

<sup>20</sup> Hatnavah, athaonae a kamnue saknae khonaw ni pankângainae a tawn awh hoeh dawkvah, hote khonaw hah Jisuh ni a yue. <sup>21</sup> Oe! Khorazin, na yawthoe. Bethsaida, na yawthoe. Nangmouh koe thaonae hno ka sak e naw hah Taire hoi Sidon khonaw dawkvah ka sak boipawiteh, hotnaw ni buri kâkhu hoi vaiphu kâphuen awh vaiteh, pankângai awh han ei nan toung mah. <sup>22</sup> Atangcalah na dei pouh awh, lawkcengnae hnin dawkvah, nangmouh teh Taire hoi Sidon khonaw hlak na khang awh han. <sup>23</sup> Kapernuam kho, nang teh kalvan totouh tawm lah na kaawm ei nakunghai, phuen kho totouh pabo lah na o han. Na thungvah thaonae hno sak lah kaawm e naw hah Sodom kho dawkvah ka sak pawiteh, hote kho teh atu sittouh kangdout han ei. <sup>24</sup> Atangcalah na dei pouh awh. Lawkcengnae hnin dawkvah Sodom kho hlak hoe na khang awh han, atipouh.

*Hnori kaphawtnaw tho awh**Luk 10:21-22*

<sup>25</sup> Hatnavah, Jisuh ni, kalvan hoi talai kaukung a Pa, nang ni a lungkaangnaw hoi kathoumnaw koe kângairu hnonaw hah na hro teh, camonaw koe na pâpho dawkvah na lungmanae teh ka pholen. <sup>26</sup> Oe apa hottelah na ngainae ao. <sup>27</sup> A Pa nang ni hnocawngca pueng kai koe na poe toe. Pa laipalah apinihai Capa panuek hoeh. Capa hoi Capa ni a kamnue pouh e hloilah apinihai Pa teh panuek hoeh.

<sup>28</sup> Hno ka ri ni teh kapatangnaw kai koe tho awh, kai ni na kâhat sak han. <sup>29</sup> Kaie kahnam hah phawt awh. Kai koe kamtu awh. Kai teh lungdonae hoi lungnemnae lah ka o. Na hringnae ni kâhatnae a hmu han. <sup>30</sup> Bangkongtetpawiteh, kaie kahnam teh phu a nep. Ka hno hai a pâhaw, atipouh.

**12***Jisuh teh Sabbath Bawi lah a o**Mrk 2:23-28; Luk 6:1-5*

<sup>1</sup> Hatnae tueng nah, Jisuh teh Sabbath hnin vah, catun lawnaw dawk a cei navah, a hnukkâbangnaw teh a vonhlam awh dawkvah, catun vuinaw hah a pahroe awh teh a bap awh. <sup>2</sup> Farasinaw ni a hmu toteh, sabbath hnin sak hoeh hane kawih hah na hnukkâbangnaw ni a sak awh, telah atipouh awh. <sup>3</sup> Jisuh ni, Devit teh a huinaw hoi a vonhlam awh navah, <sup>4</sup> Cathut e im dawk a kâen teh, a ma ni a cakawi hoeh e, a huinaw ni hai a cakawi hoeh e, vaihmanaw ni dueng a cakawi e vaiyei a ca e hah na touk a boihoeh maw. <sup>5</sup> Vaihmanaw nihaiyah, bawkim dawk sabbath hnin a hnan awh ei, tounhoehe lah ao tie hah kâlawnaw dawk na touk a boihoeh maw. <sup>6</sup> Kai ni ka dei e teh, hie hmuen koe bawkim hlak hoe kalen e ao. <sup>7</sup> Thuengnae hlak pahrennae hah ka ngai tie Cakathoung dawk kaawm e na thai panuek awh pawiteh, yon ka tawn hoeh e naw hah yonpen awh mahoehe ei. <sup>8</sup> Tami Capa teh sabbath hnin kaukung lah ao, atipouh.

*Kutvang kamkhuen e a dam saknae**Mrk 3:1-6; Luk 6:6-11*

<sup>9</sup> Hote hmuen koehoi a cei teh sinakok thung a kâen. A kutvang ka khem e tami buet touh ao. <sup>10</sup> Tami tangawn ni Jisuh a yon tawngnae lah, sabbath hnin vah patawnae roum sak kawih maw, titeh a pacei awh. <sup>11</sup> Jisuh



ni, tu buet touh na tawn e ca hah sabbath hnin vah, tangkom thung bawt pawiteh rasat laipalah kaawm hane tami buet touh banghai nangmouh thung dawkh na o awh maw. <sup>12</sup> Tami teh tu hlak aphu ao nahoehmaw. Hatdawkvah, sabbath hnin hnokahawi sak kawih lah ao, atipouh. <sup>13</sup> Hote a kutvang kadout e koevah, na kut hah dâw haw, atipouh navah ahni ni a kut a dâw teh, avanglae kut patetlah ao. <sup>14</sup> Hattoteh Farasinaw a tâco awh teh, Jisuh bangtelah hoi maw thei han telah a kapan awh.

### *Cathut thaw ka tawk e*

<sup>15</sup> Jisuh ni a panue dawkvah, hote hmuen koehoi alouklah a cei teh, moikapap e taminaw ni a kâbang awh teh, ahnimae patawpanatnae kaawm e pueng hah a dam sak pouh. <sup>16</sup> Ahnimouh ni pung a pathang awh hoe hahan kâhruetcuetnae a poe. <sup>17</sup> Hot teh, profet Isaiah e lawk a kuep nahane doeh. <sup>18</sup> Isaiah ni a dei e lawk teh, thai awh haw, ka rawi e ka san, ka pahren poung e ahni dawkvah ka lung ahawi tanggak. Ahni dawkh ka muitha ka caksak han. Jentelnaw hah lawkcengnae kâ ka poe han. <sup>19</sup> Oun hoe h, hram hoe h. Hatdawkvah ahnie lawk apinihai lam dawkh thai mahoe h. <sup>20</sup> Coungroe e lungpungkung khoe hoe h, hmaikhu kapap e hmaipalai dout hoe h, A lawk teh tânae koe a pha nahanlah a sak han. <sup>21</sup> A min haiyah Jentelnaw ni a kâuep awh han, telah a pâpho.

### *Jisuh hoi Beelzebub*

*Mrk 3:23-27; Luk 11:17-22*

<sup>22</sup> Hatnavah, kahrai ni a man teh, mit ka dawn, lawk ka a e tami buet touh a ma koe a thokhai awh. A mit bout a ang teh, lawk bout a dei thai nahanlah Jisuh ni ahawi sak. <sup>23</sup> Hawvah ka kamkhuengnaw pueng ni a kângairu awh teh, ahni heh Devit e capa han na maw telah ati awh. <sup>24</sup> Farasinaw ni a thai awh navah, ahni teh kahraituulinaw e bawi Beelzebub a kâuep laihoi doeh kahraituulinaw hah a pâlei thai, ati awh.

<sup>25</sup> Jisuh ni hotnaw e pouknae a panue pouh dawkvah, bangpatet e uknaeram haiyah amamouh hoi mamouh kâpo awh hoehpawiteh, rawknae koe a pha awh han. Bangpatet e khoram hoi imthung haiyah amamouh hoi mamouh kâpo awh hoehpawiteh kangdout thai mahoe h. <sup>26</sup> Setan ni Setan hah pâlei pawiteh, amamouh hoi mamouh kâkapek vaiteh a uknaeram bangtelamaw a kangdue thai han vaw. <sup>27</sup> Kai ni Beelzebub kâuep laihoi kahraituulinaw ka pâlei pawiteh, nangmae canaw niteh, apimaw a kâuepkhai vaiteh a pâlei awh han. Hatdawkvah ahnimouh teh nangmouh lawkcengkung lah ao awh han. <sup>28</sup> Kai ni Cathut e Muitha hah kâuep laihoi kahraituulinaw ka pâlei pawiteh, atangcalah nangmouh koe Cathut uknaeram kangdue nahane tueng teh a pha toe. <sup>29</sup> A thakaawmpounge tami, a ma hah hmaloe katek hoehpawiteh, apinimaw ahni imthung a cei vaiteh hnopainaw hah a lawp thai han. A ma hah hmaloe katek pawiteh doeh a hnopainaw hah lawp thai lah awm tih. <sup>30</sup> Kai koe lah kambawng hoe h e teh ka taran doeh. Kai hoi cungtalah kaawm hoe h e teh kampek e lah ao.

### *Muitha ka dudam e*

<sup>31</sup> Hatdawkvah, ka dei e teh, yonnae puenghoi Cathut dudamnae yon pueng hai taminaw ni ngaithoumnae a hmu thai awh. Hatei, Kathoung Muitha dudamnae yon teh taminaw ni ngaithoumnae hmawt thai awh hoe h. <sup>32</sup> Tami Capa hah a pahni hoi ka yon e yon ngaithoum thai.



Kathoung Muitha hah a pahni hoi ka yon e yon teh atu a hring na hai, due hnukkhu hring nah hai ngaithoum thai mahoe.

<sup>33</sup> A paw dawkh hoi akung e counghae a kamnue dawkvah, a paw hawi pawiteh akung hai ahawi. A paw hawihoe pawiteh a kung hai hawi hoe. <sup>34</sup> Hrunthoe catounnaw, laplap na thoe awh nahlangva kahawi e lawk hah bangtelamaw na dei thai awh han. Lungthung kakawi e patetlah doeh pahni ni hai a dei. <sup>35</sup> Tami kahawi ni teh a lungthung e kahawi e hno hah a rasa. <sup>36</sup> Ka dei e teh, taminaw ni aphu kaawm hoe e lawk na dei e pueng hah, lawkcengnae hnin dawkvah nama ni na deicai han. Na lawknaw lahoi yah, yon hlout lah na o han. <sup>37</sup> Hoehpawiteh, na lawk dei e naw lahoi yah, yon lawkceng lah na o han, atipouh.

### *Jawnah e mitnout*

*Luk 11:29-32*

<sup>38</sup> Hat toreih teh, cakathutkungnaw hoi Farasinaw niyah, Bawipa kaimouh ni mitnoutnae buetbuet touh hmu han ka ngai, atipouh awh. <sup>39</sup> Jisuh ni, tami kahawihoe hnaw e catounnaw ni mitnoutnae na hei awh nah, profet Jonah laipateh alouke bang buet touh boehai kamnuek sak mahoe. <sup>40</sup> Jonah teh tanga von dawkh hnin thum touh ao patetlah tami Capa teh talai thungvah hnin thum touh ao van han. <sup>41</sup> Lawkcengnae hnin navah, Nineveh kho e taminaw teh hete miphunnaw e a vang lah thaw awh vaiteh ahnimanaw a sung sak awh han. Bangkongtetpawiteh, ahnimouh teh Jawnah ni a pâpho e lawk kecu dawkh pan a kângai awh. Hie hmuen koe Jawnah hlak hoe kalen e teh ao. <sup>42</sup> Lawkcengnae hnin navah, akalae e siangpahrangnu teh hete miphunnaw e avanglah thaw vaiteh ahnimanaw hah a sung sak han. Bangkongtetpawiteh, hote siangpahrangnu teh Solomon siangpahrang e lungangnae lawk hah thai hanelah talai poutnae koehoi a tho toe. Khenhaw! hie hmuen koe vah Solomon hlak ka talae e teh ao.

### *Kahrai kathout bout a ban*

<sup>43</sup> Kakhine muitha teh tami thung hoi a tâco teh duem ao nahane hmuen hah yuengyoe a tawng. <sup>44</sup> A hmu hoeh toteh ka tâconae, ouk ka onae im koe lah bout ka ban han ati teh bout a tho navah hote im teh sut ka houng e lah ao tie a hmu. <sup>45</sup> Hahoi, ama hlak hoe kathoute alouke sari touh a kaw teh, hote tami thungvah bout a kâen awh teh ao awh. Hote tami teh ahmaloe e hlak a mathoe. Kathout e hete miphunnaw koe vah hot patetlah ao van han telah a dei pouh.

### *Jisuh e manu hoi hmaunawngna naw*

*Mrk 3:31-35; Luk 8:19-22*

<sup>46</sup> Hottelah taminaw koe vah a pâpho lahun nah a manu hoi a nawngnanaw ni pato han a ngai awh dawkvah alawilah sut a kangdue awh. <sup>47</sup> Tami buet touh ni na manu hoi na nawngnanaw ni na pato hane a ngai awh dawkvah alawilah sut a kangdue telah a dei pouh. <sup>48</sup> Ka manu ka nawngnanaw teh api nama telah a pacei. <sup>49</sup> A hnukkâbangnaw koe lah a kut a dâw teh, hetnaw teh ka manu, ka nawngnanaw doeh. <sup>50</sup> Kalvan kho kaawm, a Pa e ngainae ka sak e pueng teh ka nawngna, ka tawncanu, ka manu lah doeh ao, telah atipouh.



<sup>1</sup> Hot hnin vah Jisuh imthung hoi a tâco teh talí teng vah a tahung navah,  
<sup>2</sup> moikapap e taminaw ni a kalup awh teh a kamkhueng awh. Long thung a kâen teh a tahung. Rangpuinaw teh a kawngteng lah a kangdue awh.  
<sup>3</sup> Hatnavah, bangnuenae lawknaw hah a dei pouh e teh, thai awh haw, cati kahei e tami ni cati kahei hanelah a tâco. <sup>4</sup> Cati teh a hei navah, a tangawn teh lam teng lah a bo. Lam teng a bo dawkvah tavanaw ni a tho awh teh a pâtu awh. <sup>5</sup> A tangawn teh talai a rapamnae koe lungcarawk um vah a bo. Hawvah ka bawt e cati teh tang a paw eiteh, a khawngyang a pabo hoeh dawkvah, <sup>6</sup> Kaní a tâco toteh khumbi ni a daw dawkvah, ketkamyai teh rawknae koe a pha. <sup>7</sup> A tangawn teh pâkhing um vah a bo. Hawvah ka bawt e cati teh a paw ei pâkhing ni a katek teh a rawk awh.  
<sup>8</sup> A tangawn teh kahawi e talai dawk a bo. Hawvah ka bawt e cati teh a let 30, 60, 100 totouh a paw teh a pung awh. <sup>9</sup> Thai nahan hnâ ka tawn e pueng ni thai na seh, atípouh.

### *Bangnuenae akungtuén*

<sup>10</sup> A hnukkâbangnaw ni a hnai awh teh, bangkongmaw hetnaw koevah bangnuenae lahoi na dei pouh telah a pacei awh. <sup>11</sup> Jisuh ni, nangmouh teh kalvan uknaeram hrolawknaw hah panuethainae kâ na tawn awh. Hatei, ahnimanaw teh, tawn awh hoeh. <sup>12</sup> Apipatet haiyah ka tawn e tami teh kapap a tawn nahanlah bout poe sin han. Apipatet haiyah ka mathoe e teh a tawn e ca patenghai lawp lah ao han. <sup>13</sup> Ahnimouh teh a hmu awh nahlangva nout awh hoeh. A thai a nahlangva panuek awh hoeh. Hatdawkvah bangnuenae hoi ka cangkhai. <sup>14</sup> Isaiah ni, nangmouh teh na thai awh nahlangva vah thai panuek laipalah na thai awh. Na hmu awh nahlangva vah nout laipalah na hmu awh. <sup>15</sup> Hete miphunnaw niyah mit hmawt thai awh hoeh, hnâthai thai awh hoeh, a lungthin hoi panuek awh hoeh, a hringnae kâthung awh hoeh, a patawnae dam sak hoeh hane totouh a lungthin a hmo teh, a hnâpang awh teh, a mit a tabuem awh, telah sutdeilawk, hete miphunnaw koe a kuep. <sup>16</sup> Nangmouh teh na mit ni a hmu teh na hnâ ni hai a thai dawkvah yawhawi lah na o awh. <sup>17</sup> Atangcalah na dei pouh awh. Nangmouh ni na hmu awh e hah profetnaw hoi tami kalannaw ni hmu hane a ngai a ei hmawt awh hoeh. Na thai awh e hah thai hane a ngai a ei thai awh hoeh.

### *Cati kahei e deicainae*

<sup>18</sup> Cati kaheikung bangnuenae dei ngainae teh, thai a haw. <sup>19</sup> Lam teng dawka bawt e cati tingainae teh, uknaeram lawk hah sut a thai ei, a thai panuek hoeh dawkvah, kahrai ni a lung dawka hei lah kaawm e cati hah yout a la pouh tingainae doeh. <sup>20</sup> Lungcarawk um ka bawt e cati tingainae teh, kamthang kahawi hah a thai navah, lunghawinae lung hoi tang a dâw eiteh, <sup>21</sup> a lungthin dawka a khawngyang a payang hoeh dawkvah, dawngdengca dueng doeh ao. Lawk kamthang kecu dawka rektapnae a khang toteh, hnuklah tang a kâhnawn tingainae doeh. <sup>22</sup> Pâkhing um ka bawt e cati tingainae teh, Lawk kamthang hah a thai eiteh, talaivan hnopai dawka lungpuennae hoi hnopai tawntanae ni a dumyen teh, hote hno ni kamthang lawk hah a katek dawkvah, a paw paw thai hoeh tingainae doeh. <sup>23</sup> Talai kahawi dawka bawt e cati tingainae teh, kamthang kahawi hah a thai teh, a thai panuek dawkvah alet 30, 60, 100 totouh a pungdaw tingainae doeh atípouh.

### *Cang hoi pho mu bangnuenae*



<sup>24</sup> Alouke bangnuenae bout a dei pouh e teh, kalvan uknaeram teh, a law dawk cati kahei e hoi a kâvan. <sup>25</sup> Taminaw a i awh lahun nah taran hah a tho teh, cang hoi kâvan e pho mu hah cang um vah mak a hei sin teh yout a ceitakhai. <sup>26</sup> Cang teh a pâw, a roun, a vui a tâco toteh, phokungnaw hai a kamnue van. <sup>27</sup> Hattoteh a sannaw ni imkung koe a cei awh teh, Bawipa, cati kahawi dueng nahoehmaw na law dawk na kahei vaw, phokungnaw teh nâ e na maw. atipouh awh navah, <sup>28</sup> hethateh taran ni a sak e doeh atipouh. Hat pawiteh, ka cei a vaiteh phokungnaw hah koun phawk sak hanelah na ngainae ao maw, telah atipouh awh navah, <sup>29</sup> Imkung ni, hottelah ka ngainae awm hoeh. Phokungnaw hah na phawng awh pawiteh, cangkungnaw haiyah mek na phawng a payon vai ti puennae ao. <sup>30</sup> Canga tue totouh teh, reirei roun na yawkaw seh. Canga tue a pha toteh, phokungnaw hah hmaloe phawk vaiteh hmai phum hanlah tangoung awh. Cakang hateh capai dawk cui awh telah ka a e naw hah ka ti pouh han telah imkung ni atipouh.

*Antam mu hoi Ton bangnuenae*

*Mrk 4:30-32; Luk 13:18-21.*

<sup>31</sup> Alouke bangnuenae lawk a dei pouh e teh, kalvan uknaeram teh law dawk patûe e antam mu hoi a kâvan. <sup>32</sup> Antam mu teh a mu pueng hlak vah a thoung eiteh, a roun toteh phokung pueng hlak a len dawkvah, kahlun kamleng tavanaw ni a tho awh teh a kangnaw dawk a kamcout, a kâhat thai nahan totouh e a kung lah ao telah atipouh. <sup>33</sup> Alouke bangnuenae lawk a dei pouh e teh kalvan uknaeram teh ton hoi a kâvan. Napui ni ton a la teh tavai tangthung kathum touh dawk a thum dawkvah tahawn kaawm e pueng hah a po sak atipouh. <sup>34</sup> Jisuh ni hete bangnuenae lahoi yah, rangpuinaw hah a dei pouh. Bangnuenae laipalah dei pouh hoeh. <sup>35</sup> Hot patet e lahoi yah, profet e lawk tie hateh, ka pahni ka ang vaiteh bangnuenae hah ka dei han. Talaivan pek a kamtawng hoiyah hro lah kaawm e naw hah ka pâpho han telah sut a dei e lawk hah kuepnae koe a pha.

*Cati hoi phokung bangnuenae*

<sup>36</sup> Hathnukkuh Jisuh ni tami kamkhuengnaw hah a ceisak teh, imthung a kâen hnukkuh, a hnukkâbangnaw ni a hnai awh teh, law dawk hei e kahrawng e pho mu hah bang tingainae maw kacaicalah na dei pouh haw atipouh. <sup>37</sup> Jisuh ni, cati kahawi kahei e teh tami Capa doeh. <sup>38</sup> Law hateh het talaivan doeh. Kahawi e cati teh uknaeram capanaw doeh. Kahrawng e pho mu teh kahrai capanaw doeh. <sup>39</sup> Kahrawng e pho mu ka hei e taran hateh Kahraimathout doeh. Canga tue teh het talaivan poutnae doeh. Cang ka a e naw teh kalvantaminaw doeh.

<sup>40</sup> Kahrawng phokungnaw hah phawk vaiteh hmai phum e patetlah het talai apout navah kaawm han. <sup>41</sup> Tami Capa ni ama e kalvantami a patoun vaiteh, ka payon sak e naw hoi kahawihoehe hno ka sak e pueng hah A uknaeram thung hoi rawi vaiteh, <sup>42</sup> khuikanae, hâ katanae onae koe hmai dawk a pabo awh han. <sup>43</sup> Hatnavah tami kalannaw teh kanî patetlah amae na Pa e uknaeram dawk a ang awh han. Thai nahan hnâ ka tawn e pueng ni teh thai naseh.

*Hro e hnopai hoi aphu kaawm poung pale bangnuenae*

<sup>44</sup> Kalvan uknaeram teh law dawk hro e hno hoi a kâvan. Hote hno hah kahmawt e ni teh bout a ramuk teh, lunghawi laihoi a ban teh a tawn e pueng hah a yo hnukkuh hote law hah a ran. <sup>45</sup> Hahoi, kalvan uknaeram



teh aphu kaawm pounge e Pale ka tawng e hno kayawtkung hoi a kâvan.  
<sup>46</sup> Hote hno kayawtkung ni aphu kaawm pounge e Pale hah a hmu toteh, a cei teh a tawn e pueng hah a yo hnukkhu hote Pale hah a ran.

### *Tamlawk bangnuenae*

<sup>47</sup> Hahoi, kalvan uknaeram teh talí dawkheng nah aphunphun e tanganaw ka ramuk e tamlawk hoi a kâvan. <sup>48</sup> Tanga moi a kaman toteh a kongteng lah a sawn teh, a tahungkhah awh. Kahawi e tanganaw hah a rawi awh teh sikrei dawkhah a pâseng awh. Kahawi hoehe e tanganaw teh a tâkhawng awh. <sup>49</sup> Hot patetlah talai a pout navah kalvantaminaw ni kum awh vaiteh, tami kalannaw um hoi tamikayonnaw teh rawi ka pek vaiteh, <sup>50</sup> khuikanae, hâ katanae onae koe hmai dawkhah a pabo awh han. <sup>51</sup> Hete hnonaw pueng hah na thai panuek a ou. telah a pacei toteh, ka thaipanuek awh toe Bawipa telah a hnukkâbangnaw ni atipouh awh. <sup>52</sup> Hatdawkvah, kalvan uknaeram kong ka cang tangcoung e kâlawk kacangkhaikungnaw, a hnukkâbang lah kaawm e tami teh, amae hno aphunphun e, a katha hoi a karuem e naw hah peng ka rasat e imkung hoi a kâvan atipouh.

### *Profet ouphoeinae*

<sup>53</sup> Hote bangnuenae lawknaw hah kounge a dei pouh hnukkhu hote hmuen hah a ceitakhai. <sup>54</sup> Hathnukkhu amae khothung a pha teh sinakoknaw dawkvah a cangkhai, khothung e taminaw teh a kângairu awh dawkvah, hete tami ni hete lungangnae hoi hete thaonae heh nâ e ne a tawn. <sup>55</sup> Ahni teh lettama e capa nahoehmaw. A manu teh Meri nahoehmaw. A nawngah teh Jem, Joseph, Simon, Judah tie naw nahoehmaw. <sup>56</sup> A tawncanunaw haiyah maimouh hoi kahnai lah awm awh hoehe maw. Hat pawiteh hete tami ni hete hnonaw hah na e maw a hmu telah ati awh. <sup>57</sup> A lungpout awh. Jisuh ni profetnaw teh ama kho, amae ram alawilah doeh barinae ao telah atipouh. <sup>58</sup> Khothung e naw ni a yuem awh hoehe dawkvah, hote hmuen koe thaonae moikapap sak hoehe.

## 14

### *Baptisma Jawhan duenae*

#### *Mrk 6:14*

<sup>1</sup> Hatnavah, Herod bawi ni Jisuh e kamthang hah a thai navah, <sup>2</sup> het hateh Baptisma kapoeung Jawhan doeh. Duenae koehoi a thaw toe. Hatdawkvah kângairu hnonaw hah a sak thai telah a kut rahim e naw koe a dei pouh. <sup>3</sup> Herod ni amae a nawngah, Filip e a yu Herodias dawkvah Jawhan hah a man a katek teh thongim vah a paung. <sup>4</sup> Jawhan ni Herod koe hote napui na la e heh thoung hoehe telah Herod hah atipouh dawkvah, <sup>5</sup> Jawhan hah thei han a ngai ei rangpuinaw a taki dawkvah thet ngam hoehe. Rangpuinaw ni Jawhan hah profet buet touh lah a pouk awh,

<sup>6</sup> Herod a khenae hnin a pha teh paw i sak navah Herodias e canu teh paw i thung a lam dawkvah, Herod lung ahawi sak. <sup>7</sup> Na hei e pueng na poe han telah thoekâbonae hoi lawk a kam. <sup>8</sup> A manu ni a uen e patetlah Baptisma kapoeung Jawhan e a lû hah hete tongben dawkhah a poe telah a hei. <sup>9</sup> Siangpharang teh a lungmathoe ei lawk yo a kam toung dawkvah a huikonaw e minhmai hah a khet teh, poe hanelah kâ a poe. <sup>10</sup> Hatdawkvah, tami a patoun teh, Jawhan e lahuen hah thongim thungvah a tâtueng sak.

<sup>11</sup> A lû hah tongben dawkhah hoi napui ca a poe awh teh napui ca ni a manu



koe a sin. <sup>12</sup> Jawhan e a hnukkâbangnaw a tho awh teh a ro hah a sin awh. A pakawp awh hnukkhu, Jisuh koe a cei awh teh a dei pouh awh.

*Tami 5000 touh rawca a paca*

*Mrk 6:32-44; Luk 9:10-17; Jhn 6:1-13*

<sup>13</sup> Jisuh ni a thai nah hote hmuen hah long hoi a ceitakhai teh kingdinae koe vah a cei. Taminaw ni a thai awh dawkvah kho thung hoi a tâco awh teh khok hoi a kâbang awh. <sup>14</sup> Jisuh ni a cei navah, taminaw a hmu nah a pahren dawkvah kapatawnaw pueng a dam sak.

<sup>15</sup> Tangmin vah a hnukkâbangnaw ni a hnai awh teh, hiteh thingyeyawn doeh. Kho hai a hmo toe. Rangpuinaw teh canei ran hanlah khonaw dawk cetsak lawi atipouh awh. navah, <sup>16</sup> Jisuh ni ahnimouh a cei ngai hoeh. A ca awh hanelah poe awh, atipouh. <sup>17</sup> Ahnukkâbangnaw ni vaiyei panga touh hoi tanga kahni touh hoe laipateh kaimouh koe alouke rawca awmhoeh bout ati. Hahoi, Jisuh ni vaiyei hoi tanga hah hi sin awh haw atipouh. <sup>18</sup> Hattoteh rangpuinaw hah tahung hanlah kâ a poe. <sup>19</sup> Tamimaya hah pho van tahung hanelah kâ a poe. Vaiyei panga touh hoi tanga kahni touh hah a sin teh kalvan lah moung laihoi, lunghawi lawk a dei hnukkhu, vaiyei hoi tanga hah a raen teh a hnukkâbangnaw hah a poe. <sup>20</sup> A hnukkâbangnaw ni hai rangpuinaw hah patuen a poe awh. Rangpuinaw ni kaboumlah a ca awh hnukkhu, ka cawi e a rakhun awh teh tangthung hlaikahni touh akawi. <sup>21</sup> Ka cat e abuemlah napui hoi camo dei laipalah tongpa dueng 5,000 touh hane a pha awh.

*Jisuh tui van lam a cei*

*Mrk 6:45-51; Jhn 6:15-21*

<sup>22</sup> Jisuh ni kamkhueng e taminaw hah a ban sak lahun navah, a hnukkâbangnaw hah long a kâcui sak teh namran lah hmaloe a patoun. <sup>23</sup> Kamkhueng e naw be a ceisak hnukkhu ratoum hanlah, mon lah soumtinae koe a luen teh, tangmin vah amadueng ao. <sup>24</sup> Long teh tui lungui vah kahli ni khak a ngang dawkvah tuicapa ni a hem awh.

<sup>25</sup> Tangmin suimilam pali nah Jisuh teh ahnimouh koe tui van vah a cei. <sup>26</sup> Hottelah tui van a cei teh a tho e hah a hmu awh navah, kahrai doeh titeh taki hoi a hramki awh. <sup>27</sup> Jisuh ni na lungpuen awh hanh. Kai doeh taket awh hanh atipouh. <sup>28</sup> Piter ni Bawipa, nang boipawiteh, tui van hoi nang koe ka tho nahanlah kâ na poe haw atipouh. <sup>29</sup> Hattoteh hi tho atipouh. Piter ni long van hoi a kum teh Jisuh koe pha hanelah tui van vah a cei. <sup>30</sup> Kahli a tang e hah a hmu navah a taki teh tui thung lah a bo dawkvah Bawipa na rungngang haw telah a hram.

<sup>31</sup> Jisuh ni a kut a dâw teh Piter hah a kuet. Yuemnae kayoun e tami bangkongmaw oupvoutnae na tawn atipouh. <sup>32</sup> Long van a pha roi toteh kahli a roum. <sup>33</sup> Long thung kaawmnaw ni a hnai awh teh, nang teh Cathut Capa tangngak doeh ati awh teh a bawk awh.

<sup>34</sup> Namran lah a ceiawh teh Gennesaret ram dawk a pha awh. <sup>35</sup> Hot hmuen dawk e kaawm e naw ni a nout awh navah, a teng kaawm e hmuen pueng koe, tami a patoun awh dawkvah, ka pataw e pueng hah a thokhai awh. <sup>36</sup> A kâkhu e hni paw i hah, tek thai nahanlah a kâhei awh. Katek e pueng haiyah damnae a coe awh.



## 15

*Mintoenaw e cangkhaïnae**Mrk 7:1-23*

<sup>1</sup> Hatnavah, Jerusalem e Farasinaw hoi cakathutkungnaw teh Jisuh koe a tho awh. <sup>2</sup> Ayan e kacuenaw e phung hah bangkongmaw na hnukkâbangnaw ni a tapoe awh. Ahnimouh ni kut kamsin laipalah bu a ca awh, telah atipouh awh navah, <sup>3</sup> Nangmouh ni ayan e phung hah kâuep laihoi bangkongmaw Cathut e kâpoelawk hah na tapoe van awh. <sup>4</sup> Cathut e kâpoelawk teh na manu hoi na pa bari awh. Apihai manu hoi na pa hawihoeahnae ka dei e teh due totouh thei lah awmseh telah a ti. <sup>5</sup> Hatei, nangmouh ni na cangkhai awh e teh apipatet ni hai a manu na ou, a na pa na ou a poe hane hno hah, het hateh Cathut koe ka poe e doeh toe tet pawiteh, <sup>6</sup> a manu nakunghai, a na pa nakunghai bari ngai hoehe toe na ti awh. Hottelah patuen patuen na tawm awh e phung hoiyah Cathut e kâpoelawk na eknae doeh. <sup>7</sup> A lai kathout e taminaw, Isaiah ni nangmouh noe laihoi, <sup>8</sup> hete miphunnaw teh apâhni hoi na hnai awh teh apâhni hoi na bari a ei a lungthin teh kai hoi ahla. <sup>9</sup> Tami e kâpoelawk hoiyah a kâpâtu awh teh, ayawmyin lah na bawk awh toe telah sut a dei e hah a tang tangkaw atipouh.

*Khinnae*

<sup>10</sup> Hattoteh ka kamkhuengnaw hah ama koe a kaw teh, thai awh nateh panuek awh haw. <sup>11</sup> Thung lah ka kâen e ni tami heh khin sak hoehe. Thung laihoi ka tâcawt e hno ni doeh na khin sak awh, atipouh.

<sup>12</sup> A hnukkâbangnaw ni a hnai awh teh atu na dei e lawk heh Farasinaw ni a thai awh navah a lung apout awh tie na panue maw atipouh awh. <sup>13</sup> Jisuh ni kalvanlae Apa ni a patûe hoehe e a kung kaawm e pueng hah ka phawk han. <sup>14</sup> La awm awh nah yawkaw seh. Ahnimouh teh mitdawnnaw kahrawikung mitdawnnaw doeh. A mit ka dawn reira kâhrawi pawiteh kahni touh hoi tangkom dawka bawt roi han doeh atipouh. <sup>15</sup> Piter ni Cathut e bangnuehae hah kaimouh koevah pâpho haw atipouh navah, <sup>16</sup> Jisuh ni nangmouh teh atu sittouh lungang laipalah maw na o a rah. <sup>17</sup> Thung lah kâen e pueng teh von dawka cet ni teh alawilah a tâcawt tie heh na panuek awh hoehe rah maw. <sup>18</sup> Thung laihoi ka tâcawt e hno teh lung dawka hoi ka tâcawt e a tho dawkvah tami hah kakhin sak e hno doeh. <sup>19</sup> Kahawi hoehe e pouknae, tami theinae, kamsoumhoehe napui tongpa yonnae, napui kahlout hoi yonnae, ayâ e hno parunae, kamsoumhoehe kapanuekkhaikung lah kangduenae, ayâ minhmai mathoe saknae teh lungthung hoi a tâco dawkvah, <sup>20</sup> Tami kakhin sak e hnonaw doeh. Kamsin laipalah rawca canae ni tami khinsak hoehe atipouh.

*Kanaan napui e yuemnae**Mrk 7:24-30*

<sup>21</sup> Hathnukkuh Jisuh teh hote hmuen koehoi a kamthaw teh, Taire hoi Sidon kholah a cei. <sup>22</sup> Kanaan napui buet touh teh a tâco teh, Devit Capa kai hah na pahren haw. Ka canû teh kahrai ni puenghoi a rek atipouh eiteh kam touh hai pathung hoehe.

<sup>23</sup> A hnukkâbangnaw ni a hrawi awh teh, hote napui bout ban sak leih. Maimouh hnuk a kâbang teh a hram atipouh awh. <sup>24</sup> Jisuh ni Isarel miphun kahmat e tunaw hloilah alouke miphunnaw onae koe kai hah na patoun hoehe atipouh. <sup>25</sup> Hote napui ni tabo laihoi Bawipa na rungngang



ei bout atipouh. <sup>26</sup> Hat toteh, Bawipa ni capa e rawca hah ui poe phung nahoe hah bout atipouh. <sup>27</sup> Napui ni hai oe, Bawipa, uinaw tie teh kabawt e burameinaw hah ouk a luep phung nahoe hahmaw bout atipouh toteh, <sup>28</sup> Oe! napui nang teh na yuemnae a len tanggak. Na ngainae patetlah nang daw k awmseh atipouh navah, a canu teh hmawi a dam.

### *Tami moikapap dam saknae*

<sup>29</sup> Jisuh ni hote hmuen koehoi a cei teh, Galilee tui koe a pha toteh, monsom a luen teh a tahung. <sup>30</sup> Tami moikapap ni khokkhem, mitdawn, lawka, kamkhuen e hoi alouke patawnae ka tawn e naw hah a thokhai awh teh a khok koevah a ta awh. <sup>31</sup> A patawnae pueng hah a dam sak dawkvah, lawkanaw ni lawk a dei thai, kamkhuennaw ni a dam awh, khokkhemnaw ni lam a cei awh, mitdawnnaw ni a hmu awh e hah ka kamkhuengnaw ni a hmu awh navah Isarelnaw e Cathut hah a pholen awh.

### *Tami 4,000 touh rawca a pacanae*

#### *Mrk 7:31-37*

<sup>32</sup> Hattoteh Jisuh ni a hnukkâbangnaw hah a kaw teh, hete taminaw hah ka pahren poung. Hnin thum touh thung canei tawn laipalah kai koe ao awh toe. Lam vah tawn a langvai, ka ti dawkvah, rawca cat laipalah ceisak hane ka ngainae awm hoe hah atipouh. <sup>33</sup> A hnukkâbangnaw ni, het yit touh e tami kapap e naw ni kaboumlah a ca awh hane rawca hah hi kahrawngum vah kaimouh ni bangtelamaw ka hmu thai awh han atipouh awh. <sup>34</sup> Jisuh ni nangmouh koe vaiyei na yit touh maw kaawm atipouh. Ahnimouh ni vaiyei sari touh hoi tanga youn touh ao bout atipouh awh.

<sup>35</sup> Hattoteh tami kamkhuengnaw hah talai daw k tahung sak hanelah kâ a poe. <sup>36</sup> Vaiyei sari touh hoi tanga hah a la teh lunghawinae lawk a dei hnukkhu, vaiyei hoi tanga hah a raen teh a hnukkâbangnaw hah patuen a poe. <sup>37</sup> Rangpui ni a boum awh toteh, ka cawi e hah a racawng awh navah tangthung sari touh akawi. <sup>38</sup> Ka cat e naw abuemlah napuinaw hoi camonaw e dei laipalah 4,000 touh a pha. <sup>39</sup> Hote taminaw hah a ceisak hnukkhu Magadan kho lah long hoi a cei.

## 16

### *Kângairu mitnout a hei awh*

#### *Mrk 8:11-21*

<sup>1</sup> Farasinaw hoi Sadusinaw a tho awh teh kalvan hoi e mitnout kamnue sak hanlah a kâhei awh teh Bawipa hah a tanouk awh. <sup>2</sup> Bawipa ni ouk na dei awh e teh tangmin lah tâmai a rapam teh a paling navah kho kahawi han na ti awh. <sup>3</sup> Amom lah toteh tâmai akawi, bout a paling dawkvah kahlî ka tho han na ti awh. A laikathoutnaw nangmouh ni teh kalvan minhmai hah na kapek panuek awh. A tu e mitnoutnaw hatteh na kapek panuek awh hoe hah. <sup>4</sup> Tami kahawilah kâsak e catounnaw, noutnae na hei awh navah profet Jonah e mitnoutnae hloilah alouke noutnae bangpatet e haiyah na sak pouh awh mahoe hah atipouh teh, ahnimouh onae koehoi alouklah a cei.

### *Farasi hoi Sadusinaw e ton*

<sup>5</sup> Namran lah a cei awh toteh a hnukkâbangnaw ni vaiyei sin hane hah yout a pahnim awh. <sup>6</sup> Jisuh ni Farasinaw hoi Saddusinaw e ton hah kâhruetcuat nateh roun awh, atipouh. <sup>7</sup> Maimouh ni vaiyei sin awh hoe hah



dawkvah hete lawk heh a dei telah a hnukkâbangnaw ni buet touh hoi buet touh a kâpankhai awh.

<sup>8</sup> Jisuh ni a panue dawkvah, yuemnae dawk tha kayoun e naw, vaiyei na sin awh hoehe e dawkvah na kâpankhai a vaw. <sup>9</sup> Vaiyei panga touh hah, tami 5,000 touh ni a ca awh teh tangthung nâyittouh maw kacawi, vaiyei sari touh hah tami 4,000 touh ni a ca teh, tangthung nâyittouh maw kacawi tie hah, <sup>10</sup> na pâkuem, na pouk awh laipalah, maw na o awh rah. <sup>11</sup> Farasinaw hoi Saddusinaw e ton hah kâhruetcuete awh, ka ti navah vaiyei heh ka dei ngai e nahoehe tie hah na thai panuek a laipalah bangtelamaw khuete na o a vaw atipouh. <sup>12</sup> Hat toreie teh ton e vaiyei hah roun awh tie nahoehe. Farasinaw hoi Sadusinaw e cangkhae hah roun awh, tinae doeh telah a hnukkâbangnaw ni a thai panuek awh.

*Jisuh teh Khrih doeh telah Piter ni a kampangkhai*

*Mrk 8:27-29; Luk 9:18-20*

<sup>13</sup> Kaisarea Filippi ram e kho buet touh dawke a pha awh totehe, Jisuh ni Kai heh taminaw ni api na ti a maw telah a hnukkâbangnaw hah a pacei.

<sup>14</sup> Tami tangawn ni Baptisma Jawhan; a tangawn ni Elijah; a tangawn ni Jeremiah, hoehpawiteh alouke profet buet buet touh doeh telah atipouh awh. <sup>15</sup> Nangmouh ni hai Kai hah api na ti a maw telah a pacei. <sup>16</sup> Simon Piter ni nang teh kahring e Cathut Capa, Khrih doeh atipouh. <sup>17</sup> Hatnavah Jisuh ni Simon Barjonah, nang teh na yawhawi. Bangkongtetpawiteh hete hno teh thi hoi tak ni nang koe a pâpho e nahoehe, kalvan kho kaawm e a Pa ni a pâpho pouh e doeh. <sup>18</sup> Nang koevah ka dei, nang teh Piter doeh. Hete lungsong dawkvah Kaie kawhmoun ka kangdue sak han. Hot teh duenae longkha ni hai tâ thai mahoehe. <sup>19</sup> Kalvan uknaeram cabinaw teh nang koevah na poe han. Talai van na katek e pueng teh kalvan hai katek lah ao han. Talai van rathap lah kaawm e naw pueng teh kalvan hai rathap lah ao han, telah atipouh. <sup>20</sup> Hahoi, Bawipa ni Kai teh Khrih doeh tie hah api koehai dei hoehe nahanelah a hnukkâbangnaw kâ a poe.

*A due hnukkhu bout thaw nahane kong, sut deinae*

*Mrk 8:31—9:1; Luk 9:22-27*

<sup>21</sup> Hahoi, Jisuh ni Jerusalem ka cei vaiteh kacuenaw, vaihma bawinaw hoi cakathutkungnaw e kut dawke rektapnae moi a khang hnukkhu a thei awh vaiteh apâthum hnin vah bout a thaw nahane kong hah a hnukkâbangnaw koe a dei pouh. <sup>22</sup> Hatnavah Piter ni Bawipa yue hanelah aloukalah a kaw teh, nang dawke bawt nahan seh atipouh. <sup>23</sup> Hahoi, Bawipa ni a kamlang sin teh Piter koe, nang Setan ka hnuk lah kâhnawnh. Nang teh kai hanlah payonnae lah na o atipouh. Bangkongtetpawiteh nang ni Cathut hoi ka kâkuen e hno dawke na lungthin pen laipalah tami hoi kâkuen e hno dawke lung na pen.

*Nama e thingpalam hrawm*

<sup>24</sup> Hattotehe Jisuh ni a hnukkâbangnaw koe apihai ka hnukkâbang han ka ngai e teh amahoima kâpahnaewt vaiteh, amae thingpalam hrawm hoi ka hnuk kâbang naseh. <sup>25</sup> Bangkongtetpawiteh apihai amae hringnae ka rungngang e teh hringnae a sung han. Kai kecu dawke hringnae ka sung e teh hringnae a hmu han. <sup>26</sup> Tami ni talaivan abuemlah kounge ka coe nakunghai muihtha hringnae sung pawiteh bangmaw aphu kaawm. A hringnae hah bang hno hoi maw a ratang thai han. <sup>27</sup> Tami Capa teh Apa e bawilenna hoi kalvantaminaw hoi a tho han. Hattotehe tami pueng ni a



tawh e phu a hmu awh han. <sup>28</sup> Atangcalah na dei pouh awh. Tami Capa amae uknaeram dawh a kum toteh hi kangdout e tami tangawn duenae kâhmo mahoe rah, atipouh.

## 17

*Jisuh mei kâthungnae*  
*Mrk 9:2-13; Luk 9:28-36*

<sup>1</sup> Jisuh ni Piter, Jem, Jem e nawngah Jawhan tinaw hah, hnin taruk a poung hnukkhu a kaw teh ka rasang e mon dawh soumtinae koe a ceikhai. <sup>2</sup> Ahnimaeh hmalah a mei a kâthung pouh. A minhmai teh kanî patetlah a ang teh, a khohna e teh raeng patetlah a pangaw. <sup>3</sup> Mosi hoi Elijah hai a kamnue teh Bawipa hoi lawk a kapan awh. <sup>4</sup> Hatnavah Piter ni Bawipa hete hmuen koe o a nep. Nang hanlah buet touh, Mosi hanlah buet touh, Elijah hanlah buet touh rim kathum touh hah na ngainae awm pawiteh kaimouh ni ka sak awh han atipouh. <sup>5</sup> Hottelah a dei lahun nah ka ang e tâmai ni a ramuk awh teh, het hateh ka pahren e Capa doeh, ahni dawh ka lungkuep tangngak. Ahnie lawk hah tarawi pouh awh, telah tâmai thung hoi lawk a tho.

<sup>6</sup> A hnukkâbangnaw ni a thai awh navah a taki awh teh a tabo awh. <sup>7</sup> Jisuh ni a tho teh ahnimanaw hah kut hoi a tek teh, thaw awh, taket awh hanh telah atipouh. <sup>8</sup> Ahnimouh ni a moungh awh teh a khet awh navah, Jisuh hloilah apihai hmawt awh hoe. <sup>9</sup> Monsom hoi a kum a torei teh Jisuh ni tami Capa teh duenae koehoi a thaw hoehroukrak, atu na hmu awh e hno hah api koehoi dei awh hanh telah a hnukkâbangnaw hah a kâ a poe. <sup>10</sup> Hattoteh a hnukkâbangnaw ni Elijah hmaloe a tho han telah bangkongmaw cakathutkungnaw ni ati awh, telah a pacei awh. <sup>11</sup> Jisuh ni Elijah teh hmaloe a tho vaiteh bangpueng hah kahawicalah a pathoup han tangngak. <sup>12</sup> Ka dei e teh Elijah a tho toe. Taminaw ni a panue awh hoe dawh a ngai awh e pueng patetlah a tak dawh a sak awh toe. Hot patetvanlah tami Capa haiyah hote taminaw kut dawh a khang han atipouh. <sup>13</sup> Baptisma kapoekung Jawhan doeh a dei ngai nah tie hah a hnukkâbangnaw ni a thai panuek awh.

*Khek ka man e tami a dam sak*  
*Mrk 9:14-28; Luk 9:37-42*

<sup>14</sup> Tami ka kamkhuengnaw koe a pha awh toteh tami buet touh ni rek a hnai teh, a khokcuengkhuem teh, <sup>15</sup> Bawipa ka capa hah pahren nateh rungngang haw. Khek a man teh puenghoi a patang toe. Hmai dawh, tui dawh voutsout a rawp toe. <sup>16</sup> Na hnukkâbangnaw koe ka thokhai ei toe, ahnimouh ni hawi sak thai awh hoe atipouh.

<sup>17</sup> Jisuh ni yuemnae ka tawn hoe e naw, lung kalen e phun, nangmouh hoi cungtalal nâ totouh maw ka o han rah. Nangmouh hah nâ totouh maw na panguep awh han rah. Camo hah hi thokhai awh, atipouh. <sup>18</sup> Jisuh ni kahrai hah a yue toteh, kahrai teh hote camo thung hoi a tâco. Camo teh hmawi a dam. <sup>19</sup> Hattoteh a hnukkâbangnaw ni soumtinae koe, Jisuh a hnai awh teh, kaimouh ni teh hote kahrai hah bangkongmaw ka pâlei thai awh hoe haw atipouh awh. <sup>20</sup> Jisuh ni, nangmouh teh yuemnae na tawn awh hoe dawkvah, na pâlei thai awh hoe. Atangcalah na dei pouh awh, nangmouh ni antam mu tittoth mah yuemnae na tawn awh pawiteh, hote mon hah hmuen koehoi kâtakhoe na tetpawiteh, hmuen koehoi a kâtakhoe han. Yuemnae na tawn awh pawiteh na tithai awh



hoeh e awm mahoe. <sup>21</sup> Hatei, ratoumnae, rawcahainae laipalah hot patet e muithakathout tâcawt thai hoeh atipouh.

*Jisuh ni a due nahane kong bout a dei*

<sup>22</sup> Jisuh ni Galilee ram ao awh lahun nah, tami Capa teh taminaw e kut daw k pahawt nahane tueng a hnai toe. <sup>23</sup> Ahnimouh ni a thei awh han. Apâthum hnin bout a thaw han telah a hnukkâbangnaw koe a dei pouh. Ahnimouh teh a lung puenghoi a mathoe awh.

*Bawkim tamuk cawngnae*

<sup>24</sup> Kapernuam kho daw k a pha toteh, bawkim daw k tamuk ka-cawngkungnaw Piter koe a tho awh teh, nangmae Bawipa ni cawng e tamuk poe hoeh maw atipouh awh. Hatnavah Piter ni a poe telah atipouh. <sup>25</sup> Piter ni imthung a kâen toteh, Jisuh ni Piter bangtelamaw na pouk. Talai bawinaw ni na maw tamuk a cawng awh. Ama e Capa koe maw a cawng. Ayâ koe maw a cawng telah a pacei. <sup>26</sup> Piter ni ayâ koe doeh a cawng atipouh navah, Jisuh ni hat pawiteh, Capa teh a hlout. Hatei, hotnaw ni maimouh kecu daw k a payon awh hoeh nahanlah talî koe cet nateh hradang hah sawn haw. <sup>27</sup> A pasuek na man e tanga hah lat nateh, a pahni baw pouh. Shekel tangka buet touh na hmu han. Hote tangka hah lat nateh kai hane hoi nama hane ahnimouh koe poe atipouh.

## 18

*Apimaw ka talue poung*

*Mrk 9:33-37; Luk 9:40-48*

<sup>1</sup> Hatnavah a hnukkâbangnaw ni Jisuh koe a tho awh teh, kalvan uknaeram dawkvah apimaw kalenpoung han telah a pacei awh.

<sup>2</sup> Jisuh ni camo ca buet touh a kaw teh a hnukkâbangnaw rahak vah a ta. <sup>3</sup> Atangcalah na dei pouh awh. Nangmouh ni na kâthung awh teh camo patetlah na coung awh hoehpawiteh kalvan uknaeram daw k nâtuek hai na phat awh mahoe. <sup>4</sup> Hatdawkvah apipatet hai hete camo patetlah kârahnom e teh kalvan uknaeram daw k kalenpounge lah ao han.

<sup>5</sup> Apipatethai ka min lahoi camo buetbuet touh ka dâw e teh, kai ka dâw e lah ao toe. <sup>6</sup> Kai na ka yuem e hete camo buetbuet touh hah ka yon sak e teh lahuen daw k talungsum awi laihoi kadung poung e talî daw k pabawt pawiteh ahni hanlah bet ahawi.

<sup>7</sup> Sak payonnae dawkvah talaivan taminaw teh a yawthoe awh. Sak payonnae kaawm han. Hatei, payonnae ka sak sak e teh a yawthoe. <sup>8</sup> Na kut khok ni na payon sak pawiteh kut khok hah tâtueng. Kut khok kuep laihoi ayungyoe hmai daw k a yungyoe na bo hlak teh kut khok kuep laipalah hringnae daw k na kâen pawiteh bet ahawi. <sup>9</sup> Na mit ni na payon sak pawiteh na mit hah cawngkhawih. Na mit kahni touh hoi hell hmai daw k na bo hlak teh mit vang dueng hoi hringnae daw k na kâen pawiteh bet ahawi.

*Tu kahmat bangnuenae*

*Luk 15:4-7*

<sup>10</sup> Nangmouh ni hete camo buetbuet touh hah na hnep awh hoeh nahanlah kâhruetcuat awh. Na dei pouh awh. Ahnimae kalvantaminaw ni kalvan kho vah kaawm e Pa e minhmai hah pou a hmu awh toe.

<sup>11</sup> Hothloilah, tami Capa teh kahmat e naw rungngang hanlah doeh a tho.



<sup>12</sup> Bangtelamaw na pouk awh. Tu 100 touh ka tawn e ni tu buet touh lam payon lah kahmat pawiteh, ahni ni tu 99 touh e hah mon vah cetakhai vaiteh, lam ka payon ni teh kahmat e tu buet touh hah tawng mahoeah na maw. <sup>13</sup> Atangcalah na dei pouh awh. A hmu toteh lam ka payon hoeah ni teh kahmat hoeah e 99 touh hlakvah kahmat e buet touh dawkh hoe a konawm. <sup>14</sup> Hot patetvanlah kalvan kho kaawm e nangmae na Pa ni hete camo buet touh boehai rawk sak hanlah a ngainae awm hoeah.

### *Kawhmoun thung kâhruetcuets poenae*

<sup>15</sup> Na hmaunawngaha ni nang dawkh a sakpayon e awm pawiteh cet sin nateh namamouh roi dueng a yonnae pâpho pouh nateh yue. Na lawk hah tarawi pawiteh na hmaunawngaha teh na hmu toe. <sup>16</sup> Na lawk hah tarawi hoehpawiteh tami kahni kathum touh kapanuekkhaikung lah kaw ei. Hahoi, kaawm e lawk pueng caksak awh. <sup>17</sup> Hotnaw e lawk hah tarawi hoehpawiteh kawhmoun koe dei pouh. Kawhmoun e lawk hah ngai hoehpawiteh Jentelnaw hoi tamuk kacawngnaw patetlah pouk awh.

<sup>18</sup> Atangcalah na dei pouh awh, talai van na katek awh e pueng teh kalvan kho hai katek lah ao han. Talai van rathap e pueng teh kalvan kho hai rathap lah ao han. <sup>19</sup> Bout ka dei e teh, talai van vah nangmouh thung dawkh tami kahni touh ni lungkânging lahoi na ratoum awh pawiteh, na ratoum e pueng hah kalvan kho kaawm e a Pa ni na poe han. <sup>20</sup> Bangkongtetpawiteh, bangpatet e hmuen koehai ka min lahoi tami kahni kathum touh kamkhueng pawiteh ahnimae lungui kai ka o atipouh.

### *Ngaithoum hoeah e san*

<sup>21</sup> Hatnavah Jisuh hah Piter ni rek a hnai teh, Bawipa hmaunawngaha ni kai dawkh a sakpayon e hah avai na yit touh maw ka ngaithoum han telah a pacei teh, Jisuh ni vai sari touh na ngaithoum han ka tet hoeah. <sup>22</sup> Avai rui sari let sari totouh na ngaithoum han ka ti.

<sup>23</sup> Hatdawkhvah kalvan uknaeram teh, amae sannaw hah tangka lai ka dei pouh e siangpahrang buet touh hoi a kâvan. <sup>24</sup> Cayin kounto hoiyah tangka a thong cum touh laiba ka tawn e san buet touh hah a hmalah a thokhai awh. <sup>25</sup> Ahni ni laiba patho nahan a tawn hoeah dawkhvah ama hoi a yucanaw a tawn e hnonaw pueng yawt nateh laiba patho naseh telah a bawi ni kâ a poe.

<sup>26</sup> Hote san ni a tabo teh Bawipa, na pahren ei, laiba kaawm e pueng hah na patho han atipouh navah, <sup>27</sup> A bawipa ni a pahren teh laiba kaawm e pueng hah a raphoe pouh teh a hlout sak. <sup>28</sup> Hote san teh a cei navah ama koe tangka 100 touh ka ba e san van hai a hmu toteh, tangka na patho leih ti teh a lahuen dawkh a kara pouh. <sup>29</sup> Hote san van ni hai a khok rahim a tabo pouh teh, kai hah na pahren ei, laiba kaawm e pueng hah na patho han doeh telah a kâhei ei nakunghai, <sup>30</sup> tha laipalah laiba a patho hoehroukrak thongim thung vah a paung. <sup>31</sup> Hottelah e hno hah alouke sannaw ni a hmu awh navah, a lung puenghoi a pataw awh teh, a sakyoe e pueng hah amamae bawipa koe a cei awh teh a dei pouh awh.

<sup>32</sup> Hat toteh, a bawipa ni hote san hah a kaw teh, Oe! san kathout, nang ni na kâhei dawkhvah na laiba pueng hah ka raphoe teh na hlout sak. <sup>33</sup> Kai ni na pahren e patetlah nang ni na san hui hah, na pahren kawi nahoehmaw atipouh. <sup>34</sup> A bawipa teh a lungkhuek dawkhvah a laiba pueng kounto a patho hoehroukrak rektapkungnaw kut dawkh patang palai sak hanlah a poe. <sup>35</sup> Nangmouh haiyah hmaunawngaha reira hah lungthin katang hoi na



ngaithoum awh hoehpawiteh kalvanlae Apa ni hot patetvanlah nangmouh lathueng vah a sak van han.

## 19

*Kâ kapeknae*

*Mrk 10:1-12*

<sup>1</sup> Jisuh ni, hete lawknaw be a dei hnukkhu, Galilee ram a ceitakhai teh Jordan tui namran, Judea ram lah a cei. <sup>2</sup> Taminaw ni a hnuk a kâbang awh, hote hmuen koe kapatawnaw a dam sak.

<sup>3</sup> Farasinaw ni atengvah a tho awh teh, sak payonnae pueng dawkh hoi tami ni amae yu hah ama kaw maw titeh a tanouk awh. <sup>4</sup> Bawipa ni apuengcue vah sak lah kaawm e teh tongpa hoi napui kahni touh dueng doeh sak lah kaawm. <sup>5</sup> Hote dawkvah tongpa ni a na pa hoi a manu a ceitakhai teh, a yu hoi a kâpahlawm dawkvah hote kahni touh roi teh buet touh lah ao han telah Cakathoung dawkh a dei e hah na touk awh boihoe maw. <sup>6</sup> Hatdawkvah yuvâ roi teh kahni touh nahoe, buet touh doeh. Cathut ni buet touh lah a pahlawm tangcoung e hno hateh tami ni kapek hanh naseh atipouh.

<sup>7</sup> Farasinaw ni hottelah pawiteh manae ca poe hoi ma hanlah bangkong Mosi ni kâ a poe atipouh awh. <sup>8</sup> Nangmae lungthin a pata dawkvah yu hoi kama hanlah Mosi ni a dei. Apuengcue teh hottelah na hoe. <sup>9</sup> Na dei pouh awh, uicuknae laipalah a yu heh a ma teh alouke napui ka lat e tami teh amae a yu koe a yon. Ma lah kaawm e napui hah ka lat e tami haiyah ayâ yu koe a yon atipouh. <sup>10</sup> A hnukkâbangnaw ni yuvâ dawkh hettelah awm pawiteh yu lat laipalah o e heh ahawi atipouh. <sup>11</sup> Bawipa ni hote lawk hah tami pueng ni koung dâw a mahoe. Dâw thainae kâ kahmawt e ni dueng doeh a dâw thai. <sup>12</sup> Tami tangawn teh a manu von thung hoi a bokhai e lah a tho. A tangawn teh yu la hoe hanelah ayâ ni cingthui e lah ao. Atangawn teh kalvan uknaeram kecu dawkh yu lat laipalah ao. Hete lawk heh ka dâw thai e teh dâw naseh atipouh.

*Camonaw yawhawi a poe*

*Mrk 10:13-16; Luk 18:15-17*

<sup>13</sup> Hatnavah camonaw lathueng vah kut toung sin hoi ratoum pouh hanlah atengvah camonaw hah a thokhai awh e hah a hnukkâbangnaw ni a yue awh. <sup>14</sup> Jisuh ni, hote camonaw hah thokhai a ngoun seh kai koe a tho awh hoe hanelah ngang awh hanh. Kalvan uknaeram teh hot patet e camonaw e ram doeh atipouh teh, <sup>15</sup> Camonaw e van vah kut a toung hnukkhu alouklah a cei.

*Ka tangreng e thoundoun*

*Mrk 10:17-30; Luk 18:18-30*

<sup>16</sup> Hathnukkhu, tami buet touh a tho teh, Bawi kahawi, yungyoe hringnae coe thai nahanlah bangpatet e hnokahawi maw ka sak han telah a pacei. <sup>17</sup> Jisuh ni Bangkong, kai hah Bawi kahawi na tipouh. Cathut buet touh dueng doeh kahawi. Hringnae dawkh kâen na ngai pawiteh kâpoelawknaw hah tarawi atipouh.

<sup>18</sup> Bangpatet e, kâlawnaw maw ka tarawi han kaw telah bout a pacei toteh, tami thet hanh, uicuk hanh, ayâ e hno parawt hanh, laithoe kampangkhai hanh, <sup>19</sup> manu na pa barih, ma hoi kâkuen e tami hah nama patetlah lungpataw telah atipouh. <sup>20</sup> Hote tami ni, hote kâlawnaw pueng



teh kanawca hoi kOUNg ka tarawi toe. Bangmaw sak hane a panki rah atipouh. <sup>21</sup> Kuepnae koe pha na ngai pawiteh cet nateh na hnopai pueng hah yawt nateh mathoemara pueng hah kabawm. Hottelah na sak pawiteh kalvan kho vah hno na tawn han. Hathnukkhu ka hnukkâbang haw, telah atipouh. <sup>22</sup> Hote tami teh hnopai moi ka tawn e lah ao dawkvah, hote lawk hah a thai navah lungmathoe laihoi a ban.

### *Tangreng hoi Kalvan uknae ram*

<sup>23</sup> Bawi Jisuh ni atangcalah na dei pouh awh, tangka moi ka tawn e ni teh kalvan uknaeram thung a kâen han a ru. <sup>24</sup> Bout na dei pouh awh. Bawi tangreng ni Cathut uknaeram thung dawka kâen hlah teh Kalauk ni phuengvang khu dawka kâen heh bet a yawi. Telah a hnukkâbangnaw koe atipouh.

<sup>25</sup> Ahnimouh ni a thai awh nah a kângairu awh dawkvah, hat pawiteh apimaw hloutnae dawka phat thai han atipouh awh. <sup>26</sup> Jisuh ni ahnimanaw hah a khet teh, het heh tami hanlah teh coung thai hoe, hatei, Cathut hanelah teh, a cawngca e hnopueng a coung thai atipouh. <sup>27</sup> Hattoteh Piter ni, kaimouh ni teh ka tawn awh e pueng ceitakhai hoi na hnuk ka kâbang awh toe. Bangpatet e tawkpheu maw ka coe awh han atipouh. <sup>28</sup> Jisuh ni atangcalah na dei pouh awh. A cawngca e hnopueng a katha lah pathoupnae tueng dawkvah tami Capa ni a bawilenna bawitungkhung dawkvah a tahung toteh, ka hnukkâbang e nangmouh teh tungkhung hlaikahni touh dawka tahung laihoi Isarel miphun hlaikahni touh hah lawk na ceng awh han. <sup>29</sup> Apipatethai ka min kecu dawka imlaw, hmaunawngah, manu napa, yucanaw buetbuet touh ka cettakhai e teh a let cum touh a coe vaiteh a yungyoe hringnae râw hah a pang han. <sup>30</sup> Hnukkatengnaw ni hma ahman vaiteh hmakahmannaw ni hnuk a teng awh han.

## 20

### *Misur takha thung thaw katawnaw bangnueae*

<sup>1</sup> Bangnueae lah, kalvan uknaeram teh misur takha dawka thaw tawka hanelah, amom vah ka tâcawt ni teh thawkatawnkung ka tawng e imkung hoi a kâvan. <sup>2</sup> Katawnaw hoi haiyah lawka kâcat awh teh, hnin touh e tawka e hah tangka phekkouh poue hanlah misur takha koe a patoun.

<sup>3</sup> Amom suimilam tako nah bout a tâco teh, alouke taminaw ni hno yonae koe thaw tawka laipalah sut a kangdue awh e hah a hmu dawkvah, <sup>4</sup> nangmouh hai misur takha koe cet awh, kâki lah na poue awh han atipouh. Ahnimouh ni a cei awh. <sup>5</sup> Hahoi, suimilam hlaikahni hoi tangmin suimilam kathum nah haiyah, a tâco teh ahmaloe e patetlah bout a coun. <sup>6</sup> Tangminlah suimilam panga na haiyah bout a tâco boteh, alouke taminaw sut a kangdue awh e hah a hmu navah, thaw tawka laipalah hete hmuen koe bangkongmaw sut na kangdue awh, atipouh navah; <sup>7</sup> Ahnimouh ni apinihai na coun awh hoe atipouh awh toteh, nangmouh hai kaie misur takha koe cet awh. Kâki lah na poue awh han atipouh. <sup>8</sup> Tangmin a pha toteh misur takha katawnkung ni amae tangka ka kuenkung hah a kaw teh, thaw katawnaw heh kOUNg pâkhueng nateh a hnukteng ka tawka e koehoi ahmaloe ka tawka e totouh kutphu poue leih atipouh.

<sup>9</sup> Hatdawkvah tangminlah suimilam panganae koehoi katawnaw ni tangka phekkouh a dâw awh. <sup>10</sup> Ahmaloe katawnaw ni teh kapap hmu



han doeh telah pouknae hoi a tho awh eiteh, tangka phek touh a dâw awh. <sup>11</sup> Hottelah be a dâw a hnukkhu imkung koe a phuenang awh. <sup>12</sup> A hnukkhu e ka kâennaw teh suimilam buet touh dueng a tawk awh ei, kanî rui rui khumbei khang laihoi ka tawk e kaimouh hoi reikâvan lah na poe atipouh awh.

<sup>13</sup> Imkung ni hai ka hui, nang dawk kamsoumhoehe hno ka sak hoeh. Tangka phek touh hoi nouh kai hoi lawk kâdaw roi ei, nama e hno hah lat nateh cet leih. <sup>14</sup> A hnukkhu kâen e naw hai nang hoi reikâvan lah poe hanlah ka ngainae ao. <sup>15</sup> Kai ni kama e hno hah ka sak ngai e patetlah ka sak mahoeah na maw. Kai kahawi e heh nang ni na ut maw atipouh. <sup>16</sup> Hot patetlah hnukteng e ni hma ahman han. Hma kahman e ni hnuk a teng han. A kaw e tami apap ei nakunghai a rawi e tami ayoun atipouh.

*Jisuh ni a due nahan apâthum lah bout a dei*

*Mrk 10:32-34; Luk 18:31-37*

<sup>17</sup> Jisuh ni Jerusalem lah a cei nah lam vah, a hnukkâbang hlaikahni touh hah soumatinae koe a kaw teh, <sup>18</sup> maimouh teh atuvah Jerusalem kho lah cei awh. Tami Capa teh vaihma bawinaw hoi cakathutkungnaw e kut dawh na poe awh han. Ahnimouh ni a due hanlah ao telah yon na pen awh han. <sup>19</sup> Tami Capa hah panuikhainae, hemnae, thingpalam dawh het sak hanlah Jentelnaw kut dawh a poe awh han. Apâthum hnin vah bout ka thaw han atipouh.

*A manu ni a hei pouh*

*Mrk 10:35-45*

<sup>20</sup> Hatnavah Zebedee e a canaw e a manu ni a capanaw hoi Bawipa koe a hnai awh teh, a bawh awh hnukkhu hno hah a hei awh. Bawipa ni bangpatet e hno maw na ngai telah a pacei. <sup>21</sup> Ahni nihaiyah hete ka capa roi hah na ram thungvah aranglah buet touh avoilah buet touh tahung thainae kâ poe haw atipouh. <sup>22</sup> Jisuh ni a canaw koe, na hei e hah na panuek awh hoeh atipouh. Ka nei han kawi manang na nei thai han maw. Ka khang hane Baptisma hah na khang thai awh han maw telah a pacei navah, kaimouh roi ni ka sak thai roi han atipouh roi dawkvah, <sup>23</sup> Kaie manang teh na nei thai yawkaw han. Ka khang hane Baptisma haiyah na khang thai yawkaw awh han. Hatei, kaie avoilah aranglah tahung thainae kâ teh Pa ni a rakueng pouh tangcoung e naw koe dueng doeh poe lah awm ti atipouh.

<sup>24</sup> Alouke a hnukkâbang hra touh ni a thai awh toteh hote hmau-nawngah roi koe a lungkhuek awh. <sup>25</sup> Jisuh ni a kaw awh teh na panue awh e patetlah Jentel bawinaw teh kâtawnnae a tawn awh. <sup>26</sup> Sak thainae kalen ka tawn e lah ao awh. <sup>27</sup> Nangmouh teh hottelah sak awh hanh. Tami Capa teh amae thaw hah ayâ patoun hanlah tho hoeh. <sup>28</sup> Ayâ e thaw tawh hanlah, tami kapap ratang hanlah a hringnae poe hanlah a tho dawkvah, hot patetlah nangmouh thung dawh kalen lah o ka ngai e teh nangmae thaw katawkkung lah awm naseh. Nangmouh thung dawh a lû lah tawh han ka ngai e teh nangmae san lah awm naseh atipouh.

*Jisuh ni mit ka dawn a dam sak*

*Mrk 10:46-52; Luk 18:35-43*

<sup>29</sup> Jeriko kho hoi a tâco awh navah tami moikapap ni a hnuk a kâbang awh. <sup>30</sup> Lam teng sut ka tahung e mitdawn kahni touh roi ni Jisuh a tho tie a thai roi nah, Devit Capa Jisuh, kaimouh roi hah na pahren ei telah a hram roi. <sup>31</sup> Taminaw ni duem ao roi nahanlah kâhruetcuetnae a poe



awh eiteh, Devit Capa Bawipa kaimouh roi hah na pahren ei telah hoehoe a hram roi.

<sup>32</sup> Jisuh ni a kangdue teh ahnimouh roi hah a kaw. Bangmaw sak sak hane na ngai roi atipouh. <sup>33</sup> Bawipa, kaimouh roi e ka mit hah ang sak haw atipouh roi. <sup>34</sup> Jisuh ni ahnimouh roi hah a pahren dawkvah ahnimouh roi e mit hah a kut hoi a tek pouh. Hat nah tahma vah a mit hmawi a ang roi dawkvah a hnuk a kâbang roi.

## 21

*Jerusalem vah bawilennae hoi a kâen*

*Mrk 11:1-10; Luk 19:29-38; Jhn 12:12-25*

<sup>1</sup> Jerusalem kho teng Olive Mon rahim kaawm e Bethphage kho a pha awh navah Jisuh ni a hnukkâbang kahni touh hmalah a patoun. <sup>2</sup> Hmalae kho dawc cet roi nateh hawvah sut pâkhi e Lamanu hoi a ca hah na hmu roi han. Arui rasu roi nateh kai koe hrawi roi haw. <sup>3</sup> Tami buetbuet touh ni bangkongmaw na rasu tetpawiteh, Bawipa ni a panki tet pouh roi. Hottelah na tet pouh roi pawiteh ahni ni tang na poe han telah lawk a thui. <sup>4</sup> Hete hno pueng hateh profetnaw ni sut a dei e lawk a kuep nahane doeh.

<sup>5</sup> Zion canu teh dei pouh. Khenhaw! na siangpahrang teh nang koe a tho lahun, Ama teh tami nuen kahawicalah ao teh La manu hoi Laca a kâcui.

<sup>6</sup> Jisuh ni kâ a poe e patetlah a hnukkâbang roi ni hmalah a cei roi teh a sak roi. <sup>7</sup> Lamanu hoi a ca hah a hrawi roi teh, La van vah amamae hni a phai pouh teh Bawipa ni, a kâcui. <sup>8</sup> Touk thai hoe e tami moikapap ni amamae hninaw hah lam dawc a phai awh. Atangawnnaw ni thingbunaw a bouk awh teh lam dawc a phai awh. <sup>9</sup> A hnuk lah, a hmalah ka cet e taminaw ni Devit Capa koevah Hosanna kahring Cathut min lahoi ka tho e teh yawhawinae awm lawiseh. Kalvan kadeng lah Hosanna telah a hram awh.

<sup>10</sup> Jerusalem kho thung a kâen navah kho thung abuemlah a puen awh teh hete tami heh apimaw telah a kâpacei awh. <sup>11</sup> Ka kamkhueng e taminaw ni, het hateh Galilee ram Nazareth kho e profet Jisuh doeh atipouh awh.

*Bawkim teh ratoumnae im*

*Mrk 11:15-18; Luk 12:45-47*

<sup>12</sup> Jisuh ni Cathut e bawkim thung a kâen teh, bawkim thung hno kayawtnaw hoi ka ran e naw hah a hrek, tangka kathungnaw e caboinaw hoi âbakhu kayawtnaw e tungkhungnaw hai koung a tanawt pouh.

<sup>13</sup> Cakathoung dawkvah ka im teh ratoumnae im telah a kaw awh han ati e, hote im hah nangmouh ni dingca im lah na sak awh, atipouh.

*Camonaw Jisuh ni a oup*

<sup>14</sup> Hatnavah, mitdawnnaw hoi a khokkhemnaw ni bawkim ama koevah a tho awh teh ahnimae patawpanatnae pueng a dam sak pouh. <sup>15</sup> Jisuh ni kângairu hno a sak e naw hoi camonaw ni hai bawkim vah Devit Capa teh Hosanna awmseh telah a hram awh e lawk hah vaihma bawinaw hoi cakathutkungnaw ni a thai awh navah a lungkhuek awh. <sup>16</sup> Hetnaw ni bangtelamaw a dei awh, tie hah na thai ou telah Jisuh hah a pacei awh. Jisuh ni oe, ka thai, sanu kanetnaw e pahni dawc hoi Bawipa pholennae hah ka rakueng tie lawk hah vai touh boehai na touk boi awh hoe haw



atipouh. <sup>17</sup> Hattoteh ahnimanaw hah Bethani kho lah a ceitakhai teh hote karum hah aloum sak.

*A paw ka paw hoeh e thaibunglung*

*Mrk 11:20-26*

<sup>18</sup> Amom lah khopui koe bout a ban navah a von a hlam. <sup>19</sup> Lam teng vah a hna dueng kanaw e thaibunglung kung buet touh hah a hmu. A kung koe a cei sin navah a paw banghai ao hoeh dawh atu hoi nâtuék hai nang dawh a paw paw sak hanh lawih atipouh. Hote thaibunglung kung teh tang a ke.

<sup>20</sup> A hnukkâbangnaw ni a hmu awh dawkvah, thaibunglung kung ni tang a ke toe telah kângairu hoi a dei awh. <sup>21</sup> Jisuh ni, Atangcalah na dei pouh awh. Nangmouh ni oupvoutnae kaawm hoeh e yuemnae na tawn awh pawiteh, thaibunglung kung dawh sak e patetlah na sak thai a hloilah, hote mon patenghai a onae hmuen koehoi kampuen nateh tuipui dawh bawt haw na tet pouh pawiteh, na tie patetlah kaawm han. <sup>22</sup> Yuemnae na tawn pawiteh, ratoum laihoi na hei awh e hno pueng na hmu awh han atipouh.

*Jisuh kâtawnnae*

*Mrk 11:27-33; Luk 20:27-40*

<sup>23</sup> Bawkim dawh bout a kâen teh a cangkhai lahun nah vaihma bawinaw hoi kacuenaw ni a tho awh teh, na e kâtawnnae lahoi maw het patet e hnnonaw hah na sak, apini maw hete kâtawnnae na poe, telah a pacei awh.

<sup>24</sup> Jisuh ni buet touh na pacei a van han, na dei thai awh pawiteh doeh hete hnnonaw hah na e kâtawnnae lahoi maw ka sak tie hah ka dei van han. <sup>25</sup> Jawhan e Baptisma heh nâ lahoi e maw. Kalvan koehoi e maw, tami koehoi e maw telah a pacei. Hatnavah amamouh hoi amamouh a kâpacei awh teh, Kalvan koehoi tet pouh pawiteh, nangmouh ni Jawhan hah bangkongmaw na yuem awh hoeh telah bout na pacei han. <sup>26</sup> Tami koehoi tet pouh pawiteh tamimaya taki bout a tho, Jawhan hah tami pueng ni profet patetlah a pouk awh dawkvah, ati awh. <sup>27</sup> Hatdawkvah Jisuh koe, ka panuek awh hoeh atipouh awh. Jisuh ni hai hot patetvanlah hete hnotithainae hah apie kâtawnnae lahoi maw ka sak tie hah ka dei van mahoe.

*Capa kahni touh hoi bangnuenae*

<sup>28</sup> Bangtelamaw na pouk awh. Tami buet touh ni capa kahni touh a tawn. Kacue koevah a cei teh, ka capa, sahnin kaie misur takha dawh cet nateh thaw tawh loe atipouh. <sup>29</sup> A capa ni ka cet mahoe atipouh. Hatei, a hnukkhu vah pan a kângai teh bout a cei. <sup>30</sup> A na pa ni kanaw e capa koe a cei teh ahmaloe e patetlah bout a dei pouh. Oe! Ka cei han bawipa, atipouh eiteh cet hoeh. <sup>31</sup> Hote capa kahni touh roi dawh api hah maw a na pa ngainae ka sak telah a pacei. Capa kacue e ni atipouh awh. Jisuh ni, atangcalah na dei pouh awh. Tamuk kacawngnaw hoi a tak kâyawtnaw ni nangmouh hlakvah Cathut uknaeram dawh a kâen awh. <sup>32</sup> Jawhan ni lannae lahoi nangmouh koe a tho eiteh nangmouh ni ama na tang awh hoeh. Tamuk kacawngnaw hoi a tak kâyawtnaw ni a yuem awh. Hote hah na hmu a ei teh na lungkâthung awh hoeh, yuemnae na tawn awh hoeh.

*Misur takha katawnkung bangnuenae*

*Mrk 12:1-12; Luk 20:1-19*



<sup>33</sup> Bangnuenae lawk alouke heh thai awh haw. Imkung buet touh ni misur takha buet touh a tawn. Khoup a tumdum teh, misur katinnae tangkom a tai. Imrasang buet touh a sak. Takhakatawkkungnaw koe a hlai sak teh alouke ram daw koe a cei. <sup>34</sup> A paw tue a pha toteh, a paw khi sak hanlah a sannaw hah takhakatawkkungnaw onae koe a patoun. <sup>35</sup> Hahoi takhakatawkkungnaw ni a sannaw hah a man awh teh buet touh hah a hem awh. Buet touh hah a thei awh. Buet touh hah talung hoi a dei awh. <sup>36</sup> Ahmaloe e hlak kapap lah takha katawnkung ni bout a patoun. Takha ka ring e naw ni ahmaloe e patetlah bout ati awh. <sup>37</sup> A hnukteng vah takha katawnkung ni, hotnaw ni ka capa hah a bari awh han doeh ati dawkvah, amae capa hah a patoun.

<sup>38</sup> Takhakatawkkungnaw ni capa hah a hmu awh toteh het hateh râw kacoekung doeh. Tho awh, thei awh vaiteh, a râw hnonaw hah lat a sei telah a kapan awh teh, <sup>39</sup> Takha katawnkung e Capa hah a man awh teh takha alawilah a thei awh. <sup>40</sup> Takha katawnkung, a tho toteh, hote takhakatawkkungnaw hah bangtelamaw ati han telah a pacei.

<sup>41</sup> Tamimaya ni hote tami kahawihoehnaw hah, ka patawpoung lah a raphoe vaiteh, a paw paw tue nah a paw ka poe hanelah, alouke takhakatawkkungnaw a hlai sak han atipouh awh. <sup>42</sup> Jisuh ni im kasaknaw ni a hnoun awh e talung ni im takin a rasang poungnae koe bout a pha. Hot hateh kahring Cathut ni a sak e doeh. Maimae mithmu hai kângairu hanlah ao tie lawk hah Cakathoung daw koe na touk boi awh hoe haw.

<sup>43</sup> Hatdawkvah na dei pouh awh. Cathut uknaeram hah nangmouh koehoi lat vaiteh, ram e a paw kapaw hane naw koevah poe lah kaawm han. <sup>44</sup> Apipatethai hote talung van kabawt e teh ka rek han. Apipatethai a van vah hote talung ni a bosin e teh vitkatip lah ao han atipouh. <sup>45</sup> Hote bangnuenae hah vaihma bawinaw hoi Farasinaw ni a thai awh navah kaimouh doeh na dei sin nah tie hah a panue awh. <sup>46</sup> Bawipa man hanlah a tawng awh ei, tamimaya hah a taki awh, ahnimouh ni profet patetlah khak a pouk awh dawkvah.

## 22

### *Yu paluennae paw bangnuenae*

#### *Luk 14:16-24*

<sup>1</sup> Jisuh ni kamkhuengnaw koe, bangnuenae lawk bout a dei pouh. <sup>2</sup> Kalvan uknaeram teh siangpahrang buet touh ni, a capa hanlah yu paluennae ka sak pouh e hoi a kâvan. <sup>3</sup> Yu paluennae buven hanlah a sannaw hah, a patoun teh a coun tangcoun e naw, akawsak ei teh ahnimouh ni tho laipalah ao awh.

<sup>4</sup> Alouke a sannaw hah bout a patoun teh ka coun tangcoun e naw koevah hettelah dei pouh awh. Buven hane kawi teh coungkacoe koun kalawng toe. Maito hoi alouke saring kathâw kathâwnaw hai ka thei teh hnopai pueng teh atangcoun calah ao toe. Yu paluennae koe tho a leih tet pouh awh atipouh. <sup>5</sup> Hatei, ahnimouh ni banglahai pouk a laipalah a tangawn ni law a ceitakhai awh, a tangawn ni hno yonae koe a ceitakhai awh. <sup>6</sup> Kaawm rae naw ni a sannaw hah a man awh teh a rektap awh, a thei awh. <sup>7</sup> Hote siangpahrang ni a thai navah a lungkhuek, amae ransanaw a patoun teh a tuk sak dawkvah tami ka thet e hotnaw hah koun e thei sak. Ahnimae kho hai hmai a sawi pouh awh.

<sup>8</sup> Hathnukkhuh siangpahrang ni amae a sannaw hah a kaw teh kaie yu paluennae bu teh coungkacoe lawng lah ao. Ka coun e naw ni a kamcu



awh hoeh dawkvah, <sup>9</sup> cet awa nateh lamsalun, lamcawngket koe na hmu awa e pueng hah yu paluennae buven hanlah kaw awa nateh coun awa, atipouh. <sup>10</sup> A sannaw ni hai lam tangkuem dawka a cei awa teh tami kahawi, kahawihoea, a hmu awa e pueng hah a pâkhueng awa toteh yu paluennae bu hah kawawi lah a ven awa. <sup>11</sup> Siangpahrang ni ka tho e naw khet hanlah a kâen navah, Yu paluennae khohna ka kho hoeh e tami buet touh a hmu. <sup>12</sup> Ka hui, yu paluennae khohna laipalah bangkongmaw na kâen, atipouh. Ahni ni lawka tho thai laipalah ao.

<sup>13</sup> Hattoteh siangpahrang ni a sannaw koe, ahnie a kutkhok katek awa nateh khuika hâ katanae, alawilah hmonae koe tâkhawng awa. <sup>14</sup> Hot patetvanlah, ka kaw e apap eiteh ka rawi e a youn ca atipouh.

### *Cathut hoi Sizar*

*Mrk 12:13-17; Luk 20:20-26*

<sup>15</sup> Hattoteh Farasinaw a tâco awa. Bangtelah hoi maw a lawka dei e lahoi maimouh ni a yon man thai awa han titeh a kâdei awa. <sup>16</sup> Ama e hnukkâbangnaw hoi Herod e hnukkâbangnaw hah a patoun awa teh, Bawipa, nang teh lawkkam na cak. Apihai na taket hoea, apie minhmai hai na khen laipalah Cathut e lamthung lawkkatang hah na pâtu tie hah ka panue awa. <sup>17</sup> Hatdawkvah bangtelamaw na pouk. Sizar koe tamuk poe kawi maw, poe hoea han kawi maw, na dei a pouh haw, telah a pacei awa.

<sup>18</sup> Jisuh ni ahnimae hawihoeahae hah a panue dawkvah, a lai kathoutnaw, bangdawkmaw kai heh na tanouk cak awa. <sup>19</sup> Tamuk tangka buet touh ma na patue awa, atipouh teh rahum tangka pheka touh a sin pouh awa. <sup>20</sup> Hete mei, hete a ka pâphonae heh apie maw telah a pacei. <sup>21</sup> Sizar e mei, Sizar e ka pâphonae atipouh awa. Jisuh ni Sizar e hno teh Sizar koe poe awa. Cathut e hno teh Cathut poe awa, atipouh. <sup>22</sup> Hote lawknaw hah a thai awa navah, a kângairu awa teh alouklah a cei awa.

### *Sadusinaw hoi boutthawnae*

*Mrk 12:18-27; Luk 20:27-40*

<sup>23</sup> Hat hnin vah bout thaw hringnae awm hoea ka tet e Sadusinaw ateng vah a tho awa teh a pacei awa. <sup>24</sup> Saya, Mosi nihaiyah tongpa teh ca sak laipalah dout pawiteh catoun a pout hoea nahanlah a nawngah ni hote napui hah a yu lah a la han telah a dei. <sup>25</sup> Kaimouh thung dawka hmaunawngah sari touh kaawm e ao. Apasueke ni a yu a la teh ca khe laipalah a due dawkvah a yu hah a nawngah hanlah a ceitakhai pouh. <sup>26</sup> Hot patetvanlah buet touh hnukkhu buet touh, hmaunawngah sari touh ni hote napui hoi ao awa hnukkhu a due awa. <sup>27</sup> A hnukteng vah hote napui hai a due van. <sup>28</sup> Hottelah ao dawkvah boutthawnae hnin dawka teh hote napui hah hmaunawngah sari touh thung dawka apie yu lah maw ao han. Ahnimouh ni be bout a yu na awa, telah atipouh awa. <sup>29</sup> Jisuh ni, nangmouh teh Ca Kathoung lawka hah na thai panuek awa hoea, Cathut e bahu hai na panue awa hoea dawkvah na tawm payon awa. <sup>30</sup> Boutthawnae hnin dawka teh yuvânae awm mahoea toe, yu paluennae hai awm mahoea toe. <sup>31</sup> Kalvan tami, Cathut e taminaw patetlah doeh o awa han. <sup>32</sup> Hothloilah, kadout tangcounghaw boutthawnae dawka teh, Cathut ni kai teh Abraham e Cathut, Isak e Cathut, Jakop e Cathut lah ka o telah nangmouh koe a dei e hah na touk boi awa hoea maw. Cathut teh kadoutnaw e Cathut nahoea. Kahringnaw e Cathut doeh telah atipouh.



<sup>33</sup> Rangpui ni hote cangkhaenae lawk hah a thai awh toteh a kângairu awh.

*Kalenpounge kâlawk*

*Mrk 12:28-31*

<sup>34</sup> Sadusinaw hah lawk tho sak thai hoehe toe tie hah Farasinaw ni a thai awh toteh cungalalah a kamkhueng awh. <sup>35</sup> Ahnimouh thung daw k kâlawk ka cangkhai e buet touh ni a tanouk nahanlah buet touh a pacei. <sup>36</sup> Saya, kâlawk thung daw bangpatet e kâpoelaw k hah maw kalenpoung atipouh. <sup>37</sup> Jisuh ni, na Cathut, kahring Cathut hah na lungthin abuemlah, na muitha abuemlah, na pouknae abuemlahoi na lungpataw han. <sup>38</sup> Het hateh apasuekpoung e hoi kalenpounge kâpoelaw k doeh. <sup>39</sup> Hothloilah, nama hoi kâkuen e hah nama hoi kâvan lah na lungpataw han tie apâhni e kâpoelawknaw teh apasuek e hoi a kâtarawi. <sup>40</sup> Hete kâpoelawknaw kahni touh hateh kâlawk puenghoi profetnaw ni dei e pueng e a kung lah ao atipouh.

*Jisuh Khrih teh api capa maw*

*Mrk 12:35-37; Luk 20:41-44*

<sup>41</sup> Farasinaw a kamkhueng awh navah Jisuh ni a pacei. <sup>42</sup> Khrih heh banglah maw na pouk awh. Apie Capa lah maw na pouk awh, atipouh. Ahnimouh ni Devit Capa atipouh awh. <sup>43</sup> Hat pawiteh Devit ni Khrih hah muitha lahoi Bawipa telah bangkongmaw a kaw. <sup>44</sup> Devit ni a dei e teh, kahring Cathut ni na taran pueng hah na khok rahim ka ta hoehroukrak kaie aranglah tahung telah Bawipa ni kaie Bawipa koevah atipouh.

<sup>45</sup> Hottelah Devit ni Khrih hah Bawipa telah kaw pawiteh bangtelamaw a capa lah ao han telah atipouh. <sup>46</sup> Api buet touh ni hai lawk kam touh boehai pathung thai awh hoehe. Hat hnin hoi teh apinihai lawk bout pacei ngam awh hoehe toe.

## 23

*Thoebonae sari touh*

*Mrk 12:38-39; Luk 20:45-46; 13:34-35*

<sup>1</sup> Hathnukku Jisuh ni a hnukkâbangnaw hoi tamimaya koe lawk a dei pouh. <sup>2</sup> Cakathutkungnaw hoi Farasinaw teh Mosi e tahungnae daw k a tahung awh. <sup>3</sup> Hatdawkvah ahnimouh ni a dei awh e pueng hah tarawi a nateh sak pouh awh. Ahnimae sak e patetlah teh sak awh hanh. Bangkongtetpawiteh, a dei awh e patetlah a sak awh hoehe daw k doeh. <sup>4</sup> Ahnimouh ni ka ri ni teh phu ka ru e hnonaw hah a roup awh teh taminaw e loung daw k ouh a patue awh. Amamouh ni hote hnonaw teh a kutdawn ca hoi boehai takhoe ngai awh hoehe. <sup>5</sup> A sak awh e hno pueng hah ayâ ni hmu nahanlah doeh a sak awh. A tampa daw k a kawm sin awh e akana a len sak awh teh, khohna daw k e akana a saw sak awh. <sup>6</sup> Buvennae hoi sinakoknaw koe kahawi e tahungnae hah a lungpataw awh, <sup>7</sup> hno yonae koe barinae, kacangkhaikung telah kawnae hah a ngai awh.

<sup>8</sup> Nangmouh teh Rabbi telah kawnae hah dâw awh hanh. Khrih buet touh dueng doeh nangmouh na kacangkhaikung na tawn awh. Nangmouh pueng teh hmaunawngah lah na o awh. <sup>9</sup> Talai van vah apihai apa telah kaw awh hanh. Kalvan kho vah nangmae na Pa buet touh dueng doeh kaawm. <sup>10</sup> Saya telah kawnae hai dâw awh hanh. Khrih dueng doeh nangmouh na kacangkhaikung lah ka awm. <sup>11</sup> Nangmouh thung daw k



kalenpounge tami teh nangmae patoun patang e lah ao han. <sup>12</sup> Apipatethai amahoima kârasang e teh a rahim vah pabo lah kaawm han. Apipatethai amahoima kârahnoum e teh tawm lah kaawm han.

<sup>13</sup> A laikathout e cakathutkungnaw hoi Farasinaw yawthoe lah na o awh. Kalvan uknaeram teh ayânaw hanlah na khan awh teh namamouh hai na kâen awh hoe, kâen han kangainaw haiyah na ngang awh. <sup>14</sup> A laikathout e cakathutkungnaw hoi Farasinaw yawthoe lah na o awh. Lahmainu e im hah na lawp awh teh a kamphawng hoe hahanlah kasaw pount lah na ratoum awh. Hatdawkvah hoe kalen e yonphukhangnae hah na khang awh han.

<sup>15</sup> A laikathout e cakathutkungnaw hoi Farasinaw, yawthoe lah na o awh. Bangkongtetpawiteh, tami buet touh hai namamae bawksae dawk kâen sak hanlah talî hoi a oung pheng na katin awh teh, na kâen sak hnukkhu teh namamouh hlak let hni e hell ca lah na o sak awh.

<sup>16</sup> Kahrawikung mit ka dawnnaw, yawthoe lah na o awh. Bangkongtetpawiteh, Bawkim hah noe lahoi thoe ka bo e teh cak hoe. Bawkim thung e sui hah noe hoi thoe ka bo e doeh ka cak na ti awh. <sup>17</sup> Tamipathu, mitdawnnaw, nâ e hno maw ka talue. Sui maw, nahoe pawiteh sui ka thoungsak e Bawkim na ou. <sup>18</sup> Thuengnae khoungroe noe lahoi thoe ka bo e teh cak hoe, thuengnae khoungroe van kaawm e thuengnae hno hah noe lahoi thoe ka bo e teh a cak na ti awh. <sup>19</sup> Mitdawnnaw, bangpatet e hno maw hoe ka talue. Hote thuengnae hno na ou, Hote thuengnae hno hah ka thoungsak e thuengnae khoungroe na ou. <sup>20</sup> Hatdawkvah thuengnae khoungroe hah noe lahoi thoe na bo pawiteh thuengnae khoungroe khuehoi avan e kaawm hno pueng hah mek na noe teh thoe na bo toe. <sup>21</sup> Bawkim hah noe lahoi thoe na bo pawiteh a thung kaawm e khuehoi thoe mek na bo toe. <sup>22</sup> Kalvan kho noe hoi thoe ka bo e teh Cathut e bawitungkhung hoi, a van ka tahung e khuehoi mek na noe teh thoe na bo toe.

<sup>23</sup> A laikathout cakathutkungnaw hoi Farasinaw yawthoe lah na o awh. Nangmouh ni teh anhla a pawhiknaw hoi sawngpam totouh hra touh dawk buet touh na hmoun awh. Hatei, kâlawk thung dawk hoi hoe alawkpui e lannae, pahrennae yuemnae hah lat na hnoun awh. Hete hnonaw na sak han roeroe lah ao. A lathueng lah dei e hai sak laipalah awm awh hanh. <sup>24</sup> Kahrawikung mitdawnnaw, tui dawk manging buet touh boehai ao hoe hahanlah na raci awh ei kalauk hah na payawp awh.

<sup>25</sup> A laikathout e cakathutkungnaw hoi Farasinaw yawthoe lah na o awh. Manang hoi tongben hah avanlah na pâle awh ei a thung lah teh lawpnae hoi dumpyennae hoi na kawi awh. <sup>26</sup> Mit ka dawn e Farasinaw, manang hoi tongben hah a thung lah hmaloe pâle awh. Hottelah na sak pawiteh doeh alawilah hai thong tih.

<sup>27</sup> A laikathout e cakathutkungnaw hoi Farasinaw yawthoe lah na o awh. Avan ka pangaw dui hluk e tangkom hoi na kâvan awh. Hote tangkom teh alawilah hroung ahawi. Athung teh tami hru, khinnae a cawngca hoi akawi. <sup>28</sup> Hot patetvanlah alawilah, taminaw hmalah teh tamikalan patetlah na o awh, athunglah teh laithoenae hoi dumpyennae hoi na kawi awh.

<sup>29</sup> A laikathout e cakathutkungnaw hoi Farasinaw, yawthoe lah na o awh. Profetnaw e phuen hah na sak awh teh tami kalannaw e phuen hah na pathoup awh. <sup>30</sup> A mintoenaw e se nah kaawm awh pawiteh profetnaw theinae dawk ka bawk awh mahoe na ti awh. <sup>31</sup> Hottelah na tet awh



pawiteh profetnaw ka thet awh e catoun lah ka o awh tie hah namamouh hoi namamouh ni na kampangkhah awh toe. <sup>32</sup> Hatdawkvah mintoenaw e a sakyoe awh e totouh phat awh.

<sup>33</sup> Hrunthoe catounnaw bangtelamaw lawkcengnae hell thung hoi na hlout a thai han raw vaw. <sup>34</sup> Hatdawkvah thai awh haw, nangmouh koevah, profetnaw, a lungkaang naw, cakathutkungnaw ka patoun han. A tangawn teh na thei awh vaiteh thingpalam dawh na pathout awh han. Atangawn hah sinakoknaw dawh na hem awh teh, kho buet touh hoi buet touh na rektap awh teh na hrek awh han. <sup>35</sup> Hatdawkvah, tamikalan Abel e thi koehoi athung bawkim hoi thuengnae khoungroe rahak na thei awh e Berekhiah capa Zekhariah e a thi totouh talai van dawh rabawh lah kaawm tangcoung e tami kalannaw e thi teh nangmae lû dawh ka bawt han. <sup>36</sup> Atangcalah na dei pouh awh. Hete hno pueng heh, hete catounnaw van vah ka phat han.

### *Jisuh ni Jerusalem hanlah a ka*

<sup>37</sup> Oe! Jerusalem, Jerusalem, profetnaw kathetkung, nang koe patoun lah kaawm e naw talung hoi kadêikung, Âpui ni a canaw hah a rathei rahim a pâkhueng e patetlah na canaw hah kamkhueng sak hanlah avai moikapap ngainae ka tawn toe. Hatei, nang ni teh na ngai hoeh. <sup>38</sup> Thai haw, na onae im teh tami kingkadi lah doeh ceitakhah lah ao toe. <sup>39</sup> Na dei pouh awh, Bawipa min lahoi ka tho e hah yawhawinae awm naseh telah na dei awh hoehrourak, atu hoi teh nangmouh ni ka minhmai hah na hmawt a mahoehtoe atipouh.

## 24

### *Jisuh ni bawkim rawh nahan kong sut a dei*

*Mrk 13:1-37; Luk 21:5-36*

<sup>1</sup> Jisuh ni bawkim dawh hoi a tâco teh alouklah a cei navah, bawkim saknae imnaw hah pâttue hanlah a hnukkâbangnaw ni rek a hnai awh. <sup>2</sup> Jisuh ni hete hnouaw pueng hah na hmu awh nahoehmaw. Atangcalah na dei pouh awh. Raphoe laipalah talung buet touh e avan, buet touh kangna hai kamhmung mahoehtoe atipouh.

### *Runae kalen a tho nahane sut a dei*

<sup>3</sup> Hathnukku, Olive Mon dawh a tahung navah, a hnukkâbangnaw ni alouknaw bawh laipalah jisuh koe rek a hnai awh teh, hote hnouaw teh nâttuek maw a tho han, let na tho nahane hoi talaivan a pout nahane minoutnaw teh bangtelamaw ao han na dei pouh haw atipouh awh. <sup>4</sup> Jisuh ni, ahnimouh koevah, apipatet ni hai na dum awh hoeht nahanlah kâhruetcueth awh. <sup>5</sup> Tami kapap ni kai doeh Khrih ati vaiteh, Kaie min lahoi haiyah tho a vaiteh, tami kapap hah a dum awh han. <sup>6</sup> Taran kâttuknae hoi, tarankâttuk nahane kamthang hai na thai awh han. Hatei, na puen awh hoeht nahanelah, kâhruetcueth awh. Hote hnouaw teh kaawm han. Hatei a poutnae nahoeht rah. <sup>7</sup> Miphun buet touh hoi buet touh, uknaeram buet touh hoi buet touh a kâtaran awh han. Kho tangkuem a takang vaiteh, lacik a pung han, tâli a no han. <sup>8</sup> Hotnaw hateh runae kamtawngnae doeh.

### *Rektap khang nahan kong sut a dei*

<sup>9</sup> Hat toreit teh taminaw ni rektap hanlah, thei hanlah na man awh han. Ka min kecu dawh tami pueng ni na pahnawt awh han. <sup>10</sup> Hat



torei teh tami kapap ni lawkkam raphoe vaiteh, buet touh hoi buet touh a kâpahnaht awh vaiteh, buet touh hoi buet touh a kâmaithoe awh han. <sup>11</sup> Profet kaphawk pap vaiteh tami kapap a dum awh han. <sup>12</sup> Hounlounnae apap han, lungpatawnae a roun han. <sup>13</sup> Apipatethai apout ditouh ka khang e teh hloutnae a hmu han. <sup>14</sup> Uknaeram kamthang kahawi heh miphun pueng koe lawkpanuesaknae lah ao na hanlah, talaivan pueng dawh pâpho lah kaawm han. Hahoi, teh poutnae a pha han.

### *Rucatnae kalenpoung*

<sup>15</sup> Hatdawkvah profet Daniel ni a dei e patetlah panueththopoung karaphoeung kathoung hmuen dawh kangdue e na hmu awh toreih teh, Cakathoung ka touk e ni thai panuek naseh. <sup>16</sup> Hottelah hmu lah awm pawiteh, Judea ram kaawm e naw ni monsom lah yawng awh naseh. <sup>17</sup> Lemphu kaawm e ni imthungkhu e hno la hanlah kum hanh naseh. <sup>18</sup> Laikawh koe kaawm e ni hai a khohna la hanlah hnuklah kamlang hanh lawiseh. <sup>19</sup> Hot na hnin toteh camo ka neng e napui hoi camosen kaawm e napuinaw teh puenghoi a ru awh han. <sup>20</sup> Na yawng awh nahane teh pâding tue hoi sabbath hnin dawh a kâvoe hoe hanehanlah ratoum awh. <sup>21</sup> Bangkongtetpawiteh, talaivan pek a kamtawng hoi atu totouh kaawm boihoe hane, ao hnukkhu hoi hai bout kaawm hoe hane puenghoi runae teh hatnae tueng nah a tâco han. <sup>22</sup> Hote tueng teh saw pawiteh apipatet ni hai hlout thai mahoe. Rawi e taminaw hane kecu dawh hote tueng hah a duem sak han. <sup>23</sup> Hattoteh apipatet ni hai hi doeh Khrih ao, haw doeh Khrih ao ka tet nakunghai yuem awh hanh. <sup>24</sup> Bangkongtetpawiteh, khrihkaphawknaw hoi profetkaphawknaw tâcawt vaiteh, rawi tangcoung e naw patenghai dum thai pawiteh dum thai nahanelah, kalenpoung mitnout hoi kângairunae hnouaw hah a kamnue sak awh han. <sup>25</sup> Thai awh haw, sut na dei pouh awh.

<sup>26</sup> Hatdawkvah, ahnimouh ni Khrih teh thingyeiyawn doeh ao ka tet awh nakunghai tâcawt awh hanh. Imthung doeh ao ka tet nakunghai yuem awh hanh. <sup>27</sup> Sumpa teh kanîtho koehoi apalik nah kaniloum totouh a ang e patetlah tami Capa teh ka tho han. <sup>28</sup> Ro aonae koe langtanaw ni a kamkhueng han.

### *Tami Capa bout a tho han*

<sup>29</sup> Hatnae tueng runae hnukkhu, kanî teh vaitalahoi a hmo han. Thapa teh ang mahoe. Âsinaw teh kalvan hoi a bo awh han. Kalvannaw e bahu teh a kahuet awh han. <sup>30</sup> Hattoteh tami Capa e mitnout teh kalvan vah a kamnue han. Talai van tami pueng ni a khuika awh vaiteh, tami Capa ni kalenpoung bahu hoi kalenpoung bawilenna tîmai kâcui vaiteh a kum e hah na hmu awh han. <sup>31</sup> Hahoi a kalvantaminaw hah kâcui kalenpoung mongka lawk hoi patoun vaiteh, talai takin pali touh koe e kalvan apoutnae koehoi avanglae apoutnae koe totouh, a rawi tangcoung e taminaw hah a pâkhueng awh han.

### *Thaibunglung kung bangnuenae*

<sup>32</sup> Thaibunglung kung hoi bangnuenae hah pâkuem awh. Thaibunglung kung ni a dawn a cawn teh a hnana a naw toteh, kompawî a hnai toe tie hah na panue awh. <sup>33</sup> Hot patetlah hote a konglam abuemlah na hmu awh toteh, tami Capa teh takhang koe totouh a tho toe tie hah panuek awh. <sup>34</sup> Atangcalah na dei pouh awh. Atu e catounnaw be a due awh



hoehnahlan hote konglam pueng ka tâcawt han. <sup>35</sup> Kalvan hoi talai teh a rawk han, hatei ka lawk teh a kangning han.

*Atueng teh apinihai panuek hoeh*  
*Luk 17:26-27*

<sup>36</sup> Hote tueng teh apinihai panuek hoeh. Kalvan e kalvantaminaw ni hai panuek hoeh. Apa ni dueng doeh a panue. <sup>37</sup> Tami Capa a kum toteh Noah senae patetlah kaawm han. <sup>38</sup> Noah ni tuikamuem hoehnahlan hoi long thung a kâen ditouh tami pueng ni a canei awh, a kâpâ awh. <sup>39</sup> Tui kamuem a tho toteh taminaw pueng kount raphoe ditouh a thada e patetlah tami Capa a kum toteh hotpatetlah ka tâcawt han. <sup>40</sup> Hattoteh law kaawm e tami kahni touh dawkw buet touh a la vaiteh buet touh a ceitakhai han. <sup>41</sup> Cakang ka phawm roi e napui kahni touh dawkw buet touh a la vaiteh buet touh a ceitakhai han.

<sup>42</sup> Nangmae Bawipa teh nâtuek maw a tho han ti na panue awh hoeh dawkvah ring awh. <sup>43</sup> Tamru a tho nahane tueng heh imkung ni panuek pawiteh a paru thai hoeh nahanlah a ring han doeh tie teh na panue awh. <sup>44</sup> Hatdawkvah coungkacoe awm awh. Bangkongtetpawiteh na poukhoehnae tueng dawkw tami Capa teh ka tho han.

*Yuemkamcu e hoi kâhruetcu e san*

<sup>45</sup> Bawipa ni amae imthungnaw hah atueng a pha toteh rawcanaw poe sak hanlah kaukkung lah a rawi e yuemkamcunae hoi lungangnae hoi kakuep e san kahawi teh apimaw. <sup>46</sup> Bang patet e san hai hottelah a sak e hah a Bawipa ni a hmu pouh e teh a yawhawi. <sup>47</sup> Atangcalah na dei pouh awh. Bawipa ni hot patet e san koevah a hnopai kaawm e pueng hah a poe han. <sup>48</sup> Hatei, san kathout ni teh a lungthin dawkw hoi ka Bawipa heh tho hnai mahoehtelah a pouk laihoi, <sup>49</sup> a huinaw hah a hem a bo teh hounloun, yamuhrinaw hoi a canei awh. <sup>50</sup> A bawipa teh a poukhoehnae hoi a panuehoehnae tueng dawkw a tho teh, <sup>51</sup> hote san hah puenghoi yue vaiteh khuikanae, hâ katanae hmuen koe ka kâsak e naw hoi cungtalang hmuen a hmoun pouh awh han.

## 25

*Tanglakacuem hra touh bangnueanae*

<sup>1</sup> Kalvan uknaeram teh yupaluenkung dawn hanlah hmaiim patuep hoi ka cet awh e tanglakacuem hra touh hoi a kâvan. <sup>2</sup> Hote tanglanaw thung dawkw panga touh teh a lungang awh. Hatei, panga touh e teh a pathu awh. <sup>3</sup> Ka pathu e naw teh, hmaiim dueng a sin awh teh, atui sin awh hoeh. <sup>4</sup> A lungkaangnaw teh, hmaiim hoi, satuim dawkw, atui khuehoi a sin sin awh rah. <sup>5</sup> Yupaluenkung a tho hoeh navah, hote tanglanaw ni a ngam awh teh, muet a i awh.

<sup>6</sup> Karumsaning toteh, khenhaw! yupaluenkung a tho toe, tâcawt awh nateh, dawn a leih, telah a oung. <sup>7</sup> Hote tanglakacuemnaw ni a thaw awh teh hmaiimnaw hah a kârakueng awh.

<sup>8</sup> A lungkaang hoeh e naw ni kaimae hmaiim hmai a due toe. Nangmae satu hah youn touh na poe awh haw telah a lungkaangnaw koe a hei awh. <sup>9</sup> A lungkaang e naw van ni hai nangmouh hane khuehoi atui khout hoeh. Hatdawkvah na hno awh hanelah atui kâyawt e koe na ran awh pawiteh bet kahawi han telah atipouh awh.



<sup>10</sup> Hotnaw ni atui ran hanelah a cei awh lahun navah, yupaluenkung a tho toteh, coungkacoe kaawm e tanglanaw teh yupaluenkung hoi cungtalah pawî thung a kâen a hnukkhu takhang hah a khan awh. <sup>11</sup> Hathnukkhu alouknaw a tho awh. Bawipa, Bawipa kaimouh han tho paawng ei telah a kâhei awh. <sup>12</sup> Bawipa ni atangcalah na dei pouh awh, nangmouh na panuek awh hoe, telah atipouh. <sup>13</sup> Hatdawkvah tami Capa a tho nahane hnin hoi atueng teh na panue awh hoe dawkvah ring awh.

### *Talen hoi bangnueae*

*Luk 19:12-27*

<sup>14</sup> Kalvan uknaeram teh ahlanae ram koe kahlawng ka cet e hoi a kâvan. Ahni ni, kho louk lah cei hane pouknae a tawn dawkvah, a kut rahim e naw hah a kaw teh a hnonaw hah a hnawng. Ahnimouh teh amamae a coung thai awh e patetlah buet touh koe talen panga, <sup>15</sup> buet touh koe kahni, buet touh koe buet touh a poe hnukkhu a ceitakhai (Talen buet touh heh Deinari 6,000 hoi a kâvan ). <sup>16</sup> Talen panga touh ka dâw e ni a cei teh a yoran dawkvah alouke apung talen panga touh a hmu. <sup>17</sup> Hote patetvanlah talen kahni touh ka dâw e van nihai, alouke apung talen kahni touh a hmu. <sup>18</sup> Talen buet touh ka dâw e niteh, Bawipa e talen hah talai a tai teh talai thungvah a hro. <sup>19</sup> A hnin a tha moi a saw hnukkhu hotnaw e Bawipa a tho teh, tangka e a kong hah a dei. <sup>20</sup> Talen panga touh ka dâw e ni yah, apung e talen panga touh a sin teh, Bawipa nang ni kai koe talen panga touh na pâkuem sak. Alouke talen panga touh ka pung sak atipouh. <sup>21</sup> Bawipa ni, ahawi nang teh kahawi e hoi yuemkamcu e san., nang teh titca e hno daw yuemkamcu dawkvah, kapap e hno hai na kuem sak han. Na Bawipa lunghawinae thungvah kâen van leih atipouh.

<sup>22</sup> Talen kahni touh ka dâw e nihai, Bawipa talen kahni touh na kuem sak teh, alouke talen kahni touh ka pung sak atipouh. <sup>23</sup> Bawipa ni, ahawi. Yuemkamcu e san kahawi. Hno titca e daw yuemkamcu toe. Hno kapap e hai na kuem sak han. Na Bawipa lunghawinae thung kâen van haw, atipouh.

<sup>24</sup> Talen buet touh ka dâw e nihai, Bawipa nang teh pacipali lah na kaawm e na tho dawkvah, na patuehoehnae hmuen koe na ka a niteh, na heihoehnae hmuen koe na ka pâkhueng e na tho tie hah ka panue. <sup>25</sup> Hatdawkvah, ka taki teh, nange talen buet touh hah talai thung ka hro toe. Atu na talen roup ao atipouh. <sup>26</sup> A bawipa ni, ka pangak pasa e san kathout, atipouh. <sup>27</sup> Ka heihoehnae koe ka pâkhueng tie hah na panuek katang pawiteh kaie talen hah bangkongmaw hno yorannaw kut daw na hruek hoev vaw. Hottelah na hrueng pawiteh kai bout ka tho toteh, tangka a manu hoi apung hah ka hmu han ei.

<sup>28</sup> Hatdawkvah, talen buet touh e hah a kut daw hoi lawmh awh. Talen hra touh ka tawn e hah poe sin awh. <sup>29</sup> Bangkongtetpawiteh, apipatet hai ka tawn e teh, hoe kapap a tawn nahanlah rek poe sin han rah. Apipatethai ka mathoe e teh a tawn e ca patenghai he lawp pouh lah ao han. <sup>30</sup> Cungkeihoehe hote san hah, khuikanae hoi hâ katanae aonae koe, alawilah hmonae thungvah tâkhawng awh, atipouh.

### *Tu hoi hmae*

<sup>31</sup> Tami Capa teh a Bawilenna hoi kalvantami kathoungnaw hoi a tho toteh, a bawilenna bawitungkhung dawkvah a tahung han. <sup>32</sup> A hmalah miphun pueng a kamkhueng sak vaiteh, tukhoumkung ni tu hoi hmae a



kapek e patetlah tami pueng hah a kapek han. <sup>33</sup> Tunaw hah aranglah, hmaenaw hah avoilah a ta han.

<sup>34</sup> Hat toteh, siangpahrang ni aranglah kaawm e koevah, tho awh, a Pa e yawhawinae kacoenaw, talaivan sak pasuek hoi nangmouh hanlah sut pathoup e uknaeram hah pang awh. <sup>35</sup> Bangkongtetpawiteh, ka vonhlan nah na paca awh. Tui kahran nah nei han tui na poe awh. Imyin lah ka o nah na khetyawt awh. <sup>36</sup> Caici lah ka o nah na khohna sak awh. Ka patawpanat nah na khetyawt awh. Thongim ka bo nah na hloe awh, ati pouh.

<sup>37</sup> Hat torei teh tami kalannaw niyah, Bawipa nâtuék maw na vonhlan e hah ka hmu awh teh na paca awh. Tui na kahran e hah nâtuék maw ka hmu awh teh na nei hanlah tui na poe a waw. <sup>38</sup> Imyin lah na o e hah nâtuék maw na hmu awh teh na khetyawt awh. Caici lah na o e hah nâtuék maw na hmu awh teh, na khohna sak awh. <sup>39</sup> Na patawpanat nah nâtuék maw na hloe awh teh, nang koe ka tho awh, telah ati awh han. <sup>40</sup> Hattoteh siangpahrang ni atangcalah na dei pouh awh. Nangmouh ni hete ka nawnganaw thung dawkvah kahoengpounge koevah na sak awh e pueng hateh, kai koe na sak awh e doeh toe telah bout ati pouh awh han.

<sup>41</sup> Hat toteh, siangpahrang ni, avoilah kaawmnaw koevah, nangmouh theobo lah na kaawmnaw, kahraimathout hoi amae a hunaw hanlah sut rakueng pouh e a yungyoe hmai thungvah kai koehoi kâtakhoe awh. <sup>42</sup> Bangkongtetpawiteh, ka von a hlan nah ca han rawca na poe awh hoeh, tui kahran navah nei hane tui na poe awh hoeh. <sup>43</sup> Imyin lah ka o navah na khen na yawn awh hoeh, caici lah ka o navah na kho na hnat sak awh hoeh, ka patawpanat nahai thoseh, thongim thung ka o nahai thoseh, na tho na awm sin awh hoeh.

<sup>44</sup> Hotnaw ni vah, Bawipa, na vonhlan e, tui na kahran e, imyin lah na o e, caici lah na o e, na patawpanat e, thongim thung na onae hah nâtuék maw na hmu awh teh na khenyawn laipalah, na paca laipalah ka o awh, ati awh han. <sup>45</sup> Hattoteh siangpahrang ni, atangcalah na dei pouh awh. Nangmouh ni hete ka nawnganaw thung dawkw, ka thoung poung e koe na sak awh hoeh e pueng teh kai koe na sak awh hoeh toe, ati pouh awh han. <sup>46</sup> Hotnaw teh a yungyoe reknae koe cet awh vaiteh, tami kalannaw teh a yungyoe hringnae koe a cei awh han a ti.

## 26

*Jisuh thei hanlah a kâcai awh*

*Mrk 14:1-2; Luk 22:1-2*

<sup>1</sup> Jisuh ni hete lawknaw kOUNg a dei hnukkhu, a hnukkâbangnaw koevah, <sup>2</sup> Hnin hni touh a loun hnukkhu teh, ceitakhai pawî hnin ao han toe titeh na panue awh. Hattoteh tami Capa hah thingpalamnae dawkw thei sak hanlah, poe e lah kaawm han atipouh.

<sup>3</sup> Hatnavah, vaihma bawinaw, cakathutkungnaw hoi kho thung e kacuenaw teh vaihma kacue Kaiaphas e toeim vah a kamkhueng awh teh,

<sup>4</sup> Jisuh hah huenghai hoi bangtelah ne man thai vaiteh thei thai awh han tie hah a kâpankhah awh. <sup>5</sup> Hatei, pawî na hnin vah man awh hanh ei sei. Tami pueng ruengrueng tet a langvaih ati awh.

*Napui buet touh ni Jisuh hah hmuitui a awi*

*Mrk 14:3-9; Luk 7:37-38; Jhn 12:1-8*



<sup>6</sup> Bethani khovah ka hrikbei e Simon im Jisuh ao navah, <sup>7</sup> napui buet touh ni hmutui aphu kaawm poun e talungpangaw bom a sin teh bu a ca lahun nah a lû daw k a awi pouh.

<sup>8</sup> A hnukkâbangnaw ni a hmu awh navah, bangkongmaw a kaseikasak ati awh teh a lungkhuek awh. <sup>9</sup> Hote hmutui hah aphu moikapap lah yo vaiteh karoedengnaw poe hanelah ao ati awh. <sup>10</sup> Jisuh ni a panue toteh hote napui hah bangkongmaw na taraw k awh. Ahni ni kai koe hnokahawi a sak toe. <sup>11</sup> Karoedengnaw teh nangmouh koe doeh pou ao awh. Kai teh nangmouh koe pou kaawm mahoe. <sup>12</sup> Hete hmutui hah ka tak daw k a awi e teh, ka ro pakawp nahanlah a rakuengnae doeh toe. <sup>13</sup> Atangcalah na dei pouh awh. Talaivan kamthang kahawi deinae hmuen pueng koevah, hete napui pou pouk nahanelah, a hnosa k e heh dei lah kaawm van han atipouh.

*Judah Isakarot ni Jisuh a yo*  
*Mrk 14:10-11; Luk 22:3-6*

<sup>14</sup> Hatnavah a hnukkâbang hlaikahni touh thung daw k e Judah Isakarot ni vaihma bawinaw koe a cei teh, <sup>15</sup> Jisuh hah nangmae kut daw k na poe thai pawiteh, nangmouh ni kai hah tangka nâyittouh maw na poe awh han atipouh. Ahnimouh ni ngun tangka 30 touh na poe han atipouh awh. <sup>16</sup> Hahoi teh, Bawipa hah pahnawt thai nahanelah, Judah ni atueng kanhlongnae hah sut a ring.

*Tangmin buvennae*  
*Mrk 14:12-16; Luk 22:7-13*

<sup>17</sup> A hnukkâbangnaw ni tonphuenhoehe paw i apasuek hnin vah, ceitakhai paw i ca nahane hmuen hah nâ e koe maw rakueng sak hanlah na ngai atipouh awh. <sup>18</sup> Bawipa ni, khothung tami buet touh e im vah cet awh nateh, Bawipa ni lawk na thui e teh, a tue a hnai toe, a hnukkâbangnaw hoi cungtalai ceitakhai paw i heh nangmouh im vah ka hno awh han ati tet pouh awh, atipouh. <sup>19</sup> A hnukkâbangnaw ni a dei pouh e patetlah a sak awh teh, ceitakhai paw i hah atangcungcalah a rakueng pouh awh. <sup>20</sup> Tangmin lavah, a hnukkâbangnaw hlaikahni touh hoi bu cungtalai a ven awh.

<sup>21</sup> A ca awh lahun navah Bawipa ni, atangcalah na dei pouh awh. Nangmouh thung daw k buet touh ni kai hah na pahnawt awh han atipouh. <sup>22</sup> Hat tore i teh, a hnukkâbangnaw a lung puenghoi a mathoe awh teh, Bawipa kai maw telah lengkaleng a pacei awh. <sup>23</sup> Bawipa ni kawlung daw k kai hoi rei ka tapu e ni kai na pahnawt han. <sup>24</sup> Cakathoung daw k thut e patetlah tami Capa teh ka cet han. Hatei, tami Capa ka pahnawt e teh a yawthoe. Ahni teh khe hoe h ngala pawiteh bet ahawihnawn atipouh. <sup>25</sup> Bawipa ka pahnawt e Judah Isakarot ni hai Rabbi kai maw telah a pacei navah, na dei e patetlah oe nang doeh atipouh.

*Bawipa e bu apasuek venna*

<sup>26</sup> A ca awh lahun navah, Jisuh ni vaiyei a la teh, lunghaw i lawk a dei hnukkhu, a raen teh, hete vaiyei teh ka tak doeh. Lat awh nateh cat awh, telah a hnukkâbangnaw koe atipouh.

<sup>27</sup> Manang hai a la teh lunghaw i lawk a dei hnukkhu ahnimanaw hah a poe teh, nangmouh pueng ni net awh. <sup>28</sup> Hete manang teh lawkkam katha doeh. Taminaw hlout nahanlah ka rabaw k e ka thi doeh. <sup>29</sup> Na dei pouh awh. Hete misurtui patet e a katha e misurtui nangmouh hoi cungtalai a



Pa e uknaeram dawk bout ka nei hoehoukrak, atu hoi bout ka net mahoe h toe. <sup>30</sup> Hahoi teh la a sak awh teh Olive Mon lah a luen awh.

*A hnukkâbangnaw paringparang a yawng awh*

*Mrk 14:27-31; Luk 22:31-34*

<sup>31</sup> Hat toteh, Cakathoung dawk a thut e teh, tukhoumkung hah hem awh vaiteh, a tunaw ni paringparang lah ao awh han ati e patetlah, sahnin tangmin lah nangmouh pueng ni kai kecu dawk na lung a pout awh han.

<sup>32</sup> Hatei, bout ka thaw hnukkhu nangmouh hmalah, Galilee ram lah ka cei han, telah Jisuh ni atipouh. <sup>33</sup> Hetnaw ni nang kecu dawk a lung ka pout awh nakunghai kai teh ka lung khoeroe pout mahoe h, telah Piter ni a ti. <sup>34</sup> Jisuh ni, atangcalah na dei pouh. Sahnin tangmin ahlu i a khawng hoehnahlan kai hah vai thum touh na pahnawt han atipouh. <sup>35</sup> Piter ni, nang hoi rei due han nakunghai kai ni na pahnawt mahoe h bout atipouh. Alouke a hnukkâbangnaw ni hai hot patetvanlah a dei awh.

*Gethsemani takha thung ratoumnae*

*Mrk 14:32-42; Luk 22:40-46*

<sup>36</sup> Hatnavah Jisuh ni Gethsemani hmuen koe ahnimouh hoi rei a pha toteh, kai teh hote hmuen koe ratoum hanlah ka cei han, hete hmuen koe la tahung awh lah a, telah a hnukkâbangnaw koe atipouh. <sup>37</sup> Piter hoi Zebedee e a capa roi a hrawi. Hatnavah Bawipa teh a lungmathoe, lungpuen hoi ao dawkvah, <sup>38</sup> Jisuh ni due han totouh ka lungreithai. Hie a hmuen koe awm awh nateh kai hoi cungtalalah ring awh, telah a hnukkâbangnaw kathum touh koe a dei pouh.

<sup>39</sup> Hathnukkhu hmalah hrawt bout a cei teh, a tabo laihoi oe a Pa coung thai pawiteh hete manang na takhoe pouh haw. Hatei, kaie ka ngainae patetlah tho laipalah, na ngainae patetlah tho lawiseh telah a ratoum. <sup>40</sup> A hnukkâbangnaw aonae koe a pha navah, ahnimouh ni di a i takhai e a hmu navah, nangmouh ni suimilam buet touh kangna hai kai hah na ring thai awh hoe h maw. <sup>41</sup> Tacueknae koehoi na hlout thai awh nahan ratoum laihoi ring awh. Muitha ni teh a ngai poung ei, takthai ni teh coung thai hoe h telah Piter koe atipouh.

<sup>42</sup> Hahoi bout a cei teh Oe a Pa hete manang hah ka net laipalah roun thai hoe hpawiteh, na ngainae patetlah phat lawiseh telah bout a ratoum.

<sup>43</sup> Hat hnukkhu a hnukkâbangnaw onae koe bout a tho teh, ahnimanaw teh muet bout a i awh e a hmu navah, <sup>44</sup> a ceitakhai teh ahmaloe a ratoum e patetlah apâthum lah bout a ratoum.

<sup>45</sup> A hnukkâbangnaw onae koe bout a tho teh, atuteh duem ip awh lawih. Tami Capa teh tamikayonnaw e kut dawk pahnawt nahane tueng teh a pha toe. <sup>46</sup> Thaw awh, cet a lei sei. Kai na kapahnawtkung teh a tho toe atipouh.

*Jisuh mannae*

*Mrk 14:45-50; Luk 22:47-53*

<sup>47</sup> Hottelah a dei lahun navah a hnukkâbang hlaikahni touh daw k ka baw van e Judah Isakarot teh a tho. Vaihma bawinaw hoi khothung e tami kacuenaw ni a patoun awh e naw teh tahloi hoi bongpainaw a sin awh teh a tho awh. <sup>48</sup> Bawipa kapahnawtkung niyah, kai ni ka paco e teh Jisuh doeh, ahni hah man awh telah hote taminaw koe noutnae a poe e patetlah, <sup>49</sup> Bawipa koe rek a hnai teh, kacangkhaikung yawhawinae awmseh ati teh a paco. <sup>50</sup> Jisuh ni ka hui bang panki e daw k maw na tho atipouh navah, hote taminaw a tho awh teh Jisuh hah a man awh.



<sup>51</sup> Hatnavah Jisuh hnukkâbang e buet touh ni a kut a dâw teh tahloi a rasa hnukkhu, vaihma kacue e a san buet touh hah a bouk navah a hnâ thouk a pet.

<sup>52</sup> Jisuh ni na tahloi hah amae tabu dawk bout tat leih. Tahloi ka patuem e tami pueng teh tahloi hoi a due awh han. <sup>53</sup> Atu roeroe vah a Pa koe kahei thai tie hai thoseh, kâhet pawiteh kalvan ransahuipei apu hlaikahni touh hlak kapap lah Kai koe a patoun han tie hah nang ni na pouk hoe haw.

<sup>54</sup> Hat pawiteh, Cakathoung dawk a thut e patetlah, hettelah o han tie hnonaw hah bangtelavai a kuep thai telah a ti. <sup>55</sup> Hatnavah Jisuh ni Dingca man e patetlah kai man hanlah rama, bongpainaw na sin awh teh na tho a bo vaw. Kai ni Bawkim thung hnin ka due na cangkhai eiteh, nangmae rahak ka tahung navah nangmouh ni kai hah na man awh hoe haw. <sup>56</sup> Hot hateh, Cakathoung akuiep nahane doeh telah tami kamkhuengnaw hah a dei pouh. Hattoteh a hnukkâbangnaw pueng ni Bawipa hah parang a yawng takhai awh.

*Lawkcengnae koe a phanae*

*Mrk 14:53-65*

<sup>57</sup> Jisuh ka man e naw ni Bawipa hah, cakathutkungnaw hoi kacuenaw a kamkhuengnae vaihma kacue Kaiaphas koe a ceikhai awh. <sup>58</sup> Piter hai vaihma kacue e toeim totouh, Bawipa hoi kahlat lah a kâbang. A hnukteng bangtelamaw ati awh tie a panue nahanlah athung a kâen teh ka ring e naw hoi reirei a tahung.

<sup>59</sup> Vaihma bawinaw hoi kacuenaw, sanhedrin lawkcengkungnaw pueng ni Jisuh thei tai nahanlah laithoe kampangkhaiae a tawng awh ei hmawt awh hoe haw. <sup>60</sup> Laithoe kampangkhai hanelah moi a tho awh ei, Bangpatete kapanuekkhaikung hai tawn awh hoe haw. A hnukteng vah laithoe kampangkhaikung kahni touh a tho roi teh, <sup>61</sup> ahni ni, kai ni Cathut e Bawkim hah ka raphoe vaiteh hnin thum touh hoi bout ka cum thai han telah a dei titeh kapanuekkhaikung lah a kangdue roi. <sup>62</sup> Vaihma kacue ni a kangdue teh, kam touh boehai bout na dei mahoe haw. Hetnaw ni bangtelamaw kapanuekkhaikung lah a kangdue awh, atipouh navah Jisuh teh lawkkamuem lah ao. <sup>63</sup> Vaihma kacue ni nang teh Cathut e Capa, Khrih hoi Khrih hoe haw e hah kaimouh koe na dei nahanlah kahring Cathut noe lahoi kâ na poe atipouh.

<sup>64</sup> Hatnavah, Jisuh ni na dei e patetlah atueng. Hothloilah ka dei e teh, hmalae atueng daw k tami Capa ni bawilennae aranglah a tahung teh kalvan e tâmainaw daw k tahung lahoi a tho e hah na hmu awh han atipouh.

<sup>65</sup> Hatnavah vaihma kacue ni amae angki a phi teh hete tami ni Cathut ka tapuet lah a dei toe. Bangpatet e kapanuekkhaikung maw bout a ngai rah. Cathut ka tapuet lah a dei e hah atu roeroe vah nangmouh ni na thai awh toe. <sup>66</sup> Bangtelamaw na pouk awh, atipouh navah, hotnaw ni ahni teh due han a kamcu telah bout a dei awh.

<sup>67</sup> Hattoteh a minhmai hah tamtui hoi a tamthawi awh. <sup>68</sup> Kut hoi a thaw awh, tangawn ni a tambei awh, oe Khrih nang hah apinimaw na tambei tie hah profet lahoi dei leih, atipouh awh.

*Piter ni Jisuh a pahnawt*

*Mrk 14:66-72; Luk 22:55-62; Jhn 18:25-27*

<sup>69</sup> Piter ni toeim alawilah longkha koe a tahung navah sannu buet touh ni a tho teh nang haiyah Galilee tami Jisuh hoi cungtalae e doeh atipouh



navah, <sup>70</sup> Piter ni na dei e hah ka panuek hoech telah taminaw e hmalah a oun. <sup>71</sup> Hathnukkhu Piter ni im longkha alawilah a tâco navah alouke napui buet touh ni bout a hmu teh haw kaawm e naw koe, het haiyah Nazareth tami Jisuh hoi cungtaloh e doeh atipouh. <sup>72</sup> Piter ni ahni hah ka panuek hoech telah thoe a ka bo teh bout a oun.

<sup>73</sup> Hathnukkhu mounng ao teh hote hmuen koe kangdoutnaw ni Piter e a teng a tho awh teh, atangcalah nang haiyah hotnaw koe na ka bawh e doeh. Na lawk ni ma a pâpho toe telah atipouh awh. <sup>74</sup> Piter ni ahni hah ka panuek hoech ati teh thoe a kâbo. Hat nah tahma vah ahlui a khawng.

<sup>75</sup> Jisuh ni Ahlui a khawng hoechnahlan, vai thum touh kai hah na pahnwat han ati e lawk hah Piter ni hlaut a pouk navah alawilah a tâco teh khawngsauek laihoi a ka.

## 27

### *Jisuh teh Pailat hmalah a tâcokhai awh*

<sup>1</sup> Amom vah vaihma bawinaw hoi tamimaya dawh e kacuenaw ni Jisuh thei hanelah a kâpankhai awh. <sup>2</sup> Hahoi Bawipa hah a katek awh teh Pailat siangpahrang kut dawh tawngtang a poe awh.

### *Judah a kaithinae*

<sup>3</sup> Hatnavah, Bawipa ka pahnwat e Judah Isakarot ni Bawipa a dum e hah a hmu navah, pan a kângai teh, tangka 30 touh hah vaihma bawinaw, bawknae koelah kacuenaw koehah bout a poe. <sup>4</sup> Ka payon toe, yon ka tawn hoech e tami e a thi hah ka pahnwat payon toe telah ati. Ahnimouh van ni hai kaimouh hoi bangtelamaw kâkuet a vaw. Nama e hno hah nama ni khen lawih atipouh awh.

<sup>5</sup> Ahni ni hote tangka hah Bawkim dawh vu a tâkhawng teh alouklah a cei hnukkhu a kaithi. <sup>6</sup> Vaihma bawinaw ni hote tangka a la awh teh a thi phu doeh. Hno kuemnae dawh pâseng kaw nahoeh telah a kapan awh teh, <sup>7</sup> Hlaam ka bo e talai hmuen hah Jentelnaw e phuhen hanelah hote tangka hoi a ran awh. <sup>8</sup> Hote kecu dawkvah atu totouh hote talai hmuen hah 'thi talai telah a kaw awh. <sup>9</sup> Profet Jeremiah ni a dei e teh, Isarelnaw ni aphu khoe e tami e aphu tangka 30 touh hah a la awh teh Cathut ni lawk na thui e van patetlah, <sup>10</sup> Hlaam ka bo e talai hmuen hah ka ran awh tie lawk hah, hatnavah a kuep.

### *Pailat koe Jisuh a phanae*

#### *Mrk 15:2-15; Luk 23:2-3*

<sup>11</sup> Jisuh teh ram kaukkung hmalah a pha navah, ram kaukkung ni nang teh Judah siangpahrang katang maw telah a pacei. Jisuh ni na pacei e patetlah atang doeh atipouh. <sup>12</sup> Vaihma bawinaw hoi kacuenaw ni yon a pen awh navah kam touh boehai pathung hoech. <sup>13</sup> Pailat bawi ni nange avanglah moikapap ni a kampangkhai e hah na thai hoech maw atipouh nakunghai, <sup>14</sup> Kam touh boehai a pathung hoech e hah ram kaukkung ni a ka ngai lah a ru.

<sup>15</sup> Hote pawu dawkvah ram kaukkung ni thongkabawtnaw thung dawh hoi tami kapap ni a ngai e tami buetbuet touh hah ouk tha e lah ao. <sup>16</sup> Hatnavah paung e naw thung dawh Barabas tie min kamthang e tami buet touh ao. <sup>17</sup> Taminaw a kamkhueng awh toteh Pailat bawi ni nangmouh ni apimaw hlout sak hanlah na ngai awh, Barabas maw hoehpawiteh Khrih tie Jisuh hah maw, telah taminaw hah a pacei.



<sup>18</sup> Hettelah a paceinae teh ahnimouh ni a ut awh dawkvah Jisuh a man sak ati e hah Pailat bawi ni a panue dawk doeh.

<sup>19</sup> Hothloilah, lawkcengnae tungkhung dawk a tahung navah a yu ni tami a patoun teh, hote tamikalan hah bang telah hai tet hanh. Sahnin roeroe vah kai ni ahni kecu dawk ka mang lah puenghoi ka khang toe, telah lawk a thui. <sup>20</sup> Tami ka kamkhuengnaw ni Barabas hlout sak vaiteh Jisuh thei sak hanlah vaihma bawinaw hoi kacuenaw ni taminaw hah a uen awh.

<sup>21</sup> Hatdawkvah ram ka uk bawi ni het tarawi thung dawk, nangmouh ni api hah maw hlout sak han na ngai awh telah bout a pacei navah; 'Barabas doeh hlout sak ka ngai awh telah a dei awh. <sup>22</sup> Pailat bawi ni 'hah pawiteh Khrih tie Jisuh hah te bangtelamaw ti han telah bout a pacei navah; ahnimouh pueng ni 'ahni hateh thingpalam dawk hetnae khang seh telah ati awh. <sup>23</sup> Ram kaukung bawi ni hai 'bangkongmaw, bangmaw a sakpayon telah a pacei navah, ahni teh thingpalam dawk het lah awmseh telah hoe a hram awh.

<sup>24</sup> Pailat bawi ni tâ laipalah taminaw ni hoehoe a coukdouk awh e hah a hmu toteh, tui a la teh taminaw e a hmalah a kut a kamsin teh, hete tamikalan e a thi hoi kai teh ka bet hoe, na ngai e patetlah sak a lawih a ti. <sup>25</sup> Hote tami pueng ni, ahni e a thi teh kaimae lû dawk, ka catounnaw e a lû dawk bawt lawiseh ati awh. <sup>26</sup> Pailat bawi ni hai Barabas hah a tha pouh. Jisuh hah a hem hnukkhu thingpalam dawk thei hanelah a poe.

### *Jisuh pacekpahleknae*

*Mrk 15:16-20*

<sup>27</sup> Hat toreï teh ram kaukung e a ransanaw ni Jisuh hah bawi imthung lah a hrawi awh teh, ransahu abuemlah a kamkhueng sak. <sup>28</sup> A khohna hah a rading pouh awh, hni paling a kâkhu sak awh. <sup>29</sup> Pâkhinglukhung a kâmk sak awh. Sonron buet touh aranglah a sin sak awh teh, a hmalah khokcuengkhuem sin awh teh, Judah siangpahrang, nang koe yawhawinae awm naseh ti hoi a pacekpahlek awh. <sup>30</sup> Tamtui hoi a tamthawi awh sonron hah a la pouh awh teh a lû dawk a hem pouh awh. <sup>31</sup> Hottelah a pacekpahlek awh hnukkhu, a kâkhu e hah a rading pouh awh teh, amae kâkhu e hah bout a kâkhu sak awh teh, thingpalam dawk het hanlah a tâcokhai awh.

### *Jisuh pathoutnae*

*Mrk 15:22-32; Luk 23:33-43; Jhn 19:17-24*

<sup>32</sup> A cei awh lahun nah Simon tie Sairen tami, buet touh a hmu awh teh, thingpalam hah hmatara a hrawm sak awh. <sup>33</sup> Luhru hmuen tie Galgotha a pha awh toteh, <sup>34</sup> tâsi kakhat hoi a kalawt awh e misurtui kathut poung e hah nei sak hanlah a poe awh. A patek teh nei han ngai hoe. <sup>35</sup> Thingpalam dawk a pathout awh hnukkhu cungpam a rayu awh teh a kâkhu e hni hah a kâravei awh. <sup>36</sup> Hote hmuen koe tahung laihoi a ring awh. <sup>37</sup> Yon pâphonae ca a vo pouh e teh, 'het e tami teh Judah siangpahrang Jisuh doeh, telah a thut awh teh a lû lathueng a vo pouh awh. <sup>38</sup> Hatnavah Bawipa hoi cungalalah dingca kahni touh aranglah buet touh, avoilah buet touh thingpalamnae dawk a pathout awh. <sup>39</sup> Lam dawk ka cet kaawm e naw ni Bawkim hah ka raphoe vaiteh hnin thum touh hoi bout ka sak han e, namahoima kâhloutsak haw. <sup>40</sup> Cathut e Capa katang lah na awm pawiteh namahoima rungngang nateh, thingpalamnae dawk hoi kum leih telah a lû kahek awh teh pacekpahleknae lawk a dei awh.



<sup>41</sup> Hot patetvanlah vaihma bawinaw, cakathutkungnaw, tami kacuenaw niyah ayânaw teh a rungngang thai, <sup>42</sup> Amahoima teh kârungngang thai hoeh bô. Judah siangpahrang katang na tetpawiteh thingpalamnae dawk hoi atu kum naseh. Kum pawiteh ka yuem awh han. <sup>43</sup> Ahni teh Cathut a kâuep toe. Kai teh Cathut Capa doeh ati toe. Hatdawkvah Cathut ni ahni dawk a ngainae awm pawiteh atu roeroe vah kârungngang na seh telah a dudam awh teh a dei awh. <sup>44</sup> Hot patetlah Bawipa hoi cungtalah thingpalamnae dawk a het awh e dingcanaw ni hai a pathoe awh teh yon a pen awh.

### *Jisuh a duenae*

*Mrk 15:33-41; Luk 23:44-49*

<sup>45</sup> Kanî tuengtalueng a thunnae koehoi suimilam kathum totouh talai van pueng dawk kho a hmo. <sup>46</sup> Tangmin lah suimilam kathum navah Jisuh ni 'Eli, Eli, Lama Sabakhthani. telah a hram. Hot hateh, Ka Cathut, ka Cathut bangkongmaw na pahnawt tinae doeh. <sup>47</sup> Hote hmueng koe kangdout e a tangawn ni a thai awh navah Elijah doeh a kaw ati awh.

<sup>48</sup> Tami buet touh ni tang a yawng teh, napon a sin teh, misurtui kathut e hoi a kalawt hnukkhu rayung dawk a takei teh nei sak hanlah a poe.

<sup>49</sup> Alouknaw ni tat yawkaw, Elijah ni ahni rungngang hanlah a tho ou, tho hoeh ou tie heh khen a haw sei ati awh.

<sup>50</sup> Jisuh ni tha hoi bout a hram teh hringnae a thouk. <sup>51</sup> Hattoteh Bawkim thung e yaphni a lû hoi a khok totouh a kâphi. Talai a kâhuat. Lungsongnaw a kâbawng. <sup>52</sup> Tangkom pueng a kamawng teh, ka ip tangcoung e tami kathounaw moikapap a thaw awh teh, <sup>53</sup> Bawipa a thaw hnukkhu, ahnimanaw teh tangkom thung hoi a tâco awh teh khopui kathoung thungvah a kâen awh, tami moikapap koe a kamnue awh.

<sup>54</sup> Jisuh ka ring e ransabawi hoi ransahu ni talai a kâhuat e a hmu awh toteh a taki awh dawkvah Cathut e Capa tangngak doeh ati awh.

<sup>55</sup> Galilee kho e Jisuh khetyawt hanlah a hnukkâbang e napuinaw ni hote hmueng koe vah ahlanae koehoi a khet awh. <sup>56</sup> Hote napuinaw dawkvah Meri Magdalin, Jem hoi Joseph e a manu Meri hoi Zebedee e capanaw e manu tinaw a bawk awh.

### *Jisuh pakawpnae*

*Mrk 15:42-47; Luk 23:50-56*

<sup>57</sup> Tangmin lah a pha toteh Arimathea kho e kabawipounge Joseph, a hnukkâbang van e buet touh a tho teh, <sup>58</sup> Pailat bawi koe a kâen teh Jisuh e ro hah a hei. Pailat ni a ro hah poe lah awmseh telah kâ a poe. <sup>59</sup> Joseph ni a ro hah a la teh lukkarei ka pangaw e hoi a kayo hnukkhu, <sup>60</sup> ama hanelah lungsong dawk thuk e tangkom katha thung vah a ta. Lungphenpui hoi takhang a teng teh a ceitakhai. <sup>61</sup> Meri Magdalin hoi alouke Meri teh hote tangkom hmalah a tahung roi.

### *Phuen a ringnae*

<sup>62</sup> Atangtho toteh vaihma bawinaw hoi Farasinaw ni Pailat bawi koe a kamkhueng awh teh, <sup>63</sup> 'hot e kadumyenkung ni kai teh apâthum hnin kathâw han telah a due hoehnahan a dei e hah ka panue awh rah. <sup>64</sup> Hatdawkvah a hnukkâbangnaw ni tangmin vah a ro hah a la awh teh, ahni teh duenae koehoi a thaw toe telah tami pueng koe dei awh pawiteh ahmaloe e payon e hlak a hnukkhu e payon e hoe kalen han telah



ngaihriinae a tawn awh dawkvah, tangkom hah hnin thum touh thung ring hanlah kâ na poe haw atipouh awh.

<sup>65</sup> Pailat ni 'nangmouh koe ka ring e tamihu touh ao. Cet awh nateh a coung thai totouh a uep thai nahanlah ring awh atipouh. <sup>66</sup> Ahnimouh ni a cei awh teh talung hah mitnoutnae tacik a kin awh hnukkhu ka ring e naw a ta awh teh, tangkom hah kahawicalah a ring awh.

## 28

*Duenae koehoi Jisuh boutthawnae*

*Mrk 16:1-8; Luk 24:1-10*

<sup>1</sup> Sabbath aloum hnukkhu, hnin sari touh dawkw apasuek hnin amom kho meimei dai nah Magdalin hoi alouke Meri tinaw hai, tangkom khet hanlah a cei awh. <sup>2</sup> Hatnavah puenghoi Tâli a no. Cathut e kalvantami ni kalvan hoi a kum teh tangkom khannae talung a paawng teh hote talung van a tahung. <sup>3</sup> A minhmai teh sumpapalik e patetlah a kamnue. A khohna e hai tâmai patetlah a pangaw. <sup>4</sup> Karingnaw ni kalvantami hah a taki awh lawi a pâyaw awh teh meimei a due awh.

<sup>5</sup> Kalvantami niyah taket awh hanh. Thingpalamnae dawkw thei e Jisuh doeh na tawng awh, tie ka panue. <sup>6</sup> Hete hmuen koe awm hoehtoe. A dei tangcoung e patetlah a thaw toe. Tho awh nateh Bawipa a yannae hah khenhaw. <sup>7</sup> Karang poung lah ban awh nateh duenae koehoi a thaw toe tie hah a hnukkâbangnaw koe dei pouh awh. Nangmouh hmalah Galilee ram vah a kamnue han. Hawvah nangmouh ni Bawipa hah na hmu awh han ka ti toe telah kalvantami ni napuinaw koe a dei.

<sup>8</sup> Hote napuinaw ni a taki awh eiteh, a lunghawi awh dawkvah, tangkom koehoi karanglah a ban awh teh a hnukkâbangnaw koe hote kamthang hah dei pouh hanelah a yawng awh. <sup>9</sup> A cei awh lahun nah Jisuh ni sut a dawn teh, na konawm awh atipouh. Hote napuinaw ni rek a hnai awh teh a khok hah a tapam awh laihoi a tabo awh teh a bawkw awh. <sup>10</sup> Jisuh ni takinae tawn awh hanh. Cet awh nateh, hete kamthang lawk hah dei pouh awh. Hote ram dawkvah ahnimouh ni kai hah na hmu awh han atipouh.

*Ransanaw a tadawng awh*

<sup>11</sup> Hote napuinaw ni a cei awh navah ka ring e atangawnnaw ni khothung a kâen awh teh kaawm e hno pueng hah vaihma bawinaw koe a thaisak awh. <sup>12</sup> Hahoi vaihma bawinaw ni kacuenaw hoi pouknae kapoenaw hoi a kamkhueng awh teh, a kâpan awh. Ka ring e ransanaw hah tangka moikapap a poe awh teh, <sup>13</sup> tangmin ka i awh lahun navah a hnukkâbangnaw a tho teh a ro hah a paru awh, telah a dei awh. <sup>14</sup> Hote kong hah siangpahrang ni bout thai pawiteh kaimouh ni ka dum awh vaiteh nangmouh koe a lungkhuek hoehtoe nahanlah ka sak awh han, telah atipouh awh. <sup>15</sup> Hatdawkvah ransanaw ni tangka a la awh teh a dei pouh e patetlah a sak awh. Hettelah hoi hote kamthang teh Judahnaw rahak vah sahnin ditouh a kamthang.

*Kalenpounge kâpoelawk*

<sup>16</sup> Hlaibun touh e a hnukkâbangnaw ni Galilee ram lah a cei awh. Bawipa ni lawk a thui e mon dawkw a luen awh navah Bawipa hah a hmu awh teh a bawkw awh. <sup>17</sup> Atangawnnaw teh a lunghring awh. <sup>18</sup> Jisuh ni ahnimouh koe rek a hnai teh kalvan hoi talai van e kâtawnnae pueng teh kai koe poe lah ao toe. <sup>19</sup> Nangmouh ni cet awh nateh miphun pueng hah



ka hnuk kâbang lah coung sak awh. Pa, Capa, Kathoung Muitha e min dawk Baptisma poe awh.

<sup>20</sup> Kai ni nangmouh koe kâ na poe e pueng hah a tarawi awh nahanlah cangkhai awh. Kai teh talai van a pout totouh nangmouh hoi cungtalah pou ka o telah a hnukkâbangnaw koe atipouh.



## MARK ( The Good News According to Mark)

*Baptisma Jawhan ni lamthung rasounnae*

*Mat 3:1-11; Luk 3:2-14*

<sup>1</sup> Cathut Capa Jisuh Khrih e kamthang lawk a kamtawngnae teh het telah doeh ao.

<sup>2</sup> Ca karuem dawk Isaiah ni a thut e teh, khenhaw! Na cei nahane lamthung ka rasoun hanelah patoune ka patoun han. <sup>3</sup> Kahrawngum vah hramkhai e lawk teh, Cathut a tho nahane lamthung rasoun awh. A lamthungnaw palan awh, ati e patetlah, <sup>4</sup> Jawhan teh kahrawngum vah tui dawk baptisma a poe teh, yon ngaithoum nahanelah, pankângainae baptisma kamthang dei hanelah a tho. <sup>5</sup> Jerusalem kho thung e taminaw pueng koehoi a kamtawng teh Judah ram e tami pueng teh Jawhan koe a tho awh teh, amamae a yon a pâpho awh teh, Jordan tui dawkvah, tui baptisma a coe awh. <sup>6</sup> Jawhan teh Kalauk muen hoi kawng e angki a kho teh, a keng dawk phaiyuen taisawm a kâyeng teh, samtong hoi kahrawng e khoitui hah a canei. <sup>7</sup> A hramkhai e teh, kai hlak hno ka sak thai e tami teh ka hnukkhu lah a tho. Ahnie khokkhawmrui tabut vaiteh rasu hane boehai ka kamcu hoeh. <sup>8</sup> Kai ni teh nangmanaw hah tui dawk baptisma na poe awh. Ahni ni teh nangmanaw hah Kathoung Muitha hoi baptisma na poe awh han telah a hramkhai.

*Jisuh baptisma a coenae hoi tacueknae*

*Mat 3:13-17; Luk 3:21-22.*

<sup>9</sup> Hatnavah, Jisuh teh Galilee ram Nazareth kho hoi a tho teh, Jawhan ni Jordan palang vah tui baptisma a poe. <sup>10</sup> Tui dawk hoi bout a thaw navah kalvan a kamawng teh Muitha teh âbakhu patetlah Jisuh dawk a cu. <sup>11</sup> Nang teh Kai ni ka pahren poung e, ka lungkuep poung e ka Capa doeh telah kalvan hoi lawk a tho.

<sup>12</sup> Hathnukkhu Muitha ni Jisuh teh kahrawngum tang a cei sak. <sup>13</sup> A hnin 40 touh kahrawngum vah ao teh, Setan e tacueknae a kâhmo. Sarangnaw hoi cungtalah ao awh teh, kalvantaminaw ni Bawipa teh a khetyawt awh.

*A hnukkâbangnaw kawnae*

*Mat 4:14-22; Luk 5:2-11; Jhn 4:43-45*

<sup>14</sup> Jawhan teh thongim thung a pha hnukkhu vah, Jisuh teh Galilee ram lah a cei. Cathut uknaeram kamthang hah a pâpho. <sup>15</sup> Atueng a pha toe. Cathut uknaeram lah a hnai toe. Pankângai awh leih. Kamthang kahawi teh yuem awh leih, telah a pathang.

<sup>16</sup> Galilee tuipei teng a cei navah, Simon hoi a nawnggha Andru tanga ka heng roi e hah a hmu. Bangkongtetpawiteh, ahnimouh roi teh tangakamankungnaw lah ao roi. <sup>17</sup> Jisuh ni ahnimouh roi hanlah, ka hnukkâbang leih, tami kamankung lah na sak roi han atipouh teh, <sup>18</sup> Ahnimouh roi ni a tamlawknaw a ceitakhai awh teh, a hnuk tang a kâbang roi. <sup>19</sup> Haw hoi dongdeng a cei nah, Zebedee e capa roi Jem hoi jawhan teh long dawk tamlawk a cip roi e hah a hmu. <sup>20</sup> Ahnimouh roi hai tang a kaw. Ahnimouh roi ni long dawk kaawm e, a hlai e taminaw hoi a na pa Zebedee hah a ceitakhai teh a hnuk a kâbang roi.



*Kahrai kathout a pâlei**Luk 4:31-37.*

<sup>21</sup> Hahoi, Kapernuam kho a cei awh teh, sabbath hnin vah sinakok a kâen teh a cangkhai . <sup>22</sup> Cakathutkungnaw patetlah laipalah, kâawwnae lahoi a cangkhai dawkvah, rangpuinaw ni a cangkhai na hah kângai lah a ru awh. <sup>23</sup> Ahnimae Sinakok thungvah, kakhine muitha ni a man e tami buet touh ao. <sup>24</sup> Nazareth tami Jisuh, kaimouh hoi bangtelamaw na kâseng vaw. Kaimanaw raphoe hanelah maw na tho vaw. Nang hah apimaw tie hai na panue. Cathut e kathounge tami lah na o ati teh a hramki. <sup>25</sup> Jisuh ni kahraikathout hah, lawkkamuem awmh, hote tami thung hoi tâcawt titeh a yue. <sup>26</sup> Kakhine muitha niyah, hote tami hah a pâyaw sak teh, a hramki laihoi a tâco takhai.

<sup>27</sup> Taminaw pueng kângairu awh teh, hno tithainae hoi cangkhai nae a katha e heh bangtelah nama aw. Kakhine muithanaw hai kâawwnae lahoi kâ a poe teh, ahnimouh ni hai a lawk a ngai pouh bo aw telah buet touh hoi buet touh a kâpankhai awh. <sup>28</sup> Hettelah hoi, Jisuh e kamthang teh Galilee ram kho tangkuem vah, karang poung lah a kamthang.

*Tami moikapap a dam sak**Mat 8:14-15; Luk 4:38-39*

<sup>29</sup> Sinakok hoi a tâco awh teh Jem hoi Jawhan ti hoi Simon hoi Andru im vah a cei awh. <sup>30</sup> Simon e a masei napui a pataw teh, sut a yan e hah Jisuh koe karanglah a thaisak awh. <sup>31</sup> Jisuh ni ahni koe a cei teh, a kut daw k a kuet teh a pathaw. A pathaw tahma a tak a dam dawkvah, ahnimanaw hah a khetyawt.

<sup>32</sup> Kanî a khup hnukkhu tangmin vah, a tak ka dam hoeh e naw hoi kahraikathout ni a man e naw teh ama koevah a thokhai awh. <sup>33</sup> Kho thung e taminaw pueng teh takhang koe a kamkhueng awh. <sup>34</sup> Aphunphun lah ka pataw e naw hah a dam sak teh kahraituilinaw hai a pâlei. Kahrainaw ni Jisuh teh a panue awh dawkvah, Jisuh ni ahnimanaw lawk kam touh boehai dei sak hoeh.

*Soumtinae koe Jisuh a ratoum**Luk 4:42-43.*

<sup>35</sup> Atangtho amom khodai hoehnahlan vah, Jisuh teh kahrawngum vah a cei teh, a ratoum. <sup>36</sup> Simon hoi a huinaw ni Jisuh teh a tawng awh. <sup>37</sup> Jisuh ma a kâhmo awh toteh taminaw pueng ni na tawng awh kaima atipouh awh. <sup>38</sup> Jisuh ni a tengpam e khonaw pueng koe, phung dei hanlah cet a sei, hot hane doeh kai teh ka tho telah a hnukkâbangnaw koe atipouh. <sup>39</sup> Hatdawkvah, Galilee kho kaawm e sinakoknaw dawkvah phung a dei teh kahraituilinaw a pâlei.

*Ka hrikbei e a thoungsak**Mat 8:2-4; Luk 5:12-14.*

<sup>40</sup> Ka hrikbei e tami buet touh teh Jisuh koe a tho, a khokcuengkhuem teh, na ngainae lah awm pawiteh kai hah na thoungsak haw telah pahrennae a hei. <sup>41</sup> Jisuh ni a pahren dawkvah, a kut hoi a tek teh, oe ka ngainae a o, thoung lawih, atipouh. <sup>42</sup> Telah a dei pouh tahma vah, hrikbei patawnae a dam teh a thoung. <sup>43</sup> Jisuh ni, nang kâhruetcuat. <sup>44</sup> Hete kong heh api koehai khoeroe dei pouh hanh lah a. Vaihmanaw koe cet nateh na tak kâpâtueh. Ayânaw ni na dam toe tie a panue awh nahanelah, Mosi ni kâ poe e patetlah lawkpanuesaknae hah sak leih, ati



pouh teh a cei sak. <sup>45</sup> Hatei hote tami ni, pâphat laipalah hoehoe a dei dawkvah, peng a kamthang. Hatdawkvah, Bawipa Jisuh teh kho thungvah kâen thai laipalah, kho alawilah kingdinae hmuen koevah ama dueng ao teh, ahni koevah a tho awh.

## 2

### *Kamkhuen e tami a dam sak*

*Mat 9:2-8; Luk 5:18-26*

<sup>1</sup> Atangtho vah, Jisuh teh Kapernuam kho bout a kâen teh, imthungkhu vah ao tie kamthang a thai awh navah, <sup>2</sup> Taminaw teh takhang hmalah totouh king kakawi lah a kamkhueng awh. Ahnimouh koe Jisuh ni phung a dei pouh. <sup>3</sup> Hatnavah, kamkhuen e tami hah, tami pali touh ni a kâkayawt awh teh Jisuh koevah a thokhai awh. <sup>4</sup> Hatei, tami muen akawi dawkvah Jisuh koe phatkhai thai awh hoeh. Hatdawkvah, Jisuh a onae tueng koe lempu a rake awh teh, phailei dawkh hoi a pabo awh. <sup>5</sup> Jisuh ni hotnaw e a yuemnae a hmu navah, ka kamkhuen e tami hanlah ka ca na yonnae teh ngaithoum lah ao toe atipouh.

<sup>6</sup> Hote hmuen koe ka tahung e cakathutkungnaw niyah, <sup>7</sup> hete tami ni bangkongmaw Cathut pathoenae lawk a dei. Cathut hloilah, apimaw yon ka ngaithoum thai telah a lung thung hoi ati awh.

<sup>8</sup> Ahnima lungthin thung a pouknae hah Jisuh ni muitha lahoi tang a panue teh, bangkongmaw telah na pouk awh, atipouh. <sup>9</sup> Ka kamkhuen e tami koe bang lawk maw dei ka yawihnawn, nange yon ngaithoum lah ao toe tie lawk maw dei ka yawi, thaw haw phailei kalawng nateh cet leih tie maw dei ka yawihnawn atipouh. <sup>10</sup> Tami Capa teh talai van dawkh yon ngaithoum thainae kâ a tawn tie a panue thai awh nahan, thaw leih, <sup>11</sup> na phailei ka lawng nateh, nama im cet leih, telah ka kamkhuen e koe a dei pouh. <sup>12</sup> Hote tami ni hai tang a kangdue teh, a phailei a kalawng teh taminaw pueng e hmalah a cei. Tami pueng a kângairu awh teh, het patetlah e vai touh hai ka hmawt boi hoeh, telah a dei awh teh, Cathut a pholen awh.

### *Levih a kaw*

*Mat 9:9-13; Luk 5:27-32.*

<sup>13</sup> Hat hoiyah, Jisuh teh Galilee tuipui teng vah bout a cei. Tamihupui teh ahni koe a tho awh teh a cangkhai. <sup>14</sup> A cei navah Alfe e capa tamuk cawngnae im dawkh ka tahung e Levih hah a hmu. Jisuh ni ka hnukkâbang awh atipouh. Hluet a thaw teh a hnuk a kâbang.

<sup>15</sup> Jisuh teh Levih im vah tangmin bu a ca lahun navah, tamuk kacawngnaw, tamikayonnaw hoi a hnukkâbangnaw hai a ca awh van. Ahnimanaw teh a hnuk a kâbang awh. <sup>16</sup> Hottelah, Jisuh teh tamuk kacawngnaw, tami kahawihoeahnaw hoi rawca rei a ven awh e hah, cakathutkungnaw hoi Farasinaw ni a hmu awh navah, bangkongmaw tamuk kacawngnaw hoi tami kahawihoeahnaw hoi reirei a canei vaw telah a hnukkâbangnaw koe ati awh.

<sup>17</sup> Jisuh ni khout a thai teh, a tak kadamnaw ni tâsibawi panki hoeh. Ka damhoeahnaw ni dueng doeh tâsibawi a panki awh. Tami kalannaw kaw hanelah ka tho hoeh. Tamikayonnaw kaw hanelah doeh ka tho atipouh.

### *Rawcahainae*

*Mat 9:14-17; Luk 5:33-38.*



<sup>18</sup> Jawhan e hnukkâbangnaw hoi Farasinaw teh, rawca ouk a hai awh. Tami tangawn ni Jisuh koe a tho awh teh, Jawhan hnukkâbangnaw hoi Farasi hnukkâbangnaw teh rawca a hai awh nahoehmaw. Bangkongmaw Bawipa nange hnukkâbangnaw teh rawca a hai awh hoeh vaw telah a pacei awh.

<sup>19</sup> Jisuh ni yupaluenkung teh a huikonaw hoi cungtalah ao navah rawca ouk a hai a boimaw. A o nathing teh rawca ouk hai boi awh hoeh. <sup>20</sup> Hatei, yupaluenkung ni a ceitakhainae tueng kaawm han. Hat torei teh, ahnimanaw hai rawca a hai awh van han.

<sup>21</sup> Apipatethai angki karuem bo nahanelah, lukkarei a katha e hno boihoeh. Hottelah boipawiteh lukkarei a katha e ni a karuem e teh hoehoe a kâphi sak han. <sup>22</sup> Hat hoiyah, apipatet ni hai misurtui katha e hah phaivuen umruem dawklhun boihoeh. Hottelah hlun pawiteh misurtui katha e ni phaivuen umruem e hah tangpawklhun sak vaiteh, atui hoi a um a rawklhun. Hatdawkvah, misurtui katha teh phaivuen umtha dawklhun han atipouh.

### *Jisuh teh sabbath bawi doeh*

*Mat 12:1-8; Luk 6:1-5*

<sup>23</sup> Sabbath hnin vah Jisuh hoi hnukkâbangnaw kahlawng a cei awh teh, catun law koe a pha awh navah, a hnukkâbangnaw ni catun vui hah a pahroe awh. <sup>24</sup> Hatnavah Farasinaw ni kenhaw! sabbath hnin vah sak hoeh hane kaw, ahnimanaw ni bangkongmaw a sak awh telah Bawipa a pacei awh. <sup>25</sup> Bawipa ni, vaihma kacue Abiathar se nah Devit siangpahrang teh a huinaw hoi a vonhlah awh navah, <sup>26</sup> Cathut e imthung a kâen teh, vaihmanaw dueng ni a cakawi e vaiyei hah a ca teh, a huinaw hai a poe e hah vai touh boehai na touklhun boi awh hoeh maw. <sup>27</sup> Hathnukkhu hoiyah, sabbath teh tami hanlah sak pouh e doeh, Sabbath hanelah tami sak e na hoeh. <sup>28</sup> Hothloilah, tami Capa teh sabbath bawi lah ao, atipouh.

## 3

### *Kutvang kamkhuen e tami dam saknae*

<sup>1</sup> Sinakok dawklhun bout a kâen, hawvah a kutvang kamkhuen e tami buet touh ao. <sup>2</sup> Sabbath hnin vah, ahnie a patawnah a dam sak han maw, dam sak mahoe hmaw titeh, Jisuh yon a pen thai awh nahanlah ahnimouh ni a tuet awh. <sup>3</sup> Jisuh ni kutvang kamkhuen e tami hah alungui vah kangdout atipouh. <sup>4</sup> Hathnukkhu Jisuh ni sabbath hnin vah hnokahawi maw sak han, hno kathout. Hringnae rungngang han maw, thei han maw. Telah rangpuinaw a pacei teh ahnimouh teh duem a ngam awh.

<sup>5</sup> Hatdawkvah, a lungkhuek laihoi ahnimae tengpam a khet teh, a lungthin a pata awh dawkvah, a lungmathoe teh, na kut dâw haw atipouh. Ahni ni a kut a dâw nah, kamkhuen e a kut teh bout a dam. <sup>6</sup> Hatnavah, Farasinaw a tâco teh, Jisuh thei thai nahan karanglah Herod e taminaw hoi a ka dei awh.

### *Jisuh hnuk tami moikapap a kâbang awh.*

*Mat 12:15-16; Luk 6:17-19*

<sup>7</sup> Hahoi Jisuh teh a hnukkâbangnaw hoi cungtalah tuipui teng a cei awh navah, <sup>8</sup> Galilee ram, Judah ram, Jerusalem, Idumea, Jordan tui namran lahoi Taire hoi Sidon kho tengpam hoi Bawipa hnosa e kong a thai awh dawkvah, tami moikapap ni ama koe a tho awh. <sup>9</sup> Rangpu teh moiapap awh dawkvah, Jisuh ni taminaw ni a tek awh hoeh nahanelah,



kathoenge long buet touh coungekacoe tat awh, telah a hnukkâbangnaw koe a thai sak. <sup>10</sup> Bangkongtetpawiteh, Jisuh ni tami moikapap a dam sak dawkvah, ka damhoehnaw ni ama tek thai nahanlah a kâen awh. <sup>11</sup> Kakhine muithanaw ni hai Jisuh a hmu awh navah a tabo awh teh nang teh Cathut Capa doeh telah a hram awh. <sup>12</sup> Jisuh ni amae kong a kamthang hoeh nahan hote muitha kathoutnaw hah kâhruetcuetae a poe.

*Guncei hlaikahni touh rawinaw*

*Mat 10:2-4; Luk 6:14-16; Gun 1:13*

<sup>13</sup> Hathnukkhu hoi Jisuh teh mon a luen teh, a ngai e taminaw a kaw teh ama koe a tho awh. <sup>14</sup> Hatnavah, Bawipa ni hlaikahni touh hah a rawi teh gunceinaw telah a kaw. <sup>15</sup> Ahnimouh teh ama hoi rei o han, patoun teh phung dei sak han hoi, kahraituilinaw pâlei thainae kâ tawn sak hanlah doeh a kaw. <sup>16</sup> A rawi e hlaikahni touh teh : Piter telah kaw e Simon, <sup>17</sup> Zebedee capa keitat capa telah kaw e Jem hoi Jawhan, <sup>18</sup> Andru, Filip, Bartholomew, Matthai, Thomas, Alfe capa Jem, Taddaeus, Kanaan tami Simon, hoi <sup>19</sup> Bawipa ka pahnawt e Judah Isakarot tinaw doeh.

*Jisuh hah beelzebub atipouh awh*

*Mat 12:25-29; Luk 11:17-22*

<sup>20</sup> Hahoi, Jisuh teh im bout a pha navah, tamimaya teh king bout a kamkhueng awh dawkvah, Jisuh hoi a hnukkâbangnaw teh rawca patenghai cat mang awh hoeh. <sup>21</sup> A imthungnaw a huikonaw ni a thai awh navah, Bawipa khoun hanelah a tâco awh. Bangkongtetpawiteh, ayânaw ni Bawipa teh a pathu toe ati awh dawkw doeh.

<sup>22</sup> Jerusalem hoi ka tho e cakathutkungnaw ni hai ahni teh Beelzebub ni a man, kahrai kaukung e bahu hoi kahraituilinaw a pâlei thai atipouh awh. <sup>23</sup> Hatdawkvah, Jisuh ni a kaw teh, ahnimouh koe bangnueanae lawk a dei pouh. Bangtelamaw Setan ni Setan a pâlei thai han. <sup>24</sup> Uknaeram buet touh teh kâpo hoehpawiteh uknaeram kangdout thai mahoe. <sup>25</sup> Imthungkhu buet touh dawkw, buet touh hoi buet touh kâpo hoehpawiteh imthungkhu kangdout thai hoeh. <sup>26</sup> Hot patetvanlah, Setan hai amahoima kâtuk pawiteh a ram kangdout thai mahoe. <sup>27</sup> A thakasai e tami teh ama hmaloe katek hoehpawiteh apinimaw a im a muk vaiteh a hnopai a lawp thai han. Ama katek hnukkhu hoi doeh hnopai lat thai ti. <sup>28</sup> Atangcalah na dei pouh awh. Sak payon e yonnae aphunphun hoi Cathut pacekpahleknae pueng dawkw taminaw ni ngaithounnae a hmu thai awh. <sup>29</sup> Hatei, Kathoung Muitha ka pacekpahlek e teh nâteuk hai ngaithounn thai mahoe. Yungyoe thoebonae a khang han. <sup>30</sup> Bangkongtetpawiteh, ahnimouh ni ama teh kakhine muitha a tawn atipouh dawkw doeh.

*Jisuh a tawng awh*

*Mat 12:46-50; Luk 8:19-20.*

<sup>31</sup> Hatnavah, Jisuh e a manu hoi a nawngghanaw a tho awh teh alawilah a kangdue awh. Tami buet touh koe Jisuh a kaw sak. <sup>32</sup> A tengpam ka tahung e taminaw ni na manu hoi na nawngghanaw ni na tawng awh teh, alawilah sut a kangdue awh, telah a dei pouh awh. <sup>33</sup> Jisuh ni kaie manu hoi ka nawngghanaw teh apimaw telah bout a pacei.

<sup>34</sup> Atengpam ka tahung e taminaw a khet teh hetnaw doeh kaie manu hoi ka nawngghanaw atipouh. <sup>35</sup> Bangkongtetpawiteh Cathut ngainae ka tarawi e tami doeh kaie ka nawnggha, ka tawn canu, ka manu telah atipouh.



## 4

*Cati kahei bangnuenae**Mat 13:1-15; Luk 8:4-10.*

<sup>1</sup> Jisuh ni tuipui kongteng vah bout a cangkhai nah, tamihupui teh king a kamkhueng awh dawkvah, Jisuh teh long dawkw a luen teh a tahung. Tamihupui teh a oung lah ao awh. <sup>2</sup> Hatnavah bangnuenae lahoi moi a cangkhai e teh, <sup>3</sup> Thai awh haw, cati kaheikung ni cati kahei hanlah a kamthaw. <sup>4</sup> Cati a kahei navah, a tangawn teh lam dawkvah a bo dawkvah tavanaw ni koug a pâtu. <sup>5</sup> A tangawn teh talai a rapamnae koe lungcarawkw um a bo dawkvah tang a paw eiteh, <sup>6</sup> A khongyang a payang hoe h dawkvah, kanî a tâco, khumbei a thoe toteh, a kamyai teh a ke. <sup>7</sup> A tangawn teh pâkhing um a bo dawkvah, pâkhing ni a lawnglei teh a paw paw thai hoe h. <sup>8</sup> A tangawn teh talai kahawi dawkw a bo dawkvah, a paw teh, a roug dawkvah, alet 30, 60, 100 totouh a pung. <sup>9</sup> Thainae hnâ ka tawn pueng ni thai naseh, telah a ti.

<sup>10</sup> Jisuh ama dueng ao navah, a hnukkâbangnaw hlaikahni touh hoi alouke taminaw ni bangnuenae deingainae hah a pacei awh. <sup>11</sup> Jisuh ni nangmouh teh Cathut uknaeram hrolawkw hah panuethainae na poe awh. Alawilae taminaw hane teh bangpueng hai bangnuenae lahoi a pâpho pouh. <sup>12</sup> A lungkâthung awh teh yon ngaithoum lah ao awh hoe h nahanlah a hmu a ei nout awh hoe h, a thai a ei panuek awh hoe h.

<sup>13</sup> Nangmouh ni hete bangnuenae patenghai na thai panuek awh hoe hpawiteh, bangtelamaw bangnuenae pueng na thai panuek awh han. <sup>14</sup> Cati ka hei e tami ni Cathut lawkw hah a kahei. <sup>15</sup> Cathut lawkw lam dawkw kabawt e tinae teh, a lawkw a thai ei, Setan ni a tho teh a lungthung kahei pouh e Cathut lawkw hah, tang a lawp ti a dei ngainae doeh. <sup>16</sup> Lungcarawkw um kahei ti deingainae teh a lawkw a thai navah, lunghawinae lahoi tang a dâw ei, <sup>17</sup> A lungthung a khongyang a payang hoe h dawkvah, Cathut lawkw kecu dawkw runae hoi rektapnae a kâhmo toteh a lung tang apout awh, tingainae doeh. <sup>18</sup> Pâkhing um cati kahei tie a deingainae teh Cathut lawkw a thai eiteh, <sup>19</sup> laitaivan hno dawkw lungpuennae, hnopai ni dmyennae hoi, alouke hnonaw noenae lungthin ni a ramuk dawkvah a paw paw thai awh hoe h tingainae doeh. <sup>20</sup> Talai kahawi dawkw cati kahei ti deingainae teh Cathut lawkw a thai teh a dâw dawkvah, alet 30, 60, 100 totouh apung teh a paw a paw thai ti ngainae doeh.

*Hmaiim ramuk boi hoe h*

<sup>21</sup> Hat hoiyah, hmaiim hah apinimaw tangthung hoi a ramuk boimaw. Ikhun rahim ouk a ta boimaw. Hmaiimkhok dawkw hoi ouk paang nahoe hmaw. <sup>22</sup> A hmonae koe kaawm e pueng koug a kamnue han, ramuk lah kaawm e naw pueng koug kamawng han. <sup>23</sup> Thainae hnâ katawnnaw ni thai naseh.

<sup>24</sup> Hathnukkhu hoi Jisuh ni na thai e lawknaw kahawicalah kâhruetcuwet awh. Ayâ na poe e patetlah nama ni bout na hmu awh han. <sup>25</sup> Ka tawn e tami teh bout poe sin lah ao han. Ka mathoe e tami teh a tawn e ca patenghai la pouh lah ao han telah a ti.

*Kapâw e cati bangnuenae*

<sup>26</sup> Jisuh ni Cathut uknaeram teh tami buet touh ni law dawkw cati a kahei e hoi a kâvan. <sup>27</sup> Ahni ni cati kahei hnukkhu karum khodai a i ao ei teh a kung a pâw teh a roug, hatei bangtelah hoi maw a roug tie teh panuek



hoeh. <sup>28</sup> Talai ni cati kapâw e a rount sak teh a paw a paw sak. Hmaloe vah akung, hahoi a vui, hahoi cakang a tâco sak. <sup>29</sup> Cang a hmin teh canga tue a pha toteh imkung ni uet laipalah karang poung lah tangkoun hoi ouk a a telah a dei.

*Antam mu bangnuenae*

*Mat 13:31-32; Lûk 8:22-25.*

<sup>30</sup> Jisuh ni Cathut uknaeram teh bangtelamaw ka kamnue sak han vai, bangpatet e bangnuenae hoi maw ka bangnue han vai. <sup>31</sup> Hot teh antam mu hoi doeh a kâvan. Antam mu teh anhla munaw hlak kathounghnawn e lah ao ei, patue toteh, <sup>32</sup> Anhlaungkunaw hlak a rount teh tavanaw ni a kang dawk tabu a tuk awh teh a tâhlip dawk a kâhat nahane totouh akangnaw kalen lah a cawn awh.

<sup>33</sup> Hot patet e bangnuenae hoi taminaw ni a thai panuek nahanelah, a cangkhai. <sup>34</sup> Bangnuenae hno laipalah ahnimouh koevah cangkhai hoeh. Amamouh dueng ao awh navah a hnukkâbangnaw koe bangpuengpa a pâpho pouh.

*Tûilî hoi tuicapa a roun sak*

<sup>35</sup> Hat hnin tangmin vah Jisuh ni namran lah cet a sei telah a hnukkâbangnaw koe atipouh. <sup>36</sup> Hatdawkvah a hnukkâbangnaw ni tamimaya a ceitakhai teh long thung sut kaawm e Jisuh hoi namran lah a cei awh. Alouke longnaw hai a kâbang awh. <sup>37</sup> Hatnavah tûilî a tho teh, tuicapa a thaw dawkvah long dawk tui muen akawi. <sup>38</sup> Jisuh teh long a mai koe lah, lahouna a lahouna teh muet a i. A hnukkâbangnaw ni a pâhlaw awh teh, saya maimouh due awh han toe hei, banglahai na pouk hoeh bo aw! atipouh awh.

<sup>39</sup> Hatnavah Jisuh ni a thaw teh, tûilî hoi tuicapa a yue, hatdawkvah tûilî hoi tuicapa teh a roun. <sup>40</sup> Hat hnukkhu Bawipa ni bangkongmaw telah totouh na taki thai awh vaw. Bangkongmaw yuemnae na tawn awh hoeh vaw atipouh. <sup>41</sup> Ahnimouh ni thouk a taki awh teh, hete tami teh bangpatet e tami na mah aw, tûilî hoi tuipui ni hai a lawk a ngai pouh bo aw telah buet touh hoi buet touh a kâdei awh.

## 5

*Kahrai ni a man e a dam sak*

*Mat 8:28-34; Lûk 8:26-37*

<sup>1</sup> Jisuh hoi a hnukkâbangnaw teh, tuipui namran lah kaawm e, Kerasen ram dawk a pha awh. <sup>2</sup> Hatnavah, Jisuh teh long dawk hoi a kum tahma vah, kakhine muitha ni a man e tami tangkom thung hoi ka tâcawt e ni, Jisuh teh a dawn. <sup>3</sup> Ahni teh phuen koevah ao teh apinihai sumbawtarui hoi patenghai katek thai awh hoeh. <sup>4</sup> Ahni teh a khok roi hlong a buet sak awh, sumbawtarui hoi a katek awh eiteh, sumbawtaruinaw sounsoum a tapo teh hlong hai let let a raen teh a mawng nahanelah apinihai bang tet thai awh hoeh. <sup>5</sup> Karum khodai phuen koe thoseh, mon vah thoseh, a hramki teh amahoima talung kahran hoi patawnae a kâpoe.

<sup>6</sup> Ahlanæ koehoi Jisuh hah a hmu nah a yawng teh a khok koevah a tabo laihoi, <sup>7</sup> ka lentoe poung e Cathut Capa Jisuh, nang teh kai hoi bang mouh na kâkuet. Kai na rektap hoeh nahanlah Cathut min lahoi pahrennae ka hei telah a hramki laihoi a dei. <sup>8</sup> Hete lawk a deingainæ teh, Jisuh ni kakhine muitha, tami thung hoi tâcawt telah a dei pouh toung dawk doeh.



<sup>9</sup> Jisuh ni na min apimaw telah a pacei nah, kaie ka min teh ransahupui atipouh. <sup>10</sup> Hote ram dawk hoi alouklah pâlei hoeh nahan ngaithoumnae thouk a kâhei awh.

<sup>11</sup> Hote hmuen koe mon vah vok moikapap rawca a ca awh. <sup>12</sup> Muitha kathoutnaw ni hote voknaw thung na kâen sak loe titeh a kahei awh.

<sup>13</sup> Jisuh ni kâ tang a poe teh kakhine muithanaw a tâco teh, vok 2,000 tabang e thungvah a kâen awh. Voknaw teh pango dawk a tâto awh teh, tuipui dawk koug a kâphum awh teh koug a due awh.

<sup>14</sup> Vok ka khounnaw ni khopui hoi khote totouh, hote kong a dei awh dawkvah, tami moikapapnaw ni hote khet hanelah a tho awh. <sup>15</sup> Jisuh koe a tho awh nah, kahraikathout ransahupui ni a man e tami teh hni a kâkhu teh a lung kacailah a tahung e hah a hmu awh navah, a taki awh.

<sup>16</sup> Hote tami hoi voknaw koe bangtelamaw ao tie kahmawtnaw ni alouke taminaw koe patuen a dei pouh awh. <sup>17</sup> Hatdawkvah, Jisuh koe kaimae ram dawk hoi tâcawt leih telah atipouh awh.

<sup>18</sup> Jisuh teh long dawk a kâen nah, kahrai kathoutnaw pâlei pouh e tami ni, kai hai nang koe kâbang van han telah a kâhei. <sup>19</sup> Hatei, Jisuh ni pasoung hoeh. Nang teh nama im vah cet nateh na imthungkhunaw koevah Cathut ni banghloimaw nang koe pahrennae hoi hawinae a sak e hah dei pouh lah atipouh. <sup>20</sup> Hathnukkhu vah ahni ni Dekkapolis ram dawk Jisuh ni a lathueng a sak e naw pueng a dei teh taminaw a kângairu awh.

*Ka dout e napui ca hoi a thi ka kui e napui*

*Mat 9:18-26; Luk 8:41-56*

<sup>21</sup> Jisuh teh namran lah a cei teh hawvah ao nah, taminaw Jisuh koe a kamkhueng awh. <sup>22</sup> Hatnavah Sinakok ka uk e Jairus, Jisuh koe a tho, ama a hmu nah a khok koe a tabo teh, <sup>23</sup> ka canu teh meimei a due toe. Bout a dam nahanlah tho nateh avan na kut toung pouh haw, telah a kâhei.

<sup>24</sup> Hatdawkvah Jisuh teh Jairus im reirei a cei roi nah tami moikapap ni a kâbang awh teh, Bawipa a kâbet awh. <sup>25</sup> Hatnavah, a kum hlaikahni touh thung a thi ka kui e napui hateh, <sup>26</sup> A dam thai nahanlah tâsibawinaw koe a tawn e hnopai pueng koug a takhawk teh, kum moikasaw a kâsat sak ei, dam laipalah hoehoe a pataw. <sup>27</sup> Jisuh e kamthang a thai nah, a hni pawl ka tek pawiteh ka dam han doeh telah a titeh, <sup>28</sup> tami umsali vah, a hnukkhu lahoi a tho teh, Jisuh e a hni pawl dek a tek pouh. <sup>29</sup> A tek tahma vah a thikui e a khap teh, a patawnae a dam e hah amae a takthai dawk a kâpanue.

<sup>30</sup> Jisuh ni a bahu a tâco e tang a panue nah rangpuinaw koe lah a kamlang teh, apimaw ka hni pawl ka tek telah a pacei. <sup>31</sup> A hnukkâbangnaw ni, tamihupui ni na kânep e na hmu nahlangva, kai apimaw na katek khuet na ti vaw telah atipouh awh. <sup>32</sup> Hatei, Jisuh ni apimaw na ka tek tie hah a hmu han a ngai dawkvah yuengyoe a khet. <sup>33</sup> Hote napui ni a tak dawk bangtelamaw ao tie a kâpanue dawkvah, a taki lawi pâyaw laihoi a hmalah a tabo teh a kâpâpho. Hahoi ahni koe lawkkatang pueng a dei pouh. <sup>34</sup> Hatnavah Jisuh ni, ka canu na yuemnae ni na patawnae a roun sak toe. Lungmawng ca lahoi cet lawih. Na patawnae dawk hoi na hlout toe atipouh.

<sup>35</sup> Hote lawk Jisuh ni a dei lahun nah sinakok kaukkung, Jairus im hoi taminaw a tho teh, na canu a due toe, bangkongmaw saya hah boutbout



na tarawktakhak vaw, telah a dei pouh awh. <sup>36</sup> Jisuh ni hote lawk a thai navah, taket hanh, yuemnae buet touh dueng ma tawn haw telah sinakok kaukkung Jairus koe a dei pouh.

<sup>37</sup> Hahoi, Jisuh teh Piter, Jem hoi Jem e a nawnggha Jawhan tinaw douk a hrawi. <sup>38</sup> Sinakok kaukkung Jairus im a pha awh navah taminaw teh ruengrueng ati hoi khuika e a hmu. <sup>39</sup> Jisuh ni imthungkhu a kâen teh bangkongmaw khuika hoi ruengrueng na ti awh. Hete napui ca heh dout hoeh, ka ip e doeh telah atipouh.

<sup>40</sup> Hatnavah, ahnimanaw ni Jisuh teh a panuikhai awh. Hatei, Jisuh ni haw kaawm e naw pueng alawilah koung a hrek teh, a manu hoi a napa, ama ni a hrawi e naw dueng hoi camo aonae koe a kâen awh. <sup>41</sup> Napui ca e a kut a kuet pouh teh, Talitha Kumi telah ati. Dei ngainae teh napui ca thaw lei ka ti tinae doeh. <sup>42</sup> Telah a dei tahma napui ca ni a thaw teh a cei. Ahni teh kum hlaikahni touh nueng a pha. Ahnimanaw teh a kângairu awh. <sup>43</sup> Jisuh ni hete a kongnaw heh apihai panuek sak awh hanh telah ka patawpoung lah kâ a poe teh, ahni hah ca hane rawca poe awh, atipouh.

## 6

*Profet teh amae khoram dawk bari awm hoeh*

*Mat 13:54-58.*

<sup>1</sup> Hote hmuen koehoi a tâco teh a hnukkâbangnaw ni a hnuk a kâbang awh teh, a ma onae kho dawk a pha awh. <sup>2</sup> Sabbath hnin vah Sinakok dawk a cangkhai navah tami pueng ni a thai awh teh kângairu awh. Hete hno hah bangtelah hoi maw a hmu vaw. Ahni ni a tawn e lungangnae teh bang patet e na maw, hettelah totouh thaonae hah bangtelah hoi maw a kamnu sak vaw. <sup>3</sup> Ahni teh lettama nahoehmaw, Meri e a capa nahoehmaw, Jem, Jawhan, Joseph, Judah hoi Simon ahnimae a hmau nahoehmaw. A tawncanunaw hai maimae tengpam bo ao ei aw, ti teh a lungpout awh. <sup>4</sup> Jisuh ni Profet teh ama kho aonae koe amae im hloilah barinae awm hoeh telah atipouh. <sup>5</sup> Ka dam hoeh e tami youn touh van vah a kut a toung teh, a dam sak hloilah, hote hmuen koe thaonae kamnu sak thai mahoe. <sup>6</sup> Ahnimanaw ni a yuem awh hoeh e a hmu navah, kângai a ru. Hahoi kho touh hoi kho touh a cei teh a cangkhai.

*A hnukkâbang hlaikahni touh a patoun*

*Mat 10:1,9-14; Luk 9:1,3-5.*

<sup>7</sup> A hnukkâbangnaw hlaikahni touh a kaw teh kahni kahni touh hoi a patoun. Kakhine muithanaw pâlei thainae kâ a poe teh, <sup>8</sup> Kahlong na cei awh nah sonron hloilah yawngya, rawca hoi tangkabom dawk tangka na sin awh mahoe. <sup>9</sup> Khokkhawm khawm awh. Angki a cawi sin awh hanh telah atipouh. <sup>10</sup> A im na ka luen sak e im dawkvah kho louk lah na cei hoehnahlan pueng cam pouh awh. <sup>11</sup> Na phanae kho buet touh ni a im na luen sak hoeh, na dei e lawk tarawi awh hoehpawiteh hote hmuen koehoi na tâco nah na khok dawk e vaiphu kâkai e hah lawkpanuesaknae ao nahanlah takhawng sin awh.

<sup>12</sup> A hnukkâbangnaw a tâco awh teh, pankângainae lawk a pâpho awh.

<sup>13</sup> Kahraituilinaw a pâlei awh. Kapatawnaw satui a hluk awh teh, a dam sak awh.

*Jawhan duenae*

*Mat 14:1-12; Luk 9:7-9.*



<sup>14</sup> Jisuh e kamthang teh kho tangkuem vah a kamthang dawkvah, Herod siangpahrang ni hai hote kamthang a thai van. Tami tangawn ni baptisma kapoekung Jawhan teh duenae koehoi bout a thaw. Hatdawkvah, het patet e kângairu hnosakthainae bahu hah a tawn, telah a dei awh. <sup>15</sup> Tangawn ni ahni teh Elijah doeh ati awh. Tami alouknaw ni ayan e profetnaw patetlah e profet buetbuet touh doeh ati awh. <sup>16</sup> Hote lawk Herod ni a thai navah, tui baptisma kapoekung Jawhan doeh. Kai ni a lahuen yo ka tâtueng sak eiteh duenae koehoi bout a thaw telah a ti.

<sup>17</sup> Herod ni a nawnggha Filip e a yu Herodias hah a yu lah a la teh, hote napui kecu dawk Jawhan hah thongim a paung. <sup>18</sup> Bangkongtetpawiteh, Jawhan ni nang ni na hmau e a yu na yu lah na la e heh hawihoei telah atipouh dawk doeh. <sup>19</sup> Hatdawkvah Herodias ni Jawhan hah a pahluem teh thei han a ngai ei thet thai hoei. <sup>20</sup> Bangkongtetpawiteh Herod ni Jawhan teh tamikalan, tami kathoung tie a panue dawkvah a taki teh a bari, a kabawp. A lawk hai a thai pouh dawkvah hote napui ni thei nahane a lam hmawt thai hoei.

<sup>21</sup> Herod khenae hnin nah kum tangkuem pawu ouk a sak awh e patetlah, ukkung bawinaw, ransabawinaw, Galilee ram e bawinaw teh pawu koe a tho awh. <sup>22</sup> Hote pawu koevah Herodias e canu a kâen teh a lam navah, Herod hoi a coun e naw teh a lung a nawm poung awh. Hatdawkvah, Herod siangpahrang ni tangla hanelah, bangmaw na ngai, na hei e pueng na poe han atipouh. <sup>23</sup> Ka uknaeram tangawn totouh na poe han telah lawk a kam pouh. <sup>24</sup> Tangla ni a manu koe a cei teh bangmaw ka hei han atipouh navah, a manu ni baptisma kapoekung Jawhan e a lû hah het atipouh.

<sup>25</sup> Tangla ni Herod koevah a cei teh, atu roeroe baptisma kapoekung Jawhan e a lû teh tongben dawk hoi na poe telah atipouh. <sup>26</sup> Ahnie lawk a thai nah, Herod teh a lungmathoe. Hatei, a coun e bawinaw hoi kacuenaw hmalah lawk a kam dawkvah, kangek thai hoei toe. <sup>27</sup> Hatdawkvah, ransa buet touh thongim thung a patoun teh, Jawhan e lû tho khai hanelah kâ a poe. Hahoi ahni ni hnie lû a tâtueng pouh. <sup>28</sup> Jawhan e a lû teh tongben dawk hoi a thokhai teh tangla hah a poe teh ahni ni a manu koe patuen bout a poe. <sup>29</sup> Hote kamthang teh a hnukkâbangnaw ni a thai nah a ro a la awh teh a pakawp awh.

*Tami thong panga touh a paca*

*Mat 14:13-21; Luk 9:10-17; Jhn 6:5-13.*

<sup>30</sup> Gunceinaw ni Jisuh koe a kamkhueng awh teh a tawk a sak e naw pueng a dei pouh awh. <sup>31</sup> Jisuh ni, kahrawngum vah tho awh, dawngdeng kâhat awh ei, atipouh. Telah a deingainae teh, kâhlumkâhlai e apap dawkvah, rawca cã nahane tueng boehai a hmu awh hoei dawk doeh.

<sup>32</sup> Hatdawkvah long a kâcui awh teh, kahrawum vah a cei awh. <sup>33</sup> Hateiteh, a cei awh e hah taminaw ni a hmu awh teh, Jisuh doeh tie a panue awh toteh, khoram tangkuem e taminaw teh mon lam lahoi a yawng awh teh, a hnukkâbangnaw a pha awh hoehnahlan hmaloe a pha awh teh, Jisuh koe a la kamkhueng awh. <sup>34</sup> Jisuh ni long dawk hoi a kum teh, tami hupui a hmu navah, tukhoumkung kaawm hoei e tuhunaw patetlah a hmu dawkvah, a lungpataw teh, moikapap a cangkhai .

<sup>35</sup> Kho a hmo navah, a hnukkâbangnaw ni a hnai awh teh, hete hmuen teh thingyeiyawn doeh. Kho hai a hmo toe. <sup>36</sup> Taminaw teh tenggam e khonaw koe amamouh hane rawca ran sak hanelah patoun ei, atipouh



awh. <sup>37</sup> Hatnavah, Jisuh ni ahnimouh canei hanelah nangmouh ni poe awh, atipouh. A hnukkâbangnaw ni ngun tangka cumhni touh phu rawca ran vai teh ka poe awh han maw atipouh awh. <sup>38</sup> Jisuh ni nangmouh koe vaiyei na na yit touh maw kaawm, cet nateh khenhaw! atipouh navah, vaiyei panga touh hoi tanga kahni touh ao atipouh.

<sup>39</sup> Hatnavah taminaw pueng teh marangpho van vah hlouphloup lahoi tahung sak hanelah kâ a poe. <sup>40</sup> Ahnimouh teh cum touh, ruipanga touh telah hoi hlouphloup lahoi a tahung sak awh. <sup>41</sup> Jisuh ni vaiyei panga touh hoi tanga kahni touh a la teh kalvan lah a moung teh lunghawinae lawk a dei hnukkhu vaiyei a raen teh taminaw pueng rei hanelah a hnukkâbangnaw koe a poe. Tanga kahni touh e hai a la teh taminaw pueng a rei sak. <sup>42</sup> Taminaw pueng ni kOUNg ka boum lah a ca awh. <sup>43</sup> Hathnukkhu hoi kacawie vaiyei hoi tanga a pâkhueng awh navah, tangthung hlaikahni touh akawi. <sup>44</sup> Vaiyei kacate tongpa 5,000 touh hane a pha.

*Jisuh tui van lam a cei*

*Mat 14:22-32; Jhn 6:15-21.*

<sup>45</sup> Hathnukkhu hoi Jisuh ni a hnukkâbangnaw long dawk a luen sak teh tuipui namran lah Bethsaida kho dawk hmalah a ceisak teh tamihupui teh bout a ban sak. <sup>46</sup> Taminaw a ban sak hnukkhu Jisuh teh ratoum hanlah mon vah a luen.

<sup>47</sup> Karum a pha navah long teh, tuipui lungui vah ao. Jisuh teh ama dueng namran lah ao. <sup>48</sup> Kahlî ni a pâban dawkvah, long a mawng awh e nget a tawn awh e hah, Jisuh ni a hmu. Amom khodai hoehnahlan tui van a cei teh a hnukkâbangnaw ceihlawi hane patetlah a cei pouh. <sup>49</sup> A hnukkâbangnaw ni Jisuh tuipui van a cei e a hmu awh navah, kahrailuili lah a pouk awh dawkvah a hramki awh. <sup>50</sup> Hatnavah a hnukkâbangnaw teh a tāsue poung awh. Jisuh ni taket awh hanh, Kai doeh telah tang atipouh. <sup>51</sup> Hahoi long thung ahnimouh koe a kâen teh kahlî teh a roum. A hnukkâbangnaw teh kângai hroung a ru awh. <sup>52</sup> Bangkongtetpawiteh, vaiyei dawk kângairu a sak e hah a lungpata a dawk banglahai ngai awh hoeh.

<sup>53</sup> Hathnukkhu hoi tui namran lah a raka awh teh Kennesaret kho dawk a pha awh navah, long a kâhat sak awh. <sup>54</sup> Long dawk hoi a kum navah taminaw ni Jisuh a hmu awh teh tang a nout awh dawkvah, <sup>55</sup> Atengpam e kho pueng koe a yawng awh teh, hote hmuen koe Jisuh ao tie a thai awh navah, kapatawnaw hah a kâkayawt awh teh a thokhai awh. <sup>56</sup> Jisuh a ceinae khopui hoi khote dawk hai thoseh, taminaw ni ka dam hoeh e naw hah lam teng a ta awh teh, Jisuh e hni pawî tek sak hanelah ama koe a kâhei awh. Ka tek e naw pueng ni a dam awh.

## 7

*Thoungnae hoi thounghoehnae*

*Mat 15:1-20*

<sup>1</sup> Farasinaw hoi Jerusalem kho lahoi ka tho e cakathutkungnaw teh Jisuh koevah a kamkhueng awh. <sup>2</sup> A hnukkâbang tangawn ni kut kamsin laipalah rawca a ca awh e a hmu awh navah a pathoe awh. <sup>3</sup> Bangkongtetpawiteh, Farasinaw hoi Judahnaw teh, a kacuenaw e phung patetlah kut kamsin laipalah rawca cat awh hoeh. <sup>4</sup> Hahoi hnopai yonae koe e anhla a ran awh e hai pâsu laipalah cat awh hoeh. Hlaam, ailo,



manang, pacen hoi ikhunnaw a pâsu awh e patetlah alouke kâcangkhai e naw a tarawi awh teh ouk a sak awh. <sup>5</sup> Hatnavah Farasinaw hoi cakathutkungnaw ni bangkongmaw na hnukkâbangnaw ni kacuenaw e phung tarawi laipalah, kathounghoehe kut hoi rawca a ca awh telah Jisuh hah a pacei awh. <sup>6</sup> Profet Isaiah ni Cakathoung daw k nangmae kong a thut e teh atang tangngak doeh. Cathut ni hete taminaw ni a pahni hoi dueng doeh kai na bari awh teh, a lungthin hoi teh kai hoi a kâhla poung awh. <sup>7</sup> Kai na bawksae teh ayawmyin pui doeh toe. Bangkongtetpawiteh, tami cangkhaiae hah Cathut ni poe e kâpoelawk patetlah a kâcangkhai awh, a ti. <sup>8</sup> Cathut e kâpoelawk hah na takhoe awh teh, tami e cangkhaiae lah kaawm e ailo tongben pâle e hoi singyoenaw hah na tarawi awh.

<sup>9</sup> Na mintoenaw e kâ cangkhaiae hah tarawi hanlah, Cathut e lawkpoelawk hah na hnoun awh bo toung vaw. <sup>10</sup> Bangkongtetpawiteh, Mosi e kâlawk dawkvah, na manu hoi na pa bari awh, apihai a manu hoi a na pa a pahni hoi ka payon e teh thei lah ao han. <sup>11</sup> Nangmouh niteh, tami ni a manu hoi a na pa koe nangmouh na kabawp nahan ka tie ka hno hah Cathut e doeh tetpawiteh ; <sup>12</sup> Hote tami teh a manu hoi a na pa hanlah kabawp thainae na poe awh hoe. <sup>13</sup> Het patetlah na cangkhaiae hoi moi na sak awh eiteh, Cathut lawk koug na pahnawt awh toe. Hot patet e singyoenaw hah na tarawi awh, atipouh. <sup>14</sup> Hatnavah Jisuh ni tamimaya hah a ma koe bout a kaw teh, nangmouh pueng ni ka lawk thai panuek awh.

### *Tami kakhin sak e*

<sup>15</sup> Alawilah hoi tami thung kâen e ni tami khin sak hoe. Tami thung hoi ka tâcawt e ni doeh tami a khin sak, telah a dei pouh. <sup>16</sup> Thai nahan hnâ ka tawn pueng ni thai naseh atipouh.

<sup>17</sup> Jisuh ni tamimaya a ceitakhai teh imthungkhu a kâen nah a hnukkâbangnaw ni hote bangnueae hah a pacei awh. <sup>18</sup> Hatnavah, Jisuh ni, Nangmouh hai telah totouh maw na pathu awh rah vaw, alawilah hoi tami thung kâen e ni tami khin sak hoe tie na panuek awh hoe na maw. <sup>19</sup> Bangkongtetpawiteh, hot teh a lungthin thung kâen laipalah vonpui thung a kâen teh, alawilah bout a tâco, telah atipouh.

<sup>20</sup> Hat hoayah, Jisuh ni, Tami kakhin sak kung katang teh, a thung lahoi ka tâcawt e doeh. <sup>21</sup> Lungthin thung hoi kahawihoehe pouksae, uicuknae, tami theinae, <sup>22</sup> ayâ hno parunae, hounlounnae, cuknae, dumyennae, kamhnawngnae, hmuhmanae, ayâ min mathoe saknae, kâoupnae, kâpawinae, hounroe tawnnae, polokak lah onae, <sup>23</sup> hete kahawihoehe naw teh tami thung hoi ka tâcawt e a tho dawkvah, tami kakhin sak e lah a o, atipouh.

### *Phoenician napui e yuemnae*

#### *Mat 15:21-28.*

<sup>24</sup> Bawipa teh hote hmuen koehoi a thaw teh, Taire hoi Sidon ram lah a cei. Im buet touh daw kâen teh, apihai kâpanue sak hanlah ngai hoe. Hatei, kâhrawk thai hoe. <sup>25</sup> Bangkongtetpawiteh, a canu buet touh kakhine muitha ni a man pouh e napui buet touh ni Jisuh koe a tho teh, a khok rahim vah a tabo. <sup>26</sup> Ahni teh Jentel napui Syrophoenician kho ka khe e doeh.

<sup>27</sup> Jisuh ni ma canaw hah hmaloe kaboumlah paca han, canaw e rawca hah oun la pouh teh, ui oun paca kaw yaw maw, atipouh. <sup>28</sup> Hote napui



niyah, Bokheiyah, Bawipa. Hatei, uinaw ni patenghai camonaw e cadue hah ouk a luep nahoehmaw atipouh. <sup>29</sup> Jisuh niyah, Hettelah na dei dawkvah nama im ban leih, kahraikathout teh na canu thung hoi a tâco toe atipouh. <sup>30</sup> Hatdawkvah hote napui teh a ma im a ban teh, a canu teh ikhun daw k a i e a hmu. Kahrai kathout ni a tâco takhai katang toe tie hah a panue.

*A hnâ ka pang ni teh a lawk ka a e a dam sak*

*Mat 15:29-31.*

<sup>31</sup> Jisuh ni Taire hoi Sidon kho a ceitakhai teh, Dikapolis ram a rakan teh, Galilee tuipui koe a pha. <sup>32</sup> Hatnavah, Jisuh koe tami buet touh a hnâ ka pang niteh, a lawk ka a e van vah a kut tOUNg sak hanelah a kâhei awh.

<sup>33</sup> Jisuh ni hote tami teh tamimaya koehoi a ma dueng soumtinae koe a ceikhai teh, a hnâ roi thung a kutdawn hoi a tapu pouh. Tamtui a tamthawi teh a lai daw k a hluk pouh. <sup>34</sup> Hahoi, Jisuh ni kalvan lah a mOUNg teh, phokâha teh, Ephphatha telah atipouh. Ephphatha ti ngainae teh, Kamawng haw tinae doeh. <sup>35</sup> Dongdeng ca daw k ahnie hnâ a ang pouh teh, lawk hai bout a tho thai.

<sup>36</sup> Jisuh ni api koehai hote a konglam hah dei awh hanh lah a telah kâ a poe. Hatei, ahnimouh ni hoehoe a pâpho awh. <sup>37</sup> Hote kamthang kathainaw pueng ni kângairu pOUNg awh teh, a sak e pueng ahawipOUNg. Hnâpangnaw a hnâ a thai awh teh, lawkanaw hai lawk a tho thai awh toe, ati awh.

## 8

*Tami 4,000 touh a paca*

*Mat 15:32-33.*

<sup>1</sup> Hathnukkhu hoi, tami moikapap bout a kamkhueng awh teh, canei han ao hoe h dawkvah, Jisuh ni a hnukkâbangnaw a kaw teh, <sup>2</sup> Hete taminaw heh kai ni ka pahren. Bangkongtetpawiteh, hnin thum touh thung kai koe ao awh toe. Canei han rawca banghai tawn awh hoe h. <sup>3</sup> Tami tangawn teh ahlanae koehoi a tho awh dawkvah, rawca cat laipalah hoi amamouh im ka ban sak pawiteh lam vah a tâwn awh han doeh atipouh.

<sup>4</sup> A hnukkâbangnaw ni apimaw kahrawngum vah na e vaiyei maw sin vaiteh kaboumcalah paca thai han vaw telah bout atipouh awh. <sup>5</sup> Jisuh ni, nangmouh koe vaiyei na yit touh maw kaawm telah a pacei navah, ahnimouh ni vaiyei sari touh ao telah atipouh awh.

<sup>6</sup> Hatnavah Jisuh ni taminaw teh talai daw k tahung a naseh telah kâ a poe. Vaiyei sari touh a la teh, lunghawinae lawk a dei hnukkhu, vaiyei a raen teh, taminaw rei hanelah a hnukkâbangnaw koe a poe. A hnukkâbangnaw ni hai taminaw hah a rei awh. <sup>7</sup> Ahnimouh koe tanga kahoenge youn touh ao teh hot hanelah hai lunghawinae a dei hnukkhu rei hanelah kâ a poe. <sup>8</sup> Ahnimanaw ni a von paha a hnukkhu, acawi bout a pâkhueng awh navah tangthung sari touh akawi. <sup>9</sup> Ka cat e taminaw teh 4,000 touh hane a pha awh. <sup>10</sup> Hote taminaw bout a ban sak hnukkhu, a hnukkâbangnaw hoi long thung a kâen awh teh, Dalamannutha kho lah a cei awh.

<sup>11</sup> Hatnavah Jisuh tanouk hanelah Farasinaw a tho awh teh, ahni hoi a kâoun awh. Kalvan lahoi e mitnoutnae a hei awh. <sup>12</sup> Jisuh ni phokâha laihoi, hete miphunnaw ni bangkongmaw mitnoutnae a hei awh. Atangcalah na dei pouh awh. Hete miphunnaw koe mitnoutnae ka



kamnuek sak mahoeah atipouh. <sup>13</sup> Ahnimanaw a ceitakhai teh long dawkbout a luen teh namran lah bout a ban.

*Herod hoi Farasinaw e ton roun awh*

<sup>14</sup> A hnukkâbangnaw ni vaiyei a sin hane a pahnim awh dawkvah, ahnimouh koe vaiyei buet touh dueng doeh kaawm. <sup>15</sup> Hatnavah Jisuh ni Farasinaw e ton hoi Herod e tonnav hah kâhruetcuetei a nateh, roun awh, telah kâ a poe. <sup>16</sup> A hnukkâbangnaw ni ama koe vaiyei a sin hoeah dawkbout doeh hete lawk a dei telah buet touh hoi buet touh a kâpankhai awh.

<sup>17</sup> Telah a kâdei awh e hah Jisuh ni a panue navah, Nangmouh ni vaiyei na sin awh hoeah e bangkongmaw buet touh hoi buet touh na kâpankhai a vaw. Atu totouh na thai panuek awh hoeah rah maw. Na lungthin a pata rah maw. <sup>18</sup> Mit ao nahlangva na hmawt awh hoeah maw. Hnâ na tawn awh nahlangva na thai panuek awh hoeah maw, na pâkuem awh hoeah maw. <sup>19</sup> Tami 5,000 touh hane vaiyei panga touh ka rei navah tangthung nâyittouh maw na racawng awh, telah a pacei navah ahnimouh ni, tangthung hlaikahni touh ka racawng awh telah atipouh awh. <sup>20</sup> Tami 4,000 touh hanelah vaiyei sari touh e ka rei navah na yit touh maw na racawng awh, telah bout a pacei navah, tangthung sari touh telah bout atipouh awh. <sup>21</sup> Boipawiteh, Nangmouh ni bangtelamaw thai panuek laipalah khuet na o a vaw atipouh.

*Bethsaida kho a mit ka dawn e kho bout a hmu sak*

<sup>22</sup> Jisuh teh Bethsaida kho a pha navah, taminaw ni a mit ka dawn e ahni koe a thokhai awh. Ahnimouh ni a mit ka dawn e tek sak hanlah Jisuh koe a kâhei awh. <sup>23</sup> Hatdawkvah, Jisuh ni mit ka dawn e tami hah a kut dawkbout a kuet teh kho alawilah a hrawi. Ahnie mit dawkbout tamtui hoi a tamthawi hnukkhu avan vah a kut tounge sin teh, na hmu thai maw telah a pacei. <sup>24</sup> A mit ka dawn e tami ni a moung teh a khet navah, oe taminaw thingkung patetlah ao teh lam a cei awh e hah ka hmu atipouh.

<sup>25</sup> Jisuh ni a kut hoi a mit a tek teh bout a khet sak navah, bangpuengpa kacairoelah ka hmu toe atipouh. Bangkongtetpawiteh, a mit a ang tounge dawkbout doeh. <sup>26</sup> Jisuh ni a ma im a ban sak teh, khothung kâen hanh, api koehai dei hanh telah atipouh.

*Jisuh teh Khrih doeh*

*Mat 16:13-16; Luk 9:18-20.*

<sup>27</sup> Jisuh teh a hnukkâbangnaw hoi Kaisarea Filippi kho tengpam, khotenaw koe kahlong a cei nah lam vah, a hnukkâbangnaw koe, taminaw ni Kai hah api ati a na maw, telah a pacei. <sup>28</sup> Tami tangawn ni Bawipa nang teh baptisma ka poe e Jawhan ati awh, a tangawn ni Elijah ati awh. A tangawn ni profet buetbuet touh doeh telah atipouh awh. <sup>29</sup> Bawipa ni hai nangmouh ni teh Kai heh api na ti a maw telah a pacei navah Piter ni Bawipa, nang teh Khrih doeh telah atipouh. <sup>30</sup> Hatnavah, Bawipa ni amae akong hah api koehai a dei hoeah nahanelah kâhruetcuetnae a poe.

*A due nahane hoi bout a thaw nahane sut a dei*

*Mat 16:21-28; Luk 9:22-27*

<sup>31</sup> Hahoi, Bawipa ni tami Capa teh rucatnae moi a khang vaiteh, tami kacuenaw, vaihma bawinaw hoi cakathutkungnaw ni a pahnawt awh vaiteh a thei awh hnukkhu hnin pâthum nah bout a thaw nah tie hah a hnukkâbangnaw a cangkhai. <sup>32</sup> Bawipa ni hote akong kamcengcalah a dei pouh torei teh Piter ni Bawipa hah alouklah a kaw teh koe a yue.



<sup>33</sup> Hatei, Bawipa ni a kamlang teh a hnukkâbangnaw a khet teh, nang Setan ka hnukkhu lah kâhnawnh. Bangkongtetpawiteh nang teh Cathut hoi kâkuen e hnônaw dawk na lungpen laipalah, talai hoi kâkuen e hnôpai dawk doeh na lungpen telah atipouh teh a yue.

### *Tingpalam hrawm haw*

<sup>34</sup> Hahoi, Bawipa ni a hnukkâbangnaw hoi tamimaya a kaw teh, apihai ka hnukkâbang han na ngai awh pawiteh amahoima kâpahnaawt vaiteh, amae thingpalam hrawm hoi ka hnukkâbang awh naseh. <sup>35</sup> Apihai amae hringnae ka rungngang e teh hringnae asung han. Kai hane hoi kaie kamthang kahawî kecu dawk a hringnae ka pasoung e tami teh a hringnae a rungngang han. <sup>36</sup> Tami ni talaivan pueng koug ka coe nakunghai a hringnae muitha sung pawiteh bangmaw aphu kaawm han. <sup>37</sup> A muitha hah bang hno hoi maw a ratang thai han. <sup>38</sup> Bangkongtetpawiteh, Cathut banglah ka pouk hoeh e miphun kathoutnaw koe, apihai kai thoseh, ka lawk thoseh, kayakkhai pawiteh, tami Capa teh a na Pa Cathut e bawilennae a kâmahrawk teh kathounge kalvantaminaw hoi a tho torei teh hote tami hah a kayakhai van han.

## 9

<sup>1</sup> Atangcalah na dei pouh awh. Cathut uknaeram teh bahu hoi a kangdue e hah, hmawt laipalah hie hmuen koe na kaawm e tami tangawn teh duenae koe na phât a mahoe.

### *Jisuh mei kâthungnae*

*Mat 17:1-13; Luk 9:28-36.*

<sup>2</sup> Hnin taruk touh a loun hnukkhu Jisuh ni alouknaw bawk laipalah Piter, Jem, Jawhan tinaw dueng a kaw teh soumtinae koe, karasang e monsom vah a cei awh. Ahnimae hmalah phun louk lah a kâthung. <sup>3</sup> A kho e teh loukloukkaang e, het talai van apipatet ni hai hottelah pâsu thai hoeh hane totouh a pangawpekyek lah ao.. <sup>4</sup> Mosi hoi Elijah a kamnue roi teh Jisuh hoi a kâpan awh. <sup>5</sup> Hatnavah, Piter ni, Bawipa hie hmuen koe o a nawm poung. Nang hanlah rim buet touh, Mosi hanlah buet touh, Elijah hanlah buet touh sak awh sei, atipouh. <sup>6</sup> A hnukkâbangnaw teh a taki awh dawkvah, Piter ni hottelah a pantaivai e doeh. <sup>7</sup> Hatnavah, tâmai ni a ramuk awh teh, ahni teh ka pahren e ka Capa doeh, ahnie a lawk hah tarawi awh, telah tâmai thung hoi lawk a tho.

<sup>8</sup> Hatnah tahma vah a hnukkâbangnaw ni a tengpam a khet awh navah, amamouh hoi Jisuh hloilah apihai hmawt awh hoeh. <sup>9</sup> Mon hoi bout a kum awh toteh, Jisuh ni tami Capa teh duenae koehoi bout thaw hoehroukrak atu na hmu awh e hah api koehai dei awh hanh lah a, telah kâ a poe. <sup>10</sup> A hnukkâbangnaw ni hote lawk hah a pâkuem awh. Hatei, duenae koehoi bout thaw tie hah bangtelae na maw telah buet touh hoi buet touh a kâpacei awh. <sup>11</sup> Hatnavah cakathutkungnaw ni Elijah hmaloe a tho han telah bangkongmaw a dei awh vaw, telah a pacei awh navah, <sup>12</sup> Bawipa ni Elijah teh hmaloe a tho vaiteh bangpuengpa koug a pathoup han tie a thuem. Bangkongmaw Cakathoung ni tami Capa teh rektapnae moi khang vaiteh, a pahnawt hai a pahnawt awh han ati vaw. <sup>13</sup> Na dei pouh awh, Elijah teh yo a tho toe. Cakathoung ni a dei e patetlah taminaw ni a ngai awh e patetlah ahni koe a sak awh toe telah atipouh.



*Kahrai a pâlei pouh**Mat 17:14-17; Luk 9:37-45.*

<sup>14</sup> Alouke a hnukkâbangnaw koe a pha awh navah, tami moikapap ni a ven awh teh cakathutkungnaw teh ahnimouh hoi a kâoun awh lahun e hah a hmu. <sup>15</sup> Ka kamkhueng e tamihupui ni Jisuh a hmu awh toteh kângairu awh laihoi, Jisuh koe a yawng awh teh kut a man awh. <sup>16</sup> Jisuh ni ahnimanaw hoi bangtelamaw na kâoun a vaw. Telah cakathutkungnaw hah a pacei. <sup>17</sup> Ka kamkhueng e tamihupui thung daw k hoi tami buet touh ni, Bawipa a lawk ka a ni teh kahrai ni a man e ka capa hah nama koe ka hrawi. <sup>18</sup> Kahrai ni a man karoitawi talai daw k a rawp teh a kâko hoi potamtui a tâco, a hâ a karue teh, pheng a kamsoe toe. Hote kahrai pâlei pouh hanelah na hnukkâbangnaw koe ka dei pouh eiteh ahnimouh ni pâlei thai awh hoe h atipouh.

<sup>19</sup> Jisuh ni yuemnae katawnhoe hnaew e catoun, nangmouh hoi cungtaloh na sittouh maw ka o han vaw. Na sittouh maw na ring awh han vaw. Hate camo hah hi thokhai awh, atipouh. <sup>20</sup> A dei e patetlah camo a thokhai awh navah, hote kahrai ni Jisuh heh a hmu tahma vah, camo hah a sawn sak, talai daw k a rawp sak, potamtui a hawn sak teh a paleipaluet sak. <sup>21</sup> Jisuh ni hettelah a onae na sittouh maw a saw toung telah a na pa hah a pacei navah, a na pa ni a nawca hoi doeh toe. <sup>22</sup> Camo due sak hanelah hmai daw k, tui daw k atuhoitu a rawp sak. Hatei, Bawipa coung thai pawiteh, na pahren ei telah pahrennae a hei. <sup>23</sup> Jisuh ni na yuem thai maw. Na yuem pawiteh bangpueng a coung thai atipouh.

<sup>24</sup> Camo e a na pa ni, Bawipa ka yuem doeh, ka yuemhoe hnae hah na kabawm lah telah mitphi hoi a dei. <sup>25</sup> Hatnavah taminaw teh yawng laihoi a tho awh e Jisuh ni a hmu navah, hnâpang hoi lawka muitha, camo thung hoi tâcawt, bout kâen hanh lawih, telah kakhine muitha hah kâ a poe navah, <sup>26</sup> a hramki teh camo a sawn sak teh a tâco. Camo teh kadout e patetlah ao. Ayânaw ni teh a due toe ati awh. <sup>27</sup> Jisuh ni a kut daw k hoi a pathaw nah camo teh a kangdue.

<sup>28</sup> Imthung a kâen awh hnukkhu a hnukkâbangnaw ni bangkongmaw hote kahrai hah kaimouh ni teh ka pâlei thai awh hoe h vaw telah arulahoi a pacei awh. <sup>29</sup> Jisuh ni ratoumnae, rawcahainae laipalah teh bangtelah hai tâcawt thai mahoe h atipouh.

*A due nahane apâhni sut a deinae*

<sup>30</sup> Hote hmuen koehoi Galilee kho lungui vah a cei awh navah, api koehai kâpanue sak hanlah ngai hoe h. <sup>31</sup> Bangkongtetpawiteh, tami Capa teh taminaw kut daw k pahnaewt vaiteh, a thei awh han. <sup>32</sup> A due hnukkhu apâthum hnin bout a thaw han tie naw hah, a hnukkâbangnaw koe a dei pouh. Hote kongnaw hah thaipanuek awh hoe h ei, apinihai bout pacei ngam awh hoe h.

*Apimaw kalenpoung**Mat 18:1-5; Luk 9:46-48.*

<sup>33</sup> Kapernuam kho a pha awh teh im thung ao awh navah, tapa lam vah buet touh hoi buet touh bangmaw na kâoun awh vaw telah a pacei eiteh, a hnukkâbangnaw ni lawkkamuem lah ao awh. <sup>34</sup> Bangkongtetpawiteh, apimouh kalenpoung tie hah, a kâoun awh daw kvah dei ngam awh hoe h.

<sup>35</sup> Hatnavah Jisuh ni a hnukkâbangnaw hlaikahni touh hah a kaw teh, kalenpoung lah o ka ngai e teh, ka thoung poung lah o a ngai, hahoi tami



pueng e san lahai o a ngai atipouh. <sup>36</sup> Camo ca buet touh ahnimaie lungui a kangdue sak hnukkhu, a kut hoi a tawm teh, <sup>37</sup> apipatet hai kaie minhmai khet laihoi het patetlah e camo buetbuet touh ka dâw e teh kai na ka dâw e doeh. Kai na ka dâw e teh kai dueng na dâw e nahoe, kai na kapatounkung hai a dâw toe telah atipouh.

*Maimouh koe lah ka bawk e*

*Luk 9:49-50*

<sup>38</sup> Jawhan ni, Saya, na min lahoi kahraituilinaw ka pâlei e tami buet touh ka hmu awh. Maimouh thung daw k e tami lah ao hoe dawkvah sak hanh lawih ka ti pouh awh, telah a dei pouh. <sup>39</sup> Jisuh ni cakâ awh hanh, ka min lahoi kângairuhno kamnuek sak thai e ni teh kayawicalah ka min mathout sak thai mahoe. <sup>40</sup> Nangmouh na ka taran e koelah kaawm hoe e teh, nangmouh koe lah kaawm e doeh. <sup>41</sup> Nangmouh teh Messiah hnuk kâbang e doeh ati awh dawkvah, ka minhmai khet lahoi tui manang buet touh hai na ka poe e tami teh, tawkpheu hmawt laipalah awm mahoe atipouh.

*Jisuh ni kâhruetcuetnae a poe*

<sup>42</sup> Kai na ka yuem e camonaw thung daw k buetbuet touh ka payon sak kung teh a lahuen daw k talungsum awi sak vaiteh tuipui daw k tâkhawng pawiteh ahnimouh hanlah bet ahawihnawn. <sup>43</sup> Na kut ni na yon sak pawiteh na kut tâtueng. <sup>44</sup> Kutkuep lahoi ahri dout hoe, hmai rounhoe hnae hell hmai thung bo hla k teh kutkuep laipalah hringnae koe phat pawiteh ahawihnawn. <sup>45</sup> Na khok ni na yon sak pawiteh na khok tâtueng haw. <sup>46</sup> Ahri dout hoe, hmai rounhoe hnae hell hmai thung khok kuep lahoi bo hla k teh khok kuep laipalah hringnae koe phat pawiteh ahawihnawn. <sup>47</sup> Na mit ni na yon sak pawiteh, na mit cawngkhawih. <sup>48</sup> Ahri dout hoe, hmai rounhoe hnae, hell hmai thung mit kuep lahoi bo hla k teh, mit vang hoi Cathut uknaeram daw k kâen pawiteh ahawihnawn. <sup>49</sup> Sathei pueng teh palawi phuen e patetlah, tami pueng teh hmaipalawi phuensinnae a khang awh han. <sup>50</sup> Palawi teh ahaw. Hateiteh a paanna khamat pawiteh, bangtelamaw bout paan sak thai han. Nangmouh koe palawi awm sak awh. Buet touh hoi buet touh kâpôkâdanglah awm awh atipouh.

## 10

*Yuvâ kâkapeknae*

*Mat 19:1-9*

<sup>1</sup> Hote hmuen koe hoi a thaw teh, Jordan palang namran lah a cei teh, Judea ram vah a pha. Tami moikapap ni ahni koe bout a kamkhueng awh teh, ahmoun e patetlah bout a cangkhai. <sup>2</sup> Hatnavah, Farasinaw a tho awh teh, tongpa ni a yu a ma kaw maw telah tanouknae lahoi a pacei awh. <sup>3</sup> Mosi ni bangtelamaw kâ na poe telah Jisuh ni let a pacei navah, <sup>4</sup> ahnimouh ni kapeknae ca na poe vaiteh, nama han ati telah atipouh awh. <sup>5</sup> Jisuh ni nangmouh teh na lung a pata awh dawkvah hottelah Mosi ni kâpoelaw daw k a thut e doeh. <sup>6</sup> Cathut ni a sak pasuek nah tongpa hoi napui roi dueng doeh a sak. <sup>7</sup> Hote kecu dawkvah, tongpa ni a manu hoi a na pa hah a ceitakhai vaiteh, a yu hoi cungtalah ao roi han. <sup>8</sup> Ahnimouh roi teh takthai buet touh lah a coung han. Hatdawkvah, yuvâ teh kahni



touh na hoeh, takthai buet touh lah ao toe. <sup>9</sup> Hatdawkvah, Cathut ni a pahlawm tangcoun e teh, tami ni kapek hanh naseh a ti.

<sup>10</sup> Hahoi, a hnukkâbangnaw hoi im daw k ao awh navah, hote kong hah bout a pacei awh. <sup>11</sup> Apipatethai a yu hah ama teh, alouke napui hoi bout awm pawiteh, a yu lathueng vah ka uicuk e lah ao. <sup>12</sup> Yu ni hai a vâ hah ama teh, alouke tongpa hoi bout awm pawiteh, a vâ lathueng vah ka uicuk e lah ao van.

*Camonaw yawhawi a poe*

*Mat 19:13-15; Luk 18:15-17.*

<sup>13</sup> Hatnavah, camonaw hah ama koe tek sak hanelah, a thokhai awh. Hatei, a hnukkâbangnaw ni ka thokhai e naw hah a yue awh. <sup>14</sup> Jisuh ni a hmu navah, a lungkhuek teh, camonaw hah kai koe tho naseh, hrek awh hanh. Cathut uknaeram teh hot patet e camonaw hane doeh. <sup>15</sup> Atangcalah na dei pouh awh. Apipatethai hete camo patetlah kaawm hoeh e tami teh, Cathut uknaeram daw k kâen mahoe h atipouh. <sup>16</sup> Hahoi, camonaw hah a tawm teh, ahnima e lathueng a kut a toung sin teh, yawhawinae a poe.

*Ka tangreng e thoundoun*

*Mat 19:16-30; Luk 18:18-30*

<sup>17</sup> Lam daw k a cei awh lahun nah, tami buet touh Jisuh koe a yawng teh, a khokcuengkhuem laihoi a hmalah a tabo teh, saya kahawi, a yungyoe hringnae pang thai nahanelah, bangmaw ka sak han telah a pacei. <sup>18</sup> Hahoi Jisuh ni bangkongmaw saya kahawi na ti vaw. Cathut dueng nahoe hmaw kahawi vaw atipouh. <sup>19</sup> Kâpoelawknaw hah na panue nahoe hmaw. Uicuk hanh, tami thet hanh, ayâ e hno parawt hanh, laithoe e kapanuekkhaikung lah awm hanh, ayâ e hno kaheng lah cat hanh, na manu hoi na pa barih, telah atipouh. <sup>20</sup> Hote tami ni, hote kâlawnaw teh ka nawca hoi koug ka tarawi toe atipouh.

<sup>21</sup> Jisuh ni ahni teh lungpataw lahoi a khet teh, buet touh na vout rah atipouh. Cet nateh na hno pueng yawt nateh, ka roedengnaw poe haw. Hottelah na sak pawiteh, kalvan kho vah hno na tawn han. Hathnukkhu tho nateh, thingpalam hrawm hoi ka hnukkâbang haw, telah atipouh.

<sup>22</sup> Hote tami teh hnopai ka tawnta poung e a tho dawkvah, hote lawk a thai nah, a minhmai a mathoe teh, a lungmathoe laihoi a ban.

*Ka tangreng e hoi Cathut uknae ram*

<sup>23</sup> Jisuh ni a tengpam a khet teh, Cathut uknaeram daw k bawi tangreng ni a kâen hane banghloimaw a ru, telah a hnukkâbangnaw koe atipouh.

<sup>24</sup> A hnukkâbangnaw ni hote lawk a thai awh navah kângai lah a ru awh. Jisuh ni ka canaw, talai hno daw k a lung kapen e tami teh Cathut uknaeram daw k a kâen hane a ru poung bout atipouh. <sup>25</sup> Ka tawnta e tami Cathut uknaeram thung a kâen hla k teh, kalauk ni phuengvang khu daw k a kâen e ayawihnawn, atipouh.

<sup>26</sup> Ahnimanaw teh kângai hoe a ru awh teh, hat boipawiteh, apimaw rungngang lah kaawm han toung vaw telah buet touh hoi buet touh a kâdei awh. <sup>27</sup> Jisuh ni ahnimanaw hah a khet teh, hete heh tami koe laihoi ka coung thai hoe h nakunghai, Cathut ni a coung sak thai hoe h e awm hoe h. Bangpueng hai koug a coung sak thai, atipouh.

*Hnukteng ni hma ahman han*

<sup>28</sup> Hatnavah, Piter ni kaimouh teh ka tawn awh e pueng ka ceitakhai awh teh, na hnuk ka kâbang awh toe, atipouh navah, <sup>29</sup> Jisuh ni atangcalah



na dei pouh awh. Apipatethai Kai kecu dawk nakunghai; kamthang kahawi kecu dawk nakunghai, Imlaw, a hmaunawngna, manu napa, yuca nakunghai buetbuet touh ka cettakhai e teh, <sup>30</sup> alet 100 touh e yawhawinae lah kaawm e atu tueng nah rektapnae hoiyah, Imlaw, hmaunawngna, tawncanu, manu, canaw hai thoseh, due hnukkhu hoi yungyoe hringnae hai thoseh, a pang awh han atipouh. <sup>31</sup> Hnukkatengnaw ni hma ahman awh han. Hmakahmannaw ni hnuk a teng awh han telah atipouh.

*Jisuh ni ama a due hane apâthum sut a dei*

*Mat 20:17-19; Luk 18:31-32*

<sup>32</sup> Jerusalem kho lah a cei awh nah, lam vah Jisuh teh a hnukkâbangnaw e hmalah a cei. Ahnimouh teh kângairu hoi taki laihoi a kâbang awh. Hat toteh, a hnukkâbangnaw hlaikahni touh koevah, maimouh teh Jerusalem kho lah cet awh sei. <sup>33</sup> Tami Capa teh vaihma bawinaw hoi cakathutkungnaw kut dawk a pahnawt awh han. Ahnimouh ni tami Capa heh duekhai kawi yon pen awh vaiteh, Jentelnaw kut dawk a poe awh han. <sup>34</sup> Ahnimanaw nihai, tami Capa hah a pacekpahlek awh han, a hem awh han, a tamthawi awh han, a thei awh han. Hatei, hnin thum nah hnin vah tami Capa teh bout a thaw han telah ama ni a khang hane naw hah, a hnukkâbangnaw koe a dei pouh.

*Jem hoi Jawhan ni a hei*

*Mat 20:28*

<sup>35</sup> Hatnavah, Zebedee e capa Jem hoi Jawhan, Jisuh koe a tho roi teh Bawipa kaimouh roi ni ka hei roi e hah, poe sak hanelah ka ngai atipouh roi. <sup>36</sup> Bawipa ni nangmouh roi hanelah bangmaw sak sak hanelah na ngai roi atipouh navah, <sup>37</sup> bawilenna hoi na tahung toteh, buet touh aranglah, buet touh avoilah, tahung sak hanelah ka ngai roi atipouh. <sup>38</sup> Jisuh ni bangmouh ka hei roi aw tie na panuek roi hoeh atipouh. Ka nei hane manang heh na nei thai roi han maw. Ka coe hane baptisma hai na coe thai roi han maw, telah a pacei. <sup>39</sup> Ahnimouh roi ni ka sak thai roi han doeh atipouh roi. Jisuh ni ka nei e manang na nei awh han, ka coe e baptisma hai na coe van awh han. <sup>40</sup> Hatei, kaie avoilah aranglah tahung thainae teh Cathut ni a rawi tangcoun e naw hanelah doeh ao atipouh.

<sup>41</sup> Alouke a hnukkâbangnaw hra touh ni a thai awh navah, Jem hoi Jawhan koe a lungkhuek awh. <sup>42</sup> Jisuh ni ahnimanaw hah a kaw teh, nangmouh ni na panue a tangcoun e patetlah Jentel bawinaw ni teh tami lathueng bawi hanelah a kâtuk awh. Kâtawnnae dueng doeh a ngai awh. <sup>43</sup> Nangmouh teh hottelah awm awh hanh. Apipatethai bawi han ka ngai e tami teh, nangmae san lah ao han. <sup>44</sup> Nangmouh thung daw min kamthang ka ngai e tami teh, tami pueng e san lah ao han. <sup>45</sup> Bangkongtetpawiteh, tami Capa patenghai, ayâ patoun hanelah tho hoeh. Ayânaw e thaw tawp pouh hane hoi, hringnae pasoung laihoi, taminaw ratang hanelah doeh a tho atipouh.

*Mitdawn mit bout a ang*

*Mat 20:29-34; Luk 18:35-43*

<sup>46</sup> Jeriko kho a pha awh navah, a hnukkâbangnaw hoi, tamihupui teh hote kho thung hoi a tâco awh. Hatnavah, Timaesus capa, a mit ka dawn e Bartimaeus teh, lam teng a tahung teh hno a hei. <sup>47</sup> Nazareth tami, Jisuh tie a thai nah, Devit capa Jisuh kai hah na pahren haw atipouh.

<sup>48</sup> Ayânaw ni lawkkamuem awm haw telah kâhruetcuat a poe. Hatei, Devit capa Jisuh, kai hah na pahren haw telah hoehoe kacailah a hram.



<sup>49</sup> Jisuh ni a kangdue teh, hote tami hah hi kaw haw telah kê a poe. Hatnavah, ayânaw ni mit ka dawn e hah a kaw awh teh, na lungpuen hanh. Thaw haw, na kaw ho atipouh awh. <sup>50</sup> A hni hah vu a tâkhawng teh, hluet a thaw teh, Jisuh koe a cei. <sup>51</sup> Jisuh ni bangmaw nang hanelah sak sak hane na ngai telah a paei. A mit ka dawn e ni, Bawipa, ka mit ang sak haw atipouh. <sup>52</sup> Jisuh ni cet lawih, na yuemnae ni na dam sak toe atipouh. Hatnah tahma vah, ahni teh, a mit a ang teh, Jisuh hnuk a kâbang.

## 11

### *Tânae lahoi Jerusalem khopui thung a kâen*

*Mat 21:1-9; Luk 19:29-38*

<sup>1</sup> Jerusalem khopui teng Olive Mon rahim vah, kaawm e Bethphage kho hoi Bethani kho teng a pha awh navah, a hnukkâbang e tami kahni touh hah hmalah a patoun. <sup>2</sup> Hmalae kho dawkw, cet roi nateh, apinihai a kâcui boihoe hae, pakhi teh sut pen e Laca hah na hmu roi han. Rasu nateh hivah hrawi roi lah a. <sup>3</sup> Tami buetbuet touh ni bangkongmaw na rasu roi tetpawiteh, Bawipa ni a panki, tang ka thak awh han doeh tet pouh roi telah lawk a thui.

<sup>4</sup> A hnukkâbang roi ni a cei teh, takhang alawilah, lam teng vah sut pen e Laca hah a hmu teh a rasu roi. <sup>5</sup> Hote hmuen koe kaawm e naw ni yah, bangkongmaw na rasu roi ati awh navah, <sup>6</sup> Jisuh ni kê a poe roi e patetlah a hnukkâbang roi ni a dei pouh navah, ahnimouh ni tang a hrawi sak awh. <sup>7</sup> Laca hah Jisuh koe a phakhai roi toteh, Laca e a hnukthun vah, amamae hninaw a phai awh teh, Jisuh ni a kâcui. <sup>8</sup> Taminaw ni amamae hninaw hah lam dawkw a phai awh. Tami tangawn ni thingbunaw a phai awh. <sup>9</sup> A hnuklah a hmalah kâbang e naw ni yah, Hosanna, Cathut min lahoi ka tho e teh yawhawinae awmseh. <sup>10</sup> Cathut min lahoi ka tho lahun e maimae na pa Devit e uknaeram teh yawhawinae awmseh. A lathueng poung lah kalvan vah, Hosanna awmseh, telah bukbuk a hram awh. <sup>11</sup> Jisuh teh Jerusalem kho bawkim thung a kâen teh, hnopai pueng hah a khet. Kho hai a hmo toung dawkwah, a hnukkâbangnaw hlaikahni touh hoi, Bethani kho lah a cei awh.

### *Ka paw hoe e thaibunglung thoe a bo*

*Mat 21:18-22; Luk 19:45-47*

<sup>12</sup> Atangtho, Bethani kho hoi a ban awh navah a vonhlan. <sup>13</sup> Lam teng vah abu ka ra poung e thaibunglung teh ahlanae koehoi a hmu. Thaibunglung kung apaw khi tue a pha hoe rah dawkwah, a paw kaawm paka han doeh telah a khet navah, a paw buet touh boehai a hmu hoe haw dawkwah, <sup>14</sup> sahnin totouh hoi nange apaw hah apinihai cat hanh seh atipouh. Hote lawk hah a hnukkâbangnaw ni hai a thai awh.

### *Bawkim thung hno yo e pasoung hoe*

*Mat 21:18-22; Luk 19:45-47*

<sup>15</sup> Jerusalem kho a pha navah, Jisuh teh Bawkim thung a kâen. Bawkim thungvah hno kayawtnaw hoi hno karannaw hah phang a pâlei teh, tangka kathungnaw ni a tahungnae caboinaw, âbakhu kayawtnaw ni a tahungnae pueng hah koug a tanawt pouh. <sup>16</sup> Bawkim thungvah hnopai yo hane sin laihoi kâen hanelah apihai pasoung hoe. <sup>17</sup> Kaie Im teh miphun pueng ni ratoumnae im ati awh han telah Cakathoung dawkw thut



lah ao nahoehmaw. Hateiteh, hote Im hah nangmouh ni teh dingca im lah na coung sak awh toe telah a yue awh.

<sup>18</sup> Cakathutkungnaw hoi vaihma bawinaw ni a thai awh navah Jisuh heh bangtelah hoi maw thei thai han telah a kâpan awh. Cangkhainae hah tami pueng ni kângai lah a ru awh dawkvah, ahnimouh ni Bawipa teh a taki awh. <sup>19</sup> Tangmin a pha toteh Jisuh hoi a hnukkâbangnaw teh kho lawilah a cei awh.

*Thaibunglung kung a ke*

*Mat 21:19-22*

<sup>20</sup> Amom lam a cei awh navah, thaibunglung teh a khawngyang khuehoi yout a ke e hah a hmu awh. <sup>21</sup> Piter ni hlawt a pouk teh, kenhaw ho Rabbi, thoe na bo e thaibunglung a ke toe ho atipouh.

*Lunghring laipalah yuem awh*

<sup>22</sup> Jisuh ni nangmouh teh Cathut yuem awh. <sup>23</sup> Atangcalah na dei pouh awh. Apipatethai lunghringnae tawn laipalah dei e patetlah a coung han tie yuem pawiteh, hote mon nang na hmuen koehoi kampuen nateh tuipui dawkwaw, na tet pouh pawiteh na dei e patetlah a coung han. <sup>24</sup> Hatdawkvah, na dei pouh awh. Ka hmu mingming han tie yuemnae lahoi na ratoumnae pueng teh na hmu awh han. <sup>25</sup> Nangmouh ni na ratoum awh navah, ayânaw yonpenneae awm pawiteh, ngaithoum awh. Hottelah ayânaw e yon na ngaithoum pawiteh kalvan kho kaawm e nangmae na Pa ni nangmae yon teh a ngaithoum han. <sup>26</sup> Nangmouh ni ayânaw na ngaithoum awh hoehpawiteh, kalvan kho kaawm e nangmae na Pa ni nangmae payon e hai ngaithoum van mahoe, telah atipouh.

*Jisuh hnotithainae a pacei awh*

*Mat 21:23-27; Luk 20:1-8*

<sup>27</sup> Hahoi Jerusalem kho bout a pha. Bawkim thung Jisuh a kâhlai navah, vaihmanaw, cakathutkungnaw hoi kacuenaw ni a cei sin awh teh, <sup>28</sup> apie kâtawnnae lahoi maw hete hno tithainae hah na sak vaw. Apini maw hettelah hnotithainae hah na poe vaw, telah a pacei awh. <sup>29</sup> Jisuh ni boipawiteh, buet touh let na pacei a einei. Dei awh haw, na dei awh pawiteh hete hnotithainae hah apie kâtawnnae lahoi maw ka sak tie hah ka dei van han.

<sup>30</sup> Jawhan ni tui dawkwaw baptisma a poe e hah kalvan hoi e maw. Na hoehpawiteh tami koehoi e maw dei awh haw atipouh. <sup>31</sup> Ahnimanaw teh, buet touh hoi buet touh a ka dei awh teh, bangtelamaw dei awh han vaw. Kalvan hoi e tetpawiteh, bangkongmaw Jawhan hah na yuem awh hoe haw bout tet vai. <sup>32</sup> Tami koehoi e doeh telah dei pouh hane hai, tamimaya taki bout a tho. Bangkongtetpawiteh, Jawhan hah tami pueng ni profet katang doeh telah bout a pouk awh, ati awh teh, <sup>33</sup> ka panuek awh hoe haw atipouh awh. Hatdawkvah, Jisuh ni hot patetvanlah, hete hnotithainae heh api e kâtawnnae lahoi maw ka sak tie ka dei van mahoe atipouh.

## 12

*Misur takha katawnkung bangnuenae*

*Mat 21:33-46; Luk 20:9-19*

<sup>1</sup> Hatnavah, bangnuenae hoi a dei pouh. Tami buet touh ni misur takha buet touh a sak. Koung a tumdum hnukkhu misurpaw katin nahane tangkom hai a tai teh, takha ring nahane imrasang hai buet touh sut a



sak. Takha hah takhakatawkkungnaw a hlai sak teh, alouke ram lah a cei.  
<sup>2</sup> Atue a pha toteh, takhakatawkkungnaw koehoi misurpaw la hanelah, takhakatawkkungnaw koe a san buet touh a patoun. <sup>3</sup> Ahnimanaw ni, san hah a hem awh teh, kuthrawng hoi a pâban awh. <sup>4</sup> Alouke san hah bout a patoun navah, talung hoi a lû dawkw a dei awh teh, yeirai a po sak awh teh, a pâban awh.

<sup>5</sup> Alouke san hah bout a patoun navah, a thei awh. Alouke sannaw bout a patoun navah, a tangawn a hem awh, a tangawn a thei awh. <sup>6</sup> Takha ka pahren e ni a capa buet touh ao rah dawkvah, ahnimouh ni ka capa teh a bari awh han doeh a titeh, a capa hah a hnukteng vah a patoun. <sup>7</sup> Hatei, takhakatawkkungnaw niyah, ahni heh râw ka coe hane doeh, tho awh, thet a sei. Hat pawiteh doeh ahnie râw hah maimouh ni coe ati, ati awh. <sup>8</sup> Hatdawkvah, takha katawnkung e capa hah a man awh, a thei awh teh, takha alawilah a tâkhawng awh.

<sup>9</sup> Hottelah boipawiteh, takhakatawnkung ni bangtelamaw ati han. Takhakatawkkungnaw hah kOUNG thet vaiteh, hote takha hah alouke takhakatawkkungnaw koe a poe han. <sup>10</sup> Im kasakung ni, a pahnawt e talung hah phukaawm pOUNG e takin lung lah bout ao. Hot hateh, Cathut ni doeh a sak. <sup>11</sup> Maimae mithmu hai kângairu hanlah ao tie hah CakathOUNG dawkw na touk boi awh hoeH maw atipouh. <sup>12</sup> Hahoi, vaihma bawinaw, Kâlawk kacangkhaihaw, tami kacuenaw ni hote bangnueHae teh maimouh doeh na dei ngai nah tie a panue awh toteh, Jisuh man nahanelah kho a pouk awh. Hatei, kamkhueng e tamihupui hah a taki awh dawkvah, haw hoi alouklah a kâkhoe awh.

*Cathut e hno Cathut poe awh*

*Mat 22:15-22; Luk 20:20-26*

<sup>13</sup> Hat hoiah, yon pen nahanelah, Farasinaw hoi Herod e a taminaw teh Jisuh koe a patoun awh. <sup>14</sup> Ahnimouh ni rek a hnai awh teh, Bawipa nang teh tamikalan lah na o. Apihai takinae na tawn hoeH. Tami e minhmai khien laipalah Cathut e lamthung lawkkatang hah na cangkhai e ka panue awh. Hatdawkvah, Sizar siangpahrang koe tamuk poe kawi maw. Poe kawi hoeH maw. Kaimouh ni ka poe awh han maw. Ka poe awh mahoeH maw telah a pacei awh.

<sup>15</sup> Bawipa ni ahnimae dумыennaeh hah a panue dawkvah, nangmouh ni bangkongmaw kai na tanouk awh. Hate tangka hah hi sin awh haw, ka khienhaw nei atipouh. <sup>16</sup> Ahnimouh ni a poe awh navah, apie min hoi mei maw ka kamnuek vaw telah a pacei navah, ahnimouh ni Sizar siangpahrang e min hoi mei doeh atipouh awh. <sup>17</sup> Jisuh ni Sizar siangpahrang e hno teh Sizar poe awh. Cathut e hno teh Cathut poe awh, atipouh e hah ahnimouh ni kângai lah a ru awh.

*Bout thaw toteh kalvannaw patetlah o han*

*Mat 22:23-33; Luk 20:27-38*

<sup>18</sup> Duenae koehoi boutthawnae awm hoeH ka tet e Sadusinaw ni Jisuh koe a tho awh teh, <sup>19</sup> Bawipa, tami buetbuet touh niyah ca tawn laipalah, a yu dout takhai pawiteh, a misa a thup hoeH nahanelah, a nawngha ni let awmkhai seh telah Mosi ni a thut. <sup>20</sup> A hmaunawngha sari touh ao awh. A camin ni hmaloe a yu lah a la teh, ca sak laipalah a due takhai. <sup>21</sup> A nawngha ni patuen a okhai teh ca sak laipalah bout a due takhai. Apâthum e ni hai bout a due takhai. <sup>22</sup> Hottelah, buet touh hnukkhu buet touh a due takhai awh teh, hmaunawngha sari touh ni ca sak a laipalah,



hote napui hah be a due takhai awh. A hnukteng vah hote napui hai a due van. <sup>23</sup> Boutthawnae tue a pha toteh, ahnimanaw hai bout a thaw awh toteh, hote napui hah apie yu lah maw ao han. Hmaunawnggha sari touh ni hote napui hah a yu lah a okhai awh toe telah a pacei awh. <sup>24</sup> Jisuh ni nangmouh teh Cakathoung na thai panuek awh hoe. Cathut bahu hai na panue awh hoe dawkvah, na tawm payon awh. <sup>25</sup> Duenae koehoi bout thaw toteh, yuvânae awm mahoe. Kâpaluennae, kâhânae awm mahoe. kalvan kho e kalvantaminaw patetlah o awh han atipouh. <sup>26</sup> Hothloilah, kadoutnaw boutthawnae dawkvah, Cathut ni kai teh Abraham e Cathut, Isak e Cathut, Jakop e Cathut lah ka o telah, hmai kang e buruk thung hoi Mosi koe a dei e hah Mosi e cauk daw. Kae daw na touk awh boi hoe maw. <sup>27</sup> Cathut teh kadoutnaw e Cathut na hoe. Kahringnaw e Cathut doeh. Hatdawkvah nangmouh teh, puenghoi na payon awh atipouh.

*Kalenpounge kâlawk kahni touh*

*Mat 22:34-40*

<sup>28</sup> Hottelah a kâoun awh e hah cakathutkung buet touh ni a thai teh, Jisuh ni kalan lah bout a dei e hah a hmu navah, ama koe rek a hnai teh, kâpoelawknaw thung daw bangpatet e kâlawk maw alawkpui poung lah kaawm telah a pacei. <sup>29</sup> Jisuh ni kâlawnaw thung daw apasuek e teh, Oe Isarelnaw thai awh haw, maimae Cathut dueng doeh Cathut lah kaawm. <sup>30</sup> Na Cathut teh na lungthin abuemlah, na muitha abuemlah, na pouknae abuemlah, na thaonae abuemlah hoi lungpataw, tie teh apasuekpoung e kâpoelawk lah ao. <sup>31</sup> Hothloilah, na imri hah nama patetlah lungpataw ati e apâhni e kâpoelawk teh apasuek hoi a kâvan. Het hlak kalen e kâpoelawk awm hoe telah bout atipouh.

<sup>32</sup> Kâlawk ka cangkhai e nihai, Bawipa na dei e teh lawkkatang doeh, ahawipoung. Cathut dueng doeh Cathut lah kaawm. <sup>33</sup> Hote Cathut hloilah alouke Cathut awm hoe. Hote Cathut hah lungthin abuemlah, thaipanueknae abuemlah, thaonae abuemlah, hahoi mahoima patetlah imri hah lungpatawnae teh hmaisawi thuengnae hoi thuengnae pueng hlak hai ahawi telah a dei. <sup>34</sup> Hottelah a lawk tho e hah Jisuh ni ahawi tie a panue toteh Cathut uknaeram hoi na hlat hoe telah atipouh. Hahoi, apinihai bout pacei ngam awh hoe toe.

*Messiah teh apie capa maw*

*Mat 22:41-46; Luk 20:41-44*

<sup>35</sup> Jisuh ni bawkim thung a cangkhai lahun navah, Messiah teh Devit e capa doeh telah bangkongmaw cakathutkungnaw ni ati a vaw. <sup>36</sup> Devit ni muitha lahoi a dei e teh, Cathut ni na tarannaw hah na khok rahim ka ta hoehroukrak kaie aranglah tahung haw telah ka Bawipa hanelah atipouh. <sup>37</sup> Devit ni Messiah hanelah Bawipa tet pouh pawiteh bangtelamaw Messiah teh Devit capa lah ao thai han vaw. Tami maya ni lunghawicalah hoi a dei e lawk hah rip a thai awh.

<sup>38</sup> Hottelah a cangkhai navah Jisuh ni cakathutkungnaw heh roun awh. Bangkongtetpawiteh, ahnimouh teh angkidung kho hoi kâhlai hane a ngai awh. Hnopai yonae hmuene koe tami pueng ni bari e hah a ngai awh.

<sup>39</sup> Sinakok vah tahungnae a rasangnae koe a ngai awh teh, pawu canae koe vah, bari kaawm e hmuene koe tahung a ngai awh. <sup>40</sup> Lahmai napuinaw e im hah a lawp awh teh, a yon kamnuek vaih titeh, ka saw poung lah a ratoum awh. Ahnimouh teh hoe kalen e yonphukhangnae a kâhmo awh han atipouh.



*Lahmainu e poenae**Luk 21:1-4*

<sup>41</sup> Hahoi Jisuh teh tangkabom koelah a kangvawi teh, a tahung navah taminaw ni tangka a pâseng awh e hah a khet. Ka tawnta e naw teh ka pap a pâseng awh. <sup>42</sup> Ka roedeng e lahmainu buet touh a tho teh, rahum tangka phek touh e kahni touh a pâseng van.

<sup>43</sup> Bawipa ni a hnukkâbangnaw hah a kaw teh, atangcalah na dei pouh awh. Tangka bom thung kapâsengnaw thung dawkvah, hote lahmainu ni hoe kapap a pâseng toe, atipouh. <sup>44</sup> Bangkongtetpawiteh, alouke pueng ni teh a tawn awh e thung dawk hoi a pâseng awh. Hatei, hote lahmainu teh a mathoe ei, a kâkawak nahane a tawn e pueng hah a pâseng toe, atipouh.

**13***A hnukteng e tue mitnoutnaw**Mat 24:1-25; Luk 21:5-36*

<sup>1</sup> Jisuh teh Bawkim thung hoi a tâco teh a kâhlai navah, a hnukkâbangnaw buet touh ni, Bawipa kalenpounge talung doeh khe, ka cak poung e im pui doeh khe atipouh navah, <sup>2</sup> Jisuh ni hete imnaw hah na hmu nahoehmaw. Talung buet touh van buet touh, a kâpacounghoeahnae tue ka phat han. Abuemlah kounge katim han atipouh.

<sup>3</sup> Bawkim hmalah kaawm e Olive Mon dawak Jisuh a tahung teh a radoung navah, Piter, Jem, Jawhan hoi Andru tinaw niyah, <sup>4</sup> hete heh nâtuék han maw, hete hno pueng a tho nahane tue ti panue nahanelah, mitnoutnaw teh bangmaw kaawm han ti teh arulahoi a pacei awh. <sup>5</sup> Jisuh ni, apinihai na dum awh hoe nahanelah kâhruetcué awh. <sup>6</sup> Tami kapap ni ka Min kâmahrawk awh vaiteh, kai doeh Khrih toe tet awh vaiteh, tami moikapap a dum awh han. <sup>7</sup> Taran kâtuknae kamthang, tarankâtuk hane kamthang na thai awh han. Na lungpuen awh hanh, Hottelah ao han. Hatei apoutnae phat hoe rah. <sup>8</sup> Miphun buet touh hoi buet touh, uknaeram buet touh hoi buet touh, a kâtaran awh han. Khoram tangkuem Tâli a no han. Takang a tho han. Puennae ao han. Hetnaw teh runae a kamtawngnae lah doeh ao.

*Rektap rucat khang hane sut a dei*

<sup>9</sup> Namamouh hoi namamouh kâhruetcué awh. Bangkongtetpawiteh, lawkengkungnaw koe na thak awh han. Sinakok vah na hem awh han. Kai kecu dawak khobawinaw hmalah hoi siangpahrangnaw hmalah lawkpanuesaknae lah na tâcokhai awh han. <sup>10</sup> Kamthang kahawi hah miphun pueng koe hmaloe pâpho lah ao han. <sup>11</sup> Khobawinaw koe na thak awh navah, bangtelamaw ka dei han aw, tie ka ngai awh hanh. Sut pouk awh hanh. Dei hanelah ka tâcawt e hah dei awh. Bangkongtetpawiteh nama ni na dei e na hoe. Kathoung Muitha ni na dei sak e doeh.

<sup>12</sup> Hatnae tueng dawkvah, hmaunawngna ni a hmaunawngna, a na pa ni a ca, canaw ni a manu napanaw hah taran awh vaiteh, due sak hanelah a pahnavt awh han. <sup>13</sup> Tami pueng ni kaie ka Min kecu dawak nangmanaw hah na hmuhma awh han. Apihai a pout totouh ka khang e tami teh, rungngang lah ao han.

*Runae kalenpoung*

<sup>14</sup> Profet Daniel ni a dei e patetlah panueththopounge karaphoekung, ao hoe nahane hmuen koe a kangdue e na hmu awh navah, Cakathoung



ka touk e ni teh thai panuek na lawiseh. Hote na hmawt pawiteh Judah ram kaawm e naw mon lah yawng awh naseh. <sup>15</sup> Lemphu kaawm e tami ni kum hanh lawi naseh, im thung e hno la hanelah kâen hanh lawi naseh. <sup>16</sup> Laikaw koe kaawm e ni hai amae khohna la hanelah hnuklah ban hanh naseh. <sup>17</sup> Hat hnin toteh, camo ka vawn e napuinaw hoi camosen kaawm e napuinaw teh a temdeng awh han. <sup>18</sup> Nangmouh ni na yawng nahane atueng teh, kasik tue hoi a kâvoe hoeh nahan, ratoum awh. <sup>19</sup> Bangkongtetpawiteh, Cathut ni talai a sak pasuek hoiyah atu sittouh kaawm boihoe hae, ato hmalah hai bout kaawm hoeh han e, runae teh hatnae tueng dawkvah ka phat han. <sup>20</sup> Hote a tue teh Cathut ni saw sak pawiteh apinihai khang thai mahoe h. A rawi tangcoung e taminaw hane kecu daw k Cathut ni atueng aduem sak han. <sup>21</sup> Hatnavah tami tami buetbuet touh ni hi doeh Khrih a o, haw doeh ao ka tet awh nakunghai, yuem awh hanh. <sup>22</sup> Bangkongtetpawiteh, khrih kaphawk hoi profetkaphawk teh tâcawt vaiteh, rawi tangcoung e taminaw pateng haiyah, dum thai pawiteh, dum thai totouh kângairu hnnonaw hah a sak awh han. <sup>23</sup> Nangmouh teh kâhructuet awh. Hete kongnaw teh sut na dei pouh toe.

### *Tami Capa bout a tho nahane*

<sup>24</sup> Hote runae hnukkuh vah, kanî teh kahmawt han, thapa hai ang mahoe h. <sup>25</sup> Kalvan âsinaw teh a bo awh han. Kalvannaw e bahunaw hai a kâhuat han. <sup>26</sup> Hatnavah, tami Capa teh, ka talue poung e bawilennae hoi tâmai a kâcui vaiteh, a kumcathuk e hmu awh han. <sup>27</sup> Hat toteh, tami Capa ni a kalvantaminaw hah patoun vaiteh, kanîtho, kanîloum, atung, aka kaawm e, a rawi tangcoung e taminaw hah a pâkhueng sak han.

### *Thaibunglung kung bangnuenae*

<sup>28</sup> Thaibunglung kung bangnuenae hah pâkuem awh. Thaibunglung kung teh a dawn a cawn, a hna a nâw toteh, kompawi a hnai toe tie na panue awh. <sup>29</sup> Hot patetlah hote hnnonaw a tâco toe tie na hmu awh toteh, tami Capa teh takhang koe totouh rek a pha toe tie panuek awh. <sup>30</sup> Atangcalah na dei pouh awh. Hete catounnaw be a due awh hoehnahlan hete hno pueng teh, ka tâcawt han. <sup>31</sup> Kalvan hoi talai teh a rawk han, hatei ka lawk teh a kangning han.

### *Hote atue teh apinihai panuek hoeh*

<sup>32</sup> Hote tueng teh, apa hloilah apinihai panuek hoeh. Kalvan kho e kalvantaminaw ni hai panuek hoeh. <sup>33</sup> Tami Capa ni hai panuek hoeh. Hote a tue teh nâtuék ne a pha han tie na panue awh hoeh dawkvah, kâhructuet awh nateh, ratoum laihoi ring awh. <sup>34</sup> Bangnuenae teh, tami buet touh ni alouke ram lah cei hane a pouk dawkvah, a im hah a cei takhai teh a sannaw koe kâtawnnae hah a poe. Thaw taw kawinaw taw k hanelah, thaw lengkaleng a poe teh, takhang ka ring e koe kâ a poe teh a ceitakhai. <sup>35</sup> Imkung teh tangmin na ou, karumsaning na ou, akhawng na ou, amom na ou a tho han tie na panue awh hoeh dawkvah ring awh. <sup>36</sup> Hottelah ring hoehpawiteh, Bawipa hmatara a tho toteh, kukkuk na i e hah Bawipa ni a hmu han. <sup>37</sup> Ring awh, telah nangmouh koe ka dei e patetlah tami pueng hane la hai ka dei telah a ti.



## 14

*Ceitakhai pawī sak nahane hmuen rakuengnae*

*Mat 26:2-16; Luk 22:1-6; Jhn 12:1-8*

<sup>1</sup> Hahoi hnin hni touh a loun hnukkhu, ceitakhai pawī hoi tonphuenhoehe pawī ao hanelah ao. Vaihma bawinaw hoi cakathutkungnaw niyah Jisuh hah huenghai hoi bangtelah ne dum vai teh thei han tie a lamthung hah a tawng awh. <sup>2</sup> Hateiteh, taminaw ruengrueng tet vaih ati awh dawkvah, pawī hnin nah teh duem tat ei sei a kâti awh.

*A lû dawḡ satui awinae*

<sup>3</sup> Bethani khovah, ka hrikbei e Simon im vah Jisuh teh caboi koe a tahung navah, napui buet touh ni aphu kaawm poung e hmuitui, talungpangaw bom dawḡ hoi e hah a sin. Talungpangaw bom hah rek a hem teh, Jisuh e a lû dawḡ a awi pouh. <sup>4</sup> Tami tangawn ni a lungkhuek awh teh bangkongmaw hote hmuitui hah ayawmyin lah a rabawḡ vaw, <sup>5</sup> Tangka cumthum touh lah yo vai teh karoedengnaw kabawḡ thai nahoehmaw ati awh teh hote napui hah a pathoe awh.

<sup>6</sup> Jisuh ni, Hote napui hah pathoe awh hanh. Ahni ni kai dawḡ hnokahawi a sak toe. <sup>7</sup> Karoedengnaw teh nangmouh koe doeh pou ao. Na ngai awh e patetlah na kabawḡ thai awh. Kai teh nangmouh koe pou kaawm mahoeḡ. <sup>8</sup> Hete napui ni ama tithai totouh hno a sak toe. Kaie ro pakawḡ lah ao han tinae lah hmuitui hoi ka tak hah sut a hluk toe. <sup>9</sup> Atangcalah na dei pouh awh. Talaivan kamthang kahawi deinae hmuen pueng koe hete napui pahnim hoeḡ nahanelah, ahni ni a sak e hete hno hah dei lah ao han.

<sup>10</sup> Hahoi a hnukkâbangnaw hlaikahni touh dawḡ e Judah Isakarot teh Jisuh pahnawḡ hanelah, vaihma bawinaw koe vah a cei. <sup>11</sup> Vaihma kacuenaw ni a thai awh navah, a lunghawi awh teh tangka na poe han atipouh awh. Hahoi teh a kâvoenae tueng dawḡ vah, bangtelah hoi maw Jisuh pahnawḡ thai han tie atueng hah a pawḡ awh.

*Ceitakhai pawī tangmin bu*

*Mat 25:7-30; Luk 22:7-23; 1 Kaw 11:23-25*

<sup>12</sup> Tonphuenhoehe vaiyei canae pawī apasuek hnin, ceitakhai pawī tuca theinae hnin navah, a hnukkâbangnaw ni Jisuh koe a tho awh teh, ceitakhai pawī canei nahane hmuen hah, nâ e hmuen koe maw rakueng sak hanelah na ngai telah a pacei awh. <sup>13</sup> Jisuh ni, a hnukkâbang kahni touh roi koe, kho thungvah cet roi nateh, hawvah tuum ka sin e tongpa buet touh hah na hmu roi han. <sup>14</sup> Ahnie a hnukkâbang roi teh, ka hnukkâbangnaw hoi cungtalah ceitakhai pawī ca nahane hmuen teh, na maw ao telah saya ni na pacei sak, tet pouh roi lah a. <sup>15</sup> Ahni ni imvan coungkacoe rakueng tangcoung e hmuen pui hah na patue han, hawvah mamouh hanelah coungkacoe rakueng awh lah a, telah atipouh.

<sup>16</sup> A hnukkâbang roi ni kho thung a cei roi teh, lawḡ a thui e patetlah a hmu roi. Hawvah ceitakhai pawiteh a rakueng roi. <sup>17</sup> Tangduem a pha toteh, a hnukkâbangnaw hlaikahni touh hoi Jisuh teh a tho roi. <sup>18</sup> Cungtalah reirei a ca a nei awh navah, Jisuh ni, atangcalah, na dei pouh awh. Kai hoi rei ka cat ka net e nangmouh thung dawḡ e buet touh ni kai teh na pahnawḡ han, atipouh.

<sup>19</sup> A hnukkâbangnaw teh a lungmathoe awh, buet touh hnukkhu buet touh 'Kai ni maw Bawipa, telah lengkaleng a pacei awh. <sup>20</sup> Jisuh ni, nangmouh hlaikahni touh thung dawḡ e kai hoi ailo dawḡ rei ka tapu



e ni kai teh na yo han. <sup>21</sup> Cakathoung ni a dei e teh, tami Capa teh a cei han. Hatei, tami Capa ka pahnawt e teh, a yawthoe. Ahni teh a manu e von thung hoi khe hoehpawiteh ahawihnawn telah a ti.

<sup>22</sup> Hottelah a ca awh lahun nah, Jisuh ni vaiyei hah a la teh lunghawi lawk a dei hnukkhu, vaiyei hah a raen teh, hete vaiyei teh kaie ka tak doeh. Lat nateh cat awh, ati teh a hnukkâbangnaw hah a rei. <sup>23</sup> Manang hai a la teh lunghawi lawk a dei hnukkhu, ahnimanaw hah a rei teh ahnimouh ni a nei awh. <sup>24</sup> Jisuh ni hete manang teh lawkkam katha hoi kâkuen e taminaw hanelah ka rabawk e ka thi doeh. <sup>25</sup> Atangcalah na dei pouh awh. Hete misurtui patet e a katha e hah, Cathut uknaeram dawk bout ka nei hoehroukrak atu hoi bout ka net mahoehtoe atipouh. <sup>26</sup> Hathnukkhu la a sak awh teh, Olive Mon lah a cei awh.

*Piter ni a kâpapha*

*Mat 26:47-56; Luk 22:47-50*

<sup>27</sup> Hat toteh, Jisuh ni, Cakathoung dawk a thut e teh, tukhoumkung hah ka thei vaiteh, tunaw teh a kampek awh han telah thut tangcoun e patetlah sahnin tangmin vah nangmouh pueng teh kai kecu dawk na lung ka pout awh han. <sup>28</sup> Hatei, kai teh bout ka thaw han. Nangmae hmalah Galilee ram lah ka cet han, atipouh. <sup>29</sup> Piter ni, hetnaw pueng ni a lung ka pout awh nakunghai kai teh ka lungpout mahoehtoe a ti.

<sup>30</sup> Jisuh ni, atangcalah na dei pouh. Sahnin tangmin vah ahlui vai hni touh a khawng hoehnahlan vai thum touh kai na pahnawt han atipouh.

<sup>31</sup> Piter ni Bawipa, nang hoi reirei due hanelah kaawm nakunghai na pahnawt mahoehtoe bout ati. Hat toteh, alouknaw pueng ni hai hottelah rip ati awh.

*Gethsemani takha thung ratoumnae*

*Mat 26:36-46; Luk 22:40-46*

<sup>32</sup> Hatnavah, Gethsemani takha koe a pha awh toteh, Jisuh ni ka ratoum navah hie hmuene koe la tahung awh telah a hnukkâbangnaw koe atipouh.

<sup>33</sup> Piter, Jem, Jawhan tinaw hah a hrawi. Kângairu lungpuen hoi ao dawkvah, <sup>34</sup> due han totouh ka lungreithai poung ati teh, hi e hmuene koe la awm awh nateh na ring awh lah a atipouh.

<sup>35</sup> Haw hoi hrawt a cei teh, talai dawk a tabo teh, Apa Apa nang teh bangpueng na coun sak thai. <sup>36</sup> Hete manang dawk hoi na hlout sak thai pawiteh na hlout sak haw. Hateiteh, kai ka ngainae patetlah tho hanh seh. Nama ngainae patetlah thoseh, titeh hote atueng hah hlout thai pawiteh, hlout thai nahanlah a ratoum.

<sup>37</sup> Hahoi bout a tho teh a hnukkâbangnaw teh a i lahun awh. Hottelah a i awh lahun e hah a hmu navah, Piter yout na i maw. Suimilam buet touh boehai na ring thai hoehtoe maw. <sup>38</sup> Tacueknae dawk na kâen awh hoehtoe nahanlah ratoum hoi ring awh. Muitha ni teh a ngai ei, takthai ni khang thai hoehtoe, atipouh.

<sup>39</sup> Hahoi, bout a cei teh ahmaloe a ratoum e patetlah bout a ratoum.

<sup>40</sup> Hahoi a hnukkâbangnaw onae koe bout a ban teh ihmu a tho awh dawkvah, bout a i awh lahun e hah a hmu. Bangtelamaw dei han toung ti hai panuek awh hoehtoe. <sup>41</sup> Apâthum e lah ahnimouh onae koe bout a ban navah, atu sittouh na i awh rah maw, atu sittouh na kâhat awh rah maw, yit touh ma lawih. Atueng a pha toe. Khenhaw! tami Capa teh tami kayonnaw e kut dawk pahnawt nahane tueng a pha toe. <sup>42</sup> Thaw awh leih, cet awh leih sei. Kai na ka pahnawt hane tami a tho toe, atipouh.



*Jisuh a man awh**Mat 26:47-56; Luk 22:47-50*

<sup>43</sup> Hottelah a dei lahun nah, a hnukkâbangnaw hlaikahni touh thung dawk e Judah Isakarot hoi vaihma bawinaw, cakathutkungnaw, tami kacuenaw ni a patoun e tamimaya teh sarusarai patuep laihoi a tho awh. <sup>44</sup> Jisuh ka yawt hane tami ni, kai ni ka paco e teh Jisuh doeh toe, telah mitnout a poe e patetlah, <sup>45</sup> Judah Isakarot teh Jisuh koe rek a hnai teh, saya, saya, titeh a paco <sup>46</sup> Hatnavah ahnimanaw a tho awh teh Jisuh hah a man awh. <sup>47</sup> Ateng kangdout e tami buet touh ni sarai a rasa teh vaihma kacue e a san e hnâ thouk a bouk pouh. <sup>48</sup> Jisuh ni kai na man hanelah maw dingca man hane patetlah sarusarai hoi khuet na tho a vaw atipouh. <sup>49</sup> Hnintangkuem bawkim thung nangmouh rahak na cangkhai awh navah, louk na man awh hoevaw. <sup>50</sup> Hottelah Cakathoung a kuep nahane doeh telah haw e hmuen koe kaawm e taminaw koe a dei pouh. <sup>51</sup> Hattoteh a hnukkâbangnaw ni Bawipa teh phang a yawng takhai awh. Hni yung touh dueng kâkhu hoi a hnukkâbangnaw e thoundounca hai a yawng van. <sup>52</sup> Ahni hah a man awh ei, hni vu a tâkhawng teh caici laihoi poe a yawng.

*Jisuh yon pen thai awh hoev**Mat 26:57-68; Luk 22:67-71; Jhn 18:12,13,19-24*

<sup>53</sup> Ahnimouh ni Jisuh hah vaihma kacue koe a ceikhai awh. Hote bawi koevah vaihma bawinaw, tami kacuenaw, cakathutkungnaw teh a kamkhueng awh. <sup>54</sup> Piter hai vaihma kacue e toeim totouh Jisuh hoi kâhlat laihoi a kâbang van teh, ramvengnaw hoi hmai rei a kamben awh.

<sup>55</sup> Vaihma bawinaw hoi sanhedrin lawkceng bawinaw ni Jisuh thei nahanelah kapanuekkhaikung a tawng a ei hmawt awh hoev. <sup>56</sup> Taminaw niyah laithoe e a kampangkhai awh ei, ahnimae kampangkhaiae teh kânging awh hoev. <sup>57</sup> Tami tangawn ni a kangdue teh hete tami ni kut hoi sak e bawkim hah ka raphoe vaiteh, <sup>58</sup> tami ni a sak hoev e alouke bout ka sak han telah a dei e hah ka thai telah laithoe a kampangkhai awh. <sup>59</sup> Hateh ahnimae kampangkhaiae teh kânging hoev.

<sup>60</sup> Vaihma kacue ni a lungui a kangdue teh, kam touh hai na pathung mahoev maw. Hetnaw ni bangtelamaw a kampangkhai telah Jisuh hah a pacei. <sup>61</sup> Jisuh ni kam touh boehai pathung laipalah, lawkkamuem lah ao. Vaihma kacue ni nang teh ka lentoe poung e Cathut Capa Messiah maw telah bout a pacei. <sup>62</sup> Jisuh ni, oe bokheiyah, a to hmalah tami Capa teh bahu kut aranglah a tahung teh, kalvan e tâmainaw dawk hoi a kumcathuk e hah na hmu awh han, atipouh.

<sup>63</sup> Hattoteh vaihma kacue ni a angki hah a phi teh bang patet e kapanuekkhaikung maw a panki rah, <sup>64</sup> Cathut pacekpahleknaw lawk hah na thai awh toe. Bangtelamaw na pouk awh atipouh navah, Jisuh teh thei hanlah a kamcu telah tamihupui ni ati awh. <sup>65</sup> Hattoteh tami tangawn ni Bawipa hah tamtui hoi a tamthawi awh. A minhmai a huem pouh awh teh, a kut hoi a thaw awh. Profet laihoi pâpho haw atipouh awh. Ramvengnaw ni a ceikhai awh teh a tambei awh.

*Piter ni Jisuh a pahnawt**Mat 26:64-75; Luk 22:56-62; Jhn 18:16-18,25-27.*

<sup>66</sup> Piter teh toeim thongma vah ao navah, vaihma kacue e a san napuinaw ni, <sup>67</sup> Piter hmai a kamben e a hmu nah kheh a khet teh, nang haiyah Nazareth tami Jisuh e a vaica doeh, ati pouh navah, <sup>68</sup> Piter ni



na dei e hah ka panuek hoeh, ka thaipanuek hoeh titeh a kâpapha teh imhmalah a tâco. Hatnavah ahlui a khawng. <sup>69</sup> Hahoi a vaica napui buet touh ni Piter hah lawt a hmu teh ateng e kangdout e naw koevah ahni heh ahnimanaw e a vaica doeh bout atipouh navah, Piter ni bout a kâpapha.

<sup>70</sup> Hat hoiyah, na sittouh ao hoehnahlan tami buet touh ni nang hah, ahnimaie vaica doeh nang teh, Galilee tami doeh. Na lawk hai rei a kâvan bout atipouh navah, <sup>71</sup> Piter ni na dei e tami hah ka panuek hoeh telah thoe a kâbo teh, <sup>72</sup> Hatnah tahma vah ahlui apâhni bout a khawng. Jisuh ni ahlui vai hni touh a khawng hoehnahlan vai thum touh na pahnawt han tie lawk hah Piter ni hlawt a pouk dawkvah, hni muen a kâramuk teh a khuika.

## 15

*Pailat bawi koe Jisuh a thak aw*

*Mat 27:11-26; Luk 23:2,3,18-25; Jhn 18:29; 19:16*

<sup>1</sup> Amom torei teh vaihma bawinaw, tami kacuenaw, cakathutkungnaw, sanhedrin lawkceng bawinaw hoi karang poung lah a kapan aw hah, Jisuh hah a katek aw hah a hrawi aw hah, Pailat bawi koe a poe aw. <sup>2</sup> Pailat bawi ni, nang teh Judah siangpahrang katang maw telah a pacei nah Jisuh ni, na pacei e patetlah bokheiyah, atipouh.

<sup>3</sup> Vaihma bawinaw ni yon moi a pen aw. <sup>4</sup> Pailat bawi ni, kam touh boehai na pathung hoeh na maw. Hettelah e kapanuekkhainaw heh khenhaw! atipouh nakunghai, <sup>5</sup> kam touh boehai pathung laipalah ao e hah Pailat bawi ni a kângairu.

<sup>6</sup> Hote paw i nah taminaw ni a hei aw e patetlah khobawi ni thongkabawtnaw thung daw e buetbuet touh meng tha pouh e lah ao. <sup>7</sup> Hatnavah, dingca Barabas teh alouke tami kahawihoehnaw hoi, thong reirei a bo aw. <sup>8</sup> Taminaw niyah buetbuet touh tha mingming hanelah, a hramki aw toteh, <sup>9</sup> Pailat bawi ni, Judah siangpahrang hah tha sak hanelah na ngai a maw, atipouh. <sup>10</sup> Bangkongmaw hottelah a pacei tetpawiteh, vaihma bawinaw ni Jisuh utnae lung hoi a thak aw, tie hah a panue daw doeh. <sup>11</sup> Pailat bawi ni Jisuh tha laipalah Barabas tha sak nahanelah, vaihma bawinaw ni tamihupui hah a hroecoe aw.

<sup>12</sup> Pailat bawi ni, Judah siangpahrang telah nangmouh ni na dei aw e hah bangtelamaw ti han, telah bout a pacei navah, <sup>13</sup> kamkhueng e taminaw pueng niyah, ahni hah thingpalam daw het, telah a hram aw. <sup>14</sup> Pailat ni, bangkongmaw, bang e yon maw a sak vaw telah bout a pacei nah hotnaw pueng niyah, thingpalam daw het, telah hoehoe a hram aw. <sup>15</sup> Pailat bawi ni ahnimouh a lungroum aw nahanelah, Barabas hah a tha pouh teh, Jisuh hah a hem teh, thingpalam daw thei sak hanlah a poe.

*Ransanaw ni Jisuh a pacekpahlek aw*

*Mat 27:27-31*

<sup>16</sup> Hat toteh, ransabawi niyah Jisuh hah toeim thung vah, a ceikhai teh, ransanaw koung a kamkhueng sak teh, Jisuh hah hni paling a kâkhu sak aw. <sup>17</sup> Pâkhinglukhung a kâmuk sak aw. <sup>18</sup> Judah siangpahrang, yawhawinae awmseh, telah yawhawinae lawk a dei pouh aw. <sup>19</sup> A lû daw bongpai hoi a hem aw. A tamthawi aw. A hmalah a khokcuengkhuem aw teh, a tabut sin aw. <sup>20</sup> Hettelah a pacekpahlek aw hnukkhu, a hni paling hah bout a paw i pouh aw hnukkhu, amae



khohna hah bout a khohna sak awh teh, thingpalam dawk thei hanelah a ceikhai awh.

*Thingpalam dawk Jisuh a pathout awh*

*Mat 27:33-44; Luk 23:33-43*

<sup>21</sup> Alexander hoi Rufus e napa, Sairen tami Simon kahlong ka cet e hah a hmu awh navah, a man awh teh, thingpalam a hrawm sak awh. <sup>22</sup> Luhru hmuen tie Golgotha hmuen koe Jisuh hah a hrawi awh teh, <sup>23</sup> Murah hoi kalawt e misurtui hah nei sak hanelah a poe awh ei, net ngai hoe. <sup>24</sup> Thingpalam dawk a het awh hnukkhu angki hah cungpam a rayu awh teh, a kâravei awh. <sup>25</sup> Hottelah thingpalam dawk a pathout awh nah, amom suimilam tako doeh nueng ka phat. <sup>26</sup> Ahni yonpennae teh, JUDAH SIANGPAHRANG, telah a lû lathueng a thut awh.

<sup>27</sup> Jisuh hoi cungtalah dingca kahni touh roi teh, aranglah buet touh, avoilah buet touh thingpalam dawk rei a pathout awh. <sup>28</sup> Hatnavah Cakathoung ni a dei e, ahni teh tamikayonnaw hoi mektouk sin lah a o, tie hah a kuep. <sup>29</sup> Lam dawk ka cet kaawm e taminaw nihaiyah, hei, bawkim ka raphoe vaiteh hnin thum touh hoi ka cum han ka tet e, <sup>30</sup> namahoima kârungngang haw, thingpalam dawk hoi kum haw, telah a lû a kahek awh teh, pacekpahleknæ lawknaw hah a dei awh. <sup>31</sup> Hot patetvanlah, vaihma bawinaw, cakathutkungnaw nihaiyah, hete tami ni ayânaw teh a rungngang thai ei, amahoima teh kârungngang thai hoe. <sup>32</sup> Kaimouh ni ka hmu awh vaiteh, ka yuem awh nahan, Isarel siangpahrang, Messiah teh thingpalam dawk hoi atu roeroe kum na ei seh, telah a panuikhai awh. Bawipa hoi thingpalam dawk rei hete ni hai a pacekpahlek van.

*Jisuh a thouknae*

*Mat 27:45-56; Luk 23:44-49*

<sup>33</sup> Kanî tuengtalueng a thun hoi tangmin lahsa suimilam kathum totouh, thung talai van abuemlah kho king a hmo. <sup>34</sup> Tangmin lahsa suimilam kathum navah Jisuh ni, Eloï Eloï Lama sabakhthani, telah puenghoi a hram. A deinginae teh, ka Cathut ka Cathut bangkongmaw kai na ceitakhai tinae doeh.

<sup>35</sup> A teng vah, kangdout e tami tangawn ni a thai awh navah, Elijah doeh a kaw ati awh. <sup>36</sup> Tami buet touh ni a yawng teh, napon hah misurtui kathut dawk, a ranup teh, cakui dawk a mawp teh, Jisuh nei sak han lah, a pahni dawk a tuh pouh teh, awm nah nei, thingpalam dawk hoi kum sak hanelah, Elijah a kum hoi a kum hoe e khenhaw sei ati awh. <sup>37</sup> Jisuh teh kacaipounglah a hram teh, a thouk. <sup>38</sup> Hatnavah, bawkim e lukkarei yaphni a som hoi khok koe totouh a kâphi. <sup>39</sup> Hottelah a thouk e hah a hmahal kangdout e ransabawi buet touh ni a hmu nah, hete tami teh Cathut e Capa katang doeh, telah a ti.

<sup>40</sup> Napuinaw ni hai ahlanae koe a kangdue awh teh a khet awh. <sup>41</sup> Hote napuinaw teh, Jisuh Galilee ram ao nah, ka khenyawn e Salome, Meri Magdalin, Jem kanawhnawn e hoi Joseph e manu Meri tinaw hoi Jerusalem totouh Jisuh hnuk kâbang e alouke napuinaw hah doeh.

*Jisuh a pakawp awh*

*Mat 27:57-61; Luk 23:50-56; Jhn 19:38-42*

<sup>42</sup> Atangtho teh sabbath hnin lah ao toung dawkvah, tangmin lah a pha toteh, <sup>43</sup> Cathut uknaeram ka ngaihawi e lah kaawm e, bari kaawm e lawkceng bawi Arimathea tami Joseph ni, taranhawi lahoi, Pailat bawi koe



a cei teh, Jisuh e a ro hah a hei. <sup>44</sup> Pailat bawi ni, Jisuh tang a due e hah a panue nah, a kângairu dawkvah, ransabawi buet touh a kaw teh, a duenae a saw toung maw, telah a pacei. <sup>45</sup> Ransabawi ni, a due toe, atipouh e a thai dawkvah, Jisuh ro hah la hanelah kê a poe. <sup>46</sup> Hatdawkvah, Joseph ni ro hah a rasu teh, ama ni a ran e lukkarei hoi a kayo teh, talung tangkom daw k a thak teh, lungphenpui hoi tangkom takhang hah a teng. <sup>47</sup> Meri Magdalin, Joseph manu Meri tinaw ni ro pakawpnae hmuen hah a khet awh.

## 16

### *Jisuh duenae koehoi boutthawnae*

*Mat 28:1-8; Luk 24:1-10*

<sup>1</sup> Sabbath hnin abaw hoi Meri Magdalin, Jem manu Meri hoi Salome tinaw teh, Jisuh ro hluk nahanelah hmuítui a ran awh. <sup>2</sup> Hnin sari touh daw k apasuek hnin, amom kanî a tâco navah, ahnimouh teh tangkom koe a cei awh. <sup>3</sup> Ahnimouh ni, tangkom takhang tengnae lungphen pui hah apini mouh na paawng pouh han vaiyoe, titeh buet touh hoi buet touh a kâpan awh navah, a khet awh teh, tangkom kamawng tangcoung e hah a hmu awh.

<sup>4</sup> Hote lungphenpui teh hroung a len. <sup>5</sup> Napuinaw ni tangkom thung a kâen awh navah, thoundoun buet touh teh ka pangawpekyek e angkidung a kho teh, aranglah ka tahung e a hmu awh navah, a taki awh teh a kalue awh.

<sup>6</sup> Ahni ni na kângairu awh hanh. Thingpalam daw k a thei awh e Nazareth tami Jisuh hah nangmouh ni na tawng awh. Ahni teh bout a thaw toe. Hi awm hoeh toe. A ro tanae hmuen hah khien haw hei. <sup>7</sup> Nangmae hmalah, Galilee ram lah a cei e hah Piter hoi a hnukkâbangnaw koe dei pouh awh. A dei tangcoung patetlah hote ram daw k nangmouh ni Bawipa teh na hmu awh han atipouh. <sup>8</sup> Hote napuinaw teh tangkom thung hoi a tâco awh teh, pâyaw kângairu laihoi a yawng awh. A taki awh daw k ayânaw koe a pâpha awh.

### *A thaw hnukkhu Jisuh kamnuenae*

<sup>9</sup> Bawipa teh hnin sari touh daw k apasuek hnin amom a thaw hnukkhu, kahraituilinaw sari touh a pâlei pouh e Meri Magdalin koe a mei hmaloe a kâpatue. <sup>10</sup> Meri ni hai a cei teh, Bawipa e a taminaw khuika laihoi ao awhnae koe hete kamthang hah a dei pouh. <sup>11</sup> Jisuh teh a hring lah ka hmu toe tie hah ahnimouh koe a dei pouh ei yuem awh hoeh.

<sup>12</sup> Hathnukkhu, a hnukkâbangnaw kahni touh roi teh khote lah a cei roi lahun nah, ahnimouh roi koe meilam phunlouk lahoi Jisuh ni a kamnue pouh. <sup>13</sup> Ahnimouh roi teh, let a ban roi teh, hote kamthang hah alouke a hnukkâbangnaw koe a dei pouh roi ei, ahnimouh ni yuem awh hoeh.

### *Patounnae kalenpoung*

<sup>14</sup> Hathnukkhu a hnukkâbangnaw hlaibun touh teh, rawca a ca awh lahun navah, ahnimouh koe Jisuh ni a kamnue pouh. Bout ka thaw e Jisuh hah ka hmu awh toe telah a dei awh e lawk hah a yuem awh hoeh dawkvah, ahnimae a yuemhoehnae hoi a lung a patanae hah a yue. <sup>15</sup> Nangmouh ni talaivan pueng cet awh nateh, hnosak puengpa koevah kamthang kahawi hah dei awh. <sup>16</sup> Apipatethai ka yuem ni teh baptisma ka coe e tami teh rungngang lah ao han. Ka yuem hoeh e tami teh lawkcengnae koe a pha han. <sup>17</sup> Kayuemnaw koe kamnuek hane kângairu



hnonaw teh, ka min lahoi kahraituulinaw a pâlei awh han. Lawk kathanaw a pan awh han. <sup>18</sup> Tahrunnaw hah a kut hoi a man awh han. Asue ka net awh nakunghai banglah awm mahoe. Kapatawnaw e tak daw k kut a toung awh toteh a dam awh han, telah a ti.

*Kalvan luennae*

<sup>19</sup> Hottelah Jisuh ni lawk be a thui hnukkhu, kalvan lah a luen teh, Cathut e aranglah a tahung. <sup>20</sup> A hnukkâbangnaw ni kho tangkuem a cei awh teh, kamthang kahawi hah a pâpho awh. Cathut ni ahnimouh daw k hoi thaw a taw k teh, kângairu hno a sak awh e lahoi, a pâpho awh e hah lawk katang doeh tie a caksak awh. Amen.



## LUK (The Gospel According to Luke)

*Lawk karouknae*

*Gun 1:1*

<sup>1</sup> Ka talue poung e Theophilus, maimouh dawk kamnuek tangcoung e a konglamnaw hah, <sup>2</sup> apuengcue hoi kahmawt ni teh kapanuekkhainaw hoi lawk dawk thaw katawnaw ni maimouh koe a dei tangcoung e patetlah tami moikapap ni ca lahoi thut hanelah a panki awh. <sup>3</sup> Kai ni hai apuengcue hoi ka kamtu e a konglamnaw pueng teh atang katang tie na panue thai nahanelah, <sup>4</sup> hote konglamnaw teh nang koe pou hruek hane kawī lah ao telah ka pouk.

*Jawhan khe nahane sut deinae*

<sup>5</sup> Judah ram ka uk e Herod Siangpahrang kut rahim vah Abijah tie vaihma miphun dawk hoi e vaihma Zekhariah teh ao. Ahnie a yu teh Aron e catoun, a min teh Elizabeth, <sup>6</sup> ahnimouh roi teh kâpoelawknaw pueng a tarawi roi, tounhoehe lah ao teh, Cathut hmalah tamikalan lah ao roi. <sup>7</sup> Elizabeth teh carôe dawkvah ahnimouh roi teh ca tawn roi hoeh. A kum haiyah a cue poung roi toe.

<sup>8</sup> Hatnavah, Zekhariah teh amae a huinaw hoi cungtalah atueng a pha toung dawkvah, Cathut hmalah vaihma thaw a tawk lahun nah, <sup>9</sup> vaihmanaw e singyoe patetlah cungpam a khoe. Cathut e bawkim thung a kâen teh hmuitui hmai sawinae a sak. <sup>10</sup> Hottelah Cathut koe a sak lahun navah taminaw pueng teh alawilah a ratoum awh.

<sup>11</sup> Hatnavah Cathut e kalvantami teh Zekhariah hmalah a kamnue teh hmuitui hmaisawi thuengnae aranglah a kangdue. <sup>12</sup> Zekhariah ni a hmu navah a kalue teh a taki. <sup>13</sup> Kalvantami ni Zekhariah taket hanh, nange ratoumnae teh Cathut ni a thai toe. Na yu Elizabeth teh ca tongpa a khe han, a min teh Jawhan telah na phung han. <sup>14</sup> Nang teh na konawm vaiteh na lunghawi han, hote ca tongpa na khe kecu dawk taminaw pueng hai a konawm awh han. <sup>15</sup> Bangkongtetpawiteh, ahni teh Cathut hmalah ka talue e tami lah ao han. Misurtui hoi parui kawinaw pueng net mahoe. A manu e von thung ao nahoi Kathoung Muitha hoi akawi han. <sup>16</sup> Ahni ni Isarel catounnaw moikapap Cathut koe lah a kamlang sak han. <sup>17</sup> Ahni teh Cathut ni a tha e laiceī lah ao vaiteh Profet Elijah patetlah muitha hnotithainae hoi kakawi e tami lah ao han. A napanaw hoi a capanaw kâpo sak vaiteh lawk ka ngai hoeh e taminaw hah tami kalannaw e lungangnae lam koe lah bout a hrawi han. Cathut e taminaw teh Bawipa hanelah coungkacoe lah ao thai nahan kâraueng awh telah a dei. <sup>18</sup> Zekhariah ni kalvantami koevah hote hno a coung thai han doeh telah bangtelah hoi maw ka panue thai han. Bangkongtetpawiteh, kai teh, ka matawng toe, ka yu hai a matawng toe telah atipouh. <sup>19</sup> Kalvantami ni kai teh Gabriel doeh, hete lunghawinae kamthang nang koe dei hanelah, na ka patoun e Cathut hmalah ka kangdout e doeh. <sup>20</sup> Nang teh kaie lawk na tang hoeh dawkvah hete hno a kuep hoehnahlan totouh lawk dei thai laipalah, na lawk a a han. Kaie ka lawk teh atueng a pha toteh a kuep han telah a dei pouh.



<sup>21</sup> Taminaw ni Zekhariah teh ngaihawi laihoi a ring aw hawh teh bangkong-maw bawkim thung atu sittouh a o vaw titeh a kângairukhai aw h. <sup>22</sup> Ahni teh bawkim thung hoi a tâco navah lawk a dei thai hoe h dawkvah, kamnuenae a hmu telah a panue aw h. Zekhariah teh a lawk a a dawkvah a kut khok hoi ahnimanaw koe a yavai pouh

<sup>23</sup> Vaihma thaw a taw k e atueng abaw hnukkhu Zekhariah teh im lah a ban. <sup>24</sup> Hathnukkhu hoi a yu Elizabeth teh camo a neng dawkvah thapa yung panga touh imthungkhu a kamung. <sup>25</sup> Cathut ni taminaw e hmalah kaie yeiraiponae pueng na la pouh toe a ti.

<sup>26</sup> Thapa yung taruk navah Cathut ni kalvantami Gabriel koe, Galilee ram Nazareth kho daw k kaawm e tangla koe a patoun. <sup>27</sup> Hote tangla teh Devit miphun a min Joseph ka kâphung e tami hoi kâhâ tangcoung e lah ao. A min teh Meri doeh. <sup>28</sup> Kalvantami ni Meri koe a tho teh na konawm haw, yawhawinae ka coe e napui nang teh Cathut ni na okhai telah atipouh.

<sup>29</sup> Meri ni hote lawk a thai navah a lungtâsue teh hote lawk teh bangpatet e lawk maw ati teh a kâpouk. <sup>30</sup> Kalvantami ni hai Meri na lungpuen hanh. Nang teh Cathut koe minhmai kahawi na hmu toe. <sup>31</sup> Nang teh camo na neng vaiteh ca tongpa na khe han, a min teh Jisuh telah na phung han. <sup>32</sup> Hote capa teh ka lentoe poung e tami lah ao vaiteh Lathueng Poung e Capa telah kaw lah ao han. Cathut ni ahni teh a na pa Devit e bawitungkhung a poe han. <sup>33</sup> Ahni ni Jakop catounnaw hah pout laipalah a uk han. Ahnie uknaeram teh poutnae awm mahoe h telah atipouh. <sup>34</sup> Meri ni kai teh tongpa hoi kâ panuena e awmhoeh rah, hete hno heh kai koe bangtelamaw a coung thai han telah kalvantami hah a pacei. <sup>35</sup> Kalvantami ni Kathoung Muitha nang daw k a pha toteh Lathueng Poung e bahu nang daw k ao han. Hatdawkvah khe lah kaawm e kathoung camo hah Cathut capa telah kaw lah ao han. <sup>36</sup> Hothloilah cakaroe telah kaw e nange na hui Elizabeth teh camo a nengnae thapa yung taruk touh a pha toe. <sup>37</sup> Cathut hanelah ka coung thai hoe h e hno buet touh hai awm hoe h telah bout a dei pouh. <sup>38</sup> Meri ni kai teh Cathut e a sannu doeh, Bawipa e lawk patetlah kai daw k kuep lawiseh telah a dei pouh hnukkhu kalvantami ni a ceitakhai .

### *Meri Elizabeth koe a pai*

<sup>39</sup> Hathnukkhu Meri ni, Judah ram mon daw k kaawm e kho buet touh daw k karanglah a cei hnukkhu, <sup>40</sup> Zekhariah im daw k a kâen teh Elizabeth a pato. <sup>41</sup> Meri ni a patonae lawk Elizabeth ni a thai navah a von thung e camo teh a kâroe. Elizabeth teh Kathoung Muitha hoi akawi teh, <sup>42</sup> nang teh napuinaw pueng hlak yawkahawipoung e lah na o. Nange na von thung kaawm e camo hai a yawkahawi e tami doeh. <sup>43</sup> Ka Bawipa e a manu ni kai koe a pha navah yawhawinae bangkongmaw kai ni ka coe. <sup>44</sup> Nange na lawk kai ni ka thai navah kaie ka von thung e camo teh a lunghawi teh a coukdouk. <sup>45</sup> Bawipa ni a dei e lawk a kuep mingming han doeh telah ka yuem e napui teh a yawkahawi e doeh telah a hram laihoi a dei.

### *Meri ni a pholen*

#### *Isa 2:1-10*

<sup>46</sup> Meri nihai, ka lungthin ni Cathut a pholen teh, <sup>47</sup> ka muitha ni ka rungngangkung Cathut daw k a lunghawi. <sup>48</sup> Bangkongtetpawiteh, amamae a sannu a kârahnoumnae na hmu pouh toe. Atu hoi hmalah ka tho hane a tami pueng ni a yawkahawi e tami telah na dei aw h han. <sup>49</sup> Athaonae



hoi kakawi e Cathut ni hno kalen kai hanlah na sak pouh toe. A min teh thoung raw naseh. <sup>50</sup> Cathut ka taket e taminaw teh Bawipa e pahrennae ahnimouh dawk pou a kangning. <sup>51</sup> A kut hoi a nhotithainae teh a kamnue sak toe. Kâoupkâpawi e taminaw teh koung kathek kayak awh toe. <sup>52</sup> Bawitungkhungnaw dawk hoi khobawinaw a pabo teh, ka kârahnnoum e taminaw a tawmdawm toe. <sup>53</sup> A von kahlamnaw ka boum ca lah a paca vaiteh, katangrengnaw a kuthrawng lah a ban sak toe. <sup>54</sup> Maimae mintoenaw ni a dei e patetlah, <sup>55</sup> Abraham koehoi a catounnaw koe pahrennae pou a sak hanelah a pouk teh, amae san Isarelnaw a tawmdawm toe telah atipouh. <sup>56</sup> Meri teh Elizabeth koe thapa yung thum touh ao hnukkhu a ma im bout a ban.

### *Baptisma Jawhan khenae*

<sup>57</sup> Elizabeth teh a khenae hnin thapa a kuep navah ca tongpa teh a khe. <sup>58</sup> Cathut ni ka taluepoung e pahrennae Elizabeth koe a kamnue sak e hah imteng e a huikonaw ni a thai navah, ahni hoi cungtalah a konawm awh. <sup>59</sup> Ataroe hnin vah, camo e vuensoma hanelah, a tho awh teh, a na pa e a min Zekhariah patetlah phung hane a kâdei awh. <sup>60</sup> A manu ni telah na phung mahoe, Jawhan telah na phung han atipouh. <sup>61</sup> Ahnimouh ni hai, nangmae miphun dawk telah min phung e tami buet touh hai awmhoe rah atipouh awh. <sup>62</sup> Hathnukkhu, a na pa ni bangtelamaw phung han a ngai telah a pacei awh. <sup>63</sup> A na pa ni hai calung a hei teh Jawhan telah a min a thut navah, taminaw pueng ni kângai a ru awh. <sup>64</sup> Telah a thut tahma vah Zekhariah teh lawk bout a dei thai teh Cathut a pholen. <sup>65</sup> Imteng kaawmnaw pueng ni a taki awh teh, hete a konglamnaw pueng teh Judah ram pueng koe koung a kamthang. <sup>66</sup> Ka thai e naw pueng ni a lung thung a pâkuem awh teh, hete camo teh bangpatet e tami lah maw ao han titeh a kâpankhai awh. Bangkongtetpawiteh Bawipa e nhotithainae teh camo hoi cungtalah ao.

### *Zekhariah profet lawk deinae*

<sup>67</sup> Camo e a na pa Zekhariah teh, Kathoung Muitha hoi akawi teh profet lawk a dei, <sup>68</sup> Isarelnaw e kahring Cathut teh yawhawinae awmseh. Bangkongtetpawiteh Bawipa ni amae a taminaw na kountouk teh ratangnae na sak pouh toe. <sup>69</sup> Talaivan pek kamtawng hoi amae profet kathoungnaw ni a dei e patetlah, <sup>70</sup> maimouh hanelah rungngangnae ki teh a sanpa Devit e catoun dawk hoi a tho sak toe. <sup>71</sup> Hete hloutnae teh maimouh na ka taran e naw hoi ka maithoe e naw pueng, kut dawk hoi hloutnae doeh. <sup>72</sup> Maimae mintoenaw koe lung na patawnae kamnue sak hane hoi, <sup>73</sup> maimanaw taran kut dawk hoi na rungngang vaiteh, <sup>74</sup> hringyung lam lungpuenna tawn laipalah thounge, lannae lahoi Cathut bawk thai nahan, <sup>75</sup> maimae na pa Abraham koe thounge lawk a kam e hah pahnim hoe nahanelah doeh. <sup>76</sup> Camo nang, nang hai Lathueng Poung e profet telah na kaw awh han. <sup>77</sup> Bangkongtetpawiteh, maimae Cathut ni yonnae a ngaithoum teh rungngangnae dawk pha thainae a kong hah, amae taminaw koe pâpho vaiteh, Cathut e lamthung rakueng hanelah, nang teh hmalah na cei han. <sup>78</sup> Hote pahrennae lahoi kalvan hoi kani raeng maimouh dawk a pha teh, <sup>79</sup> hmonae hoi duenae tâhlip daw kaawm e naw koe a ang vaiteh, maimouh koe roumnae lamthung na patue awh han telah a dei.



<sup>80</sup> Hote camo teh, a rounq takhang teh muitha thaonae hoi akawi. Isarel miphunnaw koe a kamnue hoehroukrak thingyeiyawn vah ao.

## 2

### *Jisuh khenae*

<sup>1</sup> Hatnavah Sizar Augustus ni talaivan milu parei hanelah kâ a poe. <sup>2</sup> Siria ram dawq Quirinius ni a uk navah, hote miilu pareinae teh hmaloe pasuek poung e lah ao. <sup>3</sup> Taminaw pueng teh min poe hanelah ama kho lengkaleng a ban awh.

<sup>4</sup> Devit e catoun lah kaawm e Joseph hoi a ham tangcoung lah kaawm e Meri teh min poe hanelah, <sup>5</sup> Galilee ram Nazareth kho koehoi Judah ram Bethlehem telah min poe e Devit kho lah a cei roi. Hatnavah Meri e a von thung e camo teh a tang toe. <sup>6</sup> Bethlehem kho ao navah, camo khe nahan hnin a kuep tounq dawkvah camin teh a khe. <sup>7</sup> A kâhat nahane hmuen ao hoeh dawkvah, camo teh hni hoi a kayo teh maito dokko dawq a pâ i roi.

### *Tukhoumnaw hoi kalvan taminaw*

<sup>8</sup> Hote ram dawq, tukhoumnaw ni khohmo vah amamae tuhu hah kahrawngum vah a ring awh. <sup>9</sup> Hatnavah Cathut e kalvantami buet touh ahnimouh koe a kamnue teh Cathut e raeng teh atengpam pheng a ang dawkvah, ahnimouh teh a lungtâsue awh teh a taki awh.

<sup>10</sup> Kalvantami nihai, na lungtâsue awh hanh awh, taminaw pueng hane, lunghawinae kamthang kahawi nangmouh koe na dei pouh awh. Hote kamthang kahawi ni tami pueng lunghawinae koe a pha sak han. <sup>11</sup> Sahnin vah, Devit kho dawq, rungngangkung Bawi Khrih teh a khe toe. <sup>12</sup> Nangmouh ni bangtelah hoi maw na panue awh han tetpawiteh, camo teh hni hoi a kayo vaiteh maito dokko dawq a payan e na hmu awh han telah atipouh.

<sup>13</sup> Hatnavah, kalvantaminaw hoi kalvanlae ransahu a kamnue awh teh, Bawipa a pholen awh. <sup>14</sup> Cathut teh lathoung poung lah bawilennae awm lawiseh. Talai van rounnae awm lawiseh, telah a ti awh.

<sup>15</sup> Kalvantaminaw, kalvan lah a luen hnukkhu tukhoumnaw ni, maimanaw Bethlehem kho koe lah cet awh sei. Cathut ni na patue e hno khen a sei telah buet touh hoi buet touh a ka dei awh.

<sup>16</sup> Hathnukkhu, ahnimanaw teh karanglah a cei awh teh, Joseph hoi Meri ni maito dokko dawq a pâ i e camo hah a hmu awh. <sup>17</sup> A hmu hnukkhu hoi amamouh ni a thai e camo e a kong hah hmuen tangkuem koe a pâpho awh. <sup>18</sup> Tukhoumnaw ni, a dei e lawk kathainaw pueng ni kângai lah a ru awh. <sup>19</sup> Meri teh hote a konglamnaw pueng a pâkuem teh luepluep a pouk. <sup>20</sup> Tukhoumnaw teh amamouh koe pâpho pouh e patetlah a hmu awh navah Cathut a pholen awh teh a ban awh.

### *Jisuh min phungnae hoi vuensomanae*

<sup>21</sup> Ataroe hnin a pha navah camo teh vuensoma awh, camo a von hoeh nahlan vah kalvantami ni min poe e patetlah Jisuh telah a phung awh.

<sup>22</sup> Hathnukkhu hoi Mosi e kâlawk patetlah kâpasu thoungnae hnin a kuep navah, a manu hoi a na pa ni camo teh Jerusalem kho lah a ceikhai roi. <sup>23</sup> Ca caminnaw pueng teh Cathut hanelah thoungsak han telah kâlawk dawq thut tangcoung e patetlah Cathut koe a kâhnawng hnukkhu, <sup>24</sup> Âbakhu kahni touh hoi thuengnae na sak han telah kâlawk dawq a dei e patetlah a sak awh.



### *Simeon ni pholennae*

<sup>25</sup> Hatnavah Jerusalem kho dawk Simeon tie tami buet touh ao. Hote tami teh tamikalan, a lawk dawk kaawm e tami, Isarelnaw hloutnae ka ngaihawi e tami lah ao. Kathoung Muitha teh ahni dawk ao. <sup>26</sup> Ahni teh Bawipa Khrih hah na hmu hoehnahan na dout mahoei telah, Kathoung Muitha e pâpho pouh e ka coe e tami lah ao. <sup>27</sup> Hatnavah, ahni teh Muitha lahoi bawkim dawk a cei teh, a manu hoi a na pa ni Camo teh kâlawk patetlah sak hanelah a hrawi roi. <sup>28</sup> Simeon ni ahni hah a tawm teh, Cathut a pholen. <sup>29</sup> Bawipa, na lawk patetlah nange na san kai lungmawngnae ka hmu toe. <sup>30</sup> Bangkongtetpawiteh, Bawipa e miphunnaw tawmdawm hanelah hai thoseh, <sup>31</sup> Jentelnaw ang sak hanelah hai thoseh, <sup>32</sup> Isarel taminaw pueng hanelah rakueng tangcoung e runngangnae teh atu ka mit hoi ka hmu toe telah a dei.

<sup>33</sup> Hote lawk hah Joseph hoi Meri ni a thai navah kângai lah a ru roi. <sup>34</sup> Simeon ni ahnimanaw hah yawhawinae a poe teh, Meri koevah, hete camo teh Isarelnaw moikapap rawp nahane hoi thaw nahanelah ao vaiteh, oun e lah ao nahanelah hruek e lah ao toe. <sup>35</sup> Taminaw e pouknae pueng a kamnue nahanelah, na lungthin hai tahloi ni a sei han telah a dei.

### *Anna ni panuekhainae*

<sup>36</sup> Asher miphun, Fanuel e canu Anna telah a min kâphung e profet napui a kum kacue e buet touh ao. Ahni teh a vâ hoi kum sari touh ao hnukkhu hoi, <sup>37</sup> a kum, rui taroe kum pali totouh lahmai lah ao teh, ratoumnae hoi rawcahainae lahoi yah, khohmo khodai Cathut koe a kâpoe teh bawkim dawk ao. <sup>38</sup> Ahni hai tang a kâen teh Cathut a pholen. Jerusalem kho dawk ratangnae kangaihawinaw pueng koe hote Como e a kong a dei pouh.

<sup>39</sup> A manu hoi na pa ni hai Cathut e kâlawk patetlah koung a tarawi hnukkhu, ama kho Galilee ram Nazareth kho lah a ban roi.

### *Jisuh camo navah Bawkim thung a o*

<sup>40</sup> Camo hai a rounng teh lungangnae hoi akawi. Cathut e lungmanae teh ahni dawk ao. <sup>41</sup> Kum tangkuem ceitakhai paw saknae tueng a pha navah a manu hoi a na pa teh Jerusalem kho lah ouk a cei awh. <sup>42</sup> Jisuh kum hlaikahni touh a pha navah paw e singyoe patetlah Jerusalem kho lah a cei awh teh, <sup>43</sup> paw a baw hnukkhu vah a manu hoi a na pa teh a ban roi nah, camo Jisuh teh Jerusalem khovah ao e hah panuek roi hoeh. <sup>44</sup> A huikonaw hoi a tho mue telah a pouk dawkvah hnin touh lamcei a cei awh toe. <sup>45</sup> Camo teh a huikonaw koe ao hoeh toung dawkvah, Jerusalem kho lah bout a ban roi. <sup>46</sup> Hnin thum touh a ro hnukkhu vah, Jisuh teh bawkim dawk kacangkhaenaw e rahak a tahung teh ahnimanaw hoi lawk kâ pacei awh e hah a manu hoi a na pa ni a hmu roi. <sup>47</sup> Jisuh e lungangnae hoi panuena lawk ka thai e naw pueng ni a kângairu awh. <sup>48</sup> A na pa yuvâ ni ahni teh a kâhmo navah, a kângairu roi. A manu niyah ka ca bangkongmaw kaimouh roi koe telah koe na o. Na pa kaimouh roi ni ka puen roi dawkvah na tawng roi atipouh. <sup>49</sup> Jisuh ni bangkongmaw kai khuek na tawng roi vaw, kai teh a Pa e im dawk ka o han tie hah na panuek hoeh na maw. <sup>50</sup> Hateiteh, Jisuh ni a dei e a manu hoi a na pa ni thai panuek roi hoeh.

*Cathut hoi tami hmalah minhmai kahawi hmuna*



<sup>51</sup> Hattoteh Jisuh ni ahnimouh koe a cei van teh Nazareth kho a pha navah a manu hoi a na pa e kê a ngai pouh. A manu ni teh hete a konglamnaw pueng a lungthin dawkhik a pâkuem. <sup>52</sup> Jisuh teh thounthai lungangnae dawkhik a roungh teh, Cathut hmalah hoi tami hmalah, minhmai kahawi a hmu.

### 3

#### *Baptisma kapoekung Jawhan*

*Mat 3:1-10; Mrk 1:3-5*

<sup>1</sup> Tiberia Siangpahrang kum hrahlaipanga touh bawi a tawkh navah Pontius Pilat teh Judah ram dawkh ukkung bawi a tawkh. Galilee ram dawkh Herod, Iturea hoi Trakhonitis ram dawkh Herod e a nawnggha Filip, Abilen ram dawkh Lisaniah telah khobawi lah lengkaleng a tawkh awh.

<sup>2</sup> Annas hoi Kaiaphas teh vaihma kacue a tawkh roi nah, Cathut e lawkh teh kahrawngum kaawm e Zekhariah capa Jawhan koe a pha. <sup>3</sup> Profet Isaiaah e cauk dawkh a thut e patetlah kahrawngum hramkhai e lawkh teh, Cathut tho nahan lam rasoun awh. <sup>4</sup> Lamthungnaw palan awh. Ravonaw paten awh. Karasangnaw hah rahnoum sak awh. Ka lawngkoi e lamthungnaw palan awh. <sup>5</sup> Lam kamathoutnaw rasoun awh. <sup>6</sup> Taminaw pueng ni Cathut e rungngangnae a coe awh han ati e patetlah, Jawhan teh Jordan tui koe a tenggam a kâhlai teh, yon pankângainae Baptisma kong a hramkhai.

<sup>7</sup> Hatnavah, tui baptisma ka coe hanelah ka tho e tamihunaw koe, Jawhan ni lawkh a dei e teh, tahrin catounnaw ka tho hane lawkcengnae dawkh hoi, na hlout thai nahanelah apinimaw kâhruetcuetnae na poe awh vaw. <sup>8</sup> Pankângainae hoi kamcu e hno tarawi awh. Abraham teh maimae na pa telah na lungthung poukh awh hanh. Atangcalah na dei pouh awh. Cathut ni hete talung dawkh hoi Abraham e catounnaw a tâco sak thai.

<sup>9</sup> Thingkung koe cakâ sut pangawi lah ao toungh dawkhvah, a paw kahawi ka paw hoehe e a kung pueng teh ka tâtueng vaiteh hmai dawkh koungh ka phum han telah a dei. <sup>10</sup> Tami kamkhuengnaw ni telah pawiteh kaimouh ni bangtelamaw ka sak awh han telah a pacei awh navah, <sup>11</sup> Jawhan ni angki yung hni touh ka tawn e ni ka tawn hoehe e rei naseh. Ca han ka tawn e ni hot patetlah sak van na seh telah bout atipouh.

<sup>12</sup> Tamuk kacawngnaw baptisma coe hanlah a tho awh teh, saya kaimanaw ni bangtelamaw ka sak awh han telah a pacei awh navah, <sup>13</sup> nangmae na Bawipa ni na cawng sak e a hloilah cawng awh hanh atipouh. <sup>14</sup> Ransa thaw katawknaw ni hai kaimouh ni bangtelamaw ka sak awh han telah a pacei awh navah, Jawhan ni apipatet koe hai, ka kamsoum hoehe lahoi tangka lawm awh hanh, het awh hanh awh, na hmu e kutphu dawkh na lungkuep awh, telah atipouh.

<sup>15</sup> Taminaw ni a ngaihaw i awh teh Jawhan heh Messiah han vaimoe telah a poukh awh. <sup>16</sup> Jawhan ni hai kai ni nangmanaw teh tui dawkh doeh baptisma na poe awh. Hatei kai hlak kalen e a tho han. Ahnie khokkhamw rui patengghai rading pouh hane lah ka kamcu hoehe. Ahni ni nangmanaw teh Kathoung Muitha hoi hmai dawkhvah Baptisma na poe awh han. <sup>17</sup> Ahni teh a kut dawkh para a patuep teh, katin tangcoungh e cakang a hut sak dawkhvah, cataknaw teh capai dawkh a cui sak vaiteh, cahiknaw teh ka roum thai hoehe e hmai dawkh a phum han atipouh. <sup>18</sup> Hottelah alouke kamthang kahawi aphunphun lahoi a pâpho pouh.

<sup>19</sup> Hathnukkhu hoi Herod bawi ni a nawnggha e a yu Herodias hoi thoseh, amae payonpakainae puenghoi thoseh, Jawhan ni a pâpho pouh teh a yue.



<sup>20</sup> Jawhan hah thongim rek a paung dawkvah, Herod teh ahmaloe e yon van hete yonnae hoi rek a kâthap.

### *Jisuh Baptisma coenae*

*Mat 3:13-17*

<sup>21</sup> Taminaw pueng ni baptisma a coe navah Jisuh hai baptisma a coe teh ratoum lahun navah, kalvan a kamawng teh, <sup>22</sup> Kathoung Muitha teh âbakhu patetlah Jisuh van a cu teh, nang teh ka pahren poung e hoi ka lungkuep e capa doeh telah, kalvan lahoi lawk a tho.

<sup>23</sup> Hatnavah Jisuh teh a kum 30 kalekkalak a pha. Taminaw e hmunae pouknae lahoi teh Jisuh na pa teh Joseph, <sup>24</sup> Joseph na pa Heli, Heli na pa Matthat, Matthat na pa Levih, Levih na pa Melkhi, Melkhi na pa Jannai, Jannai na pa Joseph. <sup>25</sup> Joseph na pa teh Mattathias, Mattathias na pa Amos, Amos na pa Nahum, Nahum na pa Esli, Esli na pa Naggai, <sup>26</sup> Naggai na pa Maath, Maath na pa Mattathias, Mattathias na pa Shimei, Shimei na pa Josek, Josek na pa Joda, <sup>27</sup> Joda na pa Joanan, Joanan na pa Resa, Resa na pa Zerubbabel, Zerubbabel na pa Shealtiel, Shealtiel na pa Neri, <sup>28</sup> Neri na pa Melkhi. Melkhi na pa Addi, Addi na pa Kosam, Kosam na pa Elmadam, Elmadam na pa Er, <sup>29</sup> Er na pa Joshua, Joshua na pa Eliezer, Eliezer na pa Jorim, Jorim na pa Matthat, Matthat na pa Levih, <sup>30</sup> Levih na pa Simon, Simon na pa Judah, Judah na pa Joseph, Joseph na pa Jonan, Jonan na pa Eliakim, <sup>31</sup> Eliakim na pa Melea, Melea napa Menna, Menna na pa Mattatha, Mattatha na pa Nathan, Nathan na pa Devit, <sup>32</sup> Devit na pa Jesi, Jesi na pa Obed, Obed na pa Boaz, Boaz na pa Salmon, Salmon na pa Nahshon, <sup>33</sup> Nahshon na pa Amminadab, Amminadab na pa Aram, Aram na pa Hezron, Hezron na pa Perez, Perez na pa Judah. <sup>34</sup> Judah na pa Jakop, Jakop na pa Isak, Isak na pa Abraham, Abraham na pa Terah, Terah na pa Nahor, <sup>35</sup> Nahor na pa Serug, Serug na pa Reu, Reu na pa Peleg, Peleg na pa Eber, Eber na pa Selah. <sup>36</sup> Selah na pa Kainan, Kainan na pa Arphaxad, Arphaxad na pa Shem. Shem na pa Noah, Noah capa Lamek, <sup>37</sup> Lamek na pa Methuselah, Methuselah capa Enok, Enok na pa Jared, Jared na pa Mahalaleel, Mahalaleel na pa Kainan, <sup>38</sup> Kainan na pa Enok, Enok na pa Seth, Seth na pa Adam, Adam na pa Cathut.

## 4

### *Jisuh tacueknae*

*Mat 4:1-11; Mrk 1:12,13*

<sup>1</sup> Jisuh teh Kathoung Muitha hoi akawi teh, Jordan tui koehoi a ban navah, Muitha ni kahrawngum vah a hrawi. <sup>2</sup> A hnin 40 touh thung rawca cat laipalah Kahraimathout e tacueknae a kâhmo teh hote tueng aloum hnukkhu a von a hlam. <sup>3</sup> Hatnavah, Kahraimathout ni Bawipa nang teh Cathut e capa katang pawiteh hete talung heh vaiyei lah a coung nahanlah kâ poe haw. <sup>4</sup> Jisuh ni hai tami teh vaiyei hoi dueng hring hoe. Cathut e lawk hoi kâkaw k han telah Cakathoung daw k a dei atipouh.

<sup>5</sup> Kahraimathout ni mon ka rasang poung koe Jisuh hah bout a hrawi teh, het talaivan uknaeram pueng dawngdengca a pâtuê teh, <sup>6</sup> Hete kâtawnnae pueng kai koe koung na poe toe, kai ni poe han ka ngai e tami teh ka poe thai dawkvah Bawipa, nang hai na poe thai. <sup>7</sup> Kai na baw k pawiteh, hetnaw pueng nange hnopai lah koung a coung han telah atipouh. <sup>8</sup> Jisuh ni, nang Setan, kaie ka hnuklah kâhnawnh. Bawipa na Cathut doeh nang



ni na bawk han, hote Cathut dueng doeh na pholen han telah Cakathoung dawk a kâthut.

<sup>9</sup> Ahni ni Jisuh teh Jerusalem kho dawk bout a hrawi teh bawkim lempphu som dawk a kangdue sak hnukkhu, <sup>10</sup> Cakathoung dawk a thut e patetlah nang ka tawm hanelah kalvantaminaw nang hanelah a ta toung dawkvah, <sup>11</sup> nange na khok teh talung dawk na hmang hoeh nahanelah, a kut hoi na tawm awh han telah a dei. Hatdawkvah, nang teh Cathut e ca katang lah na awm pawiteh, hete a som dawk hoi tâtawt haw atipouh. <sup>12</sup> Jisuh nihai, Cakathoung dawk a thut e patetlah na Cathut teh tanouktacak hanh telah bout atipouh.

### *Nazareth kho Jisuh pahnawtnae*

<sup>13</sup> Telah Kahraimathout ni a tacuek hnukkhu Jisuh koehoi a tâco. <sup>14</sup> Hathnukkhu hoi Jisuh teh Muitha hoi akawi teh Galilee ram lah a ban. A kamthang teh kho tengpam pueng koe kOUNG a ka kâhei. <sup>15</sup> Sinakoknaw pueng dawk a cangkhai teh, taminaw pueng ni Bawipa teh a pholen awh.

### *Galilee ram thaw tawknae*

<sup>16</sup> A onae Nazareth kho dawk bout a pha navah singyoe patetlah Sabbath hnin vah sinakok thung a kâen teh Cakathoung touk hanelah a kangdue.

<sup>17</sup> Ahni koe profet Isaiaah e cakalawng a poe awh teh, a kadai navah a hmu e ca teh, <sup>18</sup> Cathut e Muitha teh kai dawk ao. <sup>19</sup> Bangkongtetpawiteh, karoedengnaw koe kamthang kahawi dei hanelah kai hah satu na awi toe. A lungkareknaw dam sak hanelah, sannaw hlout sak hanelah, mitdawnaw mit bout ang sak hanelah, rektap kakhagnaw hlout sak hanlah kai teh Cathut e kamthang kahawi dei hanelah na patoun toe telah a tho.

<sup>20</sup> Sinakok ka ring koe cauk bout a poe teh a tahung. Athung kaawm e naw pueng ni Bawipa teh takuettuet a khet awh. <sup>21</sup> Jisuh ni nangmouh ni na thai awh e patetlah Cakathoung dawk a thut e lawk teh atu a kuep toe telah a ti.

<sup>22</sup> Taminaw pueng ni Bawipa a oup awh teh, a dei e lawk hah a kângairukhai awh. Hete tami teh Joseph e capa nahoehmaw ati awh.

<sup>23</sup> Jisuh nihai, nang tâsibawi na patawnae dam sak haw telah ouk na dei awh, kaimouh ni kamthang ka thai e patetlah nang ni Kapernuam kho dawk hno na sak e naw hah ama kho dawk hai bout sak haw telah kai hai bout na ti awh han. Hatei, kai ni atangcalah ka dei e teh, <sup>24</sup> apipatet e profet hai, ama onae kho dawk, minhmai kahawi hmawt bawi hoeh.

<sup>25</sup> Lawkkatang bout ka dei e teh, profet Elijah se nah a kum kum thum tangawn totouh kalvan a khan pouh teh, khoram thung puenghoi canei a takang navah, Isarel miphun dawk lahmai napui moi ao. <sup>26</sup> Hateiteh, Sidon ram Zarephath kho dawk e lahmai napui buet touh koe dueng doeh Elijah teh a patoun. <sup>27</sup> Profet Elisha se na haiyah, Isarel miphun dawk ka hrikbei e tami moikapap ao. Hateiteh Siria tami Naaman buet touh dueng ni doeh thoungnae a hmu telah atipouh.

<sup>28</sup> Sinakok thung kaawm e taminaw pueng ni hote lawk a thai awh navah a lung puenghoi a khuek awh. <sup>29</sup> Hahoi a thaw awh teh, kho alawilah Jisuh a sawn awh, monsom lungha dawk hoi tanawt hanelah Jisuh teh a hrawi awh. <sup>30</sup> Hatei Jisuh ni ahnimouh rahak hoi alouklah a kâ takhoe .

### *Muitha kathout pâleinae* *Mrk 1:21-28*



<sup>31</sup> Galilee ram Kapernuam kho dawk a pha navah, Sabbath hnin dawc cangkhaing a tawn. <sup>32</sup> Kâtawnnae lahoi, a cangkhai dawkvah, a cangkhai e lawk hah tamimaya ni a kângairukhai awh.

<sup>33</sup> Hote sinakok thung kahrainathout ni a man e tami buet touh ao.

<sup>34</sup> Oe! Nazareth tami Jisuh, nang teh kai hoi bangmaw na kâkuei. Kai na raphoe hanelah maw na tho. Nang apimaw tie na panue nang teh Cathut e kathoungpoung tami doeh telah puenghoi a hram. <sup>35</sup> Jisuh ni a yue teh, duem awm! Hote tami thung hoi tâcawt telah, kâ a poe navah, kahrainathout ni hote tami teh taminaw e alungui vah a rawp sak teh, runae poe laipalah a tâco takhai.

<sup>36</sup> Taminaw pueng ni a kângairu awh teh, hete lawk heh bangpatete lawk ma aw, kakhine muithanaw hah bahu hoi kâtawnnae lahoi kâ a poe teh koug a tâco awh bo aw, telah buet touh hoi buet touh a kâpankhai awh. <sup>37</sup> Hote a kamthang teh kho tengpam pueng koe koug a kamthang.

### *Tami kapap a dam saknae*

<sup>38</sup> Sinakok thung hoi a tâco hnukkhu Simon e a masei napui puenghoi a pataw dawkvah Jisuh teh a kaw awh. <sup>39</sup> Jisuh ni hote napui teng a kangdue teh, patawnae hah a yue navah, ahni teh tang a dam teh Jisuh a khetyawt.

<sup>40</sup> Kanî a khup navah taminaw ni patawnae aphunphun ka tawn e taminaw Jisuh koevah a hrawi awh. Jisuh ni ka pataw e taminaw pueng dawc kut a toung teh a dam sak. <sup>41</sup> Kahrailuinau nihai, Jisuh teh Cathut Capa doeh ati awh teh, a hramki teh taminaw koehoi a tâco awh. Kahrail, muitha kathoutnaw ni hai Jisuh teh a panue dawkvah Jisuh ni hai ahnimanaw lawk kam touh boehai dei sak hoeh.

<sup>42</sup> Khodai navah kahrawngum a cei teh, taminaw ni Jisuh teh a tawng awh. Ahni koe a pha awh navah, ahnimouh koehoi alouklah bout cei hoeh nahanlah a cakâ awh. <sup>43</sup> Jisuh ni hai Cathut uknaeram hoi kâkuei e kamthang kahawi teh alouke khoram dawc kai ni ka dei han. <sup>44</sup> Hot hanelah doeh kai na patoun telah a dei pouh hnukkhu Galilee ram lae sinakoknaw dawc kamthang kahawi a pâpho.

## 5

### *Hmaloe a hnuk kâbangnaw*

*Mat 4:18-24; Mrk 1:16-20; Jhn 1:40-42*

<sup>1</sup> Hnin touh hnin vah Gennesaret tali teng Jisuh a kangdue navah tamihunaw ni Cathut e lawk thai hanelah Jisuh koevah a tho awh. <sup>2</sup> Jisuh ni tuirai lah ka kâhat e long kahni touh a hmu. Tangakamankungnaw teh long dawc hoi a kum teh tamlawk a pâsu awh. <sup>3</sup> Hote longnaw thung dawc e Simon e long thung a kâen teh, long tahruei haw telah atipouh. Hote long dawc a tahung teh, taminaw hah a cangkhai. <sup>4</sup> A pâbaw hnukkhu vah, tui adungnae koe lah bout tahruei ei, tamlawk kadai nateh tanga heng ei telah Simon koe kâ a poe. <sup>5</sup> Simon ni hai Bawipa kaimanaw ni karum tuettuet ka heng awh toe. Hatei, buet touh hai ka man awh hoeh. Hatei nang ni kâ na poe e patetlah ka heng han atipouh. <sup>6</sup> A dei e patetlah a heng navah tanga moikapap a kâman teh tamlawk meimei a kâphi. <sup>7</sup> Alouke long dawc kaawm e a huikonaw kabawp hanelah a kaw. Huikonaw a tho awh teh long kahni touh dawc tanga a pâseng awh navah tanga teh yikkawi teh long teh tui dawc meimei a bo.



<sup>8</sup> Simon Piter ni a hmu navah, Jisuh e a khok koe a tabo teh, Bawipa kai teh tamikayon doeh, Kai na cettakhai leih atipouh. <sup>9</sup> Bangkongmaw telah a dei pouh tetpawitech a man e tanganaw a khet navah a huikonaw Zebedee e capa Jem hoi Jawhan, Simon hoi kaawm e taminaw teh a kângairu awh. <sup>10</sup> Jisuh ni taket awh hanh, nang teh atu hoi tami kamangkung lah na coung sak han telah atipouh. <sup>11</sup> A kongteng lah long a hruek awh hnukkhu, ahnimanaw ni a tawn awh e pueng koug a ceitakhai awh teh a hnuk a kâbang awh.

*Ka hrikbei e tami thoungnae*

*Mat 8:2-4; Mrk 1:40-44*

<sup>12</sup> Bawipa teh kho buet touh dawk ao navah a takbuem lah ka hrikbei e tami buet touh ni a hmu navah a tabo teh, Bawipa na panki pawitech kai na thounsak haw atipouh. <sup>13</sup> Jisuh nihai, kai ni na panki, thoung lawih atipouh. A kut a dâw teh hote tami teh a tek tahma vah tang a dam. <sup>14</sup> Jisuh ni hete kong api koehai dei hanh lah a atipouh. Vaihmanaw koe cet nateh kâpâtueh, hahoi na damnae hah lawkpanuesaknae lah ao nahan, Mosi e kâ poe e patetlah thoungnae hah poe haw, atipouh.

<sup>15</sup> Hatei hote kamthang teh hoe a kamthang dawkvah tamihupui teh a lawk thai hane dawk hai thoseh, patawpanatnae dam han ngai dawk hai thoseh, a kamkhueng awh. <sup>16</sup> Hatei Jisuh teh kahrawngum a cei teh a ratoum.

*Kamkhuen e tami dam saknae*

*Mat 9:2-6; Mrk 2:1-12*

<sup>17</sup> Hnin touh hnin vah Jisuh ni cangkhae a tawn navah, Jerusalem kho, Judah ram hoi Galilee ram dawk e kaawm e Farasinaw hoi cakathutkungnaw a tahung awh teh, patawnae dam sak hanelah Cathut e hnotithainae teh Jisuh dawk ao. <sup>18</sup> Hatnavah a kutkhok kamkhuen e tami buet touh Jisuh koe a thokhai awh teh, aonae koe phakhai hanelah a panki awh. <sup>19</sup> Hatei tami muen akawi teh kâen nahane lamthung a pâphawng awh hoe dawkvah, Jisuh a onae tueng koe lempu a rake awh teh phailei dawk hoi a pabo awh. <sup>20</sup> Jisuh ni hotnaw e a yuemnae a hmu navah, ka kamkhuen e tami hanlah, ka ca na yonnae teh ngaithoum lah o toe atipouh. <sup>21</sup> Cakathutkungnaw hoi Farasinaw ni hat e tami ni bangkongmaw Cathut pathoenae lawk a dei. Cathut hloilah apimaw yon ka ngaithoum thai telah a lungthung hoi ati awh.

<sup>22</sup> Jisuh ni ahnimae lungthin thung a pouknae a panue dawkvah bangkongmaw telah na pouk awh. <sup>23</sup> Bang lawk maw dei ka yawihnawn, na yon ngaithoum lah ao toe tie maw dei kayawi, thaw nateh cet leih tie maw ka yawihnawn. <sup>24</sup> Tami Capa teh talai van dawk yon ngaithoum thainae kâ a tawn tie a panue thai awh nahan thaw leih, phailei kalawng nateh, nama im cet leih telah ka kamkhuen e koe a dei pouh. <sup>25</sup> Hote tami ni hai taminaw pueng e hmalah tang a thaw teh, amae phailei a kalawng teh Cathut pholen laihoi ama im vah a cei. <sup>26</sup> Tami pueng a kângairu awh teh, maimanaw ni kângairunae atu hmu awh toe telah a dei awh teh Cathut a pholen awh.

*Levih kawnae*

*Mat 9:9-13; Mrk 2:14-17*

<sup>27</sup> Hathnukkhu hoi Jisuh teh a cei navah tamuk ka cawng e Levih, im dawk ka tahung e a hmu navah ka hnukkâbang atipouh. <sup>28</sup> Hote tami hai a tawn e naw pueng a ceitakhai teh a hnuk a kâbang.



<sup>29</sup> Hot hnukkhu hoi, Levih ni Jisuh hanelah ama im dawk pawl kalenpoung a sak teh, tamuk kacawngnaw hoi alouke a hnukkâbangnaw teh cingtalai bu rei a ca awh. <sup>30</sup> Cakathutkungnaw hoi Farasinaw ni bangkongmaw tamuk ka cawng, tami kahawihoehnaw hoi bu rei a canei awh vaw telai a hnukkâbangnaw koe a phuenang awh. <sup>31</sup> Jisuh nihai, a tak kadamnaw ni tâsibawi panki hoe, kadamhoehnaw ni dueng doeh tâsibawi a panki awh. <sup>32</sup> Tamikalannaw kaw hanelah ka tho hoe, tamikayonnaw pankângai hanelah doeh ka tho atipouh.

### *Rawcahai e paceinae*

*Mat 9:14-17; Mrk 2:18-22*

<sup>33</sup> Tami tangawn ni Jawhan hnukkâbangnaw hoi Farasinaw teh, rawca a hai awh teh pou ratoum awh hoe haw. Bangkongmaw Bawipa nange na hnukkâbangnaw teh rawca a hai awh hoe haw, telai a pacei awh. <sup>34</sup> Jisuh ni yu kalatkung teh a huikonaw hoi cingtalai ao navah rawca ouk a hai boimaw. <sup>35</sup> Hatei yu kalatkung teh a huikonaw hoi kapek teh lanai tueng ka phat han. Hat torei teh, ahnimanaw hai rawca a hai awh van han. <sup>36</sup> Bangnuenai lahoi a dei pouh e teh, angki ka pawn e hah lukkarei katha e hoi bo boihoe. Hottelai bo pawiteh lukkarei katha e ni kapawn e hoe hoe a kâphi sak han. <sup>37</sup> Hot patetvanlah, misurtui katha e hah karuem e phaivuen um daw hlu boihoe. Hottelai hlu pawiteh misurtui katha e ni phaivuen um karuem e hah tangpaw sak vaiteh atui hoi a um a rawk han. <sup>38</sup> Misurtui katha e teh phaivuen um katha daw hlu pawiteh kahni touh hoi a cuem han. <sup>39</sup> Karuem e misurtui ka net tangcoung e tami teh a katha e misurtui tang net ngai hoe, a karuem e misurtui hoe atui e a panue dawkvah, telai atipouh.

## 6

### *Sabbath bawi*

*Mat 12:1-14; Mrk 2:23—3:6*

<sup>1</sup> Sabbath hnin vah Jisuh teh catun law daw a cei navah, a hnukkâbangnaw ni catun vui a pahroe awh teh a kut hoi a kanawi teh a ca awh. <sup>2</sup> Hatnavah, Farasinaw ni sabbath hnin daw sak hoe hane kawi hno bangkongmaw na sak awh, telai a pacei awh. <sup>3</sup> Bawipa ni, Devit ni a huikonaw hoi a vonhlam navah, <sup>4</sup> Cathut e imthung a kâen teh vaihmanaw dueng ni a cakawi e vaiyei hah a ca teh, a huikonaw hai a poe e hah vai touh boehai na touk boi awh hoe haw. <sup>5</sup> Hothloilah tami Capa teh sabbath Bawi lah ao atipouh.

### *Kamkhuen e a dam sak*

<sup>6</sup> Alouke Sabbath hnin daw, Jisuh teh, sinakok thung a kâen teh cangkhaia e tawn navah aranglae kut kamkhuen e tami buet touh ao. <sup>7</sup> Sabbath hnin vah, ahnie patawnai a dam sak han maw, dam sak mahoe haw teh hah cakathutkungnaw hoi Farasinaw ni Jisuh yon a pen thai awh nahanlah a tuet awh. <sup>8</sup> Jisuh ni ahnimai a pouknae a panue dawkvah, a kut ka kamkhuen hanelah, alungui kangdout haw atipouh e patetlah hote tami ni, a kangdue. <sup>9</sup> Jisuh ni hai kai ni nangmanaw lawk na pacei awh han. Sabbath hnin daw bang hno maw sak kawi, hnokahawi maw, hno kathout maw sak han. Hringnae rungngang han maw, thei han maw, telai rangpuinaw a pacei.

<sup>10</sup> Hahoi, tamimaya e tengpam a khet teh na kut dâw haw atipouh navah, ahni ni a kut a dâw teh avanglae kut patetlah bout ao. <sup>11</sup> Tamimaya teh



puenghoi a lungkhuek awh, Jisuh hah bangtelamaw ti awh han telah a kâpankhai awh.

### *Guncei hlaikahni*

*Mat 10:2-4; Mrk 3:16-19; Gun 1:13*

<sup>12</sup> Hatnae tueng daw, Bawipa teh ratoum hanelah mon daw, a luen teh, Cathut koe karum tuettuet a ratoum. <sup>13</sup> Khodai toteh gunceinaw a kaw teh, <sup>14</sup> Piter telah min katha poe e Simon hoi a nawng, Andru, Jem hoi Jawhan, Filip hoi Bartholomew, <sup>15</sup> Mathai hoi Thomas, Alfe capa Jem hoi Zealot telah kaw e Simon (Zealot tinae teh miphun kampangkhai tinae doeh). <sup>16</sup> Jem e a nawng Judah hoi Jisuh kâyawt e Judah Iskariot, hote tami hlaikahni touh a rawi teh Guncei telah min a poe.

### *Taminaw dam saknae*

*Mat 5:3-12*

<sup>17</sup> Ahnimanaw hoi cungal, Bawipa teh mon hoi a kum teh tanghling daw, a kangdue. Lawk thai han kanginaw hoi dam han kanginaw pueng teh Jerusalem kho lahoi thoseh, Judah ram, tui teng kaawm e naw, Taire hoi Sidon kho, avoivang lahoi ka tho e naw pueng teh a hnukkâbangnaw hoi cungal ao awh. <sup>18</sup> Kakhine muithanaw ni a pacekpahlek e naw pueng hai a tho teh a dam awh. <sup>19</sup> Bawipa e thung hoi bahu a tâco teh, taminaw pueng a dam sak dawkvah tamimaya ni Bawipa tek hanlah a panki awh.

### *A yawkahawinaw*

<sup>20</sup> Hatnavah Jisuh ni a hnukkâbangnaw koe lah a kamlang teh, ka mathoe e nangmanaw teh na yawhaw awh. Bangkongtetpawiteh Cathut uknaeram teh nangmae ram doeh. <sup>21</sup> Nangmanaw atu von ka hlam e naw na yawhaw awh. Bangkongtetpawiteh, na von a paha awh han. Atu ka kap e nangmanaw teh na yawhaw awh. Bangkongtetpawiteh, na panui awh han. <sup>22</sup> Tami Capa kecu daw, taminaw ni nangmanaw na hmuhma awh han, na pahnawt awh han, thoe na bo awh nah na yawhaw awh. <sup>23</sup> Hatnae tueng nah, na konawm awh. Lunghawinae lungthin hoi doukcouk awh. Bangkongtetpawiteh kalvan vah nangmouh ni na hmu hane tawkpau a len poung. Ahnima mintoenaw ni hai profetnaw hah hottelah doeh ati awh.

### *A yawkathounaw*

<sup>24</sup> Hatei ka bawi tangrengnaw na yawthoe awh. Bangkongtetpawiteh nangmouh teh atu na lungkuep awh toe. <sup>25</sup> Von kapahanaw nangmouh teh na yawthoe awh. Bangkongtetpawiteh nangmouh teh na vonhlan awh han. Atu na kapanuinaw na yawthoe awh, nangmouh teh na khuika awh han. <sup>26</sup> Ayânaw ni na lunghawikhai nah, na yawthoe awh. Bangkongtetpawiteh, ahnima a na mintoenaw ni profetkaphawknaw hah hottelah doeh ati awh.

### *Na taran lungpataw*

*Mat 5:39-42*

<sup>27</sup> Ka lawk ka thai naw, nangmouh koe ka dei e teh na tarannaw lungpataw awh, nangmouh ka maithoe e naw koe ahawinae sak awh. <sup>28</sup> Nangmouh thoe na ka bo e naw yawhawinae poe awh. Na ka pacekpahlek e naw hanelah ratoum pouh awh. <sup>29</sup> Na hmaibei vang tambei pawiteh avanglae bout patueng pouh awh. Na hni ka lat e tami hah angki bout poe sin awh. <sup>30</sup> Nang koe ka hete pueng hah poe awh. Na hno ka



lawm e tami koe bout het hanh lawi. <sup>31</sup> Ayânaw ni nang koe sak sak na ngai e patetlah ayânaw koe sak van awh.

<sup>32</sup> Nangmouh lungpataw e dueng na lungpataw awh pawiteh bangmaw aphu kaawm. Tami kahawihoehnaw ni pateng amamouh lungpataw e taminaw hah bout a lungpataw awh nahoehmaw. <sup>33</sup> Nangmouh koe ahawinae ka sak dueng na pathung awh pawiteh bangmaw aphu kaawm. Tami kahawihoehnaw ni patenghai hottelah ngoun teh a sak awh nahoehmaw. <sup>34</sup> Bout hmu han doeh ti ngaihawi lahoi ayânaw hno na cawi sak pawiteh, nangmouh daw k oup hane kawi bangmaw kaawm han. Tami kahawihoehnaw pateng bout hmu hane ngai daw k buet touh hoi buet touh telah a kâ cawi awh hoe h na maw. <sup>35</sup> Nangmouh ni na tarannaw lungpataw awh. Hnokahawi sak pouh awh. Hno buetbuet touh bout ka hmu han doeh ti ngaihawinae tawn laipalah hno cawi sak awh. Hottelah na sak pawiteh nangmouh ni tawkpou na hmu awh hane teh a lenpoung vaiteh, ka rasang poung e Cathut ca lah na coung awh han. <sup>36</sup> Nangmae na Pa teh pahrennae a tawn e patetlah nangmouh hai pahrennae tawn awh.

### *Ayâ lawkceng hanh*

#### *Mat 7:1-5*

<sup>37</sup> Ayânaw e hno a kâhmo e daw k lawk ceng awh hanh. Telah na tet hoehpawiteh lawkcengnae daw k hoi na hlout awh han. Ayânaw yon pen awh hanh, na pen awh hoehpawiteh yonpennae daw k hoi na hlout awh han. Ayânaw e yon ngaithoum awh, hottelah na sak awh pawiteh nangmae yon hai ngaithoum lah ao han. <sup>38</sup> Ayânaw hah poe awh, na poe pawiteh ayânaw ni bout na poe awh han. Khuecue nue laihoi, padep laihoi, karuek laihoi, puk kacawi lah, na poe awh han. Bangkongtetpawiteh ayânaw na poe e patetlah bout na hmu awh han.

<sup>39</sup> Hathnukkhu hoi bangnuenae lah mit ka dawn ni mit ka dawn teh lam a hrawi thai han maw. Kâhni touh hoi tangkom daw k baw t roi mahoe h maw. <sup>40</sup> A hnukkâbang e tami teh kacangkhaikung hlak talue hoe h. Hatei, kakueplah ka kamtu e a hnukkâbang e naw pueng teh kacangkhaikung patetlah ao han.

<sup>41</sup> Namae mit daw k e thingtaboung na pouk laipalah, hmaunawng ha e mit daw k e songnawng khuek na hmu pouh. <sup>42</sup> Namae mit daw k e thingtaboung na hmaw t laipalah, na hmaunawng ha e mit daw k e songnawngca cawngkhawi han lah khuek na panki awh vaw. Tami kahawi lah na kâsak e tami, namae mit daw k e thingtaboung hmaloe cawngkhawi ei. Hathnukkhu na hmaunawng ha mit daw k e sonawngca cawngkhawi hanelah kacaicalah na hmu han.

### *A kung hoi a paw*

#### *Mat 7:16,18,20*

<sup>43</sup> A paw kahawi ka paw hoe h e thingkung teh a kung kahawi na hoe h. <sup>44</sup> A paw khet laihoi a kung nout thai lah o. Pâkhingkung daw k thaibunglung paw ouk khi boi hoe h. Pâkhing daw k misurpaw khi boi hoe h. <sup>45</sup> Tami kahawi ni hno kahawi, lungthin thung hoi ouk a tâcokhai. Tami kathout ni hno kathout amae lungthin thung hoi ouk a tâcokhai. Bangkongtetpawiteh, lungthin thung ka poum e patetlah a kâko hoi ouk a dei.

### *Im ka sak e tami kahni touh bangnuenae*

#### *Mat 7:24-27*



<sup>46</sup> Kaie kâlawk na tarawi laipalah, Bawipa, Bawipa telah na kaw a vaw.  
<sup>47</sup> Kai koe ka tho niteh, ka lawk a thai e patetlah ka tarawi e tami teh, bangpatet lah maw ao tie na panue sak han. <sup>48</sup> Im a sak navah, lungsong dawkhomkhu kadung poungh lah ka tapu ni teh adu ka pabawt e hoi doeh a kâvan. Tui capa a thaw navah lungsong van im a sak dawkvah kâhuen thai hoeh. <sup>49</sup> Kaie lawk ka thai ni teh ka tarawi hoeh e tami teh, talai dawkh im ka sak e hoi doeh a kâvan. Tuicapa a thaw toteh tuicapa ni a suk toteh reppasei lah a kamko telah a cangkhai.

## 7

### *Ransabawi buet touh e yuemnae*

#### *Mat 8:5-13*

<sup>1</sup> Jisuh ni taminaw koe cangkchainae a pâbaw hnukkhu, Kapernuam kho thung a kâen. <sup>2</sup> Hote kho dawkh ransabawi e a san a pataw teh due hane coungkacoe lah ao. <sup>3</sup> Hote tami teh a bawipa ni a pahren poungh. Jisuh e a kamthang a thai navah, Judahnaw dawkh e kacuenaw hah a sanpa dam sak hanelah Jisuh koe a patoun. <sup>4</sup> Jisuh koe a pha awh navah, Bawipa ahni hanelah hete hno na kabawp hanelah atueng. <sup>5</sup> Bangkongtetpawiteh ahni ni kaimae miphun a pahren dawkvah sinakok na sak pouh toe telah pahrennae puenghoi a kâhei. <sup>6</sup> Jisuh teh ahnimouh hoi cungtalang a cei. Ransabawi e im koe a pha tawmlei navah, ransabawi ni a huikonaw a patoun teh, Bawipa namahoima patangnae sak han loe. Kaie imthungkhu nang na kâen hane kamcu hoeh. <sup>7</sup> Hot patetlah nang koe ka tho hanelah ka kamcu hoeh. Lawk kam touh mah na dei pawiteh ka san teh a dam han doeh. <sup>8</sup> Bangnueae lah, kai teh kâtawnnae rahim thaw ka tawkh e tami buet touh lah ka o eiteh, ka kut rahim e ransanaw buet touh cet ka tetpawiteh a cei han. Tho ka tetpawiteh a tho han. San haiyah hete thaw tawkh ti boum teh a tawkh telah ransabawi ni atipouh.

<sup>9</sup> Hote lawkh Jisuh ni a thai navah a kângairu teh, a hnukkâbangnaw koe a kamlang teh, nangmouh koe na dei pouh awh. Het patetlah yuemnae ka tawn e Isarelnaw dawkh pateng hai kahmawt boihoeh rah atipouh.  
<sup>10</sup> Ransabawi ni a patoun e naw im bout a pha navah, ka dam e a sanpa teh a hmu awh.

### *Lahmainu e capa bout thaw saknae*

#### *Mat 5:21-24,35-43; Jhn 11:1-44*

<sup>11</sup> A tangtho hnin vah, Nain kho dawkh a cei teh a hnukkâbangnaw hoi tamihupui teh a hnuk a kâbang awh. <sup>12</sup> Kho thung e longkha koe a pha navah, lahmainu ni a capa buet touh dueng a tawn e kadout e ro pakawp hanelah kho alawilah a tâcokhai navah kho thung e taminaw hai a kâbang awh. <sup>13</sup> Bawipa ni hote napui a hmu navah a pahren teh, kap hanh telah atipouh.

<sup>14</sup> Hathnukkhu, Jisuh ni a hnai teh, ro hrawmnae ratang a tek teh ka hrawm e taminaw a kâhat awh. Bawipa ni nange thoundoun thaw leih, kai ni kâ na poe telah atipouh. <sup>15</sup> Ka dout e tami teh a tanguh teh lawkh a tho. Jisuh ni hote tami hah a manu koevah a poe.

<sup>16</sup> Taminaw pueng ni a taki awh teh, profet kalenpounge maimouh koe a tho toe. Cathut teh amae a miphunnaw a khetyawt hanelah a tho toe, ati awh teh Cathut a pholen awh. <sup>17</sup> Hote kamthang teh Judah ram koehei a tengpam pueng koe koug a kâkahei.



*Baptisma ka poe e Jawhan*

*Mat 11:1-19*

<sup>18</sup> Jawhan e a hnukkâbangnaw ni hote a konglam abuemplahoi Jawhan koe a dei pouh awh. <sup>19</sup> Hatnavah Jawhan ni a hnukkâbang e tami kahni touh a kaw teh Jisuh koe a patoun teh, Bawipa, nang teh ka tho hane hah tounge na maw. Hoehpawiteh alouke ka ngaihawi awh han rah maw telah a pacei sak.

<sup>20</sup> Ahnimouh roi teh Jisuh koe a pha navah, Bawipa, nang teh ka tho hane hah tounge na maw, nahoe h pawiteh alouke ka ngaihawi awh han rah maw telah Baptisma Jawhan ni na pacei sak atipouh awh.

<sup>21</sup> Hatnae atueng dawkvah, Jisuh teh tami kapatawnaw a dam sak, mutha kathoutnaw a pâlei, mitdawnnaw hah mit a ang sak. <sup>22</sup> Jisuh ni Jawhan e laiceinaw koe, nangmouh ni na hmu e, na thai e naw pueng Jawhan koe bout dei pouh awh. Khok kamkhuennaw ni lam a cei thai awh, hrikbeinaw ni thoungnae daw k a pha awh. Kadoutnaw ni a thaw awh. <sup>23</sup> Karoedengnaw ni hai lunghawinae kamthang a thai awh. Kai daw k lung ka pout hoe h e tami teh a yawkahawi e lah ao atipouh.

<sup>24</sup> Jawhan ni patounenaw a cei hnukkhu vah, Jisuh ni Jawhan hoi kâkuen lah taminaw koe a dei pouh e teh bangpatetlae hno hmu han na ngai daw k maw, kahrawngum na cei awh. Kahlî ni a kahuet e lumpum khet hanelah maw na cei awh. <sup>25</sup> Na hoe hpawiteh kanem ca e angki ka kho e khet hanelah maw na cei awh. Angki kahawi ka kho ni teh rawca kahawi ka cat e taminaw teh siangpahrang e toeim daw k doeh ouk ao. <sup>26</sup> Profet khet hanelah maw na cei awh han. Profet hlak kalen e tami lahai ka o telah kai ni ka dei. <sup>27</sup> Cakathoung daw k a thut e teh, khenhaw! nang na cei nahane lamthung ka rasoun hanelah patoune teh na hmalah ka patoun toe telah ka dei nah hote tami doeh ka dei ngai. <sup>28</sup> Kai ni na dei pouh e teh, napui ni a khe e thung daw k, baptisma Jawhan hlak kalen e profet buet touh boehai awmhoe h. Hateiteh Cathut uknaeram daw k teh kathoengpounge tami hah, ahni hlak a talue.

<sup>29</sup> Tamuk kacawngnaw hoi taminaw pueng ni Jawhan e lawk a thai navah Cathut a pholen awh teh Jawhan koe baptisma a coe awh.

<sup>30</sup> Farasinaw hoi cakathutkungnaw teh Jawhan ni a poe e baptisma a coe ngai awh hoe h daw kvah, ahnimouh hanelah Cathut ni a pouk pouh e hah a pahnawt awh.

*Bout na ka pathung hoe h e catounnaw*

<sup>31</sup> Hatdaw kvah hete taminaw bang hoi maw ka bangnue han, api hoi maw a kâvan awh. <sup>32</sup> Ahnimanaw teh paw i koe a tahung awh teh ahnimouh hanlah tapueng longpan ka khawng pouh nakunghai lam awh hoe h. Lungmathoenae la sak pouh nakunghai kap awh hoe h. Hatdaw kvah hetnaw teh camonaw hoi doeh a kâvan awh.

<sup>33</sup> Bangkongtetpawiteh, baptisma Jawhan ni vaiyei hoi misurtui catnet laipalah ao navah nangmouh ni, hete tami teh kahrai a thung kâen e doeh na ti pouh awh. <sup>34</sup> Tami Capa teh a ca a nei hoi ao navah, hete tami teh, ka carawng e tami doeh. Tamuk kacawngnaw, tami kahawihoe hnaw hoi kâhuiko e doeh bout na ti pouh awh. <sup>35</sup> Hatei lungangnae daw k teh amamae a canaw pueng koe pathoenae daw k hoi a hlout telah atipouh.

*Ka yon e napui yon ngaihoumnae*

*Mat 26:6-13; Mrk 14:3-9; Jhn 12:1-8*

<sup>36</sup> Farasi buet touh ni bu ca hanelah Jisuh a kaw teh, hote Farasi e im daw k a kâen teh caboi daw k a tahung. <sup>37</sup> Hatnavah hote kho daw k kaawm



e napui kahawihoe e buet touh ni a panue, talungpangaw bom dawk e hmuithui buet touh a sin teh, <sup>38</sup> Jisuh e hnukkhu lah a khok koe a kangdue, a ka teh mitphi hoi a khok a duk sak teh a sam hoi a hui. A khok hai a paco teh hmuithui a hluk.

<sup>39</sup> Bawipa ka kaw e Farasi ni a hmu navah, hete tami hah profet katang pawiteh, a khok ka tek e napui bangpatet e tami maw ti a panue han. Hete napui teh napui kahawihoehe doeh telah a lung thung hoi ati awh. <sup>40</sup> Hatnavah, Jisuh ni Simon nang koe ka dei hane lawk buet touh ao atipouh navah, Bawipa dei haw telah bout atipouh.

<sup>41</sup> Jisuh ni hai hno katawnkung koe laiba ka tawn e tami kahni touh ao. Buet touh ni phoisa cumtough, alouke buet touh ni 50 touh a ba roi. <sup>42</sup> Ahnimouh roi ni laiba patho thai hoe dawkvah, hno katawnkung ni a ngaithoum roi. Hat pawiteh, apipatet e ni maw hno katawnkung hah hoe lungpataw han telah a pacei. <sup>43</sup> Simon nihai, laiba kapap ngaithoum lah kaawm e tami ni hoe a lungpataw han telah, ka pouk atipouh navah Bawipa ni, na pouk e teh a tang doeh atipouh.

<sup>44</sup> Hote napui koe lah a kangvawi teh Simon koe hete napui na hmu maw. Na im dawk ka kâen navah khok pâsu nahane tui na poe hoe. Hete napui ni teh ka khok dawk mitphi a duk sak teh a sam hoi a hui. <sup>45</sup> Nang ni kai na paco hoe, hatei hete napui ni teh im dawk kâen tahma hoi kâhat laipalah ka khok a paco. <sup>46</sup> Nang ni ka lû dawk satui na hluk pouh hoe. Hatei, hete napui ni teh ka khok dawk hmuithui hoi na hluk pouh toe. <sup>47</sup> Hatdawkvah kai ni ka dei e teh, yon moikapap dawk hoi a hlout dawkvah, lungpatawnae moi a kamnue sak. Yon kayounca dueng ngaithoum lah kaawm e ni teh lungpatawnae younca dueng a kamnue sak. <sup>48</sup> Hote napui hanelah, nang teh na yonnae dawk hoi na hlout toe atipouh. <sup>49</sup> Caboi dawk ka tahung e naw ni yon ka ngaithoum e tami heh bang patet e tami maw ati awh teh a kâpankhai awh. <sup>50</sup> Jisuh ni hote napui hanelah, na yuemnae ni na rungngang toe. Lungmawngcalah cet leiñ atipouh.

## 8

### *A thaw ka bawm e napuinaw*

<sup>1</sup> Hat hnukkhu hoi Jisuh teh kho touh hoi kho touh a cei teh Cathut uknaeram lunghawinae kamthang a pâpho. <sup>2</sup> A hnukkâbang hlaikahni touh ni a hnuk a kâbang awh. Patawnae hoi muitha kathoutnaw ni a tek e dawk hoi ka hlout e napuinaw hai a kâbang awh. Hote napui thung dawk kahraituulinaw sari touh ni a tâco takhai e Magdalin telah a kaw awh e Meri hoi, <sup>3</sup> Herod yung thaw ka tawk e Khuza e a yu Joanna hoi Shusanna hoi, a tawn e hno ka pasoung ni teh Jisuh hoi a hnukkâbangnaw ka paca, ka pânei e, alouke napuinaw hai ao awh.

### *Cati kaheikung bangnueae*

<sup>4</sup> Tamihupui, kho avoivang lahoi Bawipa koe a tho awh teh, a kamkhueng awh navah bangnueae lahoi a dei pouh e teh, <sup>5</sup> Cati kaheikung ni cati kahei hanelah a tâco. Cati a kahei navah a tangawn teh lam dawk a bo dawkvah, khok hoi a coungroe awh teh kalvan e tavanaw ni koug a patu. <sup>6</sup> Cati tangawn teh talung van vah a bo dawkvah a paw eiteh talai kahawi ao hoe dawkvah tang a kamyai teh a ke. <sup>7</sup> A tangawn teh pâkhing um a bo dawkvah, pâkhing ni a yawngyen. <sup>8</sup> A tangawn teh talai kahawi dawk a bo dawkvah, a paw teh alet cum touh totouh apung



teh a paw a paw telah ati. Hottelah a dei hnukkhu vah, thainae hnâ ka tawn pueng ni thai na seh, telah a hramkhai.

### *Bangnueae a hno ngainae kong*

<sup>9</sup> A hnukkâbangnaw ni hete bangnueae teh bangmaw a dei ngai telah Bawipa a pacei awh. <sup>10</sup> Jisuh ni nangmouh teh Cathut uknaeram hrolawh hah panuethainae na poe awh. Alouke taminaw teh, a hmu awh ei nout thai hoeh nahanelah, a thai awh ei a panue thai hoeh nahanelah ahnimouh koe bangnueae lahoi ka dei pouh.

### *Cati kaheikung deicainae*

<sup>11</sup> Hote bangnueae teh hettelah ao. Cati teh Cathut e lawk doeh. <sup>12</sup> Lam dawh kabawt e cati teh, a lawk a thai eiteh, yuemnae, hloutnae dawh a pha thai hoeh nahanelah Kahraimathout ni a tho teh, a lung thung e Cathut lawk hah, oun a lawp ti dei ngainae doeh. <sup>13</sup> Talung van ka bawt e cati dei ngainae teh, a lawk thai navah lunghawicalah hoi tang a dâw ei, a lung thung a tangpha a payang hoeh dawkvah, Cathut lawk kecu dawh, runae hoi rektapnae a kâhmo toteh tang a rawp ti ngainae doeh. <sup>14</sup> Pâkhing um ka bawt e cati, tie a dei ngainae teh Cathut lawk a thai teh, talai hno dawh lungpuennae, hnopai ni dumpyennae hoi, alouke hnonaw noenae lungthin ni a katek dawkvah a paw paw thai hoeh ti ngainae doeh. <sup>15</sup> Talai kahawi dawh ka bawt e cati tie a dei ngainae teh, thoungnae hoi lannae lungthin hoi Cathut lawk a thai teh lungsaw lahoi pou a hringkhai tie a dei ngainae doeh.

### *Hmaiim hnonae*

<sup>16</sup> Hmaiim paang e teh hlaam hoi ouk ramuk boihoeh. Ikhun rahim hai tat boihoeh. Ka kâen e taminaw ni angnae a hmu thai nahanelah hmaiimkhok dawh doeh ouk paang awh. <sup>17</sup> A hmonae koe kaawm e pueng koug a kamnue han, ramuk lah kaawm e naw pueng koug kamawng han. <sup>18</sup> Hatdawkvah nangmouh ni na thai e lawknaw kâhruetcuat awh. Ka tawn e tami teh bout poe sin lah o han. Ka mathoe e tami teh a tawn e ca patenghai la pouh lah ao han telah a ti.

### *Hmaunawnggha katang*

*Mat 12:46-50; Mrk 3:31-35*

<sup>19</sup> Hatnavah a manu hoi a nawngghanaw teh Bawipa koe a tho awh. Kamkhueng e tami apap poung dawkvah Jisuh koe phat thai awh hoeh. <sup>20</sup> Tami tangawn ni na manu hoi, na nawngghanaw ni na kâhmo han na ngai awh teh alawilah a kangdue awh telah atipouh navah, <sup>21</sup> Ahni ni Cathut e lawk ka thai ni teh ka tarawi e taminaw doeh kaie ka manu, ka nawnggha atipouh.

### *Tuicapa ni Bawipa e lawk a ngâi*

*Mat 8:23-27; Mrk 4:36-41*

<sup>22</sup> Hnin touh hnin vah, Jisuh teh a hnukkâbangnaw hoi cungtalalah long dawh a luen awh teh tui namran lah cet awh sei ati awh teh a cei awh. <sup>23</sup> Tui dawh a cei awh navah, Bawipa teh a i. Hatnavah tûilî a tho dawkvah long dawh tui yikkawi teh runae a kâhmo awh.

<sup>24</sup> A hnukkâbangnaw ni Bawipa teh a pâhlaw hnukkhu, Bawipa, Bawipa maimanaw rawknae koe pha a han toe atipouh awh navah, ahni ni, tûilî hoi tuicapa a yue teh a roum sak. <sup>25</sup> Ahni ni na yuemnae na maw na ta awh, telah a pacei navah, ahnimanaw ni hete tami teh bangpatet e tami



nama aw. Tui hoi tûilî patenghai kê a poe bo teh, ahnimouh ni a lawk a ngai pouh bo aw telah buet touh hoi buet touh a kêpankhai awh.

*Kahrai katawnkung dam saknae*

*Mat 8:28-34; Mrk 5:1-20*

<sup>26</sup> Galilee ram tui namran lah kaawm e Kerasen ram dawk a pha awh. <sup>27</sup> Jisuh teh a oung lah a luen navah, atueng moi kasawlah kahraituilinaw ni a man e tami, angki hai kho hoe, im dawh hai awmhoeh, phuen koe ouk kaawm e Kerasen tami buet touh ni Jisuh teh a dawn. <sup>28</sup> Bawipa a hmu navah a tabo teh, Lathueng Poug Cathut Capa Jisuh, nang teh kai hoi bangmaw na kêkuet. Kai na rektap hoe hahanlah pahrennae kahei telah a hramki laihoi a dei. <sup>29</sup> A deingainae teh, Jisuh ni kakhine muitha tami thung hoi tâcawt telah kê a poe toung dawk doeh. Hote tami teh kahrai ni ngailawi a tek toung dawkvah, ahni teh a khok roi dawh hlong a buet pouh awh, sumbawtarui hoi a katek awh ei soumsoum a tapo teh hlong hai rekrek a hem teh kahrawngum lah, kahrai ni ouk a hrawi.

<sup>30</sup> Jisuh ni na min apimaw ti teh a pacei navah, hote tami teh kahraituilinaw ni a tek dawkvah ransahupui telah atipouh. <sup>31</sup> Hathnukkhu hoi kahrainaw ni ka dungpoug e hmuen koe pâlei hane kê a poe hoe hanelah a kêhei awh.

<sup>32</sup> Hote hmuen koevah, vok moikapap teh a paca awh. Hote voknaw thungvah na kêen sak loe telah a kêhei awh navah Jisuh ni kêenh atipouh.

<sup>33</sup> Hatnavah, kahraituilinaw tami thung hoi a tâco awh teh vok thung vah a kêen awh. Voknaw teh pango dawh a tâto awh teh, talî dawh a kêphum awh teh, koug a due awh.

<sup>34</sup> Vok ka khounnaw ni a kêhmo e hno hah khopui khote koe lah a yawng awh teh a dei awh. <sup>35</sup> Tami moikapap teh hote hno khet hanelah a tho awh. Jisuh koe a tho awh nah kahraituilinaw ni a man e tami teh hni a kêkhu teh lung kacaicalah hoi Jisuh e khok koe a tahung e hah a hmu awh navah a taki awh. <sup>36</sup> Kahraituilinaw ni a man e tami a damnae kong hah kahmawtnaw ni alouke taminaw koe patuen a dei pouh awh. <sup>37</sup> Karasen ram dawh e taminaw pueng ni a taki awh dawkvah ahnimouh koehoi tâco hanelah Bawipa koe a kêhei awh. Bawipa hai long dawh a luen teh a ban.

<sup>38</sup> Kahraituilinaw pâlei pouh e tami ni kai hai nang koe kêbang van han telah a kêhei. <sup>39</sup> Jisuh ni nama im cet nateh, na imthungnaw koevah, Cathut ni nang koe pahrennae a sak e hah dei loe titeh a ban sak. Ahni ni a cei teh Jisuh ni a lathueng a sak e naw pueng kho thung a dei pouh.

*Kadout e napui hoi thikui e napui*

*Mat 19:18,26; Mrk 5:20-43*

<sup>40</sup> Jisuh teh a ban navah, taminaw pueng ni Bawipa ngaihawi laihoi a dawn awh. <sup>41</sup> Hatnavah, sinakok ka uk e Jairus tie Bawipa koe a tho teh a khok koevah a tabo. <sup>42</sup> Kum hlaikahni touh nueng ka phat e canu buet touh a tawn e meimei a due dawkvah, Jisuh a im vah tho hanelah a kaw teh a tho navah, taminaw teh Bawipa koe a kêen awh. <sup>43</sup> Hatnavah a kum hlaikahni touh thung thikui ni teh a hnopai pueng tâsibawi koe koug a pâbaw khai teh ka dam tai hoe e napui buet touh teh, <sup>44</sup> a hnuk lahoi a hnai teh a hni pawî a tek navah a tek tahma a thikuinae teh tang a dam. <sup>45</sup> Jisuh ni apimaw kai na tek, telah a pacei navah taminaw pueng ni a kâtang awh. Piter hoi a huinaw ni, Bawipa, tamihupui ni nang na kênep e hah kai apinimaw na tek khuet na ti vaw telah atipouh awh. <sup>46</sup> Jisuh



nihai, tami buetbuet touh ni kai na tek toe. Ka tak dawk hoi bahu a tâco e ka panue telah atipouh.

<sup>47</sup> Hote napui ni ka kâhrawk thai mahoei ti a kâpanue dawkvah, a pâyaw laihoi a tho teh bang patet e kong dawk maw a tek ti hai thoseh, tang a damnae kong hai thoseh, taminaw e hmalah a tabo teh a pâpho. <sup>48</sup> Jisuh ni, ka canu na lungpuen hanh. Na yuemnae ni na dam sak toe, lungmawngcalah hoi cet leih atipouh. <sup>49</sup> Telah atipouh navah, sinakok ka uk e im dawk hoi tami buet touh a tho teh, nange na canu a due toe. Saya teh tarawk hanh lawih atipouh. <sup>50</sup> Jisuh ni a thai navah, taket hanh awh. Yuemnae buet touh dueng mah tawn awh. Telah na tawn awh pawiteh yucatnae dawk hoi na hlout han telah sinakok ka uk e koe atipouh.

<sup>51</sup> Im dawk a pha navah, Piter, Jawhan, Jem hoi napui ca e a manu hoi a na pa hloilah apihai a kâen hoei nahanelah a cakâ. <sup>52</sup> Taminaw pueng ni a khuikakhai awh navah, Jisuh ni kap hanh awh. Camo teh dout hoei, ka ip e doeh, atipouh. <sup>53</sup> Napui ca a due e hah ahnimanaw ni a panue awh dawkvah, Bawipa teh a panuikhai awh. <sup>54</sup> Hote taminaw alawilah koug a tâco sak hnukku, camo e a kut a kuet pouh teh, camo thaw leih telah a kaw. <sup>55</sup> Hatnavah ahnie muitha teh a thung bout a kâen dawkvah camo teh tang a thaw. Hahoi rawca poe hanelah kâ a poe. <sup>56</sup> Hattoteh a manu hoi napanaw teh a kângairu awh. Hatei, hete hnongaw heh api koehai dei hoei hanelah lawk a thui.

## 9

### *A hnukkâbang hlaikahni touh a patounnae*

*Mat 10:5-15; Mrk 6:8-11*

<sup>1</sup> A hnukkâbangnaw hlaikahni touh a kamkhueng sak hnukku vah, kahraituilinaw pueng pâlei thainae hoi, kapatawnaw dam sak thainae bahu hoi kâtawnnae a poe. <sup>2</sup> Cathut uknaeram pâpho han hoi kapatawnaw dam sak hanelah a patoun teh, <sup>3</sup> kahlong na cei awh navah, bang hno hai kâken awh hanh, sonron, yawngya, vaiyei, phoisa sin awh hanh. Angki hai acawilah sin awh hanh. <sup>4</sup> Apipatet e im dawk hai na kâen awh navah, hote im dawk hoi na tâco hoei hroukrak hote im dawk awh awh. Apinihai im na luen sak awh hoei pawiteh, <sup>5</sup> hote kho dawk hoi na tâco awh navah, ahnimouh koe lah noutnae a kamnue thai nahanelah, na khok dawk e vaiphu hah lawkpanuesaknae lah ao nahan takhawng sin awh, telah atipouh. <sup>6</sup> A hnukkâbangnaw a tâco awh teh kho touh hoi kho touh kamthang kahawi a pâpho awh teh kapatawnaw a dam sak awh.

### *Jisuh kâhmo han ka ngai e Herod*

<sup>7</sup> Jisuh ni hno a sak e naw, Herod bawi ni a thai navah a lungkâounnae a tawn. Bangkongtetpawiteh tami tangawn ni Jawhan teh duenae koehoi a thaw toe ati awh. <sup>8</sup> Tami tangawn ni Elijah a tho toe ati awh, tangawn ni ayan e profet buetbuet touh a thaw toe ati awh. <sup>9</sup> Herod ni kai ni Jawhan e a lû ka tâtueng toe. Hatei, telah totouh a kamthang kai ni ka thai e tami teh bangpatet e tami ma aw a titeh Jisuh hmu hanelah a ngai.

### *Tami 5,000 bu pacanae*

*Mat 14:13-21*

<sup>10</sup> Gunceinaw teh Bawipa koe bout a tho awh teh amamouh ni a sak e hnongaw hah a dei pouh awh. Bawipa ni a kaw awh teh, Bethsaida kho teng soumtinae koe vah a hrawi. Tamihupui ni a panue awh teh a hnuk



a kâbang awh. <sup>11</sup> Hote taminaw teh Bawipa ni a kâbang sak teh, Cathut uknaeram kong a pâpho pouh. Kapatawnaw haiyah a dam sak.

<sup>12</sup> Khohmo navah, hnukkâbang hlaikahni touh ni Bawipa a hnai awh teh, hete hmuén teh kingdinae doeh, hatdawkvah ahnimanaw, o i thai nahane hoi canei thai nahanelah tenggam e khonaw koe cetsak lei sei atipouh awh. <sup>13</sup> Hatei Bawipa ni canei hane nangmouh ni poe awh atipouh. Ahnimanaw ni hai hete taminaw abuemlah hanelah canei hane ka ran awh hoehpawitech kaimouh koevah vaiyei panga touh hoi tanga kahni touh dueng doeh ka tawn awh, atipouh. <sup>14</sup> Hottelah atipouh ngainae teh, tami thong panga tabang a pha awh. Hatnavah taminaw 50 touh hoi pâkhueng nateh tahung sak awh, atipouh. <sup>15</sup> A hnukkâbangnaw ni hai a dei e patetlah a sak awh teh a tahung sak awh. <sup>16</sup> Jisuh ni vaiyei panga touh hoi tanga kahni touh e a la teh kalvan lah a moung teh lunghawinae lawk a dei hnukkhu vaiyei a raen teh tami rei hanelah a hnukkâbangnaw koe a poe. <sup>17</sup> Taminaw pueng ni a ca awh teh a boum hnukkhu vah, ka cawi e a pâkhueng navah tangthung hlaikahni touh akawi.

### *Piter ni Khrih a pâphonae*

<sup>18</sup> Hnin touh hnin vah Jisuh teh a hnukkâbangnaw hoi cungtaloh soumtinae koe a ratoum awh navah, taminaw ni kai api ati awh maw telah a pacei. <sup>19</sup> Tami tangawn ni nang teh Baptisma Jawhan, tangawn ni Elijah, tangawn ni a yan e profet buetbuet touh ka thaw e doeh telah ati awh. <sup>20</sup> Jisuh ni nangmouh ni teh kai api na ti a maw telah a pacei navah, Piter ni, nang teh Cathut e Khrih doeh atipouh.

### *Duenae koehoi boutthaw nahane kong sut a dei*

<sup>21</sup> Hote akong hah api koehai dei hoe hanelah a hnukkâbangnaw pueng hah kâ a poe. <sup>22</sup> Hothloilah tami Capa teh rucatnae moikapap a khang han. Tami kacuenaw, vaihma bawinaw hoi cakathutkungnaw ni, a hnoun awh vaitech a thei awh han. Apâthum hnin vah bout a thaw han telah atipouh.

### *Ma e thingpalam hrawm awh*

<sup>23</sup> Hathnukkhu hoi taminaw pueng koe a dei pouh e teh, kai hnukkâbang hane ka ngai e tami teh amahoima ka pahnawt naseh. Ama e thingpalam, hnintangkuem a hrawm vaitech kaie ka hnuk kâbang naseh. <sup>24</sup> Apihaiyah mae hringnae ka rungngang e tami teh hringnae a sung han. Apihaiyah Kai kecu daw k hringnae ka sung e tami teh a hringnae a rungngang han. <sup>25</sup> Tami ni talaiyan abuemlah koug ka coe nakunghai amae hringnae sung pawitech bangmaw aphu kaawm. <sup>26</sup> Apihai, kai hoi ka lawk kayakkhai e tami teh, tami Capa ni hai amae bawilennae, a na pa e bawilennae hoi kalvantami kathoungnaw e bawilennae sin hoi a kum toteh, hote tami hah a kayakhai van han. <sup>27</sup> Kai ni atangcalah na dei pouh e teh hete hmuén koe kaawm e tami tangawn ni Cathut uknaeram a hmu hoehnahlan dout awh mahoe rah telah atipouh.

### *Mei kâthungnae*

#### *Mat 17:1-8; Mrk 9:2-8*

<sup>28</sup> Hottelah a dei hnukkhu hnin taroe touh a pha navah Jisuh ni Piter, Jawhan, Jem a kaw teh ratoum hanelah mon daw k a luen awh. <sup>29</sup> Ratoum awh lahun nah, a minhmai aloukcalah a kâthung teh, angki hai pangawpekyek lah ao. <sup>30</sup> Hatnavah tami kahni touh hoi Bawipa teh lawk a kâpan, ahnimouh roi teh Mosi hoi Elijah doeh. <sup>31</sup> Ahnimouh teh bawilennae hoi a tho awh teh, Jerusalem vah kakuep han toung e Bawipa



a due nahane kong hah a kâpankhai awh. <sup>32</sup> Piter hoi a huinaw teh ihmu ni a paya awh teh mat a ngam awh. Ayawng vak awh navah, bawilennae hoi Bawipa hoi cungtalah kangdout e tami roi a hmu awh. <sup>33</sup> Hote tami roi Bawipa koehoi a cei navah Piter ni, Bawipa hete hmuen koe o hanelah ahawipoung. Bawipa, nang hanelah rim buet touh, Mosi hanelah buet touh, Elijah hanelah buet touh ka sak awh vai telah muipap lahoi a dei pouh.

<sup>34</sup> Telah a pacei hnukkhu, tâmai ni ahnimanaw teh a kayo. Mosi hoi Elijah teh tâmai thung a kâen navah, hnukkâbangnaw ni a taki awh. <sup>35</sup> Tâmai dawk hoi lawk ka tho e teh hete tami teh ka lungkuep e ka Capa doeh, ahnie lawk tarawi awh. <sup>36</sup> Hote lawk a tho hnukkhu, Jisuh teh ama dueng ao. A hnukkâbangnaw ni a hmu awh e hnonaw hah hatnae tueng dawk api koehai dei laipalah ao awh.

*Kahrai katâ e yuemnae bahu*

*Mat 17:14-18,22,23; Mrk 9:14-17,27,30-32*

<sup>37</sup> Atangtho hnin dawk mon hoi bout a kum awh navah taminaw ni Bawipa teh a dawn awh. <sup>38</sup> Tamihupui thung hoi tami buet touh ni kaie ka ka khen ei telah a kâhei. Ka capa buet touh dueng doeh ka tawn. <sup>39</sup> Kahrai ni a man teh, pouk laipalah a hramki, a sawn sak teh kâko dawk hoi potamtui a tâco teh, a tak dawk reithainae a poe hnukkhu tâco hane a ru poung. <sup>40</sup> Hote kahrai pâlei hanelah hnukkâbangnaw koe ka dei pouh eiteh, ahnimanaw ni pâlei thai awh hoeh telah hramki laihoi atipouh. <sup>41</sup> Jisuh ni hai yuemnae ka tawn hoeh e, lawkkam ka cak hoeh e, lam ka payon e miphun, kai ni na totouh maw na okhai awh han rah. Na capa kai koe thokhai haw telah atipouh. <sup>42</sup> Camo a tho navah kahraituili ni talai dawk a kâraphei sak hnukkhu a sawn sak. Jisuh ni kakhine muithanaw a yue teh hote camo a dam sak hnukkhu a na pa koe bout a poe.

*Apâhni lah a due nahan sut a deinae*

<sup>43</sup> Taminaw pueng ni Cathut e taluena e hmu navah a kângairu awh. <sup>44</sup> Telah Jisuh ni hno a sak e dawk taminaw pueng ni a kângairu laihoi pholen awh navah, a hnukkâbang koe kaie kâlawk tarawi nateh pâkuem awh. Tami Capa teh taminaw e kut dawk pahnawt nahane atueng a pha toe telah atipouh. <sup>45</sup> Hote lawk a dei ngainae hah, a hnukkâbangnaw hanelah a hro pouh dawkvah panuek thai awh hoeh. Hote lawk bout pacei ngam awh hoeh.

*Apimaw ka taluepoung*

*Mat 18:1-5; Mrk 9:33-40*

<sup>46</sup> Hatnavah a hnukkâbangnaw ni apimaw bet ka taluehnawn telah buet touh hoi buet touh a kâounkhai awh. <sup>47</sup> Jisuh ni ahnimae a pouknae a panue pouh teh, camo buet touh a kaw. Ama e ateng a kangdue sak hnukkhu, <sup>48</sup> apihai thoseh, kaie minhmai khet laihoi hete camo a dâw, hote tami teh kai hai na ka dâw e lah ao. Kai na ka dâw e teh kai na kapatoungka dâw e lah ao. Nangmouh thung dawk kathoungpoung e tami teh ka talue poung e lah ao han atipouh.

*Nangmouh koe lah kaawm e tami*

<sup>49</sup> Jawhan ni Bawipa, Bawipa, nange na min lahoi kahraituulinaw ka pâlei e tami buet touh ka hmu. Hote tami teh kaimouh hoi cungtalah kâbang ngaihoeh dawkvah ka ngang awh, telah a dei pouh. <sup>50</sup> Jisuh ni



hote tami ngang awh hanh. Nangmae na taran koe lah kaawm hoeh e tami teh nangmouh koe lah kaawm e doeh atipouh.

### *Jerusalem a ceinae*

<sup>51</sup> Bawipa teh kalvan lah tawm hane tueng a hnai navah, Jerusalem kho dawk a cei hane a radoung teh, <sup>52</sup> Patounenaw hmalah a patoun teh ahnimanaw ni Bawipa han rakueng hanlah a cei awh teh, Samaria kho buet touh dawk a kâen awh. <sup>53</sup> Jisuh ni Jerusalem kho koe lah a cei e hah, hote kho thung e taminaw ni ngai awh hoeh. <sup>54</sup> A hnukkâbang e jem hoi Jawhan ni a hmu navah Bawipa, Elijah ni a sak e patetlah maimouh ni kalvan hoi hmai bo sak vaiteh, ahnimanaw kak sak hanelah, na ngainae o maw telah a pacei awh. <sup>55</sup> Jisuh ni a kamlang teh, na pouknae namamouh ni na panuek awh hoeh. <sup>56</sup> Tami Capa teh tami e hringnae thei hanelah tho hoeh, rungngang hanelah doeh a tho telah a yue hnukkhu, kho alouklah a cei awh.

### *Jisuh hnuk kâbangnae*

#### *Mat 8:19-22*

<sup>57</sup> Lam dawk a cei awh navah, tami buet touh ni Bawipa, nang na ceinae pueng koe kai hai ka kâbang han telah atipouh. <sup>58</sup> Jisuh ni asuinaw ni khu a tawn. Kahlun e tavanaw ni hai tabu a tawn awh. Tami Capa teh lû toung nahan hmuen boehai awmhoeh telah atipouh.

<sup>59</sup> Bawipa ni alouke tami buet touh koevah ka hnukkâbang telah atipouh. Hatei, hote tami ni Bawipa apa hmaloe ka pakawp einei telah atipouh. <sup>60</sup> Ahni ni hai tami kadoutnaw ni a tami kadoutnaw hah pakawm awh naseh. Nang teh, cet nateh Cathut uknaeram hah pâpho leih, telah atipouh.

<sup>61</sup> Alouke tami buet touh ni Bawipa na hnuk ka kâbang han. Hateiteh ka imthungkhunaw hmaloe kut na man sak ei telah atipouh. <sup>62</sup> Jisuh ni laikaw kanawknae kuetai laihoi hnuklah kangvawi e tami teh Cathut uknaeram hoi kamcu hoeh, telah atipouh.

## 10

### *Tami 72 touh patounnae*

#### *Luk 9:3-5*

<sup>1</sup> Hathnukkhu hoi, Bawipa ni alouke tami 72 touh a rawi teh, a cei nahane kho tangkuem koe tami kahni kahni touh hoi hmaloe a patoun. <sup>2</sup> Bawipa ni ahnimouh koe, canga hanelah moi ao. Ka a e tami a younca. Hatdawkvah ka tawm hane tami a patoun thai nahanelah, law katawnkung koe ratoum awh. <sup>3</sup> Cet awh, asuihu koe tucanaw tha e patetlah kai ni na patoun awh. <sup>4</sup> Tangkabom, yawngya, khokkhawm sin awh hanh. Lam dawm na cei awh navah, apihai pato awh hanh.

<sup>5</sup> Api im hai thoseh, na kâen navah, hete im dawm yawhawinae awmseh telah hmaloe dei pouh awh. <sup>6</sup> Hote im dawm roumnae capa awm pawiteh, nangmouh ni na dei e yawhawinae teh ao han. <sup>7</sup> Cat net awh. Bangkongtetpawiteh ka tawm e tami teh kutphu hmu hanelah a kamcu. Im buet touh hnukkhu buet touh kampuen awh hanh.

<sup>8</sup> Bangpatet e kho dawm hai na kâen awh navah nangmouh na ka dawn e taminaw ni na hmalah a lawng awh e hah cat awh. <sup>9</sup> Kapatawnaw dam sak awh. Cathut uknaeram teh nangmouh dawm a kangdue nahan tueng a hnai toe telah dei awh. <sup>10</sup> Bangpatet e kho dawm hai na kâen navah, kho thung e taminaw ni pasoung hoehpawiteh lam dawm tâcawt awh nateh



na khok daw k e vaiphu takhawng sin awh. <sup>11</sup> Hatei, Cathut uknaeram teh nangmae teng a pha toe tie panuek awh, telah ahnimouh koe dei pouh. <sup>12</sup> Kai ni na dei pouh e teh ahnoungepoung e hnin nah hote kho teh Sodom kho hlak a khang han.

### *Pankângai hoeh e khopuinaw*

<sup>13</sup> Oe, Khorazin kho nang teh na yawthoe. Bethsaida nang hai na yawthoe. Bangkongtetpawiteh, nangmouh koe thaonae hno ka kamnue sak e hah Taire kho hoi Sidon kho daw kamnue sak pawiteh hote khonaw teh napon kâkhu awh vaiteh vaiphu a kâphuen laihoi a tahung awh vaiteh, pankângai awh han doeh toe. <sup>14</sup> Lawkcengnae hnin daw k teh Taire kho hoi Sidon kho hlak nangmanaw na khang awh han. <sup>15</sup> Oe, Kapernuam khopui, nang teh kalvan totouh na tawmdawm eiteh phuen totouh pabonae na khang han.

<sup>16</sup> Nangmae lawk ka tarawi e tami teh kaie lawk a tarawi. Nangmouh ka pahnawt e tami teh kai ka pahnawt e doeh. Kai ka pahnawt e tami teh kai na kapatoukung ka pahnawt e doeh telah atipouh.

### *A hnukkâbang 72 touh bout a ban*

<sup>17</sup> Hote a hnukkâbang 72 touh teh lunghawi laihoi a ban awh teh, Bawipa nange min lahoi kahraituulinaw patenghai ka pâlei thai awh, telah atipouh awh. <sup>18</sup> Jisuh ni hai Setan teh sumpapalik patetlah kalvan hoi a tho e hah ka hmu toe. <sup>19</sup> Nangmouh ni tahrin, aikamnaw lathueng kâtawnnae hoi tarannaw tâ thainae bahu kai ni na poe awh. Bangpatet e ni hai a rucatnae na poe mahoe. <sup>20</sup> Hatei, kahrainaw na pâlei thai awh daw k na konawm awh hanh. Nangmae na minnaw hah kalvan thut lah ao e daw k na konawm awh, telah atipouh.

### *Due hnukkhu boutthaw nahane sut a dei*

<sup>21</sup> Hatnavah Jisuh ni Kathoung Muitha daw k a konawm teh, kalvan hoi talai ka uk e apa, nang ni a lungkaang kathoumthainaw hanelah na hro pouh e hno, hete camonaw koe na pâpho pouh dawkvah ka lunghawi. Hottelah na ngainae ao daw k katang doeh apa!

<sup>22</sup> Kaie na pa ni hnocawngca pueng kai koe koug na poe toe. Capa hah apimaw telah a Pa hoeh laipalah apinihai panuek hoeh. Pa teh apimaw telah Capa hoi Capa ni a ang sak e tami hoeh laipalah apinihai panuek hoeh telah atipouh. <sup>23</sup> Hathnukkhu hoi a hnukkâbangnaw koe lah a kangvawi teh, atu na hmu e naw heh nangmouh ni na hmu awh dawkvah nangmae na mit teh a yawhawi. <sup>24</sup> Kai ni na dei pouh e teh, nangmouh ni na hmu e naw heh profetnaw hoi siangpahrangnaw ni hmu hane a ngai awh eiteh hmawt awh hoeh. Nangmouh ni na thai e naw hah thai han a ngai awh eiteh thai awh hoeh telah a hnukkâbangnaw koe dueng doeh, atipouh.

### *Samaria tami kahawi bangnueae*

#### *Mat 22:34-40; Mrk 12:25-31*

<sup>25</sup> Hnin touh hnin vah, kâlawk kacangkhaikung buet touh a kangdue teh, saya yungyoe hringnae hmu hanelah bangmaw ka sak han telah a tanouk. <sup>26</sup> Bawipa ni kâlawk cauk daw k bangtelamaw a thut. Bangtelamaw na touk telah a pacei navah, <sup>27</sup> Hote tami ni na Cathut teh na lunghin abuemlahoi, na thaonae abuemlahoi, na panuenae abuemlahoi na lungpataw han, na imri hah namahoima patetlah lungpataw telah atipouh. <sup>28</sup> Bawipa ni na dei e teh a tang doeh. Telah na sak pawiteh na hring han.



<sup>29</sup> Hote tami ni hai apipatet maw kaie ka imri telah amahoima yonnae ka tawn hoehe e patetlah Jisuh bout a pacei. <sup>30</sup> Jisuh ni tami buet touh teh Jerusalem kho dawkh hoi Jeriko kho lah a cei navah dingcanaw hoi a kâhmo. Dingcanaw ni hote tami e angki a phawi pouh teh meimei kadout lah a hem awh teh a ceitakhai awh. <sup>31</sup> Hote lamthung dawkh vaihma buet touh khoh a cei teh hote tami a hmu navah oun a roun. <sup>32</sup> Hot patetvanlah Levih tami buet touh ni hai hote hmuen koe a pha navah, ahni hah a hmu teh alouke lam lahoi a roun. <sup>33</sup> Hatei, Samaria tami buet touh kahlong a cei. Hote tami ka pataw koe a pha teh, a hmu navah, a pahren. <sup>34</sup> Ahni koe a hnai teh a hmânaw dawkh satui hoi misurtui a hluk pouh, lukkarei hoi a kawm pouh hnukkhu amae saring van a thueng teh rim koe a ceikhai teh a khetyawt. <sup>35</sup> A tangtho toteh denari kahni touh a rasa teh rim kaukkung koe a poe. Hete tami la khenyawn nateh ka baw e naw pueng bout ka tho torei na patho han telah atipouh. Bangtelamaw na pouk, telah a pacei.

<sup>36</sup> Hote tami kathum touh dawkh apimaw dingca kut dawkh ka phat e tami hoi ka kâhnai telah a pacei navah, <sup>37</sup> Kâlawk ka cangkhaikung nihai, ka pataw e tami ka pahren e telah atipouh navah, Jisuh ni nang hai cet nateh hottelah sak loe atipouh.

### *Meri hoi Martha*

<sup>38</sup> Jisuh teh a hnukkâbangnaw hoi kahlong lah a cei navah, kho buet touh dawkh a kâen awh teh, Martha tie napui buet touh ni ama im vah Bawipa teh a luen sak. <sup>39</sup> Hote napui ni Meri tie a nawnggha buet touh a tawn. Hote Meri teh Jisuh e a khok koe a tahung teh a dei e lawk a thai. <sup>40</sup> Martha teh pacapanei hane kong dawkvah a lungpuen teh, Jisuh koe Bawipa, ka nawnggha ni, ka madueng tawkh sak hanelah pak na nat e hah banglahai na pouk hoehe bo aw. Kai thaw na kabawp hanelah patoun haw telah atipouh. <sup>41</sup> Jisuh ni Martha, Martha, nang teh hno moikapap dawkh na kâhruetcueth teh thouk na patang toe. Hatei na panki e hno buet touh ao. <sup>42</sup> Meri ni hnokahawi yo a rawi toe. Apini hai bout lawm thai mahoehe toe.

## 11

### *Bawipa ratoumnae*

<sup>1</sup> Hahoi, hnin touh hnin vah, Bawipa teh hmuen buet touh koevah a ratoum teh a baw hnukkhu, a hnukkâbang buet touh ni Bawipa, Jawhan ni a hnukkâbangnaw ratoumnae a pâtu e patetlah kaimouh hai na pâtu awh haw telah atipouh. <sup>2</sup> Bawipa ni nangmanaw ni na ratoum awh navah na dei awh hane teh, kalvan kho kaawm e kaimae na Pa, na min barinae awm lawiseh, na uknaeram tho lawiseh. <sup>3</sup> Na ngainae teh kalvan kho akuiep e patetlah talai van hai kuep lawiseh, hnintangkuem von kawkh khuem rawka pou na poe haw. <sup>4</sup> Kaimae tak dawkh yonnae kasaknaw, kaimouh ni ka ngaithoum e patetlah kaimae ka yonnae hai na ngaithoum haw, yon tacueknae thung kaimanaw na hrawi hanh. Tamikahawihoehe koehoi na hlout sak haw telah tet awh, atipouh.

### *Het, Tawng, Takhawng haw*

<sup>5</sup> Hathnukkhu hoi bout a dei e teh, nangmouh thung dawkh tami buet touh ni a hui buet touh a tawn teh, karumasing vah hote a hui im a cei teh, ka hui, <sup>6</sup> kahlong lahoi ka hui buet touh a tho. Ka paca hane banghai ka tawn hoehe dawkvah vaiyei kathum touh na cawi sak ei telah atipouh.

<sup>7</sup> Imkung ni kai koe hrawang hanh, takhang hai ka khan toe, ka canaw



hai kOUNg a i awh tOUNg dawkvah ka thaw vaiteh na poe thai mahoeH telah imthungkhu hoi atipouh han. <sup>8</sup> Ka deingainae teh, hote tami teh a hui lah ao dawkvah, a lungpout laipalah a hei dawkvah a ngai e pueng a thaw vaiteh a poe han. <sup>9</sup> Bout ka dei ngainae teh het awh, na poe han. Tawng awh na pâphawng han. Tho takhawng awh, na takhawng pawiteh paawng pouh lah ao han. <sup>10</sup> Ka het e tami teh a poe. Ka tawng e tami teh a pâphawng. Ka takhawng e tami teh a paawng pouh.

<sup>11</sup> Apipatet e na pa ni maw a ca ni tanga moi a hei navah tahrUN moi ouk a poe boi. <sup>12</sup> Âdui a hei navah aikam moi ouk poe boi yaw. <sup>13</sup> Nangmanaw ni tami kahawihoeh lah na o awh nakunghai, na canaw poehno kahawi ouk na poe pawiteh hot hlakvah nangmae kalvanlae na Pa ni ka hete taminaw hah, Kathoung Muitha hoe poe mahoeH maw telah atipouh.

### *Jisuh hoi Beelzebub*

*Mat 12:22,24-29; Mrk 3:23-27*

<sup>14</sup> Hahoi hnin touh navah, a lawk ka a e kahrai a pâlei teh, kahrai a tâco hnukkhu lawka teh lawk a dei. Kamkhueng e taminaw teh a kângairu awh. <sup>15</sup> Tami tangawn ni hete tami ni kahraituilinaw e bawi Beelzebub e min lahoi doeh kahraituilinaw a pâlei ati awh. <sup>16</sup> A tangawn ni, tanouk hane a ngai awh teh, kalvan lahoi e mitnoutnae a hei awh.

<sup>17</sup> Bawipa ni ahnimaE lungthin a panue dawkvah, uknaeram hai buet touh hoi buet touh kâtaran pawiteh a kâkapek han. Hot patetlah imthungkhu hai kâpo hoehpawiteh a rawk han. <sup>18</sup> Kai ni Beelzebub e min lahoi kahraituilinaw ka pâlei pawiteh, Setan e uknaeram bangtelamaw a kangcoung thai han. <sup>19</sup> Kai ni Beelzebub e min lahoi kahraituilinaw ka pâlei tOUNg pawiteh nangmae na canaw ni teh apie min lahoi maw a pâlei awh han. Hatdawkvah ahnimanaw ni nangmanaw lawkcengkung lah ao han. <sup>20</sup> Kai ni Cathut e kutdawn hoi kahraituilinaw ka pâlei pawiteh, nangmouh koe Cathut uknaeram a kangduenae tueng teh a pha katang toe.

<sup>21</sup> A thakasai e ni senehmaica a puengcang kakuep lahoi amae toeim dawk ao navah, hnopainaw dawk lungtâsuenae awm hoeh. <sup>22</sup> Hatei ahni hlak thakasai e tami a tho teh pet a tâ torei doeh ahni ni kâuepkhai e senehmaica a puengcangnaw a la vaiteh, a tawn e hnopainaw hai ayânaw a rei han. <sup>23</sup> Kai hoi kaawm hoeh e tami teh kai na taran e doeh. Kai hoi cungtalah kamkhueng hoeh e tami teh kampek e doeh.

### *Kakhine muitha bout a ban*

<sup>24</sup> Kakhine muitha teh a tâco hnukkhu, a kâhat nahane hmuEN a tawng. A pâphawng hoeh dawkvah yampa ka onae im dawk ka ban han a titeh, <sup>25</sup> A tangtho navah, hote im teh a hOUNg teh apicai e a hmu. <sup>26</sup> Hat torei teh ama hlak ka mathout e muitha a hui sari touh a hrawi teh hote tami thung a kâEN awh. Hote tami teh hmaloe e hlak a hnukkhu e hoe a mathoe telah atipouh.

### *Yawhawinae katang*

<sup>27</sup> Hottelah a dei navah napui buet touh ni taminaw e a rahak hoi a dei e teh, Bawipa nang na ka vawn e napui hoi sanu na ka pânei e napui teh a yawhawi telah atipouh. <sup>28</sup> Jisuh ni Cathut e lawk ka thai ni teh ka tarawi e tami doeh a yawkahawi e tami telah atipouh.

### *Jawnah e mitnout*

*Mat 12:39-42*



<sup>29</sup> Hahoi tami muen a kamkhueng awh dawkvah, Bawipa ni hete miphun teh miphun kathout doeh. Mitnoutnae a hei navah, profet Jawnah e mitnoutnae hloilah, bangpatet e mitnoutnae hai kamnuek sak mahoe. <sup>30</sup> Jawnah ni Nineveh kho daw k e taminaw hanelah mitnoutnae lah ao e patetlah tami Capa hai hete miphunnaw hanelah ao han. <sup>31</sup> Lawkceng navah aka lae ram ka uk e siangpahrangnu ni hete miphun koe lah a kangdue vaiteh a sung sak han. Bangkongtetpawiteh hote siangpahrangnu teh Solomon e lungangnae lawk tarawi hanelah, talai pout koe lahoi a tho. Hete hmuen koe Solomon hlak ka talue e tami ao. <sup>32</sup> Lawkceng navah, Nineveh kho e taminaw teh hete miphunnaw hoi cungtalah a thaw vaiteh, hete miphunnaw a yonnae a kamnuek sak han. Bangkongtetpawiteh ahnimanaw teh Jawnah ni a dei e lawk daw k hoi pankangai awh. Hete hmuen koe Jawnah hlak kalen e tami ao.

*Tak e hmaiang*  
*Mat 6:22-23*

<sup>33</sup> Apinihai hmaim paang navah ouk ramuk bawi hoe, tangthung hoi hai ouk ramuk bawi hoe. Ka kâennaw ni angnae a hmu thai nahanelah, hmaimkhok daw k doeh ouk ta awh. <sup>34</sup> Na mit teh na takthai hanelah hmaim lah ao dawkvah na mit ang pawiteh na tak abuemlah a ang han. Na mitmawm pawiteh na tak abuemlah a hmo han. <sup>35</sup> Na tak daw k e angnae hah, hmonae lah na coun g sak hoe h nahan kâhruetcu et awh. <sup>36</sup> Puengcang buet touh boehai hmonae cakang lah awm laipalah, na tak abuemlah ang pawiteh, hmaim teh nangmouh a ang e patetlah na tak abuemlah koun g a ang han telah atipouh.

*Tami kahawi lah kâsak e naw*

<sup>37</sup> Hahoi hettelah a dei navah, Farasi tami buet touh ni bu ca hanelah a kaw teh caboi daw k a tahung. <sup>38</sup> Bu a ca hoe hnahlan kut kamsin hoe h e Farasi tami ni a hmu navah a kângairu. <sup>39</sup> Jisuh ni Farasi nangmanaw, awalah doeh manang, ailo na pâle awh. Athunglah teh hounlounnae, hawihoe hnae hoi doeh na kaw i awh. <sup>40</sup> Tamipathunaw, avan lae ka sak e Cathut ni athung lae hai sak hoe h maw. <sup>41</sup> Hot hlak hoe kahawi e teh, na sak thai toteh mathoenaw hah poe awh, telah na sak pawiteh hno puengpa ni na thounsak awh han.

<sup>42</sup> Farasinaw, nangmouh teh na yawthoe awh. Bangkongtetpawiteh, songpam, songkeng hoi anhlanaw totouh, pung hra pung touh na poe awh navah, lannae hoi Cathut lungpatawnae teh banglahai na noutna awh hoe h. Apasuek dei e naw hai cettakhai laipalah, a hnukkhu dei e naw hai tarawi awh.

<sup>43</sup> Farasinaw, nangmanaw teh na yawthoe awh. Bangkongtetpawiteh, sinak daw k ka talue e hmu en koehoi hno yonae koe vah ayâ ni bari e hah lung na pataw awh.

<sup>44</sup> Cakathutkungnaw hoi Farasinaw, kakâsaknaw teh na yawthoe awh. Bangkongtetpawiteh ka kamnuek hoe h e phuen hoi na kâvan awh. Hote tangkom van kacetnaw ni phuen ao e panuek awh hoe h telah atipouh.

<sup>45</sup> Hahoi kâlawk kacangkhaikung buet touh ni Bawipa telah pawiteh kaimouh hai yon na pen awh maw, telah atipouh navah, <sup>46</sup> Kâlawk kacangkhaikung, nangmouh teh na yawthoe awh. Bangkongtetpawiteh, phu thai hoe h e hno ayânaw van na patue awh. Namamouh teh kutdawn hoi boehai na tek awh hoe h.



<sup>47</sup> Nangmouh teh na yawthoe awh. Na mintoenaw ni a thei e profetnaw e phuen na sak awh. <sup>48</sup> Hatdawkvah nangmouh teh, na mintoenaw e nuencang na tarawi awh. Na mintoenaw ni profetnaw teh a thei awh toe. Nangmouh ni phuen na sak awh. <sup>49</sup> Hatdawkvah Cathut lungangnae ni profetnaw hoi gunceinaw hah ahnimanaw aonae koe patoun han. Ahnimanaw thung daw koe tami tangawn teh a pacekpahlek han, tangawn teh a thei awh han. <sup>50</sup> Hatdawkvah, Abel e a thi koehoi a kamtawng vaiteh, thuengnae hoi bawkim rahak vah a thei awh e Zekhariah e a thi totouh, talaivan kamtawngnae koehoi palawng tangcoung lah kaawm e profetnaw pueng e a thipaling phu teh hete miphunnaw koe ka suk han. <sup>51</sup> Kai ni atangalah ka dei e teh hete miphunnaw koe hote thipaling phu ka suk han telah kai ni ka dei.

<sup>52</sup> Kâlawk kacangkhainaw, nangmouh teh na yawthoe awh. Bangkongtetpawiteh panuenae cabi teh na kuem awh. Namamouh hai na kâen awh hoeh, kâen han kangainaw hai na ngang awh, telah atipouh.

<sup>53</sup> Hottelah taminaw koe a dei pouh navah, cakathutkungnaw hoi Farasinaw ni Bawipa daw koe yon a pen thai nahanelah, <sup>54</sup> a pawp awh teh lawk a dei e man thai nahane a tawng awh teh a konglam a cawngca a pacei awh.

## 12

### *Tami kahawi lah kâsaknaw kâhruetcuat poenae*

*Mat 10:26-33*

<sup>1</sup> Hatnavah, taminaw touklek thai hoeh lah a kamkhueng awh teh, a kâ katin kâ ka awi awh. Jisuh ni a hnukkâbangnaw koe a dei pouh e teh tami kahawi lah kâsaknae Farasinaw e ton hmaloe pasuek lah roun awh.

<sup>2</sup> Ramuk lah kaawm e naw pueng a kamawng han. Hro lah kaawm e naw pueng a kamphawng han. <sup>3</sup> A hmonae koe nangmouh ni na dei e naw pueng angnae daw koe a thai awh han. Nangmouh ni cawngket vah arulahoï hnâ koe lawknaw na dei e pueng lempu hoi pathang lah o han.

### *Cathut takinae*

<sup>4</sup> Ka huinaw, nangmouh koe ka dei e teh, tak ka thet ni teh alouke hno bout ka thet thai hoeh e taket awh hanh. <sup>5</sup> Bangpatet e tami maw na taki han tetpawiteh tak ka thet thai ni teh hell daw koe takhawng thai e hah taket awh. Atangalah na dei pouh awh. Hote tami hah taket awh. <sup>6</sup> Pusu panga touh e hah tangka kahni touh hoi na ran awh nahoehmaw. Hote pusu buet touh boehai Cathut ni pahnim hoeh. <sup>7</sup> Nangmae na sam hai abuemlahoi koung a touk. Hatdawkvah taket awh hanh. Nangmanaw teh pusunaw hlak aphu hoe na o awh.

### *Khrih kampangkhaïnae*

<sup>8</sup> Kai ni na dei pouh e teh apihai thoseh, taminaw e hmalah kai na kampangkhai. Cathut e kalvantami e hmalah tami Capa ni hote tami teh ka kampangkhai van han. <sup>9</sup> Apihai thoseh, taminaw e hmalah kai na hnoun, Cathut e kalvantami e hmalah kai ni ka hnoun van han. <sup>10</sup> Tami Capa pahni hoi ka dudam e tami teh ngaithoum lah ao thai rah. Kathoung Muitha ka dudam e tami teh nâtuëk hai ngaithoumnae hmawt thai mahoehtoe.

<sup>11</sup> Sinakok daw koe hai thoseh, ka ukkungnaw hoi kâ katawnnaw koe hai thoseh, nangmanaw hah na hrawi awh navah, bangmaw ka dei han tie



kângai awh hanh. <sup>12</sup> Bangkongtetpawiteh, bangtelamaw ka dei han tie hah atueng pha torei teh Kathoung Muitha ni na cangkhai han telah atipouh.

*Ka pathu e tangreng bawi bangnuenae*

<sup>13</sup> Tamimaya thung dawk e tami buet touh ni yah, Bawipa ka hmau ni râw kai hai na rei hanelah dei pouh haw telah atipouh navah, <sup>14</sup> Bawipa ni apinimaw nangmanaw râw rei hanelah kai na rawi a vaw telah a pacei. <sup>15</sup> Hathnukkhu hoi hounlounnae hah kâhruetcuete nateh roun awh. Bangkongtetpawiteh, hnopai tawn nakunghai hnopai daw khringnae awmhoeh telah ti pouh. <sup>16</sup> Bangnuenae lahoi bout a dei pouh e teh, ka tangreng e tami buet touh ni a paw moikapap ka tâcawt e talai kahawi buet touh a tawn. <sup>17</sup> Hote tangreng ni, cakang ka ta nahan hmuen awmhoeh toe, bangtelamaw ka ti han toung telah a lung thung a pouk. <sup>18</sup> Ka tâsongnaw ka raphoe vaiteh tâsong kalenpoung lah ka sak hnukkhu cakang hoi hno kahawinaw teh hote hmuen daw k ka pâtung han. <sup>19</sup> Ka muitha hanelah, nang ni kum moi kasawlah na hno hane hnopainaw koug ka pâtung toe. Duem kâhat lawih, cat net nateh nawm lawih telah ka ti pouh awh han. <sup>20</sup> Telah a pouk lahun navah Cathut ni tamipathu atu tangduem, nange muitha oun ka lat pawiteh, hnopai na kuem e naw apinimaw a pang han vaw telah tangreng koe atipouh. <sup>21</sup> Hot patetvanlah ma hanelah hnopai ka pâtung ni teh Cathut hmalah ka mathoe e tami teh hote tangreng bawi hoi doeh a kâvan telah a ti.

*Ngaihri hanh*  
*Mat 6:25-33*

<sup>22</sup> Hnukkâbangnaw koe bout a dei pouh e teh, hatdawkvah nangmouh ni bangtelamaw ka canei han telah hring nahanelah ngaihri awh hanh. Bangtelamaw ka khohna han telah na tak hanelah ngaihri awh hanh. <sup>23</sup> Rawca hlak hringnae aphu awm hoeh na maw. Khohna hlak na tak heh phu awm hoeh na maw. <sup>24</sup> Vonganaw khenhaw! Hote tavanaw ni cati hai patûe awh hoeh. Cang hai a awh hoeh. A pâtung nahane capainaw hai tawn awh hoeh. Hatei Cathut ni doeh koug a kawkhik. Nangmanaw teh hote tavanaw hlak aphu moi na o awh nahoehmaw. <sup>25</sup> Apini maw a ngaihri laihoi amae hringnae dong touh a pasaw thai han maw. <sup>26</sup> Telah kahoengpounge hnoca pateng na sak thai awh hoehpawiteh alouke hnonaw daw k bangkongmaw na ngaihri

<sup>27</sup> Kahrawngum e apeikungnaw bangtelah hoi maw a roun awh, tie khenhaw. Thaw hai taw k awh hoeh, hnicu hai kawng awh hoeh. Hateiteh Solomon siangpahrang e bawilenna ni hote apeikung buet touh boehai phat hoeh. <sup>28</sup> Yuemnae koe lah tha kayounnaw atu kahring ni teh tangtho takhuen koe ka phat e kahrawng e pho pateng Cathut ni hottelah a khohnat sak pawiteh, hot hlak nangmanaw teh na khohnat sak mahoe h maw. <sup>29</sup> Hatdawkvah bangtelamaw ka canei awh han tie pouk awh hanh. Na lung hai puen sak awh hanh. <sup>30</sup> Hote hnonaw teh talaivan miphun pueng ni ouk a tawng e doeh. Hote hnonaw, nangmouh ni na panki e hah nangmae na Pa ni a panue. <sup>31</sup> Nangmouh teh Cathut uknaeram ma hah tawng awh. Hahoi hote hnonaw teh na thap pouh awh han.

<sup>32</sup> Tuhunaw, taket awh hanh. Nangmae na Pa ni nangmanaw koe ram na poe hane a ngai. <sup>33</sup> Nangmae hnopainaw yawt awh nateh mathoenaw hah poe awh. Ka pawn thai hoeh e yawngya namamouh hanelah sak awh. Tamru ni a paruhoe hnae koe, ahri ni a raphoe hne hnae koe kalvan kho vah,



ka pout thai hoeh e râw kuem awh. <sup>34</sup> Bangkongtetpawiteh, nangmae râw onae koe nangmae lungthin pouknae hai poe ao han.

### *Bawipa bout tho nahane tueng kâra kuengnae*

<sup>35</sup> Taisawm kacaklah kâyeng nateh hmaiim sut paang awh. <sup>36</sup> Yuvâ kâpaluennae pawî koe hoi a bawipa a tho toteh, tho takhawng navah tang paawng pouh thai nahanelah sut ka ring e san patetlah awh awh. <sup>37</sup> Bawipa bout a tho toteh, kâhruetcueth lai hoi a ring tie bawipa ni a hmu e san teh a yawhawi. Kai ni lawkkatang na dei pouh e teh, a bawipa ni taisawm a kâyeng teh a sannaw a tahung sak teh, ama ni rawca a paca han. <sup>38</sup> Apâhni e tueng, hoi apâthum e tueng nah Bawipa a tho nah hottelah ka ring e sannaw hah hmawt pawiteh, ahnimouh teh a yawhawi awh. <sup>39</sup> Imkung ni tamru a tho nahane atueng panuek pawiteh ama im a muk thai hoeh na hanelah a ring han tie hah nangmouh ni na panue awh.

### *Yuemkamcu e san*

<sup>40</sup> Hatdawkvah nangmouh ni coungkacoe lah ring awh. Bangkongtetpawiteh nangmanaw ni na poukhoehnae atueng dawkw tamî Capa teh a tho han telah atipouh.

<sup>41</sup> Piter ni Bawipa hete bangnuenae heh kaimouh hane dueng maw na dei, taminaw pueng hanelah maw na dei telah a pacei. <sup>42</sup> Jisuh ni imkung ni a imthungnaw hanlah atueng pha toteh canei ka rei hanelah a rawi e tamî yuemkamcu e hoi a lungkaang niteh, ka kuepcing e san teh apimaw. <sup>43</sup> Bawipa bout a tho navah hottelah kaawm e san teh a yawhawi. <sup>44</sup> Lawkkatang na dei pouh e teh bawî ni amae hnopai a tawn e naw pueng a san koe a kuem sak han. <sup>45</sup> Hateiteh, hote san ni Bawipa tho hnai mahoe telah a pouk teh amae a san huinaw napui tongpanaw hoi a kâhem awh teh a canei awh teh a parui awh. <sup>46</sup> Hote san ni a poukhoehnae hnin, a panuehoehnae tueng dawkw Bawipa tho pawiteh hote san teh puenghoi yonphu a khang vaiteh yuemkamcu hoeh e taminaw hoi cungtalâh ao sak han.

<sup>47</sup> Ama e a bawipa ngainae a panue nahlangva vah, kâhruetcueth lah kaawm hoeh e san teh avai moikapap hem lah ao han. <sup>48</sup> Hatei, ka panuek hoeh e teh younca doeh hem khâi han. Moikapap poe e ni moikapap a patho han. Moikapap kuem sak e koe moikapap hei lah ao han.

### *Kâkapek sak hanlah thonae*

<sup>49</sup> Talai van hmai kak sak han doeh ka tho. Hmai ka kang tangcoung e lah o han ka ngainae hoe ao. <sup>50</sup> Hatei, ka coe hane baptisma buet touh ao rah. Hote Baptisma ka hmu hoehroukrak banghloimaw ka lungrei a thai. <sup>51</sup> Talai dawkw roumnae poe hanelah kai teh ka tho telah na pouk awh maw. Hottelah nahoe. Buet touh hoi buet touh kâkapek sak hanelah doeh ka tho telah a ti. <sup>52</sup> Bangtelamaw tetpawiteh, atu hoi teh tamî panga touh kaawm e im dawkvah, kathum touh ni kahni touh e a taran vaiteh, kahni touh ni kathum touh e hah a taran han. <sup>53</sup> A na pa ni a capa, a capa ni a napa, a manu ni a canu, a canu ni a manu, a mani ni a langa, a langa ni a mani a taran vaiteh a kâkapek awh han.

### *A tue panue thainae*

<sup>54</sup> Tamimaya koe bout a dei pouh e teh nangmouh ni kanîloun lah tâmai a tho e na hmu awh navah khorak han doeh telah na ti awh. Na dei awh e patetlah a rak. <sup>55</sup> Aka lahoi kahli tho e na hmu navah khumbei a thoe han doeh na ti awh. Na dei awh e patetlah bokheiyah. <sup>56</sup> Tamikahawi lah ka



kâsaknaw nangmouh ni talai hoi kalvanlae mitnoutnae na kapek awh teh na panue thai awh. Bangkongmaw a tue na kapekkaboe thai awh hoeh vaw. <sup>57</sup> Hothloilah bangkongmaw katang e hno hah namamouh lungpouk na panue thai awh hoeh vaw.

### *Kâmaihawinae*

<sup>58</sup> Nang na ka toe e hoi lawkcengkung koe reirei na cei navah, lam vah ahni hoi hnâbonae na sak thai nahanelah panki awh. Telah na sak hoehpawiteh ahni ni nang teh lawkcengkung bawi koe na hrawi vaiteh lawkcengkung ni karingkungnaw kut dawk na poe vaiteh karingkungnaw ni thongim na pabo han. <sup>59</sup> Tangka pueng koug na patho hoehroukrak thongim thung hoi na tâcawt mahoehtelah kai ni ka dei.

## 13

### *Ronae*

<sup>1</sup> Hatnavah, tami tangawn a tho teh Pailat bawi ni Galilee tami tangawn e a thi teh amamouh hoi amamae thuengnae hoi kâkalawt toe ti teh a dei pouh awh. <sup>2</sup> Jisuh ni hote Galilee taminaw teh hottelah a khang awh dawkvah alouke Galilee taminaw pueng hlak hoe a yon awh, telah na pouk a maw. <sup>3</sup> Hoe yon awh hoeh, nangmouh hai pan na kângai awh hoehpawiteh rawknae dawk na pha awh han telah a dei pouh. <sup>4</sup> Hothloilah, Siloam imrasang ni a rawp sin nah kadout e tami hlaitaroe touh teh Jerusalem kho thung e naw pueng hlak hoe a yonnae ao telah na pouk awh maw. <sup>5</sup> Hoe yon awh hoeh, nangmouh hai yon pan na kângai awh hoehpawiteh rawknae dawk na pha awh han telah bout a dei pouh.

### *Ka paw hoeh e thaibunglung bangnueae*

<sup>6</sup> Bangnueae bout a dei e teh tami buet touh ni takha dawkvah a ung e thaibunglung buet touh ao. Hote a kung koe a tho teh a paw a tawng ei hmawt hoeh. <sup>7</sup> Hatnavah takha ka ring e koe kum thum touh thung hete thaibunglung koe ka tho teh a paw ka tawng ei kahmawt bawi hoeh. Lawt tâ tueng leih, bangkongmaw talai runae na poe telah kâ a poe teh takhakaringkung ni Bawipa takum teh awm ei naseh atipouh. <sup>8</sup> Kai ni a kung tengpam ka tai vaiteh talai kahawi ka poe han rah, <sup>9</sup> Palawng vah a paw bout paw hoehpawiteh tâtueng yawkaw lawih atipouh.

### *Sabbath hnin ka pataw e a dam sak*

<sup>10</sup> Jisuh ni sabbath hnin vah sinakok dawc cangkhae na sak navah, <sup>11</sup> a kum hlaitaroe touh thung kahrai ni a man teh patawnae ka tawn e napui buet touh ao. Hote napui teh a hnamthun teh kangdout thai hoeh. <sup>12</sup> Jisuh ni hote napui a hmu navah ama koe a kaw teh nange napui, nang teh na patawnae dawc hoi na hlout toe telah kâ a poe navah, <sup>13</sup> ahni dawkvah a kut a toungeh ahni teh tang a kangdue thai teh Cathut a pholen.

<sup>14</sup> Hottelah sabbath hnin Jisuh ni patawnae a dam sak dawkvah sinakok kaukung a lungkhuek teh thaw tawknae hnin hnin taruk touh ao, hote hnin dawkvah patawnae dam hanelah tho awh. Sabbath hnin tho a hanh telah tamihu koe a dei pouh. <sup>15</sup> Jisuh ni tami kadumyennaw nangmanaw ni sabbath hnin vah marang, maitonaw hah a im dawc na ta awh teh tui nei hanelah ouk na hrawi awh nahoehmaw. <sup>16</sup> Abraham e canu kum hlaitaroe touh thung Setan ni a katek e napui heh sabbath hnin vah hlout sak thai mahoehtelah maw telah atipouh. <sup>17</sup> Hottelah a dei hnukkhu Bawipa



ka taran e naw pueng teh yeirai a po awh. Bawipa ni kângairu hnonaw a sak e hah taminaw pueng ni a konawm awh.

*Antam mu hoi ton bangnuenae*

*Mat 13:31-33; Mrk 4:30-32*

<sup>18</sup> Cathut uknaeram teh bang hoi maw a kâvan, bang hoi maw bout ka bangnue han telah atipouh. <sup>19</sup> Tami buet touh ni hote antam mu hah a la teh, a takha daw k a younca maw kaawm telah a pacei. <sup>24</sup> Hatnavah kabueng e takhang daw kâen hanelah panki awh. Bangkongtetpawiteh tami kapap ni kâen han a ngai ei teh kâen thai hoeh telah kai ni ka dei. <sup>25</sup> Imkung ni takhang a khan hnukkhu teh nangmouh ni alawilah kangdue laihoi, tho na takhawng awh teh Bawipa, Bawipa kaimouh hane tho paawng ei na ka tet awh nakunghai Bawipa ni nangmanaw nâ hoi ka tho e maw, kai ni na panuek awh hoeh telah bout ati pouh awh han. <sup>26</sup> Hatnavah nangmouh ni kaimanaw teh nama hoi cungtalalah ka canei awh toe. Kaimouh kho vah nama ni cangkchainae na sak toe telah na dei ei nakunghai, <sup>27</sup> Bawipa ni nangmanaw teh nâ hoi ka tho e maw kai ni na panuek awh hoeh. Hawihoehnae hno na ka sak e taminaw kai koehoi tâcawt awh telah nangmouh koe ati han. <sup>28</sup> Hatnavah Abraham, Isak, Jakop hoi kamtawng vaiteh profetnaw pueng ni Cathut uknaeram daw k a kâen han, nangmanaw teh alawilah pâlei lah na o awh vaiteh khuikanae, hâ katanae hmuen koe na o han. <sup>29</sup> Hatnavah kanîtho, kanîloum, atung, aka lahoi tho awh vaiteh Cathut uknaeram thung a tahung awh han. <sup>30</sup> Hnuk ka teng e tami hma a hman han. Hma ka hman e tami hnuk a teng han, telah atipouh.

*Kabueng e takhang*

<sup>22</sup> Hatnavah Jisuh teh kho tangkuem a cei teh cangkchainae a sak teh Jerusalem kho lah a cei. <sup>23</sup> Tami buet touh niyah Bawipa rungngang lah kaawm e tami a younca maw kaawm telah a pacei. <sup>24</sup> Hatnavah kabueng e takhang daw kâen hanelah panki awh. Bangkongtetpawiteh tami kapap ni kâen han a ngai ei teh kâen thai hoeh telah kai ni ka dei. <sup>25</sup> Imkung ni takhang a khan hnukkhu teh nangmouh ni alawilah kangdue laihoi, tho na takhawng awh teh Bawipa, Bawipa kaimouh hane tho paawng ei na ka tet awh nakunghai Bawipa ni nangmanaw nâ hoi ka tho e maw, kai ni na panuek awh hoeh telah bout ati pouh awh han. <sup>26</sup> Hatnavah nangmouh ni kaimanaw teh nama hoi cungtalalah ka canei awh toe. Kaimouh kho vah nama ni cangkchainae na sak toe telah na dei ei nakunghai, <sup>27</sup> Bawipa ni nangmanaw teh nâ hoi ka tho e maw kai ni na panuek awh hoeh. Hawihoehnae hno na ka sak e taminaw kai koehoi tâcawt awh telah nangmouh koe ati han. <sup>28</sup> Hatnavah Abraham, Isak, Jakop hoi kamtawng vaiteh profetnaw pueng ni Cathut uknaeram daw k a kâen han, nangmanaw teh alawilah pâlei lah na o awh vaiteh khuikanae, hâ katanae hmuen koe na o han. <sup>29</sup> Hatnavah kanîtho, kanîloum, atung, aka lahoi tho awh vaiteh Cathut uknaeram thung a tahung awh han. <sup>30</sup> Hnuk ka teng e tami hma a hman han. Hma ka hman e tami hnuk a teng han, telah atipouh.

*Jisuh hoi Herod*

<sup>31</sup> Hatnavah Farasi tami tangawn Bawipa koe a tho teh, Herod bawi ni Bawipa nang thei hanlah a ngai dawkvah hie hmuen koehoi tâcawt leih atipouh. <sup>32</sup> Bawipa ni cet awh nateh hote asui koe dei pouh awh. Kai teh sahnin tangtho kahrailuulinaw ka pâlei vaiteh, patawnae karoumsak han, apâthum hnin thaw ka cum han. <sup>33</sup> Hateiteh, sahnin, tangtho, tawkkahnin e a hninnaw dawkvah kahlawng ka cei han rah. Bangkongtetpawiteh, Jerusalem lawi lah alouke hmuen koe bangpatet e profet nakunghai a due tie awm thai hoeh.

*Jerusalem kho hanlah Jisuh a ka*

*Mat 23:37-39*

<sup>34</sup> Oe, Jerusalem, Jerusalem, nang teh profetnaw pou na thei. Nang na onae koe patoun e taminaw hai talung hoi pou na dêi. Âpui ni a canaw a rathei rahim vah, koug a ramuk e patetlah nange na canaw pakkhueng hanelah avai moikapap lah na ngaikhai ei, nang ni na ngai hoeh. <sup>35</sup> Nangmouh na onae im teh tami kingkadi lah ao han. Kai ni ka dei e teh Cathut e ngainae lahoi ka tho e tami teh yawhawinae awm



lawiseh telah nangmouh ni na dei hoeh roukrak atu hoi teh nangmouh ni kaie minhmai na hmawt mahoei telah atipouh.

## 14

### *Sabbath hnin dawk kâounnae*

<sup>1</sup> Jisuh teh sabbath hnin vah bu ca hanelah Farasi bawi buet touh im a kâen teh, hatnavah ahnimouh ni Bawipa teh a tuet awh. <sup>2</sup> A hmalah phing patawnae ka tawn e tami buet touh teh ao. <sup>3</sup> Sabbath hnin patawnae dam sak han maw telah Farasinaw hoi cakathutkungnaw hah Jisuh ni a pacei navah, <sup>4</sup> ahnimouh teh lawkkamuem ao awh. Jisuh ni hote tami a kaw teh patawnae dawk hoi hlout sak hnukkhu bout a tha. <sup>5</sup> Hathnukkhu ahnimanaw koe, sabbath hnin vah na capa hoehpawiteh na maito tangkom dawk bawt pawiteh rasat laipalah apimouh na kaawm awh han telah a pacei. <sup>6</sup> Ahnimouh ni lawk kam touh boehai pathung thai awh hoeh.

### *Kârahnoum hanlah cangkhaiae*

<sup>7</sup> Hatnavah kaw e tami teh bari kaawm e tahungnae dawk a rawi awh e hah a hmu torei teh ahnimanaw han bangnueae a dei pouh. <sup>8</sup> Tami ni yuvâ kâpaluennae paw i koe nang na kaw navah bari kaawm e hmuen koe tahung hanh. Hottelah na tahung pawiteh nang hlak ka talue e tami paw i koe tho paw i teh, <sup>9</sup> nangmouh ka kaw e tami ni hete tami hmuen poe leih telah a dei han. Hatnavah nang teh yeiraipo hoi ka rahnoum e hmuen koe na kum han. <sup>10</sup> Tami ni nang na kaw navah cet nateh ka rahnoum e hmuen daw k tahung. Hottelah na awm pawiteh nang ka kaw e tami a tho navah ka hui haw e hmuen koe luen telah ati han. Hatnavah nang hoi cungtalah ka tahung e taminaw hmalah nang teh bari e lah na o han. <sup>11</sup> Amahoima kârasang e tami teh rahnoum sak lah ao vaiteh, amahoima kârahnoum e tami teh rasang sak lah ao han atipouh.

<sup>12</sup> Jisuh ni ama ka kaw e tami koe bout a dei pouh e teh nang ni amombu, tangminbu na paca navah huikonaw, hmaunawngghanaw, miphunnaw hoi ka tawnta e intenglawpamnaw na kaw mahoei. Hottelah na kaw pawiteh a hnuk khu torei nang bout na kaw awh vaiteh na patho awh han. <sup>13</sup> Paw i na to navah ka mathoe e tami, kuepcing hoeh e tami, a khokkhem e tami hoi a mit ka dawn e taminaw hah kaw awh. <sup>14</sup> Hottelah na kaw pawiteh yawhawinae ao han. A lamthung teh hote taminaw ni na patho thai hoeh e lah ao dawkvah tami kalannaw a thawnae tueng dawkvah nang teh patho lah na o han telah atipouh.

### *Tangminbu canae paw i bangnueae*

#### *Mat 22:2-14*

<sup>15</sup> Caboi koe ka tahung e tami buet touh ni hote lawk a thai navah Cathut uknaeram paw i daw k kâen e tami teh yawhawinae ao telah a dei navah, <sup>16</sup> Jisuh ni tami buet touh teh ka talue poung lah paw i a sak teh taminaw pueng a kaw. <sup>17</sup> Pawitonae tueng a pha toteh kaw tangcoung e taminaw koe tami a patoun teh, tho awh bangpuengpa coungkacoe lah ao toe telah a thai sak.

<sup>18</sup> Kaw kamcu e taminaw pueng ni a panuiparingkhai awh. Buet touh ni kai im hmuen ka ran. Ka cei vaiteh ka khet han. Kai na ngaithoum ei telah a kahei. <sup>19</sup> Buet touh ni kai maito bo panga touh ka ran toe. Ka cei vaiteh ka tanouk han rah. Kai na ngaithoum ei telah a kâhei. <sup>20</sup> Buet touh ni kai ka yu hoi ka paluen toe. Hatdawkvah kai ka tho thai mahoei.



<sup>21</sup> A san ni bawipa koe bout a tho teh hote akongnaw a dei pouh. Hatnavah imkung a lungkhuek teh, kho thung lam teng lam rahak kaawmnaw, mathoenaw, kuepcinghoehnaw, khokkhemnaw hoi mitdawnnaw pueng kaw telah a san koe a dei pouh. <sup>22</sup> A san ni hai Bawipa kâ na poe e patetlah ka sak toe. Hatei tahung nahane hmuen ka houng e ao rah telah a dei pouh.

<sup>23</sup> Hahoi, Bawipa ni kho lawi, lam daw, takha teng cet ei, kaie im daw muen akawi thai nahan koug kaw lawih. <sup>24</sup> Hmaloe kaw e taminaw buet touh hai kaie tangminbu patek mahoe telah a san koe a dei pouh, telah atipouh.

### *Pahnawtnae hoi a hnukkâbangnae*

<sup>25</sup> Hathnukkhu tamihupui teh Bawipa hnuk a kâbang awh teh, a kamlang sin teh a khet navah, <sup>26</sup> apihai amae manu, napa, yuca, hmaunawngghanaw dueng laipalah amae hringnae patenghai pahnawt hoehpawiteh, ka hnuk kâbang lah awm thai hoeh. <sup>27</sup> Ama e thingpalam hrawm hoi ka hnuk kâbang hoeh e tami teh ka hnuk kâbang e lah awm thai hoeh. <sup>28</sup> Nangmouh thung dawkvah tami buetbuet touh ni, imrasang sak hanlah ngai pawiteh, hote im a cum totouh phoisa a khout hoi a khout hoeh e hah hmaloe tahung vaiteh, to laipalah ao han namaw. <sup>29</sup> Hottelah to laipalah hoi khomkhu a tapu teh im cum thai hoehpawiteh ka hmawt e pueng ni a pathoe awh han nahoehmaw. <sup>30</sup> Hete tami ni a kamtawng eiteh cum thai hoeh telah a pathoe awh han. <sup>31</sup> Hothloilah siangpahrang buet touh ni alouke siangpahrang hoi kâtuk han ati navah, ransa 20,000 touh hoi ka târun e hah, ransa 10,000 touh hoi tâ hoi tâ hoeh hane hmaloe pouk mahoe maw. <sup>32</sup> Tâ thai mahoehtetpawiteh alouke Siangpahrang ahlanae koe ao lahun navah laicei a patoun vaiteh roumnae ao thai nahan ngaithoumnae a hei han na vaiyaw. <sup>33</sup> Hot patetlah nangmanaw pueng hai mae tawn e hnopainaw pueng na cettakhai hoehpawiteh kaie ka hnuk kâbang lah na awm thai hoeh.

### *Palawi teh paan hoehpawiteh aphu awmhoe*

#### *Mat 5:13*

<sup>34</sup> Palawi teh ahawi. Hatei palawi teh a paannae kahmat pawiteh bangtelah hoi maw bout paan thai han. <sup>35</sup> Talai hanelah thoseh, ei lahai thoseh, hawikhangnae ao hoeh toung dawkvah, alawilah ouk a tâkhangnaw awh. Thai nahane hnâ ka tawn e tami ni thai naseh telah atipouh.

## 15

### *Tu kahmat e bangnuenae*

#### *Mat 18:12-14*

<sup>1</sup> Tamuk kacawngnaw hoi tamikayonnaw ni Bawipa e cangkhaenae thai hanelah ama koe a tho awh. <sup>2</sup> Farasi hoi cakathutkungnaw niyah hete tami teh tamikayonnaw hoi rei a o, ahnimouh hoi cungtalah bu rei a ca telah yon a pen awh. <sup>3</sup> Hatnavah bangnuenae lawk a dei e teh nangmouh daw tami buetbuet touh ni tu cum touh a tawn. <sup>4</sup> Hotnaw thung daw e tu buet touh kahmat pawiteh 99 touh e tunaw hah kahrawngum a ta vaiteh kahmat e tu buet touh a hmu hoeh roukrak a cei teh tawng laipalah ao han maw. <sup>5</sup> A hmu torei teh a lunghawi teh a loung daw a thueng teh, <sup>6</sup> im a pha torei teh a huikonaw hoi a imrinaw a kaw teh kahmat e tu bout ka hmu toe, cungtalah konawm khai awh haw telah a dei han. <sup>7</sup> Hot patetlah pankângai han ka tawn hoeh e tami 99 touh hlakvah pankângai



e tamikayon buet touh koe kalvan vah a lunghawinae bet ao hnawn telah a ti.

### *Ngun tangka kahmat e bangnueae*

<sup>8</sup> Hottelah napui buet touh ni phoisa phek hra touh a tawn. Phek touh kahmat pawiteh hmai paang vaiteh a hmu hoeh roukrak imthungkhu imka pâthoun vaiteh kahawicalah tawng laipalah ao han maw. <sup>9</sup> A hmu torei teh a huikonaw hoi imrinaw a kaw vaiteh kahmat e phoisa bout ka hmu toe, cungalal konawm khai awh haw telah ati han. <sup>10</sup> Hot patetvanlah, Cathut e kalvantaminaw ni pankângai e tamikayon buet touh dawkvah lunghawinae a tawn awh, telah atipouh.

### *Capa kahmat e hoi bangnueae*

<sup>11</sup> Bout a dei e teh tami buet touh ni ca tongpa kahni touh a tawn, <sup>12</sup> A ca cahnounng ni a na pa koe a cei teh apa, ka hmu hane kawî râw na kapek pouh leih telah a kâhei teh a na pa ni hnopainaw pueng a kapek teh a poe. <sup>13</sup> Hathnukkhu hoi a ca cahnounng ni amae hnopainaw pueng a la teh kahlatpoung e ram dawkwah a cei teh hote ram dawkvah talai nawmnae dawkwah a ngai patetlah kho a sak teh hnopainaw pueng kOUNg a kaseikasak. <sup>14</sup> A tawn e hnopai kOUNg a pâbaw hnukkhu hote ram dawkwah takang puenghoi a tho teh puenghoi roedengnae koe a pha. <sup>15</sup> Hatdawkvah hote ram dawkwah tami buet touh koe o hanelah a cei teh hote tami ni vok ring hanelah a patoun. <sup>16</sup> Ahni teh vok rawca patenghai ca hane ngai totouh a vonhlam, hatei apinihai rawca banghai poe awh hoeh.

<sup>17</sup> Hatnavah a lung vuk a ang teh apa im vah apu hmu hanelah hoi a ta e a sannaw ni boeba hai cat laipalah a hane a tawn, kai teh hivah vonhlam hoi ka o. <sup>18</sup> Ka thaw vaiteh apa koe ka cei han. Apa, kai ni kalvan hoi na hmaitung vah ka yon toe. <sup>19</sup> Na ca ti hanelah ka kamcu hoeh. Na san buet touh lah o hanelah na tat lawih ka ti han a ti. <sup>20</sup> Hatdawkvah, a na pa koe ban hanelah a kamthaw. Lam ahlapOUNgnae koe a tho e a na pa ni a hmu navah a pahren dawkwah a yawng sin teh a takawi teh a paco.

<sup>21</sup> A capa ni vah a Pa kalvan koe thoseh, na hmaitung thoseh, ka yon toe. Na ca ti han ka kamcu hoeh toe telah a ti. <sup>22</sup> A na pa ni vah apu kaawm poung e angki lat nateh kho sak awh, a kut dawkwah kuthrawt buen sak awh. <sup>23</sup> Khokkhawm hai khawm sak awh, hahoi Maito ca kathâwpoung e lat nateh thet awh, kanawm poung lah pawî sak awh sei. <sup>24</sup> Bangkongtetpawiteh ka capa teh a due toe, hatei atu bout a hring. A kahma, hateiteh atu bout ka hmu toe ati. Hottelah hoi pawî teh a kamtawng awh.

<sup>25</sup> A capa kacue ni law hoi a ban teh im teng a pha navah ratOUNg tamawî lawkwah hoi lamtu e a thai. <sup>26</sup> A san buet touh a kaw teh bangmaw na sak awh, telah a pacei. <sup>27</sup> A san ni vah na nawngka ka dam lahoi im bout a tho dawkvah, na pa ni maito ca kathâw e a thei pouh telah atipouh. A capa kacue e teh a lungphuén teh im dawkvah kâen laipalah ao.

<sup>28</sup> A na pa ni capa kacue koe a cei teh kâen leih telah a pasawt. <sup>29</sup> A capa kacue ni hai kai ni atueng moi kasawlah apa, nange san patetlah thaw ka tawkwah, vai touh boehai nange kâpoelawkwah ka tapoe hoeh. Hateiteh kai ni ka huinaw hoi cungalal nawmnae sak hanelah hmae boehai na poe hoeh.

<sup>30</sup> Ka kâyawt e napuinaw hoi kaawm ni teh na hnopai kaseikasak e na ca cahnounng, im bout a pha torei teh maito ca kathâw kathâw na thei pouh telah a ti. <sup>31</sup> A na pa ni, ka ca nang teh ka im vah yungyoe na o teh ka



tawn e hnopueng nange hno lah ao. <sup>32</sup> Hatei na nawnggha teh a due eiteh, atu bout a hring. A kahma eiteh atu bout hmu toe. Hatdawkvah lunghawi khai hane roeroe lah ao telah a na pa ni atipouh.

## 16

### *Hnopai ka kuem e tamipathu bangnuenae*

<sup>1</sup> Jisuh ni a hnukkâbangnaw koe bout a dei pouh e teh, hnopai ka tawnta poung e bawi buet touh ao. Hote bawi ni hnopai ka kuem hane tami buet touh a tawn. Hote hnopai ka kuem e ni hnopai a kaseikasak telah bawi koe ka dei pouh e tami ao dawkvah, <sup>2</sup> bawi ni ahni hah a kaw teh nange kong ka thai e heh bangtelah na maw. Ka hnopainaw na hno e cayin ka kuep lah na poe haw. Bangkongtetpawiteh ka hno ka khen e tami lah na awm thai hoeh toe telah atipouh. <sup>3</sup> Hatnavah Bawipa ni kai teh thaw daw k hoi na tâco sak toe, bangmaw ka taw k han. Laikaw k taw k hane hai ka taw k thai hoeh, ayâ koe kutdaw hane hai kayayeirai ati. <sup>4</sup> Atuvah bangmaw ka sak han tie ka panue toe, hottelah ka sak pawiteh ka thaw a baw toreï im dawkvah o sak han ka ngai e tami ka hui ka tawn han telah a pouk. <sup>5</sup> Bawipa koe laiba ka tawn e taminaw pueng a kaw teh apasuek e tami koe ka Bawipa koe patho hane laiba na yit touh maw na ba titeh a pacei. <sup>6</sup> Hote tami ni satui nuenae 1,000 touh poe han ao telah a dei. Hnopai ka khen e tami ni vah hete na cayin lat nateh nuenae 500 touh thut telah atipouh. <sup>7</sup> Hathnukkhu alouke tami a kaw teh nang te laiba na yit touh maw na ba telah a pacei. Catun pheï 1,000 touh poe han ao telah ati. Cayin lat nateh pheï 800 touh thut telah atipouh. <sup>8</sup> Hote hnopai ka khen ni teh tami ka dумыen e ni hot patetlah huenghai hoi hno a sak dawkvah a bawipa ni a oup. Bangkongtetpawiteh hete talaivan capanaw ni a thaw taw k e dawkvah angnae capanaw hlak vah a lunganghnawn telah ati. <sup>9</sup> Bout ka dei e teh, na due toreï a yungyoe kangning e lukkareïim daw k hui na tawn thai awh nahanelah, kangning hoeh e talai hno hno awh.

<sup>10</sup> Hno kathoengca daw k yuemkamcu e tami teh hno kalen daw k hai yuemkamcu, hno kathoengca daw k yuemkamcuhoeh e tami teh hno kalen daw k hai yuemkamcuhoeh. <sup>11</sup> Hottelah ao dawkvah ka kangning hoeh e talai hno hno navah, yuemkamcu lah na awm hoehpawiteh bangtelamaw bawitangrengnae katang poe lah ao han vaw. <sup>12</sup> Hatdawkvah tami alouke hno dawkvah yuemkamcu hoeh lah na awm pawiteh apinimaw namamouh han lah hno na poe han maw.

<sup>13</sup> San buet touh ni vah bawi kahni touh e san lah awm thai hoeh, buet touh pahnavt vaiteh buet touh a lungpataw han. Buet touh koe yuemkamcu lah ao vaiteh buet touh e teh banglahai noutna mahoe. Cathut hoi tangka e thaw mekkem thai mahoe telah atipouh.

### *Uknae ram hoi kâkuen e aphu o saknae*

<sup>14</sup> Farasinaw ni a dei e naw pueng a thai navah, ahnimouh teh tangka ka ngai e tami lah ao dawkvah Bawipa a panuikhai awh. <sup>15</sup> Jisuh ni hai Farasinaw, nangmouh teh tami hmalah tamikalan lah na kâsak awh. Hatei Cathut ni nangmae lungthin a panue. Bangkongtetpawiteh, tami ni aphu kaawm poung lah a pouk eiteh Cathut hmalah panuethpounge doeh.

<sup>16</sup> Mosi e kâlawk hoi profetnaw ni a thut e naw teh Baptisma ka poe e Jawhan e atueng totouh hane doeh. Hathnukkhu Cathut uknaeram kamthang teh taminaw pueng koe dei lah ao vaiteh taminaw ni ram daw k a kâen awh han. <sup>17</sup> Hatei kâlawk daw k e lawklung kathoengpounge buet touh a raw k hlak vah kalvan hoi talai a raw k e a yawi hnawn. <sup>18</sup> Nang



ni na yu hoi na kampek teh alouke napui hoi na o, hote tami teh a uicuk toe. Hahoi a vâ ka mat e napui hoi kaawm e tami hai a uicuk van telah atipouh.

### *Tangreng hoi Lazarus*

<sup>19</sup> Vai touh teh ka tangreng poung e tami buet touh ao teh khohna phu kaawm poung hoi a kamthoup teh hnintangkuem kanawm poung lah kho a sak. <sup>20</sup> Ka roedeng buet touh, âhlut hoi kakawi e, a min Lazarus tie teh, buramei ka hane pouknae lungthin hoi, <sup>21</sup> tangreng bawi im longkha teng sut a tahung. Uinaw ni a tho teh a hmânaw a palem pouh.

<sup>22</sup> Hnin touh hnin vah ka roedeng e tami a due teh kalvantaminaw ni kalvan Abraham e a lungtabue dawkvah a thak awh. Tangreng bawi hai a due teh a pakawp awh. <sup>23</sup> Tangreng bawi teh hell dawk a bo teh puenghoi ka patawpoung lah khang laihoi ao. A moungeh teh a khet navah, Abraham hoi a lungtabue dawkvah kaawm e Lazarus hah ahlanae koehoi a hmu. <sup>24</sup> Hattoteh, apa Abraham, na pahren haw. Kai teh hete hmaipalai dawkvah patawnae puenghoi ka khang dawkvah, Lazarus hah a kutdawn tui dawkvah ranup sak nateh ka lai pâding sak hanlah patoun haw telah hramki laihoi a dei.

<sup>25</sup> Hatei Abraham ni, ka capa, na hring na thungvah hnopai phunkuep pouh lah na o. Lazarus teh roedeng lah ao e hah pahnim hanh. Hatei atuvah ahni teh kanawm poung lah ao, nang teh rei thai hoi na o. <sup>26</sup> Hothloilah maimouh rahak vah kadung poung e ravo pui ni na rakan. Hatdawkvah hi lahoi nangmouh koe lah raka han ka ngai e tami ni raka thai hoeh. Hot patetlah nangmouh koe lahoi kaimouh koe lah raka han ka ngai e ni raka thai hoeh telah atipouh. <sup>27</sup> Tangreng bawi ni pawiteh, Oe! apa, Lazarus hah kai na pa im vah na patoun pouh haw <sup>28</sup> Hawvah ka hmaunawnggha panga touh ao rah. Ahnimouh ni hete puenghoi patawnae hmuen koe a pha awh hoeh nahanelah lawkpanuesaknae pouh sak hanelah ka ngai telah atipouh. <sup>29</sup> Abraham ni, na hmaunawngghanaw ni Mosi hoi profetnaw ni dei e hah tarawi awh naseh, telah atipouh. <sup>30</sup> Tangreng bawi ni, a pa, Abraham, hottelah nahoe, duenae koehoi buetbuet touh ni, ahnimanaw koe cet pawiteh a hringnae pan a kângai han doeh telah ati. <sup>31</sup> Hatei Abraham ni, ahnimanaw ni Mosi hoi profetnaw e lawk ngâi awh hoehpawiteh, tami buetbuet touh ni duenae koehoi ka thaw nakunghai yuem mahoe, telah atipouh.

## 17

### *Jisuh ni kâhruetcuetnae a pouh*

<sup>1</sup> Jisuh ni a hnukkâbangnaw koe bout a dei pouh e teh, payonnae teh kaawm han. Hatei payonnae kaawm sak e tami teh a yawthoe. <sup>2</sup> Hete camo buet buet touh payon sak e hlak cakang phawmnae talungsum lahen dawkvah awi laihoi tali dawkvah tâtawt pawiteh ahawihnawn. <sup>3</sup> Kâhruetcuete awh, hmaunawnggha ni yon pawiteh toun awh, pankângai pawiteh a yonnae ngaithoum awh. <sup>4</sup> Hnin touh dawkvah nang koe vai sari touh a payon teh vai sari touh nang koe pankângai toe telah dei pawiteh a yonnae na ngaithoum han telah atipouh.

<sup>5</sup> Gunceinaw ni Bawipa ka yuemnae hoe len sak haw telah ati awh. <sup>6</sup> Bawipa ni a dei e teh nangmouh ni antam mu tit touh yuemnae na tawn pawiteh hete thailahei kung heh tangpha khuehoi kâphawng nateh tali dawkvah kâung telah na ti navah na lawk a ngâi han telah ati.



<sup>7</sup> “Bangnue nae lah san buet touh a tawn teh, hote san ni laikawh thaw a tawknæe koehoi a tho navah, nahoe h pawiteh, tu hoi maito a khoumnae koehoi im a pha navah karang tho nateh, tahung nateh cat leih ka tet e tami ao han na ou. <sup>8</sup> Hottelah tet laipalah, kai hanlah rawca hmaloe pâtoum nateh, kai ka ca lahun nah na taisawm kâyeng nateh, khenyawn ei, hahoi toreï cat lah a na ti awh han vai yaw. <sup>9</sup> Hote san ni sak hanlah kâ poe e a sak dawkvah a bawipa ni ahni koe a lunghawi han na ou. <sup>10</sup> Hot patetvanlah, nangmouh hai kâ poe e hah be na tawk awh toreï teh, maimouh teh hawinae kaawm hoe h e sannaw doeh, tawk hane kawi doeh tawk awh telah tet awh, telah atipouh.

### *Hrikbei hra touh*

<sup>11</sup> Jisuh ni Jerusalem kho lah a cei nah Samaria hoi Galilee e rahak hoi a cei. <sup>12</sup> Kho buet touh dawh a kâen teh haw vah ka hrikbei e tami hra touh ao teh ahnimouh ni a dawn awh. Lam ahla poung koe a kangdue awh teh, <sup>13</sup> Jisuh, Bawipa, kaimouh na pahren awh haw, telah a hram awh. <sup>14</sup> Jisuh ni a hmu teh vaihmanaw koe cet awh nateh namamouh hoi namamouh kâpâtue awh, telah atipouh. Ahnimouh ni a cei awh teh lam vah thoungnae dawh a pha awh.

<sup>15</sup> Ahnimouh thung dawh hoi tami buet touh teh ka dam toe tie a kâpanue navah a ban teh Cathut hah kacaipounge lawk hoi a pholen. <sup>16</sup> Jisuh e khok rahim a tabo teh, Bawipa ka lunghawi telah ati. Hote tami teh samaria tami doeh. <sup>17</sup> Jisuh ni, “hra touh hoi kOUNg dam awh hoe h maw. Tako touh e teh na maw ao awh. <sup>18</sup> Ahnimanaw hai ban vaiteh Cathut pholen thai hoe h maw. Hete miphun alouke tami hloilah buet touh boehai awh hoe h maw telah ati. <sup>19</sup> Hatnavah Jisuh ni ahni teh, “thaw nateh cet leih, na yuemnae ni na dam sak toe, ” telah atipouh.

### *Ka tho hane Cathut uknae ram*

#### *Mat 24:37-39*

<sup>20</sup> Farasinaw a tangawn ni Jisuh teh, nâtuek maw Cathut uknaeram teh a pha han telah a pacei awh. Jisuh ni Cathut uknaeram teh mit hoi hmu e dawh kaawm e na hoe h. <sup>21</sup> Apinihai khenhaw! hi doeh ao, haw doeh ao tet thai hoe h. Bangkongtetpawiteh Cathut uknaeram teh nangmae thung doeh ao telah atipouh. <sup>22</sup> A hnukkâbangnaw koe bout a dei pouh e teh, “nangmouh ni tami Capa e hnin hnin touh hmu han ka ngai, na tinae tueng ka phat han. Hateiteh na hmu thaihoe hnae tueng ka phat han. <sup>23</sup> Hi lah khenhaw! haw lah khien a haw telah ka dei e tami kaawm han. Hateiteh hote khiet hanelah tâcawt awh hanh. <sup>24</sup> Sumpa teh kalvan avanglah hoi avanglah a palik teh pheng a ang e patetlah tami Capa teh amae hnin dawh hot patetlah ao han. <sup>25</sup> Hottelah ao hoe hnahlan a rucatnae moi a khang hane thoseh, atu miphunnaw e pahnawtnae hai thoseh, a khang han.

<sup>26</sup> Noah e tueng navah kaawm e patetlah tami Capa e tueng nahai kaawm han. <sup>27</sup> Noah ni long thung a kâen hnin totouh, taminaw ni a canei awh, a kâpaluen awh, a kâhâ awh teh ahnimouh pueng teh kOUNg raphoe e lah ao awh. <sup>28</sup> Hot patetvanlah Lot e tueng nahaiyah, taminaw ni a canei awh, a yoran awh, a patue awh, imlaw a sak laihoi ao awh. <sup>29</sup> Hatei, Lot teh Sodom hoi a tâco hnin vah kalvan hoi ganhmai kho lah a rak teh ahnimouh pueng teh kOUNg raphoe e lah ao awh.

<sup>30</sup> Hottelah tami Capa a kamnue hnin dawkvah kaawm han. <sup>31</sup> Hote hnin dawkvah lemphu kaawm e tami teh imthung kaawm e hno la hanelah kum hanh naseh, hot patetvanlah law kaawm e tami teh im lah ban hanh



naseh. <sup>32</sup> Lot e a yu hah pahnim awh hanh. <sup>33</sup> Ma e hringnae ka vum e tami teh hringnae a sung han, hringnae ka sung e tami teh a hringnae hah a rungngang han. <sup>34</sup> Na dei pouh awh. Hot hnin tangmin vah tami kahni touh ikhun buet touh dawkh ka ip e kaawm han, buet touh teh la lah ao vaiteh buet touh teh ceitakhai lah kaawm han. <sup>35</sup> Napui cakang ka phawm e tami kahni touh dawkvah buet touh la lah ao vaiteh buet touh ceitakhai lah kaawm han. <sup>36</sup> Tami kahni touh law vah thaw ka tawh e kaawm han, buet touh la lah ao vaiteh buet touh ceitakhai lah kaawm han telah atipouh. <sup>37</sup> A hnukkâbangnaw ni Bawipa, nâ e hmuen koe maw telah ao han telah a pacei awh navah ro onae koe langtanaw teh a kamkhueng awh han telah atipouh.

## 18

### *A lungpout hoeh e lahmawu*

<sup>1</sup> Lungpout laipalah ratoum yungyoe awh, tie cangkhae dawkvah Jisuh ni bangnueae a dei. <sup>2</sup> Khopui buet touh dawkvah Cathut hai ka taket hoeh ni teh tami hai barilawa ti ka tawn hoeh e lawkcengkung bawi buet touh ao. <sup>3</sup> Hote kho dawkvah lahmawu buet touh ao teh kai koe lah lawk na ceng pouh leih, telah atuhoitu pou a tho sin.

<sup>4</sup> Lawkcengkung bawi ni atueng moi ka saw lah a kangek. <sup>5</sup> Hateiteh, lawkcengkung bawi ni kai teh Cathut hai ka taket hoeh, tami barilawanae hai ka tawn hoeh e lah ka o ei, hete lahmawu ni pou na tarawh dawkvah, lawkceng pouh hoeh pawiteh boutbout tho vaiteh ka lungrei na thaisak han doeh. Hatdawkvah ahni koe lah lawk ka ceng pouh han toe telah a ti. <sup>6</sup> Hathnukkhu Bawipa ni, hote lawkcengkung bawi ni a dei e teh na thai awh toe. <sup>7</sup> Cathut ni a rawi tangcung e taminaw ni amom tangmin lah a hram laihoi het pawiteh lawkceng pouh laipalah ao han maw. <sup>8</sup> Kai ni ka dei e teh, ahnimouh koe lah karanglah lawk a ceng han. Hatei tami Capa a tho toreih teh talai van vah yuemnae a hmu han nama aw, telah atipouh.

### *Farasinaw hoi tamuk kacawngnaw bangnueae*

<sup>9</sup> Mahoima tamikalan lah kâpouk ni teh ayânaw hah banglahai ka noutna hoeh e tami koevah Jisuh ni bangnueae lawk a dei. <sup>10</sup> Tami kahni touh teh bawkim dawkh ratoum hanelah a cei roi. Buet touh teh Farasi lah ao teh, alouke teh tamuk ka cawng e lah ao. <sup>11</sup> Farasi ni a kangdue teh hettelah a ratoum. Oe Cathut, kai teh ayânaw patetlah ngainae kalen e, laithoe ka dei e, napui tongpa yonnae ka sak e tami lah ka o hoeh dawkvah nang koe ka lunghawi, hahoi hete tamuk ka cawng e tami patetlah hai ka o hoeh dawkvah ka lunghawi. <sup>12</sup> Yat touh dawkvah hnin hni touh rawca pou ka hai teh hnopai ka tawn e pueng pung hra pung touh ka poe telah a ti.

<sup>13</sup> Hatei tamuk ka cawng e tami teh ahla poungnae koe a kangdue teh, kalvan lah khen ngam laipalah a tabut teh, oe Cathut, kai tamikayon na pahren haw telah a ti. <sup>14</sup> Kai ni ka dei e teh, Farasi laipalah hete tami heh yon ngaihoum lah ao teh im vah a ban. Bangkongtetpawiteh amahoima kârasang e tami teh rahnoum lah ao vaiteh amahoima kârahnoum e tami teh tawm lah ao han telah atipouh.

### *Camo yawhawu poenae*

#### *Mat 19:13-15; Mrk 10:13-16*

<sup>15</sup> Hatnavah camonaw kut hoi tek hanelah Jisuh koe a thokhai awh. Hatei a hnukkâbangnaw ni a hmu navah a yue awh. <sup>16</sup> Hatei, Jisuh ni



camonaw a kaw teh, camonaw kai koe tho sak awh. Ahnimouh hah cakâ awh hanh. Bangkongtetpawiteh Cathut uknaeram teh het patet e taminaw hanelah nahoehmaw ao. <sup>17</sup> Lawkkatang ka dei. Cathut uknaeram teh hete camo patetlah ka dâw hoehe e teh, hote ram dawkvah nâtuek hai kêen thai mahoeheh telah atipouh.

*Tangreng bawi kacue e*

*Mat 19:16-29; Mrk 10:17-30*

<sup>18</sup> Hahoi, bawi buet touh ni Bawipa hanelah, kahawipoung e saya, a yungyoe hringnae râw ka coe thai nahanelah bangmaw ka sak han telah atipouh. <sup>19</sup> Jisuh ni, bangkongmaw kahawi e saya telah na ti pouh, telah a pacei teh, Cathut laipalah apihai tami kahawi awm hoehe. <sup>20</sup> Kâpoelawknaw hah na panue han doeh, uicuk hanh, tami thet hanh, parawt hanh, laithoe kampangkhai hanh, na manu hoi na pa barih telah atipouh. <sup>21</sup> Ahni ni, hete kâlawnaw pueng ka nawca hoi kOUNG ka tarawi toe telah ati. Hete lawk Jisuh ni a thai navah buet touh na panki rah atipouh.

<sup>22</sup> Na tawn e hno pueng yawt nateh mathoenaw poeh, hottelah na sak pawiteh, kalvan kho vah hno na tawn han, hathnukkhu tho nateh ka hnuk kâbang telah atipouh. <sup>23</sup> Ahni teh ka bawi poung e lah ao dawkvah, hete lawk a thai navah a lung thouk a mathoe.

*Ka tangreng e hoi Cathut uknae ram*

<sup>24</sup> Jisuh ni a lungmathoe e hah a hmu navah, ka tangrengnaw ni Cathut uknaeram dawka kêen hane a ru poung bovaw. <sup>25</sup> Ka tangrengnaw ni Cathut uknaeram dawka kêen hlak teh kalauk ni phuengvang kâkhu dawka kêen e a yawihnawn atipouh. <sup>26</sup> A lawk ka thai e taminaw ni, pawiteh apimaw rungngang lah kaawm han toung vaw, telah a pacei awh. <sup>27</sup> Jisuh ni a dei pouh e teh, taminaw hanelah ka coung thai hoehe e naw hah Cathut hanelah teh a coung thai telah atipouh. <sup>28</sup> Hatnavah Piter ni, kenhaw! kaimouh ni na hnukkâbang hanelah ka tawn e naw pueng ka ceitakhai teh na hnukkâbang awh toe, telah a ti. <sup>29</sup> Jisuh ni a dei e teh, Oe, na dei e atang, het heh ka dei. Cathut uknaeram kecu dawkvah im thoseh, na yu thoseh, hmaunawnga thoseh, manu hoi na pa thoseh, canaw thoseh buetbuet touh ka cettakhai e tami niteh, <sup>30</sup> atu e tueng dawkvah alet moikapap lah hawinae a coe vaiteh hmalae tueng dawkvah yungyoe hringnae a pang han, telah atipouh.

*A due nahane apâthum a dei*

*Mat 20:17-19; Mrk 10:32-34*

<sup>31</sup> Jisuh ni a hnukkâbang hlaikahni touh a kaw teh, thai awh haw, Jerusalem lah ka cei awh vaiteh hawvaw profetnaw ni tami Capa e a kong a thut awh e pueng kOUNG ka kuep han. <sup>32</sup> Jentelnaw e kut dawkvah poe lah ao vaiteh ahnimouh ni a panuikhai han, a dudam awh han, tamtui hoi a tamthawi awh han. <sup>33</sup> Bongpai hoi na hem awh vaiteh na thei a han, hatei apâthum hnin vah bout ka thaw han telah atipouh.

<sup>34</sup> A hnukkâbangnaw niyah hete kongnaw heh thai panuek awh hoehe, lawk dei ngainae a hro kecu dawkvah Jisuh ni a dei ngainae hah thai panuek awh hoehe.

*Mitdawn mit a ang sak*

*Mat 20:29-34; Mrk 10:32-34*



<sup>35</sup> Jisuh teh Jeriko kho teng a pha navah mitdawn buet touh teh lam teng vah a tahung teh hnopai a hei. <sup>36</sup> Taminaw a cei e a thai navah bang nama aw, telah a pacei. <sup>37</sup> Ahnimouh ni, Nazareth tami Jisuh a tho lahun telah a dei pouh. <sup>38</sup> Hahoi a hram teh, Jisuh, Devit e capa na pahren haw, telah a ti.

<sup>39</sup> Hmalah kaawm e taminaw ni lawkkamuem awmh telah kâhruetcuetae a poe. Hatei hoe kacailah a hram teh, Devit capa, na pahren haw telah a ti. <sup>40</sup> Hatdawkvah, Jisuh ni a kangdue teh mit ka dawn e tami kai koe thokhai awh, telah kâ a poe. Ateng a pha navah Jisuh ni a thaw teh, bangmaw sak seh ti na ngai, telah a pacei. <sup>41</sup> Bawipa, mit ang han ka ngai, telah a dei pouh. <sup>42</sup> Jisuh ni, na mit ang naseh, na yuemmae ni na dam sak toe, telah atipouh. <sup>43</sup> Hat nah tahma vah a mit bout a ang. Cathut a pholen teh a hnuk a kâbang. Ka hmawt e taminaw pueng ni hai Cathut teh a pholen awh.

## 19

### *Zakkheas im Jisuh a luen*

<sup>1</sup> Jisuh ni Jeriko kho daw k a kâen teh khothung vah a kâhlai. <sup>2</sup> Hatnavah tamuk ka cawng e kacuepoung e tami buet touh a min Zakkheas tie teh ao. Ahni teh ka bawi poung e tami lah ao. <sup>3</sup> Jisuh teh bangpatet e tami maw tie panue han a ngai dawkvah hmu hane a panki. Hatei ahni teh a rahnoum, taminaw ni a ngue dawkvah hmawt thai awh hoe. <sup>4</sup> Hatdawkvah Bawipa a hmu thai nahanelah hmalah sut a yawng teh thailahei kung buet touh dawkvah a luen. Bangkongtetpawiteh Bawipa teh haw lahoi a tho hanela ao.

<sup>5</sup> Hote hmuen koe a pha navah Jisuh ni mounng laihoi a khet teh Zakkheas hanelah, karang kum leih, nang im vah ka luen han, telah atipouh.

<sup>6</sup> Zakkheas ni karang poung lah a kum teh lunghawicalah hoi a im vah a luen sak.

<sup>7</sup> Ka hmawt e pueng ni a pathoe awh teh, hete tami ni tamikayon im luen hanelah a cei, telah yon a pen awh. <sup>8</sup> Zakkheas ni a kangdue teh Bawipa hanelah, Bawipa, thai haw, tami ka roedeng hanelah ka tawn e hno tangawn ka poe han, hahoi kai ni ka dum e awm pawiteh let pali touh hoi ka patho han, telah atipouh. <sup>9</sup> Jisuh ni a thaw teh, sahnin vah hete im daw k rungngangnae a pha toe, hete tami hai Abraham ca sak lah ao. <sup>10</sup> Bangkongtetpawiteh, tami Capa teh kahmat e tami tawng hane hoi rungngang hanelah doeh a tho telah atipouh.

### *Tangka mina 10 touh bangnuenae*

<sup>11</sup> Hete lawk ka thai e taminaw koe vah hete bangnuenae lawk a dei. Jerusalem kho vah a pha tawmlei tounng dawkvah Cathut uknaeram teh tang a kamnue han telah a pouk awh. <sup>12</sup> Hatdawkvah, bawi buet touh teh ram uknae kâ a tawn hnukkhu bout tho hanelah kahlatpoung e kho daw k a cei. <sup>13</sup> A cei hoehnahlan vah a san hra touh a kaw teh tangka mina buet touh rip a poe. Hahoi teh, ka yinhnuk na thung vah hno yoran awh, telah atipouh.

<sup>14</sup> Khoram thung e taminaw ni ahni teh a hmuhma awh dawkvah, hete tami heh Siangpahrang lah ao hane ka ngai awh hoe telah a hnuk lahoi laicea a patoun awh. <sup>15</sup> Hote Bawi teh ukkung lah ao hnukkhu hoi bout a ban torei teh, mina a poe e sannaw hah tang a kaw teh nâ yit touh maw na hmu awh telah kâ a poe. <sup>16</sup> Ahmaloe e tami a tho teh, Bawipa



nang ni na poe e tangka mina buet touh hoi alouke hra touh ka hmu, atipouh. <sup>17</sup> Bawipa ni, ahawi, nang teh san kahawi doeh. Titca e thaw dawkwuem na kamcu dawkvah kho hra touh uk lawih atipouh. <sup>18</sup> Apâhni e san a tho teh, Bawipa, nang ni na poe e tangka mina buet touh hoi alouke panga touh ka hmu, atipouh. <sup>19</sup> Bawipa ni, kho panga touh uk lawih atipouh. <sup>20</sup> Hatnavah alouke san buet touh a tho teh, Bawipa, nang ni na poe e tangka mina buet touh paroup ao, hnica hoi ka tangoung teh ka kuem. <sup>21</sup> Nang teh tami pacipali lah na o dawkvah na taki, na hmoukhoehnae koehoi na la teh, na patûe hoeh e hmuen koe na ka a e lah na o, atipouh. <sup>22</sup> Bawipa ni, san kathout nama e lawk patetlah lawk na ceng nan. Kai teh ka hmoukhoehnae hmuen koehoi ka la teh, ka patuehoehnae hmuen koe ka a e, pacipali lah ka o e hah na panuek katang pawiteh, <sup>23</sup> bangkongmaw kaie tangka mina hah tangka ka pung sak thai koe na hruek hoeh vaw. Hottelah na hrueng pawiteh kai ka tho toteh a pung khuehoi ka dâw hane hah vaw atipouh. <sup>24</sup> Ateng ka kangdout e taminaw koevah, ahni koe e tangka lawm awh, hra touh ka tawn e tami poe awh, telah atipouh. <sup>25</sup> Ahnimouh ni, Bawipa, ahni teh hra touh a tawn toe, telah ati awh. <sup>26</sup> Ahnimouh koe a dei pouh e teh, ka tawn e tami teh bout poe sin han rah. Ka tawn hoeh tami teh a tawn e patenghai la pouh lah ao han. <sup>27</sup> Hothloilah, kaie uknae ka ngai hoeh e ka tarannaw hah ka hmalah thet awh, telah atipouh, telah ati.

### *Jerusalem a kâennae*

#### *Mat 21:1-9; Mrk 11:1-10*

<sup>28</sup> Jisuh ni hete lawk a dei hnukkhu hmalah Jerusalem kho patuen a cei. <sup>29</sup> Olive mon dawkwuem e Bethphage kho hoi Bethani kho a pha tawmlei nah a hnukkâbang kahni touh a patoun teh, <sup>30</sup> hmalae kho dawkwuem cet roi nateh na kâen tahma vah kâcui boihoeh rae laca pâkhi lah ao e hah na hmu roi han. Hote hah a rui rasu roi nateh hivah thokhai roi haw. <sup>31</sup> Tami buetbuet touh ni, bangdawkwuem a rui na rasu tet pawiteh, Bawipa ni a panki tet pouh roi, telah atipouh.

<sup>32</sup> A cei roi teh Jisuh ni a dei e patetlah bangpuengpa a hmu roi. <sup>33</sup> Laca teh a rasu roi lahun navah katawnkung ni, bangkongmaw na rasu, telah atipouh. <sup>34</sup> Ahnimouh roi ni, Bawipa ni a panki, telah a dei pouh. <sup>35</sup> Laca teh Jisuh koe a thokhai roi. Hote la dawkvah hni a padoun awh teh Jisuh a kâcui sak awh. <sup>36</sup> A ceinae koe lam dawkwuem hni a phai pouh awh.

<sup>37</sup> Olive mon koe hoi bungling lah kumnae koe a pha toteh, a hnukkâbang tamimaya ni a hmu awh e thao hnosaeknae kecu dawkvah, a konawm khai awh teh a lawk kacaipoung lahoi Cathut a pholen awh.

<sup>38</sup> Bawipa min lahoi ka tho e Siangpahrang teh Cathut ni yawhawinae poe lawiseh. Kalvan vah rounnae awmseh. Kalvan a rasang poungnae koe bawilennae awmseh, telah a hram awh. <sup>39</sup> Hahoi vah taminaw pueng thung dawkwuem hoi Farasi tangawn ni Jisuh teh, saya na hnukkâbangnaw yue haw, atipouh. <sup>40</sup> Jisuh ni a dei e teh, hetnaw heh lawkkamuem awm pawiteh talungnaw ni tang a hram awh han, telah atipouh.

### *Jerusalem kho hanelah a ka*

<sup>41</sup> Jerusalem kho hoehoe a hnai teh a hmu navah, a ka khai. <sup>42</sup> Sahnin vah room nahanelah bangmaw a panki tie na panuek haw boipawiteh, hatei hothateh na hmawt ka lawm awh hoeh. <sup>43</sup> Bangkongtetpawiteh na tarannaw ni tarantuknae puengcang hoi na kalup awh teh avoivang lahoi na kâen sin nahane tueng ka phat han. <sup>44</sup> Hottelah nama hoi na



canaw hah talai hoi sue touh lah a palat awh vaiteh, nang thungvah talung buet touh boehai alouke talung van a ohoeahnae tueng ka phat han. Bangkongtetpawiteh nang koe khetyawt hanelah tho nahane tueng teh nang ni na panue hoeh dawkvah telah atipouh.

### *Bawkim a thounsak*

*Mat 21:12-16; Mrk 11:15-18*

<sup>45</sup> Jisuh ni bawkim thung a kâen teh hnopai kayawtnaw pueng a pâlei. <sup>46</sup> Cakathoung dawkvah, Cathut ni ka im teh ratoumnae im lah ao han, telah a thut. Hatei nangmouh ni teh tamrunaw kâhronae im lah na sak awh, atipouh.

<sup>47</sup> Jisuh ni bawkim vah hnintangkuem a cangkhai. Vaihma bawinaw, cakathutkungnaw hoi tamimaya kahrawikungnaw ni thei han a ngai awh. <sup>48</sup> Hatei, taminaw pueng ni a lawk atang awh teh buet touh hai pahlout hane a ngai awh hoeh dawkvah ahnimouh ni thei nahane lamthung hmawt thai awh hoeh.

## 20

### *Jisuh kâawnnae a pacei awh*

*Mat 21:23-37; Mrk 11:27-33*

<sup>1</sup> Hahoi, hnin touh hnin teh Jisuh ni bawkim vah tami moikapap a cangkhai teh kamthang kahawi a dei lahun nah vaihma bawinaw, cakathutkungnaw hoi kacuenaw a tho awh teh, <sup>2</sup> hete hnosaakthai nahanelah bangpatet e kâawnnae maw na tawn. Apini maw kâawnnae na poe dei haw, telah a ti awh. <sup>3</sup> Jisuh ni a dei pouh e teh, lawk buet touh na pacei awh vai, nangmouh ni dei awh haw. <sup>4</sup> Jawhan ni baptisma poe thainae kâ a tawn e hah kalvan hoi e maw, tami koehoi e maw, dei awh haw, telah a pacei.

<sup>5</sup> Ahnimouh ni buet touh hoi buet touh a kâpan awh teh, bangtelamaw ti han. Kalvan hoi e tetpawiteh, hat boipawiteh bangkongmaw Jawhan na yuem awh hoeh telah a dei han. Tami koehoi e doeh telah tet pawiteh, <sup>6</sup> hivah kaawm e taminaw pueng ni Jawhan teh profet roeroe doeh telah a yuem awh dawkvah, ahnimouh ni maimanaw teh talung hoi na dei awh han, telah ati awh. <sup>7</sup> Hatdawkvah ahnimanaw ni, nâ hoi e maw tie ka panuek awh hoeh, telah a dei awh. <sup>8</sup> Hahoi Jisuh ni, hat pawiteh kai ni hai bangpatetlae kâawnnae hoi maw hete hno heh ka sak tie hah ka dei van mahoe, telah atipouh.

### *Misur takha katawnkung bangnueae*

*Mat 21:33-46; Mrk 12:1-12*

<sup>9</sup> Hatnavah Jisuh ni taminaw koe bangnueae lawk a dei pouh. Tami buet touh ni misur takha buet touh a tawn. Takhakatawkkungnaw koe a hlai sak teh, kahlong lah atueng moikasawlah a cei. <sup>10</sup> Misur paw khi tue a pha toteh, a hlai sak e naw koehoi misurpaw la hanelah, takhakatawkkungnaw koe a san buet touh a patoun. Hatei takhakatawkkungnaw ni a san hah a hem awh teh, kuthrawng lah a pâban awh. <sup>11</sup> Hahoi alouke a san buet touh bout a patoun navah, a hem awh teh, yeirapo sak awh teh, kuthrawng lah bout a pâban awh. <sup>12</sup> Alouke a san hah bout a patoun navah, ka patawpoung lah a hem awh teh a pâlei awh. <sup>13</sup> Hatnavah takha katawnkung ni, bangtelamaw ka sak han. Ka pahren poung e ka capa ka patoun han, ahni teh a bari awh han doeh, telah a ti. <sup>14</sup> Hatei, takhakatawkkungnaw niyah, a capa a hmu navah ahni teh râw ka



coe hane nahoehmaw, tho awh, thet awh sei. Hat pawiteh doeh ahnie râw hah maimouh ni coe awh ti ati awh. <sup>15</sup> Hatdawkvah takha katawnkung e capa hah a man awh, takha alawilah a pâlei awh teh a thei awh. Hottelah pawiteh, takha katawnkung ni bangtelamaw ati han. <sup>16</sup> Takhakatawnkung hah koug thet vaiteh, hote takha hah alouke takhakatawkkungnaw koe a poe han telah atipouh. Hote hah taminaw ni a thai navah, hottelah awm hanh naseh, ati awh.

<sup>17</sup> Jisuh ni ahnimanaw a khet teh, im kasakkung ni, a pahnawt e talung hah a takinlung lah bout ao tie Cakathoung dawk kaawm e lawk hah bangmaw a dei ngai, telah a pacei awh. <sup>18</sup> Hote talung dawk ka bawt e pueng teh rekrek a kâbawng vaiteh hote talung ni a bosin e pueng teh vitpatit lah ao han, telah atipouh. <sup>19</sup> Hahoi teh vaihma bawinaw, cakathutkungnaw ni hote bangnueae teh maimouh doeh na dei ngai nah tie a panue awh toteh, Jisuh man nahanelah kho a pouk awh. Hatei kamkueng e tamihupui hah a taki awh. <sup>20</sup> Hatnavah Farasinaw ni Jisuh e lawk man pouh hanelah a tawng teh kho kaukkung kâtawnnae katawnnaw e kut dawk poe thai nahanelah, tamikalan lah kâsak e katuethaw a patoun awh.

### *Cathut hoi Sizar*

*Mat 22:15-22; Mrk 12:13-17*

<sup>21</sup> Hahoi, Jisuh hanlah, saya, atangcalah na cangkhai teh na dei tie ka panue awh. Hahoi apie minhmai hai na khen hoe, hatei Cathut e lamthung lawkkatang hah na cangkhai toe. <sup>22</sup> Hatdawkvah na dei pouh haw, Sizar koe tamuk poe e hah kaimae phung hoi a kâtaran ou, kâtaran hoe ou telah a pacei awh.

<sup>23</sup> Jisuh ni ahnimae huenghaionae hah a panue dawkvah nangmouh ni bangkongmaw kai na tanouk awh. <sup>24</sup> Phoisa phek touh na patue haw, apie mei hoi min maw ka kamnuek telah a pacei navah, ahnimouh ni Rom siangpahrang e mei hoi min doeh atipouh awh. <sup>25</sup> Jisuh ni Rom siangpahrang e hno teh Rom siangpahrang poe awh. Cathut e hno teh Cathut poe awh, telah atipouh.

<sup>26</sup> Hottelah ahnimouh ni taminaw e hma lah a lawk yon a hmu thai awh hoe dawkvah, kângairu lahoi lawkkamuem lah ao awh.

### *Sadusinaw hoi boutthawnae*

*Mat 22:23-33; Mrk 12:18-27*

<sup>27</sup> Duenae koehoi boutthawnae awm hoe ka tet e Sadusinaw ni Jisuh koe a tho awh teh, <sup>28</sup> Bawipa, tami buetbuet touh niyah a tawn laipalah, a yu dtho takhai pawiteh, a tami a thup hoe nahanelah, a nawngha ni let awmkhai seh titeh Mosi ni a thut. <sup>29</sup> A hmaunawnggha sari touh ao awh. A camin ni hmaloe a yu lah a la teh, Ca sak laipalah a due takhai. <sup>30</sup> A nawnggha ni patuen a okhai teh ca sak laipalah bout a due takhai. <sup>31</sup> Hottelah, buet touh hnukkhu buet touh a due takhai awh teh, hmaunawnggha sari touh ni ca sak awh laipalah, hote napui hah be a due takhai awh. <sup>32</sup> A hnukteng vah hote napui hai a due van. <sup>33</sup> Hatdawkvah, boutthawnae tue a pha toteh, hote napui hah apie yu lah maw ao han. Hmaunawnggha sari touh ni hote napui hah a yu lah a okhai awh toe telah a ti.

<sup>34</sup> Jisuh ni a dei e teh, atu tueng e taminaw teh a kâpaluen awh, a kâha awh. <sup>35</sup> Hatei, a yungyoe e pang hane hoi duenae koehoi bout thawnae daw kamcu e taminaw teh kâpaluen awh hoe, kâhâ awh hoe toe.



<sup>36</sup> Ahnimouh teh kalvantaminaw patetlah ao awh teh dout thai awh hoeh toe. Ahnimouh teh duenae koehoi bout thaw lah ao tounge dawkvah Cathut e ca lah ao awh. <sup>37</sup> Hothloilah Mosi ni kadout tangcoung e taminaw hringnae dawkvah bout a thaw awh tie kacaicalah a dei. Hmai ka kang e buruk kong a dei nah Bawipa teh Abraham Cathut, Isak Cathut, Jakop Cathut lah ao a ti. <sup>38</sup> Cathut teh kadoutnaw e Cathut na hoeh. Kahringnaw e Cathut doeh. Hote taminaw pueng ni Cathut dawkvah kahring awh telah atipouh.

<sup>39</sup> Cakathutkungnaw tami tangawn ni, Bawipa, nange na dei e lawk teh atang doeh telah a ti. <sup>40</sup> Hahoi ahni teh lawk bout pacei ngam awh hoeh.

### *Khrih teh apie Capa maw*

*Mat 22:41; 23:7; Mrk 12:35-40*

<sup>41</sup> Jisuh ni a thaw teh, bangtelamaw Messiah teh Devit capa lah ao han, telah na ti awh. <sup>42</sup> Bangkongtetpawiteh Devit roeroe ni Cathut ni ka Bawipa teh, Na tarannaw hah na khok tounge lah ka ta hoehroukrak kaie aranglah tahung telah, <sup>43</sup> ka Bawipa ni Sam cauk dawkvah ati na nahoehmaw. <sup>44</sup> Hottelah Devit ni Khrih hah Bawipa telah kaw pawiteh bangtelamaw Khrih teh ahnie a capa lah ao thai han, telah a pacei awh.

### *Kacangkhaikungnaw kâhruetcuat awh*

<sup>45</sup> Rangpui ni a thai navah Bawipa ni a hnukkâbangnaw koe bout a dei pouh e teh, <sup>46</sup> Cakathutkungnaw heh roun awh. Ahnimouh teh angkidung kho hoi kâhlai hane a ngai awh. Hnopa yonae hmuen koe tami pueng ni bari e hah a ngai awh. Sinakok dawkvah tahungnae a rasangnae hah a lungpataw awh teh, pawitonae koevah bari kaawm e hmuen kahawi a ngai awh. <sup>47</sup> Lahmainunaw e im hah a lawp awh teh, a yon kamnuek vaih titeh, kasawpoung lah a ratoum awh. Ahnimouh teh hoe kalen e yonphukhangnae a kâhmo awh han atipouh.

## 21

### *Lahmai napui e poenae*

*Mat 12:41-44*

<sup>1</sup> Hahoi, Jisuh ni a khet teh, katawntanaw ni amamae poehnonaw hah tangkabom dawkvah a pâseng awh hah e a hmu. <sup>2</sup> Ka roedeng e lahmainu buet touh ni hai rahum tangka kahni touh a pâseng van e hah a hmu. <sup>3</sup> Hahoi, Jisuh ni atangalah na dei pouh awh, hote lahmainu ni alouknaw pueng hlak kapap lah a pâseng toe, atipouh. <sup>4</sup> Bangkongtetpawiteh, alouke pueng ni teh a tawn awh e thung dawkvah hoi poehno a pâseng awh. Hatei, hote lahmainu ni teh a mathoe ei, a kâkaww nahane a tawn e pueng hah a pasoung toe atipouh.

### *Bawkim a rawk nahan sutdeinae*

<sup>5</sup> Tami tangawn a tho awh teh bawkim teh lungphen kahawinaw hoi poehnonaw kahawi hoi a pathoup awh, telah a dei pouh. <sup>6</sup> Jisuh ni hete hnnonaw nangmouh ni na hmu awh. Talung buet touh van buet touh, a ohoeahnae tueng ka phat han telah atipouh.

### *A tue pout nahan sutdeinae*

<sup>7</sup> Bawipa, hete heh nâtuék han maw, hete hno pueng a tho nahan a hnai toe tie panue nahanelah, mitnoutnaw teh bangmaw kaawm han, telah a pacei awh. <sup>8</sup> Jisuh ni nangmanaw na ka dum e koe na bawkvah



hoeh nahanelah kâhruetcuwet awh. Tami kapap ni ka min kâmahrawk laihoi tho awh vaiteh, kai doeh Khrih toe tef awh vaiteh, atueng a pha toe ati awh han, hatei kâbang awh hanh. <sup>9</sup> Nangmanaw ni tarankâtuk e kamthang, tarankâtuk hane kamthang na thai awh navah na lungpuen awh hanh. Hote hno teh hmaloe kaawm han, hatei, a poutnae phat hoeh rah. <sup>10</sup> Hothloilah miphun buet touh hoi buet touh, uknaeram buet touh hoi buet touh, a kâtaran awh han. <sup>11</sup> Khoram tangkuem tâli a no han. Takang a tho han. Patawnae kaawm han. Takikathopounge hno hoi kalenpounge mitnoutnaw teh kalvan hoi a kamnue han.

<sup>12</sup> Hote hnonaw ao hoehnahlan taminaw ni ka min kecu dawk sinakok vah nangmanaw na man awh vaiteh na pacekpahlek awh han. Thongim hai na pabo awh han. <sup>13</sup> Hot hateh nangmouh hanelah lawkpanuesaknae deinae tueng lah kaawm han. <sup>14</sup> Hatdawkvah nangmouh ni bangtelamaw ka pathung han aw tie sut na pouk awh hoeh nahanelah kâhruetcuwet awh. <sup>15</sup> Bangkongtetpawiteh tarannaw pueng ni na tâ thai hoeh nahan, na oun thai hoeh nahanelah lawk hoi thouthainae na poe awh han. <sup>16</sup> Na manu hoi napa, hmaunawngaha rei ka tâcawt e na huikonaw ni nangmanaw teh na pahnawt awh han. Atangawn teh a thei awh han. <sup>17</sup> Tami pueng ni kaie ka min kecu dawk nangmanaw hah na hmuhma awh han. <sup>18</sup> Hatei, na lû dawk e sam buet touh boehai kahmat mahoe. <sup>19</sup> Nangmouh teh na panguepnae lahoi namamae hringnae teh na tawn awh han.

### *Jerusalem a rawknae*

<sup>20</sup> Hatnavah Jisuh ni, nangmanaw ni Jerusalem kho hah ransanaw ni a kalup e na hmu navah hote kho teh a rawk han toe tie panuek awh. <sup>21</sup> Hatnavah Judah ram dawk kaawm e taminaw mon lah yawng awh naseh. Kho thung kaawm e taminaw teh alawilah tâcawt awh naseh. Khote lah kaawm e taminaw teh kho thung vah kâen hanh naseh. <sup>22</sup> Bangkongtetpawiteh het hateh, reknae hnin telah tie lah ao teh Cakathoung dawk a dei e naw pueng a kuep nahanelah kaawm e doeh. <sup>23</sup> Hat hnin toteh, camo kaneng e napuinaw hoi camo nene ka pânei e napuinaw teh a temdeng awh han. Bangkongtetpawiteh Judah ram dawk pueng hai rucatnae kaawm han, Judah taminaw lathueng lungkhueknae ka phat han. <sup>24</sup> Ahnimouh teh sarusarai hoi thei lah awh vaiteh kho tangkuem vah san lah a hrawi awh han. Jentelnaw ni Jerusalem kho a cangroe awh vaiteh, atueng a kuep hoeh roukrak a khok rahim a hruek awh han.

### *Tami Capa bout a thonae*

<sup>25</sup> Hatnavah kanî, thapa hoi âsinaw dawkvah mitnoutnae kamnuek han. Talai van dawkvah tuicama a thaw vaiteh taminaw pueng lungpuen lahoi ao awh han. <sup>26</sup> Talai van abuemlah dawkvah ka phat hane hno pouk navah taminaw teh takinae hoi a pâyaw han, bangkongtetpawiteh kalvannaw e bahunaw teh a kâhuet han. <sup>27</sup> Hatnavah tami Capa ni ka talue poung e bawilennae hoi tâmai kâcui vaiteh a tho e hah na hmu awh han. <sup>28</sup> Hote hnonaw pueng teh a kamtawng navah kangdout nateh kahlun lah khenhaw! Bangkongtetpawiteh na ratang nahane tueng teh a hnai toe, telah atipouh.

### *Thaibunglung kung bangnueae*

<sup>29</sup> Hahoi, Jisuh ni bangnueae lawk a dei teh, thaibunglung hoi alouke thingkungnaw hah khen awh <sup>30</sup> Thaibunglung kung teh a dawn a cawn, a



hna a naw toteh, kawmpoi tue a hnai toe tie na panue awh. <sup>31</sup> Hot patetlah hote hnonaw a tâco toe tie na hmu awh toteh, Cathut uknaeram teh a pha han a hnai toe tie panuek awh. <sup>32</sup> Atangcalah na dei pouh awh. Atu e taminaw be a due awh hoehnahlan, hete hno pueng teh ka tâcawt han. <sup>33</sup> Kalvan hoi talai ka rawk nakunghai, ka lawk teh a kangning han.

### *Atueng apinihai panuek hoeh*

<sup>34</sup> Nangmouh ni kâhruetcuot awh. Caneinawmnae, yamuhrinae, talai hnopai dawk lungpuen tâsue hoi o navah, hote hnin teh pouk laipalah na kâhmo awh han. <sup>35</sup> Hote hnin teh tamlawk patetlah talai van kaawm e taminaw pueng koug a ramuk han. <sup>36</sup> Hatdawkvah nangmanaw ni ka tho hane hno dawk hoi na hlout vaiteh tami Capa koe pha hane kamcu e tami lah na o tie panue thai nahanelah ratoum hoi ring awh, telah atipouh.

<sup>37</sup> Hottelah Jisuh ni hnintangkuem bawkim dawk a cangkhai teh tangmin lah a pha toteh Olive mon dawkvah tangmin a loun sak. <sup>38</sup> Taminaw pueng ni a lawk thai hanelah bawkim dawkvah amom a cei awh.

## 22

### *Jisuh thei hanlah khokhannae*

*Mat 26:2-5; Mrk 14:1-2,10-11*

<sup>1</sup> Ceitakhai pawî tie tonphuenhoehe vaiyei pawî a hnai toe. <sup>2</sup> Vaihma bawinaw hoi cakathutkungnaw niyah tami hu a taki dawkvah Jisuh hah bangtelah hoi maw thei han tie lamthung a tawng awh. <sup>3</sup> Hatnavah a hnukkâbang hlaikahni touh thung dawk e Judah Isakarot thungvah Setan a kâen. <sup>4</sup> Hatdawkvah ahni ni vaihma bawinaw hoi im karingkungnaw koe a cei teh Jisuh hah bangtelah hoi maw ahnimae kut dawk pahnawt thai han telah a kâdei awh. <sup>5</sup> Hote taminaw ni a lunghawi awh teh tangka na poe han atipouh. <sup>6</sup> Hottelah Judah Isakarot ni hai a hnâbo teh taminaw ni a panue hoeh navah bangtelah hoi maw Jisuh hah ahnimouh koe ka poe thai han tie atueng kahawi a pawp.

### *Ceitakhai pawî hanlah rakuengnae*

<sup>7</sup> Tonphuenhoehe vaiyei canae pawî dawkvah ceitakhai pawî tuca theinae hnin a pha. <sup>8</sup> Ahni ni Piter hoi Jawhan koe cet roi nateh ceitakhai pawî ca nahanelah rakueng roi, telah atipouh teh a patoun.

<sup>9</sup> Ahnimouh roi nihai, nâ e hmuen koe maw rakueng han na ngai, telah a pacei. <sup>10</sup> Jisuh ni kho thung na kâen navah tuim ka sin e tami na hmu han. Ahnie a hnukkâbang roi nateh a kâennae im dawk kâen roi nateh, <sup>11</sup> saya ni, ka hnukkâbangnaw hoi cungtalai ceitakhai pawî tangmin bu ca nahane hmuen teh na maw ao telah saya ni na pacei sak, tet pouh roi lah a. <sup>12</sup> Ahni ni imvan rakueng tangcoung e hmuen pui hah na patue han. Hawvah coungkacoe rakueng awh, telah atipouh. <sup>13</sup> A hnukkâbang roi ni a cei teh lawk a thui e patetlah a hmu teh haw vah ceitakhai pawiteh a rakueng roi.

### *Apasuekpoung e tangmin bu vennae*

<sup>14</sup> Atueng a pha toteh Jisuh ni gunceinaw hlaikahni touh hoi cungtalai caboi a ven awh. <sup>15</sup> Kai ka due hoehnahlan hete ceitakhai pawî nangmouh hoi cungtalai ka hane ka ngainae lah ao. <sup>16</sup> Bangkongtetpawiteh Cathut uknaeram dawk hete ceitakhai pawî a kuep hoehroukrak atu hoi bout ka cat mahoeht telah atipouh. <sup>17</sup> Hahoi, Jisuh ni manang a la teh Cathut



koe lunghawi lawk a dei hnukkhu, het heh lat awh nateh cungtalai rei hmawng awh. <sup>18</sup> Bangkongtetpawiteh Cathut uknaeram a pha hoehnahlan atu hoi misur heh bout ka net mahoe, telah a ti.

<sup>19</sup> Hahoi vaiyei a la teh Cathut koe lunghawi lawk a dei hnukkhu vaiyei a raen teh ahnimouh a rei teh hetheh ka tak doeh, nangmouh hanlah ka pasoung e ka tak doeh. Kai na pahnim awh hoeh nahanlah sak awh, telah atipouh. <sup>20</sup> Hot patetlah tangmin bu a ca hnukkhu manang hai a la teh, hete manang heh nangmouh hane ka palawng e ka thi hoi caksak e lawkkam katha doeh. <sup>21</sup> Hatei, kai na ka pahnawtkung e a kut teh hete caboi koe ka kut hoi rei ao. <sup>22</sup> Cathut ni a hmoun tangcoung e patetlah tami Capa teh a due han, hatei na ka pahnawt e tami teh a yawthoe telah a ti. <sup>23</sup> Hahoi amamouh hoi amamouh teh apinimaw het heh a sak han telah buet touh hoi buet touh a kâ pacei awh.

### *Apimaw ka talue poung han*

<sup>24</sup> Hothloilah a hnukkâbangnaw ni maimouh dawkvah apimaw hoe ka talue telah buet touh hoi buet touh a kâoun awh. <sup>25</sup> Jisuh ni yah Jentel siangpahrangnaw ni teh a uk awh. Kâtawnnae katawnnaw hah ram hanlah hnokahawi kasakkung telah ati awh. <sup>26</sup> Hatei nangmouh teh hottelah sak awh hanh. Nangmouh thung dawkw e ka talue e ni camo patetlah awh seh, kahrawikung ni san patetlah awh seh. <sup>27</sup> Apimaw bet ka talue. Bu ca hanelah ka tahung e maw, bu kapoekung maw. Dei ngai laipalah ka tahung e a taluehnawn. Hatei, kai teh nangmouh thung dawkvah bu kapoekung lah ka o. <sup>28</sup> Tanouknae ka khang navah nangmouh ni na okhai awh. <sup>29</sup> Hahoi a Pa ni uknaeram kai na poe e patetlah kai ni hai nangmouh na poe. <sup>30</sup> Kaie uknaeram thung, kaie caboi dawkw na canei awh vaiteh Isarel miphun hlaikahni touh lawkceng hanelah bawitungkung dawkw na tahung awh han, telah atipouh.

### *Piter ni Jisuh a pahnawt nahane sut a dei*

<sup>31</sup> Simon, Simon, thai haw. Cai karue e patetlah nangmouh karue hanelah Setan ni a kâhei toe. <sup>32</sup> Hatei Simon, na yuemnae a rawk hoe hanelah, nang hanelah ka ratoum toe. Hahoi kai koe lah bout na ban nah na hmaunawngghanaw hah tha na poe han, telah atipouh. <sup>33</sup> Piter ni, Bawipa, nang hoi thongim dawkw bo hane hoi due hanelah coungkacoe lah ka o toe telah atipouh. <sup>34</sup> Jisuh ni, Piter, sahnin ahluai a khawng hoehnahlan nang ni ka panuek hoe hanelah vai thum touh na pahnawt han, atipouh.

### *Tangka, yawngya hoi tahloi sin awh hanh.*

<sup>35</sup> Jisuh ni bout a dei e teh, tangkabom, yawngya, khokkhawm sin laipalah cet awh, telah na patoun awh navah buet touh a panki maw telah a pacei. Ahnimouh ni panki hoe hanelah, atipouh awh. <sup>36</sup> Hahoi Jisuh ni, hatei atuteh, tangkabom ka tawn e ni sin naseh, hot patetvanlah yawngya hai sin naseh. Tahloi ka tawn hoe hanelah e ni amae khohna a yo vaiteh tahloi ran naseh. <sup>37</sup> Bangkongtetpawiteh, Cakathoung ni, ama teh tamikayonnaw hoi mektouk sin lah ao, telah ati e hah kaie kong dawkvah atu akuap han. Kaie kong a thut e naw pueng teh a kuep toe, telah a ti. <sup>38</sup> Ahnimouh ni, Bawipa, khenhaw! hi vah tahloi kahni touh ao, telah ati awh teh, a khout toe atipouh.



<sup>39</sup> Hathnukkhu Jisuh a tâco teh amae phung patetlah, Olive mon dawk a cei teh a hnukkâbangnaw ni a hnuk a kâbang awh. <sup>40</sup> Hote hmuen koe a pha navah nangmouh teh tacueknae dawk na kâen awh hoeh nahanlah ratoum awh, telah atipouh. <sup>41</sup> Hathnukkhu, talung tâkhawng e sittouh a cei teh a khokcuengkhuem teh a ratoum. <sup>42</sup> A Pa, na ngainae awm pawiteh, hete manang dawk hoi na hlout na hlout sak haw. Hatei, kai ka ngainae patetlah tho hanh naseh. Nama na ngainae patetlah thoseh, telah a ratoum. <sup>43</sup> Hatnavah ahni koe kalvan hoi kalvantami a kamnue teh ahni hah tha a poe. <sup>44</sup> Lungthin meimei ka tangpawk lah a ratoum teh lahun tui talai dawkvah thi patetlah a bo.

<sup>45</sup> A ratoumnae koehoi a thaw teh a hnukkâbangnaw koe a bout a cei navah, ahnimouh teh lungreirhai hoi ao awh teh a i awh e hah a hmu. <sup>46</sup> Ahnimouh koe bangkong na i awh, tacueknae dawk na kâen awh hoeh nahanelah thaw awh nateh ratoum awh, atipouh.

### *Judah ni Jisuh a paco*

*Mat 26:47-56; Mrk 14:43-50*

<sup>47</sup> Hottelah a dei lahun nah, a hnukkâbang hlaikahni touh thung dawk e Judah Isakarot ni tamimaya hmalah a cei teh Jisuh paco hanlah rek a hnai. <sup>48</sup> Jisuh ni ahni koe, Judah, tami Capa heh paco laihoi maw na pahnawt vaw, atipouh.

<sup>49</sup> Jisuh hoi rei kaawm e naw ni kaawm hane hno hah a hmu navah, Bawipa tahloi hoi ka bouk awh han maw atipouh awh. <sup>50</sup> Ahnimouh thung dawk e tami buet touh ni vaihma kacue e a san buet touh e a hnâ aranglae a bouk pouh. <sup>51</sup> Jisuh ni malawi seh, atipouh. Ahnie a hnâ a tek pouh teh ahawi sak. <sup>52</sup> Jisuh koe ka tho e vaihma bawinaw, bawkim karingkungnaw, kacuenaw ni tamru man hane patetlah tahloi hoi bongpai hoi na tho awh maw. <sup>53</sup> Nangmouh hoi bawkim dawkvah hnintangkuem ka o navah, nangmouh ni kai na man awh hoeh. Hatei atuteh nangmae tueng doeh, khohmo bahu lah hai ao telah atipouh.

### *Piter ni Jisuh a pahnawt*

*Mat 26:69-75; Mrk 14:43-50*

<sup>54</sup> Hahoi, Jisuh a man awh teh a hrawi awh. Vaihma kacue im dawk a ceikhai awh. Hatnavah Piter teh ahlanae koehoi a kâbang van. <sup>55</sup> Toeim thongma lungui hmai a patawi awh teh cungtalah a tahung awh. Piter hai ahnimouh koe a tahung van. <sup>56</sup> Piter ni hmai teng a tahung nah sannu buet touh ni khei a khet teh hete tami heh Jisuh hoi rei kaawm e tami doeh telah a ti. <sup>57</sup> Piter ni a oun, napui nang ahni teh ka panuek hoeh. <sup>58</sup> Hathnukkhu dongdeng ao hoi tami alouke buet touh ni a hmu teh nang haiyah ahnimouh koe na o doeh atipouh, Piter ni tongpa nang kai nahoe atipouh. <sup>59</sup> Hahoi suimilam buet touh a ro hnukkhu tami alouke buet touh ni hete tami hai Jisuh hoi rei ao katang, ahni heh Galilee tami doeh atipouh. <sup>60</sup> Hatnavah Piter ni tongpa nang na dei e ka panuek hoeh atipouh. Dongdeng ca lawk a dei lahun nah ahlui a khawng. <sup>61</sup> Hatnavah Bawipa ni a kamlang teh Piter hah a khet. Hatnavah Piter ni Bawipa e lawk teh hlawt a pouk, ahlui a khawng hoehnahlan vai thum touh na pahnawt han telah a dei pouh e lawk hah hlawt a pouk. <sup>62</sup> Piter ni alawilah a tâco teh puenghoi a khawngsauek teh a kâ.

### *Jisuh pacekpahlekae*

*Mat 26:67-68; Mrk 14:65; Jhn 18:22-23*



<sup>63</sup> Jisuh ka man e naw ni ama teh pacekpahlek awh teh a hem awh. <sup>64</sup> A mit a huem pouh teh, a hem awh, nang apinimaw na hem telah atipouh. <sup>65</sup> Alouke lawknaw hoi lawkthoe hoi a pathoe awh.

### *Lawkcengnae hmalah Jisuh a tâcokhai awh*

<sup>66</sup> Khodai navah Judah kacuenaw hoi vaihma bawinaw hoi cakathutkungnaw cungtal a tho awh teh lawk deinae hmuen koe a ceikhai awh. <sup>67</sup> Nang teh Khrih maw, dei haw atipouh awh, Jisuh ni ka dei nakunghai na tang awh ma hoe. <sup>68</sup> Kai ni na pacei nakunghai na dei awh mahoe. <sup>69</sup> Atu hoiyah tami Capa heh Cathut hnosakthainae aranglah a tahung han atipouh. <sup>70</sup> Hatnavah ahnimouh pueng ni nang heh Cathut capa na maw atipouh awh. Ahni ni na dei e patetlah bokheiyah atipouh. <sup>71</sup> Ahnimouh ni bangpatet e kapanuekkhaikung maw a ngai rah, amae lawk roeroe na thai awh toe ati awh.

## 23

### *Pailat hmalah Jisuh*

*Mat 27:11-14; Mrk 14:61-63*

<sup>1</sup> Hahoi ahnimouh teh karik a thaw awh teh, Jisuh hah Pailat koe a ceikhai awh. <sup>2</sup> Hete tami ni ka taminaw a dумыen, Sizar siangpahrang koe tamuk na poe mahoe, ati teh, kai doeh Khrih, siangpahrang toe a ti, ti teh ahni hah yonpen awh. <sup>3</sup> Pailat bawi ni, nang teh Judah siangpahrang katang maw telah a pacei nah, Jisuh ni na pacei e patetlah bokheiyah, atipouh.

<sup>4</sup> Hatnavah Pailat ni vaihma bawinaw hoi taminaw koe, hete tami heh a yonnae banghai ka hmawt hoe atipouh. <sup>5</sup> Hatei hoe ka cai lah a hram awh teh, hete tami ni cangkhai e lahoi tami moikapap thung dawkvah runae a tâcokhai. Galilee ram hoi Judah ram pueng koug a katin, atuteh hi vah a pha toe ati awh.

### *Herod hmalah*

<sup>6</sup> Hote Pailat ni a thai navah, hete tami heh Galilee tami maw telah a pacei. <sup>7</sup> Jisuh teh Herod ni a uknaeram dawkvah ao tie a panue navah ama teh Herod koe a ceisak awh. Hatnavah Herod hai Jerusalem kho ao.

<sup>8</sup> Herod ni Jisuh a hmu navah a lunghawi poug, bangkongtetpawiteh ahnie kong hah pou a thai e lah ao teh kâhmo han a ngainae moi a ro toe. Hahoi Jisuh ni kângairuhno buetbuet touh a sak e hmu hanelah a ngai awh. <sup>9</sup> Hatnavah Herod ni Jisuh teh lawk moikapap a pacei. Hatei Jisuh ni lawk kam touh boehai pathung hoe. <sup>10</sup> Vaihma bawinaw hoi cakathutkungnaw ni a kangdue awh teh, puenghoi yon a pen awh. <sup>11</sup> Herod hoi a ransanaw ni Jisuh teh a pacekpahlek teh banglahai noutna awh hoe. Angki kahawi a kho sak awh teh Pailat koe bout a thak awh. <sup>12</sup> Hote hnin dawkvah Pailat hoi Herod teh huiko lah a o, hat hoehnahlan teh a kâtaran roi.

### *Barabas maw Jisuh maw*

<sup>13</sup> Pailat ni vaihma bawinaw hoi kahrawikungnaw hoi tami moikapap a kaw teh, <sup>14</sup> hete tami heh kai koevah na thokhai teh tami moikapap hah runae koe a hrawi na ti awh. Atuteh ama hah na hmalah tâcokhai teh hno kahawioeh a sak telah yon na pen e naw pueng hah buet touh boehai a sak telah ka hmawt hoe. <sup>15</sup> Herod ni hai a yonnae hmawt van hoe, hatdawkvah kai koevah bout a thak. Hete tami ni vah thei khai han kamcu



lah hno a sak e buet touh hai awm hoeh. <sup>16</sup> Hatdawkvah ka yue vaiteh ka tha han, telah a ti. <sup>17</sup> Ceitakhai pawl ao nah tangkuem vah Pailat ni thongim ka bawt e buetbuet touh ouk a tha e lah ao.

<sup>18</sup> Taminaw pueng ni a hram awh teh, ahni teh thet awh. Barabas hah tha awh telah a ti. <sup>19</sup> Barabas teh kho thungvah kamcannae hoi tami ka dumyen e, tami a thei kecu dawkvah thongim ka bawt e lah ao.

<sup>20</sup> Pailat ni Jisuh tha han a ngai dawkvah taminaw pueng koe lawk bout a dei. <sup>21</sup> Hatei a hram awh teh, thingpalam dawk het sin awh, thingpalam dawk het sin awh, telah ati awh.

<sup>22</sup> Pailat ni bout a dei pouh e teh, bang yonnae maw a sak. Due han kamcu lah hno a sak e buet touh hai ka hmawt hoeh. Ka yue vaiteh ka tha han, telah apâthum lah a dei. <sup>23</sup> Hatei lawk kacaipoung lahoi yah, Jisuh teh thingpalam dawk het sin awh, telah puenghoi a hram awh dawkvah ahnimae lawk ni a tâ. <sup>24</sup> Pailat ni hai ahnimouh ni a hei e patetlah lawk a tâtueng pouh. <sup>25</sup> Ruengruengtinae hoi tamitheinae dawk hoi thongim paung lah kaawm e hah a hei awh e patetlah a tha pouh teh, Jisuh hah amamae ngainae patetlah a poe.

### *Thingpalam hrawmnae*

*Mat 27:33-44; Mrk 15:22-32*

<sup>26</sup> Jisuh teh ransanaw ni a ceikhai awh navah, Sairen kho e Simon ka tho lahun e hah a hmu awh teh a man awh, hateh thingpalam a hrawm sak awh teh Jisuh hnuk a kâbang sak awh. <sup>27</sup> Hahoi tamimaya hoi ka khuikap e napuinaw ni a kâbang sin awh. <sup>28</sup> Jisuh ni ahnimanaw hah a khet teh, Jerusalem e napuinaw, kai hanelah kap awh hanh, namamouh hoi na canaw hanelah kap awh. <sup>29</sup> Bangkongtetpawiteh, cakaroe e napui teh a yawhawi. Camo kaneng boihoe hae napui teh a yawhawi telah dei nahane hnin a pha han. <sup>30</sup> Hote tueng dawkvah taminaw ni monnaw kaimouh dawk bawt haw, ati awh vaiteh, monruinaw, kaimouh muen na tim sin awh haw, telah ati awh han. <sup>31</sup> Bangkongtetpawiteh thingkung a hring lahun nah hottetelah sak pawiteh, ka ke e koe teh bangtelamaw ao han, telah atipouh.

### *Thingpalam dawk pathoutnae*

<sup>32</sup> Alouke tami kahni touh tamikayon reira, Jisuh hoi rei thei hanelah a ceikhai van awh. <sup>33</sup> Hatnavah, Luhru tie hmuen koe a pha awh navah Jisuh teh thingpalam dawk a pathout awh teh tamikayon kahni touh hai aranglah buet touh, avoilah buet touh a pathout van awh. <sup>34</sup> Jisuh ni, a Pa, ahnimae yon ngaithoum haw, bangmaw ka sak tie panuek awh hoeh, telah ati. Ahnimouh ni cungpam a rayu awh teh angki a kâravei awh.

<sup>35</sup> Hahoi, tami moikapap ni kangdue laihoi a khet awh. Ahnimouh hoi kahrawikungnaw ni a panuikhai awh teh, tami alouknaw teh a rungngang, ama teh Cathut ni a rawi e Messiah lah awm pawiteh amahoima rungngang naseh, telah ati awh. <sup>36</sup> Ransanaw ni hai a tho teh misur tui ka thut e hah a poe teh, <sup>37</sup> Judah Siangpahrang lah na awm pawiteh na mahoima kârungngang haw titeh a dudam awh.

<sup>38</sup> A lû lathueng thut lah kaawm e lawk teh, AHNI TEH JUDAH SIANGPAHRANG DOEH, telah Grik, Latin, Hebru lawk lahoi a vo awh. <sup>39</sup> Hahoi vo lah kaawm e tamikayon buet touh ni, Jisuh a dudam teh, Messiah lah na awm hoeh maw. Namahoima rungngang nateh kaimouh hai na rungngang haw telah atipouh.



<sup>40</sup> Hatei, alouke buet touh ni ahni hah a yue teh, Cathut na taket hoe haw. Nang hai ahni hoi reikâvan lah yonphukhangnae hah pouk haw atipouh. <sup>41</sup> Maimouh roi teh tawkphu doeh khang roi. Hatei hete tami ni teh banghai payonnae sak hoe haw atipouh. <sup>42</sup> Hahoi Jisuh koe a dei pouh e teh, Bawipa, na uknaeram daw k na tho tore i teh, kai na pahnim hanh lah a, telah atipouh. <sup>43</sup> Jisuh ni atangalah na dei pouh, sahnin paradis vah kai hoi rei na o han, atipouh.

### *A duenae*

*Mat 27:33-44; Mrk 15:22-32*

<sup>44</sup> Hote tueng teh kanituengtalueng a thun hoi tangminlasa suimilam katham totouh, suimilam katham touh thung talai van abuemlah kho king a hmo. <sup>45</sup> Hahoi bawkim thung yap e lukkarei kahni touh lah a kâphi. <sup>46</sup> Jisuh ni kacaipounglah a hram teh, a Pa, na kut dawkvah ka muitha na poe, telah a titeh a hringnae a thouk.

<sup>47</sup> Hote hah ransabawi ni a hmu navah, Cathut a pholen. Hete tami teh tamikalan tangngak doeh, telah a ti. <sup>48</sup> Hote hno khet hanelah ka tho e taminaw pueng ni hotnaw a hmu navah a lungtabue a ratup awh teh a ban awh. <sup>49</sup> Jisuh ka panuek e taminaw hoi Galilee ram hoi amae hnukkâbang e napuinaw ni, hete hno teh ahlapoungnae koehoi a khet awh.

### *Pakawpnae*

*Mat 27:57-61; Mrk 15:42-47*

<sup>50</sup> Hatnavah Judah ram Arimathea kho daw k tami buet touh a min Joseph tie ao. Ahni teh tami kahawi hoi tamikalan lah ao teh Cathut uknaeram ka tho hane ka ngaihawi e lah ao. Ama teh Bawi daw k ka baw k e lah ao van ei teh lawk tâtueng e hoi hno a sak awh e hah a lungkuep hoe h. <sup>51</sup> Cathut uknaeram ka ngaihawi e tami kahawi, tamikalan lah ao. <sup>52</sup> Pailat koe a cei teh Jisuh e a ro hah a hei. <sup>53</sup> A ro hah a la teh lukkarei hoi a kayo teh tami buet touh boehai pakawp boihoe h rae talung tangkom thungvah a pakawp. <sup>54</sup> Atangtho teh sabbath hnin a hnai toe, <sup>55</sup> Galilee ram hoi Jisuh e a hnukkâbang e napuinaw hah Joseph koe a cei awh teh tangkom hoi tangkom thungvah bangtelamaw Jisuh e a ro hah a ta tie khet hanelah a cei awh. <sup>56</sup> Hahoi im lah a ban awh teh hmu itui hoi satui hah a rakueng awh. Sabbath hnin teh kâpoelaw k patetlah a kâhat awh.

## 24

### *Bout a thawnae*

*Mat 28:1-8; Mrk 16:1-8; Jhn 20:1-8*

<sup>1</sup> Hatei a yat daw k e apasuek hnin, amom vah hote napuinaw ni alouke napuinaw hoi cungtalah, hluk hanelah hmu itui a sin awh teh tangkom koe a cei awh. <sup>2</sup> Hahoi tangkom tengnae lungphen a kâta hruet e hah a hmu awh. <sup>3</sup> Hahoi a thung a kâen awh bote h Jisuh e ro hmaw t awh hoe h. <sup>4</sup> Hatnavah bangmaw sak han ti panuek laipalah a kangdue awh lahun navah, lukkarei loukloukkaang e ka khohnat e tami kahni touh hmatara a kangdue roi. <sup>5</sup> Hote napuinaw ni a taki awh teh a saling awh navah, ahnimouh roi ni, bangkongmaw kahring e tami hah kadout um na tawng awh. <sup>6</sup> Hivah awm hoe h, bout a thaw toe. Tami Capa teh tamikayonnaw e kut daw k poe lah awm vaite h thingpalam daw k a pathout awh han. <sup>7</sup> Apâthum hnin bout a thaw han, telah Galilee ram ao navah a dei e naw hah pahnim awh hanh, telah atipouh roi. <sup>8</sup> Hahoi ahnimouh ni a lawk hah bout a panue awh, <sup>9</sup> hahoi tangkom koehoi a ban awh teh hote hnonaw



hah a hnukkâbangnaw hlaibun touh hoi alouknaw pueng koe a dei pouh awh.

<sup>10</sup> Hote napuinaw teh Meri Magdalin, Joanna hoi Jem e a manu Meri hoi alouke napuinaw doeh. Amamouh hoi ahnimouh koe ka cet van e tami a alouknaw ni vah hete kong teh gunceinaw koe a dei pouh awh. <sup>11</sup> Hatei a hnukkâbangnaw ni vah napui ni a dei e teh rumram lah a pouk teh yuem awh hoeh. <sup>12</sup> Hatei Piter teh a thaw teh tangkom koe a yawng, a khet navah, ro kayonae lukkarei hah a hmu. Hahoi hote hno kaawm e dawk a kângai lah a ru teh, ama im lah a ban.

*A hnukkâbang kahni touh koe a kamnuenae*

<sup>13</sup> Hahoi hote hnin dawkvah ahnimouh thung dawk e kahni touh teh Jerusalem kho hoi meng sari touh hlai ahlanae Emmaus kho lah a cei roi. <sup>14</sup> Kaawm tangcoung e a konglamnaw pueng buet touh hoi buet touh a kâpankhai roi. <sup>15</sup> Hottelah a kâpankhai navah Jisuh ni ahnimouh roi koe a hnai teh ahnimouh hoi cungtalah rei a cei awh. <sup>16</sup> A hmu roi ngoun, hatei panuek roi hoeh. <sup>17</sup> Hahoi Jisuh ni, na cei roi nah buet touh hoi buet touh na kâpankhai roi e lawk teh bangpatet e lawk maw. Bangkongmaw na minhmai a mathoe roi, telah a pacei. <sup>18</sup> Hahoi ahnimouh roi thung dawk e tami buet touh, a min Kleopas tie ni, Jerusalem vah imyin lah na o nahlangva hote kho dawk e a konglamnaw hah na panuek hoeh maw telah atipouh. <sup>19</sup> Jisuh ni bangpatet e hno maw telah a pacei navah Nazareth kho e Jisuh doeh. Hote tami ni Cathut hmalah thoseh, dei thainae, sak thainae hoi kakuep e profet athakaawm katang e doeh. <sup>20</sup> Vaihma bawinaw hoi na kaukkungnaw ni thei hanelah a poe awh teh thingpalam dawk a hetsin awh. <sup>21</sup> Kaimouh ni ama teh Isarel taminaw ka hlout sak hane mue telah ka pouk awh. Hothloilah, hote hno aonae hah atuteh apâthum hnin a pha toe. <sup>22</sup> Kaimouh thung dawk kaawm e napui tangawn ni kângai na ru sak awh. Amom tangkom koe a cei awh, <sup>23</sup> hatei, a ro teh hmawt awh hoeh. A ban awh teh kalvantaminaw ni, ahni teh a hring telah a dei awh e kamnuenae hah a hmu awh. <sup>24</sup> Hatnavah kaimouh dawk kaawm e tami tangawn ni tangkom koe a cei awh teh napuinaw ni a dei e patetlah a hmu awh. Hatei a ma teh hmawt awh hoeh, telah a ti. <sup>25</sup> Jisuh ni, na pathu awh maw! profetnaw ni a dei e yuem hanelah na ru sak poung awh. <sup>26</sup> Messiah ni hete hnonaw hah a bawilennae thung a pha hoehnahlan a khang hane nahoehmaw telah a ti. <sup>27</sup> Hatnavah Jisuh ni Cakathoung dawkvah Mosi e cauk hoi profetnaw ni a thut e cauk totouh, amae kong a thut e naw pueng hah kacaicalah a dei.

<sup>28</sup> A ceinae kho a pha tawmlei navah Jisuh ni hmalah pou cei hloi hane patetlah ao pouh. <sup>29</sup> Hote tami roi ni kaimouh hoi cungtalah rei luen leih, tangmin lah a pha toe kho hai meimei a hmo toe atipouh roi. Hatdawkvah ahnimouh koe cungtalah a luen.

<sup>30</sup> Ahnimouh hoi cungtalah caboi a ven awh navah vaiyei a la teh lunghawilawk a dei hnukkhu vaiyei a raen teh a rei. <sup>31</sup> Ahnimouh roi ni a mit a ang roi teh Jisuh doeh tie a panue roi. Hatei ahnimouh roi e mithmu vah yout a kahma pouh. <sup>32</sup> Ahnimouh roi ni, lam vah lawk kâpankhai e hoi Cakathoung e a dungkawnae a dei navah ka lunghin thungvah hmai ka kang e patetlah a o, telah buet touh hoi buet touh a kâpankhai roi.

<sup>33</sup> A hnukkâbang roi teh tang a thaw roi teh, Jerusalem lah let a ban roi. A hnukkâbangnaw hlaibun touh hoi alouknaw a kamkhueng awh e hah a hmu roi. <sup>34</sup> Bawipa teh a thaw katang doeh. Simon koe a kamnue pouh



toe tie a kâdei awh. <sup>35</sup> Hahoi a hnukkâbang kahni touh ni lam vah hno kaawm e hoi Bawipa ni vaiyei a raen navah a panue roi e kong hah a dei pouh roi.

*Jisuh a thawnae hoi a kamnue*

<sup>36</sup> Hahoi hottelah buet touh hoi buet touh a kâdei awh navah, Jisuh ni ahnimae alungui vah a kangdue teh, nangmouh koe roumnae awm lawih seh, telah atipouh.

<sup>37</sup> Hatei, ahnimouh teh lungpuen, hoi a taki awh teh kahrai doeh ka hmu telah a pouk awh. <sup>38</sup> Bawipa ni, bangkongmaw na lungpuen awh. Bangkongmaw na lungthung oupvoutnae na tawn awh. <sup>39</sup> Ka kut hoi ka khok khenhaw! Kama roeroe doeh. Na tek awh haw na panue awh han, kahrai teh a hru hoi a tak tawn hoe, kai teh ka tawn tie hah na hmu awh, telah atipouh. <sup>40</sup> Hote lawk a dei e abaw hoi a kut hoi a khok a pätue. <sup>41</sup> Hahoi a lunghawi awh lawi, a yuem thai awh hoe rah dawkvah, nangmouh koe cakawi ao maw telah a pacei. <sup>42</sup> Hahoi ahnimouh ni tanga pâeng e a kawvang hoi a poe awh. <sup>43</sup> Jisuh ni a la teh ahnimae hmalah a ca pouh. <sup>44</sup> Bawipa ni, nangmouh hoi cungtalalah ka o nah bout ka dei e teh, Mosi e kâlâw cauk, profetnaw hoi Sam lanaw dawkvah kaie ka kong a thut e pueng teh koug a kuep han atipouh.

<sup>45</sup> Cakathoung a panue awh nahanelah ahnimae panuenae lungthin a paawng pouh hnukkhu, <sup>46</sup> ahnimouh koe a dei pouh e teh, Cakathoung daw k a thut e teh, Khrih teh a due vaiteh apâthum hnin duenae koehoi bout a thaw han. <sup>47</sup> Hahoi a mae min lahoi yon pankângainae hoi yon ngaithoumnae kong hah Jerusalem kho hoi a kamtawng vaiteh taminaw pueng koe dei lah ao han telah a dei. <sup>48</sup> Hete hnônaw pueng daw k nangmouh teh kapanuekkhaikung lah na o awh. <sup>49</sup> Hahoi a Pa ni lawk a kam e patetlah nangmouh koe na poe han. Hateiteh lathueng lahoi hnosakthainae khohna awh hoehroukrak Jerusalem kho vah ring awh, atipouh.

*Kalvan a luennae*

<sup>50</sup> Hahoi Bethani kho lah ahnimouh a ceikhai teh a kut a dâw teh ahnimanaw yawhawi a poe. <sup>51</sup> Yawhawi a poe lahun navah ahnimouh hoi a kâkapek teh kalvan vah a luen. <sup>52</sup> Ahni a baw k awh teh lunghawi laihoi Jerusalem lah a ban awh teh, <sup>53</sup> bawkim daw k pout laipalah Cathut teh a pholen awh.



## JAWHAN (The Gospel According to John)

### *Lawk teh Cathut doeh*

<sup>1</sup> Apuengcue vah lawk teh ao, Lawk teh Cathut hoi rei ao, Lawk teh Cathut doeh. <sup>2</sup> Ahni teh apuengcue vah Cathut hoi rei ao. <sup>3</sup> Hnocawngca pueng ahni pawlawk dawk sak lah ao teh, ahni laipalah sak hoeh e banghai awm hoeh. <sup>4</sup> Ahni dawk hringnae ao, hahoi hote hringnae teh taminaw e angnae lah ao. <sup>5</sup> Hote angnae teh a hmonae koe a ang teh, hmonae ni ramuk thai hoeh.

<sup>6</sup> Cathut ni Jawhan tie a tami hah a patoun. <sup>7</sup> Jawhan ni angnae kong hah a kampangkhai. Tami pueng ni hote akong a thai navah yuemnae a tawn thai awm nahane dei hanlah a tho. <sup>8</sup> Ahni teh angnae nahoe, angnae kong kampangkhai hane doeh a tho. <sup>9</sup> Angnae katang teh heh talaivan a tho teh tami pueng angnae ka poe e lah ao.

<sup>10</sup> Ahni teh het talaivan vah ao teh, hete talai hai a sak toe. Hatei, talai ni ahni teh panuek hoeh. <sup>11</sup> Ahni teh a taminaw koe a tho ei a taminaw ni a hnamthun takhai awh. <sup>12</sup> Capa ka yuem e taminaw pueng teh Cathut ca lah counгнаe kâ a poe. <sup>13</sup> Cathut ca lah counгнаe teh tami phunglam lahoi khe e lah tho hoeh. Thi moi hoi khe e na hoeh. Tami ni khe e hai nahoe. Cathut ama ni khe e ca lah ao.

### *Lawk teh tami lah a counг*

<sup>14</sup> Lawk hah tami lah a counг teh, lungmanae hoi lawkkatang hoi akawi. Maimouh koe ao teh Cathut ni a Capa tawn dueng a poe e a bawilennaе patetlah maimouh ni bawilennaе hmu awh.

<sup>15</sup> Jawhan ni ahnie kong hah a kampangkhai teh, kaie hnuk lah ka tho hane teh, ka o hoehnahlan kaawm toung niteh, kai hlak kalen e lah ao ka ti navah ahni doeh telah a hramkhai. <sup>16</sup> Ahnie kuepnae koehoi lungmanae van lungmanae teh coe awh. <sup>17</sup> Cathut ni kâlawk teh Mosi koehoi na poe awh, lungmanae hoi lawkkatang teh Jisuh Khrih koehoi doeh a tho.

### *Jawhan ni a kampangkhai*

<sup>18</sup> Apinihai Cathut teh hmawt boihoeh eiteh, Cathut lungtabue dawк kaawm e a Capa buet touh dueng ni Cathut teh a kamnue sak. <sup>19</sup> Judahnaw ni vaihmanaw hoi Levihnaw hah Jerusalem lah Jawhan koe a patoun awh teh, nang hah apimaw telah a pacei sak awh. <sup>20</sup> Jawhan ni kai teh Messiah na hoeh telah kancengcalah a dei pouh. <sup>21</sup> Ahnimouh nihai, pawiteh nang apimaw, Elijah maw telah a pacei awh. Jawhan ni, kai teh Elijah nahoe telah atipouh. Hoeh pawiteh profet maw atipouh awh, nahoe bo bout atipouh. <sup>22</sup> Ahnimouh ni, nang teh apimaw. Kaimouh kapatounnaw koe bout ka dei awh nahanlah namahoima bangtelamaw na kâdei telah a pacei awh. <sup>23</sup> Jawhan nihai, kai teh profet Isaiaһ ni a dei e patetlah Cathut e lamthung lan sak awh telah kahrawngum ka hramkhai e lawk doeh atipouh.

<sup>24</sup> A patoun awh e naw teh Farasinaw doeh. <sup>25</sup> Ahnimouh ni, nang teh Messiah hai na hoeh, Elijah na hoeh, profet hai na hoehpawiteh, bangkongmaw tui baptisma na poe vaw atipouh awh. <sup>26</sup> Jawhan ni, Kai ni vah tui dawк baptisma na poe awh, hatei, nangmouh ni na panue hoe



e, ka hnuklah ka tho hane ao. <sup>27</sup> Kai ni vah khokkhawmrui boehai rasu pouh han ka kamcu hoeh atipouh.

<sup>28</sup> Hettelah lawk a kâ paceinae hmuén teh Jordan palang teng Bethani kho, Jawhan ni tui baptisma a poenae hmuén koe doeh.

### *Cathut e tuca*

<sup>29</sup> Atangtho Jawhan ni Jisuh a tho e a hmu navah khien a haw Cathut e tuca talaivan e yon ka cetkhai e ho! <sup>30</sup> Ahni teh kai ka o hoehnahlan hoi kaawm tangcoung e ni teh kai hlak kalen ni teh kaie ka hnuklah a tho han ka tie hah doeh. <sup>31</sup> Ahmaloe vah ahni teh ka panuek hoeh. Hatei, Isarelnaw ni ama a panue thai awh na hanelah kai ni tui baptisma na poe awh e doeh atipouh.

<sup>32</sup> Hahoi Jawhan ni, kalvan hoi Muitha teh Âbakhu patetlah a kum teh avan vah a cu e ka hmu telah a kampangkhai teh a dei. <sup>33</sup> Ahmaloe vah ahni ka panuek hoeh, hatei, teh tui baptisma na kapoesakkung ni, tami buet touh van vah Muitha a kum teh a cu e hah na hmu navah, ahni teh Kathoung Muitha hoi tui baptisma ka poe hane doeh tie na panue han ati e patetlah, <sup>34</sup> khei ka hmu teh ahni teh Cathut Capa doeh telah nangmouh koe ka kampangkhai telah Jawhan ni a dei.

### *Jisuh hnuk apasuek kâbang e naw*

*Mat 4:18-22; Mrk 1:16-20; Luk 5:2-11*

<sup>35</sup> Atangtho vah Jawhan hoi a hnukkâbang kahni touh ni Jisuh a tho e a hmu awh navah, <sup>36</sup> Jawhan ni a khet teh, Cathut e tuca hah khienhaw ati. <sup>37</sup> Avaica roi ni a thai navah Jisuh hnuk a kâbang roi. <sup>38</sup> Jisuh ni a kamlang teh a hnuklah a kâbang roi e a hmu navah, bangmaw na ngai roi telah a pacei. Ahnimouh roi ni, Rabbi, Bawipa nang teh namaw na o telah atipouh. Rabbi ti ngainae teh kacangkhaikung tinae doeh. <sup>39</sup> Jisuh ni tho nateh khienhaw! atipouh. Ahnimouh ni a cei awh teh a onae teh a hmu awh, atueng teh tangmin lahsa suimilam pali a pha toe. Kho hmo totouh ama koe ao awh.

<sup>40</sup> Jawhan e lawk a thai hoi Jisuh hnukkâbang roi e thung dawb buet touh teh Simon Piter e a nawngaha Andru doeh. <sup>41</sup> Andru ni apasuekpoung lah Simon koe a cei teh, Messiah teh ka hmu awh toe atipouh. Messiah tie teh Khrih tinae doeh. <sup>42</sup> Andru ni Simon hah Jisuh koe a ceikhai. Jisuh ni nang teh Jawhan capa Simon doeh. Cephas tie min katha phung lah na o han atipouh. Cephas tinae teh Piter tie hoi kâvan e talung ti ngainae doeh.

### *Filip hoi Nathanael*

<sup>43</sup> Atangtho vah Jisuh teh Galilee lah cei han a kâcai. Filip hah a hmu nah ka hnukkâbang atipouh. <sup>44</sup> Filip teh Andru hoi Piter a onae Bethsaida kho hoi ka tho e tami doeh. <sup>45</sup> Filip ni Nathanael a hmu nah, phunglawk cauk dawb e Mosi ni a thut e, profetnaw ni akong a thut e Nazareth tami Joseph capa Jisuh hah ka hmu toe atipouh. <sup>46</sup> Nathanael ni, Nazareth kho hoi hnokahawi a tâco boimaw atipouh navah Filip ni vah tho nateh khienhaw! atipouh.

<sup>47</sup> Jisuh ni Nathanael ama koe a tho e hah a hmu teh, Isarel tami katang hi ao e hah khien awh, dumyennae lunghin khoeroe tawn hoeh, atipouh. <sup>48</sup> Nathanael ni hai Bawipa nang ni bangtelamaw kai heh na panue atipouh. Jisuh ni Filip ni na kaw hoehnahlan vah thaibunglung rahim na o nah na hmu toe atipouh.

<sup>49</sup> Nathanael ni, Bawipa nang teh Cathut Capa doeh Isarelnaw e Siangpahrang doeh, atipouh. <sup>50</sup> Jisuh ni thaibunglung rahim na o e ka



hmu ka ti daw k maw na tang. Hot hla k kalen e hno hah bout na hmu han atipouh. <sup>51</sup> Atangcalah na dei pouh awh, kalvan kamawng vaiteh tami Capa e a van vah Cathut e kalvantaminaw ka kum ka luen e na hmu a han atipouh.

## 2

### *Jisuh ni tui hah misur lah a kâthung sak*

<sup>1</sup> Apâthum hnin Galilee ram Kanâ khovah yuvâ kâ paluennae pawî koe Jisuh e manu hai ao van. <sup>2</sup> Jisuh hoi a hnukkâbangnaw hai hote pawî koe a coun awh. <sup>3</sup> Misurtui abaw navah Jisuh koe a manu ni Misurtui abaw toe atipouh.

<sup>4</sup> Jisuh ni, napui nang, bangmaw duem na o hoe h, ka tueng kuep hoe rah, atipouh. <sup>5</sup> A manu ni, ahni ni a dei e patetlah sak awh, atipouh.

<sup>6</sup> Judah phung lah kut kamsin nahanelah maroi taruk touh ouk a hruek awh. <sup>7</sup> Jisuh ni maroi daw k tui koug pakawi awh, telah thaw katawknaw a patoun teh seisei ka poum lah a hlun awh. <sup>8</sup> Duek nateh pawî thungvah rei haw atipouh e patetlah a rei awh. <sup>9</sup> Pawî thung kaawm naw ni hote misurtui teh nâ e maw tie panuek awh hoe h ei, haw e thaw katawknaw ni teh a panue awh. Hatnavah yupaluenkung hah a oup awh. <sup>10</sup> Ayânaw teh misur yamu ahruem hah apasuek poung lah a pânei awh, hahoi teh a radu a pânei awh, nang teh atu sittouh ahruem na tawn rah atipouh awh.

<sup>11</sup> Hottelah Jisuh ni apasuekpoung e kângairunae Galilee ram Kanâ khovah a sak teh, amae bawilennae a kamnue sak. A hnukkâbangnaw ni hai hoe a tang awh.

<sup>12</sup> Hahoi, Jisuh teh a manu, a nawngghanaw hoi a hnukkâbangnaw hoi Kapernuam lah a cei awh teh hawv ah hnin dongdeng a cam awh.

### *Bawkim a thoung*

#### *Mat 21:12-13; Mrk 11:15-17; Luk 19:45-46*

<sup>13</sup> Judahnaw e ceitakhai pawî a hnai toug dawkvah Jisuh teh Jerusalem lah a cei. <sup>14</sup> Bawkim daw k maito, tu hoi bakhu ka yawt e naw hoi pawî koe tangka ka thung e naw a hmu navah, <sup>15</sup> hem nahan bongpai a la teh haw e taminaw, tu hoi maitonaw hai bawkim thung hoi a pâlei teh hnopai yonae caboinaw hai koug a tanawt pouh. <sup>16</sup> Bakhu kayawtnaw han hai na hnônaw lat awh. A Pa e im hah hnopai yonae lah sak a hanh awh.

<sup>17</sup> Cakathoung ni a dei e patetlah, Aw, Bawipa na im ka lungpatawnae ni ka lung a tangpo sak tie hah a hnukkâbangnaw ni hlot a pouk awh.

<sup>18</sup> Judahnaw ni nang ni hettelah hno na sak pawiteh, bang patet e mitnout hno maw kaimouh na patue han, atipouh awh. <sup>19</sup> Jisuh ni, hete bawkim heh, raphoe awh haw hnin thum touh hoi ka sak han telah atipouh. <sup>20</sup> Judahnaw ni a kum 46 touh thung hete bawkim ka sak awh e nang ni teh hnin thum touh hoi ka cum han na ti, atipouh awh. <sup>21</sup> Hottelah a dei ngainae teh, amae a tak bawkim a dei ngainae doeh. <sup>22</sup> Duenae koehoi bout a thaw hnukkhu vah, a hnukkâbangnaw ni hote lawk hah hlot a pouk awh teh, Cakathoung hoi Jisuh lawk teh a yuem awh.

<sup>23</sup> Ceitakhai pawî ao nah thungvah, Jisuh teh Jerusalem vah ao teh, mitnout a sak e hah tami moikapap ni a hmu awh, hahoi Bawipa teh a yuem awh. <sup>24</sup> Hatei, Jisuh ni tami pueng koug a panue dawkvah ahnimouh koe amahoima kâhnawng hoe h. <sup>25</sup> Tami e a lungthung



bangmaw kaawm tie pheng a panue dawkvah tami e a kong rene kampangkhai han ngai hoeh.

### 3

#### *Jisuh ni Nikodemus a cangkhai*

<sup>1</sup> Judah tami, kahrawikung lah kaawm e Nikodemus tie Farasi tami buet touh ao. <sup>2</sup> Ahni ni tangmin vah Jisuh koe a tho teh, Bawipa nang ni na sak e mitnoutnaw Cathut ni na awmkhai hoehpawiteh sak thai lah awm mahoehtie ka hmu awh dawkvah, Bawipa nang teh Cathut ni na patoun e doeh tie ka panue, atipouh.

<sup>3</sup> Jisuh ni atangcalah ka dei, apihai apâhni khekatha hoehpawiteh, Cathut uknaeram hmawt thai mahoehtie atipouh. <sup>4</sup> Nikodemus ni hai matawng ni bangtelamaw apâhni lah maw a manu vonthung bout a kâen vaiteh, bout a khe han vaw atipouh.

<sup>5</sup> Jisuh ni atangcalah ka dei, tui hoi Muitha ni a khe hoe e tami ni Cathut uknaeram dawk kâen thai mahoehtie atipouh. <sup>6</sup> Takthai ni a khe e teh takthai doeh, Muitha ni a khe e teh muitha doeh. <sup>7</sup> Khe katha lah o han ka ti dawk na kâ ngai ru sak hanh. <sup>8</sup> Kahlî teh ama ngai e patetlah doeh a tho, kahlî tho lawk na thai ei, nâ lahoi maw a tho teh nâ lah maw a cei tie panuek thai hoehtie. Hottelah doeh Muitha ni a khe e teh ao atipouh.

<sup>9</sup> Nikodemus nihai, hete hno heh bangtelah hoi maw a coung thai han atipouh. <sup>10</sup> Jisuh ni bout atipouh e teh, nang heh Isarelnaw kacangkhaikung lah na o ei het patet boehai na panuek hoehtie atipouh.

<sup>11</sup> Atangcalah na dei pouh, kaimouh ni ka panue e ka dei awh, ka hmu awh e doeh ka kampangkhai awh. Hatei kaimouh ni kampangkhai e teh na tang awh hoehtie. <sup>12</sup> Talailae hno ka dei navah na tang awh hoehpawiteh kalvanlae hno natawng teh bangtelamaw na tang awh han. <sup>13</sup> Kalvan hoi ka kum ni teh kalvan kho kaawm e tami Capa hloilah apihai kalvan ka luen e awm hoehtie. <sup>14</sup> Mosi ni kahrawngum vah tahrûn a pathout e patetlah tami Capa hai a pathout awh han. <sup>15</sup> A Capa ka yuem e naw pueng teh rawk laipalah yungyoe hringnae a tawn nahane doeh.

<sup>16</sup> Cathut ni a Capa tawntoe e pasoung ditouh talaivan a lungpataw. Capa ka yuem e tami pueng teh rawk laipalah a yungyoe hringnae a tawn awh nahane doeh. <sup>17</sup> Bangkongtetsapawiteh Cathut ni talaivan taminaw lawkceng hanelah Capa heh patoun hoehtie, talai taminaw rungngang hanlah doeh a patoun. <sup>18</sup> Apihai Capa ka yuem pueng ni lawkcengnae khang mahoehtie. Kayuemhoehnaw teh Cathut Capa tawntoe e min a yuem awh hoe dawkvah atu hai lawkceng lah ao toe. <sup>19</sup> Lawkceng lah a onaeteh, angnae teh talaivan a pha ei, taminaw ni kahawihoehtie hno hoe a sak awh dawkvah, angnae hlah hmonae hah hoe a ngai awh. <sup>20</sup> Kathout hno ka sak e naw ni angnae hah a maithoe awh teh, thoe a saknae a kamnue hoehtie nahanelah angnae koe tho hane ngai awh hoehtie. <sup>21</sup> Lawkkatang ka tarawi e tami teh, amae a tarawinae hah Cathut e ngainae hoi a kânging tie a kamnue thai nahanlah angnae koe a tho telah a dei.

#### *Jisuh hoi baptisma Jawhan*

<sup>22</sup> Hahoi, Jisuh hoi a hnukkâbangnaw teh Judah ram lah a cei awh, hawvah a hnukkâbangnaw hoi baptisma a poe awh. <sup>23</sup> Jawhan hai Salim kho teng Aenon vah tui apap dawkvah, baptisma a poenae koe taminaw ni a tho teh baptisma a coe awh. <sup>24</sup> Hatnavah Jawhan thongim thung phat hoe rah. <sup>25</sup> Jawhan e a hnukkâbangnaw teh tui hoi kamthoungnae kong



dawk Judahnaw hoi a kâoun awh. <sup>26</sup> Hatdawkvah Jawhan koe a tho awh teh, Bawipa Jordan tui namran vah nang hoi rei kaawm ni teh akong na kampangkhai e tami ni tui dawk baptisma a poe teh taminaw pueng ahni koe a tho awh atipouh awh. <sup>27</sup> Jawhan ni Kalvan lahoi poe hoehpawiteh, tami ni banghai tet thai mahoe. <sup>28</sup> Kai teh Khrih nahoe, ahnie hmalah patoun lah kaawm e doeh tie hah nangmouh teh kapanuekkhaikung lah na o awh. <sup>29</sup> Vâ ka sak e tangla teh yupaluenkung thoundoun e lah doeh ao toe. Yupaluenkung thoundoun e lawk ka thai e a hui ni yupaluenkung e a lawk a thai nah puenghoi a konawm. Hot patetvanlah kaie lunghawinae hai a kuep. <sup>30</sup> Ahni teh rounng vai, kai teh ka kumcathuk han.

### *Kalvan hoi ka kum te tami*

<sup>31</sup> Lathueng lahoi ka tho e teh bangpueng e lathueng lah ao. Talai lahoi ka tho e teh talai hoi a kâkuet dawkvah, talai kong a dei. Kalvan hoi ka tho e teh bangpueng e lathueng lah ao. <sup>32</sup> Ahni ni a hmu hoi a thai e hah kampangkhai ei, apinihai ahnie kampangkhaiae teh tang awh hoe. <sup>33</sup> Apihai ahnie kampangkhaiae ka dâw e teh Cathut katang doeh tie hoe a panue cai. <sup>34</sup> Cathut ni patoun e ni teh Cathut e lawk doeh a dei. Bangkongtetpawiteh ahni koe Cathut ni Muitha pout laipalah a poe. <sup>35</sup> Apa ni Capa lungpataw dawkvah, hnocawngca pueng teh Capa kut dawk a poe toe. <sup>36</sup> Capa ka yuem e teh yungyoe hringnae a tawn. Hatei, Capa ka ek e teh hringnae a hmu hoe e dueng laipalah, Cathut lungkhueknae ahni dawk vah ao telah Jawhan ni a ti.

## 4

### *Jisuh hoi Samaria napui*

<sup>1</sup> Jisuh ni Jawhan hlak tami moikapap a hnukkâbang lah a coung sak tie Farasinaw ni a thai awh e hah Jisuh ni a panue. <sup>2</sup> Atangcalah Jisuh ma roeroe ni apihai baptisma poe hoe, a hnukkâbangnaw ni doeh a poe. <sup>3</sup> Hatdawkvah, Judah ram lahoi Galilee lah let bout a ban.

<sup>4</sup> Samaria ram a rakan teh, <sup>5</sup> Jakop ni a capa Joseph a poe e tâpit teng Samaria khopui Sikhar vah a pha. <sup>6</sup> Hote hmuen koe Jakop e tuikhu a tai e ao. Jisuh teh a tawn dawkvah hote tuikhu teng vah a tahung. Hote atueng nah kanî boung a thun.

<sup>7</sup> Hawvah Samaria napui teh tui do hanlah a tho. Jisuh ni hote napui koevah, tui nei hane na poe haw atipouh. <sup>8</sup> A hnukkâbangnaw teh rawca ran han khotung a cei awh. <sup>9</sup> Hote napui ni hai nang teh Judah tami nahoehmaw. Bangkong Samaria napui kai koe tui nei hane na hei vaw atipouh. Bangkongtetpawiteh Judahnaw teh Samaritanaw hoi cungtalak ouk awm awh hoe. <sup>10</sup> Jisuh nihai, Cathut e a pahrennae hoi nang koe tui ka hete heh apipatet e ne tie na panuek pawiteh ahni koe na hei han ei te atipouh. Ahni ni hai hringnae tui teh na poe han, atipouh. <sup>11</sup> Hote napui ni Bawipa nang koe do nahane awm hoe bo. Hete tuikhu haiyah hroung a dung dawkvah, hringnae tui na e maw ka hmu han vaw. <sup>12</sup> Nang teh kaimae mintoe Jakop hlak na cue maw. Jakop ni hete tuikhu heh kaimouh na poe awh teh, ama hoi a canaw pueng ni a do awh hloilah saring ka khoumnaw pueng ni hai hete tui hah a pânei awh atipouh. <sup>13</sup> Jisuh ni, hete tui ka net e pueng teh tui bout a kahran han rah. <sup>14</sup> Kai ni ka poe hane tui ka net e tami teh, nâtuok hai tui bout kahran mahoe toe. Hothloilah Kai ni ka poe hane tui teh, a yungyoe ditouh ka phuek e tuikahring lah ao han telah bout atipouh. <sup>15</sup> Napui ni, Bawipa, kai hai tui bout kahran hoe



nahan hoi hie hmuen koe tuido hanlah bout ka tho hoe h nahanelah hote tui na poe haw atipouh. <sup>16</sup> Jisuh ni cet nateh na vâ kaw nateh, hi bout tho ei atipouh. <sup>17</sup> Napui nihai, kai ka vâ ka tawn hoe h atipouh, Jisuh ni ka vâ ka tawn hoe h na tie teh atang doeh, <sup>18</sup> Hatei, na vâ panga touh na tawn toe. Atu na okhai e hai na vâ katang nahoe h bokheiyah, atipouh. <sup>19</sup> Napui nihai, Bawipa, nang teh profet lah na o tie ka panue. <sup>20</sup> Kaimae mintoenaw teh hete mon daw k Cathut a baw k awh. Hatei, nangmouh Judahnaw ni teh Jerusalem kho daw k dueng doeh Cathut ka baw k awh ouk na ti awh, atipouh.

<sup>21</sup> Jisuh ni, napui nang, ka law k yuem haw. Hete mon koe cet laipalah, Jerusalem kho hai cet laipalah Cathut baw k nahane atueng a pha han toe. <sup>22</sup> Rungngangnae teh Judahnaw koehoi a tâco daw kvah, kaimouh teh kamamouh ni ka panue awh e hah ka baw k awh. Nangmouh teh namamouh ni na panue awh hoe h e hah na baw k awh. <sup>23</sup> Ka baw k katangnaw ni Pa hah muitha hoi law kkatang hoi baw knae a tue atu a pha toe. Bangkongtetpawiteh hottelah baw k hanelah doeh Pa ni a ngainae ao. <sup>24</sup> Cathut teh Muitha lah ao daw kvah, ka baw k e pueng ni teh muitha hoi law kkatang hoi a baw k awh han atipouh. <sup>25</sup> Napui ni hai Khrih tie Messiah a tho han tie ka panue. Ama a tho hnin toteh bangpueng kaimouh koe a pâpho han, atipouh. <sup>26</sup> Jisuh ni, ahni teh kai doeh, atu nang hoi law k kâpan e teh Messiah doeh atipouh.

### *Canga tue a pha toe*

<sup>27</sup> Hatnavah a hnukkâbangnaw a tho awh teh hote napui hoi a kâpan e hah a hmu awh navah a kângairu awh. Hatei, bangmaw a ngai, hote napui hoi bangkongmaw law k a kâpan roi tie hah apinihah pacei hoe h.

<sup>28</sup> Hote napui ni tuium a ceitakhai teh kho thung lah a cei. <sup>29</sup> Kaie ka to ka sak e naw pheng ka panuek e tami heh khenhaw! ahni teh Messiah tie Khrih paka han doeh, telah taminaw hah a dei pouh. <sup>30</sup> Kho thung e taminaw teh, Jisuh koe a tho awh.

<sup>31</sup> Hatnae tueng daw k a hnukkâbangnaw ni Rabbi bu cat ei, atipouh awh. <sup>32</sup> Hatei, nangmouh ni na panue hoe h e cakawi kai koe ao, atipouh.

<sup>33</sup> A hnukkâbangnaw ni, tami buetbuet touh ni rawca a la poe toung ma aw ti teh a kâ pacei awh. <sup>34</sup> Jisuh ni, kai na kapatoung e a ngainae taw k e hoi ahnie thaw cum e doeh kaie rawca lah ao. <sup>35</sup> Nangmouh ni canga nahan thapa yung pali touh a ngai rah na ti awh nahoe h maw. Kai ni ka dei e teh law naw hah khenhaw. Canga hane coungkacoelah koug a hmin toe. <sup>36</sup> Cang ka a kung ni kutphu a hmu teh yungyoe hring nahanelah capai daw k a pâkhueng awh. Hatdaw kvah cati ka patue e hoi cang ka a e teh reirei a konawm awh han. <sup>37</sup> Tami buet touh ni a patue, buet touh ni a a telah dei e heh hitueng vah a kuep. <sup>38</sup> Nangmouh ni thaw na taw khoehnae law hmuen ko evah canga hanlah na kâ patoun awh, ayâ ni a taw k tangcoung e nangmouh ni youn na pang awh, atipouh.

### *Talai rungngangkung*

<sup>39</sup> Samaria napui ni vah, kaie ka tawksak e pueng ahni ni be a pâpho tie a dei daw kvah kho thung kaawm e Samaria taminaw ni Jisuh hah a yuem awh. <sup>40</sup> Hatdaw kvah Samarianaw ni hai Jisuh koe a cei awh teh ahnimouh koe hnin o hanelah a haw awh. Hawvah hnin hni touh a roe.

<sup>41</sup> Ama e law k khe i a thai awh daw kvah taminaw pueng ni a tang awh.

<sup>42</sup> Hote napui ko evah, nang ni na dei daw k dueng yuem e tho hoe h. Ama e



a lawk kheh ka thai awh dawkvah, hete tami teh talaivan rungngangkung Bawi Messiah tie atuvah ka panue awh toe atipouh awh.

### *Galileenaw ni Jisuh a dawn awh*

<sup>43</sup> Hnin hni touh aloum hoi haw hoi a tâco teh, Nazareth kho a roun teh Galilee ram lah a cei. <sup>44</sup> Bangkongtetpawiteh, profet teh ama khovah barinae awmhoeheh telah Jisuh ma ni ati. <sup>45</sup> Galilee lah a pha navah ahnimouh ni Bawipa teh a dawn awh, bangkongtetpawiteh ahnimouh hai paw koe a cei awh van teh, Jerusalem kho paw koe vah Jisuh ni a sak e hnouaw pueng hah a hmu awh.

### *Kalaw bawi e capa damnae a coe*

<sup>46</sup> Tui he misurtui lah a coung saknae Galilee ram kanâ khovah bout a pha. Hatnavah Kapernuam kho e kalaw bawi buet touh e a capa teh a pataw. <sup>47</sup> Jisuh hah Judah ram hoi Galilee ram lah a pha tie hote kalaw bawi ni a thai navah, Jisuh koe a cei teh, meimei kadout e a ca damnae a hmu thai nahanelah a kaw.

<sup>48</sup> Jisuh ni nangmouh ni mithmu kângairunae na hmawt awh hoehpawiteh na yuem a mahoeheh atipouh. <sup>49</sup> Bawipa, ka capa a due hoehnahlan uren tho ei, telah kalaw bawi ni atipouh. <sup>50</sup> Jisuh ni cet leih, na capa teh yo a dam toe atipouh nah, kalaw bawi ni hai a yuem teh a cei.

<sup>51</sup> A cei lahun nah a vaicanaw ni a dawn awh teh, na capa yo a dam toe atipouh awh. <sup>52</sup> Nâtuëk maw damnae a hmu titeh a pacei navah paduem tangmin suimilam sari nah atipouh awh. <sup>53</sup> Hote tueng teh Jisuh ni na capa a dam toe tinae tueng doeh tie a na pa ni a panue dawkvah, ama hoi imthungkhu abuemlah ni a yuem awh.

<sup>54</sup> Hete mitnout teh Jisuh ni Judah hoi Galilee lah a cei hnukkhu avai hni nah e a sak e doeh.

## 5

### *Bethesda vah ka pataw e a dam sak*

<sup>1</sup> Hahoi Judahnaw bawkae paw koe awhnae koe Jisuh teh Jerusalem kho lah a cei. <sup>2</sup> Jerusalem kho e tu longkha teng vah Hebru lahoi Bethesda tie tuikamuem ao. Hawvah vaikhap panga touh ao. <sup>3</sup> Hote vaikhap dawk hoi mit kadawnnaw, a khok kakhemnaw, ka kamkhuen ni teh atak kadamhoehnaw, a patawnae aphunphun katawnnaw ni tui ka kâhuen e hah a ring awh. <sup>4</sup> Bangkongtetpawiteh a tue a pha navah, kalvantami ni tuikamuem dawk a cei teh a kâhuet sak. Hottelah tui a kâhuet hnukkhu hmaloe poung lah ka kâphum e ni atak dawk kaawm e patawnae pueng damnae a hmu.

<sup>5</sup> Hawvah a kum 38 ditouh patawnae ka tawn e tami buet touh tuikamuem teng ao van. <sup>6</sup> Hote tami sut ka yan e Jisuh ni a hmu navah hroung kasawlah ao toe tie a panue dawkvah, dam hane na ngai maw telah a pacei. <sup>7</sup> Ahni nihaiyah, Bawipa tui a kâhuet nah tui dawk na ka phum hane tami awmhoeheh. Nueng ka thaw nah ayânaw ni hma oun na cu atipouh. <sup>8</sup> Jisuh ni thaw leih, na inae phailei sin nateh cet leih atipouh. <sup>9</sup> Hatnavah ahni teh a patawnae koehoi peng a dam teh a inae phailei a sin teh a cei. <sup>10</sup> Sabbath hnin lah ao dawk taminaw ni Sabbath hnin nah a inae phailei hah sin hanlah awm hoeheh telah damnae ka hmawt e tami hanelah atipouh awh. <sup>11</sup> Ahni nihai, kai na kadamsakkung ni na inae phailei sin nateh cet leih ati telah atipouh. <sup>12</sup> Judahnaw ni hai na inae phailei sin nateh cet leih katetkung te apimaw telah a pacei awh.



<sup>13</sup> Hote tami teh apimaw tie damnae ka hmawt e tami ni panuek hoeh. Bangkongtetpawiteh, hote hmuen koe tami moi a kamkhueng navah Jisuh duem a tâco dawkvah.

<sup>14</sup> Hatnavah Jisuh ni, hote tami bawkim thung a hmu navah, damnae na coe toe yonnae bout sak hanh lawih. Hoehpawiteh het hlak ka mathout e patawnae teh nang dawk bout a pha han atipouh. <sup>15</sup> Hote tami ni a cei teh, ahni ka damsakkung e teh Jisuh doeh tie Judahnaw koe a dei pouh.

### *Pa hoi Capa barinae*

<sup>16</sup> Sabbath na hnin vah tami a dam sak dawkvah Judahnaw ni Jisuh hah a rektap awh. <sup>17</sup> Jisuh nihai, a Pa teh sahnin ditouh thaw a tawk e patetlah kai hai thaw ka tawk atipouh. <sup>18</sup> Sabbath hnin a raphoe awh dueng laipalah, Cathut hah a Pa ati teh, amahoima Cathut hoi a kâvan sak dawkvah Judahnaw ni thei hanelah a kâcai awh. <sup>19</sup> Jisuh ni, atangcalah na dei pouh awh, Pa ni a sak e dueng doeh Capa ni a hmu teh a sak. Amahmawk banghai sak thai hoeh. Ahni ni a sak e doeh Capa ni hai a sak. <sup>20</sup> Pa ni Capa a lungpataw dawkvah a sak e pueng hah a patue. Nangmouh ni na kângairu nahanelah het hlak hoe ka talue e hno Capa a hmu sak han. <sup>21</sup> Pa ni kadout tangcounghaw bout a thaw sak teh, hringnae a poe e patetlah Capa ni hai a ngai e pueng a hring sak han. <sup>22</sup> Pa ni apihai lawkceng hoeh, Capa koe kâtawnnae pueng poe lah ao toe. <sup>23</sup> Tami pueng ni Pa bari awh e patetlah Capa hai a bari awh han. Api nang ni hai Capa na bari hoehpawiteh ahni kapatounkung Pa na bari awh hoeh.

### *Yungyoe hringnae hoi yon lawkcengnae*

<sup>24</sup> Atangcalah na dei pouh awh. Ka lawk ka thai ni teh kai na kapatounkung ka yuem e tami teh yungyoe hringnae a hmu vaiteh, ahni teh lawkcengnae koehoi hringnae dawk a kâen toe. <sup>25</sup> Atangcalah na dei pouh awh. Kadoutnaw ni Cathut Capa e a lawk a thai awh vaiteh, kathainaw pueng ni a hringnae tue a pha han toung dawkvah atu hai a pha toe. <sup>26</sup> Bangkongtetpawiteh, Pa ni hringnae a tawn e patetlah Capa ni hai hringnae tawwnae kâ a poe. <sup>27</sup> Tami Capa lah ao dawkvah, lawkcengnae dawk kâtawnnae hai bout a poe.

<sup>28</sup> Hete kong dawk na kângairu sak awh hanh. Phuen koe kaawm e pueng ni Capa e lawk thai awh vaiteh, <sup>29</sup> a tâco awh nahane tue ka phat han. Hnokahawi ka sak e teh hringnae koe lah bout a thaw vaiteh, hno kathout ka sak e teh yon lawkcengnae koe lah bout a thaw awh han. <sup>30</sup> Kai ni ka mahmawk banghai ka sak thai hoeh. Ka thai e patetlah lawk ka ceng teh lawk ka ceng e hai a lan. Bangkongtetpawiteh, kama ngai e patetlah laipalah Kai na kapatounkung a ngainae lah doeh ao.

### *Jisuh kampangkhai e hnaw*

<sup>31</sup> Kai ni ka mae kong ka kampangkhai pawiteh, hote kampangkhaiae teh cak hoeh. <sup>32</sup> Hatei, kai na kapanuekkhaikung buet touh ao. Ahnie panuekhainae teh a cak tie ka panue.

<sup>33</sup> Nangmouh ni Jawhan koe laicei na patoun awh, ahni ni lawkkatang doeh a kampangkhai. <sup>34</sup> Tami e kampangkhaiae ka panki hoeh. Nangmouh rungngang lah na o awh nahanelah doeh ka dei. <sup>35</sup> Jawhan teh paang e hmaiim lah ao. Ahnie angnae thungvah dongdeng konawm hanlah doeh na ngai awh.

<sup>36</sup> Jawhan e a kampangkhai e hlak kalen e kai koe lawkpanuesaknae ao. Pa ni na poe e thaw cum hanelah na patoun e patetlah thaw ka tawknae



ni doeh na kampangkhai . <sup>37</sup> Pa ni hai kai koe lah na kampangkhai. Nangmouh ni ahnie lawk teh na thai panuek awh hoeh, ama hai na hmawt awh hoeh. <sup>38</sup> A lawk hai nangmae na lung thung awm thai hoeh. Bangkongtetpawiteh, ama ni a patoun e hah na yuem awh hoeh kecu dawkvah. <sup>39</sup> A lawk thut e Cakathoung dawkvah yungyoe hringnae ao na ti awh teh, Cakathoung teh na touk awh. Hote Cakathoung ni doeh na kampangkhai . <sup>40</sup> Nangmouh ni hringnae na hmu awh nahan kai koe na tho hane na ngai awh hoeh.

<sup>41</sup> Kai teh tami ni poe e barinae ka tawng hoeh. <sup>42</sup> Hatei, Cathut lungpatawnae na tawn awh hoeh tie ka panue. <sup>43</sup> Kai teh a Pa e Min lahoi ka tho ei nangmouh ni banglahai na ngai awh hoeh. Ayânaw ni amamae min lahoi tho pawiteh na dâw awh han doeh. <sup>44</sup> Namamouh hoi namamouh ni na kâpoe awh e barinae hah na ngai awh teh, Cathut ni dueng poe thai e barinae na ka ngai awh hoeh e naw ni bangtelamaw kai hah na yuem thai awh han vaw.

<sup>45</sup> Kai ni Pa e hmalah nangmouh yon na pen han doeh tet awh hanh. Nangmouh yon na ka pen e teh nangmouh ni na kâuep awh e Mosi ni doeh na pen tih. <sup>46</sup> Mosi ni teh Kaie kong doeh a thut. Nangmouh ni Mosi na yuem awh pawiteh, Kai hai na yuem awh han doeh. <sup>47</sup> Hatei, Mosi ni a thut e na yuem awh hoehpawiteh, kaie ka lawk hah bangtelamaw khuet na yuem awh han vaw telah Judahnaw han atipouh.

## 6

### *Tami 5000 touh a paca*

*Mat 14:13-21; Mrk 6:32-44; Luk 2:10-17.*

<sup>1</sup> Hahoi Jisuh teh Galilee tali tie Taiberia tali koehoi namran lah a raka. <sup>2</sup> Kapatawnaw a dam sak e mitnout hah taminaw ni a hmu awh dawkvah a hnuk a kâbang awh. <sup>3</sup> Jisuh teh mon lah a luen teh a hnukkâbangnaw hoi cungtalah a tahung awh. <sup>4</sup> Hatnae tueng nah Judahnaw e ceitakhai paw i a hnai toe.

<sup>5</sup> Jisuh ni a khet navah tami moikapap ama koe ka tho e a hmu navah, hete taminaw han kakhoutlah canei hane namaw vaiyei ran han telah Filip a pacei. <sup>6</sup> Ama ni bangtelah ka sak han tie a panue ei tanouk nahanlah Filip a pacei e doeh. <sup>7</sup> Filip ni hai hete taminaw ni vaiyei tangen rip a dâw thai nahanlah denari cumhni phu patenghai khout mahoeht atipouh.

<sup>8</sup> Simon Piter e a nawngaha Andru tie a hnukkâbang e ni, <sup>9</sup> Vaiyei panga touh hoi kathoege tanga kahni touh ka sin e camo ao. Hatei, tami yit touh e ni hote vaiyei panga touh hoi tanga kahni touh e palek hai tet mahoeht bo atipouh. <sup>10</sup> Jisuh ni, taminaw pueng koug tahung sak telah atipouh. Hote hmuen koe tahung nahan marangpho moi ao. Haw kaawm e tami tongpa luelue 5,000 touh a pha. <sup>11</sup> Jisuh ni vaiyei a la teh lunghawi lawk a dei hnukkhu, a hnukkâbangnaw koe a rei sak, ahnimouh ni katahungnaw hah a rei awh. Hot patetvanlah tanga kahni touh e hai tami pueng kaboumlah a rei awh.

<sup>12</sup> Ahnimanaw pueng ni a von paha lah a ca awh hnukkhu, Jisuh ni kacawi e pueng hah kahmat sak hanh awh, koug racawng awh atipouh. <sup>13</sup> A canawi awh e kanuikapin pueng be a pâkhueng awh navah, vaiyei hoi tanga kacawie abuemlah tangthung hlaikahni touh yikkawi.

<sup>14</sup> Hottelah Jisuh ni a sak e mitnout hah ahnimouh ni a hmu navah ahni teh talaivan ka kum e profet katang doeh ati awh. <sup>15</sup> Ahnimouh ni Bawipa



teh siangpahrang lah ao sak hane a ngai awh e hah Jisuh ni a panue dawkh mon lah ama dueng a luen takhai.

*Tui van lam a cei*

*Mat 14:22-23; Mrk 6:47-51.*

<sup>16</sup> Tangmin a pha toteh, a hnukkâbangnaw teh talî koe lah a cei awh teh long thung a tahung awh. Hahoi Kapernuam kho lah a cei awh. <sup>17</sup> Khohmo tounge eiteh, ahnimouh koe Jisuh tho hoeh rah. <sup>18</sup> Hatnavah tûilî a tho dawkvah tuicapa hai a thaw toe. <sup>19</sup> Lawng hoi meng hni meng thum a cei awh hoi Jisuh teh tui van a khok hoi a cei teh, ahnimouh koe hruethruet a hnai navah a taki awh. <sup>20</sup> Taket awh hanh, Kai kama doeh atipouh teh ama hoi lawng dawkh lunghawicalah ao awh. <sup>21</sup> Ahnimae lawng hai a pha han ngainae hmuen koe tang a pha.

*Hringnae vaiyei*

<sup>22</sup> Atangtho toteh talîpui namran lah kaawm e tamimaya ni, hote hmuen koe lawng buet touh ao e hoi Jisuh hote lawng dawkh cet hoeh, a hnukkâbangnaw dueng doeh ka cet awh tie a panue awh. <sup>23</sup> Taiberia hoi ka tho e longnaw teh, Bawipa ni lunghawi lawk a dei teh tami pueng ni vaiyei canae hmuen koe tui teng a pha awh. <sup>24</sup> Hote hmuen koe Jisuh hoi a hnukkâbangnaw awm awh hoeh tie taminaw ni a panue dawkvah lawng a kâcui awh teh Jisuh kâhmo hanelah Kapernuam kho lah a cei awh.

<sup>25</sup> Taminaw ni talî na ran lah Jisuh a hmu awh navah Bawipa nâtuek maw hivah na tho tounge vaw titeh a pacei awh. <sup>26</sup> Jisuh ni atangcalah na dei pouh awh. Nangmouh ni mitnout na hmu awh dawkh kai na tawng awh hoeh. Vaiyei kaboumlah na ca awh dawkh doeh na tawng awh. <sup>27</sup> Ka kamko kawi e rawcarawnei hanlah patang khang awh hanh. Hot hlak teh tami Capa ni nangmouh na poe teh yungyoe kangning e rawca hah tawng awh. Bangkongtetpawiteh Cathut ni ahni dawkvah amae lungkuepnae tacik a deng toe. <sup>28</sup> Ahnimouh nihai, Cathut e a ngainae ka sak thai nahan bangmaw ka sak awh han titeh a pacei awh. <sup>29</sup> Jisuh ni, Cathut ni nangmouh sak sak han a ngai e teh, ama ni a patoun e hah yuem hane doeh atipouh. <sup>30</sup> Ahnimouh nihai, kaimouh ni ka mit hoi khei ka hmu vaiteh Bawipa nang na yuem nahanelah bangpatete mitnout maw na sak han. Bangmaw na sak pouh awh han. <sup>31</sup> Kaimae mintoenaw ni thingyeiyawn vah mana a ca awh. Cakathoung ni ahnimouh ni a ca awh hanelah kalvan lahoi vaiyei a poe, telah ati awh. <sup>32</sup> Jisuh ni hai atangcalah na dei pouh awh. Mosi ni kalvan e vaiyei nangmouh na poe hoeh, a Pa ni doeh kalvan e vaiyei katang teh na poe awh. <sup>33</sup> Cathut e vaiyei teh kalvan lahoi ka kum ni teh talaivan taminaw hringnae ka poe e doeh atipouh. <sup>34</sup> Ahnimouh nihai, Bawipa hote vaiyei hah kaimouh pou na poe leih, atipouh awh.

<sup>35</sup> Jisuh ni hai kai teh hringnae vaiyei lah ka o. Kai koe ka tho e teh nâtuek hai a vonhlam mahoe. Kai ka yuem e pueng teh tui hai bout kahran mahoe. <sup>36</sup> Hatei, teh nangmouh ni laplap na hmu awh eiteh, na yuem awh hoeh telah yo ka dei toe. <sup>37</sup> Apa ni na poe e tami maw pueng ni teh kai koe a tho awh han. Kai koe ka tho e naw pueng teh apihai ka hrek mahoe. <sup>38</sup> Bangkongtetpawiteh, kama ngainae sak hanlah kalvan hoi ka tho hoeh. Kai na kapatoukung e a lungngai sak hanelah doeh ka tho. <sup>39</sup> Kai na kapatoukung a Pa e a ngainae teh, kai koe na poe e naw thung dawkh buet touh boehai kahmat laipalah a hnukteng e hnin dawkh bout thaw sak hane hah doeh. <sup>40</sup> Atangcalah a Pa e ngainae teh Capa kahmawt



ni teh ka yuem e pueng ni yungyoe hringnae a hmu awh hane doeh. Kai ni hai a hnukteng e hnin dawkvah hote taminaw hah ka thaw sak han ati.

### *Kalvan hoi kum e vaiyei*

<sup>41</sup> Kai teh kalvan hoi ka kum e vaiyei doeh ati dawkvah, Judahnaw ni bangkong het patet e lawk a dei ati awh teh a phuenang awh.

<sup>42</sup> Ahnimanaw ni, ahni teh Joseph capa, Jisuh nahoehtmaw. A manu a na pa hai panue e nahoehtmaw. Bangtelamaw kalvan lahoi ka tho ati vaw ati awh.

<sup>43</sup> Jisuh ni, buet touh hoi buet touh phuenang awh hanh atipouh. <sup>44</sup> Kai na ka patoukng Pa ni sawn hoe pawiteh apihai kai koe tho thai mahoeht, ka tho e pueng teh a hnukteng e hnin dawk kai ni bout ka thaw sak awh han. <sup>45</sup> Cakathoung niteh, ahnimanaw teh Cathut ni a cangkhai han, ati e patetlah a Pa lawk ka thai ni teh katarawinaw pueng teh kai koe a tho awh.

<sup>46</sup> Hatei, tami buetbuet touh ni Cathut a hmu toe tinae nahoeht. Cathut koehoi ka tho e ni dueng doeh Pa teh a hmu toe. <sup>47</sup> Atangcalah na dei pouh awh. Ka yuem e tami teh a yungyoe hringnae a tawn toe. <sup>48</sup> Kai teh hringnae vaiyei doeh. <sup>49</sup> Nangmae mintoenaw teh kahrawngum vah mana a ca awh nahlangva a due awh. <sup>50</sup> Kalvan hoi ka kum e vaiyei kacatnaw pueng teh dout mahoeht. <sup>51</sup> Kai teh kalvan lahoi ka kum e ka hring e vaiyei lah ka o. Apihai hete vaiyei ka cat e teh a yungyoe a hring han. Kai ni na poe awh hane vaiyei teh talaivan taminaw ni a hring awh nahanelah ka pasoung e ka moi doeh atipouh.

<sup>52</sup> Judahnaw ni bangtelamaw amae a moi hah maimouh ca hanelah na poe thai han vaw ati awh. <sup>53</sup> Jisuh nihai, atangcalah na dei pouh awh, tami Capa e a moi cat laipalah, a thi net laipalah nangmouh koe hringnae awmhoeh. <sup>54</sup> Kaie ka moi ka cat ni teh ka thi ka net e tami pueng ni yungyoe hringnae a hmu. Ahnimouh teh a hnukteng e hnin navah bout ka thaw sak han. <sup>55</sup> Kaie ka moi teh cakawi katang lah ao teh ka thi teh nei kawi katang lah ao. <sup>56</sup> Apihai kaie ka moi ka cat niteh, ka thi ka net e pueng ni kai dawk ao teh, kai hai ahni dawk ka o van. <sup>57</sup> Kahring e Pa ni kai na patoun teh, Kai ni Pa e ka lahoi kahring e patetlah Kai na kacate hai Kai lahoi a hring van han. <sup>58</sup> Hete vaiyei teh kalvan lahoi ka kum e vaiyei lah ao. Nangmae mintoenaw ni a ca awh ei, a due awh, hot patet e vaiyei nahoeht. Hete vaiyei ka cat e teh a yungyoe a hring han ati. <sup>59</sup> Kapernuam kho sinakok dawk a cangkhai navah hete kongnaw hah a dei.

### *A hnukkâbang kapap ni Jisuh a yawng takhai awh*

<sup>60</sup> A hnukkâbangnaw ni a thai awh navah, hote lawk teh a ru poug, apinivai a tarawi thai han ati awh. <sup>61</sup> Hete kong dawk a hnukkâbangnaw ni a phuenang awh e hah Jisuh ni a mahmawk a panue dawkvah hete lawk dawk nangmouh ni na lung apout a maw. <sup>62</sup> Tami Capa ni ao pasueknae hmuen koe bout a cei e na hmawt awh pawiteh bangtelamaw na pouk awh han. <sup>63</sup> Muitha ni doeh na hring sak. Takthai ni banghai hawinae na poe hoeh. Kai ni ka dei e lawknaw teh Muitha lah ao teh hringnae lahai ao. <sup>64</sup> Hatei, nangmouh thung dawk a tangawn ni na yuem awh hoeh atipouh awh. <sup>65</sup> Hatdawkvah, apa e rawinae laipalah apihai kai koe tho thai mahoeht ka ti toe. Hottelah atinae teh apimaw ka yuem hoeh, apinimaw na pahnawt han tie hah ahmaloe hoi Jisuh ni a panue toe.

<sup>66</sup> Hahoi teh, a hnukkâbangnaw kapap teh Bawipa hnukkâbang laipalah hnuklah a kamlang awh. <sup>67</sup> Jisuh ni a hnukkâbang hlaikahni touh e koe hai, nangmouh hai kai koehoi na cei han na ngai awh maw atipouh.



<sup>68</sup> Simon Piter ni, Bawipa kaimouh ni api koe maw bout ka cei awh han, yungyoe hringnae hoi kâkuen e lawk teh Bawipa nang koe dueng doeh ao. <sup>69</sup> Bawipa nang teh Khrih lah na o. Ka hring Cathut e a Capa lah na o e kaimouh ni ka panue teh ka yuem awh atipouh. <sup>70</sup> Jisuh ni kai ni tami hlaikahni touh na rawi awh ei, nangmouh thung dawk buet touh teh kahrainathout doeh atipouh. <sup>71</sup> Hottelah a dei ngainae teh, hlaikahni touh thung dawk Bawipa ka pahnawt hane Simon capa Judah Iskariot a dei ngainae doeh. Ahni teh hlaikahni touh thung dawk e buet touh lah ao teh, Jisuh yo hanlah kâcai e lah ao.

## 7

### *Jisuh hmaunawngghanaw ni yuem awh hoeh*

<sup>1</sup> Hahoi Jisuh teh Galilee lah kahlawng a cei. Judahnaw ni Bawipa teh thei hane a kâcai awh dawkvah, Judah lah kahlawng cei hane ngai hoeh. <sup>2</sup> Judahnaw e lukkareiim paw, a tue ni a hnai toe. <sup>3</sup> Hatdawkvah, Jisuh koe a nawngghanaw ni, hi hoi Judah lah cet nateh na sak e hnaw hah na hnukkâbangnaw ni hmawt van naseh. <sup>4</sup> Apihai min kamthang han ka ngai e niteh, arulaho hno sak boi hoeh. Nang ni hete hnaw hah na sak pawiteh, het talaivan vah namahoima kamthang sak awh loe na ka tet e lah doeh na o. <sup>5</sup> Hottelah deingainae teh, amae a nawngghanaw ni patenghai Jisuh teh a yuem awh hoeh dawk doeh. <sup>6</sup> Jisuh nihai, kaie atueng phat hoe rah, hatei, nangmae atueng teh coungkacoe lah pou ao. <sup>7</sup> Talaivan ni nangmouh teh na hmu ngai awh. Kai teh na hmuhma awh. Bangkongtetpawiteh thoenae a sak e naw kai ni ka takhi dawkvah. <sup>8</sup> Hote paw koe nangmouh ni cet awh. Kai teh ka tueng ni a kuep hoe rah daw k ka cet mahoe rah atipouh. <sup>9</sup> Hete lawk a dei nah ahni teh Galilee doeh ao rah.

### *Pawi koevah Jisuh ni a cangkhai*

<sup>10</sup> Hatnavah, a nawngghanaw paw koe be a cei awh hnukkhu, Jisuh teh hote paw koe a ru lah duem a cei van. <sup>11</sup> Hote paw koe, Judahnaw ni Jisuh te na maw o, telah a tawng awh.

<sup>12</sup> Taminaw ni Bawipa e kong hah phuenangnae lah a o. Tami tangawn ni teh tami kahawi doeh ati awh. Tami a tangawn ni teh tami ka dumyen e doeh ati awh. <sup>13</sup> Hatei, Judahnaw a taki awh dawkvah api ni hai kancengcailah dei han ngam awh hoeh.

<sup>14</sup> Hote paw a sak awh lahun nah Jisuh ni bawkim a cei teh a cangkhai. <sup>15</sup> Judahnaw ni a kângairu awh teh, hete tami heh cangnae tawn laipalah, bangtelah hoi maw thouthainae telah a panue ati awh. <sup>16</sup> Jisuh nihai, kai ni ka cangkhai e teh kama e cangkhai nae nahoe bo, na kathakung e cangkhai nae doeh atipouh. <sup>17</sup> Apihai ahnie a ngainae sak han ngai pawiteh hete cangkhai nae heh Cathut koe e cangkhai na e maw. Hoehpawiteh Kai ni kamae kâawnae lahoi ka dei e maw tie kapekkaboe thainae a tawn van han. <sup>18</sup> Amahmawk ka dei e niteh, amae a barinae doeh a tawng awh. Kapatoungkung e a barinae ka tawng e teh yuemkamcu teh a payonnae ahni tak daw awh hoeh. <sup>19</sup> Mosi ni kâlawk doeh nangmouh na poe awh. Apinihai hote kâlawk tarawi han na ngai awh hoeh. Hatei, bangkong maw nangmouh ni kai thei hanelah na kâcai awh, atipouh.

<sup>20</sup> Taminaw ni nang heh kahrainathout ka tawn e doeh. Nang hah apinihai na thei han kâcai hoe bo atipouh awh. <sup>21</sup> Jisuh nihai, kai ni ka sak



e hno buet touh dawkh nangmouh abuemlah na kângai a ru awh. <sup>22</sup> Mosi ni vuensomanae phunglawk na cangkhai awh e heh, Mosi koehoi kamtawng ti deingainae laipalah mintoenaw koe e râw lah a pang awh. Hatdawkvah sabbath nah hnin vuensomanae a sak awh. <sup>23</sup> Mosi e phung lawk a kamko hoe na hanlah Sabbath hnin vuensom na awh pawiteh, kai ni Sabbath na hnin nah tami a takbuem lah damnae ka poe dawkvah nangmouh ni bangkong na lungkhuek awh vaw. <sup>24</sup> Minhmai khet lahoi lawk tâtueng han awh. Kalancalah lawk tâtueng awh, atipouh.

### *Khrih lah a onae a kamnué sak*

<sup>25</sup> Hatnavah Jerusalem e tami tangawn ni hete tami heh ahnimouh ni thei hanelah e kâcaikhai awh e nahoehmaw. <sup>26</sup> Hateiteh, khenhaw! lolo kamnuék lah phung a dei ei apinihai bang tet awh hoe bo! Hete tami heh Khrih ama doeh tie ukkung bawinaw ni a panue katang toung vaimoe. <sup>27</sup> Hatei, hete tami teh nâhoi maw a tho tie maimouh ni panue awh. Khrih a tho torei teh, nâhoi maw a tho tie apinihai panuek mahoe ati awh.

<sup>28</sup> Jisuh ni bawkim vah a cangkhai nah a hramkhai e teh, nangmouh ni kai na panue awh, na hoi maw ka tho tie na panue awh. Hatei, kai heh ka mahmaw ka tho hoe, kai kapatoungkung teh a katang doeh. Ahni teh nangmouh ni na panuek awh hoe. <sup>29</sup> Hatei, kai ni teh ka panue, bangkongtetpawiteh kai teh ahni koehoi ka tho teh ahni ni na patoun telah a hramkhai.

<sup>30</sup> Hatnavah ahnimouh ni Bawipa teh a man awh hanlah a panki awh ei, a tue a pha hoe rah dawkvah apinihai man awh hoe. <sup>31</sup> Kamkhueng e thung hoi tami tangawn ni teh a yuem awh dawkvah, Khrih a tho torei teh, ahni ni a sak e hlae hoe kapap e kângairunae a sak han ma aw ati awh.

<sup>32</sup> Taminaw a phuenang awh e hah vaihma bawinaw hoi Farasi kacuenaw ni a thai awh navah Jisuh man sak hanelah karingkungnaw a patoun awh. <sup>33</sup> Jisuh ni, kai teh nangmouh koe dongdeng doeh kaawm tih, kapatoungkung koe let bout ka cei han. <sup>34</sup> Nangmouh ni kai na tawng awh han, hatei, na hmawt thai awh mahoe. Bangkongtetpawiteh kai ka onae hmuén koe nangmouh ni na phat thai mahoe ati pouh. <sup>35</sup> Judahnaw ni hettelah atipouh awh. Kaimouh ni ka hmu awh hoe nahanelah amahoima nâ lah maw cei han a kâcai vai. Griknaw koe hoi kampeknaw koe a cei vaiteh, Griknaw vaimoe a cangkhai han vai. <sup>36</sup> Nangmouh ni na tawng awh han, hatei, na hmawt a mahoe, kai ka onae koe nangmouh ni na phat thai mahoe ati e lawk hah bang dei ngainae vaimoe ati awh.

### *Kathoung Muitha na poe han tie lawkkam*

<sup>37</sup> Hote pawî abaw nah hnin, Jisuh ni a kangdue lahoi a hramkhai e teh, apihai tui kahrân e pueng, kai koe tho awh teh net awh. <sup>38</sup> Cakathoung dawkh thut e patetlah apihai kai na ka yuem e teh a lungthung hoi hringnae tui ka phuek e lah ao han a ti. <sup>39</sup> A tingainae teh, ka yuem e naw ni Muitha a hmu awh hane hah a dei ngai e doeh. Hatei, Jisuh teh pholen lah ao hoe rah dawkvah, Kathoung Muitha poe hoe rah.

### *Jisuh kecu a kampek awh*

<sup>40</sup> A lawk ka thai pueng ni, ahni teh profet katang doeh ati awh. <sup>41</sup> Bangpatetnaw niteh, ahni heh Khrih doeh ati awh. Hatei, bang patet niteh, Khrih teh Galilee hoi maw a tâco han, ati awh. <sup>42</sup> Khrih teh Devit catoun, Devit kho Bethlehem a khe han, Cakathoung ni a dei na hoe maw ati awh. <sup>43</sup> Hatnavah, tamihu thung Jisuh kawng dawkh kâkapeknae ao



awh. <sup>44</sup> Atangawn ni teh a man han a ngai awh. Hatei, apinihai bout man awh hoeh.

### *Jisuh kong a kâoun awh*

<sup>45</sup> Karingnaw ni vaihma bawinaw hoi Farasinaw koe let a ban awh navah, ahnimouh ni bangkongmaw ahni hah na hrawi hoe vaw atipouh.

<sup>46</sup> Karingnaw ni, ahnie a lawk dei e patetlah apinihai dei boihoeh atipouh awh.

<sup>47</sup> Farasinaw ni, nangmanaw hai na dum awh toe khe. <sup>48</sup> Kâ katawnnaw hoi Farasinaw thung dawk ahni kayuem e tami buet touh bang ao maw.

<sup>49</sup> Kâlawk ka panuek hoeh e hete tamimaya ni theobonae khang lawiseh atipouh awh.

<sup>50</sup> Karum vah Jisuh koe ka cet e ahnimae a hui buet touh Nikodemus tie ni ahnimouh koe a dei pouh. <sup>51</sup> A sak hoi a dei e panue hoi thai hoeh nahlan, maimae kâlawk ni lawkceng thai na maw telah atipouh.

<sup>52</sup> Ahnimouh ni nang hai, Galilee tami van maw. Galilee dawk hoi profet tâcawt boihoeh tie hah panuek awh.

<sup>53</sup> Hathnukkhu haw kaawm e pueng amamouh im lah a cei awh.

## 8

### *Ka uicuk e napui*

<sup>1</sup> Jisuh teh Olive Mon lah a cei. <sup>2</sup> Amom vah bawkim vah bout a tho teh taminaw hai a teng vah a tho awh, hawvah a tahung teh a cangkhai.

<sup>3</sup> Hawvah cakathutkungnaw, hoi Farasinaw ni ka uicuk e napui a man awh teh a lungui a kangdue sak awh. <sup>4</sup> Ahnimouh ni Jisuh koe, Bawipa hete napui heh a uicuk lahun nah ka man awh. <sup>5</sup> Mosi e kâlawk thung kaimouh kâ na poe e dawkvah het patet e napui heh talung hoi dêi hanlah ao. Hatei, nang ni teh bangtelamaw na dei han, atipouh awh. <sup>6</sup> Hottelah a dei awh ngainae teh Bawipa tanouk nahanlah a dei awh e doeh. Yonpen han a ngai awh e doeh. Jisuh ni a tabut teh a kutdawn hoi talai dawk ca a thut. <sup>7</sup> Ahnimouh ni boutbout a pacei awh dawkvah Jisuh ni a kamlang sin teh nangmouh thung dawk kayonhoehe ni, talung hoi hmaloe dêi seh atipouh hnukkhu, <sup>8</sup> bout a tabut teh ca bout a thut.

<sup>9</sup> Ahnimouh ni hote lawk a thai awh navah a lungthung vah a yonae a kâpâpho awh dawkvah kacuepoung koehoi camo totouh buet touh hnukkhu buet touh koug a ban awh. Jisuh teh a madueng sut a ceitakhai awh. <sup>10</sup> Jisuh ni a kamlang toteh napui a madueng sut a kangdue e a hmu navah, napui nang, nang yon ka pen e taminaw te na maw ao awh. Nang apinihai yon na hnei hoeh maw atipouh. <sup>11</sup> Apinihai yon na pen hoe Bawipa telah napui ni atipouh. Kai ni hai nang yon na hnei mahoe, atu hoi law teh yonnae bout sak han lawih atipouh.

### *Talai angnae*

<sup>12</sup> Jisuh ni, kai teh het talaivan angnae lah ka o. Kaie ka hnuk kâbang e pueng ni hmonae thung cet hoeh. Hring angnae teh a hmu han atipouh.

<sup>13</sup> Farasinaw ni, Jisuh hanlah nang ni nama e kong na kampangkhai. Na kampangkhae teh cak hoeh atipouh awh. <sup>14</sup> Jisuh nihai, kai ni kama e kong kampangkhai e teh a cak. Bangkongtetpawiteh kai teh na lahoi maw ka tho tie hoi na lah maw ka cei han tie hah ka panue. Hatei, nangmouh ni teh na panuek awh hoeh. <sup>15</sup> Nangmouh teh takngainae patetlah lawk na ceng awh. Kai ni teh apihai lawk ka ceng hoeh. <sup>16</sup> Kai ni



lawk ka ceng e teh a cak. Bangkongtetpawiteh kai teh ka madueng kaawm hoeh. Kapatoukung Pa teh kai koe ao. <sup>17</sup> Kapanuekkhaikung tami kahni touh e lawk teh a cak telah nangmae kâlawk dawk ao. <sup>18</sup> Kai ni kama e kong ka dei, kai kapatoukung Pa ni hai kaie kong kampangkhai atipouh. <sup>19</sup> Ahnimouh ni haiyah, nange na pa te na maw ao telah a pacei awh. Jisuh ni nangmouh ni kai heh na panuek awh hoeh. A Pa hai na panuek awh hoeh. Nangmouh ni kai na panuek pawiteh apa hai na panue awh han atipouh. <sup>20</sup> Jisuh ni hete kong heh, bawkim thung tangka kuemnae teng vah a cangkhai navah a dei. Hatei, amae atueng a pha hoe rah dawkvah apinihai ahni teh man awh hoeh.

### *Talai hoi tâco hanlah sut a dei e*

<sup>21</sup> Jisuh ni kai teh, ka cet vaiteh nangmouh ni na tawng awh han. Hatei, nangmouh teh namamae yon dawk na due awh han. Kai ka ceinae hmuen koe na tho thai awh mahoe atipouh. <sup>22</sup> Judahnaw ni, kai ka ceinae koe na tho a thai mahoe ati e heh, amahoima kaithi han ati ngainae maw, ati awh.

<sup>23</sup> Jisuh ni nangmouh teh talaivan lahoi na tho awh, Kai teh kahlun lahoi ka tho. Nangmouh teh talai tami doeh. Kai teh talai tami na hoeh. <sup>24</sup> Hatdawkvah nangmouh teh namamae yon dawk na due awh han. Kai teh ka hring tie na yuem awh hoehpawiteh namamae yon dawk na due awh han atipouh. <sup>25</sup> Boipawiteh, nang apimaw, telah a pacei awh. Jisuh ni ahmaloe hoi yo ka dei tangcoung e patetlah kai doeh. <sup>26</sup> Nangmae kong dawk dei han hoi toun han moi ao. Hatei, kai na kapatoukung teh lawkkatang lah ao. Ahni koe e ka thai e pueng doeh talaivan ka dei atipouh.

<sup>27</sup> A na pa kong a dei e hah ahnimouh ni thai panuek awh hoeh. <sup>28</sup> Hatdawkvah Jisuh ni nangmouh ni tami Capa na pathout awh toteh kai teh ahni doeh tie hah na panue awh vaiteh kai ni ka mahmawk banghai ka sak hoeh, Pa ni na cangkhai e patetlah doeh ka dei tie na panue awh han. <sup>29</sup> Kai kapatoukung teh, kai hoi cungtalah ao. Kai ka madueng o sak hanlah a Pa ni na cettakhai hoeh. Bangkongtetpawiteh, ama ngainae hno dueng doeh pou ka sak pouh ati. <sup>30</sup> Hote lawknaw a dei navah, tami moikapap ni a yuem awh.

### *Lawkkatang dawh hoi hloutnae*

<sup>31</sup> Hatnavah nangmouh ni, kaie cangkhai e patetlah na yuem awh pawiteh, ka hnukkâbang katang lah na o awh. <sup>32</sup> Lawkkatang hah na panue awh vaiteh, hote lawkkatang ni na hlout sak awh han, telah ka yuem e Judahnaw hanlah atipouh. <sup>33</sup> Judahnaw nihai, kaimouh teh Abraham e catoun lah ka o awh. Apie san lahai kaawm boi awh hoeh. Na hlout awh han tie hah bang na tingainae maw titeh a pacei awh. <sup>34</sup> Atangcalah na dei pouh awh. Yonnae ka sak e tami pueng teh yonnae san lah ao awh. <sup>35</sup> San ni im dawh pou awh hoeh. A capa doeh kaawm. <sup>36</sup> Hatdawkvah, a Capa ni nangmouh na hlout sak pawiteh nangmouh teh na hlout katang awh han. <sup>37</sup> Nangmouh teh Abraham catoun tie ka panue. Hateiteh, kaie cangkhaeinae ni nangmae lunghung hmuen a la hoeh dawkvah, nangmouh ni kai thei hanelah na panki awh. <sup>38</sup> Kai ni a Pa koehoi ka hmu e patetlah na cangkhai awh. Nangmouh ni hai namamae na pa koe na hmu awh patetlah na sak awh, atipouh. <sup>39</sup> Ahnimouh nihai, Abraham teh kaimae na pa doeh atipouh awh. Jisuh ni hai nangmouh teh Abraham e a ca lah na awh awh pawiteh, Abraham a sak e patetlah na sak awh han. <sup>40</sup> Cathut



koe e lawkkatang na kacangkhaikung kai hah nangmouh ni thei hanlah na kâcai awh. Abraham teh hot patetlah sak hoeh. <sup>41</sup> Nangmouh teh namamae na pa ni a sak e patetlah na sak awh atipouh. Ahnimouh nihai, Kaimouh teh cataca nahoe. A Pa Cathut buet touh dueng doeh kaawm atipouh awh.

<sup>42</sup> Jisuh ni Cathut teh nangmae na Pa katang pawiteh kai na lungpataw awh han. Bangkongtetpawiteh kai heh Cathut koehoi ka kum e doeh. Ka mahmawk ka tho hoeh. Cathut ni kai na patoun. <sup>43</sup> Bangkongmaw kai ni ka dei e lawk na thai panuek awh hoeh vaw. Kaie lawk na dâw thai awh hoeh dawk doeh. <sup>44</sup> Nangmouh teh nangmae na pa Kahraimathout koehoi doeh na tho awh. Na pa e a ngainae patetlah dueng doeh na sak awh. Kahraimathout teh apasuek hoi tami ka thet e doeh. Ahni dawk lawkkatang ao hoeh dawkvah, lawkkatang dawk awm hoeh. Laithoenae hoi kho a sak dawk laithoe e dueng a dei. Laithoe na pa lahai ao. <sup>45</sup> Kai ni lawkkatang ka dei dawkvah, nangmouh ni kai na yuem awh hoeh. <sup>46</sup> Nangmouh thung dawk ka yonnae ka pâpho thai e apimaw kaawm. Kai ni Lawkkatang ka dei nahlangva bangkongmaw na yuem awh hoeh. <sup>47</sup> Cathut hoi kâkuen e tami teh, Cathut e lawk a ngâi, nangmouh teh Cathut hoi na kâkuet awh hoeh dawk lawk na ngâi awh hoeh.

### *Jisuh hoi Abraham*

<sup>48</sup> Judahnaw nihai, nang teh samaria tami doeh. Na thung kahraikathout ao ka tie hah atang nahoehmaw telah a pacei awh. <sup>49</sup> Jisuh ni kai kahrai ka tawn hoeh. A Pa doeh ka bari. Nangmouh ni kai hah na bari awh hoeh. <sup>50</sup> Hatei, kama e lentoe nahane ka tawng hoeh. Kaie lentoe nahan ka tawng ni teh lawkcengkung buet touh ao. <sup>51</sup> Atangcalah na dei pouh awh. Kaie lawk ka thai ni teh ka tarawi pueng ni duenae koehoi a hlout han atipouh.

<sup>52</sup> Judahnaw ni hai na thung kahrai kathoute ao tie atu ka panue awh. Abraham hoi profet pueng ni be a due awh toe. Nang ni teh kaie ka lawk ka tarawi e pueng ni duenae koe phat mahoe na ti. <sup>53</sup> Kaimae na pa Abraham hlak nang hoe na cue maw. Ahni teh a due toe. Profetnaw hai a due awh toe. Nang ni namahoima banglah maw na kâpouk. <sup>54</sup> Jisuh ni kamahoima kârasang sak pawiteh ayawmlah doeh ao. A Pa ni kai hah na rasang sak. Hote Cathut teh nangmouh ni kaimae Cathut doeh na ti awh. <sup>55</sup> Hatei, teh hote Cathut hah nangmouh ni na panuek awh hoeh. Kai ni teh ka panue. Ka panuek hoeh ka tetpawiteh nangmouh patet van lah laithoe ka dei e lah kaawm han. Hote Cathut teh kai ni ka panue, Cathut e a lawk hai ka ngâi. <sup>56</sup> Nangmae na pa Abraham ni kai ka tho nahane hnin hmu hanlah a konawm, a hmu toteh a lunghawi atipouh. <sup>57</sup> Judahnaw nihai, na kum 50 touh patenghai ka phat hoeh rae nang ni Abraham teh ka hmu toe ngangngang na ka tet atipouh awh. <sup>58</sup> Jisuh nihai, lawkkatang na dei pouh awh. Abraham ao hoehnahlan kai teh yo ka o toe, atipouh. <sup>59</sup> Hah navah Bawipa talung hoi dêi hanlah talungnaw a racawng awh. Hatei, Jisuh teh bawkim thung hoi alawilah a cei teh ahnimouh a roun.

## 9

### *Manu von thung hoi mit ka dawn e mit a ang sak*

<sup>1</sup> Jisuh teh lam a cei lahun nah a manu von thung hoi a mit ka dawn e tami buet touh a hmu. <sup>2</sup> A hnukkâbang e naw ni, Bawipa, hete tami heh



apie a yonnae dawk maw a mit dawn vaw, amae a yonnae dawk maw, a na pa e yon dawk maw, telah a pacei.

<sup>3</sup> Jisuh ni hai amae yon dawk na hoe. A manu a na pa e yon dawk hai na hoe. Cathut thawtawaknae ahni dawk hoi a kamnue na hane doeh. <sup>4</sup> Kai kapatoukung e a thaw teh khodai vah ka tawk han. Apini thaw tawk thahoeahnae karum e tueng hai a tho han. <sup>5</sup> Kai teh talaivan ka o navah talai angnae lah ka o, atipouh. <sup>6</sup> Talai dawk tamtui a tamthawi teh tangdong a sak e hoi a mit ka dawn e tami e a mit dawk a hluk pouh. <sup>7</sup> Cet nateh Siloam tuikamuem dawk pâsu haw atipouh. Siloam ati ngainae teh patoun tinae doeh. Hote tami ni a cei teh a pâsu hnukkhu a mit ang laihoi a ban.

<sup>8</sup> Ahmoun nah ayânaw koe a kut a dâw eiteh, ahawi e hah imrinaw ni a hmu navah, hete tami teh ayâ koe ka hete tami na hoe maw telah a dei awh. <sup>9</sup> Tami tangawn ni ahni bokheiyah ati awh. A tangawn ni teh ahni patet ati awh. Ahni ni hai kai bokheiyah atipouh. <sup>10</sup> Ahnimouh ni, bangtelamaw kho bout na hmu thai telah a pacei awh. <sup>11</sup> Ahni nihai, Jisuh tie ni tangdong a sak teh ka mit dawka a kano, Siloam tuikamuem dawka na mit pâsu ati e patetlah ka cei teh ka pâsu navah ka mit a ang atipouh.

### *Mit bout ka ang e tami ni a kampangkhai*

<sup>12</sup> Taminaw ni, ahni te nâ maw ao telah a pacei nah ka panuek hoe atipouh. <sup>13</sup> Taminaw ni, hote tami hah Farasinaw koe a ceikhai awh. <sup>14</sup> Jisuh ni tangdong a sak teh hote mit a ang saknae hnin teh Sabbath hnin lah ao. <sup>15</sup> Farasinaw ni hai bangtelah hoi maw na mit a ang telah bout a pacei navah ka mit dawka ahni ni tangdong a hluk e ka pâsu teh a ang atipouh. <sup>16</sup> Farasi a tangawn ni ahni teh Sabbath ya hoe. Cathut ni a tha e tami mahoe ati awh. A tangawn ni teh tamikayon ni hettelah mitnout sak thai mahoe ati awh dawkvah buet touh hoi buet touh lawk kânging awh hoe.

<sup>17</sup> Hote tami koe nange mit ka ang sak e hah api na ti maw telah bout a pacei awh navah, ahni ni vah profet doeh atipouh. <sup>18</sup> Judahnaw ni a mit a dawn teh bout a ang tie a yuem awh hoe dawka manu hoi a na pa a kaw awh teh, <sup>19</sup> Hete na ca heh a manu e a vonthung hoi a mit ka dawn e na ca ka tang maw. Boipawiteh bangtelah hoi maw a mit bout a hmu telah a pacei. <sup>20</sup> A manu hoi a na pa ni hai vonthung hoi a mitdawn laihoi ka khe e kaimae ka ca la doeh ka panue awh. <sup>21</sup> Bangkongmaw a mit bout a ang e hai apinimaw a ang sak tie teh ka panuek hoe. Hivah ama hai ao doeh, pacei awh. Ahni ni amae a konglam a dei han doeh, atipouh. <sup>22</sup> Bangkongmaw telah a dei awh tetpawiteh, Jisuh teh Khrih doeh telah ka tet e teh sinakok koehoi tâco sak han telah Judahnaw yo a kâdei awh toe. <sup>23</sup> Hatdawkvah a manu hoi a na pa ni, a ma pacei awh camo yaw toung ma telah Judahnaw a taki teh a dei rawi.

<sup>24</sup> Hatdawkvah a mit ka dawn e tami hah a pahni lah bout a kaw awh teh Cathut hah pholen. Hote tami teh tami kathout doeh atipouh awh. <sup>25</sup> Ahni nihai, Jisuh teh tami kahawi maw kahawi hoe e maw ka panuek hoe. Ka mik a dawn ei atuvah ka mit bout ka hmu thai tie doeh ka panue, atipouh. <sup>26</sup> Hatnavah, ahnimouh ni, nange na mit bangtelamaw a sak teh na mit bout a ang telah bout a pacei awh. <sup>27</sup> Yo ka dei toung hah tayaw. Bangkong na thai panuek awh hoe vaw. Bangkong bout bout thai han na ngai awh vaw. Nangmouh hai ahnie hnukkâbang lah o han na ngai a maw.



<sup>28</sup> Ahnimouh nihai, nang doeh ahnie hnuk na kâbang, kaimouh teh Mosi e a hnukkâbang e doeh. <sup>29</sup> Cathut ni Mosi koe lawk a thui e kaimouh ni ka panue awh. Hote tami heh bang patet e tami maw ka panuek awh hoeh titeh min mathoe nahanelah a dei awh. <sup>30</sup> Hote tami nihai, kaie ka mit ahni ni a ang sak nahlangva vah nâ lahoi maw a tho na ti awh e hah kâ ngai lah a ru. <sup>31</sup> Cathut ni tamikayon e lawk tarawi pouh hoeh. Cathutlae taminaw e lawk doeh a tarawi tie doeh ka panue. <sup>32</sup> A manu e a vonthung hoi a mit ka dawn e a mit bout a ang sak thai tie talaivan a kamtawng pasuek hoi ka thai boihoe. <sup>33</sup> Hote tami he Cathut ni patoun hoehpawiteh banghai sak thai mahoe atipouh. <sup>34</sup> Ahnimouh ni na khe pasuek hoi yonnae hoi kakawi e nang ni kaimanaw na cangkhai hanh khe titeh alawilah a pâlei awh.

### *Muitha mit ka dawn e Farasinaw*

<sup>35</sup> A pâlei awh tie Jisuh ni a thai hnukkhu hote tami a hmu toteh, nang ni Capa na yuem maw atipouh. <sup>36</sup> Bawipa, tami Capa teh yuem thai nahan, ahni teh apimaw atipouh. <sup>37</sup> Jisuh ni, ahni teh nang ni na hmu toe. Atu nang hoi lawk kapan e teh tami Capa doeh atipouh. <sup>38</sup> Bawipa, na yuem toe titeh a tabo laihoi a baw. <sup>39</sup> Hatnavah Jisuh ni, kai teh a mitdawnnaw hmu sak hane hoi a mitkaangnaw ni a mitdawn nahanlah lawkcengnae doeh, ka tho atipouh. <sup>40</sup> Ateng kaawm e Farasi tangawn ni teh kaimouh hai ka mit dawn a maw telah a pacei awh. <sup>41</sup> Jisuh ni, nangmouh ni ka mit a dawn awh na tet awh pawiteh yonnae awm hoeh. Hatei, ka mit a ang na ti awh dawkvah nangmouh teh na yon awh atipouh.

## 10

### *Tukhoum hoi tunaw bangnueae*

<sup>1</sup> Atangcalah ka dei. Tu takhang dawh hoi kâen laipalah alouklah hoi kâen e pueng teh tamru hoi dingca doeh. <sup>2</sup> Tukhoumkung teh takhang dawh hoi a kâen. <sup>3</sup> Longkha ka ring e ni hai a paawng pouh teh, ahnie a lawk hai a tunaw ni a ngai awh. A tunaw teh a min lahoi a kaw teh alawilah a tâcokhai. <sup>4</sup> Tunaw a tha navah, a tunaw e a hmalah a cei. A tunaw ni hai a lawk a nout awh teh a hnukkâbang awh. <sup>5</sup> Tamitavannaw e a lawk teh a nout awh hoeh dawkvah ahniae hnuk teh kâbang awh hoeh, a yawng takhai awh, atipouh. <sup>6</sup> Hote bangnueae Jisuh ni a dei navah taminaw ni a deingainae hah thai panuek awh hoeh.

### *Tukhoum kahawi*

<sup>7</sup> Hatdawkvah Jisuh ni, atangcalah na dei pouh awh. Kai teh tu kâennae takhang lah ka o. <sup>8</sup> Kai hoehnahlan e ka tho e pueng teh tamru hoi dingca doeh. Ahniae a lawk tunaw ni ngai pouh hoeh. <sup>9</sup> Kai teh takhang doeh. Kai dawh hoi kâen pueng ni rungngang lah ao han. Kâen tâcawt vaiteh hram kanaw dawh a pawngpa han. <sup>10</sup> Tamru teh paru han, thei han hoi raphoe hanlah doeh a tho. Kai teh tunaw ni hringnae a tawn awh dueng laipalah, hote hringnae hoi kawi sak hanlah doeh ka tho.

<sup>11</sup> Kai teh tukhoumkung kahawi doeh. Tukhoumkung kahawi ni teh a tunaw hanlah a hringnae a pasoung. <sup>12</sup> Tukhoumkung hai nahoe, tu katawnkung hai nahoe e naw niteh, asui a tho e a hmu navah, tunaw hah pak a tha teh a yawng takhai awh. Hatnavah Asuinaw ni tunaw hah a soukyak awh teh, parang a kamphei sak. <sup>13</sup> Bangkongtetpawiteh, hlai e tukhoumkung teh hlai e lah ao dawkvah tunaw kahawicalah khom hoeh.



<sup>14</sup> Kai teh tukhoumkung kahawi doeh. Pa ni kai na panue teh, Kai ni hai Pa ka panue e patetlah ka tunaw ni hai kai na panue awh. <sup>15</sup> Kai ni ka khoun e ka tunaw hanlah ka hringnae ka pasoung. <sup>16</sup> Hatei tu takha daw kâen hoe e alouke tunaw hai ka tawn. Hote tunaw hai ka thokhai han. Hotnaw ni hai lawk a ngai vaiteh tu buet touh tukhoumkung buet touh ao han. <sup>17</sup> Kai teh hringnae bout la hanlah ka hringnae ka pasoung dawkvah Pa ni lungpataw e lah ka o. <sup>18</sup> Apinihai ka hringnae na lawm thai mahoe. Ka mahmawk ka pasoung. Ma e hringnae pasoung hane hoi bout la thainae kama daw kâo. Hete kâpoelawk heh a Pa koehoi ka coe e doeh.

<sup>19</sup> Hete lawk kecu daw kâ Judahnaw a kâkapek awh. <sup>20</sup> Tami tangawn niteh, ahni heh kahrai ni a man e ka pathu e doeh toe. Bang hane mouh khuet na thai pouh va ati awh. <sup>21</sup> Tami tangawn niteh, ahnie lawk heh kahrai ka tawn e lawk na hoe. Kahrai ni a mit ka dawn e ahawi sak thai han namaw ati awh.

### *Bawkim pathoungnae paw koe Jisuh a tho*

<sup>22</sup> Kasik tue nah, Jerusalem vah kamthoungnae paw koe. <sup>23</sup> Jisuh teh bawkim Solomon thongma dawkvah a kâhlai. <sup>24</sup> Judahnaw ni khuk a ven awh teh, kaimouh nâtotouh maw lung na hring sak han vaw. Nang teh Khrih lah na awm katang pawiteh kamcengcalah dei leih atipouh awh. <sup>25</sup> Jisuh nihai, ka dei ei na yuem awh hoe. A Pa e kâ lahoi ka sak e pueng ni kai heh na kampangkhai. <sup>26</sup> Hateiteh, nangmouh ni na yuem awh hoe. Bangdawkmaw na yuem awh hoe tetpawiteh nangmouh teh kaie tu na hoe. <sup>27</sup> Ka tunaw ni ka lawk a thai teh ka hnuk a kâbang awh. Hote tunaw teh kai ni ka nout. <sup>28</sup> Yungyoe hringnae hai ka poe. Hote tunaw teh kamkonae koe phat mahoe. Kaie ka kut daw kâ hoi apinihai na lawm thai mahoe. <sup>29</sup> Hote tunaw teh kai koe na kapekung a Pa teh bangpueng hlak a lentoe daw kâ apinihai hote tunaw teh apa kut daw kâ hoi lawm thai mahoe. <sup>30</sup> Kai teh Pa hoi buet touh lah ka o, atipouh.

<sup>31</sup> Hatnavah Judahnaw ni Bawipa teh talung hoi dêi hanlah talung bout a rakhun sin awh. <sup>32</sup> Jisuh nihai, kai ni apa e kâ lahoi kahawi e hnonaw na patue awh. Hotnaw dawkvah bangmaw ka payon teh talung hoi dei han na ti awh vaw, telah a pacei awh. <sup>33</sup> Judahnaw ni kahawi hno na sak pawiteh talung hoi na dêi mahoe. Nang ni tami lah o nahlangva Cathut na kâti teh, Cathut na dudam daw doeh talung hoi na dei han ka ti awh. <sup>34</sup> Jisuh nihai, nangmae Cakathoung daw kâ, nangmouh teh cathutnaw doeh telah a thut nahoehmaw. <sup>35</sup> Cathut e a lawk daw kâ awm e taminaw hah cathutnaw tetpawiteh, Cakathoung teh payon hoe e lah ao dawkvah, <sup>36</sup> Pa ni a thounsak teh, het talaivan lah a tha e kai teh Cathut Capa doeh ka ti dawkvah nangmouh ni Cathut koe na payon na ti thai awh han na maw. <sup>37</sup> A Pa e thawnaw hah kai ni ka taw kâ hoe pawiteh, kai hai na yuem awh hanh. <sup>38</sup> Ka taw kâ pawiteh kai na yuem awh hoe nakunghai hote hno sak e hah yuem awh. Hottelah na yuem awh pawiteh kai ni Pa daw kâ o e hoi apa ni kai daw kâ ao e hah na thai panuek awh han atipouh. <sup>39</sup> Hatnavah Judahnaw ni Jisuh man hanelah bout a tawng awh. Ahnimae kut daw kâ hoi a hlout teh yout a ceitakhai.

### *Tami moikapap ni Jisuh a yuem awh*

<sup>40</sup> Hathnukkuh Jawhan ni tui baptisma a poenae Jordan palang na ran lah a cei teh haw va ao. <sup>41</sup> Taminaw teh ahnimouh koe a pha navah, Jawhan ni bang patet e mitnout hai sak hoe eiteh, ahnie a kông Jawhan



ni a dei e patetlah atang doeh ati awh. <sup>42</sup> Hettelah hoi hote hmuen koe e tami moikapap ni Bawipa teh a yuem awh.

## 11

### *Bethani tami Lazarus duenae*

<sup>1</sup> Bethani kho kaawm e Meri hoi Martha e a thangroi Lazarus tie teh a pataw. <sup>2</sup> Ka pataw e Lazarus e a tawncanu Meri teh Jisuh khok dawkhmuitui a hluk pouh teh a sam hoi ka hui e Meri doeh. <sup>3</sup> A hmaunawnggha roi ni, Jisuh koevah tami a ceisak teh, Bawipa na lungpataw e Lazarus teh a pataw atipouh.

<sup>4</sup> Jisuh ni a thai navah, hote patawnae teh due patawnae nahoe. Cathut a lentoe a kamnue nahane doeh. Hote patawnae dawkh Cathut Capa e a lentoe a kamnue han, atipouh. <sup>5</sup> Jisuh ni Martha nuca hoi Lazarus hai a lungpataw. <sup>6</sup> Lazarus a pataw e a thai ei teh roup cet laipalah hote hmuen koe hnin hni touh ao takhai. <sup>7</sup> Hahoi a hnukkâbangnaw hanlah, Judah lah bout cet awh sei atipouh. <sup>8</sup> A hnukkâbangnaw ni Bawipa, atuvah Judahnaw ni talung hoi dêi hanelah, nang na tawng awh nahlangva vah, hote hmuen koe bout na cei han rah maw telah a pacei awh. <sup>9</sup> Jisuh ni, khodai dawkh suimilam hlaikahni touh ao nahoe. Apihai kho a ang nah ka cet e ni talaivan angnae thung a cei dawkvah tâlaw mahoe. <sup>10</sup> Hatei, khohmo cet awm pawiteh angnae ao hoe dawkvah a tâlaw thai, atipouh. <sup>11</sup> Hahoi Jisuh ni maimae hui Lazarus teh a i, hatei, pâhlaw hanlah ka cei han, atipouh. <sup>12</sup> A hnukkâbangnaw ni, Bawipa ka ip e ngoun teh bout a dam han doeh, atipouh. <sup>13</sup> Jisuh ni Lazarus a due e hah a dei ngainae ei, a hnukkâbangnaw ni teh a mahmawk ka ip e doeh telah pouknae a ton awh. <sup>14</sup> Hatdawkvah, Jisuh ni, Lazarus a due toe, telah a dei pouh. <sup>15</sup> Hatei, na yuem awh nahanelah hote hmuen koe kai ka o hoe e hah ka lunghawi. Bangtelah nakunghai ahni koe cet awh sei atipouh. <sup>16</sup> Samphei tie Thomas ni, a hnukkâbang huinaw hanlah, Bawipa hoi cungtalah due hanlah maimouh hai kâbang awh sei atipouh.

### *Bouthawnae hoi hringnae*

<sup>17</sup> Jisuh haw a pha nah Lazarus pakawp hoi hnin pali touh a pha toe tie a panue awh. <sup>18</sup> Bethani kho teh Jerusalem kho hoi meng hni touh ahla. <sup>19</sup> Martha hoi Meri e a thangroi a due dawkvah Judah taminaw ni tahungkhai hanlah a tho sin awh. <sup>20</sup> Jisuh a tho e Martha ni a thai navah, Bawipa dawn hanelah a cei, hatei, Meri teh im vah ao. <sup>21</sup> Martha ni, Bawipa nang na awm pawiteh, ka thangroi dout mahoe. <sup>22</sup> Hatei, atu kadout nakunghai, Bawipa nang ni Cathut koe ratoum e patetlah Cathut ni na poe han tie ka panue, atipouh. <sup>23</sup> Jisuh nihai, na thangroi bout a thaw han, atipouh. <sup>24</sup> Martha ni a hnukteng bouthawnae tueng toteh, ahni hai bout a thaw han tie ka panue atipouh. <sup>25</sup> Jisuh ni, kai teh bouthawnae hoi hringnae doeh. Kai ka yuem pueng ni kadout nakunghai bout a hring han. <sup>26</sup> Ka hring ni teh Kai na kayuemnaw pueng nâtuék hai dout mahoe. Kaie ka lawk na yuem maw telah a pacei navah, Martha ni oe ka yuem atipouh. <sup>27</sup> Martha ni, oe Bawipa nang teh het talaivan ka kumcathuk hane Cathut Capa Khrih doeh tie ka yuem toe atipouh.



<sup>28</sup> Hahoi, Martha ni Meri koe a cei teh, Bawipa a tho, nang na kaw, telah duem a dei pouh. <sup>29</sup> Meri ni hote lawk a thai navah, karanglah a thaw teh Bawipa koe a cei. <sup>30</sup> Jisuh teh kho thung kâen laipalah Martha ni a dawnnae koe doeh ao rah. <sup>31</sup> Im dawk Meri hoi cungtalah ao navah, Meri lung ka pahawi e Judahnaw ni Meri karanglah a thaw teh a tâco e hah a hmu awh navah, khuika hanlah phuen koe vai a cei telah a pouk awh dawkvah, Meri hnuk a kâbang awh. <sup>32</sup> Meri ni Jisuh aonae koe a pha teh Bawipa a hmu navah, a khok koe a tabo teh, Bawipa, nang na awm pawiteh kaie ka thangroi dout mahoe e atipouh. <sup>33</sup> Meri hoi a hnukkâbang e Judahnaw khuika e Jisuh ni a hmu navah, Jisuh a lungmathoe teh, <sup>34</sup> Ahnimouh koe, na maw na pakawp awh, telah a pacei. Ahnimouh ni, Bawipa tho nateh khenhaw! atipouh. <sup>35</sup> Jisuh a ka. <sup>36</sup> Judahnaw ni, khenhaw! Lazarus banghloimaw a lungpataw, ati awh. <sup>37</sup> Tami bangpatet niteh, a mit ka dawn patenghai ka hmawt sak thai e ni, Lazarus a due hoe h nahanlah sak thai mahoe ma aw, ati awh.

### *Lazarus a thaw sak*

<sup>38</sup> Jisuh teh lungreithai hoi tangkom koe a cei. Hote tangkom teh talung hoi a teng awh. <sup>39</sup> Jisuh ni talung paawng awh haw, atipouh. Martha ni, Bawipa pakawpnae hnin pali touh a pha toe, atuvah a hmui a tho han toe atipouh. <sup>40</sup> Jisuh ni hai na yuem pawiteh Cathut bawilennae na hmu han ka ti toung nahoehmaw.

<sup>41</sup> Hatdawkvah taminaw ni tangkom tengnae talung hah a takhoe awh. Hatnavah Jisuh ni kahlun lah a mounge teh, Oe a Pa ka hei e hah na thai pouh toung dawkvah ka lungawi. <sup>42</sup> Bawipa nang ni kaie ratoum lawk pou na thai pouh tie ka panue. Hatei, hete ka heinae teh na kaven e taminaw hanelah a tho teh, kai hah na patoun e doeh tie a yuem awh nahanelah doeh, telah atipouh. <sup>43</sup> Hottelah a dei hnukkhu Lazarus tâcawt, telah puenghoi hram laihoi a kaw. <sup>44</sup> Hatnavah, kadout tangcoung e teh a kut, a khok, a minhmai pueng hni hoi muen kâkayo laihoi a thaw teh a tâco. Jisuh ni ratham pouh awh, cetsak awh atipouh.

### *Jisuh thei hanelah a kâcai awh*

<sup>45</sup> Hatdawkvah Meri koe ka tho e naw ni, Jisuh ni a sak e naw hah a hmu awh toteh, Bawipa hah a yuem awh. <sup>46</sup> Hatei, tami tangawn ni Farasinaw koe a cei awh teh Jisuh ni a sak e hno a dei pouh awh. <sup>47</sup> Hatnavah vaihma bawinaw hoi Farasinaw teh sanhedrin lawkceng bawinaw hoi a kamkhueng awh teh, Bangtelane ti awh han, ahni ni kângairunae moi a sak toe. <sup>48</sup> Telah sut khen pawiteh tami pueng ni a yuem awh han toe. Rom taminaw ni tho awh vaiteh maimae hmuen, hoi miphun a pathup awh han toe ati awh.

<sup>49</sup> Hat nah e kum nah vaihma kacue ka taw e Kaiaphas ni, nangmouh ni bang na panuek awh hoe. <sup>50</sup> Maimouh miphun abuemlah rawk awh hlak teh tami buet touh ni tami pueng e yueng lah a due e ahawihnawn tie na pouh awh hoe bo vaw atipouh. <sup>51</sup> Hottelah a dei e heh amae kâtaunnaw laihoi a dei e laipalah hote kum dawkvah vaihma kacue lah ao e patetlah Jisuh ni Judah miphunnaw hanlah a due han ati tangcoung e doeh. <sup>52</sup> Ahnimouh han dueng laipalah alouke kampek e lah kaawm e Cathut e canu capanaw a pâkhueng hanlah a due han tie ao toe. <sup>53</sup> Hat hnin hoi teh Bawipa thei hanelah a kâcai awh toe.

<sup>54</sup> Hatdawkvah, Jisuh ni Judahnaw aonae koe cet toung laipalah, haw hoi a tâco teh thingyei yawn hoi kahnai e, Ephraim kho lah a hnukkâbangnaw



hoi a cei awh teh hawvah ao awh. <sup>55</sup> Judahnaw e ceitakhai paw i a hnai dawkvah, taminaw mahoima thoungsak hanelah ceitakhai paw i hoehnahlan alouklouk lahoi Jerusalem lah a tho awh. <sup>56</sup> Hotnaw ni, Jisuh a hmu awh hoe h dawkvah, bawkim teng vah, bangtelamaw na pouk awh, paw i koe ahni tho mahoe h maw ati awh teh a kâpacei awh. <sup>57</sup> Hatnavah Farasinaw hoi vaihma bawinaw ni, Jisuh onae na panuek pawiteh man hanlah na dei awh han telah kâ a poe.

## 12

*Jisuh khok satui hoi a awi pouh*

*Mat 26:6-13; Mrk 14:3-9; Luk 7:37-39.*

<sup>1</sup> Ceitakhai paw i to nahane hnin taruk touh a ngai nah duenae koehoi bout ka thaw e Lazarus onae kho Bethani vah Jisuh teh a pha. <sup>2</sup> Hatdawkvah Jisuh barinae lah tangmin bu canae paw i hah a sak awh teh Martha teh bu pacanae koe thaw a kabawp. Hawvah Lazarus hai Bawipa hoi bu venna koe ao van. <sup>3</sup> Hatnavah, Meri ni aphu kaawm poung e hmuitui a la teh Jisuh khok dawk a hluk teh a sam hoi a hui pouh. Hmuitui e a hmui teh imthung abuemlah akawi.

<sup>4</sup> A hnukkâbangnaw thung dawk e Bawipa ka pahnawt hane Simon capa, Judah Iskariot ni vah, <sup>5</sup> Hete hmuitui heh tangka cumthum touh lah yo vaiteh karoedengnaw na kabawp hoe h vaw atipouh. <sup>6</sup> Hatei, karoedengnaw kabawp ngai dawk a deinae nahoe h. Ama teh tamru lah ao teh, tangka bawm a kuem nah a thung e tangka ouk a paru dawk doeh. <sup>7</sup> Jisuh nihai, hote napui ni ama ngai patetlah sak seh. Kaie ro pakawp nahane hnin totouh hmuitui teh a pâkuem toe. <sup>8</sup> Mathoenaw teh nangmouh koe pou ao. Kai teh nangmouh koe pou kaawm mahoe h, atipouh.

*Lazarus hai thei hanlah a kâcai awh*

<sup>9</sup> Hote hmuen koe Jisuh ao tie Judahnaw ni a thai awh navah a tho awh. Jisuh hmu han dueng laipalah duenae koehoi ka thaw e Lazarus hmu hanlah a tho awh. <sup>10</sup> Vaihma bawinaw ni Lazarus hai thei han a kâcai awh. <sup>11</sup> Bangkongtetpawiteh Judahnaw moikapap ni Lazarus kecu dawk ahnimanaw a ceitakhai awh teh, Jisuh a yuem awh dawkvah.

*Jerusalem a kâen*

*Mat 21:4-7; Mrk 11:7-12; Luk 19:35-38.*

<sup>12</sup> Hote paw i koe ka tho e pueng ni tangtho vah Jerusalem lah Jisuh a tho han tie a panue awh. <sup>13</sup> Samtue hna rip a patuep awh teh Bawipa dawn hanelah a cei awh. Hosanna, Bawipa min lahoi ka tho e Isarel siangpahrang teh a yawhawi, telah bukbuk a hram awh. <sup>14</sup> Hawvah Jisuh ni laca a hmu teh a kâcui. <sup>15</sup> Cakathoung ni, taket hanh. Zion canu, khenhaw! na siangpahrang ni laca a kâcui teh nangmouh koe a tho telah a thut tangcoung e patetlah ao.

<sup>16</sup> Hote a konglamnaw hah a hnukkâbangnaw ni hmaloe teh thai panuek awh hoe h ei Jisuh a bawilennae ao hnukkhu Bawipa doeh a thut ngainae tie bout a panue awh. <sup>17</sup> A hnukkâbangnaw ni Lazarus tangkom thung hoi a kaw teh duenae koehoi bout a thawnae kong hah a kampangkhai awh. <sup>18</sup> Hottelah kângairunae a sak e taminaw ni, kamthang a thai navah dawn hanlah a tho awh. <sup>19</sup> Farasinaw ni amamouh hoi amamouh, bang tet thai hoe h toe, talaivan ni ahni hnuk doeh koug a kâbang awh toe, ati awh.



### *A due hane sut a dei*

<sup>20</sup> Pawi koe Cathut bawk hanlah ka cet e Griknaw hai ao van. <sup>21</sup> Ahnimouh ni, Galilee Bethsaida kho e Filip koe a cei awh teh Jisuh hmu han ka ngai atipouh awh. <sup>22</sup> Filip ni Andru koe a dei pouh teh, ahnimouh roi ni Jisuh koe tawngtang a dei pouh roi. <sup>23</sup> Jisuh nihai, tami Capa teh a lentoe kamnuenae tue a pha toe. <sup>24</sup> Atangcalah ka dei, cati teh talai dawk a bo teh dout hoehpawiteh ama buet touh lah doeh paroup ao. Hatei, dout pawiteh moikapap lah a kamphung. <sup>25</sup> Ama e hringnae a lung ka pataw e tami teh hringnae a sung han. Het talaivan vah amae hringnae ka hmuha e tami teh hote hringnae hah a yungyoe hringnae hanlah a kuem. <sup>26</sup> Apihai kaie thaw tawk han ngai pawiteh ka hnuk a kâbang han. Hatnavah kai ka onae koe kaie thaw ka tawk e hai ao han. Apipatethai kaie thaw ka tawk han tetpawiteh, ahni hah Pa ni barinae a poe han. <sup>27</sup> Atuvah kai teh ka lung a puen. Bangtelamaw dei han. Oe a Pa hete tueng dawk hoi na rungngang haw ka ti han maw. Hatei teh, het hanelah atu e tueng koe ka pha toe. <sup>28</sup> Oe apa na min bawilennae kamnuek sak haw telah a dei. Hatnavah Kai ni bawilennae kamnue sak toe. Bout ka kamnue sak han rah telah kalvan hoi lawk a tho. <sup>29</sup> Ateng kaawm e taminaw ni hote lawk a thai awh navah, khoparit e mue telah tami tangawn ni ati awh. Atangawn ni teh kalvantami ni lawk a pato ati awh. <sup>30</sup> Hatei, Jisuh ni, hote lawk heh kai hanlah dei hoeh, nangmouh hane doeh. <sup>31</sup> Atuvah het talaivan lawkcengnae tueng lah ao. Het talai kaukkung teh atu pâlei lah ao han toe. <sup>32</sup> Kai hai talai hoi pathout lah ka o toteh, tami pueng kama koe kOUNg ka sawn han, telah a ti. <sup>33</sup> Hottelah a dei nginae teh ama teh bangtelae duenae hoi maw a due han tie hah a pâtuena e doeh.

<sup>34</sup> Taminaw ni kâlawk cauk dawkvah Khrih teh yungyoe ao han, telah a thut e ka panue awh, hatei, tami Capa teh pathout a han tie bangtelamaw na dei thai, atipouh awh. Hote tami Capa te apimaw atipouh awh.

<sup>35</sup> Jisuh nihai, angnae teh nangmouh koe dawngdeng ao han rah. Angnae ao nah cet awh. Hoehpawiteh hmonae ni nangmouh na kei payon vai. Khohmo thung ka cet e teh na la maw ka cei tie panuek hoeh. <sup>36</sup> Angnae ao navah angnae ca lah na o awh nahan angnae hah yuem awh haw, atipouh. Hote lawk phouk a dei hoi Jisuh teh ahnimouh koehoi alouklah duem a roun.

### *Isaiah ni sutdeilawk a kuep*

<sup>37</sup> Hettelah totouh puenghoi ahnimae hmalah kângairunae a sak ei teh ahnimouh ni yuem awh hoeh. <sup>38</sup> Profet Isaiah ni a dei e teh, Bawipa, kaimouh ni ka dei e phung lawk heh apinimaw a yuem han. Bawipa e a kut teh api koe maw a dâw tie lawk teh a kuep nahane doeh. <sup>39</sup> Hat dawk doeh a yuem thaihoehnae teh, <sup>40</sup> Profet Isaiah ni, Ama ni ahnimae a mit a dawn sak, a lungpata sak, a lungkâthung hoeh. A patawnae dam thai hoeh nahanlah amamouh ni a mit a dawn sak awh. A lungthung hoi nout thai awh hoeh, ati e patetlah doeh. <sup>41</sup> Isaiah ni hote lawk a dei navah ahnie a bawilennae sut a hmu e doeh.

<sup>42</sup> Hatei, kâ katawnkung, Judahnaw moikapap ni Jisuh teh a yuem awh. Hatei, Farasinaw ni sinakok koehoi na pâlei awh vaih ati awh dawkvah kamnuek sak awh hoeh. <sup>43</sup> Bangkongtetpawiteh Cathut ni poe e pholennae hlak tami ni poe e pholennae hah a ngai awh.

### *Jisuh a tho nginae*



<sup>44</sup> Jisuh ni apihai kai na ka yuem e tami teh kai dueng na yuem hoe, kai na kapatounkung hai a yuem toe. <sup>45</sup> Kai na kahmawt e pueng ni na kapatounkung hai a hmu toe. <sup>46</sup> Kai na ka yuem pueng ni a hmonae koe ao hoe nahan kai teh angnae lah ka o teh het talaivan vah ka tho toe.

<sup>47</sup> Kaie lawk ka thai e naw ni yuem laipalah ao nakunghai lawk ka ceng mahoe. Talaivan taminaw yon lawkceng hanelah kai ka tho hoe. Talaivan taminaw rungngang hanelah doeh ka tho. <sup>48</sup> Kai na ka pahnawt ni teh ka lawk ka ek e tami hah lawkcengkung buet touh ao Kai ni ka dei e lawk ni doeh toe a hnukteng e hnin daw lawk na ceng han toe. <sup>49</sup> Bangkongtetpawiteh, kai teh kamae kâtawnnae lahoi ka dei hoe. Kai na kapatounkung a Pa ni bangtelamaw dei han tie hah na dei pouh. Pa e kâpoelawk teh yungyoe hringnae lah ao tie ka panue. <sup>50</sup> Hatdawkvah, ka dei e naw pueng heh Pa ni lawk na thui e patetlah ka dei, telah hram laihoi a dei.

## 13

### *A hnukkâbangnaw e khok a pâsu*

<sup>1</sup> Ceitakhai paw i pha hoe nah, Jisuh teh het talaivan heh ceitakhai vaiteh a na Pa koe cei hane tueng a pha toe tie a panue. Ahni ni het talaivan kaawm e a taminaw a lungpataw dawkvah, apout totouh a lungpataw.

<sup>2</sup> Tangmin bu a ca awh lahun nah kahraimathout ni Simon capa, Judah Isakarot e a lungthung vah Jisuh pahnawt hanelah pouknae yo a la poe toe.

<sup>3</sup> Pa ni bangpuengpa hai ama kut daw koug a poe tie hoi ama teh Cathut koehoi ka tho ni teh Cathut koe bout ka cei han toe tie hai Jisuh ni a panue.

<sup>4</sup> Tangmin bu venna koehoi a thaw teh, angkidung a rading, hnica hah a la teh a keng daw a kâyeng. <sup>5</sup> Hathnukkhu, tui kawlung daw a hlun teh a hnukkâbangnaw e khok a pâsu pouh teh hnica hoi a hui pouh. <sup>6</sup> Telah hoi Simon Piter koe a pha toteh, ahni ni Bawipa nang ni kaie ka khok hah na pâsu han maw atipouh. <sup>7</sup> Jisuh nihai, nang ni atu kai bangmaw ka sak tie na panuek hoe, atototeh na panue han, atipouh. <sup>8</sup> Piter nihaiyah, Bawipa nang ni kaie ka khok pâsu hanh atipouh. Jisuh ni, kai ni ka pâsu hoehpawiteh nang teh kai hoi kâkuetnae awm mahoe, atipouh. <sup>9</sup> Simon Piter ni hai pawiteh ka khok dueng pâsu hanh, ka kut hoi ka lû pueng hai pâsu, atipouh. <sup>10</sup> Jisuh nihai, tui ka kamhluk tangcoun e ni teh a khok dueng doeh pâsu han a ngai. A tak teh a thoung. Nangmanaw teh na thoung awh ei, buet touh teh thoung hoe, atipouh. <sup>11</sup> Bawipa ni ama ka pahnawt hane a panue dawkvah, nangmouh thung daw buet buet touh na thoung hoe ti a deingainae doeh.

### *Khok pâsungainae*

<sup>12</sup> Jisuh ni a khoknaw be a pâsu pouh hnukkhu, angkidung bout a kho teh a tahung. Kai ni ka sak e hah na thai panuek awh maw, telah a pacei.

<sup>13</sup> Kai teh nangmouh ni Bawipa, saya telah na kaw awh, hottelah ka o daw atueng. <sup>14</sup> Kai teh nangmae Bawipa hoi saya lah ka o eiteh nangmae na khok ka pâsu pawiteh nangmouh teh buet touh hoi buet touh na kâpasu van awh han. <sup>15</sup> Kai ni nangmouh koe ka sak e patetlah nangmouh ni na out awh hanelah ka sak toe. <sup>16</sup> Atangcalah ka dei, bawi teh san hlak a talue, laicei hlak kapatounkung a talue. <sup>17</sup> Hetnaw nangmouh ni na panue awh hnukkhu na tarawi awh pawiteh, nangmouh teh a yawkahawi e tami lah na o awh han.



<sup>18</sup> Nangmouh abuemlah dei ngainae na hoeh. Ka rawi e tami teh ka panue. Hatei, kaie vaiyei ka hmawng khai e ni a khok hoi na pathui tie Cakathoung a kuep han. <sup>19</sup> Hete hno a tâco hoehnahlan sut ka dei. A pha na hnin toteh kai heh ahni doeh toe tie na panue awh han. <sup>20</sup> Lawkkatang na dei pouh awh, kai ni ka patoun e tami na dâw pawiteh kai na dâw e lah ao. Kai na ka dâw e tami teh kai na kapatounkung ka dâw e lah a o, atipouh.

### *Judah ni Jisuh a poenae*

<sup>21</sup> Jisuh ni hete lawknaw be a dei hnukkhu vah, muitha dawk a reithai laihoi, atangalah na dei pouh awh. Nangmouh thung dawk buet touh ni kai hah na pahnawt han telah atipouh. <sup>22</sup> A hnukkâbangnaw ni apimaw a deingai vaiyoe a titeh buet touh hoi buet touh a kâkhet awh. <sup>23</sup> Jisuh ni a lungpataw e a hnukkâbangnaw thung dawk buet touh teh Jisuh koe rek kahnaï lah a tahung. <sup>24</sup> Simon Piter ni, apimaw a deingainae pacei haw, telah hote ahnuk kâbang e koe minout a poe. <sup>25</sup> Hatdawkvah, hote ahnuk kâbang e ni Jisuh koe rek a hnaï teh, Bawipa apimaw atipouh.

<sup>26</sup> Jisuh ni kai ni vaiyei ka raen vaiteh ka ranup hnukkhu ka poe e ni kai teh na man sak han ati teh, vaiyei raen e hah Simon capa Judah Isakarot teh a poe. <sup>27</sup> Ahni teh vaiyei a ca hoi, Setan ni a thung a kâen. Jisuh ni hai na sak hane kawï hno karanglah sak leih, atipouh.

### *Judah ni a yo nahane a dei*

<sup>28</sup> Bangkongmaw Jisuh ni hottelah a dei ati e cungtalah caboi kavennaw buet touh ni hai panuek awh hoeh. <sup>29</sup> Bangpatet ni teh Judah Isakarot teh tangkabom ka kuen e lah ao dawkvah, pawï nah ca hane kawï ran hanlah a patoun mue ati awh. Hoeh pawiteh, karoedengnaw buetbuet touh poe hane mue Jisuh ni a dei telah a pouk awh. <sup>30</sup> Judah Isakarot teh vaiyei a ca teh a tâco. Hahoi teh kho a hmo toe.

### *Kâlawk katha*

<sup>31</sup> Judah a cei hnukkhu, Jisuh ni atuvah tami Capa bawilen lah ao toe. Cathut teh tami Capa dawk hoi bawilen lah ao toe. <sup>32</sup> Cathut teh tami Capa koehoi a bawilennae awm pawiteh, Cathut ma roeroe ni bawilennae a kamnue sak han. Hote bawilennae teh tang a kamnue sak han.

<sup>33</sup> Ka canaw, kai teh nangmouh hoi dongdeng doeh kaawm ti toe. Nangmouh ni kai hah na tawng awh han. Judahnaw koe ka dei e patetlah atu hai ka dei, kai ka ceinae koe nangmouh na phat thai mahoe. <sup>34</sup> Nangmouh ni buet touh hoi buet touh lungkâpataw awh, kai ni lung na pataw awh e patetlah buet touh hoi buet touh lungkâpataw awh telah kâpoelawk katha na poe awh. <sup>35</sup> Nangmouh ni buet touh hoi buet touh lungkâpataw awh pawiteh, taminaw ni hote lungpatawnae hmawt awh vaiteh nangmouh teh ka hnuk kâbang katang lah na o tie a panue awh han, atipouh.

### *Piter ni pahnawt nahane sut a dei*

<sup>36</sup> Simon Piter ni, Bawipa na lah maw na cei han telah a pacei. Jisuh ni kai ka cei nahane hmuen koe atu na kâbang thai mahoe, hatei, atototeh na kâbang thai han, atipouh. <sup>37</sup> Piter ni, Bawipa nang koe atu bangkong kâbang thai hoeh han vaw, Bawipa, nang hanlah ka hringlu ka pasoung han atipouh. <sup>38</sup> Jisuh ni kai hanlah na hringlu na pasoung katang han



maw. Lawkkatang na dei pouh. Ahlui a khawng hoehnahlan nang ni kai vai thum touh na pahnawt han.

## 14

### *Lam, Lawkkatang, hoi hringnae*

<sup>1</sup> Nangmouh na lungpuen awh hanh. Cathut hah yuem awh. Kai hai na yuem awh. <sup>2</sup> A Pa e im dawk nangmouh o nahan hmuen moi ao. Awm hoehpawiteh awmhoeh tie hah nangmouh koe yo ka dei han doeh toe. Nangmouh hanlah hmuen rakueng hanlah ka cei han. <sup>3</sup> Hottelah ka cei vaiteh nangmouh o nahan hmuen be ka rakueng hnukkhu, Kai ka onae koe nangmouh hai o sak hanelah bout ka tho vaiteh nangmanaw hah kama koe na kaw awh vaiteh na la awh han. <sup>4</sup> Kai ka ceinae hmuen koe phanae lamthung teh na panue awh atipouh.

<sup>5</sup> Thomas ni, Bawipa, nang na lah maw na cei han tie kaimouh ni ka panue awh hoeh dawkvah lamthung bangtelamaw ka panue thai a han, atipouh. <sup>6</sup> Jisuh ni, kai teh lam, lawkkatang hoi hringnae lah ka o. Kai laipalah teh apinihai Pa koe phat thai mahoeht atipouh.

### *Pa a kamnue saknae*

<sup>7</sup> Nangmouh ni kai na panuek pawiteh a Pa heh panuek laipalah na awm awh mahoeht. Atuhoi teh na panue awh teh na hmu awh toe, atipouh.

<sup>8</sup> Filip nihai, Bawipa, na Pa hah kaimouh na patue haw, na patue pawiteh kaimae ngainae akuap han atipouh.

<sup>9</sup> Jisuh ni, Filip sahnin totouh kai ni nangmouh hoi cungtalah ka o eiteh nang ni kai na panuek hoeht rah. Kai ka hmawt e ni Pa hah a hmu toe. Hat pawiteh, bangkong Pa na maw ao titeh na pacei awh vaw. <sup>10</sup> Kai teh Pa dawk ka o teh Pa teh kai dawk ao e hah na yuem awh hoeht maw. Kai ni ka dei e pueng kamae kâtawnnae lahoi ka dei e tho hoeht. Kai ni ka sak e pueng hai kai koe kaawm e Pa ni doeh a sak. <sup>11</sup> Kai teh Pa dawk ka o teh Pa teh kai dawk ao e hah na yuem awh hoeht nakunghai ka tawk e hah khien nateh yuem awh.

<sup>12</sup> Atangalah na dei pouh awh. Kai na ka yuem e pueng ni kai ni ka tawk e patetlah a tawk han. Ka tawk e hlah hoe kalen e hai a tawk han. Bangkongtetpawiteh kai ni a Pa koe ka cei han toung dawkvah. <sup>13</sup> Pa teh Capa dawk hoi bawilenna a kamnue hanelah nangmouh ni kaie min lahoi na hei e pueng teh na poe han atipouh. <sup>14</sup> Nangmouh ni kaie ka min lahoi buetbuet touh na het pawiteh poe lah na o han atipouh.

### *Kathoung Muitha poe hane lawkkam*

<sup>15</sup> Kai na lungpataw awh pawiteh kaie kâpoelawknaw ngâi awh. <sup>16</sup> Kai ni Pa koe ka hei vaiteh, Pa ni lawkkatang kacangkhaikung Kathoung Muitha hah nangmouh na kaawmkhai hanelah na poe awh han. <sup>17</sup> Hote Muitha teh talaivan ni a panue awh hoeht dawkt hmawt thai hoeht. Hote Muitha teh nangmouh hoi cungtalah ao teh nangmouh koe ao dawkt nangmouh ni na panue awh. <sup>18</sup> Kai ni nangmouh nara patetlah sut na tat awh mahoeht. Nangmouh koe bout ka tho han.

### *Pa, Capa, Kathoung Muitha*

<sup>19</sup> Atu hoi talaivan taminaw ni kai teh na hmawt awh mahoeht toe. Nangmouh ni teh na hmu awh han. Kai teh ka hring dawkvah nangmouh hai na hring awh han. <sup>20</sup> Kai teh a Pa dawkt ka o teh, nangmouh teh kai dawkt na onae, kai ni nangmouh dawkt ka onae hai hat hnin vah



nangmouh ni na panue awh han. <sup>21</sup> Kaie kâpoelawknaw ka tarawi e teh, kai lungpataw e doeh. Kai lungpataw e teh a Pa ni a lungpataw han. Kai ni hai ka lungpataw teh ahni koe ka kamnue pouh han, a ti.

<sup>22</sup> Judah Isakarot nahoe, alouke Judah ni Bawipa kaimouh koe na kamnue hanelah na pouk ei, talaivan taminaw koe na kamnue hoe e hah bangtelamaw ati teh a pacei.

<sup>23</sup> Jisuh ni, kai lungpataw e ni teh kaie ka lawk a ngâi han. A Pa ni hai ahni teh a lungpataw han. Kaimouh hai ahni koe ka cei vaiteh ahni hoi rei ka o han. <sup>24</sup> Kai lung na ka pataw hoe e teh ka lawk ngâi mahoe. Nangmouh ni na thai awh e lawk heh kaie lawk nahoe. Kai na kapatoukung Pa e lawk doeh. <sup>25</sup> Nangmouh koe ka o navah hete lawknaw hah ka dei toe. <sup>26</sup> Pa ni ka min lahoi patoun lah kaawm e kabawmkung Kathoung Muitha ni nangmouh koe bangpueng na cangkhai vaiteh ka dei e lawk pueng panuethainae na poe awh han.

### *Lungmawngnae na poe awh*

<sup>27</sup> Lungmawngnae nangmouh koe ka ceitakhai. Kaie lungmawngnae teh na poe awh. Talaivan ni na poe e patet na hoe. Nangmouh ni lungpuen tâsue laihoi awh hanh awh. <sup>28</sup> Kai ni ka cei hnukkhu hoi bout ka tho han tie lawk nangmouh ni na thai awh. Nangmouh ni kai na lungpataw pawiteh Pa koe ka cei hane na konawm awh han. Bangkongtetpawiteh Pa teh kai hlak a lenhnawn. <sup>29</sup> Hote hno a tâco katang toteh nangmouh ni na yuem awh nahanlah a tâco hoehnahlan vah, atu sut ka dei e doeh. <sup>30</sup> Atu hoi teh nangmouh koe moi ka dei mahoe toe. Bangkongtetpawiteh talaivan kaukung teh a tho han toe. A tho ei kai dawk banghai sak thainae kâ tawn mahoe. <sup>31</sup> Kai ni Pa ka lungpataw teh a Pa e kâpoelawk patetlah ka tawk e hai talaivan taminaw ni a panue awh han. Thaw awh leih, hete hmuen koehoi cet awh leih sei, atipouh

## 15

### *Misurkung hoi a kang bangnuenae*

<sup>1</sup> Kai teh misurkung katang doeh. A Pa teh takha katawnkung doeh. <sup>2</sup> Kai dawk a paw ka paw hoe e a kang pueng teh bouk lah ao han. A paw ka paw e a kangaw teh hoe a paw nahan rasoun lah o awh han. <sup>3</sup> Nangmouh teh kai ni ka dei e lawk ni na thoungsak awh toe. <sup>4</sup> Kai dawk awh awh. Kai hai nangmouh dawk ka o han. A kang ni misurkung hoi kâkuen hoehpawiteh a mahmawk a paw paw thai hoe e patetlah nangmouh hai kai dawk na awh hoehpawiteh a paw na paw thai awh mahoe.

<sup>5</sup> Kai teh misurkung doeh. Nangmouh teh akang doeh. Kai dawk kaawm e teh kai hai ahni koe ka o van han. Ahni teh moi a paw han. Kai hoi na kâkuen hoehpawiteh banghai na sak thai awh mahoe. <sup>6</sup> Kai dawk kaawm hoe e teh ka ke e a kang patetlah alawilah tâkhawng han. Hot patetlah e a kangaw teh taminaw ni a pâkhueng vaiteh hmai dawk koug phum vaiteh a kak han. <sup>7</sup> Nangmouh ni kai dawk na o awh teh kaie ka lawk hai nangmouh dawk awh pawiteh nangmouh ni na hei e naw pueng hai poe lah ao han. <sup>8</sup> Nangmouh ni a paw moikapap na paw paw doeh, a Pa e a bawilennae a kamnue vaiteh nangmouh hai kaie hnukkâbang katang lah na o awh han.

### *Khrih e lungpatawnae*



<sup>9</sup> Pa ni kai lung na pataw e patetlah kai ni nangmouh lung na pataw awh. Kaie lungpatawnae thungvah awm awh. <sup>10</sup> Kai ni a Pa e kâpoelawknaw ka ngâi teh a Pa ni lung na pataw e patetlah, nangmouh ni kâpoelawknaw na ngâi awh pawiteh kaie lungpatawnae dawh na o awh han. <sup>11</sup> Nangmouh lunghawinae ao vaiteh nangmae lunghawinae akuep nahanelah hete lawk heh nangmouh koe ka dei.

<sup>12</sup> Kaie kâpoelawh teh kai ni nangmouh lungpataw e patetlah nangmouh ni buet touh hoi buet touh lungkâpataw awh. <sup>13</sup> Tami ni a hui hanelah a hringnae a pasoung e hloilah ka talue e api koehai lungpatawnae alouke awm hoe. <sup>14</sup> Nangmouh ni kaie kâ poe e na tarawi pawiteh ka hui lah na o awh. <sup>15</sup> Atu totouh hoi san telah na kaw a mahoe. <sup>16</sup> San ni teh a bawipa ni a sak e hno panuek hoe. Nangmouh teh huiko lah na o awh. Bangkongtetpawiteh a Pa ni a dei e hnonaw pueng teh nangmouh koe na panue sak. <sup>17</sup> Nangmouh ni kai na rawi awh hoe. Kai ni doeh nangmouh na rawi awh. Hatdawkvah, cet awh nateh ka kangning e a paw na paw awh nahane hoi ka min lahoi Pa koe na hei awh e pueng na hmu awh nahanelah nangmanaw teh kai ni na rawi awh. <sup>18</sup> Nangmouh ni buet touh hoi buet touh lungpatawnae tawn awh telah kâ na poe.

### *Talai taminaw ni na hmuhma awh han*

<sup>19</sup> Talaivan taminaw ni na hmuhma awh pawiteh, nangmouh na hmuhma awh hoehnahlan vah kai hmaloe na hmuhma awh toe tie panuek awh. <sup>20</sup> Nangmouh ni talaivan taminaw patetlah na awm awh pawiteh, talaivan taminaw ni na lungpataw awh van han. Nangmouh teh talaivan taminaw thung hoi rawi e lah na o teh talai taminaw patetlah na o awh hoe dawkvah talai taminaw ni na hmawt ngai awh hoe. <sup>21</sup> San teh a bawi hlak len hoe ka tie hah thai panuek awh. Taminaw ni kai na dudam awh pawiteh nangmouh hai na dudam awh han. Ka lawk ngâi awh pawiteh na lawk hai a ngâi awh han. <sup>22</sup> Ahnimouh ni kai na kapatoukung a panue awh hoe dawkvah kaie ka min kecu dawh hote hno pueng a sak awh han. <sup>23</sup> Kai ni ka tho teh ahnimouh hanlah ka dei hoehpawiteh ahnimae yonnae awm hoe. Hatei, atuvah a yonae hro thai lah awm hoe toe. <sup>24</sup> Kai na ka hmuhma e teh a Pa hai a hmuhma <sup>25</sup> Apinihai a sak boihoe e hnonaw hah, ahnimae hma lah ka sak pouh hoehpawiteh a yonae awm hoe. Hatei, atuvah hote hno a hmu awh nahlangva vah kai hoi a Pa hah na hmuhma awh. <sup>26</sup> Ahnimae kâlawk cauk dawh thut e teh, kai hah ayawmyin lah na hmuhma awh ti e a kuep nahane doeh.

<sup>27</sup> Apa koehoi kai ni nangmouh koe ka patoun hane lawkkatang hoi kakawi e Muitha a tho toteh kaie ka kong hah a kampangkhai han. <sup>28</sup> Nangmouh hai apuengcue hoi kai hoi cungtalah o awh dawkvah kai heh na kampangkhai han.

## 16

<sup>1</sup> Nangmouh ni na lungpout awh hoe nahanelah, hete lawk het na dei pouh awh. <sup>2</sup> Talai taminaw ni nangmouh sinakok dawh hoi na pâlei awh han. Nangmouh na ka thet e ni hai Cathut thaw doeh ka tawh tinae atueng hai a pha han. <sup>3</sup> Apa hai panuek awh hoe, kai hai na panue awh hoe dawkvah hottelah a sak awh han. <sup>4</sup> Hote tueng a pha toteh kai ni hettelah ka dei e hah nangmouh ni hlawt na pouk awh nahanlah na dei pouh awh.



<sup>5</sup> Kai teh kapatoungkue koe atuvah ka cei han toe. Hatei, nâmouh na cei han telah apinihai na pacei awh hoe. <sup>6</sup> Hete konglam ka dei dawkvah nangmouh ni puenghoi na lungmathoenae na tawn awh. <sup>7</sup> Nangmouh koe lawkkatang ka dei, kai ni ka cet pawiteh nangmouh hanelah aphu o han. Bangkongtetpawiteh ka cet hoehpawiteh Kabawmkung teh nangmouh koe tho mahoe. Kai ni ka cet pawiteh ahni teh nangmouh koe ka patoun han. <sup>8</sup> Kabawmkung a tho toteh, yonnae kong, lannae kong hoi lawkcengnae kongnaw hah talaivan taminaw koe kamcenglah a pâpho han. <sup>9</sup> Kai na yuem awh hoe dawkvah yon kong ka pâpho han. <sup>10</sup> Kai teh Pa koe ka cei hnukkhu vah na hmu awh hoe han toung dawkvah yon thoungnae kong hah a pâpho han. <sup>11</sup> Het talaivan kaukung teh lawk ceng lah ao toung dawkvah lawkcengnae a pâpho han.

<sup>12</sup> Nangmouh koe lawk ka dei han moi ao ei nangmouh ni be na kuem thai mahoe. <sup>13</sup> Lawkkatang Muitha a tho toteh, ahni ni lawkkatang pueng thung na hrawi awh han. Ahni ni amae kâtawnnae patetlah dei mahoe, hatei, a thai e naw pueng dei vaiteh hmalah ka tho hane hnonaw hai nangmouh koe a pâpho han. <sup>14</sup> Ahni ni kaie bawilenna a kamnu sak han. Bangkongtetpawiteh kai hoi kâkuetnae nangmouh koe a dei han. <sup>15</sup> Pa ni a tawn e pueng teh kaie doeh, hatdawkvah kai ni ka tawn e hno hah a la vaiteh nangmouh koe a pâpho han, atipouh.

### *Lung mathoenae koehoi lunghawinae koe*

<sup>16</sup> Dawngdeng ca, nangmouh ni hai na hmawt awh mahoe, hatei, dawngdengca teh kai hah bout na hmu awh han. Bangkongtetpawiteh kai teh Pa koe ka cei han toe, atipouh. <sup>17</sup> A hnukkâbangnaw ni, bangtelamaw, dawngdengca, kai heh na hmawt a mahoe, dawngdengca, kai heh bout na hmu a han tie hah bangkongtetpawiteh kai teh apa koe ka cei han toe tie hah bangtelah nama aw titeh a kâdei awh. <sup>18</sup> Bangtelamaw, ka thaipanuek hoe telah buet touh hoi buet touh a kâti awh. <sup>19</sup> A hnukkâbangnaw ni pacei hanlah a ngai awh han doeh tie Jisuh ni a panue dawkvah dawngdengca, nangmouh ni na hmawt awh mahoe. Dawngdeng ca vah, kai hah bout na hmu a han telah kai ni ka dei e nangmouh ni buet touh hoi buet touh na kâpacei awh maw. <sup>20</sup> Lawkkatang ka dei, nangmouh teh lungmathoe hoi na khuika awh han, hatei, talaivan taminaw teh a konawm awh han. Nangmouh teh na lungmathoe awh nakunghai hote lungmathoenae teh konawmnae lah bout ka tho han. <sup>21</sup> Napui ni camo a khe nah a khe hane atueng a pha toteh a lungmathoe. Yo a khe hnukkhu, talaivan tami buet touh a khe daw a lunghawi teh camo a khe nah rucat a khangnae hah a pahnim. <sup>22</sup> Hot patetvanlah, atu lung ka mathout awh nakunghai, kai teh nangmouh hoi bout kâhmo hanelah ao dawkvah nangmouh teh konawmnae hoi na kawi awh han. Hote konawmnae teh nangmouh koehoi apinihai na lawm thai mahoe toe. <sup>23</sup> Hote hnin torei teh, bang hno ca boehai api nang ni hai kai hah na pacei ngai mahoe. Atangcalah ka dei, nangmouh ni kaie ka min lahoi Pa koe na hei e pueng teh Pa ni na poe awh han. <sup>24</sup> Atu totouh nangmouh ni ka min lahoi banghai na het awh hoe rah. Lunghawinae a kuep nahane het awh, na het pawiteh poe lah ao han.

### *Talai a tâ toe*

<sup>25</sup> Hete hnonaw nangmouh koe bangnuenae hoi ka dei. Bangnuenae laipalah Pa e kong nangmouh koe kacailah deinae atueng ni a pha han.

<sup>26</sup> Hatnae hnin nah nangmouh ni ka min la hoi na hei awh han. Nangmouh



han Pa koe ka hei han ti deinae nahoe. <sup>27</sup> Bangkongtetpawiteh, nangmouh ni kai na lungpataw awh teh kai hah Cathut koehoi ka tho e tie na yuem awh dawkvah Pa ma roeroe ni nangmouh na lungpataw awh. <sup>28</sup> Kai teh a Pa koehoi het talaivan ka tho. Het talai koehoi a Pa koe bout ka cei han atipouh. <sup>29</sup> A hnukkâbangnaw ni, Bawipa atuvah bangnue nae laipalah kacailah na dei. <sup>30</sup> Bawipa nang ni bangpuengpa koug na panue tie teh atuvah ka panue awh toe. Apihai nang pacei han ngai hoe. Hatdawkvah, Bawipa nang teh Cathut koehoi na tho tie ka yuem awh toe, atipouh awh. <sup>31</sup> Jisuh nihai, atuvah na yuem awh toung maw. <sup>32</sup> Nangmouh ni parang na kamphei awh vaiteh kai kamadueng sut na yawng takhai awh han tie atueng teh atu a pha toe. Hatei, kai teh kama dueng kaawm hoe, Pa ni na o khai. <sup>33</sup> Nangmouh ni kai koehoi lungmawngnae na coe awh nahanelah hete lawknaw hah nangmouh koe ka dei toe. Nangmouh teh het talaivan rucat roedengnae na kâhmo awh han. Hatei, ngaihri awh hanh. Kai ni talaivan ka tâ toe telah bout a dei.

## 17

### *Jisuh a ratoum*

<sup>1</sup> Jisuh ni hete lawknaw a dei hnukkhu kalvan lah a moug teh, Oe a Pa! atueng a pha toe. Capa ni Pa e bawilenna a kamnue sak thai nahan, Capa e bawilenna kamnuek sak haw. <sup>2</sup> Pa ni Capa hah taminaw pueng e lathueng kâtawanna a poe toe. Het hateh Pa ni Capa koe a poe e naw pueng ni a yungyoe hringnae a hmu thai awh nahane doeh. <sup>3</sup> Yungyoe hringnae tie teh katang e Cathut, buet touh dueng ao tie hoi a patoun e Jisuh Khrih panuena hah doeh. <sup>4</sup> Kai ni na bawilenna het talai van ka kamnue sak toe. Kai koe na poe e hno sak han kawi ka cum toe. <sup>5</sup> Apa, het talaivan ao hoehnahlan vah nang koe e bawilenna ka tawn e hoi atuvah nama koe bawilenna kamnuek sak haw.

### *A hnukkâbangnaw hanlah ratoumnae*

<sup>6</sup> Hete talaivan daw k hoi na rawi teh, kai koe na poe e taminaw koe Bawipa nange min hah kai ni ka kamnue sak toe. Ahnimanaw teh nange taminaw lah ao awh teh, nang ni kai koe na poe toe. Ahnimanaw ni hai nange na lawk a tarawi awh toe. <sup>7</sup> Bangpuengpa na poe e heh nang ni na poe tie hoi nang koe e doeh ti a panue awh toe. <sup>8</sup> Bangkongtetpawiteh, kai na poe e lawk heh ahnimouh koe ka poe teh a dâw awh dawkvah kai teh nama koehoi ka tho e ti a panue awh teh nang ni kai na patoun e hah a yuem awh toe. <sup>9</sup> Ahnimouh han ka ratoum. Talaivan taminaw hanlah ka ratoum hoe. Kai koe na poe teh nama e tami lah ao dawkvah ahnimouh hanlah doeh ka ratoum. <sup>10</sup> Kai ni ka tawn e pueng nama e doeh. Nang ni na tawn e pueng hai kaie doeh. Kai teh ahnimanaw lahoi bawilenna a kamnue toe. <sup>11</sup> Kai teh atu totouh hoi het talaivan kaawm mahoe. Hete taminaw teh talaivan ao han rah. Kai teh nang koe ka cei han toe. Kathoung poung e a Pa nang hoi kai teh buet touh lah o e patetlah na poe e taminaw hai buet touh lah ao awh nahan, nange min daw kaksak haw. <sup>12</sup> Het talaivan ahnimouh hoi cungtalah ka o na thung na min lahoi ka kaksak toe. Ahnimanaw thung daw k rawknae capa dueng hloilah teh buet touh hai rawknae koe phat hoe. Ahnie rawknae teh Cakathoung a kuep nahane doeh.

<sup>13</sup> Atuvah kai teh nama koe ka cei han toe. Ahnimouh ni kai koe e lunghawinae pou a tawn awh thai nahan talaivan ka o nah hete lawk ka



dei. <sup>14</sup> Nange na lawk ahnimouh koe ka poe toe. Kai teh het talaivan hoi ka kâkuet hoeh e patetlah ahnimouh hai a kâkuet hoeh dawkvah talai taminaw ni a hmuhma awh. <sup>15</sup> Talaivan dawk hoi ahnimanaw na la hanelah ka ratoum hoeh, hawihoehnae koehoi na khetyawt hanlah ka ratoum. <sup>16</sup> Kai teh talaivan hoi ka kâkuet hoeh e patetlah ahnimouh hai talai hoi kâkuen hoeh. <sup>17</sup> Na lawkkatang hoi ahnimouh thoungsak haw. Nange lawk teh lawkkatang doeh. <sup>18</sup> Kai heh talaivan na patoun awh e patetlah kai ni hai ahnimouh talaivan ka patoun. <sup>19</sup> Ahnimouh ni lawkkatang lahoi a thoung thai, na han kai ni kama hoi kama ka kamthoung.

### *Kayuemnaw pueng hanelah ratoumnae*

<sup>20</sup> Ahnimouh han dueng ka ratoum hoeh, ahnimouh ni a dei e lawk lahoi kai kayuemnaw hanelah hai ka ratoum. <sup>21</sup> Bawipa, nang ni kai na patoun e talaivan taminaw ni a yuem awh nahan, ahnimanaw pueng teh buet touh lah ao a vaiteh, kai hai nang dawk ka o patetlah ahnimanaw hoi nang dawk cungtalah o thai nahan ka ratoum. Het hateh Bawipa nang ni kai na patoun e talai taminaw ni a yuem awh nahane doeh. <sup>22</sup> Maimanaw teh buet touh lah o e patetlah ahnimouh hai buet touh lah ao awh nahan na bawilennae na poe e patetlah ahnimouh koehai ka poe toe. <sup>23</sup> Ahnimae thung vah kai ka o teh kaie ka thung vah nang na o. Ahnimouh teh buet touh lah ao teh a kuep thai awh nahan nang ni kai na patoun teh lung na pataw e patetlah ahnimouh hai lung na pataw tie talaivan ni a panue han.

<sup>24</sup> Oe a Pa talaivan ao hoehnahlan hoi kai lung na pataw teh kai na poe e kaie bawilennae hah kai koe na poe e taminaw ni a hmu awh nahanelah, ahnimanaw hah kai ka onae koe kai hoi rei o sak hanelah ka ngai.

<sup>25</sup> Kalan e a Pa talaivan ni nang na panuek hoeh ei, kai ni teh nang na panue. Nang ni kai na patoun tie ahnimouh ni a panue awh toe. <sup>26</sup> Kai na lungpatawnae ahnimae thung vah ao teh, kai hai ahnimae thung ka o nahan, Bawipa nang min teh ahnimouh ka panue sak toe, pou ka panue sak han rah telah atipouh.

## 18

### *Jisuh a kâhnaungnae*

<sup>1</sup> Jisuh ni hettelah a ratoum hnukkhu hoi, a hnukkâbangnaw hoi Kidron palang a raka awh teh, haw e takha thung vah a kâen awh. <sup>2</sup> Hote hmuen koe Jisuh hoi a hnukkâbangnaw ouk a ceinae hah Bawipa kapahnawtkung Judah Isakarot ni a panue. <sup>3</sup> Hawvah Judah ni ransahu buet touh hoi Farasinaw hoi vaihma bawinaw ni a patoun e karingkungnaw a kaw teh hmaim hmaito, sarusarai hoi a thokhai.

<sup>4</sup> Jisuh ni ama koe ka tho hane kawi teh be a panue dawkvah ahnimouh koe a cei teh apimaw na tawng awh telah a pacei. <sup>5</sup> Ahnimouh ni Nazareth tami Jisuh atipouh awh. Jisuh ni, kai teh ahni doeh atipouh. Bawipa kapahnawtkung Judah Isakarot hai ahnimouh hoi cungtalah a kangdue.

<sup>6</sup> Kai teh ahni doeh ati navah ahnimouh teh hnuklah talai dawk koug a rawp awh. <sup>7</sup> Apimaw na tawng awh telah bout a pacei teh, Nazareth tami Jisuh ka tawng awh telah ati awh. <sup>8</sup> Jisuh ni kai doeh toe ka ti toung nahoehmaw, hatdawkvah kai hah na tawng awh pawiteh, ahnimanaw teh cet awh lawi naseh bout atipouh. <sup>9</sup> Hettelah a deinae teh, Bawipa nang ni na poe e taminaw buet touh hai kahmat sak mahoe, ati e lawk a kuep nahane doeh.



<sup>10</sup> Hatnavah Simon Piter ni a sin e tahloi a rasa teh vaihma kacue e avaica e aranglae hnâ pak a tâsek pouh. Ahnie min teh Makhas doeh. <sup>11</sup> Jisuh ni tahloi hah amae tabu dawk pâseng leih. Pa ni na poe e manang ka net mahoe haw. telah, Piter hanlah atipouh.

*Jisuh a man awh teh Annas koe a hrawi awh*

<sup>12</sup> Hahoi ransa bawi, ransanaw hoi Judahnaw e karingkungnaw ni Jisuh teh a man awh teh a katek awh. <sup>13</sup> Annas koe hmaloe a ceikhai awh. Annas teh hatnae kum dawk vaihma kacue Kaiaphas e a masei lah ao. <sup>14</sup> Kaiaphas teh Judahnaw koe, tami moikapap yueng tami buet touh a due e hoe ahawi, telah pouknae kapoekung doeh.

*Piter ni Jisuh pahnavtnae*

<sup>15</sup> Simon Piter hoi alouke a hnukkâbang buet touh teh Jisuh hnuk a kâbang roi. Hote a hnukkâbang e teh vaihma kacue hoi a kâpanue dawk Jisuh hoi cungtalai vaihma kacue e toeim thung totouh a kâen thai. <sup>16</sup> Hatnavah Piter teh takhang e alawilah a kangdue. Hatdawkvah vaihma kacue hoi kâpanuek e tami ni takhang ka ring e napui koe a dei pouh teh Piter hah a thung lah a kâen sak. <sup>17</sup> Takhang ka ring e napui ni Piter han, nang hai hote tami e a hnukkâbang e nahoe haw atipouh nah, Piter ni, na hoe hoi bo atipouh teh a kâpapha.

<sup>18</sup> Hatnae tueng nah hroung a pâding dawkvah sannaw hoi karingkungnaw ni hmai a patawi awh teh hmai a kamben awh. Piter hai ahnimouh hoi cungtalai hmai a kamben van.

*Jisuh lawk a pacei awh*

<sup>19</sup> Hatnavah vaihma kacue ni Jisuh hnukkâbangnaw kong hoi a cangkhae a konglamnaw a kung a khe. <sup>20</sup> Jisuh ni, kai ni talaivan taminaw koe kamcengcalah ka dei toe, Judahnaw a kamkhuengnae sinakoknaw hoi bawkim dawkvah pou ka cangkhai. A ru lahoi banghai ka sak hoe hoi. <sup>21</sup> Bangkongmaw kai na pacei awh vaw. Kai ni bangtelamaw ka cangkhai tie hah, ka thai e naw koe pacei a khe. Kai ni ka cangkhai e hai ahnimouh ni a panue atipouh. <sup>22</sup> Hottelah a dei navah, ateng ka kangdout e karingkung buet touh ni Jisuh a tambei teh, nang ni vaihma kacue hah telah na dei kawi maw, atipouh. <sup>23</sup> Jisuh ni hai kaie ka lawk ka payonnae awm pawiteh na payon tie kampangkhai haw, ka payon hoe pawiteh bangdawkmaw na tambei, atipouh. <sup>24</sup> Annas ni Bawipa teh kateknae ratham pouh laipalah vaihma kacue Kaiaphas koe a thak awh.

*Piter ni Jisuh bout pahnavt*

<sup>25</sup> Simon Piter teh kangdue laihoi hmai a kamben na koevah tami bangpatetnaw ni vah, nang hai ahnie a hnukkâbang van e nahoe haw telah atipouh navah, kai na hoe hoi bo atipouh teh a kâpapha.

<sup>26</sup> Piter ni a hnâ pak a tâsek pouh e a hui vaihma kacue e avaica ni, nang heh takha thung Jisuh hoi rei na o e na hmu atipouh. <sup>27</sup> Piter ni bout a kâpapha, hat nah tahma vah ahlui teh a khawng.

*Jisuh Pailat bawi koe a hrawi awh*

<sup>28</sup> Amom vah Jisuh teh Kaiaphas im hoi a ceikhai awh teh lawkcengnae im lah a hrawi awh. Ahnimouh ni ceitakhai pawe e bu a ca thai nahan amamae a bawknae phunglam patetlah thoungnae a ngai dawkvah ukkung bawi e imthung lah kâen awh hoe hoi. <sup>29</sup> Hatdawkvah, Pailat bawi ni ahnimouh aonae koe a tâco teh, hat e tami ni bangmaw a yonnae a



tawn teh na thokhai awh atipouh. <sup>30</sup> Ahnimouh ni, hete tami heh yon hoehpawiteh nang koe ka thokhai awh mahoehe mue telah bout atipouh awh. <sup>31</sup> Pailat ni vah, Bawipa teh, namamae phung lawk patetlah lawkceng awh atipouh. Ahnimouh ni, kaimanaw ni apihai thei thainae kâ ka tawn awh hoeh atipouh awh. <sup>32</sup> Jisuh ni amahoima bangtelamaw a due han tie a dei e kuep nahanelah doeh hettelah ao.

<sup>33</sup> Pailat teh imthungkhu bout a kâen teh Jisuh, nang heh Judah siangpahrang katang maw atipouh. <sup>34</sup> Jisuh ni, hete lawk heh na mahmaw maw na pacei. hoehpawiteh ayâ ni maw nang koe a dei, ati teh a pacei. <sup>35</sup> Pailat bawi ni, kai hah Judah tami lah maw na pouk. Kai kut dawng nang na kapoekung teh nama e miphun Judahnaw hoi vaihma bawinaw nahoehmaw, na sakpayon e hno ao maw. atipouh. <sup>36</sup> Jisuh ni, kaie uknaeram teh het talaivan hoi kâkuen hoeh. Kaie uknaeram teh talaivan hoi kâkuen pawiteh kai teh Judahnaw e kut dawng ka pha hoeh na han, ka taminaw ni a tuk awh han toe. Hatei, kaie ram teh het talai hoi kâkuen hoeh, atipouh. <sup>37</sup> Pailat bawi nihai, pawiteh, nang heh siangpahrang maw telah a pacei. Jisuh ni, nang ni na pacei e patetlah kai teh siangpahrang doeh. Kai teh lawkkatang kampangkhai hanlah ka khe e doeh. Hot hanelah doeh het talaivan ka tho toe. Lawkkatang hoi kâkuen e pueng ni ka lawk a ngâi awh atipouh.

<sup>38</sup> Pailat nihai, lawkkatang teh bangmaw titeh a pacei hnukkhu Judahnaw aonae koe a tâco teh, hete tami dawng a yonnae khoeroe kahmawt hoeh. <sup>39</sup> Ceitakhai pawih nah namamae phung patetlah tami buetbuet touh ouk hlout sak. Nangmouh ni Judah siangpahrang hlout sak hanelah na ngai a maw telah a pacei. <sup>40</sup> Ahnimouh ni bout a hram awh teh, ahni heh thei han, Barabas heh tha awh telah hram laihoi ati awh. Barabas teh dingca doeh.

## 19

### *Jisuh thei hanlah a hei awh*

*Mat 27:31; Mrk 15:16-20*

<sup>1</sup> Hathnukkhu Pailat ni Jisuh hah a la teh a hem sak. <sup>2</sup> Ransanaw ni pâkhinglukhung a sak awh teh a lû dawng a kâ muk sak awh teh hni paling a khu awh. <sup>3</sup> Judah siangpahrang na hringyung vang na seh ati awh teh a tambei awh. <sup>4</sup> Pailat nihai, Hete tami dawng a yonnae khoeroe kahmawt hoeh tie na panue awh nahoehmaw, atu nangmouh na onae koe ka thokhai, telah ahnimouh koe atipouh.

<sup>5</sup> Hahoi Jisuh teh pâkhinglukhung a kâ muk sak awh teh hni paling kâkhu hoi alawilah a tâco. Pailat ni hai ahni teh khen awh atipouh awh.

<sup>6</sup> Vaihma bawinaw hoi karingkungnaw ni a hmu awh teh, thingpalam dawng thet, thingpalam dawng thet atipouh awh. Pailat ni, nangmouh ni hrawi a nateh thingpalam dawng thet awh. Kai ni teh a yonnae ka hmawt hoeh, atipouh. <sup>7</sup> Judahnaw ni, ahni ni Cathut e a Capa telah a kâti dawngvah kaimae phung lawk dawng a dei e patetlah a due hanlah o telah atipouh awh.

<sup>8</sup> Hettelah a dei awh e Pailat ni a thai navah hoe a taki. <sup>9</sup> Imthung khu lah bout a kâen teh Jisuh koe, nang heh nâ lahoi maw na tho atipouh. Hatei, Jisuh ni a lawk kam touh boehai pathung hoeh. <sup>10</sup> Pailat ni, kai na pato ngai hoeh maw. Kai ni nang thingpalam dawng thei hane hoi thei hoeh nahane kâ ka tawn e na panuek hoeh na maw atipouh. <sup>11</sup> Jisuh ni, lathueng lae kâ na poe hoehpawiteh nang ni kai dawng banghai na sak thai



mahoeh. Hatdawkvah kai heh nang koe na ka poe e tami koe a yonnae hoe a len atipouh.

<sup>12</sup> Hahoi teh Pailat ni Bawipa a hlout thai na hane kho a pouk. Hatei, Judahnaw ni hat e tami na tha pawiteh, nang teh Sizar siangpahrang e a hui na hoeh. Apihai amahoima siangpahrang lah ka kâ sak e teh Sizar siangpahrang e taran lah a o, atipouh awh. <sup>13</sup> Hete lawk a thai navah Pailat bawi ni Jisuh teh alawilah a hrawi teh Hebru lahoi, Gabbatha ati e lawkcengnae tungkhung, lungphen phai tie tungkhung van a tahung. <sup>14</sup> Hat hnin teh ceitakhai pawî apâthum hnin kanîthun suimilam hlaikahni touh han navah, Pailat bawi ni, nangmae siangpahrang hah khenhaw telah Judahnaw koe atipouh. <sup>15</sup> Ahnimouh ni a hram awh teh, ahni teh thet, thet thingpalam dawkvah thet atipouh awh. Pailat ni nangmae siangpahrang teh thingpalam dawk thei han maw, telah a paei. Vaihma bawinaw ni kaimae Sizar siangpahrang hloilah api siangpahrang awmhoeh, atipouh awh.

<sup>16</sup> Hatnavah Pailat bawi ni Bawipa Jisuh teh thingpalam dawk thei hanelah ahnimae kut dawk a poe teh ahnimouh ni Bawipa teh a ceikhai awh.

### *Jisuh thingpalam dawk a pathout awh*

<sup>17</sup> Bawipa teh amae thingpalam a hrawm laihoi a cei teh luhru hmuen tie koe a pha. Hote a hmuen teh Hebru lahoi, Golgotha ati awh. <sup>18</sup> Hote hmuen koe Bawipa teh alouke tami kahni touh hoi cungtalâh thingpalam dawk a het awh. Ahnimouh roi e a rahak vah Jisuh a pathout awh.

<sup>19</sup> Pailat bawi ni noutnae min a thut teh thingpalam dawk a bet, NAZARETH TAMI JISUH, JUDAH SIANGPAHRANG telah a thut. <sup>20</sup> Jisuh thingpalam dawk pathoutnae hmuen teh khothung hoi a hnai dawkvah, Hebru, Latin, Rom lawk lahoi a thut e ca hah Judahnaw moikapap ni a touk awh. <sup>21</sup> Hatdawkvah Judah vaihma bawinaw ni Pailat koe a cei awh teh, Judah siangpahrang telah thut hanh. Kai teh Judah siangpahrang a kâ tie hah thut loe atipouh awh. <sup>22</sup> Pailat bawi ni hai kai ni kathut tangcounge teh thut lah o toe, atipouh.

<sup>23</sup> Ransanaw ni Jisuh teh thingpalam dawk a pathout awh teh a khohna hah pali touh lah a phi awh teh buetbuet touh hoi a kârei awh. Athung e angkidung teh pou kamtawm lah kawng e angkidung lah ao dawkvah, <sup>24</sup> Angki phi laipalah apinimaw a coe han ati awh teh cungpam khoe e a rayu awh telah Cakathoung ni ati e hah a kuep na han ransanaw ni a sak awh.

<sup>25</sup> Jisuh e thingpalam teng vah a manu hoi a manu e a nawngâh Klopas e a yu Meri hoi Madalin Meri tinaw a kangdue awh. <sup>26</sup> Jisuh ni a manu hoi a lungpataw e a hnukkâbangnaw ateng a kangdue e a hmu navah, a manu hanlah nange napui na capa hah khenhaw! atipouh. <sup>27</sup> A hnukkâbangnaw koe, hei! na manu teh kahawicalah khenyawñ awh atipouh. Hahoi teh a hnukkâbangnaw ni a manu teh im lah a ceikhai awh.

### *Jisuh a thouknae*

*Mat 27:48-50; Mrk 15:36-37; Luk 23:36.*

<sup>28</sup> Hahoi Jisuh ni, bangpuengpa a kuep toe tie a panue dawkvah Cakathoung dawk a dei e a kuep nahanelah, tui kahran telah a ti. <sup>29</sup> Hote hmuen koe misurtui ka thut hoi yikkawi e hlaam buet touh ao. Ahnimouh ni napon hoi hote atui hah a nep awh teh cakui dawk hoiyah Jisuh e a pahni koe a panep pouh awh. <sup>30</sup> Jisuh ni hote tui a nei teh, ka cum toe a titeh a lûsaling teh a hringnae a thouk.



### *A na tahroe hoi a thut awh*

<sup>31</sup> Judahnaw ni hote hnin teh kâraquengnae hnin lah ao. A tangtho teh sabbath hnin lah ao dawkvah thingpalam dawk ro ao hoeh nahan, Pailat bawi koe a cei awh teh a khok khoe vaiteh ronaw la hanelah a hei awh. <sup>32</sup> Hatnavah ransanaw ni a cei awh teh Jisuh hoi cungtalah thingpalam dawk a vo awh e a khoknaw hah a khoe pouh. <sup>33</sup> Jisuh koe a pha awh navah yo a due toe tie a hmu teh a khok khoe pouh hoeh toe. <sup>34</sup> Ransa buet touh ni a na dawk tahroe hoi a cawk navah thi hoi tui a tâco. <sup>35</sup> Hote hno kahmawtnaw ni kampangkhainae teh a yuem awh. Ahni ni a dei e teh atang katang doeh ati awh. Nangmouh ni na yuem awh nahanelah ahni e a dei e lawkkatang teh ahni ni a panue. <sup>36</sup> Cakathoung ni, ahni e a hru teh khoe mahoe tie a kuep nahane doeh. <sup>37</sup> Cakathoung ni bout a dei e teh, amamouh ni a cawk awh e hah a hmu a han bout a ti.

### *Jisuh pakawpnae*

*Mat 27:57-61; Mrk 15:42-47; Luk 23:50-56.*

<sup>38</sup> Hahoi, Arimathea tami Joseph, Jisuh hnukkâbang van e Judahnaw a taki dawk a ru lah kaawm e ni Pailat bawi koe a cei teh Jisuh e ro la hanelah a hei. Pailat bawi ni kâ a poe teh ahni ni Jisuh e a ro teh a la. <sup>39</sup> Yampa karum Jisuh koe ka tho e Nikodemus ni Joseph hoi a cei roi teh murah hoi ka lawt tangcung e hmu tui a sin roi. <sup>40</sup> Ahnimouh roi ni Jisuh e a ro a kâkayawt roi teh Judahnaw e ro kuem e patetlah hmu tui naw hoi, hnica hoi a ro teh a kayo roi. <sup>41</sup> Thingpalam dawk a theinae teng vah takha ao. Hote hmuen koe api hai pakawp hoeh rae tangkom katha teh ao. <sup>42</sup> Atangtho teh Judahnaw Sabbath ya na hnin lah ao dawkvah a hninae koe kaawm e hote tangkom dawk Jisuh teh a pakawp awh.

## 20

### *Bouthawnae*

*Mat 28:1-8; Mrk 16:1-8; Luk 24:1-10*

<sup>1</sup> A yat e apasuek hnin amom khodai hoehnahlan vah, Meri Magdalin teh phuen koe a cei teh phuen tengnae talung a kamawng e hah a hmu. <sup>2</sup> Ahni ni Simon Piter hoi Jisuh ni a lungpataw e a hnukkâbang alouknaw koe a yawng teh, tangkom thung e Bawipa teh a la awh toe, na vaimoe a ta vaiyoe, ka panuek hoeh, ati pouh.

<sup>3</sup> Hatnavah, Piter hoi alouke a hnukkâbang e teh phuen koe lah a cei roi. <sup>4</sup> Ahnimouh roi teh a yawng roi eiteh, alouke a hnukkâbang e ni Piter hah a yawngtahrei teh phuen koe hmaloe a pha. <sup>5</sup> Ahni ni a khet navah, kayonae hni dueng a hmu teh athung kâen hoeh. <sup>6</sup> Simon Piter hai a pha van toteh tangkom thung a kâen teh ro kayonae a hmu. <sup>7</sup> A lû dawk yeng e hnica hai hni hoi rei awm laipalah ao e hah a hmu. <sup>8</sup> Hathnukkhuh phuen koe hmaloe ka phat e a hnukkâbang e hai a thung a kâen teh a yuem van. <sup>9</sup> Cakathoung ni, Bawipa ni duenae koehoi bout a thaw han tie hah thai panuek awh hoeh rah. <sup>10</sup> Hahoi, a hnukkâbang roi teh im lah a ban roi.

### *Meri koe Jisuh kamnuenae*

<sup>11</sup> Meri ni tangkom teng a kangdue teh a kâ. Ahni ni a kâ laihoi a tabut teh tangkom thung a khet navah, <sup>12</sup> Hni pangaw kâkhu e kalvantami kahni touh teh Jisuh ro payannae a lû koe lah buet touh, a khok koe lah buet touh a tahung e hah a hmu. <sup>13</sup> Ahnimouh roi ni, napui nang, bangkongmaw na ka telah a pacei. Ahni ni ka Bawipa teh yo a la awh toe, na maw a ta awh tie



ka panuek hoe, atipouh. <sup>14</sup> Hottelah a dei hoi, a hnuklah a kamlang teh, Jisuh a kangdue e a hmu ei teh Jisuh lah nout hoe. <sup>15</sup> Jisuh nihai, napui nang bangkongmaw na ka, apimaw na tawng, atipouh. Nang ni ahni hah na lat pawiteh na maw na hruek tie dei haw, ka la han telah takha ka ring e mue telah a pouk. <sup>16</sup> Jisuh ni, Meri telah a kaw nah Meri ni a kamlang teh, rabboni (rabboni tie teh ka Bawipa ati ngainae) atipouh. <sup>17</sup> Jisuh ni hai na tapam han ei, kai teh Pa koe ka luen hoe rah. Ka hmaunawngghanaw koe cet nateh, kaie a Pa lah kaawm e nangmae na Pa, kaie Cathut lah kaawm e nangmae Cathut koe ka luen hane hah dei pouh awh, atipouh.

<sup>18</sup> Magdalin kho e napui Meri ni a cei teh, Bawipa ka hmu toe telah a hnukkâbangnaw koe a dei pouh teh, ahni koe lawk a thui e naw hah a dei pouh.

### *A hnukkâbangnaw koe kamnuenae*

<sup>19</sup> Yat touh thung daw k apasueke hnin tangmin lah a hnukkâbangnaw teh Judahnaw a taki awh dawkvah takhang khik a khan awh. Hawvah Jisuh a tho teh, ahnimouh lungui vah a kangdue teh nangmouh koe rounmae awmseh, atipouh. <sup>20</sup> Hottelah a dei hnukkhu, a kut hoi ana hah ahnimouh a patue. A hnukkâbangnaw ni Bawipa a hmu awh navah a lunghawi awh. <sup>21</sup> Jisuh ni, nangmouh koe rounmae awmseh, Pa ni kai na patoun e patetlah nangmouh hai kai ni na patoun awh, bout atipouh. <sup>22</sup> Telah a dei hoi, ahnimouh koe pho a hmu teh, Kathoung Muitha coe awh. <sup>23</sup> Ayâ e yonnae na ngaithoum pawiteh ahni teh yon ngaithoum lah ao han. Ahnimae a yonnae na ngaithoum awh hoehpawiteh ngai thoum lah awm mahoe, atipouh.

### *Hmu hoe hoi yuemnae teh yawhawinae*

<sup>24</sup> Jisuh a tho navah a hnukkâbang hlaikahni thung daw k e buet touh, ca samphei tie Thomas teh awmhoeh. <sup>25</sup> A hnukkâbangnaw ni, kaimouh Bawipa ka hmu awh, atipouh. Hatnavah, Thomas ni a kut daw k e sum hetnae a hmâ ka hmawt hoe, ka tek hoehpawiteh, a thutnae a na koe e a hmâ ka tek hoehpawiteh nâtuék hai ka yuem mahoe atipouh.

<sup>26</sup> Yat touh o hnukkhu hoi apasueke hnin nah a hnukkâbangnaw hoi Thomas hai ao van. Takhang hai khik a ka khan awh, hatnavah Jisuh a tho teh ahnimanaw e alungui a kangdue, nangmouh koe lungmawngnae awmseh, atipouh. <sup>27</sup> Hahoi Thomas hanlah, na kut kâyp nateh tek haw, kaie ka kut hah khi haw, na kut dâw nateh kanâ hah tek haw, yuem laipalah awm hanh, yuem haw atipouh. <sup>28</sup> Thomas nihai, ka Bawipa hoi ka Cathut, atipouh. <sup>29</sup> Jisuh nihai, Thomas, nang ni kai na hmu daw k doeh na yuem, hmawt laipalah kayuemnae ni yawhawinae a hmu, atipouh.

<sup>30</sup> Hete Cakathoung daw k a thut hoe e, Jisuh ni a hnukkâbangnaw e hmaitung vah kângairunae moi a sak. <sup>31</sup> Hatei, Jisuh teh Messiah, Cathut Capa doeh tie na yuem awh thai nahan, na yuemnae lahoi a min daw k hringnae tawn thai nahan hetnaw heh ka thut.

## 21

### *Guncei sari touh koe Jisuh a kamnu*

<sup>1</sup> Hahoi vah Jisuh teh Tiberia talî pui teng vah a hnukkâbangnaw koe amahoima bout a kamnu. A kamnuenae teh hettelah doeh. <sup>2</sup> Simon Piter casamphei tie Thomas, Kanâ tami Nathanael, Zebedee e capa roi hoi alouke a hnukkâbang kahni touh teh cungtalah ao awh. <sup>3</sup> Simon Piter ni



ahnimouh koe tanga heng hanlah ka cei han, atipouh. Ahnimouh nihai, ka kâbang awh van han ati awh teh a cei awh. Long dawk a cei awh teh karum tuettuet a heng awh ei buet touh boehai man awh hoeh.

<sup>4</sup> Amom a pha navah Jisuh teh tui teng vah a kangdue. Hatei, a hnukkâbangnaw ni Jisuh hah nout awh hoeh. <sup>5</sup> Hahoi Jisuh ni ka canaw cakawi ao maw atipouh. Ahnimouh ni awm hoeh atipouh awh. <sup>6</sup> Hahoi Jisuh ni, lawng e aranglah tamlawk heng haw, na heng pawiteh na man awh han, atipouh. Hottelah a heng awh navah, tanga moi a kâman dawk tamlawk sawn thai awh hoeh. <sup>7</sup> Hatnavah Jisuh ni a lungpataw e a hnukkâbang e ni Piter koe, Bawipa doeh, atipouh. Bawipa doeh tie Piter ni a thai navah hni kâkhu laipalah angkidung a kho teh tui dawk a kum. <sup>8</sup> Alouke a hnukkâbangnaw teh tanga hoi tamlawk hah tuiteng lah a sawn awh teh lawng hoi a tho awh. Turai koehoi ek hlat hoeh lam 50 touh bang doeh ahla. <sup>9</sup> A kongteng lah a pha awh navah, hmaisaan dawk tanga pâeng tangcoung e hoi vaiyei hai a hmu awh. <sup>10</sup> Hahoi Jisuh ni, tanga na man awh e youn touh hi sin awh, atipouh. <sup>11</sup> Simon Piter ni lawng dawk a luen teh tam lawk hah a kongteng lah a sawn navah, tanga kalen 153 touh a kâman. Telah tanga moi apap eiteh tamlawk ti ca hai vek hoeh. <sup>12</sup> Jisuh ni ahnimouh hanlah, tho awh amom bu cat awh, atipouh. A hnukkâbangnaw ni Jisuh tie a panue awh dawkvah, apinihai nang apimaw, telah pacei ngam awh hoeh. <sup>13</sup> Jisuh a tho teh, vaiyei hoi tanga a la teh ahnimouh a poe. <sup>14</sup> Hetteh Jisuh ni duenae koehoi bout a thaw hnukkhu a hnukkâbangnaw koe apâthum nah a kamnuenae doeh.

#### *Piter vai thum touh lawk paceinae*

<sup>15</sup> Amom bu a ca awh hoi, Jisuh ni Simon Piter koe, Jawhan capa Simon, ahnimanaw hlak kai lungpataw ou, telah a pacei. Oe, Bawipa, kai ni lung na pataw e, nama ni na panue doeh atipouh. Jisuh ni, ka tucanaw kahawicalah paca atipouh. <sup>16</sup> Jisuh ni, Jawhan capa Simon, kai na lungpataw ou, telah apâhni bout a pacei teh, Oe, Bawipa, kai ni lung na pataw e na panue atipouh. Jisuh ni ka tunaw kahawicalah khoun atipouh. <sup>17</sup> Jisuh ni Jawhan capa Simon, kai na lungpataw ou, telah apâthum lah bout a pacei dawkvah Piter teh a lungmathoe teh, Bawipa nang ni bangpueng koun na panue, kai ni na lungpataw e hai na panue, atipouh. Ka tunaw hah paca atipouh. <sup>18</sup> Atangcalah ka dei, na thoundoun nah namahoima taisawm na kâyeng teh na ngainae koe na cei. Nang ni na matawng toreï teh na kut roi na dâw vaiteh, ayâ ni na pakhit vaiteh, na ngaihoeh e hmuen koe na hrawi awh han, atipouh. <sup>19</sup> Hottelah a deinae teh, Piter ni bangtelae duenae lahoi maw a due vaiteh, Cathut bawilennae a kamnue sak han tie hah sut a panue saknae doeh. Hottelah a dei hnukkhu, ka hnuk kâbang, telah Piter hanlah bout atipouh.

<sup>20</sup> Tangmin bu a ven awh navah, Jisuh ni a lungpataw e ni a lungtabue dawk a kamngawi teh, Bawipa apini maw nang na pahnawt han telah ka pacei e a hnukkâbang e hai hnuklah a kâbang e hah Piter ni a hmu. <sup>21</sup> Piter ni Bawipa ahni teh bangtelamaw ao han telah a pacei. <sup>22</sup> Jisuh ni, kai ka tho hnin totouh ahni o sak hanlah ka ngainae awm pawiteh, nang ni bangmaw na ti thai. Nang teh ka hnukkâbang loe, atipouh.

<sup>23</sup> Hottelah a dei e hah hmaunawngghanaw koe hote a hnukkâbang dout mahoehtelah a kamthang. Jisuh ni ahni teh dout mahoehtati e na hoeh. Kai ka tho hnin ditouh ahni o sak hane ka ngai pawiteh nang ni bangmaw na ti thai, ati e doeh.



*Lawk pâpout nae*

<sup>24</sup> Hete kongnaw kathutkung teh, a hnukkâbang e tami doeh. Ahni e kampangkhainae hai a tang doeh.

<sup>25</sup> Jisuh ni a sak e hno alouknaw moi ao rah. Hotnaw pueng koung thun pawiteh talaivan ni hai cawng mahoeh, telah ka pouk.



## GUNCEI (The Acts of the Apostles)

### *Lawk karouknae*

<sup>1</sup> Theophilus, ka lungpataw e, Jisuh ni a thaw tawknae hoi a cangkhai e naw pueng a kamtawngnae koehoi a rawi e gunceinaw Kathoung Muitha lahoi kâpoelawknaw a poe hnukkhu, <sup>2</sup> Lathueng lah tawm lah ao hnin totouh e akong pueng hah ka thut. <sup>3</sup> A due hnukkhu hoi ama teh kahring e lah ka o tie hah hote gunceinaw koe avai moikapap a kamnue pouh teh, hnin 40 touh thung ahnimouh koe a kamnue pouh. Cathut uknaeram kong hah a pâpho.

### *Kathoung Muitha patounnae*

<sup>4</sup> Hathnukkhu hoi cungtalaw a kamkhueng awh navah Jisuh ni, Jerusalem kho dawkh hoi tâcawt laipalah apa koe e lawkkam ring awh. <sup>5</sup> Lawkkam poe e teh, Jawhan ni tui dawkh Baptisma na poe awh, hatei nâsittouh o hoehnahlan Kathoung Muitha dawkh Baptisma na hmu awh han telah atipouh. <sup>6</sup> Jisuh hoi cungtalaw kamkhueng awhnae koe vah gunceinaw ni, Bawipa a tu maw Isarel miphunnaw hah, uknaeram bout na poe han toung telah a pacei awh. <sup>7</sup> Jisuh ni Pa e kâtaunnaw hninthanaw hoi a tuengnaw hah nangmouh ni panue han ngai hoeh. <sup>8</sup> Hateiteh, nangmae lathueng vah Kathoung Muitha a tho toteh nangmouh teh bahu hoi na kawih awh vaiteh Jerusalem hoi na kamtawng awh vaiteh Judah ram, Samaria ram, talai a pout ditouh kai kapanuekkhaikung lah na o a han atipouh.

### *Kalvan lah tawm lah a o*

<sup>9</sup> Hote lawk a dei hnukkhu hoi ahnimae a mithmu vah Bawipa teh kahlun tawm lah a o, tâmai ni a kayo teh ahnimouh ni hmawt awh hoeh toe.

<sup>10</sup> Hottelah, gunceinaw ni Bawipa kalvan a luen e a khet awh lahun nah ahnimae a teng hnipangaw kâkhu e tami kahni touh a kangdue. <sup>11</sup> Ahnimouh roi ni, Galilee taminaw kalvan lah na khet awh teh bangkongmaw sut na kangdue awh vaw. Nangmouh koehoi kalvan lah tawm e Jisuh hah kalvan lah a luen e na hmu awh e patetlah let bout a kum e na hmu awh han, atipouh.

### *Cungtalaw a ratoum awh*

<sup>12</sup> Hathnukkhu hoi ahnimouh teh Olive Mon hoi Jerusalem lah a ban awh. Hote mon teh Jerusalem hoi sabbath hnin hnin touh lamcei ahla. <sup>13</sup> Ahnimouh teh khotung a kâen awh teh a luennae imvan a luen awh. Ahnimanaw teh; Piter, Jawhan, Jem, Andru, Filip, Thomas, Bartholomew, Mathai, Alfe capa Jem, miphun kampangkhai Simon hoi Jem capa Judah tinaw doeh. <sup>14</sup> Ahnimouh ni, Jisuh e a manu Meri, napuinaw hoi a nawngnanaw hoi cungtalaw lungkânging lahoi thouk a ratoum awh.

### *Matthias rawinae*

<sup>15</sup> Hatnavah tami 120 touh e hmaunawngnanaw teh cungtalaw a kamkhueng awh navah, Piter ni a kangdue teh, <sup>16</sup> Hmaunawngnanaw Jisuh man hanelah lam kapâtuekung Judah Isakarot e kong hoi Kathoung Muitha ni Devit koe sut a dei e lawk Cakathoung dawkh a thut e patetlah



kuep laipalah awm mahoe h. <sup>17</sup> Judah teh maimouh hoi cungtalah rawi e lah ao teh hete thaw daw k na kambawngkhai van. <sup>18</sup> Ahni teh kathounghoehe kutphu hoi lawhmuen buet touh a ran ei hawvah bungling lah a boteh a von a tangpo daw k a ruennaw hai koun g a tâco. <sup>19</sup> Hete hah Jerusalem kaawm e naw pueng ni a panue aw h teh hote talai hah Akeldama telah a phung aw h. A deingainae teh thi talai tinae doeh. <sup>20</sup> Sam cauk daw kvah aonae hmuen teh tami kingdi lah awm naseh, im thung pihai awm hanh naseh. Ahnie thaw a ya ni lawm naseh telah a kâthut.

<sup>21</sup> Jawhan ni Baptisma a poenae koehoi, kamtawng teh, <sup>22</sup> Bawipa jisuh maimouh hoi kamphei teh kahlun lah tawm e hnin totouh a hnukkâbangnaw hoi rei ceionae pueng daw k, maimouh koe kambawng e tami buet buet touh ni Bawipa thawnae kong a pâpho teh kaimouh hoi cungtalah kapanuekkhaikung lah ao han telah Piter ni a pâpho.

<sup>23</sup> Hatnavah Barsabbas telah a kaw aw h teh Justus telah a awitawm aw h e Joseph hoi Matthias a rawi aw h. <sup>24</sup> Hahoi a ratoum aw h teh, Bawipa nang ni tami lungthin koun g na panue. <sup>25</sup> Taminaw pueng e lungthin ka panuek e Cathut, Judah teh ama onae hmuen koe cei hanelah kacangkhaikung thaw, guncei thaw daw k hoi a kâtakhoe teh ahnie yueng lah bout ka taw k hane tami kahni touh thung daw kvah na rawi tangcoung e tami na patue haw telah a ratoum aw h. <sup>26</sup> Hahoi ahnimouh roi hanlah cungpam a rayu sak aw h teh Matthias ni a hmu daw kvah ahni teh guncei hlaibun touh hoi mek touksin lah ao toe.

## 2

### *Pentikos hnin*

<sup>1</sup> Pentikos hnin a pha toteh ahnimanaw teh hmuen buet touh koe king a kamkhueng aw h. <sup>2</sup> Hatnavah kahli katangpounge pawlawk patetlah kalvan lahoi yah hmatara a tho teh ahnimouh onae im daw k muen akawi pouh. <sup>3</sup> Hahoi teh, hmai patetlah e lainaw kampek e a kamnuet teh ahnimouh rip koe ao. <sup>4</sup> Hahoi teh ahnimouh abuemlah ni Kathoung Muitha hoi akawi aw h teh, Muitha ni dei thainae kâ a poe e patetlah alouklouk e lawk lahoi a dei aw h.

<sup>5</sup> Hatnae tueng nah kalvan rahim e ram tangkuem hoi ka tho ni teh Cathut ka bari e Judah miphunnaw teh Jerusalem kho a roe aw h. <sup>6</sup> Hote pawlawk a thai aw h torei teh tami moi a kamkhueng aw h teh gunceinaw ni a dei aw h e lawk a thai aw h navah a kângairu aw h. <sup>7</sup> Ahnimanaw ni a kângairu aw h teh atu hete taminaw pueng heh Galilee taminaw nahoe h maw. <sup>8</sup> Hottelah pawiteh maimouh ni mama lawk lahoi lengkaleng thai e heh bangtelane. <sup>9</sup> Maimanaw teh Parthian ram, Medes hoi Elam ram, Mesopotamia ram, Judea ram, Kappadosia, Pontus ram, Asia ram, <sup>10</sup> Frigia ram, Pamfilia ram, Izip ram hoi Lubim ram, Rom kho hoi ka tho e imyinnaw, Sairen hoi e naw nahoe h maw. <sup>11</sup> Maimouh Judah koe kahmawng e Jentel thoseh, hahoi a tangawn teh Krete tuilum hoi Arabia ram hoi ka tho e lah ao aw h. Hateiteh Cathut ni kângairu hnouaw a sak e a dei aw h e hah amanae lawk lahoi lengkaleng a thai aw h telah a kâpankhai aw h. <sup>12</sup> Taminaw pueng ni kângairu lungkâoun aw h teh, hete hno bangtelamaw telah buet touh hoi buet touh a kâ pacei aw h. <sup>13</sup> Tami tangawn ni teh a dudam aw h teh, hetnaw heh misurtui a parui aw h atipouh aw h.

*Piter ni kamthang lawk a pâpho*



<sup>14</sup> Hatnavah Piter ni guncei hlaibun touh hoi rei a kangdue teh kacaipounglah a dei e teh, Judah miphunnaw hoi Jerusalem kho na kaawm e naw hete hnonaw na panue sak hanelah ka ngai. Ka lawk kahawicalah na thai pouh awh. <sup>15</sup> Atu e tueng heh amom Suimilam tako doeh. Hetnaw teh na pouk awh e patetlah parui awh hoeh. <sup>16</sup> Het hateh profet Joel ni a dei tangcoung e doeh toe. <sup>17</sup> A dei e lawk teh, Cathut ni a poe e lawk hah hmalah toreì teh tami pueng e a lathueng vah ka Muitha ka awi han. Hat toreì teh, nangmae na canu capanaw ni profet lawk lahoi a dei awh han. Nangmouh thung dawkvah thoundoun tanglanaw ni kamnue nae a hmu awh han. Matawngnaw ni mang a sak awh han. <sup>18</sup> Hote hninnaw dawkvah Ka sannu sanpanaw koe ka Muitha ka awi vaiteh profet lawk lahoi a dei awh han. <sup>19</sup> Kalvan lah kângairu hnonaw hoi talai van hai thi, hmai hoi hmaikhu tie mitnoutnaw na patue han. <sup>20</sup> Cathut e kalenpounge hninpuì a pha hoehnahlan vah kanì a hmo vaiteh thapa thi patetlah kaawm han. <sup>21</sup> Hatnavah Cathut min ka kaw pueng ni rungngang lah ao han telah a ti.

<sup>22</sup> Isarelnaw ka lawk thai awh haw na panue awh e patetlah Nazareth tami Jisuh ni kângairuhnonaw, kângairunaenaw, hoi mitnoutnaw a sak toe. Hete hno sak e naw lahoi Cathut ni Jisuh teh a kampangkhai toe. <sup>23</sup> Cathut ni Jisuh teh nangmouh hanlah a hmoun tangcoung e hoi a panue tangcoung e patetlah, kâlawklaipa taminaw kut dawkh hoi thingpalam dawkh a pathout awh teh a thei awh. <sup>24</sup> Hat nakunghai Cathut ni ahni teh due reithainae thung hoi a thaw sak teh a hlout sak. <sup>25</sup> Devit ni hote Bawipa hoi kâkuen lah a dei e teh, kai teh a yungyoe kahring e Cathut doeh kahma lah pou ka hmu. Bangkongtetpawiteh, Bawipa teh kaie aranglah ao dawkvah kai teh takinae ka tawn hoeh. <sup>26</sup> Hatdawkvah, ka lung a konawm teh ka lai hai a lunghawi. Hothloilah ka takthai ni hai ngaihawinae tawn laihoi a due han. <sup>27</sup> Bangkongtetpawiteh Bawipa ni ka muitha hah phuen dawkh na cettakhai mahoe. Bawipa e a Tami Kathoung teh pawk sak mahoe. <sup>28</sup> Bawipa ni hringnae lam na panue sak teh na hmalah lunghawinae hoi na kawi sak han telah a dei.

<sup>29</sup> Hmaunawngghanaw mintoe Devit teh a due hoi pakawp lah ao teh tangkom hai sahnin ditouh ao rah. <sup>30</sup> Ahni teh profet buet touh lah ao dawkh a catounnaw thung dawkh buet touh teh amae bawitungkhung dawkh tahung sak lah ao han telah Cathut ni a kam pouh e hah kancangalah a panue. <sup>31</sup> Devit ni kanceng lah a panue dawkvah Khrih e boutthawnae kong hah hettelah a dei. Bawipa teh phuen dawkh cettakhai mahoe. A tak hai pawknae hoi kâhmo sak mahoe a ti. <sup>32</sup> Cathut ni hote Jisuh hah a thaw sak toe. Maimanaw hai kapanuekkung lah o awh. <sup>33</sup> Hottelah Jisuh teh Cathut e aranglah tahungnae poe lah ao hnukkhu, lawkkam lah kaawm e Kathoung Muitha hah Pa koehoi poe lah ao. Nangmouh ni na thai teh na panue awh e patetlah hote Muitha hah na rabawkh sin toe. <sup>34</sup> Devit teh kalvannaw koe luen hoeh rah, hatei, ahni ni hettelah a dei, Bawipa ni ka Bawipa koe, <sup>35</sup> Na tarannaw na khok toungnae lah ka hruek hoehroukrak kaie aranglah tahung haw atipouh. <sup>36</sup> Hatdawkvah, thingpalam dawkh pathout awh e Jisuh hah Cathut ni Bawipa hoi, Khrih lah a khoe toe tie hah Isarelnaw pueng ni kancangalah panuek awh naseh telah a ti.

### *Khrih lahoi coe e yon ngaithoumnae*

<sup>37</sup> Taminaw ni hote lawk hah a thai awh navah, a lungpuen awh teh Piter hoi alouke gunceinaw hanlah hmaunawngghanaw bangtelamaw



ti awh han toungeh telah a pacei awh. <sup>38</sup> Piter ni nangmae na yonnae ngaithoum lah ao nahanlah pankângai awh nateh Jisuh Khrih min dawkbaptisma rip coe awh. Hattoteh Kathoung Muitha poehno na coe awh han. <sup>39</sup> Bangkongtetpawiteh, hete lawkkamnae teh nangmouh hoi, nangmae na catounnaw hane hoi, ahlnae koe kaawm e Cathut ni a kaw e naw pueng hane doeh a ti.

<sup>40</sup> Piter ni alouklouk e lawk lahoi a pâpho teh hete tamikathoutnaw thung hoi hlout nahanlah kârunngang awh haw telah ahnimanaw hah a hroecoe. <sup>41</sup> Hattoteh Piter e lawk ka dâw e naw ni baptisma a coe awh teh, hat hnin vah tami thong thum tabang a kâthap awh. <sup>42</sup> Ahnimouh teh gunceinaw e cangkhae, vaiyei kâraennae, kâhuikona hoi ratoumnae pou a tawn awh.

### *Hnopai cungtalah a hmawng awh*

<sup>43</sup> Tami pueng ni a taki awh teh, gunceinaw teh kângairu hnouaw hoi mitnout hnouaw moi a sak awh. <sup>44</sup> Ka yuem e pueng teh cungtalah a kamkhueng awh teh, a tawn awh e pueng hai reirei a hmawng awh. <sup>45</sup> A tawn awh e hnopai pueng hai a yo awh teh, a pankinae patetlah a kârei awh. <sup>46</sup> Ahnimouh teh hnintangkuem Bawkim vah a kamkhueng awh teh, im touh hnukkhu im touh vaiyei a raen awh teh, lungthoung lunghaw nalaioi rawca a canei awh. <sup>47</sup> Cathut a pholen awh teh taminaw e hmalah minhmai kahawi a hmu awh. Hnintangkuem runngang lah kaawm e taminaw hah Bawipa ni kawhmoun thung a thap sin.

## 3

### *Khokkhem e a dam sak*

<sup>1</sup> Vai touh teh, tangmin lah suimilam kathum nah e ratoumnae tue nah Piter hoi Jawhan teh Bawkim lah a cei roi. <sup>2</sup> A manu von thung hoi kamkhuen e buet touh a hrawm awh teh a thokhai awh. Bawkim kacetnaw ni poe e a coe thai nahan kahawipoung e takhang koe ahni teh ouk ao sak awh. <sup>3</sup> Piter hoi Jawhan tinaw Bawkim koe lah a tho e a hmu nah na poe haw titeh a hei. <sup>4</sup> Hatnavah Piter hoi Jawhan ni ahni hah kheikhei a khet teh kaimouh na khenhaw! atipouh. <sup>5</sup> Ahni ni buetbuet touh ka hmu han telah a pouk teh a ngaihaw nalaioi a khet. <sup>6</sup> Piter ni sui ngun ka tawn hoe, ka tawn e hno na poe han, Nazareth tami Jisuh Khrih min lahoi thaw nateh cet atipouh. <sup>7</sup> Aranglae a kut daw koe hoi a pathaw tahmaca vah khok roi hoi a khoksaluemnaw a thao. <sup>8</sup> A thaw teh lam a cei. Lamtu laihoi Cathut a pholen teh gunceinaw hoi bawkim thung a kâen. <sup>9</sup> Hottelah lamcei laihoi Cathut a pholen e hah taminaw ni a hmu navah, <sup>10</sup> hote tami teh Bawkim meihawi longkha koe kut ka dâw e tami doeh tie a panue awh dawkvah, ahni koe ka kamnuek e hnouaw daw puenghoi a kângairu awh.

### *Solomon rim koe a pâphona*

<sup>11</sup> Hote tami ni Piter hoi Jawhan tinaw pou a kuet lahun nah, tami pueng a kângairu awh teh, Solomon e vaikhap koe lah a yawng awh teh a kamkhueng awh. <sup>12</sup> Piter ni a hmu nah, Isarel taminaw bangkong hete hno daw koe kângairu a vaw. Hete tami a cei thainae heh kaimouh ni kamamae bahu hoi kamamae hawinae lahoi ka poe thai e patetlah bangkongmaw kaimouh kheikhei na khet a vaw. <sup>13</sup> Abraham, Isak, Jakop, ahnima Cathut, maimae mintoenaw e Cathut ni a Capa e a Bawilennae



a kamnue sak toe. Hote Bawipa teh nangmouh ni Pailat siangpahrang e kut dawk na poe awh teh ahni ni hlout sak han pouknae a tawn eiteh nangmouh ni hote Bawipa hah na pahnavt awh. <sup>14</sup> Kathoung kalan e Bawipa hah na pahnavt awh teh namamouh hanelah tami ka thet e hah hlout sak hanelah na hei awh. <sup>15</sup> Hringnae na kapoethaikung Bawipa teh na thei awh toe. Hatei Cathut ni ahni hah duenae koehoi bout a thaw sak toe. Kaimouh teh hete konglamnaw kapanuekkhaikung lah ka o awh. <sup>16</sup> Hote ahni e min yuennae lahoi hote ahni e min teh nangmouh ni na hmu awh e hete tami hah a tha ao sak toe. Hote Bawipa kecu dawk coe e yuennae ni nangmae mithmu vah hete tami hah kuepcingnae a poe toe.

<sup>17</sup> Hmaunawngghanaw nangmouh koehoi kamtawng teh khobawinaw panuek laipalah hottelah na sak awh tie hah kai ni ka panue. <sup>18</sup> Khrih teh a rucat patang a khang han tie hah Cathut e profetnaw ni a dei tangcoung e patetlah a kuep sak toe. <sup>19</sup> Hatdawkvah na yonnae ngaithoum lah ao nahan pankângai awh nateh na lungkâthung awh. <sup>20</sup> Het hateh Cathut koehoi lungpahawinae tueng a pha vaiteh, nangmouh hanlah rawi tangcoung e Khrih tie a patoun nahane doeh. <sup>21</sup> Cathut ni talai kamtawng hoi kathoung profetnaw koehoi a la dei awh e patetlah bangpueng a katha lah sak kathanae tueng a pha hoehroukrak kalvan vah Bawipa teh ao han. <sup>22</sup> Mosi ni hai nangmae BAWIPA hah nangmae hmaunawnggha thung dawk hoi kai hoi kâvan e profet buet touh hah nangmouh hanelah a tho sak han. Ahni ni a dei e naw pueng nangmouh ni na tarawi awh han. <sup>23</sup> Hote profet e lawk hah ka tarawi hoeh e pueng miphun dawk hoi takhoe vaiteh raphoe lah ao han.

<sup>24</sup> Samuel koehoi kamtawng teh a hnukkhu lah ka tho e profetnaw pueng ni hai hete hninth a kong hah a pathang awh. <sup>25</sup> Nangmouh teh profetnaw e catoun lah na o awh. Cathut ni Abraham koe nange catoun dawk hoi talai van e miphun pueng ni yawhawinae a coe awh han telah a pâpho. Nangmouh teh lawkkam e catoun lahai na o awh. <sup>26</sup> Cathut ni nangmouh buet touh rip e hawihoehnae a raphoe vaiteh nangmouh yawhawi na poe nahanlah amae Capa Jisuh hah a thaw sak hnukkhu nangmouh koe hmaloe a patoun telah taminaw koe Piter ni a dei.

## 4

### *Piter hoi Jawhan a man awh*

<sup>1</sup> Piter hoi Jawhan tinaw ni tami moikapap koe lawk a dei awh navah, vaihmanaw, bawkim kaukkung hoi sadusinaw teh ahnimouh koe a tho awh. <sup>2</sup> Guncceinaw ni duenae koehoi Jisuh boutthawnae kong hah tami pueng koe a dei awh dawkvah, ahnimouh teh a lungphuen awh. <sup>3</sup> Hatdawkvah, Piter hoi Jawhan a man awh teh, khohmo toung dawkvah, thongim thung rum touh a paung awh. <sup>4</sup> Hateiteh, Cathut lawkkatang ka thai ni teh ka yuem e tami tongpa dueng 5,000 touh a pha awh.

### *Kacuenaw hoi a kâhmonae*

<sup>5</sup> Atangtho vah khobawinaw, kacuenaw, cakathutkungnaw teh Jerusalem vah a kamkhueng awh. <sup>6</sup> Vaihma kacue Annas, Kaiaphas, Jawhan, Alexander hoi vaihma kacuenaw pueng hai a kamkhueng awh. <sup>7</sup> Ahnimouh ni Piter hoi Jawhan teh tamimaya hmalah a kangdue sak awh teh api kâ lahoi maw, api min lahoi maw hete hno heh na sak awh vaw telah a pacei awh.



<sup>8</sup> Hatnavah Piter teh Kathoung Muitha hoi akawi teh khobawinaw hoi kacuenaw, <sup>9</sup> sahnin vah kaimouh ni a tha kayoun e tami buet touh kabawp awh e hah lawk na ceng awh dawkvah, <sup>10</sup> nangmouh abuemlahoi Isarelnaw abuemlah panue sak hanlah ka ngai e teh, thingpalam dawh na pathout awh ei, duenae koehoi Cathut ni a thaw sak e Nazareth tami Jisuh Khrih min lahoi hete tami ni a dam teh nangmae hmalah a kangdue e doeh. <sup>11</sup> Hote Bawipa teh im kasakkungnaw ni na pahnawt awh e talung, patopatang poung e takinlung lah ao.

<sup>12</sup> Hote Bawipa min hloilah kalvan rahim taminaw koevah ka rungngang thai e rungngangnae min alouke awmhoeh telah Piter ni a pâpho.

### *Jisuh min dei hoeh hanelah a cakâ awh*

<sup>13</sup> Lawkcengkungnaw ni Piter hoi Jawhan e taran ahawi roinae hah a hmu awh navah, a kângairu awh. Hatnavah, ahnimouh roi teh jisuh hoi reirei kaawm e tie hah a panue awh. <sup>14</sup> Hahoi, ahnimouh koe damnae kahmawt e tami hai ahnimouh koe a kangdue e a hmu awh navah banghai oun hane tawn hoeh. <sup>15</sup> Hatnavah, ahnimouh ni gunceinaw sanhedrin lawkcengnae imthung hoi a tâco hanelah kâ a poe awh teh bangtelamaw ti awh han telah amamouh dueng a kâpan awh. <sup>16</sup> Ahnimanaw heh bangtelamaw ti awh han. Bangkongtetpawiteh ahnimouh koehoi kângairuhno kamnuek e teh Jerusalem kho kaawm e tami pueng ni a panue awh toung dawkvah maimouh ni oun thai awh hoeh toe. <sup>17</sup> Hete kamthang teh tami pueng koe a kampai hoeh nahanlah Jisuh e min kâuep laihoi hmalah apipatet koehai bout a dei hoeh nahanlah pakhi awh sei ati awh.

<sup>18</sup> Hathnukkuh gunceinaw hah a kaw awh teh, Jisuh min lahoi khoeroe pâpho awh hanh, cangkhai awh hanh telah a cakâ awh. <sup>19</sup> Piter hoi Jawhan ni, Cathut e lawk hlak nangmae lawk ka tarawi awh pawiteh, Cathut hmalah a kamcu hoi a kamcu hoeh e hah pouk awh haw. <sup>20</sup> Kaimouh teh ka thai awh, ka hmu awh e hah pâpho laipalah kaawm thai awh hoeh ' atipouh awh.

<sup>21</sup> Hote kamthang dawkvah tami pueng ni Cathut a pholen awh teh, gunceinaw hah bangtelah hoi ne runae poe han tie a lamthung a hmu awh hoeh dawkvah, ahnimouh ni gunceinaw hah bout a pakhi awh teh bout a tha awh. <sup>22</sup> Hete kângairuhno lahoi ahmaloe e patetlah ka dam e tami teh a kum 40 hlai a pha toe.

### *Taran hawi nahanelah ratoumnae*

<sup>23</sup> Gunceinaw teh bout a tha awh navah amamae a huinaw koe bout a ban awh navah vaihma bawinaw hoi kacuenaw ni a dei pouh e hah a dei awh. <sup>24</sup> Ahnimouh ni be a thai awh hnukkhu, Cathut koe lungkânging lahoi a ratoum awh e teh, Bawipa nang teh kalvan hoi talai rahak e hnopueng hoi tuipui thung e hnopueng hai na sak, telah ati awh. <sup>25</sup> Bawipa ni Kathoung Muitha lahoi kaimae mintoe lah kaawm ni teh na patoun e Devit koehoi bangkongmaw khoramnaw kâpo awh hoeh, taminaw hai bangkongmaw ayawmyin lae hnonaw sak hanelah a kâcai awh. <sup>26</sup> Talai e siangpahrangnaw pueng a kamkhueng awh teh, BAWIPA hoi Bawipa Jisuh hah tuk han telah ati awh.

<sup>27</sup> Herod hoi Pontius Pailat bawi teh Isarelnaw hoi Jentelnaw a hroecoe teh, Bawipa nang ni satui na awi tangcoung e, Capa Jisuh hah a taran awh teh hete kho dawh a kamkhueng awh toe. <sup>28</sup> Na pouk tangcoung e lahoi ka tho hane kawinaw hah a kuep sak awh toe. <sup>29</sup> Bawipa atuvah ahnimouh



ni pakhinae daw k hoi taran kahawicalah law k ka pâpho thai nahanlah lungtangnae na poe awh haw. <sup>30</sup> Patawnae pueng a roum nahanlah Bawipa na kut dâw haw. Kathounge na San Jisuh min lahoi kângairu mitnoutnaw sak thai nahanlah na poe haw telah a ratoum awh.

<sup>31</sup> Hottelah be a ratoum awh hnukkhu a kamkhuengnae hmuen a kahuet teh ahnimanaw pueng teh, Kathoung Muitha hoi akawi awh dawkvah Cathut e law k hah lungtang laihoi a pâpho awh.

### *Hnopai rei hmawngnae*

<sup>32</sup> Kayuemnaw e kamkhuengnae teh lung suetalah ao dawkvah apipatet ni hai mae hnonaw heh, kama e hno doeh tet awh laipalah, kaawm e hno pueng teh cungtalah hno hanlah a hmoun awh. <sup>33</sup> Gunceinaw ni Bawipa e bouthawnae kong hah kalenpounge bahu hoi a kampangkhai awh dawkvah, kalenpounge lungmanae teh ahnima lathueng vah a pha. <sup>34</sup> Ahnimouh thungvah ka roedeng e tami buet touh hai awm hoe h. Bangkongtetpawiteh laikaw k, im a tawn awh e pueng hah a yo awh teh, a hmu awh e tangkanaw pueng a sin awh teh, <sup>35</sup> Gunceinaw e khok koe vah a tâ awh teh lengkaleng a panki e patetlah a rei awh.

<sup>36</sup> Lungpahawinae capa tinae lah kaawm e, gunceinaw ni Barnabas telah a kaw awh e, Saipras tuilum tami, Levi h catoun, Joseph teh, <sup>37</sup> a tawn e laikaw k a yo e phu, tangka hah a sin teh gunceinaw e khok koe a ta.

## 5

### *Kathoung Muitha dumnae*

<sup>1</sup> Hatei Ananias tie tami hoi a yu Sapphira ni a tawn roi e hnopai a yo roi. <sup>2</sup> A yu hoi lung a kânging roi teh aphu tangawn e a la roi, a tangawn dueng hah gunceinaw e khok koe vah a thokhai roi. <sup>3</sup> Hatnavah, Piter ni Ananias bangkongmaw nang ni Setan hah na lungthin daw k uk hanlah hmuen na poe teh Kathoung Muitha hah na dumyen teh talai phu a tangawn na kapek. <sup>4</sup> Na talai teh na yo hoe h na hai nama e nahoe h maw, na yo hnukkhu hoi hai aphu teh nama e kâ lah awm hoe h na maw. Bangkongmaw hottelah sak hane lungthin thung na kâcai, tami koe laithout laipalah Cathut koe na laithoe atipouh.

<sup>5</sup> Hote law k Ananias ni a thai nah a rawp teh a due, hote kong ka thai pueng ni puenghoi a taki awh. <sup>6</sup> Hahoi nawsainaw a kâen awh teh a ro hah hni hoi a kayo hnukkhu a kâkayaw t awh teh a pakawp awh.

<sup>7</sup> Suimilam kathum touh ao hnukkhu a yu ni bang hno maw ka tâcaw t tie panuek laipalah a kâen. <sup>8</sup> Hatnavah Piter ni ahni koe nangmouh roi ni talai nâ yit touh maw na yo ka tang tie a pacei nah, ahni ni oe het yit touh doeh ka yo telah a ti. <sup>9</sup> Piter ni hai nangmouh roi ni bangkong lungkânging laihoi Cathut e Muitha hah na tanouk roi. Khenhaw! na vâ ro kapakawmnaw teh takhang koe a pha toe. Ahnimanaw ni nang hai na hrawm awh han atipouh.

<sup>10</sup> Hatnavah vai touh lahoi Piter e khok koe a rawp teh a due. Nawsainaw a kâen teh a ro a hrawm awh teh a vâ teng a pakawp awh. <sup>11</sup> Kawhmoun abuemlahoi hote law k kathainaw pueng ni puenghoi a taki awh teh a pâyaw awh.

### *Gunceinaw ni sak e kângairu hnonaw*

<sup>12</sup> Gunceinaw ni taminaw e hmalah mitnoutnaw hoi kângairuna e sak awh. Ahnimouh abuemlah Solomon e vaikhap daw k lungkânging lahoi



ouk kamkhueng aw. <sup>13</sup> Alouke taminaw ni ahnimouh teh a oughlawp a eiteh ahnimouh koe bawh hanelah ngam aw. <sup>14</sup> Cathut ka yuem e napui, tongpanaw teh ahnimouh koe a kâthap aw. <sup>15</sup> Taminaw ni ka dam hoe e taminaw a hrawm aw. <sup>16</sup> Jerusaleu tenggam e khopuinaw koe hoi tami moikapap naw ni ka dam hoe e naw hoi kakhine muithanaw ni a man e naw hah a hrawi aw, ahnimanaw pueng ni damnae a hmu aw.

### *Thongim bonae hoi bout hloutnae*

<sup>17</sup> Hatnavah vaihma kacue hoi ahnimouh koe kaawm e Sadusinaw pueng a thaw aw. <sup>18</sup> Gunceinaw hah a man aw. <sup>19</sup> Hateiteh tangmin vah Bawipa e kalvantami ni thongim takhangnaw a paawng pouh teh gunceinaw hah a tâco sak hnukkhu, <sup>20</sup> cet aw. <sup>21</sup> Hatnavah vaihma kacue hoi ahnimouh koe kaawm e naw teh a tho aw. <sup>22</sup> Hahoi thongim a pha aw. <sup>23</sup> Hatnavah vaihma kacue hoi ahnimouh koe kaawm e naw teh a tho aw. <sup>24</sup> Hatnavah vaihma kacue hoi ahnimouh koe kaawm e naw teh a tho aw. <sup>25</sup> Hatnavah vaihma kacue hoi ahnimouh koe kaawm e naw teh a tho aw. <sup>26</sup> Hatnavah vaihma kacue hoi ahnimouh koe kaawm e naw teh a tho aw. <sup>27</sup> Hahoi gunceinaw teh a hrawi aw. <sup>28</sup> Hahoi gunceinaw teh a hrawi aw. <sup>29</sup> Hahoi gunceinaw teh a hrawi aw. <sup>30</sup> Hahoi gunceinaw teh a hrawi aw. <sup>31</sup> Hahoi gunceinaw teh a hrawi aw. <sup>32</sup> Hahoi gunceinaw teh a hrawi aw. <sup>33</sup> Hahoi gunceinaw teh a hrawi aw. <sup>34</sup> Hahoi gunceinaw teh a hrawi aw.

### *Gunceinaw lawk a khei aw*

<sup>28</sup> Hatei nangmouh ni Jerusaleu khopui daw na cangkhae na kâkahei teh ahnie thi teh kaimae lathueng vah a pha hanelah na noe aw. <sup>29</sup> Hahoi Piter hoi guncei alouknaw ni taminaw e lawk ngai hlak Cathut lawk ngai hanlah ao atipouh. <sup>30</sup> Nangmouh ni thingpalam daw na pathout aw. <sup>31</sup> Cathut ni Isarel miphunnaw yon pankângainae hoi yonthanae poe hanelah Bawi Jisuh teh Bawi hoi Rungngangkung hanlah amae aranglah a tawm teh a tawng sak toe. <sup>32</sup> Kaimouh teh hote kongnaw kapanuekkhaikung lah ka o aw. Cathut ni amae lawk kangâinaw koe poe lah kaawm e Kathoung Muitha hai kapanuekkhaikung lah ao telah bout a dei pouh aw.

### *Gamaliel ni pouknae a poe*

<sup>33</sup> Ahnimanaw ni hote lawk a thai navah a lungkhuek aw. <sup>34</sup> Hatei sanhedrin daw kâpa e



Farasi tami Gamaliel, teh kâlawk kacangkhaikung ahni teh tami pueng ni bari e lah a o. Sanhedrin koehoi kacangkhaikung buet touh a kangdue teh gunceinaw hah dongdengca alawilah tâco sak hanlah kâ a poe. <sup>35</sup> Isarel miphunnaw ahnimae a lathueng vah bangpatet e hno maw ka sak han tie kâhruetcueth awh. <sup>36</sup> Bangkongtetpawiteh, vai touh teh Theudas tie tami a tâco. Amahoima tami ka lentoe lah a kâdei teh a hnuk vah tami cumpali touh a kâbang. Hatei ahni teh tami alouknaw ni a thei awh teh ama kayuemnaw pueng a kâkapek teh a kahma awh. <sup>37</sup> Hathnukkhu vah milu parei navah Galilee tami Judah a tâco teh amae hnukkâbang hanelah Judahnaw hah a coun. Ahni ni hai a due takhai teh ahnie a hnukkâbang e naw hai alouklah koun a kampek awh. <sup>38</sup> Hatdawkvah nangmouh teh ahnimanaw kâbet awh hanh. Tami koe lahoi e pawiteh karawk hane doeh. <sup>39</sup> Hatei Cathut koe lahoi e lah awm pawiteh nangmouh ni na raphoe thai mahoe. Cathut na ka taran e lah doeh na awm ati. Hattoteh ahnie lawk hah ahnimouh ni a lungkuep awh. <sup>40</sup> Hote lawk a thai awh hnukkhu vah gunceinaw hah a kaw awh teh, a hem awh hnukkhu a tu hoi teh Jisuh min lahoi cangkhae sak awh hanh lawih telah kâ a poe awh teh a cei sak awh. <sup>41</sup> Gunceinaw ni Jisuh min lahoi khang hane a kamcu tie a pouk awh daw k sanhedrin lawkcengnae koehoi lunghawicalah hoi a tâco awh. <sup>42</sup> Bawkim daw k hai thoseh, im daw k hai thoseh, hnintangkuem a cangkhai awh teh Jisuh teh Khrih doeh telah pout laipalah a pâpho awh.

## 6

### *Tami sari touh a rawinae*

<sup>1</sup> Hatnae tueng dawkvah a hnukkâbangnaw moi apap awh toe. A hnintangkuem a paca awh navah, Grik lawk kapan e Hellenist lahmai napuinaw ni kaimouh teh na paca awh hoe telah Hebru lawk kapannaw phuenangnae a tawn awh. <sup>2</sup> Hatnavah gunceinaw hlaikahni touh ni a hnukkâbangnaw pueng a kaw awh teh maimouh teh Cathut e a lawk paktoung awh vaiteh canei koelae thaw taw k hane kawi nahoe. <sup>3</sup> Hatdawkvah hmaunawnganaw muitha hoi, lungangnae hoi, kaawm e tami sari touh nangmouh thung tawng awh. Hete thaw taw k sak hanelah ahnimouh hah kaimouh ni ka rawi awh han. <sup>4</sup> Maimouh teh ratoumnae hoi lawk pâphona e thaw maha pou taw k awh sei telah a dei awh.

<sup>5</sup> Hote lawk teh kamkhueng e tami pueng ni a hnâbo awh teh, yuemnae lahoi thoseh, Kathoung Muitha hoi thoseh, kakawi e Stiven, Filip, Prokhoras, Nikhanaw, Timon, Parmenas, hoi Judah phung lah ka kâen e Antiok tami Nikolas tinaw a rawi awh. <sup>6</sup> Ahnimouh teh gunceinaw hmalah a kangdue sak awh teh gunceinaw ni ratoum laihoi ahnimae lathueng kut a toung sin awh.

<sup>7</sup> Hettelah hoiyah Cathut e lawk a kampung teh Jerusalem kho thung a hnukkâbangnaw hoe hoe apap. Vaihmanaw pueng ni hai yuemnae lawk a thai awh.

### *Stiven mannae*

<sup>8</sup> Stiven teh lungmanae a bahu hoi akawi teh puenghoi kângairunae mitnoutnaw hah taminaw hmalah a sak. <sup>9</sup> Hah navah sanhlout tie sinakok daw k kamkhuengnaw koehoi kamtawng teh Sairen, Alexandria, Silisia ram, Asia ram hoi ka tho e taminaw ni Stiven teh a oun awh. <sup>10</sup> Hatei muitha lungangnae hoi Stiven ni a dei e hah ahnimanaw ni oun thai awh hoe.



<sup>11</sup> Hatnavah rangpuinaw hah arulah a uen awh teh hete tami ni Mosi hoi Cathut e lawk ka tapuet lah a dei awh e hah ka thai ati awh. <sup>12</sup> Rangpui, kacuenaw hoi cakathutkungnaw ni ahni hah a man awh teh sanhedrin lawkcengnae hmuen koe a hrawi awh. <sup>13</sup> Laithoe e kapanuekkhaikungnaw a kaw awh teh ahnimouh ni, ahni teh kathounge a hmuen hoi kâlawnaw a tapuet telah kâhat laipalah a dei awh. <sup>14</sup> Hote Nazareth tami Jisuh ni hete hmuen a raphoe vaiteh kaimouh koe Mosi ni na poe e kâlawnaw kâthung sak han ati awh e kaimouh ni ka thai awh toe telah a dei awh. <sup>15</sup> Sanhedrin lawkcengnae koe ka tahungnaw ni Stiven hah kheikhei a khet awh teh ahnie minhmai teh kalvantami e minhmai patetlah ao e hah a hmu awh.

## 7

### *Stiven ni a pâpho*

<sup>1</sup> Vaihma kacue ni Stiven koe, ahnimouh ni a dei awh e heh atang maw, telah a pacei. <sup>2</sup> Stiven ni, hmaunawngnaw hoi apanaw thai awh haw. Maimae na pa Abraham teh Haran kho a cei hoehnahlan, Mesopotamia ram ao nah ka lentoe e Cathut ni a kamnue pouh teh, <sup>3</sup> na ram hoi na imthungkhu cettakhai nateh kai ni na patue e ram dawc cet haw, atipouh.

<sup>4</sup> Hatdawkvah ahni ni Khaledan ram a ceitakhai teh Haran khovah ao. A na pa a due hnukkhu hoi Cathut ni atu maimouh onae ram dawc a kampuen sak. <sup>5</sup> Hatei, hote ram dawc e râw pang hanlah bang tica hai poe hoeh. Abraham ni a ca a cun hoehnahlan Cathut ni ahni hoi catounnaw hanlah hote ram teh râw lah poe hane lawk a kam toe. <sup>6</sup> Cathut ni ahnie catounnaw teh ayânaw e ram dawkvah imyin lah ao awh han tie hoi hote ram dawc a kum cumpali touh thung san lah ao a vaiteh rektapnae a khang awh han telah a ti. <sup>7</sup> Cathut ni ahnimouh san lah ka hno e naw lawk ka ceng han ati. Hahoi ahnimanaw ni hote ram dawc hoi a tâco awh vaiteh hete a hmuen koehoi kai na bawc awh han, telah a ti. <sup>8</sup> Cathut ni vuensomanae hoi kâkuen e lawkkamnae hah Abraham koe a poe teh, a ca Isak a sak hoi hnin taroe navah vuensomanae a sak pouh. Isak ni a capa Jakop a sak teh mintoe hlaikahni touh e na pa lah ao.

### *Izip ram ka phat e mintoenaw*

<sup>9</sup> Mintoenaw ni Joseph hah a ut awh dawkvah Izip ram lah a yo awh. Hateiteh Cathut ni Joseph teh a okhai. <sup>10</sup> Ahnie a rucatnae koehoi a hlout sak. Lungangnae hah a poe teh Izip siangpahrang ni Izip ram hoi Faro siangpahrang e a imthungnaw a uk sak.

<sup>11</sup> Hahoi, Izip ram hoi Kanaan ram pueng dawc takang a tho teh rucatnae puenghoi a kâhmo awh dawkvah maimae mintoenaw teh a ca hane tawn awh hoeh. <sup>12</sup> Hatei Jakop ni Izip ram vah rawca ao e a thai navah maimae mintoenaw apasuek lah a patoun. <sup>13</sup> Apâhni lah a cei awh navah Joseph ni a hmaunaw koe amahoima a kâpâpho teh Joseph miphunnaw hah Faro siangpahrang ni a panue. <sup>14</sup> Hahoi, Joseph ni tami a patoun teh a na pa Jakop hoi a miphunnaw tami 75 touh e hah koug a kaw. <sup>15</sup> Hottelah Jakop ni Izip ram lah a cei teh, ahni hoi maimae mintoenaw teh hote ram dawkvah a due awh toe. <sup>16</sup> Ahnimae ronaw teh Shekhem kho lah a kâkayawt awh teh hote kho dawc hoi Abraham ni Hamor canaw koe tangka hoi a ran e phuen dawkvah a pakawp awh.

### *Kahloutkhaikung Mosi a pahnawt awh*



<sup>17</sup> Cathut ni Abraham koe lawkkam e atueng akuep e patetlah Izip ram kaawm e taminaw puenghoi a kamphung, <sup>18</sup> A hnukkhu teh Joseph ka panuek hoehe e Siangpahrang alouke ni Izip ram a uk. <sup>19</sup> Hote siangpahrang ni maimae miphun a dum teh, camonaw hah tâkhawng vaiteh hring sak hoehe hanelah a ngai dawkvah maimae mintoenaw a rektap awh. <sup>20</sup> Hote tueng navah, Mosi a khe. Ahni teh Cathut hmalah a mei kahawipoung e camo lah ao teh, a na pa e im dawkw thapa yung thum touh thung khetyawt e lah ao. <sup>21</sup> Im dawkw hoi a tâcokhai hnukkhu Faro canu ni a ca lah a kawkw. <sup>22</sup> Mosi teh Izipnaw e thouthainae pueng hah a cang teh, lawk dei koe lahai, tawksak koe lahai a thakaawme lah ao.

<sup>23</sup> Mosi teh kum 40 touh a pha navah a miphun Isarelnaw khetyawt hane lungpouk a tawn. <sup>24</sup> Tami buet touh teh Izip tami tongpa ni a rektap lahun navah a hmu teh amae miphun kampangkhai teh Izip tami hah a thei. <sup>25</sup> Mosi ni a kut hoi amae hmaunawngghanaw hlout nahanlah Cathut ni kâ na poenae kong hah ahnimouh ni a panue han doeh toe telah a pouk ei ahnimouh ni panuek thai awh hoehe. <sup>26</sup> A tangtho vah, Mosi ni Isarel miphunnaw amamouh hoi mamouh lawkpungnae a sak awh e hah a hmu navah, bangkongmaw hettelah na o awh, atipouh hnukkhu a rahak dawkw kâponae a sak. <sup>27</sup> Hateiteh ka yon e ni Mosi a tanawt teh, apinimaw nang hah kaie lathueng vah lawkcengkung lah na ta vaw. <sup>28</sup> Nang teh paduem e Izip tami na thei e patetlah kai hai thei hanelah na noe maw atipouh. <sup>29</sup> Hote lawkw hah Mosi ni a thai toteh Midian ram lah a yawng teh, hawvah imyin lahoi capa kahni touh a sak. <sup>30</sup> A kum 40 touh a kuep hnukkhu Sinai mon dawkw e thingyei yon dawkvah, kalvantami teh Mosi koe buruk dawkw hmai ka kang e lahoi a kamnue. <sup>31</sup> Mosi ni a hmu e hah a kângairu dawkvah kahnai lahoi khet hanelah buruk koe lah a cei navah Bawipa e lawk a thai teh, <sup>32</sup> Kai teh na mintoenaw e Cathut, Abraham, Isak, hoi jakop e Cathut lah ka o ati. Mosi teh a taki lawi vah a pâyaw teh khen pateng khen ngam hoehe. <sup>33</sup> Bawipa ni Mosi hanlah, na khokkhawm hah rading, bangkongtetpawiteh, na kangduenae hmuen teh kathounge hmuen doeh. <sup>34</sup> Izip ram thung kaie taminaw ni a khang e hah ka hmu. A hramki awh e ka thai teh ahnimanaw rungngang hanelah ka kum toe. Atu cet leih! Nang teh Izip ram lah na patoun han atipouh.

<sup>35</sup> Mosi heh Isarelnaw ni a pahnawt e doeh. Maimae lathueng vah apinimaw lawkceng han e, hoi na ka uk hanlah a ta, ati awh. Hateiteh, ahni teh buruk thung kamnuek e kalvantami ni ukkung hoi kahloutkhaikung lah a patoun. <sup>36</sup> A taminaw hah Izip ram hoi a tâcokhai teh, Izip ram, tuiptui paling, hoi thingyei yon dawkvah kum 40 touh thung kângairunae hoi, mitnoutnae hnnonaw a sak.

### *Isarelnaw ni Cathut lawk ngâi awh hoehe*

<sup>37</sup> Hote Mosi teh Isarelnaw koe, Cathut ni nangmae hmaunawngghanaw thung dawkw kai hoi kâvan e profet buet touh nangmouh hanlah ka tâco sak han, telah dei e hah doeh. <sup>38</sup> Ahni teh Sinai mon vah, ahni koe lawkw ka dei e kalvantami hoi, maimae mintoenaw cungtalah kahrawngum vah kaawm e taminaw koe ao teh maimouh na poe hane kahring e lawkw maimouh koe ka phatsakkung lah ao. <sup>39</sup> Hatei, maimae mintoenaw ni a lawkw ngâi awh hoehe, ahni hah a hnoun awh teh ahnimae a lungthung vah Izip ram dueng a doun awh. <sup>40</sup> Hatdawkvah Aron koe maimouh Izip ram hoi na katâcawtkhaikung hote Mosi teh bangtelamaw ao tie maimouh ni panue hoehe toung dawkvah maimouh hmalah kahrawikung hane cathutnaw



hah kaimouh han lah sak awh leih telah a hei awh. <sup>41</sup> Hottelah hoiyah ahnimouh ni hatnae atueng daw k maitoca meikaphawk a sak awh teh, hote meikaphawk koe thueng hanelah a sin awh teh, amamae kut hoi sak e daw k a konawm awh. <sup>42</sup> Hatnavah Cathut ni ahnimouh a hnamthun takhai teh ahnimouh han kalvan âsi, thapanaw a baw k sak. Profetnaw e cauk daw kvah, Isarelnaw nangmouh ni kahrawngum vah kum 40 touh thung thueng hanelah saringnaw hoi thueng e naw teh kai koe ouk na sin a maw. <sup>43</sup> Nangmouh ni Molek e rim hoi namamae âsi cathut Rephan hah na sin awh. Hotnaw teh nangmouh ni baw k han kawi lah na sak awh e meikaphawknaw doeh. Hatdaw kvah kai ni nangmouh teh Babilon ram hloilah ditouh na hrek awh han telah a thut.

### *Cathut e lukkareiim katang*

<sup>44</sup> Mosi ni a hmu e hoi kâvan lah lawkpanuesaknae sak hanelah, kâ ka poe e ni a lawk poe e patetlah hote lukkareiim teh kahrawngum maimae mintoenaw koe ao. <sup>45</sup> Maimae mintoenaw ni hote rim hah a pang awh teh maimae mintoenaw e hmalah Cathut ni pâlei e Jentelnaw e ram a la awh toteh Joshua hoi hote rim hah a sin awh teh Devit se totouh ao. <sup>46</sup> Devit ni Cathut e a lungmanae a coe teh Jakop e Cathut ao, nahane hmuen sak hanlah a ratoum, <sup>47</sup> Hateiteh, Cathut hanelah im kasakkung teh Solomon doeh. <sup>48</sup> Hatei, Lathueng Poug ni tami kut hoi sak e baw kim daw k awm hoeh. <sup>49</sup> Hete kong daw kvah Bawipa ni, kalvan teh kaie bawitungkhung doeh, talai teh khok ka tOUNGNAE doeh. Nangmouh ni bangpatet e im maw kai han na sak awh han. Bang patet e hmuen daw k maw kai ni ka o han. <sup>50</sup> Hete hno pueng teh kama e kut sak nahoehmaw. , telah Cathut ni ati e profetnaw ni a dei e patetlah khoup ao.

### *Kathoung Muitha tarannae*

<sup>51</sup> Na lung a len teh, hnâ hoi lungthin daw kvah vuensoma lah kaawm hoeh e nangmanaw haiyah na mintoenaw patetlah Kathoung Muitha na taran awh. <sup>52</sup> Nangmae na mintoenaw ni a rektap boihoeh e profetnaw ao maw, ahnimouh teh kathoung baw i a tho han tie sut ka dei e naw a thei awh. Atuvah nangmouh teh hote Tami Kalan hah ka pahnavtkungnaw hoi kathetkungnaw lah na o awh. <sup>53</sup> Nangmouh teh kalvantaminaw koehoi poe e Cathut e phung law k hah na hmu awh ei, sak han na ngai awh hoeh atipouh.

### *Cathut hanelah hringnae hmaloe ka pasoung e*

<sup>54</sup> Ahnimouh teh hete konglam a thai awh navah a lungthung hoi Stiven koe puenghoi a lungkhuek awh teh hâ a katâ awh. <sup>55</sup> Hatnavah Stiven teh Kathoung Muitha hoi akawi teh kalvan lah a moug navah Cathut e bawilennae hoi Jisuh teh Cathut e aranglah a kangdue e hah a hmu. <sup>56</sup> Khen haw kalvannaw a kamawng teh tami Capa ni Cathut e aranglah a kangdue e ka hmu telah a dei.

<sup>57</sup> Hatnavah ahnimouh teh puenghoi hram laihoi a hnâ a tabuem awh teh Stiven koe a yawng awh. <sup>58</sup> Ahni hah kho alawilah a sawn awh teh talung hoi a dei awh. Kapanuekkhaikungnaw ni hai amamae angkinaw Sawl tie thoundoun e a khok koe a ta awh. <sup>59</sup> Stiven ni, Bawipa Jisuh ka muitha hah dâw leih, telah talung hoi a dei awh lahun nah Cathut koe a ratoum. <sup>60</sup> Hahoi Stiven ni a khokcuengkhuem teh Bawipa hete yonnae teh ahnimae lathueng baw t sak hanh telah puenghoi a hram teh a due. Sawl ni hai Stiven a thei awh e hah a lungkuep van.



## 8

*Pacekpahlekkung Pawl*

<sup>1</sup> Hat hnin roeroe vah Jerusalem e kawhmoun thungvah rektapnae a tâco. Gunceinaw hoehe e pueng teh Judah ram hoi Samaria ram lah kounng a kampek awh. <sup>2</sup> Cathutlae taminaw ni Stiven e a ro teh kahawicalah a kuem awh teh puenghoi a khuikakhai awh. <sup>3</sup> Sawl ni im buet touh hnukkhu buet touh a luen teh, ka yuem e napui tongpanaw hah a man teh thongim a paung teh kawhmoun hah a raphoe.

*Samaria ram ka phat e Filip*

<sup>4</sup> Voivang lah kâkapek e naw ni lawkkatang teh yuengyoe a pâpho awh. <sup>5</sup> Filip hai Samaria ram e kho buet touh dawh a cei teh Khrih e kong hah a pâpho van. <sup>6</sup> Tami pueng ni Filip ni a sak e kângairuhnonaw hah a hmu awh navah ahnie a pâpho e naw hah rip a thai awh. <sup>7</sup> Bangkongtetpawiteh tami moikapap koe kaawm e kakhine muithanaw teh hramki laihoi a tâco awh. Kamkhuen e hoi khokkhemnaw hai moikapap a dam awh. <sup>8</sup> Hatdawkvah, hote kho thungvah lunghawinae kalenpoung a tawn awh.

*Camkathoum e Simon*

<sup>9</sup> Hote kho dawh Simon tie tami buet touh ao. Ahni teh camthoum e laihoi yah. Samaria taminaw koe kângairu ka sak thai e tami doeh telah a mahoima ouk a kâdei. <sup>10</sup> Camo matawng pueng ni hete tami teh ka lentoe Cathut e bahu doeh ati awh. <sup>11</sup> Ahnimouh ni bangkongmaw a yuem awh, tetpawiteh cam thoum e laihoi kumtha moi kasawlah ahnimouh koe kângairunae a sak dawh doeh. <sup>12</sup> Hatei, Filip ni Cathut uknaeram hoi Jisuh Khrih e min hah a pâpho navah taminaw ni a yuem awh teh, tongpanaw dueng laipalah napuinaw hai tui baptisma a coe awh. <sup>13</sup> Simon ama hai a yuem dawkvah tui baptisma a coe teh Filip koe a kâbang. Mitnoutnae hoi kângairuhnonaw hah a hmu awh teh kângairu laihoi hmawn a ngam awh.

*Simon e yonnae*

<sup>14</sup> Samaria taminaw ni Cathut a yuem awh toe tie hah Jerusalem khopui kaawm e gunceinaw ni a thai awh navah, Piter hoi Jawhan teh ahnimouh koe a patoun awh. <sup>15</sup> Ahnimouh roi a pha toteh, Kathoung Muitha ahnimouh ni a coe thai awh nahanlah a ratoum pouh roi. <sup>16</sup> Bangkongtetpawiteh, ahnimouh teh Jisuh min laihoi tui baptisma dueng heh a coe awh rah dawkvah, ahnimouh thung dawh api koehai Kathoung Muitha a pha hoehe rah dawh doeh. <sup>17</sup> Hahoi, Piter hoi Jawhan ni ahnimae van kut a toung hnukkhu ahnimouh teh Kathoung Muitha a coe awh.

<sup>18</sup> Gunceinaw ni kut toung sin e laihoi taminaw ni Kathoung Muitha a coe awh e heh, Simon ni a hmu navah, gunceinaw koe tangka a sin teh, <sup>19</sup> kai ni kut ka toung sin e tami pueng ni Kathoung Muitha a coe awh nahanelah, het patetlah e hnosakthinae hah kai hai na poe haw atipouh. <sup>20</sup> Hatnavah Piter ni nang ni Cathut e lungmanae hah tangka hoi ran thai telah na pouk dawkvah nama hoi na tangka teh mek kamko naseh. <sup>21</sup> Na lungthin teh Cathut hmalah a lan hoehe dawkvah hete thaw dawh nang teh na tawh thai hoehe, nange na ham hai awm hoehe. <sup>22</sup> Hatdawkvah, na pouknae kahawihoehe hah pankângai nateh Bawipa koe ratoum haw. Hottelah na tetpawiteh na pouknae kahawihoehe naw Bawipa ni doum na ngaithoum yawkaw han doeh. <sup>23</sup> Bangkongtetpawiteh nang teh utnae hoi na kawi teh yon thongkabawt e lah na o e hah ka hmu telah atipouh.



<sup>24</sup> Simon ni, nangmouh ni na dei e buet touh boehai kai koe a pha hoe h nahanlah Bawipa koe na ratoum pouh awh telah bout a dei pouh.

<sup>25</sup> Piter hoi Jawhan teh Bawipa e lawkkatang a kampang laihoi a pâpho roi hnukkhu, Samaria ram thung e khonaw koe kamthang kahawi a pâpho roi teh Jerusalem lah bout a ban roi.

### *Ethiopia kalaw bawi kâthungnae*

<sup>26</sup> Hahoi Cathut e kalvantami ni Filip koe thaw nateh Jerusalem hoi Gaza kho lah cathuknae lam daw k akalah cet loe atipouh. Hote lamthung teh thingeyiaw n lamthung lah ao. <sup>27</sup> Hatdawkvah, Filip ni a thaw teh a cei. Hatnavah Ethiopia siangpahrangnu Kandeis e bawi lah kaawm ni teh siangpahrangnu e kâtaawnnae kalen lah kaawm e Ethiopia tami buet touh teh, <sup>28</sup> Jerusalem vah baw knae a sak hnukkhu a ban navah amae rangleng van hoi profet Isaiah e Cakathoung hah a touk. <sup>29</sup> Hatnavah Kathoung Muitha ni Filip koe vah hote rangleng koe cet nateh hnai haw atipouh. <sup>30</sup> Filip ni hai rek a yawng sin. Ahni teh profet Isaiah ni a thut e heh vawtvawt a la touk. Filip ni, na touk e hah na thai panuek maw atipouh. <sup>31</sup> Hote bawi ni na ka dei pouh e awm hoe h pawiteh bangtelamaw ka thaipanuek han ati teh Filip heh ama koe reirei tãhung hanelah a coun. <sup>32</sup> Ahni ni a touk e teh, ahni teh thei hanlah sut hmoun e tu patetlah a hrawi awh. Tuca ni muen ngaw navah a hram hoe h e patetlah hram laipalah ao. <sup>33</sup> A dudam awh navah, ahni kampangkhai api awm hoe h. A hringnae teh talai van hoi takhoe lah ao dawkvah a catoun hah apinimaw bout a dei thai han va tie doeh. <sup>34</sup> Hahoi bawi ni Filip hanelah na pacei haw nei, profet ni api e kong maw hettelah a dei aw. Ama e kong ma aw. Hoe h teh alouke buet buet touh e kong ma aw atipouh. <sup>35</sup> Hatteh Filip ni hote kongnaw hno lahoi Jisuh e kamthang hah a dei pouh.

<sup>36</sup> Ahnimouh teh pou a cei awh navah tui koe a pha awh teh bawi ni tui baptisma ka hmu hoe h nahanelah bang ni maw kai na rakhan telah a ti. <sup>37</sup> Filip ni, na lungthin abuemlahoi na yuem pawiteh tui baptisma na hmu han, telah atipouh. Jisuh Khrih teh Cathut capa doeh tie han ka yuem telah a ti. <sup>38</sup> Hahoi, bawi ni rangleng kãhat hanelah kã a poe hnukkhu, tui daw k a cei roi teh, Filip ni tui baptisma a poe. <sup>39</sup> Tui thung hoi bout a tâco roi toteh, Bawipa e Kathoung Muitha ni Filip teh oun a tawm teh, hote bawi ni hmawt hoe h toe. Hateiteh, lunghawi laihoi amae lamthung daw k pou a cei. <sup>40</sup> Filip teh Azotus kho a tâco teh, Kaisarea ram totouh kho tangkuem Cathut e kamthang kahawi a pâpho.

## 9

### *Sawl kâthungnae*

<sup>1</sup> Sawl ni Bawipa a hnukkãbangnaw hah a pakhi teh thei hanlah ngainae a tawn, ahni ni vaihma kacue koe a cei teh, <sup>2</sup> Damaskas kho e sinakoknaw koe poe hanelah panue nahane ca a hei. Bangkongtetpawiteh, Bawipa lamthung ka dawn e naw tongpa hoi napui thoseh, a hmu e pueng katek vaiteh Jerusalem lah hrawi thai na hanelah doeh. <sup>3</sup> Hottelah ahni ni a cei teh Damaskas khopui teng a pha navah, kalvan lahoi angnae ni pheng a tue. <sup>4</sup> Talai daw k a rawp teh, Sawl, Sawl bangkong kai na rektap telah ahni koe dei e lawk a thai. <sup>5</sup> Bawipa nang apimaw, telah a pacei navah Bawipa ni kai teh nang ni na rektap e Jisuh doeh. <sup>6</sup> Thaw nateh kho thung kãen lah, na sak hane thaw na dei pouh han, telah atipouh.



<sup>7</sup> Ahni hoi kahlawng rei kacetnaw ni lawk teh a thai awh ei apihai a hmu awh hoeh dawkvah muen a ka ngai awh teh lawkkamuem lahoi hawvah a kangdue awh. <sup>8</sup> Sawl teh hluet a thaw ei banghai a hmu thai hoeh dawkvah, taminaw ni a kut dawkhohi a hrawi teh, Damaskas khopui lah a ceikhai awh. <sup>9</sup> Ahni teh hnin thum touh thung a mit a dawn teh rawca cat laipalah ao.

### *Sawl Baptisma coenae*

<sup>10</sup> Damaskas kho dawkhohi Ananias tie a hnukkâbang buet touh ao. Kamnuenae lahoi, Bawipa ni, Ananias telah a kaw. Ahni ni, kai hivah ka o, Bawipa, telah atipouh. <sup>11</sup> Bawipa ni ahni koe, thaw nateh, lam kalan tie koevah cet nateh Judah im vah Tarshish tami, Sawl tie hah tawng haw. Bangkongtetpawiteh, ahni teh a ratoum lahun. <sup>12</sup> A kamnuenae dawkhohi a mit kho bout a hmu thai nahanlah Ananias tie a kâen vaiteh a van vah kut a tounge e a hmu, telah a ti. <sup>13</sup> Ananias ni, Bawipa, ahni ni Jerusalem kho e na tami kathoungnaw koe hno kahawihoehe moi a sak tie tami moikapap ni a dei e ka thai. <sup>14</sup> Vaihma bawinaw koehoi kâtawnnae hoi hivah a tho. Na min kakawnaw pueng man thainae kâ a tawn, telah atipouh. <sup>15</sup> Hateiteh, Bawipa ni cet haw ahni teh Jentelnaw, siangpahrangnaw hoi Isarelhew hmalah ka min ka sin hanelah ka rawi toe. <sup>16</sup> Ahni teh ka min kecu dawkhohi rucatae a khang hane naw ka panue sak han, telah a ti.

<sup>17</sup> Hahoi, Ananias ni a cei teh, imthungkhu vah a kâen. Sawl van vah a kut a tounge teh, ka nawngah, Sawl na tho nah lam vah nang koe ka kamnuenae e Bawipa Jisuh ni na mit bout ang sak teh, Kathoung Muitha hoi na kawi thai nahan kai na patoun, telah atipouh. <sup>18</sup> Hatnavah, vai touh lahoi a mit dawkhohi tanga lakep patetlah a kâkhawh teh, kho bout a hmu thai. Ahni ni a thaw teh Baptisma a coe. <sup>19</sup> Hahoi, rawca a ca hnukkhu a tha bout a sai. Sawl teh Damaskas khovah a hnukkâbangnaw koevah dongdengca ao.

### *Jisuh kong Sawl ni a pâpho*

<sup>20</sup> Sawl ni Khrih teh Cathut e ca doeh telah sinakoknaw dawkhohi tang a pâpho. <sup>21</sup> Hote lawk ka thai e naw abuemlah ni kângairu awh teh, hete tami teh Jerusalem kho e Bawipa min kakawnaw raphoe hanlah ka kâyawm e tami nahoehmaw, Ahnimanaw katek vaiteh vaihma bawinaw koevah hrawi hanelah hivah ka tho e nahoehmaw telah ati awh. <sup>22</sup> Hatei, Sawl teh a tha hoe ao. Jisuh teh Khrih doeh ati teh kampangkhah dawkvah Damaskas kho kaawm e Judahnaw hah a kângairu sak.

<sup>23</sup> A hnin moi ao toteh, Judahnaw ni Sawl hah thei hanlah kho a khang awh. <sup>24</sup> Hatei, Sawl ni a khokhang awh e a panue. Sawl thei hanelah kho a khang awh dawkvah tangmin tangtho longkha hah a ring awh.

### *Sawl Jerusalem bout a phanae*

<sup>25</sup> Hatnavah, a hnukkâbangnaw ni Sawl hah a hrawi awh teh, tangmin vah tapawm dawkhohi kho kalupnae rapan hloilah a pabo awh.

<sup>26</sup> Sawl ni Jerusalem a pha navah, a hnukkâbangnaw koe huiko hanlah a panki eiteh a yuem awh hoeh dawkvah a taki awh. <sup>27</sup> Hatei Barnabas koevah bangtelamaw, Bawipa a hmu teh, Bawipa ni Sawl koe bangtelamaw lawk a dei tie naw hoi Damaskas kho dawkhohi Jisuh min taranhawi lahoi a pâpho e kongnaw kacaicalah a dei pouh. <sup>28</sup> Sawl teh Jerusalem vah gunceinaw hoi rei a ceio navah, Bawipa min lahoi taranhawi laihoi a pâpho awh. <sup>29</sup> Sawl teh Grik lawk ka dei e Judahnaw hoi



a kâoun awh teh ahnimouh ni Sawl teh thei hanlah a kâcai awh. <sup>30</sup> Hote kong hah a hmaunawngghanaw ni a thai awh navah, Kaisarea kho lah a ceikhai awh teh, Tarshish kho lah a patoun awh.

<sup>31</sup> Hatnavah Judah kho, Galilee kho, Samaria kho kaawm e kawhmoun pueng ni teh karoumcalah ao awh. Ahnimanaw ni Bawipa takinae dawk thoseh, Kathoung Muitha e thapoenae dawk hai thoseh, a hring awh teh tami hoe a pung awh.

### *Aeneas damnae*

<sup>32</sup> Piter ni hnintangkuem kahlawng a cei teh Lidda khovah a pha. Hote kho dawk kaawm e tami kathoungnaw koe a pai. <sup>33</sup> Hote kho dawkvah Aeneas tie tami teh kum taroe touh thung a kamkhuen teh ikhun dawk sut ayan e hah a hmu. <sup>34</sup> Hatnavah Piter ni Aeneas koe Jisuh ni nang teh na dam sak toe, thaw nateh na iphah kalawng leih, atipouh navah ahni teh hluet tang a thaw. <sup>35</sup> Lidda kho hoi Sharon kho e kaawm e naw ni ahni a hmu awh navah Cathut koe lah a lungkâthung awh.

### *Dawka bout hringnae*

<sup>36</sup> Joppa kho kaawm e Dawka tie Tabitha teh a hnukkâbang e napui buet touh lah ao. Ahni teh hnokahawi pou ka sak ni teh poenae lahoi thaw ka tawk e lah ao. <sup>37</sup> Hatnae hnin navah ahni teh a pataw dawk a due. Taminaw ni a ro teh tui a pâhluk awh hnukkhu imvan e irakhan dawk a ta awh. <sup>38</sup> Joppa kho pui teh Lidda khopui hoi a hnai dawkvah Lidda khouthung vah Piter ao tie a hnukkâbangnaw ni a thai toteh ahni koe tami kahni touh a patoun awh. Kaimanaw koevah karang tho ei telah ati pouh.

<sup>39</sup> Hatdawkvah, Piter ni hluet a thaw teh ahnimouh hoi imvan e rakhan thung cungtalâh a kâen. Piter a pha toteh lahmainunaw ni Piter e a teng a kangdue awh teh a kâ awh. Ahnimanaw ni Dawka a hring nah a khui e khohnanaw a pâtuê awh. <sup>40</sup> Piter ni ahnimanaw alawilah a tâco sak hnukkhu, a khokcuengkuem teh a ratoum. Hahoi a ro koe lah a kamlang teh Tabitha thaw leih atipouh navah ahni teh a mit a padai teh Piter hah a hmu toteh a thaw teh a tahung. <sup>41</sup> Hahoi Piter ni Dawka hah a kut dawk hoi a pathaw teh a kangdue sak. Tami kathoungnaw hoi lahmainunaw a kaw teh bout a hring toe telah ahnimouh koe a patue. <sup>42</sup> Hote kamthang teh Joppa kho thung pueng dawk a kamthang teh tami moikapap ni Bawipa a yuem awh. <sup>43</sup> Hot hnukkhu hoi Piter teh Joppa kho dawk phaivuen ka sak e Simon im vah hnin ka saw lah ao.

## 10

### *Piter hoi Konilias*

<sup>1</sup> Kaisarea kho dawk Itali ransahu tie ransa cum touh kaukkung Konilias teh ao. <sup>2</sup> Ahni teh bawknae koe lah kâyawm poung e lah ao, a imthung ni Cathut ka bari e lah ao awh teh, Judah tami dawk e karoedengnaw a kabawp teh Cathut koe pou a ratoum, <sup>3</sup> Hnin touh teh tangmin lah suimilam kathum tapat navah vision kacaicalah a hmu. Hote vision a hmu e dawk, Cathut e kalvantami buet touh a kâen teh Konilias telah a pato. <sup>4</sup> Kalvantami hah lungpuen lahoi khei a khet teh bangne Bawipa telah ati. Kalvantami ni yah Cathut ni na ratoumnae hoi karoedengnaw na kabawp e poehnonaw teh pâkuem hane kawi lah Cathut hmalah a pha toe. <sup>5</sup> Hatdawkvah atu Joppa khovah tami patoun nateh a min Piter tie



Simon hah kaw sak loe. <sup>6</sup> Ahni teh tuipui teng kaawm e phaivuen ka sak e Simon im a luen telah ati.

<sup>7</sup> Hottelah ka dei e kalvantami a cei hnukkhu Konilias ni, <sup>8</sup> a vaica kahni touh hoi Cathut lawk daww kaawm e ransa buet touh a kaw teh Joppa kho lah a patoun.

### *Piter ni vision a hmu*

<sup>9</sup> Atangtho teh Joppa kho a pha tawmlei suimilam kahni kalekkalak nah Piter teh ratoum hanlah lempu van a luen. <sup>10</sup> A vonhnam teh ayânaw ni coungkacoe lah rawca a lawng lahun nah, Piter ni kamnueae a hmu.

<sup>11</sup> Kalvan kamawng teh hni hoi ka kâvan e a takin pali touh e talai daww ama koe ka bawt e hah a hmu. <sup>12</sup> Hote tangoung thungvah tava phunkuep, kâroe e phunkuep, saring phunkuep ao. Hathnukkhu Piter thaw nateh, thet nateh cat haw tie lawk a thai navah, <sup>13</sup> Piter ni coung thai hoe h Bawipa, <sup>14</sup> kathounghoehe hno, kakhin e hnonaw kai ni vai touh hai ka cat boihoe atipouh.

<sup>15</sup> Hathnukkhu apâhni lawk bout ka tho e teh Cathut ni a thoung tie hno hah thoung hoe telah dei hanh atipouh.

<sup>16</sup> Hettelah avaitumnae a kamnue hnukkhu, Cathut ma ni hote hno teh kalvan lah bout a tawm.

### *Konilias im Piter a pha*

<sup>17</sup> Piter ni a hmu e vision hah bang ngainae vaimoe titeh kângairu lahun nah, Konilias ni a patoun e naw ni Simon im pacei laihoi a tawng awh teh longkha koehoi, <sup>18</sup> Piter telah kaw e Simon hah hete im daww a luen maw telah a pacei awh.

<sup>19</sup> Piter ni vision kong a pouk lahun nah Muitha ni tami kathum touh ni nang na tawng awh. Thaw nateh kum haw ahnimouh teh, <sup>20</sup> kai ni ka patoun e doeh. Lung kâounnae awm laipalah kâbang lawih atipouh.

<sup>21</sup> Hatdawkvah Piter ni a kum teh na tawng awh e teh kai doeh. Bang panki lahoi maw na tho awh, atipouh. <sup>22</sup> Ahnimouh ni hettelah atipouh, ransabawi Kornilias ni na patoun awh e doeh. Ahni teh Cathut ka taket e hoi tami kahawi lah ao teh Judah taminaw ni a baripoung e doeh. Ahni ni na lawk a thai panuek nahan Cathut e kalvantami buet touh ni nang hah coun loe atipouh.

<sup>23</sup> Piter ni taminaw teh imthungkhu kâen awh atipouh teh hote tangmin teh hawvah a roe awh. A tangtho a kârasoup awh teh ahnimouh koe a cei. Joppa kho e hmaunawngaha a tangawn hai a cei van. <sup>24</sup> Tawkkahnin Kaisarea a pha awh teh hawvah Kornilias hoi avai a huikonaw a coun e naw ni a ring awh. <sup>25</sup> Piter a kâen tahma Konilias ni a dawn teh a hmalah a tabo. <sup>26</sup> Piter ni kangdout atipouh, kai hai tami van doeh atipouh.

<sup>27</sup> Piter ni Konilias pato laihoi imthungkhu a kâen nah, tami moikapap a kamkhueng e hah a hmu. <sup>28</sup> Ahnimouh koe, Judahnaw teh Jentelnaw hoi kamyawng phung nahoe, ahnimouh koe kahlawng hai cei phung na hoe tie nangmouh ni kacaicalah na panue awh. Hateiteh tami bang patet hai kakhin hoi kathoung hoe lah ka pouk hoe nahan Cathut ni na patue toe. <sup>29</sup> Hatdawkvah na kaw awh navah banghai oun han awm laipalah ka tho. Hatdawkvah bangkongmaw na kaw awh, dei a haw telah atipouh.

<sup>30</sup> Konilias ni hettelah ati. Atu totouh rawca ka hai, suimilam kathum nah im vah ka ratoum. Atu hnin pali a pha toe. Hnipangaw a kâkhu teh kaie hmalah a kangdue. <sup>31</sup> Kornilias na ratoum pawlawk kai ni ka thai toe. Nange poehnonaw haiyah Cathut hmalah pahnim hoe hanelah ao.



<sup>32</sup> Hatdawkvah Joppa kho kaawm Piter tie Simon hah kaw hanlah patoun leih. Tuipui teng phaivuen thaw ka tawk e Simon im doeh a luen. Ahni a tho torei teh nang koe a dei han doeh na ti pouh. <sup>33</sup> Hatdawkvah kai ni nang koevah tami tang ka patoun. Tang na tho thai dawk ka lung hroung ahawi. Atu kaimanaw pueng ni nang koe Cathut ni a dei e thai thai hanelah na hmalah ka o awh telah Kornilias ni a dei pouh.

### *Jentelnaw hanlah kamthang kahawi*

<sup>34</sup> Hatnavah Piter ni a kâko a paawng teh, lawkkatang lah Cathut teh tami minhmai khen hoeh ati. <sup>35</sup> Alouklouk e taminaw hai Cathut taki laihoi thaw kathoungrouk lah ka tawk e tami teh minhmai kahawi a hmu tie kai ni ka panue. <sup>36</sup> Tami pueng e Cathut ni Jisuh Khrih lahoi roumnae kamthang kahawi a dei e hah, Isarel miphunnaw koe poe e lawk nangmouh ni na panue awh. <sup>37</sup> Jawhan teh baptisma kong hah a dei hnukkhu Galilee ram hoi a kamtawng teh, Judah ram hmuen tangkuem dawk kaawm e hnonaw nangmouh ni na panue awh. <sup>38</sup> Cathut ni Kathoung Muitha e bahu hoi Nazareth tami Jisuh hah satui a awi. Ahni teh Cathut e kâ lahoi hnokahawi a sak teh kahraimathout ni a rektap e naw damnae a poe.

<sup>39</sup> Kaimouh haiyah, Jerusalem kho hoi kamtawng teh, Judah ram thung a sak e hnonaw hah kapanuekkhaikung lah ka o awh. Hote tami teh, thingpalam dawk a pathout awh teh a thei awh. <sup>40</sup> Apâthum hnin Cathut ni bout a thaw sak teh tak kamnuenae kâ a poe. <sup>41</sup> Tami pueng koe kounng kamnuet pouh hoeh. Cathut ni a rawi tangcoung e kapanuekkhaikung kaimouh koe a kamnue, duenae koehoi bout a thaw hnukkhu, hote Bawipa hoi kaimouh teh rei ka canei awh. <sup>42</sup> Hote Bawipa ni kahringnaw hoi kadoutnaw lawkcengkung lah, Cathut ni a rawi e lah ao tie tami pueng koe dei pouh hane hoi kampangkhai hanelah kaimouh koe kâ na poe awh. <sup>43</sup> Hote Bawipa ka yuem e pueng a min lahoi lungmanae lahoi yonthanae a coe awh han telah profetnaw pueng teh hote Bawipa kapanuekkhaikung lah ka o awh telah Piter ni a dei.

### *Jentelnaw baptisma coenae*

<sup>44</sup> Hote lawk a dei lahun navah ka thai pueng koe Kathoung Muitha teh a pha. <sup>45</sup> Jentel miphunnaw ni Kathoung Muitha e lungmanae a coe awh daw, vuensom ka a e, Piter hoi a hnukkâbangnaw a kângairu awh. <sup>46</sup> Bangkongtetpawiteh, ahnimouh ni alouklouk lae lawk lahoi Cathut a pholen awh. <sup>47</sup> Hathnukkhu Piter ni kaimouh patetlah Kathoung Muitha ka coe e hetnaw heh baptisma poe sak hoeh hanlah apipatet maw na ka ngang thai han ati hnukkhu <sup>48</sup> Jisuh Khrih e min lahoi baptisma coe sak hanlah kâ a poe. Hathnukkhu teh Piter hah ahnimanaw ni atueng ka saw hnawn lah okhai hane a kâhei awh.

## 11

### *Jerusalem e kawhmoun koe Piter ni a dei*

<sup>1</sup> Judah ram thung kaawm e gunceinaw hoi hmaunawngghanaw ni Jentelnaw ni Cathut lawk a dâw awh toe tie a thai awh. <sup>2</sup> Hahoi teh Piter ni Jerusalem kho a pha toteh vuensom ka a naw ni ahni teh a pathoe awh. <sup>3</sup> Nangmanaw vuensom ka a hoeh e naw koe na kâen awh teh na canei awh telah yon a hnei awh.



<sup>4</sup> Hahoi teh Piter ni hote a konglamnaw kahawicalah buet touh hnukkhu buet touh a dei pouh. <sup>5</sup> Joppa kho ka ratoum navah vision ka hmu. Hni kalenpui buet touh a takin pali touh kaawm e kalvan lahoi kabawt e ka hmu teh ka teng vah a pha. <sup>6</sup> Athung vah kahawicalah ka khet teh talai van e a khok pali touh e moithangnaw, sarangnaw, a vawn hoi kâva e naw hoi tavanaw hah ka hmu. <sup>7</sup> Hahoi lawk buet touh ka thai. Piter thaw nateh, thet haw, hahoi teh cat loe, na ti pouh. <sup>8</sup> Hatei, kai ni coung thai mahoe h Bawipa, bangkongtetpawiteh, kathounghoehe hno teh ka kâko daw kâen boihoe h ka ti pouh.

<sup>9</sup> Hatnavah apâhni lah kalvan hoi e a lawk teh Cathut ni a thounsak e nang ni thoung hoe h tet hanh a ti. <sup>10</sup> Hettelah vai thum touh thung ati hnukkhu hotnaw pueng teh kalvan lah bout a tawm.

<sup>11</sup> Hat navah, Kaisarea kho lahoi kai koe a patoun e tami kathum touh kai ka onae im hmalah a kangdue awh. <sup>12</sup> Hatnavah Kathoung Muitha ni oupvoudnae awm laipalah ahnimouh hoi rei cet lawih telah na ti pouh. Hete hmaunawng ha taruk touh hai kai hoi rei a cei awh teh kaimouh teh ahni im ka kâen awh. <sup>13</sup> Hote tami ni kalvantami ni ahnie imthungkhu a kangdue teh Joppa kho lah tami patoun nateh Piter tie Simon hah kaw loe. <sup>14</sup> Ahni ni nangmouh imthungkhu abuemlah rungngang lah na o awh nahanlah a hmu e hah na dei pouh han ti teh a hmu e hah kaimouh koe a dei. <sup>15</sup> Hahoi teh tang ka dei teh, Kathoung Muitha teh ahmaloe maimae lathueng a pha e patetlah ahnimouh lathueng hai a pha van. <sup>16</sup> Hatnavah Jawhan ni tui baptisma a poe. Nangmouh teh Kathoung Muitha daw k baptisma na hmu awh han telah Bawipa ni a dei e lawn ka pouk.

### *Kabawpnae*

<sup>17</sup> Hat tore i teh, Cathut ni Bawipa Jisuh Khrih ka yuem e nangmouh na poe e poehno patetlah, ahnimouh haiyah a poe van dawkvah, bangtelah vai khuet ka rakhout thai toung va telah atipouh.

<sup>18</sup> Ahnimouh teh hote lawk a thai navah sairasuepcalah ao awh. Hathnukkhu Cathut a pholen awh teh Cathut ni hringnae daw k pha sak lah kaawm e pankângainae phunglawk hah Jentelnaw koe haiyah a poe toe titeh a dei awh.

### *Antiok kho e Kawhmoun*

<sup>19</sup> Stiven rektap kecu daw k kâkapek awh e naw teh, Phoenicia ram koehoi saipras tuilum hoi Antiok kho totouh a cei awh. Ahnimouh teh Judah miphun dei laipalah, api koehai kamthang lawk teh dei awh hoe h toe. <sup>20</sup> Hatei, Saipras hoi Grik kho e tami a tangawn ahnimouh koe a baw k teh Antiok kho a cei awh. Grik lawk ka dei e Judahnaw koe haiyah a dei pouh teh Bawipa Jisuh e kamthang kahawi teh a dei awh. <sup>21</sup> Bawipa e thaonae kut teh ahnimouh hoi rei ao dawkvah, tami moikapap ni a yuem awh teh Bawipa koe a kâthung awh.

<sup>22</sup> Ahnimae kamthang teh Jerusalem kaawm e kawhmoun ni a thai navah, Barnabas hah Antiok kho cei hanlah a patoun awh. <sup>23</sup> Barnabas a pha teh, Cathut e lungmanae a hmu tore i teh a lunghawi, ahnimanaw hanlah yuemnae lahoi Bawipa koe pou kâhnai hanelah tha a poe teh a hroecoe. <sup>24</sup> Bangkongtetpawiteh, ahni teh tami kahawilah ao dawkvah, Kathoung Muitha hoi thoseh, yuemnae hoi thoseh, kakawi e lah ao. Hatnavah tami moikapap Bawipa daw k a kâthung awh.

<sup>25</sup> Barnabas teh Tarshish kho a cei teh, Sawl hah a tawng. <sup>26</sup> A kâhmo toteh Antiok khovah a thokhai teh kum touh thung kawhmoun hoi a



kamkhueng awh teh tami moikapap a cangkhai awh. Antiok khovah ahnukkâbangnaw hah Khristennaw telah hmaloe a kaw awh.

<sup>27</sup> Hatnae tueng dawkvah Jerusalem hoi Antiok khovah profetnaw a cei awh. <sup>28</sup> Ahnimouh thung dawkvah Agabus tie ni a kangdue teh, talaivan pueng dawkvah takang kalenpounge a tho han telah muitha lahoi a pâpho. Hote takang teh Kalawdias siangpahrang a tawk nah a tho. <sup>29</sup> Hatnavah a hnukkâbangnaw ni a tithai awh e patetlah kabawp hanelah lengkaleng a tâcokhai awh. <sup>30</sup> Ahnimouh ni hottelah a tâcokhai e hah Barnabas hoi Sawl koehoi patuen kacuenaw koe a patawn awh.

## 12

### *Jem theinae*

<sup>1</sup> Hatnae tueng nah Herod siangpahrang ni kawhmoun thungvah tami tangawn rektap hanelah a man awh. <sup>2</sup> Ahni ni Jawhan e hmau Jem hah tahloi hoi a thei. <sup>3</sup> Hettelah a thei nah Judahnaw a lunghawi awh tie a hmu dawkvah Piter hai man hanlah bout a kâcai. Hatnae tueng teh tonphuenhoehe vaiyei pawl lah ao. <sup>4</sup> Herod ni Piter a man hoi thongim thung a pakhum teh ka ring hanelah ransa phu touh dawkw pali touh kaawm e, phu pali touh koe a poe. Ahni ni ceitakhai pawl a baw toteh tamimaya hmalah a tâcokhai han a ngainae ao.

### *Piter thong bonae hoi hloutnae*

<sup>5</sup> Hettelah hoi Piter teh thongim thung a paung awh. Hatnavah kawhmoun ni Piter hanlah Cathut koe puenghoi a ratoum pouh awh. <sup>6</sup> Herod ni tamimaya hmalah a tâcokhai nahane hnin a pha hoehnahlan tangmin vah Piter hah sumbawtarui kahni touh hoi a pakhi awh teh ransa roi e rahak a i sak awh. Ka ring e naw ni hai takhang koe king a ring awh. <sup>7</sup> Hatnavah Cathut e kalvantami a tho teh thongim thung pheng a ang. Kalvantami ni Piter e a na koe a tek pouh teh, karang thaw leih atipouh. Hat nah tahma vah sumbawtaruinaw ahni kut dawkw hoi pak a ca pouh. <sup>8</sup> Kalvantami ni, taisawm kâyeng nateh khokkhawm khawm leih atipouh e patetlah Piter ni a kâroe. Hahoi, hni kâkhu nateh ka hnuk kâbang, bout atipouh. <sup>9</sup> Piter ni a thaw teh ahnie a hnuk a kâbang. Hatei kalvantami ni ati e hah kankak nahoe h mue, vision mue ka hmu a ti. <sup>10</sup> Thongim karingkungnaw ni, ringnae apasueke hoi apâhni e hmuen a tapoung teh kho thung kâennae sum longkha koe a pha roi. Hote longkha hai a mahmawk a kamawng teh hote hmuen koehoi a tâco roi. Hahoi lamthung buet touh dawkw a cei navah, kalvantami ni Piter teh a ceitakhai. <sup>11</sup> Hatnavah Piter a lungcai teh, Bawipa ni a kalvantami a patoun teh, Herod bawi e kut dawkw hoi Judahnaw ni a sak e naw thung hoi, kai hah na hlout sak katang e ka panue telah a dei.

<sup>12</sup> Hote hno kaawm e a lungcai katang hoiyah Mark ati awh e Jawhan e a manu Meri im lah a cei. Hote im dawkw taminaw a kamkhueng awh teh a ratoum awh. <sup>13</sup> Piter ni takhang tho a takhawng pouh nah Rhoda tie sannu ni tho paawng hanlah a cei. <sup>14</sup> Piter e a lawk tie a nout navah, tho paawng pouh laipalah lunghawinae lahoi im thung lah a yawng teh, tho koe Piter a kangdue, tie a dei pouh. <sup>15</sup> Ahnimouh ni, na pathu maw atipouh awh. Hatei napui ca ni a tang doeh telah makkhak a dei. Hatdawkvah ahnimouh ni yah, ahnie a kalvantami vai aw, atipouh awh. <sup>16</sup> Hatnavah Piter ni tho a takhawng. Ahnimouh ni a paawng teh a hmu navah a kângairu awh. <sup>17</sup> Sairasuep lah awh awh telah a kut hoi a kamnue sak.



Bawipa ni bangtelah hoi maw thongim thung hoi na tâco sak tie a dei pouh. Hete konglamnaw hah, Jem hoi hmaunawngghanaw koehai dei pouh awh atipouh teh alouklah a ceitakhai .

<sup>18</sup> Amom khodai toteh, Piter heh bangne ka tet ati awh teh ransanaw teh ruengrueng ati awh e heh kathoenge nahoe. <sup>19</sup> Herod ni tawng awh atipouh. Hatei hmawt awh hoe. Karingkungnaw pacei nateh thet awh telah kâ a poe. Hathnukkhu vah Herod teh Judah ram hoi Kaisarea kho lah a cei teh hawvah dawngdeng ao.

### *Herod pâri laihoi a due*

<sup>20</sup> Herod teh Taire hoi Sidon taminaw koevah, puenghoi a lungphuen dawkvah, ahnimanaw ni Herod koe a tho awh teh, Herod ka ring e Blastus hah kâmaihawikhai hanelah a dei pouh awh. Bangkongtetpawiteh ahnima ram teh siangpahrang e ram thung hoi canei ka hmawt e lah ao awh.

<sup>21</sup> Ahnimouh kamkhueng hnin vah Herod teh ama Siangpahrang e a puengcang kâmahrawk teh a bawitungkhung dawkvah a tahung teh tamimaya koe lawk a dei pouh. <sup>22</sup> Kamkhueng e taminaw ni, Lawk kadeikung heh tami kahring e lawk nahoe cathut e lawk doeh titeh a hram awh. <sup>23</sup> Herod ni Cathut hah a bari hoe dawkvah Bawipa e kalvantami ni vai touh laihoi a hem. Ahni teh pâri ni a ca teh a due. <sup>24</sup> Cathut lawk teh a kampai teh hoe a kamphung.

<sup>25</sup> Barnabas hoi Sawl ni kabawpnae thaw a cum roi hnukkhu Mark tie Jawhan hai a hrawi roi teh Jerusalem hoi bout a ban awh.

## 13

### *Thaw kârakuengnae*

<sup>1</sup> Antiok kho kaawm e kawhmoun dawkvah Barnabas, Niger telah kaw e Simeon, Sairen tami Lusius, Herod bawi e a hui Manean, Sawl tinaw, profetnaw hoi kacangkhaikungnaw teh ao awh. <sup>2</sup> Ahnimouh ni rawca hai laihoi Bawipa a bawk awh navah Kathoung Muitha ni Barnabas hoi Sawl heh kai ni ka hmoun pouh e thaw tawk hanelah na takhoe pouh awh telah a ti. <sup>3</sup> Hatnavah ahnimouh ni rawcahai ratoum hnukkhu ahnimouh roi e lathueng kut a toung awh teh a patoun awh.

### *Saipras tuilum koe thaw tawaknae*

<sup>4</sup> Hahoi, ahnimouh teh Kathoung Muitha ni a patoun awh e patetlah Seleukia kho lavah a cei awh teh Saipras lah long hoi a cei awh. <sup>5</sup> Salamis koe a pha awh navah, Judahnaw e sinakoknaw dawkvah Cathut lawk hah a pâpho awh. Ahnimouh ni kabawmkung lah Jawhan hai a hrawi awh.

<sup>6</sup> Hote tuilum pet a kâhei hnukkhu Paphos kho totouh a pha awh navah camkathoum e profet kaphawk Barjisuh a kâhmo awh. <sup>7</sup> Ahni teh, hote tuilum ka uk e bawi Sergius tie teh Pawlus e a hui lah ao. Khobawi ni Cathut lawk thai hanelah puenghoi a ngai dawkvah Barnabas hoi Sawl teh a kaw. <sup>8</sup> Hatei camkathoum e Elymas ni khobawi hah yuemnae koehoi phen sak hanelah a panki teh Barnabas hoi Sawl teh a ngang. <sup>9</sup> Hatnavah Pawl telah kaw e Sawl teh Kathoung Muitha hoi akawi dawkvah, <sup>10</sup> hote tami heh khei a khet teh, dymyennae hoi kakawi e kahrainathout capa, lannae taran lah kaawm e nang teh Cathut e lannae lamthung heh raphoe laipalah na awm thai hoe maw. <sup>11</sup> Khenhaw! Cathut kut teh na tak daww atu a pha toung dawkvah, na mit dawn vaiteh kho hmawt laipalah hninhtha kasawlah na o han atipouh. Hat nah tahma vah, a mit amom teh kho lah



a hmo pouh dawkvah ka hrawi hane tami vaivai a payam laihoi a tawng.  
<sup>12</sup> Hote khobawi ni a hmu navah Bawipa hoi kâkuen e cangkhai e naw hah kângairu lahoi a pholen teh a yuem.

*Antioch kho Pawl kamthang lawk a dei*

<sup>13</sup> Pawl hoi a huinaw teh Paphos kho hoi long hoi a cei awh teh Pamfilia ram Perga khovah a pha awh. Hatnavah Jawhan teh ahnimouh hoi a kamphei teh Jerusalem kho lah a ban. <sup>14</sup> Ahnimanaw teh Perga kho hoi bout a cei awh teh, Pisidia ram Antioch kho a pha awh. Sabbath hnin vah sinakok thung a kâen awh teh a tahung awh. <sup>15</sup> Kâlawk cauknaw hoi profet cauknaw a touk awh navah, sinakok kaukkungnaw ni tami a patoun teh, ka hmaunawngghanaw tamimaya thapoelawk dei han awm pawiteh dei awh loe telah atipouh awh.

<sup>16</sup> Hatnavah, Pawl ni a thaw teh, kut a dâw hnukkhu Isarel miphunnaw hoi Cathut ka taket e naw ka lawk thai awh haw. <sup>17</sup> Isarel miphunnaw Cathut ni maimae mintoenaw hah a rawi teh Izir ram san lah ao awh navah miphun kalenpoung lah a coung sak teh, a kut thakaawmpoung hoi ahnimouh teh hote ram thung hoi a tâco sak toe. <sup>18</sup> Kum 40 touh thung thingyei yon dawka khetawt. <sup>19</sup> Hahoi, Kanaan ram kaawm e miphun phun sari touh e naw hah a raphoe teh ahnimae ram dawka taminaw hah raw a rei awh teh ao sak. <sup>20</sup> Hatteh, kum 450 touh a ro. Hahoi, profet Samuel se totouh lawkcengkungnaw a poe. <sup>21</sup> Ahnimouh ni siangpahrang a hei awh navah Cathut ni Benjamin miphun lah kaawm e Kish capa Sawl teh kum 40 touh thung siangpahrang hanelah a poe awh. <sup>22</sup> Hahoi ahni hah a takhoe teh, Isarel siangpahrang lah Devit hah a tawm pouh. Ahni hah a kampakhai teh hettelah a dei, ka lung ka youk ni teh kaie ngainae ka kuep sak hane tami Jesi capa Devit ka hmu toe, telah a ti.

<sup>23</sup> Cathut lawkkam patetlah Isarelnaw hane rungngangkung Jisuh teh Devit catoun dawka hoi a tâco sak. <sup>24</sup> Hote Bawipa a tho hoehnahlan vah Jawhan ni Isarelnaw pueng koe pankângainae baptisma kong sut a pâpho toe. <sup>25</sup> Jawhan teh a tawka e thaw a cum tawmlei nah, nangmouh ni kai hah api lah maw na pouk awh vaw. Kai teh ka tho hane Bawipa nahoe. Ahni teh ka hnuklah doeh a tho. Ahni khok dawka e khokkhawm rui patenghai rasu pouh hanlah kai kamcu hoeheh a ti.

<sup>26</sup> Abraham catoun lah kaawm e naw hoi nangmouh thung e Cathut ka bari e hmaunawngghanaw, hete rungngangnae kamthang kahawi teh kaimouh koe poe lah ao toe. <sup>27</sup> Jerusalem e taminaw hoi kacue e naw ni, hote Bawipa hoi Sabbath hnintangkuem touk lah kaawm e profet lawknaw hai a thai panuek awh hoeheh dawkvah, hote Bawipa hah a theinae lahoi profet lawknaw teh a kuep sak awh toe. <sup>28</sup> Ahnimouh ni Bawipa hah thei thai nahane yon a tawnga e ei a hmu awh hoeheh nahlangva vah thei hanelah Pailat Bawi koe a hei awh. <sup>29</sup> Hottelah hoiyah Bawipa noe lahoi thut lah kaawm e pueng a kuep sak awh hnukkhu, a ro hah thing dawka hoi a rasu awh teh, tangkom dawka a pakawp awh. <sup>30</sup> Hatei, Cathut ni Bawipa teh duenae koehoi a thaw sak toe. <sup>31</sup> Bawipa teh Galilee hoi Jerusalem totouh kahlawng lah a cei navah, amae a hnukkâbangnaw koe hnin moikapap a kamnue pouh. Ahnimouh teh, Bawipa kapanuekkhaikung lah ao awh. <sup>32</sup> Atuvah, hete lunghawinae kamthang teh nangmouh koe a pha thai nahanlah hi ka tho e doeh. <sup>33</sup> Cathut ni Jisuh hah a thaw sak teh, mintoenaw e catoun lah kaawm e maimouh han lah, hote lawkkam hah a kuep sak toe. Het hateh apâhni e Sam dawka nang teh kaie Ka Capa lah na



o. Sahnin vah nang hah na khe sak toe, telah a thut tangcoung e patetlah ao. <sup>34</sup> Duenae koehoi bout a thaw nahane kong hoi rawknae dawk bout pha hoe nahanelah Cathut ni a dei e teh, kathounge hoi yuemkamcu e yawhawinae Devit koe lawk ka kam tangcoung e hah nangmouh koe na poe awh han tie hah doeh. <sup>35</sup> Hatdawkvah alouke Sam la dawk hai Bawipa hanlah houk kathounge naw teh bout pawk sak mahoe hah toe telah bout a dei. <sup>36</sup> Devit ni amae tueng dawk Cathut thaw a tawk teh a due hnukkhu, mintoenaw e phuen thung pakawp teh pawknae koe a pha. <sup>37</sup> Hateiteh Cathut ni thaw sak lah kaawm e Bawipa teh pawk hoe hah toe. <sup>38</sup> Hatdawkvah ka hmaunawngghanaw, hote Bawipa lahoi yon ngaithoumnae kamthang nangmouh koe pâpho e hah, ka yuem pueng ni Mosi e kâlawk lahoi lan sak thai hoe hah e thung hoi na lan sak toe tie panuek awh. <sup>39</sup> Hote Bawipa lahoi na lan toe telah khoe lah onae nakunghai, nangmouh ni panuek awh haw. <sup>40</sup> Hatdawkvah, ayâ ka pacekpahlek e naw, khien awh, kângairu awh nateh, rawknae koe phat awh. <sup>41</sup> Bangkongtetpawiteh kai ni nangmae se dawk hno buet touh ka sak han. Tami buethuet touh ni hote hah nangmouh koe pheng ka pâpho nakunghai, nangmouh ni khoeroe na yuem a mahoe telah profetnaw hno lahoi dei tangcoung e teh, nangmouh koe a bo hoe hah nahanlah kâhruetcueth awh atipouh.

### *Pawl hoi Barnabas Antiok kho a pha*

<sup>42</sup> Pawl hoi Silas a ban roi navah hmalae sabbath hnin haiyah hete kamthang bout dei pouh hanelah Jentelnaw ni a kâhei awh. <sup>43</sup> Sinakok hoi a tâco awh hnukkhu vah, Judahnaw hoi Judah phung lah kâen ni teh Cathut ka bawk e naw ni Pawl hoi Barnabas hnuk a kâbang awh. Cathut lungmanae dawk pou awm a loe telah ahnimouh roi ni tha a poe roi.

<sup>44</sup> Hmalae sabbath hnin dawk teh lawkkatang thai hanelah khobuem a kamkhueng awh. <sup>45</sup> Hatei, Judahnaw ni hote tamihupui hah a hmu awh navah, a ut awh teh Pawl ni a dei e hoi kâtaran lah dudamnae lawk a dei awh.

<sup>46</sup> Hatnavah Pawl hoi Barnabas ni lungtang laihoi a dei roi e teh, Cathut e lawkkatang hah nangmouh koe hmaloe pâpho han ka ngai ei teh nangmouh teh a yungyoe hringnae na hmu awh nahanlah na kamcu awh hoe hah dawkvah, Jentelnaw koe lah ka kamlang awh toe. <sup>47</sup> Bangkongtetpawiteh, Bawipa ni, nangmouh teh rungngangnae hah talai pout totouh pâpho hanelah, kai ni nangmanaw teh Jentelnaw e angnae lah na ta awh toe telah kaimouh koe kâ na poe toe atipouh.

<sup>48</sup> Jentelnaw ni hote lawk a thai awh navah, a lunghaw i awh teh, Bawipa e lawk hah a bawilen sak awh. Yungyoe hringnae coe hanelah hmoun tangcoung e tami pueng nihaiyah a yuem awh. <sup>49</sup> Hettelah hoi Bawipa e a lawkkatang teh haw e khoram pueng dawk a kamthang. <sup>50</sup> Hatei, Judahnaw niyah Cathut ka bawk ni teh bari kaawm e napuinaw hoi khobawinaw hah a hroecoe awh teh Pawl hoi Barnabas hah rektap sak hanelah a tacuek awh. Ahnimouh roi hah amamae kho dawk hoi a pâlei awh. <sup>51</sup> Hattoteh Pawl hoi Barnabas ni a khok dawk e vaiphu a takhawng sin teh Ikonium kho lah a cei roi. <sup>52</sup> A hnukkâbangnaw hai lunghawinae hoi thoseh, Kathoung Muitha hoi thoseh, akawi awh.



<sup>1</sup> Pawl hoi Barnabas ni Ikonium kho Judah miphunnaw e sinakok vah a kâen roi teh, a pâpho roi navah, Judah miphunnaw hoi Grik miphunnaw tami moikapap ni a yuem awh. <sup>2</sup> Hatei ka yuem hoe e Judah miphunnaw niyah Jentelnaw hah a tacuek awh teh a hmaunawngna rahak kâpohoe hnae a tâco sak. <sup>3</sup> Hatdawkvah ahnimouh roi ni moi kasawlah ao sin roi teh Cathut e lawkkatang hah taranhawi laihoi a kampangkhai roi. Bawipa ni hai ahnimouh roi e kut dawkh hoi mitnoutnaw hoi kângairu hnonaw hah sak thainae kâ a poe teh, amae lungmanae lawkkatang koe lah a kampangkhai. <sup>4</sup> Kho thung e taminaw teh kahni touh lah a kâkapek awh. Atangawn teh Judahnaw koelah a tangawn teh gunceinaw koe lah a kampang awh. <sup>5</sup> Jentelnaw hoi Judahnaw ni amamae khobawinaw hoi cungtalaw gunceinaw hah rektap vaiteh talung hoi ka dout lah dêi han ati awh e hah, <sup>6</sup> Gunceinaw ni a panue awh toteh, Likonia ram kaawm e Listra hoi 'Derbi kho tengpam vah kounge a yawng awh teh, <sup>7</sup> haw e hmuene koe kamthang kahawi a pâpho awh.

### *Barnabas hoi Pawl hah cathut ati awh*

<sup>8</sup> Listra khovah kaawm e, a manu vawn thung hoi vai touh hai ka cet boihoeh e khokkhem tami buet touh teh Pawl ni a dei e lawk a thai. <sup>9</sup> Pawl ni a khet teh yuemnae a tawn e, a hmu navah, <sup>10</sup> thaw nateh kangdout haw telah kacaipounglah a dei pouh teh hluet a thaw teh a cei thai.

<sup>11</sup> Pawl ni a sak e hno a hmu awh navah 'Ikonium lawk hoi a dei awh e teh cathutnaw heh tami lah a kâsak teh maimouh koe a kum ati awh. <sup>12</sup> Ahnimouh ni Barnabas hah Zeus ati awh teh, Pawl heh phung kadeikung hoi kahrawikung lah ao dawkvah, Hermes atipouh awh. <sup>13</sup> Vaihma Zeus e bawkim teh kho alawilah ao teh, tamimaya hoi thuengnae sak hanelah a ngai awh dawkvah, maitotannaw hoi a peinau hah kho thung a kâenkhai awh.

<sup>14</sup> Guncei Barnabas hoi Pawl ni hottelah ati awh e a thai navah amamae khohna a ravei teh taminaw e rahak a kâen. <sup>15</sup> Barnabas hoi Pawl ni hei nangmanaw bangdawkmaw hettelah na sak awh. Kaimouh hai nangmouh patetlah talai dawkh kho ka sak awh van e nahoehmaw. Nangmouh ni het patet e yawmyin hno na sak awh e hah cettakhai awh. Kalvan, talai, tuipei hoi a cawngca kasakkung kahring Cathut dawkh na lungkâthung awh nahanlah kaimouh teh kamthang kahawi ka dei e doeh. <sup>16</sup> Yo kaloum e senaw dawkvah, Cathut ni taminaw pueng hah amamae lamthung a dawn thai nahan pak a hnoun. <sup>17</sup> Hatei nangmouh koe hnokahawi a sak e, canei kakhoutcalah a poe teh a lunghawi sak nahanlah, kalvan hoi kho a rak sak teh, atimunaw a paw sak. Ratui ahawi sak teh Bawipa hawinae kampangkhai laipalah kaawm thai awh hoeh telah Pawl hoi Barnabas ni a hramkikhai roi. <sup>18</sup> Ahnimouh roi ni hottelah a hramkhai roi dawkvah thuengnae sak hoeh nahanlah rangpuinaw hah puenghoi a cakâ thai awh.

<sup>19</sup> Hathnukkhu Antiok kho hoi Ikonium kho lahoi Judah miphunnaw teh a tho awh teh rangpuinaw pueng a pâkhueng awh teh Pawl hah talung hoi a dei awh. A due toe ati awh teh kho alawilah a sawn awh. <sup>20</sup> Hatei a hnukkâbangnaw ni a khet lahun nah Pawl bout a thaw teh kho thung bout a kâen. A tangtho vah Pawl teh Barnabas hoi Derbi kho lah a cei toe.

### *Kawhmoun a kangdue sak*

<sup>21</sup> Ahnimanaw ni hote kho dawkvah, kamthang kahawi a dei awh teh tami moikapap ni a hnukkâbang lah a coung awh. Hahoi teh Listra lah a ban awh teh, Ikonium hoi Pisidia ram Antiok kho lah a cei awh.



<sup>22</sup> Yuemnae dawк kacaklah kangdout awh telah tha a poe hnukkhu, maimanaw teh Cathut uknaeram dawк kâen nahanlah rucatnae moi khang awh han telah a dei pouh. <sup>23</sup> Kawhmoun tangkuem dawк hai kacuenaw a rawi pouh teh, rawcahai laihoi a ratoum awh hnukkhu, amamouh ni a yuem awh e Bawipa e kut dawк ahnimanaw hah a hnawng awh. <sup>24</sup> Hahoi teh Pawl hoi Barnabas teh Pisidia ram a tapoung roi teh Pamfilia ram lah a pha roi. <sup>25</sup> Perga kho lawк a pâpho hnukkhu Attalia kho lah a cei roi.

<sup>26</sup> Hote kho koehoi atu e a tawк awh e thaw a cum awh nahanelah a patounnae Antiok kho lah long hoi bout a cei roi. <sup>27</sup> Hawvah a pha toteh, kawhmoun hah a kamkhueng sak teh, ahnimouh roi hno lahoi Cathut ni a sak e hno hoi Jentelnaw koe yuemnae takhang a kamawngnae hah a dei pouh awh. <sup>28</sup> Hathnukkhu haw vah hnukkâbangnaw koe hnin moi kasawlah ao awh.

## 15

### *Antiok kho hoi kâounnae*

<sup>1</sup> Tami bangpatetnaw ni Judah ram lahoi a tho awh teh, Mosi e kâlawк patetlah vuensomanae ka hmawt hoeh e ni rungngang lah na awm thai mahoe, telah hmaunawngghanaw a cangkhai awh. <sup>2</sup> Hatnavah Pawl, Barnabas ti hoi ahnimanaw teh kâounnae puenghoi ao dawкvah, hmaunawngghanaw ni, Pawl, Barnabas hoi alouke a hnukkâbangnaw hoiyah hote laidei hanelah Jerusalem kaawm e gunceinaw hoi kacuenaw koe a cei awh hane lawк a dei awh. <sup>3</sup> Kawhmoun ni ahnimanaw yo a thak awh. Phoenicia hoi Samaria ram lahoi pou a cei awh navah, Jentelnaw koe a lungpatawnae kong ahnimouh ni a dei awh teh hmaunawngghanaw pueng a lunghawi sak awh. <sup>4</sup> Jerusalem a pha awh navah, kawhmoun hoi Gunceinaw, kacuenaw ni a dawn awh. Ahnimouh ni Cathut ni ahnimouh hno lahoi hno a sak e naw a dei pouh awh.

<sup>5</sup> Hatei Farasinaw koe lahoi ka yuem e tami tangawn ni a kangdue awh teh, Jentelnaw hah vuensoma sak hane hoi Mosi e kâlawк tarawi sak hanelah lawкthui hanelah ao ati awh.

### *Jerusalem kamkhuengnae*

<sup>6</sup> Hatdawкvah gunceinaw hoi kacuenaw ni hote lawк paceinae pouk hanelah a kamkhueng awh. <sup>7</sup> Tha hoi a kâoun awh hnukkhu vah Piter ni a kangdue teh hmaunawngghanaw, Jentelnaw ni kamthang kahawi a thai awh teh, a yuem awh thai nahanlah Cathut ni nangmouh thung hoi kai heh kadeikung lah na rawi e na panue awh. <sup>8</sup> Lungthin be ka panuek e Cathut ni Kathoung Muitha heh maimouh na poe e patetlah ahnimouh hai a poe awh teh ahnimouh koelah a kampangkhai. <sup>9</sup> Cathut ni ahnimouh hoi maimouh khoeroe kapeknae awm laipalah yuemnae lahoi ahnimae lungthin a thoungsak. <sup>10</sup> Hatdawкvah nangmouh ni mintoenaw hoi maimouh ni hai phu thai hoeh e hno teh ahnimae a loung dawк na patue e lahoi atuvah Cathut tanouk hanlah na ngai awh. <sup>11</sup> Maimouh hai ahnimouh patetlah Bawipa Jisuh Khrih e a lungmanae kecu dawк rungngang lah o teh yuem awh, atipouh.

<sup>12</sup> Hatnavah ka kamkhueng e tami pueng teh sairasuep lah ao awh teh, Barnabas hoi Pawl ti ni ahnimouh koehoi Jentelnaw koe Cathut ni a sak e mitnoutnae hoi kângairuna e dei awh e a thai awh. <sup>13</sup> Ahnimanaw ni lawк dei e a pâbaw awh hnukkhu, Jem ni hmaunawngghanaw, kaie ka lawк thai awh haw. <sup>14</sup> Cathut ni ama hanlah Jentelnaw thung hoi a



miphun lah a coe nahan, ahnimouh koe hmaloe a thonae hah Simeon ni apasuek vah a dei toe. <sup>15</sup> Profetnaw e a lawk dei e hai hete a lawk hoi a kâvan. <sup>16</sup> Cakathoung ni, hetnaw e hnuklah kai ni bout ka tho vaiteh ka rawm tangcoung e Devit e lukkareiim hah bout ka sak han. Raphoe tangcoung e hote rim hah bout sak lah ao vaiteh ka caksak han. <sup>17</sup> Ka min lahoi ka kaw e Jentelnaw hai a yungyoe ka hring e Cathut a tawng awh nahane doeh telah, <sup>18</sup> ayan hoi hete lawk ka panueksakkung Bawipa ni a dei atipouh. <sup>19</sup> Hatdawkvah Jentelnaw koehoi Cathut koe lah a lungkâthung e naw koe runae poe hanlah awmhoe. <sup>20</sup> Meikaphawk dawk thounghoe hnae, kamsoumhoehe napui tongpa yonnae, lahuen kara e moi hoi a thinaw hah roun hanelah ahnimouh koe ca lahoi thaisak hanlah ka pouk. <sup>21</sup> Bangkongtetpawiteh ayan hoi kho tangkuem vah Mosi e phung lawk ka dei e ao teh, hote lawk hah sabbath hnintangkuem sinakoknaw dawk ouk touk awh atipouh.

### *Jentelnaw koe poe e ca*

<sup>22</sup> Hatnavah Gunceinaw, kacuenaw hoi Kawhmoun abuemlah ni amamouh thung dawk e tami a rawi awh teh, Pawl, Barnabas hoi hmaunawngghanaw thung dawk e kahrawikung lah kaawm awh e Barsabbas telah a kaw awh e Judah hoi Silas a rawi awh. <sup>23</sup> Ahnimouh koe a sin sak awh e ca dawkvah, gunceinaw kacuenaw hoi hmaunawngghanaw ni Antiok kho Siria ram hoi Cilicia ram kaawm e Jentel hmaunawngghanaw kut na man awh. <sup>24</sup> Kaimouh koe e tami bangpatet ni kaimouh ni patoun laipalah a cei awh teh lawk aphunphun lah a dei awh teh, nangmouh na lungpuen awh teh, a rucatnae na poe awh tie ka thai awh. Vuensom na a awh vaiteh, kâlawk hai na tarawi awh roeroe han a ti awh. Hotpatetlae lawk dei hanelah ahnimouh koe kâpoelawk banghai ka poe awh hoe. <sup>25</sup> Hatdawkvah kaimouh ni ka kâhmo awh teh, maimouh ni pahren e Pawl hoi Barnabas hoi cungtalang nangmouh koe tami patoun hanelah ka lung a kuep awh. Hatdawkvah maimouh ni Bawipa Jisuh Khrih min kecu dawkvah amamae hringnae kâphumnaw lah kaawm e, <sup>26</sup> maimouh ni lungpataw awh e Barnabas hoi Pawl tinaw hoi reirei patoun hanelah tami kahni touh rawi hane ka lungkuep awh. <sup>27</sup> Hatdawkvah Judas hoi Silas hah ka rawi awh teh nangmouh koe ka patoun awh. Ahnimouh ni lawk hoi hai a dei awh han doeh. <sup>28</sup> Hete phunglamnaw hloilah alouke hnokari titca hai nangmouh van toung sak hoe hanelah Kathoung Muitha hoi kaimouh ni ka hnâbo awh. <sup>29</sup> Hote phunglam teh nangmouh ni meikaphawk bawkae hno, thi, lahuen kara e moi, hoi kamsoumhoehe napui tongpa yonnae hah roun awh. Nangmouh teh hete hnongaw hoi kathoung lah na awm awh pawiteh ahawi. Na tak dam awh naseh telah a thut pouh awh.

### *Jerusalem hoi patawn e ca ahawinae*

<sup>30</sup> Gunceinaw a patoun navah Antiok kho lah a cei awh teh, haw a pha hoi kayuemnaw a pâkhueng awh hnukkhu ca hah ahnima kut dawk a poe awh. <sup>31</sup> Ahnimouh ni hote ca a touk awh teh thapoena lawk dawk a konawm awh. <sup>32</sup> Judah hoi Silas amamouh roi hai profet lah ao roi dawkvah ahnimouh koe thapoena lawk a dei pouh roi. <sup>33</sup> Ahnimanaw teh hnin dongdeng ao awh teh, hmaunawngghanaw ni lungmawng lah a thak awh teh kapatoungkungnaw koe let a ban sak awh. <sup>34</sup> Hatei Silas teh hawvah tongtang ao. <sup>35</sup> Pawl hoi Barnabas teh Antiok kho ao navah alouke taminaw hoi cungtalang Bawipa e lawk hah a cangkhai awh.

### *Pawl hoi Barnabas a kamphei roi*



<sup>36</sup> A hnin moi ao hoi Pawl ni Barnabas koe, Bawipa e lawk pâpho tangcounghae kho daw k kaawm e hmaunawngghanaw, bangtelane ao awh tie yo hloe hanelah ahnimouh koe bout cet awh sei atipouh. <sup>37</sup> Barnabas ni Mark tie Jawhan hai hrawi hanelah a ngai. <sup>38</sup> Hateiteh, Pawl ni Pamfilia ram vah ahnimouh hoi a kamphei teh oun a cei dawkvah, a thaw tawknae koe ahnimouh hoi reirei ka cet ngai hoe h e teh kaw hanelah awmhoeh telah a pouk. <sup>39</sup> Hatnavah puenghoi kâounnae ao dawkvah buet touh hoi buet touh a kamphei roi toe. Barnabas ni Mark a hrawi teh Saipras tuilum lah a cei. <sup>40</sup> Pawl ni Silas a rawi teh hmaunawngghanaw lahoi Bawipa e lungmanae daw k hnawng lah ao hnukkhu a kamthaw. <sup>41</sup> Ahni teh Siria ram hoi Cilicia ram lah tawngtang a cei teh, kawhmounnaw hah a cak sak.

## 16

### *Pawl ni Timote a kamyawngkhai*

<sup>1</sup> Hathnukkhu hoi Pawl teh Derbi kho hoi Lustra kho a pha. Lustra kho daw k Timote telah a min poe e a hnukkâbang buet touh ao. Ahnie a manu teh ka yuem e Judah tami napui buet touh doeh, a na pa teh Grik tami doeh. <sup>2</sup> Ahni teh Lustra lahoi, Ikonium kho daw k kaawm e hmaunawngghanaw thung bari kamcu e lah ao. <sup>3</sup> Pawl ni Timote hrawi hanelah a ngai. Ahnie a na pa Jentel tami tie hote hmuen koe kaawm e Judah tami pueng ni a panue awh daw k vuensom a a pouh awh. <sup>4</sup> Ahnimouh teh khopuinaw koe yuengyoe a cei awh navah, Jerusalem kho daw k kaawm e gunceinaw hoi pastornaw lawk a poe e naw hah kayuemnaw tarawi hanelah a poe awh. <sup>5</sup> Hottelah kawhmounnaw teh yuemnae daw k kacaklah ao teh, hnin touh hnukkhu hnin touh a pung awh.

### *Masidonia tami hram lawk*

<sup>6</sup> Frigia ram, Galati ram lah a cei awh hnukkhu Asia ram daw k lawkkatang hah dei hoe hanelah Kathoung Muitha ni a ngang dawkvah, <sup>7</sup> Misia ram lah a pha awh teh, Bitunia ram lah cei han ati awh navah, Muitha ni kâ a poe hoe hanelah dawkvah, <sup>8</sup> Misia ram a tengpam a cei awh teh, Troas kho a pha awh. <sup>9</sup> Tangmin vah Pawl koe vision a kamnue. Masidonia tami buet touh ni a kangdue teh, Masidonia ram lah raka nateh, kaimouh na kabawm haw telah a kâhei. <sup>10</sup> Hote vision a hmu nah, Masidonia ram daw k kamthang kahawi dei sak hanelah Bawipa ni kaimouh na kaw awh toe telah hnâ ka bo awh teh, hote ram koe lah cei hanelah tang ka kâcai awh.

### *Lidia kâthungnae*

<sup>11</sup> Hatdawkvah, Troas kho hoi long hoi ka cei awh teh Samotaret tuilum koe lah kuekluek ka cei awh teh, a tangtho vah Neapolis khovah ka pha awh. <sup>12</sup> Hote kho daw k hoi bout ka tâco awh teh Masidonia ram thung kaawm e Filippi khopui ka pha awh teh dongdeng hnin ka saw lah ka o awh.

<sup>13</sup> Sabbath hnin vah kaimouh kho alawilah ka tâco awh teh ratoumnae hmuen ao han mue telah ka pouk awh teh tuipui rai lah ka cei awh. Hote hmuen koe ka tahung awh teh napuinaw hanlah ka dei pouh awh. <sup>14</sup> Hatnavah hnipaling kâyawt e Tiatira kho e Lidia telah a kaw awh e napui, Cathut ka baw k e buet touh ao. Pawl ni a dei e phung lawk hah sairasuepcalah a thai nahan Cathut ni a lungthin tho a paawng pouh. <sup>15</sup> Hote napui teh a imthungkhunaw hoi Baptisma a coe hnukkhu, kai hah



Bawipa koe yuemkamcu e tami lah na pouk awh pawiteh, kai im kâen nateh awm awh ei telah a kâhei teh kaimanaw koe na dei pouh awh.

### *Pawl hoi Silas thongim bonae*

<sup>16</sup> Hathnukkhu hoi kaimouh teh ratoumnae im koe ka cei awh navah hmalah han ka dei thai e, a thung kahrai kaawm e napui hoi ka kâhmo awh. Hote napui teh amae a bawipanaw hane ahawinae moi ka sak e lah ao. <sup>17</sup> Hote napui ca teh Pawl hoi kaimae hnuklah a kâbang teh ahnimouh teh kalenpounge Cathut e kamthang lawk rungngangnae lawk ka dei e doeh telah a hram. <sup>18</sup> Hottelah, napuica ni a ngelawn dawkvah, Pawl ni a kamlang sin teh Jisuh Khrih min lahoi nang teh tâcawt telah kâ na poe. Hat nah tahma vah a thung hoi kahrai teh tang a tâco toe.

<sup>19</sup> Ahnie bawinaw ni a bawireng thai nahanelah ngaihawinae awmhoeh toe tie a panue torei teh Pawl hoi Silas hah a man awh teh khobawinaw koe a thak awh. <sup>20</sup> Khobawinaw koe a pha roi toteh hetnaw hah Judah taminaw law pawiteh maimae khopui rucat a poe awh. <sup>21</sup> Rom tami lah kaawm e maimanaw ni yuem hoeh han e, tawk hoeh hane phunglawknaw a cangkhai awh telah ati awh.

<sup>22</sup> Kamkhueng e taminaw ni ahnimouh koe lah tang a kampangkhaw awh teh Pawl hoi Silas hah a taran awh. Khobawinaw ni ahnimae angki a rading pouh teh ruitaboung hoi hem sak hanelah kâ a poe. <sup>23</sup> A hem awh teh, hmâtan a ca awh. Kahawicalah ring awh telah thongim kaukkung koe kâ a poe teh thongim thung a paung awh. <sup>24</sup> Hottelah lawkthui e patetlah thongim kaukkung ni thongim thung a paen teh a khok hlong a buet pouh awh.

### *Thongim karingkung lung kâthungnae*

<sup>25</sup> Karumsaning Pawl hoi Silas teh Cathut koe ratoum laihoi Cathut a pholen roi. Thongim ka bawt e naw ni hai a thai pouh awh. <sup>26</sup> Pouk laipalah Tâli puenghoi a no dawkvah thongim a kâhuet. Takhangnaw koug a kamawng. Thongkabawtnaw pâkhinae sumrui pueng pak a ca pouh. <sup>27</sup> Thongim kaukkung a kâhlaw teh thongim takhangnaw a kamawng e a hmu navah thongim kamungnaw koug a yawng awh mue toe telah a pouk dawkvah tahloi hoi amahoima kâhei hanelah a kâcai. <sup>28</sup> Hatei Pawl niyah namahoima runae kâpoe hanh, kaimanaw hete hmuene koe be ka o awh telah kacaipounglah a dei pouh.

<sup>29</sup> Hattoteh thongim a kaukkung ni hmaito hoi yawng laihoi a kâen teh Pawl hoi Silas e hmalah pâyaw laihoi a tabo. <sup>30</sup> Hathnukkhu ahnimouh roi alawilah a tâcokhai teh ka bawipa, rungngang lah o thai nahanlah bangmaw ka sak han ti teh a pacei. <sup>31</sup> Ahnimouh roi ni Bawipa Jisuh Khrih hah yuem haw. Hottelah na yuem pawiteh nama hoi na imthungnaw rungngang lah na o awh han atipouh roi. <sup>32</sup> Hathnukkhu ama hoi a imthungkhu daw kaawm e naw pueng koe Bawipa e lawk hah a dei pouh roi. <sup>33</sup> Thongim kaukkung ni hatnae tangmin vah ahnimanaw hah a hrawi teh, a hmâtannaw tâsi a hluk pouh. Hathnukkhu ama hoi a imthungkhu naw abuemlah baptisma koug a coe awh. <sup>34</sup> Ahni ni Pawl hoi Silas hah ama im a kaw teh, rawca a pacapanei teh, imthung abuemlahoi Cathut a yuem awh dawkvah a konawm awh.

### *Hmantang kâheinae*

<sup>35</sup> Khodai toteh khobawinaw ni, ram karingkungnaw a patoun teh, ahnimanaw hah tha awh leih atipouh awh. <sup>36</sup> Hatnavah thongim



kaukkung ni hote kamthang hah Pawl koe a dei pouh. Khobawinaw ni tami a patoun awh teh, nangmanaw hah tha hanelah lawk na thui awh. Hatdawkvah, atu tâcawt awh nateh lungmawngcalah cet awh lawih atipouh. <sup>37</sup> Hatei Pawl ni ram ka ring e naw koe Rom tami lah kaawm e kaimanaw hah akungkhei laipalah taminaw hmalah na hem awh teh, thongim thung na paung awh hnukkhu, atu kaimanaw hah arulahoi maw na tha awh han vaw. Hottelah ti kawî na maw. Amamouh kuekluek tho awh naseh, kaimouh na rasat awh naseh atipouh

<sup>38</sup> Hattoteh ram karingkungnaw ni hote lawknaw hah khobawinaw koe a dei pouh awh. Ahnimouh roi teh Rom tami roi doeh tie a panue awh torei teh, a taki awh dawkvah, <sup>39</sup> amamouh kuekluek a tho awh teh a kâhei awh. Hathnukkhu a tâco sak awh teh, hote kho thung hoi tâco hanelah a kâhei awh. <sup>40</sup> Ahnimouh hai thongim thung hoi a tâco awh toteh, Lidia im a cei awh teh, hmaunawngghanaw hoi a kâhmo awh. Ahnimouh thapoelawknaw a dei pouh hnukkhu alouklah a cei awh.

## 17

### *Thesalon khovah kamthang lawk a pâpho awh*

<sup>1</sup> Hahoi teh Pawl hoi Silas teh Amphipolis kho hoi Apollonia kho a tapuet roi teh Thesalon kho a pha roi. Hote kho dawkvah Judahnaw e sinakok ao. <sup>2</sup> Pawl ni ahmoun e patetlah ahnimanaw kamkhuengnae koe a cei teh Sabbath hnin hnin thum touh thung Cakathoung hah a kâdeikhai awh. <sup>3</sup> Khrih teh reithainae a khang vaiteh duenae koehoi bout a thaw han tie kamcengcalah a pâpho teh, nangmouh koe ka pâpho e hete Jisuh raw doeh Khrih toe atipouh. <sup>4</sup> Ahnimouh thung dawk a tangawn ni yuemnae dawk a pha teh, Pawl hoi Silas tinaw hnuk a kâbang awh. Cathut ka bawk e Griknaw moikapap hoïyah napui kam kamsawng e naw ni hai a yuem awh.

### *Jason im vah kamcan onae*

<sup>5</sup> Hatnavah Judahnaw ni a ut awh dawkvah tami kaponaw a kaw awh teh a pâkhueng awh. Khopui thung ruengruengtî khai awh, Jason im hah khik a kalup awh teh, Pawl hoi Silas hah taminaw hmalah tâcokhai hanelah a tawng awh. <sup>6</sup> Hatei ahnimouh roi teh a hmu awh hoe haw dawkvah Jason hoi a hmaunawngghanaw hah, ukkungnaw koe a hrawi awh teh, kho tangkuem talaiwan heh ka pakhuppathan e naw hi haiyah a pha awh toe. <sup>7</sup> Jason ni ahnimouh ama im a luen sak. Ahnimanaw teh Sizar bawi hlolail alouke siangpahrang tie Jisuh ao ati awh teh, Sizar bawi hah a taran awh telah a hramki awh. <sup>8</sup> Hote lawk ka thai e khobuem hoi ukkungnaw a lungpuen awh. <sup>9</sup> Jason hoi alouke hmaunawngghanaw koe e rawngkhannae tangka a la teh ahnimouh teh bout a tha awh.

### *Berea khonaw*

<sup>10</sup> Pawl hoi Silas teh karum vah Berea kho a patoun awh. Hote kho dawk a pha roi toteh, Judahnaw e Sinakok vah a cei roi. <sup>11</sup> Berea kho e taminaw teh, Thesalon kho e kaawm e naw hlak a talue awh. Pawl tinaw ni a dei e hah lunghocalah hoi a dâw awh teh, laithoe maw atang maw tie hah a panue thai awh nahanelah, Cakathoung hnintangkuem a touk awh. <sup>12</sup> Ahnimanaw thung dawk tami moikapap ni a yuem awh. Bari kaawm e Grik napuinaw hoi tongpanaw ni hai a yuem awh. <sup>13</sup> Hateiteh Thesalon kho kaawm e Judah taminaw ni Pawl teh Berea kho hai Cathut lawk a dei tie hah a thai awh toteh, taminaw a tacuek awh teh, ruengruengtî



sak awh. <sup>14</sup> Hatdawkvah hmaunawngghanaw ni Pawl hah karanglah tuipui totouh a thak awh. Silas hoi Timote teh hote khothung ao roi. <sup>15</sup> Pawl ka thak e naw ni Athen kho totouh a thak awh. Silas hoi Timote hah a coung thai nathing karanglah kai koe tho roi loe tie kâ a poe e a sin awh teh a ban awh.

### *Athen khovah Pawl phanae*

<sup>16</sup> Pawl ni Athen khovah ahnimouh a ring lahun nah hote kho teh meikaphawknaw seng lah ao e hah a hmu dawkvah, a lungthung khang thai hoeh. <sup>17</sup> Hatdawkvah ahni teh sinakok dawk Judahnaw hoi Cathut ka baw e taminaw hoi a kâdei awh teh, anhla yonae koehai a kâdeikhai. <sup>18</sup> Epikurian hnukkâbangnaw hoi Satoiknaw nihai, Pawl hoi a kâdei awh. A tangawn ni hete tami ni bangmouh a deingai aw ati awh. A tangawn ni teh ramlouknaw e cathut kong vai a dei aw ati awh. Hettelah tinae teh Pawl teh Jisuh hoi boutthawnae kong a pâpho dawk doeh. <sup>19</sup> Hattoteh Pawl hah Aripakas yungim a kaw awh teh, hete cangkhae a katha e heh kaimouh hai panue kawimaw ati awh. <sup>20</sup> Bangkongtetpawiteh, ka thai awh boihoeh e, ka panue awh boihoeh e na dei e hah, kaimanaw hai panue hane ka ngai atipouh awh. <sup>21</sup> Athen khocanaw hoi imyinnaw teh kamthang lawk thai ngainae a hloilah alouklah hoi a tueng baw sak awh hoeh.

### *Aripakas yungim vah a pâpho*

<sup>22</sup> Hatdawkvah Pawl ni yungim lungui a kangdue teh, Athen nangmouh heh phunglam koe lah na thahmei poung awh tie ka hmu. <sup>23</sup> Na baw awh e naw ka khet navah, panue hoeh e Cathut hanelah titeh ca na thut awh e thuengnae khoungroe buet touh ka hmu. Nangmouh ni na panue awh hoeh e Cathut lawk kai ni ka dei han. <sup>24</sup> Talaivan hoi talai daw kkaawm e a cawngca kasakkung Cathut teh, kalvan hoi talai ukkung Bawi lah ao teh, tami e kut hoi sak e bawkimnaw thung awmhoeh. <sup>25</sup> Hathloilah, Cathut teh tami hringnae hoi kâhanaw pueng hoi hno cawngca pueng kapoekung lah ao dawkvah, ka panki e boiboe lah tami ni khetyawtnae panki hoeh. <sup>26</sup> Cathut ni tami buet touh daw hoi miphun abuemlah a sak teh, talai van pueng ao sak teh, a tue hoi ao awh nahane hmuen pueng hai lengkaleng a hmoun pouh. <sup>27</sup> Hettelah a tingainae teh, taminaw ni Cathut hah a tawng awh teh, a hmu hai khoun a hmu awh nahane doeh. Atangcalah maimouh buet touh rip hoi Cathut teh kahlat e nahoe. <sup>28</sup> Bangkongtetpawiteh, la ka phuengkungnaw ni, atangcalah maimouh teh amae catoun doeh telah a phueng awh e patetlah maimouh teh Bawipa lahoi hring awh, kâroe awh, o awh. <sup>29</sup> Maimanaw teh Cathut e canu capa lah o awh dawkvah, Cathut hah tami e thounnae hno lahoi sui hoi sak e, talung hoi sak e meikaphawknaw hoi a kâvan telah pouk hanelah awmhoeh.

<sup>30</sup> Cathut ni taminaw ni panue thai hoeh e a tue hah banglahai pouk hoeh eiteh, atuteh ram tangkuem kaawm e tami pueng hah pankângai hanelah kâ a poe toe. <sup>31</sup> Bangkongtetpawiteh, Cathut ni amamouh ni a khoe e Bawipa lahoi yah, talaivan heh lawkceng nahane hnin sut a hmoun toe. Hote Bawipa hah duenae koehoi a thaw sak teh, tami pueng koe mitnoutnae kancengcalah a poe toe.

<sup>32</sup> Duenae koehoi boutthawnae kong hah a thai awh toteh, tami tangawn ni a dudam awh. A tangawn ni hmalah bout thai eisei ati awh. <sup>33</sup> Hattoteh Pawl teh ahnimouh koehoi a tâco. <sup>34</sup> Hatei tami tangawn ni Pawl koe a kambawng awh teh a yuem awh. Ahnimanaw thung daw Aripakas yung



e tami buet touh lah kaawm e Dionisia hoi alouke napui Damaris tinaw hloilah napuinaw hai a bawk awh.

## 18

### *Kawrin kho kawhmoun a kangdue*

<sup>1</sup> Hathnukkuh, Pawl teh Athen kho hoi a cei teh Kawrin kho a pha. <sup>2</sup> Hote hmuen koe Pontus ram e Judah tami buet touh Aguila a kâhmo. Rom siangpahrang Klaudias ni Judah taminaw pueng Rom kho hoi tâco hanlah kâ a poe dawkvah, Aguila teh Itali lahoi a yu Priscilla hoi Kawrin kho lah a yawng roi. <sup>3</sup> Pawl teh ahnimouh roi kâhmo hanlah a cei teh, thaw tawk e a kâvan dawkvah, ahnimouh roi hoi rei ao awh teh thaw a tawk van. A thaw tawk awh e teh rimkasakkung lah ao awh. <sup>4</sup> Pawl ni Sabbath hnintangkuem sinakok dawk a cangkhai teh, Judahnaw hoi Griknaw hah a pâkhueng.

<sup>5</sup> Silas hoi Timote teh Masidonia ram hoi a tho roi nah, Pawl ni Judahnaw koe Jisuh teh Khrih doeh tie kacailah a dei pouh. <sup>6</sup> Hatei Judah miphunnaw ni ahni teh a taran awh teh, a dudam awh navah, ahni ni angki a kathuek teh, nangmae thi teh nangmae lû dawk bawt seh. Kai teh ka hlout. Atu hoi teh Jentelnaw koe ka cei han toe atipouh. <sup>7</sup> Hote hmuen koehoi a tâco teh Cathut ka bawk e Justus im vah a cei. Ahnie im teh sinakok teng vah ao. <sup>8</sup> Sinakok kaukkung Krispas hoi imthungkhunaw ni Bawipa teh a yuem awh dawkvah, Kawrin kho e kaawm e tami moikapap ni a thai awh teh a yuem awh dawkvah Baptisma a coe awh.

<sup>9</sup> Tangmin buet touh teh Cathut ni vision lahoi Pawl koe, taket hanh, pou pâpho. <sup>10</sup> Bangkongtetpawiteh, nang hoi cungtalah ka o. Apinihai nang koevah rektapnae thosak mahoe. Hete kho dawk kaie tami moikapap ao atipouh. <sup>11</sup> Hatdawkvah Pawl teh hote khopui dawk kum touh hoi thapa yung taruk touh ao. Ahnimanaw hah Cathut e lawk a cangkhai.

<sup>12</sup> Hatei, Gallio ni Akhaia ram dawkhobawi lungkângingcalah hoi a tawk nah Judahnaw ni Pawl a taran awh teh lawkcengnae tungkhung hmalah a tâcokhai awh. <sup>13</sup> Ahnimouh ni kâlawk hoi kâtaran lah Cathut bawk hane taminaw a pâkhueng telah ati awh.

<sup>14</sup> Pawl ni hai lawk dei hanlah a pahni a ang navah, Gallio ni Judahnaw koevah nangmouh Judahnaw kalan hoe e lawk, nahoe pawiteh kâdumkâyenna lawk buetbuet touh lah awh pawiteh kai ni na lawk ka ngai han. <sup>15</sup> Hatei nangmae lawknaw, kâlawnaw, minnaw hoi ka kâkuen e lah awh pawiteh, namamouh roeroe ni na dei awh han. Kai teh hot patet e naw hah ka dei ngai hoe atipouh teh, <sup>16</sup> ahnimanaw hah lawkcengnae tungkhung koehoi a pâlei awh. <sup>17</sup> Hattoteh sinakok ukkung Sosthenes hah a man awh teh, lawkcengnae tungkhung hmalah a hem awh. Hatei Gallio ni hotnaw hah banglahai ngai laipalah ao.

### *Antiok lah bout a banna*

<sup>18</sup> Pawl teh Kawrin khovah tueng moikasaw ao hnukkuh a hmaunawng-hanaw koevah ka dam lah atipouh teh, Siria ram lah long hoi a cei. Ahni hoi Priscilla hoi Aguila haiyah a cei van. Lawk a kam e patetlah Kenkhrea khovah a lû a ngaw. <sup>19</sup> Hahoi Efisa kho a pha awh navah, hote hmuen koe Priscilla hoi Aguila hoi a ceitakhai teh sinakok vah a kâen teh, Judahnaw hoi kamthang lawk a kâpangkhai. <sup>20</sup> Taminaw ni ahni teh hnin kasawlah o hanlah a dei awh ei, ngai pouh hoe. <sup>21</sup> Cathut ngainae lah awh pawiteh, nangmouh koe hmalah bout ka tho han, ati pouh teh ahnimanaw kut a



man hnukkhu Efisa kho hoi long hoi a tâco. <sup>22</sup> Kaisarea kho a pha hnukkhu Jerusalem lah a takhang teh kawhmoun hah kut a man. Haw hoi Antiok kho a cei cathuk.

<sup>23</sup> Pawl teh hote hmuen koe hnin kasawlah ao hnukkhu Galati hoi Frigia ramnaw pueng daw k a kâhlai teh a hnukkâbangnaw a cak sak.

### *Lawk deikathoum Apollos*

<sup>24</sup> Hatnavah, Alexandria kho kaawm e Judah tami buet touh Apollos ati awh e Efisa khovah a tho. Ahni teh lawk dei ka thoum e hoi Cakathoung daw athakaawm e lah ao. <sup>25</sup> Ahni teh Bawipa e lamthungnaw a panue teh muitha koe lah thao laihoi Jisuh e kamthang hah taminaw koe a cangkhai. Hatei Jawhan e baptisma dueng doeh a panue. <sup>26</sup> Ahni teh sinakok vah taranhawi laihoi a pâpho. Priscilla hoi Aquila ni a lawk dei e a thai roi nah alouklah a hrâwî teh Cathut e lawk hah kacaicalah a cangkhai roi. <sup>27</sup> Apollos ni Akhaia ram lah a cei hane a ngai navah a hnukkâbangnaw ni, hote hmuen koe kaawm e a hnukkâbangnaw ni a dawn thai awh nahanelah, ca a thut pouh awh. Hawvah a pha toteh Cathut pahren lahoi ka yuem e moikapap a kabawp. <sup>28</sup> Jisuh teh Khrih lah ao tie hah kamcengcalah Cakathoung daw kahawicalah a patue teh Judahnaw hah reprep a yue.

## 19

### *Efisa khovah misin tawknæ*

<sup>1</sup> Kawrin kho Apollos ao navah Pawl teh mon lam hoi Efisa kho a cei. <sup>2</sup> A hnukkâbangnaw hoi a kâhmo toteh, nangmouh ni na yuem awh navah, Kathoung Muitha na coe awh toung maw telah a pacei. Ahnimouh ni Kathoung Muitha coe hoi coe hoeh e ka panuek awh hoeh atipouh awh. <sup>3</sup> Hattoteh Pawl niyah, bangpatet e baptisma maw na coe awh vaw, telah let a pacei navah, ahnimouh ni, Jawhan e baptisma doeh ka coe ati awh. <sup>4</sup> Pawl ni Jawhan teh amae a hnuklah ka tho hane Bawipa hah yuem awh haw titeh pankângainæe baptisma doeh na poe awh. Hottelah a dei navah Jisuh Khrih doeh a dei ngai nah atipouh. <sup>5</sup> Ahnimouh ni a yuem awh toteh Jisuh min daw baptisma a coe awh. <sup>6</sup> Pawl ni ahnimouh lathueng kut a toung pouh toteh ahnimouh koe Kathoung Muitha a pha. Hatdawkvah ahnimanaw teh alouke lawknaw a dei awh teh, profet lawk a pâpho awh. <sup>7</sup> Ahnimanaw teh abuemlahoi hrahlaikahni touh a pha.

### *Sinakok vah kamthang lawk a pâpho*

<sup>8</sup> Hathnukkhu Pawl teh thapa yung thum touh thung sinakok vah Cathut uknaeram kamthang hah taranhawi laihoi a pâpho. <sup>9</sup> Hatei tami tangawn teh a lungpata awh dawkvah yuem laipalah tamimaya hmalah lamthung pathoe lawk a dei awh dawkvah, a hnukkâbangnaw hah a kaw teh ahnimouh koehoi a tâco teh, Tirannus sengim dawkvah hnintangkuem a cangkhai. <sup>10</sup> Kum hni touh thung hottelah a kâroe dawkvah Judahnaw, Griknaw hoi Asia ram kaawmnaw pueng ni Bawipa e lawkkatang teh a thai awh.

### *Efisa kho camthoumnae a raphoe pouh*

<sup>11</sup> Cathut ni Pawl kut daw hoi ka talue e kângairuhnonaw a sak. <sup>12</sup> A tak daw e hnica, hoehpawiteh a kâyeng e hnica a sin awh teh, ka dam hoeh e tak daw a nep awh navah, ahnimæe patawnae a kahma teh muitha kathoutnaw hai a tâco awh.



<sup>13</sup> Hatnavah yuengyoe kâva e Judah mipfun, camkathoumnaw ni, muithakathout ni a man e taminaw koevah, Pawl ni a pâpho e Jisuh min lahoi kâ na poe titeh, Jisuh min hah tanouknae lah a hno awh. <sup>14</sup> Hottelah ka tet e naw teh Judah tami vaihma bawi Skiva e capa sari touh hah doeh. <sup>15</sup> Hatnavah muitha kathoutnaw ni, Jisuh hai ka panue, Pawl hai ka panue, nangmanaw teh apinaw maw telah ati hnukkhu, <sup>16</sup> Hote muitha kathoutnaw ni a man e tami ni, ahnimanaw hah a cu sin teh, a kathuek a kayak dawkvah caici lah hmâtan hoi a yawng awh. <sup>17</sup> Efisa kho kaawm e Judahnaw hoi Griknaw ni hote kamthang a thai awh navah, a taki awh teh Bawipa Jisuh min hah bari kaawm lah a pholen awh. <sup>18</sup> Ka yuem e tami moikapap a tho awh teh, amamae a tawksak awh e naw hah a pâpho awh. <sup>19</sup> Camkathoumnaw ni hai amamae hnopainaw hoi cauknaw hah tamimaya hmalah a tâcokhai awh teh, hmai a pau awh. Hote cauknaw phu to navah ngun tangka thong 50 touh phu a pha. <sup>20</sup> Hottelah hoiyah, Bawipa e lawkkatang teh thaonae hoi a rounng teh tânae a hmu.

*Efisa kho ruengrueng ati awh.*

<sup>21</sup> Hathnukkhu Pawl teh Masidonia ram hoi Akhaia ram lahoi Jerusalem cei hanelah Muitha patounnae lahoi lawk a tâtueng teh, Jerusalem ka cei hnukkhu Rom khopui hai ka hmu han a ti. <sup>22</sup> Hatdawkvah ahni kabawmkung Timote hoi Erastas hah Masidonia ram lah a patoun. Ama teh Asia ram vah dongdeng ao.

<sup>23</sup> Hatnavah kamthang lawk kecu dawkvah ruengrueng ati awh. <sup>24</sup> Bangkong nama tetpawiteh nguntui kahlun e Demetrias teh Atemis cathut napui e bawkimca hlun laihoi nguntui kahlunnaw hanlah tawn-tanae lah a coung sak. <sup>25</sup> Demetrias ni ama patet e taminaw hah a pâkhueng teh, huikonaw, hete thaw hoi maimouh teh tawnta awh tie teh na panue awh. <sup>26</sup> Hatei, hete Pawl tie niyah, kut hoi sak e teh Cathut nahoei ati teh Efisa kho e taminaw dueng laipalah Asia ram e tami pueng hai a dymyen teh lam a hmang sak toe. <sup>27</sup> Hete lawk ni maimae min a mathoe sak dueng laipalah ka lentoe e Atemis cathut napui e bawkim hai banglah noutna hanlah awmhoei toung vaiteh, Asia ram hoi talaivan pueng ni bawkvah e cathut napui e bahu teh a kahma han toe tie ngaihrinae ao telah a dei.

<sup>28</sup> Hote lawk hah ahnimouh ni a thai awh navah, a lung thouk a khuek awh teh, Efisanaw e Atemis teh a lentoe telah a hram awh. <sup>29</sup> Hattoteh khobuem ruengrueng ati awh. Taminaw niyah Pawl hnukkâbang e Masidonia tami Gaius hoi Aristarkas hah a man awh teh, pawl thungvah vai touh lahoi a kâen awh. <sup>30</sup> Hote taminaw koe Pawl ni kâen hane a ngai ei a hnukkâbangnaw ni a ngang awh. <sup>31</sup> Pawl e a hui, Asia ram e khobawinaw ni hai pawl thung kâen hoei hanelah a kahei awh.

<sup>32</sup> Taminaw teh ruengrueng ati awh dawkvah alouklouk lah a hram awh. Bangpatet ni teh bangdawkmaw kamkhueng a aw tie hai kamceng lah panuek awh hoei. <sup>33</sup> Judahnaw ni Alexander hah hmalah a tâco sak awh teh tami tangawn ni a lungkuep awh dawkvah, Alexander ni a kut a kahek teh kamkhuengnaw koe a dei pouh hanelah a kâcai. <sup>34</sup> Hatei ahni teh Judah tami doeh tie a panue awh navah, tami pueng ni, Efisanaw e Atemis teh a lentoe, telah suimilam kahni touh hane lawk suetalah a hram awh.

<sup>35</sup> Hathnukkhu khouthung e cakathutkung ni kamkhueng e taminaw cing ati sak teh, Efisa taminaw voi Efisa kho teh lentoe Atemis cathut napui e bawkim hoi, kalvan hoi kabawt e meikaphaw hah ka pâkuem e kho lah



ao tie hah ka panuek hoehe e tami apimaw kaawm. <sup>36</sup> Het hateh oun thai hoehe e lah ao dawkvah bangcahai pouk laipalah, hrumhram sak laipalah duem o hanelah ao. <sup>37</sup> Bangkongtetpawiteh nangmouh ni na man awh e hete taminaw ni nangmae bawkim na lawm awh hoehe, maimae cathut napui hah pacekpahlek awh hoehe. <sup>38</sup> Hatdawkvah Demetrias hoi nguntui kahlun e naw, nangmouh ni buetbuet touh toe hane awm pawiteh toeim paawng lah ao na yoe. Khobawinaw hai ao dawkvah ama maroi kâhmo na nei. <sup>39</sup> Hatei alouke kong dawkw pawiteh kamceng lah kamkhuengnae koe lawk tâtueng hanlah ao. <sup>40</sup> Sahnin e hno ka tâcawt e dawkvah kamceng e banghai awm hoehe. Hettelah ruengruengtinae dawkvah maimouh letlang na toe awh pawiteh, kaimouh ni hete kambawngnae dawkvah ka dei thai a mahoehe atipouh teh, <sup>41</sup> kamkhuengnaw hah kOUNg a kâkayaw sak.

## 20

### *Masidonia kho Pawl a pha*

<sup>1</sup> Ruengrueng tinae a roum hnukkhu, Pawl ni a hnukkâbangnaw a kaw teh kut a man hnukkhu kadamcalah awm awh titeh Masidonia ram lah a ceitakhai. <sup>2</sup> Haw e ram thung kaawm e a hnukkâbangnaw thapoe lawk a dei hnukkhu Grik ram a pha. <sup>3</sup> Haw e ram thung thapa yung thum touh ao hnukkhu, Siria ram lah long hoi cei han a kâcai nah Judahnaw ni arulahoï padim han ati awh torei teh, Masidonia ram koe lahoi bout ban hane a kâcai. <sup>4</sup> Pawl hoi cungtalalah Berea tami Pirhas capa Sopater hoi Thesalon tami Aristarkas Sekandus, Derbi tami Gaius hoi Asia tami Timote, Taisikas hoi Trophimus tinaw teh ahni koevah cungtalalah a cei awh. <sup>5</sup> Hmalah a cei teh Troas kho hoi a ring awh. <sup>6</sup> Tonphuenhoehe vaiyei pawï abaw hnukkhu Filippi kho hoi long hoi a tâco teh hnin panga touh a ro hnukkhu Troas kho a pha awh, Hawvah yat touh ao awh.

### *Utikhas bout a hring*

<sup>7</sup> A yat e apasuek hnin vah vaiyei raen hanelah ahnukkâbangnaw a tho awh teh, cungtalalah a kamkhueng awh. A tangtho teh Pawl a cei hanelah coungkacoe lah ao toung dawkvah karumsaning totouh a pâpho. <sup>8</sup> Kaimouh ka kamkhuengnae imvan hmaiim moikapap a paang awh. <sup>9</sup> A min Utikhas tie thoundoun teh hlalangaw teng a fahung. Muet a i teh Pawl ni kamthang lawk a dei lahun nah imvan hoi talai pou a bo teh a ro lah a rakhun awh. <sup>10</sup> Pawl ni a kum teh ahnie a tak dawkvah a tabei teh calumcalum tet awh hanh haw, bangkongtetpawiteh a hringnae kâha pout hoehe rah ati teh, <sup>11</sup> imvan a luen, vaiyei a ca awh teh khodai totouh a pâpho pouh hnukkhu hoi a ceitakhai. <sup>12</sup> Hote bout kahring e thoundoun ca hah a hrawi awh teh, a lungmawng awh.

### *Troas kho hoi Miletus kho a pha awh*

<sup>13</sup> Long koe hmaloe ka cei awh teh, Assos kho koehoi Pawl kâcui sak hanelah ka cei awh. Bangkongtetpawiteh, Pawl teh mon lam lahoi cei hanelah a kâcai teh hottelalah lawk a thui dawkw doeh. <sup>14</sup> Assos kho dawkw kaimouh hoi kâhmo awh toteh long dawkw a kâcui van teh Mitilen kho lah ka cei awh. <sup>15</sup> Haw hoi ka tâco awh teh a tangtho vah Khios tuilum ka pha awh. A tangtho patuen vah Samos ka pha awh teh a tangtho hnin vah Miletus ka pha awh. <sup>16</sup> Hettelah karang cei ngainaeh teh Asia ram dawkw atueng baw sak laipalah Efisa kho ceitakhai hanlah kâcai awh dawkw doeh. Bangkongtetpawiteh, coung thai pawiteh pentikos hnin hoehnahlan



Jerusalem vah pha hanelah ka ngai awh dawkvah hettelah karang karang cei ngainae doeh.

*Efisa kho kacuenaw lawk a thui*

<sup>17</sup> Miletus kho a pha hoi Pawl ni Efisa kho lah tami a patoun teh kacuenaw hah a kaw. <sup>18</sup> Ahnimouh a pha toteh Pawl ni, Asia ram ka pha hnin hoi, nangmae hmalah bangtelamaw ka hring tie na panue awh. <sup>19</sup> Kai teh kârahnoumnae, mitphi bonae, hoi Judahnaw ni rucat na poenae thungup hoiyah Bawipa e a thaw hah ka taw. <sup>20</sup> Kai ni nangmouh hanelah hawinae kaawm hane naw hah hnuk kâhnawn laipalah, nangmouh koe ka pâpho teh, taminaw hmalah nakunghai, im touh hnukkhu im touh nakunghai na cangkhai awh teh, <sup>21</sup> Cathut hmalah pankângainae hoi maimae Bawipa Jisuh Khrih yuemnae kongnaw hah, Judahnaw hoi Griknaw hah ka cangkhai.

<sup>22</sup> Atuteh muitha lamhrawinae lahoi Jerusalem ka cei han, kho thung bangpatet runae maw kâhmo han ka panuek hoeh. <sup>23</sup> Hat nakunghai runae hoi rektapnae ni sut na ring e hah Kathoung Muitha teh kho tangkuem kai kapanuekkhaikung lah o. <sup>24</sup> Hatei, ka yawng hane kawi hah a pout totouh ka yawng teh, Cathut lungmanae kamthang kahawi kampangkhai hanelah, Bawipa Jisuh koehoi ka coe e thaw tawknae hah lunghaw i laihoi ka cum thai nahanelah awh pawiteh ka hringnae patenghai ka pasai hoeh.

<sup>25</sup> Atuteh Cathut uknaeram kong ka dei nah nangmanaw ni ka mei bout na hmawt a mahoei toe tie ka panue. <sup>26</sup> Hatdawkvah tami pueng e thi hoi kai kamthoung toe tie sahnin vah nangmouh koe ka pâpho. <sup>27</sup> Lung kâounnae awh laipalah Cathut e pouknae pueng teh nangmouh koe he ka dei toe. <sup>28</sup> Nangmouh teh namahoima nakunghai, tuhunaw pueng nakunghai, kâhruetcuat laihoi khenyawn awh. Bawipa amae a thi hoi a ran e kawhmoun hah nangmouh ni khetyawt sak hanelah, Kathoung Muitha ni nangmouh teh tukhoumkung lah na rawi awh toe. <sup>29</sup> Bangkongtetpawiteh, ka yinhnuk nah, ka huencawn e Asuinaw ni tunaw pahrennae tawn laipalah nangmouh thung a kâen han tie ka panue. <sup>30</sup> Nangmouh thung e a hnukkâbangnaw hai, ama koe lah sawn hanelah, ceipayonnae ka pâpho e tami a tho awh han. <sup>31</sup> Hatdawkvah tuehmue awh. Kai ni kum thum touh thung karum khodai tami pueng mitphi hoi na cangkhai e pahnim awh hanh.

<sup>32</sup> Hmaunawngghanaw, atu kai ni nangmouh Cathut koe na hnawng awh. Nangmouh na rounng awh nahan, tami kathoungnaw hoi nangmanaw râw poe hanelah ka tet thai e Cathut e a lungmanae dawkvah nangmouh na hnawng awh. <sup>33</sup> Kai ni api e sui ngun hnopainaw hai ka nôe hoeh. <sup>34</sup> Hete ka kut hoi kama hoi rei kaawmnaw e pankinae pueng ka taw tie hah na panue awh toe. <sup>35</sup> Hottelah panki laihoi ka taw tie, a thakayounnaw hah kabawp kawi lah ao tie hoi, poenae teh dâwnae hlak yawhawinae ao telah Bawipa Jisuh ama ni a dei e lawk hah na pâkuem awh hanelah ao telah a dei.

<sup>36</sup> Pawl ni a dei hnukkhu khok a cuengkhuem teh ahnimouh hoi cungtalah a ratoum awh. <sup>37</sup> Abuemlahoi a khuika awh teh Pawl teh a tapam awh teh a paco awh. <sup>38</sup> Ka mei bout na hmawt a mahoei toe tie Pawl ni a dei e a thai awh dawkvah lungmathoe laihoi Pawl hah long koe totouh a thak awh.



## 21

*Jerusalem lah ceinae*

<sup>1</sup> Ahnimouh koehoi Kos tuilum koelah long hoi pou ka cei awh. A tangtho vah Rhodes ka pha awh teh, haw hoi Patara kho dawk ka pha awh. <sup>2</sup> Hahoi Phoenicia lah ka cet e long buet touh ka kâcui awh. <sup>3</sup> Saipras tuilum ka hmu awh toteh hote hmuén koehoi avoilah hoi ka cei awh teh Siria lah ka raka awh navah Taire kho ka pha awh. Hawvah long dawk e hnonaw ka rasa awh. <sup>4</sup> Hawvah a hnukkâbangnaw ka kâhmo awh teh ahnimouh koe hnin sari touh ka o awh. Ahnimouh ni Pawl hah Jerusalem lah a cei hoeh nahan Muitha lahoi a dei pouh awh. <sup>5</sup> Ahnimouh koe ka o hnukkhu hoi hot koehoi bout ka kamthaw awh. A yu a canaw abuemlahoi cungtalalah kho teng totouh na thak awh. Tuipui teng khokcuengkhuem laihoi ka ratoum awh. <sup>6</sup> Hahoi buet touh hoi buet touh kut ka kâman awh hnukkhu kaimouh teh long dawk ka luen awh teh ahnimouh hai amamouh im lah a ban awh.

<sup>7</sup> Hahoi Taire kho hoi Ptolamais kho lah pou ka cei awh teh hawvah hmaunawngghanaw hoi ka kâhmo awh teh hnin touh ka o awh. <sup>8</sup> Atangtho bout ka cei awh teh Kaisarea khovah ka pha awh. Hawvah, Jerusalem vah kabawmkung hanlah a rawi awh e tami sari touh dawk buet touh lah kaawm e Filip im vah ka luen awh. <sup>9</sup> Ahni koe profet lah kaawm e a canu pali touh ao.

<sup>10</sup> Hawvah kasawhnawn lah ka o awh teh Akabus tie profet buet touh Judah ram lahoi a tho. <sup>11</sup> Ahni teh kaimouh koe a tho navah Pawl e taisawm a la pouh teh amae a kutkhok a pâkhi teh, Judahnaw ni hete taisawm katawnkung hah Jerusalem kho hettelah a katek awh vaiteh Jentelnaw e kut dawk poe lah ao han telah Kathoung Muitha ni a dei telah atipouh.

<sup>12</sup> Hote lawk ka thai awh nah kaimouh hoi haw kaawmnaw ni Pawl hah Jerusalem lah a cei hoeh nahan ka haw awh. <sup>13</sup> Hatnavah Pawl ni, nangmouh ni na khuika awh teh, kai lungrei na thaisak awh! Kai ni Jisuh e a min kecu dawk Jerusalem khovah katek hane dueng laipalah ka due han totouh coungkacoe lah ka o toe telah atipouh. <sup>14</sup> Kaimouh ni ka haw hla awh toteh, Cathut a ngainae patetlah lawiseh ka ti awh teh duem ka o awh.

<sup>15</sup> Hawvah dongdeng ka o awh hnukkhu, ka kârasoup awh teh Jerusalem lah ka cei awh. <sup>16</sup> Kaisarea kho hoi a hnukkâbang tangawn hai kaimouh hoi cungtalalah a tho awh teh kaimouh ka luen awh nahanelah ka rasoun e, apasueke a hnukkâbang lah kaawm e Saipras tami Manason koe na ceikhai awh.

*Pawl ni Jem a kâhmo*

<sup>17</sup> Jerusalem kho ka pha awh navah hmaunawngghanaw ni lunghawicalah hoi na dawn awh. <sup>18</sup> Atangtho vah Pawl hoi cungtalalah Jem koe ka cei awh teh kacuenaw hoi ao awh. <sup>19</sup> Pawl ni ahnimanaw kut a man awh teh a thaw tawk e lahoi Jentelnaw koe Cathut ni thaw a tawknae kongnaw hah buet touh hnukkhu buet touh a dei pouh.

<sup>20</sup> Ahnimouh ni a thai awh navah Cathut a pholen awh. Hahoi ahnimouh ni Pawl koe, ka nawngha, na panue e patetlah Judahnaw touklek thai hoe e, kâlawk dawk a lungkatangnaw ni a yuem awh. <sup>21</sup> Jentelnaw thung kaawm e Judah tami pueng hah Mosi e kâlawk pahawt awh nateh vuensoma laipalah hoi Judah phung tarawi awh han loe telah na cangkhai ti teh kamthang sut a dei awh toe. <sup>22</sup> Nang na tho e hai be a panue a han doeh.



Hatdawkvah bang ne sak awh han. <sup>23</sup> Hatdawkvah, kaimouh ni na dei pouh e patetlah sak lah a. Hivah lawkkamnae ka sak e tami pali touh ao. <sup>24</sup> Ahnimouh hoi reirei cet nateh thoungnae phung lam sak kawī hah sak awh nateh, lû luengpalueng lah ngawnae aphū hah rawng pouh. Hottelah na sak pawiteh tami pueng ni na kong a dei awh e hah a tang nahoehtet awh vaiteh, nang teh Mosi e kâlawk ka tarawī e doeh tie hah tami pueng ni a panue awh han. <sup>25</sup> Jentelnaw ka yuem e naw kong daw kaimouh ni ca na patawn awh toe. Meikaphawk baw knae rawcanaw hah cat awh hanh, a thi cat awh hanh, lahuen kara e moi pueng cat awh hanh, kamsoumhoehē napui tongpa yonnae sak a hanh tie lawk tâtuengnae hah na patawn awh toe.

### *Bawkim daw k ruengrueng ati awh*

<sup>26</sup> Hattoteh Pawl ni hote tami pali touh hah a ceikhai teh a tangtho vah thoungnae phunglam hah a sak khai hnukkhu, bawkim thung a kâen awh teh thoug nahane atueng apout hoehroukrak atueng na yit touh maw a ro han, hote atueng a baw hnukkhu thuengnae lengkaleng sak hane hah vaihma koe a dei pouh awh.

<sup>27</sup> Hnin sari hnin a kuep tawmlei torei teh, Asia ram lahoi ka tho e Judah taminaw ni Pawl hah bawkim thung a hmu awh. Tami pueng a puen awh teh Pawl hah a man awh. <sup>28</sup> Isarel taminaw na kabawm a haw! Hete tami nahoehmaw, Isarel taminaw kâtaran sak hanelah, Mosi e kâlawk pahnavt hane hoi hete hmuen pahnavt hanelah kacangkhakung lah meng ao. Hete bawkim thungvah Grik taminaw bout a kâenkhai teh a kamhnawng sak. <sup>29</sup> Hettelah a dei e heh Efisa tami Trophimus hah Pawl hoi kho thungvah a hmu awh teh Pawl ni hote tami hah bawkim thung a kâenkhai telah a pouk a daw k doeh.

<sup>30</sup> Hatnavah khothung ruengrueng ati awh. Pawl hah a man awh teh bawkim thung hoi a tâcokhai awh. Karang poung lah takhangnaw koug a khan awh. <sup>31</sup> Taminaw ni Pawl hah thei hane a panki awh navah, Jerusalem kho teh ruengrueng ati awh telah ransa 1,000 touk ka uk e Rom ransabawī ni kamthang a thai navah, <sup>32</sup> vai touh lahoi Rom ransa bawinaw hoi ransanaw teh yawng laihoi a tho awh. Ransabawī hoi ransanaw a tho awh e a hmu awh navah, Pawl ka hem e naw a kâhat awh.

<sup>33</sup> Ransabawī ni Pawl a man teh sumbawtaruinaw kahni touh hoi pâkhit awh atipouh. Hahoi a kamthaw awh teh hete tami heh apimaw, bangmaw a sak, telah a pacei awh. <sup>34</sup> Taminaw ni alouklouk lah a hram awh. Ransabawī ni kamcenglah a panue thai hoeh dawkvah, Pawl hah ransaim imthung lah kâenkhai hanelah kâ a poe. <sup>35</sup> Pawl teh khalailu a pha navah taminaw hoehoe a lungkhuek awh dawkvah, Pawl hah a kâkayawt awh. <sup>36</sup> Bangkongtetpawiteh, Pawl hah thet awh, thet awh telah hoehoe a hram awh daw k doeh.

### *Rangpui hmalah Pawl ni lawk a dei*

<sup>37</sup> Ransaim thungvah Pawl a kâenkhai tawmlei Pawl ni bawipa, nang hoi lawk kâpan thai han maw telah atipouh. Ransabawī ni Grik lawk na panue maw atipouh. <sup>38</sup> Hat pawiteh nang teh, hnuk lae tami thong pali touh kahrawngum ka cetkhai e dingca bawī Izip tami nahoehmaw telah a pacei. <sup>39</sup> Pawl ni, Kai teh Judah phun, Cilicia ram thung kamthang e kho Tarshish hoi ka tho e tami doeh. Taminaw koe lawk na dei sak haw atipouh.



<sup>40</sup> Ransabawi ni hai lawk a dei sak. Pawl teh khalai dawk a kangdue teh a kut a nâ pouh teh, taminaw hah sairasuep lah ao awh. Hatnavah ahni ni Hebru lawk lahoi lawk a dei.

## 22

<sup>1</sup> Hmaunawnggha hoi a nupanaw, atu kai ni ka dei e lawk kahawicalah thai awh haw telah a dei navah, <sup>2</sup> Hebru lawk hoi a dei e a thai awh navah hoe cing ati awh. <sup>3</sup> Pawl ni kai teh Cilicia ram Tarshish kho dawk ka khe e, Judah tami buet touh lah ka o. Hatei hete kho dawk ka rounge teh, Gamaliel kut rahim vah mintoenaw e phung lawk hah kacaicalah ka kamtu niteh, sahnin nangmouh pueng Cathut hanelah na lung a tang awh e patetlah kai hai ka lung a tang van. <sup>4</sup> Kai ni hete lam ka dawn e napui tongpa tet hoeh, ka pâkhi teh thongim thung ka pakhum teh, a due han ditouh ouk ka rektap toe. <sup>5</sup> Hot patetlah vaihma kacue koehoi kamtawng teh, kacuenaw pueng teh, kai koe lah kounge na kampangkhai awh. Kai ni hai ahnimanaw koe ca ka la teh, Damaskas kho e kaawm e, hote phung lah kâen e naw hah man vaiteh rektap hanelah Jerusalem hoi Damaskas lah ka cei.

### *Pawl ni a kampangkhai*

<sup>6</sup> Hatei Damaskas kho teng ka pha nah, kanîthun e tueng navah, kalvan hoi puenghoi ka ang e ni kai pet na kalup lah pheng a tue. <sup>7</sup> Hahoi kai teh talai ka rawp teh, Sawl Sawl nang ni bangdawm maw, kai hah na rektap vaw telah na dei pouh e lawk ka thai. <sup>8</sup> Kai ni yah, Bawipa, nang teh apimaw telah ka pacei torei teh, kai teh nang ni na rektap e Nazareth kho e Jisuh doeh, telah na ti pouh. <sup>9</sup> Kai hoi rei kaawm e naw ni angnae a hmu awh eiteh kai hanlah a dei e lawk teh thai awh hoeh. <sup>10</sup> Kai ni hai Bawipa, bang mouh ka sak han ka ti pouh navah, Bawipa ni thaw nateh Damaskas kho cet haw. Hawvah na sak hane kai ni na dei pouh han na ti pouh. <sup>11</sup> Kai teh hote angnae bahu ni na tue torei teh ka mit a dawn tounge dawkvah, rei kaawm e naw ni Damaskas kho na hrawi awh. <sup>12</sup> Hatnavah Cathut ka bari e Damaskas kho e min kamthang e Judah tami Ananias ni, <sup>13</sup> kai koe a tho teh ka teng a kangdue. Ka nawnggha Sawl na mit ang seh ati navah ka mit a ang. <sup>14</sup> Ahni ni mintoenaw e Cathut ngainae panue sak hanlah thoseh, tamikalan hmu thai nahane thoseh, ahnie lawk dei pouh hane thoseh, nang teh sut na hmoun toe. <sup>15</sup> Nang teh na hmu e hoi na thai e pueng tami pueng e hmalah kapanuekkhaikung lah na o han a ti. <sup>16</sup> Bangkongmaw atu rap na o. Thaw nateh Bawipa min kaw haw. Baptisma coe haw, na yonnae pâsu haw na ti pouh.

<sup>17</sup> Hathnukkhu Jerusalem vah bout ka tho teh, bawkim thung ka ratoum lahun nah ka pouknae a mawm teh, Bawipa hah ka hmu. <sup>18</sup> Bawipa ni kai hoi kâkuen e lawkpanuesaknae hah taminaw ni a dâw awh hoeh han dawkvah, Jerusalem vah rap awm laipalah karang tâcawt leih na ti pouh. <sup>19</sup> Kai nihaiyah, Bawipa Sinakok buet touh hoi buet touh koe ka cei teh nang na kayuennaw ka theituk teh thawng ka pabo e a panue awh. <sup>20</sup> Nang kampangkhai lah kaawm e Stiven hah a thei awh navah kai kama roeroe raw hnâbo lahoi ka sak teh, kathetnaw e khohna ka ring pouh kung lah ka o. <sup>21</sup> Hateiteh, Bawipa ni, Cet leih, ramhlanae koe kaawm e Jentelnaw koe kai ni na patoun han telah kai koe na ti pouh, telah a dei.

### *Pawl teh Rom tami doeh*

<sup>22</sup> Het totouh a dei e a thai pouh teh, hot patet e tami hah talai van hring hanelah kamcu hoeh, thet awh titeh lawk kacaipounglah a hram awh.



<sup>23</sup> Taminaw niyah hottelah a hramki awh teh, a khohnanaw hah a kahek awh teh, vaiphu kahlun lah a kahei awh <sup>24</sup> Rom ransabawi kalen ni taminaw hah a kaw sak teh, ransaim thung kâen sak hanlah kâ a poe. Taminaw pueng ni bangkongmaw ahni hah telah a taran awh teh, telah a hram awh tie panue hane a ngai dawkvah, ruitaboung hoi hem vaiteh akungkhei hanelah kâ a poe. <sup>25</sup> Ahni teh phaivuenrui hoi a katek awh hnukkhu, a teng kangdout e ransabawi hanlah nangmouh ni Rom tami buet touh heh akungkhei laipalah hemnae kâ na tawn a maw telah a pacei.

<sup>26</sup> Ransabawi ni hote lawk hah a thai toteh ransabawi kalen koe a cei teh, nang bangtelamaw ti han. Ahni ni kai teh Rom tami doeh na ti pouh. <sup>27</sup> Hahoi ransabawi kalen e teh Pawl koe a tho teh, kai koe na dei pouh haw, nang teh Rom tami na maw telah a pacei toteh ue a atipouh. <sup>28</sup> Ransabawi kalen e ni kai teh, Rom tami lah o nahanelah tangka moikapap poe laihoi doeh ka o thai atipouh navah, Pawl ni, kai teh Rom tami lah ka khe atipouh.

<sup>29</sup> Hatdawkvah ahni akungkhei hane naw teh ahni koehoi karanglah a kâkhoe awh. Ransabawi kalen ni hai Pawl heh Rom tami lah ao e hah a panue toteh a pâkhi e hah a taki.

### *Pawl lawkcengnae hmalah a pha*

<sup>30</sup> Atangtho vah ransabawi teh Judahnaw ni yon a pen awh e hah kamcengcairalah a panue han a ngai dawkvah, Pawl kateknae rathap hanelah kâ a poe. Vaihma kalennaw hoi lawkcengkungnaw pueng a kamkhueng sak. Pawl hah a kaw awh teh, ahnimae hmalah a kangdue sak awh.

## 23

<sup>1</sup> Pawl ni sanhedrin lawkcengkungnaw hah takuetluet a khet teh, hmaunawngghanaw, kai teh atu totouh ka tawksak e dawkhaw e thoeahawi panuenae lungthin hoi Cathut hmalah a thoung, ati pouh.

<sup>2</sup> Hatnavah vaihma kacue Ananias ni a teng ka kangdout e taminaw koe, Pawl e a pahni tambei pouh awh telah kâ a poe. <sup>3</sup> Pawl nihai, ka pangaw hluk e tangkom, Cathut ni nama na hem han atipouh. Nang ni kai heh tathung laihoi kâlawk patetlah lawk na ceng nahlangva vah, kâlawk na tapoe teh kai hem hanelah kâ na poe maw, atipouh.

<sup>4</sup> Ateng ka kangdout e naw nihai, nang ni Cathut e vaihma kacue na dudam, ati pouh awh. <sup>5</sup> Pawl nihai, hmaunawngghanaw, ahni hah vaihma kacue tie ka panuek hoe, Cakathoung ni na miphun ka ukkungnaw na pathoe mahoe telah a dei, atipouh.

<sup>6</sup> Pawl ni haw kaawm e tami atangawn teh Sadusinaw, alouknaw teh Farasinaw tie a panue dawkvah, hmaunawngghanaw kai teh Farasi buet touh lah ka o. Farasi e a capa lahai ka o. Kai teh kadoutnaw boutthawnae ngaihawinae kecu dawkhaw hoi akungkhei e lah ka o telah sanhedrin lawkcengnae hmalah hram laihoi a dei. <sup>7</sup> Hottelah Pawl ni a dei torei teh, Farasinaw hoi Sadusinaw hai lawk apap awh teh, kahni touh lah a kâkapek awh. <sup>8</sup> Bangkongtetpawiteh, Sadusinaw ni boutthawnae awmhoeh, kalvantami awmhoeh, muitha awmhoeh telah ati awh. Farasinaw ni teh hotnaw kounng ao telah a yuem awh.

<sup>9</sup> Hahoi, hoe a hram awh teh Farasinaw koe e cakathutkungnaw bangpatet ni a kangdue awh teh, ahni koe a yonnae tica hai ka hmaut awh hoe, Muitha nahoe pawiteh, kalvantami buetbuet touh ni a dei pouh thai, telah a oun awh. <sup>10</sup> Hoe kâounnae ao dawkvah ransabawi ni,



Pawl hah vekrasen lah sawn a langvaih ati dawkvah, ransanaw koe Pawl hah amamae ransaim imthung lah a ceikhai hane kâ a poe.

*Pawl thei hanelah arulah a kâcai awh*

<sup>11</sup> Hatnae tangmin lah Pawl koe Bawipa a kangdue teh, lakueng hanh, Jerusalem vah kaie ka kong na kampangkhai e patetlah, Rom kho hai na kampangkhai han atipouh. <sup>12</sup> Khodai toteh Judahnaw ni kho a khan awh teh, Pawl thei hoe roukrak banghai canei hoe hanelah thoe a kâbo awh. <sup>13</sup> Hottelah arulah ka kâdei e naw, abuemlah tami 40 touh hlai a pha awh. <sup>14</sup> Ahnimouh ni vaihma bawinaw hoi kacuenaw koe a cei awh teh, kaimouh ni Pawl ka thei awh hoe roukrak banghai ka cat a mahoe, telah thoe ka kâbo awh toe. <sup>15</sup> Hatdawkvah nangmouh hoi sanhedrin lawkcengkungnaw ni ahnie a kong kahawicalah pacei han na ngai awh e patetlah ka sak vaiteh nangmouh koe Pawl a hrawi awh thai nahan Rom ransabawi koe thaisak awh. Hi a pha hoehnahlan thei hanlah coungkacoelah ka o awh han, atipouh.

<sup>16</sup> Hote kho a khangnae hah Pawl e tawncanu e a capa ni a thai navah thongim thung a kâen teh Pawl koe a dei pouh. <sup>17</sup> Hatnavah Pawl ni ransabawi buet touh a kaw teh, ransabawi koevah hete nawsai ni lawk dei hane a tawn dawkvah, ahni hah ransabawi kalen koe cetkhai haw atipouh. <sup>18</sup> Ransabawi ni a ceikhai teh ransabawi kalen koe a thokhai. Thongkabawt e Pawl ni, kai hah na kaw teh, hete nawsai ni nang koe hrawi hanelah a kâhei. Ahni ni nang koe lawk dei hane ao atipouh.

<sup>19</sup> Ransabawi ni hote nawsai e kut a kuets pouh teh, aloukcalah a kaw teh, kai koe na dei hane lawk teh bangmaw atipouh. <sup>20</sup> Hote nawsai ni, Judahnaw ni Pawl hah, hoe kanceng lah pacei hane boiboe lah a kâsak awh teh, tangtho vah sanhedrin lawkcengnae koe kaw hanelah nang koe kâhei hanelah a kâcai awh. <sup>21</sup> Hatei ahnimae lawk tang pouh hanh. Bangkongtetpawiteh ahnimouh thung daw koe tami 40 touh hlai ni arulah hoi Pawl hah a pawp awh. Pawl ka thei awh hoehroukrak ka catnet a mahoe ati awh teh, thoe a kâbo awh. Atu patenghai coungkacoe lah ao awh teh, bawipa, nange lawk doeh a ring awh toe atipouh.

<sup>22</sup> Ransabawi ni, hete kongnaw kai koe na dei e heh api koehai dei pouh hanh lah atipouh teh hote nawsai hah bout a ban sak.

*Pawl hah karum vah Kaisarea kho a thak awh*

<sup>23</sup> Hathnukkhu, ransabawi kalen e ni ransabawi kahni touh a kaw teh, Kaisarea cei hanelah ransa cumhni touh sut kârokueng awh. Hahoi marangransanaw 70 touh, tahroe ka patuem thai e cumhni touh hai kârokuengkhai awh nateh, atu tangmin suimilam tako nah kamthaw hanlah sut kârokueng awh. <sup>24</sup> Pawl kâcui nahanelah marang sut hmoun pouh awh. Khobawi Felik koe kahawicalah phatkhai awh telah lawk a thui. <sup>25</sup> Hathnukkhu ransabawi ni ca a thut teh telah a patawn.

<sup>26</sup> Klaudias Lisias ni khobawi Felik koevah ca na patawn. Nang koevah hnâroumnae awmseh. <sup>27</sup> Judahnaw ni hete tami heh a man awh teh thei han toe ati awh navah, ahni teh Rom tami doeh tie ka panue toteh ransanaw hoi ka rungngang awh. <sup>28</sup> Yon a hnei awh e hah bangne tie panue han ka ngai dawkvah, sanhedrin lawkcengnae hmalah ka kaw navah, <sup>29</sup> ahni teh amamae kâlawk hoi kâkuen e kamcan hoi yon a pen awh teh, duekhai kawi hoehpawiteh, thongim kamungkhai kawi yonnae a tawn tie ka hmawt hoe. <sup>30</sup> Hatei, Judah tami tangawn ni ahni thei hanelah



a kâcai awh tie ka thai dawkvah nang koe karanglah ka thak. Yon kapen e naw hai nang na hmalah a dei awh nahanelah kâ ka poe toe.

<sup>31</sup> Hat toteh, ransabawi ni kâ a poe e patetlah Pawl hah Antipatris kho totouh karum vah a thak awh. <sup>32</sup> Atangtho teh marangransanaw ni pou a ceikhai awh. Alouknaw teh a ban awh. <sup>33</sup> Kaisarea totouh a ceikhai awh teh, khobawi koe, ca a poe awh teh, Pawl hai ama kut daw koe poe awh. <sup>34</sup> Khobawi ni ca a touk teh Pawl teh nâ ram e maw telah a pacei. Cilicia daw koe doeh tie a panue hoi teh, <sup>35</sup> na katoekungnaw a tho torei vah, nange lai teh na ceng pouh han telah a titeh, Pawl hah Herod siangpahrang im vah khoup ring awh telah ransanaw kâ a poe.

## 24

### *Pawl yon a pen awh*

<sup>1</sup> Hnin panga touh aloum hnukkhu vaihma kacue Ananias teh kacuenaw hoi laicei Tertullas tihoi Kaisarea kho lah a cathuk awh. Hahoi, laicei ni ram kaukkung koe vah Pawl teh yon a pen awh toe. <sup>2</sup> Pawl a kaw awh teh, Tertullas niyah Felik koe vah Pawl e kong teh hettelah dei han a kamtawng. Nangmouh rahim vah tueng moikasaw karoumcalah ka o awh teh, na khokhangnae lahoi hete miphunnaw a roun awh. <sup>3</sup> Hete thaw tawknae heh kho tangkuem lunghawi laihoi ka taw koe awh. <sup>4</sup> Hatdawkvah, kasawlah kai ni na taraw koe nahanelah, pahren lahoi kaie law koe dei e hah na thai pouh hav.

<sup>5</sup> Kamcan dueng ka sak e hete tami heh talaivan pueng daw koe kaawm e Judahnaw koe vah lawkpungnae ao nahanlah tha ka poe e lah ao teh, Nazareth bawknae daw koe darkhing ka hem e kahrawikung buet touh lah ao. <sup>6</sup> Ahni teh bawkim hai khet kamcu hoi lah sak hane a panki dawkvah, kaimouh ni ahni teh ka man awh. Hathnukkhu, ahni teh kamamae kâlawk patetlah lawkceng han ka ti awh navah, <sup>7</sup> ransabawi Lisias a tho teh kaimae kut daw koe hoi na lawp awh teh, <sup>8</sup> ahni katoenaw hai nang koe tho hanelah kâ a poe. Hete hnouaw abuemlahoi kâkuen lah nama roeroe ni law koe na ceng pawiteh ahnie lathueng kaimanaw ni yon kapen awh e pueng hah na panue han doeh telah atipouh. <sup>9</sup> Judahnaw ni hai hate lawknaw teh atang doeh ati awh teh hnâ rip a bo awh.

### *Felik hmalah Pawl ni law koe a dei*

<sup>10</sup> Hahoi ram ukkung ni Pawl hah law koe dei van nahanlah a kut a dâw pouh. Pawl ni hete miphunnaw heh kum moikasaw thung lawkcengkung lah na o tie ka panue dawkvah lunghawi laihoi nang koe law koe dei vai. <sup>11</sup> Jerusalem vah Cathut baw koe hanelah ka ceinae heh hnin hlaikahni touh hloi phat hoi rah tie na paceipakaw pawiteh na panue han doeh. <sup>12</sup> Kai ni bawkim daw koe thoseh, sinakok daw koe thoseh, khothung thoseh, law koe kâounnae, tami ruengruengti saknae ka sak hoi tie hah hetnaw ni a panue awh. <sup>13</sup> Atuvah hetnaw ni yon na pen awh e heh ahnimouh ni kapanuekkhaikung tawn awh hoi. <sup>14</sup> Hatei, bu louk ati awh e lamthung patetlah mintoenaw e Cathut doeh ka baw koe tie nange hmalah ka kampangkhai. Kai teh kâlawnaw daw koe a thut e hoi, profet cauknaw daw koe a thut e pueng hai ka yuem teh, <sup>15</sup> ahnimouh ni a ngaihaw awh e patetlah tami kalannaw hoi tamikalan hoi e naw hai a to hmalah bout a thaw awh han tie hah ka ngaihaw. <sup>16</sup> Hatdawkvah, kai teh Cathut hmalah hoi tami hmalah yon toun han kaawm hoi e thoe hoi panuena kapek thai hanlah ouk ka panki.



<sup>17</sup> Atu kum moi asaw hnukkhu, ka miphunnaw koe poehnonaw poe hane hoi thuengnae sak hanelah kai teh ka tho. <sup>18</sup> Bawkim dawkw thounghae ka coe tangcoung e kai hah ahnimouh ni na hmu awh navah tami kamkhueng e awmhoeh, ruengruengtinae banghai awmhoeh. <sup>19</sup> Hatei Asia ram hoi ka tho e Judahnaw ao awh. Ahnimouh ni kai lathueng yon pen hane tawn awh pawiteh, bawipa, na hmalah amamouh roeroe a tho awh vaiteh na pen awh hanlah ao. <sup>20</sup> Nahoe pawiteh, sanhedrin lawkcengnae hmalah ka kangdue lahun nah bang yonnae maw kai dawkw a hmu awh tie hah atu hi kaawm e naw ni roeroe dei awh naseh. <sup>21</sup> Kai teh ahnimae hmalah ka kangdue teh, kadout tangcoungnaw boutthaw hringnae hoi kâkuen lah nangmae hmalah akungkhei e lah ka o tie lawkw buet touh doeh ka hramkhai telah a dei.

### *Lawk tâtueng hane a tahrue awh*

<sup>22</sup> Felik ni hote konglamnaw hah kamcengcalah a panue dawkvah, ransabawi Lisias a tho toreï nangmae lai teh akung na khei pouh han a titeh a tahrue pouh. <sup>23</sup> Pawl hah khik paung laipalah ring awh. A huikonaw ni a khetyawt awh e hah ngang awh hanh telah ransabawi koe kâ a poe. <sup>24</sup> A hnin youn touh ao hnukkhu Felik bawi teh Judah napui a yu Drusilla hoi a tho rawi. Pawl hah a kaw teh Khrih Jisuh thung yuemnae kong a dei e hah a thai roi. <sup>25</sup> Hatei, Pawl ni a dei e lawkw teh lannae, mahoima kâcakuepnae hoi ka tho hane lawkcengnae a dei navah, Felik bawi ni a taki teh la ban ei lawih, a to hmalah atueng ao toreï bout na kaw han telah atipouh. <sup>26</sup> Hatnavah, Pawl ni tangka na poe han doeh telah Felik bawi ni a ngaihaw dawkvah, atuhoitu a kaw teh lawkw a kâpankhai.

<sup>27</sup> Kum hnin touh ao hnukkhu hoi Felik bawi tahungnae hmuen koe Porsia Festus ni a yueng lah a tahung. Felik bawi ni Judahnaw lunghawi sak hane a ngai dawkvah Pawl hah thongim sut a paung.

## 25

### *Sizar hmalah Pawl a kamthaw*

<sup>1</sup> Festus siangpahrang teh, hote ram dawkw a pha teh hnin thum touh ao hnukkhu Kaisarea khopui hoi Jerusalem kho lah a luen takhang. <sup>2</sup> Hahoi vaihma kacue hoi Judahnaw thung dawkw e a lungkahanaw ni Pawl teh a toe awh. <sup>3</sup> Ahnimouh ni kaimouh na pahrennae lah, Pawl hah Jerusalem lah na thak pouh loe telah a kâhei awh. Bangkongtetpawiteh, Pawl hah lam vah pawp vaiteh thei awh han telah sut a kâcai awh dawkw doeh. <sup>4</sup> Hatnavah Festus siangpahrang ni Pawl hateh, Kaisarea khovah thongim thung ao. Hote kho dawkw nâsittouh o hoehnahlan, kama roeroe ka cei han. <sup>5</sup> Hatdawkvah nangmouh thung dawkw, kâtawnnae ka tawn e taminaw hah kai koe kâbang awh nateh, ahni yon pen hane awm pawiteh pen awh atipouh. <sup>6</sup> Hahoi hnin taroe, hnin hra touh ao hnukkhu vah Kaisarea kho a cei teh, lawkcengnae tungkhung dawkw a tahung teh Pawl hah kaw hanelah kâ a poe.

<sup>7</sup> Pawl a tho toreï teh Jerusalem lahoi ka tho e Judahnaw ni Pawl hah khik a ven awh. Yon a pen awh e pueng a tang e buet touh hai awmhoeh. <sup>8</sup> Pawl ni vah Judah phung thoseh, bawkim thoseh, Sizar siangpahrang thoseh, ka payon hoeh telah a pathung.

<sup>9</sup> Festus siangpahrang ni Judahnaw hah tang sak a ngai dawkvah Pawl hanelah, nang heh Jerusalem cei vaiteh kaie hmalah hete lai heh akungkhei hane na ngai maw telah a pacei. <sup>10</sup> Hatei Pawl ni kai heh Sizar



siangpahrang e lawkcengnae tungkhung hmalah ka kangdue dawkvah, hote hmuen koe kai heh akung na khei pawiteh a kamcu doeh. Nang ni kacailah na panue e patetlah Judahnaw koe yonnae khoeroe ka sak hoeh.

<sup>11</sup> Koe ka payon boilah duekhai kawi yonnae buetbuet touh koe ka sak pawiteh, due hane kangek hoeh. Hateiteh ahnimouh ni yonpen awh e naw heh buet touh hai tueng hoehpawiteh apinihai ahnimae kut dawh na phat sak mahoe. Sizar siangpahrang koe doeh nganga ka cei han atipouh.

<sup>12</sup> Hattoteh Festus siangpahrang teh thaw rei ka tawh huinaw hoi a kâpan awh teh, nang teh Sizar siangpahrang koe nganga ka cei han na ti dawkvah Siangpahrang Sizar koe na cei han atipouh awh.

### *Agrippa hoi a yu Bernike teh Festus koe a pai roi*

<sup>13</sup> Hathnukkhu hnin youn touh ao hoiyah Agrippa siangpahrang hoi a yu Bernike teh, Festus hoi kâhmo hanelah, Kaisarea kho a tho roi. <sup>14</sup> Hnin hni, hnin thum ao roi hoiyah, Festus ni Pawl e lai hah siangpahrang koe hettelah be a dei pouh. Hivah Felik ni thongim a pabo e tami buet touh ao. <sup>15</sup> Jerusalem ka pha navah, vaihma bawinaw hoi Judah kacuenaw ni ahni hah a toe awh teh rek hanelah a kâhei awh. <sup>16</sup> Hatei, yon pen lah kaawm e tami buet touh heh, yon kapenkung hoi minhmai kâhmo teh yon kâpen e hoi kâkuen lah, bout pathungnae ao hoehnahlan ahni hah alouklah thak pawiteh Romnaw e phung nahoe. <sup>17</sup> Hatdawkvah, ahnimouh teh hete khopui dawh a pha awh toteh, pouk laipalah atangtho vah lawkcengnae tungkhung dawh ka tahung teh, ahni hah kaw hanlah kâ ka poe. <sup>18</sup> Pawl yon ka pen e naw a kangdue awh toteh, ka pouk e patetlah kathoute yonnae hah pen awh hoe. <sup>19</sup> Ahnimae kamcan teh amamae phung lawh hoi ka kâkuen e hoi, yo kadout tangcoung e Jisuh teh bout a hring telah Pawl ni a dei e patetnaw hah doeh. <sup>20</sup> Kai teh het patetlah e kâounkhai e naw heh ka pouk panuek lounklang hoeh dawkvah, Pawl hah Jerusalem vah cei vaiteh hawvah, hete lai heh akungkhei hanelah na ngai ou telah ka pacei. <sup>21</sup> Hatei Pawl ni siangpahrang ni lawkceng e totouh na hrueng awh ei telah a kâhei dawkvah, Sizar Siangpahrang koe thak hoehroukrak paung hanelah kâ ka poe toe telah a dei. <sup>22</sup> Agrippa bawi ni Festus bawi hanlah kama roeroe ni a lawh thai han ka ngai atipouh teh Festus ni tangtho to thai lawih atipouh.

### *Agrippa hmalah Pawl a pha*

<sup>23</sup> A tangtho vah Agrippa siangpahrang hoi a yu Bernike teh puenghoi a kamthoup teh, ransa bawinaw, hote khoung e alawkpui lah kaawm e taminaw hoi rei a tho awh teh, impui thung a kâen awh. Hatnavah Festus siangpahrang ni kâ a poe teh Pawl hah a hravi pouh awh. <sup>24</sup> Festus siangpahrang ni, Agrippa siangpahrang hoi hie kaawm tongpanaw, nangmouh ni na hmu awh e hete tami hoi kâkuen lah, Judahnaw pueng niyah, hete tami heh hring sak kawi nahoe telah a hramki awh teh, Jerusalem kho thung hai thoseh, hi khoung hai thoseh, kai koe a kâhei awh. <sup>25</sup> Hateiteh, ahni ni duekhai kawi bang buet touh boehai sak hoeh tie hah ka panue. Hatei, ama ni Sizar bawi koe nganga ka cei han ati dawkvah, hawvah thak hanelah ka kâcai toe. <sup>26</sup> Ahnie a kong teh thut vaiteh siangpahrang nang koe poe hanelah kamceng e a kong buet touh boehai yah kai dawkvah awhhoe. Hatdawkvah yon pennae buetbuet touh ka thut hane ao nahanelah, nang ni ahni hah akungkhei thai nahan nang na hmalah ka tâcokhai. <sup>27</sup> Bangkongtetpawiteh, thongkabawt e tami



buet touh heh a yonnae panuek laipalah patoun pawiteh kamcu mahoeah atipouh.

## 26

### *Agrippa hmalah Pawl lawk a dei*

<sup>1</sup> Hattoteh Agrippa ni Pawl hanelah, nama e kong nama ni na dei thai toe atipouh. <sup>2</sup> Hatdawkvah Pawl ni a kut a dâw teh, Agrippa siangpahrang, Judahnaw niyah kai yon na pen awh e naw hah sahnin nang na hmalah dei nahane atueng ka hmu e heh yawhawinae buet touh lah ka pouk. <sup>3</sup> Bangkongtetpawiteh siangpahrang nang teh, Judahnaw e singyoe hoi kamcan pueng na panue dawvk doeh. Hatdawkvah pahren lahoi ka dei e lawk heh lungsaw lahoi na thai pouh haw telah ka kâhei.

<sup>4</sup> Kai teh ka miphunnaw koehai thoseh, Jerusalem kho thung hai thoseh, ka nawca hoiyah bangtelamaw kho ka sak tie hah Judahnaw ni kounq a panue awh. <sup>5</sup> Ahnimouh ni kanawca hoi na panue awh dawkvah, kai teh kamamae phunglawk dawkvah kacingpounge Farasi buet touh lah ka o tie teh hi kaawm e naw ni dei ngai pawiteh a dei thai awh. <sup>6</sup> Atuvah kai teh mintoenaw koe Cathut ni poe lah kaawm e lawkkam ngaihawinae kecu dawvk lawk na ceng awh. <sup>7</sup> Kaimae miphun hlaikahni touh ni, karum khodai thahmei laihoi Cathut a bawk awh teh, hote lawkkam patetlah coe hane a ngaihawih awh. Siangpahrang, kai teh hete ngaihawinae dawvk doeh Judahnaw ni yon na pen awh. <sup>8</sup> Ka dout tangcoung e taminaw teh Cathut ni a thaw sak han tie hah yuem hanlah awmhoeh telah nangmouh ni teh khuet na ti a vaw.

<sup>9</sup> Atangcalah kai roeroe haiyah Nazareth tami Jisuh min hah taran han telah doeh ka pouk van teh Jerusalem vah hottelah doeh ka kâroe van. <sup>10</sup> Kai teh vaihma bawinaw koehoi kâtawnnae ka hmu teh, tami kathoung moikapap hah thongim thung ka paung teh, ahnimouh thei awh nahai ka lungkuepkhai van. <sup>11</sup> Sinakok tangkuem hai ahnimanaw hah atuhoitu runae ka poe teh, Cathut dudamnae lawk ngangngang ka dei sak. Hothloilah ahnimouh koe ka lungkhuek teh kho louk lah totouh ka pâlei teh ouk ka rektap.

### *Pawl lung kâthungnae hoi thaw poenae*

<sup>12</sup> Hottelah hoiyah, ahnimouh rektap hanelah vaihma bawinaw ni kâtawnnae na poe e lahoi Damaskas kho lah ka cei. <sup>13</sup> Kanîthun vah lam dawvk kanî angnae hlak ka ang e kalvan hoi e ni kai hoi ka huinaw abuemlae tengamp pueng koe pheng a tue e hah ka hmu. <sup>14</sup> Kaimouh abuemlahoi talai lah kounq ka rawp awh teh, Hebru lawk lahoi Sawl, Sawl bangkong kai na rektap. Sâw na pathui hane teh a pataw kaima, telah a dei e ka thai. <sup>15</sup> Hatnavah, kai ni Bawipa nang teh apimaw telah ka pacei navah Bawipa ni, kai teh nang ni na rektap e Jisuh doeh telah ati. <sup>16</sup> Thaw nateh na khok hoi kangdout leih. Nang koe ka kamnue ngainae teh Kai koe na hmu e naw hoi, bout na hmu hane naw hah kampangkhai hanelah nang teh na rawi toe. <sup>17</sup> Kai ni Judah miphunnaw e kut dawvk hoi thoseh, Jentelnaw e kut dawvk hoi hai thoseh, nang teh na rungngang han. Ahnimouh koe nang teh na patoun toe. <sup>18</sup> Hethateh, ahnima e mit na ang sak vaiteh ahnimouh teh hmonae um hoi angnae koe lah na rasa vaiteh, Setan kâtawnnae thung hoi Cathut koe lah kâthungsak vaiteh, ahnimouh ni Kai na yuem e lahoi yon ngaihoumnae a coe awh vaiteh, thoungsaknae ka coe e naw thungvah, a kâthum awh thai nahane doeh atipouh.



<sup>19</sup> Hatdawkvah, Agrippa siangpahrang kai ni kalvanlae vision hah ka ek thai hoeh. <sup>20</sup> Ahmaloe poun lah Damaskas kho kaawm e naw, hathnukkhu Jerusalem kho kaawm e naw hoi Judah ram daw kkaawm e tami pueng koehoi Jentel miphun pueng koehai pankângai vaiteh Cathut koe kâthung hanelah pankângainae hoi kamcu e naw hah na sak awh nahanelah ka pâpho. <sup>21</sup> Hete kongnaw dawkvah Judahnaw ni bawkim vah na man awh teh thei hanelah a kâcai awh. <sup>22</sup> Hatei, kai teh Cathut pahren lungmanae ka coe dawkvah sahnin totouh tami kathoeng kalen hanelah kampangkhai lahun e lah ka o. Hottelah kampangkhai navah, a to hmalah ka tâcawt han telah Mosi hoi profetnaw ni sut a dei tangcoung e hloilah alouke ka dei e awmhoeh. <sup>23</sup> Ahnimouh ni a dei awh e teh, Khrih teh runae a khang hoi duenae koehoi apasuekpoung lah boutthawnae lahoi Isarelnaw hoi Jentelnaw koe angnae kamthang a pâpho pouh han tie doeh telah a dei.

### *Agrippa counnae*

<sup>24</sup> Pawl ni hettelah a pâpho navah, Festus siangpahrang ni, Pawl nang teh na pathu toe. Ka tapuet lah na kamtunae ni na pathu sak toe telah hram laihoi a dei.

<sup>25</sup> Hatei, Pawl ni Festus siangpahrang, kai ka pathu e nahoe. Lawkkatang hoi ka talue e lawk doeh ka dei. <sup>26</sup> Agrippa siangpahrang ni hete kongnaw hah a panue dawkvah lungtang laihoi a dei. Hete kongnaw teh arulae a tho hoeh dawkvah, siangpahrang nang ni na panue hoeh e awm mahoe telah ka pouk. <sup>27</sup> Agrippa siangpahrang, profet lawknaw hah na yuem maw. Na yuem doeh tie ka panue atipouh. <sup>28</sup> Hattoteh Agrippa siangpahrang ni, nang ni na dei e lahoi kai hai khristen lah meime ka coung toe ati. <sup>29</sup> Pawl ni, bawipa nang dueng laipalah sahnin ka lawk ka thai e tami pueng ni hete sumrui hoi pâkhi e hloilah kai patetlah kounng na o awh nahan Cathut koe ka ratoum atipouh.

<sup>30</sup> Hahoi, Siangpahrang hoi Bernike hoi ateng ka tahung e pueng a thaw awh teh, <sup>31</sup> a tâco awh hnukkhu, hete tami teh, duekhai kawi, hoehpawiteh, katekkhai kawi yonnae buet touh boehai kahmawt hoeh telah buet touh hoi buet touh a kâpankhai awh. <sup>32</sup> Agrippa siangpahrang ni Festus koe, hete tami ni Sizar koe nganga ka dei han tet hoehpawiteh hlout sak hanlah ao atipouh.

## 27

### *Pawl Rom khovah a cei*

<sup>1</sup> Itali ram lah long hoi na cei han na ti pouh awh navah, Pawl hoi alouke thongkabawtnaw hai siangpahrang e ransa hu thung e ransabawi Julius koevah a poe awh. <sup>2</sup> Asia ram long kâhatnae kho koe lahoi pou ka cet hane long ka kâcui awh teh ka cei awh. Masidonia ram Thesalon tami Aristarkas hai kaimouh hoi a cei van.

<sup>3</sup> Atangtho teh Sidon ka pha awh. Julius ni Pawl hah a lungma dawkvah a huinaw koe a ceisak teh ahnimae khetyawtnae hah a coe sak. <sup>4</sup> Haw hoi vah ka tâco awh teh kahlî hah kaimouh koe lah a kamlang dawkvah Saipras tuilum e kahlî a uepnae koe lahoi ka cei awh. <sup>5</sup> Hahoi Cilicia hoi Pamfilia tueng koe ka raka awh teh Licia khopui Mira vah ka pha awh. <sup>6</sup> Haw tueng vah ransabawi ni Alexandria kho hoi Itali kho lah ka cet hane long buet touh a hmu teh hote long dawkvah na kâcui sak awh. <sup>7</sup> Hnin kapap hnawn payai lahoi ka cei awh teh rucat laihoi Kanidas kho teng ka



pha thai awh. Kaimouh teh kahlí kecu dawk patuen ka cei thai awh hoe h dawkvah, Krete tuilum kahlí a uepnae koe lahoi ka cei awh teh Salmon talaiddawn koehoi pet ka cei awh. <sup>8</sup> Tuipui rai lahoi nganga pou ka cei awh teh Lasea kho teng lungmawng tie long kâhatnae hmuen koe ka pha awh.

*Pawl ni dei e lawk eknae*

<sup>9</sup> Haw e hmuen koevah hnin moi kasawlah ka roe awh teh rawcahainae hnin hai aloum toung dawkvah, hmalah cei hane hai taki a tho dawkvah Pawl ni na hroecoe awh atipouh. <sup>10</sup> Hmaunawngghanaw hete tuipui daw ceinae heh long hoi hnopainaw daw dueng laipalah, maimae hringnae daw hai runae na poe hanelah ao tie hah ka hmu telah a dei. <sup>11</sup> Hateiteh ransabawi ni Pawl e lawk hah tang laipalah, long kamawngkung hoi long katawnkung e lawk hah bet atanghnawn. <sup>12</sup> Hote long kâhatnae koe vah kasik thapa thung pueng o hanelah a coung hoe dawkvah, tami kapap ni kanîloumaka lah hoi kanîloumatung lah pou cei vaiteh, Krete tuilum e Finik hmuen koe pha han a ngai awh. Hawvah kasik thapa pueng o hanelah a pouk awh.

*tûlî hoi kâhmonae*

<sup>13</sup> Akalah hoi kahlí a tho toteh khokhang awh e patetlah akuap han doeh telah a pouk awh. Hatdawkvah sumtaai hah a phawk awh teh, Krete tuilum teng lahoi a cei awh. <sup>14</sup> Hateiteh, atueng a ro hoehtahlan vah kanîtho koe lahoi yah, Euroquilo kahlí katang e hah a tho. <sup>15</sup> Long ni kahlí a hmang thai hoe h toung dawkvah longhni pueng ka rasu awh teh, kahlí ni a paleknae koe doeh ka cei awh toe. <sup>16</sup> Kawda tuilum teng, kahlí a uepnae koe ka pha awh toteh, ka ru poung lahoi hloutnae longca hah ka kuet thai awh. <sup>17</sup> Hote longca hah Long van vah a pâhung awh teh long hah acak nahanlah rui hoi kacaklah a katek awh. Sadi mon dawkvah hmang payon vai ati awh teh lukkarei longhni a rahnoum sak awh teh long hah kahlí a palek sak awh. <sup>18</sup> Kaimouh teh kahlí ni puenghoi na hmang awh dawkvah, atangtho teh long daw e hnonaw hah a tâkhawng awh. <sup>19</sup> Apâthum hnin teh amamae kut hoi long daw e hnonaw hah a tâkhawng awh. <sup>20</sup> A hnin moi kasawlah Kanî, Âsinaw hmawt awh hoe h. Tâli hai hoe h a tho dawkvah, a hnukteng teh hlout awh han doeh tie ngaihawinae pueng a kahma toe.

<sup>21</sup> Hottelah taminaw teh rawca laipalah kasawlah ao awh dawkvah, Pawl teh ahnimouh hmalah a kangdue teh, hmaunawngghanaw kaie lawk hah na ngai a lah, Krete tuilum koehoi tâcawt laipalah awh pawiteh, hete runae hoi sungnae pueng heh kâhmo awh mahoe h ei. <sup>22</sup> Hatei atuteh na lungpout awh han awh, telah na dei pouh awh. Nangmouh thung daw hoi api buet touh boehai na dout a mahoe h, long dueng doeh rawk tih. <sup>23</sup> Bangkongtetpawiteh, kai na katawnkung ka baw e Cathut e kalvantami ni paduem tangmin vah ka teng a kangdue teh, <sup>24</sup> Pawl, na lungpuen hanh, siangpahrang hmalah na kangdue mingming han doeh. Hahoi Cathut ni nang hoi rei ka tho e pueng hai na kut daw na poe toe a ti. <sup>25</sup> Hatdawkvah ka huinaw na lungpout a hanh awh. Bangkongtetpawiteh, na dei pouh e patetlah ao han tie Cathut kâuep laihoi ka yuem doeh. <sup>26</sup> Maimouh hai tuilum buetbuet touh daw long heh a mang han toe telah Pawl ni a dei.

<sup>27</sup> Hnin hlaipali hnin tangmin a pha navah kaimouh teh Adria tuipui daw kâpayo awh lahun navah, karumsaning a pha toteh long teh tui kongteng buetbuet touh hoi a hnai toe telah ka pouk awh teh, <sup>28</sup> tui hah ka bangnue awh bo teh, lam 20 touh a dung tie ka panue awh. Dongdeng



o hnukkhu bout ka bangnue awh bo teh, lam hlaipanga touh a dung e ka panue awh <sup>29</sup> Ahnimouh teh lungsongnaw hman langvaih tie a taki awh dawkvah, sumtaai pali touh a pabo awh teh, khodai lawiseh telah a ratoum awh. <sup>30</sup> Long kamawngnaw teh yawng hanelah a kâcai awh dawkvah, sumtaai ka pabawt e boiboe lah a kâsak awh teh hloutnae longca hah a rui a rasu awh. <sup>31</sup> Pawl ni ransabawi hoi ransanaw koevah, long thung na awm awh hoeh pawiteh, na hlout awh mahoe atipouh. <sup>32</sup> Hattoteh ransanaw ni hloutnae longca a ruinaw thoukthouk a tâtueng pouh teh tui thung a pabo awh.

<sup>33</sup> Khodai tawmlei nah Pawl ni abuemlah bu ca hane a dei pouh teh, nangmouh hah bu na cahoeah hah atuvah hnin hlaipali touh a pha toe. <sup>34</sup> Hatdawkvah bu na ca awh nahanlah kai ni hroecoe awh. Hot hateh nangmouh na hlout awh nahane doeh. Nangmae na lû daw e sam buet touh boehai kahmat mahoe atipouh. <sup>35</sup> Hettelah a dei hnukkhu vah, Pawl ni vaiyei hah a la teh abuemlah hmalah Cathut koe lunghawi lawk a dei hnukkhu vaiyei a raen teh a ca. <sup>36</sup> Hattoteh ahnimanaw abuemlah ni hai a thahmei awh teh a ca awh. <sup>37</sup> Long dawkvah tami 276 touh ao awh. <sup>38</sup> Rawca kaboumlah a ca awh hnukkhu long daw e catunnaw hah tui daw e tâkhawng awh.

### *Long a rawk*

<sup>39</sup> Khodai toreih teh haw e a hmuen teh panuek awh hoeh eiteh, a kawngteng kaawm e a takin koe lah long kâhat sak hanlah a kâpan awh. <sup>40</sup> Hahoi sumtainaw hah a rasu awh teh tui daw e pabo awh, mawngnae acung rui kalennaw a rasu awh teh, longhni a thung awh teh a kawngteng lah a cei awh. <sup>41</sup> Hatei Long teh tuicapa kahni touh kâcunae koe a pha dawkvah, long e a lû teh sadi van a deng teh, kâhuen thai hoeh toe. Ataknaw teh tuicapa ni a hem daw e koug a rawk.

<sup>42</sup> Ransanaw ni thongkabawtnaw pueng yawng awh langvaih, hatdawkvah be thei han toe telah a pouk. <sup>43</sup> Hateiteh, ransabawi ni Pawl hlout sak hanelah a ngai dawkvah, ahnima pouknae a ngang pouh teh, tui kale thainaw hmaloe a kawngteng lah kale sak hane, <sup>44</sup> alouke taminaw ni thingphek raboung naseh. Long daw e hnopai buetbuet touh nakunghai, kuetai laihoi kale hanelah kâ a poe. Hettelah hoi abuemlahoi kongteng lah runae awm laipalah koug a hlout awh.

## 28

### *Malta tuilum vah*

<sup>1</sup> Kaimouh teh lungmawngcalah hoi a kongteng ka pha awh hnukkhu vah hote tuilum teh Malta tuilum doeh tie ka panue awh. <sup>2</sup> Tamipathunaw ni kaimouh koe lungpatawnae a kamnue sak awh. Kho a rak teh hroung a pading dawkvah hmai a patawi awh teh kaimouh abuemlah na kamben sak awh. <sup>3</sup> Pawl ni thingnaw a racum navah a thung hoi tahrin kathout a tâco teh Pawl e a kut daw e khue pouh. <sup>4</sup> Tamipathunaw ni Pawl e kut daw e lawng kanghoi e tahrin hah a hmu awh navah, hete tami heh tami ka thet e han doeh, tui daw e hoi a hlout ei nakunghai, phunglawk ni hring sak han ngai hoeh telah buet touh hoi buet touh a kâpankhai awh. <sup>5</sup> Pawl ni hote tahrin hah hmai daw e kathek, hatei, ama teh bangtelah hai awmhoe <sup>6</sup> Ahni teh a takbuem a phing han, a kamlei vaiteh a due han, titeh a ring awh. Hatei, bangtelah hai ao hoeh toreih teh a lungkâthung awh teh hete tami teh cathut han doeh atipouh awh.



### *Taminaw a dam awh*

<sup>7</sup> Hote hmuen koehoi a hnainae koe vah Publius telah kaw e tuilum khobawi e talai ao. Hote khobawi ni kaimanaw na o sak hloilah hnin thum touh thung rawca totouh na khetyawt awh. <sup>8</sup> Publius khobawi e a na pa teh a pâding e hoi a vontamci lah a pataw teh sut a yan. Hatnavah Pawl ni a kâen sin teh a ratoum pouh hnukkhu a kut a toung pouh teh a dam sak. <sup>9</sup> Hettelah a hnosak e a hmu awh navah tuilum kho kaawm e kapatawnaw pueng a thokhai awh teh damnae a coe awh. <sup>10</sup> Ahnimanaw ni barinae a sin awh teh na bari awh, ka ban awh to hai panki e naw moi a pâseng awh.

### *Rom kho a pha awh*

<sup>11</sup> Thapa yung thum touh hnukkhu, tuilum koe kaawm e, kut sak kahrai ca kamphei e mei kâbet e Alexandria long hoi ka cei awh. <sup>12</sup> Sirakus kho ka pha awh teh hote kho dawkh hnin thum touh ka roe awh. <sup>13</sup> Haw hoi bout ka cei awh teh Regium kho ka pha awh. Atangtho vah akalae kahlî a tho dawkvah apâhni hnin vah Puteoli kho ka pha awh. <sup>14</sup> Hote kho dawkh hmaunawngnanaw hoi kâhmo awh teh hnin sari touh o hanelah na coun awh. Hettelah hoi Rom kho ka pha awh. <sup>15</sup> Kaimae kamthang ka thai e Rom kho e hmaunawngnanaw teh kaimouh hoi kâhmo hanelah, Rom kho hoi Appius hno yonae hoi bangla kathum touh tie totouh a tho awh. Pawl ni ahnimouh a hmu nah, Cathut koe lunghawi lawk a dei teh a thahmei awh. <sup>16</sup> Rom kho a pha awh toteh Pawl teh ama ka ring hane ransa buet touh hoi aloukcalah o hanelah ransabawi ni kâ a poe.

### *Rom kho e Judah kacuenaw hoi a kâhmo*

<sup>17</sup> Hnin thum touh hnukkhu, Pawl ni Judah kahrawikungnaw a kaw teh, a kamkhueng sak teh, hmaunawngnanaw kai ni Judah miphun ahawihoeahnae ka sak hoe. Mintoenaw e singyoe hai ka pahnavt hoe. Jerusalem kho thongim na pabo awh, Romnaw e kut dawkh na hnawng awh. <sup>18</sup> Romnaw ni lawk bout na pacei awh hnukkhu, due han kamcu e yonnae a hmu awh hoe dawkvah hlout sak hanelah a ngai awh. <sup>19</sup> Judahnaw ni a ngai awh hoe toreï teh, Sizar siangpahrang koe nganga ka cet e doeh. Ka taminaw koe yon pen han bangcahai ka tawn hoe. <sup>20</sup> Hete kong dawkh nangmouh na kâhmo teh kâpan han ka ngai dawkh na kaw awh e doeh. Isarel miphunnaw ni ngaihawinae kong dawkvah, hete sumbawtarui hoi kai teh na pâkhi awh atipouh. <sup>21</sup> Hattoteh ahnimanaw ni, nange kong dawkh Judah ram hoi ca ka hmawt awh hoe. Haw hoi ka tho e hmaunawngnanaw apinihai nang dawkh na yon telah ka dei e awmhoe. <sup>22</sup> Hatei, hete bawknae hoi kâkuen lah, kho tangkuem vah na taran awh teh, na pathoe awh tie hah kaimouh ni sut ka panue dawkvah, nang ni bangtelamaw na pouk tie kaimouh ni thai hanelah ka ngai atipouh awh.

### *Pawl e kamthang lawk dawkh pathungnae*

<sup>23</sup> Hathnukkhu Pawl hoi hnin a kâdawkh awh teh, ahni a luennae koe hoe kapap lah a tho awh. Pawl ni amom hoi tangmin lah ditouh ahnimouh koe Cathut uknaeram kong a cangkhai, a kampangkhah teh, Mosi e kâlawk hoi Profetnaw ni a thut e naw hno lahoi Jisuh kong hah a dei pouh. <sup>24</sup> Atangawn teh Pawl ni a dei e hah a yuem awh. Atangawnaw teh yuem awh hoe. <sup>25</sup> Hottelah buet touh hoi buet touh lungkânging hoe hoi a cei awh navah, Pawl ni lawkkam touh a dei e teh, Kathoung Muitha ni Profet Isaiah hno lahoi a dei e hah atang doeh. <sup>26</sup> Cet nateh dei pouh, a thai



awh han ei thai panuek awh mahoeih, a hmu awh han ei hmawt panuek a mahoeih atipouh. <sup>27</sup> Bangkongtetpawiteh, ahnimouh teh a hnâpang, a mitdawn awh teh, a lungthin kamlang awh hoeih. Hoehpawiteh, a mit hoi hmawt awh vaiteh, hnâ hoi thai awh vaiteh, a lung hoi a thaipanuek awh vaiteh, kâthung awh vaiteh, kai ni ka dam sak han a ti. <sup>28</sup> Hatdawkvah Cathut e rungngangnae teh Jentelnaw koe poe lah ao toung dawkvah, ahnimanaw ni teh a ngai awh han tie hah panuek awh telah Pawl ni a dei pouh. <sup>29</sup> Hete lawk hah Pawl ni a dei navah, Judahnaw teh thouk a kâoun awh teh a ban awh.

*Lungmawng lah Pawl thaw tawknae*

<sup>30</sup> Kum hni touh thung Pawl teh im a hlai e dawh a o, ama koe ka tho e naw pueng a luen sak teh, <sup>31</sup> banghai tarawknae awm laipalah, Cathut uknaeram kong hah, taranhawi laihoi a pâpho teh, Bawipa Jisuh Khrih e a kongnaw hah a cangkhai.



## ROM (The Epistle of Paul to the Romans)

### *Cathut e kamthang lawk kahawi*

<sup>1</sup> Kai Pawl, Jisuh Khrih e a san, Cathut ni a kamthang kahawi pâpho hanlah, na rawi teh na kaw e, guncei lah kaawm e ni ca na patawn awh.

<sup>2</sup> Hote kamthang kahawi teh Cathut ni ahmaloe hoi profetnaw koe na kam pouh tangcoung e hoi, Cakathoung daw k a thut tangcoung lah kaawm e,

<sup>3</sup> Cathut Capa Jisuh Khrih e kong hah doeh. Tami koe lahoi teh Devit catoun lah ao. <sup>4</sup> ThOUNGNAE Muitha bahu lahoi duenae koehoi

boutthawnae, Cathut capa lah a onae, heh a kamnue sak. <sup>5</sup> Hote Bawipa min lahoi Jentelnaw pueng ni yuemnae hoi Cathut lawkngainae koe pha

sak nahanelah, guncei lah coungnae coe awh. <sup>6</sup> Nangmouh hai hote Jentel miphun lah na o awh teh, Jisuh Khrih hoi na kâkuet awh nahanelah, kaw

e lah na o awh. <sup>7</sup> Hottelah Cathut ni a pahren teh tami kathoung lah a kaw e Rom kho kaawm e naw pueng koe, hete ca heh ka thut. Maimae Pa

Cathut hoi, Bawipa Jisuh Khrih koehoi lungmanae hoi lungmawngnae teh nangmouh koe awm lawiseh.

### *Rom kho Pawl cei han a ngai*

<sup>8</sup> Nangmae yuemnae teh talaivan pueng a kamthang dawkvah, nangmouh hanelah kaie Cathut koe Jisuh Khrih lahoi hmaloe ka lunghawi.

<sup>9</sup> Ouk ka ratoum navah nangmouh pou na pouk awh teh, Cathut ngainae awm pawiteh, hnin hnin touh hnin teh bangte lahoi ne nangmouh koe ka pha thai nahane lam a aw nahan ouk ka ratoum.

<sup>10</sup> Capa e kamthang kahawi ka pâpho teh, ka muitha lahoi ka baw k e Cathut hah kai kapanuekkhaikung lah ao. <sup>11</sup> Bangkongmaw nangmouh

kâhmo hanlah ka ngai tetpawiteh, nangmouh hah muitha poehno buetbuet touh rei teh, na cak awh nahanelah thapoe hanelah ka ngai

poung daw k doeh. <sup>12</sup> Hottelah ka ti navah kaie yuemnae ni nangmouh tha na poe teh, nangmae yuemnae ni kai tha na poe teh, yuemnae lahoi

buet touh hoi buet touh lungkâpatawnae coe awh nahane doeh.

<sup>13</sup> Hmaunawngghanaw, Jentelnaw koe ka cei navah hawinae ka hmu e patetlah nangmouh koe hai hmu hanlah, tho hane atuhoitu ka kâcai ei, na

katarawkkung ao daw k atu sittouh ka tho thai hoe. <sup>14</sup> Kai teh Griknaw, tamipathunaw, a lungkaangnaw, hoi miphun pueng koe laiba ka tawn e

lah ka o. <sup>15</sup> Hatdawkvah, Rom kho kaawm e nangmouh koe a coung thai totouh kamthang kahawi pâpho hanlah coungkacoe lah ka o.

### *Kamthang kahawi e bahu*

<sup>16</sup> Kai teh Khrih e kamthang kahawi kecu daw k kayanae ka tawn hoe. Bangkongtetpawiteh, hote kamthang kahawi teh ahmaloe vah

Judahnaw, hahoi Griknaw koe pâpho lah o teh, ka yuem e tami pueng ka rungngangnae Cathut e bahu doeh. <sup>17</sup> Cakathoung ni vah, tamikalan

teh yuemnae lahoi a hring han ati e patetlah, yuemnae daw k hoi e Cathut lannae teh akung hoi a hmo ditouh hete kamthang kahawi daw k a kamnue.

### *Talai taminaw e yon*



<sup>18</sup> Lawkkatang ka ngang e taminaw, Cathut laipalah khosaknae naw hoi kamsoumhoehe khosaknae naw pueng dawk kalvan hoi Cathut lungkhueknae teh a pha. <sup>19</sup> Bangkongtetpawiteh, panue kaw i e Cathut e a kong naw teh ahnimanaw koe a kamnue toe. Cathut ni ahnimouh koe a pâpho toe. <sup>20</sup> Bangtelah hoi maw a pâpho tetpawiteh, talaivan pek a kamtawng hoi Cathut e hmuthaihoehe a yungyoe bawilenna, a Cathutnae teh, a sak e hnonaw dawk hoi kamcengcalah panue thai kaw i lah ao dawkvah, ahnimouh ni kâatang thai mahoe.

<sup>21</sup> Bangkongtetpawiteh, ahnimouh ni Cathut hah a panue awh nahlangva vah, Cathut pholen hane totouh pholen a hoe. A lungmanae hai noutna a hoe. Ayawmyinlah pouknae hoi lungthin pathunae koe a pha awh.

<sup>22</sup> Ahnimouh teh amamouh hoi amamouh a lungkaang e patetlah a kâsak awh nahlangva vah, ka pathu e lah ao awh. <sup>23</sup> Kamko thai hoe e Cathut e a bawilenna hah a pahnavt awh teh, kamko thai e, tami, tava naw, a khok pali touh e moithangnav, vonpui hoi kâva e moithangnav hoi kâvan e meikaphawknaw hah Cathut e yueng lah a ta awh.

<sup>24</sup> Hatdawkvah, ahnimanaw teh buet touh hoi buet touh a kâbari awh hoe hahan, amamae lungngai e patetlah khinnae kut dawk Cathut ni a poe awh. <sup>25</sup> Ahnimouh ni lawkkatang Cathut yueng lah a kaphaw e cathut hah a tâ awh teh, kasakkung Cathut a pahnavt awh. A sak e hno hah a bawk awh. Hote Bawipa teh a yungyoe yawhawinae awmseh. Amen.

### *Taminaw khosak kamkoniae*

<sup>26</sup> Hottelah a sak awh dawkvah, ahnimanaw teh kayanae kut dawk Cathut ni a poe toe. Bangtelamaw tetpawiteh, napuinaw ni, tongpa hoi onae heh a pahnavt awh teh, napui reira ao awh. <sup>27</sup> Hot patetvanlah, tongpanaw ni hai napui hoi onae phung a pahnavt awh teh, buet touh hoi buet touh cuknae hmai patetlah a kak awh teh, kayatho poung e tongpa reira a hmawng awh teh, amamae a yon awh e patetlah lawkcengnae teh a kâhmo awh.

<sup>28</sup> Hothloilah ahnimouh ni Cathut panue han a ngai awh hoe dawkvah, hno kahawihoe a sak awh nahanelah, Cathut ni hounlounnae kut dawk ahnimouh teh a poe toe. <sup>29</sup> Ahnimanaw teh hno kahawihoe saknae a phunphun, kamsoumhoehe napui tongpa yonnae, mawikainae, hounlounnae, hounroenae, <sup>30</sup> Utsinnae, tami theinae, kayanae, dymyenna, tami hmungaihoehae, mathengpaanae, kâoupkâpawinae, thoun kaw i hoe e thounnae, manu na pa lawkn-gaihoehae, kâhruetcuethoehae, <sup>31</sup> thaipanuekhoehae, lawkkam-cakhoehae, lungkâpatawhoehae, ngaithoun thaihoehae, pahren-hoehae lungthin ka tawn e tami lah ao awh. <sup>32</sup> Hottelah kaawm e tami teh a due hane roeroe lah ao telah Cathut ni ati e heh a panue awh nahlangva, amamouh ni a sak dueng laipalah hottelah ka sak e taminaw koehai a lungkuep awh.

## 2

### *Cathut lannae*

<sup>1</sup> Ayânaw lawk ouk ka ceng e tami nang, na yon na ramuk thai mahoe. Bangkongtetpawiteh ayânaw lawk na ceng e patetlah nama ni roungrong na sak dawkvah, ayânaw lawk na ceng nah ka yon tie kamceng saknae lah ao. <sup>2</sup> Cathut ni hottelah kaawm e taminaw hah lawk a ceng tie teh lawkkatang hoi a kânging tie maimouh ni panue awh. <sup>3</sup> Hot patet e



yon, ma ni sak nahlangva vah ayâ ni a sak e teh, akung ka khe i tami, Cathut e lawkcengnae daw k hoi ka hlout han telah na pouk maw. <sup>4</sup> Cathut lungmanae ni pankângainae lamthung daw k na hrawi e heh panuek laipalah, a lungmanae, a lungsawnae, panguepnae naw heh banglahai na noutna awh hoeh bo vaw.

<sup>5</sup> Hatei na lungpatanae hoi pankângaihoehnae dawkvah, a lungphuen-nae hnin lah kaawm e Cathut e a lannae hoi lawkcengnae hnin navah ma ni khang han e, a lungkhueknae teh na pâtung awh toe. <sup>6</sup> Cathut ni tami pueng teh amamae a taw k awh e patetlah aphu a poe han. <sup>7</sup> Hnokahawi sak hanelah a lung katang niteh, bawilennae hoi barinae hoi kamko thai hoeh e hnnonaw ka tawng e teh a yungyoe hringnae a poe han. <sup>8</sup> Ma hane dueng pouk teh, lawkkatang tarawi laipalah, lanhoehnae daw k kho ka sak e taminaw koevah, puenghoi a lungkhueknae hoi a lungphuennae teh a pha sak han. <sup>9</sup> Runae hoi pataw khangnae naw teh, ahmaloe vah, Judahnaw koe, hahoi Griknaw, kathoute hno kasaknaw pueng koe, kalenpounge runae teh a pha han. <sup>10</sup> A bawilennae hoi barinae hoi lungmawngnae teh ahmaloe vah Judahnaw, hahoi Griknaw, hawinae ka sak e taminaw pueng koe a pha han. <sup>11</sup> Bangkongtetpawiteh Cathut teh apie minhmai hai khen hoeh.

<sup>12</sup> Kâlawk panuek laipalah ka yon e naw teh kâlawk laipalah rawknae koe a pha awh han. Kâlawk panue nahlangva, ka yon e naw teh kâlawk e lawkcengnae hah a khang han. <sup>13</sup> Bangkongtetpawiteh, a lawk ka thai e ni Cathut hmalah lannae coe hoeh. A lawk ka tarawi e ni doeh Cathut hmalah lannae teh a coe. <sup>14</sup> Jentelnaw ni teh kâlawk panuek laipalah amamae a tawksaknae heh a kâuepkhai awh. <sup>15</sup> Ma hoi ma kâpanuena e ni a kampangkhai teh, buet touh hoi buet touh a kâpan awh teh, yon a kângaithoum awh teh, amamae lungthin thung kaawm e thoehawi kamcengcalah a kamnue sak awh. <sup>16</sup> Kai ni ka dei e kamthang kahawi patetlah Cathut ni Jisuh Khrih lahoi yah, taminaw e arulahoi a tawksak e naw hah lawkcengnae hnin toteh hottelah lawk a ceng han.

### *Judahnaw hoi kâlawk*

<sup>17</sup> Nang teh namahoima Judah tami lah na kâpouk teh, kâlawk na kâuep teh, Cathut na kâuepkhai teh, <sup>18</sup> Cathut ngainae ka panuek e tami, kâlawnaw na tarawi teh, kapekkaboe thai e tami lah na o teh, <sup>19</sup> mitdawnaw lam ka pâtue e tami, kahmawt um kaawm naw ka ang sak e tami, <sup>20</sup> tamikaponaw ouk ka yue e tami, camonaw ka cangkhai e tami, kâlawk lahoi lungangnae hoi lawkkatang ka panuek e tami lah ka o titeh mahoima na ka pouk e lah na awm pawiteh, <sup>21</sup> ayânaw na yue nahlangva vah, namahoima na ka cangkhai thai hoeh maw. Ayânaw e hno parawt hanh telah na dei nahlangva vah na paru bo vaw. <sup>22</sup> Uicuk hanh na ti nahlangva, nama na uicuk bo vaw. Meikaphaw na panuet nahlangva bawkim na raphoe bo vaw. <sup>23</sup> Kâlawk na kâoupkhai nahlangva vah, hote kâlawk hah na tapoe teh, Cathut na bari hoeh bo vaw. <sup>24</sup> Bangkongtetpawiteh Cakathoung daw k a thut e patetlah Jentelnaw ni nange na nuencang hah a khet awh teh Cathut min a pathoe awh.

<sup>25</sup> Nang teh kâlawk na tarawi pawiteh vuensoma e lahoi ahawinae ao. Hatei kâlawk na ek pawiteh nange vuensoma e teh a hoeh e patetlah bout ao. <sup>26</sup> Hothloilah vuensoma hoeh e tami teh, kâlawk heh tarawi pawiteh, ahnie vuensoma hoeh e heh vuensomanae lah ouk pouk pouh nahoehmaw . <sup>27</sup> Hatnavah takthai daw k vuensom ka a hoeh nakunghai kâlawk tarawi



pawiteh, kâlawk lahoi vuensomanae ao nahlangva, kâlawk na ek pawiteh, lawkceng lah na o han.

<sup>28</sup> Bangkongtetpawiteh, alawilah hoi Judah tami lah kaawm e tami teh, Judah tami katang nahoe. Alawilah hoiyah tak dawk vuensoma e teh vuensoma katang e nahoe. <sup>29</sup> Thung lahoi Judah tami katang lah kaawm e doeh Judah tami katang. Vuensomanae hai Ca Karuem lahoi laipalah Muitha lahoi lungthin koelae vuensomanae doeh vuensoma e katang lah kaawm. Hot patetlah vuensom ka a e teh tami oupnae laipalah, Cathut ni oup e lah ao.

### 3

#### *Cathut e lawkkam caknae*

<sup>1</sup> Hat pawiteh, Judah tami ni bangmaw meknae kaawm. Vuensomanae ni bangmaw hawinae kaawm. <sup>2</sup> Ahawinae aphunphun ao. Hmaloe vah, vuensoma lah kaawm e Judahnaw teh Cathut lawk hah a coe awh. <sup>3</sup> Hat pawiteh, ahnimouh thungvah ka yuem hoe e awm pawiteh bangtelane ahnimae yuemhoe hah ni Cathut yuemkamcunae hah a kâ raphoe sak han na maw. <sup>4</sup> Kâ raphoe mahoe. Cathut ni a lawk lahoi lannae lah a coe teh, lawkceng toteh tâ nahanelah, Cakathoung dawk thut e patetlah tami pueng teh laithoe kadeikung lah ao awh ei, Cathut teh kalan e lah awm naseh, telah ati.

<sup>5</sup> Hatnavah, maimae lanhoe hah ni Cathut lannae kamnuek sak pawiteh, bangtelamaw dei awh han. Tami koe lahoi dei pawiteh, lungkhuéknae ka phat sak e Cathut teh kalan hoe e Bawipa lah maw ao. <sup>6</sup> Hottelah khoeroe awm hoe. Hottelah awm pawiteh Cathut ni bangtelah hoi maw talaivan lawk a ceng han vaw. <sup>7</sup> Hatei, kaie laithoenae lahoi Cathut lawkkatang ni a bawilennae hoe pung sak pawiteh, kai heh tamikayon buet touh lah bangkongmaw lawkceng e lah ka o rah vaw. <sup>8</sup> Hnokahawi a tâco nahanlah hno kahawihoehe sak awh han, telah tet thai mahoe maw. Tami tangawn ni hottelah maimouh ni dei awh ati awh teh, maimouh dudam lahoi a dei awh. Ahnimae yonphukhangnae teh a kamcu doeh.

#### *Tami kalan buet touh boehai awmhoeh*

<sup>9</sup> Hottelah pawiteh, bangtelah han maw. Maimouh teh hoe hawi awh maw. Hoe hawi awh hoe. Bangkongtetpawiteh, Judahnaw hoi Griknaw hai yon rahim vah ao tie yo kamnue sak toe. <sup>10</sup> Cakathoung dawk thut e patetlah tamikalan awmhoeh, buet touh boehai awmhoeh. <sup>11</sup> Ka thai panuek e awmhoeh. Cathut ka tawng e awmhoeh. <sup>12</sup> Tami pueng lam a phen awh teh, abuemlahoi cungkeihoe lah ao awh toe. Hnokahawi ka sak e apihai awmhoeh, buet touh boehai awmhoeh. <sup>13</sup> Ahnimae a lawkron teh kamawng e tangkom lah ao. Ahnimouh ni a lai hoi laithoe a dei awh. A pahni dawk hrunthoe sue ao. <sup>14</sup> Ahnimae apâhni teh lawkthoeumkha hoi akawi. <sup>15</sup> Ahnimae khok teh tami thei hane koe lah a hue a rang awh. <sup>16</sup> Ahnimae lamthung dawk kamkonae hoi roedengnae ao teh, <sup>17</sup> Ahnimouh ni rounnae lam panuek awh hoe. <sup>18</sup> Ahnimae mit dawk Cathut takinae tawn awh hoe.

<sup>19</sup> Kâlawk ni a dei e pueng teh kâlawk thung kaawmnaw hanelah doeh teh panue awh. Hottelah ao dawkvah, talaivan pueng teh lawk kam touh boehai dei thai laipalah, Cathut hmalah ka yon e lah ao awh. <sup>20</sup> Hatdawkvah, kâlawk tarawinae lahoi apihai Cathut hmalah tamikalan lah awm thai hoe. Bangkongtetpawiteh, kâlawk teh yon ka panueksakkung lah doeh ao.



<sup>21</sup> Atuteh kâlawk hoi profet lawknaw ni a kampangkhai e Cathut lannae teh, kâlawk laipalah a kamnue toe. <sup>22</sup> Cathut lannae teh Jisuh Khrih kayuemnaw pueng e lathueng vah a pha. Hatdawkvah, kapeknae khoeroe awmhoeh. <sup>23</sup> Bangkongtetpawiteh, tami pueng teh a yon awh dawkvah Cathut bawilennae hoi kâhla awh toe. <sup>24</sup> Ahnimouh teh Cathut lungmanae dawk Khrih Jisuh thung ratangnae lahoi aphu poe laipalah na lan toe telah khoe e lah o toe. <sup>25</sup> Cathut ni ama lannae a kamnue sak nahanelah Khrih hah a rawi teh, yuemnae hanlah Khrih thipaling teh thuengnae lah ao sak. Phunloun lahoi dei pawiteh, Cathut ni a lungsawnae lahoi kaloum tangcoun e yonnae naw hah pâkuem laipalah ao. <sup>26</sup> Hatdawkvah, atuteh amae lannae hah kamnue sak hane hoi Cathut ama roeroe alan teh, Jisuh ka yuem e taminaw hai alansak.

<sup>27</sup> Hat pawiteh, kâoupkhai kawi na mouh ao va. Hot teh pahnawt lah ao toe. Bang phung hoi mouh pahnawt lah ao va. Tawksaknae hoi maw. Na hoeh. Yuemnae lahoi pahnawt lah ao. <sup>28</sup> Bangkongtetpawiteh, tami teh kâlawk tarawinae lahoi laipalah yuemnae lahoi tamikalan lah na khoe toe tie lah pouk awh. <sup>29</sup> Nahoe pawiteh, Cathut teh Judahnaw hane Cathut dueng na maw. Jentelnaw e Cathut lahai awmhoeh namaw. A o. Jentelnaw e Cathut lahai ao. <sup>30</sup> Yuemnae lahoi vuensom ka a e tami teh na lan toe telah khoe e lah ao teh, vuensom ka a hoeh naw hai yuemnae lahoi na lan toe telah ka khoe e Cathut teh buet touh duengdoeh. <sup>31</sup> Hat pawiteh, maimouh ni yuemnae lahoi kâlawk teh pahnawt awh namaw. Khoeroe pahnawt awh hoeh. Kâlawk hah hoe caksak awh.

## 4

### *Abraham e yuemnae*

<sup>1</sup> Hottelah pawiteh maimae na pa Abraham teh takthai lahoi bang mouh ahawinae a coe vaw. <sup>2</sup> Abraham teh a tawksaknae hoi lannae koe phat pawiteh kâoupkhai kawi lah ao. Cathut hmalah teh hottelah nahoe. <sup>3</sup> Cakathoung dawk a dei navah Abraham teh Cathut a yuem dawkvah ahnie yuemnae teh lannae lah a khoe pouh.

<sup>4</sup> Thaw tawknae lahoi kutphu hmu e teh lungmanae nahoe, a hmu hanelah a kamcu dawk a hmu e doeh. <sup>5</sup> Thaw tawknae awmhoeh eiteh, tamikayonnaw hanlah na lan toe telah katetkung Bawipa hah, ka yuem e tami teh ahnie yuemnae hah lannae lah khoe pouh lah ao. <sup>6</sup> Hot patetlah Cathut ni a thaw tawknae khen pouh laipalah a poe e lannae kacoekung e a yawhawinae hah Devit ni a dei navah, <sup>7</sup> yon ngaithoum lah kaawm e, yonnae naw ramuk pouh lah kaawm naw teh a yawhawi awh. <sup>8</sup> Cathut ni yonpennae dawk hoi ka hlout e tami teh a yawhawi telah ati.

<sup>9</sup> Vuensoma lah kaawm naw dueng maw hote yawhawi ka coe han vaw. Ka a hoeh naw hai a coe han maw. Abraham e yuemnae teh ahnie lannae lah a khoe pouh, ati. <sup>10</sup> Hot hah, bangpatinah maw a khoe pouh. Vuensoma nah maw. Hoehpawiteh, vuensoma hoehnahlan maw. Vuensoma hnukkhu laipalah, vuensoma hoehnahlan vah hottelah khoe e lah ao toe. <sup>11</sup> Hot patetvanlah, Abraham teh vuensoma hoehnahlan yuemnae dawk hoi tamikalan telah khoenae hah vuensomanae lahoi a kamnue sak. Het hateh Abraham hah, vuensoma laipalah ka yuem e tami pueng e na pa lah ao nahane hoi ahnimanaw hai lannae a coe awh nahane doeh. <sup>12</sup> Hahoi, Abraham teh kayuemnaw pueng e na pa lah ao hane



hoi vuensoma dawk dueng laipalah, a hoehnahlan hoi kaawm e yuemnae dawk ka cet naw e na pa lahai ao nahane doeh.

### *Yuemnae lahai coe e lawkkam*

<sup>13</sup> Hete talaivan heh rāw lah na pang sak han telah Abraham koe poe e lawkkam teh, kâlawk khetsin lahai poe e tho laipalah, yuemnae lahai coe e lannae dawk hoi doeh poe e lah ao. <sup>14</sup> Bangkongtetpawiteh, kâlawk hoi kâkuen e naw ni rāw coe awh pawiteh, yuemnae teh ayawmyin lah awm vaiteh, lawkkam hai karawk han doeh. <sup>15</sup> Kâlawk ni teh lungkhueknae a tâcokhai. Hatei kâlawk awm hoeh pawiteh, payonnae hai awmhoeh.

<sup>16</sup> Hatdawkvah lawkkam teh yuemnae hoi doeh a kâkuet. Hote lawkkam teh lungmanae lahai a coung sak teh, kâlawk hoi kâkuen e miphunnaw hane dueng laipalah, Abraham e yuemnae hoi kâkuen e catoun lah kaawm e catounnaw pueng hanelah a caksak nahane doeh. <sup>17</sup> Kai ni nang teh moikapap e miphunnaw e na pa lah na coung sak toe telah Cakathoung dawk thut e patetlah Abraham teh ama ni a yuem e Cathut, kadout e naw hah kahring sak niteh, kaawm hoeh e hnaw hah ao thai nahanelah kâ ka poe thai e Cathut hmalah, maimouh pueng e na pa lah ao. <sup>18</sup> Ahni teh ngaihaw hanlah kaawm hoeh toung e hah a ngaihaw, a yuem teh, na catoun teh hetetlah ao han telah lawkkam pouh e patetlah moikapap e miphunnaw e na pa lah ao. <sup>19</sup> Ahni teh a kum cum touh bang a pha nah, amae a tak teh kadout e patetlah ao e hoi, Sarah e von a due toe tie hai a panue eiteh yuemnae dawk a thayounnae awmhoeh.

### *Yuemnae lahai coe e lannae*

<sup>20</sup> Cathut e lawkkam dawk lunghringnae tawn laipalah yuemnae a len poung teh Cathut a pholen. <sup>21</sup> Cathut teh lawkkam a poe e patetlah a sak thai tie hai khoeroe a yuem. <sup>22</sup> Hatdawkvah, yuemnae hah ahnie lannae lah khoe pouh e lah ao.

<sup>23</sup> Hatei, ahni hah khoe e lah ao telah Cakathoung dawk a thut e teh, Abraham buet touh hane dueng nahoe. Maimouh hanelah hai thut e lah ao. <sup>24</sup> Maimae Bawipa Jisuh hai duenae koehoi kathawsakkung hah ka yuem e maimouh hai na lan toe telah na khoe awh han. <sup>25</sup> Bawipa Jisuh teh maimae payonnae dawkvah, thei e lah ao teh maimouh lansaknae coe nahanelah a thaw toe.

## 5

### *Roumnae lahai lunghawinae*

<sup>1</sup> Hatdawkvah maimouh teh yuemnae lahai lannae koe phat pawiteh maimouh Bawipa Jisuh Khrih lahai Cathut hmalah roumnae coe awh toe. <sup>2</sup> Hote lungmanae coe thainae teh, yuemnae tawn awh teh, hote Bawipa dawk hoi dueng doeh coe thainae kâ tawn awh. Hatdawkvah Cathut e Bawilennae ngaihaw laihoi konawmnae tawn awh toe. <sup>3</sup> Hot dueng nahoe, rucatnae khang nahaiyah lunghawinae tawn awh toe. Bangkongtetpawiteh, rucatnae ni teh panguepnae a thokhai. <sup>4</sup> Panguepnae ni teh panuecainae a thokhai. Panuecainae ni teh ngaihawinae a thokhai. <sup>5</sup> Hote ngaihawinae ni maimouh yeirai na poe mahoe. Bangkongtetpawiteh, Cathut e lungpatawnae ni maimouh na poe e Kathoung Muitha lahai maimae lungthung vah awi e lah o awh toe.

<sup>6</sup> Maimouh thayoun lah o awh lahun navah, Khrih teh atueng a pha nah cathutlaipa e taminaw hanlah a due. <sup>7</sup> Bangkongtetpawiteh, tamikalan hanelah kadout hane tami a takang. Hawinae ka sak e tami hanelah teh



ao thai tet ei sei. <sup>8</sup> Maimouh teh tamikayon lah o awh lahun nah, Khrih teh maimae yon kecu dawkw a due toe. Cathut ni maimouh banghloine lungpataw awh tie kacaicalah a kamnue sak.

<sup>9</sup> Hatdawkvah atuteh a thipaling lahoi lannae koe pha hnukkhu, hote Bawipa lahoi a lungkhueknae dawkw hoi hlout awh han tie hoe ngaihawinae ao. <sup>10</sup> Bangkongtetpawiteh, taran lah o awh lahun nah Ama e Capa duenae lahoi, maimanaw teh Cathut hoi bout kâmaihawi awh toe. Kâmaihawi tangcung lah kaawm e maimouh teh, Capa e hringnae lahoi rungngangnae dawkw pha han doeh telah ngaihawinae hoe ao. <sup>11</sup> Hot dueng laipalah, atu maimouh bout kâmaihawinae na kapoekung Bawipa Jisuh Khrih lahoi Cathut dawkw konawmnae tawn awh.

### *Adam hoi Khrih*

<sup>12</sup> Hatdawkvah, yon teh tami buet touh lahoi talaivan dawkw a kâen teh, yon ni duenae a thokhai e patetlah tami pueng a yon awh toung dawkvah, duenae koe a pha awh. <sup>13</sup> Kâlawk poe hoehnahlan hoi talaivan dawkw yon teh ao toe. Hatei, kâlawk awmhoeh pawiteh yon hah yon telah khoe thai hoeh. <sup>14</sup> Hateiteh, Adam koehoi kamtawng teh Mosi totouh duenae ni a uk. Adam ni a yon e patetlah kayonhoehe naw pueng hai kounng a uk. Hote Adam teh ka tho hane a tâhlip lah ao.

<sup>15</sup> Hatei, aphulaipa poehno hoi yonnae kâvan hoeh. Bangkongtetpawiteh, tami buet touh a yon kecu dawkw tami moikapap dout pawiteh, Cathut lungmanae hoi tami buet touh Jisuh Khrih lungmanae dawkw hoi poehno teh, tami moikapap koevah lungmanae hoehe apap han.

<sup>16</sup> Hothloilah, tami buet touh payonnae ni a thokhai e hoi poehno teh kâvan hoeh. Bangkongtetpawiteh, buet touh koelah lawkcengnae dawkw teh, yonphukhangnae lah ao. Hatei, yonnae moikapap dawkw hoi aphulaipa poehno ni teh lansaknae a tâcokhai. <sup>17</sup> Bangkongtetpawiteh, tami buet touh ni a yon toung dawkvah, hote tami buet touh e pawlawk dawkw duenae ni na uk pawiteh, ka kuep e lungmanae hoi lannae poehno ka coe e naw ni tami buet touh tie Jisuh Khrih pawlawk dawkw hoi hringnae ni hoehe a uk awh han.

<sup>18</sup> Hatdawkvah tami buet touh e payon kecu dawkvah taminaw pueng yonphukhangnae lawkcengnae koe a pha e patetlah, tami buet touh e lannae pawlawk lahoi tami pueng hringnae hoi lansaknae koe lah phanae kâ tawn awh toe. <sup>19</sup> Bangkongtetpawiteh, tami buet touh e lawk eknæ kecu dawkw tami moikapap yon dawkw pha e patetlah tami buet touh lawkngainæ lahoi tami moikapap lannae koe pha awh. <sup>20</sup> Kâlawk teh yonnae pung sak hanelah doeh a kâen. Hatei, yonnae a pungnae koe lungmanæ hoe a pung. <sup>21</sup> Hottelah pawiteh yon ni duenae lahoi na uk e patetlah lungmanæ haiyah lannæ lahoi na uk teh maimæ Bawipa Jisuh Khrih lahoi a yungyoe hringnae coe thai nahane doeh.

## 6

### *Hring katha dawkw khoktakannæ*

<sup>1</sup> Hottelah pawiteh bangtelamaw dei awh han. Lungmanæ a pung nahanelah yonnae hoehe sak awh han na maw. <sup>2</sup> Sak a mahoehe. Yonnae dawkw kadout e naw teh hote yonnae dawkw bangtelah vai bout a hring toung vaw. <sup>3</sup> Khrih Jisuh thung baptisma ka coe e maimouh teh a duenæ thung baptisma coe awh tie na panuek awh hoehe maw. <sup>4</sup> Hottelah maimouh teh a duenæ dawkw baptisma coe e lahoi, ama hoi cungtalah pakawp e



lah o awh. Khrih ni Na pa e bahu lahoi duenae koehoi a thaw e patetlah maimouh hai hring kathanae dawk hring awh hane doeh.

<sup>5</sup> A duenae koe ama hoi rei dout awh pawiteh, a thawnae koe vah ama hoi rei thaw a van han. <sup>6</sup> Maimae tami karuem teh Khrih hoi cungtalah thingpalam dawk thei lah ao toe. Hottelah nangmae tami karuem takthai raphoeneh teh yonnae san lah bout o awh hoeh na hanlah tie panue awh.

<sup>7</sup> Ka dout tangcoung naw teh yon dawk hoi a hlout toe.

<sup>8</sup> Maimouh ni Khrih hoi cungtalah dout pawiteh ama hoi cungtalah hring han telah yuem awh. <sup>9</sup> Duenae koehoi ka thaw e Khrih teh bout dout mahoe hie panue awh. Duenae ni Bawipa teh nâtuék hai uk thai mahoe hie toe. <sup>10</sup> Khrih teh yonnae dawkvah vai touh lahoi kakhoutlah a due toe. Atu e hringnae teh Cathut dawk doeh a hring toe.

<sup>11</sup> Hot patetlah nangmouh hai yon dawk teh kadout e lah na o awh teh, Cathut dawk teh Khrih Jisuh lahoi kahring telah namahoima kâpouk awh.

<sup>12</sup> Hatdawkvah nangmae kadout thai e takthai ngainae tarawi hanelah yon koe kâ uk sak awh hanh. <sup>13</sup> Nangmae na tak puengcangnaw teh lanhoehnae lah yonnae koe poe awh hanh lawih. Hothlak teh duenae koehoi bout kahring e patetlah, nangmae tak puengcangnaw teh lannae lah coung sak awh nateh Cathut koe namamouh hoi namamouh kâpoe awh. <sup>14</sup> Bangkongtetpawiteh, nangmouh teh kâlawk rahim na awm awh toung laipalah, lungmanae rahim na o awh toung dawkvah, yon ni nangmouh lathueng kâ bout tawn mahoe hie toe.

### *Yon san hoi lannae san*

<sup>15</sup> Hat pawiteh, bangtelamaw. Maimouh teh kâlawk rahim awm toung laipalah, Cathut lungmanae rahim o awh toung dawkvah, yon bout sak awh han rah maw. Khoeroe sak mahoe hie. <sup>16</sup> Nangmouh ni yah bawi e lawk ka ngai han telah na dei pawiteh nangmouh teh lawk na ngai pouh e bawi e a san lah na o awh. Hot patetvanlah yonnae a hnuk na kâbang pawiteh yonnae san lah na o vaifeh, lannae koe na ka phat sak e lawk na ngai pawiteh lannae san lah na o awh tie na panuek awh hoe hie maw.

<sup>17</sup> Nangmouh teh yon san lah na o awh ei nakunghai, atuvah na coe awh tangcoung e cangkhae hah na ngâi awh dawkvah, Cathut lungmanae a len tanggak. <sup>18</sup> Yonae dawk hoi na hlout awh teh, lannae san lah na o awh toung dawkvah, Cathut lungmanae teh ka pholen.

<sup>19</sup> Hottelah ka ti navah, na tha a youn dawkvah hottelah ka dei e doeh. Ahmaloe teh namamae takthai puengcangnaw hah kahawihoehe hnosaeknae dawkvah san lah na la hno awh e patetlah, atuteh namamae takthai puengcangnaw hah thoungnae hno sak nahanelah, lannae san lah poe awh nateh, thoungnae koe phat awh. <sup>20</sup> Nangmouh teh yon san lah na o awh navah lannae dawk hoi na hlout awh. <sup>21</sup> Hatnavah atu na tawksaknae kayanae dawk hoi bangmaw hawinae na hmu awh vaw. Hot naw e a poutnae teh duenae doeh. <sup>22</sup> Hatei, atuteh yonnae dawk hoi na hlout awh toung dawkvah, Cathut e san lah na o awh teh thoungnae apaw hah na coe awh. Apoutnae koehai a yungyoe hringnae na pang awh han. <sup>23</sup> Yon phu teh duenae doeh. Cathut ni na poe e poehno teh maimae Bawipa Khrih Jisuh thung yungyoe hringnae doeh.



<sup>1</sup> Hmaunawngghanaw, kâlawk kapanueknaw hanelah ka dei e teh, kâlawk ni teh tami a hring nathing dueng doeh a uk thai tie na panuek awh hoeh maw. <sup>2</sup> Bangnue nae lah, vâ ka sak e napui buet touh teh a vâ a hring nathing dueng doeh vâsaknae ni a katek. A vâ dout pawiteh vâ hoi kâkuen e kâlawk dawk hoi a hlout. <sup>3</sup> Hatdawkvah a vâ a hring nahlangva, alouke tongpa hoi ipawm pawiteh ka uicuk e napui telah ti han. Hatei a vâ a due hnukkhu teh, kâlawk ni kateknae thung hoi a hlout toe. A vâ bout sak pawiteh ka uicuk e napui tet mahoe hoi toe.

<sup>4</sup> Hot patetvanlah, hmaunawngghanaw, nangmouh hai, Khrih e a tak dawkvah kâlawk teh na due takhai awh toe. Het hateh alouke tami tie duenae koehoi ka thaw e Bawipa hoi kâkuen e lah o awh toun dawkvah, Cathut hanelah a paw paw nahane doeh. <sup>5</sup> Tami kahring takthai ngainae hoi hring awh navah, kâlawk ni a tâcokhai e yon sak ngainae ni maimae tak thungvah thaw a tawk teh duenae a tâco sak. <sup>6</sup> Atuteh maimouh na katek e kâlawk koe lah due awh teh kâlawk dawk hoi hlout awh toun dawkvah, kâlawk lahoi laipalah, Muitha e phung lam katha dawk thaw hoi e lah o awh toe.

### *Kâlawk hoi yonnae*

<sup>7</sup> Pawiteh bangtelamaw dei han. Kâlawk teh dawk a yon maw. Awm hoeh. Hateiteh kâlawk ni yon na panuek sak hoeh pawiteh yon tie panuek mahoe hoi. Kâlawk ni hno noe hanh tet hoe pawiteh hno noenae lunghin tie panuek mahoe hoi. <sup>8</sup> Hatei, yon ni kâpoelaw hno lahoi hno noenae a cawnga a tâco sak. Kâlawk awmhoeh pawiteh yon teh kadout e lah ao. <sup>9</sup> Kai hai yampa teh kâlawk laipalah kho ka sak e lah ka o. Hatei kâpoelaw a tho toteh, yon teh bout a hring, kai teh ka due. <sup>10</sup> Hringnae koe ka phat sak hane kâpoelaw ni teh duenae koe na phakhai tie ka hmu. <sup>11</sup> Yon ni kâlawk hno lahoi kai hah na dum teh hote kâpoelaw ni kai teh na thei. <sup>12</sup> Hatdawkvah kâlawk teh a thoun, kâpoelaw hai a thoun, a lan teh ahawi.

<sup>13</sup> Hat pawiteh hettelah kahawi e hno heh kai hanlah duenae lah maw ao vaw. nahoe hoi bo. Kai hanlah duenae lah kaawm e teh yon hah doeh. Yon teh yon tie kamceng nahanlah hete kahawi e kâpoelaw lahoi kai koe duenae lah a coung sak. Hatdawkvah yon teh kâlawk lahoi touklek hoeh e yonnae naw lah a tâco.

<sup>14</sup> Kâlawk teh muitha koelae hno doeh tie teh panue awh. Hatei kai teh takthai lahoi kaawm e lah ka o dawkvah yon san lah ka o.

<sup>15</sup> Bangkongtetpawiteh kama ni ka sak e hno hah kama ni ka thaipanuek hoeh. Bangkongtetpawiteh ka sak ngai e sak laipalah, ka sak ngai hoeh e hah ouk ka sak. <sup>16</sup> Hottelah ka sak ngai hoeh e hah ka sak navah kâlawk e ahawinae teh ka hnâbo tinae doeh. <sup>17</sup> Hatdawkvah hete hno kasakkung teh kai nahoe hoi toe, ka thung kaawm e yon ni doeh a sak toe. <sup>18</sup> Ka thungvah tami coungnae dawk hawinae buet touh boehai awmhoeh tie teh ka panue. Bangkongtetpawiteh ka thungvah hawinae sak ngainae ao eiteh sak thainae ka tawn hoeh. <sup>19</sup> Sak han ka ngai e kahawi hno sak laipalah sak han ka ngai hoeh e hno doeh let ka sak. <sup>20</sup> Hottelah kai ni ka sak ngaihoeh e ka sak navah, kasakkung teh kai nahoe hoi, ka thung e kaawm e yon ni doeh a sak.

<sup>21</sup> Hattoteh kahawi hno sak han ka ngai e kahawihoehe hno ka thung vah ao tie hah ka hmu. <sup>22</sup> Kai teh ka thung e muitha tami ni Cathut e kâlawk dawk a lunghawi ei, <sup>23</sup> ka takthai puengcang dawk alouke phung ao teh,



ka thung e phung hoi a kâtaran dawkvah, ka takthai puengcang dawk kaawm e yon phung lahoi kai hah na man teh na katek tie hah ka hmu. <sup>24</sup> Kai teh lungrei ka thai e lah doeh ka o. Hete duenae koehoi apinimaw na hlout sak han vai. <sup>25</sup> Hatei maimae Bawipa Jisuh Khrih dawk hoi na kahloutsakkung Cathut teh ka pholen. Hettelah hoi kai teh ka lung thung hoi Cathut e phung dawk san lah ka o ei, takthai lahoi teh yon phung dawk san lah ka o.

## 8

### *Kathoung Muitha hoi hringnae*

<sup>1</sup> Hatdawkvah atuteh Khrih Jisuh thung kaawm e naw pueng, yon-phukhangnae awm mahoe h toe. <sup>2</sup> Bangkongtetpawiteh Khrih Jisuh thung kaawm e hringnae Muitha phung ni yon duenae phung thung hoi kai teh hlout sak lah ka o toe. <sup>3</sup> Cathut ni amae Capa hah yon kakawi e takthai lah yon kecu dawk a patoun teh, takthai dawk yon hah lawk a ceng teh, takthai lahoi kâlawk ni a sak thai hoe h e hah na sak pouh toe. <sup>4</sup> Het hateh takthai ngainae laipalah, Muitha ngainae patetlah ka hring e maimouh koe kâlawk phung pathang e a kuep nahane doeh. <sup>5</sup> Takthai counгнаe hoi hring han ka ngai e taminaw teh takthai counгнаe naw hah a ngailem awh. Muitha ngainae patetlah ka hring e taminaw teh Muitha hoi kâkuen e naw hah a ngailem awh. <sup>6</sup> Takthai e pouknae teh duenae doeh. Muitha e pouknae teh hringnae hoi lungmawngnae doeh. <sup>7</sup> Bangtelah tetpawiteh takthai counгнаe lungthin teh Cathut hoi kâtaran e lah ao. Bangkongtetpawiteh hote lungthin ni Cathut e kâlawk ngainae awmhoeh. Atangcalah tarawi thai hoe h. <sup>8</sup> Hatdawkvah takthai lahoi kahringnaw ni Cathut lungkuep sak thai hoe h.

<sup>9</sup> Hatei, Cathut Muitha nangmouh thung awm pawiteh nangmouh teh takthai daw k laipalah Muitha daw k na o awh. Khrih Muitha ka tawn hoe h e tami teh Khrih e tami nahoe h. <sup>10</sup> Hatei Khrih teh nangmae thungvah awm pawiteh takthai teh yon kecu kadout nakunghai muitha teh lanna e kecu daw k a hring han. <sup>11</sup> Hothloilah Jisuh hah duenae koehoi kathawsakkung Cathut e Muitha teh nangmae thungvah awm pawiteh, Khrih hah duenae koehoi ka thaw sak e Cathut ni nangmouh thung kaawm e amae Muitha lahoi kadout thai e nangmae tak hai a hring sak han.

<sup>12</sup> Hatdawkvah hmaunawngghanaw, maimouh teh takthai ngainae patetlah hring hanelah, takthai counгнаe daw k san lah awm awh hoe h. <sup>13</sup> Bangkongtetpawiteh, nangmouh teh takthai ngainae patetlah na hring awh pawiteh, na due awh han. Hatei Muitha ngainae lahoi takthai ni a tawksak e naw hah na dout sak awh pawiteh na hring awh han. <sup>14</sup> A lamthung teh Cathut Muitha ni a hrawi e naw pueng teh Cathut e canaw lah o awh. <sup>15</sup> Nangmanaw teh bout ka taket thai e san muitha na coe a hoe h. Cacounгнаe Muitha doeh na coe awh. Hote muitha daw k hoi Abba Apa telah maimouh ni kaw awh. <sup>16</sup> Maimanaw ni Cathut e canaw lah onae teh Muitha ama roeroe ni maimanaw e muitha hoi cungtalah a kampangkhai. <sup>17</sup> Hottelah a canaw lah awm awh toung pawiteh a râw ka pang e lahai o awh. Khrih hoi a bawilenna e rei hmawng nahanelah, reithainae hai rei khang awh pawiteh, Cathut e a râw ka pang hanelah hai o awh.

*Hmalah A bawilenna e hoi ngai hawinae*



<sup>18</sup> Atu mithmu vah reihathainae naw pueng teh maimouh ni pang lah kaawm hane bawilennae hoi bangnue pawiteh dei han kamcu hoeh telah ka pouk. <sup>19</sup> Hete sak e hno cawngca ni Cathut e canaw a kamnue nahane hah doun laihoi a ngaihawi awh. <sup>20</sup> Bangkongtetpawiteh, sak e hno cawngca pueng teh banglahai cungkeihoeh toe tie teh ama ngai lahoi nahoe, hottelah kahruengkung ngainae lahoi doeh. <sup>21</sup> Sak e hno cawngca pueng teh kamkonae dawk hoi a hlout teh, Cathut e a canaw e bawilennae hoi ka kuep e dawkvah a kâen han tie ngaihawinae ao dawk doeh. <sup>22</sup> A sak e hno cawngca pueng teh atu totouh a cingou teh ca khe reithainae a khang tie hah panue awh. <sup>23</sup> Hothloilah Muitha e a luepaw hmaloe ka coe e maimouh nihaiyah cacoungnae tie maimae takthai ratangnae hah ngaihawi laihoi lungthung vah cingou awh. <sup>24</sup> Maimouh teh hete ngaihawinae ni rungngang lah na o sak. Hatei hmu thai e hateh ngaihawinae nahoe. Bangkongtetpawiteh, apinimaw hmuthai e hno hah khuet bout a ngaihawi han vaw. <sup>25</sup> Hmuthaihoehe maimouh ni ngaihawi awh pawiteh hote hno hah panguep lahoi ngaihawi awh.

<sup>26</sup> Hot patetvanlah Muitha nihaiyah maimae thayounnae koe na kabawp awh. Maimouh ni ratoum hane patetlah bang patet e hno maw ka ratoum han tie panuek awh hoeh. Hatei, Muitha ama roeroe ni lawk hoi a pâpho thai hoeh e cingounae lahoi maimouh hanlah na hei pouh. <sup>27</sup> Lungthin ka khen e Bawipa ni hai Muitha e lungthin hah a panue. Bangkongtetpawiteh Muitha ni Cathut ngainae patetlah tami kathoungnaw hanelah na hei pouh awh.

<sup>28</sup> Cathut ni a lungpataw teh, a pouk tangcoung e patetlah a kaw e naw hanelah, hnocawngca pueng ni hawinae koe lah doeh reirei a kâroe pouh tie teh panue awh. <sup>29</sup> Bangkongtetpawiteh, A panue tangcoung e naw hah amae Capa mei kâlat lah sut a hmoun toe. Hethateh hmaunawngghanaw thung dawc camin lah ao nahane doeh. <sup>30</sup> Hottelah sut a hmoun e naw hah ama ni a kaw teh, a kaw e naw hah a lansak, a lansak e naw hah a bawilen sak.

### *Kayuemnaw ni tânae*

<sup>31</sup> Telah boipawiteh hete hnonaw pueng khetsin hoi bangtelamaw dei han. Cathut maimouh koelah kampang pawiteh apinimaw maimouh na tuk thai han. <sup>32</sup> A Capa patenghai pasai laipalah maimouh hanlah na kapoekung ni a Capa hoi cingtalah hnocawngca pueng teh poe laipalah ao han na maw. <sup>33</sup> Cathut ni a rawi tangcoung e naw teh apinimaw yon a pen han. Na lan toe katetkung teh Cathut a ma doeh toe. <sup>34</sup> Apinimaw yon phu bout na khang sak han. A due dueng laipalah duenae koehoi ka thaw e Khrih Jisuh teh Cathut e aranglah ao teh, maimouh hanelah na ratoum pouh awh. <sup>35</sup> Apini maw maimouh heh Khrih e lungpatawnae dawc hoi na kapek thai han. Roedengnae, pawapanatnae, rektapnae, kahaikahlamnae, caicinae, takithonae hoi tahloi ni na ou. <sup>36</sup> Maimouh teh kanîrui Bawipa hanlah duenae hoi kâhmo awh. Maimouh teh thei hanlah hmoun e tunaw patetlah na pouk awh telah Cakathoung dawc thut e patetlah doeh ao.

<sup>37</sup> Maimouh teh, maimouh lungpatawkung Bawipa lahoi yah, hote hnonaw kâhmo awh lahun nah, khoeroe tâ e lah o awh. <sup>38</sup> Bangkongtetpawiteh, duenae thoseh, hringnae thoseh, kalvantaminaw thoseh, ka ukkungnaw thoseh, atu hmu thai e hnonaw thoseh, ka tho hane hnonaw thoseh, hnotithainae thoseh, <sup>39</sup> kahlun lae hno thoseh, rahim lae hno thoseh, sak e cawngca pueng hai thoseh, maimae Bawipa Khrih Jisuh



thung kaawm e Cathut e lungpatawnae hoi bang ni hai na kapek thai mahoe.

## 9

### *Isarelnaw hoi Cathut e lawkkam*

<sup>1</sup> Kai teh Khrih dawk laithout laipalah lawkkatang ka dei han. Kaie thoeahawi panuenae teh Kathoung Muitha lahoi kai hoi cungtalah kampangkhai teh, <sup>2</sup> Kai dawk puenghoi lungmathoenae hoi ka lungthung vah lungpuennae pou ka tawn. <sup>3</sup> Bangkongtetpawiteh, takthai lahoi ka miphun lah kaawm e ka hmaunawngghanaw hanelah kama roeroe Khrih hoi kampek vaiteh thoebonae khang han totouh ngainae ka tawn. <sup>4</sup> Ahnimouh teh Isarel miphun lah ao teh cacounghae, bawilennae, lawkkamnae, kâlawk poenae, bawknae teh ahnimouh hoi ka kâkuen e lah ao. <sup>5</sup> Mintoenaw teh ahnimouh hoi a kâkuet teh, Khrih hai tami lahoi teh ahnimouh thung hoi a tâco. Hote Bawipa teh bangpuengpa e lathueng vah ao teh, a yungyoe yawhawinae Cathut lah ao. Amen.

<sup>6</sup> Bangtelah nakunghai thoseh, Cathut lawkkam teh raphoe e lah awmhoeh. Bangkongtetpawiteh Isarel catoun lah kaawm e pueng Isarel miphun lah awm awh hoeh. <sup>7</sup> Abraham e catoun lah kaawm e pueng Abram e ca katang lah koug awmhoeh. Isak koehoi e catoun doeh nange catoun lah kaw han tie lah ao. <sup>8</sup> A deingainae teh takthai lahoi khe lah kaawm e taminaw teh Cathut e ca lah awmhoeh, lawkkam daw k hoi khe e tami dueng doeh a miphun lah a khoe. <sup>9</sup> Bangkongtetpawiteh lawkkam dawkvah het patet e tueng a pha navah, bout ka tho han. Sarah haiyah capa a khe han telah ati. <sup>10</sup> Hot dueng nahoe, Rebekah hai maimae mintoe Isak hoi yuvâ lah ao teh camo a vawn navah, <sup>11</sup> A ca khe hoehnahlan, a canaw ni a thoeahawi banghai a panue awh hoehnahlan hoiyah, Cathut ni a rawinae lah kaawm e a pouk tangcoun e hah, thaw tawknae lahoi laipalah, a kawnae lahoi caksak nahanlah, <sup>12</sup> Ca kacue e teh kanaw koe san lah ao han telah sut a dei pouh toe. <sup>13</sup> Jakop teh ka lungpataw, Esaw teh ka hmuhma telah Cakathoung daw k thut e patetlah doeh ao.

### *Cathut e rawinae*

<sup>14</sup> Telah boipawiteh maimouh ni bangtelamaw dei han tounge. Cathut teh lanhoehnae lah maw ao tounge. Khoeroe awmhoeh. <sup>15</sup> Bangkongtetpawiteh Cathut ni Mosi koe, lungma han ka ngai e tami hah ka lungma teh, pahren han ka ngai e tami hah ka pahren han telah ati. <sup>16</sup> Hatdawkvah het hateh, tami e ngainae hoi kâyawmnae daw k tho hoe, lungpatawkung Cathut kâ lah doeh ao. <sup>17</sup> Cakathoung daw k Faro siangpahrang koe nang hah kai ni na tawmnae teh, nang koe kama e bahu ka kamnue sak vaiteh, talai van pueng daw k a min kamthang sak nahane doeh telah ati. <sup>18</sup> Hatdawkvah, Cathut ni a pahren ngai e hah a pahren teh, a lungpata sak hanlah a ngai e hah a lungpata sak.

<sup>19</sup> Hatnavah nang ni, telah pawiteh Cathut ni bangkongmaw taminaw hah yon a pen vaw. Apini maw Cathut ngainae teh a taran thai han vaw telah na pacei han. <sup>20</sup> Hatei, oe nange tami, nang teh banglah maw na o teh Cathut hah bout na pato ngam vaw. Sak e hno ni kasakkung koe bangkongmaw hettelah na sak atipouh thai han maw. <sup>21</sup> Hlaam kasakkung ni amhru daw k kâ tawn hoe h na maw. Hote amhru hah hlaam bari kaawm hoi bari kaawm hoe h e sak thainae kâ tawn hoe h na maw.



<sup>22</sup> Hatei, Cathut ni a lungkhueknae a kamnue sak hane hoi amae bahu panue sak hanelah, a ngainae ao nahlangva vah, raphoe hanlah ta e, lungkhueknae hlaamnaw hah, lungsaw poung lahoi panguep pawiteh, bangtelamaw. <sup>23</sup> Hathloilah, a lentoe nahanlah sut rakueng e, lungmanae hlaamnaw dawkvah, amae bawilennae hah panue sak nahanelah sak pawiteh bangtelane. <sup>24</sup> Cathut ni maimanaw teh hote lungmanae hlaamnaw lah, Judahnaw thung dueng laipalah, Jentelnaw pueng koe haiyah na kaw e lah o toe. <sup>25</sup> Hosi cauk thungvah, Cathut ni ka tami lah kaawm hoeh e hah, ka tami telah ka kaw han, ka pahren hoeh e napui hah ka pahren telah ka kaw han ati. <sup>26</sup> Nangmanaw teh ka tami nahoei telah tinae hmuen koe nangmouh teh ka hring Cathut e a canaw telah na kaw awh han telah ati e patetlah ao. <sup>27</sup> Isaiah nihai, Isarelnaw kong daw k a dei e teh, Isarel canaw teh tuipui rai e sadi yit touh ka phat nakunghai kacawie dueng rungngang lah ao han. <sup>28</sup> Bangkongtetpawiteh Cathut ni a thaw teh cum hoeh roukrak tawk vaiteh, lannae hoi a tawk han. Bawipa ni talai van a thaw teh a kuep sak vaiteh kâhat laipalah ka tawk han telah a hramkhai. <sup>29</sup> Hothloilah Isaiah ni, kalvan ransabawi yungyoe kahring e Cathut ni maimouh hanlah catoun pek hoehpawiteh, Sodom hoi Gomorrah khopui hoi doeh kâvan awh ti telah sut a dei e patetlah ao.

### *Isarelnaw payonnae*

<sup>30</sup> Telah pawiteh, maimouh bangtelamaw dei awh han tounge. Lannae ka pâlei hoeh e Jentelnaw ni lannae teh a coe awh toe. Hothateh, yuemnae lahoi coe e lannae lah ao. <sup>31</sup> Lannae hoi kâkuen e phung coe hanelah ka pâlei e Isarel miphun naw teh hote phung hah phat thai awh hoeh. <sup>32</sup> Bangkongmaw a pha thai awh hoeh. Yuemnae hoi laipalah tawksaknae daw k hoi kâyawm e lah ao daw k doeh. Ahnimouh teh talung daw k kamthui teh a tâlaw awh toe. <sup>33</sup> Kenhaw! Zion vah tâlawnae lungsong, payonsakkung talung hah kai ni ka hruek. Apihai ama ka yuem e tami pueng teh kayak mahoei telah Cakathoung daw k thut e patetlah ao.

## 10

### *Yuemnae lahoi coe e rungngangnae*

<sup>1</sup> Ka hmaunawngghanaw Isarelnaw ni rungngang lah ao thai nahanelah ka ngaikhai poung dawkvah Cathut koe pou ka ratoum. <sup>2</sup> Ahnimouh ni Cathut hanelah puenghoi a lungthao awh e hah kai ni ka kampangkhai. Hatei, ahnimae a lungthaonae teh panuena katang lah awmhoeh. <sup>3</sup> Ahnimouh ni Cathut e lannae a lamthung panuek a hoeh. Amamae lannae caksak hanelah a tawng awh dawkvah, Cathut e lannae daw k kâen thai a hoeh. <sup>4</sup> Kayueme tami pueng ni lannae koe pha thai awh nahanlah Khrih teh kâlawk poutnae doeh. <sup>5</sup> Mosi ni kâlawk lahoi kâkuen e lannae kong daw k a thut e teh, apihai hote kâlawk ka tarawi e pueng teh hotnaw lahoi a hring han, a ti. <sup>6</sup> Yuemnae lahoi coe e lannae teh, nange na lungthung vah kalvan lah apimaw ka luen han tet hanh. A deingainae teh Khrih hah kum khai han ti ngainae doeh. <sup>7</sup> Nahoei pawiteh, adungpoungnae koe apimaw ka kum han telah hai tet hanh. A dei ngainae teh Khrih hah duenae koehoi tâcokhai han tinae doeh. <sup>8</sup> Bout a dei e teh phung lawk teh na teng vah ao. Na pahni daw k hai, na lungthung hai ao ati. Het hateh kaimouh ni ka pâpho awh e yuemnae lawk hah doeh. <sup>9</sup> Jisuh teh Bawipa doeh telah na pahni hoi na dei teh, na lungthung hoi Cathut ni ahni teh duenae koehoi a thaw sak toe telah



na yuem pawiteh rungngang lah na o han. <sup>10</sup> Lannae koe pha hanelah lungthin hoi yuem han, rungngangnae koe pha hanelah pahni hoi pâpho han. <sup>11</sup> Bangkongtetpawiteh, Cakathoung ni, hote talung ka yuem e pueng teh kayak mahoe h a ti. <sup>12</sup> Het dawkvah Judahnaw hoi Griknaw rahak kapeknae awmhoeh. Bangkongtetpawiteh tami pueng ka uk e Bawipa buet touh dueng ao teh Ama ka kaw e pueng teh yawhawinae kakhoutlah a poe. <sup>13</sup> Bangkongtetpawiteh Bawipa min ka kaw e pueng rungngang lah ao han.

### *Kamthang kahawi thainae lahoi yuemnae*

<sup>14</sup> Hateiteh ma ni yuem hoeh e Bawipa hah bangtelamaw kaw thai han vaw. Na thai boihoeh e Bawipa hah bangtelamaw na yuem thai han vaw. Kapâphokung awm laipalah bangtelamaw thai thai han vaw. <sup>15</sup> A tami patoun laipalah bangtelamaw pâpho thai han vaw. Hot patetlah Cakathoung daw k thut e patetlah, roumnae kamthang kahawi ka pâpho e, lunghawinae kamthang kadeikungnaw e khok teh a meihawipoung. <sup>16</sup> Hateiteh, tami pueng ni lunghawinae kamthang thai ngai awh hoeh. Profet Isaiah ni a dei e teh, Oe! Cathut kaimae kamthang kahawi apinimaw a yuem han, a ti. <sup>17</sup> Hatdawkvah yuemnae teh thainae koehoi a tho teh, thainae teh Khrih e a lawk lahoi doeh a tho. <sup>18</sup> Hatei, pacei han ka ngai e teh, ahnimouh ni thai awh hoeh maw. A thai toung te., Ahnimae hramnae lawk teh talai van pueng a kamthang teh ahnimae a lawk teh talaivan a pout totouh a pha, telah a dei. <sup>19</sup> Bout na pacei ngai e teh Isarelnaw ni panuek awh hoeh maw. Ahmaloe vah Mosi ni nâyittouh hoeh e miphun lahoi nangmouh koe utnae lungthin ka tâco sak teh, panuenae ka tawn hoeh e miphun lahoi yah, na khang thai hoeh hane totouh ka tâco sak han a ti. <sup>20</sup> Profet Isaiah nihai, kai ka tawng hoeh e naw ni kai hah na hmu awh. Kaie kong ka pacei hoeh e naw koe kamahoima kamphawng pouh han telah taranhawi laihoi a ti. <sup>21</sup> Hatei, Isarelnaw hoi kâkuen lah, lawk ka ngâi hoeh e, ka taran lah kaawm e naw koe kai ni kanîrui rui kut ka na sin toe atipouh.

## 11

### *Lungmanae lahoi rawinae*

<sup>1</sup> Telah pawiteh, Cathut ni amae miphunnaw a pahnawt toung telah na pacei pawiteh pahnawt hoeh, kai hai Isarel miphun, Abraham koehoi ka tho e, Benjamin catoun lah ka o. <sup>2</sup> Cathut ni sut a panue tangcoung e taminaw pahnawt hoeh. Profet Elijah ni, Isarelnaw Cathut koe a thaisak navah Cakathoung daw k bangtelamaw a thut tie na panuek awh hoeh maw. <sup>3</sup> Ahni ni, Oe Cathut, ahnimouh teh Bawipa nange profetnaw hah a thei awh toe. Bawipa nange thuengnae khoungroenaw a raphoe awh toe. Kai buet touh dueng doeh kaawm toe. Kai hai thei hanelah na tawng awh toe telah a dei. <sup>4</sup> Hatei, Cathut ni bangtelamaw a dei pouh tetpawiteh, Baal hmalah khok cuengkhuem hoeh e tami thong sari touh kama hanelah ka pek toe telah atipouh. <sup>5</sup> Hot patetvanlah atu tueng haiyah, lungmanae lahoi rawi e acawinaw ao rah. <sup>6</sup> Hatei, lungmanae lahoi boipawiteh tawksaknae lahoi nahoe h toe. Hoehpawiteh lungmanae teh lungmanae lah awm mahoe h.

<sup>7</sup> Hottelah pawiteh bangtelamaw. Isarel miphunnaw ni panki laihoi a tawng awh e hno hah hmawt a hoeh. Rawi e lah kaawm naw ni dueng doeh a hmu awh. Aloukenaw teh a lungpata awh. <sup>8</sup> Cathut ni ahnimouh koe vah atu totouh a lungthin pueng a ramuk pouh. Ka hmawt thai hoeh



e mit, ka thai thai hoe h e hnânaw hah a poe telah Cakathoung daw k a thut e patetlah atu a kuep toe. <sup>9</sup> Devit ni hai a dei e teh, ahnimae caboi teh tangkam patung e lah, karap patung e lah, payonsakkung lah, moipathung hanelah awm naseh telah a ti. <sup>10</sup> Ahnimanaw e mit teh hmu thai hoe h totouh dawn naseh. Ahnimae keng hai hnamkhun yungyoe seh telah a ti.

### *Jentelnaw koe ka phat e rungngangnae*

<sup>11</sup> Hat pawiteh, Isarel naw ni a rawp totouh a kamthui awh tOUNg maw telah na pacei. Telah nahoe h. Ahnimouh payonnae lahoi Jentelnaw koe rungngangnae a pha teh, Isarel naw ni utsinnae a tawn awh nahane doeh.

<sup>12</sup> Hatei, ahnimae payonnae ni talaivan taminaw hanelah yawhawinae a tâcokhai. Ahnimae sungnae ni Jentelnaw hanlah yawhawinae tâcawtkhai pawiteh, ahnimae kuepnae ni teh banghloimaw hawinae hoe a tâcokhai han.

<sup>13</sup> Hottelah ka ti nah, kai teh Jentelnaw koe patoun e guncei lah ka o e patetlah, <sup>14</sup> hote thaw taw knae daw kâoup teh, ka miphunnaw e pouknae hah buetbuet touh lahoi utsinnae a tawn awh vaiteh rungngang lah ao awh thai nahanelah ka ngai hawi. <sup>15</sup> Bangkongtetpawiteh, ahnimouh pahnawt lah a onae teh talaivan taminaw hanlah bout kâmaihawi lah awm pawiteh, ahnimouh bout coenae teh kadout tangcoung naw hanlah duenae koehoi bout hringnae lah kaawm han nahoe h maw. <sup>16</sup> Aluepaw lah thueng e tavai teh thOUNg pawiteh abuemlah a thOUNg han. A khONGyang thOUNg pawiteh, a kang naw pueng hai a thOUNg han.

<sup>17</sup> A tangawn e a kang naw teh tâtueng vaiteh, kahrawng e Olivekung lah kaawm e nang hah hote a kangnaw dawkvah, pacawng laihoi Olive khONGyang daw k e tui na kahmawng e lah na awm pawiteh, <sup>18</sup> hote cakang naw e lathueng kâoupnae lungthin tawn hanh. Na kâoup han na ngai pawiteh, nang ni a khONGyang na doun hoe h, khONGyang ni doeh nang teh na doun. <sup>19</sup> Hattoteh nang ni kai hah na pacawng nahanelah a kangnaw teh bouk lah ao na ti han doeh. <sup>20</sup> Bokheiyah. Ahnimouh a yuem hoe h daw k tâtueng lah ao teh, nang teh yuemnae lahoi doeh na cak. Kâoupnae tawn hanh, takinae tawn haw. <sup>21</sup> Bangkongtetpawiteh, Cathut ni apasuek e a kangnaw pasai hoe hpawiteh, nangmouh hai na pasai mahoe h. <sup>22</sup> Hatdawkvah Cathut ni lawkcengnae hoi lungmanae hah khenhaw! Lawkcengnae teh ka rawm e taminaw lathueng ao teh, Cathut lungmanae teh nang ni hote lungmanae daw k pou na awm pawiteh, nang koe vah ao. Pou na awmhoe h pawiteh nang haiyah tâtueng lah na o han. <sup>23</sup> Ahnimanaw pueng hai yuemhoe hnae tâkhawng awh pawiteh, a kang daw k patawp lah ao awh han. Bangkongtetpawiteh ahnimanaw pueng bout patawp hanelah Cathut ni a sak thai. <sup>24</sup> Bangkongtetpawiteh nang teh kahrawng e Olivekung daw k hoi tâtueng e lah na o teh, kahawi e Olivekung daw k kaawm boihoe h e patawp e lah na awm pawiteh, kaawm boi e Olive kangnaw teh a kung karuem daw k banghloimaw bout patawp hanelah a yawi han.

### *Isarel miphunnaw e rungngangnae*

<sup>25</sup> Hmaunawng hanaw nangmanaw, kâoupnae lungthin na tawn hoe h nahanelah, Jentelnaw pueng a kâen hoe hnahlan totouh Isarel tami tangawn teh hmonae ni a ramuk e hrolawk heh panuek laipalah na o sak hanelah na ngai khai awh hoe h. <sup>26</sup> Hote Cakathoung daw k e patetlah Isarel naw pueng rungngang lah ao awh han. Cakathoung ni a dei e teh, ka hloutkhaikung Bawi teh Zion mon daw k hoi a tho vaiteh,



Jakop e miphun daw k hoi tami kahawi hoeh naw kOUNg a raphoe han.  
<sup>27</sup> Ahnimouh a yonnae pueng ka tâkhawng pouh toteh ahnimouh koe kai ni ka poe hane lawkkam doeh telah Ca Kathoung daw thut e patetlah ao.  
<sup>28</sup> Ahnimanaw teh kamthang lawkkahawi kecu daw nangmae taran lah kaawm nakunghai rawinae daw k teh mintoenaw pawlawk daw k pahren lah ao awh. <sup>29</sup> Bangkongtetpawiteh, Cathut e poehnonaw hoi kawnae teh bout kâthung hoeh. <sup>30</sup> Nangmouh pueng teh ahmaloe vah Cathut e lawk na ngâi awh hoeh eiteh, atuteh ahnimae lawkngâihoeahnae ni pahrennae na coe sak toe. <sup>31</sup> Hot patetvanlah nangmouh ni na coe e pahrennae lahoi yah, ahnimanaw hai pahrennae a coe thai nahan, atuvah ahnimanaw teh lawkngai laipalah ao awh. <sup>32</sup> Cathut ni tami pueng pahrennae tawn thai nahanlah taminaw lawk ngaihoehnae daw k a paung.

<sup>33</sup> Cathut e lungangnae hoi poukthainae a dungkawnae teh a dungkaw tanggak doeh. Lawkcengnae naw apinimaw kOUNg a panue thai han. A lamthungnaw tawng nakunghai hmawt thai hoeh. <sup>34</sup> Cathut e a pouknae apimaw ka panuek, BAWIPA hoi apimaw ka kâpan. <sup>35</sup> Kahawi hno saknae pathung thai nahan, a yungyoe Cathut daw k apine hnokahawi ka sak. <sup>36</sup> Hno cawngca pueng teh Bawipa koehoi, Bawipa lahoi, Bawipa hanelah ao awh. Bawipa teh a yungyoe bawilenna awm lawiseh. Amen.

## 12

### *Muitha koe lah thaw tawaknae*

<sup>1</sup> Hatdawkvah, hmaunawngghanaw nangmouh na hroecoe ngainae teh Cathut pahren lahoi nangmae na tak teh, Cathut ngai e lah kaawm e kathoung ni teh kahring e sathei lah thueng awh. Hethateh, nangmouh ni na taw kawi lah kaawm e muitha koelae thaw doeh. <sup>2</sup> Nangmouh teh, talaivan meilam kâmahrawk awh hanh. Cathut ni ngai e lah kaawm e kahawi e hno, ngai kaawm e hno, ka kuep e hnonaw hah kapek teh panue thai nahanlah lungthin katha pathoupnae lahoi meilam kâthungnae tawn awh.

<sup>3</sup> Cathut lungmanae lahoi na poe lah kaawm e nangmouh koe dei hanlah ka ngai e teh, mahoima hoe kârasang laipalah Cathut ni thaw buetbuet touh na rei tangcoung e patetlah pouk awh. <sup>4</sup> Bangkongtetpawiteh, tak buet touh daw k puengcang moikapap lah ao eiteh, hote puengcangnaw ni thaw buet touh e dueng rip taw k a hoeh. <sup>5</sup> Hot patetlah moikapap e maimouh teh Khrih thung tak buet touh lah o awh teh lengkaleng a cakang lah o awh. <sup>6</sup> Hottelah na poe e poehnonaw aphunphun coe awh e patetlah, aloukloukcalah coe awh dawkvah, sutdeilaw k ka coe e lah awm pawiteh yuemnae a coe e patetlah pâpho naseh. <sup>7</sup> Ayâ hanlah thaw ka taw k hanelah na awm pawiteh, hottelah taw k hanelah ao. Kacangkhaikung saya hanelah na awm pawiteh cangkhaing thaw taw k hanelah ao. <sup>8</sup> Kahroecoekung hanelah na awm pawiteh hroecoena thaw taw k hanelah ao. Poe pasoung hanelah na awm pawiteh lungtho thahmei lahoi poe pasoung hanlah ao. Ka ukkung hanelah na awm pawiteh lungtho tha patung laihoi uk hanlah ao. Kabawp hanelah na awm pawiteh lungthocalah hoi kabawp hanlah ao.

### *Kayuennaw e lungpouk*

<sup>9</sup> Lungpatawnae teh kâsaknae awmhoeh. Kathout e hno panuet awh. Kahawi hno daw k lungpen awh. <sup>10</sup> Hmaunawnggha lungpatawnae daw k buet touh hoi buet touh kâlungma awh. Kâbari awh nateh, ayânaw kai



hlak bet ahawi telah pouk awh. <sup>11</sup> Pangak laipalah na thahmei sak awh nateh, lungkânging lahoi Bawipa e thaw tawk awh. <sup>12</sup> Ngaihawinae dawk lunghawi awh. Rucat na kâhmo awh nah panguep awh. Ratoum yungyoe awh. <sup>13</sup> Tami kathoungnaw e a pankinae hah poe pasoungnae hoi ka bawm awh nateh, imyinnaw kahawicalah khenyawn awh.

<sup>14</sup> Nangmouh na ka rektap e naw hanelah ratoum pouh awh. Yawhawi poe awh nateh thoebo awh hanh. <sup>15</sup> A kokanawmnaw hoi cungalalah konawm awh. Kakhuikapnaw hoi cungalalah khuikap awh. <sup>16</sup> Buet touh hoi buet touh lungthin kânging awh. Kâoupkâpawi laipalah, sue touh lah kâkhen awh. Namahoima kathoum ka thai kâtet awh hanh. <sup>17</sup> Apihai bout pathung a hanh awh. Taminaw hmalah nangmouh ni bari kaawm e sak hanlah kâcai awh. <sup>18</sup> A coung thai totouh tami puenghoi kâpolah awm awh. <sup>19</sup> Ka pahrennaw, nama ni pathung laipalah a lungkhueknae kut dawk hnawng awh. Bangkongtetpawiteh Cathut ni a dei e teh, pathungnae teh Kaie doeh ati. Kai ni ka pathung han ati telah Cakathoung dawk thut e lah ao. <sup>20</sup> Hatdawkvah kut pathung laipalah, na taran vonhlam pawiteh pacapanei awh. Tui kahran pawiteh tui pânei awh. Hottelah na sak e lahoi ahnie lû dawk hmaisaan na pâpawp pouh han. <sup>21</sup> Kathout e lahoi ta awh laipalah, kahawi e hno hoi kathoute hah tâ haw.

## 13

### *Ukkung bawinaw hoi kâkuetnae*

<sup>1</sup> Lathueng lae ukkungnaw e kâ teh tami pueng ni ngai awh naseh. Cathut koehoi laipalah kâtawnnae tie awmhoeh. Atu kaukkungnaw heh Cathut ma ni a poe e doeh. <sup>2</sup> Kaukkungnaw ka taran e teh Cathut ni kâ poe e ka taran e lah ao. Hottelah ka taran e naw teh yon lawkcengnae ama ni a kâhmo awh han. <sup>3</sup> Bangkongtetpawiteh, kaukkungnaw heh hawinae ka sak e taminaw hanelah taki hane awmhoeh. Hno kahawihoe ka sak naw hanelah doeh taki hanelah ao. Hottelah na sak pawiteh ahnie oupnae na pang han. <sup>4</sup> Hatdawkvah ahnimouh teh nang hane hnokahawi kasakkung Cathut e san doeh. Hatei hno kathout na sak pawiteh takinae tawn lawih. Ahnimouh teh tahloi ayawmlah patuem awh hoe. Ahni teh hno kathout ka sak naw hanlah a lungkhueknae yon lawkcengkung Cathut e san doeh. <sup>5</sup> Hat pawiteh, a lungkhueknae dawk dueng laipalah thoeahawi panue e lahoi hai ngâi awh. <sup>6</sup> Het kecu dawk nan ou, tamuk naw hai na poe awh. Nangmouh teh Cathut e thaw katawknaw lah na o awh teh hote thaw doeh pou na tawk awh. <sup>7</sup> Hatdawkvah tami tangkuem hai poe kamcu e hah poe awh. Tamuk poe kamcu e naw hah tamuk poe awh. Cawng e poe tueng e naw hah cawng pouh awh. Taki tueng e naw hah taket awh. Bari kamcu e naw hah bari awh.

### *Buet touh hoi buet touh lungkâpatawnae*

<sup>8</sup> Lungpatawnae hloilah, bang patet e laiba hai tawn awh hanh. Ayâ lung ka pataw e ni kâlawk a kuep sak toe. <sup>9</sup> Bangkongtetpawiteh, uicuk hanh, tami thet hanh, parawt hanh, radueknae lung tawn hanh tie kâpoelawk koehoi kamtawng teh, alouke kâlawk bangpatet hai, nama hoi kâkuen e hah nama hoi kâvan lah lungpataw tie kâlawk dawk koung a kâkuet. <sup>10</sup> Lungpatawnae ni teh a tengpam huiko naw koe, hawihoeahnae sak hoe. Hatdawkvah, lungpatawnae teh, kâlawk ka kuepsakkung lah ao.



<sup>11</sup> Nangmanaw ni, a tue teh na panue awh. Nangmouh inae koehoi kâhlaw nahane tueng a pha toe. Bangdawk ne tetpawiteh atu maimae rungngangnae teh maimouh yuemnae hnin hlak hoehoe a hnai toe. <sup>12</sup> Karum meimei aloum teh, kho meimei a dai toe. Hatdawkvah maimanaw teh ka hmawt e nuencangnaw takhoe vaiteh angnae nuencang naw khohnat awh sei. <sup>13</sup> Caneinawmnae, yamuhrinae, kamsoumhoehe napui tongpa yonnae hoi takngainae, kâpokâdanghoehnae hoi kâutnae dawpawngpa laipalah khodai ceio e patetlah mitkhet kamcu lah khosak awh sei. <sup>14</sup> Bawipa Jisuh Khrih hah khohnat awh. Takthai lunggradueknae thap sin hanelah kâcai awh hanh.

## 14

### *Kayuem reira kâkuetnae*

<sup>1</sup> Yuemnae dawp a tha ka youn e taminaw hah dâw awh. Pouknae aphunphun dawp oun awh hanh. <sup>2</sup> Tami tangawn ni bangpuengpa ca thai tie a yuem awh. Hatei, yuemnae dawp a tha kayoun e naw teh anhla dueng doeh a ca awh. <sup>3</sup> Ka cat e ni ka cat hoeh e naw hnepnap hanh naseh. Ka cat hoeh naw ni hai ka cat naw lawkceng hanh naseh. Bangkongtetpawiteh, Cathut ni ahni teh a coe toe. <sup>4</sup> Namahoima hah banglah maw na kângai teh, ayânaw e san hah lawk na ceng vaw. Ahni a kangdue hai thoseh, a rawp hai thoseh, a Bawipa hoi doeh a kâkuet. Hatei, ahni teh a kangdue han, bangkongtetpawiteh, Cathut ni a kangdue sak thai.

<sup>5</sup> Tami tangawn ni ahnin hnin touh heh alouke hnin naw hlak hoe a talue ati awh. Tangawn ni a hninnaw pueng teh suetouh doeh ati awh. Tami pueng ama ni a pouk e hno dawp a lungkuep naseh. <sup>6</sup> A hnin ka ya e ni Bawipa hanlah ya naseh. Ka cat e ni hai Bawipa hanlah cat naseh. Bangkongtetpawiteh, ahni ni Cathut koe a lunghawi. Ka cat hoeh e ni hai Bawipa hanlah cat laipalah Cathut koe lunghawi naseh. <sup>7</sup> Maimouh dawp ma hanlah ka hring e buet touh hai awmhoeh. Ma hanlah kadout e buet touh hai awmhoeh. <sup>8</sup> Maimouh ni hring pawiteh Bawipa hanlah hring awh teh, dout pawiteh Bawipa hanlah due awh. Hatdawkvah, maimanaw teh hring hai thoseh, due hai thoseh Bawipa e lah o awh. <sup>9</sup> Bangkongtetpawiteh, Khrih teh kadout tangcounghaw hoi kahringnaw han ukkung Bawi lah ao hanlah duenae koehoi bout a thaw toe.

<sup>10</sup> Telah pawiteh, bangkongmaw nang ni na hmaunawngghanaw hah lawk na ceng teh na dudam vaw. Maimouh pueng teh Khrih e lawkcengnae tungkhung hmalah koug kangdue awh han. <sup>11</sup> Bangkongtetpawiteh, BAWIPA ni a dei e teh kai kahring dawp tami pueng ni ka hmalah a khokcuengkhuem awh han. Tami pueng e pahni ni Cathut hah a pholen awh han, telah Cakathoug dawp a thut. <sup>12</sup> Hettelah dawkvah, maimouh pueng ni Cathut hmalah mae nuencang lengkaleng dei awh han.

### *Lungpatawnae lahoi thaw tawknae*

<sup>13</sup> Hatdawkvah, maimouh buet touh hoi buet touh lawkkâceng awh hanh sei. Hahoi, hmaunawnggha tâlaw nahan hoi lam payon nahanlah hno sak awh hanh sei. <sup>14</sup> Amahmawp kathounghoehe hno buet touh hai awmhoeh tie Bawi Jisuh dawp kacailah ka panue. Hatei, hno buetbuet touh thoung hoeh telah ka pouk e tami hanlah teh hote hno teh thoung hoeh. <sup>15</sup> Rawca kecu dawp na hmaunawnggha lung mathout sak pawiteh, lungpatawnae dawp na hring hoeh. Khrih ni na due pouh e



lungmanae hah nange rawca kecu dawk na hmaunawngghanaw, rawksak awh hanh. <sup>16</sup> Nangmouh hanlah hno kahawinaw hah yonpen e lah awm sak awh hanh. <sup>17</sup> Bangkongtetpawiteh, Cathut uknaeram teh caneinae dawk hoi kangdout hoeh. Kathoung Muitha lahoi coe e roumnae, lannae hoi lunghawinae hah doeh. <sup>18</sup> Hatdawkvah, hettelah hoi Khrih thaw katawkkungnaw teh Cathut hmalah ngai kawi e lah ao teh, taminaw hmalah hai yuemkamcu e tami lah ao.

<sup>19</sup> Hatdawkvah, roumnae ka tâcawt sak e hnouaw hoi buet touh hoi buet touh hoe kamhlawm thai nahan panki awh sei. <sup>20</sup> Rawca kecu dawk Cathut thaw hah raphoe awh hanh. Atangcalah hno puengpa teh a thoung. Hatei, buetbuet touh e caneinae ni ayâ hanlah tâlawnae lah awm pawiteh, hot hateh yonnae lah ao. <sup>21</sup> Hmaunawnggha, kamthui nahanelah awm pawiteh, moi ca hoeh e, yamu neihoehe hoi bangpueng sakhoehe ahawihnawn.

<sup>22</sup> Nang ni na tawn e yuemnae teh Cathut e hmalah hrueng awh. Atang titeh coe e hno dawk amae lungthin panuenaethoung tami teh a lunghawi. <sup>23</sup> Hatei, lungthounghoehnae hoi na cat pawiteh yuemnae lahoi a tho hoeh hatdawkvah, yon lawkcengnae hah a khang. Hahoi, bangpueng yuemnae laipalah sak e pueng teh yonnae doeh.

## 15

### *Khrih hnuk dawnnae*

<sup>1</sup> Maimouh a tha kaawmnaw ni ma ngai e patetlah awm laipalah a thakayounnaw e hnokari hah dounrouk awh sei. <sup>2</sup> Maimouh ni hmaunawngghanaw, ahawi nahan sak awh sei. Ahnimouh yuemnae hoe a rounge nahane pouk hanelah ao. <sup>3</sup> Khrih ni ama hane dueng kâkaram hoeh. Bawipa kadudamnaw e a lawk teh kai van vah a bo telah Cakathoung daw k a kâthut. <sup>4</sup> Cakathoung daw k thut e naw pueng teh, maimouh na cangkhai nahanelah thut e lah ao teh, Cakathoung daw k a thut e panguepnae hoi lung kâpahawinae lahoi maimouh ni ngaihawinae tawn awh sei.

<sup>5</sup> Khrih Jisuh e lamthung na panue laihoi lungthin buet touh lah coung thai nahan, panguepnae hoi lung kâpahawinae Bawi, Cathut ni nangmouh na kabawm lawiseh. <sup>6</sup> Hottelah doeh lungkângingcalah hoi Bawipa Jisuh Khrih e Pa hah pholen thai awh han.

<sup>7</sup> Khrih ni Cathut lentoenae a kamnue sak teh, nangmouh na dâw e patetlah nangmouh ni buet touh hoi buet touh kâ dâw awh. <sup>8</sup> Bout ka dei e teh, Jisuh Khrih teh Cathut e lawkkatang kamnue sak nahanlah vuensom ka a naw e san lah ao. Hottelah a onae teh mintoenaw koe poe e lawkkam caksak nahane hoi, <sup>9</sup> Jentelnaw ni hai lungmanae lahoi Cathut lentoenae a pholen awh nahane doeh. Hatdawkvah Cakathoung ni, kai teh Jentelnaw koehoi nang hah na pholen vaiteh na min teh la hoi ka oup han telah a thut. <sup>10</sup> Hahoi, Jentelnaw pueng, Cathut e taminaw hoi cungalah na konawm awh bout a ti. <sup>11</sup> Hathnukkuh, Jentelnaw pueng Cathut teh pholen awh. Miphun pueng ni Bawipa teh pholen awh telah bout a ti. <sup>12</sup> Hahoi Isaiah nihai, Jesi e a catoun koehoi a dâwn a sai han. Ahni teh Jentelnaw uk hanlah ka tâcawt e lah ao. Jentelnaw ni a ngaihaw i a vaiteh a kâuep a han telah a dei.

<sup>13</sup> Kathoung Muitha bahu hoi ngaihawinae kuep nahanelah, ngaihawinae Bawi, Cathut teh yuemnae koehoi ka tho e lunghawinae hoi roumnae puenghoi nangmouh koe kawi lawiseh.



*Kamthang kahawi dawk Pawl thaw tawknae*

<sup>14</sup> Hmaunawngghanaw nangmouh teh hawinae hoi na kaw i awh teh lungangnae aphunphun na tawn awh. Buet touh hoi buet touh na kâ cangkhai awh tie kaimanaw ni ka panue. <sup>15</sup> Hateiteh hete cauk daw k bout na panue sak hane ka ngai e a konglam hah taranhaw i laihoi ka thut. Ka taranhawinae teh Cathut e thaw taw k pouh hanlah Jisuh Khrih e patoun e lah na o sak. <sup>16</sup> Jentelnaw teh Cathut ni coe han kamcu lah thuengnae lah o thai nahan, Kathoung Muitha lahoi Cathut koe poe e lah ao thai nahan, Cathut koehoi ka tho e kamthang law k deinae daw k vaihma patetlah ka o.

<sup>17</sup> Hatdawkvah Khrih Jisuh thung bawilenna e daw k hoi Cathut e thaw taw knae ka kâuepkhai. <sup>18</sup> Bangkongtetpawiteh, Jentelnaw hrawi thai nahane teh, Jisuh ni kai hah na hno teh, phunglaw k lahoi taw knae daw k hai thoseh, <sup>19</sup> Mitnoutnaw hoi kângairuna e bahu hoi thoseh, Cathut e Kathoung Muitha hoi sak e hnonaw laipateh taranhaw i laihoi alouke banghai ka dei ngai hoe h. Hatdawkvah kai teh Jerusalem kho hoi Illirikum ram totouh ka cei teh Khrih e kamthang kahaw i kakueplah ka pâpho. <sup>20</sup> Hottelah ka pâpho navah kai teh ayâ ni a pabo tangcoung e daw k bout ung hoe h nahanlah Khrih kong ka thai baw i hoe h rae ram koevah, kamthang kahaw i dei hanlah ka lungtho thahmei laihoi ka panki. <sup>21</sup> Cakathoung ni, Bawipa e kong dei pouh boi hoe h rae naw ni a hmu awh teh, ka thai boi hoe h e naw ni a thaipanuek awh han telah a thut e patetlah ao.

*Rom kho cei hanelah Pawl kâcaina e*

<sup>22</sup> Nangmouh koe tho hoe h nahanlah katarawkkung moi apap. <sup>23</sup> Hateiteh, atu hie hmuen koe o nahane hmuen ao hoe h e dueng laipalah, nangmouh koe tho hanlah kum moikasaw kâcai toe. <sup>24</sup> Hatdawkvah Spain ram lah ka cei torei teh nangmouh koe tawngtang ka tho vaiteh, nangmouh koe dongdeng ka o han. Hahoi nangmouh ni na thak awh vaiteh hote ram koelah tawngtang ka cei han telah ka ngaihaw i. <sup>25</sup> Hatei atuvah dongdeng Jerusalem khopui lah ka cei vaiteh tami kathoung naw e thaw ka taw k pouh han rah. <sup>26</sup> Bangkongtetpawiteh, Masidonia ram hoi Akhaia ram e naw ni, Jerusalem vah kaawm e taminaw thung daw k e ka roedeng e naw hnopai hoi kabawp hanelah a lungtho awh. <sup>27</sup> Ahnimanaw ni lungthonae a tawn awh e patetlah, ahnimouh koe lahoi hai a kabawp awh hanelah atueng van. Bangkongtetpawiteh, Judah naw koe e muitha koelah e hnonaw hah Jentelnaw ni coe awh van pawiteh, hnopai lahoi hai ahnimae thaw taw k pouh hanelah ao. <sup>28</sup> Hote hno ka cum hoi hete hnopainaw heh ahnimouh koe kahawicalah ka poe vaiteh, nangmouh koe lam lahoi Spain ram lah tawngtang ka cei han. <sup>29</sup> Nangmouh koe ka tho toteh Khrih e kamthang yawhawinae kuep hoi ka tho han tie ka panue.

<sup>30</sup> Hmaunawngghanaw, maimae Bawipa Jisuh Khrih hoi Muitha ni na poe e lungpatawnae lahoi nangmouh koe kâhei han ka ngai. <sup>31</sup> Kai teh Judah ram e kayuemhoe hnaw e kut daw k hoi kahlout teh, Jerusalem hanelah ka taw k e thaw hah, tami kathoungnaw e hmalah, ngai kaw i kaawm lah ao nahan, <sup>32</sup> Cathut ni a ngai e patetlah lunghaw i laihoi nangmouh koe ka tho vaiteh, nangmouh hoi cungtalah lungpahawinae ka coe nahan, panki laihoi kai hane hai ratoum awh loe. <sup>33</sup> Lungmawngnae Baw i lah kaawm e Cathut teh nangmouh pueng koe reirei awm lawiseh. Amen.



<sup>1</sup> Kenkhrea kho kaawm kawhmoun thung e thaw katawkkung, ka tawncanu Phoebe heh nangmouh koe panue sak han ka ngai. <sup>2</sup> Tami kathoungnaw ni sak kaw i kamcu e patetlah Cathut dawkvah ahni hah nangmouh koe awm sak awh nateh, a panki e pueng kabawm awh. Atangcalah ahni hateh kama koehoi kamtawng teh ayānaw pueng hai kabawm e doeh.

<sup>3</sup> Khrih Jisuh thung kai hoi thaw rei ka tawk roi e Priscilla hoi Aguila hah kutman pouh awh. <sup>4</sup> Hringnae a kâhmoun hoi kai hai na khetyawt toe. Kai dueng laipalah, Jentelnaw e kawhmounnaw pueng ni hai a lunghawikhai awh. <sup>5</sup> Ahni im e kawhmoun hai kutman pouh awh. Asia ram vah Khrih hanelah aluepaw lah kaawm e ka pahren e Epenetas hai kutman awh. <sup>6</sup> Nangmouh hanlah thaw ka panki poung e Meri hai kutman awh. <sup>7</sup> Kaie miphun lah kaawm e kai hoi thongim rei ka bawt roi e Adronika hoi Junia hai kutman awh. Ahnimouh teh gunceinaw rahak vah a min kamthang e naw a tho teh, kai hlak hai Khrih thung hmaloe kaawm e taminaw doeh. <sup>8</sup> Bawipa dawkvah ka pahren e Ampliatus hah kutman awh. <sup>9</sup> Khrih thung cungtalaw thaw tawk hui Urbanus hoi ka pahren e Satakhi hai kutman awh. <sup>10</sup> Khrih thung yuemkamcu e Apelles, hai kutman awh. Aristobulus imthungkhu naw hai kutman awh. <sup>11</sup> Ka miphunnaw Herodion hoi Nasisa imthungnaw hai kutman awh. <sup>12</sup> Bawipa dawkvah thaw ka panki e Triphaena hoi Triphosa tinaw hai kutman awh. Bawipa dawkwah thaw ka panki e ka pahren e Persis hai kutman awh. <sup>13</sup> Bawipa dawkwah rawi lah kaawm ni teh ka manu lahai kaawm e Rufus e manu hai kutman awh. <sup>14</sup> Asyncritus, Phlegon, Hermes, Patrobas, Hermas, tinaw hoi ahnimouh koe kaawm e hmaunawngghanaw hai kutman awh. <sup>15</sup> Filolokus, Julia, Nereus hoi a tawncanu, Olimpasi hoi ahnimouh koe kaawm e Bawipa e tami kathoungnaw pueng hai kutman awh. <sup>16</sup> Buet touh hoi buet touh kathounge kâpaconae hoi kutman awh. Khrih e kawhmounnaw pueng ni nangmanaw kut na man awh.

### *Kâhruetcueth nahan hroecoenae*

<sup>17</sup> Hmaunawngghanaw panue tangcung e cangkhai e naw hah sak awh nateh, kampek sak e hoi payonnae ka pung sak e taminaw hah kâhruetcueth awh nateh roun awh ti teh na hroecoe awh. <sup>18</sup> Bangtelah tetpawiteh, Bawipa Jisuh Khrih thaw tawkwah laipalah, amamae vonpui thaw dueng a tawkwah teh, ouphlawpnae lawk hoi na tawmpalaw awh teh, kamawnggramenaw hah a dumen awh. <sup>19</sup> Nangmae lawkngainae tami pueng koe a kamthang dawkvah nangmouh koe ka lunghawi. Hattelaw dawkvah kahawi hno dawkwah lungang awh nateh, kahawihoehe dawkwah teh yon kanuenhoehe lah awm awh.

<sup>20</sup> Roumnae Bawipa lah kaawm e, Cathut ni a ro hoehnahlan Setan teh nangmae khok rahim vah reppasei lah ao sak han. Maimae Bawipa Jisuh Khrih e lungmanaw teh nangmouh hoi cungtalaw awm lawiseh.

<sup>21</sup> Kai hoi thaw tawkwah hui lah kaawm e Timote, ka miphun Lusius, Jason hoi Sosipater tinaw ni kut na man awh.

<sup>22</sup> Hete ca na ka thut pouh kung kai Teratias ni Bawipa dawkwah nangmanaw kut na man awh.

<sup>23</sup> Kawhmoun abuemlah kamkhuengnae imkung Gaius ni hai kut na man awh. Kho thung e tangka kuen e Erastas hoi hmaunawnggha Quartus ni hai nangmanaw kut na man awh.

<sup>24</sup> Maimae Bawipa Jisuh Khrih e lungmanaw teh nangmouh puenghoi rei awm lawiseh. Amen.



<sup>25</sup> Kai ni ka dei e kamthang kahawi hoi Jisuh Khrih e a kong ka dei dawkvah thoseh, <sup>26</sup> talaivan a kamtawng hoi hro lah ao eiteh, atuteh ayungyoe Cathut e kâpoelawh lahoi yah profetnaw e cauknaw dawh a kamnue toung dawkvah, yuemnae hoi kâkuen e lawkngainae ao nahanelah, miphun pueng koe panue sak e, hrolawh pâphonae dawh hoi thoseh, <sup>27</sup> lungangnae hoi ka kawh e buet touh dueng e Cathut dawh Jisuh Khrih lahoi a yungyoe bawilennae awm lawiseh. Amen.



# 1 KAWRIN

## (The First Epistle of Paul to the Corinthians)

### *Lawk karouknae*

<sup>1</sup> Kai Pawl, Cathut ngainae lahoi Jisuh Khrih e guncei lah kaawm e hoi ka nawngna Sosthenes ni, <sup>2</sup> maimae Bawipa Jisuh Khrih min ka kaw e kho tangkuem kaawm e taminaw hoi, tami kathoung lah kaw lah kaawm e Kawrin kho e Khrih Jisuh thung thoungsak lah kaawm e, Cathut e kawhmoun ca na patawn awh. Bawipa teh ama ka kaw e naw puenghoi kaimae Bawipa lah ao.

<sup>3</sup> Maimae Pa Cathut hoi Bawipa Jisuh Khrih koe e lungmanae hoi lungmawngnae teh nangmouh koe awm lawiseh.

### *A lungmanae dawk pholennae*

<sup>4</sup> Khrih Jisuh lahoi na poe e Cathut e lungmanae dawkvah, nangmouh hanelah ka Cathut koe lunghawilawk pou ka dei. <sup>5</sup> Nangmanaw teh hote Khrih lahoi lawk dei thainae, panue thainae, bangpueng dawk na bawi awh toe. <sup>6</sup> Khrih hoi kâkuen e lawkpanuesaknae teh nangmouh dawk a cak toe. <sup>7</sup> Hatdawkvah, nangmouh teh Bawipa Jisuh Khrih bout a kamnuenae ngaihawi laihoi ring awh navah, poehno roeroe na toutm a mahoe. <sup>8</sup> Maimae Bawipa Jisuh Khrih e hnin dawk nangmouh teh apinihai tounhoehe lah o nahan, Bawipa ni nangmouh teh apout totouh na caksak han. <sup>9</sup> Ama e Capa, Jisuh Khrih e huikonae thungvah, nangmouh na ka kaw e Cathut teh yuemkamcu lah ao.

### *kâkapeknae*

<sup>10</sup> Hmaunawngghanaw Bawipa Jisuh Khrih min lahoi pahrennae kahei. Lungthin suetalah awm awh. Kâ kapeknae tawn awh hanh. Pouknae buet touh dawk kâracui awh. <sup>11</sup> Hmaunawngghanaw Khaloe imthung ni, pou a kâtaran awh a ti. <sup>12</sup> Nangmouh ni kai teh Pawl e vaica doeh, kai teh Apollos e vaica doeh, kai teh Piter e vaica doeh, Kai teh Khrih e vaica doeh na ti awh. <sup>13</sup> Khrih teh a kâkapek na maw. Pawl na ou nangmouh han thingpalam dawk ka dout. Nahoe pawiteh Pawl e min dawk na ou baptisma na coe awh. <sup>14</sup> Crispus hoi Gaius hloilah apihai baptisma ka poe hoe dawk Cathut koe ka lunghawi. <sup>15</sup> Hatdawkvah kai Pawl e min dawk baptisma ka coe e apihai awmhoeh. <sup>16</sup> Stiven imthung baptisma ka poe, alouknaw baptisma ka poe vaimoe ka panuek hoe. <sup>17</sup> Baptisma poe hanlah Khrih ni na patoun hoe. Kamthang kahawi pâpho hane doeh na patoun. Tami lungang thounmae dawk nahoe, telah pawiteh Khrih thingpalam hnosakthainae ayawmyin han doeh.

### *Cathut e bahu*

<sup>18</sup> Bangkongtetpawiteh, thingpalam kamthang kahawi heh kahmat naw hanelah teh pathunae lah doeh ao, rungngang lah kaawm e maimouh hane teh Cathut e bahu doeh. <sup>19</sup> Cakathoung ni, a lungkaangnaw e thounmae ka raphoe pouh han. Pouknae ka rasang naw e pouknae hai ka pahnawt pouh han. <sup>20</sup> A lungkaangnaw teh nâne ao. Cakathukungnaw teh nâne ao. Laidei kathounnaw te nâne ao. Talaivan lungangnae teh Cathut ni pathunae lah a coung sak toung nahoe. <sup>21</sup> Talaivan lungangnae lahoi Cathut a panue thai awh hoe dawkvah, Cathut ni pâpho e pathunae



lawk lahoi ka yuem e naw rungngang hane a ngainae ao. <sup>22</sup> Judahnaw ni mitnoutnae naw a hei awh. Griknaw ni lungangnae lahoi a tawng awh. <sup>23</sup> Maimouh teh thingpalam dawk pathout lah kaawm e Khrih e kamthang pâpho awh. Hete kamthang kahawi teh Judahnaw kamthuinah lah ao teh, Jentelnaw hanlah pathunae lah ao. <sup>24</sup> Hatei, Judah thoseh, Griknaw thoseh, Cathut ni a kaw e taminaw hanelah, Khrih teh Cathut e bahu hoi lungangnae lah ao. <sup>25</sup> Cathut e pathunae teh taminaw lungangnae hlak a lunganghnawn rah. Cathut thayounnae teh, taminaw thasainae hlak a thasainnawn.

### *Cathut dawk kâoupnae*

<sup>26</sup> Nangmouh na kawnae pouk a haw. A kaw e thung dawk ka thouthai kapap awm hoeh. Athakaawme kapap awm hoeh. Ka talue e kapap awm hoeh. <sup>27</sup> Cathut ni ka thouthai naw kaya sak nahan talaivan koe lah ka pathu naw a rawi. Athakaawme taminaw kaya sak nahan, talai koe lah tha kayoun naw a rawi. <sup>28</sup> Ka tangreng naw kaya sak nahan, talaivan koe lah ka roedeng e, khet kamcu hoeh e, bang ka cungkeihoehe naw Cathut ni a rawi. <sup>29</sup> Hatdawkvah Cathut hmalah apihai kâoup thai hoeh. <sup>30</sup> Nangmouh teh Cathut pawlawk dawk Khrih Jisuh thung na o awh. Khrih teh maimouh hanlah Cathut koehoi ka tho e maimae lungangnae, thounghae, lannae hoi ratangnae lah o. <sup>31</sup> Hatdawkvah Cakathoung ni a dei patetlah ka kâoup e tami teh Bawipa dawk ma kâoup naseh.

## 2

### *Pawl ni pâpho e lawk*

<sup>1</sup> Ka hmaunawngghanaw, nangmouh koe Cathut e lawkpanuesaknae kadung kakaw pâpho han ka tho nah kathoumthainaw ni a hno awh e lawk ka hno a hoeh. <sup>2</sup> Bangkongtetpawiteh, thingpalam dawk kadout e, Jisuh Khrih hoi thingpalam kong laipalah teh, banghai panue sak hane na ngaikhai awh hoeh. <sup>3</sup> Nangmouh hoi rei ka o nah, ka thayoun teh lungpuen taki hoi doeh ka o. <sup>4</sup> Ka lawk dei e hoi lawk ka pâpho e hai tami thouthainae hoi nahoe, Muitha hnotithainae bahu lahoi doeh. <sup>5</sup> Nangmae na yuemnae teh taminaw e lungangnae dawk awm laipalah Cathut e bahu dawk o nahane doeh.

### *Muitha lungangnae*

<sup>6</sup> Hatei, a lungkahanaw koe lungangnae lawk ka dei. Hottelah ka ti navah talai lungangnae nahoe. Kahmat hane talai ka ukkungnaw e lungangnae nahoe. <sup>7</sup> Het talai ao hoehnahlan, maimae bawilennae lah ao nahan, Cathut ni a sak tangcoung e lungangnae hrolaw, Cathut e lungangnae doeh kaimouh ni ka pâpho awh. <sup>8</sup> Hote lungangnae hah talai ukkungnaw buet touh ni boehai panuek awh hoeh. Panuek awh pawiteh ka Bawilen poung e Bawipa thingpalam dawk thet a mahoe ei. <sup>9</sup> Cakathoung dawk thut e patetlah, mit ni a hmu boihoe, hnâ hoi thai boihoe e, lung ni hai a pouk boihoe e hah Cathut ni a lungpataw e naw hanlah sut a rakueng pouh toe.

<sup>10</sup> Cathut ni maimouh koe hote hno hah Muitha lahoi a pâpho toe. Muitha ni hro e hnonaw koehoi hnocawngca pueng pheng a pâphue. <sup>11</sup> Tami hoi kâkuen e naw hah, tami thungvah kaawm e muitha laipalah apinimouh a panue han. Hot patetvanlah Cathut hoi kâkuen e hnonaw hah, Cathut e Muitha hloilah apinihai panuek thai hoeh. <sup>12</sup> Maimouh teh talaivan e muitha coe awh hoeh. Cathut ni ayawmlah na poe e hno



panue thai nahan Cathut koehoi e Muitha doeh coe awh. <sup>13</sup> Cathut ni na poe e naw ka pâpho awh navah, tami lungangnae ni cangkhai e lahoi nahoe. Kathoung Muitha ni na cangkhai e lawk lahoi doeh ka pâpho awh. <sup>14</sup> Muitha ka tawn hoe e ni teh Cathut e Muitha koehoi ka tho e hnonaw panuek thai hoe. Ahni hane lateh hot naw hah pathunae lah ao. Muitha koelae hno lah ao dawkvah kapekkaboe thai hoe. <sup>15</sup> Muitha tami ni teh hote hnonaw pueng a kapek teh panue thai. Hateiteh hote tami teh apinihai panuek thai hoe. <sup>16</sup> Apimaw Cathut lung pouknae ka panuek ni teh Cathut hah ka cangkhai han vaw. Maimouh teh Khrih e lungthin tawn awh.

### 3

#### *Cuehoehnae*

<sup>1</sup> Hmaunawnghanaw, muitha taminaw koe ka dei e patetlah nangmouh koe ka dei hoe. Camonaw koe dei pouh e patetlah doeh ka dei. <sup>2</sup> Atu sittouh bu kate na ca thai hoe rah daw k kai ni na paca awh hoe. Sanutui doeh na pânei awh rah. Atu sittouh bu kate na cat thai awh hoe rah. <sup>3</sup> Bangkongtetpawiteh nangmouh teh, takthai tami lah doeh na o awh rah. Nangmouh koe utsinnae hoi kâounnae a onae teh, nangmouh teh takthai hoi na o awh teh, tami rumram patetlah na hring awh daw doeh. <sup>4</sup> Buet touh ni kai Pawl e avai ca, buet touh ni Apollos e avai ca, lengkaleng na tet awh pawiteh nangmouh teh takthai tami lah na o a rah.

#### *Cathut e a sannaw*

<sup>5</sup> Pawl heh apimaw. Apollos teh api na maw. Nangmouh na yuem thai awh nahan, Bawipa ni thaw a poe e san reira doeh. <sup>6</sup> Kai ni ka ung, Apollos ni tui a bu. A kung ka paw sak hoi ka rounsakkung teh Cathut doeh. <sup>7</sup> Kapatuekung hoi tui kabukung hnotithainae tawn hoe. Cathut ni doeh a paw sak. <sup>8</sup> Kapatuekung hoi tui kabukung teh buet touh doeh. A taw k roi e patetlah tawkpau reirei a coe roi han. <sup>9</sup> Bangkongtetpawiteh, kaimouh teh Cathut e thaw reirei ka taw k e lah ka o awh. Nangmouh teh Cathut e takha, Cathut e im lah na o awh. <sup>10</sup> Cathut e a lungmanae ka coe e, im kasakkung patetlah kai ni adu ka ung. Alouke tami ni hote adu daw im patuen a sak. Hatei im kasakkung ni bangtelae im maw ka sak tie hah kâhruetcuete naseh. <sup>11</sup> Bangkongtetpawiteh, Jisuh Khrih tie adu ung hnukkhu teh apinihai alouke adu ung thai mahoe toe. <sup>12</sup> Apihai hote adu e van, sui, ngun, talung phu kaawm, thing, caphon, padi naw hoi im patuen sak pawiteh, <sup>13</sup> hote a sak e teh kamnuek han doeh. A kamnue nahane teh hmai hoi a kamnue han. Tami tangkuem ni a sak e im teh bangtelamaw a sak tie hmai ni a tanouk pouh han. <sup>14</sup> Hote adu van patuen ka sak e ahnie thaw teh kangning pawiteh tawkpau a hmu han. <sup>15</sup> Hatei im a sak e kang pawiteh, a sung han. Ama ngoun teh hmaikak thung hoi ka hlout e patetlah rungngang lah ao han.

#### *Cathut e bawkim*

<sup>16</sup> Nangmouh teh Cathut e bawkim lah na o awh. Cathut e Muitha nangmouh thung ao tie na panuek awh hoe maw. <sup>17</sup> Apinihai Cathut e bawkim raphoe pawiteh, Cathut ni ahni hai a raphoe van han. Bangkongtetpawiteh, Cathut e bawkim teh a thoung. Hote bawkim teh nangmanaw doeh.

#### *Talai lungangnae teh pathunae*



<sup>18</sup> Api nang hai namahoima kâdum awh hanh. Nangmouh thung dawk kai teh a lungkaang e tami doeh tetpawiteh, tami lungkaang lah ao nahan, tamipathu lah awm na ei seh. <sup>19</sup> Bangkongtetpawiteh, talaivan lungangnae teh Cathut hmalah teh pathunae la doeh ao. Cathut ni a lungkaangnaw hah amamae pathunae lahoi a man telah Cakathoung dawk thut e lah ao. <sup>20</sup> Hahoi, tami lungkaangnaw e pouknae teh ahrawnghrang doeh tie Bawipa ni ka panue telah bout a dei. <sup>21</sup> Hatdawkvah, tami dawk kâoup han awmhoeh. Hno pueng teh nangmae doeh. <sup>22</sup> Pawl hai, Apollos hai, Cephas hai, talaivan hai, hringnae hai, duenae hai, atu e a tue hai, hmalae a tue hai, hnocawngca pueng teh nangmouh hane doeh. <sup>23</sup> Nangmouh hai Khrih ni na tawn awh, Khrih hai Cathut ni a tawn.

## 4

### *Lawkkam kacakpounge hnokuemkung*

<sup>1</sup> Hatdawkvah ayâ ni maimanaw teh Khrih e san hoi Cathut e hrolawk hno ka kuemkung lah na pouk awh naseh. <sup>2</sup> Hno kuemkung teh yuemkamcu telah ayâ ni panue e tami han. <sup>3</sup> Nangmouh hoi alouknaw ni hai kai hah lawkkam na cak hoeh telah lawk na ceng awh e heh hno kathoenge doeh. Kai teh kamahoima hai lawk ka ceng hoeh. <sup>4</sup> Ka pouknae a thoung. Hatei, hottelah ka o dawkvah kai teh tamikalan telah khoe e lah kaawm hoeh. Kai lawkcengkung teh Bawipa doeh. <sup>5</sup> Hatdawkvah, atueng a pha hoehnahlan, apihai lawkceng awh hanh. Bawipa a tho totouh ring awh. Ahni ni hmonae koe hro e pueng angnae dawk a kamnue sak vaiteh, tami e pouknae puenghai a kamnue sak han. Hattoteh tami pueng ni Cathut koehoi oupnae a coe awh han.

### *Gunceinaw kârahnoumnae*

<sup>6</sup> Hmaunawngghanaw, Cakathoung dawk thut lah kaawm e tapuet laihoi ayânaw bari kawi nahoeh tie lawk hah kaimouh roi koehoi kamtu thai awh nahan, buet touh ni buet touh e lathueng na kâoup awh hoeh nahan, kai hoi Apollos bangnue laihoi hete hnonaw hah nangmouh hanelah ka pâpho. <sup>7</sup> Apini maw nangmouh na talue sak awh. Na kamtu e laipalah ahmaloe hoi na thung kaawm e hno ao maw. Na kamtu e lah awm pawiteh na kamtu hoeh e patetlah bangkongmaw na kâoup vaw. <sup>8</sup> Na kuep awh toe. Na bawi awh toe. Kaimouh laipalah na uk awh toe. Kaimouh hah nangmouh hoi rei uk thai nahanelah na uk awh katang pawiteh ahawi. <sup>9</sup> Kai niteh, thei hane naw patetlah Cathut ni kaimouh gunceinaw a hnukteng koe lah na ta awh toe telah ka pouk. Bangkongtetpawiteh, kalvantaminaw hmalah, hoi talai taminaw hmalah, talaivan abuemlah ni khet han kawi lah ka o awh. <sup>10</sup> Kaimouh teh Khrih hanelah tamipathu lah ka o awh. Hatei nangmouh teh Khrih dawk na lungang awh. Kaimouh teh ka thayoun awh. Hatei nangmanaw teh na thao awh. Nangmouh teh bari kaawm e lah na o awh. Hatei kaimouh teh hnephnap e lah ka o awh. <sup>11</sup> Kaimouh teh atu raw vonhlamrinci hoi, caici lah o hoi, rektap e lah ka o awh teh, im laipalah, <sup>12</sup> mae kut hoi thaw ka tawk awh. Na pathoe awh navah yawhawinae lah ka pouk awh. Rektapnae kâhmo navah ka panguap awh. <sup>13</sup> Na dudam awh toreih teh, lungpatawnae kamnue sak pouh awh. Atu sittouh tami pueng ni na takhoe awh, talaivan e songnawng patetlah na pouk awh.

### *Na pa buet touh lah kaawm e Pawl*



<sup>14</sup> Nangmouh kaya sak nahanlah ka ngai dawk hete ca ka thut e nahoe. Ka pahren e ka canaw patetlah na kâhruetcuete awh nahanlah hete ca na thut pouh e doeh. <sup>15</sup> Bangkongtetpawiteh nangmouh dawk Khrih kong na ka cangkhai e thong hra touh kaawm nakunghai, na pa moipap hoe. Khrih Jisuh dawkvah kamthang kahawi lahoi na khe awh. <sup>16</sup> Hatdawkvah, kaie nuen na out awh nahanlah na hroecoe awh. <sup>17</sup> Hot kecu dawkvah, Bawipa dawk yuemkamcu e ka pahren e ka capa Timote nangmouh koe ka patoun. Ahni ni kho tangkuem e kawhmoun pueng koe kai ni ka cangkhai e patetlah Khrih Jisuh dawk kai ni ka dawn e lamthung hah nangmouh bout na panue sak awh han doeh.

<sup>18</sup> Kai nangmouh koe tho mahoe telah tami tangawn ni a pouk awh teh, a kâoup awh. <sup>19</sup> Bawipa ni a ngainae awm pawiteh karanglah ka tho han. Hat toteh, ahnimouh kâoupnae dawk laipalah, ahnimae bahu hah ka panue han doeh. <sup>20</sup> Bangkongtetpawiteh, Cathut uknaeram teh lawk dawk kaawm e nahoe, bahu dawk doeh ao. <sup>21</sup> Bangmaw na ngaihnawn awh, bongpai hoi na ou ka tho han, lungpatawnae, lungdolungnemnae hoi na ou ka tho han.

## 5

### *Kawhmoun thung pâlei thainae*

<sup>1</sup> Nangmouh koe, a na pa e yu a yonkhai ti e, kayuemhoehnaw koehai kaawm boihoe e napui tongpa kamsoum hoe e yonnae ao tie ka thai. <sup>2</sup> Nangmouh ni lungmathoe lahoi, hottelah kaawm e tami pâlei hane hlak na kâoupkhai awh. <sup>3</sup> Kai teh nangmouh koe takthai lahoi kaawm hoe ei, muitha lahoi teh nangmouh koe ka o dawkvah, hote hmuen koe kaawm e patetlah hote lai hah ka tâtueng toe. <sup>4</sup> Bawipa Jisuh Khrih min lahoi nangmouh cungtal na kamkhueng awh navah, kaie muitha hai maimae Bawipa Jisuh Khrih e bahu lahoi nangmouh hoi rei ao van. <sup>5</sup> Ahnie muitha teh Bawipa e hnin dawk rungngang lah ao nahan, a takbuem teh rawknae koe a pha nahanlah setan kut dawk ka poe toe.

<sup>6</sup> Nangmouh na kâoupnae teh hawihoe. Ton titca ni tahawn abuemlah a po sak tie na panuek awh hoe maw. <sup>7</sup> Tonphuenhoehe vaiyei lah na o awh e patetlah ton karuem teh tâkhawng awh, Bangtelah tetpawiteh, ceitakhai pawihah thueng hane tuca tie Khrih hateh, maimouh han thueng e lah ao toe. <sup>8</sup> Hatdawkvah karuem e ton lah kaawm e hawihoe, hmuhmanae naw hoi tho laipalah, tonphuenhoehe lah kaawm e thoungnae lawkkatang lahoi ceitakhai pawito awh sei.

### *Kawhmoun nuen*

<sup>9</sup> Nangmouh teh kamsoumhoehe napui tongpa yonnae ka sak e naw hoi kâhuiko hoe nahanelah ca ka thut teh na patawn awh. <sup>10</sup> Kamsoumhoehe napui tongpa yonnae hoi hounlounnae, tami ca ngainae, meikaphawk ka baw e talaivan hoi khoeroe na ka huiko mahoe ka ti ngainae nahoe. Telah pawiteh hete talai na ceitakhai hane la doeh awm ti. <sup>11</sup> Nangmouh koe ca ka thut ngainae teh, hmaunawngah lah ka o ati ei, kamsoumhoehe napui tongpa yonnae ka sak e, ka hounloun e, meikaphawk ka baw e, tami ka pathoe e, yamuhrih lah kaawm e, tami ka cat ngai e naw hoi kâhuiko awh hanh, bu hai cungtal cat awh hanh tie hah doeh. <sup>12</sup> Bangkongtetpawiteh kawhmoun alawilah kaawmnaw lawkceng hanelah kai hoi bangmaw a kâseng. Athung e taminaw hah



nangmouh ni lawk na ceng awh mahoe h maw. <sup>13</sup> Alawilah kaawm e naw teh Cathut ni lawk a ceng han. Hote tamikathout hah alawilah pâlei awh.

## 6

### *Kayuem reira e lumlai*

<sup>1</sup> Nangmouh daw k buet touh ni alouke tami buetbuet touh hoi lumlai awm pawiteh, tami kathoun gnaw hmalah na dei laipalah, cathut laipa e talai bawinaw koe lawk na kâcengsak awh bo vaw. <sup>2</sup> Tami kathoun gnaw ni talai van lawkceng han tie na panuek awh hoe h maw. Talai lawkceng hanelah na awm awh pawiteh kâthoengpoung e hno daw k hai lawkceng awh mahoe h na ou. <sup>3</sup> Kalvantaminaw lawkceng a han tie na panuek awh hoe h maw. Hatdawkvah talai hno daw k lawkceng hanelah kamcu hoe h na maw. <sup>4</sup> Hatdawkvah nangmouh teh talai e lai dei hane awm pawiteh kawhmoun thungvah bari kaawm hoe h e taminaw hah lawkcengkung lah rawi awh. <sup>5</sup> Na kaya awh nahane lah het heh ka dei. Nangmouh thung daw k hmaunawng ha rahak lai ka dei thai kawi buet touh boehai awm hoe h maw. <sup>6</sup> Atuteh, hmaunawng ha reira na kâtoe awh dueng laipalah, hote hah, kayuemhoe h naw e hmalah na kâtoe awh.

<sup>7</sup> Hottelah buet touh hoi buet touh na kâtoe awh e teh na sungnae doeh toe. Bangkok toe laipalah, rektapnae maha na khang awh hoe h. Dumyenna e maha bangkong na khang a hoe h. <sup>8</sup> Nangmouh ni ayâ na dumyen awh, kamsoum hoe he hno na sak awh. Na hmaunawng hanaw, koehai telah na sak awh. <sup>9</sup> Tami kalan hoe h naw ni Cathut uknaeram coe thai mahoe h tie na panuek awh hoe h maw. Alouklah pouk awh hanh. Kamsoum hoe he napui tongpa yonnae, meikaphaw k ba waw e naw, ayâ yu ka yonkhai e naw, tongpa reira napui reira yonnae ka sak e naw, <sup>10</sup> kaparawtnaw, ka hounloun e naw, yamuhri lah kaawm e naw, tami ka pathoe e naw, tami ka catnet ngai e naw teh Cathut uknaeram coe thai mahoe h. <sup>11</sup> Hottelah doeh nangmouh thung daw k e tami tangawn teh na o awh. Hatei maimouh teh Cathut e Muitha daw k, hahoi Bawipa Jisuh Khrih min daw k pâsu e lah o awh teh na lan toe telah na khoe awh toe.

### *Takthai lahoi Cathut bawilen kamnu e saknae*

<sup>12</sup> Hnopusung sak thainae kâ ka tawn ei, hnopusung teh hawinae koun g awm hoe h. Hno pueng ka ti thai, hatei bang hnopa i e san lahai kaawm hoe h. <sup>13</sup> Rawca heh vonpui hanlah ao teh, vonpui hai rawca hanelah ao. Hatei ahnimouh roi teh Cathut ni reirei a raphoe han. Tak teh kamsoum hoe he napui tongpa yonnae sak nahane nahoe h. Bawipa hane doeh. Bawipa hai tak hane doeh. <sup>14</sup> Cathut ni amae bahu lahoi Bawipa teh a thaw sak toe. Hot patetlah maimouh hai amae bahu lahoi na thaw sak van han. <sup>15</sup> Nangmae takthai teh Khrih e a puengcang lah o awh tie na panuek awh hoe h maw. Hat pawiteh Khrih e a puengcang hah la vaiteh kâyaw t e puengcang lah o sak awh han na maw. Khoeroe awm sak awh mahoe h. <sup>16</sup> Kâyaw t e hoi cungtalah kaawm e teh kâyaw t e hoi tak buet touh lah ao tie na panuek awh hoe h maw. Kahni touh roi teh buet touh lah ao han tie patetlah doeh. <sup>17</sup> Hatdawkvah Khrih hoi kâkuen e teh Muitha daw k tak buet touh lah ao roi.

<sup>18</sup> Kamsoum hoe he napui tongpa yonnae roun awh, tami ni yonnae ouk a sak e naw teh tak e alawilah doeh ao. Kamsoum hoe he napui tongpa yonnae teh amae tak daw k roeroe yon ka sak e lah ao. <sup>19</sup> Bang telah maw. Nangmae na tak teh Cathut koe hoi na coe awh e, nangmouh thung vah



kaawm e Kathoung Muitha e bawkim doeh tie hoi nama ni na tawn e nahoe h toe tie hah na panuek awh hoe h maw. <sup>20</sup> Nangmouh teh apu hoi ran e lah na o awh toung dawkvah, nangmae na takthai daw k Cathut bawilen sak awh.

## 7

### *Yuvâ phung*

<sup>1</sup> Nangmouh ni kai na poe e ca daw k kaawm e naw teh, tongpa teh napui hoi tak hmawng hoe hpawiteh ahawi ei, <sup>2</sup> kamsoumhoehe napui tongpa yonnae sak hoe h nahanelah, tongpa pueng a yu tawn naseh. Napui pueng amae vâ tawn naseh. <sup>3</sup> Tongpa ni a yu koe yuvâ lah onae kuep sak naseh. A yu ni hai a vâ daw k kuep sak naseh. <sup>4</sup> Yu ni amae tak daw k kâtawnnae tawn hoe h, vâ ni doeh a tawn. Hot patetvanlah, vâ ni amae tak daw k kâtawnnae tawn hoe h, yu ni doeh a tawn. <sup>5</sup> Ratoum nahan atueng dawngdeng kahawicalah hno thai nahanelah, buet touh hoi buet touh hnâbonae awm laipalah, alouklouk lah awm awh hanh. Hottelah na awm awh pawiteh, Setan ni na tacuek awh hoe h nahanlah cungtalai reirei bout awm awh. <sup>6</sup> Hottelah ka dei navah, nangmouh ni na tarawi hane la doeh ka dei. Kâpoelaw k na poe e nahoe h. <sup>7</sup> Tongpa pueng kai patetlah o sak hane ka ngai. Hatei tami pueng ni Cathut koe e poehno teh rip coe awh. Buet touh ni alouke a tawn, alouke buet touh ni hai alouke a tawn van.

<sup>8</sup> A yu ka lat hoe h e tongpanaw hoi, a vâ ka sak hoe h e lahmai napuinaw koe, kai ni ka dei e teh, kai patetlah na awm awh pawiteh ahawi. <sup>9</sup> Hatei, namahoima na ka caku ep thai hoe hpawiteh, yu lat van awh naseh. Kâcaku ep thai hoe h e hla k teh yu la vâ sak e ahawihnawn.

### *Imthungnaw hanelah pouknae a poe*

<sup>10</sup> Yuvâ lah kaawm naw koe, kai ni laipalah, Bawipa koehoi e kâ poe, kai ni na poe awh e teh, yu ni a vâ mat hanh naseh. <sup>11</sup> Mat pawiteh vâ sak laipalah awm lawiseh. Nahoe h pawiteh apasuek e vâ hoi bout kâmai hawi naseh. Vâ ni hai a yu mat nahanh seh.

<sup>12</sup> Alouke taminaw hanelah Bawipa ni a dei e nahoe h, kai ni ka dei e teh, hmaunawng ha buet touh ni ka yuem hoe h e napui a yu navah, hote napui ni a vâ hoi pou o hane ngai pawiteh, a yu a ma hanelah awmhoe h. <sup>13</sup> Hot patetvanlah, napui buet touh ni ka yuem hoe h e a vâ navah, hote tongpa ni a yu hoi pou o hane ngai pawiteh, napui ni mat hanh naseh. <sup>14</sup> Ka yuem hoe h e tongpa teh a yu hanelah a thoung. Ka yuem hoe h e napui hai, yuemnae ka tawn e a vâ hanelah a thoung. Telah nahoe h pawiteh, a canaw thoung mahoe h. Atuteh a thoung awh.

<sup>15</sup> Hatei ka yuem hoe h e ni, kamphei hanlah ngai pawiteh, cettakhai lawiseh. Hot patet e daw k teh ka yuem e tongpa hai, ka yuem e napui hai kateknae awmhoe h. <sup>16</sup> Napui nang na vâ na rungngang han, rungngang mahoe h tie bangtelamaw na panue thai han. Tongpa nang na yu rungngang hane hoi rungngang hoe h hane bangtelamaw na panue thai han.

### *Hringnuen a phunphun*

<sup>17</sup> Cathut ni a kaw teh Bawipa ni thaw a poe e daw kvah tami pueng ni a hring na thungvah awm awh naseh. Het heh kawhmounnaw pueng koe ka poe e law k doeh. <sup>18</sup> Kaw lah kaawm e tongpa, vuensom ka a tangcoung e teh, vuensom ka a hoe h e tami patetlah awm hanh naseh.



Kaw lah ao nah vuensom ka a hoehe e tami teh, vuensoma sak awh hanh lawih. <sup>19</sup> Vuensoma e heh alawkpui nahoehe. Cathut e kâpoelawk doeh alawkpuihnawn. <sup>20</sup> Cathut ni a kaw e patetlah tami pueng ama a onae hmuen daww awh naseh. <sup>21</sup> Kaw e lah ao nah san lah na awm pawiteh, hot ni lungpuennae tawn sak hanh naseh. <sup>22</sup> Hateiteh, Bawipa ni a kaw nahaw san lah kaawm e teh Bawipa daww kahlout e tami lah ao. Hot patetlah a kaw nah kahlout e teh, Khrih e san lah ao. <sup>23</sup> Nangmouh teh apu hoi ran e lah na o awh daww taminaw koe san lah awm a hanh lawih. <sup>24</sup> Hmaunawngghanaw, kaw lah kaawm e tami pueng teh, a taww e thaw hah Cathut hmalah taww naseh.

### *Imthung ka tawn hoehe e naw hoi lahmawinaw*

<sup>25</sup> Tanglakacuem hoi kâkuen e daww, Bawipa kâpoelaww na poe e ka coe hoehe eiteh, Bawipa e lungmanae ka coe teh, yuemkamcu e lah ka o dawwvâh, kai ni hettelah laww na poe awh. <sup>26</sup> Atu e rektapnae kecu dawwvâh, vâ na tawn hoehpawiteh ahawi. Tongpa hai atu ao e patetlah awm pawiteh ahawi. <sup>27</sup> Yuvâ lah na awm awh toung pawiteh, kâkapek awh hanh lawih. Yuvâ lah na awm awh hoehe rah pawiteh, yu tawng awh hanh lawih. <sup>28</sup> Hatei yu na lat toung pawiteh, het heh yonnae nahoehe. Tangla ni vâ sak pawiteh, yonnae nahoehe. Hatei ahnimanaw teh talai runae a kâhmo awh han. Kai ni teh hote runae daww hoi hlout sak hanlah na ngaihai a daww doeh. <sup>29</sup> Hmaunawngghanaw, dei ka ngai e teh, a tue abaw tawmlei toung dawwvâh, atu hoi teh yu ka tawn ni yu ka tawn hoehe patetlah, <sup>30</sup> Ka khuikap e ni khuikap hoehe e patetlah a kokanawm ni a kokanawm hoehe e patetlah, hnopai ka ran e ni bangcahai ka tawn hoehe e patetlah ao awh han. <sup>31</sup> Talaivan hnopai ka hnonaw ni hai ka hno hoehe e patetlah awm naseh. Bangkongtetpawiteh, talai hoi a thung e hnopai pueng teh be kahmat han.

<sup>32</sup> Kai ni nangmouh lungpuen hane na ngaihai a hoehe. Yu ka tawn hoehe e tongpanaw ni teh Bawipa lunghaw nahanlah Bawipa daww doeh a lungpuen awh. <sup>33</sup> Yu ka tawn e tongpa ni teh yu bangtelane lunghaw sak thai han, titeh talaivan hno daww a kâhruetcueth. <sup>34</sup> Hot patetlah doeh, vâ ka tawn hoehe e napui hoi tanglakacuem teh, tak hoi muitha thounsak thai nahanlah Cathut e thaw daww a kâhruetcueth awh. Hatei, vâ ka tawn e napui teh a vâ lunghaw nahanelah talaivan hno hah ouk a pouk. <sup>35</sup> Hettelah ka dei ngainae teh, nangmouh ahawi nahane lah doeh ka dei. Nangmouh khak na cakâ hane ka ngai daww nahoehe. Kahawi e hno sak awh nateh lungthin katang hoi Bawipa koe na kâpoe thai awh nahane lah doeh.

<sup>36</sup> Tangla teh vâ sak laipalah, vâ sak tue lawn pawiteh hawihoehe telah tangla katawnkung ni pouk pawiteh, vâ sak hanelah hai kâvoe pawiteh, vâ sak naseh. Yon nahoehe. <sup>37</sup> Hatei, a lungthung laww tâtuengnae a tawn hnukkhu, a counghoehe daww vâ sak laipalah, a kâcakuep thai daww vâ sak laipalah awm thai pawiteh ahawi. <sup>38</sup> Hatdawwvâh, hote tangla hah vâ ka sak sak e tami teh hnokahawi a sak. Vâ ka sak sak hoehe e tami hai hnokahawi hoe a sak.

<sup>39</sup> Yu teh a vâ a hring nathung vâsaknae phung ni a katek. Hatei, a vâ dout pawiteh a ngai e tongpa koe vâ sak hanelah Bawipa daww kâ ao. <sup>40</sup> Hote napui ama o lah duem awm pawiteh yawhawinae hoe ao telah ka pouk. Kai koehai Cathut e Muitha ao telah ka pouk.



## 8

*Meikaphawk hmalah thuengnae*

<sup>1</sup> Meikaphawk hmalah thueng e sathei canei kong dawkw, kapek thainae be na tawn awh tie ka panue. Hatei, thoumthainae ni a kâoup sak. Lungpatawnae ni a rounng sak. <sup>2</sup> Ka panue toe ka tet e ni panue hane yit touh panuek hoe hah. <sup>3</sup> Cathut ka lungpataw e tami teh, Cathut ni a panue.

<sup>4</sup> Meikaphawk hmalah thueng e sathei canei kong hoi kâkuen lah, meikaphawk teh talaivan dawkw banglahai awmhoe h. Cathut buet touh dueng doeh kaawm tie panue awh. <sup>5</sup> Bangkongtetpawiteh cathutnaw, bawipanaw telah kaw e patetlah talai hoi kalvan vah cathutnaw telah kaw e moikapap ao ei, <sup>6</sup> maimouh hane teh Pa Cathut buet touh dueng doeh kaawm. Ahni koehoi hnocawngca pueng a tho teh, maimanaw hai Cathut dawkw hring awh. Maimae Bawipa tie Jisuh Khrih buet touh dueng doeh kaawm, ahni koehoi hnocawngca pueng a tho teh, maimouh teh hote Bawipa dawkw hring awh.

<sup>7</sup> Hatei, panuethainae tami pueng ni tawn awh hoe h. Tami tangawn teh, meikaphawk bawknae nuen a lungthung ao rah dawkwah, thueng e sathei a canei nah thoehawi panuenae a thayoun dawkwah kakhin e lah ao awh. <sup>8</sup> Rawca lahoi Cathut hmalah minhmai kahawi hmu e na hoe h. Ca dawkwah bet ahawinae awmhoe h, ca hoe h dawkw hai bet hawihoe hnae awmhoe h. <sup>9</sup> Hatei, nangmouh na hloutnae teh, a thakayounnaw hanlah, kamthuinae lah ao hoe h nahan kâhruetcu et awh. <sup>10</sup> Bangkongtetpawiteh, kapek thainae na tawn nahlangva, meikaphawk bawkim dawkw e na ca awh e hah, tami alouke ni hmawt pawiteh, thoehawi panuenae a thakayounnaw niteh, meikaphawk hmalah thueng e sathei moi ca hanelah taranhawi awh mahoe h na maw. <sup>11</sup> Nange lungangnae ni, tha kayoun e hmaunawnggha, Khrih ni ahnimouh hanlah a due ei, rawknae koe a phakhai toe. <sup>12</sup> Hettelah hmaunawnggha lathueng vah na yon awh navah ahnimanaw panuenae kayoun ca e naw hmâ na paca awh toe. Hatdawkwah Khrih koe na yon awh toe. <sup>13</sup> Hatdawkwah, canei e ni hmaunawnggha kamthui sak pawiteh ahnimouh a rawp hlak teh, maito moi ka hai han toe.

## 9

*Gunceinaw e hnotithainae*

<sup>1</sup> Tami kahlout lah kai kaawm hoe h namaw. Guncei lah kaawm hoe h na maw. Maimae Bawipa Jisuh Khrih teh ka hmawt boihoe h namaw. Nangmouh teh Bawipa dawkw kai ni ka tawkw e thaw lah na awm awh hoe h namaw. <sup>2</sup> Alouknaw koe guncei lah kaawm hoe h nakunghai, nangmouh koe guncei lah ka o. Bangkongtetpawiteh, Bawipa dawkw nangmouh teh kai guncei lah ka onae kapanuekkhaikung lah na o awh. <sup>3</sup> Kai akung kakheinaw koe hettelah na dei pouh awh. <sup>4</sup> Ca thai, nei thainae kâ ka tawn awh hoe h na maw. <sup>5</sup> Piter hoi Bawipa e hmaunawngghanaw koehoi alouke gunceinaw patetlah ka yuem e yu hah hrawi thai hoe h na maw. <sup>6</sup> Barnabas hoi kai teh thaw tawkw hanlah awmhoe h na ti awh bo ma. <sup>7</sup> Apimaw mae lamvon hoi ransa thaw ka tawkw. Apimaw misur takha ka sak ni teh cat laipalah kaawm. Apimaw tu ka khoum ni teh sanutui net laipalah kaawm. <sup>8</sup> Talai hmuna e lahoi ka dei e na ou. Kâlawk ni hai telah doeh a dei. <sup>9</sup> Mosi e cangkhae nae dawkw telah a thut. Cabong katin e maito a pahni moum pouh hanh. Cathut ni a dei ngainae teh



maito hane doeh na ti maw. <sup>10</sup> Hoehpawiteh maimouh hanelah maw a dei. Atangcalah maimouh hane doeh a dei. Bangkongtetpawiteh law ka sak nihai, ngaihawi laihoi a sak dawkvah, katin e ni hai ngaihawi laihoi a katin van. <sup>11</sup> Kaimouh ni nangmouh dawkw muiitha cati ka patûe a dawkw nangmouh koehoi talai hnopai ka coe awh e heh ka tapuet awh e na maw. <sup>12</sup> Alouknaw ni patenghai nangmouh koe e coe awh pawiteh, kaimouh te hoe kapap coe hanlah kamcu hoeh namaw. Hatei, hnotithainae ka hno awh hoeh. Khrih kamthang kahawi kangangkung lah ao hoeh nahan bangpueng dawkw ka panguep awh.

<sup>13</sup> A thaw katawknaw ni bawkim dawkw e rawca a ca awh teh, thuengnae kasaknaw ni khoungroe dawkw e a canei awh tie na panuek awh hoeh maw.

<sup>14</sup> Hot patetvanlah, kamthang kahawi kadeinaw hai kamthang kahawi pâpho e lahoi kâkawkw awh han telah Bawipa e kâ poe doeh.

<sup>15</sup> Hatei, hete heh ka hno awh hoeh. Nangmouh ni kaimouh koe hettelah na sak awh nahanlah ka thut e nahoe. Bangkongtetpawiteh, kâoupnae heh alouknaw ni a raphoe hlak teh kadout pawiteh bet ahawihnawn. <sup>16</sup> Kai teh kamthang kahawi ka pâpho nakunghai kâoupkhai hane awmhoeh. Pâpho laipalah kaawm thai hoeh. Pâpho laipalah kaawm pawiteh yawthoenae doeh. <sup>17</sup> Thahmeicalah hoi kamthang kahawi ka pâpho pawiteh aphu ao. Thahmeicalah hoi ka pâpho hoehpawiteh kai koe na poe lah kaawm e ka pâpho rumram e la doeh awm ti. <sup>18</sup> Pawiteh, kaie tawkpheu teh bangmaw, kamthang kahawi ka pâpho e ayawm doeh. Hatdawkvah kâtawnnae ka hno hoeh. Khrih e kamthang kahawi kathainaw ni aphu pâbaw laipalah awm pawiteh kai han aphu ao.

<sup>19</sup> Kai teh tami pueng e hmalah kahlout e lah ka o ei, tami hoe kapap ka la thai nahanelah, tami pueng e san lah ka o. <sup>20</sup> Judahnaw ka la thai nahan, Judahnaw koe Judah tami patetlah ka o. Kâlawk rahim kaawm hoeh ei, kâlawk rahim kaawm naw ka la thai nahan, kâlawk rahim kaawm naw koe, kâlawk rahim kaawm e patetlah ka o. <sup>21</sup> Kai teh kâlawk hoi kâhlat e nahoe. Khrih e kâlawk rahim ka o ei, kâlawk hoi kâhlat e taminaw ka la thai nahanelah, kâlawk hoi kâhlatnaw koe kâlawk hoi kâhlat e patetlah ka o. <sup>22</sup> Tha kayounnaw ka la thai nahan, a thakayounnaw koe a tha kayoun e patetlah ka o. Tami tangawn ka rungngang thai nahan, tami pueng koe aphunphun lah ka o. <sup>23</sup> Nangmouh hoi kamthang kahawi rei hmawng thai nahan, kamthang kahawi kecu hottelah ka onae doeh.

<sup>24</sup> Yawng kâtânae koe a yawng awh ei, buet touh ni dueng doeh suh a hmu tie na panuek awh hoeh maw. Suh rip na hmu thai awh nahanlah yawng awh. <sup>25</sup> Kâtânae dawkw kâen e ni teh bangpueng radueknae a kâcakup thai. Ahnimanaw teh kamyai thai e bawilukhung hmu hane dawkw tha a patung awh. Maimanaw teh, kamyai kamko thai hoeh e bawilukhung hmu hanlah tha patung awh. <sup>26</sup> Hatdawkvah, noenae awm laipalah ka yawng hoeh, kahlî dawkw ka thaw rumram hoeh. <sup>27</sup> Ayâ ka yue teh kama ka sung e lah ka o hoeh nahanelah, kamahoima hmaloe ka kâhaw.

## 10

### *Isarelnaw koehoi tha lanaw*

<sup>1</sup> Hmaunawngghanaw, mintoenaw ni tâmai rahim, vah talîpui a raka awh, <sup>2</sup> Tâmai hoi talîpui thung Mosi koe baptisma a coe awh, <sup>3</sup> Muitha bu rei a ca awh, Muitha tui rei a nei awh, tie nangmouh ni panuek laipalah



na o awh hane na ngaikhai a hoe. <sup>4</sup> Ahnimouh hnukkâbang e muiitha talung tui hah rei a nei awh. Hote talung teh Khrih hah doeh. <sup>5</sup> Hatei, hote taminaw thung daw k tami moikapap ni Cathut lunghawi sak awh hoe. Hatdawkvah kahrawngum vah a due awh teh a rawk awh.

<sup>6</sup> Ahnimouh ni kahawihoe hno a raduek awh e patetlah maimouh ni raduek awh hoe hanelah ahnimouh teh maimouh ni khetsin hanelah ao. <sup>7</sup> Ahnimouh canei hanelah a tahung awh. Hahoi lamtu hanlah a thaw awh telah Cakathoung daw k a thut e patetlah, nangmanaw teh meikaphawk kabawke ahnimanaw patetlah awm awh hanh. <sup>8</sup> A tangawnaw ni kamsoumhoeh napui tongpa yonnae a sak awh e patetlah maimouh teh kamsoumhoeh napui tongpa yonnae sak a hanh sei. Tami tangawn ni kamsoumhoeh napui tongpa yonnae a sak awh kecu daw k, hnin touh daw k 23,000 touh a due awh. <sup>9</sup> Tami tangawn ni Cathut a tanouk awh e patetlah maimouh teh Khrih hah tanouk awh hanh sei. Hottelah a tanouk awh dawkvah, tahrn ni a khue awh teh a due awh. <sup>10</sup> Tami tangawn teh a phuenang awh e patetlah maimouh teh phuenang awh hanh sei. Hottelah ka cingou e naw hah kalvantaminaw ni a due sak awh. <sup>11</sup> Hetnaw hateh, maimouh ni khetsin hanelah ahnimouh koe ka phat e doeh. A tue poutnae koe lah kaawm e maimouh kâhructuet nanelah ao. <sup>12</sup> Hatdawkvah, kacaklah kangdue thai ka tet nang, na rawp hoe hanelah kâhructuet. <sup>13</sup> Tami ni a khang thai e tacueknae dueng doeh nangmouh ni na kâhmo awh. Hatei Cathut teh yuemkamcu dawkvah, na khang thai hoe hane tacueknae hah nangmouh koe phat sak mahoe. Tacueknae na khang thai awh nahan, tacueknae hoi cungtalah hlout nahane lamthung hai na poe han.

### *meikaphawk bawknae kâhructuet*

<sup>14</sup> Hatdawkvah ka pahren naw, meikaphawk bawknae roun awh. <sup>15</sup> Nangmouh a lungkaang e lah na pouk awh daw k ka dei. Ka lawk hah noumcai a haw. <sup>16</sup> Maimouh ni lunghawi lawk deinae manang teh Khrih e thi daw k hmawngkhainae lah awm hoe hane na maw. Maimouh ni raen e vaiyei teh Khrih tak hmawngkhai e nahoe hmaw. <sup>17</sup> Vaiyei phen buet touh dueng ao dawkvah moikapap e maimouh teh tak buet touh lah o awh. Bangkongtetpawiteh maimouh pueng ni buet touh dueng e vaiyei hah hmawng awh. <sup>18</sup> Isarel taminaw kenhaw! sathei ka cat e naw teh thuengnae khoungroe hoi kâkuen e lah awm hoe hane maw. <sup>19</sup> Telah ka ti nah bang ne ka dei ngai. Meikaphawk thoseh, sathei thoseh, hetnaw heh alawkpui lah ao telah ka dei ngainae na ou. <sup>20</sup> Ka deingainae nahoe. Jentelnaw ni thuengnae teh Cathut koe a thueng awh e laipalah, kahraituilinaw koe thueng e lah ao dawkvah, nangmouh teh kahrai hoi hmawng hane na ngaikhai awh hoe. <sup>21</sup> Nangmouh teh Bawipa e manang na net awh pawiteh, kahraituilinaw e manang na net thai hoe. Bawipa e caboi na hmawng pawiteh, kahraituilinaw e caboi na hmawng thai hoe. <sup>22</sup> Bawipa lungkhuek nahan boma na sak a va. Maimouh teh Bawipa hlak bahu tawn awh maw.

### *Kayuemnaw hloutnae*

<sup>23</sup> Hno pueng sak thai, hatei bangpueng sak han kawi nahoe. Hno pueng sak thai e lah ao, hatei hno pueng rounge lah awm hoe. <sup>24</sup> Ma hawinae dueng apihai tawng hanh naseh. Tami pueng ayânaw hanelah hawinae tawng awh naseh. <sup>25</sup> Hnoyonae koe a yo awh e moi pueng heh thoe hawi panuena lahoi pacipali pacei laipalah cat awh.



<sup>26</sup> Bangkongtetpawiteh, talai hoi talai dawk e hnopai pueng teh Cathut e seng doeh. <sup>27</sup> Ka yuem hoeh naw ni na kaw awh pawiteh, nang hai cei hane na ngai pawiteh, a pâtoum e pueng pacipali pacei laipalah cat awh. <sup>28</sup> Hatei hete teh, meikaphawk hmalah thueng e sathei moi doeh telah buetbuet touh ni tetpawiteh, hottelah ka tet e a lung thoung nahanlah cat pouh hanh. <sup>29</sup> Lung thoung ka ti navah nangmae lung ka deingainae na hoeh. Ayâ e lung doeh ka dei. Kaie hloutnae hah bangkongmaw ayânaw e thoehawi panuenae hoi akungkhei lah khuet ao han vaw. <sup>30</sup> Lunghawi lawk deinae lahoi kai ni ka hno pawiteh, kai ni lunghawi lawk ka deinae hah bangkong a dudam a vaw.

<sup>31</sup> Na canei hai, bang patet e hno na sak hai Cathut a Bawilen nahan sak awh. <sup>32</sup> Taminaw rungngang lah ao nahan, kai teh ma hawinae dueng ka tawng hoeh, ayânaw hawi nahane doeh ka tawng. <sup>33</sup> Tami cawngca e ngainae koe lah ka o e patetlah nangmouh hai Judah tami, Jentel tami, Cathut e kawhmoun thung kaawm naw koe tâlaw nahanelah sak laipalah awh awh.

## 11

### *Lû huemnae*

<sup>1</sup> Kai ni Khrih e nuen ka out e patetlah nangmouh ni hai kaie nuen out van awh. <sup>2</sup> Hmaunawngghanaw, bangpueng dawk kai na pouk awh teh, kai ni na cangkhai e naw na tarawi awh dawkvah na oup awh. <sup>3</sup> Tongpa e lû teh Khrih doeh, napui e lû teh tongpa doeh, Khrih e lû teh Cathut doeh tie na panue hane na ngaikhai awh. <sup>4</sup> Tongpa ni lû huem laihoi ratoum boi, profet lawk dei boipawiteh amae lû ka bari hoeh e lah ao. <sup>5</sup> Napuinaw ni lû huem laipalah ratoum boi, profet lawk dei boipawiteh amae lû ka bari hoeh e lah ao. <sup>6</sup> Hatdawkvah napui ni a lû huem hoehpawiteh a sam ngaw naseh. Sam ngaw e kayak pawiteh, a lû huem naseh.

<sup>7</sup> Tongpa teh Cathut e mei, Cathut e bawilennae lah ao dawkvah a lû huem nahanh seh. Napui teh tongpa bawilennae doeh. <sup>8</sup> Tongpa teh, napui dawkh hoi ka tâcawt e nahoeh. Napui doeh tongpa dawkh hoi ka tâcawt. <sup>9</sup> Tongpa teh napui hanlah sak e nahoeh, napui teh tongpa hanlah sak e doeh. <sup>10</sup> Hatdawkvah, kalvantaminaw khet lahoi napui ni kâtawnnae mitnoutnae lah a lû huem naseh. <sup>11</sup> Hateiteh, Bawipa dawkh tongpa laipalah napui awmhoeh, Napui laipalah tongpa kaawm e na hoeh. <sup>12</sup> Napui teh, tongpa dawkh hoi a kangcoung e patetlah tongpa hai napui dawkh hoi a kangcoung van. Bangpueng hai Cathut dawkh hoi doeh a kangcoung awh.

<sup>13</sup> Napui ni lû huem laipalah Cathut koe a ratoum e a kamcu hoi kamcu hoeh e hah namamouh ni pouk a haw. <sup>14</sup> Talai khosaknae dawkvah tongpa ni sam pâhlung pawiteh amahoima kâbari hoeh e doeh. <sup>15</sup> Napui ni sam pâhlung pawiteh, ama a bawilennae lah ao, napui e a sam teh a kâhuemnae lah ao. <sup>16</sup> Hatei, buetbuet touh ni na oun pawiteh, maimouh dawkh hai, Cathut e kawhmounnaw dawkh hai hot patetlah e phung awmhoeh.

### *Bawipa e tangminbu*

<sup>17</sup> Na kamkhueng awh navah, hawinae koe hlah, thoenae koe lah a paphnawn dawkvah kai ni na oup awh hoeh. <sup>18</sup> A pasuek lah, kawhmoun thung na kamkhueng awh navah buet touh hoi buet touh na kâkapek awh



tie ka thai. <sup>19</sup> Ka thai e patetlah atang han doeh. Bangkongtetpawiteh, tami kahawinaw a kamnue nahanlah kâkapeknae ao han. <sup>20</sup> Rei na kamkhueng awh navah Bawipa e pawî hmawng hanlah na kamkhueng a hoeh. <sup>21</sup> Na canei awh nah na kâring awh laipalah, na canei awh, tami tangawn a vonhlam, tami tangawn teh khak na ca awh. <sup>22</sup> Na canei nahan im na tawn awh hoeh na maw. Cathut e kawhmoun na dudam awh teh, karoedengnaw na kaya sak awh. Bangtelane bout dei han. Hete dawkw kai ni na oup a han namaw. Na oup a mahoe.

<sup>23</sup> Bangkongtetpawiteh, Bawipa koehoi ka coe e doeh na dei pouh awh. A pahnawt awh hnin tangmin vah Bawipa Jisuh ni, vaiyei a la teh, <sup>24</sup> lunghawi lawk a dei hnukkhu, vaiyei a raen teh, hete vaiyei teh, nangmouh han ka raen e ka tak doeh, lat a nateh cat awh. Kai na pahnim awh hoeh nahanlah hettelah sak awh atipouh.

<sup>25</sup> Hot patetvanlah, tangmin bu a ca awh hnukkhu manang bout a la teh, hete manang teh ka thi hoi ka caksak e lawkkam katha doeh. Hete manang na nei awh nah kai na pahnim hoeh nahan net haw atipouh.

<sup>26</sup> Hatdawkvah, vaiyei na ca awh teh manang na nei awh na tangkuem vah, Bawipa e a duenae hah bout a tho hnin totouh na pathangnae doeh.

### *Mahoima akungkheinae*

<sup>27</sup> Bawipa e vaiyei hoi manang kamcu hoeh lah ka catnet e teh, Bawipa e a tak, a thi hah kayonkhai e lah ao. <sup>28</sup> Hatdawkvah, mahoima akung kâkhei hnukkhu vaiyei cat naseh, hot patetvanlah manang hai net naseh.

<sup>29</sup> Bangkongtetpawiteh, kamcu hoeh lah ka catnet e teh Bawipa e a tak kapekkaboe thai hoeh dawkvah a lathueng lawkcengnae hoi hmai a canei e lah ao. <sup>30</sup> Hat kecu dawkw nan ou, a tha kayoun, kapatawnaw moi na o awh. Kadout e naw hai moi na o awh. <sup>31</sup> Hmaloe mahoima akung ka khei pawiteh, lawkcengnae dawkw hoi hlout awh han. <sup>32</sup> Lawkcengnae kâhmo awh navah, talaivan hoi yonphukhangnae koehoi hlout thai awh nahan Bawipa koe hoi e yuenae kâhmo awh. <sup>33</sup> Hatdawkvah, hmaunawngghanaw, canei hanelah na kamkhueng awh navah kâring awh. <sup>34</sup> Na kamkhueng awh navah, buetbuet touh teh a von la hlam pawiteh, yon lawkceng e lah na o awh hoeh nahanelah, ahni teh ama im cat naseh. Aloukenaw teh ka tho torei bout ka dei han toe.

## 12

### *Muitha poehno alouklouk*

<sup>1</sup> Hmaunawngghanaw, Muitha poehnonaw panue sak hane na ngaikhai awh. <sup>2</sup> Nangmouh teh Cathut na panue awh hoehnahlan vah, jentel lah na o awh, bang lawkw hai ka dei thai hoeh e meikaphawkw koe lah lam na phen awh tie na panue awh. <sup>3</sup> Hatdawkvah, apihai Cathut e Muitha lahoi Jisuh teh theob loah awmseh tet mahoe. Hot patetvanlah apinihai Kathoung Muitha laipateh, Jisuh teh Bawi doeh tet thai mahoe.

<sup>4</sup> Poehnonaw alouklouk ao ei, Muitha teh buet touh doeh. <sup>5</sup> Thaw tawkwah alouklouk ei, Bawipa teh buet touh doeh. <sup>6</sup> Hnosaknae alouklouk ei, Cathut ni doeh tami pueng dawkw thaw a tawkw. <sup>7</sup> Hatei, tami kapap hawi nahanelah, Kathoung Muitha hah tami tangkuem koe kamcengcalah a poe.

<sup>8</sup> Tami buet touh koe Kathoung Muitha lahoi lungangnae lawkw a poe. Hote Muitha ni alouke tami buet touh koe pheng nout thainae a poe. <sup>9</sup> Hote Muitha lahoi alouke tami buet touh koe yuemnae a poe. Hote Muitha lahoi alouke tami buet touh koe patawnae roum sakthainae poehno a poe.



<sup>10</sup> Alouke tami buet touh koe kângairuhno sakthainae a poe. Alouke tami buet touh koe sutdeilawk, alouke tami buet touh koe muithanaw kapek teh panuethainae a poe. Alouke tami buet touh koe alouk lawkpanthainae, alouke tami buet touh koe hote alouk lawk tâhlat thainae a poe. <sup>11</sup> Hetnaw pueng Kathoung Muitha buet touh dueng e a thaw tawknae lah ao. Ama ni a ngai e patetlah hote thaw hah tami buetbuet tangkuem koe a rei teh a poe.

*Tak buet touh dawk puengcang kapap ao.*

<sup>12</sup> Hatdawkvah, tak buet touh dueng ei, puengcang moikapap ao. Puengcang moikapap e ni tak buet touh lah ao sak e patetlah Khrih hai ao. <sup>13</sup> Bangkongtetpawiteh, maimouh pueng heh Muitha buet touh ni doeh tak buet touh thung Baptisma na poe awh. Judah hai jentel hai san hai ka hlout e hai, maimouh pueng teh Muitha buet touh doeh nei awh. <sup>14</sup> Tak teh puengcang buet touh dueng kaawm e nahoe, moikapap ao. <sup>15</sup> Khok ni kai teh kut lah ka o hoeh dawk tak dawk ka bet hoeh, tetpawiteh hottelah ati dawk tak dawk ka bet katang hoeh na maw. <sup>16</sup> Hnâ ni kai teh mit lah ka o hoeh dawkvah, tak dawk ka bet hoeh, tetpawiteh hottelah ati dawk tak dawk ka bet katang hoeh namaw. <sup>17</sup> Tak heh mit lah kOUNg awm pawiteh, bang ni maw lawk a thai han. Tak heh hnâ lah kOUNg awm pawiteh, bang ni ne a hmuï a pahnuep han. <sup>18</sup> Hatei, Cathut ni tak dawk e a puengcangnaw hah ama ni a ngainae hmuen koe kOUNg a hruek. <sup>19</sup> Tak e a puengcangnaw buet touh lah kOUNg awm pawiteh, tak teh nâne ao han tOUNg. <sup>20</sup> Hatdawkvah, puengcang moiapap ei, tak buet touh doeh.

<sup>21</sup> Mît ni kut koe, mit nang na panki hoeh tet thai pouh hoeh, lû ni khok koe, lû nang na panki hoeh tet thai pouh hoeh. <sup>22</sup> Hothloilah, tha hoe ka youn e puengcangnaw hah, hoe panki e puengcang lah ao. <sup>23</sup> Hahoi, barinae kaawm hoeh e puengcangnaw hah kalenhawn e barinae a coe awh. <sup>24</sup> Ka talue tangcOUNg e naw ni teh alouke barinae hah ngai awh hoeh toe. <sup>25</sup> Tak dawk kâkapeknae awm laipalah, puengcang buet touh hoi buet touh sue touh lah a pouk thai awh nahan telah a sak. <sup>26</sup> Tak dawk e a puengcang buet touh runae kâhmo pawiteh, alouknaw ni hai runae a khangkhai van, puengcang buet touh bari pawiteh alouknaw pueng ni a konawm khai van awh.

<sup>27</sup> Nangmouh teh Khrih e a tak lah na o awh, lengkaleng a puengcang lah na o awh. <sup>28</sup> Kawhmoun thungvah Cathut ni gunceinaw apasuek a kaw. Apâhni lah profetnaw, apâthum lah kacangkhaïnaw, hathnukkhu kângairuhno kasakthainaw, hahoi teh patawnae ka roum sakthainaw, kabawmthainaw, ukthainaw, alouk lawk kapekthainaw hah a poe. <sup>29</sup> Abuemlahoi guncei lah kOUNg ao maw, kaawm e pueng ni profet lah be o a maw. Maimouh pueng teh kacangkhaikung lah be o a maw. Maimouh pueng teh kângairuhno kOUNg sak thai a maw. <sup>30</sup> Maimouh pueng ni patawnae roum sakthainae poehno kOUNg tawn a maw. Maimouh pueng ni alouke lawk be pan thai a maw. Maimouh pueng ni alouke lawk be tâhlat thai a maw. <sup>31</sup> Nangmouh ni kahawipOUNge poehnonaw na ngai awh dawkvah, kahawihloe e lamthung na patûe awh han rah.

## 13

*Ka talue poung e lungpatawnae*

<sup>1</sup> Kai teh tami lawk hoi kalvantaminaw e lawk kOUNg kapan thai nakung-hai lungpatawnae ka tawn hoehpawiteh ka cai e mongka lawk hoi khawng



na dueng kacai e Cecak lawk patetlah doeh ka o. <sup>2</sup> Kai ni sutdeilawk poehno ka tawn niteh, hrolawk pueng hoi thoumthainae aphunphun ka thoum nakunghai thoseh, monnaw tahruet thainae totouh e yuemnae ka tawn nakunghai thoseh, lungpatawnae ka tawn hoehpawiteh ayawmyin doeh. <sup>3</sup> Ayâ ka paca ni teh ka tawn hno pueng karoedengnaw ka poe hloilah, ka tak hmaisawi totouh ka poe nakunghai, lungpatawnae ka tawn hoehpawiteh kai dawk aphu awm hoeh

<sup>4</sup> Lungpatawnae teh a lungsaw, lungpatawnae teh kahawi hno a sak, lungpatawnae teh kâoup hoeh, lungthin poan hoeh. <sup>5</sup> A nuen mathout hoeh, kâkaram hoeh, a lungkhuek hoeh, yonnae pâkuem hoeh, <sup>6</sup> kamsoumhoeh e hno dawk konawm hoeh, lawkkatang dawk doeh a konawm. <sup>7</sup> Hno cawngca a ramuk thai. Hno cawngca a yuem, hnocawngca a ngaihaw, hnocawngca a panguep.

<sup>8</sup> Lungpatawnae teh nâ RUEK hai pout ma hoeh. Profet lawk pan thainae teh a pout han, alouke lawk dei thainae teh a roum han, thoumthainae hai ka hmat han. <sup>9</sup> Atuvah maimouh teh ka kuep hoeh lah panue awh. Profet lahoi ka kuep hoeh lah pâpho awh. Kuepnae koe pha awh toteh ka kuep hoeh e naw pueng a kahma han. <sup>10</sup> Kuepnae koe a pha toteh, Ka kuep hoeh e pueng a pout han, <sup>11</sup> Camo lah ka o nah, camo lawk lah ka dei, camo patetlah ka pouk, camo patetlah ka panue. Ka cue toteh camonae naw ka ceitakhai. <sup>12</sup> Atuteh maimouh ni hlalang dawk ka khien e patetlah doeh o awh rah. Hat toteh, minhmai rek kâhmuh han toe. Atuteh ka panuena kuepcing hoeh. Hat toteh, ayânaw ni kai na panue e patetlah ka panue han toe.

<sup>13</sup> Atuvah, yuemnae, ngaihawinae, lungpatawnae hetnaw ao. Hote kathum touh thung dawk lungpatawnae teh a lenpoung.

## 14

### *Ka talue e Muitha thaw tawaknae*

<sup>1</sup> Lungpatawnae pâlei awh. Muitha poehnonaw hroung na ngai awh dawkvah, profet lawkdeithainae hoe ngainae tawn a haw. <sup>2</sup> Bangkongtetpawiteh, alouke lawk kapan e ni tami koe pan hoeh, Cathut koe doeh a pan, apinihai panuek hoeh, hrolawk naw muitha lahoi doeh a pan. <sup>3</sup> Hatei lawk ka pâpho e niteh, rount saknae, tha poenae, lungmawng nahanelah taminaw koe a pâpho. <sup>4</sup> Alouke lawk kapan e ni teh ama dueng doeh a rount sak. Profet lawk ka pâpho e ni teh kawhmoun a rount sak. <sup>5</sup> Nangmouh pueng alouke lawk kount pan sak hanlah na ngaikhai awh. Profet lawk dei hanelah hoe na ngaikhai awh. Bangkongtetpawiteh, alouke lawk kapan e tami teh kawhmoun a rount nahan deicainae tawn hoehpawiteh, ahni hlak profet lawk ka pâpho e aphu o hnawn.

<sup>6</sup> Hmaunawngghanaw, kai nangmouh koe ka tho teh alouke lawk hoi ka dei nakunghai, lawk tâlatnae, lungang pâ tuna, profet lawk deicainae, cangkhaenae buetbuet touh sak laipalah bangmaw aphu kaawm. <sup>7</sup> Hot patetlah doeh, ka cairing e ratoung tamawi, vovitnaw teh kanceng lah a lawk tâcawt sak hoehpawiteh ratoung lawk vovit lawknaw bangtelamaw panue thai han vaw. <sup>8</sup> Mongka hai a lamthung lah ueng hoehpawiteh, taran tuk hanelah apimaw kâra kueng han vaw. <sup>9</sup> Hot patetvanlah, thai panuek e lawk na dei hoehpawiteh, na dei e lawk bangtelamaw panue thai han. Kahlî koe kapan e patet la doeh awm tih. <sup>10</sup> Talaivan lawk a cawngca ao. Lawk pueng deingainae kount ao. Thai panuek hoeh e buet



touh hai awm hoeh. <sup>11</sup> Lawk hah tâhlat hoehpawiteh, kadeikung koe kai teh tamipathu lah doeh ka o. Kadeikung hai kai koe tamipathu lah doeh ao van. <sup>12</sup> Hatdawkvah, nangmouh Muitha koe lae poehnonaw coe han hoe na ngai awh dawkvah, kawhmoun ka roun sak hane muitha poehnonaw hah hoe ka kuepcing lah hmu hanelah panki awh.

<sup>13</sup> Hatdawkvah alouke lawk kapan e ni a deicai thai nahan ratoum naseh. <sup>14</sup> Bangkongtetpawiteh, alouke lawk hoi ka ratoum pawiteh, ka muitha ni a ratoum ei nakunghai ka panuenae koe hawinae poe hoeh. <sup>15</sup> Bangtelah ne ti han. Lungthin hoi muitha hoi ratoum han. Lungthin hoi muitha hoi pholen han. <sup>16</sup> Hoehpawiteh nang ni muitha hoi na pholen navah, ka thoum hoeh e nyah nange lawk a thai panuek hoeh dawkvah, lunglawi pholennae dawk bangtelamaw, Amen ati thai han. <sup>17</sup> Nang teh lunglawk kahawicalah na dei thai ei, alouke tami hanelah ahawinae awm hoeh.

<sup>18</sup> Nangmouh hlak, alouke lawk lahoi moikapap ka dei daw Cathut e lungmanae ka pholen, <sup>19</sup> Hatei, kawhmoun thung alouke lawk thong hra ka dei thai e hlak, alouknaw cangkhai hanelah lawklung panga touh panuenae hoi dei thainae ka tawn e hoe ka ngai.

<sup>20</sup> Hmaunawngghanaw, kho pouknae camo lah awm a hanh, kahawihoehe hno dawc camo lah awm awh, panuenae koe lah kacue e lah awm awh. <sup>21</sup> Cakathoung dawc thut e patetlah alouke lai, alouke pahni hoi hete mipun koe ka dei han, hat nakunghai ahnimouh ni thai ngai awh mahoehtelah BAWIPA ni a ti. <sup>22</sup> Hatdawkvah alouke lawknaw teh, kayuemnaw han mitnout lah awm hoeh. Kayuemhoehnaw hane mitnout lah ao. Profet lawk deinae, kayuemhoehnaw hane nahoehtelah. Kayuemnaw hane la doeh. <sup>23</sup> Kawhmoun thung cungtalah a kamkhueng nah, alouke lawk hoi a dei awh navah, ka yuem hoeh e, lawk ka panuek hoeh e kâen pawiteh, kapathunaw ati a han nahoehtelah. <sup>24</sup> Nangmouh ni lawk na pâpho awh navah, ka yuem hoeh e lawk ka panuek hoeh e tami kâen pawiteh, ahnimouh hah nangmouh ni kahawicalah na dei pouh e lahoi, tamikayon lah ka o tie a kâpanue han. <sup>25</sup> Ahnimae lungthin dawc kamphawng hoeh e naw bout a kamphawng vaiteh, a tabo lahoi Cathut a bawc han. Cathut teh nangmouh koe ao katang telah a kampangkhai han.

### *Bawknae katang*

<sup>26</sup> Hmaunawngghanaw, na kamkhueng awh toteh, Sam la ka sak ngai e, ka cangkhai ngai e, alouke lawk kapan ngai e, pâpho lawk ka dei ngai e, ka deicai thai e lengkaleng na o awh dawc, bangpuengpa kawhmoun a roun nahanlah sak awh. <sup>27</sup> Alouke lawk kapan e tami awm pawiteh, kahni touh nakunghai, katham touh nakunghai, kapap poung lah katham touh ni buet touh hnukkhu buet touh ni a dei han, hatnavah buet touh ni dei ngainae kamnuek sak seh. <sup>28</sup> Ka dei cai e tami awm hoehpawiteh, kadeikung teh, kawhmoun thung lawkkamuem lah awm naseh, ama hoi Cathut rahak dueng pan naseh.

<sup>29</sup> Profet kahni katham touh ni a dei e hah alouknaw ni kahawicalah noumcai awh naseh. <sup>30</sup> Ka tahung e tami koe buetbuet touh kâpâpho pawiteh, hmaloe ka dei e teh lawkkamuem lah duem awm naseh. <sup>31</sup> Bangkongtetpawiteh, tami pueng kamtu hanelah thoseh, tami pueng teh lungmawng nanelah thoseh, nangmouh pueng teh patuen patuen lawk na pâpho thai awh. <sup>32</sup> Profetnaw hai, amamae lungthin muitha a kâcakupe thai awh. <sup>33</sup> Cathut teh kâponae ka sak e doeh. Tami kathoung naw e kawhmounnaw thungvah kâponae lah kaawm e Cathut doeh.



<sup>34</sup> Napuinaw kawhmounnaw thung lawkkamuem lah awmseh. Ahnimouh dei thinae kâ tawn awh hoeh. Phung lawk ni a dei e patetlah ahnimouh teh tongpa uknae rahim awm naseh. <sup>35</sup> Yunaw buetbuet touh kamtu han ngai awh pawiteh, im vah a vanaw koe pacei naseh. Yu ni kawhmoun dawk lawk dei pawiteh yeirai pui doeh. <sup>36</sup> Cathut e a lawk nangmouh koehoi maw a tâco. Nahoe pawiteh nangmouh koe ka phat e na ou.

<sup>37</sup> Kai ni nangmouh koe na poe e lawknaw heh Bawipa e kâpoelawk doeh tie hah, profet lah kaawm e, muitha poehno ka coe e ni teh oe tet naseh, panuek hoehpawiteh a panue hoeh e patetlah awm naseh. <sup>38</sup> Lawk racuinae lah, hmaunawngghanaw nangmouh profet lawk dei han nginae kalenpoung tawn a loe. <sup>39</sup> Alouke lawk lahoi pâphonae hai cakâ pouh hanh awh. <sup>40</sup> Hno cawngca a lamthung patetlah kamcu lah sak hanelah ao.

## 15

### *Kamthang lawk kahawi*

<sup>1</sup> Hmaunawngghanaw, nangmouh koe ka pâpho awh e kamthang kahawi, nangmouh ni na coe awh teh na kangduekhai awh e, bout panue sak hanelah na ngaikhai awh. <sup>2</sup> Nangmouh koe ka pâpho e lawk heh, kacaklah na kuen awh pawiteh, hote kamthang kahawi lahoi nangmouh rungngang e lah na o awh. <sup>3</sup> Kai kama ni ka coe e patetlah nangmouh koe ahmaloe na poe awh e teh Cakathoung ni a dei e patetlah Khrih teh maimouh yon kecu dawk a due toe. <sup>4</sup> Pakawp hnukkhu Cakathoung ni a dei e patetlah apâthum hnin bout a thaw toe. <sup>5</sup> Cephas ni Bawipa a hmu hnukkhu, hlaikahni touh e naw ni hai a hmu awh. <sup>6</sup> Hathnukkhu, hmaunawnggha cum panga touh hlai koe bout a kamphawng pouh. Ahnimouh thung dawk a tangawn teh atu sittouh a hring awh rah. A tangawn naw teh a i awh toe. <sup>7</sup> Hat hoi, Jem koe a kamnue. <sup>8</sup> Hathnukkhu gunceinaw pueng koe a kamphawng pouh. A hnuktengpoung thapa kuep laipalah ka khe e patetlah kaawm e kai koehai a kamnue van.

<sup>9</sup> Kai heh, alouke gunceinaw thung dawk kathoengpounge lah ka o teh, Cathut e kawhmoun ka pacekpahlek dawk, guncei ti hanelah kamcu hoeh.

<sup>10</sup> Hatei Cathut e lungmanae lahoi, kai teh kai lah ka o. Ka coe e a lungmanae hai ayawmyin ka coe hoeh. Hatdawkvah, alouke gunceinaw pueng hlak kai hoe kâyawmnae ka tawn. Hatei kai nahoe. Kai dawk kaawm e Cathut lungmanae hoi doeh. <sup>11</sup> Kai ni hai ahnimouh ni hai het doeh a pâpho awh. Het doeh ka yuem awh.

### *Bouthawnae*

<sup>12</sup> Khrih teh duenae koehoi bout a thaw toe tie ka pâpho tOUNg pawiteh, bangtelamaw a tangawn ni duenae koehoi bouthawnae awmhoeh na ti awh vaw. <sup>13</sup> Duenae koehoi bouthawnae awmhoeh pawiteh, Khrih hai duenae koehoi thaw van mahoe. <sup>14</sup> Khrih teh duenae koehoi bout thaw hoehpawiteh, kaimouh ni ka pâpho e ahrawngghrang lah awm vaiteh, nangmouh ni na yuemnae hai ahrawngghrang han doeh. <sup>15</sup> Hothloilah kaimouh teh Cathut e thaw dawk kamsoumhoeh e kapanuekkaikung lah doeh kaawm awh tih. Cathut ni kadout tangcounghaw bout thaw sak hoehpawiteh, Cathut ni a thaw sak hoeh e Khrih hah Cathut ni a thaw sak toe telah laithoe ka dei e lah doeh awm awh tih. <sup>16</sup> Bangtelah tetpawiteh, kadoutnaw bouthawnae awmhoeh pawiteh, Cathut ni Khrih



hai thaw sak mahoe. <sup>17</sup> Khrih duenae koehoi bout thaw hoehpawiteh, nangmae yuemnae teh banglahai tho hoe. Yonnae a rahim doe na o a rah. <sup>18</sup> Telah pawiteh Khrih thung kaip tangcounghaw hai kahmakata awh toe. <sup>19</sup> Atu hring nahane dueng, Khrih thung ngaihawinae tawn pawiteh, tami pueng hlaq pahen ka tho poung la doe o awh.

<sup>20</sup> Atuteh Khrih duenae koehoi a thaw katang toung dawk kaipnaw thung dawk aluepaw lah ao. <sup>21</sup> Hatdawkvah duenae teh tami buet touh koehoi a tho, boutthawnae hai tami buet touh dawk hoi a tho van, <sup>22</sup> Tami pueng Adam dawk hoi duenae koe pha awh e patetlah tami pueng Khrih thung hoi bout hringnae koe pha awh han. <sup>23</sup> Hatei a taminaw pueng amamae atueng a pha torei a thaw awh han. Khrih teh aluepaw doe. Hathnukkhu Khrih a tho toteh a taminaw bout thaw awh han. <sup>24</sup> Hathnukkhu a poutnae teh a pha han. Hattoteh Khrih ni uknae pueng, kâtawnnae pueng, hoi bahu pueng apout sak vaiteh, Cathut uknaeram hah Na pa koe a poe han. <sup>25</sup> A tarannaw pueng a khok rahim a hruek hoehroukrak Khrih ni a uk han. <sup>26</sup> A hnuktengpoung e taran tie duenae teh poutnae koe ka phat han. <sup>27</sup> Hno cawngca tami Capa e khok rahim a hruek toe telah Cakathoung dawk thut lah ao. Hno cawngca a khok rahim a hruek ti navah, hnocawngca khok rahim kahruengkung ama teh bawk hoeh tie a kanceng. <sup>28</sup> Hetnaw be a sak hnukkhu Cathut teh a cawngca dawk a cawngca lah ao thai nahan, hnocawngca pueng hah tami Capa e khok rahim ka tat pouh kung e uknae rahim vah Capa ma roeroe hai ao han.

<sup>29</sup> Kadout tangcounghaw boutthawnae khoeroe awmhoeh pawiteh, kadoutnaw e yueng lah baptisma ka coe naw bangtelamaw ti han toung. Kadoutnaw e yueng lah bangkongmaw baptisma a coe a vaw. <sup>30</sup> Maimouh hai bangkongmaw hnintangkuem runae kâhmo a vaw. <sup>31</sup> Hmaunawnganaw maimae Bawipa Khrih Jisuh thung nangmouh kecu ka coe e kâoupnae lahoi hnintangkuem ka due telah ka dei. <sup>32</sup> Kadoutnaw boutthawnae awm hoehpawiteh, Efisa kho tami pouknae sarang taki ka tho poung hoi kâtuknae hai kai hanlah bangmaw aphu kaawm. Cat awh sei, net awh sei, tangtho due a han toe. <sup>33</sup> Alouklah pouk awh hanh. Tami kahawihoehnaw hoi kamyawngnae lahoi nuen kahawi a rawk thai. <sup>34</sup> Lannae koe lah yongvak awh haw. Yonnae sak awh hanh. Taminaw tangawn teh Cathut panuek a hoe. Hottelah ka ti nah nangmouh kaya nahanelah doe ka dei.

### *Boutthawnae tak*

<sup>35</sup> Tami tangawn ni, bangtelamaw tami kadout tangcounghaw e bout a thaw han. Bangpatetlah tak hoi maw a thaw han telah na pacei thai. <sup>36</sup> Na pathu maw. Na patûe e cati ni dout hoehpawiteh hring mahoe. <sup>37</sup> Na patûe nah a kung na patûe hoe. Catun nakunghai, cang nakunghai, a mu roeroe doe na patûe awh. <sup>38</sup> Cathut ni a ngainae patetlah a kung a paw sak. Cati pueng hai amamouh phun patetlah a kung a paw sak. <sup>39</sup> Moi pueng koug kâvan hoe. Tami moi alouk, moithangnaw e moi alouk, tanga moi alouk, tava moi alouk, alouklouk lah ao awh. <sup>40</sup> Kalvan tak ao teh talai tak hai ao. Hatei, kalvan tak e bawilennae phun louk, talai e bawilennae hai phun louk lah ao. <sup>41</sup> Kanî e bawilennae alouk, thapa e bawilennae alouk, âsi e bawilennae alouk, alouklouk lah doe ao awh. Âsi buet touh rip e a bawilennae hai kâvan hoe. <sup>42</sup> Hot patetvanlah kadoutnaw e boutthawnae teh ao. Tak teh patûe navah ka pawk thai e lah ao. Thaw toteh ka pawk thai hoe e lah bout a thaw han. <sup>43</sup> Patûe navah bari awm hoe. Bout



thaw toteh a bawilen. Patûe navah tha a youn, bout thaw toteh bahu a o. <sup>44</sup> Pakawp navah talai tak lah a o, bout thaw toteh muitha tak lah ao. Talai tak alouk, muitha tak alouklah ao. <sup>45</sup> Cakathoung ni, apasueke tami Adam teh kahring e lah ao. A hnukteng e Adam teh kahringsakkung Muitha doeh. <sup>46</sup> Muitha tak ahmaloe awmhoeh. Talai tak hmaloe ao. Hathnukkhu muitha tak ao. <sup>47</sup> Ahmaloe e tami teh vaiphu hoi sak e talai tami doeh. Apâhni e tami teh kalvan kho hoi ka tho e Bawipa doeh. <sup>48</sup> Vaiphu hoi sak e tami teh hote vaiphu tami patetlah ao awh. Kalvanlae taminaw teh hote kalvanlae tami patetlah ao awh han. <sup>49</sup> Maimouh teh vaiphu tami e meilam sin e patetlah kalvanlae meilam hai sin van awh han.

### *Boutthawnae dawk tânae*

<sup>50</sup> Hmaunawngghanaw, thi hoi tak ni Cathut uknaeram coe thai mahoe. Ka pawk thai e ni ka pawk thai hoe e coe thai van mahoe. <sup>51</sup> Hrolaw na dei pouh han, maimouh pueng koug ip a mahoe. <sup>52</sup> Hatei, a hnukteng e mongka ueng torei teh, tawkkadekca dawk maimouh pueng teh mitpalap vah koug kâthung awh han. Mongka ueng lawk thai toteh kadout tangcounghaw ka pawk thai hoe e lah a thaw awh han. Maimouh pueng hai koug kâthung awh han. <sup>53</sup> Atu ka pawk thai e ni ka pawk thai hoe e a khohna han. Kadout thai e ni kadout thai hoe e a kâmahrawk han. <sup>54</sup> Ka pawk thai e ni ka pawk thai hoe e lah, kadout thai e ni kadout thai hoe e a kâmahrawk toteh, duenae teh tânae ni a payawp toe telah Cakathoung ni a dei e a kuep han. <sup>55</sup> Oe duenae nange sue teh nâ ne. Oe phuen, nange tânae teh nâne ao. <sup>56</sup> Duenae sue teh yon doeh. Yon thaonae teh kâlawk doeh. <sup>57</sup> Maimae Bawipa Jisuh Khrih dawk hoi, maimouh tânae na ka poe kung, Cathut teh pholen awh.

<sup>58</sup> Hatdawkvah, ka pahren e hmaunawngghanaw, Cathut thaw na taw awh e aphu a talue poung tie na panue awh dawkvah, na lungcak sak awh. Rawm laipalah Cathut e thaw dawk thapatho nateh panki awh.

## 16

### *Jerusalem kawhmoun hanlah poenae*

<sup>1</sup> Tami kathoungnaw han pasoumhno na patung e dawkvah Galati ram e kawhmounnaw lawk ka thui e patetlah nangmouh sak van a loe. <sup>2</sup> Kai ka tho nah, bout cawng toung laipalah, hnin sari touh dawk apasuek hnintangkuem vah namamouh ni yawhawi na coe awh e patetlah na hnopai sut pâkhueng awh. <sup>3</sup> Kai ka tho torei, na ngai awh e tami koe, ca ka thut vaiteh nangmae poehno Jerusalem kho thak sak hanelah ka patoun han. <sup>4</sup> Kai hai cei hanelah awm pawiteh ahnimouh hoi rei ka cei han.

### *Pawl kahlawng ceinae*

<sup>5</sup> Masidonia ram lahoi nangmouh koe ka tho han, bangkongtetpawiteh, Masidonia ram lahoi doeh ka cei han. <sup>6</sup> Nangmouh koe dawngdeng ka o han rah. Kasik thapa thung teh nangmouh koe ka o han mue. Nangmouh ni na thak awh han doeh telah ka pouk. <sup>7</sup> Atu dueng nangmouh na hmu hanelah ka ngai e nahoe. Bawipa ni atueng na poe pawiteh nangmouh hoi ka saw lah ka o hane ka ngaihaw. <sup>8</sup> Pentikos hnin totouh Efisa kho ka o han. <sup>9</sup> Bangkongtetpawiteh, aphu kaawm poung e thaw ka tawk thai nahanlah kai hanlah takhang paawng lah ao. Hatei na ka ngang e taminaw hai ao. <sup>10</sup> Timote nangmouh koe tho pawiteh, takinae a tawn



hoeh nahan, khenyawn awh. Ahni hai kai patetlah Bawipa e thaw doeh a tawk. <sup>11</sup> Api nang ni hai hnephnap awh hanh. Kai koe bout a pha thai nahan kahawicalah thak awh. Ahni hoi hmaunawnggha alouknaw kai ni ka ngaihawi han. <sup>12</sup> Ka nawnggha Apollos teh, hmaunawngghanaw, hoi nangmouh koe cei hanelah, pasawt laihoi ka dei pouh ei, atu cei hanelah khoeroe ngaihoeh. Hmalah kâvoe pawiteh a cei han doeh.

### *Ahnounpoung thapoena*

<sup>13</sup> Kâhruetcueth laihoi ring awh. Yuemnae daw kacaklah kangdout awh. Tongpa katang lah awm awh. Na thasai sak awh. <sup>14</sup> Bang hno na sak e pueng lungpatawnae laihoi sak awh.

<sup>15</sup> Hmaunawngghanaw, Stiven imthung teh Akhaia ram thung daw aluepaw lah ao teh, tami kathoungnaw e thaw tawknae daw a kâhmoun e hah na panue awh. <sup>16</sup> Ahnimanaw e uknae hai thoseh, kaimouh hoi thaw rei ka tawk e tami pueng e uknae hai thoseh na panue awh nahanlah ka kâhei. <sup>17</sup> Stiven, Fortunatas, Akhaikas tinaw a tho awh dawkvah ka lunghaw. <sup>18</sup> Bangkongtetpawiteh, nangmouh ni na khetyawt awh teh, kuepcing hoeh rae naw, bout na kuep sak awh dawkvah, kai hoi nangmae lung tha a dam sak awh toe. Hot patetlah e taminaw hah dâw awh.

<sup>19</sup> Asia ram e kawhmounnaw ni nangmouh kut na man awh. Aquila hoi Priscilla ni ama im kaawm e kawhmoun hoi Bawipa daw nangmouh pueng kut na man awh. <sup>20</sup> Hmaunawnggha pueng ni kut na man awh. Buet touh hoi buet touh kathounge kâpaconae laihoi kut kâman awh.

<sup>21</sup> Kai Pawl ni kut mannae ca hah ka kut hoi ka thut. <sup>22</sup> Apihai Bawipa Jisuh Khrih lungpataw hoeh pawiteh, ahni teh thoebô lah awmseh. Oe! Bawipa tho leih. <sup>23</sup> Maimae Bawipa Jisuh Khrih e lungmanae teh nangmouh koe awm lawiseh. <sup>24</sup> Kaie lungpatawnae teh Khrih Jisuh thung kaawm e nangmouh pueng koe awm lawiseh. Amen.



## 2 KAWRIN (The Second Epistle of Paul to the Corinthians)

### *Lawk karouknae*

<sup>1</sup> Kai Pawl, Cathut ngainae lahoi Jisuh Khrih e guncei lah kaawm e, hoi ka nawnggha Timote ni Kawrin kho kaawm e Cathut e kawhmoun hoi Akhaia ram pueng daw k kaawm e tami kathounghaw koe ca na patawn awh. <sup>2</sup> Maimae Pa Cathut koehoi Bawipa Jisuh Khrih koe e lungmanae hoi roumnae teh nangmouh koe awm lawiseh.

### *Lungpahawikung Cathut*

<sup>3</sup> Maimae Bawipa Jisuh Khrih e Pa Cathut pahrennae hoi ka kawi e maimae na Pa, kabawmkung Bawi lah kaawm e Cathut teh yawhawinae awm lawiseh. <sup>4</sup> Maimouh ni reithainae a phunphun khang awh navah, lung na pahawi awh. Bangkongtetpawiteh maimouh ni coe awh e lungpahawinae hoayah reithainae aphunphun kakhangnaw hah lungpahawi thai nahane doeh. <sup>5</sup> Hote Khrih ni a khang e reithainae teh moipap dawkvah, Khrih kecu daw k maimouh ni coe e lungpahawinae hai moipap van. <sup>6</sup> Maimouh ni reithai patang khang awh pawiteh nangmouh lungpahawinae hoi rungngangnae doeh. Kaimouh ni hawinae ka hmu awh e hai nangmouh ni hawinae na hmu awh nahane doeh. Hote hawinae teh kaimouh ni ka hmu e reithainae koe nangmouh ni lungdonae hoi khang thai nahan thaonae lah ao. <sup>7</sup> Hatdawkvah nangmouh koe ka ngaihawinae a cak. Bangkongtetpawiteh, nangmouh ni reithai khangnae na phukhai e patetlah ahawinae hai reirei na khangkhai awh, tie ka panue awh.

<sup>8</sup> Hmaunawngghanaw, Asia ram vah kaimouh koe runae ka phat e hah, nangmouh panuek laipalah o sak han ka ngai hoehe. Kaimouh ni a rucatnae khang thai hoehe totouh ka kâhmo awh daw k hring hane patenghai ngaihawinae awmhoeh. <sup>9</sup> Kaimouh due han totouh lawk a tâtueng awh toe telah ka panue. Hatei telah bout onae teh kaimouh ni mahoima kâuepnae tho laipalah kadoutnaw kathâw sakkung, Cathut kângue nahane doeh. <sup>10</sup> Cathut ni hettelah e taki kaawm e duenae koehoi kaimouh na hlout sak. Hmalah hai bout na hlout sak han telah Bawipa daw k ka ngaihaw. <sup>11</sup> Nangmouh ni hai ratoumnae hoi kaimouh hah na kabawp teh, taminaw e ratoumnae daw k kaimouh ni ka hmu awh e poehnonaw khet navah, taminaw ni kaimae yueng lah lunghawinae lawk a dei awh han.

### *Kathounge panuenae lungthin*

<sup>12</sup> Kaimouh ni kâoup kawi e teh talaivan lungangnae laipalah Cathut e lungmanae daw k Cathut koehoi ka tho e lungthin thoungnae hoi kahring awh e hah lawkpanuesaknae lung ni na panue sak. <sup>13</sup> Kaimouh ni nangmouh koe ca ka thut awh navah, nangmouh ni na touk thai hane hoi na thai thai nahane hloilah alouke ka thut hoehe. <sup>14</sup> Atuvah nangmouh ni kaimouh be na panuek awh hoehe ei, maimae Bawipa Jisuh e hnin nah kaimouh teh nangmouh hanlah kâoupnae lah na o awh e patetlah, nangmouh hai kaimouh hanelah, kâoupnae lah na o awh e hah na panue awh han telah ka ngaihaw.



<sup>15</sup> Hettelah mangkhak katang dawkvah nangmouh teh hawinae bout na coe awh hanlah nangmouh koe ahmaloe ka tho han telah ka kâcai. <sup>16</sup> Nangmouh koe lah ka cei vaiteh Masidonia ram lah ka cei hnukkhu, haw hoi nangmouh koe ka tho vaiteh, Judah ram totouh nangmouh ni na thak a han telah ka pouknae ao. <sup>17</sup> Hottelah ka kâcai e heh a vanlong lah ka pouk e maw. Hoe pawiteh talai ngainae dawkvah ka titeh, Oe teh Oe hoi, nahoe hoi nahoe telah ka tet boi e na maw. <sup>18</sup> Cathut teh yuemkamcu e patetlah nangmouh koe ka dei awh e lawk teh vai touh daw, bokheiyah hoi, nahoe telah nahoe hoi. <sup>19</sup> Kaimouh hoi Silvanas, Timote tinaw ni nangmouh koe ka dei awh e Cathut Capa Jisuh Khrih daw vai touh hoi, Oe hoi Oe nahoe telah awm laipalah Bawipa daw, Oe telah doeh ao. <sup>20</sup> Hote Bawipa daw Cathut e a lawk kam e naw pueng teh maimouh kecu daw a bawilennae a kamnue nahanlah, Oe telah ati, Amen telah ati. <sup>21</sup> Nangmouh hoi kaimouh teh Khrih thung na o sak teh satui kaawikung teh Cathut doeh. <sup>22</sup> Hote Cathut ni maimouh hah tacik na kin teh maimae lungthung vah lawkawm lah Kathoung Muitha na poe toe.

<sup>23</sup> Cathut teh kai kampangkhai e lah ao. Ama ni ka lungthin teh a panue. Kawrin kho lah cei hoe hoi nahan kho ka pouk teh nangmouh hane malam ka pouk daw doeh. <sup>24</sup> Kaimouh ni nangmae na yuemnae daw kâ ka tawn awh hoe. Nangmouh ni lunghawi nahanlah nangmouh hoi cungtalai thaw ka tawk awh e doeh. Nangmouh teh yuemnae hoi na kangdue thai awh toe.

## 2

<sup>1</sup> Hatdawkvah, kai nangmouh koe ka tho navah, nangmouh lungmathoe sak hanelah ka tho hoe telah lawk ka tâtueng. <sup>2</sup> Bangkongtetpawiteh, kai ni nangmouh lung na mathout sak pawiteh, kai kecu daw a lung ka mathout e hloilah, apinimaw kai lung na hawi sak thai han va. <sup>3</sup> Kai ka tho navah, ka lung na kahawi sak e taminaw koe lungmathoenae sak hoe hanelah ca na patawn e doeh. Kai ka lung hawinae teh, nangmouh na kaawm e naw pueng lunghawinae lah ka tho han telah nangmouh abuemplahoi kâkuen lah kai ka yuem teh ka lung a kuep toe. <sup>4</sup> Nangmanaw lungmathoe sak hanlah tho laipalah, nangmouh na tak daw lungpatawnae ka tawn e hah na panue thai nahanelah, lungmathoe, lung reithai, mitphi vailong hoi nangmouh koe vah ka thut e doeh.

### *Ngaithoum lah kaawm e tamikayon*

<sup>5</sup> Lungmathoenae katâcawtsakkung ni lungmathoenae a tâco sak navah, kai ka tak daw tâco sak e tho laipalah nangmanaw abuemplah daw doeh lung a mathoe sak awh. <sup>6</sup> Tami moikapap ni reknae teh, ahni hanelah a khout toe. Ama e a yonnae ngaithoum hane hoiyah, <sup>7</sup> lung na pahawi hanelah ao, a lung hloi mathout pawiteh a lungpout langvai. <sup>8</sup> Hat dawkvah nangmanaw ni ahnimouh koe lungpatawnae na kamnue sak nahanelah nangmanaw kai ni na kâ awh. <sup>9</sup> Nangmanaw teh bangpueng daw lawk na ngai ou, ngai hoe ou ti panue nahanlah nangmanaw tanouk hanelah hoiyah hote ca teh kai ni na patawn awh e a tho. <sup>10</sup> Nangmouh na ka ngaithoum e hah kai ni hai ka ngaithoum van. Kai ni buetbuet touh ka ngaithoum pawiteh nangmouh hanelah Jisuh Khrih hmalah ka ngai thoum e doeh. <sup>11</sup> Hoehpawiteh Setan ni na tâ langvaih tie ngaihrinae ao. Maimouh teh ahnie a kâcainae naw hah panue awh.

### *Masidonia lah a ceinae*



<sup>12</sup> Kai teh Khrih kamthang kahawi pâpho hanelah Troas khovah Bawipa ni takhang na paawng pouh eiteh, <sup>13</sup> ka nawnggha Titu ka hmu hoeh dawkh ka lung nawm hoeh, ahnimanaw kut kaman hnukkhu, Masidonia ram lah ka ceitakhai.

### *Due hoi hring rahak thaw tawknæ*

<sup>14</sup> Maimanaw teh Khrih thung tânae paw pou to thai nahanelah, hote Bawipa panuena hmuithui hah maimouh lahoi kho tangkuem koe, kâkahei thai nahanelah ka sak pouh e Cathut lungmanæ teh pholennæ awm naseh. <sup>15</sup> A lamthung teh maimouh teh rungngang lahun e naw hoi kahmat e naw koe Cathut hmalah Khrih e hmuithui lah o awh. <sup>16</sup> Kahmatnaw hanlah duenæ koe a ka phat sak e duenæ hmuithui lah ao teh rungngang lah kaawmnaw hanelah teh hringnæ hmuithui lah ao. Hat boipawiteh hetnaw heh api hoi maw a kamcu. <sup>17</sup> Cathut e lawk pakhuppathan e taminaw patetlah maimouh ni dei hoeh niteh, Cathut ngainæ patetlah lungthin kathoung hoi Cathut hmaitung vah Khrih thung pâpho awh.

## 3

### *Hringnæ na kacoesakkung canaw*

<sup>1</sup> Hottelah dei awh navah, mahoima kâphokâlennæ lah maw o awh han. Hettelah nahoe pawiteh, maimouh ni alouknaw patetlah ayâ ni lungkuepkhai e, nahoe pawiteh, nangmouh ni lungkuepkhai e ca hah a panki maw. <sup>2</sup> Nangmouh teh kaimæ lungthung thut lah kaawm e, tamipueng ni a touk awh teh a panue awh e, kaimæ ca lah na o awh. <sup>3</sup> Nangmouh teh kaimouh ni thut lah kaawm e Khrih e ca lah na o awh tie hah a kamnu. Hote ca teh cahang hoi thut e nahoe, kahring e Cathut e Muitha lahoi thut lah ao teh, lungphen dawkh laipalah, tami e lungthin dawkvah thut e lah ao.

### *Pawl e thouthainæ*

<sup>4</sup> Maimouh ni Cathut hmalah Khrih kecu dawkh hoi hot patetlah e yuennæ teh tawn awh. <sup>5</sup> Hatnavah, maimouh teh mae bahu lahoi ma ngainæ patetlah hno buetbuet touh pouk teh sak thai e nahoe. Cathut kâuep laihoi sak thai e doeh. <sup>6</sup> Cathut ni maimouh hanlah lawkkam katha e thaw tawkh sak thai nahanlah thaonæ na poe. Hote lawkkam katha teh thut e kâlawk nahoe, Muitha hah doeh. Thut e kâlawk ni teh duenæ a tâcokhai. Hatei, Muitha ni teh hringnæ a thokhai.

### *Lawkkam katha thaw tawknæ*

<sup>7</sup> Lungphen dawkh thut e duenæ hoi kâkuen e kâlawk patenghai yah, bawilennæ hoi a tho teh, Mosi e minhmai dawkh hoi ka tâcawt e kahmatthaie bawilennæ dawkvah Isarelnaw ni ahnie minhmai hah khen thai awh hoeh pawiteh, <sup>8</sup> Muitha thawtawknæ teh banghloine bawilennæ hoi hoe a kawi han. <sup>9</sup> Hatdawkvah, yonphukhangnæ dawkh patenghai bawilennæ awm pawiteh, lannæ thaw dawkh hane natawng teh banghloimaw hoe bawilennæ ao han. <sup>10</sup> Atanglah, yampa kaawm e bawilennæ hah atu e bawilennæ ni bang hoeh lah a coung sak. <sup>11</sup> Dongdeng hane dawkh patenghai bawilennæ awm pawiteh, a yungyoe han dawkh natawng teh hoe ao han.

<sup>12</sup> Maimouh teh hete ngaihawinæ ao dawkvah, taranhawinæ hoi tawkh awh. <sup>13</sup> Mosi ni angnæ a roum hnukkhu, Isarelnaw ni ka minhmai khen langvaihi ati teh lukkarei hoi a minhmai a ramuk e patetlah maimouh teh awm awh hoeh. <sup>14</sup> Ahnimæ a lungthin teh puenghoi a pata dawkvah



sahnin totouh lawkkam karuem touk awh navah, hote lukkarei teh pou a ramuk lah ao awh. Bangkongtetpawiteh, Khrih lahoi dueng doeh hote lukkarei teh takhoe thai. <sup>15</sup> Sahnin totouh Mosi e Cakathoung a touk awh navah ahnima lungthin teh hote minhmai huemnae lukkarei ni a ramuk pouh rah. <sup>16</sup> Hateiteh, Bawipa koe lah a kamlang awh toteh, hote minhmai ramuknae lukkarei teh takhoe lah ao han. <sup>17</sup> Bawipa ti navah Muitha doeh deingai nah. Bawipa e muitha aonae koe hloutnae ao. <sup>18</sup> Maimouh pueng ni minhmai ramuknae hawng a vaiteh, hlalang kâkhet e patetlah Bawipa e bawilennaeh heh khet awh vaiteh, Muitha lawkkam e Bawipa ni raeng a patoun e patetlah a bawilennaeh dawk meilam kâthungnae teh coe awh.

## 4

### *Yuemnae lahoi hringnae*

<sup>1</sup> Hatdawkvah, maimouh teh a pahrennae coe e lahoi thaw tawh e lah o awh dawkvah, ka lungpout a hoe. <sup>2</sup> Maimouh ni arulaho kaya ka tho e hnosakenaw pahnawt awh. Huenghai awm awh hoe. Cathut lawk hai tami dum nahanlah pâpho a hoe. Lawkkatang doeh kacairoecalah pâpho awh. Hottelah hoi Cathut hmalah, taminaw e thoe hawi panuenae lungthin dawk mamouh hoi mamouh kamnue sak awh. <sup>3</sup> Maimouh ni pâpho e kamthang kahawi heh, ramuk lah awm pawiteh, rawknae dawk kaawm lahun e naw koe doeh ramuk lah awm tih. <sup>4</sup> Ahnimouh hoi ka kâkuen lah dei han tetpawiteh, Cathut e meilam lah kaawm e Khrih e bawilennaeh hoi kahawi e kamthang kahawi angnae hah, a hmu thai awh hoe hoi nahanlah het talai ka uk e cathut ni kayuemhoe hnaw a lungmit a dawn sak pouh. <sup>5</sup> Bangkongtetpawiteh, maimouh ni mamae kong pâpho a hoe. Khrih teh Bawi lah ao tie pâpho awh. Kaimouh roeroe heh Khrih hanlah, nangmae san lah ka o awh. <sup>6</sup> Hmonae thungvah, angnae awmseh telah kâ ka poe e Cathut ni Jisuh Khrih minhmai ka ang e Cathut bawilennaeh hah, panue thai nahane raeng poe hanelah, maimae lungthin dawk a ang sak toe.

### *Talai hlaam thung hro e hno*

<sup>7</sup> Hateiteh, a thaonae hno sakthainae teh, maimae nahoe. Cathut amae lah ao dawkvah, a bahu a kamnue sak. Hote hno teh talai hlaam thung a ta teh maimouh dawk ao. <sup>8</sup> Maimanaw teh avoivang lahoi na ka tarawh nakunghai, thayoun awh hoe. Kângairunae lah kaawm nakunghai, lungpout awh hoe. <sup>9</sup> Rektapnae kâhmo nakunghai, hnoun e lah awm awh hoe. Rahim lah pabonae kâhmo nakunghai, poutnae koe phat awh hoe. <sup>10</sup> Bawipa Jisuh Khrih teh a hring tie heh, maimae tak dawkvah a kamnue sak hanelah, Khrih e duenae teh pout laipalah maimae tak dawk sin awh. <sup>11</sup> Bangkongtetpawiteh, Khrih hringnae teh, maimae tak dawk kamnue thai nahanelah, Jisuh kecu dawk maimouh kahring e naw heh duenae kut dawk pout laipalah, poe e lah o awh. <sup>12</sup> Hatdawkvah, duenae ni maimouh dawk thaw a tawh teh, hringnae ni nangmouh dawk thaw a tawh.

<sup>13</sup> Ka yuem dawkvah, ka pâpho telah thut e patetlah yuemnae hoi ka kâkuen e Muitha hah maimouh ni tawn awh teh, maimouh hai yuem dawkvah pâpho awh. <sup>14</sup> Bangkongtetpawiteh, Jisuh ka thaw sak e Cathut ni maimouh hai Jisuh hoi rei na thaw sak teh, nangmouh hoi cungtalalah a hmalah na thokhai han tie panue awh. <sup>15</sup> Hno cawngca pueng teh, nangmouh hane doeh. Hethateh, ahnimanaw koe, lungmanae hoe a pung



teh Cathut e bawilennae kamnuesak nahanelah lunghawilawkdinae teh hoe a kuep.

<sup>16</sup> Hatdawkvah, kaimouh teh lungpout awh hoe. Kaimae a lawi lae tami teh, ka kumcathuk nakunghai, thung lae tami teh hnin touh hnukkhu hnin touh sak katha e lah pou ao. <sup>17</sup> Bangkongtetpawiteh, maimouh ni dongdeng rucatnae khangnae naw ni maimouh hanlah a yungyoe bawilennae lah ao sak. <sup>18</sup> Hatdawkvah, maimouh teh hmu thai e hno khen awh hoe. Hmu thai hoe e hnonaw doeh khet awh. Bangkongtetpawiteh hmuthai e hnonaw teh dongdeng ca hanelah ao teh, hmuthaihoe hnonaw teh a yungyoe a kangning.

## 5

### *Due hnukkhu kâmo hane*

<sup>1</sup> Rim lah kaawm e maimae talai im a ro torei teh, kalvannaw dawk tami kut hoi sak hoe e, Cathut ni a sak e yungyoe im ao tie hah panue awh.

<sup>2</sup> Maimanaw ni talai im dawk o awh nateh, kalvan im dawk pha hanlah cingou awh. <sup>3</sup> Hote hmuen koe pha awh toteh, hmuen tawn laipalah awm a mahoe. <sup>4</sup> Het talai rim dawk o awh navah, hnokari phu hoi cingou awh. Hottelah cingounae teh, hote rim hah ceitakhai han ngai dawk nahoe. Kadout thai e tak heh hringnae koe pha hane hoi kangning e dawk kâen hane ngai dawk doeh. <sup>5</sup> Hettelah, na ka rakueng pouh e Bawi teh Kathoung Muitha hah lawkawm lah na ka poe e Cathut doeh.

<sup>6</sup> Hatdawkvah, maimouh teh pout laipalah yuemnae tawn awh. Hete tak dawk o awh lahun nah Bawipa hoi kâhla awh tie panue awh.

<sup>7</sup> Bangkongtetpawiteh, maimouh teh mithmu e hno tho laipalah, yuemnae lahoi doeh hring awh. <sup>8</sup> Maimouh teh yuem awh toung dawkvah, tak hoi kampek vaiteh Bawipa hoi rei o hanlah hoe ngai awh. <sup>9</sup> Hatdawkvah maimouh teh takthai dawk o awh nakunghai, kâhla awh nakunghai, Bawipa ni a ngai e tami lah o awh nahanlah panki awh. <sup>10</sup> Bangkongtetpawiteh, tak dawk thoe hoi sak e pueng hmu awh nahanelah, maimouh pueng teh Khrih e lawkcengnae tungkhung hma lah koug kamnue awh han.

<sup>11</sup> Hatdawkvah, Cathut takinae teh panue awh dawkvah taminaw hah pâhlawp awh. Maimae kong teh Cathut hmalah a kamnue toung dawkvah, nangmae lungthin haiyah a kamnue toe telah ka ngaihawi. <sup>12</sup> Kaimouh teh kamamouh hoi kamamouh hmalah kâoup awh e nahoe. Hatei, lungthin khen laipalah, alawilae meilam dueng khet hoi kâoup e taminaw e lawk hah nangmouh ni bout na pathung awh thai nahanlah kaimouh hoi kâkuen lah kâoupnae hmu awh nahanlah doeh nangmouh na poe awh.

<sup>13</sup> Bangkongtetpawiteh tamipathu lah ka onae teh Cathut hane doeh. Tami lungkaang lah kaawm awh pawiteh nangmouh hane doeh. <sup>14</sup> Bangkongtetpawiteh, Khrih e a lungpatawnae ni maimouh teh muen na kayo awh. Tami buet touh ni tami pueng hanelah dout pawiteh tami pueng hai a due a van toe. <sup>15</sup> Hottelah tami pueng hane Bawipa ni a duenae teh, kahring e naw ni ma hanelah hring toung laipalah, ahnimouh hanelah kadout ni teh bout ka thaw e Bawipa hanelah a hring awh nahane doeh.

### *Bout kâmaihawinae*

<sup>16</sup> Hatdawkvah atu hoi teh, apihai takthai koe lahoi panuek awh hoe toe. Maimouh ni Khrih hah takthai koe lahoi hmaloe panue awh nakunghai atuvah hottelah panuenae awmhoe toe. <sup>17</sup> Hatdawkvah apipatet hai Khrih thung awm pawiteh sak katha e lah ao. Hno karuem



pueng a kahma teh hnocawngca pueng teh a katha toe. <sup>18</sup> Hetnaw pueng teh Cathut koehoi e doeh. Cathut ni Jisuh Khrih lahoi maimanaw teh ama hoi bout na kâmaihawinae sak awh toe. Hote bout kâmaihawinae thaw hah maimouh koe na poe awh. <sup>19</sup> Hote kamthang teh Cathut ni Khrih thung ao teh, talaivan e yon hah pâkuem pouh hoeh toe. Taran a roum sak teh, ama hoi bout na kâmaihawinae sak toe. Hote bout kâmaihawinae hah maimouh koe na poe awh. <sup>20</sup> Hatdawkvah, maimouh teh Khrih e laicei lah o awh. Cathut hoi bout kâmaihawi awh leih titeh Khrih yueng lah kaimouh ni na hroecoe awh. <sup>21</sup> Bangkongtetpawiteh, Cathut ni yon ka tawn hoeh e hah maimouh hane kecu dawk yon ka tawn e lah ao sak. Hot hateh, maimouh pueng ni Khrih lahoi Cathut e lannae koe pha thai nahane doeh.

## 6

<sup>1</sup> Kaimouh teh Cathut hoi thaw ka tawk e lah ka o a awh dawkvah, Cathut e lungpatawnae aphu kaawm hoeh lah na o sak awh hoeh nahanlah na thaisak awh. <sup>2</sup> Bangkongtetpawiteh, kai ka ngainae tueng dawkvah, na lawk na thai pouh toe. Rungngangnae hnin nah na kabawp teh na rungngang toe telah Bawipa ni ati. Khenhaw! atu doeh ngai kaawm e tueng toe. Atu raw doeh rungngangnae hnin toe.

### *Pawl thaw tawknae koe kâhmo e*

<sup>3</sup> Kaimouh ni a thaw tawknae koe ayâ ni a toun hoeh nahan, ayânaw koe tarawknae ka sak awh hoeh. <sup>4</sup> Rektapnae, roedengnae, hlout thai hoeh e runae hoi kâhmonae, <sup>5</sup> hemnae, thongim bonae, ruengruengtinae, yonpennae, ihmuhnaphlanae, kahaionae, <sup>6</sup> lungthoungnae, lungangnae, lungasawnae, hawinae, Kathoung Muitha coenae, kâsak laipalah atangcalah lungpatawnae, <sup>7</sup> Lawkkatang pâphonae, Cathut e bahu kamnue saknae, lannae puengcang avoilah aranglah kâmahrawknae, <sup>8</sup> barinae hoi barihoehnae, oupnae hoi pathoenae, dumyen e patetlah kaawm ei nakunghai hmantang e tami, <sup>9</sup> Apinihai panue hoeh e patetlah kaawm ei nakunghai min kamthang e tami, thei e patetlah kaawm ei nakunghai kahring e tami, yue e patetlah kaawm ei nakunghai theinae hoi kahlout e tami, <sup>10</sup> a lung ka mathout e patetlah kaawm nakunghai a lung pou kahawi e tami, ka roedeng e patetlah kaawm ei nakunghai tami moikapap ka bawi sak e tami, bangcahai ka tawn hoeh e patetlah kaawm ei nakunghai a cawngca ka tawn e tami lah ka o dawkvah, Cathut ni na ta e a thaw katawkkung katang lah ka o tie hah bangpueng dawk kancengcalah kamnue sak awh.

<sup>11</sup> Kawrin kho kaawm e hmaunawngghanaw kaimae pahni teh nangmouh hanlah a kamawng toe. Kaimae lungthin hai sut a kamawng toe. <sup>12</sup> Kaimouh dawk na khawk awh hoeh. Nangmae lung dawk doeh na khawk awh. <sup>13</sup> Hatdawkvah na pathungnae lahoi nangmae lungthin ka kaw lah paawng awh, telah ka canaw koe lawk ka dei pouh e patetlah na dei pouh.

### *Kânging hoeh e Yawcu*

<sup>14</sup> Kayuemhoehnaew hoi cungtalalah kânging hoeh e yawcu hrawm awh hanh. Lannae hoi kamsoumhoehe hah bangtelamaw a hmawng thai han vaw. Angnae teh hmonae hoi bangtelamaw reirei ao thai han vaw. <sup>15</sup> Khrih hoi Belial teh bangtelamaw lungkânging thai han vaw. Kayuem hoi ka yuem hoeh ni bangmaw cungtalalah a coe han vaw. <sup>16</sup> Cathut bawkim hoi meikaphawknaw teh bangtelamaw khuet a kâkuet han vaw. Cathut ni a



dei e teh ahnimouh koe ka o han. Ahnimae Cathut lah ka o han. Ahnimouh hai kaie tami lah ao a han ati e patetlah nangmouh teh kahring Cathut e bawkim lah na o awh. <sup>17</sup> Hatdawkvah ahnimouh thung hoi tâcawt awh nateh, aloukcalah awm awh, telah Cathut ni ati. Ka khin e hnônaw hah na kut hoi boehai tek awh hanh. Hottelah na tetpawiteh nangmouh kai ni na dâw awh han. <sup>18</sup> Kai teh nangmae Pa lah ka o vaiteh, nangmouh hai Kaie canu capa lah na o awh han telah Athakasaipoung e Bawipa ni ati.

## 7

<sup>1</sup> Ka pahren e naw, maimouh koe het patetlah lawkkamnae ao dawkvah, takthai hoi lungthin dawk khinnae pueng teh mahoima kâcai sak vaiteh, Cathut taki laihoi thoungnae hoi kawi a sei.

### *Kayuemnaw koe Pawl a lunghawinae*

<sup>2</sup> Kaimanaw na dâw a loe. Kaimouh ni api koehai ka payon awh hoe. Apipatethai ka rawk sak awh hoe. Api koehai huenghai hoi ka cat awh hoe. <sup>3</sup> Nangmanaw yon na pen ngai daw hettelah ka dei e nahoe. Bangkongtetpawiteh ka dei tangcoung patetlah nangmouh hoi rei hring hane hoi due hanelah ngainae totouh kaimouh ni nangmouh lung na pataw awh. <sup>4</sup> Kai ni nangmanaw hah na yuem awh dawkvah nangmouh kecu dawka kâoup. Kai teh lungpahawinae ka coe dawkvah kaimouh ni ka khangnae rucatnae pueng dawka lunghawinae hoi ka kawi.

<sup>5</sup> Masidonia ram ka pha navah kâhat nahan tueng kahmawt laipalah alawilah kâtuknae, a thung lah takinae ao teh a voivang hoi rektapnae ka khang awh. <sup>6</sup> Hatei, a thakayounnaw lung ka pahawikung, Cathut ni Titu a tho e lahoi kaimanaw lung na pahawi awh. <sup>7</sup> Titu a tho e dawka hoi dueng lungpahawi e nahoe. Titu ni nangmouh koehoi a coe e lungpahawinae lahoi lung na pahawi awh. Alouke lahoi dei pawiteh, nangmouh ni na rabui awh e, na lungmathoe awh e, hoi kai koe pahrennae na tawn awh e naw hah Titu ni na dei pouh dawkvah ka ko a nawm.

<sup>8</sup> Ka thut e ca ni nangmouh, lungmathoenae na kapoekung lah kaawm nakunghai thoseh ka lung mathout hoe. Hote ca teh, nangmouh koe dongdeng lung ka mathout sak nakunghai atuteh lunghawinae bout ka tawn toe. <sup>9</sup> Kai ni na patawn e ca ni nangmouh lung na mathoe sak eiteh lunghawihoeahnae ka tawn hoe. Hote ca ni nangmouh dongdeng lung na mathoe sak awh e hah ka hmu navah ka lunghawi hoe. Hatei nakunghai, atu ka lung ahawi. Hottelah ka ti navah nangmouh na lungmathoe sak dawkvah ka lunghawi e nahoe. Nangmae lungmathoenae ni nangmouh pan na ka ngai sak dawka doeh. Atangcalah nangmouh teh Cathut ngainae patetlah na lungmathoe awh dawkvah, kaimouh kecu dawka bangcahai na sung awh hoe. <sup>10</sup> Bangkongtetpawiteh, Cathutlai lahoi khang e lungmathoenae ni teh rawkphai koe lah awm sak laipalah rungngangnae hmu nahan koe lah pan na kângainae lah doeh ao. Talaiwan lungmathoenae teh duenae ka tâcawtkhai e lah ao.

<sup>11</sup> Khenhaw! Cathutlai lahoi lungmathoenae ni nangmouh thungvah hoe tawkae, caisaknae, khang thaihoeahnae, takinae dounnae, lungthawgnae a tâcokhai. Hahoi, kamsoum lah lawkcengnae kong naw dawka hoi yon thoung nahanelah hno puengpa dawka na hringnae kamnue sak awh toe. <sup>12</sup> Hottelah, kai ni nangmouh koe ka thut e ca teh yonnae ka sak e tami hanelah nahoe, yon ka khang e hai nahoe, maimae lathueng nangmae lung thahmeinae naw hah Cathut hmalah namamouh ni roeroe na hmu hanelah doeh ka thut. <sup>13</sup> Hatdawkvah maimouh teh lungpahawinae coe



awh. Maimae lungpahawinae coe e Titu e a lungthin teh nangmouh abuemlah kecu dawkhunghawi hmu e lah ao teh ahnie lunghawinae dawkh hoi maimouh teh puenghoi konawm awh. <sup>14</sup> Kai ni nangmae kong hah Titu koevah kâoupkhai e yeirai awmhoeh. Bangkongtetpawiteh nangmouh koe kaimouh ni ka dei awh e naw pueng teh, lawkkatang lah ao dawkvah, Titu kâoupkhai e naw hai atang e lah a onae a kamnue toe. <sup>15</sup> Titu ni nangmae lawk a ngâi teh nangmouh ni takinae hoi na dawn awh e heh pouk navah nangmanaw hah lung hoe na pataw awh. <sup>16</sup> Kai ni bangpueng dawkh nangmanaw na tang awh dawkvah ka konawm.

## 8

### *Pasoumhno kuep sak nahanlah hroecoena*

<sup>1</sup> Hmaunawngnanaw, Masidonia ram e Kawhmounnaw koe Cathut ni a poe e lungmanae hah nangmouh koe dei hanelah ka ngai. <sup>2</sup> Ahnimouh teh roedengnae hoi puenghoi tanouknae a khang awh ei, ahnimae lunghawinae hoi roedengnae pueng teh, ahnimae pasounggamnae dawkbawinae lah a coung sak. <sup>3</sup> Kai ni kampangkhai e teh, ahnimouh ni amamae a coung thai awh e hlak acawilah a poe awh teh, <sup>4</sup> tami kathoung kawkhik e lahoi coe hane yawhawinae hah ka coe awh van nahan, poehno hah na dâw pouh awh loe titeh na kâ awh. <sup>5</sup> Ahnimouh teh kaimouh ni ka ngaihaw e hloilah, Cathut ngainae patetlah Bawipa koe amamouh hoi amamouh hmaloe a ka poe, a hnukkhu kaimouh koehai a ka poe awh. <sup>6</sup> Hatdawkvah, Titu ni hote lungmanae hah nangmouh koe a kamtawng e patetlah a pout totouh a sak nahanlah kaimouh ni ahni hah ka hroecoe awh. <sup>7</sup> Nangmouh teh yuemmae dawkh hai thoseh, pâphonae dawkh hai thoseh, lungangnae dawkh hai thoseh, lungtangnae dawkh hai thoseh, kaimouh koe na tawn awh e nangmae lungpatawnae hai thoseh, bangpueng dawkh na kuepcing awh e patetlah hnokahawi saknae dawkh haiyah na kawi awh naseh.

<sup>8</sup> Hottelah khet navah, kâpoelawkh lah ka dei e nahoe. Ayânaw e lungthonae hoiyah nangmae lungpatawnae ka tanouknae doeh. <sup>9</sup> Bangkongtetpawiteh nangmouh teh, maimae Bawipa Jisuh Khrih e lungmanae heh panue awh. Bawipa teh a bawi ei ahnie roedeng e lahoi nangmouh na bawi awh nahanelah, nangmouh han roedengnae a khang.

<sup>10</sup> Hete kahawi hno sak e hoi kâkuen lah, pouknae kahawi na poe han. Hete pouknae teh kaloum tangcoung e kum dawkh hoi hete hno kamtawng awh e lahoi tawkh hanelah lungthonae ka tawn e nangmouh hanlah aphu ao. <sup>11</sup> Nangmouh ni lungthonae hmaloe na tawn awh e patetlah atu hoi namamouh na coung thai awh e patetlah tawksak a nateh hete thaw hah abaw totouh tawkh awh. <sup>12</sup> Bangkongtetpawiteh, lungthonae awm pawiteh, kaawm hoeh e hno khien laipalah, kaawm hno dawkh hoi ngai hane kawi lah ao. <sup>13</sup> Hete a kong dawkh hoi alouknaw bet ahawi sak vaiteh nangmouh runae poe hane na hoeh. Reikâvan lah sak hane doeh. <sup>14</sup> Atu tueng dawkh nangmae tawwnae hah ahnimae pankinae koe na poe awh pawiteh ahnimae tawwnae hoi nangmae pankinae koe thap e lah kaawm van han. <sup>15</sup> Hatnavah, kapap lah ka hmawt e haiyah cawi hoeh. Kayoun lah ka hmawt e hai vout hoeh telah Cakathoung dawkh thut e patetlah sue kâvan lah ao han.

### *Pasoumhno hnonae*



<sup>16</sup> Nangmae lathueng kaie lungthonae teh Titu lungthin dawk kaawm sak e Cathut teh ka pholen. <sup>17</sup> Titu teh kaimae thapoena lawk a ngai hloilah ama lungthonae hoe a tawn dawkvah nangmouh koe ka tho e lah ao. <sup>18</sup> Titu hoi hmaunawngaha buet touh teh kaimouh ni ka patoun awh. Ahni ni kahawi e kamthang a hramkhai navah kawhmounnaw pueng koehoi pholen e tami lah ao hloi lah, <sup>19</sup> Cathut amae bawilenna hoi kaimae lungthonae hah kamnue sak thai nahanlah thoseh, kaimouh hoi thaw ka tawk e hete poehnonaw hah, kaimouh hoi cungtalah cei sak hanelah, Kawhmounnaw ni na rawi awh teh coungkacoe lah ka o awh. <sup>20</sup> Kaimouh ni hote poehno moikapap dawk, tounnae awm laipalah, ayânaw koehoi pathoena ao hoeh nahanlah ka kâhruetcueth awh. <sup>21</sup> Bangkongtetpawiteh, kaimouh teh, Bawipa e hmalah dueng tho laipalah, talai taminaw e hmalah hai bari kaawm e dueng doeh ka tawk awh. <sup>22</sup> Ahnimouh hoi cungtalah, kaimae alouke hmaunawngaha buet touh ka patoun awh. Kaimouh ni ahni teh atuhoitu noumcai hnukkhu hno puengpa dawk a lungthahmei e tami lah a onae hah ka hmu awh. Ahni teh, nangmae lathueng yuemkamcu lah ao dawkvah, atu hai hoe lungtho e lah ao. <sup>23</sup> Titu hoi kâkuen lah dei pawiteh ahni heh kaie ka hui lah ao teh nangmouh hanelah kai hoi cungtalah thaw ka tawk e lah ao. Maimae hui, hmaunawngahanaw hoi kâkuen lah dei pawiteh ahnimouh teh kawhmoun e patounenaw, Khrih bawilenna lah kaawm e lah na o awh. <sup>24</sup> Hatdawkvah nangmae pahren lungmanae hoi nangmae kong dawk kaimouh ni kâoupkhai hane kongnaw hah kawhmounnaw e hmalah hoi ahnimouh koe kamnuek sak awh.

## 9

### *Pasoung hanlah hroecoena*

<sup>1</sup> Tami kathoungnaw kawkhiknae hoi kâkuen lah, kai ni nangmouh ca na patawn awh hanelah ngai hoeh toe. <sup>2</sup> Bangkongtetpawiteh, nangmae lungthonae teh ka panue. Hote lungthonae dawkvah Masidonia ram kaawm e hoi Akhaia ram e naw koe coungkacoe a ta toe tie nangmae kong hah kâoupkhai awh. Hatdawkvah nangmae na lungthin thahmeinae ni na tahrue awh. <sup>3</sup> Hatdawkvah hete kong hoi kâkuen lah, nangmouh koe kai ni kâoupkhai e teh, ayawmlah awm laipalah kai ni ka dei e patetlah nangmanaw coungkacoe na kâhruetcueth awh nahanlah hmaunawngahanaw hah ka patoun. <sup>4</sup> Telah nahoe pawiteh, Masidonia taminaw nangmouh koe ka thokhai navah, nangmouh ni banghai na hrueng awh hoehpawiteh, kaimouh ni yo ka kâoupkhai awh tangcoung e hah kaya ka tho han doeh. <sup>5</sup> Hatdawkvah, nangmouh ni na poe awh e poehno hah nganggang cawng e patetlah tho laipalah, lungthocalah hoi poe e hno lah coungkacoe ao nahan, hmaunawngahanaw ni nangmouh koe hmaloe a thao awh vaiteh, hote poehno hah hmaloe kuep sak hanelah, kai ni na hroecoe awh laipalah o kawi nahoe telah ka pouk.

### *Cati tunae*

<sup>6</sup> Cati younca ka tu e ni younca a a han, moikapap ka tu ni moikapap a a han tie hah panuek awh. <sup>7</sup> Tami pueng ni amahmawk pasoung naseh. Paawtnae lungthin hoi pasoung awh hanh. Poe laipalah awm mahoe tie lungthin hoi pasoung awh hanh. Lungthonae lahoi ka pasoung e dueng doeh Cathut ni a ngai. <sup>8</sup> Cakathoung ni a dei e patetlah ahni teh a pasoung toe. Karoedengnaw hai a poe toe. <sup>9</sup> Ahnie a lannae teh a yungyoe a cak,



het hateh, Ahni ni karoedengnaw hanelah poehno a pasoung toe. A lannae teh a yungyoe kangning ati e Cakathoung dawk a thut e patetlah lah doeh ao.

<sup>10</sup> Cati ka patûenaw teh a patûe e patetlah rawcarawnei kapoekung ni ahnimouh hane cati a poe vaiteh a pungdaw sak han. Nangmae na lannae haiyah a pungdaw sak vaiteh a paw a paw sak han. <sup>11</sup> Hottelah nangmouh teh lungthocalah hoi, a cawngca na pasoung awh nahanelah a cawngca dawk na tawnta awh dawkvah, maimouh dawk hoi Cathut e lungmanae teh lunghawilawk dei hanelah ao. <sup>12</sup> Bangkongtetpawiteh, tami kathoungnaw kabawpnae ni ahnimouh hanlah yawhawinae lah ao hloilah Cathut koe lunghawilawkdeinae a pungdaw sak. <sup>13</sup> Nangmouh teh Khrih kamthang kahawi na hringkhai awh e thoseh, tami kathoungnaw hoi alouke taminaw pueng hai barilawanae na poe awh e thoseh, ahnimouh ni a pouk awh toteh hete khetyawtnae khetsin lahoi Cathut a pholen awh han. <sup>14</sup> Hothloilah nangmouh lathueng ka phat e Cathut e ka talue e lungmanae kecu dawk ahnimouh ni na rabui awh vaiteh na ratoum pouh awh han. <sup>15</sup> Deilekhoeh e poehno kecu dawkvah Cathut teh pholen lah awm lawiseh.

## 10

### *Guncei Pawl kâtawnnae*

<sup>1</sup> Nangmouh hoi rei o nateh banghai na dei ngam awh hoeh, ahlanae koehoi taran kahawi na ti awh e kai Pawl ni Khrih e lungdo lungnemnae lahoi na thaisak awh. <sup>2</sup> Nangmouh koe ka pha awh navah, talai ngainae patetlah o hoeh nahan na kâ awh. Bangkongtetpawiteh, talai ngainae patetlah ao ati e a kamnue hoeh nahan lah. <sup>3</sup> Kaimouh ni kâtuk nah ka hno e puengcang teh talai tak ngainae dawk hoi ka tuk e lah tho hoeh. <sup>4</sup> Kaimouh ni kâtuknae koe ka hno awh e senehmaica teh takthai na hoeh. Cathut e thaonae dawk hoi kho rapanimnaw ka raphoe thai e senehmaica doeh. <sup>5</sup> Hote senehmaica hoiyah taminaw e pouknae, Cathut panuena kangangkung kâoupnae pueng a raphoe teh, a cawngca e lungpouknae pueng hah a man a katek teh, Khrih lawk a ngâi sak awh. <sup>6</sup> Nangmouh ni lawk na ngâi awh toteh, lawk ka ngâi hoeh e naw pueng teh hmantang vah lawkceng hanelah coungkacoe lah ka o.

<sup>7</sup> Nangmouh ni hnopai pueng a vanlong doeh na khet awh. Apinihai mahoima Khrih dawk ka o tie na yuem pawiteh ahni ni Khrih dawk ao e patetlah ahnimouh ni Khrih dawk onae hah bout pouk hanlah a ngâi. <sup>8</sup> Bangkongtetpawiteh, nangmanaw hah raphoe hanelah tho laipalah rounng sak hanelah Bawipa ni na poe e kâtawnnae a kong dawk, kâoup payon nakunghai kayak mahoe. <sup>9</sup> Kai ni nangmouh ca na patawn e teh pakhinae lah pouk sak hane na ngaikhai hoeh. <sup>10</sup> Bangkongtetpawiteh, Pawl e canaw teh ari teh bahu a tawn ei, ama kâhmo awh toteh a tha kayoun e hoi a pâpho e hai banghai bari hane kawi awmhoeh ka tet e tami na o awh. <sup>11</sup> Hottelah ka dei e naw ni lamhla hoi ka thut e ca hoi nangmouh koe ka o nah ka tawk ka sak hane heh banghai kâvaihoehnae awmhoeh tie hah panuek naseh.

<sup>12</sup> Bangkongtetpawiteh, kaimouh teh ahnimouh hoi ka bangnue ngam awh hoeh. Ahnimouh teh buet touh hoi buet touh a ka bangnue awh teh, ka pathu e lah ao awh. <sup>13</sup> Kaimouh teh kamamae coungnae hloilah ka pholen awh hoeh. Cathut ni na hmoun pouh e a thaw dawk dueng doeh kâoup awh. Hote thaw teh nangmouh koe totouh ka tawk awh.



<sup>14</sup> Nangmouh koe totouh phat hoehpawiteh, kaimouh ni ka tapuet lah ka sak awh hoeh. Bangkongtetpawiteh, Khrih kamthang dei laihoi nangmouh koe totouh ka pha awh toe. <sup>15</sup> Hatdawkvah Cathut ni na hmoun pouh e thaw hloilah tami alouknaw ni a tawh e thaw hah ka noe awh hoeh. Kaimouh ka ngaihaw e teh na yuemnae a rounng vaiteh Cathut ni na hmoun pouh e khori thungvah hoe ka kaw lah thaw tawh han tie hah doeh. <sup>16</sup> Nangmae ram hloilah kamthang kahawi ka dei hanelah ka ngaihaw awh. Ayânaw ni a tawh tangcoungae hmuén koe kaimouh ni ka kâoup awh hoeh. <sup>17</sup> Hatdawkvah kâoup han ka ngai e tami teh Cathut dawh kâoup naseh. <sup>18</sup> Bangkongtetpawiteh, yuemkamcu e tami teh amahoima kâtalue e tami nahoe, Cathut ni a lungkuép e tami hah doeh.

## 11

### *Guncei kaphawknaw*

<sup>1</sup> Kaie pathunae hah dongdeng na panguep awh nahanlah na ngaikhai awh. Dongdeng na panguep awh haw. <sup>2</sup> Cathutlae dipmasin e patetlah nangmouh hanelah ka dipma. Nangmouh teh kathounge tanglakacuem patetlah Khrih koe poe hanlah, hote buet touh dueng e vâ koe na ham sak toe. <sup>3</sup> Tahrûn ni amae huengo e laihoi Evi a dymen e patetlah Khrih lung na patawnae lungthin yout na kâhat awh langvaih tie ka tâsue. <sup>4</sup> Nangmanaw koe ka tho e taminaw ni kaimouh ni ka pâpho awh hoeh e alouke Jisuh kong a dei awh nakunghai thoseh, nangmouh ni na coe awh hoeh rae muitha a coe awh nakunghai thoseh, na thai boi awh hoeh rae kamthang na thai awh nakunghai thoseh, ahni hah panguep hanlah ao. <sup>5</sup> Kai teh kalenpounge gunceinaw hlak bet ka rahnoum hoeh mue ka ti. <sup>6</sup> Lawk deinae koelah kathoumhoeh nakunghai thouthainae koe lah ka rahnoum hoeh. Nangmouh koe bangpueng dawh kacaipinlah kamnue sak toe.

<sup>7</sup> Nangmouh ni na oup awh nahanlah ka ka rahnoum teh, Cathut e kamthang kahawi hah nangmouh koe ayawmlah pâpho e laihoi ka payonpakai e o maw. <sup>8</sup> Nangmae thaw ka tawh hanelah alouke kawhmounnaw koehoi kutphu hei laihoi nangmouh na lawp a maw. <sup>9</sup> Nangmouh hoi rei o teh buet buet touh ka panki nah apihai ka tarawh hoeh. Bangkongtetpawiteh, Masidonia ram laihoi ka tho e hmaunawngghanaw ni ka panki e naw na poe awh. Nangmouh tarawh laipalah doeh ka o. Hmalah haiyah poe ka kâhruetuet han. <sup>10</sup> Khrih e a lawkkatang kai thung ao e patetlah Akhaia ram dawkvah, hettelah kai ka kâoupkhai e heh apinihai cakâ thai hoeh. <sup>11</sup> Bangkongtetpawiteh, kai ni nangmouh lung na pataw hoeh dawh maw. Nangmouh kai ni lungpataw e hah Cathut ni a panue. <sup>12</sup> Kâoup han kangainaw ni a kâoup awh hoeh nahanelah, kâoupnaw ni hai kai patetlah hmantang a sak awh nahanelah, ka sak tangcounge e patetlah pou ka sak han rah.

<sup>13</sup> Bangkongtetpawiteh, ahnimanaw teh guncei kaphawknaw doeh. Khrih e guncei patetlah a kâsak awh teh, dymyennae thaw katawknaw lah ao awh. <sup>14</sup> Hethêh kângairukhai hane na hoe, Setan patenghai ka ang e kalvantami boiboe lah a kâsak. <sup>15</sup> Hat pawiteh, ahnimae sayanaw hai lannae kamthang ka pâpho e lah kâsak pawiteh, bangmouh dei han kaawm. Ahnimouh teh amamouh ni a tawh awh e patetlah a hnukteng e hnin navah a tawh e patetlah a khang awh han doeh.

*Khrih hanlah Pawl ni a khangnae*



<sup>16</sup> Kai ni bout ka dei e teh, apinihai tamipathu tet hanh naseh. Kai kâoupnae younca ao thai nahan, tamipathu patetlah na pouk awh nateh panguep awh. <sup>17</sup> Hettelah kai ni ka dei e lawk heh Bawipa ni a dei e patetlah ka dei e nahoeh. Ka pathu e patetlah taranhawi laihoi kâoup teh ka dei e doeh. <sup>18</sup> Tami pueng ni teh talai ngainae dawk kâoupkâpawi dawkvah kai haiyah kâoupkâpawi van e doeh. <sup>19</sup> Nangmouh teh na lungang awh dawkvah, tamipathunaw hah lunghawicalah na panguep thai awh. <sup>20</sup> Ayânaw ni nangmanaw pueng san lah na ta awh, na yo awh, hnopai na lawp awh, na yue awh, na tambei awh navah, na panguep awh.

<sup>21</sup> Kai teh hot patetlah ka tawk sak hoeh nahanlah ka tha a youn tanggak. Hatei tami buetbuet touh ni hno buetbuet touh dawk kâoupkhai pawiteh, kai hai kâoupkhai van han telah kapathunaw e patetlah ka dei. <sup>22</sup> Ahnimanaw teh Hebru tami namaw. Kai hai doeh. Isarel taminaw maw. Kai hai doeh. Abraham catounnaw maw. Kai hai doeh. <sup>23</sup> Khrih e a san maw, ahnimanaw hlak vah kai teh ka taluehnawn lah ka o telah ka pathu e patetlah hoi ka dei. Ahnimanaw hlak hoe ka panki teh, avai moikapap thongim na pabo awh, moikapap na hem awh, due han totouh khangnae atuhoitu ka kâhmo. <sup>24</sup> Judahnaw kut dawk hoi avai 40 vaitouh vout hemnae vai panga touh ka khang toe. <sup>25</sup> Ruitaboung hoi vai thum touh na hem awh. Talung hoi vai touh na dêi awh. Long vai thum touh a kamko teh tui van hnin touh hoi rum touh ka o. <sup>26</sup> Kahlong voutsout ka ceinae koe tuipui rakanae koehoi runae, dingcanaw koehoi runae, ka miphunnaw koehoi runae, Jentelnaw koehoi runae, kho thung kâhmo e runae, kahrawngum kâhmo e runae, tuipui dawk kâhmo e runae, hmaunawngaha lah ka kâsaknaw koehoi runae, het patetlah e runae naw ka ka hmo. <sup>27</sup> Thapatungnae hoi patangnae, atuhoitu ihmuhnapahlanae, kahaikahlam lah onae, pâding ni karuemnae, caicinae hai ka kâhmo. <sup>28</sup> Hote runae hloilah kawhmounnaw hanelah lungpuenna ni hai hnintangkuem na ratet. <sup>29</sup> Ayânaw a thayoun navah ka thayoun laipalah ka o thai han maw. Ayânaw a payonpakai navah ka lungpuen laipalah ka o thai han namaw.

<sup>30</sup> Kai ni kâoup pawiteh kama e ka thayounnae dawk ka kâoup han. <sup>31</sup> Kai teh laithoe ka dei hoeh tie teh Bawipa Jisuh Khrih e napa, a yungyoe yawhawinae katawnkung, Cathut ni a panue doeh. <sup>32</sup> Damaskas kho kaawm e siangpahrang Aretas kut rahim kaawm e khobawi ni kai na man sak hanlah a kâcai navah, longkha khoup a khan awh. <sup>33</sup> Khobawi e kut dawk hoi hlout thai nahanlah, a hnukkâbangnaw ni tapawm thung na ta awh teh kho thung hoi rapan alawilah na pabo awh teh, na yawng sak awh.

## 12

### *Lungmanae teh a khout*

<sup>1</sup> Kâoup e heh kai hanlah meknae awmhoeh. Hateiteh, Bawipa ni vision na patue e heh bout ka dei ei nei. <sup>2</sup> Hnuk lae kum hlaipali touh nah, Khrih thung kaawm e tami buet touh teh, kalvan dot thum e dawk tawm lah ao e hah ka panue. Hatnavah ahni dawk tak hoi maw, tak laipa maw tie teh ka panuek hoeh. <sup>3</sup> Cathut ni a panue. Ahni teh paradis totouh tawm lah ao teh, tami ni a dei kawi hoeh e lawk, a thaithai hoeh e lawk hah a thai e hah ka panue. <sup>4</sup> Hatnavah ahni dawk takthai hoi maw, a takthai hoi nahoehmaw tie teh ka panuek hoeh. Cathut ni a panue. <sup>5</sup> Hot



patet e tami hah ka kâoupkhai han. Hatei, kai dawk teh, ka thayounnae hloilah kâoupkhai hane awmhoeh. <sup>6</sup> Kai teh kâoup han ka ngai nakunghai, lawkkatang dueng dei hanlah ao dawkvah, ka pathu e nahoe. Hatei, apipatet ni hai kai na hmu e hlak, kaie kamthang a thai e hlak, kai dawk na pouk payon awh hoe nahanelah, kâoup laipalah ka o han.

<sup>7</sup> Kai ni ka hmu e vision teh a lentoe poung dawkvah, ka kâoup hoe nahanelah ka thung vah Setan e patoune lah kaawm e, ka tak dawk na ka ruk hanelah pâkHING hah na poe. <sup>8</sup> Hote reithainae dawk hoi kahlout nahanelah Bawipa koe vai thum touh ka ratoum. <sup>9</sup> Hatei, Bawipa ni kaie lungmanae teh nang hanelah a khout. Bangkongtetpawiteh, kaie thaonae teh thayounnae dawkvah ouk a kuep sak telah a dei. Hatdawkvah, Khrih e bahu teh kai dawkvah pou ao thai nahanelah, kai teh ka thayounnae dawkvah lunghaw laihoi hoe ka kâoupkhai han. <sup>10</sup> Hatdawkvah Khrih kecu dawk ka khang e katha ohoeahnae, dudamnae, rucatanae, ka pacekpahleknae, hoi het patet e khangnae hah ka ngai. Bangkongtetpawiteh, kai ka tha ayoun nah bahu hoi na kawi sak.

### *Guncei noutnae*

<sup>11</sup> Kai teh tamipathu lah ka o toe. Nangmouh ni kai teh khak katek e lah na o sak awh. Atanglah kai teh nangmouh ni na oup awh hanlah ao. Bangkongtetpawiteh, kai teh banglahai kaawm hoe nahakunghai gunceinaw hlak hoe ka rahnoum hoe. <sup>12</sup> Atangcalah kaie guncei lah ka onae mitnoutnaw teh, kângairunae hoi thaonae hah doeh. <sup>13</sup> Kai teh nangmouh hanelah hnokari lah ka o hoe e hloilah, nangmouh koe alouke kawhmounnaw hlak hoe rahnoum nahane bangcahai ao maw. Hot patet e dawk teh na ngaitoum awh loe.

### *Kawrinaw Pawl ni tuehmuena*

<sup>14</sup> Atu nangmouh koe, avai pâthumnae tho hane coungkacoe ka o. Hatei, nangmouh tarawk hanelah pouknae awmhoeh. Nangmae hnopai ka ngai e nahoe. Namamouh doeh na ngai awh. Canaw ni manu na pa hanlah hnopai pâkhueng e na hoe. Manu na pa ni doeh canaw hanlah pâkhueng e lah ao. <sup>15</sup> Kai ni nangmae lungthin muitha hanlah lunghawicalah hoi kama e hno hah ka hno teh kama e tak hai abuemlah ka hno han. Namamouh dawk kai ni lungpatawnae kampung pawiteh, nangmouh ni kai dawk lungpatawnae a kamyawt han maw. <sup>16</sup> Kai teh nangmouh hanlah hnokari lah kaawm ei nakunghai, arulaho nangmouh koehoi a dâw toe na tet awh pawiteh, <sup>17</sup> arulaho nangmouh koe tami ka patoun e naw koehoi nangmae hno hah ouk ka la boimaw. <sup>18</sup> Kai ni Titu hah nangmouh koe a tho hanelah ka hroecoe nah, ahni hoi cungtalah alouke hmaunawngah buet touh ka patoun. Titu ni nangmouh koe dymyenna lahoi nangmae hno a la maw. Kaimouh teh lungkânging lahoi thaw ka tawk awh hoe maw. Lam buet touh dawk ka dawn awh hoe maw.

<sup>19</sup> Kaimanaw ni nangmouh hmalah mahoima yon hlout nahanlah lawk a dei awh telah na pouk awh na maw. Kaimouh teh Khrih thung hoi Cathut hmalah doeh lawk ka dei awh. Pahren e ka huikonaw, ka tawk e hnonaw heh nangmouh rounghahane doeh. <sup>20</sup> Ka tho torei teh, nangmouh heh kai ni hmungaihoehenaw, kai hai nangmouh ni na hmungaihoehe lah o han tie hoi, nangmouh dawk kâyuenae, kâtânae, lungkhueknae, kâounnae, kaya saknae, tamcuk lawk deinae, kâoup kâpawinae, buet touh hoi buet touh kâtoenae lah o han tie hoi, <sup>21</sup> yampa vah yon awh teh kamhnawngnae, kamsoumhoehe napui tongpa yonnae, hounlounnae sakpayon teh, sahnin ditouh pankângai hoe naw kecu dawk cingou awh



teh, nangmouh hmalah Cathut ni kai hah na ka rahnoum sak han tie hah tâsuenae ao.

## 13

### *Hnukteng kâhruetcuetha poenae*

<sup>1</sup> Atu apâthum lah nangmouh koe ka tho han. Cakathoung ni a dei e patetlah, yon kâhnei navah, kapanuekkhaikung kahni katham touh e lawk hah caksak lah ao han. <sup>2</sup> Yampouh yonnae na ka sak e naw hoi alouke taminaw hai, apâhni ka tho navah ka dei e patetlah bout ka tho pawiteh nangmouh buet touh hai minhmai ka khen mahoe. <sup>3</sup> Bangkongtetpawiteh, Khrih ni kai dawk hoi lawk a dei tie na panue awh nahane doeh. Bawipa teh nangmouh koe a thayoun hoe. Nangmouh thungvah bahu hoi akawi. <sup>4</sup> Telah boipawiteh, Bawipa teh a thayounnae lahoi thingpalam dawk a pathout awh nakunghai Cathut e bahu lahoi bout a hring. Hot patetvanlah maimanaw haiyah Bawipa dawk thayoun nakunghai, Cathut e bahu lahoi Bawipa hoi hring awh han.

<sup>5</sup> Nangmouh teh yuemnae dawk na o awh maw, na awh awh hoe maw tie hah namamouh hoi namamouh akung kâkhei awh. Nangmouh thung vah Jisuh Khrih ao tie hah na panuek awh hoe maw. Telah hoehpawiteh tanouknae dawk ka sung e tami lah namaw, na o awh toung hah vaw. <sup>6</sup> Kaimouh teh tanouknae dawkvah ka sung awh hoe tie hah na panue a han ti teh ka ngaihawi. <sup>7</sup> Nangmanaw teh kahawihoehe bangchai na sak awh hoe nahanelah Cathut koe na ratoum pouh awh. Hottelah ka tinae teh tanouknae ka tâ awh toe tie kamnue sak nahanelah nahoe. Maimouh teh tanouknae dawk ka sung e patetlah o awh lahunnah vah nangmouh teh bari kaawm e na sak thai awh nahane doeh. <sup>8</sup> Maimouh teh lawkkatang khoeroe ngang thai awh hoe. Lawkkatang koe lah kampang lah doeh kampangkhai thai awh. <sup>9</sup> Kaimouh katha ayoun teh nangmouh na tha a sai awh navah, kaimouh ka lunghawi awh. Nangmouh na kuep awh nahane doeh na ngai Khai awh. <sup>10</sup> Hatdawkvah raphoe nahane nahoe, sak nahanlah Bawipa ni na poe e kâtaunnâe patetlah ka tho toteh rek han ka ngai hoe dawkvah, atu nangmouh hoi ahlanae koe ka o lahunnah hettelah ca na patawn awh.

<sup>11</sup> Ahnoungepoung lah dei han ka ngai e teh, hmaunawngghanaw nangmouh koe yawhawinae awm lawiseh. Kuepnae hoi lunghawinae awm lawiseh. Lung buet touh lah awm awh nateh, kâponae hoi lungpatawnae lah kaawm e Cathut teh nangmouh koe cingtalâh na okhai han. <sup>12</sup> Buet touh hoi buet touh kathoung kâpaconae hoi kut kâman awh.

<sup>13</sup> Tamikathoungnaw pueng ni kut na man awh. <sup>14</sup> Bawipa Jisuh Khrih e lungmanae, Cathut e lungpatawnae hoi, Kathoung Muitha e kâhuikonae naw teh nangmouh pueng koe awm lawiseh. Amen.



## GALATI (The Epistle of Paul to the Galatians)

### *Lawk karouknae*

<sup>1</sup> Kai Pawl hoi kai koe kaawm e hmaunawngaha abuemlah ni, Galati ram kaawm e kawhmounnaw ca na patawn awh. <sup>2</sup> Kai teh guncei lah ka o nahanlah tami ni na patoun e hoi tha e hai nahoe. Jisuh Khrih duenae koehoi kathawsakkung Cathut ni na kaw e lah doeh ka o. <sup>3</sup> Maimae Pa Cathut hoi Bawipa Jisuh Khrih koe e lungmanae hoi roumnae teh nangmouh koe awm lawiseh. <sup>4</sup> Atu e se kathout thung hoi maimouh teh hlout sak hanelah maimae Cathut hoi na Pa ni a ngai e patetlah ama teh maimae yon kecu a kâhmoun. <sup>5</sup> Cathut teh pout laipalah a yungyoe bawilenna awm lawiseh! Amen.

### *Kamthang lawk alouke awmhoeh*

<sup>6</sup> Nangmouh teh, Khrih e lungmanae dawkh hoi na kakawkung Bawipa e kamthang kahawi hloilah, alouke kamthang lawk koe tang na kamlang awh dawkvah ka ka ngai lah a ru. <sup>7</sup> Hote kamthang lawk teh kamthang kahawi nahoe. Nangmanaw tarawkh hane hoi Khrih e kamthang kahawi hah bungling hanelah a ngai a dawkh doeh. <sup>8</sup> Hatei, kaimouh thung dawkh hoi nakunghai, kalvan hoi ka tho e kalvantami nakunghai, kaimouh ni ka dei awh e kamthang kahawi patetlah ka dei hoe e teh thoebo e lah awmseh. <sup>9</sup> Ahmaloe, kaimouh ni ka dei awh tangcoung e patetlah atu hai bout ka dei e teh, apipatet ni hai nangmouh ni na dâw tangcoung e kamthang kahawi hoi kâvan laipalah, ka pâpho e tami teh thoebo lah awmseh.

<sup>10</sup> Bangkongtetpawiteh, atuvah kai heh tami e minhmai kahawi hmu hanelah ka kâyawm e na ou. Cathut koe e minhmai kahawi hmu hanelah kâyawm e na ou. Nahoe pawiteh, tami ngainae dawkh kâyawm e na ou. Tami ngainae lahoi kâyawm pawiteh Khrih san lah kaawm e nahoe.

### *Pawl ni pâpho e kamthang kahawi bout thai saknae*

<sup>11</sup> Hmaunawngahanaw kai ni ka dei e kamthang kahawi heh tami koe lahoi ka coe e nahoe tie teh koung na panue thai nahan na ngaikhai awh. <sup>12</sup> Bangkongtetpawiteh, hot hateh tami koehoi kai ni ka coe e nahoe. Cangnae dawkh hai nahoe. Jisuh Khrih e a kâpâphonae dawkh hoi kai ni ka coe e doeh.

<sup>13</sup> Judah phunglah kahring navah Cathut e kawhmoun hah ka rektap teh raphoe hanelah ka kâyawm. <sup>14</sup> Mintoenaw e cangkhae dawkh ka lung atang teh, ka huikonaw hlak Judah phung hoe ka tarawi e hah na panue awh. <sup>15</sup> Hatei anu vawn thung ka o na patenghai yah, Capa e kamthang kahawi pâpho hanelah, amae lungmanae lahoi kai hah na ka rawi niteh, na kakaw e Cathut niyah, <sup>16</sup> hote Capa hah kai koe pâpho hanelah a ngainae ao navah, Capa e kong Jentelnaw koe pâpho hanlah, kai teh ka takthai hoi ka kapan hoe. <sup>17</sup> Ahmaloe e gunceinaw aonae koe Jerusalem hai ka cet laipalah, Arabia ram lah hmatara ka cei teh Damaskas kho bout ka ban.

<sup>18</sup> Hahoi kum thum touh a kuep hnukkhu Cephas (Cephas teh Piter tinae) hoi kâhmo hanlah ka ngai dawkvah, Jerusalem lah ka cei teh ahni koe hnin



hlaipanga touh ka o. <sup>19</sup> Ahni hoi Bawipa Jisuh e a nawnggha Jem laipalah alouke guncei buet touh hai ka hmawt hoeh. <sup>20</sup> Ka thut e heh laithoe awmhoeh, atangcalah ao e heh Cathut ni a panue. <sup>21</sup> Hathnukkhu vah, Siria ram hoi Cilicia ram lah vah ka cei. <sup>22</sup> Khrih thung kaawm ni teh Judah ram e kawhmounnaw ni kai na panuek awh hoeh rah. <sup>23</sup> Ahmaloe vah, maimouh na ka rektap e tami ni raphoe hanlah ouk a kâyawm e yuemnae hah atu teh a kampangkhai toe tie dueng hah thai lah ao toung dawkvah, <sup>24</sup> ahnimouh ni kai kecu dawk Cathut bawilennae teh a pholen awh.

## 2

### *Pawl hoi guncei alouknaw*

<sup>1</sup> Hahoi, kum hlaipali touh aloum hnukkhu, kai ni Titu hah ka kaw teh Barnabas hoi Jerusalem kho lah bout ka cei. <sup>2</sup> Pâpho e patetlah hoi doeh ka cei teh, Jentelnaw koe ka dei e kamthang kahawi hah hatnavah ka dei pouh. Hottelah ka ti nah ka tawk tangcoung e thaw hoi hmalah bout ka tawk hane thaw hah ayawmyin lah o hoeh nahan kacue lah ka kâpouknaw hanelah doeh duem ka dei. <sup>3</sup> Hat navah, kai hoi rei kaawm e Jentel miphun Titu hah kuekluek vuensoma sak awh hoeh. <sup>4</sup> Telah ka dei ngainae teh arulaho ka tho niteh, hmaunawnggha lah kakâsaknaw ao dawk doeh telah ka dei. Ahnimanaw ni kaimanaw san lah na o sak hane a ngai teh, Khrih Jisuh thung hoi hmu e maimae hloutnae hah tuet hane la doeh a tho awh. <sup>5</sup> Hatei lawkkatang kamthang kahawi nangmouh dawk ao thai nahanelah kaimouh ni, ahnimanaw ni a dei e lawk dawngdengca boehai ka thai pouh awh hoeh.

<sup>6</sup> Kacue lah ka kâpouk e taminaw pueng ni bangpatet e tami lah maw ao awh tie kai hoi kabet hoeh. Cathut ni tami e minhmai khen hoeh. Hote taminaw hoi ka kambawng teh hnokahawi buet touh hai kahmawt hoeh. <sup>7</sup> Hatdawkvah, vuensom ka a naw hane kamthang kahawi teh Piter koe poe lah ao teh vuensom ka a hoeh naw hane kamthang kahawi teh kai Pawl koe poe lah ao tie na panue awh. <sup>8</sup> Bangkongtetpawiteh vuensom ka a e Piter koe vah thaw poe e patetlah vuensom ka a hoeh e Jentelnaw koe kai Pawl heh guncei lah Cathut ni na hmoun e lah ao. <sup>9</sup> Kâuepkhai e Jem, Piter hoi Jawhan tinaw hai kai ni ka coe e lungmanae a panue navah, ahnimanaw teh vuensom ka a naw koe cei hane hoi kaimouh teh Jentelnaw koe cei hanelah Barnabas hoi kai ni hnâ ka bokhai.

### *Kâ lawk dawk hoi hloutnae*

<sup>10</sup> Karoedengnaw maimouh ni pahnim hoeh nahanelah ahnimouh a ngainae buet touh ao. Hote thaw hah kai ni puenghoi tha ka patho. <sup>11</sup> Hatei, Piter teh Antiok kho a pha navah toun hane kawi ao dawk a ma roeroe hah kai ni ka ngang. <sup>12</sup> Bangkongtetpawiteh Jem koehoi taminaw a pha hoehnahlan vah, Piter teh Jentelnaw hoi bu cungalai rei a ca. Ahnimanaw a tho hnukkhu Piter ni vuensom ka a e taminaw a taki dawkvah hnuklah a kâhnawn teh alouklah ao. <sup>13</sup> Hat terei teh ka yuem e Judahnaw pueng ahni hoi cungalai tami kahawipoung patetlah a kâsak teh Barnabas ni hai ahnimae moi a out teh a hnukkhu a kâbang van toe.

<sup>14</sup> Kamthang kahawi lawkkatang lam kalan dawn awh hoeh toe tie ka hmu navah, ahnimae a hmalah Piter hanelah, nang teh Judah tami doeh, hateiteh, Jentel tami patetlah na o, Judah tami lah na awmhoeh, hatdawkvah, bangtelamaw Jentelnaw hah Judah tami patetlah na o awh han telah ngangngang na ti pouh vaw telah ka ti pouh.



<sup>15</sup> Maimouh teh coungrae lahoi Judah lah o awh teh, Jentel tamikayon lah awh awh hoe. <sup>16</sup> Jisuh Khrih yuem e lahoi lannae dawk pha awh e hah yon kamnuek e Jentelnaw laipalah, takthai koe lah Judah tami lah kaawm e maimouh teh rek panue e patetlah, kâlawk dawk hoi lannae koe phat awh hoe. Khrih Jisuh yuemnae lahoi doeh lannae dawk pha awh. Bangkongtetpawiteh, a pihai kâlawk tarawinae lahoi lannae dawk phat awh thai hoe, Khrih yuemnae lahoi doeh pha thai awh.

<sup>17</sup> Khrih lahoi lannae koe pha hanelah, maimanaw ni kâyawm nahlangva, yonnae bout kamnuek pawiteh Khrih teh yonnae kathokhaikung maw. <sup>18</sup> Telah coung thai hoe koe kai ni apasuek ka raphoe tangcoung e hah bout ka sak pawiteh, yon ka tawn e hah kaimouh ni ka kamnue sak. <sup>19</sup> Hothloilah, Cathut koe lah ka hring thai nahanelah, kâlawk koe lah, kâlawk lahoi ka due toe. <sup>20</sup> Kai teh Khrih hoi thingpalam dawk rei ka due toe, hatei ka hring rah. Hattelah ka ti navah kai roeroe ka hring hoe toe, Khrih teh kai dawk a hring, ka tak dawk a tu ka hringnae teh Cathut e Capa yuemnae lahoi doeh, Capa ni kai lung na pawat teh kai hanelah amahoima hringnae a kâpasoung. <sup>21</sup> Cathut e lungmanae ka pahnawt hoe, kâlawk kâuepnae lahoi lannae koe phat thai pawiteh Khrih teh ayawmyin la doeh a due toe.

### 3

#### *Yuemnae lahoi lannae a cak sak*

<sup>1</sup> Galati tamipathunaw, thingpalam sawi pathout lah kaawm e Jisuh Khrih heh nangmae mithmu laplap kamnué sak e hah, lawkkatang na tarawi awh hoe nahanlah apinimaw nangmouh na ân awh. <sup>2</sup> Nangmouh koehoi ka panue han ka ngai e teh nangmouh ni kâlawk hoi kâkuen lah tawknae dawk hoi Muitha na coe awh e na ou. Nahoe pawiteh yuemnae hah thainae lahoi na ou na coe awh. <sup>3</sup> Nangmouh teh hettelah totouh na pathu awh rah maw. Muitha dawk hoi na kamtawng awh teh takthai koe lah maw na pâpout a han toung. <sup>4</sup> Nangmouh ni rucatnae hettelah totouh na khang awh e hah ayawmyin lah maw na khang awh vaw. Hettelah totouh rucatnae hah ayawmyin lah maw na khang awh toung vaw. Ayawmyin la maw ao han toung vaw. <sup>5</sup> Hatdawkvah Muitha heh nangmouh koe na poe e kângairuhno ka kuep lah ka sak e Bawipa teh nangmae kâlawk tarawi e lahoi maw a sak. Nahoe pawiteh nangmouh ni na thai teh na yuem e lahoi maw a sak.

<sup>6</sup> Abraham teh Cathut a yuem dawkvah hote yuemnae teh ahnie lannae lah khoe pouh lah ao. <sup>7</sup> Hatdawkvah, Abraham e catoun katang teh yuemnae ka tawn e naw doeh tie hah na panue awh hanlah ao. <sup>8</sup> Cathut ni Jentelnaw teh yuemnae lahoi a lan toe ti nahanelah, Cakathoung ni sut a dei tangcoung toe. Hatdawkvah, Cakathoung ni kamthang teh Abraham koe a dei tangcoung e patetlah nangmouh kecu dawk hoi Cathut ni talai tami pueng yawhawinae a coe han telah a ti. <sup>9</sup> Hatdawkvah yuemnae ka tawn e naw teh, ka yuem e Abraham hoi cungtalah yawhawinae a coe awh.

#### *Kâlawk hoi lawkkamnae*

<sup>10</sup> Kâlawk ka kâuepnaw teh thoebo e rahim kaawm e lah o awh. Bangkongtetpawiteh, Cakathoung ni kâlawk dawk e naw pueng abuem-lahoi koug ka tarawi hoe e naw teh Cathut thoebo e lah ao telah a ti. <sup>11</sup> Tami kalan teh yuemnae lahoi a hring hanelah ao dawkvah, kâlawk tarawi e lahoi apihai Cathut hmalah tamikalan lah awh thai hoe tie



hah kamcengcalah a kamnue. <sup>12</sup> Hatei kâlawk teh yuemnae hoi kâkuen hoeh. Kâlawk ka tarawi e tami teh kâlawk lahoi a hring han a ti. <sup>13</sup> Khrih ni maimouh hanelah thoebonae a khang dawkvah kâlawk e thoebonae thung hoi maimouh teh na ratang awh toe. Bangkongtetpawiteh thing sawi pathout lah kaawm e pueng teh thoebo e tami lah ao. <sup>14</sup> Hottelah na ratangnae teh Abraham ni a coe e yawhawinae teh Khrih Jisuh lahoi Jentelnaw koe a pha dawkvah, lawkkam pouh e Muitha hah yuemnae lahoi maimouh ni coe nahanelah doeh.

<sup>15</sup> Hmaunawngghanaw tami e singyoe lahoi ka dei vai, taminaw ni lawkkin e patenghai yah apinihai raphoe hoeh, bout thap sin yaw maw. <sup>16</sup> Cathut ni Abraham hoi ahnie a catoun koe lawkkam a poe navah kapap e lah catounnaw tet pouh laipalah buet touh dueng dei ngainae lah na catoun atipouh. Ahni teh Khrih hah doeh. <sup>17</sup> Ka dei ngainae teh hettelah doeh, kum 430 aloum hnukkhu hoi ka tâcawt e kâlawk ni sut dei tangcoung e Cathut lawkkam teh raphoe thai hoeh. Hothloilah hnoun hai hnoun thai mahoe. <sup>18</sup> Bangkongtetpawiteh râw pangnae teh kâlawk daw kamtue pawiteh, lawkkam e daw kamtue hoeh toe. Hateiteh, Cathut ni hote râw hah lawkkamnae lahoi Abraham koe a poe toe.

### *Kâlawk ni a noenae*

<sup>19</sup> Hottelah pawiteh, kâlawk teh bangmaw hawinae kaawm vaw, tetpawiteh, lawkkam ka coe hane catoun a tâco hoehnahlan yonnae kecu daw poe e lah doeh ao. Kâlawk teh kalvantaminaw koehoi patuen laicei lahoi hruek e lah ao. <sup>20</sup> Laicei tie teh avoivang lahoi a kâkuet, Cathut teh buet touh duengdoeh.

<sup>21</sup> Hottelah pawiteh, kâlawk teh Cathut e lawkkam hoi a kâtaran maw. Kâtaran roeroe hoeh. Poe lah kaawm e kâlawk ni na hring sak thai katang pawiteh, lanae teh hote kâlawk lahoi coe e lah doeh awh ti. <sup>22</sup> Hatei Jisuh Khrih yuemnae lahoi ka kâkuen e lawkkamnae teh ka yuem e taminaw koe poe nahanelah Cakathoung ni tami pueng hah yon thongim thung a paung.

<sup>23</sup> Hatnavah yuemnae phung a tho hoehroukrak, kâlawk lahoi na hrawi awh teh, yuemnae phung a tho ditouh, kâlawk kut daw maimouh teh na paung awh. <sup>24</sup> Hatdawkvah maimouh teh yuemnae lahoi na lan toe tie coe awh thai nahanelah, kâlawk teh Khrih koe maimouh na kathakkung, hoi na kakhoumkung lah doeh ao. <sup>25</sup> Hatei yuemnae phung a tho tounge dawkvah maimouh teh na ka khoumkung kâlawk e kut rahim awh awh hoeh toe.

<sup>26</sup> Bangkongtetpawiteh nangmouh pueng teh Khrih Jisuh na yuem awh e lahoi Cathut e ca lah na o awh toe.

### *Ca hoi râw kacoekungnaw*

<sup>27</sup> Khrih thung baptisma ka coe e tami pueng teh Khrih a khohna awh toe. <sup>28</sup> Nangmouh pueng teh Khrih Jisuh thung buet touh lah na o awh dawkvah, Judah miphun, Grik miphun tie awhmoeh, san hoi tami kahlout awhmoeh, tongpa hoi napui tie hai awhmoeh. <sup>29</sup> Nangmouh teh Khrih e lah na awh awh pawiteh, Abraham catoun lah na o awh hloilah, lawkkam e patetlah râw kacoekung lah na o awh.

## 4

<sup>1</sup> Atuvah, ka dei ngai e teh râw ka coe hane ni râwnaw pueng teh a coe hanlah ao ei, a camo nah thung teh san patetlah ao. <sup>2</sup> A na pa ni atueng



khoe e a pha hoehnahlan hno ka kuem kayawtnaw hoi ka khenyawnnaw e kut rahim vah ao. <sup>3</sup> Hot patetvanlah maimouh hai camo lah o awh nateh talaivan cangkhae rahim vah san lah o awh. <sup>4</sup> Hatei, atueng kuep toreï teh Cathut ni a Capa hah a patoun. Ahni teh napui buet touh koehoi kâlawk rahim vah a khe. <sup>5</sup> Hote kâlawk rahim kaawm e taminaw hah a ratang dawkvah maimouh teh cacoungnae coe awh nahane doeh. <sup>6</sup> Hottelah nangmouh teh ca lah na o awh dawkvah Cathut ni Abba A Pa telah ka kaw thai e Capa e Muitha hah nangmae lungthin thung a patoun. <sup>7</sup> Hatdawkvah nangmouh teh san nahoeï toe. A ca lah o awh toe. A ca lah o awh toung dawkvah Khrih lahoi Cathut e râw kacoekung lahai o awh.

### *Pawl ni Galatinaw malam a pouk*

<sup>8</sup> Cathut na panue awh hoehnahlan teh cathutnaw lah kaawm hoeï e naw koe san lah na o awh. <sup>9</sup> Atuteh nangmanaw ni Cathut yo na panue toe. Phunlouk lahoi dei pawiteh Cathut ni nangmouh hah na panue awh toe. Hat pawiteh, hno sakthainae ka tawn hoeï e ahmaloe e phunglawk dawkgongmaw san lah bout kamlang hane na ngai a vaw. <sup>10</sup> Nangmanaw ni a hnin, a tha, atueng hoi a kumnaw hah na ya awh. <sup>11</sup> Nangmouh han kâyawm laihoi ka tawï e ayawmyin lah awm payon vaih tie na tâsue khai awh.

<sup>12</sup> Hmaunawngghanaw kai patetlah awm awh ti teh na kâ awh. Bangkongtetpawiteh kai hai nangmouh patetlah doeh ka o. Nangmouh ni kai koe kahawihoeï hno banghai na sak awh hoeï. <sup>13</sup> Nangmouh koe kamthang kahawï hmaloe ka pâpho pasuek nah ka takthai dam hoeï tie na panue awh. <sup>14</sup> Hottelah kaie ka rucatnae teh nangmouh hanlah tarawï lah kaawm nakunghai nangmanaw ni kai na hmuhma awh hoeï, na pahnawï awh hoeï. Cathut e kalvantami hoi Khrih Jisuh patetlah kai hah na pouk awh. <sup>15</sup> Hottelah na coe awh nahlangva, na coe awh e yawhawinae teh bangtelane. Coung thai pawiteh, na mitnaw patenghai cawngkhawï vaiteh kai na poe han na ngai a han doeh tie ka kampangkhai. <sup>16</sup> Lawkkatang ka dei kecu dawkgatuvah nangmae taran lah maw ka o toung.

<sup>17</sup> Alouknaw ni nangmouh hanelah hawinae ka sak e patetlah ao awh eiteh, a pouknae hawihoeï. Kai hoi nangmanaw kampek vaiteh nangmanaw teh ahnimouh koe lah kambawng hane a ngai a dawkgatuvah. <sup>18</sup> Hatdawkvah nangmouh koe kai ka o na dueng tho laipalah nâtuë hai thoseh hnokahawï hah kampangkhai e teh ahawï. <sup>19</sup> Ka lungpataw e ka canaw Khrih mei nangmouh koe a kamnue hoeïroukrak, camo khe nah khang e patetlah ka khang. <sup>20</sup> Nangmanaw oupvoutnae ka tawn dawkvah, kama ni roeroe na kâhmo vaiteh alouke lawk dei hane ka ngai.

### *Hagar hoi Sarah bangnueae*

<sup>21</sup> Nangmouh kâlawk rahim o hane na ka ngai e naw, dei haw, kâlawk ni a dei ngainae na thai panuek awh hoeï maw. <sup>22</sup> Bangkongtetpawiteh, Abraham ni capa kahni touh a tawn. Buet touh teh a sannu e ca lah ao teh buet touh e teh kahlout e napui e ca lah ao telah Cakathoung ni a ti. <sup>23</sup> Sannu ni takthai coungnae lahoi capa a khe teh kahlout e napui ni lawkkamnae lahoi capa a khe.

<sup>24</sup> Hotnaw teh hmusaknae lah ao. Bangkongtetpawiteh, napui kahni touh teh lawkkam phun hni touh e hmusaknae lah ao. Phun touh e teh Sinai mon hoi ka tho ni teh sannaw hah a khe. Ahni teh Hagar doeh.

<sup>25</sup> Hagar teh Arabia ram e Sinai mon hmu saknae lah a tho teh, atu Jerusalem hoi a kâvan. Bangkongtetpawiteh ahni teh amae a canaw hoi



san lah ao awh. <sup>26</sup> Hatei, lathueng lah kaawm e Jerusalem khopui kahlout e tie teh maimouh pueng e manu lah ao. <sup>27</sup> Bangkongtetpawiteh cakaroe e napui na konawm haw. Camokhe patawnae ka khang boihoeh e napui na lawk na tawn e puenghoi hramki haw. Bangkongtetpawiteh, pahnawt e napui teh a vâ ka tawn e napui hlak a ca kapap na khe toe telah a thut.

<sup>28</sup> Hmaunawngghanaw, nangmanaw teh Isak patetlah lawkkam e canaw lah na o awh. <sup>29</sup> Hatei, takthai counгнаe lahoi khe e capa ni Muitha hoi khe e ca a rektap e patetlah atu hai ao. <sup>30</sup> Hatdawkvah Cakathoung ni bangtelamaw a dei. Sannu hoi a ca teh pâlei leih. Bangkongtetpawiteh, sannu e a ca ni kahlout e napui e a ca hoi cungtalah râw rei coe thai mahoe telah a ti. <sup>31</sup> Atuteh hmaunawngghanaw, maimouh teh sannu e ca lah awm awh hoe kahlout e napui e canaw lah o awh.

## 5

### *Hloutnae*

<sup>1</sup> Hloutnae hmu nahanlah Khrih ni maimanaw teh na hlout sak awh toe. San counгнаe ni bout na man hoe nahanlah kacacalah awm awh. <sup>2</sup> Thai awh haw, kai Pawl ni nangmouh koe ka dei e teh nangmouh ni vuensomanae na coe awh toung pawiteh Khrih teh nangmouh hanlah apu awmhoeh. <sup>3</sup> Vuensom ka a awh e naw pueng, kai ni lawkpanuesaknae na poe awh. Kâlawk naw pueng koug tarawi hanlah ao. <sup>4</sup> Kâlawk lahoi lannae coe hanlah ka pouk e nangmanaw teh, Khrih koehoi takhoe lah na o awh teh, lungmanae daw k hoi na cei payon awh toe. <sup>5</sup> Maimanaw teh yuemnae lahoi lannae daw pha han tie lungmanae hah Muitha lahoi ngaihaw awh teh ring awh. <sup>6</sup> Khrih Jisuh daw vuensoma e apu awmhoeh. A hoe hoi hai apu awmhoeh. Lungpatawnae daw hoi kaawm e yuemnae doeh apu kaawm.

<sup>7</sup> Nangmouh teh kahawicalah na yawng awh toe. Lawkkatang na tarawi awh hoe nahanelah apinimaw na ngang awh vaw. <sup>8</sup> Hete tacueknae teh nangmouh na kakawkung koehoi ka tho e nahoe, <sup>9</sup> Yitca e tawn ni tahawnbu koug a paw sak. <sup>10</sup> Nangmanaw teh kâkapeknae lungthin na tawn awh mahoe telah ka pouk. Cathut min lahoi nangmanaw teh kai ni na yuem teh na kâuep awh. Nangmanaw lungmawng hoe nahanlah ka tâcawt sak e teh apipatet hai lawkcengnae a khang han. <sup>11</sup> Hmaunawngghanaw kai teh vuensomanae phunglawk bout ka pâpho rah pawiteh, bangkongmaw rektapnae bout ka kâhmo rah vaw. Hottelah pawiteh, kamthuinae lah kaawm e thingpalamnae teh takhoe lah ao toe. <sup>12</sup> Nangmouh lam na ka payonsakkung taminaw hah takhoe vaiteh pâlei hanelah doeh kai ni na ngaikhai awh.

<sup>13</sup> Hmaunawngghanaw hlout hanlah na kaw awh e doeh toe. Hatei na hloutnae teh takthai ngainae daw hno laipalah buet touh hoi buet touh lungpatawnae lahoi thaw taw awh. <sup>14</sup> Bangkongtetpawiteh kâlawk ni yah, namahoima na lungpataw e patetlah na hui lungpataw tie lawk buet touh daw he a kâracut. <sup>15</sup> Hatei, nangmanaw ni buet touh hoi buet touh na kâkei, na kâpayawp awh pawiteh rawknae koe na pha a han tie hah na ngaihri khai dawkvah kâhruetcu et awh.

### *Muitha hoi takthai counгнаe*

<sup>16</sup> Kai ni ka dei ngainae teh Muitha lahoi hring awh. Telah pawiteh takthai noenae hah khoeroe tarawi laipalah na o awh han.



<sup>17</sup> Bangkongtetpawiteh takthai ngainae hoi Muitha ngainae teh a kâtaran. Muitha ni takthai hoi kâtaran e hno a doun. Hattelah dawk doeh ahnimouh teh buet touh hoi buet touh a kâtaran awh teh nangmouh ni sak han na ngai e na sak thai awh hoe. <sup>18</sup> Hattelah pawiteh Muitha e lamhrawinae dawk na cet vaiteh nangmouh teh kâlawk rahim na awm a mahoe.

<sup>19</sup> Takthai coungnae hoi kâkuen e saknae naw teh reng a kam-nue. Hotnaw teh uicuknae, khinnae, takthaingainae, <sup>20</sup> meikaphawk bawknae, sueânnæ, kâsaveknae, kâpohoeahnae, utnae, lungkhueknae, kâkaramnae, lungkânginghoeahnae, kâkapeknae, <sup>21</sup> hmuhmanæ, yamuhrinae, phuvounnepnae, pawitonae naw hah doeh. Hot patet e hno ka sak e, katarawinaw pueng teh Cathut uknaeram râw pang awh mahoe titeh ahmaloe ka dei tangcung patetlah atu hai nangmanaw koe bout ka dei.

<sup>22</sup> Muitha e a paw teh: lungkâpatawnæ, lunghawinae, lungmawngnae, lungsawnae, kâpahrennae, hawinae, yuemkamcuna, lungdolungnemnae, <sup>23</sup> mahoima kâcakuepnae naw hah doeh. Hotnaw teh bang patet e kâlawk hoi hai kâtaran hoe. <sup>24</sup> Khrih Jisuh hoi kâkuennaw ni takthaingainæ teh radueknae hoi cungtalah thingpalam dawk mek a het awh toe. <sup>25</sup> Maimouh teh Muitha lahoi hring awh toung dawkvah Kathoung Muitha hoi pou kâkuehnae dawk khok takan awh lawi sei. <sup>26</sup> Lunglennæ a kâen teh buet touh hoi buet touh kâtarannæ lungthin, buet touh hoi buet touh kâ hmuhmanæ lungthin tawn laipalah awm awh lawi sei.

## 6

### *Hno ka ri kâhlainæ*

<sup>1</sup> Hmaunawngghanaw, tami buet touh ni yonnae buetbuet touh koe sak pawiteh, muitha koe lah na kaawm awh e nangmouh ni, lungdo lungnemnae lahoi yah, ahni hah khenyawn awh. Namamouh hai yon daw k na bo awh hoe hah nahanlah kâhruetcu et awh. <sup>2</sup> Buet touh hoi buet touh e hnokari kâhlai awh. Hottelah na taw k awh e lahoi Khrih e phung teh na kuep sak awh han. <sup>3</sup> Apihai banglah ao hoe hah nahlangva, a mahoima kârasang sak pawiteh, ahni teh a mahoima kâdum e lah ao. <sup>4</sup> Tami pueng ni a taw k awh e thaw hah noumcai naseh. Hat pawiteh ayâ daw k dei laipalah ama daw k kâoupkhai hane ao han. <sup>5</sup> Bangkongtetpawiteh tami pueng mae thaw taw k awh han.

<sup>6</sup> A law k kamtu e tami ni kacangkhaikung hah hnokahawi kaawm e pueng poe naseh.

<sup>7</sup> Alouklah pouk awh hanh. Cathut teh dudam e lah awm mahoe. Bangkongtetpawiteh, tami ni cati buetbuet touh patûe pawiteh ama ni bout a han. <sup>8</sup> Takngainæ lahoi ka patûe e tami teh takngainæ lahoi rawknae hah a han. Muitha daw k ka patûe e tami teh Muitha koehoi a yungyoe hringnae a a han. <sup>9</sup> Maimouh ni kahawi e hno sak navah lungpout thayounnæ tawn laipalah awm a sei. Bangkongtetpawiteh, lungpout awh laipalah awm awh pawiteh atueng a kuep toteh a awh han. <sup>10</sup> Hatdawkvah maimouh teh atueng kahawi hmu navah tami pueng e lathueng alawkpui lah yuemnae imthungkahunaw koevah, kahawi e hnonaw hah sak a sei.

### *Ahnoungpoung tha poenæ*



<sup>11</sup> Kai ni nangmouh koe ka kut hoi ka thut e ca heh banghloimaw a len tie teh na hmu awh.

<sup>12</sup> Talai mithmu daw k khet kamcu ka ngai e taminaw teh, Khrih e thingpalam kecu daw rektapnae khang hane a ngai awh hoe h daw doeh, nangmouh vuensoma sak hanlah ngangngang a dei awh.

<sup>13</sup> Bangkongtetpawiteh vuemsom ka a naw ni hai kâlawk tarawi thai awh hoe h. Nangmouh koe a kâoup awh nahanelah doeh nangmouh hah vuensoma sak hanelah a ngai awh. <sup>14</sup> Kai teh Maimae Bawipa Jisuh Khrih e thingpalam daw kâoupnae hloilah alouke kâoupkhai hane awmhoeh. Kai koe lahoi teh talaivan heh hote thingpalam daw k pathout tangcoung lah ao teh talai koe lahoi hai kai teh thingpalam daw k pathoup lah ka o toe. <sup>15</sup> Bangkongtetpawiteh, vuensoma nakunghai, a hoe h nakunghai, alawkpui nahoeh. Sak kathanae daw k doeh alawkpui lah ao. <sup>16</sup> Hete kâhrawinae ka tarawi e pueng lathueng hai, Cathut e tami Isarelnaw lathueng hai, lungmawngnae hoi pahrennae awm lawiseh.

<sup>17</sup> Atu hoi teh api nang ni hai na taraw k awh hanh lawih. Bangkongtetpawiteh Jisuh e hmâ teh ka tak daw k pou ka sin toe.

<sup>18</sup> Hmaunawngghanaw maimae Bawipa Jisuh Khrih e lungmanae teh nangmae lungthin muitha thung awm lawiseh. Amen.



## EFISA (The Epistle of Paul to the Ephesians)

### *Lawk karouknae*

<sup>1</sup> Kai Pawl, Cathut e ngainae lahoi Khrih Jisuh e guncei lah kaawm e ni, Jisuh Khrih dawk yuemkamcu ni teh Efisa kho kaawm e tami kathoungnaw koe ca na patawn awh. <sup>2</sup> Jisuh Khrih hoi maimae Pa Cathut koe e lungmanae hoi lungmawngnae teh nangmouh koe awm lawiseh.

### *Muitha koelae yawhawinaw*

<sup>3</sup> Khrih dawk kalvanlae Muitha yawhawinae kaawm e puenghoi Khrih dawk yawhawinae na ka poe e maimae Jisuh Khrih e Pa Cathut teh pholen lah awm lawiseh. <sup>4</sup> Maimouh teh amae hmalah thoung awh teh tounnae ao hoeh nahan talaivan a sak hoehnahlan vah Khrih dawk na rawi awh toe. <sup>5</sup> Jisuh Khrih lahoi maimouh teh cacoungnae coe awh nahan, a pahrennae dawk a ngainae patetlah hmoun lah o awh toe. <sup>6</sup> Hottelah na hmounnae teh maimouh koe na poe e ka lentoe poung, a pahrennae hah pholen awh nahane doeh. <sup>7</sup> Puk ka cawi lae a lungmanae lahoi yah, yon a ngaithoum teh a thipaling hoi na ratang awh. <sup>8</sup> Hothateh lungangnae abuemlah, thaipanueknae abuemlah maimouh koe na poenae doeh. <sup>9</sup> Cathut ni a ngainae lahoi Khrih dawk a noe e hrolawh hah maimouh koe na panue sak. <sup>10</sup> Kuepnae tue a pha toteh kalvan kaawm e hoi talai van kaawm e abuemlah Khrih e rahim vah cungtalah o sak nahane doeh.

<sup>11</sup> Ama e ngainae patetlah bangpuengpa ka sak e ni pouknae a tawn e patetlah maimouh teh Jisuh Khrih lahoi raw kacoekung lah o awh. <sup>12</sup> Bangkongtetpawiteh, Khrih dawk hmaloe ka ngaihawi e kaimouh ni a bawilenna hah pholen awh nahane doeh. <sup>13</sup> Nangmouh hai rungngangnae kamthang lawk kahawi, lawkkatang lawk hah na thai awh teh, hote Jisuh Khrih hah na yuem awh navah Kathoung Muitha hoi noutnae tacik na kin awh toe. <sup>14</sup> Hote Kathoung Muitha teh a bawilenna pholen hanelah ama koe na ratang hoehroukrak, pang han kaw raw e lawkawm lah ao.

### *Lunghawilawkdeinae hoi ratoumnae*

<sup>15</sup> Hatdawkvah, nangmouh ni Jisuh Khrih na yuem awh e hoi tami kathoungnaw na lungpataw awh e hah ka thai hnukkhu teh: <sup>16</sup> Nangmouh hanelah Cathut koe lunghawinae lawk dei e hoi ratoumnae ka papout hoeh. <sup>17</sup> Ouk ka ratoum e teh, maimae Bawipa Jisuh Khrih e Pa Cathut, ka lentoe poung e a ma panue thai nahanelah, lungangnae hoi thaipanueknae na poe awh nahan, <sup>18</sup> na kaw e dawh ngaihawinae teh bang hah maw tie hoi tami kathoungnaw ni a coe awh e raw teh banghloimaw a len ti e, hoi <sup>19</sup> maimouh ka yuem e naw koe na patue awh e thao thasainae teh banghloimaw a len tie hah nangmouh ni na panue awh nahanlah panuenae mit a ang sak nahan ouk ka ratoum.

### *Khrih dawh kaawm e Cathut e bahu*

<sup>20</sup> Hote bahu teh Khrih hah duenae koehoi a thaw sak teh Khrih dawh a sak e a thaonae patetlah ao. <sup>21</sup> Uknae abuemlah, katawnnae abuemlah, atu e tue dawh dueng tho laipalah hmalae tue dawh kaw lah kaawm e minnaw pueng e lathueng, kalvanlae amae aranglah a rasang poungnae koe Khrih



teh tahungnae hmuen a poe toe. <sup>22</sup> Cathut ni a khok rahim hnocawngca pueng a ta pouh teh Kawhmoun hanelah hnocawngca e lathueng vah lû lah ao sak. <sup>23</sup> Hote amae tak hateh hnocawngca hah hnocawngca hoi ka kuep sak e ni a kuepnae Khrih e a tak lah ao.

## 2

### *Duenae koehoi hringnae*

<sup>1</sup> Nangmouh teh ahmaloe vah namamae yon hoi sakpayon e yon-naw dawk na due awh teh, <sup>2</sup> kahli dawk kâawwnae kapatuengkung, lawkngainae katawnhoehnaw koe atu thaw ka tawk e muitha ngainae patetlah het talaivan phung patetlah hote yonnae dawkvah na hring awh. <sup>3</sup> Maimouh pueng haiyah ahmaloe teh, ahnimanaw patetlah hring awh teh, ma takngainae dawkvah hring awh. Takngainae hoi lungngainae patetlah kâroe awh teh, alouknaw patetlah a lungkhueknae ka khang e lah o awh. <sup>4</sup> Hatei lungmanae hoi kakawi Cathut ni, maimouh a lungpatawnae kalenpoung kecu dawkvah, <sup>5</sup> sakpayon e yonnaw dawk kadout awh e maimouh hah, Khrih hoi cungtalah na hring sak awh toe. Nangmouh teh a lungmanae lahoi rungngang lah na o awh. <sup>6</sup> Hathnukkhu, Khrih Jisuh thung maimouh hah Khrih hoi cungtalah na thaw sak awh teh, kalvanlae tahungnae hmuen na poe awh toe. <sup>7</sup> Hethateh, maimouh lung na patawnae hah Khrih Jisuh thung a kamnue sak teh lungmanae hoi kawî e hah hmalae tuengnaw dawk a kamnue sak nahane doeh. <sup>8</sup> Lungmanae dawk doeh yuemmae lahoi rungngang lah o awh. Hnokahawi sak e dawk hoi rungngang lah o e nahoe. Cathut e poehno doeh ka tho. <sup>9</sup> Ma ni kahawi hno sak e dawk nahoe. Hatdawkvah apihai kâoup thai hoe. <sup>10</sup> Hno kahawinaw sak awh nahanlah, Khrih Jisuh thung sak katha e lah o awh. Maimouh ni hnokahawi sak awh hanelah Cathut ni sut na rakueng toe.

### *Khrih dawk buet touh lah onae*

<sup>11</sup> Hatdawkvah, nangmouh teh Jentel lah na o awh teh, kut hoi takthai dawk vuensoma lah kaawm e naw ni nangmouh teh vuensom ka a hoe e naw ati awh e hah panuek awh. <sup>12</sup> Hatnavah, Isarel miphun lahai na awm awh hoe. Lawkkamnae hoi hai na kabot awh hoe. Ngaihawinae hai na tawn awh hoe. Talaivan Cathut laipalah na o awh e hah panuek awh. <sup>13</sup> Nangmouh teh ahmaloe vah na kahlat awh nakunghai, atuteh Khrih Jisuh thung Khrih e thipaling lahoi na hnai awh toe. <sup>14</sup> Bangkongtetpawiteh, na ka taransakkung rapanpui hah a raphoe teh miphun kahni touh hah miphun buet touh lah a coung sak toe. Bawipa teh maimae roumnae lah ao. <sup>15</sup> Phunglawknaw dawk kaawm e kâpoelawknaw hoi kâkuen e kâlawk hah amae a tak dawk hoi a raphoe toe. Miphun kahni touh e hah miphun buet touh dueng e tami katha lah a sak teh a kâmaihawi sak toe. <sup>16</sup> Thingpalam dawk taran a raphoe teh, thingpalam lahoi hote miphun kahni touh teh tak buet touh thung Cathut hoi bout kâmaihawi awh toe. <sup>17</sup> Hote Khrih ni a tho teh, ahlanae koe kaawm e nangmouh hoi a hnainae koe kaawm e kaimouh teh roumnae kamthang kahawi hah na pâpho pouh. <sup>18</sup> Hottelah Khrih lahoi maimouh roi teh, lungthin muitha buet touh lah o awh teh, Pa koe kâen thainae kâ hmu awh toe.

<sup>19</sup> Hatdawkvah, nangmouh teh miphun alouke nahoe toe. Imyin lahai na awm awh hoe toe. Tami kathoungnaw e miphun lah na o awh teh



Cathut e imthung lahai na o awh toe. <sup>20</sup> Bangtelamaw tetpawiteh, adu lah kaawm e gunceinaw hoi profetnaw e van vah, patuen pacoung sin teh sak e lah na o awh. Khrih Jisuh ama teh a takinlung lah ao. <sup>21</sup> Hote takinlung hoi kOUNg ka kâkuen lah a rOUNg teh Bawipa hanelah kathounge bawkim lah a coung. <sup>22</sup> Hote hmuen teh Cathut ni a Muitha lahoi ao nahanelah nangmouh teh kaimouh hoi cungtalah sak e lah o awh.

### 3

#### *Jentelnaw koe Pawl thaw tawknae*

<sup>1</sup> Hote kong dawK, kai Pawl teh nangmouh Jentelnaw hane dawkvah Khrih Jisuh e thongkabawt lah ka o. <sup>2</sup> Nangmouh ni na thai tangcoung e patetlah kai koe na poe e Cathut lungmanae teh nangmouh hane dawK doeh kai ni ka khang. <sup>3</sup> A lungmanae kai koe panuesaknae lahoi lathueng lah youn touh ka thut tangcoung e patetlah, Cathut ni a pâphonae lahoi yah, hrolawK hah na panue sak. <sup>4</sup> Hote ca na touk awh pawiteh Khrih e hrolawK ka panue e hah na panue awh han. <sup>5</sup> Hote hrolawK hah tami kathoungnaw, gunceinaw hoi profetnaw koe atu e se nah Muitha lahoi a pâpho e patetlah alouke senaw dawK taminaw koe pâpho hoeh. <sup>6</sup> Hote hrolawK teh Jentelnaw ni kamthang kahawi lahoi Isarelnaw hoi cungtalah râw a coe awh teh tak buet touh lah a onae lahoi Khrih Jisuh lahoi lawkkamnae hah cungtalah a hmawng van awh. <sup>7</sup> Hnosakthainae lahoi poehno a lungmanae hah kai koe na poe toe. Kai teh hote kamthang kahawi ka pâpho e san lah ka o. <sup>8</sup> Pâphue teh ka baw thai hoeh e Khrih e kuepnae kamthang kahawi hah Jentelnaw koe dei pouh hanelah, <sup>9</sup> hnocawngca pueng hah Khrih lahoi yah, ka sak e Cathut dawkvah ayan e se pueng dawK hro lah kaawm e hote hrolawK hah tami pueng koe pâpho pouh hanelah kai teh tami kathoungnaw thung dawK, kathoungpoung naw hlak hai hoe kathounge lah ka o. <sup>10</sup> Bangkoktetpawiteh, maimae Bawipa Khrih Jisuh dawK a yungyoe pouknae a tawn e patetlah, <sup>11</sup> kalvanlae bahunaw hoi hnosakthainae dawkvah, Cathut e kângairu a lungangnae hah Kawhmoun lahoi atuvah panue awh nahane doeh. <sup>12</sup> Maimouh ni hote Bawipa yuemnae lahoi lungtang awh teh, Cathut koe kâhnai thainae tawn awh toe. <sup>13</sup> Hatdawkvah, nangmae bawilennaeh hanlah ka khang e reithainae hah na hmu awh navah na lungpout awh hanh.

#### *Efisanaw hanelah ratoumnae*

<sup>14</sup> Hete kongnaw dawkvah, khok ka cuengkhuem laihoi, <sup>15</sup> kalvan hoi talai kaawm e imthungkhu abuemplaeh a kungpui lah kaawm e, maimae Bawipa Jisuh Khrih e Pa hmalah ouk ka ratoum. <sup>16</sup> Ouk ka ratoum e teh, Muitha lahoi yah, nangmae thung lae tami thao thasainae hoi a cak vaiteh, <sup>17</sup> yuemnae lahoi Khrih ni nangmae lungthin thungvah ao nahan, lungpatawnae dawK patue e, tangpha a payang teh, <sup>18</sup> tami kathoungnaw patetlah hnosakthainae na tawn awh teh, Khrih e lungpatawnae adung, asaw, arasang, akaw e hah kapek teh na panue thai awh nahan, <sup>19</sup> maimae panuenaeh lahoi panue thai hoeh e Jisuh Khrih e a lungpatawnae hah panue thai awh nahanlah Cathut e kuepnae hoi kawi awh nahan ouk ka ratoum.

<sup>20</sup> Maimouh dawK kamnuek e a bawilennaeh patetlah maimouh ni pouk teh hei e hlak acawilah ka sak thai e Cathut ni, <sup>21</sup> Khrih Jisuh lahoi



Kawhmoun dawk talai apout hoehroukrak a yungyoe bawilen lawiseh. Amen.

## 4

### *Khrih tak dawk buet touh lah onae*

<sup>1</sup> Nangmouh teh kaw lah na onae hoi ka kamcu lah na hring awh nahan Bawipa hanelah thongkabawt e kai ni tha na poe awh teh na hroecoe awh. <sup>2</sup> Bangpueng koehai kârahnoumnae, lungdo lungnemnae, lungsawnae, lungkâpatawnae hoi buet touh hoi buet touh kângaithoum awh. <sup>3</sup> Lungmawngnae hoi na katekkung Muitha dawk buet touh lah onae hah a cak nahanelah panki awh. <sup>4</sup> Tak buet touh dueng doeh kaawm. Muitha buet touh dueng doeh kaawm. Ngaihawinae buet touh dueng dawk doeh nangmouh teh na kaw awh. <sup>5</sup> Bawipa buet touh dueng doeh kaawm. Yuemnae buet touh dueng doeh kaawm. Baptisma buet touh dueng doeh kaawm. <sup>6</sup> Maimouh pueng e Pa, Cathut buet touh dueng doeh kaawm. Ahni teh maimouh pueng e lathueng vah ao teh, maimouh pueng lahoi ao teh, maimouh pueng e thung vah ao.

<sup>7</sup> Hatei Khrih ni poehno na poe awh e patetlah mama ham lengkaleng rip coe awh. <sup>8</sup> Hatdawkvah, Cakathoung dawk thut e teh, a rasangnae koe a luen navah man e san hah a hrawi teh, taminaw koe poehnonaw a poe. <sup>9</sup> A luen ti navah ahmaloe talai thungvah a kum e hah a dei ngainae nahoehmaw! <sup>10</sup> Ka kum e teh alouke nahoe. A cawngca pueng kuep sak hanlah kalvannaw pueng a tapuet teh ka luen takhang e hah doeh.

<sup>11</sup> Khrih e a tak hah sak awh teh, Cathut e a taminaw ni a thaw tawk awh thai nahanelah a pathoup awh han. <sup>12</sup> A tangawn teh gunceinaw lah, atangawn teh profetnaw lah, atangawn teh evangelistnaw lah, atangawn teh pastornaw hoi kacangkhaikungnaw lah thaw lengkaleng a poe. <sup>13</sup> Hottelah a poenae teh maimouh kaawm e pueng ni yuemnae dawh hai, Cathut Capa panuenae dawh hai, cungtalaw rount awh teh, Khrih e kuepnae hmuene koe totouh pha awh nahane doeh.

<sup>14</sup> Bangkongtettapawiteh, taminaw e dumpyenna hoi yonnae koe lah tacueknae, cangkhaing kahlî aphunphun ni avoivang lah a palek e camo patetlah bout awh awh laipalah, <sup>15</sup> lungkâpatawnae dawkvah lawkkatang hah dei awh nateh bangpuengpa dawh lû lah kaawm e Khrih dawh rount awh nahane doeh. <sup>16</sup> Hote lû koehoi doeh tak abuemlah ni a kâkuet awh teh, kâletlout koe kaawm e pueng ni hai tha hoi akawi awh. Puengcang kaawm e pueng ni mamae thaw lengkaleng a tawh awh teh lungpatawnae dawh lengkaleng a rount awh.

### *Hring katha nuencang*

<sup>17</sup> Hatdawkvah paletpalut lah ka pouk awh ni teh kahring awh e Jentelnaw patetlah bout na hring awh hoeh nahan Bawipa e kâ lahoi lawk na thui awh. <sup>18</sup> Ahnimouh teh lungthin mit a dawn awh. Lungthin patanae lahoi khoeroe a panue awh hoeh dawkvah Cathut hringnae hoi a kâkapek awh. <sup>19</sup> Ahnimouh teh kayayeirai panuek awh hoeh. Noenae dawh a sawtaw awh teh kakhin e hno aphunphun hah hoehoe a sak awh nahanlah mahoima radueknae kut dawh a kâpoe awh toe.

<sup>20</sup> Hot patetlah na o awh nahan Khrih e cangkhaing hah na kamtu awh hoeh. <sup>21</sup> Jisuh dawh lawkkatang ao e patetlah a lawk hah na thai awh teh na kamtu awh. <sup>22</sup> Ahmaloe na hringnae, dymyen hounlounnae, lungthin hoi rawknae koe ka phat e tami karuem hah na rading awh nahan



cangkhai lah na o awh. <sup>23</sup> Hottelah cangkhai lah na onae teh a katha e lungthin na tawn awh nahane doeh. <sup>24</sup> A katang e lannae hoi thoungnae dawck Cathut hoi kâvan lah sak lah kaawm e tami katha hah khohnat awh.

<sup>25</sup> Hatdawkvah, laithoe e lawk hah takhoe awh nateh, lawkkatang dueng hah buet touh hoi buet touh kâdei awh. Bangkongtetpawiteh, maimouh pueng teh tak buet touh e puengcang lah o awh. <sup>26</sup> Na lungkhueknae dawck yon bawck sak awh hanh. Na lungkhueknae roum laipalah kanîloum sak awh hanh. <sup>27</sup> Kahraimathout hanelah hmuen poe awh hanh. <sup>28</sup> Ouk ka parawt e ni bout parawt laipalah karoedengnaw a poe thai van nahan a kut hoi thaw kahawi tawck naseh.

<sup>29</sup> Kakhin e lawk kam touh boehai nangmae pahni dawck hoi tâcawt sak awh hanh. Ka thai e taminaw hanelah ahawinae ao nahan a panki e patetlah rounng nahane lawk dueng mah dei awh. <sup>30</sup> Ratangnae hnin totouh hanelah nangmouh tacikkinkung Cathut e Kathoung Muitha hah a lung mathout sak awh hanh. <sup>31</sup> Lungduemnae, Lungphuenna, Lungkhueknae hramkinae, tami minhmai ka mathout lah lawk deinae, hounroena, pueng hah takhoe awh. <sup>32</sup> Buet touh hoi buet touh kahawi hno saknae, kâpahrennae, Cathut ni Khrih thung vah nangmae yon a ngaithoum e patetlah buet touh hoi buet touh yon kângaithoum awh.

## 5

### *Cathut e ca lah o awh*

<sup>1</sup> Hottelah nangmouh teh Cathut ni pahren e a ca lah na o awh dawkvah, Cathut koe kamtu awh. <sup>2</sup> Cathut koe hmuitui lah ao thai nahan Khrih ni amae a tak hah a kâhnawng teh thuengnae a sak e lahoi maimouh lung na pataw e patetlah lungpatawnae dawkvah hring awh.

<sup>3</sup> Hatei, kamsoumhoehe napui tongpa yonnae, kakhin lah hringnae abuemlah, hounlounnae hah tami kathoungnaw ni a roun kawi e lah ao e patetlah lawk hoi boehai dei awh hanh. <sup>4</sup> Ka kamcukamnat hoehe e lawk, panuilai, thangpoutlai, dei e patetnaw hai takhoe awh nateh pholenna lawk hah dei awh. <sup>5</sup> Kamsoumhoehe napui tongpa yonnae ka sak e tami, kakhin lah ka hring e tami, meikaphawck bawcknae lah kaawm e hounlounnae hoi kahring e tami apipatet haiyah, Khrih hoi Cathut uknaeram dawck bangpatet e râw boehai coe mahoehe tie teh na panue awh.

### *Angnae hoi hmonae*

<sup>6</sup> Apipatet koehai ayawmyin e lawknaw hoi kâdum sak awh hanh. Hotnaw kecu dawck Cathut lungkhueknae teh lawk ka ngai hoehe e naw koevah a pha. <sup>7</sup> Hatdawkvah, ahnimouh hoi rei kambawng awh hanh.

<sup>8</sup> Ahmaloe vah, nangmouh teh hmonae dawck na o awh. Atuteh Bawipa dawck angnae lah na o awh dawkvah, angnae canaw patetlah hring awh.

<sup>9</sup> Angnae a pawnaw teh hawinae, lannae hoi lawkkatang dawck hringnae hah doeh. <sup>10</sup> BAWIPA Cathut ni a ngai e hno teh bangne tie hah kamtu awh. <sup>11</sup> Ahawinae banghai kaawm hoehe e hmonae thawng hoi kâbet laipalah hotnaw hah letlang pâpho pouh awh. <sup>12</sup> Bangkongtetpawiteh, arulahoi sak e hnonaw dei e ca patenghai kaya a tho rah. <sup>13</sup> Yon pueng teh angnae lahoi doeh a kamnu. Ka kamnu sak e hno haiyah angnae doeh. <sup>14</sup> Hatdawkvah, hettelah a dei awh. Ka ip nang kâhlaw leih, duenna koehoi thaw leih, hottelah na sak pawiteh Khrih ni angnae na poe han.



### *Hring katha dawk pou caknae*

<sup>15</sup> Hatdawkvah tamipathu patetlah awm laipalah, tami a lungkaang patetlah kheikhei na tarawi awh nahan kâhruetcueth awh. <sup>16</sup> Atu e a hninnaw teh a mathoe tOUNg dawkvah atueng hno panuek awh. <sup>17</sup> Hatdawkvah, pathu a hanh leih. Bawipa ni a ngai e hno hah kapek nateh ka panuek e tami lah awm awh leih. <sup>18</sup> Sak payonnae kampaisakkung, misurtui hoi paruinae hah roun awh nateh Muitha hoi kawi awh. <sup>19</sup> Sam la, pholennae la, hoi muitha hringnae koe lah tha kâpoenae lanaw hoi buet touh hoi buet touh kâdei awh nateh lunghawî nalahoi Bawipa pholennae la sak awh. <sup>20</sup> Pa Cathut koevah Bawipa Jisuh Khrih min lahoi hnocawnga dawk pout laipalah lunghawinae lawk dei awh.

<sup>21</sup> Cathut barinae lahoi buet touh hoi buet touh e rahim kârahnoum awh.

### *Yunaw*

<sup>22</sup> Yunaw, Bawipa e uknae rahim na o awh e patetlah vanaw e uknae rahim vah awm awh. <sup>23</sup> Bangkongtetpawiteh, Khrih teh Kawhmoun e lû lah ao e patetlah vâ teh yu e lû lah ao. Ahni teh tak runngangkung lah ao. <sup>24</sup> Kawhmoun teh Khrih e uknae rahim a kâhnawng e patetlah yunaw teh bangpueng dawk vanaw e uknae rahim vah kâhnawng van awh.

### *Vanaw*

<sup>25</sup> Vânaew: Khrih ni Kawhmoun a lungpataw teh amahoima a kâhmoun e patetlah, yunaw hah lungpataw awh. <sup>26</sup> Hottelah yon thoung lah ao teh khinnae awmhoeh. Vuen cipeinae awmhoeh. Ka kamcu e hah Khrih ni ama koe a hnawng nahanelah, <sup>27</sup> lawkkatang tui hoi a pâsu teh thoungsak nahan hote Kawhmoun hanelah a hringnae a kâpasoung toe. <sup>28</sup> Hot patetvanlah, vanaw, namamouh hoi namamouh na lungpataw awh e patetlah yunaw hah lungpataw awh. A yu ka lungpataw e tami teh amahoima hai a lungpataw. <sup>29</sup> Ma e takthai ka hmuhma e api buet touh hai awmhoeh. Khrih ni Kawhmoun hah a kawkhik e patetlah tami pueng ni amahoima e tak teh a kawkhik awh. <sup>30</sup> Bangkongtetpawiteh, maimanaw teh amae a takthai, a hruhrawng lah o awh dawkvah a takthai e puengcang lah o awh. <sup>31</sup> Hete kong dawkvah, tongpa ni a na pa hoi a manu a ceitakhai vaiteh a yu hoi tak a hmawng dawkvah kahni touh roi teh tak buet touh lah a coung han. <sup>32</sup> Hethateh, hrolawk doeh. Hettelah ka ti navah, Khrih hoi Kawhmoun ka dei ngainae a tho. <sup>33</sup> Hatdawkvah, nangmouh ni namamae takthai lungpataw awh e patetlah yu hah lungpataw awh. Yu ni hai vâ hah bari van naseh.

## 6

### *Canaw hoi manu napanaw*

<sup>1</sup> Canaw: Bawipa ngainae patetlah nupanaw e lawk hah ngâi awh. Hot teh kamsoum e doeh. <sup>2</sup> Manu hoi na pa hah bari awh. Hotteh apasuek e kâpoelawk hoi lawkkam lah ao. <sup>3</sup> Hottelah na sak pawiteh, nang teh talai van hringsawnae hoi hawinae na coe han tie lawkkam teh apasuek poung e lawkkam e kâlawk lah ao.

<sup>4</sup> Panaw, canaw hah a lungphueng sak awh hanh. Bawipa e cangkhaenae patetlah cingthui awh nateh kawkhik awh.

### *Sannaw*

<sup>5</sup> Sannaw, Khrih e lawk na ngâi awh e patetlah talai bawinaw e lawk hai taki nalahoi lunghringnae tawn laipalah ngâi awh. <sup>6</sup> Mithmu dueng



taminaw e lung karoumsak e lah awm laipalah, Khrih e san patetlah Cathut ngainae hah lungtho nalaihoi tarawi awh. <sup>7</sup> Tami e san lah kaawm e patetlah dueng pouk laipalah, Bawipa e a san lah kaawm e patetlah bari nalaihoi a san lah awm awh. <sup>8</sup> Kahawi e hno ka sak e tami teh san nakunghai, tami kahlout nakunghai, Bawipa koehoi a tawk e patetlah bout hmu han tie hah panuek awh.

### *Bawinaw*

<sup>9</sup> Bawinaw, namamae sannaw koe hot patetvanlah sak awh. Nangmae Bawipa teh kalvan ao tie hoi ahni teh apie minhmai hai khen hoech tie hah panuek awh.

### *Cathut e tarantuknae puengcang*

<sup>10</sup> A hnuktengpoung lah ka hmaunawngghanaw, Bawipa lahoi thoseh, thaonae bahu lahoi thoseh, kacaklah awm awh. <sup>11</sup> Kahraimathout e dumpyennae na ngang thai awh nahan, Cathut ni na pathoup pouh e puengcang hoi kamthoup awh. <sup>12</sup> Bangkongtetpawiteh, takthai hoi kaawm e taran hoi kâthe awh hoech. Uknaenaw, kâtawnnaenaw, talai hmonae ka ukkungnaw, kalvanlae muitha kathoutnaw hoi doeh kâthe awh. <sup>13</sup> Hatdawkvah, atueng kamathout e hnin dawc kacaklah na kangdue thai nahan, thaw na cum teh na ngang thai awh nahan, Cathut e puengcang kakuep e hah sin awh. <sup>14</sup> Lawkkatang taisawm kâyeng awh. Lannae saiphei hah kho awh. <sup>15</sup> Lungmawngnae kamthang kahawi pâpho nahanlah khokkhawm hah khawm awh. <sup>16</sup> Kahrai ni na ka e hmaisene hah na ngang thai awh nahan yuemnae bahling hah senehmaicanaw e a van vah patuem sin awh. <sup>17</sup> Rungngangnae sumluhuem hah huem awh nateh, Cathut e lawk Muitha tahlou hai patuem awh. <sup>18</sup> Pout laipalah ratoumnae a phunphun lahoi ratoum awh. Hottelah na ratoum awh navah nâtuék hai na thathout awh hanh. Na lungpout awh hanh. Kai hane hoi tami kathoungnaw hane hai ratoum awh nateh khenyawn awh.

<sup>19</sup> Hete kamthang kahawi e laicei lah ka o dawc doeh sumbawtarui hoi na katek awh. Hote kamthang kahawi hah lungtang nalaihoi ka dei thai nahan, <sup>20</sup> kamthang kahawi hrolawc hateh pâpho hane roeroe lah ao dawkvah taranhawi nalaihoi ka pâpho thai nahan kai hane hai ratoum awh. <sup>21</sup> Kai dawc ka tho e hnonaw hoi ka sak e hnonaw hah na panue thai awh nahan, Bawipa koe yuemkamcu lah thaw ka tawc e ka pahren e ka nawngha Taisikas ni abuemlahoi nangmouh koe a pâpho han doeh.

### *Lawkthuinae*

<sup>22</sup> Nangmouh ni kaimae kamthangnaw hah na panue awh nahan, ahni ni nangmouh lung na pahawi nahanlah ahni hah nangmouh koe ka patoun e doeh. <sup>23</sup> Hmaunawngghanaw nangmouh koe lungmawngnae awm lawiseh. Pa Cathut hoi Bawipa Jisuh Khrih ni na poe e yuemnae hoi lungpatawnae teh nangmouh koe awm lawiseh. <sup>24</sup> Maimae Bawipa Jisuh Khrih lungpataw katangnaw koe a lungmanae awm lawiseh. Amen.



## FILIPPI (The Epistle of Paul to the Philippians)

### *Lawk karouknae*

<sup>1</sup> Kai Pawl hoi Timote, Jisuh Khrih e a san lah kaawm e ni Filippi kho kaawm e bishopnaw hoi hotunaw, Khrih Jisuh thung tami kathoungnaw pueng koe ca na patawn awh. <sup>2</sup> Maimae Pa Cathut hoi Bawipa Jisuh Khrih koehoi e lungmae hoi roumnae teh nangmouh koe awm lawiseh.

### *Lunghawi lawk deinae hoi ratoumnae*

<sup>3</sup> Nangmouh na pouk nah tangkuem, Cathut koe lunghawinae lawk ouk ka dei. <sup>4</sup> Ka ratoum tangkuem nangmouh hanlah lunghawinae lungthin hoi pou ka ratoum. <sup>5</sup> Bangkongtetpawiteh, nangmouh teh apasueke hnin koehoi atu totouh a thaw kahawi dawc cungtalai rei ka tawc e lah na o awh. <sup>6</sup> Nangmouh koe hnokahawi ka kamtawng e Cathut ni Jisuh Khrih e hnin totouh thaw na cum sak a han doeh ti yuemnae ka tawn.

<sup>7</sup> Nangmanaw hoi ka kâkuen lah hettelah pouknae ka tawn e heh kahawi e lah ao. Nangmanaw pueng ni kai thongim ka bo nah thoseh, kamthang kahawi deinae dawc thoseh, kai hoi a lungmae cungtalai rei ka hmawng awh e lah na o awh dawkvah nangmouh teh ka lungthin dawc pou na o awh. <sup>8</sup> Nangmouh teh Jisuh Khrih e lungpatawnae lahoi na rabuipoung awh tie na kapanuekkhaikung teh Cathut doeh.

<sup>9</sup> Nangmae lungpatawnae teh a tang e lungangnae hoi pouknae aphun-phun dawc hoehoe kuep teh, <sup>10</sup> Ka lentoe e hno hah kapeknae na tawn thai awh nahan hoi Jisuh Khrih e hnin nah kathoung lahoi toun awm laipalah na o thai awh han. <sup>11</sup> Jisuh Khrih lahoi lanna apaw dawc na kuep thai awh teh Cathut lentoe kamnue thai nahane hoi a bawilenna na pholen thai awh nahan ka ratoum.

### *Lawk kamthang a pungnae*

<sup>12</sup> Hmaunawngghanaw kai dawc kaphate hnouaw ni kamthang kahawi hoe a kampai sak tie na panue thai awh nahanlah na ngai khai awh.

<sup>13</sup> Hatdawkvah, Khrih kecu dawc kateknae ka khang e heh, siangpahrang im koe dueng laipalah, hmuem tangkuem a kamnue. <sup>14</sup> Kapap e hmaunawngghanaw ni kai ni kateknae ka khang kecu dawc Bawipa dawc yuemnae a cak awh teh, takinae tawn laipalah taranhawi laihoi kamthang lawk a dei awh.

<sup>15</sup> Tangawn ni teh hmuhmae lungthin hoi kâtaran hanlah Khrih kamthang a dei awh. <sup>16</sup> A lungpatawnae lungthin hoi ka dei e taminaw ni kahawi e kamthang heh Bawipa ni na poe e thaw doeh ti a panue dawc pahrennae lungthin katang hoi a pâpho awh. <sup>17</sup> Alouknaw ni teh kai katek lah ka onae dawkvah, runae hoehoe kâhmo seh tie ngai lahoi yah, kâtânae lung hoi Khrih e kamthang kahawi teh a dei awh. <sup>18</sup> Telah pawiteh bangtelamaw dei awh han, kâsak laihoi nakunghai, lawkkatang laihoi nakunghai, Khrih kong dei lah ao dawc ka konawm. Hmalah hai ka ko bout a nawm han. <sup>19</sup> Bangkongtetpawiteh, nangmae ratoumnae naw hoi Jisuh Khrih e Muitha koehoi kabawpnae naw hoi hetnaw teh, kai ka hloutnae lah ao han telah ka panue. <sup>20</sup> Kai teh bangpatet hno dawc hai kayayeirai takinae awm hoehe. Yampa e patetlah atu hai taranhawinae hoi



ka kawi lahun, ka hring hai thoseh, ka due hai thoseh ka takthai dawk hoi Khrih teh pholen lah ao han tie ngaihawinae kalenpoung ka tawn.

### *Khrih hanlah hringnae*

<sup>21</sup> Bangkongtetpawiteh, kai kahringnae teh Khrih doeh, ka due haiyah meknae lah ao. <sup>22</sup> Hahoi ka hring rah pawiteh apu kaawm e thaw bout ka tawk thai nahanlah bangmaw ka rawi han ti ka panuek hoeh. <sup>23</sup> Hatdawkvah kai teh hno kahni touh e rahak vah ka o. Kai teh talai hringnae ceitakhai vaiteh Khrih hoi o hanelah ka ngai toe, hot teh hoe kahawi e doeh. <sup>24</sup> Hateiteh, hete tak hoi kai roup kaawm rah pawiteh nangmouh hanlah hoe pankinae lah ao. <sup>25</sup> Hatdawkvah yuemnae a roungh nahan hoi lunghaw i nahanlah kahring rah pawiteh nangmouh hoi cungtalai rei o han tie hah yuemnae lahoi ka panue. <sup>26</sup> Hat nah nangmouh koe bout ka tho toteh kai hoi Jisuh Khrih dawk na lunghawinae hoe apap han.

<sup>27</sup> Bangtelah nakunghai nangmouh teh Khrih e kamthang kahawi hoi kamcu lah khosak awh. Hottelah na hring awh pawiteh Muitha buet touh dawk kacaklah na kangdout e lah awh vaiteh, lungkanging lahoi Khrih e kamthang kahawi yuemnae dawk thaw rei ka tawk e lah na o awh han. Na ka taran e naw kong dawk, takinae banghai awhhoe tie hah, nangmouh hoi ka kâhmo nakunghai, kamphei nakunghai ka panue thai han. <sup>28</sup> Hottelah takihoehnae teh ahnimouh hanlah rawk kahmanae lah ao. Nangmouh hanelah teh rungngangnae lah ao teh Cathut koehoi ka tho e lah ao. <sup>29</sup> Bangkongtetpawiteh, Khrih thaw tawk e hah ama yuem e dueng laipalah, ama hanelah runae khang sin hanelah hai na poe sin e a tho dawkvah, <sup>30</sup> kai ni ka kâhmo e hai na panue awh. Atu hai kai ni ka kâhmo e patet e hah nangmouh ni na kâhmo awh.

## 2

### *Kayuemnaw e kârahnoumnae*

<sup>1</sup> Hatdawkvah Khrih dawk thapoenae, lungpatawnae, Muitha hoi kâhuikona, kâpahrennae tie buetbuet touh awh pawiteh, <sup>2</sup> nangmouh ni buet touh hoi buet touh lungkâpataw awh nateh, lungthin kâkapeknae tawn laipalah lungthin cungtalai pouknae lahoi ka lunghawinae kuep sak awh. <sup>3</sup> Kâtaran ngainae lungthin, kâoupkapawinae lungthin tawn laihoi bangpatet e hno hai sak awh hanh. Ayânaw kai hlah ahawi telah buet touh hoi buet touh kârahnoumnae lungthin hoi khosak awh. <sup>4</sup> Ma hane ahawinae dueng pouk laipalah ayâ louk hane hai pouk pouh van awh.

### *Khrih a kârahnoumnae hoi oupnae*

<sup>5</sup> Khrih Jisuh thung kaawm e lungthin hah nangmouh koehai awh sak van awh. <sup>6</sup> Hote Bawipa teh Cathut counghae hoi a kuep ei teh Cathut hoi kâvannae thama lahoi lawp hanelah pouknae tawn hoeh. <sup>7</sup> Amae a reng a ceitakhai teh san counghae a kâmahrawk teh tami patetlah a khe. <sup>8</sup> Hottelah tami counghae hoi a kuep teh thingpalam daw duenae totouh a khang teh amahoima a kârahnoum. <sup>9</sup> Hatdawkvah Pa Cathut ni Bawipa teh a lathueng poung lah a tawm teh min pueng hlah ka talue poung e min a poe. <sup>10</sup> Bangkongtetpawiteh, Jisuh min barinae lah kalvan kaawm e, talai daw kaawm e, talai thung kaawm e kâroe tako pueng ni khok a cuengkhuem vaiteh, <sup>11</sup> Jisuh Khrih teh Bawipa doeh telah pahni hoi a kampangkhai teh, Pa Cathut a bawilenna a kamnue sak nahane doeh.



### *Talai angnae*

<sup>12</sup> Hatdawkvah ka pahren e naw, lawk pou na ngâi awh e patetlah nangmouh teh ka mithmu lawk na ngâi e dueng laipalah, kai hoi na kâhla nahai lawk na ngâi awh teh, takinae lung hoi nangmae rungngangnae hah kamnuék sak awh. <sup>13</sup> Bangkongtetpawiteh, nangmouh teh ngainae tawn sak han e, tawk sak han e, nangmae thung lungthocalah hoi thawtawkkung teh Cathut doeh.

<sup>14</sup> Bang patet e thaw dawkh hai phuenangnae tawn laipalah tawkh awh. <sup>15</sup> Hottelah na tetpawiteh tami kadumyennaw hmalah nangmouh teh tounhoehe hoi ayâ runae ka poe hoehe e Cathut e ca lah na o awh han. Hringnae lawkkatang hah kacaklah na patuep awh vaiteh, kalvan lah kaawm e hmaiangnaw patetlah ahnimaie thung pheng a tue pouh han. <sup>16</sup> Hottelah hoiyah kai teh yawmyin lah ka yawng hoehe tie hoi yawmyin lah ka kâyawm e nahoehe tie hah Khrih e hnin a pha toteh ka konawm han. <sup>17</sup> Hot dueng laipalah nangmae yuemnae hoi kâkuen e bawknae, hoi thuengnae naw dawkh kai na thueng awh han ati awh nakunghai, ka lunghawih vaiteh nangmouh pueng hoi cungtalalah ka konawm han. <sup>18</sup> Hot patetvanlah nangmouh hai na lunghawih awh, kai hoi cungtalalah konawm awh.

### *Timote hoi Epaphroditus*

<sup>19</sup> Nangmae akongnaw ka thai navah ka tha hoe ao. Nangmouh koe Timote tang ka patoun thai nahanelah, Jisuh Khrih dawkh ngaihawinae ka tawn. <sup>20</sup> Bangkongtetpawiteh, Timote patetlah kai hoi lungkânging niteh, nangmae hawih nahanelah, ka pouk katang e tami buet touh hai kai koe awmhoeh. <sup>21</sup> Taminaw pueng teh Khrih Jisuh ahawih nahan tawng awh hoehe, ma hawih nahan dueng doeh a tawng awh. <sup>22</sup> Hatei Timote teh kai hoi cungtalalah, a capa hoi a na pa patetlah kamthang kahawih hanelah thaw ka tawkh roi katang doeh tie ahni ni a kamnuék sak e nangmouh ni na panue awh. <sup>23</sup> Hatdawkvah kai dawkh bangtelah ao han tie ka panue nah ahni teh nangmouh na o koe tang ka patoun han telah pouknae ka tawn. <sup>24</sup> Kama roeroe hai palang ka tho thai han doeh telah Bawipa dawkh yuemnae ka tawn.

<sup>25</sup> Ka nawngaha Epaphroditus teh nangmouh koe atu patoune hane a panki telah ka pouk. Ahni teh kai hoi thaw tawkh hui, ransa hui lah ao. <sup>26</sup> Bangkongtetpawiteh ahni patounnae a kong nangmouh ni na thai a dawkh doeh. Ahni ni nangmanaw pueng na rabui lawi vah a lung nawm hoehe. <sup>27</sup> Ahni teh meimeie kadout lah a pawaw, hatnavah Cathut ni ahni teh a pahren, ahni dueng a pahren e nahoehe, kai ka lung boutbout a mathoe hoehe nahanelah, kai hai na pahren e lah ao. <sup>28</sup> Hatdawkvah nangmouh teh ahni hah bout na hmu awh nah konawm sak nahan, kai hai ka lung tha a dam nahan, ahni teh hoe a kâyawm dawkhvah ka patoun. <sup>29</sup> Hatdawkvah Bawipa khet lahoi lunghawinae lahoi ahni teh dâw awh. Hot patetlah e taminaw bari awh. <sup>30</sup> Bangkongtetpawiteh, ahnimouh ni kai na khetyawt awh, ka kuep hoehe rae thaw hah ahni ni a kuep sak hanelah ka hringnae kâhmoun teh Khrih e a thaw kecu dawkh duenae koe meimeie ka pha toe.



<sup>1</sup> Ahnoungepoung lah ka hmaunawngghanaw, Bawipa dawk na konawm awh. Kai ni boutbout ka thut nakunghai ka patang hoe. Bangkongtetpawiteh nangmouh teh karoumlah na o awh han. <sup>2</sup> Uinaw roun awh. Tami kahawi hoe e naw hah roun awh. Vuensoma e lah ka kâsawnaw roun awh.

### *Lunghawi lawk deinae hoi ratoumnae*

<sup>3</sup> Maimouh ni Cathut heh Muitha lahoi bawk dawkvah maimouh teh vuensoma katang e lah o awh. Bangkongtetpawiteh, maimouh teh talai dawk kamngawi awh laipalah, Khrih Jisuh thung konawm e lah o awh. <sup>4</sup> Hatei takthai koe lahoi kâoupkhai hane ka tawn van. Alouknaw ni kâoupkhai hane ao tet awh pawiteh kai dawk hoe ao. <sup>5</sup> Bangkongtetpawiteh, kai teh aphung patetlah ataroe hnin vuensoma lah ka o. Hebrunaw thung dawk Hebru, Isarel miphun Benjamin catoun Farasi lah ka o. <sup>6</sup> Lunghthone koe lahoi pawiteh, kawhmoun karektapkung lah ka o. Kâlawk dawk e lannae lahoi teh tounhoehe lah ka o.

<sup>7</sup> Hatei hete hnonaw pueng teh Khrih dawkvah banglahai ka pouk hoe toe. <sup>8</sup> Maimae Bawipa Khrih Jisuh panuene aphu kaawm e hno dawk bangpueng ka sung sak e lah ka pouk. Hote Bawipa kecu dawk bangpueng hai ka hnoun teh eivoi patetlah doeh ka pouk. <sup>9</sup> Ka lannae heh kâlawk dawk hoi laipalah Khrih thung yuemnae lahoi doeh ka coe, hote lannae teh Cathut koehoi e yuemnae lahoi doeh. <sup>10</sup> Kai ka ngainae teh Khrih panue hane hoi a ma bouthawnae panue vaiteh a ma a khangnae khang van han hoiyah a ma patetlah due van hane doeh. <sup>11</sup> Ka ngaihawinae teh, duene koehoi bouthawnae koe pha hane doeh.

### *Kawntung koe yawngnae*

<sup>12</sup> Kai teh ka kuepcing toe ka ti ngainae tho hoe. Khrih Jisuh ni hote thaw tawk thai nahanelah, kai hah na man dawkvah, kai ni hai hote thaw ka tawk thai nahanelah ka kâyawm. <sup>13</sup> Hmaunawngghanaw, kai ni ka kuet toe ka tie nahoe. Hatei buet touh ka sak e hno teh, hnuk lae naw ka pahnim teh, hmalae hnonaw koe lah ka kâyp. <sup>14</sup> Khrih Jisuh thung Cathut ni lathueng lahoi na kaw teh na poe hane suh hah ka hmu thai nahanlah kawntung koe kâyawm laihoi ka yawng.

<sup>15</sup> Hatdawkvah kacue e tami pueng ni teh het patetlah e lungthin tawn hanelah ao. Nangmouh dawk pouknae alouklouk na tawn awh pawiteh, hot patenghai Cathut ni a pâpho han. <sup>16</sup> Bangtelah nakunghai, maimouh ni atu totouh pha awh e patetlah hmalah hoe cet awh sei.

<sup>17</sup> Hmaunawngghanaw kaie khosaknae hah out awh. Kaimouh koehoi out kawi e patetlah katarawinaw hai nangmouh ni khen sin awh. <sup>18</sup> Kai ni hete kong dawk ka dei e patetlah atu hai ka mitphi bout a bo. Bangkongtetpawiteh Khrih e thingpalam hah ka taran e tami moi apap. <sup>19</sup> Ahnimouh teh rawknae koe a hringnae a pâpout awh. Bangkongtetpawiteh ahnimae Cathut teh vonpui doeh. Ahnimouh ni kaya kawi e hnopai dawkvah a kâoup awh teh talai hno dawk a lungpen awh. <sup>20</sup> Hatei maimanaw teh, kalvanlae tami lah o awh. Hote hmuene koehoi ka tho hane Runggangkung, Bawipa Jisuh Khrih hah maimouh ni ngaihaw awh. <sup>21</sup> Hote Bawipa teh bangpueng haiyah, amae lawkngai sak thainae bahu hoi banglah kaawm hoe e maimae tak hah bawilenna hoi ka kawi e amae tak hoi kâvan sak hanelah, a kâthungsak han.



## 4

*Hroecoenae naw*

<sup>1</sup> Hatdawkvah, kaie lunghawinae hoi bawilukhung lah kaawm e, ka pahren teh, ka rabui e, ka hmaunawngghanaw, ka dei e patetlah nangmouh teh ka pahren poung e, Bawipa dawkw kacaklah awm aw h ka pahrennaw.

<sup>2</sup> Euodias hoi Sintikhe, Bawipa dawkw lungthin suetalah na o aw h nahanlah na hroecoe aw h. <sup>3</sup> Kai hoi thaw rei ka tawkw huinaw nangmouh hai na dei pouh aw h. Kai hoi Klement, hahoi hringnae dawkw kâen e alouke thaw ka tawkw hui naw hoi kamthang lawkw deinae koe na kabawm e, hote napuinaw hah ka bawm aw h lah a.

<sup>4</sup> Bawipa dawkw konawm aw h haw, bout ka dei ko pou nawm aw h haw. <sup>5</sup> Nangmouh lungthin na nem aw h e teh tami pueng ni panuek naseh. <sup>6</sup> Bangpatet e hno dawkw hai lungpuennae tawn laipalah lunghaw-ilawkdeinae hoi ratoum aw h nateh, na kâhei han na ngai e pueng hah Cathut koe panuek sak aw h. <sup>7</sup> Hatnavah, taminaw ni panue thai hoeh e Cathut e rounnae teh Khrih Jisuh lahoi nangmae na lungthin hoi na pouknae naw hah a ring han.

<sup>8</sup> Ahnoungepoung lah hmaunawngghanaw kahman e, bari kawi e, kalan e, kacai e, ngai kaawm e, a kamthang kahawi e naw hoi na lungthin dawkw kawi sak aw h. <sup>9</sup> Nangmouh ni ahmaloe hoi kai koe na kamtu aw h teh, na hmu aw h teh na thai aw h e naw dawkw hring aw h. Hottelah na hring aw h pawiteh, rounnae Cathut teh nangmouh hoi rei a o han.

*Kabawpnae dawkw lunghawi lawkw deinae*

<sup>10</sup> Atu haiyah nangmouh ni kai hah khetyawt hanlah na lung bout a kuep aw h dawkvah, Bawipa dawkw puenghoi ka konawm. Hote lungthonae hah ahmaloe hai na tawn aw h ei, na khenyawn thai aw h hoeh. <sup>11</sup> Hottelah ka dei navah, ka roedeng dawkw nahoe. Bangkongtetpawiteh, ka kâhmo e pueng dawkw lungkuep thai nahanelah yo kamtu toe. <sup>12</sup> Hnephnapnae ka khang thai teh, bawirengnae hai ka panue toe. Von pahanae, vonhlamnae, bawirengnae roedengnae naw pueng khang hanelah kho tangkuem vah ka kamtu toe. <sup>13</sup> Kai hah thayung hoi na kakawi sak e Khrih lahoi bangpuengpa ka ti thai.

<sup>14</sup> Hatei roedengnae ka khang navah, nangmouh ni kahawicalah na khetyawt aw h toe. <sup>15</sup> Filippi taminaw, kamthang lawkw dei hanelah Masidonia ram hoi nuengnueng ka kamthaw nah poenae hoi dâwnae hah nangmouh hloilah alouke kawhmoun ni na kabawm aw h hoeh. <sup>16</sup> Thesalon khopui dawkw ka o nah kai ni ka panki e hno vai hni touh na poe aw h toe. <sup>17</sup> Hottelah ka ti navah, poehno ka tawngnae nahoe. Nangmanaw na bawi aw h nahanlah doeh na ngaikhai aw h. <sup>18</sup> Kai teh bangpueng koug ka tawn toe. Nangmouh ni na patawn e poehno hah Epaphroditus koehoi kakueplah ka dâw toe. Hote hnonaw teh a hmoi katui e, Cathut ni a ngai kawi e hno lah ao. <sup>19</sup> Maimae Cathut ni a bawilennae dawkw kaawm e amae bawinae hoeyah nangmae pankinae pueng teh Khrih Jisuh lahoi a kuep sak han. <sup>20</sup> Maimae na pa Cathut teh talai a pout hoehroukrak lentoe lawiseh. Amen.

*Ahnoungepoung lawkw deinae*

<sup>21</sup> Khrih Jisuh thung kaawm e tami kathoung naw hah kut man a loe. Kai koe kaawm e hmaunawngghanaw ni hai nangmouh kut na man aw h.

<sup>22</sup> Tami kathoungnaw thung dawkw alawkpui lah Sizar Bawi im kaawm e



naw ni nangmouh kut na man awh. <sup>23</sup> Maimae Bawipa Jisuh Khrih e a lungmanae teh nangmouh koe awm lawiseh. Amen.



## KOLOSA (The Epistle of Paul to the Colossians)

### *Lawk karouknae*

<sup>1</sup> Kai Pawl, Cathut ngainae lahoi Jisuh Khrih e guncei lah kaawm e hoi, Timote ni Kolosa kho kaawm, Khrih thung kaawm e tami kathoungnaw hoi yuemkamcu e hmaunawngghanaw ca na patawn awh. <sup>2</sup> Jisuh Khrih hoi maimae Pa Cathut koe e lungmanae hoi lungmawngnae teh nangmouh koe awm lawiseh.

### *Lunghawi lawk deinae*

<sup>3</sup> Nangmouh ni Khrih Jisuh hah na yuem awh teh, <sup>4</sup> tami kathoungnaw pueng hah na lungpataw awh tie ka thai awh dawkvah, <sup>5</sup> Lawkkatang kamthang lawk nangmouh ni na thai awh teh, na yuem awh e patetlah nangmouh hane ngaihawinae kalvan vah hmouk lah ao dawkvah, nangmouh hanelah pout laipalah ka ratoum awh teh, maimae Bawipa Jisuh Khrih e Pa Cathut e lungmanae teh ka pholen. <sup>6</sup> Hote kamthang teh talaivan pueng a kamthang toung dawkvah nangmouh koe totouh hai a pha toe. Cathut e lungmanae lawkkatang hah na thai awh teh na panue awh hnin hoi, a paw na paw awh, na roun awh e patetlah kho tangkuem vah a kampung van. <sup>7</sup> Hote hah Epaphras ni na cangkhai awh e patetlah na coe awh. Ahni teh, kaimouh lungpataw e thaw tawk hui, Jisuh Khrih e a san lah kaawm e a tho. <sup>8</sup> Muitha dawkw lungpatawnae na tawn awh e ahni ni tOUNgloung a dei.

### *Muitha roun nahanelah ratoumnae*

<sup>9</sup> Hatdawkvah, nangmae kong ka thai awh nah hnin hoi nangmouh hanlah ratoumnae ka pâpout awh hoeh. <sup>10</sup> Ka ratoum awh e teh, Bawipa e lungang hringnae hoi na hring awh teh, bangpueng koe ama lung kahawi sak e lah na o awh nahan, kahawi e nuen aphunphun dawkw a paw na paw awh nahan, Cathut panuenae dawkw na roun awh nahan, <sup>11</sup> thaonae bahu hoi na kaw awh teh, khangnae hoi na lung a saw awh nahan, <sup>12</sup> angnae dawkw kaawm e tami kathoungnaw e râw hah na coe thai awh nahanelah, na ka kamcu sak e Bawipa hah lunghawi nalaihoi na pholen awh thai nahan, lungangnae aphunphun, poukthainae aphunphun lahoi Cathut e a ngainae hah na panue awh thai nahan ouk ka ratoum. <sup>13</sup> Cathut ni hmonae thung hoi na rasa awh teh a lungpataw e Capa e ram dawkw na paen awh. <sup>14</sup> Hote Capa e a thipaling lahoi, ratangnae tie yon ngaithoumnae teh coe awh.

### *Akungtuen e Khrih*

<sup>15</sup> Capa teh mithmu hoeh e Cathut mei ka kamnuek sak e lah ao teh hnosaq puengpa e lathueng vah camin lah ao. <sup>16</sup> Ahni pawlawkw lahoi hnocawngca pueng teh sak e lah ao. Kalvan kaawm e hnocawngca hoi talai van kaawm e hno cawngca, hmu thai e hoi hmu thai hoeh e, bawitungkhung, uknae, kâtawnae bahunaw pueng teh ahni lahoi sak e lah ao teh a Capa hanelah sak e lah ao. <sup>17</sup> Ahni teh hnocawngca ao hoehnahlan ao toe. Ahni thungvah hnocawngca pueng teh a kamtue. <sup>18</sup> Hahoi, ahni teh kawhmoun e lô lah ao. Kamtawngnae lah kaawm niteh duenae koehoi camin lah ao dawkvah hnocawngca pueng e lathueng



poung lah ao. <sup>19</sup> Bangkongtetpawiteh a cawngca pueng e kuepnae teh ahni daw k a kamtue. <sup>20</sup> Thingpalam daw k a rabaw k e a thi lahoi, taran a roum sak teh, kalvanlae hno nakunghai, talailae hno nakunghai, hnocawngca pueng hah Capa lahoi Cathut hoi a kâmai hawi sak.

<sup>21</sup> Ahmaloe teh kahawihoehe hno sak awh dawkvah, lungthung vah taran lah o awh teh Cathut hoi kâkapek awh. <sup>22</sup> Atu teh, takthai hoi kâkuem e tak daw k duenae lahoi kâmai hawi awh toe. <sup>23</sup> Bangkongtetpawiteh, na thai awh tangcoun g e kamthang kahawi ngaihawinae daw k hoi, phen laipalah, kacaklah na yuem awh pawiteh, amae hmalah ka thoun g e, tounhoehe lah na o sak nahane doeh. Het hateh, na thai a tangcoun g e kalvan rahim kaawm e hnocawngca koe pathang lah kaawm e, kai Pawl nihai a san lah ka okhai e kamthang kahawi doeh.

### *Pawl ni thaw taw knae*

<sup>24</sup> Atuvah amae tak tie kawhmoun hane kecu daw k Khrih e reithainae a panki rae hah ka takthai daw k ka kuep sak. Nangmouh hanelah reithai ka khangnae daw k ka konawm. <sup>25</sup> Ayan e se daw k hro lah ao eiteh, atuteh ngit pâpho sak hanelah tami kathoungnaw koe a pâpho e hro lah kaawm e Cathut e lawkkatang hah teh nangmouh hane kecu daw k kai koe a kuep sak toe. <sup>26</sup> Hottelah ka kuep sak e Cathut e a thaw ka cangkhai e lah kai teh ka o. <sup>27</sup> Jentelnaw ni hote hrolaw k lah kaawm e bawinae teh banghloimaw a len tie hah tami kathoungnaw koehoi patuen panue sak hanlah Cathut ni a ngai. Hote hno teh nangmouh thung vah kaawm e ngaihawinae Khrih hah doeh.

<sup>28</sup> Khrih Jisuh thung tami pueng kuepnae koe pha thai awh nahanlah tami pueng kâhruetcuetae poe awh nateh, lungangnae aphunphun lahoi kamthang kahawi teh pâpho awh. <sup>29</sup> Hottelah kai teh a thaw ka taw k. Kai daw k a bahu ni na pathoup teh a hnosakhainae hoi ka panki teh ka taw k.

## 2

<sup>1</sup> Nangmouh hoi Laodicea kho kaawm e taminaw hoi ka minhmai ka hmawt hoe h rae naw pueng hanelah banghloimaw ka panki teh ka kâroe tie hah panue sak hanelah ka ngai. <sup>2</sup> Hethateh, nangmouh lungpahawinae lah ao teh, lungpatawnae daw k lungthin kâsawmbawmnae hoi Pa Cathut hoi Khrih e hrolaw k hah panue thai awh nahane doeh. <sup>3</sup> Hote Khrih dawkvah lungangnae hoi panuena e puengpa teh hro lah ao. <sup>4</sup> Apipatet e tami nihai dumyenna e law k hoi, na dumyen awh hoe h nahanlah hete law k heh ka dei. <sup>5</sup> Takthai lahoi teh nangmouh hoi ka kâhlat nakunghai, ka muitha lahoi teh nangmouh hoi reirei ka o. Hatdawkvah, nangmouh ni kahawicalah na taw k awh e, Khrih Jisuh daw k kacaklah na yuem awh e naw hah ka hmu navah ka lunghawi.

### *Khrih daw k hringnae hoi khoktakannae*

<sup>6</sup> Khrih Jisuh hah na yuem awh toung dawkvah Khrih daw k hring awh. <sup>7</sup> Ama thung tangpha kacaklah pabawt nateh a ma daw k na hring awh teh, na kamtu awh e patetlah yuemnae daw k cak awh nateh, lunghawilaw k deinae daw k hring awh.

<sup>8</sup> Jisuh Khrih e a law k daw k dawn laipalah tami ni a sak e hoi talaivan phunglam hah a dawn awh teh, ayawmyin e thouthainae lahoi apipatet nihai na dumyen awh teh, na lawp awh hoe h nahan kâhruetcuetae awh.

<sup>9</sup> Bangkongtetpawiteh, Cathut a coun g nae pueng hateh, Khrih tak daw k doeh ao. <sup>10</sup> Hote Bawipa teh hnosakhainae, uk thainae abuemlae



lû lah ao teh maimouh kuepcingnae lah ao. <sup>11</sup> Khrih hoi kâkuen e vuensomanae lahoi, tak hoi kâkuen e takthai hah, rading awh nateh, tami e kut hoi laipalah e vuensomanae hah, hote Bawipa koehoi coe awh toe. <sup>12</sup> Hatdawkvah, Cathut ni a hnosa e yuemnae lahoi Baptisma dawk hmai pakawp lah o awh teh duenae koehoi a thawnae dawk yuemnae lahoi Khrih dawk hmai thaw sak lah o awh toe. <sup>13</sup> Sak payonnae hoi vuensoma hoehnae yon dawk kadout e nangmouh teh Cathut ni Khrih dawk cungtalah na hring sak teh, sakpayon e yon kaawm e pueng hah a ngaithoum toe. <sup>14</sup> Maimouh hoi ka kâtaran lah thut lah kaawm e hah, thingpalam dawk hetsinnae lahoi a takhoe teh, maimae rahak hoi a pâmen toe. <sup>15</sup> Hnosakthainae hoi bahu tawnae hah hmantang vah a kamnue sak teh, thingpalam dawk hoi a tâ toe.

<sup>16</sup> Hatdawkvah, na canei e, pawî hnin, thaparei hnin, sabbath hnin na sakyoe awh e dawkvah apipatet koehai lawkceng sak awh hanh. <sup>17</sup> Hotnaw hateh hmalah ka tâcawt hane a tâhlipnaw lah doeh ao. A tak teh Khrih ama doeh. <sup>18</sup> Lû hah kâuep laipalah, a kâoup awh teh amamouh ni a hmu hoeh e naw hah a noumcai awh. Muiitha hringnae laipalah, kalvantami ka bawk e apipatet koehai kâdum sak awh hanh. <sup>19</sup> Lû koehoi doeh puengcang takthai pueng ni tha akawî awh teh, Cathut ngainae patetlah tak ni a rounng thai. <sup>20</sup> Het talaivan phung dawk Jisuh Khrih hoi cungtalah, na dout awh toung pawiteh, <sup>21</sup> het talai tak a hring nathung vah bangkongmaw talai phung lah kaawm e tek hanh, patek hanh, kâbet hanh tie naw hah tounglounng na tarawî a vaw. <sup>22</sup> Tami e kâpoelawknaw hoi kâcangkhainae dawk tarawinae pueng teh rawk kahmanae seng doeh. <sup>23</sup> Hot patetlah e kâlawnaw teh mahoima kaboumlah kâpacanae tho hoeh. Mahmawk bawknae, katang hoeh e kârahnoumnae, kârektapnae lah ao dawkvah a lungkaang e boiboeh lah a kâsak awh.

### 3

#### *Tami katha hringnae*

<sup>1</sup> Ka dei tangcoung e patetlah nangmouh teh Khrih hoi cungtalah na thaw awh toung pawiteh Khrih ni Pâ e aranglah a tahungnae hmuen koe kaawm e kahlun lae hno tawng awh. <sup>2</sup> Talai van kaawm e hno dawk na lung pen awh hanh. Kahlun lae hnonaw dawk na lung pen awh. <sup>3</sup> Bangkongtetpawiteh, nangmouh teh na due awh toung dawkvah, nangmae hringnae teh Khrih hoi cungtalah Cathut thung hro lah ao toe. <sup>4</sup> Maimae hringnae lah kaawm e Khrih a kamnue toteh maimouh hai ama hoi cungtalah bawilen laihoi kamnue awh van han.

<sup>5</sup> Hatdawkvah, ka kamsoumhoehe napui tongpa yonnae, kaisuenae, lungradueknae, kathout lah onae, meikaphawk bawknae lah kaawm e hounlounnae, het talai van kaawm e pueng hah dout sak awh. <sup>6</sup> Hetnaw kecu dawk Cathut lungkhueknae teh a lawk ka tarawî hoeh e naw koevah a pha. <sup>7</sup> Nangmouh hai ahmaloe teh hotnaw dawk ka hring e lah na o awh. <sup>8</sup> Hatei atuteh, lungkhueknae, Lungphuenna, hmuhmanae, tounkhounae, kakhin e lawk deinae kaawm e pueng hah nangmae pahni dawk hoi takhoe awh. <sup>9</sup> Tami karuem hoi a sakenaw hah na takhoe awh hnukkhu, buet touh hoi buet touh kâdum awh hanh. <sup>10</sup> A katang e lungangnae hoi sak katha lah kaawm e tami katha, kasakkung e mei ka lat e hah kâmahrawk awh toe. <sup>11</sup> Hote sak katha e dawk teh Grik, Judah, vuensoma e, vuensoma hoeh e, tamipathunaw, tamimathengnaw,



san, tami kahlout, tie awmhoeh toe. Khrih teh hnocawngca kuepcingnae lah ao teh hnocawngca thung hai ao.

### *Khrih tami hringnae*

<sup>12</sup> Hatdawkvah, Cathut ni rawi e tami, thoungsak e tami, a lungpataw e tami lah na o awh e patetlah pahrenpavainae, pahrenlungmanae, kârahnoumnae, lungdolungnemnae, lungsawnae naw hah khohnat awh.

<sup>13</sup> Buet touh hoi buet touh yon kâtoun kawi awm pawiteh Khrih ni na ngaithoum awh e patetlah buet touh hoi buet touh yon kângaithoum awh.

<sup>14</sup> Kuepcingnae lah kaawm e lungpatawnae hah patuen khohnat sin awh.

<sup>15</sup> Nangmae lungthung vah, Khrih e lungmawngnae ni uk seh. Hottelah hanelah doeh nangmouh teh tak buet touh thung kaw e lah na o awh. A lung kahawi e lah awm awh. <sup>16</sup> Khrih e a lawkkatang teh nangmouh thungvah yikkawi naseh. Nangmouh teh Sam la, Cathut pholennae la, muitha la aphunphun sak awh nateh, buet touh hoi buet touh kâhroecoena, tha kâpahmeinae, tawn awh. <sup>17</sup> Lawk na dei nakunghai, a thaw na tawk nakunghai, bangpueng Bawipa Jisuh Khrih e min lahoi yah, tawksak awh. A lungmanae teh a len tangngak ti hoi Pa Cathut hmalah lunghawinae lawk dei awh.

<sup>18</sup> Yunaw, Bawipa dawk na o awh e patetlah vâdaw e uknae rahim vah awm awh. <sup>19</sup> Vanaw, na yunaw hah lungpataw awh. Kuekluekhmailuek tet awh hanh. <sup>20</sup> Camonaw, manu na pa e lawk hah ngâi awh. Manu na pa e lawkngainae teh, Bawipa ni a ngai e hno doeh. <sup>21</sup> Napanaw, canaw hah a lungphuen sak awh hanh. A lung na phuen sak awh pawiteh, a lung a pout awh han.

<sup>22</sup> Sannaw, Bawipa taket awh nateh, tami lunghawi nahane dueng lah mithmu dueng tawk awh hanh. Lunghring laipalah, talai bawinaw e lawk hah ngâi awh. <sup>23</sup> Tami e thaw dueng ka tawk e lah pouk laipalah, Bawipa e a thaw ka tawk e lah pouk awh nateh, lungthocalah hoi bangpueng tawk awh. <sup>24</sup> Nangmouh teh Bawipa Khrih e thaw tawkkung lah na o awh dawkvah, râw teh tawkphu lah Bawipa kut dawk hoi na coe a han tie panuek awh. <sup>25</sup> Kamsoumhoeh hno ka sak e tami teh, ama ni a tawk e aphu hah a hmu han. Apihai ngaima tanae awm mahoe.

## 4

<sup>1</sup> Bawinaw, nangmae Bawi teh kalvan vah ao tie panuek awh nateh, na sannaw koe kahman lah, kahawi e hno sak awh.

### *Alouke lawkthuinaenaw*

<sup>2</sup> Pou ratoum awh nateh, lunghawilawkdeinae hoi khenyawn awh. <sup>3</sup> Kai teh Khrih e hrolawk kecu dawk sumrui hoi katek lah ka o dawkvah, <sup>4</sup> Hote hrolawk hah pâpho nahanelah Cathut ni takhang a paawng nahan, hote hrolawk teh pâpho hane kawi lah ao dawkvah, ka pâpho thai nahan, kaimouh hane lahai ratoum awh.

### *Ahnoungpoung lawkthuinae*

<sup>5</sup> Alawilae taminaw e minhmai khét laihoi, lungangnae lahoi kâroe awh nateh, atueng hah hno panuek awh. <sup>6</sup> Tami pueng bangtelane let ka pato han tie na panue thai awh nahan, nangmae na lawk dei e teh palawi patetlah paan sak awh nateh, pout laipalah lungmanae lah pou awm naseh.

<sup>7</sup> Bawipa dawk yuemkamcu e, Bawipa e a san lah rei kaawm awh e, ka lungpataw e ka nawnggha Taisikas ni kaie a konglam kaawm e pueng teh na



dei pouh han doeh. <sup>8</sup> Ahni teh nangmae konglam kOUNg a panue dawkvah nangmouh lung na pahawi nahanlah, <sup>9</sup> nangmouh thung e yuemkamcu e hoi ka lungpataw e ka nawnggha Onesimus hoi ahni teh reirei a tho roi han. Ahnimouh roi ni hie khouthung e kamthang pueng hah nangmouh koe a dei roi han.

<sup>10</sup> Kai hoi thongim rei ka bawt e Aristarkas, Barnabas e a pahringca Mark, Justus telah a kaw awh e Jisuh tinaw ni kut na man awh. Mark hanelah nangmouh koe lawk na thui awh toe. Nangmouh koe a tho toteh dawn awh. <sup>11</sup> Vuensom a lah kaawm e naw dawkvah, ahnimouh dueng doeh Cathut uknaeram hanelah kai hoi reirei ka tawk e lah kaawm niteh, ka lung ahawi sak awh. <sup>12</sup> Nangmouh thung e Khrih Jisuh e a san Epaphras ni nangmanaw kut na man awh. Nangmouh na cue awh teh, Cathut ngainae dawk kacaklah na kangdue awh nahan, nangmouh hanelah a kâyawm teh ouk a ratoum. <sup>13</sup> Ahni teh nangmouh hane hoi, Laodicea kho kaawmnaw hane hoi, Hierapolis kho kaawmnaw hanelah a lung ka tho roeroe e doeh titeh kai ni ka kampangkhai . <sup>14</sup> Ka lungpataw e tâsibawi Luk hoi Demas ni kut na man awh. <sup>15</sup> Laodicea kho kaawm e hmaunawngghanaw, Nimpha hoi ahni im kaawm e kawhmoun hah kutman awh.

<sup>16</sup> Hete ca heh, nangmouh ni na touk awh hnukkhu vah, Laodicea kawhmoun hai touk sak awh. Hote kho koehoi e ca hai nangmouh ni touk van awh. <sup>17</sup> Arkhippas koe hai, Bawipa koehoi na coe e thaw hah, kuep sak nahanelah kâhruetcu et loe tet pouh awh.

<sup>18</sup> Kai Pawl ni nangmouh kutmannae ca hah ka mae kut hoi ka thut. Ka khang e kateknae hah pahnim awh hanh. A lungmanae nangmouh koe awm lawiseh. Amen.



# 1 THESSALON

## (The First Epistle of Paul to the Thessalonians)

### *Lawk karouknae*

<sup>1</sup> Pawl, Silvanas hoi Timote tinaw ni Cathut hoi Bawipa Jisuh Khrih daw kaaawm e, Thesalon kho e kawhmoun, nangmouh koe ca na patawn awh. Bawipa Jisuh Khrih hoi maimae Pa Cathut koe e lungmanae hoi roumnae teh nangmouh koe awm lawwih.

### *Lunghawi lawk deinae*

<sup>2</sup> Nangmae yuemnae daw kout laipalah Cathut ka pholen awh teh, nangmouh hanlah pou ka ratoum awh. <sup>3</sup> Nangmouh ni yuemnae lahoi thaw na tawaknae, lungpatawnae lahoi na pankinae, maimae Bawipa Jisuh Khrih ngaihawinae lahoi lungcaknae hah maimae Pa lah kaaawm e Cathut hmalah pout laipalah pou pouk awh.

<sup>4</sup> Cathut ni lungpataw e hmaunawngghanaw nangmanaw teh rawi lah na o awh e hah ka panue awh. <sup>5</sup> Kaimouh teh nangmouh hoi rei o awh navah, nangmouh koe bangpatet e tami lah maw ka o awh tie hah na panue awh e patetlah kaimouh ni ka pâpho awh e kamthang lawk teh, nangmouh koe vah lawkhawng tho hoe. Lentoena hoi, Kathoung Muitha hoi panuecainae lahoi doeh a tho. <sup>6</sup> Nangmanaw teh runae na khang awh nakunghai, Kathoung Muitha koe e lunghawinae hoi lawkkatang hah na dâw awh teh, nangmouh teh kaimouh hoi Bawipa hnukkâbang e lah o awh. <sup>7</sup> Hatdawkvah, nangmouh teh Masidonia hoi Akhaia ram kaaawm e kayuennaw pueng hanelah, khetsin hane kawi lah na o awh. <sup>8</sup> Bangtelamaw tetpawiteh, Bawipa e lawk teh nangmouh koe hoi, Masidonia ram, Akhaia ram pueng daw kout a kamthang dueng tho laipalah, Cathut na yuemnae kong teh, khoram tangkuem a kamthang. Kaimouh ni buet touh hai toun hane awmhoeh. <sup>9</sup> Kaimouh teh nangmouh koe bangtelamaw ka kâen awh tie hah namamouh ni na dei awh. Hringnae hoi kakawi e Cathung katang e thaw taw k hanelah hai thoseh, <sup>10</sup> ka tho hane Cathut lungkhueknae daw kout hoi maimouh na kahloutsakkung Bawipa Jisuh Khrih, duenae koe hoi Cathut ni a thaw sak e Capa teh kalvan hoi bout a tho han tie ngaihawinae, meikaphaw k hah pahawt teh, Cathut koe na kâhungnae kongnaw hai a dei awh.

## 2

### *Thesalon khovah Pawl e thawtawaknae*

<sup>1</sup> Hmaunawngghanaw, nangmouh koe ka tho awh e hah, ayawmyin lah awm hoe tie namamouh ni na panue awh. <sup>2</sup> Nangmouh ni na panue awh e patetlah kaimanaw teh, Filippi khovah rucatnae hoi rektapnae hmaloe ka khang awh hnukkhu, Cathut kângue laihoi kâtuknae kalen kâhmo awh teh, Cathut e kamthang kahawi hah nangmouh hanlah taranhawi laihoi ka pâpho awh. <sup>3</sup> Yonnae, kamhnawngnae, dymyenna hoi kaimouh ni nangmanaw hah tha na poe awh hoe. <sup>4</sup> Kamthang kahawi ka phawt hanelah Cathut ni na taw kvah, tami lunghawi sak hane na hoe, maimae lunghin ka tanouk e Cathut lunghawi sak nahanelah doeh, kaimouh ni ka pâpho awh. <sup>5</sup> Bangtelamaw tetpawiteh, nangmouh ni na panue awh e patetlah nangmouh pasawtpanepnae lawk buet touh boehai



ka dei awh hoeh. Hounlounnae lahoi kâsaknae hai awm hoeh tie teh Cathut nihai a kampangkhai. <sup>6</sup> Hot hloilah, Khrih e guncei lah ka o teh, nangmouh hnokari na phu sak thai awh ei, tami ni poe e bawilenna hah nangmouh koe ka tawng awh hoeh, alouknaw koehai ka tawng awh hoeh.

<sup>7</sup> A manu ni a ca a khetyawt e patetlah nangmouh koe lungnemnae lahoi na khetyawt awh. <sup>8</sup> Kaimouh ni nangmouh lung na pataw dawkvah, Cathut e kamthang kahawi dueng tho laipalah, kamamae hringnae totouh pasoung hanelah nangmouh koe lungthonae ka tawn awh. <sup>9</sup> Hmaunawngghanaw, patang laihoi kâyawm e hah nangmouh ni na panue awh. Cathut e kamthang kahawi nangmouh koe ka dei awh nah, nangmouh han hnokari lah ka o awh hoeh nahanelah, karum khodai thaw ka tawk awh.

<sup>10</sup> Nangmouh kayuennaw rahak ka o awh navah, thoungnae hoi lannae dawk toun hoeh e lah ka o awh e hah nangmouh hoi Cathut teh kapanuekkhaikung lah a o. <sup>11</sup> Na pa ni canaw a khetyawt e patetlah nangmouh haiyah na khetyawt awh tie na panue awh. <sup>12</sup> A ram hoi a lentoenae thungvah nangmouh na ka kaw e ni, a ngai e patetlah hring awh nahanelah, pout laipalah, kâhroecoena hoi lung na pahawi awh teh, tha na poe awh.

### *A lawk dâwnae*

<sup>13</sup> Nangmouh ni kaimouh koehoi Cathut e kamthang kahawi na dâw awh navah, tami e lawk na dâw awh hoeh, Cathut e lawk roeroe doeh na dâw awh tie hai thoseh, ka yuem tangcounnaw hringnae dawk, Cathut lawk ni thaw a tawk tie hai thoseh, na dâw awh tie ka thai awh navah, Cathut lungmanae hah pout laipalah ka pholen awh. <sup>14</sup> Bangtelah tetpawiteh, hmaunawngghanaw, Khrih Jisuh thung kaawm niteh, Judah ram kaawm, Cathut e kawhmounnaw hah Judahnaw ni a rektap awh e patetlah nangmouh hai namamae taminaw ni rektapnae na khang awh.

<sup>15</sup> Judahnaw ni Jisuh koehoi a kamtawng awh teh profetnaw a thei awh toe. Maimouh hai na rektap awh toe. Cathut e ngaina hoi tarawi awh hoeh. Taminaw puenghoi hai a kâtaran awh toe. <sup>16</sup> Jentelnaw rungngangnae koe pha sak hanelah kaimouh ni pâpho e kamthang lawk hai a ngang awh teh, amamae yonnae teh pou a kuep sak awh toe. Hatdawkvah, Cathut lungkhueknae ni ahnimouh lathueng a bosin awh.

### *Kayuennaw kâhmo hanlah a rabui*

<sup>17</sup> Hmaunawngghanaw kaimouh teh lungthin hoi tho laipalah, tak hoi dawngdengca kamphei awh navah, nangmae minhmai hmu hanlah, na rabui awh teh, kâhmo hanelah hoe ka panki awh. <sup>18</sup> Hatdawkvah, kaimouh teh nangmouh koe tho hanlah ka ngai awh. Kai Pawl teh nangmouh ona koe vai hni touh tho han ka kâcai ei, Setan ni na ngang. <sup>19</sup> Maimae Bawipa Jisuh Khrih bout a tho torei teh, amae hmalah kaimae ngaihawinae, lunghawinae hoi, kâoupnae, bawilukhung lah kaawm hane teh, api nahoe, nangmouh doeh toe. <sup>20</sup> Nangmouh teh kaimae bawilenna hoi lunghawinae katang lah na o awh.

## 3

### *Timote patounnae*

<sup>1</sup> Hatdawkvah, kaimouh teh bout ka khang thai awh hoeh dawkvah, Athen kho o hane doeh kahawipoung telah ka ti awh toe. <sup>2</sup> Khrih e kamthang kahawi ka pâpho niteh, Cathut thaw reirei ka tawk e ka nawnggha Timote hah nangmouh koe ka patoun awh. <sup>3</sup> Nangmouh koe



ka patoun ngainae teh, kaimouh ni ka khang awh e rutcatnae kecu daw, api nang hai hnuklah na kahnawn awh hoe nahanelah, na yuemnae daw na cak awh nahanelah, hroecoe sak hanlah doeh ka patoun. <sup>4</sup> Bangkongtetpawiteh, nangmouh hoi cungtaloh o awh navah, maimouh teh, rucat rektapnae khang awh han telah nangmouh koe sut ka dei e patetlah doeh, a tho toe tie hah na panue awh. <sup>5</sup> Hatdawkvah, kâdumkâyennae, taminaw ni nangmouh hah na dumyen awh teh, kaimouh ni patangpalai laihoi thaw ka taw awh e hah, ayawmyin lah awm payon vaih tie ka puen awh teh, ka khang thai awh hoe dawkvah, nangmae yuemnae panue han ka ngai awh dawkvah, ka patoun e doeh.

### *Timote koe a lungkuepnae*

<sup>6</sup> Hatei, atuvah Timote teh nangmouh koehoi bout a tho teh, nangmae yuemnae hoi lungpataw awh e, kaimouh ni nangmouh pou na pouk awh teh nangmae mei hmu han ka ngai awh e patetlah, nangmouh nihai kaimouh pou na pouk awh teh, mei hmu han na ngai awh e kamthangnaw hah kaimouh koe bout a dei. <sup>7</sup> Hatdawkvah, hmaunawngghanaw, kaimouh teh, rucatnae hoi rektapnae aphunphun ka khang awh ei nakunghai, nangmae yuemnae ni tha na poe awh. <sup>8</sup> Nangmouh ni Bawipa dawkvah kacaklah na awm awh pawiteh atu kaimouh teh ka hring awh. <sup>9</sup> Maimae Cathut hmalah, nangmouh kecu daw kaimouh lunghawinae ka hmu awh han e khet navah, Cathut e lungmanae bangtelamaw ka patho thai awh han. <sup>10</sup> Kaimouh teh nangmouh hoi kâhmo thai awh nahan hoi, nangmae yuemnae daw ka panki e naw, pakhout thai nahanlah karum khodai thahmei laihoi ka ratoum awh.

### *Kawhmoun hanelah ratoumnae*

<sup>11</sup> Nangmouh na onae koe kaimouh ka tho thai nahanlah Pa Cathut hoi, maimae Bawipa Jisuh Khrih ni lam na rasoun pouh lawiseh. <sup>12</sup> Kaimouh ni nangmouh lungpataw e patetlah, nangmouh hai buet touh hoi buet touh koe thoseh, tami pueng koe thoseh, na pung awh teh, lungpatawnae daw na roungh thai awh nahan Cathut ni na pathoup awh lawiseh. <sup>13</sup> Hahoi maimae Bawipa Jisuh Khrih teh, a tami kathoungnaw puenghoi a tho awh torei teh, maimae na pa Cathut hmalah tounhoehe lah, na lungthin teh Cathut ni thounghae lahoi caksak lawiseh. Amen.

## 4

### *Cathut ngainae lahoi khosaknae*

<sup>1</sup> A hnukteng lah, hmaunawngghanaw, Cathut ngainae patetlah na hring thai awh nahanelah, bangtelamaw hring han tie hah kaimouh koehai na kamtu awh teh, hoe na roungh thai awh nahanlah Bawipa Jisuh min lahoi tha na poe awh. <sup>2</sup> Bawipa Jisuh lahoi bangpatete kâpoelawknaw maw na poe awh tie hah na panue awh.

<sup>3</sup> Cathut e ngainae teh nangmouh ni kamsoumhoehe napui tongpa yonnae na roun awh vaiteh thoungsaknae, <sup>4</sup> nangmouh pueng ni thoungsaknae hoi barinae hoi, mahoima kâhruetcuethan tie na panue awh teh, <sup>5</sup> Cathut ka panuek hoe e Jentelnaw patetlah talai ngainae daw hring awh hanh. <sup>6</sup> Bangpatet daw hai thoseh, hmaunawnggha hah dumyennae lahoi yon awh hoe nahanlah a ngainae ao. Nanganaw hah kaimouh ni kâhruetcuethae sut ka dei awh e patetlah, hot patetlah e yonnae ka sak e pueng hah Bawipa ni a rek han. <sup>7</sup> Bangkongtetpawiteh, Cathut ni maimouh teh khinsak hanelah na kaw awh hoe, thounghae



thung doeh na kaw awh. <sup>8</sup> Hatdawkvah hete cangkhai e naw ka ek e tami teh, tami e lawk dueng ek e tho laipalah, Bawipa e Kathoung Muitha maimouh na kapoekung Cathut ka ek e lah ao.

### *Pahrennae lahoi thaw tawknæ*

<sup>9</sup> Hmaunawngghanaw lungpatawnæ hah ca lahoi thut vaiteh nangmouh na patawn hanelah ngaihoeh toe, Bangkongtetpawiteh, nangmouh teh buet touh hoi buet touh lungpataw nahanlah Cathut koe na kamtu e lah na o awh. <sup>10</sup> Kayuemhoehnaw e hmalah khet kamcu lah na hring awh nahan hoi apihai na vout awh hoeh nahanelah, <sup>11</sup> nangmouh teh Masidonia ram kaawm e hmaunawngghanaw koe hote lungpatawnæ na sak awh toe. Hatdawkvah, hmaunawngghanaw hoe lung na kâpataw thai nahan, <sup>12</sup> kai ni kâ na poe e patetlah lungmawng ca lahoi na o awh teh, mae kut hoi thaw na tawk awh nahan, tha na poe awh.

### *Kadoutnaw boutthaw awh han, kahringnaw a kâthung awh han.*

<sup>13</sup> Hmaunawngghanaw ngaihawinae katawnhoehnaw patetlah nangmouh teh lungmathoe awh hoeh nahanelah, nangmouh ni kaipnaw e kong hah panuek laipalah na o awh hane na ngaikhai awh hoeh. <sup>14</sup> Jisuh teh duenæ koehoi bout a thaw toe tie hah na yuem awh pawiteh, hot patetvanlah Jisuh dawk ka ip e naw hai Bawipa hoi cungtalâ Cathut ni a thaw sak han. <sup>15</sup> Bawipa e a lawk lahoi nangmouh koe ka dei awh e teh, Bawipa bout a tho toteh, kahring e maimouh ni ka ip tangcoungnaw hmâcu awh mahoe. <sup>16</sup> Bawipa ni kacaipoung lah hram vaiteh, kalvantaminaw ukkung bawi e lawk hoi, Cathut e mongka ueng lawk hoi ama roeroe kalvan kho hoi a kum han. Khrih thung kadout tangcoungnaw teh hmaloe a thaw awh han. <sup>17</sup> Hatnavah la kahring e maimouh teh, kahlî dawk Bawipa hoi kâhmo hanelah, ahnimanaw hoi cungtalâ, tâmai dawk na tawm awh vaiteh, Bawipa hoi pout laipalah o awh han. <sup>18</sup> Hatdawkvah, hete lawknaw hoi buet touh hoi buet touh lung kâpahawi awh.

## 5

### *Bawipa e hnin*

<sup>1</sup> Hmaunawngghanaw hninthanaw hoi tuengnaw hah thut vaiteh na patawn hanelah panki hoeh toe. <sup>2</sup> Bangkongtetpawiteh, tamru teh karum vah a tho e patetlah Bawipa e hnin teh a tho van han tie hah nangmouh ni kamcengcalah na panue awh. <sup>3</sup> Lungmawngnae ao, rucatnae ka hlout toe ati awh lahun nah camo ka yawn e napui ni camo a khe nah patawnæ a khang e patetlah pouk laipalah rawknæ phat vaiteh, khoeroe hlout awh mahoe.

<sup>4</sup> Hatei hmaunawngghanaw hote hnin teh tamru patetlah nangmouh koe a tho nahanlah nangmouh teh khohmo thung na awm awh hoeh. <sup>5</sup> Nangmouh pueng teh agnae hoi khodai e ca lah na o awh. Khohmo ca lah na awm awh hoeh. <sup>6</sup> Hatdawkvah alouknaw ni a i awh e patetlah maimouh teh ip laipalah, kâhruetcueth laihoi ring awh sei. <sup>7</sup> Bangkongtetpawiteh ka ip e naw teh khohmo vah a i awh, kaparuinaw hai tangmin vah a parui awh. <sup>8</sup> Khodai ca lah kaawm e maimouh teh kâhruetcueth awh sei. Yuemnae hoi lungpatawnæ lah kaawm e saiphei, rungngangnae ngaihawinae sum luhuem kâmahrawk awh sei. <sup>9</sup> A lungkhueknæ khang sak hanelah Cathut ni maimouh na rawi e nahoe, Bawipa Jisuh Khrih lahoi rungngangnae coe sak hanelah doeh



na rawi awh. <sup>10</sup> Maimouh teh kâhlaw awh nakunghai, i awh nakunghai Bawipa hoi cungtalaw hring awh nahanelah, maimouh hanelah a due toe. <sup>11</sup> Hatdawkvah, nangmouh ni atu hai na sak awh e patetlah buet touh hoi buet touh thakâpoe laihoi kâtaawmdawm awh sei .

*A hnukteng lawkthuinae*

<sup>12</sup> Hothloilah, nangmouh thung dawk vah, a thaw ka tawk e, Bawipa kâ lahoi ka uk e, hroecoe ka poe e tami hah panuek awh nateh, <sup>13</sup> ahnimouh ni a tawk awh e dawkvah lungpatawnae hoi na barilawa awh nahan, buet touh hoi buet touh kâpocalah awm awh. <sup>14</sup> Hmaunawngghanaw, kamsoumhoehlah kaawm e naw hah kâhruetcuetae poe awh. A lung kathoengnaw thapoe awh. A thakayounnaw ka bawm awh. Tami pueng koe na lungsaw sak awh. <sup>15</sup> Buet touh hoi buet touh yon kâpathung hoeh nahan kâhruetcuetae awh nateh, namamouh koehai thoseh, ayânaw koehai thoseh, panki laihoi hnokahawi pou sak awh. <sup>16</sup> Pout laipalah konawm awh. <sup>17</sup> Pout laipalah ratoum awh. <sup>18</sup> Bangpueng dawk lunghawilawk dei awh. Bangkongtetpawiteh Khrih Jisuh thung nangmouh ni hottelah na sak awh nahanelah Cathut ni na ngaikhai awh.

<sup>19</sup> Kathoung Muitha e a hue roun sak awh hanh. <sup>20</sup> Profet lawk hah noutna laipalah awm hanh. <sup>21</sup> Hno puengpa hah tanouk awh nateh hnokahawi e teh kacaklah kuen awh. <sup>22</sup> Kahawi hoeh e kaawm e pueng hah roun awh. <sup>23</sup> Rounnae Cathut ama ni nangmouh abuemplah pin na thoungsak lawiseh. Maimae Bawipa Jisuh Khrih a tho toteh, nangmae tak, lungthin, muitha abuemplah tounhoehe lah na o awh nahan na kabawm lawiseh. <sup>24</sup> Nangmouh na kakawkung teh yuemkamcu lah ao dawkvah hottelah a sak han doeh. <sup>25</sup> Hmaunawngghanaw kaimouh han lah na ratoum pouh awh. <sup>26</sup> hmaunawngghanaw pueng hah kathounge kâpaconae lahoi kâdawn awh. <sup>27</sup> Hete ca heh hmaunawnggha tami kathoungnaw abuemplah koe na touk pouh awh nahanelah Bawipa Min lahoi lawk na thui awh. <sup>28</sup> Maimae Bawipa Jisuh Khrih e a lungmanae teh nangmouh pueng koe awm lawiseh. Amen.



## 2 THESSALON

### (The Second Epistle of Paul to the Thessalonians)

#### *Lawk karouknae*

<sup>1</sup> Pawl, Silvanas, hoi Timote tinaw ni, maimae Pa Cathut hoi Bawipa Jisuh Khrih dawkw kaawm e Thesalon kho kaawm Kawhmoun koe ca na patawn awh. <sup>2</sup> Bawipa Jisuh Khrih hoi maimae Pa Cathut koehoi e lungmanae hoi lungmawngnae teh nangmouh koe awm lawiseh.

#### *Cathut lawkcengnae*

<sup>3</sup> Hmaunawngghanaw, nangmae yuemnae teh, puenghoi a roungh teh, buet touh hoi buet touh lengkaleng lungpatawnae hoi na kaw i awh dawkwah, kaimouh ni sak hane kaw i lah ao e patetlah nangmouh kecu dawkw Cathut lungmanae teh pout laipalah ka pholen awh. <sup>4</sup> Hottelah nangmouh ni rektapnae, rucat kâhmonae pueng hah na khang awh laihoi, na yuemnae ka hmu navah, Cathut e kawhmounnaw koe nangmouh na kâoupkhai awh.

<sup>5</sup> Nangmouh ni, Cathut uknaeram hanelah, reithai na khang awh teh, hote ram thung kâen hanlah na kamcu toe tie hah panue sak nahan, kalan lah Cathut e lawkcengnae teh hottelah hoi a kamnue sak. <sup>6</sup> Cathut ni kalanlah a sak han. Nangmouh runae na ka poe koe runae a pha sak vaiteh, <sup>7</sup> Runae kâhmo e nangmouh hoi kaimouh koevah kâhatnae na poe awh han. <sup>8</sup> Bangtelamaw tetpawiteh, Bawipa Jisuh Khrih teh bahu kaawm e kalvantaminaw hoi kalvan kho hoi a kum toteh, Cathut kapanuekhoehnaw hoi Bawipa Jisuh Khrih e kamthang kahawi ka thai ngai hoe e naw pueng teh, hmai hoi runae a poe han. <sup>9</sup> Bawipa Jisuh teh a tami kathoungnaw lahoi amae thao bawilennae a kamnue e hai thoseh, kaimae lawkpanuesaknae na yuem awh dawkwah, <sup>10</sup> kayuemnaw pueng lahoi kângairu pholennae hai thoseh, coe hanelah a tho na hnin vah, ahnimouh teh Bawipa e hmaitung bawilennae koehoi kapek vaiteh, a yungyoe rawknae hoi reknae hah a khang awh han.

<sup>11</sup> Hatdawkwah, maimae Cathut hoi Bawipa Jisuh Khrih e a lungmanae patetlah Bawipa Jisuh Khrih e Min teh nangmouh koehoi bawilennae a kamnue nahanelah thoseh, nangmouh hai Bawipa koehoi bawilen a kamnue nahanelah thoseh, nangmouh teh kaw e lah na kamcu awh tie panuek awh nateh, <sup>12</sup> hno kahawi sak han lungthonae pueng hoi, na yuemnae koe bawilennae bahu hoi akawi nahanlah kaimouh ni nangmouh hanlah pou ka ratoum awh.

## 2

#### *Rawknae capa*

<sup>1</sup> Hmaunawngghanaw, Bawipa Jisuh Khrih a tho nahane hoi ama koe maimouh cungtalah kamkhueng nahane hoi ka kâkuenlah, <sup>2</sup> Muitha lahoi thoseh, a lawk pâphonae lahoi thoseh, ca na patawn awh e lahoi thoseh, Bawipa e hnin teh yo a tho toe telah a dei awh eiteh, lungpuen tâsuenae tang na tawn awh hoe hanehanlah na dei pouh ngai awh. <sup>3</sup> Apini hai bangpatetlah hoi hai kâdum sak hanh awh. Hote hnin a pha hoehnahlan kâkapeknae hmaloe awm vaiteh, tamikahawihoehe rawknae capa teh a tâco han. <sup>4</sup> Ahni teh Cathut hoi bawknae pueng hah a taran



vaiteh, amahoima kârasang vaiteh, Cathut e bawkim dawk tahung vaiteh, amahoima Cathut doeh telah a kâpathang han.

<sup>5</sup> Nangmouh hoi rei ka o awh navah hote kongnaw yo ka dei awh e hah na pâkuem awh hoeh maw <sup>6</sup> Ahni teh amae tue nah a tâco nahanelah, atuvah ka ngang e ao tie hai na panue awh. <sup>7</sup> Bangtelamaw tetpawiteh, kâlawklaipanae arulawk teh, atuvah a kâroe lahun toe. Hatei kangangkung takhoe lah ao hoehroukrak a ngang han. <sup>8</sup> Takhoe lah ao torei teh kâlawklaipa e tami a kamnue han. Hote tami kahawihoehe hah Bawipa Jisuh ni amae muitha lawk lahoi raphoe vaiteh, a kumnae raeng hoi a takhoe han. <sup>9</sup> Rawknae koe ka phat hane taminaw koevah hote tami kahawihoehe a thoniae teh, Setan e thawtawknae lahoi dumpyennae bahu, mitnoutnae, kângairu hno aphunphun hoi, kamsoumhoeh dumpyennae aphunphun hoi a tho han. <sup>10</sup> Bangkongtetpawiteh, ahnimouh teh, rungngang lah o nahanelah, lawkkatang lungpataw hane ngai awh hoeh. <sup>11</sup> Hatdawkvah, lawkkatang hah yuem laipalah, kamsoumhoeh hno daw kahring e naw pueng teh, <sup>12</sup> lawkkatang ka yuem hoeh niteh lanhoehnae daw kaawmnaw hah yonphukhangsak nahane doeh.

### *Kacaklah kangdue hanlah lawkthuinae*

<sup>13</sup> Hateiteh, Bawipa ni lungpataw e hmaunawngghanaw, nangmouh teh thoungsaknae, lawkkatang yuennae lahoi rungngangnae daw kpha hanelah Cathut ni hmaloe hoiyah na rawi awh toung dawkvah, nangmouh kecu daw kaimouh ni Cathut lungmanae pout laipalah ka pholen awh han. <sup>14</sup> Hot patetlah hanelah kamthang kahawi lahoi nangmouh teh na kaw awh toe. Bangkongtetpawiteh, nangmouh teh, Bawipa Jisuh Khrih e bawilennae hmawngkhai nahanelah doeh. <sup>15</sup> Hatdawkvah hmaunawngghanaw, lawk lahoi hai thoseh, ca lahoi hai thoseh, kaimouh ni na cangkhai awh e lawkkatang daw kacaklah kangdout awh nateh na lungpen awh.

<sup>16</sup> Maimanaw lungpataw niteh, a yungyoe lungpahawinae, lungmanae lahoi kahawi e ngaihawinae na ka poe e, maimae Pa Cathut hoi maimae Bawipa Jisuh Khrih ama roeroe ni, <sup>17</sup> nangmae lungthin a dam sak teh, lawk kahawi, hnokahawi pueng daw k nangmanaw hah na caksak awh naseh.

## 3

### *Ratoum pouh awh*

<sup>1</sup> Ahnoungepoung lah, hmaunawngghanaw, Bawipa e lawkkatang teh, nangmouh koe a kâkahei teh Bawilennae a kamnue e patetlah hmueng tangkuem koehai a kamnue thai nahanelah, <sup>2</sup> ka kaisue niteh tami kahawihoehe naw kut daw k hoi ka hlout awh thai nahan kaimouh hanelah na ratoum pouh awh. <sup>3</sup> Hatei, Bawipa teh yuemkamcu e lah ao. Nangmouh na caksak awh vaiteh kahawihoehe hno pueng daw k hoi hlout nahanelah na kabawp awh han. <sup>4</sup> Kaimouh ni kâ na poe e patetlah nangmouh ni na tarawi awh. Hmalah haiyah bout na tarawi awh han doeh titeh Bawipa kâuep laihoi oupoutnae ka tawn awh hoeh. <sup>5</sup> Cathut lungpataw sak nahanelah thoseh, Khrih patetlah hring sak nahanelah thoseh, Bawipa ni nangmae lung hah hroecôe lawiseh.

### *Pangak hoeh nahanlah kâhruetcuat poenae*

<sup>6</sup> Hmaunawngghanaw kaimouh koe na kamtu awh e patetlah tarawi laipalah hno kamsoumhoeh lah ka sak e hmaunawngghanaw pueng hah



roun awh tie hah maimae Bawipa Jisuh Khrih min lahoi kâ na poe awh. <sup>7</sup> Bangkongtetpawiteh kaimouh ni ka tawksak e patetlah nangmouh ni bangtelamaw ka tawksak han tie teh na panue awh. Kaimouh ni hno kamsoumhoehlah ka sak awh hoeh. <sup>8</sup> Apie rawca hai ka cat rumram awh hoeh. Nangmouh thung dawksak buet touh boehai na tarawk awh hoeh nahanlah patangpalai laihoi kâyawm awh teh karum khodai thaw ka tawk awh. <sup>9</sup> Hottelah ka saknae teh hmu han ka ngai awh dawksak nahoe. Nangmanaw ni kamtu hanelah ka tawksak awh e doeh. <sup>10</sup> Bangkongtetpawiteh nangmouh hoi rei ka o navah ka pangak e teh rawca hai cat nahanh seh telah kâ na poe awh. <sup>11</sup> Hno kamsoumhoeh lah ka sak niteh banghai tawksak laipalah, ma hoi kâkuen hoeh e dawksak kambawng e tami tangawn na o awh tie ka thai awh. <sup>12</sup> Hot patet e taminaw koe mae rawca, ca thai nahanelah lungmawng lahoi thaw na tawksak thai nahan, Bawipa Jisuh Khrih ni kâ na poe e patetlah tha na poe awh, <sup>13</sup> Hmaunawngghanaw hnokahawi na sak awh navah lungpoutnae tawn hanh awh.

<sup>14</sup> Hete ca lahoi lawk na thui e patetlah tami buetbuet touh ni tarawi hoehpawiteh, yeirai po nahanelah kâhuikokhai awh hanh. <sup>15</sup> Hatei hote tami hah taran telah pouk a hanh awh. Hmaunawnggha patetlah pouk awh, hroecoe awh.

#### *Lawkthuinae*

<sup>16</sup> Roumnae Bawipa ama roeroe ni bangtelae hmuen koe na pha hai thoseh, nangmouh koe lungmawngnae na poe lawiseh. Bawipa teh nangmouh abuemlah koe awm lawiseh. <sup>17</sup> Hete kutmannae ca heh kai Pawl roeroe ni ka kut hoi ka thut e doeh. Hathateh, ca kathut e pueng dawksak e mitnout e lah ao. Kai ni hettelah ouk ka thut. <sup>18</sup> Maimae Bawipa Jisuh Khrih e lungmanae teh nangmouh pueng koe awm lawiseh. Amen.



## 1 TIMOTE (The First Epistle of Paul to Timothy)

### *Lawk karouknae*

<sup>1</sup> Kai Pawl, na ka runngangkung Cathut hoi, maimouh ni ngaihawi e Jisuh Khrih e kâpoelawk lahoi Jisuh Khrih e guncei lah kaawm e ni yuemnae lahoi ka ca katang lah kaawm e Timote koe ca na patawn.  
<sup>2</sup> Na pa Cathut hoi maimae Jisuh Khrih koehoi lungmanae, pahrennae hoi lungmawngnae teh nang koe awm lawiseh.

### *Kâhruetcuwet poenae*

<sup>3</sup> Masidonia ram lah ka cei navah kai ni na hroecoe e patetlah Efisa kho la na o teh, alouklouk e cangkhaihnae cangkhai hoeh nahanelah,  
<sup>4</sup> lairuiapakong hoi ka pout thai hoeh e miphun tâconae hah banglah pouk awh hoeh nahanelah, cingthui haw. Hote hnonaw niteh yuemnae hlak kâounnae doeh a tâco sak. <sup>5</sup> Hatei kâpoelawk ni ngainae teh, kathounge lungthin hoi thoseh, kathounge mahoima kâpanuenae hoi thoseh, kathounge yuemnae hoi thoseh, kâkuen e lungpatawnae hah doeh.  
<sup>6</sup> Hote hno dawkh hoi tami tangawn ni a roun awh teh, aphu kaawm hoeh e lawk deinae koe lah a kamlang awh toe. <sup>7</sup> Bangpatetlae phung koe lah maw kacaklah ka o awh tie hai kâpanuek awh laipalah, kacangkhaikung saya lah o han a ngai awh bo aw.  
<sup>8</sup> Kâlawk teh hnokahawi kasaknaw hanelah ta e nahoe. <sup>9</sup> Kâlawklaipa hoi lawkkangaihoehnaw, cathutlaipa hoi tamikayonnaw, kathounghoehnaw hoi lawkkatang banglahai ka pouk hoeh e naw, manu kathetnaw hoi na pa kathetnaw, <sup>10</sup> tami kathetnaw, kamsoumhoehe napui tongpa yonnae kasaknaw, tongpa reira yonnae kasaknaw, tami kaparawtnaw, laithoe kadeinaw, laithoe koe lah thoekâbonaw, kathounge cangkhaihnae katarannaw pueng hanelah doeh kâlawk teh ta pouh e lah ao. Hote kâlawk hah hmantang ka hno e taminaw teh, hote kâlawk ni hawinae a poe. <sup>11</sup> Hottelah ka ti navah, Yawhawi Cathut e bawilen kamthang kahawi teh kai na poe toe.

### *Pawl ni a kampangkhainae*

<sup>12</sup> Kai hah thaonae hoi na kakawisakkung maimae Bawipa Khrih Jisuh e a lungmanae teh ka pholen. Bangkongtetpawiteh, ahni ni a thaw tawk hane lah na rawi teh yuemkamcu lah na pouk toe. <sup>13</sup> Kai teh ahmaloe vah, kapathoekung, kadudamkung, ayâ karektapkung lah ka o eiteh, yuemhoehnae hoi panuek laipalah hoi ka tawksak e a tho dawkvah, lungmanae ka coenae doeh. <sup>14</sup> Maimae Bawipa e a lungmanae haiyah, Khrih Jisuh thung kaawm e yuemnae hoi lungpatawnae hoi cungtalah pouk e hlak a kuep toe.

<sup>15</sup> Khrih Jisuh ni het talaivan a tho ngainae teh tamikayon runngang hanlah a tho tie teh, yuemkamcu e hoi dâw hane roeroe lah a kamcu. Hote tamikayonnaw thung dawkvah kai teh kalenpounge lah ka o.  
<sup>16</sup> Hateiteh, a yungyoe hringnae coe nahanlah ka yuem hane naw ni a dawn han kawi lah ao nahan, kalenpounge yonnae ka tawn e kai hah Jisuh Khrih ni lungsawnae hoi panguepnae na patue toe. <sup>17</sup> A yungyoe



siangpahrang, kangning e, hmuthaihoehe, Cathut buet touh dueng teh barinae, bawilennae a yungyoe hoi a yungyoe awm lawiseh, Amen.

<sup>18</sup> Ka capa Timote, nang hanelah profet lahoi ka pâpho e naw hoi hete cingthuilaawnaw hah nang koe na poe. Hethateh, yuemnae hoi kathounge panuenae lung na tawn teh kahawi e tarankâtuknae na tuk thai nahane doeh. <sup>19</sup> Tami tangawn ni yuemnae a takhoe awh dawkvah, yuemnae long a rawk teh rawknae koe a pha awh toe. <sup>20</sup> Hotnaw thung dawkvah Himenaias hoi Alexander a bawk roi. Ahnimouh roi ni Cathut dudamnae lawk a dei roi hoeh nahanelah a kamtu roi nahan Setan kut daw koe poe toe.

## 2

### *Cathut bawknae*

<sup>1</sup> Tami pueng hanelah hai thoseh, siangpahrangnaw hoi kâ katawnnaw hanelah hai thoseh, <sup>2</sup> ratoum pouh hane hoi lunghawilawkdinae ahmaloe na sak awh nahan kai ni na hroecoe. <sup>3</sup> Hottelah tinae teh maimae rungngangkung Cathut hmalah ngai kaawm e lah doeh ao. <sup>4</sup> Tami pueng rungngang lah o vaiteh, lawkkatang panuenae koe pha sak hanelah Cathut ni a ngainae ao. <sup>5</sup> Cathut teh buet touh dueng doeh kaawm. Cathut hoi taminaw rahak tami lah kaawm e Khrih Jisuh buet touh dueng doeh laicei lah kaawm. <sup>6</sup> Ahni ni tami pueng ratang hanelah a tak a pasoung toe. A tue a pha toteh a kamnue sak. <sup>7</sup> Kai teh kapâphokung lah thoseh, guncei lah thoseh, yuemnae hoi Khrih thung e lawkkatang hah Jentelnaw koe ka pâpho hane saya lahai thoseh, na ta toe. Hottelah ka dei nah laithoe ka dei hoeh, hmantang doeh ka dei.

### *Tongpanaw hoi napuinaw hanelah cingthuinae*

<sup>8</sup> Tongpanaw ni hmuen tangkuem koe, lungkhueknae, kâounnae awm laipalah, kathounge kut dâw laihoi na ratoum awh nahanlah na ngaikhai awh. <sup>9</sup> Hot patetvanlah, napuinaw ni samveinae, sui, pale, apu kaawm e khohnanaw hoi kamthoup laipalah, mitkhet kamcu lah kamthoup awh nateh, lungdo lungnem lahoi kacuemkamui lah awm awh. <sup>10</sup> Cathut ka barilawa e napuinaw ni a kamthoup hanelah ao e patetlah, kamcu e nuen hoi kamthoup awh na seh.

<sup>11</sup> Napuinaw teh lawngai laihoi lawkkamuem lah kamtu naseh. <sup>12</sup> Napui teh tongpanaw lathueng cangkhae hoi kâtawnnae ka poe hoeh. Napui teh lawkkamuem ao hanlah ao. <sup>13</sup> Bangkongtetpawiteh, Adam hmaloe a sak hnukkhu Evi sak e lah ao. <sup>14</sup> Hothloilah, Adam teh tacuek lah awm hoeh, Evi doeh tacuek lah kaawm niteh ka payon. <sup>15</sup> Hateiteh, napuinaw teh, kacuemkamui lah onae, yuemnae, lungpatawnae, thoungeae daw koe awm awh pawiteh, cakhenae daw rungngang lah ao awh han.

## 3

### *Bishop lah kuepnae*

<sup>1</sup> Tami buet touh ni bishop thaw taw koe hanelah ngai pawiteh thaw kahawi ka ngai e lah ao. <sup>2</sup> Bishopnaw teh, tounhoehe, napui buet touh e vâ lah kaawm e,, kâhruetcuete e, kacuemkamui lah kaawm e, imyin ka ngai e, ka cangkhai thai e han. <sup>3</sup> Yamuhri lah kaawm hoeh e, ka pahngawpahrak hoeh e, kamsoum hoeh lahoi tangka hmu ka ngai hoeh e, a lung kanem e, ayâ hoi kâyue hoeh e, tangka ka hounloun hoeh e han. <sup>4</sup> Ama e



imthung kahawicalah ka uk thai niteh, a canaw ka yue ka toun thai e tami han. <sup>5</sup> Ama e imthungkhu patenghai kahawicalah hrawi thai hoehpawiteh bangtelamaw kawhmoun a khetyawt thai han. <sup>6</sup> Kâthungtahma e tami mahoe. Telah nahoe pawiteh, ahni ni kâoup vaiteh, kahraimathout hoi kâvan e yonphukhangnae dawkwawt payon vaih tie ngaihrinae ao. <sup>7</sup> Pathoene awm laipalah kahraimathout mannae dawkwawt hoi a hlout nahan, alawilae taminaw koe bari kaawm e tami han.

### *hotunaw*

<sup>8</sup> Hot patetvanlah, hotunaw hai a lung kacakpounge han. A lai ka samphei e, yamuhri lah kaawm e tami mahoe. Kathounghoehe tangka hmuna e ka ngai hoe e tami han. <sup>9</sup> Ma hoi ma kâpanuene lung a thoung vaiteh yuemnae a dungkawnae hah mangkhak kangdoutkhai e tami han. <sup>10</sup> Ahnimouh hai tanouknae hmaloe a kâhmo awh hnukkhu, tounhoehe lah awm pawiteh, hotunaw thaw tawkwawt awh naseh.

<sup>11</sup> Ahninae yunaw hai a lung kacakpounge lah ao awh han. Tam-cueklawkwawt ka dei e lah awm laipalah, kâhruetcuete e, lawkkam kacakpounge lah ao awh han.

<sup>12</sup> Hotunaw teh, napui buet touh e vâ lah ao han. A yu a ca kahawicalah ka uk thai e han. <sup>13</sup> Bangkongtetpawiteh, hotunaw thaw kahawicalah katawknae teh, amamouh hanelah min hawinae a hmu awh hloilah, Khrih Jisuh thung yuemnae dawkwawt, taranhawinae a hmu awh.

### *Cathut lawkwawt dawkwawt hringnae*

<sup>14</sup> Nang koe ca ka thut ngainaeh teh nang koe karanglah ka tho hane ka ngaihawie ei, <sup>15</sup> ka hnawng pawiteh Cathut e imthung dawkwawt bangtelamaw kâroekâkhawie han tie hah, na panue thai nahanlah, hettelah ka thut teh na patawn. Hote im hateh, kahring Cathut e Kawhmoun doeh, lawkkatang e khom hoi adu pui doeh. <sup>16</sup> Cathut lawkwawt hoi khosaknae teh atangcalah adungkaw tanggak. Cathut teh takthai dawkwawt a kamnuete. Muitha lahoi a katang doeh titeh a kampangkhai. Kalvantaminaw nihai a hmu awh toe. Jentelnaw nihai kamthang lawkwawt a thai awh toe. Talaivan taminaw nihai a yuem awh toe. Bawilennaeh hoi lathueng lah tawm lah ao toe.

## 4

### *Kamsoumhoehe kacangkhaikungnaw*

<sup>1</sup> Muitha ni kamcengcalah a pâpho e teh, a to hmalah teh dumpyennaeh muithanaw hoi kahraituulinaw e cangkhainaeh dawkwawt dawn awh vaiteh, yuemnae a ceitakhai awh han. <sup>2</sup> Hote cangkhai e naw teh, amamaeh panuene lung hah sumhmaisaan hoi kânep awh niteh, a lai kathout e, tami kahawie lah ka kâsak e naw koehoi doeh a tho. <sup>3</sup> Ahnimouh ni kâpaluennaeh cakâ awh vaiteh, kayuem niteh lawkkatang ka panuek e taminaw ni lunghawilawkwawt deinaeh lahoi canei hane rawca Cathut ni a sak e hah a hai sak awh han. <sup>4</sup> Cathut ni a sak e pueng teh ahawie dawkwawt lunghawilawkwawt deinaeh lahoi hno pawiteh, hnoun hane banghai awh hoe. <sup>5</sup> Bangkongtetpawiteh, Cathut e lawkwawt lahoi thoseh, ratoum e lahoi thoseh, bangpueng teh a thoung.

### *Jisuh e san kahawie*

<sup>6</sup> Hete lawknaw hah hmaunawngghanaw koe na dei pouh pawiteh, Jisuh Khrih e thaw ka tawkwawt e, yuemnaeh lawknaw hoi kawkhik e lah



na o han. <sup>7</sup> Napui matawngnaw ni ouk a dei awh e lairuiapakongnaw hah takhoe nateh, Cathutlae khosaknae lahoi namahoima kâcangkhai haw. <sup>8</sup> Takthai dawkhâ cangkhai nae teh hawinae moikapap awmhoeh. Cathut lawk dawkhosaknae teh atu e hringnae hoi due hnukkhu e hringnae totouh lawkkamnae ao dawkvah, bangpueng hanelah hawinae ao. <sup>9</sup> Hethateh yuemkamcu e hoi dâw hane roeroe lah kamcu e doeh. <sup>10</sup> Hatdawkvah, maimouh teh hot hanelah thapatho teh panki laihoi tawkhaw. Bangkongtetpawiteh, tami pueng rungngangkung, alawkpui lah kayuemnaw e rungngangkung lah kaawm e kahring Cathut hah maimouh ni ngaihaw awh.

### *A thawawknaw dawk lamthung pâtuena*

<sup>11</sup> Hete hnouaw hah kâ poe nateh cangkhaih. <sup>12</sup> Na nawnae hah apinihai, dudam hanh naseh. Lawk deinae, kêroekâkhawinae, ayânaw lungpatawnae, muitha hoi hringnae, lawkkamcacknae, thoungnae dawkvah, kayuemnaw han khetsin hanelah awm loe. <sup>13</sup> Kai ka tho hoehrourak Cakathoung touknae, thapoenae hoi cangkhai nae hah panki laihoi pou sak loe. <sup>14</sup> Kacuenaw e kut toung e hoi sutdeilawkhahoi, nang koe poe lah kaawm e poehno hah noutna laipalah awm hanh. <sup>15</sup> Na rounngnae teh taminaw koe kamnue sak nahanelah, hotnaw hah panki loe. <sup>16</sup> Nama hoi nama na kâcangkhai nakunghai thoseh, na cangkhai e dawkhah thoseh, kâhruetcuete nateh pou awm loe. Hottelah na tetpawiteh nama hoi na lawk kathainaw hah na rungngangkung han.

## 5

### *Kawhmoun Thung e Thaw*

<sup>1</sup> Tongpa matawngnaw hah puenghoi yue laipalah, na pa patetlah thapoe loe. Tongpa kanaw hah hmaunawngnae patetlah pouk loe.

<sup>2</sup> Napui matawngnaw hah na manu patetlah pouk nateh, tanglanaw hah kathoungpoung na tawncei patetlah pouk loe.

<sup>3</sup> Lahmai lah kaawm katang e napuinaw hah bari nateh khenyawn loe. <sup>4</sup> Hateiteh, hote lahmaw ni a ca catounnaw tawn pawiteh, hote ca catounnaw ni Cathut thaw lah a pouk awh vaiteh, mae im a khetyawt hoi, manu na pa mintoenaw khetyawtnae kamtu awh naseh. Hottelah tawknaw teh Cathut ni a ngai e doeh. <sup>5</sup> Khenyawnkung awm laipalah amadueng kaawm e lahmaw ni teh, Cathut kâuep laihoi karum khodai pout laipalah ouk a ratoum. <sup>6</sup> Hatei, talai van nawmnae dawkhah cet e lahmaw ni teh a hring nahlangva kadout e lah ao. <sup>7</sup> Apinihai tounhoehe lah ao nahan kâ poe loe. <sup>8</sup> Apipatethai imthung ka khenyawn hoehe e teh yuemnae ka pahawt e lah ao teh, kayuemhoehnaw hlah hoe a mathoe.

<sup>9</sup> Kum 60 kakuep hoehe rae teh lahmaw ni lah khoe hanh loe, a vâ buet touh dueng ouk kaawm e, <sup>10</sup> a canaw kahawicalah ka khen thai e, imyin ka ngai e, tami kathoungnaw e khok ka pâsu e, rucat ka kâhmo e naw ka khenyawn e, kahawi hno kaawm e pueng ka tawkhah lah awm pawiteh, lahmai lah khoe han.

<sup>11</sup> A kum kanaw e lahmaw ni teh, lahmaw ni lah khoe hanh loe. Bangkongtetpawiteh, Khrih e cangkhai nae ngai hoehe, vâ sak hanelah ngai pawiteh, <sup>12</sup> ahmaloe lawkkam a raphoe dawkvah, yonphukhangnae ao han. <sup>13</sup> Im touh hnukkhu im touh a luen awh teh, a pangak awh. Hottelah a pangak awh dueng tho laipalah, tamthoe a dei awh teh ayânaw e lai dawkhah kâphum awh teh, dei kawh hoehe e hah ouk a dei awh. <sup>14</sup> Hatdawkvah,



kanaw e lahmmainu teh a vâ bout a tawn vaiteh, a canaw bout sak naseh. Ayâ ni bout pathoe hoeheh nahanlah a imthung kahawicalah bout tawn naseh, pathoenae heh taran ni a tha kâla hoeheh nahan lah. <sup>15</sup> Lahmainu tangawn teh, lam a payon awh teh setan hnuk a kâbang awh toe.

<sup>16</sup> Ka yuem e napui hoehpawiteh, tongpa ni ama hoi kâkuen e lahmmainu tawn pawiteh, khenyawn naseh. Hat pawiteh doeh, lahmmainu katangnaw hah tarawknae awm laipalah, kawhmoun ni a khetyawt thai han.

<sup>17</sup> Kahawicalah ka uk e kacuenaw, alawkpui lah lawk pâphonae hoi cangkhaiae dawkvah, panki laihoi ka tawk e kahrawikungnaw teh, let hni touh barinae lah awm awh naseh. <sup>18</sup> Cakathoung ni cangkatin lahun e maitotan a pahni moun pouh hanh, thawtawkkung ni a tawknae phu hmu hanelah a kamcu, telah bout a ti. <sup>19</sup> Kacue ni hno a sakpayon nah, kapanuekkhaikung kahni kathum touh awmhoeheh pawiteh hote yonpennae teh dâw pouh hanh loe. <sup>20</sup> Alouke taminaw ni a taki nahan yonnae ka sak e tami teh taminaw hmalah yue loe.

<sup>21</sup> Kapeknae tawn laipalah, bang patet e hno dawk hai, kâkangkhai e tawn laipalah na tawk nahan, Bawipa Jisuh Khrih hoi Cathut hmalah, rawi lah kaawm e kalvantami hmalah ka patawpoung lah na hroecoe.

<sup>22</sup> Apipatet e lathueng haiyah, kuttoungnae hmatara sak pouh hanh loe. Ayâ alouknaw e lumlai dawk hai bawk hanh loe. Nama hoi nama kamthoung loe.

<sup>23</sup> Na vonpui patawnae hoi atuhoitu na damhoehnae dawkvah, tui dueng net laipalah misurtui hai youn touh net khai loe.

<sup>24</sup> Tami tangawn e yon teh lawkceng hoehnahlan a kamphawng toe. A tangawn e yon teh a hnukkhu doeh ouk a kamphawng. <sup>25</sup> Hot patetvanlah hnokahawi sak e haiyah, bangpatet teh tang a kamnue, kamnuek hoeheh rae hnokahawi sak e hai hrawk thai mahoeheh.

## 6

### *Bawi barilawanae*

<sup>1</sup> Cathut min hoi cangkhaiae teh dudam e lah ao hoeheh nahan, patoun e san niteh a bawipa hah a bari hanelah a kamcu tie panuek naseh.

<sup>2</sup> A bawipa teh ka yuem e lah awm pawiteh, hmaunawngnae doeh tie lung hoi hnepnap laipalah, hoe kahawicalah tawk pouh awh naseh. Bangkongtetpawiteh, kahawicalah tawk pouh e ka coe e bawi teh, ka yuem e tami, lungpataw kawi e tami lahai ao. Hetnaw heh cangkhai nateh hroecoe loe.

### *Alouke cangkhaiae hoi hounlounnae*

<sup>3</sup> Tami buetbuet touh ni ka thuem hoeheh e cangkhaiae hah a cangkhaia teh, maimae Bawipa Jesuh Khrih e kathoung cangkhaiae hoi cathutlae cangkhaiae ka tarawi hoeheh e tami teh, lunglenpansa lah kaawm niteh banghai ka panuek hoeheh e doeh. <sup>4</sup> Lawklung kâounnae hoi kamcan dawk a lung kapen e lah ao awh. Hot kecu dawkvah, hounroenae, kâyuenae, dudam lawk deinae, lunghringnae ouk a tâco. <sup>5</sup> Hottelah panuenae lung a kamko dawkvah, lawkkatang ka bawk hoeheh e kâounnae lah ao teh, Cathut lawk dawk khosaknae teh aphu ao tounglounng katetnaw koe ka pout thai hoeheh e kâounnae ouk a tâcokhai.

<sup>6</sup> Hatei, lungkuepnae lahoi Cathut lawk dawk khosaknae teh aphu ao tanggak doeh. <sup>7</sup> Bangkongtetpawiteh, maimouh teh het talaivan dawk banghai sin laipalah tho awh dawkvah, banghai sin laipalah bout tâco awh han tie teh a kamceng. <sup>8</sup> Hatdawkvah, canei khohna han tawn e ca



dawk lungkuep awh sei . <sup>9</sup> Tawnta han ka ngai e taminaw teh dумыennaе dawk thoseh, karap dawk thoseh, taminaw kamkoneaе dawk ka bawt sak e radueknae dawk thoseh, ouk a bo awh. <sup>10</sup> Bangkongtetpawiteh, tangka lungpatawnae teh kahawihoehe hno pueng e a kung lah ao. Taminaw teh tangka thouk a hounloun awh dawkvah, yuemnae dawk hoi lam a phen awh teh, lungreithainae hoi runae a kâpoe awh.

*Yuemnae hoi kâkuen e kâtuknae*

<sup>11</sup> Hatdawkvah, Oe! Cathut e tami, nang teh hote yonnae hah roun loe. Lannae, Cathut lawk dawk khosaknae, yuemnae, lungpatawnae, panguepnae, lungdo lungnemnae hah pou pâlei haw. <sup>12</sup> Yuemnae hoi kâkuen e, kahawi e kâtuknae hah tuk nateh, a yungyoe hringnae hah kuen nateh tawn loe. Nang teh hote hringnae hanlah, kaw lah na o dawkvah, kapanuekkhaikungnaw e hmalah kahawicalah na pâpho toe. <sup>13</sup> Khrih Jisuh a kamnue ditouh, nang teh tounhoehe lah na o nahanlah, kaie kâpoelawk na tarawi nahan, <sup>14</sup> a cawngca pueng kahring sak e Cathut hmalah hai thoseh, Pontius Pailat bawi hmalah hai thoseh, kahawicalah pâphonaе lahoi kampangkhai e Bawipa Jisuh Khrih hmalah hai thoseh, kai ni kâ na poe. <sup>15</sup> A tue a kuep toteh Cathut ni Khrih a kamnue sak han. Cathut teh yawhawinae ao teh, buet touh dueng e ukkung Bawi lah ao. Siangpahrang pueng e Siangpahrang, bawi pueng e Bawi lah ao. <sup>16</sup> Bawipa dueng doeh duenaе dawk hoi kahlout niteh, rek hnai thai hoehe e angnae dawk kaawm. Taminaw thung dawk api buet touh nihai Cathut teh hmawt awh boihoehe, hmawt hai hmawt thai awh hoehe. Hote Cathut teh bahu hoi barinae a yungyoe awm lawiseh. Amen.

*Katawntanaw kâhruetcuеt poenaе*

<sup>17</sup> Atu e hringnae dawk tangka katawntanaw teh, kâoupnae lung tawn laipalah, kangning hoehe e hnopai kâuep laipalah, maimouh ni coe hane ka kuep lah na ka poe e kahring Cathut kâuep nahanlah cingthui loe. <sup>18</sup> Ayânaw hanlah hnokahawi saknae, nuencang kahawi hoi kamsi laipalah ka poe e naw lah coungkacoe ao awh nahan, <sup>19</sup> hringnae katang a coe awh nahanelah due hnukkhu hringnae adu a ung thai awh nahanlah cingthui loe.

<sup>20</sup> Oe! Timote, nang koe na poe e naw hah tarawi loe, Cathut lawk hoi kâkuen hoehe e ayawmyin lah dei e lawknaw hoi, talai thoumthainae lahoi kâtaran lah deinae hah roun loe. <sup>21</sup> Hote talai thoumnae hah, tami tangawn ni kampangkhai e lahoi, yuemnae lamthung a phen awh toe. Nang koe lungmanaе awm lawiseh. Amen.



## 2 TIMOTE (The Second Epistle of Paul to Timothy)

### *Lawk karouknae*

<sup>1</sup> Kai Pawl, Khrih Jisuh thung kaawm e hringnae hoi kâkuen e lawkkamnae patetlah, Cathut ngainae lahoi Jisuh Khrih e guncei lah kaawm e ni, ka lungpataw e ka ca Timote koe ca na patawn. <sup>2</sup> Maimae Bawipa Khrih Jisuh hoi Pa Cathut koe e lungmanae, pahrennae hoi lungmawngnae teh nang koe awm lawiseh.

### *Lunghawi thapoena*

<sup>3</sup> Mintoenaw ni a bawk awh e Cathut e lungmanae teh ka pholen. Karum khodai ka ratoum navah nang teh na pahnim hoe. <sup>4</sup> Na mitphi, kai ni ka pouk navah lunghawinae hoi na kaw i thai nahanlah nang hoi kâhmo han dikdik ka doun. <sup>5</sup> Na minpui Lois hoi na manu Euniki ni yuemnae hmaloe a tawn teh, atu nang nihai yuemnae na tawn tie teh ka panue. <sup>6</sup> Hatdawkvah, kai ni kut na toung sin e lahoi Cathut ni poehno na poe e hah bout na kâtahrue nahan na thai sak. <sup>7</sup> Cathut ni takinae muitha na poe hoe, taranhawinae, lungpatawnae hoi mahoima kâcakup thainae muitha doeh na poe awh.

### *Kahawi hno dawк taket hanh*

<sup>8</sup> Hatdawkvah Bawipa e lawkpanuesaknae dawк kayak hanh, ahni kecu thongim ka bawt e kai hai kayakkhai hanh, Cathut e kamthang kahawi dawк khang thai hringnae ma tawn haw. <sup>9</sup> Cathut ni teh amae tami roeroe lah coung nahanelah na rungngang teh na kaw awh. Hot teh maimae tawksak thainae dawк nahoe, amae na pahren lungmanae dawк doeh. Atue kamtawng hoehnahan, lungmanae teh Khrih Jisuh thung na poe tangcoung e lah ao toe. <sup>10</sup> Hateiteh atu angnae teh maimae rungngangkung Jisuh Khrih a tho e dawк talai tami pueng koe a kamnue sak. Duenae a raphoe teh hringnae kamthang kahawi hoi angnae koe a sin toe. <sup>11</sup> Hete kamthang kahawi hramkhai hanelah thoseh, Jentelnaw kacangkhaikung lah thoseh Cathut ni na rawi toe. <sup>12</sup> Hot kecu dawк hete roedengnae khang awh. Hatei, khoeroe kayakkhai hoe. Bangkongtetpawiteh, ka yuem e Cathut teh ka panue. Ama koe ka poe e hah hote hnin totouh, Bawipa ni a khetyawt thai tie ka ngaiuep.

<sup>13</sup> Kai ni na cangkhai e Khrih Jisuh thung kaawm e yuemnae hoi lungpatawnae hah khetsin hanelah kacaklah kuen loe.

### *Yuem cak nahane tha poena*

<sup>14</sup> Maimae thung kaawm e Kathoung Muitha thaona e hoi na kut dawк poe lah kaawm e thaw kahawicalah tawк loe. <sup>15</sup> Asia ram dawк kaawm-naw ni kai teh na pahnawt awh toe tie hah na panue toe. Ahnimanaw dawkvah, Phygelus hoi Hermogenes hai ao roi. <sup>16</sup> Onesiphorus ni lung pou na hawi sak dawkvah Cathut ni a imthung koe yawhawinae poe naseh. Sumbawtarui hoi ka o e heh ka kayak khai hoe. <sup>17</sup> Rom kho a pha toteh kai na hmu hoehroukrak na tawng. <sup>18</sup> Hote hnin dawк Cathut koehoi a lungmanae a hmu thai nahanelah, Bawipa ni poe lawiseh. Hahoi, kai hanlah banghloimaw Efisa kho dawк thaw na kabawp teh na khetyawt tie hah na panue.



## 2

*Lungmanae dawk cak nahanlah hroecoenae*

<sup>1</sup> Ka ca, nang teh Khrih Jisuh thung kaawm e lungmanae lahoi kacaklah awm loe. <sup>2</sup> Kapanuekkhaikung moikapap ao e patetlah kai koe na thai tangcoung e naw hah, yuemkamcu niteh alouke tami bout ka cangkhai thai hane naw koe patuen poe loe. <sup>3</sup> Jisuh Khrih e ransa kahawi lah kai hoi reithai khang van loe. <sup>4</sup> Ransa thaw ka tawk ni a bawipa e lawk a tarawi e patetlah talai koe lah na lung pen hanh. <sup>5</sup> Yawng kâtânae dawk ka yawng e ni a phunglam patetlah yawng hoehpawiteh, bawilukhung hmawt mahoe. <sup>6</sup> Law ka sak nihai hmaloe a patang torei doeh a tawk na phu a ca van. <sup>7</sup> Ka dei e lawknaw pueng Bawipa ni panuenae na poe e hoi kahawicalah pakhingpalang loe. <sup>8</sup> Devit catoun duenae koehoi kathaw e Jisuh Khrih kong heh pahnim awh hanh. <sup>9</sup> Kamthang kahawi kecu dawk tamikapo patetlah na hmu awh, na man awh teh na katek awh. Hateiteh Cathut lawk teh katek thai awh hoe. <sup>10</sup> Hatdawkvah rawi lah kaawm e naw teh Khrih Jisuh thung kaawm e rungngangnae hah yungyoe bawilennae hoi cungtalah a hmu thai awh nahanelah kai ni ahnimouh hanelah bangpueng ka khang.

<sup>11</sup> Hetteh yuemkamcu e lawk doeh, ama hoi dout awh pawiteh ama hoi rei hring awh han. <sup>12</sup> Ama hoi panguap awh pawiteh ama hoi cungtalah rei uk awh han. Na pahnawt pawiteh na pahnawt awh van han. <sup>13</sup> Maimouh ni yuem awh hoe nakunghai Bawipa teh yuemkamcu dawkvah, amahoima kâpahnawt thai hoe.

*Bawipa hmalah yuemkamcu e*

<sup>14</sup> Bawipa hmalah cungkeihoehe kâoun rumram e naw hah kâhruetcuetae poe haw. Kâounnae ni hnokahawi thokhai hoe, kâraphoenae dueng doeh a thokhai. <sup>15</sup> Nang teh Cathut hmalah yuemkamcu e tami lah na o teh lawkkatang hah kahawicalah kapek thai e, a taran kahawi e thaw katawkkung buet touh lah na kâhmoun thai nahan panki loe. <sup>16</sup> Cathutlaipa e pathunae lawknaw hah roun loe. <sup>17</sup> Cangkhai payonnae teh a hmâ hoe kalensakkung lah ao. Himenaias hoi Philetus teh cangkhai payon dawk a kambawng roi.

*Lawkkatang lamthung*

<sup>18</sup> Ahnimanaw ni lawkkatang lamthung a phen awh teh, kadout tangcoungnaw yo a thaw awh toe telah a dei awh dawkvah, tami tangawn e yuemnae a payon sak awh. <sup>19</sup> Hateiteh, Bawipa ni amae taminaw hah a panue. Bawipa min kampangkhai e taminaw teh hno kahawihoehe roun han tie hoi tacikkin lah kaawm e Cathut e im du teh a cak.

<sup>20</sup> Kalen e im dawk sui, ngun, thing, talai hoi sak e aphunphun ao teh bari e hno hoi barihoehe hno hai ao. <sup>21</sup> Hatdawkvah, ka dei tangcoung e patetlah kahawihoehe pahnawt vaiteh, barinae, kathoung niteh imkung ni hno hane kawi lah o han a ngai.

<sup>22</sup> Nang teh nawsainaw ni raduek e roun nateh, lannae, yuemnae, roumnae, lungpatawnaw naw hah kacaklah poe kuen loe. <sup>23</sup> Pathunae lawk kâpaceinae niteh kâyuekâounnae doeh a tâcokhai tie panuek nateh roun loe. <sup>24</sup> Bawipa e a san teh ayâ hoi lawk pungnae tawn mahoe, alouknaw koe pahrennae ka tawn e hoi, Lung kasawe tami lah ao han. <sup>25</sup> Ama ka tarannaw koe lawkkanem hoi cangkhai a ngai. Lawkkatang a dâw nahanelah Cathut ni lung kâthungnae a poe hai a poe yawkaw han



doeh. <sup>26</sup> Hahoi, kahraimathout ni a ngainae patetlah a man e taminaw ni a kâpanue vaiteh, hote mannae dawk hoi a hlout hai a hlout awh han doeh.

### 3

#### *Ka tho hane a tue kamathout*

<sup>1</sup> A hnukteng e hnin toteh atueng kathoute a tho han tie hah panuek loe. <sup>2</sup> Bangtelamaw tetpawiteh, amahoima lungkapatawe, tangka ka hounloun e, ka kâoup e, ayâ dudamnae lawk ka dei e, ayâ min mathoe ka poe e, manu na pa lawk ka ngâi hoeh e, hawinae ka panuek hoeh e, ka thoung hoeh e, <sup>3</sup> pahrennae ka tawn hoeh e, tami ka hmuhma e, tami ka tacuek e, amahoima kâcakuiep thai hoeh e, ka pahngawpahrak e, tami kahawinaw lungpataw hoeh e, <sup>4</sup> lawkkam ka cak hoeh e, lawk ka ngâi hoeh e, lunglenpansa lah kaawm e, Cathut lungpataw hlak hnopai tawnta hoe lungpataw e, <sup>5</sup> Cathut thaw ka ngai e patetlah ao eiteh Cathut thaw dawk onae hah ka pahnawt e lah ao awh han. Hot patet e taminaw hah roun loe.

<sup>6</sup> Bangkongtetpawiteh ahnimouh thung dawk e tami tangawn teh, imnaw dawk arulaho a kâen awh teh, radueknae aphunphun hnuk a kâbang awh teh, yon toungloung toungloung ka sak e napui kaponaw hah a man awh. <sup>7</sup> Hote napui kaponaw teh pou a kamtu eiteh nâtuék hai lawkkatang panuek thai awh hoeh. <sup>8</sup> Jannes hoi Jambres ni Mosi a taran roi e patetlah ahnimanaw hai lawkkatang hah a taran awh. Ahnimouh teh a lungthin a kamko toung dawkvah ka yuem e patetlah a kâsak awh. <sup>9</sup> Ahnimanaw teh bout thaw thai awh mahoe toe. Bangkongtetpawiteh ahnimae pathunae teh ahnimouh roi e pathunae patetlah tami pueng e hmalah a kamphawng han.

#### *Cakathoung ni na poe e kahawi hno*

<sup>10</sup> Hatei, nang teh kaie cangkhae, o angnae, pouknae, yuemnae, lungsawnae, lungpatawnae, panguepnae dawk hai thoseh, <sup>11</sup> Antiok kho, lkonium kho hoi Listra khonaw dawkvah ka kâhmo e rektapnae hoi rucatnae dawk hai thoseh, nangmouh hoi pou ka o. Hot patet e rektapnae hah kai ni ka khang ei, hotnaw pueng dawk hoi Bawipa ni na hlout sak. <sup>12</sup> Atangcalah, Khrih Jisuh thung cathutlae khosaknae ka ngai e tami pueng teh rektapnae a khang han. <sup>13</sup> Tamikathoutnaw hoi tami ka dumyen e naw teh ayânaw hai a dum awh teh, ama hai a kâdum awh teh hoe ka mathout e kamkonae koe hoehoe a bo awh han. <sup>14</sup> Nang teh, nama ni na kamtu teh kacaklah na yuem e dawk awm loe. Bangkongtetpawiteh, nang teh hote hnônaw hah api koehoi maw na kamtu tie hai thoseh, <sup>15</sup> Khrih Jisuh thung yuem e lahoi rungngangnae hmu thainae hah lungangnae nang na ka poe thai e Kathoung, Cakathoung hoi nangmanaw ca hoi na kahnai e hai thoseh, na panue toe. <sup>16</sup> Cakathoung dawk a thut e pueng teh Cathut ni kâha a poe e a tho dawkvah, cangkhai nahanelah thoseh, yon pâpho pouh nahanelah thoseh, payon e palan pouh nahanelah thoseh, lanna cangkhai hanelah thoseh, kahawipoung e lah ao. <sup>17</sup> Het hateh, Cathut e tami ni hnokahawi alouklouk a sak thai nahanlah ka kuep e tami lah ao thai nahane doeh.

### 4

#### *Lawkkatang pâpho hanelah hroecoena*



<sup>1</sup> Bawipa ama hoi a uknaeram a kamnuenae tueng toteh, kadoutnaw hoi kahringnaw lawk ka ceng hane Cathut hoi Bawipa Jisuh Khrih hmalah kai ni nang hah kâ na poe. <sup>2</sup> Lawk hah pâpho hanelah coungkacoe awm haw. Atueng o hai, ao hoeh hai thoseh, panki nateh pâpho haw. Lungsaw laihoi cangkhai nateh hroecoe, yue, thapoe loe. <sup>3</sup> Bangkongtetpawiteh, ato hmalah teh taminaw ni kathounge cangkhaenae ngai awh laipalah, a hnâ pathak awh vaiteh, amamouh ni a ngai awh e patetlah saya moikapap hnuk a kâbang awh han. <sup>4</sup> Lawkkatang tarawi awh laipalah, lairuiapakong tarawi awh vaiteh, lam a payon awh han toe, <sup>5</sup> Nang teh, bangpueng daw kâhruetcuete loe. Rucatnae hah panguep loe. Evangelist ni a taw k hane kawi hah taw k loe. Na taw k hane thaw hah thouk taw k loe.

<sup>6</sup> Bangkongtetpawiteh, kai teh thuengnae khoungroe van thueng lah ka o toe. Ka due nahane tueng a pha toe. <sup>7</sup> Kâtuknae teh kahawicalah ka tuk toe. Yawng hane lamthung hai apout totouh ka yawng toe. Yuemnae hai ka kuep sak toe. <sup>8</sup> Atuvah lannae bawilukhung ni sut na ring toe. Hatnae hnin Bawkvah, hmantang lawkcengkung Bawipa ni kai hah na poe han. Hothloilah, a kamnuenae ka lungpataw pueng koehai a poe han.

### *Ahnoung lawkthuinae*

<sup>9</sup> Kai koe karang tho hanlah panki loe. <sup>10</sup> Demak teh atu e talaivan hringnae a lungpataw dawkvah, kai na pahnawt teh Thesalon kho lah a yawng toe. Kresen hai Galati ram lah a cei. Titu teh Dalmatia ram lah a cei. <sup>11</sup> Luk dueng doeh kai koe kaawm. Mark hah thokhai haw loe. Bangkongtetpawiteh, thaw ka taw k navah na kabawmkung kahawipoung lah ao. <sup>12</sup> Taisikas hai Efisa kho lah ka patoun. <sup>13</sup> Hahoi, Troas kho Kapulet im ka ceitakhai e angki, cakalawng, hoi alawkpui lah phaivuen cauk hah pahnim laipalah uren thokhai lah a.

<sup>14</sup> Sum ka dêi e Alexander niyah kai daw k kahawihoehe hno thouk a sak. Bawipa ni a sak e patetlah pathung lawiseh. <sup>15</sup> Nang hai ahni hah kâhruetcuete loe. Bangkongtetpawiteh ahni ni kaimae lawk hah puenghoi a taran toe.

<sup>16</sup> Kai yon na pen awh e ka deicai pasuek navah, apinihai na kambawngkhai hoeh. Taminaw pueng ni na pahnawt awh. <sup>17</sup> Ahnimouh daw k Bawipa ni yon pen nahanh seh. Tami pueng ni na ka pahnawt nakunghai, kamthang kahawi Jentelnaw koe ka pâpho thai nahanelah doeh. Cathut teh kai koe lah a kampang daw k thaonae hoi na kawi sak. Sendek e pahni daw k hoi na hlout sak. <sup>18</sup> Hot dueng nahoehe, Bawipa ni kahawihoehe pueng koehoi na hlout sak toe. Amae kalvanlae uknaeram totouh na hrawi han tie ka panue. Hote Bawipa teh a yungyoe hoi a yungyoe pholennae awm lawiseh. Amen.

### *Yawhawi poenae*

<sup>19</sup> Priscilla hoi Aquila, Onesiphorus e imthungnaw kut man loe. <sup>20</sup> Erastas teh Kawrin kho daw k a o. Trophimus teh a pataw dawkvah Miletus khopui daw k ka ceitakhai. <sup>21</sup> Kasik thapa a pha hoehnahlan na tho thai nahane kâyawm. Ubulas, Pudén, Linus, Kalaudia hoi hmaunawngghanaw pueng ni nang teh kut na man awh. <sup>22</sup> Bawipa Jisuh Khrih teh nange muitha hoi rei awm lawiseh. Nang daw k Cathut lungmanae awm lawiseh. Amen.



## TITU (The Epistle of Paul to Titus)

### *Lawk karouknae*

<sup>1</sup> Kai Pawl, Cathut e a san lah kaawm niteh, Cathut ni a rawi e taminaw e yuemnae hanlah, Jisuh Khrih e guncei lah kaawm e, Cathut koe lah lawkkatang ka kangdoutkhai kung, <sup>2</sup> A lai kathout hoehe e Cathut ni, talai a kamtawng hoehnahlan lawk sut a hruek tangcoun e, a yungyoe hringnae hah ngaihawinae, <sup>3</sup> A tue a pha toteh a lawk a pâpho e lahoi, a kamnue sak teh, hote lawk hah maimouh na ka rungngangkung Cathut e kâpoelawk patetlah kai koe patue lah kaawm e ni, <sup>4</sup> Cungtalaw hmaung e yuemnae dawkvah, ka capa lah kaawm e Titu nang koe hete ca heh ka thut teh na patawn. Cathut hoi maimouh na ka rungngangkung Bawipa Jisuh Khrih e a lungmanae, a pahrennae hoi lungmawngnae teh nang koevah awm yungyoe lawiseh.

### *Kawhmoun thung kacuenaw e kuepnae*

<sup>5</sup> Kai ni lawk sut na thui tangcoun e patetlah Krete tuilum vah cum hoehe rae pueng pacum thai nahan, kho tangkuem vah kacuenaw na rawi pouh nahanelah, na hruek e doeh. <sup>6</sup> Kacue lah kaawm hane teh, yon toun e kaawm hoehe e tami, yu buet touh dueng ka tawn e tami, a canaw ka yuem e tami, lawk ka ngai hoehe e tami mahoehe. <sup>7</sup> Bangkongtetpawiteh, bishop teh Cathut e hno ka kuemkung patetlah tounhoehe, takngainae dawka hring hoehe e, a lung kaduem hoehe e, misurtui ka kâso hoehe e, ayâ hoi ka kâhem hoehe e, kaheng lah tangka tawn ka panki hoehe e tami han. <sup>8</sup> Imyin ka khenyawn thai e tami, tami kathoungnaw ka lungpataw e, a lungthin ka lan e, tamikalan lah kaawm e, tami kathoung lah kaawm e, ka kâcakuep thai e, tami han. <sup>9</sup> Kathoung cangkhai hoi a cangkhai thai nahan, katang hoehe e cangkhai e naw a pathung thai han, a kamtu tangcoun e yuemkamcue e lawk kacaklah ka kuen e tami han.

### *Kawhmoun thung lawk kaek e*

<sup>10</sup> Bangkongtetpawiteh, lawk ka ngai hoehe e tami, ayawmyin e lawk ka dei e tami hoi a lai kathoute tami moi ao awh. A lawkpui lah vuensoma e taminaw thung ao awh. <sup>11</sup> Ahnimae a pahni hah cakuep pouh awh. Ahnimouh teh kaheng lahoi hno tawn hane a panki awh. Cangkhai kawi hoehe e naw hah a cangkhai awh teh, imthung abuemlah lam a phen sak awh. <sup>12</sup> Ahnimouh thung e profet buet touh niyah, Kretenaw pueng a laithoe awh, a matheng a paan awh. A kâsokâroum awh teh, a pangakpasa awh ati. <sup>13</sup> Hete lawkpanuesaknae teh a tang tangngak. Hatdawkvah, ahnimouh hah raprap yue loe, yuemnae dawka a thoung awh nahanelah. <sup>14</sup> Judahnaw e lairuipakong hoi lawkkatang hnamthun takhainaw kâpoelawknaw hah tarawi pouh hanh. <sup>15</sup> Kathoung naw koe teh bangpueng a thoung. Kathounghoehe naw, ka yuem hoehe e naw koe teh bangpueng hai thoung hoehe. Amamae lungthin hoi, mahoima kâpanuenaenae lungthin pateng boehai thoung hoehe. <sup>16</sup> Cathut ka panue toe ka kâtet awh nakunghai, thaw a tawka awh e lahoi, Cathut a hnoun awh. Panuet ka tho e tami, lawk ka ngai hoehe e tami, kahawi e hno buet touh boehai ka sak panuek hoehe e tami lah ao awh.



## 2

*Kathuem e cangkhaïnae*

<sup>1</sup> Nang teh kathounge cangkhaïnae hoi ka kamcu e pueng hah pâpho haw. <sup>2</sup> Tongpa matawngnaw teh, kâhruetcuët e, a lung kacake amahoïma kâcakuëp e, yuemnae, lungpatawnae, panguepnae dawk a lung thahmei e tami lah o nahanelah pâpho pouh.

<sup>3</sup> Hot patetvanlah, napui matawngnaw hai, nuencang kathoung lah kaawm e, a khuekhaw kaawm hoeh lah ayânaw yon ka pen hoeh e, misurtui ka kâso hoeh e, hnokahawi kacangkhaïkung lah ao awh nahan pâpho pouh. <sup>4</sup> Hot patetvanlah, napui kanawnaw ni a vâdaw lungpataw awh nahan, a canaw lungpataw awh nahan, <sup>5</sup> kacuemkamui lah kathoung lah imlaw ka picai e lah, tami kahawi lah, vâ lawk ka ngai e lah, ao awh teh Cathut lawk pathoe e lah ao hoeh nahan napui matawngnaw ni a cangkhai awh nahan, <sup>6</sup> hot patetvanlah, tongpa kanawnaw nihai, lawk a ngâi thai nahan cangkhai loe. <sup>7</sup> Bangpueng koe kahawi e nuen kamtu kawi e lah kamnuek sak. Cangkhaïnae na sak navah katang e cangkhaïnae, lungcaknae, barilawa kawi lah onae, <sup>8</sup> toun kaawm hoeh e, kathounge lawk deïnae, kahawihoehe lawk a dei thai awh hoeh nahanelah, a kaya awh nahan kamnuek sak.

<sup>9</sup> Sannaw ni amamae bawi lawk a ngâi awh teh hno puengpa dawk lung ahawi sak awh nahan, <sup>10</sup> kutsaveksai laipalah, bangpatet e lawkkam e nakunghai kamcengcalah kamnue sak awh nahan, bangpuengpa dawk na ka rungngangkung Cathut e kathounge cangkhaïnae hoi a kamthoup awh nahan dei pouh nateh yue lah a.

<sup>11</sup> Bangkongtetpawiteh, Cathut e lungmanae teh tami pueng koe a kamnue teh, tami pueng koe rungngangnae hah a tho khai. <sup>12</sup> Cathutlaipanae, hoi talaivan hno noenae pahawt teh, mahoïma lungthin thoungnae, cathutlae hringnae hoi hring awh thai nahanelah, Cathut lungmanae ni atuëtueng vah na cangkhai awh. <sup>13</sup> Ka lentoe poung e Cathut hoi rungngangkung Jisuh Khrih ni bawilen poung lahoi, a kamnue nahane, yawhawi ngaihawinae ring hanelah cangkhai e lah ao. <sup>14</sup> Yonnae pueng thung hoi na ratang awh nahan, nuen kahawi koe lah cak awh teh, ama hanelah thoungsak nahan Bawi Jisuh Khrih ni amahoïma a kâhmoun toe.

<sup>15</sup> Hete hnonaw hah kâtawwnae abuemlahoi cangkhaih, tha poe nateh kâtawwnae lahoi yue lah a. Apinihai nang na dudam hanh naseh.

## 3

*Hnokahawi saknae*

<sup>1</sup> Taminaw ni kaukkungnaw hoi kâ kâtawwnaw e lawk a ngâi awh nahan, hnokahawi aphunphun hah a tarawi awh vaiteh coungkacoelah ao nahan, <sup>2</sup> apihai pathoe laipalah, apihai taran laipalah, lungdonae hoi lungnemnae hah tami pueng koe a sak thai awh nahan dei pouh.

<sup>3</sup> Bangkongtetpawiteh maimouh pueng haiyah, ahmaloe teh lungangnae ka tawn hoeh e tami, lawk ka ngâi hoeh e tami, a lai kathoute tami, aphunphun hah ka doun e tami, phunepnae dueng ka sak e tami, utsinnae hoi hounlounnae dawk ka hring e tami, panuetpasa ka tho e tami, buet touh hoi buet touh ka kâmaithoe e tami lah o awh. <sup>4</sup> Hatei, maimouh na ka rungngangkung Cathut e a pahrennae hoi a lungpatawnae hah tami koe a kamnue hnukkhu teh, <sup>5</sup> Maimouh ni tawksak e lannae lahoi tho laipalah, a katha lah khe teh pâsucinæ hoi Kathoung Muitha e khekathanae lahoi,



amae a lungmanae patetlah doeh na rungngang awh. <sup>6</sup> Maimouh na ka rungngangkung Jisuh Khrih lahoi, maimouh dawkvah hote Muitha puk ka poum lah na awi awh. <sup>7</sup> Bangkongtettawiteh, maimouh teh Cathut e a lungmanae lahoi, lannae koe pha awh teh, a yungyoe hringnae ngaihawi awh e patetlah a râw kacoekung lah o awh nahane doeh. <sup>8</sup> Hetteh yuemkamcu e lawk doeh. Cathut ka yuem e naw ni, kahawi e hno hah pou a sak awh nahan, kâhruetcuete awh nahan, hete lawknaw hah panki laihoi na cangkhai nahanelah, na ngaikhai. Hote hnonaw teh ahawi dueng laipalah tami pueng hanelah hawinae ka tâcawtkhai e lah ao.

<sup>9</sup> Pathunae lawk pacei e naw, miphun tâconae lairuinaw, kâlawk daw kâoun kâyuenae naw hah roun loe. Bangkongtettawiteh, hot patet e naw teh ahawinae awmhoeh. Ayawmyin doeh. <sup>10</sup> Kâ kapek sak hanelah ka thokhai e tami hah vai touh, vai hni touh yue nateh pâlei lawih. <sup>11</sup> Hot patet e tami teh a yonnae a panue nahlangva vah, ka yon niteh amahoima ka kâpakhup kâpathan e tami lah doeh ao.

#### *A hnukteng lawkthuinae*

<sup>12</sup> Artemas hoehpawiteh Taisikas hah nang koe ka patoun toteh Nikopolis kho totouh kai koe na tho thai nahan panki loe. Hote kho dawkvah kasik thapa totouh o hanelah ka kâcai. <sup>13</sup> Kâlawk ka panuek e Zenas hoi Apollos hah banghai a voutnae lah a ceinae lam daw kâhawicalah thak loe. <sup>14</sup> Kaimae taminaw ni a paw paw laipalah o hoe hah nahan, amamouh hno hane kawi a tawn awh thai nahan, hnokahawi hah pou a tawk awh thai nahan kamtu awh naseh.

<sup>15</sup> Kai koe kaawm e pueng ni kut na man awh. Yuemnae lahoi, kaimouh lung na ka pataw e naw hah kut man van loe. Nangmouh pueng koe a lungmanae awm yungyoe lawiseh. Amen.



## FILEMON (The Epistle of Paul to Philemon)

### *Lawk karouknae*

<sup>1</sup> Kai Pawl, Khrih Jisuh e thongim ka bawt lah kaawm e, hoi maimae hmaunawngna hmoi ni, lungpataw awh e thaw taw hui Filemon, <sup>2</sup> Lung pataw awh e tawncanu Apphia, ransa hui Archippus, hoi nama im kaawm e kawhmoun nangmouh koe ca na patawn awh. <sup>3</sup> Maimae Pa Cathut hoi Bawipa Jisuh Khrih koe hoi a lungmanae hoi lungmawngnae teh nangmouh koe awm yungyoe seh.

### *Filemon e lungpatawnae hoi yuemnae*

<sup>4</sup> Nang ni Jisuh Khrih na yuem teh tami kathoungnaw lung na pataw tie ka thai nah, <sup>5</sup> Cathut lungpatawnae hah ka pholen teh nang hanelah ouk ka ratoum. <sup>6</sup> Khrih Jisuh thung tawn e hno pueng na panue thai nahanlah yuemnae daw k na kâroe nahanlah ouk ka ratoum. <sup>7</sup> Ka nawngna, nang ni tami kathoungnaw e a lungthin na roum sak dawkvah, nange lungpatawnae daw k na lung ahawi awh.

### *Onesimus hanlah kâheinae*

<sup>8</sup> Hatdawkvah, na sak kawinaw hah na sak thai nahanlah Khrih thung taranhawinae lahoi nang teh kâ na poe. <sup>9</sup> A kum kacue e kai Pawl ni, Jisuh Khrih hanlah thongim ka bo nah patenghai yah, lungpatawnae lahoi doeh ka dei. <sup>10</sup> Kateknae ka khang lahun nah, ka ca Onesimus hanelah lawk na thui. <sup>11</sup> Yampa teh nang hanelah hno kamcu hoe e lah ao ei, atu teh nang hoi kai hanelah, hno kamcu e lah ao toe.

<sup>12</sup> Ahni hah nang koe let ka patoun dawkvah, ka ca rayin patetlah pouk lah a. <sup>13</sup> Kamthang kahawi kecu daw k, kateknae ka khang navah na ka khenyawn hanelah, nang na yueng ta hanelah ka ngai ei, <sup>14</sup> Kai daw k hawinae na sak navah, ngangngang saksak e lah awm laipalah, lungtho nalaihoi saksak e lah ao nahan, nang ni na pasoung laipalah banghai sak hane ka ngai hoe. <sup>15</sup> Hothloilah, nang ni ahni hah pou na tawn nahanlah, nang hoi dongdeng kampek e lah ao ti hanelah ao. <sup>16</sup> Hottelah ti navah, san patetlah nahoe, alawkpui lah ka lungpataw e ka nawngna lah ao. Nang koe natawng teh takthai koe lahai, Bawipa daw k hai, banghloimaw hoe ao han ka tinae doeh.

<sup>17</sup> Hatdawkvah kai hah na hui lah na pouk pawiteh, ahni hah kai patetlah pouk van lah a. <sup>18</sup> Ahni ni nang koe a payon e, lai a ba e awm pawiteh kai hanelah ma hrueng lawih a. <sup>19</sup> Ka patho pouh han ti teh kai Pawl ni ka kut hoi ca lah ka thut. Hatei, nama roeroe hah kai koe na patho hane ao ka ti ngainae na hoe. <sup>20</sup> Ka nawngna, Bawipa daw k kai koe hawinae sak haw. Khrih dawkvah ka lung roum sak haw. <sup>21</sup> Na tarawi han doeh titeh lunghringnae ka tawn hoe. Ka dei e hlak acawilah na sak han doeh titeh panue nalaihoi ca ka thut e doeh.

<sup>22</sup> Hothloilah, ka luen nahane im hai sut la pathoup lah a. Bangkongtet-pawiteh, nangmouh ni na ratoum awh e lahoi, nangmouh na o awhnae koe pha thainae kâ na poe han doeh ti teh ngaihawinae ka tawn.

### *Ahnoungpoung lawkthuinae*



<sup>23</sup> Khrih Jisuh thung kai hoi thongim rei ka bawt roi e Epaphras, <sup>24</sup> thaw ka tawh hui lah kaawm e Mark, Aristarkas, Demas, Luk tinaw ni kut na man awh.

<sup>25</sup> Maimae Bawipa Jisuh Khrih e a lungmanae teh nangmae lungthin muitha hoi cungtalawh awh lawiseh. Amen.



## HEBRU (The Epistle to the Hebrews)

### *Capa teh kalvantami hlak hoe a talue*

<sup>1</sup> Yampa teh Cathut ni profetnaw hno laihoi mintoenaw koe aphunphun lahoi lawk a dei. <sup>2</sup> Hatei, atu hnukteng e atueng nah, a Capa hno laihoi maimouh koe lawk a dei. Cathut ni Capa teh hnocawngca e raw kacoekung lah a rawi. Hote a Capa lahoi talaivan hai a sak. <sup>3</sup> Capa teh, Cathut e bawilennae raeng hoi a counгнаe kamnuek sak e lah ao. Ama e bahu hoi kakawi e a lawk hnosaikhainae lahoi a cawngca pueng hah acak sak teh, maimae yonnae pueng hai ama roeroe ni a thoungsak hnukkhu, kalvan vah Bawilennae aranglah a tahung.

<sup>4</sup> Kalvannaw e min hlakvah min a lentoe dawkvah kalvantaminaw hlak hai ka lentoe e lah ao. <sup>5</sup> Bangkongtetpawiteh, nang teh ka Capa lah na o, sahnin vah nang teh na khe tie thoseh, kai teh ahnie na pa lah ka o han, ahni hai kaie Capa lah ao han tie thoseh, telah kalvantaminaw koe tet pouh boihoeh. <sup>6</sup> Hahoi, Cathut ni a camin hah talaivan a patoun navah Cathut e kalvantami pueng ni ahni teh bawk awh naseh telah a ti. <sup>7</sup> Hahoi, kalvantaminaw hoi kâkuen lah, Bawipa ni a kalvantaminaw teh kahlî patetlah thoseh, a thaw katawknaw teh hmaipalai patetlah thoseh a coung sak, telah a ti. <sup>8</sup> Hateiteh, a Capa hoi kâkuen lah a dei e teh, Oe Cathut, Na bawitungkhung teh a yungyoe a kangning. Na Uknaeram teh na lannae hoi lawkcengnae ram lah ao. <sup>9</sup> Nang teh lannae hah na lungpataw teh, kathounghoehe hnonaw hah na hmuhma. Hatdawkvah, Oe Cathut, na Cathut ni na huikonaw hlak nang teh lunghawinae satui na awi toe telah a ti. <sup>10</sup> Cakathoung dawkvah bout a dei e patetlah, Oe Bawipa, nang ni apuengcue vah talai hah na sak, hahoi kalvannaw teh na kutsaknaw doeh. <sup>11</sup> Hatei, na kut sak hnonaw pueng teh kamko nakunghai, nang teh ayungyoe na kangning. Hno cawngca pueng teh khohna patetlah koung a pawn awh. <sup>12</sup> Bawipa ni hote hnonaw teh kâkhu e hni patetlah a kalawng teh, hotnaw teh khohna patetlah a kâthung han. Bawipa teh kâthung mahoe. A hringnae hai abaw tie awm hoe telah a ti. <sup>13</sup> Hothloilah, Cathut ni bang patet e kalvantami koe maw na tarannaw hah na khok tounгнаe lah kata hoehroukrak kaie aranglah, tahung loe atipouh boi vaw. <sup>14</sup> Kalvantaminaw pueng teh rungngangnae raw ka coe hane naw khetyawt hanelah, patoun e thawtawkkung muithanaw nahoehmaw.

## 2

### *Kâhruetcuet poenae*

<sup>1</sup> Hatdawkvah, maimanaw teh thai awh e kamthang lawk hah pahnim hoehe nahanlah lungthin dawkvah panue han ngainae tawn awh sei. <sup>2</sup> Kalvantaminaw hno lahoi a dei e lawk teh acak teh, payon kâtapoenae hoi lawkngaihoehae pueng dawkvah ka kamcu e rektapnae khang a boipawiteh, <sup>3</sup> Hettelah totouh, kalen e rungngangnae heh banglahai noutna awh hoehe pawiteh, bangtelamaw yon phu khangnae dawkvah hoi hlout thai awh han vaw. Hote lawk teh apuengcue vah Bawipa ni a pâpho teh, ka thai e naw ni a kamsoum ati awh teh maimouh koe patuen a dei awh. <sup>4</sup> Cathut niyah mitnoutnaw, kângairuhnonaw a cawngca a sak e



lahoi thoseh, kângairu hnosakthainae hoi thoseh, ama ngainae patetlah Kathoung Muitha ni poehnonaw na poe e lahoi thoseh, ahnimouh hoi cungtalah a kampangkhai .

### *Duenae koehoi bawilennae koe*

<sup>5</sup> Maimouh ni dei awh e ka tho hane talaivan uknae kâ teh Cathut ni kalvantaminaw e kut rahim hrueng hoeh. <sup>6</sup> Cakathoung hmuen buet touh dawkw, tami heh bangtelah ao dawkw maw Bawipa nang ni khuet na pouk. Tami Capa heh bangtelah ao dawkw maw khuet na khet. <sup>7</sup> Ahni teh kalvantaminaw hlakvah dawngdengca bet a rahnoum sak teh, bawilennae hoi barinae lahoi bawilukhung a kâ muk sak, na kutsaknaw hah na uk sak teh, <sup>8</sup> hno cawngca pueng hah ahnie khok rahim vah a ta toe ati. Hno cawngca pueng hah ahnie khok rahim vah koug a ta toe ti navah, a pek e buet touh hai awmhoeh. Atu hno cawngca pueng hah rahim vah koug a ta e hah maimouh ni hmawt awh hoeh rah. <sup>9</sup> Hatei, Cathut e lungmanae lahoi, Jisuh teh tami pueng hanlah duenae khang hanelah, kalvantaminaw hlak dawngdengca bet a rahnoum sak teh, a due dawkvah, a lû dawkw bawilennae hoi barinae bawilukhung a kâ muk e hah maimouh ni hmu awh.

<sup>10</sup> Bangkongtetpawiteh, hnocawngca pueng e akungtuen lah kaawm e Cathut ni, ca moikapap hah bawilennae thung a hrawi navah, ahnimae rungngangnae kasakkung Bawipa teh reithainae hoi akuep sak e hah a kamcu doeh. <sup>11</sup> Kathoungsakkung hoi a thoungsak e taminaw pueng teh buet touh koehoi doeh a coung. Hatdawkvah, kathoungsakkung ni a thoungsak e naw hah hmaunawnggha telah kaw hane kayakkhai hoeh. <sup>12</sup> Hottelah a kaw ngainae teh, ka hmaunawngghanaw koevah kamthang kahawi teh ka pâpho vaiteh, kakamkhuengnaw rahak vah nang pholennae la ka sak han, telah a ti. <sup>13</sup> Hahoi, Bawipa nang teh na yuem han. Hahoi, thai awh haw, kai hoi kai koe Cathut ni na poe e camonaw doeh, telah bout a ti.

<sup>14</sup> Hote camonaw teh takthai hoi thi ka tawn e lah ao dawkvah, Khrih ni a duenae pawlawk dawkw hoi, duenae ka uk e kahraimathout e bahu hah a raphoe thai nahanlah thoseh, <sup>15</sup> duenae ka taket niteh, a hring nathung sankatounghaw hah hloutsak hanelah thoseh, hote camonaw patetvanlah takthai hoi thi a sin van. <sup>16</sup> Bangkongtetpawiteh, Khrih ni kalvantaminaw hah kabawm hoeh, Abraham e catounnaw hah a kabawp. <sup>17</sup> Hatdawkvah Khrih ni taminaw e yonthanae hah a sak teh, Cathut hoi kâkuen e dawkvah, lungmanae hoi thoseh, lawkkamcaknae hoi thoseh, yuemkamcu e Vaihma Kacue lah ao nahan, amae hmaunawngghanaw hoi khoeroe kâvan e lah ao. <sup>18</sup> Hottelah, ama roeroe tacueknae a khang dawkvah, yon tacueknae kakâhmonaw hah a kabawp thai.

## 3

### *Mosi hlak hai Jisuh teh bawilen*

<sup>1</sup> Hatdawkvah kalvanlae kawnae na ka coe e hmaunawngghanaw, maimouh ni yuem awh e guncei hoi Vaihma Kacue lah kaawm e Khrih Jisuh e kong hah kahawicalah pouk awh. <sup>2</sup> Mosi teh Cathut e imthungkhu dawkw yuemkamcu patetlah ahni haiyah ama kapatoungkung koe yuemkamcu. <sup>3</sup> Im kasakkung teh im hlak bari hoe ao e patetlah, Jisuh teh Mosi hlak hai hoe ka talue e bawilennae coe hanlah a kamcu telah pouk e lah ao. <sup>4</sup> Im teh tami buet buet touh ni a sak dawkw kaawm e doeh. Bangpuengpa kasakkung teh Cathut lah ao. <sup>5</sup> Mosi teh



hmalah pâpho lah kaawm hane hnonaw lawkpanuesaknae lah ao nahan, Cathut e imthungkhu koe yuemkamcu lah ao. <sup>6</sup> Khrih teh capa patetlah Cathut e im thung yuemkamcu lah ao. Maimanaw teh yuemnae hoi ngaihawinae dawkvah kâoupnae hah apout totouh kuen awh pawiteh, Cathut e imthungkhu lah o awh.

*Kayuemhoehnaw kâhructuet poenae*

<sup>7</sup> Hatdawkvah, Káthoung Muitha ni a dei e teh, sahnin vah nangmanaw ni pâpho e lawk hah na thai awh dawkvah, <sup>8</sup> Na lung patak awh hanh. <sup>9</sup> Na mintoenaw ni a kum 40 touh thung kai hah aphunphun lahoi na tanouk awh teh, kaie thaw ka tawknae hah a hmunaeh kahrawngum vah kai na tarannae tueng patetlah awm awh hanh. <sup>10</sup> Hote miphunnaw teh ka panuet dawkvah, a lungthin thung hoi pou a payon awh. Kaie lamthung hai panuek awh hoeh. <sup>11</sup> Hatdawkvah, ahnimouh teh kaie kâhatnae dawkw na kâen awh mahoehtelaw lungkhuek laihoi thoe ka bo e patetlah, <sup>12</sup> hmaunawngghanaw, nangmouh teh kahring Cathut ceitakhai e lahoi yuemhoehnae hoi kahawihoehe lung na tawn awh hoeh nahanlah kâhruetcueth awh. <sup>13</sup> Nangmouh thung dawkw yon phung ni dumnae lahoi na lungthin a pata hoeh nahanlah, sahnin telaw kaw e atueng ao nathung, hnintangkuem buet touh hoi buet touh kâhroece awh. <sup>14</sup> Bangkongtetpawiteh, maimouh teh apuengcue hoi kaawm e lungtangnae hah, apout ditouh kacaklah na kuen pawiteh, Khrih hoi kâkuen e lah na o awh. <sup>15</sup> Cakathoung dawkw sahnin vah nangmouh ni lawk hah na thai awh pawiteh, lawk tarannae tueng patetlah na lungthin patak sak awh hanh leih a ti.

<sup>16</sup> Hottelah a thai awh nahlangva ka tarannaw teh, apinaw namaw. Mosi e hrawinae lahoi, Izip ram hoi ka tâcawt e taminaw nahoehmaw. <sup>17</sup> Hahoi, a kum 40 touh thung, Cathut teh apinaw e lathueng maw a lungkhuek. Yonnae ka sak awh ni teh kahrawngum vah kadoutnaw koe nahoehmaw. <sup>18</sup> Hothloilah, nangmouh teh Bawipa e kâhatnae dawk na kâen awh mahoei telah apinaw maw thoe a bo vaw. Lawk ka ngai hoei e taminaw koe nahoehmaw. <sup>19</sup> Hatdawkvah, ahnimouh teh a yuem awh hoei dawkvah kâen thai awh hoei tie teh maimouh ni panue awh.

## 4

*Cathut e taminaw kâhatnae hnin*

<sup>1</sup> Hatdawkvah, Cathut e kâhatnae dawk kâen thainae a lawkkam ao nahlangva, nangmouh thung dawk hoi kâen laipalah tami buet touh hai ao hoeh nahanlah kâhrungcuet awh sei. <sup>2</sup> Bangkongtetpawiteh, maimouh haiyah ahnimaw patetvanlah kamthang kahawi hah thai awh toe. Hatei, ahnimouh ni a thai awh e kamthang lawk teh ahnimae thungvah, yuemnae hoi a kâkalawt hoeh dawkvah aphu awmhoeh. <sup>3</sup> Ka yuem e maimanaw teh Cathut e kâhatnae dawk kâen awh. Cakathoung dawk, Ahnimouh teh kaie kâhatnae dawk kâen mahoei telah ka lungkhuek teh thoe ka bo e patetlah ao. Hatei, athawnaw teh talaivan kamtawng nah a cum e lah ao toe. <sup>4</sup> Asari hnin hoi kâkuen lah, Cathut ni hno pueng koug a cum hnukkhu, asari hnin vah duem a kâhat telah Cakathoung ni hmuen buet touh koe a dei. <sup>5</sup> Hahoi, ahnimouh teh kaie kâhatnae dawk kâen awh mahoei, telah bout a ti.

<sup>6</sup> Hatdawkvah, hote kâhatnae thungvah kâen thainae teh, atangawnnaw hanelah ao rah. Lunghawinae kamthang kahawi teh hmaloe ka thai e



naw ni a yuem awh hoeh dawkvah kâen awh hoeh toe. <sup>7</sup> Hatdawkvah, Cathut ni hnin hnin touh hah sahnin telah a dei teh a kum moi asaw hnukkhu, ahmaloe a dei e patetlah sahnin a lawk na thai awh pawiteh, na lungpata sak awh hanh telah Devit hno lahoi a dei. <sup>8</sup> Joshua ni ahnimouh kâhatnae poe katang pawiteh, hat hnukkhu, alouke hnin hah Cathut ni a dei han namaw. <sup>9</sup> Hatdawkvah, Cathut e miphunnaw hanlah kâhatnae phun touh ao rah. <sup>10</sup> Bangkongtetpawiteh, Cathut ni athawnaw hah a cum teh duem a kâhat e patetlah Bawipa e kâhatnae dawkvah ka kâen e tami hai thawnew a cum vaiteh duem a kâhat van han. <sup>11</sup> Isarel taminaw ni yuemnae lungthin tawn laipalah a tâlaw awh e patetlah maimouh ni tâlaw laipalah hote kâhatnae dawk kâen hanlah kâpanki awh sei .

<sup>12</sup> Cathut e lawk teh a hring, tahloi avoivang kahran e hlak a hran. Hringnae hoi muitha, hru kâletlout hoi rakhing totouh a thut teh a racei thai. Lungthin pouknae pueng hai a panue thai. <sup>13</sup> Sak e hnonaw pueng dawkvah Cathut hmalah ka kamnuek hoeh e buet touh boehai awm hoeh. Bangpuengpa teh, Bawipa e hmalah ka ngue e awm laipalah pheng a kamnue. Maimouh pueng teh hote Bawipa ni akung na khei awh han.

### *Vaihma bawi Jisuh*

<sup>14</sup> Atu kalvan kho ka kâen e Vaihma Kacue, Cathut Capa Jisuh teh maimouh koe kalenpounge Vaihma Kacue lah ao dawkvah, maimouh ni yuemnae lawk dawk kacaklah awm awh sei. <sup>15</sup> Bangkongtetpawiteh, maimouh thayounnae kapanuekkhaikung Vaihma Kacue tawn awh. Ahni teh maimouh patetlah tacueknae aphunphun a kâhmo. Hatei, yonnae tawn hoeh. <sup>16</sup> Hatdawkvah, maimouh teh a pahrennae hoi a lungmanae naw hah coe awh teh panki nah tueng nah kabawpnae hmu nahanlah lungtang nalaihoi lungmanae bawitungkhung koe rek hnai awh haw sei.

## 5

### *Vaihma kacue Messiah*

<sup>1</sup> Taminaw thung dawk hoi rawi lah kaawm e vaihma kacuenaw pueng teh poehno poe hane hoi yon thuengnae hah taminaw han Cathut koe ka thueng hanelah rawi e lah ao. <sup>2</sup> Ama roeroe hai thayounnae a tawn dawkvah, panuenae ka tawn hoeh e naw hoi lam kapayonnaw koe pahrennae a tawn thai. <sup>3</sup> Hatdawkvah, taminaw e yon hoi amae yon hanlah thuengnae sak hanelah a panki.

<sup>4</sup> Cathut ni Aron a kaw e patetlah kaw e tami laipalah, apinihai hote thaw bari kaawm e teh tawk thai awh hoeh. <sup>5</sup> Hot patetvanlah, Khrih haiyah, Vaihma Kacue lah amahmawk ka kâtaawm e nahoe. Nang teh ka Ca lah na o. Sahnin vah nang teh na khe toe, telah ka tet e ni a tawm toe. <sup>6</sup> Cakathoung ni a dei e, nang teh Melkhizedek patetlah yungyoe e vaihma lah na o, tie patetlah ao.

<sup>7</sup> Khrih teh talai van ao navah, duenae koehoi rungngang thai kung koevah mitphi hoi puenghoi a hram laihoi ratoumnae a sak teh, takinae koehoi kâhatnae a hmu dawkvah, <sup>8</sup> ahni teh Cathut Capa lah kaawm ei nakunghai patang khangnae lahoi lawkngainae a kamtu. <sup>9</sup> Hottelah kuepnae koe a pha hnukkhu, lawk ka thai niteh ka yuem e naw pueng yungyoe rungngangnae kapoekung lah ao.

### *Cuenae koe ka phat hoeh e yuenae*



<sup>10</sup> Melkhizedek patetlah Cathut ni Vaihma Kacue telah a kaw e lah ao. <sup>11</sup> Hotteh, Melkhizedek e kong daw kaimouh ni dei hane moi ao, hatei, nangmouh teh hnâ na thai panuek awh hoe haw dawkvah dei hane hroung a ru. <sup>12</sup> Bangkongtetpawiteh nangmouh teh a kumtha lahoi teh kacangkhaikung lah na o awh hanelah na o awh toe. Hatei, akungtuen e Cathut lawk hah ayâ koehoi bout kamtu hanlah ao dawkvah, bu kate na cat laipalah sanutui na ka net e lah doeh na o awh rah. <sup>13</sup> Sanu tui dueng ka net e tami teh camo lah ao rah dawkvah, lannae hoi ka kâkuen e lawk panuethainae tawn hoe haw. <sup>14</sup> Bu kate tie teh, thoehawi kapek thainae a tawn teh, poukthainae, panuethainae lahoi cuenae koe lah kaawmnaw hane doeh.

## 6

### *Cuenae koe pha hanelah thapoenae*

<sup>1</sup> Hatdawkvah, maimouh teh Khrih hoi kâkuen e akungtuen hoi kâcangkhaikung hah ta awh vaiteh, kuepcingnae koe lah khok takan awh sei. Duenae hoi kâkuen e tawksaknae daw koi pan ka ngainae, Cathut yuemnae, <sup>2</sup> baptisma hoi kâkuen e cangkhaikung, kut toungnae, duenae koehoi boutthawnae, yungyoe lawkcengnae hah a kung koehoi bout kamtu toung laipalah awm awh sei. <sup>3</sup> Cathut ni atueng na poe pawiteh hot teh sak awh han.

<sup>4</sup> Angnae daw koi vai touh pha awh teh, kalvanlae poehno pateknae, Kathoung Muitha coenae, <sup>5</sup> Cathut e kamthang kahawi hoi due hnukkhu hnosakthainae hah patek awh hnukkhu hoi, <sup>6</sup> tâlaw pawiteh, Cathut Capa thingpalam daw koi apâhni lah bout a pathout awh teh yeirai a po sak awh dawkvah, pankângainae koe bout phat thai awh hoe haw toe. <sup>7</sup> Bangkongtetpawiteh, talai ni ama daw koi boutbout kabawt e kho ratui a dawp teh, thaw katawknaw hanlah anhnatusue ouk tâcawtkhai pawiteh, Cathut koehoi e yawhaw i a hmu e lah ao. <sup>8</sup> Hatei, pâkhing pâyam aphunphun kapâw sak e talai lah awm pawiteh, hno han a kamcu hoe haw dawkvah, thoebonae a khang vaiteh, hnukteng vah hmai hoi sawi lah ao han.

<sup>9</sup> Ka lungpataw e naw, kaimouh ni hettelah ka dei awh ei nakunghai, nangmouh hanelah teh hoe kahawi e runngangnae hoi kâkuen lah ao tie ngaihaw i awh. <sup>10</sup> Bangkongtetpawiteh, Cathut teh nangmae thaw na taw koi awh e hai thoseh, tami kathoungnaw yampa vah na khetyawt awh e patetlah atu hai Bawipa min lahoi na kamnue sak awh e lungpatawnae hai thoseh, pahnim totouh hno kahawihoe haw ka sak e lah awmhoe haw. <sup>11</sup> Nangmouh pueng teh, pangaknae tawn laipalah, yuemnae hoi panguepnae lahoi lawkkamnae râw lah kacoenaw patetvanlah na tarawi thai awh nahan, <sup>12</sup> hottelah apout totouh lunghringnae awm laipalah na ngaihaw i awh nahan kaimouh ni na ngai khai awh.

### *Cathut e lawkkam coenae*

<sup>13</sup> Cathut ni Abraham koe vah lawkkamnae a sak navah, ama hlak kalenhnawn e min ao hoe haw dawkvah, amahoima noe lahoi, <sup>14</sup> kai ni nang teh yawhawinae pou na poe vaiteh na catoun ka pungdaw sak han, telah a ti. <sup>15</sup> Hettelahoi, Abraham ni lungsaw laihoi a ring hnukkhu lawkkamnae teh a coe.

<sup>16</sup> Taminaw ni amamouh hlak ka lentoe e tami min lahoi thoe ouk a bo awh. Hote thoebonae ni kâounnae pueng a roum sak teh laidei ouk



a cak sak. <sup>17</sup> Hatdawkvah, lawkkamnae kacoenaw teh Cathut e a noenae kâthung thai hoeh tie panue sak hanlah Cathut ni thoebonae lahoi acak sak. <sup>18</sup> A laikathout thai hoeh e Cathut ni kâthung thai hoeh e hno kahni touh hno laihoi hmalah ta e ngaihawinae hno hah kâuep thai nahanlah ka yawng e maimouh hoe thao thai nahanelah doeh. <sup>19</sup> Hote ngaihawinae teh maimae lungthin hanlah kacakpounge sumtaai patetlah maimouh daw athung yap e lukkarei a thung lah a kâen. <sup>20</sup> Jisuh teh Melkhizedek patetlah yungyoe Vaihma Kacue la o teh, lukkarei yap e athunglah lam na kapâtuekung lah ao teh maimouh yueng lah a kâen.

## 7

### *Melkhizedek e lentoenae*

<sup>1</sup> Melkhizedek teh Salem siangpahrang, ka lentoe poungh Cathut e vaihma lah ao. Abraham ni taran a tuk teh tânae hoi bout a ban nah Melkhizedek ni a dawn teh yawhawi a poe. <sup>2</sup> Abraham ni taran kutnaw koehoi a thokhai e, hnopainaw pueng pung hra pung touh Melkhizedek koe a poe. Apasuekpoung lah Melkhizedek tie feh 'lannae Siangpahrang tinae doeh. Apâhni lah Salem siangpahrang lah ao dawkvah 'lungmawngnae siangpahrang tinae lah ao. <sup>3</sup> Ahni teh a manu a na pa tawn hoeh, a miphun tawn hoeh, a khenae hoi a duenae hai tawn hoeh. Ahni teh Cathut e capa patetlah ao teh, a yungyoe vaihma lah ao.

<sup>4</sup> Mintoe Abraham ni a hmu e hnopainaw pung hra pung touh a poe teh hete tami teh banghloimaw a lentoe tie hah pouk awh haw. <sup>5</sup> Vaihma lah rawi e Levih canaw teh Abraham e miphun lah ao. A hmaunawngghanaw kut daw hoi kâpoelawh patetlah pung hra pung touh coe thainae a tawn awh. Ahnimanaw teh Abraham koehoi ka tho e a hmaunawngghanaw lah ao awh. <sup>6</sup> Hatei, ahnimae miphun lah kaawm hoeh e hote bawi ni Abraham koehoi pung hra pung touh a coe teh, lawkkamnae ka coe e Abraham hah yawhawinae a poe. <sup>7</sup> Kacue niyah kanaw yawhawinae a poe e hah oun hanelah awm hoeh. <sup>8</sup> Hothloilah, atuvah kadout thai e taminaw ni pung hra pung touh a coe awh. Hatei, hatnae tueng dawh teh a hring telah kapanuekkhaikung ni pung hra pung touh a coe e lah ao. <sup>9</sup> Hahoi, pung hra pung touh ka coe e Levih haiyah Abraham koehoi pung hra pung touh a poe toe telah ti thai awh. <sup>10</sup> Bangkongtetpawiteh, Melkhizedek ni Abraham a kâhmo navah Levih teh a na pa e atak thung vah ao rah.

### *Jisuh teh Melkhizedek patetlah a o*

<sup>11</sup> Hahoi, Levih miphun koehoi ka tho e vaihma phun hoi kâkuen lah taminaw ni kâlawk hah coe awh dawkvah, hote phun lahoi kuepcingnae koe phat thai pawiteh, Aron patetlah e laipalah, Melkhizedek patetlah e a tho hane bangkongmaw a panki rah. <sup>12</sup> Vaihma miphun kâthung pawiteh kâlawk hai kâthung laipalah awm thai hoeh. <sup>13</sup> Bangkongtetpawiteh, dei tangcounge e ni a takhi e Bawipa teh, thuengnae thaw ka tawh boihoe h rae miphun hoi a kâkuet <sup>14</sup> Bangkongtetpawiteh, maimae Bawipa teh Judah miphun daw hoi a tâco tie teh a kamceng. Hote miphun teh vaihma hoi a kâkuet telah Mosi ni kam touh hai dei boihoe h. <sup>15</sup> Hahoi, Melkhizedek patetlah alouke vaihma teh, yo awm toung pawiteh, vaihma miphun a kâthung toe tie hoe a kamceng. <sup>16</sup> Hote vaihma teh kâpoelawh lahoi rawi e tho hoe h, yungyoe hringnae bahu lahoi rawi e doeh.



<sup>17</sup> Bangkongtetpawiteh, nang teh Melkhizedek patetlah yungyoe e vaihma lah na o, telah a kampangkhai.

<sup>18</sup> Kâlawk teh a thayoun teh kuepnae a poe thai hoeh dawkvah, takhoe e lah ao toe. <sup>19</sup> Bangkongtetpawiteh, kâlawk ni apipatet hai lannae koe phat sak thai hoeh. Hatei atuvah hoe ka talue e ngaihawinae a tho dawkvah, maimouh teh hote ngaihawinae lahoi Cathut koe rek hnai awh.

<sup>20</sup> Ahnimouh teh thoebonae lah awm laipalah vaihma lah ao awh. <sup>21</sup> Jisuh teh thoebonae awm laipalah vaihma lah awm hoeh. Cathut ni nang teh Melkhizedek patetlah yungyoe vaihma lah na o telah thoe a bo teh, a lung bout a kâthung hoeh e patetlah Jisuh ni thoebonae lahoi vaihma lah ao e patetlah, <sup>22</sup> hoe kahawi e lawkkam kacaksakkung lah ao.

<sup>23</sup> Ahnimouh haiyah a due awh teh, thaw pou a tawk thai awh hoeh dawkvah, tami moikapap vaihma lah ao awh. <sup>24</sup> Jisuh teh yungyoe kahring e lah ao dawkvah kâthung thai hoeh e vaihma lah ao. <sup>25</sup> Hatdawkvah, apipatet hai thoseh, Jisuh lahoi Cathut koe kahnai e hah a runngang thai katang. Bangkongtetpawiteh, Bawipa teh ahnimouh hane pahrennae hei hanlah a yungyoe poe a hring.

<sup>26</sup> Hot patetlah e Vaihma Kacue teh a thoung teh khinnae tawn hoeh, tamikayonnaw hoi kamyawng hoeh. Kalvannaw pueng hlak a rasanghnawn dawkvah maimouh han lah a kamcu. <sup>27</sup> Alouke vaihma kacuenaw teh ama hane yon thuengnae thoseh, taminaw hane yon thuengnae thoseh, hnintangkuem a sak e patetlah hote Bawipa teh ama hanlah yon thuengnae sak ngai hoeh. Bangkongtetpawiteh, amahoima vai touh hoi thuengnae a sak teh hote thaw teh a cum toe. <sup>28</sup> Kâlawk niteh yon ka tawn e tami hah vaihma kacue lah a rawi. Hatei, kâlawk hnukkhu vah ka tho e thoebo lawk niteh a yungyoe kakuep e Capa doeh a rawi.

## 8

### *Kalvan e Vaihma Kacue*

<sup>1</sup> Kaimouh ni ka dei awh e alawkpui teh, kalvannaw dawkvah, ka Lentoenae bawitungkhung aranglah ka tahung e Vaihma Kacue tawn awh tie hah doeh. <sup>2</sup> Tami ni a sak e tho laipalah, BAWIPA ni a sak e lukkareiim katang hoi kathounge hmuen dawk Cathut thaw ka tawk e lah ao.

<sup>3</sup> Vaihma kacue pueng teh poehnonaw hoi thuengnae hah poe han rawi e lah ao patetlah, thueng han buet touh a tawn. <sup>4</sup> Kâlawk patetlah thuengnae poehnonaw ka poe e vaihmanaw ao patetlah, ahnimouh teh talai van vah awm rah pawiteh vaihma lah awm mahoe. <sup>5</sup> Mosi ni lukkareiim a sak han navah, mon vah nang na patue e patetlah bangpuengpa na sak nahan kâhruetcuete loe tie lawk ka thai e patetlah hotnaw teh kalvanlae hnonaw e a tâhlip lah doeh ao awh. <sup>6</sup> Hatei, Jisuh teh hoe ka talue e lawkkamnae dawkvah kaawm e, hoe ka talue e lawkkam e laicei lah ao dawkvah hoe ka talue e thaw tawk thainae teh a coe.

### *Lawkkam katha*

<sup>7</sup> Hmaloe e lawkkamnae teh yonpen hanlah awm hoehpawiteh, apâhni e lawkkamnae teh bout panki mahoe toe. <sup>8</sup> Hatei, Cathut ni hmaloe e lawkkam teh yon a hnei, hahoi a dei e teh, kai ni hete miphunnaw e mintoenaw hah, Izip ram hoi ka hrawi nah, ahnimouh koe ka poe e lawkkamnae hoi kâvan hoeh e lawkkam katha hah Isarel hoi Judahnaw koe ka poenae tueng ka phat han. <sup>9</sup> Hmaloe ka poe e lawkkam dawkvah ahnimouh ni awm awh hoeh. Hatdawkvah, kai nihai noutna laipalah ka



o telah a ti. <sup>10</sup> Atototeh, Isarelnaw koe ka poe hane lawkkamnae teh, kai Cathut ni ka kâlawnaw hah ahnimae a lungthin muitha thungvah ka pakhum han. Ahnimae a lungthin daw k ka thut han. Kai teh ahnimae Cathut lah ka o vaiteh ahnimouh haiyah ka tami lah ao awh han. <sup>11</sup> Hahoi, ahnimouh ni Bawipa panuek haw telah a imri, a hmaunawnga buet touh hoi buet touh kâcangkhai awh mahoe. Bangkongtetpawiteh, kathoung poun koehoi kalenpoun totouh kai na panue awh han. <sup>12</sup> Hat toteh, kai ni ahnimae lanhoe hnae, a payonnae hoi kâtapoenae teh ka pâkuem pouh mahoe telah a ti. <sup>13</sup> Cathut ni Lawkkam katha telah ati navah, hmaloe e lawkkam teh a karuem sak. Karuem tangcoun e hno teh, counkacoe kahmat han doeh toe.

## 9

### *Lawkkam karuem e phung*

<sup>1</sup> Hmaloe e lawkkamnae daw hai baw knae phungnaw hoi talai van kaawm e kathoung hmu en ao. <sup>2</sup> Bangkongtetpawiteh, lukkareiim a sak awh navah, kathoung hmu en tie ahmaloe e rakhan dawkvah, hmaiimkhok, caboi hoi vaiyeinaw a ta awh. <sup>3</sup> Apâhni e yaphni athunglah teh hmu en kathoung poun telah kaw e rakhan ao. <sup>4</sup> Hote lukkareiim dawkvah, sui tongben hoi sui hoi sak e lawkkam thingkong ao. Hote thingkong daw mana tanae sui hlaam, a pei ka pei e sonron, hoi kâlawk thutnae lungphennaw ao. <sup>5</sup> Hote thingkong van vah, ka lentoe e cherubim ni yonthanae hmu en hah a ramuk. Hote hnonaw teh atu ka kamceng lah dei thai lah awmhoeh.

<sup>6</sup> Hottelah, hnonaw pueng koungrakueng awh torei teh, vaihmanaw teh lukkareiim apasuek e rakhan thungvah baw knae thawnaw tawk hanlah atu hoi atu a kâen awh. <sup>7</sup> Apâhni e rakhan daw teh vaihma kacue ni dueng doeh kum touh daw vai touh ouk a kâen. Hottelah a kâen navah ama han hoi taminaw ni yon a sak payonnae hanlah thoseh, thueng nahanlah thi hoi ouk a kâen. <sup>8</sup> Lukkareiim apasuek rakhan ao roukrak, kathoungpounge rakhan koe kâen thainae lam aw hoe rah tie hah Kathoung Muitha ni hete hno hoi a pâpho. <sup>9</sup> Hote teh, atutueng hanelah bangnuenae lah a o. Thuengnae poehnonaw hoi thueng e sathainaw ni mahoima kâpanuenae lung thounsak thai hoe. <sup>10</sup> Hote hnonaw teh canei kawi hoi kâpasunae phungnaw hoi a kâkuet teh, a katha lah bout sak hoe hnahanlah totouh takthai hoi kâkuen e phunglam lah doeh ao.

### *Lawkkam katha e phung*

<sup>11</sup> Hatei, Khrih teh hno kahawinaw hoi kâkuen e Vaihma Kacue lahoi a tho toun dawkvah, tami kut hoi sak e nahoe, het talai van e nahoe, hoe ka lentoe niteh hoe kakuep e lukkareiim dawkvah, <sup>12</sup> Hmae hoi Maitoca e thipaling tho laipalah amae thi roeroe a sin teh kathoungpounge hmu en koe a kâen teh maimouh han lah a yungyoe ratangnae vaihahoi kakhoutlah a sak toe. <sup>13</sup> Bangkongtetpawiteh, kathounghoehe taminaw van vah kahei e maito thi, hmae thi hoi Maitola sawi e hraba ni ahnimae takthai daw thounsak thai boipawiteh, <sup>14</sup> a yungyoe Muitha lahoi yah yonnae ka tawn hoe e amahoima Cathut koe ka kâthueng e Khrih e a thipaling teh kahring Cathut thaw tawk thai nahanelah, nangmae thoe hawi panuenae lungthin duenae tawksaknae thung hoi hoe thounsak thai mahoe namaw.



<sup>15</sup> Hatdawkvah, hmaloe e lawkkam rahim yonnae dawkh hoi hlout sak hanlah, Khrih teh a due toung dawkvah, a kaw e naw ni yungyoe râw hah a coe thai aw h nahanlah Bawipa teh lawkkam katha e laiceh lah ao.

<sup>16</sup> Râw coenae lawk teh râw coenae lawk kadeikung a due hnukkhu to doeh ouk a coe aw h. <sup>17</sup> Bangkongtetpawiteh lawk kadeikung a hring nathing teh cungkei hoeh, a due hnukkhu torei doeh to e lah ao. <sup>18</sup> Hatdawkvah, hmaloe e lawkkamnae haiyah thipaling laipalah sak hoeh. <sup>19</sup> Mosi ni kâlawk cauk dawkh kaawm e kâlawnaw pueng hah rangpuinaw koe a pathang pouh hnukkhu, tui hoi kalawt e maito hoi hmae thi hah a sin teh tumuen paling hoi dingsala dawn hoi kâlawk cauk hoi rangpuinaw hah a kahei sin. <sup>20</sup> Hete thi teh, Cathut ni nangmouh koe kâ a poe e lawkkamnae thipaling doeh a ti. <sup>21</sup> Hathnukkhu hot patetvanlah, lukkareim hoi bawknae koe hno e hnopainaw lathueng hai thipaling a kahei sin. <sup>22</sup> Kâlawk patetlah bangpuengpa heh thipaling hoi thoungsak thai lah ao. Thi palawng laipalah yon ngaithoumnae awmhoeh.

<sup>23</sup> Kalvanlae hnônaw e tâhlipnaw hah hottelah thuengnae lahoi thoungsak lah ao teh, kalvan lae hnônaw hateh hoe ka talue e thuengnae lahoi thoungsak lah ao. <sup>24</sup> Bangkongtetpawiteh, Khrih teh a katang e hmuen kathoungpounge tâhlip lah kaawm e tami ni kut hoi sak e kathoungpounge hmuen dawkh kâen hoeh, maimouh han kecu dawkh atu Cathut e a hmalah amahoima kâpâtue hanlah kalvan vah a kâen toe. <sup>25</sup> Vaihma kacue ni sathei thi sin laihoi kum tangkuem kathoungpounge hmuen koe a kâen e patetlah Khrih teh a mahoima atuhoitu thueng hanelah panki hoeh. <sup>26</sup> Hottelah hoehpawiteh, talaivan a paw pasuek hoi avai moikapap a khang han doeh toe. Atuteh a tue abawnae koe lah a mahoima vai touh thuengnae lahoi yon thoungsak hanlah a tho toe. <sup>27</sup> Tami teh vai touh due hnukkhu lawkcengnae a kâhmo e patetlah, <sup>28</sup> Khrih ni taminaw e yonnaw ceikhai hanelah, amahoima vai touh dueng thuengnae a sak teh, apâhni e dawkh teh yon hoi kâkuen laipalah, rungngangnae kangaihawinaw han lah apâhni bout a kum han.

## 10

### *Kakuep e sathei*

<sup>1</sup> Bangkongtetpawiteh, kâlawk teh ka tho hane hno kahawinaw e a tâhlip lah ao teh, a katang e lah awmhoeh. Hatdawkvah, kum tangkuem sathei thuengnae lahoi Ama koe vah thuengnae kasaknaw teh kuepnae koe phat thai aw h hoeh. <sup>2</sup> Hottelah hoehpawiteh, kabawkkungnaw hah vai touh hoi a yon thoungsak toung vaiteh, yonpennae awm hoeh toung vaiteh sathei thuengnae laipalah awm aw h mahoe h namaw. <sup>3</sup> Hatei, hottelah thuengnae lahoi a kum tangkuem yonnae boutbout a pouk aw h. <sup>4</sup> Bangkongtetpawiteh Maito hoi hmae e a thi ni yonnae hah thoungsak thai hoeh. <sup>5</sup> Hatdawkvah Jisuh ni het talaivan a tho navah, oe Cathut, nang ni sathei hoi thuengnae na ngai hoeh dawkvah, kai hanlah tak hah rakueng pouh toe. <sup>6</sup> Bawipa ni hmaisawi thuengnae hoi yon thuengnae hah a ngai e nahoe h. <sup>7</sup> Hatnavah, Kai ni cakalawng dawkh kai hanelah na thut e patetlah, na ngainae sak hanelah kai teh ka tho toe Cathut telah ka dei pouh. <sup>8</sup> Ahmaloe vah, kâlawk patetlah thuengnae sak e naw, sathei hoi hno poe e naw, hmaisawi e sathei hoi yonthanae satheinaw hah ka ngai hoeh, hotnaw dawkvah lungkuepnae haiyah ka tawn hoeh, telah a ti. <sup>9</sup> Hathnukkhu, Bawipa e ngainae tawkh hanelah ka tho, telah ati. Hottelah



hoi Bawipa ni apâhni thuengnae hah acak sak teh, apasueke thuengnae hah a takhoe . <sup>10</sup> Hote ngainae lahoi, Jisuh Khrih ni a tak hah vai touh hoi kakhoutlah a thueng e lahoi maimouh teh yon thoungsak lah o awh.

<sup>11</sup> Vaihmanaw pueng ni hnintangkuem a kangdue awh teh thuengnae hoi yon katha thai hoe e sathei hah atu hoi atu thuengnae a sak awh. <sup>12</sup> Hatei, Khrih ni yonnae hanelah vai touh dueng thuengnae lahoi a yungyoe han kakhoutlah a sak hnukkhu, Cathut e aranglah a yungyoe a tahung. <sup>13</sup> Ama e a tarannaw khok toungnae lah ao hoehroukrak ngaihaw i laihoi a ring. <sup>14</sup> Bangkongtetpawiteh Bawipa ni vai touh dueng thuengnae lahoi thoungsak lah kaawm e naw hah yungyoe akuap sak. <sup>15</sup> Kathoung Muitha nihaiyah maimouh koe na kampakkhai. <sup>16</sup> Cathut ni atotovah ahnimouh koe ka poe hane lawkkam teh, Kai Cathut ni kâlawnaw hah ahnimae a lungthin daw k pakhum pouh han. A lungthin muitha daw k ka thut pouh han, telah a ti. <sup>17</sup> Hahoi, Kai ni ahnimae a yonnae hoi kâlawk a tapoenae hah ka pâkuem pouh mahoe h toe telah a ti. <sup>18</sup> Hottelah yonthanae a onae hmuem koe teh yon hanlah thuengnae bout panki hoe h toe.

### *Cathut thaw daw k tha poenae*

<sup>19</sup> Hatdawkvah, hmaunawngghanaw, maimouh teh Jisuh e thipaling pawlawk daw k hoi hmuem kathoung poung koe kâen hanlah taranhawinae tawn awh. <sup>20</sup> Hote a thi lahoi, Bawipa ni amae tak lah kaawm e lukkarei yap e koehoi hringnae lamthung katha hah na rasoun pouh awh. <sup>21</sup> Hot dueng tho laipalah, maimouh koevah Cathut imthungkhu ka uk e kalenpounge Vaihma tawn awh dawkvah, <sup>22</sup> maimae lungthin daw k e thoeawai panuenae kahawioehoe teh thoungsak lah o toe, maimae tak hai tui kathoung hoi pâsu lah ao toung dawkvah yuemnae kakuep tawn hoi lungthin katang hoi Cathut hnai awh sei . <sup>23</sup> Lawkkamnae kapoekung teh lawkkam acak dawkvah pâpho awh e ngaihawinae hah kâhuen sak laipalah caksak awh sei . <sup>24</sup> Hahoi, lungpatawnae tawn thai nahan hoi hnokahawi sak thai nahanlah buet touh hoi buet touh tha kâpoe awh nateh kâkhen awh. <sup>25</sup> Tami tangawn ni a sak e patetlah kamkhuengnae pahnawt laipalah, buet touh hoi buet touh kâhruetcuat awh sei. A tue hoehoe a hnai toung dawkvah, hottelah hoe sak awh sei .

<sup>26</sup> Bangkongtetpawiteh, lawkkatang panue awh hnukkhu, ma ngai lahoi yonnae bout sak awh pawiteh, yonnae tha nahanelah thuengnae bout awhmoe h toe. <sup>27</sup> Lawkcengnae thoseh, ama ka taran e taminaw raphoe nahane a lungkhueknae hmai thoseh, kak hane taki laihoi ring hane dueng doeh kaawm toe <sup>28</sup> Mosi e kâlawk ka tapoe e tami teh kapanuekkhaikung kahni touh na ou, katham touh na ou awm pawiteh, pahren laipalah a due sak awh. <sup>29</sup> Hothloilah, Cathut Capa khok hoi ka coungroe niteh, ama thoungnae lawkkam thipaling hah hno kathoung hoe h lah ka pouk e naw hoi lungmanae hoi ka kâkuen e Muitha ka dudam e naw teh banghloi kalen e reknæ maw a khang hanlah a kamcu telah na pouk awh. <sup>30</sup> Bangkongtetpawiteh, kut pathungnae teh kaie doeh, kama roeroe ni ka pathung han, ti hai thoseh, Cathut ni a taminaw lawk a ceng han ti hai thoseh, ka tet e hah maimouh ni panue awh. <sup>31</sup> Kahring Cathut e kut daw k pha e teh taki a tho poung e hno doeh.

<sup>32</sup> Nangmouh ni angnae daw k na pha hnukkhu, rucatnae puenghoi na khang awh e yampa e ahnin thapanaw hah pouk awh. <sup>33</sup> Avaivai nangmouh ni taminaw hmalah yonpennæ hoi rucatnae na khang awh teh,



avaivai, hottelah kasaknaw kakhangkhaikung lah na o awh. <sup>34</sup> Nangmouh ni thongkabawtnaw na pahren awh dueng tho laipalah, hoehoe ka talue niteh kangning e hno kalvan vah na tawn e hah na panue awh dawkvah, na hnopainaw ayâ ni na lawp awh nakunghai, lunghawicalah hoi na panguep awh.

<sup>35</sup> Hatdawkvah, tawkpheu kalenpoung lah ka awm e na yuemnae kacakpounge hah tâkhawng awh hanh. <sup>36</sup> Cathut ngainae sak hnukkhu, lawkkam e coe nahanlah nangmouh dawka a panki e hno teh panguepnae doeh. <sup>37</sup> Bangkongtetpawiteh, ka tho hane Ahni teh nâsittouh awm mahoehtoe, palang a tho han toe. <sup>38</sup> Tami kalan teh yuemnae lahoi a hring han. Hatei, hnuk kâhnawn pawiteh ka lungthin Muitha ni ahni koe ka lunghawi mahoehtoe, telah Cathut ni a ti. <sup>39</sup> Hatei, maimanaw teh kamkonae dawka pha hanlah hnuk kâhnawn e tami lah awm awh hoehtoe, rungngang lah o awh nahanlah ka yuem e tami lah o awh.

## 11

### *Yuemnae dawka hringlu kapasounghaw*

<sup>1</sup> Yuemnae tie teh, ngaihaw i e hnonaw hah kamcengcalah panuenae, hmu hoehtoe rae hnonaw ao katang telah hmucainae doeh. <sup>2</sup> Ayan e mintoenaw ni hete yuemnae lahoi doeh oupnae a coe awh.

<sup>3</sup> Het talaivan heh Cathut e lawk lahoi sak e lah ao teh, atu hmu awh e hnonaw teh kaawm tangcoung e hnonaw dawka hoi sak e nahoehtoe tie teh yuemnae lahoi maimouh ni panue awh.

<sup>4</sup> Abel ni Kain hlak kahawihloe e thuengnae Cathut koevah yuemnae lahoi a sak. Hatdawkvah, Cathut ni ahni teh tamikalan lah a khoe. Bangkongtetpawiteh, ahni poehno hah Cathut ni a dâw pouh. Hatdawkvah, Ahni teh yo a due toung ei teh hote yuemnae lahoi sahnin ditouh kamthang a dei lahun rah.

<sup>5</sup> Yuemnae lahoi Enok teh dout laipalah a kâthung. Cathut ni a kâthungsak dawkvah ahni teh bout kamphawng hoehtoe. Ahni teh a kâthung hoehnahlan vah hete kapanuekkhaikung a tawn teh Cathut lung ka youk e tami lah ao. <sup>6</sup> Yuemnae tawn hoehpawiteh apinihai Cathut lungyouk e lah awm thai hoehtoe. Bangkongtetpawiteh, Cathut koe ka tho e taminaw ni Cathut ao katang tie hoi ama katawngnaw hah tawkpheu kapoekung lah ao tie a yuem han.

<sup>7</sup> Yuemnae lahoi Noah ni a hmu boihoehtoe rae naw dawka kâhruetcuetnae lawka a thai navah, yuemnae lahoi a imthungkhunaw rungngang nahanlah long a sak. Hote yuemnae lahoi talaivan taminaw a yonnae a kamnue sak teh, yuemnae lahoi lannae hah râw lah a coe. <sup>8</sup> Cathut ni Abraham teh râw lah a coe hane ram dawka cei hanlah a kaw navah, ahni ni nâ lah maw ka cei han tie panuek laipalah yuemnae lahoi lawka a ngâi teh a cei. <sup>9</sup> Ahni teh yuemnae lahoi lawkkam e ram dawkvah, ramlouk e tami, imyin patetlah kho a sak teh, lawkkamnae buet touh rei ka coe awh e Isak hoi Jakop ti hoi cungtalal rimnaw dawka rei ao awh. <sup>10</sup> Bangkongtetpawiteh, Cathut ni a sak e a yungyoe kacakpounge khopui hah a ngaihaw i awh.

<sup>11</sup> Hot patetvanlah a cakaroe e Sarah nihai a matawng hnukkhu vah, yuemnae lahoi camo vawn thainae a tawn. Bangkongtetpawiteh, lawkkamnae kapoekung teh lawkkam a cak tie a yuem dawka doeh.

<sup>12</sup> Hottelah hoi, kalvan e âsinaw hoi palang e sadinaw patetlah kapap e taminaw hah tami kadout patetlah kaawm e tami buet touh koehti khe lah ao awh.



<sup>13</sup> Hote taminaw pueng ni lawkkamnaw coe awh hoehe ei, ahlanae koehoi a radoung awh teh a hmu awh, talai van a hring awh navah, imyin hoi kahlawng ka cet e tami lah ka o awh tie a kâpanue awh teh, yuemnae lahoi a due awh. <sup>14</sup> Hottelah kâpanuek e naw niteh amamae khoram katang hah panki laihoi a tawng awh tie a kamnue sak awh. <sup>15</sup> Ahnimouh ni hmaloe, a ceitakhai e ram teh pouk awh katang pawiteh, hote ram daww bout ban nahane kâ a tawn awh. <sup>16</sup> Hatei, atangcalah ahnimouh ni kalvanlae ram kahawihnawn e doeh, a doun awh. Hatdawkvah, Cathut ni ahnimae Cathut telah kaw e hah kayak hoehe. Bangkongtetpawiteh, Bawipa ni ahnimouh hane khopui teh yo a rakueng pouh toe.

<sup>17</sup> Abraham teh tanouk lah ao navah yuemnae lahoi Isak hah thuengnae lah a sak. Lawkkamnaw ka coe e tami ni a tawn dueng capa thueng hanlah a rakueng. <sup>18</sup> Cathut ni Abraham koe, Isak daww hoi khe lah kaawm e taminaw teh nange catoun telah kaw han, atipouh. <sup>19</sup> Cathut niteh kadoutnaw patenghai a thaw sak thai tie Abraham ni a pouk dawwvah hottelah thuengnae hah a sak. Hatdawkvah, a capa teh duenae koehoi bout a hmu.

<sup>20</sup> Isak ni yuemnae lahoi ka tho hane naw hoi kâkuen lah, Jakop hoi Esaw yawhawi a poe.

<sup>21</sup> Jakop ni yuemnae lahoi a due tawmlei vah Joseph e a capa roi yawhawinae a poe teh, a sonron hmo van Cathut a baww.

<sup>22</sup> Joseph ni a due tawmlei vah yuemnae lahoi Isarel miphunnaw san hlout nahan lawk a dei teh a hru hoi kâkuen e lawk a thui.

<sup>23</sup> Mosi e manu hoi na pa ni Mosi a khe navah a meilam ahawi e a hmu dawwvah yuemnae lahoi Siangpahrang kâpoe e taket laipalah thapa yung thum touh a hro roi. <sup>24</sup> Mosi ni a lungha toteh yuemnae a tawn dawwvah Faro canu e capa telah kaw hane a kangek. <sup>25</sup> Yonnae hoi kâkuen e nawmnae dawngdengca pang hlak teh, Cathut e taminaw hoi roedeng rektapnae cungtalang khang hane heh yuemnae lahoi a kârawi. <sup>26</sup> Ahni ni kahawi e, hmalah hmu hane a ngaihaww dawwvah, Khrih hanlah pathoenae, yonpennae a khang e hah Izip ram e hnopainaw pueng hlak hai aphu kaawm poung e lah a pouk. <sup>27</sup> Yuemnae lahoi siangpahrang lungkhueknae hah taket laipalah, Izip ram a ceitakhai. Bangkongtetpawiteh, hmu thai hoehe e Cathut hah kahmawt e patetlah a kâcai daww doeh. <sup>28</sup> Ca caminnaw kathetkung ni Isarelnaw e camin a thei hoehe nahanlah yuemnae lahoi ceitakhai paww a sak teh takhang daww thi a hluk sak.

<sup>29</sup> Isarelnaw ni yuemnae lahoi tuipei paling hah talai kaphui daww ka cet e patetlah a raka awh. Hot patetlah ka raka e Izipnaw teh tui daww koug a bo awh.

<sup>30</sup> Yuemnae lahoi Jeriko khopui hai hnin sari totouh a lawngven hnukkhu, kho kalupnae tapang teh rup a tip. <sup>31</sup> Kâyawt e napui Rahab ni Isarel tami katuetnaw a hro dawwvah kayuemhoehnaw hoi cungtalang dout laipalah a hlout.

<sup>32</sup> Hahoi, bang e akong maw bout dei han rah. Gideon, Barak, Samson, Jephthah, Devit, Samuel hoi profetnaw e kongnaw dei pawiteh atueng ni na khout mahoehe. <sup>33</sup> Hotnaw ni yuemnae lahoi uknaeramnaw hai a la awh, lannae a sak awh, lawkkam a coe awh, Sendek pahni hah a kâcakuep sak awh. <sup>34</sup> Hmai bahu hah a roum sak, sarusarai daww hoi hloutnae, thayounnae koehoi thaonae, taran tuknae koe tha hoi akaww awh teh ram alouknaw e ransanaw e rimnaw hah raphoenae, hot patetnaw hah a sak



awh. <sup>35</sup> Napuinaw nihai duenae koehoi bout ka thaw e a canaw bout a hmu aw. Hahoi, tangawn teh hoe kahawi e boutthawnae hah a hmu thai nahanlah hloutnae rawi laipalah rektapnae ka patawpoung lah a khang aw. <sup>36</sup> Hahoi, tangawn nihai hmuhmanae hoi hemnae a khang dueng tho laipalah thongim dawkvah kateknae totouh a khang aw. <sup>37</sup> Ahnimouh teh, a dêi aw, a a aw, tahloi hoi a thei aw, a rektap aw, kamcu hoe hah a dudam aw teh, hmae pho, tu pho khohna hoi yuengyoe kampuen laihoi kho a sak aw. <sup>38</sup> Het talaivan teh ahnimouh o nahan kamcu hoe. Ahnimouh teh thingyeyawn, montam, lungngoum, hoi talai kâko naw daw a kâva aw teh ao aw.

<sup>39</sup> Ahnimanaw pueng ni yuemnae lahoi a kampangkhaw aw eiteh, lawkkam e teh coe aw hoe. <sup>40</sup> Cathut ni maimouh han lah kahawihloe e hno hah sut na rakueng pouh dawkvah, ahnimanaw teh maimouh laipalah kuepsak lah awm aw mahoe.

## 12

### *Thathoe hoe nahan hroecoena*

<sup>1</sup> Hatdawkvah, hettelah kapap e kapanuekkhaikungnaw ni maimouh na kalup aw dawkvah, maimouh ni hnokari hoi kayawicalah kâbet thai e yonnae pueng hah takhoe aw vaiteh, maimae hmalah sut ta e kontung koe pha hanelah thathout laipalah yawng aw sei. <sup>2</sup> Yuemnae hah akung lah ta vaiteh maimouh na ka kuep sak e jisuh hah takuetluet khen aw sei. Bawipa ni a hmalah sut ta e lunghawinae kecu daw kayanae teh banglahai noutna laipalah thingpalam daw a khang hnukkhu, Cathut e bawitungkhung aranglah a tahung.

### *Na pa e cingthuinae*

<sup>3</sup> Hatdawkvah nangmouh ni na lungreithai aw teh lungpout hoe nahanelah, tamikayonnaw e kut daw hoi hmuhmanae ka khang e Bawipa hah pouk aw. <sup>4</sup> Nangmouh ni yonnae na tuknae daw thi lawng ditouh na khang aw hoe rah. <sup>5</sup> Hahoi, ka ca Cathut e yuenae hah pahnim hanh. Na yue nah na lungpout hanh. <sup>6</sup> Cathut ni a lungpataw e naw teh ouk a yue. A coe e a canaw pueng teh ouk a phep tie hah camonaw dei pouh e patetlah nangmouh koe ka dei e thapoenae lawk hah na pahnim aw toun maw.

<sup>7</sup> Cathut ni nangmouh teh a ca patetlah na khetyawt aw dawkvah na yuenae hah na khang aw han. Bangkongtetpawiteh, na pa ni a yue hoe e ca ao boimaw. <sup>8</sup> Canaw pueng ni a khang aw e yuenae hah nangmouh ni na khang aw hoehpawiteh nangmouh teh ka katang nahoe. Cata ca lah doeh na o aw. <sup>9</sup> Talai takthai hoi ka kâkuen e napanaw ni a kut hoi na hemnae maimouh ni khang aw navah, ouk bari aw. Hot hlak vah, muitha koelae na Pa hah lawk hoe ngâi pouh mahoe namaw. Hatnavah maimouh ni hring hloutnae hmu aw han. <sup>10</sup> Bangkongtetpawiteh, hote napanaw niteh amamouh ahawi ati aw e patetlah dongdengca dueng doeh na yue aw. Bawipa niteh amae thoungnae hah maimouh ni hmawngkhaw hanlah, maimouh hawi nahanelah na yue aw.

<sup>11</sup> Yuenae tie pueng heh khang aw nateh lunghawinae lah awm hoe, lungmathoenae lah pouk aw. Hatei, yuenae ka khang e taminaw teh a hnukkhu vah rounnae hoi kâkuen e lannae a coe aw. <sup>12</sup> Hatdawkvah, tha kayoun e kutnaw hoi a tha kaawm hoe e khokpakhunaw hah tha awm sak aw. <sup>13</sup> A khok ka cu hoe e taminaw ni hru kamhoutnae awm laipalah, a dam aw nahanlah, na cei aw nahane lamkalannaw hah rakueng aw.



*Cathut ka pahnawt e teh hoe ka pataw e rektapnae a khang han*

<sup>14</sup> Tami puenghoi kâpocalah awm awh. ThOUNGNAE laipalah apihai Bawipa hmawt mahoe. <sup>15</sup> Nangmouh dawk apihai Cathut lungmanae hah coe laipalah na o awh hoe hah nahanlah thoseh, kakhat poung e a tangpha a payang teh nangmouh runae na poe awh hoe hah nahan, hote kecu dawk taminaw ni yon hoi a khin awh hoe hah nahanlah thoseh, <sup>16</sup> kamsoumhoeh napui tongpa yonnae ka sak e tami ao hoe hah nahanelah, bu vai touh ca hane dawc camin coungnae kâyawt e Esaw patetlah Cathut ka taket hoe e na o awh hoe hah nahanlah thoseh kahawicalah kâhruetcuat awh. <sup>17</sup> Bangkongtetpawiteh, nangmouh ni na panue e patetlah ahni ni a hnukkhu vah yawhawinae râw coe han a ngai eiteh pahnawt lah ao teh mitphi hoi bout a hei ei nakunghai pankângai nahane tueng awm hoe toe.

<sup>18</sup> Nangmouh teh tek thai hmu thai e mon, hmai ka kang e, kahmot e, cakho tûilî, <sup>19</sup> mongka ueng lawk koe thoseh, kamthang kahawi koe thoseh na kahnai awh e nahoe. Hote lawk kathainaw ni ahnimouh koe lawk bout dei hoe hah nahanlah a kâhei awh. <sup>20</sup> Bangkongtetpawiteh, saring ni patenghai hote mon kânep pawiteh talung hoi kadout lah dêi han tie kâpoelawk hah ahnimouh ni khang thai awh hoe. <sup>21</sup> Hottelah hno a hmu awh e teh taki a tho poung dawc, Mosi ni ka taki lawi ka pâyaw, telah a ti.

<sup>22</sup> Hatei, nangmouh teh Zion mon koe thoseh, kahring Cathut e khopui, kalvanlae Jerusalem koe thoseh, touklek hoe e kalvantami kamkhuengnae koe thoseh, <sup>23</sup> Kalvan min thut lah kaawm e caminnaw e kawhmoun koe thoseh, taminaw pueng lawk ka ceng e Cathut koe thoseh, kuepnae koe ka phat e tami kalannaw e muithanaw koe thoseh, <sup>24</sup> Lawkkam katha e laicei Jisuh koe thoseh, Abel e thipaling hlakvah hoe ka talue e lawk ka dei e, kahei e thipaling koe vah thoseh, pha awh toe.

<sup>25</sup> Nangmouh koe lawk ka dei e na pahnawt awh hoe hah nahanlah kâhruetcuat awh. Bangkongtetpawiteh, talai van lawk kapâphokung kapahnawtnaw teh lawkcengnae dawc hoi hlout thai awh hoehpawiteh, kalvan hoiyah lawk ka pâpho e hah maimouh ni pahnawt awh pawiteh hlout nahane lamthung hoe awm hoe. <sup>26</sup> Hatnavah, Bawipa e a lawk ni talai a kâhuat sak. Hatei atuteh, Bawipa ni talai dueng tho laipalah kalvan haiyah bout kâhuat sak han rah telah lawk a kam. <sup>27</sup> Bout tie lawk ni kâhuen thai hoe e hnouaw hah kangning sak nahanelah, sak lah kaawm e kâhuen thai e hnouaw teh raphoe han ti a deingainae doeh. <sup>28</sup> Hatdawkvah, maimouh teh kâhuen thai hoe e uknaeram hah coe awh dawkvah, a lungmanae hah pholen awh haw sei. Hottelah lungmanae, pholennae hoi barinae lahoi Cathut ni a ngai e patetlah bawc awh haw sei. <sup>29</sup> Bangkongtetpawiteh, maimae Cathut teh ka kang e hmai lah ao.

## 13

*Ahnoungpoung tha poenae*

<sup>1</sup> Hmaunawngah reira lung pou kâpataw awh. Imyin khetyawtnae pahnim awh hanh. <sup>2</sup> Bangkongtetpawiteh, imyin lungpatawnae pahnim awh hanh. Tami tangawn ni imyin a khetyawt nah pouk laipalah kalvantaminaw a khetyawt awh toe. <sup>3</sup> Thongkabawtnaw pahnim awh hanh awh, ahnimouh hoi thongim rei kabaw e patetlah pouk awh. Rektapnae kakhangnaw hah nangmouh hai na khang e patetlah pouk awh nateh pahnim awh hanh.



<sup>4</sup> Yuvâ kâpaluennae heh tami pueng ni bari awh naseh. Ikhun hai khin sak awh hanh. Kamsoumhoehe napui tongpa yonnae kasaknaw hoi ka uicuknaw teh Cathut ni lawk a ceng awh han. <sup>5</sup> Na khosaknae dawkvah, tangka lungpatawnae awm hanh naseh, na tawn e hno dawk lungkuepnae tawn awh. Bangkongtetpawiteh, nang teh nâtuék hai pak natha mahoe, nâtuék hai na pahnawt awh mahoe, telah Cathut ni a ti. <sup>6</sup> Hatdawkvah, Bawipa teh na kabawmkung Bawi lah ao dawkvah, kai teh ka taket mahoe, telah taranhawi laihoi dei awh han.

<sup>7</sup> Nangmouh koe Cathut lawk hmaloe ka dei e, na kahrawikungnaw hah pahnim awh hanh. Ahnimae a hringnae dawk hoi ka tâcawt e hnonaw hah pouk awh nateh, a yuemnae hah kamtu awh. <sup>8</sup> Jisuh Khrih teh paduem, sahnin hoi a to hmalah a yungyoe ditouh kâhungnae tawn hoe.

<sup>9</sup> Alouke cangkhai e naw dawk pâlei awh hanh. Bangkongtetpawiteh, rawca lahoi laipalah, a lungmanae lahoi lungthin caksak awh. Rawca lahoi kho ka sak e naw teh, hawinae hmawt awh hoe. <sup>10</sup> Lukkareim dawk thaw katawnaw ni cathainae kâ a tawn awh hoe e thuengnae khoungroe teh maimouh koelah ao. <sup>11</sup> Bangkongtetpawiteh, vaihma kacue ni sathainaw e a thi hah yonthanae sathai lah kathoung hmuén koe a sin eiteh, sathai e a tak teh rapan alawilah doeh hmai hoi sawi lah ao. <sup>12</sup> Hot patetlah Jisuh nihai amae thi hoi taminaw thoungsak hanlah khopui longkha alawilah duenae a khang. <sup>13</sup> Hatdawkvah, maimouh teh hote Bawipa hoi cungtalah pacekpahleknae khang awh teh rapan alawilah ama koe cet awh haw sei. <sup>14</sup> Bangkongtetpawiteh, het talai van vah maimouh han e kangning e khopui awmhoe. Ka tho hane khopui doeh maimouh ni panki lahoi tawng awh.

<sup>15</sup> Hatdawkvah, maimouh ni Cathut e lungmanae heh dâw awh vaiteh pahni e a paw lah kaawm e pholennae sathai hah Jisuh Khrih pawlawk hoi Cathut hmalah pou sak awh sei. <sup>16</sup> Hnokahawi sak e hoi, hnopai hoi kâkabawpnae hah pahnim awh hanh. Bangkongtetpawiteh hot patet e thuengnae hah Cathut ni a lungkuep e lah ao.

<sup>17</sup> Nangmouh na kahrawikungnaw teh akungkhei hane patetlah nangmae muitha ahawi nahanelah, thahmei laihoi ao awh dawkvah, ahnimouh teh cingounae awm laipalah, lunghawicalah hoi hote thaw a tawk thai awh nahan, lawk ngâi pouh awh. Telah nahoeh pawiteh, nangmouh han lah hawinae banghai awm mahoe.

<sup>18</sup> Kaimouh hane na ratoum pouh awh. Bangkongtetpawiteh, kaimouh ni mahoima kahawilah kâpanuennae lungthin kathoung ka tawn awh teh, bangpueng dawkvah bari kaawm lah hring han ka ngai awh. <sup>19</sup> Kai teh nangmouh koe karanglah ka tho thai nahanlah kaimouh han e nangmanaw ni na ratoum nahanlah na kâ awh.

### *Yawhawi poenae hoi kutmannae*

<sup>20</sup> Yungyoe lawkkamnae lahoi kâkuen e a thi lahoi tunaw ka khoum e Tukhoum kalen, maimae Bawipa Jisuh hah duenae koehoi kathâw sak e roumnae Cathut ni, <sup>21</sup> Ama e hmalah ngai kaawm e thaw hah Jisuh Khrih lahoi nangmouh koe a sak teh, nangmouh ni a ngainae na tarawi thai awh nahanelah kahawi e nuencang pueng dawk nangmouh hah na kuep sak naseh. Hote Bawipa dawkvah a yungyoe bawilennae awm lawiseh. Amen

<sup>22</sup> Hmaunawngnaw, nangmouh koe ca kaduemcalah ka thut e lah ao dawkvah hete thapoenae lawk heh na dâw awh nahanlah na kâ awh.



<sup>23</sup> Maimae nawngha Timote teh a hlout toe ti na thai sak awh. Ahni teh palang tho pawiteh ahni hoi rei ka tho roi vaiteh, na kâhmo awh han.

<sup>24</sup> Nangmouh na kauknaw hoi tami kathoungnaw pueng hah kut man awh. Itali ram hoi ka tho e naw ni nangmouh kut na man awh.

<sup>25</sup> Lungmanae teh nangmouh pueng koe awm lawiseh. Amen



## JEM (The General Epistle of James)

### *Lawk karouknae*

<sup>1</sup> Kai Jem, Cathut hoi Bawipa Jisuh Khrih e san lah kaawm e ni talai van kho tangkuem kâkayei e Isarel miphun hlaikahni touh koe ca na patawn awh.

### *Tanouknae hoi cuenae*

<sup>2</sup> Ka hmaunawngghanaw, nangmouh ni tanouknae a phunkuep na kâhmo awh navah lunghawinae lah doeh ao tie lah pouk awh.

<sup>3</sup> Bangkongtetpawiteh, nangmae yuemnae hah tanouknae ni panguepnae a tâco sak tie panuek awh. <sup>4</sup> Nangmouh teh khire laipalah na roungh awh teh, na kuep awh nahan, panguep awh. <sup>5</sup> Nangmouh thungvah, lungangnae ka panki e awm pawiteh, phuenang laipalah tami pueng pasai laipalah kapoekung Cathut koe het naseh. Het pawiteh poe lah ao han. <sup>6</sup> Hatei, oupvoudnae lungthin tawn laipalah yuemnae hoi na het pawiteh na hmu han. Oupvoudnae lungthin ka tawn e tami teh kahlî ni tuicapa a thaw sak e hoi doeh a kâvan. <sup>7</sup> Hot patetnaw teh, Cathut ni na poe han tie roeroe pouk na hanh seh. <sup>8</sup> Hot patet e tami teh a lungthin a samphei teh a sak e hnonaw pueng dawh ka cak hoe e lah ao.

<sup>9</sup> Ayâ ni a hnephnap e tami teh Cathut ni a tawm nah a lunghawi seh. <sup>10</sup> Ka tawnta e tami teh Cathut ni a bo sak torei teh a lunghawi seh. Hatdawkvah, ka bawi tangrengnaw teh kahrawng kaawm e a pei ka sarut e patetlah a sarut han. <sup>11</sup> Kani a tâco teh khumbei ni a pei a kamyai sak teh a sarut, a kamhlawngnae hai a rawk. Hot patetvanlah, amae tawnta hnopai a tawng lahun navah a kamyai teh ouk a kahma.

### *Tacueknae hoi tanouknae*

<sup>12</sup> Tanouknae hah ka panguep e teh, a yawhawi. Bangkongtetpawiteh, tanouknae a tâco toteh, Bawipa kalungpatawnaw koe lawk kam pouh e hringnae bawilukhung a hmu han.

<sup>13</sup> Tacueknae ka kâhmo e ni, Cathut ni na tacuek telah tet nahanh seh. Bangkongtetpawiteh, hawihoeahnae ni Cathut teh tacuek thai hoe. Cathut nihai apipatet hai tacuek boihoe. <sup>14</sup> Tami teh mae hounlounnae dawh doeh tacueknae kâhmo awh teh, tacueknae dawh ouk bo awh. <sup>15</sup> Hat toteh, hounlounnae ni, a vawn teh yonnae hah a khe. Yonnae a roungh teh, duenae a tâcokhai.

<sup>16</sup> Ka lungpataw e ka hmaunawngghanaw pouk payon awh hanh. <sup>17</sup> Kahawi hoi kakuep e poehnonaw pueng teh angnae apa koehoi ka tho e doeh. Cathut teh nâtuek hai kâthung hoe. Kampuen thai e a tâhlip hai awmhoeh. <sup>18</sup> Bawipa ama ni a sak e pueng dawkvah, maimouh hah aluepaw lah na o sak teh, a ngainae patetlah lawkkatang lawk lahoi maimouh teh na khe sak toe.

### *A lawk thainae hoi tarawinae*

<sup>19</sup> Ka lungpataw e hmaunawngghanaw, hothateh pahnim awh hanh. Apihai thainae koe lateh, a hue karang e lah awm awh. Lawk deinae hoi lungkhueknae koe lah teh ka hnawng e lah awm awh. <sup>20</sup> Tami e lungkhueknae ni Cathut lannae heh tâcawt sak hoe. <sup>21</sup> Hatdawkvah kakhin e



nuencangnaw puenghoi kahawihoehe kaisuenae pueng tâkhawng awh. Nangmae lungthin muitha ka runngang thai e, nathing patûe lah kaawm e Cathut lawk hah lungdo lungnemnae lahoi dâw awh.

<sup>22</sup> A lawk thai teh a khout toe telah namahoima kâdum awh hanh. A lawk dawka tawka e lah awh. <sup>23</sup> A lawka tarawihoehe e tami teh hlalang dawka minhmai ka kâkhen e hoi a kâvan. <sup>24</sup> Kahawicalah a kâkhet teh a cei hnukkhu, amae meilam bang hoi maw ka kâvan tie tang a pahnim. <sup>25</sup> Hateiteh, hloutnae kâlawk dawka kahawicalah ka khen niteh ka tarawihoehe e teh, a thai teh pahnim laipalah ka tawka e lah ao. Ahnimouh teh tawksaknae dawka yawhawinae a hmu han.

<sup>26</sup> Tami buet touh ni kai teh a lawka tarawihoehe e lah ka o telah a pouk han ei, a lai hah uk thai laipalah, amahoima kâdum pawiteh, ahnie bawka e teh ahrawnghrang lah ao. <sup>27</sup> Pa Cathut e hmalah kathounge hoi ka khinhoehe bawka e teh, roedengnae ka kâhmo e naranaw hoi lahmainunaw khetyawtnae, talaivan khinnae hoi thoung nahanelah, mahoima kâkhetyawtnae naw hah doeh.

## 2

### *Ngaima tawn awh hanh.*

<sup>1</sup> Ka hmaunawngnaw, Bawipa e bawilenna hoi kakawihoehe e maimae Bawipa Jisuh Khrih yuemnae dawkvah ngaima tawn awh hanh.

<sup>2</sup> Bangnuena hoi, nangmouh na kamkhuengnae koe sui kuthrawt hoi khohna duidui ka tawka e khohna laihoi tami buet touh kâen boilah, hahoi khohna kahawihoehe ka khohnat e mathoe buet touh hai kâen pawiteh, <sup>3</sup> khohna kahawihoehe hoi ka tho e tami teh barinae na poe awh teh, tahungnae kahawipoung dawka tahung haw na ti pouh awh. Ka roedeng e tami teh kangdout lawih, nahoehe pawiteh, ka khok koe carawng dawka tahung na ti pouh awh. <sup>4</sup> Hottelah, na tet pawiteh, namamouh thungvah, tami na kapek awh teh kahawihoehe khopouknae lahoi lawkcengkungnaw lah na o awh toe, nahoehmaw.

<sup>5</sup> Ka lungpataw e ka hmaunawngnaw, thai awh haw, Cathut ni het talaivan e tami karoedengnaw hah yuemnae dawka bawihoehe e lah thoseh, ama lungpatawnaw hanlah kam pouh e uknaeram coe hanelah thoseh a rawi nahoehmaw. <sup>6</sup> Nangmouh niteh mathoenaw hah na bari awh hoehe bo vaw. Ka tawnta e naw niteh nangmouh hah na rektap awh teh, lawkcengnae hmalah betbet na sawn awh nahoehmaw. <sup>7</sup> Cathut ni na poe e bari kaawm e min ka dudam e naw teh ahnimouh nahoehmaw.

<sup>8</sup> Cakathoung dawka kaawm e kâlawk hah na tarawihoehe e pawiteh hnokahawi na sak awh toe. Hote kâlawk teh, namahoima lungpataw patetlah na imri hai lungpataw van haw, telah a ti. <sup>9</sup> Hatei, ngaima na tawn pawiteh, na yon awh dawkvah kâlawk lahoi na yon pâpho lah na o awh han. <sup>10</sup> Bangkongtetpawiteh, kâlawk abuemplah na tarawihoehe e, buet touh na ek pawiteh abuemplah ek e lah ao. <sup>11</sup> Bangkongtetpawiteh, uicuk hanh ka tet e niyah tami teh hanh bout ati. Hatei na uicuk hoehe nakunghai tami na thet pawiteh kâlawk na ek e lah ao mingming.

<sup>12</sup> Hatdawkvah, hloutnae hoi kâkuen e kâlawk lahoi lawkceng hane patetlah deipan, kâroe awh. <sup>13</sup> Bangkongtetpawiteh, lawkcengnae ni tamikathout teh pahren hoehe, pahrennae teh lawkcengnae lathueng tânae ouk a hmu.

### *Yuemnae hoi tawka e*



<sup>14</sup> Ka hmaunawngghanaw, buetbuet touh ni yuemnae ka tawn ati ei yuemnae hah tawknae hoi kamnuek sak hoehpawiteh bangmaw a cungkeinae kaawm han. Hote yuemnae niyah ama hah a runngang thai han na maw. <sup>15</sup> Hmaunawnggha hoehpawiteh, tawncei ni caici lah ao teh khohna han a tawn hoeh navah, <sup>16</sup> Hotnaw hanlah, Cathut ni yawhawi na poe a lawiseh, kabetcalah awm nateh kaboumcalah cat awh, na ti pouh ei, a panki awh e hah na poe hoehpawiteh bangmaw cungkeinae kaawm. <sup>17</sup> Hot patetvanlah, tawknae kaawm hoeh e yuemnae teh kadout e lah a o.

<sup>18</sup> Hatei, nang teh yuemnae na tawn. Kai teh tawknae ka tawn. Hottelah pawiteh, nang ni tawknae laipalah na yuemnae kamnuek sak haw. Kai niteh tawknae lahoi ka yuemnae hah ka kamnue sak han. <sup>19</sup> Cathut buet touh dueng doeh kaawm tie hah na yuem awh, ahawi doeh. Kahraituilinaw nihai hotteh a yuem awh van, a taki awh teh a pâyaw awh.

<sup>20</sup> Oe tamipathu, tawknae kaawm hoeh e yuemnae teh a due tie panue han na ngai katang maw. <sup>21</sup> Maimae mintoe Abraham ni Isak hah Cathut koe thuengnae a sak navah tawknae lahoi a lan telah khoe pouh nahoehmaw. <sup>22</sup> Yuemnae teh tawksaknae hoi kamrawi e lah ao teh tawksaknae lahoi akuiep tie panue awh. <sup>23</sup> Hat dawk nahoehmaw, Abraham ni Cathut a yuem teh, hote yuemnae hah ahnie lannae lah a khoe pouh tie Cakathoung lawk teh akuiep. Abraham hai Cathut e a hui, telah a kaw awh. <sup>24</sup> Hatdawkvah tami teh yuemnae lahoi dueng lannae dawkh pha e nahoeh, tawknae lahoi pha e hah nangmouh ni na panue awh.

<sup>25</sup> Hot patetvanlah, kâyawt e Rahab hai patounenaw a im a luen sak teh, alouke lam lahoi a ban sak toteh, hote tawknae lahoi lan toe telah khoe lah ao nahoehmaw. <sup>26</sup> Bangkongtetpawiteh, Muitha laipalah tak teh kadout e lah ao patetlah tawknae laipalah yuemnae hai kadout e lah ao.

### 3

#### Lai

<sup>1</sup> Ka hmaunawngghanaw, kaimouh saya lah kaawm e naw hah hoe kacinge lawkcengnae kâhmo awh han tie panuek awh nateh, saya lah kapap awm awh hanh. <sup>2</sup> Bangkongtetpawiteh, maimanaw pueng teh kapap lah ouk payon awh. Apihai lawk deinae koe ka payon hoeh e teh tami kakuep e lah ao teh tak abuemplah ka uk thai e lah ao.

<sup>3</sup> Ka lawk ngâi seh titeh marang hah a pahni moum pouh teh a tak buem lah ngainae koe ouk ceisak awh. <sup>4</sup> Hahoi, kalenpounge long teh kahli katang poung nakunghai kathoengcae tuisamlanae hoi ngainae koe a ceisak thai. <sup>5</sup> Hot patetlah doeh lai hai ao. Hno kathoengca ei teh kalenpoung lah a kâoup. Hmaitalica ni ratu pui hai a kak sak thai e panuek awh. <sup>6</sup> Lai teh hmai doeh. Hno kahawihoehe talaivan lahai ao. Tak dawkh e puenggang buet touh lah ao ei, tak abuemplah kahawihoehe hoi a khin sak. Hringnae hah abuemplah a kak sak teh, ama hai hell hmai hoi a kak. <sup>7</sup> Taminaw ni moithangnaw hoi tavanaw, vonpui hoi kâvanaw, tui dawkh kaawmnaw a mawng sak thai e patetlah a mawng hai a mawng sak awh. <sup>8</sup> Hatei, lai teh apipatet nihai mawng sak thai hoeh. Lai teh yue thai hoeh e kapopoung e lah ao teh, duesue hoi ka kawi e lah ao.

<sup>9</sup> Maimouh ni lai hoi na pa Cathut ouk pholen awh. Cathut e mei hoi kâlat lah sak e tami hah lai hoi thoe hnep na bo awh.



<sup>10</sup> Kâko buet touh dawkh hoi pholennae lawk hoi thoebonae lawk hah a tâco bo vaw. Ka hmaunawngghanaw, telah o hanlah awm hoehe.

<sup>11</sup> Tuiphuek buet touh dawkh hoi tui katui hoi kakhat e reirei ouk a tâco maw. <sup>12</sup> Ka hmaunawngghanaw thaibunglung ni olive lah a paw thai maw. Misurkung nihai thaibunglung paw lah paw boihoehe. Hot patetvanlah, tui katui e ni kakhat e lah tâcawt sak thai hanh.

<sup>13</sup> Nangmouh thung dawkvah thouthainae hoi kakuep e lungkaang e tami buet touh awm pawiteh, hote tami niteh a lungangnae hoi panuenae a tawn e hah, kahawi hno a sak e hno dawkvah a kamnue sak hanlah ao. <sup>14</sup> Hatei, nangmae na lungthin thungvah, utnae, hoi ma han dueng kâkaramnae awm pawiteh, lawkkatang hah oun laihoi kâoup awh hanh.

<sup>15</sup> Hot patet e lungangnae teh lathueng lahoi ka tho e lungangnae nahoehe, talai lae kahrai koehoi ka tho e lungangnae doeh. <sup>16</sup> Utnae hoi ma hane dueng kâkaramnae tangkuem koevah, ruengruengtinae hoi kahawihoehe a cawngca doeh ouk kaawm.

<sup>17</sup> Hat nakunghai, lathueng lahoi ka tho e lungangnae teh hmaloe poungh lah a thoung. Hahoi teh kâponae ao, lungmawngnae ao, dei a yawi, pahrennae, hawinae hoi akawi. Kapeknae banghai tawn hoehe. Kaisue hoehe. <sup>18</sup> Hahoi, roumnae kasaknaw ni lannae cati hah kahawicalah a patue awh.

## 4

### *Kârahnoumnae*

<sup>1</sup> Nangmouh dawkvah, tarankâtuknae hoi kâyuenae naw teh nâhoi maw a tho vaw. Nange takthai dawkh kâtânae lah kaawm e takngainae lung koehoi vaiyaw a tho vaw. <sup>2</sup> Na noe awh ei, na hmu awh hoehe dawkvah tami na thei awh. Puenghoi na ngai ei, na tawn thai hoehe dawkvah, na kâyue na kâhem awh teh taran na kâtuk awh. Na tawnhoehehnae teh na hei awh hoehe dawkh doeh. <sup>3</sup> Hahoi, na hei awh ei, na hmawt thai awh hoehe. Bangkongtetpawiteh namamouh phunepnae koe hno hanelah dai na hei awh dawkh doeh.

<sup>4</sup> Kamsoumhoehe napui tongpa yonnae dawkh kaawm e napui tongpanaw, talaivan hoi kâhuikonae teh Cathut hoi kâtarannae doeh tie hah na panuek awh hoehe maw. Talaivan hoi kâhuiko ka ngai e tami teh Cathut e taran doeh. <sup>5</sup> Cathut ni maimouh thung vah na hruek pouh e Muitha teh dipmanae a tawn tie hah Cakathoung ni ayawmyin lah doeh a dei telah na pouk awh maw. <sup>6</sup> Hatei, Cathut ni na poe e lungmanae teh hot hlak patenghai a tha hoe ao rah. Cakathoung ni a dei patetlah kâphokâlen e tami hah a taran teh, ayâ rahim kârahnoum e tami hah yawhawinae a coe sak.

<sup>7</sup> Hatdawkvah, Cathut ngainae tarawi awh, kahraimathout hah ngang awh. Telah na tetpawiteh, kahraimathout ni na yawng takhai han.

<sup>8</sup> Cathut teh hnai awh haw, ama ni na hnai awh van han. Tamikayonnaw na kut thoungsak awh. Lung ka sampheinaw na lung thoungsak awh.

<sup>9</sup> Lungthoungnae, lungmathoenae, kanae hoi awm awh. Na panuiparingnae teh lungmathoenae lah, na lunghawinae hai lungmathoenae lah awm sak awh. <sup>10</sup> Cathut hmalah kârahnoum awh. Hottelah na tet pawiteh, Cathut ni na tawm takhang han.

*Buet touh hoi buet touh kâ pathoe awh hanh.*



<sup>11</sup> Ka hmaunawngghanaw buet touh hoi buet touh kâ pathoe awh hanh, apihai a hmaunawnggha ka pathoe e teh kâlawk ka pathoe e lah ao. Hottelah na sak pawiteh, nang teh kâlawk na ka tarawi e lah na awm hoehe. Lawk na ka ceng e lah doeh na o. <sup>12</sup> Kâlawk na kapoekung, lawkcengkung teh buet touh dueng doeh kaawm. Hote Bawipa ni na rungngang thai teh na raphoe thai. Nang teh bang patet e tami lah mouh na o teh, na tengpam e taminaw hah lawk khuet na ceng va.

### *Tami e ngainae hoi Cathut e ngainae*

<sup>13</sup> Sahnin na ou, tangtho na ou, kahlawng ka cei vaiteh awi haw vah kum tabang ka o han, hno kayo vaiteh, tangka moikapap ka hmu han telah ka pouk e naw, ka lawk heh thai awh haw. <sup>14</sup> Tangtho na hringnae hah bangtelamaw ao han tie hai na panuek awh hoehe. Nangmae na hringnae teh bang patetlah maw ao. Nangmouh teh dawngdengca ka kamnuek niteh tang kahmat e a kahû patetlah doeh na o awh. <sup>15</sup> Hatdawkvah, Bawipa a ngainae awm boilah, maimouh hai hring a boipawiteh, hottelah hoehpawiteh hettelah sak awh sei telah doeh na ti awh hanelah ao. <sup>16</sup> Hatei, atu nangmanaw teh namahoima na kâtalue awh teh na kâoup awh rah, hot patet e kâoupnae pueng teh kahawihoehe hno doeh. <sup>17</sup> Hatdawkvah, apipatet hai, hnokahawi sak hane a panue nahlangva, sak laipalah awm pawiteh, yo a yon toe.

## 5

### *Ka tangrengnaw kâhruetcuet poenae*

<sup>1</sup> Nangmouh tami ka tangrengnaw ka lawk heh thai awh haw, nangmae lathueng rucatnae a tho han kecu dawkvah, hramki khuikap awh. <sup>2</sup> Na hnopainaw teh kouna a hmawn teh, na khohnanaw hai ahri ni kouna a ca toe. <sup>3</sup> Nangmae sui ngunnaw hai a ekko toe. Hote ekko teh, nangmouh kapanuekkhaikung lah ao han. Nangmae na tak hah hmai patetlah a ca han. A hnukteng e hnin dawk hane hnopai bo na pâkhueng awh vaw. <sup>4</sup> Thai awh haw, na law dawkwaw katawnaw hah kutphu poe laipalah, na dum awh teh hote aphu ni a hram toe. Cang ka a naw e hram lawk haiyah kalvan Cathut e a hnâ dawkwaw kâen toe. <sup>5</sup> Nangmouh teh het talai nawmnae dawkwaw phunep awh toe. <sup>6</sup> Tami kalan hah lawk na ceng awh teh, na thei awh toe. Ahni nihai nangmouh na ngang awh hoehe.

### *Bawipa ngaihawinae*

<sup>7</sup> Hatdawkvah ka hmaunawngghanaw, Bawipa a tho hoehroukrak na lungsaw sak awh. Law ka phaw niyah a law dawkwaw e aphu kaawm anhla a pawhik hah hmaloe e ratui hoi a hnukteng e ratui totouh lungsaw laihoi ouk a ring awh. <sup>8</sup> Nangmouh haiyah na lung saw awh haw, nangmae na lungthin caksak awh. Bangkongtetpawiteh Bawipa a tho nahane atueng teh a hnaica toe. <sup>9</sup> Hmaunawngghanaw, lawkcengnae na khang awh hoehe nahanlah, buet touh hoi buet touh yon kâpen awh hanh. Khenhaw! lawkcengkung Bawi teh takhang hmalah sut a kangdue toe.

<sup>10</sup> Ka hmaunawngghanaw Cathut e min lahoi ka dei e profetnaw e patangpalai a khangnae hah khetsin hanelah pahnim awh hanh. <sup>11</sup> Ka panguep e taminaw teh a yawhawi awh telah maimouh ni pouk awh. Job e a panguepnae teh nangmouh ni na thai awh toe. Cathut ni a hnukteng poung bout a pahren teh a lungma e hai na panue awh.

### *Thoebonae roun awh*



<sup>12</sup> Hmaunawngghanaw, thoebonae hah hoe roun awh. Kalvan khet hoi thoebo awh hanh. Talai khet hoi thoebo awh hanh. Hothloilah, bangpatet e thoebonae lahoi hai thoebo awh hanh. Yon lawkcengnae hoi na hlout awh nahan, nangmae na lawk hah, ue teh ue tet awh, nahoe teh nahoe tet awh.

*Lung kadeng lah ratoumnae*

<sup>13</sup> Nangmouh thung dawk runae kâhmo e awm pawiteh, ratoum naseh. A lung kahawi e awm pawiteh pholennae la sak naseh. <sup>14</sup> Ka pataw e awm pawiteh kawhmoun thung e kacuenaw hah kaw naseh. Ahnimouh ni Bawipa min lahoi satui a hluk vaiteh ratoum pouh naseh. <sup>15</sup> Yuemnae lahoi ratoum e ni ka pataw e hah a dam sak han. Bawipa ni a thaw sak vaiteh yonnae a sakpayon nakunghai a ngaithoum han. <sup>16</sup> Hatdawkvah dam sak lah na o awh nahan, buet touh hoi buet touh mae yonnae hah pâpho awh nateh, buet touh hoi buet touh hanelah, ratoum awh. Tami kalannaw e ratoumnae a hue teh bahu ao. <sup>17</sup> Elijah heh maimouh patet e tami rumram ei, khorak hoe hah nahanlah puenghoi a ratoum navah, kum thum touh hoi thapa yung taruk totouh khorak laipalah ao. <sup>18</sup> Hahoi, bout a ratoum navah kalvan hoi kho a rak teh, talai ni a pawhik bout a pâw sak. <sup>19</sup> Hmaunawngghanaw, nangmouh thung dawk e buetbuet touh ni lawkkatang lamthung a phen navah, buetbuet touh ni bout bankhai pawiteh, <sup>20</sup> tamikayon lam payonnae koehoi bout ka bankhai e tami teh lam ka phen e tami e hringnae hah duenae koehoi a rungngang teh yonnae hah a ramuk pouh toe tie hah panuek naseh.



## 1 PITER (The First Epistle General of Peter)

### *Lawk karouknae*

<sup>1</sup> Kai Piter, Jisuh Khrih e guncei lah kaawm e ni, Pontus, Galati ram, Kappadosia ram, Asia ram hoi Bithunia ramnaw hoi kho tangkuem ka kampek e, Cathut ni a rawi e imyin lah kaawm e nangmouh koevah ca na patawn awh. <sup>2</sup> Jisuh Khrih a thi kaheinae hoi, Muitha lahoi thoungsaknae hmu hanelah, Pa Cathut ni sut a panue tangcoung e patetlah, a rawi e taminaw nangmouh koe a lungmanae hoi rounnae teh pungdaw lawiseh.

### *Kahring e ngaihawinae*

<sup>3</sup> Maimae Bawipa Jisuh Khrih e Pa Cathut teh yawhawinae awm lawiseh. Bawipa ni amae ka lentoe poung e a pahrennae hoi Jisuh Khrih duenae koehoi bout thawsaknae lahoi maimouh teh kahring e ngaihawinae dawkh thoseh, <sup>4</sup> nangmouh hanelah kalvan kho vah a hruek e, kamkonea, khinnae, kamyaina kaawm hoeh e raw dawkh thoseh, katha lah bout na khe sak awh toe. <sup>5</sup> Nangmouh ni ahnoungepoung e tueng dawkh coungkacoe kamnue hane rungngangnae hah Cathut e bahu dawkh yuemnae lahoi na kountouk awh. <sup>6</sup> Nangmouh ni atu e atueng dawkvah tanouknae hoi lungmathoenae a cawngca dawngdeng na kâhmo awh ei nakunghai, a lathueng lah ka dei tangcoung e patetlah konawmnae kalenpoung tawn awh. <sup>7</sup> Hotnaw teh, hmai hoi tanouk e lah o tangcoung eiteh kamko thai kawi e sui hlak aphu kaawm poung e nangmae yuemnae hah tanouknae teh Jisuh Khrih a kamnue toteh, pholennae, bawilennae hoi barinae lah na hmu awh han. <sup>8</sup> Nangmouh ni hote Bawipa teh na hmawt bawi awh hoeh eiteh lung na patawn awh. Hote Bawipa teh atu na hmawt awh hoeh eiteh na yuem awh toe. Lawk hoi deithailekhoeh e konawmnae lahoi a bawilennae teh pholen awh. <sup>9</sup> Lungthin muitha rungngangnae yuemnae aphu hah a hmu awh.

<sup>10</sup> Nangmouh ni na coe hane lungmanae hoi kâkuen lah ka dei e profetnaw nihai rungngangnae a kong a la tawng awh toe. <sup>11</sup> Nangmouh thung kaawm e Khrih e Muitha ni Khrih rektapnae hoi, hote rektapnae hnuklah ka tho hane a bawilennae akong hah sut kampangkhai awh navah, apimaw, hoehpawitech nâtuek e atueng maw a dei ngai nah tie hah ahnimouh ni a la tawng awh toe. <sup>12</sup> Hatnavah, ahnimouh ni a sak e hnonaw teh amamouh hanelah tho laipalah, nangmouh hanelah ahnimouh koe a pâpho. Atu hote hnonaw teh kalvan lahoi a patoun e Kathoung Muitha lahoi kamthang kahawi kadeinaw koehoi nangmouh koe bout pâpho e lah ao toe. Kalvantaminaw ni patenghai yah hote hnonaw a hmu hanelah puenghoi a ngai awh.

### *Hringnuen thoung nahanlah hroecoenae*

<sup>13</sup> Hatdawkvah, nangmae na lungthin hah kârakueng nateh kâhruetcueth awh. Jisuh Khrih a kamnue toteh nangmouh koe ka tho hane yawhawinae hah apout ditouh ngaihawi awh. <sup>14</sup> Yampa vah nangmouh ni na thai panuek awh hoeh nah lungradueknae hno na pâlei e naw atu bout pâlei laipalah lawk ka ngai e camo patetlah o vaiteh, <sup>15</sup> nangmouh na kakaw e Bawipa a thoung e patetlah nangmouh hai



na hring kho na saknae dawk thoungsak awh. <sup>16</sup> Bangkongtetpawiteh, kai kathoung dawkvah nangmouh haiyah thoungnae tawn awh, telah Cakathoung dawk a dei.

<sup>17</sup> Nangmouh ni tami e minhmai khen laipalah buetbuet touh tangkuem ni a sak e patetlah lawkcengkung hah Apa telah na kaw awh pawiteh het talai imyin lah na o nathung barinae lungthin hoi khosak awh. <sup>18</sup> Bangkongtetpawiteh, nangmouh ni mintoenaw koehoi na coe e ayawmyin kho na saknae thung hoi na ratangnae teh sui ngun kamko thai e hno hoi nahoe, <sup>19</sup> Yonnae banghai ka tawn hoe e, khinnae ka tawn hoe e tuca patetlah e aphu kaawm poun e Khrih thipaling hoi na ratang e titeh panue awh. <sup>20</sup> Bawipa teh talaivan a sak hoehnahan sut a hmoun tangcung e lah ao eiteh, atu ahnoungepoun e atueng dawkvah nangmouh hanelah a kamnue toe. <sup>21</sup> Nangmouh ni Cathut khet laihoi yuemnae, ngaihawinae tawn thai nahanelah hote Bawipa hah Cathut ni duenae koehoi a thaw sak teh bawilenna e poe toe.

<sup>22</sup> Nangmouh teh, lawkkatang ngai e lahoi, nangmae lungthin muitha hah a thoung a cai sak teh, a katang e hmaunawnggha reira lungpatawnae na coe awh dawkvah, kathounge lungthin hoi buet touh hoi buet touh kacaklah lungkâpataw awh. <sup>23</sup> Nangmouh teh kamko thai e cati hoi tho laipalah, kamko thai hoe e cati, kahring niteh a yungyoe kangning e Cathut e a lawk hoi a katha lah khe e lah na o awh. <sup>24</sup> Bangkongtetpawiteh mipun pueng teh phokung patetlah doeh ao awh. Taminaw e lentoenae pueng haiyah pho pei patetlah lah doeh ao. Phokung teh a kamyai teh a ke thai. A pei haiyah a sarut thai. <sup>25</sup> Hatei, Cathut e a lawk teh a yungyoe a kangning. Hote a lawk teh nangmouh koe dei e kamthang kahawi doeh.

## 2

### *Kahring e talung, kathounge mipun*

<sup>1</sup> Nangmouh teh Bawipa Cathut e lungmanae na patek toung dawkvah, <sup>2</sup> Utsinnae cawngca, dумыenna, tami kahawi lah kâsaknae, kâhmuhmanae, kâpathoenae pueng pahnawt awh nateh, rungngang nahanelah muitha sanutui katang hoi rounng hanelah, <sup>3</sup> camosen patetlah hote sanutui hah ngainae hoi kahran awh haw.

<sup>4</sup> Taminaw ni a pahnawt awh teh Cathut ni a rawi e hringnae talung tie hote Bawipa koe pha teh, <sup>5</sup> kahring e talungnaw patetlah patuenpatuen pacoung teh sak e muitha koe lae im lah o awh. Jisuh Khrih lahoi Cathut ni a ngai e thuengnae ka sak hane kathounge vaihma mipun lah o awh.

<sup>6</sup> Cakathoung dawk a thut e patetlah rawi e im takinlung aphu kaawm e hah Zion mon dawka ka ta. Hote talung ka kâuep e naw pueng teh kayanae tawn mahoe telah ati. <sup>7</sup> Hatdawkvah hote talung teh kayuennaw hanelah a lentoenae lah ao. Kayuemoehnaw hanelah teh im kasaknaw ni a pahnawt a eiteh im tungkhu takin koe ka phat e talung lah ao. <sup>8</sup> A lawk kangâihoehnaw hanelah teh hote talung teh tâlawnae talung hoi payonnae lungsong lah ao. Hottelah ao nahanelah ahnimouh teh a rawi e lah ao.

<sup>9</sup> Nangmouh teh a hmonae koehoi kângairu angnae dawka na kakawkung Amae pholenna kamnue sak hanelah rawi e mipun lah na o awh. Siangpahrang vaihma mipun, kathounge mipun, Cathut e mipun katang lah na o awh. <sup>10</sup> Yampa vah nangmouh teh Cathut e mipun lah na awm awh hoe. Atuteh Cathut e mipun lah na o awh. Yampa vah a lungmanae na coe awh hoe eiteh atuteh na coe awh toe.



### *Hnokahawi sak nahan hroecoenae*

<sup>11</sup> Ka lungpataw e taminaw, nangmouh teh imyin lah na o awh teh Muitha ka taran e takthai radueknae hah roun hanelah na hroecoe awh. <sup>12</sup> Jentelnaw e rahak vah khet kamcu lah khosak awh. Hottelah kho na sak awh pawiteh ahnimouh ni nangmouh teh yon ka sak e tami lah na dei nakunghai nangmae hnokahawi na sak e naw a hmu toteh, Cathut hmalah Bawipa e bawilennae teh a pholen awh han.

<sup>13</sup> Bawipa e minhmai khet laihoi ka lentoe poug e siangpahrang nakunghai thoseh, tami kahawi oup hanelah thoseh, <sup>14</sup> Siangpahrang ni a rawi e kâ katawnnaw thoseh, taminaw koe khokhangkung bawinaw e hrawinae lawk ngâi awh. <sup>15</sup> Bangkongtetpawiteh nangmouh ni hnokahawi na sak e laihoi tami pathunaw e pathunae lawk rakhip thai nahanelah Cathut ngainae lah ao. <sup>16</sup> Tami kahloutnaw patetlah hring awh. Hatei hote hloutnae hah kahawihoeh sak nahanelah hno laipalah Cathut e a san patetlah kâroe awh. <sup>17</sup> Tami pueng hah bari awh. Hmaunawngah hah lungpataw awh. Cathut hah taket awh. Siangpahrang hah bari awh.

### *Bawinaw koe lawkngainae*

<sup>18</sup> Sannaw, takinae laihoi na Bawipa e hrawinae ngai awh. Bawi teh lungthin kahawi hoi lungdonae ka tawn nakunghai thoseh, a lungthin ka muenyang e hai thoseh, a lawk ngâi pouh awh. <sup>19</sup> Cathut e minhmai khet laihoi kathuem hoeh e rektapnae na khang nakunghai yawhawinae ao. <sup>20</sup> Ma e yon kecu dawk hemnae khang boipawiteh bangmaw oup hane kawi kaawm. Hnokahawi na sak nahlangva vah, rucatinae na khang pawiteh Cathut koe yawhawinae ao. <sup>21</sup> Bangkongtetpawiteh, hot patetlah hane doeh nangmouh teh kaw lah na o awh teh, Khrih ni mamouh hanelah a khang teh, a khokhnuk dawn vaiteh khetsin hane kawi mitnoutnae na ta pouh toe. <sup>22</sup> Hote Bawipa teh yonnae sak hoeh, apâhni dawk hai laithoe awmhoeh. <sup>23</sup> Pathoenae a khang navah, bout pathung hoeh. Rucatinae a khang na haiyah pakhi laipalah, kalan lah lawkcengkung koe amahoima a kâhnawng toe. <sup>24</sup> Maimouh teh yon hoi ka kâkuen e naw koe lah due awh teh lannae koelah na hring sak hanelah maimae yonnae hah ama roeroe ni a tak thung thing dawk a sin toe. A hemnae hmâtannaw dawk hoi nangmouh teh na dam awh toe. <sup>25</sup> Nangmouh teh lam ka phen e tu patetlah na o awh. Atuteh Tukhoumkung lah kaawm e, nangmae lungthin muitha kakhenyawnkung, Bawi koe bout na pha awh toe.

## 3

### *Yuvâ ni tarawi hane kawi*

<sup>1</sup> Hot patetvanlah, napuinaw, na vâlaw e lawk ngâi awh. Hottelah na tet awh pawiteh, na vâlaw ni a lawk a ngâi awh hoeh nakunghai, <sup>2</sup> nangmae Cathut takinae hoi kathoungue hringnuen hah hmawt awh vaiteh, nangmae lawk dawk hoi laipalah, na hringnuen laihoi a lungkâthung awh han. <sup>3</sup> Nangmouh dawk kamthoupnae, samveinae, sui dingyin awinae, khohnanae tie naw alawilae kamthoupnae hoi laipalah, <sup>4</sup> Cathut hmalah aphu kaawm poug e lungdonae tie karawk thai hoeh e kamthoupnae hoi a thung lae tami lah awm awh. <sup>5</sup> Cathut kâuep e napuinaw teh ayan vah hot patetlah amahoima a kamthoup awh. <sup>6</sup> Sarah ni Abraham teh bawipa telah a kaw teh ahnie a lawk a ngâi e patetlah, vâ e lawk hah ngâi awh. Nangmouh ni kahawicalah na sakyoe awh teh tâsuenae tawn laipalah na awm pawiteh, Sarah e canu lah na o awh.



<sup>7</sup> Hot patetvanlah, vanaw, na yu hah bari awh. Yu teh a tha ka youn e lah ao tie hah panue nalaihoi hringnae râw rei ka coe e lah pouk awh, apu awh sak awh nateh reirei khosak awh. Het hateh nangmae ratoumnae rakhout hoe hahane doeh.

*Kahawi hoe h e sak awh hanh.*

<sup>8</sup> A hnuktengpoung lah dei han tetpawiteh, nangmouh pueng ni lungkângingcalah awh awh. Lungkâpatawnae, hmaunawngah patetlah kâpahrennae, kârahnoumnae tawn awh. <sup>9</sup> Nangmouh teh yawhawinae râw na coe awh nahanelah, kaw e tami lah na o awh dawkvah, kathout hno hah hno kathout hoi, yuenae hah yuenae lahoi pathung awh hanh. Yawhawinae mah poe awh. <sup>10</sup> Bangkongtetpawiteh hring nawmnae lung ka pataw niteh, hnin kahawi hoi kâhmo hanelah ka ngai e tami teh amae a lai hah cakuep vaiteh kahawihoehe lawk hoi kâhlat naseh. A pahni hoi laithoe hai dei hanh naseh. <sup>11</sup> Kahawi hoe h e hno roun vaiteh hnokahawi sak naseh. Ayânaw hoi kâpocalah khosak naseh. <sup>12</sup> Bangkongtetpawiteh Cathut e tami kalannaw hah khetyawt teh ahnimae ratoumnae hai a thai pouh. Hatei kahawihoehe ka sak e taminaw teh Cathut ni minhmai athung takhai.

*Lannae kecu daw khang hane runae*

<sup>13</sup> Nangmouh teh hnokahawi ka sak e tami lah na awh awh pawiteh apinimaw runae na poe awh han. <sup>14</sup> Lannae kecu daw khang reithainae na khang pawiteh na yawhaw awh, ahnimae pakhinae taket awh hanh awh, kalue awh hanh awh, <sup>15</sup> Na lungthin hoiyah Bawipa hah barinae tawn awh. Nangmae ngaihawinae hno hah na ka pacei e taminaw pueng koe lungdona lungthin hoi bout na dei thai nahanelah coungkacoe lah awh awh. <sup>16</sup> Khrih thung nangmouh ni hnokahawi na sak awh e hah kahawihoe hah kadeinaw ni yon na pen awh nah amamouh yeraipo nahanelah nangmouh teh namahoima ka panuenae lungthin kathoungcalah awh awh. <sup>17</sup> Cathut e ngainae lah awh pawiteh hnokahawi sak daw khang reithai khangnae teh kahawihoehe saknae daw khang reithai khang e hlah hoe ahawi. <sup>18</sup> Bangkongtetpawiteh Khrih hai yon kecu daw khang vai touh hoi kakhoutlah a khang. Nangmanaw Cathut koe na thak nahanlah tamikalan ni tamikalanhoe hnanlah runae a khang toe. Ama teh takthai koe lahoi kadout ei nakunghai, Muitha koe lahoi hring sak lah ao dawkvah, <sup>19</sup> Muitha lahoi a cei teh thong thung paung e muithanaw koe phung a dei. <sup>20</sup> Hote muithanaw teh ayan Noah senae, tami kayounca tami taroe touh tuikamuem daw khang hoi ratang nahane long a sak awh navah, Cathut ni lungsaw laihoi a ring eiteh lawk ka ngai hoe h e muithanaw doeh. <sup>21</sup> Hote bangnuenae patetlah atu e baptisma teh jisuh Khrih a thawnae lahoi maimouh na rungngang awh. Baptisma tie teh takthai khinnae pâsu e dei ngainae lah tho hoe h. Mahoima kâpanuenae lungthin a thoung teh Cathut hmalah boutdeinae doeh. <sup>22</sup> Hote Bawipa teh kalvan kho a luen teh kalvantaminaw, kâtawnnae hoi bahu onae hah a uk teh, Cathut e aranglah ao.

## 4

*Khrih hnuk kâbangnae*

<sup>1</sup> Hottelah Khrih ni maimouh hanelah a tak hoi a khang katang dawkvah nangmouh hai hot patetlah e lungthin pouknae hah sene lah hno awh. Bangkongtetpawiteh a tak daw khang e tami teh yonnae daw k



hoi a hlout toe. <sup>2</sup> Takthai dawk hringkhai hane kaawm rae atueng dawk bout hring hanelah taminaw e radueknae lahoi tho laipalah Cathut e ngainae lahoi a hring thai nahane doeh. <sup>3</sup> Bangkongtetpawiteh Jentelnaw patetlah hring awh teh, takngai pâleinae, radueknae, yamuhrinae, nawm ngainae, carawngcakhanae, meikaphaw bawknae dawkvah kaloum tangcoung e tuengnaw dawk khosak awh e teh maimouh hanelah a khout toe. <sup>4</sup> Talai nawmnae dawk ahnimouh hoi na kâhuikohoeahnae hah ahnimouh ni a kângai a ru teh na pathoe awh. <sup>5</sup> Hatdawkvah, kahringnaw hai thoseh, kadoutnaw hai thoseh, lawkceng hanelah coungkacoe na ka ring e hmalah ahnimouh ni a kâpâpho awh han. <sup>6</sup> Taminaw e a hmalah yon lawkcengnae a tak hoi a khang nakunghai thoseh, Cathut hmalah lungthin muitha lahoi hring hanelah kadoutnaw ni kamthang kahawi a thai awh.

### *Ahnoungpoung e tue tami oangnaw*

<sup>7</sup> Hno cawngca pueng heh a pout tawmlei toung dawkvah kâhruetcueth awh. Ratounnae lahoi ring awh. <sup>8</sup> Lungpatawnae ni yonnae moikapap a ramuk thai dawkvah bangpueng hlakvah buet touh hoi buet touh rahak vah lungpatawnae caksak awh. <sup>9</sup> Phuenangnae tawn laipalah buet touh hoi buet touh im luen hane kâpasoung awh. <sup>10</sup> Nangmanaw ni na coe awh e poehno tawk thainae thaw lengkaleng na coe awh dawkvah, Cathut e hnopai ka kuem e patetlah buet touh hoi buet touh hote thaw tawk thainae lahoi lengkaleng kâ kabawm awh. <sup>11</sup> Cathut teh bang pueng dawk Jisuh Khrih lahoi a bawilenna a kamnue thai nahanelah, ka pâpho e ni Cathut ni dei e patetlah dei naseh. A thaw ka tawk e ni Cathut ni a poe e thaonae patetlah tawk naseh. Hote Bawipa teh bahu hoi bawilenna a yungyoe awm lawiseh. Amen.

### *Khrih e taminaw ni a khang hane kawi runae*

<sup>12</sup> Ka lungpataw e naw, nangmouh noumcai nahanelah nangmouh koe ka tho e runae hmai hoi tanouknae teh kângairu kawi patetlah kângairu awh hanh. <sup>13</sup> Nangmouh teh Khrih e reithainae na hmawngkhai awh dawkvah konawm awh. Khrih e bawilenna a kamnue toteh na lunghaw awh nahane doeh. <sup>14</sup> Jisuh Khrih min kecu dawk pathoenae na khang pawiteh yawhawinae ao. Bangkongtetpawiteh, Cathut e ka lentoe e Muitha teh nangmouh thungvah ao. Ahnimouh hane teh pathoenae, nangmouh hanelah teh pholenna lah ao. <sup>15</sup> Nangmouh thung dawkvah tami ka thet e, kaparawte, kahawihoehe hno ka sak e, ayânaw e kamcan dawk kambawang e, nangmouh dawk apihai awm sak awh hanh. <sup>16</sup> Kristen lah na o awh dawkvah na khang pawiteh, kayak awh hanh, hatei a min lahoi Cathut pholen naseh. <sup>17</sup> Cathut e imthungkhunaw hmaloe pasuek lawkcengnae tueng a pha toe. Hottelah maimouh koehoi hmaloe pasuek lawkceng hoehpawiteh, Cathut e kamthang kahawi ka thai ngaihoehnae e kamcan teh bangtelamaw abaw thai han vaw. <sup>18</sup> Tami kalan ni rungngang lah ao hane ru pawiteh cathutlaipa e naw hoi tamikayonnaw teh bangtelamaw ao awh han.

<sup>19</sup> Hatdawkvah, Cathut e ngainae patetlah a rucat ka kâhmo e taminaw teh hnokahawi a sak awh navah, mae hringnae hah lawkkam kakapoung na kasakkung koe poe naseh.



<sup>1</sup> Kacue lah kaawm niteh, Khrih e reithainae ka kampangkhai e lah kaawm e, kamnuek hane Bawipa e a bawilennae kahmawng hane kai, Piter ni nangmouh thung dawkw e kacuenaw hah na hroecoe awh.

<sup>2</sup> Nangmouh hoi rei na kaawm e Cathut e tuhu hah na khoum e hno dawkw, na khoum thai dawkw nahoe, kathounghoehe hnopai ngai dawkw hai nahoe, lungthonae hoiyah khenyawn awh. <sup>3</sup> Bawinaw ni kâtawnnae lahoi uk laipalah tuhu hmalah khetsin kamcu e tami lah awm awh.

<sup>4</sup> Hottelah na sak pawiteh, Tukhoum kalen a tho toteh nangmouh teh kamyai thai hoe e bawilennae bawilukhung na hmu awh han.

<sup>5</sup> Hot patetlah kanawnaw, kacuenaw e lawk hah ngai awh. Hothloilah buet touh hoi buet touh kârahnoum awh nateh lungdonae puengcang kâmahrawk awh. Bangkongtetpawiteh, kâoupkâpawi e taminaw teh Cathut ni a cakâ. Lungthin kârahnoum e taminaw teh yawhawinae a poe. <sup>6</sup> Hatdawkvah atueng a kuep toteh Cathut ni nangmouh teh na oup awh nahanelah thaonae kut rahim vah namahoima kârahnoum awh. <sup>7</sup> Nangmouh takuetluet na khet dawkvah, nangmae tâsuenae hnonaw pueng Bawipa koe poe awh.

### *Pâpoutnae*

<sup>8</sup> Kâhruetcueth hoi ip laipalah ring awh. Nangmae taran lah kaawm e kahraimathout teh ka huk e sendek patetlah apimaw ka padoun han telah yuengyoe a tawng. <sup>9</sup> Hatdawkvah, talaivan dawkw kaawm e hmaunawngghanaw hah hot patet e reithainae a khang awh telah pouk nateh yuemnae dawkvah kacakcalah awm awh nateh ahni hah ngang awh.

<sup>10</sup> Khrih Jisuh lahoi maimouh yungyoe bawilennae koe lah na ka kaw e, bangpueng dawkw ahawinae ka sak e, Cathut ni dawngdengca reithai ka khang tangcoung e nangmanaw hah na kuep sak awh vaiteh, thaonae hoi na kawi vaiteh pou na caksak awh han. <sup>11</sup> A thaonae teh a yungyoe ama koe awm lawiseh. Amen. <sup>12</sup> Kai ni nangmanaw teh tha poenae lahoi na coun awh teh nangmouh ni na kâuep awh e hnonaw hah Cathut e yawhawinae katang doeh telah panuek awh. Hete ca teh kaduemcalah ka thut teh, nangmouh koe yuemkamcu e hmaunawnggha Silvanas koehoi patuen na patawn awh. <sup>13</sup> Ka ca, Mark hoi Babilon khopui dawkw kaawm e nangmouh hoi cungtalah rawi lah kaawm e ni nangmouh kut na man awh. <sup>14</sup> Buet touh hoi buet touh lungkâpataw lahoi kâpaco awh. Khrih Jisuh thung e rounnae teh nangmouh abuemlah koe awm lawiseh. Amen.



## 2 PITER (The Second Epistle General of Peter)

### *Lawk karouknae*

<sup>1</sup> Kai Piter, Jisuh Khrih e guncei lah kaawm e ni maimae Cathut hoi rungngangkung Jisuh Khrih lannae lahoi kaimouh patetlah aphu kaawm yuemnae katawnnaw koe ca na patawn awh. <sup>2</sup> Cathut hoi maimae Bawipa Jisuh panuena, lungmanae hoi lungmawngnae teh nangmouh koevah pungdaw lawiseh.

### *Yuemnae dawk rounghae*

<sup>3</sup> Ama e bawilenna hoi ahawinae thungvah na ka kaw e Bawipa hah, maimouh ni panuena lahoi Bawipa dawk kaawm e bawilenna teh hringnae hoi cungalal Cathut lawk dawk khosaknae pueng teh maimouh koe na poe toe. <sup>4</sup> Hottelaho, ka lentoe niteh aphukaawm e lawkkamnaw hah maimouh koe na poe toe. Bangkongtetpawiteh, hote lawkkamnaw hno lahoi nangmanaw ni talaivan takngainae dawk hoi na hlout awh vaiteh, Cathut counghae kahmawng e tami lah na o awh nahane doeh. <sup>5</sup> Hettelah kecu dawkvah nangmae yuemnae dawkvah hawinae, hawinae dawkvah lungangnae, lungangnae dawkvah mahoima kâcakuelpnae, <sup>6</sup> mahoima kâcakuelpnae dawkvah lungsawnae, lungsawnae dawkvah Cathut lawk dawk khosaknae, <sup>7</sup> Cathut lawk dawk khosaknae dawkvah hmaunawnggha lungkâpatawnae, hmaunawnggha lungkâpatawnae dawkvah lungpatawnae hah thahmei lahoi patuen kâthap sin awh. <sup>8</sup> Bangkongtetpawiteh, hete talen heh nangmouh dawka ao vaiteh pungdaw pawiteh, Bawipa Jisuh Khrih panuena dawka aphu kaawm e tami, a paw kapaw e tami lah o awh han. <sup>9</sup> Hote talen ka tawn hoeh e taminaw teh, a mit ka dawn e lah ao. Yon thoungsak lah ao tangcounghae hah a pahnim awh.

<sup>10</sup> Hatdawkvah hmaunawngghanaw, nangmouh kawnae hoi rawinae hoe acak nahanelah, hoe panki awh. Bangkongtetpawiteh, hotellah na sak nah thungvah nâtuék hai lam na payon awh mahoe. <sup>11</sup> Hothloilah, maimae Bawipa hoi rungngangkung Jisuh Khrih e yungyoe uknaeram thungvah, kâen thainae kâ kakueplah na hmu awh han.

<sup>12</sup> Hatdawkvah, nangmanaw ni hete akongnaw hah na panue awh teh nangmouh koe kaawm e lawkkatang dawka kacaklah na o awh eiteh, hotnaw hoi kâkuen lah nangmanaw pou na hroecoe hanelah pouknae ka tawn. <sup>13</sup> Hete ka tak rim dawka o nah yunglam teh hotellah kâhroecoenae lahoi nangmanaw na kâhlaw sak hanelah ka pouk. <sup>14</sup> Bangkongtetpawiteh, maimae Bawipa Jisuh Khrih ni kai koe a pâpho e patetlah ka tak rim heh palang ka rading han toe tie ka panue. <sup>15</sup> Het talaivan hoi ka tâco hnukku hoi hai hete akongnaw pou na panue awh nahanelah ka panki han.

### *Ka kangning e profet lawk*

<sup>16</sup> Bangkongtetpawiteh, kaimouh teh maimae Bawipa Jisuh Khrih e bahu hoi a tho nahane nangmouh koe ka pâpho awh e hah dumpyenna lairuiapakong hoi ka pâpho awh hoeh. Kaimouh teh Bawipa amae lentoe-nae hah kamamouh roeroe ni ka hmu awh toe. <sup>17</sup> Bangkongtetpawiteh,



Pa Cathut koehoi e barinae hoi bawilennae teh Bawipa ni a pang e lah hmu navah, ka talue poung e bawilennae thung hoiyah, ahni teh kai ni ka lungpataw e ka Capa doeh, ahni dawk ka lung akuiep tie lawk hah Bawipa koe hoi a daw. <sup>18</sup> Kaimanaw teh kathoungpoung mon dawk Bawipa hoi rei ka o awh navah kalvan hoi ka tho e hote lawk teh ka thai awh.

<sup>19</sup> Hothloilah, maimouh koe hoe Kacake profet lawknaw hai ao. Nangmae lungthin thungvah khodai teh, amom tempalo a tâco ditouh hote lawk teh hmonae koe ka ang e hmaiim patetlah na pouk awh hanelah ao. <sup>20</sup> Cakathoung dawk kaawm e sutdeilawknaw pueng teh, tami buet touh ni amae a ngainae lahoi a pâpho e nahoeh tie hmaloe panue hanlah a o. <sup>21</sup> Bangkongtetpawiteh, nâtuek hai sutdeilawk teh tami ngainae lahoi ka tâcawt e nahoeh. Kathoung Muitha hroecoenae ka coe pueng niteh, Cathut koehoi ka tho e lawk kapâphokung lah doeh ao awh.

## 2

### *Kacangkhaikung kaphawknaw lawkcengnae*

<sup>1</sup> Hatei, profetkaphawknaw teh Judahnaw thung hoi a tâco e patetlah nangmouh thung hoi hai saya kaphawknaw a tâco van han. Ahnimouh ni kamkonae koe kaphatkhai e tawm payonnae arulahoï thokhai awh vaiteh, na karatangkung Bawipa patenghai pahnavt awh vaiteh, amamae lathueng karang poung lah rawknae a pha sak han. <sup>2</sup> Tami moikapap nihai, ahnimae hnopai lungradueknae hnukkâbang awh vaiteh, lawkkatang lamthung teh ahnimouh kecu dudam e lah kaawm han. <sup>3</sup> Ahnimouh ni hounlounnae, pasawtpanepnae lawk hoi nangmouh na yo awh han. Ahnimouh lawkcengnae teh ayan hoi hnawng hoe. Ahnimae kamkonae haiyah ngâm boihoe.

<sup>4</sup> Bangkongtetpawiteh, Cathut ni ka payon e kalvantami hah pasainae tawn hoe. Hell hmai adungpoungnae koe hmonae sumbawtarui hoi a katek teh lawkceng hanelah a hruek toe. <sup>5</sup> Ayan e talaivan hai pasai laipalah, lannae phung ka dei e Noah hoi tami sari touh e naw hah a hlout sak teh cathutlaipa e talai taminaw pueng teh tuikamuem hoi koug a raphoe. <sup>6</sup> Hothloilah Sawdom hoi Gomorrah khopui hah lawk a ceng teh hralah mueng a yawng sak teh, cathutlaipa e taminaw ni khetsin hanelah sut ao. <sup>7</sup> Hatnavah, kâcakuelpnae kaawm hoe e taminaw e hounlounnae lahoi khosaknae ni rektap lah kaawm e tamikalan Lot hah a rungngang. <sup>8</sup> Hote tamikalan teh, ahnimouh koe kho a sak navah, ahnimae kâlawklaipa hringnae hoi tawksaknae hnintangkuem a hmu teh a thainae ni a lannae lungthin hah puenghoi a rektap pouh. <sup>9</sup> Hatdawkvah, cathutlae taminaw hah tacueknae dawh hoi rasa hanelah thoseh, tamikalan hoe e naw lawkcengnae hnin dawk reknæ khang sak hanelah hruek hane hai thoseh a panue e lah ao. <sup>10</sup> Alawkpui lah ka khin e hounlounnae lahoi takngainæ hnukkâbang teh, kâtawnnae kadudamnaw hah hottelah a hruek han. <sup>11</sup> Ahnimouh hlah thao thasainæ hoi bahu kaawm e kalvantami ni patenghai yah, Cathut hmalah lawkcengnae sak awh hoe. <sup>12</sup> Hatei, ahnimanaw hah man vaiteh, be thei hane moithangnaw patetlah ao awh teh amamouh ni a thai panuek hoe e hah a dudam awh. Ahnimouh teh moithangnaw kahmakata e patetlah a kahmakata awh vaiteh, amamae lanhoeinae phu teh a khang awh han.

<sup>13</sup> Khodai patenghai yah canei hounloun e heh nawmnae lah a pouk awh teh, nangmouh hoi rei canei awh navah amamae dymyennæ dawh a nawm awh teh nangmouh hanlah min mathoenæ lah ao awh. <sup>14</sup> Ahnimæ



mit teh uicuk nginae hoi akawi dawkvah yon sak laipalah awm ngai awh hoeh. A lung kacakhoehe taminaw hah yonnae koe lah a tacuek awh teh, hounlounnae daw k a phunep awh tOUNg dawkvah, thoebo e canu capa lah ao awh. <sup>15</sup> Ahnimouh teh, lam kalan hah a pahnawt awh teh, lam a payon awh tOUNg dawkvah, lanhoehnae kutphu lungpataw e Beor capa Balaam e lamthung a dawn awh. <sup>16</sup> Hatei, Balaam teh amae a payonnae daw k yue e lah ao. Lawk ka dei thai hoeh e la ni tami lawk lahoi a dei teh hote profet e pathunae hah a ngang.

<sup>17</sup> Ahnimanaw teh tui kahak e tuikhu, kahlî ni a palek e tâmai patetlah doeh ao awh. Ahnimouh hanelah yungyoe hmonae a hruek pouh toe. <sup>18</sup> Bangkongtetpawiteh, ahnimouh ni lawk pacawt lahoi a kâoup awh teh, tami kahawihoehnaw thung hringnae koehoi nuengnueng kahlout e naw hah taknginae, hounlounnae hoi a dymyen awh. <sup>19</sup> Ahnimouh ni hote taminaw hah hloutnae na poe awh han atipouh awh nahlangva vah, amamouh rawknae san lah ao awh. Bangkongtetpawiteh, tami katâ e teh tami e bawi lah ao. <sup>20</sup> Maimae Bawipa hoi rungngangkung jisuh Khrih panuenae lahoi talaivan khinnae daw k hoi hlout awh hnukkhu, hote hnonaw daw k bout kâman awh pawiteh, ahmaloe e hlak a hnukkhu e hoe a mathoe. <sup>21</sup> Bangkongtetpawiteh, lannae lamthung panue nahlangva, maimouh koe na poe e kathounge kâpoelaw k hah hnamthun takhai hlak teh hote hah panuek laipalah awm pawiteh ahnimouh hanlah bet ahawihnawn. <sup>22</sup> Uî ni a palo bout a ca, tui pâhluk tangcoung e vok ni tangkan bout a kâkaaw k tie cingthuila w k hah hot patet e taminaw koe aku ep.

### 3

#### *Bawipa e hnin*

<sup>1</sup> Ka lungpataw e naw: nangmouh koe hete apâhni e ca hah bout na patawn awh. Kai ni hete ca kahni touh hoi nangmanaw na kâhruetcu et nahanelah nangmae kathounge lungthin hah ka pâhlaw teh a thahmei sak. <sup>2</sup> Hethateh, kathounge profetnaw ni a dei tangcoung e thoseh, gunceinaw koehoi patuen na pang awh e Bawi hoi rungngangkung lah kaawm e kâpoelawknaw thoseh, nangmanaw ni let bouk na pouk awh nahane doeh.

<sup>3</sup> Ahmaloe poung lah na panue awh hane teh, tami ka dudam e teh a hnukteng e hnin nah dudam nalaihoi tâcawt vaiteh, amae takngai e patetlah a cei awh vaiteh, <sup>4</sup> Jisuh tho nahane hnin hoi kâkuen e lawkkamnaw teh nâma w a o, mintoenaw a due hnin hoiyah a cawngca pheng kamtawng koe e patetlah nahoehmaw pou ao awh heh vaw telah a dei awh han. <sup>5</sup> Bangkongtetpawiteh, Cathut lawk lahoi kalvannaw teh ayan hoi ka la awm niteh, talai haiyah tui lahoi tui thung hoi a kamnue toe. <sup>6</sup> Hatnavah, talaivan teh tui ni muen a khu teh, tui lahoi a rawk tie teh khoeroe pahnim hanelah a ngai awh. <sup>7</sup> Atu kaawm e kalvannaw hoi talai teh hote lawk lahoi yah, hmaisawi hanelah sut hruek lah ao teh, cathutlaipa e taminaw e kamkonae hoi lawkcengnae hnin totouh la rouk e lah ao toe.

<sup>8</sup> Hatei, ka lungpataw e naw: Cathut hanelah teh hnin touh heh kum 1,000 touh e patetlah kum 1,000 touh e heh hnin touh e patetlah ao tie hah pahnim awh hanh. <sup>9</sup> A hnawng poung telah tami tangawn ni pouk e pateflah Cathut teh a lawkkam daw k hnawng hoeh. Apihai rawk laipalah,



tami pueng ni yon pankângai awh nahanlah a ngainae ao dawkvah, maimae lathueng a lungsawnae doeh.

<sup>10</sup> Hateiteh, Bawipa e hnin teh, tamru a tho e patetlah a tho han. Hote hnin toteh kalvannaw teh cairing lahoi a kahma awh han. Talai teh kâan lawi a tui lah dui a lawng han. Talai hoi talai van e hno sak puengpa hai a kak awh han. <sup>11</sup> Hete hnonaw pueng teh be raphoe lah ao han dawkvah, nangmanaw teh bangpatetlae tami lah maw na o kawi vaw. Nangmouh teh kathoung hringnae hoi cathutlae hringnae dawk khosak awh nateh, <sup>12</sup> Cathut e hnin hah ngaihawi laihoi, hote hnin phanae hah rang sak hanelah ao. Hot hnin a pha toteh kalvannaw teh ngeng kang vaiteh a kamko han. Talai hai kabet poung e kahû hoi atui lah a kamyawt han. <sup>13</sup> Hatei, maimouh teh Bawipa amae lawkkam patetlah lannae aonae koe kalvan katha hoi talai katha ngaihawi awh.

### *Pâpoutnae*

<sup>14</sup> Hatdawkvah, ka lungpataw e naw: nangmouh teh hotnaw hah na ngaihawi awh dawkvah, tounhoehe tami, ka khinhoehe tami patetlah Bawipa hmalah rounnae hmu awh nahan kâyawm awh sei. <sup>15</sup> Maimouh ni lungpataw e Pawl nihai, ahni koevah a poe e lungangnae hoi, nangmouh koe a thut e patetlah maimae Bawipa a lungsawnae hah rungngangnae coe awh nahane doeh telah pouk awh. <sup>16</sup> Ahni ni alouke canaw dawk hai hete akongnaw hoi kâkuen lah a dei. Hote canaw thung dawkvah, thai panuek han ka ru e youn touh ao. Panuenae kayoun niteh a lung kacakhoehe taminaw teh alouke Ca Kathoungnaw dawk a tawm awh e patetlah hote ca hai amamouh ngainae koe a sawn awh teh, amamouh rawknae koe a pha sak awh.

<sup>17</sup> Hatdawkvah ka lungpataw e naw: nangmouh ni hetnaw teh sut na panue awh toung dawkvah, kadumyennaw e lamthung dawk dawn laipalah, mamae lungcaknae hah pahma awh hoeh nahan mahoima kâkhenyawn awh sei. <sup>18</sup> Maimae Bawi hoi rungngangkung Jisuh Khrih lungmanae dawk hai thoseh, Bawipa panuenae dawk hai thoseh, rounng awh. Atu hoi a yungyoe e hnin totouh Bawipa koe bawilennae awm lawiseh. Amen.



# 1 JAWHAN

## (The First Epistle General of John)

### *Na kahring sak e Cathut Lawk*

<sup>1</sup> Apuengcue hoi kaawm e, kaimouh ni khei ka thai awh e, mit hoi khei ka hmu awh e, kut hoi khei katek awh e, hringnae lawk hah nangmouh koe ka pâpho awh. <sup>2</sup> Hote hringnae teh yo a kamnue toe. Kaimouh ni hai ka hmu awh toe. Pa hoi rei kaawm niteh maimouh koe ka kamnuek e, hote yungyoe hringnae hah, kaimouh ni nangmouh koe ka kampangkhai awh teh ka pâpho awh. <sup>3</sup> Kaimouh teh Pa hoi hai, Capa Jisuh Khrih hoi hai, huikonae ka tawn awh dawkvah, nangmouh ni kaimouh hoi huikonae na tawn awh nahanelah, ka thai awh e naw hah nangmouh koe ka pâpho awh. <sup>4</sup> Nange lunghawinae a kuep nahanelah, hete canaw hah ka thut awh.

### *Angnae dawk khoktakannae*

<sup>5</sup> Hote lawk hah ahni koehoi ka thai awh teh, nangmouh koe ka pâpho awh e teh, Cathut teh angnae lah ao. <sup>6</sup> Cathut dawk hmonae khoeroe awmhoeh. Maimouh ni Cathut hoi huikonae ka tawn toe ti awh lahun navah, hmonae dawk hring awh pawiteh, lawkkatang dawk hring awh hoeh. Laithoe doeh dei awh. <sup>7</sup> Cathut teh angnae dawk ao e patetlah maimouh ni angnae dawk hring awh pawiteh, buet touh hoi buet touh huiko lah o awh. Cathut Capa, Jisuh Khrih e thi ni, maimae yon kaawm e naw pueng hah a pâsu teh a thoungsak toe.

<sup>8</sup> Maimouh ni ka yon hoeh tet awh pawiteh, mahoima kâdum awh. Maimouh dawk lawkkatang awmhoeh. <sup>9</sup> Maimouh ni mamae yonpâpho awh pawiteh, Cathut teh maimae yonnae pueng hoi sakpayon e naw pueng, ngaithoum hane hoi lanhoehnae pueng thoungsak hanelah, a lawkkam a cak. <sup>10</sup> Maimouh ni yonnae ka sak hoeh tet awh pawiteh, ama hah laithoe sak awh. A lawk hai maimouh dawk awmhoeh.

## 2

<sup>1</sup> Ka pahren e canaw, yonnae na sak awh hoeh nahanelah, hete ca hah ka thut teh na patawn awh. Tami buetbuet touh ni yonnae sakpayon pawiteh, maimouh na kampangkhai hanelah kalan e Bawipa Jisuh Khrih teh Pa koe ao. <sup>2</sup> Hote Bawipa teh maimae yon dueng nahoe, talaivan pueng e yontha nahanelah, thueng e lah ao.

### *Khrih e kâlawknaw*

<sup>3</sup> Hote Bawipa teh maimouh ni bangtelah hoi maw panue awh tetpawiteh, kâpoelawknaw hah tarawi e lahoi panue awh. <sup>4</sup> Kâpoelawknaw hah tarawi laipalah, Bawipa ka panue toe kâ tet e tami teh, a lai kathoute lah doeh o awh. Ahni dawk lawkkatang awmhoeh. <sup>5</sup> Hote Bawipa lawk hah ka tarawi e teh, Cathut e a lungpatawnae hoi akawi katang. Maimouh ni hote Bawipa dawk o awh e hah het telah hoi panue awh. <sup>6</sup> Hote Bawipa dawk ka hring toe ka tet e tami teh, jisuh ni a sak e patetlah a dawn van han.

<sup>7</sup> Ka lungpataw e ka huinaw: nangmouh koe ka thut e kâpoelawk hateh, a katha e na hoeh. Ahmaloe hoi kaawm tangcoung e kâpoelawk hah doeh. Ahmaloe hoi kaawm tangcoung e kâpoelawk hateh na thai awh



tangcoung e lawk hah doeh. <sup>8</sup> Atuvah kâpoelawk katha hah nangmouh koevah ka thut. Hote kâpoelawk teh, Bawipa dawk nakunghai, nangmouh dawk nakunghai, hmu katang e lah ao. Bangkongtetpawiteh, hmonae teh a kahma teh angnae katang teh coungkacoelah a ang toe.

<sup>9</sup> Hmaunawnggha hah na hmuhma lahun nah, kai teh angnae dawk ka o ka tet e tami teh, atu sittouh hmonae thung doeh ao rah. <sup>10</sup> Hmaunawnggha lungpataw e tami teh angnae dawk kahring e lah ao. Kamthui teh rawp nahane ahni dawk awmhoeh. <sup>11</sup> Hmaunawnggha kahmawt ngai hoeh e tami teh, hmonae dawk kaawm niteh hmonae dawk doeh a hring rah. Hmonae ni a mit a dawn sak teh, na maw ka cei tie hai panuek hoeh.

### *Canaw, napanaw, thoundounnaw*

<sup>12</sup> Ka lungpataw e canaw: nangmouh teh hote Bawipa min lahoi yon thoungsak lah na o awh tOUNg dawkvah, hete ca ka thut teh na patawn awh. <sup>13</sup> Apanaw: nangmouh teh apuengcue hoi kaawm tangcoung e hah, na panue awh dawkvah, hete ca ka thut teh na patawn awh. Thoundounnaw: nangmouh teh, kahrai hah na tâ awh dawkvah hete ca ka thut teh na patawn awh. Camonaw: nangmouh teh Pa hah na panue awh dawkvah hete ca ka thut teh na patawn awh. <sup>14</sup> Napanaw: nangmouh ni apuengcue hoi kaawm tangcoung e hah, na panue awh dawkvah hete ca ka thut teh na patawn awh. Thoundounnaw: nangmouh na thasai awh teh, Cathut lawk na thung a hring teh, kahrai hah na tâ awh dawkvah, hete ca ka thut teh na patawn awh.

### *Talai hoi talai hno lungpataw hanh*

<sup>15</sup> Talaivan hoi talaivan dawk kaawm e hnonaw hah lungpataw awh hanh. Talai lungpataw e teh, Pa lungpatawnae tawn hoeh. <sup>16</sup> Talaivan dawk kaawm e hnonaw teh: takngainae, mitnoenae, talai hno dawk kâoupnae hah doeh. Hotnaw teh, Pa koehoi ka tho e nahoe. Talai lahoi ka tho e doeh. <sup>17</sup> Talaivan hoi talaivan hno noenae teh kahmat han. Cathut ngainae patetlah ka tarawi e tami teh a yungyoe a kangning.

### *A hnukteng e tueng*

<sup>18</sup> Ka lungpataw e canaw: atu e tueng teh, a hnukteng e atueng lah ao. Khrih e a taran khrihkaphaw a tâco e na thai awh e patetlah atu rawraw khrihkaphawknaw moi ao toe. Hatdawkvah, atu e tueng teh a hnukteng e atueng doeh toe tie panue thai. <sup>19</sup> Ahnimanaw teh, maimouh koehoi a tâco awh teh, a cei awh toe. Hatei, ahmaloe hoi maimouh hoi kâkuen awh hoeh. Maimouh hoi kâkuen awh pawiteh maimouh hoi doeh rei awh a tih. Maimouh hoi kâkuen awh hoeh tie hah a kamnue nahanelah, maimouh koehoi a tâco awh toe.

<sup>20</sup> Nangmouh teh, kathounge Cathut kut dawk hoi, satui awi lah na o awh. Hno cawngca pueng teh na panue awh. <sup>21</sup> Lawkkatang na panue awh hoeh dawk ca na patawn awh e na hoeh. Nangmouh ni na panue awh teh, laithoe e pueng teh lawkkatang hoi kâkuen hoeh tie na panue awh dawkvah ca na patawn awh e doeh ka tho. <sup>22</sup> Laithoe ka dei e teh apimaw. Jisuh teh Khrih nahoe ka tet e tami hah doeh. Pa hoi Capa ka taran e teh khrihkaphaw doeh.

### *Cathut dawk kamtue awh*

<sup>23</sup> Capa ka taran e tami teh, Pa panuek hoeh. Capa ka dâw e tami teh Pa hah a panue. <sup>24</sup> Hatdawkvah, ahmaloe hoi na thai awh e phung lawk hah nangmouh dawk hring sak awh. Hote phung lawk teh, nangmouh dawk hring pawiteh, nangmouh teh Capa hoi Pa dawk kahring e lah na o awh



han. <sup>25</sup> Maimouh koe, na poe e lawkkam teh, a yungyoe hringnae hah doeh.

<sup>26</sup> Nangmouh na ka dum e naw e a kong teh, hettelah kathut teh na patawn awh. <sup>27</sup> Cathut koehoi na coe awh e satui awi lungmanae teh nangmouh daw k a hring dawkvah nangmouh teh apinihai bout cangkhai ngai hoeh toe. Hote satui awi lungmanae teh laithoe e nahoe. A katang e na cangkhai dawkvah, na cangkhai e patetlah nangmouh ni Capa daw k hring awh.

### *Cathut e canaw*

<sup>28</sup> Ka lungpataw e canaw : Capa a kamnue toteh, maimouh hai ama koe pha awh toteh, taranhawi laihoi, kayanae ao hoeh nahanelah, Capa daw k pou hring awh. <sup>29</sup> Cathut teh a lan tie na panuek awh pawiteh, lannae ka sak e tami pueng hah Cathut ni a khe e doeh tie teh panue awh.

## 3

<sup>1</sup> Cathut e canaw telah kaw e lah o awh nahanelah, Cathut ni maimouh banghloimaw lungpataw awh, tie hah pouk a haw! Talai taminaw ni Cathut hah a panue awh hoeh dawkvah, maimouh hai na panuek awh hoeh. <sup>2</sup> Ka lungpataw e naw : atuvah maimouh teh Cathut e ca lah o awh. Ato hmalah teh bangtelamaw o awh han tie hah kamnuek hoeh rah. Hatei Bawipa Jisuh ama a kamnue toteh, ama hoi kâvan awh han. Bangkongtetpawiteh, Bawipa ama a coung e patetlah hmu awh han. <sup>3</sup> Hottelah, ka ngaihawi e tami teh Bawipa a thoung e patetlah amahoima a kamthoung.

<sup>4</sup> Yonnae ka sak e tami teh kâlawk a ek. Sak payonnae teh kâlawk eknae doeh. <sup>5</sup> Bawipa ni maimae yonnae pueng ceikhai hanelah a tho toe tie hah na panue awh. Bawipa daw k yonnae awm hoeh. <sup>6</sup> Bawipa daw k kahring e tami teh, yonnae pou sak hoeh. Yonnae pou ka sak e tami teh, Bawipa hah hmawt hoeh rah.

<sup>7</sup> Ka canaw: apihai kâdum sak awh hanh. Apihai lannae nuen ka tarawi e teh Bawipa a lan e patetlah a lan. <sup>8</sup> Kahraimathout teh ahmaloe hoi yonnae ka sak e lah ao dawkvah, apipatet hai yonnae ka sak e teh kahraimathout hoi a kâkuet. Cathut Capa a tho ngainae teh kahraimathout thaw taw k raphoe pouh hane doeh. <sup>9</sup> Cathut ni a khe e tami teh, yonnae pou sak hoeh. Bangkongtetpawiteh, ahni daw k Cathut e cati a o. Ahni teh, Cathut ni a khe e lah ao dawkvah, yonnae pou sak thai hoeh.

### *Buet touh hoi buet touh lungkâpataw awh*

<sup>10</sup> Hot patetlah e noutnae lahoi yah, Cathut e a canaw hoi kahraimathout e a canaw teh a kamnue awh. Lannae ka tarawi hoeh e, mae hmaunawngaha lungpataw hoeh e teh, Cathut hoi kâkuen hoeh.

<sup>11</sup> Nangmouh ni hmaloe hoi na thai a tangcoung e kamthang kahawi hateh, buet touh hoi buet touh lungkâpataw awh han tie hah doeh.

<sup>12</sup> Kahrai hoi kâkuen niteh a nawngaha ka thet e Kain patetlah awm hanh awh. Kain ni bangkongmaw a nawngaha a thei tetpawiteh, amae tawksak e teh lan hoeh, a nawngaha e tawksak e teh a lan daw k doeh.

<sup>13</sup> Hmaunawngaha naw: talaivan taminaw ni na ka hmawt ngaihoeh nakunghai, na kângairu awh hanh. <sup>14</sup> Maimouh teh hmaunawngaha reira lungkâpataw awh dawkvah, duenae koehoi hringnae koe lah, raka awh toe tie kâpanue awh. Ma e hmaunawngaha lungpataw hoeh e tami teh, duenae daw k doeh a hring rah. <sup>15</sup> Ma e hmaunawngaha lung ka pataw



hoeh e tami teh, tami ka thet e lah doeh ao. Tami ka thet e tami buet touh dawk boehai, a yungyoe hringnae awmhoeh tie hah nangmouh ni na panue awh.

### *Tawksnae lahoi lungpatawnae*

<sup>16</sup> Khrih ni maimouh hane kecu dawk, a hringnae a pasoung e khet navah, a lungpatawnae hah panue awh. Maimouh ni hai hmaunawnggha reira hanelah, hringnae pasoung hanlah ao. <sup>17</sup> Apipatethai talaivan hnopai a tawn nahlangva vah, a hmaunawnggha a roedeng e hah a hmu ei, paawt pawiteh, ahni dawk Cathut lungpatawnae bangtelamaw khuet ao han vaw. <sup>18</sup> Canaw: maimouh teh lawk hrawng hoi dueng laipalah, tawksaknae hoi lawkkatang lahoi lungpataw awh sei. <sup>19</sup> Hottelah lungpataw awh pawiteh, lawkkatang hoi kâkuet awh toe tie hah na panuek awh vaiteh, mamae lung ni yon na kapen nakunghai, Cathut hmalah lungtangnae ao sak han. <sup>20</sup> Cathut teh maimae lung hlak a len dawkvah, hnocawngca pueng a panue.

<sup>21</sup> Ka lungpataw e naw : mae lung ni yon na pen awh hoehpawiteh, Cathut hmalah taranhawinae teh tawn awh toe. <sup>22</sup> Maimouh ni kâpoelawknaw ngâi awh teh, a ngai e patetlah tarawi awh pawiteh, ratoum awh e pueng Cathut koehoi hmu awh han. <sup>23</sup> Cathut e kâpoelawk tie hateh Capa Jisuh Khrih min yuem han tie hoi ahni ni na dei pouh e patetlah buet touh hoi buet touh lungkâpataw awh han tie hah doeh. <sup>24</sup> Kâpoelawknaw ka tarawi e tami teh, Cathut thung ao teh, ahnimouh thung Cathut ao. Maimouh koe na poe e Kathoung Muitha lahoi, Cathut teh maimouh dawk ao tie panue awh.

## 4

### *Cathut Muitha hoi khrihkaphawk e muitha*

<sup>1</sup> Ka lungpataw e naw, muitha pueng hah yuem awh hanh. Cathut koehoi ka tho e maw, ka tho hoeh e maw tie tanouk awh. Bangkongtetpawiteh, moikapap e profetkaphawknaw teh het talaivan vah a kamthaw awh toe. <sup>2</sup> Cathut e Muitha hah bangtelah hoi maw panue awh han tetpawiteh, tami lahoi ka tho e Jisuh Khrih ka dâw e muitha hateh, Cathut koehoi ka tho e doeh. <sup>3</sup> Tami lahoi ka tho e Jisuh Khrih ka dâw hoeh e muitha hateh, Cathut koehoi ka tho e nahoe. Hot patet e muitha hateh, na thai awh tangcoung e patetlah, het talaivan tho awh vaiteh, atu patenghai ka tho lahun niteh coungkacoelah kaawm e khrihkaphawk e muitha doeh. <sup>4</sup> Ka canaw : Nangmouh teh, Cathut hoi kâkuen e lah na o awh. Hotnaw hai na tâ awh toe. Bangkongtetpawiteh, nangmouh koe lah kaawm e hateh, talaivan koe lah kaawm e hlak hoe a len. <sup>5</sup> Ahnimouh teh talaivan lae a tho awh dawkvah, talai e konglam hah ouk a dei awh. Talai taminaw nihai ahnimae lawk hah ouk a ngâi awh. <sup>6</sup> Maimouh teh, Cathut e lah doeh o awh. Cathut ka panuek e niteh, maimae lawk hah a ngâi awh. Cathut hoi kâkuen hoeh e niteh, maimae lawk hah ngâi awh hoeh. Hote hnonaw khet lahoi yah, lawkkatang muitha hoi muitha kaphawk tie hah panue awh.

### *Lungkâpatawnae lahoi Cathut panuena*

<sup>7</sup> Ka pahren e naw : buet touh hoi buet touh lungpataw awh sei. Bangkongtetpawiteh, lungpatawnae teh Cathut e doeh. Lungpatawnae ka tawn e tami teh Cathut ni a khe e lah ao teh, Cathut ka panuek e lahai ao. <sup>8</sup> Lungpatawnae ka tawn hoeh e tami teh, Cathut panuek



hoeh. Bangkongtetpawiteh, Cathut teh lungpatawnae lah ao. <sup>9</sup> Cathut ni maimouh lungpatawnae a kamnue sak e teh, Capa lahoi maimouh hring awh nahanelah, a tawn dueng e Capa het talaivan a patoun e dawkvah a kamnue sak. Hmu thai e hmaunawnggha patengghai lungpataw hoehpawiteh, hmu thai hoeh e Cathut na tawng teh, bangtelamaw a lungpataw thai han. <sup>10</sup> Maimouh ni Cathut lungpataw awh toe tie na hoeh. Cathut ni maimouh lung na pataw awh, maimae yon tha lah ao nahan Capa a patoun e dawkvah a lungpatawnae teh ao.

### *Lungpatawnae a bawilen*

<sup>11</sup> Ka pahren e naw: Cathut ni maimouh hettelah totouh lung na pataw pawiteh, maimouh hai buet touh hoi buet touh lungkapataw awh hanlah ao. <sup>12</sup> Cathut teh apinihai nâtuék hai hmawt boihoeh. Buet touh hoi buet touh lungpataw awh pawiteh, Cathut ni maimouh dawkw awh vaiteh, maimouh teh lungpatawnae hoi kawi awh han.

<sup>13</sup> Cathut ni a Muitha na poe awh e lahoi yah, maimouh teh Cathut dawkw o awh e hoi Cathut maimouh dawkw ao e hah panue awh. <sup>14</sup> Talaivan taminaw ka Rungngangkung lah a coung sak nahan, Pa ni Capa a patoun e hah maimouh ni hmu awh teh kampangkhai awh. <sup>15</sup> Jisuh teh Cathut Capa doeh tie ka kampangkhai e tami dawkw Cathut ao teh ahni hai Cathut dawkw ao. <sup>16</sup> Cathut ni maimouh lungpataw e hah panue teh yuem awh. Cathut teh lungpatawnae lah ao. Lungpatawnae dawkw ka hring e tami teh Cathut dawkw a hring. Cathut hai ahni dawkw a hring. <sup>17</sup> Maimouh teh lungpatawnae hoi kawi awh dawkvah, lawkcengnae hmalah taranhawi awh han. Bangkongtetpawiteh, maimouh teh het talaivan vah Bawipa ama patetlah doeh hring awh. <sup>18</sup> Lungpatawnae dawkvah takinae awh hoeh. Lungpatawnae niteh takinae pueng a takhoe. Bangkongtetpawiteh, takinae teh rek lah ao toe. Ka taket e tami teh lungpatawnae hoi kawi hoeh rah.

<sup>19</sup> Cathut ni hmaloe hoi lung na pataw awh dawkvah, maimouh nihai lungpataw awh.

### *Cathut e kâlawknaw tarawinae*

<sup>20</sup> Apipatethai Cathut ka lungpataw toe ati nahlangva, a hmaunawnggha hmuhma pawiteh a laithoe doeh a dei. Hmu thai e hmaunawnggha patengghai, lungpataw hoehpawiteh, mit ni hmu thai hoeh e Cathut na tawng teh bangtelamaw lungpataw thai han vaw. <sup>21</sup> Cathut lungpataw e tami niteh, a hmaunawnggha hai lungpataw van han tie kâlawk teh Khrih koehoi maimouh ni coe awh toe.

## 5

### *Hmaunawnggha lungpatawnae*

<sup>1</sup> Jisuh teh Khrih doeh tie kayueme tami pueng teh Cathut ni a khe e lah ao. Apipatethai Pa lungpataw e teh Capa hai a lungpataw van. <sup>2</sup> Maimouh ni Cathut hah lungpataw awh teh, a kâpoelawknaw hah tarawi awh pawiteh, Cathut e a canaw lungpataw awh tie panue awh. <sup>3</sup> Kâpoelawknaw tarawinae teh, Cathut lungpataw e lah ao. Amae kâpoelawknaw teh hnori phu saknae nahoe. <sup>4</sup> Cathut e ca lah kaawm e tami teh talai hah a tâ. Talaivan a tânae hateh, maimae yuemnae hah doeh. <sup>5</sup> Jisuh teh Cathut capa doeh tie ka yuem e tami ni dueng doeh talaivan a tâ.

### *Jisuh yuemkamcu*



<sup>6</sup> Hote Bawipa teh tui hoi thi hoi ka tho e Jisuh Khrih hah doeh. Tui hoi dueng nahoe, tui hoi thi hoi doeh a tho. Kapanuekkhaikung Muitha hateh lawkkatang Muitha doeh. <sup>7</sup> Kalvan vah kapanuekkhaikung kathum touh Pa, Lawk, hoi Kathoung Muitha ao. Hote kathum touh teh buet touh lah ao awh. <sup>8</sup> Talai van hai kapanuekkhaikung kathum touh Muitha, Tui, hoi Thi ao. Hote kathum touh teh a kânging awh. <sup>9</sup> Maimouh ni tami e panuekhainae hah yuem awh pawiteh Cathut e panuekhainae hateh hoe yuem hanelah ao. Hote panuekhainae teh Cathut ni a Capa na poe awh e kong hah doeh. <sup>10</sup> Cathut e Capa hah ka yuem e tami teh a thungvah hote kapanuekkhaikung hah a tawn. Cathut hah ka yuem hoe e tami teh Cathut hah laithoe, yon a pen. Bangtelamaw tetpawiteh Cathut ni amae Capa kong a kampangkhai e hah ahni ni yuem laipalah ao dawkvah. <sup>11</sup> Panuekhainae hateh Cathut ni maimouh hah yungyoe hringnae na poe awh. Hote hringnae hateh Capa dawk ao. <sup>12</sup> Capa ka tawn e tami teh hringnae a tawn toe. Capa ka yuem hoe e tami teh hringnae tawn hoe. <sup>13</sup> Cathut Capa e min ka yuem e pueng ni yungyoe hringnae na tawn awh toe tie namahoima na kâpanue awh nahanlah hete canaw hah ka thut teh na patawn awh.

#### *Hmakacawne ratoumnae*

<sup>14</sup> Maimouh ni Cathut ni a ngai e patetlah hno buetbuet touh het awh pawiteh, Cathut ni na thai pouh tie hah panue awh. <sup>15</sup> Hahoi, Cathut koe hei awh e pueng na thai pouh tie panuek awh pawiteh, a ma koe hei e pueng teh hmu awh toe tie hah panue awh.

<sup>16</sup> Hmaunawngna hah ni duenae koe ka phatkhai hoe e yonnae a sakpayon e hah, tami buetbuet touh ni hmawt pawiteh ratoum naseh. Duenae koe ka phatkhai hoe e yonnae ka sak e hmaunawngna hah Cathut ni hringnae a poe han. Duenae koe ka phatkhai e yonnae ao. Hot patet e yonnae hanlah ratoum na seh ka tie na hoe. <sup>17</sup> Lanhoehnae pueng hateh yonnae doeh. Hatei, duenae koe kaphatkhai hoe e yonnae ao.

#### *Pâpoutnae*

<sup>18</sup> Cathut e ca lah kaawm e pueng ni yonnae pou sak awh hoe. Cathut ni a khe e tami teh Cathut ma ni a okhai dawkvah, kahrai ni runae poe thai hoe. <sup>19</sup> Maimouh teh Cathut ca lah o awh tie hoi talaivan pueng teh kahrai kut dawk ao awh tie hah panue awh. <sup>20</sup> Cathut Capa a tho toe tie hoi, ama teh Cathut katang doeh ti panuethainae hai na poe awh tie panue awh. Cathut katang dawk hai thoseh, Capa Jisuh Khrih dawk hai thoseh, maimouh teh o awh. Ahni teh Cathut katang doeh. A yungyoe hringnae lahai ao.

<sup>21</sup> Ka canaw, meikaphawknaw hah roun awh.



## 2 Jawhan (The Second Epistle of John)

### *Lawk karouknae*

<sup>1</sup> Kacue e kai ni, a rawi e bawinu hoi a canaw hah ca na patawn. Lawkkatang dawk ka lungpataw teh, kai ni dueng laipalah lawkkatang ka panuek e naw pueng nihai lung na pataw awh. <sup>2</sup> Bangkongtetpawiteh, lawkkatang teh maimouh thung kaawm niteh maimouh koe pou ao han. <sup>3</sup> Pa Cathut koehoi, Pa e Capa Bawipa Jisuh Khrih koehoi, lungmanae, pahrennae hoi rounnae teh lawkkatang hoi lungpatawnae lahoi nangmouh koe awm lawiseh.

### *Lawkkatang hoi lungkâpatawnae*

<sup>4</sup> Maimae na pa koehoi kâpoelawk coe awh e patetlah na canaw tami tangawm ni lawkkatang dawk a hring awh tie ka hmu navah ka konawm poung. <sup>5</sup> Hatdawkvah bawinu, kâpoelawk katha hah ka thut hoe, ahmaloe hoi maimouh koe kaawm tangcoung e kâpoelawk, buet touh hoi buet touh lungkâpataw awh sei telah ka kâhei. <sup>6</sup> Lungkâpataw tie teh Bawipa e kâpoelawknaw tarawinae hah doeh. Hote kâpoelawknaw teh ahmaloe hoi na thai awh tangcoung e patetlah lungpatawnae daw k hringnae hah doeh. <sup>7</sup> Jisuh Khrih teh tami coungnae lahoi a tho yaw ma ka tet e tami het talaivan moi a tâco toe. Hot patet e taminaw teh dumpyenna e hoi kakawi e tami a tho dawkvah khrihkaphawk doeh. <sup>8</sup> Maimouh teh ma ni taw k e pahmat laipalah tawkp hu kakueplah hmu awh han. <sup>9</sup> Khrih e cangkhae nae daw k kaawm hoe h e tami teh Cathut panuek hoe h. Khrih e cangkhae nae daw k kaawm e tami teh Pa hoi Capa hah a panue. <sup>10</sup> Hete cangkhae nae tawn laipalah apipatet hai nangmouh koe tho pawiteh na im daw k luen sak a hanh, dawn awh hanh. <sup>11</sup> Bangkongtetpawiteh, hot patetlah e tami hah na dawn pawiteh, ahnie hawihoe hnae daw k na ka baw k e lah na o.

### *Lawkthuinae*

<sup>12</sup> Nangmouh koe dei hane kawi moi ka tawn rah ei, cahna daw k cahang hoi thut hane hlakvah, nangmouh koe ka pai vaiteh buet touh hoi buet touh lunghawinae a kuep nahanlah nangmouh koe ka tho teh, nangmouh hoi lawk kapan awh han tie doeh ka ngaihnawn teh ka ngaihaw i. <sup>13</sup> Rawilah kaawm e na nawng ha e a canaw ni kut na man awh.



### 3 JAWHAN (The Third Epistle of John)

#### *Lawk karouknae*

<sup>1</sup> Kacue e kai ni lungpataw e Gaius koe ca na patawn. Ahni teh kai ni lawkkatang dawk ka lungpataw e doeh.

<sup>2</sup> Ka lungpataw e ka hui, na lungthin ni hawinae a coe e patetlah bangpueng dawk hawinae na coe teh, tak ka dam lah na o thai nahan ka ratoum. <sup>3</sup> Lawkkatang dawk na hring teh nang dawk kaawm e lawkkatang hah hmaunawngghanaw ni a tho awh teh a kampangkhai awh navah, ka lung hroung ahawipoung. <sup>4</sup> Ka canaw ni lawkkatang dawk a hring awh tie ka thai nah, lunghawinae ka tawn e hlak lunghawinae alouke ka tawn hoeh.

#### *Gaius oupnae*

<sup>5</sup> Ka lungpataw e ka hui, nang teh hmaunawngghanaw koe hai, imyin koe hai, sakyoe kawi kaawm e pueng hah lung kacaklah na sak. <sup>6</sup> Ahnimouh ni nange lungpatawnae kong hah kawhmoun hmalah a kampangkhai awh. Ahnimanaw hah Cathut ngainae dawk bout na hrawi pawiteh hnokahawi hah na sak toe. <sup>7</sup> Bangkongtetpawiteh, Bawipa min kecu dawk Jentelnaw koehoi kabawpnae dâw laipalah a cei awh. <sup>8</sup> Maimouh teh lawkkatang kampangkhai e lah o awh nahan, hot patet e taminaw hah kabawp awh teh khetyawt hanlah a kamcu.

<sup>9</sup> Kawhmoun koe ca ka thut teh ka patawn toe. Hatei, kacue lah o ka ngai e Diotrefes niteh kaimouh hanelah tho paaw hoeh. <sup>10</sup> Hatdawkvah, ka tho torei teh ama ni a sak e ama ni a kâpanue thai nahanlah ka toun han. Ahni ni lairoe laihoi na pathoe awh dueng laipalah hmaunawngghanaw hai dawn hoeh, dawn hanelah ka ngai e taminaw hai a cakâ teh, kawhmoun thung hoi ouk a pâlei. <sup>11</sup> Ka lungpataw e ka hui, hno kahawihoeahnaw hah out hanh. Kahawinaw ma hah out. Kahawi e nuen hoi ka hring e tami teh Cathut e lah ao. Kahawihoeah e nuen hoi ka hring e tami teh Cathut panuek hoeh, hmawt hai hmawt hoeh. <sup>12</sup> Tami pueng teh Demetrias e kapanuekkhaikung kahawi ao awh. Lawkkatang haiyah ahni kapanuekkhaikung lah ao. Kaimouh haiyah ahni kapanuekkhaikung lah ka o awh van. Kaimouh ni ka panuekhai awh e teh atang doeh titeh nangmouh ni na panue awh.

#### *Lawkthuinae*

<sup>13</sup> Nangmouh koe thut hane moi ao rah ei, cacung hoi cahang hoi thut hanelah ka ngainae awm hoeh. <sup>14</sup> Palang kâhmo roi pawiteh buet touh hoi buet touh lawk kâpan han telah ngaihawi hoi ka o. <sup>15</sup> Nang koe roumnae awmseh. Huikonaw nihai kut na man awh. Nang koe kaawm e huikonaw e min pâpho nateh, ahnimaie kut man pouh lah a.



## JUDAH (The General Epistle of Jude)

### *Lawk karouknae*

<sup>1</sup> Jisuh Khrih e a san, Jem e a nawnggha kai Judah ni, Cathut ni a lungpataw teh Jisuh Khrih ni a kaw e taminaw ca na patawn awh.

<sup>2</sup> Lungmanae, lungmawngnae, hoi lungpatawnae teh nangmouh koe pung lawiseh.

### *Noenae*

<sup>3</sup> Ka lungpataw e ka huinaw, maimouh ni cungtalaw hmawng awh e rungngangnae kong hah ka thut teh nangmouh koe na patawn a hanelah thouk ka panki. Tami kathoungnaw koe apuengcue vah a poe tangcounge e yuemnae phung koe lah na kâyawm awh teh na tuk awh nahan, na hroecoe awh teh na uen awh. <sup>4</sup> Bangkongtetpawiteh, Cathut e a lungmanae hah, amae ngainae koe lah a pakhuppathan teh, maimae Bawipa Jisuh Khrih hah ka hnoun niteh, apuengcue hoi yonphukhangnae, noutnae a ta tangcounge e tami kaponaw arulaho duem a kâen awh.

### *Lawkkam kacakhoehe naw*

<sup>5</sup> Hatdawkvah, na panue awh tangcounge e ei, na kâhruetcuete awh nahanelah bout ka dei ngai e teh, a yungyoe ka hring e Cathut ni Isarelnaw hah Izip ram hoi a tâcokhai nah ka yuem hoeh e naw hah bout a raphoe.

<sup>6</sup> Hothoilah, amamae hmuene dawkwawm laipalah, amamae hmuene cettakhai awh e kalvantaminaw hah lawkcengnae hnin kalenpoung dawkwawm laipalah hanelah hmonae thungvah a yungyoe kateknae lahoi a paung.

<sup>7</sup> Hot patetvanlah, Sodom hoi Komorah kho koehoi kamtawng teh, a tengpam e khonaw pueng ni, ahmaloe dei tangcounge e tami kaponaw patetlah kamsoumhoeh yonnae hah a sak awh teh, mae yu hoeh e naw hoi a yon awh teh, a hring awh dawkvah, a yungyoe e hmai hoi reknae a khang awh teh khetsin hanelah sut a kamnue.

<sup>8</sup> Hot boiboe lah, hot patet e taminaw niteh, amamae a takthai a khin sak awh teh, kâtaawnnae a oun awh. Bawilenna hoi kaawm e taminaw hah a pathoe awh. <sup>9</sup> Hatei, kalvantaminaw ukkung bawi Mikel niteh, Mosi e tak hah kahraimathout hoi a kâlapp roi navah, tha hoi oun laipalah, Cathut ni mah na yue lawiseh telah doeh atipouh. <sup>10</sup> Hote taminaw teh, amamouh ni a panue awh hoeh e hah a pathoe awh. Saringnaw patetlah amamouh ni a panue awh e hoi amahoima a kâparo awh. <sup>11</sup> Ahnimouh teh yawthoe lah ao awh. Bangkongtetpawiteh, Kain hnuk a kâbang awh. Aphu hmu hane ngai lahoi yah, Balaam a yon e patetlah a yon awh. Korah e a yon e lahoi rawknae koe a pha awh.

### *Lawkkam kacakhoehe naw rawknae*

<sup>12</sup> Lungpatawnae paw koe rei kacatnaw hah barinae tawn laipalah, a kâsokâroum awh teh min mathoenae hoi ao awh. Kahlî ni a palek e tui laipalah e tâmai patetlah ao awh. Kawt ka kamyai niteh, a paw paw laipalah, vai hni touh kadout niteh, phawkwawm e thingkung patetlah ao awh. <sup>13</sup> Kayanae ka phuen sak e tuicapa patetlah Âsi kamlang e patetlah ao awh. Hote Âsi kamlang e naw hanelah a yungyoe hmonae teh sut ta e lah ao.



<sup>14</sup> Adam e a catoun, a se sarinae, Enok ni Cathut teh touklek thai hoeh e a tami kathoungnaw hoi a tho a han ti teh profet lawk lahoi a dei. <sup>15</sup> A tho toteh cathutlaipa e taminaw ni cathutlaipa lah amamae hnosak e patetlah, cathutlaipa e taminaw ni Cathut banglahai a noutna awh hoeh e lawk kahram a dei awh e patetlah tami pueng lawk a ceng han. <sup>16</sup> Ahnimanaw teh, cairing laihoi ayâ yon ka pen e tami, mae takngai e patetlah ka hring awh e tami, kâoupnae lawk ka dei e tami, ma hane hawinae dawк dueng ayânaw ka oup e tami lah ao awh.

<sup>17</sup> Ka lungpataw e naw, a hnukteng e atueng dawкvah, mae cathutlaipa radueknae dawк ka hring awh niteh, <sup>18</sup> ka pacekpahlek e taminaw teh a tho awh han titeh, maimae Bawipa Jisuh Khrih e gunceinaw ni sut a dei awh e lawk hah pâkuem awh. <sup>19</sup> Ahnimouh teh nangmouh na kapek hane tami, takngainae dawк dueng ka hring a niteh, kathounge muitha tawn awh hoeh. <sup>20</sup> Ka lungpataw e ka huinaw, ka thoung poung e yuemnae dawкvah, namahoima rounг awh nateh, Kathoung Muitha lahoi ratoum awh.

### *Muitha lahoi ratoum awh*

<sup>21</sup> Cathut lungpatawnae dawк awm awh nateh, a yungyoe hringnae koe na hrawi han ti hoi Bawipa Jisuh Khrih e a lungmanae hah ngaihawi awh.

<sup>22</sup> Lunghringnae hoi kaawmnaw hah pahren awh. <sup>23</sup> Takthai ngainae lahoi kakhine khohna hah panuet awh. Tami tangawn hah hmai thung hoi rasat awh nateh rungngang awh, takinae hoi pahren awh.

<sup>24</sup> Rawpnae dawк hoi a hlout awh teh nangmouh na khenyawn thai e, yonnae awm laipalah, lunghawinae hoi kakawi e nangmouh hah bawilennaе hmalah na ka thak thai e, <sup>25</sup> Maimouh na ka Rungngangkung, Bawi buet touh dueng e Cathut ni, maimae Bawipa Jisuh Khrih lahoi bawilennaе, taluenaе, uknae, hoi bahu teh atu hoi a yungyoe ditouh awm yungyoe lawiseh ! Amen.



## PAPHOLAWK (The Revelation to Saint John)

### *Lawk karouknae*

<sup>1</sup> Hethateh, Jisuh Khrih e papholawk lah ao. Het teh nâsittouh ao hoehnahlan kaawm hane hnonaw hah, a sannaw koe pâtue hanlah Khrih dawk Cathut ni poe e hno lah ao. Khrih ni kalvantami hah a patoun teh a san kai Jawhan koe a kamnue sak. <sup>2</sup> Jawhan nihai Cathut lawk hoi Jisuh Khrih e lawkpanuesaknae pueng hah a hmu e patetlah a kampangkhai.

<sup>3</sup> Atueng a hnai toung dawkvah, hete sutdeilawk ka touk e, ka thai e, hoi a thung thut e lawknaw katarawinaw teh a yawhawi awh.

<sup>4</sup> Kai Jawhan ni Asia ram kaawm e kawhmounnaw sari touh koe ka thut. Kaawm lahun e, kaawm tangcoung e hoi ka tho han rae Bawipa koehoi a bawitungkhung hmalah kaawm e muitha sari touh koehoi,

<sup>5</sup> Yuemkamcu kapanuekhaikung, duenae koehoi camin lah kaawm e, talai siangpahrangnaw ka ukkung Jisuh Khrih koehoi e lungmanae hoi roumnae teh nangmouh koe awm yungyoe seh. Maimouh lungpataw niteh amae thi hoi maimae yonnae pueng na pâsu pouh. <sup>6</sup> Pa Cathut hmalah maimanaw hah uknae ram, vaihma lah na hrueng kung koe bawilennaehoi hnotithainae teh a yungyoe awm lawiseh. Amen.

<sup>7</sup> Khenhaw! Bawipa teh tâmai dawk hoi bout a kum han. Hatdawkvah Bawipa kacawknaw ni amamae mit hoi ama teh a hmu awh han. Talai van kaawm e miphun pueng ni Bawipa kecu dawka lungtabue ratum awh vaiteh a khui awh han. Bokheiyah. Amen.

### *Khrih a kâpâphoneae*

<sup>8</sup> Kaawm lahun e, kaawm tangcoung e hoi bout kaawm hane Athaka-saipounge ni, kai teh Alpha hoi Omega, a kamtawngnae hoi a poutnae lah ka o ati. <sup>9</sup> Jisuh Khrih dawk reithai rucatnae thoseh, a uknaeram hai thoseh, lungsawnae thoseh, nangmouh hoi cungtalai rei coe e lah kaawm e, nangmae hmau kai Jawhan ni Cathut e a lawk hoi Jisuh Khrih hoi kâkuen e lawkpanuesaknae kecu dawkvah Patmos tuilum koe ka pha.

<sup>10</sup> Bawipa e hnin navah, kai teh Muitha dawka o lahunnah, mongka lawk patetlah kacaipounge lawk hah hnukkhu lahoi ka thai. <sup>11</sup> Hote lawk ni, na hmu e hno hah cauk dawka thut nateh Efisa kho, Smirna kho, Pergamos kho, Thiatira kho, Sardis kho, Philadelphia kho hoi Laodicea kho kaawm e kawhmounnaw sari touh koe patawn haw, telah a dei.

<sup>12</sup> Hatnavah, kai koe lawk kadeikung hmu hanelah ka kamlang teh ka khet. <sup>13</sup> Hottelah ka khet nah sui hmaiimkhok sari touh hoi hote hmaiim pâhung e naw lungui vah a khokcampha totouh ka phat e hni a kho teh, a lû, a lungtabue dawka sui taisawm kâyeng e tami Capa hoi kâvan e tami buet touh ka hmu. <sup>14</sup> Ahnie a lû hoi a sam teh tumuen ka pangaw e patetlah hoi tadamtui patetlah a pangaw teh, ahnie a mit teh hmaipalai patetlah ao. <sup>15</sup> Ahnie a khok teh hmai hoi sôlêi tangcoung e rahum hoi a kâvan teh, ahnie a lawk teh tuipei lawk hoi a kâvan. <sup>16</sup> Ahnie aranglae kut dawka Âsi sari touh a patuep teh ahnie a kâko dawka hoi a hâ voivang kahran e tahloi a tâco. Ahnie a minhmai teh bahu hoi ka ang e kanî patetlah ao.

<sup>17</sup> Ahni hah ka hmu navah, a khok koe ka rawp teh, tami kadout patetlah ka o. Hahoi ahni ni kai dawkvah, aranglae kut a toung teh taket hanh, kai



teh ahmaloe poun e hoi a hnukteng poun e lah ka o. <sup>18</sup> Kahring e lah ka o. Kai teh yo ka due toe. Hatei khenhaw! kai teh a yungyoe kahring e lah ka o. Duenae hoi duenae kho cabinaw hai kai ni ka kuet.

<sup>19</sup> Hatdawkvah nang ni na hmu tangcoung e naw thoseh, atu na hmu e naw hai thoseh, nāsittouh ao hoehnahlan kaawm hane ka tâcawt han toung e naw hai thoseh thun haw. <sup>20</sup> Aranglae ka kut dawkw na hmu e Âsi sari touh hoi sui hmaiim sari touh e hrolawkw ni a dei ngainae teh Âsi sari touh e teh kawhmounnaw sari touh e kalvantami doeh. Sui hmaiimkhok sari touh e teh kawhmounnaw sari touh e doeh.

## 2

### *Efisa kho e kawhmoun hanelah kamthang*

<sup>1</sup> Efisa kho e kawhmoun e kalvantami koe hettelah thut haw. Aranglae kut dawkw Âsi sari touh a sin teh, sui hmaiimkhok sari touh e lungui kâhlai e ni hettelah a dei. <sup>2</sup> Na thaw tawkw e naw, na kâyawm e naw, hoi na khang e naw hah ka panue. Nang teh tami kahawihoehnaw hah na dâw thai hoeh e hoi amamouh hoi amamouh guncei telah a kêdei eiteh guncei lah kaawm hoeh e taminaw hah na tanouk awh teh ahnimouh teh tami kadumyennaw lah na hmu awh e hai ka panue. <sup>3</sup> Nang teh panguep nalaihoi ka Mîn kecu dawkw, patang na khang teh thayounnae na tawn awh hoeh.

<sup>4</sup> Hatei, kai ni nang yon pen hane ao. Bangkongtetpawiteh, nang ni ahmaloe e lungpatawnae hah na pahnawt toe. <sup>5</sup> Hatdawkvah, nang teh nâ e hmuen koehoi maw na bo tie bout pouk nateh, pankângai haw. Hmaloe e thawnaaw hah tawkw haw. Hottelah pankângainae na tawn hoehpawiteh, nang koe kai ka tho vaiteh, nange hmaiimkhok hah hmuen koehoi ka puen han. <sup>6</sup> Hatei, buet touh teh nang dawkw ao, ka hmuhma e Nikolas hnukkâbangnaw e tawksaknae hah nang nihai na hmuhma van tie dei hane kawî lah ao.

<sup>7</sup> Muitha ni kawhmounnaw koe a dei e lawknaw hah hnâ ka tawn pueng ni thai naseh. Ka tâ e tami teh Cathut e paradis takha thung kaawm e hringnae thingpaw hah ca thainae kâ ka poe han.

### *Smirna kho e kawhmoun hanlah kamthang*

<sup>8</sup> Smirna kho e kawhmoun e kalvantami koe hettelah thut haw. Hmaloe poun hoi hnukteng poun lah kaawm e, a due eiteh bout kahring e ni hettelah a dei. <sup>9</sup> Nange rucatnae hoi reithainae teh ka panue. Hatei, nang teh na bawî. Namamouh hoi namamouh hah Judah tami na kâti awh eiteh, Judah tami nahoe, Setan e tami lah kaawm e naw ni na dudam awh e hai ka panue. <sup>10</sup> Nang ni na khang hane rucatnae hah taket hanh. Khenhaw! Nang ni tanouknae hah na khang awh hanelah kahraimathout ni nangmouh thung dawkw hoi tangawn teh thongim dawkvah a pabo awh han toe. Nangmanaw teh hnin hra touh thung reithai rucat na khang awh han. Due totouh yuemkamcu lah aww awh. Telah na sak pawiteh, hringnae bawilukhung teh na poe han.

<sup>11</sup> Muitha ni kawhmounnaw koe a dei e lawkw hah thainae hnâ ka tawn ni thai seh, ka tâ e tami teh apâhni duenae ni rektap mahoe.

### *Pergamos kho e kawhmoun hanelah kamthang*

<sup>12</sup> Pergamos kho e kawhmoun e kalvantami koe hettelah thun haw. A hâ avoivang kahran e tahloi ka tawn e ni hettelah a dei. <sup>13</sup> Nang teh na e hmuen dawkw maw na o tie ka panue. Hote hmuen dawkw Setan e bawitungkhung ao. Kai dawkw yuemkamcu lah kaawm e, kai



na kapanuekkhaikung, Antipas teh Setan onae hmuen lah kaawm e nangmouh koevah a thei awh nah patenghai yah kaie min hah na kueta awh teh, yuemmae na tâkhawng awh hoehe.

<sup>14</sup> Hatei, nang koe yon pen hane youn touh ao. Bangkongtetpawiteh, nang koevah Balaam e cangkhaiae ka tarawi e ao. Isarelnaw ni meikaphaw bawknae koe a thueng e hnonaw hah a ca awh nahan hoi kamsoumhoehe napui tongpa yonnae ahnimouh hmalah payon sak e hnonaw hah pâtoum pouh hanelah Balaam ni Balak siangpahrang koe a cangkhai. <sup>15</sup> Hot patet lavah nangmouh dawkvah Nikolas hnukkâbangnaw e cangkhaiae ka tarawi e tami moi ao awh. <sup>16</sup> Hatdawkvah pankângai awh haw. Hoehpawiteh kai teh nangmouh koe karanglah ka tho vaiteh, ka kâko e tahloi hoi ahnimanaw teh ka tuk han.

<sup>17</sup> Muitha ni kawhmounnaw koe a dei pouh e lawk hnâ ka tawn e pueng ni thai naseh. Ka tâ e tami teh hro e Mana ka poe han. Talung pangaw hai ka poe han, hote talung van e min ka kâthut e kacoekung hloilah apinihai panue hoehe e min katha teh a thut.

### *Thiatira kho e kawhmoun hanelah kamthang*

<sup>18</sup> Thiatira kho e kawhmoun e kalvantami koe hettelah thun haw. Hmaipalai patetlah e mit hoi laklakkaang e rahum hoi kâvan e khok ka tawn e Cathut e Capa ni hettelah a dei. <sup>19</sup> Nange na tawk e naw puenghoi nange lungpatawnae, yuemmae, thawtawknae, hoi lungsawnae hai kai ni ka panue. Nange hnuk lae thaw na tawk e naw teh hmaloe e thaw na tawk e hlak hoe ahawi e hah ka panue.

<sup>20</sup> Hatei, nang teh kai ni yon pen hane ao. Bangdawk tetpawiteh nang teh amahoima profet napui ka kâtet e Jezebel hah sak ngai e pueng sak thainae kâ na poe dawkvah ahni teh kaie ka hnukkâbangnaw koe kamsoumhoehe napui tongpa yonnae hoi meikaphaw bawknae sathai moinaw ca hanelah na cangkhai teh ahnimanaw na dумыen awh. <sup>21</sup> Kai ni ahni koe pankângai hane tueng ka poe eiteh ahni ni kamsoumhoehe napui tongpa yonnae daw k pankângainae lungthin tawn hoehe. <sup>22</sup> Khenhaw! kai ni ahni teh a ikhun daw k pak ka tha han. Ahni hoi uicuknae daw k pankângai awh hoehpawiteh, takikathopounge runae ka pha sak han. <sup>23</sup> Ahnie a canaw koehai duenae hoi kai ni lawk ka ceng han. Hahoi kai teh pouknae lungthin hoi ngainae kakhenkung lah ka o tie kawhmounnaw pueng ni a panue awh han. Nangmanaw pueng hai namamouh ni na sak e patetlah tawkpouh na poe awh han. <sup>24</sup> Hatei, hote napui e cangkhaiae na dawn awh hoehe. Setan e hro e hno telah ka panuek hoehe e Thiatira kho kaawm e pueng koe, kai ni ka dei e teh nangmouh lathueng vah alouke hno karinaw hah na thueng pouh mahoehe. <sup>25</sup> Nangmouh dawkvah kaawm e hno hah kai ka tho totouh kacakcalah kuen awh. <sup>26</sup> Ka tâ e tami hoi kaie ka thaw hah a pout totouh ka taw k e tami teh miphunnaw pueng uknae kâ ka poe han. <sup>27</sup> Ahni teh talai hlaamnaw reppasei lah hem e patetlah sum sonron hoi ahnimouh teh a uk han. Hethateh, kama roeroe ni a Pa koehoi ka coe e uknae hoi a kâvan. <sup>28</sup> Ahni teh amom tempalo hai ka poe han.

<sup>29</sup> Muitha ni kawhmounnaw koe a dei e lawk hah hnâ ka tawn pueng ni thai naseh.



<sup>1</sup> Sardis kho e kawhmoun e kalvantami koe hettelah thut haw. Cathut Muitha sari touh hoi Asi sari touh ka tawn e tami ni hettelah a dei. Nange na tawksaknae ka panue. Nang teh kahring e patetlah na kâsak ei na kadout e lah na o e hah ka panue. <sup>2</sup> Kâhruetcuethoi ring haw. Due han lah coungkacoe kaawmnaw hah khenyawn haw. Bangkongtetpawiteh, nange na tawknah teh kaie Cathut hmalah a kuep telah ka hmawt hoeh. <sup>3</sup> Hatdawkvah, nang teh bangtelamaw na thai tie hah pouk nateh tarawi haw. Pankângai haw, kâhruetcuethoi laihoi na ring hoehpawiteh, tamru patetlah ka tho vaiteh, nâtueth maw ka tho han tie khoeroe na panuek mahoe.

<sup>4</sup> Hateiteh, Sardis kho daw patenghai amamae khohna kakhin sak hoeh e youn touh ao. Ahnimouh teh kamcu e lah ao awh dawkvah hni pangaw kâkhu awh vaiteh kai hoi cungtalah ka ceio awh han. <sup>5</sup> Katâ e tami teh hot patetvanlah hni pangaw a khohna han. Kai nihai ahnie min teh hringnae cauk dawkhoi khoeroe ka raphoe mahoe. Kai teh ahnimae min hah a Pa hmalah hoi Bawipa e kalvantami hmalah ka kampangkhah han. <sup>6</sup> Muitha ni kawhmounnaw koe a dei pouh e lawknaw hah hnâ ka tawn e tami pueng niteh thai naseh.

### *Philadelphia kho e kawhmoun hanelah kamthang*

<sup>7</sup> Philadelphia kho e kawhmoun e kalvantami koe hettelah thun haw. Kathoung e, kalan e, Devit e cabi ka kuen e, apinihai khan thai hoeh hanlah ka paawng e, apinihai paawng thai hoeh hanlah ka khan e niyah hettelah a dei. <sup>8</sup> Nange na tawh na sak e pueng teh kai ni ka panue. Khenhaw! apinihai khan thai hoeh e takhang hah kai ni na hmalah ka paawng toe. Bangkongtetpawiteh, nang teh na tha a youn nakunghai kaie ka lawk na tarawi awh, ka min haiyah na pahnawt awh hoeh. <sup>9</sup> Khenhaw! mahoima niteh Judah tami lah ka o a kâti ei, Judah tami lah kaawm hoeh e, Setan e sinakok lah kaawm e laithoe ka dei e taminaw hah nange khok rahim ka tabo sak vaiteh, kai ni nangmouh lungpatawnae hah ahnimouh ka panue sak han. <sup>10</sup> Nang ni lungsawnae hoi kaie kâpoelawh na tarawi dawkvah, talaivan kaawm e taminaw hah tanouk nahanelah, talai van pueng dawh ka tho hane tanouktacaknae tueng nah kai ni nangmanaw teh na hlout sak awh han.

<sup>11</sup> Kai teh karanglah ka tho han. Nange bawilukhung apinihai na lawp hoeh nahanlah nama koe kaawm e hno hah kacakah kuen haw. <sup>12</sup> Ka tâ e tami teh Cathut bawkim e khom lah ka o sak han. Ahni teh nâtueth kai a alawilah bout tahrue mahoe toe. Ahnie van vah Cathut e min hai thoseh, Cathut koehoi ka tho e Jerusalem khopui katha e min hoi kaie min katha hai thoseh ka thut pouh awh han. <sup>13</sup> Muitha ni kawhmounnaw bangtelamaw a dei tie hah hnâ ka tawn e tami pueng ni thai naseh.

### *Laodicea kho e kawhmoun hanelah kamthang*

<sup>14</sup> Laodicea kho e kawhmoun e kalvantami koe hettelah thun haw. Amen lah kaawm e, yuemkamcu hoi katang e kapanuekkhaikung, Cathut e sak e naw thung dawh ahmaloe poung lah kaawm e ni hettelah a dei. <sup>15</sup> Nange na tawh sak e naw ka panue. Nang teh na bet hoeh, na pâding hoeh. Ka pâding ngala hoehpawiteh kabet ngala e buetbuet touh ka ngai. <sup>16</sup> Hottelah pâding hai na pâding hoeh, na bet hai na bet hoeh. Upap lah na o dawkvah ka kâko hoi kai ni meimei na patha toe. <sup>17</sup> Nang ni kai teh ka tawna dawkvah banghai ka panki e awh hoeh toe na ti. Hatei nang teh lungpout hanelah kaawm e, pahren han kawh lah kaawm e, ka mathoe e, mit ka dawn e hoi caici lah kaawm e lah na o e hah nama ni



na ka panuek hoeh toe. <sup>18</sup> Nang ni hnopai na tawnta nahanlah hmai hoi sôlei tangcoun e sui, caici lah na o e kaya ramuk nahanelah khohna ka pangaw e hni, na mit bout a ang thai nahanelah na mit daw k a wi hane mittasinaw hah kai koe ran hanelah kai ni pouknae na poe.

<sup>19</sup> Ka lungpataw e taminaw pueng e yon teh ouk ka pâphue teh, ahnimanaw hah ouk ka yue. Hatdawkvah pankângai haw. <sup>20</sup> Khenhaw! kai teh takhang hmalah kangdue teh ka takhawng. Apihai thoseh kaie lawk ka thai niteh takhang ka paawng e tami koe ka kâen vaiteh ahni hoi cungtalah bu kavenkhai han. Ahni haiyah kai hoi cungtalah a ven van han. <sup>21</sup> Kai teh ka tâ hnukkhu a Pa hoi cungtalah, a Pa e bawitungkhung daw k a tahung e patetlah ka tâ e tami teh kaie bawitungkhung daw k kai hoi rei tahungnae kâ ka poe han. <sup>22</sup> Muitha ni kawhmounnaw koe a dei e naw hah, hnâ ka tawn e tami ni thai na seh telah ati.

## 4

### *Kalvan e tungkhung*

<sup>1</sup> Hathnukkhu ka khet navah, kalvan vah takhang buet touh kamawng e ao. Ahmaloe poung ka thai e lawk teh hete hmuen koe luen haw, hmalah ka tho hane kawi na patue han telah mongka lawk patetlah e lawk lah ka thai. <sup>2</sup> Kai teh vai touh lahoi Muitha daw k ka o teh, khenhaw! kalvan vah bawitungkhung buet touh ao. Hote bawitungkhung dawkvah ka tahung e bawi buet touh ao. <sup>3</sup> Ahnie mei teh jasper talung hoi karmelian talung patetlah a ang. Bawitungkhung tengpam kâkalup lah emerald talung patetlah salumpa a paham. <sup>4</sup> Hote bawitungkhung a tengpam vah, alouke tungkhung 24 touh ao. Hote bawitungkhung van kacuenaw 24 touh ka pangaw poung e hni a kâkhu awh teh, a lû daw k suilukhungnaw kâ muk hoi a tahung awh. <sup>5</sup> Bawitungkhung thung hoi sumpapalik, keitat, khoparit. Tungkhung e hmalah Cathut Muitha sari touh lah kaawm e hmaiim sari touh teh a ang awh.

<sup>6</sup> Bawitungkhung hmalah vah kristal talung hoi kâvan e hlalang patetlah talî ao. Tungkhung thung, a tengpam vah a tak pueng daw k mit hoi kakawi e moithang pali touh ao. <sup>7</sup> Apasueke moithang teh Sendek hoi a kâvan. Apâhni e moithang teh maito ca hoi a kâvan. Apâthum e moithang teh tami minhmai hoi a kâvan, apali e moithang teh kamleng e mataw hoi a kâvan. <sup>8</sup> Hote moithang pali touh teh rathei taruk touh rip a tawn awh. A tak buem mit hoi akawi awh. Ahnimanaw ni karum khodai kâhat laipalah kaawm tangcoun, kaawm lahun, kaawm hane Bawipa Cathut, Athakasaipounge teh a thoung, a thoung, a thoung telah a târue awh.

<sup>9</sup> Bawitungkhung van ka tahung niteh padungpathang kahring e Cathut telah moithangnaw ni bawilennae hoi barinae hoi lunghawinae hoi a pholen awh. <sup>10</sup> Kacue e 24 touh ni bawitungkhung daw k ka tahung e hmalah a tabo laihoi a yungyoe padungpathang kahring e Cathut a baw k awh teh, <sup>11</sup> oe a yungyoe kahring e Cathut hnocawngca pueng na sak toe. Hote hnônaw teh na ngainae laihoi doeh na sak. Hatdawkvah Cathut teh bari hoi bawilennae hoi bahu hoi na kamcu doeh ati awh teh tungkhung hmalah amamae bawilukhungnaw teh a hruek awh.

## 5

### *Ca kalawng hoi Tuca*



<sup>1</sup> Hathnukkhu, bawitungkhung dawk ka tahung e ni aranglah e kut dawk, cakalawng a sin e ka hmu. Hote cakalawng teh athung avan lahai ca thut lah ao, tacik hoi vai sari touh kin e lah ao. <sup>2</sup> Hattoteh a thakaawmpounge kalvantami buet touh ni, hote cakalawng paawng vaiteh taciknaw buet touh hnukkhu buet touh rathap hanlah apimouh ka kamcu aw telah kacaipounglah a dei e hah ka hmu. <sup>3</sup> Hatei, kalvan hai thoseh, talai van hai thoseh, talai rahim hai thoseh hote cakalawng rathap vaiteh, khet hanelah kamcu e apihai pâphawng hoeh dawkvah, kai teh thâhoi ka ka. <sup>4</sup> Hat toreî teh kacuenaw thung dawk e buet touh ni kap hanh. Judah catoun dawk hoi ka tâcawt e sendek, Devit khawngyang lah kaawm e ni, <sup>5</sup> cakalawng hoi tacik sari touh e hah a paawng thai han telah na dei pouh.

<sup>6</sup> Hathnukkhu tuca buet touh, bawitungkhung lungui a kangdue teh moithang pali touh hoi kacuenaw ni a ven awh e ka hmu. Tuca teh kadout e patetlah ao. Ki sari, mit sari touh a tawn teh hote mit sari touh e teh Cathut e Kathoung Muitha sari touh talai van a patoun e hah doeh. <sup>7</sup> Tuca ni a tho teh bawitungkhung dawk ka tahung e aranglah e kut dawk a sin e cakalawng teh a la.

### *Kamcu e tuca*

<sup>8</sup> Hote cakalawng a la toteh, moithang pali touh hoi kacuenaw 24 touh ni, tami kathoungnaw e ratoumnae lah kaawm e hmuitui hoi ka kawi e sui tongben hoi ratoung hai rip a sin awh teh tuca hmalah a tabo awh. <sup>9</sup> Bawipa nang teh cakalawng na la vaiteh tacik hoi kin e naw hah paawng hanlah kamcu e Bawi lah na o. Bangkongtetpawiteh, nang teh thei e lah na o teh nama e thi hoi miphun cawngca hoi lawk cawngca ka dei e pueng, khoram cawngca e tami pueng teh, Cathut hanelah na ratang toe. <sup>10</sup> Ahnimanaw hah maimae Cathut hanelah uknaeram buet touh hoi vaihmanaw lah na coung sak teh ahnimouh ni talai van a uk awh han. <sup>11</sup> Hathnukkhu ka khet navah, bawitungkhung, moithang pali touh hoi kacuenaw e tengpam hoi touklek thai hoeh e kalvantami e lawk ka thai. <sup>12</sup> Ahnimouh ni kacaipounglah la a sak awh. A thei awh e tuca teh bahu, tawntanae, lungangnae, thaonae, barinae, bawinae, hoi yawhawinae teh coe hanelah a kamcu ati awh. <sup>13</sup> Hathnukkhu, kalvan hoi, talai van e kaawm hoi talai rahim hoi tali thung kaawm e hoi ka hring e naw pueng ni bawitungkhung dawk ka tahung e tuca teh barinae, bawilenna hoi bahu teh a tak dawk yungyoe hoi yungyoe ditouh awm lawiseh titeh la sak e a pawlawk ka thai. <sup>14</sup> Hattoteh moithang pali touh ni Amen ati awh. Kacuenaw nihai a tabo awh teh a bawk awh.

## 6

### *Apasuek e tacik*

<sup>1</sup> Tuca ni tacik sari touh thung dawk e buet touh a paawng navah, moithang pali touh thung dawk e buet touh ni, khoparit lawk patetlah e lawk hoi, tho nateh khenhaw ati e ka thai. <sup>2</sup> Ka khet bo teh, marang ka pangaw e buet touh ka hmu. Hote marang kâcuie ni licung buet touh a patuep. Ahni koe bawilukhung a poe teh tânae lahoi tâ hanelah a cei.

### *Apâhni e tacik*

<sup>3</sup> Apâhni e tacik a paawng navah, moithang apâhni e ni, tho nateh khenhaw tie ka thai. <sup>4</sup> Hatnavah, marang paling buet touh a tâco. Hote marang paling kâcuie ni, talai taminaw buet touh hoi buet touh



kâtheikârawng nahanelah, roumnae talai dawk hoi bankhai thainae kâ a tawn. Ahni koe tahloi pui hai a poe.

### *Apâthum e tacik*

<sup>5</sup> Apâthum e tacik a paawng navah, apâthum e moithang ni tho nateh khenhaw tie ka thai. Hatnavah ka khet bo teh marang ka tamang e buet touh ao. Marang kâcuie ni yawcu a patuep. <sup>6</sup> Moithang pali touh e a rahak hoi a dei e lawk teh, phoisa paling buet touh hoi satun hoi satui, misurtui pout sak hanh awh telah tie ka thai.

### *Apali e tacik*

<sup>7</sup> Apali e tacik a paawng navah, apali e moithang ni tho nateh khenhaw ati e ka thai. <sup>8</sup> Hatnavah, ka khet teh marang pâdamrep e buet touh ao. Hote marang kâcuie teh duenae telah a kâphung. A hnukkhu lah phuen ni a kâbang. Ahni ni talai pung pali touh dawk pung touh a uk. Kâ theinae, takang thonae, patawpanat duenae, sarang hoi thei thainae kâ a poe.

### *Apanga e tacik*

<sup>9</sup> Apanga e tacik a paawng navah, Cathut e a lawk kecu dawk hai thoseh, lawkpanuesaknae dawk hai thoseh, a thei awh e muithanaw, thuengnae khoungroe rahim vah ka hmu. <sup>10</sup> Ahnimanaw ni kathoung kalan lah kaukkung Bawipa, talai van kaawm e taminaw hah kaimae thi phu moi pathung laipalah nâtotouh maw na o han telah kacaipounglah a hram awh. <sup>11</sup> Hat toteh, ahnimanaw hah hni pangaw rip a poe. Ahnimanaw patetlah thei hanelah kaawm e, thaw ka tawh hui hmaunawngghanaw ni kuepnae koe a pha hoehnahlan, dongdeng kâhat awh ei telah atipouh.

### *Ataruk e tacik*

<sup>12</sup> Ataruk e tacik a paawng navah, Tâlî puenghoi a no. Kanî teh muenhni patetlah thapa teh thi patetlah ao. <sup>13</sup> Kahlî katang poung e ni, thaibunglung paw a sarut sak e patetlah kalvan e Âsinaw talai van vah a bo awh. <sup>14</sup> Kalvan teh cahna kalawng e patetlah a kahma, monnaw, tuilumnae pueng teh a onae hmuen koehoi koung a kâtahruet awh. <sup>15</sup> Talai siangpahrangnaw, ukkungnaw, ransabawinaw, ka tangrengnaw, thakaawme taminaw hoi sannaw, kahloutnaw pueng ni lungngoum, mon e talungkhunaw dawh kâhro awh teh talungnaw hoi monnaw a kaw awh. <sup>16</sup> Kaimae van tim awh nateh, na ratet awh haw loe bawitungkhung dawh ka tahung e hmalah hoi tuca lungkhueknae dawh hoi kaimanaw hah na ngue a haw loe. <sup>17</sup> Bangkongtetpawiteh, a lungkhueknae hninpui a tho toe. Apipatet ni maw a khang thai han telah a dei awh.

## 7

### *Isarelnaw thung hoi tacikkin e naw*

<sup>1</sup> Hathnukkhu kalvantami pali touh ni talai takin pali touh koe a kangdue awh teh, talai koehai thoseh, thingkung pueng koehai thoseh, tuiptui koehai thoseh, kahlî a tho hoeh nahanlah talai takin pali touh koe e kahlîlaw a kuet awh e hah ka hmu. <sup>2</sup> Hahoi, alouke kalvantami buet touh teh kahring Cathut e tacik patuep laihoi kanîtho laihoi a luen takhang e hah ka hmu. Hote kalvantami niteh talai hoi tuiptui dawh runae tho sak thainae kâ a tawn teh, kalvantami pali touh koe, <sup>3</sup> maimae Cathut e sannaw e tampa dawh tacik be kin hoehroukrak talai, tuiptui, hoi thingnaw koe runae phat sak hanh ei telah kacaipounglah a hram. <sup>4</sup> Hathnukkhu,



tacikkin lah kaawm e tami nâyittouh maw tie lawk ka thai. Isarel miphun dawk e miphun 12 touh dawk e tami 144,000 touh teh tacikkin lah ao. <sup>5</sup> Judah catoun dawk hoi 12,000, Gad catoun dawk hoi 12,000, Reuben catoun dawk hoi 12,000, <sup>6</sup> Asher catoun dawk hoi 12,000, Naphtali catoun dawk hoi 12,000, Manasseh catoun dawk hoi 12,000, <sup>7</sup> Simeon catoun dawk hoi 12,000, Levi catoun dawk hoi 12,000, Issakhar catoun dawk hoi 12,000, <sup>8</sup> Zebulun catoun dawk hoi 12,000, Joseph catoun dawk hoi 12,000, Benjamin catoun dawk hoi 12,000 naw teh tacikkin lah ao awh.

### *Runae kalenpoung thung hoi ka tâcawt e tamihu pui*

<sup>9</sup> Hathnukkhu ka khet navah, lawk alouklouk ka dei e miphun cawngca koehoi apinihai a touk thai hoe e tamihu pui teh, hni pangaw a kâkhu awh teh samtue e a kang a patuep teh bawitungkhung e hmalah hoi tuca e hmalah a kangdue awh. <sup>10</sup> Ahnimouh ni rungngangnae teh bawitungkhung dawk ka tahung e maimae Cathut hoi tuca koe ao telah kacaipounglah a târue awh.

<sup>11</sup> Bawitungkhung hoi, a kum kacuenaw hoi moithang pali touh e teng kâkalup lah kangdout e kalvantami pueng ni tungkhung hmalah a tabo awh teh Cathut hah a baw awh. <sup>12</sup> Amen. Maimae Cathut teh a yungyoe hoi a yungyoe totouh yawhawinae, bawilenna, lungangnae hoi lunghawilawkdeinae, barinae, bahu, thaonae teh awm lawiseh, Amen telah a dei awh.

<sup>13</sup> Hathnukkhu kacuenaw thung dawk e buet touh ni hni pangaw kâkhu e naw pueng teh apinaw maw Na hoi maw a tho awh telah kai hah na pacei. <sup>14</sup> Kai ni Bawipa nang ni na panue bout ka ti pouh navah, ahni ni hetnaw teh runae kalenpoung thung hoi ka hlout niteh, ka tâcawt e naw doeh. Ahnimouh teh amamae kâkhu e hni hah tuca thi dawk a pâsu awh teh a pangaw sak awh. <sup>15</sup> Hatdawkvah, ahnimouh teh Cathut e tungkhung hmalah vah ao awh teh, Bawipa bawkim dawk karum khodai Bawipa a pholen awh. Bawitungkhung dawk ka tahung e Cathut teh ahnimouh hoi a yungyoe a okhai han. <sup>16</sup> Ahnimanaw teh vonhnam tui kahran bout awm mahoe toe. Ahnimaie van khumbei hoi bang patet e kabet nihai dâw mahoe toe. <sup>17</sup> Bangkongtetpawiteh, bawitungkhung lungui kaawm e tuca ni ahnimouh khoum vaiteh, hringnae tui a lawngnae koe a ceikhai han. Cathut ni ahnimaie mitphi pueng teh a hui pouh han telah a ti.

## 8

### *Asari e tacik*

<sup>1</sup> Asari e tacik a paawng navah, kalvan kho vah suimilam atangawn hane cing ati awh. <sup>2</sup> Cathut hmalah kangdout e kalvantami sari touh koe mongka sari touh a poe e ka hmu.

<sup>3</sup> Kalvantami buet touh a tho teh sui tongben ka patuem niteh thuengnae khoungroe teng a kangdue. Bawitungkhung hmalah kaawm e sui khoungroe van tami kathoungnaw e ratoumnae hoi rei hnawng hanlah hmuituinaw hmaisawi hane a poe. <sup>4</sup> Hmuitui sawi e hmaikhu teh tami kathoungnaw e ratoumnae hoi cungtalah kalvantami e kut dawk hoi Cathut hmalah a luen. <sup>5</sup> Kalvantami ni thuengnae tawngben dawk hoi hmai a sin teh talai van a rabawk navah keitat, khoparit, sumpapalik teh Tâli a no.

<sup>6</sup> Kalvantami sari touh ni mongka sari touh ueng hanlah a kârakueng awh.



*Apasuek e mongka*

<sup>7</sup> Apasuek e kalvantami ni mongka a ueng navah, thi hoi kê kalawt e roun hoi hmai talai van a rabawk teh talai pung thum touh dawk pung touh, thingkung pung thum touh dawk pung touh, ka hring e phovai pueng a kak.

*Apâhni e mongka*

<sup>8</sup> Apâhni e kalvantami ni mongka a ueng navah, hmai ka kang e monpui patetlah kaawm e teh tuipui thung tâkhawng lah ao. Hattoteh tuipui pung thum pung touh thi lah ao. <sup>9</sup> Tuipui thung kahring e moithang pung thum pung touh a due. Lawng pung thum pung touh a kamko.

*Apâthum e mongka*

<sup>10</sup> Apâthum e kalvantami ni mongka a ueng navah, hmaito patetlah ka ang e Âsi pui buet touh kalvan hoi a bo teh, palang pui pung thum touh dawk pung touh, hoi tuiphueknaw dawkvah a bo. <sup>11</sup> Hote Âsi e min teh khanae telah a kaw awh. Palang pui pung thum touh dawk pung touh, a kha dawkvah tami moi a due.

*Apali e mongka*

<sup>12</sup> Apali e kalvantami ni mongka a ueng navah, kanî pung thum touh dawk pung touh, thapa pung thum touh dawk pung touh, Âsi pung thum pung touh sao ni a payawp dawkvah pung thum pung touh kho lah a hmo. Khodai pung thum touh dawk pung touh, karum pung thum pung touh angnae awmhoeh.

<sup>13</sup> Hathnukkhu ka khet navah, kamleng e mataw buet touh ni, kalvantami katham touh ni a ueng hane kaawm rae, mongka lawk kecu dawk talai van kaawm e taminaw teh yawthoe yawthoe yawthoe lah ao awh telah kacaipounglah a dei e ka thai.

## 9

*Apanga e mongka*

<sup>1</sup> Apanga e kalvantami ni mongka a ueng navah, kalvan hoi Âsi buet touh talai van a bo e ka hmu. Ahni koe kadung poung e tangkom paawngnae cabi a poe. <sup>2</sup> Ahni ni ka dungpoung e tangkom a paawng navah, kalenpounge hmaikhu patetlah tangkom thung hoi hmaikhu a tâco. Hote hmaikhu kecu dawk kanî hoi kalvan teh kho lah a hmo. <sup>3</sup> Hote hmaikhu thung hoi samtongnaw teh talai van lah a tâco awh. Ahnimouh koe aikam e sue patetlah e sue hah a poe. <sup>4</sup> Talai kaawm e thingkungnaw hoi bangpatet e phokungnaw hai raphoe laipalah, a tampa dawk Cathut e tacikkin lah kaawm hoeh e naw pueng teh rektap nahanelah kê a poe. <sup>5</sup> Hothloilah, ahnimanaw teh taminaw thei sak hanlah pasoung hoeh. Thapa yung panga touh thung rektap sak nahanelah kêtawwnae a poe. Hote rektapnae teh aikamsue patetlah a pataw han a ti. <sup>6</sup> Hote hnin toteh tami pueng ni duenae a tawng awh han. Hatei hmawt awh mahoe. Due hane ngai nakunghai duenae ni a yawng takhai han.

<sup>7</sup> Hote samtongnaw teh taran tuk nahan rakueng e marangtannaw hoi a kâvan. Ahnimae a lû dawk suilukhungnaw kâ muk e patetlah ao. Ahnimae minhmai teh tami e minhmai hoi a kâvan. <sup>8</sup> Ahnimae a sam teh napui sam hoi a kâvan. A hâ hai sendek e hâ patetlah ao. <sup>9</sup> Lungtabue ramuknae saiphei teh sum hoi sak e saiphei hoi a kâvan. A rathei takhawng e



pawlawk teh taran tuknae koe hno e marang moikapap poun e yawng pawlawk patetlah doeh ao. <sup>10</sup> Ahnimouh teh aikam patetlah pâkhing kaawm e a mai hah a tawn awh. Hote a mai hoi taminaw thapa yung panga touh thung rektap thainae kâ a tawn awh. <sup>11</sup> Ahnimae siangpahrang teh ka pout thai hoe e kadung poun e tangkom e kalvantami lah ao. Ahnie min teh Hebru lawk lahoi Abadon telah a kaw awh teh Grik lawk lahoi Apollyon telah a kaw awh. <sup>12</sup> Apasueke yawthoenae a loun toe. Yawthoenae kahni touh a tho han rah.

### *Ataruk e mongka*

<sup>13</sup> Ataruk e kalvantami ni mongka a ueng navah, Cathut hmalah kaawm e sui khoungroe e ki pali touh daw k hoi ka tâcawt e lawk ka thai. <sup>14</sup> Hote mongka ka ueng e ataruk e kalvantami koevah, Euphrates palang pui koe katek e, kalvantami pali touh tha leih telah a dei e ka thai. <sup>15</sup> Hatnavah hote kum, hote thapa, hote hnin, hote suimilam hanelah hmoun tangcoun e kalvantami pali touh teh, tami pung thum pung touh thei hanlah tha e lah ao. <sup>16</sup> Marangransanaw teh ting thong hni touh a pha tie ka thai.

<sup>17</sup> Vision daw k kai ni ka hmu e marangnaw hoi marang kâcuie naw teh hettelah ao. Marang kâcuie naw teh hmaito, mupamat e hoi gan patetlah ka samen e rong patetlah kaawm e saiphei ao. Marangnaw e lû teh sendek e lû hoi a kâvan. A kâko daw k hoi hmaito, hmaikhu hoi gan a tâco. <sup>18</sup> Ahnimae kâko hoi ka tâcawt e hmaito, hmaikhu hoi gan tie runae kecu daw k talai tami pung thum pung touh a due awh. <sup>19</sup> Marangnaw e a thaonae teh ahnimae kâko hoi a mai daw k a o, A mai teh tahrûn hoi a kâvan, lû a tawn. A mai ni taminaw runae a poe.

<sup>20</sup> Hote runae daw k hoi dout laipalah kaawm e taminaw teh kahraituili-naw, sui hoi sak e, rahum hoi sak e, talung hoi sak e, thing hoi sak e, ka hmawt thai hoe e, ka thai thai hoe e, ka cet thai hoe e, meikaphawknaw baw k laipalah o nahan, pankângai awh hoe. <sup>21</sup> Amamouh ni a taw k awh e tami theinae, sueânnae, kamsoumhoeh napui tongpa yonnae, hoi parunae daw k hoi hai pankângai laipalah ao awh.

## 10

### *Kalvantami buet touh hoi ca kalawng*

<sup>1</sup> Hathnukkhu a thakaawmpoun e kalvantami buet touh teh, tâmai a kâkhu teh, kalvan hoi a kum e hah ka hmu. Ahnie a lû daw k salumpa a paham. A minhmai teh kanî patetlah ao. A khok teh hmaisaaan khom patetlah ao. <sup>2</sup> A kut daw k kadai tangcoun e cakalawngca buet touh ao. Aranglae a khok hah tuipui daw k a coun groe teh avoilah e khok hah talai daw k a coun groe. <sup>3</sup> Sendek ka huk e patetlah kacaipounglah a hram. Hottelah a hram navah khoparit lawk vai sari touh a cai. <sup>4</sup> Khoparit lawk vai sari touh a cai hnukkhu vah thut hanelah ka kâcai navah kalvan hoi ka tho e lawk ni khoparit lawk sari touh e hah kin loe, hot hah thun hanh tie lawk ka thai.

<sup>5</sup> Hatnavah tuipui hoi talai daw k kangdout e kalvantami ni aranglae a kut hah kalvan lah a dâw teh, <sup>6</sup> a yungyoe kahring niteh kalvan hoi kalvan e hno pueng, talai hoi talai kaawm e hno pueng, tuipui hoi tuipui daw k kaawm e hno pueng ka sak e Bawipa hah a kaw teh atueng saw mahoe h toe. <sup>7</sup> Asari e kalvantami ni a ueng hane mongka a cai na hnin vah Cathut ni a hro e hno teh amae a san profetnaw koe a dei pouh e patetlah aku ep han toe telah a ti.



<sup>8</sup> Hathnukkhu ka thai e kalvan lahoi e lawk ni, tuipei hoi talai dawk kangdout e kalvantami kut dawk kaawm niteh kadaí tangcounge e cakalawngca hah cet nateh lat loe telah na ti pouh.

<sup>9</sup> Hatdawkvah hote kalvantami koe ka cei teh cakalawngca hah ka hei navah, ahni ni cakalawngca hah lat nateh cat haw. Na von dawk akha vaiteh na kâko dawk khoitui patetlah a radip han na ti pouh. <sup>10</sup> Hatnavah kalvantami kut dawk e cakalawngca hah ka la teh, ka ca bo teh ka pahni dawk khoitui patetlah a radip ei ka von thung a kha. <sup>11</sup> Hat toteh, kalvantami ni nang ni miphunnaw moikapap, ram moikapap, lawk moikapap siangpahrangnaw hoi kâkuen e profet lawk bout na dei han telah na ti pouh.

## 11

### *Kapanuekkhaikung kahni touh*

<sup>1</sup> Hahoi sonron hoi kâvan e lungpungkung buet touh bangnue nahanlah kai hah na poe. Thaw nateh Cathut e bawkim hoi thuengnae khoungroenaw hah bangnue nateh hote hmuen koe ka bawk e naw hah touk haw.

<sup>2</sup> Hateiteh, bawkim e alawilah kaawm e thongma teh Jentelnaw poe e lah o toe. Hote teh bangnue han lawih. Ahnimouh ni kathoungé khopui hah thapa 42 touh thung a coungroe awh han. <sup>3</sup> Hattoteh kai ni kama e kapanuekkhaikung kahni touh hah, kâ ka poe vaiteh, ahnimouh roi ni buri angki khohna laihoi hnin 1260 touh thung profet lawk a dei roi han a ti. <sup>4</sup> Ahnimouh roi teh talai Bawi e hmalah kaawm e Olivekung kahni touh hoi hmaiim kahni touh lah ao roi. <sup>5</sup> Tami buetbuet touh ni ahnimouh roi runae poe han ngai pawiteh ahnimouh roi e kâko hoi hmai a tâco vaiteh ahnimae tarannaw hah hmai hoi a kak sak han. Tami buetbuet touh ni ahnimouh roi rucat poe han ngai pawiteh, hote tami teh hot boiboe lah thei e lah ao han. <sup>6</sup> Ahnimouh sutdeilawk a deinae hnin pueng daw khorak hoeh nahanelah kalvan tabuem thainae kâ a poe teh, tui hah thi lah kâthungsak thainae, a ngainae tueng daw k a ngai patetlah talai pui heh runae aphunphun hoi rektap thainae kâ a tawn roi.

<sup>7</sup> Ahnimouh roi ni lawkpanuesaknae a pâbaw hnukkhu kadung pounge e hmuen koehoi ka luen e sarang ni ahnimouh roi hah tuk vaiteh a tâ hnukkhu a thei han. <sup>8</sup> Ahnimouh roi e ro teh muitha koelah hoi deinae lah Sodom hoi Izip khopui telah a dei awh e khopui lamthung dawkvah a ta awh han. Ahnimouh roi e Bawipa haiyah hote khopui daw kthingpalam sawi pathout lah ao. <sup>9</sup> Hatnavah lawk a cawngca ka pan e miphun puenghoi ram pueng ni hote ahnimouh roi e ro hah hnin thum tangawn totouh khen awh vaiteh tangkom thung pakawp laipalah a ta awh han. <sup>10</sup> Talai kho ka sak e taminaw ni ahnimouh roi e ro a hmu awh navah a konawm awh vaiteh, buet touh hoi buet touh poehnonaw a kâpoe awh han. Bangkongtetpawiteh, hote profet kahni touh ni talai kho ka sak e naw hah a rektap e lah ao.

<sup>11</sup> Hatei hnin thum tangawn a pounge toteh Cathut koehoi hringnae Muitha ahnimouh roi e thung a kâen. Ahnimouh roi teh amamouh roi e khok hoi a kangdue roi. Ahnimouh roi ka hmawt e tami pueng ni thouk a taki awh. <sup>12</sup> Hatnavah kalvan hoi lawk kacaipoung ni, hie hmuen koe luen roi leih telah a dei pouh e lawk a thai roi navah ahnimouh roi teh tâmai hoi kalvan lah a luen roi. Ahnimouh roi e tarannaw nihai a khet awh.



<sup>13</sup> Hote atueng dawkvah puenghoi tâli a no teh khopui pung hra pung touh a tip. Hote tâli dawk hoi tami 7,000 touh a due awh. Kahlout e taminaw ni a taki awh teh, kalvan kho e Cathut bawilennae hah a pholen awh. <sup>14</sup> Apâhni e yawthoenae teh aloum toe. Apâthum e yawthoenae teh karanglah bout a tho han.

### *Asari e mongka*

<sup>15</sup> Asari e kalvantami ni mongka a ueng navah kalvan vah puenghoi a cairing teh, talaivan uknaeram teh maimae Bawipa e a ram lah ao toe. Hot teh amae Khrih e lah ao toe. Ahni ni a yungyoe hoi a yuengyoe a uk han toe. <sup>16</sup> Hatnavah Cathut e hmalah bawitungkhung dawkwah ka tahung e kacuenaw 24 touh ni Cathut teh a bawkwah, <sup>17</sup> Oe Bawipa Cathut, Athakasaipounge, atu kaawm niteh, kaawm tangcoung e, nama teh nama e bahu hah na patuep teh na uk dawkvah, nang koe ka lunghaw. <sup>18</sup> Miphunnaw teh a lungkhuek awh. Hatei nama e lungkhueknae teh a pha toe. Ka dout tangcoungnaw lawkceng hane hoi nama e taminaw, profetnaw, tami kathoungnaw, hoi nama e min ka taket niteh ka bari e, kathoeng hoi kalen, talai karaphoenaw raphoenae tueng ka phat han.

<sup>19</sup> Hathnukkhu kalvan kaawm e Cathut e bawkim a kamawng teh, hote bawkim thungvah, Bawipa e lawkkam thingkong ka hmu. Sumpapalik, khoparit, keitat, tâlino, kalenpounge roun a bo.

## 12

### *Napui, ca tongpa, khorui*

<sup>1</sup> Hathnukkhu kalvan vah kalenpounge mitnout teh ka hmu. Napui buet touh ni kanî a kho teh, thapa hah a coungroe teh, Âsi hlaikahni touh kaawm e bawilukhung a kâmuk e hah ka hmu. <sup>2</sup> Hote napui ni camo a vawn teh capa khe hanelah a von a pataw toung dawkvah a hram ki. <sup>3</sup> Hahoi kalvan vah alouke mitnout hah bout ka hmu. Lû sari touh hoi ki hra touh kaawm niteh a lû dawkwah bawilukhung sari touh kâmuk e ka palingpak e khorui buet touh ka hmu. <sup>4</sup> A mai ni kalvan Âsi pung thum pung touh a sawn teh talai lah a tâkhawng. Hote khorui ni capa ka khe han coungkacoe kaawm e napui hmalah a kangdue teh, capa a khe torei payawp hanelah a ring. <sup>5</sup> Hote napui ni miphun pueng sum sonron hoi ka uk hane ca tongpa hah a khe. Hote capa teh Cathut koehoi amae bawitungkhung koewah tawm lah ao. <sup>6</sup> Hote napui teh thingyei kahrawngum vah a yawng. Hote hmuen koe hnin 1260 touh khetyawt hanelah Cathut ni a rakueng pouh e hmuen ao.

<sup>7</sup> Hathnukkhu kalvan vah tarankâtuknae ao. Maikel hoi ama e kalvantami ni khorui hah a tuk awh. Khorui ni amae hnukkâbangnaw hoi bout a tuk awh ei, tâ awh hoe. <sup>8</sup> Kalvan haiyah ahnimouh o nahane hmuen awh hoe toe. Het talai van pueng ka dum ni teh, kahraimathout tie Setan, <sup>9</sup> ayan e tahrin karuem tie khorui teh talai vah tâkhawng lah ao toe. Ahni hoi ahnie a hnukkâbangnaw pueng hai tâkhawng lah ao. <sup>10</sup> Hathnukkhu kalvan vah kacaipounge lawk ni, maimae Cathut uknaeram hoi ahnie Khrih e bahu teh a kamnue toe. Bangkongtetpawiteh maimae hmaunawngghanaw hah Cathut hmalah karum khodai yon kapen e taran teh tâkhawng lah ao toe. <sup>11</sup> Hmaunawngghanaw teh tuca e thi lahoi hai, amamouh ni lawkpanuesaknae a lawk lahoi hai a tâ awh teh, due ditouh amamae hringnae lungpataw awh hoe. <sup>12</sup> Hatdawkvah kalvannaw hoi kalvan kaawm e naw konawm awh haw. Talai hoi tuipuinaw teh yawthoe



lah ao awh. Bangkongtetpawiteh kahraimathout teh amae tueng younca doeh kaawm toe tie a panue dawkvah puenghoi a lungkhuek laihoi nangmouh koe a kum toe telah dei e hah ka thai.

### *Rektap e napui*

<sup>13</sup> Khorui ni talai van tâkhawng lah ka o toe tie a kâpanue dawkvah ca tongpa ka khe e napui hah a rektap. <sup>14</sup> Hatei hote napui ni kahrawng e thingyei yawn, amae a hmuen koe a kamleng thai nahanlah kalenpoung mataw rathei kahni touh poe lah ao. Hote napui teh tahrûn hmalah hoi a hlout teh hote hmuen koe kum thum touh hoi tangawn khetyawt e lah ao. <sup>15</sup> Tahrûn ni hote napui hah tui pâyo sak hanelah, hote napui hnuk lahoi tui hah palangpui patetlah a kâko hoi a khu teh a tâco sak. <sup>16</sup> Hatei talai ni amae a kâko a ang teh khorui kâko hoi patha lah kaawm e tuipui hah a padoun. <sup>17</sup> Hattoteh khorui ni hote napui koe puenghoi a lungkhuek teh Cathut e kâpoelawknaw ka tarawi e taminaw hoi Jisuh Khrih e lawkpanuesaknae lah kaawm e hote napui e catoun thung hoi kacawiraenaw hoi tarankâtuk hanelah a kamthaw teh, <sup>18</sup> tuipui teng thingyei daw k a kangdue.

## 13

### *Tupui thung hoi ka luen e sarang*

<sup>1</sup> Hathnukkhu a ki hra touh hoi lû sari touh ka tawn e sarang buet touh teh tuipui daw k hoi a luen takhang e ka hmu. Hote kinaw dawkvah bawilukhung hra touh ao teh a lûnaw dawkvah Cathut dudamnae minnaw ao. <sup>2</sup> Kai ni ka hmu e hote sarang teh kaisi hoi a kâvan. Ahnie a khok teh tavom khok patetlah ao teh a kâko teh sendek kâko patetlah ao. Khorui ni a mae bahu, amae bawitungkhung hoi amae kâtawnnae hah ahni koe a poe. <sup>3</sup> Hote sarang e lû buet touh teh kadout lah thei tangcoung e patetlah ao ei duekhai kawi e hmâ hah yout a kahma. Hat toteh, talaivan pueng ni a kângairu awh teh hote sarang hnuk a kâbang awh. <sup>4</sup> Hothloilah khorui ni sarang hah kâtawnnae a poe dawkvah ahnimouh ni khorui hah a baw k awh. Ahnimouh ni, apimouh sarang hoi ka kâvan vah, apinimaw sarang hah ka tuk thai han vai titeh sarang hai a baw k awh.

<sup>5</sup> Hote sarang teh lawk dei thainae a tawn dawkvah Cathut dudamnae lawk dei thainae a tawn teh thapa yung 42 totouh kâtawnnae a hmu. <sup>6</sup> Hat toteh, Cathut dudamnae lawk a dei teh, Bawipa e min hai thoseh, Bawipa e lukkareim hai thoseh, kalvan kaawm e naw hai thoseh dudamnae lawk a dei. <sup>7</sup> Ahni ni tami kathoungnaw hah taran a tuk teh tânae a hmu dawkvah miphunaw, lawk cawngca, kho tangkuem e taminaw lathueng kâtawnnae hai a hmu. <sup>8</sup> Thei lah kaawm e tuca e hringnae cauk daw k talaivan kamtawng hoi min thut lah kaawm hoe h e talai taminaw pueng ni hote sarang hah a baw k awh han. <sup>9</sup> Hnâ ka tawn e tami ni thai naseh.

<sup>10</sup> Ayânaw kaman niteh ka hrawi e tami teh ama hai man vaiteh hrawi la o han. Tahloi hoi tami ka thet e hai tahloi hoi thei lah ao han. Hi tueng vah tami kathoungnaw e yuemnae hoi khangnae ao.

### *Talai thung hoi ka tâcawt e sarang*

<sup>11</sup> Hathnukkhu talai thung hoi ka tâcawt e alouke sarang buet touh hah ka hmu. Ahni ni tuca e ki hoi kâvan e ki kahni touh a tawn teh khorui patetlah lawk a dei. <sup>12</sup> Hote sarang ni hmaloe e sarang e kâtawnnae patetlah a hmalah a hno teh talai hoi talai van kho ka sak e pueng ni



duekhai kawi hmâ dawk hoi kahawi e ahmaloe e sarang hah a bawk sak. <sup>13</sup> Hothloilah kalenpounge kângairu mitnoutnaw hah a sak teh taminaw e hmaitung vah kalvan hoi hmai patenghai talai van a bo sak awh. <sup>14</sup> Ahni ni ahmaloe e sarang hmalah sak thainae a tawn e mitnoutnaw lahoi talai van kho ka sak e tami pueng a dum teh tahloi hoi hmâ a ca ei, bout kahring e sarang e meikaphawk sak hanelah, talai van kho ka sak e taminaw hah a patoun. <sup>15</sup> Hahoi sarang meikaphawk teh lawk dei thai nahane hoi sarang meikaphawk ka bawk hoehe e tami pueng thei sak hanelah hote sarang e meikaphawk hah hring sak thainae kâ a tawn. <sup>16</sup> Hothloilah kalen nakunghai, kathoeng nakunghai, ka bawi nakunghai, kamathoe nakunghai, kahlout nakunghai, san nakunghai, tami pueng aranglae kut dawk hoehpawiteh tampa dawk mitnoutnae tacik a kin sak teh, <sup>17</sup> sarang e min na hoehpawiteh, hote min nambat ka tawn hoehe e tami pueng, apihai yawt thai hoehe, ran thai hoehe nahanlah a sak.

<sup>18</sup> Hi tueng vah, lungang hanlah ao. A lungkaang e tami niteh sarang e nambat hah to naseh. Bangkongtetpawiteh, tami buet touh e nambat lah a o, 666 lahai ao.

## 14

### *Tuca hoi 144,000*

<sup>1</sup> Hahoi ka khet navah, tuca teh Zion mon dawk a kangdue. Tuca e min hoi Cathut e min hah amamae tampa dawk thut e tami 144000 touh hai ahni hoi cungtalah ao awh. <sup>2</sup> Hahoi kalenpounge tuicapa lawk hoi, kacaipounge keitat lawk hoi, kâvan e kalvan hoi ka tho e lawk ka thai. Kai ni ka thai e a pawlawk teh ratoungkuengnaw ni amamae ratoung a kueng awh e lawk hoi hai a kâvan. <sup>3</sup> Ahnimouh teh lawkcengnae hmalah, moithang pali touh hoi kacuenaw hoi bawitungkhung hmalah hai thoseh la katha a sak awh. Talai van hoi ratang lah kaawm e 144,000 naw laipalah apinihai hote la teh kamtu thai awh hoehe. <sup>4</sup> Ahnimouh teh napui koe lah khin awh hoehe. Bangkongtetpawiteh ahnimouh teh thoundoun kacueme lah ao awh. Ahnimouh teh tuca a cei na tanguem koe a kâbang awh. Cathut hoi tuca hanlah aluepaw, taminaw thung hoi ratang teh ran e lah ao awh. <sup>5</sup> Cathut e bawitungkhung hmalah, ahnimae pahni dawk hoi laithoe tâcawt hoehe. Ahnimouh teh yon kathounge lah ao awh.

### *Kalvantami katham touh*

<sup>6</sup> Hahoi alouke kalvantami buet touh teh kalvan lungui a kamleng e hah ka hmu. Ahni teh talai van kaawm e tami miphun puenghoi khoram pueng hanelah pâpho hane a yungyoe e kamthang kahawi hah a sin. <sup>7</sup> Ahni teh lawk kacailahoi Cathut ni lawkcengnae tueng teh a pha toe telah a dei hnukkhu, Bawipa taket nateh a Bawilenna pholen leih kalvan, talai, tuipui sawkcanaw kasakkung Cathut teh bawk awh leih telah a hram.

<sup>8</sup> Hahoi apâhni e kalvantami buet touh a tho teh mae kamsoumhoehe napui tongpa yonnae kecu dawk hoi ka tâcawt e lungkhueknae misurtui miphun pueng ka pânei e Babilon khopui a rawp toe, a rawp toe telah a hram.

<sup>9</sup> Hahoi apâthum e kalvantami teh ahnimae hnuklah a kâbang teh sarang hoi sarang e meikaphawk ka bawk niteh, a tampa dawk, hoehpawiteh a kut dawk sarang e mitnout tacik a kin e pueng teh, <sup>10</sup> Cathut lungkhueknae manang dawk e misur yamu ahruem a nei awh han. Ahni teh kathounge kalvantami hoi tuca e hmalah vah ganhmai thung puenghoi rektapnae a khang han. <sup>11</sup> Ahnimouh ni a khang awh e rektapnae hmaikhu



teh a yungyoe hoi yungyoe a luen. Sarang hoi sarang e meikaphawk ka bawk niteh sarang e mitnout tacik hoi kin e naw teh karum khodai hawinae hmawt awh mahoeht telah kacaipounglah a hram. <sup>12</sup> Hi tueng vah Cathut e kâpoelawknaw hai, Jisuh dawk yuemnae hai ka tarawi e tami kathoungnaw e panguepnae ao.

<sup>13</sup> Hahoi kalvan hoi lawk ka tho e lawk ni, thun haw, atu hoi Bawipa dawk kadout e taminaw pueng teh a yawhawi awh ati e ka thai. Muitha nihai bokheiyah telah ati. Ahnimouh teh amamae thapathonae dawk hoi a kâhat awh han. Amamae thawtawk e hai amamouh hoi cungtalah a kâbang telah a ti.

### *Talaivan canganæ*

<sup>14</sup> Hahoi bout ka khet navah ka pangaw e tâmai ao teh hote tâmai van vah a lû dawk suilukhung ka kâ muk niteh a kut dawk kahran e tangkoun ka sin e tami Capa hoi ka kâvan e buet touh a tahung. <sup>15</sup> Hahoi alouke kalvantami buet touh teh bawkim thung hoi a tâco teh tâmai van ka tahung e hanlah, talai van canga hane a hmin toe, canga hanelah a tue a pha tounge dawkvah nama e tangkoun hoi a lei khe telah kacaipounglah hram laihoi a dei. <sup>16</sup> Hatnavah tâmai van ka tahung e ni amae tangkoun teh talai van ayaha navah talai teh a lah ao toe.

### *Talaivan misur anæ*

<sup>17</sup> Hahoi alouke kalvantami buet touh teh kalvan e bawkim thung hoi a tâco. Ahni nihai kahran e tangkoun a sin. <sup>18</sup> Hahoi hmai koe kâ ka tawn e alouke kalvantami buet touh, thuengnae khoungroe dawk hoi a tâco teh, kahran e tangkoun ka sin e kalvantami hanelah misurpaw a hmin tounge dawkvah nange kahran e tangkoun hoi talai van e misurpaw abawmnaw hah a leih telah puenghoi hram laihoi a dei. <sup>19</sup> Hote kalvantami nihai amae tangkoun hah talai van ayaha teh talai van e misur pawnaw hah a a teh, Cathut lungkhueknae misur katinnae tangkom kalenpounge dawk a cui. <sup>20</sup> Hotnaw hah kho alawilae misurpaw katinnae tangkom dawk a katin torei teh misur katinnae thung hoi thi a tâco. Hote thi kalawng e teh marang kam totouh hane a dung teh, meng 200 touh hane a saw.

## 15

### *Runæ sari touh ka sin e kalvantami sari touh*

<sup>1</sup> Hahoi, kalvan vah kângairu kawi, kalenpounge mitnout lah kaawm e a hnukteng e runæ sari touh ka sin e kalvantami sari touh ka hmu. Hote runæ laihoi Cathut e lungkhueknae teh a kuep han. <sup>2</sup> Hahoi, hmai hoi kâkalawt niteh hlalang tali patetlah kaawm e hno hoi, sarang, sarang e meikaphawk hoi sarang e a nambat lathueng tânae kahmawtnaw ni Cathut e ratoungnaw a patuep awh teh hote hlalang tali van vah a kangdue awh e hai ka hmu. <sup>3</sup> Ahnimouh ni Cathut e a san Mosi e la hoi tuca e la a sak awh. Oe Bawipa Cathut, Athakasaipounge, na sak e hno kângai lah a ru. Tami pueng e siangpahrang, nange na lamthung teh a lan. <sup>4</sup> Oe, Cathut, apimaw nang taket laipalah, na min oup laipalah kaawm ngam han. Nang teh na thounge nange na sak e pueng teh a lan teh tami pueng ni a hmu dawkvah miphun pueng ni Bawipa, na hmalah tho avai teh na bawk a han telah la a sak awh.

<sup>5</sup> Hahoi ka khet navah, kalvan vah lawkpanuesaknae lukkareim onae bawkim a kamawng teh, <sup>6</sup> runæ sari touh ka sin e kalvantami sari touh teh bawkim thung hoi a tâco awh. Ahnimouh ni kathoung poung niteh



loukloukkaang e lukkarei a kâkhu teh a lungtabue dawk sui hah lakhang lah a kâyeng awh. <sup>7</sup> Hahoi moithang pali touh thung dawk e buet touh ni a yungyoe kahring e Cathut e lungkhueknae hoi ka kawi e suimanang sari touh e hah, hote kalvantami sari touh koe a poe. <sup>8</sup> Bawkim teh Cathut e a bawilenna hoi hnotithainae hmaikhu hoi akawi dawkvah, kalvantami sari touh e runae sari touh, a baw hoeh roukrak bawkim thung apihai kâen thai hoeh.

## 16

### *Apasuek e lungkhueknae manang*

<sup>1</sup> Hahoi, bawkim thung hoi kacaipounge lawk ni, cet awh. Cathut e lungkhueknae manang sari touh hah, talai van rabawk awh tie lawk kalvantami sari touh koe a dei pouh e ka thai. <sup>2</sup> Apasuek e kalvantami ni a cei teh, amae manang hah talai van a rabawk navah, sarang e mitnoutnae ka tawn e hoi sarang e meikaphawk kabawknaw koe ka mathout poun e âhlut patawnae ni a tho sin awh.

### *Apâhni e lungkhueknae manang*

<sup>3</sup> Apâhni e kalvantami ni amae manang hah talipui dawk a rabawk toteh tui teh tami kadoutnaw e thi patetlah ao teh, talipui dawk kaawm e moithang pueng teh a due awh.

### *Apâthum e lungkhueknae manang*

<sup>4</sup> Apâthum e kalvantami ni amae manang hah palang hoi sokcanaw dawk a rabawk toteh, tui teh thi lah a kangcoun. <sup>5</sup> Tui ka uk e kalvantami ni, atu hai kaawm niteh yampa hai kaawm e kathounge Bawipa, hete hnonaw na sak dawkvah nang teh na lan doeh. <sup>6</sup> Bangkongtetpawiteh, ahnimouh teh tami kathoungnaw hoi profetnaw e thi a rabawk awh toe. Bawipa nama nihai hote thinaw hah nei hanelah ahnimanaw na poe toe. Ahnimanaw nihai hettelah a khang awh hanelah a kamcu doeh tie lawk ka thai. <sup>7</sup> Hahoi thuengnae khoungroekoehoi lawk buet touh ka thai e teh, bokheiyah, Oe Bawipa Cathut, Athakasaipounge, nama e lawkcengnae teh a thuem teh a lan doeh telah tie ka thai.

### *Apali e lungkhueknae manang*

<sup>8</sup> Apali e kalvantami ni amae manang hah kanî dawk a rabawk toteh, kanî teh taminaw hmaikak thainae kâ a tawn. <sup>9</sup> Ka bet poun e khumbei kecu dawk taminaw a kak awh. Hatdawkvah hete runae dawk kâ ka tawn e Cathut e min hah a dudam awh. Pankângainae hai tawn a hoeh. Cathut hai pholen awh hoeh.

### *Apanga e lungkhueknae manang*

<sup>10</sup> Apanga e kalvantami ni amae manang hah sarang e bawitungkhung dawk a rabawk navah sarang uknaeram dawk kho lah a hmo. Taminaw teh amamae patawnae kecu dawk a lainaw taptap a kei awh. <sup>11</sup> Taminaw teh a khang awh e patawnae hoi âhlut kecu dawkvah, kalvan kho e Cathut dudamnae lawk a dei awh teh amamouh ni a sak e dawk pankângai hanelah ngai awh hoeh.

### *Ataruk e lungkhueknae manang*

<sup>12</sup> Ataruk e kalvantami ni amae manang hah Euphrates palangpui dawk a rabawk toteh, tui rem a hak teh, kanîtholae siangpahrangnaw hane lamthung a kamawng pouh. <sup>13</sup> Hathnukkhu khorui e a kâko hoi, sarang e a



kâko hoi, profetkaphawk e kâko hoi ekka hoi kâvan e kakhine muithanaw kathum touh a tâco e hah ka hmu. <sup>14</sup> Hote kahrailuulinaw e muithanaw ni a sak awh e mitnoutnaw doeh. Hote muitha kathum touh e naw teh talaivan ram tangkuem e siangpahrangnaw ni Athakasaipounge, Cathut e hnin kalenpoung hnin tarankâtuknae koe a kamkhueng thai nahanelah hote ukkungnaw koe a kamthaw awh. <sup>15</sup> Thai haw, tamru patetlah ka tho han, taminaw hmalah tongtai lahoi kâhlai e lah na o hoeh nahan mae khohna ka khenyawn niteh kâhruetcuat laihoi ka ring e teh a yawkahawi e lah ao. <sup>16</sup> Hote muithanaw niteh siangpahrangnaw hah Hebru lawk lahoi Armageddon tie hmuen koe a kamkhueng sak awh.

### *Asari e lungkhueknae manang*

<sup>17</sup> Asari e kalvantami ni amae manang hah kalvan vah a rabawk toteh kalvan bawkim thung e bawitungkhang dawkw hoi kacaipounge lawk ni hot hateh ka cum toe a ti. <sup>18</sup> Hatnavah sumpapalik, khoparit, keitat teh tâli puenghoi a no. Talai van tami sak pasuek hoi hot patetlah e athakaawme Tâli a no e awm boihoe.

<sup>19</sup> Khopui teh pung thum touh lah a kâkapek teh ram louk dawkw e khopuinaw moi a rawk awh. Cathut ni a lungkhueknae misurtui a pânei hanelah Babilon khopui hah pahnim hoe. <sup>20</sup> Tuilum abuemlah a kahma teh monnaw hai hmawt hoe toe. <sup>21</sup> Kalvan hoi pong 100 touh hlai ka ri e roun kalenpoungnaw hai taminaw e van a bo awh. Hete runae teh ekvoi a ru dawkvah, taminaw ni hote roun kecu dawkw Cathut dudamnae lawk a dei awh.

## 17

### *Sarang paling kâcuie napui*

<sup>1</sup> Hatnukkuh manang sari touh ka patuem e kalvantami sari touh thung dawkw e buet touh ni a tho teh, kai hoi lawk kâpan roi teh, tho haw, tuipui van ka tahung e kalenpounge kâyawt e napui, ni lawkcengnae a khang hane hah na patue han. <sup>2</sup> Talai siangpahrangnaw teh hote napui hoi kamsoumhoehe napui tongpa yonnae a sak awh toe. Talai van kaawm e naw nihai hote napui e kamsoumhoehe napui tongpa yonnae misur hoi a parui awh toe telah a dei. <sup>3</sup> Kai hah muitha lahoi kahrawngum lah na ceikhai. Hatnavah, lû sari touh hoi ki hra touh ka tawn e Cathut dudamnae min hoi ka kawi e ka paling e sarang dawkw ka tahung e napui buet touh ka hmu. <sup>4</sup> Hote napui teh hni paling hoi palinghup e a kâkhu teh, sui, talung aphu kaawm poung e hoi palenaw hoi a kamthoup teh a kut dawkw panueththopounge hoi kamsoumhoehe napui tongpa yonnae hoi ka kawi e suimanang a patuep. <sup>5</sup> Ahnie tampa dawkw thut e ca teh, HROLAWK, BABILON KHOPUI, KÂYAWT E NAPUINAW HOI TALAI E PANUET KATHOUPONGE MANU telah a kâthut. <sup>6</sup> Hote napui teh tami kathoungnaw e thi, Jisuh kampangkhai naw e thi hoi a parui e ka hmu. Ahni ka hmu nah ka kângai a ru.

### *Sarang hoi sarang van ka tahung e napui deingainae*

<sup>7</sup> Hatnavah kalvantami ni, Bangkong na kângai a ru. Hote napui hoi ahni ni a kâcuinae lû sari touh hoi ki hra touh ka tawn e sarang e hrolawkw hah nang koe na dei pouh vai. <sup>8</sup> Na hmu e sarang teh yampa teh ao ei atuteh awm hoe. Nâsittouh o hoehnahlan ka dungpoung e tangkom thung hoi luen vaiteh rona koe a pha han. Talaivan kho ka sak e a taminaw thung



dawkvah, talai pek a pâw hoi hringnae cauk dawk min thut hoeh e pueng ni yampa kaawm niteh atu kaawm hoeh e, nâsittouh o hoehnahlan kaawm hane sarang hah hmawt awh vaiteh a kângai a ru awh han.

<sup>9</sup> Hitueng vah lungangnae hoi panuena e ngai. Lû sari touh e teh hote napui ni a tahungnae mon sari touh e hah doeh. <sup>10</sup> Siangpahrang sari touh e lahai ao. Panga touh e te a bo toe. Buet touh teh ao rah. Buet touh e teh tâcawt hoeh rah. A tâco toreî hai dongdeng ca doeh ao han.

<sup>11</sup> Yampa kaawm niteh, atu kaawm hoe e sarang te ataroe e siangpahrang doeh. Ahni teh sari touh thung dawk e buet touh lah ao teh rawknae koe ka phat hane doeh. <sup>12</sup> Na hmu e ki hra touh e teh uknaeram kahmawt hoeh rae siangpahrang hra touh e doeh. Hatei ahnimouh teh sarang hoi cungtalah dongdeng ca, atueng buet touh dueng kê a tawn awh han.

<sup>13</sup> Hote siangpahrangnaw teh a lungkânging awh vaiteh, amamae a lennae hoi kâtawnnae hah sarang koe a poe awh han. <sup>14</sup> Ahnimouh ni tuca hoi a kâtuk awh han. Hatei tuca ni ahnimouh teh a tâ han. Bangkongtetpawiteh, ama teh bawi pueng e Bawi, siangpahrang pueng e Siangpahrang lah ao. Ama hoi rei kaawm naw nihai kaw e lah kaawm e, rawi e lah kaawm e, hoi yuemkamcu e telah ati awh.

<sup>15</sup> Hahoi kalvantami ni, na hmu e kâyawt e ni a tahungnae tuinaw teh khoramnaw, lawk cawngca ka pan e taminaw hah doeh. <sup>16</sup> Na hmu e ki hra touh e hoi sarangnaw ni hote kâyawt e napui hah a hmuhma vaiteh, a tawnta e naw he raphoe pouh awh vaiteh, caici lah pak a tha awh han. A moi hai cat awh vaiteh hmai a sawi awh han. <sup>17</sup> Bangkongtetpawiteh, Cathut ni amae a lawk a kuep totouh, ahnimouh ni lung a kânging awh vaiteh, amamae uknaeramnaw hah sarang koe a poe awh e lahoi Cathut pouknae patetlah a sak awh nahane hah ahnimae lungthin dawk a pakhum pouh toe. <sup>18</sup> Na hmu e napui teh talai siangpahrangnaw ka ukkung khopui doeh telah ati.

## 18

### *Babilon a rawknae*

<sup>1</sup> Hathnukku, kalvantami buet touh, kâtawnnae kalenpoung ka tawn e kalvan hoi a tho e hah ka hmu. A raeng ni talai pueng pheng a tue. <sup>2</sup> Athakaawmpoung lawk hoi a hram teh, Babilon khopui a rawp toe, a rawp toe. Kahraituilinaw ni onae, tava kathoutnaw onae kho, kakhin niteh panuettouh e moithangnaw pueng ni kamtumnae kho lah ao toe. <sup>3</sup> Bangkongtetpawiteh miphun pueng ni ahnie kamsoumhoehe napui tongpa yonnae ka sak e hoi kâkuen e lungkhueknae misur yamu teh a nei awh toe. Talai e siangpahrangnaw nihai ahni hoi kamsoumhoehe napui tongpa yonnae a sak awh teh, talai hnopai kayawtnaw nihai ahnie kamsoumhoehe napui tongpa yonnae dawk a phunepnae lahoi a tawnta awh a ti. <sup>4</sup> Hahoi, kalvan hoi lawk buet touh bout ka thai e teh, ka taminaw tâcawt awh haw! Ahnimouh thung hoi tâcawt awh. Ahnie kamsoumhoehe napui tongpa yonnae dawk bawk awh hanh. Ahni ni a khang hane runae buet touh boehai na khang van hoeh nahanlah ahni koehoi tâcawt awh. <sup>5</sup> Bangkongtetpawiteh ahnie yonnae teh kalvan totouh a pha teh kahawihoehe a sak e naw hai Cathut ni pahnim pouh hoeh. <sup>6</sup> Ahnimouh ni na poe e patetlah ahni hai bout poe awh. A sak e hno dawk let hni touh hoi pathung awh. A poe e manang dawk hoi ama hanelah let hni touh poe awh. <sup>7</sup> Lentoena e hoi tawntanae patetlah amahoima a kâpoe e yit touh rektapnae hoi lungmathoena e khang sak



awh. Bangkongtetpawiteh ahni ni kai teh siangpahrangnu doeh, lahmai nahoeh. Lungmathoenae hai nâtuék hai ka khang boi mahoehtelah amae lung thung vah ati dawkw doeh. <sup>8</sup> Hatdawkvah a khang hane runae teh duenae, lungmathoenae, hoi takangnae teh hnin touh dawkvah, ahni van tâcawt vaiteh, ahni teh hmai hoi pou a kak han. Bangkongtetpawiteh ahni lawk ka ceng e Cathut teh thaonae hoi a kuep.

### *Babilon khopui a ro e dawkw talai taminaw a khuika awa*

<sup>9</sup> Ahni hoi ka kamsoumhoehe napui tongpa yonnae ka sak awa e talai siangpahrangnaw ni vah, hmaikaknae hmaikhu a hmu awa toteh a lungtabue a ratup laihoi a khuika awa. <sup>10</sup> Ahni ni a khang e rektapnae hah a taki awa teh, ahlanae koe a kangdue awa teh, Babilon khopui kho kalenpounge hoi a tha kaawm poung e, lungmathoe hanelah, lungmathoe hanelah na o bo vaw, Bangkongtetpawiteh nange lawkcengnae teh dongdengca dawkw a pha bo vaw a titeh a khuika awa.

<sup>11</sup> Talai e hno kayawtnaw hai amamae hnonaw hah ka ran hane ao hoehtoung dawkvah lungmathoe laihoi a khuika awa han. <sup>12</sup> Ahnimaeh hnopainaw teh, sui, ngun, talung phu kaawm, pale, paling, loukloukkaang, hnipaling, thing hmuitui, kasaino, thing aphu kaawm hoi sak e hnopai a buem lah, rahum, sum, talung pangaw hoi sak e hno aphunphun, <sup>13</sup> Nakzik, musala, hmuitui, murah hmuitui, frankinsen hmuitui, Yamu, satui, catun, cai, maito, pâna, tu, marang, rangleng, san hoi taminaw hah doeh. <sup>14</sup> Nang ni na nôe poung e a pawhiknaw hai a kahma toe. Na thâwnae hoi na meihawinae hnonaw hai a kahma toe. Hote hnonaw hah nâtuék hai bout hmawt mahoehtoe. <sup>15</sup> Nang koehoi ka tawnta e hno kâyawt e naw ni a khang e rektapnae hah a taki awa teh, ahlanae koe kangdue laihoi a khuika awa teh, <sup>16</sup> La muen hni paling ka kho ka hnât niteh sui hoi talung aphu kaawm e pale hoi ouk ka kamthoup e khopui nang teh lungmathoe hanlah ao, lungmathoe hanlah ao. <sup>17</sup> Bangkongtetpawiteh dongdengca dawkw hnopai abuemlah be a kahma tangngak toe ati awa han. Long ka ring e bawinaw, kahlong ka cet e naw, long dawkw thaw katawknaw, tuipui dawkw kaawm e naw pueng nihai ahlanae koe a kangdue awa teh, <sup>18</sup> Hmaikaknae hmaikhu a hmu awa nahav a khuika awa teh, hete khopui patetlah bangpatetlah khopui maw kaawm ati awa. <sup>19</sup> A lû dawkw vaiphu a kâphuen awa vaiteh, lungmathoe laihoi khuikap awa vaiteh, aphu kaawm poung e hnopainaw yo e laihoi tuipui dawkw kaawm e longnaw ka tawn e naw pueng ka bawî tangreng sak e khopui, nang teh dongdengca dawkw khoeroe raphoe lah na o toe. Lung mathoe hanlah ao lungmathoe hanlah ao telah hramki laihoi a dei awa. <sup>20</sup> Kalvan hoi tamikathounnaw, Gunceinaw, profetnaw, hote khopui ka rawk e kecu dawkw na konawm awa. Bangkongtetpawiteh, Cathut ni nangmouh na kampangkhah teh, hote khopui hah lawk a ceng toe tie ka thai.

### *Babilon khopui a poutnae*

<sup>21</sup> Hathnukkuh a thakaawmpounge kalvantami buet touh ni kalenpounge talungsum patetlah e talung buet touh a tawm teh tuipui thung a tâkhawng teh., het patetlah Babilon khopui hai tâkhawng vaiteh nâtuék hai bout hmawt mahoehtoe. <sup>22</sup> A thung kaawm e ratoung ka kueng thai e naw hoi vovit ka ueng thainaw, mongka ka ueng thainaw ni meng a ueng e lawk hah nâtuék hai bout thai awa mahoehtoe. A thung vah thawtawkkung ao hoehtoung dawkvah cakang kuen e pawlawk hah thai a mahoehtoe. <sup>23</sup> A thung vah hmaiang awm mahoehtoe. Thoundoun



tangla yu paluennae awm mahoe h toe. Talai e kaawm hnopai kayawtnaw a tha kaawm poun lah a la o teh miphun pueng sueánnae hoiyah a dymyen awh toe telah kalvantami ni a ti. <sup>24</sup> Profetnaw, tami kathoungnaw hoi talai van a thei awh e tami pueng e thi hai hote khopui daw hmu e lah ao a ti.

## 19

### *Babilon khopui a rawk e daw k kalvannaw lunghawi awh*

<sup>1</sup> Hathnukkhu kalvan kaawm e kalenpounge tamihu lawk patetlae lawk ka thai. Ahnimanaw ni, Hallelujah, rungngangnae hoi bawilennae, bahu teh Cathut e doeh. <sup>2</sup> Bangkongtetpawiteh, Ama e lawkcengnae teh a lan, atueng. Kamsoumhoehe napui tongpa yonnae lahoi talaipui rawknae koe ka phat sak e, kâyawt e napui hah Bawipa ni lawkceng vaiteh, Ama e a taminaw a thei e daw k Ama ni moipathung toe ati. <sup>3</sup> Hahoi ahnimouh ni, Hallelujah, ahnie hmaikhu teh a yungyoe hoi a yungyoe a luen telah bout ati awh. <sup>4</sup> Kacuenaw 24 touh hoi moithang pali touh ni a tabo awh teh, bawitungkhu daw k ka tahung e Cathut hah a baw k awh teh, Amen! Hallelujah ati awh. <sup>5</sup> Hahoi bawitungkhu koehoi e lawk ni, Cathut e a sannaw hoi Cathut ka taket e tami kalen kathoeng pueng maimae Cathut teh pholen awh ati.

### *Tuca yu paluennae paw*

<sup>6</sup> Hahoi tamihupui e lawk, moikapap e tuicapa lawk, athakaawme khoparit lawk patet e lawk ni, Hallelujah. Maimae Bawipa Cathut, Athakasaipounge ni a uk toe. <sup>7</sup> Bangkongtetpawiteh, tuca yu paluennae atueng teh a pha toung dawkvah, a paluen hane tangla teh coungkacoe a kamthoup toe. Hatdawkvah, lunghawi awh sei, ahni teh konawmnae hoi bawilennae poe awh sei. <sup>8</sup> Hote tangla teh kathoungpounge lukkarei hoi kamthoupnae kâ a tawn. Hote lukkarei hateh tami kathoungnaw e lannae doeh tie ka thai. <sup>9</sup> Hahoi kalvantami ni, tuca yu paluennae paw tangmin bu vennae koe coun e taminaw teh a yawhawi awh telah thun haw. Hete lawknaw teh Cathut e lawk roeroe doeh bout ati. <sup>10</sup> Hatnavah hote kalvantami baw k hanlah a khoksampha koe ka tabo. Ahni ni hattelah sak hanh. Kai hai nang hoi Jisuh e lawkpanuesaknae nange hmaunawngghanaw patetlah van doeh ka o. Cathut ma baw k. Bangkongtetpawiteh, sutdeilaw k muitha ni a deingainae lawk teh, Jisuh e lawkpanuesaknae lah ao telah kai koe a dei.

### *Marang pangaw ka kâcuie*

<sup>11</sup> Hahoi ka khet boteh, kalvan a kamawng teh marang pangaw buet touh ka hmu. Marang van kâcuie teh Yuemkamcu hoi Katang, hahoi lannae telah kaw e lah ao. Lannae lahoi lawk a ceng teh taran a tuk. <sup>12</sup> A mit teh hmaipalai patetlah ao teh a lû daw k lukhugnaw a kâ muk. Avan vah a min buet touh a kâthut. Ama ni dueng doeh a panue, apinihai hote min panuek hoe h. <sup>13</sup> Thi daw k ranup e hni a kâkhu teh ahnie min teh Cathut e lawk telah kaw e lah ao. <sup>14</sup> Rasahu ni kathounge lukkarei a kâkhu awh teh marang pangaw a kâcui laihoi a hnuk a kâ bang awh. <sup>15</sup> A kâko hoi miphun pueng runae poe thainae kahran poun e tahloi a tâco. Ahni ni miphun pueng hah sum sonron hoi a uk han. Ahni ni Athakasaipounge, Cathut e lungkhueknae misur katinnae thung a katin han. <sup>16</sup> Ama e hni hoi a phai dawkvah, SIANGPAHRANG PUENG E SIANGPAHRANG, BAWI PUENG E BAWI telah a kâthut.



### *Sarang hoi a ransanaw sungnae*

<sup>17</sup> Hahoi, kanî dawk kangdout e kalvantami buet touh ka hmu. Kalvan e kamleng e tavanaw pueng hah, tho awh, Cathut e tangmin bu vennae pawî kalenpoung koe tho nateh kamkhueng awh. <sup>18</sup> Siangpahrangnaw e moi, ransa bawinaw e moi, athakaawme taminaw e moi, marangnaw e moi, marangransanaw naw e moi, tami kahloutnaw e moi, sannaw hoi tami kalen kathoeng puengpa e moinaw hah tho nateh cat awh telah kacaipounglah a hramkikhai.

<sup>19</sup> Hattoteh sarang hoi talai siangpahrangnaw teh amamae ransanaw ni marang daw kâcuie hoi amae ransahu hah taran tuk hanelah a kamkhueng awh e hah ka hmu. <sup>20</sup> Hatei sarang teh profetkaphawk hoi mek man lah ao. Hote profetkaphawk teh sarang hmalah mitnoutnaw a sak teh, hote mitnout e lahoi sarang e tacik ka kâkin e taminaw, amae meikaphawk ka baw k e naw hah ka dumyen e tami doeh. Ahnimouh roi teh ganhmaili daw k a hring o lahoi mek tâkhawng e lah ao. <sup>21</sup> Aloukenaw teh marang kâcuie a kâko hoi ka tâcawt e tahloi hoi thei lah ao awh teh, tavanaw pueng ni ahnimae moi teh kaboumcalah a ca awh.

## 20

### *Setan kateknae*

<sup>1</sup> Hathnukkhu kalvantami buet touh teh, poutnae kaawm hoeh e kadung poung e tangkom paawngnae cabi hoi kalenpoung sumbawtarui a kut daw k a patuep teh kalvan lahoi a kum e hah ka hmu. <sup>2</sup> Ahni ni ayan e tahrûn karuem, Kahrâimathout, Setan, khorui hah a man teh a kum 1,000 touh hanelah a pâkhi teh, <sup>3</sup> a kum 1,000 abaw hoehroukrak, taminaw bout a dumyen hoeh nahanlah, apoutnae kaawm hoeh e kadung poung e tangkom daw k a tâkhawng teh, a paung hnukkhu tacik hoi khak a kin. A kum 1000 abaw hoi dongdeng bout tha lah ao han.

### *Tami kathoungnaw Khrih hoi rei uknae*

<sup>4</sup> Hathnukkhu bawitungkhungnaw hoi hot daw k ka tahung e naw hah ka hmu. Ahnimouh teh lawkcengnae kâ a tawn awh. Jisuh e lawkpanuesaknae hoi Cathut e lawk kecu daw k lahuen tâtueng lah kaawm e taminaw e muithanaw hoi, sarang hoi meikaphawk ka baw k hoeh e, sarang e tacik hai a tampa daw k hoehpawiteh a kut daw k ka kin hoeh e muithanaw hai ka hmu. Ahnimanaw teh bout a hring awh teh a kum 1,000 touh thung Khrih hoi cungtalalah rei a uk awh han. <sup>5</sup> Alouke kadout naw pueng teh a kum 1000 abaw hoehroukrak hring awh hoeh rah. Hete thawnae teh ahmaloe thawnae lah ao. <sup>6</sup> Ahmaloe thawnae daw k ka thaw e tha a yawkahawi e hoi kathoung tami lah ao. Apâhni duenae ni ahnimouh lathueng bang patet e kâ hai tawn hoeh. Ahnimanaw teh Cathut hoi Khrih e vaihma lah ao awh teh, Khrih hoi cungtalalah kum 1,000 touh thung a uk awh han.

### *A hnuktengpoung kâtuknae*

<sup>7</sup> Hote kum 1000 abaw hnukkhu Setan teh thawng paungnae koehoi bout tha han. <sup>8</sup> Talai van a takin pali touh koe kaawm e gog hoi magog tie miphun pueng dum hane hoi tarankâtuk hane kamkhueng sak hanelah a kamthaw han. Ahnimouh teh tuiipui teng e sadi yit touh a pha awh. <sup>9</sup> Ahnimouh teh talai hmuen kakaw poung koe a kamthaw awh teh tami kathoungnaw e rapan hoi a lungpataw e khopui hah a kalup awh. Hahoi,



Kalvan hoi hmai a bo teh ahnimanaw kOUNG a padoun. <sup>10</sup> Ahnimouh ka dum e kahraimathout haiyah sarang hoi profetkaphawk onae koe ganhmai tali dawK a tâkhawng teh, ahnimouh teh karum khodai hote hmuen dawK pout laipalah rektapnae a khang han.

### *A hnuktengpoung lawkcengnae hoi hringnae cauk*

<sup>11</sup> Hathnukkhu kalenpoung bawitungkhung pangaw hoi hot dawK ka tahung e ka hmu. Kalvan hoi talai teh amae hmalah a kahma teh ao nahane hmuen awm hoeH toe. <sup>12</sup> Kadout tangcoung e, kahoeng kalen pueng teh tungkhung hmalah a kangdue awh e hah ka hmu. Cauknaw a kadai teh hringnae cauk tie alouke cauk hai a kadai. Kadout tangcoungnaw teh cauknaw dawK a thut e patetlah amamae a tawksaknae dawK lawkcengnae a khang awh. <sup>13</sup> Talipui ni ama koe kaawm e tami kadoutnaw a tâcokhai. Duenae hoi duenae kho nihai amamouh koe kaawm e tami kadoutnaw a tâcokhai. Hatnavah tami pueng teh amamae a tawksak e patetlah lawkcengnae lengkaleng a khang awh. <sup>14</sup> Hathnukkhu duenae hoi duenae kho hah hmaitali dawK a tâkhawng. Hete hmaitali teh apâhni duenae doeh. <sup>15</sup> Hringnae cauk dawK a min thut lah kaawm hoeHnaw pueng teh hmaitali dawK tâkhawng lah ao awh.

## 21

### *Kalvan katha hoi talai katha*

<sup>1</sup> Hahoi kalvan katha hoi talai katha ka hmu. Bangtelah tetpawiteh apasueke kalvan hoi apasueke talai teh a kahma toe. Talipui hai awm hoeH toe. <sup>2</sup> Hahoi teh khopui kathoung Jerusalem katha teh Cathut koe, kalvan lahoi a kum e ka hmu. Vâ ka sak hane tangla ni a vâ nahane hoi kâhmo han nah a kamthoup e patetlah a kamthoup. <sup>3</sup> Hathnukkhu kalvan hoi ka tho e kacaipoung lawk ni, khenhaw! Cathut onae lukkareiim teh taminaw koe ao toe. Ama teh taminaw hoi reirei ao han. Ahnimanaw hai Ama e miphun lah ao awh vaiteh Cathut ma roeroe ahnimouh hoi rei o vaiteh ahnimae Cathut lah ao han. <sup>4</sup> Ama ni ahnimae mit dawK e mitphi pueng a hui pouh han. Duenae awm mahoeH toe. Lungmathoenae awm mahoeH toe. Khuikanae awm mahoeH toe. Patawnae awm mahoeH toe. Bangkongtetpawiteh ahmaloe e hno pueng teh a kahma toe tie lawk ka thai. <sup>5</sup> Bawitungkhung dawK ka tahung e ni, khenhaw! Kai ni hnocawngca pueng teh katha sak toe telah ati hnukkhu, thun haw! hete lawknaw teh yuengkamcu hoi katang e doeh telah a ti. <sup>6</sup> Ka cum toe. Kai teh Alpha hoi Omega lah ka o. Kamtawngnae hoi poutnae lah ka o. Tui kahrannaw pueng hringnae tuiphuek ayawmlah hoi ka poe han. <sup>7</sup> Katâ e tami teh hete râwnaw hah a coe han. Kai teh ahnie Cathut lah ka o han. Ahnimouh teh ka ca lah ao awh han. <sup>8</sup> Hatei, ka taket e, kayuem hoeH e, panuetho e, tami ka thet e, kamsoumhoehe napui tongpa yonnae ka sak e, taân ka sin e, meikaphawk ka bawK e, tami ka dумыen e pueng teh ganhmaili dawK amamouh hanelah a coe awh han. Het hateh apâhni duenae doeh toe a ti.

### *Jerusalem khopui katha*

<sup>9</sup> Hathnukkhu runae phun sari touh hoi ka kawi e manang sari touh ka patuem e kalvantami sari touh thung dawK e buet touh ni a tho teh, kai hah na pato. Tho haw tuca ni a paluen hane tangla na patue vai a ti. <sup>10</sup> Hote kalvantami ni mon kalen niteh ka rasang e dawkvah Muitha lahoi kai na hrawi teh Cathut lentoenae hoi ka kawi e Jerusalem kho kathoung kalvan lahoi a kum e hah na patue. <sup>11</sup> Hote kho teh Cathut bawilenna



hoi akawi teh khopui e angnae teh apfu kaawm poun e talungnaw hoi a kâvan teh, jasper talungnaw patetlah a ang, hlalang patetlah a cairoe. <sup>12</sup> Hote khopui daw k karasang poun e rapan ao teh longkha hlaikahni touh ao. Longkhakoe kalvantami hlaikahni touh ao teh hote longkhanaw dawkvah Isarel miphun hlaikahni touh e min a thut pouh. <sup>13</sup> Imhmah longkha katham, imhlel lah longkha katham, Imtung lah longkha katham, Imka lah longkha katham touh ao. <sup>14</sup> Kho kalupnae adu hlaikahni touh ao teh, hotnaw e a van vah tuca e guncei hlaikahni touh e min thut lah ao.

<sup>15</sup> Kai hoi lawk kapan e kalvantami koe hote khopui, kho longkha hoi a rapan bangnue nahanelah suicakui buet touh a sin. <sup>16</sup> Hote khopui teh a takin suekâvan teh, ayung hoi adangka suekâvan. Kalvantami ni suicakui hoi khopui hah a bangnue boteh meng 1500 touh a pha. Ayung hoi adangka hoi a rasang e sue touh a kâvan. <sup>17</sup> Rapan hai a bangnue awh teh kalvantami e bangnue nae hoi tami e bangnue nae lahai kaawm e dong 144 touh a pha. <sup>18</sup> Hote rapan teh Jasper talung hoi a sak teh khopui teh suituici hoi sak e lah ao teh, hlalang patetlah a cai roe. <sup>19</sup> Kho tumdumnae rapan teh talung apfu kaawm e aphunphun hoi a pathoup. Apasuek vah jasper talung, apâhni vah safaiar talung, apâthum e teh chalcedony talung, apali e teh emerald talung, <sup>20</sup> apanga e teh Onits talung, ataruk e teh kamelian talung, asari e teh, khrosolaih talung, ataroo e teh beril talung, atako e teh topaz talung, a hra e teh khalsedon talung, a hlaibun e teh Jacinth talung hoi a hlaikahni e teh amethyst talungnaw doeh. <sup>21</sup> Kho longkha hlaikahni touh e teh, pale hlaikahni touh e lah ao. Longkha buet touh dawkvah pale buet touh hoi sak e lah ao. Khopui thung e lamthungpui hai suituici lah ao teh hlalang patetlah ao.

<sup>22</sup> Hote kho thungvah bawkim ka hmawt hoeh toe. Bangkongtetpawiteh, Bawipa Cathut Athakasaipounge hoi tuca teh hote khopui e bawkim lah ao. <sup>23</sup> Cathut e bawilenna e ni khopui hah phengkaang lah a tue teh tuca teh khopui e angnae lah ao dawkvah, kani, thapa angnae hai panki hoeh toe. <sup>24</sup> Miphun pueng ni khopui e angnae lahoi a ceio awh han. Talai siangpahrangnaw nihai amamae a bawinae hoi barinae teh hote khopui thung a sin awh han. <sup>25</sup> Hote kho teh karum ao hoeh tOUNg dawkvah khopui longkhanaw teh nâtuék hai khan mahoe toe. <sup>26</sup> Taminaw ni miphun pueng e bawilenna e hoi barinae teh hote khopui thung a sin awh han. <sup>27</sup> Kathounghoehe naw, panuet kathopoung niteh cawmpang kawilah kaawm hoeh e naw pueng teh khopui daw kâen mahoe. Tuca e hringnae cauk daw k min kaawm naw dueng ni doeh kâen awh han.

## 22

### *Hringnae tuiphuek*

<sup>1</sup> Hahoi kalvantami ni kristal patetlah ka cairoe e hringnae tuiphuek a lawngnae palang hah na patue. Hote palang teh Cathut hoi tuca bawitungkhung koehoi a phuek teh, khopui e lungui vah a lawng. <sup>2</sup> Hote palang tengpan vah, hringnae thingkung ao. A paw teh phun hlaikahni touh lah ouk a paw. Thapa tangkuem a paw a paw teh, a hna hai miphun pueng damnae lah ao. <sup>3</sup> Thoebo e buet touh boehai awm mahoe toe. Cathut hoi tuca e bawitungkhung teh, hote khopui thungvah ao teh amae a thaw katawnaw ni ama teh a baw awh han. <sup>4</sup> Ahnimouh ni Bawipa e minhmai teh a hmu awh han. Bawipa e a min hai ahnimae tampa daw k kâthut pouh han. <sup>5</sup> Karum awm mahoe toe. A yungyoe ka hring Cathut



ni ahnimouh koe ang tounge vaiteh hmaiim hoi kanî raeng panki mahoe h toe. Ahnimouh ni a yungyoe a uk a han toe.

### *Atueng a hnai toe*

<sup>6</sup> Hathnukkhu kalvantami ni yah, hete lawknaw teh yuemkamcu hoi katang e doeh. Profetnaw e muiathanaw katawnkung, ka hring Cathut ni palang ka tho hane naw hah amae a sannaw koe patue hanelah a kalvantami hah a patoun toe telah a dei.

<sup>7</sup> Khenhaw! Kai teh karanglah ka tho han. Hete cakalawng daw k e sutdeilawknaw ka tarawi e tami teh a yawhaw i telah a ti.

<sup>8</sup> Kai Jawhan teh hete konglamnaw ka hmawt ka thai e lah ka o. Kai ni ka hmu ka thai navah kai na kahmawt sak e kalvantami baw k hanelah a khok rahim ka tabo navah, <sup>9</sup> ahni ni hottelah tet hanh. Kai teh nang hoi nange hmaunawng ha profetnaw hoi hete cakalawng daw k kaawm e lawknaw ka tarawi e san hui la doeh ka o. Cathut ma hah baw k leih na ti pouh. <sup>10</sup> Hahoi ahni ni bout a dei e teh hete cakalawng daw k e sutdeilaw k pâpho e naw hah kin hanh loe bangkongtetpawiteh atueng a hnai toe. <sup>11</sup> Hnokathout ka sak e teh la sak ngoun seh, kâmhnaung e hai la kâmhnaung ngoun seh, kalan e tami hai la lan ngoun seh, kathounge tami hai la thounge ngoun seh, telah a ti.

<sup>12</sup> Khenhaw! Kai teh karanglah ka tho han. A tawkp hu poe hane ka sin dawkvah tami pueng amamae hnosa k e patetlah ka patho han. <sup>13</sup> Kai teh Alpha hoi Omega lah ka o. Ahmaloe poung hoi a hnukteng poung e lah ka o. A kamtaungnae hoi a poutnae lah ka o.

<sup>14</sup> Hringnae thingkung hoi kâkuen e kho longkha thung kâen hanelah, kâpoelawknaw ka tarawi e teh, a yawkahawi e tami lah ao awh.

<sup>15</sup> Alawilah teh, uinaw, taânna w, kamsoumhoehe napui tongpa yonnae ka sak e naw, tami kathetnaw, meikaphaw k kabawknaw hoi laithoe lungpatawnaw pueng teh ao awh.

<sup>16</sup> Kai Jisuh ni kawhmounnaw hanlah hete akongnaw nangmouh koe kampangkhai sak hanlah, kamae kalvantami hah ka patoun. Kai teh Devit e a khawngyang hoi a catoun lah ka o teh, ka ang e tempalo lah ka o.

<sup>17</sup> Muitha hoi vâ ka sak hane tangla ni tho awh haw ati. Ka thai e nihai tho awh haw tet awh naseh. Tui kahran e teh tho naseh. Ka panki e nite hringnae tui ayawmlah net naseh.

### *A lawk thap sin hanh, rayu hanh*

<sup>18</sup> Hete cauk daw k kaawm e sutdeilawknaw ka thai e tami pueng hanelah kai ni ka dei e teh, apinihai bout thap sin pawiteh Cathut ni a thut e hete cauk daw k e runae hah ahni koe a pha sak han. <sup>19</sup> Apihai hete cauk daw k e sutdeilawknaw takhoe boipawiteh, hete cauk daw k thut e hringnae thingkung koehoi nakunghai, kathounge khopui koehoi nakunghai a hmu hane ham hah Cathut ni a takhoe pouh han. <sup>20</sup> Hete konglamnaw ka kampangkhai e ni, Bokheiyah, Kai teh karanglah ka tho han ati. Amen. Bawipa Jisuh tho leih. <sup>21</sup> Maimae Bawipa Jisuh Khrih e lungmanae teh tamikathoung pueng koe awm lawiseh. Amen.